

# TUSI KAP

*Bible Society (1901)*

WALE

## ÛHIHINYKÖU EHAC,

KE

## ÛHIHINYKÖU AE TEB ÛNYI

ADRE WIA KA HNYI

HWEN IAI.

**London :**

**BRITISH AND FOREIGN BIBLE SOCIETY.**

1901

224.122.9  
3

Harvard College Library

Sept. 23, 1910

Gift of the

British & Foreign Bible Society

THE BIBLE IN THE IAIAN LANGUAGE SPOKEN IN UVEA  
LOYALTY ISLANDS.

# IEN JE TUSI HIA THITHÖ HNYI TUSI KAP.

## ÛHIHINYKÖU EHAC.

Genese . . . . .	5	At Khet . . . . .	595
Esodo . . . . .	52	Khumöng Hwanyi Solomona . . . . .	602
Levitiko . . . . .	91	Isaia . . . . .	607
Numera . . . . .	119	Jeremia . . . . .	655
Deuteronomi . . . . .	159	Je tenge anyi Jeremia . . . . .	709
Josua . . . . .	194	Ezekiela . . . . .	715
Hnyat Owisa . . . . .	217	Daniela . . . . .	764
Rutha . . . . .	240	Hosea . . . . .	778
I. Samuela . . . . .	244	Joela . . . . .	785
II. Samuela . . . . .	274	Amosa . . . . .	788
I. Je Than . . . . .	300	Obadia . . . . .	794
II. Je Than . . . . .	329	Jona . . . . .	795
I. Man Ûlabainy je Than . . . . .	357	Mika . . . . .	797
II. Man Ûlabainy je Than . . . . .	384	Nahuma . . . . .	801
Ezera . . . . .	416	Habakuka . . . . .	803
N. hemia . . . . .	425	Zefania . . . . .	805
Esetera . . . . .	439	Hagai . . . . .	807
Jobu . . . . .	446	Zakaria . . . . .	809
Ta je Salamo . . . . .	479	Malaki . . . . .	817
Ta je Vejec . . . . .	566		

## ÛHIHINYKÖU AE TEB ÛNYI.

Mataio . . . . .	823	I. Timoteo . . . . .	1019
Mareko . . . . .	854	II. Timoteo . . . . .	1022
Luka . . . . .	874	Tito . . . . .	1025
Ioane . . . . .	907	Filemona . . . . .	1027
Ta je Huliwa . . . . .	932	Heberu . . . . .	1027
Roma . . . . .	963	Iakobo . . . . .	1038
I. Korinito . . . . .	977	I. Peteru . . . . .	1041
II. Korinito . . . . .	990	II. Peteru . . . . .	1045
Galatia . . . . .	999	I. Ioane . . . . .	1048
Efeso . . . . .	1003	II. Ioane . . . . .	1051
Filipi . . . . .	1008	III. Ioane . . . . .	1052
Kolose . . . . .	1011	Juda . . . . .	1053
I. Thesalonika . . . . .	1014	Hna Omanenâ . . . . .	1054
II. Thesalonika . . . . .	1017		



# GENESE

TUSI A BÂN ANYI MOSE.

## HNYIMAKAN 1.

**H**ABA hnyi can Khong ame op drany me hmeledrany. 2 Ke haba hmeledrany ame ba hwenöiny ke ba önyen; ke ka e menekholom hon dok ae dit: k' ame nap Hanon Khong hon je köiö. 3 Ke Khong ame ha, ka habe, Lany jut: k'ame lany dö. 4 Ke Khong ame wâ lany a ûnyi ae so: ke Khong ame sihnyigöulen lany me menekholom. 5 Ke Khong ame hwenyi ien lany, me, Bong, ke e ame hwenyi ien menekholom, me, Hnyinghet. Ke e hu sahac me e hu hnyomakatu, wale bong a khaca.

6 Ke Khong ame ha, ka habe, E so e me hu ke bwang hnyi wanben je köiö, me me bi hnyigöulen je köiö ûnyi hnyi ke je köiö. 7 Ke Khong ame ânyâ bwang, me sihnyigöulen je köiö eü hmelen bwang, ûnyi hnyi je köiö ethö hon bwang: ke e but e. 8 Ke Khong ame hwenyi ien bwang, me, Drany. Ke e hu sahac me e hu hnyomakatu, wale ke bong a loiny.

9 Haba Khong ame ha, ka habe, E so adre me ûkhacaköüâ ta je köiö eü hmelen drany ka hnyi dok a khaca me me manen dut dok ae mada: ke e but e. 10 Ke Khong ame hwenyi ien dok ae mada, me, Kânâ; ke haba ta je köiö adre ûkhacaköüâ, e ame hwenyi ien, me, Köiö: haba Khong ame wâ a e so. 11 Haba Khong ame ha, ka habe, E so kânâ ame he ka okûâ hna önying, me üö ae ometu ame he ka hu önyen wan, me üö ae wa ame he ka hu wan, wale ae hu önyen hnyin, hoton bongon. 12 Ke haba kânâ ame okûâ thö hna önying, ke üö ae ometu ame hu önyen wan hoton bongon e, me üö ame wa ae hu önyen hnyin, hoton bongon; haba Khong ame wâ a e so. 13 Ke e hu sahac me e hu hnyomakatu, wale ke bong a kuniny.

14 Haba Khong ame ha, ka habe, E so he

ka hu ta je melam hnyi bwanginy drany ethö, me me bi hnyigöulen lany me lit; ke haba je ûnyi e me hnân ta je haten, me ta je üen, me ta je bong, me ta je huna: 15 ke wale minya e, a hnân ta je melam hnyin bwanginy drany ethö he ka omelamâ hmeledrany: ke e but e. 16 Ke Khong ame ânyâ li melam a lo ae gan; haba melam ae gan hmâ, me hnân musö lany, ke haba melam ae ûhnyükong hnân musö lit: k' ame ânyâ minya ta je okhû. 17 Haba Khong ame ip ta je ûnyi e hnyi bwanginy drany ethö me me he ka omelamâ hmeledrany, 18 me he ka musö lany me lit, me he ka bi hnyigöuleny lany me lit: ke Khong ame wâ a e so. 19 Ke e hu sahac me e hu hnyomakatu, wale ke bong a vakiny.

20 Haba Khong ame ha, ka habe, E so ame he je köiö ka odedo ta je ûnyi ame bwebwet ae hu möt, ke so ame gâ ethö hon kânâ je meno ame gâ, hnyi bwanginy drany ethö. 21 Ke Khong ame op je wâ ae gan hmâ, me ta je ûnyi hia thithö ae möt ame bwebwet, waleji ame odedo hnen köiö, hoton je ve bongon, me ta je meno hia ae hu labenyin, hoton je bongon: ke Khong ame wâ a e so. 22 Ke Khong ame hahnahici ödra, haingen, ka habe, Si but, me dudu but, me ounöngötâ thö köiö, k' e so e me dudu but je meno ame gâ hnyi hmeledrany. 23 Ke e hu sahac me e hu hnyomakatu, wale ke bong a thabûnginy.

24 Haba Khong ame ha, ka habe, E so kânâ ame öduduâ ta je meno ame menâ, hoton je ve bongon, wale je meno a vak cadra, me ta je ûnyi ame iyâü, me je menöiny hnyot, hoton je ve bongon: ke e but e. 25 Ke Khong ame ânyâ je menöiny hnyot, hoton je ve bongon e, me ta je meno a vak cadra, hoton ta je ve bongon, me ta je meno hia thithö adre me iyâü hon kânâ, hoton jeve bongon: ke Khong ame wâ a e so. 26 Ke haba Khong ame ha, ka habe, E so ate me

## GENESE 2, 3.

op at hnyi wi öta, me tha úcú m'öta : ke hamödra he ka musö ta je wá eú hnyi köiö, me ta je meno ame gá ethö, me ta je meno a vak cadra, me hmeledrany hia thithö, me ta je meno ame iyâú wale adre me iyâúâ hmeledrany. 27 Ke Khong ame op at ae we e bi, ame op e me we Khong ; e ame up ödru baga me momo. 28 Ke Khong ame hahnahici ödru : ke haba Khong ame ha ködru, ka habe, Si but, me dudu but me ödedoâ hmeledrany, me hom úhnyúkongo ; me musö thö ta je wá eú hnyi köiö, me ta je meno ame gá ethö, me ta je únyi hia ae möt ame iyâúâ hmeledrany. 29 Ke Khong ame ha, ka habe, Wá bi, oge hia but ham köbu ta je úö hia ae ometu ae hu önyen hnyin, a hnyi hon hmeledrany hia thithö, me ta je úö hia ae wa me hu önyen hnyin ; wale me hnân ö 'bu : 30 Ke haba ta je úö ae ometu ae hat, me, wale hnân an ta je menoiny hnyot hia, me ta je meno hia ame gá ethö, me ta je meno hia ame iyâúâ hmeledrany, a ta je únyi ame menâ : ke e but e. 31 Ke Khong ame wá ta je únyi hia thithö e ame ányâ, ke wá bi, e so hmönyin. Ke e hu sahac me e hu hnyomakatu, wale bong a siksiny.

### HNYIMAKAN 2.

**K**E ame umo thö drany me hmeledrany me ta je únyi hia thithö eú hnyin. 2 Ke haba hnyi bong a seveniny Khong ame oumo anyin ta je huliwa waleji e ame ányâ. 3 Ke haba Khong ame hahnahicâ bong a seveniny, me okabâ e : anyin a e ame menâ hnyin, únyi hnyi anyin ta je huliwa hia thithö waleji Khong ame op me ányâ.

4 Walang je bongon ioiny drany me hmeledrany, waleji hnyi úen adre op li únyi e, hnyi bong Iehova Khong ame ányâ hmeledrany me drany. 5 Ke tiga ba hnyeuten hnyei hnyi kânâ, ke tiga ca kú thö khölakiny hnyei : anyin a Iehova Khong ame tiga ca ota we ka hnyi hon kânâ, ke tiga ba at he ka belökâ kânâ ; 6 k' ame ölö thö hau únyi hnyi kânâ me okhubetâ hia hon kânâ. 7 Ke haba Iehova Khong ame op at ge sesâiny kânâ, me menâ ka hnyi li hnyingöiny homenâiny möt ; ke haba at ame wia me me hanu ae möt. 8 Ke Iehova Khong ame belökâ ke hnyei hnyi ke keihen Edena e deiö ; k' ame ip eling at waleji a hia but op. 9 Ke Iehova Khong ame okúâ únyi hnyi kânâ ta je úö hia thithö ae hmanenang at ka wá, me so hnân han ; me úöiny möt

minya hnyi wanben hnyei, me úöiny wá-hmakhmeto so me kong. 10 Ke ame hingölö úheny hnyi Edena wagewe hnân he ka hú hnyei belök ; k' ame vese but úheny e me me je vheiny a vak. 11 Haba ien at a bân, me, Pisona : wale at ame igigilö hia hnyei Havila, waleling ae hu gol ; 12 ke so but goliny hnyei e : e minya eling bedola me veto soama. 13 Ke haba ien wagewe a loiny, me, Gihona : wale at ame igigilö hnyei Kuza. 14 Ke haba ien wagewe a kuniny, me, Hidekela : wale ame he deiö Asuria ai. Ke Euferate wagewe a vakiny. 15 Ke haba Iehova Khong ame hom at, me ip ju e hnyi hnyei Edena he ka belökâ me tuö. 16 Ke Iehova Khong ame húna ka at, ka habe, U me he ka han monu únyi hnyi ta je úö hia thithö hnyi hna belök : 17 ke haba úöiny wáhmakhmetoâ so me kong, me, u me ca he ka han únyi hnyin : anyin a haba hnyi bong u me he ka han hnyin, e hnathu u me he ka mokcu.

18 Haba Iehova Khong ame ha, ka habe, E ca so e he ka hake laba at ; oge me he ka ányâ hobi kâu ke úhadruo ae úcú kâu. 19 Ke Iehova Khong ame op únyi hnyi kânâ ta je menoiny hnyot hia, me ta je meno hia ame gá ethö ; me hum ödra ka at me me wá ia ien e ame he ka hwenyi ödra : ke haba ien ta je meno ae möt hia ame hwenyi iödra at, wale ien bi. 20 Ke ame hwenyi ien ta je meno hia a vak can hnen at, me ta je meno ame gá ethö, me ta je menoiny hnyot hia ; ke adre tiga ca wá hobi kâu at ke úhadruo ae úcú kâu. 21 Ke Iehova Khong ame kunâ mokut hnying ka hnyi hon at, me e ame mokut ; me e ame hom but ke jeien hvaken, k' ame hlöng hmetu ju hwaban ge utiöiny : 22 ke haba jehvak wale Iehova Khong ame hia but hom únyi ge at, me ame op me me momo but, me su thö e ka at. 23 Ke haingen at, ka habe, Walang jö hanen je jeiök, me utiö hanen vik : adre me he ka hwenyi ien, me, Momo, anyin adre hom únyi ge baga. 24 Waleling me me he at ka hna kamen me hinyen, me kece ka áiân ; k' ame he ka khaca thibi unyidru. 25 Ke ödru lo ödru me he thu, wale lia-mâiân, k' ödru me ca hmehma bi.

### HNYIMAKAN 3.

**K**E e khana he ka bibihwakecin hnen on, hon ta je menoiny hnyot hia, hnö Iehova Khong hna op. Haba e ame ha ka momo ka habe. Hawa, a um dö ha

GENESE 4.

Khong, ka habe, Öbu ma ca he ka han únyi hnyi ta je úö hia thithö hnyi hnyi? 2 Ke haingen momo ka on, ka habe, Adre hna köhmu he ka han wan ta je úö hnyi hnyi: 3 ke so bi haba wan úö waleji hnyi wanben hnyi, a hia but ha Khong, ka habe, Ca he öbu ka han wan, ke haba khaca, ca he öbu ka kâlâ, wâ öbu nye mokcu. 4 Ke haba on ame ha ka momo, ka habe, Öbu me ca he ka wen mokcu: 5 anyin ae khana Khong a haba hnyi bong öbu ma han hnyin, wale ame he ka metâ but li emaköbu, m' öbu me he ka helâ but me Khong, ka wâhmakhmeto so me kong. 6 Ke a wâ but momo úö, a e so hnân han, me hmanenang at ka wâ, me úö ae únyi hnathu, me hnân ometâ at, me haba momo ame tau wan, me han; k' ame ham minya ka áîân a tha e mē, me e ame munyi han. 7 Me ame metâ but li emaködrü, me me khan' ödrü thö a ödrü me he thu; me ödrü me útibetköüâ ta je lan meta, me hnân hnamejidru. 8 Ke ödrü me löng hwo Iehova Khong ame ngeno hnyi, hnyi ke hnyi ban bong ae menyik: ke haba Adamu me áîân ödrü me lubaduöng ge hnyimakö Iehova Khong hnyi ta je úö hnyi hnyi. 9 Ke Iehova Khong ame hawo Adamu, me ha, ka habe, U a? 10 Ke haingen, ka habe, Oge löng ut hwâm hnyi hnyi, ke oge ot, anyin oge me he thu; me inya oge me lubaduöng. 11 Me e ame ha, ka habe, Ia thumetu u m' u me he thu? Hawa, u je hia but han únyi hnyi úö waleji oge me húna köu, a u ma ca he ka han? 12 Haingö Adamu, ka habe, Haba momo u je hna kõnya me me tha e mönya, e ame ham kõnya únyi hnyi úö, me oge me hnyi han. 13 Haba Iehova Khong ame ha ka momo, ka habe, Ie únyi ang u je ányâ? Haingen momo, ka habe, hnen on hna iyawö nya, m' oge me han. 14 Ke Iehova Khong ame ha ka on, ka habe, u je hnaúhangö but hon ta je meno a vak can hia thithö, me hon ta je menoiny hnyot hia thithö, anyin a u je ányâ helâe; u ma he ka iyâúâ hnyekom, me an sesáiny kânâ hnyi ta je bong hia bonginy ányâm möt: 15 ke oge me he ka oiwahnahmiönyi u me momo, me mátránâm me mátrániny momo: e ame he ka kot bâm, ke u me he ka kot ohmáiny can. 16 Ke e ame ha ka momo, ka habe, Oge me he ka osehia ányâm vec u ka erkin; u ma he ka hnokoâ hnyi vec; ke u me he ka wem bi hmelen áîâm, ke e ame he ka musu u. 17 Ke e ame ha kö Adamu, ka habe, Anyin a u je hia

but löng hoton hwan áîâm, me han únyi hnyi úö waleji oge me nyibu u gan, me ha. ka habe, Ca he ka han únyi hnyin; awe hnaúhangö but kânâ únyi gam; ke u ma he ka han únyi hnyin hnyi vec hnyi ta je bonginy ányâm möt hia; 18 k' ame he ka okûâ köu ta je úö ae údedö me watetaföcö; ke u me he ka han je úö ae ometu hnyi ta hnyi; 19 ke u me he ka han únyi ge khuniny hnyimákâm, ke ne o but úen u me he ka hmetu ka hnyi kânâ; anyin adre hum u únyi hnyin e; anyin a u sesáiny kânâ, ke u me he ka hmetu hmetu ka knyi sesáiny kânâ. 20 Haba Adamu ame hwenyi ien áîân, me, Eva; anyin a e hinyen tavat ae möt hia thithö. 21 Ke haba Iehova Khong ame ányâ li úkhaú a unen meno hobi kö Adamu me áîân, me okhav' ödrü.

22 Haba Iehova Khong ame ha, ka habe, Wa bi, e úcü but at mötin, ame wâhmakhmeto so me kong; ke haba walang ang, wâ e nye hinöbeny me hom minya únyi hnyi úö hnân melen, me han, me möt bi nyiele balua: 23 anyin a wale Iehova Khong ame obâ but e únyi hnyi hnyi Edena, me me belökâ kânâ waleji adre hia but hom e únyi hnyin. 24 Waleling e ame obö Adamu but; ke e ame ip eiö hnyi hnyi Edena ta je Kerubi, me hele vat ae ubâhlâ ame wiwia ka hnyi je ke keihen hnyi hia, me hnân tuö gethen ka hnyi úö hnân melen.

HNYIMAKAN 4.

**K**E Adamu ame khana áîân jia Eva; me ame erkin dut me hnöku Kaina, ke haingen, ka habe, Oge hia but kap at únyi ga Iehova. 2 Ke e ame hnokoâ hmetu jia Abela a keiny. Haba Abela, me, at tuö mamoe, ke haba Kaina, me, at belökâ kânâ. 3 Ke hwaban ke ta je bong, haba Kaina ame hom ke troban kânâ hnân hut kö Iehova. 4 Ke haba Abela, e ame hom únyi hnyi hna hat mamoe je lakon a bân me je meno ae pipikhenya. Ke Iehova ame oúnyihnathu Abela me anyin hut: 5 k' ame ca oúnyihnathu Kaina me anyin hut. Me Kaina ame hmönyin gan hmâ, me khöt ut hnyimakan. 6 Haba Iehova ame ha kö Kaina, ka habe, Ieú gam u me hmönyâm? k' ame khöt hnyimákâm geú? 7 U je ne ányâ so, hawa adre me ca he ka köp u? ke u ka ca ányâ so, awe, ame bate-tot hulö hnyi hwanuma: k' ame ke ka e hmelâm weny, ke u ma he ka musö e.

GENESE 5.

8 Ke Kaina ame thumetu Abela a keiny. Ke tiga ödru hnyi ta hnyei haba Kaina ame tot kö Abela a keiny, me hlingâ. 9 Ke Iehova ame ha kö Kaina, ka habe, Ewa Abela a kem? Ke e ame thu, ka habe, E ca khanö nya: hawa, inya at tuö keik? 10 Ke e ame ha, ka habe, Ieú e u je ányâ? ame tänge könya ifucin dren kem únyi hnyi kánâ. 11 Ke walang ang u je hnaúhângö but únyi ge kánâ, waleji a memang ut me cem dren kem únyi hnyi hnyamâm; 12 u ka belöká kánâ, ame ca he hmetu ka ohwenyingâ gánâ; ke u ma he bi u ka at baú, me at he monu eang hmeledrany. 13 Ke haingö Kaina ko Iehova, ka habe, E gan hmâ hwaban könya ke ca khanö nya he ka hok hnyoká. 14 Wá bi u je hia but obö nya hnyi bong ang únyi hnyi hni kánâ: ke oge me he ka iyong ut hnyimákâm; ke oge me he bi nya ka at baú me he monu eang hmelen; wale m'adre me he ka hlingö nya hnen tavat hia andre me he ka ö nya. 15 Haba Iehova ame ha káu, ka habe, Anyin a wale, haba at ame he ka hlingö Kaina, me, andre me he ka ibi oseven bi hwaban hmetu káu, Ke haba Iehova ame bi hatö Kaina, wá e nye hlingâ hnen ke at ame he ka wá e.

16 Ke Kaina ame he but úheny hnyi hnyimakö Iehova, me laba hnyi hnyei Noda, Edena ke e deiö. 17 Ke Kaina ame khana thö áíán; me e ame erkin dut me hnöku Enoka: ke e ame otílâ ke taun, me hwenyi ien taun, hoton ien nokon, jia Enoka. 18 Ke Enoka ame hnöku Irada: ke Irada ame hnöku Mehujaela: ke Mehujaela ame hnöku Methusaela: ke Methusaela ame hnöku Lameka. 19 Haba Lameka ame hok lo momo; Ada ien ke at, ke Zila ien ke at. 20 Ke Ada ame hnöku Jabala: e kamen tavat andre laba hnyi je uma mano, me tren meno. 21 Haba ien keiny, me, Jubala: e kamen tavat hia andre khenen hom kitara me utköwi. 22 Ke haba Zila, me e ame hnöku Tubala-kaina, at ame op ta je únyi hia a bras me fao hnân subâ: ke haba Naama hani Tubala-kaina. 23 Ke haingö Lameka ka li áíán, ka habe, Ada me Zila lö, löng ju hok hofuc; Öbu laöiö Lameka lö, tevelöng ju ifucik: Anyin oge hia but hlingâ at, oge aatö gan, Ke hidröu, anyin a e ame okongu nya: 24 Adre ne he ka oseven bihwaban ga Kaina, Awe, sevente seven ga Lameka bi.

25 Ke Adamu ame khana hmetu áíán; me e ame hnokoá da, me hwenyi ien Setha: anyin a haingen, A hia but Khong ham könya ke mátrán hwabö Abela; anyin a hia but Kaina hlingâ. 26 Ke haba Setha, andre hnokoá nokon ke da; ke e ame hwenyi ien Enosa: wale úen ame bi hwân tavat he ka hawá iö Iehova.

HNYIMAKAN 5.

WALANG tusiny je dö únyi ga Adamu. Haba hnyi bong Khong ame op at hnyin, e ame op e me we Khong; 2 e ame up ödru a бага me momo; ke e ame hahnahici ödru, me hwenyi iödru at, hnyi bong andre up ödru hnyin. 3 Haba Adamu ame möt hnyi khaca haded ke thöte ta je huna, me e ame hnokoá ke da helâ me e bi, me we e; me hwenyi ien, me, Setha: 4 ke haba ta je bong bongu Adamu hwaban hnen hna hnöku Setha, me, eit haded ta je huna: ke e ame hnokoá je da me in. 5 Ke haba ta je bong hia ame möt hnyin Adamu, me, nain haded ke thöte ta je huna: k' ame mokcu.

6 Haba Setha ame möt hnyi khaca haded ke thabúng ta je huna, me hnöku Enosa: 7 ke haba ta je hunainy möt anyi Setha hwaban hnen hna hnöku Enosa, me, eit haded ke seven, k' ame hnokoá je da me in: 8 ke haba ta je bong hia bongu Setha, me, nain haded ke twelv ta je huna: ke ame mokcu.

9 Ke nainte ta je hunainy möt anyi Enosa, ke e ame hnöku Kainana: 10 ke eit haded ke fiftin ta je hunainy möt anyi Enosa hwaban hnen hna hnöku Kainana, ke e ame hnokoá ta je da me in: 11 ke haba ta je bong hia bongu Enosa, me, nain haded ke thabúng ta je huna: ke ame mokcu.

12 Ke sevente ta je hunainy möt anyi Kainana, ke e ame hnöku Mahalaleel: 13 ke eit haded ke fâte ta je hunainy möt anyi Kainana, hwaban hnen hna hnöku Mahalaleel, ke ame hnokoá ta je da me in: 14 ke haba je bong hia bongu Kainana, me, nain haded ke libenyita ta je huna: ke ame mokcu.

15 Ke sikste ke thabúng ta je hunainy möt anyi Mahalaleel, ke ame hnöku Jareda: 16 ke eit haded ke thöte ta je hunainy möt anyi Mahalaleel hwaban hnen hna hnöku Jareda, ke ame hnokoá ta je da me in: 17 ke haba ta je bong hia bongu Ma-



## GENESE 6.

halaleel, me, eit haded ke nainte faiv ta je huna : ke ame mokcu.

18 Ke khaca haded ke sikste tu ta je hunainy möt anyi Jareda, ke e ame hnöku Enoka : 19 ke eit haded ta je hunainy möt anyi Jareda hwaban hnen hna hnöku Enoka, ke ame hnokoâ ta je da me in : 20 ke haba je bong hia bongu Jareda, me, nain haded ke sikste tu ta je huna : ke ame mokcu.

21 Ke sikste faiv ta je hunainy möt anyi Enoka, ke e ame hnöku Methusela : 22 ke Enoka ame labö tha he me Khong hnyi kun ta haded ta je huna hwaban hnen hna hnöku Methusela, ke ame hnokoâ ta je da me in : 23 ke haba je bong hia bongu Enoka, me, kun ta haded ke sikste faiv ta je huna : 24 haba Enoka ame labö tha he me Khong : k' ame hia thiju ; anyin a Khong ame hom dö e.

25 Ke khaca haded ke eite seven ta je hunainy möt anyi Methusela, ke ame hnöku Lameka ; 26 ke seven haded ke eite tu ta je hunainy möt anyi Methusela hwaban hnen hna hnöku Lameka, ke ame hnokoâ ta je da me in : 27 ke haba ta je bong hia bongu Methusela me nain haded ke sikste nain ta je huna : ke ame mokcu.

28 Ke khaca haded ke eite tu ta je hunainy möt anyi Lameka, k' ame hnokâ da : 29 ke e ame hwenyi ien bi, me, Noa, ke haingen, Walang at ame he ka otubweli ötin ge anyitin huliwa, me vecin li hnyamöta ünyi ge kânâ waleji a hangâ Iehova. 30 Ke thabûng ta haded ke nainte faiv ta je hunainy möt anyi Lameka hwaban hnen hna hnöku Noa, ke ame hnokoâ ta je da me in : 31 ke haba ta je bong hia bongu Lameka, me, seven haded ke sevente seven : ke ame mokcu. 32 Ke thabûng haded ta je hunainy Noa : ke Noa ame hnöku Sema, me Hama, me Jafeta.

### HNYIMAKAN 6.

**K**E hnyi üen ame hwân ka hu tavat ae se hia eang hmeledrany, ke adre hnokoâ lakudra je hlu, 2 ke haba je lakon Khong adre me wâ je lakon tavat a je hlu a ödra hmanenang ; me adre me hom me laöiödra je hlu ae ve wedra. 3 Ke Iehova ame ha, ka habe, Ame ca he bala hanuk ha üö hwege me at, anyin a e thibi unyin : ke so bi haba bonginy je bong ame he ka khaca haded ke twente ta je huna. 4 Haba hnyi je bong eling e hu je Nefilim eang hmelen,

me hnyi je bong minya a biliny, waleji hnyi üen ame o but ta je lakon Khong ka lakon tavat a ta je hlu, ke adre me hnokoâ lakudra : haba tavat eling waleji tavat ae hwege ehac, me tavat ae lung. 5 Ke a wâ but Iehova a e gan hmâ but monuiny at eang hmeledrany, ke kong ut ta je hna ünyküme hia eü hnyi hnyekudra hnyi ta ogo bong hia. 6 Ke Iehova ame ietra a g' ame hia but op at eang hmelen, ke e hmak ut hnyekon. 7 Ke Iehova ame ha, ka habe, Oge me he ka ohia at waleji oge hia but op, ünyi hnyi kânâ ; wale at, me menoiny hnyot, me ünyi ame iyâü, me meno ame gâ ethö ; anyin a khenyi but hnyekuk ge hnök hna up ödra. 8 Ke haba Noa ame wâ so hnyi hnyimakö Iehova.

9 Walang ta je dö anyi Noa. Haba Noa, at ae wisa, ke fâfâ but hnyi anyin ta je dö : haba Noa ame tha he me Khong. 10 Ke Noa ame hnokoâ ta lakon a kun, jia Sema, ma, Hama, me Jafeta. 11 Ke ikiki thö hmeledrany hnyi hnyimakan Khong ; k' ame unöngötö hmeledrany ge ükonguny. 12 Ke Khong ame wâ hmeledrany, ke wâ bi a ikiki thö ; anyin a hia but tavat hia oiki-kiâ dedra eang hmelen.

13 Ke Khong ame ha kö Noa, ka habe, A o but hnyi hnyimakök obiny tavat hia thithö ; anyin a unöngötö hmeledrany hnen ükonguny ünyi gadra ; ke wâ bi oge me he ka tha ohî' ödra me hmeledrany. 14 Tibet ju hobi köu aka ge utö a gofa ; ke u me he ka ânyâ ta je hnyeule hnyin aka, ke u me he ka okeceâ eiö hnyin me hoton ge ouge. 15 Ke walang hwakecin u ma tibet e, ka habe, kun ta haded kubit ibeüen aka, ke fifte kubit ülaue, ke thöte kubit ibeüen gö-ranyai. 16 U ma he ka tube aka ethö hon, ke u ma he ka oumo e ethö hnyi kubit a khaca ; ke u ma he ka bi hwanumen aka hnyi ke baten ; ke u ma he ha ânyâ kun ta deö dek, khaca hnyikânâi, me ke at a loiny, me kuniny, eiö hnyin. 17 Ke wâ bi, inya oge me he ka oukhotukhavâ hmeledrany ge uou, me me he ka ohia unyin hia ae hu hnyin homenâiny möt ünyi eang hmelen ; k' ame he ka mokcu ta je ünyi hia thithö eang hmelen. 18 Ke oge me he ka otilâ hmâ anyik ühinyökou möu ; ke u ma he ka dit ka hnyi aka, u, me je lakom, me âiâm, me lâiân je lakom a tha ödrin möu. 19 Ke u ma he ka hom ka hnyin aka üsa lo li ünyi hnyi ta je meno hia thithö, me me tha möt möu ; üsa khaca бага me momo. 20 A je meno ame gâ, hoton bongudrin ; me ta je meno a

## GENESE 7, 8.

vak can, hoton bongudrin, me ta je únyi hia ame iyâúâ kánâ, hoton bongudrin, ame he ka o kôu úsa lo gadra hia, m' adre me môt. 21 Ke u ma he ka hom kôu únyi ge ta je jeú hia thithö hnân han, me úkhöúnâ unyâm ; k' ame he ka âm, me ö 'drin minya. 22 Haba Noa ame ányâ helâe ; e ame ányâ hoton ta je únyi hia Khong ame húna káu.

### HNYIMAKAN 7.

**H**ABA Iehova ame ha kö Noa, ka habe, Aiö u me ányâm lap hia ka hnyin aka ; anyin a oge hia but wâ a u wisa hnyi hnyimakök hnyi dö ang. 2 U ma he bi ka hom unyâm, únyi hnyi ta je meno a vak cadra ae bo so úsa seven, бага me momo ; ke únyi hnyi ta je meno a vak cadra ae ca bo so, úsa lo, бага me momo ; 3 ke únyi hnyi ta je meno ame gâ ethö úsa seven, бага me momo : me me hu mátrân eang hmeledrany hia thithö. 4 Anyin a seven biju ta je bong me oge me he ka ota we ka hnyi hmeledrany hnyi fâte ta je lany ke fâte ta je lit ; ke oge me he ka ohia eang hmeledrany ta je únyi hia ae môt waleji oge hia but op. 5 Haba Noa ame ányâ helâ me hna húna hnö Iehova káu.

6 Ke siks haded ta je hunai Noa, ke e but uou eang hmelen. 7 Me ame tha didrö Noa ka hnyin aka, me lakon, me áiân, me láiân je lakon, can köiö ame uou. 8 Haba ta je meno a vak can ae bo so, me je meno a ca bo so, me ta je meno ame gâ, me ta je únyi hia thithö adre me iyâúâ kánâ, 9 adre me dit úsa lo ka hnyin aka kö Noa, бага me momo, helâ me hnen Khong hna húna kö Noa. 10 Ke hwaban je bong a seven, ame o but uou eang hmeledrany. 11 Haba hnyi hunai a siks hadediny môt anyi Noa, hnyi tehi a loiny, hnyi bong a seventininy tehi, haba hnyi bong eling ame patrutrua thö ta je pupuainy köiö ae gan hmâ, k' adre khöng ut je mamalamainy drany. 12 K' ame ta we balua eang hmeledrany hnyi fâte ta je lany ke fâte ta je lit. 13 Haba hnyi bong eling a khaca ame tha didrö ka hnyin aka Noa, me Sema, me Hama, me Jafeta je laku Noa, me öiö Noa, me kun a láiân je lakon ; 14 ödrin, me ta je menoiny hnyot hia hoton je bongudrin, me ta je meno hia a vak can hoton je bongudrin, me ta je únyi ae iyâú, wale ame iyâúâ kánâ hoton je bongudrin, me ta je meno

ame gâ hoton je bongudrin, me ta je meno ae ve bongon hia. 15 Ke adre me didrö kö Noa ka hnyin aka, úsa lo únyi hnyi ta je unyin hia wale ae hu homenâiny môt eú hnyidra. 16 Ke haba tavat adre me dit hnyin, adre me didrö, бага me momo, a ta je unyin hia thithö, hoton hna húna hnen Khong káu : ke Iehova ame hlöng ut hwanumen. 17 Ke e bi uou hnyi hmeledrany fâte ta je bong ; ke ame gan tot köiö, me ame matö göranyai aka hon hmeledrany. 18 Ke ame khibi but köiö, k' ame khibi tot hmönyin eang hmelen ; me ame matö aka hon köiö. 19 Ke ame ti khibi gan hmâ but köiö hon hmeledrany ; me tube but ta je bucen hia ae beu hmâ eang hmeledrany. 20 Ame khibi thö köiö fiftin kubit ibeúen göranyai ; me ka iyong ut ta je bucen. 21 Ke ame mokcu ta je únyi hia ame bwebwet eang hmelen, a ta je meno ame gâ, me meno a vak can, me menoiny hnyot, me ta je únyi hia ame iyâú waleji adre iyâúâ kánâ, me tavat hia : 22 waleji a mokcu ta je únyi hia ae hu homenâiny môt hnyi je hnyingöidra, me ta je únyi hia hon hnyei. 23 Ke adre ohia but ta je únyi hia thithö ae môt eang hmelen, wale at, me meno a vak can, me únyi ame iyâú, me meno ame gâ ethö ; ke a hi' ödra but únyi eang hmelen ; ke hake Noa thiju, me hnyat a tha e mē hnyin aka. 24 Ke e bi köiö eang hmelen khaca haded ke fite ta je bong.

### HNYIMAKAN 8.

**K**E Khong ame únykúmi Noa, me ta je únyi ae môt, me ta je meno hia a vak can a tha e mē hnyin aka : me Khong ame kunâ ang he ka tûâ hmeledrany me ame nunu but köiö ; 2 adre hlöng ut minya ta je pupuainy köiö ae gan me je hlinginy drany, ka adre thawâ ju we únyi hnyi drany ; 3 ke ame hmetuhmetu tot köiö únyi hnyi hmeledrany : ke hwaban khaca haded ke fite ta je bong adre öúhnyúkongoâ köiö. 4 Ke haba hnyi tehi a seveniny, hnyi bong a seventininy tehi ame laba thö aka hon bucen Ararata. 5 Ke ame úhnyúkong tot bala but köiö ke ne o but tehi a libenyitainy : haba hnyi tehi a libenyitainy, hnyi bong a bániny tehi, e manen dut ban ta je bucen. 6 Ke hwaban ta je bong a fâte, haba Noa ame khöng mamalama waleji e ame tibet hnyi aka : 7 ke e ame hna but ke oreba, k' ame gâ monu

ke ne o but ame hme thö köiö hon hnyei. 8 Ke e ame hna ke biny únyi gan, me me khana thö ame ne hme thö köiö únyi hnyi káná; 9 ke haba biny ame ca wá ke ong dok he ka mená hnyin, k' ame hmetu hmetu káu ka hnyin aka, anyin a tiga e bala köiö hon hnyei hia : ke e ame iná but hnyamen me hom e, me odilá hmeto káu hnyin aka. 10 Ke e ame lubahingen hnyi ke je bong a seven minya ; me e ame hna hmetu but biny úheny hnyin aka ; 11 ke a o hmetu but biny káu hnyi sahac ; ke, wá bi, e hnyi hnyimen lan elaiö adre hia but thu : waleling me me khana ju Noa a e hme but köiö hon hnyei. 12 Ke e ame halubahingen hmetu hnyi ke je bong a seven ; me ame hna hmetu but biny ; ke e ame ca o hmetu bala bi káu. 13 Ke hnyi huna a siks haded ke wan, hnyi tehi a bán, hnyi bong a bániny tehi, ame hme but köiö únyi hnyi hon hnyei : ke Noa ame hom dö tubiny aka, me hngele, ke wá bi a hme but hon káná. 14 Ke haba hnyi tehi a loiny, hnyi bong a twente seveniny tehi, ame hwahwacit dö káná.

15 Ke haba Khong ame ha kö Noa, me ha, ka habe, 16 Didrut úhem hnyin aka, u me áiam, me je lakom, me láian je lakom a tha ödrin möu. 17 Hom but ta je únyi hia ae möt a e unyám wale je meno hia, a je meno ame gá, me vak cadrin, me iyâú hia eang hmeledrany : m' adre me he ka si but eang hmelen, me se hia but, me dedo eang hmelen. 18 Me Noa ame didrut, me je lakon, me áian, me láian je lakon a tha ödrin mé : 19 ame tha didrut úheny hnyi aka ta je menoiny hnyot hia, me ta je únyi ame iyâú hia, me ta je meno ame gá, me ta je únyi ame bwebwet eang hmelen, hoton anyidrin je ve lap. 20 Ke Noa ame otilá ke taben hnân bi hut kö Iehova ; me hom únyi hnyi ta je meno hia a vak can ae bo so, me ta je meno hia ame gá ae bo so, me hudo ta je hut adre le hon taben hut. 21 Ke Iehova ame löng bunen ae so ; ke haingö Iehova eú hnyi hnyekon, ka habe, Oge me ca he hmetu ka hangá káná can at, anyin ae kong weny hnyekon at hwán ke tiga wanakat ; ke oge me ca he hmetu ka hlingá ta je únyi hia ae möt, helâji me hnök hna ányá. 22 Ke ka e bala bi hmeledrany, me ame ca he ka hia úen tá, me úen menu, me megic, me kahwa, me honivakeny, me hnyeyun, me lany, me lit.

## HNYIMAKAN 9.

**K**E Khong ame hahnahici Noa, me je lakon, me ha ködrin ka habe, Si but, me dudu but, me dedo hmeledrany. 2 K' ame he ka ot gabun me hiny gabun ta je meno hia eang hmeledrany, me je meno ame gá ethö, me ta je únyi hia adre iyâúâ monoá káná, me ta je wá hia eú hnyi köiö, adre hn' ödra but ka hnyi hnyamöbun. 3 Haba ta je únyi hia ame bwebwet ae möt ame he ka hnân ö 'bun ; oge hia but ham köbun hia helâji me ta je úö ae ometu ae hat. 4 Ke öbun e ca he ka tha an utiö me melen, wale únyi a dren. 5 E hnathu oge me he ka bi hwaban dröbun, wale anyibun möt ; oge me he ka bi hwaban e ka ta je meno hia : me tavat minya, oge me he ka bi hwaban melen at ka liamekeiny mē. 6 Haba at ame hingálá dren ke at, me ame he bi ka hingálá dren hnen ke at : anyin adre op at e me we Khong. 7 Ke haba öbun, si but, me dudu but ; hnokoá gáná eang hmelen, me dedo hnyin.

8 Ke Khong ame ha kö Noa me je lakon unyin, ka habe, 9 Wá bi, inya oge me otilá anyik úhinhinyköu möbun, me je mâtân hwaböbun, 10 me ta je únyi hia ae möt unyibun, a je meno ame gá, me je meno a vak can, me je menoiny hnyot hia unyibun eang hmeledrany ; a ta je meno hia 'a didrut úhedra hnyin aka, wale ta je meno hia eang hmeledrany. 11 Ke oge me he ka otilá anyik úhinhinyköu möbun ; ke adre me ca he hmetu ka subá degecâ ta je únyi hia ae möt ge köien uou ; ke haba khaca ame ca he hmetu uou ka ohia hmeledrany. 12 Ke Khong ame ha, ka habe, Walang haten anyik úhinhinyköu möbun, me ta je meno ae möt hia unyibun, ke ne o but hnyi ta je dö nyiele balua : 13 ka habe, Oge me ip anyik wajeleufat hnyi úlá, me hnân haten anyik úhinhinyköu me hmeledrany. 14 Ke iny' ka he ka hom ke úlá ka hnyi hon hmeledrany, me, ame he ka manen wajeleufat hnyi úlá, 15 me oge me he ka únykúme anyik úhinhinyköu, wale möbun, me ta je únyi hia ae möt ae ve bongon ; ke haba köio ame ca he hmetu ka uou me ohia je únyi hia ae möt. 16 Ke ame he ka e wajeleufat hnyi úlá ; ke oge me he ka wá e, me únykúme úhinhinyköu anyin Khong ame ca ba balua, me ta je únyi ae möt ae ve bongon eang hmeledrany. 17 Ke Khong ame ha kö Noa, ka habe, Wale haten úhi-

GENESE 10.

hinykôu oge hia but otilâ me ta je ûnyi hia ae môt eang hmelen.

18 Ke walang je laku Noa ödrin e didrut ûhedrin hnyin aka, jia Sema, me Hama, me Jafeta : haba Hama me kamö Kanana.

19 Haba ödrin kun ta laku Noa : ke ûnyi gadrin bi adre khavâ hmeledrany hia hnen at.

20 Ke Noa ame hwân ka belök, me e ame ta hnyei vine: 21 ke e ame ijem waina, me monu but ; ke e ame mokut thu eiö hnyin umen uma mano. 22 Ke haba Hama a kamö Kanana ame wâ kamen ame mokut thu, me thumeto li liamekeiny mē eü hnyöu. 23 Ke haba Sema me Jafeta ödru me hom ûkhaü, me lau hon li abenyidru, me he nulötudru, me okhâüâ kamödrü ame mokut thu ; ke ödru me hnyimaködrü eü, m' ödru me ca wâ kamödrü ame mokut thu. 24 Ke a hmak dö Noa hwaban hna ic waina, me khana hna ânyâ kâu hnen nokon a wakeiat. 25 Ke e ame ha, ka habe,

E ka mok Kanana ;

E ame he ka bi athnyabainy lathnyabainy je liamekeiny mē.

26 Ke e ame ha, ka habe,

Haisoi Iehova, Khongu Sema ;

Me hamö Kanana ka bi athnyabainy.

27 E so Khong ame olawö Jafeta

Me me he ka laba hnyi ta je uma mano umö Sema.

K' ame he Kanana ka bi athnyabainy.

28 Ke haba môt anyi Noa hwaban uoü, me, kun ta haded ke fifte ta je hunu.

29 Ke haba ta je bong hia bongu Noa, me, nain haded ke fifte ta je hunu : ke ame mokcu.

HNYIMAKAN 10.

**K**E walang ta je dö anyin laku Noa, Sema, me Hama, me Jafeta : ke ödrin e hnokoâ lakudrin obaga hwaban dö uoü.

2 Haba je laku Jafeta ; Gomera, me Magog, me Madai, me Javana, me Tubala, me Meseka, me Tirasa. 3 Ke haba laku Gomera ; Asekenaza, me Rifatha, me Togarema. 4 Ke haba laku Javana ; Elisa, me Tasesa, me Kitim, me Dodanima. 5 Ünyi gadrin adre me khenâ ta je bomeneiny ta je dökhu hnyi idrin je hnyei, hoton je ve hwen hodra ; hoton anyidrin je lap, hnyi dökhudrin je dökhu.

6 Haba je laku Hama ; Kuza, me

Mizeraima, me Futa, me Kanana. 7 Ke haba je laku Kuza ; Saba, me Havila, me Sabeta, me Rama, me Sabeteka : ke haba li laku Rama ; Sheba, me Dedana. 8 Ke Kuza ame hnöku Nimeroda : e at ame hwân he ka hwege eang hmelen. 9 E at ae hwege he ka hnu ta je meno hnyi hnyimakö Iehova : waleling m' adre me ha, ka habe, Helâ me Nimeroda at hwege he ka hnu ta je meno hnyi hnyimakö Iehova. 10 Ke haba hwâniny dokhon dökhu, me, Babela, me Ereka, me Akada, me Kalene, hnyi hnyei Sinara. 11 E ame he but ûheny hnyi hnyei eling Asuria ai, me otilâ Nineve, me Rehoboth-Ir, me Kala, 12 me Resen hnyi wanben Nineve me Kala (wale taun ae gan). 13 Ke Mizeraima ame hnöku Luda, me Anami, me Lehabi, me Nafetui, 14 me Patherusi, me Kaselui (ke ûnyi gan at Filisiti), me Kafetori.

15 Ke Kanana ame hnöku Zidona a atö, me Heth ; 16 me at Jebusi, me Amora, me Girigasa ; 17 me at Hivi, me Areki, me Sini ; 18 me at Arevadi, me Zimari, me Hamath, ke hwaban dö e, adre ovesea je lap anyi Kanaba. 19 Ke haba hnyigöulen at Kanana, me, ûheny Zidona, gethen ame he Gerara ai, ke ne o but Gaza : deny ka he Sodoma ai, me Gomora, me Adema, me Zeboim, ke ne o but Lasa. 20 Wale je laku Hama, hoton anyidrin je ve lap, me je hwen gadrin hnyi idrin je hnyei, me dökhudrin je dökhu.

21 Ke Sema ame hnokoâ lakon, haba e kamen laku Heberu hia, ke liamekeiny me Jafeta a atö. 22 Haba laku Sema ; Elama, me Asura, me Afasada, me Luda, me Arama. 23 Ke haba laku Arama ; Uza, me Huli, me Gethera, me Mase. 24 Ke Afasada ame hnöku Sala ; ke Sala ame hnöku Heberu. 25 Ke Heberu ame hnokoâ lakon li бага ; Pilege ien khaca ; anyin adre khenâ hmeledrany hnyi bonginy ta je bong ; ke Joketana ien liamekeiny mē.

26 Ke Joketana ame hnöku Alemodada, me Salefa, me Hazamaveta, me Jara ; 27 me Hadorama, me Uzala, me Dikela ; 28 me Obala, me Abimaela, me Sheba ; 29 me Ofira, me Havila, me Jobad ; haba hnyat hia eling laku Joketana. 30 Ke haba je hnyabadrin, me, hwân hnyi Mesa, gethen ka he Sefera ai, wale bucen e deiö. 31 Wale ta je laku Sema, hoton anyidrin je lap, me je hwen hodrin, hnyi je gadrin, hoton dökhudrin je dökhu.

32 Wale ta je lap anyin je laku Noa,

GENESE 11, 12.

hoton anyidrin je dö, hnyi dökhudrin je dökhü : ke únyi gadrin adre khená je dökhü hnyi hmeledrany hwaban dö uóú.

HNYIMAKAN 11.

**K**E khaca thibi hwan hmeledrany hia, me khaca thibi hofuc. 2 Ke adre me tiga hok töt deiö, me adre me wá ke dok ae thahon hnyi hnyei Sinara ; ke adre me labā e. 3 Ke adre me úhakouá, ka habe, E so ate me op je veto káná, me le wia. Ke adre me hom veto káná me hnán veto, me hmudra hnán dröu. 4 Ke adre me ha, ka habe, E so ate me otilá ke taun, me tap ae beú hmá ban hnyi dranyai, m' ate me ölungá iöta ; wá adre nye ovesei öta hnyi hmeledrany hia. 5 Ke Iehova ame utut ka wá taun me tap, ame otilá lakon tavat. 6 Ke Iehova ame ha, ka habe, Wá bi, khaca thibi hnyei ödra, ke khaca thibi hwen hodra hia ; ke walang únyi adre me hwán he ka ányá : ke haba walang ang, ame ca he ka hmak ködra ke únyi adre me beányá. 7 E so ate me utut me omonumoná hwen hodra, me me ca khana ke at hofuc hwan ke at. 8 Me Iehova ame ovesei ödra úheny e ka hnyi hmeledrany hia thithö : ke adre me hna ju he ka otilá taun. 9 Anyin a wale, adre me hwenyi ien e, Babela ; anyin a Iehova ame omonoá eling hwan hmeledrany hia : ke Iehova ame ovesei odra úheny e ka hnyi hmeledrany hia.

10 Walang ta je dö anyi Sema, khaca haded hunai Sema, ke e ame knöku Afasada hnyi huna a loiny hwaban uóú : 11 ke haba möt anyi Sema, hwaban hna hnöku Afasada, me thabúng haded ta je huna, ke e ame hnokoá je lakon baga me hlu.

12 Ke thöte faiv ta je hunainy möt anyi Afasada, ke e ame hnöku Sala : 13 ke vak ta haded ke kun ta hunainy möt anyi Afasada hwaban hna hnöku Sala, ke e ame hnokoá lakon je baga me hlu.

14 Ke thöte ta je hunainy möt anyi Sala, ke ame hnöku Heberu : 15 ke vak ta haded ke kun ta je hunainy möt anyi Sela, hwaban hna hnöku Heberu, ke e ame hnokoá ta je lakon baga me hlu.

16 Ke thöte foa ta je hunainy möt anyi Heberu, ke e ame hnöku Pelege : 17 ke vak ta haded ke thöte ta je hunainy möt anyi Heberu hwaban hna hnöku Pelege, ke e ame hnokoá lakon baga me hlu.

18 Ke thöte ta je hunainy möt anyi Pelege, ke e ame hnöku Reu : 19 ke lo li

haded ke nain ta je hunainy möt anyi Pelege hwaban hna hnöku Reu, ke e ame hnokoá lakon baga me hlu.

20 Ke thöte tu ta je hunainy möt anyi Reu, ke ame hnöku Serugi : 21 ke lo li haded ke seven ta je hunainy möt anyi Reu hwaban hna hnöku Serugo, ke e ame hnokoá lakon baga me hlu.

22 Ke thöte ta je hunainy möt anyi Serugo, ke e ame hnöku Nahora : 23 ke lo li haded hunainy möt anyi Serugo hwaban hna hmöku Nahora, ke ame hnokoá lakon baga me hlu.

24 Ke twente nain ta je hunainy möt anyi Nahora, ke e ame hnöku Tera : 25 ke khaca haded ke naintin ta je hunainy möt anyi Nahora hwaban hna hnöku Tera, ke e ame hnokoá lakon je baga me hlu.

26 Ke sevente ta je hunainy möt anyi Tera, ke ame hnöku Aberama, me Nahora, me Harana.

27 Ke walang ta je dö anyi Tera. Haba Tera ame hnöku Aberama, me Nahora, me Harana ; ke Harana ame hnöku Lota. 28 Ke ame mokcu Harana hnyi hnyimakö Tera a kamen hnyi hnyei adre hnokoá e hnyin, wale Ure hnyi Kaledaia. 29 Ke Aberama me Nahora ödrü me ve hok áian : haba ien öiö Aberama, me, Sarai ; ke haba ien öiö Nahora, me, Mileka nöku Harana wale kamö Milika me kamö Iseka. 30 Ke toúnyi Sarai, e ba nokon. 31 Haba Tera ame hom Aberama a nokon, me Lota nöku Harana, a öbiny, me Sarai a úngon, öiö Aberama a nokon ; ke ödrin e tha he úhedrin Ure hnyi Kaledaia ka he ka hnyi hnyei Kanana ; ke ödrin e o but Karan me labā e. 32 Ke haba ta je bongu Tera tu haded ke faiv je huna : ke Tera ame mokcu hnyi Karan.

HNYIMAKAN 12.

**K**E haba Iehova ame ha kö Aberama, ka habe, He but úhem hnyi gam, me ányám lap, me hnyaban kámám, ka hnyi hnyei oge me he ka omanená köu : 2 ke oge me he ka wiö u me me dökhü ae gan, ke oge me he ka ohnahici u, me ogáná iám ; ke u ma he ka hnahic : 3 ke oge me he ka ohnahici ödra adre me ohnahici u, ke haba at ame hangö u oge me he ka hangá : ke ame he ka hnahic ut únyi gam ta je hnyei hia eang hmelen. 4 Me haba Aberama ame he but helá me hna ha káu hnö Iehova ; ke Lota ame tha he mē : me

Aberama ame he úheny Karan, ke sevente faiv ta je hunainy. 5 Haba Aberama ame hum Sarai a áiân, me Lota a nokon liamekeiny mē, me tang omjehedrin hia ödrin e hia but úkböúna, me je hnyat ödrin e hia but hom unyidrin hnyi Karan ; ke ödrin e he but ka hnyi hnyei Kanana ; me ödrin e o but hnyi hnyei Kanana. 6 Ke Aberama ame vheno hnyei ke ne o but hnyi Sekema, hnyi iwajo anyi More. Ke ka e at Kanana hnyi hnyei. 7 Ke ame manen dut Iehova kö Aberama, ame ha, ka habe, Oge me he ka ham hnyei ang ka ta je mâtrânâm : me e ame otilâ eling taben hut kö Iehova at ame manen kâu. 8 Ke e ame he úheny e ka hnyi bucen, Bethela ke e deiö, me otilâ umen uma mano, ke e jio Bethela, ke e deiö Ai : ke e ame otilâ ke taben hut kö Iehova eling, me hawâ iö Iehova. 9 Ke Aberama ame hok tot ka hnyi Hwaiöu.

10 Ke e hu hmiâ hnyi hnyei : me Aberama ame he Aigupito ai he ka mē laba e ; anyin ae gan hmâ hmiâ hnyi hnyei. 11 Ke e hakekeny jut ka dit ka hnyi hnyei Aigupito, e ame ha kö Sarai a áiân, ka habe, Wâ bi, e khanö nya a u momo ae so hmainy : 12 ke e ka ö u hnen at Aigupito, me, adre me he ka ha, ka habe, Wale áiân, me adre me he ka hlingö nya, k'adre me he biju ka omeli u. 13 Me ö u ha thö, ka habe, U hanik, m' inye so únyi gam, me me möt bi hanuk únyi gam. 14 Ke ame o but Aberama Aigupito, me at Aigupito adre me wâ momo ae so hmönyin hmainy. 15 Ke a wâ but hnen je than unyi Farao, me ödrin e haisoâ e kö Farao : ke ödra adre me hom dö momo ka hnyi hnyaba Farao. 16 Ke e ame bi so kö Aberama can mono : me e ame tren ta je mamoe, me kau, me asina бага, me je lathnyabainy бага, me je lathnyabainy momo, me je asina momo, me je kamela. 17 Ke Iehova ame oveci Farao me anyin lap ge ta je vec ae gan can Sarai öiö Aberama. 18 Ke Farao ame hawo Aberama, me ha, ka habe, Ieú ang u je ányá könya ? Ieú gam u je ca thumetu nya a áiâm ang ? 19 Ieú can u je ha, ka habe, Hânâm ang ? Waleling me oge me hia but hom me öiök : ke walang ang wâ ju áiâm, hom dö, me he thö. 20 Ke Farao ame huna e ka je lakeiny : ke adre me hom e ka hnyi gethen, me áiân, me anyin ta je únyi hia.

## HNYIMAKAN 13.

**H**ABA Aberama ame he but úheny Aigupito, e, me áiân, me anyin ta je únyi hia, me Lota minya, ka hnyi Hwaiöu. 2 Ke Aberama ame tren omjeú ae gan hmâ wale je meno, me sileva, me gol. 3 Ke e ame hok tot úheny hnyi Hwaiöu ke ne o but Bethela, ka hnyi dok adre ip umen uma mano hnyin a bân, wanben Bethela me Ai ; 4 me ka hnyi dok e ame otilâ hnyin taben hut a bân : ke hnyi dok eling Aberama ame hawâ iö Iehova. 5 Ke e hu minya ga Lota, at ame tha he me Aberama, ta je mamoe, me kau, me je uma mano. 6 Ke ca úcú ödrü hnyei ka tha laba : anyin ae gan hmâ omjehedru, me me ca khan' ödrü ka tha laba. 7 Ke e hu iwatretra ge hnyat tuö meno hale Aberama, me hnyat tuö meno hale Lota : ke at Kanana me at Perizi adre me ka labâ hnyei. 8 Me haingö Aberama kö Lota, ka habe, E so e me ca hu iwatretra gatu, ke únyi ge hnyat tuö halek je meno, me hnyat tuö halem : anyin a ötu liamekeiny. 9 Hawa, e ca e hnyei hnyi hnyimákâm ? e so ötu na úsákâüö : u ka he but ka hnyi ke keihen a me, awe, oge ma he bi nya ka hnyi ke keihen a metâ ; ke u ka he ka hnyi ke keihen a metâ, awe, oge ma he bi nya ka hnyi ke keihen a me. 10 Haba Lota ame bwele me wâ dok ae thahon hia hnyi Joridano, a g' ame hu köiö hnyi je ke keihen hia, ke tiga ca ohia Sodoma me Gomora hnö Iehova, helâke hnyei i Iehova, helâke hnyei Aigupito, gethen Zoara ai. 11 Me haba Lota ame úca hobi kâu bi dok ae thahon hia hnyi Joridano : me Lota ame hok tot deiö, ke ödrü me úsákâüö but. 12 Haba Aberama ame laba hnyi hnyei Kanana, ke Lota ame labâ je taun hnyi dok ae thahon, me sukhöünâ umen uma mano ke ne o but Sodoma. 13 Ke e kong at Sodoma, ke beönua anyidra monu hnyi hnyimakö Iehova. 14 Haba Iehova ame ha kö Aberama hwaban hna úsákâüö a e me Lota, ka habe, Bwele thö, me wâ eang dok u me tot hnyin ka hnyi hwadrö, me hwaiöu, me deiö, me jio : 15 anyin a haba hnyei hia u ma wâ, oga ma he ka ham köu, me je mâtrânâm nyiele balua. 16 Ke oge me he ka wia ta je mâtrânâm, me me helâ me sesâiny kânâ : waleling me a ne khana ke at he ka aú sesâing kânâ, me adre me he

GENESE 14, 15.

minya ka aú ta je mátránâm. 17 Todró, vheno thö hnyei hnyi ibeúen me úlaunen; anyin oge me he ka ham e köu. 18 Me Aberama ame oc umen uma mano, me o but me laba hnyi sawajo anyi Mamere, wale hnyi Heberona, k' ame otilá eling ke taben hut kö Iehova.

HNYIMAKAN 14.

**K**E haba hnyi je bong bongu Amerafela than Sinara, me Arioka than Elasara, me Kedalaoma than Elama, me Tidala than Goiim, 2 ödrin e vat me Bera than Sodoma, me Biresa than Gomora, me Sinaba than Adema, me Semeba than Zeboim, ke than Bela minya (wale Zoara). 3 Haba tavat hia eling adre me iouny dö hnyi Sidima hnyigöulen bucen (wale Nem ae Hiny). 4 Adre me bâ kö Kedalaoma hnyi twelv ta je huna, ke hnyi huna a thötininy adre me behúgúnâ hmetu musi. 5 Ke haba hnyi huna fotininy ame o thö Kedalaoma, me ta je than a tha ödrin më, me kot at Refai hnyi Aseteroha-karenaima, me at Zuzi hnyi Hama, me at Emi hnyi Save-kiriathaima, 6 me at Hori hnyi anyidra bucen a Seira, ke ne o but Eleparana hnyi baten hnyebuba. 7 Ke ödrin e hmetuhmetu me o hnyi Eni-misepata (wale Kadesi), me kot hia hnyei iny at Amaleka, me at Amora minya, tavat adre me labâ Hazezo-tamara. 8 Me ame he but than Sodoma, me than Gomora, me than Adema, me than Zeboim, me than Bela (wale Zoara); me adre me tet metâ he ka vat mödra hnyi Sidima hnyigöulen bucen; 9 wale Kedalaoma than Elama, me Tidala than Goiim, me Amerafela than Sinara, me Arioka than Elasara; wale vak ta than úcon thabúng. 10 Ke unöngöt Sidima hnyigöulen bucen ge ta je op hmudra; ke a kec ut li than Sodoma me Gomora, ke adre me ta ju eling, ke haba je kolon adre me kec ka hnyi bucen. 11 Ke adre me húgúnâ hia ta je omjeúiny Sodoma me Gomora, me anyidra ta je jeú hia, me he but. 12 Ke adre me húgúnö Lota nokon liamekeiny me Aberama, waleji ame laba hnyi Sodoma, me anyin ta je únyi, me he but. 13 Ke ame o but ke at a kec möt, me thumetu Aberama at Heberu: wale ame laba hnyi sawajo anyi Mamere at Amora, liamekeiny me Esekolo ke liamekeiny me Anere; wale hnyat ödrin e tha hien me Aberama. 14 Ke a löng ut Aberama

a g' adre hom bâ thö keiny, me e ame oc dö vat adre hia but ná wia, waleji adre hnöku ödrin hnyi hnyaban, wale ödrin kun ta haded ke eitín, me hnu hotudra ke ne o but Dana. 15 Ke e ame kia but vat, e me je lathnyabainy hnyi hnyinghet, me kuc ödra, me hnu ödra ke ne o but Hoba, wale Damaseko, ke hwadrö. 16 Ke e ame hom hmeto ta je únyi hia, ke ame hom hmetu minya Lota a keiny, me anyin ta je únyi, me omomo, me tavat. 17 Ke ame he but than Sodoma he ka iouny më, wale a tiga hmetu úheny hnyi hna kuc Kedalaoma me ta je than unyin, hnyi Save hnyigöulen bucen (wale hnyigöulen bucen anyin than). 18 Ke haba Melekisedeke than Salema ame hok areto me waina: ke e at bi hut ka Khong ae Beönua. 19 Me e ame hahnahicá, me ha, ka habe, E so e hnahic Aberama únyi ge Khong ae Beönua, at a gan drany me hmeledrany: 20 Ke so adre haisoá Khong ae Beönua waleji ame hua but je iwahnaihmiöny möu ka hnyi hnyamám. Ke e ame ham káu ke keihen a libenyitainy ta je únyi hia. 21 Ke haingen than Sodoma kö Aberama, ka habe, ham ju könya tavat, ke hom dö ta je únyi me ányâm. 22 Ke haingö Aberama ka than Sodoma, ka habe, Oge hia but hai hnyamök kö Iehova, Khong ae Beönua, at a gan drany me hmeledrany, 23 ka habe, Oge me ca he ka hom ke hnyiban tö, me ong wen taben hnyeúca me ke únyi bi a ányâm, wá u nye ha thö, ka habe, Oge hia but otreni Aberama ge omjeú: 24 e so thibi hnen wahidröu hna han, me únyi minya a jekhon ta je бага adre tha he mönya; jia Anere, me Esekolo, me Mamere, e so ödrin e he ka hom jekhöúdrin.

HNYIMAKAN 15.

**H**WABAN ta je únyi e ame o thö hofuc ho Iehova kö Aberama hnyi hna omanená, haingen, ka habe, Aberama lö, ca ot: inya ang becâm, me troban hobi köu ae ti gan hmâ. 2 Ke haingö Aberama, ka habe, Than Iehova lö, ie únyi u me he ka hna könya, ke inya ang at ae ba nokon, ke haba at ame he ka hwö hwabök hnyi hnyabak, me, Eliezera at Damaseko? 3 Ke haingö Aberama, ka habe, Wá bi, u je ca hia but ham könya ke mátránik: ke wá bi ame he ka hwabök ju at adre hnokoá hnyi hnyabak. 4 Ke wá bi, ame o thö hofuc ho Iehova káu, ka habe, ame ca he ka hwabám

at eling ; ke so bi ame he ka hwabâm hing nokom. 5 Me e ame su e kâ û, me ha, ka habe, Bwele thö hnyidanyai, me aû thö ta je ohkû, ame ne khanö u he ka aû e : me e ame ha kâu, ka habe, ame he ka helâe ta je mâtrânâm. 6 Ke e ame labageju kö Iehova ; ke e ame bi haten e kâu me hnân hwakecin ae wisa. 7 Me e ame ha kâu, ka habe, Inya Iehova, at ame su u ûhem Ure hnyi Kaledaia, me me he ka ham köu hnyei ang hnân em. 8 Me e ame ha, ka habe, Than Iehova lö, ieu haten kõnya a oge me he ka tren e ? 9 Ke e ame ha kâu, ka habe, Hom dö kõnya kau a kun hunainy, me got momo a kun hunainy, me mamoe бага a kun hunainy, me ke biny, me ke nokon mekôta. 10 Me e ame hom ta je ûnyi hia e, me kia luâ bi hnyi wanben, me ip ûôuco je ve ec ke keihen : ke a ca hnyi kia luâ li meno ame gâ. 11 Ke ame utut ta je meno ûkuc ame gâ ka hnyi hon unyin je meno, ke Aberama ame obâ hmetu. 12 Ke haba hnyi ûen a dit seûnö, Aberama ame mokut hnying ; ke wâ bi, ame o but kâu ot me menekholom ae gan. 13 Ke e ame ha kö Aberama, ka habe, Wâhmakhmeto ju u, haba je mâtrânâm adre me he ka laba kanyua hnyi hnyei a ca idra, ke adre me he ka bi athnyaba ködra ; ke adre me he ka oveci ödra vak ta haded ta je huna ; 14 ke oge me he ka owisa ka hnyei eling minya, adre me bi athnyabainy : ke hwaban dö e adre me he ka he hmetu me omjeû ae gan. 15 Ke u ma he ka hnyi he ka je lakâmâm hnyi hnahic ; adre me he ka kõnim u k' u hingat kong ut. 16 Ke haba hnyi dö ae vakiny adre me he ka hmetu jem : anyin ae tiga ca bekhöt ut konginy at Amora. 17 Ke a didrut seûnö, me lit ut, ke wâ bi wahnainyâ ame sâ, me okûnú ame ubâhlâ, k' ame he hnyi wanben ta je ec utiö. 18 Haba hnyi bong eling Iehova ame ha ûhinhinköu me Aberama, ka habe, Oge hia but ham hnyei ang ka ta je mâtrânâm, hwân hnyi wageweiny Aigupito keneo but wagewe ae gan, wale wagewe Euferate : 19 at Keni, me at Kenaza, me at Kademoni, 20 me at Heth, me at Perizi, me at Refai, 21 me at Amora, me at Kanana, me at Girigasa, me at Jebusi.

HNYIMAKAN 16.

**H**ABA Sarai öiö Aberama ame ca hnoköa, ke e unyin ke athnyabainy a at Aigupito, Hagara ien. 2 Ke Sarai ame

ha kö Aberama, ka habe, Wâ ju, ame musö Iehova a oge me ca he ka hnokoâ ; ö u he thö ka anyik hlu ; ame ne he ka hu lakuk ûnyi gan. Me Aberama ame löng hwan Sarai. 3 Ke a hia but Aberama laba libenyita ta je huna hnyi hnyei Kanana, ke Sarai öiö Aberama ame hum Hagara at Aigupito a anyin hlu, me ham e kö Aberama âiân, me me âiân bi. 4 Ke e ame hum Hagara, me e ame erkin dut : ka löng ut e a ga erkin dut, me e ame hûkötia momo at a musö e. 5 Ke haingö Sarai kö Aberama, ka habe, ûnyi gam hna okongunya : oge ham köu anyik hlu, ke a löng ut a ga erkin dut, me e ame hûkötio nya : hamö Iehova he ka owisa kötu. 6 Ke haingö Aberama kö Sarai, ka habe, Wâ bi, e unyâm ânyâm hlu, me ânyâ kâu hoton wem. Ke Sarai ame oveca e, me e ame kec ut gan. 7 Ke ame ö e hnen angela anyi Iehova hnyi an ame pupua hnyi hnyebuba, wale ame pupua hnyi gethen ka he Sura ai. 8 Ke e ame ha, ka habe, Hagara lö, hlu anyi Sarai, u je m' ua ? ke u me he kâ ? Me e ame ha, ka habe, oge me kec ga Sarai, momo ame musiny. 9 Ke haingen angela anyi Iehova kâu, ka habe, Hmetu ju ka at ame musiny u, me löng hoton. 10 Ke haingen angela anyi Iehova kâu, ka habe, Oge me he ka ti osehia mâtrânâm, ke ca hnân öü ödra, anyin a ödra se hia. 11 Ke haingen angela anyi Iehova kâu, ka habe, Wâ bi, u erkin dut, ke u ma he ka hnokoâ da ; me hwenyiny ien Isamaela, anyin a löng ut Iehova ânyâm vec. 12 Ke e ame he ka tha ûcü me asina ae hiny unyin tavat ; k' ame he hnyamen ka iwahnaihmiöny me tavat hia, k' ame he hnyamen tavat hia ka iwahnaihmiöny me ; ke e ame he ka laba hnyi hnyimakan je liamekeiny me. 13 Haba momo ame hwenyiny iö Iehova at ame fuc kâu, ka habe, U thibi Khongat ame wâ : anyin a haingen, ka habe, Hawa oge hap wâ ju ang at ame ö nya ? 14 Anyin a wale, adre hwenyiny ien an ka habe, Bere-lahai-roi ; wâ bi, e hnyi wanben Kadesi me Bareda. 15 Ke Hagara ame hnokoâ da nöku Aberama : ke Aberama ame hwenyiny ien nokon, a hnokoâ Hagara, me Isamaela. 16 Ke eite siks hunai Aberama hnyi hnö Hagara hna hnöku Isamaela nöku Aberama.

HNYIMAKAN 17.

**K**E nainte nain hunai Aberama, me ame manen dut Iehova kö Aberama,



GENESE 18.

me ha kân, ka habe, Inya ang Khong Ataekhanahia; u ma he hnyi hnyimakök, ke wisa but. 2 Me oge me he ka úhinhinykõu möu, me oge me he ka ti osehia ta je mátránám. 3 Ke Aberama ame ta hnyimakan hnyikánái: ke Khong ame ha hofuc káu, ka habe, 4 Wâ bi, e unyâm anyik úhinhinykõu, ke u me he ka kamen ta je hnyei ae se. 5 Ke adre me ca he hmetu ka hwenyi iâm, me, Aberama, ke Aberahama bi iâm; anyin a oge hia but wiö u me kamen ta je hnyei ae se. 6 Ke oge me he ka ti ösi u, ke oge me he ka oâ ta je hnyei únyi gam, k' ame he ka o únyi gam ta je than. 7 Ke oge me he ka ohmâ anyik úhinhinykõu möu me ta je mátránám hwabâm hnyi anyidra ta je dö hnân úhinhinykõu ae ca ba balua, me oge me he ka Khongom me ta je mátránám hwabâm. 8 Me oge me he ka ham kõi, me ta je mátránám hwabâm, hnyei u me laba kanyua hnyin, a hnyei Kanana hia, hnân gam nyiele balua; ke oge me he ka Khongudrin. 9 Haba Khong ame ha kö Aberahama, ka habe, U ma he ka tuö anyik úhinhinykõu, u, me ta je mátránám hwabâm, hnyi anyidra ta je dö. 10 Walang anyik úhinhinykõu möbun, wale öbun e he ka tuö, me ta je mátránám a hwabâm, ka habe, Adre me he ka peritomonâ ta je baga hia unyibun. 11 Adre me he ka peritomonâ unen unyibun; ke wale haten anyik úhinhinykõu möbun. 12 K' adre me he ka peritomonâ at unyibun a eit ut bonginy, a ta je baga hia hnyi anyibun ta je dö, at adre hnokoâ hnyi hnyabam, me at adre úco hnen mone anyin ta je atkanyua, a ca mátránám bi. 13 E únyi hnathu he ka peritomona at adre hnokoâ hnyi hnyabâm, me hna úco hnen ányâm mone: k' ame he ka e bi hnyi je unyibun anyik úhinhinykõu hnân úhinhinykõu nyiele balua. 14 Ke adre me he ka subâ degecâ únyi hnyi iny hnyei at adre me ca peritomonâ unen unyin; e ame hanyáúâ anyik úhinhinykõu.

15 Haba Khong ame ha kö Aberahama, ka habe, Haba Sarai áiâm, u me ca he hmetu ka hawâ, Sarai, k' ama Sara bi ien. 16 Ke oge me he ka ohnahicâ e, ke haba khaca, oge me he ka ham kõi nokom da únyi gan: eke, oge me he ka ohnahicâ e, k' ame he ka hinyen ta je hnyei; k' ame he ka o únyi gan je thaniny ta je hnyei. 17 Me Aberahama ame ta hnyikánái, me hluma, me ha eú hnyi hnyekon, ka habe, Hawa, ama he at a khaca haded hunainy

ka hnokoâ nokon? k' ame he Sara ka hnokoâ ke nainte but ta je hunainy? 18 Ke haingö Aberahama ka Khong, ka habe, Ama na möt Isamaela hnyi hnyimákâm! 19 Me Khong ame ha, ka habe, Ca me ha, ke ame he Sara áiâm ka hnokoâ nokom a baga; ke u me he ka hwenyi ien Isaaka: ke oge me he ka ohmâ anyik úhinhinykõu mē, me ta je mátrániny hwaban hnân úhinhinykõu nyiele balua. 20 Ke so bi oge hia but ling u ga Isamaela: wâ bi, oge hia but hahnahicâ, me oge me he ka ohâtâ e, me ösiâ gánâ but e; e ame he ka hnokoâ ta jo taben a twelv, me oge me he ka wia e me me kamen ta je hnyei ae se hia. 21 Ke haba anyik úhinhinykõu me, oge me he ka ohmâ e me Isaaka, at ame he Sara ka hnokoâ únyi gam hnyi úen eang hnyi huna ame he ka o. 22 Ke e ame um dö úhnenamö mē, me Khong ame ölö thö úheny uny Aberahama. 23 Me Aberahama ame hum Isamaela a nokon, me ödrin adre hnokoâ hnyi hnyaban, me tavat hia adre úco ge anyin mone, a obaga hia hnyi hnyaba Aberahama, me peritomonâ unen unyidrin, hnyi bong eling a khaca, helâji me hnen Khong hna ha káu. 24 Ke nainte nain ta je hunai Aberahama hnyi hna peritomonâ unen unyin. 25 Ke thötin hunai Isamaela a nokon hnyi hna peritomonâ unen unyin. 26 Hnyi bong a khaca adre tha peritomoni Aberahama me Isamaela a nokon. 27 Ke adre tha peritomonâ mē ta je baga hia hnyi hnyaban, waleji adra hnokoâ hnyi hnyaban, me tavat adre úco ge mone unyin je atkanyua.

HNYIMAKAN 18.

**K**E Iehova ame manen dut káu hnyi sawajo anyi Mamere, k' ame laba hnyi hwanumen umen uma mano hnyi jebigö; 2 ke e ame bwele me wâ, ke wâ bi ta hnyat a kun ödrin e tot hnyi hnyimakan: ke e ame ö' drin me wadring dö he ka iouny mödrin úheny hnyi uma mano, me nom ju hnyikánái, 3 me ha, ka habe, Than lö, u ka na betenge gak, ca he but ka hnö nya a athnyabaem: 4 e so adre me sâú utköiö, me ösúâ thö je cabun, ke me menâ ju hmelen úö: 5 ke oge ma hom ongareto, m' öbun e okahwa hnyekubun; hwaban dö e he th' öbun; anyin a öbun e hia but o ka athnyabaibun. Ke ödrin e ha, ka habe, He thö ka ányâ helâ me hnâm hna ha. 6 Ke Aberahama ame he mweimwei kö

GENESE 19.

Sara eiö hnyi uma mano, me habe, Logotö penapena falawa ae so ama kun ta tulut, op dö, me le je ong areto. 7 Ke Aberahama ame wadring ka hnyi hna hat meno, me hom nokon kau ae mougou me so, me ham ka athnyaba ; ke e ame ie penapena e. 8 Ke e ame hom bata me debai, me nokon kau e ame penapena, me ip hnyi hnyimaködrin ; ke e ame tot hakekenyi ödrin hnyi hmelen üö, ke ödrin e han. 9 Ke haingödrin kâu, ka habe, Ewa Sara âiâm ? Haingen, ka habe, Walethö hnyi uma mano. 10 Ke e ame ha kâu, ka habe, Oge me he ka o hmetu köu e ka o but üen ; ke, wâ bi, ame he Sara âiâm ka hnokoâ da. K' a löng ut Sara hnyi hwanumen uma mano hnyi hoton. 11 Ke li hingat ut Aberahama me Sara, ke se hia ta je hunaidru, ke ba hmetu ga Sara hwa-kecin omomo. 12 Ke Sara ame hluma eü knyi hnyekon, ka habe, Hë, oge me he ka hu hnân senyin, k' iny hingat ut, ke hingat minya but anyik than ? 13 Ke Iehova ama ha kö Aberahama, ka habe, Ieü ga Sara ame hluma, me habe, Hawa e hnathu oge me he ka hnokoâ k' iny hingat ut ? 14 Ewa ke ünyi ae hmak kö Iehova ? Haba hnyi bong adre thu oge me he ka hmetu köu, e ka o but üen, k' ame he Sara ka hnokoâ nokon da. 15 Ke Sara ame ivinöâ, ka habe, Oge ca hluma ; anyin a e ame ot. Ke haingen, Ohe, u je hluma.

16 Ke ame todrö hnyat me hnyimaködrin Sodoma ai : ke Aberahama ame tha he mödrin he ka ip ödrin hnyi gethen. 17 Ke Iehova ame ha, ka habe, Hawa, oge me he ka ikhâlâ ga Aberahama hnök hna he ka ânyâ ; 18 anyin ame he Aberahama ka hnân hnyei ae gan me man, ke ame he ka hnahic ünyi gan ta je hnyei hia eang hmel- len ? 19 Anyin a oge hia but wâhma- khmetoâ e, me me hamen he ka hûna ka lakon me anyin lap hwaban e, m' adre me he ka tuö de Iehova, he ka ânyâ wisa me owisa ; me me he Iehova ka ohmä kö Aberahama hna ha bânâ gan. 20 Ke Iehova ame ha, ka habe, E hnathu e gan hmâ but tenge anyin Sodoma me Gomora, ke e hnathu e ti hmak ut anyidrin hulö ; 21 anyin a wale oge ma utut walang aug, me ö 'drin, hawa ödrin e ne ânyâ hia helâji me hwa tenge ame o but kõnya ; ke a ne ba ame he ka khanö nya. 22 Ke a saü thö hnyat üheny e, me he bala Sodoma ai : ke Aberahama ame tiga tot hnyi hnyimakö Iehova. 23 Ke Aberahama ame hakekenyâ, me ha, ka habe, Hawa, u me he ka tha ohia wawisa

me wamonu ? 24 A ne hu fifte tavat ae wisa hnyi hnyei : hawa, u ma he ka ohia, me ca betenge ka hnyei can fifte tavat ae wisa hnyin e ? 25 Ö u ca he ka ânyâ helâe, wale he ka tha omoko tavat ae wisa me tavat ae kong, me me tha ücü at ae wisa me at ae kong. Ö u ca he ka helâe : hawa ame ca he at owisa hmeledrany hia ka ânyâ wisa ? 26 Ke Iehova ame ha, ka habe, Oge ne wâ e Sodoma fifte tavat ae wisa hnyin taun, me oge me he ka betenge ka hnyei hia ünyi gadrin. 27 Ke Aberahama ame thu me ha, ka habe, Wâ bi, anyin a iny hwege hnyok he ka fuc köu, Than, k' iny sesâiny kânâ me hnabadröu ; 28 ke hawa, a ne hia thabûng ta hnyat hnyi fifte tavat ae wisa, u ma he ka ohia hnyei hia can ae hia thabûng ? Me e ame ha, ka habe, Oge me ca he ka ohia e, iny ka wâ fâte faiv. 29 Ke e ame ha hmetu kâu, ka habe, Hawa, u je ne he ka wâ fâte ? Ke e ame ha, ka habe, Oge me ca he ka ânyâ can tavat a fâte. 30 Ke haingen, ka habe, E na ca he Than ka hmönyin, m' oge me he ka fuc : hawa a ne hu tavat a thöte ? Ke e ame ha, ka habe, Oge me ca he ka ânyâ oge ne wâ eling tavat a thöte. 31 Ke e ame ha, ka habe, Wâ ju, e hwege hnyekuk he ka fuc ka Than ; ke hawa, a ne hu tavat a twente eling ? Hai- ngen, Oge me ca he ka ohia e can tavat a twente. 32 Ke e ame ha, ka habe, E na ca he Than ka hmönyin, m' iny okhaca biju fuc : hawa a ne hu tavat a libenyita ? Me haingen, Oge me ca he ka ohia e can tavat a libenyita. 33 Ke a um dö ühnenamö Iehova me Aberahama, me ame he but : ke Aberahama ame hmetu ka hnyi hnyaban.

HNYIMAKAN 19.

**K**E haba li angela ödrü me o hnyi Sodoma hnyi sahac ; ke Lota ame laba hnyi homagöuleny Sodoma : ke Lota ame ö 'dru, me e ame tot he ka iouny mödrü, ke e ame nom hnyikânâi ; 2 ke e ame ha, ka habe, Li than lo, wâ bi, saü ju ka hnyi hnyaban athnyabaibu, me mokut me ösüâ li cabu, ke öbu me he ka vesâ me vheno debu. Ke haingödrü, ka habe, Ohe, öbmu me he ka mokut hnyi gethen eâu hnyinghet. 3 Ke e ame üjöngi ödrü hwege ödrü ; me ödrü me saü kâu, me didrö ka hnyi umen uma : ke e ame bi jeü hobi ködrü, me le areto adre ca levenâ bi, ke ödrü me han. 4 Ke ödrü tiga ca mokut, me ame igigilö uma hnen aten hnyei, wale

GENESE 19.

aten Sodoma, hwân ge ta je hidröu ke ne o but ge wahingat, a tavat hia úhedra hnyi je ke keihen hia ; 5 ke adre me hawo Lota me ha, ka habe, Ewa li at eja ödre o köu sahac? Hum ödrü but köhmun e me úkhanöh munköu thö. 6 Ke Lota ame didrut ködra eü hnyi hwanuma, k' ame hlöng hwanuma ka hnyi hoton. 7 Me haingen, ka habe, Hnyat me lakeiny lö, ca ányá únyi heláe ae kong. 8 Wá bi, e hu lakuk li hlu, a ödrü tiga ca tha laba me бага, hnö nya but he ka su ödrü köbun, ke he th' öbun ka ányá ködrü bi helá me webun : ke ca he ka ányá únyi ae kong ka li at ang ; anyin a ödre o but ka hnyi hmenon umök uma. 9 Ke haingödra, ka habe, Kec dö. Ke adre me ha, ka habe, Haba at ang a o but a atkanyua, ke beweny bi he ka at owisa : ke walang ang öhmun e he ka okongu u gan hmâ hudru. Ke adre me úlüö kâu, wale Lota, me hakekenyâ he ka kia hlingeny hwanuma. 10 Ke haba li at ödrü me hinöbeny jut me hügünö Lota ködrü eiö hnyin uma, me hlöng ut hwanuma. 11 Ke ödrü me owarduâ but tavat hnyi hwanumen uma, tavat ae úhnyükong me tavat ae gan : ke adre me húkötö but khaúteta hwanuma. 12 Ke haingen li at kö Lota, ka habe, Hawa, e hu je waem eang? haba úngom бага, me je lakom бага, me hlu, me ányâm tavat hia hnyi hnyei ; hum ödrin but úheny ang : 13 anyin a ohmu me he ka ohia dok ang, anyin ae gan hmâ hwan anyidra tenge hnyi hnyimákö Iehova ; ke a kun' öhmu Iehova he ka ohia e. 14 Ke Lota ame didrut me úhnenamö me laúngon, hnyat ödrin e hom lakon je hlu, me haingen, ka habe, Todrö, kec dö ge dok ang, anyin ame he Iehova ka ohia hnyei. Ke laungon ödrin e únykúme a g' ame úhiö. 15 Ke ame o thö hnyomakatu, me haba li angela ödrü me sihwegiö Lota, ka habe, Todrö hom dö áiâm, me lakom li hlu eang ; wâ u nye hmunyi mokcu, at ka he ka bi hwaban ka hnyei. 16 Ke e ame bec ; me haba li at ödrü me lelö hnyamen, me hnyamen áiân, me hnyamen lakon li hlu ; anyin a Iehova ame betenge gan : me ödrü me su e me ip hnyi hoton taun. 17 Ke ödre hia but su ödrin, me e ame ha kâu, ka habe, Kec dö m' u me möt ; ca hwiö bi, ke ca tot hnyi dok ae thahon hia ; kec dö ka hnyi bucen, wâ u nye mokcu. 18 Ke Lota ame ha ködrü, ka habe, Than lö, e na ca heláe : 19 me wâ ju a hia but athnyabaem wâ

ibetengiö baú hnyi hnyimákâm, ke u je hia but oganá ányâm ibetengiö, wale u je omanená könya me me omeli nya but ; ke ca kxanö nya he ka kec ka hnyi bucen, wâ e nye hom tilö nya hnen kong, m' iny mokcu : 20 wale bi eü taun ae hakekeny ka kec kâu, ke úhnyükong thibi : iny na kec ut kâ e, (hawa e ca úhnyüköng e?) m' inye möt. 21 Me e ame ha kâu, ka habe, Wá bi oge hia but köp u hnen únyi ang minya, me oge me ca he ka ohia taun e u me ha. 22 Logotö, kec dö kâ e, anyin ae ca kxanö nya ka ányá ke únyi u ka tiga ca o e. Anyin a wale adre me hwenyi ien taun e, me Zoara. 23 Ame görany dö seúnö hon hnyei ke Lota ame o thö Zoara. 24 Ke Iehova ame ota we hon Sodoma me Gomora a teio me meic únyi hnyi drany ga Iehova ; 25 me e ame ohia li taun e, me dok ae thahon hia, me tavat hia adre me labâ li taun e, me ta je únyi hia ame kú eü hnyi kânâ. 26 Ke haba áiân ame hwiö hmetu, m' adre wia momo e me me sâlt ame tot wisa. 27 Ke Aberahama ame vesákong me he ka hnyi dok e ame labö tot hnyin hnyi hnyimákö Iehova : 28 ke e ame bwele Sodoma ai me Gomoroai me hnyei hia ae thahon, me wâ, ke wâ bi ame sâ göranyai hainy hnyei heláke hainy inyâ ji.

29 Ke e ka he Khong ka ohia li tauniny hnyei ae thahon, me Khong ame únykúmi Aberahama me kunö Lota únyi hnyi w-nben úhiö, hnyi úen e ame ohia li taun ame laba hnyin Lota.

30 Ke Lota ame ölö thö úheny Zoara me laba hnyi bucen tha e me lakon li hlu ; anyin a e ot ka laba e Zoara : ke e ame laba hnyi op, tha e me lakon li hlu. 31 Ke haingen atö ka wakeiat, ka habe, A hingat ut cica, ke ba at ehe ang he ka hum ötu helá me bongon hmeledrany : 32 ötü ma he ka habeli cica ge waina, me ötu me he ka tha mokut më, me me hu mâtrân únyi ga cica. 33 Ke hnyi lit eling ödrü me habelen kamödrü ge waina : me ame he atö me tha mokut me kamen ; ke e ca khana úen e ame mokut me tot hmetu. 34 Ke nyi, haingen atö ka wakeiat, ka habe, Wá bi, et hnyinghet oge tha mokut me cica : ötu me he ka habelen hmetu aú ge waina hnyinghet ; me u me he ka tha mokut më, me me hu mâtrânitu únyi ga cica. 35 Ke ödrü me habelen kamödrü ge waina hnyi lit minya eling : me wakeiat ame todrö me tha mokut më ; ke e ca khana úen e ame mokut me tot hmetu. 36 Me

wale e erkin dut li laku Lota hnen kamödrü. 37 Ke atö ame hnokoâ da, me hwenyi ien Moaba : wale kamen at Moaba ke ne o but hnyi bong ang. 38 Ke wa-keiat minya ame hnokoâ ke da, me hwenyi ien Ben-ami : wale kamen ta je laku Amona ke ne o but hnyi bong ang.

HNYIMAKAN 20.

**K**E Aberahama ame hok tot úheny e ka hnyi hnyei hnyi Whaiöu, me laba wanben Kadesi me Sura, me e ame laba kanyua e Gerara. 2 Ke haingö Aberahama ga Sara a áian, ka habe, Hanik at ang : me Abimeleke thaniny Gerara ame úkhünöng ka hum Sara. 3 Ke Khong ame o but kö Abimeleke hnyi bwi hnyi hnyinghet, me ha kâu, ka habe, Wâ bi u me helâ me at ae moku can momo u je hom ; anyin a e áian ke at. 4 Ke Abimeleke ame tiga ca úhakekenyi mē : ke e ame ha, ka habe, Than lö, u je he bi ka hlingâ hnyei ae wisa ? 5 Hawa, a ca ha könya, ka habe, Hanik at e ? ke haba momo, e ame ha minya, ka habe, Hanik at ang : me oge hia but ányâ únyi ang ge hnyekuk ae hnathu, me li hnyamök ae alai. 6 Me Khong ame ha kâu hnyi bwi, ka habe, Eke, e khanö nya a u je ányâ e hnyi hnyekom ae hnathu, me oge me hom behanö u, wâ u nye kong könya : waleling m' oge me ca hnö u he ka kâlâ e. 7 Anyin a wale, he thö u ka hna hmetu momo ka áian : anyin a e perofeta, k' ame he ka hic hobi köu, me u me he ka möt : ke u je ne ca he ka hna hmetu, wâhmakhmeto ju a u me he ka moku, u bi, me je waem hia. 8 Ke Abimeleke ame vesákong, me hawa je athnyabainy hia, me thumetu ödrin ge ta je únyi hia e : me ame ot gan hmâ tavat. 9 Me Abimeleke ame hawo Aberahama, me ha kâu, ka habe, Ieú ang u je hia but ányâ köhmun ? ke ieú anyik monu köu, wale me u je bi jönik gan hmâ me dökhuk dökhü ? u je hia but ányâ könya ta je únyi a ca hnân ányâ. 10 Me haingö Abimeleke kö Aberahama, ka habe, Ieú u je wâ me u me ányâ thö únyi e ? 11 Ke Aberahama ame ha, ka habe, Oge me únykúme bi nya, ka habe, e ba ot ka Khong hnyi dok ang ; me ödrin e he ka hlingö nya can öiök. 12 Ke haba khaca, e hnathu, hanik e, ke nöku cica, ke ve hinyöhmu bi ; k' ame wia me me öiök bi : 13 ke haba hnyi úen Khong ame ohei nya únyi hnyi hyaba cica, me oge me ha kâu, ka habe, Walang ányâm

ibetengiö u me he ka ányâ könya, a haba hnyi ta je hnyei ötu me he ka o hnyin, u me he ka haiö nya, ka habe, Hanik ang. 14 Ke Abimeleke ame hom ta je mamoe me kau, me athnyaba бага me momo, me ham kö Aberahama, me hnö Sara áian hmetu kâu. 15 Ke Abimeleke ame ha, ka habe, Wâ bi, ik hnyei hnyi hnyimákâm : labâ ju hnâm hna he ka weny. 16 Ke haingen kö Sara, ka habe, Wâ bi, oge hia but ham ka hânâm ta je ong sileva a khaca thauzan : ke wâ bi, haba únyi e me hnân tube hnyimákâm, m' ödrin hia a tha ödrin möu ; m' u me he ka wisa hnyi hnyimakan tavat hia. 17 Ke Aberahama ame hic ka Khong : ke Khong ame osoi Abimeleke, me áian me lathnyabainy omomo ; me ödrin e hnokoâ bi. 18 Anyin a hia but Iehova otounyö omomo hia hnyi lap anyi Abimeleke ca Sara öiö Aberahama.

HNYIMAKAN 21.

**K**E haba Iehova ame senö Sara helâ me hnen hna ha, me Iehova ame ányâ kö Sara helâ me hwan hofuc. 2 Ke ame erkin dut Sara, me ame hnokoâ nöku Aberahama бага ka hingat ut, hnyi hing úen Khong ame hia but ha kâu. 3 Me Aberahama ame hwenyi ien nokon a hnokoâ Sara, Isaaka 4 Ke Aberahama ame peritomoni Isaaka a nokon ke eit ta bonginy, helâji me hnen Khong hna hûna kâu. 5 Ke khaca haded je hunai Aberahama hnyi hna hnöku Isaaka a nokon. 6 Ke haingö Sara, ka habe, Khong ame hia but ohlumö nya ; k' ame he ka tha hluma mönya tavat hia adre me löng. 7 Ke haingen momo, ka habe, Ia ame he ka ba ehac kö Aberahama, ka habe, Ame he Sara ka asen je wanakat ? anyin a oge hia but hnokoâ nokon da ke hingat ut.

8 Ke ame hûhûö thö wanakat, k' adre hnebaiö but : ke Aberahama ame ányâ bijeú ae gan hnyi bong adre hnebaiö Isaaka hnyin. 9 Ke Sara ame wâ nöku Hagara, momo Aigupito, waleji nöku Aberahama, k' ame hiâ. 10 Waleling me me ha ko Aberahama, ka habe, Tha obâ but momó eang adre úco me nokon : anyin ame ca he nokon momo eang adre úco ka tha hu hwajekhon me Isaaka nöku. 11 Ke a vec gan hmâ Aberahama ge hofuc eling, can nokon. 12 Ke Khong ame ha kö Aberahama, ka habe, E so u me ca vec can da, me momo u je úco ; ke löng ju hia thithö hna ha köu hnö

GENESE 22.

Sara ; anyin adre me he ka ha matrânâm únyi ga Isaaka. 13 Ke oge me he bi nya ka wia nokon momo adre úco me hnân hnyei, anyin a e matrânâm. 14 Me Aberahama ame vesákong, me hok areto me kaia ae lup, me ham kö Hagara, me ip hon bajebyin, me wanakat minya, me kunâ but momo : k' ame he but me he monu hnyi hnyebuba Bere-seba. 15 Ke a hme thö kaia, me momo ame ip ju wanakat eú hmelen úö ae okhulit. 16 K' ame he momo me laba sâkâú cicö e, helâke hna fana ka hnyin : anyin a haingen, ka habe, Iny na ca wâ imekiny wanakat. Ke momo ame laba cicö me tenge hwege goranyai. 17 Ke haba Khong ame löng hwan da ; me angela anyin Khong ame hongot hnyi drany kö Hagara, ka habe, Hagara lö, ieú gam ? ca ot bi, anyin a löng ut Khong hwan da hnyi nnen hna mokut. 18 Tödro, kap dö göranyai da, me kap nnen hnyamâm ; anyin a oge me he ka wia e me me hnyei ae gan. 19 Ke Khong ame obwela li emakan, me e ame wâ an, me e ame he but me öunöngötâ kaia, me habelen da. 20 Ke tha e Khong me da, ke e ame hûhûö thö ; ke e ame laba hnyi hnyebuba, me e at ame fana bi. 21 K' ame laba hnyi hnyebuba Parana : ke hinyen ame hok momo únyi hnyi hnyei Aigupito me áiân.

22 Ke haba hnyi úen eling Abimeleke me Fikolo tuban anyin je deö vat, ödru me úhnenamö me Aberahama me ha, ka habe, E unyâm Khong hnyi ta je únyi hia u je anyâ : 23 anyin a wale e so u ma khemanyinâ ien Khong kõnya eang, a u me ca he ka iyawö kõnya, me nokuk, me nokon nöruk : me u me he ka anyâ kõnya, me ka hnyei u me laba kanyua hnyin, helâ me huök hna betenge köu. 24 Me haingö Aberahama, ka habe, Oge me he ka khemanyin. 25 Ke Aberahama ame ú Abimeleke can an adre koú, waleji ame hûgúnâ nnen je athnyabai Abimeleke. 26 Me haingö Abimeleke ka habe, Eca khanö nya at a anyâ únyi e : ke u je ca thumetu nya minya, ke oge me ca löng ke ne but hnyi bong ang. 27 Me Aberahama ame hom je mamoe me kau, me ham kö Abimeleke ; me ödru me úhinhinyköu. 28 Ke Aberahama ame hake ip je nokon mamoe momo a seven únyi hnyi hnahat. 29 Ke haingö Abimeleke kö Aberahama, ka habe, Ieú bongon je nokon mamoe momo eang a seven u je ke ip ? 30 Me haingen, ka habe, U me he ka kap únyi gak je lakon mamoe

momo a seven, me me bi haten kõnya, a oge hia but koú an eang. 31 Anyin a wale e ame hwenyi ien dok e Bere-seba, anyin a ödre úkhemanyin eling. 32 Wale ödru me úhinhinyköu e Bere-seba : ke ame todrö Abimeleke me Fikolo tuban anyin je deö vat, me ödru me hmetu ka hnyi hnyei iny at Filisite. 33 Ke Aherahama ame tá ke úö tarfa e Bere-seba, me háwâ iö Iehova eling, Khong a Nyiele balua. 34 Ke se hia bongu Aberahama hnyi hnyei iny at Filisiti.

HNyimakan 22.

**K**E hwaban ta je únyi e, haba Khong ame cubic Aberahama, me ha kâu, ka habe, Aberahama lö ; me e ame thu, ka habe, Inya ang. 2 Ke e ame ha, ka habe, Hom dö nokom, a nokom a khaca, at u me betenge gan, jia Isaaka, me he thö ka hnyi hnyei Moria ; me hudo thö e me hnân hut adre le, hon ke bucen oge me he ka ha köu. 3 Me Aberahama ame vesákong, me ip tap hon haleny asina, me hom ke li at únyi hnyi je hidröu unyin, me Isaaka a nokon ; ke e ame khe utö hnân le hut, me todrö me he ka hnyi dok Khong ame hia but ha kâu. 4 Haba hnyi bong a kuniny, Aberahama ame bwele me wâ dok ae tiga sâkâú. 5 Me Aberahama ame ha ka anyin li hidröu, ka habe, Me laba ju öbu eang me asina, ke oge me he bi nya me da kâ 'le ; ke öhmu me he ka hmi me hmetu ju köbu. 6 Ke Aberahama ame hom thi ot hobi kâu hut adre le, me ip hu Isaaka a nokon ; ke e ame hom hele me meic hnyi hnyamen ; ke ödru me tha he. 7 Ke Isaaka ame ha kö Aberahama a kamen, ka habe, Cica lö, me haingen ka habe, Nökuk lö, inya ang. Ke haingen, ka habe, Wâ bi meic me thi ot : ke ewa nokon mamoe hnân hut adre le ? 8 Ke Aberahama ame thu, ka habe, Nökuk, hamen Khong he ka penapena hobi kâu bi ke nokon mamoe hnân hut adre le : me ödru me tha he. 9 Ke ödru me o but ka hnyi dok Khong ame ha kâu ; ke Aberahama ame otilâ eling taben hut, me khutâ inyâ, me co Isaaka a nokon, me ip e hon útoiny taben hut. 10 Ke Aberahama ame inâ but hnyamen me hom hele he ka hlingâ nokon. 11 Ke haba angela anyi Iehova ame hawâ e únyi hnyi drany me ha, ka habe, Aberahama, Aberahama lö : me haingen, ka habe, Inya ang. 12 Me e ame ha, ka habe, Ca ip hnyamâm hon da, ke ca anyâ ke únyi kâu : anyin a oge wâ

but walang ang a u me outen Khong, anyin a u je ca behânâ gak nokom, wale nokom a khaca. 13 Me Aberahama ame bwele me wâ, ke wâ bi, e hnyi hoton ke mamoe бага, ame vhet li faoiny hnyi hnyot: ke Aberahama ame he me hom mamoe бага, me hudo biju hnân hut adre le, me hwaban nokon. 14 Ke Aberahama ame hwenyi ien dok e, ka habe, Iehova-irae: helâ me hnödra hna labö ha ke ne o but hnyi bong ang, ka habe, Adre me he ka penapena e hnyi bucen anyi Iehova. 15 Ke ame olo hongot angela anyi Iehova kö Aberahama ûnyi hnyi drany, 16 me ha, ka habe, Haingö Iehova, ka habe, Oge hia but khemanyin gak bi, anyin a u je hia but ânyâ ûnyi e, k' u je ca behânâ nokom, wale nokom a khaca: 17 anyin a wale oge me he ka ti ohnahici u, me ti osiâ je mâtrânâm, me me helâ me ta je okhûiny drany, me helâ me öny hnyi baten köiö; k' ame he mâtrânâm ha hu homagöuleiny ta je iwahnamionny mē; 18 ke ame he ka hnahic ûnyi ge mâtrânâm ta je hnyei hia thithö eang hmelen; anyin a u je löng hoton hok hofuc. 19 Ke Aberahama ame he hmetu ka li hidrou a anyin, me ödrin e tot, me tha he Bere-seba ai; ke Aberahama ame labâ Bere-seba.

20 Ke hwaban ta je ûnyi e, adre me thumetu Aberahama, ka habe, Wâ bi, haba Mileka ame hia but hnokoâ nöku Nahora a liamekeiny möu; 21 jia Uza nokon a bân, me Buza liamekeiny mē, me Kemuela kamö Arama; 22 me Kesed, me Khaso, me Piledasa, me Jidelafo, me Bethuela. 23 Ke Bethuela ame hnöku Rebeka: haba ödrin eit Mileka ame hnokoâ a je laku Nahora liamekeiny me Aberahama. 24 Ke haba anyin ke momo, Reuma ien, e ame hnokoâ minya Teba, me Gaama, me Takasa, me Maaka.

### HNHYIMAKAN 23.

**K**E khaca haded ke twente seven ta je hunai Sara: wale ta je hunainy anyin möt. 2 Ke a moku Sara hnyi Kiriath-areba (wale Heberona) hnyi hnyei Kanana: ke ame o but Aberahama he ka hnyamok me tenge ga Sara. 3 K' ame todrö Aberahama unyin kokiny komok, me ha ka je laku Heth, ka habe, 4 Iny atkanyua me at ame mē laba unyibun: e so öbun e ham könya ke utkânâ hnân khön komok hnyin unyibun m' inye konâm

kokik m' iny ca wâ but. 5 Haba je laku Heth adre me thu kö Aberahama me ha kâu, ka habe, 6 Than lö, löng ju köhmun: u than ae gan hmâ hmönyin unyihmun: konâm ju kokâm hnyi anyihmun erkemok u je úca; ke ba at gahmun ame he ka behanö u ge anyin erkemok, m' u me he ka konâm kokâm. 7 Me ame todrö Aberahama, me nom ju ka aten hnyei, wale je laku Heth. 8 Ke e ame ûhnenamö mödra, ka habe, A ne webun a oge me he ka konâm kokik m' iny ca wâ bi, löng ju könya me tengiö nya kö Eferona nöku Zohara, 9 me me ham könya op e Makepela, a obiny, hnyi baten iny hnyei; e so e ame he ka ham e könya hnan hwaban ae bekhöt hnyi wanböbun me me anyik dok hnân khön komok hnyin. 10 Ke haba Eferona ame hnyi laba unyin lakon Heth: me Eferona at Heth ame thu kö Aberahama, ke ame löng lakon Heth, wal' ödra hia adre me didrö ka hnyi homagöuleny taun, haingen, ka habe, 11 E ba than lö, ling nya ju: haba utkânâ inya oge me ham but köu, me op eü hnyin oge me ham köu; oge me hna but köu hnyi hnyimakan lakon aten ik hnyei: konâm ju kokâm. 12 Ke Aberahama ame nom ju hnyi hnyimakan aten hnyei. 13 Me e ame ha kö Eferona k' ame löng aten hnyei, haingen, ka habe, U je ne wem, u na löng ju könya: oge me he bi nya ka ham hwaban utkânâ; hom dö ûnyi gak, m' oge me he ka konâm eling kokik. 14 Ke Eferona ame thu kö Aberahama me ha kâu, ka habe, 15 Ling nya ju, than lö, haba ong utkana ae úcü hwaban me vak ta haded je sekeliny sileva, ke hnân eü e kötu? anyin a wale, konâm ju kokâm. 16 Ke Aberahama ame löng kö Eferona; me Aberahama ame tuluto kö Eferona ta je sileva, waleji e ame ha hnyi hnyimakan je lakon Heth, a vak ta haded je sekeliny sileva, mone adre labö úco ka at úcü. 17 Me haba utkânâ i Eferona, e Makepela, cicö Mamere, wale utkânâ me op eü hnyin, me ta je úö hia hnyi utkâna hnyi ta je hounyin igigilö, adre me ohmâ 18 kö Aberahama me gan hnyi hnyimakan je lakon Heth a tavat hia adre me didrö ka hnyi homagöuleny anyin taun. 19 Ke hwaban dö e Aberahama ame könim Sara âian hnyi op hnyi utkânâ e Makepela cicö Mamere (wale Heberona), hnyi hnyei Kanana. 20 Ke haba utkânâ me op eü hnyin, adre ohmâ kö Aberahama hnen je lakon Heth me anyin dok hnân khön komok hnyin.

HNYIMAKAN 24.

**K**E hingat ut Aberahama, me se hia je hunainy : ke Iehova ame hia but ohnahici Aberahama hnyi ta je únyi hia. 2 Ke Aberahama ame ha ka athnyabainy, a hingatiny hnyaba, at ame musö anyin ta je únyi hia, ka habe, Iná ju hnyamám hmelen jevak : 3 me oge me he ka ha köu he ka khemanyin kõnya hnyi hnyimakö Iehova, Khongon drany. me Khongon hmeledrany, a u me ca he ka hok áiân nökuk unyin je hlu lakon at Kanana, wale oge me laba unyidra : 4 ke u ma he ka hnyi ik hnyei, me anyik lap, me hok áiân nökuk jia Isaaka. 5 Ke haingen athnyaba káu, ka habe, Ke so bi ame ne ca hmehmela hlu ka he hotuk ka hnyi hnyei eang : hawa, hamök he ka su nokom ka hnyi hnyei u je he but únyi hnyin? 6 Ke Aberahama ame ha káu, ka habe, Wâ eáu, u nye he thö ka su hmetu nökuk kâ e. 7 Haba Iehova, Khongon drany, waleji at a hum nya úhek hnyi hnyaba cica, me únyi hnyi hnyei adre hnöku nya hnyin, at ame ha kõnya me khemanyin kõnya, ka habe, Oge me he ka ham hnyei eang ka ta je mátránám ; haba at eling ame he ka kuná anyin angela hnyi hnyimákám, ke u me he ka hok únyi eling áiân nökuk. 8 Ke a ne ca hmehmela hlu ka he hotom, awe, me u gufa hnyi hnam hna khemanyin kõnya eang ; ke so bi u ma ca he bi ju ka su nökuk kâ e. 9 Me haba athnyaba ame iná hnyamen hmelen jeva Aberahama a tuhan, me khemanyin káu hnyi únyi eling. 10 Ke haba athnyaba ame hom ke je kamela a libenyita hanen je kamela haleny tuhan, me he but ; anyin a e arne musö ta je únyi hia anyin tuhan : ke e ame tot me he Mesopotamia ai, ka hnyi taun i Nahora. 11 Ke e ame ocibouca je kamela hoton taun hnyi an, hnyi sahac, hnyi úen ame he omomo ka se köiö. 12 Me e ame ha, ka habe, Iehova lö, Khongu Aberahama a tuhök, ö u kuná so kõnya hnyi bong ang, me betenge ju kö Aberahama a tuhök. 13 Wâ bi oge me tot hnyi an ; k' ame he jem ta je hlu lakon aten taun he ka se köiö : 14 ke so e helâng, a haba hlu oge me he ka ha káu, ka habe, Ö u sáú thö ányâm kaia m' inye ic ; me e ame he ka ha, ka habe, Ic dö, ke oge me he minya ka habelen halem je kamela : e so e e bi at e u je úca hobi kö Isaaka

athnyabaem ; ke waleling oge me he ka wáhmakhmeto a u je omanená ibetengiö ka tuhök. 15 Ke e ame tiga ha hofuc, me wâ bi a o thö Rebeka nöku Bethuela a nöku Mileka, öiö Nahora, liamekeiny me Aberahama, ke e hu kaia hon bajebenyin. 16 Ke ti so hmainty hlu at ka wâ, ke hlu hnathu ae tiga ca tha laba me бага ; me e ame utut ka hnyi an me öunöngötá anyin kaia me ölö hmetu. 17 Ke ame wadring athnyaba ka úkhanö mē, me ha, ka habe, Ö u habelik ge ke ong utköiö. 18 Ke haingen hlu, ka habe, Than lö, ic dö : me e ame ie hna but kaia ka hnyi hon hnyamen, me habelen. 19 Ke a hia but habelen, me e ame ha, ka habe, Oge me he minya ka se köiö hobi káu halem ta je kamela ke ne o but ödrin e um dö ic. 20 Ke e ame ie hingálá but anyin kaia ka hnyi kumete, me wadring hmetu ka hnyi an ka sáú, k' ame se köiö hobi káu je kamela hia. 21 Ke haba at ame wâ hmá hlu, me laba hnyibú, me me khana a ne hia but Iehova ohnahicá hnen hna vheno, ame ne ba. 22 Ke a um dö ic je kamela, haba at ame hom otu gol haf sekel ihmakiny me li waen gol hobi káu li hnyamen a libenyita ta sekel ihmakiny ; 23 me haingen, ka habe, U nöku ia? bethe thumetu nya. Hawa e hu hna mokut hobi köhmun hnyi hnyaban kámám? 24 Me haingen, ka habe, Inya nöku Bethuela, a nöku Mileka, waleji e ame hnoköá nöku Nahora. 25 Me haingen minya káu, ka habe, E hu thatúnyin hwit me an meno unyihmun, me hna mokut minya. 26 Ke haba at e ame nom ju me ogánö Iehova. 27 Ke haingen, ka habe, E so adre me haisoi Iehova, Khongu Aberahama a tuhök, at ame ca hota degecé anyin ibetengiö me hnathu ka tuhök : ke haba inya, me a hia but Iehova su nya hnyi getheniny hnyaban liamekeiny me tuhök. 28 Ke haba hlu ame wadring me thumeto lap anyin hinyen ge ta je únyi e. 29 Ke e hu hani Rebeka, Labana ien : me Labana ame wadring ka at ka hnyi an. 30 Ke e ame wâ otu, me li waen hnyi hnyamen haniny, k' ame löng ut ho Rebeka a haniny, ka habe, Ame ha heláe kõnya at ; me e ame o ka at ; ke wâ bi e ame tot unyin je kamela hnyi an. 31 Me e ame ha, ka habe, Hna ohnahicá hnö Iehova lö, didrö ; ieú gam u me tot eú? anyin oge hia but ányáwia uma, me hna mokut hobi káu je kamela. 32 Me haba at, e ame didrö ka hnyin uma, ke e ame thang je

## GENESE 24.

töiny je kamela ; ke e ame ham thatûnyin öwit me an je kamela, me utköiö hnân östûa li can me je li cadrin hanen anyin bunyen. 33 Ke adre me ip jeû hnyi hnyimakan : ke haingen kâu, ka habe, Oge me ca he ka me han, ke oge me he ka me ha can hna kunö nya jem. Me haingen, ka habe, Ha thö. 34 Ke e ame ha, ka habe, Inya athnyabai Aberahama. 35 Ke a hia but Iehova ohnahicâ gâná tuhök ; ke gan hmâ e : ke e ame hia but ham kâu ta je hnahat mamoe, me kau, me sileva, me gol, me je lathnyabainy obaga me omomo, me je kamela, me je asina. 36 Ke haba Sara âiân tuhök e ame hnokoâ nokon tuhök a бага, ke somaca but : ke a hia but ham kâu anyin ta je ûnyi hia. 37 Ke tuhök ame kunö nya ka khemanyin, ka habe, U me ca he ka hok âiân nôkuk ûnyi hnyi je hlu lakon at Kanana, hnyei oge me laba hnyin : 38 ke u ma he ka hnyi hnyabacica, me anyik lap, me hok âiân nôkuk. 39 Ke oge me ha ka tuhök, ka habe, Ame ne ca hmehmela hlu ka he hotuk. 40 Me haingen kõnya, ka habe, Ame he Iehova, wale oge me he hnyi hnyimakan, ka kunâ anyin angela ka tha e möu, me ohnahicâ ûhem ; ke u ma he ka hok âiân nokuk ûnyi hnyi anyik lap, me hnyabacica : 41 waleling m' u me he ka gufa hnyi hnâm hna khemanyin kõnya, u ka o ka anyik lap ; ke ödrin e ne ca ham kôu hlu, me u me he ka gufa hnyi hnâm hna khemanyin kõnya. 42 Ke oge me o but eja ka hnyi an, me oge me ha, ka habe, Iehova lö, Khongu Aberahama a tuhök, u je ne he ka ohnahicâ hnök hna vhenö : 43 wâ bi, oge me he ka tot hnyi an ; ke so ame he ka e bi, a haba hlu ame he jem ka se köiö, at oge me he ka ha kâu, ka habe, Ö u habelik ge ke ong utköiö ; 44 k' ame he ka ha kõnya, ka habe, Ic dö, ke oge me he minya ka se köiö hobi kâu halem je kamela : e so e hlu ame úca Iehova hobi kâu nokon tuhök. 45 Ke iny tiga ca um do ha hofuc e eû hnyi hnyekuk, wâ bi, Rebeka ame o me kaia hon bajebenyin ; ke e ame utut ka hnyi an ka sâû : ke oge me ha kâu, ka habe, Ö u habelik. 46 Me e ame logötö hna but kaia ûnyi hon bajebenyin, me ha, ka habe, Ic dö, ke oge ma he minya ka habelen halem je kamela : me oge me ic, ke e ame habelen minya je kamela. 47 Ke oge me hnö e, ka habe, Nöku ia u ? Ke haingen, ka habe, Nöku Bethuela, a nöku Nahora, wale Mileka

ame hnokoâ me nokon : me oge me ip otu hnyi hnyimakan, me li waen hnyi li hnyamen. 48 Me oge me nom ju, me khudrung kö Iehova, me oganö Iehova, Khongu Aberahama a tuhök, waleji at ame hum nya hnyi gethen ae wisa he ka hom hlu nokon liamekeiny me tuhök hobi kâu nokon. 49 Ke walang ang, öbun e ne he ka betenge me hnathu ka tuhök, thumetu nya thö : ke a ne ba, thumetu nya thö ; me oge me he bi nya ka saû ka hnyi ke keihen metâ, ame ne ke keihen me. 50 Me ame thu Labana me Bethuela, ka habe, Unyi ga Iehova ûnyi eang : e ca khan' öhmu he ka ha kôu kong me so. 51 Wâ bi, wale Rebeka hnyi hnyimákâm, hom dö, me tha he thö mē, me e ame he ka âiân nokon tuhâm, helâ me hna ha hnö Iehova. 52 Ke a löng ut hodru hnen athnyabai Aberahama, me e ame nom ju hnyikânâi kö Iehova. 53 Ke haba athnyaba ame hom ta je omjeû a sileva, me je omjeû a gol, me je úkhaû, me ham kö Rebeka : e ame ham minya ta je ûnyi ae ûnyi hnathu hmönyin ka haniny, me hinyen. 54 Me ödrin e han me ic, e me tavat unyin, me mokut eling ; ke ödrin e hmak dö hnyi hnyomakatu, me e ame ha, ka habe, Hnö nya but ka tuhök. 55 Ke haingen haniny me hinyen, ka habe, E so e me tha laba thibi möhmun hlu hnyi ke je bong, ame ne libenyita ; hwaban e, e ame he ka he. 56 Ke haingen ködru, ka habe, Ca ovheli nya, anyin a hia but Iehova ohnahicâ anyik he ; hnö nya but m' inye ka hmetu ka tuhök. 57 Ke haingödrü, ka habe, Öhmu me he ka hawâ hlu me hnö weny. 58 Me ödru me hawo Rebeka, me ha kâu, ka habe, Hawa, u me he ka tha he me at ang ? Me haingen, ka habe, Oge ma hnyi he. 59 Me ödrin e hnö Rebeka but a hanidrin, me momo at a hat e, me athnyabai Aberahama, me tavat unyin. 60 Me ödrin e ha hnahici Rebeka, me ha kâu, ka habe, Hanihmun lö, e so u ma he ka hinyen ta je thauzan me je libenyita ta je thauzan, ke so ame he je mâtrânâm ka laba hnyi ta je homagöuleny tavat adre me hûkoti ödra. 61 Ke ame todrö Rebeka, me je hluiny a je hlu, ke ödrin e tabâ je kamela, me he hoton at : k' ame hum Rebeka hnen athnyaba me he but. 62 Ke haba Isaaka ame he hnyi gethen ûheny Bere-lahai-roi ; anyin a e ame laba hnyi hnyei ka hnyi Whaiöu. 63 Ke Isaaka ame he but hnyi sahac ka hnyi utkânâ



GENESE 25.

hnân he ka ûnykûme : ke e ame bwele me wâ, ke wâ bi ame he jem je kamela. 64 Ke Rebeka ame bwele me o Isaaka, me e ame utut ûnyi hon kamela. 65 Anyin a e ame ha ka athnyaba, ka habe, Ia at e ame he hnyi utkânâ he ka ûkhanö mötin ? K' ame thu hnen athnyaba, ka habe, Tuhök 'ling : me e ame hom mano hnân tubi, me tube e bi. 66 Ke athnyaba ame aú gaga kö Isaaka ta je ûnyi hia e ame ânyâ. 67 Ke Isaaka ame su e ka hnyi uma mano umö Sara a hinyen, me hum Rebeka, me me âiân ; ke e ame betenge gan : ke Isaaka ame hnyibû ju hwaban imekiny hinyen.

HNYIMAKAN 25.

**K**E haba Aberahama ame hok âiân hmetu Ketura ien. 2 Ke e ame hnokô nokon jia Zimeran, me Jokesana, me Medana, me Midiana, me Isebak, me Sua. 3 Ke Jokesana ame hnöku Sheba, me Dedana. Ke walang je laku Dedana, jia Asurim, me Letusim, me Leumim. 4 Ke haba je laku Midiana, me Efa, me Efera, me Enoka, me Abida, me Eledaa. Je laku Ketura ödrin hia. 5 Ke Aberahama ame ham kö Isaaka anyin ta je ûnyi hia. 6 Ke Aberahama ame ham ta je bwihlany ka lakon li momo anyi Aberahama ; me kun' ödrin ka hnyi hnyei e deiö, me me ûsâkâüö me Isaaka a nokon, ke e tiga möt. 7 Ke walang je bongon ta je hunainy möt anyi Aberahama, khaca haded ke sevente faiv ta je huna. 8 Ke Aberahama ame khüö homenâ, me mokcu ke ti hingat ut, me se hia hunainy ; k' adre öûkhacaköüâ me lahanen. 9 Ke haba Isaaka me Isamaela ödrü me konâm e hnyi op e Makepela, hnyi utkânâ anyi Eferona nöku Zohara at Heth, cicö Mamere ; 10 waleji utkânâ a ûco Aberahama unyin lakon Heth : adre könim Aberahama eling unyi Sara a âiân. 11 Ke hwaban dö mok a Aberahama Khong ame ohnahici Isaaka a nokon ; ke Isaaka ame laba e Bere-lahai-roi.

12 Ke walang ta je dö anyi Isamaela nöku Aberahama, waleji ame hnokô nöku Aberahama hnö Hagara momo Aigupito, blu anyi Sara : 13 ke walang ien je laku Isamaela, a je iödrin hoton anyidrin je dö : jia Nebaioth, nöku Isamaela a bán ; me Kedara, me Adebeela, me Mibesam, 14 me Misema, me Duma, me Masa ; 15 me Hadara, me Tema, me Jetura, me Nafiso, me Kedema : 16 wale je laku Isamaela, ke

wale je iödrin hoton anyidrin je ong taun, me anyidrin je hnabâ ; ödrin je than a twelv hoton idrin je hnyei. 17 Ke walang ta je hunainy möt anyi Isamaela, khaca haded ke thöte seven ta je hunainy ; ke e ame khüö homenâ me mokcu, k' adre öûkhacaköüâ me lahanen. 18 Ke ödrin e labâ hwân hnyi Havila ke ne o but hnyi Sura, cicö Aigupito, gethen ka he Suria ai : e ame laba hnyi hnyimakan je liamekeiny më hia thithö.

19 Ke walang je dö anyi Isaaka a nöku Aberahama : Aberahama ame hnöku Isaaka : 20 ke fâte ta je hunai Isaaka e ame hum Rebeka nöku Bethuel at Suria, a at Padana-rama, hani Labana at Suria, me me âiân bi. 21 Ke Isaaka ame khawéâ âiân kö Iehova, anyin ae toûnyi e : ke Iehova ame löng kâu, me ame erkin dut Rebeka a âiân. 22 Ke ame ve hwiö lihúnye eú hnyi hnyekon ; ke haingen, ka habe, Ieú ang a oge me helâng ? Me e ame he but ka hnei Iehova. 23 Me Iehova ame ha kâü, ka habe,

Lo li dökhu eú hnyi hnyekom,

Ke u me he ka hnokô lo li hnyei :

K' ame he ke hnyei ka hwege hon ke hnyei ;

K' ame he atö ka bi athnyabainy wa-keiat.

24 Ke ame o but ûen he ka hnokô, me wâ bi lihúnye eú hnyi hnyekon. 25 Ke haba at ame bán ka o ame dra, helâ me ûkhaü ae tot dinen hia thithö ; ke ödrin e hwenyi ien, me, Esau. 26 Ke hwaban dö e ame o but minya keiny, ke hnyamen ame kât ohmâiny ca Esau ; ke adre me hwenyi ien Jakob : ke sikste hunai Isaaka hnyi ioi 'dru. 27 Ke ame húhúö thö lida : ke ti metâ but Esau he ka hnu meno, e aten hnyot ; ke haba Jakob, me, at ae menyik k' ame laba hnyi je uma mano. 28 Ke Isaaka ame betenge ga Esau, anyin a e ame han utiö gan : ke Rebeka ame betenge ga Jakob. 29 Ke Jakob ame öt an : ke Esau ame o but úheny hnyot, k' a sényin dut : 30 me haingö Esau kö Jakob, ka habe, Haök ge tap ûnyi e ae dra ; anyin a oge sényin dut : waleling m' adre me hwenyi ien Edoma. 31 Me haingö Jakob, ka habe, Awe, úco thö könnya hanymen atö hnyi bong ang. 32 Me haingö Esau, ka habe, Wâ bi, oge me he but ang ka mok, ke hnân eú könnya hanymen atö ? 33 Ke haingö Jakob, ka habe, Khemanyin thö könnya hnyi bong ang ; me e ame khemanyin kâu : me e ame

GENESE 26.

üco kö Jakob hanymen a atö. 34 Ke Jakob ame ham kö Esau areto me je lentil adre ölä; me e amehan me ic, me tot ka he but: ke waleling Esau ame hükötiä hanymen atö.

HNHYIMAKAN 26.

**H**E hmiä thö hnyei, ke ke hmiä ehac hnyi bong bongu Aberahama. Ke Isaaka ame he Gerara ai kö Abimeleke thaniny at Filisiti. 2 Ke Iehova ame manen dut kâu, me ha, ka habe, Ca he Aigupito ai; laba ju hnyi hnyei oge me he ka ha köu: 3 u ma laba kanyua hnyi hnyei eling, ke oge me he ka tha e möu, me ohnahici u; anyin oge me he ka ham köu me ta je mâtânâm ta je hnyei hia eang, me oge me he ka ohwädâ hnök hna úhihinyköu kö Aberahama a kâmâm; 4 ke oge me he ka osiä ta je mâtânâm helä me ta je okhúinydrany, me ham ta je hnyei hia thithö ang ka ta je mâtânâm; ke adre me he ka ohnahicä ta je hnyei hia eang hmelen únyi ge ta je mâtânâm; 5 anyin a löng hoton hok hofuc Aberahama, me tuö hnök hna otilä, me hna hûna, me hna owisa, me anyik ta je hnanyibu. 6 Ke Isaaka ame laba hnyi Gerara: 7 ke haba aten hnyei adre me hnö e ge áiân; ke haingen, ka habe, Hanik at ang: anyin a e ot ka ha, ka habe, Öök ang; haingen wä e nye he aten hnyei ka hlingö nya but ca Rebeka, anyin ae so hmainy at ka wä. 8 Ke e ame laba beú eling, me ame bwele únyi hnyi mamalama hnö Abimeleke thaniny at Filisiti me wä, ke wä bi, Isaaka ame walak me Rebeka a áiân. 9 Me Abimeleke ame haö Isaaka, me ha, ka habe, Wä bi, e hnathu a áiâm at ang: ke ieu gam a u me ha, ka habe, Hanik at ang? Me Isaaka ame ha kâu, ka habe, Anyin a haingök, Wä inye mokcu can e. 10 Ke Abimeleke ame ha, ka habe, Ieu e u je ányä köhmun? A ne tha laba thö ke at me áiâm, me u je bi jönhmun. 11 Me Abimeleke ame hûna ka tavat hia, ka habe, Haba at ame he ka kälä at eang me áiân, adre me he ka hlingä e. 12 Ke Isaaka ame belök hnyi hnyei e, me meno a khaca haded troban hnyi hunae: ke Iehova ame ohnahicä e. 13 Me ame lung tot at eling, me labö gan tot ke ne o but ame ti gan hma hmönyin: 14 ke e huan ta je hnahat mamoe, me ta je kau, me je lanyin a ödrin se hia: ke at Filisiti adre me hmönyidra kâu. 15 Ke haba at Filisiti

adre hia but hlöng me öunöngötä ge kânä ta je an hia a kou hnen lanyin kamen, hnyi üö Aberahama a kamen. 16 Ke Abimeleke ame ha kö Isaaka, ka habe, He thö gahmun, anyin a u gan hmä hmönyin huan. 17 Me Isaaka ame he but úheny e, me laba hnyi hnyigöulen bucen Gerara, me labä e. 18 Ke Isaaka ame äc hmeto ta je an adre kou hnyi üö Aberahama a kamen; anyin a hia but hlöng e hnen at Filisiti hwaban mok a Aberahama: ke e ame ve hwenyi ien hoton je ien hnen kamen hna hwenyi ien. 19 Ke haba je lanyin Isaaka adre me kou hnyi hnyigöulen bucen, me wä eling köiö ame pupua. 20 Ke haba je hnyat tuö meno e Gerara ödrin e iwatretra me hnyat tuö meno hale Isaaka, me ha, ka habe, Anihmun an eu: me e ame hwenyi ien an e Esek; anyin a ödrin e iwatretra me. 21 Ke ödrin e kou hmetu ke an, me ödrin e iwatretra hmetu e: me e ame hwenyi ien e Sitena. 22 Ke e ame hna but dok e, me kou ke an; ke ödrin e ca iwatretra e: me e ame hwenyi ien e Rehoboth; anyin a haingen, ka habe, A hia but Iehova bi hnötin walang ang, k' ötin e he ka si but hnyi hnyei. 23 Ke e ame he thö úheny e Bere-seba ai. 24 Ke Iehova ame manen dut kâu hnyi hnyinghet eling, me ha, ka habe, Inya Khongu Aberahama a kâmâm: ca ot, anyin a tha inya möu, ke oge me he ka ohnahici u, me osehia ta je mâtânâm can athnyabaik a Aberahama. 25 Ke e ame otilä eling ke taben hut, me hawä iö Iehova, me otilä eling umen uma mano: me je lanyin Isaaka ödrin e khü an hnyi dok eling. 26 Ke ame he but kâu úheny Gerara Abimeleke, me Ahuzatha a hanen, me Fikolo taben anyin je deö vat. 27 Ke Isaaka ame ha ködrin ka habe, Ieu can öbun e he but könya, anyin öbun e hükötiö nya, k' öbun e hia but öbö nya? 28 Ke haingödrin, ka habe, Öhmun e wä wia thö a tha Iehova möu; me haingöhmun, ka habe, Ötin e he ka ve khemanyin, a öhmun möu, ke öhmun e he ka úhihinyköu möu; 29 ka habe, U ma ca he ka okongu öhmun, heläji me hnöhmun hna ca kalö u, ke so bi öhmun e hia but ányä thibi so köu, me kunö u hnyi úsoköu: waleling m' u hnabic walang ang hnö Iehova. 30 Ke e ame ányä bijeu hobi ködrin, me ödrin e tha han me ic. 31 Ke ödrin e vesákong me úkhemanyidrinköu: ke Isaaka ame kun' ödrin, me ödrin e he but úhedrin unyin hnyi úsoköu. 32 Ke hnyi bong eling ame o thö lanyin Isaaka,

GENESE 27.

me thumeto e ge an ödrin e kou, me ha kâu, ka habe, Öhmun e wâ ju köiö. 33 Me e ame hwenyi ien e Seba: waleling me me ien taun eling Bere-seba ke ne o but hnyi bong ang.

34 Ke fâte hunai Esau, me e ame hum Juditha nöku Beerri at Heth, me Basemathi nöku Elona at Heth me li áiân: 35 me ame vec hnyeku Isaaka me Rebeka gadru.

HNYIMAKAN 27.

**K**E hingat ut Isaaka me hadedak li emakan, me me ca khana he ka wâ, me e ame hao Esau a nokon a atö, me ha kâu, ka habe, Nökuk lö: me haingen kâu, ka habe, Inya ang. 2 Ke haingen, ka habe, Wâ bi, iny hingat ut, ke ca khanö nya bong oge me he ka mokcu hnyin. 3 Anyin a wale he thö walang ang ka hom ányâm ta je únyi hnân hlingâ meno, a ányâm thi fana me cafana, ke he thö ka hnyi hnyot ka uö ök meno; 4 ke ányâ thö hobi könya utiö ae bo so helâ me wek, me hom but könya, me oge me he ka han; me me he hanuk ka hahnahici u inye tiga ca mok. 5 Ke Rebeka ame löng hna ha hnö Isaaka kö Esau a nokon. Ke Esau ame he but ka hnyi hnyot ka uö meno, me he ka hom. 6 Ke Rebeka ame ha kö Jakob a nokon, ka habe, Wâ bi, oge löng ut hna ha hnen kâmâm kö Esau a tuhâm, ka habe, 7 Ho jem meno könya, ke anyâ thö hobi könya utiö ae bo so, m' inye he ka han me hahnahici u hnyi hnyimakö Iehova, k' inye tiga ca mok. 8 Anyin a wale nokuk lö, löng ju hoton hok hofuc, helâ me hnök hna he ka hûna köu. 9 He thö ka hnyi hnahat meno, me hom but jem lo li lakon got ae so; ke oge me he ka ányâ e hnân utiö ae bo so hobi kâu kâmâm helâ me hnen hna weny: 10 ke u ma he ka hom e ka kâmâm, me me he ka han, me me he but ka hahnahici u e me tiga ca mokcu. 11 Ke Jakob ame ha kö Rebeka a hinyen, ka habe, Wâ bi, at ae kú leúnen Esau, k' inya at khabalâú unyik. 12 Ame ne he la cica ka abö nya, me iny at ae thoi kâu; waleling m' oge me he ka oâ hnaúhangö könya, ke ba bi hnahicik. 13 Ke haingen hinyen kâu, ka habe, e so ame takú nya bi hna hangö u nöku: ke löng ju hoton hok hofuc, ke he thö ka hom könya. 14 Ke e ame he but ka hom, me hom ka hinyen: ke hinyen ame ányâ utiö ao bo so, helâ me weny kamen. 15 Ke Rebeka ame hom je úkhaú

ae so anyi Esau nokon a atö, eiö hnyin uma, me okhaúö Jakob nokon a wakeiat: 16 ke e ame lan li hnyamen, me hon nyin ae khabalâú hnen ke hnyiban unen li lakon got: 17 ke e ame ham utiö ae bo so, me areto e ame penapena ka hnyi li hnyamö Jakob a nokon. 18 Me e ame o ka kamen, me ha, ka habe, Cica lö: me haingen, ka habe, Iny ang nöku, u ia? 19 Me haingö Jakob ka kamen, ka habe, Inya Esau nokom a atö; oge hia but ányâ helâ me hnâm hna hûna könya: höhöi thö, me laba thö he ka han hanik, m' u ma he ka hahnahici nya. 20 Ke haingö Isaaka ka nokon, ka habe, Nökuk a hawa u je ie wâ? Me haingen, ka habe, Anyin a hnö Iehova Khongom hna ohwegi nya. 21 Me haingö Isaaka kö Jakob, ka habe, Nökuk lö me hok ju jem m' inye he ka abö u, ame ne Esau u nöku, ame ne ia. 22 Ke Jakob ame hakekeny dö kö Isaaka a kamen, ke e ame aba ju e, me ha, ka habe, Haba hwan me ho Jakob, ke haba li hnyam, a li hnyamö Esau bi. 23 Ke ca manen e kâu, anyin ae kú leúnen li hnyamen, helâ me li hnyamö Esau a tuhan: me e ame hahnahicâ e. 24 Ke e ame ha, ka habe, E hnathu u Esau a nöku? Me haingen, ka habe, E. 25 Ke haingen, ka habe, Hö jem könya, m' inye he ka han hanem nöku, m' inye he ka hahnahici u. Me e ame hom kâu, me e ame han: ke e ame hom waina, me e ame ic. 26 Ke Isaaka a kamen ame ha kâu, ka habe, Nökuk lö, hok ju jem könya, me úcimhnyimak mönya. 27 Me e ame hakekeny, me úcimhnyimak mē: me e ame hnulâ bunen úkhaúen, me hahnahicâ e, me ha, ka habe,

Wâ bi, haba bunen nöku,

Me helâ me bunen utkânâ hnö Iehova hna hahnahicâ:

28 Ke ame he Khong ka ham köu hau únyi hnyi drany,

Me pipikhenyainy hmeledrany,

Me hwit me waina ae gan hmâ:

29 E so ame he tavat ka hulwa köu,

Me ta je hnyei he ka nom ju köu:

U me he ka thaniny je liamekeiny möu,

Ke ame he je lakon hinyâm ka nom ju köu:

Ame he ka hangâ but at ame hangö u,

K' ame he ka hnahic ut at ame hahnahici u.

30 Ke a hia but Isaaka hahnahici Jakob, ke Jakob ame hap didrut unyi Isaaka a

GENESE 28.

kamen, me waleling ame ie o but Esau a tuhan úheny hnyi hna uö meno. 31 Ke a hia but ányâ utiö ae bo so minya, me hom e ka kamen ; me e ame ha ka kamen, ka habe, Cica lö, höhöi thö, me han hanik, me u ma he ka hahnahici nya. 32 Ke haingö Isaaka a kamen, ka habe, U ia? Me e ame ha, ka habe, Inya Esau nokom a bán. 33 Ke Isaaka ame öbubuny gan hmâ but, me ha, ka habe, Ie at wale a hia but uö meno me oâ könya, ke oge hia but han ke tiga hiö u, me oge hia but hahnahicâ e? eke, k' ame he balua but e ka hnahic. 34 Ke a löng ut Esau hofuc hwan kamen, me e ame tenge gan hmâ hmönyin, me haingen ka kamen, ka habe, Cica lö, hahnahici nya minya thö walö nya eang. 35 Ke haingen, ka habe, A mwi ang kem ka iyawö, me a hia but hom ányâm hnahic. 36 Ke haingen, ka habe, Hawa, e ca úcú hnödra hna hwenyi ien me Jakob? anyin a olo but obö nya : e ame bán ka hügúnâ anyik atö ; ke wâ bi, walang ang a hia but hügúnâ hnahicik. Me e ame ha, ka habe, Hawa, e ba ke hnahic u je ip hobi könya minya? 37 Ke Isaaka ame thu me ha kö Esau, ka habe, Wâ bi, oge hia but otilâ me hnân tuhâm, me oge hia but ham kâu je liamekeiny hia mē me lanyin ; ke oge hat e ge hwit me waina : ke ie únyi oge ma ányâ köu nöku? 38 Ke haingö Esau ka kamen, ka habe, Cica lö, hawa khaca thibi hnahic unyâm? Hahnahici nya minya thö, walö nya ang. Ke Esau ame tenge hwege göranyai. 39 Me Isaaka a kamen ame thu kâu, me ha, ka habe,

Wâ bi, ame he ka e hnyabam hnyi kânâ ae pipikhenya,

Me hau únyi hnyi drany ethö ;

40 Ke u me he ka möt hnen ányâm hele vat, ke u ma he ka bi athnyabainy kem ;

Ke haba hnyi úen u ka he ka hon,

Me u ma he ka hota degecâ únyi hon nyem hnen hna ohmâ.

41 Ke Esau ame húkötö ga Jakob, can hnahic a ham kâu kamen : ke haingö Esau eú hnyi hnyekon, ka habe, E hakekeny jut úen ka hnyamoki Cica, me oge me he ka hlingö Jakob a keik. 42 Ke adre me thumetu Rebeka ge hofuc ho Esau nokon a bán ; me e ame úkhúnöng ka hao Jakob nokon a wakeiat, me haingen kâu, ka habe, Wâ bi, Esau a tuhâm ame ip hnâm he ka hlingö u. 43 Anyin a wale nöku lö, löng ju hoton hok hofuc, me todrö, kec dö Karan

ai kö Labana a hanik ; 44 me tha laba mē hnyi ke je bong, ke ne o but ame aú but hmönyin anyin tuham ; 45 ke ne o but ame ame hwiö but hna hmönyini u hnen tuhâm, me ame hnying ut hnâm hna ányâ kâu : ke hamök he ka úkhúnöng ka hao u úheny e : hnân eú ka tha hi' öbu gak hnyi bong a khaca?

46 Ke haingö Rebeka kö Isaaka, ka habe, E hmak ut hnyekuk can li momo Heth : a ne he Jakob ka hok áiân únyi hnyi je lakon Heth a je hlu, helâ mödrü li momoiny hnyei, hnân eú hmetu möt könya?

HNYIMAKAN 28.

**K**E Isaaka ame hao Jakob, me hahnahicâ e, me húna kâu, me ha kâu, ka habe, U ma ca he ka hok momo únyi hnyi je hluiny hnyei Kanana. 2 Todrö, he thö Padanarama ai, ka hnyi hnyaba Bethuela, kamen hinyâm ; me hok áiâm ju únyi e unyin je laku Labana a je hlu, a mahinyâm. 3 Ke e so ame he Khong Ataekhanahia he ka ohnahici u, me odedu u, me osi u, me me se hia em je hnyei ; 4 me ham köu hna hahnahici Aberahama, köu, me ka ta je mátránâm ; m' u ma he ka hu bi hnyei u me laba kanyua hnyin, waleji hnen Khong hna ham kö Aberahama. 5 Ke Isaaka ame kunö Jakob : me e ame he Padanarama ai kö Labana, nöku Bethuela, at Suria, hani Rebeka, hinyö Jakob me Esau. 6 Ke ame wâ Esau a ga um but Isaaka hahnahici Jakob, me kunâ e Padanarama ai, he ka hok áiân únyi e ; ke ame hahnahicâ e, me húna kâu, ka habe, U ma ca he ka hok momo únyi hnyi je hluiny hnyei Kanana ; 7 k' ame wâ a g' ame löng hoton kamen me hinyen hnö Jakob, me he Padanarama ai : 8 ke a wâ Esau a g' ame húkotiâ hnö Isaaka a kamen ta je hluiny hnyei Kanana ; 9 me Esau ame he kö Isamaela, me hum Maalatha me hanen láiân, wale hlu nöku Isamaela, a nöku Aberahama, hani Nebaioth, me me áiân.

10 Ke Jakob ame hna but Bere-seba, me he Karan ai. 11 Ke e ame o but hnyi ke dok, me e ame mokut ju eling, anyin a didrut seúnö ; ke e ame hom ke veto hnyi dok eling me hnân hunen, ke e ame mokut hnyi dok e. 12 Ke e ame bwi, me wâ bi ke wacúat adre otilâ hon kânâ, k' ame kâlâ thö ethö drany ke hnyiban e : ke wâ bi ame ölö me utut hnyin ta je angela anyin

Khong. 13 Ke wâ bi, ame tot Iehova ethô hon e, me ha, ka habe, Inya Iehova, Khongu Aberahama a kâmâm, me Khongu Isaaka : haba kânâ u me mokut hnyin, oge me he ka ham e köu, me je mâtrânâm ; 14 ke ame he ta je mâtrânâm ka helâ me sesâiny kânâ, ke u ma he ka lau jio, me deiö, me hwadrö, me hwaiöu : k' ame he ka hnahic ta je hnyei hia eang hmeledrany únyi gam me únyi ge ta je mâtrânâm. 15 Ke wâ bi, tha inya möu, ke oge me he ka tuö u hnyi je hnyei hia u je he ka hnyin, me ohmetu u ka hnyi hnyei eang : anyin oge ma ca he ka hnö u ke ne o but oge hia but ányâ hnök hna ha köu. 16 Ke Jakob ame hmak dö úheny hnyi hna mokut, me e ame ha, ka habe, E hnathu Iehova hnyi dok ang ; ke ca khanö nya but. 17 Ke e ame ot, me ha, ka habe, Hnân outen dok eang, haba dok ang me wale thibi e uma umen Khong, me homagöuleny drany. 18 Ke Jakob ame vesâkong me hom veto e ame hunâ, me otilâ e hnân haten, me hú hon ge wakaco. 19 Ke e ame hwenyi ien dok e, me, Bethela : ke Luza ien hnyei e a bân. 20 Ke Jakob ame hip' khöbi, me ha, ka habe, Ame ne he Khong ka tha e mönya, me tuö nya hnyi gethen ang oge me vheno, me haök, me ha khauk, 21 m' oge me he ka o hmetu ka hnyi hnyaba cica hnyi hnahic, awe, Iehova but Khonguk, 22 ke haba veto eang, wale oge otilâ hnân haten, ame he ka hnen uma umen Khong : ke únyi hnyi ta je únyi hia u ma he ka ham könya, e hnathu oge me he ka ham hmetu köu je ke keihen a libenyitainy.

HNHYIMAKAN 29.

**K**E Jakob ame vheno deny me o ka aten hnyei e deiö. 2 Ke e ame bwele me wâ bi ke hna khú an hnyi hnyei, ke wâ bi kun ta hnahat mamoe ame mokut eling ; anyin adre me labö habelen ta je mamoe hnyi an eling ; ke gan hmâ veto hlinginy an. 3 Ke adre me labö úkhacaköuâ kâ e ta je mamoe hia : ke adre me tetebulo veto únyi hnyi hnyimen an, me söu belen ta je mamoe, me hlöng hmeto an hnen veto. 4 Me haingö Jakob ködrin, ka habe, Hnyat me lakeiny mönya lö, öbun e mwi ua? Haingödrin, ka habe, Öhmun je aten hnyei Karan. 5 Me e ame ha ködrin, ka habe, Hawa, e khan' öbun Labana nöku Nahora? Haingödrin, E khan' öhmun. 6 Me e ame ha ködrin, ka habe, Hawa,

ame sot e? Haingödrin, ka habe, e ame sot : ke wâ bi Rakela nokon hlu ame he jem me ta je mamoe. 7 Me haingen, ka habe, Wâ bi, e tiga jebigö, ke tiga ca ün he ka úkhacaköuâ ta je meno : he th' öbun ka söu belen ta je mamoe, me he thö ka hân. 8 Ke ödrin e ha, ka habe, E ca khan' öhmun, e so bân ka úkhacaköuâ ta je hnahat hia, m' adre me he ka tetebulo veto únyi hnyi hnyimen an, me waleling öhmun e he ka söu belen ta je mamoe. 9 Ke e ame tiga úhnenamö mödrin, me ame o thö Rakela me ta je mamoe haleny kamen ; anyin a e at ame tuö. 10 Ke hnyi ün Jakob ame ö Rakela nöku Labana a mahinyen, me ta je mamoe hale Labana a mahinyen, me Jakob ame hakekeny me tetebulo veto únyi hnyi hnyimen an, me söu belen ta je mamoe hale Labana a mahinyen. 11 Ke Jakob ame úcimhnyimak me Rakela, me tenge hwege göranyai. 12 Ke Jakob ame thumetu Rakela a e utha ge kamen, ke nöku Rebeka e : ke ame wadring hlu me thumetoâ kamen. 13 Ke e ka löng Labana úthumetu ga Jakob a nokon haniny, me e ame wadring he ka iouny mä, me e ame delúâ e, me úcimhnyimak mä, me su e ka hnyi hnyaban. Ke e ame aú gaga kö Labana ta je únyi hia. 14 Ke haingö Labana kâu, ka habe, E hnathu u hanen jeiök, me hanen utiöik. Ke khaca tehi ödrü me tha laba hnyin. 15 Ke Labana ame ha kö Jakob, ka habe, Hawa, u ma huliwa gufa könya anyin a ötu liame-nakaúnyin? Ha thö könya hwabâm. 16 Ke lo laku Labana li hlu : haba ien atö, me, Lea, ke Rakela ien wakeiat. 17 Ke vhihne li emakö Lea ; ke khula údren makö Rakela, me so hmainty. 18 Ke Jakob ame weny Rakela, ke haingen, ka habe, Oge me he ka huliwa köu hnyi seven je huna hwabö Rakela nokom a wakeiat. 19 Ke haingö Labana, ka habe, E ti so könya he ka ham e köu hon hnök hna he ka ham ka ke at : tha laba ju mönya. 20 Me Jakob ame huliwa seven ta je huna hwabö Rakela ; ke helâke je bong ae wakhalet thibi kâu, can anyin betenge ka hlu. 21 Ke Jakob ame ha kö Labana, ka habe, Ham but könya öiök, anyin a um dö ta je bonguk, m' inye he ka tha laba mä. 22 Ke Labana ame úkhacaköuâ aten hnyei hia me bi jeú. 23 Ke haba hnyi hnyinghet e ame hum Lea bi a nokon, me su e kâu ; me ödrü me tha laba. 24 Ke Labana ame ham Zilepa a athnyabainy kö Lea a nokon me hnân

anyin hlu. 25 Ke wâ bi, hnyi hnyomakatu Lea bi eling : me e ame ha kö Labana, ka habe, Ieü e u je ânyâ könya ? hawa, oge ca huliwa köu hwabö Rakela ? ieü gam u je iyawö nya. 26 Ke haingö Labana kâu, ka habe, Ca hwakecin ihmun hnyei he ka ham bânâ wakeiat, ke biliny bi atö. 27 Oumo thö wikiny at ang, ke öhmun e he ka ham minya köu ke at, a hwaban huliwa u ma he ka ânyâ könya hnyi seven hmetu ta je huna. 28 Me Jakob ame ânyâ helâe, me oumo anyin wik : me e ame ham Rakela a nokon me hnân âiân. 29 Ke Labana ame ham Bila a athnyabainy kö Rakela a nokon, me hnân anyin hlu. 30 Ke e ame tha laba me Rakela minya, ke e ame betenge ga Rakela hu Lea, me e ame huliwa kâu hnyi seven hmetu ta je huna.

31 Ke Iehova ame wâ a g' adre me höciö Lea, me e ame ohnoko e : ke toünyi bi Rakela. 32 Ke Lea ame erkin dut me e ame hnokoâ da, me hwenyi ien Reubena : ke haingen, ka habe, Anyin a wâ but Iehova anyik vec ; k' ame he öiök ka betenge gak walang ang. 33 Ke e ame erkin hmetu, me e ame hnokoâ da, ke haingen, ka habe, Anyin a Iehova ame löng hna höciö nya, me e ame ham minya könya da eang : ke e ame hwenyi ien Simeona. 34 Ke e ame erkin hmetu, me e ame hnokoâ da ; me haingen, ka habe, Ame ne üen dut ang ame he öiök ka tha hnyok mönya, anyin oge hia but hnokoâ kun lakon ta бага : anyin a wale adre hwenyi ien Levi. 35 Ke e ame erkin hmetu, me e ame hnokoâ da : ke haingen, ka habe, Walang ang oge me he ka ogânö Iehova : anyin a wale e ame kwenyi ien Juda ; ke e ame mwi thö.

HNYIMAKAN 30.

**K**E a wâ but Rakela a g' ame ca hnöku nöku Jakob, me Rakela ame hmönyin ka tuhan, me ha kö Jakob, ka habe, Ha nöku ut, wâ inye mokcu. 2 Ke Jakob ame hmönyin kö Rakela, me haingen, ka habe, Hawa inya ang hnen Khong, waleji at ame behanö u ge ta je wanakat ? 3 Ke haingen, ka habe, Wâ bi anyik hlu jia Bila, hom ju e, ke e ame he ka hnokoâ hobi könya, me me hu nöku minya ünyi gan. 4 Me e ame ham kâu anyin hlu wale Bila hnân âiân : ke Jakob ame hom e. 5 Me Bila ame erkin dut, me e ame hnokoâ nöku Jakob a da. 6 Me haingö Rakela, ka habe, A hia but Khong owisa könya,

me löng hok hofuc, me ham könya nöku da : anyin a wale e ame hwenyi ien Dana. 7 Ke ame erkin hmetu Bila hlu anyi Rakela, me e ame hnokoâ nöku Jakob da a loiny. 8 Me haingö Rakela, ka habe, E gan hmâ but hnök hna üsöu me tuhök, ke oge hon dut : me e ame hwenyi ien Nafatali. 9 Ke a wâ but Lea a ga mwi thö, me e ame hum Zilepa a anyin hlu, me ham kö Jakob hnân âiân. 10 Me Zilepa hlu anyi Lea ame hnokoâ nöku Jakob a da. 11 Me haingö Lea, ka habe, A o but hnahic ! me e ame hwenyi ien Gada. 12 Ke Zilepa hlu anyi Lea ame hnokoâ nöku Jakob ke da a loiny. 13 Ke haingö Lea, ka habe, Oge senyin dut, anyin ame he ka hawo nya me senyin hnen ta je hlu : ke e ame hwenyi ien e Asera. 14 Ke ame he Reubena hnyi üen meno hwit, k' ame wâ ta je dudai hnyi utkânâ, me e ame hom but e kö Lea a hinyen. Ke haingö Rakela kö Lea, ka habe, Ö u haök ge je dudai anyin nokom. 15 Me haingen kâu, ha habe, Hawa, ünyi ae ühnyükong e, a u je hia but hügünâ öiök ? ke u me he minya ju ka hügünâ je dudai anyin nöku ? Ke haingö Rakela, ka habe, Anyin a wale e ame he ka tha e möu eâu hnyinghet hwaban je dudai anyin nokom. 16 Ke Jakob ame o but üheny hnyi hna belök hnyi sahac, k' ame he Lea ka iouny me, me ha, ka habe, U ma he ka tha e mönya ; anyin ae hnathu oge ücü u hwaban je dudai anyin nöku. Me e ame tha e me hnyi hnyinghet eling. 17 Ke Khong ame löng kö Lea, ke e ame erkin dut, me hnokoâ nöku Jakob бага a thabünginy. 18 Me haingö Lea, ka habe, A hia but Khong ham könya hwabök, anyin a oge ham anyik hlu ka öiök : ke e ame hwenyi ien Isakara. 19 Ke ame erkin hmetu but Lea me hnokoâ ke da a siksiny kö Jakob. 20 Ke haingö Lea, ka habe, Khong ame hia but ham könya tang omjeü ae so ; ame he öiök ka laba so mönya walang ang, anyin oge hia but hnokoâ lakon je бага a siks : ke e ame hwenyi ien e Zebulona. 21 Ke hwaban dö e, e ame hnokoâ in, me hwenyi ien Dina. 22 Ke Khong ame ünykümi Rakela, me Khong ame löng kâu me ohnokoâ e. 23 Me e ame erkin dut, k' ame hnokoâ da : me ha, ka habe, A hia but Khong hom hna haikongu nya : 24 ke e ame hwenyi ien Josefa, me ha, ka habe, E so Iehova ame ham minya ke da a nöku.

25 Ke a hia but Rakela hnöku Josefa, haba Jakob ame ha kö Labana, ka habe,

Hnö nya but, m' inye hmetu ka hnyi gak, me ik hnyei. 26 Hna but könya je laöiök me je lakuk, wale hwaban hnök hna huliwa köu, me hnö nya but : anyin ae khanö u huliwa waleji oge änyá köu. 27 Me haingö Labana kâu, ka habe, A ne hu änyâm ibetengiö könya, me halubahingen ju, anyin a oge me wâhmakhmetoâ a Iehova ame ohnahici nya gam. 28 Ke e ame ha, ka habe, Ha wia thö könya hwâbâm me oge me ke ka ham. 29 Me haingen kâu, ka habe, E khanö u hnök hna huliwa köu, me troban hnök hna tuö halem ta je meno. 30 Anyin ae wakhalet thibi gam ehac ke tiga hiö nya, k' ame si gan dut walang ang ; ke a hia but Iehova ohnahici u hnyi je deny hia waleji oge wia kâu : ke haba walang ang, oge me he ka penapena hobi kâu anyik lap kehö ? 31 Me haingen, ka habe, Oge me he ka ham ieú köu ? Ke haingö Jakob, ka habe, E ba únyi u me he ka ham könya : ke khaca thibi únyi u me he ka änyâ hobi könya, me oge me he hmetu ka hat me tuö änyâm je hnahat mamoe. 32 Haba hnyi bong ang, oge me he ka he hnyi waben halem ta je hnahat meno hia thithö, he ka ve ip ta je meno hia ae údenöny me sisit, me ta je meno ae hlit únyi hnyi ta je mamoe, me ta je údenöny me ta je sisit únyi hnyi ta je got : ke wale thibi e hwabök. 33 Ke ame he ka ohnathu nya nyiele hnen hwakecik ae wisa, u ka o but ka hnyi hwabök wale hnyi hnyimákâm : haba ta je got hia ae ca údenöny bi me sisit, me ta je mamoe ae ca hlit, adre wâ unyik, wale oge hia but venâu. 34 Me haingö Labana, ka habe, E so e he ka e hnâm hna ha. 35 Ke e ame ve ip hnyi bong eling ta je got бага adre sihnalimen me sisit, me ta je got momo hia ae údenöny me sisit, me ka hu hawen, me ta je mamoe ae hlit, me hn' ödrin ka je lakon бага ; 36 ke e ame úsákáúö me Jakob hnyi kun ta bong ka he : ke Jakob ame hat ta je hnahat hale Labana a hnen bi ju. 37 Ke Jakob ame hom ta je ong utö ae hat, libene, me luza, me aremoni ; me e ame bi hnalimen me me manen dok ae hau hnyi je ong utö. 38 Ke e ame ip je ong utö adre bi hnalimen hnyin je kumete taben belen je meno hnyi hnyimakan ta je hnahat ; ke ödrin e erkin ödrin ka o ka ic. 39 Ke ame erkin dut ta je hnahat cicö ta je ong utö, me je hnahat adre me hnokoâ but ta je meno ae hu hnalimen, me údenöny, me sisit. 40 Ke Jakob ame ve ip ta je lakon mamoe, me wia ta je

hnyimakan je hnahat ka hnyi ta je hnalimen, me ta je hlit hia hnyi hnahat hale Labana ; ke e ame ke ip haleny to je meno, k' ame ca tha hnen me ta je hnahat meno hale Labana. 41 Ke e ka he ka erkin ta je meno ae hwege, me Jakob ame ip ta je ong utö hnyi je kumete hnyi hnyimakan ta je hnahat, m' adre me he ka erkin hnyi ta je ong utö ; 42 ke ame ne mat ta je meno, e ame ca ip hmetu : waleling me me hale Labana je meno ae mat, ke hale Jakob bi je meno ae hwege. 43 Me ame ti tren gan hmâ thatúnyi hnen at e, ke ti se hia haleny ta je meno, me je lathnyabainy omomo me obaga, me je kamela me asina.

HNYIMAKAN 31.

**K**E e ame löng ta je hofuc hwan laku Labana ta бага, ka habe, A hom hia thö Jakob ta je únyi anyi cica ; ke únyi hnyi ta je únyi anyi cica e ame hom hmanenang eang. 2 Ke a wâ but Jakob hnyimakö Labana a ca helâ hmetu ehac kâu. 3 Ke Iehova ame ha kö Jakob, ka habe, He hmetu thö ka hnyi hnyei iny lakâmâm, me lahanâm ; me ame he ka tha hnya möu. 4 Ke Jakob ame úkhúnöng ka hao Rakela me Lea ka hnyi hnyei a e hnyin haleny ta je meno, 5 me haingen ködru, ka habe, Oge wâ but hnyimakan kamöbu a ca helâ hmetu ehac könya ; ke so bi a hia but tha e mönya Khongu cica. 6 Ke khan' öbu a oge hia but huliwa ka kamöbu hnyi hwegiök hia. 7 Ke a iyawö nya hnen kamöbu, me olibenyita wia hwabök ; ke Khong ame ca hna but kâu he ka okongu nya. 8 Ame ne ha, ka habe, Ame he ka hwâbâm ta je údenöny, me ame hnokoâ but ta je údenöny hnen ta je meno hia : ke ame ne ha, ka habe, Ame he ka hwâbâm ta je meno ae hu hnalimen, me ame knoböa but ta je meno ae hu hnalimen hnen ta je meno hia. 9 Waleling Khong ame hia but hügúnâ ta je meno haleny kamöbu, me ham bi könya. 10 Ke hnyi úen erkin a je meno, inya oge me bwele me wâ hnyi bwik, me wâ bi, ta je got бага hia ame takoú ta je meno ae hu hnalimen, me údenöny, me sisit. 11 Ke haba angela anyin Khong ame ha könya hnyi bwi, ka habe, Jakob lö : ke haingök, ka habe, Inya ang. 12 Ke e ame ha, ka habe, Bwele thö me wâ, a haba ta je got бага hia adre me takoú ta je meno ae hu hnalimen, me údenöny, me sisit : anyin a oge hia but wâ

hia hna ânyâ köu hnö Labana. 13 Inya Khongon Bethela, waleji u je ostâ haten hnyin, ke waleji u je bi khöbi könya hnyin : ke walang ang todrö me he úheny hnyi hneyi eang, ke hmetuhmetu thö ka hnyi hneyi adre hnöku u hnyin. 14 K' ame thu Rakela me Lea me ha, ka habe, Hawa e hu únyi hmetu me jekhöhmu hnyi hnyaban kamöhmu? 15 Hawa, e ame ca únykúmi öhmu a helâke li atkanyua kâu? anyin a e ame hia but úcú öhmu, me odilâ anyihmu mone. 16 Ke haba tang omjeú hia hnen Khong hna hûgúnâ únyi ge kamöhmu, me wale anyihmu ta je únyi, me lakuhmu : ke walang ang ânyâ thö ta je únyi hia a ha köu hnen Khong. 17 Ke Jakob ame tot me ip je lakon me laâiân hon je kamela ; 18 ke e ame hom but haleny ta je meno hia, me ta je onijeú hia ae hu gan, a ta je meno a huliwan, waleji e ame hu e Padan-arama, me me he kö Isaaka a kamen hnyi hneyi Kanana. 19 Ke Labana ame hia but he ka subâ leúnen haleny ta je mamoe : ke haba Rakela ame venâu thö ta je idola anyin kamen. 20 Ke Jakob ame kec duöng ga Labana at Suria, anyin a e ame ca thumetu a e ame he ka kec. 21 Waleling e ame kec me anyin ta je únyi hia ; ke e ame todrö me hanyâúú Wagewe, me hnyimakan ka hnyi bucen Gileada. 22 Ke hnyi bong a kuniny adre me thumetu Labana, ka habe, A kec ut Jakob. 23 Me e ame hom dö je liamekeiny mē, me wadring hotudrin seven je bong ; me e ame khöü ödrin hnyi bucen Gileada. 24 Ke Khong ame o but kö Labana at Suria hnyi bwi hnyi hnyinghet, me ha kâu, ka habe, Wâ eâu k' u he thö ka ha kö Jakob so me kong. 25 Ke Labana ame hom tilö Jakob. Ke a hia but Jakob otilâ umen uma mano hon bucen : ke haba Labana me je liamekeiny mē ödrin e laba hnyi bucen Gileada. 26 Ke haingö Labana kö Jakob, ka habe, Ieú u je ânyâ, u je kâcâ duöngâ gak lakuk li momo helâke adre hûgúnâ ge hele vat? 27 Ieú gam u je kec duöng me iyawö nya ; me ca úhüne mönya, m' inye he ka kunö u me senyin me khumöng me binybet me kitara ; 28 ke u je ca hna könya he ka úcimhnyimak me je laöbik me lakuk? u monu u je ânyâ helâe. 29 E hu manik man he ka okongu öbun : ke a ha könya hnen Khongon kamöbun et hnyinghet, ka habe, Wâ eâu, k' u he thö ka ha kö Jakob so me kong. 30 Ke walang ang e hwege

thö wem he ka he, anyin ae gan hmâ wem ka hnyi hnyaban kâmâm, ke ieú gam u je venâu je khonguk? 31 Ke Jakob ame thu me ha kö Labana, ka habe, Anyin iny ot : me haingök, ka habe, Wa u nye hûgúnâ hmeto thö gak lakom. 32 Ke haba at u me he ka wâ unyin ânyâm ta je khong, ame ca he ka möt : wâhmakhmeto ju hnyi hnyimakan je liamekeiny mötu ânyâm ta je únyi unyik, ke hom hmeto thö. Anyin ae ca khanö Jakob a ga venâu Rakela je únyi e. 33 Me Labana ame didrö ka hnyin uma mano umö Jakob, me uma mano umö Lea, me uma mano umen li athnyaba a li momo : k' ame ca wâ bi. Ke e ame didrut únyi hnyi uma mano umö Lea me didrö ka hnyi uma mano umö Rakela. 34 Ke haba Rakela ame hia but hom ta je idola me ikhâlâ hnyi je tap hnân tabâ kamela, me e ame laba ju hon. Ke Labana ame elâm igigilö hia hnyi uma mano, k' ame ca wâ bi. 35 Ke haingen ka kamen, ka habe. Ca he tuhok ka hmönyâm wale ae ca khanö nya köüü hnyi hnyimákâm anyin a oge me hom bongon omomo. Ke e ame beleú, k' ame ca wâ bala bi ta je idola. 36 Ke Jakob ame hmönyin me iwatretra me Labana : me haingö Jakob kö Labana, ka habe, Ieú hnök hna hanyâúú? ieú anyik monu m' u me wadring hotuk? 37 U je hia but elâm igigilö anyik ta je únyi, hawa e hu omjehem u je wâ? ip ut hnyi hnyimakan je liamekeiny mönya me je liamekeiny möu, ke hamödrin he ka owisa kötu. 38 Twente je hunaik unyâm ; ke e ca kölubabú halem ke nokon mamoe me got, k' oge ca han je mamoe бага hnyi hnahat halem. 39 Ke oge ca hom köu at adre usu kia ; ke oge bi hwaban bi ; k' u je elâm unyik hna venöu hnyi lany, me hna venöu hnyi lit. 40 Waleji hwakecik, haba hnyi je lany seúnö ame okongu nya, me megic hnyi hnyinghet ; k' oge me ca wen mokut. 41 Twente je hunaik hnyi hnyabam ; oge bi athnyaba köu fortin ta huna hwaban lakom li hlu, ke siks ta huna hwaban halem je meno : ke u je olibenyita wia hwabök. 42 Ame ne hia Khongu cica unyik, wale Khongu Aberahama, me hna outen hnö Isaaka, me e hnathu u je he ka kunö nya ke ba únyi. A wâ but Khong anyik vec me huliwa anyin li hnyamök, me e ame thao u et hnyi lit. 43 Ke Labana ame thu me ha kö Jakob, ka habe, Haba li momo ödru li lakuk, ke haba je wanakat ödrin je laöbik, ke halek ta je



hnabat, ke omjebek ta je únyi hia u me wá: ke ie únyi oge me he ka ányá hnyi bong ang ka je lakuk eang me je lakudru ádru me hnokoá? 44 Aió u walang ang m'ítu me úhinhinköu; ke wale hnân ohnatho kötu. 45 Ke Jakob ame hom veto me otílá hnân haten. 46 Ke Jakob ame ha ka je liamekeiny mē, ka habe, Thigö veto thö; me ödrin e hom je veto me khon; ke ödrin e han eling hnyi ve veto. 47 Ke Labana ame hwenyi ien Jegara-sadutha: ke Jakob ame hwenyi ien Galeed. 48 Ke Labana ame ha, ka habe, At hnân ohnatho kötu hna khon e hnyi bong ang. Anyin a wale adre hwenyi ien e Galeed: 49 me Mizepa minya, anyin a haingen, ka habe, E so e he Iehova ka labö hmáká wanbötu, ötu ka úsákáü. 50 U je ne he ka ovecá je lakuk, me hok momo minya hanen le lakuk, e ba at unyita: wá ju, Khong ame wá hnathu wanbötu. 51 Ke haingö Labana ka Jakob, ka habe, Wá bi hna khon veto eang, ke wá bi haten wale oge ip wanbötu. 52 Hnân ohnathoá hna khon veto eang, ke hnân ohnathoá minya haten eang, oge me ca he ka he hanyáüá hna khöü veto eangköu, me u me ca he ka he hanyáüá hna khöü veto eang, me haten eang könya, he ka úokonguny. 53 E so e he Khongu Aberahama me Khongu Nahora minya, a Khongon kamödru ka owisa kötu. Ke Jakob ame khemanyin me ha Hna outen hnö Isaka a kamen. 54 Ke Jakob ame bi hulo ke hut hnyi bucen, me hawá je liamekeiny mē ka hnyi han areto: ke ödrin e han areto, me mokut hnyi bucen. 55 Ke Labana ame vesá hnyi haolany me úcimhnyimak me je läöbiny me je lakon me hahnahici ödrin: ke Labana ame he hmetu ka hnyi iny.

HNYIMAKAN 32.

**K**E Jakob ame he hnyi deny gethen, me e ame ukhanö me je angela anyin Khong. 2 Ke a ö'ödrin dut Jakob, me e ame ha, ka habe, Wale but ang utbat anyin Khong: ke e ame hwenyi ien lok eling Mahanaima.

3 Ke Jakob ame kuná báná anyin je metá kö Esau a tuhan hnyi hnyi Seira, wale úkáná hnyi Edoma. 4 Ke e ame húna ödrin, ka habe, Öbun e he ka ha helâng ö Esau a tuhök, ka habe, Walang hna ta hnö Jakob a athnyabaem, haingen, ka habe, Oge laba kanyua unyi Labana, me

laba e ke ne o but walang ang: 5 ke e hu gak ta je kau, me asina, me je hnabat, me je athnyaba obaga, me je athnyaba omomo: ke inya oge me úkhúnöng ka thumetu u tuhök, m' u ma betenge gak. 6 Ke ame hmetu ju kö Jakob ta je metá, me ha, ka habe, Öhmun e mwi but unyi Esau a tuhám, ke wale but ang ame he ka iouny möu, ke e unyin tavat a vak ta haded. 7 Me Jakob ame ot gan hmá me hmak hnyekon: me e ame khená luá tavat unyin, me ta je mamoe, me kau, me kamela; 8 ke haingen, ka habe, A ne iouny Esau me ke bunyen me kuc' ödra, me ame he ka möt biju ke bunyen. 9 Ke Jakob ame ha, ka habe, Khongon kibik Aberahama lö, me Khongu cica Isaaka, Iehova lö, at ame ha könya, ka habe, He hmetu thö ka hnyi hnyi iny je lahanám, m' oge me he ka ányá so köu: 10 e ca úcü nya at ae úhnyúkong hnyi je ibetengiö hia, me hnathu hia, waleji u je omanená ka athnyabaem; anyin oge hanyáüá Joridano eang me anyik uci; ke walang ang lo but anyik li bunyen. 11 Ö u, omeli nya únyi hnyi hnyamen tuhök Esau: anyin oge me outen e, wá e nye o but ka kuc nya, tha inya me ta momo me lakudrin. 12 Ke u je hia but ha könya, ka habe, E hnathu oge me he ka ányá so köu, ke oge me he ka osehia je mátránám me me helá me önyin köü, wale me me ca hnân aü anyin ae se hia. 13 Ke e ame mokut eling hnyi hnyinghet; me e ame hom únyi hnyi anyin ta je únyi hnân bwihlany hobi kö Esau a tuhan: 14 lo li haded ta je got momo, ke twente ta je got бага, me lo li haded ta je mamoe momo, ke twente ta je mamoe бага, 15 ke thöte ta je kamela adre me úasin me je lakudrin, ke fáte ta je kau, ke libenyita ta je bolok, ke twente ta je asina momo, ke libenyita ta lakon. 16 Ke e ame ve ham ta je hnabat ka ta je athnyabainy; k' ame ha ka je athnyabainy, ka habe, Böbun ka hanyáüá me ve bi hnyiöulen wanben ta je hnabat. 17 Ke e ame húna ka at ame bán, ka habe, E ka iouny möu Esau a tuhök, me hnei u, ka habe, U athnyaba ia? k' u ma he ká? ke hale ia hnabat meno hnyi hnyimákám? 18 M' u ma he ka ha, ka habe, Hale Jakob a athnyabaem; ke wale bwihlany adre kunú ka tuhök a Esau: ke wá ju a e but ang. 19 Ke heláe minya e ame húna ka at a loiny me kuniny, me tavat hia ödrin e alen ta je hnabat, ka habe, Öbun e he ka ha heláe kö Esau e ka iouny möbun; 20 ke öbun e he

ka ha minya, ka habe, Wâ ju e but ang Jakob a athnyabaem. Anyin a haingen, ka habe, Oge me he ka omenyikâ e hnen bwihlany adre kunâ bânâ, ke hwaban e oge me he ka iohnyimak mē, ame ne he ka köp nya. 21 Me a he bân but bwihlany: ke e bi ame mokut hnyi hnyinghet eling tha e mödrin.

22 Ke e ame todrö hnyi hnyinghet eling me hom li âiân, me li athnyabainy momo me je lakon a libenyita ke khaca, me hanyâ-ûâ wagewe Jaboka. 23 Ke e ame hum ödrin me kun' ödrin ka hanyâûâ wagewe, k' ame kunâ minya anyin ta je ûnyi. 24 Ke hake laba Jakob; ke haba ke at ame úsöu mē ke ne o but hnyi haolany. 25 Ke a löng ut a e ca hwege hmetu hon, me e ame kâlâ jebalainon; me ame nik dö jebalainou Jakob k' ame tiga úsöu mē. 26 Ke haingen, ka habe, hnö nya but, ke lany dö jimeyö ame o. Me haingen, ka habe, Oge me ca he ka hnö u, ke ne o but u je hahnahici nya. 27 Ke e ame ha kâu, ka habe, Ia iâm? Haingen, ka habe; Jakob. 28 Me e ame ha, ka habe, adre me ca he hmetu ka hao u Jakob, ke Isaraela bi: anyin a u je hia but nâ hwegiâm me Khong me tavat, ke ne u hwege. 29 Ke Jakob ame hnö, ka habe, Bethe ha thö könya iâm. Me haingen, ka habe, Ieû gam u me hnö iök? me e ame hahnahicâ e eling. 30 Ke Jakob ame hwenyi ien dok e Peniela, haingen, anyin a oge iohnyimak me Khong, k' iny möt bi. 31 Ke ame o thö seûnö hon hnyi ûen e ame he hanyâûâ Penuela, ke e ame he hwali ge jevan. 32 Waleling me me ca han hnen lakon Isaraela ta je toiny fetrin hnyi jevan ke ne o but hnyi bong ang, anyin e ame kâlâ jebalainon ca Jakob huyi töiny fetrin.

HNYIMAKAN 33.

**K**E Jakob ame bwele me wâ, ke wâ bi, Esau ame he jem me tavat a vak ta haded. Me e ame khenâ but je wanakat kö Lea, me Rakela, me li athnyaba a li momo. 2 Ke e ame ip li athnyaba momo me je lakudru hnyi hnyimakan, ke hwabödrin jia Lea me je lakon, ke a bili Rakela me Josefa. 3 Ke e ame he bânâ, me osewen nom hnyikânâi ke ne o but ame hakekenyâ tuhan. 4 Ke Esau ame wadring me iouny mē, me delûâ e, me ta hon nyin, me úcimhnyimak mē: k' ödrü me útengiö. 5 Ke e ame bwele me wâ je momo me je wanakat;

me haingen, ka habe, Ie hnyat ang unyâm! Ke haingen, ka habe, wale je lakuk hnen Khong hna betenge gak a athnyabaem. 6 Ke ame o but li athnyaba momo, ödrü me je lakudru me nom ju. 7 Ke ame o but minya Lea me je lakon me nom ju: ke hwaban e ame o but Josefa me Rakela me nom ju. 8 Ke e ame ha, ka habe, Hawa gam ge ta je hnahat hia oge úkhanö mē! Me e ame ha, ka habe, Wale hnân elâu ibetengiö gam könya tuhök. 9 Ke Esau ame ha, ka habe, E gan hmâ anyik ta je ûnyi; keik lö, ame ka hnen biju unyân ûnyâm ta je ûnyi. 10 Ke haingö Jakob, ka habe, Ohe, e ba, ö u betenge gak me kap ju anyik bwihlany: anyin oge wâ hnyimâkâm, helâ me man at ame wâ hnyimakan Khong, k' u je kap soi nya. 11 Ö u kap ju anyik betenge adre hom köu; anyin a hia but betenge gak Khong, anyin e gan hmâ anyik ta je ûnyi. K' ame újengö e, me e ame kap ju. 12 Ke e ame ha, ka habe, Aiö u ötin e he, ke ama bök. 13 Ke haingen kâu, ka habe, E khana tuhök a e sēnyin dut je wanakat, ke je hnahat mamoe me kau adre me úasin: ke adre me ne alen hwegiâ hnyi bong a khaca, me ame ne he ka mok hia ta je hnahat meno. 14 E so u ma he tuhök ka bâm, ke bilik biju athnyabaem: ke oge me he ka omise, helâ me tulutiny úheny je meno hnyi hnyimakök, me helâ me úheny je wanakat, ke ne o but oge me o unyâm tuhök e Seira. 15 Ke Esau ame ha, ka habe, E so oge me ip biju unyâm ke je athnyabaik. Ke haingen, ka habe, Hnân eû? U ma he tuhök ka betenge gak. 16 Ke Esau ame he hmetu hnyi bong eling hnyi gethen Siera ai. 17 Ke Jakob ame he Sukotha ai, me otilâ umen uma, me ânyâ ta je uma baelelu hobi kâu haleny ta je meno: anyin a wale adre hwenyi ien dok eling Sukotha.

18 Ke Jakob ame o ka hnyi taun Sekema ke hnahic, wale hnyi hnyeï Kanana, ge ioiny úheny Padan-arama; me hunuma cicö taun. 19 Ke e ame úco utkânâ wale ame otilâ hnyin umen uma mano, ûnyi ge je laku Hamora, kamö Sekema, hwaban je mone a khaca haded. 20 Ke e ame otilâ taben hut, me hwenyi ien e El-eloe-Isaraela.

HNYIMAKAN 34.

**K**E ame he but Dina nöku Lea a hlu, wale hnen hna huokoa nöku Jakob, he ka wâ ta je hluiny hnyeï. 2 Ke ame

GENESE 35.

wá e hnö Sekema, nöku Hamora at Hivi, ke thaniny hnyei, me e ame hom e, me tha laba mē, me okongoá. 3 K' ame kece but hnyekon kö Dina nöku Jakob, ke e ame betenge ka hlu, me fuc menyik ka hlu. 4 Ke Sekema ame ha kö Hamora a kamen, ka habe, He thö ka hom hlu e me öök. 5 Ke Jakob ame löng a ga okongu Dina but a nokon hnen e; ke tiga e je lakon hnyi hnyei me meno; ke Jakob ame laba hnyibú ke ne o but ödrin e o. 6 Ke ame he but Hamora kamö Sekema kö Jakob me me úhnenamö me. 7 Ke ame o but ta je laku Jakob únyi hnyi hnyei hnyi úen ödrin e löng e: ke a vec ut hnyekudrin, ke gan hmá anyidrin hmönyin anyin a e ame ányá monu hnyi Isaraela, waleji ame tha laba me nöku Jakob; ke wale únyi ae kap he ka ányá. 8 Ke Hamora ame úhnenamö mödrin, ka habe, Haba Sekema a nöku ame hnyok gan hmá ka nöku bun hlu: ö u ham but e me áian. 9 Ke so ötin e he ka ihok lakon, ham but köhmun lakubun je hlu, ke hom ju öbun lakuhmun je hlu. 10 Ke öbun e he ka tha laba möhmun: ke kónöbun káná hnyi hnyimaköbun; labá ju me úcü hnyin, me me ve huibun eang. 11 Ke haingö Sekema ka kamen hlu me je lahaniny, ka habe, E so öbun e betenge gak, ke haba únyi öbun e he ka ha könya, oge me he ka ham. 12 Ha gáná ju könya sániny me omjeü, k' oge me he ka ham helá me hnöbun hna he ka ha könya: ke so öbun e ham but könya hlu me áian. 13 Ke ame thu iyawöá hnen je laku Jakob kö Sekema me Hamora a kamen, anyin a e ame okongu Dina a hanidrin, 14 ke haingödrin ködrü, ka habe, E ca khan' öhmun he ka ányá únyi e, wale he ka ham hanihmun ka at adre ca peritomoná; anyin a wale hanán haikongu öhmun: 15 walang öhmun e he ka og' öbun, ka habe, Hamöbun he ka helá möhmun, wale he ka peritomoní öbun hia obaga; 16 me öhmun e he ka ham köbun lakuhmun a je hlu, k' öhmun e he bi ka hom lakubun je hlu, m' öhmun e he ka tha laba unyibun me me khaca itin hnyei. 17 Ke öbun e ne ca ling öhmun he ka hnyi peritomoná, awe öhmun e he ka hom nökuhmun hlu me he but. 18 Ke so kö Hamora me Sekema nöku Hamora bodrin hofuc. 19 Ke ca bec bi hidröu he ka ányá únyi e, anyin a e ame senyin ge nöku Jakob; k' adre oganá e hon lap hia anyin kamen. 20 Ke Hamora me Sekema a nokon, ödrü me he ka hnyi homagöuleny

taun, me úhnenamö me tavat aten idruhnyei, ka habe, 21 Ödra menyik köta tavat eang; anyin a wale e so adre me labá hnyei me úcü hnyin; ke, wá bi, e lau hnyei me úcü ödra; e so ate me hom lakudra je hlu me me laöiöta, k' ate me he ka ham bi ködra lakuta je hlu. 22 Ke walang ang ame he tavat ka og' öta he ka tha laba möta me me khaca hnyei, ka habe, adre me he ka peritomoní öta hia obaga helá me hna peritomoní ödra. 23 Hawa, ame ca he anyidra ta je únyi, me tang omjhedra, me haledra ta je meno hia ka anyitin? E so ate me he ka og' ödra, k' adre me he ka tha laba möta. 24 Ke ame löng hotu Hamora me Sekema a nokon hnen tavat hia adre me didrut ka hnyi homagöuleny taun, k' adre me peritomoná ta je бага hia, tavat adre me didrut ka hnyi homagöuleny taun. 25 Ke habe hnyi bong a kuniny, m' adre me tiga vec, haba ke li laku Jakob, jia Simeona me Levi, lahani Dina, ödrü me ve hom anyidru li hele vat, me utut ka hnyi hnyei, me hlingá ta je бага hia. 26 Ke ödrü me blingö Hamora me Sekema a nokon hneu homakan hele vat, me hum Dina únyi hnyi hnyin uma umö Sekema, me he but. 27 K' ame o but laku Jakob ka ta je komok, me söh taun, can hnödra hna okongoá hanidrin. 28 Ke ödrin e hügúná haledra ta je mamoe, me haledra ta je kau, me haledra ta je asina, me ta je únyi hnyi taun, me ta je únyi hnyi hnyei; 29 me tang omjhedra hia, me lakudra ta je wana-kat hia, me je laöiödra, adre hom bá me hügúná, me ta je únyi hia hnyi hnyaba. 30 Ke Jakob ame ha kö Simeona me Levi, ka habe, Öbe ohmaki nya, he ka obokongi nya ka aten hnyei, wale at Kanana me Perizi: ke ötin wakhalet, k' adre me he ka úkhacaköu könya me kuc nya; m' adre me he ka hiö nya me anyik lap. 31 Ke ödrü me thu, ka habe, Hawa, hamen he ka ányá ka hanihmun helá me momo hnyi gethen.

HNYIMAKAN 35.

**K**E Khong ame ha kö Jakob, ka habe, Todrö, he thö Bethela ai, ke laba e: me otílá e taben hut ka Khong, at ame manen köu, waleji hnyi hnám hna kec ga Esau a tuhám. 2 Ke Jakob ame ha ka anyin lap, m' ödra hia a tha e mē, ka habe, Hna but ta je hnatheat kanyua unyibun, me obosoi öbun, me khaú ju öbun: 3 k' ate me tot me he thö Bethela ai; k'

GENESE 36.

oge me he ka otilâ taben hut eling ka Khong, at ame ling nya hnyi bong oge me vec hnyin, me tha e mönya eü hnyi gethen oge me he hnyin. 4 Ke ödrin e ham kö Jakob ta je hnatheat kanyua hia unyidra, me je wen ûnyi hnyi ta je hnyikonyödrin; ke Jakob ame ikhâlâ je ûnyi e hmelen iwajo hnyi baten Sekema. 5 K'adre me he but: ke e gan hmâ hna outen hnyi ta je hnyei igigili ödra, k'adre me ca hnu hoton je laku Jakob. 6 Ke Jakob ame o but hnyi Luza hnyi hnyei Kanana, (wale Bethela), e me tavat hia unyin. 7 Ke e ame otilâ taben hut e, me hwenyi ien dok eling Ele-bethela: anyin a Khong ame manen kâu e, hnyi ûen e ame kec ge tuhan. 8 Ke a mokcu Debora at ame hat Rebeka, k'adre konâm hmelen Bethela, eü hmelen iwajo: k'adre hwenyi ien e Alona-bakota.

9 Ke Khong ame manen hmetu kö Jakob, hnyi ûen e ame he úheny Padanarama, me hahnahica e. 10 Ke Khong ame ha kâu, ka habe, Jakob iâm: k'adre me ca he hmetu ka hao u Jakob, ke Isaraela bi iâm: ke e ame hwenyi ien e Isaraela. 11 Ke Khong ame ha kâu, ka habe, Inya Khong Aekhanahia: dudu but me si but; ame he ka o unyâm ke hnyei me ta je hnyei, ke ame he ka o ûnyi gam ta je than; 12 ke haba hnyei waleji oge ham kö Aberahama me Isaaka oge me he ka ham köu, k'oge me he ka ham hnyei ka ta je mâtrânâm a hwâbâm. 13 Ke Khong ame ölö thö ûnyi gan hnyi dok e ame fuc kâu hnyin. 14 Ke Jakob ame otilâ haten hnyi dok e ame fuc kâu hnyin, veto a haten: ke e ame bingâlâ hon e hudiny hic, me hingâlâ wakaco hon. 15 Ke Jakob ame hwenyi ien dok Khong ame fuc kâu hnyin, Bethela. 16 Ke adre me he úhedrin Bethela; ke tiga ca sâkâû bi Eferatha: k'ame vec hnyeku Rakela ke vec hmönyin. 17 Ke e ame tiga vec hmönyin, me haingen kâu momo ame hok wanakat, ka habe, Ca ot; anyin a u ma he ka hnokoâ ke da. 18 Ke ame tiga he ka he but banon (anyin a mokcu) me e ame hwenyi ien e Benoni: ke haba kamen ame hwenyi ien, me Beniamina. 19 Ke a mokcu Rakela, me adre me konâm hnyi gethen ka he Eferatha ai, wale (Bethelma). 20 Ke Jakob ame otilâ ke haten hon: wale haten hu Rakela ke ne o but hnyi bong ang. 21 Ke Isaraela ame he but, me e ame otilâ umen uma mano hnyi hoton tap ae beü göranyai hnyi Edera. 22

Ke ame tiga laba Isaraela hnyi hnyei eling, me haba Reubena ame tha mokut me Bila, ke momo anyin kamen: ke a löng ut Isaraela.

Ke ödrin twelv ta laku Jakob a бага; 23 haba je laku Lea; Reubena, nöku Jakob a bân, me Simeona, me Levi, me Juda, me Isakara, me Zebulona: 24 ke haba li laku Rakela; Josefa, me Beniamina: 25 ke haba li laku Bila, a athnyabai Rakela; Dana, me Nafatali: 26 ke haba li laku Zilepa, a athnyabai Lea; Gada me Asera: wale je laku Jakob a hnokoâ e Padanarama. 27 Ke Jakob ame o kö Isaaka a kamen e Mamere, hnyi Kiriath-areba (wale Heberona), waleji hnö Aberahama me Isaaka hna laba kanyua hnyin. 28 Ke haba je bong bongu Isaaka, me khaca haded ke eite ta je huna. 29 Ke Isaaka ame khüö homenâ me mokcu, me e ame úkhacaköu me lakamen, a hingat ut ke se hia bongon je bong; ke a konâm e hnö Esau me Jakob a li lakon.

HNYIMAKAN 36.

**K**E walang je dö ûnyi ga Esau (wale Edoma). 2 Haba Esau ame hok laâiân ûnyi ge je hlu Kanana; jia Ada nöku Elona at Heth, me Aholibama nöku Ana, nöku Zibeona at Hivi; 3 me Basemathi nöku Isamaela, hani Nebaioth. 4 Ke Ada ame hnöku Elifaza nöku Esau; ke Basemathi ame hnöku Reuela; 5 ke Aholibama ame hnöku Jeuso, me Jalama, me Kora: wale je laku Esau a hnokoâ hnyi hnyei Kanana. 6 Ke Esau ame hom je laâiân, me je lakon obaga me wahlu, me aten hnyaban hia, me balen ta je meno, me halen ta je bolok hia, me je ûnyi hia thithö e ame hu hnyi hnyei Kanana; k'ame he but ka hnyi ke keihen hnyei úsâkâü me Jakob a keiny 7 Ke ca khan' ödru he ka tha laba anyin ae ve gan dut anyidru ta je ûnyi; ke ca úcú ödru hnyei ödru me laba kanyua hnyin, anyin ae ve se hia but ta je meno. 8 Ke Esau ame laba hnyi bucen Seira: haba Esau a Edoma. 9 Ke walang je dö ûnyi ga Esau a kamen at Edoma hnyi bucen Seira: 10 walang je ien laku Esau a je бага; jia Elifaza nöku Ada öiö Esau, me Reuela nöku Basemathi öiö Esau. 11 Ke haba je laku Elifaza, jia Temana, me Omar, me Zefo, me Galama, me Kenaza. 12 Ke Timena ke momo anyi Elifaza nöku Esau; ke e ame hnöku Amaleka nöku Elifaza: wale ta je mâtrâni Ada öiö Esau. 13 Ke

GENESE 37.

walang minya ta je laku Reuela, jia Nakath, me Zera, me Sama, me Miza : wale je matriani Basemathi öiö Esau. 14 Ke walang ta je laku Aholibama nöku Ana a nöku Zibeona öiö Esau : ke e ame hnöku Jeuso, me Jalama, me Kora, a je laku Esau. 15 Walang ta je taben a je laku Esau : haba ta je laku Elifaza nöku Esau a atö ; jia Temana taben, ke Omar taben, ke Zefo taben, ke Kenaza taben, 16 ke Kora taben, ke Gatama taben, ke Amaleka taben : wale je taben únyi ga Elifaza hnyi hnyei Edoma ; wale je laku Ada. 17 Ke walang ta je laku Reuela nöku Esau ; jia Nakath taben, me Zera taben, me Sama taben, me Miza taben : wale ta je taben únyi ga Reula hnyi hnyei Edoma ; wale je laku Basemathi öiö Esau. 18 Ke walang ta je laku Aholibama öiö Esau ; jia Jeuso taben, me Jalama taben, me Kora taben : wale ta je taben únyi ga Aholibama nöku Ana, öiö Esau. 19 Wale ta je laku Esau a Edoma, ke wale anyidrin ta je taben.

20 Walang je laku Seira at Hori a aten hnyei ; jia Lotana, me Sobala, me Zibeona, me Ana, 21 me Disona, me Ezera, me Disana : wale ta je taben anyin at Hori hnyi hnyei Edoma. 22 Ke haba je laku Lotana, jia Hori me Homama ; ke Timena hani Lotana. 23 Ke walang ta je laku Sobala ; jia Alevana, me Manakatha, me Ebala, me Sefo me Onama. 24 Ke walang li laku Zibeona ; jia Aia me Ana : wale Ana at ame wá je hna pupuainy köiö ae kahwa hnyi hnyebuba hnyi úen e ame tuö ta je asina hale Zibeona, a kamen. 25 Ke walang li laku Ana ; jia Disona me Aholibama a hlu nöku Ana. 26 Ke walang je laku Disona ; jia Hemedan, me Eseban, me Itheran, me Keran. 27 Ke walang je laku Ezera ; jia Bilehana, me Zaavana, me Akana. 28 Ke walang li laku Disana ; jia Uza, me Arana. 29 Walang ien ta je taben ame o únyi ge at Hori ; jia Lotana taben, me Sobala taben, me Zibeona taben, me Ana taben, 30 me Disona taben, me Ezera taben, me Disana taben : wale je taben ödrin e o únyi ge at Hori, hoton anyidrin ta je taben hnyi hnyei Seira.

31 Ke walang ta je than ödrin e musu hnyi hnyei Edoma, ke tiga ba than ame musö lakon Isaraela. 32 Ke haba Bela nöku Beora ame musu hnyi Edoma ; ke Dinaba ien anyin taun. 33 Ke ame mokcu Bela, ke haba hwaban, at ame musu, jia Jobab nöku Zera úheny Bozera. 34 Ke a

mokcu Jobab, ke haba hwaban, at ame musu, me Husama únyi hnyi hnyei Temana. 35 Ke a mokcu Husama, ke haba hwaban, at ame musu, me Hadada, nöku Bedada, wale at ame kuc Midiana hnyi hnyei Moaba : ke Avitha ien anyin taun. 36 Ke a mokcu Hadada, ke haba hwaban, at ame musu, me Samela úheny Masereka. 37 Ke a mokcu Samela, ke haba hwaban, at ame musu, me Saulo úheny Rehoboth hnyi baten wagewe. 38 Ke a mokcu Saulo, ke haba hwaban, at ame musu, me Baala-hanana, nöku Akebora. 39 Ke a mokcu Baalahanana, nöku Akebora, ke haba hwaban, at ame musu, me Hadara : ke Pau ien anyin taun ; ke haba ien áiân me Mehetabela, nöku Matereda, nöku Mezahaba. 40 Ke walang ien ta je taben ame o únyi ga Esau, hoton anyidrin je lap, me idrin je hnyei, me je iödrin ; Timena taben, me Aleva taben, me Jethetha taben ; 41 me Aholibama taben, me Ela taben, me Pinono taben ; 42 me Kenaza taben, me Temana taben, me Mibezara taben ; 43 me Magediela taben, me Irama taben : wale ta je taben anyi Edoma hoton je hnyabadrin hnyi idrin je hnyei. Haba Esau wale kamen at Edoma.

HNYIMAKAN 37.

**K**E Jakob ame laba hnyi hnyei hnen kamen hna laba kanyua hnyin, wale hnyei Kanana. 2 Walang ta je dö anyi Jakob. Seventin ta je hunai Josefa, me e ame tha tuö me latuhan ta je hnahat meno ; ke e thöth unyin je laku Bila me Zilepa, la-áíân kamen : ke Josefa amethumetu ka kamödrin anyidrin monu. 3 Ke Isaraela ame betenge ga Josefa hon je lakon hia, anyin a e nokon hingat : ke e ame tibet ke úkot khauen ae ve hnalimen. 4 Ke a wá but je latuhan a g' ame betenge gan hnen kamödrin hon je latuhan hia ; m' ödrin e hukötiá e, me ca úhnenamö so më. 5 Ke Josefa ame bo ke bwi, me e ame thumeto latuhan ; me ödrin e hukötiá hmönyinâ e. 6 Ke e ame ha ködrin, ka habe, Ö öbun, löng ju bwik oge bo : 7 wá bi ötin e ca je thi hwit hnyi utkânâ, k' ame höhöi thö anyik thi hwit, me tot wisa minya ; ke wá bi, ame tot igigilö anyibun je thi hwit me nom ju ka anyik thi hwit. 8 Me haingen je latuhan kâu, ka habe, Hee u me he ka than humun ? ke u me he ka musu öhmun ? Ke odrin e hukötiá hmönyina e can je bwiny, ke hwan je hofuc. 9 Ke e ame bo hmetu

GENESE 38.

ke bwi, me ha e ka je latuhan, ka habe, Wâ bi, oge bo hmetu ke bwi ; ke wâ bi, ame khudrung kõnya seünö me tehi me je okhû a libenyita me nua khaca. 10 Ke e ame ha e ka kamen me latuhan ; ke kamen ame thawâ e, me ha kâu, ka habe, Ie bwi e u je bo ? Hawa, oge me he me hinyâm me latuhâm ka nom hnyikânâi kôu ? 11 Ke ame hmönyin kâu latuhan ; ke haba kamen ame ip únyi e hnyi únykúmânen. 12 Ke je latuhan ödrin e he Sekema ai ka hân hnahat meno haleny kamödrin. 13 Ke haingö Isaraela kö Josefa, ka habe, Hawa ame ca hân hnahat meno hnen je latuhâm, hnyi Sekema ? aiö u, oge me he ka kunö u ködrin. Ke haingen kâu, ka habe, Walönya eang. 14 Ke e ame ha kâu, ka habe, He thö ka wâ, hawa, e sot latuhâm, me hnahat meno ; ke u hmetu thö ka thumetu nya. Wale e ame kunâ e úheny hnyi hnyigöulen bucen e Heberona, me e ame e but Sekema. 15 Ke a wâ but e hnen ke at, ke wâ bi e ame he baü hnyi hnye : ke ame hnö e hnen at, ka habe, Ieü u me elâm ? 16 Ke haingen, ka habe, Inya oge me elâm latuhök : ö u ha thö kõnya dok ödrin e hân hnahat hnyin. 17 Me haingen at, ka habe, Ödrin dut hâng, anyin oge löng ut huödrin hna ha, ka habe, Ötin he Dothana ai. Ke Josefa ame he hoton je latuhan me e ame ö 'drin hnyi Dothana. 18 Ke ödrin e wâ but e ke tiga sâkâü, ke e tiga ca hakekeny ködrin, me ödrin e úhnenamö he ka hlingâ. 19 Ke ödrin e úhaköüâ, ka habe, e but ang at ame bo je bwi. 20 Ötin e he walang ang ka hlingâ me khûâ kâu ka hnyi ke monop, ke ötin e he ka ha, ka habe, A hia thö an e hnen ke meno ae kong : m' ötin e he ka wâ, hawa, ame he ka hwâdâ je bwiny. 21 Ke a löng ut Reubena, me e ame omelö e únyi hnyi hnyamödrin ; ke haingen, ka habe, E so ötin e ca ohia anyin möt. 22 Ke Reubena ame ha minya ködrin, ka habe, Ötin e ca he ka hingâlâ dra, ke so bi he ka khûâ but e ka hnyi hmonop ang hnyi hnyebuba, ke ca hoibeny kâu : wale me me omelö e únyi hnyi je hnyamödrin, me hna hmetu e ka kamen. 23 Ke ame o but Josefa ka je latuhan, me ödrin e uny jut úkot anyi Josefa, wale anyin úkot ae ve hnalimen ; 24 ke ödrin e hom e me khûâ e ka hnyi hmonop : ke ba önyen hmonop, e ba köiö hnyin e. 25 Ke ödrin e laba ju ka han, me ödrin e bwele, ke wâ bi ame he jem bunyen anyin at Isamaela úheny Gileada,

me haledrin je kamela ödrin e hok setura, me basama, me muro, ödrin e hok Aigupito ai. 26 Ke haingö Juda ka je liamekeiny mä, ka habe, Ieü troban ötin ka he ka hlingâ keitin, me ikhâlâ dren ? 27 E so ötin e he ka úco e ka at Isamaela, ke ca he ötin ka höibeny kâu ; anyin a keitin, e tha unyin mötin. Me ame löng hoton hnen je liamekeiny mä. 28 Ke ame he ka gethen unyidrin at Midiana tavat úcú ; me ödrin e öü Josefa úheny ú hnyi hmonop, me úcú Josefa ka at Isamaela hwaban je sileva a twente. Ke ödrin e hum Josefa Aigupito ai. 29 Ke Reubena ame hmetu ka hnyi hmonop, ke wâ bi, e hiö Josefa but eü hnyin hmonop ; me e ame kia je úkhaüen. 30 Me e ame he ka je liamekeiny mä, me ha, ka habe, E hiö thö thöth ; ke oge me he biju kâ ? 31 Ke ödrin e hom úkot anyi Josefa, me hlingâ nokon got a бага, me hneü úkot hnyi dra ; 32 ke ödrin e úkhü-nöng ka hom ukot ae ve hnalimen ka kamödrin ; me ha, ka habe, Öhmun e wâ thiju ang : wâ ju, ame ne úkot ang anyin nokom, ame ne ba. 33 Ke e ame wâhmakhmetoâ, me ha, ka habe, Úkot ang anyin nökek ; a hia thö han e hnen meno ae kong ; e hnathu a hia thö oloú usu kiö Josefa. 34 Ke Jakob ame kia anyin je úkhaü, me khavâ mano ae gan nân me tenge can nokon, ae se hia je bong. 35 Ke ame todrö je lakon hia je бага me hlu he ka otubwelâ e ; ke e höcö tubwet, ke haingen, ka habe, Oge me he ka tenge can nökek ke ne o but ka hnyi erkemok. Wale hna tengiâ e hnen kamen. 36 Ke haba at Midiana adre me úco e Aigupito kö Potifara athnyabai Faro, taben hnyat tue.

HNYIMAKAN 38.

**K**E hnyi úen eling Juda ame he but únyi ge je liamekeiny mä, me sâü ka ke at a at Adulama, Hira ien e. 2 Ke Juda ame wâ eling ke hlu nokon ke at Kanana, Sua ien ; me e ame hom e me tha e mä. 3 K' ame erkin dut, me e ame hnokoâ da ; ke e ame hwenyi ien Era. 4 K' ame erkin hmetu but me hnokoâ da, me hwenyi ien Onana. 5 Ke e ame hnokoâ hmetu ke da minya, me hwenyi ien Sela : ke Juda e Keziba hnyi hnen hna hnokoâ. 6 Ke Juda ame hok öiö Era nokon a bân, Tamara ien. 7 Ke at ae kong Era noku Juda hnyi hnyimakö Iehova ; ke Iehova ame hlingâ. 8 Ke Juda ame ha kö Onana ka habe

## GENESE 39.

Laba ju ka momo áiân tuhâm, me hom e  
 ne bi mâtâniny tuhâm. 9 Ke a wâ but  
 Onana a ga me ca he ka mâtâniny bi ; me  
 e ame laba ka momo áiân tuhan, k' ame  
 hingâlâ ka hnyi kânâ wâ e nye bi mâtâniny  
 tuhan. 10 Ke kong hnyi hnyimakö Iehova  
 hnen hna ányâ : me e ame hlingâ e minya.  
 11 Ke Juda ame ha kö Tamara a úngon,  
 ka habe, Laba safac ju hnyi hnyaban kâ-  
 mâm, ke ne o but ame gan dut Sela a  
 nökuk : anyin a haingen, Wâ e nye mok  
 minya ju helâ me latuhan. K' ame he  
 Tamara me laba hnyi hnyaban kamen.  
 12 Ke se hia je bong me ame mokcu nöku  
 Sua öö Juda ; ke ame hnyibi but Juda, me  
 e ame he Timenatha ai ka tavat adre me  
 subâ leünen haleny mamoe, tha e me hanen  
 ju Hira at Adulama. 13 Ke adre me  
 thumetu Tamara, ka habe, Wâ bi, ame he  
 Timenatha ai úngon ka subâ leünen haleny  
 je mamoe. 14 Ke e ame uny jut je úkha-  
 ñen safac, me tube e hnen mano hnân tubi  
 hnyimak, me khaú, me e ame laba ju hnyi  
 homagöule e Enaima hnyi gethen he Time-  
 natha ai ; anyin a e ame wâ a ga gan dut  
 Sela, k' adre ca ham kâu me me áiân.  
 15 Ke a wâ but e Juda, me ame únykúme  
 a e momo hnyi gethen, anyin a hia but tube  
 hnyimakan. 16 Ke e ame saú kâu eú hnyi  
 haten gethen, me ha, ka habe, Oge ma na  
 ne köu ; anyin ae ca khana a úngon e. Ke  
 haingen, ka habe, Ieú únyi u me he ka  
 ham könya, m' u me he ka he könya ?  
 17 Ke haingen, ka habe, Oge me he ka  
 kunâ köu ke nokon got hanen hnahat meno.  
 Ke e ame ha kâu, ka habe, U me he ka  
 ham könya haten ke ne o but u me he ka  
 kunâ ? 18 Ke haingen, ka habe, Ieú haten  
 oge me he ka ham köu ? Ke haingen, ka  
 habe, Wale hnân ohmâ haten gam me nyi-  
 ngen, me uci hnyi hnyamâm. Me e ame  
 ham kâu, me he kâu, me ame erkin dut.  
 19 K' ame todrö momo, me he but, ke a  
 hia but uny mano hnân tube hnyimakan,  
 me e ame khavâ hmeto je úkhañen safac.  
 20 Ke Juda ame kunâ hanen at Adulama  
 me nokon got, me me hom hmetu haten  
 unyin momo : ke ame ca wâ. 21 Me e  
 ame hnö tavat aten hnyei, ka habe, Ewa  
 momo hnyi gethen hnyi Enaima waleji eú  
 hnyi baten gethen ? Ke haingödrin, ka  
 habe, E ba momo hnyi gethen eang.  
 22 Me e ame hmetu kö Juda, me ha, ka  
 habe, Oge me ca wâ e ; ke walang hna ha  
 hnenaten hoyei, ka habe, E ba momo hnyi  
 gethen eang. 23 Ke Juda ame ha, ka habe,

Hnen ju unyin momo, wâ adre nye hlum'  
 ötu : wâ bi oge hia but kunâ got ang, k' u  
 je ca wâ momo. 24 Ke helâke kun ta tehi  
 adre me thumetu Juda, ka habe, a hia but  
 bi únyi monu Tamara a úngom ; ke wâ bi,  
 a erkin dut hnyi hnen hna bi unyi monu.  
 Ke haingö Juda, ka habe, Hom but, m' adre  
 me he ka thong degecâ. 25 K' adre hia  
 but hom momo, me e ame úkhúnöng ka ha  
 ka úngon, ka habe, Oge erkin hnen at a  
 anyin ta je únyi eang : ke haingen minya,  
 ka habe, Wâhmakhmeto ju u, anyi ia ta je  
 únyi eang, wale únyi hnân bi haten, me  
 nyingen, me uci. 26 Ke Juda ame wâhma-  
 khmetoâ e, me ha, ka habe, E wisa at eang  
 huk : anyin oge ca ham Sela a nökuk kâu.  
 Ke ca tha e hmetu mē. 27 Ke wâ bi ame  
 o but úen ame he ka hnokoâ, li hñnye eú  
 hnyi hnyekon. 28 K' ame he ka hnokoâ  
 me haba ke at ame inâ but hnyamen, me  
 haba momo at ame tuö erkin ame hom me  
 hûkâlâ hnyi hnyamen hnyiban tö ae dra,  
 me ha, ka habe, wale at ame bân. 29 Ke  
 e ame thu hmetu hnyamen, me wâ bi ame o  
 but liamekeiny mē : me haingen momo, ka  
 habe, A hawa u je úhanyöú ka únyi gam  
 hna ányâ ? k' ame hwenyi ien e Farez.  
 30 Ke hwaban e ame o liamekeiny mē ae  
 hu hna hûkâlâ hnyi hnyamen tö ae dra :  
 k' adre hwenyi ien e Zera.

### HNYIMAKAN 39.

**K**E adre me hum Josefa Aigupito ai ;  
 k' ame úco e hnö Potifera at Aigu-  
 pito athnyabai Farao, taben hnyat tue, únyi  
 ge at Isamaela, hnyat ödrin e hom kâ e.  
 2 Ke tha Iehova me Josefa, ke e at ae sot ;  
 k' ame laba hnyi hnyaban at Aigupito a  
 tuhan. 3 Ke a wâ but tuhan a tha Iehova  
 mē, ke Ievoha ame ohnahicâ hia ta je únyi  
 e ame ányâ. 4 K' ame betenge ga Josefa,  
 me huliwa kâu : me e ame otilâ e he ka  
 musö hnyaban, me hna kâu anyin ta je únyi  
 hia. 5 Ke hwân e ame otilâ e he ka musö  
 hnyaban, me anyin ta je únyi hia, me  
 Iehova ame ohnahicâ hnyaban at Aigupito  
 ga Josefa ; ke haba hnahic únyi ga Iehova  
 ame ta hon anyin ta je únyi hia eiö hnyi  
 uma, me eú hnyi utkânâ. 6 Me e ame hna  
 biju anyin ta je únyi hia kö Josefa ; ke ca  
 khana e anyin ke únyi bi, ke so jeú e ame  
 han. Ke so hmainy unyi Josefa, ke hma-  
 nenang ka wâ. 7 Ke hwaban e ame hinou-  
 tmhâkâ e hnen áiân tuhan ; k' ame ha kâu  
 momo, ka habe, Ötu he ka tha mokut.

GENESE 40.

8 Ke e ame hōcō, me ha ka áiân tuhan, ka habe, Wâ bi, E ca khana tuhök ta je únyi unyik hnyi uma ; k' a hia but hna hia anyin ta je únyi kõnya ; 9 ke ba at ae beönua huk hnyi hnyaba eang ; ke e ame ca behânâ gak ke únyi ke u thiju, anyin a u bi áiân : oge ma hawa ka ányâ monu e ae gan, ke kong ka Khong? 10 Ke e ame fuc kö Josefa hnyi ta je bong hia, ke e ame ca löng kâu, he ka tha mokut mē, me tha e mē. 11 Ke hnyi ke bong eling e ame didrö eiö hnyin uma ka ányâ húdrân ; ke ba aten hnyaba eiö hnyin uma. 12 Ke momo ame kât úkhaúen, me ha, ka habe, Ötu ma tha mokut : ke e ame hna degecâ ju úkhaúen hnyi hnyamen me kec ut. 13 Ke a wâ but a ga hia but hna degecâ úkhaúen ka hnyi hnyamen me kec ut, 14 me e ame hawâ tavat aten hnyaban, me ha ködrin, ka habe, Wâ bi, e ame hom kōtin at Heberu he ka hlum' ötin, e a o kõnya he ka tha mökut mönya me oge me hongot hwege : 15 ke e ame löng hok hwakhöü me hongot, me e ame hna degecâ bi kõnya úkhaúen, me kec ut. 16 Ke momo ame ip ju úkhaúen ke ne o but ame o tuhan ka hnyi hnyaban. 17 Ke momo ame ha kâu ta je únyi eling, ka habe, A o kõnya athnyaba at Heberu u je hom kōtin, me me he ka hlumö nya : 18 me oge me khöü me hongot, me e ame hna degecâ bi unyik úkhaúen me kec ut. 19 Ke a löng ut tuhan hofuc hwan áiân, wale a ha kâu, ka habe, Ame ányâ helâe hnen athnyabaem : me gan hmâ anyin hmönyin kâu. 20 Ke haba tuhö Josefa ame hom e me ip eiö hnyin uma ceat unyin tavat adre ca únyi ge than : ke e ame laba eiö hnyin uma ceat. 21 Ke tha Jehova me Josefa, k' ame betenge gan, me okúâ he ka betenge gan hnen tuhan uma ceat. 22 Ke haba tuhan uma ceat ame hna kö Josefa tavat hia adre ca hnyin uma ceat ; ke haba ta je huliwa hia ödrin e ányâ eling, me e at ame musö. 23 Ke ame ca wâ tuhan uma ceat ke únyi unyin, anyin a tha Iehova me, ke Iehova ame ohnahicâ hnen hna ányâ.

HNYIMAKAN 40.

**K**E hwaban ta je únyi e haba at ame khöp utköiö belen than Aigupito, me at minya ame bi han, ame kong hwakecidru ka anyidru than, a than Aigupito. 2 Ke Farao ame hmönyin ka li athnyabainy, wale taben tavat khöp utköiö belen

than, me taben tavat adre me bi han. 3 Ke e ame hn' ödrü m' adre me tu' ödrü hnyi uma umen taben hnyat tue, hnyin uma ceat wale adre cö Josefa hnyin. 4 Ke haba taben tavat tue ame ip ödrü unyi Josefa, me e ame huliwa ködrü : k' ödrü me laba hnyi ke je bong hnyi uma ceat. 5 Ke ödrü me ve bwi hnyi hnyinghet a khaca, ke ve bongon li bwidru, wale at ame khöp utköiö belen than Aigupito, me at ame bi han, wale adre c' ödrü hnyin uma ceat. 6 Ke ame didrö Josefa ködrü hnyi hnyomakatu ka ö 'dru, ke wâ bi, ödrü me hlöuhlöu. 7 Me e ame hnö li athnyabai Farao unyin, adre me tu' ödrü hnyin uma umen tuhan, ka habe, Ieü ame khöt gan li hnyimaköbu hnyi bong ang? 8 K' ödrü me thu kâu, ka habe, Öhme bwi, ke ba at ae khana he ka ha bongon. Ke haingö Josefa ködrü, ka habe, Hawa, ca hamen Khong he ka ha ta je bongon? Bethe ha thö kõnya. 9 Me haba taben hnyat khöp utköiö belen than ame aü gaga bwiny kö Josefa, haingen ka habe, Walang bwik, wâ bi e hnyi hnyimakök e hu vine ; 10 ke kun ta vheiny vine ; ke helâke ame vhöng me suou vongan ; me ame oâ je de wan vine ta je wan ae mat : 11 ke e hnyi hnyamök kaia anyi Farao ; me oge me hom je wan vine me owa ka hnyi kaia anyi Farao, me hom kaia ka hnyi hnyamö Farao. 12 Ke haingö Josefa, ka habe, Walang bongon ; Haba je vheiny a kun, me wale kun ta bong ; 13 ke e tiga ca um kun ta bong, ama he Farao ka ogörányâ bâm, me ham hmetu köu húdrâm : k' u ma he ka ham hmetu kaia anyi Farao ka hnyi hnyamâm, helâ me hwakecâm ehac, k' u me tiga khöp belen. 14 Ke so u ma únykúmi nya minya e ka hu sot gam, ke o u na betenge gak, me haimemenö nya kö Farao, me me hum nya minya but únyi hnyi uma eang : 15 anyin adre hia but venöu nya únyi hnyi hnyeiny at Heberu : ke ba ke únyi oge hia but ányâ eang m' adre me ip nya ju hnyi hmonop. 16 Ke a wâ but taben tavat bi han, a e so hna ha bongon, me e ame ha kö Josefa, ka habe, Oge bwi minya, ke wâ bi, kun ta tang areto ae hau hon bök : 17 ke haba hnyi hnyin tang ethö görany e hu jeü hia adre le hobi kö Farao ; k' ame han e hnen ta je meno ame gâ únyi hnyi tangeru hon bök. 18 Ke Josefa ame thu, ka habe, Walang bongon : haba ta tang a kun, me wale kun ta bong ; 19 ke tiga ca um kun ta bong ame he Farao ka ogörányâ bâm únyi hnyi unyâm, me uhai u hnyi úö ; k'



GENESE 41.

ame he ka an unyâm hnen ta je menö ame gâ. 20 Ke haba hnyi bong a kuniny, wale bong ae gan adre hnöku Farao hnyin, ke e ame bi jeü hobi kâu lathnyabainy hia : ke e ame ogörányâ ban taben tavat khöp utköö belen than, me me ban taben tavat bi han uuyin lathnyabainy. 21 Ke e ame ham hmetu hanymen ka taben tavat khöp utköö belen than ; me ame ham hmetu kaia ka hnyi hnyamö Farao : 22 ke e ame uhno taben tavat bi han, helâ me hnö Josefa hna ha bongon ködru. 23 Ke ame ca únykúmi Josefa bi hnen taben tavat khöp utköö belen than, k' ame hnying ut e.

HNYIMAKAN 41.

**K**E hwaban lo li huna, Farao ame bwi : ke wâ bi, e ame tot hnyi baten wagewe. 2 Ke wâ bi ame o thö úheny ú hnyi wagewe je kau a seven ae so ka wâ me pipikhenya ; k' ödrin e han hnyi sâmun. 3 Ke wâ bi hwabödrin dö, ame o minya thö úheny ú hnyi wagewe ke je kau a seven ae kong ka wâ me delâ ; k' ödrin e tha tot me ke je kau hnyi baten wagewe. 4 Ke haba je kau ae kong ka wâ me delâ, ödrin e han je kau a seven ae so ka wâ me pipikhenya. Me a hmak dö Farao. 5 Ke e ame mokut hmetu me bwi : ke wâ bi seven ta je wan hwit ae wa se ke hlau ame kú hnyi vheny a khaca. 6 Ke wâ bi, hwaban e, ame kú thö seven je wan hwit ae kong me meleca hnen anghwei. 7 Ke haba je wan hwit ae kong ame han je wan hwit a seven ae wa se me hlau. Ke a hmak dö Farao, ke wâ bi, bwi bi. 8 Ke haba hnyi hnyomakatu me ame hmak hnyekon ; me e ame úkhúnöng ka hawâ ta je magoi Aigupito hia me tavat ae metâ hia : ke Farao ame aú gaga ködrin bwiny ; ke ba at ae khana he ka ha bongon kö Farao. 9 Ke haba taben tavat adre me khöp utköö belen than ame ha kö Farao, ka habe, Inya oge me únykúme hnyi bong ang anyik monu : 10 ka habe, Farao ame hmönyin ka je lathnyabainy, me ame ip nya hnyi uma ceat hnyi uma umen taben tavat tue, tha inya me taben tavat bi han : 11 ke öhmu me bwi hnyi lit a khaca, inya mē ; ke öhmu me ve bwi me ve bongon bi li bwihmu. 12 Ke e bi unyihmu ke hidröu at Heberu, athnyabainy taben tavat tue ; me öhmu me aú gaga kâu, ke e ame ha köhmun bongon li bwihmu ; e ve bongon li bwihmu hnyi hnen hna ha. 13 K' ame hwádâ thö helâ

me hnen hna ha bongon köhmu, ka habe, e ame hna hmetu könya hanymök, ke haba ke at bi adre ma uhno. 14 Ke haba Farao ame úkhúnöng he ka hum Josefa, m' adre me hom logotâ but e únyi hnyi uma ceat eü hnyi kânâ : ke e ame gi me khavâ me he kö Farao. 15 Ke haingö Farao kö Josefa, ka habe, Oge bwi ke ba at ae khana he ka ha bongon : ke oge löng ut gam, ka habe, U je ne löng bwi e khatö u he ka ha bongon. 16 Ke Josefa ame thu kö Farao, ka habe, E ca khanö nya : ke ame he Khong ka thu kö Farao únyi ae so. 17 Ke haingö Farao kö Josefa, ka habe, Wâ bi hnyi bwik oge me tot hnyi baten wagewe : 18 ke wâ bi, ame o thö úheny u hnyi wagewe je kau a seven ae pipikhenya me so ka wâ ; k' ödrin e han hnyi sâmun : 19 ke wâ bi hwabödrin dö ame o thö ke je kau a seven ae sēnyin me ti kong ka wâ, me delâ, oge me ca wâ konginy helâe eang Aigupito : 20 ke haba je kau ae kong me delâ ödrin e han je kau a bân a seven ae pipikhenya : 21 ke ödrin ka hia but ön ödrin, me ca manen dö, ka habe, ödrin e hia but ön ödrin ; k' ödrin kong bala ka wâ helâ me eja. M' inya oge me hmak dö. 22 Ke oge me wâ hnyi ke bwik, me wâ bi, seven ta je wan hwit ae hlau me so ame kú hnyi vheny a khaca : 23 ke wâ bi, hwaban ame kú thö ke je wan hwit a seven ae meleca, me kong, me ba önyen hnen anghwei : 24 ke haba je wan hwit ae kong ame han je wan hwit a seven ae so : ke oge me omanená e ka je magoi ; ke ba at ae khana omanená bongon könya. 25 Ke Josefa ame ha kö Farao, ka habe, Khaca thibi hnö Farao hna bo : a hia but Khong omanená kö Farao únyi e ame he ka ányâ. 26 Haba je kau a seven ae so, me wale seven ta huna ; ke haba je wan hwit a seven ae, me wale seven ta huna : khaca thibi ang bwi. 27 Ke haba je kau ae dela me kong a seven ame o hwabödrin, me wale seven ta je huna, ke haba je wan hwit ae ba önyen ame ohú hnen anghwei ; me wale seven ta je hunainy hmiâ. 28 Wale únyi oge me ha kö Farao, ka habe, Khong ame hia but omanená kö Farao hnen hna he ka ányâ. 29 Wâ bi, ame he ka o ta huna a seven, ke gan hmâ widrany eang hnyi hnyei Aigupito hia : 30 ke hwaban e ame he ka o ta hunainy hmiâ a seven ; k' adre me he ka hnying widran hnyi hnyei Aigupito ; k' ame he ka aú but hnyei hnen hmiâ. 31 K' ame ca he hmetu ka manen

GENESE 42.

widrany hnyi hnyei anyin ae gan hmâ hmiâ hwaban e, anyin ame he ka ti gan hmâ hmiâ eling. 32 Ke Farao ame olo bo, waleling me me he Khong ka ohmâ ûnyi e, k' ame ie he Khong ka ohwâdâ. 33 Anyin a wale e so e he Farao ka ûca at ae hu oûnykûminy me metâ, ke otilâ e, hon hnyei Aigupito. 34 Ke so e he Farao ka ânyâ ta je ûnyi eang, wale he ka otilâ ta je homakan hon hnyei me hlo ke keihen a thabûnginy jeû hnyi hnyei Aigupito hnyi je hunainy widrany a seven. 35 Ke so adre me he ka ûkhôûnâ je jeû hia thithö hnyi ta je huna eling ae so ame he ka o, me ûkhôûnâ hwit me me musö hnö Farao, hnân jeû hnyi je taun, ke hamödrin he ka tuö e. 36 Ke wale thibi e jeû adre me he ka ip penapena hobi kâu tavat hnyi je hunainy hmiâ a seven ame he ka o ka hnyi hnyei Aigupito ; me me ca he ka hia tavat hnen hmiâ. 37 Ke so hofuc eling kö Farao me lathnyabainy hia thithö. 38 Me haingö Farao ka lathnyabainy, ka habe, Hawa, ötin e he ka wâ at ae ûcû me at ang, ke e unyin Hanon Khong? 39 Ke Farao ame ha kö Josefa, ka habe, E ba at ae hu oûnykûminy me metâ helâ möu, anyin a hia but Khong omanenâ köu ta je ûnyi hia e : 40 u thibi at ame he ka hon hnyabak, k' u ma he ka musö ik hnyei hoton hwâm hofuc : ke theron thiju oge ma he ka beönuu hom. 41 Me haingö Farao kö Josefa, ka habe, Wâ bi, oge hia but otilö u hon hnyei Aigupito hia. 42 Ke Farao ame uny wen banyen me inâ ga Josefa, me okhavâ e ge ta je ûkhaû lino, me ovhekinyâ e ge sa gol ; 43 k' ame ip e hon anyin ûkariota a loiny ; k' adre me hongot hnyi hnyimakan, ka habe, Iâû ju öbun : k' ame otilâ e hon hnyei Aigupito hia. 44 Ke haingö Farao kö Josefa, ka habe, Inya Farao, ke u ka ca musi, e ba at ame he ka ogörânyâ hnyamen me can hnyi hnyei Aigupito hia. 45 Ke Farao ame hwenyi iö Josefa, ka habe, Zafenatha-paenea ; k' ame ham kâu Asenatha nöku Potifera at bihut hnyi Ona, hnân âiân. Ke Josefa ame vhenö hnyei Aigupito hia. 46 Ke thöte ta je hunai Josefa, hnyi ûen e ame tot hnyi hnyimakö Farao than Aigupito. Ke Josefa ame he ûheny unyi Farao, me vhenö hnyei Aigupito hia. 47 K' ame wa gan hmâ but kânâ hnyi je hunainy widrany a seven. 48 Ke e ame ûkhôûnâ ta je jeû hia thithö hnyi je huna a seven hnyi hnyei Aigupito, me ip hnyi ta je taun : waleji troban ta je utkânâ igigilö ta je

taun, e ame ve ip hnyin. 49 Ke Josefa ame ûkhôûnâ hwit helâ me önyin köiö, e ti gan hmâ, waleling me me ca aû hmetu e ; anyin a ca hnân aû. 50 Ke ame hnokoâ li laku Josefa a бага, ke tiga hia je hunainy hmiâ, wale ame hnokoâ hnö Asenatha nöku Potifera at bihut hnyi Ona. 51 Ke Josefa ame hwenyi ien atö, Manase : haingen, ka habe, Anyin a hia but Khong okhöti nya hnyi anyik ta je vec hia, me hnyaba cica hia. 52 Ke e ame hwenyi ien wakeiat Eferaima : haingen, ka habe, Anyin a Khong ame osi nya hnyi hnyei adre oveci nya hnyin. 53 Ke a um dö je hunainy widrany a seven hnyi hnyei Aigupito. 54 Me ame hwân ka o je hunainy hmiâ a seven, helâ me hnö Josefa hna ha : ke e but hmiâ hnyi te je hnyei hia ; ke e hu han bi hnyi hnyei Aigupito hia. 55 Ke ame mekihnanem but hnyei Aigupito hia, me haba tavat adre me tengiâ kö Farao ba han : ke Farao ame ha ka at Aigupito hia, ka habe, He th' öbun kö Josefa ; me ânyâ thö ûnyi ama he ka ha köbun. 56 Ke hmiâ hia thö je hnyei hia : ke Josefa ame khöng ut ta je uma jeû hia, me ûcû ka at Aigupito ; ke gan hmâ but hmiâ hnyi hnyei Aigupito. 57 K' ame he Aigupito ai ta je hnyei hia he ka ûcû jeû unyi Josefa, anyin ae gan hmâ hmiâ hnyi ta je hnyei hia.

HNYIMAKAN 42.

**K**E kxanö Jakob but ae hu jeû Aigupito, me Jakob ame ha ka je lakon, ka habe, Ieû e gabuu öbun e iwahmö thibi ? 2 Ke haingen, ka habe, Wâ bi, oge löng ut a e hu jeû Aigupito : he th' öbun kâ e ka ûcû ö 'tin m' ötin e möt me ca mok. 3 Me ame he ta je latuhö Josefa a libenyita he ka ûcû jeû hnyi Aigupito. 4 Ke Jakob ame ca kunö Beniamina kei Josefa tha e me je latuhan, anyin a haingen, ka habe, Wâ e nye o but kong kâu. 5 Ke ame o but je laku Isaraela he ka ûcû jeû, unyin tavat adre me o eling : anyin ae hmiâ but hnyei Kanana. 6 Ke Josefa ame musi hnyi hnyei, k' ame ûcû jeû me tavat hia hnyi hnyei : k' ame o but je latuhö Josefa me nom ju hnyikânâi kâu. 7 Ke a wâ but Josefa je latuhan, me wâhmakhmetu ödrin, me e ame bi ke at ködrin, me fuc hwege, me ha ködrin, ka habe, Öbun e mwi ua ? K' ödrin e thu, ka habe, Öhmun e mwi hnyi hnyei Kanana, öhmun e he ka ûcû

jeû. 8 Ke Josefa ame wâhmakhmeto je latuhan, k' ödrin e ca wâhmakhmeto e bi. 9 Ke Josefa ame ûnykûme li bwi e ame bo gadrin, me e ame ha ködrin, ka habe, Öbun je hnyat ae kong; öbun e o but he ka ecmâkâ hnyei ae ba ûnyi. 10 K' ödrin e thu kâu, ka habe, Than lö, e ba, k' ame o but lathnyabaem he ka úcû jeû. 11 Je lakon at a khaca öhmun hia; öhmun e hnathu, öhmun e ca he ka ecmâkâ hnyei, a öhmun lathnyabaem. 12 Ke haingen ködrin, ka habe, Ohe, öbun e o but he ka ecmâkâ hnyei ae ba ûnyi. 13 Ke haingödrin, ka habe Haba öhmun lathnyabaem je liamekeiny a twelv, lakon at a khaca, hnyi hnyei Kanana; ke haba wakeiat hmönyin tha e biju me kamöhmun walang ang, ke hia but khaca. 14 Ke Josefa ame ha ködrin, ka habe, Wale hnök hna ha köbun, ka habe, öbun je hnyat ame he ka ecmâkâ hnyei: 15 ke walang hnân ohnathu öbun, ka habe, Kia inya Farao a öbun e ca he ka he úheny ang e ka ca o minya eang keibun wakeiat hmönyin. 16 Kunâ thö ke at gabun he ka hom keibun, k' adre me he ka c' öbun me cubec hobun hofuc, öbun e ne hnathu: ke ame ne ba, kia inya Farao a öbun je hnyat ame he ka ecmâkâ hnyei. 17 Ke e ame c' ödrin kun ta bong. 18 Ke haba hnyi bong a kuniny Josefa ame ha ködrin, ka habe, Ânyâ th' öbun ûnyi ang m' öbun e möt; anyin a iny outen Khong: 19 öbun e ne hnathu, e so adre ca ke at gabun a je liamekeiny hnyi uma adre c' öbun hnyin; ke he th' öbun hom dö jeû ka anyibun je lap ae mekihnânem: 20 k' öbun hmeto thö kõnya keibun a wakeiat hmönyin; me me ohnathoâ hobun hofuc, m' öbun e ca he ka mok. K' ödrin e ânyâ helâe. 21 Ke ödrin e tha ûhnenamö, ka habe, E hnathu jönitin keitin anyin a ötin e wâ thö vecin hnyekon e, waleji e ame khöü kötin k' ötin e ca löng bi; waleling me me o but kötin vec eang. 22 Ke haba Reubena ame thu ködrin, ka habe, Hawa, oge ca hia but ha köbun, ka habe, ca okongoâ da; k' öbun e ca löng? Anyin a wale wâ bi, adre me elâm hwaban dren. 23 Ke ca khaun' ödrin a Josefa ame löng hmakhueto, anyin a e ame ûhnenamö mödrin deny at ame wia hwan hnyei. 24 Ke e ame he thö unyidrin, me tenge; ke e ame hmetu ködrin me ûhnenamö mödrin, me hum Simeona unyidrin me ca e hnyi hnyimaködrin. 25 Ke Josefa ame hunâ he ka ounöngötâ tangödrin je tang

ge hwit, me ve hitangen anyidrin je mone hnyi tangödrin je tang, me ha kamijidrin hobi kâu eû hnyi gethen: k' adre ânyâ helâe ködrin. 26 K' ödrin e ve ip ta je tang hwit hon haledrin je asina, me he but. 27 Ke haba ke at gadriu ame khöng tangen tang he ka hân haleuy asina hnyi omtabaga, k' ame wâ anyin mone; ke wâ bi e hnyi hnyimen tangen tang. 28 Ke e ame ha ka je liamekeiny mē, ka habe, Wale hmetu thö ang anyik je mone hnyi tangök tang: me ame gâ udrin, k' ödrin e öbubuny me ûhakouâ, ka habe, Ieû ang a ânyâ kötin Khong? 29 Ke ödrin e o but kö Jakob a kamödrin hnyi hnyei Kanana, me ödrin e thumeto e ge ta je ûnyi hia ame o but ködrin, ka habe, 30 Ame fuc hwege köhmun at, wale thaniny hnyei, me ha, öhmun e ecmâkâ hnyei. 31 Ke haingöhmun kâu, ka habe, Öhmun e hnathu, öhmun e ca ecmâkâ hnyei: 32 öhmun je liamekeiny a twelv, ke khaca thibi kamöhmun; a hia but ke at, ke haba wakeiat hmönyin e unyin kamöhmun hnyi bong ang hnyi hnyei Kanana. 33 Ke ame ha köhmun at, wale thaniny hnyei, ka habe, Walang haten m' inye he ka wâhmakhmetoâ a öbun e hnathu, hnen biju ang unyik ke at gabun je liamekeiny ke hok ö 'bun dö ka anyibun je lap ae mekihnânem, ke he th' öbun: 34 ke hom dö kõnya keibun wakeiat hmönyin: ke wale oge me he ka wâhwa-khmetoâ a öbun e ca he ka ecmâkâ hnyei, k' öbun je hnyat ae hnathu: ke oge me he ka ham hmetu köbun liamekeiny möbun, me öbun e he ka úcû hnyi hnyei. 35 Ke ödrin e ve hingâlâ önyen tangödrin je tang, ke wâ bi, ve e bi hnyi tangödrin je tang anyidrin je tang mone; ke ödrin e wâ me kamödrin anyidrin je tang mone, m' ödrin e ot. 36 K' ame ha ködrin Jakob a kamödrin, ka habe, Öbun hnyat öbun e ohia lakuk: a hiö Josefa but, ke hiö Simeona but, k' öbun e he minya ju ka hum Beniamina: hnân okongu nya ta je ûnyi hia thithö eling. 37 Ke haingö Reubena ka kamen, ka habe, U ma he ka hlingâ lakuk li бага, iny ka ca hom hmetu e köu: hna but e ka hnyi hnyamök, ke oge me he ka hmeto e köu. 38 Ke e ame ha, ka habe, Ame ca he nökkuk ka tha he möbun; anyin a mokcu keiny, ke hake biju e: ke a ne o but kong kâu eû hnyi gethen öbun e he, me öbun e he ka otengiö nya k' iny hûen dut ke ne o but ka hnyi erkemok.

## HNYIMAKAN 43.

**K**E gan hmâ but hmiâ hnyi hnyei. 2 Ke ödrin e hia but han hwit waleji ödrin e hom úheny Aigupito, me ame ha ködrin kamödrin, ka habe, He hmetu th' öbun ka úcú ö 'tin. 3 Ke haingö Juda kâu, ka habe, A hûna hwegiâ köhmun hnen at, ka habe, Ca he hmetu öbun ka iohnyimak mönya e ka hia unyibun keibun. 4 U je ne he ka tha kunâ möhmun keihmun, m' öhmun e he ka he me úcú âm ; 5 k' u je ne ca he ka hnyi kunâ e, m' öhmun e ca he ka he kâ e : anyin a haingen at köhmun, ka habe, Öbun e ca he ka iohnyimak mönya e ka hia minya unyibun keibun. 6 Ke Isaraela ame ha, ka habe, Ieú gabun öbun e okongu nya, me haimemenâ ka at a g' ame hu keibun biju ang? 7 Ke ödrin e thu, ka habe, A hnö win gahmun hnen at me jelahanöhmun, me ha, Hawa, e tiga möt kamöbun? ke e hu keibun biju eiö? m' öhmun e thu kâu hoton ta je únyi eling : anyin ae ca khanöhmun a g' ame he ka ha, ka habe, He th' öbun ka hom keibun? 8 Ke Juda ame ha kö Isaraela a kamen, ka habe, Hna but kõnya da, k' öhmun e he ka tha he ; m' ötin e möt, me ca mok, öhmun, möu, me je lakutin. 9 Oge me he ka bi singiny ; k' u ma he ka elâm e unyik : iny ka ca he ka hom hmetu e köu, me ip hnyi hnyimákâm, e so e takú nya konginy nyiele balua : 10 anyin adre ne ca ovheli öhmun, m' öhmun e ne hmetu but ang aloiny. 11 K' ame ha ködrin hnö Isaraela a kamödrin, ka habe, Hawe, a ne helâe, walang hnöbun hna he ka ânyâ, hom dö hnyi tangöbun je tang ta je wan ae únyi hnathu hnyi hnyei, ke hom dö ka at ta je bwihlany, wale tap basama, me tap hani, me setura, me muro, me je betuni, me je saked : 12 ke hom dö je tang mone a usa lo hnyi je hnyamöbun ; ke haba je mone adre hitangen hnyi hnyimen tangöbun je tang, hom hmetu thö hnyi je hnyamöbun ; wâ adre nye ânyâ monoâ : 13 ke hom minya thö keibun, me todrö, me he hmetu th' öbun ka at : 14 ke so e he Khong Aekhanahia ka okúâ köbun betenge hnen at me me tha kunâ möbun liamekeiny möbun me Beniamina minya. K' adre ne ohia lakuk, hawe, iny kong ut.

15 Ke a hom je bwihlany eling hnen tavat, m' ödrin e hom je mone, úsa lo li tang hnyi je hnyamödrin, tha ödrin me Be-

niamina ; k' ödrin e tot me he Aigupito ai, me tha tot hnyi hnyimakö Josefa. 16 Ke Josefa ame ö Beniamina unyidrin, me ame ha ka at ame tuö hnyaban, ka habe, Su thö tavat eang ka hnyi uma, me hlingö meno, me penapena ; anyin ödrin e he ka tha han mönya eâu jebigösa. 17 Me ame ânyâ hnen at helâ me hna ha hnö Josefa ; me hum ödrin ka hnyi uma umö Josefa. 18 K' ame ot je hnyat anyin adre me su ödrin ka hnyi hnyaba Josefa ; k' ödrin e úhaköu ka habe, Can je mone adre hitangen hnyi tangötin je tang hnyi úen a bân, m' adre me su ötin kâang ; me me he ka heleú can gatin, me ut kötin, he ka hom hwenb' ötin, me haletin je asina. 19 K' ödrin e he ka at ame tuö hnyaba Josefa, me úhuenamö mē hnyi hwanumen uma, 20 me ha, ka habe, Than lö, öhmun e bân ka he jem ehac ka úcú jeú : 21 ke öhmun e o but ka hnyi omtabaga, me öhmun e khöng ut tangöhmun je tang, ke wâ bi, e ve e anyihmun je mone hnyi hnyimen tangöhmun je tang, wale anyihmun je mone ae bekhöt : k' öhmun e hom hmetu ang hnyi je hnyamöhmun. 22 Ke öhmun e hom walang ang ke je mone hnyi je hnyamöhmun he ka úcú jeú : e ca manen köhmun ie at ame hitangen hmetu anyihmun je mone hnyi tangöhmun je tang. 23 Ke haingen ködrin, ka habe, Öbun so, ca ot : hnen Khongubun, a Khongon kamöbun hna ham köbun tang omjeú hnyi tangöbun je tang : oge hia but kap anyibun mone. Ke e ame hum Simeona but ködrin. 24 Ke haba at ame hom je hnyat ka hnyi uma umö Josefa, me ham ködrin utköö m' ödrin e hneú je li cadrin ; k' ame hân haledrin je asina. 25 Ke ödrin e penapena ta je bwihlany hobi kâu e ka o Josefa hnyi jebigö : anyin a ödrin e löng a ödrin e he ka hnyi han eling. 26 Ke a o but Josefa ka hnyi uma, m' ödrin e hom kâu eiö hnyi uma anyidrin je bwihlany, me ödrin e nom ju hnyikânâi kâu. 27 Ke e ame hnei ödrin ge anyidrin sot, me ha, ka habe, Hawa, e hwege kamöbun, waleji hingat öbun e ha? hawa e möt balua e? 28 Ke ödrin e thu, ka habe, E hwege athnyabaem a kamöhmun, k' e möt balua. Ke ödrin e nom je bödrin me iâú. 29 Ke e ame bwele me ö Beniamina a keiny, a tha hinyen mē, me ha, ka habe, Wale keibun wakeiat hmönyin, waleji öbun e ha kõnya? Ke haingen, ka habe, Nokuk lö, e so Khong ame he ka betenge gam. 30 Ke Josefa ame he mweimwei ; anyin a e gan hmâ anyin

GENESE 44.

ibetengiö ka keiny : k' ame heleü dok he ka tenge hnyin ; me e ame didrut ka hnyi hnyeulen me tenge eling. 31 Ke e ame osüa hnyimakan, me dit hmetu but me hokhnyok me ha, ka habe, Laulau but. 32 K' ödrin e ve laulau hobi kâu, me hobi ködrin, me hobi kâu hnyat Aigupito ödrin e tha han mē, anyin ae kap ka at Aigupito he ka tha hau me at Heberu ; anyin ae ikiki ka at Aigupito únyi e. 33 K' ödrin e laba gaga hnyi hnyimakan, wale atö ke ne o but ka wakeiat hnyi je ve hnödrin bi : ke haba hnyat ödrin e uthmok. 34 Ke e ame kunâ ködrin ta je tap jeü únyi gan : ke gan hmâ hna haö Beniamina hudrin a othabúng. K' ödrin e ic me tha senyin mē.

HNyimakan 44.

**K**E e ame huna ka at ame tuö hnyaban, ka habe, Ünöngötâ ju ta je tang tangen je hnyat ge jeü, me me hmak ka hijen, ke ve hitangen ju anyidrin je mone hnyi hnyimen je tang. 2 Ke hitangen ju anyik kaia, wale kaia sileva hnyi hnyimen tang tangen wakeiat, me mone hwaban ân tang jeü. K' ame ânyâ helâ me hofuc ho Josefa. 3 Ke a lany jut, e ame kunâ je hnyat, ödrin me haledrin je asina. 4 Ke ödrin e he but ûhedrin hnyi taun, k' ödrin tiga ca sâkâü, me Josefa ame ha ka at ame tuö hnyaban, ka habe, Todró, wadring dö hoton je hnyat, ke u ka hom til' ödrin, ha thö ködrin, ka kabe, Ieü gabun öbun e bi hwaban so hnen kong? 5 Hawa, ca e únyi ic anyin anyik than, me anyin únyi hnân kikite? e kong hnöbun hna ânyâ. 6 Ke e ame hom til' ödrin me ha ködrin je hofuc eling. 7 Ke haingödrin kâu, ka habe, Than ame ha hofuc eling geü? Ohe e ca khan' öhmun je athnyabaem he ka ânyâ únyi e. 8 Wâ bi, haba je mone öhmun e wâ hnyi hnyimen tangöhmun je tang, me öhmun e hom hmetu köu úheny hnyi hnyi Kanana : hawe, öhmun a kâmaü ka venâu sileva me gol únyi hnyi uma umen tuhâm? 9 Ke adre ne wâ unyin ke at gahmun a je lathnyabaem, me ame he ka mok, k' öhmun e he biju ka bi lathnyabainy than. 10 Ke haingen, ka habe, E so e he ka helâ me hobun hofuc ; ka habe, Eka wâ thö e unyin ke at, me ame he ka bi athnyabaik ; k' öbun e he biju ka wisa. 11 K' ödrin e ie hom but tangödrin ta je tang hnyikânâi, me ve khöng tangödrin je tang. 12 Me e ame hwân ka elâm unyin atö ke ne

o but ka wakeiat : k' adre wâ ju kaia hnyi tang tangö Beniamina. 13 Me ödrin e kia anyidrin je úkhaü me ve ip hmetu je hok hnyi haledrin je asina, me hmetu ka hnyi taun. 14 K' ame o but Juda me je liamekeiny mē ka hnyi uma umö Josefa ; ke tiga e e : k' ödrin e ta ju hnyikânâi hnyi hnyimakan. 15 Ke haingö Josefa ködrin, ka habe, Ie únyi ang öbun e ânyâ? e ca khan' öbun a inya ang at ae tren kikite? 16 Ke Juda ame ha ka habe, Than lö, öhmun e he ka thu ieü? ke ieü öhmun e he ka ha? k' öhmun e he ka kâmaü hna haiwisai öhmun? A hia but Khong omanenâ konginy je lathnyabaem : wâ bi öhmun je hwenbâ anyin than, wal' öhmun ang, me at minya adre wâ gan kaia. 17 Ke haingen, ka habe, Ohe, ame ca he ka helâe : ke haba at adre wâ unyin kaia e ame he ka hwenbâ unyik ; ke haba öbun, he th' öbun me hmanenang ka kamöbun.

18 Me haba Juda ame hakekeny kâu, me ha, ka habe, Than lö, ö u hnö nya a athnyabaem he ka ha ong hofuc ka hnyi li hnyikönyen than, ke ca he ânyam hmönyin ka palulu ka athnyabaem : anyin a u úcü me Farao. 19 Hnen than hna hnei öhmun je lathnyabaem, ka habe, Hawa, e hu kamöbun, me keibun? 20 Ke öhmun e thu ka than, ka habe, E hu kamöhmun, a hingat, me nokon hingat a e a wakeiat at ae úlhyûkong ; ke a moku tuhan, ke hake e biju nokon hinyen, k' ame betenge gan hnen kamen. 21 K' u je ha köhmun a je lathnyabaem, ka habe, Hom but könya me inye he ka wâ e. 22 K' öhmun e ha köu than, ka habe, E ca khana da he ka hna kamen : anyin a ne hna kamen ; me ame he ka mok. 23 Ke u je ha köhmun lathnyabaem, ka habe, A ne ca tha o möbun keibun a wakeiat, ca he hmetu öbun ka iohnyimak mönya. 24 Ke öhmun e o but ka kamöhmun a athnyabaem, me öhmun e thumeto e ge hwâm hofuc, than. 25 Ke kamöhmun ame ha, ka habe, He hmetu th' öbun ka úcü ö 'tin. 26 Me haingöhmun, ka habe, E ca khan' öhmun he ka he : e ka he unyihmun keihmun a wakeiat, öhmun e he ka he : anyin ae ca khan' öhmun he ka iohnyimak me at eling, e ka hia bi unyihmun keihmun a wakeiat. 27 Ke haingö cica athnyabaem köhmun, ka habe, E khan' öbun a ga hnokoâ hnen öiök lo lakuk li бага : 28 k' ame he but gak ke at, ke haingök, ka habe, A hia but oloú usu kia e ; k' oge me ca wâ hmetu e : 29 ke öbun e ne hom minya at ang

GENESE 45.

unyik, k' ame ne o but kâu kong, m' öbun e he ka otengiö nya, k' oge hûen dut, ke ne o but ka hnyi erkemok. 30 Ke walang ang iny ka o kö cica athnyabaem, ke hia biju gahmun da; anyin adre úhúkálákouá anyin möt me möt anyin da; 31 ke e ka wâ but ae hia biju gahmun da, me e ame he ka mokcu: k' ame he je lathnyabaem ka otengiâ athnyabaem a kamöhmun ke hûen dut ke ne o but ka hnyi erkemok. 32 Ke haba inya athnyabaem singiny da hobi kö cica, ka habe, Oge ne ca he ka hom hmetu e kâu, ame he bala ka jönik ga cica nyiele balua. 33 Ke walang ang than lö ö u hnö nya a athynabaem ka laba biju, a bâ, me hwaban da; ke so e tha he thö da me latuhan. 34 Anyin oge ma kâmâu ka he kö cica ke hia biju unyik da? wâ inye wâ thö kong ame he ka o kö cica.

HNYIMAKAN 45.

**K**E ca khanö Josefa hmetu he ka hkhnyok hnyi hnyimaködrin hia adre me tot unyin; me ame hongot, ka habe, Kunâ but unyik tavat hia. Ke Josefa ame omanená e bi ka je liamekeiny mē, ke ba ke at biju unyin. 2 Ke e ame tenge hwege göranyai: k' ame löng at Aigupito, k' ame löng minya lap anyi Farao. 3 Ke haingö Josefa ka je liamekeiny mē, ka habe, Inya Josefa; hawa e möt cica? Ke ca khana je liamekeiny mē he ka thu kâu, anyin ödrin e uthmok gan. 4 Ke Josefa ame ha ka je liamekeiny mē, ka habe, Hok ju jem öbun könya. M' ödrin e hakekenyâ. Me ame ha, ka habe, Inya Josefa liamekeiny möbun, waleji at öbun e úco kâang Aigupito ai. 5 Ke walang ang ca hmak je hnyekubun, ke ca tenge can anyibun monu, hnyi hnöbun hna úcú nya kâang; anyin a Khong ame kunö nya bán inya hnân úhömeli. 6 Anyin a lo but li hunainy hmiâ ang hnyi hnyei: ke thabúng biju ta huna ke ba hmetu trohnen me menu. 7 Ke Khong ame kunâ bán inya he ka tu' öbun a kolon biju hnyi hnyei, me he ka omeli öbun hnen úhömeli ae gan. 8 Anyin öbun e ca kunö nya jem, ke hnen Khong: ke a hia but otilö nya hnân kamö Farao, me thaniny hnyaban hia, me at musi hnyei Aigupito hia. 9 Ie he th' öbun kö cica, me ha kâu, ka habe, Walang hna ha hnö Josefa a nokom, ka habe, A hia but Khong otilö nya hnân thaniny hnyei Aigupito hia thithö: he but jem könya, ca

bec: 10 ke u ma he ka labā hnyei Gosená, m' u ma hakekenyi nya, u me je lakom, me je laöbem, me halem je hnahat mamoe, me halem je kau, me ányâm ta je úuyi hia thithö: 11 k' oge me he ka tuö u eling, anyin a thabúng biju je hunainy hmiâ; wâ u nye theduoc, me ányâm lap, me ányâm ta je únyi hia. 12 Ke wâ bi, ame wâ li emaköbun, me li emakö Beniamina a keik, a g' ame fuc köbun hnen hnyimök. 13 Ke öbun e he ka thumetu cica ge anyik hmanenang hia hnyi Aigupito, me ta je únyi hia öbun e wâ: ke ie su cica but jem. 14 Ke e ame ta ju hon nyi Beniamina a keiny, me tenge, ke Beniamina ame tenge hon nyin. 15 Ke e ame úcimhnyimak me je liamekeiny mē hia, me tenge ködrin: ke hwaban e haba je liamekeiny mē ödrin e úhnenamö me.

16 Ke adre me löng hnyi hnyaba Farao, ka habe, A o thö je liamekeiny me Josefa: ke haba Farao me lathnyabainy ödrin e senyin. 17 Ke haingö Farao, kö Josefa, ka habe, Ha thö ka je liamekeiny möu, ka habe, Walang únyi öbun e ha ka ányâ, bi hokâ ju hon halebun je meno, ke he th' öbun ka hnyi hnyei Kanana; 18 me hom dö kamöbun me anyibun je lap jem könya: ke oge me he ka ham köbun soiny hnyei Aigupito, k' öbun e he ka han pipikhenyainy hnyei. 19 Ke walang ang, oge me hûna köu únyi öbun e he ka ányâ; hom dö je úkat hnyi hnyei Aigupito hobi kâu je lakubun ae úhnyúkong, me je laöiöbun, ke hom but kamöbun me he jem. 20 Ke ca únykúme bi anyibun ta je únyi; anyin a hobi köbun soiny hnyei Aigupito hia. 21 K' ame ányâ helâe hnen je laku Isaraela: ke Josefa ame ham ködrin ta je úkat hoton hna hûna hnö Farao, k' ame ha kamejidrin hobi kâu gethen. 22 Ke e ame ham ködrin hia úsa lo je úkhaú; ke e ame ham kö Beniamina kun ta haded sileva, ke thabúng ta úkhaú. 23 Ke walang hnen hna kunâ ka kamen, libenyita je asina, adre bi hokâ ge ta je únyi ae so hnyi Aigupito, ke libenyita ta je asina momo adre bi hokâ hnen hwit, me areto, me kamejin kamen eú hnyi gethen. 24 Ke e ame kunâ je liamekeiny mē, m' ödrin e he but: ke haingen ködrin, ka habe, Ca he öbun ka ú eú hnyi gethen. 25 Ke ödrin e he but úheny Aigupito me o hnyi hnyei Kanana unyi Jakob a kamödrin. 26 Ke ödrin e thumeto e ka habe, E tiga möt Josefa, ke e at ame musö hnyei Aigupito

GENESE 46.

hia. K' ame hmak hnyekon, anyin a e ame ca köp ödrin. 27 Ke ödrin e thumeto e ge ta je únyi hia ame ha Josefa ködrin : ke e ame wá je úkat a kuná Josefa hnân taben bi, me ame möt hmetu thö hnyeku Jakob a kamödrin : 28 ke haingö Isaraela, ka habe, E úcú, e tiga möt bi Josefa nökek : oge me he ka he me iouny me k' iny tiga ca mok.

HNYIMAKAN 46.

**K**E Isaraela ame he me anyin lap hia, me o hnyi Bere-seba, me hudo eling je hut ka Khongu Isaaka a kamen. 2 Ke Khong ame ha kö Isaraela hnyi hna omanená hnyi hnyinghet, ka habe, Jakob, Jakob lö. Me e ame ha, ka habe, Inya ang. 3 Ke e ame ha, ka habe, Inya Khong, a Khongon kámâm : ca ot he ka he Aigupito ai ; anyin oge me he ka wiö u eling me hnyei ae gan : 4 oge me he ka tha he möu Aigupito ai ; k' oge me he bi nya ka hum u hmetu úheny e : k' ame he Josefa ka hlec li emákâm. 5 Ke Jakob ame he thö úheny Bere-seba : ke je laku Isaraela adre me hum Jakob a kamödrin, me lakudrin ae úhnyükong, me je laöiödrin hon je úkat ame kuná hnö Farao me hnân tabödrin. 6 Ke ödrin e hom miunya haledrin ta je hnahat, me tang omjedrin waleji ae hu gadrin hnyi Kanana, me o Aigupito, wale Jakob me anyin lap hia a tha e me : 7 je lakon obaga, me laöbiny obaga, a tha e me, me je lakon wahu, me je laöbiny wahu, me mátrániny hia thithö ame tha he me Aigupito ai.

8 Ke walang je ien laku Isaraela ödrin e o Aigupito, a Jakob me lakon obaga : jia Reubena nöku Jakob a atö. 9 Ke haba je laku Reubena ; jia Enoka, me Palu, me Hezerona, me Karemi. 10 Ke haba je laku Simeona ; jia Jemuela, me Jamina, me Ohada, me Jakina, me Zohara, me Saulo nokon momo Kanana. 11 Ke haba je laku Levi ; jia Geresoma, me Kohatha, me Merari. 12 Ke haba je laku Juda ; jia Era, me Onana, me Sela, me Farez, me Zera : ke a moku Era me Onana hnyi hnyei Kanana. Ke lo li laku Farez, jia Hezerona me Hamula. 13 Ke haba je laku Isakara ; jia Tola, me Pua, me Jobu, me Simerona. 14 Ke haba je laku Zebulona ; jia Sereda, me Elona, me Jalela. 15 Wale je laku Jakob hnö Lea hna hnokoá hnyi Padanarama, me Dina a nokon hlu ;

ke haba hnyat hia thithö je lakon obaga me wahu, me, ödrin thöte theri. 16 Ke haba je laku Gada ; jia Zifiono, me Hagi, me Suni, me Ezebona, me Eri, me Aroda, me Areli. 17 Ke haba je laku Asera ; jia Iemina, me Ieseva, me Iesevi, me Beria, me Sera a hanidrin : ke lo laku Beria ; jia Heberu, me Malekiela. 18 Wale je laku Zilepa hnö Labana hna ham kö Lea a nokon, k' ame hnokoá me Jakob, ödrin sikstin. 19 Ke haba li laku Rakela öiö Jakob ; jia Josefa me Beniamina. 20 Ke adre hnokoá lo laku Josefa hnyi hnyei Aigupito, jia Manase me Eferaima, wale hnö Asenatha nöku Potifera, at bihut hnyi Ona. 21 Ke haba je laku Beniamina ; jia Bela, me Bekera, me Asebala, me Gera, me Naamana, me Eki, me Rosa, me Mupima, me Hupima, me Areda. 22 Wale je mátráni Jakob me Rakela, haba hnyat hia, me, fortin. 23 Ke haba nöku Dana ; jia Husima. 24 Ke haba je laku Nafatali ; jia Jazela, me Guni, me Jezera, me Silema. 25 Wale je laku Bila hnö Labana hna ham kö Rakela a nokon, k' ame hnöku ödrin je laku Jakob : ke haba hnyat hia, me, ödrin seven. 26 Haba tavat hia a tha he me Jakob Aigupito ai, wale a hnokoá, ke ca ha bi je laúngú Jakob, me, ödrin sikste siks hia thithö ; 27 ke lo laku Josefa e ame hnokoá hnyi hnyei Aigupito : k' ödrin sevente tavat hia hnyi lap anyi Jakob, wale tavat ödrin e o hnyi hnyei Aigupito.

28 Ke e ame kuná báná Juda kö Josefa me me he ka kú Gosena káu ; me ödrin e o but hnyi hnyei Gosena. 29 Ke Josefa ame penapena anyin kariota, me he Gosena ai he ka iouny me Isaraela a kamen ; ke ödru me iouny dö, me Josefa ame ta ju hon nyin, me tenge beú hmá hon nyin. 30 Ke haingö Isaraela kö Josefa ka habe, Hnö nya but walang ang he ka mok, anyin oge wá thö hnyimákâm a u möt. 31 Ke Josefa ame ha ka je liamekeiny mē, me lap anyin kamen, ka habe, Oge me he ka thumetu Farao, me ha káu, ka habe, A o thö könnya je liamekeiny mönya, me lap anyi cica úhedrin hnyi hnyei Kanana ; 32 k' ödrin je hnyat tuö mamoe, anyin a odrin hnyat tuö omeno ehac ; k' ödrin e hia but hom je hnahat mamoe a haledrin, me je hnahat kau, me anyidrin ta je únyi hia. 33 Ke e ka he Farao ka haö 'bun, me hnei öbur, ka habe, Ieú huliwa a öbun khenen káu ? 34 me öbun e he ka ha, ka habe, Öhmun lathnyabaem hnyat tuö meno hwân hnyi

GENESE 47.

hidröu a öhmun ke ne o but walang ang öhmun me lakamöhmun : m' öbun e he ka laba hnyi hnyei Gosena ; anyin a at Aigupito adre me ikikiâ hnyat tnö mamoe.

HNYIMAKAN 47.

**K**E Josefa ame he me thumetu Farao, ka habe, A o thö cica me je liamekeiny mönya, me haledrin je hnahat mamoe me haledrin je hnahat kau, me anyidrin ta je ünji hia ünyi hnyi hnyei Kanana ; ke wâ bi, ödrin dut hnyi hnyei Gosena. 2 Ke e ame hom ke je liamekeiny mē, a ödrin tha-bûng, me hum ödrin ka hnyi hnyimakö Farao. 3 Ke haingö Farao ka je liamekeiny mē, ka habe, Ieü öbun e khenen kâu ? Ke haingödrin kö Farao, ka habe, Öhmun hnyat tuö mamoe a lathnyabainy, öhmun me lakamöhmun. 4 Ke haingödrin kö Farao, ka habe, Öhmun e o but he ka laba kanyua hnyi hnyei ; anyin ae ba an je hnahat haleny lathnyabaem ; anyin ae gan hmâ hmiâ hnyi hnyei Kanana : ke ö u he walang ang ka hn' öhmun a lathnyabaem ka laba hnyi hnyei Gosena. 5 Ke Farao ame ha kö Josefa, ka habe, A o thö köu kâmâm me je liamekeiny möu : 6 waleü hnyei Aigupito hnyi hnyimâkâm ; olabâ ju kâmâm me je liamekeiny möu hnyi kânâ ae hoso ; e so ödrin e laba hnyi hnyei Gosena : ke e ka khanö u ke je hnyat ae meta unyidrin, otil' ödrin dö he ka musi hnyi ta je hnahat a halek. 7 Ke Josefa ame hum Jakob ame hahnahici Farao. 8 Ke haingö Farao kö Jakob, ka habe, Ve but ta je bonginy hunaiâm ? 9 Ke Jakob ame thu kö Farao, ka habe, Khaca haded me thöte ta je huna oge me he kanyua hnyin ; wakhalet thibi me kong ta je hunainy möt a inya, ke ca tha ücü me je bonginy hunainy möt anyin lakamök hnyi je bonginy hnödrin hna he kanyua hnyin. 10 Ke Jakob ame hahnahici Farao, me he üheny unyi Farao. 11 Ke Josefa, ame olabâ kamen me je liamekeiny mē, me ha gadrin hnyi hnyei Aigupito, hnyi kânâ ae hoso, hnyi hnyei Ramese, helâ me hna hûna hnö Farao. 12 Ke Josefa ame han kamen, me je liamekeiny mē, me lap anyin kamen hia ge areto, hoton anyidrin je lap.

13 Ke ba areto hnyi hnyei hia ; anyin ae gan hmâ but hmiâ ; ke mat ut hnyei Aigupito me hnyei Kanana hnen hmiâ. 14 Ke Josefa ame ükhacaköuâ ta je mone

hia ünyi hnyi hnyei Aigupito me ünyi hnyi hnyei Kanana, hwaban je hwit adre me üco : ke Josefa ame hom ta je mone ka hnyi uma umö Farao. 15 Ke ba but mone hnyi hnyei Aigupito me hnyei Kanana, me ame he but at Aigupito hia kö Josefa me ha, ka habe, Ö u ha öhmun : anyin a ieü öhmun e he ka mok hnyi hnyimâkâm ? anyin ae ba but mone. 16 Ke haingö Josefa, ka habe, Hom but jem halebun ta je meno ; ke oge me he ka ha öbun hwaban halebun ta je meno e ka ba but mone. 17 Ke adre me hom kö Josefa haledrin ta je meno : ke Josefa ame ham ködra areto hwaban ta je hors, me je mamoe, me kau, me je asina : ke e ame ha ödra ge areto hnyi huna eling hwaban haledra je meno. 18 Ke a um dö huna eling, me adre me o but kâu hnyi huna a loiny, me haingödra kâu, ka habe, Öhmun e ca he ka ikhâlâ gam than a e ba but anyihmun mone ; ke e but unyâm than halehmun ta je meno ; ke ba hmetu ke ünyi a anyihmun hnyi hnyimâkâm than, ke so bi je unyihmun me ihmun je hnyei : 19 ke anyin a ieü öhmun e he ka mok hnyi hnyimâkâm, öhmun me je ihmun ? ücü öhmun dö me je ihmun hwaban areto, ke haba öhmun me je ihmun ame he ka bi athnyabai Farao : ke ha hanihmun me öhmun e he ka möt me ca mok, me me ca he ka iny wau kânâ. 20 Me Josefa ame üco ta hnyei hia hnyi Aigupito hobi kö Farao ; anyin ame ve üco hnen at Aigupito ta je idrin, anyin ae gan hmâ hmiâ unyidra : me me i Farao but kânâ. 21 Ke e ame hom tavat ka hnyi je taun ünyi hnyi ke hnyigöulen Aigupito ke ne o but ka hnyi ke hnyigöulen. 22 Ke e ame ca üco hnyei iny tavat bi hut : anyin a hnö Farao hna khenâ hwajekhön tavat bi hut, k' ödrin e han jekhöu Farao ame ham ködrin ; waleling m' adre me ca üco idrin. 23 Ke Josefa ame ha ka tavat, ka habe, Wâ bi, oge hia but ücü öbun me je ibun hnyi bong ang hobi kö Farao : wâ bi, walang ang ta je hanibun, he th' öbun ka belökâ kânâ. 24 Ke e ka hwenying ut, öbun e he ka ham kö Farao je ke keihen a thabûnginy, ke baba vak ta ke keihen me hobi köbun, hnân haniny hnyei, me hnân ö'bun, me anyibun je lap, me an je wanakat unyibun. 25 Ke haingödrin, ka habe, U je hia but omeli öhmun ; ö u betenge gahmun than, k' öhmun e ka bi athnyabai Farao. 26 Ke Josefa ame otilâ ünyi eling hnân hnanyibu



hnyi hnyei Aigupito ke ne o but hnyi bong ang, ka habe, Hobi kö Farao ta je ke keihen a thabúnginy ; ke ca helâe ta hnyei iny tavat bi hut, ca i Farao bi e. 27 Ke Isaraela ame labâ hnyei Gosenâ, hnyi hnyei Aigupito ; ke hu idrin eling, k' ödrin e hát me si gan hmâ.

28 Ke haba Jakob ame laba hnyi hnyei Aigupito seventin ta huna : ke haba je bongu Jakob, wale hunainy anyin möt hia, me, khaca haded ke fâte seven ta je huna. 29 Ke hakekeny jut úen ame he Isaraela ka mok ; ke e ame haö Josefa e nokon, me hûna kâu, ka habe, U je ne betenge gak, ö u inâ ju hnyamâm hmelen jevak, me ânyâ únyi ae so me hnathu kõnya ; u na ca he ju ka kõnim nya eang Aigupito : 30 ke iny ka tha mokut me lakamök u ma he ka sam nya úheny ang Aigupito, me kõnim nya hnyi anyidrin hna khön komok. Ke e ame ha, ka habe, Oge me he ka ânyâ helâ me hwâm hofuc. 31 Me haingen, ka habe, Khemanyin dö kõnya : me e ame khemanyin kâu. Ke Isaraela ame nom dut hon hageny hna mokut.

HNYIMAKAN 48.

**H**WABAN ta je únyi e, adre me thumetu Josefa, ka habe, Wâ bi e hu mok anyin kâmâm : me e ame hom li lakon Manase me Eferaima. 2 Ke adre me thumetu Jakob, ka habe, Wâ bi, ame he jem Josefa a nokom ; ke Isaraela ame ham hwegien me laba thö hon hna mokut 3 Ke haingö Jakob kö Josefa, ka habe, A manen dut Khong Aekhanahia kõnya ehac hnyi Luza hnyi hnyei Kanana, me hahnahici nya, 4 me ha kõnya, ka habe, Wâ bi, oge me he ka ohâti u me osi u me wiö u, m' u ma je hnyei ae se, ke oge me he ka ham hnyei eang ka ta je mâtrânâm a hwâbâm me me em nyiele balua. 5 Ke walang ang haba li lakom jia Eferaima me Manase adre hnokoâ gam hnyi hnyei Aigupito, k' iny tiga ca o köu eang Aigupito, me ödru li lakuk bi, helâ me Reubena me Simeona. 6 Ke haba je lakom u ma he ka hnokoâ hwabödrü, me ka je lakom bi ; adre me he ka hwenyi iödrin hoton ien je liamekeiny mödrin hnyi je hwajekhöüdrin. 7 Ke haba úhek Padana, me a mokcu Rakela unyik hnyi hnyei Kanana eü hnyi gethen ke hakekeny Eferatha : k' oge me konâm e hnyi deny ka he Eferatha ai, (wale Bethleema). 8 Ke Isaraela ame wâ

laku Josefa, me ha, ka habe, Li ia e? 9 Ke haingö Josefa ka kamen, ka habe, Ödru li lakuk hnen Khong hna ham kõnya eang. Ke haingen, ka kabe, Hum ödru thö jem kö nya m' inye he ka hahnahici ödru. 10 Ke wadröu but li emakö Isaraela, anyin ae hingat ut. Me e ame hum ödru kâu ; ke e ame úcimhnyimak mödru, me delúâ. 11 Ke haingö Isaraela kö Josefa, ka habe, Oge me ca únykúme bi he ka wâ hmetu hnyimâkâm ; ke wâ bi hnen Khong hna omanená kõnya li lakom minya. 12 Ke Josefa ame hum ödru únyi hnyi wanben li boucan me nom ju hnyikânâi. 13 Ke Josefa ame hum ödru lo, jia Eferaima hnyi hnyamen a metân ka hnyi hnyamen a me Isaraela, me Manase hnyi hnyamen a meny ka hnyi hnyamö a metö Isaraela, me lili ödru kâu. 14 Ke Isaraela ame inâ hnyamen a metân me ip hon bö Eferaima a wakeiat, me hnyamen a meny hon bö Manase, k' ame ip metâ li hnyamen ; anyin a atö Manase. 15 Ke e ame hahnahici Josefa, me ha, ka habe, E so ame he Khong, wale hnen lakamök Aberahama me Isaaka hna he hnyi hnyimakan, a Khong waleji at ame ha ök hwân k' iny tiga wanakat ke ne o but hnyi bong ang, 16 waleji angela at ame omeli nya únyi hnyi ta je kong hia, e so e ame ohnahica li thöth ; ke so adre ip hudru iök, me ien lakamök Aberahama, me Isaaka ; ke so ödru me he ka ti si eang hmelen. 17 Ke Josefa ame wâ a kamen ame ip hnyamen a metân hon bö Eferaima, me ame vec hnyekon : me e ame kap göranyai hnyamen kamen he ka hai hon bö Eferaima ka hnyi bö Manase bi. 18 Ke haingö Josefa ka kamen, ka habe, Cica lö, ca helâe, anyin a atö at ang ; ip dö hnyamâm a metâm hon ban. 19 Ke höcö kamen, me ha, ka habe, Nökuk lö, e khanö nya, e khanö nya ; ame he minya e ka bi hnyei, k' ame he minya ka gan : ke so bi ame he ka ti gan keiny hon, k' ame he ta je mâtrâniny ka bi hnyei ae se hia. 20 Ke e ame hahnahici ödru hnyi bong eling me ha, ka habe, Ame he Isaraela ka hahnahicâ gam, me ha, ka habe, E so e he Khong ka wiö u helâ me Eferaima me Manase : ke e ame ip Eferaima me at a bân, ke Manase a biliny. 21 Ke haingö Isaraela kö Josefa, ka habe, Wâ bi, Oge me he but ang ka mok : ke ame he Khong ka tha e möbun, me hum öbun hmetu ka hnyi hnyei lakamöbun. 22 Ke inya oge hia but ham köu ke hwajekhön a khaca hon je liamekeiny möu, waleji

GENESE 49.

oge me hûgûnâ ûnyi hnyi hnyamen at  
Amora ge anyik hele vat me anyik fana.

HNYIMAKAN 49.

**K**E Jakob ame hawâ lakon, me ha, ka  
habe : Ûkhacaköu th' öbun, k' oge  
ame me he ka omanenâ köbun ta je ûnyi  
he ka o köbun hnyi ta je bong a biliny.

2 Ûkhacaköu thö, me löng, öbun je laku  
Jakob :

Ke löng ju kö Isaraela a kamöbun.

3 Reubena lö, u nökkuk a atö, me manik  
man me hwâniny tang hwegiök ;  
Beönuainy hmanenang, me beönuainy  
man.

4 U me bwebwet helâ me köiö, k' u me  
ca he ka beönuu ;  
Anyin a u je ölö ka hnyi hnamokut  
hnen kâmâm ;  
Me okongoâ : e ame he ka hnyi hnök  
hnamokut.

5 Haba Simeona me Levi, ödru liame-  
keiny ;  
Ke haba anyidru li hele vat me hnân  
ûokonguny.

6 Hanuk lö, u ma ca he ka ûne gadru ;  
Soik lö, ca bi hanen hnödrü hna ûkha-  
caköu ;  
Anyin ödre hlingâ at hnyi anyidru  
hmönyin,  
Me sö can bolok hnyi hnödrü hna bi  
gan.

7 E so e mok anyidru hmönyin, anyin ae  
hwege e ;  
Me anyidru wathethot, anyin ae hwege  
oveciny ;  
Oge me he ka ve ip ödru unyi Jakob,  
Me ovesei ödru but unyi Isaraela.

8 Juda lö, ame he je liamekeiny möu ka  
oganö u :  
Ame he hnyamâm ka e hnyi nyin je  
iwahnahmiony möu :  
K' ame he lakon kamâm ka iâu gam.

9 Haba Juda me nokon liona ;  
U me he, nökkuk, ûhem hnyi hanem :  
K' ame mokut me iâu helâ me liona,  
Helâ me liona momo ; ia ame he ka  
bwebwelâ e?

10 Ame ca he ka hia unyi Juda uci nusi,  
Me at bi hnanyibu ûheny hnyi wanben  
li can,  
Ke ne o but ame o Silo ;  
K' ame he ta je hnyei ka löng hoton.

11 Adre me he ka hûkâlâ haleny asina  
hnyi vine,

Me nokon haleny asina hnyi vine ae so ;  
E ame hneú je ûkhaûen hnyi waina,  
Me anyin imano hnyi dren ta je wan  
vine.

12 Ame he ka dra li emakan ge waina,  
K' ame he ka hau nyon hnen dân basin,

13 Ame he Zebulona ka laba hnyi wasaú :  
K' ame he ka khöp unyin ta je hu ;  
K' ame he ka o hnyigöuleu hnyi Zi-  
dona.

14 Asina ae hwege Isakara,  
A mokut hnyi wanben li umen mamoe :  
15 K' ame wâ dok ae so hnân menâ hnyin,  
Me hnyei ae hmanenang ;  
K' ame ham bajebenyin he ka hije hok  
K' ame bi athnyaba hnyi hna khene  
huliwa.

16 Ame he Dana ka owisa iny hnyei,  
Helâ me ke tribu hnyi Isaraela.

17 Ame he Dana ka on eú hnyi gethen,  
Me vaipa hnyi hna cit gethen,  
At ame oloú ohmáiny can ta je hos,  
Me me kölu hoton at ame tabâ.

18 Iehova lö, oge hia but halubahingen  
ânyâm ûhomeli.

19 Ame he ka takû Gada hnen utbavat,  
K' ame he bi e ka hwege hwaban.

20 Ûnyi ga Asera an ae pipikhenya,  
K' ame he ka hu gan hnân an than.

21 Nafatali, aila aidre hna :  
E ame ha hofuc ae so.

22 Josefa, anginy ûö ae wa,  
Anginy ûö ae wâ hnyi an ;  
Ame iâu ta je anginy hon hak veto.

23 Adre ti ovecâ hnen tavat fana  
Me fana kâu, me okongoâ :

24 Ke hwege balua anyin cafana,  
K' adre ohwegiâ li hnyamen me li be-  
nyin,  
Ûnyi ge li hnyamen thani Jakob,  
(Ûheny e at tuö mamoe, wale veto anyi  
Isaraela,)

25 Wale ûnyi ge Khongon kâmâm, at ame  
hadruö u,  
Ke ûnyi ge Ataekhanahia, at ame he ka  
ohnahici u,  
Hnen ta je soiny drany ethö,  
Me soiny dok ae dit eú hnyikânâi,  
Me soiny basin, me hnyekon at ame  
hnokoâ.

26 Haba je hnabic hna ha hnen kâmâm,  
me, gan hmâ  
Hon je hna hahnabicâ hnen je lakamök  
Ke ne o but ka hnyi hnyigöulen je  
bucen nyiele balua :  
Ame he ka ta hon bö Josefa,

GENESE 50.

Wanben ban at waleji adre oúsakáúá me je liamekeiny mē.  
 27 Haba Beniamina, me, luko ame oloú usu kia :  
 Hnyi hnyomakatu e ame he ka han haniny,  
 K' ame he ka khenâ hna hûgúnâ hnyi sa hac.

28 Wale je tribu anyi Isaraela hia a twelw ; ke wale hnen hna ha ködrin hnen kamödrin me hahnabici ödrin ; e ame hahnabici ödrin helâ me úcú ködrin. 29 Ke e ame húna ködrin, me ha ködrin, ka habe, Adre me he ka oúkhacaköuö nya me lakamök : e so öbun e könim nya unyin lakamök hnyi op hnyi utkâna anyi Eferona at Heth, 30 hnyi op hnyi utkânâ hnyi Makepela cicö Mamere, hnyi hnyei Kanana, waleji Aberahama ame úco tha e me utkânâ únyi ga Eferona at Heth, me me utkânâ khön komok ; 31 adre me könim Aberahama me Sara a áiân eling, k' adre konâm eling Isaaka me Rebeka, k' oge konim Lea e : 32 wale utkânâ me op eú hnyin adre úco únyi ge je laku Heth. 33 Ke a um dö Jakob húna ka je lakon, me e ame hwetö li can hnyi hnamokut me hna but hanon, k' adre me ukhacaköuâ e me lakamen.

HNYIMAKAN 50.

**M**E Josefa ame ta hon hnyimakan kamen me tenge hon, me úcimhnyimak mē. 2 Ke Josefa ame húna ka lathnyabainy a je hnyat tren bubun he ka onákâ kamen : k' ame onâki Isaraela hnen je hnyat tren bubun. 3 K' adre um dö je bong a fáti hobi káu e ; anyin a wale je bong adre me oumo hnyin hna onákâ : ke sevente ta je bong hnen at Aigupito hna tengiá e. 4 Ke a um dö ta je bongon hna tengiá e, me haba Josefa ame ha ka lap anyi Farao, ka habe, Öbun e ne betenge gak, ha thö ka hnyi hnyikönyö Farao, ka habe, 5 Cica ame kunö nya he ka khemanyin, ka habe, Wâ bi, oge me he but ang ka mok : ke haba erkemok oge hiny hobi könya bi hnyi hnyei Kanana, u ma he ka könim nya eling. Ke walang ang, ö u hnö nya but ka he me könim cica, m' iny hmetu ju. 6 Ke haingö Farao, ka habe, He thö ka konâm kâmâm, helâ me hnen hna kunö u he ka khemanyin. 7 Ke Josefa ame he but he ka konâm kamen ; k' ame tha he mē lathnyabai Farao hia, a je hingating hnya-

ban, me wahingat hia hnyi hnyei Aigupito, 8 me lap anyi Josefa hia, me je liamekeiny mē, me lap anyin kamen : ke adre hnen biju lakudrin ae úbnyúkong, me ta je mamoe, me haledrin ta je kau, hnyi hnyei Gosena. 9 K' ame tha he me ta je ukariota me tavat adre me tabö hos : ke gan hmâ bunyen. 10 K' ödrin e o but ka hnyi hnahuje hwit anyi Atada, wale hoton Joridano, me ödrin e hnyamok eling me tenge hwege : ke e ame otilâ je bongon hnyamoko kamen a seven. 11 Ke a wâ but tavat aten hnyei, wale at Kanana, a g' adre tenge hnyamok hnyi hnahuje hwit anyi Atada, me ödrin e ha, ka habe, Wale hnyamok ae gan hmâ anyin at Aigupito ; waleling adre me hwenyi ien e Abela-mizeraima, wale hoton Joridano. 12 Ke haba lakon ödrin e ányâ káu helâ me hnen hna húna ködrin : 13 anyin a je lakon ödrin e hom e ka hnyi hnyei Kanana, me konâm hnyi op hnyi utkânâ hnyi Makepela, waleji a úco Aberahama tha e me utkânâ hnân khön komok hnyin, únyi ga Eferona at Heth, cicö Mamere.

14 Ke Josefa ame hmetu Aigupito ai, e me je liamekeiny mē, me ödrin hia adre me tha he mē ka hnyi konâm kamen, hwaban hna konâm kamen. 15 Ke a wâ but je liamekeiny me Josefa a ga mokcu kamödrin, me haingödrin, ka habe, Ame ne he ka he Josefa ka hûkötí' öta, me bi hwaban köta anyitin ta je monu waleji ötin e ányâ káu. 16 Ke ödrin e úkhûnong kö Josefa, me ha, ka habe, Haingen kâmâm ke tiga ca mok, ka habe, 17 Öbun e he ka ha helang kö Josefa, ka habe, Oge me sumató u he ka hna degecâ hulö anyin je liamekeiny möu me hwakecidrin ae kong, anyin a ödrin e ányâ kong köu : ke walang ang, ö u hna degecâ hulö anyin lathnyabainy Khongon kâmâm. Ke Josefa ame tenge hnyi úen ödrin e fuc káu. 18 K' ame he minya je liamekeiny mē me ta ju hnyi hnyimakan, me ha, ka habe, Wâ bi öhmun je athnyabaem. 19 Ke haingö Josefa ködrin, ka habe, Ca ot : hawa, hwaban Khong inya? 20 Ke haba öbun eja ke ne öbun e únykúme ehac he ka okongu nya, haba Khong ame únykúme he ka osoâ bi, me me hwâdá helâ me hnyi bong ang, he ka omelö tavat ae se hia madre me möt. 21 Anyin a wale ca ot : oge me he ka hat öbun, me je lakubun ae úhnyúkong. Ke e ame otubweli ödrin, me fuc menyik ködrin.

## ESODO 1, 2.

22 Ke Josefa ame laba hnyi Aigupito, e me lap anyin kamen: ke möt Josefa khaca haded ke libenyita ta je huna. 23 Ke Josefa ame wâ laku Eferaima ke ne o but ka hnyi dö a kuniny: me laku Makir minya nöku Manase adre hnokoâ me ip hnyi li jevö Josefa. 24 Ke haingö Josefa ka je liamekeiny mē, ka habe, Oge me he but ang ka mok: ke e hnathu ame he Khong ka sen' öbun, me hum öbun únyi

hnyi hnyei eang ka hnyi hnyei e ame khemanyinâ kö Aberahama, me Isaaka, me Jakob. 25 Ke Josefa ame kunâ je laku Isaraela he ka khemanyin, ka habe, E hnathu Khong ame he ka sen' öbun, ke öbun e he ka hom minya je jeiök úheny ang. 26 Ke Josefa ame mokcu, ke haba hunainy me khaca haded ke libenyita je hunainy: ke ödrin e onákâ e, me hitangen hnyi tang hnyi Aigupito.

# ESODO

## TUSI A LOINY ANYI MOSE.

### HNYIMAKAN 1.

**W**ALANG ta je ien laku Isaraela, waleji ödrin e o Aigupito ai; ödrin hia me anyidrin je lap ödrin e tha o me Jakob. 2 Jia Reubena, me Simeona, me Levi, me Juda; 3 me Isakara, me Zebulona, me Beniamina; 4 me Dana, me Natatali, me Gada, me Asera. 5 Haba je hnyat hia a je mâtrâni Jakob, me ödrin sevente: ke Josefa bi hnyi Aigupito. 6 Ke a mokcu Josefa me je liamekeiny mē hia, me dö hia eling. 7 Ke ame dudu me si but ta je lakon Isaraela, me se hia, k' adre me hwege tot; ke unöngötö hnyei gadra.

8 Ke a o thö ke thaniny Aigupito a teb únyi, at ae ca khana Josefa. 9 Ke haingen ka lakeiny, ka habe, Wâ bi, haba tavat únyi ge laku Isaraela, ödra se hia but me hwege huta: 10 ai öbun, ötin e he ka ânyâ metâ ködra; wâ adre nye se but, ke ame ne o thö vat, me adre me he ka utut ka ta je iwahnaihmiony mötin, me tet metâ köta, me kec únyi hnyi hnyei. 11 Anyin a wale, adre me otilâ hudrin ta je tuhan huliwa, hnân he ka oveci ödra ge anyidrin ta je huliwa ae hmak. Ke adre me otilâ li hnyaba hobi kö Farao, Pithoma me Ramese, hnân ip omjeü hnyin. 12 Ke e gan hna okongu ödra, ke gan minya údudui 'drin me si. Ke hmak je hnyekudrin can lakon Isaraela. 13 Ke haba at Aigupito adre me musö hwegiâ je lakon Isaraela: 14 k' adre me oveci ödra hnyi je bong gē ta je huliwa ae hmak, wale drön me veto kânâ, me ta je huliwa hia ae ve man hnyi hnyei,

haba anyidrin ta je huliwa hia adre me musi ödra hwegiödra hnyin.

15 Ke haba thaniny Aigupito ame ha ka li at tuö erkin anyin at Heberu, Sifera ien ke at, ke Pua ien ke at: 16 ke haingen, ka habe, Öbu ka he ka tuö erkin anyin at Heberu, me ö 'drin adre me he ka hnokoâ; ke ame ne baga hlingâ but: k' ame ne hlu, me ame he ka möt. 17 Ke outen Khong li at tuö erkin, k' ödrü me ca ânyâ hna hûna ködrü hnen thaniny Aigupito, k' ödrü me omelö je wainda. 18 Ke haba thaniny Aigupito, ame hawâ li at tuö erkin, me ha ködrü, ka habe, Ieü öbe ânyâ gan únyi e, me omelö je wainda? 19 Ke haba li at tuö erkin ödrü me ha, ka habe, E ca tha úcû omomo Heberu me omomo Aigupito; anyin a ödrin hwege, me ie hnokoâ, ke tiga ca o but ködrin at tuö erkin. 20 Ke Khong ame ohnahicâ li at tuö erkin: k' ame dudu but tavat, me ti se hia hmönyin. 21 Ke haba li at tuö erkin ödrü me outen Khong, me e ame otilâ anyidru li lap. 22 Ke Farao ame hûna ka lakeiny hia, ka habe, Öbun e he ka khûâ ka hnyi wagewe je wainda hia adre hnokoâ, ke omelö ju je waindusem hia.

### HNYIMAKAN 2.

**E**HU ke at hnyi lap anyi Levi ame hom ke hlu a at Levi. 2 K' ame erkin dut momo me hnokoâ da: k' ame wâ momo a e so, me e ame ikhâlâ but hnyi kun ta tehi. 3 Ke ca khana hmetu he ka ikhâlâ e hnen momo, me e ame hom tang

### ESODO 3.

waje hobi kâu e, me botro ge hemara me bilit, me ip wanakat hnyin, me ip ju hnyi samun hnyi baten wagewe. 4 K' ame tot sâkâu haniny, me me wâ ûnyi ame he ka o kâu. 5 Ke ame o but hlu nôku Farao he ka sou hnyi wagewe; k' ame vhenô baten wagewe anyin wahlu; ke ame wâ tang waje hnyi samun, me e ame kunâ ke hlu ka hom. 6 Ke e ame khöng e, me wâ wanakat, ke wâ bi ame tenge wanakat. Ke e ame betenge gan me ha, ka habe, Nokon at Heberu ang. 7 Ke haba haniny ame ha ka hlu nôku Farao, ka habe, Hawa, m' inye he ka hawâ köu ke sangadra ûnyi ge at Heberu he ka hat wanakat hobi köu? 8 Ke haba hlu nôku Farao ame thu kâu, ka habe, He thö. K' ame he but hlu me hawâ hinyen wanakat. 9 Ke haingen nôku Farao kâu, ka habe, Hom dö wanakat eang me hat hobi könya k' oge me he ka bi hwaban köu. Ke haba momo ame hom wanakat, me hat e. 10 Ke gan dut wanakat, me e ame hom e ka hlu nôku Farao, ke nokon dut e. Ke e ame hwenyi ien Mose, ke haingen, ka habe, Anyin a öge hom ûnyi hnyi köiö.

11 Ke haba hnyi je bong wale a gan dut hnyin Mose, me e ame he ka je liamekeiny mē, me wâ anyidra huliwa ae hmak: ke e ame wâ ke at Aigupito ame kot at Heberu a liamekeiny mē. 12 Ke e ame ngengele, ke a wâ but ae ba at, me ame kot moko at Aigupito me ikhâlâ hnyi öny. 13 Ke haba hnyi bong a loiny e ame he hnyöu ai, me wâ bi, li at Heberu ödrü me û, ke haingen ka at ame ânyâ monu, ka habe, Can ieu u me kot hanâm? 14 Ke ame thu, ka habe, La otilö u hnân than me at owisa unyihmun! u me ûnykûme he ka hlingö nya belâ me hnâm hna hlingâ at Aigupito? Ke Mose, ame ot, me habe, E hnathu e manen dut ûnyi eling. 15 Ke e khanö Farao but ûnyi eling, me ame elâm he ka hlingö Mose. Ke Mose ame kec ga Farao, me laba hnyi hnyei Midiana: ke e ame laba ju hon ke an. 16 Ke e hu ge at bi hut hnyi Midiana lakon ta hlu a seven: k' ödrin e o but he ka se köiö me ounöngötâ ta je kumete he ka habelen ta je hnahat mamoe haleny kamödrin. 17 K' ame o but hnyat tuö mamoe me ob' ödrin: k' ame todrö Mose me hadruo 'drin me habelen haledrin hnahat mamoe. 18 K' ödrin e o but kö Reuela a kamödrin, me haingen, ka habe, Ieu gabun öbun e ie o hnyi bong ang? 19 Haingödrin, ka habe, Hnen ke at Aigupito hna

sing' öhmun ge hnyat tuö mamoe, ke ame se köiö minya bi, me habelen hnahat mamoe. 20 Ke ame ha ka lakon je hlu, ka habe, E but ua? ke ieu gabun öbun e hna but at e? He thö ka hawâ e me hnyi han. 21 Ke so kö Mose he ka tha laba me at e: ke ame ham Zipora a nokon hlu kö Mose. 22 K' ame hnokoâ nokon бага, me ame hwenyi ien Geresoma: anyin a haingen, ka habe, Iny atkanyua hnyi ke hnyei bi.

23 Ke hwaban ta je bong e ae se hia, a mokcu than Aigupito; k' ame mâng je lakon Isaraela can hna hwenb' ödra k' adre me hongot tenge, k' ame o but ka Khong anyidra hwatenge can hna hwenb' ödra. 24 Ke Khong ame löng anyidra mâng, k' ame ûnykûme Khong hnen hna ûhihi-nyköu me Aberahama, me Isaaka, me Jakob. 25 Ke Khong ame wâ je lakon Isaraela, me Khong ame wâhmakhmetu ödra.

### HNYIMAKAN 3.

**K**E haba Mose ame tuö hnahat mamoe hale Jethero a ûngon, at bihut e Midiana; k' ame alen hnahat mamoe ka hnyi hoton hnyebuba, me o ka hnyi bucen anyin Khong, wale Horeba. 2 Ke ame manen kâu angela anyi Iehova hnyi bâhlân meic hnyi wanben ûö ae údedö: ke ame wâ, me wâ bi, ame hlâ meic hnyi ûö, k' ame ca aú but ûö. 3 Ke haingö Mose, ka habe, Oge me he walang ang ka saú, me wâ ûnyi ae gan eang, anyin ame ca aú but geú úö. 4 Ke a wâ but Iehova, a e ame saú ka wâ, me haba Khong ame hawâ e ûnyi hnyi úö ae údedö, me ha, ka habe, Mose, Mose lö. Ke haingen, ka habe, Inya ang. 5 Ke ame thu, ka habe, Ca hakekeny bi kâang: uny jut taben li hnyeu cam ûnyi hnyi li cam, anyin a haba dok e u me tot hnyin, me, wale kânâ ae kap. 6 Ke e ame ha minya ka habe, Inya ang Khongon kâmâm, me Khongu Aberahama, me Khongu Isaaka, me Khongu Jakob. Ke Mose ame tube hnyimakan; anyin a e ot ka wâ Khong. 7 Ke Iehova ame ha, ka habe, Inya oge hia but wâ hna okongoâ lakeik walödra hnyi hnyei Aigupito, me löng anyidra tenge ûnyi ge je tuhan anyidra huliwa; anyin ae khanö nya anyidra vec; 8 k' oge me utut ang he ka hûgún' ödra ûnyi hnyi hnyamen at Aigupito, me hum ödra ûnyi hnyi hnyei eling ka hnyi ke hnyei ae so me

au, a hneyi ame di hnyin debai me hane; a hnen at Kanana, me at Heth, me at Amora, me Perizi, me Hivi, me Jebusi. 9 Ke walang ang. wâ bi, ame o but kõnya hwatenge anyin lakon Isaraela: ke haba khaca, oge hia but wâ úkonguny hnen at Aigupito hna oveci ödra. 10 Anyin a wale aiö u, oge me he ka kunö u kö Farao, m' u ma he ka hom lakeik a lakon Isaraela, únyi hnyi Aigupito. 11 Ke haba Mose ame ha ka Khong, ka habe, Iny ia, m' oge me he ka he kö Farao me he ka hom lakon Isaraela únyi hnyi Aigupito. 12 Ke ame ha, ka habe, Inya oge me he ka tha e möu; ke walang haten köu hnyi hnök hna kunö u, ka habe, U ka um dö hom tavat únyi hnyi Aigupito, öbun e he ka bi athnyabainy Khong hnyi hon bucen eang. 13 Ke haingö Mose ka Khong, ka habe, Wâ bi, iny ka o ka je lakon Isaraela me ha ködra, ka habe, A kunö nya köbun Khongon lakamöbun; ke adre me he ka ha kõnya, ka habe, Ia ien? oge ma he ka thu ködra ieu? 14 Haba Khong ame ha kö Mose, ka habe, INYA ANG A E, KE KA INYA ANG: ke e ame ka, ka habe, U ma ha helâng ka lakon Isaraela, ka habe, INYA ANG at a hia but kunö nya köbun. 15 Ke Khong ame ha minya kö Mose, ka habe, U ma he ka ha helâng ka lakon Isaraela, ka habe, A hia but kunö nya köbun Iehova, Khongon, lakamöbun, a Khongu Aberahama, me Khongu Isaaka, me Khongu Jakob; wale iök nyiele balua, ke wale hnân únykümi nya hnyi ta je dö hia. 16 He thö u he ka úkhacaköuá wahingatiny Isaraela, me ha ködra, ka habe, A manen dut kõnya Iehova, Khongon lakamöbun, Khongu Aberahama, me Khongu Isaaka, me Khongu Jakob, me ame ha, ka habe, Inya oge hia but sen' öbun, me wâ ta je únyi adre ányá köbun e Aigupito: 17 k' oge hia but ha a oge me he ka hum öbun únyi hnyi ta je vec hnyi Aigupito ka hnyi hneyi iny at Kanana, me Heth, me Amora, me Perizi, me Hivi, me Jebusi, wale hneyi ame di hnyin debai me hani. 18 Ke adre me he ka löng hwâm: ke u ma he ka tha he me wahingatiny Isaraela ka than Aigupito, k' öbun e he ka ha kâu, ka habe, A hia but iouny möhmun Iehova Khongon at Heberu: ke walang ang, ö u hn' öhmun dut he ka he ka hnyi hnyebuba hnyi kun ta bong, he ka bi hut kö Iehova a Khonguhmun. 19 Ke manen kõnya a g' ame ca he than Aigupito ka hu' öbun, ke so bi hnen hnyamen ae hwege.

20 Ke oge me he ka hai hnyamök me kot Aigupito ge ta je únyi hnân láiiá, wale oge me he ka ányá eling: ke hwabau dö e, e ame he ka hn' öbun. 21 K' oge me he ka okúá ibetengiö ka tavat eang únyi ge at Aigupito: k' öbun ka he but, me öbun e ca he ka he me ba ta je omjeü: 22 k' ame he omomo hia ka ve sumâ:á unyin at ame laba hakekenyi ödra, me unyin tavat adre me tha laba hnyi umödra ta je uma, je hmanenanginy sileva, me je hmanenanginy gol, me je úkhaú: k' öbun e he ka otheibá lakubun obaga me wablu; m' öbun e he ka öba omjeüiny hneyi Aigupito.

## HNYIMAKAN 4.

**K**E haba Mose ame thu me habe, Wâ bi adre me ca he ka köp nya, me löng ifucik: anyin adre me he ka ha, ka habe, A ca manen köu Iehova. 2 Ke haba Iehova ame ha kâu, ka habe Ieü e hnyi hnyamâm? Ke ame ha, ka habe, Uci. 3 Me haingen, ka habe, Khúá but hnyikânái. K' ame klúá but hnyikânái, me ame on dut; ke Mose ame kec gan. 4 Ke Iehova ame ha kö Mose, ka habe, Iná but hnyamâm ka hom obiny: (ke ame iná but hnyamen me hom, k' ame uci hmetu but hnyi hnyamen:) 5 m' adre me he ka kap a ga manen köu Iehova, Khongon lakamödra, Khongu Aberahama, me Khongu Isaaka, me Khongu Jakob. 6 Ke Iehova ame ha minya kâu, ka habe, Iná but hnyamâm ka hnyi úláiiám. Ke ame iná hnyamen ka hnyi úlainy: me oc hmetu but, ke wâ bi, a lepera but hnyamen, ke hau helâ me kiona. 7 Ke ame ha, ka habe, Ina hmetu ju hnyamâm ka hnyi úláiiám. (K' ame iná hmetu but hnyamen ka hnyi úlainy; ke ame oc hmetu but e únyi hnyi úlainy, me wâ bi, e so hmetu but helâ me unyin.) 8 Ke adre me ne ca köp u, me löng hoton haten a bán, adre me he ka löng hoton haten a bilany bi. 9 Ke adre me ne ca kap li haten eling, me ca löng minya ifucâm, me u ma he ka sâú únyi hnyi köien wagewe, ke hingâlâ ka hnyi hon kânâ ae mada: me haba köiö u ma he ka sâú únyi hnyi wagewe, me ame he ka dra hnyi dok ae mada. 10 Ke haba Mose ame ha kö Iehova, ka habe, Than lö, iny ca at khet, waleji ehac, me walang ang hwaban hnâm hna fuc kõnya a athnyabaem: anyin a teta ifucik, ke teta bohömök. 11 Ke haba Iehova ame ha kâu, ka habe, Ia op hnyimen at? ke ia ophum, me wijiji, me bwela, me

ESODO 5.

wadröu! hawa ca inya bi Iehova? 12 Ke walang ang he thö, me oge me he ka tha inya me hnyimâm, me nö u hofuc he ka ha. 13 Ke ame ha, ka habe, Than lö, bethe kunâ at u je wem he ka kunâ. 14 Ke ame ubâhlâ hmönyin anyi Iehova kö Mose, me haingen, ka habe, Hawa e ca tuhâm Arona, at Levi? E khanö nya e at ae khana he ka fuc so. Ke wâ minya bi, e ame he jem he ka ûkhanö möu: ke ka õ u, me ame he ka senyin hnyekon. 15 Ke u ma he ka ha hofuc kâu, me bi hofuc ka hnyi hnyimen: ke oge me he ka tha inya me hnyimâm me hnyimen, me ku köbu únyi öbu me he ka ânyâ. 16 Ke ame he ka hwabâm he ka fuc ka tavat: ke ame he ka bi hnyimâm, me u me he ka helâ me Khong kâu. 17 Ke u ma he ka hom uci ang hnyi hnyamâm, me u me he ka ânyâ ta je haten hnen e.

18 Ke haba Mose ame he hmetu kö Jethero a ûngon, me ha kâu, ka habe, Ö u hnö nya but he ka he hmetu Aigupito ai ka je liamekeiny mönya he ka wâ, hawa ödrin e ne. möt. Ke haingö Jethero kö Mose, ka habe, He thö me hnahic. 19 Ke haba Iehova ame ha kö Mose e Midiana, ka habe, He hmetu thö Aigupito ai: anyin a moku hnyat hia waleji ödrin e elâm he ka hlingö u. 20 Me haba Mose ame hom âiân, me lakon, me ip ödrin hon asina, me he hmetu ka hnyi hnyei Aigupito: haba Mose ame hom uci anyin Khong hnyi hnyamen. 21 Ke Iehova ame ha kö Mose, ka habe, U ka he hmetu Aigupito ai, únykúme ju he ka ânyâ ta je únyi hnân láiâ hia hnyi hnyimakö Farao, waleji oge ip hnyi hnyamâm: ke oge me he ka okhötâ hnyekon, me ame ca he ka hna tavat. 22 Ke u me he ka ha kö Farao, ka habe, Haba Isaraela nökek a atö: 23 ke oge hia but ha köu, ka habe, Hna but nökek me me he ka bi athnyaba kúnya; ke u je hia but behânâ: wâ bi, oge me he bi nya ka hlingâ nokom a atö. 24 Ke Iehova ame iouny me eú hnyi gethen hnyi ontabaga, me elâm he ka hlingâ. 25 Ke haba Zipora ame hom veto a out me subâ degecâ unen unyin nokon, me khûâ ka hnyi li can; haingen momo, ka habe, U baga at ame bi dra kúnya. 26 Waleling me me hna but e. Ke haingen momo, ka habe, U baga at ame bi dra, únyi hnyi hnaperitomon.

27 Ke Iehova ame ha kö Arona, ka habe, He thö u he ka ûkhanö me Mose hayi hnyebuba. Ke ame he me ûkhanö

mê hnyi bucen anyin Khong, me úcimhnyi-mak mê. 28 Ke Mose ame thumetu Arona ge ta je hofuc hia ho Iehova waleji a kunâ, me ta je haten e ame húna kâu. 29 K' ame he Mose me Arona me úkacacöuâ wahingatiny lakon Isaraela hia: 30 me Arona ame ha je hofuc hia waleji a ha Iehova kö Mose, ke ame ânyâ ta je haten hnyi hnyimakan tavat. 31 Me ame kap e hnen tavat: ke ödrin e löng a ga um but Iehova senâ lakon Isaraela, me wâ hna okongu ödra, me ödrin e nom ju me khudrung.

HNYIMAKAN 5.

**K**E hwaban dö e haba Mose me Arona ödru me he me ha kö Farao, ka habe, Walang hna ha hnö Iehova Khongu Isaraela, ka habe, Hna but lakeik m' adre me he ka bi jeú kúnya hnyi hnyebuba. 2 Ke Farao ame ha, ka habe, Ia Iehova m' inye he ka löng ifucin he ka hna but at Isaraela? E ca khanö nya Iehova, ke oge me ca he bi nya ka hna but at Isaraela, 3 Ke haingödrü, ka habe, A hia but iouny möhmun Khongon at Heberu: ö u hn' öhmun dut he ka he hnyi kun ta bong ka hnyi hnyebuba he ka bi hut kö Iehova Khonguhmun; wâ e nye he ka kuc' öhmun ge mok ae cap, ame ne hele vat. 4 Ke haingen than Aigupito ködru, ka habe, Ieú gabu Mose me Arona öbu me anyi jut je hok ge tavat hnyi je hanymödra? He bi thö ka huliwa. 5 Ke haingö Farao, ka habe, Wâ bi e se hia tavat aten hnyei walang ang, k' öbu me omen 'ödra ge anyidra huliwa. 6 Ke haba hnyi bong eling Farao ame húna ka je tuhan tavat huliwa me je homakan gadra, ka habe, 7 Ca he hmetu bi öbun ka ham thatúnyin hwit ka tavat hnân ânyâ veto kânâ helâ me ehac: hamödra ka hlo thatúnyin hwit hobi ködra bi. 8 Ke haba úseiny je veto kânâ waleji adre ânyâ ehac, öbun e he bala ka elâm gadra; öbun e ca he ka öúhnyúko-ngoâ: anyin a ödra wenhöcö; anyin a wale adre me hongot, ka habe, Hn' öhmun dut he ka hudo ka Khonguhmun. 9 He thö ka ogânâ huliwa anyin tavat, m' adre me he ka huliwan; m' adre me ca he ka löng je hofuc thoi. 10 Me ame he but ta je tuhan tavat huliwa me je homakan gadra, me ha ka tavat, ka habe, Walang hna ha hnö Farao, ka habe, Oge me ca he hmetu ka ham thatúnyin hwit köbun. 11 He

thö öbun ka hlo je thatúnyin hwit hnyi je dok öbun e me wâ hnyin : ke adre me ca he ka öühnyúkongoá ke keihen anyibun huliwa. 12 Waleling me me vese but tavat hnyi hnyei Aigupito he ka hlo tiren hwaban thatúnyin hwit. 13 Ke haba je tuhan huliwa adre me ojati ödra, ka habe, Oumo thö je ve húdröbun hnyi ke bong me ke bong, helâ me ehac ke tiga hu thatúnyin hwit. 14 Ke adre kot je homakan huliwa a je lakon Isaraela, wale hnen je tuhan huliwa anyi Farao hna otílâ hudra, me hnei ödra, ka habe, Ieú gabun öbun e ca oumo ta je veto kânâ a húdröbun et, me enyi, helâ me ehac? 15 Waleling me me he but ta je homakan huliwa a je lakon Isaraela me khöü kö Farao, ka habe, Ieú, gam u me ányâ helâe köhmun a je lathnyabaem? 16 E ba thatúnyin hwit adre ham köhmun a je lathnyabaem, k' ödrin e ha köhmun, ka habe, Ányâ thö ta je veto kânâ : ke wâ bi, adre me kot je lathnyabaem ; ke haba monu bi me únyi ge je lakem. 17 Ke ame ha, ka habe, Öbun je uthöcö, öbun je uthöcö : anyin a wale öbun e ha, ka habe, Hn' öhmun dut he ka hudo kö Iehova. 18 Ke walang ang he th' öbun ka huliwa ; anyin adre me ca he hmetu ka ham thatúnyin hwit köbun, ke so bi öbun e he ka ham je veto kânâ helâ me tulut. 19 Ke a wâ but je homakan huliwa a je lakon Isaraela a ödrin e kong ut únyi hnyi hna ha, ka habe, Öbun e ca he ka owakhalatâ je veto kânâ, waleji húdröbun hnyi je bong. 20 Ke ödrin e he but úheny unyi Farao, me ödrin e úkhanö me Mose me Arona ödru me tot eú hnyi gethen : 21 ke haingödrin ködru, ka habe, Hamö Iehova he ka ö 'bu me owisa, anyin a öbe obokongi öhmum kö Farao, me lathnyabainy, he ka ham hele vat ka hnyi hnyamödrin he ka hling' öhmun. 22 Ke haba Mose ame he bmetu kö Iehova, me ha, ka habe, Than lö, ieú gam u me ovecâ tavat eang? ke ieú gam u je kunö nya? 23 Anyin a hwân hnyi úhek unyi Farao he ka fuc hnyi iâm, e aue okongoá tavat eang ; ke u me ca omelö balua lakem.

## HNYIMAKAN 6.

**K**E Iehova ame ha kö Mose, ka habe, U ma he walang ang ka wâ únyi oge me he ka ányâ kö Farao : anyin a e ame he ka hn' ödra ge hnyam ae hwege, k'

ame he ka ob' ödra únyi hnyi iny hnyei ge hnyam ae hwege.

2 Ke Khong ame fuc kö Mose, me ha kâu, ka habe, Inya IEHOVA : 3 ke oge manen dut kö Aberahama, me Isaaka, me Jakob, a inya Khong Aekbanabia, ke ca khan' ödrin bi ehac a haba iök me IEHOVA. 4 Ke oge hia but ohmâ anyik úbihinyköu mödrin, he ka ham ködrin hnyei Kanana, waleji hnyei ödrin e labö he kanyua hnyin hnyi hnödrin hna he kanyua. 5 Ke haba khaca oge hia but löng mâng anyin lakon Isaraela, wale hnen at Aigupito hna hom hwenbödra ; me inya oge me únyküme anyik úbihinyköu. 6 Anyin a wale, ha thö ka je lakon Isaraela, ka habe, Inya Iehova, me oge me he ka hum öbun únyi hnyi ta je huliwa ae hmak anyin at Aigupito, k' oge me he ka húgûn 'öbun únyi hnyi hnödra hna hwenböbun, k' oge me he ka omeli öbun ge hnyam adre hai, me hna owisa ae gan hmâ ; 7 k' oge me he ka hum öbun me me lakeik, k' oge me he ka Khongubun : k' ame he ka khan' öbun a inya Iehova Khongubun, at ame hum öbun únyi hnyi hmelen ta je hok anyin at Aigupito. 8 Ke oge me he ka hum öbun ka hnyi hnyei waleji oge ogörányâ hnyamök he ka ham kö Aberahama, me Isaaka, me Jakob ; k' oge ma he ka ham köbun me hwajekhöubun : haba inya Iehova. 9 Ke Mose ame ha helâe ka je lakon Isaraela : k' adre me ca ling Mose can hnyekudra ae vec, me hwenbödra ae hmak.

10 Ke haba Iehova ame ha kö Mose, ka habe, 11 He thö me ha kö Farao than Aigupito he ka hna but je lakon Isaraela únyi hnyi iny hnyei. 12 Ke Mose ame ha hnyi hnyimakö Iehova, ka habe, Me wâ, ame ca ling nya ge je lakon Isaraela ; k' ama kâmâu, Farao ka ling nya, at adre ca peritomonâ esongodiny? 13 Ke haba Iehova ame fuc kö Mose me Arona me húna ködru ge je lakon Isaraela me ga Farao than Aigupito, m' ödru me he ka hom je lakon Isaraela únyi hnyi hnyei Aigupito.

14 Ke walang je tuhan je lap anyin je lakamödra : haba laku Reubena nöku Isaraela a bán ; jia Enoka, me Falu, me Hezerona, me Karemi : wale je lap únyi ga Reubena. 15 Ke haba je laku Simeona : jia Jemuela, me Jamina, me Ohada, me Jakina, me Zohara, me Saulo nokon momo Kanana : wale je lap únyi ga Simeona. 16 Ke walang ien je laku Levi hoton anyidrin je dö ; jia Geresoma, me Kohatha,



## ESODO 7.

me Merari : ke haba je hunainy möt anyi Levi, me, wan haded ke thöte seven ta je huna. 17 Ke lo li laku Gerisoma ; jia Libeni me Simeï, hoton anyidru li lap. 18 Ke je laku Kohatha ; jia Amerama, me Izara, me Heberona, me Uziela : ke haba ta je hunainy möt anyi Kohatha, me wan haded ke thöte theri ta je huna. 19 Ke lo li laku Merari ; jia Maheli, me Musi. Waleling je lap anyin je at Levi hoton anyidriu je lap. 20 Ke haba Amerama ame hum Jokebeda haniny kamen, me âiân, me ame hnöku Arona me Mose : ke haba je hunainy möt anyi Amerama, me wan haded ke thöte seven ta je huna. 21 Ke haba je laku Izara ; jia Kora, me Nefega, me Zikeri. 22 Ke haba je laku Uziela ; jia Misaela, me Elizafana, me Shilheri. 23 Ke Arona ame hum Elisaba nöku Aminadaba, hani Nasona, me âiân ; ke ame hnöku Nadaba, me Abiu, me Eleazara, me Ithamaza. 24 Ke haba je laku Kora ; jia Asiro, me Elekana, me Abiasafa ; wale je lap anyin at Kora. 25 Ke haba Eleazara nöku Arona ame hom ke hlu únyi ge je laku Putiela, me âiân ; ke ame hnöku Fineasa a nokou. Wale je tuhan lakamen at Levi hoton anyidrin je lap. 26 Ke haba Arona me Mose, me, wale li at ame ha ködrü Iehova, ka habe, Hom but je lakon Isaraela únyi hnyi hnyei Aigupito hoton anyidra je dö. 27 Ke wale li at ödrü me ha kö Farao than Aigupito he ka hom lakon Isaraela únyi hnyi hnyei Aigupito : a Mose me Arona eling.

28 Ke haba hnyi bong Iehova ame fuc kö Mose hnyi hnyei Aigupito, 29 me haingö Iehova kö Mose, ka habe, Inya Iehova : bethe ha kö Farao than Aigupito je hofuc hia thithö oge me ha köu. 30 Ke haba Mose ame ha hnyi hnyimakö Iehova, ka habe, Wâ bi, adre ca peritomonâ li esongodik, k' ama hawa Farao ka ling nya ?

### HNYIMAKAN 7.

**K**E Iehova ame ha kö Mose, ka habe, Wâ bi, oge hia but otilö u hnân khong kö Farao : k' ame he tuhâm jia Arona ka perofeta unyâm. 2 U ma he ka ha hia hnök hna húna köu : k' ame he Arona a tuham ka fuc kö Farao, me me he ka hna lakon Isaraela únyi hnyi iny hnyei. 3 Ke oge me he ka onákâ hnyeku Farao, me osehia anyik ta je haten me ta je únyi hnân láiâ, hnyi hnyei Aigupito. 4

Ke so bi ame ca he Farao ka ling öbu, me, oge me he ka ip hnyamök hon Aigupito, me hom anyik köö, wale lakeik a lakon Isaraela únyi hnyi hnyei Aigupito ge ta je hwaban ae gan hmâ. 5 Ke ame he at Aigupito ka wâ a Inya Iehova iny ka he ka hai hnyamök hon Aigupito, me hom lakon Isaraela úhedra. 6 Ke haba Mose me Arona ödrü me ânyâ helâ me Iehova ame ha ködrü, ödrü me ânyâ helâe. 7 Ke eite je hunai Mose, ke eite theri je hunai Arona hnyi ün ödrü me fuc kö Farao.

8 Ke haba Iehova ame ha kö Mose me Arona, ka habe, 9 E ka ha köbu Farao, ka habe, Ányâ thö anyibu haten : me u me he ka ha kö Arona, ka habe, Hom dö ânyâm uci, me khûâ hnyikânâi hnyi hnyimakö Farao, me me on dut. 10 K' ame didrö Mose me Arona kö Farao, me ânyâ helâ me hna húna hnö Iehova ködrü : ke Arona ame khûâ but hnyikânâi anyin uci hnyi hnyimakö Farao me je lathnyabainy, k' ame on dut. 11 Me haba Farao ame hawâ tavat metâ me tavat tren khong : me haba ödrin minya a je magoi hnyi Aigupito ödrin e ânyâ helâe ge anyidrin je bibihwakecin. 12 Ke ödrin hia ödrin e ve khûâ hnyikânâi anyidrin je uci, me me je on dut ; ke haba uci anyi Arona ame olom but anyidrin je uci. 13 Ke ame nâk ut hnyeku Farao, k'ame ca ling ödrü, helâ me hna ha hnö Iehova.

14 Haba Iehova ame ha kö Mose, ka habe, A khöt ut hnyeku Farao, k' ame hócö he ka hna tavat. 15 U ma he kö Farao hnyi hnyomakatu ; wâ bi e ame he ka hnyi wagewe ; ke u me ha ka halubahingen hnyi baten wagewe ; ke hom dö hnyi hnyamâm ânyâm uci waleji adre wia me on. 16 Ke u ma he ka ha kâu, ka habe, A kunö nya Iehova, Khongon at Heberu, köu, he ka ha ka habe, Hna but lakeik m' adre me he ka biathnyabaik hnyi hnyebuba : ke wâ bi u je ca löng könya hnyi je bong eji. 17 Walang hna ha hnö Iehova, ka habe, U ma he ka wâhmakhmetô a inya Iehova hnyi únyi eang : wâ bi, oge me he ka kot kööiny wagewe ge uci hnyi hnyamök me me dra but. 18 Me ame he ka mokcu ta je wâ hnyi wagewe, k' ame he ka bon wagewe : k' ame he at Aigupito ka ikiki ka ijem wagewe. 19 Ke Iehova ame ha kö Mose, ka habe, Ha thö kö Arona, ka habe, Hom dö ânyâm uci, me hai hnyamâm hon ta je köö hnyi Aigupito,

## ESODO 8.

hon anyidra ta je di, me anyidra je wagewe, me belidra je an, me anyidra je koiö hia, me me dra but ; k' ame he ka hu dra hnyi hnyei Aigupito hia, hnyi ta je kaia utö me veto. 20 Ke haba Mose me Arona ödrü me ânyâ eling, helâ me hna hûna hnö Iehova ; ke ame hai thö uci me kot koiö hnyi wagewe hnyi hnyimakö Farao me lathnyabainy, k' ame dra but dân wagewe hia. 21 Ke a mokcu ta je wâ hnyi wage- we ; k' ame bon dut wagewe, ka ca khana hmetu at Aigupito he ka ijem koiöiny wagewe ; k' ame hu dra hnyi hnyei Aigupito hia thithö. 22 Haba ta je magoi hnyi Aigupito ödrin e ânyâ helâe ge anyidrin ta je bibihwakecin : ke ame nâk hnyeku Farao, me ca ling ödrü, helâ me hna ha hnö Iehova. 23 Ke Farao ame hwiö me didrö ka hnyi umen uma, ka ame ca oûnyihnathoâ ûnyi e eû hnyi hnyekon. 24 Ke haba at Aigupito adre me khû an hnyi baten wagewe hnân ic ; anyin ae ca khan' ödra ijem koiöiny wagewe. 25 K' ame hwâdâ but ta je bong a seven hwaban hna kot wagewe ga Iehova.

### HNYIMAKAN 8.

**K**E Iehova ame ha kö Mose, ka habe, Didrö kö Farao, me ha kâu, ka habe, Walang hna ha hnö Iehova, ka habe, Hna but lakeik m' adre me he ka bi athnyabaik. 2 Ke u je ne hócö hn' ödra, wâ bi, oge me he ka okongoâ je ke keihen em hnyei ge ta je rana : 3 k' ame he ka ûnöngöt wagewe ge ta je rana, k' adre me he ka ölö me iyâu ka hnyi umâm uma, me hnyeule u je mokut hnyin, me hon hnâm, me hnyi je uma umen lathnyabaem, me je lakem, me je wahnainyâm ; me hnyi je kumete hnân up âm falawa : 4 k' ame he ta je rana ka tabü u me ta je lakem, me je lathnyabaem hia. 5 Ke Iehova ame ha kö Mose, ka habe, Ha thö kö Arona, ka habe, Hai thö hnyamâm me ânyâm uci hon ta je wagewe me je di, me je an, me oâ ta je rana ka hnyi hnyei Aigupito. 6 Ke Arona ame hai thö hnyamen hon ta je koiö hnyi Aigupito, me ame o thö ta je rana, me khavâ hnyei Aigupito. 7 Ke ame ânyâ helâe ta je magoi ge anyidrin je bibihwakecin, me oâ ta je rana hon hnyei Aigupito. 8 Me haba Farao ame hao Mose me Arona, me habe, Khöu th' öbu kö Iehova, me me ohia ta je rana unyik, me unyin lakeik ; me oge me he ka hna but

tavat, m' adre me he ka hudo kö Iehova. 9 Ke haingö Mose kö Farao, ka habe, Hamâm he ka musî konya : kehö oge me he ka khöu hobi köu, me lathnyabaem, me lakem, me me he ka hia but ta je rana unyâm, me hnyi umâm je uma, m' adre me laba thibi hnyi wagewe? 10 Ke haingen, ka habe, Bong nyi. Ke ame thu, ka habe, Ame he ka helâ me hnâm hna ha : me me he ka khanö u ae ba ke at ae úcû me Iehova Khonguhmun. 11 K' ame he ka hia ta je rana unyâm, me hnyi umân uma, me unyin lathnyabaem, me je lakem, m' adre me he ka laba thibi hnyi wagewe. 12 Ke haba Mose me Arona ödrü me he ûheny unyi Farao : ke Mose ame tengiâ kö Iehova ge ta je rana waleji e ame oâ kö Farao. 13 Ke haba Iehova ame löng hoton hofuc ho Mose ; k' ame mokcu ta je rana, hnyi ta je uma, me ta je hnyaba, me je hna belök. 14 Ke adre me ve ûkhöünâ : ke bon dut hnyei. 15 Ke a wâ but Farao a ga menâ thö, me ame onâkâ hmetu but hnyekon, k' ame ca löng ködrü ; helâji me hofuc ho Iehova.

16 Ke Iehova ame ha kö Mose, ka habe, Ha thö kö Arona, ka habe, Inâ but ânyâm uci, me kot sesâiny kânâ, me ame he ka hu je uto hnyi hnyei Aigupito hia. 17 Ke ödrü me ânyâ helâe ; ke Arona ame hai hnyamen me anyin uci, me kot sesâiny kânâ, me me hu uto hon at, me meno ; ke uto hia but kânâ hnyi hnyei Aigupito hia. 18 Ke haba ta je magoi adre me ânyâ helâe ge anyidrin je bibihwakecin m' ödrin e he ka oâ ta je uto : ke ca khan' ödrin : ke e but uto hon at me meno. 19 Me haingen ta je magoi kö Farao, ka habe, Wale but e banyen Khong : ke ame nâk hnyeku Farao, k' ame ca löng ködrü ; helâji me hna ha hnö Iehova.

20 Ke Iehova ame ha kö Mose, ka habe, U ma vesâkong me tot hnyi hnyimakö Farao ; wâ bi, e ame he ka hnyi koiö ; ke u ma he ka ha kâu, ka habe, Walang hna ha hnö Iehova, ka habe, Hna but lakeik he ka bi athnyabaik. 21 Ke u je ne ca he ka hna lakeik, wâ bi, oge me he ka kunâ ta je nöng köu ae se hia hmönyin, me lathnyabaem, me lakem, me eiö hnyin umâm ta je uma : k' ame he ka unöngöt ta je uma umen at Aigupito hnen ta je nöng, me kânâ minya adre me laba hon. 22 Ke haba hnyi bong eling oge me he ka ovebongonâ hnyei Gosena, wale ame labâ lakeik, k' ame ca he ka o kâ e ta je nöng ;

ESODO 9.

me me khanö u a inya Iehova eang hmelen. 23 Ke oge me he ka sihnyigöulen dut lakeik me lakem : ke haba nyi ame he ka hu haten ang. 24 Ke Iehova ame ânyâ ; me ame o but ta je nöng ae se hia ka hnyi je uma umö Farao, me je uma umen lathnyabainy : ke haba hnyi hnyei Aigupito hia ame kong ut hnyei ge nöng. 25 Ke haba Farao ame hao Mose me Arona, me ha, ka habe, He th' öbun ka bi hut ka Khongubun hnyi hnyei. 26 Ke haingö Mose, ka habe, E ca ûcû he ka ânyâ helâe ; anyin a öhmun e he ka hudo kö Iehova Khonguhmun ûnyi ae ikiki ka at Aigupito : hawa, öhmun e he ka hudo ûnyi ae ikiki ka at Aigupito hnyi hnyimaködra, k' adre me ca he ka lû öhmun ge veto? 27 Öhmun e he ka he hnyi kun ta bong ka hnyi hnyebuba he ka bi hut kö Iehova Khonguhmun, hoton hnen hna hûna köhmun. 28 Ke haingö Farao, ka habe, Oge me he ka hn' öbun, m' öbun e he ka bi hut kö Iehova Khongubun hnyi hnyebuba ; ke so bi ca he öbun sâkâû ai : khöu thö hobi kõnya. 29 Ke haingö Mose, ka habe, Wâ bi, oge me he but ang ûhek anyâm, k' oge me he ka khöu kö Iehova me me hia but nyi ta je nöng unyi Farao, me lathnyabainy, me lakeiny : ke so bi, ca he hmetu Farao ka iyawâ, wale he ka ca hna but tavat he ka bi hut kö Iehova. 30 Ke Mose ame he but ga Farao, me khöu kö Iehova. 31 Haba Iehova ame ânyâ helâ me hofuc ho Mose, me ame ohia ta je nöng ga Farao, me lathnyabainy, me lakeiny ; ke ba but kolon me khaca. 32 Ke Farao ame onâkâ hmetu but hnyekon hnyi ûen minya e, k' ame ca hna bala tavat.

HNYIMAKAN 9.

**M**E haba Iehova ame ha kö Mose, ka habe, He thö kö Farao, me ha kâu, ka habe, Walang hna ha hnö Iehova Khongon at Heberu, ka habe, Hna but lakeik m' adre me he ka bi athnyabaik. 2 Anyin a u je ne hücö hn' ödra, me behan' ödra bala bi, 3 wâ bi, ame he hnyamö Iehova ka ta hon halem ta je meno hnyi je utkânâ, hon ta je hos, me asina, me kamela, me kau, me mamoe ; ame he ka gan hmâ mok. 4 K' ame he Iehova ka sihnyigöulen dut ta je meno haleny at Isaraela me ta je meno haleny at Aigupito : ke ba meno a khaca haleny at Isaraela ame he ka mok.

5 Ke haba Iehova ame thu ûen, me ha, ka habe, Nyi ame he Iehova ka ânyâ ûnyi e hnyi hnyei. 6 Ke haba nyi, Iehova ame ânyâ ûnyi eling, k' ame mokcu ta je meno hia haleny at Aigupito : k' ame ca mokcu ke meno a khaca haleny lakon Isaraela. 7 Ke Farao ame ûkhünöng, ke wâ bi, a ca mokcu ke meno haleny at Isaraela, e ba me khaca. K' ame khöt hnyeku Farao, k' ame ca hna but tavat.

8 Ke haba Iehova ame ha kö Mose me Arona, ka habe, E so öbu me he ka hom dröu ûnyi hnyi wahnainyâ, ke hamö Mose he ka iâ göranyai hnyi hnyimakö Farao. 9 K' ame he ka sâ hnyi hnyei Aigupito hia, k' ame he ka ohuc bi me hmouca me han, wale unyin at me meno hnyi hnyei Aigupito hia. 10 K' ödru me hom dröu hnyi wahnainyâ me tot mē hnyi hnyimakö Farao : ke Mose ame iâ göranyai ; me ame wia me ohuc ae hmouca me han unyin at me meno. 11 Ke ca khana ta je magoi he ka tot hnyi hnyimakö Mose, can je ohuc ; anyin a e bi hon ta je magoi me at Aigupito hia ta je ohuc. 12 Ke haba Iehova ame onâkâ hnyeku Farao, k' ame ca ling ödru, helaji me hna ha hnö Iehova kö Mose.

13 Ke Iehova ame ha kö Mose, ka habe, Vesâkong ut, me tot knyi hnyimakö Farao, me ha kâu, ka habe, Walang hna ha hnö Iehova Khongon at Heberu, ka habe, Hna but lakeik m' adre me he ka bi athnyaba kõnya. 14 Anyin a haba hnyi ûen ang oge me he ka kunâ anyik ta je kong hia ka hnyi hnyekom, me hon lathnyabaem, me lakem : me me khanö u ae ba at ae ûcû mönya eang hmelen hia. 15 Anyin a oge ne hia but inâ hnyamök, me kuc u me lakem ge mok ae cap, me adre hia but ohüö u ûnyi hnyi hmeledrany : 16 ke so bi e hnathu oge hia but otilö u, hnân he ka omanenâ köu manik man, me me lung iök hnyi hmeledrany hia. 17 Hawa, u me tiga he bala ka ogöranyi u hon lakeik m' u me ca he ka hn' ödra but? 18 Wâ bi, haba nyi, helâ me ûen eang, oge me he ka öta we ae wahma me gan, e ba helâe hnyi Aigupito ehac hnyi can ke ne o but hnyi bong ang. 19 Ke walang ang ûkhünöng dö he ka hom halem ta je meno, me ânyâm ta je ûnyi hia hnyi hnyei ; anyin a haba tavat hia me je meno hia adre me he ka wâ hnyi hnyei, k' adre ca hom ka hnyi uma, me ame he ka ta we ae wahma hudrin, m' adre me he ka mokcu. 20 Haba je hnyat unyin je lathnyabai Farao, a tavat

outen hna ha hnö Iehova, ödrin e kâcâ lathnyabaidrin me haledrin je meno ka hnyi je uma : 21 ke haba at ame ca oûnyi-hnathoâ hna ha hnö Iehova, e ame hna but lathnyabainy, me haleny je meno hnyi hnyi.

22 Haba Iehova ame ha kö Mose, ka habe, Hai thö hnyamâm göranyai, me me ta but we ae wahma hnyi hnyi Aigupito hia, ka hnyi hon at, me omeno, me je üöiny hnyi hia, hnyi hnyi Aigupito hia. 23 Ke haba Mose ame inâ thö göranyai anyin uci : ke haba Iehova ame kunâ hendreng, me we ae wahma, k' ame hingâlâ but meic hon kânâ ; ke Iehova ame öta we ae wahma hon hnyi Aigupito. 24 Waleling me o but we ae wahma, me meic adre üthueniken me we ae wahma, ke hwege but, ke ba helâe hnyi hnyi Aigupito hwân hnyi hna ibi labâ. 25 Ke haba we ae wahma ame kot ta je ünyi hia hnyi hnyi, tavat, me omeno, hnyi hnyi Aigupito hia : k' ame kot ta je khölak hnen we ae wahma, me thu ta je üö hia hnyi hnyi. 26 Ke haba Gosena thibi, hnyi ame labâ hnen lakon Isaraela, e ba we ae wahma eling. 27 Ke haba Farao ame ükhünöng he ka hao Mose me Arona, me ha ködrü, ka habe, Oge hia but monu hnyi üen eang : e wisa Iehova, k' iny kong ut me lakeik. 28 Khöü thö kö Iehova ; ö e soju hendring ang me we ae wahma ; k' oge me he ka hn' öbun, ke öbun e ca he hmetu ka laba. 29 Ke Mose ame ha kâu, ka habe, Iny ka he ühek ang hnyi taun oge me he ka hai li hnyamök kö Iehova ; k' ame he ka hia hendreng, k' ame he ka ba hmetu we ae wahma : me me khanö u, ka habe, anyi Iehova hmeledrany. 30 Ke haba u, me lathnyabaem, e khanö nya öbun e tiga ca he ka outö Iehova a Khong. 31 Ke adre kot lino me bali : anyin ame wa bali, me vhong ut lino. 32 Ke adre ca kot hwit me kesem anyin a tiga ca kü. 33 Ke Mose ame he üheny hnyi taun unyi Farao, me hai li hnyamen kö Iehova : me ame hia ju hendreng, me we ae wahma, k' ame ca ta hmetu we ka hnyi kânâ. 34 Ke a wâ but Farao ae ba but we, me we ae wahma, me hendring, me ame monu hmetu me onâkâ hnyekon, tha e me lathnyabainy. 35 Ke nâk ut hnyeku Farao, k' ame ca hna but lakon Isaraela ; helâji me hna ha hnö Iehova a deny Mose.

## HNYIMAKAN 10.

**K**E haba Iehova ame ha kö Mose, ka habe, He thö kö Farao : anyin a oge hia but onâkâ hnyekon, me hnyekon lathnyabainy, m' inye he ka omanená hnyi hnyimaködrin ta je hatök eang : 2 m' u ma he ka ha hnyi li hnyikönyen nokom, me öbem, ta je ünyi oge hia but änyâ ka Aigupito, me ta je hatök oge hia but änyâ hnyi wanbödra ; me me khan' öbun dö a inya Iehova. 3 Ke haba Mose me Arona ödrü me he kö Farao, me ha kâu, ka habe, Walang hna ha hnö Iehova Khongon at Heberu, ka habe, Ke ne o but kehö u ma he ka höcö öühnyükongi u hnyi hnyimakök? hna but lakeik m' adre me he ka bi athnyaba könya. 4 Ke u je ne höcö hna lakeik wâ bi, haba nyi, oge me he ka kunâ je wahamon ka hnyi em hnyi : 5 k' adre me he ka khavâ kânâ, me me ca khana at he ka wâ kânâ : k' adre me he ka an je kolon biju ae möt, wale ta je kolon unyibun, hwaban we ae wahma, k' adre me he ka an ta je üö hia ame kü hobi köbun hnyi hnyi : 6 k' ame he ka öünöngötâ umâm je uma, me je uma umen lathnyabaem, me je uma umen at Aigupito hia ; ke ame ca wâ helâe hnen je lakâmâm me je lakibâm, hwân hnyi bong adre me laba eang hmelen ke ne o but hnyi bong ang. Ke ame hwiö me he üheny unyi Farao. 7 Ke haingen je lathnyabai Farao kâu, ka habe, Ame he ka hnân knewe köta at eang ke ne o but kehö? hna but tavat m' adre me he ka bi athnyabai Iehova Khongudrin : hawa e ca khatö u bala a ga kong ut Aigupito? 8 Ke adre me hao Mose me Arona hmetu kö Farao : me ame ha ködrü, ka habe, He th' öbun ka bi athnyabai Iehova Khongubun : ke ie je hnyat adre ma he? 9 Ke haingö Mose, ka habe, Öhmun e he ka tha he me je wanakat, me wahingatihmun, me je lakuhmun obaga, me wahlü, me je hnahat mamoe, me halehmun je kau ; anyin a hamöhmun he ka bi jeu kö Iehova. 10 Ke ame ha ködrü, ka habe, E so e he ka tha e m' öbun Iehova helâ me hnök hna hn' öbun, me je lakubun ae ühnyükong : ke wâ eaü ; anyin ae hu monu hnyi hnyimaköbun. 11 Ca he ka helâe : he so bi he th' öbun obaga he ka bi athnyabai Iehova ; anyin a waleling webun. K' adre ob' ödrü üheny unyi Farao.

12 Ke haba Iehova ame ha kö Mose, ka

## ESODO 11.

habe, Hai tho hnyamám hon hneyi Aigupito, me me o thö je wahamon ka hnyi hneyi Aigupito, me an ta je khölak hia hnyi hneyi, a kolon biju hwaban we ae wahma. 13 Ke haba Mose ame inâ anyin uci hon hneyi Aigupito, ke Iehova ame oâ ang hwei ka hnyi hneyi hnyi bong eling ae bekhöt me lit ae bekhöt; ke hnyi hnyomakatu haba ang hwei ame hom je wahamon. 14 K' ame ölö je wahamon ka hnyi Aigupito hia, me tabâ je hnyigöulen hneyi Aigupito hia; e ti se hia hmönyin; e ba wahamon helâe ehac, k' ame ca he hmetu ka helâe. 15 K' adre khavâ hon kânâ hia, k' ame lit ut hneyi; k' adre me an ta je khölakiny hneyi, me je wan üö hia je kolon hwaban we ae wahma: ke ba hmetu lan hnyot, wale üö me khölakiny kânâ, hnyi hneyi Aigupito hia. 16 Me haba Farao ame ie hao Mose me Arona, me ha, ka habe, Oge hia but monu kö Iehova Khongubun, me köbu. 17 Ke walang ang ö u na okhaca thibi hna degecâ anyik monu, ke khöu th' öbu kö Iehova Khongubun, me me he ka hom únyi gak mok eang. 18 Ke ame he úheny unyi Farao, me khöu kö Iehova. 19 Ke haba Iehova ame kunâ hwegiâ ang hnyi köiö, k' ame kap göranyai je wahamon me hom kâú ka hnyi Köiö ae Dra; me ba hmetu wahamon me khaca hnyi hneyi Aigupito hia. 20 Ke Iehova ame onâkâ hnyeku Farao, k' ame ca hna bala lakon Isaraela.

21 Ka haba Iehova ame ha kö Mose, ka habe, Hai thö hnyamám göranyai, me me menekholom but hneyi Aigupito, ke menekholom ae khöt. 22 Me haba Mose ame hai hnyamen göranyai, me menekholom ae khöt ut hneyi Aigupito hia hnyi kun ta bong; 23 adre me ca iodraköu, ke ba at ame höhöi hnyi hnen hnyi je bong a kun: ke so bi e hu lany hnyi je hnyaban lakon Isaraela hia. 24 Ke Farao ame hao Mose me ha kâú ka habe, He th' öbun ka bi athnyabai Iehova; ke hnen biju ta je hnahat mamoe, me halebun je kau: ke so ame tha he m' öbun je lakubun ae úhnyúkong. 25 Ke haingö Mose, ka habe, Hâmâm he ka hna ka hnyi je hnyamöhmun je hut, me je hudiny leú, m' öhmun e he ka bi hut kö Iehova Khonguhmun. 26 Ke öhmun e he ka hom minya halehmun je hnahat: ame ca he ka hnen biju hotuhmun ai ke boujimen can a khaca; anyin öhmun e he ka hom keihen gadrin he ka bí athnyabai Iehova; ke ca khan' öhmun únyi ae úcü

he ka bi athnyabai Iehova, öhmun ka tiga ca o eling. 27 Ke Iehova ame ouâkâ hnyeku Farao, me ame höcö he ka ln' ödra. 28 Ke haingö Farao kâú, ka habe, He thö úhem unyik, ke ö u âu, ca he hmetu ka wâ hnyimakök; anyin a u me he ka mok hnyi bong u me he hmetu ka wâ hnyimakök hnyin. 29 Ke Mose ame thu, ka habe, E so hnâm hna ha, oge me ca he hmetu bala ka wâ hnyimákâm.

### HNYIMAKAN 11.

**H**ABA Iehova ame ha kö Mose, ka habe, Khaca biju vec oge me he ka oâ kö Farao me Aigupito; hwaban eling e ame he ka hn' öbun úheny ang: ke ka he ka hn' öbun, me ame he ka ob' öbun úheny ang. 2 Ha thö walang ang ka hnyi je hnyikönyen tavat, me me he obaga me omomo ka ve sumâtâ unyin tavat adre me laba úhakekenyi m' ödra, ta je hmanenanginy gol me ta je hmanenanginy sileva. 3 Ke Iehova ame okûâ ibetengiö ka tavat hnyi hnyimakan at Aigupito. Ke haba khaca, Mose ame lung hnyi hneyi Aigupito, me unyin lathnyabai Farao, me unyin tavat.

4 Ke haingö Mose, ka habe, Walang hna ha hnö Iehova, ka habe, Hnyi wanbenset oge me he ka he hnyi wanben hneyi Aigupito: 5 k' ame he ka mokcu ta je atö hia hnyi hneyi Aigupito, hwân ge atö nöku Farao at ame tabâ anyin theron, ke ne o but ka atö nokon momo at ame khenyö hwit; ke je atö minya lakon je menö hia. 6 K' ame he ka hu tenge ae gan hmâ hnyi hneyi Aigupito hia, e ba helâe ehac, k' ame ca he hmetu ka helâ. 7 Ke ame ca he ke kuli ka bwebwelâ bohmen ka lakon Isaraela hia, wale ka at me meno: me me khan' öbun thö a hnö Iehova hna ve obongonâ at Aigupito me at Isaraela. 8 K' ame he lathnya-baem hia eang ka he könya, me nom ju könya, me habe, He thö me tavat hia adre me hnu hotom: ke hwaban e oge me he ka he. Ke e ame he úheny unyi Farao me hmönyin ae gan hmâ.

9 Ke haba Iehova ame ha kö Mose, ka habe, Ame ca he Faroa ka ling öbu, m' adre me he ka osehia anyik ta je únyi hnân láiâ hnyi hneyi Aigupito. 10 Ke Mose me Arona ödrü me ányâ ta je únyi hnân láiâ hnyi hnyimakö Farao: ke Iehova ame onâkâ hnyeku Farao, me ame ca hna lakon Isaraela únyi hnyi iny hneyi.

## HNYIMAKAN 12.

**K**E haba Iehova ame ha kö Mose me Arona hnyi hnyei Aigupito, ka habe, 2 Haba tehi ang ame he ka hnyimakan ta je tehi köbun : k' ame he ka tehi a bân hnyi huna köbun. 3 Ha th' öbu ka tavat Isaraela hia adre ûkhacaköu, ka habe, Haba hnyi bong a libenyitainy tehi ang, adre me he ka ve hom nokon mamoe hoton je lap anyin lakamödra, úsa khaca nokon mamoe hobi kâu ke lap me ke lap : 4 k' ame ne ûhnyûkong ke lap ke ca úcû nokon mamoe, e ame he ka tha hom me at ame laba hakenyâ hoton úseiny tavat ; k' öbun e he ka aû tavat me me úcû ködrin nokon mamoe. 5 Haba nokon mamoe hobi köbun ame he ka ba kongon, ke бага a khaca hunainy : öbun e he ka hom únyi hnyi je mamoe, ame ne je got : 6 k' öbun e he ka ányâ ke ne o but hnyi bong a fortininy tehi eling : k' ame he ka ve hlingâ hnyi sahac hnen ûkhacaköu anyin lakon Isaraela hia. 7 K' adre me he ka hom dra me bi hnalimen hnyi li uthwanuma, me hon hwanumen ta je uma adre me he ka han hnyin. 8 Ke haba utiö adre le hnyi meic, adre me he ka tha han hnyi lit eling, me areto adre ca levenâ bi ; k' adre me he ka han me bi uten ge ta je bö ae hiny. 9 Ca he öbun ka han hát, k' ame ne ölä hnyi köiö, ke so bi he ka le ge meic ; wale ban me je can me önyen hnyekon. 10 Ke ca he ka ip ke keihen ke ne o but hnyomakatu ; ke ka hu kolon bi hnyi hnyomakatu öbun e he ka le degecâ hnyi meic. 11 Ke öbun e he ka han helâng, ka habe, öbun e he ka ca je hnyekubun, me bi taben je hnyeûcabun, me kât anyibun je uci : k' öbun e he ka han logot : wale paseka anyi Iehova. 12 Anyin oge me he ka vheno hnyei Aigupito hnyi lit eling, me kot ta je atö hia hnyi hnyei Aigupito, wale at me omeno ; ke oge me he ka bi hwaban ta je khong, hia hnyi Aigupito : inya Iehova. 13 Ke haten köbun dra hnyi ta je uma öbun e laba hnyin : ke iny ka wâ but dra, me oge me he ka hanyâú öbun, k' ame ca he ka o köbun mok at ame ohia, iny ka he ka kot hnyei Aigupito. 14 Ke ame he bong ang ka oúnykúmi öbun, m' öbun e he ka ányâ hnyin bijeú kö Iehova : hnyi anyibun je dö hia öbun e he ka bijeú helâ me hnanyibu nyiele balua. 15 Seven ta je bong öbun e he ka han areto hnyin adre ca leverâ bi : haba hnyi bong a bân öbun e he

ka degec leven únyi hnyi umöbun ta je uma : anyin a haba at ame he ka han areto adre levenâ hwân hnyi bong a bân ke ne o but ka hnyi bong a seveniny, me adre me he ka subâ degeca at e unyi Isaraela. 16 Ke haba hnyi bong a bân ame he ka hu unyibun ûkhacaköu ae kap, ke hnyi bong a seveniny minya ame he ka hu ûkhacaköu ae kap unyibun ; e ba huliwa adre me he ka ányâ hnyi je bong eling, ke so thibi jeu an at, wale thibi únyi öbun e he ka ányâ. 17 Ke öbun e he ka bijeúâ areto adre ca levenâ bi ; anyin a haba hnyi bong eling, oge hia but hom köiöbun je köiö únyi hnyi hnyei Aigupito : anyin a wale öbun e he ka tuö bong e helâ me hnanyibu nyiele balua. 18 Hnyi tehi a bân, hnyi bong a fortininy tehi hnyi sahac, öbun e he ka han areto adre ca levenâ bi, ke ne o but hnyi sahaciny bong a twente waniny tehi. 19 Adre me ca he ka wâ leven hnyi umöbun je uma hnyi je bong a seven : anyin a haba at ame he ka han areto adre levenâ, me adre me he ka subâ degecâ at eling únyi hnyi ûkhacaköu anyin at Isaraela, ame ne atkanyua, ame ne at adre hnokoâ hnyi hnyei. 20 Öbun e ca he ka han únyi adre levenâ ; k' öbun e he ka han areto adre ca levenâ bi hnyi je hnyabun hia. 21 Ke haba Mose ame hawâ wahingatiny at Isaraela hia, me ha ködrin, ka habe, Ve úca thö me hom ta je nokon mamoe hobi kâu anyibun je lap, ke hlingâ ju paseka. 22 Ke hom d' öbun ta je thi hisop, me hneú hnyi dra hnyi utkaia, me sa hon hwanuma me li uthwanuma ge dra únyi hnyi utkaia ; k' ame ca he ke at gaban ka dit kâ ú únyi hnyi umen uma ke ne o but ka hnyi hnyomakatu. 23 Anyin ame he Iehova ka he hnyi wanben hnyei me kot at Aigupito ; ke e ka wâ but dra hnyi hon hwanuma me li uthwanuma, me ame he Iehova ka hanyâúâ hwanuma, k' ame ca he ka hna at úhlingö he ka didrö ka hnyi umöbun je uma he ka kuc öbun. 24 K' öbun e he ka tuö únyi e hnân hnanyibu hobi köu me je lakom nyiele balua. 25 Ke öbun ka o ka hnyi hnyei ame he Iehova ka ham köbun helâ me hnen hna ha bâná, me öbun e ha ka tuö huliwa eang. 26 Ke e ka ha köbun lakubun, ka habe, Ieú bongon huliwa eang? 27 m' öbun e he ka thu, ka habe, Wale hut paseka kö Iehova, waleji at ame he hanyâúâ ta je uma umen lakon Isaraela hnyi Aigupito hnyi hnen hna kot at Aigupito me omelö anyitin ta je lap. Ke haba tavat adre me nom ju me khudrung.

28 K' ame he but lakon Isaraela me ânyâ helâe; adre me ânyâ helâ me Iehova ame hunö Mose me Arona.

29 Ke haba hnyi wanbenset Iehova ame kot ta je atö hia thithö hnyi hnyei Aigupito, hwân ge atö nöku Farao a tabâ anyin theron, ke ne o but ka je atö lakon je bâ hnyi uma ceat; me je atö lakon je meno hia. 30 Ke haba Farao ame höhöi thö hnyi hnyinghet, e me lathnyabainy hia, me at Aigupito hia; ke e hu tenge ae gan hmâ hnyi Aigupito; anyin ae ba uma ae ba komok hnyin. 31 Ke e ame hao Mose me Arona hnyi hnyinghet, me ha, ka habe, Todrö, he but ge lakeik, öbu me lakon Isaraela; ke he th' öbun ka bi athnyaba Iehova helâ me hnöbu hna ha. 32 Ke hom minya thö ta je hnahat mainoe me halebun je kau, helâji me hnöbu hna ha, ke he thö; ke ha hnahicinya minya thö. 33 Ke at Aigupito adre me ûjengö hwegiâ tavat m' ödrin e ie hna but hnyei; anyin a haingödrin, ka habe, Ate me mok hia but. 34 Ke haba tavat adre me hom anyidra falawa adre op k' ödra tiga ca levenâ, ke anyidra je kumete hnân up falawa hnyin adre lan kâu ge anyidra je ûkhaû, me hijen. 35 Ke je lakon Isaraela adre me ânyâ helâ me hofuc ho Mose; me adre me sumâtâ at Aigupito ge ta je hmanenanginy sileva, me ta je hmanenanginy gol, me ta je ûkhaû: 36 ke Iehova ame okûâ ibetengiö anyin at Aigupito ka tavat, m' adre me hna but ta je ûnyi adre me sumâtâ. M' adre me öba ta ûnyi anyin at Aigupito.

37 Ke haba lakon Isaraela adre me he ûhedra Ramase Sukotha ai, ame ne siks haded thauzan tavat adre he, k' adre ca aû bi ta je wanakat. 38 K' ame tha he mödra tavat ae se hia ae ve bongon bi, me ta je hnahat mamoe me kau, a omeno ae se hia hmönyin. 39 K' adre me le falawa adre op waleji adre hom ûnyi Aigupito, je ong areto adre ca levenâ bi, anyin adre ca levenâ: anyin adre ob' ödra ûnyi Aigupito, ke ca khan' ödra bi he ka halubahingen, k' adre me ca bi kamec. 40 Ke haba je hunainy laba a lakon Isaraela hnyi hnyei Aigupito, me foa haded ke thöte. 41 Ke haba hnyi obiny je huna a foa haded ke thöte, hnyi bong eling ame he but ta je köiö anyi Iehova hia ûhedra hnyi hnyei Aigupito. 42 Ke walang hnyinghet hnân he ka ûnykûmi Iehova hnen lakon Isaraela hia hnyi anyidra ta je dö.

43 Ke Iehova ame ha kö Mose me Arona, ka habe, Walang hnanyibuiny paseka, ka habe, Ame ca he atkanyua ka hnyi an e: 44 ke haba athnyabainy tavat hia adre ûco ge mone, u me he ka peritomonâ, me ame he ka hnyi han. 45 Ame ca he ka hnyi han hnen atkanyua me athnyaba ame kap hwaban. 46 Adre me he ka han e hnyi uma a khaca; ke u me ca he ka hom utiöiny hnyöu ai; ke ca he öbun ka thu ke jeien. 47 Ke ame he ka ânyâ e hnen ûkhacaköu hia anyin at Isaraela. 48 Ke a ne hu atkanyua ame laba unyâm ame weny he ka hnyi hanen paseka kö Iehova, e so bân peretomonâ obaga hia unyin, me hwaban e ame he ka bakekeny ka hnyi hanen; k' ame he ka helâ me at adre hnokoâ hnyi hnyei: ke ame ca he at adre ca peretomonâ ka hnyi han. 49 Ame he ka khaca hnanyibu hobi kâu aten hnyei me atkanyua ame laba unyibun. 50 Ke haba lakon Isaraela hia, adre me ânyâ helâ me hnö Iehova hna hûna kö Mose me Arona, adre me ânyâ helâi. 51 Me haba hnyi bong heling, Iehova ame hom lakon Isaraela ûnyi hnyi hnyei Aigupito hoton anyidra je dö.

#### HNIMAKAN 13.

**K**E Iehova ame ha kö Mose, ka habe. 2 Okâbâ thö könya ta je atö hia, a lakon Isaraela adre bân hna hnokoâ, at me meno: wale hobi könya.

3 Ke haba Mose ame ha ka tavat, ka habe, ûnykûme ju öbun bong eang, bong öbun e he but ûhebun Aigupito hnyin, ûnyi hnyi hnyaban at hwenbâ; anyin a ûnyi ge hwegien hnyamö Iehova, e ame hum öbun ûnyi hnyi dok e: adre me ca he ka han areto adre levenâ. 4 Hnyi bong ang öbun e he but, hnyi tehi Abiba. 5 Ke e ka he Iehova ka hum u ka hnyi hnyei Kanana, me Heth, me Amora, me Hivi, me Jebusi, waleji a khemanyin ka lakâmâm he ka han köu, a hnyei ame di ge dân basin me hani, me u ma he ka ânyâ huliwa eang hnyi tehi eang. 6 Haba hnyi seven ta bong u ma he ka han areto adre ca levenâ bi, ke haba hnyi bong a seveniny adre me he ka bi jeû kö Iehova. 7 Adre me he ka han areto adre ca levenâ hnyi je bong hia a seven; k' ame ca he ka hu unyâm areto adre levenâ, k' ame câ he ka hu leven unyâm, hnyi em hnyei hia. 8 Ke u ma he ka thumeto nokom hnyi bong eling, ka habe, Adre

## ESODO 14.

me ányá únyi ang can hna ányá hnö Iehova hobi kõnya hnyi úhek Aigupito. 9 K'ame he ka bi haten köu únyi eling hnyi hnyamâm, me hnân oúnykúmeá hnyi wanben li emakâm, me me he huanyibu anyi Iehova ka hnen hnyi hnyimâm: anyin a Iehova ame hum u úhem Aigupito hnen hnyamen ae hwege. 10 Anyin a wale u ma he ka vheno hnanyibu eang hnyi úen adre thu hnyi ke huna me ke huna.

11 Ke e ka he Iehova ka hum u ka hnyi hnyei iny at Kanana, helá me hnen hna khemanyin köu me lakámâm me ham köu, 12 me u ma he ka ip hobi kö Iehova ta je atö hia, me ta je atö nokon meno unyâm; hobi kö Iehova obaga. 13 Ke haba je atö hia nokon asina, me u ma he ka hom nokon mamoe me hwaban; ke u je ne ca he ka bi hwaban e, me u me he ka thu nyin: ke u ma he ka bi hwaban ta бага hia a bán a lakom. 14 Ke e ka he nokom nyiele ka hnei u, ka habe, Ieú e? U me he ka ha kâu, ka habe, Iehova ame hum öhmun ge hnyamen ae hwege úhehmun Aigupito, únyi hnyi hnyaban at hwenbâ: 15 ke e höcö Farao hn' öhmun, haba Iehova ame hlingá je atö hia hnyi hnyei Aigupito, a atö lakon at me atö lakon meno: anyin a wale inya oge me hudo ta je nokon a bán kö Iehova, a obaga; ke oge me bi hwaban je atö a lakuk hia. 16 K'ame he ka bi haten köu únyi eling hnyi hnyamâm, me hnân wen bariny hnyi wanben li emakâm: anyin a Iehova ame hum öhmun úheny Aigupito ge hnyamen ae hwege.

17 Ke a hia but Farao hna tavat, haba Khong ame ca su ödra hnyi hnyei iny at Filisiti, ae hakekeny; anyin a haingen Khong, ka habe, Wá adre nye he ka ietra, ödra ka wá vat, m'adre me he hmetu Aigupito ai: 18 ke Khong ame su ödra hnyi getheniny hnyebuba baten Köiö ae Dra: k'ame he but lakon Isaraela únyi hnyi hnyei Aigupito me omjehen vat. 19 Haba Mose ame hom ta je jeiö Josefa: anyin a hia but khemanyin ka laku Isaraela, ka habe, E hnathu ame he Khong ka sen' öbun; ke hamöbun he ka hom minya je jeiök únyi eang. 20 K'adre me he úhedra Sukotha, me hunuma e Ethama baten hnyebuba. 21 Ke haba Iehova ame he hnyi hnyimaködra hnyi lany hnyi úlá ame tot wisa, he ka humödra eú hnyi gethen, ke hnyi hnyinghet ge meic ama tot wisa, he ka omelami ödra; m'adre me he ka he hnyi lany me lit:

22 k'adre me ca hom hmetu úlá ame tot wisa hnyi lany, me meic ame tot wisa hnyi lit, únyi hnyi hnyimakan tavat.

## HNHYIMAKAN 14.

**K**E haba Iehova ame ha kö Mose, ka habe, 2 Ha thö ka lakon Isaraela, m'adre me he ka saú hmetu me hunuma cicö Pihahiroth wanben Migidola me köiö, cicö Baalazefona: öbun e he ka hunuma cicö e hnyi baten köiö. 3 K'ame he Farao ka ha ge lakon Isaraela, ka habe, Ödra adre me hnok dö hnyi hnyei, k'ame sing ödra hnen hnyebuba. 4 Ke oge me he bi nya ka onáká hnyeku Farao, k'ame he ka hnu hotudra; k'ame he ka oganö nya ga Farao, me anyin je vat hia; k'ame he ka khana hnen at Aigupito a inya Iehova. K'adre me ányá helâe. 5 Ke adre me thumeto than Aigupito a ga kec ut tavat: me ame wia thö hnyeku Farao me lathnyabainy ka tavat, me haingödrin, ka habe, Ieú hnötin hna ányá he ka hna at Isaraela adre me huliwa kötin? 6 Ke e ame penapena anyin kariota me tha he me lakeiny: 7 k'ame hom minya siks haded ta je kariota adre úca, me je kariota hia hnyi Aigupito, me latuhödra hia. 8 Ke haba Iehova ame onáká hnyeku Farao than Aigupito, k'ame hnu lakon Isaraela: anyin a haba lakon Isaraela adre me he me tang hwege. 9 K'ame hnu ödra hnen at Aigupito, je hos hia me je kariota anyi Farao, me tavat adre me tabá haleny je hos, me anyin vat, me homtil' ödra adre me hunuma hnyi köiö cicö Baalazefona, hakekeny Pihahiroth. 10 Ke Farao ame hakekenyá, me lakon Isaraela adre me wá, ke wá bi ame hnu hotudra at Aigupito; k'adre me ot gan hmá: ke lakon Isaraela adre me tenge kö Iehova. 11 Ke haingödra kö Mose, Hawa, e ba je erkemok hnyi Aigupito, m' u me hum öhmun ka mok ang hnyi hnyebuba? Ieú ang u je ányá köhmun, ka hum öhmun úhehmun Aigupito? 12 Hawa, öhmun e ca hia but ha köu hnyi Aigupito, ka habe, Hn' öhmun dut m' öhmun e he ka bi athnyabainy at Aigupito? Anyin ae so köhmun he ka bi athnyabainy at Aigupito, ke kong köhmun he ka mokcu eang hnyi hnyebuba. 13 Ke haba Mose ame ha ka tavat, ka habe, Ca ot, tot ju, me wá úhömeli anyi Iehova, wale ame he ka ányá hobi köbun hnyi bong ang: anyin a haba at Aigupito öbun e wá hnyi



ESODO 15.

bong ang, me öbun e ca he ka wâ hmetu nyiele balua. 14 Ame he Iehova ka vat sing öbun, k' öbun e he ha laba hayibú.

15 Ke haba Iehova ame ha kö Mose, ka habe, Ieú gam u me tenge könya? Ha thö ka lakon Isaraela m' adre me he thö. 16 Ke hai thö ányâm uci, me inâ but hnyamâm hon köiö, me me khekhe lo but: k' ame he lakon Isaraela ka he wanben köiö hnyi dok ae mada. 17 Ke haba inya oge me he bi nya ka onákâ hnyekon at Aigupito, k' adre me he ka hnu hotudra ka hnyin: k' oge me he ka oganö nya bi ga Farao, me anyin je vat hia, me anyin je kariota, me anyin je hnyat tabö hos. 18 K' ame he ka khana hnen at Aigupito a inya Iehova, iny ka hia but oganö nya bi ga Farao, me anyin je kariota, me anyin tavat tabö hos. 19 Ke haba angela anyin Khong, at ame bân hnyi hnyimakan at Isaraela, ame biliny jut hotudra; ke haba úlá at ame tot wisa hnyi hnyimaködra, e ame hwiö me tot hotudra: 20 ke ame he me tot hnyi wanben hunuma anyin at Aigupito me hunuma anyin at Isaraela; ke wale bi eling úlá me menekholom minya, ke so bi ame omelamá hnyinghet: k' ame ca hakekenyâ ke at ka ke, at hnyi lit hia. 21 Ke haba Mose ame inâ hnyamen hon köiö; me Iehova ame okhuto köiö hnen ang hwei ae hwege hnyi lit ae bekhöt me omada e, ke haba köiö ame khekhe lo but. 22 Me ame he but lakon Isaraela hnyi wanben köiö hon kânâ ae mada: ke li hak ködra köiö hnyi ke keihen metödra me medra. 23 Ke haba at Aigupito adre me hnu ödra, me utut hotudra ka hnyi wanben köiö, a je hos hia hale Farao, me anyin je kariota, me anyin tavat tabö hos. 24 Ke haba hnyi hmak hnyi hnyomakatu, Iehova ame selâdra hnyi meic ame tot wisa me úlá, me ame ovecâ vat anyin at Aigupito. 25 Ke ame thang je waengen hnyi anyidra je kariota, me me hmak he ka lelö: waleling me me ha hnen at Aigupito, ka habe, E so ate me kec ge at Isaraela; anyin a Iehova ame bi hiödra, me iwahnaihmiöny me at Aigupito.

26 Ke haba Iehova ame ha kö Mose, ka habe, Inâ but hnyamâm hon köiö, me me he köiö ka hmetuhmetu but ka hnyi hon at Aigupito, hon anyidra je kariota me tavat adre me tabö hos. 27 Ke haba Mose ame inâ hnyamen hon köiö, me ame khutu hmetu but köiö ka hnyi hnen, hnyi ioiny dö lany; ke haba at Aigupito adre me kec me úkhóu me: ke Iehova ame khúâ at Aigu-

pito ka hnyi wanben köiö. 28 Ke ame khutu hmetu but köiö me húlúlúâ je kariota me vat tabö hos, me utbavat hia anyi Farao adre me ut hotudra ka hnyi köiö, me ba ju köluidra e ba me khaca. 29 Ke haba lakon Isaraela adre me vheno dok ae mada wanben köiö; ke li hak ködra köiö hnyi ke keihen metödra me medra. 30 Helâng Iehova ame omelö at Isaraela hnyi bong eling únyi hnyi hnyamen at Aigupito; ke haba at Isaraela adre me wâ at Aigupito a moku hnyi hobat köiö. 31 Ke a wâ but at Isaraela huliwa ae gan ame ányâ Iehova hon at Aigupito, me me outö Iehova tavat: ke adre me labageju kö Iehova me Mose a athnyabainy.

HNYIMAKAN 15.

**K**E haba Mose me lakon Isaraela adre me tha khumöngö khumöng eang, ka habe,

- Oge me he ka khumöng kö Iehova anyin a e ame ti hom dökhü:  
A hia but khúâ hos me at ame tabâ ka hnyi köiö.
- 2 Ja, a tang hwegiök me anyik khumöng, Ke e thibi úhömelik:  
Wale thibi e Khonguk, ke oge me he ka haisoâ;  
Khongu cica, k' oge me he ka ogöra-nyâ.
- 3 Iehova thibi at vat:  
Iehova ien.
- 4 E ame hia but khúâ ka hnyi köiö je kariota anyi Farao, me anyin je vat;  
K' ame ú but eú hnyi Köiö ae Dra anyin je tuhan vat adre úca.
- 5 A húlúlú ödra hnen je dok ae dit;  
Adre me ú but kâ ú helâ me veto.
- 6 Iehova lö, e mec hnyamâm a metâm ae man;  
Iehova lö, a hia but hnyamâm a metâm kot omomono iwahnaihmiöny.
- 7 Ke únyi hnyi úganiny ibeönuaiâm u je hagut' ödra tavat adre me tot köu:  
U je kunâ ányâm hmönyin, m' adre me aú but helâ me tiren.
- 8 Ame kakap göranyai köiö únyi ge homenâiny li hnyingoiâm,  
Ame tot wisa je di helâ me khölöki;  
Ame wahma thö köiö eú hnyi dok ae dit.
- 9 Haingen iwahnaihmiöny, ka habe,  
Oge me he ka hnu, oge me he ka homtilâ, oge me he ka khenâ hna hügúnâ:

ESODO 16.

- Oge me he ka sekuk únyi gadra ;  
 Oge me he ka oc anyik hele vat, ame he  
 hnyamök ka ohi' ödra.
- 10 U je kunâ ányâm ang, me ame húlálú  
 ödra hnen köiö :  
 Adre me ú but eú hnyi köiö ae man,  
 helâ me veten kuha.
- 11 Iehova lö, ewa at ae tha úcú möu unyin  
 ta je khong ?  
 Ia ae tha úcú möu, e hmanenang hwa-  
 kecâm ae kap,  
 Ke hnân outen, ödra ka ogânö u, at  
 ame ányâ ta je únyi hnân láiá ?
- 12 U je inâ hnyamâm a metâm,  
 Me ame ön ödra dut hnen kânâ.
- 13 Hnyi ányâm ibetengiö u je lelö tavat u  
 je hia but omelö :  
 U je lili ödra ge tang hwegiâm ka hnyi  
 hnyabam ae kap.
- 14 A löug ut ta je hnyei, adre me öbu-  
 buny :  
 Vec ae gan ame o ka tavat adre me  
 labâ Filisiti.
- 15 Ame uthmok ta je tuhan hnyei Edo-  
 ma ;  
 Ame öbubun tavat hwege hnyi Moaba :  
 K' ame aú tavat hia adre me laba Ka-  
 nana.
- 16 Ame o but ködra ot me öbubuny ;  
 Únyi ge ihwegeiny benyâm adre me  
 laba hmâ helâ me veto ;  
 Ke ne o but ame hanyâúâ lakem, Iehova,  
 Ke ne o but ame he thö tavat u je hia  
 but úco.
- 17 U ma he ka hum ödra, me t' ödra hnyi  
 bucen, wale hwajekom,  
 Iehova lö, wale hnâm u je ányâ hnân  
 hnyabam,  
 Iehova lö, wale dok ae kap u je hia but  
 ohmâ hnen li hnyamâm.
- 18 Ame he Iehova ka musi nyiele nyiele  
 halua.
- 19 Anyin ame tha utut kâ ú ka hnyi  
 köiö je hos hale Farao me anyin je kariota  
 me tavat tabö hos, ke haba Iehova ame  
 okhuto hmetu köiö hudra ; ke haba lakon  
 Isaraela adre me he hnyi wanben li köiö  
 hnyi dok ae mada. 20 Ke Miriama perofeta  
 momo, hani Arona, ame hom bwinybet  
 hnyi hnyamen ; ke omomo hia ae ve hu  
 bwinybet ödrin e he hoton me bibiâ. 21  
 Ke haba Miriama ame thu me ha, ka  
 habe,  
 Khumöngö th' öbun kö Iehova, anyin a  
 e ame ti hom dökhu ;

A hia but khúâ hos me at ame tabâ ka  
 hnyi köiö.

- 22 Ke haba Mose ame hom dö at Isara-  
 ela únyi hnyi Köiö ae Dra, k' adre me o ka  
 hnyi hnyebuba e Sura ; ke kun bongudra  
 hnyi hnyebuba ke ba köiö adre me wâ.
- 23 K' adre me o but Mara, ke ca khan ödra  
 ijem an eling Mara, anyin ae hiny : wale-  
 ling m' adre me hwenyi ien e Mara. 24 Ke  
 haba tavat adre me etrö Mose, me habe,  
 öhmun e he ka ic ieu ? 25 Me ame tenge  
 kö Iehova, ke Iehova ame omanená kâu ke  
 úö, me ame khúâ ka hnyi an, me ame hnam  
 but an. Ke waleling e ame otílâ hobi  
 ködra hnanyibu me hna owisa, k' ame  
 cubic ödra eling ; 26 ke haingen, ka habe,  
 U ka he ka löng wia hofuc ho Iehova a  
 Khongom, me ányâ únyi ae wisa hnyi  
 hnyimakan, me tevehlöng hnen hna hûna,  
 me tuö anyin je hnanyibu hia, oge me ca  
 he ka kunâ köu ta je mok waleji oge kunâ  
 ka at Aigupito : anyin a inya Iehova at ame  
 osoi u.
- 27 K' adre me o hnyi Elima, ke eling je  
 an a twelv, me ta je úö pama a sevente :  
 k' adre me hunuma hnyi je an.

HNYIMAKAN 16.

**K**E adre me he úhedra Elima, ke ame  
 o but úkhacaköu hia anyin lakon  
 Isaraela ka hnyi hnyebuba Sina, wanben  
 Elima me Sinai hnyi bong a ffitininy tehi  
 a loiny hwaban úhedra hnyi Aigupito.

2 Ke haba úkhacaköu hia anyin lakon  
 Isaraela adre me etrö Mose me Arona hnyi  
 hnyebuba : 3 ke haingen lakon Isaraela  
 ködra, ka habe, Öhmun na mokcu hnen  
 hnyamö Iehova hnyi hnyei Aigupito waleji  
 öhmun e laba hnyi je hna öt meno, me han  
 areto me sekubmun ; anyin a öbe hum  
 öhmun ka hnyi hnyebuba eang he ka  
 blingâ úkhacaköu ang hia ge mekihnânem.

4 Ke haba Iehova ame ha kö Mose, ka  
 habe, Wâ bi oge me he ka ota köbun jeú  
 helâ me we únyi hnyi drany ; k' ame he  
 tavat ka thigâ e hnyi je bong ae úcú ka  
 hnyi bong, m' inye he ka cubic ödra, adre  
 me ne he ka vheno anyik hnanyibu, ame  
 ne ba. 5 Ke haba hnyi bong a siksiny,  
 adre me he ka penapena hnödra hna hom,  
 k' ame he ka tha úcú me hnödra hna hom  
 hnyi li bong a lo. 6 Ke haingö Mose me  
 Arona ka lakon Isaraela hia, ka habe, Öbun

ESODO 16.

e he ka wáhmakhmeto eáu sahac a ga hum öbun Iehova úheibun hnyi hnyei Aigupito : 7 ke haba hnyi hnyomakatu öbun e he ka wá soi Iehova ; anyin a e ame löng hna etró Iehova gabun : ke ie li at öhmü, m' öbun e he ka etr' öhmü? 8 Ke haingö Mose, ka habe, Eáu sahac ame he Iehova ka ha öbun ge meno, me jeú hnyi hnyomakatu me me sekubun ; anyin' a löng ut Iehova hnöbun hna etra : ke ie li at öhmü? k' öbun e ca etr' öhmü, ke Iehova bi. 9 Haba Mose ame ha kö Arona, ka habe, Ha thö ka úkhacaköu hia anyin lakon Isaraela, ka habe, Hakekeny dö ka hnyi hnyimakö Iehova : anyin a löng ut hnöbun hna etra. 10 Ke Arona ame tiga ha hofuc ka úkhacaköu hia anyin lakon Isaraela, me adre me bwele hnyebuba ai, ke wá bi, e manen soi Iehova hnyi úlá. 11 Ke Iehova ame ha kö Mose, ka habe, 12 Oge löng ut ietra anyin lakon Isaraela : ha thö ködra, ka habe, Eáu sahac öbun e he ka han meno, ke haba hnyi hnyomakatu ame he ka sekubun ge jeú ; k' öbun e he ka wáhmakhmeto a inya Iehova Khongubun. 13 Ke haba hnyi sahac ame ölö thö ta je jüö me khavá hnyei : ke hnyi hnyomakatu ame ta hau igigilö je hnyaba. 14 Ke wá bi ame ölö göranyai hau, me e biju hnyi hnyebuba ke únyi ae úhnyükong ae wathalaba, e úhnyükong helá me dân hau ae wahma hon káná. 15 Ke a wá but e hnen lakon Isaraela, adre me úhaköuá, ka habe, Ieú ang? Anyin ae ca khan' ödra bongon. Ke Mose ame ha ködra, ka habe, Wale jeú Iehova ame ham köbun. 16 Walang hofuc a húna hnö Iehova, ka habe, Ve thigá öücü öbun dö ka han ; khaca omer hobi káu at a khaca hoton numerainy tavat ; he th' öbun ka ve hom hobi köbun ka hnyi umöbun je uma mano. 17 Ke haba lakon Isaraela adre me ányá heláe, ke haba keihen adre me thigá gáná, ke keihen ae úhnyükong. 18 Me adre me tuluto hnen omer, me haba at ame thigá gáná, me ba kolon, ke haba at ame thigá úhnyükong, e ha únyi a hia gan ; k' adre me thigá e ve úcü ödra ka han. 19 Ke haingö Mose ködra, ka habe, Ca he ke at ka hip kamec ke ne o but hnyomakatu. 20 K' adre me ca ling Mose ; ke haba ke je hnyat ödrin e hip kamec ke ne o but hnyomakatu me ame ahnyöng me meng : ke Mose ame hmönyin ködra. 21 K' adre me thigá hnyi je hnyomakatu e ve úcü ka han : ke kahwa hwan seúnö, me ame köiö but. 22 Ke

hnyi bong a siksiny adre me thigá jeú ae úcü lo li bong, wale li omer hobi káu at a khaca : ke ame he but je taben úkhacaköu hia me thumetu Mose. 23 Me e ame ha ködrin, ka habe, Walang hna ha hnö Iehova, ka habe, haba bong nyi me hnân mená ae únyi hnathu, sabath ae kap kö Iehova : haba hnöbun hna he ka thán, thán ju, ke haba hnöbun hna he ka ölá, ölá ju ; ke hip kamec ju kolon hobi köbun hnyi hnyomakatu. 24 K' adre me hip kamec ke ne o but hnyomakatu helá me hna húna hnö Mose : k' ame ca meng bi, ke ba minya ahnyöng hnyin. 25 Ke haingö Mose, ka habe, Han d' öbun e hnyi bong ang ; anyin a sabath anyi Iehova bong ang : öbun e ca he ka wá únyi e hnyi káná hnyi bong ang. 26 Ke hnyi siks ta bong öbun e he ka thigá e ; ke hnyi bong a seveniny, wale sabath, ame he ka ba but hnyin. 27 Ke haba hnyi bong a seveniny ame he ke je hnyat ka thigá, me ba. 28 Ke haba Iehova ame ha kö Mose, ka habe, Ke ne o but kehö öbun e he ka höcü ka tuö hnök hna húna me anyik je hnan-yibu? 29 Wá bi, Iehova ame ham köbun sabath, waleling me me ham köbun hnyi bong a siksiny jeú ae úcü lo li bong ; ve laba ju öbun hnyi je hnöbun, ame ca he ka he ke at úheny hnyi hnen hnyi bong a seveniny. 30 Waleling me me mená ju tavat hnyi bong a seveniny. 31 Ke haba lap anyi Isaraela adre me hwenyi ien únyi eling, me, Mana : ke úcü e me önyen gada, ke hau ; ke úcü useneminy me je ong falawa adre úthueniken me hani. 32 Ke haingö Mose, ka habe, Walang hna ha hnö Iehova, ka habe, Ounöngötá ju omeriny me tuö hobi káu anyibun ta je dö, m' adre me he ka wá jeú oge ha öbun gan hnyi hnyebuba hnyi hnök hna hum öbun úheibun hnyi hnyei Aigupito. 33 Haba Mose ame ha kö Arona, ka habe, Hom dö kaia me bi önyen ju e ge mana a khaca omer me ip hnyi hnyimakö Iehova, m' adre me he ka tuö hobi káu anyibun je dö. 34 Me Arona ame ip e hnyi hnyimakan tang hnân ohnatho, m' adre me he ka tuö helá me Iehova ame ha kö Mose. 35 Ke haba lakon Isaraela adre me han mana hnyi je huna a fáte, ke ne o but adre me o ka hnyi hnyei ae hu aten ; adre me han mana ke ne o but adre me o but ka hnyi je hnyigöulen hnyei Kanana. 36 Haba omer me wale ke keihen a libenyitainy efa.

## HNYIMAKAN 17.

**K**E haba úkxacaköu hia anyin lakon Isaraela, adre me he úhedra hnyi hnyebuba Sina, hoton je úhedra, helá me hna húna hnö Iehova, me hunuma hnyi Refidima: ke ba köiö belen tavat. 2 Waleling me me he tavat ka ú Mose, me ha, ka habe, Habelihmun. Ke Mose ame ha ködra, ka habe, Ieú gabun öbun e ú nya? Ieú gabun öbun e cubic Iehova? 3 Ke haba tavat adre me beic eling; k' ame etrö Mose tavat me habe, Ieú gam u je hum öhmun úhehmun Aigupito he ka hling' öhmun me lakuhmun me halehmun je meno ge beic? 4 Ke haba Mose ame tenge kö Iehova, me habe, Ieú oge me he ka ányá ka tavat eang? helá ke adre me he but ang ka lúö nya ge veto. 5 Ke haba Iehova ame ha kö Mose, ka habe, He thö hnyi hnyimakan tavat ke hom dö ke je hingatiny at Isaraela, ke hom minya thö ányám uci hnyi hnyamám, waleji u je kot káu wagewe, ke he thö. 6 Wá bi oge me he ka tot hnyi hnyimákám wale hon ban kic hnyi Horeba; ke u me he ka kot kic me me hingölö but köiö únyi hnyin. Ke haba Mose ame ányá e hnyi hnyimakan wahingatiny at Isaraela. 7 Ke e ame hwenyi ien dok eling Masa, me Meriba, can fuc a lakon Isaraela, me can hnödra hna cubic Iehova, me habe, Hawa, ka e Iehova unyita, ame ne ba?

8 Ke ame o but at Amaleka he ka vat me at Isaraela e Refidima. 9 Ke haingö Mose kö Josua, ka habe, Úca thö hobi köta tavat, ke he thö ka vat me at Amaleka: haba nyi oge me he ka tot hnyi dok ae hut me uci anyin Khong hnyi hnyamök. 10 Haba Josua ame ányá helá me Mose ame ha káu, me vat me at Amaleka: ke haba Mose me Arona me Huro ödrin e tha öliá dok ae hut. 11 Ke Mose ame tiga höibeny, me hwege but at Isaraela; ke ame ne hna but hnyamen, me hwege at Amaleka. 12 Ke sényin dut li hnyamö Mose; m' ödrü me hom veto me bi taben, me ame laba hon: ke haba Arona me Huro ödrü me cö li hnyamen, ke at hnyi ke keihen ke ke at hnyi ke keihen; k' ame hmá li hnyamen ke ne o but ame dit seúnö. 13 Ke Josua ame kot at Amaleka me tavat unyidra ge hele vat. 14 Ke Iehova ame ha kö Mose, ka habe, Sihnalimen ju hnyi tusi hnán ónykúmiá, ke ná

thö aú kö Josua: a oge me he ka ti ohia at Amaleka m' adre me ca he ka únykúme hmetu gadra eang hmelen. 15 Ke Mose ame otílá taben hut me hwenyi ien e Iehova-nisi: 16 ke haingen, ka habe, A hia but Iehova khemanyin, ka habe, Ame he Iehova ka vat me Amaleka hnyi ke dö me ke dö.

## HNYIMAKAN 18.

**K**E a wá but Jethero at bihut e Midiana, úngu Mose, ta je únyi hia Khong ame ányá hobi kö Mose, me at Isaraela a lakeiny, waleji a Iehova ame hom at Isaraela úheny Aigupito. 2 Ke haba Jethero, úngu Mose, ame hum Zipora öiö Mose, hwaban dö hnen hna kuná hmetu, 3 me lakon li бага; haba ien khaca Geresoma; anyin a haingen, ka habe, Oge hia but atkanyua hnyi ke hnyi bi: 4 ke haba ien khaca, me, Eliezera, anyin a haingen, ka habe, Khongon cica at ame hadruo nya, me omeli nya únyi hnyi hele vat anyi Farao: 5 ke haba Jethero, úngu Mose, ame hom li lakon me áián kö Mose hnyi hnyebuba, hnyi dok e ame hunuma hnyin, hnyi bucen anyin Khong: 6 ke ame ha kö Mose, ka habe, Inya Jethero úngom oge me o kóu me áiám me lakom li бага a tha ödrü me. 7 Ke haba Mose ame he ka úkhanö me úngon, me nom káu, me úcumhnyimak me; k' ödrü me úhnököuá li ve bongudru, k' ödrü me didrö ka hnyin uma 'mano. 8 Ke Mose ame thumeto úngon ge ta je únyi hia a ányá Iehova kö Farao me at Aigupito hobi káu at Isaraela, me ta je vec hia a o ködra eú hnyi gethen, me hna omeli ödra ga Iehova. 9 Ke Jethero ame senyiná je so hia a ányá Iehova ka at Isaraela, waleji hna omeli ödra únyi hnyi hnyamen at Aigupito. 10 Ke haingö Jethero, ka habe, Ole kö Iehova at ame omeli öbun únyi hnyi hnyamen at Aigupito, me hnyamö Farao; at ame omelö tavat únyi hnyi hmelen hnyamen at Aigupito. 11 E khanö nya walang ang ae gan hmá Iehova hon ta je khong hia: eke e beönua hudrin hnyi únyi ödrin e bi gáná. 12 Ke Jethero, úngu Mose, ame hom hut adre le me je hut ka Khong: ke ame o Arona me wahingatiny Isaraela hia he ka tha han me úngu Mose hnyi hnyimakan Khong. 13 Ke nyi ame laba Mose he ka owisa tavat: ke ame tot tavat hnyi hnyimakö Mose hwán hnyomakatu ke ne o but

ESODO 19.

sahac. 14 Ke a wâ but ûngu Mose ta je ûnyi hia e ame ânyâ hobi kâu tavat, me e ame ha, ka habe, Ie ûnyi u me ânyâ ka tavat? Ieû gam u me hake laba, k' ame üttilen hnyi hnyimâkâm tavat hia hwân hnyomakatu ke ne o but sahac? 15 Ke haba Mose ame thu ka ûngon, ka habe, Anyin ame labö he kõnya tavat he ka hnö Kkong: 16 a ne hu ke ûnyi gadra adre me he kõnya; ke inya oge me owisa ka ke at me ke at, ke inya oge me thumetu ödra ge ta je hna hûna hnen Khong me anyin je hnanyibu. 17 Ke haingen ûngu Mose kâu, ka habe, E ca so hnâm hna ânyâ. 18 U ma he ka aû tot, u, me tavat eang unyâm; anyin ae hmak köu ûnyi eang; e ca khanö u he ka hake ânyâ. 19 Löng ju walang ang hok, inya oge me nö u, k' ame he Khong ka tha e möu: u ma tot hnyi hnyimakan Khong hobi kâu tavat, ke u ma he ka oâ ta je ûnyi ka Khong: 20 ke u ma he ka n' ödra ge ta je hna hûna me ta je hnanyibu, me omanenâ ködra gethen adre me he ka he hnyin, me huliwa adre me he ka ânyâ. 21 Ke haba khaca u me he ka úca ûnyi ge tavat hia hnyat ae metâ, ödrin e ouden Khong, a hnyat ae hnathu, ödrin e hûkötîâ troban thoi; ke otil' ödrin hon tavat, hnân je taben thauzan, me je taben haded, me je taben fifte, me je taben libenyita: 22 ke so ödrin e he ka owisa tavat hnyi ta je ûen hia: k' ödrin e he ka hom köu ta je ûnyi ae gan, k' ödrin e he biju ka owisa ta je ûnyi ae ûhnyûkong hia: waleling me me hâhâ köu, k' ödrin e hadruo u. 23 U je ne he ka ânyâ ûnyi e, me ame ne he Khong ka köp u hnyin, me u me he ka tethmâ, k' ame he tavat ang ka hnyi hnyabadra hnyi hnahic. 24 Ke haba Mose ame löng ifucin ûngon, me ânyâ hia hnen hna ha. 25 Ke Mose ame úca hnyat ae metâ unyin at Isaraela hia, me otil' ödrin me je homakan tavat, a je taben thauzan, me je taben haded, me je taben fifte, me je taben libenyita. 26 K' ödrin e owisa ka tavat hnyi ta je ûen hia: ke baba ta je ûnyi ae hmak ödrin e hom kö Mose, k' ödrin e owisa biju ta je ûnyi ae ûhnyûkong hia. 27 Ke haba Mose ame hna but ûngon; k' ame he ka hnyi iny hnyei.

HNyimakan 19.

**H**NYI tehi a kuniny hwaban úheny lakon Isaraela hnyi hnyei Aigupito, hnyi bong eling adre me o but hnyi

hnyebuba Sinai. 2 K' adre me he úheny Refidima, me o hnyi hnyebuba Sinai, me adre me hunuma hnyi hnyebuba; ke haba at Isaraela adre me hunuma cicö bucen. 3 Ke haba Mose ame ölö thö ka Khong, ke haba Iehova ame hongot kâu ethö hon bucen me ha kâu, ka habe, Walang hofuc u me he ka ha ka lap anyi Jakob, me thumeto lakon Isaraela, ka habe; 4 Öbun e wâ but hnök hna ânyâ ka at Aigupito, a oge köp öbun hon labenyin aeto, me hum öbun kõnya. 5 Ke walang ang öbun e ne he ka löng hoton hok hofuc me vheno anyik uhihinyköu, m' öbun e he ka helâ me omjeû ae ûnyi hnathu hon ta je hnyei hia: anyin a anyik hmeledrany hia: 6 k' öbun e he ka dökuk dökhu a je at bihut, me hnyei ae kap kõnya. Wale hofuc u me he ka ha ka lakon Isaraela. 7 K' ame o but Mose me hâwâ wabingatinny hnyei, me haimemenâ ködra hofuc eling a hûna Iehova kâu. 8 K' ame thu tavat hia me ha, ka habe, Öhmun e he ka ânyâ ta je ûnyi hia ame ha Iehova. Haba Mose ame thumetu Iehova hofuc hwan tavat. 9 Ke haingö Iehova kö Mose, ka habe, Wâ bi oge me o but köu hnyi úlá ae khot, me me he tavat ka löng anyik úhnenamö möu, m' adre me labageju bala köu. Haba Mose ame thumeta Iehova hofuc hwan tavat. 10 Ke Iehova ame ha kö Mose, ka habe, He thö ka tavat, me okabi ödra hnyi bong ang, me bong nyi, k' adre me he ka hneû anyidra je úkhaû: 11 m' adre me penapena hobi kâu bong a kuniny: anyin a haba hnyi bong a kuniny ame he Iehova ka utut hnyi hnyimakan tavat hia thithö hon bucen Sinai. 12 K' u me he ka si hnyigöulen hnyei igigilö, me habe, Wâ eâu öbun ne he ka öliâ bucen, me kâlâ baten: haba at ama kâlâ bucen adre me he ka hlingâ: 13 e ba hnyamen ke at ame he ka kâlâ, ke so bi adre me he ka lúâ ge veto, ame ne daoâ; ame ca he ka möt, ame ne meno, ame ne at bi: ke ka fuc beû hmâ trutru, me adre me he ka öliâ bucen. 14 Haba Mose ame utut hon bucen ka tavat me okabi ödra; k' adre me hneû anyidra je úkhaû. 15 Ke haingen ka tavat, ka habe, Penapena th' öbun hnân bong a kuniny: ca he ka kâlâ momo. 16 Ke haba hnyi bong a kuniny hnyi hnyomakatu, e hu hendreng, me je huuce, me úlá ae khöt, me hwan trutru ae gan hmönyin; k' ame öbubuny tavat hia hnyi hna hunuma. 17 Ke haba Mose ame

ESODO 20.

hom tavat úheny hnyi hna hunuma he ka úkhanö me Khong; k' adre me tot hmelen bucen. 18 K' ame sâ bucen Sinai hia, anyin a Iehova ame ut hnyin meic kâ e: k' ame ölö görany ai sân helâ me sân inyâ ji: k' ame úk hwege bucen hia. 19 Ke gan tot hwan trutru, me Mose ame fuc, ke Khong ame thu kâu hnyi hofuc. 20 K' ame utut Iehova ka hnyi bucen Sinai, ka hnyi ban bucen: ke Iehova ame hao Mose ka hnyi ban bucen: me Mose ame ölö thö. 21 Ke haingö Iehova kö Mose, ha habe, Utut, he ka thawâ tavat wâ adre nye hanyâúâ he ka ö Iehova, me me moku tavat ae se hia gadra. 22 Ke haba tavat bihut ödrin e hakekeny kö Iehova, e so ödrin e okabi ödrin bi, wâ enyi gâ but Iehova ködrin. 23 Ke haba Mose ame ha kö Iehova, ka habe, E ca khana tavat he ka öliâ bucen Sinai: anyin a u je hûna köhmun, ka habe, Si hnyigöulen dö bucen, me okâbâ. 24 Ke Iehova ame ha kâu, ka habe, He thö, utut: ke u ma he hmetu me Arona ka ölö: ke ca' hna tavat bihut me tavat he ka hanyâúâ he ka ölö kö Iehova wâ e nye he ka gâ ködra. 25 Ke haba Mose ame utut ka tavat me ha ködra.

HNYIMAKAN 20.

**K**E haba Khong ame ha ta je hofuc hia eang, ka habe,  
 2 Inya Iehova Khongom, at ame hum u úhem hnyi hnye Aigupito, únyi hnyi hnyaban úthaluo.  
 3 U ma ca he ka hu ke je khong hnyi hnyimakök.  
 4 U ma ca he ka bi hnatheat hobi köu, me ouco ke únyi ethö hnyi drany me eang hmelen, me hnyi köiö hmelen hnye: 5 u ca he ka khudrung ju ködra me bi athnyabaidra: anyin a inya Iehova Khongom, Khong ame ciâ, at ame bi hwaban monu anyin je kamen ka ta je mátrân ke ne o but dö a kuniny me dö a vakiny adre me húkötio nya; 6 ke ame omanenâ tang ibetengiö ka ta je dö a thauzan tavat adre me hnyok könya, me tuö anyik je hnanyibu.  
 7 U ca he ka ha mono iö Iehova a Khongom: anyin ame ca he Iehova ka haisoâ tavat adre me haimono ien.  
 8 Únykúme ju bong sabath he ka okâbâ.  
 9 Siks ta bong u ma he ka huliwa hnyin, me ányâ je hudrâm hia: 10 ke haba bong a seveniny, wale sabath anyi Iehova a

Khongom: e ba huliwa u ma he ka ányâ hnyin, u, me nokom бага, me nokom hlu, me athnyabaem бага, me momo, me halem meno, me atkanyua unyâm hnyi je homagöulem: 11 anyin a Iehova ame op hnyi siks ta bong drany me hmeledrany, me köiö me ta je únyi hia eú hnyin, k' ame menâ hnyi bong a seveniny: waleling me me hahnahicâ bong sabath hnö Iehova me o kbâ.

12 Ogânâ thö kâmâm me hinyâm me me se hia bongom je bong hnyi hnye ame he Iehova a Khongom ka ham köu.

13 U ca he ka úhlingö.

14 U ca he ka bi únyi monu.

15 U ca he ka venöu.

16 U ca he ka bi fuco thoiâ ke at.

17 U ca he ka behnyekom uma umen ke at, u ca he ka behnyekom áiân ke at, me athnyabainy a бага, me momo, me haleny bolok, me haleny asina, me ta je únyi hia anyin ke at.

18 Ke haba tavat hia adre me wâ hendreng, me hucucu, me meainy trutru, me bucen ame sâ: ke a wâ but tavat me adre me öbubuny me tot sâkâú. 19 K' adre me ha kö Mose, ka habe, Úhnenamö möhmun k' öhmun e he ka löng: ke ca he Khong ka fuc köhmun wâ öhmun nye moku. 20 Ke haba Mose ame ha ka tavat, ka habe, Ca ot bi: anyin a o but Khong me me cubic öbun, m' öbun e he ka outen e, m' öbun e ca he ka monu. 21 Ke ame tot sâkâú tavat, ke Mose ame hakekenyâ menekholom ae khöt wale ame laba hnyin Khong.

22 Ke haba Iehova ame ha kö Mose, ka habe, Walang hofuc u ma he ka ha ka lakon Isaraela, ka habe, Öbun e wâ but a oge hia but úhnenamö möbun únyi hnyi drany. 23 Ca he öbun ka bi hanok ge khong, a je khong sileva me gol öbun e ca he ka mádrâ hobi köbun. 24 U me he ka ányâ hobi könya ke taben hut a kánâ, ke u me he ka hudo hon ányâm je hut adre le. me ányâm je hudiny úsoköu, me halem je mamoe, me halem je kau: haba hnyi je dok hia oge me he ka ounykúmeâ iök hnyin oge me he ka o köu me ohnahici u. 25 Ke u je ne he ka otilâ taben hut a veto hobi könya, u ma ca he ka op e ge je veto adre delâ: anyin a u je ne inâ ányâm únyi huliwa hon, me u je he ka okongoâ. 26 Ke u ca he ka bi wacúat hnân ölö ka hnyi anyik taben hut, wâ e nye manen unyâm ethö hon.

## ESODO 21.

### HNYIMAKAN 21.

**K**E walang je hna owisa u ma he ka omanená ködra.

2 U je ne úco athnyabaem a at Heberu, e ame he ka huliwa hnyi siks ta huna : ke hnyi huna a seveniny e ame he ka he baúâ, k' ame ca bi hwaban bi. 3 K' ame ne hake didrö, me ame he minya ka hake didrut : k' ame ne hu áian, me ame he áian ka tha didrut me. 4 A ne hu áian a ham kâu tuhan, k' ame ne hnokoâ lakon baga me hlu ; haba momo me lakon me wale anyin tuhan, ke hake e ame he ka he kha. 5 Ke ame ne hu manená hnen athnyaba, ka habe, Inya oge me hnyokâ tuhök, me öiök, me lakuk ; oge me ca he ka he baú : 6 hawe, ame he tuhan ka hom e ka hnyat owisa, me hom e ka hnyi hlinginy hwanuma, ame ne ut hwanuma ; k' ame he tuhan ka kou hnyikonyen ge únyi hnân kou ; k' ame he ka bi athnyabainy nyiele balua.

7 Ke ame he ke at ka úco nokon hlu me me athnyaba momo, me ame ca he ka didrut hmetu helâ me úheny je athnyaba baga. 8 Ke ame ne ca so momo ka tuhan, wale at ame hom, hamen he ka hna but ködra he ka úco e hmetu : ke ca khana he ka úco momo ka hnyi ke hneyi bi, anyin a e ame iyawâ. 9 Ke ame ne ham hlu ka nokon baga, hamen he ka ányâ kâu helâ me hnen hna ányâ ka lakon je hlu. 10 Ke ame ne hom ke momo bi ; me ame ca he ka ouhnyúkongo an, me khaúen, me únyi ae úcu ka momo ae hu áian. 11 K' ame ne ca ányâ kâu ta únyi eling a kun, hawe e ame he ka he baú k' ame ca he ka ham mone.

12 Haba at ame kot moko at adre me he ka hlingâ. 13 Ke ame ne ca ikhölö bi, ke ame ne hna ka hnyi hnyamen hnen Khong, me oge me he ka bi hnen hnâu he ka kec ka hnyin. 14 Ke ame ne he ke at ame sihnân ke at he ka hlingâ hnen anyin tang iyawö, u ma he ka hom e únyi hnyi anyik taben hut me me mokcu.

15 Haba at ame kot kamen me hinyen, adre me he ka hlingâ.

16 Haba at ame venâu at me úco hwaban mone, k' adre me ne wâ e unyin, me, adre me he ka hlingâ e.

17 Kaba at ame hangâ kamen me hinyen adre me he ka hlingâ e.

18 Ke a ne ú li at, me ame he ke at ka

lúâ ke at hnen veto, ke ame ne kot ge hnyamen adre vhec, ke ame ca mokcu bi, k' ame mokut hon hna mokut : 19 ke ame ne tot hmetu thö, me he eú ame ci, me waleling ame he ka he baú at ame kot e : ke so bi e ame he ka bi hwaban ta je bong e ame úâ hnyin, me ti osoâ.

20 Ke a ne he ke at ka kot athnyabainy baga, ame ne momo, ge osö, me ame mokcu hnyi hmelen hnyamen : adre me he ka bi hwaban kâu. 21 Ke a ne tiga möt hwaban khaca bong ame ne lo, me adre me ca he ka bi hwaban kâu, anyin a anyin mone e.

22 Ke a ne ú li at me okongoâ momo a erkin, me ame köluhabú nokon, ke so bi e ca kong momo, me adre me he ka bi hwaban kâu hoton hna ha hnen áian ; k' ame he ka bi hwaban helâ me hna ha hnen hnyat owisa. 23 Ke a ne kong ut hnyi obiny, me adre me he ka ham möt me hwaban möt, 24 ecmak hwaban ecmak, nyu hwaban nyu, hnyamen hwaban hnyamen, can hwaban can, 25 hna thong hwaban hna thong, aat hwaban aat, okhaca hna hwaban okhaca hna.

26 Ke a ne he at ka kot emakan athnyabainy baga, ame ne emakan athnyabainy a momo, me ohia e ; me adre me he ka hna baúâ but e hnân hwaban emakan. 27 Ke a ne he ka kot hmetro nyona thnyabainy baga me momo, m' adre me he ka hna baúâ but e me hnân hwaban nyon.

28 Ke a ne he kau ka dá at, a ne baga a ne momo, me me mokcu, me adre me he ka lúâ ge veto, k' adre me ca he ka an utiöiny : k' adre me he ka hna baúâ at ae tren kau. 29 Ke a ne hwakecin kau eling e hac he ka údö, k' adre hia but omanená e ka at ae tren kau, k' ame ca tuö e, me ame hlingâ at, a ne baga a ne momo ; me adre me he ka lúâ kau ge veto, k' adre me he minya ka hlingâ at ae tren kau. 30 Ke adre ne ip hon hwaban, me ame he ka ham hwaban anyin möt, wale ta únyi hia adre ip hon. 31 Ke a ne dá baga nokon ke at, ke a ne momo, me adre me he ka ányâ kâu helâ me hna owisa e. 32 Ke a ne he kau ka dá athnyaba baga ame ne momo ; me ame he at ae tren kau ka ham ka tuhan je sekel sileva a thöti, ke haba kau adre me he ka lúâ ge veto.

33 Ke a ne he ke at ka jien thop, ame ne hiny thop, ke ame ca tube e, ke a ne kölu but kau, ame ne asina, 34 me ame he at ae tren thop ka bi hwaban e, me ham

ESODO 22.

mone ka at a haleny ; ke haba meno a mok ame he ka anyin biju.

35 Ke a ne kot moko kau haleny ke at hnen kau haleny ke at ; me ödru me he ka úco kau ae möt, me khenâ tang mone ; k' ödru me he minya ka khenâ meno a mok. 36 Ke a ne manen a g' ame labö údö e hac kau eling, k' ame ca tuö e bi hnen at a haleny ; me e ame he ka ham ke kau hwaban ke kau, ke anyin biju meno ae mok.

HNYIMAKAN 22.

**A** NE he at ka venâu kau, ame ne mamoe, me hlingâ e, ame ne úco ; me ame he ka ham thabúng ta kau me hwaban ke kau, me je mamoe a vak me hwaban ke mamoe. 2 Adre ne kât at hnyi úen e ame tiga venöu, ke adre kot moko e, me ba dra hnân bi hwaban. 3 Ke a ne utö seúnö hon, me ame he ka hu dra hwaban e ; ke hamen he ka bi hwaban ; ke a ne ba omjehen, me adre me he ka úco e me hwaban hnen hna venöu. 4 K' adre me ne wâ únyi a venöu ae tiga möt hnyi hnyamen, ame ne kau, ame ne asina, ame ne mamoe ; e ame he ka ham lo me hwaban.

5 A ne he ke at ka okongoâ hna belök, ame ne hnyei vine, me hna haleny meno he ka an hnyei iny ke at ; me e ame he ka bi hwaban soâ únyi hnyi iny hnyei, ame ne anyin hnyei vine.

6 A ne o thö meic me thong ta je úö ae údedö, me le hwit ame ta, ame ne hwit ame tot, ame ne hnyei ; me ame he ka bi hwaban hnen at a hlogon.

7 A ne ke at ame ip unyin ke at tang mone, ame ne ke únyi he ka tuö, k' adre me ne venâu únyi hnyi umen uma ; ke adre me ne wâ at venöu, me ame he ka bi hwaban ibi olo. 8 K' adre me ne ca wâ at venöu, me adre me he ka hom at a umen uma ka hnyat owisa, m' adre me wâ thö, hawa, ame ne hia but inâ hnyamen ka hnyi tang omjehen at. 9 Haba hnyi je hna hanyâúâ hia, ame ne kau, ame ne asina, ame ne mamoe, ame ne úkhaú, ame ne ke unyi bi ae hia, ke haingen ke at, ka habe, ka anyin, me adre me he ka hom hnödra hna ivinö ka hnyat owisa ; ke haba at hnen hnyat owisa hna aat, me hamen he ka ibi olo bi hwaban ka ke at bi.

10 A ne he ke at ka hna asina ka ke at he ka tuö, ame ne kau, ame ne mamoe, ame ne ke meno ; k' ame ne mokcu, k' adre

ne okongo, k' adre ne alen, ke ba at a wâ : 11 me ödru me he ka khemanyin hnyi hnyimakö Iehova, a ga ca inâ hnyam ka hom únyi anyin ke at ; k' ame he ka kap e hnen at a haleny ke ame ca he ka bi hwaban. 12 Ke adre ne venöu unyin, me ame he ka bi hwaban ka at a haleny. 13 K' ame ne kikia but, hamen he ka hom hnân ohnathoâ, k' ame ca he ka bi hwaban hna kia.

14 Ke a ne he ke at ka me hom ke únyi anyin ke at, k' adre ne okongo, k' ame ne mok, ke tiga hia at a anyin, me e ame he ka bi hwaban. 15 Ke a ne tha e me at a anyin, e ame ca he ka bi hwaban : ke a ne ke únyi adre me me hom hnân hwaban, me ame he ka hu hwaban.

16 A ne he ke at ka cubec ke hlu adre tiga ca kácá, k' ame tha mokut mē, me ame he ka ham omjeú me me áiân. 17 Ke a ne höcö kamen he ka ham kâu, me e ame he ka ham mone ae úcú me hwaban hlu.

18 U ma ca he ka hna but momo ae tren khong he ka möt.

19 Adre me he ka hlingâ at ame tha mokut me meno.

20 Adre me he ka ti ohia at ame bi hut ka ke khong, ke ca kö Iehova. 21 U me ca he ka okongoâ atkanyua, me ovecâ : anyin a öbun je atkanyua hnyi hnyei Aigupito. 22 Ca he ka okongoâ safac me nakahme. 23 U je ne he ka okongu ödrin, ke odrin e he ka tenge könya, me oge me he ka löng anyidrin tenge ; 24 k' ame he ka ubáhlâ anyik hmönyin, ke oge me he ka hling' öbun ge hele vat ; k' ame he ka safac je laöiöbun, k' ame he biju ka nakahme je lakubun.

25 U je ne he ka me ham mone ka lakeik unyâm at ae ba ta únyi, ca he ka helâ me at ame ham ge hwaban ; ke u ca he ka hnei hwaban gan. 26 U je ne he ka hom úkhaú anyin ke at hnân haten, me u ma he ka ham hmetu e kâu ke tiga ca dit seúnö : 27 anyin a iny kubö a khaca, ke hnân khavâ unyin : k' ame he ka mokut hnyi iéú? ke e ka tenge könya oge me he ka löng, anyin a iny at betenge.

28 U ma ca he ka haikongoâ hnyat owisa, me hangâ at ame musö em hnyei. 29 U ca he ka becâ ham wan em hnyei, me dân wan halem je úö. Ke u me he ka ham könya watö a lakom бага. 30 Ke helâe u me he ka ányá ge halem ta je kau, me halem je mamoe : seven ta je bong ame he ka hnen unyin hinyen, ke hnyi bong a



eitiny u me he ka ham kõnya. 31 Ke öbun e he ka tavat ae kap hobi kõnya; anyin a wale öbun e ca he ka han utiö adre olou hnyi hnyot; k' öbun e he ka khûa ka ta je kuli.

## HNYIMAKAN 23.

U CA he ka kap úthumetu ae thoi: ke ca hai hnyamám tha u me at ae monu he ka ohnatho úokonguny. 2 U ca he ka hnu hoton tavat ae se he ka ányá monu; ke u ca he ka fuc hnyi ivinö he ka tha hien me tavat ae se hia adre me ohnathoa thoi; 3 ke u me ca he minya ka betenge ge at ae ba ta' únyi, hnyi anyin ivinö.

4 U je ne he ka úkhanö me kau, ame ne asina haleny iwahnaihmiöny möu, ame he monu, u ma he ka ohmeto e káu. 5 U je ne wá asina haleny at ame húkotiö u, ame mokut takoú hnen honen hok, wá eáu u ne he ka hake hna káu, u me he ka hom hadruá.

6 U ca he ka ohwalö hna owisa ka liamewaeny möu ae ba ta únyi, hnyi anyin ivinö. 7 Úsákáúö u but me hofuc ae thoi; ke ca he ka kot at ae ba kongon, ke wisa hwakecin: anyin oge me ca he ka haiwisa at ae kong. 8 Ke u me ca he ka kap bwihlany: anyin a haba bwihlany ame omúko at ame wá, me ohavá hofuc hwan tavat ae wisa. 9 Ke u ca he ka okongoá atkanyua: anyin ae khan' öbun hnyekon atkanyua, anyin je atkanyua öbun e hac hnyi hnyei Aigupito.

10 Ke siks ta je huna u me he ka belöká kánám káná, me menö je wan: 11 ke haba huna a seveniny u me he ka hna but ka me mená, me me han hnen tavat unyám ae ba ta únyi: ke haba je kolon hwabödrin, ame he ka han hnen omeno. Ke u me he ka ányá heláe ka halem ta je vine me elaiö. 12 Hnyi ta bong a siks u ma he ka ányá je hudrám, ke haba hnyi bong a seveniny u me he ka mená: me me hnyi mená halem bolok, me halem asina, me me he ka ohwegiá hmeto nokon athnyabaem a momo, me atkanyua. 13 Ke hnyi ta je hofuc hia oge ha köbun, wá eáu: ke ca he öbun ka ha ien ke ta je khong, k' adre me ca he ka löng e únyi hnyi hnyimám.

14 Kun ta úen u me he ka bijeu hnyin kõnya knyi huna. 15 U me he ka bijeuá areto adre ca levená bi: seven ta bong u me he ka han areto adre ca levená, helá

me hnök hna húna köu, hnyi úen adre thu, hnyi tehi Abiba (anyin a u je he but úhem Aigupito hnyi tehi eling); ke ca he ke at ka manen hnyi hnyimakök ke ba únyi: 16 me bijeuá hna meno, ta je wan a bán hnyi ányám huliwa, wale u je tá hnyi hnyei: me bijeu adre meno hnyi obiny huna, úen u je um dö meno hnám hna huliwan hnyi hnyei. 17 Haba obaga hia unyám adre me he ka okun manen hnyi huna hnyi hnyimakan Than Iehova.

18 U ma ca he ka hudo kõnya dra tha e me areto adre levená; k' ame ca he ka laba ke ne o but hnyomakatu pipikhenyainy meno adre hudo kõnya. 19 U me he ka hom ka hnyi uma umö Iehova a Khongom ta je jeú a bán únyi hnyi kánám káná. Ke ca he ka ölä nokon got hnyi dân basin hinyen.

20 Wá bi, inya oge me kuná angela he ka bán hnyi hnyimákám he ka tuö u eú hnyi gethen, me hum u ka hnyi dok oge hia but penapena. 21 Wá wia e bi, me löng hoton hwan hofuc: ca he ka ohmönyiná: anyin a e ame ca he ka hna degecá hnám ta je hna hanyáúá; anyin a eú hnyi hnyekon iök. 22 Ke u ka he ka löng hoton hwan hofuc, me ányá hia hnök hna ha; me oge me he ka iwahnaihmiöny me je iwahnaihmiöny möu, me ivinö me at ame ivinö möu. 23 Anyin ame he anyik angela ka hnyimakan ányám bunyen, me hum u ka at Amora, me Heth, me Perizi, me Kanana, me Hivi, me Jebusi: k' oge me he ka ohí' ödra. 24 U ca he ka khudrung ka ta je khongundrin, me bi athnyaba ködrin, me ányá helá me anyidrin huliwa: ke so bi u me he ka hagus' ödrin, me kot omomono anyidrin je veto ametot. 25 K' öbun e he ka bi athnyabai Iehova Khongubun, me ame he ka hahnahicá ám me belám; ke oge me he ka hom mok únyi gam. 26 E ba at ame he ka köluhabú nokon, ke ba ke at ame he ka safac hnyi em hnyei: ke oge me he ka ohwádá numerainy bongom ta je bong. 27 Oge me he ka kuná hnán outö nya hnyi hnyimákám, me ovecá ta je hnyei hia u me he ka o ka hnyin, k' oge me he ka kuná ta je iwahnaihmiöny hia möu he ka kec gam. 28 Ke oge me he ka kuna báná wahan-káná wale ame he ka obá at Hivi, me Kanana, me Heth únyi hnyi hnyimákám. 29 Oge me ca he ka ob' ödra hnyi huna a khaca, wá e nye hnyotö káná, k' ame osehia but omenoiny hnyot köu. 30 Ke oge me he ka ob' ödra úhnyúkong tot

hnyi hnyimákâm ke ne o but u me se hia, me labâ hnyeï. 31 Ke oge me he ka si hnyigöulâm hwân hnyi Köiö ae Dra ke ne o but ka hnyi köien at Filisiti, ke hwân hnyi hnyeubaba ke ne o but hnyi Wagewe : anyin oge me he ka hna ka hnyi hnyamöbun tavat adre me labâ hnyeï ; k' u me he ka ob' ödra hnyi hnyimákâm. 32 U me ca he ka úhibinyköu m' ödra me je khongudrin. 33 Adre me ca he ka laba hnyi em hnyeï wâ odra nye bi jönâm kõnya : anyin a u je ne he ka bi athnyaba je khongudrin, wale thibi e hnân nuc u.

## HNYIMAKAN 24.

**K**E e ame ha kö Mose, ka habe, Ölö thö kö Iehova, u, me Arona, me Nadaba, me Abiu, me wahingatiny Isaraela a sevente; ke öbun e he ka khudrung sâkâû : 2 ke haba Mose ame he ka hake hakekeny kö Iehova; ke ödrin e ca he ka hakekenyâ; k' ame ca he tavat ka tha ölö mē. 3 Ke Mose ame he me thumeto ta je hofuc ho Iehova, me ta je hna owisa hia; ke ame thu hnen tavat hia hnyi hofuc a khaca, ka habe, Öhmun e he ka ânyâ ta je hofuc hia a ta hnö Iehova. 4 Ke haba Mose ame sihnalimen je hofuc ho Iehova, me vesâkong, me otilâ taben hut hmelen bucen, me je veto ame tot a twelv hoton je tribu a twelv anyin at Isaraela : 5 Ke e ame kunâ wahidröu a je lakon Isaraela, m' ödrin e hudo ta je hut adre le, me hudo kö Iehova je kau hnân hudiny úsoköu. 6 Haba Mose ame hom ke keihen dra, me hingâlâ ka hnyi je kâia; ke haba kolon dra e ame dukâiâ kâu taben hut. 7 Ke e ame hom tusiny úhibinyköu, me aú, k' ame löng tavat : me haingödra, ka habe, Öhmun e he ka ânyâ hia hna ha hnö Iehova, me löng hoton. 8 Ke haba Mose ame hom dra me dukâiâ tavat, me ha, ka habe, Wâ bi dren úhibinyköu a ânyâ Iehova m' öbun hnyi je hofuc hia eang. 9 Ke haba Mose ame tha ölö me Arona, me Nadaba, me Abiu, me wahingatiny at Isaraela a sevente : 10 ke ödrin e wa Khongon at Isaraela; ke eú hnyi hmelen li can helâ me dek veto a safairo, ke helâ me drany ae alai. 11 Ke e ame ca ip hnyamen hon je thaniny lakon Isaraela : k' ödrin e wâ Khong me han me ic. 12 Ke Iehova ame ha kö Mose, ka habe, Ölö thö kõnya hon bucen, me laba eling : ke oge me he ka ham köu li veto ae lau, me hnanyibu me je hna hûna waleji

oge sihnalimen, m' u me he ka úne. 13 Ke Mose ame todrö me Josua athnyabainy : ke Mose ame öliâ bucen anyin Khong. 14 Ke haingen ka wahingat, ka habe, Halubahing öhmu ju öbun eang ke ne o but öhmu me hmetu köbun : ke wâ bi e unyibun Arona me Huro : ke a ne hu hna ivinö ge at, me ame he ka he ködrü. 15 Ke haba Mose ame öliâ bucen, k' ame khavâ bucen hnen úlá. 16 Ke haba hmanenangi Iehova ame laba hon bucen Sinai, k' ame oiyongâ hnen úlá hnyi siks ta bong : ke hnyi bong a seveniny e ame laba hnyin úlá me hao Mose. 17 Ke haba hwakecin hmanenangi Iehova, me, helâ me meic ame han hnyi hon bucen hnyi hnyimakan lakon Isaraela. 18 Ke Mose ame dit ka hnyin úlá me öliâ bucen : ke ethö Mose hon bucen fâte je lany ke fâte je lit.

## HNYIMAKAN 25.

**K**E Iehova ame ha kö Mose, ka habe, 2 Ha thö ka lakon Isaraela m' adre me hom bwihlany hobi kõnya, öbun e he ka hom anyik bwihlany hoton weny je hnyekudra. 3 Ke walang bwihlany öbun e he ka kap únyi gadra, gol, me sileva, me bras; 4 me je mano udrudrá, me udrudrá hlit, me dra vec, me lino ae úhnyükong nân, me leúnen got; 5 me je unen mamoe бага adre wia me me dra, me je unen takasa, me je úö ohum; 6 me wakaco hnân umumelan, me ta je únyi ae bo so hnân le; 7 me je veto soama, me je veto hnân mokut hnyi iefoda, me tubiny úlainy. 8 K' adre me he ka ânyâ hobi kõnya dok ae kap; m' inye he ka laba unyidra. 9 Öbun e he ka ânyâ helâ me ta je hofuc hia oge me omanenâ köu, tulutiny uma, me tulutiny omjehen, öbun e he ka ânyâ helâe.

10 K' adre me he ka tibet ke tang a utö ohum : ame he ka lo li kubit me haf ibeúen, ke khaca kubit me haf úlaun, ke khaca kubit me haf ibeúen göranyai. 11 Ke u me he ka tube hnyin me hoton ge gol ae so, ke u me he ka bi koronainy a gol. 12 Ke u me he ka le je otru gol a vak hobi kâu, me ohmâ hnyi je can a vak; lo li otru hnyi ke keihen; ke lo hnyi ke keihen. 13 Ke u me he ka ânyâ li utö ohum hnân venyâ, me tube ge gol. 14 Ke u me he ka in' li únyi e hnyi hnyin je otru hnyi li ke keihen tang, hnân vadren kâu tang. 15 Ame he ka mokut li venyâ hnyi hnyin je otruin tang, ca he ka oc ut. 16 Ke

u me he ka hitangen hnyin tang únyi hnân ohnatho, wale oge me he ka ham kôu. 17 Ke u me he ka ányâ taben ibetengiö gol ae so: lo li kubit me haf ibeúen, ke khaca kubit me haf úlauen. 18 Ke u me he ka ányâ li kerubi gol; u me he ka tibet me huliwan ge hama, hnyi li bahebetiny taben ibetengiö. 19 U ma tibet ke kerubi hnyi ke bahebet, me ke kerubi hnyi ke bahebet: öbun e he ka ip li kerubi me hanen taben ibetengiö hnyi li ke keihen. 20 K' ame he li kerubi ka lau göranyai li labenyidru, me me khavâ taben ibetengiö ge li labenyidru, ke ödru me he ka úhnyimakö-drukou; k' ame he li kerubi ka hnyimakö-dru ka hnyi taben ibetengiö. 21 Ke u me he ka ip taben ibetengiö ethö hon tang: ke u me he ka hitangen hnyin tang únyi hnân ohnatho oge me he ka ham kôu. 22 Ke oge me he ka iouny möu eling, me úhne-namö möu únyi ethö hon taben ibetengiö, únyi hnyi wanben li kerubi hon tang hnân ohnatho, hnyi ta je hofuc oge. me he ka huna kôu hobi kâu lakon Isaraela.

23 Ke u me he ka tibet utö ohum hnân laulau: lo li kubit ibeúen, ke khaca kubit úlauen, ke khaca kubit me haf ibeúen göranyai. 24 Ke u me he ka tube ge gol ae so, me bi koronainy gol hnyi je baten. 25 Ke u me he ka bi baten igigilö a khaca hnyam, me bi koronainy baten igigilö e ge gol. 26 Ke u me he ka tibet hobi kâu je otru gol a vak hnyi je baten a vak, wale hnyi je can a vak. 27 K' ame he ka úhakekenyi je otru me baten hnân hnen li venyâ, m' adre me vaden laulau. 28 Ke u me he ka ányâ li venyâ ge utö öhum, me tube ge gol, m' adre me vaden laulau kâu. 29 Ke u me he ka ányâ je utkaiainy, me je spuniny, me je jöginy, me je kaiainy, hnân hingála: u me he ka ányâ je únyi eling gol ae so. 30 Ke u me he ka ip bala hnyi hnyimakök hon laulau areto hnân omanená.

31 Ke u me he ka ányâ taben lamepa gol ae so: ke u me he ka ányâ taben lamepa me huliwan ge hama, wale can, me unyin; k' adre me he ka khacâ mē je kaiainy, me je ovejien, me je vongon: 32 ke ame he ka vhei siks ta vheiny únyi hnyi li ke keihen; kun ta vheiny taben lamepa hnyi ke keihen, ke kun ta vheiny taben lamepa hnyi ke keihen: 33 kun ta kaia helâ me vhonginy saked, me ovejien, me vongon, hnyi ke vheiny; ke kun ta kaia helâ me vhonginy saked hnyi ke vheiny, me ovejien, me

vongon: ame he ka helâe hnyi je vheiny a siks a vheivhei únyi hnyi taben lamepa: 34 ke vak ta kaia hnyi taben lamepa helâ me je vhonginy saked, me je ovejien, me je vongon: 35 ke ke ovejien hmelen li vheiny me khacâ mē, me ke ovejien hmelen ke li vheiny me khacâ mē, hnân je vheiny a siks ame vhei únyi hnyi taben lamepa. 36 Ke únyi hnyi únyi a khaca je ovejien me je vheiny eling: a khaca thibi hia thithö hna huliwan ge hama gol ae so. 37 Ke u me he ka ányâ je lamepainy me me seven: k' adre me he ka vâc je lamepainy me me umumelam igigilö. 38 Ke ame he ka gol ae so li uthesiúniny, me taben hleúhleú. 39 Ke khaca talan gol ae so adre me he ka ányâ tha e me je taben hia eling. 40 Ke wâ bi, me u me he ka ányâ ta je únyi e helâ me tulut adre omanená kôu hon bucen.

## HNYIMAKAN 26.

**K**E u me he ka ányâ uma mano a ten je tubwiny; a mano lino ae úhnyú-kong nân adre seveny, me udrudrá, me udrudrá hlit, me dra vec, k' ame he hnyat huliwa ae metâ ka huliwan ge je kerubi. 2 Haba ibeúen je tubwiny, ame he ka twente eit je kubit, ke úsa vak kubit úlauen je tubwiny: ame he ka khaca tulutiny ta je tubwiny hia. 3 Adre me he ka útibetkôuâ ta tubwiny a thabúng ke at me ke at; k' adre me he ka útibetkôuâ ke je tubwiny a thabúng ke at me ke at. 4 Ke u me he ka ányâ je hnyimen hnewe ae udrudrá hnyi baten tubwiny hnyi hna ohmâ; ke u me he ka ányâ helâe minya hnyi ke baten tubwiny, hnyi hna ohmâ khaca. 5 Fifte hnyimen je hnewe u me he ka ányâ hnyi ke tubwiny, ke fifte hnyimen je hnewe u me he ka ányâ hnyi baten tubwiny hnyi hna ohmâ a loiny, me me he hnyimen je hnewe ka tha úcú. 6 Ke u me he ka ányâ je bálet gol a fifte, me úseú-kôuâ je tubwiny ge je bálet: me me khaca uma mano. 7 Ke u me he ka ányâ je tubwiny unen got hnân khavâ uma mano: eleven je tubwiny u me he ka ányâ. 8 Ke haba ibeúen je tubwiny ame he ka úsa thöte je kubit, k' ame he ka úsa foa kubit úlauen je tubwiny: k' ame he ka khaca tulut je tubwiny a eleven. 9 Ke u me he ka úohmâ-kôuâ je tubwiny a thabúng me me khaca, me je tubwiny a siks me me khaca, me u me he ka vhec tubwiny a siksiny hnyi hnyi-

## ESODO 27.

makan uma. 10 Ke u me he ka ányá hnyimen je hnewe a fifte hnyi baten tubwiny hnyi hoton hnyi ohmáiny, ke fifte hnyimen je hnewe hnyi baten ke tubwiny hnyi hna ohmá a loiny hnyi hoton. 11 Ke u me he ka ányá je bálet bras a fifte, me odilá je bálet ka hnyi hnyimen je hnewe, me me úohmákouá uma me me khaca thibi. 12 Ke haba ke keihen kolon je tubwiny uma, wale kolon a hafiny tubwiny uma, ame he ka him hnyi hoton uma mano. 13 Ke haba kubit hnyi ke keihen a khaca, me kubit hnyi ke keihen a loiny, wale únyi hnyi kolon hnyi ibeúiny je tubwiny uma, ame he ka him hnyi li ke keihen uma mano hnyi ke baten me ke baten hnân khavá e. 14 Ke u me he ka ányá hnân tube uma je unen mamoe бага adre wia e me dra, me je unen takasa hna tube ban.

15 Ke u me he ka ányá je esö öhum adre me he ka otilá hnân uma mano. 16 Ame he ka úsa ten kubit ibeúen je esö, ke úsa khaca kubit me haf úlaun je esö. 17 Ke ame he ka úsa lo can hnân dit hnyi je esö he ka tha hújákouá : ke u me he ka ányá heláe je esöiny hia uma mano. 18 Ke u me he ka ányá je esö a twente hobi káu uma mano hnyi ke keihen ka hnyi hwaiöu. 19 Ke fáte je taben sileva u me he ka ányá eú hmelen je esö a twente; lo li taben eú hmelen ke esö hobi káu li can, ke lo li taben hmelen ke esö hobi káu ke li can: 20 ke ame he ka twente je esö hobi káu ke keihen uma mano ka hnyi hwadrö: 21 k' ame he ka fáte je taben sileva; lo li taben eú hmelen ke esö, me ke li taben eú hmelen ke esö. 22 Ke u me he ka ányá je esö a siks hobi káu hnyaumainy uma mano e jio. 23 Ke u me he ka ányá lo li esö hobi káu hnyaumainy uma mano hnyi li kop. 24 K' adre me he ka ányá me me úsa lo eú, ke adre me he ka úohmákouá ke ne o but ethö hnyi ke otru; k' ame he ka heláe li at a lo hia; wale hnân hobi káu li kop. 25 K' ame he ka hu eit je esö, me je taben, me je taben sileva a sikstin; lo li taben hmelen ke esö, ke lo li taben hmelen ke esö. 26 Ke u me he ka ányá je venyá öhum; thabúng hobi káu je esö hnyi ke keihen uma mano, 27 ke thabúng je venyá hobi káu je esö hnyi ke keihen uma mano, ke thabúng je venyá hobi káu je esö hnyi ke keihen uma mano, hobi káu hnyaumainy e jio. 28 Ke haba venyá hnyi wanben wale ame mokut hnyi wanben je esö, ame he ka hwân hnyi ke baten ke ne o but ka

hnyi ke baten. 29 Ke u me he ka khavá je esö ge gol, me ányá je otru gol hnân iná je venyá : ke u me he ka khavá je vhenyá ge gol. 30 Ke u me he ka otilá uma mano hoton tulutiny adre hia but omanená kou hon bucen.

31 Ke u me he ka ányá singiny a mano ae udrudrá, me udrudrá hlit, me dra vec, me lino ae úhnyúkong nân adre seveny; ka adre me he ka ányá hnyin je kerubi a huliwan hnyat ae metá: 32 ke u me he ka uhno e hnyi vak ta utö öhum ame tot adre khavá ge gol, me je bálet gol, hnyi je taben sileva a vak. 33 Ke u me he ka uhno singiny hmelen je bálet, me hom eiö tang hnân ohnatho ka hnyi hoton singiny: k' ame he singiny ka bi hnyigöulen köbun dok ae kap me dok ae ti kap. 34 Ke u me he ka ip taben ibetengiö ethö hon tang hnân ohnatho hnyi dok ae ti kap. 35 Ke u me he ka ip laulau hnyi ke keihen singiny hnyou ai, me taben lamepa cicö laulau hnyi ke keihen uma mano ka hnyi hwaiöu; ke u me he ka ip laulau hnyi ke keihen ka hnyi hwadrö. 36 Ke u me he ka ányá hobi káu hwanumen uma hlinginy ae udrudrá, me udrudrá hlit, me dra vec, me lino ae úhnyúkong nân, a huliwan hnyat omeçá mano. 37 Ke u me he ka ányá utö öhum ame tot a thabúng hobi káu hlinginy, me khavá ge gol; me je bálet gol, me le je taben bras a thabúng hobi káu je utö.

### HNYIMAKAN 27.

**K**E u me he ka tibet taben bihut a utö öhum, faiv je kubit ibeúen, ke faiv kubit úlaun; ke khaca tulut vak ta baten taben bihut: ke kun ta kubit ibeúen göra-nyai. 2 Ke u me he ka ányá je baitoiny hnyi vak ta baten, haba je baitoiny me khaca me unyin: ke u me he ka khavá ge bras. 3 Ke u me he ka ányá je taben hnabadröuiny, me je soi, me je kaiainy, me je báletiny hnân sêú utiö, me je taben meic, u me he ka ányá je taben hia a bras. 4 Ke u me he ka ányá hobi káu echigic a bras helá me boert; ke u me he ka anyá hon boert je otru bras a vak hnyi je baten a vak. 5 Ke u me he ka ip únyi e eú hmelen baten taben bihut hnyikânái, me me he ka uhni boert hnyi wanben taben bihut. 6 Ke u me he ka ányá ke li venyá hobi káu taben bihut, a li öhum, me khavá ge bras. 7 Ke adre me he ka iná li venyá hnyi hnyin je

otru, k' ame he ka hnen li venyâ hnyi li baten taben bihut, m' adre me vadren. 8 U me he ka tibet esöiny me olanyâ hnyin: adre me he ka ânyâ helâ me hna omanenâ köu hon bucen.

9 Ke u me he ka bi haginy uma mano; haba hnyi ke keihen ka hnyi hwaiöu adre me he ka uhno mano lino ae ûhnyûkong nân adre seveny hnân hak, a khaca haded je kubit ibeüen hnyi ke keihen a khaca: 10 ke twente je khetepiny, me je taben bras a twente hobi kâu, k' ame he ka sileva je bâletiny je khetep, me je venyâ. 11 Ke helâe ibeüen hnyi ke keihen ka hnyi hwadrö, khaca haded kubit ibeüen mano adre uhno, k' ame he ka bras je khetepiny a twente, me je taben a twente; k' ame he ka sileva je bâletiny je khetep me je venyâ. 12 Ke haba hnân ûlauen hak hnyi ke keihen e jio adre me he ka uhni mano fite kubit; k' ame he ka ten je khetepiny, ke ten minya je taben. 13 Ke ame he ka fite kubit ûlauen hak hnyi ke keihen e deiö. 14 Ke adre me he ka uhno mano fiftin kubit hnyi ke keihen homagöule: k' ame he ka kun ta khetepiny, ke kun minya ta taben. 15 Ke haba hnyi ke keihen adre me he ka uhno mano fiftin kubit, ke kun ta khetep, ke kun ta taben. 16 Ke twente kubit mano ame he ka uhni hnân hlinginy homagöule, ame he ka udrudrà, me udrudrà hlit, me dra vec, me lino ae ûhnyûkong nân adre seven, a huliwan ge hnyat omecâ mano: ke vak ta khetepiny, ke vak ta taben. 17 Ke adre me he ka vhenyâ je khetep hia igigilö hak ge je vhenyâ sileva; ke sileva je bâletiny, ke bras je taben. 18 Ke ame he ka khaca haded kubit ibeüen hak, ke fite kubit ûlauen, ke thabûng ta kubit ibeüen göranyai, a mano lino ae ûhnyûkong nân adre seven, ke bras je taben. 19 Ame he ka bras hia je ûnyi hnyi uma mano, hnân hobi kâu je huliwa hia thithö, me je faoiny hia, me je faoiny hia hnyi hak.

20 Ke u me he ka hûna ka lakon Isaraela he ka hom köu wakaco elaiö ae alai adre kokot hnân umumelam, me me möt bala lamepa. 21 Ame he Arona me je lakon ka ânyâwia e hwân hnyi sahac ke ne o but hnyomakatu, hnyi hnyimakö Iehova, hnyi uma ûkhacaköu, hnyi ke keihen deiö singiny ûnyi hnân ohnatho: ame he ka tot hnân hnanyibu ûnyi eling nyiele balua hnyi anyidra ta je dö hobi kâu lakon Isaraela.

## HNYIMAKAN 28.

**K**E hom dö köu Arona a tuhâm me je lakon a tha ödrin me, ûnyi hnyi lakon Isaraela, m' ödrin e he ka huliwa könya hnyi je hanyemen at bi hut; Arona, me Nadaba, me Abiu, me Eleazara, me Ithamara, a je laku Arona. 2 Ke u me he ka tibit je ûkhaû ae kap hobi kö Arona tuthâm, ûnyi ae mec me hmanerang. 3 Ke u me he ka ha ködrin hia hnyat ae metâ hnyok, wale hnyat oge hia but ounöngötâ ge metâ, m' ödrin e he ka tibet je ûkhaüö Arona, m' adre me okhabâ me me at bihut könya. 4 Ke walang je ûkhaû adre me he ka tibet, ka habe, tubwiny ûlainy, me iefoda, me ûkhaû ae befû, me ûkot ae hu hnalimen, me hnabinybak, me wen hnyekon: adre me he ka tibet je ûkhaû ae kap hobi kö Arona tuhâm, me je lakon, me me at bihut könya. 5 K' adre me he ka hom gol, me mano ae udrudrà, me udrudrà hlit, me dra vec, me lino ae ûhnyûkong nân.

6 K' adre me he ka tibet iefoda gol, me mano ae udrudrà, me udrudrà hlit, me dra vec, me lino ae ûhnyûkong nân adre seveny a huliwan hnyat ae metâ. 7 Ame he ka hu ke mano hon li bajebenyin adre útibe-tköuâ hnyi li hnyiban; me me khaca thibi. 8 Ke haba wen iefoda adre hwâwâ metâ, hnân he ka okhavâ, adre me he ka huliwan a tha úcû me, me khacâ me; wale gol, me mano ae udrudrà, me udrudrà hlit, me dra vec, me lino ae ûhnyûkong nân adre seveny. 9 Ke u me he ka hom li veto soama, me kave hon ien lakon Isaraela: 10 siks je iödrin hnyi ke veto, ke siks minya je ieu hnyi ke veto, hoton je útangköu. 11 U me he ka kave hon li veto je ien lakon Isaraela, ge huliwa anyin at ame khavi veto, helâ me bongon kave ûnyi hnân bi haten: u me he ka ânyâ me ohmâ hnyi li gol hnân taben. 12 Ke u me he ka ohmâ li veto ka hnyi hon li bajebenyin iefoda, me me li veto hnân oûnykúmeâ ka lakon Isaraela: k' ame he Arona ka hom je iödrin hyi hnyimakö Iehova hnyi hon li bajebenyin hnân oûnykúmeâ.

13 Ke u me he ka ânyâ li gol hnân taben: 14 ke u me he ka ânyâ li cein gol ae so adra khenyö helâ me tö, me ohmâ li cein adre khenyö ka hnyi li taben. 15 Ke u me he ka ânyâ tubwiny ûlainy hnân owiea a huliwan hnyat ae metâ; u me he

ka ânyâ e helâ me ihuliwainy iefoda ; u me he ka ânyâ e ge gol, me mano ae udrudrâ, me udrudrâ hlit, me dra vec, me lino ae ûhnyûkong nân adre seveny. 16 Ame he ka khaca tulut je baten a vak, k' adre thu ; haba tulut, me, khaca hnyam ibeûen, ke khaca hnyam ûlauen. 17 Ke u me he ka ip hnyin je deö veto, a vak ta deö veto : haba dö a bân, me, sadis, me topazio, me bereketh : 18 ke haba dö a loiny, me, semerado, me safairo, me aloma ; 19 ke haba dö a kuniny, me, lesema, me sevo, me amethusa ; 20 ke haba dö a vakiny, me, berulo, me sadonuki, me jasepi ; adre me he ka ve bi taben ta je ûnyi e hnyi gol. 21 Ke ame he ka hnen hnyi je veto je ien lakon Isaraela a twelv, hoton je iödrin, helâ me hna kave ûnyi hnân bi haten, ame he ka ve hu ien hoton je tribu a twelv. 22 Ke u me he ka ânyâ hnyi tubwiny ûlainy li cein gol ae so adre khenyö. 23 Ke u me he ka ânyâ hnyi tubwiny ûlainy li otru gol, ke u me he ka ip li otru hnyi li hnyiban tubwiny ûlainy. 24 Ke u me he ka inâ li cein gol adre khenyö hnyin li otru hnyi li baten tubwiny ûlainy. 25 Ke u me he ka ohmâ li hnyiban li cein adre khenyö hnyi li taben, me ip li ûnyi e hon ke keihen bajebenyin iefoda hnyi hnyimakan. 26 Ke u me he ka ânyâ li otru gol, me ohmâ hnyi li ke keihen khaûen ûlainy hnyi baten hnyi ke keihen ban hnyin iefoda. 27 Ke u me he ka ânyâ ke li otru gol, me ohmâ hnyi li hnyiban hon bajebenyin iefoda eû hnyi hnyimakan, hnyi hna ûohmâkouâ ethö hon wen adre hwâwâ metâ. 28 Ke adre me he ka ca tubwiny ûlainy ge li otru ka hnyi li otruiny iefoda ge telenu ae udrudrâ me me he ka mokut hon wen iefoda adre hwâwâ metâ, me me ca he ka ok tubwiny ûlainy hnyi iefoda. 29 Ke ame he Arona ka hom je ien lakon Isaraela hnyi tubwiny ûlainy, a ûnyi hnân owisa, hon oûnykûminy bi, e ka didro ka hnyi dok ae kap hnân oûnykumeâ bala hnyi hnyimakö Iehova. 30 Ke u me he ka ip hnyi tubwiny ûlainy hna owisa Urim me Thumim ; k' ame he ka hnen li ûnyi e hon oûnykûmi Arona e ka didrö ka hnyi hnyimakö Iehova : ke Arona ame he ka hom hna owisa hobi kâu lakon Isaraela hon oûnykûminy bi hnyi hnyimakö Iehova bala.

31 Ke u me he ka tibet ûkhaû ae beû hanen iefoda ge mano ae udrudrâ hia. 32 Ke ame he ka hu hnyimen deny ban hnyi wanben ; k' adre me he ka tibet telenu adre

hwâwâ igigilö hnyimen, helâ me man ûkhaûen vat me me ca he ka mou. 33 Ke u me he ka ânyâ hnyi obiny je wan rimona ae udrudrâ, me udrudrâ hlit, me dra vec, hnyi obiny ûkhaû igigilö ; me je pate gol hnyi wanben ta je ûnyi e igigilö : 34 khaca pate gol me khaca wan rimona, me khaca pate gol me khaca wan rimona, hnyi obiny igigilö ûkhaû. 35 Ke adre me he ka okhaûö Arona hnân huliwa ; k' adre me he ka löng úcuhainy e ka didrö ka hnyi dok ae kap hnyi hnyimakö Iehova, me dit hmetu but, me me ca he ka mok.

36 Ke u me he ka ânyâ ke wahano a gol ae so, me kave hon helâ me hna kave ûnyi hnân bi haten, ka habe, E KAP KÖ IEHOVA. 37 Ke u me he ka ohmâ e ka hnyi telenu ae udrudrâ, me me hnen hnyi hnabinybak ; ame he ka hnen hnyi hnyimakan hnabinybak. 38 K' ame he ka e hnyi bari Arona, me me he Arona ka hom monuiny ta je ûnyi ae kap, ame he ka okabâ hnen lakon Isaraela hnyi anyidra ta je bwihlany hia ae kap ; ke ame he ka e bala hnyi bariny me me he ka kap soi ödra hnyi hnyimakö Iehova. 39 Ke u me he ka hwâwâ úkot lino ae ûhnyûkong nân ae sisit, ke u me he ka ânyâ hnabinybak lino ae ûhnyûkong nân, me u me he ka ânyâ wen hnyekon, a huliwan at omecâ mano. 40 Ke u me he ka tibet je úkot hobi kâu je laku Arona, me u me he ka ânyâ hobi ködrin je wen hnyekudrin, ke u me he ka ânyâ hobi ködrin je hnabinybak, hnân mec me hmanenang. 41 Ke u me he ka okhaûö Arona tuhâm me je lakon unyin ge je ûkhaû ; ke u me he ka hú' ödrin, me otil' ödrin, me okabi ödrin, m'ödrin e hnyat bihut kõnya. 42 Ke u me he ka tibet hobi ködrin je utrauzes me me khavâ unyidrin hwân hnyi fetriny ke ne o but hnyi li jevan : 43 k' ame he Arona ka khavâ e me je lakon, ödrin ka he ka didrö ka hnyin umâ úkhacaköu, me hakekenyâ taben hut he ka huliwa hnyi dok ae kap ; me me ca hu jönidrin m' ödrin e mokcu ; wale hnanyibu nyiele balua hobi kâu me je mâtrâniny a hwaban.

#### HNYIMAKAN 29.

**K**E walang ûnyi u me he ka ânyâ ködrin he ka okabi ödrin hnân he ka huliwa kõnya hnyi hanymen at bihut : hom dö nak bolok a khaca me lo li mamoe бага ae ba hnyikongon, 2 me areto adre ca levenâ bi, me je ong areto adre ca levenâ

k' adre úthueniken me wakaco, me je ong areto ae halelöü adre ca levenâ k' adre khinö wakacoiny : u me he ka ânyâ ge falawainy hwit adre omomono wia. 3 Ke u me he ka tha hitangen, me hom hnyi tangen, me bolok me li mamoe бага. 4 Ke haba Arona me je lakon u me he ka hum ödrin ka hnyi hwanumen uma hnân úkhacaköu, ke u me he ka osú' ödrin ge köiö. 5 Ke u me he ka hom je úkhaú, me okhaúö Arona ge úkot me khaúen ae beú hanen iefoda, me iefoda, me tubwiny úlainy, ke u me he ka oweikâ e ge wen iefoda adre hwáwá metâ : 6 ke u me he ka obicâ ge hnabinybak, me ip korona ae kap hon hnabinybak. 7 Me u me he ka hom wakaco hnân hú, me hingâlâ hon ban me hú. 8 Ke u me he ka hom je lakon me okhaú' ödrin ge je ukot. 9 Ke u me he ka oweik' ödrin ge wen hnyekon, wale Arona me je lakon, ke u me he ka obic' ödrin ge je hnabinybak ; m' ödrin e he ka hnyat bihut, wale hanymodrin hnyi hnanyibu nyiele balua : ke u me he ka okabi Arona me je lakon. 10 Ke u me he ka hom bolok ka hnyi hnyimakan uma hnân úkhacaköu : k' ame he Arona me je lakon ka ip je hnyamödrin hon ban bolok. 11 Ke u me he ka hlingâ bolok hnyi hnyimakö Iehova hnyi hwanumen uma hnân úkhacaköu. 12 Ke u me he ka hom ke keihen dren bolok me kina hon je baitoiny taben hut hnen banyâm ; ke u me he ka hingâlâ kolon dra hia hnyi hmelen taben hut. 13 Ke u me he ka hom hia pipikhenyainy wale ame lan tang tiny, me únyi ae lau hon akiny, me li wagien me pipikhenyainy, ke u me he ka le hon taben hut. 14 Ke haba utiöiny bolok, me unen, me ta tet, u me he ka le hnyi meic hoton hna hunuma ; wale hudiny hulö. 15 Ke u me he ka hom ke mamoe бага a khaca ; k' ame he Arona me je lakon ka ip je hnyamödrin hon ban mamoe бага. 16 Ke u me he ka hlingâ mamoe бага, me hom dren, me dukâiâ hon taben hut igigilö. 17 Ke u me he ka susubâ mamoe бага me hneú tang tiny, me je can, me tha ip ta je únyi e me je hnyiban, me ban. 18 Ke u me he ka tha le hia mamoe бага hon taben hut ; wale hut hnân le kö Iehova : wale hut ae bo so, me hut a le ge meic kö Iehova. 19 Ke u me he ka hom ke mamoe бага a khaca, k' ame he Arona me je lakon ka ip je hnyamödrin hon ban mamoe бага. 20 Ke u me he ka hlingâ mamoe бага me hom ke keihen dren me kina hnyi boulölöven hnyikönyö Arona a metân, me hnyi boulölöven je hnyikönyen lakon Arona a metâ, me je bahnyökveto gadrin a metâ, me je bacan gadrin a metâ, me dukâiâ hon taben hut igigilö e ge dra. 21 Ke u me he ka hom ke keihen dra únyi hnyi hon taben hut, me wakaco hnân hú, me duköiö Arona, me je úkhaúen, me je lakon, me je khaúen lakon unyin : ke adre me he ka okabâ, me je úkhaúen me je úkhaúen lakon unyin. 22 Ke u me he ka hom pipikhenyainy mamoe бага, me obiny ae pipikhenya, me pipikhenya wale ame lan tang tiny, me únyi ae lau hon akiny, me li wagien me pipikhenyainy, me jevan a metâ ; anyin a wale mamoe бага hnân okabâ : 23 ke khaca areto, me khaca ong areto adre bi wakacoiny, ke khaca ong areto ae halelöü, únyi hnyi tang areto adre ca levenâ a e hnyi hnyimakö Iehova : 24 ke u me he ka ip hia hon li hnyamö Arona, me je hnyamen je lakon ; ke u me he ka hajijingâ e hnân hudiny adre hajijingâ hnyi hnyimakö Iehova. 25 Ke u me he ka hom je únyi e únyi hnyi je hnyamödrin, me le hon taben hut hnân hut adre le, e me bo so hnyi hnyimakö Iehova. 26 Ke u me he ka hom úlainy mamoe бага wale hnân okabâ anyi Arona, me hajijingâ hnân hut adre hajijingâ hnyi hnyimakö Iehova. 27 Ke u me he ka okabâ úlainy hut adre hajijingâ, me jevan wale hut adre kap göranyai, wale at adre hajijingâ me kap göranyai, wale ec mamoe бага hnân uhotilâ, wale hobi kö Arona me lakon : 28 ke wale jekhö Arona me lakon unyin lakon Isaraela nyiele balua : anyin a e hut adre kap goranyai : ke ame he ka hnân hut adre kap goranyai unyin lakon Isaraela únyi hnyi anyidrin je hudiny úsoköu, wale anyidra hut adre kap göranyai kö Iehova. 29 Ke haba je úkhaú ae kap anyi Arona ame he ka hnân hobi kâu biju. lakon hwaban, hnân hú me otil' ödrin hnyin. 30 Ke hamen nokon wale at ame bihut a hwaban, he ka khavâ e hnyi je bong a seven, e ka didrö ka hnyi uma hnân úkhacaköu he ka huliwa hnyi dok ae kap. 31 Ke u me he ka hom mamoe бага wale hnân uhotilâ, me ölä utiöiny hnyi ke dok ae kap. 32 K' ame he Arona me lakon ka an utiöiny mamoe бага, tha e me areto únyi hnyi tangen, hnyi hwanumen úma úkhacaköu. 33 K' ödrin e he ka han ta je únyi wale adre bi hwaban möt kâu, hnân uhotilâ me okabi ödrin : ke ame ca he atkanyua ka hnyi han, anyin ae kap.

34 Ke a ne hu kolon meno wale hnân uho-tilâ me areto hnyi hnyomakatu, u me he ka le kolon ge meic: adre me ca he ka an e, anyin ae kap. 35 Ke u me he ka ânyâ hia kö Arona me je lakon helâ me hnök hna hûna kôu: seven ta je bong u me he ka otil' ödrin. 36 Ke u me he ka hudo bolok hnyi ke bong me ke bong hnân hudiny hwakecin ae monu me hwaban möt: ke u me he ka ânyâwia taben hut, u ka hia but bi hwaban möt hon; ke u me he ka hû me okabâ. 37 Seven ta bong u me he ka bi hwaban möt hon taben hut, me okabâ: k' ame he ka ti kap taben hut; k' ame he ka kap ta je ûnyi hia ame kâlâ taben hut.

38 Ke walang ûnyi u me he ka hudo hon taben hut, a lo li lakon mamoe a khaca hunainy hnyi ta ogo bong hia. 39 U me he ka hudo ke nokon mamoe hnyi hnyomakatu, ke u me he ka hudö ke nokon mamoe hnyi sahac: 40 ke haba ke keihen a libenyitainy bath falawa adre ûhaniken me tap wakaco adre kokot a ke keihen a vakiny hin; me tap waina minya a ke keihen a vakiny hin hnân hudiny ic, tha e me nokon mamoe. 41 Ke haba ke mamoe u me he ka hudo hnyi sahac me ânyâ hobi kâu helâ me hudiny han hnyi hnyomakatu, me helâ me hudiny ic, me me bo so, wale hut a an hnen meic kö Iehova. 42 Haba hut adre le ame he ka e bala hnyi anyibun je dö hnyi hwanumen uma ûkhacaköu hnyi hnyimakö Iehova: ke oge me he ka iouny möbun eling, me fuc kôu eling. 43 Ke oge me he ka iouny me lakon Isaraela eling; k' ame he ka okabâ hnen soik. 44 Ke oge me he ka okabâ uma ûkhacaköu, me taben hut, ke oge me he ka okabi Arona me lakon, m' ödrin e hnyat bihut kõnya. 45 Ke oge me he ka laba hnyi wanben lakon Isaraela, m' oge me he ka Khongudrin. 46 K' ame he ka khan' ödra a inya Iehova Khongudrin, waleji ame hum ödra ûnyi hnyi hnyei Aigupito, m' inye he ka laba wanbödra. Inya Iehova Khongudrin.

## HNYIMAKAN 30.

**K**E u me he ka tibet tap hnân leü utö ae bo so hon: u me he ka tibet e ge utö öhum. 2 Khaca kubit ibeüen, me khaca kubit ulauen; k' ame he ka tha ücü je hwenöiny a vak: k' ame he ka lo li kubit ibeüen göranyai, k' ame he ka tha khacâ me je baitoiny. 3 Ke u me he ka

tube e ge gol ae so, wale hon, me hnyi je ke keihen igigilöâ, me je baitoiny; ke u me he ka bi koronainy a gol igigilö e. 4 Ke u me he ka ânyâ vak ta otru gol ka hnyi hmelen baten, hnyi li vhaken, wale hnyi li ke keihen; ke wale hnen li venyâ hnân vadren. 5 Ke u me he ka ânyâ li venyâ öhum, me tube ge gol. 6 Ke u me he ka ip e hnyi hnyimakan singiny cicö tang hnân ohnatho hnyi hnyimakan taben ibetengiö wale hon ûnyi hnân ohnatho, dok oge me he ka iouny möu hnyin. 7 Ke hamö Arona he ka le hon e je utö ae bo so: k' ame he ka le hnyi je hnyomakatu, e ka ânyâwia je lamepa. 8 Ke ka he Arona ka vac je lamepa hnyi je sahac, me ame he ka le e, ke wale thibi e hnân bo so bala hnyi hnyimakö Iehova, hnyi anyibun ta je dö hia. 9 Ca he öbun ka hudo hon ke je utö bi ae bo so, me je hut adre le, me je hut hnân han; ke öbun e ca he ka hudo hudiny ic hon e. 10 Ke ame he Arona ka okhaca bi hwaban möt hon je baitoiny hnyi je huna: e ame he ka okhaca bi hwaban möt hon e hnyi je huna ge dra hnân hudiny hwakecin ae monu hnân bi hwaban möt hnyi anyibun ta je dö hia: e ti kap e kö Iehova.

11 Ke Iehova ame ha kö Mose, ka habe, 12 U ka he ka aü üseiny lakon Isaraela hoton numeraidra, haba hnyi üen e adre me he ka ve bi hwaban anyidra möt kö Iehova, u ka öü ödra; me me ca he ka hu mok unyidra u ka öü ödra. 13 Walang ûnyi adre me he ka ve ham, ödra ka hanyâ-ûâ hnyi hna öü ödra, üsa haf sekel, helâ me sekeliny dok ae kap: (haba sekel twente je gera:) haba hut kö Iehova, me, haf sekel. 14 Haba tavat hia adre me hanyâüâ ka hnyi tavat adre hia but aü, hwân ge tavat a twente huna me gan hon e, adre me he ka ve bi hut kö Iehova. 15 Ame ca he tavat tren omjeü ka ham gânâ, k' ame ca he tavat ae ba ta ûnyi ka ham öuhnyükongoâ, ke haf sekel cici thibi, hnyi üen adre bi hut kö Iehova, hnân bi hwaban anyibun möt. 16 Ke u me he ka hom mone hwaban möt unyin lakon Isaraela, me ip hobi kâu huliwa hnyi uma ûkhacaköu; me me hnân öünykümeâ ka lakon Isaraela hnyi hnyimakö Iehova hnân bi hwaban anyibun möt.

17 Ke Iehova ame ha kö Mose, ka habe, 18 U me he minya ka ânyâ taben sou a bras, k' ame he ka bras je can, hnân sou: ke u me he ka ip e hnyi wanben uma



## ESODO 31.

úkhacaköu me taben hut, ke u me he ka hingálá köiö hnyin. 19 K' ame he Arona me lakon ka hinyem hnyin me osúâ je cadrin : 20 ödrin ka didró ka hnyi uma úkhacaköu ödrin e he ka sou ge köiö, wá ödrin e mokcu ; helâe minya, ödrin ka hakekenyâ taben bi hut he ka huliwa me le hut a an ge meic kö Iehova ; 21 helâe ödrin e he ka hinyem me osúâ je cadrin, wá ödrin e mokcu : ke wale hnanyibu ködrin nyiele balua, hobi kâu, me je mátrâniny hnyi anyidrin ta je dö hia.

22 Ke Iehova ame ha kö Mose, ka habe, 23 U me he ka hom je únyi ae bo so ae únyi hnathu, wale muro ae köiö a faiv haded je sekel, ke hafiny e kinamo ae bo so, wale lo li haded ke fifte, 24 me kasia a faiv haded je sekel, helâ me sekeliny dok ae kap, me tap wakaco elaiö a khaca hin : 25 ke u me he ka ányâ e me wakaco hnân hú ae kap, wakaco ae bo so adre úhaniken helâ me hna huliwan hnen at ame bi wakaco ; ke wale wakaco hnân hú ae kap. 26 Ke u me he ka hú uma úkhacaköu hnen únyi e, me tang hnân ohnatho, 27 me laulau, me je omjehen, me taben lamepa me je omjehen, 28 me tap hnân leú únyi ae bo so, me tap hnân leú hut me je omjehen, me taben sou me je can. 29 Ke u me he ka okabá je únyi e, me me ti kap : ame he ka kap ta je únyi hia ame kâlâ. 30 Ke u me he ka hú Arona me lakon, me okabi ödrin, m' ödrin e hnyat bihut könya. 31 Ke u me he ka ha ka lakon Isaraela, ka habe, Wale thibi e wakaco ae kap hnân hú könya hnyi anyibun ta je dö hia. 32 Ca he ka hingálá e hon unyin at, ke ca he öbun ka ányâ únyi helâe, helâ me önyen : e kap, k' ame he ka kap köbun. 33 Ke haba at ame he ka úhaniken únyi helâe, me ip hanen hon ke atkanyua, me adre me he ka ohia at e únyi hnyi iny hnyei.

34 Ke Iehova ame ha kö Mose, ka habe, U me he ka hom je únyi ae bo so, wale natafa, me sekeletha, me kelibena ; je únyi ae bo so tha e me libanu ae so : úsa khaca thibi ihmakiny ; 35 ke u me he ka ányâ e hnân bo so adre le me úhaniken helâ me ihuliwainy at ame bi wakaco, adre únya-köuâ ae so me kap : 36 ke u me he ka kot omomono ke keihen, me ip cicö únyi hnân ohnatho hnyi uma úkhacaköu, wale oge me he ka iouny möu hnyin : ame he ka ti kap e unyihun. 37 Ke haba únyi ae bo so u me he ka ányâ, ca he öbun ka ányâ hobi köbun helâ me önyen : ame he ka kap e

unyámhobi kö Iehova. 38 Ke haba at ame he ka ányâ únyi helâe hnân hnulâ, me adre me he ka ohia e únyi hnyi iny hnyei.

## HNYIMAKAN 31.

**K**E Iehova ame ha kö Mose, ka habe, 2 Wá bi oge hia but hawâ iö Bezaleli a nöku Uri, nöku Huro, únyi hnyi tribu Juda : 3 ke oge hia but öunöngötâ e hnen hanon Khong hnyi metâ, me wá únykúme, me tremang, me ta je huliwa hia, 4 me me he ka wáhmakhmeto ta je únyi ae iyong, he ka hulwan gol, me sileva, me bras, 5 me subö veto hnân ohmâ hnyi je taben, me subö utö, me he ka huliwan ta je huliwa hia. 6 Ke wá bi, inya oge hia but kú Aholiaba nöku Ahisamaka me me tha e me, únyi hnyi tribu Dana ; ke oge hia but ip metâ eú hnyi hnyekon hnyat ae metâ hia, m' ödrin e he ka ányâ hia hnök hna húna köu : 7 wale uma úkhacaköu, me tang hnân ohnatho, me taben ibetengiö hon e, me je omjehen uma ; 8 me laulau me omjehen, me taben lamepa ae so me je omjehen hia, me tap hnân leú únyi ae bo so, 9 me taben leú hut me je omjehen hia, me taben sou me je can, 10 me ta je úkhaú adre tibet soâ, me je úkhaú ae kap hobi kö Arona at bihut, me je úkhaúen lakon hnân bi hanymen hnyat bihut ; 11 me wakaco hnân hú, me je únyi ae bo so hnân le hobi kâu dok ae kap : adre me he ka ányâ hoton hnök hna húna köu hia thithö.

12 Ke Iehova ame ha kö Mose, ka habe, 13 U me he ka ha ka lakon Isaraela, ka habe, Öbun e he ka tuö anyik je sabath : anyin a wale haten könya m' öbun hnyi anyibun ta je dö hia : m' öbun e he ka wá a inya Iehova at ame okabi öbun. 14 Anyin a wale öbun e he ka tuö sabath, anyin ae kap e unyibun : ke haba at ame he ka okongo e, adre me he ka hlingâ : anyin a haba at ame he ka huliwa hnyin, me, adre me he ka ohia at eling únyi hnyi iny hnyei. 15 Siks je bong hnân huliwa ; ke haba bong a seveniny, me, wale sabath hnân menâ, e kap hobi kö Iehova : ke haba at ame he ka bi huliwa hnyi bong sabath, me, adre me he ka hlingâ. 16 Anyin a wale ame he ka tuö sabath hnen lakon Isaraela, me únykúme sabath hnyi anyidra ta je dö hia, hnân úhibinyköu nyiele balua. 17 Wale ke haten könya me lakon Isaraela nyiele balua : anyin a hnyi je bong a siks Iehova ame op drany me hmeledrany, ke

hnyi bong a seven e ame menâ, me me hunyin hmetu.

18 Ke e ame ham kö Mose li veto ae lau anyin únyi hnân ohnatho, li veto ae lau a sihnalimen ge hnyamen Khong, hnyi úen e ame um dö úhnenamö mē hon bucen Sinai.

### HNYIMAKAN 32.

**K**E a wâ but tavat a ga bec Mose he ka utut únyi hnyi hon bucen, me ame úkhacaköu tavat unyi Arona, me ha kâu, ka habe, Todrö ka ányâ ke khong hnân hobi köta me me hnyimakan anyita bunyen ; ke haba Mose waleji at ame hum öta únyi hnyi hnyei Aigupito, me ca khan' öta únyi a o kâu. 2 Ke haingö Arona ködra, ka habe, Uny jut je anen hnyikönyen a gol hnyi je hnyikönyen laöiöbun me je lakubun бага me hlu, ke hö jem könya. 3 Ke haba tavat hia adre me uny jut je anen hnyikönyen gol hnyi ta je hnyikönyidra me hom kö Arona. 4 Ke e ame kap ta je únyi eling gadra, me tretrauâ ge sulâ, me ányâ me me nokon kau adre oköiâ : ke adre me ha, ka habe, Isaraela lö, walang khongom at ame hum u únyi hnyi hnyei Aigupito. 5 Ke a wâ but e hnö Arona me e ame otillâ taben hut cicö e ; ke haba Arona ame haimemenâ, ka habe, Haba bong nyi adre me he ka ányâ bijeu kö Iehova. 6 Ke adre me vesâ hnyi hnyomakatu kong, me hudo je hut adre le, me hom je hudiny úsoköu ; me ame laba ju tavat he ka han me ic, me adre me todrö he ka mat.

7 Ke Iehova ame ha kö Mose, ka habe, He thö, utut ; anyin ae kong ut ányâm tavat, waleji u je hom únyi hnyi hnyei Aigupito : 8 adre hia but ie saú únyi hnyi gethen waleji oge húna ködra ; k' adre hia but ányâ hobi ködra nokon kau adre oköiâ, me khudrung kâu, me bi hut kâu, me ha, ka habe, Isaraela lö, walang khongom, at ame hum u únyi hnyi hnyei Aigupito. 9 Ke Iehova ame ha kö Mose, ka habe, Oge wâ but tavat eang, me wâ but, ödra tavat ae hwege nyin : 10 ke walang ang hnö nya but, me me ubâhlâ thö anyik hmönyin ködra, m' inye he ka ohí' ödra ; k' oge me he ka wiö u bi hnân hnyei ae gan. 11 Ke Mose ame khöu kö Iehova a Khongon, me ha, ka habe, Iehova lö, geú ame he ka ubâhlâ gan ányâm hmönyin ka je lakem waleji u je hom únyi hnyi hnyei Aigupito ge man ae gan me hnyam ae hwege ? 12 Ieú ge at Aigupito tavat adre

me he ka ha, ka habe, E a hum ödra me me he ka hling' ödra hnyi je bucen, me ohí' ödra únyi hnyi hon kânâ ? Ö u ikhâlâ ju hmönyininy hnyekom ame ubâhlâ, me ietra monu a o ka je lakem. 13 Únyküme ju kö Aberahama, me Isaaka, me Isaraela, a lathnyabaem, waleji hnyat u je khemanyin gam bi ködrin, me ha, ka habe, Oge me he ka osehia je mátrânibun helâ me je okhúiny drany, ke haba hnyei hia eang waleji oge ha köbun, oge me he ka ham ka je mátrânibun hnân idrin nyiele balua. 14 Ke haba Iehova ame ietra monu, wale e ame ha he ka ányâ ka lakeiny.

15 Ke Mose ame hwiö me utut úheny hon bucen ke wale hnyi li hnyamen li veto ae lau hnân ohnatho, wale li veto ae lau adre sihnalimen hnyi li ve ke keihen : adre sihnalimen hnyi ke keihen me ke keihen. 16 Huliwa anyin Khong li veto ae lau, ke haba hna sihnalimen, me, a sihnalimen Khong, a kave hnyi li veto ae lau. 17 Ke a löng hnö Josua hwan imedien tavat adre me kuku, me e ame ha kö Mose, ka habe, Hwan vat únyi hnyi hna hunuma. 18 Ke haingen, ka habe, Ca hwan vat eling hwan tavat hwege, ke haba khaca, ca hwan tenge anyin tavat ae bâ : ke so bi oge me löng hwan khumöng. 19 Ke ame hakekeny ka hnyi hna hunuma, me e ame wâ nokon kau me biâ, me ame ubâhlâ hmönyin anyi Mose, me e ame khuâ degecâ li veto ae lau únyi hnyi li hnyamen, me me hmouca but hmelen bucen. 20 Ke e ame hom nokon kau adre me ányâ, me thong hnyi meic, me omomonoâ, me khúkhúâ ka hnyi hon köiö, me bi belen lakon Isaraela. 21 Ke haingö Mose kö Arona, ka habe, Ieú a anyâ köu tavat eang, m' u me okúâ ködra monu ae gan eang ? 22 Haba Arona ame thu, ka habe, Than lö, ca he ka ubâhlâ ányâm hmönyin tuhök : e khanö u hwakecin tavat a ödra be monu. 23 Anyin a haingödra könya, ka habe, Ányâ thö hobi köta ke khong, me me hnyimakan anyita bunyen anyin a haba Mose, waleji at ame hum öta únyi hnyi hnyei Aigupito, me, ca khan' öta únyi a o kâu. 24 Ke haingök ködra, ka habe, Ame he tavat tren gol ka uny jut ; me adre me ham könya, me oge me khúâ ka hnyi meic, me a o but nokon kau eang. 25 Ke a wâ but Mose a ga monu monu but tavat ; anyin Arona ame omonu ödra me me he ka hlum' ödra nhen je iwahnahmiöny m' ödra : 26 ke haba Mose ame tot hnyi homagöuleny hna hunuma, me ha,

ESODO 33.

ka habe, Ie at ame tha hien me Iehova? he but jem kõnya. Me ame úkhacakõu kàu je at Levi hia. 27 Ke haingen ködrin, ka habe, Walang hna ha hnö Iehova Khongu Isaraela, ka habe, He th' öbun ka ve ca anyibun je hele vat hnyi je batöbun, me vheno hna hunuma hwân hnyi ke homagöule ke ne o but ka hnyi ke homagöuleny hna hunuma, me ve hlingâ je liamekeiny m' öbun, me je iate, me tavat andre me laba hakekeny köbun. 28 Ke laba at Levi ödrin e ânyâ helâ me hofuc ho Mose: me a mokcu hnyi bong eling helâ me kun ta thauzan tavat aten hnyei. 29 Ke Mose ame ha, ka habe, Ve hn' öbun bi kö Iehova hnyi bong ang, eke, e so at ame tot metâ ka nokon me liamekeiny mē; me me he ka ohnahici öbun hnyi bong ang. 30 Ke haba nyi, Mose ame ha ka tavat, ka habe, E gan hmâ anyibun hulö: ke walang ang oge me he ka olö kö Iehova; oge me ne he ka bi hwaban melen anyibun hulö. 31 Ke Mose ame he hmetu kö Iehova me ha, ka habe, E kölö, e ti gan hulö ame ânyâ tavat ang, k' andre me bi khongudrin gol. 32 Ke walang ang, u je ne he ka ikhâlâ anyidra hulö—; ke ame ne ba, ö u na he ka kot degeci nya ûnyi hnyi ânyâm tusi u je sihnalimen. 33 Ke Iehova ame ha kö Mose, ka habe, Haba at ame monu kõnya oge me he ka kot degecâ ûnyi hnyi anyik tusi. 34 Ke he thö walang ang me hom tavat ka hnyi dok waleji oge me ha köu: wâ bi, ame he ka he anyik angela hnyi hnyimâkâm: ke so bi, haba hnyi bong oge me he ka senâ, me oge me he ka bi hwaban anyidra hulö. 35 Ke Iehova ame kot tavat can hnödra hna anyâ nokon kau, waleji a ânyâ Arona.

HNYIMAKAN 33.

**K**E Iehova ame ha kö Mose, ka habe, Hna but dok ang, ke he thö úhem ang me tavat waleji u je hom úhedra hnyi hnyei Aigupito, ka hnyi hnyei oge úhinhinykõuâ kö Aberahama, me Isaaka, me Jakob, ka habe, Oge me he ka ham ka je matrânâm: 2 ke oge me he ka kunâ hnyi hnyimâkâm ke angela; ke oge me he ka obâ at Kanana, me Amora, me Heth, me Perizi, me Hivi, me Jebusi: 3 ka hnyi hnyei ame di hnyin dân basin me hani: anyin a oge me ca he ka tha he möu; anyin a u hnyei ae hwege nyin: wâ oge te he ka ohiö u eû hnyi gethen. 4 Ke a

lông tavat uthumetu eling ae kong, me andre me útengiö: ke ba at ame theip. 5 Ke Iehova ame ha kö Mose, ka habe, Ha thö ka lakon Isaraela, ka habe, U hnyei ae hwege nyin: oge ne he hnyi wanbâm hnyi thuthubademak, me, oge me he ka ohiö u: anyin a wale u ma he walang ang ka uny jut je theibâm, me me khandya ûnyi oge me he ka ânyâ köu. 6 Ke haba lakon Isaraela andre me uny jut je theibidra hwân hnyi bucen Horeba.

7 Ke haba hwakeci Mose, me, e ame labö hom uma úkhacakõu, me otilâ hoton hna hunuma, e úsâkâüö me hna hunuma, ke e ame hwenyi ien, ka habe, Uma mano hnân úkhacakõu. Ke haba tavat hia andre me elöm Iehova me andre me he but ka hnyi uma mano a uma úkhacakõu wale hoton hna hunuma. 8 Ke e ka he Mose ka hnyi Uma mano, me ame köüe thö tavat hia andre me ve tot hnyi je hwanumen umödra je uma mano, me ö Mose ke ne o but e ame didrö ka hnyi uma mano. 9 Ke hnyi ûen Mose ame didrö ka hnyi Uma mano, me ame utut ûlâ ame tot wisa, me laba hnyi hwanumen Uma mano, ke Iehova ame úhnenamö me Mose. 10 Ke a wâ but tavat hia ûlâ ame tot wisa a g' ame tot hnyi hwanumen Uma mano: me haba tavat hia andre me köüe me ve khudrung hnyi hwanumen umödra je uma mano. 11 Ke Iehova ame fuc kö Mose ae úcú hnyem, helâ me at ame úhnenamö me waeny. Ke e ame he hmetu ka hnyi hna hunuma; ke kaba athnyabainy jia Josua nöku Nuna, a hidröu, me ame ca he bi úheny hnyin uma mano.

12 Ke haingö Mose kö Iehova, ka habe, Me wâ bi, u je ha kõnya, ka habe, He thö ka hom tavat eang: ke u tiga ca omanenâ kõnya at u me he ka tha kunâ mönya. Ke so bi u je ha, ka habe, E khandö u inya me iâm, ke inya oge me betenge köu. 13 Anyin a wale, u je ne betenge gak, ö u omanenâ kõnya dem gethen, me me khandö nya u, me u me betenge gak: ke ûnykûme ju a haba hnyei ang me hing lakem. 14 Ke e ame ha, ka habe, Ötu tha he, ke oge me he ka omenö u. 15 Ke haingen kàu, ka habe, Öte ne ca tha he, me u me ca he ka hum öhmun úhehmun ang. 16 K' ame he ka kamâu ka manen a u me betenge gak, walönya me lakem ang? Hawa, ca hnyi ûnyi ang a ötin e tha he, me öhmun e he ka ve bongon me ta je hnyei hia eang hmelen, a inya me lakem?

ESODO 34.

17 Ke Iehova ame ha kö Mose, ka habe, Oge me he ka ányá minya únyi eang u me ha : anyin a inya oge me betenge gam, ke e khanö nya u me iám. 18 Me haingen, ka habe, U na he ju ka omanená kónya ányám hmanenang. 19 Me e ame ha, ka habe, Oge me he ka kuná anyik so ka hnyi hnyimákâm, ke oge me he ka omanená iö Iehova hnyi hnyimákâm ; ke oge me he ka betenge ge at ae bewek ka betenge gan, ke oge me he ka kölu ge at ae bewek ka kölu gan. 20 Ke haingen, ka habe, e ca khanö u he ka wâ hnyimakök : anyin ae ca khana at ka o nya, me möt bi. 21 Ke haingö Iehova, ka habe, Wâ bi, walang ke ong dok unyik, ke u me he ka tot hon kic : 22 ke haba hnyi úen ame hanyâúâ anyik hmanenang, me oge me he ka ip u ka hnyi kic adre hia but tho, me tubi u ge hnyamök ke ne o but oge me um dö hanyâúâ : 23 ke oge me he ka thu hmetu hnyamök, ke u me he ka wâ hotuk : k' adre me ca he bi ka wâ hnyimakök.

HNyimakan 34.

**K**E Iehova ame ha kö Mose, ka habe, U me he ka delâ li veto ae lau helâ me li veto a bân, ke oge me he ka sihnalimen hon li veto ae lau ta je hofucin li veto ae lau a bân, waleji u je tho. 2 Ke laba penapena thö hnyi hnyomakatu, ke öliâ bucen Sinai, me tot eling hnyi hnyimakök hnyi hon ban bucen. 3 Ke ca he ke at ka tha ölö möu, ke ca he ke at ka manen hnyi bucen hia ; ke haba khaca, ca he je hnahat mamoe me kau ka han hnyi hnyimakan bucen eling. 4 Ke e ame delâ ke li veto ae lau helâ me li veto a bân ; ke Mose ame vesâ hnyi hnyomakatu, me öliâ bucen Sinai, helâ me hna hûna kâu hnö Iehova, ke e ame hom tilâ hnyi hnyamen li veto ae lau. 5 Ke Iehova ame utut hnyi úlá, me tha tot me eling me haimemenâ iö Iehova. 6 Ke haba Iehova ame he hnyi hnyimakan, me ha, ka habe, Iehova, Iehova, Khong a at ame kölu me betenge, at ame bec ka hmönyin ke gan hmâ anyin so me hnathu ; 7 at ame tuö ibetengiö hobi kâu ta je thauzan, me degecâ monu me hna hanyâúâ me hwakecin ae monu : k' ame ca he ka ha me ba hulö anyin tavat ae kong ; k' ame bi hwaban monu anyin je kamen ka lakon, me laöbiny, ke ne o but hnyi dö a kuniny me vakiny. 8 Ke haba Mose ame ie nom ju hnyikânâi me khudrung. 9 Ke haingen,

ka habe, Than lö u je ne betenge gak, ö u he Than ka tha he möhmun ; anyin ae hwege nyin hnyei ang ; ke u ma thang degecâ anyihmun monu me hulö, me wi' öhmun do m' öhmun e em hnyei. 10 Ke e ame ha, ka habe, Wâ bi, oge ma ányâ úhinhinykôu : ke oge me he ka ányâ hnyi hnyimakan tavat hia unyâm ta je únyi hnân láiiâ, ke ba hna ányâ helâe eang hmelen hia, k' ame he tavat hia eang a tha ödra möu ka wâ huliwa anyi Iehova, anyin a únyi hnân outen oge me he ka ányâ kôu. 11 Wâ wia hnök hna hûna kôu hnyi bong ang : wâ bi, oge me he ka obâ hnyi hnyimákâm at Amora, me Kanana, me Heth, me Perizi, me Hivi, me Jebusi. 12 Wâ wiö u bi, wâ u nye ányâ úhinhinykôu me aten hnyei u me he ka hnyin, wâ e nye he ka nuc u helâ me hnewe unyâm : 13 ke so bi öbun e he ka tho anyidra je taben hut, me sa omomono anyidra je veto ame tot, me sö degecâ anyidra je Aseira : 14 anyin a u me ca he ka khudrung ka ke khong : anyin a Khong ame ciâ Iehova, Ciâ ien : 15 wâ u nye he ka úhinhinykôu me tavat adre me labâ hnyei, k' adre me bi únyi monu me anyidra je khong, me bi hut ka anyidra je khong, k' ame ne he at ka hao u, me u me he ka hnyi an anyin hut ; 16 ke wâ u nye he ka hom lakudra je hlu hobi kâu lakom je baga, me ame he lakudra je hlu ka bi únyi monu me anyidra je khong, k' ame he minya lakom je baga ka bi únyi monu me anyidra je khong. 17 U ca he ka ányâ je khong adre oköiâ. 18 U me he ka tuö bijeúiny areto adre ca levenâ bi. Seven ta bong u me he ka han hnyin areto adre ca levenâ, hnyi tehi Abiba, helâ me hnök hna hûna kôu : anyin a hnyi tehi Abiba u je he but úhem Aigupito. 19 Hobi kónya je lakon a bân hia ; me je lakon halem meno hia a baga, a je kau me je mamoe a bân. 20 Ke u me he ka bi hnen nokon asina ge nokon mamoe : ka u je ne ca bi hnen e, me u me he ka thu nyin. Haba lakom baga a bân hia me u me he ka bi hnen. Ke ca he ke at ka manen hnyi hnyimakök ke ba ta únyi. 21 Siks ta bong u me he ka huliwa, ke hnyi bong a seveniny u me he ka menâ : u me he ka menâ hnyi úen trohnen me menu. 22 Ke u me he ka ányâ bijeú anyin je wik, wale je wan hwit a ban adre meno, me bijeúiny menu hnyi obiny huna. 23 Hamen obaga hia ka okun manen hnyi huna hnyi hnyimakan Than Iehova Khongu Isaraela. 24 Anyin

oge me he ka obâ ta je hnyeî hnyi hnyi-mâkâm, me ogânâ je hnyegöulâm : ke ame ca he ke at ka behnyekon em hnyeî, u ka he ka manen hnyi hnyimakö Iehova Khongom, hnyi kun ta ûen hnyi huna. 25 U me ca he ka hudo kõnya dren ânyâm hut a tha e me areto adre levenâ, ke ca he ka ip hudiny bijeûiny paseka ke ne o but hnyomakatu. 26 U me he ka hom ka hnyi uma umö Iehova a Khongom, ta je jeûiny kânâm kânâ a bân. U me ca he ka ölä nokon got hnyi dân basiny hinyen. 27 Ke Iehova ame ha kö Mose, ka habe, Sihnalimen ju ta je ûnyi ang : anyin a oge hia but ûhinhinykôu möu me at Isaraela hoton je hofuc e. 28 Ke e ame laba eling tha e me Iehova fâte je lany ke fâte je lit ; ke ame ca han, k' ame ca ic. Ke e ame sihnalimen hon li veto ae lau je hofucin ûhinhinykôu, wale je hnanyibu a ten.

29 Ke Mose ame utut ûheny hon bucen Sinai, ke e hnyi li hnyamö Mose li veto ae lau hnân ohnatho, k' ame utut ûheny hon bucen, ke ca khanö Mose a g' ame hadröngöc unen hnyimakan hwaban hna ûhnenamö me. 30 Ke Arona me lakon Isaraela hia adre me ö Mose, ke wâ bi, e hadröngöc unen hnyimakan ; m' adre me ot he ka hakekenyâ. 31 Ke haba Mose ame hao' ödra ; me a hmetu kâu Arona me je taban úkhacaköu hia ; ke Mose ame ûhnenamö m' ödrin. 32 Ke hwaban e me ame úkhacaköu thö lakon Isaraela hia : me e ame thumetu me hûna ködra ta je hofuc hia a ha kâu Iehova hon bucen Sinai. 33 Ke a hia but Mose thumetu ödra, me ame tube hnyimakan. 34 Ke hnyi ûen Mose ame didrö kö Iehova he ka ûhnenamö me, me ame uny jut tubwiny hnyimakan ke ne o but e ame dit hmetu but ; ke e ame didrut me ha ka lakon Isaraela hofuc a hûna kâu ; 35 ke a wâ but lakon Isaraela hnyimakö Mose, a ga hadröngöc dö unen hnyimakö Mose : me Mose ame tube hmetu hnyimakan ke ne o but e ame dit me ûhnenamö me.

HNYIMAKAN 35.

**K**E haba Mose ame úkhacaköuâ tavat hia lakon Isaraela, me ha ködra, ka habe, Walang je hofuc Iehova ame hûna, m' öbun e he ka ânyâ. 2 Siks je bong u me he ka huliwa hnyin, ke haba bong a seveniny ame he ka bong ae kap, a sabbath hnân menâ kö Iehova : ke haba at ame he

ka bi huliwa hnyi bong eling adre me he ka hlingâ. 3 Ca he öbun ka hû meic hnyi je hnyababun hnyi bong sabbath.

4 Ke haingö Mose ka úkhacaköu hia anyin at Isaraela, ka habe, Walang je hofuc a hûna Iehova, ka habe, 5 Öbun e he ka bi bwihlany unyibun hobi kö Iehova : haba tavat adre me hnyokâ me weny, me, hamödra he ka hom, wale bwihlany hobi kö Iehova ; a gol, me sileva, me bras ; 6 me mano ae udrudrâ, me udrudrâ hlit, me dra vec, me lino, me leûnen got, 7 me je unen mamoe бага adre wia e me dra, me je unen takasa, me utö öhum, 8 me wakaco hnân umumelam, me je ûnyi ae bo so hobi kâu wakaco hnân hû, me je ûnyi ae bo so hnân le, 9 me je veto soama, me je veto adre ohmâ hnyi taben, hnân iefoda, me tubwiny úlainy. 10 Ke e so ame o but hnyat ae metâ unyibun, me ânyâ ta je ûnyi hia a hûna Iehova ; 11 waleji uma mano, a uma, me ban e, me je bâletiny, me je esöiny me je venyâyiny, me je khetepiny, me je taben ; 12 me tang, me li venyâyiny, me taben ibetengiö, me mano a singiny, 13 me laulau, me li venyâyiny, me je omjehen hia, me areto hnân omanenâ ; 14 me taben lamepa hnân umumelam, me omjehen, me je lamepainy, me wakaco hnan umumelam ; 15 me tap hnân leû ûnyi ae bo so, me li venyâyiny, me wakaco hnân hû, me je ûnyi ae bo so hnân le, me singiny hwanuma, wale hwanumen uma mano ; 16 me taben leû hut, me echigic a bras, me li venyâyiny, me je omjehen hia, me taben soû, me je can e ; 17 me mano he ka huno hnyi hak, me je khetepiny, me je taben, me singiny homagöuleny hak ; 18 me je faoiny uma mano, me je faoiny, me je töiny ; 19 me je úkhaû adre huliwa soâ, hobi kâu hnyat ae hu hanymen hnyi dok ae kap, a ta je úkhaû ae kap hobi kö Arona at bihut, me je úkhaûen lakon hnân hanymen bihut.

20 Ke haba úkhacaköu anyin lakon Isaraela hia adre me vese but ûhedra uny Mose. 21 Ke a o but tavat wale a újöngi ödrin hnen je hnyekudrin, me tavat a ohmehmel' ödrin hnen hanudrin, m' ödrin e hom ta je bwihlany hobi kö Iehova, hnân hobi kâu huliwa huyi uma úkhacaköu, me hobi kâu je huliwainy hia, me hobi kâu je úkhaû ae kap. 22 K' adre o but, obaga me omomo, tavat hia adre me weny, me hom but ta je ohmâiny nyin ae mec, me je anen hnyikönyen, me je wen banyen

ESODO 36.

hnân bi haten, me je waen, wale ta je hmanenanginy gol hia; haba tavat hia adre me bi bwihlany, me adre me ham ta je ûnyi a gol kö Iehova. 23 Ke tavat ae tren mano ae udrudrà, me udrudrà hlit, me dra vec, me lino ae úhnyúkong nân, me leúnen got, me je unen mamoe бага adre wia e me dra, me je unen takasa, ödra hia adre me ve hom. 24 Ke haba tavat hia adre me bi bwihlany sileva me bras, adre me ve hom hnân bwihlany hobi kö Iehova; ke tavat hia tren utö öhum, hnân hobi kâu je huliwa, adre me ve hom. 25 Ke omomo hia ae metâ hnyekudrin ödrin a hwâwâ mano ge je hnyamödra, me hom but hnödra hna hwâwâ, wale je mano ae udrudrà, me udrudrà hlit, me dra vec, me lino ae úhnyúkong nân. 26 Ke omomo hia waleji a újongi ödra hnen je hnyekudra ae metâ, adre me hwâwâ je leunen got. 27 Ke haba je taben, me adre me hom but je veto soama, me je veto hnân hnen hnyi iefoda me tubwiny úlainy; 28 me ûnyi ae bo so me wakaco; a hnân umumelam, me wakaco hnân hú, me je ûnyi ae bo so hnân le. 29 Haba lakon Isaraela adre hom bwihlany ibetengiö kö Iehova; obaga me omomo a ohmehmel' ödra hnen je hnyekudra, adre me ve hom hnân ta je huliwa hia, waleji Iehova ame húna he ka ányâ, a deny Mose. 30 Ke haingö Mose ka lakon Isaraela, ka habe, Wâ bi a hia but Iehova hao Bezaleli nöku Uri, nöku Huro, ûnyi hnyi tribu Juda; 31 ke a hia but ounöngötâ e ge hanon Khong hnyi metâ, me wâ únykúme, me tremâng, me ta je ve huliwa hia, 32 me me he ka wâhmakhmeto ta je huliwa ae iyong, he ka huliwan gol me sileva me bras, 33 me he ka subö veto me bi hnen hobi kâu, me subö utö, me huliwan ta je huliwa hia ae iyong. 34 Ke e ame ip eú hnyi hnyekon bongon at úne, a e, me Aholiaba nöku Ahisamaka, ûnyi hnyi tribu Dana. 35 Ke e ame ounöngöti ödrü ge hnyok ae metâ, he ka huliwan je ve huliwa anyin at ame khavi, me huliwa ae iyong, me huliwa anyin at omecâ mano ae udrudrà, me udrudrà hlit, me dra vec, me lino ae úhnyúkong nân, me huliwa anyin at ame hwâwâ mano, me hnyat a ányâ ta je huliwa hia, me wâhmakhmetoâ ta je huliwa ae iyong.

HNYIMAKAN 36.

**K**E ame he Bezaleli, me Aholiaba, me tavat hia adre me hnyok metâ he ka

huliwa wale hnö Iehova hna ometâ me wâhmakhmeto, me okhana he ka ányâ ta je huliwa hia hnân hobi kâu dok ae kap, helâ me ta je ûnyi hia a húna Iehova.

2 Ke Mose ame hao Bezaleli, me Aholiaba, me tavat hia adre me hnyok metâ, waleji hnö Iehova hna ometâ hnyok, me ödra hia wale a újongi ödra hnen je hnyekudra he ka he ka hnyi huliwa he ka ányâ e; 3 ke ödrin e kap ta je bwihlany hia ûnyi ga Mose, waleji hnen lakon Isaraela hna hom hobi kâu huliwa hnyi dok ae kap, he ka huliwan. Ke adre me hom bala je bwihlany ibetengiö hnyi je hnyomakatu. 4 Ke haba tavat ae metâ hia, wale hnyat a ányâ ta je huliwa hia hobi kâu dok ae kap, ödrin e o ûnyi hnyi anyidrin ta je huliwa wale ödrin e ve ányâ; 5 ke haingödrin kö Mose ka habe, E gan, ke a kölu ju ta je ûnyi a hom tavat hobi kâu huliwa a húna Iehova he ka ányâ. 6 Ke haba Mose ame húna k' adre omanenâ hnyi je ke keihen hna hunuma hia, ka habe, Ca he hmetu ke бага me momo ka bi huliwa hnân bwihlany hobi kâu dok ae kap. Me ame um ju tavat he ka hom. 7 Anyin ae úcû but ta je ûnyi hobi kâu huliwa he ka ányâ, ke hu kolon biju.

8 Ke haba tavat hia adre me hnyok metâ unyin tavat huliwa, ödrin e ányâ uma mano me ten tubwiny; wale lino ae úhnyúkong nân adre seveny, me udrudrà, me udrudrà hlit, me dra vec, me je kerubi huliwanen at ae metâ, adre me ányâ. 9 Ke haba ibeúen je tubwiny, me úsa twente eit je kubit, ke úsa foa kubit úlaen je tubwiny; khaca tulutiny je tubwiny hia. 10 Ke e ame úohmákouâ je tubwiny a faiv, wale ke at me ke at: ke ome úohmákouâ ke je tubwiny a faiv. 11 Ke e ame ányâ hnyimen je hnewe ae udrudrà hnyi baten ke tubwiny hnyi hna ohmâ: ke ame ányâ helâe hnyi baten ke tubwiny ethö hon hnyi hna ohmâ ke at. 12 Fifte hnyimen je hnewe e ame ányâ hnyi ke tubwiny, ke fifte minya hnyimen je hnewe e ame ányâ hnyi baten ke tubwiny hnyi hna ohmâ tubwiny a loiny: me me he hnyimen je hnewe ka úcû. 13 Ke e ame ányâ je bâlet gol a fifte, me úseúkouâ je tubwiny hnen je bâlet: me me khaca uma mano. 14 Ke e ame ányâ je tubwiny a leúnen got hnân tube hon uma mano: eleven je tubwiny e ame ányâ. 15 Ke haba ibeúen je tubwiny, usa thöte je kubit, ke usa vak kubit úlaen je tubwiny hia; ke khaca tulut hobi kâu je tubwiny a eleven. 16 Ke e ame úohmákouâ je

## ESODO 37.

tubwiny a thabûng, me je tubwiny a siks. 17 Ke e ame ânyâ hnyimen je hnewe a fite hnyi baten ke tubwiny ethö hon, hnyi hna ohmä, ke fite minya hnyimen je hnewe e ame ânyâ hnyi baten ke tubwiny, hnyi hna ohmä tubwiny a loiny. 18 Ke e ame ânyâ fite ta je bâlet bras, me me ûohmäköüâ uma me me khaca thibi. 19 Ke e ame ânyâ ke tubwiny uma ge unen mamoe бага adre wia e me dra, me ke tubwiny a unen takasa ethö hon.

20 Ke e ame ânyâ je esöiny uma mano a utö öhum, wale ame tot wisa. 21 Ke üsa ten kubit ibeüen je esö, ke khaca kubit me haf ûlauen je esö. 22 Ke üsa lo can je esö hnân dit, ke e ame ânyâ helâe hobi kâu je esöiny uma mano hia. 23 Ke e ame ânyâ je esö hobi kâu uma mano; twente je esö hnân ke keihen ka hnyi hwaiöu: 24 ke e ame ânyâ fâte je taben a sileva eü hmelen je esö a twente; lo li taben hmelen ke esö hobi kâu ke li can e, ke lo li taben minya hmelen ke esö hobi kâu li can e. 25 Ke twente je esö e ame ânyâ hobi kâu uma mano hnyi ke keihen ka hnyi hwadrö, 26 ke fâte je taben e a sileva; lo li taben hmelen ke esö, ke lo li taben minya hmelen ke esö. 27 Ke e ame ânyâ je esö a siks hobi kâu hnyaumainy uma mano e jio. 28 Ke e ame ânyâ lo li esö hobi kâu hnyaumainy uma mano hnyi li kopiny. 29 Ke adre me thu hwetö me me lo eü, ke adre me ûohmäköüâ ethö hon ke otru, ke e ame ânyâ helâe ka li at a lo hnyi li kop. 30 Ke e hu eit je esö me je taben sileva a sikstin, üsa lo li taben hmelen je esö. 31 Ke e ame ânyâ je venyâ a utö öhum: thabûng hobi kâu je esö hnyi ke keihen uma mano, 32 ke thabûng je venyâ minya hobi kâu je esö hnyi ke keihen uma mano, ke thabûng minya je venyâ hobi kâu je esö hnyi hnyaumainy uma mano e jio. 33 Ke e ame inâ je venyâ hnyi wanben je esö hwan hnyi ke keihen, ke ne o but ka hnyi ke keihen. 34 Ke e ame tube je esö ge gol, me e ame ânyâ je otruiny gol, hnân inâ hnyin je venyâ, ke e ame tube je venyâ ge gol.

35 Ke e ame ânyâ singiny ae udrudrá, me udrudrá hlit, me dre vec, me lino ae ûhnyükong nân adre seveny: me e ame ânyâ hnyin e je kerubi a huliwan at ae metâ. 36 Ke e ame ânyâ hobi kâu e vak ta khetep a öhum, me tube ge gol: me je bâletiny a gol: ke e ame le hobi kâu e vak ta taben sileva. 37 Ke e ame ânyâ ke singiny

ae udrudrá hobi kâu hwanumen uma, me udrudrá hlit, me dra vec, me me manelino ae ûhnyükong nân adre seveny, a huliwan at omecâ mano; 38 me je khetepiny a faiv me je bâletiny a faiv: ke e ame tube je ban me je venyâ ge gol: ke bras je taben a thabûng.

### HNYIMAKAN 37.

**K**E Bezaleli ame tibet tang a utö öhum: lo li kubit me haf ibeüen, ke khaca kubit me haf ûlauen, ke khaca kubit me haf ibeüen göranyai. 2 Ke e ame tube eü hnyin me hoton ge gol ae so, me bi koronainy gol ethö hon. 3 Ke e ame le je otru gol a vak hobi kâu vak ta can; lo li otru hnyi ke keihen, ke lo li otru minya hnyi ke keihen. 4 Ke e ame ânyâ li venyâiny a li öhum, me tube ge gol. 5 Ke e ame inâ li venyâ hnyin je otru hnyi li ke keihen tang hnân vâdren tang. 6 Ke e ame ânyâ taben ibetengiö gol ae so, lo li kubit me haf ibeüen, ke khaca hubit me haf ûlauen. 7 Ke e ame ânyâ li kerubi gol; e ame ânyâ e a huliwan hnen hama hnyi li hnyiban; 8 a khaca kerubi hnyi ke hnyiban, ke khaca kerubi hnyi ke hnyiban; ke ame ânyâ li kerubi hnyi li hnyiban a khacâ me taben ibetengiö. 9 Ke haba li kerubi ödru me lau göranyai je labenyidru me tube taben ibetengiö ge je labenyidru, ke ödru me ûhnyimaködruköu: haba li kerubi ödru me hnyimaködrü ka hnyi taben ibetengiö.

10 Ke e ame tibet laulau a utö öhum, lo li kubit ibeüen, ke khaca kubit ûlauen, ke khaca kubit me haf ibeüen göranyai: 11 ke e ame tube e ge gol ae so, me bi koronainy a gol. 12 Ke e ame bi baten igigilö e a khaca hnyam, k' ame bi koronainy igigilö e. 13 Ke e ame le hobi kâu e je otru gol a vak, me ohmä je otru hnyi je ke keihen a vak hnyi vak ta can. 14 Ke ûhakekenyi je otru me baten, hnân hnen li venyâ, m' adre me vâdren laulau. 15 Ke e ame ânyâ li venyâ öhum me tube ge gol, m' adre me vâdren laulau. 16 Ke e ame ânyâ je omjehen laulau, a je utkaiainy, me je spuniny, me je kaiainy, me je jöginy, hnân hingâlâ, gol ae so.

17 Ke e ame ânyâ taben lamepa gol ae so; e ame ânyâ taben lamepa adre huliwan hnen hama, wale can me unyin; ke haba je kaiainy, me je ovejien, me je vongon, adre me khacâ me: 18 Ke siks ta vheiny ame vheivhei ünyi hnyi li ke keihen; kun ta vheiny taben lamepa hnyi ke keihen, ke

kun minya ta vheiny taben lamepa hnyi ke keihen. 19 Kun ta kaia helâ me je v्होंginy saked, me ovejien, me vongon, hnyi ke vheiny, ke kun minya ta kaia helâ me je v्होंginy saked, me ovejien, me vongon, hnyi ke keihen; helâe hnyi je vheiny a siks ame vhei únyi hnyi taben lamepa. 20 Ke e hnyi taben lamepa vak ta kaia helâ me je v्होंginy saked, me je ovejien, me je vongon: 21 haba ke ovejien hmelen ke li vheiny andre okhacâ me, me ke ovejien hmelen ke li vheiny andre okhacâ me, me ke ovejien hmelen ke li vheiny andre okhacâ me, hnân je vheiny a siks ame vheivhei únyi hnyin. 22 Haba je ovejien me je vheiny andre me khacâ me: ke gol ae so andre huliwan hnen hama hia thithö. 23 Ke e ame ânyâ je lamepainy a seven, me uthesiúniny, me je taben hleúhleúiny gol ae so. 24 Khaca talan gol ae so hnân ânyâ e, me je omjehen hia.

25 Ke e ame tibet tap utö öhum hnân leú únyi ae bo so; khaca kubit ibeúen, ke khaca kubit úlaueu, ke tha úcú vak ta hwe-nöiny; ke lo li kubit ibeúen göranyai; k' ame tha khacâ me je baitoiny. 26 Kee ame tube e ge gol ae so, walethö hon, me je ke keihen igigilö, me je baitoiny: ke e ame bi koronainy gol igigilö. 27 Ke e ame ânyâ vak ta otru gol ka hnyin hmelen koronainy, hon li vhaken, wale hnyi li ke keihen, a hnen li venyâ hnân vaden e. 28 Ke e ame ânyâ li venyâ öhum me tube ge gol. 29 Ke e ame ânyâ wakaco hnân hú ae kap, me únyi ae únyi hnathu ae bo so hnân le, hoton ihuliwainy at ame bi wakaco.

## HNYIMAKAN 38.

**K**E e ame tibet taben hut hnân leú, a utö öhum: thabúng ta kubit ibeúen, ke thabúng kubit ulaúen, ke tha úcú je hwe-nöiny a vak; ke kun ta kubit ibeúen göranyai. 2 Ke e ame ânyâ vak ta baitoiny hnyi vak ta kopiny, k' andre khacâ me je baitoiny, ke e ame khavâ e ge bras. 3 Ke e ame ânyâ je omjehen taben hut hia, a je ot, me je soi, me je kaia, me je bâlet hnân seú utiö, me je taben meic; e ame ânyâ je omjehen hia ge bras. 4 Ke e ame ânyâ hnân taben hut echigic a bras helâ me boert eú hmelen baten hnyikânâi, me me uhni hnyi wanben e. 5 Ke e ame le vak ta otru hobi kâu vak ta hnyibaniny echigic bras, hnân hnen li venyâ. 6 Ke e ame ânyâ li venyâ a utö öhum, me tube ge bras. 7 Ke e ame inâ li

venyâ hnyin je otru hnyi li ke keihen taben hut hnân vaden e; ke e ame tibet esöiny me olanyâ hnyin.

8 Ke e ame ânyâ taben soú a bras, me can a bras, únyi hnyi je uselat anyin omomo andre úkhacaköu he ka bi athnyaba hnyi hwanumen uma úkhacaköu.

9 Ke e ame bi haginý: haba hnyi ke keihen ka hnyi hwaiöu andre uhno mano lin oae úhnyúkong nân andre seveny hnyi hak, a khaca haded je kubit: 10 ke twente je khetepiny, ke twente je taben a bras; ke sileva je bâletiny je khetep, me je venyâiny. 11 Ke khaca haded je kubit hobi kâu ke keihen ka hnyi hwadrö, ke twente je khetepiny, ke twente je taben a bras; ke sileva je bâletiny je khetep, me je venyâiny. 12 Ke hobi kâu ke keihen e jio fifte je kubit mano andre uhno, ke ten je khetepiny, ke ten je taben, ke sileva je bâletiny je khetep me je venyâiny. 13 Ke fifte kubit hobi kâu ke keihen e deiö. 14 Ke andre uhno hnyi ke keihen homagöule fiftin kubit mano; ke kun ta khetepiny, ke kun ta taben: 15 helâe minya hnyi ke keihen: wale hnyi li ke keihen homagöuleny hak andre ve uhni mano a fiftin je kubit; ke kun ta khetepiny me kun ta taben. 16 Ke haba mano hia andre uhno igigilö hak, me mano lino ae úhnyúkong nân, andre seveny. 17 Ke bras je taben je khetepiny; ke sileva ta je bâletiny je khetepiny, me je venyâiny, ke andre tube ge sileva je ban hia; ke andre venyâ ge sileva je khetepiny hak hia. 18 Ke haba mano andre uhno a hlinginy homagöule, me, huliwa anyin at omecâ mano, ae udrudrá, me udrudrá hlít, me dra vec, me lino ae úhnyúkong nân andre seveny: ke twente kubit ibeúen, ke haba ibeúen göranyai hnyi úlaueu, thabúng ta kubit, helâ me hna uhni mano hni hak. 19 Ke vak ta khetepiny, ke vak ta taben bras; ke sileva je bâletiny, k' andre khavâ ge sileva je ban e me je venyâiny. 20 Ke bras je faoiny uma mano hia me hak a igigilö.

21 Ke walang úseiny je únyi hnyi uma mano, a uma mano hnân ohnatho, helâ me hnödra hna aú, hoton hna húna hnö Mose, hnân huliwa anyin at Levi, a aú ga Ithamara nöku Arona at bihut. 22 Ke haba Bezaleli, nöku Uri, nöku Huro, únyi hnyi tribu Juda, ame ânyâ ta je únyi hia a húna Iehova kö Mose. 23 Ke e unyin Aholiaba, nöku Ahisamaka únyi hnyi tribu Dana, at khavi hnalimen, ke at huliwa ae metâ, ke at omecâ mano ge udrudrá, me udrudrá



hlit, me dra vec, me lino ae úhnyúkong nân.

24 Haba gol hia adre hom hobi kâu ta je huliwa hia hnyi dok ae kap, wale gol únyi hnyi je bwihlany, me, twente nain je talan, me tu haded ke thöte je sekel, hoton sekeliny dok ae kap. 25 Ke haba sileva unyidrin tavat adre aú hnyi úkhacaköu, khaca haded je talan, ke khaca thauzan ke seven haded ke sevente faiv je sekel, hoton sekeliny dok ae kap: 26 úsa khaca beka ke at me ke at, wale haf sekel, hoton sekeliny dok ae kap. ödra úsa khaca hia adre hanyâúú ka hnyi hna öú ödra, hwân ge tavat a twente me gan hon e, ödra siks haded ke theri thauzan ke faiv haded ke fifte. 27 Ke adre me le je talan sileva a khaca haded hnân je taben khetepiny dok ae kap, me je taben singiny; adre me ânyâ je taben a khaca haded, únyi hnyi je talan a khaca haded, a khaca talan hobi kâu ke taben a khaca. 28 Ke únyi ge khaca thauzan seven haded ke sevente faiv sekel e ame ânyâ je bâlet hobi kâu je khetep, me khavâ je ban, me ânyâ je venyâ hobi kâu. 29 Ke haba bras únyi hnyi bwihlany, me, sevente je talan me lo li thauzan ke foa haded je sekel. 30 Ke e ame ânyâ únyi hnyin e je taben hobi kâu hwanumen uma úkhacaköu, me taben hut a bras, me echigic bras, me je omjehen hia taben hut, 31 me je taben hak igigilö, me je taben homagöuleny hak, me ta je faoiny hia uma mano, me ta je faoiny hia hak igigilö.

### HNYIMAKAN 39.

**K**E ödrin e tibet je mano ae udrudrá, me udrudrá hlit, me dra vec, hnân úkhaüen huliwa hnyi dok ae kap, ke ödrin e ânyâ je úkhaú ae kap hobi kö Arona: helâ me hna húna hnö Iehova kö Mose.

2 Ke e ame tibet iefoda gol, me udrudrá, me udrudrá hlit, me dra vec, me lino ae úhnyúkong nân adre seveny. 3 Ke adre me kokot halelöúú gol me kave helâ me tö, m' adre me hwâwâ hnyi mano ae udrudrá, me udrudrá hlit, me dra vec, me hnyin lino ae úhnyúkong nân a huliwan hnyat ae metâ. 4 Ke ödrin e tibet li hon bajebenyin hobi kâu únyi e adre utibetkôuâ: ke adre me úohmâkôuâ hnyi li hnyiban. 5 Ke haba wen e, wale adre hwâwâ metâ, hnân ca e, adre khacâ me, ke tha úcú me hna huliwan e; wale gol, me udrudrá, me udrudrá hlit, me dra vec, me lino ae úhnyúkong nân

adre seveny; helâ me hna húna hnö Iehova kö Mose.

6 Ke ödrin e huliwan li veto soama, wale adre bi taben hnyi li ong gol, k' adre kave hnyin ien lakon Isaraela, helâ me hna khavi hnalimen hnân bi haten. 7 Ke e ame ip li únyi e hon li bajebenyin iefoda, me me li veto hnân oúnykumeâ ka lakon Isaraela; helâ me hna húna hnö Iehova kö Mose.

8 Ke e ame ânyâ tubwiny úlainy a huliwan at metâ, helâ me hna huliwan iefoda; a gol, me udrudrá, me udrudrá hlit, me dra vec, me lino ae úhnyúkong nân adre seveny.

9 E hu vak ta baten ae tha úcú tulutiny; ke adre ânyâ tubwiny úlainy me thu e: khaca hnyam ibeüen, ke khaca hnyam úlaüen, k' adre hia but tbu. 10 Ke adre me ohmâ hnyin e vak ta deö veto: haba ke dö, me sadio, me topazio, me bereketh, dö a bân eling. 11 Ke haba dö a loiny, me semerado, me safairo, me aloma. 12 Ke haba dö a kuniny, me lesema, me sevo, me amethusa. 13 Ke haba dö a vakiny, me berulo, me sadonuki, me jasepi: adre ve bi taben hnyin je ong gol. 14 Ke twelv je veto hoton je ien lakon Isaraela, helâ me je iödrin; helâ me hna khavi hnalimen hnân bi haten, e ve hu ien hoton je tribu a twelv.

15 Ke ödrin e ânyâ hnyi tubwiny úlainy li cein adre khenyö gol ae so. 16 Ke adre me ânyâ lo li ong taben a gol me li otru a gol; me ohmâ li otru hnyi li baten tubwiny úlainy. 17 Ke ödrin e inâ li cein gol adre khenyö ka hnyin li otru hnyi li hnyiban tubwiny úlainy. 18 Ke adre me ohmâ li hnyiban li cen adre khenyö hnyi li ong taben, me ip li únyi e hnyi li bajebenyin iefoda hnyi hnyimakan e. 19 Ke ödrin a ânyâ li otru gol me ohmâ hnyi li ke keihen tubwiny úlainy, hnyi baten hnyi ke keihen iefoda eü hmelen. 20 Ke ödrin e ânyâ ke li otru gol me ohmâ hnyi li únyi hon bajebenyin iefoda eü hmelen ke hnyi hnyimakan, hnyi hna úohmâkôuâ hon wen iefoda. 21 Ke ödrin e ca tubwiny úlainy hnyi li otruiny, ka hnyi li otruiny iefoda, ge telenu ae udrudrá, me me mokut hon wen iefoda adre hwâwâ metâ, me me ca he tubwiny úlainy ka ok únyi hnyi iefoda; helâ me hnö Iehova hna húna kö Mose.

22 Ke e ame tibet úkhaú ae beü hanen iefoda, adre hwâwâ mano ae udrudrá hia; 23 ke hnyimen hnyi wanben úkhaú helâ me hnyimen úkot hnân vat, me tibet igigilö hnyimen me me ca he ka mou. 24 Ke ödrin e ânyâ hnyi obiny úkhaú ae beü je

wan rimona ae udrudrá, me udrudrá hlit, me dra vec, me mano lino adre seveny. 25 K' adre me ányá je pate gol ae so, me ohmá je pate wanben je wan rimona hnyi obiny úkhaú igigilö wanben je rimona; 26 ke pate me wan ke rimona, me ke pate me wan ke rimona hnyi obiny úkhaú ae beú igigilö, hnân huliwa; helá me hnö Iehova hna húna kö Mose.

27 Ke ödrin e ányá je úkhaú mano lino adre hwáwá hobi kö Arona me hobi káu je lakon, 28 me hnabinybak mano lino, me je hnabinybak mano lino ae hmanenang, me je trauzes mano lino ae úhnyúkong nân adre seveny, 29 me weny hnyekon mano lino adre seveny, me udrudrá, me udrudrá hlit, me dra vec, a huliwan at omecá mano; helá me hnö Iehova hna húna kö Mose.

30 Ke ödrin e ányá ke wahano a gol ae so hobi káu korona ae kap, me sihnalimen hon, helá me hna khavi hnalimen hon únyi hnân bi haten, ka habe, Ε ΚΑΡ ΚΟ ΙΕHOVA. 31 Ke ödrin e húkálá hnyin ke telenu ae udrudrá hnân ohmá ethö hon hnabinybak; helá me hnö Iehova hana húna kö Mose.

32 Ke adre oumo heláe je huliwa hia hobi káu uma mano, me uma úkhacaköu: haba lakon Isaraela adre me ányá ta je únyi hia, helá me hna húna hnö Iehova kö Mose.

33 Ke ödrin e hom but kö Mose uma úkhacaköu, wale Uma Mano, me je omjehen hia, wale je bâletiny, me je esöiny, me je venyáiny, me je khetepiny, me je taben; 34 me tubwiny a unen mamoe бага adre wia me me dra, me tubwiny a unen takasa, me mano hnân singiny; 35 me tang ohnatho, me li venyáiny, me taben ibetengiö; 36 me laulau, me je omjehen hia, me areto hnân omanená; 37 me taben lamepa gol ae so, me je lamepainy wale je lamepa adre ip gaga, me je omjehen hia, me wakaco hnân umumelam; 38 me taben hut a gol, me wakaco hnân hú, me únyi ae bo so hnân le, me mano singiny hwanuma; 39 me taben hut a bras, me echigic bras, me li venyáiny, me je omjehen hia, me taben soú, me can e; 40 me mano hnân uhno hnyi kak, me je khetepiny, me je taben e, me mano hlinginy homagöuleny hak, me je töiny e, me je faoiny, me ta je únyi hnân huliwa hia hnyi uma mano, hobi káu uma úkhacaköu; 41 me je úkhaúen huliwa adre tibet soá hnân huliwa hnyi dok ae kap, me je úkhaú ae kap hobi kö Arona at bihut,

me je úkhaúen lakon hnân hanymen bihut. 42 Haba lakon Isaraela adre me ányá ta je únyi hia thithö e, helá me Iehova ame húna kö Mose. 43 Ke haba Mose ame wá ta je huliwa hia thithö, ke wá bi, adre hia but ányá e; adre me ányá helá me hna húna hnö Iehova: ke haba Mose ame hahnahici ödra.

## HNYIMAKAN 40.

**H**ABA Iehova ame ha kö Mose, ka habe, 2 U ma he ka otilá uma mano hnân uma úkhacaköu, hnyi bong a bâniny tehi a bân. 3 Ke u me he ka ip eiö hnyin tangen ohnatho, me söng tang ge mano adre uhno. 4 Ke u ma he ka hom laulau, me ip gaga ta je únyi hnân ip hon; ke u me he ka hom taben lamepa me vac je lamepainy. 5 Ke u me he ka ip hnyi hnyimakan tangen ohnatho taben gol hnân leú utö ae bo so, me uhno hlinginy hwanumen uma mano. 6 Ke u me he ka ip taben leú hut cicö hwanumen uma mano a uma úkhacaköu. 7 Ke u me he ka ip taben soú wanben uma úkhacaköu me taben hut, me hingálá köiö ka hnyin. 8 Ke u me he ka otilá hak igigilö me uhno hlinginy homagöuleny hak. 9 Ke u me he ka hom wakaco hnân hú, me hú uma mano, me ta je únyi hia eiö hnyin, ke u me he ka okabâ. me je omjehen hia thithö: k' ame he bi ka kap. 10 Ke u me he ka hú taben leú hut me je omjehen hia me okabâ taben hut: k' ame he ka ti kap taben bi hut. 11 Ke u me he ka hú taben soú me can e, me okabâ e. 12 Ke u me he ka hum Arona me je lakon ka hnyi hwanumen uma úkhacaköu me osú' ödrin ge köiö. 13 Ke u me he ka khaúö Arona ge je úkhaú ae kap; me u me he ka hú e, me okabâ, me me at bihut könya. 14 Ke u me he ka hom je lakon me okhaú ödrin ge je úkhaú: 15 ke u me he ka hú ödrin helá me hnâm hna hú kamödrin, m' ödrin e je at bibut könya: ke haba hna hú ödrin, me waleling me me hnyat bihut nyiele balua hnyi anyidrin ta je dö hia. 16 Haba Mose ame ányá heláe: hoton ta je hofuc hia a húna Iehova káu.

17 Ke haba hnyi tehi a bân hnyi huna a loiny, hnyi bong a bâniny tehi, adre me otilá uma mano. 18 Haba Mose ame otilá uma mano, me ohmá je taben, me otilá je esöiny, me iná je venyáiny, me otilá je khetepiny. 19 Ke e ame ulolo mano ethö hno uma, me ip tubwiny uma ethö hon e,

## LEVITIKO 1.

helâ me hna hûna hnö Jehova kö Mose. 20 Ke e ame hom me hitangen únyi hnân ohnatho hnyin tang, me inâ li venyâ hnyi tang, me ip taben ibetengiö ethö hon tang: 21 ke e ame odilâ tang hnyin uma mano, me uhno mano a singiny me söng tang ohnatho, helâ me hnö Jehova hna hûna kö Mose. 22 Ke e ame ip laulau hnyin uma úkhacaköu, hnyi ke keihen uma mano ka hnyi hwadrö, hoton singiny. 23 Ke e ame ip gaga je areto hon e hnyi hnyimakö Jehova; helâ me Jehova ame hûna kö Mose. 24 Ke e ame ip taben lamepa hnyi uma úkhacaköu cicö laulau hnyi ke keihen ka hnyi hwaiöu hnyi uma mano. 25 Ke e ame vac je lamepa hnyi hnyimakö Jehova; helâ me Jehova ame hûna kö Mose. 26 Ke e ame ip taben hut a gol hnyi uma úkhacaköu hnyi hnyimakan singiny: 27 ke e ame le únyi ae bo so hon; helâ me Jehova ame hûna kö Mose. 28 Ke e ame uhno hlinginy hwanumen uma mano. 29 Ke e ame ip taben leú hut hnyi hwanumen uma mano a uma úkhacaköu, me hudo hon e je hut adre le, me hudiny han; helâ me Jeho-

va ame hûna kö Mose. 30 Ke e ame ip taben sou hnyi wanben uma úkhacaköu me taben hut, me hingölö köiö hnân sou. 31 Ke haba Mose me Arona me je lakon ödrin e hinyem me osúâ je cadrin eling; 32 ödrin ka didrö ka hnyi uma úkhacaköu, me hakekenyâ taben bihut, ödrin e me sou; helâ me hna hûna hnö Jehova kö Mose. 33 Ke e ame otilâ hak igigilö uma mano, me taben hut, me uhno hlinginy homagöule. Helâe Mose ame umo huliwa.

34 Me haba úlâ ame tube uma úkhacaköu, ke haba hmanenangi Jehova ame ounöngötâ uma mano. 35 Ke ca hanö Mose he ka didrö ka hnyi uma úkhacaköu, anyin a laba úlâ hon, k'ame ounöngötâ uma mano ge hmanenangi Jehova. 36 Ke adre me hom dö úlâ úheny hon uma mano, me haba lakon Isaraela adre me he, hnyi anyidra je bunyen; 37 ke adre ne ca hom göranyai úlâ, me ame ca he lakon Isaraela, ke ne o but adre me hom e göranyai. 38 Haba úlâ anyi Jehova ame laba hon uma mano hnyi lany, ke meic hnyi lit, hnyi hnyimakan lap hia anyin at Isaraela, hnyi anyidra je bunyen hia.

# LEVITIKO

## TUSI A KUNINY ANYI MOSE.

### HNYIMAKAN 1.

**K**E haba Jehova ame hao Mose me ha kâu únyi hnyi hnyin uma úkhacaköu, ka habe, 2 Ha thö ka lakon Isaraela, ka habe, E ka he ke at gabun ka bi hut kö Jehova, me öbun e he ka bi hut únyi hnyi je meno, wale je kau, me hnahat mamoe.

3 Ame ne hut adre le únyi hnyi hnahat kau anyin hut, hamen he ka hudo бага ae ba hnyikongon: e ame he ka hudo e hnyi hwanumen uma úkhacaköu, m' adre me kap soâ e hnyi hnyimakö Jehova. 4 Ke e ame he ka ip hnyamen hon ban hut adre le; k' adre me he ka kap soâ e hobi kâu, me me bi hwaban anyin möt. 5 Ke e ame he ka hlingâ bolok hnyi hnyimakö Jehova: ke hamen hnyat bihut, a je laku Arona, he ka hom dren, me dukâiâ igigilö ge dra wale hon taben hut a e hnyi hwanumen uma úkhacaköu. 6 Ke e ame he ka uja hut adre le, me susubâ. 7 Ke haba laku

Arona at bihut ödrin e he ka hú meic hon taben hut me hú meic: 8 k' ame he hnyat bihut a laku Arona ka ip je eckeihe wale ban, me pipikhenya, hon hna hú meic hnyi hon taben hut: 9 ke haba tang tiny me je can, e ame he ka hneú hnyi köiö: k' ame he at bihut ka tha le hia hon taben hut, me me hut adre le, hut a an hnen meic, únyi ae bo so kö Jehova.

10 Ke ame ne únyi hnyi je hnahat meno, ame ne mamoe, ame ne got, anyin hut, hnân hut adre le; me e ame he ka hudo бага ae ba hnyikongon. 11 Ke hamen he ka hlingâ e hnyi ke keihen taben hut ka hnyi hwadrö hnyi hnyimakö Jehova: ke hamen hnyat bihut a laku Arona, he ka dukâiâ igigilö ge dren hon taben hut. 12 Ke e ame he ka susubâ, me ban me pipikhenyainy: k' ame he at bihut ka ip gaga je uthmeno eling hon hna meic wale hon taben hut: 13 ke haba tang tiny me je can e ame he ka hneú hnyi köiö: k' ame

## LEVITIKO 2, 3.

he at bihut ka hudo hia thithö, me le hon taben hut ; wale hut adre le, hut a an ge meic, únyi ae bo so kö Iehova.

14 Ke ame ne únyi hnyi je meno ame gâ anyin hut adre le kö Iehova, me e ame he ka hudo je biny ame ne lakon meköta. 15 K' ame he at bihut ka hom e ka hnyi taben hut, me ken degecâ ban, me le hon taben hut ; k' adre me he ka owa dren ka hnyi ke keihen taben hut : 16 ke e ame he ka hom wahanen me anen, me khûâ ka hnyi ke keihen taben hut e deiö hnyi hnen hnabadröu : 17 ke e ame he ka kia e hnyi li bajebenyin, k' ame ca he ka kia luâ : k' ame he at bihut ka le hon taben hut, wale hon hna meic : haba e me hut adre le, hut a an hnen meic ae bo so kö Iehova.

### HNYIMAKAN 2.

**K**E a ne he ke at ka hudo hudiny han kö Iehova, ame he ka falawa ae so anyin hut ; k' ame he ka hú ge wakaco, me bi niken libanu ka hnyin : 2 ke e ame he ka hom e ka laku Arona a hnyat bihut : ke e ame he ka okhaca aoc falawa, me ke keihen wakacoiny, me libanuiny hia ; k' ame he at bihut ka le e hnân oúnykúmeâ hon taben hut, wale hut a an ge meic, ae bo so kö Iehova : 3 ke haba kolon hut hnân han : wale ae ti kap únyi hnyi je hut a an ge meic kö Iehova.

4 Ke u ka he ka hudo hudiny han adre thân, me so je ong areto falawa ae so adre ca levenâ bi, adre úthueniken me wakaco, k' ame ne je ong areto ae balelöu adre ca levenâ k' adre khinö wakacoiny. 5 Ke ame ne hudiny han hnyi öt ânyâm hut, me so e falawa ae so adre ca levenâ bi, k' adre úthueniken me wakaco. 6 U ma he ka susubâ, me hú ge wakaco ; wale hudiny han. 7 Ke ame ne hudiny han hnyi fraingpan ânyâm hut, m' adre me he ka bi falawa me wakaco. 8 Ke u me he ka hom hudiny han adre ânyâ únyi hnyi je unyi eling kö Iehova : k' adre me he ka ham e ka at bihut, ke e ame he ka hom e ka hnyi taben hut. 9 K' ame he at bihut ka hom ke keihen hudiny han me hnân oúnykúmiâ, me le hon taben hut : wale hut a an hnen meic, ae bo so kö Iehova. 10 Ke haba kolon hudiny jeú me hobi kö Arona me lakon ; wale únyi ae ti kap únyi hnyi je hut a an hnen meic kö Iehova. 11 Adre me ca he ka bi leven ka hnyi ke hudiny han öbun e he ka hudo kö Iehova ; anyin a öbun e ca

he ka leú leven me hani hnyi hut a an ge moic kö Iehova. 12 Öbun e he ka hudo e hnân hudiny wan a bân kö Iehova, k' ame ca he ka ölö göranyai bunen ae so únyi hnyi hon taben hut. 13 Ke u me he ka sâltâ je hudiny ânyâm han hia ; ke so ame ca ba balua sâltiny úhihinyköu anyin Khongom hnyi ânyâm hudiny han : u me he ka hudo ânyâm je hut hia tha e me sâlt.

14 Ke u ka he ka hudo hudiny han, únyi hnyi je wan a bân kö Iehova, me u me he ka hudo hnân hudiny han je wan a bân hnyi em hnyeï, je wan hwit adre le ge meic, me je hwit adre omomonoâ. 15 Ke u me he ka bi wakacoiny, me ip libanu hon : wale hudiny han. 16 K' ame he at bihut ka le önykúmiâ, a ke keihen hwit adre omomonoâ, me ke keihen wakacoiny, me libanuiny hia : wale hut a an ge meic kö Iehova.

### HNYIMAKAN 3.

**K**E ame ne hudiny ole anyin hut, ame ne he ka hudo únyi hnyi hnahat meno, ame ne бага, ame ne momo, me hamen he ka hudo at ae ba hnyikongon hnyi hnyimakö Iehova. 2 Ke e ame he ka ip hnyamen hon ban anyin hut me hlingâ hnyi hwanumen uma úkhacaköu : k' ame he laku Arona hnyat bihut ka dukâiâ dren igigilö hnyi hon taben hut. 3 Ke e ame he ka hudo kö Iehova hut a an ge meic únyi hnyi je hudiny ole ; haba pipikhenya at ame lan tang tiny, me pipikhenyainy tiny hia, 4 me li wagien, me pipikhenyainy cicö li jebalainon me únyi ae laú ethö hon akiny, e ame he ka tha hom me li wagien. 5 K' ame he laku Arona ka le únyi e hon taben bi hut, hon hut hnân le hnyi hna hú meic : wale hut a an hnen meic, ae bo so kö Iehova.

6 Ke ame ne únyi hnyi hnahat meno anyin hut hnân hudiny ole, ame ne бага ame ne momo, me e ame he ka hudo at ae ba hnyikongon. 7 Ame ne hudo nokon mamoe hnân anyin hut, me e ame he ka hudo e hnyi hnyimakö Iehova : 8 ke e ame he ka ip hnyamen hon ban anyin hut me hlingâ e hnyi hnyimakan uma úkhacaköu, k' ame he laku Arona ka dukâiâ dren igigilö hon taben bi hut. 9 Ke e ame he ka hudo kö Iehova hut a an ge meic únyi hnyi je hudiny ole ; ke haba pipikhenyainy, me obiny ae bekhöt ae pipikhenya e ame he ka hom únyi hnyi jö tot ; ke haba pipi-

## LEVITIKO 4.

khenya at ame lan tang tiny, me pipikhenya hia hnyi tiny, 10 me li wagien, me pipikhenyainy cicö li jebalainon, me únyi ae lau ethö hon akiny, e ame he ka tha hom e me li wagien. 11 K' ame he at bihut ka le hon taben hut : wale jeúiny hut a an ge meic kö Iehova.

12 K' ame ne got anyin hut, e ame he ka hudo hnyi hnyimakö Iehova. 13 Ke e ame he ka ip hnyamen hon ban, me hlingâ hnyi hnyimakan uma úkhacaköu : k' ame he laku Arona ka dukâiâ dren igigilö hon taben hut. 14 Ke e ame he ka hudo únyi hnyin je anyin hut, a hut a an ge meic kö Iehova ; ke haba pipikhenya at ame lan tany tiny, me pipikhenyainy hia tang tiny, 15 me li wagien me pipikhenyainy, cicö li jebalainon, me únyi ae lau ethö hon akiny, e ame he ka tha hom me li wagien. 16 K' ame he at bihut ka le ta je únyi e hon taben hut : wale jeúiny hut a an ge meic hnân bo so : hobi kö Iehova pipikhenya hia. 17 Ame he ka hnanyibu nyiele balua hnyi anyibun ta je dö, hnyi je hnyababun hia, ka habe, ca he öbun ka han pipikhenya me dra.

### HNYIMAKAN 4.

**K**E haba Iehova ame ha kö Mose, ka habe, 2 Ha thö ka lakon Isaraela, ka habe, A ne ke at ame hanyâúâ ke hnanyibu anyi Iehova, ke ca khana, waleji hnyi je únyi a húna Iehova a g' adre me ca he ka ányâ, ke ame ne he ka ányâ ke únyi eling : 3 ame ne he at bihut adre hú ka hanyâúâ, me hom hulö hon tavat ; me e ame he ka hudo, can monu e ame ányâ, ke nak bolok ae ba hnyikongon, kö Iehova, hnân hudiny hulö. 4 Ke ame he ka hom bolok ka hnyi hwanumen uma úkhacaköu hnyi hnyimakö Iehova ; k' ame he ka ip hnyamen hon ban bolok, me hlingâ bolok hnyi hnyimakö Iehova. 5 K' ame he at bihut adre hú ka hom únyi hnyi dren bolok, me hom ka hnyi uma úkhacaköu : 6 k' ame he at bihut ka hneú banyen hnyi dra, me oseven dukâiâ dren hnyi hnyimakö Iehova, cicö singiny dok ae kap. 7 Ke ame he at bihut ka kina dra eling hon je baitoiny taben leú únyi ae bo so hnyi hnyimakö Iehova, a e hnyin uma hnân úkhacaköu : ke e ame he ka hingâlâ hia dren bolok eú hmelen taben leú hut, wale hnyi hwanumen uma ukhacaköu. 8 Ke hamen he ka uja únyi hnyin e pipikhenyainy bolok hia

hnân hudiny hulö : haba pipikhenya at ame lan tang tiny, me pipikhenya hia hnyi tang tiny, 9 me li wagien, me pipikhenyainy cicö li jebalainon, me únyi ae lau ethö hon akiny, e ame he ka tha hom me li wagien, 10 helâ me hna hom únyi hnyi bolok hnân hudiny ole : k' ame he at bihut ka le ta je únyi e hon taben leú hut. 11 Ke haba unen bolok, me utiöiny hia, me ban, me je can, me tang tiny, me ta tet, 12 wale bolok hia thithö e ame he ka hom hoton hnyaba ka hnyi dok ae so, wale adre labö hingölö dröu hnyin, ke adre me he ka le e ge meic : adre me he ka thong hnyi dok adre me labö hingölö dröu hnyin.

13 Ke ame ne hanyâúâ tavat Isaraela hia, ke iyong únyi eling ka úkhacaköu, k' adre me ne ányâ ke únyi a ha Iehova a g' adre me ca he ka ányâ, m' adre me hulö but ; 14 ke e ka manen hulö adre me ányâ, me hamen úkhacaköu he ka hudo nak bolok hudiny hulö, me hom e ka hnyi hnyimakan uma úkhacaköu. 15 Ke ame he wahingatinginy úkhacaköu ka ip je hnyamödrin hon ban bolok hnyi hnyimakö Iehova : ke adre me he ka hlingâ bolok hnyi hnyimakö Iehova. 16 Ke ame he at bihut adre hú he ka hom dren bolok ka hnyi uma úkhacaköu : 17 k' ame he at bihut ka hneú banyen hnyi dra me oseven dukâiâ e hnyi hnyimakö Iehova, cicö singiny. 18 Ke e ame he ka kina ke ong dra hnyi je baitoiny taben hut hnyi hnyimakö Iehova, hnyi uma úkhacaköu, ke e ame he ka hingâlâ dra hia hmelen taben leú hut, wale hnyi hwanumen uma úkhacaköu. 19 Ke e ame he ka uja únyi hnyin e je pipikhenya hia me le hon taben hut. 20 Helâe e ame he ka ányâ ka bolok ; helâ me hnen hna ányâ ka bolok hnân hudiny hulö, me e ame he ka ányâ helâe kâ âng : ke ame he at bihut ka bi hwaban anyidra möt, k' adre me he ka ln' ödra. 21 Ke e ame he ka hom bolok ka hnyi hoton hnyaba, me le, helâ me hnen hna le bolok a bân : haba únyi e, me hudiny hulö hobi kâu úkhacaköu.

22 A ne he ke than ka ányâ hulö, ke ca khana, k' ame ne mádrâ ke únyi a ha hnö Iehova Khongon a g' adre me ca he ka mádrâ, k' ame ne hulö but ; 23 ke adre me ne omanenâ kâu anyin monu, waleji e ame hulö hnyin, me e ame he ka hom hnân anyin hut got бага ae ba hnyikongon : 24 ke e ame he ka ip hnyamen hon ban got me hlingâ e hnyi dok adre me labö hlingâ hut adre le hnyi hnyimakö Iehova :

## LEVITIKO 5.

wale hudiny hulö. 25 Ke hamen at bi hut he ka hom ke ong dra dren hudiny hulö, ge banyen, me kina hnyi je baitoiny taben leû hut, k' ame he ka hingälâ dren hmelen taben leû hut. 26 Ke ame he ka le hia pipikhenyainy hon taben hut, helâ me pipikhenyainy hudiny ole ; ke ame he at bihut ka bi hwaban anyin möt anyin a e at hulö, k' adre me he ka hna but anyin monu.

27 Ke ame ne monu ke at aten hnyi, ke ca khana, k' ame ne ânyâ ke ûnyi a ha hnö Iehova a g' adre me ca he ka ânyâ, k' ame hulö but ; 28 ke adre ne omanenâ kâu anyin monu, me e ame he ka hom hnân anyin hut, ke got momo ae ba hnyikongon, can monu e ame anyâ. 29 Ke e ame he ka ip hnyamen hon ban hudiny hulö, me hlingâ hudiny hulö hnyi dok adre le hnyin hudiny leû. 30 Ke ame he at bihut ka hom ge banyen ke ong dra, me kina hon je baitoiny taben leû but, me hingälâ dren hia hnyi hmelen taben hut. 31 Ke e ame he ka hom pipikhenyainy hia, helâ me hna hom pipikhenyainy hudiny ole ; k' ame he at bihut ka le e hon taben hut me me bo so kö Iehova ; ke ame he at bihut ka bi hwaban anyin möt, k' adre me he ka thang degecâ anyin hulö.

32 Ke ame ne hom nokon mamoe hnân anyin hut a hudiny hulö, hamen he ka hom momo ae ba hnyikongon. 33 Ke e ame he ka ip hnyamen hon ban hudiny hulö, me hlingâ e hnyi dok adre me labö hlingâ hnyin hudiny leû. 34 Ke ame he at bi hut ka hom ge banyen ke ong dra dren hudiny hulö, me kina e hon je baitoiny taben leû hut, me hingälâ dren hia hmelen taben hut : 35 ke e ame he ka hom hia pipikhenyainy, helâ me hna uja pipikhenyainy nokon mamoe hnân hudiny ole ; ke hamen at bihut he ka le ta je ûnyi e hon taben hut, helâ me je hut kö Iehova a an hnen meic ; ke ame he at bihut ka bi hwaban möt anyin a e at ae monu, k' adre me he ka thang degecâ anyin hulö.

### HNYIMAKAN 5.

**K**E ame ne monu ke at a löng hnödra hna kunâ he ka khemanyin, ke e at ohnatho, a ne wâ, a ne khana, k' ame ne ca ha hofuc eling, me ame he ka takou e anyin hulö : 2 ke haba khaca, a ne he ke at ka kâlâ ûnyi ae bokong, ame ne unyin meno ae bokong a mokcu, ame ne meno a

vak can ae bokong a mokcu, ame ne meno ame iyâû ae bokong a mokcu, ke ame ne ca manen kâu, me e ame he minya ka bokong, k' ame hulö but : 3 ke ame ne kâlâ bokonginy at, a ta je ûnyi hia ae ikiki ame obokongoâ, ke iyong e kâu ; haba hnyi ûen a e khana e, me e at hulö : 4 ke ame ne he ke at ka ie khemanyin ge li esongodiny he ka ânyâ ûnyi ae kong, ame ne ûnyi ae so, haba ta je ûnyi hia e ame ie ha me khemanyin, ke iyong kâu, haba hnyi ûen ae khana me e at hulö hnyi ke ûnyi eling : 5 ke ame ne hulö but hnyi ke ûnyi eling, me e ame he ka haimemenâ a ga hulö but hnyin e : 6 ke e ame he ka hom kö Iehova hudiny anyin hulö, can hulö e ame ânyâ, a meno momo ûnyi hnyi hnâhat mamoe, ame ne nokon mamoe, ame ne got, hnân hudiny hulö ; ke ame he at bihut ka bi hwaban anyin möt, anyin a e at hulö. 7 Ke ame ne ca khana he ka ham ke meno helâe can hulö e ame ânyâ, me hamen he ka hom hwaban kö Iehova, a lo li biny, ame ne li lakon meköta ; hnân hudiny hulö khaca, ke hnân hudiny leû khaca. 8 Ke e ame he ka hom li meno eling ka at bihut, k' ame he ka bân ka hudö hudiny hulö, me ken degecâ ban, ke ca he ka subâ luâ : 9 ke e ame he ka dukâiâ ke keihen taben hut ge dra dren hudiny hulö ; ke adre me he ka owa kolon dra hmelen taben hut : haba e me hudiny hulö. 10 Ke e ame he ka hudo at a loiny hnân hudiny leû hoton hnanyibu : ke ame he at bihut ka bi hwaban anyin möt ge monu e ame hia but ânyâ, k' adre me he ka hna e.

11 Ke ame ne ca khana he ka hom li biny, ame ne li lakon meköta, me hamen at a ânyâ hulö he ka hom hnân anyin hut, khaca omer falawa hnân hudiny hulö ; e ame ca he ka hû e ge wakaco, k' ame ca he ka ip libanu ka hnyi hon : anyin a e hudiny hulö. 12 Ke e ame he ka hom ka at bihut, k' ame he at bihut ka okhaca aoc ge hnyamen hnân oûnykúmeâ, me le hon taben hut, helâ me je hut a an ge meic kö Iehova : haba e hudiny hulö. 13 Ke ame he at bihut ka bi hwaban anyin möt can hulö e ame ânyâ hnyi ta je ûnyi eling, k' adre me he ka hna e ; ke hobi kâu at bihut kolon hnân hudiny han.

14 Ke Iehova ame ha kö Mose, ka habe, 15 A ne he ke at ka ânyâ monu, ke ca khana, hnyi ta je ûnyi ae kap ga Iehova ; me e ame he ka hom kö Iehova hudiny hulö, a mamoe бага ae ba hnyikongon ûnyi

LEVITIKO 6.

hnyi hnahat mamoe, hoton hnâm hna tuluto kâu je sekel sileva, helâ me sekeliny dok ae kap, hnân hudiny hulö : 16 ke e ame he ka bi hwaban hulö e ame ânyâ hnyi ûnyi ae kap, ke e ame he ka bi hanen ka hnyin ke keihen a thabûnginy, me ham e ka at bihut : ke ame he at bihut ka bi hwaban anyin môt, ge mamoe бага hudiny hulö, k' adre me he ka hna e.

17 Ke ame ne ke at ame ânyâ hulö me anyâ ke je ûnyi hnyi ta je ûnyi a hûna hnö Iehova a g' adre me ca he ka ânyâ ; k' ame ne ca khana e, me ame hulö but, k' ame he ka takou e anyin hulö. 18 Ke e ame he ka hom ka at bihut mamoe бага ae ba hnyikongon ûnyi hnyi hnahat mamoe, helâ me hnâm hna tuluto kâu, hnân hudiny monu : ke ame he at bihut ka bi hwaban anyin môt, can anyin monu, ke ca khana bi k' adre me he ka hna e. 19 Wale hudiny monu : anyin ae hnathu e ame monu kö Iehova.

HNYYIMAKAN 6.

**K**E Iehova ame ha kö Mose, ka habe, 2 A ne ke at ame anyâ monu, me hanyââ hnanyibu anyi Iehova, me iyawö ka at ame laba hakekenyâ ge ûnyi ame hna kâu he ha tuö, ame ne ge úhîhînykôu, ame ne ûnyi adre hûgûnâ, ame ne ovecâ ke at ; 3 ame ne wâ ûnyi a hia anyin ke at, k' ame iyawâ hnyin, me khemanyin thoi ; haba hnyi ta je ûnyi hia eling a ânyâ ke at, me mädra hulö hnyin : 4 hawe, a ne monu, a ne hia but ânyâ hulö, hamen he ka ham hmetu ûnyi e ame hûgûnâ, ame ne ke ûnyi e ame hom hnyi hnen hna ovecâ at, ame ne ûnyi adre hna kâu he ka tuö, ame ne ûnyi a hia, wale ame blo, 5 ame ne ke ûnyi e ame khemanyin thoi hnyin ; hawe, hamen he ka ham hmetu hia thithö, me bi hanen ke keihen a libenyitainy : bamen he ka ham ka at a anyin hnyi bong a manen hnyin. 6 Ke e ame he ka hom kö Iehova hudiny anyin hulö, a mamoe бага ae ba hnyikongon ûnyi hnyi hnahat mamoe, helâ me hnâm hna tuluto hnân hudiny monu a deny at bihut : 7 ke ame he at bihut ka bi hwaban anyin môt hnyi hnyimakö Iehova, ke adre me he ka hna e ; wale hnyi ta je ûnyi hia e ame monu hnyin.

8 Ke Iehova ame ha kö Mose, ka habe, 9 Ha thö kö Arona me lakon, ka habe, 10 Walang hnanyibuiny hudiny leû ; wale hut

adre le, ame he ka mokut hon hna hû meic, hnyi hnyinghet hia ke ne o but hnyomakatu ; k' ame he ka môt meic hon taben hut. 10 Ke ame he at bihut he ka khavâ anyin úkhaû lino, me khavâ unyin ge anyin útrauzes lino ; ke e ame he ka aoc hnabadröu ta an hut adre le hon taben hut, ke e ame he ka ip e hnyi ke keihen taben hut. 11 Ke e ame he ka uny anyin je úkhaû, me khavâ ke je úkhaû, me hom dröu ka hnyi hoton hnyaba ka hnyi dok ae so. 12 Ke ame he ka labö môt meic hon taben hut, k' ame ca he ka mok ; ke ame he at bihut he ka hû utö hon hnyi je hnyomakatu hia : ke e ame he ka ip gaga hon e hut adre le, me e ame he ka le hon e pipikhenyainy je hudiny ole. 13 Ame he bala ka môt meic hon taben hut ; ame ca he ka mok.

14 Ke walang hnanyibuiny hudiny han : ame he laku Arona ka hudo e hnyi hnyimakö Iehova, cicö taben hut. 15 Ke e ame he ka okhaca aoc falawa a hudiny han, me wakacoiny, me libanu hia, hon hudiny han, ke e ame he ka le e hon taben hut me me bo so, hnân oûnykûmiâ kö Iehova. 16 Ke haba kolon, ame he Arona me lakon he ka an : ödrin e he ka han e, adre ca levenâ, hnyi ke dok ae kap ; ödrin e he ka han e hnyi haginy uma úkhacaköu. 17 Adre me ca he ka le e adre levenâ. Oge hia but ham e hnân hwajekhöüdrin ûnyi hnyi je hut a an ge meic kõnya ; e ti kap e, helâ me hudiny hulö, me hudiny monu. 18 Ame he lakon бага a laku Arona hia ka hnyi han e, wale ke hwajekhön nyiele balua hnyi anyibun ta je dö, ûnyi hnyi je hut a an ge meic kö Iehova : ödrin e he ka kap hia tavat ödrin e kâlâ.

19 Ke Iehova ame ha kö Mose, ka habe, 20 Walang hut anyi Arona me je lakon ödrin e he ka hudo kö Iehova hnyi bong adre me he ka hû e ; khaca omer falawa hnân hudiny han nyiele balua, haf hnyi hnyomakatu, ke ke haf hnyi sahac. 21 Adre me he ka ânyâ e me wakaco hnyi öt ; at ka hia but le, me u me he ka odilâ : ke u me he ka hudo hudiny han hnân bo so kö Iehova wale je ong falawa. 22 Ke ame he ka hudo e hnen at bihut adre hû, a nokon wale at ame hwaban : haba hnanyibu nyiele balua ka habe, Adre me he ka tha le hia kö Iehova. 23 Ke adre me he ka le avâ je hudiny han hia anyin at bihut : adre me ca he ka an e.

24 Ke Iehova ame ha kö Mose, ka habe, 25 Ha thö kö Arona me lakon, ka habe

## LEVITIKO 7.

Walang hnanyibuiny hudiny hulö : haba dok adre me labö hlingâ je hudiny leû hnyin, me adre me he ka hlingâ minya hnyin hudiny hulö hnyi hnyimakö Iehova : wale ae ti kap. 26 Haba at bihut, wale at a hudo e hnân hulö, ame he ka han e : adre me he ka an e hnyi dok ae kap hnyi haginy uma ûkhacaköu. 27 Haba ûnyi ame kâlâ utiöiny me e kap e : ke ame ne ta thö dra hnyi ke ûkbaû, u ma he ka hneû dren eling hnyi ke dok ae kap. 28 Ke adre me he ka tho degecâ kaia kânâ adre ôlâ hnyin : ke adre ne ôlâ e hnyi kaia a bras, adre me he ka kot e me hneû ge köiö. 29 Ame he ka hnyi an e obaga hia hnyat bihut : wale ûnyi ae ti kap. 30 Ke haba ta je hudiny hulö hia, wale adre odilâ dren ka hnyi uma ûkhacaköu, hnân bi hwaban môt hnyi dok ae kap, me, adre me ca he ka an e : adre me he ka le degecâ ge meic.

### HNYIMAKAN 7.

**K**E walang hnanyibuiny hudiny monu : wale ae ti kap. 2 Adre me he ka hlingâ hudiny monu hnyi dok adre me labö hlingâ hnyin hudiny leû : ke adre me he ka dukâiâ dren igigilö hon taben hut. 3 Ke e ame he ka hudo pipikhenyainy hia ; wale obiny ae pipikhenya, me pipikhenya at ame lan tang tiny, 4 me li wagien, me pipikhenyainy, cicö li jebalainon, me ûnyi ae lau ethö hon akiny, e ame he ka tha hom me li wagien : 5 ke ame he at bihut ka le ta je ûnyi e hon taben hut, me me hut a an ge meic kö Iehova : haba ûnyi e me hudiny monu. 6 Ame he obaga hia a hnyat bihut ka an e, adre me he ka an e hnyi dok ae kap ; wale ûnyi ae ti kap. 7 E ûcû thibi hudiny hulö me hudiny monu : khaca thibi hnanyibu hobi kâu li ûnyi e : haba at bihut ame bi hwaban môt kâu, me anyin bi e. 8 Ke haba at bihut, at ame hudo hudiny leû anyin ke at, me anyin bi unen hut adre le waleji e ame hudo. 9 Ke haba hudiny han hia adre thân, me ta je ûnyi hia adre ânyâ hnyi faraingpan me öt, me ame he ka an at ame hudo ûnyi eling. 10 Ke haba ta je hudiny han hia adre úthueniken me wakaco, ame ne mada, me wale anyin laku Arona hia, e ûcû ka ke at me ke at.

11 Ke walang hnanyibuiny hudiny ole, adre me he ka hudo kö Iehova. 12 Ame ne he ka hudo e hnân hudiny ole, me e ame he ka tha hudo me hudiny ole je ong areto adre ca levenâ bi adre úthueniken me wa-

kaco, me je ong areto ae halelöu adre ca levenâ bi adre khinö wakacoiny, me je ong areto adre úthueniken me wakaco, a falawa ae so adre le. 13 Eame he ka hudo hudiny hut tha e me ta je hudiny ole, me hnân ole, tha e me je ong areto adre ca levenâ bi. 14 Ke haba khaca hut hnyi je hut hia, me ame he ka hudo hnân hut adre kap göranyai kö Iehova : ke haba at bihut at ame dukâiâ dren je hudiny ole, me, anyin bi e. 15 Ke haba utiöiny hudiny ole hnân anyin ole, adre me he ka han hnyi bong adre hudo hnyin ; e ame ca he ka ip kolon ke ne o but hnyomakatu. 16 Ke ame ne khöbi, ame ne hudiny ibetengio anyin hut, me adre me he ka han e hnyi bong adre hudo hnyin anyin hut : ke bong nyi adre me he ka an kolon : 17 ke haba kolon utiöiny hut hnyi bong we, me adre me he ka le degecâ e ge meic. 18 Ke adre me ne he ka an ke keihen utiöiny hudiny ole hnyi bong we, waleji e ame hudo, me adre me ca he ka kap e, ke adre me ca he ka aû e ka at ame hudo : ûnyi ae ikiki, ke haba at ame he ka an, me ame he ka takoû e anyin hulö. 19 Ke adre me ca he ka an utiöiny ame kâlâ ge ûnyi ae bo kong : adre me he ka le degecâ e ge meic. Haba utiö ame he tavat thibi ae bo so ka hnyi han : 20 ke haba at ame han utiöiny hudiny ole wale a anyi Iehova, ke e at ae bo kong, me adre me he ka subâ degecâ at eling ûnyi hnyi iny hnyei. 21 Ke haba at ame kâlâ ûnyi ae bo kong, ame ne bo konginy at, ame ne bo konginy meno, ame ne ke ûnyi bi ae ikiki ae bo kong, me han utiöiny hudiny ole, wale a anyi Iehova, me adre me he ka subâ degecâ at eling ûnyi hnyi iny hnyei.

22 Ke Iehova ame ha kö Mose, ka habe, 23 Ha thö ka lakon Isaraela, ka habe, Ca he öbun ka han pipikhenyainy kau, me mamoe, me got. 24 Ke haba pipikhenyainy meno ame mok hwege, me pipikhenyainy meno adre oloú, me ûcû hobi kâu ke ta je huliwa : k' öbun e ca he bala ka an e. 25 Ke haba at ame he ka han pipikhenyainy meno, adre bödra ka hudo hnân hut a an ge meic kö Iehova, me adre me he ka subâ degecâ at a han, ûnyi hnyi iny hnyei. 26 Ca he öbun ka han dra hnyi je hnyababun hia, ame ne dren meno ame gâ, ame ne meno a vak can. 27 Haba at ame han dra, me adre me he ka subâ degecâ e ûnyi hnyi iny hnyei.

28 Ke Iehova ame ha kö Mose, ka habe,



## LEVITIKO 8.

29 Ha thö ka lakon Isaraela, ka habe, Haba at ame hudo anyin hudiny ole kö Iehova, me e ame he ka hom anyin hut kö Iehova únyi hnyi anyin hudiny ole : 30 e ame he ka hom ge li hnyamen je hut a an ge meic kö Iehova, a pipikhenyainy, me úlainy, e ame he ka hom, me me hajjingga úlainy hnân hudiny hajjingga hnyi hnyimákö Iehova. 31 Ke ame he at bihut he ka le pipikhenyainy hon taben hut: ke haba úlainy me ö Arona me lakon. 32 Ke öbun e he ka ham ka at bihut jevan a metâ hnân hudiny kap göranyai únyi hnyi anyibun je hut ole. 33 Haba ke nöku Arona at ame hudo dren je hudiny ole, me pipikhenyainy, me anyin bi jevan a metâ hnân an. 34 Anyin oge me kap únyi ge lakon Isaraela úlainy hajjingga me jevan hnân kap göranyai únyi hnyi anyidra je hut ole, me ham únyi e kö Arona at bihut me lakon me me hwajekhöüdrin nyiele balua únyi ge lakon Isaraela.

35 Wale hwajekhöü Arona, me hwajekhön lakon, únyi hnyi je hut a an ge meic kö Iehova, hwân hnyi bong e ame otil' ödrin ka hnyi hanyemen bi hut kö Iehova ; 36 waleji Iehova ame húna he ka ham ködrin únyi ge lakon Isaraela, hnyi bong e ame hú ödrin. Wale ke hwajeköüdrin nyiele balua hnyi anyidrin ta je dö. 37 Wale hnanyibuiny hudiny leü, me hudiny ban, me hudiny hulö, me hudiny monu, me je hna otilâ, me je hudiny ole ; 38 waleji hnö Iehova hna húna kö Mose hon bucen Sinai, hnyi bong e ame húna ka lakon Isaraela he ka hudo anyidra je hut kö Iehova hnyi hnyebuba Sinai.

### HNYIMAKAN 8.

**K**E haba Iehova ame ha kö Mose, ka habe, 2 Hum Arona thö tha e me lakon, me je úkhaú, me wakaco hnân hú, me bolok hnân hudiny hulö, me li mamoe бага, me tangen areto adre ca levenâ bi ; 3 ke hawâ úkhacaköüâ thö tavat hia ka hnyi hwanumen uma úkhacaköü. 4 Ke haba Mose ame ányâ helâ me hna húna hnö Iehova kâu ; ke adre hawâ úkhacaköüâ tavat ka hnyi hwanumen uma úkhacaköü. 5 Ke haingö Mose ka úkhacaköü, ka habe, Walang únyi a ha Iehova he ka ányâ. 6 Ke haba Mose ame hum Arona me lakon me osi' ödrin ge köiö. 7 Ke e ame okhaúâ e ge úkhaú, me oweikâ e ge wen hnyekon, me okhaúâ e ge úkhaú ae beü me iefoda,

me oweikâ e ge wen iefoda adre hwâwâ metâ, me hukâlâ e hnyi fetriny únyi gan. 8 Ke e ame ovekinyâ e ge tubwiny úlainy : ke e ame ip hnyi tubwiny úlainy Urim me Thummim. 9 Ke e ame obicâ e ge hnabinybak, me ip hnyi hnyimakan hnabinybak wahano gol, korona ae kap : helâ me hna húna hnö Iehova kö Mose. 10 Haba Mose ame hom wakaco hnân hú me hú uma mano me ta je únyi hia eü hnyin, me okabâ ta je únyi e. 11 Ke e ame osewen dukâiâ hnen e taben hut, me hú taben hut, me je omjehen hia, me taben soú me cau e, me me kap ta je únyi e. 12 Ke e ame hingâlâ wakaco hnân hú hon bö Arona, me hú e, me me okabâ. 13 Ke Mose ame hom laku Arona, me okhaú' ödrin ge je úkhaú, me oweikâ je hnyekudrin, me obic' ödrin ge je hnabinybak ; helâ me hna húna hnö Iehova kö Mose. 14 Ke e ame hom bolok hnân hudiny hulö : ke Arona me lakon ödrin e ip je hnyamödrin hon ban bolok a hudiny hulö. 15 Ke e ame hlingâ ; ke Mose ame hom dra me kina e hon je baitoiny taben hut igigilö ge banyen, me ányâ wia taben hut, me hingâlâ dra hmelen taben hut, me okabâ, me me bi hwaban möt. 16 Ke e ame hom pipikhenya hia hon tang tiny, me únyi ae lau ethö hon akiny, me li wagian, me pipikhenyainy, ke Mose ame le je únyi e hon taben hut. 17 Ke haba bolok, me unen, me utiöiny, me ta tetiny, e ame thong ge meic hnyi hoton hnyaba ; helâ me Iehova ame húna kö Mose. 18 Ke e ame hom mamoe бага a hudiny leü : ke Arona me lakon ödrin e ip je hnyamödrin hon ban mamoe бага. 19 Ke e ame hlingâ : ke Mose ame dukâiâ dren igigilö hon taben hut. 20 Ke e ame susubâ mamoe бага ; ke Mose ame le ban, me je ong hanen, me pipikhenya. 21 Ke e ame hneü tang tiny ge köiö, me je can ; ke Mose ame tha le hia mamoe бага hon taben hut, wale hut adre le hnân bo so, me hut a an hnen meic kö Iehova : helâ me Iehova ame húna kö Mose. 22 Ke e ame hom ke mamoe бага, wale mamoe бага hnân otilâ : ke Arona me lakon ödrin e ip hnyamödrin hon ban mamoe бага. 23 Ke e ame hlingâ ; ke Mose ame hom dren, me kina e hnyi boúlölöven metân hnyikönyö Arona, me hnyi bahnyökvetoiny a metân, me bacan a metân. 24 Ke e ame hom laku Arona, ke Mose ame kina dra hnyi boúlölöven metân je hnyikönyödrin, me je bahnyökvetoidrin a metâ, me je bacadrin a metâ :

## LEVITIKO 9.

ke Mose ame dukâiâ dra igigilö hon taben hut. 25 Ke e ame hom pipikhenya, me obiny, me pipikhenya hia hon tang tiny, me únyi ae lau ethö hon akiny, me li wagien, me pipikhenyainy, me jevan a metâ: 26 ke e ame hom únyi hnyi tang areto adre ca levenâ bi a e hnyi hnyimakö Jehova, khaca ong areto adre bi wakacoiny, me khaca ong areto ae halelöü, me ip hon pipikhenya, me jevan a metâ; 27 k' ame ip ta je únyi hia e hon hnyamö Arona, me je hnyamen lakon, ke e ame hajijingâ me me hudiny hajijing hnyi hnyimakö Jehova. 28 Ke Mose ame kap je únyi e únyi hnyi je hnyamödrin me le hon taben hut hon hudiny leü: wale hudiny otilâ a hnân bo so: wale hut a an ge meic kö Jehova. 29 Ke Mose ame hom úlainy, me hajijingâ me me hudiny hajijing hnyi hnyimakö Jehova: wale ö Mose únyi hnyi mamoe бага a hudiny otilâ: helâ me Jehova ame húna kö Mose. 30 Ke Mose ame hom wakaco hnân hú, me dra a e hon taben hut, me duköiö Arona me anyin je úkhaú, me lakon, me je úkhaú anyin lakon; me okabi Arona, me je úkhaúen, me lakon, me je úkhaúen lakon anyin. 31 Ke haingö Mose kö Arona me lakon, ka habe, Ölä ju utiö hnyi hwanumen uma úkhacaköu; ke tha an ju e me areto únyi hnyi tang hnân otilâ, helâ me hnök hna húna, ka habe, Ame he Arona me lakon ka an e. 32 Ke haba kolon utiö me areto, hamöbun he ka thong hnyi meic. 33 Ke ca he öbun ka he úhebun hnyi hwanumen uma úkhacaköu hnyi je bong a seven, ke ne o but ame um dö je bonginy hna otil' öbun: anyin ame he ka seven je bonginy hna otil' öbun. 34 Helâ me hna ányâ hnyi bong ang, helâe Jehova ame hia but húna he ka ányâ, ka bi hwaban anyibun möt. 35 Hamöbun he ka laba hnyi hwanumen uma úkhacaköu seven ta bong hnyi lany me lit, me tuö hna húna hnö Jehova wâ öbun nye mokcu: anyin adre húna helâe könya. 36 Haba Arona me lakon ödrin e hnyi ányâ ta je únyi hia hnö Jehova hna húna a deny Mose.

### HNYIMAKAN 9.

**K**E haba hnyi bong a eitiny, Mose ame hao Arona, me lakon, me wahingating at Isaraela; 2 ke haingen kö Arona, ka habe, Hom dö ke nak bolok hnân hudiny hulö, me mamoe бага ae ba hnyikongon,

hnân hudiny leü, me hudo li meno e hnyi hnyimakö Jehova. 3 Ke u ma he ka ha ka lakon Isaraela, ka habe, Hom d' öbun got бага me me hudiny hulö; me nokon kau, me nokon mamoe a khaca hunainy ae ba hnyikongon, me me hudiny leü; 4 me bolok, me mamoe бага hnân hudiny ole, he ka hudo hnyi hnyimakö Jehova; me hudiny jeu adre me úthueniken me wakaco, anyin a haba hnyi bong ang Jehova ame manen köbun. 5 Ke ödrin e hom únyi a ha Mose ka hnyi uma úkhacaköu: ke haba úkhacaköu hia adre me hakekeny, me útililen hnyi hnyimakö Jehova. 6 Ke haingö Mose, ka habe, Walang únyi a húna Jehova köbun he ka ányâ, k' ame he ka manen köbun hmanenangi Jehova. 7 Ke haingö Mose kö Arona, ka habe, He thö ka hnyi taben hut, me hudö thö hudiny ányâm hulö, me ányâm hut adre le, me bi hwaban ányâm möt, me melen tavat: ke hudo hut anyin tavat, me bi hwaban anyidra möt, helâ me hna húna hnö Jehova. 8 Me haba Arona ame he ka hnyi taben hut, me hlingâ nokon kau hnân hudiny hulö, wale hobi kâu e bi. 9 Ke laku Arona ödrin e hom dren kâu: ke e ame hneú banyen hnyi dra, me kina hnyi je baitoiny taben hut, me hingâlâ dra hmelen taben hut: 10 ke haba pipikhenya, me li wagien, me únyi ae lau únyi hnyi hon akiny, a hudiny hulö, e ame le hon taben hut; helâ me hna húna hnö Jehova kö Mose. 11 Ke e ame le utiöiny me unen ge meic hoton hnyaba. 12 Ke e ame hlingâ hudiny leü, ke haba laku Arona ödrin e ham kâu dren, me e ame dukâiâ igigilö hon taben hut. 13 Ke ödrin e ham kâu hudiny leü, wale je ec keihen, me ban: me e ame le hon taben hut. 14 Ke e ame hneú tang tiny, me je can, me le hon hudiny leü hon taben hut. 15 Ke e ame hudo hudiny tavat, me hom got бага a hudiny hulö anyin tavat, me adre me hlingâ, me hudo e hnân hudiny hulö helâ me a bân. 16 Ke e ame hom hudiny leü, me hudo hoton hnanyiibu. 17 Ke e ame hom hudiny han, me okhaca aoc ge hnyamen, me le hon taben hut, ka ke hut bi hudiny han hnyi hnyomakatu. 18 Ke e ame hlingâ bolok me mamoe бага hnân hudiny ole hobi kâu tavat: ke laku Arona ödrin e ham kâu dren, me e ame dukâiâ e igigilö hon taben hut, 19 me pipikhenyainy bolok, me mamoe бага, me obiny, me hlanyin tang tiny, me li wagien, me únyi ae lau ethö hon akiny: 20 ke

## LEVITIKO 10, 11.

ödrin e ip pipikhenya hon ùlainy, ke e ame le pipikhenya hon taben hut : 21 ke haba ùlainy me jevan a metâ, me Arona ame hajijingâ hnân hudiny hajijing hnyi hnyimakö Iehova, helâ me hna hûna hnö Mose. 22 Ke haba Arona ame hai li hnyamen hon tavat, me hahnahici ödra ; me e ame utut ûheny hnyi hna hudo hudiny hulö, me hudiny leû, me je hudiny ole. 23 Ke Mose me Arona ödrü me tha didrö ka hnyi uma úkhacaköu, me dit hmetu but, me hahnahicâ tavat : me ame manen ka tavat hia hmanenangi Iehova. 24 Ke ame he but meic ûheny ûnyi Iehova me le avâ hudiny leû, me pipikhenya hon taben hut ; ke a wâ but e ge tavat hia, me adre me hongot, me ta ju hnyikânâi.

### HNYIMAKAN 10.

**K**E haba Nadaba me Abiu, li laku Arona, ödrü me ve hom anyidru li taben meic, me hû meic hnyin, me ip ûnyi ae bo so hon, me hudo meic ae ke bongon bi hnyi hnyimakö Iehova, waleji e ame ca hûna ködrin. 2 Ke ame o but meic ûheny unyi Iehova me li ödrü, me ödrü me mokcu hnyi hnyimakö Iehova. 3 Ke haingö Mose kö Arona, ka habe, haba ûnyi ang waleji ame ha Iehova, ka habe, Ame he ka okabi nya ge tavat adre me hakekeny kõnya, k' adre me he ka oganö nya hnyi hnyimakan tavat hia. Ke haba Arona ame ca fuc. 4 Ke haba Mose ame hao Misaela me Elizafana li laku Uziela a ke kamö Arona, me ha ködrü, ka habe, Hok cu jem, me hom dö liamekeiny m' öbu ûhedrin hnyi hnyimakan dok ae kap ka hnyi boton hnyaba. 5 Ke ödrü me he me hum ödrin hnyi je khaúidru ka hnyi hoton hnyaba ; helâ me hna ha hnö Mose. 6 Ke haingö Mose kö Arona, me Eleazara, me Ithamara, a li lakon, ka habe, Ca he ka úöhe je böbun, me khekke anyibun je úkhaú, wâ öbun nye mokcu, ke wâ e nye hmönyin ka tavat hia : ke ame he je liamekeiny m' öbun, a lap Isaraela hia he ka tengiâ a g' adre thong ûnyi ga Iehova. 7 Ke ca he öbun ka he úhebun hnyi hwanumen uma úkhacaköu, wâ öbun nye mokcu : anyin ae but hubun wakaco hnân hû anyi Iehova. Ke ödrin e ânyâ helâ me hofuc ho Mose.

8 Ke Iehova ame ha kö Arona, ka habe,  
9 U me ca he ka ic waina me grâg, a u me je lakom unyâm, öbun ka didrö ka hnyi

uma úkhacaköu, wâ öbun nye mokcu : wale hnanyibu nyiele balua, hnyi anyibun ta je dö : 10 m' öbun e he ka ovebongonâ ûnyi ae kap me ûnyi ae ca kap, a bo kong, me bo so ; 11 m' öbun e he ka nâ je lakon Isaraela ge je hnanyibu hia a ha Iehova ködra a deny Mose.

12 Ke Mose ame ha kö Arona, me Eleazara, me Ithamara, a li lakon, wale lo li kolon, ka habe, Hom dö hudiny han, kolon je hut a an ge meic kö Iehova, me an ju ke ba leven hnyi baten taben hut : anyin ae ti kap e : 13 ke hamöbun he ka han e hnyi ke dok ae kap, anyin a wale âm, me an li lakom, ûnyi hnyi je hut a an ge meic kö Iehova : anyin adre hûna helâe kõnya. 14 Ke haba ùlainy adre hajijingâ, me jevan adre kap göranyai, öbun e he ka han hnyi ke dok ae so ; a u me lakom obaga me wahlu a tha ödrin möu : anyin adre ham e hnân âm, me an lakom, adre ham ûnyi hnyi hudiny ole ûnyi ge lakon Isaraela. 15 Hamödra he ka hom jevan adre ogö-ranyâ, me ùlainy adre hajijingâ tha e me pipikhenya wale hut a an hnen meic, he ka hajijingâ hnân hudiny hajijing hnyi hnyimakö Iehova : a âm, me an li lakom a tha ödrü möu, me wale hnanyibu nyiele balua ; helâ me hna hûna hnö Iehova.

16 Ke Mose ame hwege elâm got hudiny hulö, ke wâ bi, adre hia but le ; me e ame hmönyin kö Eleazara, me Ithamara li laku Arona, a li kolon, me ha, ka habe, 17 Ieú öbun e ca an gan hudiny hulö hnyi dok ae kap, anyin ae ti kap e, ke e ame hia but ham köbun he ka hom hulö anyin úkhacaköu, me hnân bi hwaban anyidra möt hnyi hnyimakö Iehova? 18 Wâ bi, adre ca hom dren ka hnyi dok ae kap : e ti úcú köbun he ka han e hnyi dok ae kap, helâ me hnök hna hûna. 19 Ke haingö Arona kö Mose, ka habe, Wâ bi, hnyi bong ang ödre hudo hudiny anyidru hulö, me anyidru hut adre le hnyi hnyimakö Iehova ; ke a o kõnya je ûnyi eang ; ke hawa, oge ne hia but han hudiny hulö hnyi bong ang, ame ne he ka kap soâ hnyi hnyimakö Iehova? 20 Ke haba Mose ame löng, me e ame kap soâ.

### HNYIMAKAN 11.

**K**E haba Iehova ame ha kö Mose me Arona, haingen ködrü, ka habe, 2 Ha thö ka lakon Isaraela, ka habe, Walang ta je meno öbun e he ka han ûnyi hnyi ta

LEVITIKO 11.

je meno hia a vak can eang hmelen. 3 Haba ta je meno adre kia újimen can, me kia luâ can, me omeno adre hoc hmeto hna han, me, wale ö 'bun. 4 Ke so bi walang omeno öbun e ca he ka an, wale adre hoc hmeto hna han, me je hna kia luâ can : wale kamela, anyin a e ame hoc hmeto hna han, k' ame ca kia luâ bi újimen can, wale ae bo kong köbun. 5 Me shefani, anyin a e ame hoc hmeto hna han, ke e ame ca kia luâ bi újimen can, wale ae bo kong köbun. 6 Me arnebeth, anyin a e ame hoc hmeto hna han, k' ame ca kiâ luâ bi újimen can, wale ae bo kong köbun. 7 Me buaka, anyin a e ame kia luâ újimen bacan, me can, k' ame ca hoc hmeto bi hna han, wale ae bo kong köbun. 8 Ca he öbun ka han utiöidra, me kâlâ unyidra a mok ; wale je únyi ae bo kong köbun.

9 Walang je únyi öbun e he ka an únyi eü hnyi köiö, haba ta je únyi hia ae hu bohúnyon me unöiny hnyi je an, me köiö, me wagewe, wale öbun e he ka han. 10 Ke haba ta je únyi ae ba bohúnyon me unöiny, eü hnyi köiö, me wagewe, a ta je únyi hia ae möt hnyi köiö, me je únyi hia adre op me me möt eü hnyin je köiö, wale je únyi öbun e he ka ikikiâ, 11 k' öbun e he ka ikiki ödra ; ca he öbun ka han utiöidra, ke öbun e he ka ikikiâ je unyidra ae mok. 12 Haba je únyi hia eü hnyi je köiö ae ba bohúnyon me unöiny, öbun e he ka ikiki ödra.

13 Ke walang je meno ame gâ öbun e he ka ikiki ödrin ; a ca hnân han, anyin a ödra ikiki : wale aeto, me perese, me ozeni ; 14 me daa, me aia hoton je ve bongon : 15 je oreba hia hoton je ve bongon ; 16 me iaena, me taemasa, me sahafe, me dring, hoton je ve bongon : 17 me mun, me salak, me ianesuf ; 18 me tinesemeth, me kati, me raama ; 19 me kasida, me anafa hoton je ve bongon, me dukifath, me bú.

20 Haba je únyi hia adre me iyâü me gâ, adre me he ge vak can, öbun e he ka ikiki ödra. 21 Ke so bi walang je únyi öbun e he ka han, adre me iyâü me gâ, adre me he ge vak can, wale je únyi ae úsa lo can ae beü hnân gâ hon kânâ ; 22 walang ö 'bun, a wahamon hoton je ve bongon, me solame hoton je ve bongon, me haregole hoton je ve bongon, me hagabe hoton je ve bongon. 23 Ke haba je únyi hia adre iyâü me gâ, me vak can, öbun e he ka ikiki ödra.

24 Ke walang je únyi ame he ka obokongi öbun ; haba at ame he ka kâlâ je unyidra

ae mok, ame he ka bo kong ke ne o but sahac : 25 ke haba at ame kaptilâ ke ong utiöiny je únyi e a mokcu, hamen he ka hneü anyin je úkhaü me laba bo kong ke ne o but sahac. 26 Haba ta je meno adre kia luâ újimen bacan, k' adre ca kia luâ bi újimen can, ke ame ca hoc hmeto hna han, ame he ka bo kong köbun : ke haba at ame kal' ödra, ame he ka bo kong. 27 Ke haba je meno adre me he ge je hnyeúcadra, a ta je meno adre me he ge vak can, adre me he ka bo kong köbun ; ke haba at ame he ka kâlâ unyin je meno e a mokcu, ame he ka bo kong ke ne o but sahac. 28 Ke hamen at ame kaptilâ unyin je meno e a mokcu, he ka hneü anyin je úkhaü, me laba bo kong ke ne o but sahac : haba ta je únyi e ae bo kong köbun.

29 Ke walang je meno ae bo kong köbun, adre me iyâü eang hmelen, wale holed, me tip, me behölök, hoton je ve bongon, 30 me anaka, me koa, me letaah, me home-ta, me tinesemeth. 31 Wale ta je únyi adre bo kong köbun hnyi ta je meno adre me iyâü : haba at ame kâlâ je únyi e a mokcu, ame he ka bo kong ke ne o but sahac. 32 Ke ame ne he ke at gadra ae mokcu ka kölu takoú ke únyi, me ame he ka bo kong únyi eling ; ame ne kaia utö, ame ne úkhaü, ame ne unen ke meno, ame ne tang, ame ne ke utkaia adre me huliwa kâu, me adre me he ka ip e hnyi köiö, k' ame he ka bo kong ke ne o but sahac ; me me he ka bo so. 33 Ke haba ke kaia kânâ ame kölu ke at gadra ka hnyin, me ame he ka bo kong önyen, hamöbun he ka tho degecâ. 34 Ke haba ta je jeü hia adre me labö han ; ke ame ne ta hnyin köiö, me ame he ka bo kong : ke haba únyi hnân ijem, adre ijem únyi hnyi je kaia eling ame he ka bo kong. 35 Ke ame he ka bo kong ta je únyi hia ame kölu takoú ge ong ke keihen je unyidra ; ame ne wahnainya, ame ne je öt, me adre me he ka tho degecâ, anyin ae bo kong, k' ame he ka bo kong köbun. 36 Ke so bi ame he je pupuainy köiö, me je thopiny an ae gan hmâ köiö hnyin, ka bo so : k' ame he ka bo kong ta je únyi ame kâlâ je unyidra ae mokcu. 37 Ke a ne kölu takoú je hatong adre ta, ge ke únyi a hanen unyin je únyi e a mokcu, me ame he ka bo so. 38 Ke adre me ne hú je hatong ge köiö, me ame kölu takoú ge ke únyi a hanen unyin je únyi e a mokcu, me ame he ka bo kong köbun.

39 Ke a ne mok hwege ke meno a vak

## LEVITIKO 12, 13.

can adre han, haba at ame he ka kâlâ unyin a mokcu, me ame he ko bo kong ke ne o but sahac. 40 Ke haba at ame he ka han hanen unyin meno e a mokcu, me hamen he ka hneû anyin je ûkhaû, me bo kong ke ne o but sahac: ke haba at ame kaptilâ unyin ûnyi a mokcu, me hamen he ka hneû anyin je ûkhaû, me bo kong ke ne o but sahac.

41 Ke haba ta je ûnyi adre me iyâû eang hmelen, adre me he ka ikikiâ, k' adre me ca he ka han. 42 Haba ta je ûnyi hia adre me iyâûâ hnyekon, me je ûnyi ame he a vak can, me je ûnyi ae se hia can, me je ûnyi hia adre me iyâû eang hmelen, ca he öbun ka ön ödra, anyin a ödra ikiki. 43 Ca he öbun ka oikiki öbun bi ge ta je ûnyi ame iyâû, ke ca obokongi öbun bi gadra, wâ öbun nye bo kong ûnyi gadra. 44 Anyin a inya Iehova Khongubun: okabi öbun dö, m' öbun e he ka kap: anyin a iny kap: ke ca obokongi öbun bi ge ta je ûnyi ame iyâû eang hmelen. 45 Anyin a inya Iehova at ame hum öbun ûnyi hnyi hnyei Aigupito, me me he ka Khongubun: anyin a wale öbun e he ka kap, anyin a iny kap.

46 Wale hnanyibu ge ta je meno a vak can, me je meno ame gâ, me je ûnyi hia ame iyâû ae möt hnyi je köiö, me ta je ûnyi hia ame iyâû eang hmelen: 47 me me he ka ve bongon bi bo kong me bo so, a meno hnân han, me meno a ca hnân han.

### HNHYIMAKAN 12.

**K**E haba Iehova ame ha kö Mose, ka habe, 2 Ha thö ka lakon Isaraela, ka habe, Ame ne erkin ke momo, me ame hnokoâ da, me ame he ka bo kong hnyi je bong a seven; e ame he ka bo kong hoton üen omomo. 3 Ke haba hnyi bong a eitiny adre me he ka peritomonâ unen unyin. 4 Ke momo ame he ka laba hnyi dren hnân obosoâ hnyi je bong a thöti theri; k' ame ca he ka kâlâ ke ûnyi ae kap, k' ame ca he ka hnyi dit ka hnyi dok ae kap, ke ne o but ame um dö je bongon obosoâ. 5 Ke ame ne hnokoâ hlu, me ame he ka bo kong fotin ta bong hoton üen omomo: ke e ame he ka laba hnyi dren hnân obosoâ hnyi je bong a sikste siks. 6 Ke ka um dö je bongon obosoâ, ame ne da, ame ne hlu, me e ame he ka hom hnân hudiny leû nokon mamoe a khaca hunainy, me nokon meköta, ame ne biny, me me hudiny hulö ka hnyi hwanumen uma ûkhacaköu, ka at bihut: 7 ke e ame he ka hudo e hnyi hnyimakö Iehova, me bi

hwaban anyin möt: k' ame he momo ka bo so ûnyi hnyi bongon bi. Wale hnanyibu hobi kâu omomo at ame hnokoâ da ame ne hlu. 8 Ke a ne ca khana momo he ka hom nokon mamoe, me so e ame hom lo li biny, ame ne li lakon meköta; khaca hnân hudiny leû, ke khaca hnân hudiny hulö; k' ame he at bihut ka bi hwaban anyin möt, me me bo so momo.

### HNHYIMAKAN 13.

**K**E haba Iehova ame fuc kö Mose me Arona, ka habe, 2 Ame ne e hnyi unen unyin at ke dok ae khibi, ame ne dok ae han, ame ne dok ae hadröngöc, k' ame ne e hnyi unen unyin me me mok lepera bi, me adre me he ka hom e kö Arona at bihut, k' ame ne ke nokon at bihut. 3 Ke hamen at bihut he ka wâ mok hnyi unen unyin: ke ame ne hûen dut je leünen hnyi mok, ke a ne manen a ga dit mok eû hmelen unen unyin, me wale mok lepera: k' ame he at bihut ka wâ, me hai bokongoâ. 4 Ke ame ne hau but dok ae hadröngöc hnyi unen unyin, ke ca manen bi eû hmelen unen, ke ca hûen bi je leünen, me ame he at bihut ka hlöng hwanumen at ae mok hnyi je bong a seven: 5 ke hnyi bong a seveniny hamen at bihut he ka wâ: ke wâ bi, a ne e bala bi mok adre me wâ, k' ame ca hûhûö bi mok hnyi unyin, me ame he at bihut ka hlöng hwanumen hnyi je bong a seven hmetu: 6 ke hnyi bong a seveniny hmetu, hamen at bihut he ka wâ; ke wâ bi, ame ne hlit ut mok, k' ame ca hûhûö hmetu mok hnyi unen, me ame he at bihut ka hai bosoâ; a han e; ke e ame he ka hneû anyin je ûkhaû, me me bo so but. 7 Ke ame ne hûhûö hwege dok ae han hnyi unen, hwaban hna wâ hnen at bihut, me me obosoâ, me hamen at bihut he ka wâ hmetu: 8 ke hamen at bihut he ka wâ, ke wâ bi, ame ne hûhûö dok ae han hnyi unen, me hamen at bihut he ka hai bokongoâ: lepera eling.

9 Ame ne takoû ke at hnen mok lepera, me adre me he ka hom e ka at bihut: 10 ke hamen at bihut he ka wâ, ke wâ bi, a ne hau dok ae khibi hnyi unen, ke hûen dut je leünen, ke ame ne hu utiö ae hât hnyi dok ae khibi, 11 wale lepera ae kueny hnyi unen unyin, ke hamen at bihut he ka hai bokongoâ: ke adre me ca he ka hlöng hwanumen, anyin ae bo kong ut. 12 Ke ame ne kû lepera hnyi unen, k'

LEVITIKO 13.

ame ne okhötâ hia ge lepera unen at ame takou ge mok, hwân hnyi ban ke ne o but hnyi li can, wale a wâ hnen at bihut ; 13 me ame he at bihut ka wâ : ke wâ bi, a ne khöt hia but unyin ge lepera, me e ame he ka hai bosoâ at ae mok : ke hau hia but : ke bo so but e. 14 Ke a ne manen gan utiö ae hât, e ame he ka bo kong. 15 K' ume he at bihut ka wâ utiöiny ae hât, me hai bokongoâ : ame bo kong utiö ae hât : wale lepera. 16 Ke a ne wia hmetu utiö ae hât me me hau, me e ame he ka he ka at bihut, 17 k' ame he at bihut ka wâ ; ke wâ bi, ame ne wia mok me me hau, me ame he at bihut ka hai bosoâ : e bo so but.

18 Ke a ne hu ke okuc hnyi unen utioiny, ke e metu but, 19 ke ame ne hwaban ohuc dok ae khihi, me hau, k' ame ne dok ae hadröngöc, ke hngihngidra, me adre me he ka omanenâ e ka at bihut ; 20 k' ame he at bihut ka wâ, ke wâ bi, ame ne manen kâu a ga dit ut hnyi unen, ke hûen dut je leûnen, me ame he at bihut ka hai bokongoâ : wale mok lepera, ame kû ûnyi hnyi ohuc. 21 Ke ame ne wâ hnen at bihut, ke wâ bi, e ba leûnen ae hûen hnyin, ke a ca dit hnyi unen, ke hlit ut, me hamen at bihut he ka hlöng hwanumen e hnyi je bong a seven : 22 k' ame ne hûhûö hwege hnyi unen, me ame he at bihut ka hai bokongoâ : wale ke mok. 23 Ke ame ne e bala bi dok ae hadröngöc hnyi hnen, k' ame ca hûhûö bi, me wale shala hnen okuc ; k' ame he at bihut ka hai bosoâ.

24 Ke a ne hu dok a hlâ ge meic hnyi unen utiö, ke e bi hnyi utiö ae hât hnyi hna hla dok ae hadröngöc, ame ne hngihngidra, ame ne hau ; 25 me hamen at bihut he ka wâ : ke wâ bi, ame ne hûen dut je leûnen hnyi dok ae hadröngöc, k' ame ne manen eû hmelen unen ; me wale lepera ame kû ûnyi hnyi dok ae hlâ : k' ame he at bihut ka hai bokongoâ : wale thibi mok lepera. 26 Ke ame ne wâ e hnen at bihut, ke wâ bi, e ba je leûnen ae hûen hnyi dok ae hadröngöc, k' ame ca dit hnyi unen, ke hlit thibi ; me hamen at bihut he ka hlöng hwanumen hnyi je bong a seven : 27 k' ame he at bihut ka wâ hnyi bong a seveniny ; k' ame ne hûhûö hwege hnyi unen, me ame he at bihut ka hai bokongoâ : wale thibi mok lepera. 28 Ke ame ne e bala bi dok ae hadröngöc hnyi hnen, k' ame ca hûhûö bi hnyi unen, ke hlit thibi ; me wale dok ae khihi ûnyi hnyi

dok ae hlâ, me ame he at bihut ka hai bosoâ : anyin a wale shalainy hlâ.

29 Ame ne hu ge baga ame ne momo ke mok hnyi ban, ame ne wainy, 30 hamen at bihut ka wâ mok, ke wâ bi, ame ne manen dut dok ae dit hnyi unen, k' ame ne hu hnyin je leûnen ae mat me taú, ame he at bihut ka hai bokongoâ : wale ke wathu, a lepera hnyi ban, ame ne wainy. 31 Ke ame ne he at bihut ka wâ mok a wathu, ke wâ bi, ame ne ca manen bi dok ae dit hnyin unen, ke ba leûnen ae hlit hnyin, hamen at bihut he ka hlöng hwanumen at amo moko wathu hnyi seven ta bong : 32 ke hnyi bong a seveniny ame he at bihut ka wâ mok, ke wâ bi, ame ne ca hûhûö wathu, ke ba leûnen ae mat hnyin, ke manen bi a ga ca dit wathu hnyin unen, 33 me adre me he ka giâ, k' ame ca he ka giâ wathu, k' ame he at bihut ka hlöng hwanumen at amo moko wathu hnyi je bong hmetu a seven : 34 ke haba hnyi bong a seveniny ame he at bihut ka wâ wathu : ke wâ bi, ame ne ca hûhûö wathu hnyi unen, ke manen dut a ga ca dit hnyin unen ; me ame he at bihut ka hai bosoâ ; k' ame he at ka hneú anyin je úkhâú me me bo so. 35 Ke ame ne hwege hûhûö wathu hnyi unen hwaban hna obosoâ ; 36 me ame he at bihut ka wâ : ke wâ bi, ame ne hûhûö but wathu hnyi unen, me ame ca he at bihut ka elâm leûnen ae mat ; e bo kong ut. 37 Ke ame ne manen kâu a e bala bi wathu, k' ame ne kû hnyin je leunen ae hlit ; a metu but wathu, ke bo so but : me ame he at bihut ka hai bosoâ.

38 Ke ame ne hu hnyi unen utiöiny ke baga ame ne momo je ong dok ae hadröngöc, wale je ong dok ae hadröngöc me hau ; 39 me ame he at bihut ka wâ : ke wâ bi, ame ne löhau je ong dok ae hadröngöc hnyi unen unyidrin ; wale thibi okhicö ame kû hnyi unen : e ame bo so.

40 Ke a ne kolu but leûnen ban ke at, k' ame hadreú ban ; e bo so but. 41 Ke a ne kolu but leûnen ûnyi hnyi hon bariny, ame hadreú bariny ; e bo so but. 42 Ke ame ne hu hnyi ban ae hadreú, ame ne hon bariny ae hadreú, ke mok ae hau me dra ; me wale lepera ame kû hnyi ban ae hadreú, ame ne hon bariny ae hadreú. 43 Me ame he at bihut ka wâ : ke wâ bi, ame ne hau me dra úkhibiny mok hnyi ban ae hadreú, ame ne bariny ae hadreú, helâ me imaneniny lepera hnyi unen utiöiny ; 44 haba at e me lepera, k' ame bo kong

LEVITIKO 14.

ut ; hamen at bihut he ka hai bokongoâ ;  
haba anyin mok me wale hnyi ban.

45 Ke haba at ae tren lepera, wale a  
takoû ge mok, adre me he ka kia anyin je  
ûkhaû, ke ame he ka ûôhe leûnen ban, me  
tube esongodiny ethö, me hongot, ka habe,  
Iny bo kong ut, iny bo kong ut. 46 E ame  
he ka bo kong hnyi je bong hia ae hu gan  
mok ; e bo kong ut : e ame he ka hake laba ;  
haba hnyaban, me, wale hoton je hnyaba.

47 Ke haba ûkhaû ae hu mok lepera  
hnyin, ame ne ûkhaû leûnen mamoe, ame  
ne ûkhaû lino ; 48 ame ne hnyi töiny adre  
otilâ, ame ne hnyi töiny adre omokulec,  
ame ne lino, ame ne leûnen mamoe ; ame  
ne unen meno, ame ne ke ûnyi adre tibet  
ûnyi ge unen meno ; 49 ke ame ne udru-  
drâ lôhau, ame ne dra mok hnyi ûkhaû, ame  
ne unen meno, ame ne töiny adre otilâ, ame  
ne töiny adre omokulec, ame ne ke ûnyi bi a  
unen meno ; wale mok lepera, k' adre me  
he ka omanenâ ka at bihut : 50 ke ame  
he at bihut ka wâ mok, me hlöng hwanu-  
men ûnyi ae hu mok hnyin, hnyi je bong a  
seven : 51 ke e ame he ka wâ mok hnyi  
bong a seveniny : ke ame ne ca hûhûö mok  
hnyi ûkhaû, ame ne hnyi tö adre otilâ, ame  
ne hnyi tö adre omokulec, ame ne unen  
meno, ame ne ke ûnyi bi adre tibet ûnyi ge  
unen meno ; wale ke mok lepera ae han ;  
ame bo kong ut. 52 Ke e ame he ka thong  
ûkhaû, ame ne tö adre otilâ, ame ne tö adre  
omokulec, ame ne leûnen mamoe, ame ne lino,  
ame ne ke ûnyi bi a unen meno ae hu mok  
hnyin : anyin a wale ke lepera ae han ; k' adre  
me he ka thong degecâ ge meic. 53 Ke ame  
ne he ka wâ e hnen at bihut, ke wâ bi ame  
ca hûhûö mok hnyi ûkhaû, ame ne tö adre  
otilâ, ame ne tö adre omokulec, ame ne ke  
ûnyi bi a unen meno ; 54 me ame he at  
bihut ka kun' ödra he ka hneû ûnyi ae hu  
mok hnyin, ke e ame he ka hlöng hwanu-  
men e hnyi je bong hmetu a seven : 55 ke  
ame he at bihut ka wâ ûnyi ae hu mok  
hnyin, hwaban hnödra hna hneû e ; ke wâ  
bi, ame ne ca wia makan mok eling, ke ame  
ca hûhûö mok, me, bo kong ut e ; m' u ma  
he ka thong degecâ ge meic : ame han eû  
hnyin, ame ne hadreû hnyin ame ne hoton.  
56 Ke ame ne he ka wâ e hnen at bihut,  
ke wâ bi ame ne hia töt ut mok hwaban  
hnödra hna hneû, me e ame he ka kia  
degecâ e ûnyi hnyi ûkhaû, ame ne unen  
meno, ame ne tö adre otilâ, ame ne tö adre  
omokulec : 57 ke ame ne manen bala bi e  
hnyi ûkhaû, ame ne tö adre otilâ, ame ne

tö adre omokulec, ame ne ke ûnyi bi a unen  
meno ; me wale ke mok ame hûhûö : m' u  
ma he ka thong degecâ ge meic ûnyi ae hu  
mok hnyin. 58 Ke haba ûkhaû, ame ne tö  
adre otilâ, ame ne tö adre omokulec, ame ne  
ke ûnyi bi a unen meno, wale u me he ka  
hneû, k' ame ne hia but mok hnyin, me u  
ma he ka hneû hmetu, me ame he ka bo so  
but. 59 Wale hnanyibuiny mok lepera  
hnyi ûkhaû, ame ne leûnen mamoe, ame ne  
lino, ame ne tö adre otilâ, ame ne tö adre  
omokulec, ame ne ke ûnyi bi a unen meno,  
m' adre me he ka hai bosoâ, m' adre me ne  
he ka hai bokongoâ.

HNyimakan 14.

**K**E Iehova ame ha kö Mose, ka habe,  
2 Walang hnanyibu ge lepera hnyi  
bong adre me he ka obosoâ : adre me he  
ka hom e ka at bihut : 3 k' ame he  
at bihut ka he ka hnyi hoton hnyaba ; k'  
ame he at bihut ka wâ, ke wâ bi, ame ne  
metu but mekiny at lepera ; 4 me ame he  
at bihut ka ûkhünöng he ka hom lo li  
meno ame gâ ae möt me bo so, me utö  
arasi, me leûnen mamoe ae dra, me thi  
boviny hisop, hobi kâu at adre me he ka  
obosoâ : 5 k' ame he at bihut ka ûkhü-  
nöng ka hlingâ ke at hnyi li meno ame gâ  
hnyi kaia kânâ hon an ame hingölö : 6 ke  
haba meno ame gâ ae tiga möt e ame he ka  
hom, tha e me utö arasi, me leûnen mamoe  
ae dra, me thi boviny hisop, ke e ame he  
ka tha hneû je ûnyi e me meno ame gâ ae  
möt ka hnyi dren meno ame gâ adre hlingâ  
hon an ame hingölö : 7 ke e ame he ka  
oseven dukâiâ at adre obosoâ ûnyi hnyi  
lepera, me hai bosoâ, me hna meno ae  
möt ka hnyi hneyi. 8 Ke hamen at adre  
he ka obosoâ he ka hneû anyin je ûkhaû,  
me giâ leûnen hia, me osûâ ge köiö, me me  
bo so but : ke hwaban e, e ame he ka he ka  
hnyi hnyaba, k' ame he ka laba hoton  
umen uma mano hnyi je bong a seven.  
9 Ke hnyi bong a seveniny e ame he ka  
giâ hia leûnen ban, me wainy, me hon li  
bademakan, e ame he ka giâ leûnen hia :  
ke e ame he ka hneû hia anyin je ûkhaû,  
me osûâ unyin ge köiö, ke e ame he ka bo  
so. 10 Ke haba hnyi bong a eitiny e ame  
he ka hom li nokon mamoe бага ae ba hnyi-  
kongon, ke khaca nokon mamoe momo a  
khaca hunainy ae ba hnyikongon, me kun  
ta omer falawa hnân hudiny han, adre uha-  
niken me wakaco, me khaca loga wakaco.

## LEVITIKO 14.

11 Ke hamen at bihut, a at ame obosoâ, he ka ip at adre me he ka obosoâ, tha e me ta je únyi eling, hnyi hnyimakö Iehova, hnyi hwanumen uma úkhacaköu : 12 ke ame he at bihut ka hom nokon mamoe бага a khaca, me hudo e hnân hudiny monu, me wakaco a khaca loga, me hajijingâ hnân hudiny hajijing hnyi hnyimakö Iehova : 13 k' ame he ka hlingâ nokon mamoe hnyi dok adre me labö hlingâ hnyin hudiny hulö, me hudiny leú, wale hnyi dok ae kap : anyin a hobi kâu at bihut hudiny hulö, helâ me hudiny monu : únyi ae ti kap : 14 ke ame he at bihut ka hom dren hudiny monu, k' ame he at bihut ka kina e hnyi boúlölöven hnyikönyen at adre me he ka obosoâ, me bahnyökvetoiny a metân, me bacan a metân : 15 k' ame he at bihut ka hom hanen wakaco a khaca loga, me hingâlâ ka hnyi hnyamen a meny : 16 k' ame he at bihut ka hneú banyen a metân hnyi tap wakaco a e hnyi hnyamen a meny, k' ame he ka oseven dukâiâ wakaco ge banyen hnyi hnyimakö Iehova : 17 ke haba kolon wakaco hnyi hnyamen ame he at bihut ka kina hnyi boúlölöven hnyikönyen a metân at adre me he ka obosoâ, me bahnyökvetoiny a metân, me bacan a metân, hon dren a hudiny monu : 18 ke haba kolon wakaco hnyi hnyamen at bihut, e ame he ka kina hnyi ban at adre me he ka obosoâ : k' ame he at bihut ka bi hwaban anyin möt hnyi hnyimakö Iehova. 19 K' ame he at bihut ka hudo hudiny hulö, me bi hwaban möt anyin at adre me he ka obosoâ únyi hnyi bo kong a e : ke hwaban e e ame he ka hlingâ hudiny leú : 20 k' ame he at bihut ka hudo hudiny leú, me hudiny han hon taben hut : k' ame he at bihut ka bi hwaban anyin möt, me e ame he ka bo so.

21 Ke ame ne at ae ba ta únyi, ke ca úco e bi únyi eling, me e ame he ka hom nokon mamoe бага a khaca, hnân hudiny monu he ka hajijingâ, me me bi hwaban anyin möt, ke khaca omer falawa adre úhaniken me wakaco hnân hudiny han, me khaca loga wakaco : 22 me lo li biny, ame ne li nokon meköta, helâ me úcú kâu ; haba khaca hnân hudiny hulö, ke hnân hudiny leú khaca. 23 E ame he ka hom ta je únyi eling ka at bihut hnyi bong a eitiny hnyi hwanumen uma ukhacaköu hnyi hnyimakö Iehova hnân obosoâ e. 24 Ke ame he at bihut ka hom nokon mamoe hudiny monu, me loga wakaco, k' ame he at bihut ka hajijingâ hnân hudiny hajijing hnyi hnyimakö

Iehova : 25 k' ame he ka hlingâ nokon mamoe hnân hudiny monu, k' ame he at bihut ka hom hanen dren hudiny monu, me kina hnyi boúlölöven hnyikönyen a metân at adre me he ka obosoâ, me bahnyökvetoiny a metân, me bacan a metân : 26 k' ame he at bihut ka hingâlâ hanen wakaco ka hnyi hnyamen bi a meny : 27 k' ame he at bihut ka oseven dukâiâ hnyi hnyimakö Iehova ge banyen a metân hanen wakaco hnyi hnyamen a meny : 28 k' ame he at bihut ka kina ge wakaco hnyi hnyamen boúlölöven hnyikönyen a metân at adre me he ka obosoâ, me bahnyökvetoiny a metân, me bacan a metân, hon dren hudiny monu : 29 ke haba kolon wakaco hnyi hnyamen at bihut, e ame he ka kina e hnyi ban at adre me he ka obosoâ, he ka bi hwaban anyin möt hnyi hnyimakö Iehova. 30 Ke e ame he ka hudo ke at hnyi li biny, ame ne ke nokon meköta, helâ me úcú kâu : 31 wale únyi ae khana he ka hom, haba khaca hnân hudiny hulö, ke khaca hnân hudiny leú, tha e me hudiny han : k' ame he at bihut ka bi hwaban möt anyin at adre me he ka obosoâ hnyi hnyimakö Iehova. 32 Wale hnanyibu hobi kâu at ame moko lepera, a ne ca khana he ka hom ta je únyi ae úcú hnân obosoâ e.

33 Ke Iehova ame ha kö Mose me Arona, ka habe, 34 Öbun ka o hnyi hnyei Kanana, wale oge me ham köbun hnân ibun, ke oge ne okúâ mok lepera hnyi ke uma hnyi ibun hnyei ; 35 hamen at tren uma ka thumeto at bihut, ka habe, Oge me wâ hnyi umök uma a helâ me mok : 36 k' ame he at bihut ka úkhúnöng m' adre me he ka hom ta je únyi a eiö hnyin uma, ke tiga ca dit bi at bihut he ka wâ mok, wâ e nye bo kong ta je únyi hia hnyin uma : 37 ke e ame he ka wâ mok, ke wâ bi, ame ne dit mok hnyi hnyeige uma, ame ne udrudrá löhau, ame ne hngihngidra, ae manen eú hnyi hnyeige uma ; 38 me ame he at bihut ka didrut kâu ka hnyi hwanuma, me hlöng hwanumen uma hnyi je bong a seven : 39 ke hnyi bong a seveniny ame he ka hmetu at bihut ka wâ ; ke wâ bi, ame ne húhüö but mok hnyi hnyeige uma ; 40 ame he at bihut ka kun' ödra ka tho degecâ je veto ae hu mok hnyin k' adre me he ka degecâ ka hnyi dok ae bo kong hoton hnyaba : 41 ke e ame he ka kun' ödra he ka khudreú hia eiö hnyin uma, k' adre me he ka hingâlâ degecâ taan hna khudreú ka hnyi dok ae bo kong hoton hnyaba : 42 k' adre me he ka hom ke je veto me op



## LEVITIKO 15.

hwaban je veto eling; k' ame he ka hom ke dröu me botro hmetu uma. 43 Ke ame ne o hmetu mok, me kú hmetu but hnyi uma hwaban hna tho degecâ je veto, me hwaban hna khudreü uma, ke hwaban hna botro hmeto; 44 me hamen at bihut ka he hmetu ka wâ: ke wâ bi ame ne hûhûö mok hnyi uma, wale thibi e lepera ae han hnyi uma: e bo kong ut. 45 Ke e ame he ka tho degecâ uma, a je veten, me je utöiny, me dröuiny hia uma; me hom tilâ ka hnyi dok ae bo kong hoton hnyaba. 46 Ke haba at ame didrö ka hnyi uma hnyi je bonginy hia hna hlöng hwanuma, me e ame he ka bo kong ke ne o but sahac. 47 Ke haba at ame mokut hnyin uma, me e ame he ka hneü anyin je úkhaú; ke haba at ame han hnyin uma, me e ame he ka hneü anyin je úkhaú. 48 Ke a ne didrö at bihut me wâ, ke wâ bi, ame ca hûhûö but mok hnyi uma, hwaban hna botro uma: me ame he at bihut ka hai bosoâ uma, anyin a hia but mok. 49 Me e ame he ka hom lo li meno ame gâ, me utö arasi, me leünen mamoe ae dra, me thi bovinny hisop, me me obosoâ uma: 50 ke e ame he ka hlingâ khaca hnyi li meno ame gâ hnyi kaia kânâ hon an ame hingölö: 51 ke e ame he ka hom utö arasi, me thi bovinny hisop, me leünen mamoe ae dra, me meno ame gâ ae möt, me hneü hia hnyi dren meno waleji adre hlingâ, me hnyi an ame hingölö, me e ame he ka osewen dukâiâ uma: 52 ke e ame he ka obosoâ uma ge dren meno ame gâ, me au ame hingölö, me meno ame gâ ae möt, me utö arasi, me thi bovine hisop, me leunen mamoe ae dra: 53 ke e ame he bi ju ka hna meno ame gâ ae möt únyi hnyi taun ka hnyi hnyei, helâe e ame he ka bi hwaban melen uma: me bo so but.

54 Wale hnanyibuiny mok lepera hia, me wathu; 55 me lepera hnyi úkhaú, me uma; 56 me dok ae khibi, me dok ae han, me ong dok ae hadröngöc: 57 m' adre me he ka wâhmakhmeto at ame bo kong, me at ame bo so: wale hnanyibuiny lepera.

### HNYIMAKAN 15.

**K**E Iehova ame ha kö Mose me Arona, ka habe, 2 Fuc dö ka lakon Isaraela, me ha ködra, ka habe, E ka hingölö dân unyin ke at, e ame he ka bo kong ge hna hingölö únyi gan. 3 Ke walang bongon

bo kong a e ge hna hingölö únyi gan: ame ne tiga hingölö dân unyin, ke ame ne um dö hingölö dân unyin, wale obokonginy. 4 E bo kong ut je hna mokut hia a moku- lec hnen at ame hingölö, k' ame bo kong je únyi hia e ame labâ. 5 Ke haba at ame kâlâ hnen hna mokut, hamen he ka hneü anyin je úkhaú, me sou hnyi köiö, me bo kong ke ne o but sahac. 6 Ke haba at ame hnyi labâ ke únyi a labâ hnen at ame hingölö, e ame he ka hneü anyin je úkhaú, me sou hnyi köiö, me bo kong ke ne o but sahac. 7 Ke haba at ame he ka kâlâ unyin at ame hingölö, e ame he ka hneü anyin je úkhaú, me sou hnyi köiö, me bo kong ke ne o but sahac. 8 Ke ame ne he at ame hingölö ka hangöjâ at ae bo so, e ame he ka hneü anyin je úkhaú, me sou hnyi köiö, me bo kong ke ne o but sahac. 9 Ke haba je tap hnân tabâ meno, ame tabâ hnen at ame hingölö, ame he ka bo kong. 10 Ke haba at ame kâlâ ke únyi a mokut hmelen at eling, e ame he ka bo kong ke ne o but sahac: ke haba at ame vaden je únyi eling, e ame he ka hneü anyin je úkhaú, me sou hnyi köiö, me bo kong ke ne o but sahac. 11 Ke haba at ame kâlâ hnen at ame hingölö, k' ame ca hinyem hnyi köiö, e ame he ka hneü anyin je úkhaú, me sou hnyi köiö, me bo kong ke ne o but sahac. 12 Ke haba kaia kânâ ame kâlâ hnen at ame hingölö, adre me he ka tho degecâ: ke haba je kaia utö hia, adre me he ka hneü hnyi köiö. 13 Ke ödra ka he ka obosoâ at ame hingölö, únyi hnyi hna hingölö únyi gan; me hamen he ka aú hobi kâu e bi je bong a seven he ka obosoâ e, me hneü anyin je úkhaú, me súâ unyin hnyi köiö ame hingölö, ke ame he ka bo so. 14 Ke haba hnyi bong a eitiny e ame he ka hom li biny, ame ne li nokon meköta, me hom ka hnyi hwanumen uma úkhacaköu, hnyi hnyimakö Iehova, me ham ödru ka at bihut: 15 ke ame he at bihut ka hudi ödru, haba khaca hnân hudiny hulö, ke khaca hnân hudiny leü; k' ame he at bihut ka bi hwaban anyin möt hnyi hnyimakö Iehova, can hna hingölö únyi gan.

16 Ke ame ne hingölö sin unyin ke at, e ame he ka tha súâ hia unyin hnyi köiö, me bo kong ke ne o but sahac. 17 Ke haba je úkhaú hia, me je unen meno hia ae hu sin unyin hnyin, adre me he ka hneü hia hnyi köiö, me bo kong ke ne o but sahac. 18 Ke haba momo ame tha mokut

LEVITIKO 16.

mē hnyi sin, me hamödrü he ka sou hia hnyi köiö, me bo kong ke ne o but sa hac.

19 Ke ame ne ke momo ame hingölö, ke dra ame hingölö únyi gan, adre me he ka hake ip e hnyi je bong a seven : ke haba at ame kálá, ame he ka bo kong ke ne o but sa hac. 20 Ke haba je únyi hia e ame mokulec, hnyi hna hake ip e, ame he ka bo kong : k' ame he ka bo kong minya ta je únyi e ame labā. 21 Ke haba at ame he ka kálá hnen hna mokut, e ame he ka hneú anyin je úkhaú, me sou hnyi köiö, me bo kong ke ne o but sa hac. 22 Ke haba at ame he ka kálá ke únyi e ame labā, e ame he ka hneú anyin je úkhaú, me sou hnyi köiö me bo kong ke ne o but sa hac. 23 K' ame ne hon hna mokut, ame ne hon ke únyi bi e ame labā, ame ne kálá hnen ke at, me e ame he ka bo kong ke ne o but sa hac. 24 Ke ame ne ke baga ame tha mokut mē, ke e thö bongon omomo unyin, e ame he ka bo kong hnyi je bong a seven ; k' ame he ka bo kong je hna mokut hia e ame mokulec.

25 Ke ame ne hingölö dra ge ke momo hnyi je bong ae se, ke tiga ca úen bongon omomo, k' ame ne tiga hingölö hwaban úen bongon omomo ; me ame he ka tha úcú je bongon bo kong a e me je bongon adre hake ip hnyin : e ame he ka bo kong. 26 Ke haba je hna mokut hia e ame mokulec hnyi je bong hia e ame hingölö, ame he ka tha úcú me je hna mokut hnyi hna hake ip : ke haba je únyi hia e ame labā, ame he ka bo kong helá me úbokonginy hna hake ip. 27 Ke haba at ame he ka kálá je únyi eling, e ame he ka bo kong, me hneú anyin je úkhaú, me sou hnyi köiö, me bo kong ke ne o but sa hac. 28 Ke ame ne bo so únyi hnyi hna hingölö únyi gan, e ame he ka aú hobi kau e bi seven ta bong, ke hwaban e, e ame he ka bo so. 29 Ke haba hnyi bong a eitiny e ame he ka hom li biny hobi káu, ame ne li nokon meköta, me hum ödrü ka at bihut hnyi hwanumen uma úkhacaköu. 30 Ke ame he at bihut ka hudo khaca hnân hudiny hulö, me khaca hnân hudiny leú ; ke hamen at bihut ka bi hwaban anyin möt hnyi hnyimakö Iehova can hna hingölö únyi gan ae bo kong.

31 Heläe öbu me he ka hake ip lakon Isaraela únyi hnyi anyidra bo kong ; wá ödra nye mokcu hnyi bokongidra ; ödra ka he ka obokongoá umök uma mano a e hnyi wanbödra.

32 Wale hnanyibuiny at ame hingölö, me at ame hingölö sin, me ame bo kong hnyin : 33 me ke at ae hu bongon omomo, me at ame hingölö, baga me momo, me at ame tha mokut me momo ae bo kong.

HNYIMAKAN 16.

**K**E Iehova ame ha kö Mose, hwaban imekiny li laku Arona, hnyi hnödrü hna bi hut hnyi hnyimakö Iehova, me ödrü me mokcu ; 2 ke Iehova ame ha kö Mose, ka habe, Ha thö kö Arona a tuhâm, a g' ame ca he ka dit monu hnyi je úen hia ka hnyi dok ae kap hoton singiny mano hnyi huyimakan taben ibetengiö hon tang ; wá e nye mokcu : anyin a oge me he ka manen hnyi úlá hon taben ibetengiö. 3 Ke walong hwakecin údili Arona ka hnyi dok ae kap : e ame he ka hom nak bolok hnân hudiny hulö, me mamoe baga hnân hudiny leú. 4 E ame he ka khavá úkhaú lino ae kap, k' ame he ka khavá unyin ge útrauzes lino, k' ame he ka weiká hnyekon ge wen lino, me obicâ e ge hnabinybak lino : wale je úkhaú ae kap ; k' ame he ka osúâ unyin ge köiö, me khavá je únyi eling. 5 Ke e ame he ka hom únyi ge úkhacaköu anyin lakon Isaraela lo li got baga hnân hudiny hulö, me mamoe baga a khaca hnân hudiny leú. 6 K' ame he Arona ka hudo bolok hnân hudiny hulö, wale hobi káu e bi, me me bi hwaban anyin möt me anyin lap. 7 Ke e ame he ka hom li got, me ip ödrü hnyi hnyimakö Iehova, hnyi hwanumen una hnân úkhacaköu. 8 Ke hamö Arona he ka uglekóbâ li got, hobi kö Iehova ke leköp, ke hobi kö Azazele ke leköp. 9 Ke ame he Arona ka hom got anyi Iehova, waleji a kú hnen leköp, me hudo e hnân hudiny hulö. 10 Ke haba got a kú hnen leköp anyi Azazela, adre me he ka ip melö e hnyi hnyimakö Iehova, me me bi hwaban möt hnen e, me kuná e kö Azazele hnyebuba ai. 11 Ke ame he Arona ka hom bolok hnân hudiny hulö, wale hobi káu e bi, me e ame he ka bi hwaban anyin möt me anyin lap, k' ame he ka hlingâ bolok hnân hudiny anyin hulö : 12 ke e ame he ka ounöngötâ taben meic ge je walep ae möt únyi hnyi taben hut hnyi hnyimakö Iehova, me olo aoc únyi ae bo so hnân leú adre kokot úhnyükongo, me hom hoton singiny mano : 13 k' ame he ka auk únyi ae bo so hnân leú ka hnyi hon meic hnyi

## LEVITIKO 17.

hnyimakö Iehova, me me he hai únyi hnyi únyi ae bo so ka oiyongá taben ibetengiö hon únyi hnân ohnatho, wâ e nye mokcu : 14 ke hamen he ka hom hanen dren bolok, me dukâiâ hnen banyen taben ibetengiö e deiö ; me hnyimakan taben ibetengiö, e ame he ka oseveny dukâiâ dren hnen banyen. 15 Ke e ame he ka hlingâ got hnân hudiny hulö hobi kâu tavat, me hom dren ka hnyi hoton singiny mano, me anyâ dren e helâ me hnen hna anyâ dren bolok, me dukâiâ e hon taben ibetengiö me hnyi hnyimakan taben ibetengiö : 16 ke hamen he ka bi hwaban melen dok ae kap can bo konginy lakon Isaraela, ke can hnödra hna hanyâûâ, me anyidra je monu hia ; k' ame he ka anyâ helâe hobi kâu uma úkhacaköu ame laba unyidra wanben anyidra hulö. 17 Ke ame he ka ba at hnyi uma úkhacaköu e ka didrö he ka bi hwaban möt hnyi dok ae kap, ke ne o but e ame dit hmetu, ke a hia but bi hwaban anyin möt, me anyin lap, me úkhacaköu hia anyin at Isaraela. 18 Ke e ame he ka didrut ka hnyi taben hut hnyi hnyimakö Iehova, me bi hwaban melen ; ke e ame he ka hom hanen dren bolok, me hanen dren got бага, me kina hnyi je baitoiny taben hut igigilö. 19 Ke e ame he ka oseven dukâiâ e hnen dra ge banyen, me obosoâ, me okabâ únyi hnyi bo konginy lakon Isaraela. 20 Ke a hia but bi hwaban melen dok ae kap, me uma hnân ukhacaköu, me taben hut, me, e ame he ka hom got бага ae möt : 21 k' ame he Arona ka ip li hnyamen hon ban got ae möt, me ha manená hon e je hulö hia anyin lakon Isaraela, me hnödra hna hanyâûâ, me anyidra je monu hia ; k' ame he ka ip je únyi e hon ban got, me kunâ e hnen at adre penapena hnyebuba ai ; 22 k' ame he got ka vaden anyidra je hulö hia ka hnyi dok ae ba aten ; ke e ame he ka hna got ka hnyi hnyebuba. 23 Ke ame he Arona ka didrö ka hnyi uma hnân úkhacaköu, me úny jut je úkhaû lino, waleji a khavâ hnyi nen e ame dit ka hnyi dok ae kap, me e ame he ka hnen bi ju ling : 24 ke e ame he ka osûâ unyin hnyi köiö hnyi ke dok ae kap, me khavâ hmetu khaûen bi, me didrut, me hudo hudiny anyi. leû, me hudiny leû anyin tavat, k' ame he ka bi hwaban anyin möt, me tavat. 25 Ke haba pipikhenyainy hudiny hulö, e ame he ka le hon taben hut. 26 Ke hamen at a hna got hobi kö Azazele he ka hneû anyin je úkhaû, me osûâ unyin

hnyi köiö, ke hwaban e e ame he ka he hmetu ka hnyi hnyaba. 27 Ke haba bolok hnân hudiny hulö, me got hnân hudiny hulö waleji adre hom drödrö ka hnyi dok ae kap, me me bi hwaban möt, adre me he ka hom ka hnyi hoton hnyaba ; ke adre me he ka le degecâ ge meic li unödrö me unyidru me tidru. 28 Ke hamen at a le degecâ ta je únyi e he ka hneû anyin je úkhaû, me osûâ unyin hnyi köiö, ke hwaban e e ame he ka hmetu ka hnyi hnyaba.

29 Ke wale hnanyibu hobi köbun nyiele balua : haba hnyi tehi a seveniny, hnyi bong a teniny tehi, öbun e he ka hom úhnyûkongoâ je hnyekubun, me ca huliwa, ame ne ke at a aten hnyeï, ame ne aten ke hnyeï at ame laba kinyua unyibun : 30 anyin a hnyi bong eling adre me he ka bi hwaban anyibun möt hny ka obosoi öbun ; únyi hnyi anyibun je hulö hia adre me he ka obosoi öbun hnyi hnyimakö Iehova. 31 Ke walang sabath hnân menâ köbun, ke öbun e he ka hom úhnyûkongo je hnyekubun : wale thibi hnanyibu nyiele balua. 32 Ke haba at bihut adre hû me otillâ me me at bihut hwaban kamen, hamen he ka bi hwaban möt, me khavâ je úkhaû lino, a je úkhaû ae kap : 33 ke e ame he ka bi hwaban melen dok ae ti kap, k' ame he ka bi hwaban melen uma úkhacaköu me taben bi hut ; me bi hwaban möt anyin hnyat bihut, me úkhacaköu hia. 34 Ke wale hnanyibu köbun nyiele balua, he ka bi hwaban möt anyin lakon Isaraela can anyidra je hulö, úsa khaca anyâ hnyi huna. Me e ame anyâ helâ me Iehova ame hûna kö Mose.

### HNYIMAKAN 17.

**K**E Iehova ame ha kö Mose, ka habe, 2 Ha thö kö Arona me lakon, me lakon Isaraela hia, me ha ködra ka habe ; Walang únyi a hûna Iehova, ka habe, 3 Haba at Isaraela hia ame hlingâ bolok, ame ne nokon mamoe, ame ne got, hnyi hnyaba, k' ame ne hlingâ hoton hnyaba, 4 k' ame ca hom e ka hnyi hwanumen uma úkhacaköu, he ka hudo e kö Iehova hnyi hnyimakan uma mano anyi Iehova : ame he ka joniny at eling dra ; k' ame hingâlâ dra ; k' adre me he ka subâ degecâ at eling únyi hnyi iny hnyeï : 5 waleling me me he ka hom hnen lakon Isaraela haledra je meno hnân hudo, wale adre me labö hlingâ

## LEVITIKO 18.

hnyi hnyei, ödra ka he ka hum ödrin kö Iehova hnyi hwanumen uma úkhacaköu, ka at bihut, me bling' ödrin hnân hudiny ole kö Iehova. 6 Ke hamen at bihut he ka dukâiâ, taben hut anyi Iehova ge dren, hnyi hwanumen uma úkhacaköu, me le pipikhenyainy hnân bo so kö Iehova. 7 Ke adre me ca he hmetu ka hudo anyidra je hut ka je khong waleji adre me bi únyi monu më. Wale hnanyibu nyiele balua ködra hnyi anyidra ta je dö.

8 Ke u me he ka ha ködra, ka habe, Haba at Isaraela hia, ame ne aten ke je hnyei ame laba kanyua unyibun, at ame hudo hudiny leú, ame ne ke hut, 9 k' ame ca he ka hnyi hwanumen uma úkhacaköu he ka hudo e kö Iehova, me adre me he ka subâ degeca at eling únyi hnyi iny hnyei.

10 Ke haba at Isaraela hia, ame ne aten ke hnyei ame laba kanyua unyibun, ame he ka han dra ; me oge me he ka wâ hmâ at eling ame han dra, me subâ degecâ e únyi hnyi iny hnyei. 11 Anyin a e hnyi dra melen unyin : ke oge hia but ham e köbun hon taben hut, me me bi hwaban anyibun möt : anyin a haba dra, me, wale at ame bi hwaban möt, anyin ae hu möt hnyin. 12 Anyin a wale oge me ha ka lakon Isaraela, ka habe, E ba at unyibun ame he ka han dra, ke ca he ke at e aten ke hnyei ame laba kanyua unyibun he ka han dra.

13 Ke haba at Isaraela, ame ne aten ke hnyei ame laba kanyua unyibun, at ame hnu me kât menoiny hnyot, ame ne meno amegâ, hnân han ; me hamen he ka hingâlâ dren, me konâm ge kânâ. 14 Anyin a wale melen je únyi hia ; haba dren me wale möt : ke waleling me oge me ha ka lakon Isaraela, ka habe, Ca he öbun ka han dren omeno hia : anyin a haba dra, me, wale melen ta je únyi hia, ke haba at ame he ka an e, adre me he ka subâ degecâ. 15 Ke haba at ame he ka han meno a mok hwege, ame ne kiâ ge ke meno, a aten hnyei, me atkanyua, me, hamen he ka hneú anyin je úkhaú, me sou hnyi köiö, me bo kong ke ne o but sahac, me me bo so but. 16 Ke ame ne ca he ka hneú anyin je úkhaú, me súâ unyin, me ame he ka takoú e anyin hulö.

### HNYIMAKAN 18.

**K**E Iehova ame ha kö Mose, ka habe, 2 Ha thö ka lakon Isaraela, me ha, ka habe, Inya Iehova Khongubun. 3 Ca

he öbun ka ányâ hoton hwakecin hnyei Aigupito waleji öbun e laba hnyin ; ke ca he öbun ka ányâ hoton hwakecin hnyei Kanana, wale oge me hum öbun ka hnyin : ke ca he öbun ka hnu hoton anyidra je hnanyibu. 4 Ke hamöbun he ka ányâ hnök je hna owisa, me tuö anyik je hnanyibu, me he hnyin : inya Iehova Khongubun. 5 Anyin a wale hamöbun he ka tuö anyik je hnanyibu, me hnök je hna owisa : anyin a haba at ame he ka ányâ e, me ame he ka möt hnyin : Inya Iehova.

6 Ca he ke at gabun ka hakekenyâ ke liamekeiny më, he ka hai hnamejin : Inya Iehova. 7 U me ca he ka hai hnamejin kâmâm, ma hnamejin hinyâm : e hinyâm ; u me ca he ka hai hnamejin. 8 U me ca he ka hai hnamejin áiân kâmâm : anyin a wale hnamejin kâmâm. 9 U me ca he ka hai hnamejin mânyâm, nokon kâmâm a hlu, ame nokon hinyâm adre hnokoâ hnyi hnyaba, k' adre me ne hnokoâ hnyi ke hnyaba. 10 U me ca he ka hai hnamejin nokon hlu anyin nokom бага, ame ne nokon hlu anyin nokom momo ; anyin a haba hnamejidru a hnamejâm bi. 11 U me ca he ka hai hnamejin nokon áiân kâmâm a hlu, a hnokoâ hnen kâmâm, hânâm e. 12 U me ca he ka hai hnamejin tehem a haniny kâmâm : haba e me hing liamekeiny me kâmâm. 13 U me ca he ka hai hnamejin liamekeiny me hinyâm : anyin a hing liamekeiny me hinyâm. 14 U me ca he ka hai hnamejin liamekeiny me kâmâm, ke u me ca he ka hakekenyâ áiân : ke hinyâm e. 15 U me ca he ka hai hnamejin áiân nokom бага ; úngom momo e ; u me ca he ka hai hnamejin. 16 U me ca he ka hai hnamejin áiân liamekeiny möu : wale hnamejin liamekeiny möu. 17 U me ca he ka hai hnamejin momo me nokon a hlu ; ke u me ca he ka hok nokon hlu a nokon nokon momo, he ka hai hnamejin : ödrin je hing liamekeiny : hulö eling. 18 Ke u me ca he ka hok momo a liamekeiny me áiâm, he ka ovecâ, me hai hnamejin ke tiga möt at a bán. 19 Ke u me ca he ka hakekenyâ momo he ka hai hnamejin, hnyi hna hake ip can bo kong a e. 20 Ke u me ca he ka tha mokut me áiân ke at, he ka okongu u unyin. 21 Ke u me ca he ka hna lakom he ka he hnyi wanben meic kö Moleka, ke u me ca he ka okongoâ ien Khongom : Inya Iehova. 22 U me ca he ka tha mokut me ke бага, helâ me hwakecin tha mokut me

## LEVITIKO 19.

momo: wale thibi ikiki. 23 Ke u me ca he ka tha mokut me ke meno he ka okongu u mē: k' ame ca he momo ka tot hnyi hnyimakan ke meno me me tha mokut mē: wale hulö ae gan.

24 Ca he ka okongu öbun bi hnyi ta je ünyi eling; anyin a ta je ünyi hia e ame okongoâ je hnyei wala oge me he ka obâ hnyi hnyimaköbun: 25 k' ame kong ut hnyei; anyin a wale oge me he ka bi hwaban hulöiny, k' ame he hnyei ka hmita degecâ aten. 26 Anyin a wale hamöbun he ka tuö anyik je hnanyibu, me hnök je hna owisa, ke ca he öbun ka ânyâ ke ünyi hnyi ta je ünyi eling ae ikiki, wale aten ibun hnyei, me aten ke je hnyei adre me laba kanyua unyibun: 27 (anyin a wale ta je ünyi hia ae ikiki eling a ânyâ hnen aten hnyei a bân, me me kong ut hnyei;) 28 me me ca he ka hmita degeci öbun minya hnen hnyei öbun ka he ka okongoâ, helâ me hna hmita degecâ je hnyei a bân. 29 Anyin a haba at ame ânyâ ke ünyi eling ae ikiki, me adre me he ka subâ degecâ tavat adre me ânyâ e ünyi hnyi idrin hnyei. 30 Awe, öbun e he ka tuö hnök je hna hûna, me me ca ânyâ bi ke hwakecin ae ikiki waleji adre ânyâ ke tiga hi' öbun, me me ca he ka okongu öbun hnyin: Inya Iehova Khongubun.

### HNYIMAKAN 19.

**K**E Iehova ame ha kö Mose, ka habe, 2 Ha thö ka ûkhacaköu hia anyin lakon Isaraela, me ha ködra, ka habe, Okabi öbun ju, anyin a inya Iehova Khongubun ae kap. 3 Öbun e he ka ve outen je lahi-nyöbun, me je lakamöbun, me tuö anyik je sabath: Inya Iehova Khongubun. 4 Ca saú öbun ka je idola, ke ca he ka bi khongubun adre oköiöâ: Inya Iehova Khongubun. 5 Ke öbun e ne he ka hudo hudiny ole kö Iehova, me hamöbun he ka hudo e me me he ka kap soi öbun. 6 Ke adre me he ka an e hnyi bong öbun e hudo hnyin, me bong nyi: ke ame ne hu kolon hnyi bong we, me adre me he ka le degecâ ge meic. 7 Adre me ne he ka an e we, wale ikiki; adre me ca he ka kap soâ: 8 ke haba at ame han e, me ame he ka takou e hnen anyin hulö, anyin a e ame okongoâ ünyi ae kap anyi Iehova; me adre me he ka subâ degecâ at eling ünyi hnyi iny hnyei.

9 Ke öbun ka he ka meno je ibun, me u

me ca he ka meno hia ke ne o but hnyi je hounyin em, ke u me ca he ka hlo kolon hnâm hna menu. 10 U me ca he ka hlo kolon halem je vine, ke u me ca he ka hlo hia je wan vine ame kökölü ünyi hnyi halem je vine; ke u me he ka hna bi ju hobi kâu at ae ba ta ünyi me atkanyua: Inya Iehova Khongubun. 11 Ca he öbun ka venöu; me ca bibiman bi, ke ca thoi ke at ka ke at. 12 Ke ca he öbun ka kheman-nyin thoi hnyi iök, anyin a u je okongoâ ien Khongom helâe: Inya Iehova. 13 U me ca he ka okongoâ at ame laba hakekenyi u, me hûgûná anyin ta je ünyi: haba hwaban athnyaba u je hawâ, ame ca he ka mokut unyâm hnyi hnyughet ke ne o but hnyomakatu. 14 U me ca he hangâ at ae wejiji, ke ca ip ke ünyi hnân ohavâ hnyi hnyimakan wadröu, ke u me he ka outen Khongom: Inya Iehova. 15 Ca he öbun ka ânyâ hwali hnyi owisa: u me ca he ka wâhmakhmetoâ at ae ba ta ünyi, me ogânâ at ae tren omjeü: ke hamâm he ka owisa at ame laba hakekenyi u hnyi wisa. 16 U me ca he ka ngeno em hnyei he ka úhaiö monu: ke u me ca he ka tot he ka thoi me me mok at ame laba hakekenyi u: Inya Iehova. 17 U me ca he ka hûkötîâ eü hnyi hnyekom liamekeiny möu: u ma he bala ka thawâ at ame laba hakekenyi u, ke ca he ka bi jönâm gan. 18 Ca he ka oucöâ hulö, me ip hnân ka aten em hnyei, ke u me he ka betenge ka at ame laba hakekenyi u helâ me u bi: Inya Iehova. 19 Hamöbun he ka tuö anyik je hnanyibu. U me ca he ka hna halem je meno he ka hnokoâ meno ae ke bongou bi: u me ca he ka ta em hnyei ge je hatong ae ve bongon bi: ke u me ca he ka khavâ ûkhaü adre úthúeneken ge li tö ae ve bongon. 20 Ame ne he ke at ka tha mokut me momo a athnyaba adre úco, k' adre ham ka ke бага, k' adre ca úco hmeto bi me hna baúâ; me adre me he ka bi hwaban; adre me ca he ka hling' ödru, anyin a e ame ca gufa bi. 21 Ke hamen бага he ka hom hudiny anyin monu bi kö Iehova, ka hnyi hwanumen uma ûkhacaköu, a mamoe бага hnân hudiny monu. 22 Ke ame he at bihut ka bi hwaban anyin möt ge mamoe бага hnân hudiny monu hnyi hnyimakö Iehova, can hulö e ame ânyâ: me adre me he ka hna hulö e ame ânyâ. 23 Ke öbun ka o but ka hnyi hnyei, k' adre um dö tä ta je ve úö ae hu wan hnân han; me öbun e he ka aü

## LEVITIKO 20.

je wan helâ me únyi adre ca peritomonâ : hnyi kun ta huna adre me he ka helâ me únyi adre ca peritomonâ köbun : öbun e ca he ka han. 24 Ke haba hnyi huna a vakiny ame he ka kap hia je wan, me hnân oganá Iehova. 25 Ke hnyi huna a thabúnginy öbun e he ka han je wan, me me hu troban köbun : Inya Iehova Khongubun. 26 Ca he öbun ka tha han meno me dren : ke u me ca he ka biobotkong, me bihiwakecin. 27 Ca he öbun ka giâ li halelöü hnyi böbun, me okongoâ baten waiâm. 28 Ca he öbun ka sei hon komok hnyi je unyibun, me thâ je unyibun : Inya Iehova. 29 Ca he ka okongoâ nokom hlu me me momo hnyi gethen bi ; wâ e nye labö bi únyi monu tavat, me me unöngötö hnye hnen hwakecin ae kong. 30 Hamöbun he ka tuö anyik je sabath, me okabâ dok a kabik : Inya Iehova. 31 Ca he öbun ka saú ka tavat tren hanu, me tavat bibi-hwakecin ; ca elöm ödrin, m' öbun e ca he ka kong : Inya Iehova Khongubun. 32 U me he ka köüö hnyi hnyimakan at ae hûen ban, me ogânâ hnyimakan hingat, me u me he ka outen Khongom : Inya Iekova. 33 Ke ame ne ke at a aten ke hnye ame laba kanyua unyibun hnyiibun hnye, ca he öbun ka okongoa. 34 Ame he aten ke hnye ka laba unyibun helâ me atenibun hnye, ke u me he ka betenge gan helâ me u bi ; anyin a je atkanyua öbun hnyi hnye Aigupito : Inya Iehova Khongubun. 35 Ca he öbun ka ânyâ únyi ae hwali hnyi hna owisa, ge tulutiny ibeüen, me tulutiny ihmakiny, me tulutiny dân. 36 Ame he ka hu unyibun tulut adre uhno ae wisa, me tulut ihmakiny ae wisa, me efa ae wisa, me hin ae wisa : Inya Iehova Khongubun, at ame hum öbun únyi hnyi hnye Aigupito. 37 Ke hamöbun he ka tu anyik je hnani-bu hia, me hnök je hna owisa hia, me ânyâ ta je únyi e : Inya Iehova.

### HNYIMAKAN 20.

**K**E Iehova ame ha kö Mose, ka habe, 2 U me he ka ha ka lakon Isaraela, ka habe, Haba at Isaraela, ame ne aten ke hnye ame laba kanyua unyi Isaraela, ame he ka ham nokon kö Moleka, me adre me he ka hlingâ at eling : hamen tavat a aten hnye he ka lûâ ge veto. 3 Oge me he ka wâ hmâ at eling me subâ degecâ e únyi hnyi iny hnye ; anyin a e ame ham nokon kö Moleka, me ame oikikiâ dok a kabik, me oko-

ngoa iök ae kap. 4 Ke ame ne he aten hnye ka omúko ge at ame ham nokon kö Moleka, k' ame ca hlingâ bi ; 5 me oge me he bi nya ka wâ hmâ at eling me anyin lap me subâ degecâ, me tavat hia ödrin e bi únyi monu hoton, he ka bi únyi monu me Moleka, únyi hnyi idrin hnye. 6 Ke haba at ame saú ka je hnyat tren hanu me tavat bibihwakecin, he ka bi únyi monu hotudrin, me oge me he ka wâ hmâ at eling me subâ degecâ únyi hnyi iny hnye. 7 Okabi öbun ju, m' öbun e kap : anyin a inya Iehova Khongubun. 8 Ke öbun e he ka tuö anyik je hnanyibu me ânyâ : Inya Iehova at ame okabi öbun. 9 Ke haba at ame hangâ kâmen me hinyen, adre me he ka hlingâ e : e hia but hangâ kâmen ame ne hinyen ; ame he ka takoú e ge dren bi. 10 Haba at ame bi únyi monu me âiân ke at, me adre me he ka tha hlingâ baga me momo, a li at bi únyi monu. 11 Ke haba at ame he ka tha mokut me âiân kâmen, e ame hai hnamejin kâmen : me adre me he ka tha hling' ödru hia ; k' ame he ka takú ödru ge drödrü. 12 Ke ame ne he ke at ka tha mokut me âiân nokon baga, me adre me he ka tha hling' ödru hia : ödru me ânyâ únyi ae ti kong ; ame he ka taku ödru ge drödrü. 13 Ke ame ne he ke baga ka tha mokut me ke baga helâ me hwakecin tha mokut me momo, ödru me ânyâ únyi ae ikiki : adre me he ka tha hling' ödru ; k' ame he ka takú ödru ge drödrü. 14 Ke ame ne he ke at ka tha hok momo me hinyen, wale hulö : k' adre me he ka tha thong degeci ödru ge meic, me me ba hulö unyibun. 15 Ke ame ne he ke baga ka tha mokut me meno, me adre me he ka hlingâ at e : k' öbun e he ka hlingâ minya meno. 16 Ke ame ne he he momo ka hakekenyâ ke meno, me tha mokut mē, me u me he ka tha hlingâ momo me meno : adre me he ka tha hling' ödru hia : ame he ka taku ödru ge drödrü. 17 Ke ame ne he ke baga ka hok haniny, ame ne nokon kâmen, ame ne nokon hinyen, me ödru me úwâköüâ úhethuidru ; me wale únyi ae ikiki ; ke adre me he ka tha subâ degeci ödru hnyi hnyimakan aten idru hnye : e a hia but hai hnamejin haniny ; ame he ka takoú e hnen anyin hulö. 18 Ke a ne he ke baga ka tha mokut me momo ae hu bongon omomo, me hai huamejin ; me e ame hia but ohethuâ pupua gan, k' ame hia but tubwiny pupainy dra gan bi : me adre me he ka tha subâ degeci ödru únyi hnyi idru hnye. 19 Ke u me ca he

LEVITIKO 21.

ka hai hnamejin liamekeiny me hinyâm, ame ne haniny kamâm; anyin a u me hai hnamejin hing liamekeiny môu: me ame he ka takû ödrin hnen anyidrin hulö. 20 Ke ame ne he ke at ka tha mokut me momo âiân liamekeiny me kamen; me e ame hai hnamejin liamekeiny me kamen bi: me ame he ka takû ödru ge anyidru hulö; ödru me he ka mok ke ba mâtrân. 21 Ke ame ne he ke at ka hok momo a âiân liamekeiny mē, wale únyi ae ikiki: k' ame hai hnameyín liamekeiny mē; ame he ka ba mâtrânidru.

22 Anyin a wale öbun e he ka tuö anyik je huanyibu, me hnök je hna owisa hia, me anyâ e: me ca he hnyei ka hmita degeci öbun, wale oge me hum öbun ka hnyin he ka labâ. 23 Ke ca he öbun ka he hoton hwakecin je hnyei oge me he ka obâ hnyi hnyimaköbun: anyin a ödra adre me anyâ ta je únyi hia eling, anyin a wale oge me ikiki ödra. 24 Ke oge hia but ha köbun, ka habe, Ame he ka hu köbun idrin hnyei, ke oge me he ka ham e köbun he ka labâ, wale hnyei ame di hnyin debai me hani: Inya Iehova Khongubun, at ame uc' öbun únyi hnyi ta je hnyei. 25 Anyin a wale, öbun e he ka ovebongonâ omeno ae bo so, me omeno ae bo kong, me omeno ame gâ ae bo kong, me bo so: ke ca he öbun ka oikiki öbun bi hnen meno, me meno ame gâ; me ta je únyi adre iyâú hon kânâ, waleji oge ve khenâ unyibun ae bo kong. 26 M' öbun e he ka kap bi könya: anyin a inya Iehova ae kap, k' oge hia but uc' öbun únyi hnyi ta je hnyei hnân hobi könya.

27 Haba бага, ame ne momo, at tren hanu me at ame bibihwakecin, me adre me he ka hlingâ: adre me he ka lu' ödrin ge veto: ame he ka takû ödrin ge drödrin.

HNYIMAKAN 21.

**K**E Iehova ame ha kö Mose, ka habe, Ha thö ka hnyat bihut a lahu Arona, me ha ködrin, ka habe, Ca he ke at ka obokongâ e can ta je komok hnyi iny hnyei. 2 Ke so thibi can je hing liamekeiny mē, wale hinyen, me kamen, me nokon бага me hlu, me liamekeiny mē; 3 me hing haniny hlu ae ba âiân: e so ka bo kong can e. 4 E ame ca he ka obokongâ e bi, me okongoâ, anyin a e at hnathuiny hnyei. 5 Ödrin e ca he ka ohadreûâ je bödrin, me giâ baten waidrin, me kave unyidrin. 6 Ödrin hnyat ae kap ka Khongudrin, ke ödrin e ca he ka

okongoâ ien Khongudrin: anyin a ödrin e hudo je hut a an hnen meic kö Iehova, a an Khongudrin: anyin a wale ödrin e he ka kap. 7 Ca he ödrin ka hok momo hnyi gethen, me hlu adre hia but okongoâ; k' adre me ca he ka hok momo a degec hnen âiân: anyin a ödrin hnyat ae kap ka Khongudrin. 8 Ke u me he ka okabi ödrin: anyin a ödrin hnyat hudo an Khongom: ödrin hnyat ae kap köu: anyin a inya Iehova ae kap at ame okabi öbun. 9 Ke e ka he nokon at bihut a hlu ka okongoâ e bi, ame bi únyi monu, me e ame okongoâ kamen: k' adre me he ka thong degecâ e ge meic.

10 Ke haba at bihut ae nua unyin je liamekeiny mē, wale adre hingâlâ wakaco hnân hú hon ban, k' adre otílâ he ka khavâ je úkhaú, me e ame ca he ka ouheâ ban, me kia anyin je úkhaú; 11 ke haba khaca e ame ca he ka hakekenyâ anyin at a moku, me obokongoâ e bi can kamen me hinyen; 12 ke e ame ca he ka he únyi hnyi dok ae kap, me okongoâ dok a kapiny Khongon; anyin a e hon ban wakaco hnân hú anyin Khongon: Inya Iehova. 13 Ke e ame he ka hok âiân a hlu. 14 Ke e ame ca he ka hom safac, me momo adre degec, me hlu adre okongo, me momo hnyi gethen: ke e ame he ka hok âiân a hlu únyi hnyi iny hnyei. 15 Ke e ame ca he ka okongoâ lakon únyi hnyi iny hnyei: anyin a inya Iehova at ame okabâ e.

16 Ke haba Iehova ame ha kö Mose, ka habe, 17 Ha thö kö Arona, ka habe, Ame ne hu mâtrânâm hnyi anyidra je dö ae hu hnyikongon unyin, me e ame ca he ka hakekeny he ka hnyi hudo an Khongon. 18 Anyin a haba at ae hu hnyikongon unyin ame ca he ka hakekenyâ; wale wadröu, me at ame ci, me at ae lau hnyingöiny, me at ae hu ovejien, 19 me at ae hmetru bacan, me hmetru hnyamen, 20 me at ae hwali jö tot, me at ame aú, me hwiö emakan, me at ae huje unyin, me úhölök, me hna hmouca wakunyin; 21 e ba at hnyi je mâtrâni Arona at bihut, ame he ka hakekeny ka hudo je hut a an hnen meic kö Iehova a ne hu hnyikongon unyin: e at ae hu hnyikongon; e ame ca he ka hakekeny he ka hudo an Khongon. 22 E ame he ka hnyi han an Khongon, wale je únyi ae ti kap hmönyin, me je únyi ae kap. 23 Ke so bi e ame ca he ka dit ka hnyi hoton singiny, me hakekenyâ taben hut, anyin ae hu hnyikongon; me me ca he ka okongoâ je dok a

## LEVITIKO 22.

kapik : anyin a inya Iehova at ame okabi ödrin. 24 Me haba Mose ame ha helâe kö Arona, me lakon, me lakon Isaraela hia thithö.

### HNYIMAKAN 22.

**K**E Iehova ame ha kö Mose, ka habe, 2 Ha thö kö Arona me lakon, a g' adre me he ka úsákâúö me je únyi ae kap anyin lakon Isaraela, wale adre me okabâ kõnya, m' ödrin e ca he ka okongoá iök ae kap : Inya Iehova. 3 Ha thö ködrin, ka habe, Haba at hnyi mâtrânibun hia hnyi anyibun ta je dö ame hakekenyâ ta je únyi ae kap, wale hnen lakon Isaraela hna okabâ kö Iehova, k' ame bo kong ut, me adre me he ka subâ degecâ at eling hnyi hnyimakök : Inya Iehova. 4 Ame ne lepera ke at hnyi mâtrâni Arona, ame ne hingölö dân unyin ; me e ame ca he ka hnyi han je únyi ae kap, ke ne o but e ame bo so bi. Ke ame ne hu ke at ame kâlâ ke únyi ae bo kong hnen unyin ae mok, ke ame ne at ame hingölö sin unyin ; 5 ke ame ne ke at ame kâlâ únyi ame iyâú, wale ame obokongoá e, ke ame ne ke at ame obokongoá e hnen ke únyi ae bo kong unyin ; 6 haba at ame kâlâ ta je únyi helâe, me e ame he ka bo kong ke ne o but sahac, k' ame ca he ka hnyi han ta je únyi ae kap, e ka tiga ca súâ unyin hnyi köiö. 7 Ke e ka didrut seúno, me e ame he ka bo so ; ke hwaban e, e ame he ka hnyi han je únyi ae kap, anyin a wale an. 8 Haba únyi a mok hwege, me hna kia hnen meno, e ame ca he ka hnyi han, wâ e nye bo kong hnen e. Inya Iehova. 9 Anyin a wale ödrin e he ka tuö hnök je hna hûna, me me ca takû ödrin hnen hulö, me mok can e, ödrin ka he ka okongoá : Inya Iehova at ame okabi ödrin. 10 Ame ca he atkanyua ka hnyi han únyi ae kap : haba at ame tha laba me at bihut, me athnyabainy adre hawâ, ame ca he ka hnyi han únyi ae kap. 11 Ke ame ne he at bihut ka úco ke at ge mone, me e ame he ka hnyi han ; helâ minya hnyat adre hnokoâ hnyi hnyaban, ödrin e he ka hnyi han an. 12 Ke ame ne faipoipo me atkanyua nokon at bihut a hlu, e ame ca he ka hnyi han je únyi ae kap adre hudo hnân hudiny kap göranyai. 13 Ke ame ne safac nokon at bihut, ame ne thang faipoipo, me ba nokon, k' ame hmetu ka hnyi hnyaban kamen, helâ ke me tiga hlu bi, me e ame he ka hnyi han an kamen : ke ame ca he ka atkanyua ka

hnyi han. 14 Ke ame ne han monoâ hnen ke at únyi ae kap, me hamen he ka bi hwabân, me bi hanen ke keihen a thabúnginy me ham ka at bihut únyi ae kap. 15 Ke ca he ödrin ka okongoá je únyi ae kap unyin lakon Isaraela wale ödrin e hudo kö Iehova ; 16 me takû ödrin hulöiny anyidra monu, ödrin ka he ka hnyi han anyidrin je únyi ae kap : anyin a inya Iehova at ame okabâ ta je únyi eling.

17 Ke Iehova ame ha kö Mose, ka habe, 18 Ha thö kö Arona, me lakon, me lakon Isaraela hia, me ha ködra, ka habe, E ka he ke at Isaraela, ame ne atkanyua unyin at Isaraela ka hudo anyin hut, ame ne hobi kâu anyidra ke je khöbi, ame ne hobi kâu anyidra hut ae betenge, wale adre me he ka hudo kö Iehova hnân hudiny leú : 19 hamöbun he ka hudo бага ae ba hnyikongon únyi hnyi je bolok, ame ne mamoe, ame ne got, me me he ka kap soi öbun. 20 Ke haba at ae hu hnyikongon, ca he öbun ka hudo : anyin a ca hnân kap soi öbun hnyin. 21 Ke e ka he ke at ka hudo hudiny úsoköu kö Iehova, me thamúa khöbi, ame ne hut ae betenge, ame ne bolok, ame ne mamoe, me e so e ame bekhöt, m' adre me he ka kap soâ ; ame ca he ka hu hnyikongon. 22 Haba wadröu, me at ae hmetru jeien, me bâbu, me anyû, me at ae huje unyin, me úhölök, ca he öbun ka hudi ödrin ko Iehova, me ca hudi ödrin hnân hut a an ge meic hon taben hut kö Iehova. 23 Ame ne bolok, ame ne nokon mamoe ae hu ovejien, ame hia ke keihen unyin, me u me he ka hudi ödrin hnân hut betenge ; ke adre me ca he ka kap soâ hobi kâu khöbi. 24 Ca he öbun ka hudo kö Iehova únyi adre okongoá wakunyin, ame ne hmouca, ame ne khekhe, ame ne kave ; ke ca he öbun ka ânâ helâe hnyiibun hnyei. 25 Ke ca he öbun ka hudi ödrin hnân an Khongubun únyi ge aten ke hnyei bi ; anyin a e unyidrin hulö me hnyikongon : adre me ca he ka kap soi öbun hnyin.

26 Ke Iehova ame ha kö Mose, ka habe, 27 Adre me ne hnokoâ bolok, ame ne mamoe, ame ne got, me e ame he ka tha laba me hinyen hnyi je bong a seven : ke hwân hnyi bong a eitiny adre me he ka hap hnân hut a an ge meic kö Iehova. 28 Ke ame ne kau, ame ne mamoe, me öbun e ca he ka tha hlingâ e me nokon hnyi bong a khaca. 29 Ke öbun ka he ka hudo hudiny ole kö Iehova, hudo thö e me me kap soi öbun hnyin. 30 Hnyi bong a khaca adre me he



## LEVITIKO 23.

ka an e ; ca he öbun ka ip kolon ke ne o but nyi : Inya Iehova. 31 Anyin a wale hamöbun he ka tuö anyik je hnanyibu me änyä : Inya Iehova. 32 Ke ca he öbun ka okongoâ iök ae kap ; ke adre me he ka okabi nya wanben lakon Isaraela : Inya Iehova at ame okabi öbun, 33 wale at ame hum öbun únyi hnyi hnyei Aigupito, me me Khongubun : Inya Iehova.

### HNYIMAKAN 23.

**H**ABA Iehova ame ha kö Mose, ka habe, 2 Ha thö ka lakon Isaraela me ha ködra, ka habe, Haba je úen a thu bongon hnö Iehova, wale öbun e he ka haimemenâ me me je úkhacaköu ae kap, me wale thibi e je úen oge thu bongon. 3 Siks je bong adre me he ka huliwa, ke haba hnyi bong a seveniny, me wale sabath hnân menâ, me úkhacaköu ae kap : ca he öbun ka änyâ ke huliwa : wale sabath anyi Iehova hnyi je hnyababun hia.

4 Walang je úen a thu bongon hnö Iehova, je úkhacaköu ae kap, wale öbun e he ka omanenâ hnyi je úen. 5 Haba hnyi bong a fortininy tehi a bán, hnyi sabac, me wale paseka anyi Iehova. 6 Ke hnyi bong a fittininy tehi eling, me wale bongon han areto adre ca levenâ kö Iehova : öbun e he ka han areto adre ca levenâ hnyi seven ta bong. 7 Hnyi bong a bán öbun e he ka hu úkhacaköu ae kap : úbun e ca he ka änyâ huliwa ae hmak. 8 Ke öbun e he ka hudo hut a an ge meic kö Iehova hnyi je bong a seven : ke hnyi bong a seveniny, me ame he ka hu úkhacaköu ae kap ; e ba huliwa ae hmak öbun e he ka änyâ.

9 Ke Iehova ame ha kö Mose, ka habe, 10 Ha thö ka lakon Isaraela, me ha ködra, ka habe, Öbun ka o ka hnyi hnyei oge me he ka ham köbun, ke öbun ka meno jeúiny, me öbun e he ka hom je thi hwit a bán öbun e meno ka at bihut : 11 ke e ame he ka hajijingâ thi hwit hnyi hnyimakö Iehova, me me kap soi öbun hnyin ; haba at bihut ame he ka hajijingâ e bong nyi hwaban sabath. 12 Ke hnyi bong eling, öbun e hajijingâ thi hwit hnyin, me öbun e he ka hudo mamoe бага a khaca hunainy ae ba hnyikongon hnân hudiny leú kö Iehova. 13 Ke haba hudiny han ame he ka lo li omer falawa adre úthueniken me wakaco hnân hut a an ge meic ae bo so kö Iehova : ke haba hudiny ic, ame he ka tap waina a vakiny hin. 14 Ke ca he öbun ka

han areto, me hwit adre lo, me je ihwit a but, ke ne o but bong eling, öbun e he ka hom hut ka Khongubun hnyin : wale hnanyibu nyiele balua, hnyi anyibun ta je dö hnyi je hnyababun.

15 Ke öbun e he ka aú hobi köbun, hwân bong nyi hwaban sabath, hwân hnyi bong öbun e hom hnyin thi hwitiny hajijing ; ame he ka bekhöt je sabath a seven : 16 öbun e he ka aú je bong a fite ke ne o but nyi hwaban sabath a seveniny ; ke öbun e he ka hudo hudiny han a teb únyi kö Iehova. 17 Me öbun e he ka hom únyi hnyi je hnyababun lo li aretoiny hajijing, ke lo li omer falawa : adre me he ka le ge falawa ae so adre levenâ, wale je wan a bán kö Iehova. 18 Ke öbun e he ka tha hudo me areto je mamoe a seven ae ba hnyikongon a khaca hunainy, me khaca nak bolok, me lo li mamoe бага, wale hnân hudiny leú kö Iehova, tha e me hudiny han, me hudiny ic, hut a an ge meic, ae bo so kö Iehova. 19 Ke öbun e he ka hudo ke got бага hnân hudiny hulö, me lo li mamoe бага a khaca hunainy hnân je hudiny úsoköu. 20 Ke ame he at bihut ka tha hajijingâ ta je únyi e me li areto a bán hnân hudiny hajijing hnyi hnyimakö Iehova, me li mamoe : e kap ta je únyi e kö Iehova ke hobi kâu at bihut. 21 Ke öbun e he ka haimemenâ hnyi bong eling anyibun úkhacaköu ae kap : e ba huliwa ae hmak öbun e he ka änyâ : wale hnanyibu nyiele balua hnyi je hnyababun hia hnyi anyibun ta je dö.

22 Ke öbun ka he ka meno je ibun, me u me ca he ka meno wia hnyi hounyin em, ke u me ca he ka hlo kolon hnâm hna meno : ke u me he ka hna but e hobi kâu at ae ba ta únyi me atkanyua : Inya Iehova Khongubun.

23 Ke Iehova ame ha kö Mose, ka habe, 24 Ha thö ka lakon Isaraela me ha, ka habe, Hnyi tehi a seveniny, hnyi bong a bániny tehi, ame he ka hu hna menâ hobi köbun, hnân oúnykúmeâ hnen tuö trutru, úkhacaköu ae kap. 25 E ba huliwa ae hmak öbun e he ka änyâ : ke öbun e he ka hudo hut a an ge meic kö Iehova.

26 Ke Iehova ame ha kö Mose, ka habe, 27 Haba hnyi bong a libenyitainy tehi eling a seveniny, ame he ka bong hnân bi hwaban möt : ke öbun e he ka hu úkhacaköu ae kap, k' öbun e he ka hom úhnyú-kongoâ je hnyekubun ; me hudo hut a an ge meic kö Iehova. 28 Ke ca he öbun ka

## LEVITIKO 24.

ányá ke huliwa hnyi bong eling; anyin a wale bong hnân bi hwaban môt, m' adre me he ka bi hwaban anyibun môt hnyi hnyimakö Iehova Khongubun. 29 Ke haba at ame ca vec hnyekon hnyi bong eling, me adre me he ka subâ degecâ e únyi hnyi iny hnyei. 30 Ke haba at ame bi huliwa hnyi bong eling, me oge me he ka ohia hnyi iny hnyei. 31 E ba ke huliwa öbun e he ka ányá: wale hnanyibu nyiele balua hnyi anyibun ta je dö hnyi je hnyababun. 32 Haba bong e me sabath hnân menâ köbun, k' öbun e he ka hom úhnyú-kongoá je hnyekubun: hnyi bong a naininy tehi, hnyi sahac, hwân hnyi ke sahac ke ne o but hnyi ke sahac öbun e he ka okabâ anyibun sabath.

33 Haba Iehova ame ha kö Mose, ka habe, 34 Ha thö ka lakon Isaraela, ka habe, hnyi bong a fiftininy tehi eling a seveniny ame he ka bong hnân bi jeüiny je uma hunuma kö Iehova hnyi je bong a seven. 35 Haba hnyi bong a bán ame he ka hu úkhacaköu ae kap: e ba huliwa ae hmak öbun e he ka ányá. 36 Hnyi je bong a seven öbun e he ka hudo je hut a an ge meic kö Iehova: ke hnyi bong a eitiny öbun e he ka hu úkhacaköu ae kap: ke öbun e he ka hudo hut a an ge meic kö Iehova: wale úkhacaköu ae únyi hnathu; e ba huliwa ae hmak öbun e he ka ánya.

37 Wale je úen anyi Iehova m' öbun e he ka haimemenâ a je úkhacaköu ae kap, he ka hudo hut a an ge meic kö Iehova, hudiny leü, me hudiny han, me hut, me huding ic, a je únyi hnyi je ve bong: 38 ke ca ha bi je sabath anyi Iehova, me anyibun je bwihlany, me anyibun je khöbi hia, me anyibun je hut betenge hia, wale öbun e he ka ham kö Iehova.

39 Ke hnyi bong a fiftininy tehi, öbun ka hia but ip je jeüiny hnyei, me öbun e he ka bi jeü kö Iehova hnyi je bong a seven: hnyi bong a bán ame he ka hu hna menâ ae únyi hnathu, me hnyi bong a eitiny ame he ka hu hna menâ ae únyi hnathu. 40 Ke öbun e he ka hom hnyi bong a bán je wan úö ae so, me je lan pama, me je vheiny úö ae gan, me je arebeiny wagewe; ke öbun e he ka senyin hnyi hnyimakö Iehova Khongubun hnyi seven ta bong. 41 Ke öbun e he ka tuö e hnân bi jeü kö Iehova hnyi je bong a seven hnyi huna: wale hnanyibu nyiele balua hnyi anyibun ta je dö: öbun e he ka tuö e hnyi tehi a seveniny. 42 Öbun e he ka laba

hnyi je uma hunuma hnyi seven ta bong: ame he tavat a hing at Isaraela hia ka laba hnyi je uma hunuma: 43 me me khana hnen anyibun je dö a oge kunâ lakon Isaraela he ka laba hnyi je uma hunuma, hnyi úen oge me hum ödra únyi hnyi hnyei Aigupito: Inya Iehova Khongubun. 44 Ke haba Mose ame omanená ka lakon Isaraela je úen a thu hnö Iehova.

### HNYIMAKAN 24.

**K**E Iehova ame ha kö Mose, ka habe, 2 Kunâ thö lakon Isaraela he ka hom köu wakaco elaiö ae alai adre kokot hnân umumelam, me me môt bala je lamepa. 3 Hamö Arona he ka tuö e bala hwân sahac ke ne o but hnyomakatu, baten singiny únyi hnân ohnatho, hnyi uma hnân úkhacaköu hnyi hnyimakö Iehova: wale hnanyibu nyiele balua hnyi anyibun ta je dö. 4 E ame he bala ka tuö je lamepa hon taben lamepa gol ae so hnyi hnyimakö Iehova.

5 Ke u me he ka hok falawa ae so me le je areto a twelv: ame he ka úsa lo omer areto a khaca. 6 Ke u me he ka ip gaga je únyi e hon laulau gol ae so hnyi hnyimakö Iehova hnyi lo li gaö, usa siks hnyi li gaö. 7 Ke u me he ka ip hon li gaö libanu ae so, me me e bi hon je areto hnân oúnykúmeá, hnân hut a an ge meic kö Iehova. 8 E ame he ka ip gaga bala únyi e hnyi je sabath hnyi hnyimakö Iehova; haba e me únyi ge lakon Isaraela, a úhihi-nyköu nyiele balua. 9 Haba e me ö Arona me lakon; ke ödrin e he ka han e hnyi dok ae kap: anyin a ti kap e hobi káu, únyi hnyi je hut a an ge meic kö Iehova hoton hnanyibu nyiele balua.

10 Haba ke бага nokon momo Isaraela. ke at Aigupito kamen, ame he hnyi wanben lakon Isaraela: k' ame iwatretra hnyi je hnyaba nokon momo Isaraela, me ke at Isaraela; 11 ke haba nokon momo Isaraela ame haikongoá ien Khong, me úhangö: me adre me hom e kö Mose. Haba ien hinyen, me, Selomith, nöku Deberi, únyi hnyi tribu Dana. 12 Ke adre me ca at eling, me me he ka manen ködra we Iehova.

13 Ke Iehova ame ha kö Mose, ka habe, 14 Hom but at waleji a úhangö hoton hnyaba ai; ke hamödrin hnyat ödrin e löng he ka ip je hnyamödrin hon ban, k'

LEVITIKO 25.

ame he úkhacaköu hia ka lûâ e ge veto. 15 Ke u me he ka ha ka lakon Isaraela, me ha, ka habe, haba at ame hangâ Khongon, me ame he ka takou e ge anyin hulö. 16 Ke haba at ame hakongoâ iö Iehova, me adre me he ka hlingâ ; k' ame he úkhacaköu hia ka lûâ e ge veto ; ame ne atkanyua, ame ne aten hnyei, e ka haikongoâ iö Iehova, me adre me he ka hlingâ. 17 Ke haba at ame kot ke at me me mok, me adre me he ka hlingâ e ; 18 ke haba at ame kot meno me me mok, me e ame he ka bi hnen : ke möt hwaban ke möt. 19 Ke ame ne he ke at ka okongoâ unyin ke at, me adre me he ka ânyâ kâu helâ me hnen hna ânyâ ; 20 aat hwaban aat, ecmak hwaban ecmak, nyu hwaban nyu ; adre me he ka ânyâ ka at helâ me hnen hna okongoâ unyin ke at. 21 Ke haba at ame hlingâ meno, me e ame he ka bi hwaban e : ke haba at ame hlingâ at, me adre me he ka blingâ e bi. 22 Ame he ka hu khaca thibi hnanyibu hobi kâu atkanyua me aten hnyei : anyin a inya Iehova Khongubun. 23 Ke haba Mose ame ha ka lakon Isaraela, m' adre me he ka hom hoton hnyaba ai at úhangö me lûâ e ge veto. Ke haba lakon Isaraela adre me ânyâ hoton hna huna hnö Iehova kö Mose.

HNYIMAKAN 25.

**K**E Iehova ame ha kö Mose hon bucen Sinai, ka habe, 2 Ha thö ka lakon Isaraela, me ha ködra, ka habe, Öbun ka o ka hnyi hnyei oge me he ka ham köbun, me ame he kânâ ka tuö sabath kö Iehova. 3 Siks ta huna u ma he ka belökâ em hnyei, ke siks ta huna u me he ka ânyâwia halem je vine, me ip je wan : 4 ke hnyi huna a seveniny ame he ka sabath ae únyi hnathu hnân menâ, hobi kâu kânâ, a sabath kö Iehova : me u me ca he ka belökâ em hnyei, me ânyâwia halem je vine. 5 Haba únyi ame kú hwege hnyi úen menu a u, me u me ca he ka meno, me ca ip wan halem je vine adre ca ânyâwia : waleling me me hunainy menâ ae únyi hnathu hobi kâu kânâ. 6 Ke haba jeúiny sabathiny kânâ, ame he ka hnân ö 'bun ; hnân hobi köu, me athnyabaem бага, me momo, me athnyabaem adre hawâ, me atkanyua at ame tha laba möu ; 7 me hobi kâu halem je bolok, me je menoiny em hnyei, ame he ka hnân han je jeúiny hia.

8 Ke u me he ka aú hobi köu seven ta

sabath a je huna ; wale seven je seven je huna, ke haba kahmen seven je sabath a je huna, me, fâte nain je huna. 9 Ke u me he ka túö trutru ae gan hwan hnyi bong a libenyitainy tehi a seveniny : öbun e he ka túö trutru hnyi ibun hnyei hnyi bong hnân bi hwaban möt. 10 Ke öbun e he ka okabâ huna a fifteiny, me haimemenâ he ka thang aten hnyei a tavat adre me labâ e : ame he ka jubeli hobi köbun ; ke öbun e he ka ve hmetu ka hnyi je ibun, me ve hmetu ka anyibun je lap. 11 Ame he ka jubeli hobi köbun huna eling a fifteiny : öbun e ca he ka belök, me meno únyi ame kú hwege hnyin, me ip wan halem je vine adre ca ânyâwia. 12 Anyin a wale jubeli ; ame he ka kap köbun : öbun e he ka han jeúiny unyi hnyi hnyei. 13 Hnyi huna jubeli eling öbun e he ka ve hmetu ka hnyi je ibun. 14 Ke u je ne úúcüköu me at ame laba hakekenyi u, me ca he öbun ka úkongunyköu : 15 u me he ka úco me at ame laba hakekenyi u hoton numerainy je huna hwaban jubeli, ke e ame he ka úco möu hoton numerainy je hunainy belök. 16 U me he ka osehia hwaban hoton úsehiainy je huna, ke u me he ka oúhnyúkongo hwaban hoton úwakhaletiny je huna ; anyin a e ame he ka úco möu hoton numerainy je úen wa. 17 Ca he öbun ka úkongunyköu ; ke so bi u me he ka outen Khongom : anyin a inya Iehova Khongubun. 18 Anyin a wale hamöbun he ka ânyâ anyik je hnanyibu, me tuö hnök je hna owisa me ânyâ : m' öbun e ne ka laba hnahic hnyi hnyei. 19 Ke ame he kânâ ka ham jeúiny, ke öbun e he ka han me sekon, me laba hnahic hnyin. 20 Ke öbun e ne he ka ha, ka habe ; Ötin e he ka han ieú hnyi huna a seveniny? wâ bi ötin e ca he ka belök, me ip jeú : 21 hawe, oge me he ka húna anyik hnahic köbun hnyi huna a seveniny, ke e ame he ka okúâ jeú hobi kâu je huna a kun. 22 Ke öbun e he ka belök hnyi huna a eitiny, me han jeú ehac ; ke ne o but huna a naininy, ke ne o but ame o thö jeúiny, öbun e he ha han jeú únyi ehac. 23 Ke adre me ca he ka úco degecâ kânâ me me hia balua ; anyin a ik kânâ : anyin a öbun je atkanyua, me tavat adre me laba ka bi athnyisi unyik. 24 Ke hnyi hnyei hia öbun e labâ me öbun e he ka hna kânâ, m' adre me he ka úco hmeto.

25 A ne ba but ta únyi anyin liamekeiny möu, me ame úco ke keihen iny, me hamen ke hing liamekeiny mē he ka o but me úco

LEVITIKO 25.

hmetu únyi a úco hnen liamekeiny mē. 26 Ke ame ne ba at he ka úco hmetu, ke e ame hwán ka tren ta únyi hmetu me khana he ka úco hmetu; 27 awe, e ame he ka aú je hunainy hna úco e, me ham kolon ka at e ame úco mē; ke e ame he ka he hmetu ka hnyi gan. 28 Ke ame ne ca khana he ka hom hmetu e hobi káu e bi, awe, ame he ka hnen bi ju únyi adre úco unyin at ame úco ke ne o but hnyi huna jubeli: ke adre me he ka hna e hnyi jubeli, ke e ame he ka hmetu ka hnyi gan.

29 Ke ame ne he ke at ka úco uma hnyi taun adre op haginy, me e khana he ka úco hmetu e hnyi obiny huna e ame úco hnyin: wale úen ae úcú he ka úco hmetu hnyin. 30 Ke adre me ne ca úco hmetu e, e ka tiga ca bekhöt huna, awe, adre me he ka ohmâ balua bi uma eling, hnyi taun adre op haginy, ka at ame úco e, hnyi anyin je dö: adre me ca he ka hna e hnyi jubeli. 31 Ke haba je uma hnyi je hnyaba, adre ca op haginy igigilö, me adre me he ka únykúme helâ me je utkânâ hnyi ta hnyei: e khan' ödra he ka úco hmetu, k' adre me he ka hna hmetu hnyi jubeli. 32 Ke so bi haba je taun anyin at Levi, wale je uma hnyi anyidrin je taun, me e khana at Levi ka úco hmetu hnyi je úen bala. 33 Ke e ka he ke at Levi ka úco hmetu, me adre me he ka hna uma adre úco me hnyabainy hnyi jubeli: anyin a haba je uma hnyi je hnyaban at Levi, me wale je idrin unyin lakon Isaraela. 34 Ke adre me ca he ka úco je utkânâ igigilö je hnyabadrin; anyin a idrin eling nyiele balua.

35 Ke ame ne ba ta únyi anyin liamekeiny möu, ke mat bi hnyamen unyâm; hâmmâ he ka hom hadruâ: k' ame he ka tha laba möu helâ me atkanyua me aten ke hnyei bi. 36 U me ca he ka kap hwaban me troban únyi gan; ke u ma outen Khongom; me me tha laba möu liamekeiny möu. 37 U me ca he ka ham káu ânyâm mone ge hwaban, me ham káu âm ge troban. 38 Inya Iehova Khongubun, at ame hum öbun únyi hnyi hnyei Aigupito, me me ham köbun hnyei Kanana, me me Khongubun.

39 Ke ame ne ba ta únyi anyin liamekeiny möu unyâm, me úco e bi köu; me u ma ca he ka kunâ ka bi athnyaba köu helâ me at adre úco: 40 ke e ame he ka tha e möu helâ me athnyaba adre hawâ, me at

ame bi athnyisi; ke e ame he ka bi athnyabaem ke ne o but hnyi huna jubeli: 41 me e ame he ka hmetu but úheny unyâm, e me lakon, me me hmetu ka anyin lap, me hmetu ka hnyi hnyaban lakamen. 42 Anyin a lathnyabaik ödrin, waleji oge hum ödrin únyi hnyi hnyei Aigupito: adre me ca he ka úcú ödrin helâ me hna úco athnyaba. 43 U me ca he ka musî ödrin hwege; ke u me he ka outen Khongom. 44 U ma he ka hom lathnyabaem obaga me omomo únyi ge aten ke je hnyei igigili öbun, öbun e he ka úcú ödrin me me lathnyaba obaga me omomo. 45 Ke habe khaca, öbun e he ka úco únyi ge lakon je atkanyua adre me tha laba möbun, me anyidrin je lap unyibun, waleji adre hia but hnokoâ hnyi ibun hnyei: k' ödrin e he ka anyibun. 46 Ke öbun e he ka hn' ödrin hna hwajekhon lakubun hwaböbun, me me anyidra: öbun e he ka hom je lathnyaba únyi gadra nyiele balua; ke haba je liamekeiny möbun a lakon Isaraela, ca he ka musö hwegiâ ke at hnen ke at.

47 Ke ame ne tren omjeú aten ke hnyei bi, ame ne at bi athnyisi unyâm, ke ba ta únyi anyin liamekeiny möu unyin, k' ame úco e bi ka aten ke hnyei, ame ne at bi athnyisi unyâm, ame ne hanen ke lap anyin aten ke hnyei bi: 48 awe, e khan' ödra he ka úco hmetu at eling hwaban hna úco; e khana ke liamekeiny mē he ka úco hmetu e: 49 e khana he ka úco e hmetu hnen ke kamen, ame ne nokon ke kamen, ame ne ke at bi a hanen anyin lap: ke ame ne tren hmetu ta únyi me e khana he ka úco e bi hmetu. 50 Ke e ame he ka aú ka at ame úco e, hwán hnyi huna hna úco e hnyin ke ne o but hnyi huna jubeli: ke haba mone a hwaban me ame he ka úcú me numerainy je huna; e ame he ka tha laba me helâ me úen athnyaba adre hawâ. 51 Ame ne tiga se hia je huna, me e ame he ka ham hmetu hwaban hnân úco e hmetu, hoton je huna, únyi hnyi mone adre bi hwaban káu. 52 Ke ame ne wakhalet bi ju je huna ke ne o but huna jubeli, me e ame he ka aú wia mē, me e ame he ka ham hmetu hwaban hna úco e, hoton je huna. 53 E ame he ka tha e me helâ me athnyaba adre hawâ hnyi ke huna me ke huna: e ame ca he ka musö hwegiâ e hnyi hnyimâ-kâm. 54 Ke adre me ne ca úco e hmetu hnyi je deny eling, me e ame he ka he but hnyi huna jubeli, e me lakon. 55 Anyin a je lathnyabaik lakon Isaraela; lathnya-

## LEVITIKO 26.

baik ödra, waleji oge hom únyi hnyi hnyeí Aigupito: Inya Iehova Khongubun.

### HNYIMAKAN 26.

**C**A he öbun ka bi idola, ke ca he ka otílâ hobi köbun ke hnatheat, ame ne veto ame tot, k' öbun e ca he ka ip hnyi ibun hnyeí ke veto adre kave he ka nom kâu; anyin a inya Iehova Khongubun. 2 Öbun e he ka tuö anyik je sabbath me okabâ dok a kapik: Inya Iehova.

3 Öbun ka he ka vheno hnök je hna otílâ, me tuö anyik je hnanyibu, me ányâ; 4 awe, oge me he bi nya ka ham köbun we bnyi úen e, k' ame he kânâ ka okúâ jeúiny, ke ame he je úöiny ka wa. 5 Öbun e he ka uja hwit ke ne o but úen he ka ip je wan vine, me ip wan anyibun vine ke ne o but úen cekön: ke öbun e he ka han sekön me laba hnahic hnyi ibun hnyeí. 6 Ke oge me he ka ham úsoköu köbun hnyi hnyeí, ke öbun e he ka mokut, ke ba at ame he ka oti öbun: ke oge me he ka ohia je menoiny hnyot ae kong hnyi hnyeí, k' ame ca he hele vat ka vheno ibun hnyeí. 7 Ke öbun e he ka hnu je iwahnaihmiöny möbun, k' adre me he ka ta hnyi hnyinaköbun ge hele vat. 8 K' ame he thabúng gabun ka hnu khaca haded, k' ame he haded gabun ka hnu ten thauzan: k' ame he ka ta hnyi hnyimaköbun ta je iwahnaihmiöny möbun ge hele vat. 9 Ke oge me he ka ogân' öbun me osiâ me osehi' öbun; me ohmâ anyik úbihinyköu möbun. 10 Ke öbun e he ka han únyi ehac, me hom únyi ehac me me bi hnen únyi ae teb únyi. 11 Ke oge me he ka ip umök uma mano hnyi wanböbun, ke oge me ca he ka húkötí öbun. 12 Ke oge me he ka ngenu hnyi wanböbun, ko oge me he ka Khongubun, ke öbun e he ka lakeik. 13 Inya Iehova Khongubun, at ame hum öbun únyi hnyi hnyeí Aigupito, möbun e ca he ka bi athnyaba ködra; ke oge thu hnödra hna húköl' öbun, me wi' öbun he ka tot wia.

14 Ke öbun e ne ca he ka ling nya, me ányâ je hnanyibu hia eling; 15 ke öbun e ne he ka degec hnök je hna húna, me húkötíâ hnök je hna owisa, me me ca ányâ hia anyik je hnanyibu, me hanyáúâ anyik úbihinyköu möbun; 16 me oge me he bi nya ka ányâ köbun eang; oge me he ka kunâ köbun ot, me delâ, me kahwa unyin,

me me dit je emaköbun, me aú but unyibun; k' ame he ka únyi baú hnöbun hna cekön, anyin ame he ka han e hnen je iwahnaihmiöny möbun. 17 Ke oge me he ka wâ hm' öbun, k' adre me he ka hling' öbun hnyi hnyimakan je iwahnaihmiöny möbun: k' ame he ka musi öbun tavat adre me húkötí öbun; k' öbun e he ka kec ke ba at ame hnu öbun. 18 Ke öbun e ne ca he bala ka ling nya can ta je únyi eling, me oge me he bi nya ka oseven kuc öbun can anyibun je hulö. 19 Ke oge me he ka thu biganiny manibun man, ke oge me he ka wia anyibun drany me me helâ me fao, me könöbun kânâ me me helâ me bras: 20 ke ame he ka ba troban hwegiöbun; anyin ame ca he kânâ ka okúâ jeúiny, k' ame ca he ka wa ta je úöiny hnyeí. 21 Ke öbun e ne he ka hna degeci nya, me höcö ling nya; me oge me he ka oseven oâ köbun je mok hoton anyibun je hulö. 22 Ke oge me he ka kunâ köbun je menoiny hnyot he ka húgúnâ lakubun, me ohia halebun je meno, me owakhaleti öbun; k' ame he ka ba at eú hnyi debun je gethen. 23 Ke öbun e ne ca wisa könya ge ta je únyi eling, k' öbun e he ka digic nya bi; 24 me oge me he bi nya ka digic öbun; ke oge me he ka oseven kuc öbun can anyibun je hulö. 25 Ke oge me he ka oâ hele vat köbun at ame bi hwaban hna okongoâ úhinhinyköu: ke öbun e ne he ka úkhacaköu hnyi anyibun je taun me oge me he ka kunâ mok ae cap hnyi wanböbun; k' adre me he ka hn' öbun ka hnyi hnyamenta je iwahnaihmiöny. 26 Hnyi úen oge me thu uciny anyibun jeú, me ame he ten ta momo ka tha inyâ ö 'bun hnyi wahnainyâ a khaca, k' ödrin e he ka ham hmetu ö bun hoton tulut: k' öbun e he ka han ke ca sekön bi.

27 Ke öbun e ne ca ling nya can ta je únyi hia eling, k' öbun e he ka hna degeci nya; 28 me oge me he bi nya ka hna degeci öbun hnyi hmönyin: ke oge me he minya ka oseven kuc öbun can anyibun je hulö. 29 Ke öbun e he ka han lakubun je da, k' öbun e he ka han lakubun je waindusem. 30 Ke oge me he ka ohia anyibun je dok ae görany, me subâ degecâ hnöbun hna theati seúnö, me khúâ degecâ je unyibun a mokcu ka hnyi hon anyibun je idola ae mok; ke oge me he ka húkötí öbun. 31 Ke oge me he ka oba aten anyibun je taun, me ohia je dok a kabibun, ke oge me ca he ka hnulâ bunen anyibun je únyi ae

## LEVITIKO 27.

bo so. 32 Ke oge me he ka oba atenibun hnyei: k' ame he je iwahnaihmionny möbun tavat adre me laba hnyin he ka uthmâhmâ gan. 33 Ke oge me he ka ovesei öbun ka hnyi ta je hnyei, me oc hele vat he ka hnu öbun: ke ame he ka ba kolonibun hnyei, k' ame he ka hnyot je hnyababun. 34 Haba hnyi üen eling ame he kânâ ka senyiná je sabathiny hnyi je üen itremacat hia, ke öbun dut hnyi hnyei iny je iwahnaihmionny möbun; wale ame he kânâ ka menâ me senyiná je sabathiny. 35 Hnyi üen itremacat e hia, e ame he ka menâ; anyin a e ame ca menâ hnyi anyibun je sabath, wal' öbun e labâ. 36 Ke haba je kolon gabun, me oge me he ka okûâ ot eü hnyi je hnyekudrin hnyi je hnyei iny je iwahnaihmionny mödrin: k' ame he hwan lan üö ka hnu ödrin; k' ödrin e he ka kec helâ me at ame kec ge hele vat; k' ödrin e he ka ta ke ba at ame hnu. 37 Ke ame he ke at ka ta hon ke at helâ me tavat kec ge hele vat, ke ba at ame hnu: ke ame he ka ba manibun man he ka tot hnyi hnyimakan je iwahnaihmionny möbun. 38 Ke ame he ka hi' öbun unyin aten ke je hnyei, k' ame he hnyei iny je iwahnaihmionny möbun ka ön öbun. 39 Ke ame he je kolon gabun ka aü hnyi anyidrin hulö hnyi je hnyei iny je iwahnaihmionny möbun, k' ödrin e he minya ka aü hnen je hulö anyin lakamödrin a tha e mödrin. 40 Ke ödrin e he ka ha manená hwakecidrin ae kong anyin je lakamödrin hnyi anyidrin monu adre monu könnya, ke can minya ödrin e hna degeci nya, 41 me inya oge me digic ödrin, me hum ödrin ka hnyi hnyei iny je iwahnaihmionny mödrin: ke ame ne he ka he je hnyekudrin adre ca peritomona ka hnyikânâ, k' ödrin e kap hwaban hwakecidrin ae kong; 42 awe, oge me he ka únykúme hnök hna úhinyköu me Jakob; me hnök hna úhinyköu me Isaaka; ke oge me he ka únykúme hnök hna úhinyköu me Aberahama; ke oge me he ka únykúme ka hnyei. 43 Ke ödrin e he ka he but me hnen bi ju hnyei, k' ame he ka senyiná je sabathiny, k' ame itremacat ke tiga hi' ödrin ke ödrin e he ka kap hwaban hwakecidrin ae kong: can, anyin a ödrin e degec hnök je hna owisa, me húkotiâ anyik je hnanyibu. 44 Ke so bi eja ke ne a ne helâe, ke ka ödrin bi hnyi hnyei iny je iwahnaihmionny mödrin, me oge me ca he ka digic ödrin me húkoti ödrin, me ti oh' ödrin, me thu hnök hna úhinyköu mödrin:

anyin a inya Iehova Khongudrin: 45 ke oge me he ka únykúme ködrin, cadrin bi, waleji hnök hna úhinyköu me lakamödrin, tavat oge me hom únyi hnyi hnyei Aigupito hnyi hnyimakan aten ke je hnyei, m' inye he ka Khongudrin: Inya Iehova.

46 Wale je hna otílâ, me je hna owisa, me je hnanyibu hnö Iehova hna ham hobi kâu lakon Isaraela hon bucen Sinai a deny Mose.

### HNYIMAKAN 27.

**K**E haba Iehova ame ha kö Mose, ka habe, 2 Ha thö ka lakon Isaraela, me ha ködra, ka habe, E ka he ke at ka bi khöbi ae únyi hnathu, ame he ka hobi kö Iehova je hnyat hoton únyi ae úcü köu. 3 Ke haba hnâm hna tuluto kâu, wale hobi kâu бага hwân hnyi twente ta je hunainy ke ne o but hnyi sikste, me fite sekel sileva hoton sekeliny dok ae kap, wale únyi ae úcü köu. 4 Ke ame ne momo, me thöte je sekel únyi ae úcü köu. 5 Ke ame ne hwân hnyi thabúng hunainy ke ne o but hnyi twente hunainy, me twente sekel sileva hobi kâu бага, ke ten sekel hobi kâu momo, wale ae úcü köu. 6 Ke ame ne hwân hnyi khaca tehi ke ne o but thabúng ta hunainy, me thabúng ta sekel sileva hobi kâu бага, ke kun ta sekel sileva hobi kâu hlu, wale ae úcü köu. 7 Ke ame ne hwnâ hnyi sikste je hunainy, me gan hon e, ame ne бага, me fiftin je sekel, ke ame ne momo, me ten je sekel, wale ae úcü köu. 8 Ke ame ne ba anyin únyi ae úcü köu, me adre me he ka hom e ka hnyi hnyimakan at bihut, ke ame he at bihut ka ha únyi ae úcü kâu, k' ame he at bihut he ka tuluto e hoton hna khana hnen at bi khöbi.

9 Ke ame ne meno adre me hudo kö Iehova, me e kap únyi eling hia adre ham kö Iehova. 10 Ke e ame ca he ka wia e, me bi hnen, wale únyi ae so bnen únyi ae kong, ame ne únyi ae kong hnen únyi ae so: ke so bi adre me ne bi hnen e, a ke meno hnen ke meno, awe, ödru me he ka tha kap. 11 Ke ame ne ke meno ae bo kong, ke ca hnân hudo kö Iehova, me e ame he ka ip meno hnyi hnyimakan at bihut: 12 ke hamen at bihut he ka ha únyi ae úcü, ame ne so ame ne kong: helâ möu a at bihut ame tuluto, me ame he ka helâe. 13 Ke ame ne he ka úco hmetu e, me hamen he ka bi hanen ke keihen a thabúnginy ka hnyi únyi ae úcü köu.

## NUMERA 1.

14 Ke ame ne he ke at ka okabâ umen uma, me me kap kö Iehova, me hamen at bihut he ka ha ûnyi ae ûcû, ame ne so, ame ne kong: haba hna ha hnen at bihut ûnyi ae ûcû kâu, me ame he ka helâe.

15 Ke ame ne he at a okabâ uma ka úco hmetu e, me hamen he ka bi hanen ke keihen a thabûngin ta mone ae ûcû köu ka hnyin me me anyin dut.

16 Ke ame ne he ke at ka okabâ kö Iehova ke keihen iny hnyei, me u me he ka tuluto e hoton hatungen: haba hwaban khaca homer bali adre ta, me fifte je sekel sileva. 17 Ke ame ne he ka okabâ iny hnyei hwân hnyi huna jubeli, me ame he ka helâ me hnâm hna tuluto. 18 Ke ame ne he ka okabâ iny hnyei hwaban jubeli, me hamen at bihut he ka aú kâu je mone hoton je kolon je huna ke ne o but ka hnyi huna jubeli, ke u me he ka homi ûhnyû-kongoâ hnâm hna tuluto. 19 Ke ame ne he at ame okabâ iny hnyei ka úco hmetu e, me hamen he ka bi hanen ke keihen a thabûnginy ka hnyin a mone ae ûcû köu, me me anyin dut. 20 Ke ame ne ca he ka úco hmetu hnyei, ke ame ne hia but úco ka ke at, me adre me ca he ka úco hmetu e: 21 ke ödra ka hna hnyei hnyi jubeli, me ame he ka kap kö Iehova, helâ me hnyei adre nyibo; k' ame he ka iny at bihut. 22 Ke ame ne he ke at ka okabâ kö Iehova ke hnyei e ame úco, ke ca hanen iny hnyei; 23 me hamen at bihut he ka aú kâu hwaban ae ûcû köu ke ne o but ka hnyi huna jubeli: ke hnyi bong eling e ame he ka ham ûnyi ae ûcû köu, a wale ûnyi ae kap kö Iehova. 24 Haba hnyi huna jubeli ame he ka iny hmetu hnyei wale iny at adre úco gan, at a ka gan ehac.

25 Ke haba hnâm je hna ha hwaban hia, me, ame he ka hnu hoton sekeliny dok ae kap: haba sekel, me twente je gera.

26 Ke haba lakon omeno a bân, wale nokon a bân adre ip hobi kö Iehova, me ca he ke at ka okabâ; ame ne bolok, ame ne mamoe, anyi Iehova bi e. 27 Ke ame ne menoe ae bo kong, me e ame he ka bi hnen ûnyi ae ûcû köu, me bi hanen ke keihen a thabûnginy ka hnyin: ke adre me ne ca úco hmetu, me adre me he ka úco e hoton ûnyi ae ûcû köu.

28 Ke so bi, haba ûnyi adre nyibo, a nyibo hnen ke at kö Iehova ûnyi hnyi anyin ta je ûnyi, ame ne at, ame ne menoe, ame ne hnyei, me adre me ca he ka úco hmetu me bi hnen: e ti kap kö Iehova je ûnyi hia adre nyibo. 29 E ba ûnyi adre nyibo, a labö nyibo hnen at, adre me he ka úco hmetu; k' adre me he ka hlingâ e.

30 Ke haba ke keihen a libenyitainy troban kânâ, ame ne hatonginy, ame ne wan úö, me, anyi Iehova e: e kap e kö Iehova. 31 Ke ame ne he ke at ka úco hmetu ûnyi hnyi ke keihen a libenyitainy, me hamen he ka bi hanen ke keihen a libenyitainy ka hnyin. 32 Ke haba ke keihen a libenyitainy omeno, ame ne bolok, ame ne mamoe, a ta je ûnyi hia adre me dit hmelen uci, me e kap kö Iehova ke keihen a libenyitainy. 33 E ame ca he ka elâm, ame ne so, ame ne kong, k' ame ca he ka bi hnen e: ke so bi, ame ne he ka bi hnen e, awe, ame he ka tha kap ûnyi e me ûnyi a bi hnen e; k' adre me ca he ka úco hmetu.

34 Wale ta je hnanyibu a hûna Iehova kö Mose hobi kâu lakon Isaraela hnyi bucen Sinai.

## NUMERA

### TUSI A VAKINY ANYI MOSE.

#### HNYIMAKAN 1.

**H**ABA Iehova ame ha kö Mose hnyi hnyebuba Sinai, hnyi uma úkhacaköu, hnyi bong a bâniny tehi a loiny, hnyi huna a loiny hwaban hnödra hna he but úhedra hnyi hnyei Aigupito, ka habe, 2 Öbun e he ka aú úseiny úkhacaköu anyin

lakon Isaraela hia, hoton anyidra je lap, a je hnyaban lakamödra, tha e me numerainy je ien, k' adre me he ka ve aú obaga hia; 3 hwân ge tavat a twente hunaidra, me gan hon e, a at Isaraela hia, a tavat ae khan' ödra he ka hnyi vat, u me he me Arona ka öü ödra hoton anyidra je utbavat. 4 Ke ame he ka tha e möbu ke je hnyat, a

## NUMERA 1.

úsa khaca únyi hnyi je tribu; a je taben je lap anyin je lakamödrin. 5 Ke walang ien je hnyat ödrin e he ka tha e möbu: Únyi ga Reubena; Elizura, nöku Sedeura. 6 Únyi ga Simeona; Selumiela nöku, Zurisadai. 7 Únyi ga Juda; Nasona, nöku Aminadaba. 8 Únyi ga Isakara; Nathaniela, nöku Zuara. 9 Únyi ga Zebulona; Eliaba, nöku Helona. 10 Únyi ge laku Josefa; a únyi ga Eferaima; Elisama nöku Amihuda: únyi ga Manase; Gamaliela, noku Pedazura. 11 Únyi ga Beniamina; Abidana, nöku Gideona. 12 Únyi ga Dana; Ahiezera nöku Amisadai. 13 Únyi ga Asera, Pagiela, nöku Okerana. 14 Únyi ga Gada; Eliasafa, nöku Deuela. 15 Únyi ga Nafatali; Ahira, nöku Enan. 16 Wale hnyat adre hawá ge úkhacaköu, a je tuhan je tribuiny lakamödrin; ödrin je homakan je thauzaniny at Isaraela. 17 Ke haba Mose me Arona ödru me hom hnyat eling adre ha iödrin: 18 ke ödrin e ukhacaköuá tavat hia hnyi bong a bâniny tehi a loiny, me ödrin e ve omanená anyidrin je dö, hoton anyidrin je lap, a je hnyaban lakamödrin, wale numerainy je ien, a je ve at, hwân ge tavat a twente huna, me gan hon e. 19 Ke e ame öü ödrin hnyi hnyebuba Sinai, hoton hnö Iehova hna huna kö Mose.

20 Haba laku Reubena, nöku Isaraela a bân, wale anyidra je dö, hoton anyidra je lap, a je hnyaban lakamödra, wale numerainy je ien, ke at me ke at, a je бага hia hwân ge tavat a twente huna me gan hon e, tavat hia ae khan' ödra he ka hnyi vat; 21 haba tavat adre aú únyi hnyi tribu Reubena, me, ödra fâte siks thauzan ke faiv haded.

22 Haba laku Simeona, wale anyidra je dö, hoton anyidra je lap, a je hnyaban lakamödra, haba tavat adre me aú hoton numerainy je ien, ke at me ke at, a je бага hia hwân ge tavat a twente huna me gan hon e, tavat ae khana he ka hnyi vat; 23 haba tavat adre aú únyi hnyi tribu Simeona, me ödra fíte nain thauzan ke theri haded.

24 Haba laku Gada, wale anyidra je dö, hoton anyidra je lap, a je hnyaban lakamödra, wale numerainy je ien, hwân ge tavat a twente huna me gan hon e, tavat ae khana he ka hnyi vat; 25 haba tavat adre aú únyi hnyi tribu Gada, me ödra fâte faiv thauzan ke siks haded ke fíte.

26 Haba laku Juda, wale anyidra je dö, hoton anyidra je lap, a je hnyaban laka-

mödra, wale numerainy je ien, hwân ge tavat a twente huna me gan hon e, tavat ae khana he ka hnyi vat; 27 haba tavat adre me aú únyi hnyi tribu Juda, me ödra sevente foa thauzan ke siks haded.

28 Haba laku Isaraela, wale anyidra je dö, hoton anyidra je lap, a je hnyaban lakamödra, wale numerainy je ien, hwân ge tavat a twente huna me gan hon e, tavat ae khana he ka hnyi vat; 29 haba tavat adre aú únyi hnyi tribu Isaraela, me ödra fíte foa thauzan ke foa haded.

30 Haba laku Zebulona, wale anyidra je dö, hoton anyidra je lap, a je hnyaban lakamödra, wale numerainy je ien, hwân ge tavat a twente huna me gan hon e, tavat ae khana he ka hnyi vat; 31 haba tavat adre aú únyi hnyi tribu Zebulona, me ödra fíte seven thauzan ke foa haded.

32 Haba laku Josefa, a laku Eferaima, wale anyidra je dö, hoton anyidra je lap, a je hnyaban lakamödra, wale numerainy je ien, hwân ge tavat a twente huna me gan hon e, tavat ae khana he ka hnyi vat; 33 haba tavat adre aú únyi hnyi tribu Eferaima, me ödra fâte thauzan ke faiv haded.

34 Haba laku Manase, wale anyidra je dö, hoton anyidra je lap, a je hnyaban lakamödra, wale je numerainy je ien, hwân ge tavat a twente huna me gan hon e, tavat ae khana he ka hnyi vat; 35 haba tavat adre aú únyi hnyi tribu Manase, me ödra thöte tu thauzan ke tu haded.

36 Haba laku Beniamina, wale anyidra je dö, hoton anyidra je lap, a je hnyaban lakamödra, wale numerainy je ien, hwân ge tavat a twente huna me gan hon e, tavat ae khana he ka hnyi vat; 37 haba tavat adre aú únyi hnyi tribu Beniamina, me ödra thöte faiv thauzan ke foa haded.

38 Haba laku Dana, wale anyidra je dö, hoton anyidra je lap, a je hnyaban lakamödra, wale numerainy je ien, hwân ge tavat a twente huna me gan hon e, tavat ae khana he ka hnyi vat; 39 haba tavat adre aú únyi hnyi tribu Dana, me ödra sikste tu thauzan ke seven haded.

40 Haba laku Asera, wale anyidra je dö, hoton anyidra je lap, a je hnyaban lakamödra, wale numerainy je ien, hwân ge tavat a twente huna me gan hon e, tavat ae khana he ka hnyi vat; 41 haba tavat adre aú únyi hnyi tribu Asera, me ödra fâte wan thauzan ke faiv haded.

42 Haba laku Nafatali, wale anyidra



## NUMERA 2.

je dö, hoton anyidra je lap, a je hnyaban lakamödra, wale numerainy je ien, hwân ge tavat a twente huna me gan hon e, tavat ae khana he ka hnyi vat; 43 haba tavat adre aú únyi hnyi tribu Nafatali, me ödra fifte theri thauzan ke foa haded.

44 Wale tavat adre aú, waleji a aú hnö Mose me Arona, me je tuhan Isaraela, a ödrin twelv: a úsa khaca hobi kâu je hnyaban lakamödrin. 45 Me haba numerainy hia lakon Isaraela adre aú, hoton je hnyaban je lakamödra, hwân ge tavat a twente huna me gan hon e, a tavat Isaraela hia ae khana he ka hnyi vat; 46 wale tavat hia adre aú, me ödra siks haded ke theri thauzan ke faiv haded ke fifte.

47 Ke adre ca tha áu mödra at Levi hoton je tribuiny lakamödra. 48 Anyin a Iehova ame ha kö Mose, ka habe, 49 U me ca he ka tha aú úseidra me lakon Isaraela: 50 ke u me he ka otilá at Levi hnyi uma manoiny ohnatho, me hon omjehen hia, me ta je únyi hia a hanen: hamödra he ka sukhöúná uma mano, me je omjehen hia; ke hamödra he ka bi athnyaba hnyin, me laba igigilö uma mano. 51 Ke ödra ka he ka hom uma mano, me hamen at Levi he ka ái e: ke ödra ka' he ka otilá uma mano, me hamen at Levi he ka otilá e: ke adre me he ka hlingá atkanua at ame hakekenyá e. 52 Ke ame he je lakon Isaraela ka ve otilá umödra je uma hnyi je hnyabadra, me hnyi je hatödra, hoton anyidra je utbavat. 53 Ke ame he at Levi ka ve otilá umödra je uma mano igigilö uma manoiny ohnatho, me me ca ta hmönyin ka hnyi hon úkhacaköu anyin lakon Isaraela: ke hamen at Levi he ka tuö uma manoiny ohnatho. 54 Ke haba lakon Isaraela, me adre me ányá hia helá me hna húna hnö Iehova kö Mose, adre me ányá heláe.

### HNYIMAKAN 2.

**K**E Iehova ame ha kö Mose me Arona, ka habe, 2 Ame he lakon Isaraela ka ve hunuma hnyi je hatödra, hnyi je haten hnyi je hnyaban lakamödra: adre me he ka hunuma cicö uma úkhacaköu igigilö. 3 Ke haba hnyi ke keihen e deiö ame o hnyin seúnö, adre me he ka hunuma hnyi haten hnyaban at Juda, hoton anyidra köiö: ke ame he Nasona nöku Aminadaba ka thaniny lakon Juda.

4 Ke haba köien a tavat gadra adre aú, me ödra sevente foa thauzan ke siks haded. 5 Ke haba tavat adre me he ka hunuma útangköu mē, me tribu Isakara: haba Nathaniela nöku Zuara ame he ka thaniny lakon Isakara: 6 ke haba köien a tavat adre aú, me ödra fifte foa thauzan ke foa haded: 7 ke tribu Zebulona: haba Eliaba nöku Helona ame he ka thaniny laku Zebulona: 8 Ke haba köien a tavat adre aú, me ödra fifte seven thauzan ke foa haded. 9 Haba tavat hia adre aú únyi hnyi lap anyi Juda, me ödra wan haded ke eite siks thauzan ke foa haded, hoton köiödra. Hamen tavat eling he ka bán.

10 Ke haba haten lap anyi Reubena ame he ka e hnyi ke keihen ka hnyi hwaiöu, hoton anyidra köiö: haba Elizura nöku Sedeura ame he ka thaniny lakon Reubena. 11 Ke haba köien a tavat adre aú, me ödra fâte siks thauzan ke faiv haded. 12 Ke haba tavat adre me he ka hunuma útangköu mē, me tribu Simeona: haba Selumiela nöku Zurisadai ame he ka thaniny lakon Simeona: 13 ke haba köien a tavat adre aú, me ödra fifte nain thauzan ke theri haded: 14 ke tribu Gada: haba Eliasafa nöku Reuela ame he ka thaniny lakon Gada: 15 ke haba köien, a tavat adre aú, me fâte faiv thauzan ke siks haded ke fifte. 16 Haba tavat hia adre aú únyi hnyi lap anyi Reubena, me ödra wan haded ke fifte wan thauzan ke foa haded ke fifte, hoton köiödra. Walödra he a loiny.

17 Ke hwaban e ame he ka he uma úkhacaköu me lap anyin at Levi hnyi wanben je hnyaban; adre me he ka hwân ka he hoton hnödra hna hunuma, a ke at me ke at hnyi hnen bi, hoton je hatödra.

18 Ke haba haten lap anyi Eferaima ame he ka e bi hnyi ke keihen e jio, hoton köiödra: haba Elisama nöku Amihuda ame he ka thaniny lakon Eferaima. 19 Ke haba köien a tavat adre aú, me ödra fâte thauzan ke faiv haded. 20 Ke ame he ka útangköu mē tribu Manase: haba Gama-liela nöku Pedazura ame he ka thaniny lakon Manase: 21 ke haba köien a tavat adre aú, me ödra thöte tu thauzan ke tu haded: 22 ke tribu Beniamina: haba Abidana nöku Gideona ame he ka thaniny lakon Beniamina: 23 ke haba köien a tavat adre me aú, me ödra thöte faiv thauzan ke foa haded. 24 Haba tavat hia adre aú únyi hnyi tribu Eferaima, me

### NUMERA 3.

ödra wan haded ke eit thauzan ke wan haded, hoton köiödra. Ke walödra he a kuniny.

25 Ke haba haten lap anyi Dana ame he ka e bi hnyi ke keihen ka hnyi hwadrö, hoton köiödra : haba Ahiezera nöku Amisadai ame he ka thaniny lakon Dana. 26 Ke haba köien, a tavat adre aú, me ödra sikste tu thauzan ke seven haded. 27 Ke ame he tribu Asera ka hunuma útangköu mē : haba Pagiela nöku Okerana ame he ka thaniny lakon Asera : 28 ke haba köien a tavat adre aú, me ödra fâte wan thauzan ke faiv haded : 29 ke tribu Nafatali : haba Ahira nöku Enan ame he ka thaniny lakon Nafatali : 30 ke haba köien, a tavat adre aú, me ödra fifte theri thauzan ke foa haded. 31 Haba tavat hia adre aú únyi hnyi lap anyi Dana, me ödra wan haded ke fifte seven thauzan ke siks haded. Hamödra he ka he biliny hoton anyidra je haten.

32 Wale tavat adre aú únyi hnyi lakon Isaraela hoton je hnyaban lakamödra : haba tavat hia thithö adre aú únyi hnyi je lap hoton köiödra, me ödra siks haded ke theri thauzan ke faiv haded ke fifte. 33 Ke adre me ca tha aú bi tavat Levi unyin lakon Isaraela ; helâ me hna húna hnö Iehova kö Mose. 34 Ke haba lakon Isaraela adre me ányâ hia hoton hna húna hnö Iehova kö Mose, ke adre me hunuma helâe unyin anyidra ta je haten, me adre me he helâe ke at me ke at hoton anyidra ta je lap, ke hoton je hnyaban lakamodra.

#### HNYIMAKAN 3.

**K**E walang je dö anyi Arona me Mose hnyi bong ame fuc Iehova kö Mose hon bucen Sinai. 2 Ke walang ien je laku Arona ; Nadaba a atö, me Abiu, me Eleazara, me Ithamara. 3 Wale je ien laku Arona, a hnyat bihut adre hú, waleji e ame otilâ hnân bi hut. 4 Ke ame mokcu Nadaba me Abiu hnyi hnyimakö Iehova, hnyi hnödrü hna hudo meic ae ke bongon hnyi hnyimakö Iehova, hnyi hnyebuba Sinai, ke ba nöku : ke Eleazara me Ithamara ödrü me labö bi hut hnyi hnyimakan kamödrü.

5 Ke haba Iehova ame ha kö Mose, ka habe, 6 Hom but jem tribu Levi, me ip ödrin hnyi hnyimakö Arona at bihut, m' ödrin e he ka huliwa kâu. 7 Ke ödrin e he ka vheno hna húna kâu, me hna húna ka

úkacaköu hia hnyi hnyimakan uma úkacaköu, he ka ányâ huliwainy uma mano. 8 Ke ödrin e he ka tuö omjehen uma úkacaköu hia, me húna ka lakon Isaraela he ka ányâ huliwa hnyi uma mano. 9 Ke u me he ka ham at Levi kö Arona me lakon : adre ham mu' ödrin kâu úhedrin unyin lakon Isaraela. 10 Ke u me he ka otilö Arona me lakon, ke ödrin e he ka labö tuö hanymen at bihut : ke adre me he ka hlingâ atkanyua at ame hakekenyâ.

11 Ke Iehova ame ha kö Mose, ka habe, 12 Me wâ bi, haba inya oge hia but hom at Levi úhedra unyin lakon Isaraela hnân bi hnen je atö wale a bödra lakon Isaraela ka hnokoâ : me hobi könya at Levi : 13 anyin a hobi könya lakon hia a bân ; ke oge me okabâ könya je atö hia ge lakon Isaraela, at me meno, hnyi bong oge me kot hnyin je atö hia hnyi hnyeí Aigupito : hobi könya ödrin ; Inya Iehova.

14 Ke Iehova ame ha kö Mose hnyi hnyebuba Sinai, ka habe, 15 U me he ka aú je laku Levi hoton je hnyaban lakamödrin, me anyidrin je lap : u me he ka aú obaga hia, hwân ge tavat a khaca tehi me gan hon e. 16 Ke haba Mose ame öú ödrin helâ me hna ha hnö Iehova, hoton hna húna kâu. 17 Ke walang ien laku Levi ; Geresoma, me Kohatha, me Merari. 18 Ke walang ien li laku Geresoma hoton anyidru li lap ; Libeni me Simei. 19 Ke haba laku Kohatha hoton anyidrin je lap ; me Amerama, me Izara, me Heberona, me Uziela. 20 Ke li laku Merari hoton anyidru li lap ; me Maheli me Musi. Wale je lap anyin at Levi hoton je hnyaban lakamödrin.

21 Haba lap anyin at Lebeni, me lap anyin at Simei, me únyi ga Geresoma : wale li lap anyin at Geresoma. 22 Haba tavat adre aú gadra, a úseiny obaga hia, hwân ge tavat a khaca tehi me gan hon e, wale adre aú gadra sevente thauzan ke faiv haded. 23 Haba lap anyin at Geresoma ame he ka hunuma hnyi hoton uma mano ke e jio. 24 Ke haba thaniny hnyaban lakamen at Geresoma, me Eliasafa, nöku Laela. 25 Ke haba hanymen laku Geresoma hnyi uma úkacaköu, me wale uma mano, me uma, me baniny, me singiny hwanumen uma úkacaköu, 26 me mano adre uhno hnân hak, me singiny homagouleny, hnyi uma mano, me hnyi taben hut igigilö, me je wen, hobi kâu ta je huliwainy hia.

27 Haba lap anyin at Amerama, me lap

## NUMERA 4.

anyin at Izara, me lap anyin at Heberona, me lap anyin at Uziela, me únyi ga Kohatha. 28 Haba numerainy obaga hia, hwân ge tavat a khaca tehi me gan hon e, me ödra eit thauzan ke siks haded, tavat adre tuö hanymödra hnyi dok ae kap. 29 Ame he je lap anyin laku Kohatha ka hunuma hnyi ke keihen uma mano ka hnyi hwaiöu. 30 Ke haba thaniny hnyaban kamen je lap anyin at Kohatha, me Elizafana nöku Uziela. 31 Ke haba banymödra, me wale tang, me laulau, me taben lamepa, me li taben hut, me je utkaiainy dok ae kap, wale adre huliwa kâu, me mano hnân uhni, me ta je huliwainy hia. 32 Ke ame he Eleazara nöku Arona at bihut he ka tuhan je thaniny at Levi, me homakan tavat adre me huliwan dok ae kap.

33 Haba lap anyin at Maheli, me lap anyin at Musi, me únyi ga Merari: wale li lap anyin at Merari. 34 Ke haba tavat adre aú gadra, a numerainy obaga hia, hwân ge tavat a khaca tehi me gan hon e, me ödra siks thauzan ke tu haded. 35 Ke haba thaniny hnyaban kamen je lap anyi Merari, me Zuriela nöku Abihaila: adre me he ka hunuma hnyi ke keihen uma mano ka hnyi hwadrö. 36 Ke haba hanymen adre ham ka laku Merari, me esöiny uma mano, me je venyâiny, me je utöiny ame tot, me je taben, me je omjehen hia, me ta je huliwainy hia; 37 me je khetepiny hak igigilö, me je taben e, me je faoiny e, me je wen e. 38 Ke haba tavat adre me he ka hunuma e deiö hnyi hnyimakan uma úkhacaköu wale ame o seúnö hnyin, me Mose, me Arona, me je lakon, he ka tuö hanymen hnyi dok ae kap, a hanymen lakon Isaraela; ke adre me he ka hlingá atkanyua at ame hakekenyâ e. 39 Haba tavat hia adre aú a at Levi, wale Mose me Arona ame aú helâ me hna húna hnö Iehova, hoton anyidra je lap, a obaga hia, hwân ge tavat a khaca tehi me gan hon e, me ödra twente tu thauzan.

40 Ke Iehova ame ha kö Mose, ka habe, He thö ka aú obaga hia, a je atö unyin lakon Isaraela, hwân ge tavat a khaca tehi me gan hon e, me aú numerainy je iödra. 41 Ke u me he ka hom at Levi hobi könya, (Inya Iehova) hnân bi hwaban je atö hia unyin lakon Isaraela; me omeno haleny at Levi, hnân bi hwaban omeno hia a bán haleny lakon Isaraela. 42 Ke haba Mose ame aú je atö hia unyin lakon Isaraela, helâ me Iehova ame húna kâu. 43 Ke

haba numerainy je ien obaga a je atö hia, hwân ge tavat a khaca tehi me gan hon e, a tavat adre aú gadra, me ödra twente tu thauzan ke tu haded ke sevente theri.

44 Ke haba Iehova ame ha kö Mose, ka habe, 45 U me he ka hom at Levi hnân bi hwaban je atö hia unyin lakon Isaraela, me omeno haleny at Levi, hnân bi hwaban haledra omeno: k' ame he ka hobi könya at Levi; Inya Iehova. 46 Ke haba hnân bi hwaban möt anyin tavat a tu haded ke sevente theri a je atö unyin lakon Isaraela, wale tavat ae nua biju hon úseiny at Levi, 47 me u ma he ka kap úsa thabúng je sekel hwaban ke at me ke at; u ma he ka kap e hoton sekeliny dok ae kap (haba sekel, me twente je gera): 48 ke u ma he ka ham mone, wale hwaban tavat ae nua biju gadra, kö Arona me lakon. 49 Ke haba Mose ame kap mone adre ham hnân bi hwaban möt anyin tavat ae nua biju hon úseiny tavat a bi hwaban anyidra möt hnen at Levi: 50 ke e ame kap ta je mone únyi ge ta je atöiny lakon Isaraela; a wan thauzan ke theri haded ke sikste faiv je sekel, hoton sekeliny dok ae kap: 51 ke haba Mose ame ham mone eling, wale adre bi hwaban kâu möt, kö Arona me lakon, helâ me hna ha hnö Iehova, hoton hna ha hnö Iehova kö Mose.

### HNYIMAKAN 4.

**K**E haba Iehova ame ha kö Mose me Arona, ka habe, 2 Aú úseiny laku Kohatha unyin laku Levi, hoton anyidra je lap, me je hnyaban lakamödra, 3 hwân ge tavat a thöte huna me gan hon e ke ne o but fíte huna, tavat hia adre me hnyi vat, he ka ányâ huliwa hnyi uma úkhacaköu. 4 Walang huliwa anyin laku Kohatha hnyi uma úkhacaköu, hnyi ta je únyi ae ti kap: 5 e ka hwân tavat ka he but, me hamö Arona me lakon he ka didrö, me ái mano a singiny, me tube tang ohnatho hnen e: 6 k' ame he ka ip hon e tubwiny unen takasa, me ulolo hon e imano ae udrudrá hia, me inâ li venyâiny. 7 Ke adre me he ka ulolo imano ae udrudrá hon laulau areto hnân omanená, me ip hon e je mini, me je spun, me je utkaia, me je kaia hnân hingálâ: ke ame he ka hnen hon e areto ae bala bi: 8 ke adre me he ka ulolo hon je únyi e imano ae dra vec, me tube je únyi e ge tubwiny a unen takasa, me inâ li

## NUMERA 4.

venyâiny. 9 Ke adre me he ka hom mano ae udrudrâ me tube taben lamepa hnân umumelam, me ta je lamepainy, me uthesi-ûniny, me je taben wahleûhleûiny, me je kaia wakaco hia, wale adre me huliwa kâu: 10 ke adre me he ka ip e me je omjehen hia hnyi hnyin tubwiny a unen takasa, me bi venyâiny. 11 Ke adre me he ka ulolo mano ae udrudrâ hon taben hut a gol, me tube e hnen tubwiny a unen takasa, me inâ li venyâiny: 12 ke adre me he ka hom je utkaia hia adre huliwa kâu, wale adre me huliwa kâu hnyi dok ae kap, me ip hnyi hnyin mano ae udrudrâ, me tube je ûnyi e hnen tubwiny a unen takasa, me bi venyâiny. 13 Ke adre me he ka aoc degecâ hnabadrôu ûnyi hnyi taben hut, me ulolo hon e imano ae udrudrâ blit: 14 ke adre me he ka ip hon e je utkaia hia, wale adre me huliwa kâu, a je taben meic, me je bâletiny hnân sêû utiö, me je soi, me je kaia, a je omjehen taben hut hia; ke adre me he ka ulolo hon e tubwiny a unen takasa, me inâ li venyâiny. 15 Ke e ka hia but tube dok ae kap hnö Arona me lakon, me omjehen dok ae kap hia, anyin ame he ka he but tavat; haba hnyi ûen e me ame he ka o je laku Kohatha he ka sukhöünâ: ke ca he ödra ka kâlâ ta je ûnyi ae kap, wâ ödra nye mokcu. Wale hanymen laku Kohatha hnyi uma ûkhacaköu. 16 Ke haba Eleazara nöku Arona at bihut ame he ka tuö wakaco hnân umumelam, me je unyi ae be so hnân le, me hudiny han a e bala bi, me wakaco hnân hû, me hanymen uma mano hia, me ta je ûnyi hia hnyin, me dok ae kap, me omjehen hia.

17 Ke Iehova ame ha kö Mose me Arona, ka habe, 18 Ca he öbu ka hna subâ tribuinny lap anyi Kohatha unyin at Levi: 19 ke walang ûnyi he ka ûnyâ ködra m' adre me möt, me ca mok hnyi ûen adre me hakekenyâ je ûnyi ae ti kap: haba Arona me lakon ödrin e he ka didrö, me ve kü ködrin ta je hanymödrin, me hon ödrin je hok: 20 ke ödrin e ca he ka didrö he ka hamâ dok ae kap, hnyi thuthubademak wâ ödrin nye mokcu.

21 Ke Iehova ame ha kö Mose, ka habe, 22 U me he ka aú minya laku Geresoma, hoton je hnyaban lakamödra, ke hoton anyidra je lap; 23 hwân ge tavat a thöte huna me gan hon e ke ne o but fifte huna u ma he ka öü ödrin; a ödra hia adre me didrö he ka hnyi huliwa me bi hanymen hnyi uma ûkhacaköu. 24 Walang je ha-

nymen je lap anyi Geresoma he ka bi huliwa me hije hok: 25 adre me he ka sukhöünâ je singiny uma mano, me uma ûkhacaköu, me ban ethö, me tubwiny a unen takasa a e hon, me singiny hwanumen uma ûkhacaköu; 26 me mano adre uhno hnyi hak, me tubwiny a hlinginy homagöuleny hak, wale hnyi uma mano me hnyi taben hut igigilö, me je wen e, me ta je omjehen huliwa hia, me ta je ûnyi hia adre ânyâ hobi kâu ta je ûnyi e, adre me he ka bi hanymen hnyin. 27 Hamö Arona me lakon he ka musö ta je huliwa hia anyin laku Geresoma hnyi je hanymödra hia, me anyidra ta je huliwa hia: ke öbun e he ka ve khenâ ködra he ka ve tuö je hanymödra. 28 Walang hanymen je lap anyin laku Geresoma hnyi uma ûkhacaköu: ke ame he ka musö hanymödra hnö Ithamara nöku Arona at bihut he ka ânyâ.

29 Ke haba laku Merari u me he ka öü ödra hoton anyidra je lap, hoton je hnyaban je lakamödra; 30 hwân ge tavat a thöte huna, u me he ka öü ödra, a ödrin hia adre me hnyi dit he ka hnyi huliwa, me ânyâ hanymen hnyi uma ûkhacaköu. 31 Walang je ûnyi hamödra he ka sukhöünâ hnyi anyidra je huliwa hia hnyi uma ûkhacaköu; je esöiny uma mano, me je venyâiny, me je utöiny ame tot, me je taben e; 32 me je khetepiny hak igigilö, me je taben e, me je faoiny, me je wen e, tha e me je omjehen hia, me je huliwainy hia: ke öbun e he ka aú ien ta je ûnyi wale hanymödra he ka sukhöünâ. 33 Wale hanymen je lap anyin je laku Merari, hoton anyidra je huliwa hnyi uma ûkhacaköu, ame musö ga Ithamara nöku Arona at bihut.

34 Ke haba Mose me Arona me je taben ûkhacaköu, ödrin e aú je laku Kohatha hoton anyidra je lap, me je hnyaban lakamödra, 35 hwân ge tavat a thöte huna me gan hon e ke ne o but tavat a fifte huna, ödra hia adre me hnyi huliwa me ânyâ hanymen hnyi uma ûkhacaköu: 36 ke haba tavat adre me aú hoton anyidra je lap, me ödra tu thauzan ke seven haded ke fifte. 37 Wale tavat adre aú ûnyi hnyi lap anyin at Kohatha, ödra hia adre me huliwa hnyi uma ûkhacaköu, wale hnö Mose me Arona hna aú hoton hna hûna hnö Iehova a deny Mose.

38 Ke haba tavat adre aú ûnyi hnyi laku Geresoma hoton anyidra je lap, me je hnyaban lakamödra, 39 hwân ge tavat a thöte huna me gan hon e ke ne o but tavat a

NUMERA 5.

fifte huna, ödra hia adre me hnyi huliwa, me anyâ hanymen hnyi uma ûkhacaköu, 40 wale tavat adre aú hoton anyidra je lap, me je hnyaban lakamödra, me ödra tu thauzan ke siks haded ke thöte. 41 Wale tavat adre aú únyi hnyi je lap anyin laku Geresoma, ödra hia adre me hnyi huliwa hnyi uma ûkhacaköu, wale hnö Mose me Arona hna aú hoton hna húna hnö Iehova.

42 Ke haba tavat adre me aú únyi hnyi je lap anyin je laku Merari hoton anyidra je lap me je hnyaban lakamödra, 43 hwân ge tavat a thöte huna me gan hon e ke ne o but tavat a fifte huna, ödra hia adre me hnyi huliwa me anyâ hanymen hnyi uma ûkhacaköu, 44 wale tavat adre me aú hoton anyidra je lap, me ödra theri thauzan ke tu haded. 45 Wale tavat adre aú únyi hnyi je lap anyin laku Merari, wale hnö Mose me Arona hna aú hoton hna húna hnö Iehova a deny Mose.

46 Ke haba tavat hia adre aú a at Levi, wale hnö Mose me Arona me je taben at Isaraela hna aú, hoton anyidra je lap, me je hnyaban lakamödra, 47 hwân ge tavat a thöte huna me gan hon e ke ne o but tavat a fifte huna, ödra hia adre me didrö he ka hnyi huliwa, me hijen je hok hnyi uma ûkhacaköu; 48 wale tavat adre me aú, me ödra eit thauzan ke faiv haded ke eite. 49 Adre me öú ödra hoton hna húna hnö Iehova a deny Mose, a ke at me ke at hoton anyin huliwa, me hok: adre öú ödra helâe hoton hna húna hnö Iehova kö Mose.

HNyimakan 5.

**K**E haba Iehova ome ha kö Mose, ka habe, 2 Húna ju ka lakon Isaraela m' adre me he ka kunâ ka hnyi hoton je hnyaba ta je lepera hia thithö, me tavat hia ame hingölö, me tavat adre me bo kong únyi ge komok: 3 öbun e he ka kunâ obaga me omomo, hamöbun he ka kun' ödrin ka hnyi hoton je hnyaba; wâ ödra nye obokongu' öbun, a hnyei oge me laba hnyin. 4 Ke haba lakon Isaraela adre me anyâ helâe, me kun' ödrin ka hnyi hoton je hnyaba: ke a anyâ lakon Isaraela hoton hna húna hnö Iehova kö Mose.

5 Ke Iehova ame ha kö Mose, ka habe, 6 Ha thö ka lakon Isaraela, ka habe, E ka he бага ame ne momo ka anyâ ke hwakecin ae kong, k' ame monu hnyi hnyimakö Iehova, ke hulö but at eling; 7 me hamödra he ka omanená anyidra hulö waleji adre me anyâ:

k' adre me he ka bi hwaban bekhötâ anyidra hulö, me bi hanen ke keihen a thabúnginy ka hnyin, me ham ka at waleji e ame monu kâu. 8 Ke ame ne ba ke liamekeiny më at he ka ham hwaban monu kâu, me haba hwaban hulö adre bi hwaban kö Iehova ame he ka hobi kâu at bihut; ke ca ha bi mamoe бага hnân úcú möt, wale hnân úco anyin möt. 9 Ke haba je hudiny kap gö-ranyai únyi hnyi je únyi ae kap hia anyin at Isaraela, wale adre labö hom ka at bihut, me wale hnân hobi kâu e. 10 Ke hobi kâu e ta je únyi a kapiny tavat: haba ta je únyi ame he ka ham hnen ke at ka at bihut, me wale hobi kâu.

11 Ke Iehova ame ha kö Mose, ka habe, 12 Ha thö ka lakon Isaraela, me ha ködra, ka habe, A ne monu áiân ke бага, me ame anyâ hulö kâu, 13 k' ame tha mokut me ke бага, k' ame ikhâlâ e ge áiân, me iyong, k' ame kong ut momo, ke ba at ame wâ hnân ohnathoâ, k' adre ca lelö e hnyi hnen hna anyâ; 14 ke ame ciâ бага hnyi hnyekon, k' ameciâ ge áiân a momo, k' ame kong ut momo: ke haba khaca, ame ne o ciâ hnyi hnyekon, ame ciâ ge áiân a momo, k' adre ca okongoâ: 15 me hamen бага he ka hom áiân ka at bihut, k' ame he ka hom anyin hut hobi kâu e, a tap falawa bali a khaca omer; k' ame ca he ka hú e ge wakaco; k' ame ca he ka bi libanu ka hnyin; anyin a hudiny ciâ eling me hudiny oúnykúmeâ, hnân oúnykúmeâ hulö. 16 Ke hamen at bihut he ka hom momo hakekeny, me ip e hnyi hnyimakö Iehova: 17 k' ame he at bihut ka hom köiö ae kap hnyi kaia kânâ; k' ame he at bihut ka aoc sesâ hnyi kânâ eiö hnyi uma mano, me khûâ ka hnyi utköiö: 18 ke hamen at bihut he ka otilâ momo hnyi hnyimakö Iehova, me hna but leúnen ban momo, me ip hnyi hnyamen hudiny oúnykúmeâ, a wale hudiny ciâ: ke e hnyi hnyamen at bihut köiö ae hiny at ame ohnaúhangöâ: 19 k' ame he at bihut ka kunâ momo he ka khemanyin, me ha kâu, ka habe, U je ne ca tha mokut me ke бага, a ca áiâm bi, ke u je ne ca saú ka hnyi únyi ae ikiki, awe, u me he ka gufa ge utköiö ae hiny eang, at ame ohnaúhangöâ: 20 ke u je ne hia but monu me ke at a ca áiâm, k' adre okongu u, ke a ne hia but tha mokut möu ke at ke ca áiâm bi: 21 me hamen at bihut he ka kunâ momo he ka khemanyin a khemanyin hnân ohnaúhangöâ, k' ame he at bihut ka ha ka momo, ka kabe, Ame he Iehova ka wiö u hnân hangâ me khemanyin hnyi wanben em

## NUMERA 6.

hnyei, e ka he Iehova ka oavâ jevam me okhibö hnyekom; 22 ke haba utköiö eang at ame ohnaúhangöâ ame ke ka dit ka hnyi hnyekom, me okhibö hnyekom, me oavâ jevam: ke ame he momo ka ha, Amen, Amen. 23 Ke hamen at bihut he ka sihnalimen je úhangö eling hnyi ke tusi, me hneú degecâ hmetu hnyi utköiö ae hiny: 24 ke e ame he ka habelen momo ge utköiö ae hiny at ame ohnaúhangöâ: k' ame he köiö at ame ohnaúhangöâ ka dit ka hnyi hnyekon me me hiny jut. 25 Ke ame he at bihut he ka hom hudiny ciâ únyi hnyi hnyamen momo, me hajijingâ hut eling hnyi hnyimakö Iehova, me hom ka hnyi taben hut: 26 ke hamen at bihut he ka okhaca aoc hudiny falawa ge hnyamen, hnân oúnykúmeâ, me le hon taben hut, ke hwaban e, e ame he ka habelen momo ge utköiö. 27 Ke e ka hia but habelen momo ge utköiö, ke ame ne monu but momo, k' ame ne hia but ányâ hulö ka áiân, me ame he utköiö at ame ohnaúhangöâ ka dit eú hnyi hnyekon, me me hiny jut, me ame he ka khibi hnyekon, me oavâ jevan: ke ame he ka hnaúhangö momo hnyi wanben iny hnyei. 28 Ke adre me ne ca hia but okongoâ momo, k' ame ne bo so; awe, ame ke ka he bâu bi momo, k' ame he ka erkin bi. 29 Wale hnanyibuiny ciâ, e ka monu but momo me ke at, a ca áiân bi, me me kong ut: 30 ke ame ne hwân hnyekon бага he ka cia, k' ame ciâ áiân momo; me ame he бага ka ip áiân momo hnyi hnyimakö Iehova, me ame he at bihut ka ányâ kâu hnanyibu eang hia. 31 Ke ame he ka he baú bi бага ge hulö, k' ame he momo ka hom takoú anyin hulö.

### HNYIMAKAN 6.

**K**E Iehova ame ha kö Mose, ka habe, 2 Ha thö ka lakon Isaraela me ha ködra, ka habe, Ame ne he ke бага ame ne momo ka hûkâlâ khöbi ae únyi hnathu, wale khöbi anyin at Nazeri, he ka okabâ e bi kö Iehova: 3 me e ame he ka úsákáúö me waina me grâg; k' ame ca he ka ic vinegainy waina, me vinegainy grâg; k' ame ca he ka ijem dân je wan vine, k' ame ca he ka han je wan vine ae lup me meleca. 4 Haba hnyi je bong hia adre okabâ e hnyin, me e ame ca he ka han ke únyi adre ányâ ge vine, hwân ge önyen ke ne o but ka hnyi unen. 5 Hnyi je bong hia adre okabâ e ge khöbi, adre me ca he ka kâlâ ban ge hele-

úgi: ke e ame he ka kap ke ne o but ame bekhöt ut je bong e ame okabâ e kö Iehova hnyin, k' ame he ka hna ban. 6 E ame ca he ka hakekenyâ komok hnyi je bong hia e ame okabâ e kö Iehova. 7 E ame ca he ka obokono e bi ge kamen, me hinyen, me liamekeiny mē, me haniny, ödrin ka mokcu: anyin a e bi hon ban hanen hna okabâ e bi ka Khong. 8 E kap kö Iehova hnyi je bong hia adre okabâ e hnyin. 9 Ke ame ne ie mok hwege ke at unyin, me me bo kong ut ban e ame okabâ; me e ame he ka giâ ban hnyi bong adre obosoâ e hnyin, k' ame he ka giâ hnyi bong a seven. 10 Ke haba hnyi bong a eitiny, me e ame ke ka hom li biny, ame ne li nokon meköta, ka at bihut, ka hnyi hwanumen uma úkhacaköu: 11 k' ame he at bihut ka hudo khaca hnân hudiny hulö, ke khaca hnân hudiny leú, me me bi hwaban anyin möt, anyin a kong ut ge únyi ae mok, k' adre me he ka okabâ hmeto ban hnyi bong eling. 12 Ke e ame he ka okabâ kö Iehova je bong e ame okabâ e hnyin, me hom nokon mamoe бага a khaca hunainy hnân hudiny monu: ke ame he ka únyi baú je bong a bân anyin ae kong ut hnen hna okabâ e.

13 Ke walang hnanyibuiny at Nazari, e ka bekhöt ut je bong e ame okabâ e hnyin; adre me he ka hom e ka hnyi hwanumen uma úkhacaköu: 14 ke e ame he ka hudo anyin hut kö Iehova, a nokon mamoe бага a khaca ae ba hnyikongon, a khaca hunainy, me hnân hudiny leú, ke khaca nokon mamoe momo ae ba hnyikongon, a khaca hunainy, me hnân hudiny hulö, ke khaca mamoe бага ae ba hnyikongon hnân hudiny ole, 15 me tang areto adre ca levenâ, je ong areto adre úthúeniken me wakaco, me je areto ae halelöu adre ca levenâ k' adre khino wakacoiny, me hudiny han, me hudiny ic. 16 Ke ame he at bihut ha hom ta je únyi e ka hnyi hnyimakö Iehova, me hudo hudiny anyin hulö, me hudiny leú: 17 ke e ame he ka hudo mamoe бага hnân hudiny ole kö Iehova, tha e me tang areto adre ca levenâ: k' ame he at bihut ka hudo hudiny han, me hudiny ic. 18 Ke ame he at Nazeri ka giâ baniny hna okabâ e hnyi hwanumen uma úkhacaköu, me hom leúnen baniny han okabâ e, me khúâ ka hnyi meic eú hmelen hudiny ole. 19 Ke ame he at bihut ka hom benyin mamoe бага ae mesök, me khaca ong areto adre ca levenâ únyi hnyi tangen, me khaca areto ae halelöu adre ca levenâ, me ip ta je únyi

## NUMERA 7.

e hon li hnyamen at Nazeri e ka hia but giã ge hna okabâ : 20 ke ame he at bihut ka hajijingã je únyi e hnân hudiny hajijing hnyi hnyimakö Iehova ; wale únyi ae kap hobi kâu at bihut, tha e me úlainy hajijing, me benyin hnân kap göranyai : ke hwaban e, e khana at Nazeri he ka ic waina. 21 Wale hnanyibuiny at Nazeri at ame ip khöbi, me anyin hut kö Iehova hnyi hnen hna okabâ e, me ke je únyi ame ne hu gan : e ame he ka ányã hoton hnanyibuiny hnen hna okabâ, helã me anyin khöbi wale hnyi hnen hna bi khöbi.

22 Ke Iehova ame ha kö Mose, ka habe, 23 Ha thö kö Arona me lakon, ka habe, Walang hwakecin he ka hahnahicã lakon Isaraela : öbun e he ka ha ködra, ka habe,

24 Ame he Iehova ka ohnabici u, me tuö u :

25 Ame he Iehova ka omelamá hnyimakan hom, me betenge gam :

26 Ame he Iehova ka ogöranyã hnyimakan hom, me ham köu úsoköu.

27 Ke adre me he ka ip iök hon lakon Isaraela helãe ; ke oge me he ka ohnabici ödra bi.

### HNYIMAKAN 7.

**K**E hnyi bong a um dö Mose otilã uma mano, me hú me okabâ e, me je omjehen e hia, me taben hut me je utkaiainy hia, me hú me okabâ ta je únyi e ; 2 waleji a ham hnen je tuhan at Isaraela, a taben je lap anyin lakamödra ; a je thainy je tribu, waleji adre otilã hon tavat adre aú : 3 ke adre me hom anyidra je bwihlany kö Iehova, a siks je kat adre tube hon, ke twelv je bolok ; úsa khaca kat ge lo li than, ke úsa khaca bolok, ke adre me hom ta je únyi e ka hnyi hnyimakan uma mano. 4 Ke Iehova ame ha kö Mose, ka habe, 5 Hom je únyi e únyi gadra me me hobi kâu huliwa hnyi uma úkhacaköu ; ke u me he ka ham ka at Levi, hoton je ve huliwa. 6 Ke haba Mose ame hom je kat me je bolok me ham ka at Levi. 7 Ke e ame ham ha laku Geresoma lo li kat me vak ta bolok, hoton anyidra huliwa : 8 ke e ame ham ka laku Merari vak ta kat me eit ta bolok, hoton anyidra huliwa, k' ame he Ithamara nöku Arona at bihut he ka muso. 9 Ke e ame ca ham bi ka laku Kohatha : anyin adre me huliwa eiö hnyi dok ae kap ; k' adre me vadren hon je bajibenyidra. 10 Ke haba je than ödrin e ham bwihlany hnân okabâ

taben hut hnyi bong adre me hú e hnyin, haba je than ödrin e hudo anyidrin hut hnyi hnyimakan taben hut. 11 Ke Iehova ame ha kö Mose, ka habe, Ame he je than ka ve hudo anyidrin je hut hnyi anyidrin bi je bong, hnân okabâ taben hut.

12 Ke haba at ame hudo anyin hut hnyi bong a bán, me Nasona, nöku Aminadaba, únyi hnyi tribu Juda : 13 ke haba anyin hut, me khaca mini sileva, a wan haded ke thöte je sekel ihmakiny, ke khaca kaia sileva a sevente je sekel, hoton sekeliny dok ae kap : a unöngöt li unyi e ge falawa ae so adre úhaniken me wakaco, hnân hudiny han ; 14 ke khaca spun gol a ten je sekel, ae unöngöt ge únyi ae bo so hnân le ; 15 ke khaca nak bolok, ke khaca mamoe бага, ke khaca nokon mamoe бага a khaca hunainy hnân hudiny leú ; 16 ke khaca got бага hnân hudiny hulö ; 17 ke hnân hudiny ole lo li bolok, ke thabúng ta mamoe бага, ke thabúng ta got бага, ke thabúng ta nokon mamoe бага a khaca hunainy. Wale hut anyi Nasona, nöku Aminadaba.

18 Ke hnyi bong a loiny, haba Nathaniela, nöku Zuara, thaniny at Isakara, ame hudo : 19 ke e ame hudo anyin hut a khaca mini sileva a wan haded ke thote je sekel ihmakiny, ke khaca kaia sileva a sevente je sekel, hoton sekeliny dok ae kap ; a unöngöt li únyi e ge falawa ae so adre úhaniken me wakaco, hnân hudiny han ; 20 ke khaca spun gol a ten je sekel, ae unöngöt ge únyi ae bo so hnân le ; 21 ke khaca nak bolok, ke khaca mamoe бага, ke khaca nokon mamoe бага a khaca hunainy, hnân hudiny leú ; 22 ke khaca got бага, hnân hudiny hulö ; 23 ke hnân hudiny ole, lo li bolok, ke thabúng ta mamoe бага, ke thabúng ta got бага, ke thabúng ta nokon mamoe бага a khaca hunainy : wale hut anyi Nathaniela, nöku Zuara.

24 Ke haba hnyi bong a kuniny, Eliaba, nöku Helona, thaniny je laku Zebulona : 25 ke haba anyin hut, me khaca mini sileva a wan haded ke thöte je sekel ihmakiny, ke khaca kaia sileva a sevente je sekel hoton sekeliny dok ae kap ; a unöngöt li únyi e ge falawa ae so adre úhaniken me wakaco, hnân hudiny han ; 26 ke khaca spun gol a ten sekel, ae unöngöt ge únyi ae bo so hnân le ; 27 ke khaca nak bolok, ke khaca mamoe бага, ke khaca nokon mamoe бага, a khaca hunainy, hnân hudiny leú ; 28 ke khaca got бага, hnân hudiny hulö ; 29 ke hnân hudiny ole, lo li bolok, ke

## NUMERA 7.

thabúng ta mamoe baga, ke thabúng ta got baga, ke thabúng ta nokon mamoe baga a khaca hunainy: wale hut anyi Eliaba nöku Helona.

30 Ke haba hnyi bong a vakiny, Elizura, nöku Sedeura, thaniny laku Reubena: 31 ke haba anyin hut, me khaca mini sileva a wan haded ke thöte je sekel ihmakiny, ke khaca kaia sileva, a sevente je sekel, hoton sekeliny dok ae kap; a unöngöt li únyi e ge falawa ae so adre úhaniken me wakaco, hnân hudiny han; 32 ke khaca spun gol a ten je sekel ae unöngöt ge únyi ae bo so hnân le; 33 ke khaca nak bolok, ke khaca mamoe baga, ke khaca nokon mamoe baga a khaca hunainy, hnân hudiny leú; 34 ke khaca got baga, hnân hudiny hulö; 35 ke hnân hudiny ole, lo li bolok, ke thabúng ta mamoe baga, ke thabúng ta got baga, ke thabúng ta nokon mamoe baga a khaca hunainy: wale hut anyi Elizura, nöku Sedeura.

36 Ke haba hnyi bong a thabúng, Selumiela nöku Zurisadai, thaniny je laku Simeona: 37 ke haba anyin hut, me khaca mini sileva, a wan haded ke thöte je sekel ihmakiny, ke khaca kaia sileva a sevente je sekel, hoton sekeliny dok ae kap; a unöngöt li únyi e ge falawa ae so adre úhaniken me wakaco, hnân hudiny han; 38 ke khaca spun gol a ten je sekel ae unöngöt ge únyi ae bo so hnân le; 39 ke khaca nak bolok, ke khaca mamoe baga, ke khaca nokon mamoe baga a khaca hunainy, hnân hudiny leú; 40 ke khaca got baga hnân hudiny hulö; 41 ke hnân hudiny ole, lo li bolok, ke thabúng ta mamoe baga, ke thabúng ta got baga, ke thabúng ta nokon mamoe baga a khaca hunainy: wale hut anyi Selumiela, nöku Zurisadai.

42 Ke haba hnyi bong a siksiny, Elisafa, nöku Deuela, thaniny je laku Gada: 43 ke haba anyin hut, me khaca mini sileva a wan haded ke thöte je sekel ihmakiny, ke khaca kaia sileva a sevente je sekel hoton sekeliny dok ae kap; a unöngöt li únyi e ge falawa ae so adre úhaniken me wakaco, hnân hudiny han; 44 ke khaca spun gol a ten je sekel ae unöngöt ge únyi ae bo so hnân le; 45 ke khaca nak bolok, ke khaca mamoe baga, ke khaca nokon mamoe baga a khaca hunainy, hnân hudiny leú; 46 ke khaca got baga hnân hudiny hulö; 47 ke hnân hudiny ole, lo li bolok, ke thabúng ta mamoe baga, ke thabúng ta got baga, ke thabúng ta nokon mamoe baga a khaca

hunainy: wale hut anyi Eliasafa, nöku Deuela.

48 Ke haba hnyi bong a seveniny Elisama, nöku Amihuda, thaniny je laku Eferaima: 49 ke haba anyin hut, me khaca mini sileva a wan haded ke thöte je sekel ihmakiny, ke khaca kaia sileva a sevente sekel hoton sekeliny dok ae kap, a unöngöt li únyi e ge falawa ae so adre me úhaniken me wakaco, hnân hudiny han; 50 ke khaca spun gol a ten sekel, ae unöngöt ge únyi ae bo so hnân le; 51 ke khaca nak bolok, ke khaca mamoe baga, ke khaca nokon mamoe baga a khaca hunainy, hnân hudiny leú; 52 ke khaca got baga, hnân hudiny hulö; 53 ke hnân hudiny ole, lo li bolok, ke thabúng ta mamoe baga, ke thabúng ta got baga, ke thabúng ta nokon mamoe baga a khaca hunainy: wale hut anyi Elisama, nöku Amihuda.

54 Ke haba hnyi bong e eitiny, Gamaliela, noku Pedazura, thaniny je laku Manase; 55 ke haba anyin hut, me khaca mini sileva a wan haded ke thöte je sekel ihmakiny, ke khaca kaia sileva a sevente je sekel, hoton sekeliny dok ae kap, a unöngöt li únyi e ge falawa ae so adre úhaniken me wakaco hnân hudiny han; 56 ke khaca spun gol a ten sekel, ae unöngöt ge únyi ae bo so hnân le; 57 ke khaca nak bolok, ke khaca mamoe baga, ke khaca nokon mamoe baga a khaca hunainy, hnân hudiny leú; 58 ke khaca got baga hnân hudiny hulö; 59 ke hnân hudiny ole, lo li bolok, ke thabúng ta mamoe baga, ke thabúng ta got baga, ke thabúng ta nokon mamoe baga a khaca hunainy; wale hut anyi Gamaliela, noku Pedazura.

60 Ke haba hnyi bong a naininy, Abidana, nöku Gideona, thaniny je laku Beniamina: 61 ke haba anyin hut, me khaca mini sileva a wan haded ke thöte je sekel ihmakiny, ke khaca kaia sileva a sevente je sekel hoton sekeliny dok ae kap, a unöngöt li únyi e ge falawa ae so adre úhaniken me wakaco, hnân hudiny han; 62 ke khaca spun gol a ten sekel ae unöngöt ge únyi ae bo so hnân le; 63 ke khaca nak bolok, ke khaca mamoe baga, ke khaca nokon mamoe baga a khaca hunainy hnân hudiny leu; 64 ke khaca got baga hnân hudiny hulö; 65 ke hnân hudiny ole, lo bi bolok, ke thabúng ta mamoe baga, ke thabúng ta got baga, ke thabúng ta nokon mamoe baga a khaca hunainy: wale hut anyi Abidana, nöku Gideona.



## NUMERA 8.

66 Ke haba hnyi bong a teniny, Ahiezera, nöku Amisadai, thaniny je laku Dana : 67 ke haba anyin hut, me khaca mini sileva a wan haded ke thöte je sekel ihmakiny, ke khaca kaia sileva a sevente sekel hoton sekeliny dok ae kap, a unöngöt li únyi e ge falawa ae so adre úhaniken me wakaco, hnân hudiny han ; 68 ke khaca spun gol a ten sekel, ae unöngöt ge únyi ae bo so hnân le ; 69 ke khaca nak bolok, ke khaca mamoe бага, ke khaca nokon mamoe бага a khaca hunainy, hnân hudiny leú ; 70 ke khaca got бага hnân hudiny hulö ; 71 ke hnân hudiny ole, lo li bolok, ke thabúng ta mamoe бага, ke thabúng ta got бага, ke thabúng ta nokon mamoe бага a khaca hunainy : wale hut anyi Ahiezera, nöku Amisadai.

72 Ke haba hnyi bong a eleveniny, Pagiela, nöku Okerana, thaniny je laku Asera : 73 ke haba anyin hut, me khaca mini sileva a wan haded ke thöte je sekel ihmakiny, ke khaca kaia sileva a sevente sekel, hoton sekeliny dok ae kap, a unöngöt li únyi e ge falawa ae so adre úhaniken me wakaco, hnân hudiny han ; 74 ke khaca spun gol a ten sekel, ae unöngöt ge únyi ae bo so hnân le ; 75 ke khaca nak bolok, ke khaca mamoe бага, ke khaca nokon mamoe бага a khaca hunainy, hnân hudiny leú ; 76 ke khaca got бага hnân hudiny hulö ; 77 ke hnân hudiny ole, lo li bolok, ke thabúng ta mamoe бага, ke thabúng ta got бага, ke thabúng ta nokon mamoe бага a khaca hunainy : wale hut anyi Pagiela, nöku Okerana.

78 Ke haba hnyi bong a twelviny, Ahira, nöku Enan, thaniny je laku Nafatali : 79 ke haba anyin hut, me khaca mini sileva a wan haded ke thöte je sekel ihmakiny, ke khaca kaia sileva a sevente sekel hoton sekeliny dok ae kap, a unöngöt li únyi e ge falawa ae so adre úhaniken me wakaco, hnân hudiny han ; 80 ke khaca spun gol a ten sekel, ae unöngöt ge únyi ae bo so huân le ; 81 ke khaca nak bolok, ke khaca mamoe бага, ke khaca nokon mamoe бага a khaca hunainy, hnân hudiny leú ; 82 ke khaca got бага hnân hudiny hulö ; 83 ke hnân hudiny ole, lo li bolok, ke thabúng ta mamoe бага, ke thabúng ta got бага, ke thabúng ta nokon mamoe бага a khaca hunainy : wale hut anyi Ahira nöku Enan.

84 Wale hnân okabâ taben hut, hnyi bong thaniny at Isaraela ame hú e hnyin : a twelv je mini sileva, ke twelv je kaia

sileva, ke twelv je spun gol : 85 úsa wan haded ke thöte je sekel ihmakiny je mini sileva, ke úsa sevente sekel je kaia : haba ihmakiny silevainy je kaia hia, me tu thauzan ke foa haded je sekel, hoton sekeliny dok ae kap ; 86 ke twelv je spun gol ae unöngöt ge únyi ae bo so hnân le, a úsa ten sekel ihmakiny, hoton sekeliny dok ae kap : haba goliny hia je spun, me wan haded ke twente je sekel : 87 ke haba je bolok hia hnân hudiny leú, me twelv je bolok, ke twelv je mamoe бага, ke twelv je nokon mamoe бага, a khaca hunainy, me je hudiny han : ke je got бага a twelv hnân hudiny hulö : 88 ke haba je bolok hia hnân hudiny ole, me twente foa je bolok, ke sikste je mamoe бага, ke sikste je got бага, ke sikste je nokon mamoe бага a khaca hunainy. Wale hnân okabâ taben hut hnyi hna hú e. 89 Ke hnyi úen ame didrö Mose ka hnyi uma úkhacaköu he ka úhnenamö më, me e ame löng Hwan ame fuc kâu úheny thö hon taben ibetengiö wale hon tang ohnatho, úheny hnyi wanben li kerubi : ke e ame fuc kâu.

### HNYIMAKAN 8.

**K**E haba Iehova ame ha kö Mose, ka habe, 2 Ha thö kö Arona, ka habe, U ka he ka vác je lamepa, ame he je lamepa a seven ka umumelam hnyi hnyimakan taben lamepa. 3 Me Arona ame ányâ eling ; k' ame vác je lamepa hnyi hnyimakan taben lamepa, helâ me Iehova ame ha kö Mose. 4 Ke walang hna huliwan taben lamepa, a gol adre huliwan ge hama ; wale taben ke ne o but je vongon adre huliwan ge hama : e ame ányâ taben lamepa hoton tulut a omanená Iehova kö Mose.

5 Ke Iehova ame ha kö Mose, ka habe, 6 Hom dö tavat Levi únyi hnyi wanben lakon Isaraela, me obosoi ödra. 7 Ke walang hnâm hna he ka ányâ ködra, m' adre me he ka bo so : u ma duköi' ödra ge köien obosoa, k' adre me he ka giâ je unyidra hia, me hneú anyidra je úkhaú, me obosoi ödra. 8 Ke adre me he ka hom nak bolok, me hudiny han, a falawa ae so adre úhaniken me wakaco, ke u me he ka hom ke nak bolok hnân hudiny hulö. 9 Ke u me he ka hom at Levi ka hnyi uma úkhacaköu : ke u me he ka úkhacaköuâ tavat, a lokon Isaraela hia : 10 ke u me he ka hom tavat Levi ka hnyi hnyimakö Iehova : ke hamen lakon Isaraela he ka ip

NUMERA 9.

je hnyamödra hon je at Levi; 11 k' ame he Arona ka hajijingâ tavat Levi hnyi hnyimakö Iehova hnân hudiny hajijing ûnyi ge lakon Isaraela, m' adre me he ka hnân hobi kâu huliwa anyi Iehova. 12 Ke hamen tavat Levi he ka ip je hnyamödra hon ban li bolok: ke u me he ka hudo khaca hnân hudiny hulö, me khaca hnân hudiny leû, kö Iehova, me me bi hwaban möt anyin tavat Levi. 13 Ke u me he ka otîlâ je at Levi hnyi hnyimakö Arona me lakon, me hajijingi ödra hnân hudiny hajijing kö Iehova. 14 Ke u me he ka ke ip tavat Levi helâe ûnyi hnyi wanben lakon Isaraela: ke hnân hobi kõnya tavat Levi. 15 Ke hwaban dö e ame he tavat Levi ka didrö he ka huliwa hnyi uma ûkhacaköu: ke u me he ka obosoi ödra, me hajijingi ödra hnân hudiny hajijing. 16 Anyin adre ham mu' ödra kõnya ûnyi hnyi wanben lakon Isaraela; oge me hum ödra hobi kõnya, hnyi hnen je nokon a bân hia, a je atö hia hnyi lakon Isaraela. 17 Anyin a hobi kõnya je atö hia unyin lakon Isaraela, a tavat me omeno: oge me okabi ödra hobi kõnya hnyi bong waleji oge me kot hnyin je nokon a bân hia hnyi hnyei Aigupito. 18 Ke oge me hom tavat Levi hnân bi hnen je nokon hia a bân unyin lakon Isaraela. 19 Oge me ham muâ tavat Levi kö Arona me lakon, ûnyi hnyi wanben lakon Isaraela, he ka ânyâ huliwa anyin lakon Isaraela hnyi uma ûkhacaköu, me bi hwaban möt anyin lakon Isaraela: me me ca he ka mok lakon Isaraela, e ka hakeny lakon Isaraela ka hnyi dok ae kap. 20 Ke haba Mose, me Arona, me ûkhacaköu hia anyin lakon Isaraela, me adre me ânyâ helâe ka tavat Levi: hoton hna hûna hnö Iehova kö Mose ge tavat Levi: ame ânyâ ködra helâe hnen lakon Isaraela. 21 Ke haba tavat Levi adre me obosoi ödra bi ûnyi hnyi hulö, me hneû anyidra je ûkhaû; ke haba Arona ame hajijingi ödra hnân hudiny hajijing hnyi hnyimakö Iehova; ke Arona ame bi hwaban anyidra möt me obosoi ödra. 22 Ke hwaban e, haba tavat Levi adre me didrö ka hnyin uma ûkhacaköu he ka hnyi huliwa hnyi hnyimakö Arona me lakon: hoton hna ha hnö Iehova kö Mose ge at Levi, ödra adre me ânyâ helâe ködra.

23 Ke Iehova amê ha kö Mose, ka habe, 24 Walang bongon tavat Levi: haba hwân hnyi twente faiv je hunaidra me gan hon e adre me he ka didrö he ka labö huliwa

hnyi uma ûkhacaköu: 25 ke e ka fifte je hunaidra me adre me he ka bi obiny anyidra huliwa, k' adre me ca he hmetu ka hnyi huliwa; 26 ke adre me he ka labö huliwa tha ödra me je liamekeiny mödra hnyi uma ûkhacaköu, he ka tuö je hanyemen, k' adre me ca he ka hnyi ânyâ huliwa. U ma he ka ânyâ helâe ka at Levi ge je hanymödra.

HNYIMAKAN 9.

**K**E Iehova ame ha kö Mose hnyi hnyebuba Sinai, hnyi tehi a bân hnyi huna a loiny, hwaban hnödra hna he but ûnyi hnyi hnyei Aigupito, ka habe, 2 Hamen lakon Isaraela he ka ânyâ paseka hnyi ûen adre thu. 3 Hnyi bong a fortininy tehi eang, hnyi sabac, öbun e he ka tuö e hnyi ûen adre thu: hoton je hnanyibuiny hia me je bongon hia öbun e he ka ânyâ e. 4 Ke haba Mose ame ha ka lakon Isaraela, m' adre me he ka ânyâ paseka. 5 Me adre me ânyâ paseka hnyi tehi a bân, hnyi bong a fortininy hnyi sabac hnyi hnyebuba Sinai: haba lakon Isaraela adre me ânyâ hoton hna hûna hnö Iehova kö Mose. 6 Ke wale ke je hnyat ödrin e bo kong ûnyi ge komok, ke ca ueû ködrin he ka hnyi hanen paseka hnyi bong eling: me ödrin e he kö Mose me Arona hnyi bong eling: 7 ke haba hnyat eling ödrin e ha kâu, ka habe, Öhmun e bo kong ut ûnyi ge komok: ieû gadra adre me ovheli öhmun, m' öhmun e ca he ka hnyi hudo hut kö Iehova hnyi ûen adre thu, tha öhmun me lakon Isaraela; 8 Ke haingö Mose ködrin, ka habe, Me tot u öbun, m' inye he ka löng hofuc ho Iehova gabun.

9 Me haba Iehova ame ha kö Mose, ka habe, 10 Ha thö ka lakon Isaraela, ka habe, Ame ne he ke at gabun, me je mátrânibun nyiele, ame bo kong ûnyi ge komok, k' ame ne he but ka hnyi ke dok ae sâkâú, me, hamen he ka hnyi ânyâ paseka kö Iehova: 11 adre me he ka tuö e hnyi tehi a loiny hnyi bong a fortininy hnyi sabac; k' adre me he ka tha han e me areto adre ca levenâ, me je khölak ae hiny: 12 ke adre me ca he ka ip hanen ke ne o but hnyi hnyomakatu, k' adre me ca he ka thu jeien: adre me he ka ânyâ paseka hoton je hnanyibuiny hia. 13 Ke haba at ae bo so, k' ame ca hnyi he but, k' ame ca hnyi hanen paseka, me adre me he ka subâ degeca at eling ûnyi hnyi iny hnyei: anyin a e ame ca hom hut kö

## NUMERA 10.

Iehova hnyi úen adre thu, k' ame he ka takou at eling hnen anyin hulö. 14 Ke ame ne tha laba möbun ke atkanyua, k' ame hnyi behanen paseka kö Iehova; me e ame he ka ányá hoton hnanyibuiny paseka me hwakecin: khaca thibi hnanyibu köbun ge atkanyua me aten hnyei.

15 Ke haba hnyi bong adre me otilâ uma mano hnyin, me ame tube uma mano hnen úlá, wale uma ohnatho: ke haba hnyi sahae e ame mokut hon uma mano helâ me meic ke ne o but hnyomakatu. 16 K' ame helâe bala: haba úlá ame tube e hnyi lany, ke helâ me meic hnyi lit. 17 Ke adre me ne kap göranyai úlá únyi hnyi hon uma, me hwaban e haba lakon Isaraela adre me he: ke haba dok ame tot hnyin úlá, wale dok ame hunuma hnyin lakon Isaraela. 18 Haba lakon Isaraela adre me he hnyi úen Iehova ame húna, k' adre me hunuma hnyi úen e ame húna: haba hnyi ta je bong hia wale úlá ame laba hon uma mano, me adre me laba. 19 Ke ame ne laba úlá hon uma mano hnyi je bong ae se, me haba lakon Isaraela adre me tuö hna otilâ hnö Iehova, k' adre me ca he bi. 20 Ke haba hnyi ke je úen, me ame laba úlá hon uma mano hnyi je bong ae wakhalet; me ödra adre me hunuma bala hoton hna húna hnö Iehova, ke adre me he hoton hna húna hnö Iehova. 21 Ke haba hnyi ke je bong me ame laba úlá hwân hnyi sahac ke ne o but hnyomakatu; ke ödra ka kap göranyai úlá hnyi hnyomakatu, me adre me he: k' ame ne lany, k' ame ne lit, hnyi úen adre me hom göranyai úlá, me adre me he. 22 Ame ne lo thibi li bong, ame ne khaca tehi, ame ne khaca huna, k' ame ne e bi úlá hon uma mano, me labö e, me haba lakon Isaraela adre me laba, me ca he bi: ke hnyi úen adre me kap göranyai e, me adre me he. 23 Hnyi musi anyi Iehova adre me laba, ke hnyi musi anyi Iehova adre me he: k' adre me tuö hna otilâ hnö Iehova, hoton musi anyi Iehova a deny Mose.

### HNYIMAKAN 10.

**K**E Iehova ame ha kö Mose, ka habe, 2 U me he ka tibet li trutru sileva; u me he ka huliwan ge hama: ke wale li únyi hnân hawâ úkhacaköu, me hnân he je bunyen. 3 Ke ödra ka he ka tuâ, me ame he ka úkhacaköu köu tavat hia hnyi hwanumen uma úkhacaköu. 4 Ke ödra ka he

ka okhaca tuâ, me ame he ka úkhacaköu köu ta je than, a je taben je thauzan unyin at Isaraela. 5 Ke öbun ka tuâ hnahna, me ame he ka he tavat adre me hunuma hnyi ke keihen e deiö. 6 Ke öbun ka olo tuâ hnahna, me ame he ka he tavat adre me hunuma hnyi ke keihen ka hnyi hwa-iöu: ödra ka ke ka tuâ hnahna me hnân ohei ödra. 7 Ke ödra ka he ka úkhacaköuâ tavat, me adre me he ka tuâ thibi, k' adre me ca he ka tuâ hnahna. 8 Ke hamen laku Arona hnyat bihut he ka tuö trutru, wale hnân hnanyibu köbun nyiele balua hnyi anyibun je dö. 9 Ke öbun ka he ka vat hnyi ibun hnyei me je iwahnaihmiöny möbun, tavat adre me okongu öbun, me öbun e he ka tuâ hnabna wale li trutru; me adre me he ka únykúmi öbun hnyi hnyimakö Iehova Khongubun, k' adre me he ka omeli öbun únyi ge je iwahnaihmiöny möbun. 10 Ke haba hnyi je bong öbun e senyin hnyin, me hnyi anyibun je bijeú adre thu, me hnyi hnyimakan je tehi, adre me he ka tuâ li trutru hon anyibun je hudiny leú, me anyibun je hudiny ole; m' adre me he ka únykúmi öbun hnyi hnyimakan Khongubun: Inya Iehova Khongubun.

11 Ke haba hnyi huna a loiny, hnyi tehi a loiny, hnyi bong a twenteiny, me adre me hom göranyai ulâ únyi hnyi hon uma mano uma ohnatho. 12 Ke haba lakon Isaraela adre me he but úheny hnyi hnyebuba Sinai; me ame tot u úlá hnyi hnyebuba Parana. 13 Ke adre me bán ka he únyi hnyi musi anyi Iehova, a deny Mose. 14 Ke ame he bán haten lap anyin laku Juda, hoton anyidra je utbavat: ke haba at ame musö anyin vat, me, Nasona, nöku Aminadaba. 15 Ke haba at ame musö vat anyin tribuiny laku Isakara, me, Nathaniela, nöku Zuara. 16 Ke haba at ame musö vat anyin tribuiny laku Zebulona, me, Eliaba, nöku Helona. 17 Ke adre me äi uma mano, k' ame hwân laku Geresoma me laku Merari hnyat sukhöünâ uma mano ka he. 18 Ke ame hwân ka he haten lap anyi Reubena, hoton anyidra je utbavat: ke haba at ame musö anyin vat, me, Elizura, nöku Sedeura. 19 Ke haba at ame musö vat anyin tribuiny laku Simeona, me, Selumiela, nöku Zurisadai. 20 Ke haba at ame musö vat anyin tribuiny laku Gada, me, Eliasafa, nöku Deuela. 21 Ke ame hwân at Kohatha ka he, ödrin e kap tilâ únyi ae kap: ke haba keihen ödrin e

NUMERA 11.

otilá uma `mano hobi káu ödrin ka o thö. 22 Ke ame hwân haten lap anyin laku Eferaima ka he, hoton anyidra je utbavat, ke haba at ame musö anyin vat, me Elisama, nöku Amihuda. 23 Ke haba at ame musö vat anyin tribuiny laku Manase, me, Gama-liela, nöku Pedazura. 24 Ke haba at ame musö vat anyin tribuiny laku Beniamina, me Abidana, nöku Gideona. 25 Ke ame hwân haten lap anyi Dana ka he, wale obiny je lap hia, hoton anyidra je utbavat, ke haba at ame musö anyin vat, me Ahiezera, nöku Amisadai. 26 Ke haba at ame musö vat anyin tribuiny laku Asera, me, Pagiela, nöku Okerana. 27 Ke haba at ame musö vat anyin tribuiny laku Nafatali, me Ahira, nöku Enan. 28 Wale hwakecin úheny lakon Isaraela hoton anyidra je utbavat; k' adre me hwân ka he.

29 Ke haba Mose ame ha hö Hobaba, nöku Reuela, at Midiana, a úngu Mose, ka habe, Öhmun e he ka hnyi hnyei waleji Iehova ame ha, ka habe, Oge me he ka ham köbun; aiö u ötin e tha he, ke öhmun e he ka ányá so köu, anyin a hia but Iehova ha so kö Isaraela. 30 Ke e ame thu káu, ka habe, Oge me ca he ka hnyi he, ke oge me he bi nya ka hnyi ik hnyei me anyik lap. 31 Ke haingen ka habe, Ó u ca he bi ka hn' öhmun; anyin a khanö u a öhmun e he ka hunuma hnyi hnyebuba, ke u me he ka emaköhmun. 32 Ke u je ne tha he möhmun, me haba so ame he Iehova ka ányá köhmun, me öhmun e he minya ka ányá helâe köu.

33 Ke adre me he but úhedra hnyi bucen anyi Iehova hnyi kun ta bong; ke haba tangen úhinhinköu ame he bán hnyi kun ta bong, he ka elâm hna menâ hobi ködra. 34 Ke ethö bi hudrin úlá anyi Iehova hnyi lany, hnyi úen adre me he úhedra hnyi hnödra hna hunuma hnyin.

35 Ke haba hnyi úen ame hwân tang ka he, haba Mose ame ha, ka habe, Iehova lö, todrö, me me ve se but je iwahnaihmiöny möu; me kec gam tavat adre me hukötiö u. 36 Ke hnyi úen ame menâ, me e ame ha, ka habe, Iehova lö, hmetuhmetu ju ka ta je thauzaniny aten Isaraela.

HNYIMAKAN 11.

**K**E haba tavat helâke adre me úhaiö, ke e kong e kö Iehova; ke Iehova ame löng, me gan hmâ anyin hmönyin; me ame ubâhlâ hmönyin anyi Iehova unyidra, me

an ke ne o but ka hnyi obiny hna hunuma 2 Ke haba tavat adre me tengiâ kö Mose; me Mose ame khawe kö Iehova, me ame mok hmetu ju meic. 3 Ke adre hwenyi ien dok eling Tabera: anyin ame ubâhlâ meic anyi Iehova unyidra.

4 Ke haba tavat ae ve bongon unyidra adre me hwân ka behnyekon: k' ame tenge hmetu lakon Isaraela me ha, ka habe, Ia ame he ka ha ötin ge meno? 5 Ötin e únykúme je wâ waleji ötin e an baúâ hnyi hnyei Aigupito; me ta je kokuma, me je wajem, me je liki, me je önyen, me je galika: 6 ke meleca thö walang je unyitin; e ba but ta je únyi hia; ke ba ke únyi ötin e wâ ke mana thibi. 7 Haba mana me wale ke únyi helâ me onyen gada, ke haba bongon, at ka wâ, me helâ me bedola. 8 Ke haba tavat adre me ngenu me aoc, me oamamá hnyi li veto, ame ne kokot e hnyin kumete, k' adre me thân hnyi öt, me up aretoiny, ke haba bunen me helâ me wakaco ae teb únyi, at ka drem. 9 Ke ame ta hau hon je hnyaba hnyi lit, me ame ta minya mana. 10 Ke Mose ame löng hwan tavat adre me tenge hnyi je hwanumen umödra je uma mano: me ame ubâhlâ hmönyin anyi Iehova, ke e kong ut minya kö Mose. 11 Ke haba Mose ame ha kö Iehova, ka habe, Ieú gam u me okongo athnyabaem? ke ieú gam u me ca betenge gak, ke u je ip huk hmakiny tavat eang? 12 Hawa oge erkinâ tavat hia ang? hawa oge hnöku ödra, m' u me he ka ha könya, ka habe, Köp ödra ka hnyi úláiam, helâ me kamen wale at ame tuö wanakat adre asen, ka hnyi hnyei u je khemanyin ka lakamödra? 13 Únyi ua utiö, m' inye he ka ham ka je hnyat hia eang? anyin adre me tenge könya, me ha, ka habe, Ha öhmun ge utiö. 14 E ca khanö nya he ka hake kap tavat eang, anyin ae ti hmak könya. 15 Ke u je ne ányá helâe könya, me ö u hlingö nya but u je ne betenge gak; m' oge me ca he ka wâ anyik hlöuhlöu.

16 Haba Iehova ame ha kö Mose, ka habe, Úkhacaköuâ thö könya je hnyat a sevente, a wahingatiny at Isaraela, wale u me wâhmakhmeto a wahingatiny hnyei, me homakan hnyei; ke hum ödrin ka hnyi uma ukhacaköu, m' ödrin e he ka tha tot möu eling. 17 Ke oge me he ka utut me úhnenamö eling möu: ke oge me he ka hom ke keihen hanu unyâm me ip hudrin; m' ödrin e he ka tha vaden möu tavat a únyi ae hmak, me u me ca he ka hake

## NUMERA 12.

vadren. 18 Ke u me he ka ha ka tavat, ka habe, Okabi öbun dö hobi kâu nyi, m' öbun e he ka han utiö : anyin a öbun e hia but tenge ka hnyi li hnyikönyö Iehova, me ha, ka habe, Ia ame he ka ha öhmun ge utiö? anyin ae so köhmun ehac hnyi hnyer Aigupito : waleling me me he Iehova ka ha öbun ge utiö. 19 Öbun e he ka han utiö, ca hnyi khaca thibi bong, ke ca lo li bong, ke ca thabúng ta bong, ke ca libe-nyita ta bong, ke ca twente ta bong ; 20 ke so bi ama khaca tehi, ke ne o but e ka o but e hnyi je hnyingöibun, ke öbun e he ka ikikiá e : anyin a öbun e húkotiö Iehova at ame tha e möbun, me tenge hnyi hnyimakan, ka habe, Ötin e he jem geü üheta Aigupito? 21 Ke Mose ame ha, ka habe, Haba tavat unyik ödra siks haded thauzan tavat vat ; ke u je ha, ka habe, Öge me he ka ha ödra ge utiö, m' adre me he ka han hnyi khaca tehi. 22 Hawa, adre me he ka hlingá hobi ködra je hnahat mamoe me kau, me me sekudra? ke adre me ne he ka úkhacaköüá ta je wá hia eü hnyi köiö hobi ködra, me me sekudra?

23 Ke Iehova ame ha kö Mose, ka habe, Hawa, ame hwán ka okhulit hnyamö Iehova? u me he ka wá walang ang, ame ne he ka át, ame ne ca he ka át hok hofuc. 24 Ke Mose ame didrut me ha ka tavat hofuc ho Iehova : me e ame úkhacaköüá wahingatiny hnyei a sevente me otíl' ödrin igigilö Uma. 25 Ke ame utut Iehova hnyin úlá, me fuc kâu, me hom ke keihen hanu unyin me ip hon wahingat a sevente : ke a mokut hanu hudrin, me ödrin e perofeta, ke ödrin e ca ányá hmetu heláe. 26 Ke ame laba hnyi hna hunuma ke li at, Eledada ien ke at, ke Medada ien ke at : ke ame mokut hudru banu ; haba ödru ke li at adre sihnalimidru, k' ödre ca hnyi he ka hnyi Uma : ke ödru me perofeta hnyi hna hunuma. 27 Ke ame wadring ke hidróu me thumetu Mose, ka habe, Haba Eledada me Medada ödru me perofeta hnyi hna hunuma. 28 Ke haba Josua nöku Nuna athnyabai Mose, a hanen hnyat e ame úca, ame thu me ha, ka habe, Than Mose lö, thaw' ödru ju, 29 Ke Mose ame ha kâu, ka habe, U me vec gak? e na je perofota hia je lakei Iehova, me me he Iehova ka ip hanon hudrin! 30 Ke Mose me wahingatiny Isaraela ödrin e he ka hnyi hna hunuma. 31 Ke ame o thö ang únyi ga Iehova, me ame oá je júö únyi hnyi köiö, me ota but hnyi hna hunuma, ame ne helá me khaca bong ka he ka hnyi ke kei-

hen, k' ame ne helá me khaca bong ka he ka hnyi ke keihen, igigilö hnyaba ; ke ame ne lo li kubit göranyai hon káná. 32 Me ame todrö tavat hnyi bong eling hia me lit hia, me bong nyi hia, me hlo ta je júö : ke haba at ame hlo úhnyúkongo, ame hlo ten je homer ; ke adre me ve ip monoá hobi ködra igigilö hna hunuma. 33 Ke tiga e bi utiö hnyi wanben je nyudra, k' adre tiga ca um hoc, me ame ubáhlá thö hmönyin anyi Iehova ka tavat, ke Iehova ame kot tavat ge mok ae gan hmá. 34 Ke adre me hwenyi ien dok eling, me Kiberoth-atava ; anyin adre konám eling tavat behnyekon. 35 Ke haba tavat adre me he Hazeroth ai, úhedra Kiberoth-atava, me laba hnyi Hazeroth.

### HNYIMAKAN 12.

**K**E haba Miriama me Arona ödru me haikongo Mose can momo Kuza e ame hom, anyin a e ame hom mome a at Kuza. 2 Ke haingödra, ka habe, Hawa, ame hake fuc Iehova kö Mose? a ca hnyi ha minya köhmu? Ke Iehova ame löng e. 3 Haba Mose, me wale at ae ti menyik hon tavat hia eang hmelen. 4 Ke Iehova ame ie ha kö Mose me Arona me Miriama, ka habe, Ai öbun kun ka hnyi uma úkhacaköü. Me ödrin kun ödrin e he. 5 Me Iehova ame utut hnyi úlá ame tot wisa, me tot hnyi hwanumen uma úkhacaköü, me hawo Arona me Miriama : ke ödru me o thö. 6 Ke e ame ha, ka habe, Löng ju hok hofuc : a ne hu perofeta unyibun, me haba Inya Iehova oge me he ka omanenö nya kâu hnyi hna omanená, me fuc kâu hnyi bwi. 7 Ke haba athnyabaik Mose, me ca heláe ; e bi at ae hnathu hnyi hnyabak hia : 8 me oge me he ka úcü hnyem mē me ha manená, ke ca hnyi je hofuc ae lit ; ke e ame he ka wá unyu Iehova : ke ieú gabu a öbu ca ot he ka fuc ga Mose a athnyabaik? 9 Ke ame ubáhlá thö hmo-nyin anyi Iehova ködru ; ke e ame he but. 10 Me ame he but úlá únyi hnyi hon Uma ; ke wá bi, e lepera but Miriama helá me kiona : ke Arona ame ö Miriama, ke wá bi e lepera. 11 Ke Arona ame ha kö Mose, ka habe, Ekölö than lö, ö u ca he ka ip köhmu hulö, can öhme ányá monu, me can öhme ányá hulö. 12 Ö e ca he ka helá me komok, ke helá me at ame o únyi hnyi hnyekon hinyen, k' ame aú but unyin. 13 Ke Mose ame tenge kö Iehova, me ha, ka habe,

## NUMERA 13.

Khong lö, ö u omelö thö momo walang ang. 14 Ke Iehova ame ha kö Mose, ka habe, Hawa, a ne hangöjä hnyimakan, ge kamen ame ca he ka hmehma seven ta bong? e so adre me tuö e hoton hnyaba hnyi seven ta bong, ke hwaban e adre me he ka hom hmetu e. 15 Me adre me tue Miriama hoton hnyaba hnyi seven ta bong: ke ame ca he tavat ke ne o but adre hum Miriama hmetu thö. 16 Ke hwaban e ame he tavat úhedra Hazeroth, me hunuma hnyi hnyebuba Parana.

### HNYIMAKAN 13.

**K**E Iehova ame ha kö Mose, ka habe, 2 Kunâ ke je hnyat he ka ecmâkâ hnyei Kanana, wale oge ham ka lakon, Isaraela: öbun a he ka kunâ úsa khaca únyi hnyi je tribu hia anyin lakamödrin, a je than hia. 3 Ke Mose ame kun' ödrin únyi hnyi hnyebuba Parana, helâ me Iehova ame ha: haba ödrin hia ödrin je taben lakon Isaraela. 4 Ke walang je iödrin; Samua, nöku Zakuri, únyi hnyi tribu Reubena. 5 Ke haba únyi hnyi tribu Simeona, Safata nöku Hori. 6 Ke únyi hnyi tribu Juda, Kaleba, nöku Jefune. 7 Ke únyi hnyi tribu Isakara, Igala, nöku Josefa. 8 Ke únyi hnyi tribu Eferaima, Hosea, nöku Nuna. 9 Ke únyi hnyi tribu Beniamina, Paleti nöku Rafu. 10 Ke únyi hnyi tribu Zebulona, Gadiela, nöku Sodi. 11 Ke únyi hnyi tribu Josefa, a wale tribu Manase, Gadi, nöku Susi. 12 Ke únyi hnyi tribu Dana, Amiela, nöku Gemali. 13 Ke únyi hnyi tribu Asera, Setura, nöku Mikaela. 14 Ke únyi hnyi tribu Nafatali, Nahebi, nöku Vofesi. 15 Ke únyi hnyi tribu Gada, Geuela, nöku Maki. 16 Wale ien hnyat Mose ame kunâ he ka ecmâkâ hnyei. Ke Mose ame hwenyi iö Hosea, a nöku Nuna, me, Josua. 17 Ke Mose ame kun' ödrin he ka ecmâkâ hnyei Kanana, me ha ködrin, ka habe, Öbun e he ka ölö hnyi Hwaiöu, ke öliâ thö je bucen: 18 me wâ hnyei habe ehö; ke tavat adre labâ, hawa ödra tavat ae hwege, ame ne tavat ae ngâ, ame ne tavat ae se hia ame ne vakhalet thibi; 19 ke ehö hnyei adre me labâ, ame ne so, ame ne kong; ke ehö je taun adre me labâ, ame ne je hna hunuma, k' ame ne je hñabâ ae hwege; 20 ke ehö kânâ, ame ne pipikhenya ame ne delâ, ame ne hu je úö, ame ne ba. Ke hwege th' öbun, ke

öbun e he ka hom jem hanen jeüiny kânâ. Haba úen eling, me úen wan vine a bân. 21 Ke ödrin e ölö thö me ecmâkâ hnyei hwân hnyi hnyebuba Zine ke ne o but Rehoba, ke ne o but hnyi gethen úheny Hamath. 22 Ke ödrin e ölö hnyi Hwaiöu, me o hnyi Heberona; wale Ahiman, me Sesai, me Talemai, a laku Anaka. (Ke haba Heberona, me adre bödra ka op e ehac seven ta huna e tiga ca op Zoana hnyi Aigupito.) 23 Ke ödrin e o but hnyi Esekolo a hnyigöulen bucen, me sö but eling ke vheiny me thi wan vine a khaca, me vaden hnyi venyâ hnen li at a lo; ke ödrin e hom minya je wan rimona, me je wan ometa. 24 Ke adre hwenyi ien dok eling Esekolo hnyi hnyigöulen bucen, can thi vine a sö lakon Isaraela eling. 25 Ke ödrin e hmetu úhedrin hnyi hna ecmâkâ hnyei hwaban je bong a fâte. 26 Ke ödrin e hmetu but me o kö Mose me Arona, me úkhacaköu hia anyin lakon Isaraela, ka hnyi hnyebuba Parana, wale Kadesi; me oâ úthúmetu ködru, me úkhacaköu hia anyin lakon Isaraela, me omanená ködra waniny kânâ. 27 Ke ödrin e thumeto e, ka habe, Öhmun e o but ka hnyi hnyei u je kun' öhmun ka hnyin, ke e hnathu ame di ge debai me hani; ke walang waniny. 28 Ke so bi e hwege tavat a idra hnyei, ke adre up haginy je taun, ke e ti gan: ka öhmun e wâ eling je laku Anaka. 29 K' ame laba Amaleka hnyi ke keihen ka hnyi Hwaiöu: ke haba hnyi je bucen ame laba hnyat Heth, me Jebusi, me Amora: k' ame laba at Kanana hnyi hobat köiö me hnyi baten Joridano. 30 Me haba Kaleba ame thawâ tavat hnyi hnyimakö Mose, me ha, ka habe. E so ötin e ie he me hügúnâ; anyin ae khan' ötin he ka hwege hon. 31 Ke haingen tavat ödrin e tha ölö mē, ka habe, E ca khan' öta he ka ölö thö ka tavat eling, anyin a ödra hwege huta. 32 Ke ödrin e haikongoâ hnyei ödrin e ecmâkâ ka lakon Isaraela, me ha, ka habe, Haba hnyei öhmun e vheno me ecmâkâ, me hnyei ame ohia aten, ke haba tavat hia öhmun e wâ eling, me tavat ae beú. 33 Ke öhmun e wâ eling ta je hmai ae beú hmâ, a je laku Anaka, a mátrániny je hmai ae beú, ke öhmun helâ me je wahamon hnyi hnyimaköhmun, ke helâe minya hnyi hnyimaködrin.

HNYIMAKAN 14.

**K**E ame tenge hwege úkhacaköu hia, k' ame tenge thungau tavat hnyi lit eling. 2 Ke ame haiö Mose me Arona hnen lakon Isaraela hia : ke ame ha ködrü hnen úkhacaköu hia, ka habe, Öhmün na mokcu hnyi hnyei Aigupito ! ke öhmün na mokcu hnyi hnyebuba eang ! 3 Ke ieu e ga Iehova a hum öhmün ka hnyi hnyei eang he ka mok ge hele vat ? Adre me he ka hügüná laöiöhmün me lakuhmun je wanakat : hawa e ca so kohmun he ka hmetu Aigupito ai ? 4 Ke adre me uhaköuá, ka habe, E so ötin e úca at me me than, k' ate me he ka hmetu Aigupito ai. 5 Me haba Mose me Arona ödrü me ta ju hnyimaködrü hnyikánái hnyi hnyimakan tavat hia, wale úkhacaköu anyin lakon Isaraela. 6 Ke haba Josua nöku Nuna, me Kaleba nöku Jefuna, ödre hnyi ecmáká hnyei, me, ödrü me kia but anyidru je úkhaú : 7 ke ödre ha ka úkhacaköu hia anyin lakon Isaraela, ka habe, Haba hnyei öhmün e vheno me ecmáká me hnyei ae so hmönyin. 8 Ame ne senyin köta Iehova, me e ame he ka hum öta ka hnyi hnyei, me ham köta ; a hnyei ame di hnyin debai me hani. 9 Ke so bi ca he öbun ke ivinö me Iehova, ke ca he öbun ka outen tavat a idra hnyei ; anyin a ödra areto bi hobi köhmün : k' adre hia but hom unyidra únyi hnân tu' ödra bi, ke e unyita Iehova : ca out' ödra. 10 Ke haba úkhacaköu hia adre me ha he ka lu' ödrü ge veto. Me ame manen hmanenangi Iehova hnyi uma úkhacaköu ka lakon Isaraela hia. 11 Ke Iehova ame ha kö Mose, ka habe, Ame he tavat eang ka húkotiö nya ke ne o but kehö ? adre me ca he ka labageju könya ke ne o but kehö, ge ta je úöman hia waleji oge ányá unyidra ? 12 Oge me he ka kuc ödra ge mok me ohia hwajeköüdra, ke oge me he ka wiö u hnân hnyei ae gan me man hudra. 13 Ke haba Mose ame ha kö Iehova, ka habe, Me ame he ka löng hnen at Aigupito ; anyin a u je hom tavat eang únyi gadra ge manám man ; 14 ke adre me he ka thumeto tavat a gadra hnyei ang : ke adre löng a u Iehova unyin tavat eang ; anyin a u Iehova u me úhnyimaköu mödra, ke ame tot hudra ányám úlá, ke haba u hnyimakan anyidra bunyen, hnyi úlá ame tot wisa hnyi lany, me meic ame tot wisa hnyi lit. 15 Ke walang ang u ka hlingá tavat eang helá me at a khaca, awe, ame he

ka ha hnen je hnyei adre me löng ányam lung, ka habe, 16 Anyin ae ca khanö Iehova he ka hom tavat eang ka hnyi hnyei e ame khemanyin ködra, me wale e ame hling' ödra hnyi hnyebuba. 17 Ke walang ang, ö e gan dut man manin Than, hoton hnám hna kü, ka habe, 18 At ae bec he ka hmönyin Iehova, ke gan hmá anyin ibetengiö, k' ame degecá hulö, me monu, k' ame ca he ka ha ae ba kongon at ae kong ; ke e ame bi hwaban monu anyin je kamen ka je lakon, ke ne o but ka hnyi dö a kuniny me vakiny. 19 Ö u degec ut konginy tavat eang hoton úganiny ányám ibetengiö, ke hoton hnám hna thang monu anyin tavat eang, waleji hwân hnyi Aigupito ke ne o but hnyi bong ang. 20 Me haba Iehova ame thu, ka habe, Awe oge me hna degecá hoton hwám hofuc. 21 Ke kia inya inya a g ame he ka unöngöt hmeledrany hia ge hmanengi Iehova ; 22 ke can anyin a olibe-nyita cubic nya hnen tavat hia eang adre me wá hmanenangik me anyik je úöman, waleji oge ányá hnyi Aigupito, me hnyi hnyebuba, k' adre ca löng hok hofuc ; 23 awe, adre me ca he ka wá hnyei waleji oge khemanyin ka lakamödra, k' ame ca he ka wá e hnen tavat adre me húkotiö nya : 24 ke haba athnyabaik a Kaleba, anyin a e at ae ke hnyekon, ke e ame tha löng hotuk, awe oge me he ka hom e ka hnyi hnyei wale a mwi hnyin ; k' ame he je mátrániny ka hu e. 25 Haba at Amaleka me Kanana adre me laba hnyi hnyigöulen bucen : ke haba nyi öbun e he ka hwiö me he ka hnyi hnyebuba, gethen ka hnyi Köiö ae Dra.

26 Ke Iehova ame ha kö Mose me Arona, ka habe, 27 Oge me he ka hokhnyoká ke ne o but kehö úkhacaköu eang ae kong, tavat adre me ulidri nya ? oge löng ut ulit anyin lakon Isaraela wale adre me ulidri nya. 28 Ha thö ködra, ka habe, Haingö Iehova, kia inya inya oge me he ka ányá köbun helá me hnöbun hna ha hnyi li hnyikönyök : 29 k' ame he ka mok ta je unyibun hnyi hnyebuba eang ; ke öbun hia wale tavat adre aú, hoton hna sihna- limibun hia, hwân ge tavat a twente huna me gan hon e, a tavat adre ulidri nya, 30 e hnathu öbun e ca he ka o ka hnyi hnyei waleji oge hai hnyamök he ka olab' öbun hnyin, ke so thibi Kaleba nöku Jefuna, me Josua nöku Nuna. 31 Ke haba lakubun je wanakat wale öbun e ha a g' ame he ka hügüná hnen vat, me oge me he ka hum ödrin bi, ke adre me he ka wá hnyei öbun e

hükötiä. 32 Ke haba öbun, me ame he ka mok je unyibun hnyi hnyebuba eang. 33 K' ame he lakubun-ka he monumonu hnyi hnyebuba hnyi je huna a fâte, k' ödrin e he ka hijen tilâ hnöbun je hna bi únyi monu, ke ne o but ame aú degecâ je unyibun hnyi hnyebuba. 34 Helâ me úseiny je bong öbun e ecmâkâ hnyin hnyei, a fâte je bong, me haba khaca bong ame he ka khaca huna, k' öbun e he ka hijen tilâ anyibun hulö, hnyi je huna a fâte, ke öbun e he ka wâhmakhmetoâ hnök hna hwio. 35 Inya Iehova oge me fuc, k' oge me he ka ânyâ eling ka úkhacaköu hia ae kong eang, adre tot meta könya : adre me he ka ohi' ödra hnyi hnyebuba eang, k' adre me he ka mok eling. 36 Ke haba tavat a kunâ Mose he ka ecmâkâ hnyei, wale hnyat ödrin e hmetu me oâ ulidro úkhacaköu hia gan, ke ödrin e haikongoâ hnyei, 37 haba hnyat eling ödrin e hom úthumeto ae kong ge hnyei, me ödrin e mok hia hnyi hnyimakö Iehova hnen mok ae gan. 38 Ke haba Josua nöku Nuna, me Kaleba nöku Jefune a li at ödre hnyi ecmâkâ hnyei, me ödre möt biju. 39 Ke Mose ame thumetu lakon Isaraela hofuc eling : me ame tenge hwege tavat. 40 Ke adre me vesâkong, me öliâ bucen, me ha, ka habe, Wal' öhmun ang, ke öhmun e he ka he ka hnyi hnyei ame ha Iehova, anyin ae kong hwakecihmun. 41 Ke Mose ame ha, ka habe, leú gabun öbun e hanyâúâ hnanyibu anyi Iehova, k' ame ca he bi ka hwâdâ? 42 Ca öl' öbun, anyin a ca e unyibun Iehova, wâ e nye kuc öbun hnen je iwahnaihmiony möbun. 43 Ke wala at Amaleka me at Kanana hnyi hnyimaköbun, k' öbun e he ka ta ge hele vat ; anyin a öbun e hmetu únyi ga Iehova, me waleling ame ca he Iehova ka tha e möbun. 44 Ke hwege hnyimaködra he ka öliâ bucen : ke so bi ame ca he únyi hnyi hna hunuma tangen úhinhinköu anyi Iehova, me Mose. 45 Ke ame utut at Amaleka me at Kanana, a wale tavat adre me laba hnyi bucen eling, me adre me kuc ödra me hnu ödra hmetu ke ne o but Horema.

HNYIMAKAN 15.

**K**E Iehova ame ha kö Mose, ka habe, 2 Ha thö ka lakon Isaraela, me ha ködra ka habe, Öbun ka o ka hnyi hnyei öbun e he ka labâ wale oge ham köbun, 3 ke öbun ka he ka bi hut a an ge meic kö

Iehova, ame ne hudiny leú, ame ne hudiny thamuö khöbi, ame ne hudiny ibetengiö, ame ne hnyi anyibun je bijeu adre thu, me me bo so kö Iehova, ame ne kau, ame ne namoe : 4 awe, hamen at a hom hut kö Iehova he ka hom hudiny han a khaca omer falawa adre úhaniken me wakaco a ke keihen hin a vakiny : 5 me tap waina hnân hudiny ic a ke keihen a vakiny hin u me he ka tha penapena me hudiny leú, ame ne ke hut bi, me wale hobi kâu je ve lakon mamoe. 6 Ame ne mamoe бага, me u me he ka penapena hnân hudiny han lo li omer falawa adre úhaniken me wakaco wale ke keihen a kuniny hin : 7 ke u me he ka hudo tap waina wale ke keihen a kuniny hin hnân hudiny ic ae bo so kö Iehova. 8 Ke u ka he ka penapena bolok hnân hudiny leú, ame ne hudiny thamuö khöbi, ame ne hudiny ole kö Iehova : 9 me e ame he ka tha hom me bolok hudiny han a kun ta omer falawa adre úhaniken me wakaco a hafiny hin. 10 Ke u me he ka hom tap waina a hafiny hin, hnân hudiny ic, a hut a an ge meic ae bo so kö Iehova. 11 Adre me he ka ânyâ helâe hobi kâu je ve bolok, ame ne je ve mamoe бага, ame ne nokon mamoe бага, ame ne nokon got. 12 Öbun e he ka penapena hoton úseiny je hut, ke helâe öbun e he ka ve ânyâ hoton úseiny. 13 Ame he je aten hnyei hia ka ânyâ helâe, ödra ka he ka hudo hut a an ge meic ae bo so kö Iehova. 14 Ke ame ne laba unyibun atkanyua, ame ne ke at bi unyibun hnyi anyibun je dö, ke e ka he ka hudo hut a an ge meic ae bo so kö Iehova ; me e ame he ka ânyâ helâ me hnöbun hna ânyâ. 15 Khaca thibi hnanyibu köbun, a wale úkhacaköu me atkanyua ame laba unyibun, wale hnanyibu nyiele balua hnyi anyibun ta je dö : haba öbun me tha úcú me atkanyua hnyi hnyimakö Iehova. 16 Khaca hnanyibu, ke khaca tulut hobi köbun me hobi kâu atkanyua ame laba unyibun.

17 Ke Iehova ame ha kö Mose, ka habe, 18 Ha thö ka lakon Isaraela, me ha ködra, ka habe, Öbun ka o ka hnyi hnyei oge me hum öbun ka hnyin, 19 ke öbun ka he ka han jeúiny hnyei, me öbun e he ka hudo hudiny kap göranyai kö Iehova. 20 Öbun e he ka hudo ke ong areto únyi hnyi anyibun falawa a bán hnân hudiny kap göranyai : öbun e he ka kap e göranyai helâ me hno-bun hna kap göranyai hut únyi hnyi hna uja hwit. 21 Öbun e he ka ham kö Iehova



NUMERA 16.

hudiny kap göranyai únyi hnyi anyibun falawa a bán hnyi anyibun ta je dö.

22 Ke öbun e ne haú, me ca ányâ bi je hnanyibu hia eang wale a ha Iehova kö Mose, 23 a ta je únyi hia waleji ame húna hnö Iehova köbun a deny Mose, hwân hnyi bong Iehova ame húna hnyin ke ne o but nyiele hnyi anyibun ta je dö: 24 haba hnyi úen e, adre me he ányâ haúâ, ke ca khana bi hnen úkhacaköu, me hamen úkhacaköu hia he ka hudo ke nak bolok hnân hudiny leú ae bo so kö Iehova, tha e me hudiny han, me hudiny ic, hoton tulut, me nokon minya got a khaca hnân hudiny hulö.

25 Ke hamen at bihut he ka bi hwaban möt anyin úkhacaköu hia anyin lakon Isaraela, k' adre me he ka hn' ödra; anyin adre haú, k' adre hia but hom anyidra hut, wale hut a an ge meic kö Iehova, me hudiny anyidra hulö hnyi hnyimakö Iehova, can hnödra hna haú; 26 k' adre me he ka hna úkhacaköu hia anyin lakon Isaraela, me atkanyua ame laba unyidra; anyin adre ányâ haúâ hnyi hnyimakan tavat hia.

27 Ke ame ne ányâ hulö ke at a khaca ke ca khana, me e ame he ka hom got momo a khaca hunainy hnân hudiny hulö. 28 Ke ame he at bihut ka bi hwaban möt anyin at a ányâ ke ca khana, k' ame ányâ haúâ hulö, hnyi hnyimakö Iehova, me me bi hwaban anyin möt: ke adre me he ka hna e. 29 Ame he ka hu gabun hnanyibu a khaca hobi kâu at ame haú ame ne aten hnyei unyin lakon Isaraela, ame ne atkanyua ame tha laba unyidra. 30 Ke haba at ame ányâ sheshamökâ ke únyi, ame ne aten hnyei ame ne atkanyua, me wale at ame bi gan kö Iehova; ke adre me he ka subâ degecâ at eling únyi hnyi iny hnyei. 31 Anyin a e ame höciâ hofuc ho Iehova, me hanyâúâ anyin hnanyibu; k' adre me he ka ti suba degecâ at eling, k' ame he ka takoué e ge anyin hulö.

32 Ke hnyi úen lakon Isaraela adre me he hnyi hnyebuba, me adre me lelö ke at ame blu utö hnyi bong sabath. 33 Ke haba hnyat ödrin e wâ at ame tiga hlu utö hnyi bong sabath, me ödrin e lelö e kö Mose me Arona me úkhacaköu hia. 34 Ke adre me hna e ka tavat tue, anyin ae tiga ca manen únyi adre me he ka ányâ kâu. 35 Ke haba Iehova ame ha kö Mose, ka habe, Adre me he ka hlingâ at: ke hamen úkhacaköu hia ka lúâ e ge veto hnyi hoton hna hunuma. 36 Me haba úkhacaköu hia adre me hom e ka hnyi hoton je hnyaba,

me lúâ ge veto, me ame mokcu; helâ me Iehova ame húna kö Mose.

37 Ke Iehova ame ha kö Mose, ka habe, 38 Ha thö ka lakon Isaraela, me ha ködra, ka habe, Adre me he ka bi bâbuen baten je khaúdra hnyi anyidra je dö, ke adre me he ka ip telenu ae udrudrá hon baten bâbuen: 39 ke wale bâbuen köbun, m' öbun e he ka wâ e me únykúme ta je hnanyibu anyi Iehova hia, me vheno; m' öbun e ca he monu hoton je hnyekubun me je li emaköbun, waleji öbun e labö bi únyi monu hoton: 40 m' öbun e he ka únykúme me ányâ hoton anyik je hnanyibu hia, m' öbun e at ae kap ka Khongubun. 41 Inya Iehova Khongubun, waleji at ame hum öbun únyi hnyi hnyei Aigupito, me me Khongubun: Inya Iehova Khongubun.

HNYIMAKAN 16.

**K**E haba Kora nöku Izara, a nöku Kohatha, a nöku Levi, tha e me Dathana me Abirama a li laku Eliaba, ke Ona nöku Peleth, a kun ta laku Reubena, ödrin e hokhien: 2 ke ödrin e todrö kö Mose, ke tha e mödrin ke je lakon Isaraela, a ödrin tu haded ke fitte je tuhan úkhacaköu, tavat adre úca hnyi úkhacaköu, tavat ae lung: 3 ke ödrin e úkhacaköu kö Mose me Arona, me ha ködru, ka habe, Öbu me bi gan, anyin ae tha kap úkhacaköu hia a ke at me ke at, ke e unyidra Iehova: anyin a wale ieú gabu öbu me ogöranyi. öbu bi hon úkhacaköu hia anyi Iehova? 4 Ke a löng ut Mose, me e ame ta ju hnyimakan hnyikânâi: 5 ke e ame ha kö Kora mödrin hia a tha e mē, ka habe, Nyi ame he Iehova ka omanenâ lahien, me tavat ae kap, me ohakekenyâ kâu: eke, haba at e ame úca me e ame he ka ohakekenyâ kâu. 6 Ányâ thö ang; e so Kora me lahien hia ame hom je taben meic; 7 me ip meic hnyin, me aoc je únyi ae bo so ka hnyin hnyi hnyimakö Iehova nyi: ke haba at a úca hnö Iehova, me wale at ae kap: ke öbun e bi gan, öbun laku Levi. 8 Ke Mose ame ha kö Kora, ka habe, Öbun na löng ju öbun laku Levi: 9 hawa, únyi ae úhnyúkong köbun a g' ame hake ip öbun únyi hnyi úkhacaköu anyin at Isaraela hnen Khongon at Isaraela, me ohakekenyi öbun kâu he ka ányâ huliwa hnyi uma mano anyi Iehova, me tot hnyi hnyimakan úkhacaköu he ka huliwa ködra; 10 ke e ame hia but ohakekenyi u me je liamekeiny

möu a je laku Levi? ke öbun e behom minya hanymen at bihut? 11 Anyin a wale haba u me je lahiâm, öbun e tot kö Iehova: ke ie Arona m' öbun e ulidró? 12 Me haba Mose ame úkhûnöng he ka hao Dathana me Abirama, a li laku Eliaba; ke haingödrü, ka habe, Öhmu me ca he ka he: 13 hawa únyi a úhnyúkong a u je hum öhmun jem únyi hnyi hnyeí ame di hnyin debai me hani, he ka hling' öhmun hnyi hnyebuba, ke u je wem minya he ka bi than humun? 14 Ke haba khaca, u je ca hia but hum öhmun ka hnyi hnyeí ame di hnyin debai me hani, k' u me ca ham köhmun hwajekon a ihmun me ihmun hnyeí vine: hawa, u me he ka owadruá tavat eang? awe öhmu me ca he ka he. 15 Me ame ubáhlá hmönyin anyi Mose, me e ame ha kö Iehova, ka habe, U me ca he ka wá anyidrin hut: ke ba haledrin asina oge hom, ke oge ca okongo ke at a khaca gadrin. 16 Ke haingö Mose kö Kora, ka habe, He but nyi me je lahiâm hnyi hnyimakö Iehova, a u, mödrin, me Arona: 17 ke öbun e he ka ve hom anyibun je taben meic, me auk únyi ae bo so ka hnyin, ke öbun e he ka ve hom jem hnyi hnyimakö Iehova anyibun je taben meic, a tu haded ke fifte je taben meic; haba u me Arona öbu me he ka ve hom anyibu li taben meic. 18 Ke ödrin e ve hom anyidrin je taben meic, me ip meic hnyin, me auk únyi ae bo so ka hnyin, me útitilen hnyi hwanumen uma úkhacaköu, a tha ödrin me Mose me Arona. 19 Ke haba Kora ame hawá úkhacaköu hia úcúdrü ka hnyi hwanumen uma úkhacaköu: ke amo manen dut hmanenangi Iehova ka úkhacaköu hia. 20 Ke Iehova ame ha kö Mose me Arona, ka habe, 21 Úsákáúö but öbun me úkhacaköu eang, m' inya he ka obi' ödrin hnyi thuthubademak. 22 Ke ödrü me ta ju hnyikánái, me ha, ka habe, Khong lö, Khongon hanon tavat hia, ame ne kong hwakecin at a khaca, me hawa u me he ka hmönyin ka úkhacaköu hia? 23 Ke Iehova ame ha kö Mose, ka habe, 24 Ha thö ka úkhacaköu, ka habe, Ve kec ut únyi hnyi uma umö Kora, me Dathana, me Abirama. 25 Ke Mose ame köütö thö, me he kö Dathana me Abirama; k' ame he hoton wahingatiny at Isaraela. 26 Ke e ame ha ka úkhacaköu, ka habe, Öbun na vese but únyi hnyi je uma mano umen hnyat eang ae kong, ke ca kálá ke únyi gadrin, wá öbun nye tha mok ge anyidrin je hulö.

27 Me adre me kec me vese but únyi hnyi uma mano umö Kora, me Dathana, me Abirama, hnyi je ke keihen hia: me haba Dathana, me Abirama ödrü me didrut me tot hnyi hwanumen umödrü li uma mano, tha ödrü me laöiödrü me lakudru obaga, me lakudru ae úhnyúkong. 28 Ke Mose ame ha, ka habe, Walang haten m' öbun e he ka wáhmakhmeto a g' ame kunö nya Iehova he ka ányá ta je huliwa hia eang; anyin a ca únyi gak. 29 Ame ne he ka mokcu tavat eang helá me man imekiny tavat hia, k' ame ne he ka o ke únyi ka tavat eang helá me ioiny ka tavat hia; awe a ca kunö nya Iehova. 30 Ke ame ne he Iehova ka ányá ke únyi a teb únyi, k' ame ne memang ut káná me ut' ödrin, me ta je únyi hia unyidrin, ke ödrin e ne dit ke möt hedis ai; awe, öbun e he ka wáhmakhmeto a g' ame húkotiö Iehova hnen hnyat eang. 31 Ke e ame um dö ha ta je hofuc hia eling, me ame khekhe but káná hmelidrin: 32 me ame memang ut káná me ut' ödrin me umödrin je uma, me tavat hia a tha ödrin me Kora, me anyidrin ta je únyi hia. 33 Ke haba ödrin me tavat unyidrin hia ödrin e tha dit ke tiga möt bi hedis ai; ke ame buhlum hmetu ju káná hudrin, me hi ödrin únyi hnyi úkhacaköu. 34 Ke haba at Isaraela hia ödrin e útitilen, me, ödrin e kec ge hwatenge a ödrin: anyin a haingödrin, Wá e nye ut' ötin minya but ge káná. 35 Ke ame o but meic únyi ga Iehova me le degeci ödrin a tu haded ke fifte, hnyat ödrin e hudo únyi ae bo so. 36 Ke Iehova ame ha kö Mose, ka habe, 37 Ha thö kö Eliazara nöku Arona at bihut, me me hom je taben meic únyi hnyi hna hlá, k' u ma he ka kot degecá meic e helé; anyin a wale únyi ae kap; 38 a je taben meic anyin hnyat ae hulö ang ödrin e bi jöning anyidrin möt: ke e so adre me kot lauá ta je únyi e ge hama, me hnân tube taben hut: anyin a ödrin e hudo hnyi ta je únyi e hnyi hnyimakö Iehova, anyin a wale e kap: me me hnân haten ka lakon Isaraela. 39 Me haba Eleazara at bihut ame hom je taben meic bras wale a hudo hnyin tavat adre thong degecá; me adre me olauá ta je únyi e hnân tube taben hut: 40 me hnân ónykúmeá ka lakon Isaraela, me me ca he ka hakekenyá ge atkanyua a ca hanen je mátráni Arona, he ka hudo únyi ae bo so kö Iehova; me me ca he ka helá me Kora me lahien, hoton hofuc he Iehova káu a deny Mose.

NUMERA 17, 18.

41 Ke haba nyi ame ulidri Mose me Arona hnen úkhacaköu hia, me habe, Öbe hlingâ je atö Iehova. 42 Ke hnyi úen ame úkhacaköu tavat úcû Mose me Arona, me adre me bwele ka hnyi uma úkhacaköu: ke wâ bi ùlä ame tube e, ke ame manen dut hmanenangi Iehova. 43 Ke haba Mose me Arona ödru me he ka hnyi hnyimakan uma úkhacaköu. 44 Ke haba Iehova ame ha kö Mose, ka habe, 45 He th'öbu únyi hnyi úkhacaköu eang, m' inye he ka ohí' ödra hnyi thuthubademak. Me ödru me ta ju hnyimaködrü hnyikânâi. 46 Ke haba Mose ame ha kö Arona, ka habe, Hom dö ânyâm taben meic únyi hnyi hon taben hut, me auk únyi ae bo so, me ie wadring dö ka úkhacaköu, me bi hwaban anyidra möt: anyin ame o hmönyin únyi ga Iehova; ke ame hwân dö mok ae gan. 47 Ke haba Arona ame hom helâ me hnö Mose hna ha, me ame wadringâ ka hnyi wanben úkhacaköu; ke wâ bi ame hia but kü thö mok ae gan anyin tavat: me e ame bi únyi ae bo so ka hnyin, me bi hwaban möt anyin tavat. 48 Ke e ame tot hnyi ke dok a wanben tavat ae mok me tavat ae möt; k' ame so ju mok ae gan. 49 Ke haba tavat a mokcu hnen mok ae gan me ödra fotin tbauzan ke seven haded, ke ca ha bi tavat a mok can bongu Kora. 50 Ke Arona ame hmetu kö Mose hnyi hwanumen uma úkhacaköu: ke hia but mok ae gan.

HNYIMAKAN 17.

**K**E Iehova ame ha kö Mose, ka habe, 2 Ha thö ka lakon Isaraela, me hom únyi gadra je uci a úsa khaca hoton je hnyaban lakamödra, únyi ge anyidra je than hia hoton je hnyaban lakamödra, a twelv je uci: ke u me he ka ve sihnalimen je ödrin hnyi anyidrin je uci. 3 Ke u me he ka sihnalimen iö Arona hon uci anyi Levi: k' ame he ka úsa khaca uci hobi kâu je ve taben lap anyin lakamödrin. 4 Ke u me he ka ip je uci hnyi uma úkhacaköu cicö tangen ohnatho, dok oge me labö öony möbun hnyin. 5 Ke haba at oge me he ka úca, me ame he ka vhong anyin uci: me oge me he ka bi obiny gak je hna ulidri nya ge lakon Isaraela, wale adre me ulidri öbu. 6 Ke Mose ame fuc ka lakon Isaraela me anyidra je than hia, m' ödrin e ve ham kâu je uci, a úsa khaca uci anyin ke than me ke than hoton je hnyaban lakamödrin, a twelv je uci. 7 Ke haba Mose

ame ip je uci hnyi hnyimakö Iehova hnyi uma ohnatho. 8 Ke nyi Mose ame didrö ka hnyi uma ohnatho; ke wâ bi a vhong ut uci anyi Arona hobi kâu hnyaban at Levi, ke a hlau but, ke vhong je vhongon, me wa but a je wan saked. 9 Ke haba Mose ame hom je uci hia únyi hnyi hnyimakö Iehova ka lakon Isaraela: m' adre me wâ, me ve hom anyidrin uci. 10 Ke Iehova ame ha kö Mose, ka habe, Ip hmetu ju uci anyi Arona ka hnyi cicö tangen ohnatho, m' adre me tuö me hnân haten ka tavat bi tot; m' u me he ka bi obiny hnödra hna ulidri nya, m' adre me ca he ka mok bi. 11 Ke Mose ame ânyâ helâ me Iehova ame hûna kâu, wale hnen hna ânyâ. 12 Ke haba lakon Isaraela adre me ha kö Mose, ka habe, Wâ bi, öhmun e he but ang ka mok, me hia, me hia hia. 13 Haba tavat hia adre me he hakekeny, wale adre me hakekenyâ uma mano umö Iehova, adre me mok: ke hawa adre me he ka hling' öhmun hia thithö?

HNYIMAKAN 18.

**K**E Iehova ame ha kö Arona, ka habe, Hâmâm me lakom, me hnyaban lakamâm a tha e möu he ka vaden hulöiny dok ae kap: ke hâmâm me lakom a tha ödrin möu he ka vaden hulöiny hanymen bi hut. 2 Ke u me he ka tha oühakekenyâ je liamekeiny möu, a tribu Levi, a tribuiny lakamâm, me me tha e bala möu, me huliwa köu: ke hâmâm me lakom a tha ödrin möu he ka huliwa cicö uma ohnatho. 3 Ke ödrin e he ka tuö hanymâm, me hanymen hia hnyi Uma: ke so bi adre me ca he ka hakekenyâ je utkaiainy dok ae kap, me taben hut, m' adre me ca mok, m' öbun minya. 4 Ke adre me he ka tha ödra möu, me tuö hanymen hnyi uma úkhacaköu, hobi kâu huliwainy Uma: k' ame ca he atkanyua ka hakekenyi öbun. 5 Ke öbun e he ka tuö hanymen hnyi dok ae kap, me hanymen hnyi taben hut: me me ba hmetu bi hmönyin ka lakon Isaraela. 6 Ke wâ bi, inya oge hia but hom je liamekeiny möu a at Levi únyi hnyi wanben lakon Isaraela; adre ham ödra hnân bwihlany kö Iehova hnyi hnyimaköbun, he ka ânyâ huliwa hnyi uma úkhacaköu. 7 Ke u ma he me lakom a tha ödrin möu ka tuö hanymen a hnöbun hna bi hut ta je únyi hia hnyi taben hut, me ta je únyi eiö hnyin singiny; ke öbun e he ka huliwa: Inya öge me ham

## NUMERA 18.

köbun hanymen at bihut helâ me huliwa adre ham: k' adre me he ka hlingâ atkanyua at ame hakekenyâ.

8 Ke Iehova ame ha kö Arona, ka habe, Wâ bi, inya oge hia but ham köu hanymen hudiny kap göranyai könya, a wale je únyi ae kap hia ge lakon Isaraela, oge hia but ham köu ta je únyi e can hnödra hna hú, me hobi kâu lakom hnân hwajekhon nyiele balua. 9 Walang ânyâm únyi hnyi ta je únyi ae kap hmönyin, únyi hnyi meic: a anyidra je hut hia, me je hudiny hia anyidra han, me je hudiny hia anyidra hulö, me je hudiny hia anyidra monu, adre me he ka ham könya, wale ae ti kap hobi köu me lakom. 10 U me he ka an je únyi e helâ me ta je únyi ae ti kap; ame he obaga hia ka an je únyi e; e kap e hobi köu. 11 Ke walang ânyâm; a hudiny kap göranyai adre ham, wale je hudiny hajijing hia anyin lakon Isaraela: oge hia but ham ta je únyi e köu me lakom obaga me wahlu a tha ödrin möu, hnân hwajekhou nyiele balua: haba tavat hia ae bo so hnyi hnyabam adre me he ka an je únyi e. 12 Haba soiny wakaco hia, me soiny waina hia me hwit, a je wan a bân adre me ham kö Iehova, haba ta je únyi e oge me ham köu. 13 Haba je wan hia a bân ae mat hnyi hnyei adre me ham kö Iehova, me wale âm; k' ame he tavat hia ae bo so hnyi hnyabam ka an je únyi e. 14 Haba ta je únyi hia adre okâbâ hnyi Isaraela me wale hnân hobi köu. 15 Haba ta je únyi adre hnokoâ a bân, a ta je únyi hia adre ham kö Iehova, ame ne at ame ne meno, me wale hobi köu: ke so bi u me he ka bi hnen je wanakat a bân, ke u me he ka bi hnen je nokon meno a bân ae bo kong. 16 Ke haba ta je únyi adre me he ka bi hnen, hwân ge at a khaca tehi, me u me he ka bi hnen hoton únyi ae úcû köu, a thabúng ta sekel, hoton sekeliny dok ae kap, (wale twente je gera). 17 Ke haba nokon kau a bân, me nokan mamoe a bân, me nokon got a bân, me u me ca he ka bi hnen; ödra kap: ke u me he ka dukâiâ taben hut ge drödrin, me le pipikhenyaidrin hnân hut a an ge meic, me hnân bo so kö Iehova. 18 Ke haba utiödrin me ânyâm, helâ me úlainy hajijing, me helâ me jevan a metâ, a hnân hobi köu. 19 Haba je hut hia adre kap göranyai únyi hnyi ta je únyi ae kap ame he lakon Isaraela ka hudo kö Iehova, me wale oge me ham köu, me lakom obaga me wahlu unyâm, helâ me hwaje-

khou nyiele balua: ke wale úhinyköüny sâlt nyiele balua hnyi hnyimakö Iehova, hnân hobi köu, me je mátrânâm unyâm. 20 Ke Iehova ame ha kö Arona, ka habe, U me ca he ka hu em hnyi idra hnyei, ke u me ca he ka hu hwajekhom unyidra: inya bi a hwajekhom me em unyin lakon Isaraela.

21 Ke wâ bi oge me ham ka laku Levi ke keihen a libenyitainy ta je únyi hia hnyi Isaraela hnân idra, me hwaban anyidrin huliwa ödrin e ânyâ, wale huliwainy uma úkhacaköu. 22 Ke hwân ang me ame ca he bala lakon Isaraela ka hakekenyâ uma úkhacaköu, wâ e nye takü ödra ge hulö, m' adre me mokcu. 23 Ke ame he at Levi ka ânyâ huliwa hnyi uma úkhacaköu, k' ödrin e he ka vaden anyidrin hulö: wale hnanyibu nyiele balua hnyi anyibun ta je dö, k' ödrin e ca he ka hu idrin unyin lakon Isaraela. 24 Anyin a haba ta je ke keihen a libenyitainy únyi ge lakon Isaraela, wale ödrin e hudo kö Iehova hnân hudiny kap göranyai, me wale hnök hna ham ka at Levi hnân hwajekhöüdrin: waleling m' oge me hia but ha ködrin, ka habe, Ame ca he ka hu hwajekhöüdrin unyin lakon Isaraela.

25 Ke Iehova ame ha kö Mose, ka habe, 26 U me he ka ha ka at Levi, me ha ködrin, ka habe, Öbun ka he ka hom únyi ge lakon Isaraela ke keihen e libenyitainy wale oge ham köbun únyi gadra hnân hwajekhou, me öbun e he ka hudo únyi gan hudiny kap göranyai kö Iehova, wale ke keihen a libenyitainy únyi hnyi libenyitainy. 27 Ke adre me he ka únykúme köbun hudiny anyibun kap göranyai, me me tha úcû me hwit únyi hnyi hua huje hwit, ke helâ me hna hlec wan vine ae únöngöt. 28 Ke helâe öbun e he ka hudo hudiny kap göranyai kö Iehova, únyi hnyi anyibun je ke keihen a libenyitainy hia, wale öbun e kap únyi ge lakon Isaraela; me ham únyi gan kö Arona at bihut hnân hudiny kap göranyai kö Iehova. 29 Öbun e he ka hudo kö Iehova je hudiny kap göranyai únyi hnyi je bwihlany hia, a unyi hnyi soiny hia, wale hanen ae kap. 30 Anyin a wale u me he ka ha ködra, ka habe, Öbun ka kap göranyai soiny únyi gan, me adre me he ka únykúme e ka at Levi helâ me trobaniny hna huje hwit, ke helâ me trobaniny hna hlec wan vine. 31 Ke öbun e he ka han e hnyi ta je dok hia, a öbun me anyibun je lap: anyin a wale me hnân bi hwaban

anyibun huliwa hnyi uma úkhacaköu. 32 Ke ame ca he ka takú öbun hnen hulö can e, öbun ka hia but kap göranyai soiny: ke ca he öbun ka ökongoâ je únyi ae kap anyin lakon Isaraela, wâ öbun nye mokcu.

HNYIMAKAN 19.

**K**E Iehova ame ha kö Mose me Arona, ka habe, 2 Walang bongon hnanyibu a huna Iehova, ka habe, Ha thö ka lakon Isaraela, m' adre me he ka hom köu ke kau ae dra hia me ba hnyikongon, at adre tiga ca ip hon únyi hnân úhúkálaköuâ: 3 ke öbun e he ka ham e kö Eleazara at bihut, me hamen he ka lelö e ka hnyi hoton hnyaba, ke hamen ke at he ka hlingâ e hnyi hnyimakan: 4 ke hamö Eleazara at bihut he ka hom únyi hnyi dren ge banyen, me oseven dukâiâ ge dren hnyi hnyimakan uma úkhacaköu: 5 ke ame he ke at ka thong kau eling hnyi hnyimakan, adre me he ka thong unen, me utiöiny, me dren, me tiny: 6 ke ame he at bihut ka hom utö arasi, me thi hisop, me únyi ae dra, me khúa ka hnyi hna thong kau. 7 Me ame he at bihut ka hneú anyin je úkhaú, me osúâ unyin hnyi köiö, ke hwaban e ame he ka he ka hnyi hnyaba, k' ame he at bihut ka bo kong ke ne o but sahac. 8 Ke ame he at a thong e ka hneú anyin je úkhaú hnyi köiö, me osúâ unyin hnyi köiö, k' ame he ka bo kong ke ne o but sahac. 9 Ke hamen ke at ae bo so he ka aoc hnabadröuiny kau, me ip hoton hnyaba hnyi dok ae so, k' adre me he ka tuö únyi eling hnân hobi kâu úkhacaköu anyin lakon Isaraela me hnân köien okabâ: wale hudiny hulö. 10 Ke haba at a aoc hnabadröuiny kau ame he ka hneú anyin je úkhaú, ke e ame he ka bo kong ke ne o but sahac: ke wale hnanyibu nyiele balua ka lakon Isaraela, me atkanyua ame tha laba unyidra. 11 Habat ame kâlâ komok, me e ame he ka bo kong hnyi seven ta bong: 12 ke ame he at eling ka obosoâ e hnyi bong a kuniny ge únyi e, ke e ame he ka bo so hnyi bong a seveniny: ke ame ne ca obosoâ e bi hnyi bong a kuniny, me e ame ca he ka bo so hnyi bong a seveniny. 13 Ke haba at ame kâlâ komok, k' ame ca obosoâ e bi, me e ame okongoâ uma mano umö Iehova; k' adre me he ka subâ degecâ at eling unyin at Isaraela: anyin adre ca dukâiâ e hnen köien okabâ, e bo kong ut e; ke e bi unyin anyin bo kong. 14 Ke walang hnanyibu e

ka mokcu ke at eiö hnyin ke uma mano: haba hnyat hia ödrin e dit ka hnyin uma, me hnyat hia eiö hnyin uma, me ödrin e he ka bo kong hnyi seven ta bong. 15 Ke haba ta je utkaia ae memang, k' adre ca ohmâ ge hlinginy, me ame bo kong ut. 16 Ke haba at hnyöuai ame kâlâ at adre hlingâ ge hele vat, ke ame ne ke komok, k' ame ne jeien at, k' ame ne erkemok, me e ame he ka bo kong hnyi seven ta bong. 17 Ke adre me he ka hom hobi kâu at ae bo kong, únyi hnyi dröuiny adre thong a hudiny hulö, me hû e ge köiö ame hingölö hnyi hnyin utkaia: 18 k' ame he ke at ae bo so ka hom thi hisop, me hneú hnyi köiö eling, me dukâiâ uma, me je utkaia hia, me hnyat hia eiö hnyin, me at minya a kâlâ jeien at, ame ne at adre hlingâ, ame ne komok, ame ne erkemok: 19 ke ame he at ae bo so ka dukâiâ at ae bo kong hnyi bong a kuniny me bong a seveniny: k' ame he ka obosoâ e hnyi bong a seveniny: ke e ame he ka hneú anyin je úkhaú, me sou hnyi köiö, k' ame he ka bo so hnyi sahac. 20 Ke haba at ae bo kong, k' ame ca he ka obosoâ e bi, me adre me he ka subâ degecâ at eling únyi hnyi úkhacaköu, anyin a e ame hia but okongoâ dok a kabi Iehova: ke adre ca hia but dukâiâ e ge köien okabâ; e bo kong ut e. 21 Ke wale hnân hnanyibu ködra nyiele: ke haba at ame dukâiâ köien okabâ ame he ka hneú anyin je úkhaú; ke haba at ame kâlâ köien okabâ, me, ame he ka bo kong ke ne o but sahac. 22 Ke ame he ka bo kong ta je únyi hia a kâlâ hnen at ae bo kong; ke haba at ame kâlâ ta je únyi e, me e ame he ka bo kong ke ne o but sahac.

HNYIMAKAN 20.

**K**E ame o but lakon Isaraela, wale úkhacaköu hia, ka hnyi hnyebuba Zin, hnyi tehi a bân; k' ame labâ Kadesi hnen tavat; ke ame mokcu eling Miriama, m' adre me konâm e. 2 Ke ba köiö hobi kâu tavat, m' adre me úkhacaköu me tot kö Mose me Arona. 3 Me ame ivinö tavat me Mose, me ha, ka habe, Öhmun na tha mokcu ehac me je liamekeiny möhmun hnyi hnyimakö Iehova! 4 Ieú gabu obe hom úkhacaköu anyi Iehova ka hnyi hnyebuba eang, m' öhmun e he ka mok e, me je halehmun? 5 Ke ieú gabu obe hum öhmun úhehmun Aigupito, he ka hum öhmun ka hnyi dok eang ae kong? haba dok ang me

## NUMERA 21.

dok ae ba hatungen, me wan ometa, me vine, me rimona, ke ba köio hnân ic. 6 Ke haba Mose me Arona ödru me he úhedru unyin úkhacaköu ka hnyi hwanumen uma úkhacaköu, me ta ju hnyikânâi : me ame manen dut hmanenangi Iehova ködru. 7 Ke Iehova ame ha kö Mose, ka habe, 8 Hom dö uci, ke úkhacaköuâ tavat, a u, me Arona liamekeiny möu, ke öbu me he ka fuc ka kic hnyi hnyimaködra, me ame he ka ham köien ; ke u me he ka oâ köio únyi hnyi kic hobi ködra : ke u me he ka habelen úkhacaköu, me haledra omeno. 9 Ke Mose ame hom uci únyi hnyi hnyimakö Iehova, hoton hnen hna hûna. 10 Ke haba Mose me Arona ödru me úkhacaköuâ tavat cicö kic, me ha ködra, ka habe, Löng ju, öbun tavat bi tot ; öhmu me he ka oâ köio köbun únyi hnyi kic eang? 11 Ke Mose ame únâ hnyamen göranyai, me olo kot kic ge uci : k' ame patrutrua köio ae gan, me ame ic úkhacaköu me haledra omeno. 12 Ke Iehova ame ha kö Mose me Arona, ka habe, Anyin a öbu me ca labageju kõnya he ka okabi nya hnyi hnyimakan lakon Isaraela, awe, öbu me ca he ka hom úkhacaköu eang ka hnyi hnyei oge hia but ham ködra. 13 Haba köio ang me an Meriba : anyin ame ivinö lakon Isaraela me Iehova, ke adre okabâ e gan.

14 Ke haba Mose ame kunâ je úthümetu úheny Kadesi ka thaniny Edoma, he ka ha, ka habe, Walang hofuc ho Isaraela a liamekeiny mön, ka habe, E khanö u ta je vec a o köhmun : 15 a g' ame he Aigupito ai lakamöhmun : 16 ke öhmun e tenge kö Iehova, me ame löng hohmun, me kunâ angela, me hum öhmun úheny Aigupito : ke wâ bi öhmun ang hnyi Kadesi, a taun hnyi obiny em hnyei : 17 ö u hn' öhmun he ka he hnyi wanben em : k' öhmun e ca he ka he hnyi ta hnyei, me hnyei vine, k' öhmun e ca he ka ijem köio únyi hnyi je an : öhmun e he ka he thibi hnyi cit gethen anyin than, k' öhmun e ca he ka saú ka hnyi ke keihen metâ me me, ke ne o but öhmun e he ka hna but hnyigöulem. 18 Ke Edoma ame thu kâu, ka habe, U me ca he ka gethen eang unyik, wâ oge nye oâ köu hele vat. 19 Ke ame ha kâu lakon Isaraela, ka habe, Öhmun e he ka he hnyi hna cit gethen : ke öhmun ka ijem me halehmun köio a belem, me oge me he ka bi hwaban : u na hnö nya he ka he, ke ba ke únyi oge me he ka ânyâ. 20 Ke e ame thu, ka habe, U me ca he ka gethen eang. Me Edoma ame hawâ

tavat ae se hia he ka vat mē, me hnyam ae hwege. 21 Ke hócö Edoma he ka hna Isaraela ka he hnyi iny : me me saú thö Isaraela gan.

22 Ke adre me hna Kadesi ; k' ame o hnyi bucen Hora lakon Isaraela, a úkhacaköu hia. 23 Ke Iehova ame ha kö Mose me Arona hnyi bucen Hora, hnyi baten hnyei Edoma, ka habe, 24 Adre me he ka hum Arona ka lakamen : ke e ame ca he ka hnyi he ka hnyi hnyei waleji oge ham ka lakon Isaraela, can hnöbu hna hanyâúâ hok hofuc hnyi an Meriba. 25 Hum Arona me nokon a Eleazara, me hum ödru ka hnyi bucen Hora : 26 me uny jut úkhaú Arona me okhauö Eleazara a nokon : k' adre me he ka hum Arona ka lakamen, k' ame he ka mokcu eling. 27 Ke Mose ame ânyâ helâ me Iehova ame hûna : ke ödrin e öliâ bucen Hora hnyi hnyimakan úkhacaköu hia. 28 Ke Mose ame uny jut je úkhaú Arona, me okhaúo Eleazara a nokon ; me ame mokcu Arona eling hon bucen : ke ame utut hmetu Mose me Eleazara úhedru hon bucen. 29 Ke e khana but úkhacaköu hia a ga mok Arona, me haba lap Isaraela hia adre me tenge thungaú thöte ta je bong, ca Arona.

### HNYIMAKAN 21.

**K**E haba thaniny Arada at Kanana, at ame laba hnyi Hwaiöu, ame löng a g' ame o but at Isaraela a gethen deny Atharima, me e ame vat me at Isaraela, me hom hwenbâ keihen gadra. 2 Me haba at Isaraela adre me húkâlö khöbi kö Iehova, me ha, ka habe, U me ne he ka hna tavat ang ka hnyi hnyamök, me oge me he ka tha ohia anyidra ta je taun. 3 Ke Iehova ame löng hwan at Isaraela, me hna but at Kanana ködra ; me adre me tha ohí ödra me anyidra ta je taun : ke adre me hwenyi ien dok eling Horema.

4 Ke adre me he úhedra hnyi bucen Hora, getheniny Köio ae Dra, igigilö hnyei Edoma : ke ame vec hnyekon tavat can gethen. 5 Me haba tavat adre me fuc hwege ka Khong me Mose, me ha, ka habe, Ieú gabu öbe hum öhmun úhehmun Aigupito he ka mokcu hnyi hnyebuba? anyin ae ba han, ke ba köio ; k' öhmun hócö han eang ae baba. 6 Ke Iehova ame kunâ je on meic unyin tavat, m' adre me olou tavat, me a mokcu at Isaraela ae se hia. 7 Me ame he tavat kö Mose, me ha, ka habe, Öhmun

NUMERA 22.

e hia but ânyâ hulö, anyin a öhmun e fue  
 hwege kö Jehova, m' u: ö u hic dö kö  
 Jehova, me me he ka obia je on unyi-  
 hmun. Ke Mose ame hic hobi kâu tavat.  
 8 Ke Jehova ame ha kö Mose, ka habe,  
 U me he ka op ke on meic, me ip hon  
 ke uci; ke e ka wâ e hnen tavat adre  
 obou, me ödrin e he ka möt. 9 Ke  
 Mose ame op ke on a bras, me ip hon  
 ai: ke ame ne wâ on bras hnen at a oloû  
 ge on, me e ame möt. 10 Haba lakon  
 Isaraela adre me he, k' adre hunuma hnyi  
 Oboth. 11 Ke adre me he úhedra Oboth  
 me hunuma hnyi Ie-abarima hnyi hnye-  
 buba cicö Moaba, hnyi hna o hnyin seúnö.  
 12 Ke úhedra e me adre me hunuma hnyi  
 hnyigöulen bucen e Zareda. 13 Ke úhedra  
 e me adre me hunuma hoton Arenona, wale  
 hnyi hnyebuba gethen ame o únyi hnyi hnye  
 i at Amora: anyin a Arenona me hnyi-  
 gülen Moaba, wanben Moaba me hnye  
 Amora. 14 Anyin a wale ame ha hnyi  
 usiny Je vat anyi Jehova, ka habe,

Vaeba hnyi Sufa

Me je hnyigöulen bucen e Arenona,

15 Me hwatapkoluiny je bucen,

Ame hwali ka hnyi hnyaban Aro

K' ame ci hon hnyigöulen Moaba.

16 Ke úhedra e me adre me he Bere ai:  
 an eling, waleji Jehova ame ha kö Mose, ka  
 habe. Úkhacaköuâ thö könya tavat m' oge  
 me he ka habelidra.

17 Me haba at Isaraela adre me kio  
 mongö khumöng eang, ka habe,

An lö pupua thö; khumöng dö kâu:

18 An a kou hnen je than,

A ac hnen je tuhan tavat

Ge anyidrin je haten musi, me anyi-  
 drin je uci.

Ke úhedra hnyi hnyebuba, me adre me he  
 Matana ai: 19 ke úhedra Matana me adre  
 me he Nahaliela ai: ke úhedra Nahaliela  
 ai me adre me he Bamoth ai: 20 ke úhedra  
 Bamoth me adre me o ka hnyi hnyigöulen  
 bucen a e hnyi hnye Moaba, ka hnyi ban  
 Pisega, walethö hon hnyebuba.

21 Haba Isaraela ame kunâ je úthúmetu  
 kö Sihona thaniny at Amora, me ha, ka  
 habe. 22 Iny be hé hnyi wanben em hnye:  
 öhmun e ca he ka saú ka hnyi ta hnye, me  
 je hnye vine; öhmun e ca he ka ijem je  
 an adre kou, k' öhmun e hé ka he hnyi hua  
 sit gethen anyin than, ke ne o but öhmun  
 hna but je hnyigöulem. 23 Ke haba Si-  
 hona ame ca hna at Isaraela ka he hnyi  
 wanben iny hnye: ke so bi Sihona ame

úkhacaköuâ lakeiny hia, k' ame he hnye-  
 ba ai he ka tet metâ ka at Isaraela, k' ame  
 o hnyi Jahaza, me ame vat me at Isaraela.  
 24 Ke Isaraela ame kot e ge hele vat, me  
 hügünâ iny hnye hwân Arenona ke ne o  
 but Jaboka, a ke ne o but je laku Amona:  
 anyin ae hwege hnyigöulen je laku Amona.  
 25 Ke haba at Isaraela adre me hügünâ ta  
 je taun eling: ke Isaraela ame labâ je taun  
 anyin at Amora, hnyi Hesebona, me ta je  
 tauniny hia. 26 Anyin a Hesebona, me,  
 wale taun anyi Sihona thaniny at Amora,  
 waleji at ame vat me ke than Moaba ehac,  
 me hügünâ iny hnye hia, ke ne o but  
 Arenona. 27 Anyin a wale, haba hnyat  
 vejecâ, ödrin e ha, ka habe,

Ai öbun Hesebona ai

E so adre me op me otilâ taun Sihona:

28 Anyin a he but meic úheny Hesebona,

A bâhlân meic únyi hnyi taun Sihona:

K' ame an Aro hnyi Moaba,

Je thaniny je dok ae görany hnyi Are-  
 nona.

29 Ekölö gam, Moaba!

Hnye Kemosâ lö, adre okongu u:

E ame hna lakon бага m' ödrin e kec  
 möt,

Ke lakon je hlu m' ödrin e hwenbâ,

Kö Sihona tuhan at Amora.

30 Ötin e fan' ödra; a kong ut Hesebona ke  
 ne o but Dibona,

K ötin e hia but hügün' ödra ke ne o  
 but Nofa,

Wale ke ne o but Medeba.

31 Me haba Isaraela ame labâ hnye iny  
 at Amora. 32 Ke Mose ame úkhünöng he  
 ka ecinâkâ Jazera, me adre me hügünâ je  
 tauniny me obâ at Amora eling. 33 Ke  
 adre me hwiö me he hnyi gethen Basana:

me ame o but Oga than Basana ködra, a e  
 me lakeiny hia, me me vat hnyi Ederi.

34 Ke Jehova ame ha kö Mose, ka habe,  
 U me ca he ka outen e: anyin a oge me  
 hua e ka hnyi hnyamâm, me lakeiny hia  
 me iny hnye; ke u me he ka ânyâ kâu  
 helâ me hnâm hna ânyâ kö Sihona tuhan  
 at Amora, waleji ame laba hnyi Hesebona.

35 Me adre me kot e, me lakon, me lakeiny  
 hua, ke ba kolon gadra: ke adre me labâ  
 iny hnye.

HNYIMAKAN 22.

**K**E ame he lakon Isaraela, me hunuma  
 hnyi dok ae tha hon hnyi Moaba,  
 hoton Joridano cicö Jeriko.

2 Ke haba Balaka nöku Zipora ame wâ ta je únyi hia a ányâ Isaraela ka at Amora. 3 Ke ame ot gan hmâ at Moaba ge tavat anyin a ödra se hia : ke ame hlohlo at Moaba ge lakon Isaraela. 4 Ke haingö Moaba ka wahingatiny at Midiana, ka habe, Ame he tavat walang ang ka drem ta je únyi hia igigili öta helâ me bolok ame drem hna önyinginy hnei. Haba than Moaba hnyi úen eling, me, Balaka nöku Zipora. 5 Me e ame kunâ je úthúmetu kö Balaama nöku Beora hnyi Pethora, a e hnyi Wagewe, ka hnyi hnyei anyin lakon lakeiny, he ka hawâ e, me haingen, ka habe, Wâ bi a o thö tavat úhedra Aigupito : ke wâ bi adre me avâ hnyei, k' adre me laba but ang cicö ik : 6 ö u he but jem me hangâ tavat eling hobi könya ; anyin a ödra hwege huk : me ame ne khanö nya la he ka kuc ödra, me hnu ödra únyi hnyi hnyei : anyin ae khanö nya a haba at u me hahnahicâ me ame hnahic bi ; ke haba at u me hangâ me ame hnaúhangö. 7 Me ame he wahingatiny Moaba me wahingatiny Midiana, k' ödrin e hom hwaban biobotkong hnyi je hnyamödrin ; ke ödrin e o but unyi Balaama, me ha kâu hofuc ho Balaka. 8 Me haingen ködrin, ka habe, Me mokut ju eang, ke oge me he ka hmeto köbun hofuc ame he Iehova ka ha könya : me haba je than Moaba ödrin e laba unyi Balaama. 9 Ke ame o but Khong kö Balaama me ha ka habe, Ie hnyat ú unyâm? 10 Ke Balaama ame thu ka Khong, ka habe, Hnö Balaka nöku Zipora than Moaba hna kunâ könya he ka ha, ka habe, 11 Wâ bi, haba tavat adre o úhedra Aigupito adre me avâ hnyei : ö u he but jem me hang' ödra hobi könya ; me oge me ne he ka hwege hudra la, me hnu ödra. 12 Ke haba Khong ame ha kö Balaama, ka habe, U me ca he ka tha he mödrin : u me ca he ka hangâ tavat eling : anyin adre hahnahici ödra. 13 Ke Balaama ame vesâkong, me ha ka je than úhedrin unyi Balaka, ka habe, He th' öbun ka hnyi ibun hnyei, anyin ae höcö Iehova hnö nya he ka tha he möbun. 14 Ke ame köüö thö je than Moab, me he kö Balaka, me ha, ka habe, E höcö Balaama he ka tha he jem möhmun. 15 Ke haba Balaka ame kunâ hmetu ke je than ae se hia, a hnyat ae beönuu hon hnyat a bán. 16 Ke ödrin e o but unyi Balaama, me ha kâu, ka habe, Walang hofuc ho Balaka nöku Zipora, ka habe, O u ca he ka bi ovhelâm he ka he jem könya : 17 anyin a oge me he ka ti oganö u, ke oge me he ka ányâ ta je únyi hia u me he ka ha könya : anyin a wale ö u he but jem. me hangâ tavat eang hobi könya. 18 Ke Balaama ame thu, me ha ka lathnyabai Balaka, ka habe, Ame ne he Balaka ka ham könya umen uma ae unöngöt ge sileva me gol, e ca khanö nya he ka hanyâúâ hofuc ho Iehova a Khonguk, he ka ányâ úhnyükong me gan. 19 Anyin a wale mē mokut ju öbun eang, m' inye he ka vehlöng hofuc ame he Iehova ka ha hmetu könya. 20 Ke haba Khong ame o but kö Balaama hnyi hnyinghet, me ha kâu, ka habe, Ame ne o tavat ka hawo u, me todrö, me tha he mödrin : ke so bi, haba thibi únyi oge me he ka ha köu, me wale únyi u ma he ka ányâ. 21 Me haba Balaama ame vesâ, me hûkâlâ taben hon haleny asina, me tha he me je thaniny Moaba. 22 Ke ame ubâhlâ hmönyin anyi Iehova can e ame he : ke haba angela anyi Iehova ame tet metâ kâu eü hnyi gethen he ka ovhelâ e. Ke e ame tabâ haleny asina me he, ke tha e me li athnyabainy. 23 Ke haba asina ame wâ angela anyi Iehova ame tot eü hnyi gethen, ke e hnyi hnyamen hele vat adre oc : me haba asina ame saú but úheny hnyi gethen, me he ka hnyi hnyot : me Balaama ame kot asina he ka ohmeto e ka hnyi gethen. 24 Me haba angela anyi Iehova ame tot hnyi thopiny gethen hnyi wanben je hnyei vine, ke e hu hak hnyi ke keihen e, me ke hak hnyi ke keihen ang. 25 Ke haba asina ame wâ angela anyi Iehova me ame hakekenyâ hak veto, me me hlec ca Balaama hnyi hak veto : me e ame kot hmetu. 26 Ke haba angela anyi Iehova ame he e helê, me tot hnyi dok ae hnek, ke ba gethen he ka saú ka hnyin hnyi ke keihen metâ me me. 27 Ke a wâ but asina hnen angela anyi Iehova, me e ame ta but me Balaama : me ame ubâhlâ thö hmönyin anyi Balaama me e ame kot asina ge anyin uci. 28 Ke Iehova ame khöng hnyimen asina me ame fuc kö Balaama, me ha, ka habe, Ieü oge ányâ köu, m' u me okun ku' nya? 29 Me Balaama ame thu ka asina, ka habe, Can hnâm hna hlumö nya : e na hu anyik hele vat, me oge me he bi nya ka hlingö u. 30 Me asina ame ha kö Balaama, ka habe, Ca halem asina inya, at u je labö tabâ hnyi bongom ta je bong hia ke ne o but ang? hawa, hwakecik he ka ányâ helâe ehac köü? Me e ame thu, ka habe, E ba. 31 Me Iehova ame obwela li emakö Balaama, me e



NUMERA 23.

ame wâ angela anyi Iehova ame tot hnyi gethen ke e hnyi hnyamen hele vat adre oc: me e ame nom me ta ju hnyikânâi. 32 Ke haba angela anyi Iehova ame ha kâu ka habe, Ieú gam u me okun kot halem asina? wâ bi, oge me he jem he ka ovheli u, anyin ae kong kõnya úhem: 33 ke ame õ nya asina, me ame okun saú gak, ke ame ne ca saú gak, me oge me hia but hlingö u, me omelö e bi. 34 Haba Balaama ame ha ka angela anyi Iehova, ka habe, E kong hwakecik, anyin a oge me ca wâ a u me tot eú hnyi gethen he ka ovheli nya: ke haba walang ang ame ne kong köu únyi ang me oge me he ka hmetu. 35 Ke haba angela anyi Iehova ame ha kö Balaama, ka habe, He thö u me tavat: ke so bi u me he ka ha thibi je únyi oge me he ka ha köu. Me Balaama ame tha he me je than úhedrin unyi Balaka. 36 Ke a löng ut Balaka a e but ang Balaama, me e ame he ka úkhanö mē hnyi taun Moaba, hnyi hnyigöulen Arenona, wale hnyi obiny hnyigot. 37 Ke Balaka ame ha kö Balaama, ka habe, Hawa, oge ca úkhúnöng újengöâ he ka bao u? Ieú gam u je ca he jem kõnya? hawa e ca hnathu ang ae khanö nya he ka oganö u? 38 Ke Balaama ame thu kö Balaka, ka habe, Wâ bi oge o but köu: hawa, e khanö nya he ka ha ke hofuc? ke haba hofuc ame he Khong ka ip hnyi hnyimök, me oge me he ka ha eling. 39 Ke Balaama ame tha he me Balaka, me o Kiriathazoth. 40 Ke Balaka ame hudo je bolok me je mamoe, me hawo Balaama me je than unyin. 41 Ke haba nyi Balaka ame hum Balaama, me hom e ka hnyi je dok ae görany anyi Baala, ke e ame wâ úheny e tavat ke ne o but obiny je bunyen.

HNyimakan 23.

**K**E Balaama ame ha kö Balaka, ka habe, Ányâ thö je taben hut a seven eang, ke penapena thö eang seven ta bolok, ke seven ta mamoe бага. 2 Me Balaka ame ányâ helâ me hna ha hnö Balaama; ke haba Balaka me Balaama ödru me hudo hon je taben hut a úsa khaca bolok me úsa khaca mamoe бага. 3 Ke haba Balaama ame ha kö Balaka, ka habe, U me he ka tot hnyi ányâm hut, ke oge me he ka he but; me ame ne he la Iehova he ka úkhanö mönya: ke haba hofuc e ame he ka omanâ kõnya me oge me he bi nya ka thumetu u. Ke e ame he ka hnyi dok ae

görany. 4 Ke Khong ame úkhanö me Balaama, me e ame ha kâu, ka habe, Oge hia but penapena je taben hut a seven, me ve hudo hon je taben úsa khaca bolok me khaca mamoe бага. 5 Ke Iehova ame bi hofuc ka hnyi hnyimö Balaama, me ha, ka habe, Hmetu thö kö Balaka, ke u me he ka ha kâu helâe. 6 Ke e ame hmetu kâu, ke wâ bi, e ame tot hnyi anyin hut, e me je thaniny Moaba hia. 7 Me e ame ha anyin úhötú, ka habe,

Balaka ame hum nya úhek Arama,  
Wale than Moaba únyi hnyi je bucen e  
Deiö:

Aiö u, hangö Jakob hobi kõnya,  
Ke aiö u, me ú Isaraela.

8 Oge ma kâmâu ka hangâ at a ca hangâ  
hnen Khong?

Ke oge ma kâmâu ka ou at a ca ou hnö  
Iehova?

9 Oge me wâ e únyi hnyi hon kic,  
Oge bwele kâu únyi hnyi dok ae görany:  
Wâ bi, wale tavat adre me he ka hake  
laba,

K' adre me ca he ka tha öü ödra me ta  
je hnyi.

10 Ia ae khana he ka aú sesâi Jakob,  
Me ha úseiny ke keihen a vakiny  
Isaraela?

E na he ju mekik ka helâ me mekiny  
at ae wisa,

Me obiny melik helâ me obiny melen.

11 Ke Balaka ame ha kö Balaama, ka habe, Ieú e u je ányâ kõnya? oge hawo u he ka hangâ je iwahnaihmiöny mönya, ke wâ bi, u je hia but hahnahici ödra bi.

12 Ke e ame thu, ka habe, Hawa, oge me ca he ka wâ wia he ka ha hofuc Iehova ame ip hnyi hnyimök? 13 Ke Balaka ame ha kâu, ka habe, Ö u me tha he mönya

ka hnyi ke dok, m' u me he ka õ ödra hnyin; u me he ka wâ ke keihen tavat thibi, ke u me ca he ka wâ hia: ke u me he ka hangâ ling hobi kõnya. 14 Me e ame hom e ka hnyi utkânâ iny Zofim, hnyi ban Pisega, k' ame otilâ je taben hut a seven, me ame hudo hon je taben úsa khaca bolok ke khaca mamoe бага.

15 Ke e ame ha kö Balaka, ka habe, U me he ka tot eang hnyi ányâm hut, ke oge me he ka úkhanö me Iehova e helê. 16 Ke Iehova ame úkhanö me Balaama, me bi hofuc ka hnyi hnyimen, ka habe, Hmetu thö kö Balaka me ha je hofuc eling. 17 Me e ame o but, ke wâ bi, e ame tot hnyi anyin hut, ke tha e me je thaniny Moaba. Ke

NUMERA 24.

Balaka ame ha kâu, ka habe, Ieù a ha Iehova? 18 Me e ame ha anyin ùhòúcú, ka habe,

Höhöi thö, Balaka, me löng ju ;  
Tevehlöng ju könya u nöku Zipora :

19 Haba Khong me ca at bi, me me he ka thoi ;

Ke ca nokon at bi, me me he ka ietra :  
Hawa e ame fuc k' ame ca he ka ányá? Ame ha hofuc, k' adre me ca he ka owháda?

20 Wá bi, adre kunö nya he ka hahnahicá :  
Ke e ame hia but ohnahicá, ke e ca khanö nya he ka wia e.

21 E ame ca wá hulö unyi Jakob,  
K' ame ca wá monu ga Isaraela :  
E unyin Iehova a Khongon,  
Ke e hnyi wanbödra ùhongötiny than.

22 Khong ame hum ödra ùhedra Aigupito ;  
Ke e hu but gan heláke tang hwegeiny bolok ae hiny.

23 E hnathu, e ba bibihwakecin kö Jakob,  
Ke ba biobotkong kö Isaraela :  
Ke adre me he ka ha ga Jakob me Isaraela, ka habe,  
Ieù a ányá Khong!

24 Wa bi, ame tot tavat helá me liona momo,  
K' ame höihöi thö helá me liona бага :  
K' ame ca he ka mokut ke ne o but e ame an haniny,  
Me ijem dren at adre hlingá.

25 Me Balaka ame ha kö Balaama, ka habe, Ca he ka hang' ödra, ke ca he ka hahnahici ödra. 26 Ke haba Balaama ame thu me ha kö Balaka, ka habe, Oge me ca ha köu, ka habe, Hamök he ka ányá ta je unyi hia ame he Iehova ka ha könya?

27 Ke Balaka ame ha kö Balaama, ka habe, Aiö u, m' inye he ka hum u ka hnyi ke dok ; k' ame ne so ka Khong, me u ma he ka hang' ödra eling hobi könya. 28 Me Balaka ame hum Balaama ka hnyi hon Peora, wale cicö hnyebuba. 29 Ke haingö Balaama ka habe, Otilá thö je taben hut eang a seven, ke penapena thö eang seven ta bolok, ke seven ta mamoe бага. 30 Ke Balaka ame ányá hoton hna ha hnö Balaama, me hudo hon je taben hut úsa khaca bolok, me khaca mamoe бага.

HNYIMAKAN 24.

**K**E e manen dut kö Balaama ae so kö Iehova he ka ohnahici Isaraela, me e ame ca he but he ka heleù bibihwakecin,

heláji me ke je ùen, ke e ame hnyimakan hnyebuba ai. 2 Ke Balaama ame bwele me wá at Isaraela adre me ve laba hoton anyidra je tribu ; me ame o but kâu hanon Khong. 3 Me e ame ha anyin ùhòúcú, ka habe,

Ame ha Balaama nöku Beora,  
Waleji at a mok li emakan ame ha :

4 Haingen at ame löng je hofuc hwan Khong

K' ame wá hna omanená ge Ataekhanahia,

Ke e ame ta hnyikánái, me bwela bi li emakan :

5 Jakob lö, e so umám je uma mano,  
Ke je hnyabam Isaraela!

6 Adre avi ödra helá me je hwatapkolu,  
Helá me je hna belök hnyi baten wagewe,

Helá me je aloe a ta hnö Iehova,  
Helá me je üö arasi hnyi baten je an.

7 Ame he ka hingálá köiö unyi hnyi anyin li baket,

K' ame he ka hu je mátrániny hnyi je köiö ae se,

K' ame he ka gan hmá thaniny hu Agaga,

K' adre me he ka oganá dokhon dökhü.

8 Haba Khong ame hom e ùheny Aigupito  
E hwege helá me bolok ae hiny :  
E ame he ka an je hnyei, a je iwahnaihmiony më,

Me thu omomonou je jeiödra  
Me fan' ödra ge anyin je fana.

9 E ame cibouca, helá me man liona,  
Ke helá me liona momo ; ie at ame he ka bwebwelá?

Ame he ka hnahic at ame hahnahici u,  
K' adre me he ka hangá at ame hangö u.

10 Me ame ubáhlá hmönyin anyi Balaka kö Balaama, me eame kháukháu li hnyamen :  
ke Balaka ame ha kö Balaama, ka habe,  
Oge hawo u he ka hangá je iwahnaihmiony mönya, ke wá bi u je okun hahnahici ödra.

11 Ke walang ang kec dö ka hnyi em hnyei : oge me únkyúme he ka oganö u, ke wá bi, Iehova ame beháná gam hna ogáná. 12 Ke Balaama ame ha kö Balaka, ka habe, Hawa, oge me ca ha ka ányám je úthúmetu waleji u je kuná könya, me ha, ka habe, 13 Ame ne he Balaka ka ham könya umen uma ae unöngöt ge sileva me gol, me ca khanö nya bi he ka onua hofuc ho Iehova, he ka ányá so me kong hoton wek ; ke haka hofuc ame ha Iehova, me wale hofuc oge me he ka ha? 14 Ke

NUMERA 25.

walang ang oge me he but ka hnyi ik hnyeï, ke aiö u me oge me he ka ha köu ke je únyi ame he tavat eang ka ányá ka lakem hnyi je bong a biliny. 15 Me e ame ha anyin úhöúcú, ka habe,

Ame ha Balaama nöku Beora,

Waleji at a mok li emakan ame ha :

16 Haingen at ame löng je hofuc hwan Khong,

At ae khana metá anyin Beönua,

At ame wá hna omanená anyin Atae-khanahia,

At ame ta hnyikánái, me bwele bi li emakan :

17 Oge me wá e, ke ca walang ang :

Oge me wá e, ke ca hakekeny bi :

Ame he ka o okhú úheny unyi Jekob,

K' ame he ka kú haten musi úheny unyi Isaraela,

K' ame he ka kot je ke keihen Moaba Me okongoá je laku Setha.

18 Haba Edoma me hwajekhon

K' ame he Seira minya ka hwajekhon, waleji iwahnaihmiöny më ;

K' ame he Isaraela ka ton.

19 Ame he ka o úheny unyi Jekob ke at musi,

Ke e ame he ka ohia kolon únyi hnyi taun.

20 Ke e ame bwele ka wá Amaleka me e ame ha anyin úhöúcú, ka habe,

E beönua Amaleka ehac hnyi je hnyeï ;

Ke haba obiny káu me e ame he ka hia but.

21 Ke e ame bwele ka wá at Keni, me e ame ha anyin úhöúcú, ka habe,

E hwege hnyabam

K' adre ip ányám háúen hnyi kic.

22 Ke so bi adre me he ka oaúá at Keni, Ke ne o büt Asura ame hum u ka hnyi bá

23 Ke e ame ha anyin úhöúcú, ka habe, Ekölö, ie at ame he ka möt e ka ányá e hnen Khong ?

24 Ke ame he ka khöp je hu úheny Kitim, Me adre me he ka oveci Asura, me

oveci Heberu,

K' adre me he ka ohia e bi hnyi obiny

25 Ke ame todrö Balaama me he hmetu ka hnyi hnyaban ; k' ame he but minya Balaka.

HNYIMAKAN 25.

**K**E haba at Isaraela adre me labá Sitima, ke ame hwán tavat he ka bi únyi monu me omomoiny Moaba : 2 anyin

adre hawâ tavat he ka hnyi bi hut ka anyidra je khong ; ke haba tavat adre me hnyi han me khudrung ka anyidra je khong.

3 Ke haba at Isaraela adre me úkhacaköu unyi Baala-peora : me ame ubâhlâ thö

hmönyin anyi Iehova ka at Isaraela. 4 Ke haba Iehova ame ha kö Mose, ka habe,

Hom dö je taben tavat hia, me uhno döi ödrin hnyi hnyimakö Iehova, me me hmetu

je hmönyin ae gan anyi Iehova úheny unyi at Isaraela. 5 Ke haba Mose ame ha

ka tavat owisa unyin at Isaraela, ka habe, He th' öbun ka ve hlingá tavat unyibun

adre me tha ödra me Baala-peora. 6 Ke wa bi, haba ke at Isaraela ame hom ke

momo Midiana ka je liamekeiny më, hnyi hnyimakö Mose, me hnyi hnyimakan úkha-

caköu anyin lakon Isaraela hia, ödra adre me tenge hnyi hwanumen uma úkhacaköu.

7 Ke a wá e hnö Fineasa, nöku Eleazara, a nöku Arona at bihut, me e ame todrö

hnyi úkhacaköu, me hom ö hnyi hnyamen ; 8 me e ame he hoton at Isaraela eling ka

hnyi hak, me dáoa li hnyekudru, wale at Isaraela me momo. Me ame todru mok ae

cap unyin lakon Isaraela. 9 Ke haba tavat a mokcu ge mok ae cap, me ödra twente

foa thauzan.

10 Ke Iehova ame ha kö Mose, ka habe, 11 Haba Fineasa nöku Eleazara a nöku

Arona at bihut ame hia but wia anyik hmönyin úheny unyin lakon Isaraela, hnyi

hnen hna ciá gak hnyi wanbödra, m' oge me ca ohia lakon Isaraela hnyi hnök hna

ciá. 12 Anyin a wale ha thö, ka habe, Wá bi, inya oge me ham anyik úhihi-

nyköuiny úsoköu : 13 k' ame he ka e bi unyin, me je mátrániny a hwaban, me me

úbihinyköu he ka at bihut nyiele balua ; anyin a e ame ciá ge Khongon, me bi

hwaban möt anyin lakon Isaraela. 14 Ke haba ien at Isaraela adre hlingá, wale at

adre tha hlingá me momo Midiana, me Zimeri, a nöku Salu, thaniny lap anyin ke

kamen unyin at Simeona. 15 Ke haba ien momo Midiana adre hlingá, me Kozebi,

nöku Zura ; ke haba бага eling, me taben ke lap anyin ke kamen hnyi hnyeï Midiana.

16 Ke Iehova ame ha kö Mose, ka habe, 17 Ovecá at Midiana, me kuc ödra : 18 anyin

adre me oveci öbun hnyi hnödra hna bi jöniny, waleji adre bi jönibun hnyi únyi

anyi Peora me únyi anyi Kozebi, a nokon thaniny Midiana, a hanidra, waleji adre

hlingá hnyi bong bongon mok ae cap can únyi anyi Peora.

## HNYIMAKAN 26.

**K**E hwaban mok ae cap, haba Iehova ame ha kö Mose me Eleazara, nöku Arona at bihut, ka habe, 2 He thö ka aú úseiny úkhacaköu anyin lakon Isaraela hia, hwân ge tavat a twente huna me gan hon e, hoton je lap anyin lakamödra, tavat hia ae khana hnyi vat unyi Isaraela. 3 Me haba Mose me Eleazara at bihut ödrü me úhnenamö mödra hnyi dok ae tha hon hnyi Moaba hnyi Joridano, wale Jeriko, ka habe, 4 He thö ka öü ödra, hwân ge tavat a twente huna ke gan hon e; hoton hna huna hnö Iehova kö Mose me lakon Isaraela, waleji tavat adre hom úhedra hnyi hnyei Aigupito.

5 Haba Reubena, nöku Isaraela a bân : haba laku Reubena; Enoka me lap anyin at Enoka : Palu me lap anyin at Palu : 6 Ezerona me lap anyin at Hezerona : Karemi me lap anyin at Karemi. 7 Wale je lap anyin at Reubena : ke haba úseidra a tavat adre aú me ödra fâte theri thauzan ke seven haded ke thöte. 8 Ke haba nöku Palu; Eliaba. 9 Ke haba laku Eliaba; me Nemuela, me Dathana, me Abirama. Waleling Dathana me Abirama a li at adre hawá hnyi úkhacaköu, waleji ödre iwatretra me Mose me Arona hnyi je lahio Kora hnyi hnödra hna iwatretra me Iehova : 10 k' ame memang ut hnyimen kâná k' ame tha ut' ödrü me Kora hnyi imekiny lahien eling; k' ame ön ödrin tu haded ke fifte ge meic, m' ödrin e haten bi. 11 Ke so bi a ca mokcu laku Kora.

12 Ke haba laku Simeona hoton anyidra je lap : únyi ga Nemuela, me, lap anyin at Nemuela : únyi ga Jamina, me, lap anyin at Jamina : únyi ga Jakina, me, lap anyin at Jakina : 13 únyi ga Zera, me, lap anyin at Zera : únyi ga Saulo, me, lap anyin at Saulo. 14 Wale je lap anyin at Simeona, ke ödra twente tu thauzan ke tu haded.

15 Haba laku Gada hoton anyidra je lap : únyi ga Zifiono, me, lap anyin at Zifiono : únyi ga Hagi, me, lap anyin at Hagi : únyi ga Suni, me, lap anyin at Suni : 16 únyi ga Ozeni, me, lap anyin at Ozeni : únyi ga Eri, me, lap anyin at Eri : 17 únyi ga Aroda, me, lap anyin at Aroda : únyi ga Areli, me, lap anyin at Areli. 18 Wale je lap anyin laku Gada hoton hna öü ödra, ke ödra fâte thauzan ke faiv haded.

19 Ke haba laku Juda, me, Era me

Onana : ke a mokcu Era me Onana hnyi hnyei Kanana. 20 Ke haba laku Juda hoton anyidra je lap; únyi ga Sela, me, lap anyin at Sela : únyi ga Farez, me, lap anyin at Farez : únyi ga Zera, me, lap anyin at Zera. 21 Ke haba laku Farez : únyi ga Hezerona, me, lap anyin at Hezerona : únyi ga Hamula, me, lap anyin at Hamula. 22 Wale je lap anyi Juda hoton hna öü ödra, ke ödra sevente siks thauzan ke faiv haded.

23 Ke haba laku Isakara hoton anyidra je lap : únyi ga Tola, me, lap anyin at Tola : únyi ga Pua, me, lap anyin at Pua : 24 únyi ga Jasuba, me, lap anyin at Jasuba : únyi ga Simerona, me, lap anyin at Simerona. 25 Wale je lap anyi Isakara hoton je hna öü ödra, ke ödra sikste foa thauzan ke theri haded.

26 Ke haba laku Zebulona hoton anyidra je lap : únyi ga Sereda, me, je lap anyin at Sereda : únyi ga Elona, me, je lap anyin at Elona : únyi ga Jalela, me, je lap anyin at Jalela. 27 Wale je lap anyin at Zebulona hoton hna öü ödra, ke ödra sikste thauzan ke faiv haded.

28 Ke haba laku Josefa hoton anyidra je lap : Manase me Eferaima. 29 Haba laku Manase : únyi ga Makir, me, je lap anyin at Makir : ke Makir ame hnöku Gileada : únyi ga Gileada, me, lap anyin at Gileada. 30 Ke walang je laku Gileada : únyi ga Iezera, me, lap anyin at Iezera : unyi ga Heleka, me, lap anyin at Heleka : 31 ke únyi ga Aseriela, me, lap anyin at Aseriela : ke únyi ga Sekema, me, lap inyin at Sekema : 32 ke únyi ga Semida, me, lap anyin at Semida : ke únyi ga Hefera, me, lap anyin at Hefera. 33 Ke haba Zelo-feada nöku Hefera, me ba nokon бага, ke wahlu tbibi : ke haba ien wahlu a laku Zelo-feada, me, Mala, me Noa, me Hogela, me Mileka, me Tireza. 34 Wale je lap anyin at Manase : ke haba tavat adre aú gadra, me fifte tu thauzan ke seven haded.

35 Walang laku Eferaima, hoton anyidra je lap : únyi ga Suthela, me, lap anyin at Suthela : ke únyi ga Bekera, me, lap anyin at Bekera : ke únyi ga Thana, me, lap anyin at Thana. 36 Ke walang laku Suthela : únyi ga Erana, me, lap anyin at Erana. 37 Wale je lap anyin laku Eferaima hoton hna öü ödra, ke ödra thöte tu thauzan ke faiv haded. Wale li laku Josefa hoton je lap únyi gadru.

38 Ke haba laku Beniamina me anyidra

NUMERA 27.

je lap: únyi ga Bela, me, lap anyin at Bela: ke únyi ga Asebala, me, lap anyin at Asebala: ke únyi ga Ahirama, me, lap anyin at Ahirama: 39 ke únyi ga Supima, me, lap anyin at Supima: ke únyi ga Hupima, me, lap anyin at Hupima. 40 Ke haba li laku Bela, me, Areda, me Naamana: ke únyi ga Areda, me, lap anyin at Areda: ke únyi ga Naamana, me, lap anyin at Naamana. 41 Wale laku Beniamina hoton anyidra je lap: ke haba tavat gadra adre me aú, me fâte faiv thauzan ke siks haded.

42 Walang laku Dana hoton anyidra je lap: únyi ga Suhama, me, lap anyin at Suhama. Wale je lap anyi Dana hoton anyidra je lap. 43 Haba je lap hia anyin at Suhama, hoton tavat adre me aú, me ödra sikste foa thauzan ke foa haded.

44 Haba laku Asera hoton anyidra je lap: únyi ga Iemina, me, lap anyin at Iemina: únyi ga Iesevi, me, lap anyin at Iesevi: únyi ga Beria, me, lap anyin at Beria. 45 Ke únyi ge laku Beria: haba únyi ga Heberu, me, lap anyin at Heberu: ke únyi ga Malekiela, me, lap anyin at Malekiela. 46 Ke Sara ien hlu nöku Asera. 47 Wale je lap anyin laku Asera hoton tavat adre aú gadra a fíte theri thausan ke foa haded.

48 Haba laku Nafatali hoton anyidra je lap: únyi ga Jazela, me, lap, anyin at Jazela: únyi ga Guni, me lap anyin at Guni: 49 ke únyi ga Jazera, me, lap anyin at Jazera: ke únyi ga Silema, me lap anyin at Silema. 50 Wale je lap anyin at Nafatali hoton anyidra je lap: ke haba tavat gadra adre aú, me, fâte faiv thauzan ke foa haded.

51 Wale tavat adre me aú unyin lakon Isaraela, a ödra siks haded ke wan thauzan ke seven haded ke thöte.

52 Ke Iehova ame ha kö Mose, ka habe, 53 Adre me he ka khenâ hnyei ka tavat eling hoton úseiny je ien. 54 Haba tavat ae se, me u me he ka ham gânâ hnyei ködra, ke haba tavat ae wakhalet, me u me he ka ham hnyei ae úhnyukong: adre me he ka ve ham ködra hnyei hoton úseidra adre me aú. 55 Ke so bi adre me he ka khenâ hnyei ge uglekôb: adre me he ka hu hnyei hoton ien je tribu anyin lakamödra. 56 Adre me he ka khenâ me idra hoton uglekôb ge tavat ae se me tavat ae wakhalet.

57 Ke walang at Levi adre aú hoton anyidra je lap: únyi ga Geresoma, me, lap

anyin at Geresoma: únyi ga Kohatha, me lap anyin at Kohatha: únyi ga Merari, me lap anyin at Merari. 58 Wale je lap anyin at Levi: a lap anyin at Libeni, me lap anyin at Heberona, me lap anyin at Maheli, me lap anyin at Musi, me lap anyin at Kora. Ke Kohatha ame hnokoâ Amerama. 59 Ke haba ien öio Amerama, me, Jokebeda, a nöku Levi, waleji a hnokoâ hnyi Aigupito: ke e ame hnöku Arona, me Mose, me Miriama, a hanidru, ga Amerama. 60 Ke haba laku Arona, me, Nadaba, me Abihu, me Eleazara, me Ithamara. 61 Ke a mokcu Nadaba me Abihu hnyi hnödrü hna hudo meic ae ke bongon bi hnyi hnyimakö Iehova. 62 Ke je hnyat gadra adre aú, me, ödra twente theri thauzan, obaga hia hwân ge tavat a khaca tehi me gan hon e: anyin adre ca tha öü ödra me lakon Isaraela, anyin adre ca ha gadra unyin lakon Isaraela.

63 Wale tavat a aú hnö Mose me Eleazara at bihut: wale li at ödre aú lakon Isaraela, hnyi dok ae tha hon hnyi Moaba, hnyi Joridano, hnyi Jeriko. 64 Ke haba unyidra hia me ba ke at a aú hnö Mose me Arona ehac, waleji hnyi hnödrü hna aú lakon Isaraela hnyi hnyebuba Sinai. 65 Anyin a hia but Iehova ha gadra, ka habe, Adre me he ka mokcu hnyi hnyebuba. Me ba köluidra, ke so bi Kaleba nöku Jefune, me Josua nöku Nuna.

HNYIMAKAN 27.

**K**E ame o but je hlu laku Zelofeada, nöku Hefera, nöku Gileada, nöku Makir, nöku Manase, a je lap anyi Manase nöku Josefa: ke walang ien lakon je hlu, jia Mala, me Noa, me Hogela, me Mileka, me Tireza. 2 Ke ödrin e tot hnyi hnyimakö Mose me Eleazara at bihut, me hnyi hnyimakan je than me úkhacaköu hia hnyi hwanumen uma úkhacaköu, me ha, ka habe, 3 A mokcu kamöhmün hnyi hnyebuba, ke e ame ca tha tot me tavat adre me bi tot kö Iehova unyin lahiö Kora: ke so bi e ame moko anyin hulö bi, ke ba nokon бага. 4 Geú adre me he ka ohia ien kamöhmün hnyi wanben anyin lap, anyin ae ba nokon бага? Ha ihmün bi unyin je liamekeiny me cica. 5 Ke Mose ame hom hodrin hofuc kö Iehova. 6 Ke Iehova ame ha kö Mose, ka habe, 7 E wisa hofuc hwan je hlu laku Zelofeada: e

hnathu u me he ka ha idrin unyin je liamekeiny me kamödrin; ke u me he ka hna ködrin iny kamödrin. 8 Ke u me he ka ha ka lakon Isaraela, ka habe, A ne mokcu ke at ke ba nokon бага, me öbun e he ka hna iny ka nokon hlu. 9 Ke ame ne ba nokon hlu, me öbun e he ka ham iny hnyei ka je liamekeiny më. 10 Ke ame ne ba liamekeiny më, me öbun e he ka ham iny hnyei ka je liamekeiny me kamen. 11 Ke ame ne ba liamekeiny me kamen, me öbun e he ka ham iny hnyei ka je útangköu më, a iny biju: ke wale hnanyibu adre owisa hobi kâu lakon Isaraela, hoton hna húna hnö Iehova kö Mose.

12 Ke Iehova ame ha kö Mose, ka habe, Öliâ thö bucen eang a Abarima, me u me wâ hnyei waleji oge ham ka lakon Isaraela. 13 Ke u ka hia but wâ e, me u me he ka he minya ka tha mokut me lakâmâm, helâ me Arona a tuhâm: 14 anyin a obe hanyâûâ hok hofuc hnyi hnyebuba Zin, waleji hnyi hna iwatretra hnen úkhacaköu, he ka okabi nya hnyi an hnyi hnyimaködra. (Wale an Meriba e Kadesi, hnyi hnyebuba Zin.) 15 Ke Mose ame ha kö Iehova, ka habe, 16 E na he Iehova Khongon je hanon tavat hia, ka otilà ke at hon úkhacaköu, 17 me me didrut hnyi hnyimaködra me dit hmetu hnyi hnyimaködra, me lili ödra e helê, me ohmetu ödra, me me ca he úkhacaköu anyi Iehova ka helâ me hnahat mamoe ae ba at ame tuö. 18 Ke Iehova ame ha kö Mose, ka habe, U me he ka hum Josua noku Nuna, at ae so hanon, ke ip hnyamâm hon; 19 me otilà e hnyi hnyimakö Eleazara at bihut, me úkhacaköu hia; me húna kâu hnyi hnyimaködra. 20 Ke u me he ka ip hon e hanen ânyâm hmanenang, me me löng hoton hnen úkhacaköu hia a lakon Isaraela. 21 Ke e ame he ka tot hnyi hnyimakö Eleazara at bihut, ke hamen he ka hnö hobi kâu hnyi hna owisa hnen Urim hnyi hnyimakö Iehova: ke adre me he ka he hoton hnen hna ha, k' adre me he ka hmetu hoton hnen hna ha, & e me lakon Isaraela hia a tha ödra më, wale úkhacaköu hia. 22 Ke Mose ame ânyâ helâ me hna húna hnö Iehova; me e ame hum Josua me otilà e hnyi hnyimakö Eleazara at bihut me úkhacaköu hia: 23 me e ame ip li hnyamen hon, me húna kâu, helâ ma hna ha hnö Iehova a deny Mose.

## HNYIMAKAN 28.

**K**E haba Iehova ame ha kö Mose, ka habe, 2 Húna thö ka lakon Isaraela me ha ködra, ka habe, Haba hut könya, wale jeú hobi kâu je hut a an hnen meic me me bo so könya, me wale únyi öbun e he ka tuö he ka hudo könya hnyi je úen adre thu. 3 Ke u me he ka ha ködra, ka habe, Walang hut a an ge meic öbun e he ka hudo kö Iehova; a je lakon mamoe бага a klaca hunainy ae ba hnyikongon, úse lo hnyi ke bong me ke bong, hnân hudiny leú hnyi ta ogo bong hia. 4 U me he ka hudo ke nokon mamoe hnyi hnyomakatu, ke u me he ka hudo ke nokon mamoe hnyi sahac; 5 ke khaca omer falawa adre úhaniken me wakaco adre kokot a ke keihen a vakiny hin, me hnân hudiny han. 6 Wale hudiny leú hnyi ta ogo bong hia, waleji adre húna hnyi bucen Sinai me me bo so, a hut a an ge meic kö Iehova. 7 Ke haba hudiny ic, me ke keihen a vakiny hin hnân bi hanen nokon mamoe a khaca: u me he ka hingâlâ but waina ae hwege kö Iehova hnyi dok ae kap hnân hudiny ic. 8 Ke haba nokon mamoe a loiny me u me he ka hudo hnyi sahac: helâ me hudiny han hnyi hnyomakatu u me he ka hudo e, ke helâe hudiny ic, me hut a an ge meic ae bo so kö Iehova.

9 Ke haba hnyi bong sabath, me lo li nokon mamoe бага ae ba hnyikongon a khaca hunainy, ke lo li omer falawa hnân hudiny han adre úhaniken me wakaco, me hudiny ic a hanen: 10 haba únyi e me hudiny leú hnyi ta je sabath hia, ke ca ha bi hudiny leú hnyi ta ogo bong, ke hudiny ic a hanen.

11 Ke haba hnyi hnyimakan anyibun je tehi me öbun e he ka hudo hudiny leú kö Iehova: a lo li nak bolok, ke khaca mamoe бага, ke seven ta lakon mamoe бага ae ba hnyikongon, a khaca hunainy; 12 ke kun ta omer falawa adre úhaniken me wakaco hnân hudiny han hnân bi hanen ke bolok me ke bolok; ke lo li omer falawa adre úhaniken me wakaco hnân hudiny han, a hanen mamoe бага a khaca; 13 ke khaca omer falawa adre úhaniken me wakaco hnân hudiny han, a hanen nokon mamoe a khaca; hnân hudiny leú ae bo so, hut a an ge meic kö Iehova. 14 Ke haba je hudiny ic gadra, me hafny hin waina hnân bi hanen ke bolok, ke ke keihen a kuniny hin hnân bi hanen mamoe бага, ke

ke keihen a vakiny hin hnân bi hanen mamoe: wale hudiny leû hnyi je tehi hnyi huna. 15 Ke khaca got бага hnân hudiny hulö, he ka hudo kö Iehova; ke ca ha bi hudiny leû adre hudo bala, me hudiny ic a hanen e.

16 Ke haba hnyi tehi a bân hnyi bong a fortininy, me adre me he ka ânyâ paseka kö Iehova. 17 Ke hnyi bong a fiftininy tehi eling, me adre me he ka bijeû: adre me he ka han areto adre ca levenâ hnyi je bong a seven. 18 Ke haba hnyi bong a bân, me ame he ka hu ûkhacaköu ae kap; k' öbun e ca he ka ânyâ huliwa ae hmak: 19 ke öbun e he ka hudo hut a an ge meic, a hudiny leû kö Iehova; wale lo li nak bolok, ke khaca mamoe бага, ke seven je lakon mamoe a khaca hunainy: a je meno ae ba hnyikongudrin: 20 ke haba je hudiny han a hanen, me, falawa adre úhaniken me wakaco: öbun e he ka hudo kun ta omer hnân bi hanen ke bolok, ke lo li omer hnân mamoe бага; 21 u me he ka hudo úsa khaca omer he ka ve bi hanen je lakon mamoe a seven; 22 ke khaca got бага hnân hudiny hulö, me me bi hwaban anyibun möt. 23 Öbun e he ka hudo e, a tha e me hudiny leû adre hudo hnyi hnyomakatu a hudiny leû ae hmâ bala. 24 Ke öbun e he ka hudo helâe hnyi je bong a seven, wale han he ka bi hanen hut a an ge meic k' ame bo so kö Iehova: adre me he ka hudo e a tha e me hudiny leû ae hmâ, me hudiny ic a hanen. 25 Ke haba hnyi bong a seveniny öbun e he ka hu ûkhacaköu ae kap; ke öbun e ca he ka ânyâ huliwa ae hmak.

26 Helâe minya hnyi bong bongon je wan a bân, öbun ka he ka hudo hudiny han ae teb únyi kö Iehova, hnyi anyibun bijeû je wik, me öbun e he ka hu ûkhacaköu ae kap; k' öbun e ca he ka ânyâ huliwa ae hmak: 27 ke öbun e he ka hudo hudiny leû ae bo so kö Iehova; a lo li nak bolok, ke khaca mamoe бага, ke seven lakon mamoe бага a khaca hunainy; 28 me hudiny han a hanen e, wale falawa adre úhaniken me wakaco, kun ta omer hanen bolok a khaca, ke lo li omer hanen mamoe бага a khaca, 29 a úsa khaca omer he ka ve bi hanen lakon mamoe a seven; 30 ke khaca got бага, hnân bi hwaban anyibun möt. 31 Öbun e he ka hudo e a tha e me hudiny leû ae hmâ, me hudiny han a hanen (a je meno ae ba hnyikongon) tha e me je hudiny ic a hanen e.

## HNYIMAKAN 29.

**K**E haba hnyi tehi a seveniny hnyi bong a baniny tehi, me öbun e he ka hu ûkhacaköu ae kap; k' öbun e ca he ka ânyâ ke huliwa ae hmak: wale bong öbun e he ka túö je trutru hnyin. 2 Ke öbun e he ka hudo hudiny leû ae bo so kö Iehova; a khaca nak bolok, ke khaca mamoe бага, ke seven lakon mamoe бага ae ba hnyikongon a khaca hunainy: 3 ke haba hudiny han a hanen e, me falawa adre me úhaniken me wakaco, a kun ta omer hnân bolok, ke lo li omer hnân mamoe бага, 4 ke úsa khaca omer he ka ve bi hanen lakon mamoe a seven: 5 ke khaca got бага hnân hudiny hulö, me me bi hwaban anyibun möt: 6 ke adre me he ka ânyâ minya hudiny leû hnyi úen ae manen je tehi, me hudiny han a hanen e, me hudiny leû ae hmâ, ke hudiny han a hanen, tha e me je hudiny ic, hoton hna hûna, hnân bo so, a hut a an ge meic kö Iehova.

7 Ke haba hnyi bong a teniny tehi a seveniny öbun e he ka hu ûkhacaköu ae kap: me öbun e he ka hom úhnyúkongo ta je hnyekubun; k' öbun e ca he ka huliwa: 8 ke öbun e he ka hudo hudiny leû kö Iehova me me bo so: a khaca nak bolok, ke khaca mamoe бага, ke seven lakon mamoe бага a khaca hunainy: a je meno ae ba hnyikongon: 9 me hudiny han a hanen e; wale falawa adre úhaniken me wakaco, kun ta omer hnân bolok, ke lo li omer hnân mamoe бага a khaca, 10 úsa khaca omer he ka ve bi hanen lakon mamoe a seven: 11 ke khaca got бага hnân hudiny hulö; ke ca ha bi hudiny hulö hnân bi hwaban möt, me hudiny leû ae hmâ, me hudiny han a haniny, a tha e me je hudiny ic.

12 Ke haba hnyi bong a fiftininy tehi a seveniny, me öbun e he ka hu ûkhacaköu ae kap; ke ca he öbun ka ânyâ huliwa ae hmak, k' öbun e he ka bijeûâ kö Iehova seven ta bong: 13 ke öbun e he ka hudo hudiny leû, hut a an ge meic ae bo so kö Iehova; a thötin je nak bolok, ke lo li mamoe бага, ke fortin lakon mamoe бага a khaca hunainy; a je meno ae ba hnyikongon: 14 ke je hudiny han a hanen, wale falawa adre úhaniken me wakaco, a úsa kun omer he ka ve bi hanen je bolok a thötin, ke úsa lo li omer he ka ve bi hanen li mamoe бага, 15 ke usa khaca omer he

## NUMERA 30.

ka ve bi hanen lakon mamoe a fortin : 16 ke khaca got baga hnân hudiny hulö ; ke ca ha bi hudiny leú ae hmâ, me hanen a hudiny han, me hudiny ic.

17 Ke haba hnyi bong a loiny, me öbun e he ka hudo twelv je nak bolok, ke lo li mamoe baga, ke fortin lakon mamoe baga ae ba hnyikongon a khaca hunainy : 18 ke hudiny han me hudiny ic he ka ve bi hanen je bolok, me li mamoe baga, me lakon mamoe, hoton úseidrin, helâ me hna hûna : 19 he khaca got baga hnân hudiny hulö : ke ca ha bi hudiny leú ae hmâ, me hanen e ; a hudiny han, me hudiny ic.

20 Ke haba hnyi bong a kuniny, me eleven ta bolok, ke lo li mamoe baga, ke fortin lakon mamoe baga ae ba hnyikongon, a khaca hunainy ; 21 ke hudiny han, me hudiny ic, a hanen je bolok, me li mamoe baga, me lakon mamoe, hoton úseidrin, helâ me hna hûna : 22 ke khaca got baga hnân hudiny hulö ; ke ca ha bi hudiny leú ae hmâ, me hanen a hudiny han me hudiny ic.

23 Ke haba hnyi bong a vakiny, me ten ta bolok, ke lo li mamoe baga, ke fortin lakon mamoe baga ae ba hnyikongon, a khaca hunainy : 24 ke haba je hudiny han me je hudiny ic, ame he ka ve bi hanen je bolok, me li mamoe baga, me lakon mamoe, hoton je úseidrin, helâ me hna hûna : 25 ke khaca got baga hnân hudiny hulö : ke ca ha bi hudiny leú ae hmâ, ke hanen a hudiny han, me hudiny ic.

26 Ke haba hnyi bong a thabúnginy nain je bolok, ke lo li mamoe baga, ke fortin je lakon mamoe baga, ae ba hnyikongon, a khaca hunainy : 27 me je hudiny han, me je hudiny ic a hanen, ame he ka ve bi hanen je bolok, me li mamoe baga, me lakon mamoe hoton úseidrin, helâ me hna hûna : 28 ke khaca got baga hnân hudiny hulö ; ke ca ha bi hudiny leú ae hmâ, ke hudiny han, me hudiny ic a hanen.

29 Ke haba hnyi bong a siksiny, eit ta bolok, ke lo li mamoe baga, ke fortin lakon mamoe baga ae ba hnyikongon, a khaca hunainy : 30 ke je hudiny han, me je hudiny ic a hanen, he ka ve bi hanen je bolok, me li mamoe baga, me lakon mamoe, hoton úseidrin, helâ me hna huna : 31 ke khaca got baga hnân hudiny hulö ; ke ca ha bi hudiny leú ae hmâ, ke hudiny han, me hudiny ic a hanen.

32 Ke haba hnyi bong a seveniny, seven ta bolok, ke lo li mamoe baga, ke fortin

lakon mamoe baga ae ba hnyikongon, a khaca hunainy : 33 me je hudiny han, me je hudiny ic a hanen, he ka ve bi hanen je bolok, me li mamoe baga, me lakon mamoe, hoton úseidrin, helâ me hna hûna : 34 ke khaca got baga hnân hudiny hulö, ke ca ha bi hudiny leú ae hmâ, me hudiny han, me hudiny ic a hanen.

35 Ke haba hnyi bong a eitiny, me öbun e he ka hu úkhacaköu ae únyi hnathu, öbun e ca he ka ányâ ke huliwa ae hmak : 36 ke öbun e he ka hudo hudiny leú, hut a an ge meic ae bo so kö Iehova : a khaca bolok, ke khaca mamoe baga, ke seven lakon mamoe baga ae ba hnyikongon, a khaca hunainy : 37 me hudiny han, me hudiny ic a hanen he ka ve bi hanen bolok, me mamoe baga, me lakon mamoe, hoton úseidrin, helâ me hna hûna : 38 ke khaca got baga hnân hudiny hulö, ke ca ha bi hudiny leú ae hmâ, me hudiny han, me hudiny ic a hanen.

39 Öbun e he ka hudo eling kö Iehova hnyi anyibun je bijeú adre thu, ke ca ha bi anyibun je khöbi, me je hut ae betenge hnân je hudiny leú, me je hudiny han, me je hudiny ic, me je hudiny ole öbun e labö hudo. 40 Ke haba Mose ame omanená ka lakon Isaraela hoton hna hûna hnö Iehova kö Mose.

### HNYIMAKAN 30.

**K**E haba Mose ame ha ka je taben je tribuiny lakon Isaraela, ka habe, Walang únyi a hûna Iehova. 2 Ame ne he ke at ka bi khöbi kö Iehova, ame ne khemanyin he ka ca hnyekon ge hwan hofuc, me e ame ca he ka hanyâúâ hnen hna ha ; ke e ame he ka ányâ hia hoton hna he but úyui hnyi hnyimen. 3 Helâe minya ke momo ame ne bi khöbi kö Iehova, me ca hnyekon ge hwan hofuc, ke tiga e bi hnyi hnyaban kamen, ke tiga ca at hnathu ; 4 ke ame ne löng anyin khöbi hnen kamen, me hofuc ame ca hnyekon kâu, k' ame ne laba hnyibi kamen ; awe ame he ka tethmâ hia anyin khöbi, ke haba khaca ame he ka tethmâ hofuc hia ame ca hnyekon kâu. 5 Ke ame ne thawâ e hnen kamen, hnyi bong e ame löng hwan hnyin ; awe, ame ca he ka tethmâ anyin khöbi, me hofuc a ca kâu hnyekon ; k' ame he Iehova ka hna e, anyin a thawâ e hnen kamen. 6 Ke ame ne hu áian, ke ka e bi anyin khöbi, ame ne ke hofuc ae úhlöhlök ame he únyi hnyi li eso-



NUMERA 31.

ngodiny, wale ame hia but ca hnyekon kâu; 7 ke e ka löng ut e hnen âiân бага, k' ame ca fuc kâu hnyi bong e ame löng hnyin; awe, ame he ka tethmä anyin khöbi, me hofuc e ame ha, waleji a ca hnyekon kâu. 8 Ke ame ne thawá momo hnen âiân hnyi bong e ame löng hnyin; awe, e ame he ka oúnyibâúâ anyin khöbi, me hofuc ae úhlöhlök únyi hnyi li esongodiny, waleji e ame ca hnyekon gan: ke Iehova ame he ka hna but e. 9 Ke haba khöbiny safac, ame ne momo adre degec, me ame he ka tethmä hia unyin hofuc hia e ame ca e gan. 10 Ke ame bi khöbi hnyi uma umen âiân a бага, k' ame ne ca hnyekon ge hofuc adre khemanyin, 11 ke a löng ut hnen âiân, k' ame ne laba hnyibi, k' ame ca thawá, awe, ame he ka tethmä hia anyin je khöbi hia, k' ame he ka tethmä hofuc hia waleji e ame ca hnyekon kâu. 12 Ke ame ne hia but oúnyibâúâ hnen âiân a бага hnyi bong e ame löng hnyin, awe, ame ca he ka tethmä je hofuc únyi hnyi li esongodiny hnyi anyin je khöbi, me hofuc ame ca hnyekon gan: anyin a hia but oúnyibâúâ je únyi e hnen бага; ke ame he Iehova ka hna e bi. 13 E khana âiân a бага he ka ohmä, ke e khana âiân a бага he ka oúnyibâúâ je khöbi hia me je hna khemanyin hia a hnân ca hnyok. 14 Ke ame ne ba hofuc hwan бага ka momo a âiân hnyi ke bong me ke bong; awe, e ame ohmä ta je khöbi hia anyin âiân a momo, me hofuc hia e ame ca hnyekon gan: haba e ame otílâ hmâ e, anyin ae ba hnen hna ha kâu hnyi bong e ame löng hnyin. 15 Ke ame ne he бага ka oúnyibâúâ, hnyi úen e ame löng, awe, ame he ka takou e hulö anyin momo. 16 Wale je hnanyibu a húna Iehova kö Mose ge бага me âiân, me kamen me nokon hlu e ka tiga ca at hnathu bi hnyi hnyaban kamen.

HNYIMAKAN 31.

**K**E Iehova ame ha kö Mose, ka habe, 2 U me he ka bi hwaban at Midiana can lakon Isaraela: ke hwaban e, me adre me he ka tha hum u ka lakâmâm. 3 Ke haba Mose ame ha ka tavat, ka habe, He th' öbun ka penapena keihen gabun he ka vat, m' adre me he ka vat at Midiana he ka bi hwaban at Midiana hobi kö Iehova. 4 Ke öbun e he ka kunâ úsa khaca thauzan únyi hnyi je tribu Isaraela hia he ka vat. 5 Me adre me ham únyi hnyi je

thauzaniny Isaraela, úsa khaca thauzan únyi hnyi je tribu, a twelv thauzan adre penapena hnân vat. 6 Ke Mose ame kun' ödra, a úsa khaca thauzan únyi hnyi je tribu, he ka vat, walödra me Fineasa, a nöku Eleazara at bihut he ka hnyi vat, tha e me je únyi únyi hnyi dok ae kap, ke lo li trutru hnyi hnyamen he ka túâ. 7 Me adre me vat me at Midiana helâ me Iehova ame húna kö Mose; ke adre me hlingâ obaga hia. 8 Ke adre me hlingâ je thaniny Midiana tha ödrin me tavat adre hlingâ; wale Evi, ke Rekem, ke Zura, ke Huro, ke Reba, ödrin je thaniny Midiana a thabúng: ke adre me hlingö Balaama nöku Beora ge hele vat. 9 Ke haba lakon Isaraela adre me hom hwenbâ omomoiny Midiana, me ta je úhnyúkongidra; me húgúnâ hia haledra je hnahat kau me mamoe, me je omjehedra 10 Ke adre me thong degecá ge meic anyidra je taun hnyi je dok adre me laba hnyin. 11 Ke adre me söh, me húgúna ta je únyi hia, a at me meno. 12 Ke adre me hom je bâ, me omeno, me hnödra hna húgúnâ, kö Mose, me Eleazara at bihut, me úkhacaköu anyin lakon Isaraela, ka hnyi hna hunuma hnyi je dok ae tha hon hnyi Moaba, wale baten Joridano hnyi Jeriko.

13 Ke haba Mose, me Eleazara at bihut, thaödru me je thaniny úkhacaköu, ödrin e he he ka úkhanö mödra hoton hna hunuma. 14 Ke Mose ame hmönyin ka tavat musö vat, a je taben thauzan, me je taben haded, a je hnyat ödrin e hmetu úhedrin hnyi vat. 15 Ke Mose ame ha ködrin, ka habe, Hawa, öbun e omelö hia omomo? 16 Wâ bi walödrin e hnyat ödrin e bijoniny lakon Isaraela, me me hna degeci Iehova hnyi únyi eji anyi Peora, hnen úne anyi Balaama, me me o mok ae cap ka hnyi úkhacaköu anyi Iehova. 17 Anyin a wale hlingâ but wainda hia unyin je wanakat, ke hlingâ but watamomo hia, tavat adre hia but tha mokut me бага. 18 Ke omelö ju hobi köbun bi wahlu a ca tha mokut me бага. 19 Ke öbun e he ka hunuma hoton hna hunuma hnyi seven ta bong; a je hnyat unyibun adre hia but hlingâ at, me hnyat unyibun adre hia but kâlâ komok, me obosoi öbun bi me anyibun je bâ hnyi bong a kuniny me bong a seveniny. 20 Ke haba je úkhaú hia, me ta je únyi hia adre tibet únyi hnyi unen meno, me leúnen got, me utö, me öbun e he ka obosoi öbun can ta je únyi eling. 21 Ke haba Eleazara at bihut ame ha ka tavat adre hnyi vat, ka habe, Wa-

## NUMERA 32.

lang hna owisa hnen hnanyibu waleji hnö Iehova hna hûna kö Mose; 22 haba gol, me sileva, me bras, me fao, me tin, me led, 23 a ta je únyi hia a ca an ge meic, me öbun e he ka inâ ta je únyi e hnyin meic, me me bo so but; ke so bi adre me he ka obosoâ minya ge köien hake ip. 24 Ke öbun e he ka hneú anyibun je úkhaú hnyi bong a seveniny, m' öbun e bo so, ke hwabab e me öbun e he ka dit ka hnyi hna hunuma.

25 Ke Iehova ame ha kö Mose, ka habe, 26 U me he ka aú úseiny ta je únyi adre hûgúnâ, wale at me meno, hamâm, me Eleazara at bihut, me lakamen ae beönua hnyi úkhacaköu: 27 me khenâ luâ but ta je hna hûgúnâ ka tavat vat ae metâ úhedra hnyi vat, me ka úkhacaköu hia: 28 ke u me he ka hûna he ka bi fat kö Iehova hnen tavat adre hnyi vat: a úsa khaca únyi hnyi je faiv haded, ame ne tavat, ame ne bolok, ame ne asina, ame ne mamoe: 29 hom dö e únyi hnyi jekhoudra me ham kö Eleazara at bihut, hnân hudiny hajijing kö Iehova. 30 Ke u me he ka hom únyi hnyi jekhon lakon Isaraela, úsa khaca únyi hnyi je fifte, a tavat, me bolok, me asina, me mamoe, me omeno hia, me ham hia ka at Levi, tavat adre me ányâ hanymen hnyi uma mano unö Iehova. 31 Me haba Mose me Eleazara at bihut ödru me ányâ hoton hna hûna hnö Iehova kö Mose. 32 Ke haba ta je meno adre söh, ke ca ha ge ta je únyi adre hûgúnâ bnen aten vat, me siks haded ke sevente faiv thauzan ta je mamoe, 33 ke sevente tu thauzan ta je bolok, 34 ke sikste wan thauzan ta je asina, 35 ke haba tavat hia, me, thöte tu thauzan a je hlu adre tiga ca tha mokut me бага. 36 Ke haba ke haf, wale jekhon tavat adre hnyi vat, haba numerainy me theri haded ke thöte seven thauzan ke faiv haded je mamoe: 37 ke haba fat kö Iehova únyi hnyi je mamoe, me, siks haded ke sevente faiv. 38 Ke thöte siks thauzan je bolok, ke haba fatiny hobi kö Iehova, me, sevente tu. 39 Ke thöte thauzan ke faiv haded je asina; ke haba fatiny hobi kö Iehova me sikste wan. 40 Ke sikstin thauzan tavat; ke haba fat kö Iehova, me ödrin thöte tu. 41 Ke haba Mose ame ham fat, wale hudiny kap göranyai kö Iehova, kö Eleazara at bihut, hoton hna hûna hnö Iehova kö Mose. 42 Ke haba jekhon lakon Isaraela, wale hnö Mose hna khenâ únyi hnyi hna hûgúnâ hnen aten vat, 43 (haba jekhon úkhaca-

kö me, theri haded ke thöte seven thauzan ke faiv haded je mamoe, 44 ke thöte siks thauzan je bolok, 45 ke thöte thauzan ke faiv haded je asina, 46 ke sikstin thauzan tavat:) 47 ke Mose ame hom únyi hnyi jekhon lakon Isaraela úsa khaca únyi hnyi je fifte, a tavat me omeno, me ham ka at Levi, tavat adre me ányâ hanymen hnyi uma mano umö Iehova; hoton hna hûna hnö Iehova kö Mose. 48 Ke ame o but kö Mose je taben thauzaniny je utbavat, a je taben je thauzan, me je taben je haded: 49 ke ödrin e ha kö Mose, ka habe, Öhmun je lathnyabaem, öhmun e aú úseiny tavat vat unyihmun, me ca hia ke at gahmun. 50 Ke öhmun e hom jem hut kö Iehova, a je únyi öhmun e ve hûgúnâ, je hmanenanginy gol, je wen can, me je wen benyin, me je wen banyen, me je anen hnyikonyen, me ta je waen, huân he ka bi hwaban anyihmun möt hnyi hnyimakö Iehova. 51 Ke haba Mose me Eleazara at bihut, ödru me hom ta je gol únyi gadrin, wale je hmanenanginy hia thithö adre huliwan. 52 Ke haba gol hia thithö wale hudiny kap göranyai ödrin e hudo kö Iehova, a únyi ge je taben je thauzan, me je taben je haded, me, sikstin thauzan ke seven haded ke fifte ta je sekel. 53 (Anyin a haba aten vat, me adre me hia but ve hûgúnâ ta je únyi, wale ke at me ke at gadra.) 54 Ke haba Mose me Eleazara at bihut ödru me hom gol únyi ge je taben je thauzan, me je taben je haded, me hom ka hnyi uma úkhacaköu, hnân oúnykúmeâ ka lakon Isaraela hnyi hnyimakö Iehova.

### HNYIMAKAN 32.

**K**E haba laku Reubena, me laku Gada ödrin e tren omeno ae se hia: ke ödra adre me wâ hnyei Jazera, me hnyei Gileada, me wâ bi, hnyei ae so hobi kâu ta je meno; 2 me ame he laku Gada me laku Reubena, me ha kö Mose me Eleazara at bihut, me je tuhan úkhacaköu, ka habe, 3 Haba hnyei Atarotha, me Dibona, me Jazera, me Nimera, me Hesebona, me Eleala, me Sebama, me Nebo, me Beona, 4 wale hnyei Iehova ame kot hnyi hnyimakan úkhacaköu anyin at Isaraela, me, wale hnyei ae úcú hobi kâu omeno, ke öhmun tavat tren omeno a lathnyabaem. 5 Ke ödrin e ha, ka habe, U je ne betenge gahmun, ö u hna hnyei eling köhmun a lathnyabaem, me ihmun; ke ca

hum öhmun bi he ka hanyâûâ Joridano. 6 Ke Mose ame thu ka laku Gada me laku Reubena, ka habe, Hawa, ame he je liamekeiny möbun ka vat e helê, ke öbun e he biju ka laba eang? 7 Ke ieû gabun öbun e ohluhluâ hnyekon lakon Isaraela, m' adre me ca he ka hanyâûâ ka hnyi hnyei waleji a ham ködra Iehova? 8 Ame ânyâ helâe lakamöbun waleji hnyi hnök hna kun' ödrin úheny Kadesi-banea he ka ecmakâ hnyei. 9 Anyin a ödrin e he but ka hnyi hnyigöulen bucen Esekolo, me wâ hnyei, me ödrin e ohluhluâ hnyekon lakon Isaraela, m' adre me ca he ka hnyi hnyei waleji a ham ködra Iehova. 10 Ke ame ubâhlâ thö hmönyin anyi Iehova hnyi bong eling, me e ame khemanyin, ka habe, 11 Haba tavat adre he jem úhedra Aigupito, hwân ge tavat a twente huna me gan hon e, me adre me ca he ka hnyi wâ hnyei waleji oge khemanyin kö Aberahama me Isaaka, me Jekob; anyin adre me ca hnu hotuk hnyi ta je únyi hia: 12 ke ca ha bi Kaleba nöku Jefune at Kenaza, me Josua nöku Nuna: anyin a ödre hnu hotu Iehova hnyi ta je únyi hia. 13 Ke ame ubâhlâ thö hmönyin anyi Iehova ka at Isaraela, me e ame ohei ödra hnyi hnyeububa fâte je huna ke ne o but ame hia but tavat adre me ânyâ hulö hnyi hnyimakö Iehova. 14 Ke wâ bi, öbun e o biju hwaban lakamöbun, a hanen tavat ae kong, he ka ogânâ hmönyin ae gan anyi Iehova kö Isaraela. 15 Anyin a öbun e ne hmetu úhebun unyin, me e ame he hmetu ka hna degeci öbun hnyi hnyeububa; ke öbun e he ka ohia tavat eang hia thithö. 16 Me ödrin e hakekeny kâu me ha, ka habe, Öhmun e he ka si hagin halehmun je meno eang, me bi hnyaban lakuhmun, can aten hnyei: 17 ke öhmun e he ka penapena me hnyimakan lakon Isaraela, ke ne o but öhmun e hum ödra ka hnyi idra: k' ame he lakuhmun bi ka labâ je taun adre up hagin, can aten hnyei. 18 Öhmun e ca he ka hmetu ka hnyi umöhmun je uma ke ne o but ame ve hu iny lakon Isaraela hia. 19 Anyin a öhmun e ca he bi ka tha tren hnyei mödra hnyi ke keihen Joridano ke e jio, anyin adre kû köhmun ihmun hnyi ke keiben e deiö Joridano. 20 Ke haba Mose ame thu ködrin, ka habe, Öbun e ne he ka ânyâ únyi e; wale öbun e ne he ka penapena he ka he hnyi hnyimakö Iehova he ka hnyi vat e helê, 21 k' ame ne he tavat penapena hia unyibun ka hanyâûâ Joridano hnyi

hnyimakö Iehova, ke ne o but e ame obâ je iwahnaihmony mē hnyi hnyimakan, 22 me hom úhnyúkongo hnyei hnyi hnyimakö Iehova: awe, öbun e he ka hmetu hwaban e, k' ame he ka ba hulö gabun hnyi hnyimakö Iehova, me hnyi hnyimakan at Isaraela; ke haba hnyei eang, me ibun bi hnyei hnyi hnyimakö Iehova. 23 Ke öbun e ne ca ânyâ e, me wâ bi, öbun tavat hulö kö Iehova: ke wâhmakhmeto ju öbun, a g' ame he ka omanen' öbun ge anyibun hulö. 24 Otilâ ju je taun hobi kâu je lakubun, me bi hagin halehmun je mamoe; ke he th' öbun ka ânyâ únyi ame o únyi hnyi je hnyimöbun. 25 Me ame ha laku Gada me laku Reubena kö Mose, ka habe, Öhmun e he a lathnyabaem ka ânyâ helâ me than ame ha. 26 Ame he lakuhmun me laöiöhmun, me halehmun je hnahat mamoe, me halehmun je meno hia ka laba hnyi je taun e Gileada: 27 k' ame he lathnyabaem ka hanyâûâ, a tavat gahmun hia adre me hom omjehen vat hnyi hnyimakö Iehova he ka hnyi vat, hoton hna ha hnen than.

28 Me haba Mose ame hún ödra kö Eleazara at bihut, me kö Josua nöku Nuna, me ka je taben ae beönua hnyi je tribuiny lakon Isaraela. 29 Ke Mose ame ha ködra, ka habe, Ame ne tha he möbun laku Gada me laku Reubena ka hanyâûâ Joridano, a je hnyat hia adre hom omjehen vat, hnyi hnyimakö Iehova, me hom úhnyúkongoâ hnyei hnyi hnyimaköbun; awe, öbun e he ka ham ködra hnyei Gileada me me idra bi: 30 ke adre me ne ca hom omjehen vat me tha hanyâûâ unyibun, awe, adre me he ka tha hnyei unyibun hnyi hnyei Kanana. 31 Ke haba laku Gada me laku Reubena adre me thu, ka habe, Öhmun e he ka ânyâ helâ me Iehova ame ha köhmun a lathnyabaem. 32 Öhmun e he ka hom omjehen vat me hanyâûâ hnyi hnyimakö Iehova ka hnyi hnyei Kanana, me me he ka hu ihmun hnyei hnyi ke keihen e deiö Joridano. 33 Me haba Mose ame ham ködra, a laku Gada, me laku Reubena, me hafiny tribu Manase a nöku Josefa, dökhu dökhu Sihona thaniny at Amora, me dökhu dökhu Oga thaniny Basana, wale hnyei me je tauniny, a je tauniny hngei igigilö. 34 Ke haba laku Gada, adre me otilâ Dibona, me Atarotha, me Aroera; 35 me Aterotha-sofana, me Jazera, me Jogebea, 36 me Bethe-nimera. me Bethe-harana: a je taun adre up hagin, me je hagin mamoe. 37 Ke haba laku

NUMERA 33.

Reubena, me adre me otilâ Hesebona, me Eleala, me Kiriathaima; 38 me Nebo, me Baala-meon (k' adre me wia li ien,) me Sibema : ke adre me ve hwenyi ien je taun adre otilâ. 39 Ke haba laku Makir nöku Manase, me, adre me he Gileada ai, me hûgûnâ, me obâ at Amora ûnyi hnyin. 40 Ke Mose ame ham Gileada kö Makir nöku Manase ; m' adre me labâ e. 41 Ke haba Jaira, nöku Manase, ame he me hûgûnâ je tauniny, me hwenyi ien Havoth-jaira. 42 Ke haba Noba ame he me hûgûnâ Kenatha me je tauniny, ae ûhnyûkong, me hwenyi ien e Noba hoton ien bi.

HNYIMAKAN 33.

**W**ALANG ûheny lakon Isaraela, hnyi hnödra hna he but ûhedra hnyi hnyeï Aigupito, a je köïödra, k' ame musi ödra hnö Mose me Arona. 2 Ke haba Mose ame sihnalimen bongon ûhedra hoton hna huna hnö Iehova : ke walang bongon ûhedra. 3 Adre me he ûheny Ramese hnyi tehi a bân hnyi bong a fiftininy tehi a bân : haba bong nyi hwaban paseka ame he but lakon Isaraela ge hnyam ae hwege hnyi hnyimakan at Aigupito hia, 4 k' ame tiga konâm lakudra a bân hia hnen at Aigupito, waleji a hlingâ Iehova unyidra : ke Iehova ame bi hwaban minya anyidra je khong. 5 Ke ame he lakon Isaraela ûheny Ramese me hunuma Sukotha. 6 Ke ûhedra Sukotha, me adre me hunuma Ethama hnyi baten hnyeububa. 7 Ke ûhedra Ethama me adre me hmetu Pihahiroth ai, cicö Baalazefona ; me hunuma cicö Migedola. 8 Ke ûhedra cicö Hahiroth, me adre me he hnyi wanben köïö ka hnyi hnyeububa : ke adre me he hnyi kun ta bong hnyi hnyeububa. Ethama, k' adre me hunuma Mara. 9 Ke ûhedra Mara, me adre me o Elima : ke eling Elima je pupuainy köïö a twelve ke sevente je pama ; me adre me hunuma eling. 10 Ke ûhedra Elima, me adre me hunuma hnyi Köïö ae Dra. 11 Ke ûhedra hnyi Köïö ae Dra, me adre me hunuma hnyi hnyeububa Sina. 12 Ke ûhedra hnyi hnyeububa Sina, me adre me hunuma Dofeka. 13 Ke ûhedra Dofeka, me adre me hunuma Alusa. 14 Ke ûhedra Alusa, me adre me hunuma Refidima, ke ba köïö eling hnân habelen tavat. 15 Ke ûhedra Refidima, me adre me hunuma hnyi hnyeububa Sinai. 16 Ke ûhedra hnyi hnyeububa Sinai, me adre me hunuma

Kiberoth-atava. 17 Ke ûhedra Kiberoth-atava, me adre me hunuma Hazeroth. 18 Ke ûhedra Hazeroth, me adre me hunuma Rithema. 19 Ke ûhedra Rithema, me adre me hunuma Rimona-farez. 20 Ke ûhedra Rimona-farez, me adre me hunuma Libena. 21 Ke ûhedra Libena, me adre me hunuma Risa. 22 Ke ûhedra Risa, me adre me hunuma Kehelatba. 23 Ke ûhedra Kehelatba, me adre me hunuma hnyi bucen Safera. 24 Ke ûhedra hnyi bucen Safera, me adre me hunuma Harada. 25 Ke ûhedra Harada, me adre me hunuma Makeloth. 26 Ke ûhedra Makeloth, me adre me hunuma Tahath. 27 Ke ûhedra Tahath, me adre me hunuma Tara. 28 Ke ûhedra Tara, me adre me hunuma Mitheka. 29 Ke ûhedra Mitheka, me adre me hunuma Hasemona. 30 Ke ûhedra Hasemona, me adre me hunuma Moseroth. 31 Ke ûhedra Moseroth, me adre me hunuma Bene-jakana. 32 Ke ûhedra Bene-jakana, me adre me hunuma Horohagidegad. 33 Ke ûhedra Horohagidegad, me adre me hunuma Jotebath. 34 Ke ûhedra Jotebath, me adre me hunuma Aberona. 35 Ke ûhedra Aberona, me adre me hunuma Eziona-gebera. 36 Ke ûhedra Eziona-gebera, me adre me hunuma hnyi hnyeububa Zin (wale Kadesi). 37 Ke ûhedra Kadesi, me adre me hunuma hnyi bucen Hora, hnyi baten hnyeï Edoma. 38 Ke Arona at bihut ame öliâ bucen Hora hoton musi anyi Iehova, me ame mokcu eling hnyi huna a fâteiny hwaban hna he lakon Isaraela ûheny Aigupito, hnyi bong a bâniny tehi a thabûnginy. 39 Ke haba je hunai Arona me wan haded ke twente theri, me e ame mokcu hnyi hon bucen Hora. 40 Ke a löng ut thaniny Arada, at Kanana, at ame laba hnyi Hwaiöu hnyi hnei Kanana, a e but ang lakon Isaraela. 41 Ke ûhedra hnyi bucen Hora, me adre me hunuma Zalemona. 42 Ke ûhedra Zalemona, me adre me hunuma Punona. 43 Ke ûhedra Punona, me adre me hunuma Oboth. 44 Ke ûhedra Oboth, me adre me hunuma Ieabarima, hnyi hnyegöulen Moaba. 45 Ke ûhedra Iima, me adre me hunuma Dibonagada. 46 Ke ûhedra Dibonagada, me adre me hunuma Alemona-debelathaima. 47 Ke ûhedra Alemona-debelathaima, me adre me hunuma hnyi je bucen Abarima, cicö Nebo. 48 Ke ûhedra hnyi je bucen Abarima, me adre me hunuma hnyi dok ae tha hon hnyi Moaba baten Joridano, wale Jeriko. 49 Ke

NUMERA 34.

adre me hunuma hnyi Joridano, hwân Bethjesimoth ke ne o but Abela-sitima hnyi dok ae tha hon hnyi Moaba.

50 Ke haba Iehova ame ha kö Mose, hnyi dok ae tha hon hnyi Moaba hnyi Joridano, wale Jeriko, ka habe, 51 Ha thö ka lakon Isaraela, ka habe, Öbun ka hia but hanyäüâ Joridano ka hnyi hnyeï Kanana, 52 me öbun e he ka obâ aten hnyeï hia hnyi hnyimaköbun, me ohia anyidra je hnatheat hia, me ohia anyidra je idola hia adre oköiâ, me tho degecâ hia anyidra je dok ae görany : 53 ke öbun e he ka obâ tavat a aten hnyeï me labâ bi : anyin a oge hia but ham köbun hnyeï hnân ibun. 54 Ke öbun e he ka khenâ hnyeï hnân ibun hnen leköb, hoton anyibun je lap ; öbun e he ka khenâ gänâ ka tavat ae se hia, ke khenâ ühnyükongo ka tavat ae wakhalet : ame he ka ve hu gadra helâ me hna kû hnen leköb : öbun e he ka hu hoton je tribuiny lakamöbun. 55 Ke öbun e ne ca obâ aten hnyeï hni hnyimaköbun, awe, ame he je kolon gadra ka helâ me wajua hnyi je emaköbun, ke helâ me ünyi hnân údö je vhaköbun, ke adre me he ka oveci öbun hnyi hnyeï öbun e he ka labâ. 56 Me haba ta je ünyi waleji oge me ünyküme he ka ânyâ ködra, me wale oge me he ka ânyâ köbun bi.

HNYIMAKAN 34.

**K**E Iehova ame ha kö Mose, ka habe, 2 Hüna thö ka lakon Isaraela, ka habe, Öbun ka o but ka hnyi hnyeï Kanana, (wale hnyeï adre me he ka ham köbun me ibun, a hnyeï Kanana hoton je hnyigöulen,) 3 me haba ibun ka hnyi hwaiöu ame he ka hwân hnyi hnyebuba Zin, hnyi baten Edoma, ke haba hnyigöulöbun ka hnyi hwaiöu, ame he ka hwân hnyi obiny Köiö ae Hiny ke ne o but e deiö : 4 ke ame he ka khenyi hnyigöulöbun ka hnyi hwaiöu hnyi gethen üheny Akerabima ke ne o but Zin : ke adre me he ka umo hnyi hwaiöu, wale Kadesi-banea ; ke ame he ka he ke ne o but Hazarader, ke ne o but Azemona : 5 ke ame he ka khenyi hnyigöulen üheny Azemona ke ne o but hnyi wageweiny Aigupito, k' ame he ka umo hnyi köiö. 6 Ke haba hnyigöulen e jiö, me köiö ae gan, wale hnyigöulöbun, a hnyigöulöbun e jiö. 7 Ke walang hnyigöulöbun ka hnyi hwadrö : haba hwân hnyi köiö ae gan öbun e he ka bi haten ke ne o but hnyi bucen Hora : 8 ke üheny hnyi bucen Hora me

öbun e he ka bi haten ke ne o but hnyi gethen üheny Hamath ; k' adre me he ka umo hnyi hnyigöulen Zedada : 9 ke e bala bi hnyigöulen ke ne o but Zifona, k' ame he ka umo e Hazar-enana : wale hnyigöulöbun ka hnyi hwadrö. 10 Ke öbun e he ka bi haten hnyigöulöbun e deiö, hwân Hazar-enana ke ne o but Sefama : 11 ke e bi hnyigöulen üheny Sefama ke ne o but Ribela, hnyi ke keihen Aina ke e deiö ; ke e bi hnyigöulen ke ne o but ke keihen baten köiö Kinereth ke e deiö : 12 ke e bi hnyigöulen ke ne o but Joridano, k' ame he ka umo hnyi Köiö ae Hiny : wale ibun hnyeï hoton je hnyigöulen igigilö. 13 Ke haba Mose ame hüna ka lakon Isaraela, ka habe, Wale hnyeï ame he ka hu gabun ge ukleköb, waleji hnö Iehova hn. hüna he ka ham ka je tribu a nain ke hafiny tribu : 14 anyin a haba tribuiny laku Reubena, hoton je lap anyin lakamödra, me tribuiny laku Gada hoton je lap anyin lakamödra, me hafiny tribu anyi Manase, haba ödra adre me hia but ve kap idra : 15 haba li tribu ke hafiny tribu, me adre me ve kap idra hnyi ke keihen hoton Joridano hnyi Jeriko ke e deiö, cicö hna o hnen seünö.

16 Ke Iehova ame ha kö Mose, ka habe, 17 Walang ien je hnyat ödrin e he ka khenâ köbun hnyeï : haba Eleazara at bihut, me Josua nöku Nuna. 18 Ke öbun e he ka hom üsa khaca than ünyi hnyi je tribu hia he ka hnyi khenâ hnyeï hnân ibun. 19 Ke walang ien je hnyat : haba ünyi hnyi tribu Juda, me, Kaleba nöku Jefune. 20 Ke ünyi hnyi tribu anyin laku Simeona, me, Semuela nöku Amihuda. 21 Ünyi hnyi tribu Beniamina, me Eli-dada, nöku Kiselona. 22 Ke ke than ünyi hnyi tribu anyin laku Dana, wale Buki nöku Jogeli. 23 Ke ünyi hnyi tribu anyin laku Josefa : haba ünyi hnyi tribuiny laku Manase ke than, wale Haniela nöku Efoda : 24 ke ünyi hnyi hnyi tribuiny laku Eferaima ke than, wale Kemuela nöku Sifetan. 25 Ke ünyi hnyi tribuiny laku Zebulona ke than, wale Elizafana (nöku Parenaka. 26 Ke ünyi hnyi tribuiny laku Isakara ke than, wale Paletielä nöku Azana. 27 Ke ünyi hnyi tribuiny laku Asera ke than, wale Ahiuda nöku Selomi. 28 Ke ünyi hnyi tribuiny laku Nafatali ke than, wale Pedaela nöku Amihuda. 29 Wale hnyat Iehova ame kunâ he ka khenâ hnyeï ka lakon Isaraela hnyi hnyeï Kanana.

HNYIMAKAN 35.

**K**E haba Iehova ame ha kö Mose hnyi dok ae tha hon hnyi Moaba hnyi baten Joridano wale Jeriko, ka habe, 2 Huna thö ka lakon Isaraela, m' adre me he ka ham únyi hnyi idra je taun he ka labā, ka at Levi; k' öbun e he ka ham minya ka at Levi je utkânâ igigilö je taun. 3 Me me he ka hu je taun gadra he ka labā; ke haba je utkânâ igigilö je taun, me hnân hobi kâu haledra je kau, me anyidra ta je omjeû, me haledra je meno hia. 4 Ke haba utkânâ igigilö je taun, wale öbun e he ka ham ka at Levi, me ame he ka hwân hnyi hna up hagin vetoiny taun ke ne o but ka hnyi khaca thauzan kubit igigilö. 5 Ke öbun e he ka tuluto hoton je taun, tu thauzan je kubit e deiö, ke tu thauzan je kubit ka hnyi hwaiöu, ke tu thauzan je kubit e jio, ke tu thauzan je kubit ka hnyi hwadrö, k' ame he ka mokut taun hnyi wanben. Wale je utkânâ hobi ködra igigilö je taun. 6 Ke haba je taun öbun e he ka ham ka at Levi, me wale je taun a siks hnân lubaduöng, wale öbun e he ka ip hobi kâu at úhlingö hnân he ka kec ka hnyin: ke öbun e he ka ham minya ködra fâte tu ta je taun. 7 Ke haba je taun hia öbun e he ka ham ka at Levi, me úsa fâte eit ta je taun: öbun e he ka ham e me utkânâ igigilö e. 8 Ke öbun e he ka ham je taun únyi hnyi hnyeï iny lakon Isaraela, k' öbun e he ka hom gâná únyi hnyi hnyeï ae gan; k' öbun e he ka hom úhnyúkongo únyi hnyi hnyeï ae úhnyúkong: adre me he ka ve ham je taun ka at Levi hoton je idra ae hu gadra.

9 Ke Iehova ame ha kö Mose, ka habe, 10 Ha thö ka lakon Isaraela, ka habe, Öbun ka he ka hanyâüâ Joridano ka hnyi hnyeï Kanana, 11 me öbun e he ka kû ke je taun hnân je tauniny lubaduöng hobi köbun; me me he ka kec ka hnyin at úhlingö wale at ame hlingâ at a utöteta. 12 Haba je taun eling me hnân kec ka hnyin can at ame he ka bi hwaban; me me ca he ka mok at úhlingö k' adre tiga ca lelö e ka hnyi hnyimakan úkhacaköu he ka owisa e. 13 Ke haba je taun eling öbun e he ka ham, me wale siks ta tauniny lubaduöng hobi köbun. 14 Öbun e he ka ham kun ta taun hnyi hoton Joridano, ke öbun e he ka ham minya kun ta taun hnyi hnyeï Kanana; wale je tauniny

lubaduöng. 15 Ke hnân hobi kâu lakon Isaraela, me atkanyua, me tavat adre me tha laba mödra, je taun eling a siks hnân lubaduöng hnyin; me me he ka kec ka hnyin tavat hia adre me hlingâ at a utöteta. 16 Ke ame ne hia but kot moko e ge ut fao, awe, at úhlingö e; ke adre me he ka hlingâ at úhlingö. 17 Ke ame ne kot moko e ge veto hnyi hnyamen, a únyi hnân hlingâ at, k' ame ne mokcu, awe, at úhlingö e: ke adre me he ka hlingâ at úhlingö. 18 Ke ame ne kot e ge utö hnyi hnyamen, a únyi hnân hlingâ at, me ame mokcu, awe, at úhlingö e; ke adre me he ka hlingâ at úhlingö. 19 Ke hamen at bi hwaban komok he ka hlingâ at úhlingö: e ka úkhanö mē e ame he ka hlingâ. 20 Ke ame ne dâ e hnyi hnen hna húkotiâ, k' ame ne mokut iyâüâ me lûâ, me me mokcu; 21 k' ame ne kot e ge hnyamen hnyi hmönyin, me me mokcu: me adre he bi ka hlingâ at a úkhulup; at úhlingö e: k' ame he at a bi hwaban komok ka hlingâ at úhlingö, e ka úkhanö mē. 22 Ke ame ne ie dâ e ke ca hmönyin bi, k' ame ne lûâ ke a ca mokut iyâüâ, 23 ame ne ge veto, a ne únyi hnân hlingâ at, ke a ca wâ bi e, k' ame khûâ me aat dö, k' ame mokcu at, ke ca iwahnaihmiöny mē ehac, k' ame ca elâm he ka okongoâ: 24 awe, ame he úkhacaköu ka owisa gadru, a at hlingâ at, me at ame bi hwaban komok, hoton je hna owisa eang: 25 ke ame he úkhacaköu ka omelö at ame hlingâ at únyi hnyi hnyamen at ame bi hwaban komok, ke ame he úkhacaköu he ka ohmeto e ka hnyi tauniny lubaduöng, waleji e ame kec ka hnyin: ke e ame he ka laba eling ke ne o but ame mokcu at bihut ae beönua, at adre hú ge wakaco ae kap. 26 Ke ame ne he at ame hlingâ at ka dit hanyâüâ hnyigöulen tauniny lubaduöng, waleji e ame kec kâu; 27 k' ame ne wâ e hnen at ame bi hwaban komok hnyi hoton hnyigöulen tauniny lubaduöng, k' ame ne hlingâ at úhlingö hnen at ame bi hwaban komok, awe, e ame ca he ka hulö ge dren: 28 anyin ae úcû kâu he ka laba hmâ hnyi tauniny lubaduöng, ke ne o but ame mokcu at bihut ae beönua: ke hwaban imekinny at bihut ae beönua, me ame he at úhlingö ka hmetu ka hnyi iny hnyeï. 29 Haba ta je únyi e me wale hnanyibuiny owisa köbun hnyi anyibun ta je dö hnyi je hnyababun hia. 30 Haba at ame hlingâ at, me adre me he ka hlingâ thibi at úhlingö ge hofuc

## DEUTERONOMI 1.

hwan hnyat ohnatho: k' ame ca he at a khaca ka ohnatho ge ke at m' adre me he ha hlingâ e. 31 Ke haba khaca, öbun e ca he ka kap hwaban möt anyin at ùhlingö ae úcú he ha mok: e hnathu adre me he ka hlingâ. 32 Ke ca he öbun ka kap hwaban möt anyin at ame kec ka hnyi tauniny lubaduöng, me me laba hmetu bi hnyi iny hnyei, ke ne o but imekiny at bihut. 33 Waleling m' öbun e ca he ka okongoâ hnyei öbun e labâ: anyin a haba dra, me, wale únyi ame okongoâ hnyei: ke e ca khan' ödra he ka bi hwaban melen hnyei únyi hnyi dra adre hingölö hnyin, ke so bi únyi ge dren at ame hingâlâ. 34 Ke ca he öbun ka okongoâ hnyei öbun e laba hnyin, ke inya oge me laba hynin: anyin a inya Iehova oge me laba hnyi wanben lakon Isaraela.

### HNyimakan 36.

**K**E ame he je taben ae beönua únyi hnyi lap anyin laku Gileada, nöku Makir, nöku Manase, únyi hnyi je lap anyin laku Josefa, me fuc kö Mose, me je than, a je taben ae beönua unyin lakon Isaraela; 2 me ödrin e ha, ka habe, Hnö Iehova hna huna köu than he ka ham hnyei me me iny lakon Isaraela, únyi ge ugkeköb: ke Iehova ame huna köu than he ka ha i Zelofeada liamekeiny möhmun ka lakon je hlu. 3 Ke ödrin e ne láian je bagainy ke tribuiny lakon Isaraela, me adre me he ka hom hmetu idrin únyi hnyi iny lakamöhmun, me me tha e bi me iny tribu wale ödrin e láian hnyin: me adre me he ka hom but e únyi hnyi ihmun,

wale a hwajekhöúhmun. 4 Ke ame ne o thö jubeli anyin lakon Isaraela, me ame he ka khaca ihmun me iny tribu waleji ödrin e tha ödrin më: me adre me he ka hom iny tribuiny lakamöhmun. 5 Ke haba Mose ame huna ka lakon Isaraela, hoton hofuc ho Iehova, ka habe, E hnathu hna ha hnen tribuiny laku Josefa. 6 Walang hofuc a huna Iehova ge je hlu laku Zelofeada, ka habe, Ödrin e he ka láian hnödrin je hna weny, ke so bi ödrin e he ka láian je lapiny tribu anyin kamödrin. 7 Me helâe adre me ca he ka úhomköuâ je iny lakon Isaraela únyi hnyi ke tribu ka hnyi ke tribu; anyin ame he lakon Isaraela ka ve kece hmâ ka hnyi je iny je tribu anyin lakamödrin. 8 Ke haba wahlu hia a ödrin tren hnyei hnyi je tribu anyin lakon Isaraela, me ödrin e he ka láian tavat a hanen lap anyin tribuiny lakamödrin, me me he bala bi lakon Isaraela ka ve labâ iny lakamödra. 9 Ke ca he bi ka úhomköuâ je hnyei únyi hnyi ke tribu ka hnyi ke tribu; anyin ame he je tribuiny lakon Isaraela ka ve kece hmâ ka hnyi je idra. 10 Ke haba je hlu a laku Zelofeada, me ödrin e ânyâ helâ me hna huna hnö Iehova kö Mose: 11 me haba Mala, me Tireza, me Hogela, me Mileka, me Noa, a je hlu laku Zelofeada, me ödrin e láian je hidróuiny lakon je liamekeiny me kamödrin. 12 Ke ödrin e láian je lap anyin je laku Manase, nöku Josefa, ke e bala bi idrin hnyei tribuiny lap anyin kamödrin.

13 Wale je hna huna me je hna owisa, waleji Iehova ame ha ka lakon Isaraela a deny Mose, hnyi dok ae tha hon hnyi Moaba wale baten Joridano hnyi Jeriko.

## DEUTERONOMI

### TUSI A THABÛNGINY ANYI MOSE.

#### HNyimakan 1.

**W**ALANG ta je hofuc a ha Mose ka lakon Isaraela hia hnyi hoton Joridano, hnyi hnyebuba, hnyi Arabah cicö Sufe, hnyi wanben Parana me Tofel, me Labana, me Hazeroth me Dizahab. 2 Eleven ta je bong ka he úheny Horeba gethen hnyi bucen Seira ke ne o but Kadesi-banea. 3

Ke haba hnyi huna a fâte, hnyi tehi a eleveniny, hnyi bong a bâniny tehi, me haba Mose ame ha ka lakon Isaraela ta je únyi hia hoton hna huna hnö Iehova kâu gadra; 4 hwaban hnen hna kuc Sihona thaniny at Amora, at ame laba Hesebona, me Oga thaniny Basana, at ame laba Asaterotha hnyi Ederai: 5 hoton Joridano, hnyi hnyei Moaba, me ame hwân Mose ka omanená

## DEUTERONOMI 1.

hnanyibu eang, ka habe, 6 Haba Iehova Khonguta ame ha kôta e Horeba, ka habe, Soju hnöbun hna laba hnyi bucen eang : 7 hwiö th' öbun me he ka hnyi bucen anyin at Amora, me je dok ae hakekeny kâ e, hnyi Arabah, hnyei ae hu je bucen hnyin, me hnyei ae hnyikânâ, me hnyi ke keihen ka hnyi Hwaiöu, me hobatköiö, a hnyei iny at Kanana, me Lebanona, ke ne o but hnyi wagewe ae gan, a wagewe Euferate. 8 Wâ bi, oge hia but ip hnyei hnyi hnyimaköbun : he th' öbun me labâ hnyei waleji ame khemanyin ka lakamöbun, a Aberahama, me Isaaka, me Jakob, he ka ham ködrin, me je mâtânidrin hwabödrin. 9 Ke oge me ha köbun hnyi ûen eling, ka haba, E pason könya a iny' khaca he ka tu' öbun : 10 hnö Iehova Khongubun hna osehi' öbun, ke wâ bi, helâ me je okhüiny drany úsehiai-bun hnyi bong ang. 11 E na he ju Iehova Khongon lakamöbun ka osehi' öbun a je thauzaniny, me ohnahici öbun hoton hnen hna ha köbun ! 12 Oge me he ka kâmâu hna hake vadren hmakibun, me honöbun je hok, me anyibun je iwatretra ? 13 Úca th' öbun hobi köbun tavat ae metâ, tavat wâ tremângâ, a tavat adre wâhmakhmeto, hoton anyibun je tribu, ke oge me he ka otil' ödrin me hnân je taben köbun. 14 Ke öbun e thu könya me ha, ka habe, E so he ka ânyâ hofuc u me ha. 15 Waleling me oge me hom ta je taben anyibun je tribu, tavat ae metâ, adre wâhmakhmeto, me otil' ödrin hnân je homakan köbun, a je taben thauzan, me je taben haded, me je taben fifte, me je taben ten, me tavat musi, hoton anyibun je tribu. 16 Ke oge me hûna ka tavat owisa hnyi ûen eling, ka habe, Öbun e he ka löng je iwatretra anyin je liamekeiny möbun, me owisa wia ka at me liamekeiny mê, me atkanyua unyin. 17 Ca he öbun ka wâhmakhmetoâ hnyi úhnei ; e so öbun e löng wia hofuc hwan at ae gan me at ae úhnyükong ; ca he öbun ka ot hnyi hnyimakan at ; anyina únyi ge Khong hna owisa : ke haba únyi ae hmak köbun, öbun e he ka hom könya m' inye löng dö. 18 Ke oge me hûna köbun hnyi ûen eling ge ta je únyi hia öbun e he ka ânyâ.

19 Ke úheta Horeba me ötin e vheno hnyebuba ae gan me hnân outen, waleji öbun e wâ, hnyi gethen úheny hnyi bucen iny at Amora, hoton hnö Iehova Khonguta hna hûna kôta, m' ate me o but Kadesi-banea. 20 Ke oge me ha köbun, ka habe, Öbun e o but walang ang ka hnyi bucen at Amora,

wale hnö Iehova Khonguta hna ham kôta. 21 Wâ bi, hnö Iehova Khongom hna ip hnyei hnyi hnyimákâm : ölö thö me labâ, helâ me Iehova Khongon lakâmâm ame ha köu ; ca ot bi me öbubuny. 22 Me öbun hia öbun e hakekeny könya, me ha, ka habe, E so ate me kunâ bánâ ke je hnyat, ke ödrin e he ka ecmákâ hnyei hobi kôta, me hmetuhmetu he ka thumetu öta ge deta gethen he ka ölö, me je taun ate me he ka o ka hnyin. 23 Ke so könya hobun hofuc : me oge me hom úheny unyibun je hnyat a twelv, a usa khaca únyi hnyi je tribu : 24 ke ödrin e he me öliâ bucen, me o hnyi hnyigöulen bucen e Esekolo, me ecmákâ e. 25 Ke ödrin e hom hnyi je hnyamödrin jeúiny hnyei, me hom kôta, me thumetu öta, ka habe, E so hnyei a ham kôta Iehova Khonguta. 26 Ke so bi öbun e höcö ölö, ke öbun e hanyâûâ hofuc ho Iehova Khongubun : 27 ke öbun e ulidro hnyi umöbun je uma, ka habe, Anyin a Iehova ame húkoti öta, me e ame hum öta úheta hnyi hnyei Aigupito he ka hn' öta ka hnyi je hnyamen at Amora he ka ohi' öta. 28 Ate me ölö ua ? haba je liamekeiny möta ödrin e oköiâ je hnyekuta, haingödrin, ka habe, E gan hmâ tavat me beú huta ; ke gan hmâ je taun adre up haginy ke ne o but ka hnyi drany ; ke haba khaca öhmun e wâ eling je laku Anaka. 29 Waleling me inye ha köbun, ka habe, Ca öbubun bi ke ca ot bi gadra. 30 Haba Iehova Khongubun at ame he hnyi hnyimaköbun me e ame he ka vat hobi köbun, helâ me hnen hna ânyâ hobi köbun hnyi hnyei Aigupito hnyi hnyimaköbun : 31 me hnyi hnyebuba, waleji u je wâ a g' ame köp u tilö u Iehova Khongom, helâ me at ame delûâ nokon, hnyi je gethen hia öbun e he hnyin ke ne o but öbun e o but eang. 32 Ke haba hnyi únyi eling öbun e ca labageju kö Iehova Khongubun, 33 at ame hnyimaköbun hnyi gethen, he ka heleú dok hnân otilâ umöbun je uma mano hnyin, a meic hnyi lit, he ka omanená köbun gethen öbun e he ka he hnyin, ke úlá hnyi lany. 34 Ke Iehova ame löng hobun je hofuc, me e ame hmönyin me khemanyin, ka habe, 35 Haba hnyi dö eang ae kong, me ba at a khaca ame he ka wâ hnyei ae so, waleji oge me khemanyin he ka ham ka lakamöbun. 36 ke so thibi Kaleba nöku Jefune, e ame he ka wâ e ; ke oge me he ka ham kâu hnyei waleji a mwi hnyin me je mâtâniny : anyin a e ame löng bekhötâ hotu Iehova.



DEUTERONOMI 2.

37 Ke haba Iehova ame hmönyin minya könya cabun, me ha, ka habe, U me ca he ka hnyi he kâ e : 38 k' ame he Josua nöku Nuna at ame tot hnyi hnyimákâm ka munyi he kâ e : u ma sihwegiâ ; anyin a e ame he ka ohuâ hnyi ka at Isaraela. 39 Ke haba je úhnyúkongibun, waleji öbun e ha a g' adre me he ka húgûná, ke lakubun ae ca khan' ödra únyi ae so me unyi ae kong hnyi bong e, me adre me he ka munyi he kâ e, ke oge me he ka ham e ködra, m' adre me he ka hu e. 40 Ke haba öbun bi, hwiö th' öbun me he ka hnyi hnyeububa gethen úheny hnyi Köiö ae Dra. 41 Ke öbun e thu me ha könya, ka habe, E kong hwakecihmun hnyi hnyimakö Iehova, öhmun e he ka he me vat helâ me Iehova Khonguta ame ha köhmun. Me öbun e ve weikâ ta je únyi hnân vat, k' öbun hwege he ka öliâ bucen. 42 Ke haba Iehova ame ha könya, ka habe, Ha thö ködra, ka habe, Ca he öbun ka ölö, ke ca he öbun ka vat ; anyin a ca tha inya möbun ; wâ e nye kuc öbun hnen iwahnaihmiöny möbun. 43 Me oge me fuc köbun ke öbun e ca löng bi ; ke so bi öbun e hanyâúâ musu anyi Iehova, me hwege hnyimaköbun he ka öliâ bucen. 44 Me ame o but at Amora, tawat adre me labâ bucen eling, he ka vat möbun, me hnu öbun, helâ me je bi adre me úhnúhnú, me kuc öbun ke ne o but hnyi Seira, me he ke ne o but Horema. 45 Ke öbun e hmetu me tenge hnyi hnyimakö Iehova, ke Iehova ame ca löng hobun, k' ame ca tevehling öbun. 46 Me öbun e laba ju Kedesi hnyi je bong ae se hia, hoton je bong öbun e labâ e.

HNYIMAKAN 2.

**K**E ate me hwiö me he ka hnyi hnyeububa gethen ka he ka hnyi Köiö ae Dra, hoton hna huna hnö Iehova könya : ke se hia je bong ate me laba igigilö bucen Seira. 2 Ke Iehova ame ha könya, ka habe, 3 Soju hnöbun hna laba igigilö bucen eang : hwiö th' öbun ka hnyi hwadrö. 4 Ke ha thö ka tawat, ka habe, Öbun e he ka hanyâúâ hnyigöulen hnyi iny je liamekeiny möbun a lakon Esau, tawat adre me labâ Seira ; ke adre me he ka out' öbun : anyin a wale wâ wi' öbun bi : 5 ca he öbun ka ivinö mödra ; anyin oge me ca he ka ham köbun únyi hnyi idra, e ba dok ae úhnyúkong hmönyin helâ me hnyeuca : anyin oge hia but ham bucen Seira kö Esau hnân iny. 6 Öbun e

he ka úcú jeú hwaban mone unyidra, me hnân han ; k' öbun e he minya ka úcú köiö unyidra hwaban mone hnân ic. 7 Anyin a Iehova Khongom ame hia but ohnabici u hnyi ta je huliwa hia anyin li hnyamâm : e ame wâhmakhmeto hnâm hna vheno hnyeububa eang ae gan : k' ame tha e möu Iehova Khongom hnyi ta je huna a fâte ; ke ba ke únyi a hia gam. 8 Waleling m' ate me he úheny unyin je liamekeiny möta a laku Esau, tawat adre me labâ Seira gethen hnyi Arabah úheny Elath, ke úheny Eziona-gebera.

Ke ate me khenyi, me he hnyi gethen úheny hnyi hnyeububa Moaba. 9 Ke haba Iehova ame ha könya, ka habe, Ca he ka okongoâ at Moaba, me vat mödra : anyin oge me ca he ka ham únyi hnyi idra hnyi me me em bi ; anyin oge hia but ham Aro ka laku Lota me me idra. 10 (Ame labâ eling ehac at Emi, tawat ae gan, ke ödra se hia, ke beú helâ me at Anaka : 11 adre haw' ödra me at Refai, helâ me at Anaka ; ke haba at Moaba adre me hwenyi iödra, me, at Emi. 12 Ke haba at Hori adre me labâ Seira ehac, k' ame hwöhwabödra hnen laku Esau ; a ohí' ödra hnyi hnyimaködra me labâ bi hwabödra : helâ me hna ányâ hnen at Isaraela hnyi hnyi a idra, waleji Iehova ame ham ködra.) 13 Ke todr' öbun me hanyâúâ wagewe Zareda. Me ate me he hanyâúâ wagewe Zareda. 14 Ke haba úseiny je bong ate me he úheny Kadesi-banea, ke ne but ate me hanyâúâ wagewe Zareda, me thöte eit je huna ; ke ne o but ame ba hia döiny aten vat hnyi hnyi, helâ me Iehova ame khemanyin ködra. 15 Ke haba khaca ame mokut hnyamö Iehova hudrin, he ka ohí' ödra úheny unyin tawat, ke ne o but adre ohí' ödra hia thithö.

16 Ke haba hnyi úen adre hia but ohia aten vat hia hnyi hnyi, k' adre mokcu, 17 me Iehova ame ha könya, ka habe, 18 Haba hnyi bong ang u me he ka hanyâúâ Aro, a hnyigöulen Moaba : 19 ke u ka hakekenyâ laku Amona, ca he ka okongu ödra, ke ca ivinö mödra : anyin oge me ca he ka ham köu únyi hnyi hnyi iny laku Amona me me em : anyin oge hia but ham e me me iny laku Lota me me idra. 20 (Adre me hawâ hnyi eling minya me hnyi iny at Refai : k' ame laba eling at Refai ehac ; ke ame hwenyi iödra hnen at Amona, me, at Zamezumi ; 21 ödra tawat ae gan, me se hia, me beú helâ me at Anaka ; k'

### DEUTERONOMI 3.

ame ohi' ödra hnö Iehova hnyi hnyimaködra; k' adre me hwöhwabödra, me laba hnyi hnödra: 22 helâ me hnen hna ânyâ hobi kâu laku Esau, tavat adre me labâ Seira, waleji hnyi hnen hna ohia at Hori hnyi hnyimaködra; k' adre me hwöhwabödra me laba hnyi hnödra ke ne o but hnyi bong ang: 23 ke haba at Avi tavat adre me laba hnyi je ong taun ke ne o but Gaza, a at Kafetori, a tavat adre o üheny Kafetori, adre me ohi' ödra me laba hnyi hnödra.) 24 Köüö th' öbun me he, ke hanyâüâ hnyigöulen bucen e Arenona: wâ bi, oge hia but ham ka hnyi hnyamâm Sihona at Amona, thaniny Hesebona, me iny hnyei: hwân dö he ka hügünâ, ke tet metâ kâu hnyi vat. 25 Ke oge me he ka hwân hnyi bong ang he ka oküâ outö u, me me he ka öbubuny gam hnen ta je hnyei hia eang hmeledrany, a tavat adre me löng ânyâm lung, k' adre me he ka öbubuny, me hleuhleu gam.

26 Ke oge me kunâ je metu üheny hnyi hnyebuba e Kademotha kö Sihona than Hesebona, me ta je úthumetu hnân úsoköu, ka habe, 27 Iny be wek he ka he hnyi wanben em hnyei: ke oge me he ka he hnyi hna cit gethen, k' oge me ca he ka saü ka hnyi ke keihen metâ me me. 28 U me he ka ham könya jeü hwaban mone me inye he ka han; me habelik hwaban mone m' inye he ka ic: hnö nya thibi he ka he hnyi hon kânâ; 29 helâ me hna ânyâ könya hnen laku Esau adre me labâ Seira, me at Moaba adre me labâ Aro; me inye he ka hanyâüâ Joridano ka hnyi hnyei waleji a ham köhmun hnö Iehova Khongubmun. 30 Ke e höcö Sihona than Hesebona he ka hn' öta ka gethen unyin: anyin a Iehova Khongom ame okhötâ hnyekon, me ohwegiâ hnyekon, me me he ka hna e ka hnyi hnyamâm, a helâe hnyi bong ang. 31 Ke Iehova ame ha könya, ka habe, Wâ bi oge me hwân ang ka hnö Sihona, me iny hnyei köu hnyi hnyimâkâm: hwân dö he ka hom, m' u me he ka labâ. 32 Ke ame o thö Sihona úcüta, a tha e me lakeiny hia me vat e Jahaza. 33 Ke haba Iehova Khonguta ame hna e köta; m' ate me kot e, me lakon, me lakeiny hia. 34 Me ate me hügünâ anyin ta je taun hia hnyi üen eling, me ti ohia je taun adre labâ, tha e me je momo me tavat ae ühnyükong; ke ba kolon: 35 ke so bi ate me hügünâ omeno me haleta, tha e me omjeü ünyi hnyi taun waleji ate me hügünâ. 36

E ba ke taun ae hwege huta, hwân hnyi Aroera hnyi baten hnyigöulen bucen e Arenona, me taun a e hnyi hnyigöulen bucen, ke ne o but Gileada: Iehova Khonguta ame hna but hia köta hnyi hnyimâköta: 37 ke so bi u je ca o ka hnyi hnyei iny laku Amona; me baten hia wagewe Jaboka, me je tauniny bucen, me ta je dok hia ame nyibu öta hnyin Iehova.

#### HNYIMAKAN 3.

**M**E ate me khenyi me he hnyi gethen üheny Basana: me ame o but Oga than Basana úcüta, a e me lakeiny he ka vat hnyi Ederei. 2 Ke Iehova ame ha könya, ka habe, U me ca he ka outen e, anyin a oge me hna e, me lakeiny hia, me iny hnyei ka hnyi hnyamâm; ke u me he ka ânyâ kâu helâji me hnâm hna ânyâ kö Sihona thaniny at Amora at ame laba e Hesebona. 3 Ke Iehova Khonguta ame hnö Oga minya thaniny Basana me lakeiny hia ka hnyi hnyamöta, m' ate me kuc ödra, ke ne o but ame ba kolon. 4 Ke ate me hügünâ anyin ta je taun hia hnyi üen eling; ke ba taun ate me ca hügünâ ünyi gadra; a sikste je taun, wale hnyei hia hnyi Aregoba, dökhü dökhü Oga e Basana. 5 Haba je taun hia eling, adre si haginy göranyai igigilö, k' ame hu je homagöuleny, me je venyâiny; ke ca ha bi je taun ae se hia ae ba haginy. 6 Ke ate me ohi' ödra helâ me hnöta hna ânyâ kö Sihona thaniny Hesebona, me ti ohia je taun hia adre labâ. tha e me omomo me tavat ae ühnyükong, 7 Ke ate me hügünâ hobi köta bi omeno hia, me ta je ünyi hnyi je taun. 8 Ke haba hnyi üen eling ate me hügünâ hnyei ünyi ge li thaniny at Amora, hoton Joridano, hwân hnyi hnyigöulen bucen e Arenona ke ne o but hnyi bucen Heremona; 9 (haba at Zidona adre me hwenyi ien Heremona eling, me Siriona, ke haba at Amora adre me hwenyi ien, me Senira;) 10 a ta je taun hia hnyi dok ae tha hon, me Gileada hia, me Basana hia, ke ne o but Saleka, me Ederei, a je tauniny dökhü dökhü Oga hnyi Basana. 11 (Anyin a haba Oga thaniny Basana, me hake e thibi kolon at Refai; wâ bi, haba hnen hna mokut, me fao; hawa ca e hnyi Raba taun anyin laku Amona? haba ibeüen e me nain ta kubit, ke foa kubit úlaun, hoton kubitiny at.) 12 Ke ate me labâ hnyei e hnyi üen eling: hwân Aroera hnyi hnyigöulen bucen

DEUTERONOMI 4.

e Arenona, me hafiny hnyei hnyi bucen Gileada, me je tauniny, me waleji oge ham ka at Reubena me Gada : 13 ke haba kolon Gileada me Basana hia, a dökhu dökhu Oga, me waleji oge ham ka hafiny tribu Manase; wale hnyei hia hnyi Aregoba, a Basana hia. Adre me hwenyi ien hnyei e, me, hnyei anyin at Refai. 14 Haba Jaira nöku Manase ame hügünâ hnyei hia e Aregoba, ke ne o but hnyi hnyigöulen at Gesuri me at Maaka; ke e ame hwenyi ien, a wale Basana, hoton ien bi, me Havoth-jaira, ke ne o but hnyi bong ang.) 15 Ke oge me ham Gileada kö Makir. 16 Ke oge me nam ka at Reubena me Gada, hwân Gileada ke ne o but hnyi hnyigöulen bucen e Arenona, a hnyi wanben e, me baten: ke ne o but hnyi wagewe Jaboka, wale hnyigöulen laku Amona: 17 ke Araba minya, me Joridano, me baten e, hwân Kinereth, ke ne o but hnyi köien Araba, wale Köiö ae Hiny hmelen hwatapkoluiny Pisega, ke e deiö. 18 Ke oge me hûna köbun hnyi ûen eling, ka habe, Haba Iehova Khongubun ame ham köbun hnyei eang he ka labâ: ke öbun e he ka penapena ûnyi hnân vat me hanyâüâ hnyi hnyimakan je liamekeiny möbun a lakon Isaraela, tavat hia ae hwege. 19 Ke haba laöiöbun, me je ûhnyû-kongibun, me halebun omeno, (e khanö nya ae se hia halebun omeno) adre me he ka laba biju hnyi anyibun je taun wale oge ham köbun; 20 ke ne o but Iehova ame he ka omenâ je liamekeiny möbun, helâ möbun, me hu gadra hnyei waleji Iehova Khongubun ame ham ködra hnyi ke keihen Joridano: me öbun e he ka ve hmetu ka hnyi je gabun wale oge ham köbun. 21 Ke oge me hûna kö Josua hnyi ûen eling, ka habe, A wâ but li emakâm ûnyi a ânyâ Iehova ka li than eling: awe, ame he Iehova ka ânyâ helâe ka je dökhu u me he ka o ka hnyin. 22 Ca he öbun ka out' ödra: anyin a haba Iehova Khongubun, me wale at ame vat hobi köbun. 23 Ke oge me khöü kö Iehova hnyi ûen eling, me ha, ka habe, 24 Iehova lö, u je hwân ka omanenâ ûgânâm ka athnyabaem, me hnyamâm ae hwege; anyin a ie khong thö hnyi drany me eang hmelen ae khana he ka ânyâ helâ me ânyâm ta je huliwa, me helâ me hnâm hna ânyâ ae man? 25 Iny ta he ju ka hnyi hamâ hnyei ae so hnyi ke keihen Joridano, wale bucen ae so, me Lebanona. 26 Ke Iehova ame hmönyin könya cabun, me ame ca ling nya bi; ke

Iehova ame ha könya, ka habe, Soju ang, ca he hmetu ka ha könya hofuc e. 27 Ölö thö ka hnyi hon Pisega, me bwele jio, me ka hnyi hwadrö, me hwaiöu, me deiö, me wâ ge li emakâm; anyin a u me ca he ka hnyi hanyâüâ Joridano eang. 28 Ke hûna thö kö Josua, me nâ, me sihwegiâ e: anyin a e ame he ka hnyimakan tavat eang, ke e ame he ka olab' ödra hnyi hnyei wale u me wâ. 29 Me ate me laba hnyi hnyigöulen bucen a e cicö Bethe-peora.

HNYIMAKAN 4.

**I**SARAELA lö, löng ju u walang ang je hnanyibu me je hna owisa, oge me n' öbun he ka ânyâ; m' öbun e he ka möt, me he but me labâ hnyei a ham köbun Iehova Khongon lakamöbun. 2 Ca he öbun ka bi hanen ka hnyi hofuc oge me hûna köbun, ke ca ohia ke hanen, m' öbun e he ka löng hoton je hna hûna hnö Iehova Khongubun wale oge me hûna köbun. 3 Öbun e hia but wâ ge je emaköbun ûnyi a ânyâ Iehova can Baala-peora: anyin a haba tavat hia adre me hnu hoton Baal-peora, me Iehova Khongom ame hia but ohî ödra unyâm. 4 Ke haba tavat hia gabun adre kece hmâ kö Iehova Khongubun, me öbun e möt hia hnyi bong ang. 5 Wâ bi, oge hia but ûne köbun je hnanyibu me je hna owisa, helâ me Iehova Khonguk ame hûna könya, m' öbun e he ka ânyâ helâe hnyi hnyei öbun e he ka hnyin he ka labâ. 6 He th' öbun ka tuö me ânyâ; ke waleling anyibun metâ me anyibun wâhmakhmeto hnyi hnyimakan ta je hnyei, a tavat adre me he ka wâ je hnanyibu eang, me ha, ka habe, E hnathu hnyei ae metâ, me hnyei wâhmakhmeto hnyei eang ae gan. 7 Anyin a ewa hnyei ae gan ae hu khongon ame hakekeny ködra, helâ me Iehova Khonguta ame ânyâ hnyi je ûen hia ate me hongot kâu? 8 Ke ewa hnyei ae gan ae hu je hnanyibu me je hna owisa ae so, helâ me je hnanyibu hia eang oge me ip hnyi hnyimaköbun hnyi bong ang? 9 Ke so bi o u âu, me tuö u wia, wâ u nye hnying ta je ûnyi u je wâ, ke wâ e nye hia ta je ûnyi e hnyi hnyekom, hnyi ta je bongon ânyâm möt; ke u me he ka ûnö e ka lakom me laöbem; 10 waleji hnyi bong u je tot hnyi hnyimakö Iehova Khongom hnyi Horeba, k' ame ha könya Iehova, ka habe, Ükhacaköu thö könya tavat, m' adre me he ka löng hok je hofuc, me me khan' ödra he

## DEUTERONOMI 4.

ka outö nya hnyi ta ogo bong bongon anyi-  
dra möt hnyi hnyei, m' adre me he ka únö  
ka lakudra. 11 Ke öbun e hakekenyá me  
utitilén hmelen bucen; ke haba bucen ame  
hlá ge meic ke ne o but ka hnyi drany, ke  
menekholom, me úlá, me lit ae gan. 12 Ke  
Iehova ame ha köbun únyi hnyin meic:  
öbun e löng hwan k' öbun e ca wá bi unyin;  
ke hwan hofuc thibi. 13 Ke e ame omanená  
köbun anyin úhinhinyköu, waleji e ame  
húna köbun he ka ányá, a libenyita je hna-  
nyibu, ke e ame sihnalimen hnyi li veto ae  
lau. 14 Ke Iehova ame húna könya hnyi  
úen eling he ka n' öbun ge je hnanyibu me  
hna owisa, m' öbun e he ka tuö hnyi hnyei  
öbun e he ka hnyin he ka labá. 15 Ke wá  
eáu ju öbun; anyin ae ba unyin öbun e wá  
hnyi bong ame fuc köbun Iehova e Horeba  
hnyi meic: 16 wá öbun nye okongu öbun,  
me bihnatheat hobi köbun adre óuco ke únyi,  
ame ne бага, ame ne momo, 17 ame ne helá  
me mena ame he eang hmelen, ame ne helá  
me mena ae hu labenyin at ame gá ethö, 18  
ame ne helá me ke mena at ame iyáú eú hnyi  
káná, ame ne helá me ke wá eú hnyi köö  
hmelen hnyei: 19 ke wá u nye bwele thö  
hnyi drany ai, ke u je wá seúnö, me tehi,  
me je okhú, a je únyi ae se hia hnyi drany,  
k' adre me hum u he ka khudrung me bi  
athnyabainy ta je únyi e, waleji Iehova ame  
ip hobi káu ta je hnyei hia eang hmeledrany.  
20 Ke a hia but Iehova hum öbun, me su  
öbun úheny hnyi hnyin inyá fao, a úheny  
Aigupito, m' öbun e lakeiny ae hu hwaje-  
khon, helá me hnyi bong ang. 21 Ke  
haba khaca, Iehova ame hmönyin könya ca  
'bun, me ame khemanyin a oge me ca he ka  
hnyi he hanyáúá Joridano, me hnyi he ka  
hnyi hnyei ae so, wale a ham Iehova Kho-  
ngom hnán em; 22 ke so bi oge me he ka  
mokeu hnyi hnyei eang, k' oge me ca he ka  
he hanyáúá Joridano: ke öbun e he biju  
ka he hanyáúá, me hu hnyei ae so eling.  
23 Wá eáu, wá öbun nye hnying úhinhinyköu  
anyi Iehova Khongubun, waleji e ame úhi-  
hinyköu möbun, k' öbun e bi hnatheat hobi  
köbun he ka óuco ke únyi a thawá köu  
hnö Iehova Khongom. 24 Anyin a meic  
ae han Iehova Khongom, Khong amc ciá.

25 Ke e ka hu lakom me laöbem, ke beú  
ulabaibun hnyi hnyei, k' öbun ka okongu  
öbun bi, me bi hnatheat, he ka óuco ke  
únyi, me ányá únyi ae kong hnyi hnyimákö  
Iehova Khongom, me ohmönyiná: 26 awe,  
oge me hawá drany me hmeledrany he ka  
ohnathoá gabun hnyi bong ang, a g' adre

me he ka ie ohí' öbun únyi hnyi hnyei wale  
öbun e hanyáúá Joridano he ka hu gabun;  
k' ame ca he ka se hia bongubun je bong  
hnyin, k' adre me he ka ti ohí' öbun. 27 Ke  
ame he Iehova ka ovesei öbun ka hnyi ta  
je hnyei, k' ame he ka wakhalet biju kolon  
gabun unyin ta je hnyei ame he Iehova ka  
lili öbun ka hnyin. 28 Ke öbun e he ka  
bi athnyabainy eling je khong, wale a ányá  
ge hnyamen at, utö me veto, a ta je únyi  
ame ca wá, me ca löng, me ca han, me ca  
bubune. 29 Ke so bi öbun ka he eling ka  
elöm Iehova Khongom, me u me he ka wá,  
u je ne elám ge hnyekom ae bekhöt, me  
hanom ae bekhöt. 30 Ke ka o köu vec,  
k' ame ne aat köu ta je únyi hia eling, me u  
me he ka hmetu kö Iehova Khongom hnyi  
je bong a biliny, me löng hoton hwan hofuc;  
31 anyin a haba Iehova Khongom me  
Khong ame betenge; e ame ca he ka hna  
degeci u, me ohö u, me hnying anyin úhi-  
hinyköu me lakámám, waleji e ame khe-  
manyin ködrin, 32 Ke he thö u ka elám je  
bong ehac, ke tiga hiö u, hwán hnyi bong  
waleji Khong ame op at eang hmelen hnyin,  
ke hwán hnyi ke keihen drany ke ne o but  
ka hnyi ke keihen, hawa e hu únyi ae gan  
heláng, k' adre me ne löng helá me únyi ang?  
33 Hawa, e hu ke hnyei ame löng hofuc  
hwan Khong ame fuc hnyin meic, helá me  
hnám hna löng, ke möt bi? 34 Ke hawa,  
hwakecin Khong he ka he me hom hnyei  
hnán hobi káu únyi hnyi ke hnyei, ge je  
úcúbic, me je haten, me je únyi hnán láia,  
me vat, me hnyam ae hwege, me benyin  
adre hai, me je únyi ae gan hnán outen,  
hoton ta je únyi hia waleji a ányá Iehova  
Khongubun hobi köbun hnyi hnyimáköbun  
hnyi Aigupito? 35 Adre me omanená  
únyi eling köu, me me khanö u thö a  
Iehova Khong; hake e ke ba ke at. 36 E  
ame hna köu he ka löng hwan hofuc únyi  
ethö hnyi drany, me me nö u: ke e ame  
omanená köu eang hmelen anyin meic ae  
gan; ke u je löng hwan je hofuc únyi hnyin  
meic. 37 Ke can anyin e ame betenge ge  
lakámám, waleling me e ame úca je mátrá-  
nidrin hwabödrin, me hum u úheny Aigu-  
pito ge maniny man ae hwege, k' ame tot  
unyám; 38 he ka obá hnyi hnyimákám je  
hnyei ae gan me hwege hom, me hum u he  
ka ham bi köu idra hnyei me me em, helá  
me hnyi bong ang. 39 Ke khanö u thö  
hnyi bong ang, ke ip hmá eú hnyi hnyekom  
a haba Iehova me Khong ethö hnyi drany  
me eang hmelen; hake e ke ba ke at. 40 Ke

DEUTERONOMI 5.

u me he ka tuö anyin je hnanyibu, me hnen je hna hûna, wale oge me hûna kôu hnyi bong ang, m' u me so, me lakom hwabâm, me me se hia bongom je bong hnyi hnyei a ham kôu Iehova Khongom nyiele balua.

41 Ke haba Moso ame kû je taun a kun hnyi ke keihen Joridano a o hnyin seünö; 42 me me kec ka hnyin at ame hlingâ at, wale at ame hlingâ at ame laba hakekeny kâu a utöteta kâu, k' ame ca hûkötia ehac; me me he ka môt e ka kec ka hnyi ke taun eling: 43 hobi kâu at Reubena, e ame ip Bezeri hnyi hnyebuba, hnyi hnyei a tha hon; me Ramotha hnyi Gileada, hobi kâu at Gada; me Golana hnyi Basana, hobi kâu at Manase.

44 Ke walang hnanyibu ame ip Mose hnyi hnyimakan lakon Isaraela: 45 ke walang je ohnathoa, me je hna otilâ, me je hna owisa hnö Mose hna omanenâ ka lakon Isaraela, ödra ka o but üheny Aigupito; 46 hnyi hoton Joridano, hnyi hnyigöulen bucen cicö Bethe-peora, hnyi hnyei i Sihona thaniny at Amora, at ame laba e Hesebona, waleji ame kot hnö Mose me lakon Isaraela, ödra ka o but üheny Aigupito: 47 ke adre me labâ iny hnyei, me hnyei i Oga thaniny Basana, a li tuhan at Amora, a wal' ödru hnyi hoton Joridano hnyi hna o hnen seünö; 48 hwân Aroera hnyi baten hnyigöulen bucen e Arenona ke ne o but hnyi bucen Siona (wale Heremona), 49 me hnyei ae tha hon hia hoton Joridano e deiö, ke ne o but hnyi köien je hnyei ae tha hon hmelen hwatapkoluiny Pisega.

HNyimakan 5.

**K**E haba Mose ame hawâ lakon Isaraela hia, me ha ködra, ka habe, Isaraela lö, löng ju je hnanyibu, me je hna owisa oge me haimemenâ ka hnyi je hnyikönyöbun hnyi bong ang, me me klan' öbun e, me tuö, me ânyâ. 2 Haba Iehova Khonguta ame ühinhnykôu möta hnyi Horeba. 3 Iehova ame ca ânyâ ühinhnykôu eang me lakamöta, ke möta bi, öta hia tavat ae môt hnyi bong ang. 4 Iehova ame fuc ühnyimaköu möbun hon bucen hnyi meic, 5 (ke oge me tot hnyi wanbö Iehova möbun hnyi üen eling, me thumetu öbun ge hofuc ho Iehova: anyin a öbun ot ge meic, k' öbun e ca öliâ bucen:) k' ame ha, ka habe,

6 Inya Iehova Khongom, at ame hum u üheny hnyi hnyei Aigupito, ke üheny hnyi hnyaban üthaluo.

7 U me ca he ka ânyâ ke khong hnyi hnyimakök.

8 U me ca he ka bi hnatheat hobi kôu bi, me ouco ke ünyi ethö hnyi drany, me eang hmelen, me hnyi köiö hmelen hnyei:

9 u me ca he ka kbudrung me bi athnyabainy ta je ünyi e: anyin a inya Iehova Khongom, Khong ame ciâ, at ame bi hwaban monu anyin je kamen ka je mâtrânidrin ke ne o but ka hnyi dö a kuniny me dö a vakiny a tavat adre hûkötio nya: 10 k' oge me omanenâ ibetengiö ka ta je dö a thauzaniny tavat adre me hnyok könya, me vheno anyik je hnanyibu.

11 U me ca he ka ha bâüâ iö Iehova Khongom: anyin ame ca he Iehova ka ha ae ba kongon at ame ha mono ien.

12 U ma tuö bong sabath he ka okabâ e, helâ me Iehova Khongom ame hûna kôu.

13 Siks ta bong u me he ka huliwa hnyin, me ânyâ ânyâm ta je huliwa hia: 14 ke haba bong a seveniny, me, wale sabath anyi Iehova Khongom: ke ba huliwa u me he ka ânyâ hnyin, a u, me nokom бага, me nokom hlu, me athnyabaem a бага, me momo, me halem bolok, me halem asina, me halem je meno hia, me atkanyua unyâm hnyi je homagöulem; me me tha menâ möu athnyabaem a бага, me momo. 15 Ke u me he ka ünykûme a g' adre thaluö u hnyi hnyei Aigupito, ke haba Iehova Khongom ame hum u üheny e ge hnyam ae hwege me benyin adre hai: anyin a wale Iehova Khongom ame hûna kôu he ka tuö bong sabath.

16 Ogânâ thö kâmâm me hinyâm, helâ me Iehova Khongom ame hûna kôu, me me se hia je bongom, m' u me so hnyi hnyei Iehova ame ham kôu.

17 U ca he ka ühlingö.

18 U ca he ka bi ünyi monu.

19 U ca he ka venöu.

20 U ca he ka thoiâ ke at.

21 U ca he ka behnyekom aiân ke at; k' u me ca he ka beweny uma umen ke at, me iny hnyei, me athnyabainy a бага, me athnyabainy a momo, me halen bolok, me haleny asina, me ta je ünyi hia anyin ke at.

22 Wale je hofuc a ha Iehova ka anyibun ükhacaköu hia hon bucen ünyi hnyi wanben meic, me ülä, me menekholom ae gan, ke gan hmâ hwan: ke e ame ca bi hanen. Ke e ame sihnalimen e hnyi li veto ae lau, me ham könya. 23 Ke haba

DEUTERONOMI 6.

hnyi úen öbun e löng hwan únyi hnyi wanben menekholom, ke tiga hlá thö bucen ge meic, me öbun e he könya, a je taben hia anyibun je tribu me wahingatibun; 24 ke öbun e ha, ka habe, Wá bi, Iehova Khonguta ame omanená köta hmanenanginy me úganiny, k' ate me hia but löng hwan ame fuc únyi hnyi wanben meic: ate me wáhmakhmeto but hnyi bong ang a Iehova ame úhnenamö me at, k' ame möt bi. 25 Anyin a wale geú ate me he but ka mok? anyin ame he meic eang ae gan he ka thung öta: ate me ne löng hmetu hofuc ho Iehova Khonguta, me ate me he ka mokcu. 26 Anyin a ewa at unyin tavat hia ame löng hwan Khong ae möt ame fuc hnyin meic helá me hnöhmun hna löng, k' ame möt bi? 27 U ma hakekenyá me löng hofuc hia ame he Iehova Khonguta ka ha: ke u me he biju ka omanená köhmun hofuc hia ame he Iehova Khonguta ka ha köu: k' öhmun e he ka löng me ányá. 28 Me haba Iehova ame löng hobun hofuc, waleji öbun e ha könya; ke Iehova ame ha könya, ka haba, Oge löng ut ifucin tavat eang, wale adre me ha köu: ke so hia hnödra hna ha. 29 E na hu ju gadra hnyok ae úcú m' adre me outö nya, me löng bala hnök ta je hna húna hia, m' adre me so me je mátránidra nyiele balua! 30 He thö ka ha ködra, ka habe, Hmetu ju öbun ka hnyi umöbun je uma mano. 31 Ke u me he bi u ka tot eang unyik, ke oge me he ka omanená hia köu ta je hnanyibu, me hna húna, me je hna owisa, wale u me he ka n' ödra, m' adre me he ka ányá hnyi hnyei oge me he ka ham ködra me me idra. 32 Ke wá wia ju öbun he ka ányá helá me Iehova Khongubun ame húna köbun: ca he öbun ka saú ka hnyi ke keihen metá me me. 33 Öbun e he ka vheno hia gethen wale Iehova Khongubun ame húna köbun, m' öbun e möt, me so, me se hia bongubun je bong hnyi hnyei öbun e he ka hu.

HNHYIMAKAN 6.

**K**E walang hna húna, me je hnanyibu, me je hna owisa, waleji a húna Iehova Khongubun he ka n' öbun, m' öbun e he ka ányá hnyi hnyei öbun e he ka hnyin me me hu: 2 m' u me he ka outö Iehova Khongom he ka vheno anyin ta je hnanyibu hia, me hnen je hna húna, wale oge me húna köu, u, me nokom, me öbem

hnyi ta je bong bongon ányám möt hia, me me se hia bongom. 3 Isaraela lö, löng ju, me tuö he ka ányá: m' ume so, me öbun e he ka ti se hia, helá me hna ha báná köu hnö Iehova Khongon lakámám hnyi hnyei ame di hnyin debai me hani.

4 Isaraela lö, löng ju: haba Iehova Khonguta, me Iehova a khaca; 5 ke hamám he ka hnyok kö Iehova Khongom ge hnyekom ae bekhöt, me hanom ae bekhöt, me tang hwegiám ae bekhöt. 6 Ke haba ta je hofuc eang oge me húna köu hnyi bong ang, me ame he ka e bi hnyi hnyekom: 7 ke u me he ka labö ná e ka lakom, me úhnenamö gan u ka laba hnyin umám uma, me he eü hnyi gethen, me u ka mokut, me u ka köüö hmetu. 8 Ke u me he ka ca hofuc eling hnán haten hnyi hnyamám, ke wale minya hnán wen bariny wanben li emakám. 9 Ke u me he ka sihnalimen ta je hofuc e hnyi je ut hwanumen umám uma, me hnyi je homagöulem.

10 Ke ka hum u hnö Iehova Khongom ka hnyi hnyei waleji e ame khemanyin ka lakámám, a Aberahama, me Isaaka me Jakob, he ka ham köu, a je taun ae gan me so wale u je ca op, 11 me je uma ae únöngöt ge ta je únyi hia ae so, wale u je ca ounöngötá, me je hna khú an, wale u je ca kou, je hnyei vine me je hnyei elaiö. wale u je ca ta, ke u me he ka han sekön; 12 awe, wá eáu, wá u nye hnying Iehova at ame hum u úheny hnyi hnyei Aigupito, únyi hnyi hnyaba ae úthaluo. 13 U me he ka outö Iehova Khongom; me bi athnyabainy, me khemanyin hnyi ien. 14 Ca he öbun ka hnu hoton je khong a je khongon tavat igigili öbun; 15 anyin a haba Iehova Khongom unyám, me, Khong ame ciá; wá e nye ubáhlá hmönyin anyi Iehova Khongom köu, ke e ame ohio u but únyi hnyi hon káná.

16 Ca he öbun ka cubic Iehova Khongubun, helá me hnöbun hna cubic e hnyi Masa. 17 Öbun e he ka tuö wia je hna húna hnö Iehova Khongubun, me hnen je hna ohnatho, me anyin je hnanyibu, wale e ame húna köu. 18 Ke u me he ka ányá únyi ae wisa me so hnyi hnyimako Iehova; m' u me so, m' u me he me hu gam hnyei ae so waleji Iehova ame khemanyin ka lakámám, 19 a g' ame he ka obá je iwahnaihmiony möu hia hnyi hnyimákám, hoton hna ha hnö Iehova.

20 Ke e ka he nokom ka hnei u nyiele,

DEUTERONOMI 7.

ka habe, Ieú bongon je hna ohnatho, me je hnanyibu, me je hna owisa, waleji Iehova Khonguta ame húna köbun? 21 awe u me he ka ha ka nokom, ka habe, Haba öhmun lathnyabai Farao hnyi Aigupito ehac; me Iehova ame hum öhmun úheny Aigupito ge hnyam ae hwege: 22 ke Iehova ame omanená je haten, me je únyi hnân láia ae gan me kong ka at Aigupito, me kö Farao, me hnyaban hia hnyi hnyimaköhmun: 23 ke e ame hum öhmun úheny e, me me hum öhmun ka hnyin me ham köta hnyei waleji e ame khemanyin ka lakamöta. 24 Ke Iehova ame húna köhmun he ka ányá ta je hnanyibu eang, he ka outö Iehova Khonguta, m' ate me so bala, me e ame omeli öta, helâ me hnyi bong ang. 25 Ke ame he ka hnân hwakecita ae wisa ate me ne wâ wia he ka ányâ hna húna eang ae bekhöt hnyi hnyimakö Iehova Khonguta, hoton hnen hna húna köta.

HNYIMAKAN 7.

**E** KA hia but Iehova Khongom hum u ka hnyi hnyei wale u me he ka hnyin he ka hu e, ke e ka hia but oc degecá je hnyei ae se hia hnyi hnyimákâm, a at Heth, me Girigasa, me Amora, me Kanana, me Perizi, me Hivi, me Jebusi, wale seven je hnyei ae gan me hwege hom; 2 ke e ka he Iehova Khongom ka hn' ödra hnyi hnyimákâm; awe, u me he ka kuc ödra me ti ohí' ödra hia; u me ca he ka úhinhnyköu mödra, me betenge gadra: 3 ke haba khaca u me ca he ka úhok ta momo mödra; u me ca he ka ham nokom hlu ka nokon бага, ke u me ca he ka hom nokon hlu hobi káu nokom бага. 4 Anyin a e ame he ka oká nokom unyik, me me he ka bi athnyabainy ke je khong: me ame he ka ubâhlâ hmönyin anyi Iehova köbun, ke e ame he ka ie ohíö u. 5 Ke walang únyi öbun e ha ka ányâ ködra; öbun e he ka kia anyidra je taben hut, me tho amamá anyidra je veto ame tot, me sö degecá anyidra je Aseira, me thong degecá anyidra je hnatheat ge meic. 6 Anyin a u hnyei ae kap kö Iehova Khongom: ke Iehova Khongom ame úcö u, me me iny hnyei ae ke bongon ae nua hon ta je hnyei hia hnyi hon kânâ. 7 Haba Iehova ame ca betenge köbun, me uc' öbun can öbun se hia hon je hnyei hia: anyin a öbun tavat ae úhnyükong hmönyin ehac: 8 ke so bi únyi hnyi ibetengiö anyi Iehova köbun, ke hnyi weny he ka oúnyihnathö

hnen hna khemanyin ka lakamöbun, waleling me me hum öbun hnö Iehova ge hnyam ae hwege, me omeli öbun únyi hnyi hnyaba ae úthaluo, a úheny hnyi hnyamö Farao than Aigupito. 9 Khanö u thö a Iehova Khongom, e thibi Khong; Khong ae hnathu, at ame tuö úhinhnyköu me ibetengiö ka tavat adre me hnyok káu, me tuö anyin je hna húna ka ta je dö a thauzan; 10 ke ame bi hwaban manená ka tavat adre me húkotiâ e he ka ohí' ödra: e ame ca he ka bec ka at ame húkotiâ e, k' ame he ka bi hwaban manená káu. 11 Anyin a wale u me he ka tuö hna húna, me je hnanyibu, me je hna owisa, wale oge me húna köu hnyi bong ang, he ka ányâ.

12 Ke ame he ka e bi, a u je ne löng je hna owisa eang, me tuö, me anyâ, a g' ame he Iehova Khongom ka tuö möu úhinhnyköu me ibetengiö waleji e ame khemanyin ka lakámâm: 13 me e ame he ka hnyok köu, me ohnahici u, me osehiö u: k' ame he minya ka ohnahicâ je wan hnyekom, me wan kânâm kânâ, wale ányâm hwit, me ányâm waina, me ányâm wakaco, me lakon halem je kau, me je hnahat halem je mamoe, hnyi hnyei e ame khemanyin ka lakámâm he ka ham köu. 14 Ame he ka beönua ányâm hnahic hon ta je hnyei hia: k' ame ca he ka toúnyi ke бага me momo unyibun, me halem omeno. 15 Ke ame he Iehova ka ohia unyâm ta je mok hia, ke e ame ca he ka ip hom ke mekiny Aigupito ae kong, wale ae khanö u, k' ame he ka ip e hon hudrin hia a tavat adre me húkotiö u. 16 Ke u me he ka ohia ta je hnyei hia ame he Iehova ka hna köu; k' ame ca he emakâm ka betenge gadra: ke u ma ca bi athnyabainy anyidra je khong; anyin a wale hnân nuc u. 17 U je ne ha hnyi hnyekom, ka habe, E gan je hnyei eling huk, k' oge ma kâmâu ka he ka hnyi hnödra? 18 awe, u me ca he ka out' ödra: ke u ma he ka únykúme wia ta je únyi waleji a ányâ Iehova Khongom kö Farao me at Aigupito hia; 19 a ta je úcúbic ae gan a wâ li emakâm, me je haten, me je únyi hnân láia, me hnyamen ae hwege, me benyin adre hai, waleji hnö Iehova Khongom hna hum u káu: k' ame he Iehova Khongom ka ányâ helâe ka ta je hnyei hia wale u me ouden. 20 Ke haba khaca, ame he Iehova Khongom ka kunâ wahankânâ ködra, ke ne o but ame hia but je kolon tavat adre me lubaduöng gam. 21 U ma ca he ka out' ödra, anyin a e bi

DEUTERONOMI 8, 9.

unyâm Iehova Khongom, Khong ae gan me hnân outen. 22 Ke ame he Iehova Khongom ka obâ úsa úhnyúkong je hnyei eling hnyi hnyimâkâm : u me ca he ka okhaca ob' ödra, wâ ödra nye se hia but hom omenoiny hnyot. 23 Ke ame he Iehova Khongom ka hn' ödra köu, me okongu ödra ge hna okongoâ ae gan, ke ne o but adre ohi' ödra. 24 Ke e ame he ka hna anyidra je than ka hnyi hnyamâm, ke u ma he ka ohia je iödrin eang hmeledrany : e ba at ae khana he ka tot hnyi hnyimâkâm, ke ne o but u je hia but ohi' ödra. 25 Ke öbun e he ka thong degecâ ge meic ta je hnatheatiny anyidra je khong : ke u me ca he bi ka behnyekon sileva me gol wale adre tube kâu, me hom e me ânyâm bi, wâ e nye nuc u hnen únyi eling : anyin a haba únyi e me únyi ae ikiki kö Iehova Khongom : 26 ke u me ca he ka hom únyi ae ikiki ka hnyi umâm uma, wâ adre nye obnaúhangö u helâ me ; ke u ma he ka ti ikikiâ e, me ti hûkotiâ, anyin a e únyi adre ohnaúhangoâ.

HNyimakan 8.

**H**ABA ta je hna hûna hia wale oge me hûna köu hnyi bong ang, me, öbun e he ka wâ wia he ka ânyâ, m' öbun e möt, me se hia, me he, me hu hnyei waleji Iehova ame khemanyin ka lakamöbun. 2 Ke u ma he ka únykúme gethen hia waleji a hum u hnyin Iehova Khongom, hnyi je huna a fâte hnyi hnyebuba, me me oúhnyúkongi u, he ka cubic u, me me wâhmakhmetoâ únyi eú hnyi hnyekom, hawa, u me ne he ka tuö hnen je hna hûna, k' u je ne höcö bi. 3 Ke e ame oúhnyúkongi u, me omekihnânemi u, me hâm ge mana, wale únyi ae ca khanö u, ke ca khana minya lakânâm ; me me khanö u thö a g' ame ca möt at hnen thibi areto, k' ame möt bi at hnen ta je únyi hia ame o únyi hnyi hnyimö Iehova. 4 Ame ca bobot ânyâm je úkhaú waleji u me khavâ, k' ame ca khibi cam hnyi ta je huna eling a fâte. 5 Ke u me he ka únykúme eú hnyi hnyekom a g' ame kuc u hnö Iehova Khongom helâ me at ame kot nokon. 6 Ke u me he ka tuö je hna hûna hnö Iehova Khongom, he ka vhenö deny je gethen me outen e. 7 Anyin a Iehova Khongom ame hum u ka hnyi hnyei ae so, a hnyei ae hu je wagewe hnyin, a je hna pupua me je köiö ae dit, k' ame ve pupua hnyi je hnyi-

göulen bucen me hnyi je bucen ; 8 a hnyei ae hu hwit, me bali, me vine, me ometa, me rimona ; a hnyeiny wakaco me elaiö me hani ; 9 a hnyei u me he ka han hnyin, ke ba hmiâ, ke ba ke únyi ae hia hnyin e unyâm ; a hnyei ae hu fao hnyi hnen vetoiny, ke u me he ka hiny bras hnyi je buceniny. 10 Ke u me he ka han sekon, me u me he ka hasoi Iehova Khongom ge hnyei ae so e ame ham köu. 11 Ke wâ eâu, wâ u nye hnying Iehova Khongom, me ca tuö bi hnen hna hûna, me anyin je hna owisa, me anyin je hnanyibu, wale oge me huna köu hnyi bong ang : 12 wâ u nye he bi ka han sekon, me bi uma ae so, me labâ ; 13 ke e ka se hia but halem je kau me halem je mamoe, ke e ka gan dut ânyâm sileva me gol, ke ka se hia but ânyâm je únyi hia ; 14 me wale ame bi gan hnyekom, me u me hnying Iehova Khongom at ame hum u úheny hnyi hnyei Aigupito, únyi hnyi hnyaba ae úthaluo : 15 at ame lili u tilö u hnyi wanben hnyebuba ae gan me hnân outen, dok ae hu on hnyin ae kahwa, me je sekopio, dok ae mada me ba köien ; at ame oâ köu köiö únyi hnyi kic a out ; 16 at ame hâm ge mana hnyi hnyebuba únyi a ca wâ hnen lakâmâm ; me me oúhnyúkongi u, me cubic u, he ka ohnahici u hnyi obiny : 17 ke u je ne he ka ha eú hnyi hnyekom, ka habe, A o könya omjeú eang únyi ge manik man me tang hwegien hnyamök. 18 Ke so u ma únykúme kö Iehova Khongom, anyin a e at ame ham köu tang hwege he ka hu tang omjeú ; me me ohmâ anyin úhinhnyökou waleji e ame khemanyin ka je lakâmâm, helâ me hnyi bong ang. 19 Ke u je ne hnying Iehova Khongom, me hnu hoton ke je khong bi, me bi athnyabaidrin, me khudrung ködrin, awe, inya oge me ha wia köbun hnyi bong ang a g' adre me he ka ohi' öbun. 20 Adre me he ka ohi' öbun helâ me je hnyei ame he Iehova ka ohia hnyi hnyimaköbun ; anyin a öbun e höcö löng hoton hofuc ho Iehova Khongobun.

HNyimakan 9.

**I**SARAELO lö, löng ju : u me he ka he hanyâúâ Joridano hnyi bong ang, he ka he me hûgúnâ je hnyei ae gan me hwege hom, je taun ae gan k' adre u haginy ke ne o but ka hnyi drany, 2 a tavat ae gan me beú, je laku Anaka, tavat ae khanö u, k' u je löng hnödra hna ha



DEUTERONOMI 9.

gada, ka habe, Ie at ame he ka tot hnyi hnyimakan je laku Anaka? 3 Ke ame he ka khanö u hnyi bong ang a Iehova Khongom ame hnyimakan anyâm bunyen, e meic ae han; ke e ame he ka ohî' ödra, me öhnyükongu ödra: ke u me he ka ob' ödra, me ie ohî' ödra, helâ me Iehova ame ha köu. 4 Ke e ka hia but Iehova Khongom ob' ödra hnyi hnyimâkâm, me u me ca he ka ha eü hnyi hnyekom, ka habe, Can hwakecik ae wisa, Iehova ame hum nya me inye he ka hu hnyei ang: ke so bi can hwakecin ae kong anyin tavat eling, Iehova ame ob' ödra hnyi hnyimâkâm. 5 Ca ûnyi ge hwakecâm ae wisa, me wisainy hnyekom, wale me u me he me hûgûnâ idra hnyei: ke so bi can hwakecin ae kong anyin tavat eling Iehova Khongom ame ob' ödra hnyi hnyimâkâm, me me hwâdâ hofuc waleji a khemanyin Iehova ka lakâmâm, a Aberahama, me Isaaka, me Jakob. 6 Anyin a wale, u ma wâhmakhmetoâ a ca ûnyi ge wisainy hwakecâm me ame ham köu hnyei eang ae so hnö Iehova Khongom me me em; anyin a haba u me hnyei ae hwege nyin. 7 ûnykûme ju, me ca he ka hnying bi ge hnâm hna ohmönyini Iehova Khongom hnyi hnyebuba: hwân hnyi bong u je hna but hnyin hnyei Aigupito, ke ne o but öbun ang, me öbun e labö ûkhin fuc me Iehova. 8 Ke öbun e ohmönyini Iehova hnyi Horeba, me Iehova ame hmönyin köbun k' ame he ka ohî' öbun. 9 Hnyi üen oge me öliâ bucen he ka kap li veto ae lau, a li vetoiny ühinyköu waleji a anyâ Iehova möbun, ke oge me laba hnyi bucen fâte je lany ke fâte je lit; k' oge me ca han me ic. 10 Ke Iehova ame ham könya li veto ae lau a sihnalimen ge banyen Khong; k' adre sihnalimen hnyi li ûnyi eling hofuc waleji a ha köbun Iehova hon bucen hnyin meic, hnyi bong adre ûkhacaköu hnyin. 11 Ke a um dö je lany a fâte me je lit a fâte me haba Iehova ame ham könya li veto ae lau, a li vetoiny ühinyköu. 12 Ke Iehova ame ha könya, ka habe, Todrö, ie utut ühem ang; anyin ae kong ut anyâm tavat wale u je hom üheny Aigupito; adre me saü logot ûnyi hnyi gethen waleji oge hûna ködra; k' adre anyâ hobi ködra hnathat adre oköiâ. 13 Ke haba khaca Iehova ame ha könya, ka habe, Oge wâ but tavat ang, ke wâ bi, ödra tavat ae hwege nyin: 14 Ca thao nya me oge me he bi nya ka ohî' ödra, me kot degecâ ödra üheny eang hmelen, ke oge me he bi

nya ka wiö u me me hnyei ae gan me man hudra. 15 Waleling me oge me hwiö me utut ühek hon bucen, ke ame hlâ thö bucen ge meic: ke e bi hnyi li hnyamök li vetoiny ühinyköu. 16 Me oge me bwele, ke wâ bi e kong hwakecibun kö Iehova Khongubun; k' öbun e anyâ nokon kau adre oköiâ hobi köbun; k' öbun e logot saü ûnyi hnyi gethen waleji a hûna köbun Iehova. 17 Me oge me kât li veto, me khûâ degecâ ûnyi hnyi li hnyamök me thu hnyi hnyimaköbun. 18 Ke oge me ta ju hnyi hnyimakö Iehova helâ me a bân, fâte je lany, ke fâte je lit; k' oge me ca han me ic; can anyibun ta je hulö hia, waleji öbun e anyâ hwakecibun ae kong hnyi hnyimakö Iehova me ohmönyinâ. 19 Anyin oge me outen hmönyin me hwahwacit waleji ame hmönyin köbun Iehova he ka ohî' öbun. Ke so bi Iehova ame löng könya minya hnyi üen eling. 20 Ke Iehova ame hmönyin gan hmâ kö Arona he ka ohia e; ke so bi oge me khawei Arona minya hnyi üen eling. 21 Ke oge me hom anyibun hulö, wale nokon kau öbun e anyâ, me thong ge meic, me kokot e, me oamamâ ke ne o but ame sesâ but: ke oge me khûâ sesâiny ka hnyi wagewe ame di ûnyi hnyi bucen. 22 Ke öbun e ohmönyini Iehova hnyi Tabera, me Masa, me Kiberoth-atava. 23 Ke hnyi üen Iehova ame kun' öbun üheny Kadesi-banea, k' ame ha, ka habe, Ölö th' öbun, me hom hnyei oge me ham köbun; me öbun e hanyâtû musî anyi Iehova Khongubun ke öbun e ca labageju kâu, me löng hwan hofuc. 24 Öbun e hia but ûkhin fuc me Iehova hwân hnyi bong oge ibi iouny möbun hnyin. 25 Me waleling oge me ta ju hnyi hnyimakö Iehova hnyi ta je lany a fâte ke je lit a fâte waleji oge ta hnyin; anyin a Iehova ame ha he ka ohî' öbun. 26 Me oge me hic kö Iehova me ha, ka habe, Than Iehova lö, u me ca he ka ohia lakem me hwajekhom, waleji u je omelö ge manâm man, me hom üheny Aigupito ge hnyam ae hwege. 27 ûnykûme ju lathnyabaem, Aberahama, me Isaaka, me Jakob; e so u me ca wâ hwakecin ae üjöng anyin tavat eang, me hwakecidra ae kong, me anyidra hulö: 28 wâ e nye ha hnen hnyei wale u je hum öhmun üheny hnyin, ka habe, E ca khanö Iehova he ka hum ödra ka hnyi hnyei waleji e ame ha bânâ ködra, ke e ame hûköti ödra, waleling me e ame hum ödra he ka hling' ödra hnyi hnyebuba. 29 Ke so bi em

## DEUTERONOMI 10, 11.

hnyei ödra, ke hwajekhom, waleji u je hom ge manâm man ae gan, me benyâm adre hai.

### HNYIMAKAN 10.

**K**E haba hnyi ûen eling Iehova ame ha kõnya ka habe, U me he ka delâ li veto ae lau helâ me a bân, ke öliâ thö bucen kõnya, ke u me he ka tibet ke tang ütö. 2 Ke oge me he ka sibnalimen hnyi li veto ae lau ta je hofuc hnyi li veto ae lau a bân waleji u je thu, ke u me he ka hitangen li ûnyi e hnyin tang. 3 Me oge me tibet tang ütö ohum, me delâ li veto ae lau, helâ me li at a bân, me öliâ ka hnyi hon bucen, me li veto ae lau hnyi hnyamök. 4 Ke e ame sibnalimen hnyi li veto ae lau helâ me hna sibnalimen a bân, wale je hnanyibu a ten, a ha Iehova kõbun hon bucen ûnyi hnyi wanben meic hnyi je bong bongon úkhacaköu : me Iehova ame ham li ûnyi e kõnya. 5 Ke oge me hwiö me he úheny hon bucen, me oge me hitangen li veto hnyin tang oge tibet ; ke wale bala ling, helâ me Iehova ame hûna kõnya. 6 (Ke haba lakon Isaraela adre me he úheny Berotha Bene-jakana, Mosera ai : ke a mokeu Arona eling, k' adre konâm e eling ; ke haba Eleazara a nokon ame ânyâ hany-men at bihut hwaban. 7 Ke adre me he úheny e Gudagoda ai, ke úhedra Gudagoda, me adre me he Jotebath ai, hnyei ae hu je wagewe hnyin. 8 Haba hnyi ûen eling Iehova ame hake ip tribu anyin at Levi, he ka vaden tangen úhinhnykõu anyi Iehova, he ka tot hnyi hnyimakö Iehova, me huliwa kâu, me hahnahicâ hnyi ien, ke ne o but hnyi bong ang. 9 Anyin a wale e ba hwajekhöú Levi me iny unyin je liamekeiny mē ; haba Iehova, me iny hnyei, helâ me Iehova Khongom ame ha kâu.) 10 Ke oge laba hon bucen fâte je lany ke fâte je lit, helâ me ûen eji a bân : ke Iehova ame löng minya kõnya hayi ûen eling ; ke ca we Iehova he ka ohio u. 11 Ke Iehova ame ha kõnya, ka habe, Todró u me hnyimakan tavat ; me adre me he ka he me hu hnyei, waleji oge khemanyin ka lakamödra he ka ham ködra.

12 Ke haba walang ang Isaraela lö, ieu we Iehova Khongom ûnyi gam, ke wale thibi ang, he ka outö Iehova Khongom, he ka vheno deny je gethen hia, me hnyok kâu, me athnyabai Iehova Khongom ge hnyekom ae bekhöt, me hanom ae bekhöt,

13 he ka tuö je hna hûna hnö Iehova, me anyin je hnanyibu, wale oge me hûna kôu hnyi bong ang, m' u me so bi? 14 Wâ bi ûnyi anyi Iehova Khongom drany me draniny je drany, me hmeledrany, me ta je ûnyi hia thithö hnyin. 15 Ke so bi Iehova ame senyin ka lakâmâm me hnyok ködrin, me e ame úca je mâtrânidrin hwa-bodrin, wal' öbun e, ûnyi hnyi je hnyei hia, helâ me hnyi bong ang. 16 Anyin a wale peritomonâ unen je hnyekubun, ke ca he hmetu bi öbun ka hwege nyin. 17 Anyin a haba Iehova Khongubun, me Khongon je khong, me Thaniny je than, e Khong ae gan, me man, me hnân outen, k' ame ca wâhmakhmetoâ at, k' ame ca kap hwaban. 18 E ame owisa hobi kâu nakahme, me safac, k' ame betenge ge atkanyua, me hân, me okhavâ. 19 Anyin a wale betenge ju öbun ge atkanyua ; anyin a je atkanyua öbun hnyi hnyei Aigupito ehac. 20 U me he ka outö Iehova Khongom ; u me he ka bi athnyabainy, me kece kâu, me khemanyin hnyi ien. 21 E thibi at u me he ka ogânâ, ke e thibi Khongom, at ame ânyâ ta je ûnyi ae gan me hnân outen hobi kôu, waleji ame wâ li emakâm. 22 Ame he lakâmâm Aigupito ai ehac a ödrin sevente tavat ; ke walang ang Iehova Khongom ame wiö u m' u me helâ me je okhuiny drany ae se hia.

### HNYIMAKAN 11.

**A**NYIN a wale u me he ka hnyok kö Iehova Khongom, ke u me he bala ka tuö hnen hna otilâ, me anyin je hnanyibu, me hnen je hna owisa, me hnen je hna hûna. 2 Khan' öbun ju hnyi bong ang : anyin a oge me ca fuc ka lakubun, tavat ae ca khana ke ca hnyi wâ hna bi hwaban ûnyi ga Iehova Khongubun, ge úganiny, me hnyamen ae hwege, me benyin adre hai, 3 me anyin je úöman, me anyin je huliwa, waleji e ame ânyâ kö Farao than Aigupito hnyi Aigupito, me lakeiny hia ; 4 me hnen hna ânyâ ka tavat vat hnyi Aigupito, ka haledra je hors, me anyidra je kariota ; waleji hnyi hnen hna khutukhavâ but Köiö ae Dra, waleji hnyi hnödra hna hnu öbun ; me hnö Iehova hra ohí' ödra ke ne o but hnyi bong ang ; 5 me hnen hna ânyâ kõbun hnyi hnyebuba ke ne o but öbun e o eang ; 6 me hnen hna ânyâ kö Dathana me Abirama li laku Eliaba nöku Reubena ; waleji hnyi hna memang hnyi-

DEUTERONOMI 12.

men kânâ me ut ödrin me anyidrin je lap, me umödrin je uma mano, me tavat ae möt hia ödrin e hnu hotudrin, hnyi hnyimakan at Isaraela hia : 7 ke so bi öbun e hia but wâ ge je emaköbun ta je huliwa ae gan hia anyi Iehova, waleji e ame ânyâ. 8 Anyin a wale hamöbun he ka tuö je hnanyibu hia oge me hûna köbun hnyi bong ang, m' öbun e hwege, me he, me hu hnyei öbun e he kâu, m' öbun e he ka hu ; 9 me me se hia bongubun je bong hnyi hnyei ame khemanyin Iehova ka lakamöbun he ka ham ködrin me mâtrânidrin, a hnyei ame di hnen debai me hani. 10 Anyin a haba hnyei u me he ka he kâu m' u me he ka hu e, me ca helâ me hnyei Aigupito waleji u me o but ûheny hnyin, ke u je ta hatungâm je hatong, me bi deny köiö ge cam helâ me hna belökâ je khölak : 11 ke haba hnyei öbun e he ka hnyin me me he ka hu e, me wale hnyei ae hu je bucen me je hnyigöulen bucen, k' ame ijem dân we únyi hnyi drany : 12 e hnyei ame tuö hnö Iehova Khongom ; ke e bala bi hon e li emakö Iehova Khongom, hwân hnyi hnyimakan huna ke ne o but hnyi obiny.

13 Ke öbun e ne he ka ti löng hoton anyik je hnanyibu oge me hûna köbun hnyi bong ang, he ka hnyok kö Iehova Khongubun, me bi athnyabainy ge je hnyekubun ae bekhöt, me hanubun ae bekhöt, 14 me oge me he ka ham we hobi kâuibun hnyei hnyi úen e, wale we a bân, me we a biliny, me u me he ka ip ânyâm je whit, me ânyâm waina, me ânyam wakaco. 15 Ke oge me he ka ham hna önying ka hnyi em hnyei, hobi kâu halem omeno, ke u me he ka han me sekom. 16 Wâ wia öbun, wâ e nye iyawâ je hnyekubun, m' öbun e saú bi, me bi athnyabainy je khong me khudrung ködrin ; 17 me ame he ka ubâhlâ hmönyin anyi Iehova köbun, me e ame he ka hlöng drany, me me ba we, k' ame ca he kânâ ka okúâ waniny ; me ame he ka ie hi' öbun únyi hnyi hnyei ae so Iehova ame ham köbun. 18 Anyin a wale e so öbun e ohmâ hok hofuc eang eú hnyi je hnyekubun, me je hanubun ; ke öbun e he ka ca ju e hnân haten hon je hnyamöbun, k' ame he ka hnân wen bariny hnyi wanben li emaköbun. 19 Ke öbun e he ka ná hofuc e ka lakubun, me ûhnenamö gan, u ka laba hnyin umâm uma, me he eú hnyi gethen, ke u ka he ka mokut me köüö hmetu bi. 20 Ke u me he ka sihnalimen e hnyi je uthwanumen

umâm uma, me hnyi je homagöulem : 21 me me se hia bongubun je bong me bongon lakubun hnyi hnyei waleji a khemanyin hnö Iehova ka lakamöbun he ka ham ködrin, helâ me ta je bong bongon drany walethö hon hmeledrany. 22 Anyin a öbun e ne labö tuö je hnanyibu eang wale oge me hûna köbun he ka ânyâ, he ka hnyok kö Iehova Khongubun, he ka vheno deny je gethen hia, me kece kâu ; 23 awe, ame he Iehova ka obâ je hnyei hia eang únyi hnyi hnyimaköbun, ke öbun e he ka hu je hnyei ae gan me hwege hubun. 24 Ame he kaibun je dok hia ame he ka uto ge je hnyeúcabun : hwân hnyi hnye-buba, me Lebanona, hwân hnyi wagewe, a wagewe Euferate, ke ne o but hnyi köiö e jio, me wale hnyigöulöbun. 25 E ba at ame he ka tot hnyi hnyimaköbun : k' ame he Iehova Khongubun ka ootâ me öbubunâ je hnyei gabun wale öbun e he ka uto, helâ me hnen hna ha köbun.

26 Wâ bi, inya oge me ip hnyi hnyimaköbun hnyi bong ang hnahic me hnaúhangö : 27 wale hnahic, öbun e ne löng hoton je hnanyibu anyi Iehova Khongubun, walang oge me hûna köbun hnyi bong ang ; 28 ke hnaúhangö, öbun e ne ca löng hoton je hnanyibu anyi Iehova Khongubun, me saú bi únyi hnyi gethen oge me hûna köbun hnyi bong ang, he ka hnu hoton je khong monu, ae ca khan' öbun.

29 Ke ka hia but Iehova Khongom lili u ka hnyi hnyei u me he ka he ka hnyin me me gam, me u me he ka ip hnahic hon bucen Girizim, ke hnaúhangö hon bucen Ebala. 30 Hawa ca hoton Joridano li dok e, cicö hna dit hnen seúnö, hnyi hnyei ing at Kanana tavat adre me laba hnyi Araba cicö Gilegala hakekeny sawajo anyi More? 31 Anyin a hamöbun he ka hanyâúâ Joridano, me he he ka hu hnyei wale a ham köbun Iehova Khongubun, ke öbun e he ka hu e me labâ. 32 Ke hamöbun he ka tuö me ânyâ je hnanyibu hia, me je hna owisa wale oge me ip hnyi hnyimaköbun hnyi bong ang.

HNYIMAKAN 12.

**W**ALANG je hnanyibu me je hna owisa öbun e he ka tuö he ka ânyâ hnyi hnyei a ham köu hnö Iehova Khongon lakâmâm he ka hu e hnyi ta je bong bongon anyibun möt hia eang hmelen. 2 Öbun e he ka ti ohia ta je dok hia adre

DEUTERONOMI 12.

me bi athnyabainy hnyin je khongudrin hnyi je hnyei öbun e he ka hu, wal' ethö hon je bucen ae beú, me je dok ae görany, me hmelen je úö hia ae hat : 3 ke öbun e he ka kia anyidra je taben hut, me khûâ oamemâ anyidra je veto ame tot, me thong degecâ anyidra je Aseira ge meic ; ke öbun e he ka sö degecâ je hnatheatiny anyidra je khong ; ke öbun e he ka ohia je iödra únyi hnyi dok eling. 4 Öbun e ca he ka ányâ helâe kö Iehova Khongubun. 5 Ke haba dok ame he Iehova Khongubun ka úca únyi hnyi anyibun je tribu hia me me ip eling ien bi, awe öbun e he ka elâm e wale hnyaban me he kâ e : 6 ke öbun e he ka hom kâ e anyibun je hudiny leú, me anyibun je hut, me anyibun je ke keihen a libenyitainy, me je hudiny kap göranyai hnyi hnyamöbun, me anyibun je khöbi, me anyibun je hudiny ibetengiö, me je nokon a bán hnyi halebun je kau me mamoe : 7 ke öbun e he ka han e hnyi hnyimakö Iehova Khongubun, me öbun e he ka senyinâ ta je únyi hia öbun e ányâ, öbun me anyibun je lap, wale ame ohnahici u hnyin Iehova Khongom. 8 Ca he öbun ka ányâ hoton ta je únyi hia ate me ányâ eang hnyi bong ang, wale ae ve so hnyi li emakan ke at me ke at : 9 anyin a öbun e tiga ca o ka hnyi hna menâ me hwajekon ame ham köu Iehova Khongubun. 10 Ke öbun ka he ka hanyâúâ Joridano, me labâ hnyei a ham Iehova Khongubun me ibun, ke e ame omen' öbun ge je iwahnaihmiony hia möbun igigilö, me öbun e laba hnahic ; 11 awe, haba dok ame he Iehova Khongubun ka úca hnân umen ien bi ; me öbun e he ka hom kâ e ta je únyi oge hûna köbun ; wale je hudiny leú, me anyibun je hut, me anyibun je ke keihen a libenyitainy, me je hudiny kap göranyai hnyi hnyamöbun, me anyibun ta je khöbi hia ae únyi hnathu kö Iehova : 12 ke öbun e he ka senyin hnyi hnyimakö Iehova Khongubun, öbun, me lakubun obaga, me lakubun wahlu, me lathnyabaibun obaga me omomo, me at Levi hnyi anyibun je lap, anyin ae ba hwajekhon, ke ba iny bi unyibun. 13 Wâ wia u nye he ka hudo ányâm je hudiny leú hnyi je dok hia u me wâ : 14 ke so thibi hnyi dok ame he Iehova ka úca hnyi ányâm ke tribu, ke u me he ka hudo eling ányâm je hudiny leú, me ányâ eling ta je únyi hia oge hûna köu. 15 Ke so bi e khatö u he ka hlingâ me han utiöiny hnyi ányâm je lap, hoton je weny hnyekom hia, me hoton

hnahic únyi ga Iehova Khongom, wale e ame ham köu : k' ame he ka hnyi han hnen tavat ae bo kong me tavat ae bo so, helâ me zebi, me aila. 16 Ke so bi öbun e ca he ka han dren : k' öbun e he ka hingâlâ e hon kânâ helâ me köiö. 17 U me ca he ka han hnyi ányâm je lap je ke keihen a libenyitainy ányâm hwit, me ányâm waina, me ányâm wakaco, me nokon halem kau a bán, me mamoe, me ányâm je khöbi wale u je bi khöbi, me ányâm je hudiny ibetengiö, me hudiny kap göranyai hnyi hnyamâm : 18 ke u me he ka han ta je únyi e hnyi hnyimakö Iehova Khongom, hnyi dok ame he Iehova Khongom ka úca, u, me nokom бага, me nokom hlu, me athnyabaem бага me momo, me at Levi hnyi ányâm je lap : ke u me he ka senyinâ hnyi hnyimakö Iehova Khongom ta je únyi hia u me he ka ányâ. 19 Wâ eâu u nye he ka hna degecâ at Levi hnyi bongom ta je bong hia hnyi em hnyei.

20 Ke e ka he Iehova Khongom ka ogânâ je hnyigöulem, helâji me hnen hna ha köu, ke u je ne he ka ha, ka habe, Oge me he ka han meno, anyin a iny behan meno ; awe, u me he ka han hoton wem. 21 Ke ame ne ti sákâu gam dok ame he Iehova Khongom ka úca me me ip ien hnyin, awe, u me he ka hlingâ halem ke je kau me mamoe, a ham köu Iehova, helâ me hnök hna hûna köu, ke u me he ka han hnyi ányâm je lap, hoton je weny hnyekom hia. 22 U me he ka han e helâ me hnödra hna han zebi, me aila : k' ame he at ae bo kong me bo so he ka hnyi han. 23 Ke so bi, wâ eâu, me ca he ka han dra : anyin a haba dra, me, wale möt ; ke u me ca he ka tha han möt me utiöiny. 24 U me ca he ka han e, ke u me he ka hingâlâ e hon kânâ helâ me köiö. 25 U me ca he ka han e ; m' u me so bi, me lakom hwabâm, u ka ányâ wisa hnyi hnyimakö Iehova. 26 Ke haba ányâm je únyi ae kap, me ányâm je khöbi, me u me he ka hom me he ka hnyi dok ame he Iehova ka úca : 27 ke u me he ka hudo ányâm je hudiny leú, a utiö me dra hon taben hut kö Iehova Khongom ; ke adre me he ka hingâlâ dren ányâm je hut hon taben hut anyi Iehova Khongom, ke u me he ka han utiöiny. 28 Wâ wia me löng hoton ta je hofuc eang, wale oge me hûna köu, m' u me so, me lakom hwa-bâm nyiele balua, u ka ányâ únyi ae so me wisa hnyi hnyimakö Iehova Khongom. 29 Ke ka he Iehova Khongom ka subâ

## DEUTERONOMI 13, 14.

degecâ je hnyei hnyi hnyimâkâm, wale u me he ka hnyin me he ka hu, ke u ka tren, me labâ idra; 30 me wâ eâu, wâ e nye nuc u, u ka he ka he hotudra, e ka hia but ob' ödra hnyi hnyimâkâm; ke wâ u nye hnei ge anyidra je khong, me ha, ka habe, Adre me kâmâu je hnyei eang ka bi athnyaba anyidra je khong? ke oge me he bi nya ka ânyâ helâe. 31 U me ca he ka ânyâ helâe kö Iehova Khongom: anyin adre hia but ânyâ ka anyidra je khong ta je ûnyi ae ikikiâ Iehova, wale e ame hûkötîâ; anyin adre me labö le ge meic lakudra obaga me wahlu ka anyidra je khong.

32 Haba ta je ûnyi hia oge me hûna köbun, me öbun e he ka tuö me ânyâ: u me ca he ka bi hanen ka hnyin, me ohia hanen.

### HNYIMAKAN 13.

**A**NE o ûnyi gam ke perofeta, ame ne at bwi, ke e ame ham köu ke haten, ame ne ûnyi hnân lâiâ, 2 ke e ka hwâdâ thö haten, ame ne ûnyi hnan lâiâ, waleji e ame ha köu, ame ha, ka habe, Ötin e he ka hnu hoton ke je khong ae ca khanö u, me bi athnyabaidrin: 3 awe, u me ca he ka löng hofuc hwan at eling, ame ne perofeta, k' ame ne at bwi: anyin a Iehova Khongubun ame cubic öbun he ka wâ öbun e ne hnyok kö Iehova Khongubun ge hnyekuhun ae bekhöt, me hanubun ae bekhöt. 4 Öbun e he ka hnu hotu Iehova Khongubun, me outen, me tuö anyin je hnanyibu, me löng ifucin, k' öbun e he ka bi athnyabainy, me kece kâu. 5 Ke haba at eji, ame ne perofeta, k' ame ne at bwi, me adre me he ka hlingâ; anyin a e ame hia but ûkhin fuc kö Iehova Khongubun at ame hum öbun ûheny hnyi hnyei Aigupito, me ûcü u ûnyi hnyi hnyaba ae ûthaluo, he ka lili u ûnyi hnyi gethen waleji Iehova Khongom ame hûna köu he ka vheno. Me u ma he ka ohia helâe hulö unyâm.

6 Ame ne alecuâ duöngi u hnen liamekeiny möu a nokon hinyâm, k' ame ne nokom бага me hlu, k' ame ne âiâm, k' ame ne waem at u me hnyokâ, ke haingen, ka habe, E so ötu me he ka bi athnyabainy ke je khong ae ca khanö u me lakâmâm; 7 a je khongon ta je hnyei igigili öbun, ame ne hakekeny ame ne úsâkâüö möu, hwân hnyi ke can hmeledrany ke ne o but ka hnyi ke can; 8 u me ca he ka ogâ kâu,

me löng kâu; ke haba khaca, u me ca he ka betenge gan, me hna, ke u me ca he ka ikhâlâ: 9 ke u me he bi ka hlingâ; u ma bâm ka ip hnyamâm hon he ka hlingâ, ke biliny bi je hnyamen tavat hia. 10 Ke u me he ka lûâ e ge veto, me me mokcu; can e ame heleû deny he ka thöng u ûnyi ga Iehova Khongom, at ame hum u ûheny hnyi hnyei Aigupito, ûnyi hnyi hnyaba ae ûthaluo. 11 K' ame he at Isaraela hia ka löng, me ot, k' adre me ca he hmetu ka ânyâ ûnyi eling unyâm a ûnyi ae kong.

12 Ke u je ne löng hnyi ke taun a ham köu Iehova Khongom he ka labâ, ka habe, 13 A he but ke je hnyat ae kong ûheny unyâm, ke ödrin e hia but thang aten anyidrin taun, me ha, ka habe, E so ötin e he ka bi athnyabainy ke je khong ae ca khan' öbun; 14 awe, u me he ka hnei, me elâm, me hnö wia; ke ame ne hnathu, me manen a g' adre hia but ânyâ ûnyi eling ae ikiki unyâm: 15 me u me he ka ti kot tavat aten taun eling ge hele vat, me ti ohia, me ta je ûnyi hia hnyin e, me omenoiny hia, ge hele vat. 16 Ke u me he ka khon ta je ûnyi hia adre hûgûna ka hnyi wanben gethen, me le degecâ taun ge meic, me ta je ûnyi hia adre hûgûnâ, hobi kö Iehova Khongom: k' ame he ka hna digic thatûnyi nyiele balua, k' adre me ca he hmetu ka op e. 17 Ke e so ame ca he ka kece ka hnyi hnyamâm ûnyi adre ohnauhangoâ: me me he Iehova ka degec ûbâhlâiny hmönyin, k' ame he ka betenge gam, me hnyok köu, me osehio u, helâ me hnen hna kheimanyin ka lakâmâm; 18 u ka he ka löng hoton hofuc ho Iehova Khongom, he ka tuö anyin je hnanyibu, wale oge me hûna köu hnyi bong ang, he ka ânyâ ûnyi ae wisa hnyi hnyimakö Iehova Khongom.

### HNYIMAKAN 14.

**Ö**BUN je laku Iehova Khongubun: ca he öbun ka kavi öbun bi, ke ca he öbun ka ohadreûâ bademaköbun hnyi wanben li emaköbun adre ânyâ can komok. 2 Anyin a u hnyei ae kap kö Iehova Khongom, ke haba Iehova ame ücü u hnân iny hnyei ae ke bongon kâu, ûnyi hnyi je hnyei hia thithö eang hmelen.

3 U me ca he ka han ke meno ae ikiki. 4 Walang je meno öbun e he ka han: a je kau, me mamoe, me got, 5 me aila, me zebi, me imura, me got ae hiny, me disona, me teo, me zamera. 6 Ke haba ta je meno

## DEUTERONOMI 15.

hia adre kia luâ újimen can, me kia luâ bacan, me hoc hmeto hna han, unyin omeno, me wale ö 'bun. 7 Ke so bi walang je meno öbun e ca he ka han únyi gadra, a je meno adre me hoc hmeto hna han, me kia luâ újimen can : a kamela, me anebeth, me shefani, anyin a ödrin e hoc hmeto hna han, ke adre ca kia luâ újimen can, ödrin bo kong köbun : 8 me buaka, anyin a e ame kia luâ can, k' ame ca hoc hmeto bi hna han, wale ae bo kong köbun : ca he öbun ka han utiöidra, me kâlâ unyidra ae mok.

9 Walang ta je únyi öbun e he ka han únyi hnyi köiö ; haba ta je wâ hia ae hu bohúnyon me unöiny, me öbun e he ka han : 10 ke haba je únyi hia ae ba bohúnyon me unöiny, me öbun e ca he ka han ; wale ae bo kong köbun.

11 Öbun e he ka han omeno hia ame gâ ae bo so. 12 Ke walang je at öbun e ca he ka han, a aeto, me perese, me ozeni ; 13 me rae, me aia, me daa hoton bongudrin ; 14 me ta je oreba hoton bongudrin ; 15 me iaena, me taemasa, me sahafe, me dring hoton bongudrin ; 16 me mun, me ianesuf, me tinesemeth, 17 me kati, me raama, me salak ; 18 me kasida, me anafa hoton bongudrin, me dukifath, me bú. 19 Ke haba je únyi hia ame iyâú me gâ, me bo kong köbun : k' adre me ca he ka han. 20 Ke öbun e he ka han je meno ame gâ hia ae bo so.

21 Öbun e ca he ka han meno ame mok hwege : ke e khatö u he ka ham ka atkanyua hnyi hnyabam me me lie ka han ; ke e khatö u minya ka úco e ka aten ke hnyei ; anyin a u hnyei ae kap kö Iehova Khongom. U me ca he ka ölä nokon got hnyi dân basin hinyen.

22 U me he ka ham ke keihen a libenyitainy troban hnyei hnyi ke huna me ke huna. 23 Ke u me he ka han ke keihen a libenyitainy ányâm hwit, me ányâm waina, me ányâm wakaco, me je nokon halem je kau a bân, me halem je mamoe, hnyi hnyimakö Iehova Khongom, hnyi dok e ame he ka úca me me laba hnyin ien ; m' u me he ka ná ka outö Iehova Khongom hnyi ta ogo bong hia. 24 Ke ame ne ti sákâú gethen, me ca khanö u he ka hom tilâ ta je únyi e, can anyin ae sákâú dok ame he Iehova Khongom ka úca me me laba hnyin ien, e ka he Iehova Khongom ka ohnahici u ; 25 awe, u me he ka úco e hwaban mone, me lan mone hnyi hnyamâm,

me he ka hnyi dok ame he Iehova Khongom ka úca : 26 ke u me he ka úco ge mone eling ja únyi u me wem, ame ne kau, ame ne mamoe, ame ne waina, ame ne grâg, k' ame ne ke únyi u me wem hobi köu : ke u me he ka han eling hnyi hnyimakö Iehova Khongom, me senyin, a u me ányâm lap : 27 ke u me ca he ka hna degecâ at Levi a e unyâm : anyin ae ba hwajekhon me iny unyâm.

28 Ke haba hnyi obiny huna a kuniny me u me he ka hom ke keihen a libenyitainy troban em hnyei hnyi huna eling, me ip hnyi je hnyabam, 29 k' ame he ka hnyi han unyam at Levi, anyin ae ba hwajekhon me iny unyâm, me atkanyua, me nakahme, me safac, a tavat hnyi je hnyabam me me sekudrin ; me me he Iehova Khongom ka ohnahici u hnyi ta je huliwa anyin hnyamâm u me ányâ.

### HNYIMAKAN 15.

**K**E haba hnyi obiny huna a seven, me u me he ka hna baúâ. 2 Ke walang hwakecin hnâm hna he ka hna : haba tavat adre hia but ham gufa ka ke at, ame ne liamekeiny, me adre me he ka hna baúâ ; anyin adre hia but hajmemenâ hna hna baúâ hnö Iehova. 3 Ame ne aten ke hnyei, me khatö u he ka hom hmetu e : ke haba ányâm ta je únyi a e unyin liamekeiny möu, me ame he hnyamâm he ka hom hmetu e. 4 Ke so e ba at unyâm ae ba ta únyi ; (anyin ame he Iehova ka ti ohnahici u hnyi hnyei ame he Iehova Khongom ka ham köu huân em, m' u me tren e ;) 5 wale u je ne löng wia hofuc ho Iehova Khongom, me tuö me ányâ je hnanyibu eang wale oge me húna köu hnyi bong ang. 6 Anyin a Iehova Khongom ame he ka ohnahici u helâ me hnen hna ha köu ; ke u me he ka me ham ta je únyi ka ta je hnyei ae se hia, ke u me ca he ka me sumat ; ke u me he ka musö je hnyei ae se, k' adre me ca he bi ka musi u.

7 Ame ne hu ke at unyâm ae ba ta únyi, a liamekeiny möu, hnyi ke hnyaba hnyi em hnyei, wale a ham köu Iehova Khongom, me, u me ca he ka okhötâ hnyekom, me thu hnyamâm ka liamekeiny möu a at ae theduoc : 8 ke u me he ka lau hnyamâm kâu, me u me he ka me ham gâná kâu únyi ae úcú ka hnyi weny. 9 Wâ êau, wâ e nye hu únykúme ae kong eú hnyi hnyekom, me ha, ka habe, E hakekeny jut

## DEUTERONOMI 16.

huna a seveniny, a hunainy hna baúâ; me ame kong emakâm ka liamekeiny môu ae theduoc, me ca ham únyi bi kâu; ke e ame he ka tenge kö Iehova gam, m' u me hulö but. 10 E so u ma ham kâu, k' ame ca he bi hnyekom ka hmak he ka ham kâu: anyin a can únyi eling ame he Iehova Khongom ka ohnahici u hnyi anyâm ta je huliwa hia, me ta je únyi hia u ma he ka ip hnyamâm ka hnyin. 11 Anyin ame ca he ka ba at ae theduoc hnyi hnyei: anyin a wale inya oge me húna köu, ka habe, U me he ka lau hnyamâm ka liamekeiny môu, wale hnyat unyâm ae theduoc, me hnyat ae ba ta únyi hnyi em hnyei.

12 Ke adre ne úco köu ke at Heberu a liamekeiny môu, ame ne baga, ame ne momo, k' ame ne bi athnyabaem hnyi je huna a siks; me hamâm he ka hna baúâ e úheny unyâm hnyi huna a seveniny. 13 Ke u ka hna baúâ e úheny unyâm, me u me ca he ka kunâ ke ba ta únyi; 14 u me he ka ohuâ e me ca behânâ únyi hnyi halem je mamoe, ke únyi hnyi hna uja ányâm hwit, me hna hlec ányâm vine: ke u me he ka ham kâu helâ me Iehova Khongom ame ohnahici u. 15 Ke u me he ka únykúme a g' adre thaluö u hnyi hnyei Aigupito, ke Iehova Khongom ame omeli u; anyin a wale, inya oge me húna köu bofuc e hnyi bong ang. 16 Ke ame ne he ka ha köu, ka habe, Oge me ca he ka he gam; anyin a e ame hnyok köu me ányâm lap, anyin a e so e unyâm; 17 awe, u me he ka hom únyi hnân kou, me kou hnyikönyen ka hnyi hlinginy hwanuma, ke e ame he ka bi athnyabaem nyiele balua. Ke u me he ka ányâ helâe minya ka athnyabaem a momo. 18 Ke u ka hna baúâ ke at úheny unyâm e so e ca he ka hmak hnyekom; anyin a haba anyin huliwa me úcü me huliwa anyin lo li at adre hawâ, hnyi je huna a siks e ame bi athnyabaem: k' ame he Iehova Khongom ka ohnahici u hnyi ta je únyi hia u me he ka ányâ.

19 Haba je lakon a bán ka hnokoâ ge halem je kau, me mamoe, a je baga hia, me u me he ka okabâ kö Iehova Khongom: u me ca he ka kunâ nokon halem kau a bán he ka huliwa, me subâ leúnen nokon halem mamoe a bán. 20 Ke u me he me ányâm lap he ka han e hnyi hnyimakö Iehova Khongom, hnyi je huna hia thibut, hnyi dok ame he Iehova ka úca. 21 Ke ame ne hu hnyikongon, ame ne kong can, ame ne wadröu, ame ne ke hnyikongon ae

kong, me u me ca he ka hudo e kö Iehova Khongom. 22 U me he ka han e hnyi je hnyabam; k' ame he ka hnyi han tavat ae bo kong me bo so, helâ me hnödra hna han zebi me aila. 23 Ke so bi u me ca he ka han dren: ke u me he ka hingâlâ e hon kânâ helâ me köiö.

### HNYIMAKAN 16.

**H**AMÂM he ka tuö tehi Abiba, me ányâ paseka kö Iehova Khongom: anyin a haba hnyi tehi Abiba Iehova Khongom ame hum u úheny Aigupito hnyi hnyinghet. 2 Ke u me he ka hudo paseka kö Iehova Khongom, únyi hnyi je mamoe, me kau, hnyi dok ame he Iehova ka úca hnân umen ien bi. 3 U me ca he ka tha han e me leven, u me he ka han e me areto adre ca levenâ hnyi je bong a seven, a aretoiny vec eling; anyin a u je he mweimwei úhem hnyi hnyei Aigupito: m' u me he ka únykúme hnyi bongom ta je bong hia, ge bong u me he úhem hnyi hnyei Aigupito. 4 Ke adre me ca he ka wâ leven unyâm hnyi seven ta bong hnyi em hnyei; k' adre me ca he ka ip ke ne o but hnyi hnyomakatu ke keihen uthmeno u je hudo hnyi bong a bán hnyi sahac. 5 U me ca he ka hudo paseka hnyi je hnyabam a ham köu Iehova Khongom: 6 ke so bi hnyi dok ame he Iehova Khongom ka úca hnân umen ien bi, ke u me he ka hudo eling paseka hnyi sahac e ka dit seúno, cicö úen u je he úheny Aigupito. 7 Ke u me he ka thân e me han hnyi dok ame he Iehova Khongom ka úca: ke u me he ka hwiö hnyi hnyomakatu me he ka hnyi umâm je uma mano. 8 Siks je bong u me he ka han areto adre ca levenâ: ke haba hnyi bong a seveniny ame he ka hu úkhacaköu ae únyi hnathu kö Iehova Khongom; k' u me ca he ka huliwa.

9 U me he ka aú je wik a seven; ke u me he ka hwân ka aú je wik hnyi hna ibi hwân subâ hwit ame tot. 10 Ke u me he ka tuö bijeúiny je wik kö Iehova Khongom me bwihlany a hudiny ibetengiö únyi hnyi hnyamâm, ke u me he ka ham e hoton hnö Iehova Khongom hna ohnahici u: 11 ke u me he ka senyin hnyi hnyimakö Iehova Khongom, u, me nokom baga, me hlu, me athnyabaem a baga, me momo, me at Levi hnyi je hnyabam, me atkanyua, me nakahme, me safac unyâm, hnyi dok ame he Iehova ka úca hnân umen ien. 12 Ke u

## DEUTERONOMI 17.

me he ka únykúme hna thaluö u hnyi Aigupito: ke u me he ka wâ wia me ányá je hnanyibu e.

13 Ke u me he ka ányá bijeúiny je uma hunuma, hnyi je bong a seven, hwaban hnâm hna ip únyi hnyi uma hnân uja ányâm hwit, me únyi hnyi hna hlec ányâm vine: 14 ke u me he ka senyinâ ányâm bijeú, u, me nokom baga, me hlu, me athnyabaem baga, me momo, me at Levi, me atkanyua, me nakahme, me safac hnyi ta je hnyabam. 15 Seven je bong u me he ka ányá bijeú kö Iehova Khongom hnyi dok ame he Iehova ka úca: anyin ame he Iehova Khongom ka ohnahici u hnyi troban em hnyei hia, me ta je huliwa hia anyin li hnyamâm, ke u me he ka ti senyin. 16 Ke ame he obaga hia ka okun o hnyi hnyimakö Iehova Khongom hnyi huna hnyi dok e ame he ka úca: hnyi bijeúiny areto adre ca levenâ, me bijeúiny je wik, me bijeúiny je uma hunuma: ke adre me ca he ka manen hnyi hnyimakö Iehova ke ba ta únyi: 17 adre me he ka ve ham hoton hnödra hna khana, ke hoton hnahic únyi ga Iehova Khongom wale e ame ham köu.

18 Ke u me he ka otílâ hnyat owisa, me je taben hnyi em hnyei hia a ham köu hnö Iehova, hnyi ányâm je tribu: ke ödrin e he ka owisa tavat ge hna owisa ae wisa. 19 U me ca he ka ohwalö hna owisa; ke u me ca he ka wâhmakhmetoâ at bi: ke u me ca he ka kap bwihlany; anyin a haba bwihlany, me wale at ame omúko tavat ae metâ, me ohavâ hofuc hwan tavat ae wisa. 20 U me he ka hnu hoton hwakecin ae ti wisa, m' u me möt bi me hu hnyei wale a ham köu Iehova Khongom.

21 U me ca he ka ta ke úö hnân bi Aseira hobi köu, hakekenyâ taben hut anyi Iehova Khongom wale u me he ka ányá hobi köu bi. 22 Ke u me ca he ka otílâ hobi köu ke veto ame tot; wale únyi ame húkötia Iehova Khongom.

### HNYIMAKAN 17.

**U** ME ca he ka hudo kö Iehova Khongom ke bolok me mamoe ae hu hnyikongon, k' ame ne ca so: anyin a wale húkötianö Iehova Khongom.

2 Adre me ne wâ unyâm, hnyi je hnyabam a ham köu Iehova Khongom, ke at, ame ne baga, ame ne momo, ame ányá hulö hnyi hnyimakö Iehova Khongom, k' ame

hanyáúâ anyin úhihinyköu, 3 k' ame he me bi athnyabainy ke je khong me khudrung ködrin, ame ne seúnö, ame ne tehi, ame ne ke únyi hnyi drany, wale oge ca hûna; 4 ke adre thumetu u, ke u je löng ut e, me hamâm he ka elâm wia, ke, wâ bi, ame ne hnathu, ke manen dut a g' adre ányâ hnyi Isaraela únyi eling ae ikiki: 5 awe, u me he ka hom at eling ka hnyi homagöulem, ame ne baga, ame ne momo, at ame ányá únyi eling ae kong; ke u me he ka lu' ödrin ge veto, ame ne baga ame ne momo, me me mokcu. 6 Adre me he ka hlingâ at ae úcú ka hnyi mok, ge ifucin hnyat ohnatho a lo li at, ame ne kun; k' adre me ca he ka hlingâ ge ifucin at ohnatho a khaca. 7 Ke ame he ka bán je hnyamen hnyat ohnatho hon he ka hlingâ, ke biliny bi je hnyamen tavat hia. Me waleling u me he ka ohia ta je únyi ae kong unyâm.

8 Ame ne hmak köu ke únyi he ka owisa, hnyi ke dra me ke dra, ame ne ke úhnei me ke úhnei, ame ne ke ukuc me ke ukuc, a ta je únyi hnân iwatretra hnyi je homagöulem: awe, u me he ka tot me he ka hnyi dok ame he Iehova Khongom ka úca; 9 ke u me he ka he ka hnyat bihut a at Levi, me at owisa hnyi úen e: ke u me he ka hnei; me ödrin e he ka thumetu u ge obiny hna owisa: 10 ke u ma he ka ányá hoton hofuc ödrin e he ka thumetu u hnyi dok eling ame he Iehova ka úca; ke u me he ka wâ wia me ányá hoton ta je hofuc ödrin e he ka nö u hnyin; 11 u me he ka ányá hoton hna ha hnen hnanyibu ödrin e nö u, me hoton hna owisa ödrin e he ka ha köu: ke u me ca he ka saú ge hofuc ödrin e he ka thumetu u, ka hnyi ke keihen a metâ, me me. 12 Ke haba at ame he ka sheshamökâ, k' ame ca löng hoton at bihut a at ame labö huliwa eling hnyi hnyimakö Iehova Khongom, ame ne at owisa, me ame he ka mok at eling: me u me he ka ohia hulö unyi Isaraela. 13 Ke ame he tavat hia ka löng me ot, k' adre me ca he hmetu ka ányá sheshamök.

14 U ka o ka hnyi hnyei a ham Iehova Khongom köu, k' ame he ka hu gam, me labâ; ke u me he ka ha, ka habe, Oge me he ka otílâ than huk, helâ me je knyeyi igigili nya; 15 awe, u me he ka otílâ than a at ame he Iehova Khongom ka úca: ke u me he ka otílâ ányâm than únyi hnyi je liamekeiny möu: k' u me ca he ka otílâ atkanyua hom, a ca liamekeiny möu. 16



## DEUTERONOMI 18, 19.

Ke so bi e ca so e ame osehia je hors hobi kâu, me ohmeto tavat Aigupito ai, me me he ka osehia haleny je hors: anyin a hia but ha Iehova köbun, ka habe, Öbun e ca he ka hmetu hnyi gethen eling. 17 Ke e ame ca he ka osehia je laâiân, wâ e nye saü hnyekon: ke ca so e ame úkhöünâ sileva me gol hnân hobi kâu bi. 18 Ke ka laba hon theroniny dokhon dökhu, me e ame he ka uny je hnanyibu eang hobi kâu, ka hnyi ke tusi hnyi hnyimakan tavat bihut a at Levi: 19 k'ame he ka e bi unyin, me e ame he ka aü e hnyi je bong bongon anyin möt hia: me me ná he ka outö Iehova Khongon, he ka vheno ta je hofucin hia hnanyibu eang, me je hna húna eang, me ányâ: 20 me me ca he ka bi gan hnyekon hon je liamekeiny mē, me saü únyi hnyi hnanyibu ha hnyi ke keihen metâ, me me: waleling me me he ka obeünâ je bongon hnyi dokhon dökhu, e me je lakon, hnyi Isaraela.

### HNYIMAKAN 18.

**A** ME ca he tavat bihut a at Levi unyi Isaraela, a tribu Levi hia ka hu jekhon me hnyei: ke ödrin e he ka han je hut a an ge meic kö Iehova, a jekhon. 2 Ke ödrin e ca he ka hu hwajeköudrin unyin je liamekeiny mödrin: haba Iehova hwajeköudrin, helâ me hnen hna ha ködrin. 3 Ke walang jekhon tavat bihut únyi hnyi hnyei, a únyi ge tavat adre me hudo je hut, ame ne bolok, ame ne mamoe, me adre me he ka ham ka at bihut bajebenyin me li wahicen, me tangen han. 4 U me he ka ham kâu ge ányâm hwit a bán, me ányâm waina, me ányâm wakaco, me ányâm leúnen mamoe adre subâ a bán. 5 Anyin a Iehova Khongom ame hia but úcö e únyi hnyi ányâm je tribu hia, he ka labö huliwa hnyi iö Iehova, a e, me lakon je бага nyiele balua.

6 Ke ame ne o ke at Levi únyi hnyi je homagöulem hnyi Isaraela hia, a dok e ame me laba hnyin, k'ame o me weny hnyekon ae bekhöt ka hnyi dok ame he Iehova ka úca; 7 awe, e ame he ka huliwa hnyi iö Iehova Khongon helâ me je liamekeiny mē a at Levi, tavat ödrin e tot eling hnyi hnyimakö Iehova. 8 K' ödrin e he ka hu jekhon ae úcú unyin keihen, ke ca ha bi hna úco hobi ködrin je únyi hnyi iny lakamen.

9 U ka o but ka hnyi hnyei ame ham köu Iehova Khongom, me u me ca he ka

nâ he ka ányâ hoton hwakecin ae ikiki anyin tavat eling. 10 E so adre me ca he ka wâ unyâm ke at ame kunâ nokon бага me nokon hlu he ka he hnyi wanben meic, me at bi khong, me at ame bibihwakecin, me at ae tren khong, 11 me at ame úhne-namö me je hanu, me at ame biobotkong, me perofeta thoi, me at ame úhnenamö me hanon je komok. 12 Anyin a Iehova ame ikikiâ tavat adre me ányâ ta je únyi e: ke haba can ta je únyi eling ae ikiki, me Iehova Khongom ame ob' ödra hnyi hnyimákâm. 13 U me he ka ti wisa kö Iehova Khongom. 14 Amyin a haba je hnyei eling u me he ka hu, me, adre me löng hoton tavat bibihwakecin, me tavat bi khong: ke haba u, me Iehova Khongom ame ca hnö u he ka helâe. 15 Ke ame he Iehova Khongom ka oâ köu perofeta ae úcú mönya úheny unyâm a únyi ge je liamekeiny möu; m' öbun e he ka löng kâu; 16 a helâ me wem hia únyi ga Iehova Khongom hnyi Horeba, waleji hnyi bong adre úkhacaköu hnyin, ka habe, Ö iny ca he hmetu ka löng ifuci Iehova Khonguk, me wâ hmetu meic ae gan eling, m' inye ca he ka mokcu. 17 Ke haba Iehova ame ha könya, ka habe, E so hnödrin hna ha. 18 Me oge me he ka oâ hobi ködra ke perofeta únyi ge je liamekeiny mödra; me oge me he ka ip hok je hofuc hnyi hnyimen, me e ame he ka ha ködra ta je únyi hia oge me he ka ha kâu. 19 Ke haba at ame ca he bi ka löng hok je kofuc wale e ame he ka ha hnyi iök, me oge me he ka hnö e gan. 20 Ke haba perofeta ame he ka ha sheshamökâ ke hofuc hnyi iök, waleji oge me ca húna kâu he ka ha; k' ame ne fuc hnyi ien ke je khong, awe, ame he ka mok perofeta eling. 21 Ke u je ne he ka ha eu hnyi hnyekom, ka habe, Öhmun e he ka kâmâu hna wâhmakhmeto hofuc a ca ha Iehova? 22 Haba, e ka he perofeta ka ha hofuc hnyi iö Iehova, k' ame ca o bi únyi, k' ame ca hwâdâ bi, awe, wale hofuc ame ca ha Iehova: ke ame hia but ha e sheshamökâ hnen perofeta, m' u me ca he ka outen at e.

### HNYIMAKAN 19.

**E** KA he Iehova Khongom ka subâ degecâ je hnyei wale a ham köu idra Iehova Khongom, ke u je hwöhwabödra, me labâ anyidra je taun me umödra je uma; 2 me u me he ka kia hobi köu bi kun ta

## DEUTERONOMI 20.

taun hnyi wanben em hnyei wale Iehova Khongom ame he ka ham köu me me em. 3 Ke u me he ka thu gethen, me khenâ je hnyigöulen em hnyei, a ohuâ köu Iehova Khongom, me me kun, me hnân kec ka hnyin ge tavat hia adre me hlingâ at. 4 Ke walang hwakecin at ame hlingâ at, a at ame he ka kec kâ e me me möt: haba at ame hlingâ ke at, ke ca ûnykûme he ka ânyâ, k' ame ca hûkötîâ ehac; 5 helâke at ame tha he me ke at ka hnyi hnyot he ka si utö, k' ame hna gö ge hnyamen he ka sö utö, ke ame ok ut ban gö ûnyi hnyi taben me hwâdâ ge ke at, me ame mokcu; awe, e ame he ka kec ka hnyi ke taun eling me me möt bi: 6 wâ e nye hnu at ame hlingâ at ge at ame bi hwaban komok, e ka tiga hmönyin hnyekon, me kât e, anyin ae sâkâû gethen, me ame kot moko e; ke ca ûcû kâu he ka mok, anyin a e ame ca hûkötîâ ehac. 7 Anyin a wale oge me hûna köu, ka habe, U ma he ka ke ip kun ta taun hobi köu bi. 8 Ke ame ne he Iehova Khongom ka olauâ em hnyei, helâji me hnen hna khemanyin ka lakâmâm, me ham köu hnyei hia waleji e ame ha bânâ he ka ham ka lakâmâm; 9 ke u je ne tuö je hna hûna hia eang he ka ânyâ, wale oge me hûna köu hnyi bong ang, he ka hnyok kö Iehova Khongom, me vheno bala deny je gethen; me u me he ka bi hanen ke je taun a kun minya hnân hobi köu, ke ca ha bi kun eling: 10 m' adre me ca he ka hingâlâ dra ae ba hulöiny hnyi em hnyei a ham köu Iehova Khongom me me em, me ame taku u ge dra. 11 Ke ame ne ke at ame hûkötîâ ke at, k' ame mokut iyawâ, k' ame köüö thö kâu, me kot e me me mokcu; ke e ame kec ka hnyi ke taun eling: 12 awe, ame he wahingatiny anyin taun ka ûkhûnöng he ka hom e ûheny e, me hna e ka at ame bi hwaban komok, me me mokcu. 13 Ca he emakâm ka betenge gan, ke u me he ka ohia dra ae ba hulöiny ûnyi hnyi Isaraela, m' u me so bi.

14 U me ca he ka uny haten hnyigöulen ke at, waleji adre ip kâû ehac, hnyi em hnyei u me he ka labâ, wale hnyei a ham köu Iehova Khongom, me em.

15 Ame ca he bi at a khaca ka tot me ohnathoâ ge at hnyi anyin monu, ame ne ke hulö, hnyi ke hulö e ame ânyâ; ke adre me he he ka ohmâ ke ûnyi ge ifucin li at ohnatho, ame ne kun. 16 Ame ne tot ke at ohnatho ae ca wisa ka ke at he ka haikongoâ; 17 me hamödrü a li at ivinö he

ka tha tot hnyi hnyimakö Iehova, hnyi hnyimakan hnyat bihut, me hnyat owisa hnyi ün eling; 18 ke hamen hnyat owisa he ka ûhnö wia; ke wâ bi, ame ne at thoi at ohnatho, k' ame hia but hathoiâ liamekeiny mē; 19 awe, hamöbun he ka ânyâ kâu helâ me hnen hna ûnykûme he ka ânyâ ka liamekeiny mē: helâe u me he ka ohia hulö unyâm. 20 Me me löng me ot ge kolon tavat, me ca ânyâ hmetu balua ûnyi helâe ae kong unyâm. 21 Ca he emakâm ka betenge; ke haba möt me hwaban möt, ke ecmak hwaban ecmak, ke nyu hwaban nyu, ke hnyam hwaban hnyam, ke can hwaban can.

### HNYIMAKAN 20.

**U** KA he ka vat me je iwahnaihmiöny möu, me wâ je hors, me je kariota, me tavat ae se hia hom, me u me ca he ka out' ödra: anyin a e unyâm Iehova Khongom, a at ame hum u ûheny hnyi hnyei Aigupito. 2 Ke öbun ka he ka ûhakekenyi he ka vat, me hamen at bihut he ka tot me fuc ka tavat, 3 me ha ködra, ka habe, Isaraela lö, long ju, öbun e he ka vat hnyi bong ang me je iwahnaihmiöny möbun; ca hlohlo bi je hnyekubun; ca ot me öbubuny, ke ca he öbun ka ot gadra; 4 anyin a Iehova Khongubun ame tha he möbun he ka omeli öbun. 5 Ke hamen je taben he ka ha ka tavat, ka habe, Ewa at up uma a teb ûnyi ke tiga ca hia but delec? e so ame he at eling ka hmetuhmetu ka hnyi umen uma, wâ e nye mokcu hnen vat, me delec biju hnen ke at. 6 Ke ewa at ame belökâ hnyei vine ke tiga ca hia but ijem wan ûnyi hnyin? e so e ame he me hmetu ka hnyi umen uma, wâ e nye mokcu hnen vat, me ijem biju hnen ke at. 7 Ke ewa at ame ûkocö me hlu, ke tiga ca hia but hom? e so e ame he me hmetu ka hnyi umen uma, wâ e nye mokcu hnen vat, ke hom biju hnen ke at. 8 Ke hamen je taben he ka ha hmetu ka tavat, me ha, ka habe, Ewa at ame ot me hlohlo hnyekon? e so e ame he me hmetu ka hnyi umen uma, wâ e nye oköiö hnyekon je liamekeiny mē helâ me hnyekon. 9 Ke ka hia but fuc je taben ka tavat, me ödrin e he ka otilâ je tuhan vat, me me homakan tavat.

10 Ke u ka hakekenyâ ke taun he ka vat, me u ma bâm ka ha úsoköu mödra. 11 Ke adre me ne thu úsoköu hmetu köu, me khöng köu, me hamen tavat hia adre wâ eú hnyin he ka bi fat köu, me bi athnya-

## DEUTERONOMI 21.

baem. 12 Ke ödrin e ne ca úsoköu, ke ödrin e bevat bi möu, me u me he ka igigilö taun ge vat : 13 ke e ka hna e köu Iehova Khongom ; me u me he ka kot ta je бага hia ge hele vat : 14 ke haba omomo, me tavat ae úhnyúkong, me omeno, me ta je únyi hia hnyin taun, a ta je únyi hia hnân hügúnâ, me u me he ka hom hnân hobi köu ; ke u me he ka han ta je únyi anyin je iwahnaihmiöny möu a ham köu Iehova Khongom. 15 U me he ka ányâ helâe ka ta je taun hia ae úsákáúö möu, ke ca tavat adre me labâ hnyei eang. 16 Ke haba aten je taun ang a ham köu Iehova Khongom hnân em, me u me ca he ka omelö ke únyi ae hu homenâiny : 17 ke u me he ka ti ohi' ödra ; wale at Heth, me Amora, me Kanana, me Perizi, me Hivi, me Jebusi ; helâ me Iehova Khongom ame húna köu : 18 m' adre me ca he ka n' öbun he ka ányâ hoton hwakecidra ae ikiki, wale adre me ányâ ka anyidra je khöng ; m' öbun e kong kö Iehova Khongubun.

19 U je ne he ka igigilö ke taun hnyi je bong ae se hia he ka vat mä, me hom e, me u me ca he ka ohia je úöiny, me sö degecâ ge gö ; anyin a u me he ka an wan, ke u me ca he ka sö ; hawa, úöiny hnyei helâ me at, m' u me ka igigilö e ge vat ? 20 Ke so bi, haba je úö u me wâhmakhmeto a ca je úö hnan han, me u me he ka ohia me sö ; ke u me he ka otílâ hak cicö taun ame vat möu, ke ne o but ame ngâ but.

### HNYIMAKAN 21.

**A**DRE me ne wâ komok hnyi hnyei ame ham köu Iehova Khongom me me em, k' ame mokut hnyi utkânâ ke ca manen bi at a hlingâ : 2 me ame he wahingatatâ me hnyat owisa unyâm, ke ödrin e he ka tuluto únyi hnyi hnen komok ka hnyi je taun igigilö : 3 ke haba taun ae hakekeny ka hnen komok, me hamen wahingatiny taun eling ka hom ke kau a ca huliwa ehac, ke tiga ca hlihli únyi ge únyi hnân úhúkálákouâ ; 4 ke hamen wahingatiny taun eling ka hom kau ka hnyi hnyigöulen bucen ame hingölö hnyin köiö, k' adre ca tronená me belökâ, me ödrin e he ka thu nyin kau hnyi dok e : 5 ke ame he ka úhakekenyi ge tavat bihut a laku Levi ; anyin a hia but Iehova Khongom uc' ödrin he ka huliwa kâu, me he ka hahnahicâ hnyi iö Iehova ; ke adre me he ka owisa hoton hnödrin hna ha hnyi je ivinö hia me

je úkúc hia : 6 k' ame he wahingatiny taun eling hia a ödrin hakekenyâ komok he ka hnyem hnyi hon kau adre thu nyin hnyi hnyigöulen bucen : 7 ke ödrin e he ka ha, ka habe, A ca hingâlâ dra e ge je hnyamöhmun, ke haba khaca a ca wâ bi ge li emaköhmun. 8 Iehova lö, thang monu anyin em hnyei Isaraela waleji u je omelö, ke u me ca he ka ip dra ae ba hulöiny he ka laba hnyi em hnyei a at Isaraela. Me adre me he ka hn' ödrin dut ge dra. 9 Ke u me he ka ohia unyâm dra ae ba hulöiny, u ka ányâ únyi ae wisa hnyi hnyimakö Iehova.

10 U ka he ka vat me je iwahnaihmiöny möu, ke Iehova Khongom ame ham ödra ka hnyi hnyamâm, ke ödrin e bâ but gam, 11 ke u je wâ momo ae so hmainty unyin je bâ, ke u je bewem, k' u je behom e me me áiâm ; 12 awe, u me he ka hom e ke hnyi umâm uma ; ke e ame he ka giâ ban, me suba je újimen banyen ; 13 ke e ame he ka uny jut je úkhaúiny bâ, me laba hnyi umâm uma me tenge ge kamen me hinyen hnyi khaca tehi ae bekhöt : ke hwaban dö e me u me he ka tha laba me, m' öbu me liamáian. 14 Ke u je ne ca wem momo, me u me he ka hna but e ka hnyi weny bi ; ke u me ca he ka úco e hwaban mone, u me ca he ka thaluâ, anyin a u je hia but okongoâ.

15 Ame ne lo li momo a li áian бага khaca, ke e ame betenge ge khaca, ke húkotiâ khaca, ke ödru me hia but hnokoâ kâu, a momo e ame betenge gan me momo e ame wâ kongo ; ke haba atö, me wale nokon momo adre wâ kongo ; 16 ke haba hnyi bong e ame he ka khenyâ omjehen ka lakon бага, me e ame ca he ka hwiö me me atö nokon wale, at e ame betenge gan hon nokon wale e ame wâ kongo, a atö, 17 ke e ame he ka oúnyihnathoâ atö, a nokon momo e ame húkotiâ, ge li jekhóu e ame he ka ham, únyi hnyi anyin ta je únyi hia ; anyin a nokon hidrou a e ; ke e bi gan hanymen atö.

18 Ame ne ke at ae hu nokon бага ae újöng me úkhin fuc, k' ame höcö löng hwan kamen me hinyen, ke ne ödre hia but kot e, ke e ame ca ling ödru bala bi : 19 me ame he ka kât e ge kamen me hinyen me hom e ka wahingatiny anyin taun, hnyi homagöuleny dok e ame labâ ; 20 me ödru me he ka ha ka wahingatiny anyin taun, ka habe, Walang hnökuhmu at ame újöng me úkhin hofuc, k' ame ca löng hohmu ; e

at ae hwenhmiâ me monu ge grâg. 21 Ke ame he tavat hia hnyi anyin taun ka luâ e ge veto me me mokcu : helâe u me he ka ohia hulö unyâm ; k' ame he at Isaraela hia ka löng me ot.

22 Ke ame ne he ke at ka ânyâ hulö ae úcú he ka mok gan, ke adre me hlingâ, me u me he ka uhno e hon üö : 23 k' ame ca he ka hnen unyin hon üö hnyi hnyinghet, ke u me he ka konâm e hnyi bong eling ; anyin a hnaúhangö ka Khong at adre uhno ; me u me ca he ka okongoâ kânâm kânâ hnö Iehova Khongom hna ham köu me em.

## HNYIMAKAN 22.

**U** KA wâ bolok haleny liamekeiny möu ame ne haleny mamoe ame he monu, me u me ca he ka kec hota : ke u me he ka ohmetuhmeto ka liamekeiny möu. 2 Ke ame ne ca úhakekenyi möu liamekeiny möu, ke ca khanö u e, me u me he ka hom e ka hnyi umâm uma, me me tha e möu ke ne o but liamekeiny möu ame elâm, me u me he ka hna hmetu kâu. 3 Ke u me he ka ânyâ helâe ka haleny asina ; me u me he ka ânyâ helâe ka anyin úkhaú ; me u me he ka ânyâ helâe ka ta je únyi hia a hia anyin liamekeiny möu, wale ame hia gan, ke u je hlo, u me ca he ka laba duöng.

4 U me ca he ka wâ asina haleny liamekeiny möu, ame ne bolok ame ta eü hnyi gethen, me u me oiyongi u bi gadrin : ke u me he ka hadruâ he ka otílâ hmetu.

5 Ame ca he momo ka khavâ khaüen бага, k' ame ca he бага ka khavâ khaüen momo ; anyin a húkötianö Iehova Khongom ödra hia adre me ânyâ helâe.

6 Ame ne e bi hnyi hnyimákâm eü hnyi gethen ke háüen meno ame gâ, hnyi üö, ame ne hon kânâ, ae hu lakon a tho, k' ame ne ca tho bi, ke ame mokulec lakon ge hinyen, me u me ca he ka tha hom lakon me hinyen : 7 ke u me he ka hna but hinyen, ke e khatö u he ka hom lakon nobi köu bi ; me u me so, me se hia bongom je bong.

8 U je ne up uma a teb únyi, me u me he ka bi haginy ethö hnyi ban umâm uma igigilö, wâ e nye takou umâm uma ge dra, ame ne kölu at úheny thö. 9 U me ca he ka ta hatong a lo li bongon hnyi em hneyi vine : wâ e nye hia but wan hia, wale je hatong u je ta, me wan em hneyi vine.

10 U me ca he ka wia kânâ ge bolok a tha e me asina. 11 U me ca he ka khavâ mano adre hwâwâ únyi hnyi li únyi a lo, wale leünen mamoe me liuo.

12 U me he ka bi bâbuen hnyi je baten úkhaúâm a vak, wale u je khaüö u kâu.

13 Ame ne hom momo hnen ke at me âiân, ke e ame tha laba mē, me húkotiâ. 14 me haikongoâ e ge ta je únyi hnân ohmehma, me oâ kâu ien ae kong, me ha, ka habe, Oge hom momo eang, ke iny ka úhakekenyi mē, me oge me ca wâ haten hlu ; 15 awe, ame he kamen me hinyen hlu ka hom haten anyin hlu, me hom ka wahingatiny taun hnyi homagöule : 16 ke ame he kamen hlu ka ha ka wahingat, ka habe, Oge ham nöukuk ka at ang me áiân, ke e ame húkotiâ ; 17 ke wâ bi e ame hia but hathoiâ e ge ta je únyi hnân ohmehma, k' ame ha, ka habe, Oge ca wâ ju haten hlu ge nokom ; ke walang haten hlu anyin nöukuk. Ke ödru me he ka ulolo úkhaú hnyi hnyimakan wahingatiny taun. 18 Ke hamen wahingatiny taun eling ka hom at e me kot. 19 Ke ödrin e he minya ka ha hwaban kâu a khaca haded ta je sileva, me ham ka kamen hlu, can e ame oâ ien ae kong hon hlu Isaraela : ke ame he bala ka áiân ; ke e ame ca he bala ka degec. 20 Ke so bi ame ne hnathu hofuc eling, k' adre ca wâ haten anyin hlu ; 21 me ödrin e he ka hom hlu kâ ú ka hnyi hwanumen uma umen kamen, ke ame he aten anyin taun ka luâ e ge veto, me me mokcu : anyin a e ame ânyâ monu hnyi Isaraela, k' ame bi únyi monu hnyi hnyaban kamen : ke helâe u me he ka ohia hulö unyâm.

22 Adre me ne wâ ke at ame tha mokut me momo a áiân ke бага, me ödru me he ka mok, wale бага at ame tha mokut me momo, ke momo minya : helâe u me he ka ohia hulö unyi Isaraela.

23 A ne hu ke hlu baú a at úkocö me бага ; ke a wâ ge ke бага bi hnyi taun, k' ame tha mokut mē ; 24 awe, öbun e he ka hum ödru ka hnyi homagöuleny taun eling, me öbun e he ka lu' ödru ge veto m' ödru me mokcu : haba hlu, me can e ame ca kuku ke e hnyi taun ; ke haba бага, me can e ame okongo momo anyin ke at : helâe u me he ka ohia hulö únyi gam.

25 Ke ame ne ke бага ame wâ hnyi ta hneyi hlu ae hmehmela ke бага, k' ame kât e me tha mokut mē ; me ame he ka hake mok бага at a tha mokut mē : 26 ke u me ca he ka ânyâ ke únyi ka hlu ; ke ba

## DEUTERONOMI 23.

monu anyin hlu me me moko : anyin a haba únyi eang me helá me at ame todró ka at ae hakekeny káu me hlingá ; 27 anyin a e ame wá e hnyi hnyei ; k' ame kuku hnen hlu a hmehmela ke at, ke ba at he ka hadruá.

28 Ame ne ke baga ame wá hlu baú a at ame ca hmehmela ke at, k' ame kát e, ke tha mokut mē, ke adre o 'dru ; 29 me hamen baga at ame tha mokut mē ka ham ka kamen hlu je sileva a fifte, me ame he ka áián bi anyin a e ame okongoá ; e ame ca he ka degec e hnyi bongon ta je bong hia.

30 Ame ca he ke at ka hom áián kamen, ke e ame ca he ka hai hnamejin kamen.

### HNYIMAKAN 23.

**A** ME ca he ka hnyi hanen úkhacaköu anyi Iehova at ae aat wakunyin, k' adre subá degecá anyin baga.

2 Ame ca he nokon gethen ka hnyi hanen úkhacaköu anyi Iehova ; ke ame ca he bala ka hnyi hanen úkhacaköu anyi Iehova ke ne o but hnyi dö a libenyitainy.

3 Ame ca he at Amona, me at Moaba ka hnyi hanen úkhacaköu anyi Iehova ; k' ame ca he balua ke at gadra ka hnyi hanen úkhacaköu anyi Iehova ke ne o but hnyi dö a libenyitainy : 4 anyin a ödra me ca úkha-nöá möbun jeú me köiö eú hnyi gethen waleji hnyi úheben úheny Aigupito ; ke can adre me bi omjeú kö Balaama nöku Beora úheny Pethora hnyi Mesopotamia, he ka hangö u. 5 Ke so bi haba Iehova Khongom ame ca ling Balaama, ke Iehova Khongom ame wia hnaúhangö eling me me inahic bi, anyin a Iehova Khongom ame hnyok köu. 6 U me ca he ka hadruá anyidra úsoköu me anyidra hnahic hnyi bongom ta je bong hia nyiele balua.

7 U me ca he ka húkötíá at Edoma, anyin a e liamekeiny möu : u me ca he ka húkötíá at Aigupito anyin a u je laba kanyua hnyi iny hnyei. 8 Haba ta je mátrá-nidra, me adre me he ka hnyi hanen úkhacaköu anyi Iehova hnyi dö a kuniny.

9 U ka he hnyi vat he ka vat me je iwahnaihmiöny möu, me u me he ka naúá ta je únyi hia ae kong. 10 A ne hu ke at unyám ame ca bo so can únyi a o káu hnyi hnyinghet, me hamen he ka he ka hnyi hoton hna hunuma, k' ame ca he ka hmetu ka hnyi hna hunuma : 11 ke haba hnyi sahaç, me e ame he ka sou hnyi köiö : ke ka

didrut seúnö, me e ame he ka hmetu ka hnyi hna hunuma. 12 U me he ka hu dok hnyi hoton hna hunuma hnân he ka he ka hnyin : 13 ke u me he ka hom ke utsoi a hanen je omjehem vat ; ke u ka he hnyot ai e hele, me u me he ka hiny káu, me hwiö he ka konâm hna he únyi gam : 14 anyin a Iehova Khongom ame he hnyi wanben hnâm hna hunuma, he ka omeli u, me hna je iwahnaihmiöny möu hnyi hnyimákâm ; anyin a wale ame he ka kap bi hnâm hna hunuma : me me ca he ka wá unyám ke únyi ae kong, me me hna degeci u.

15 U me ca he ka hna athnyaba ka tuhan, a at ame kec köu únyi ge tuhan : 16 ke e ame he ka tha laba möu, wale unyám, hnyi dok e ame he ka úca hnyi anyám je tauu, hoton weny bi : ke u me ca he ka okongoá.

17 Ame ca he ka hu momo hnyi gethen a at Isaraela, k' ame ca he ka hu at hwen Sodoma unyin obagainy Isaraela. 18 U me ca he ka hom ka hnyi uma umö Iehova hwaban momo hnyi gethen, ke hwaban kuli hnân bi khöbi : anyin a wale li únyi a ikikiá Iehova Khongom.

19 U me ca he ka me ham ke únyi ge hwaban ka liamekekeiny möu ; wale ge hwaban mone, me hwaban jeú, me hwaban ke únyi adre labö ham ge hwaban : 20 ke e khatö u he ka me ham únyi ge hwaban ka atkanyua ; ke u me ca he ka me ham únyi ge hwaban ka liamekekeiny möu : me me he Iehova Khongom ka ohnahici u hnyi ta je únyi hia u me he ka ip li hnyamám káu, hnyi hnyei u me he ka hnyin he ka labá.

21 U ka bi khöbi kö Iehova Khongom, me u me ca he ka bec he ka thamúá : anyin ame he Iehova Khongom ka hnö e gam ; me wale hulö köu. 22 Ke u je ne ca bi khöbi, me ba monu gam. 23 Haba hofuc ame he úheny hnyi li esongodâm, me u me wá wia he ka ányá ; hoton hnâm hna bi khöbi kö Iehova Khongom he ka hudo hut ibetengiö, a únyi u je ha báná ge hnyimám.

24 U je ne o hnyi hnyei vine iny at ame laba hakekenyi u, me e khatö u he ka ijem je wan vine me me sekem, ke u me ca he ka hitangen hnyi tángám tang.

25 U je ne o hnyi je hwit anyin at ame laba hakekenyi u, me e khatö u he ka thu je hwit ge hnyamám ; ke u me ca he ka iná ányám hele hnân subá hwit ka hnyi hwit ame tot anyin at ae hakekeny köu.

## HNYIMAKAN 24.

**A**ME ne ke baga ame hom momo me faipoipo me, ke e ame ca betenge bi gan, anyin a e ame wâ ke únyi ae ca so unyin, me e ame he ka sihnalimen hobi kâu tusiny degec momo, me ham ka hnyi hnyamen, me obâ únyi hnyi umen uma. 2 Ke e ka hia but didrut, me e khana he ka âiân ke baga bi. 3 Ke ame ne hûkotiâ e ge baga a biliny, k' ame ne sihnalimen hobi kâu tusiny degec momo, ke ham ka hnyi hnyamen, me obâ únyi hnyi umen uma; ke ame ne mokcu baga a biliny at ame hom e me âiân; 4 awe, ame ca he baga a bân waleji a obâ ka hom hmetu, k' adre hia but okongoâ; anyin a wale únyi ae ikiki hnyi hnyimakö Iehova: ke u me ca he ka bi jöning hnyei a ham köu Iehova Khongom me me em.

5 Ame ne ke baga ame hap hoktamomo, me e ame ca he ka tha he me vat, k' adre me ca he ka khene hanyamen: ke e ame he ka at baú hnyi hnyaban hnyi huna a khaca, me osenyinâ âiân a momo e ame hom. 6 Ca he ke at ka hom únyi hnân oamamá, k' ame ne vetoiny ethö görany, me me haten bi: anyin a e ame hom melen at me me haten.

7 Adre me ne wâ ke at ame venâu liamekeiny mē a at Isaraela, ke ame ânyâ kâu helâ me ka at adre úco, me úco bi; awe ame he ka mokcu at venöu eling: helâe u me he ka ohia hulö unyâm.

8 Ó u âu ge mok lepera he ka ti wâ wia, me ânyâ helâ me at Levi a tavat bihut ame n' öbun: öbun e he ka wâ wia ka ânyâ hoton hnök hna húna ködra. 9 Únykúme thö únyi a ânyâ Iehova Khongom kö Miriama eú hnyi gethen waleji hnyi úhebun Aigupito.

10 U je ne mē ham ke únyi ka liamekeiny möu, me u me ca he ka dit ka hnyi umen uma he ka hom haten. 11 Ke u me he ka tot eú hnyi hwanuma, ke hamen at waleji u je mē ham únyi kâu he ka hom haten köu eú hnyi hwanuma. 12 Ke ame ne at ae theduoc, me u me ca he ka tha mokut me haten bi. 13 Ke u me he ka ham hmetu kâu haten e ka didrut seúnö, me me he ka tha mokut me khaúen bi me hahnahici u: ke wale hwakecâm ae wisa hnyi hnyimakö Iehova Khongom.

14 U me ca he ka ovecâ at u me hawâ he ka huliwa, a at ae theduoc ke ba ta

únyi gan, ame ne liamekeiny möu, ame ne atkanyua hnyi em hnyei hnyi ânyâm je taun: 15 u me he ka bi hwaban hnyi bong bi, k' ame ca he ka dit seúnö hon; anyin a e theduoc, k' ame oúnyihnthoâ hwaban: ke wâ e nye tenge kö Iehova gam, ke wale hulö bi köu.

16 Adre me ca he ka hlingâ je kamen can je nokon, k' adre me ca he ka hlingâ je nokon can je kamen: k' adre me he ka ve hlingâ at can anyin hulö bi.

17 U me ca he ka ohwalö hna owisa ka atkanyua me nakahme; me hom úkhaúen safac hnân haten: 18 ke u me he ka únykúme hna thaluö u hnyi Aigupito, ke Iehova Khongom ame omeli u úheny: anyin a wale inya oge me húna köu he ka ânyâ únyi e.

19 U ka subâ ânyâm hwit hnyi em hnyei, ke u me hnying ke thi hwit hnyi hnyei, me u me ca he ka hmetu ka hom e: ke hobi kâu biju atkanyua, me nakahme, me safac: me me he Iehova Khongom ka ohnahici u hnyi ta je huliwainy li hnyamâm hia.

20 U ka tau halem úö elαιο, me u me ca he hmetu ka elâm hnyi je vheiny: ke hobi kâu biju atkanyua, me nakahme, me safac. 21 U ka tau wan halem hnyei vine, me u me ca he hmetu ka hlo hia: ke hobi kâu biju atkanyua, me nakahme, me safac. 22 Ke u me he ka únykúme hna thaluö u hnyi hnyei Aigupito: anyin a wale me oge me húna köu he ka ânyâ únyi eling.

## HNYIMAKAN 25.

**A**NE hu ivinö anyin tavat, k' ödrin e hom ka hnyi hna owisa, k' adre me owisa ködrin; me adre me he ka haisoâ at ae wisa, me hangâ at ae kong; 2 ke ame ne úcú he ka osöâ at ae kong, me ame he at owisa ka ha m' adre me omokulec e, me osöâ bi hnyi hnyimakan, e úcú me anyin hulö hoton numerainy. 3 E khana he ka ofâte kot ke ca onuâ bi: wâ e nye bi hanen, ke osehia kot, me ame he ka kong bi liamekeiny möu hnyi hnyimákâm.

4 U me ca he ka ca hnyimen bolok k' ame ututo hwit.

5 Ame ne tha laba je liamekeiny, ke ame mokcu ke at gadrin ke ba nokon, me ame ca he momo a âiân at ae mokcu ka he hnyöu ai me me âiân ke atkanyua bi: ke ame he liamekeiny me âiân ka hom e me

áián bi, me ányá káu hanymen liamekeiny me áián. 6 Ke haba nokon a bán e ame he ka hnokõá hnen momo, me adre me he ka wenyö ien liamekeiny me бага at eji a mok, me me ca he ka hia ien hnyi Isaraela. 7 Ke ame ne ca weny бага he ka hom safaciny liamekeiny me, me hamen safaciny liamekeiny me ka he ka hnyi homagöule ka wahingat me ha, ka habe, E höcö liamekeiny me öiök he ka okúâ hnyi Isaraela ien liamekeiny më, e höcö he ka ányâ hanymen liamekeiny më kõnya. 8 Me ame he wahingatiny anyin taun ka hawa бага, me fuc káu : ke ame ne tot бага, me ha, ka habe ; E ca wek he ka hom momo e ; 9 awe, ame he momo a áián liamekeiny më ka he káu hnyi hnyimakan wahingat, me uny dut taben hnyeúcan бага, me hangöcá hnyimakan, me ha, ka habe, Adre me he ka ányâ helâe ka at ame ca otilâ lap anyin liamekeiny më. 10 Ke adre me he ka hwenyi ien hnyi Isaraela, ka habe, Lap anyin at adre uny taben hnyeuca.

11 Ame ne ú ke li at, ke ame o momo he ka omelö áián únyi ge at ame kot, k' ame he momo ka inâ hnyamen me kát e únyi hnyi unyin : 12 awe, u me he ka subá degecá hnyamen momo, ca he emakâm ka betenge gan.

13 Ame ca he ka hu hnyi tangâm tang je tulut ae ve bongon, at ae gan me úhnyukong. 14 Ame ca he ka hu hnyi umâm uma efa ae ve bongon, at ae gan me úhnyukong. 15 Ke u me he ka hu tulut ae bekhöt me wisa ; efa ae bekhöt me wisa u me he ka hu : me me se hia bongom je bong hnyi hnyei a ham köu Iehova Khongom. 16 Anyin a hükötiânö Iehova Khongom tavat hia adre me ányâ helâe, a tavat adre me ányâ hwakecin ae ca wisa.

17 Únykúme ju únyi a ányâ Amaleka köu eú hnyi gethen, waleji u me he jem úheny Aigupito : 18 a g'ame úkhanö möu eú hnyi gethen, k' ame kot tavat a biliny, tavat ae sényin adre me biliny, ke u sényin me vec ; ke e ame ca outen Khong. 19 Anyin a wale e ka hia but Iehova Khongom omenö u ge je iwahnaihmiöny hia möu igigilö, hnyi hnyei a ham köu Iehova Khongom me me em hnân labâ, me u me he ka kot degecá hna únykúme at Amaleka únyi eang hmeledrany ; u me ca he ka hnying.

## HNYIMAKAN 26.

**K**E u ka o ka hnyi hnyei ame ham köu Iehova me em, ke u je hom me labâ : 2 awe, u me he ka hom je wan kânâ hia a bán, wale u me he ka hom únyi hnyi em a ham köu Iehova Khongom : ke u me he ka hitangen, me hom e ka hnyi dok ame he Iehova Khongom ka úca me me umen ien bi. 3 Ke u me he ka he ka at ame bi hut hnyi úen eling, me ha káu, ka habe, Inya oge me omanená kö Iehova Khongom hnyi bong ang, a iny o but ka hnyi hnyei a khe-manyin Iehova lakamöta he ka ham köta. 4 Ke ame he at bihut ka kap tang únyi gam, me ip hnyi hnyimakan taben hut anyi Iehova Khongom. 5 Ke u me he ka thu me ha hnyi hnyimakö Iehova Khongom, ka habe, Haba kamök, me, at Suria ame he but ka mok, ke e ame he Aigupito ai, k' ame laba atkanyua eling, ke e wakhalet thibi ; me e ame wia ka hnyei ae gan, ke hwege, ke se hia : 6 ke ame okongu öta at Aigupito, me oveci öta, me kun' öta ka hnyi huliwa ae hmak : 7 ke ötin e tenge kö Iehova Khongon lakamöta, me Iehova ame löng hota hwatenge, ke e ame wá anyita vec, me anyita huliwa, me hnödra hna oveci öta : 8 me Iehova ame hum öta úheny Aigupito ge hnyam ae hwege, me benyin adre hai, me je únyi hnân outen, me je haten, me je únyi hnân láia : 9 ke e ame hia but hum öta ka hnyi dok ang, me ham köta hnyei ang, hnyei ame di hnen debai me hani. 10 Ke wá ju, walang ang, Iehova lö, inya oge me hom köu je wan kânâ a bán wale u je hia but ham kõnya. Ke u me he ka ip e hnyi hnyimakö Iehova Khongom, me khudrung ju hnyi hnyimakö Iehova Khongom : 11 ke u me he ka senyinâ ta je so hia a ham köu Iehova Khongom, me ka ányâm lap, me at Levi, me atkanyuaa unyâm. 12 Ke u ka hia but ham je ke keihen a libenyitainy jeúiny huna a kuniny, wale huna adre ham je ke keihen a libenyitainy, me u me he ka ham e ka at Levi, me atkanyua, me nakahme, me safac, m' ödrin e he ka han sekon hnyi ányâm je lap ; 13 ke u me he ka ha hnyi hnyimakö Iehova Khongom, ka habe, Oge hia but bom ta je únyi ae kap úheny hnyi umök uma, ke oge hia but ham e ka at Levi, me atkanyua, me nakahme, me safac, hoton je hna hûna hia, u me hûna kõnya : oge me ca hanyáúú.

## DEUTERONOMI 27.

ányâm je hnanyibu hia, ke oge ca hnying e : 14 oge me ca hia but han únyi hnyin hnyi úen oge me tenge, me hom únyi hnyin iny ka bo kong, me ham únyi hnyin hobi kâu je komok : oge hia but löng hoton hofuc ho Iehova Khonguk, oge hia but ányâ hia hoton hnâm hna húna kónya. 15 Wá ju eú hnyi hnyabam ae kap únyi hnyi drany ethö, me ohnahicâ em hnyei Isaraela, me kúnâ u je ham köhmun, helâji me hnâm hna khemanyin ka lakamöhmun, a hnyei ame di hnen dân basin me hani.

16 Haba hnyi bong ang Iehova Khongom ame húna kôu he ka vheno je hnanyibu eang, me je hna owisa, ke u me he ka tuö me ányâ ge hnyekom ae bekhöt, me hanom ae bekhöt. 17 U je hia but ha muâ hnyi bong ang a haba Iehova me e Khongom, ke úcú kôu he ka vheno deny je gethen, me tuö hnen je hna húna, me anyin je hnanyibu, me hnen je hna owisa, me löng hoton hwan hofuc : 18 ke a hia but Iehova ha muâ hnyi bong ang a u hnyei ae ke bongon bi kâu, helâ me hnen hna ha bánâ kôu, me u me he ka tuö hnen je hna húna hia ; 19 k' ame he ka obeönuai u hon je hnyei hia e ame op, hnân baisoâ, me hnân ien bi, me hnân ogânâ ; m' u me he ka hnyei ae kap hobi kö Iehova Khongom hoton hofuc waleji e ame ha.

### HNYIMAKAN 27.

**K**E haba Mose me wahingatiny at Isaraela ödrin e húna ka tavat, me ha ka habe, Tuö ju ta je hnanyibu hia oge me húna köbun hnyi bong ang. 2 Ke haba hnyi bong öbun e he ka hanyâúâ Joridano ka hnyi hnyei a ham kôu Iehova Khongom, me u me he ka khon je veto ae gan, me botru dröüiny : 3 ke u me he ka sihnalimen hon ta je hofuciny hia hnanyibu eang, u ka hia but he hanyâúâ ; m' u me he ka he ka hnyi hnyei a ham kôu Iehova Khongom, a hnyei ame di hnen debai me hani, helâ me Iehova Khongon lakâmâm ame hia but ha bánâ kôu. 4 Ke öbun ka hia but hanyâúâ Joridano, me öbun e he ka khon je veto eling, wale oge me huna köbun hnyi bong ang, hnyi bucen Ebela, me up dröüiny. 5 Ke u me he ka otilâ taben but eling kö Iehova Khongom a tap veto : u me ca he ka inâ ke ut fao ethö ka hnyi hon. 6 U me he ka otilâ taben hut kö Iehova Khongom ge je veto ae bekhöt, ke u me he ka hudo hon je hudiny

leú kö Iehova Khongom : 7 ke u me he ka hudo je hudiny úsokôu, me han eling ; ke u me he ka senyin hnyi hnyimakö Iehova Khongom. 8 Ke u me he ka sihnalimen manená hon je vetoiny ta je hofuciny hia hnanyibu eang.

9 Ke haba Mose me tavat bihut a at Levi ödrin e ha ka at Isaraela hia, ka habe At Isaraela lö, ca mede bi, ke löng ju, haba hnyi bong ang me u hnyei i Iehova Khongom. 10 Anyin a wale u me he ka löng hofuc ho Iehova Khongom, me ányâ anyin je hnanyibu, me hnen hna húna, me hnen je hna owisa, walang oge me húna kôu hnyi bong ang.

11 Ke haba Mose ame húna ka tavat hnyi bong eling, me ha, ka habe, 12 Ame he hnyat eang ka tot hon bucen Gerizim he ka hahmahicâ hnyei, öbun ka hia but hanyâúâ Joridano ; jia Simeona, ke Levi, ke Juda, ke Isakara, ke Josefa, ke Beniamina : 13 ke walang hnyat ödrin e he ka tot hon bucen Ebala he ka hangâ ; jia Reubena, ke Gada, ke Asera, ke Zebulona, ke Dana, ke Nafatali. 14 Ke ame he at Levi ka thu me ha ka at Isaraela hia ge hwan ae hwege, ka habe,

15 Hnaúhangö at ame bi hnatheat adre sö adre me ne oköiâ, k' ame otilâ duöngâ, e hûkötianö Iehova huliwainy hnyamen at tretrau. Ke ame he tavat hia ka thu me ha, ka habe, Amen.

16 Hnaúhangö at ame ca oúnvihnatho kamen me hinyen. K' ame he tavat hia ka ha, ka habe, Amen.

17 Hnaúhangö at ame oc hnyigöulen ke at. Ke ame he tavat hia ka ha, ka habe, Amen.

18 Hnaúhangö at ame omono wadröu eú hnyi gethen. K' ame he tavat hia ka ha, ka habe, Amen.

19 Hnaúhangö at ame ohwalö hna owisa ka atkanyua, me nakahme, me safac. K' ame he tavat hia ka ha, ka habe, Amen.

20 Hnaúhangö at ame tha mokut me áiân kamen, anyin a e ame hai hnamejin kamen. K' ame he tavat hia ka ha, ka habe, Amen.

21 Hnaúhangö at ame tha mokut me meno. K' ame he tavat hia ka ha, ka habe, Amen.

22 Hnaúhangö at ame tha mokut me haniny, ame ne nokon kamen a hlu, k' ame ne nokon hinyen. Ke ame he tavat hia ka ha, ka habe, Amen.

23 Hnaúhangö at ame tha mokut me



DEUTERONOMI 28.

hinyen áián. K' ame he tavat hia ka ha, ka habe, Amen.

24 Hnaúhangö at ame kot ikhálâ ke at. K' ame he tavat hia ka ha, ka habe, Amen.

25 Hnaúhangö at ame kap hwaban me me hlingâ at ae ca úcú ka mok. K' ame he tavat hia ka ha, ka habe, Amen.

26 Hnaúhangö at ame ca hnyi ohwâdâ hofuciny hnanyibu eang he ka ányâ. K' ame he tavat hia, ka habe, Amen.

HNYIMAKAN 28.

**K**E u je ne he ka ti löng hoton hofuc ho Iehova Khongom he ka wâ wia me ányâ hnen je hna húna, wale oge me húna kôu hnyi bong ang, me ame he Iehova Khongom ka obeónuai u hon ta je hnyeí hia eang hmelen : 2 k' ame he ka o kôu ta je hnahic hia eang, me hom tilö u, u ka löng hoton hofuc ho Iehova Khongom. 3 Ke u me he ka hnahic hnyi taun, k' u me he ka hnahic hnyi ta hnyeí. 4 Ame he ka hnahic wan hnyekcm, me wan kânâm kânâ, me wan halem omeno, me úsahiainy je kau me lakon mamoe. 5 Ame he ka hnahic tangâm. tang, me taben bi ányâm falawa hnyin. 6 U me he ka hnahic u ka didrö, ke u me he ka hnahic u ka didrut. 7 Ame he Iehova ka hna je iwahnaihmiöny möu, tavat adre tot kôu ka mok hnyi hnyimákâm adre me he ka o kôu hnyi ke gethen, me ve kec gam hnyi je gethen a seven. 8 Ame he Iehova ka ohnahici u hnyi je uma u me ip ányâm jeú hnyin, me hnyi ta je ányí u me he ka ip hnyamâm kâu ; k' ame he ka ohnahici u hnyi hnyeí a ham kôu Iehova Khongom. 9 Ame he Iehova ka ohmö u m' u hnyeí ae kap hobi kâu e bi, helâ me e ame khemanyin kôu ; u je ne he ka tuö je hnanyibu anyi Iehova Khongom, me vheno deny je gethen. 10 Ke ame he je hnyeí hia eang hmelen ka wâ a g' adre ip iö Iehova hom ; m' adre me he ka outö u. 11 Ke ame he Iehova ka osehia hobi kôu ta je únyi ae so, a wan hnyekom, me wan halem je meno, me wan kânâm kânâ, hnyeí a khemanyin Iehova ka lakâmân he ka ham kôu. 12 Ke ame he Iehova ka khöng kôu tang omjehen ae so, wale drany te ka ota we hnyi üen bi hnyi kânâm kânâ, me ohnahicâ huliwa hia anyin li hnyamâm : ke u me he ka me ham omjeú ka ta je hnyeí ae se, k' u me ca he bi ka me sumatâ. 13 Ke ame he Iehova ka wiö u hnân ban, ke ca hmokunen bi ; ke u me he bi ka

hon, ke ca hnyikânâ bi ; u je ne löng hoton je hnanyibu anyi Iehova Khongom, wale oge me húna kôu hnyi bong ang he ka wâ wia me ányâ ; 14 ke ca saú ka hnyi ke keihen metâ, me ke keihen me, a únyi hnyi je hofuc oge me húna kôu hnyi bong ang, he ka hnu hoton ke je khong me bi athnya-baidrin.

15 Ke u je ca löng hofuc ho Iehova Khongom he ka wâ wia me ányâ anyin je hnanyibu hia, me hnen je hna húna, wale oge me húna kôu hnyi bong ang ; me ame he ka o kôu me hom tilö u ta je hnaúhangö hia eang. 16 Ke u me he ka hnaúhangö hnyi taun, ke u me he ka hnaúhangö hnyi ta hnyeí. 17 Ame he ka hnaúhangö tangâm tang, me taben u me bi ányâm falawa hnyin. 18 Ame he ka hnaúhangö wan hnyekom, me wan kânâm kânâ, me úsehiainy halem je kau me lakon halem je mamoe. 19 U me he ka hnaúhangö u ka didrö, ke u me he ka hnaúhangö u ka didrut. 20 Ame he Iehova ka kunâ kôu hnaúhangö, me vec, me ú, hnyi ta je únyi u me ip hnyamâm kâu he ka ányâ ke ne o but u me mok me ke ne o but u me ie hia but ; can hulöiny ányâm je huliwa u me digic nya hnyin. 21 Ame he Iehova ka okeceâ kôu mok ae cap, ke ne o but e ame ohio u únyi hnyi hnyeí, wale u me he ka hnyin he ka hu e. 22 Ame he Iehova ka kuc u ge delâ, me kahwa unyin, me hngihngidra, me kahwainy meic, me hele vat, me meleca, me om ; k' adre me he ka hnu u ke ne o but u me mokcu. 23 Ke haba drany ethö hon bâm, me, ame he ka helâ me bras, k' ame he ka helâ me fao bi kânâ eú hmelâm. 24 Ame he Iehova ka wia ányâm we me me kânâ me sesâiny kânâ, k' ame he ka ta únyi hnyi drany ka hnyi hom, ke ne o but adre ohio u. 25 Ame he Iehova ka hnö u me me kuc u ge je iwahnaihmiöny möu : u me he ka he ködra hnyi ke gethen, ke u me he ka kec hnyi hnyimaködra hnyi je gethen a seven : ke adre me he ka úkhúkhú u unyin je dökhü hia eang hmelen. 26 Ke haba unyâm bi me an omeno hia ame gâ ethö, me omenoiny hnyot, ke ba at ame he ka alen. 27 Ame he Iehova ka kuc u ge ohuciny Aigupito, me vec tiny, me anyú, me hölök, wale ae ca khana bi he ka metu. 28 Ame he Iehova ka kuc u m' u me monu, me wadröu, me uthmâhmâ hnyekon : 29 ke u me he ka khaüteta hnyi jebigö, helâ me at ae wadröu ame khaüteta hnyi lit, k' u me ca he ka hnahic hnyi dem je gethen,

DEUTERONOMI 28.

ke adre me he ka okongu u me hügünâ ânyâm ta je ûnyi hnyi je bong hia, ke ba at ame he ka omeli u. 30 U me he ka kâcâ momo, k' ame he bi ke at ka tha mokut mē : u me he ka op uma, k' u me ca he bi ka labā : u me he ka belökâ vine, k' u me ca he bi ka ijem wan. 31 Adre me he ka hlingâ halem bolok hnyi hnyimâkâm, ke u me ca he bi ka hnyi han : adre me he ka hügünâ halem asina hnyi hnyimâkâm, k' adre me ca he ka hom hmetu e köu : adre me he kaham halem je mamoe ka je iwahnaihmiöny möu, ke ba at ame he ka omeli u. 32 Adre me he ka ham lakom бага me hlu ka hnyi ke hnyei, ke u me he ka elâm ge li emakâm, me sēnyin halubahing 'ödrin hnyi je bong hia thibut : ke ba maniny hnyam m. 33 Haba wan kânâm kânâ, me ânyâm ta je huliwa hia, me ame he hnyei kanyua he ka han hia thibut ; k' adre me he thibi ka okongu u, me hlic u balua : 34 me me omonu u ge ta je ûnyi u me he ka wâ ge li emakâm. 35 Ame he Iehova ka kot li boucam me li cam ge ohuc ae vec, a at ae ca khana he ka metu, hwân hnyi hnyeúcac me ne o but ka hnyi wanben bâm. 36 Ame he Iehova ka tha hum u, me tuhâm a at u me otilâ hom, ka hnyi hnyei ae ca khanö u, a u me lakâmâm ; ke u me he ka bi athnyabainy eling ke je khong a utö me veto. 37 Ke u me he ka hnân lâiâ, me vejec, me hofuc hluhluma hnyi je hnyei hia ame he Iehova ka lili u ka hnyin. 38 E gan hmâ je hatong u me he ka hom ka hnyi em hnyei, ke ûhnyükong bi u me he ka ip ; anyin ame he ka han hnen ta je wahamon. 39 U me he ka ta je hnyei vine me belökâ, ke u me ca he ka ijem wainainy, ke u me ca he bi ka tau wan ; anyin ame he ka han hia é ge je oúnyi. 40 Ame he ka hu halem je úö elaiö hnyi em hnyei hia, ke u me ca he ka súö u ge wakooiny ; anyin ame he ka kölu wan ke tiga but. 41 U me he ka hnokoâ je бага me momo, k' ödrin e ca he ka lakom bi ; anyin adre me he ka hum ödrin ka hnyi hwenbâ. 42 Haba halem je úö me wan kânâm kânâ, me ame he je wahamon ka han. 43 Ame he atkanyua unyâm ka labö kú tot me me nua hom ; ke u me he ka hnyikânâ tot hmönyin. 44 E ame he ka me ham köu, ke u me ca he ka me ham kâu ; e ame he ka ban, ke u me he bi ka hmokunen. 45 Ke ame he ka o ta je hnaühangö eling hia köu, me hnu u, me hom tilö u, ke ne o but ame hiö u but ; anyin a u je ca löng hofuc

hó Iehova Khongom he ka tuö anyin je hnanyibu me hnen je hna otilâ waleji e ame hûna köu : 46 k' ame he ka e bi unyâm hnân haten me hnân lâiâ me unyin mâtânâm nyiele balua : 47 anyin a u je ca bi athnyabai Iehova Khongom me senyin me hobâ hnyi hnyekom can úgâniny ta je ûnyi hia : 48 anyin a wale u me he ka bi athnyabainy je iwahnaihmiöny möu tavat ame he Iehova ka kunâ köu, k' u mekihnânem, me beic, me he thu, me weny ta je ûnyi hia : k' ame he ka ip ûnyi hnân úhukâlâköuâ a fao hon nyem, ke ne o but e ame ohiö u. 49 Ke ame he Iehova ka oâ köu vat, a hnyei ûnyi hnyi dok ae sâkâú úheny hnyi can hmeledrany, helâ me ugâiny aeto ; hnyei ae ca khanö u he ka löng hwan ; 50 hnyei ae hwege hnyimakan, k' adre me ca ogânâ wahingat, me betenge ge tavat ae úhnyükong : 51 ke e ame he ka han wan halem je meno, me wan kânâm kânâ, ke ne o but ame hiö u but : ke e ame ca he ka bi kolon köu hwit, me waina, me wakaco, me úsehiainy halem je kau, me lakon halem je mamoe, ke ne o but e ame ohiö u. 52 Ke e ame he ka igigili u hnen vat hnyi ânyâm je taun hia, ke ne o but ame u ta je hak veto u me op göranyai waleji u me geju kâu hnyi em hnyei hia : ke e ame he ka igigili u hnyi ânyâm je taun hia hnyi em hnyei waleji a ham köu Iehova Khongom. 53 Ke u me he ka han wan hnyekom a utiöiny lakom бага me hlu a ham köu Iehova Khongom ; hnyi hia igigilö me thelöng, wale ame he je iwahnaihmiöny möu ka oveci u gan. 54 Haba бага at ae menyik unyâm me ti mita, me e ame he ka okongo emakan ka liamekeiny mē, me âiân ae betenge gan, me kolon je lakon adre tiga ca hügünâ ; 55 me e ame ca he ka ham ka ke at gadrin ong utiöiny lakon e ame he ka han anyin ae ba but ta ûnyi gan ; a hnyi úen igigilö me thelöng, wale ame he je iwahnaihmiöny möu ka oveci u hnyi ânyâm je taun hia. 56 Haba momo ae menyik me ti mita unyâm, at ame ca hnyi kâlâ kânâ ge hnyeúcac can mitainy me menyikiny, me e ame he ka okongo li emakan ka âiân ae betenge gan, me nokon бага, me nokon hlu ; 57 me at ae úhnyükong ame o wanben li can, me lakon e ame he ka hnokoâ ; ke ame he momo e ka han duöngi ödrin anyin ae ba han ; hnyi hna igigilö me thelöng, wale ame he je iwahnaihmiöny möu ka oveci u gan, hnyi ânyâm ta je taun hia. 58 U je ne ca he ka wâ wia he ka ânyâ ta je

DEUTERONOMI 29.

hofucin hia hnanyibu wale adre sihnalimen hnyi tusi ang, me u me outen ien ae hmanang me hnân outen, wale IEHOVA KHONGOM; 59 k' ame he Iehova ka olungâ anyâm ta je mok, me je mok anyiu je mâ-trânâm, a je mok ae gan hmâ, me tet hmâ, me je mekiny ae vec, me tet hmâ. 60 Ke e ame he ka oâ kôu je mekiny Aigupito hia, wale u me outen; k' ame he ka kece kôu. 61 Ke ta je mok hia minya me je ûnyi ae kong hia adre ca set hnyi tusiny hnanyibu eang, ame he Iehova ka oâ kôu, ke ne o but ame hiö u. 62 Ke öbun e he ka wakhaleet biju, waleji a helâ me je okhüiny drany üseibun; anyin a u je ca löng hoton hofuc ho Iehova Khongom. 63 Ke wâ bi, helaji me Iehova ame senyin köbun he ka o-oi öbun, me osehi' öbun, me helâe e ame he ka senyin köbun he ka ohi' öbun, me ousi öbun; ke adre me he ka oc degeci öbun ûnyi hnyi hnyei u me he ka hnyin m' u me hu. 64 Ke ame he Iehova ka ovesei u ka hnyi je hnyei hia, hwân hnyi ke can hmeledrany ke ne o but ka hnyi obiny hmeledrany; ke u me he ka huliwa ka je khong ae ca khanö u, u, me lakâmâm, a utö me veto. 65 Ke u me ca he ka labawia hnyi je hnyei hia eling, k' ame ca he ka menâ hnyeucam: ke ame he Iehova ka ham eling kôu hnyok ae öbubuny, me li ecmak ae dit, me hanu ae höcö: 66 ke u me he ka labö loloâ anyâm möt; ke u me he ka labö ot hnyi hnyinghet me lany, ke u me ca he ka sekunâ anyâm möt: 67 hnyi hnyomakatu u me he ka ha, ka habe, E na sahac ut! ke e sahac me u me he ka ha, ka habe, E na hnyomakatu but! anyin ae ot hnyekom, ke can ta je ûnyi u me wâ ge li emakâm. 68 Ke ame he Iehova ka ohmetu u Aigupito ai hnyi je hu, k' u me he ka gethen waleji oge ha kôu, ka habe, U me ca he hmetu ka wâ e balua: ke öbun e he bi eling ka beucü öbun ka .je iwahnaihmiony möbun m' öbun e bi athnyaba k dra obaga me omomo, ke ba at ame he ka üco.

HNYIMAKAN 29.

**W**ALANG je hofuciny ühinykôu, waleji Iehova ame huna kö Mose he ka anyâ me lakon Isaraela hnyi hnyei Moaba, ke ca ha bi hna ühinykôu mödra hnyi Horeba.

2 Ke haba Mose ame hawâ at Isaraela hia thithö, me ha ködra, ka habe, Öbun e wâ ta je ûnyi hia a anyâ Iehova kö Farao

hnyi hnyimaköbun hnyi hnyei Aigupito, me lathnyabainy, me iny hnyei hia: 3 a ta je ücubic ae gan waleji a wâ je emaköbun, me je haten, me je ûnyi hnân läiâ gan eling: 4 ke a ca ham bi köbun Iehova hnyok ae wâhmakhmeto, me li emakan ae bwela, me li hnyikönyen ame löng, ke ne o but hnyi bong ang. 5 Ke oge hia but hum öbun hnyi hnyebuba fâte je huna: e ca bobot anyibun je ükhaü, k' ame ca bobot je tangen hnyeucabun hnyi je cabun. 6 Öbun e ca han areto, me ijem waina me grâg: me me khan' öbun a inya Iehova Khongubun. 7 Ke öbun e o but ka hnyi dok ang, me ame tot metâ köta Sihona tuhan Hesebona, me Oga than Basana he ka vat, me ötin e kuc ödra: 8 me otin e hügünâ idru hnyei me ham e me iny at Reubena, me Gada, me hafiny tribu Mauase. 9 Anyin a wale tuö ju ta je hofuciny ühinykôu eang, me anyâ, m' öbun e hnahic hnyi ta je ûnyi hia öbun e anyâ.

10 Öbun e tha tot hnyi bong ang, a öbun hia hnyi hnyimakö Iehova Khongubun; a anyibun je taben, me je tribu, me wahingat, me je homakan, a tavat hia aten Isaraela, 11 lakubun, me laöiöbun, me atkanyaua unyâm hnyi hnâm je hna hunuma, hwân ge at ame höcö hlogom ke ne o but at ame söü belâm köiö: 12 me u me he ka tot hnyi ühinykôu anyi Iehova Khongom me hnen hna khemanyin wale ame khemanyin köu Iehova Khongom hnyi bong ang: 13 me e ame he ka ohmö u hnyi bong ang m' u me he bi ka iny hnyei, me e ame he ka Khongom, hoton hofuc e ame ha kôu, ke hoton hofuc e ame khemanyin ka lakâmâm, a Aberahama, me Isaaka, me Jakob. 14 Ke oge me ca hake anyâ ühinykôu ang möbun me khemanyin köbun; 15 ke so bi hobi ködra adre me tha tot möta eang hnyi hnyimakö Iehova Khonguta hnyi bong ang, me tavat minya ae hia unyita hnyi bong ang: 16 (anyin e khan' öbun a ötin e laba hnyi hnyei Aigupito, me he but hnyi waben je hnyei waleji öbun e he hanyâüâ; 17 ke öbun e hia but wâ je ûnyi ae ikiki gadra, me anyidra je idola, a utö, me veto, me sileva, me gol, waleji unyidra:) 18 wâ e nye hu at gabun, ame ne бага, ame ne momo, ame ne lap, ame ne tribu, at ame hwiö hnyekou hnyi bong ang ûnyi ga Iehova Khonguta he ka he me bi athnyabainy je khongon je hnyei eling; wâ e nye hu unyibun wân ame oküâ ûnyi hnân mekiny, ame ne üthâ; 19 ke e ka löng hofucin ühangö

DEUTERONOMI 30.

eang, me e ame he ka hahnahicá e bi hnyi hnyekom me ha, ka habe, Eja ke ne oge ne vheno weny hnyekuk, he ka bi hnen únyi ae kukuba ge únyi ae mada, me oge me he ka so but : 20 ke ame ca he Iehova ka hna e, ke so bi, ame he ka sâ hmönyin anyi Iehova me anyin ciâ ka at eling, k' ame he bi ka ta hon hnaúhangö hia adre sihnalimen hnyi tusi ang, ke ame he Iehova ka kot degecâ ien únyi eang hmeledrany. 21 K' ame he Iehova ka ke ip e ka hnyi ke únyi ae kong hnyi ta je tribu anyin at Isaraela hia, hoton ta je hnaúhangöiny úhihinyköu, wale adre sihnalimen hnyi tusiny hnanyibu eang. 22 Ke ame he ka ha hnen dö a biliny, a je lakubun adre me he ka o hwaböbun, me atkanyua at ame he ka o úheny hnyi dok ae sákáú, ödra ka wâ je mekinny hnyei eling, me je mok a kunâ Iehova ; 23 me haba hnyei hia me teio, me alase, me ame hlâ, k' adre ca belökâ, k' ame ca wa, ke ba hnaonying ame kú hnyin, helâ me hna ohia Sodoma, me Gomora, me Adema, me Zebaim, waleji Iehova ame ohia ge anyin hmönyin me anyin ú : 24 ke ame he je hnyei hia ka ha, ka habe, Can ieu Iehova ame ányâ helang ka hnyei ang? can ieu hmönyin ae gan eling? 25 Ke adre me he ka thu, ka habe, Can adre degecâ úhihinyköu anyi Iehova Khongon lakamödra waleji e ame ányâ mödra, hnyi úen e ame hum ödra úheny hnyi hnyei Aigupito ; 26 ke adre me he me bi athnyabainy ke je khong, me khudrung kâu, a je khong ae ca khan' ödra, ke e ame ca ham ködra : 27 anyin a wale ame ubâhlâ hmönyin anyi Iehova ka hnyei ang, he ka oâ kâu hnaúhangö hia adre sihnalimen hnyi tusi eang : 28 ke Iehova ame oc degeci ödra hnyi könödra kânâ hnyi hmönyin me hnyi ú, me hmönyin ae gan, k' ame ob' ödra ka hnyi ke hnyei bi, helâ me hnyi bong ang. 29 E unyi Iehova Khonguta ta je únyi ae iyong : ke haba ta je únyi ae manen, me e unyita me lakuta nyiele balua, m' ate me he ka ányâ ta je hofucin hia hnanyibu ang.

HNYIMAKAN 30.

**K**E e ka o köu ta je únyi hia eling, wale hnahic me hnaúhangö oge hia but ip hnyi hnyimákâm, ke u me he ka únykúme gan hnyi je hnyei hia wale Iehova ame obö u ka hnyin, 2 ke u me he ka hmetu kö Iehova Khongom, me löng hoton hwan hofuc helâ me ta je únyi hia oge me húna

köu hnyi bong ang, a u me lakom, tha e me hnyekom ae bekhöt, me hanom ae bekhöt : 3 awe, ame he Iehova ka ohmetu u únyi hnyi hna bâ, me betenge gam, me he hmetu ka úkhacaköü u únyi hnyi ta je hnyei hia wale Iehova ame hia but oveseiö u ka hnyin. 4 Eja ke ne adre ne obâ keihen ka hnyi obiny drany, me ame he Iehova Khongom ka úkhacaköü u úheny, me hum u úheny : 5 ke ame he Iehova ka hum u ka hnyi hnyei a labâ lakâmâm m' u me he ka labâ, ke e ame he ka osoi u, me osehio u hon je lakâmâm. 6 Ke ame he Iehova Khongom ka peritononâ hnyekom, me hnyekom je mátrânâm, m' u me we Iehova Khongom ge hnyekom ae bekhöt me hanom ae bekhöt, m' u me möt bi. 7 Ke ame he Iehova Khongom ka ip je hnaúhangö hia eling hon je iwahnaihmiöny möu, me tavat adre me hükotiö u adre oveci u. 8 Ke u me he ka hmetu me löng hoton hofuc ho Iehova me ányâ anyin je hnanyibu wale oge me húna köu hnyi bong ang. 9 Ke ame he Iehova ka osehio u hnyi ányâm ta je huliwa hia, hnyi wan hnyekom me wan halem je meno, me wan kânâm kânâ, me me so bi ; anyin ame he hmetu Iehova ka senyin gam hnyi so, helâ me e ame senyin ka lakâmâm : 10 u je ne he ka löng hoton hofuc ho Iehova Khongom, he ka tuö anyin je hnanyibu me hnen je hna otilâ wale adre sihnalimen hnyi tusiny hnanyibu ang : ke u je ne hmetu kö Iehova Khongom me hnyekom ae bekhöt, me hanom ae bekhöt.

11 Anyin a haba hnanyibu ang wale oge me húna köu hnyi bong ang, me e ca hmak köu, ke ca sákáú. 12 Ca e bi hnyi drany, m' u me he ka ha, ka habe, Ie at ame he ka ölö hnyi drany ai hobi köta, me me hom e köta, m' ate me löng me ányâ? 13 Ke haba khaca, ca e bi hnyi hoton köiö, m' u me he ka ha, ka habe, Ie at ame he ka kâcâ köiö hobi köta, me hom e köta, m' ate me löng me ányâ? 14 Ke so bi e hakekeny hmönyin hofuc köu, a hnyi hnyimâm me hnyi hnyekom, m' u me he ka ányâ.

15 Wâ bi oge hia but ip hnyi hnyimákâm hnyi bong ang möt me hnahic, ke mok me hulö ; 16 anyin a inya oge me húna köu hnyi bong ang, he ka hnyok kö Iehova Khongom me vheno deny je gethen, me tuö anyin je hnanyibu, me hnen je hna otilâ, me hnen je hna owisa, m' u me möt me osehia, me ame he Iehova Khongom ka ohnahici u hnyi hnyei u me he ka hnyin he ca labâ.

DEUTERONOMI 31.

17 Ke e ka hwiö hnyekom, ke u me ca löng bi, ke adre me ne lili u, he ka khudrung ka ke je khong me bi athnyabaidrin; 18 awe, inya oge me ha hwegiä köbun hnyi bong ang a öbun e he ka mok; k' öbun e ca he bi ka laba beü hnyi hnyi öbun e he ka hanyâüâ Joridano me he ka hnyin he ka labâ. 19 Inya oge me hawâ drany me hmeledrany hnyi bong ang he ka ohnatho köbun, a oge hia but ip hnyi hnyimâkâm möt me mok, ke hnabic me hnaühangö: anyin a wale üca thö möt m' u me möt a u me je mâtrânâm: 20 me hnyok ju kö Iehova Khongom, me löng hoton hwan hofuc, me kece kâu; anyin a e melâm, ke at ame osehia bongom je bong: m' u me he ka labâ hnyi Iehova ame khemanyin ka lakâmâm, jia Aberahama, me Isaaka, me Jakob, he ka ham ködrin.

HNYIMAKAN 31.

**K**E haba Mose ame he me ha ta je hofuc eang ka at Isaraela hia. 2 Haingen ködra, ka habe, Wan haded ke twente but je hunaik hnyi bong ang; ke ca khanö nya hmetu he ka didrut me didrö: ke Iehova ame hia but ha könnya, ka habe, U me ca he ka hanyâüâ Joridano eang. 3 Ke haba Iehova Khongom me e ame he ka bân ka hanyâüâ hnyi hnyimâkâm; ke e ame he ka ohia je hnyi eang hnyi hnyimâkâm, me me em biju: haba Josua me e ame he ka hanyâüâ hnyi hnyimâkâm, helaji me Iehova ame ha. 4 Ke ame he Iehova ka ânyâ ködra helâ me e ame ânya kö Sihona me Oga, a li thaninyat Amora, me lakeidru; waleji e ame ohia. 5 K' ame he Iehova ka hn' ödra hnyi hnyimâkôbun, m' öbun e he ka ânyâ ködra hoton je hna hûna hia oge hia but hûna köbun. 6 Hwege th' öbun me hnyok бага but, ca ot bi, ke ca öbubuny bi gadra: anyin a Iehova Khongom me e at ame tha he möu; e ame ca he ka hia unyâm, me hna degeci u. 7 Ke Mose ame hawo Josua me ha kâu hnyi hnyimakan at Isaraela hia, ka habe, Hwege thö, me hnyok бага but, anyin a u me he ka hom tavat eang ka hnyi hnyi waleji a khemanyin Iehova ka lakamödra, he ka ham ködra; ke u me he ka ohuâ e ködra. 8 Ke haba Iehova me wale at ame he hnyi hnyimâkâm; ke e ame he ka tha e bi möu, e ame ca he ka hia unyâm, me hna degeci u: ca ot ke ca öbubuny bi.

9 Ke haba Mose ame sihnalimen hnanyi-

bu eang me ham e ka hnyat bihut a laku Levi, tavat adre me vadren tangen ühihi-nyköu anyi Iehova, me wahingatiny at Isaraela hia. 10 Ke Mose ame hûna ködra, ka habe, Hnyi obiny je huna a seven, hnyi üen adre thu, a cicö hunainy hna baüâ, hnyi bijeüiny je uma hunuma, 11 e ka o at Isaraela hia he ka manen hnyi hnyimâkö Iehova Khongom, hnyi dok e ame he ka üca, me u me he ka aü hnanyibu eang hnyi hnyimakan at Isaraela hia, ke hnyi je hnyikönyidra. 12 Ükhacaköüâ tavat, obaga me omomo me tavat ae ühnyükong, me atkanyua unyâm hnyi ânyâm je lap, m' adre me löng, me nâ, me outö Iehova Khongubun, me wâ wia he ka ânyâ ta je hofucin hia hnanyibu eang; 13 me me löng hnen lakudra a hnyat adre tiga ca löng, me nâ he ka outö Iehova Khongubun, hnyi je bong hia öbun e laba hnyi hnyi öbun e he ka hanyâüâ Joridano ka hnyin he ka hu e.

14 Ke Iehova ame ha kö Mose, ka habe, Wâ bi, e hakekeny jut bong u me he ka mok hnyin: hawo Josua, m' öbu me he ka tha tot hnyi uma hnân ükhacaköu, me oge me he ka hûna kâu. Me haba Mose me Josua, me, ödru me tha he me tot hnyi uma hnân ükhacaköu. 15 Ke Iehova ame manen dut hnyi uma hnyi ülä ame tot wisa: ke haba ülä ame mokut hnyi hwanumen uma. 16 Ke haba Iehova ame ha kö Mose, ka habe, Wâ bi u me he ka mokut unyin lakâmâm; k' ame he tavat ang ka köüö me bi ünyi monu me ke je khongon hnyi adre me he ka hnyin he ka tha laba mödra, k' adre me he ka hna degeci nya, me öünyibâüâ hnök hna ühihi-nyköu mödra. 17 Ke ame he ka ubâhlâ anyik hmönyin ködra hnyi bong eling, ke oge me he ka hna degeci ödra, me ikhâlâ hnyimâkök gadra, k' adre me he ka ön ödra, ke ame he ka o ködra je hulö me vec ae se; m' adre me he ka ha hnyi bong eling, ka habe, Hawa, ame ca o köta je hulö ang can Khong a ca tha e möta? 18 Ke oge me he ka ikhâlâ hnyimâkök hnyi bong eling, can ta je hulö hia adre me he ka ânyâ, anyin a hnyimâködra bi ka ta je khong. 19 Ke walang ang sihnalimen ju khumöng ang hobi köbun, me nâ e ka lakon Isaraela: ip ju hnyi je hnyimödra, me me ohnathu nya khumöng ang ka lakon Isaraela. 20 Ke iny ka hia but hum ödra ka hnyi hnyi waleji oge khemanyin ka lakamödra, ame di ge debai me hani; ke ödra ka hia but han sekon me

DEUTERONOMI 32.

pipikhenya; me adre me he ka hnyimakodra ka ke je khong, me bi athnyabaidrin, me höciö nya, me öünyibâüâ hnök hna ühihi-nykôu. 21 Ke ka o ködra je hulö me je vec ae se, me ame he khumöng ang ka ohnatho ködra; anyin a e ame ca he ka hia hnyi hnyimen je mâtrânidra: anyin ae khanö nya ünykümenödra adre me he ka ânyâ, a walang ang, k' iny tiga ca hia but hum ödra ka hnyi hnyei waleji oge khemanýinâ. 22 Ke haba Mose ame sihnalimen khumöng eang hnyi bong eling me nâ e ka lakon Isaraela. 23 Ke e ame hûna kö Josua nöku Nuna, ka habe, Hwege thö ke hnyok бага thö; anyin a u me he ka hom lakon Isaraela ka hnyi hnyei oge khemanýin ködra: me oge me he ka tha inya möu.

24 Ke Mose ame umo sihnalimen ta je hofucin hnanyibu eang hnyi tusi, ke ne o but ame um dö, 25 me haba Mose ame hûna ka at Levi, a tavat adre me vaden tangen ühihinykôu anyi Iehova, ka habe, 26 Hom dö tusiny hnanyibu eang, me ip e hnyi tangen ühihinykôu anyi Iehova Khongubun, k' ame he ka hnen ling hnân ohnatho gam. 27 Anyin a oge wâ but hnâm hna ükhin fuc, ke hwege nyem: wâ bi, iny tiga möt unyibun hnyi bong ang, me öbun e hia but ükhin fuc me Iehova; ke hawa bi iny ka mokcu? 28 Ükhacaköu thö könya wahingatiny hia anyibun je tribu, me je homakan gabun, m' oge me he ka ha ta je hofuc eang ka hnyi je hnyikonyödra, me hawâ drany me hmeledrany he ka ohnathoâ ködra. 29 Anyin ae khanö nya a iny ka mokcu, me öbun e he biju ka oikiki öbun, me sâü ünyi hnyi gethen waleji oge hûna köbun; ke ame he ka o kong köbun hnyi ta je bong a biliny; anyin a öbun e he ka ânyâ ünyi ae kong hnyi hnyimakö Iehova, he ka ohmönyinâ e ge je huliwa ae kong anyin li hnyamöbun.

30 Ke Mose ame ha hnyi je hnyikönyen ükhacaköu hia anyin at Isaraela, hofucin khumöng ang, ke ne o but ame um dö.

HNYIMAKAN 32.

**D**RANY lö, tevehlöng ju, ke oge me he ka fuc;

Ke so hmeledrany ame löng ifucin hnyimök;

2 Ame he ka khula bongon üüneik helâ me we,

Ame he ka ta ifucik helâ me hau;  
Helâ me we ae menyik hon je bü ae mita,

Ke helâ me khukhula hon sa khölak:

3 Anyin oge me he ka omanená iö Iehova;  
Heth' öbun ka ogânâ Khonguta.

4 E Kic, ke bekhöt anyin huliwa;

Anyin a je deny hia, me hna owisa:

E Khong ae hnathu, ke ba hnyikongon  
E wisa ke fâfâ.

5 Adre hia but iyawâ, ödra ca lakon, ke wale hnyikongudrin;

Dö ae hwen höcö, ke hwali hwakecidra.

6 Hawa, öbun e bi hwaban kö Iehova helâe,

Hnyei ae monu, ke ba metâ?

Hawa, ca kâmâm bi at ame ücü u?

E ame up u, me otölö u.

7 Ünyküme ju je bong ehac,

Wâhmakhmeto je hunainy ta je dö ae se:

Hnö thö kâmâm, me e ame he ka thumetu u;

Wahingatâm minya, ke ödrin e he ka ha köu.

8 Hnyi üen waleji Beönua ame ha idrin ka ta je hnyei hnyin,

K' ame ovesê lakon tavat,

Me wale e ame kia je hnyigöulen tavat,  
Hoton üganiny lakon Isaraela.

9 Anyin a haba jekhöu Iehova, me iny hnyei bi,

Ke Jakob iny hnyei adre tuluto.

10 E ame wâ e hnyi hnyebuba,

Ke hnyi dok ae hnyot ke ba aten, ke je meno thibi adre me kuku;

Me e ame igigilöâ, me nâ e,

K' ame tuö e helâ me wan li emakan.

11 Helâ me man aeto ame ânyâwia hâuen,

Ke ame gâ igigilö hon lakon,

Me helâe e ame ulolo li labenyin,

Me kaptil' ödrin hon li labenyin:

12 Iehova thibi at ame lelö e

Ke ba ke khong atkanyua unyin.

13 E ame otabâ e hon je dok ae görany eang hmelen,

K' ame han je troban hnyei,

Ke e ame habelen e ge hani ünyi hnyikic,

Me wakaco ünyi hnyi out;

14 Bata ünyi ge kau, ke dân basin mamoe,

Tha e me pipikenyainy lakon mamoe

Me je mamoe бага üheny Basana, me je got,

Tha e me pipikhenyainy wan hwit;

Ke u je ijem waina a dren wan vine.

DEUTERONOMI 32.

- 15 Ke haba Jesuruna ame pipikhenya bi,  
k' ame nyikâ can :  
U pipikhenya but, me gan unyâm, me  
habubut :  
Waleling me me degec Khong at a op e,  
Me oûnyibâtû Kic at a omelö e.
- 16 Adre me okûâ anyin ciâ ûnyi ge je  
khong atkanyua,  
K' adre ohmönynâ ge anyidra ta je ûnyi  
ae ikiki.
- 17 Adre me hudo ka ta je demoni, ke ca  
Khong bi,  
A je khong ae ca khan' ödra,  
Ae teb ûnyi k' ödrin e teb o,  
K' ame ca outen ge lakamöbun.
- 18 U je hnying ge Kic, at ame hnöku u,  
Me ca ûnykûme hmetu ge Khong at  
ame up u.
- 19 Iehova ame wâ me höci ödra,  
Can hna ohmönynâ e ge lakon бага me  
hlu.
- 20 Me e ame ha, ka habe, Oge me he ka  
ikhâlâ hnyimakök gadra,  
Oge me he ka wâ ieu obiny ködra :  
Anyin a ödra me dö ae ûjöng,  
Je wanakat ae ba labageju.
- 21 Adre hia but okûâ anyik ciâ can ûnyi a  
ca Khong bi ;  
Adre hia but ohmönyni nya ge anyidra  
ta je ûnyi baû :  
Me oge me he ka okûâ anyidra ciâ ge je  
hnyat a ca hnyei bi ;  
Oge me he ka ohmönyni ödra ge hnyei  
ae monu.
- 22 Anyin adre hû meic hnyi anyik hmö-  
nyin,  
Ke ame thong ke ne o but dok ae dit  
hmönyni,  
Me an hmeledrany me troban,  
Me thong ta je taben je bucen.
- 23 Oge me he ka ûkhöünâ hudra je ûnyi  
ae kong,  
Oge me he ka khûâ ködra anyik je fana  
hia :
- 24 Adre me he ka delâ ge mekihnânem, me  
aû ge kahwainy unyidra,  
Me mok ae hiny ;  
Ke oge me he ka kunâ ködra je meno ae  
ûhûlû,  
Me je oniny kânâ adre me mekiny.
- 25 Ame he hele vat ka otengiâ eû hnyöu,  
Ke ot eiö hnyin uma ;  
Ame he ka hlingâ hidröu me hlu baû,  
Mendreng me at ae hûen.
- 26 Oge ha, ka habe, Oge me he ka ovesei  
ödra,
- Oge me he ka bi obiny hna ûnykûmi  
ödra ge tavat :
- 27 Ke so bi oge me outen hmönyn anyin  
iwahnaihmiöny,  
Wâ e nye ca wâhmakhmeto iwahnai-  
hmiöny mödra,  
Wâ adre nye ha, ka habe, Adre hia but  
hai hnyamöhmun,  
Ke Iehova ame ca âuyâ ta je ûnyi hia  
ang.
- 28 Anyin a ödra hnyei ae ba ûne,  
Ke ba metâ unyidra.
- 29 Ödra na metâ ju, me wâhmakhmeto  
ûnyi eang,  
M' adre me he ka ûnykûme obiny ködra !
- 30 Ama kamâu at a khaca he ka hnu thau-  
zan,  
Me okecâ ten thauzan ge li at a lo,  
Ame ne ca bân anyidra Kic ka úco  
degeci ödra,  
Me hna degeci ödra hnö Iehova ?
- 31 Anyin ae ca tha úcú anyidra kic me  
anyita Kic,  
K' ame he ta je iwahnaihmiöny möta ka  
ohnathoâ.
- 32 Anyin a haba anyidra vine, me ûnyi  
hnyi vineiny Sodoma,  
Me ûnyi hnyi ta hnyeiny Gomora :  
Wan vine anyin úö hnân mekiny je wan  
anyidra vine,  
Ke hiny anyidra je thi vine.
- 33 Haba anyidra waina me mekiny tanimo,  
Me dân údöiny asip a at ovecâ.
- 34 Hawa, adre ca ip unyik ûnyi eang,  
Me okeceâ hmâ hnyi tang omjehek ?
- 35 Hamök he ka ip hwaban monu, me bi  
hwaban,  
Hnyi ûen ame he ka haû je cadra :  
Anyin ae hakekeny jut bonginy anyidra  
vec,  
K' ame he ka logot ta je ûnyi ame he  
ka o ködra.
- 36 Anyin ame he Iehova ka owisa lakeiny,  
Me ietra can lathnyabainy ;  
E ka wâ ae ba manidrin man,  
Ke ba kolon, a hnyat adre ca, ke hnyat  
adre hna.
- 37 Ke e ame he ka ha, ka habe, Ewa je  
khongudrin,  
A kic waleji ödrin e labageju kâu ;
- 38 At ame an pipikhenyainy anyidrin je  
hut,  
Me ijem wainainy je hudiny anyidrin  
ic ?  
E so ödrin e köüö me hadru' öbun,  
Me bi hnbâ hnân hobi köbun.

DEUTERONOMI 33.

39 Wâ bi walang ang, a inya but ang,  
 Ke ba ke khong anyik :  
 Oge me hlingâ, ke oge me omelö ;  
 Oge hia but oätâ, ke oge me ometo :  
 Ke ba at ae khana he ka hügünâ únyi  
 hnyi hnyamök.  
 40 Anyin a oge me ogöranyâ hnyamök ka  
 hnyi drany,  
 Me ha, ka habe, Inya oge me möt balua,  
 41 Ke oge ne khet anyik hele vat ae ha-  
 drongöc,  
 Me hom hna owisa ge hnyamök ;  
 Awe, oge me he ka ip hna okongoâ ka  
 je iwahnaihmiöny mönya,  
 Me bi hwaban tavat adre me hükötö  
 nya.  
 42 Oge me he ka habelen anyik je fana ge  
 dra me me monu,  
 K' ame he anyik hele vat ka han utiö :  
 Me dren tavat adre hlingâ, me je bâ,  
 Hwân ge ban je taben iwahnaihmiöny.  
 43 Ta je hnyei lö, tha senyin me lakeiny :  
 Anyin a e ame he ka bi hwaban dren  
 lathnyabainy,  
 Me ip hna okongoâ ka je iwahnaihmiöny  
 më,  
 Me ohia hwaban hulöiny iny hnyei,  
 hobi kâu lakeiny.  
 44 Ke haba Mose ame he but me ha ta  
 je khumong ang ka hnyi hnyikönyen tavat,  
 a e me Hoshea nöku Nuna. 45 Ke Mose  
 ame un dö ha ta je hofuc eang ka at Isara-  
 ela hia : 46 me haingen ködra, ka habe, E  
 so öbun e kong hnyekunâ ta je hofuc eang  
 hia oge me ha köbun hnyi bong ang ; wale  
 m' öbun e he ka ha ka je lakubun he ka wâ  
 wia me ânyâ ta je hofucin hia hnanyibu ang.  
 47 Anyin a ca únyi bi e ae hâhâ köbun :  
 anyin a e melibun, ke haba únyi ge únyi  
 eling me öbun e he ka osehia bongubun  
 je bong hnyi hnyei öbun e he ka hanyâüâ  
 Joridano ka hnyin m' öbun e labâ.  
 48 Ke Iehova ame ha kö Mose hnyi bong  
 eling, ka habe, 49 Öliâ thö bucen eang a  
 Abarima, ka hnyi bucen Nebo, wale hnyi  
 hnyei Moaba, cicö Jeriko ; me wâ hnyei  
 Kanana, wale oge me ham ka lakon Isara-  
 ela me me idrin : 50 me u me he ka mokcu  
 hnyi hon bucen e u me he ka öliâ, me tha  
 laba me lakâmâm ; helâ me Arona tuhâm  
 ame mok hnyi hon bucen Hora, ke e ame  
 tha laba me lakamen : 51 anyin a öbu monu  
 könya hnyi wanben lakon Isaraela, hnyi an  
 Meriba hnyi Kadesi, hnyi hnyebuba Zin :  
 can obe ca okabi nya unyin lakon Isaraela.  
 52 Ke u me he ka wâ hnyei hnyi hnyimâ-

kâm ; ke so bí u me ca he ka hnyi hnyei,  
 wale oge me ham ka lakon Isaraela.

HNYIMAKAN 33.

**K**E walang hnahic waleji hnö Mose hna  
 hahnahicâ lakon Isaraela ke tiga ca  
 mok. 2 Ke e ame ha, ka habe,  
 A o thö Iehova úheny Sinai,  
 Me köö ködra úheny Seira ;  
 E ame umumelam but úheny hon bucen  
 Parana,  
 Ke e ame o úheny je ten thauzan tavat  
 ae kap :  
 Ke e hnyi hnyamen a metân hnanyibu  
 ae meic hobi ködra.  
 3 Eke, e ame betenge ge je tribu ;  
 E hnyi hnyamâm laten ae kap hia.  
 Ke adre me laba ju hmelen li cam :  
 Adre me he ka ve kap hwâm je hofuc.  
 4 Mose ame huna köta hnanyibu,  
 A jekhon úkhacaköu anyi Jakob.  
 5 E than hnyi Jesuruna.  
 Hnyi úkhacaköuiny je taben hnyei,  
 A je tribu Isaraela hia thithö.  
 6 E so e he Reubena ka möt, ke ca mok  
 bi ;  
 Ke so e wakhalet ut lakeiny.  
 7 Ke walang hna hahnahici Juda : k' ame  
 ha, ka habe,  
 Iehova lö, löng ju ifuci Juda,  
 Me hom e ka hnyi iny hnyei :  
 E ame ka vat hobi kâu ge li hnyamen ;  
 Ke u me he ka hadruâ can je iwahnai-  
 hmiöny më.  
 8 Ke e ame ha ga Levi, ka habe,  
 E bi unyin ânyâm at ae kap ânyâm  
 Thumim me Ürim,  
 At eji u je cubic hnyi Masa,  
 At u je ivinö më hnyi an Meriba ;  
 9 At ame ha ge kamen me hinyen, ka  
 habe, Oge ca wâ e ;  
 K' ame ca wâhmakhmeto je liamekeiny  
 më,  
 Ke ca khana je hing lakon :  
 Anyin adre me hia but wâ wia hwâm  
 hofuc,  
 Me tuö úhibinyköu möu.  
 10 Adre me he ka nö Jakob hnyi ânyâm je  
 hna owisa,  
 Me nö Isaraela hnyi ânyâm hnanyibu :  
 Ödrin e he ka ip utö ae bo so hnyi hnyi-  
 mâkâm,  
 Me hudiny le adre ca subâ hon ânyâm  
 taben hut,  
 11 Iehova lö, ohnahicâ tang omjehen,



DEUTERONOMI 34.

- Ke kap huliwa anyin li hnyamen bi :  
Kot oâ ju je hnyin tavat adre me tot  
metâ kâu,  
Me tavat adre me hûkotiâ, m' adre me  
ca tot hmetu.
- 12 Ke e ame ha ga Beniamina, ka habe,  
Ame he ka laba khôtkeic unyin hnyat a  
betenge ködrin Iehova ;  
E ame tube e hnyi bong hia,  
K' ame laba hnyi wanben li bajebenyin,
- 13 Ke e ame ha ga Josefa, ka habe,  
E so e hnahic bi iny hnyei ga Iehova ;  
Ge ta je únyi hnathuiny drany, ke únyi  
ge hau,  
Medok minya ae dit ame mokut eú,  
14 Me ta je únyi hnathu a waniny seúnö,  
Me ta je únyi hnathu a kú ge je tehi,  
15 Me ta je únyi ae beönua hnyi je bucen  
kâú ehac,  
Me ta je únyi hnathu hnyi je dok ae hut  
nyiele balua,
- 16 Me ta je únyi ae únyi hnathuiny kânâ,  
me unöngötiny,  
Me ibetengiö anyin at waleji ame laba  
hnyi úö ae údedö :  
E so e o hnahic ka hnyi hon bö Josefa,  
Ke hon wanben ban at waleji adre úsâ-  
kâúö me je liamekeiny më.
- 17 E hmanenang nokon haleny bolok a bân ;  
Ke haba li faoiny, me wale faoiny bolok  
ae hiny :  
Ge li únyi e e ame he ka hukâ je hnyei  
hia ke ne o but je obiny hmeledrany :  
Ke haba ödra, me, je ten thauzan anyi  
Eferaima,  
Ke ödra je thauzan anyi Manasi.
- 18 Ke e ame ha ga Zebulona, ka habe,  
Zebuloua lö, senyin dö hnyi hnâm hna  
didrut ;  
Ke u Isakara, hnyi umâm je uma mano.
- 19 Ödru me he ka hawâ tavat ka hnyi  
bucen ;  
K' adre me he ka hudo eling je hudiny  
hwakecin ae wisa :  
Anyin a ödru me he ka hu tang omjeú  
únyi eú hnyi köiö,  
Me ta je omjeú adre ikhâlâ hnyi öny.
- 20 Ke e ame ha ga Gada, ka habe,  
Hnahic hnen at ame okhulelaúo Gada :  
E ame laba helâ me liona momo,  
Eat ame oloú usukia benyin, me wanben  
han.
- 21 Ke e ame ip ke keihen a bân hobi kâú  
e bi,  
Anyin adre ip eling jekhon at me at ham  
hnanyibu ;
- Ke e ame tha o me je taben hnyei,  
K' ame ányâ hna owisa hnö Iehova,  
Me hnen je hna owisa kö Isaraela.
- 22 Ke e ame ha ga Dana, ka habe,  
Haba Dana, me, nokon liona  
At ame gâ úheny Basana.
- 23 Ke e ame ha ga Nafatali, ka habe,  
Nafatali lö, u sekom ge ibetengiö  
Me unöngötö ge hnahic únyi ga Iehova :  
U me he ka tren ke keihen e jio me  
hwaiöu.
- 24 Ke e ame ha ga Asera, ka habe,  
E so e hnahic Asera ge lakon ;  
E so ame kap soâ e hnen je liamekeiny  
më,  
Ke so e ame hneú can hnyin wakaco.
- 25 Ame he ka fao me bras ányâm je venyâ :  
Ke haba bongom je bong me ame he ka  
tha úcú me tang hwegiâm.
- 26 Jesuruna lö, e ba at ae úcú me Khong,  
At ame tabâ drany me me hadruö u  
Ke hon je úlá hnyi anyin hmanenang.
- 27 Haba hnyabam, me, Khong a nyiele  
balua ;  
Ke eú hmelâm li benyin a nyiele balua ;  
E ame obâ iwahnaihmiöny hnyi hnyi-  
mâkâm,  
Ke haingen, ka habe, Ohia but.
- 28 Ke Isaraela ame laba khôtkeic,  
Hake e pupuainy Jakob,  
Hnyi hnyei ae hu whit me waina ;  
Eke, ame ta hau únyi hnyi anyin drany.
- 29 Isaraela lö, u hnahic ;  
Ewa at ae tha úcú möu, a hnyei Iehova  
ame omelö ;  
E beciny úhadruö u,  
Ke wale hele vatiny ányâm so !  
K' ame he je iwahnaihmiöny möu ka  
nom ju köu ;  
Ke u me he ka uto anyidra je dok ae  
göraný.

HNYIMAKAN 34.

**K**E haba Mose ame ölö úheny hnyi dok ae  
tha hon hnyi Moaba, ka hnyi hon  
bucen Nebo, ka hnyi ban Pisega, cicö Jeriko.  
Ke Iehova ame omanená kâú hnyei Gileada  
hia ke ne o but Dana ; 2 me Nafatali hia, me  
hnyei Eferaima me Manase, me hnyei Juda  
hia, ke ne o but köiö e jio ; 3 me Hwaiöu,  
me Dok ae tha hon hnyi hnyigöulen bucen  
e Jeriko, tauniny je úö pama, ke ne o but  
Zoara. 4 Ke Iehova ame ha kâú, ka habe,  
Walang hnyei oge me khemanyin kö Abe-  
rahama, me Isaaka, me Jakob, me ha, ka

habe, Oge me he ka ham e ka ta je mâtâ-nâm: oge hia but omanenâ e ka hnyi li emâkâm, ke u me ca hnyi he bi ka hnyin. 5 Me haba Mose, a athnyabai Iehova ame mokcu eling, hnyi hnyei Moaba, hoton hofuc ho Iehova. 6 Ke adre me konâm e hnyi hnyigöulen bucen hnyi hnyei Moab cicö Beth-peora; ke ba at ae khana hnen hon ke ne o but hnyi bong ang. 7 Ke haba ta je hunai Mose hnyi üen e ame mokcu, me, wan haded ke twente: ke ca hadedak li emakan, ke ca hia tang hwegeien. 8 Ke haba lakon Isaraela, me adre me tengiö Mose hnyi je dok ae tha hon hnyi Moaba, hnyi je bong a thöte: me adre me um dö je bong bonginy hnyamoki Mose.

9 Ke ame unöngötö Josua nöku Nuná ge hanu ae metâ; anyin a hia but Mose ip li hnyamen hon: ke haba lakon Isaraela me adre me löng kâu, me ânyâ helâ me Iehova ame húna kö Mose. 10 Ke ba ke perofeta bala helâ me Mose ame o hmetu hnyi Isaraela, wale hnö Iehova hna iohnyimak mē; 11 wale hnyi ta je haten me ta je úöman hia, waleji Iehova ame kunâ he ka ânyâ hnyi hnyei Aigupito, kö Farao, me lathnyabainy hia, me iny hnyei hia thithö; 12 ke únyi hnyi hwegien hnyamen hia, me hnyi únyi hia hnân outen ae gan hmâ, waleji a ânyâ Mose hnyi hnyimakan at Isaraela hia thithö.

## TUSI ANYI JOSUA.

### HNYIMAKAN 1.

**H**WABAN mok a Mose athnyabai Iehova, me haba Iehova ame ha kö Josua nöku Nuna, athnyabai Mose, ka habe, 2 A mokcu Mose athnyabaik; ke walang ang todrö, he thö ka hanyâúâ Joridano eang, a u, me tavat eang hia thithö, ka hnyi hnyei oge me ham ködra, wale ka lakon Isaraela. 3 Haba ta je dok hia thithö ame he ka uto ge li hnyeúcabun, me wale oge me ham köbun, helâji me hnök hna ha kö Mose. 4 Hwân hnyi hnyebuba, me Lebanona eang, ke ne o but ka hnyi wagewe ae gan, a wagewe Euferate, a hnyei hia iny at Heth, ke ne o but hnyi köiö ae gan cicö hna dit hnen seúnö, wale hnyegölöbun. 5 E ba at ame he ka khana ka tot hnyi hnyimâkâm hnyi je bong bongon ânyâm möt; oge me he ka tha inya möu helaji me hnök hna tha e me Mose: ame ca he ka hiö nya unyâm me hna degeci u. 6 Hwege thö, ke hnyok бага but: anyin a hamâm he ka ohuâ hnyei ka tavat eang, waleji oge me khemanyin he ka ham ka lakamödra. 7 Ke so bi, hwege thö, me ti hnyok бага, m' u me he ka wâ wia me ânyâ hia hnanyibu a húna köu Mose a athnyabaik: ca saú thö úheny e ka hnyi

ke keihen metâ, me me, m' u me he ka hu hnahic hnyi je dok hia u me he ka hnyin. 8 Haba tusiny hnanyibu eang, me ame ca he ka hia únyi hnyi hnyimâm, ke u me he ka únykúme e hnyi lany me lit, me tuö me ânyâ hia helâ me hna sihnalimen hnyin: m' u me he ka so hnyi dem je gethen, m' u me he ka hnahic. 9 Hawa, oge ca húna köu? Hwege thö, ke hnyok бага but; ca ot, ke ca öbubuny bi, anyin a e bi unyâm Iehova Khongom hnyi je dok u me he ka hnyin.

10 Ke haba Josua ame húna ka je homakan ge tavat, ka habe. 11 He th' öbun ka hnyi wanben je hna hunuma, me ha ka tavat ka habe, Bi kamejibun ju; anyin a kun biju ta bong, me öbun e he ka hanyâúâ Joridano eang, me e jio he ka hou hnyei Iehova Khongubun ame ham köbun hnânibun.

12 Ke haba Josua ame ha ka at Reubena, me Gada, me hafny tribu Manase, ka habe, 13 Únykúme thö hofuc waleji Mose athnyabai Iehova ame húna köbun, ka habe, ame he Iehova Khongubun ka omen' öbun, me ame he ka ham köbun hnyei ang. 14 Ame he je laüöbun, me je lakubun ae úhnyúkong, me halebun je meno, ka laba biju hnyi hnyei Mose ame ham köbun hoton

Joridano; ke so bi, öbun e ne ka he me ta je únyi hnân vat hnyi hnyimakan je liamekeiny möbun, je hnyat hia ae hwege he ka vat, me hadru' ödrin, 15 ke ne o but a hia but Iehova omenâ je liamekeiny möbun, helâ möbun, me ödrin e hia but hom hnyei Iehova Khongubun ame ham ködrin; ke hnyi únen e, öbun e he ka hmetu ka hnyi ibun, me labâ e, wale Mose athnyabai Iehova ame ham köbun hoton Joridano, cico hna o hnen seúnö. 16 Ke ödrin e thu kö Josua, ka habe, öhmun e ha ka tha anyâ hia hnâm hna húna köhmun, me he ka hnyi dok u me kun' öhmun kâu. 17 Öhmun e he ka ling u helâ me hnöhmun hna ling Mose hnyi ta je únyi hia thithö: ke e na tha e ju möu Iehova Khongom, helâ me hnen hna tha e me Mose. 18 Ke haba at ame he ka úkhin fuc ge ányâm hnanyibu, me ca löng hwâm hofuc hnyi ta je únyi hia u me he ka húna kâu, me adre me he ka hlingâ e: ke so bi hwege thö, me hnyok haga but.

HNYIMAKAN 2.

**K**E haba Josua nöku Nuna ame kunâ duöngâ úheny Sitima li at he ka ecmak, me ha, ka habe, He thö ka wâ hnyei, me Jeriko. Me ödru me he me o ka hnyi uma umen momo hnyi gethen, Rahaba ien, me mokut eling. 2 Me adre me thumeto thaniny Jeriko, ka habe, Wâ bi, ame he jem li at eja hnyinghet úheny unyin lakon Isaraela, he ka ecmákâ hnyei. 3 Me haba thaniny Jeriko ame úkhúnöng kö Rahaba, me ha, ka habe, Hom but jem li at a o köu, wale ödru dit ka hnyin umâm uma; anyin a ödre o he ka ecmákâ hnyei. 4 Ke haba momo ame hom li at me ikhöl' ödru; me haingen, ka habe, E hnathu a o könya li at, ke ca khanö nya dok ödre mwi hnyin: 5 ke haba hnyi únen adre me he ka hlöng homagöule hnyi lit, me ame didrut li at, ke ca khanö nya dok ödre me he ka hnyin: tiga wadring hotudru anyin a öbun e he ka kät ödru. 6 Ke a hia but momo hum ödru ka hnyi hon ban uma, me tubi ödru ge je thi lino wale e ame ip gaga ethö hnyi hon ban uma. 7 Ke haba tavat ödrin e wadring hotudru hnyi gethen deny Joridano, ke ne o but hnyi je dok ae cöcö: ke adre me ie hlöng homagöule hwaban hna didrut tavat he ka hnu hotudru. 8 Ke ödru tiga ca mokut, me momo ame ölö thö ködru ka únyi hon ban uma; 9 ke e ame ha ka li at,

ka habe, E khanö nya a Iehova ame ham köbun hnyei, ke a o but köhmun ot gabun, k' ame aú but aten hnyei hia thithö hnyi hnyimaköbun. 10 Ke öhmun e hia but löng a Iehova ame ohmö köien Köiö ae Dra hobi köbun, hnyi únen öbun e he jem úheny Aigupito; ke hnöbun minya hna ányâ ka li than Amora hnyi hoton Joridano, a Sihona, me Oga, waleji öbun e ohia. 11 Ke öhmun e löng e, me ame köiö but je hnyekuhmun, ke ba hmetu tang hwege eú hnyi hnyekon ke at, cabun: anyin a Iehova Khongubun me e thibi Khong ethö hnyi drany, me eang hmelen. 12 Ke walang ang ö öbu khemanyin könya hnyi iö Iehova, a öbu me he ka betenge ge lap anyi cica helâ me oge me betenge gabu, ke ham könya haten ae hnathu: 13 ke omeli cica, me bai, me lahanik, me je liamekeiny mönya, me ta je únyi hia unyidrin, ke omeli öhmun, m' öhmun e ca he bi ka mok. 14 Ke ame thu ka momo hnen li at, ka habe, Öhmu me he ka mok hwaböbun, öbun e ne ca he ka omanená úhemnu eang; ke e ka át bi a g' ame he Iehova ka ham köhmun hnyei; me öhmun e he ka ányâ hwakecin ae betenge me hnathu köu. 15 Me e ame öú ödru ge tö úheny hnyi mamalama: anyin a umen uma, me ethö hon haginy taun adre up, ke e ame laba hnyi hon hna up haginy. 16 Ke e ame ha ködru ka habe, Kec d' öbu ka hnyi bucen, wâ e nye úkhanö möbu tavat úhnúhnú; me öbu me lubaduöng eling hnyi kun ta bong, ke ne o but ame hmetu tavat úhnúhnú: ke hwaban e, m' öbu he thö. 17 Me ame ha kâu li at, ka habe, öhmu me he ka gufa hnyi hna khemanyin eang u me kun' öhmun hnyin. 18 Wâ bi, öhmun ka e hnyi hnyei eang, hamâm he ka húkâlâ tö ae dra eang hnyi mamalama u je hn' öhmu hnyin: ke u me he ka úkhacaköuâ unyâm e hnyi hnyabam eang kâmâm me hinyâm, me je liamekeiny möu, me lap hia anyin kâmâm. 19 Ke haba at ame he ka dit kâu ka hnyi gethen únyi hnyi hwanumen umâm uma, me ame he ka takoú ban ge dren bi, ke öhmu me he biju ka gufa: ke haba tavat a tha e möu hnyin uma, ame he ka takoú böhmu ge drödrin, e ka hu at ame he ka hinöbeny ködrin. 20 Ke so bi, u je ne omanená úhehmu eang; me öhmu me he ka gufa hnyi hna khemanyin u je kun' öhmu hnyin. 21 Me haingen, ka habe, Ame he ka helâ me hnöbu hna ha. Ke e ame kun' ödru, me ödru me he: me

e ame húkálá tö ae dra hnyi mamalama. 22 Ke ödrü me he but me o ka hnyi bucen me laba eling hnyi kun ta bong, ke ne o but ame hmetu tavat úhnúhnú: ke adre elöm ödrü hnyi gethen hia ge tavat úhnúhnú, me ödrin e ca wá bi. 23 Ke ame hmetu li at, me utut úheny hon bucen, me hanyáúá me o unyi Josua nöku Nuna; me ödrü me thumeto e ge ta je únyi hia a o ködrü, 24 Ke ödrü me ha kö Josua, ka habe, E hnathu a hia but Iehova hna kötín hnyeí hia; he haba khaca ame köiö hnyekon tavat hia thithö a aten idra hnyeí, únyi gata.

HNYIMAKAN 3.

**K**E Josua ame vesákong, k' adre me he úheny Sitima me he hnyi Joridano, a e me lakon Isaraela hia thithö; ke adre me mokut eling k' ödra tiga ca hanyáúá. 2 Ke hwaban kun ta bong haba ta je homakan ödrin e he hnyi wanben je hna hunuma; 3 ke ödrin e húna ka tavat, ka habe, Öbun ka wá tangen úhíhínykôu anyi Iehova Khongubun, k' ame vadren e tavat bihut, a at Levi, me öbun e he ka köüö úheny hnyi hnöbun, me hnu hoton. 4 Ke so ama lu hnyigölöbun mē, haba tulut me helá me lo li thauzan kubit: k' öbun e ca he ka hakekenyá, m' öbun e he ka wá gethen öbun e he ka vleno; anyin a öbun e tiga ca he hnyi gethen eling ehac. 5 Ke haba Josua ame ha ka tavat, ka habe, Okabi öbun dö, anyin a haba bong nyi me Iehova ame he ka ányá unyibun ta je únyi hnán láíá. 6 Ke Josua ame ha ka tavat bihut, ka habe, Vadren dö tangen úhíhínykôu, me hanyáúá hnyi hnyimakan tavat. Me ödrin e hom tangen úhíhínykôu, me bödrin hnyi hnyimakan tavat. 7 Ke haba Iehova ame ha kö Josua, ka habe, Oge me he ka hwán hnyi bong ang ka oganö u hnyi hnyimakan at Isaraela hia thithö, me me khan' ödra a tha inya möu, heláji me tha inya me Mose. 8 Ke u me he ka húna ka at bihut, tavat ödrin e vadren tangen úhíhínykôu, ka habe, Öbun ka o ka hnyi baten köien Joridano me öbun e he ka todru hnyi Joridano.

9 Ke Josua ame ha ka lakon Isaraela, ka habe, Ai öbun, me löng je hofuc ho Iehova Khongubun. 10 Ke haingö Josua, ka habe, Walang haten m' öbun e he ka wá a e bi unyibun Khong ae möt, k' ame he ka ti obá hnyi hnyimaköbun at Kanana, me

Heth, me Hivi, me Perizi, me Girigasa, me Amora, me Jebusi. 11 Wá bi ame bán ka hanyáúá hnyi hnyimaköbun ka hnyi Joridano, tangen úhíhínykôu anyin Thaniny hmeledrany hia. 12 Anyin a wale öbun e he ka úca tavat a twelv únyi hnyi je tribu anyin at Isaraela, úsa khaca únyi hnyi je tribu. 13 Ke e ka tot hnyi Joridano hnyeúcan je hnyat ödrin e vadren tang anyi Iehova, Thaniny hmeledrany hia, me ame he ka subá luá but köien Joridano, wale únyi hnyi köiö ame di úheny hnyi hwadrö; ke ame he ka tot helá me khölöki: 14 Ke e ka he but tavat úheny hnyi umödrin je uma mano he ka hanyáúá Joridano, ke ame vadren tangen úhíhínykôu hnen tavat bihut hnyi hnyimakan tavat; 15 ke ödrin ka o hnyi Joridano tavat ödrin e vadren tang, ke ka kálá baten köiö hnen li can tavat bihut, hnyat ödrin e vadren tang, (ke Joridano ame öliá je baten hia hnyi úen menu hia,) 16 me ame todru köiö úheny hnyi hwadrö ame görany dö helá me khölöki úsákáúö, hwán Adamu, wale taun cicö Zaretana: ke ame hme köiö ame di ka hnyi köien dok ae tha hon, wale Köiö ae Hiny, ame subá but: me ame he hanyáúá ge tavat cicö Jeriko. 17 Ke ame tot me ca bwebwet tavat bihut, hnyat ödrin e vadren tangen úhíhínykôu anyi Iehova, hnyi dok ae mada, wanben Joridano, ke adre me he hanyáúá hnyi dok ae mada a at Isaraela hia thithö ke ne o but ame hanyáúá Joridano haen tavat hia.

HNYIMAKAN 4.

**K**E adre hia but hanyáúá Joridano hnen tavat hia thithö, haba Iehova ame ha kö Josua, ka habe, 2 U me he ka úca únyi hnyi tavat je hnyat a twelv, úsa khaca únyi hnyi je tribu, 3 ke húna thö ködrin, ka habe, Öbun e he ka hom únyi hnyi wanben Joridano, únyi hnyi dok ame tot hnyin ke ca bwebwet li can hnyat bihut, je veto a twelv, k' öbun e he ka tha hom möbun jio, me ip hnyi dok öbun e he ka mokut hnyin eáu hnyinghet. 4 Ke Josua ame hawá je hnyat a twelv, wale a penapena únyi hnyi lakon Isaraela, úsa khaca únyi hnyi je tribu: 5 ke Josua ame ha ködrin, ka habe, Hanyáúá thö hnyi hnyimakan tang anyi Iehova Khongubun, ka hnyi wanben Joridano, me hom dö úsa khaca veto hon je bajebenyibun, hoton úseiny je tribuiny lakon Isaraela: 6 me me huán

haten eling unyibuny, e ka he lakubun ka hnö nyiele, ka habe, Hnân eú je veto ang? 7 Me öbun e he ka thu ködra, ka habe, Anyin adre subâ luâ köien Joridano hnyi hnyimakan tangen úhinhinköu anyi Iehova : haba hnyi úen e ame hanyâúâ Joridano, me adre subâ luâ köien Joridano : ke haba je veto ang me hnân oúnykúmeâ lakon Isaraela nyiele balua. 8 Ke haba lakon Isaraela adre me ányâ helâ me Josua ame hûna, me ödrin e hom je veto a twelv únyi hnyi wanben Joridano, helâ me Iehova ame ha kö Josua, ke hoton úseiny je tribuiny lakon Isaraela : ke ödrin e tha hom je veto ka hnyi dok adre me he ka mokut hnyin, me ip eling. 9 Ke haba Josua ame hwa je veto a twelv eú hnyi wanben Joridano, hnyi dok ame tot hnyin li can hnyat bihut, hnyat ödrin e vaden tangen úhinhinköu : ke ka eling ke ne o but hnyi bong ang. 10 Anyin a haba hnyat bihut, wale hnyat vaden tang, me ödrin e tot hnyi wanben Joridano, ke ne o but adre umo hia waleji a hûna Iehova kö Josua he ka ha ka tavat, helâ me Mose ame hûna kö Josua : ke haba tavat adre me mweimwei me hanyâúâ. 11 Ke a hia but tavat hia hanyâúâ, me ame hanyâúâ tang anyi Iehova, me tavat bihut minya unyin tavat. 12 Ke ame tha he me je omjehen vat hnyi hnyimakan lakon Isaraela laku Reubena, me laku Gada, me hafiny tribu anyi Manase, helâji me Mose ame ha ködra : 13 Ame ne fâte thauzan adre hia but penapena hnân vat adre me hanyâúú hnyi hnyimakö Iehova, he ka vat, ka hnyi je dok ae tha hon hnyi Jeriko. 14 Ke haba hnyi bong eling Iehova ame oganö Josua hnyi hnyimakan at Isaraela hia thithö ; m' adre me outen e helâ me hnödrin hna outö Mose hnyi ta je bonginy hia anyin möt.

15 Ke Iehova ame ha kö Josua, ka habe, 16 Hunâ thö ka tavat bihut, hnyat ödrin e vaden tangen ohnatho, he ka ölö thö úheny Joridano. 17 Anyin a wale Josua ame hûna ka tavat bihut, ka habe, ölö thö úheny hnyi Joridano. 18 Ke e ka ölö thö tavat bihut hnyat ödrin e vaden tangen úhinhinköu anyi Iehova únyi hnyi wanben Joridano, ke ame uto dok ae mada hnen hnyeúcan hnyat bihut, me ame khutu hmetu but köien Joridano ka hnyi hnen, me öliâ je baten helâ me et. 19 Ke ame ölö tavat úheny hnyi Joridano hnyi bong a teniny tehi a bân, me hunuma hnyi Gilegala hnyi ke keihen e deiöiny Jeriko. 20

Ke haba je veto a twelv wale ödrin e hom únyi hnyi Joridano, Josua ame khon hnyi Gilegala. 21 Ke e ame ha ka lakon Isaraela, ka habe, E ka he lakubun ka hnö je lakamödrin nyiele, ka habe, Hnân eú je veto ang? 22 me öbun e he ka omanená ka lakubun, ka habe, Adre hanyâúâ jem Joridano eang hnen at Isaraela hnyi kânâ ae mada. 23 Anyin a Iehova Khongubun ame ohmö köien Joridano hnyi hnyimaköbun, ke ne e but öbun e hia but hanyâúâ, helâ me Iehova Khongubun ame ányâ ka hnyi Köiö ae Dra, waleji e ame ohmö hnyi hnyimakötin ke ne o but ötin e hia but he hanyâúâ ; 24 me me khana hnen tavat hia thithö eang hmelen ge hnyamö Iehova, ae hwege ; m' adre, me he ka outö Iehova Khongubun nyiele balua.

HNYIMAKAN 5.

**K**E haba je tuhan hia at Amora a ödrin hoton Joridano ke e jio, me je tuhan hia at Kanana hnyi hobat köiö, me ödrin e löng a Iehova ame hia but ohmö köien Joridano hnyi hnyimakan lakon Isaraela ke ne o but ate me hanyâúâ, me ame gâ udrin, ke ba hmetu hwege eú hnyi je hnyekudrin ge lakon Isaraela.

2 Ke Iehova ame ha kö Josua hnyi úen eling, ka habe, Ányâ thö je watagi out m' adre me he ka olo peritomonâ lakon Isaraela. 3 Ke Josua ame ányâ je watagi out me peritomonâ lakon Isaraela hnyi Gibeaaalota. 4 Ke walang can Josua ame peritomonâ : Haba tavat hia adre me o úheny Aigupito, a obaga hia adre me hnyi vat, me adre me mokcu hnyi hnyeubaba eú hnyi gethen, hnyi úhedra Aigupito. 5 Anyin adre peritomonâ tavat hia úhedra Aigupito : ke so bi adre tiga ca peritomonâ tavat hia waleji adre hnokoâ hnyi hnyeubaba eú hnyi gethen hnyi úhedra Aigupito. 6 Anyin a haba lakon Isaraela adre me vheno hnyeubaba fâte je huna, ke ne o but ame hia tavat adre hnyi vat úhedra Aigupito, anyin adre me ca löng hoton hofuc ho Iehova : me Iehova ame khemanyin ködra a g' ame ca he ka omanená ködra hnyei, waleji a khemanyin Iehova ka lakamödra he ka ham köta, wale hnyei ame di ge debai me hani. 7 Ke haba Josua ame peritomonâ lakudra wale tavat adre hnokoâ me hwabödra : anyin adre tiga ca hia but peritomoni ödra, anyin adre ca peritomoni ödra eú hnyi gethen. 8 Ke a hia but peritomonâ tavat

hia thithö, me adre me laba hnyi je hnödra hnyi je hna hunuma ke ne o but ame metu but. 9 Ke haba Iehova ame ha kö Josua, ka habe, Oge hia but ohia hnyi bong ang únyi hnân ohmehma unyibun úheny Aigupito. Anyin a wale adre me hwenyi ien dok eling Gilegala ke ne o but hnyi bong ang

10 Ke ame hunuma hnyi Gilegala lakon Isaraela; ke ödrin e ányâ paseka hnyi bong a fortininy tehi hnyi sahad, hnyi dok ae tha hon hnyi Jeriko. 11 Ke haba nyi ödrin e han jeúiny kânâ hwaban paseka, je ong areto adre ca levenâ bi, me hwit adre le, hnyi bong a ka e. 12 Ke nyi, e ba hmetu mana hwaban hnödrin hna han jeúiny hnye; ke ba hmetu bi mana ka lakon Isaraela; ke ödrin e han wan hnye Kanana hnyi huna eling.

13 Ke e Josua hnyi Jeriko, me e ame bwele me wâ, ke wâ bi, ame tot cicö e at ame tot me hele vat adre oc hnyi hnyamen: ke haba Josua ame he kâu me ha kâu, ka habe, U me tha hiâm möhmun, hawa, me je iwahnaihmiony möhmun? 14 Ke e ame thu, ka habe, E ha, anyin a oge o hnân taben je utbavat anyi Iehova. Ke Josua ame ta ju hnyikânâi, me nom ju, me ha kâu, ka habe, Ieú hofuc hwan tuhök ka athnyabainy? 15 Ke haba taben je utbavat anyi Iehova, ame ha kö Josua, ka habe, Uny jut tangen hnyeucam únyi hnyi li cam, anyin ae kap utkânâ e u me tot hnyin. Ke Josua ame ányâ helâe.

HNYIMAKAM 6.

(**K**E ame ti thelöng hwegiâ Jeriko can lakon Isaraela: e ba at ame didrut, ke ba at ame didrö.) 2 Ke Iehova ame ha kö Josua, ka habe, Wâ bi, oge hia but ham ka hnyi hnyamâm Jeriko, me thaininy, me je taben tavat ae hwege. 3 Ke öbun e he, tavat a hnyi vat hia, ka igigilö taun, me okhaca he igigilö taun. U me he ka ányâ helâe hnyi je bong a siks. 4 Ke ame he tavat bihut a seven ka hom tilâ je trutruiny jubeli hnyi hnyimakan tang: ke haba hnyi bong a seveniny, hamöbun he ka oseven he igigilö taun, ke ame he tavat bihut ka tûâ tilâ je trutru. 5 Ke eka beú but hna tûâ trutruiny jubeli, ke öbun ka löng ut ifuciny trutru me ame he tavat ka kuku hwege: me ame he ka ü but hagininy taun adre up veten, me me ve ölö thö tavat hia thithö hnyi hnyimaködra. 6 Ke haba Josua nöku

Nuna ame hawâ tavat bihut, me ha ködra, ka habe, Hom dö tangen úhinyköu, ke hamen hnyat bihut a seven ka hom tilâ je trutruiny jubeli a seven hnyi hnyimakan tang anyi Iehova. 7 Ke e ame ha ka tavat, ka habe, He th' öbun me igigilö taun, ke bân hnyat adre hom omjehen vat, hnyi hnyimakan tang anyi Iehova. 8 Ke a hia but Josua ha ka tavat, me ame he hnyat bihut a seven ke ödrin e hom tilâ je trutruiny jubeli a seven hnyi hnyimakö Iehova, me tûö trutru tot: k' ame he hotudrin tangen úhinyköu anyi Iehova. 9 Ke ame bân tavat adre me hom omjehen vat hnyi hnyimakan hnyat bihut ödrin e tûâ je trutru, ke ame he hoton tang obiny bunyen, ke adre me tûö trutru tot. 10 Ke Josua ame ha ka tavat, ka habe, Ca he öbun ka hongot, k' adre me ca he ka löng ifucibun, ke so ame ca o ke ong hofuc únyi hnyi hnyimöbun, ke ne o but bong oge me he ka kun' öbun ka kuku: me waleling öbun e he ka kuku. 11 Me e ame kunâ he ka igigilö taun ge tang anyi Iehova, k' adre me okhaca igigilö; me adre me hmetu ka hnyi hna hunuma, me mokut eling.

12 Ke Josua ame vesâ hnyi hnyomakatu, kehnyat bihut ödrin e hom tang anyi Iehova. 13 Ke haba hnyat bihut a seven, me ödrin e hom tilâ je trutruiny jubeli a seven hnyi hnyimakan tang anyi Iehova, ödrin e he bala me tûö trutru tot, k' ame bân tavat adre hom omjehen vat; k' ame he hoton tang anyi Iehova obiny bunyen, me tûö trutru tot. 14 Ke hnyi bong a loiny ödrin e okaca he igigilö taun, me hmetu ka hnyi hna hunuma: ke adre me ányâ helâe hnyi je bong a siks. 15 Ke haba hnyi bong a seveniny me adre me vesâ hnyi okubelit me he igigilö taun helâ me hwakecin úhedra, ke ne o but oseveniny: ke haba hnyi bong thibi eling me adre me oseven he igigilö taun. 16 Ke haba hnyi úen a seveniny, k' ame tûö trutru hnyat bihut, me haba Josua ame ha ka hnyat bihut, ka habe, Kuku thö; anyin a hia but Iehova ham köbun taun. 17 K' adre me he ka ke ip taun, me ta je únyi hia eú hnyin hobi kö Iehova: ke Rahaba thiju momo hnyi gethen a g' ame he ka möt, e me hnyat bia thithö unyin hnyi uma, anyin a e ame ikhâlâ li metâ ötin e kunâ. 18 Ke öbun e he ka tu' öbun bi ge ta je omjeú ae kap; wâ öbun nye hia but ke ip, me hom únyi adre ke ip; me ham hnaúhangö ka lap anyin at Isaraela hia, me okongoá e. 19 Ke

haba je sileva hia me gol, me je kaia bras me fao, adre me okabâ kö Iehova: adre me he ka oâ ka hnyi tang omjehe Iehova. 20 Ke ame kuku tavat, me adre tûâ je trutru: ke ame löng hnen tavat ifucin trutru, me ame kuku hwege tavat göranyai, me ame ü but hna up veto, me ame ve ölö thö tavat ka hnyi taun cici ödrin, me ödrin e hügünâ taun. 21 Me ödrin e ti ohia ta je únyi hia hnyi taun, je baga me momo, me wanakat, me hingat, me bolok, me mamoe, me asina, ge hele vat. 22 Ke Josua ame ha ka li at ödre ecmâkâ hnyei, ka habe, He th' öbu ka hnyi uma umen momo hnyi gethen, me hom but momo mödrin hia thithö a tha ödrin mē, helâ me hnöbu hna khemanyin kâu. 23 Me ame didrö li hidröu li at ecmak, me hum Rahaba kâú, me kamen me hinyen, me je liamekeiny mē, mödrin hia a tha ödrin mē, ke ödrü me hom kâú anyin lap hia; me hn' ödrin ka hnyi hoton hna hunuma anyin at Isaraela. 24 Ke ödrin e thong taun ge meic, me ta je únyi hia eú hnyin: ke haba sileva me gol, me bras, me fao, ödrin e ip hnyi tang omjeü hnyi uma umö Iehova. 25 Ke Josua ame omeli Rahaba momo hnyi gethen, me lap anyin kamen, mödrin hia a tha ödrin mē; ke e ame laba hnyi Isaraela ke ne o but hnyi bong ang; anyin a e ame ikhâlâ li metâ waleji Josua ame kunâ he ka ecmâkâ Jeriko. 26 Ke haba Josua ame ha hwegiâ ködra hnyi úen eling. ka habe, Hnaúhangö hnyi hnyimakö Iehova at ame he ka tot me op hmeto taun eang Jeriko: e ame he ka bi taben e ge imekeiny nokon a atö, me otílâ je homagöuleny ge imekeiny nokon a wakeiat hmönyin. 27 Ke tha Iehova me Josua, me ame lung hnyi hnyei hia.

HNYIMAKAN 7.

**K**E kong hwakecin lakon Isaraela hnyi únyi adre nyiboâ: anyin a haba Akana nöku Karemi, nöku Zabedi, nöku Zera, únyi hnyi tribu Juda, ame hom ke je únyi adre nyiboâ; me ame ubâhlâ hmonyin anyi Iehova ka lakon Isaraela.

2 Ke haba Josua ame kunâ ke je hnyat úheny Jeriko Ai ai, wale ae hakekeny Bethaven, hnyi ke keihen Beth-ela ke deiö, me ha ködra, ka habe, He th' öbun me ecmâkâ hnyei. Me ame he je hnyat me ecmâkâ Ai. 3 Ke ödrin e hmetu kö Josua me ha kâu, ka habe, U ma ca kunâ tavat hia thithö he ka he, ke so ame ne lo li thauzan tavat, ame ne

kun ta thauzan he ka kot Ai; ke ca he ka ohuliwan tavat hia thithö, anyin a ödrin wakbalet. 4 Waleling me ame he kâ e helâ me kun ta thauzan tavat: ke ödrin e kec ge at Ai. 5 Ke haba at Ai ödrin e kot thöte siks ta hnyat gadrin: ke ödrin e hnu ödrin hwân hnyi homagöule ke ne o but ka hnyi Sebarima me kuc ödrin hnyi hna utut: me ame oköiö je hnyekon tavat me me helâ me köiö. 6 Ke haba Josua ame kia anyin je úkhaú, me ta but hnyikânâi hnyi hnyimakan tang anyi Iehova ke ne o but sahad, a e me wahingatiny Isaraela; ke ödrin e ip dröu hon je bödrin. 7 Ke Josua ame ha, ka habe, Ekölö Than Iehova, ieú gam u je hom tavat eang he ka hanyâúâ Joridano, m' u me he ka hn' öhmun ka hnyi hnyamen at Amora, he ka ohí' öhmun? e na sekuhmun he ka laba hnyi ke kheihen Joridano e deiö! 8 Than lö oge me he ka ha ieú, anyin a hia but lakon Isaraela wia judrin ka ta je iwahnaihmöny mödrin! 9 Anyin ame he at Kanana ka löng, me ödrin hia tavat adre me labâ hnyei, m' adre me he ka igigili öhmun me subâ degecâ iöhmun únyi eang hmelen: ke ieú u me he ka ányâ hobi kâu iam ae gan? 10 Ke Iehova ame ha kö Josua, ka habe, Höhöi thö; ieú gam u me mokut hnyimâm hnyikânâi belâe? 11 E kong hwakecin at Isaraela; anyin a ödrin e hia but hanyâúâ anyik úhinyköu waleji oge hûna ködrin: ke ödrin e hia but hom únyi adre nyiboâ me venöu me iyawö minya, me ödrin e hia but ip e me je omjedrin. 12 Anyin a wale e ca khana lakon Isaraela he ka tot hnyi hnyimakan je iwahnaihmöny mödrin, ödrin e wia je judrin ka je iwahnaihmöny mödrin, anyin a ödrin e hnaúhangö but: ke oge me ca he hmetu ka tha e möbun, öbun e ne ca degec únyi adre hake ip unyibun. 13 Höhöi thö me okabâ thö tavat, me ha, ka habe, Okabi öbun dö hobi kâu nyi: anyin a walang ame ha Iehova Khongu Isaraela, ka habe, Isaraela lö, e hu únyi adre nyiboâ unyâm: ke ca khanö u he ka tot hnyi hnyimakan je iwahnaihmöny möu, ke ne o but öbun e hom degecâ únyi adre hake ip unyibun. 14 Ke adre me he ka hum öbun nyi, hoton anyibun je tribu; ke haba tribu ame he Iehova ka kú ame he ka he jem hoton je lap; ke haba lap ame he Iehova ka kú, me ame he ka he jem hoton je uma, ke haba uma ame he Iehova ka kú me ame he ka he jem ke at me ke at. 15 Ke haba at adre me hom ke e unyin

finyi adre hake ip, me adre me he ka thong degecâ e ge meic, e me anyin ta je únyi hia : anyin a e ame hia but hanyâúâ úhihi-nykôu anyi Iehova, ke can e ame hwen monu hnyi Isaraela.

16 Ke haba Josua ame vesâ hnyi hnyomakatu, me hom hakekenyâ at Isaraela hoton anyidrin je tribu ; me adre me kú tribu anyi Juda : 17 ke e ame hom lap anyi Juda ; me e ame hom lap anyin at Zera ; me e ame hom lap anyin at Zera ke at me ke at ; ke adre me kú Zabedi ; 18 ke e ame hom umen uma ke at me ke at ; me ame kú Akana nöku Karemi, nöku Zabedi, nöku Zera, únyi hnyi tribu Juda. 19 Ke haba Josua ame ha kö Akana, ka habe, Nökuk lö, ö u na he ka oganö Iehova Khongon at Isaraela, me haimemenâ kâu ; ke ha könnya walang ang únyi u je hia but ânyâ ; ca he ka ikhâlâ gak. 20 Ke haba Akana ame thu kö Josua, ka habe, E hnathu e kong hwakecik hnyi hnyimakö Iehova Khongon at Isaraela, ke oge hia but ânyâ helâng me helâng : 21 haba hnyi úen oge me wâ únyi hnyi je únyi adre húgúnâ ke úkhaúiny Sinara ae so, ke lo li haded je sekel sileva, ke ong gol a fite je sekel, me oge me behnyekon me hom ta je únyi e ; ke wâ bi adre ikhâlâ hnyi wanben umök uma mano hnyi kânâ, ke eú hmelen e je sileva. 22 Ke Josua ame kunâ tavat, ke ödrin e wadring ka hnyi uma mano ; ke wâ bi adre hia but ikhâlâ hnyi umen uma mano, ke eú hnyi hmelen e je sileva. 23 Ke ödrin e hom ta je ânyi e únyi hnyi uma mano, me hom kö Josua, me lakon Isaraela hia ; ke ödrin e ip hnyikânâi hnyi hnyimakö Iehova. 24 Ke haba Josua me lakon Isaraela hia, adre me hum Akana, nöku Zera, me sileva, me úkhaú, me ong gol, me lakon бага me hlu, me haleny je bolok, me haleny je mamoe, me umen uma mano, me anyin ta je únyi hia thithö, ke adre me hum odrin ka hnyi hnyigöulen bucen Akora. 25 Ke haba Josua ame ha, ka habe, Ieú gam u me oveci öhmun ? ame he Iehova ka oveci u hnyi bong ang. Me haba at Isaraela hia adre me lúâ e ge veto ; ke ödrin e thong degeci ödrin ge meic, me lu' ödrin ge veto. 26 Me adre me khon gánâ je veto ethö hon, a wale bi e ke ne o but hnyi bong ang ; me haba Iehova ame hwiö únyi hnyi anyin hmönyin ae hwege. Anyin a wale adre me hwenyi ien dok eling, me, Hnyigöulen bucen Akora ke ne o but hnyi bong ang.

HNYIMAKAN 8.

**K**E haba Iehova ame ha kö Josua, ka habe, Ca ot bi me öbubuny : ke tha hom dö tavat vat hia thithö möu, ke höhöi thö me he Ai ai : wâ bi oge hia but ham ka hnyi hnyamâm thaniny Ai, me lakeiny, me anyin taun, me iny hnyei : 2 ke u me he ka ânyâ ka Ai me thaniny, helâ me hnâm hna ânyâ ka Jeriko me thaniny : ke so je omjeúiny me je menoiny öbun e he ka hom hobi köbun bi : u me he ka ip mokut ke je aten vat hoton e. 3 Me ame höhöi thö Josua me tavat vat hia thithö, he ka he Ai ai : ke Josua ame úca thöte thauzan tavat, je hnyat ae hwege vat, me kun' ödrin hnyi hnyinghet. 4 Ke e ame húna ködrin, ka habe, Wâ bi, öbun e he ka khöu mokut hnyi taun, wale hoton taun : ca úsâ-kâúö me taun, ke öbun e he hia thithö ka laba penapena : 5 ke haba inya, me tavat hia thithö unyik ame he ka he hakekenyâ taun : ke ödrin ka he ka didrut köhmun he ka vat helâ me a bân, öhmun e he ka kâcâ anyidrin vat : 6 ke ödrin e he ka hnu hotu-hmun ke ne o but öhmun e hia but lili ödrin úheny hnyi taun ; anyin ödrin e he ka ha, ka habe, Ödrin e kec gatin, helâ me vat a bân ; me öhmun e he ka kec hnyi hnyimaködrin : 7 ke öbun e he ka utut únyi hnyi hna khöu mokut, me húgúnâ taun : anyin ame he Iehova Khongubun ka hna e ka hnyi hnyamöbun. 8 Ke öbun ka hia but húgúnâ taun, öbun e he ka thöng degecâ e ge meic ; öbun e he ka ânyâ hoton hofuc ho Iehova : wâ bi, oge hia but húna köbun. 9 Ke Josua ame kun' ödrin : ke ödrin e he ka hnyi dok hnân khöu mokut hnyin, me laba wanben Bethela me Ai, hnyi ke keihen e jio Ai : ke Josua ame mokut hnyi lit eling unyin tavat.

10 Ke Josua ame vesâ hnyi hnyomakatu, me úkhacaköúâ tavat, me he hnyi hnyimakan tavat Ai ai e me je hingatiny at Isaraela. 11 Ke ame he tavat hia thithö wale vat unyin ka hakekenyâ, me o hnyi hnyimakan taun, me hunuma hnyi ke keiben Ai ka hnyi hwadrö : ke e hu hnyigöulen bucen hnyi wanbödrin me Ai. 12 Ke e ame hom helâ me faiv thauzan tavat me ip duöngi ödrin hnyi wanben Bethela me Ai, hnyi ke keihen taun ke e jio. 13 Waleling, adre me ip tavat, a utbavat hia hnyi ke keihen taun ka hnyi hwadrö, ke haba tavat adre me ip duöngâ me ödrin e laba hnyi ke



keihen taun ke e jio: ke haba Josua ame he hnyi hnyigöulen bucen hnyi lit eling. 14 Ke a wâ e than Ai, me ödrin e mwei-mwei me vesâ, ke ame utut aten taun ka at Isaraela he ka vat, a e me lakeiny hia, hnyi üen adre thu, ka hnyi ke dok cicö hnyebuba; ke ca khana a g' ame hu tavat adre me mokut duöng kâu hnyi hoton taun. 15 Ke haba Josua me at Isaraela hia thithö me adre me kec iyawö hnyi hnyimaködrin, ke adre me kec hnyi gethen üheny hnyi hnyebuba. 16 Ke adre me hawâ tavat hia thithö hnyi taun he ka hnu ödra; ke adre me hnu Josua, me adre me ok ut üheny hnyi taun. 17 Ke ba at biju hnyi Ai me Bethela a ca hnyi he hoton at Isaraela; ke adre me hna taun adre khöng, me hnu at Isaraela. 18 Ke Iehova ame ha kö Josua, ka habe, Inâ but ö hnyi hnyamâm hon Ai; anyin a oge me he ka hnu e köu. Me Josua ame inâ ö hnyi hnyamen hon taun. 19 Me ame ie köüö mokut üny hnyi hnödrin hnyi üen e ame inâ hnyamen, k' ödrin e wadring me dit ka hnyi taun, me hügünâ; ke ödrin e logot he ka thong taun ge meic. 20 Ke ame hwiö at Ai me wâ, k' adre me bwele, me wâ bi, ame sâ hnyi drany ai hainy taun, ke ba mangadra he ka kec ka hnyi ke keihen e me ke keihen ang: k' ame hmetu tavat kec hnyebuba ai ka tavat ühnühnü. 21 Ke haba hnyi üen Josua ame wâ me at Isaraela hia a g' ame hia but hügünâ taun hnen mokut, ke ame sâ göranyai hainy taun, me adre me hmetu me kot at Ai. 22 Ke haba ke keihen tavat ödrin e didrut ködrin üheny hnyi taun; me ödrin bi hnyi wanben at Isaraela, keihen hnyi ke keihen, ke keihen hnyi ke keihen: ke ödrin e kuc ödrin me ame ba but thelidrin me at ame kec möt. 23 Ke ödrin e hom melö thaniny Ai, me hom e kö Josua. 24 Ke a hia but at Isaraela kot at Ai hnyi hnyei, hnyi hnyebuba wale adre me hnu ödra hnyin, ke adre me ta hia ge hele vat, me ohî ödra, me ame hmetu Ai ai at Isaraela hia thithö, me kot e ge hele vat. 25 Ke ödra, twelv thauzan tavat hia obaga me omomo a're ta hnyi bong eling, wale aten Ai hia thithö. 26 Anyin a Josua ame ca thu benyin ge hna inâ ö, ke ne o but adre hia but ohia at Ai hia thithö. 27 Ke so bi haba at Isaraela adre me hom hobi ködra bi je meno me tang onjeüiny hnyei eling, helâ me hofuc ho Iehova e ame hûna kö Josua. 28 Me Josua ame thong degecâ Ai, me wia e hnân

ve ta ünyi nyiele balua; me oba wan ke ne o but hnyi bong ang. 29 Ke e ame uhno thaniny Ai hon üö ke ne o but hnyi sahac: ke hnyi üen ame didrut seünö Josua ame úkhünöng he ka hom but huyikânâi unyin ünyi hnyi üö, me khûâ e hnyi homagöuleny taun, me khon veten hon e ae gan hmâ, ke ne o but hnyi bong ang.

30 Ke haba Josua ame otilâ taben hut kö Iehova, Khongon at Isaraela, hnyi bucen Ebala, 31 helâji me Mose athnyabai Iehova ame hûna ka at Isaraela, helâ me hna sihnalimen hnyi tusiny hnanyibu anyi Mose, ka habe, Taben hut je veto ae bekhöt, adre ca inâ göranyai utfao hon: ke ödrin e hudo hon e je hudiny leü kö Iehova, me hudo je hudiny úsoköu. 32 Ke e ame sihnalimen hon je veto eling hna oc hnanyibu anyi Mose, waleji e ame sihnalimen hnyi hnyimakan lakon Isaraela. 33 Ke haba at Isaraela hia, me wahingaidrin, me anyidrin je taben, me anyidrin je hnyat owisa, ödrin e útítilen hnyi li baten tang hnyi hnyimakan hnyat bihut a at Levi, wale hnyat ödrin e vaden tangen úhihi-nyköu anyi Iehova, a je atkanyua tha ödrin me tavat adre hnoköâ hnyi hnyei; haba ke keihen a hafiny adre me tot cicö bucen Gerizim, ke ke hafiny cicö bucen Ebala; helâji me Mose a athnyabai Iehova ame hûna, m' adre me he ka bödrin ka ha hnahicâ hnyei Isaraela. 34 Ke hwaban e me e ame aú hofuciny hnanyibu hia, wale hnahic me hnaúhangö, helâ ma hna sihnalimen hia hnyi tusiny hnanyibu. 35 E ba ke ong hofuc a hûna Mose a ga ca aú bi Josua hnyi hnyimakan úkhacaköu anyin at Isaraela hia thithö, a tha ödra me omomo, me tavat ae úhnyükong, me je atkanyua hnyat adre imetenyimwi mödra.

#### HNYIMAKAN 9.

**K**E haba je than hia ödrin e löng, wal' ödrin hnyi ke keihen Joridano e jio hnyi je bucen me hnyei ae ca hut, me hnyi hobat köien köiö ae gan hia cicö Iebanona, wale at Heth, me Amora, me Kanana, me Perizi, me Hivi, me Jebusi; 2 me ödrin e úkhacaköu he ka tot metâ kö Josua me at Isaraela hnyi hnyok a khaca.

3 Ke a löng at Gibeona ünyi a ânyâ Josua ka Jeriko me Ai, 4 me ödrin e huliwa iyawö, k' ödrin e úcúcúbongoâ hnyat metâ, me hom je tang ae bobot hon haledrin je asina, me je tangen waina ae bobot ut,

ke khekke, ke adre ca ; 5 ke bobot ut me hna tibet hmetu je tangen hnyeúcadrin, k' ödrin e khavâ je úkhaú ae bobot ut ; ke meleca but me om but jeúiny kamejidrin hia. 6 Me ödrin e he kö Josua hnyi hna hunuma e Gilegala, k' ödrin e ha kâu, me at Isaraela, ha habe, Çhehmun hnyi hnyeí ae sâkâú : ke walang ang e so öbun e ányâ úhíhínykôu möhmun. 7 Ke haba at Isaraela adre me ha ka at Hivi, ka habe, Hawa la, öbun e ne tha laba unyihmun, ke öhmun e he ka kâmâu ka úhíhínykôu möbun? 8 Me ödrin e ha kö Josua, ka habe, Öhmun lathnyabaem. Ke haingö Josua ködrin, ka habe, Öbun ie je hnyat? k' öbun je hnyat ua? 9 Me ödrin e ha kâu, ka habe, Çhehmun hnyi hnyeí ae ti sâkâú lathnyabaem can iö Iehova Khongom : anyin a öhmun e hia but löng úlunginy, me hnen hna ányâ hia hnyi Aigupito, 10 me je únyi hia e ame ányâ ka li thaniny at Amora, wale hoton Joridano, kö Sihona than Hesebona, me Oga than Basana hnyi Aseterötha. 11 Ke ame ha köhmun wahingatihmun, mödrin hia aten ihmun, ka habe, Bi kamejibun hobi kâu he, me he thö me úkhanö mödra, me ha ködra, ka habe, Öhmun lathnyabai-bun : ke walang ang e so öbun e ányâ úhíhínykôu möhmun. 12 Waleú kamejihmun öhmun e hom ke tiga kabwa únyi hnyi umöhmun je uma hnyi bong öhmun e to-drö hnyin he ka he köbun ; ke walang ang, wâ bi, e meleca thö me om but : 13 me je tangen waina eang a teb únyi öhmun e ounöngötâ ; ke wâ bi, e khekke but : ke bobot ut je khaúhmun eang me je tangen hnyeúcáhmun únyi hnyi gethen ae sâkâú. 14 Me ame köp ödrin hnen tavat ge je kamejidrin, ke ödrin e ca hnö unyi Iehova. 15 Ke haba Josua ame ányâ úsoköu mödrin, me úhíhínykôu mödrin, me ödrin e möt : me ame khemanyin ködrin hnen je taben úkhacaköu. 16 Ke hnyi kun ta bong hwaban hna úhíhínykôu mödrin, ödrin e löng a tavat ae hakekeny ködrin, me tavat adre me laba unyidrin. 17 Ke haba lakon Isaraela ödrin e he me o hnyi anyidrin je taun hnyi bong a kuniny. Ke waleú anyidrin je taun, me Gibeona, me Kefira, me Berotha, me Kiriatha-jarim. 18 Ke a ca kac ödrin hnen lakon Isaraela, anyin a hia but khemanyin ködrin hnen je taben úkhacaköu, me haiö Iehova Khongu Isaraela. Ke ame ulidró je taben hnen úkhacaköu hia. 19 Ke ame ha hnen je taben hia ka úkhacaköu hia, ka habe, Öhmun e hia but

khemanyin ködrin me haiö Iehova Khongu Isaraela : anyin a wale, e ca khan' öhmun he ka kal' ödrin. 20 Walang únyi ötin e he ka ányâ ködrin, me omeli ödrin ; wâ e nye takú öta ge hmönyin, can hnöta hna khemanyin ködrin. 21 Me ame ha ködra je taben, ka habe, Hn' ödrin ju he ka möt, m' ödrin e bi hnyat höcö me hnyat söú köiö hobi kâu úkhacaköu hia, helâ me je taben ame ha ködrin. 22 Me Josua ame haw' ödrin, me ha ködrin, ka habe, Ieú gabun öbun e iyaw' öhmun, ke ha, ka habe, Öhmun úsâkâúö hmönyin möbun ; ke öbun e tha laba bi möhmun? 23 Ke walang ang e hu gabun úhangö, ke ba ke at gabun adre me ca he ka thaluâ he ka höcö, me söú köiö hobi kâu uma umen Khonguk. 24 Ke ödrin e thu kö Josua, ka habe, Adre me ha hnathoâ ka lathnyabaem a Iehova Khongom ame húna kö Mose a athnyabainy he ka ham köbun hnyeí hia thithö, me he ka ohia aten hnyeí hnyi hnyimaköbun, anyin a wale öhmun e ot gan hmâ me bemöt gabun, waleling m' öhmun e ányâ únyi e. 25 Ke haba walang ang wâ bi öhmun ang hnyi hnyámâm : ányâ thö köhmun helâ me u je únykúme so me wisa he ka ányâ. 26 Me e ame ányâ helâe ködrin, me omeli ödrin únyi hnyi hnyamen lakon Isaraela, m' adre me ca hling' ödrin. 27 Ke haba Josua ame wi' ödrin hnyi bong eling mödrin e he ka tavat höcö me seköiö hobi kâu úkhacaköu, me hobi kâu taben hut kö Iehova, ke ne o but hnyi bong ang, hnyi dok e ame ke ka úca.

HNYIMAKAN 10.

**K**E Adoni-zedeka thaniny Jerusalema ame löng a ga hia but Josua húgúnâ Ai, ke ohia e ; ke ame ányâ ka Ai me thaniny helâji me hnen hna ányâ ka Jeriko me thaniny ; ke a hia but tavat aten Gibeona úsoköu me at Isaraela m' ödrin e tha laba unyidra ; 2 me ödrin e ot gan hmâ, anyin a haba Gibeona me wale taun ae gan hmâ, helâ me ke taun ame labâ than, ke beönua e hon Ai, ke e hwege obagainy hia thithö. 3 Anyin a wale Adoni-zedeka than Jerusalema ame úkhúnöng kö Hoham thaniny Heberona, me Pirama thaniny Jamuth, me Jafia thaniny Lakisa, me Debira thaniny Egelona, he ka ha, ka habe, 4 Ai öbun könya, me hadruö nya, me ötin e he ka kot Gibeona : anyin a e ame hia but úsoköu me Josua me lakon Isaraela.

## JOSUA 11.

5 Anyin a wale ame úkxacaköu thö je thaniny Amora a faiv, wale thaniny Jerusalema, me thaniny Heberona, me thaniny Jamuth, me thaniny Lakisa, me thaniny Egelona, me he thö, ödra me anyidra je utbavat hia thithö, me hunuma cicö Gibeona, me vat mē. 6 Ke haba at Gibeona ödrin e úkhünöng kö Josua hnyi hna hunuma Gilegala, me ha, ka habe, Ca he ka hn' öhmun lathnyabaem; ie he thö jem köhmun, me omeli öhmun, me hadru' öhmun: anyin a hia but úkxacaköu köhmun je thaniny hia thithö at Amora, tavat ödrin e laba hnyi je bucen. 7 Me Josua ame he úheny Gilegala, e me je aten vat hia thithö, me je taben tavat ae hwege hia. 8 Ke haba Iehova ame ha kö Josua, ka habe, Ca ot gadra: anyin oge hia but hn' ödra ka hnyi li hnyamám; ke ame ca he ke at gadra ka tot hnyi hnyimákâm. 9 Anyin a wale, Josua ame o outhmoki ödra; e ame he úheny Gilegala hnyi lit ae bekhöt. 10 Ke haba Iehova ame ohmaki' ödra hnyi hnyimakan at Isaraela, me kuc ödra, ke gan hmâ hna kuc ödra hnyi Gibeona, me hnu ödra til' ödra hnyi gethen ame ölö Bethe-horona ai, me kuc ödra ke ne o but Azeka, me Makeda. 11 Ke adre ödrin me kec ge at Isaraela ke adre me tiga he hnyi hna utut Bethe-horona, me Iehova ame khûâ hudrin je veto ae gan únyi hnyi drany ke ne o but Azeka, me adre me mokcu: ke se hia tavat a mokcu ge je veto, wale we ae wahma, ke wakhalet thibi haniny lakon Isaraela ge hele vat.

12 Ke Josua ame ha hofuc kö Iehova hnyi bong Iehova ame hna at Amora hnyi hnyimakan lakon Isaraela; ke e ame ha hnyi hnyimakan at Isaraela, ka habe,

Seúnö lö, todru u hon Gibeona;

Me u Tehi hnyi hnyigöulen bucen Aijalona.

13 Me ame todru seúnö, ke ame todru tehi,

Ke ne o but hnyei ame bi hwaban ka ta je iwahnaihmiöny.

Hawa, adre ca sihnalimen e hnyi tusi Jaserá? Haba seúnö ame tot hnyi wanben drany, k' ame ca logot bi he ka dit helâke bong ae bekhöt. 14 Ke ba ke bong helâe ehac ke hwaban e, wale Iehova ame löng ifucin at: anyin a Iehova ame vat hobi kân at Isaraela.

15 Ke haba Josua me at Isaraela hia adre me tha hmetu ka hnyi hna hunuma Gilegala.

16 Ke ame kec je than eling a thabúng me lubaduöng hnyi op e Makeda. 17 Ke adre me thumetu Josua, ka habe, Adre wâ je than a thabúng ödrin e lubaduöng hnyi op e Makeda. 18 Ke Josua ame ha, ka habe, Tetebulo but je veto ae gan ka hnyi hnyimen op, ke kunâ tavat he ka tu' ödrin: 19 ke ca bec öbun; hnu je iwahnaihmiöny möbun, me kot tavat wale a bilidra; ca hn' ödra bi he ka dit ka hnyi anyidra je taun: anyin a Iehova Khóngubun ame hn' ödra köbun. 20 Ke a um dö kuc ödra Josua me lakon Isaraela, ke gan hmâ hna kuc ödra ke ne o but ame ba but, ke haba kolon ödrin e dit ka hnyi je taun adre up haginny, 21 me ame hmetu tavat hia ka hnyi hna hunuma kö Josua hnyi Makeda, hnyi hnahic: ke ame ca bwebwet bohmen ke at ka lakon Isaraela. 22 Ke Josua ame ha, ka habe, Khöng ut hnyimen op, ke hom jem könya je than eling a thabúng únyi hnyi op. 23 Me adre me ányâ helâe me hom kâu je than eling a thabúng, únyi hnyi op, a than Jerusalema, me than Heberona, me than Jamuth, me than Lakisa, me than Egelona. 24 Ke ödrin e hia but hom kö Josua je than eling a thabúng, me haba Josua ame hawâ at Isaraela hia thithö, me ha ka je taben vat a tha he mē, ka habe, Ai öbun jem me uto ju nyin je than eang. Me ödrin e he me uto je nyidrin. 25 Ke haingö Josua ködra, ka habe, Ca ot bi, ke ca öbubuny; hwege thö me hnyok бага but öbun; anyin ame he Iehova ka ányâ helâe ka je iwahnaihmiöny hia thithö möbun tavat öbun e vat mödrin. 26 Ke hwaban e Josua ame kuc ödrin me hling' ödrin, me uhni ödrin hon je úö a thabúng: me ödrin e uhni hon je úö ke ne o but sahac. 27 Ke ame he bi seúnö ka dit, me haba Josua ame húna, m' adre me hum ödrin hnyikânâi únyi hnyi je úö, me khu' ödrin ka hnyi op, wale ödrin e lubaduöng hnyin, me ip je veto ae gan ka hnyi hnyimen op ke ne o but hnyi bong ang.

28 Ke Josua ame hügúnâ Makeda hnyi bong eling, me kot e ge hele vat, me thaniny e; e ame ti ohí' ödrin me tavat hia thithö hnyin, e ame ca hna bi ke kolon a khaca: ke e ame ányâ ka thaniny Makeda helâ me hnen hua ányâ ka thaniny Jeriko.

29 Ke Josua ame tha he me at Isaraela hia thithö, úheny Makeda, Libena ai, me vat me at Libena: 30 ke Iehova ame hna minya e me thaniny e ka hnyi hnyamen at Isaraela; ke e ame kot e ge hele

vat, me tavat hia thithö hnyin; me ba kolon biju; ke e ame ânyâ ka thaniny e, helâ me hnen hna ânyâ ka thaniny Jeriko.

31 Ke Josua ame tha he me at Isaraela hia thithö ûheny Libena, Lakisa ai, me hunuma cicö e, me vat mē: 32 ke Iehova ame hna Lakisa ka hnyi hnyamen at Isaraela, me e ame hûgûnâ e hnyi bong a loiny, me kot e ge hele vat, me tavat hia thithö hnyin, helâ me hnen hna ânyâ ka Libena.

33 Me ame he but Horema thaniny Gezera he ka hadruâ at Lakisa; ke haba Josua ame kot e me lakeiny ke ne o but ame ba but kolon.

34 Ke Josua ame tha he me at Isaraela hia ûheny Lakisa, Egelona ai; me hunuma cicö e, me vat mē: 35 ke ödrin e hûgûnâ e hnyi bong eling, me kot e ge hele vat, ke e ame ohia tavat hia thithö hnyin hnyi bong eling helâji me hnen hna ânyâ hia ka Lakisa.

36 Ke Josua ame tha he me at Isaraela hia thithö ûheny Egelona, Heberona ai, me vat mē: 37 ke ödrin e hûgûnâ e, me kot ge hele vat, me thaniny, me je tauniny hia, me tavat hia hnyin; e ame ca hna but kolon, helâji me hnen hna ânyâ hia ka Egelona: ke e ame ti ohia e me tavat hia thithö hnyin.

38 Ke haba Josua ame tha hmetu me at Isaraela hia Debira ai; me vat mē: 39 ke e ame hûgûnâ e, me thaniny, me je tauniny hia thithö; ke andre me kuc ödrin ge hele vat, me ti ohia tavat hia thithö hnyin; e ame ca hna but ke kolon: helâji me hnen hna ânyâ ka Heberona, helâe minya e ame ânyâ ka Debira me thaniny; ke helâji me hnen hna ânyâ ka Libena me thaniny.

40 Me haba Josua ame kot huyei hia ae hu buceniny, me hnyi Hwaiöu, me hnyei ae ca hut, me je hwatapkölu, me je thaniny hia thithö; e ba kolon e ame hna: ke e ame ohia ta je ûnyi hia ae hu homenâ, helâji me Iehova Khongon at Isaraela ame hûna. 41 Ke haba Josua ame kuc ödra hwân Kadesi-banea ke ne o but Gaza, me hnyei hia hnyi Gosena ke ne o Gibeona. 42 Ke haba Josua ame hûgûnâ je than eling hia me idrin je hnyei hnyi khaca thibi ûen, anyin a Iehova Khongon Isaraela ame vat hobi kâu at Isaraela. 43 Ke haba Josua ame tha hmetu me at Isaraela hia, ka hnyi hna hunuma e Gilegala.

HNYIMAKAM 11.

**K**E a löng ut Jabin thaniny Hazora, me e ame ûkhûnöng kö Jobab thaniny Madon, me thaniny Simerona, me thaniny Akesafa, 2 me ka je thaniny hnyi hwadrö, wale hnyei ae hut, me dok ae tha hon hnyi Kinereth ke e hwaiöu, me hnyi hnyei ae ca hut, me je dok ae göranyiny Dora e jio, 3 me tavat Kanana e deiö me jio, me at Amora, me Heth, me Perizi, me at Jebusi hnyi je bucen, me at Hivi hmelen Heremona hnyi hnyei Mizepa. 4 Me andre me he but, ödra me anyidrin je utbavat hia thithö, e se hia tavat, helâ me önyin hobat köiö úseiny, me je hos, me je kariota ae se hia. 5 Ke ame ûkbacaköu je than hia thithö eling, me andre me he but me tha hunuma cicö an Meroma, he ka vat me at Isaraela. 6 Ke Iehova ame ha kö Josua, ka habe, Ca he ka out ödra; anyin a nyi hnyi ûen a helâng, oge me he ka hn' ödra hia thithö andre hling' ödra, hnyi hnyimakan at Isaraela: u me he ka sö can haledrin je hos, me le anyidrin je kariota ge meic. 7 Ke haba Josua me tavat hia thithö andre me tha o outhmoki ödra hnyi an Meroma, me utut ködra. 8 Ke Iehova ame hn' ödra ka at Isaraela, me andre me kuc ödra, me hnu ödra ke ne o but Zidona ae gan, ke ne o but Miserefo-maim, me hnyigöulen bucen Mizepa e deiö; me andre me kuc ödra ke ne o but ame ba but kolon. 9 Ke Josua ame ânyâ ködra helâ me Iehova ame ha kâu: e ame sö can haledrin je hos, me le anyidrin je kariota ge meic.

10 Ke haba Josua ame hmetu hnyi ûen eling me hûgûnâ Hazora, me hlingâ thaniny ge hele vat: anyin a Hazora me wale ban je dökhü eling hia thithö ehac. 11 Ke andre me kot tavat hia thithö hnyin ge hele vat, andre me tha ohî' ödra: ke ba kolon ame menâ: ke e ame le degecâ Hazora ge meic, 12 Ke haba Josua ame hûgûnâ je tauniny je than eling hia thithö, me je thaniny hia, me hling ödrin ge hele vat, me ti ohî' ödra; helâji me Mose athnyabai Iehova ame hûna. 13 Ke haba je taun ame tot ethö hon anyidra je utkânâ ae görany, me at Isaraela andre me ca thong degecâ; ke Hazora thibi; Josua ame thong degecâ e. 14 Ke haba ta je omjeú hia hnyi je taun eling me omeno, me lakon Isaraela andre me hom hobi ködrin bi; ke so bi andre me hlingâ tavat hia thithö ge hele vat ke ne o

## JOSUA 12, 13.

but ame hi' ödra, ke ba but kolon ame menâ. 15 Helâji me Iehova ame hûna kö Mose a athnyabainy, ke helâe Mose ame hûna kö Josua : me Josua ame ânyâ helâe : e ame ca degec ke ûnyi hnyi ta je ûnyi hia a hûna Iehova kö Mose.

16 Ke Josua ame hom hnyei hia eling, a je hnyei ae hut, me je ke keihen ka hnyi hwaiöu hia, me hnyei Gosena hia, me hnyei ae ca hut, me dok ae tha hon, me hnyei ae hut hnyi Isaraela, me ke keihen e ae ca hut ; 17 hwân hnyi bucen Halaka gethen ûheny Seira ke ne o but Baala-gada hnyi hnyigöulen bucen e Lebanona, wale hmelen bucen Heremona : ke e ame hom je than hia me kuc ödrin, me hling' ödrin. 18 Ke Josua ame vat me je than eling hnyi je bong ae se. 19 E ba ke taun ame úsoköu me lakon Isaraela, ke at Hivi thibi adre labâ Gibeona : adre me hûgûnâ hia hnyi vat. 20 Anyin a ûnyi ga Iehova he ka okhötâ je hnyekudra, m' adre me he ka vat me at Isaraela, me e ame he ka ti ohî' ödra, m' adre me ca he ka betenge gadra, ke so bi m' adre me he ka ohî' ödra, helâji me Iehova ame ha kö Mose.

21 Ke ame o Josua hnyi ûen eling, me subâ degecâ at Anaka wal' ödrin hnyi hnyei ae hut, hwân Heberona, me Debira, me Anabi, me hnyei ae hut hia hnyi Juda, me hnyei minya ae hut hia hnyi Isaraela : haba Josua ame ti ohî' ödra me anyidrin je taun. 22 E ba but je at Anaka hnyi hnyei iny lakon Isaraela : ke hake hu kolon thiju bi hnyi Gaza, me Gatha, me Asedoda. 23 Ke helâe Josua ame hom hnyei hia thithö helâ me je hofuc hia thithö a ha Iehova kö Mose ; ke Josua ame ham e ka at Isaraela me idrin, hoton hna khenâ ködrin hnyi anyidrin je tribu. Me ame menâ ju tavat ûhedrin hnyi hna vat.

### HNYIMAKAN 12.

**W**ALANG li thaniny hnyei a kot ge lakon Isaraela, me hom idrin hnyei hnyi ke keihen Joridano hnyi hna o hnen seûnö, hwân hnyi hnyigöulen bucen e Arenona ke ne o but hnyi bucen Heremona, me dok ae tha hon hia e deiö : 2 Sihona thaniny at Amora, at ame laba Hesebona, at musî hwân Aroera hnyi baten hnyigöulen bucen e Arenona, me taun hnyi wanben e, me ke keihen Gileada a hafiny, ke ne o but hnyi wagewe Jaboka, hnyigöulen je laku Amona ; 3 ke hwân hnyi dok ae tha hon,

ke ne o but hnyi köiö Kinereth, e deiö, ke ne o but hnyi köien dok ae tha hon, wale Köiö ae Hiny, e deiö, gethen ûheny Bethjesimoth ; me hnyi hwaiöu hmelen je hwatapköluiny Pisega : 4 me hnyigöülö Oga than Basana, hanen kolon tavat ae beû, at ame laba hnyi Aseterötha, me Ederei, 5 me musî hnyi bucen Heremona, me hnyi Saleka, me Basana hia, ke ne o but hnyi hnyigöulen at Gesuri, me at Maaka, me ke keihen a hafiny Gileada, hnyigöülö Sihona thaniny Hesebona. 6 A kuc ödra Mose athnyabai Iehova me je lakon Isaraela : ke haba Mose athnyabai Iehova ame ham e hnân iny at Reubena, me at Gada, me hafiny tribu Manase.

7 Walang je thaniny hnyei a kot Josua me lakon Isaraela hnyi ke keihen Joridano ke e jio, hwân Baala-gada hnyi thopiny Lebanona, ke ne o but hnyi bucen Halaka, gethen ame ölö Seira ai ; ke Josua ame ham e ka je tribuiny at Isaraela hnân idrin hoton hna khenâ ködrin ; 8 hnyi hnyei ae hut, me hnyei ae ca hut me je dok ae tha hon, me je hwatapkölu, me hnyebuba, me hnyi Hwaiöu ; a at Heth, me Amora, me Kanana, me Perizi, me Hivi, me Jebusi : 9 than Jeriko, khaca ; thaniny Ai, wale hakekeny Beth-ela, khaca ; 10 than Jerusalem, khaca ; than Heberona, khaca ; 11 than Jamuth, khaca ; than Lakisa, khaca ; 12 than Egelona, khaca ; than Gezera, khaca ; 13 than Debira, khaca ; than Gedera, khaca ; 14 than Horema, khaca ; than Arada, khaca ; 15 than Libena, khaca ; than Adulama, khaca ; 16 than Makeda, khaca ; than Beth-ela, khaca ; 17 than Tapua, khaca ; than Hefera, khaca ; 18 than Afeka, khaca ; than Lasarona, khaca ; 19 than Madon, khaca ; than Hazora, khaca ; 20 than Simerona-merona, khaca ; than Akesafa, khaca ; 21 than Tanaka, khaca ; than Megido, khaca ; 22 than Kadesi, khaca ; than Jokeneama hnyi Karamela, khaca ; 23 than Dora hnyi bucen Dora, khaca ; than Goim hnyi Gilegala, khaca ; 24 than Tireza, khaca ; habi je than hia thithö, me ödrin thote wan.

### HNYIMAKAN 13.

**K**E a hingat ut Josua, ke se hia but hunainy ; ke haba Iehova ame ha kâu, ka habe, U je hingat ut, ke se hia hunaiâm, ke se hia biju je hnyei öbun e tiga ca hûgûnâ. 2 Ke walang je hnyei

## JOSUA 13.

biju : a hnyei hia iny at Filisiti, me at Gesuri hia ; 3 hwân hnyi Sihora cicö Aigupito, ke ne o but hnyigöulen Ekerona ka hnyi hwadrö, k' adre me aú e, me hnyei iny at Kanana : ödrin thabûng je thaniny at Filisiti ; ke at Gaza me at Asedoda, me at Asekelona, me at Giti, me at Ekerona, 4 me at Avi minya, wale hnyi hwaiöu : hnyei hia iny at Kanana, me Meara hnyei iny at Zidona, ke ne o but Afeka, ke ne o but hnyi hnyigöulen at Amora : 5 me hnyei iny at Gebali, me Lebanona hia, hnyi hna o hnen seúnö, hwân hnyi Baala-gada hmelen bucen Heremona ke ne o but hnyi gethen ame didrö ka hnyi Hamath : 6 je aten hia adre me laba hnyi je bucen, hwân Lebanona ke ne o but Miserefa-maim, me at Zidona hia ; oge me he ka ob' ödra hnyi hnyimakan lakon Isaraela : ke so bi hamâm he ka khenâ e hnen uglekôb hnân iny at Isaraela, helâ me bnök hna hûna köu. 7 Ke walang ang u me he ka khenâ hnyei ang ka je tribu a nain, me hafiny tribu Manase me idrin : 8 ke haba e, a tha e me at Reubena me Gada ödrin e hia but kap idrin, wale a ham ködrin Mose hnyi hoton Joridano e deiö, helâji me a ham ködrin Mose athnyabai Iehova ; 9 hwân Aroera, hnyi baten hnyigöulen bucen e Arenona, me taun hnyi wanben e, me hnyei hia ae tha hon hnyi Medeba, ke ne o but Dibona ; 10 me je taun hia anyi Sihona than Amora, at ame musi hnyi Hesebona, ke ne o but hnyigöulen je laku Amona ; 11 me Gileada, me hnyigöulen at Gesuri, me at Maaka, me bucen Heremona hia, me Basana hia ke ne o but Saleka ; 12 me dökhu hia dökhu Oga hnyi Basana, at ame musi hnyi Aseterotha, me Ederei (wale ke je kolon tavat ae beú) ; anyin a Mose ame kuc ödrin me ob' ödrin dut. 13 Ke haba lakon Isaraela adre me ca obâ at Gesuri me Maaka : ke so bi at Gesuri me Maaka ödrin e tha laba me at Isaraela ke ne o but hnyi bong ang. 14 Ke hake tribu Levi thiju adre ca khene iny ; haba je hut a an hnen meic kö Iehova Khongon at Isaraela, me wale iny, helâ me hnen hna ha ködrin.

15 Ke haba Mose ame khenâ ka tribuiny laku Reubena hoton anyidrin je lap. 16 Ke haba hnyigöulödrin, hwân Aroera hnyi baten hnyigöulen bucen e Arenona, me taun hnyi wanben e, me hnyei hia ae tha hon hnyi Medeba ; 17 Hesebona me je tauniny hia thithö hnyi dok ae tha hon ; Dibona me Bamotha-baala me Bethe-baala-

meon ; 18 me Jahaza, me Kedemotha, me Mefat ; 19 me Kiriathaima, me Sibema, me Zereth-sahar hnyi bucen a e hnyi hnyigöulen bucen ; 20 me Bethe-peora, me Ase-doda-pisega, me Bethie-jesimoth ; 21 me je taun hia thithö hnyi dok ae tha hon, me dökhu hia dökhu Sihona than at Amora, at ame musi Hesebona, at a hlingâ Mose tha e me je than at Midiana, jia Evi, me Rekem, me Zura, me Huro, me Reba, a je taben unyi Sihona, hnyat labâ hnyei. 22 Balaama minya nöku Beora, at ame bi khong, ame mokut unyin je komok a hlingâ hnen lakon Isaraela ge hele vat. 23 Ke haba hnyigöulen laku Reubena, me Joridano me baten. Me wale iny laku Reubena hoton anyidrin je lap, me je tauniny, me je tauniny ae úhnyúkong.

24 Ke Mose ame khenâ ka tribu Gada, a je laku Gada, hoton anyidrin je lap. 25 Ke haba hnyigöulödrin me Jazera me je taun hia hnyi Gileada, me hafiny hnyei iny laku Amona, ke ne o but Aroera cicö Raba ; 26 ke hwân Hesebona, ke ne o but Ramatha-mizepa, me Betonim ; ke hwân Mahanaima ke ne o but hnyigöulen Debira ; 27 ke haba hnyi hnyegöuleny bucen, me Beth-arama, me Bethe-nimera, me Sukotha, me Zafon, kolon dökhu dökhu Sihona than Hesebona, ke haba hnyigöuleny me Joridano, ke ne o but hnyi obiny köien Kineth, hnyi ke keihen e deiö Joridano. 28 Ke wale hnyei iny laku Gada hoton anyidrin je lap, me je tauniny, me je tauniny ae úhnyúkong.

29 Ke Mose ame khenâ ka hafiny tribu Manase : a wale hobi kâu hafiny tribu Manase, hoton anyidrin je lap. 30 Ke haba hnyigöulödrin, me, hwân hnyi Mahanaima, Basana hia, a je dökhu hia dökhu Oga than Basana, me je taun hia anyi Jaira, wale hnyi Basana, je taun a sikste : 31 me hafiny Gileada, me Aseterotha, me Ederei, a je tauniny dökhu dökhu Oga hnyi Basana, hnân hobi kâu je laku Makir nöku Manase, hobi kâu ke hafiny laku Makir hoton anyidrin je lap.

32 Wale je hnyei a khenâ Mose hnyi dok ae tha hon hnyi Moaba, hnyi ke keihen Joridano, Jeriko ke e deiö, 33 Ke Mose ame ca khene iny tribu Levi : Iehova, Khongu Isaraela idrin, helâ me hnen hna ha ködrin.

HNYIMAKAN 14.

**K**E walang je hnyei ame hom hnen lakon Isaraela hnyi hnyei Kanana, wale ame khenâ Eleazara at bihut, me Josua nöku Nuna, me je ban a je kamen je tribuiny lakon Isaraela hnân idrin, 2 adre khene idrin ge ugleköp, helâ me Iehova ame hûna deny Mose, hobi kâu je tribu a nain, me hafiny tribu. 3 Anyin a Mose ame hia but ham iny lo li tribu me hafiny tribu hnyi ke keihen e deiö Joridano: ke e ame ca khene iny at Levi unyidrin. 4 Anyin a haba lo li tribu, li laku Josefa, jia Manase me Eferaima; ke ödrin e ca ham ka at Levi ke keihen hnyei; ke so bi je taun hnân me labâ, me utkânâ igigilö e hobi kâu haledrin je meno me anyidrin je ûnyi. 5 Ke haba lakon Isaraela ödrin e ûnyâ helâ me Iehova ame hûna kö Mose, me ödrin e khenâ hnyei. 6 Ke ame he laku Juda kö Josua hnyi Gilegala; me ame ha kâu Kaleba nöku Jefune at Kenaza, ka habe, E khatö u ûnyi a ha Iehova kö Mose aten Khong gatü hnyi Kadesi-banea. 7 Fâte but je hunaik hnyi ûen ame kunö nya Mose athnyabai Iehova, ûheny Kadesi-banea he ka ecmâkâ hnyei; ke oge me hmetoâ je hofuc ae eü hnyi hnyekuk. 8 Ke so bi haba je liamekeiny mönya, adre tha he mönya, ödrin e oköiâ hnyekon tavat: ke oge me tha hnu hotu Iehova Khonguk. 9 Ke Mose ame khemanyin hnyi bong eling, me ha, ka habe, E hnathu hnân em me je matrânâm nyiele balua hnyei e u je uto, anyin a u je hia but tha hnu hotu Iehova Khonguk. 10 Ke walang ang, wâ bi, Iehova ame omeli nya tilö nya hnyi ta je hûna eang a fâte faiv helâji me hnen hna ha, hwân hnyi ûen Iehova ame ha hofuc eling kö Mose, k' ame tiga he Isaraela hnyi hnyebuba: ke walang ang, wâ bi, eite faiv je hunaik. 11 Iny tiga hwege bala bi hnyi bong ang, helâji me bong a kunö nya hnyin Mose; haba tang hwegiök walang me helâji me tang hwegiök ehac, hnân vat, ke hnân didrut me didrö. 12 Anyin a wale ham kõnya bucen eang, wale Iehova ame ha gan hnyi bong eling; anyin a u je löng hnyi bong eling a ka eling at Anaka, me je taun ae gan adre up haginy: me ame ne he la Iehova ka tha e mönya, me oge me he ka ob' ödrin helâ me Iehova ame ha. 13 Ke haba

Josua ame hahnahicâ e, me ham Heberona kö Kaleba nöku Jefune, me me iny. 14 Anyin a wale haba Heberona me i Kaleba nöku Jefuue at Kenaza ke ne o but hnyi bong ang; anyin a e ame tha hnu hotu Iehova Khongon at Isaraela. 15 Ke haba ien Heberona ehac me Kiriath-areba; haba Areba eling me wale at ae beönua unyin at Anaka. K' ame menâ hnyei ke ba vat.

HNYIMAKAN 15.

**K**E haba jekhon tribuiny laku Juda hoton anyidrin je lap, me wale ke ne o but hnyigöulö Edoma, ke ne o but hnyebuba Zin hnyi hwaiöu, wale obiny hnyei ae hwaiöu hnönyin. 2 Ke haba hnyigöulen hnyi hwaiöu, me, hwân hnyi baten Köiö a Hiny, a hwân hnyi bwedua ame hnyimakan ka hnyi hwaiöu: 3 k' ame he ka hnyi hwaiöu ke ne o but hnyi gethen ame he Akerabima ai, k' ame he bala Zin ai me he ka hnyi hwaiöuiny Kadesi-banea, me he Hezerona ai, me Adara ai, k' ame khenyi ke ne o but Kareka: 4 k' ame he Azemona ai, me o ka hnyi wageweiny Aigupito; k' ame um ju hnyigöulen eling hnyi köiö: me wale hnyigöulöbun ka hnyi hwaiöu. 5 Ke haba hnyigöulen e deiö, me, Köiö ae Hiny ke ne o but ka hnyi hnyimen Joridano. Ke haba hnyigöulen ka hnyi hwadrö hwân hnyi bwedua hnyi köiö wale hnyi hnyimen Joridano: 6 ke ame he bala bi hnyigöulen Bath-ogela ai, ke ame he bala bi ka hnyi hwadrö iny Beth-araba; ke ame he hnyigöulen ke ne o but ka veto anyi Bohan nöku Reubena: 7 k' ame he bala bi hnyigöulen Debira ai, hwân hnyi hnyigöulen bucen Akora, ke helâe ka hnyi hwadrö cicö Gilegala, wale cicö gethen ame he Adunim ai, wale hnyi baten köiö ka hnyi hwaiöu: ke ame he bala hnyigöulen ka hnyi köiö Eni-semes, me ame um ju hnyi Eni-rogel: 8 ke ame he bala hnyigöulen hnyi hnyigöulen bucen anyin nöku Hinom ke ne o but hnyi baten at Jebusi hnyi hwaiöu (wale Jerusalema): ke ame he bala hnyigöulen ka hnyi hon bucen cicö jio hnyigöulen bucen anyi Hinom, wale obiny hnyigöulen bucen anyin tavat ae beü hnyi hwadrö: 9 ke adre tuluto hnyigöulen ûnyi hnyi ban bucen ke ne o but hnyi köiö ame pupua anyi Nefetoa, ke ame he ke ne o but je taun hnyi bucen Eferona; ke adre tuluto hnyigöulen hnyi Baala (wale Kiriatha-jarim): 10 ke ame

khenyi hnyigöulen e jio úheny Baala ka hnyi bucen Seira, ke ame he bala bi ke ne o but hnyi baten bucen Jarim hnyi hwadrö (wale Kesalon), ke ame he bala bi Bethesemes ai me he hnyi gethen deny Timena : 11 me ame um ju hnyigöulen hnyi ke keihen Ekerona ka hnyi hwadrö : ke adre tuluto hnyigöulen ka hnyi Sikerona, me ame he bala bi ka hnyi bucen Baala ke ne e but Jabanel ; ke adre me umo je hnyigöulen hnyi köiö. 12 Ke haba hnyigöulen e jio, köiö ae gan me hobat köiöiny. Wale hnyigöulen laku Juda igigilö hoton anyidrin je lap.

13 Ke e ame ham kö Kaleba nöku Jefune jekhon unyin laku Juda, helâ me hnö Iehova hna hûna kö Josua wale Kiriath-Areba, haba Areba kamö Anaka (wale Heberona). 14 Ke haba Kaleba ame obâ je laku Anaka a kun úheny e, jia Sesai, me Ahiman, me Talemari, a laku Anaka. 15 Ke e ame he úheny e he ka tet metâ ka tavat adre me labâ taun Debira : ke haba ien Debira ehac, me, Kiriatha-sefer. 16 Ke haingö Kaleba, ka habe, Haba at ame he ka kot Kiriatha sefer, me hûgúnâ, me oge me he ka ham kâu nöku hlu jia Akesa me áiân. 17 Ke ame hûgúnâ e Otheniela nöku Kenaza, liamekeiny me Kaleba : me e ame ham Akesa a nokon me áiân. 18 K' ame o kâu hlu, me haba hlu ame kunâ áiân he ka sumâtâ utkânâ ge kamen : ke ame utut hlu úheny hon asina, ke Kaleba ame ha kâu, ka habe, Ieú ae wem? 19 Me e ame ha, ka habe, ham dö kõnya hnahic ; anyin a u je hia but ham kõnya utkânâ ka hnyi Hwaiöu, ke ham minya thö kõnya je an ae pupua. Me e ame ham kâu je an ae pupua wal' ethö me eú hnyikânâi.

20 Walang jekhon tribuiny laku Juda hoton anyidrin je lap.

21 Haba je taun ae sâkâu ka hnyi Hwaiöu anyin tribuiny laku Juda, wale hnyi hnyigöulö Edoma, me Kabezeela, me Eder, me Jagur ; 22 me Kina, me Demona, me Adada ; 23 me Kadesi, me Hazora, me Ithenan ; 24 me Zif, me Telem, me Bealoth ; 25 me Hazora-hadata, me Keriotha-hezerona (wale Hazora) ; 26 me Amam, me Sema, me Molada ; 27 me Hazara-gada, me Hesemon, me Bethe-palet ; 28 me Hazara-sual, me Bere-seba, me Biziothia ; 29 me Baala, me Iima, me Azem ; 30 me Eletolad, me Kesil, me Horema ; 31 me Zikelak, me Mademan, me Sanesana ; 32 me Lebaoth, me Silehim,

me Aina, me Rimona : haba je taun hia thithö me twente nain, me je tauniny ae úhnyúkong.

33 Ke haba hnyi hnyei ae ca hut, me Esetaol, me Zorea, me Asena ; 34 me Zanoa, me Eni-ganim, me Tapua, me Enaima ; 35 me Jamuth, me Adulama, me Soko, me Azeka ; 36 me Saraim, me Adithaim, me Gedera, me Gederothaim ; wale je taun a fortin, me je tauniny ae úhnyúkong.

37 Ke Zenan, me Hadasa, me Migedolagada ; 38 me Dilean, me Mizepa, me Jokeheela ; 39 me Lakisa, me Bozekath, me Egelona ; 40 me Kabona, me Lamam, me Kithelis ; 41 me Gederoth, me Bethedagona, me Naama, me Makeda ; wale sikstin je taun me je tauniny ae úhnyúkong.

42 Libena, me Ethera, me Asan : 43 me Ifetha, me Asena, me Nezib, 44 me Keila, me Akeziba, me Maresa ; nain je taun me je tauniny ae úhnyúkong.

45 Ekerona, me je taun, me je tauniny ae úhnyúkong : 46 hwân Ekerona ke ne o but hnyi köiö, me je dok ae hakekenyâ Asedoda, me je taun ae úhnyúkong.

47 Asedoda me je tauniny me je tauniny ae úhnyúkong ; Gaza me je tauniny e me je tauniny ae úhnyúkong ; ke ne o but hnyi wageweiny Aigupito, me köiö ae gan me hobatköiny.

48 Ke haba hnyi hnyei ae hut, Samira, me Jatira, me Soko ; 49 me Dana, me Kiriatha-sana (wale Debira) ; 50 me Anabi, me Esetemo, me Anim ; 51 me Gosena, me Holon, me Gilo ; eleven je taun me je tauniny ae úhnyúkong.

52 Araba, me Duma, me Esean ; 53 me Janum, me Bethe-tapua, me Afeka ; 54 me Humeta, me Kiriatha-areba (wale Heberona), me Ziora ; nain je taun, me je tauniny ae úhnyúkong.

55 Maon, me Karemela, me Zif, me Juta ; 56 me Jezerela, me Jokedeam, me Zanoa ; 57 me Kaina, me Gibeä, me Timena ; ten je taun me je tauniny ae úhnyúkong.

58 Halehul, me Bethe-zur, me Gedor ; 59 me Maarath, me Bethe-anoth, me Eletekon ; siks je taun me je tauniny ae úhnyúkong.

60 Kiriatha-baala (wale Kiriatha-jarim), me Raba ; li taun me je tauniny ae úhnyúkong.

61 Hnyi hnyebuba, Beth-araba, me Midin, me Sekaka ; 62 me Nibesan, me Tauniny Sâlt, me Eni-gedi ; siks je taun me je tauniny ae úhnyúkong.



JOSUA 16, 17.

63 Ke haba at Jebusi, ödrin e labā Jerusalema, me ca khana laku Juda he ka ob' ödrin : k' ame tha laba at Jebusi me je laku Juda hnyi Jerusalema ke ne o but hnyi bong ang.

HNYIMAKAN 16.

**K**E haba jekhon laku Josefa me hwân hnyi Joridano e Jeriko wale hnyi köien Jeriko e deiö, ke ne o but hnyi hnye-buba, gethen úheny Jeriko hnyi wanben hnyi ae hut ke ne o but Beth-ela ; 2 k' ame he úheny Beth-ela Luza ai, k' ame he bala ke ne o but hnyigöulen at Areki ke ne o but Atarotha ; 3 k' ame he bala bi jio ka hnyi hnyigöulen at Jafelet, ke ne o but hnyigöulen Bethe-horona eü, ke ne o but Gezera : k' ame umo hnyi köiö. 4 Ke haba li laku Josefa, jia Manase me Eferaima, me ödru melabā idru. 5 Ke haba hnyigöulen laku Eferaima hoton anyidrin je lap, haba hnyigöulen jeköüdrin e deiö, me, Ataroth-adara ke ne o but hnyi Bethe-horona ethö ; 6 ke ame he bala hnyigöulen e jio Mikematha ai ka hnyi hwadrö : ke ame khenyi deiö hnyigöulen, ke ne o but Tanatha-silo, k' ame he hanyáúâ ke ne o but Janoa ke e deiö : 7 k' ame he úheny Janoa Atarotha ai, me Naratha, k' ame o hnyi Jeriko, me umo ju hnyi Joridano. 8 Ke ame he hnyigöulen hnyi Tapua me he e jio ke ne o but hnyi wagewe Kana ; k' ame um ju hnyi köiö. Wale jekhon tribuiny laku Eferaima hoton anyidrin je lap ; 9 ke ca ha bi je taun adre hake ip hobi kâu je laku Eferaima wale hnyi wanben jekhon laku Manase, a ta je taun hia thithö me ta je tauniny ae úhnyükong. 10 Ke haba at Kanana a tavat adre me laba hnyi Gezera, me adre me ca ob' ödrin dut : me haba at Kanana ödrin e laba unyin at Eferaima ke ne o but hnyi bong ang, me bi athnyabaidrin me ányâ anyidrin je huliwa.

HNYIMAKAN 17.

**K**E walang jekhon tribu anyi Manase ; anyin a e nöku Josefa a bán. Hobi kö Makir nöku Manase a bán, kamö Gileada, anyin a e at vat, me adre me ham me iny Gileada me Basana. 2 Ke haba jekhon eling hobi kâu ke keihen laku Manase hoton anyidrin je lap ; hobi kâu laku Abiezera, me laku Heleka, me laku Aseriela, me laku Sekema, me laku Hefera, me laku

Semida : wale je бага nöku Manase nöku Josefa hoton anyidrin je lap. 3 Ke haba Zelofeada nöku Hefera, nöku Gileada, nöku Makir, nöku Manase, me ba nokon бага, ke so bi a je hlu : ke walang ien lakon je hlu, Mala, me Noa, me Hogela, me Mileka, me Tireza. 4 Me ödrin e he kö Eleazara at bihut, me Josna nöku Nuna, me je than, me ha ka habe, Iehova ame húna kö Mose he ka ha' ihmun unyin je liamekeiny möhmun : anyin a wale e ame ha' idrin unyin je liamekeiny me kamödrin, helâ me hna ha hnö Iehova. 5 Ke adre khenâ kö Manase libenyita je ke keihen, ke ca ha bi hnyi Gileada me Basana, wale hoton Joridano ; 6 anyin ae hu iny je hlu laku Manase unyin lakon je бага : ke haba ke je laku Manase, ödrin e hu hnyi Gileada. 7 Ke haba hnyigöülö Manase, me, hwân Asera ke ne o but Mikematha cicö Sekema ; ke ame he bala hnyigöulen hnyi ke keihen metâ ke ne o but unyin tavat adre me laba Eni-tapua. 8 Ke i Manase hnyi Tapua : ke haba Tapua hnyi hnyigöülö Manase, me wale iny laku Eferaima. 9 Ke ame he hnyigöulen ka hnyi wagewe Kana hnyi hwaiöuiny wagewe : haba je taun eling anyi Eferaima, e hnyi wanben je taun anyi Manase : ke haba hnyigöülö Manase hnyi ke keihen hwadröiny wagewe, ke ame umo e hnyi köiö : 10 ke i Manase ka hnyi hwaiöu, ke i Eferaima ka hnyi hwadrö, ke haba hnyigöulen, me, köiö ; k' ame he ke ne o but Asera hnyi hwadrö, me Isakara e deiö. 11 Ke e hu ga Manase hnyi Isakara me Asera, Betheseana me je tauniny, me Ibeleama me je tauniny, me aten Dora me je tauniny, me aten En-dora me je tauniny, me aten Tanaka me je tauniny, me aten Megido me je tauniny, wale je dok ae hut. 12 Ke ca khana bi laku Manase he ka obâ aten je taun eling ; anyin ame belaba at Kanana hnyi hnyi eling. 13 Ke hnyi úen ame hwege but lakon Isaraela me ödrin e kunâ at Kanana he ka huliwa hnyi je hna khenâ huliwa, k' adre ca ti ob' ödrin.

14 Ke haba laku Josefa ödrin eha kö Josua, ka habe, Ieü gam u je ham könya jekhöü a khaca, me ke keihen a khaca, anyin a haba inya, me, hnyi ae gan, ke Iehova ame hia but ohnahici nya hwân ehac ke ne o but hnyi bong ang? 15 Ke Josua ame ha kodrin, ka habe, U je ne hnyi ae gan, me e so u ma he ka hnyi hnyot me khutu eling hobi köu bi hnyi hnyi iny at Perizi me tavat ae beü ; anyin ae hnek köu bucen Eferaima.

## JOSUA 18.

16 Me ame ha je laku Josefa, ka habe, E ca úcú köhmun bucen : ke haba at Kanana adre me laba hnyi hnyigöulen bucen me ödrin e tren je kariota fao, wale tavat hnyi Bethe-seama me je tauniny, me tavat minya hnyi hnyigöulen bucen e Jezerela. 17 Ke Josua ame ha ka lap anyi Josefa, jia Eferaima, me Manase, ka habe, U hnyei ae gan me tren man ae gan : ke u me ca he ka jekhom a khaca thibi ; 18 k' ame he ka em hnyei bi bucen ; k' ame ne hnyot, me u ma he ka khutu, ke hobi köu bi obiny : anyin a u me he ka obâ at Kanana, eja ke ne a ne hu je kariota fao, ke eja ke ne ödrin e hwege.

### HNYIMAKAN 18.

**K**E ame úkhacaköu tavat a lakon Isaraela hia hnyi Silo, ke adre me otilâ eling uma mano a uma úkhacaköu : ke ame ngâ but hnyei hnyi hnyimaködrin. 2 Ke seven biju je tribuiny lakon Isaraela a ödrin tiga ca khenâ jekhöüdrin. 3 Ke Josua ame ha ka lakon Isaraela, ka habe, Ieú gabun öbun e bec he ka he me hügünâ hnyei wale a ham köbun Iehova Khongon lakamöbun ? 4 Uca thö unyibun ke je hnyat úsa kun hobi kâu je tribu : me oge me he ka kun' ödrin, ke ödrin e he ka todrö me vheno hnyei, me omanenâ e hoton je jekhöüdrin ; me ödrin e he ka he jem könya. 5 Ke ödrin e he ka kia sevenâ : ame he Juda ka laba hnyi hnyigöulen ka hnyi hwaiöu, ke ame he lap anyi Josefa ka laba hnyi hnyigöülödrin ka hnyi hwadrö. 6 Ke öbun e he ka omanenâ hnyei me me seven, me hom jem könya hna omanenâ eling : me oge me he ka uglekóbâ hobi köbun eang hnyi hnyimakö Iehova Khongutin. 7 Anyin ae ba iny at Levi unyibun ; anyin a haba hanymen tavat bihut kö Iehova, wale jekhöüdrin : ke haba Gada, me Reubena, me hafiny tribu Manase, ödrin e hia but kap jekhöüdrin hnyi ke keihen e deiö Joridano, wale a ham ködrin Mose athnyabai Iehova. 8 Me ame todrö tavat me he : ke Josua ame húna ködrin wale hnyat ödrin e he he ka omanenâ hnyei, ka habe, he thö, me vheno hnyei, me omanenâ e, ke hmetu ju könya, me oge me he ka uglekóbâ eang hobi köbun hnyi hnyimakö Iehova hnyi Silo. 9 Me ame he tavat me vheno hnyei, me omanenâ e hnyi tusi hoton je taun me me seven, me ödrin e o kö Josua hnyi hna hunuma hnyi Silo. 10 Ke Josua ame

uglekóbâ hobi ködrin hnyi Silo hnyi hnyimakö Iehova : ke Josua ame khenâ eling hnyei ka lakon Isaraela hoton je jekhöüdrin.

11 Ke ame át dö ge leköp tribu anyin laku Beniamina hoton anyidrin je lap : ke ame hnyigöulen jekhöüdrin hnyi wanben laku Juda, me laku Josefa. 12 Ke haba hnyigöülödrin ka hnyi hwadrö, hwân hnyi Joridano ; ke ame he hnyigöulen ka hnyi ke keihen hwadröiny Jeriko, me he ka hnyi hnyei ae hut e jio ; k' ame umo hnyi hnyebuba Beth-aven. 13 Ke ame he bala hnyigöulen úheny e Luza ai, ka hnyi ke keihen Luza (wale Beth-ela) ka hnyi hwaiöu ; ke ame he bala hnyigöulen Ateroth-adara ai ka hnyi bucen hnyi hwaiöu hnyi Beth-horona eú. 14 Ke adre me tuluto hnyigot me khenyi hnyi ke keihen e jio ka hnyi hwaiöu, hwân hnyi bucen cicö Bethe-horona hnyi hwaiöu ; ke adre me umo e hnyi Kiriatha-baala (wale Kiriatha-jarim), ke tauniny laku Juda : wale ke keihen e jio. 15 Ke haba ke keihen ka hnyi hwaiöu ame hwân hnyi obiny Kiriatha-jarim, ke ame he hnyigöulen e jio, me umo hnyi je an ame pupua e Nefetöa : 16 ke ame o hnyigot ka hnyi obiny bucen cicö hnyigöulen bucen anyi nöku Hinom, wale hnyi hnyigöulen bucen anyin tavat ae beú ka hnyi hwadrö ; ke ame he ka hnyi hnyigöulen bucen anyi Hinom ka hnyi ke keihen at Jebusi ka hnyi hwaiöu, me he Eni-rogel ai ; 17 ke adre me tuluto hnyi hwadrö me umo hnyi Eni-semes, me he Geliloth ai, wale cicö gethen ame ölö Adumim ai ; k' ame he ka hnyi veto anyi Bohan nöku Reubena ; 18 ke ame he bala ka hnyi ke keihen cicö Araba hnyi hwadrö me he Araba ai : 19 ke ame he bala bi hnyigot ka hnyi ke keihen Beth-ogela hnyi hwadrö : ke adre me umo hnyigot hnyi bweduainy Köiö ae Hiny ka hnyi hwadrö, hnyi obiny Joridano ka hnyi hwaiöu : wale hnyigöulen ka hnyi hwaiöu. 20 Ke haba hnyigöulen e hnyi ke keihen e deiö, me, Joridano. Wale jekhon laku Beniamina hoton je hnyigöülödrin igigilö ; hoton anyidrin je lap. 21 Ke walang je taun anyin je tribuiny laku Beniamina hoton anyidrin je lap, Jeriko, me Beth-ogela, me Emeka-Keziz ; 22 me Beth-araba, me Zemari, me Beth-ela ; 23 me Avi, me Para, me Ofera ; 24 me Kefara-hamouai, me Ofeni, me Geba ; a twelv ta je taun me je tauniny ae úhnyúkong ; 25 Gibeona, me Rama, me Berötha ; 26 me Mizepa, me Kefira, me Moza ; 27 me Rekem, me Irepel,

me Tarala ; 28 me Zela, me Elef, me Jebusi (wale Jerusalema), me Gibeaa, me Kiriatha ; fortin je taun me je tauniny ae úhnyúkong. Wale jekhon je laku Beniamina hoton anyidrin je lap.

HNYIMAKAN 19.

**K**E ame át dö kö Simeona ge leköp a loiny, hobi káu tribuiny laku Simeona, hoton anyidrin je lap : ke haba jekhóúdrin, me, hnyi wanben jekhon laku Juda. 2 Ke e hu gadrin hnân hwajekhóúdrin Bere-seba, me Seba, me Molada ; 3 me Hazara-sual, me Bala, me Azem ; 4 me Eletolad, me Bethuela, me Horema ; 5 me Zikelag, me Bethe-marekaboth, me Hazarasusa ; 6 me Bethe-lebaoth, me Saruen ; thótin je taun me je tauniny ae úhnyúkong : 7 Aina, me Rimona, me Ethera, me Asan ; foa je taun me je tauniny ae úhnyúkong : 8 me je taun hia ae úhnyúkong igigilö je taun eling, ke ne o but Balatha-bere, wale Ramath ka hnyi hwaiöu. Wale jekhon tribu anyin laku Simeona hoton anyidrin je lap. 9 Únyi hnyi jekhon laku Juda jekhon je laku Simeona : anyin a haba hna khená ka laku Juda e ti gan ködrin : anyin a wale laku Simeona ame hu idrin hnyi wanben jekhóúdrin.

10 Ke ame át dö ge leköp a kuniny ka laku Zebulona hoton anyidrin je lap : ke haba hnyigöulen jekhóúdrin ame o but Saridi ; 11 ke ame he hnyigöülödrin jio ke ne o but Marala, me he ke ne o but Dabaseth ; me he bala ke ne o but hnyi wagewe cicö Jokeneama ; 12 ke ame khenyi úheny Siridi me he deiö hnyi hna o hnen seúnö, ke ne o but hnyi hnyigöulen Kiselothator ; me ame he Daberath ai me he ke ne o but Jafia ; 13 ke ame he bala deiö úheny e Gita-hefera ai, me Ita-kazin ai ; ke ame umo hnyi Rimona wale ame hújá me Nea ; 14 ke ame khenyi hnyigöulen igigilö e hnyi hwadrö ke ne o but Hanathon ; ke ame um dö hnyi hnyigöulen bucen e Ifeta-ela ; 15 me Kata, me Nahalol, me Simerona, me Idala, me Bethe-leema : twelv je taun me je tauniny ae úhnyúkong. 16 Wale jekhon laku Zebulona hoton anyidrin je lap, a je taun eling me je taun ae úhnyúkong.

17 Ke ame hwádâ thö kö Isakara ge leköp a vakiny hobi káu je laku Isakara hoton anyidrin je lap. 18 Ke haba hnyigöülödrin, me, Jezerela, me Kesulath, me Sunema ; 19 me Haferaim, me Sihon, me

Anaharath ; 20 me Rabith, me Kiseon, me Abez ; 21 me Remeth, me Eni-ganim, me En-ada, me Bethe-pazes ; 22 ke ame o but hnyigot ka hnyi Tabora, me Sakazima, me Bethe-semes ; ke adre umo hnyigöülödrin hnyi Joridano : sikstin je taun me je tauniny ae úhnyúkong. 23 Wale jekhon tribuiny laku Isakara, hoton anyidrin je lap, a je taun me je tauniny ae úhnyúkong.

24 Ke ame hwádâ thö ge leköp a thabúnginy ka tribuiny laku Asera hoton anyidrin je lap. 25 Ke walang hnyigöülödrin, me, Helekath, me Hali, me Beten, me Akesafa ; 26 me Alamelek, me Amad, me Miseal ; ke ame o ka hnyi Karemela e jio, me Sihora-libenath ; 27 k' ame khenyi ka hnyi hna o hnen seúnö Bethe-dagona ai, me o ka hnyi Zebulona, me hnyigöulen bucen e Ifeta-ela ka hnyi hwadrö, ke ne o but Bethemek me Neiel ; k' ame umo hnyi Kabul hnyi ke keihen hnyam a me, 28 me Heberona, me Rehoba, me Hamona, me Kana, ke ne o but Zidona ae gan ; 29 ke ame khenyi hnyigot Rama ai ke ne o but Turo wale taun ae hwege ; ke ame khenyi hnyigot Hosa ai ; ke adre umo e hnyi köiö hnyi ke keihen hnyei Akeziba : 30 me Uma, me Afeka, me Rehoba : a twente tu je taun me je tauniny ae úhnyúkong. 31 Ke wale jekhon tribuiny laku Asera hoton anyidrin je lap, je taun eling me je tauniny ae úhnyúkong.

32 Ke ame hwádâ thö ge leköp a siksiny ka laku Nafatali, hobi káu laku Nafatali hoton anyidrin je lap. 33 Ke ame hwân dö hnyigöülödrin hnyi Helef, me iwajo hnyi Zanim, me Adami-nekel, me Jabenel, ke ne o but Lakom ; me adre me umo e hnyi Joridano : 34 ke ame khenyi hnyigot e jio Azenotha-tabora ai, ke ame he úheny e Hukok ai ; ke ame o ka hnyi Zebulona hnyi hwaiöu, me he Asera ai e jio, me Juda hnyi Joridano, hnyi hna o hnen seúnö. 35 Ke haba je taun adre up haginy, Zidim, me Zeri, me Hawath, me Rakatha, me Kinereth ; 36 me Adama, me Rama, me Hazora ; 37 me Kadesi, me Ederei, me Eni-hazora ; 38 me Irona, me Migedal-el, me Horema, me Beth-anath, me Bethe-semes ; naintin je taun me je tauniny ae úhnyúkong. 39 Wale jekhon tribuiny laku Nafatali, hoton anyidrin je lap, je taun me je tauniny ae úhnyúkong.

40 Ke ame hwádâ thö ge leköp a seveniny ka tribuiny laku Dana hoton anyidrin je lap. 41 Ke haba hnyigöulen jekhóúdrin,

Zorea, me Esetaol, me Ira-semes; 42 me Salabin, me Ajalona, me Iethela; 43 me Elona, me Timenatha, me Ekerona; 44 me Eletek, me Gibethon, me Baalath; 45 me Jehud, me Bene-berak, me Gatha-rimona; 46 me Ma-jarekon, me Rakon, tha e me hnyigot cicö Jopa. 47 Me adre me umo hnyigöulen laku Dana e hotudrin: anyin a haba laku Dana ödrin e ha me vat me Lesem, me hügünâ e, me kot e ge hele vat, me hom e, me labâ e, me hwenyi ien Løsem, me Dana, hoton iö Dana a kamödrin. 48 Wale jekhon tribuiny laku Dana hoton anyidrin je lap, je taun eling me je tauniny ae ûhnyükong.

49 Ke ödrin e umo khenâ hnyei hnân hwajekhon hoton je hnyigöulen e; ke haba lakon Isaraela ödrin e ham kö Josua nöku Nuna ke jekhöû unyidrin: 50 hoton hofuc ho Iehova me adre me ham kâu taun e ame ha, wale Timena-sera, hnyi hnyei ae hut hnyi Eferaima: me e ame otilâ taun me labâ.

51 Wale je hwajekhon a khene idrin ga Eleazara at bihut, me Josua noku Nuna, me je kamen je tribuiny lakon Isaraela, ge ugleköp hnyi Silo, hnyi hnyimakö Iehova, hnyi hwanumen uma ukhacaköu. Ke adre me umo thö khenâ hnyei.

HNYIMAKAN 20.

**K**E Iehova ame ha kö Josua, ka kabe, 2 Ha thö ka lakon Isaraela, ka habe, Kû thö je taun hnân lubaduöng hnyin, waleji oge ha köbun a deny Mose: 3 me me kec ka hnyin at ame blingâ at, wale a hlingâ at k' ame utöteta ke ca khana: ke haba je dok e me hnân lubaduöng hnyin hobi köbun únyi ge at ame bi hwaban komok. 4 Me e ame he ka kec ka hnyi ke taun eling, me tot hnyi homagöuleny taun, me haimemenâ hwan hofuc ka wahingatiny taun eling; ke ödrin e he ka kap e ka hnyi taun eling unyidrin, k' ödrin e he ka ham kâu ke dok, ke e ame he ka tha laba mödrin. 5 Ke ame ne hnu hoton e ge at ame bi hwaban komok, me ödrin e ca he ka hna kâu at ame hlingâ at; anyin a e ame kot ke at ke ca khana bi, k' ame ca hûkötîâ ehac. 6 Ke e ame he ka laba hnyi taun eling ke ne o but e ame tot hnyi hnyimakan ûkhacaköu m' adre owisa, ke ne o but ame mokcu at bihut ae beönua hnyi úten eling: me waleling ame he ka he hmetu at ame hlingâ at ka hnyi anyin

taun me umen uma, wale taun e ame kec únyi hnyin ehac. 7 Me ödrin e kû Kadesi hnyi Galelaia hnyi bucen Nafatali, me Sekema hnyi hnyei ae hut hnyi Eferaima, me Kiriatha-areba (wale Heberona), hnyi hnyei ae hut hnyi Juda. 8 Ke hnyi hoton Joridano e Jeriko ke e deiö, me ödrin e kû Bezeri hnyi hnyebuba hnyi dok ae tha hon únyi hnyi tribu Reubena, me Ramotha hnyi Gileada únyi hnyi tribu Gada, me Golana hnyi Basana únyi hnyi tribu Manase. 9 Wale je taun adre kû hobi kâu je lakon Isaraela hia thithö, me je atkanyua adre me laba unyidrin, me me kec ka hnyin tavat hia adre me hlingâ at a utöteta, me me ca mok ge hnyamen at ame bi hwaban komok, ke ne o but e ame tot hnyi hnyimakan ûkhacaköu.

HNYIMAKAN 21.

**K**E haba je ban lakamen at Levi, ödrin e he kö Eleazara at bihut, me Josua nöku Nuna, me je ban je tribuiny lakon Isaraela; 2 ke ödrin e fuc ködrin e Silo hnyi hnyei Kanana, ka habe, Iehova ame hûna a deny Mose he ka ham köhmun je taun hnân labâ, me je utkânâ igigilö e hobi kâu halehmun je meno. 3 Ke haba lakon Isaraela ödrin e ham ka at Levi únyi hnyi jekhöúdrin je taun eang me je utkânâ igigilö e, helâ me hna ha hnö Iehova.

4 Ke ame hwâdâ thö ge leköp je taun hobi kâu at Kohatha: ke ame hu thö ge ugleköp ka laku Arona at bihut, a at Levi, únyi hnyi tribu Juda, me tribu Simeona, me tribu Beniamina, je taun a thötin.

5 Ke ame hu thö ge ugleköp ka ke je laku Kohatha únyi hnyi je lap anyin tribu Eferaima, me tribu Dana, me hafiny tribu Manase, ten je taun.

6 Ke ame hu thö ge ugleköp ka laku Geresoma únyi hnyi je lap anyin tribu Isakara, me tribu Asera, me tribu Nafatali, me hafiny tribu Manase hnyi Basana, thötin je taun.

7 Ke ame hu thö ka laku Merari hoton anyidrin je lap únyi hnyi tribu Reubena, me tribu Gada, me tribu Zebulona, twelw je taun.

8 Ke haba lakon Isaraela ödrin e ham ka at Levi ge ukleköp je taun eling me je utkânâ igigilö e, helâ me hna hûna ga Iehova a deny Mose. 9 Ke ödrin e ham únyi hnyi tribuiny laku Juda, me tribuiny laku Simeona, je taun eling wale adre me

ha ien : 10 ke wale me hnân hobi kâu laku Arona, a je lap anyin at Kohatha, a laku Levi: anyin a haba leköp a bân, me, anyidrin. 11 Ke adre me ham ködrin Kiriathareba, haba Areba me kamö Anaka (wale Heberona), hnyi hnyeï ae hut hnyi Juda, me je utkânâ igigilö e. 12 Ke haba ta hnyeiny taun, me je tauniny ae ûhnyûkong, me, adre me ham kö Kaleba, nôku Jefune me me iny.

13 Ke adre me ham ka laku Arona at bihut Heberona me je utkânâ igigilo, wale taun hnân lubaduöng hnyin at ame hlingâ at, me Libena me je utkânâiny; 14 me Jatira me je utkânâiny, me Esetemoa me je utkânâiny; 15 me Holon me je utkânâiny, me Debira me je utkânâiny; 16 me Aina me je utkânâiny, me Juta me je utkânâiny, me Bethesemes, me je utkânâiny; a nain je taun ûnyi hnyi li tribu eling. 17 Ke ûnyi hnyi tribu Beniamina, me, Gibeona me je utkânâiny, me Geba me je utkânâiny; 18 me Anathoth me je utkânâiny, me Alemon me je utkânâiny; vak ta taun. 19 Haba je taun hia anyin laku Arona hnyat bihut, me, thötin, me je utkânâ igigilö.

20 Ke haba je lap anyin laku Kohatha a hnyat Levi, wale ke je laku Kohatha, me ödrin e hu je tauniny hwajekhöudrin, ûnyi hnyi tribu anyi Eferaima. 21 Ke adre me ham ködrin Sekema me je utkânâiny wale hnyi hnyeï ae hut hnyi Eferaima, a taun hnân lubaduöng hnyin ge at ame hlingâ at, me Gezera me je utkânâiny; 22 me Kibezam me je utkânâiny, me Bethehorona me je utkânâiny; vak ta taun. 23 Ke ûnyi hnyi tribu Dana, me, Eletek me je utkânâiny, me Gibethon me je utkânâiny; 24 me Ajalona me je utkânâiny, me Gatharimona me je utkânâiny; vak ta taun. 25 Ke ûnyi hnyi hafiny tribu Manase, me, Tanaka, me je utkânâiny, me Gatharimon me je utkânâiny; lo li taun. 26 Haba je taun hia thithö hobi kâu je lap anyin ke je laku Kohatha, me ten, me je utkânâ igigilö.

27 Ke hobi kâu laku Geresoma, a hansen je lap anyin at Levi, adre ham ûnyi hnyi hafiny tribu Manase, Golona hnyi Basana, me je utkânâiny, wale taun hnân lubaduöng hnyin at ame hlingâ at; me Besetera me je utkânâiny; lo li taun. 28 Ke ûnyi hnyi tribu anyi Isakara, Kiseon, me je utkânâiny me Daberath me je utkânâiny; 29 Juremuth me je utkânâiny,

me Eniganim me je utkânâiny; vak ta taun. 30 Ke ûnyi hnyi tribu Asera, Miseal me je utkânâiny, me Abedon me je utkânâiny; 31 Halekath me je utkânâiny, me Rehoba me je utkânâiny; vak ta taun. 32 Ke ûnyi hnyi tribu Nafatali, Kadesi hnyi Galelaia, wale taun hnân lubaduöng hnyin ge at ame hlingâ at, me je utkânâiny, me Hamathe-doro me je utkânâiny, me Karatan, me je utkânâiny; kun ta taun. 33 Ke haba je taun hia thithö anyin at Geresoma hoton anyidrin je lap, thötin je taun me je utkânâ igigilö.

34 Ke hobi kâu je lap anyin je laku Merari, wale kolon je at Levi, adre ham ûnyi hnyi tribu Zebulona, Jokeneama me je utkânâiny, me Kareto me je utkânâiny, 35 me Dimena me je utkânâiny, me Nahalol me je utkânâiny; vak ta taun. 36 Ke ûnyi hnyi tribu anyi Reubena, Bezari me je utkânâiny, me Jahaza me je utkânâiny, 37 me Kademotha me je utkânâiny, me Mefath, me je utkânâiny; vak ta taun. 38 Ke ûnyi hnyi tribu Gada, Ramoth hnyi Gileada, taun hnân lubaduöng hnyin ge at ame hlingâ at, me je utkânâiny, me Mahanaima me je utkânâiny; 39 me Hesebona me je utkânâiny, me Jasera me je utkânâiny; vak ta taun. 40 Haba je taun hia e eling hobi kâu je laku Merari, hoton anyidrin je lap, a je kolon je lap anyin at Levi, twelv ta taun hwajeköüdrin.

41 Haba je lap hia thithö anyin at Levi hnyi wanben je hnyeï iny lakon Isaraela, me, fâte eit je taun, me je utkânâ igigilö. 42 Haba je taun eling me ve hu je utkânâ igigilö: ke helâe je taun hia thithö eling.

43 Me Iehova ame ham ka at Isaraela hnyeï hia waleji e ame khemanyin he ka ham ka lakamödra; ke adre me tren e me labâ. 44 Ke Iehova ame omen' ödra igigilö, hoton hofuc hia e ame khemanyin ka lakamödra: ke ba ke iwahnaihmiöny mödra ame tot hnyi hnyimaködra; ke Iehova ame hna ta je iwahnaihmiöny mödra hia ka hnyi je hnyamödra. 45 Ke ame ca haû ke hofuc hnyi ta je hofuc ae so ame ha Iehova ka lap anyin at Isaraela; k' ame hwâdâ hia.

HNYIMAKAN 22.

**M**E haba Josua ame hâwâ at Reubena, me Gada, me hafiny tribu Manase, 2 me ha ködrin, ka habe, Öbun e hia but vheno ta je ûnyi hia a hûna köbun. Mose,

athnyabai Iehova, me löng ifucik hnyi ta je únyi hia waleji oge kun' öbun kâu : 3 öbun e ca hna degecâ je liamekeiny möbun hnyi ta je bong ae se hia ke ne o but hnyi bong ang, ke öbun e hia but vheno únyi a húna Iehova Khongubun. 4 Ke walang ang Iehova Khongubun ame omenâ je liamekeiny möbun, helâji me hnen hna ha ködra, anyin a wale hmetu th' öbun, me he ka hnyi umöbun je uma, ka hnyi je ibun, waleji a ham köbun Mose athnyabai Iehova hoton Joridano. 5 Ke wâ wia ju öbun he ka ânyâ hna húna me hnanyibu, waleji a húna köbun Mose athnyabai Iehova, wale he ka hnyok kö Iehova Khongubun me vheno je gethen hia thithö únyi gan, me tuö anyin je hna húna, me kece kâu, me huliwa kâu ge je hnyekubun ae bekhöt me ta je hanubun ae bekhöt. 6 Me Josua ame hahnahici ödrin me kun' ödrin, me ödrin e vese but ka hnyi umödrin je uma.

7 Ke a hia but Mose khene jekhoú hnyi Basana ka hafiny tribu Manase : ke haba ka ke haf, Josua ame khenâ unyin je liamekeiny mödrin hoton Joridano ke e jio. Ke haba khaca, hnyi úen e ame kun' ödrin ka hnyi umödrin je uma, me Josua ame hahnahici ödrin, 8 me ha ködrin, ka habe, He hmetu thö ka hnyi umöbun je uma me tang omjeú ae gan, me je meno ae se hia hmönyin, me sileva, me gol, me bras, me fao, me je úkhaú ae ti se hia : öbun e he ka tha khenâ me je liamekeiny möbun je únyi adre húgúnâ únyi ge je iwahanai-hmiöny möbun.

9 Me ame he hmetu je laku Reubena, me je laku Gada, me hafiny tribu Manase ge lakon Isaraela úheny Silo hnyi hnyei Kanana, he ka he ka hnyi hnyei Gileada, ka hnyi idrin hnyei, wale ae hu gadrin, helâji me hna ha hnö Iehova a deny Mose. 10 Ke ödrin e o hnyi baten Joridano hnyi hnyei Kanana, me haba je laku Reubena, me je laku Gada, me hafiny tribu Manase ödrin e otilâ taben hut hnyi Joridano, tap ae gan hnân wâ. 11 Ke haba lakon Isaraela ödrin e löng adre me ha, ka habe, Wâ bi, a hia but otilâ taben hut hnen je laku Reubena, me je laku Gada, me hafiny tribu Manase, cicö hnyei Kanana, hnyi baten Joridano, hnyi ke keihen iny lakon Isaraela. 12 Ke a löng ut lakon Isaraela, me ame úkhacaköu tavat hia a je lakon Isaraela hnyi Silo, he ka vat mödrin.

13 Ke haba lakon Isaraela adre me kunö Fineasa nöku Eleazara at bihut ka laku Reubena me laku Gada, me hafiny tribu Manase, ka hnyi hnyei Gileada ; 14 ke tha e me je than a ten, úsa khaca than anyin je kamen je lap hia thithö anyin je tribu Isaraela ; ke haba ödrin hia, me ödrin je ban je lap anyin lakamödrin unyin je thauzaniny at Isaraela. 15 Ke ödrin e o but ka laku Reubena, me laku Gada, me hafiny tribu Manase hnyi hnyei Gileada, me ha ködrin ka habe, 16 Walang hofuc hwan úkhacaköu hia anyi Iehova, ka habe, Ie únyi ang ae kong öbun e ânyâ ka Khongon at Isaraela, möbun e hna hota but Iehova, wale öbun e otilâ taben hut hobi köbun, me khikhin ga Iehova hnyi bong ang ? 17 Hawa, e ti úhnyúkong köta hulö hnyi Peora, wale ate me tiga ca obosoi öta hnyin ke ne o but hnyi bong ang, eja ke ne a ne hia but o mok ae cap ka hnyi hon úkhacaköu anyi Iehova, 18 m' öbun e hna hota but Iehova hnyi bong ang ? ke haba hnyi bong ang öbun e khikhin ga Iehova, me haba nyi e ame he ka hmönyin ka úkhacaköu hia thithö anyin at Isaraela. 19 Ke so bi ame ne bo kong hnyei ae hu ibun hnyin, awe, hanyâúâ thö ka hnyi i Iehova adre otilâ hnyin uma mano umö Iehova, m' öbun e hu hnyei unyihmun : ke ca he ka khikhin ga Iehova, me úkhin fuc möhmun, wale möbun e otilâ taben anyibun hut kö Iehova Khonguhmun. 20 Hawa, e ca ânyâ hwakecin ae kong Akana nöku Zera hnyi únyi adre okabâ, me ame o hmönyin ka úkhacaköu hia anyin at Isaraela ? ke ame ca hake mok at eling hnyi anyin hulö.

21 Me haba laku Reubena, me laku Gada, me hafiny tribu Manase, ödrin e thu me ha ka je ban je thauzaniny at Isaraela, ka habe, 22 Haba Iehova Khongon ta je khong, Iehova Khongon ta je khong, me e at ame wâhmakhmetoâ, ke ame he at Isaraela ka wâhmakhmetoâ bi ; a g' adre ne ânyâ únyi hnyi khikhin, ke ame ne únyi hnyi hwakecin ae kong kö Iehova, (ca he ka omeli öhmun hnyi bong ang,) 23 wale ge hnöhmun hna otilâ taben anyihmun hut, me hna degeci Iehova ; ke ame ne hnân he ka hudo je hudiny leú, me hudiny han, ke ame ne hnân budo je hudiny úsoköu hon e, hamö Iehova he ka elâm ; 24 ke öhmun e ne ca ânyâ únyi e hnyi hnyok ae hmäk, me únyi ge hna únykúme, ke haingöhmun, ka habe, ame ne

he lakubun nyiele ka ha ka lakuhmun, ka habe, leú anyibun únyi unyi Iehova Khongon at Isaraela? 25 anyin a hia but Iehova bi hnyigöulen Joridano wanböhmun möbun laku Reubena, me laku Gada; e ba hwajekhöubun unyi Iehova: ke ame he lakubun ka ohia ot kö Iehova unyin je lakuhmun. 26 Anyin a wale haingöhmun, ka habe, Ötin a hwân walang ang he ka otilâ taben hut, a ca hnân leú hut me bi hut hon e: 27 ke so bi hnân haten e wanböhmun möbun, me anyitin je dö hwabötin, m' öhmun he ka ânyâ huliwa anyi Iehova hnyi hnyimakan hnyi je hudiny leú, me je hut, me je hudiny úsoköu; me me ca he lakubun ka ha nyiele ka lakuhmun, ka habe, E ba jekhöúbun unyi Iehova. 28 Anyin a wale öhmun e ha, ka habe, Ödrin ka he ka ha helâe köhmun me anyihmun je dö nyiele, öhmun e he ka ha bi, ka habe, Wâ bi tulut taben hut kö Iehova a ânyâ lakamöhmun, a ca hnân leú hut me bi hut hon e; ke so bi hnân ohnathoâ köhmun möbun. 29 Öhmun na ca he ju ka khikhin ga Iehova, me hmetu ga Iehova hnyi bong ang, he ka otilâ taben hut hnân leú, me hudiny han, me ke hut, hnân he ka hanen taben hut kö Iehova Khongutin cicö umen uma mano.

30 Ke löng ut Fineasa at bihut, me je thaniny úkhacaköu, wale je ban je thauzaniny at Isaraela unyin, ta je hofuc ame ha laku Reubena, me laku Gada, me laku Manase, me ame so ködrin. 31 Ke haba Fineasa nöku Eleazara at bihut ame ha ka laku Reubena, me laku Gada, me laku Manase, ka habe, E khan' ötin dut hnyi bong ang a e unyita Iehova, anyin a öbun e ca ânyâ monu ang kö Iehova: walang öbun e omelö lakon Isaraela únyi hnyi hnyamö Iehova. 32 Me ame hmetu Fineasa nöku Eleazara at bihut, me je than, úheny unyin laku Reubena, me laku Gada, únyi hnyi hnyei Gileada, ka hnyi hnyei Kanana, ka lakon Isaraela, me thumetu ödra. 33 Ke so hofuc eling ka lakon Isaraela; me haba lakon Isaraela adre me ogânâ Khong, m' adre me ca ha hmetu he ka vat mödrin, he ka okongoâ hnyei ame laba hnyin laku Reubena, me laku Gada. 34 Ke haba laku Reubena, me laku Gada, me ödrin e hwenyi ien taben hut, me At ohnatho, anyin a hnân ohnathoâ köta a Khonguta Iehova.

HNYIMAKAN 23.

**K**E hwaban je bong ae se, ke Iehova ame hia but omenâ at Isaraela únye ge je iwahnaihmiöny mödra igigilö, ke hingat ut Josua ke se hia hunainy; 2 me haba Josua ame hawâ at Isaraela hia thithö, me wahingatidra, me anyidra je ban, me tavat owisa ködra, me je homakan gadra, me ha ködra, ka habe, Iny hingat ut, ke se hia je hunaik: 3 öbun e hia but wâ ta je únyi a ânyâ Iehova Khongubun ka je hnyei hia eang cabun: anyin a Iehova Khongubun, me wale at ame vat hobi köbun. 4 Wâ bi, oge hia but khenâ köbun je kolon je hnyei ang, me hwajekhön anyibun je tribu, hwân hnyi Joridano, me je hnyei oge hia but ohia, ke ne o but ka hnyi köiö ae gan cicö hna dit hnen seünö. 5 Ke ame he Iehova Khongubun ka ob' ödrin hnyi hnyimaköbun, me ohí' ödrin unyibun; ke ame he bi ka hwajekhöubun idrin hnyei helâji me Iehova Khongubun ame ha köbun. 6 Anyin a wale hwege th' öbun he ka tuö me ânyâ ta je únyi hia adre sihnalimen hnyi tusi hnanyibu anyi Mose, me ca saú bi ka hnyi ke keihen metâ me me; 7 m' öbun e ca he bi ka laba unyin je hnyei eling, wale je kolon unyibun, me ca ha ien anyidrin je khong, me khemanyinâ, me huliwa ködrin, me khudrung ködrin: 8 ke so bi öbun e he ka kece kö Iehova Khongubun, helâ me hnöbun hna ânyâ ke ne o but hnyi bong ang. 9 Anyin a hia but Iehova obâ hnyi hnyimaköbun je hnyei ae gan me hwege: ke haba öbun, me ba at ame tot hnyi hnyimaköbun ke ne o but hnyi bong ang. 10 Ame he at a khaca gabun ka hnu thauzan: anyin a Iehova Khongubun ame vat hobi köbun, helâ me hnen hna ha köbun. 11 Anyin a wale wâ wia bi öbun he ka hnyok kö Iehova Khongubun. 12 Ke öbun e ne hmetu ju, me kece ka je kolon je hnyei eling, wale je kolon unyibun, me faipoipo mödrin, me he ködrin, ke ödrin, ödrin e he köbun: 13 awe, wâhmakhmeto ju öbun a g' ame ca he hmetu bi Iehova Khongubun ka obâ je hnyei eling hnyi hnyimaköbun; ke ödrin e he ka hnân je hnewe me je offic köbun, me je osö hnyi je vhaköbun, me údö hnyi je li emaköbun, ke ne o but ame bi' öbun únyi hnyi hnyei ae so a ham köbun Iehova Khongubun. 14 Ke wâ bi, oge me he ka vhenö hnyi

bong ang gethen deny aten hmeledrany hia: ke e khan' öbun dut hnyi ta je hnyok me je hanubun, ae ca haü ke únyi hnyi ta je únyi hia ae so a ha Iehova Khongubun gabun; e hwâdâ hia köbun, he ca haü bi ke únyi a khaca. 15 Ke e hwâdâ köbun ta je únyi hia ae so a ha köbun Iehova Khongubun, awe, helâe ame he Iehova ka oâtâ köbun ta je únyi hia ae kong, ke ne o but e ame hi' öbun hia but únyi hnyi hnyei eang ae so a ham köbun Iehova Khongubun. 16 Öbun ka he ka hanyâüâ úhinyköu anyi Iehova Khongubun, wale e ame hûna köbun, me he ka bi athnyaba ke je khong bi me khudrung ködrin: awe, ame he ka ubâhlâ hmönyin anyi Iehova köbun, ke ame he ka logot hi' öbun únyi hnyi hnyei ae so wale e ame hia but ham köbun.

HNYIMAKAN 24.

**K**E haba Josua ame úkhacaköuâ je tribu Isaraela hia hnyi Sekema, me hawâ wahingatiny at Isaraela, me je ban, me je hnyat owisa, me je homakan gadra; me adre me o hnyi hnyimakan Khong. 2 Ke Josua ame ha ka tavat hia thithö, ka habe, Walang hofuc ame ha Iehova, Khongon at Isaraela, ka habe, Haba kâü adrem ame laba lakamöbun hnyi hoton Wagewe, wale Tera kamö Aberahama, me kamö Nahora: k' odrin e bi athnyabainy ke je khong. 3 Ke oge me hom kamöbun Aberahama únyi hnyi ke keihen Wagewe, me lelö e he ka vheno hnyei Kanana hia thithö, me osehia je mâtrániny, me ham kâü Isaaka. 4 Ke oge me ham Jakob me Esau kö Isaaka; ke oge me ham bucen Seira kö Esau me me iny; ke Jakob ame he me lakon Aigupito ai. 5 Ke oge me kunö Mose me Arona, me oge me kot Aigupito, helâji me hnök hna ânyâ unyidra: ke hwaban e me oge me hum öbun bi. 6 Ke oge me hom lakamöbun úheny Aigupito: me öbun e o ka hnyi köiö: ke haba at Aigupito adre me hnu lakamöbun me je kariota me tavat tabö hors ke ne o but ka hnyi Köiö ae Dra. 7 Ke adre me tenge kö Iehova, me e ame ip menekholom wanböbun me at Aigupito, me okhuto hudrin köiö me húlulú ödra; ke a wâ but je emaköbun únyi oge me ânyâ hnyi Aigupito: ke öbun e laba hnyi hnyebuba hnyi je bong ae se. 8 Me oge me hum öbun ka hnyi hnyei iny at

Amora, tavat adre me laba hoton Joridano; ke ödrin e vat möbun; me oge me hn' ödrin ka hnyi hnyamöbun, me öbun e hom idrin hnyei; ke oge me obi' ödrin hnyi hnyimaköbun. 9 Ke ame todrö Balaka nöku Zipora, than Moaba, me vat me Isaraela; me e ame úkhünöng he ka hum Balaama nöku Beora he ka hang' öbun: 10 ke haba inya oge me höcö he ka ling Balaama; anyin a wale e ame ha hnahici öbun bi; me oge me omeli öbun unyi hnyi hnyamen. 11 Ke öbun e he hanyâüâ Joridano, me o hnyi Jeriko: ke ame vat möbun at Jeriko, me at Amora, me Perizi, me Kanana, me Heth, me Girigasa, me Hivi, me Jebusi; ke oge me hn' ödrin ka hnyi hny amöbun. 12 Ke oge me kunâ hânâ je wahankânâ, me ame ob' ödrin hnyi hnyimaköbun, wale li than Amora; ca hnen ânyâm hele vat, me ânyâm fana. 13 Ke oge ham köbun ke hnyei a öbun e ca huliwan, me je taun a öbun e ca otilâ, me öbun e labâ; öbun e han únyi hnyi je hnyei vine, me je hnyei elaiö a öbun e ca belökâ. 14 Ke walang any ot ju kö Iehova, me bi athnyabainy ge hnyok me hnathu minya: ke degec ut je khong wale a athnyabainy lakamöbun hoton Wagewe me e Aigupito; ke bi athnyabai Iehova. 15 Ke ame ne kong köbun he ka bi athnyabai Iehova, úca th' öbun hnyi bong ang at öbun e he ka bi athnyabainy; ame ne je khong waleji a bi athnyabainy lakamöbun hoton Wagawe, ame ne je khong khongon at Amora, hnyi hnyei öbun e labâ: ke haba inya me anyik lap, öhmun e he ka bi athnyabai Iehova. 16 Ke haba tavat ödrin e thu me ha, ka habe, Öhmun na ca he ka hna degeci Iehova me bi athnyabainy ke je khong; 17 anyin a Iehova Khongutin wale at ame hum ötin me lakamötin únyi hnyi hnyei Aigupito, únyi hnyi hnyaba ae úthaluö, me ânyâ je haten ae gan hnyi hnyimaköta, me tu' öta eü hnyi gethen hia waleji ötin e vheno, wanben tavat waleji ötin e he wanbödrin: 18 ke Iehova ame obâ tavat hia thithö hnyi hnyimakötin, wale at Amora tavat adre me labâ hnyei: anyin a wale öhmun e he minya ka bi athnyabai Iehova; anyin a e Khongutin. 19 Ke Josua ame ha ka tavat, ka habe, E ca khan' öbun he ka bi athnyabai Iehova; anyin a e Khong ae kap; me Khong ame ciâ; e ame ca he ka hna anyibun hulö me anyibun je monu. 20 Ke öbun ka he ka hna degeci Iehova, me bi



## OWISA 1.

athnyahabainy je khong kanyua, awe, e ame he ka hwiö me okongu öbun, me ohi öbun, hwaban ta je ünyi ae so e ame änyâ köbun. 21 Me ame ha tavat kö Josua, ka habe, Ohe, öhmun e he bi ka bi athnyabai Iehova. 22 Ke Josua ame ha ka tavat, ka habe, Öbun tavat ohnathu öbun bi, a öbun e ücö Iehova hobi köbun he ka bi athnyabainy. Me haingödra, ka habe, Öhmun tavat ohnatho. 23 Anyin a wale he th' öbun walang ang ka hna degecâ but je kong kanyua unyibun, me hna je hnye-kubun kö Iehova, Khongu Isaraela. 24 Me ame ha tavat kö Josua, ka habe, Öhmun e he ka bi athnyabai Iehova Khonguta, me löng hwan hofuc 25 Me haba Josua ame ühibinyköu me tavat hnyi bong eling, me otilâ hobi ködra hnanyibu me hna owisa hnyi Sekema.

26 Ke Josua ame sihnalimen ta je hofuc ang hnyi tusiny hnanyibu anyin Khong; ke e ame hom ke veto ae gan me otilâ eü hmelen iwajo hnyi baten dok ae kap anyi Iehova. 27 Ke Josua ame ha ka tavat hia thithö, ka habe, Wâ bi, haba veto ang, me, hnân ohnatho köta, anyin a e at ame

löng hia je hofuc a ha köta Iehova : anyin a wale hnân ohnatho köbun, wâ öbun nye he ka ivinoâ Khongubun. 28 Me haba Josua ame kunâ tavat hia ka hnyi je jekhöüdra.

29 Ke hwaban ta je ünyi e, me ame mokcu Josua, nöku Nuna, athnyabai Iehova, ke wan haded ke ten je hunainy. 30 Me adre me konâm e hnyi iny hnyei, wale Timena-sera, hnyi hnyei ae hut hnyi Eferaima, hnyi bucen Gasa ka hnyi hwa-drö. 31 Ke haba at Isaraela adre me bi athnyabai Iehova hnyi je bong hia bongu Josua, me je bong bongon wahingat a ütangköu me Josua, hnyat adre hnyi wâ je huliwa hia anyi Iehova hobi kâu at Isaraela. 32 Ke haba je jeiö Josefa waleji a hom lakon Isaraela übeny Aigupito adre me konâm hnyi Sekema, hnyi utkânâ a üco Jakob ünyi ge laku Hamora kamö Sekema hwaban je mone a khaca haded : ke wale hwajekhon laku Josefa. 33 Ke ame mokcu Eleazara, nöku Arona, me ödrin e konâm e hnyi dok ae hut ga Fineasa a nokon, wale adre ham kâu hnyi hnyei ae hut hnyi Eferaima.

## TUSI ANYIN HNYAT OWISA.

### HNYIMAKAN 1.

**H**WABAN imeki Josua haba lakon Isaraela adre me hnö unyi Iehova, ka habe, la ame he ka bân ka he hobi köhmun ka at Kanana me vat mödrin? 2 Ke haingö Iehova, ka habe, Bân at Juda : wâ bi öge hia but hna ködrin hnyei. 3 Ke Juda ame ha kö Simeona liamekeiny mē, ka habe, Aiö u ka hnyi jekhöük me ötu me tha he ka vat me at Kanana ; ke öge me he ka tha he möu ka hnyi jekhom. Ke haba Simeona ame tha he mē. 4 Me Juda ame he ; me Iehova ame hna at Kanana me Perizi ködrin : ke hnyi Bezek ödrin e kot ten thauzan tavat. 5 Ke ödrin e ö Adoni-bezek hnyi Bezek, me ödrin e vat wē, me ödrin e kot at Kanana, me at

Perizi. 6 Ke ame kec dö Adoni-bezek ; me ödrin e hnu e, me kât e, me ödrin e subâ but li bahnyökveto me li bacan ae gan. 7 Ke Adoni-bezek ame ha, ka habe, Ödrin sevente je than adre subâ je bahnyökveto me li bacan ae gan gadrin, ödrin e hlo je atmen hmelen anyik laulau : ke haba Khong ame bi hwaban könya helâ me hnök hna änyâ. Ke ödrin e hom e Jerusalema ai, me e ame mokcu eling.

8 Ke haba laku Juda ödrin e vat me Jerusalema, me hügünâ e, me kot ge hele vat, me thong taun ge meic. 9 Ke hwaban e laku Juda ödrin e he me vat me at Kanana tavat adre me laba hnyi hnyei ae hut, me hnyi Whaiöu, me hnyi hnyei ae ca hut. 10 Ke Juda ame he ka at Kanana adre me laba hnyi Heberona : (ke haba ien Heberona ehac me Kiriath-areba :) me

## OWISA 2.

ödrin e kot Sesai, me Ahiman, me Talemái. 11 Ke úheny e ödrin e he ka tavat adre me labā Debira. (Ke haba ien Debira ehac me Kiriatha-sefer.) 12 Ke haba Kaleba ame ha, ka habe, Haba at ame he ka kot Kiriatha-sefer, me hûgúnâ e, me oge me he ka ham kâu nökuk hlu jia Akesa. 13 Ke ame hûgúnâ e Otheniela, nöku Kenaza kei Kaleba: me e ame ham Akesa a nokon kâu me me áiân. 14 Ke ame o but kâu hlu eling, me ha ka áiân he ka sumâtâ utkânâ ge kamen: he ame utut hlu úheny hon asina; me Kaleba ame ha kâu, ka habe, Ieú ae wem? 15 Ke haingen, ka habe, Ham but könya hnahic; u je hia but ham könya hneyi ka hnyi Hwaiöu, anyin a wale ö u ham könya je an ame pupua. Me Kaleba ame ham kâu je an ame pupua walethö me eú.

16 Ke haba lakon at Keni a úngú Mose, ödrin e tha he me laku Juda úheny hnyi tauniny je úö pama ka hnyi hnyebuba anyi Juda, hnyi ke keihen Arada ka hnyi hwaiöu; ke ödrin e he me tha laba me tavat. 17 Ke Juda ame tha he me Simeona a liamekeiny mē, me ödrin e kot at Kanana hnyat adre me labā Zefath me ohia e. Ke haba ien taun, me, Horema. 18 Ke Juda ame hûgúnâ minya Gaza me baten e, me Asekelona me baten e, me Ekerona me baten e. 19 Ke o bi Iehova unyi Juda; me e ame obâ tavat ödrin e laba hnyi hneyi ae hut; ke ca khana bi he ka obâ tavat ödrin e laba hnyi hnyigöulen bucen, anyin ae hu gadrin je kariota fao. 20 Ke adre me ham Heberona kö Kaleba, helâji me Mose ame ha: ke e ame obâ úheny e laku Anaka a kun. 21 Ke haba laku Beniamina, ödrin o ca obâ at Jebusi, wale tavat adre me labā Jerusalema: ke haba at Jebusi ödrin e tha laba me laku Beniamina hnyi Jerusalema ke ne o but hnyi bong ang.

22 Ke haba lap anyi Josefa, me ödrin e he ka vat me tavat Beth-ela: ke e bi Iehova unyidrin. 23 Ke haba lap anyi Josefa ödrin e úkhúnöng ka ecmákâ Beth-ela. (Ke Luza ien taun ehac.) 24 Ke tavat ecmak ödrin e wâ et ame dit úheny hnyi taun, me ödrin e ha kâu, ka habe, Ö u omanená thö köhmun homagöuleny taun, ke öhmun e he ka betenge gam. 25 Me e ame omanená ködrin homagöuleny taun, me ödrin e kot taun ge hele vat; ke ödrin e hna but at me anyin lap hia. 26 Me ame he at ka hnyi hneyi iny at Heth, me otílâ taun me

hwenyi ien Luza, wale ien ke ne o but hnyi bong ang.

27 Ke haba at Manase ödrin e ca obâ tavat adre me laba hnyi Beth-seana me je tauniny, me Tanaka me je tauniny, me tavat adre me labā Dora me je tauniny, me tavat adre me labā Ibeleama me je tauniny, me tavat adre me labā Megido me je tauniny: ke hwege at Kanana he ka laba bala bi hnyi hneyi eling. 28 Ke ame hwege bi at Isaraela, me ödrin e kunâ at Kanana he ka bi athnyaba, k'adre ca ti ob' ödrin.

29 Ke haba at Eferaima ödrin e ca obâ at Kanana tavat adre me laba hnyi Gezera; ke at Kanana ame laba hnyi Gezera unyi drin.

30 Ke haba at Zebulona, ödrin e ca obâ tavat adre me laba hnyi Kiterona, me tavat adre me laba hnyi Nahalol; ke ame tha laba mödrin at Kanana, me bi fat ködrin.

31 Ke haba at Asera, ödrin e ca obâ tavat adre me laba hnyi Ako, me tavat adre me laba hnyi Zidona, me Alab, me Akeziba, me Heleba, me Afeka, me Rehoba: 32 ke haba at Asera ödrin e tha laba me at Kanana, wale tavat a aten hneyi: anyin a ödrin e ca ob' ödrin.

33 Ke haba at Nafatali, ödrin e ca obâ tavat adre me laba hnyi Beth-semes, me tavat adre me laba hnyi Beth-anath: ke ödrin e tha laba me tavat Kanana, tavat adre me labā hneyi: ke so bi haba tavat adre me laba hnyi Beth-semes, me Beth-anath ödrin e bi fat ködrin.

34 Ke haba at Amora, ödrin e khöbwe at Dana ka hnyi hneyi ae hut: k'adre ca hn' ödrin he ka utut ka hnyi hnyigöulen bucen: 35 ke hwege at Amora he ka laba bala bi hnyi bucen Heres, hnyi Ajalona, me Salebim: ke hwege bi hnyamen lap anyi Josefa, me ödrin e bi fat bi. 36 Ke haba hnyigöulen at Amora, me, hwân hnyi gethen ame ölö Akerabima ai, hwân hnyi kic me ethö görany.

### HNYIMAKAN 2.

**K**E ame o hnyi Bokim úheny Gelegala angela anyi Iehova. Me e ame ha, ka habe, Oge me kun' öbun úheny Aigupito, me hum öbun ka hnyi hneyi waleji oge khemanyin ka lakamöbun; ke oge me ha, ka habe, Oge me ca he balua ka ounyibâúâ anyik úhinyköu möbun: 2 ke

### OWISA 3.

haba öbun m' öbun e ca he bi ka úhi-hinykôu me aten hnyei ang ; k' öbun e he ka kia anyidrin je taben hut : ke so bi öbun e ca löng hok hofuc : ieu gabun m' öbun e ányâ helâe ? 3 Anyin a wale oge me ha, ka habe, Oge me ca he ka ob' ödrin hnyi hnyimaköbun ; k' ödrin e he ka helâ me je údö hnyi je vhaköbun, ke haba je khongudrin, me, hnân hnewe köbun. 4 Ke angela anyi Iehova ame ha ta je hofuc eling, me haba tavat adre me tenge gan hmâ. 5 Me adre me hwenyi ien dok eling, me, Bokim : ke ödrin e bi hut eling kö Iehova.

6 Ke Josua ame kunâ tavat, me haba lakon Isaraela ödrin e ve he ka hnyi je idrin he ka labâ hnyei. 7 Ke ame bi athnyabai Iehova tavat hnyi je bong bongu Josua hia, me hnyi je bong hia thithö bongon je hingat ae útangköu me Josua, tavat adre hia but hnyi wâ ta je huliwa hia thithö ae gan hmâ anyi Iehova, waleji e ame ányâ hobi kâu at Isaraela. 8 Ke a mokcu Josua nöku Nuna, athnyabai Iehova, ke wan haded me ten je hunainy. 9 Me ödrin e konâm e hnyi baten iny hnyi Timena-sera, hnyi hnyei ae hut hnyi Eferaima, hnyi ke keihen hwadröiny Gaza. 10 Ke ame úkhacaköu dö eling hia me lakamödrin : ke ame kü ke dö hwabödrin ae ca khan' ödrin Iehova, me je huliwa e ame ányâ hobi kâu at Isaraela.

11 Ke haba lakon Isaraela ödrin e ányâ únyi ae kong hnyi hnyimakö Iehova, me bi athnyabainy je Baala : 12 Ke ödrin e hna degeci Iehova Khongon lakamödrin, at a hum ödrin úheny hnyi hnyei Aigupito, me hnu hoton ke je khong, je khongon je hnyei igigili ödrin, me khudrung ködrin : ke ödrin e okuâ hmönyin anyi Iehova. 13 Ke ödrin e hna degeci Iehova, me bi athnyaba ka Baala, me Aseira. 14 Me ame ubâhlâ thö hmönyin anyi Iehova ka at Isaraela, me e ame hn' ödrin ka hnyi hnyamen hnyat sei me sei ödrin, me e ame úcü ödrin me je iwahnaihmiöny mödrin igigilö, me me ca khan' ödrin hmetu bi he ka tot hnyi hnyimakan je iwahnaihmiöny mödrin. 15 Ödrin e he ka hnyi ke je dok hia, me ame kong hnyamö Iehova ködrin, helâji me Iehova ame ha, me helâ me hna khemanyin ködrin ga Iehova : me ödrin e vec gan hmâ. 16 Ke haba Iehova ame oâ je at owisa, wale adre omeli ödrin únyi hnyi hnyamen je hnyat sei ödrin. 17 Ke ödrin e ca löng ka tavat owisa kö

drin, ke ödrin e bi únyi monu me je khong monu, me khudrung ködrin : ödrin logot saú únyi hnyi gethen a vheno lakamödrin waleji adre löng hnanyibu anyi Iehova ; ke ödrin e ca ányâ bi helâe. 18 Ke Iehova ame ham ködrin tavat owisa, me Iehova ame tha e me at owisa, me omeli ödrin únyi hnyi hnyamen je iwahnaihmiöny mödrin hnyi ta je bong hia bongon at owisa : anyin a Iehova ame ietra can anyidrin mokhon ge tavat adre me sed ödrin me oveci odrin, 19 Ke a mokcu at owisa, me ödrin e hmetu me okongu ödrin bi hon hwakecin lakamödra me hnu hoton je khong me bi athnyabaidrin me khudrung ködrin ; ke adre me ca degeci anyidrin je huliwa me hwakecidrin ae újöng. 20 Me ame ubâhlâ thö hmönyin anyi Iehova ka at Isaraela ; me e ame ha, ka habe, anyin a hia but tavat eang hanyâúâ anyik úhi-hinykôu, waleji oge me húna ka lakamödrin, me ca löng hok hofuc ; 21 awe, oge me ca he hmetu ka obâ je hnyei hobi ködrin a je kolon hnyi úen mok a Josua : 22 m' oge me he ka cubec at Isaraela únyi gadrin, hawa, adre me he ka tuö gethen de Iehova he ka vheno e, helâji me lakamödra ame ányâ, ame ne ba. 23 Me Iehova ame onuâ je hnyei eling, me ca ie ob' ödrin ; ke e ame ca hn' ödrin ka hnyi hnyamö Josua.

### HNYIMAKAN 3.

**K**E walang je hnyei Iehova ame onuâ m' ödrin e he ka cubic at Isaraela, a tavat adre ca hnyi wâ je vat hia hnyi Kanana : 2 waleling me me khana je dö anyin lakon Isaraela he ka úne vat ködrin, a tavat ödrin e ca hnyi wâ ehac : 3 walang faiv ta than Filisiti, me at Kanana hia, me at Sidona, me at Hivi adre me labâ bucen Lebanona, hwân hnyi bucen Baala-here-mona ke ne o but hnyi gethen ame didrö ka hnyi Hamath. 4 Ke haba tavat eling me hnân cubic at Isaraela me me he ka wâ hawa, ödrin e ne he ka hnu hoton je hnanyibu anyi Iehova, waleji a húna ka lakamödra a deny Mose. 5 Me ame laba lakon Isaraela unyin at Kanana, me at Heth, me at Amora, me at Perizi, me at Hivi, me at Jebusi : 6 ke adre me hom lakudrin je hlu me me laöiödra, me ham lakudra bi je hlu ka lakudra obaga, me bi athnyabainy je khongudrin.

7 Ke haba lakon Isaraela adre me ányâ hulö hnyi hnyimakö Iehova, me hnying

Iehova Khongudrin, me bi athnyabainy je Baala me je Aseira. 8 Anyin a wale ame ubâhlâ hmönyin anyi Iehova ka at Isaraela, me e ame úcû ödrin kö Kusani-risathaima than Mesopotamia : me lakon Isaraela adre me bi athnyabai Kusani-risathaima eit ta huna. 9 Ke ame tenge lakon Isaraela kö Iehova, me Iehova ame oâ ka lakon Isaraela at hnân omelö, ke e ame omeli ödrin, jia Otheniela nöku Kenaza kei Kaleba. 10 Ke ame mokut hon at e hanu Iehova, ke e ame owisa ka at Isaraela ; ke e ame he ka vat, me haba Iehova ame hnö Kusani-risathaima than Mesopotamia ka hnyi hnyamen : ke e hwege hnyamen hu Kusani-risathaima. 11 Ke ame menâ hnyei hnyi fâte je huna. Ke ame mokcu Otheniela nöku Kenaza.

12 Ke ame ânyâ hmetu bi ûnyî ae kong hnyi huyimakö Iehova lakon Isaraela : ke Iehova ame siwhegiö Egelona than Moaba ka at Isaraela, can ödrin e ânyâ ûnyî ae kong hnyi hnyimakö Iehova. 13 Me e ame úkhacakouâ bi kâu laku Amona me Amabeka ; me e ame he me kot Isaraela, me hûgûnâ tauniny je úö pama. 14 Ke lakon Isaraela ödrin e athnyabai Egelona eitn je huna. 15 Ke ame tenge kö Iehova lakon Isaraela, me Iehova ame oâ ködrin at hnân omelö, jia Ehuda nöku Gera, at Beniamina, e at ae me benyin : ke haba lakon Isaraela ödrin e kunâ e me bwihlany kö Egelona than Moaba. 16 Ke Ehuda ame tibet hobi kâu e bi hele vat a lo li homakan, khaca kubit ibeûen ; me e ame weikâ e eú hmelen anyin úkhaú hnyi jevan a metân. 17 Ke e ame hom bwihlany kö Egelona than Moaba : ke at ae ti pipikhenya Egelona. 18 Ke a hia but ham bwihlany e ame kunâ hmetu tavat adre vaden bwihlany. 19 Ke habe e bi, e ame hmetu hmetu cicö je hnatheat hnyi Gilegala, me ha, ka habe, Than lö, e hu gak hofuc ae iyong köu. Ke haingen, ka habe, Laba hnyibú ju. Me ame he but hnyöu ai tavat ödrin e tot unyin. 20 Ke ame hok dö Ehuda kâu : ke e ame laba hnyi hnyeule ethö dok ae hu ang, ke e ame hake lap. Me haba Ehuda ame ha, ka habe, E hu gak hofuc hwan Khong köu. Me e ame todrö úheny hon taben lap. 21 Me Ehuda ame inâ but hnyamen a me me oc ut hele vat ûnyî hnyi jevan a metân, me dá hnyekon bi : 22 k'ame dit hele vat ke ne o but hnyi can ; me ame khöt ju pipikhenya hon hele vat, anyin a e ame ca oc hmeto hele vat ûnyî hnyi hnyekon ; k'ame o but ka

hnyi hoton. 23 Me ame didrut Ehuda ka hnyi poretiko, me hlöng li hwanumen hnyeule ethö kâu, me kiâ. 24 Ke e ame he but, me ame o lathnyabainy ; me ödrin e wâ, ke wâ bi, adre hia but kiâ li hwanumen hnyeule ethö ; ke haingödrin, ka habe, Ame ne tube li can la hnyi anyin hnyeule ethö. 25 Ke ödrin e halubahingen ke ne o but ödrin e hmehma but : ke wâ bi e ame ca khöng li hlinginy hwanumen hnyeule ethö ; me ödrin e hom ki me khöng : me wâ bi, a ta but anyidrin than kâu a ga mokcu. 26 Ke ödrin e tiga halubahingen, me haba Ehuda ame kec, me he but hnyi hoton je hnatheat, me kec Seirath ai. 27 Ke e ame he but me túâ trutru hnyi hnyei ae hut hnyi Eferaima, me ame tha utut lakon Isaraela mē úheny hon hnyei ae hut, ke e ame bán. 28 Me e ame ha ködrin, ka habe, Hnu hotuk : anyin Iehova ame hna at Moaba je iwahnaihmiöny ka hnyi hnyamöbun. Ke ödrin e utut mē, me tuö je dok ae cöcö hnyi Joridano úcon at Moaba, ke adre me ca hna ke at a khaca ame he hanyâúâ. 29 Ke ödrin e kot at Moaba hnyi úen eling helâke ten thauzan tavat, tavat hia ae hunyin, ke tavat hia ae hwege ; e ba at ame kec möt. 30 Ke adre hom úhnyúkongu Moab hnyi bong eling hmelen hnyamen at Isaraela. Ke ame menâ hnyei eite je huna.

31 Ke hwaban e bi, me Samegara nöku Anath, haba at eling ame kot at Filisiti a siks haded ge osö hnân alin bolok : me e ame omelö minya at Isaraela.

#### HNYIMAKAN 4.

**K**E haba lakon Isaraela adre me ânyâ hmetoâ ûnyî ae kong hnyi hnyimakö Iehova, ke a mokcu Ehuda. 2 Ke haba Iehova ame úcû ödrin ka hnyi hnyamö Jabin than Kanana, at ame musi hnyi Hazora ; ke Sisera taben anyin vat, at ame laba hnyi Haroseth hnyi je hnyei. 3 Haba lakon Isaraela ödrin e tenge kö Iehova : anyin ae hu gan nain haded je kariota fao ; ke twente je huna e ame hom úhnyúkongo hwegiâ lakon Isaraela.

4 Ke haba Debora perofeta momo, öiö Lapidoth, e at owisa ka at Isaraela hnyi úen e. 5 Ke e ame laba hmelen pama anyi Debora wanben Rama me Beth-ela hnyi hnyei ae hut hnyi Eferaima : ke lakon Isaraela adre me he kâu ka owisa. 6 Ke e ame úkhúnöng ka hawo Baraka nöku

Abinoam úheny Kadesi-nafatali, me ha kâu, ka habe, Hawa, a ca ha Iehova Khongu Isaraela, ka habe, He thö, hok dö ka hnyi bucen Tabora, ke tha hom möu ten thauzan laku Nafatali, me laku Zekulona? 7 Ke oge me he ka lelö köu ka hnyi wagewe Kisona, Sisera, taben vat anyi Jabin, me anyin je kariota, me anyin je utbavat; me oge me he ka hna e ka hnyi hnyamân. 8 Ke haingö Baraka, ka habe, U je ne he ka tha he mönya oge me he ka he; ke u je ne ca he ka tha he mönya, me oge me ca he ka he. 9 Haingen, ka habe, Oge ma hnyi he möu: ke so bi, ca hnân oganö u úhem; anyin ame he Iehova ka hnö Sisera ka hnyi hnyamen momo. Ke ame todrö Debora me tha he me Baraka Kadesi ai. 10 Ke haba Baraka ame hawâ at Zebulona me Nafatali Kadesi ai; ke ödrin ten thauzan tavat adre tha he më: ke Debora ame tha he më. 11 Ke haba Heberu at Keni ame usákáúö me at Keni ehac, wale laku Hobaba úngu Mose, ke e ame otilá unien uma mano hnyi iwajo hnyi Zanim, hnyi baten Kadesi. 12 Ke ödrin e thumetu Sisera, ka habe, E but Baraka nöku Abinoam ka hnyi bucen Tabora. 13 Me haba Sisera ame úkhacaköuâ anyin ta je kariota hia, nain haded je kariota fao, me tavat hia unyin, úheny Haroseth hnyi je hnyeï, ka hnyi wagewe Kisona. 14 Ke Debora ame ha kö Baraka, ka habe, Todrö, anyin a walang bong ame he Iehova ka hnö Sisera ka hnyi hnyamâm: hawa, ame ca bö Iehova hnyi hnyimakâm? Ke Baraka ame utut úheny hnyi bucen Tabora ke ten thauzan tavat adre me hnu hoton. 15 Ke haba Iehova ame ohmöiöngi Sisera, me anyin ta je kariota hia, me anyin ta je utbavat hia, ge hele vat hnyi hnyimakö Baraka; ke Sisera ame utut úheny hon anyin kariota, me kec hon kânâ. 16 Ke Baraka ame hnu je kariota me je utbavat, ke ne o but Haroseth hnyi je hnyeï: ke ame ta but je utbavat hia thithö anyi Sisera ge hele vat, ke ba but kolon. 17 Ke so bi haba Sisera ame kec hon kânâ ka hnyi uma mano umö Jaela öïö Heberu at Keni: anyin ame laba so Jabin than Hazora, me lap anyi Heberu at Keni. 18 Ke haba Jaela ame he me úkhanö me Sisera, me ha kâu, ka habe, Than lö saú ju, saú ju könya, ca ot bi. Me e ame saú kâu ka hnyi uma mano, ke e ame tube e ge kubö. 19 Ke haingen kâu, ka habe, Ö u habelik ge köiö; anyin a iny beic. Ke e

ame oc hlinginy kaia a dân basin, me habelen e, me tube e. 20 Ke haingen kâu, ka habe, U me he ka tot hnyi hwanuma, ke ame ne o thö ke at me hnei u, ka habe, E hu at ethö? u me he ka ha ka habe, E ba. 21 Ke haba Jaela öïö Heberu ame hom faoiny uma mano, me hom hama hnyi hnyamen, me he hmecek kâu, me tho fao hnyi halelöüiny, me ame dá oâ ka hnyi kânâ; anyin a e ame mokut hnying me sënyin; me e ame mokcu. 22 Ke wâ bi, Baraka ame tiga hnu Sisera, me ame didrut Jaela he ka úkhanö më, me ha kâu, ka habe, He thö jem, me oge me he ka omanenâ köu at u me elâm. Ke e ame o but kâu, me wâ bi, ame mokut Sisera a mokcu, ke ka e faoiny uma mano hnyi li halelöüiny. 23 Ke Khong ame oúhnyúkongu Jabin than Kanana hnyi bong eling hnyi hnyimakan lakon Isaraela. 24 Ke haba hnyamen lakon Isaraela ame musi hmetu hu Jabin than Kanana, ke ne o but adre ohïö Jabin than Kanana.

HNYIMAKAN 5.

**M**E haba Debora me Baraka nöku Abinoam, ödru me khumöng hnyi bong eling, ka habe,  
 2 Anyin ame homakan je taben hnyi Isaraela,  
 Ke haba tavat adre ka ve ham ödra bi me ca höcö  
 Awe, Oganö Iehova.  
 3 Löng ju öbun je than; tivehlöng ju öbun je taben;  
 Me oge me he bi nya ka khumöng kö Iehova;  
 Oge me he ka khumöngö olungâ kö Iehova, Khongon at Isaraela.  
 4 Iehova lö, u me he úheny Seira,  
 U me he úheny hnyi utkânâiny Edoma,  
 Me ame öbubuny hmeledrany, k' ame ta but drany,  
 Me ta but köiö únyi hnyi je úlá.  
 5 Ame o Iehova me ame bahihingölö je bucen,  
 Wale Sinai, ke ame o Iehova Khongu Isaraela.  
 6 Hnyi úö Samegara nöku Anath,  
 Hnyi úö Jaela, ke ba at hnyi je hna cit gethen,  
 Ke ame he tavat hnyi je ong gethen.  
 7 Ame ba but je at musi hnyi Isaraela, e hi' ödrin,  
 Ke ne o but oge me tot, a inya Debora,

OWISA 5.

- Me oge me tot, a ke hinyen hnyi Isaraela.
- 8 Ke adre me úca je khong kanyua ;  
Me ame o vat ka hnyi je homagöule :  
Hawa, e hu bec ame ne ö adre wá  
Unyin je fáte thauzan hnyi Isaraela ?
- 9 E bi hnyekuk unyin je taben hnyi hnyei Isaraela,  
Hnyat ödrin e ham ödrin bi me ca hócö :  
Oganö Iehova thö.
- 10 Ha manená e, öbun tavat tabá je asina ae hau,  
Öbun tavat a laba hon je kubö ae mec,  
Me öbun tavat vheno gethen.
- 11 Hnyi dok adre ca löng medien tavat fana, hnyi je hna seköio,  
Adre me he ka aú gaga eling je huliwa ae wisa anyi Iehova,  
A ta je huliwa ae wisa hnyi hnen hna musi hnyi Isaraela,  
Me ame he je aten Khong ka hnyi je homagöule,
- 12 Debora lö, hmak dö, hmak dö ;  
Hmak dö, hmak dö, hai thö khumöng :  
Baraka lö, nöku Abinoam todrö, me lelö bá ányám je bá.
- 13 Me ame ok ke kolon je taben, me tavat ;  
Ke ame o könja Iehova, úcon tavat ae hwege.
- 14 Úhedrin hnyi Eferaima ke anyidra wân úheny Amaleka ;  
K' ame he hotom Beniamina, aten em hnyei ;  
Ke ame ok je taben úheny Makir,  
Ke úheny Zebulona tavat hok uciny at musö vat,
- 15 Ke e bi unyi Debora je than Isakara ;  
Haba Isakara, me tha úcú e me Baraka ;  
Ödrin e wadring ka hnyi hnyigöulen bucen hnyi li can.  
Ke haba hnyi je deny je wagewe anyi Reubena,  
Me adre me ve sihwegiá je hnyekudrin eling.
- 16 Ieú gam u me laba hnyi je haginny mamoe,  
He ka löng hwan at ame hawá je hnabat meno ?  
Haba hnyi je deny wagewe anyi Reubena,  
Me waleling adre ti elám je hnyok.
- 17 Gileada ame laba hnyi hoton Joridano :  
Ke ieú ga Dana, me e ame laba bala hon je hu ?
- Ke ame laba baú Asera hnyi hobat köio  
Me laba hnyi anyin je bwedua
- 18 Haba Zebulona me wale at ame hna anyin möt ka hnyi deny mok.  
Me Nafatali, hnyi je dok ae görany hnyi vat.
- 19 Ame o but je than me vat ;  
Me ame vat je thaniny Kanana,  
Hnyi Tanaka hnyi je an hnyi Megido :  
Ödrin e ca hok mone me hwaban.
- 20 Ödrin e vat úheny hnyi drany  
A vat me Sisera je okhú hnyi je deny.
- 21 A hom degeci ödrin hnen wagewe Kisona,  
Hnen wagewe ehac, wale wagewe Kisona.  
Hanuk lö u je hia but uto ju at ae hwege.
- 22 Me ame uto but boujimen can je hors Anyin a bibiá hwege, a hwege bibiá hnyat ae hwege gadrin
- 23 Haingen angela anyi Iehova, ka habe, Hangö Meroza but,  
Hangá hwegiá but tavat adre me labá e ;  
Anyin ödrin e ca o he ka hadruo Iehova, He ka hadruo Iehova unyin tavat ae hwege.
- 24 Hnahic ut Jaela hon ta je momo,  
Wale öio Heberu at Keni,  
E ame he ka hnahic hon ta je momo hnyi uma mano.
- 25 E ame sumátá köio, me e ame ham bi dân basin ;  
E ame hom dân basin ae wahma hnyi kaia anyin than,
- 26 E ame iná hnyamen ka hnyi fao,  
Me hnyamen a metán ka hnyi hama anyin at huliwa ;  
E ame kuc Sisera ge hama, e ame kot dá oá ban,  
E ame dá me kot dá oá halelöúiny.
- 27 Hnyi li can e ame nom, me ta, me mokut ;  
Hnyi li can e ame nom, me ta,  
Hnyi hnen hna nom, wale e ame ta a mokcu.
- 28 Ke ame selat momo hnyi mamalama me hongot,  
Wale hinyö Sisera, hnyi hna pewaná mamalama, ka habe,  
Ieú a bec gan he ka o anyin kariota ?  
Ieú a bec gan je wil anyin anyin ta je kariota ?

29 Me ame thu kâu anyin je momo ae metâ,  
 Ke e ame thu bi kâu, ka habe,  
 30 Hawa, e ba wâhnodrin, adre tiga ca khenâ je hna hûgûnâ?  
 Ame ne úsa khaca hlu ka ke at me ke at, ame ne úsa lo li hlu;  
 Ke hnân hobi kö Sisera je khauen adre sei ae ve makan,  
 Ae ve makan hna tibet omecin hnyi li hwenöiny, únyi hnyi nyin je hna sei?  
 31 Iehova lö, e so e he ka mok je iwahnai-hmiöny möu hia helâe:  
 Ke ame he tavât adre me hnyok kâu ka helâ me seúnö ame he hnyi hwegien.  
 Me ame menâ but hnyei ke ne o but fáte je huna.

HNYIMAKAN 6.

**K**E haba lakon Isaraela adre me ânyâ únyi ae kong hnyi hnyimakö Iehova: me Iehova ame hn' ödra ka hnyi hnyamen at Midiana hnyi je huna a seven. 2 Ke hwege at Midiana hon at Isaraela: ke can at Midiana, haba lakon Isaraela adre me ânyâ hobi ködra bi je thop hnyi bucen, me je op, me je hnebâ. 3 Ke a hia but belökâ hnyei at Isaraela, me ame o at Midiana, me Amaleka, me tavat e deiö; adre me o but he ka vat mödra; 4 me adre me hunuma cici ödra, me okongoâ jeúiny kânâ ke ne o but Gaza, ke ba hmetu omelen at Isaraela, ame ne mamoe, me kau, me asina. 5 Anyin a adre me tha o me haledrin omeno, me umödra je uma mano, ke adre me o helâ me úseiny hamon; ke ca hnân öü ödra me haledra je kamela: ke adre me o ka hnyi hnyei he ka ohîâ e. 6 Ke gan hmâ ba ta únyi anyin at Isaraela can at Midiana; me haba lakon Isaraela adre me tenge kö Iehova.

7 Ke ame tenge kö Iehova lakon Isaraela can at Midiana, 8 me Iehova ame kunâ perofeta ka lakon Isaraela; me e ame ha ködra, ka habe, Walang hofuc ho Iehova Khongon at Isaraela, ka habe, Oge me lili öbun úheny Aigupito, me hum öbun únyi hnyi hnyaba ae uthaluö; 9 ke oge me omeli öbun únyi hnyi hnyamen at Aigupito, me únyi hnyi hnyamen tavat hia adre me hom úhnyükongu öbun, me ob' ödrin hnyi hnyimaköbun me ham bi köbun idrin hnyei; 10 ke oge me ha köbun, ka habe, Inya Iehova Khongubun; ca he öbun ka

outen je khong khongon at Amora, wale hnyei öbun e labâ: ke öbun e ca löng hok hofuc.

11 Ke ame o but angela anyi Iehova, me laba hmelen iwajo anyi Joasa at Abiezera hnyi Ofera: ke haba Gideona a nokon ame kokot hwit hnyi hna hlec vine, he ka ikhâlâ e ge at Midiana. 12 Ke ame manen dut kâu angela anyi Iehova, me ha kâu, ka habe, E bi unyâm Iehova, u бага ae hwege. 13 Ke haba Gideona ame ha kâu, ka habe, Tuhök lö, ame ne e but Iehova unyihmun, iéú can ame o köhmun ta je únyi hia eang? ke ewa anyin je úöman hia wale a thumetu öhmun hnen lakamöhmun, ka habe, A ca hum öhmun Iehova úheny Aigupito? ke walang ang a hia but Iehova digic öhmun bi, me hn' öhmun ka hnyi hnyamen at Midiana. 14 Ke haba Iehova ame wâ e, me ha, ka habe, He thö me tang hwegiâm eang me omelö at Isaraela únyi hnyi hnyamö Midiana: hawa, oge me ca kunö u? 15 Ke e ame ha kâu, ka habe, Tuhök lö, oge me he ka omelö at Isaraela hnen iéú? wâ bi, haba anyik lap wale ae únyi baú hmönyin hnyi Manase, ke iny úhnyükong hmönyin hnyi hnyaba cica. 16 Haba Iehova ame ha kâu ka habe, Oge me he ka tha e möu, ke u me he ka kot at Midiana helâ me at a khaca. 17 Ke haingen kâu, ka habe, Oge ne hia but kap betenge baú hnyi hnyimâkâm, u me he ka ânyâ könya haten, a u at ame úhnenamö mönya. 18 Ö u ca he ka he úhem ang, iny me o hmetu but köu, me hom anyik bwihlany, me ip e hnyi hnyimâkâm. Me e ame ha, ka habe, Oge me he ka laba úhalubahing ke ne o but u me hmetu. 19 Ke Gideona ame didrö, me penapena nokon got, me areto adre ca levenâ ge tap falawa a khaca efa: ke e ame ip utiö hnyi tangen, me hingâlâ dân meno ka hnyi öt, me hom kâu eü hnyi hmelen iwajo, me ham. 20 Me angela anyin Khong ame ha kâu, ka habe, Hom dö utiö me areto adre ca levenâ, me ip hon kic ang, ke hingâlâ but tap meno. Me e ame ânyâ helâe. 21 Me haba angela anyi Iehova ame inâ but hnyiban uci hnyi hnyamen, me kâlâ meno me areto adre ca levenâ; me ame o thö meic únyi hnyi kic. me thong degecâ meno me areto adre ca levenâ; me ame he but angela anyi Iehova, k' ame ca wâ bi. 22 Ke Gideona ame wâ a angela anyi Iehova; me haingö Gideona, ka habe, Ekölö Iehova Khong! anyin oge

iohnyimak me angela anyi Iehova. 23 Me Iehova ame ha kâu, ka habe, E so e hu gam hnahic; ca ot bi: u me ca he ka mok. 24 Me haba Gideona ame otilâ taben hut eling kö Iehova, me hwenyi ien e Iehova-salom: ke ka e bi hnyi Ofera anyin at Abiezera, ke ne o but hnyi bong ang.

25 Ke haba hnyi lit eling Iehova ame ha kâu, ka habe, Hom dö bolok haleny kâmâm, a bolok a loiny wale at a seven hunainy, me kia but taben hut kö Baala anyin kâmâm, me subâ degecâ but Aseira walethö hon e: 26 ke u me he ka otilâ taben hut kö Iehova Khongom hnyi hon ban hnabâ ae hwege eling, ge huliwa ae úcú, me hom dö bolok a loiny me me hudo hudiny leú hon utöiny Aseira u me he ka sö degecâ. 27 Ke Gideona ame hom hnyat a ten únyi hnyi lathnyabainy, me ányâ helâ me Iehova ame ha kâu: ke e ame outen lap anyin kamen, me tavat a aten taun, me me ca khana he ka ányâ e hnyi lany, ke e ame ányâ bi hnyi lit. 28 Ke a hmak dö tavat aten taun hnyi hnyomakatu, me wâ bi, adre hia but kia taben hut kö Baala, me sö degecâ Aseira walethö hon, me hudo bolok a loiny hon taben hut adre otilâ. 29 Ke ame úhnenamokouâ tavat, ka habe, Ia ame ányâ e? Ke ödrin e hia but úhnö, me hnö, me haingödrin, ka habe, Gideona nöku Joasa ame ányâ únyi ang. 30 Ke haingen aten taun kö Joasa, ka habe, Hom but nokom m' adre me hlingâ: anyin a e ame kia taben hut kö Baala, me sö degecâ Aseira walethö hon. 31 Haba Joasa ame ha ködrin hia tavat ödrin e tot kâu, ka habe, Óbun e he ka tengiö Baala? Óbun e he ka omelö e? Haba at ame he ka tengiö Baala me adre me he ka hlingâ ke tiga hnyomakatu bi: ame ne ke khong bi e, hamen he ka tengiâ e bi, can ame hia but kia taben hut kâu. 32 Anyin a wale e ame hwenyi ien e hnyi bong eling Jerubaala, ame ha, ka habe, Hamö Baala he ka tengiâ e bi, can hna kia taben hut kâu.

33 Me ame úkbacaköu at Midiana hia me at Amaleka, me aten e deiö; me ödrin e he me laba hnyi hnyigöulen bucen anyin Jezerela. 34 Ke ame ta hu Gideona hanu Iehova; me e ame tûâ trutru; me ame úkbacaköu hoton e at Abiezera 35 Me e ame úkhünöng ka at Manase hia; me ödrin e úkbacaköu hoton e: ke e ame úkhünöng ka at Asera hia, me Zebulona, me Nafatali; me ödrin e he he ka úkhanö

mödrin. 36 Ke Gideona ame ha ka Khong, ka habe, U je ne he ka omelö at Isaraela ge hnyamök helâ me hna ba gam, 37 wâ bi, o ge me he ka ip leúnen mamoe hnyi hna huje hwit; ke ame ne hu khubet hon leúnen mamoe thibi, ke mada bi kânâ, awe, oge me he ka wâhmakhmeto a u me he ka omelö at Isaraela ge hnyamök helâ me hna ha gam. 38 Ke ame helâe: anyin a e ame vesâ hnyi hnyomakatu, me hlec leúnen mamoe, me owa khubet únyi hnyi leúnen mamoe, ke ame unöngötö kaia ge köiö. 39 Ke haba Gideona ame ha ka Khong, ka habe, ca he ka ubâhlâ ányâm hmönyin könya, ke oge me he ka okhaca biju fuc: ö iny me he ka okhaca hmetu cubec ge leúnen mamoe; e so e he bi leúnen mamoe ka mada, ke ame he ka hu khubet bi hnyi kânâ hia. 40 Me haba Khong ame ányâ helâe hnyi lit eling: anyin ame mada thibi leúnen mamoe, ke khubet bi kânâ hia.

#### HNYIMAKAN 7.

**K**E haba Jerubaala, wale Gideona ame vesâ hnyi hnyomakatu, me tavat hia thithö unyin me laba hnyi an ame pupua anyi Harod: ke e hnyi hwadrö vat anyin at Midiana hnyi baten ong bucen More hnyi hnyigöulen bucen.

2 Ke haba Iehova ame ha kö Gideona, ka habe, E se hia hmönyin tavat unyâm, me oge me ca he ka ham at Midiana ka hnyi hnyamödra, wâ e nye bi gan at Isaraela könya, me ha, ka habe, Iny möt ge hing hnyamök. 3 Ke walang ang, ha thö ka tavat, ka habe, Haba tavat ae ot me öbubuny, e so ödrin e he hmetu, me ie he úheny hnyi bucen Gileada. Me haba tavat a twente tu thauzan adre me hmetu hmetu, ke ten biju thauzan.

4 Ke Iehova ame ha kö Gideona, ka habe, E tiga se hia hmönyin tavat; hum ödrin dö ka hnyi an, me oge me he ka cubic ödrin eling hobi köu: ke haba at oge me he ka ha köu a g' ame he ka tha he möu, me wale at ame he ka tha he möu; ke haba at oge me he ka ha köu, a g' ame ca he ka tha he möu, me ame ca he ka he. 5 Me e ame hom tavat ka hnyi an: ke haba Iehova ame ha kö Gideona, ka habe, Haba hnyat hia ödrin e drem an helâ me uicin kuli, me u me he ka hake ip ödrin; ke helâe minya hnyat hia ödrin e cibouca me ic. 6 Ke haba úseiny tavat adre me drem, wale hnyat ödrin e kap hnyamödrin.



ka hnyi je hnyimödrin, me ödrin theri haded: ke haba ke keihen tavat bi ae ae hia, me ödrin e cibouca me ic. 7 Ke Iehova ame ha kö Gideona, ka habe, Oge me he ka omeli öbun ge tavat a theri haded, a hnyat ödrin e drem, me hna at Midiana ka hnyi hnyamâm: ke he thö tavat hia thithö ka hnyi je hnyabadrin bi. 8 Haba tavat ödrin e hok kamec ge je hnyamödrin me anyidrin je trutru: ke e ame kunâ at Isaraela hia ka hnyi umödrin je uma mano; ke e ame hom behânâ bi tavat a theri haded: ke e hnyi hmelen e, hnyi hnyigöulen bucen, vat anyin at Midiana.

9 Ke haba hnyi lit eling, Iehova ame ha kâu, ka habe, Todrö, me utut ka hnyi hna hunuma; anyin a oge hia but hna e ka hnyi hnyamâm. 10 Ke u je ne ot ka ut, me u ma tha he me Fura athnyabaem ka hnyi hna hunuma: 11 ke u me he ka löng üfucidrin; ke hwaban e adre me he ka ha hwegien li hnyamâm he ka utut ka hnyi hna hunuma. Me e ame tha he me Fura athnyabainy, ke ne o but ka hnyi hoton tavat adre me hom omjehen vat hnyi hna hunuma. 12 Ke haba at Midiana, me Amaleka, me aten e deiö, adre me laba hnyi hnyigöuleny bucen helâ me üseiny hamon; ke haba üseiny haledrin je kamela helâ önyin köiö, ca hnân bi aü. 13 Ke ame o but Gideona, me wâ bi, ke at ame thumeto hanen ge bwi, haingen, ka habe, Wâ bi, oge bwi, ke e hu ke areto bali adre me khüâ ka hnyi hna hunuma anyin at Midiana, me ame ât ka hnyi uma mano, me kot e, me ame kölu but me hwiö hnyimen hnyikânâi, me ame ta but uma mano. 14 Me ame thu hnen hanen, ka habe, Wale hele vat anyi Gideona, nöku Joasa, a at Isaraela: a hia but Khong hna at Midiana, me anyidrin utbavat hia ka hnyi hnyamen.

15 Ke a löng ut Gideona hna ha bwi ke bongon e, me ame khudrung; me e ame hmetu ka hnyi hna hunuma anyin at Isaraela, me ha, ka habe, Todrö, anyin a hia but Iehova hna vat anyin at Midiana ka hnyi hnyamöbun. 16 Me e ame khenâ kun ta haded me me kun ta bunyen me ve ham ka hnyi je hnyamödrin hia je trutru, me je kaia ae ba önven me je okûnû eü hnyi hnyin je kaia. 17 Ke e ame ha ködrin, ka habe, Wâ hwakecik, me ânyâ helâe: ke wâ bi, iny ka o but ka hnyi hoton hna hunuma, me öbun e he ka ânyâ helâ me oge me ânyâ. 18 Ke iny ka he ka tûö trutru, a inya me tavat hia

a tha laba unyik, awe, öbun e he minya ka tha tûö trutru igigilö hna hunuma hia, me ha hwegiâ, ka habe, Hobi kö Iehova me Gideona.

19 Me haba Gideona me haded unyin, ödrin e o ka hnyi hoton hna hunuma hnyi hwân hmak a wanben, k' adre hap ibi hmak: me ödrin e tûâ je trutru, me ohmouca je kaia hnyi je hnyamödrin. 20 Ke ame tûö trutru je bunyen a kun, me thu je kaia, me ve kât je okûnû ge je hnyamödrin a me, me je trutru ge je hnyamödrin a metâ me me tûâ; ke ödrin e hongot hwege, ka habe, Hele vat anyi Iehova me Gideona. 21 Ke ödrin e ve tot hnyi je hnödrin bi igigilö hna hunuma; me ame wadring je vat hia thithö; ke ödrin e hongot me ob'ödra. 22 Ke ödrin e tûâ je trutru a kun ta haded, ke Iehova ama iwiaköuâ hele vat anyin ke at me ke at ka ke at a hanen, ke ücon vat hia thithö: ke ame kec vat ke ne o but hnyi Bethe-sita hnyi ke keihen Zererath, ke ne o but hnyi hnyigöulen Abela-mehola hnyi Tabath. 23 Me ame ükhacaköu at Isaraela üheny Nafatali, me Asera, me Manase hia, me hnu at Midiana. 24 Me haba Gideona ame kunâ je metâ ka hnyi hnyeï ae hut hnyi Eferaima hia, me ha, ka habe, Utut öbun ücon at Midiana me hügünâ bânâ wagewe ke ne o but hnyi Bethe-bara, wale Joridano. Me ame ükhacaköu at Eferaima hia me hügünâ wagewe ke ne o but ka hnyi Bethe-bara, wale Joridano. 25 Ke adre me kât li tuban at Midiana jia Oreba me Zeba; me adre me hlingö Oreba hnyi hon kic Oreba, ke adre me hlingö Zeba hnyi hna hlec vine anyi Zeba, me hnu at Midiana: ke ödrin e hom li bö Oreba me Zeba kö Gideona hoton Joridano.

#### HNYIMAKAN 8.

**K**E haingen at Eferaima kâu, ka habe, Ieü e u je ânyâ köhmun, a u je ca hum öhmun minya wale m' u he ka vat me at Midiana? Me ödrin e ti ou e. 2 Ke e ame ha ködrin, ka habe, Ieü oge ânyâ walang ae nua hon hnöbun hna ânyâ? Hawa, e ca beönua bi hna hlo je wan vine anyi Eferaima hon je wan vine adre ip anyi Abiezera? 3 Haba Khong ame hna ka hnyi je hnyamöbun li thaniny Midiana, jia Oreba me Zeba: ke ieü ae khanö nya he ka ânyâ helâ möbun? Me ame hia anyidrin hmönyin kâu, hnyi üen e ame ha e. 4 Ke ame o but Gideona hnyi Joridano,

me he hanyâûâ, e me tavat a kun ta haded unyin, a sēnyin dut, k' ame tiga hnuhnu bala bi. 5 Ke e ame ha ka at Sukotha, ka habe, Ö öbun ham je falawa ka tavat adre me he hotuk; anyin a ödrin sēnyin, ke inya oge me hnu Zeba me Zalemuna, li thaniny at Midiana. 6 Ke haingen je thaniny Sukotha, ka kabe, Hawa, e bi hnyi li hnyamâm li hnyamö Zeba me Zalemuna, m' öhmun e he ka ham areto ka je lahiâm? 7 Haba Gideona ame ha, ka habe, Awe, e ka hia but Iehova hnö Zeba me Zalemuna ka hnyi hnyamök, oge me he ka kia je unyibun ge je únyi ae údö hnyi hnyebuba me je iwatetaföcö. 8 Ke e ame he úheny e Penuela ai, me ha helâe ködrin: me ame thu kâu at Penuela helâ me hna thu ge at Sukotha. 9 Ke e ame ha minya ka at Penuela, ka habe, Iny ka hmetu me hnabic, oge me he ka kia hna-bâ eang.

10 Ke e hnyi Karekora Zeba me Zalemuna, tha e mödrü anyidru je utbavat helâ me fitin thauzan, je kolon je utbavat hia aten e deiö: anyin a kölu but khaca haded me twente thauzan tavat hok hele vat. 11 Ke haba Gideona ame ölö thö hnyi gethen deny tavat adre me laba hnyi je uma mano hnyi ke keihen e deiö Noba me Jogeba, me hlingâ je utbavat; anyin ame laba hmâ vat eling. 12 Ke ame kec ut Zeba me Zalemuna; me e ame hnu ödrü; me e ame kât li thaniny at Midiana, Zeba me Zalemuna, me ohmöiöngâ utbavat hia. 13 Ke haba Gideona nöku Joasa ame hmetu úheny hnyi hna vat hnyi gethen úheny thö Heres. 14 Ke e ame kât ke hidröu at Sukotha me hnö e: me e ame ha bongon je than Sukotha, me je hingat a sevente seven. 15 Me e ame o but ka at Sukotha me ha, ka habe, Wâ hm' öbun ju Zeba me Zalemuna, wale öbun e ú nya cadru, me ha, ka habe, Hawa, e bi hnyi hnyamâm li hnyamö Zeba me Zalemuna, m' öhmun e he ka ham areto ka tavat unyâm ae sēnyin? 16 Me e ame hom wahingatin taun, me je únyi ae údö únyi hnyi hnyebuba me watetaföcö me osöâ kâu. 17 Ke e ame kiâ hnabâ hnyi Penuela, me hlingâ aten taun. 18 Ke e ame ha kö Zeba me Zalemuna, ka habe, Ehö tavat öbe hlingâ hnyi Tabora? Me haingödrü, ka habe, Ödrin e tha úcú möu; haba ödrin hia me ve úcú me lakon than. 19 Me e ame ha, ka habe, Je liamekeiny mönya ödrin, a tha hinyöhmun; kia inya Iehova,

öbe ne omeli ödrin, me oge me ca he bi nga ka hling' öbu. 20 Me e ame ha kö Jethrö a nokon a atö, ka habe, Todrö, hling' ödrü but. Ke haba hidröu ame ca oc hele vat, anyin ae ot, k' ame tiga thoth. 21 Ke haba Zeba me Zalemuna ödrü me ha, ka habe, Todrö me kuc öhmu: anyin ae úcú at me tang hwegien. Me ame todrö Gideona me hlingö Zeba me Zalemuna, me hom je hmanenanginy nyin haledru li kamela.

22 Ke haba at Isaraela adre me ha kö Gideona, ka habe, U me he ka musü öhmun, a u, me nokom, me öbem: anyin a u je hia but omeli öhmun únyi hnyi hnyamen at Midiana. 23 Ke haingö Gideona ködra, ka habe, Oge me ca he ka musü öbun, k' ame ca he bi nöku ka musü öbun: hamö Iehova he ka musü öbun bi. 24 Ke haba Gideona ame ha ködra, ka habe, Inya oge me sumat öbun, m' öbun e he ka ve ham bi könya je anen hnyikönyen a gol öbun e hügünâ. (Anyin ae hu gadrin je anen hnyikönyen a gol, anyin a at Isamaela ödrin.) 25 Ke haingödrin, ka habe, Öhmun e he ka ham senyina e. Me ödrin e ulolo imano me ve khüâ ka hnyin je anen hnyikönyen, ödrin e hügünâ. 26 Ke haba ihmakinj je anen hnyikönyen a gol, wale e ame sumâtâ, me wan thauzan ke seven haded je sekel gol; ke ca ha bi je hmanenanginy, me je sawakinj, me je úkhaú ae udrudrá a khaüen li than Midiana, ke ca ha bi je sacein hon nyin je kamela. 27 Ke haba Gideona ame ányâ iefoda únyi hnyi je únyi e, me ip e hnyi anyin taun wale Ofera: ke haba at Isaraela hia thithö ödrin e bi únyi monu me únyi eling: ke wale hnewe kö Gideona me anyin lap. 28 Ke ame ngâ at Midiana hnyi hnyimakan lakon Isaraela, ke ca görany hmetu bi je bödrin. Ke ame menâ ju hnyei ke ne o but fâte je huna hnyi je bong bongu Gideona.

29 Me ame he Jerubaala nöku Joasa, me laba hnyi umen uma bi. 30 Ke sevente je бага laku Gideona, a je hing lakon: anyin ae se hia laâian. 31 Ke haba anyin momo hnyi Sekema, me ame hnokoâ nokon бага me e ame hwenyi ien Ábimelek. 32 Ke ame mokcu Gideona nöku Joasa ke ti hingat ut, me adre me konâm e hnyi hu Joasa a kamen hnyi Ofera iny at Abiezera.

33 Ke ame mokcu Gideona, me ame hmetu lakon Isaraela, me bi únyi monu me je Baala, me wiö Baala-berith me me

khongudrin. 34 Ke haba lakon Isaraela ödrin e ca únykúme Iehova Khongudrin, at ame omeli ödrin únyi ge je iwahnaihmüny mödrin hia thithö igigilö: 35 ke khaca ödrin e ca betenge ge hnyaba Jerubaala, wale Gideona, hoton ta je so hia e ame ányá hobi káu at Isaraela.

## HNYIMAKAN 9.

**K**E haba Abimelek nöku Jerubaala ame he Sekema ai ka je liamekeiny me hinyen, me úhnenamö mödrin, me lap hia anyin kamen hinyen, me ha, ka habe, 2 Ö öbun e ha ka hnyi hnyikönyen tavat hia hnyi Sekema, ka habe, Hawa e so köbun ame he bi laku Jerubaala hia a sevente ka musu öbun, ke hawa, ame ne so at a khaca he ka musu öbun? Ke únykúme ju öbun a jeiöbun me utiöibun inya. 3 Me ame úhnenamö gan je liamekeiny me hinyen ka hnyi hnyikönyen at Sekema hia je hofuc hia eling: ke ame hmehmela je hnyekudrin he ka he hotu Abimelek, anyin a haingödrin, ka habe, Liamekeiny e mötin. 4 Ke ödrin e ham káu je mone a sevente únyi hnyi uma umö Baala-berith, me Abimelek ame úco je hnyat ae monu me hop, k' ödrin e hnu hoton. 5 Me e ame he ka hnyi uma umen kamen hnyi Oferá, me hlingá je liamekeiny më a laku Jerubaala a sevente, hon veto a khaca: ke kolon thiju Jotham noku Jerubaala a wa-keiat; anyin a e ame lubaduöng.

6 Ke ame úkhacaköu at Sekema hia, me lap anyi Milo hia, me he me otilö Abimelek me me than, hnyi iwajo baten veto ame tot hnyi Sekema. 7 Ke adre me thumetu Jotham, me e ame he me tot hon bucen Gerezim, me fuc göranyai me hongot me ha ködrin, ka habe, Ling nya ju öbun at Sekema, me me ling öbun bi Khong. 8 Haba ta je úö hnyi ke bong ehac adre me he ka hú ke than hobi ködra bi; me adre me ha ka úö elaiö, ka habe, U me he ka musu öhmun bi. 9 Ke haingen úö elaiö ködra, ka habe, Hawa, oge me he ka hna degecá anyik pipikhenya wale adre ogáná Khong me at únyi gak, me he ka hnyihnyikö háâng me jem hon ta je úö? 10 Me ame ha je úö ka imeta, ka habe, Aiö u, u ma he ka musu öhmun. 11 Ke haingen imeta ködra, ka habe, Hawa, oge me he ka hna degecá hnebwiak, me je wan gak ae so, me he he ka hnyihnyikö háâng me jem hon je úö? 12 Ke haba je úö adre

me ha ka vine, ka habe, Aiö u, he ka musu öhmun. 13 Ke haingen vine ködra, ka habe, Hawa, oge me he ka hna degecá anyik waina, at ame osenyiná Khong me at, me he he ka hnyihnyikö hon ta je úö? 14 Ke haba je úö hia thithö adre me ha ka iwataföcö, ka habe, Aiö u, he ka musu öhmun. 15 Ke haingen iwataföcö ka je úö, ka habe, Öbun e ne hú nya hnathu nya me me anyibun than, he thö jem me laba hnahic hmelen anyik dok ae hwaelu: ke ame ne ba, e so e he but meic únyi hnyi iwataföcö me thong degecá je arasiny Lebanona. 16 Ke walang ang ame ne hnathu me wisa wale hnöbun hna ányá, öbun e otilö Abimelek me than, ke ame ne so hnöbun hna ányá kö Jerubaala me anyin lap, ke öbun e ne bi hwaban káu helá me anyin huliwa; 17 (anyin a vat cica hobi köbun, me ip anyin möt hnyi hnyimakan, me omeli öbun únyi hnyi hnyamen at Midiana: 18 ke hnyi bong ang öbun e tot ka lap anyi cica, me hia but hlingá lakon a sevente hon veto a khaca, me otilö Abimelek, wale nokon ke momo a athnyabainy, me me thaniny at Sekema, anyin a liamekeiny e möbun;) 19 ke ame ne hnathu me wisa hnöbun hna ányá kö Jerubaala me anyin lap hnyi bong ang, Awe, senyini Abimelek dö öbun, ke e ame he ka senyin köbun: 20 ke ame ne ba, e so e me he but jem meic únyi ga Abimelek, me an at Sekema, me únyi hnyi lap anyi Milo: e so e me he but meic únyi ge at Sekema me laba hnyi Milo, me ön Abimelek. 21 Ke Jotham ame wadring dö me kec, me he Bere ai me laba eling, ame outö Abimelek a liamekeiny më.

22 Ke ame than hon at Isaraela Abimelek hnyi kun ta huna. 23 Ke haba Khong ame kuná hanu ae kong kö Abimelek me at Sekema; ke haba at Sekema ödrin e iyawö Abimelek: 24 me me hwádá thö hna okongoá laku Jerubaala a sevente, ke ame takú Abimelek dren liamekeiny mödrin, at a hling' ödrin, me at Sekema, hnyat ödrin e hadruá he ka hlingá je liamekeiny më. 25 Ke haba at Sekema ödrin e ip tavat he ka mokut iyáwá hon je bucen, ke ödrin e hügúná omjehen tavat adre me gethen unyidrin: ke adre me thumetu Abimelek.

26 Ke ame o but Gaala nöku Ebed me je liamekeiny më, me he Sekema ai: ke ame labageju káu at Sekema. 27 Ke ödrin e he ka hnyi ta hnyei, me tau wan haledrin

je vine, me ututo je wan vine, me senyin, me didrö ka hnyi uma umen khongudrin, me han, me ic, me hangö Abimelek. 28 Ke Gaala nöku Ebed ame ha, ka habe, Ia Abimelek, ke ia Sekema, m' ötin e he ka bi athnyabainy? Hawa, ca nöku Jerubaala? ke Zebul althnyabainy? e so öbun e bi athnyabainy hnyat Hamora, kamö Sekema: ke hnän eü ötin e he ka bi athnyabainy at e. 29 E na e ju unyik tavat eang! m' inye he ka hum Abimelek. Me e ame ha kö Abimelek, ha habe, Bi hanen ju änyâm vat, me he thö jem. 30 Ke haba Zebul tuhan taun ame löng hofuc. ho Gaala nöku Ebed, me ame ubâhla anyin hmönyin. 31 Me e ame kunâ duöngâ je metâ kö Abimelek, ka habe, Wâ bi, a o but hnyi Sekema Gaala nöku Ebed me je liamekeiny më; ke wâ bi, ödrin e okongoâ taun gam. 32 Ke walang ang todrö hnyi lit, u me tavat unyâm, me mokut duöng hnyi ta hnyei; 33 ke hnyi hnyomakatu e ka o thö seünö, me u me he ka vesâ, me utut ka hnyi taun: ke wâ bi, e ka he me lahien he ka tet metâ köu, me u me he ka änyâ ködrin helâ me imaneniny köu.

34 Me ame todrö hnyi lit Abimelek, me lahien hia, me mokut iyawö Sekema a ödrin je bunyen a vak. 35 Ke ame didrut Gaala nöku Ebed me tot hnyi homagöuleny taun; ke ame todrö Abimelek me tavat unyin ünyi hnyi hna mokut. 36 Ke haba Gaala ame wâ tavat, me e ame ha kö Zebul, ka habe, Wâ bi ame utut tavat üheny hon je bucen. Ke haingö Zebul kâu, ka habe, Haba ünyi u je wâ, me, hmenon je bucen helâ me tavat. 37 Ke ame ha hmetu Gaala ka habe, Wâ bi, ame utut tavat ethö hnyi wanben hnyei, ke ame o ke bunyen hnyi gethen ame he ka hnyi iwajo anyi Meoneni. 38 Me Zebul ame ha kâu, ka habe, Ewa hnyimâm wale at ame ha, ka habe, Ia Abimelek m' adre me he ka bi athnyabainy? hawa, ca wale hnyei u me hûkötîâ? ö u he thö walang ang me vat mödrin. 39 Me ame he but Gaala hnyi hnyimakan at Sekema, me vat me Abimelek. 40 Ke haba Abimelek ame hnu e me e ame kec gan, ke se hia a ta me ät ke ne o but hnyi homagöule. 41 Ke Abimelek ame laba hnyi Aruma: ke haba Zebul ame obö Gaala me je liamekeiny më, me ödrin e ca he ka laba hnyi Sekema. 42 Ke nyi ame he tavat ka hnyi hnyei; me adre me thumetu Abimeleke. 43 Me e ame hom tavat me khenâ me me kun ta bunyen me khöu mokut hnyi

hnyei; me wâ, ke wâ bi, ame he but tavat ühedrin hnyi taun; me e ame utut ködrin, me kuc ödrin. 44 Ke ame wâdring Abimelek, me je vat unyin, me tot hnyi homagöuleny taun: ke haba ke li bunyen, ödrin e wâdring ködrin hia hnyi hnyei me kuc ödrin. 45 Ke haba Abimelek ame vat me taun hnyi bong hia eling; ke e ame hügünâ taun, me hlingâ je aten: ke e ame kot taun, me ave ge sält.

46 Ke a löng ut tavat hia hnyi hñabâ hnyi Sekema, me ödrin e didrö ka hnyi thop hnyi uma umen khong Berith. 47 Me adre me thumetu Abimelek a g' ame ükhacaköu tavat hia thithö aten hñabâ hnyi Sekema. 48 Ke haba Abimelek me tavat hia thithö unyin, ödrin e ölö ka hnyi bucen Zalemon; ke haba Abimelek ame hom gö hnyi hnyamen, me subâ but ke vheiny úö, me hom me ip hon bajibenyin: ke haingen ka tavat unyin, ka habe, Haba hnök hna änyâ wale öbun e wâ, logotö me öbun a änyâ helâng. 49 Me ame ve sö but tavat hia je vheiny minya, me he hotu Abimelek, me ip hnyi thop, me thong thop hudrin; me ame mok tavat hia aten hñabâ hnyi Sekema minya, helâ me wan thauzan obaga me omomo.

50 Haba Abimelek ame he Thebez ai, me ip vat cicö Thebez, me kot e. 51 Ke e hu hñabâ ae hwege hnyi wanben taun, me ame kec kâ e obaga me omomo, me tavat hia thithö hnyi taun, me hlöng hwanumödrin, me olo ka hnyi hon hñabâ. 52 Ke ame o Abimelek ka hnyi hñabâ me vat më, ke e ame hakekenyâ hwanumen hñabâ he ka thong e ge meic. 53 Me haba ke momo ethö görany ame khûâ veto hnän omomono hwit ka hnyi hon bö Abimelek, me ame hmouca but ibokomokiny. 54 Me e ame ie hongot ka hidröu at ame hom tilâ anyin je ünyi vat, me ha kâu, ka habe, Oc ut änyâm hele vat me hlingö nya, wâ adre ne haiö nya, ka habe, Haniny momo. Me ame dá oâ e hnen hidröu me e ame mokcu. 55 Ke a wâ but at Isaraela a ga mokcu Abimelek, me adre me vese ka hnyi je hnyabadra. 56 Ke helâe Khong ame bi hwaban monu anyi Abimelek, waleji e ame änyâ ka kamen, a hlingâ je liamekeiny më a sevente: 57 ke haba ta je hulö hia thithö anyin tavat Sekema, me, Khong ame bi hwaban ka hnyi je bödrin: me ame hwädâ ködrin hnaühangö hnö Jotham nöku Jerubaala.

HNYIMAKAN 10.

**K**E hwabö Abimelek me ame o Tola nöku Pua, nöku Dodo, at Isakara, he ka omelö at Isaraela ; ke e ame laba hnyi Samira hnyi hnyei ae hut hnyi Eferaima. 2 Ke e ame owisa ka at Isaraela hnyi je huna a twente theri, ke e ame mokcu, me andre me konâm e hnyi Samira.

3 Ke hwaban e me ame o Jaira at Gileada, ke e ame owisa ka at Isaraela hnyi je huna a twente tu. 4 Ke e hu lakon бага a thöte, ödrin e tabâ je asina a thöte, ke e hu gadrin je taun a thöte, ke andre me hwenyi iödrin Havoth-jaira ke ne o but hnyi bong ang, wale je taun hnyi hnyei Gileada. 5 Ke ame mokcu Jaira, me andre me konâm e hnyi Kamon.

6 Ke haba lakon Isaraela andre me ânyâ hmeto bi únyi ae kong hnyi hnyimakö Iehova, me bi athnyaba ka je Baala, me Aseira, me je khongon Suria, me je khongon Zidona, me je khongon Moaba, me je khongon laku Amona, me je khongon at Filisiti ; ke andre me digic Iehova me ca biathnyabainy. 7 Me ame ubâhlâ hmönyin anyi Iehova ka at Isaraela, me e ame úcú ödrin ka hnyi hnyamen at Filisiti, me laku Amona. 8 Ke ödrin e ovecâ me seda lokon Isaraela hnyi huna eling : eitn ta je huna andre hom úhnyúkongo lakon Isaraela hia wale hoton Joridano hnyi hnyei iny at Amora, hnyi Gileada. 9 Me ame he hanyâúâ Joridano laku Amona he ka vat minya me at Juda, me Beniamina, me lap anyi Eferaima ; ke e hmak gan hmâ at Isaraela. 10 Haba lakon Isaraela ödrin e tenge kö Iehova, me ha, ka habe, Öhmun e hia but ânyâ hulö köu, wale öhmun e hna degecâ Khonguhmun, me bi athnyaba bi ka je Baala. 11 Ke haba Iehova ame ha ka lakon Isaraela, ka habe, Hawa, oge ca omeli öbun únyi ge at Aigupito, me at Amora, me laku Amona, me at Filisiti? 12 Ke haba at Zidona, me Amaleka, me Maon, ödrin e okongu öbun ; me öbun e tenge könya, me oge me omeli öbun únyi hnyi je hnyamödrin. 13 Ke öbun e digic nya bi, me bi athnyaba ka je khong : anyin a wale oge me ca he hmetu ka omeli öbun. 14 He th' öbun ka tenge ka je khong öbun e úca ; hamödrin he ke omeli öbun hnyi úen hna sed' öbun. 15 Haba lakon Isaraela ödrin e ha kö Iehova, ka habe, Öhmun e ânyâ hwakecin ae kong, hamâm he ka ânyâ hia

köhmun únyi ae so köu ; ke so bi ö u omeli öhmun thibi hnyi bong ang. 16 Me andre me degec je khong kanyua unyidrin, me bi athnyaba kö Iehova, ke e ame tenge ge vec anyin at Isaraela.

17 Ke ame úkhacaköu laku Amona, me hunuma hnyi Gileada. Ke ame úkhacaköu lakon Isaraela me hunuma hnyi Mizepa. 18 Haba tavat, a je thaniny Gileada, ödrin e úhaköuâ, ka habe, Ie at ame he ka bân he ka vat me laku Amona? me e ame he ka taben at Gileada hia thithö.

HNYIMAKAN 11.

**M**E haba Jefetha at Gileada me at ae hwege, ke e nokon momo hnyi gethen ; ke Gileada ame hnöku Jefetha. 2 Ke haba öiö Gileada ame hnokoâ lakon obaga ; ke a gan dut obaga lakon âiân, me ödrin e obö Jefetha, me ha kâu, ka habe, U me ca he ka hnyi hu jekhöu hnyi hnyaban kamöhmun, anyin a u nokon ke momo. 3 Me Jefetha ame kec ge liamekeiny më, me laba hnyi hnyei Tob : ke ame the he me Jefetha tavat ae monu, k' ödrin e tha he ehele më.

4 Ke hnyi ke úen bi, haba laku Amona, ödrin e vat me at Isaraela. 5 Ke haba hnyi úen ame he laku Amona ka vat me at Isaraela, me ame he wahingatiny Gileada he ka hum Jefetha únyi hnyi hnyei Tob : 6 me ödrin e ha kö Jefetha, ka habe, He thö jem he ka ci öhmun, m' ate me he ka vat me laku Amona. 7 Me Jefetha ame ha ka wahingatiny Gileada, ka habe, Hawa, öbun e ca húkotiö nya me obö nya únyi hnyi hnyaba cica? ke ieu gabun öbun e he jem könya walang ang, k' ame o but köbun únyi ae kong? 8 Me haba wahingatiny Gileada ödrin e thu kö Jefetha, ka habe, Waleling öhmun e o köu walang ang, m' u me he ka tha he möhmun me vat me laku Amona, m' u me he ka taben at Gileada hia. 9 Me haba Jefetha ame ha ka wahingatiny at Gileada, ka habe, Öbun e ne he ka hum nya ka hnyi ik he ka vat me laku Amona, k' ame ne he Iehova ka hn' ödrin könya, hawa, oge me he ka ban köbun? 10 Me haba wahingatiny Gileada ödrin e thu kö Jefetha, ka habe, Hamö Iehova ka wâ hnathu ötin ; a öhmun e he ka ânyâ helâ me hwâm hofuc. 11 Me haba Jefetha ame tha he me wahingatiny Gileada, me haba tavat andre me otílâ me me taben me ban hudrin : ke haba Jefetha

ame ha hwan ta je hofuc hia hnyi hnyimakö Iehova hnyi Mizepa.

12 Ke haba Jefetha ame kunâ je metâ ka thaniny laku Amona, ka habe, Ieû gam kõnya, anyin a u je he jem ka vat me ik hnyei? 13 Haba thaniny laku Amona ame thu ka je metâ anyi Jefetha, ka habe, Anyin a at Isaraela ödrin e hûgúnâ ik hnyei, hnyi úhedrin jem úheny Aigupito, hwân hnyi Arerona ke ne o but Jaboka, me Joridano: ke walang ang ham hmetu thö e hnyi úsoköu. 14 Ke haba Jefetha ame kunâ hmetu ke je metâ ka thaniny laku Amona: 15 me ha kâu, ka habe, Walang hofuc ho Jefetha, ka habe; A ca hom at Isaraela hnyei Moaba me hnyei iny laku Amona: 16 ke ame he jem at Isaraela úheny Aigupito, me ödrin e vheno hnyebuba ke ne o but hnyi Köiö ae Dra, me o hnyi Kadesi; 17 me ame kunâ je metâ at Isaraela ka thaniny Edoma, ka habe, Ö u hnö nya but he ka vheno em hnyei: ke ame ca löng bi than Edoma. Ke helâe minya adre me úkhúnöng ka than Moaba: me e ame hócö bi: ke Isaraela ame laba hnyi Kadesi. 18 Ke e ame vheno hnyebuba, me igirilö hnyei Edoma, me hnyei Moaba, me he hnyi ke keihen e deiö hnyei Moaba, me hunuma hnyi ke keihen Arenona; ke ödrin e ca o hnyi hnyigöulen Moaba, anyin a Arenona hnyigot me Moaba ehac. 19 Ke haba Isaraela ame úkhúnöng kö Sihona than Amora, than Hesebona; ke Isaraela ame ha kâu, ka habe, Ö u hn' öhmun he ka vheno hnyi em hnyei, me he ka hnyi ik. 20 Ke haba Sihona ame ca kap ho Isaraela he ka vheno hnyi iny hnyei: ke Sihona ame úkhacaköu lakeiny hia, me hunuma hnyi Jahaza, me vat me Isaraela. 21 Ke haba Iehova Khongu Isaraela ame hnö Sihona me lakeiny hia thithö ka hnyi hnyamö Isaraela, me adre me kuc ödrin: me Isaraela ame hom hnyei hia iny at Amora, tavat a idrin hnyei eling. 22 Ke adre me hom hnyigöulen hia at Amora hwân hnyi Arenona ke ne o but hnyi Jaboka, ke hwân hnyi hnyebuba, ke ne o but Joridano. 23 Ke walang ang, haba Iehova Khongu Isaraela ame obâ at Amora hnyi hnyimakan lakeiny a at Isaraela, ke u me he biju u ka labâ e? 24 Hawa, u me ca he ka labâ hnyei a ham köu he ka labâ ga Kemosa a khongom? Me haba öhmun, me öhmun e he ka hom iny tavat hia waleji a obâ Iehova Khonguhmun hnyi hnyimaköhmun. 25 Ke

hawa, u beönua hu Balaka nöku Zipora than Moaba? hawa, ame tot at eling kö Isaraela me vat mödra? 26 Ke ame tiga laba Isaraela ehac hnyi Hesebona me je tauniny, me Aroera me je tauniny, me ta je taun hia thithö hnyi hnyigöulen Arenona hnyi je huna a theri haded; me ieû gabun öbun e ca hûgúnâ e hnyi úen eling! 27 Anyin a wale oge me ca okongu u, ke u me ányâ kõnya únyi ae kong he ka vat mönya: hamö Iehova, At Owisa, he ka owisa ka lakon Isaraela me laku Amona hnyi bong eang. 28 Ke haba thaniny laku Amona ame ca löng hofuc ho Jefetha wale e ame úkhúnöng kâu.

29 Me ame ta but hu Jefetha hanu Iehova, me e ame he hanyáúá hnyei Gileada, me Manase, me vheno Mizepa hnyi Gileada, ke úheny Mizepa hnyi Gileada me e ame he ka laku Amona. 30 Ke haba Jefetha ame bi khöbi kö Iehova, ka habe, U je ne he ka hna laku Amona ka hnyi hnyamök, 31 ke iny ka o hmetu hnyi hnahic úheny unyin laku Amona, me haba únyi ame he ka didrut úheny hnyi hwanumen umök uma he ka úkhanö mönya, me wale hobi kö Iehova, me oge me he ka hudo e me hudiny leú. 32 Me haba Jefetha ame he ka laku Amona he ka vat mödrin; ke Iehova ame hn' ödrin ka hnyi hnyamen. 33 Ke e ame kuc ödrin hwân Aroera ke ne o but hnyi Minith, a je taun a twente, ke ne o but Abela-ceramim, ke ti gan hna kuc ödrin. Ke adre me hom úhnyükongo laku Amona hnyi hnyimakan lakon Isaraela.

34 Ke ame o thö Jefetha hnyi Mizepa ka hnyi hnyaban, me wâ bi, ame o thö nokon hlu he ka ukhanö mä, me je bwinybet me bibiâ: ke hake e thibi nokou, ke ba hmetu nokon бага me hlu. 35 Ke e ame wâ e, me e ame kia anyin úkhaú, me ha, ka habe, Ekölö ge nökkuk! u je hia but ohmakâ hnyekuk, ke iny vec ut gam: anyin a oge hia but fuc kö Iehova, ke ca khanö nya bi he ka hmetu. 36 Me e ame ha kâu, ka habe, Cica, u je hia but fuc kö Iehova; ányâ thö kõnya helâ me hofuc ame o but únyi hnyi hnyimâm; anyin a Iehova ame bi hwaban ka je iwahnaihmiöny möu, a laku Amona. 37 Ke haingen ka kamen, ka habe, Ányâ thö kõnya únyi eang, wale he ka hnö nya but hnyi lo li tehi, me inye he ka he monu hon je bucen tha e me je lahanök, me tenge can anyin a iny hlu baú but. 38 Me haingen dö, He

OWISA 12, 13.

thö. Ke e ame hna e hnyi lo li tehi, me e ame tha he me je lahanen, me tenge hon je bucen can anyin a e hlu baü but. 39 Ke hwaban lo li tehi e ame hmetu ka kamen, me e ame ânyâ kâu helâ me nhen hna bi khöbi: ke a ca hia but tha mwi me ke бага. Ke wale hwakecin hnyi Isaraela, 40 a g' ame he je hlu lakon at Isaraela hnyi je huna he ka tengiâ hlu nöku Jefetha at Gileada vak ta bong hnyi je huna.

HNYIMAKAN 12.

**K**E haba at Eferaima adre me ûkhaca-köu me he ka hnyi hwadrö: me ödrin e ha kö Jefetha, ka habe, Ieü gam u je he ka vat me laku Amona, ke u je ca haw' öhmun he ka tha he möu? öhmun e he ka thong umâm uma ka hom ge meic. 2 Haba Jefetha ame ha ködrin, ka habe, haba inya me atök öhmun e üö hwege me laku Amona; ke o ge haw' öbun, ke öbun e ca omeli nya ûnyi hnyi hnyamödrin. 3 Ke o ge me wâ a öbun e ca omeli nya, me oge me öünyibâüâ anyik möt, me he ka vat me laku Amona, ke Iehova ame hn' ödrin ka hnyi hnyamök: can ieü öbun e he jem könya hnyi bong ang he ka vat mönya? 4 Ke haba Jefetha ame ûkhaca-köüâ tavat hia hnyi Gileada, me vat me Eferaima; ke haba at Gileada ödrin e kot at Eferaima, anyin a ödrin e ha, ka hâbe, Je bâ öbun at Gileada üheny Eferaima hnyi wanben at Eferaima me Manase. 5 Ke haba at Gileada ödrin e khaletâ je dok ae cöcö hnyi Joridano, ke tiga bec at Eferaima: ke ame ne ha at Eferaima, tavat adre me kec, ka habe, Hne dek dö he ka hanyâüâ, me haba at Gileada ödrin e ha kâu, ka habe, U at Eferaima? Ke ame ne ha, e ba, 6 me haingödrin kâu, ka habe, Bethe ha, ka habe, Shibolet; me haingen bi, ka habe Siboleth; ke ca khana he ka ha wisa. me ödrin e kât me hlingâ hnyi je dok ae cöcö hnyi Joridano: ke ame ta hnyi üen eling fâte tu thauzan at Eferaima.

7 Ke Jefetha ame owisa ka at Isaraela hnyi je huna a siks. Me ame mokcu Jefetha at Gileada, me adre me konâm e hnyi ke taun hnyi Gileada.

8 Ke hwaban e me ame owisa ka at Isaraela Ibezana at Bethe-leema. 9 Ke thöte lakon obaga, ke thöte lakon wahlu e ame ve hna hââng, ke e ame hom wahlu a thöte üheny hele hobi kâu lakon obaga. Ke e ame owisa ka at Isaraela hnyi

je huna a seven. 10 Ke ame mokcu Ibezana, me adre me konâm e hnyi Bethe-leema.

11 Ke hwaban e me ame owisa ka at Isaraela Elona at Zebulona; ke e ame owisa ka at Isaraela hnyi je huna a ten. 12 Ke ame mokcu Elona at Zebulona, me adre me konâm e hnyi Ajalona hnyi Zebulona.

13 Ke hwaban e, me, Abedon nöku Hilel, at Pirathon, ame owisa ka at Isaraela. 14 Ke e hu lakon obaga a fâte, ke thöte laöbiny, ödrin e tabâ je asina a sevente; ke a ame owisa ka at Isaraela hnyi je huna a eit. 15 Ke ame mokcu Abedon nöku Hilel, at Pirathon, me adre me konâm e hnyi Pirathon hnyi hnyei Eferaima, hnyi hnyei ae hut anyin at Amaleka.

HNYIMAKAN 13.

**K**E haba lakon Isaraela adre me ânyâ hmetu hwakecin ae kong hnyi hnyimakö Iehova; me Iehova ame hn' ödra ka hnyi hnyamen at Filisiti hnyi je huna a fâte.

2 Ke wale ke at at Zorea hanen lap anyin at Dana, Manoa ien; ke toünyi âiân, k' ame ca hnokoâ bi. 3 Ke ame manen dut angela anyi Iehova ka momo, me ha kâu, ka habe, Wâ bi, u toünyi walang ang, me ca hnokoâ bi; ke so bi u me he ka erkin, me hnokoâ da. 4 Ke walang ang, e so u me wâ via bi, u me ca he ka ic waina me grâg, ke u me ca the bi ka han ûnyi ae kap: 5 ke wâ bi, u me he ka erkin, me hnokoâ da, ke adre me ca he ka ip heleügi hon ban, anyin ame he ka Nazeri ka Khong wanakat ûnyi hnyi hnyok: ke e ame he ka hwân he ka omelö at Isaraela ûnyi ge at Filisiti. 6 Ke ame he but momo me thumeto âiân, ka habe, A o könya ka aten Khong, ke helâ hnyimakan me hnyimakan angela anyin Khong hnân outen; ke oge ca hnö dok a mwi hnyin, ke e ame ca ha minya könya ien: 7 ke e ame ha könya, ka habe, Wâ bi, u me he ka erkin, me hnokoâ da; ke walang ang u me ca he ka ic waina me grâg, ke ca he bi ka han ûnyi ae kap: anyin ame he ka Nazeri ka Khong wanakat ûnyi hnyi hnyok, ke ne o but bong e ame mokcu. 8 Ke haba Manoa ame sumatö Iehova, ka habe, Tuhök lö, ö e o hmetu köhmu aten Khong u je kunâ, me me n' öhmu ge

únyi öhmu me he ka ányá ka wanakat ame he ka hnokoá. 9 Ke Khong ame löng hofuc ho Manoa; me ame o hmetu angela anyin Khong ka áián ame laba hnyi hnyei: ke hiö Manoa a áián unyin. 10 Me ame ie wadring momo, me thumeto áián, me ha káu, ka habe, Wá bi, ame manen hmetu könya ateji ame o könya hnyi ke bong. 11 Me ame todrö Manoa me he hoton áián, me o unyin at, me ha káu, ka habe, U at waleji u je úhnenamö me momo? Haingen, lnya e. 12 Ke haingö Manoa, ka habe, E na át ju hwám hofuc: ke ame he ka helá ua wanakat? ke ieu hudrán. 13 Me ame ha angela anyi Iehova kö Manoa, ka habe, Haba hnök haa ha hia ka momo, hamen he ka wá wia. 14 E ame ca he ka an ke únyi únyi hnyi vine, ke e ame ca he ka ic waina me grág, me han ke únyi ae kap; ke e ame he ka tuö ta je únyi hia oge me ha káu. 15 Me haba Manoa ame ha ka angela anyi Iehova, ka habe, Me laba ju unyihmu m' öhmu me he ka penapena hobi köu nokon got. 16 Me angela anyi Iehova ame ha kö Manoa, ka habe, Eja ke ne u je ne thawo nya, me oge me ca he ka han ányám areto: ke u je ne he ka penapena hudiny leú, me u me he ka hudo e kö Iehova. Anyin ame ca wá Manoa a e angela anyi Iehova. 17 Me Manoa ame ha kö angela anyi Iehova, ka habe, Ia iám, m' öhmun e he ka oganö u e ka át dö hwám hofuc? 18 Me ame ha angela anyi Iehova, ka habe, Anyin a ieu u me hnö iök, anyin a e me hnán láia gan? 19 Ke Manoa ame hom nokon got me hudiny han, me hudo kö Iehova hon kic: ke hnán láia bi hna ányá ge angela, ke Manoa me áián ödru me tot ka wá. 20 Ke ame o thö báhlán ka hnyidranyai úheny hon tap, me ame ölö thö angela anyi Iehova hnyi báhlán taben hut: ke a wá but Manoa me áián; me ödru me ta ju hnyikánái. 21 Ke ca manen hmetu bi angela anyi Iehova kö Manoa me áián. Me Manoa ame wáhmakhmetoá a e angela anyi Iehova. 22 Me Manoa ame ha ka áián, ka habe, Ötu me he but ka mok anyin a öte hia but wá Khong. 23 Ke haingen áián káu, ka habe, Ame ne behling' ötu Iehova, me ame ca he ka kap hudiny leú me hudiny han únyi gatu, ke e ame ca he minya ka omanená kötu ta je únyi hia eling, me thumetu ötu ge ta je únyi a heláng hnyi úen eang. 24 Ke haba momo ame hnokoá da me hwenyi ien

Samasona: ke ame gan tot wanakat, ke haba Iehova ame ohnací e. 25 Ke ame hwán hanu Iehova he ka huliwan hnyekon hnyi lap anyi Dana, hnyi wanben Zorea me Esetaol.

## HNYIMAKAN 14.

**K**E Samasona ame he Timenatha ai, me ame wá hnyi Timenatha ke hlu nokon at Filisiti. 2 Ke a ame o me thumeto kamen me hinyen, ka habe, Oge wá hnyi Timenatha ke hlu nokon at Filisiti: ke walang ang he thö ka hom me öiök. 3 Haba kamen me hinyen ödru me ha káu, ka habe, Hawa, e ba momo nokon je liamekeiny möu, me ik hnyei hia, m' u me he ka hok áiám unyin at Filisiti adre ca peritomoná bi? Ke haingö Samasona ka kamen, ka habe, He thö ka hom e hobi könya anyin ae so e könya. 4 Ke ca khana kamen me hinyen a únyi ga Iehova e; anyin a e ame heleú can unyin at Filisiti. Ke haba at Filisiti ame musö at Isaraela hnyi úen eling.

5 Ke ame tha he Samasona me kamen me hinyen Timenatha ai, me o but hnyi je hnyei vine hnyi Timenatha: ke wá bi ame kuku káu nokon liona. 6 Me ame o hwegiá káu hanu Iehova, me e ame wahai e helá me hna wahai nokon got, ke ba únyi hnyi hnyamen: ke e ame ca thumeto kamen me hinyen ge hnen hna ányá. 7 Ke e ame o me úhnenamö me hlu, ke e so hmönyin kö Samasona. 8 Ke hnyi ke úen e ame hmetu he ka hom e, me e ame saú he ka wá unyin liona: ke wá bi, e hu je bi me hani hnyi unyin liona. 9 Ke e ame hom hanen hnyi li hnyamen me han tot me o unyin kamen me hinyen, me ha ödru, me ödru me hnyi han, ke e ame ca thumetu ödru a g' ame hom hani únyi hnyi unyin liona. 10 Ke ame he but kamen ka momo; ke haba Samasona ame ányá ke bijeu eling; anyin ame labö ányá heláe ta je hidróu. 11 Ke ödrin e wá but e, me ödrin e hom laüen a ödrin thöte mödrin e tha e më. 12 Ke haba Samasona ame ha ködrin, ka habe, oge me he ka ha walang ang anyik húkehmuen köbun: ke öbun e ne omanená bongon könya hnyi je bong a seveniny bijeu, me wá e, me oge me he ka ham köbun thöte je úkhaú lino, me thöte je úkot: 13 ke ame ne ca khan' öbun bi he ka omanená könya bongon, awe, öbun e he bi ka ham könya thöte je



úkháú lino ke thöte je úkot. Ke haingödrin, ka habe, Omanená thö ányâm húkehmuén, m' öhmun e löng. 14 Me e ame ha ködrin, ka habe,

Ame o but jeú únyi hnyi hnyin at ameban,

K' ame o but únyi a hnebwia únyi hnyi hnyin at ae hwege.

Ke ca khan' ödrin he ka omanená húkehmuén hnyi kun ta bong. 15 Ke haba hnyi bong a seveniny, me ödrin e ha ka öiö Samasona, ka habe, U ma he ka újengö áiam me me he ka omanená köhmun húkehmuén, wá adre nye he ka thung u me uma umen kámám ge meic : hawa, öbun e haw' öhmun me me hom anyihmun ta únyi? e ba! 16 Me öiö Samasona ame tenge káu me ha, ka habe, U me húkötíö nya, me ca betenge gak : u je ha húkehmuén ta tavat aten ik hnyeí, ke u je ca omanená könya bongon. Ke haingen káu, ka habe, Wá öi oge me ca omanená bongon kö cica me bai, me oge ma hawa ka omanená köu? 17 Me e ame tenge káu hnyi je bong a seven hnyi anyidrin bijeu : ke haba hnyi bong a seveniny, me e ame omanená káu bongon, anyin a e ame újengoá : me e ame he bi me omanená bongon húkehmuén ka aten iny hnyeí. 18 Ke haba hnyi bong a seveniny me ame ha káu aten taun, ke tiga ca dit seúnö, ka habe, Ieú únyi ae hnebwia hon hani? ke ieú ae hwege hon liona? Me e ame ha ködrin, ka habe,

Öbun e ne ca wia káná ge halek kau,

Me ca khan' öbun he ka wá bongon anyik húkehmuén,

19 Me ame ut hwege hanu Iehova ka hnyi hon, me e ame he Asekelona ai, me kot eling hnyat a thöte me sei ödrin, me ham ka hnyat ödrin e omanená húkehmuén je hwiny khaú. Ke ame ubáhlá thö anyin hmönyin me e ame he ka hnyi hnyaban kamen. 20 Ke adre ham bi áian ka hanen, wale at a lihum mé.

### HNYIMAKAN 15.

**K**E haba hnyi ke bong, hnyi úen meno hwit, haba Samasona ame o ka áian me nokon got : ke haingen, ka habe, Oge me he ka he ka áiök eú hnyi hnyeule, ke ame ca hna e kamen he ka didró. 2 Ke haingen kamen, ka habe, Oge me únykúme a u me ikiki gan ; me oge me ham e ka hánám : hawa e ca so hmáiny keiny hon? ö u hom dö e me hwaban. 3 Ke

haba Samasona ame ha ködrin, ka habe, E ba kongik walang ang, iny ka he ka okongó at Filisiti. 4 Ke Samasona ame he me kát kun ta haded je alope, me hom je okúnú, me úobinyákóuá úsa lo, me ve ip je okúnú wanben lí obiny. 5 Ke ame hia but vác je okúnú ge meic, me e ame hn' ödrin ka hnyi hwit ame tot anyin at Filisiti, me ame hlá hwit adre khon, me hwit ame tot, me je hnyeí elaió minya. 6 Ke haingen at Filisiti, ka habe, Ia ame ányá e? Me ödrin e thu, ka habe, Hnö Samasona úngon at Timinatha, anyin a e ame hom áian, me ham ka hanen. Haba at Filisiti ödrin e he me thong hlu me kamen ge meic. 7 Ke haingö Samasona ködrin, ka habe, öbun e ne ányá heláe, e hnathu oge me he ka bi hwaban, ke ka um dö e soju. 8 Me e ame kuc ödrin je can me jevan, e gan hmá hna kuc ödrin, me e ame he me laba hnyi khékheiny kic hnyi Etama.

9 Me ame ölö thö at Filisiti me hunuma hnyi Juda, me avá Lehi. 10 Ke ame ha at Juda, ka habe, Öbun e o but köhmun eang geú? Haingödrin, ka habe, Öhmun e o he ka co Samasona, he ka ányá káu helá me hnen hna ányá köhmun. 11 Me ame he at Juda a ödrin theri thauzan ka hnyi khékheiny kic hnyi Etama, me ha kö Samasona, ka habe, U ma ca wá a at Filisiti ödrin e musí ötin? ieú e u je ányá köhmun? Ke haingen, ka habe, Oge ányá ködrin helá me hnödrin hna ányá könya. 12 Ke haingödrin káu, ka habe, Öhmun e o he ka cö u me me hnö u ka at Filisiti. Me Samasona ame ha ködrin, ka habe, Khemanyin dö könya a öbun e ca he ka okongu nya bi. 13 Ke haingödrin, ka habe, E ba ; ke öhmun e he thibi ka cö u, me hnö u ka hnyi hnyamödrin : ke so bi e hnathu a öhmun e ca he ka hlingö u. Me ödrin e ca e ge lí tö ae teb únyi, me hom e únyi hnyi kic. 14 Ke e ame o ka hnyi Lehi, me haba at Filisiti ödrin e iouny mé me kuku káu : ke ame utut ka hnyi hon hanu Iehova, ke haba lí tö hnyi lí benyin me helá me wakunenu adre le ge meic, ke ame ok ut hna ca hnyi lí benyin. 15 Me e ame wá jeien wainy asina a teb únyi, me e ame iná benyin me hom, me kot tavat a khaca thauzan. 16 Ke haingö Samasona, ka habe,

Hnen jeien wainy asina, je hna khon hon je hna khon,

Oge hlingá tavat a khaca thauzan ge jeien wainy asina.

17 E ame ha hofuc eling me khûâ jeien wainy únyi hnyi hnyamen, me adre me hwenyi ien hnyei eling me Rama-lehi. 18 Ke gan hmâ beic kâu me e ame tenge Iehova, me ha, ka habe, U je hna ka athnyabaem hna omelö eang ae gan, ke walang any oge me he but ka mok ge beic, me ta ka hnyi hnyamen tavat adre ca peritomonâ bi. 19 Me haba Khong ame kia thop a e hnyi Lehi, me ame o köiö únyi hnyin : ke e ame ic me ame o hmetu hanon me me möt bi : anyin a wale adre hwenyi ien e me Eni-hakore, ke e hnyi Lehi ke ne o but hnyi bong ang. 20 Ke e ame owisa ka at Isaraela hnyi únen at Filisiti twente je huna.

## HNYIMAKAN 16.

**K**E Samasona ame he Gaza ai, me e ame wâ eling momo hnyi gethen, ke e ame didrö kâu. 2 Ke adre me thumeto at Gaza, ka habe, E but ang Samasona. Me ödrin e igigilöâ, me mokulic e hnyi lit hia hnyi homagöuleny taun, me ca mede hnyi lit hia, ke haingödrin, ka habe, Ötin e he ka hlingâ e hnyi haolany. 3 Ke haba Samasona ame mokut ke ne o but wanbenset, me ame todrö hnyi wanbenset, me kât li hlinginy homagöuleny taun, me li uthomagöulen me tha hom e me li venyainy, me vadren e hon li bajebenyin, me öliâ ka hnyi bucen cicö Heberona.

4 Ke hwaban e e ame betenge ge ke momo hnyi hnyigöulen bucen Sorek, Delila ien. 5 Me ame he ka momo je thaniny at Filisiti, me ha kâu, ka habe, U me he ka újengö e, me me khan' ötin can anyin hwege ae gan, me öhmun e he ka kâmâu he ka hwege hon, me me khan' öhmun he ka ca e me hom úhnyúkongoâ : ke öhmun e he ka ve ham köu je silva a eleven haded. 6 Me haba Delila ame ha kö Samasona, ka habe, Ö u me ha thö könya ewa dok ame laba hnyin ányâm hwege ae gan, me adre me he ka cö u hnen ieü m' adre me hom úhnyúkongu u. 7 Ke haingö Samasona kâu, ka habe, Ödrin e ne he ka cö nya ge je tö a seven ae hat a ga ca mok bi, me oge me he ka sényin me helâ me ke at. 8 Haba je thaniny at Filisiti ödrin e hom ka momo je tö a seven ae hat a ga ca mok bi, ke e ame ca e ge je tö. 9 Ke e hu tavat mokulec e únyi hnyi ke hnyeule. Ke e ame ha kâu ka habe, Samasona, at Filisiti but ang. Me e ame thamûâ je tö, helâ me hna

thamûâ wakunenu ame kâlâ meic. Ke ca khan' ödrin anyin hwege. 10 Ke haingö Delila kö Samasona, ka habe, Wâ bi, u je iyawö nya, me thoi könya : ö u ha thö könya únyi hnân cö u. 11 Ke e ame ha kâu, ka habe, Ödrin e ne cö nya ge je tö ae teb únyi, ke ödra tiga ca huliwan, me oge me he ka sényin me helâ me ke at. 12 Haba Delila ame hom je tö ae teb únyi, me ca e, me ha kâu, ka habe, Samasona at Filisiti but ang. Ke wale je at mokulec, ödrin e laba eü hnyi hnyeule. Me e ame thamûâ je tö únyi hnyi li benyin, helâ me ütö. 13 Ke haba Delila ame ha kö Samasona, ka habe, U je iyawö nya ke ne o but walang ang, ke u je thoi könya : ha thö könya únyi hnân cö u. Me e ame ha kâu, ka habe, U je ne he ka tha hwâmâ je ohmuök a seven me je tö ame tot. 14 Me e ame ohmâ e ge ong fao, me ha kâu, ka habe, Samasona, at Filisiti but ang. Ke e ame hmak dö úheny hnyi hna mokut, me oc ut únyi hnân hwâwâ mano me je tö ame tot. 15 Me e ame ha kâu, ka habe, Ieü gam u me ha, ka habe, Oge me betenge gam, ke ca tha hnyekom bi mönya ? u je okun dut iyawö nya me ca ha könya can ányâm hwege. 16 Ke e ame labö újengö hnyi je bong ge hwan hofuc, me huliwa gan, me e ame mok ge hna újengö. 17 Me e ame ha ka momo hnyekon hia, me ha kâu, ka habe, Adre tiga ca ip heleúge ka hnyi hon bök ; anyin adre Onazeri nya ka Khong únyi hnyi hnyeku bai : ke adre ne giâ bök me ame he ka hia unyik tang hwegiök, me oge me he ka sényin, helâ me ke at bi. 18 Ke a wâ but Delila a ga hia but ha kâu hnyekon hia, me e ame úkhünöng he ka hom je thaniny Filisiti, me ha ködrin, ka habe, Ai öbun walang ang, anyin a e ame ha könya hnyekon hia. Me ame o kâu je than Filisiti, ke ödrin e hom mone hnyi je hnyamödrin. 19 Me momo ame hawâ e ka mokut me ban hon jewan ; me e ame hawâ ke at he ka subâ je ohmuen ban a seven, me e ame hwân he ka hom úhnyúkongoâ, me ame he but tang hwegien únyi gan. 20 Ke e ame ha, ka habe, Samasona at Filisiti but ang. Me e ame hmak dö úheny hnyi hna mokut, me ha, ka habe, Oge me he ka didrut helâ me je únen ehac, me inye hlöhlöu but, Ke ca khana a ga hiö Iehova but anyin. 21 Me ame kât e at Filisiti me úâ li emakan ; me ödrin e hom a Gaza ai, me ca e ge je tö a bras ; ke haba hanymen hnyi kalebus me

he ka khenyo ta je únyi. 22 Ke ame hwán he ka kú hmetu leúnen ban hwaban hna subá.

23 Ke haba je tuhan at Filisiti ödrin e úkhacaköu he ka hudo hut ae gan kö Dagona a khongudrin, me he ka senyin: anyin a haingödrin, ka habe, a hia but khongutin hnö Samasona a iwahnaihmiöny mötin ka hnyi hnyamötin. 24 Ke ame wá hnen tavat me ödrin e ogáná khongudrin: anyin a haingödrin, ka habe, Hnen khongutin hna hna iwahnaihmiöny mötin ka hnyi hnyamötin a at ame okongo itin hnyei, me hlingá tavat ae se hia gatin. 25 Ke ame senyin dut je hnyekudrin, me ödrin e ha, ka habe, Hawö Samasona me me úhiö kötin. Me ödrin e hum Samasona únyi hnyi kalebus; me e ame úhiö ködrin: ke ödrin e otilá e hnyi wanben je hmolom. 26 Haba Samasona ame ha ka hidröu at ame kát hnyamen, ka habe, Me hnö nya but he ka kálá je hmolominy uma, me inye he ka tot inyifálá. 27 Ke unöngötö uma ge obaga me omomo; ke wale je tuhan at Filisiti hia; ke theri thauzan obaga me omomo ethö hnyi hon uma, ödrin e ö Samasona ame úhiö. 28 Haba Samasona ame haö Iehova, ka habe, Iehova Khong lö, ö u únykúme könya, me okhaca hmetu bi owhegiö nya, Khong lö, me inye he ka bi hwaban li emakök ka at Filisiti. 29 Ke haba Samasona ame kát li hmolom eú hnyi wanben uma, wale ame kap uma, me tot inyifálá, khaca ge benyin a metá, ke khaca ge benyin a me. 30 Ke haingö Samasona, ka habe, Oge me he ka tha mok me at Filisiti. Ke e ame nom hnyikánái me hwegien hia; me ame ú but uma, me takoué je than me tavat hia. Ke haba je komok e ame hlingá hnyi anyin mok me beönua hon je hna hlingá ke tiga möt. 31 Me ame he je liamekeiny me me lap anyin kamen hia, me hom e, me vaden, me konám wanben Zorea me Esetaol hnyi hu Manoa a kamen. Ke e ame owisa ka at Isaraela twente je huna.

## HNYIMAKAN 17.

**K**E e hu ke at aten hnyei ae hut hnyi Eferaima, Mika ien. 2 Ke e ame ha ka hinyen, ka habe, Haba je sileva a eleven haded adre hom unyám, wale u je úhangö gan, me fuc gan hnyi li hnyekönyök, wá bi, e unyik; oge hom. Me ame ha hinyen, ka habe, E hnahic ut nökkuk únyi ga Iehova. 3 Ke e ame ham hmetu je

mone a eleven haded ka hinyen, me hinyen ame ha, ka habe, Oge me okabá je mone kö Iehova únyi hnyi hnyamök hobi káu nökkuk, m' adre me ányá hnatheat adre tretrao me hnatheat adre oköiá: ke walang ang oge me he ka ham köu. 4 Ke e ame ham je mone ka hinyen, me hinyen ame hom lo li haded je sileva me ham ka at ame huliwan fao, me e ame ányá hnatheat adre tretrao, me hnatheat adre oköiá: ke ka e hnyi uma umö Mika. 5 Haba Mika, me ame tren uma umen je khong, ke e ame ányá iefoda, me je idola, me okabá ke nokon me me at bihut unyin. 6 Haba hnyi úen e, me ba than hnyi Isaraela: ke adre me ve ányá únyi ae wisa ködrin.

7 Ke wale ke hidröu úheny Bethe-leemajuda, hanen lap anyi Juda, ke e at Levi bi, ke e ame laba kanyua eling. 8 Ke ame he at úheny hnyi taun Bethe-leemajuda he ka elám ke dok he ka laba kanyua hnyin; ke e ame o thö ka hnyi hnyei ae hut hnyi Eferaima, me he ka hnyi uma umö Mika. 9 Ke Mika ame ha káu, ka habe, U je mua? Me e ame ha, ka habe, Iny at Levi, úhek Bethe-leemajuda, ke oge me he ka laba kanyua hnyi ke dok oge me he ka wá. 10 Me haba Mika ame ha káu, ka habe, Tha laba ju mönya he ka bi kamök me at bihut unyik; me oge me he ka ham köu ten je sileva hnyi ke huna me ke huna, me khaca bwiny khaú, me jeú. Me haba at Levi ame didró. 11 Me so bi ka at Levi he ka tha laba mē; me haba hidröu me helá me ke nokon bi. 12 Ke haba Mika ame otilá at Levi, me me anyin at bihut hidröu eling, k' ame laba eiö hnyi uma umö Mika. 13 Ke haingö Mika, ka habe, E khanö nya walang ang a ga me he Iehova ka ányá únyi ae so könya, anyin ae hu unyik at Levi hnán at bihut.

## HNYIMAKAN 18.

**K**E hnyi úen eling me ba than hnyi Isaraela: ke hnyi je bong eling haba tribu Dana ödrin e eleú idrin he ka labá; anyin adre tiga ca khená ködrin idrin unyin at Isaraela ke ne o but bong eling. 2 Ke haba laku Dana, ödrin e kuná je hnyat únyi hnyi anyidrin lap a ödrin faiv, hnyi hnyi úseidrin hia, a je hnyat ae hwege, úheny Zorea, me Esetaol, he ka ecmáká hnyei, me elám e; ke ödrin e ha ködrin, ka habe, He thö ka elám hnyei: ke ödrin e o but ka hnyi hnyei ae hut hnyi Eferaima,

hnyi uma umö Mika, me ödrin e mokut eling. 3 Ke tiga ödrin hnyi baten uma umö Mika, ödrin e löngmakhmetoâ ifucin hidröu at Levi; me ödrin e saü kâ e, me ha kâu, ka habe, Ia hum u jem? ke ieü hudrâm eang? ke ieü ânyâm eang? 4 Ke haingen, ka habe, Helâng me helâe ame ânyâ kõnya Mika, ke e ame he ka bi hwa-bök, ke inya ang anyin at bihut. 5 Me ödrin e ha kâu, ka habe, Ö u elâm dö unyin Khong me me khan' öhmun dö ame ne he ka hnahic ûhehmun. 6 Ke ame ha ködrin at bihut, ka habe, He thö me hnabic: e hnyi hnyimakö Iehova debun gethen öbun e he ka vheno.

7 Me ame he but hnyat a ödrin faiv, me o hnyi Laisi, me wâ tavat hnyin e a ödrin e laba so helâ me at Zidona, a hnahic ut me khötkic; anyin ae ba at musî hnyi hnyei me me thawâ ta je ûnyi, he ka oh-mehm' ödrin hnyi ta je ûnyi; ke ödrin e úsákâüö me at Zidona, ke ba ûnyi anyin ke at ka ke at. 8 Ke ödrin e o but ka je liamekeiny mödrin hnyi Zorea me Esetaol; me ame ha ködrin je liamekeiny mödrin, ka habe, Hawa gabun? 9 Ke haingödrin, ka habe, Todrö, me ötin e he ködrin, anyin a öhmun e wâ hnyei, ke wâ bi, e ti so; ke ieü gabun öhun e laba ju? ca bec bi he ka he, me he thö ka hu hnyei. 10 Öbun ka he, öbun e he ka o ka tavat adre laba khötkic, ke lau but hnyei; anyin a Khong ame ham e köbun; hnyei ae ba ke ûnyi ae hia hnyin eang hmeledrany.

11 Ke ame he úheny e ûnyi hnyi lap anyi Dana, a úheny Zorea, me Esetaol, ödrin hnyat a siks haded ae ve hu omjehen vat. 12 Ke ödrin e he me hunuma hnyi Kiriathajarim hnyi Juda: anyin a wale adre me hwenyi ien dok eling me Mahane-dana ke ne o but hnyi bong ang: wâ bi e hnyi hoton Kiriatha-jarim. 13 Ke ödrin e he úheny e ka hnyi hnyei ae hut hnyi Eferaima, me o hnyi uma umö Mika. 14 Me ame fuc tavat a thabûng hnyat ödrin e ecmâkâ hnyei Laisi, me ha ka je liamekeiny mödrin, ka habe, Hawa, e khan' öbun a g' ame hu iefoda hnyi je uma eang, me je idola, me hnatheat adre tretrao, me hnatheat adre oköiâ? Ke walang ang wâhmakhmeto ju öbun ûnyi he ka ânyâ. 15 Me ödrin e saü thö kâ e, me o ka hnyi uma umen hidröu a at Levi, wale uma umö Mika, me iouny mē. 16 Ke haba tavat a siks haded ae ve hu omjehen vat, a laku Dana, ödrin e tot hnyi homagöule. 17 Me ame he hnyat a thabûng a

hnyat ecmâkâ hnyei, me didrö, me hom hnatheat adre tretrao, me iefoda, me je idola, me hnatheat adre oköiâ: ke ame tha tot at bihut hnyi homagöule me tavat a siks haded ae hu omjehen vat. 18 Ke ame didrö hnyat eling ka hnyi uma umö Mika, me hom hnatheat adre tretrao, me iefoda, me je idola, me hnatheat adre oköiâ, me haingen at bihut ködrin, ka habe, Ieü öbun e ânyâ? 19 Me haingödrin kâu, ka habe, Ca mede, ip ju hnyamâm ka hnyi hon hnyimâm, me tha he möhmun, me u ma he ka bi kamöhmun me ânyâ hanymen at bihut unyihmun: hawa, e so köu he ka ânyâ hanymen at bihut hnyi lap anyin at a kha-ca, ke hawa, he ka bi hut ka tribu me lap anyi Isaraela? 20 Me ame senyin hnyekon at bihut, me e ame hom iefoda, me je idola, me hnatheat adre tretrao, me he hnyi wanben tavat. 21 Me ödrin e hwiö me he, me ip tavat ae úhnyûkong, me je meno, me ta je ûnyi hnyi hnyimaködrin. 22 Ke ödrin e sákâü but úheny hnyi uma umö Mika, haba tavat hnyi je uma hakekenyâ uma umö Mika, ödrin e úkhacaköu, me khöü laku Dana. 23 Ke ödrin e hongot ka laku Dana. Ke ödrin e hwiö me ha kö Mika, ka habe, Ieü gam u me tha he me bunyen helâe? 24 Ke haingen, ka habe, Öbun e hia but hom anyik je khong wale oge ânyâ, me anyik at bihut, me öbun e he, ke ieü biju kõnya? ke ieü e öbun e ha kõnya, ka habe, Ieü gam? 25 Me ame ha kâu laku Dana, ka habe, E so adre me ca löng hwâm hofuc unyihmun wâ e nye kuc u thö tavat ae hmönyin, me u me he ka mok me ânyâm lap. 26 Me ame he balua bi laku Dana: ke a wâ but Mika a ödrin hwege hon, me e ame hwiö thö me hmetu ka hnyi hnyaban. 27 Ke ödrin e hom je ûnyi a ânyâ Mika, me anyin at bihut, me o but Laisi, ka tavat adre me laba so me khötkic, me kuc ödrin ge hele vat; ke ödrin e thong taun ge meic. 28 Ke ba at úhömeli, anyin ae úsákâüö e me Zidona, ke ba hna iouny me ke at; ke e hnyi hnyigöulen bucen e. Bethe-rehob. Ke ödrin e otilâ taun me labâ e. 29 Ke ödrin e hwenyi ien taun Dana, hoton ien kamödrin Dana, wale a hnöku nöku Isaraela: ke so bi Laisi ien taun ehac. 30 Ke haba laku Dana ödrin e otilâ hobi ködrin hnatheat adre tretrao: ke haba Jonathana, nöku Geresoma, nöku Mose, e me lakon a hnyat bihut anyin tribu Dana ke ne o but bong adre hom hwenbâ hnyei. 31 Ke ödrin e otilâ hobi ködrin hnatheat adre

tretrao anyi Mika, wale e ame ânyâ, hnyi ta je bong hia wale a e bi hnyi Silo uma umen Khong.

## HNYIMAKAN 19.

**K**E haba hnyi je bong eling ae ba than hnyi Isaraela, me hu ke at Levi ame laba kanyua hnyi ke keihen hoton hnyei ae hut hnyi Eferaima, at ame hom anyin momo únyi hnyi Bethe-leema-juda. 2 Ke ame bi únyi monu anyin momo, me kec gan ka hnyi hnyaban kamen hnyi Bethe-leema-juda, me e ame laba eling vak ta tehi. 3 Me ame todrö áiân baga me he hoton he ka úhnenamö wia mē me hom hmetu bi, ke e unyin athnyabainy me li asina : ke haba momo ame hom e ka hnyi uma umen kamen : ke a wâ e kamen momo, me e ame senyin he ka iouny mē. 4 Me úngon ame thawâ e, wale kamen momo ; me e ame tha laba mē hnyi kun ta bong : me ödrin e tha han, me ic, me mokut eling. 5 Ke haba hnyi bong a vakiny ödrin e vesâkong, me e ame todrö he ka he : ke ame ha kâu úngon a kamen momo, ka habe, Me okahwa hnyekom ge jeú, ke hwaban thö e he th' öbun. 6 Me ödru me laba me tha han me tha ic : ke haba kamen momo ame ha ka at, ka habe, Ö u me laba ju me mokut, me me he ka senyin hnyekom. 7 Ke haba at ame todrö he ka he, me úngon ame újengöâ, me e ame mokut hmetu eling. 8 Ke e ame vesâ hnyi hnyomakatu hnyi bong a thabúnginy he ka he ; me ame ha kamen momo, ka habe, Ö u me okahwa thö hnyekom, me laba ju ke ne o but sabac ; me ödru me tha han. 9 Me ame todrö at he ka he me anyin momo me athnyabainy, me ame ha kâu úngon a kamen momo, ka habe, Wâ bi ame he but ang ka dit seúnö, ö u mokut hmetu ju : wâ bi a he but ka lit ut, mokut ju eang, me me he hnyekom ka senyin ; ke öbun e he ka vesâkong me he me o ka hnyi hnyabam. 10 Ke höcö bi baga he ka mokut hmetu, me e ame tot me he, me e ame o hnyi hnyei cicö Jebusi (wale Jerusalem) : ke e unyin li asina adre hûkâlâ li taben hudru ; me anyin minya momo. 11 Ke ödrin e o hnyi Jebusi hnyi hauhaotreng ; ke haingen athnyaba ka tuhan, ka habe, Ö ötin saú ka hnyi taun ang anyin at Jebusi me mokut eling. 12 Me ame ha kâu tuhan, ka habe, Ötin e ca he ka saú ka hnyi taun kanyua, a ca hanen laku Isaraela, ke ötin e he ka he Gibea ai. 13 Ke haingen ka athnyabainy, ka habe, Ötin e he

ka saú ka hnyi ke dok eang ; ke ötin e he ka mokut hnyi Gibea, ame ne Rama. 14 Ke ödrin e he bala bi ; ke ame dit ködrin seúnö hnyi Gibea hnyi Beniamina. 15 Ke ödrin e saú kâ e, he ka mokut hnyi Gibea : ke e ame didrö me laba hnyi getheniny taun : anyin ae ba at ame haw ödrin ka hnyi umen uma he ka mokut. 16 Ke wâ bi, wale ke hingat ame o úheny hnyi anyin huliwa hnyi ta hnyei hnyi sahac ; haba at eling aten hnyei ae hut hnyi Eferaima, ke ame laba kanyua hnyi Gibea : ke so bi at Beniamina, je aten taun. 17 Ke e ame bwele me wâ hnyi getheniny taun at úheny hnyi hna he ; ke haingen hingat, ka habe, u me he kâ? ke úhem ua? 18 Ke haingen kâu, ka habe, Úhehmun Bethe-leema-juda, ke öhmun e he ka hnyi ke keihen hnyei ae hut hnyi Eferaima ; úbek e, me oge me he Bethe-leema-juda ai : ke oge me he but ka hnyi uma umö Iehova ; ke ba at ame hawo nya ka hnyi umen uma. 19 Ke so bi e hu thatúnyin hwit me an asina minya, ke hu areto me waina hobi könya, me athnyabaem a momo, me hidröu unyihmu a li athnyabaem : e ba únyi ae hia. 20 Ke ame ha hingat, ka habe, E so u me hnahic ; ke hamök he ka ö u ; ke so bi ca mokut bi eú hnyi gethen. 21 Ke e ame hom e ka hnyi umen uma, me hân li asina : ke ödrin e hneú je li cadrin, me han, me ic. 22 Ke ödrin e tiga osenyinâ je hnyekudrin, wâ bi, je aten taun, a je atö Belial, ödrin e tot igigilö uma, me kot hwanuma ; me ha ka at ae tren uma, wale hingat, ka habe, Hom but jem at a he ka hnyi umâm uma, me me úkhanöhmumköu thö. 23 Ke ame didrut ködrin at, wale ae tren uma, me ha ködrin, ka habe, Ohe, je liamekeiny mönya, ö öbun ca ânyâ bi únyi ae kong eling ; anyin a o but at ang ka hnyi umök uma, ca he ka ânyâ únyi eang ae kong. 24 Walang nö-kuk ae tiga hlu, me momo anyin baga oge me he ka hum ödru köbun, m' öbun e okongu ödru, me ânyâ ködru webun : ke ca ânyâ bi ka at ang únyi e ae ikiki. 25 Ke höcö bi tawat he ka löng kâu : ke haba at, me e ame kât anyin momo, me hom e ködrin eú ; ke ödrin e tha mē, me okongöâ hnyi lit ke ne o but hnyomakatu ; me ödrin e hna but hnyi haolany. 26 Ke ame o thö momo hnyi haolany, me ta ju hnyi hwanuma umen at a e hnyin áiân, ke ne o but ame lany dö. 27 Ke ame todrö áiân hnyi hnyomakatu, me khöng ut je hlinginy hwanumen, me didrut he ka he ; ke wâ bi a ta

but momo, a anyin momo, eú hnyi hwanuma, me li hnyamen hon hwanuma. 28 Ke haingen kâu, ka habe, Todrö, m' ötin e he ; me ame ca thu bi : me e ame kât momo me ip hon asina ; ke ame todrö at me he ka hnyi hnyaban. 29 Ke e ame o but ka hnyi umen uma, me e ame hom hele, me kât anyin momo, me susuba e me je jeien, me me twelv je uthat, me kunâ ka hnyi je ke keihen Isaraela hia. 30 Me haingödra hia thithö tavat adre me wâ, ka habe, E ba únyi helâe adre ányâ me wâ, hwân hnyi bong ame he jem lakon Isaraela úheny Aigupito ke ne o but hnyi bong ang : únykúme ju, me úhanyinyâ ju, me ha ju.

## HNYIMAKAN 20.

**M**E haba lakon Isaraela hia thithö adre me he, me ame úkhacaköu tavat helâ me at a khaca, hwân hnyi Dana ke ne o but hnyi Bere-seba, a tha ödra me hnyeí Gileada, unyi Iehova hnyi Mizepa. 2 Ke e manen hnyi úkhacaköu anyin aten Khong je taben tavat hia thithö wale hnyi je tribuiny lakon Isaraela hia, a foa haded thauzan tavat adre me he hon kânâ me hok hele vat. 3 (Ke haba laku Beniamina ödrin e löng a g' ame he Mizepa ai lakon Isaraela.) Me haba lakon Isaraela adre me úhaköuâ, ka habe, Më thumetu öhmun, adre me kâmâu únyi eang ae kong. 4 Me ame thu at Levi, a áiân momo adre hlingâ, ka habe, Oge o but hnyi Gibeá anyi Beniamina he ka mokut, inya me anyik momo. 5 Ke ame todrö könya obagainy Gibeá, me tot igigili nya hnyi uma hnyi hnyinghet ; ke ödrin e únykúme he ka hlingö nya, me ödrin e okongo anyik momo, me ame mokcu. 6 Me oge me hom anyik momo, me susuba, me kunâ e ka hnyi je hnyeí hia iny at Isaraela : anyin a ödrin e ányâ únyi ae ikiki me monu hnyi Isaraela. 7 Wâ bi, öbun hia lakon Isaraela, úhanyinyâ ju me oâ but hobun hofuc. 8 Ke haba tavat hia thithö ödrin e tha tot helâ me at a khaca, me ha, ka habe, Ame ca he ke at gatin ka hnyi umen uma mano, ke ame ca he ke at gatin ka hmetu ka hnyi hnyaban. 9 Ke walang únyi ötin e he ka ányâ ka Gibeá ; adre me he ka he úcon hoton leköp ; 10 ke ötin e he ka hom tavat a ten únyi hnyi haded hnyi je tribu hia anyin at Isaraela, me khaca haded únyi hnyi thauzan, ke khaca thauzan únyi hnyi je ten thauzan, he ka hok kamejin tavat, me adre me he ka ányâ

helâ me anyidrin monu ödrin e ányâ hnyi Isaraela, ödrin ka o but hnyi Gibeá hnyi Beniamina. 11 Me ame úkhacaköu at Isaraela hia cicö taun, k' adre tha hnyok helâ me at a khaca.

12 Ke haba je tribu anyin at Isaraela ödrin e kunâ tavat ka hnyi wanben tribu anyi Beniamina hia, he ka ha, ka habe, Ie únyi e ae kong adre ányâ unyibun ? 13 Ke walang ang, hom but jem je atö Belial hnyi Gibeá, m' öhmun e he ka hling' ödrin, me ohia hulö hnyi Isaraela. Ke höcö laku Beniamina he ka löng hofuc hwan je liamekeiny mödrin a lakon Isaraela. 14 Ke haba laku Beniamina ödrin e úkhacaköu hnyi Gibeá únyi hnyi je taun, he ka vat me lakon Isaraela. 15 Ke adre aú laku Beniaminâ hnyi bong eling únyi hnyi je taun, ödrin twente siks thauzan tavat adre me hok hele vat, ke ca ha bi at Gibeá haba úseidrin ödrin seven haded tavat adre úca. 16 Ke e unyin tavat hia eling me hu tavat a seven haded adre úca, a hnyat ae me benyidrin ; ke khan' ödrin he ka kúlúá je veto ka hnyi leúnen ban me ca onua bi.

17 Ke adre aú at Isaraela, ke ca ha bi at Beniamina, me, foa haded thauzan tavat hok hele vat, a tavat vat hia. 18 Ke ame todrö lakon Isaraela, me he Beth-ela ai, me elâm unyin Khong, me ha, ka habe, Hamö ia he ka bân me vat me laku Beniamina ? Me Iehova ame ha, ka habe, Bân at Juda. 19 Me ame vesákong lakon Isaraela me hunuma cicö Gibeá. 20 Me ame he lakon Isaraela me vat me at Beniamina ; ke ame tot metâ ködrin at Isaraela hnyi Gibeá. 21 Me ame didrut laku Beniamina úheny hnyi Gibeá, me kot hnyikânâi hnyi bong eling twente tu thauzan at Isaraela. 22 Ke haba tavat a lakon Isaraela ödrin e sihwegiödrinköuödrin, me tot metâ hmetu he ka vat hnyi dok ödrin e tot metâ hnyin hnyi bong a bân. 23 (Ke ame he lakon Isaraela me tenge hnyi hnyimakö Iehova ke ne o but hnyi sahac ; ke ödrin e hnei Iehova me ha, ka habe, Hawa, oge me he hmetu he ka vat me laku Beniamina je liamekeiny mönya ? Ke Iehova ame ha, ka habe, He thö ködrin.)

24 Me haba lakon Isaraela ödrin e hakekenyâ laku Beniamina hnyi bong a loiny. 25 Me ame he Beniamina ködrin úheny Gibeá hnyi bong eling a loiny, me kot hnyikânâi eitín thauzan minya lakon Isaraela, a hnyat hok hele vat hia. 26 Me ame he lakon Isaraela hia me tavat hia,

me o hnyi Beth-ela, me tenge, me laba e hnyi hnyimakö Iehova, me ca han hnyi bong e ke ne o but sahac; me ödrin e hudo je hudiny leû, me je hudiny úsoköu hnyi hnyimakö Iehova. 27 Ke haba lakon Isaraela ödrin e elâm unyi Iehova (anyin a eling tangen úhibinyköu anyin Khong hnyi je bong eling, 28 ke haba Fineasa nöku Eleazara, nöku Arona at ame tot hnyi hnyimakan hnyi üen e,) me ha, ka habe, Hawa, oge me he ka he hmetu he ka vat me laku Beniamina je liamekeiny mönya, hawa, ame ne hna ju? Ke haingö Iehova, ka habe, He thö, anyin oge me he ka hn' ödrin nyi ka hnyi hnyamâm. 29 Ke haba at Isaraela ödrin e kunâ tavat he ka mokulec igigilö Gibeaa.

30 Ke haba lakon Isaraela ödrin e he ka úcon laku Beniamina hnyi bong a kuniny, me tot metâ me at Gibeaa, helâ me li üen a bân. 31 Ke ame didrut laku Beniamina ka tavat, ke adre lili ödrin úheny hnyi taun; me ödrin e hwân he ka kot tavat, me hlingâ helâ me li bong a bân, hnyi li gethen, khaca úheny Beth-ela, ke khaca úheny Gibeaa, hnyi hnye, helâ me thöte at Isaraela. 32 Ke haingen laku Beniamina, ka habe, adre kuc ödrin hnyi hnyimakötin helâ me a bân. Ke haingen lakon Isaraela, ka habe, Ötin e he ka kec me köc ödrin únyi hnyi taun, ka hnyi je gethen. 33 Ke ame todrö at Isaraela hia thithö, únyi hnyi je hnödrin, me tot metâ hnyi Baala-tamara: ke ame utut tavat mokut anyin at Isaraela únyi hnyi je hnödrin, wale hnyi Maare-gibeaa. 34 Ke ame he ka tet metâ me Gibeaa ödrin ten thauzan je hna úca a lahanen at Isaraela hia, ke gan hmâ hna vat, ke ca khan' ödrin ae hakekenyi ödrin dut únyi ae kong. 35 Ke haba Iehova ame kot at Beniamina hnyi hnyimakan at Isaraela; ke haba lakon Isaraela ödrin e ota hnyi bong eling at Beniamina, ödrin twente faiv thauzan ke wan haded: tavat hok hele vat hia.

36 Ke a wâ but laku Beniamina a g' adre kuc ödrin dut: anyin a at Isaraela ödrin e kâcâ vat anyin at Beniamina, anyin a ödrin e labageju ka je mokut, wale adre ip cicö Gibeaa. 37 Ke logot je mokut, me utut Gibeaa ai; ke haba je mokut ödrin e iyâwâ hon kânâ, me kot hia taun ge hele vat. 38 Ke e hu haten ka at Isaraela, me je mokut, a ödrin e he ka oâ hainy mec helâ me úlâ ae gan únyi hnyi taun. 39 Ke haba at Isaraela ödrin e kâcâ vat, me ame

hwân at Beniamina ka kot me hlingâ at Isaraela helâke thöte je hnyat: anyin a haingödrin, ka habe, E hnathu adre kuc ödrin hnyi hnyimakötin helâ me vat a bân. 40 Ke ame hwân he ka ölö úlâ únyi hnyi taun, wale hai ame tot, haba at Beniamina ödrin e hngele hotudrin ai, ke wâ bi, haba taun hia ame ölö hnyidranyai ge hai. 41 Ke haba at Isaraela ödrin e hwiö me ame gâ ön at Beniamina: anyin ödrin e wâ a ga o but ködrin únyi ae kong. 42 Anyin a wale ödrin e kec ge at Isaraela hnyi gethen úheny hnyeububa; k' ame hnu ödrin bi vat; ke haba tavat úheny hnyi taun, me adre me hling' ödrin hnyi wanben. 43 Me adre me thelöng at Beniamina, me hnu ödrin, me uti ödrin ju hnyi anyidrin dok hnân menâ, ke ne o but cicö Gibeaa cicö hna o hnen seünö. 44 Ke ame ta but at Beniamina a ödra eitit thauzan tavat; a je hnyat ae hwege hia. 45 Ke ödrin e saû me kec hnyeububa ai ka hnyi kic Rimona: ke adre me hlu ödrin eû hnyi je gethen a ödrin faiv thauzan; ke ödrin e hnu ödrin ke ne o but Gidom, me kot lo li thauzan gadrin. 46 Ke a ta hnyi bong eling a at Beniamina hia, ödrin twente faiv thauzan tavat hok hele vat; ödrin hia tavat ae hwege. 47 Ke ame saû me kec hnyeububa ai ka hnyi kic Rimona tavat a siks haded, me laba hnyi kic Rimona vak ta tehi. 48 Me ame hmetu at Isaraela ka laku Beniamina, me kuc ödrin ge hele vat, wale taun hia thithö, me omeno, me ta je únyi hia ödrin e wâ: ke ödrin e thong minya ge meic je taun hia ödrin e wâ.

#### HNYIMAKAN 21.

**K**E haba at Isaraela ödrin e hia but khemanyin hnyi Mizepa, me ha, ka habe, Ame ca he ke at gatin ka ham nokon hlu ka at Beniamina me áiân. 2 Ke ame o but tavat hnyi Beth-ela, me laba eling ke ne o but sahac hnyi hnyimakan Khong, ke ödrin e tenge thungau gan hmâ. 3 Ke ödrin e ha, ka habe, Iehova lö, Khongu Isaraela, anyin a ieú ame o únyi eang hnyi Isaraela, a g' ame hia but hnyi Isaraela ke tribu hnyi bong ang? 4 Ke nyi hnyomakatu, ame vesâkong tavat, me otilâ eling taben hut, me hudo je hudiny leû, me hudiny úsoköu. 5 Ke haingen lakon Isaraela, ka habe, Ia hnyi je tribu anyi Isaraela hia ae tiga ca hnyi he ka hnyi úkhacaköu kö Iehova,

## RUTHA 1.

anyin a ödrin e hia but khemanyin hwege gan ae tiga ca hnyi he Mizepa ai kö Iehova, ka habe, Adre me he ka hlingâ e. 6 Ke haba lakon Isaraela ödrin e ietra ga Beniamina liamekeiny mödrin, me ha, ka habe, Khaca tribu adre subâ degecâ hnyi bong ang unyi Isaraela. 7 Ieû ötin e he ka ânyâ hobi ködrin je kolon, me me hu laöiödrin, anyin ötin e hia but khemanyin hnyi iö Iehova a ötin e ca he ka ham ködrin lakutin je hlu me me laöiödrin? 8 Ke haingödrin ka habe, Ie tribu unyin je tribu Isaraela a ca hnyi he Mizepa ai kö Iehova? Ke wâ bi, ame ca o ke at ka hnyi hna hunuma ûheny Jabese-gileada ka hnyi ûkhacaköu. 9 Anyin adre aû tavat, me wâ bi, e ha at eling aten Jabese-gileada. 10 Ke haba ûkhacaköu ödrin e kunâ kâ e twelv thauzan tavat ae ti hwege, me hûna ködrin, ka habe, He th' öbun, me kot at Jabese-gileada tha e me je momo me wana-kat ge hele vat. 11 Ke walang ûnyi öbun e he ka ânyâ; öbun e he ka ohia obaga hia, me omomo hia a tha mwi me бага. 12 Ke ödrin e wâ unyin at Jabese-gileada foa haded je hlu a ödrin tiga ca tha mwi me бага: ke ödrin e hum ödrin Silo ai ka hnyi hna hunuma hnyi hneyi Kanana.

13 Ke haba ûkhacaköu hia ödrin e ûkhû-nöng he ka ûhnenamö me laku Beniamina, hnyi kic Rimona, me ha úsoköu mödrin. 14 Ke ame hmetu Beniamina hnyi ûen eling; ke adre me ham ködrin je momo wale ödrin e omelö ûnyi ge omomoiny Jabese-gileada: ke ca úcû úseidrin bi. 15 Ke ame ietra tavat ga Beniamina, anyin a Iehova ame kia je tribu Isaraela.

16 Ke ame ha wahingatiny ûkhacaköu,

ka habe, Ötin e he ka hö me me hu laâian je kolon, anyi adre ohia omomo ûnyi hnyi Beniamina? 17 Ke haingödra, ka habe, E so e hu jekhöu hobi kâu tavat kec möt hnyi Beniamina, me me ca he bi ke tribu ka hia hnyi Isaraela. 18 Ke ca khan' öhmun he ka ham ködrin lakuhmun je hlu me laöiödrin: anyin a hia but khemanyin lakon Isaraela, ka habe, Hnauhangö at ame he ka ham momo kö Beniamina. 19 Me ödrin e ha, ka habe, Wâ bi, e hu bijeû anyi Iehova hnyi Silo hnyi je huna, wale hnyi ke keihen Beth-ela, ke keihen e deiö gethen ame he Sekema ai ûheny Beth-ela, ke keihen Lebona ka hnyi hwai-öuiny. 20 Ke adre me ha ka laku Beniamina, ka habe, He th' öbun, me mokut hnyi je hneyi vine: 21 ke wâ bi, ame ne didrut je hluiny Silo he ka bibiâ, me öbun e he ka o ûnyi hnyi je hneyi vine, me ve khöt âian je hluiny Silo, me he ka hnyi hneyi Beniamina. 22 Ke ame ne o je kamen me je hanidrin he ka hai' öbun köhmun, me öhmun e he ka ha ködrin, ka habe, Me betenge köhmun gadrin; anyin a öhmun e ca ve hok âian hobi ködrin hnyi vat: ke haba khaca öbun e ca ham bi ködrin; anyin a wale e ba jönibun. 23 Me haba laku Beniamina ödrin e ânyâ helâe me hom je momo hoton úseidrin ûnyi ge tavat adre bibiâ, ke ödrin e hum ödrin: me ödrin e he me hmetu ka hnyi idrin, me op taun, me labâ e. 24 Ke ame vese ûheny e lakon Isaraela hnyi ûen eling ka hnyi je tribu me je hnyabadrin; ke ödrin e vese ûheny e ka hnyi je idrin. 25 Ke haba hnyi ûen eling me ba than hnyi Isaraela: ke a ve ânyâ tavat hia ûnyi ae wisa ködrin bi.

## TUSI ANYI RUTHA.

### HNyimakan 1.

**H**NYI ûen musi anyin hnyat owisa, ame o but hmiâ hnyi hneyi. Ke ame he ke at Beth-leema-juda he ka laba kanyua hnyi hneyi Moaba, e, me âian, me

lakon li бага. 2 Ke Elimelek ien at, ke Naomi ien âian, ke Malona, me Kiliona ien li lakon, je hnyat Eferatha ûheny Beth-leema-juda. Ke ödrin e o but hnyi hneyi Moaba, me laba eling. 3 Ke ame mokcu Elimelek öiö Naomi, ke e biju me



## RUTHA 2.

li lakon. 4 Ke ödrü me ve hok öiödrü unyin je momo Moaba; Orepa ien ke at, ke Rutha ien ke at: ke ödrin e laba eling helâ me ten je huna. 5 Ke ame tha mokcu Malona, me Kiliona; ke ödrin e mok degecâ monu hnen aiân me lakon li бага. 6 Me e ame todrö me laúngon, me hmetu úheny hnyi hneyi Moaba: anyin a löng ut hnyi hneyi Moaba a Iehova ame senâ lakeiny me me ha ödrin. 7 Ke e ame he úheny hnyi dok e ame laba hnyin, ke tha he me laúngon; ke ödrin e vheno gethen he ka hmetu ka hnyi hneyi Juda. 8 Haba Naomi ame ha ka laúngon, ka habe, E, ve hmetu ju öbu ka hnyi li uma umen lahi-nyöbu: ke so ame he Iehova ka betenge gabu, helâ me hnöbu hna ânyâ ka li komok, mönya minya. 9 E so ame he Iehova he ka omen' öbu hnyi hnyaban laöiöbu. Me e ame úcimhnyimak mödrü, me tenge gan hmâ. 10 Ke ödrü me thu bi kâu, ka habe, öhmu me he ka tha he möu ka je lahanâm. 11 Haba Naomi ame ha, ka habe, Hmetu ju öbu laúnguk: öbu me he ka tha he mönya geú? hawa, e hu je lakuk hmetu bi бага eú hnyi hnyekuk me me li öiöbu? 12 Hmetu ju öbu laúnguk, ke he thö; anyin oge somaca but, ke ame ca he hmetu ka hu öiök. Oge ne ha, ka habe, E hu hnageju gak, oge ne he ka hu öiök eâu hnyinghet, me hnokoâ je бага: 13 hawa öbu me he ka laba ke ne o but ödrin e gan dut? hawa, öbu me he ka bec me ca hu aiân? Ohe laúnguk: anyin ae gan hmâ anyik vec gabu, anyin a Iehova ame ip hnyamen huk. 14 Me ödrin e útengiö, me tenge hmetu: ke haba Orepa ame úcimhnyimak me úngon; ke Rutha ame kece hmâ bi kâu. 15 Me haingen momo, ka habe, Wâ bi, a hmetu but liamekeiny möu ka ta je lahanen, me khongon: bethe hmetu minya ju hoton liamekeiny möu. 16 Me Rutha ame ha, ka habe, Ca újöngi nya bi he ka hna degeci u, me hmetu gam; anyin a haba dok u ma he ka hnyin me oge me he bi nya ka he kâu: ke haba dok u ma he ka labâ, me oge me he bi nya ka labâ: me haba lahanâm ame he ka lahanök bi, me Khongom ama Khonguk bi: 17 haba dok u me he ka mokcu hnyin me oge me he bi nya ka mokcu eling, m' adre me he ka könim nya hnyin: e so ame he Iehova ka ânyâ helâe könya me bi hanen bi, ame ne he ke únyi ka ovesei ötu, ke so bi mok thibi. 18 Ke a wâ hnen momo a ga hwege hnyekon kâu he ka tha

he mē, me e ame ca ha hmetu bi hofuc kâu. 19 Ke ödrü me tha he ke ne o but hnyi Bethe-leema. Ke ödrü me o hnyi Bethe-leema, me ame bwebwet hia taun gadru, ke adre me ha, ka habe, Ame ne Naomi la eang? 20 Ke haingen ködrin, ka habe, Ca ha iök bi, me, Naomi, ke ha iök bi, me, Mara: anyin a haba hwakecin Aekhanahia me gan hmâ hiny könya. 21 Oge me he thö k' iny unöngötö, ke Iehova ame ohmetu nya ke ba ta únyi gak: ieú gabun öbun e ha iök me Naomi, anyin a Iehova ame owisa kongo könya, ke haba Aekhanahia ame oveci nya? 22 Me ame tha hmetu Naomi me Rutha a úngon, wale at Moaba, at a hmetu úheny hnyi hneyi iny at Moaba: ke ödrü me o but hnyi Bethe-leema hnyi úen adre hwân he ka meno bali.

### HNYIMAKAN 2.

**K**E e hu waeny öiö Naomi, at tren omjeú ae gan, hanen lap anyi Elimelek; Boaza ien. 2 Ke Rutha at Moaba ame ha kö Naomi, ka habe, Hnö nya but ka hnyi ta hneyi he ka hlo je wan hwit hnyi hoton at ame he ka betenge gak. Haingen, ka habe, He thö únguk. 3 Me e ame he, me o, me hlo hnyi hneyi hoton tavat subö bali; ke wâ bi adre oâ e ka hnyi ke keihen i Boaza hanen lap anyi Elimelek. 4 Ke wâ bi, ame o but Boaza úheny Bethe-leema, me ha ka hnyat subâ, ka habe, E so e unyibun Iehova. Ke ödrin e thu, ka habe, E so Iehova ame ohnahici u. 5 Haba Boaza ame ha ka athnyabainy, at ame tuö tavat subâ, ka habe, Hlu e anyi ia? 6 Me haba athnyaba a homakan tavat subö bali, ame thu, ka habe, Wale hlu Moaba a tha o me Naomi úheny Moaba: 7 ke ame ha, hlu ka habe, Ö iny na he ka hlo me thigâ hoton tavat subö bali wanben je thi bali: ke e ame o but me laba eang, but eja hnyomakatu ke ne o but walang ang, ke so bi hnyi ke ong úen e ame me laba hnyi uma. 8 Haba Boaza ame fuc kö Rutha, ka habe, U me löng, nökek? U me ca he ka hlo hnyi ke hneyi, ke ca he úheny ang, ke laba hmâ ju eang unyin lathnyabaik a je hlu. 9 Ke u me he ka wâ utkânâ ödrin e he ka subâ baliny, me he hotudrin: hawa, oge ca hia but húna ka je hidröu he ka ca kalö u? ke u ka beic dö, he thö ka hnyi je kaia ka ic

### RUTHA 3.

wale a sâû je hidröu. 10 Me e ame ta ju me nom hnyikânâi, me ha kâu, ka habe, Anyin a iëu u me betenge gak, me ûnykûme kõnya, ke iny atkanyua bi? 11 Ke Boaza ame thu me ha kâu, ka habe, Adre hia but thumetu nya ge hnâm hna ânyâ ka ûngom. hwaban mok a âiâm: ke u je hna degecâ kâmâm me hinyâm, me hnyei adre hnök' u hnyin, me he jem ka tavat u je ca wâ ehac. 12 E so Iehova ame bi hwaban ânyâm huliwa, me e so ame he Iehova Khongu Isaraela he ka ti bi hwaban köu, wale at a u je he jem he ka laba hmelen li labenyin. 13 Me e ame ha, ka habe, Me betenge ju gak, tuhök; anyin a u je otubweli nya, me ha kõnya a athnyabaem hofuc ae so, eja ke ne ca ûcû me lathnyabaem omomo inya. 14 Ke haba hnyi ûen han, me haba Boaza ame ha kâu, ka habe, He thö jem he ka hnyi han areto me hneû âm hnyi vinega. Me e ame tha laba me tavat subâ: ke adre me inâ kâu je hwit adre le, me e ame han me sekon ke hu kolon bi. 15 Ke e ame tot hmetu he ka hlo, me Boaza ame ha ka anyin je hidröu, ka habe, E so e ame he ka hlo hnyi wanben je thi bali, ke ca ou bi. 16 Ke oc minya but keihen ûnyi hnyi je thi bali, me hna biju, me me he ka hlo, ke ca thawâ bi. 17 Me e ame hlo hnyi hnyei ke ne o but saha; me e ame kokot ûnyi e ame hlo, ke helâ me khaca efa tap bali. 18 Ke e ame hijen me he ka hnyi taun: ke a wâ but ûngon ûnyi e ame hlo: ke e ame hom me ham kâu kolon hnen hna han. 19 Me ame ha kâu ûngon, ka habe, Ewa dok u je hlo hnyin hnyi bong ang? ke u je huliwa ua? E so e hnahic bi at ame ûnykûmi u. Ke e ame omanenâ ka ûngon at e ame huliwa unyin, me ha, ka habe, haba ien at oge me huluwa unyin hnyi bong ang, me, Boaza. 20 Me Naomi ame ha ka ûngon, ka habe, E so e he Iehova ka ohnahicâ at ame ca degec anyin betenge ka hnyat ae möt me hnyat ae mok. Ke Naomi ame ha kâu, ka habe, E hakekeny at e kötín, ke e at a ti hanen anyitin lap. 21 Ke haingö Rutha at Moaba, ka habe, E ame ha minya kõnya, ka habe, U me he ka laba hmâ me anyik je hidröu, ke ne o but ödrin e meno ik je nnyei hia. 22 Me haingö Naomi kö Rutha a ûngon, ka habe, E so u ma he unguk ka tha he me lathnyabainy a je hlu, m' ödrin e ca he ka iouny möu hnyi ke utkânâ bi. 23 Me e ame laba hmâ me je hlu anyi Boaza he ka hlo, ke ne o but obiny hna meno bali me hna meno hwit: ke e ame tha laba me ûngon.

### HNYIMAKAN 3.

**K**E ame ha kâu Naomi a ûngon, ka habe, Unguk, hawa, oge me ca he ka beleú hna menâ hobi köu m' u me so? 2 Hawa, ca hanötín Boaza wale u me tha he me anyin je hlu? Wâ bi, e ame he ka huje bali eâu hnyinghet hnyi hna huje hwit. 3 He thö ka sou, me suö wakaco, me khavâ ânyâm je úkhaú, ke he thö ka hnyi hna huje hwit: ke u me ca he ka omanenö u bi ka at, ke ne o but e ame um dö han me ic. 4 Ke e ka he bi ka mokut, me hamâm he ka wâhmakhmetoâ dok e ame he ka mokut hnyin, ke u me he ka he me hai kubö hnyi li can, me mokut ju; ke e ame he ka ha köu hanymâm he ka ânyâ. 5 Haingen kâu, ka habe, Oge me he ka ânyâ hia hnâm hna ha kõnya. 6 Me e ame he ka hnyi hna huje hwit, me ânyâ hia hna hûna kâu ge ûngon. 7 Ke a hia but Boaza han me ic, ke ame senyin hnyekon, me e ame he ka mokut hnyi baten hna khon bali: me momo ame he hmecik, me hai kubö hnyi li can, me mokut ju. 8 Ke hnyi wanbenset ame ot at me hwiö: ke wâ bi wale momo ame mokut hnyi li can. 9 Ke haingen, ka habe, U ia! Haingen, Inya Rutha athnyabaem, u me he ka khavö nya a athnyabaem ge baten ânyâm imano, anyin a u at a ti hanen anyitin lap. 10 Me e ame ha, ka habe, E so u hnahic nökkuk ga Iehova: e beönua ânyâm betenge walang ang hnyi obiny. hon ehac hnyi hwân, anyin a u je ca hnu hoton je hidröu, ame me ca tren omjeu, k' ame ne tren ta ûnyi. 11 Ke walang nökkuk u ma ca ot; oge me he ka ânyâ hobi köu helâ me hna ha gam, anyin a wâ but taun hia anyin lahanök a u momo ae so hwa-kecin. 12 Ke e hnathu oge me ti hanen köu, ke so bi e hu ke at ae hakekeny hmönyin köu hnyi lap. 13 Me mokut ju hnyi lit ang, ke hnyi hnyomakatu, ame ne he ka ânyâ köu hanymen at ame bi hanen lap, me e so; e hamen he ka ânyâ: ke ame ne höcö he ka ânyâ köu hanymen at ame bi hanen anyitin lap, awe, hamök bi he ka ânyâ köu hanymen at ame hakekeny köu, kia inya Iehova: mokut ju, ke ne o but ame lany dö. 14 Ke e ame mokut hnyi li can ke ne o but hnyi haolany, k' ame köütö hnyi okubelit. Anyin a haingen

## RUTHA 4.

at, ka habe, Ca he ka ha a ga mwi ang momo hnyi hna huje hwit. 15 Ke ame ha bi at, ka habe, Hö jem ânyâm ûkot, me kât; ke e ame kât, me at ame tuluto je tap bali a siks me ip hon ûkot; ke e ame he ka hnyi taun. 16 Ke e ame o but unyin ûngon, ke haingen, ka habe, U ia nokuk? Me e ame thumeto hia ge hna ânyâ kâu hnen at. 17 Haingen, ka habe, E ame ham kõnya tap bali eang a siks je tulut; anyin a haingen, U ma ca he ka ûngom ke ba ûnyi. 18 Ke haingen momo, ka habe, Me laba ju ûnguk, me wâ ûnyi ame he ka o: anyin ame ca he at ka menâ, k' ame he hnyi bong ang ka umo ûnyi ang.

### HNYIMAKAN 4.

**K**E haba Boaza ame he ka hnyi homagöüle me laba ju eling: ke wâ bi, ame he at a hanen anyidrin lap, wale at a ha ga Boaza; me e ame ha kâu, ka habe, E, ketha lö! aiö u, laba ju eang. Me a ame saü thö me laba ju. 2 Me e ame hom je hnyat a ten ûnyi hnyi wahingatin y taun, me ha, ka habe, Laba ju eang, me ödrin e laba. 3 Me e ame ha ka at a ti hanen anyidrin lap, ka habe, Haba Naomi wale momo a o hmetu úheny hnyi hnyei Moaba, ame úco utkânâ wale iny liamekeiny mötin jia Elimelek: 4 ke oge me únykúme he ka omanená kâu, me ha, ka habe, Hamâm he ka úco e hnyi hnyimakan je hnyat ödrin e laba eang, me hnyi hnyimakan wahingatin y labanök. Ke u me ne he ka úco, awe, úco thö: ke u je ne ca he ka úco, me ha thö kõnya, me me khanö nya thö: anyin ae ba hmetu ke at ame he ka úco, ke u thibi; ke iny thibi útangköu möu. Me haingen, Oge me he ka úco. 5 Haba Boaza ame ha ka habe, Hnyi bong u me he ka úco hnyin ûnyi ga Naomi u me he ka úco minya ûnyi ga Rutha at Moaba, âiân at a mokcu, he ka oâ ien at a mok hon iny bi. 6 Ke haingen at a ti hanen lap, ka habe, E ca khanö nya he ka úco hobi kõnya bi, wâ e nye kong ut ik: u me he ka úco húdrök, anyin ae ca khanö nya he ka úco e. 7 Ke walang bongon hnyi Isaraela ehac ge bi hwaban me úcú, me me ohmâ ta je ûnyi hia thithö; a g' ame he at ka uny jut tangen hnyeúcan me ham ka at ame laba hakeken

kâu: ke wale hnân ohnatho hnyi Isaraela. 8 Anyin a wale haingen at a ti hanen anyidrin lap kö Boaza, ka habe, Úco thö hobi köu bi. Me e ame uny jut tangen hnyeúcan. 9 Ke Boaza ame ha ka je hingat me tavat hia thithö, ka habe, Öbun e ohnathoâ hnyi bong ang a oge úco ta je ûnyi hia anyi Elimelek, me ta je ûnyi hia anyi Kiona me Malona ûnyi ga Naomi. 10 Ke khaca oge úcú Rutha at Moaba äiö Malona, me öiök, me inya oâ ien at a mok hon iny, me me ca hia ien at a mokcu unyin je liamekeiny mē, me ûnyi hnyi homagöüleny anyin taun: öbun e tavat ohnatho hnyi bong ang. 11 Me ame ha tavat hia thithö hnyi homagöüle me je hingat, ka habe, Öhmun tavat ohnatho. Hamö Iehova he ka wia momo ame he ka o ka hnyi umâm uma me me helâ me Rakela me Lea, li at ödre otilâ lap anyi Isaraela: ke e so u me tren ûnyi ae úcú hnyi Eferatha, me lung hnyi Beth-eleema: 12 ke e so ânyâm lap he ka helâ me lap anyi Farez, wale a hnököâ Tamara ga Juda, ûnyi ge mâtrân ame he Iehova ka ham köu ûnyi ge momo ang. 13 Me Boaza ame hum Rutha, ke âiân dö e, me e ame didrö kâu, ke e ame erkin dut, ge musi anyi Iehova, me e ame hnokoâ da. 14 Ke haba omomo ödrin e ha kö Naomi, ka habe, Ole kö Iehova, wale at ame ca hnö u he ka ba at ae hakekeny köu hnyi ânyâm lap hnyi bong ang, ke so e me lung bi ien hnyi Isaraela. 15 Ke e ame he ka otubweli u, me hat u hnyi somaca a u, anyin ame hnokoâ nokon ge ûngom at ame betenge gam, ke beönua anyin ibetengiö köu hon lakom je бага a seven. 16 Me Naomi ame hom wanakat, me kât e ka hnyi úlainy; ke e ame hat e. 17 Ke haba omomo ödrin e hwenyi ien, ke haingödrin, A hia but hnokoâ da öbi Naomi; ke ödrin e hwenyi ien me Obed: haba e kamö Jese, kamö Davita. 18 Ke walang je dö anyi Farez: haba Farez ame hnöku Hezerona; 19 ke Hezerona ame hnöku Ram, ke Ram ame hnöku Aminadaba; 20 ke Aminadaba ame knöku Nasona, ke Nasona ame hnöku Salemona; 21 ke Salemona ame hnöku Boaza, ke Boaza ame hnöku Obed; 22 ke Obed ame hnöku Jese, ke Jese ame hnöku Davita.

# TUSI A BAN ANYI SAMUELA.

## HNYIMAKAN 1.

**E** HU ke at úheny Ramathaima-sofma únyi hnyi hnyei ae hut hnyi Eferaima, Elekana ien, nöku Jerohama, nöku Elihu, nöku Tohu, nöku Zuf a at Eferaima: 2 ke lo láian; haba ien khaca me Hana, ke Penina ien khaca: ke e hu laku Penina ke ba nöku Hana. 3 Ke haba at eling ame labö he hnyi je huna úheny hnyi hnyaban he ka hnyi hmi me bi hut kö Iehova tuhan sabaoth hnyi Silo. Ke haba eling li laku Eli, jia Hofeni me Fineasa, a li at bihut kö Iehova. 4 Ke ame o but úen ame he Elekana ka bi hut hnyin, me e ame ve ham jekhöú kö Penina áian, me lakon obaga me wahlu: 5 ke e ame ham kö Hana lo li jekhöú; anyin a e ame betenge ga Hana, ke Iehova ame otoúnyö e. 6 Ke haba momo a iwahnaihmiöny me ame ovecâ hwegiâ e, he ka otengiâ e, anyin a Iehova ame otoúnyö e. 7 Ke e ame labö ányâ helâe hnyi je huna hnyi úen e ame he ka hnyi uma umö Iehova, me ovecâ e; anyin a wale e ame tenge me ca hnyi han. 8 Haba Elekana áian ame ha kâu, ka habe, Hana, ieú u me tenge gan? me ieú gam u je ca me han? ke ieú ame vec gan hnyekom? hawa, iny ca beönua köu hon lakuk obaga a ten? 9 Me ame todrö Hana hwabân ödrin e hia but han me ic hnyi Silo. Ke haba Eli at bihut ame laba hon tap hmelen uthwanuma hnyi uma umö Iehova. 10 Ke e vec hnyekon momo, me e ame hic kö Iehova me tenge. 11 Ke e ame bi khöbi me ha, ka habe, Iehova tuhan sabaoth lö, u je ne he ka wâ vec anyin athnyabaem a momo, me únykúme könya, me ca hnying bi athnyabaem a momo, ke u je ne he ka ham könya a athnyabaem ke da, me oge me he ka ham e kö Iehova hnyi ta je bonginy hia thithö, ke ame ca he ka o heleúgi ka hnyi hon ban. 12 Ke e ame tiga hic bala bi hnyi hnyimakö Iehova, me haba Eli ame wâhmakhmeto hnyimen. 13 Ke haba Hana ame fuc hnyi hnyekon; k' ame bwebwet thibi li esongodiny, keadre me ca löng ifucin: anyin a wale Eli ame únykúme a g' ame monu ge grâg. 14 Ke Eli ame ha kâu ka habe, U me he ka monu

ke ne o but kehö? degec ut waina unyâm. 15 Haingö Hana ame thu, ka habe, Eba, than lö, inya momo ae vec hnyekon, ke oge ca ic waina bi me grâg, ke so bi oge me hingâlâ hnyekuk hnyi hnyimakö Iehova. 16 U me ca he ka únykúme a atö Belial inya athnyabaem a momo: anyin oge me fuc ke ne o but walang ang únyi hnyi úganiny hmakiny hnyekuk me hna oveci nya. 17 Haba Eli ame thu me ha, ka habe, He thö me hnabic: ke e so ame he Khongu Isaraela ka ham köu únyi u je sumâtâ gan. 18 Ke haingen, ka habe, Ö u betenge gak a athnyabaem. Me ame he but momo, me han, ke haba hnyimakan e ca hmak hmetu bi. 19 Ke ödrin e vesâkong me hic hnyi hnyimakö Iehova, me hmetu, me o hnyi hnyabadrin hnyi Rama: ke Elekana ame khanö Hana a áian, me Iehova ame únykúme kâu. 20 Ke a hwádâ thö úen me ame erkin dut Hana, me e ame hnökoâ da, me hwenyi ien Samuela, ame ha, ka habe. anyin oge sumâtâ ga Iehova. 21 Ke ame he at, jia Elekana me anyin lap hia he ka hudo kö Iehova hut helâ hnyi je huna, me anyin khöbi. 22 Ke a ca hnyi he bi Hana: anyin a e ame ha ka áian, ka habe, Me hnebaiö but wanakat, me oge me he ka hom e me me manen hnyi hnyimakö Iehova, me laba balua but eling. 23 Haba Elekana a áian ame ha kâu, ka habe, ányâ thö so köu; laba ju ke ne o but u me hnebaiö e; ke so e he Iehova ka ohmâ hwan hofuc. Me ame laba momo, me asen nokon ke ne o but e ame hnebaiö. 24 Ka hia but hnebaiö e, e ame hom e me je bolok minya a kun, ke khaca efa falawa, me tap waina, me hom e ka hnyi uma umö Iehova hnyi Silo: ke tiga úhnyúkong wanakat. 25 Ke ödrin e hlingâ bolok, me hom wanakat kö Eli. 26 Ke haingen momo, ka habe, Than lö, u möt tuhök, he inya ang momo waleji at ame tot unyâm eang me hic kö Iehova. 27 Oge sumâtâ wanakat ang; ke Iehova ame ham könya hnök hna sumâtâ gan: 28 Anyin a wale oge hia but hna minya e kö Iehova; adre hna kö Iehova hnyi ta je bonginy hia anyin möt. Me e ame khudrung kö Iehova eling.

## I. SAMUELA 2.

### HNYIMAKAN 2.

- K**E haba Hana ame hic me ha, ka habe,  
Ame senyin hnyekuk ga Iehova,  
Ame ogöranyâ anyik faoiny meno unyi  
Iehova ;  
Adre ogânâ hnyimök hon je iwahnai-  
hmiöny mönya ;  
Anyin a oge hobâ úhömeli únyi gam.
- 2 E ba at ae kap helâ me Iehova ;  
Anyin ae ba at bi ke hake thibi u  
Ke ba kic helâ me Khonguta.
- 3 Ca he hmetu bi ka ha hofuc ae bi gan ;  
Ke so ame ca gâ hofuc bi gan únyi hnyi  
je hnyimöbun ;  
Anyin a Iehova, me e Khongon metâ,  
Ke e ame tuluto je hna ânyâ.
- 4 A hmetru thö je cafana anyin tavat ae  
hwege,  
Ke adre oweikâ tavat ame haü ge tang  
hwege.
- 5 Haba tavat ae sekon me ödrin e hn'  
ödrin bi he ka huliwa hnân jeü ;  
Ke ame menâ but tavat ae mekihnâ-  
nem ;  
Ke ame hnokoâ seven lnen at ae  
tounyi ;  
Ke ame sēnyin dut at ae hu lakon  
ae se.
- 6 Iehova ame hlingâ, ke e ame omelö :  
E ame hagutâ hedis ai me ogöranyâ  
hmeto.
- 7 Iehova ame otheduocâ, me oten omjeuâ :  
E ame kot hnyikânâi, me ogöranyâ.
- 8 E ame ogöranyâ at ae theduoc únyi  
hnyi sesâ,  
Me ogöranyâ at ae ba ta únyi hnyi hna  
digic thatúnyi,  
He ka tha olab' ödrin me je than,  
Me tabâ theron ae hmanenang :  
Anyin a e unyi Iehova je hmolominy  
hmeledrany,  
Ke e ame otilâ hmeledrany hon e.
- 9 E ame he ka tuö je li can tavat ae kap,  
Ke e ame he ka ohnyibö hnyat ae ca  
wisa hnyi menekholom ;  
Anyin ame ca he at ka ton únyi ge  
tang hwegien.
- 10 Adre me he ka oamamâ tavat adre me  
vat me Iehova ;  
E ame he ka kunâ hendreng ködra  
úheny hnyi drany :  
Ame he Iehova ka owisa je can hmele-  
drany ;  
Ke e ame he ka ham tang hwege ka  
than a aten,

Me ogöranyâ faoiny meno anyin at e  
ame osüâ.

11 Me haba Elekana ame he Rama ai ka  
hnyi hnyaban. Me wanakat ame bi athnya-  
ba Iehova hnyi hnyimakö Eli at bihut.

12 Ke haba li laku Eli me li laku Relial ;  
ke ca khan' ödrü Iehova. 13 Ke haba  
hwakecin tavat bihut ka tavat, hnyi úen  
ame he at ka hudo hut, me haba athnya-  
bainy at bihut ame o, k' ame tiga ölä utiö,  
ke eü hnyi hnyamen bâlet a kun ta vheiny ;  
14 ke e ame seü hnyin öt, ame ne ketel,  
ame ne ot ae gan, ame ne kaia ; me haba  
únyi hia ame kât at bihut ge bâlet me wale  
hnân hobi kâu. Ke ödrin e ânyâ helâe  
hnyi Silo ka at Isaraela hia adre me he kâ  
e. 15 Eke, ödrin e tiga ca le pipikhenya,  
me ame he athnyabainy at bihut me ha ka  
at ae tren hut, ka habe, Hö jem utiö  
m' adre me le hobi kâu at bihut ; anyin a e  
ame ca he ka kap gam utiö ae mesök, ke so  
thibi únyi ae hât. 16 Ke ame ne thu kâu  
hnen at, ka habe, ödrin e he eâu ka le pipi-  
khenya, me waleling e khanö u he ka hom  
hoton wem bi ; awe, e ame he ka ha, ka  
habe, Ohe, ke u me he ka ham walang ang :  
k' ame ne ba me oge me he ka hügünâ e.

17 Ke e ti gan úkonginy li hidröu hnyi  
hnyimakö Iehova ; me haba tavat adre me  
hükötiâ bwihlany kö Iehova.

18 Ke Samuela ame bi athnyaba hnyi  
hnyimakö Iehova, ke e tiga wanakat, k' ame  
weikâ iefoda lino. 19 Ka hinyen ame  
tibet úkhaü ae úhnyükong hobi kâu me  
hom kâu hnyi ke huna me ke huna, hnyi  
úen e ame tha he me áian he ka bi hut  
hnyi je huna. 20 Ke haba Eli ame hahna-  
hici Elekana me áian, me e ame ha, ka  
habe, E so Iehova ame ham köu wan únyi  
ge momo eang, can bwihlany e ame me ham  
kö Iehova. Ke ödrü me he hmetu ka  
hnyi hnyabadru. 21 Ke haba Iehova ame  
senö Hana, me e ame erkin, me hu lakon a  
kun ta da me lo li in. Ke ame gan tot  
wanakat jia Samuela hnyi hnyimakö  
Iehova.

22 Ke haba Eli, me, ti hingat ut ; ke e  
ame löng ta je únyi hia a ânyâ li lakon ka  
at Isaraela hia, me hnödrü hna tha mokut  
me je momo adre hnyi huliwa hnyi hwanu-  
men uma úkhacaköu. 23 Me e ame ha  
ködrü, ka habe, Ieü gabu öbu me ânyâ je  
únyi helâe ? anyin oge löng únyi ge tavat  
hia eang hwakecibu ae kong. 24 Ohe,  
lakuk ; e ca so úthümetu oge löng : öbu me  
omono tavat anyi Iehova. 25 Ame ne

## I. SAMUELA 3.

kong ke at ka ke at, Khong ame he ka owisa kâu : ke ame ne kong at kö Iehova ie at ame he ka khöü hobi kâu? Ke so bi ödru me ca long hofuc hwan kamödrü, anyin ae be he Iehova ka hling'ödru. 26 Ke ame gan tot wanakat Samuela, ke ame betenge gan Iehova, me tavat minya

27 Ke ame o ke aten Khong kö Eli, me ha kâu, ka habe, Walang hofuc ho Iehova, ka habe, Hawa, oge manen dut ka lap anyin lakâmâm, ke tiga ödrin bi Aigupito, hnyi hnyaba Farao? 28 Me oge úca e únyi hnyi je tribu hia anyin at Isaraela me me at bihut könya, he ka hudo hon taben hut könya, he ka leú ütö ae bo so, he ka khavâ iefoda hnyi hnyimakök? ke hawa, oge ham ka lap anyin lakâmâm ta je hut a an hnen meic únyi ge lakon Isaraela? 29 Anyin a wale can iéü öbun e uto hut me bwihlany könya, wale oge húna ka hnyi hnyabak; me oganá lakom huk he ka opipikenyai öbun ge je hut hia ae únyi hnathu anyin at Isaraela a lakeik? 30 Anyin a wale ame ha Iehova Khongon at Isaraela, ka habe, Oge ha a g' ame he ányâm lap me lap anyin lakâmâm ka he hnyi hnyimakök nyiele balua: ke walang ang haingö Iehova, Hükötiânök; anyin oge me he ka ogan' ödrin hnyat ödrin e oganö nya, ke oge me he ka hmehma gadrin hnyat ödrin e hükötiö nya. 31 Wâ bi, ame he ka o ta je bong, me oge me he ka subâ benyâm, me benyin lakâmâm, me me ba hingatiny ányâm lap. 32 Ke u me he ka wâ hna okongoâ hnyi hnyabak, hnyi ta je omjeü hia Khong ame he ka ham ka at Isaraela: ke ame he ka ba hingatiny ányâm lap nyiele balua. 33 Ke haba atâm oge me ca he ka subâ degecâ únyi hnyi anyik taben hut, ame he ka hnân odilâ li emâkâm me otengiâ hnyekom: ke haba je wan hia thithö ányâm lap, me adre me he ka mok k' ödra tiga hmai. 34 Ke walang haten köu, a únyi ame he ka o ka li lakom, jia Hofeni me Fineasa; ödru me he ka tha mok hnyi bong a khaca. 35 Ke oge me he ka oâ hobi könya ke at bihut ae hnathu, me e ame he ka ányâ hoton hnyekuk me oñy-kúmânök: ke oge me he ka otillâ hobi kâu lap ae tethmâ: ke e ame he ka bi hanymen hnyi hnyimakan hnyat oge me hú nyiele balua. 36 Ke haba je kolon hnyi ányâm lap, me adre me he ka o kâu me nom kâu hnân ong sileva, me ujeü, me ha, ka habe, Ö u ha hanymök a hanymen at bihut, m' inye hnyi han ong jeü.

## HNYIMAKAN 3.

**K**E haba Samuela a da ame athnyabai Iehova hnyi hnyimakö Eli. Ke ca khenen hofuc ho Iehova hnyi je úen eling; ke ba hna omanená ame o. 2 Ke hnyi úen eling k' ame mokut Eli hnyi hnen, (ke hadedak ut li emakan, ke ca khana bi bwele,) 3 ke tiga ca mok lamepa anyin Khong, ke Samuela ame mokut hnyi uma umö Iehova wale hnen tangen Khong; 4 me waleling haba Iehova ame hawo Samuela: ke haingen, ka habe, Inya ang. 5 Me e ame wadring kö Eli, me ha, ka habe, Inya ang; anyin a u je hawo nya. Me haingen, ka habe, Oge ca hawo u; he hmetu thö ka mokut. Me e ame he me mokut. 6 Ke haba Iehova ame hongot hmetu, ka habe, Samuela lö. Me Samuela ame todrö me he kö Eli, me ha, ka habe, Inya ang; anyin a u je hawo nya. Me haingen, ka habe, Oge ca hawo u nökek; he hmetu thö ka mokut. 7 Ke tiga ca khanö Iehova bi ga Samuela, k' adre tiga ca hia but omanená kâu hofuc ho Iehova. 8 Ke haba Iehova ame okun hmetu hawo Samuela. Me e ame todrö me he kö Eli, me ha, ka habe, Inya ang; anyin a u je hawo nya. Me Eli ame wâhmakhmeto a Iehova ame hawâ wanakat. 9 Anyin a wale ame ha Eli kö Samuela, ka habe, He thö ka mokut, ke ame ne he ka hawo u, me u me he ka ha, ka habe, Iehova lö, ha thö, anyin a löng ut athnyabaem. Haba Samuela ame he me mokut hnyi hnen. 10 Ke ame o but Iehova, me tot, me hongot helâ me eja, ka habe, Samuela, Samuela lö. Ke haingö Samuela, ka habe, Ha thö, anyin a löng ut athnyabaem. 11 Haba Iehova ame ha kö Samuela, ka habe, Wâ bi, oge me he ka ányâ ke únyi hnyi Isaraela, ke ame he ka mea hnyi li hnyikönyen tavat hia adre me löng. 12 Hnyi bong eling oge me he ka ányâ kö Eli ta je únyi hia wale oge hia but ha ge anyin lap, hwân hnyi can, ke ne o but obiny. 13 Ke oge hia but ha kâu a oge me he ka owisa anyin lap nyiele balua, can monu e ame wâ, anyin a lakon ödru me oâ hnaúhangö ködru bi, ke e ame ca thaw ödru. 14 Anyin a wale oge hia but khemanyin ka lap anyi Eli, a oge me ca he ka ohia hulöiny lap anyi Eli ge hut me bwihlany nyiele balua. 15 Ke Samuela ame mokut ke ne o but ame lany, me khöng ut je hwanumen uma umö Iehova. Ke Samuela ame ot he ka thume-

I. SAMUELA 4.

tu Eli ge hna omanená. 16 Ke haba Eli ame hawo Samuela, me ha, ka habe, Samuela, nökkuk. Haingen, ka habe, Inya ang. 17 Ke haingen, ka habe, Ieú únyi adre hia but ha köu? Ö u ca he ka ikhâlâ gak: e so ame he khong ka ânyâ helâe köu, me bi hanen u je ne ikhâlâ ke únyi wale a ha köu. 18 Ke Samuela ame thumeto ge ta je únyi hia, ke ame ca ikhâlâ gan khaca. Ke haingen, ka habe, E bi Iehova, hamen he ka ânyâ únyi ae so hnyi hnyimakan. 19 Ke ame gan tot Samuela, ke tha Iehova më, ke e ame ca hna he ka kölu ka hnyi kânâ khaca hnyi hwan je hofuc. 20 Ke e khana but at Isaraela hia thithö hwân Dana ke ne o but Bere-seba a g' adre otilö Samuela thö me perofeta anyi Iehova. 21 Ke Iehova ame manen hmetu hnyi Silo: anyin a Iehova ame omanená e bi kö Samuela hnyi Silo únyi hnyi hofuc ho Iehova.

HNYIMAKAN 4.

**K**E ame o thö hofuc ho Samuela ka at Isaraela hia.

Me ame he at Isaraela he ka vat me at Filisiti, me adre me hunuma hnyi Eben-eza: ke ame hunuma at Filisiti hnyi Afeka. 2 Me at Filisiti adre me tot metâ ka at Isaraela: ke adre me hwân vat, ke Isaraela ame ngâ ge at Filisiti: ke adre me hlingâ tavat vat a helâ me foa thauzan. 3 Ke ame o tavat ka hnyi hna hunuma, me haba wahingatiny at Isaraela ödrin e ha ka habe, Can ieú Iehova ame kuc öta hnyi hnyimakan at Filisiti hnyi bong ang? E so ate me hom úheny Silo tangen úhinhinyköu, me me e bi unyita, me omeli öta únyi ge je iwahnaihmiöny möta. 4 Me ame úkhünöng tavat Silo ai he ka hom úheny e tangen úhinhinyköu anyi Iehova tuhan sabaoth, at ame laba wauben li kerubi: ke li laku Eli eling, jia Hofeni me Fineasa, unyin tangen úhinhinyköu anyin Khong. 5 Ke adre me hom tangen úhinhinyköu anyi Iehova ka hnyi hna hunuma me ame kuku gan hmâ at Isaraela hia me ame umet hnyi. 6 Ke a löng ut at Filisiti medien kuku, me haingödra, ka habe, Ieú hwan kuku ae gan hnyi lap anyin at Heberu? Me adre me wáhmakhmetoâ a g' ame o thö tang tangö Iehova hnyi hna hunuma. 7 Ke haba at Filisiti adre me ot, ke adre me ha, ka habe, A o thö Khong ka hnyi hna hunuma. Ke haingödra, ka habe, Ekölö

gata! E ba únyi a helâe ehac. 8 Ekölö gata! ia ame he ka hügún' öta únyi hnyi je hnyamen ta je khong eling ae hwege? wale ta je khong eji hnyat a kot at Aigupito ge ke je mok ae cap hnyi hnyebuba. 9 E, öbun at Filisiti lö, hwege th' öbun, hnyok бага thö, wâ adre nye thalu' öbun ge at Heberu, helâ me hnöbun hna thalu' ödrin: hnyok bagâ th' öbun, me vat. 10 Me haba at Filisiti adre me vat bi, ke ame ngâ but at Isaraela, me adre me ve kec ka hnyi umödra je uma mano: ke ti gan hmâ hna hling' ödra; anyin ameta but thöte thauzan at Isaraela tavat he hon kânâ. 11 Ke adre hügúnâ tang tangen Khong; ke adre hlingâ li laku Eli, jia Hofeni me Fineasa. 12 Ke ame wadring ke at Beniamina úheny hnyi hna vat, me o hnyi Silo hnyi bong eling, ke khekke but anyin úkhaú, ke e hu kânâ hon ban. 13 Ke e ame o but, me wâ bi Eli ame laba hon taben tap eú hnyi gethen ame selâdrâ: anyin ae öbubuny hnyekon can tang tangen Khong. Ke o but at hnyi taun, me úthumetu, me ame útengiö taun hia. 14 Ke a löng Eli hwan útengiö, me e ame hnö, ka habe, Ieú imedien úmonumouny eling? Me ame ie he at, me thumetu Eli. 15 Ke nainte eit ut je hunai Eli; ke wadröu but li emakan, ke ca khana bwele. 16 Ke haingen at kö Eli, ka habe, Iny' at úhek hnyi vat, ke oge kec eja jem únyi hnyi hna vat. Ke haingen, ka habe, Nökuk, ieú bongon? 17 Me ame thu at hom úthumetu, ka habe, a kec dö at Isaraela ge at Filisiti, ke e gan hmâ hna hlingâ unyin tavat, ke a mok minya thö lakom, jia Hofeni me Fineasa, ke adre hia thö hügúnâ tang tangen Khong. 18 Ke hnyi üen e ame háia tang tangen Khong, me e ame ta me hnyimen göranyai únyi hnyi taben tap hnyi baten homagöule, me ame hmetru but nyin me mokcu; anyin ae hingat ut me hmak. Ke e ame hia but owisa ka at Isaraela fâte je huna. 19 Ke haba úngon a öio Fineasa, e erkin ame ne üen he ka o, ke e a löng ut úthumetu a g' adre hia thö hügúnâ tang tangen Khong, ke a mokcu úngon me âian, me e ame iyâú he ka hno-koâ, anyin ame o kâu vec hnyekon. 20 Ke hnyi üen anyin mok ame ha kâu je momo adre tha e më, ka habe, Ca he ka ot, anyin a u je hia but hnokoâ da. Ke e ame ca thu bi, ke ame ca löng minya bi. 21 Ke e ame hwenyi ien wanakat Ikaboda, haingen, ka habe, A hia but hmanenang unyin at

## I. SAMUELA 5, 6.

Isaraela: anyin adre hùgúnâ thö tang tangen Khong, me únyi ge úngon me áiân. 22 Ke e ame ha, ka habe, A hia thö hmanenang unyin at Isaraela; anyin adre hùgúnâ thö tang tangen Khong.

### HNYIMAKAN 5.

**W**ALELING a hom tang tangen Khong hnen at Filisiti, ke adre me hom e Asedoda ai úheny Eben-eza. 2 Ke at Filisiti adre me hom tang tangen Khong me vaden ka hnyi uma umö Dagona, me ip e unyi Dagona. 3 Ke a todrö at Asedoda hnyi hnyomakatu, me wâ bi, ame ta but Dagona hnyikânâi cicö tang tangö Iehova. Me ödrin e köp Dagona me otilâ hmetu hnyi hnen. 4 Ke ödrin e tot hmetu nyi hnyomakatu, me wâ bi, a ta but hnyikânâi Dagona cicö tang tangö Iehova; ke haba bö Dagona, me li hnyamen ame mokut hnyi hwanuma a mou but, ke e bi unyi Dagona thiju. 5 Anyin a wale adre me ca uto hwanumen umö Dagona e Asedoda ke ne o but hnyi bong at, wale ge tavat bihut kö Dagona, me tavat minya adre me dit ka hnyi umö Dagona.

6 Ke hmak ut hnyamö Iehova hon at Asedoda, me eame ohi' ödrin me kuc ödrin je je okuc, wale hnyi Asedoda me je hnyigöulen. 7 Ke a wâ but e at Asedoda, me ödrin e ha, ka habe, Ame ca he bi tang tangen Khongon at Isaraela ka hnen unyitin, anyin ae hwege hnyamen hutin, me hon khongutin a Dagona. 8 Me ödrin e úkhúnöng he ka úkhacaköuâ mödrin je thaniny at Filisiti hia, me ödrin e ha, ka habe, Ötin e he ka hawa ka tang tangen Khongon at Isaraela? Me ödrin e thu, ka habe, E so adre me hom tilâ tang tangen Khongon at Isaraela Gatha ai. Me ödrin e hom tilâ tang tangen Khongon at Isaraela. 9 Ke ödrin e hia but hom tilâ e, me haba hnyamö Iehova ame iwahnaihmiöny me taun k' ame ti okongoâ: me ame kot obagainy taun a tavat ae úhnyúkong me tavat ae gan, k' ame tab' ödrin ohuc. 10 Me ödrin e úkhúnöng me tang tangen Khong Ekerona ai. Ke ame o but tang tangen Khong hnyi Ekerona, me haba at Ekerona ödrin e kuku me ha, ka habe, Ödrin e hom kötin tang tangen Khongon at Isaraela, me me hling' ötin me itin hnyei. 11 Me ödrin e úkhúnöng he ka úkhacaköuâ je thaniny hia at Filisiti, me ha, ka habe, Kunâ but tang tangen Khongon at Isaraela me me

hmetu ka hnyi hnen, me me ca hling' öhmun me ihmun hnyei: anyin ae gan hmâ hna okongoâ hnân mekinny hnyi taun hia; e hmak gan hmâ eling hnyamen Khong. 12 Ke haba tavat a ca mokcu, a tab' ödra ohuc: ke ame he thö hnyi dranyai hwan utengien taun.

### HNYIMAKAN 6.

**K**E e bi tang tangö Iehova hnyi hnyei iny at Filisiti seven je tehi. 2 Haba at Filisiti ödrin e hawâ tavat bihut me tavat bi khong, me ha ködrin, ka habe, Öhmun e he ka hawa ka tang tangö Iehova? bethe omanená thö köhmun dok öhmun e he ka kunâ e ka hnyi. 3 Me haingödrin, ka habe, Öbun e ne he ka kunâ tang tangen Khongon at Isaraela, ca kunâ bi ke ba únyi; ke so bi öbun e he ka hom kâu hudiny hulö: m' öbun e menyik ut, me ame he ka khan' öbun can hna ca hom hnyamen únyi gabun. 4 Ke haingödrin, ka habe, Ieú hudiny hulö öhmun e he ka hom kâu? Haingödrin, ka habe, Thabúng ta ohuc gol, me thabúng ta tep gol, oúco je thaniny at Filisiti: anyin a khaca thibi anyibun mok hia me je tuhöbun. 5 Anyin a wale öbun e he ka theatâ anyibun je ohuc, me halebun je tep, hnyat okongoâ hnyei; ke öbun e he bi ka ogânâ Khongon at Isaraela; me ame ne he ka ohâhá hnyamen hubun, me hon je khongubun me ibun hnyei. 6 Ke anyin a ieú öbun e ohwegiâ je hnyekubun, helâ me at Aigupito me Faraö ödrin e ohwegiâ je hnyekudrin? ke e a hia but huliwa hnân láiâ unyidrin, me hawa, ödrin e ca hna but tavat, me ödrin e he but? 7 Awe, e so öbun e hom me penapena ke kat ae teb únyi, me hom li kau a li sangadra, ke adre tiga ca ip hudru únyi hnân úhúkáláköuâ, me ohmâ li kau ka hnyi kat, me hom únyi gadru li nokon ka hnyi hnyaba: 8 ke hom dö tang tangö Iehova, me ip hon kat; ke hitangen ju je omjeú gol wale öbun e he ka hom kâu hnân hudiny hulö hnyi ong tang me tha ip mē; me kunâ e me me he but. 9 Ke wâhmakhmeto ju ame ne he ka gethen hnyi hing hnyigöulen, Bethe-semes ai, awe, e ame hia but ányâ kötin ta je hna okongo eang ae gan: ke ame ne ca helae, awe, ame he ka khan' öta a ga ca kuc ötin ge hnyamen; ke ame ka o baú bi kötin. 10 Me ame ányâ helâe tavat; me ödrin e hom li kau a li sangadra, me ohm' ödru ka hnyi



## I. SAMUELA 7.

kat, me hlöng hwanumödru hnyi hnyaba : 11 ke ödrin e ip tang tangö Iehova hon kat, me ong tang me je tep gol me je hna-theatá anyidrin je ohuc. 12 Ke ame he wisa eü hnyi gethen li kau hnyi gethen üheny Bethe-semes ; k' ame vheno hna cit gethen, ke ame kuku tot, ke ame ca saü ka hnyi ke keihen metâ me me ; ke haba je than Filisiti ödrin e he hotudru ke ne o but hnyi hnyigöulen Bethe-semes. 13 Ke haba at Bethe-semes, ödrin e subâ anyidrin hwit eü hnyi hnyigöulen bucen : ke ödrin e bwele me wâ tang, me ödrin e senyin he ka wâ. 14 Ke ame o thö kat hnyi utkânâ i Josua at Bethe-semes, me ame todru eling hnyi veto ae gan : me ödrin e kia utöiny kat me hudo li kau hnân hudiny leü kö Iehova. 15 Ke haba at Levi ödrin e hom tang tangö Iehova, me ong tang unyin, a tangen je omjeü gol, me ip hon veto ae gan : ke haba at Bethe-semes ödrin e hudo je hudiny leü me hudo je hut kö Iehova hnyi bong eling. 16 Ke a wâ e je than Filisiti a thabüng, me ödrin e hmetu Ekerona ai hnyi bong eling. 17 Ke walang je ohuc gol a ham at Filisiti hnân hudiny hulö kö Iehova ; khaca ünyi ge Asedoda, khaca ünyi ge Gaza, khaca ünyi ge Asekelona, khaca ünyi ge Gatha, khaca ünyi ge Ekerona ; 18 me je tep gol öco je tauniny at Filisiti hia anyin je than a thabüng, a je taun adre up baginy, me je taun ae ühnyükong hnyi ta hnyei : ke ne o but hnyi veto ae gan wale ödrin e ip tang tangö Iehova hnyi hon, ka eling ke ne o but hnyi bong ang hnyi utkânâ i Josua at Bethe-semes. 19 Ke e ame kot tavat hnyi Bethe-semes, can ödrin e selâdrâ hnyin tang tangö Iehova, e ame kot tavat a sevente, me fite thauzan tavat : me ame tenge tavat anyin a Iehova ame kot tavat, ke e gan hmâ hna hling' ödrin. 20 Me ame ha at Bethe-semes, ka habe, Ie at ae khana he ka töt hnyi hnyimakö Iehova, Khong ae kapeang ? Ke e ame he ka ölö kö ia gatin ? 21 Me ödrin e kunâ je úthümetu ka tavat adre me laba hnyi Kiriatha-jarim, ka habe, Haba at Filisiti ödrin e hia but hom hmetu jem tang tangö Iehova ; ok ut öbun ka hom e köbun.

### HNYIMAKAN 7.

**M**E ame he at Kiriatha-jarim, me hom tang tangö Iehova, me hom e ka hnyi uma umö Abinadab hnyi dok ae hut,

me okabi Eleazara a nokon he ka tuö tang tangö Iehova.

2 Ke adre ip kuenyâ tang hnyi Kiriatha-jarim ; wale tuente je huna : ke ame tenge hotu Iehova lap anyin at Isaraela hia. 3 Ke Samuela ame ha ka lap anyin at Isaraela hia, ka habe, Öbun e ne hmetu kö Iehova me hnyekubun a khaca, awe, degec ut je khong kanyua me Aseira unyibun, me penapena je hnyekubun kö Iehova, me bi athnyaba thibi kâu : ke e ame he ka omeli öbun ünyi hnyi hnyamen at Filisiti. 4 Me haba lakon Isaraela ödrin e degec je Baala me Aseira, me bi athnyaba thibi kö Iehova.

5 Haba Samuela ame ha, ka habe, Úkhacaköüâ thö at Isaraela hia hnyi Mizepa, ke oge me he ka hic hobi köbun kö Iehova. 6 Me ödrin e úkhacaköü hnyi Mizepa, me seköio, me hingälâ hnyi hnyimakö Iehova, me ca han hnyi bong eling, me ha eling, ka habe, Öhmun e hia but änyâ hulö kö Iehova. Ke Samuela ame owisa ka lakon Isaraela hnyi Mizepa. 7 Ke a löng ut at Filisiti a g' ame úkhacaköü lakon Isaraela hnyi Mizepa, me ame he je thaniny at Filisiti ka tot ka at Isaraela. Ke a löng ut at Isaraela me ödrin e outen at Filisiti. 8 Ke haba lakon Isaraela adre me ha kö Samuela, ka habe, U me ca he ka menâ khöü' öhmun kö Iehova Khongutin, me me omeli öta ünyi ge at Filisiti. 9 Haba Samuela ame hom ke nokon mamoe ame tiga i, me hudo hnân hudiny leü ae bekhöt kö Iehova : me Samuela ame tengiâ at Isaraela kö Iehova : me Iehova ame löng. 10 Ke Samuela ame hudo hudiny leü, me haba at Filisiti adre ma hakekenyâ he ka vat me at Isaraela : ke Iehova ame bi hwan than ae gan hnyi bong e hon at Filisiti me ohmöiöngi ödra ; me Isaraela ame kuc ödra. 11 K' ame he at Isaraela üheny Mizepa me hnu at Filisiti, me kuc ödra ke ne o but hmeli Bethe-ka. 12 Ke Samuela ame hom ke veto, me otilâ wanben Mizepa me Seni, me hwenyi ien Eben-eza, haingen, ka habe, Iehova ame hadru' öta ke ne o but eang. 13 Ke adre me hom ühnyükongo at Filisiti, me adre me ca he hmetu bi ka hnyi hnyigöulen at Isaraela : ke iwahnaihmiöny hnyamö Iehova ka at Filisiti hnyi ta je bong bongu Samuela. 14 Ke adre ham hmetu ka at Isaraela je taun waleji a hügünâ at Filisiti ünyi ge at Isaraela, hwân hnyi Ekerona, ke ne o but Gatha ; ke haba at Isaraela adre me hügünâ hmeto je hnyigöulen ge at

## I. SAMUELA 8, 9.

Filisiti. Ke úsoköu but at Isaraela me at Amora. 15 Ke Samuela ame owisa ka at Isaraela hnyi ta je bonginy anyin möt. 16 Ke e ame labö vheno gaga Beth-ela, me Gilegala, me Mizepa, hnyi ke huna me ke huna; me e ame owisa ka at Isaraela hnyi ta je dok hia eling. 17 Ke e ame labö hmetu Rama ai, anyin a waleling umen uma; ke e ame owisa eling ka at Isaraela: ke e ame otilà eling ke taben hut kö Iehova.

### HNyimakan 8.

**K**E hingat ut Samuela me e ame otilà li lakon he ka owisa ka at Isaraela. 2 Joela ien nokon a atö, ke Abia ien loiny, li at owisa hnyi Bere-seba. 3 Ke haba li lakon ödrü me ca vheno deny gethen, ke ödrü me saú ka omjeú me khöp hwaban, me ohwalö hna owisa.

4 Ke ame úkhacaköu je hingatiny at Isaraela hia me o kö Samuela hnyi Rama: 5 me ödrin e ha káu, ka habe, Wâ bi, u hingat ut, ke ame ca vheno dem gethen li lakom: ke walang ang u me he ka otilà thanilmun he ka owisa köhmün helâ me je hnyei hia. 6 Ke e kong kö Samuela hnödrin hna ha, ka habe, Ham dö köhmün than he ka owisa köhmün. Ke Samuela ame hic dö kö Iehova. 7 Ke Iehova ame ha kö Samuela, ka habe, Löng ju hofuc hwan tavat, wale adre me ha hia köu: anyin a ödrin e ca hna degeci u, ke ödrin e hna degeci nya bi, me inye ca thanidrin. 8 Helâ me hnödra hna ânyâ hia, hwân hnyi bong waleji oge hum ödra hnyin úheny Aigupito ke ne o but hnyi bong ang, ke adre me digic nya me bi athnyaba ka ke je khöng, me ödrin e ânyâ minya e köu, 9 Ke löng ju walang ang hwodrin: ke so bi, u me he ka ha hwegiâ ködra me thumetu ödra ge bongon than ame he ka musi ödra.

10 Ke Samuela ame ha ta je hofuc ho Iehova hia ka tavat ödrin e sumatö than unyin. 11 Ke e ame ha, ka habe, Walang bongon than ame he ka musi öbun: e ame he ka hom lakubun obaga, me otíl' ödrin hobi káu anyin je kariota, me anyin tavat tabö hors; ke ödrin e he ka wadring hnyi hnyimakan anyin je kariota; 12 ke e ame he ka otíl' ödrin hobi káu je taben thauzan, me je taben je fifte; me he ka wia kânân kânâ, me subâ anyin hwit, me he ka tibet anyin je únyi hnân vat, me je únyi hõbi

káu anyin je kariota. 13 Ke e ame he ka hom lakubun je hlu hnân úhaniken ta je únyi ae hnebwia, me bi han, me beka. 14 Ke e ame he ka hom je ibun, me je hnyei vine, me je hnyei elaiö únyi gabun me ham ka lathnyabainy. 15 Ke e ame he ka hom ke keihen a libenyitainy hatungubun je hatong, me ibun je hnyei vine, me ham bi ka je taben unyin me lathnyabainy. 16 Ke e ame he ka hom lathnyabaibun obaga me omomo, me je hidróu gabun ae so, me halebun je asina, me kun' ödrin bi ka hnyi anyin huliwa. 17 E ame he ka hom ke keihen a libenyitainy halebun je mamoe: ke öbun e he ka bi athnyabainy. 18 Ke öbun e he ka tenge hnyi bong eling can tuhöbun at öbun e he ka úca; k' ame ca he bi Iehova ka thu köbun hnyi bong eling. 19 Ke so bi haba tavat adre me höcö löng hofuc ho Samuela; ke haingödra, ka habe. Ohe, öhmün e he ka hu tuhöhmün: 20 m' öhmün e he ka helâ me je hnyei hia; k' ame he tuhöhmün ka owisa köhmün, me hnyimakan anyihmun bunyen, me vat hobi köhmün. 21 Haba Samuela ame löng ta je hofuc hia hwan tavat, me e ame ha kö Iehova. 22 Ke haba Iehova ame ha kö Samuela, ka habe, Löng ju hodra, me otilà tuhödra. Me Samuela ame ha ka at Isaraela, ka habe, Vese but öbun ka hnyi anyibun je taun.

### HNyimakan 9.

**H**ABA e hu ke at Beniamina, Kiso ien, nöku Abiela, nöku Zero, nöku Bekorath, nöku Afia, a nokon ke at Beniamina, at ae únyi hnathu hmönyin. 2 Ke e hu nokon бага, Saulo ien, hidróu ae hmanenang; ke ba at unyin lakon Isaraela ae so hon: ke haba úbeúen e hon tavat hia, me bongödra hnyi li abenyin. 3 Ke a hia je asina hale Kiso kamö Saulo. Me haba Kiso ame ha kö Saulo a nokon, ka habe, Bethe hawâ ke athnyaba me todriö me he thö ka elâm je asina. 4 Ke e ame vheno hnyei ae hut hnyi Eferaima, me vheno hnyei Salisa k' ame ca ö' drin; ke ödrü me vheno hnyei Salim, ke hia bala bi eling: ke ödrü me vheno hnyei Beniamina, ke ödrü me ca wâ bala bi. 5 Ke ödrü me o but hnyi hnyei Zuf, me Saulo ame ha ka athnyaba unyin, ka habe, Ötu me he ka hmetu, wâ e nye ca únykúme hmetu bi cica ge asina, ke hmak biju hnyekon gatu. 6 Ke haingen káu, ka habe, Wâ bi, e hu

## I. SAMUELA 10.

ke aten Khong hnyi taun eang, at ae lung so; ame hwadâ hia hnen je hna ha: ötu he kâ e; ame ne he ka omanenâ kötu la ge hnötu hna vheno. 7 Ke haingö Saulo ka athnyabainy, ka habe, Ke wâ bi, öte ne he, me ötu me he ka hok ieü ka at? anyin a um dö anyitu je areto hnyi tangen, ke ba ke bwihlany he ka hom ka aten Khong: ieü honötu? 8 Me ame thu hmetu athnyaba kö Saulo, ka habe, Wâ bi, e hu gak ke keihen a vakiny sekel sileva: oge me he ka ham e ka aten Khong he ka omanenâ kötu detu. 9 (Haba ehac hnyi Isaraela, e ka he at ka hnö unyin Khong, e ame ha, ka habe, Ötin e he ka he ka at ame wâ: anyin a haba perofeta walang ang, adre hwenyi ien ehac, ka habe, At ame Wâ.) 10 Me Saulo ame ha ka athnyabainy, ka habe, E so hofuc e; ötu he. Me ödrü me he ka hnyi taun wale a e aten Khong hnyi. 11 Ödrü me tiga öliâ hwatapköluiny taun, me ödrü me wâ je hlu ödrin e he ka seköiö, ke ödrü me ha ködrin, ka habe, Hawa, e ang at ame wâ? 12 Me ödrin e thu ködrin, ka habe, e, wâ bi hnyi hnyimákâm: hele th' öbu, anyin a o thö eja hnyi taun; anyin ae hu but anyin tavat eâu hnyi dok ae görany: 13 öbu ka o hnyi taun öbu me he ka wâ, ke tiga ca ölö bi ka hnyi dok ae görany ka han: anyin ame ca he tavat ka han, k' ame tiga ca o, anyin a hamen he ka hmö hut; hwaban e, ame hnyi han tavat adre hawâ. Ke ölö th' öbu walang ang; anyin öbu me he ka wâ hnyi üen ang. 14 Me ödrü me he ka hnyi taun; ke ödrü me o hnyi hnyin taun, wâ bi Samuela ame he jem cici ödrü, he ka öliâ dok ae görany.

15 Ke a hia but Iehova omanenâ kö Samuela et ke tiga ca o bi Saulo, ka habe, 16 haba nnyi hnyi üen heläng, oge me he ka kunâ köu ke at ünyi hnyi hnye Beniamina, ke u me he ka hü e, me me taben lakeik at Isaraela, me e ame he ka omelö lakeik ünyi hnyi hnyamen at Filisiti: anyin a oge hia but wâ lakeik, k' ame o but könya anyidra mâng. 17 Ke Samuela ame ö Saulo me Iehova ame ha kâu, ka habe, Wâ bi at waleji oge ha köu! a at ame he ka musö lakeik. 18 Ke haba Saulo ame hakekeny Samuela hnyi homagöule, me ha, ka habe, Ö u kú thö könya uma umen at ame wâ. 19 Me Samuela ame thu kö Saulo, ka habe, Inya ang at ame wâ; böbu thö ka ölö ka hnyi dok ae görany, anyin a öbu me he ka tha han

mönya eâu: ke oge me he nyi ka kunö u, me omanenâ hnyekom. 20 Ke haba je asina wale a hia hnyi kun ta bong ca hmak bi hnyekom gadrin: anyin adre ö 'drin ju. Ke hobi kö ia ünyi adre weny hia hnyi Isaraela? Hawa, ca hobi köu bi, me lap hia anyin kâmâm? 21 Me Saulo ame thu, ka habe, Hawa, ca at Beniamina bi nya, wale ae ühnyükong hnyi je tribu hia anyin at Isaraela? ke ühnyükong hmönyin anyik lap hnyi je lap hia hnyi tribu Beniamina? ieü gam u me ha helâe könya? 22 Ke Samuela ame hum Saulo me athnyabainy, me hum ödrü ka hnyi hnyeule, me olab' ödrü hnyi li tap ae beönua unyin tavat adre hawâ, helâke thöte tavat. 23 Ke Samuela ame ha ka at ame bi han, ka habe, Hom but jem uthmeno waleji oge ham köu me ha köu, ka habe, Ip ju e. 24 Me haba at ame bi han ame hom but jevan, me ünyi hon e, me ip hnyi hnyimakö Saulo. Ke haingö Samuela, ka habe, Wâ bi ünyi adre ip! ip ju hnyi hnyimákâm, âm; anyin adre tuö e hnân hobi köu hwân hnyi üen adre thu, anyin oge me ha, ka habe, Oge me he ka hawâ tavat. Ke haba Saulo ame tha han me Samuela hnyi bong eling. 25 Ke ödrin e utut ka hnyi taun ünyi hnyi dok ae görany, me haba Samuela ame ühnenamö me Saulo hon uma. 26 Ke ödrin e vesâ kong: ke haba hnyi haolany, me Samuela ame hongot kö Saulo hon ban uma me ha, ka habe, Todrö, m' inye he ka kunö u. Me ame todrö Saulo, ke ödrü me tha he háang a e me Samuela. 27 Ke ödrin e tiga utut ka hnyi obiny taun, me haba Samuela ame ha kö Saulo, ka habe, Ha thö ka athnyabaem he ka mē ban (me e ame he), ke mē todrü u, m' inye he ka omanenâ köu hofuc hwan Khong.

### HNYIMAKAN 10.

**M**E wale Samuela ame hom tap wakaco me hingâlâ hon ban, me úcimhnyimak mē, me ha, ka habe, Hawa, ca anyin a Iehova ame hü u me hnân taben jekhon? 2 U ka he but eâu üheny ang unyik, u me he ka wâ li at hnyi hu Rakela hnyi hnyigöulö Beniamina hnyi Zeleza; ke ödrü me he ka ha köu, ka habe, Adre wâ ju asina, wale u me elâm: ke wâ bi ame ca ünykúme hmetu je asina kâmâm, ke e hmak ut hnyekon gabu, ame ha, ka habe, Hawa la nökek? 3 Ke u me he ka he ühem e, me u je he ka o hnyi iwajo anyi

## I. SAMUELA 11.

Tabora, me ame he ka úkhanö möu eling kun ta hnyat, ödrin e he Beth-ela ai ka Khong, ke at ame hom tilâ kun ta nokon got, ke ke at ame hom tilâ kun ta areto, ke ke at ame hom tilâ tap waina : 4 ke ödrin e he ka iouny möu, me ham köu lo li areto'; ke u me he ka kap gadrin. 5 Ke hwaban e, u me he ka o ka hnyi dok ae hut anyin Khong, wale lap tue anyin at Filisiti : ke u ka hia but o ka hnyi taun, u me he ka úkhanö me deö perofeta ödrin e utut úheny 'thö, ke e hnyi hnyimaködrin nabeli, me bwinybet, me utköwi, me kitara ; ke ödrin e he ka hnyi perofeta : 6 ke ame he ka o hwege hom hanu Iehova, me u me he ka tha perofeta mödrin, ke adre me he ka wiö u helâ me ke at bi. 7 Ke e ka át dö köu je haten eling, u me he ka ányâ hnâm hna wáhmakmeto ; anyin a e unyâm Khong. 8 Ke bâm dö Gilegala ai, ke ama bilik ; ke wâ bi, oge me he ka utut köu he ka hudo je hudiny leú, me hudo je hudiny úsököu : seven je bong u me he ka hulubahingen ke ne o but oge me o köu, me omanená köu únyi u me he ka ányâ. 9 Ke e ame hwiö thö me he ga Samuela, me Khong ame ham kâu hnyekon ae ke hwakecin bi, ke ame hwadá thö je haten hia eling hnyi bong eling.

10 Ke ödrü me o eling hnyi dok ae hut, me wâ bi, ame ukhanö mödrü deö perofeta ; me ame o hwege hon hanon Khong, me e ame tha perofeta unyidrin. 11 Ke a wâ but tawat hia, a hnyat wáhmakmeto e ehac, ke wâ bi e ame hnyi perofeta me je perofeta, me adre me úhaköuâ ka habe, Ieú e a o ka nöku Kiso? Hawa, Saulo ame laba unyin je perofeta? 12 Ke ame thu ke at a aten eling, ka habe, Ke ia kamödrin? Anyin a wale, adre wejecâ, ka habe, Hawa, Saulo ame laba unyin je perofeta? 13 Ke e ame um dö perofeta me he ka hnyi dok ae görany.

14 Ke haba ke kamö Saulo ame ha kâu me athnyabainy, ka habe, Úhebu ua? Haingen, ka habe, Öhme elâm je asina : ke öhme wâ but ae hia bala me öhmu me he kö Samuela. 15 Me ame ha ke kamö Saulo, ka habe, Me omanená könya hofuc ho Samuela köbu. 16 Me Saulo ame ha ka ke kamen, ka habe, E ame ha manená köhmu a g' adre wâ ju je asina. Ke e ame ca omanená kâu ge dökhü, waleji a ha Samuela.

17 Ke Samuela ame úkhacaköuâ tawat kö Iehova hnyi Mizepa ; 18 me e ame ha

ka lakon Isaraela, ka habe, Walang hofuc ho Iehova, Khongu Isaraela, ka habe, Oge me hom at Isaraela úheny Aigupito, me oge me omeli öbun únyi hnyi hnyamen at Aigupito, me únyi hnyi hnyamen je dökhü hia waleji a oveci öbun : 19 ke öbun e hia but degec Khongubun hnyi úen ang, at a omeli öbun únyi ge anyibun je hna okongoâ me hna ovecâ ; ke öbun e ha kâu, ka habe, Otilâ thanihmun dö. Awe, omanen' öbun dö walang ang hnyi hnyimakö Iehova hoton anyibun je tribu me je thauzan gabun. 20 Me Samuela ame hakekenyâ je tribu hia anyin at Isaraela, me adre me kü tribu Beniamina. 21 Ke e ame hakekenyâ tribu Beniamina hoton anyidrin je lap, me adre kü lap anyi Mater : ke adre kü Saulo noku Kiso ; ke ödrin e elâm e, k' adre me ca wâ. 22 Anyin a wale adre me elâm hmetu unyi Iehova, hawa, e tiga hu ke at biju ame he ka he jem? Me Iehova ame thu, ka habe, Wâ bi, e ame lubaduöng hnyi je thatúnyi. 23 Me adre me wadring me hom e úheny e ; ke e ame tha tot me tawat, me e beú hon tawat hia, bongödra ju' hnyi li abenyin. 24 Ke haba Samuela ame ha ka tawat hia, ka habe, Wâ ju e, wale a úca Iehova, anyin ae ba at helâ më unyin tawat hia thithö. Me ame hongot tawat hia, me tha ha, ka habe, Khong lö omelö than.

25 Ke haba Samuela ame thumeto tawat ge bongon dökhü, me sihnalimen e hnyi tusi, me ip hnyi hnyimakö Iehova. Ke Samuela ame kunâ tawat ka hnyi je hnyabadra. 26 Ke Saulo ame he minya ka hnyi hnyaban hnyi Gibeá ; ke ame tha he më tawat a kâlâ Khong je hnyekudrin. 27 Ke ame ha ke je laku Belial, ka habe, Ame he ka kâmâu hna omeli ötin at eji? Me ödrin e húkötíâ e, ke ödrin e ca hom kâu je bwihlany. Ke e bi ame laba hnyibú.

### HNYIMAKAN 11.

**K**E ame o but Nahasa at Amona me hunuma cicö Jabese-gileada : ke ame ha at Jabese hia kö Nahasa, ka habe, U me he ka úhinyköu möhmun, me öhmun e he ka bi athnyabaem. 2 Haba Nahasa at Amona, ame thu ködrin, ka habe, Walang oge me he ka úhinyköu möbun a g' ame he ka bán ka oc ut je emaköbun hia a metâ ; ke oge me he ka ip únyi e hnân haikongoâ at Isaraela hia. 3 Me ame ha kâu wahingat hnyi Jabese,

I. SAMUELA 12.

ka habe, Me hn' öhmun hnyi seven ta bong, me öhmun e he ka kunâ je úthumetu ka hnyi je hnyigöulen at Isaraela: ke ame ne ba at ame he ka omeli öhmun, awe öhmun e he ka he köu. 4 Me ame o je metâ hnyi Gibea i Saulo me thumeto tavat ge ta je hofuc eling: me ame tenge gan hmâ tavat hia. 5 Ke wâ bi, ame o but Saulo e ame alen je kau úheny hnyi hnyei; ke Saulo ame ha, ka habe, Ieú ame tenge gan tavat; Me ödrin e thumeto ge hofuc hwan at Jabese. 6 Ke ame o hwege hanon Khong ka hnyi hu Saulo, hnyi úen e ame löng hofuc eling, me ame ubâhlâ gan hmâ anyin hmönyin. 7 Me e ame hom li bolok, me susub' ödru, me kunâ me je metâ ka hnyi je ke keihen hia anyi Isaraela, me ha, ka habe, Adre me he ka ányâ helâng ka je bolok haleny tavat adre me ca he ka he hotu Saulo me Samuela. Me ame o ot ka tavat únyi ga Iehova, ke ödrin e ok helâ me at a khaca. 8 Ke e ame öü ödrin hnyi Bezek; ke haba lakon Isaraela ödra theri haded thauzan, ke thöte thauzan at Juda. 9 Me adre me ha ka je metâ ödrin e o, ka habe, Öbun e he ka ha ka at Jabese-gileada, ka habe, Haba nyi e ka vec ut hwan seúnö, me adre me he ka hn' öbun. Me ame he je metâ me thumeto at Jabese, me ödrin e senyin. 10 Waleling me me ha at Jabese, ka habe, Öhmun e he nyi ka didrut köbun, me hamöbun he ka ányâ hia köhmun webun. 11 Ke haba nyi Saulo ame khenâ tavat me me kun ta bunyen: ke ödrin e o hnyi wanben hna hunuma hnyi bna hmak hnyi hnyomakatu, me kot at Amona ke ne o but ame vec hwan seúnö: ke adre oveseâ bi je kolon, me me ca tha laba li at a lo. 12 Ke ame ha tavat kö Samuela, ka habe, Ie at a ha, ka habe, Hawa, ame he Saulo ka musi öta! Hom but jem tavat m' öhmun e he ka hling' ödrin. 13 Haba Saulo ame ha, ka habe, Adre me ca he ka hlingâ ke at hnyi bong ang: anyin a Iehova ame ham möt hnyi bong ang hobi kâu at Isaraela. 14 Me Samuela ame ha ka tavat, ka habe, Ötin he Gilegala ai, he ka ohâtâ dökhu eling. 15 Me ame he tavat hia Gilegala ai; me adre me otilö Saulo eling ka than hnyi hnyimakö Iehova hnyi Gilegala; ke adre me hudo eling je hudiny ole hnyi hnyimakö Iehova; me ame tha senyin gan hmâ eling Saulo me at Isaraela hia.

HNYIMAKAN 12.

**K**E Samuela ame ha ka at Isaraela hia, ka habe, Wâ bi, oge hia but löng hia hoton hobun hofuc waleji öbun e ha könya, me otilâ tuhöbun. 2 Ke haba walang ang, me ame ngenu tuhöbun hnyi hnyimaköbun: ke iny' hingat ut, me huen dut; ke wâ bi e unyibun li lakuk: ke oge hia but ngenu hnyi hnyimaköbun hwân k' iny tiga thöth ke ne o but hnyi bong ang. 3 Iny' ang: ohnathu nya thö hnyi hnyimakö Iehova, me hnen hna hú: ia oge hom haleny bolok? ke hale ia asina oge hom? ke oge iyawö ia? ke oge oveci ia? ke oge kap hwaban únyi hnyi hnyamö ia he ka omúkâ li emakök can e? m' oge me he ka ham hmetu köbun. 4 Ke haingödra, ka habe, U je ca iyaw' öhmun, me oveci öhmun, ke ba únyi u je hom únyi ge ke at. 5 Me e ame ha ködra, ka habe, Iehova at ame ohnathoâ köbun, ke ame ohnathoâ aten adre hú minya, hnyi bong ang, a öbun e ca wâ ke únyi hnyi hnyâmök. Haingödra, ka habe, E but at ohnathoâ. 6 Haba Samuela ame ha ka tavat, ka habe, E bi Iehova, at ame otilö Mose me Arona, me hom je lakamöbun únyi hnyi hnyei Aigupito. 7 Anyin a wale todr' öbun walang ang, me inye he ka n' öbun hnyi hnyimakö Iehova hnyi ta je hwakecin hia thithö ae wisa anyi Iehova, wale e ame ányâ köbun, me ta je lakamöbun. 8 Haba hnyi úen ame o Jakob hnyi Aigupito, me ame tenge lakamöbun kö Iehova, me haba Iehova ame kunö Mose me Arona, ödre hom lakamöbun úheny Aigupito, me olab' ödrin hnyi dok eang. 9 Ke ödrin e hnying Iehova Khongudrin, me e ame úcü ödrin ka hnyi hnyamö Sisera, taben utbavat anyi Hazora, me ka hnyi hnyamen at Filisiti, me ka hnyi hnyamen than Moaba, me ödrin e vat mödrin. 10 Ke ödrin e tenge kö Iehova me ha, ka habe, Öhmun e hia but monu, anyin a öhmun e hia but hna degeci Iehova, me bi athnyaba ka je Baala, me Aseira: ke u me he walang ang ka omeli öhmun únyi hnyi hnyamen je iwahnaihmiöny möhmun, m' öhmun e he ka bi athnyabaem. 11 Me haba Iehova ame-kunö Jerubaala me Bedan, me Jefetha, me Samuela he ka omeli öbun únyi hnyi hnyamen je iwahnaihmiöny möbun igigilö, ke öbun e laba hnahic ut. 12 Ke öbun e wâ a ga o but köbun Nahasa, thaniny laku

Amona, me öbun e ha könya, ka habe, Ohe, e so e hu than he ka musi köhmun: ke so bi Iehova me anyibun than. 13 Ke walang ang, wâ bi than öbun e úca, me sumâtâ: ke wâ bi Iehova ame hia but otílâ tuhöbun. 14 Öbun e ne he ka outö Iehova, me bi athnyabainy, me löng hwan hofuc, me ca úkhin fucâ hnanyibu anyi Iehova, ke öbun e ne he bala bi me than minya a musi köbun ka hnu hotu Iehova Khongubun, awe, e so eling: 15 ke öbun e ne ca löng hoton hofuc ho Iehova, k' öbun e ne hanyâúâ hnanyibu anyi Iehova, awe, ame he ka iwahnaihmiöny möbun hnyamö Iehova, belâji me ka je lakamöbun. 16 Ke tot ju öbun walang ang me wâ únyi ang ae gan ame he ka ányâ Iehova hnyi hnyimaköbun. 17 Hawa, ca úen ang he ka meno hwit? Oge me he ka hongot kö Iehova, me e ame he ka kunâ hendreng me we; me me khan' öbun me wâhma-khmetoâ a e ti kong hwakecibun öbun e ányâ hnyi hnyimakö lehova, a ga sumatö tuhöbun. 18 Me Samuela ame hongot kö Iehova; me Iehova ame kunâ hendreng me we hnyi bong eling: me ame ot gan hmâ tavat hia thithö kö Iehova me Samuela. 19 Ke ame ha tavat hia kö Samuela, ka habe, Bethé hic hobi köhmun a lathnyabaem kö Iehova Khongom, m' öhmun e ca he ka mokcu: anyin a öhmun e hia but bi hanen ka anyihmun ta je hulö hia únyi eang ae kong, he ka sumatö tuhömun. 20 Haingö Samuela ka tavat, ka habe, Ca ot öbun: e hnathu öbun e hia but ányâ ta je hulö eang: ke so bi ca he öbun ka saú ga Iehova, ke bi athnyaba Iehova ge je hnyekubun ae bekhöt; 21 ke ca he öbun ka saú: ke helâe öbun e he ka he hoton ta je únyi baú ae ca khana he ka bi troban me möt, anyin ae ba önyen. 22 Anyin ame ca he Iehova ka hna degecâ lakeiny, únyi ge ien ae gan hmâ: anyin ae we Iehova he ka wi' öbun me hnân hing lakeiny. 23 Ke haba inya bi, ö iny ca he ka monu kö Iehova, he ka degec hiji öbun: ke oge me he ka n' öbun ge gethen ae so me wisa. 24 Ke hamöbun bi he ka outö Iehova, me bi athnyabainy hnyi hnathu me hnyekubun ae bekhöt: ke me únykúme th' öbun ta je únyi ae gan e ame hia but ányâ hobi köbun. 25 Ke öbun e ne he bala ka-ányâ hwakecin ae kong, awe, adre me he ka tha ohí' öbun me tuhöbun.

## HNYIMAKAN 13.

**K**E haba Saulo ame hwân he ka musi ke (thöte) je hunainy; ke e ame musi hnyi Isaraela hnyi lo li huna. 2 Ke haba Saulo ame úca hobi kâu kun ta thauzan at Isaraela; haba lo li thauzan ka e bi unyi Saulo hnyi Mikemas me hnyi bucen Beth-ela, ke haba khaca thauzan ka e unyi Jonathana hnyi Gibeá hnyi Beniamina: ke haba kolon tavat e ame ve kun' ödrin ka hnyi umödrin je uma mano. 3 Ke haba Jonathana ame kot lap tue anyin at Filisiti hnyi Geba, ke a löng ut at Filisiti. Ke haba Saulo ame tuâ trutru hnyi hnyeí hia thithö, me ha, ka habe, Löng ju öbun, at Heberu. 4 Ke a löng ut at Isaraela hia, ka habe, A hia but Saulo kot lap tue anyin at Filisiti, ke e bon dut at Isaraela minya ka at Filisiti. Me ame úkhacaköu tavat kö Saulo hnyi Gilegala.

5 Haba at Filisiti adre me úkhacaköu he ka vat me at Isaraela, thöte thauzan je kariota, ke siks thauzan tavat tabö hors. me tavat helâ me önyin köiö úseidra: ke adre me he me hunuma hnyi Mikemas, Beth-aven ke e deiö. 6 Ke a wâ but at Isaraela a g' adre vhet ut (anyin ame gâ on tavat,) haba tavat adre me ve lubaduöng hnyi je hmonop, me hnyot, me kic, me op. me hna hiny. 7 Ke haba keihen at Heberu ödrin e hia but he hanyâúâ Joridano ka hnyi hnyeí Gada me Gileada; ke haba Saulo me tiga e bi hnyi Gilegala, ke ame he hoton tavat hia thithö, me öbubuny.

8 Ke e ame halubahingen seven je bong, helâ me hna thu úen ga Samuela: ke ame ca o bi Samuela hnyi Gilegala ke ame vese thö tavat unyin. 9 Ke haba Saulo ame ha, ka habe, Hom but jem könya hudiny leú, me je hudiny ole. Me e ame hudo hudiny leú. 10 Ke e tiga um dö hudö hudiny leú, wâ bi, ame o thö Samuela; ke Saulo ame he ka úkhanö më me me iouny më. 11 Ke haingö Samuela, ka habe, leú u je hia but ányâ? Haingö Saulo, ka habe, Oge wâ a ga vese thö tavat gak, ke u tiga ca o waleji hnyi úen, me haba at Filisiti adre me úkhacaköu hnyi Mikemas; 12 anyin a wale oge me ha, ka habe, Ame he ka utut walang ang at Filisiti könya hnyi Gilegala, k' iny tiga ca hia but sumâtâ ibetengiö anyi Iehova: can e oge me ohwegiâ hnyekuk me hudo hudiny leú. 13 Me Samuela ame ha kö Saulo, ka habe, E monu

I. SAMUELA 14.

ányi u je ányá : u je ca tuö hnanyibu anyi Iehova Khongom, waleji e ame húna köu : ame we Iehova ka ohmâ dokhom dökhu hnyi Isaraela nyiele balua. 14 Ke walang ang ame ca he ka tet hmâ dokhom dökhu : ke Iehova ame hia but elâm at ae úcú me hnyekon bi, ke Iehova ame hia but úca at eling me me tuhan lakeiny, anyin a u je ca tuö únyi waleji Iehova ame húna köu.

15 Ke Samuela ame tot me he Gibeaa ai hnyi Beniamina úheny Gilegala. Ke Saulo ame aú tavat unyin, ke helâke siks haded. 16 Ke ame laba Saulo me Jonathana a nokon me tavat unyidru hnyi Geba hnyi Beniamina : ke haba at Filisiti andre me hunuma hnyi Mikemas. 17 Ke haba tavat húgúná, me ödrin e he úheny hnyi hna hunuma anyin at Filisiti a kun ta bunyen : haba ke bunyen ame hnyi gethen úheny Ofera me he hnyi hnyeí Sual : 18 ke ke bunyen ame saú hnyi gethen úheny Bethoronona : ke ke bunyen bi ame saú ka hnyi getheniny hnyigot cicö hnyigöulen bucen Zeboim hnyi hnyebuba.

19 Ke ba at leú fao hnyi hnyeí Isaraela hia : anyin a haingen at Filisiti, ka habe, Wá e nye he at Heberu ka bi hele vat me : 20 ke haba at Isaraela hia andre me hia he ka at Filisiti he ka khet je únyi hnân wia káná, me utetebelök, me je giwa, me je pik ; 21 ke so bi e hu gadra je fail hobi káu je pik, me je utetebelök, me je fao ae vheivhei, me je giwa ; me hnân khet je osöiny bolok. 22 Me haba hnyi úhen vat, me ba hele vat me ö andre me wá anyin tavat hia thithö ödrin e tha e me Saulo me Jonathana : ke so bi andre me hake wá unyi Saulo me Jonathana a nokon. 23 Ke e bi lap tue anyin at Filisiti ke ne o but hnyi gethen úheny Mikemas.

HNyimakan 14.

**K**E haba hnyi ke bong me Jonathana nöku Saulo ame ha ka hidróu, at ame hom tilâ anyin ta je únyi hnân vat, ka habe, Ötu he ka lap tue anyin at Filisiti hnyi ke keihen eji. Ke e ame ca thumeto kamen. 2 Ke Saulo ame laba hnyi obiny Gibeaa hnyi hmelen úö rimona hnyi Migeron : ke helâ me siks haded tavat unyin ; 3 me Ahia a nöku Ahituba, liamekeiny me Ikaboda, nöku Fineasa, nöku Eli, at bihut kö Iehova hnyi Silo, e ame khavâ efoda. Ke ca khana bi tavat a ga he but Jonathana. 4 Ke hnyi wanben li gethen

Jonathana ame elâm deny hnyin he ka he ka hnyi lap tue anyin at Filisiti, ke wale ke kic ae beú me újejöng hnyi ke keihen, me ke kic ae beú me újejöng hnyi ke ke keihen : ke Bozez ien khaca, ke Sene ien khaca. 5 Ame tot khaca kic ka hnyi hwadrö cicö Mikemas, ke haba khaca ka hnyi hwaiöu cicö Geba. 6 Haba Jonathana ame ha ka hidróu, at ame hom tilâ omjehen vat, ka habe, Ötu he ka hanyâúâ ka hnyi lap tue anyin tavat eang andre ca peritomonâ : ame ne he Iehova ka huliwa hobi kötin : anyin a e ba at ame musi kö Iehova he ka omelö, ame ne únyi ge tavat ae se, ame ne únyi ge tavat ae wakhalet. 7 Me ame thu káu at ame hom tilâ omjehen vat, ka habe, Ányâ hia thö únyi hnyi hnye-kon : hwiö thö, wá bi iny' ang unyâm hoton weny hnyekom. 8 Haba Jonathana ame ha, ka habe, Wá bi ötu me he ka hanyâúâ ka tavat, me omanen' ötu bi ködrin. 9 Ödrin e ne ha helâng kötu, ka habe, Todru, m' öhmun e me he köbu, awe, ötu me he ka tot bala, me ca he bi ködrin. 10 Ke ödrin e ne ha helâng, ka habe, Ölö th' öbu köhmun ; awe, ötu me he ka ölö thö ; anyin a hia but Iehova hn' ödrin kötu : ke walang haten kötu. 11 Ke ödrü me omanen' ödrü bi ka lap tue anyin at Filisiti : ke haingen at Filisiti, ka habe, Wá bi, ame o but at Heberu úheny hnyi jê op wale ödrin e lubaduöng hnyin. 12 Me ame thu aten lap tue kö Jonathana me at ame hom tilâ omjehen vat, ka habe, Ölö th' öbu köhmun, me öhmun e he ka omanenâ köbu ke únyi. Haba Jonathana ame ha ka at hom tilâ omjehen vat, ka habe, Ölö thö hotuk : anyin a hia but Iehova hu' ödrin ka hnyi hnyamen at Isaraela. 13 Ke Jonathana ame iyâw ge li benyin me li can, ke ame he hoton at hom tilâ omjehen vat : me ödrin e ta hnyi hnyimakö Jonathana ; ke haba at hom tilâ omjehen vat ame hling' ödrin hnyi hoton. 14 Ke haba hnyi hna hlingâ eling a bán, wale Jonathana me at hom tilâ omjehen vat ame ányâ me ame ne twente tavat, hnyi utkânâ ae úhnyúkong helâ me hafiny wadeny únyi hnân wia káná. 15 Ke e hu öbubuny hnyi hna hunuma, me hnyeí, me unyin tavat hia ; haba lap tue me hnyat húgúnâ ödrin e öbubuny minya : ke ame úk hmele-dran ; me gan hmâ hmönyin öbubuny. 16 Ke haba hnyat hmâká hnyi Saulo hnyi Gibeaa hnyi Beniamina ödrin e wá ; ke wá bi ame aú but tavat, ke andre me kec monu ehele.

## I. SAMUELA 14.

17 Ke haba Saulo ame ha ka tavat unyin, ka habe, Aú thö tavat, me wá ie at a hia gatin. Ke ödrin e aú, me wá bi, e hiö Jonathana me at a hom tilâ omjehen vat. 18 Me haba Saulo ame ha kö Ahia, ka habe, Hom but jem tang tangen Khong. Anyin a e unyin lakon Isaraela tang tangen Khong hnyi úen e. 19 Ke Saulo ame tiga úhnenamö me at bihut, me ame tiga hu mede hnyi hna hunuma anyin at Filisiti, me ame gau tot: me Saulo ame ha ka at bihut, ka habe, Me tot ju. 20 Ke Saulo me tavat hia unyin adre me úkhacaköu me he ka hnyi vat: ke wá bi, ödrin e úkotköuá lahiödrin, ke ti gan hmá imonumonuny. 21 Ke haba at Heberu tavat ödrin e tha he unyin at Filisiti ehac, a tavat adre me tha he mödrin ka hnyi hna hunuma únyi hnyi hnyeí igigilö; me haba hnyat eling ödrin e hwiö he ka tha ödra me at Isaraela unyi Saulo me Jonathana. 22 Helâe minya hnyat Isaraela hia a hnyat adre lubaduöng hnyi hnyeí ae hut hnyi Eferaima, k' ödrin e löng a ga kec ut at Filisiti, me ödrin e hnyi hnu ödrin hwegi-ödrin hnyi vat. 23 Me haba Iehova ame omelö at Isaraela hnyi bong eling: ke adre me vat ke ne o but ka hnyi Beth-aven. 24 Ke a vec ut Isaraela hnyi bong eling: ke haba Saulo ame thawá hwegiá tavat, me ha, ka habe, Hnaúhangö a ame he ka han ke ne o but sahac, me inye me hia thö bi hwaban ka je iwahnaihmiöny mönya. Ke ame ca han bi tavat hia. 25 Ke ame o but tavat hia hnyi hnyot, ke wale hani eú hon káná. 26 Ke a o but tavat hnyi hnyot, me wá bi, ame khula hani: ke so bi e ba at ame iná hnyamen ka hnyi huyimen; anyin a tavat ödrin e outen hnaúhangö. 27 Ke haba Jonathana ame ca löng bi hnen kamen hna khemanyin ka tavat: ke e ame iná hnyiban uci wale hnyi hnyamen, me hneú e hnyi hani, me hai hnyamen ka hnyi hnyimen; me ame metâ li emakan. 28 Me ame ha ke at, ka habe, Haba kâmâm ame khemanyin hwege ka tavat, me ha, ka habe, Hnaúhangö at ame he ka han hnyi bong ang. Ke e sényin dut tavat. 29 Haba Jonathana ame ha, ka habe, Cica ame ovecá hnyeí: wá bi e metâ but li emakök únyi hnyi hnök hna drem ke ong hani eang. 30 Hawa, a ne han ganá tavat eja je únyi ödrin e húgúná ge je iwahnaihmiöny mödrin wale adre me hlo! ke ame ca se hia hanitin ge at Filisiti walang ang. 31

Ke ödrin e kot at Filisiti hnyi bong eling hwán Mikemas ke ne o but hnyi Ajalona: ke ame sényin gan hmá but tavat. 32 Ke ame gá but tavat ka sei, me hom je mamoe, me je bolok, me je nokon kau, me hlingá eú hnyi káná: ke tavat ödrin e tha han je meno me dren. 33 Ke adre me thumetu Saulo, ka habe, Wá bi, ame monu tavat kö Iehova, ödrin e han meno me dren. Me e ame ha, ka habe, Öbun e hia but iyawö; tetebulo thö eáú könya ke veto ae gan. 34 Ke haba Saulo ame ha, ka habe, Vese thö ka tavat me ha ködra, ka habe, Ve hom but könya halebun je bolok, me je mamoe, me hlingá eang, me han; ke ca ányá hulö kö Iehova he ka tha han me dra. Ke haba tavat hia ödrin e ve hom haledrin je bolok hnyi lit e, me hlingá eling. 35 Ke Saulo ame otilá taben hut kö Iehova: wale taben hut a bán e ame otilá kö Iehova.

36 Ke haba Saulo ame ha, ka habe, Ötin he ka at Filisiti hnyi hnyinghet, me kuc ödrin ke ne o but hnyi haolany me me ba köluidrin. Me haingödrin, ka habe, E so u me ányá weny hnyekom. Ke haingen at bihut, ka habe, Ötin a me he ka hakeny ka Khong. 37 Haba Saulo ame elâm unyin Khong, ka habe, Hawe, oge me he ka he úcon at Filisiti? hawa, u me he ka hn' ödra ka hnyi hnyamen at Isaraela? Ke e ame ca thu káu hnyi bong eling. 38 Me haingö Saulo, ka habe, Ai öbun öbun je taben tavat, me me khan' ötin me wáhmakhmeto únyi ua monu eang hnyi bong ang. 39 Anyin a kia inya Iehova at omelö at Isaraela, me ame ne e unyi Jonathana a nökkuk me hamen he ka mok. Ke ame ca thu káu ke at unyin tavat hia. 40 Me e ame ha ka at Isaraela hia, ka habe, Hamöbun he ka tot hnyi ke keihen, ke inya me Jonathana a nökkuk hnyi ke keihen. Me haingen tavat kö Saulo, ka habe, Hamâm. 41 Me Saulo ame ha kö Iehova Khongu Isaraela, ka habe, Omanená thö at ae wisa. Ke ame kú Saulo me Jonathana ge ugleköb, ke gufa bi tavat. 42 Me haingö Saulo, ka habe, Ugleköbí nya thö me Jonathana nökkuk. Me ame kú Jonathana. 43 Me haba Saulo ame ha kö Jonathana, ka habe, Ha thö könya únyi u je ányá. Me Jonathana ame ha káu, ka habe, Oge drem thibi hani hnyi obiny uci hnyi hnyamök; ke wá bi hamök he ka mok. 44 Ke haingö Saulo, ka habe, Ame he Khong ka ányá helâe me bí hanen.



## I. SAMUELA 15.

ke e hnathu u me he ka mok, Jonathana. 45 Me ame ha tavat kö Saulo, ka habe, Hawa, ame he ka mokcu Jonathana at ame omelö gånâ at Isaraela? Ohe, kia öhmun Iehova, ame ca he ka kölu ke leünen ban; anyin a e ame hia but tha huliwa me Khong hnyi bong ang. Me haba tavat adre me omeli Jonathana, me ame ca mok bi. 46 Ke Saulo ame hmetu úheny hnyi hna hnu at Filisiti: k' ame vese at Filisiti ka hnyi hnödra bi.

47 Ke hnyi úen Saulo ame kap dökhu Isaraela, me e ame vat me je iwahnaihmiöny mē hia igigilö, a at Moaba, me laku Amona, me at Edoma, me je thaniny Zoba, me at Filisiti: ke hwege hudrin hia e ame he úcon. 48 E ti hwege me kot at Amaleka, me omelö at Isaraela únyi hnyi hnyamen tavat adre me hügún' ödra.

49 Ke walang laku Saulo, Jonathana, me Ishivi, me Maleki-sua: ke walang ien lakon li hlu; jia Meraba wale atö, ke Mikala ien wakeiat: 50 ke Ahinoam ien öö Saulo, e nöku Abimaza: ke haba ien taben anyin vat jia Abinera, nöku Neri, wale ke kamö Saulo. 51 Ke Kiso kamö Saulo; ke haba Neri kamö Abinera, wale noku Abiela.

52 Ke e hwege vat me at Filisiti hnyi je bong hia bongu Saulo: ke ame ne wâ but Saulo ke je hnyat ae hwege, me tavat ae ba ot, me e ame hom bi kâu.

### HNYIMAKAN 15.

**K**E haba Samuela ame ha kö Saulo, ka habe, Iehova ame kunö nya he ka hú u me thaniny lakeiny a at Isaraela: ke löng ju walang ang hofuc ho Iehova. 2 Walang hna ha hnö Iehova tuhan sabaoth, ka habe, Oge hia but bi haten hna ányâ hnö Amaleka kö Isaraela, waleji e ame tot kâu eú hnyi gethen, e ka ölö e úheny Aigupito. 3 Ke he thö walang ang, me kuc Amaleka, me tha ohia anyidrin ta je únyi hia, ke ca he ka betenge gadrin: ke so bi kot hia thö obaga me omomo, je mendreng me at ame i, je bolok me mamoe, je kamela me asina.

4 Ke haba Saulo ame úkhacaköuâ tavat, me öú ödrin hnyi Telaim, ödrin tu haded thauzan tavat he hon kânâ, me ten thauzan at Juda. 5 Ke ame o but Saulo ka hnyi taun anyi Amaleka, me khöu mokut hnyi hnyigöulen bucen. 6 Ke haba Saulo ame ha ka at Keni, ka habe, E, kec dö öbun,

utut ge at Amaleka, wâ oge ne he ka tha ohí' öbun mödrin: anyin a öbun e betenge ge lakon Isaraela hia waleji hnyi úhedrin jem úheny Aigupito. Me ame he but at Keni ge at Amaleka. 7 Ke Saulo ame kot at Amaleka hwân hnyi Havila wale gethen ame he Sura ai, cicö Aigupito. 8 Ke e ame hom meli Agaga thaniny at Amaleka, ke adre me tha ohia tavat hia ge hele vat. 9 Ke Saulo me tavat ödrin e omeli Agaga, me je mamoe ae so, me bolok, me je meno ae pipikenyâ, me je nokon mamoe, me ta je únyi hia ae so, ke ca wedrin he ka tha ohia ta je únyi e: ke haba ta je únyi hia ae kong me únyi baú adre me tha ohia.

10 Me ame o hofuc ho Iehova kö Samuela, ka habe, 11 Inya oge me ietra hnök hna otilö Saulo me than: anyin a e ame hmetu but únyi hnyi hnen hna he hotuk, ke e ame ca ányâ hnök je hna húna. Me ame hmönyi Samuela; me tenge kö Iehova hnyi hnyinghet hia. 12 Ke ame vesákong Samuela he ka úkhanö me Saulo hnyi hnyomakatu: ke adre me thumetu Samuela, ka habe, A o thö Saulo hnyi Karemela, ke wâ bi e ame otilâ haten hobi kâu, k' ame hwíö thö, me he but, me utut Gilegala ai. 13 Ke ame o but Samuela kö Saulo: ke Saulo ame ha kâu, ka habe, E so u hnahic ga Iehova: ke oge hia but ányâ únyi a húna ga Iehova. 14 Ke haingö Samuela, ka habe, Ieú bongon je mamoe ame tenge hnyi li hnyikönyök, me je bolok ame kuku k', inya oge me löng? 15 Me Saulo ame ha, ka habe, Adre me hom únyi ge at Amaleka: anyin a haba tavat adre me omelö je mamoe me je bolok ae so hnân hut kö Iehova Khongom; ke öhmun e hia but ti ohia je kolon. 16 Me haba Samuela ame ha kö Saulo, ka habe, Me todru, me oge me he ka thumetu u ga hofuc a ha könya Iehova eja hnyinghet. Me haingen, ka habe, ha thö. 17 Haba Samuela ame ha, ka habe, Eja ke ne u je ne at ae úhnyúkong ehac, hawa, adre ca hum u hnân homakan je tribu Isaraela? Me Iehova ame hú u m' u me thaniny at Isaraela; 18 ke Iehova ame kunö u he ka vheno ke keihen hnyei, me ha köu, ka habe, He thö, me ti ohia but tavat ae kong a at Amaleka, me vat ju mödra ke ne o but ame hi' ödra. 19 Ke ieú gam a u je ca löng hofuc ho Iehova, ke u je gâ he ka hom ta je hna hügúnâ, me ányâ únyi ae kong huyi hnyimakö Iehova? 20 Ke Saulo ame ha kö Samuela,

I. SAMUELA 16.

ka habe, Ohe, oge hia but löng hofuc ho Iehova, ke oge me vheno gethen wale a kunö nya hnyin Iehova, ke oge hia but hum Agaga thaniny at Amaleka, ke oge me hia but ti ohia at Ameleka. 21 Ke haba tavat, me, ödrin e hom ta je hna hû-gûnâ, a ta je mamoe, me ta je bolok, je ûnyi ae ûnyi hnathu hnân hake ip, he ka bi hut kö Iehova Khongom hnyi Gilegala. 22 Haba Samuela ame ha, ka habe, Hawa, e hu senyin kö Iehova ge je hudiny leû me je hut, helâ me hna löng hoton hofuc ho Iehova? Wâ bi, e beönua hna löng hon hut, me beönua, hna hnu hoton, hon pipikhenyainy je mamoe бага. 23 Anyin a haba hanyâûâ, me helâ me ûkongon bi khong, ke haba ûjông, me helâ me ûkongon hmi ka hnatheat, me je idola. Anyin a u je hia but hna degecâ hofuc ho Iehova, awe, e ame hia but hna degeci u, me u me ca than dut. 24 Ke Saulo ame ha kö Samuela, ka habe, Oge hia but ânyâ hulö: anyin oge hia but hanyâûâ hna hûna hnö Iehova, me hwâm hofuc: anyin oge outen tavat, me löng hodrin. 25 Ö u hna but walang ang anyik hulö, me tha hmetu mönya, me inye he ka khudrung kö Iehova. 26 Haingö Samuela kö Saulo, ka habe, Oge me ca he ka tha hmetu möu: anyin a u je hia but hna degecâ hofuc ho Iehova, ke Iehova ame digic u, me u me ca he ka than ka at Isaraela. 27 Ke Samuela ame hwiö he ka he but, me e ame kât baten khaûen, me ame khekhe but. 28 Ke haba Samuela ame ha kâu, ka habe, Iehova ane hia but kia dôkhu Isaraela hnyi bong ang ûnyi gam, me ham e ka ke at ame laba hakekenyi u, ae so hom. 29 Ke haba khaca, ame ca he ka thoi me ietra Man mani Isaraela: anyin a ca at, me me ietra. 30 Ke e ame ha, ka habe, Oge hia but ânyâ hulö: ke so bi ö u ogânö nya walang ang hnyi hnyimakan wahingatinny lakeik, me hnyimakan at Isaraela, ke u me he ka tha hmetu mönya me inye he ka khudrung kö Iehova Khongom. 31 Me Samuela ame hmetu hotu Saulo; ke Saulo ame khudrung kö Iehova. 32 Me ame ha Samuela, ka habe, Hum Agaga thö jem kõnya, thaniny at Amaleka. Ke Agaga ame he hmecik kâu. Ke haingö Agaga E hnathu e hia but hinyin mok. 33 Ke Samuela ame ha, ka habe, Hnen ânyâm hele vat hna öba nokon je momo, helâe adre me he ka öba nokon hinyâm unyin je momo. Ke Samuela ame susubö Agaga hnyi hnyimakö Iehova hnyi Gilegala.

34 Ke Samuela ame he Rama ai; ke Saulo ame ölö ka hnyi hnyaban hnyi Gibea anyi Saulo. 35 Ke ame ca o hmetu Samuela kö Saulo ke ne o but hnyi bong e ame mokcu hnyin: ke Samuela ame tengiö Saulo; ke Iehova ame ietra hna otilö Saulo ka thaniny at Isaraela.

HNHYIMAKAN 16.

**H**ABA Iehova ame ha kö Samuela, ka habe, U me he ka tengiö Saulo ke ne o but kehö anyin oge me degecâ me me ca musö at Isaraela? Öunöngötâ thö ânyâm faoiny meno ge wakaco, ke he thö, me oge me he ka kunö u kö Jese at Bethe-leema: anyin a oge hia but penapena ke than hobi kõnya unyin lakon. 2 Ke haingö Samuela, ka habe, Oge me he ka hawa? ame he Saulo ka hlingö nya ame ne löng bi. Haba Iehova ame ha, ka habe, U me he ka tha hom möu ke nokon kau, me ha, ka habe, Oge me o he ka hudo kö Iehova. 3 Ke u me he ka hawo Jese he ka hnyi hanen hut, ke oge me he ka omanenâ köu ûnyi u me he ka ânyâ: ke u me he ka hû hobi kõnya at oge me he ka ha köu. 4 Me Samuela ame ânyâ ûnyi ame ha Iehova, me o hnyi Bethe-leema. Ke haba wahingatinny taun ödrin e ûkhanö me, me öbubuny, me ha, ka habe, U me o hnyi úsoköu? 5 Me haingen, ka habe, Oge me o hnyi úsoköu he ka bi hut kö Iehova: okabi öbun dö, me tha he thö mönya ka hnyi bi hut. Ke e ame okabi Jese me lakon, me haw' ödrin he ka hnyi hanen hut. 6 Ke ödrin e o but, me e ame ö Eliaba me ha, ka habe, E hnathu wale at adre hû kö Iehova hnyi hnyimakan. 7 Ke Iehova ame ha kö Samuela, ka habe, Ca wâ hnyimakan bi, me ibeûen; anyin ae ca wek bi at e: anyin ame ca wâ ga Iehova helâ me at; anyin a haba at ame wâ ûnyi ae manen, ke Iehova ame wâ hnyök. 8 Me Jese ame hawo Aminadab, me kunâ ka hnyi hnyimakö Samuela. Ke e ame ha, ka habe, Iehova ame ca úca at ang. 9 Me Jese ame kunö Sama he ka he. Ke haingen, ka habe, Iehova ame ca úca minya at ang. 10 Ke Jese ame ve kunâ lakon a seven he ka he hnyi hnyimakö Samuela. Me Samuela ame ha kö Jese, ka habe, Iehova ame ca úca hnyat eang. 11 Me haingö Samuela kö Jese, ka habe, Hawa, e ba minya lakon? Me haingen, ka habe, Khaca biju, wale wakeiat hmönyin ke, wâ bi, e ame tuö je mamoe. Ke haingö Samuela kö Jese, ka

## I. SAMUELA 17.

habe, Úkhúnöng dö he ka hom : anyin a ötin e ca he ka laba ju ke ne o but e ame o thö. 12 Ke e ame úkhúnöng, me hom e. Kee dra makan, me hmanenang hnyimakan, me so ka wâ. Haba Iehova ame ha, ka habe, Todró, hú but e : anyin ae at e. 13 Ke haba Samuela ame hom faoiny wakaco, me hú e hnyi wanben je liamekeiny mē : me ame o hwege hanu Iehova hu Davita hwán hnyi bong eling. Me Samuela ame tot me he Rama ai.

14 Me ame hia but he digic Saulo hnen hanu Iehova, me ame ohmakâ e hnen hanu ae kong únyi ga Iehova. 15 Ke haba lathnyabai Saulo ödrin e ha kâu, ka habe, Wâ bi, ame ohmaki u walang ang hanu ae kong únyi ge Khong. 16 E so u me he, tuhömun, ka kun' öhmun a lathnyabaem hnyi hnyimákâm he ka elâm at ae khana he ka kokot kitara : ke e ka o but köu hanu ae kong únyi ge Khong, me e ame he ka ányâ ge hnyamen, me u me he ka so but. 17 Ke haingö Saulo ka lathnyabainy, ka habe, He thö ka elâm walang ang at ae khana wia ányâ únyi khumöng, me hom jem könya. 18 Me ame thu ke hidróu me ha, ka habe, Wâ bi, oge hia but wâ ke at nöku Jese, at Bethe-leema, ae khana ányâ únyi khumöng, ke e at ae hwege hmönyin, me at vat, me metâ hnyi hwan je hofuc, ke e at ae hmanenang, ke e unyin Iehova. 19 Anyin a wale habe Saulo ame kunâ je úthumetu kö Jese me ha, ka habe, Kunö Davita thö a nokom könya, wale a tha laba me je mamoe. 20 Haba Jese ame hom asina ame hijen hok areto, me tap waina me ke nokon got, me kunâ a deny Davita a nokon kö Saulo. 21 Ke Davita ame o but kö Saulo, me tot hnyi hnyimakan : kee gan hmâ hnen hna hnyok kâu ; ke e at hom tilâ anyin ta je omjehen vat. 22 Ke haba Saulo ame úkhúnöng kö Jese, he ka ha, ka habe, Ama me tot Davita hnyi hnyimakök, anyin oge me betenge gan. 23 Ke hnyi üen ame o but kö Saulo hanu ae kong únyi ge Khong, me haba Davita ame hom kitara me ányâ ge hnyamen : me ame menâ Saulo, me so, me ame hia unyin hanu ae kong.

### HNYIMAKAN 17.

**K**E haba at Filisiti adre me úkhacaköuâ anyidra je utbavat he ka vat, ke adre me úkhacaköu hnyi Soko, i Juda, me hunuma hnyi wanben Soko me Azeka hnyi Efesidamim. 2 Ke Saulo me at Isaraela adre

me úkhacaköu me hunuma hnyi hnyigöulen bucen e Ela, me tot metâ he ka vat me at Filisiti. 3 Ke haba at Filisiti adre me tot hon bucen hnyi ke keihen, k' ame tot at Isaraela hon bucen hnyi ke keihen ; ke e bi thop hnyi wanbödra. 4 Ke ame he but at ae nua hwegien únyi hnyi hna hunuma anyin at Filisiti, adre hwenyi ien Goliatha, at Gatha, haba ibeüen me siks je kubit ke khaca hnyain. 5 Ke e ame bicâ hnabinybak bras, me khavâ úkhaüen vat a fao ; ke faiv thauzan je sekel bras ihmakiny úkhaüen. 6 Ke e hu li unen bras hnyi li can, me ke unen bras hnyi wanben li bajebenyin. 7 Ke haba taben anyin ö, me helâ me ütöiny únyi hnân hwâwâ mano ; ke haba homakan anyin ö, me, siks haded je sekel fao ihmakiny : k' ame he hnyi hnyimakan, at ame hom tilâ anyin bec. 8 Ke e ame tot me hongot ka je utbavat anyin at Isaraela, me ha, ködra, ka habe, Ieü gabun öbun e ok he ka tot metâ hnyi vat ? hawa, ca at Filisiti bi nya, ke öbun lathnyabai Saulo ? Uca thö ke at gabun, me hamen he ka utut könya. 9 Ame ne khana he ka vat mönya me hlingö nya, awe, öhmun e he ka bi athnyaba köbun : ke oge ne tuk me hlingâ, awe, öbun e he ka bi athnyaba köhmun me huliwa köhmun. 10 Haingen at Filisiti, ka habe, Inya oge me humbasö je utbavat anyi Isaraela hnyi bong ang ; kunâ jem könya ke at m' öhmu me he ka úkúc. 11 Ke haba Saulo me at Isaraela hia adre me löng ta je hofuc hwan Filisiti, me ödrin e öbubuny me ödrin e gan hmâ ot.

12 Ke haba Davita, me nokon at Eferatha, adre hwenyi ien Jese, at Bethe-leemajuda ; ke eit lakon obaga : ke e at ae hingat ut hnyi je bong bongu Saulo, ke e hingat ae hnathu unyidra. 13 Ke ame tha he hotu Saulo ka hnyi vat kun ta laku Jese a lakon ae gan : Ke haba ien ta lakon a kun ödrin e hnyi vat, me jia Eliaba a atö, me Aminadab a utangköu mē, me Sama a kuniny. 14 Ke Davita a wakeiat : ke ame he hotu Saulo ta hnyat a kun ae gan. 15 Ke Davita ame labö he úheny unyi Saulo he ka tuö je mamoe haleny kamen hnyi Bethe-leema. 16 Ke ame labö hakekeny at Filisiti hnyi je hnyomakatu me sahac, me omanenâ e bi hnyi fâte je bong.

17 Ke haba Jese ame ha kö Davita a nokon, ka habe, Hom dö walang ang ka latuhâm a kun, khaca efa hwit eang adre le, me je areto eang a ten, me hom mweimweiâ ka hnyi hna hunuma ka latuhâm a

I. SAMUELA 17.

kun: 18 me hom je fromage a ten ka taben anyidrin je thauzan, me wâ hawa ge latuhâm a kun, me kap anyidrin haten. 19 Ke Saulo, mödrin, me at Isaraela hia thithö ödrin e labö vat me at Filisiti hnyi hnyigöulen bucen Ela. 20 Ke Davita ame vesâkong, me hna je mamoe ka at ame tuö, me hom je únyi me he, helâ me Jese ame húna kâu; ke a ame o but hnyi hnen je kat k' ame tiga he ka hnyi vat je utbavat ke ödrin e tiga sue. 21 Ke haba at Isaraela me at Filisiti ödrin e ve tot metâ, ke vat cicö ke vat. 22 Ke Davita ame hna anyin ta je únyi ka at ame tuö ta je únyi, me wadring ka hnyi hna vat, me he me iouny me latuhan. 23 Ke e ame tiga úhnenamö mödrin, me wâ bi, ame o but at ae beönua hwegien, at Filisiti úheny Gatha, Goliatha ien, únyi hnyi je vat anyin at Filisiti, me fuc helâ me hna labö ha: ke a löng ut Davita. 24 Ke haba at Isaraela hia ödrin e wâ at, me ödrin e kec gan, me ot gan hmâ. 25 Me ame ha at Isaraela, ka habe, Öbun e wâ at eang ame o? ame o he ka humbasö at Isaraela: ke haba at ame he ka hlingâ, me ame he than ka otenâ gan hmâ omjeú, me ham kâu nokon hlu, ke adre me he ka hna gufa lap anyin kamen hnyi Isaraela. 26 Haba Davita ame ha ka tavat adre me tha tot mē, ka habe, Ieú adre me he ka ânyâ ka at, at ame he ka hlingâ at Filisiti e, me ohia hmehma únyi ge at Isaraela? anyin a ia at Filisiti ang adre ca peretomonâ, me e ame he ka humbasö je vat anyin Khong ae möt? 27 Ke ame thu kâu tavat helâe ge ta je únyi, ka habe, Helâe adre me he ka ânyâ ka at ame he ka hlingâ. 28 Ke haba Eliaba a tuhan ame löng hnyi úen e ame úhnenamö me tavat; k' ame ubâhlâ hmönyin anyi Eliaba kö Davita me e ame ha, ka habe, U je o eang kâ ieú? me u je hna kö ia je ong mamoe hnyi hnyebuba? Oge me wâ bi gan gam, me hnyekom ae monu; anyin a u je he jem he ka hnyi wâ vat. 29 Ke haingö Davita, ka habe, Ieú oge ânyâ walang ang? Hawa, e ba can? 30 Ke e ame hwiö únyi gan, me ha helâe ka ke at: k' ame thu hmetu bi kâu tavat helâ me hofuc a bân. 31 Ke a löng ut tavat hofuc ho Davita, me ödrin e thumetu Saulo; me e ame hawâ. 32 Ke Davita ame ha kö Saulo, ka habe, Ca he ke at ka ot gan; haba inya athnyabaem oge me he ka vat me at Filisiti ang. 33 Ke haingö Saulo kö Davita, ka habe, E ca khanö u he

ka he úcon at Filisiti eling me vat mē: anyin a u thöth ke e at vat hwân e tiga thöth ke ne o but ang. 34 Me Davita ame ha kö Saulo, ka habe, Inya athnyabaem oge me tuö je mamoe hale cica; k' ame ne o but liona ame ne bea, me hom ong mamoe únyi hnyi hnahat meno, 35 me oge me hnu, me kot, me omelö únyi hnyi hnyimen: ke e ame tot könya me oge me kât wainy, me kot, me hlingâ. 36 Inya athnyabaem oge me kot liona me bea; k' ame he at Filisiti ang adre ca peritomonâ ka helâ me ke at gadru, anyin a e ame humbasö je vat anyin Khong ae möt. 37 Ke ame ha Davita, ka habe, haba Iehova at ame omeli nya únyi hnyi benyin liona me bea, me e ame he ka omeli nya únyi hnyi hnyamen at Filisiti eling. Ke haingö Saulo, ka habe, he thö, k' ame he Iehova ka tha e möu. 38 Me haba Saulo ame okhavö Davita ge anyin úkhaú, me obicâ e ge hnabinybak bras, ke e ame okhavâ e ge úkhaúen vat. 39 Ke Davita ame húkálâ anyin hele vat hon úkhaúen, me e ame hwân he ka he; k' ame tiga ca bia but ná únyi e. Me haingö Davita kö Saulo, ka habe, E ca khanö nya he ka he me ta je únyi eang; anyin oge me tiga ca ná. Me Davita ame uny hmetu but. 40 Ke e ame hom anyin uci hnyi hnyamen, k' ame úca je veto a thabúng ae haúhaú únyi hnyi wagewe, me hitangen hnyi tangen tang, a tangen at tuö mamoe; me koloú hnyi hnyamen: ke e ame hakekeny ka at Filisiti. 41 Ke ame he at Filisiti, me hakekeny kö Davita; ke ame bân at ame hom tilâ bec. 42 Ke ame bwele at Filisiti me ö Davita, me e ame oúnyibâúâ e; anyin a e tiga thöth, ke hngihngidra, me hmanemang hnyimakan. 43 Ke ame ha kö Davita at Filisiti, ka habe, Iny kuli, me u me o könya me je uci? Me haba at Filisiti ame hangö Davita ge je khongon. 44 Ke haingen at Filisiti kö Davita, ka habe, Aiö u könya, me oge me he ka ham unyâm ka omeno ame gâ, me omenoiny hnyot. 45 Ke haingö Davita ka at Filisiti, ka habe, U me o könya me hele vat, me ö, me ö a telat; ke inya oge me o köu hnyi iö Iehova tuhan sabacth, Khongon je utbavat anyi Isaraela, wale u je hia but humbasö. 46 Ame he Iehova ka hnö u ka hnyi hnyamök hnyi bong ang; ke oge me he ka kuc u me subâ degecâ bâm; ke oge me he ka ham unyin je utbavat anyin at Filisiti ka omeno ame gâ, me omeno a

## I. SAMUELA 18.

binyin hmeledrany hnyi bong ang ; me me he hmeledrany hia ka wâhmakhmeto a e bi Khong unyin at Isaraela : 47 me me he minya úkhacaköu eang ka wâhmakhmeto a Iehova ame ca úhömeli ge hele vat me ö : anyin a haba vat anyi Iehova, me e ame he ka hn' öbun ka hnyi hnyamöhmun. 48 Ke ame todrö at Filisiti, me he me hakekeny he ka úkhanö me Davita, me haba Davita ame wadring logot ka hnyi vat he ka úkhanö me at Filisiti. 49 Ke Davita ame inâ hnyamen ka hnyi tang, me hom únyi hnyin ke veto, me kúlúâ, me ame hwadâ hnyi bariny at Filisiti ; me ame didrut veto hnyi bariny, me e ame ta but hnyimakan hnyikánâi. 50 Me e hwege Davita hon at Filisiti ge koloú me veto, me kot at Filisiti me hlingá e ; ke ba hele vat hnyi hnyamö Davita. 51 Ke Davita ame wadring me tot hon at Filisiti, me kát anyin hele vat, me oc ut únyi hnyi tangen, me hlingá, me subâ degecâ ban. Ke a wâ but at Filisiti a ga mokcu anyidrin at ae beönua hwegien, me ödrin e kec. 52 Me ame todrö at Isaraela me at Juda me sue, me hnu at Filisiti ke ne o but hnyi Gai, me je homagöuleny Ekerona. Ke ame ta tot tavat adre át dö a at Filisiti eü hnyi gethen ame he Saraim ai, ke ne o but hnyi Gatha, me Ekerona. 53 Ke a hmetu lakon Isaraela úhedra hnyi hna hnu at Filisiti, me ödra adre me sö anyidra ta je únyi. 54 Ke Davita ame hom ban at Filisiti, me hom e Jerusalema ai ; k' ame ip omjehen vat eiö hnyi umen uma mano.

55 Ke hnyi úen Saulo ame ö Davita ame he ka úkhanö me at Filisiti, me e ame ha kö Abinera taben anyin vat, ka habe, Abinera lö, nöku ia hidröu e? Haingö Abinera, ka babe, Kia inya than ae ca khandö nya. 56 Ke haingen than, ka habe, Hnö thö, nöku ia thöth e. 57 Ke Davita ame hmetu úheny hnyi hna kot at Filisiti, me Abinera ame hom e, me hom kö Saulo, ke e hnyi hnyamen ban at Filisiti. 58 Ke haingö Saulo kâu, ka habe, Hidröu lö, u nöku ia? Me Davita ame thu, ka habe, Inya nöku Jese a athnyabaem at Bethleleema.

### HNYIMAKAN 18.

**K**E haba hnyi úen e ame umö fuc kö Saulo, me haba hnyeku Jonathana ame hwege hnyok kö Davita, ka ame betenge

kâu Jonathana helâ me e ame ka hnyokâ hing hanon bi. 2 Ke haba Saulo ame hom behânâ hnyi bong eling, k' ame ca hna he ka hmetu ka hnyi hnyaban kamen. 3 Me haba Jonathana me Davita ödrü me úhi-hinyköu, anyin a e ame betenge gan helâ me e ame betenge kâu bi. 4 Me Jonathana ame uny jut anyin úkot wale e ame khavâ, me ham kö Davita me me khaúen bi, me anyin minya hele vat, me cafana, me wen minya hnyekon. 5 Ke Davita ame labö he ka hnyi je hna kunâ kâu hnö Saulo, me metâ hwakecin : ke Saulo ame otilâ e hon aten vat, k' ame so ka tavat hia, me lathnyabai Saulo.

6 Ke hnyi úen adre me o, wale Davita ame hmetu úheny hnyi hna kot at Filisiti, me ame he omomo únyi hnyi ta je taun hia hnyi Isaraela, k' ödrin e khumöng me bibiâ he ka úkhanö me Saulo, me je bwi-nybet, me senyin, me je únyi khumöng. 7 Ke je momo ödrin e sithwanân hnyi bibiâ, ha habe,

Saulo ame hia but kot haniny je thauzan,

Ke Davita bi, haniny je ten thauzan, 8 Ke Saulo ame hmönyin gan hmâ, ke kong kâu hofuc eling ; ke haingen, ka habe, Ödrin e hna je ten thauzen kö Davita, ke ödrin e hna könya je thauzan thibi : awe, ieú hmetu bi, ama hobi kâu but dökhü? 9 Ke Saulo ame ecmakö Davita hwân hnyi bong eling.

10 Ke nyi ame o but kö Saulo hanu ae kong únyi ge Kkong, ke e ame perofeta hnyi wanben umen uma : ke Davita ame kokot ge hnyamen helâ me ta je bong : ke e hnyi hnyamö Saulo ö. 11 Ke haba Saulo ame khúâ ö ; anyin a haingen, ka habe, Oge me he ka dá fineci Davita ka hnyi hnyeige uma. Ke Davita ame olo naúâ anyin ö. 12 Ke haba Saulo ame outö Davita anyin a e bi Iehova unyin, ke e hia but unyi Saulo. 13 Ke Saulo ame úsâkâüö mē, me otilâ e hnân taben thauzan ; ke e ame didrut me didrö hnyi hnyimakan tavat. 14 Ke Davita ame ányâ metâ hnyi ta je hwakecin ; ke e bi Iehova unyin. 15 Ke a wâ but Saulo a e ame ányâ metâ me e ame outen. 16 Ke ame betenge Isaraela hia me Juda hia ga Davita ; anyin a e ame didrut me didrö hnyi hnyimaködrin.

17 Ke Saulo ame ha kö Davita, ka habe, Wâ bi nöku hlu a atö jia Meraba, oge me he ka ham köu me áiâm : ke so bi u me he ka hwege bi singik, me vâtâ je vat anyi

Iehova. Anyin a haingö Saulo, ka habe, E so e me ca kot e ge hnyamök, ke so bi hamen hnyamen at Filisiti he ka kot. 18 Ke haingö Davita kö Saulo, ka habe, Iny ia? ke ieu soik, me lap anyi cica hnyi Isaraela, me inye he ka úngon than? 19 Ke hnyi úen adre me he ka ham Meraba hlu nöku Saulo kö Davita, me adre me ham bi kö Aderiela at Mehola me áián. 20 Ke haba Mikala hlu nöku Saulo ame betenge ga Davita: me ödrin e thumetu Saulo, ke e so káu. 21 Ke ame ha Saulo, ka habe, Oge me he ka ham e káu, me me hai hnyamen at Filisiti káu. Anyin a wale Saulo ame ha kö Davita, ka habe, U me he ka únguk hnyi bong ang hnyi úen a loiny. 22 Ke Saulo ame húna ka lathnyabainy, ka habe, Úhnenamö duöng ju me Davita, me ha, ka habe, Wá bi, than ame weny u, k'ame betenge gam lathnyabainy hia: ke u me he ka úngon than walang ang. 23 Me haba lathnyabai Saulo ödrin e ha je hofuc eling hnyi hnyikönyö Davita. Ke haingö Davita, Hawa, öbun e únykúme e háhá he ka úngon than, ke inya at ae ba ta únyi k'iny únyibaú? 24 Ke haba lathnyabai Saulo ödrin e thumeto e, ka habe, Davita ame ha ta je hofuc heláe. 25 Me haingö Saulo, ka habe, Öbun e he ka ha heláng kö Davita, ha habe, E ca weny bi than sániny hlu, ke so bi, khaca haded je unen unyin at Filisiti, me me bi hwaban je iwahnaihmióny me than. Anyin a haba Saulo ame únykúme he ka kuc Davita ge hnyamen at Filisiti. 26 Ke haba lathnyabainy, ödrin e thumetu Davita ge ta je hofuc eling, me ame so kö Davita he ka úngon than. Ke tiga ca um bi je bong; 27 me haba Davita ame tot me he, a e me anyin vat me kot at Filisiti a tu haded; ke Davita ame hom je unen unyidrin a ka e ka than, me me he ka úngon than. Me Saulo ame ham Mikala a nokon hlu káu me áián. 28 Ke a wá but Saulo, me wáhmakhmeto a e bi Iehova unyi Davita; ke haba Mikala hlu nöku Saulo ame betenge káu. 29 Ke ame ot tot Saulo ga Davita; ke iwahnaihmióny bala Saulo me Davita.

30 Ke ame he but je thaniny at Filisiti: ke hwán hnyi úen ödrin e he but, me Davita ame ányâ metâ hon lathnyabai Saulo; me ame lung gan hmâ ien.

## HNYIMAKAN 19.

**K**E haba Saulo ame ha kö Jonathana a nokon, me lathnyabainy hia, m'ödrin e he ka hlingö Davita. 2 Ke so bi Jonathana ame hnyok kö Davita. Me Jonathana ame thumetu Davita, ka habe, Cica Saulo ame elám he ka hlingö u: anyin a wale ö u wá wia nyi, ke me laba hnyi dok ae iyong, me ikhölö: 3 ke oge me he ka he me tha tot me cica hnyi utkáná u me he ka ikhölö hnyin, ke oge me he ka úhnenamö me cica gam; me oge me he ka thumetu u ge hnök hna he ka wá. 4 Ke Jonathana ame ha soi Davita kö Saulo a kamen, me ha káu, ka habe, ca he than ka kong hwakecám kö Davita athnyabaem; anyin ae ca kong hwakacin köu, ke e ti so hmönyin anyin je huliwa köu: 5 ke e ame ip anyin möt hnyi hnyamen, me hlingá at Filisiti, me Iehova ame omelö gan hmâ Isaraela hia thithö: u je wá e, me senyin: ke anyin a ieu u me he ka kong ka dra ae ba hnyikongon, he ka hlingö Davita ke ba can? 6 Ke a löng ut Saulo hofuc ho Jonathana: ke Saulo ame khemanyin, ka habe, Kia inya Iehova, adre me ca he ka hlingá. 7 Ke Jonathana ame hawo Davita, ke Jonathana ame thumeto ge ta je hofuc hia eling. Ke Jonathana ame bum Davita kö Saulo, ke e ame tha e mē helá me ehac.

8 Ke ame kú hmetu thö vat: ke Davita ame he, me vat me at Filisiti, me hling'ödrin, ke gan hmâ hna hlingá; ke adre, me kec gan. 9 Ke e bi hnyi hu Saulo hanu ae kong únyi ga Iehova, ke e ame laba hnyi umen uma, ke e hnyi hnyamen dân ö; ke Davita ame kokot ge hnyamen. 10 Ke Saulo ame elám he ka dá fineci Davita ka hnyi hnyeige uma ge ö; ke e ame nauá úheny hnyi hnyimakö Saulo, ke ame hwáda thö ö hnyi hnyeige uma: ke Davita ame wadring, me kec möt hnyi lit eling. 11 Ke haba Saulo ame kuná tavat ka hnyi uma umö Davita he ka tuö e, me hlingá hnyi hnyomakatu: ke ame thumetu Davita hnö Mikala a áián, ka habe, U je ne ca omeli u bi eáu hnyinghet, adre me he ka hlingö u nyi. 12 Ke haba Mikala ame öú Davita úheny hnyi mamalama, me ame he, me kec, me möt. 13 Ke Mikala ame hom idola, me ip hon hna mokut, me ip bwiny leúnen got hnân uthunöng, me tube ge mano. 14 Ke Saulo ame kuná tavat he ka hum Davita, me e ame ha, ka

## I. SAMUELA 20.

habe, E mok. 15 Ke Saulo ame kuná tavat he ka ò Davita, me ha, ka habe, He thö ka vaden jem könya hon hna mokut me inye he ka hlingá. 16 Ke a didrö tavat, me wâ bi, idola ame mokut hon hna mokut, me bwiny leúnen got hnân uthunöng. 17 Ke haba Saulo ame ha kö Mikala, ka habe, Ieú gam u je iyawö nya heläe, me hna but iwahnaihmiöny mönya, me me kec möt? Ke Mikala ame thu kö Saulo, ka habe, E ame ha könya, ka habe, Hnö nya but; hnân eú oge ma he ka hlingö u?

18 Ke Davita ame kec möt me he Rama ai kö Samuela, me thumeto e ge ta je únyi hia ame hia but ányá kâu Saulo. Me e ame tha he, me laba me Samuela hnyi Naioth. 19 Ke adre me thumetu Saulo, ka habe, Wâ bi, e but Davita Naioth hnyi Rama. 20 Me Saulo ame kuná tavat he ka hum Davita: ke ödrin e wâ bunyen perofeta adre me perofeta, k' ame tot Samuela helä me homakan ködrin, me ame o hanon Khong ka tavat a je atö Saulo, m' ödrin e hnyi perofeta minya. 21 Me adre me thumetu Saulo, me e ame kuná ke je hnyat, me ödrin e hnyi perofeta minya. Ke Saulo ame kuná ke je hnyat minya a okuniny, me ödrin e hnyi perofeta minya. 22 Me e ame he Rama ai me o ka hnyi an ae gan hnyi Seku: ke e ame hnei, ka habe, Ewa Samuela me Davita? Me haingen ke at, ka habe, Wâ bi, ödru but hnyi Naioth hnyi Rama. 23 Me e ame he kâ e Naioth ai hnyi Rama: ke ame o minya kâu hanon Khong, me e ame perofeta tot ke ne o but Naioth hnyi Rama. 24 Ke e ame uny jut je úkhaúen, ke e ame hnyi perofeta minya hnyi hnyimakö Samuela, me mokut ke ba úkhaú hnyi bong hia eling me lit hia. Anyin a wale adre me ha, ka habe, Hawa, tha Saulo minya but me je perofeta?

### HNYIMAKAN 20.

**K**E Davita ame kec úheny Naioth hnyi Rama, me he me ha hnyi hnyimakö Jonathana, ka habe, Ieú oge me ányá? ke ieú anyik hulö? ke ieú kongik hnyi hnyimakan kââmâm, me me elâm he ka hlingö nya? 2 Me haingen, ka habe, E so adre me thawâ: m' u me ca he ka mok: wâ bi, ama ca ányá ke únyi cica, ame ne gan ame ne úhnyúkong, ke ame bân ka omanená könya: ke hnân ieú ame he cica ka ikhâlâ gak únyi eling? ame ca hnathu bi. 3 Me

Davita ame khemanyin, me ha, ka habe, E khana wia kââmâm a u me betenge gak; me haingen, ka habe, E so Jonathana ame ca löng e, wâ e nye vec ut: ke kia inya Iehova, ke kia inya u, a e okhaca biju okca me oge me he ka mok. 4 Ke Jonathana ame ha kö Davita, ka habe, haba únyi u me he ka ha, me oge me he ka ányá hobi köu. 5 Ke haingö Davita kö Jonathana, ka habe, Wâ bi, tehi ae teb únyi nyi, ke hanmök he ka tha laba me than he ka hnyi han: ke hnö nya but he ka lubaduöng hnyi utkânâ ke ne o but hnyi sahacin bong a kuniny. 6 Ame ne hnei nya kââmâm, u me he ka ha, ka habe, Ame sumat újöngi nya Davita he ka wadring Bethe-leema ai wale anyin taun: anyin ae hu hudiny huna eling hobi kâu anyin lap hia. 7 Ame ne ha, ka habe, E so; me ame he ka hnahic athnyabaem: ke ame ne gan anyin hmönyin, awe, khanö u thö a ga hia but ip hnök. 8 Anyin a wale e so u me ányá betenge ka athnyabaem; anyin a u je hia but hum nya athnyabaem ka hnyi úhinhinköu anyi Iehova: ke ame ne e unyik hulö, hamâm he ka hlingö nya; anyin a hnân eú he ka hum nya ka kââmâm? 9 Ke haingö Jonathana, ka habe, Ohe, e ba e: anyin a ne khanö nya a cica ame ip hnâm, hawa, oge me ca he ka ha köu? 10 Ke Davita ame ha kö Jonathana, ka habe, Hamö ia he ka ha könya ame ne thu hwegiâ kââmâm? 11 Ke haingö Jonathana kö Davita, ka habe, Ötu he ka hnyi hnyei. Ke ödru me tha he ka hnyi hnyei.

12 Ke Jonathana ame ha kö Davita, ka habe, Hamö Iehova Khongon at Isaraela he ka ohnathoâ; haba nyi hnyi úen helâng ame ne we, iny ka hia but elâm unyi cica, me wâ bi, a ne so but kö Davita, hawa, oge me ca he ka úkhúnöng köu me omanená köu? 13 Ke so Iehova ame ányá heläe kö Jonathana, me bi hanen minya, ame ne so kö cica he ka okongu u, me oge ne ca omanená köu, me kunö u, me u me he ka he hnyi hnahic: ö e tha Iehova möu helä me hnen hna tha e me cica e hac. 14 Ke u me he ka omanená könya ibetengiö únyi ga Iehova inye tiga möt, me inye ca mok: 15 ke walang minya u me ca he ka subâ degecâ ányâm ibetengiö ge anyik lap nyiele balua: wale e ka hia but subâ degecâ je iwahnaihmiöny me Davita hia únyi eang hmeledrany ga Iehova. 16 Me haba Jonathana ame úhinhinköu me lap anyi Davita, me ha, ka habe, Ame e Iehova ka elâm e unyin je iwahnaihmiöny me Davita. 17 Ke

## I. SAMUELA 21.

Jonathana ame kunö Davita hmetu he ka khemanyin, can anyin ibetengiö gan: anyin a e ame betenge gan helá me hing hanon bi. 18 Ke Jonathana ame ha káu, ka habe, Nyi, me tehi ae teb únyi: ke adre me he ka hnei u, anyin ae ba at hnyi tabám tap. 19 Ke kun biju bongom, me u me he ka ie he me o ka hnyi dok waleji u je ikhölö hnyin hnyi bong ae hu hwakecin, ke u me he ka laba hnyi veto Azela. 20 Ke oge me he ka fana kun ta fana hnyi baten, heláke oge me vakha. 21 Ke wá bi, oge me he ka kuná da, me ha, ka habe, He thö he ka elám je fana. Ke oge ne ha ka da, ka habe, Wá bi ke keihám e jem je fana: awe, u ma hom dö me he jem; anyin ae hu hnahic köu, ke ba kong, ke kia inya Iehova. 22 Ke oge ne ha ka da, ka habe, Wá bi, hnyi ke keihám háang je fana: awe, u me he but, anyin a Iehova ame kunö u. 23 Ke haba hofuc ötu me úhnenamö, wá bi, e bi Iehova hnyi wanbötu nyiele balua.

24 Me Davita ame ikhölö hnyi utkâná: ke ame laba thö tehi, me ame laba ju je than he ka tha han. 25 Ke ame laba than hon taben tap, heláji me hnyi je úen, wale hon tap hnyi hnyeige uma: ke ame todrö Jonathana, ke Abinera ame laba útangköu me Saulo: ke ba at hnyi tap tabö Davita. 26 Ke so bi e ba hofuc ho Saulo hnyi bong eling: anyin a haingen, ka habe, Ame ne o káu ke únyi, ame ne ca bo so; eke, e ca bo so. 27 Ke haba nyi, wale bong a loiny tehi, me ba bala at hnyi tap tabö Davita: me haba Saulo ame ha kö Jonathana a nokon, ka habe, Anyin a ieú ame ca he jem ka hnyi han nöku Jese, et me hnyi bong ang? 28 Ke Jonathana ame thu kö Saulo, ka habe, Davita ame sumátá újóngi nya me me he Bethe-leema ai: 29 haingen, ka habe, Ö u hnö nya but, anyin ame he anyihmun lap hnyi taun he ka bi hut; ke haba tuhök ame hia but húna könya he ka hnyi hanen: ke walang ang u je ne betenge gak, ö u me hnö nya but he ka iouny me je liamekeiny mönya. Can e, me me ca he jem ka hnyi laulau anyin than. 30 Me ame ubáhlá hmönyin anyi Saulo kö Jonathana, me e ame ha káu, ka habe, Nokon momo hwege hnyimen me at úkhin fuc, hawa, e ca khanö nya a u je úca nöku Jese he ka ohmehma u bi, me ohmehma hinyám e ka he thu? 31 Ke hnyi ta je úen hia thithö e ka tiga möt bala bi eang hmeledrany nöku Jese, u me ca he ka tethmä me dokhom dökhu. Ke úkhünöng dö walang ang me hom e

könya, anyin e hnathu e ame he ka mok. 32 Ke Jonathana ame thu kö Saulo a kámen, me ha káu, ka habe, Can ieú e ame he ka mok? ieu hnen hna ányá? 33 Ke Saulo ame khúá dân ö káu he ka dá e: anyin a wale ame wáhmakhmeto Jonathana a kámen ame ip hmá hnân, he ka hlingö Davita. 34 Ke haba Jonathana ame todrö úheny hnyi laulau, ke ame ubáhlá anyin hmönyin, me e ame ca hnyi han hnyi bong a loiny tehi: anyin a e ame tenge ga Davita, anyin a ohmehma e kámen.

35 Ke nyi Jonathana ame dit ka hnyi hnyeie waleji hnyi úen a ha kö Davita, ke tha e më ke da ae úhnyúkong. 36 Ke e ame ha ka da unyin, ka habe, Wadring dö walang ang he ka elám je fana oge me he ka fana. Ke ame tiga wadring da, me a ame fana ke fana ka hnyi hnyimakan. 37 Ke ame o thö da ka hnyi dok a e hnyin fana, wale a fana Jonathana, me haba Jonathana ame ha ka da, ka habe, Hawa, e ca e fana hnyi hnyimakám? 38 Ke Jonathana ame hongot ka da, ka habe, Logotö, hele thö, ca bec bi. Ke da anyi Jonathana ame hlo je fana, me hom ka tuhan. 39 Ke ca khana da a ke únyi bi: ke Jonathana thibi me Davita ödru me wáhmakhmeto. 40 Ke Jonathana ame ham anyin je únyi vat ka da unyin, me ha káu, ka habe, Hom dö ka hnyi taun. 41 Ke a he but da, me Davita ame o úheny hnyi hwaiöu, me ta hnyikânái, me okun nom: ke ödru me úcimhnyimak, me útengiö, ke beönua tenge a Davita. 42 Ke Jonathana ame ha kö Davita, ka habe, He thö me hnahic, anyin öte hia but khemanyin hnyi iö Iehova, ka habe, Ame he ka e wanbötu Iehova, me mátránitu nyiele balua. Me e ame tot me he: ke Jonathana ame hmetu ka hnyi taun.

### HNYIMAKAN 21.

**M**E ame o but Davita hnyi Nob kö Ahimelek at bihut: ke Ahimelek ame he he ka úkhanö me Davita hnyi öbubuny, me ha káu ka habe, Ieú ang a hake u thibi, ke ba at a tha he möu? 2 Ke haingö Davita kö Ahimelek at bihut, ka habe, A kunö nya than ka ke únyi, haingen könya, ka habe, Ca he ke at ka löng únyi oge me he ka kunö u káu, me únyi oge me húna köu: ke oge hia but kuná wahidröu ka hnyi ke dok me ke dok. 3 Ke ieú únyi eang unyám? ö u ham könya je areto a thabúng, ame ne ke únyi bi ae hu. 4 Ke



ame thu kö Davita at bihut, ka habe, E ba areto ae baú unyik, ke hu areto ae kap; wale thibi ame ne ca kâlâ omomo hnen wahidröu. 5 Ke Davita ame thu ka at bihut, me ha kâu, ka habe, E hnathu öhmun e ca kâlâ omomo helâ me kun ta bong; hwân hnyi hnök hna he jem me kap ta je únyi anyin je hidröu, ke so bi únyi baú hnömun hna he; hawa, ame ca bo so hnyi bong ang anyidrin ta je únyi? 6 Me haba at bihut ame ham kâu únyi ae kap; anyin ae ba minya ju ke areto eling, ke so thibi areto hnân omanenâ, wale adre me hom únyi hnyi hnyimakö Iehova, m' adre ip bi areto ae kahwa hnyi bonginy hna hom e. 7 Ke wale ke athnyabai Saulo hnyi bong eling, adre me tuö hnyi hnyimakö Iehova, Doega ien, at Edoma, a taben tavat tuö omeno hale Saulo. 8 Ke Davita ame ha kö Ahimelek, ka habe, Hawa, e ba ö, ame ne hele vat eang unyâm? anyin oge me ca hom anyik hele vat me anyik je únyi vat, anyin a haba huliwa anyin than, me, hnân ânyâ logotâ. 9 Ke haingen at bihut, ka habe, Haba hele vat anyi Goliatha at Filisiti, at u je kot hnyi hnyigöulen bucen Ela, wale but ang adre lan ge ecmano, ame mokut hoton iefoda: u je ne wem he ka hom e, hom dö: anyin ae ba hanen eang, ke hake e thibi. Me haingö Davita, ka habe, Hö jem; anyin ae ba khaca a helâe.

10 Ke Davita ame tot me kec hnyi bong eling can hna outö Saulo, me he kö Akisa thaniny Gatha. 11 Ke haba lathnyabai Akisa ödrin e ha kâu, ka habe, Hawa, ca Davita ang, tuhan hnyei? hawa, ödrin e ca sitwhanân hnyi je bibiâ, ka habe

Saulo ame hia but kot haniny je thauzan,

Ke Davita bi, haniny je ten thauzan? 12 Ke Davita ame ip hmâ hnyi hnyekon ta je hofuc eling, ke gan hmâ hna outö Akisa thaniny Gatha. 13 Ke e ame okebongonâ hwakecin hnyi hnyimaködrin, me monu thoi unyikrin, me sisit hon li hlinginy homagöule, me ânyâ hangöc ka hnyi wainy. 14 Ke Akisa ame ha ka lathnyabainy, ka habe, Wâ bi, öbun e wâ a ga monu but at: iéú gabun öbun e hia but hom e könya? 15 Hawa e ba but je at ae monu unyik, me öbun e hom khop ang he ka monu hnyi hnyimakök? hawa, ame he ka dit khop ang ka hnyi umök uma?

## HNYIMAKAN 22.

**K**E Davita ame he úheny e, me kec ka hnyi op Adulama: ke a löng ut je liamekeiny më ke lap hia anyin kamen, me ödrin e he kâu eling. 2 Ke ame úkhacaköu unyin tavat hia ae hu hmak, me tavat hok gufa hia, me tavat hia ae hiny hnyekudrin; ke e bi taben ködrin: ke e unyin helâ me foa haded tavat.

3 Ke Davita ame he úheny e Mizepa ai hnyi Moaba: Ke e ame ha ka thaniny Moaba, ka habe, E na he ju cica me bai jem, ka laba unyibun, me inye wâ thö únyi ame he Khong ka ânyâ hobi könya. 4 Ke e ame hum ödru ka than Moaba, ke ödru me tha laba më hnyi ta je bong hia thithö ame laba Davita hnyi hhabâ. 5 Ke haba Gada perofeta ame ha kö Davita, ka habe, Ca laba bi hnyi hhabâ; he thö, me he ka hnyi hnyei Juda. Me Davita ame he me o hnyi hnyot hnyi Hareth.

6 Ke a löng ut Saulo a g' adre ö Davita me tavat unyin: ke Saulo ame me laba hnyi Gibeä, eú hmelen úö hnyi Rama, ke e hnyi hnyamen dân ö, k' ame tot igigilö lathnyabainy. 7 Ke Saulo ame ha ka lathnyabainy ödrin e tot unyin, ka habe, Löng ju öbun walang ang hnyat Beniamina; hawa, ame he nöku Jese ka ham köbun je utkânâ, me je hnyei vine, me otil' öbun hia hnân taben je thauzan me taben je haded; 8 m' öbun e úsabö hnök, ke ba at ame thumetu nya a g' ame úhinyköu nöku me nöku Jese, ke ba at gabun amë betengegak me omanenâ könya a g' ame huliwan athnyabaik hnen nöku he ka bi hnök helâ me hnyi bong ang? 9 Me ame thu Doega at Edoma, k' ame tot unyin lathnyabai Saulo, me ha, ka habe, Oge wâ nöku Jese ame he nnyi hnyei Nob kö Ahimelek nöku Ahituba. 10 Ke at eling ame elâm unyi Iehova hobi kâu, ke e ame hân, me ham kâu hele vat anyi Goliatha at Filisiti. 11 Me haba than ame úkhünöng he ka hum Ahimelek at bihut a nöku Ahituba, me lap hia anyin kamen, a tavat bihut hnyi Nob: me ödrin e o hia thithö ka than. 12 Ke haingö Saulo, ka habe, Nöku Ahituba lö, löng ju walang ang. Me haingen, ka habe, Tuhök lö, inya ang. 13 Ke haingö Saulo kâu, ka habe, Can iéú öbe úsabö hnök, a u me nöku Jese, waleji hnyi hnâm hna hân, me ham kâu hele vat, me elâm unyin Khong hobi kâu, me me tot könya, me ip hnök helâ me

I. SAMUELA 23.

hnyi bong ang? 14 Me Ahimelek ame thu ka than, ka habe, Ke ie at ae hnathu unyin lathnyabaem hia helâ me Davita, a ûngon than, k' adre hom ka hnyi ânyâm ûhnena-mö, me ogânâ hnyi hnyabam? 15 Hawa, oge me ibi hwân hnyi bong ang he ka elâm unyin Khong hobi kâu? Ohe, ca helâe : ca he than ka ûnykûmi nya a athnyabaem me lap hia anyi cica : anyin ae ca khana athnyabaem ke ûnyi eling, ame ne ûhnyû-kong, ame ne gan. 16 Ke haingen than, ka habe, Ahimelek, u me he ka mok, u me lap hia anyin kâmâm. 17 Me ame ha than ka tavat adre me labö tot unyin, ka habe, Hwiö th' öbun, me hlingâ hnyat bihut kö Iehova ; anyin ödrin e tha hien me Davita, ke e khan' ödrin a e ame kec, me ödrin e ca omanenâ kõnya. Ke lathnyabainy than ödrin höcö he ka inâ je hnyamödrin he ka kot hnyat bihut kö Iehova. 18 Me ame ha than kö Doega, ka habe, Hwiö thö u me kot hnyat bihut. Me ame hwiö Doega at Edoma me kot at bihut ; me e ame hlingâ hnyi bong eling eite faiv tavat ödrin e kha-vâ iefoda lino. 19 Ke e ame kot Nob taun anyin tavat bihut ge hele vat, obaga me omomo, je wanakat me mendreng, me je bolok, me asina me mamoe, ge hele vat. 20 Ke ame kec möt ke nöku Ahimelek nöku Ahituba, Abiathara ien, me kec kö Davita. 21 Ke Abiathara ame thumetu Davita ge hna kot tavat bihut kö Iehova ga Saulo. 22 Haba Davita ame ha kö Abiathara, ka habe, E khanö nya hnyi bong eji a eling Doega at Edoma, a g' ame he ka thumetu Saulo : oge hia but bi jöniny tavat hia hnyi lap anyin kâmâm. 23 Tha laba ju mönya, ca ot bi ; anyin a haba at ama elâm he ka hlingö u, e ame elâm he ka hlingö nya : anyin a u me he ka laba so unyik.

HNHYIMAKAN 23.

**K**E adre me ha kö Davita, ka habe, Wâ bi, ame vat at Filisiti me Keila, ke ödrin e hûgúnâ je hna huje hwit. 2 Anyin a wale Davita ame hnö ga Iehova, me ha, ka habe, Hawa, oge me he ka he me kot at Filisiti eling? Haba Iehova ame thu kö Davita, ka habe, He thö ka kot at Filisiti, me omelö Keila. 3 Ke haba je atö Davita ödrin e ha kâu, ka habe, Wâ bi, ötin ka ot eang Juda : hawa, ame ca he ka ti gan hnötin hna ot ötin ka he Keila ai ka je utbavat anyin at Filisiti? 4 Ke Davita

ame hnö hmetu unyi Iehova. Ke Iehova ame thu kâu, me ha, ka habe, Todrö, he thö Keila ai ; anyin oge me he ka hna at Filisiti ka hnyi hnyamâm. 5 Me Davita me lahien ödrin e he Keila ai, me vat me at Filisiti, me sö haledrin je meno, me kuc ödrin ge hna hlingâ ae gan. Me Davita ame omelö at Keila.

6 Ke haba hnyi ûen ame kec dö kö Davita hnyi Keila Abiathara nöku Ahimelek, me e ame o me iefoda hnyi hnyamen. 7 Ke adre me thumetu Saulo a g' ame o Davita hnyi Keila. Ke haingö Saulo, ka habe, A hia but Khong hna e ka hnyi hnyamök ; anyin adre me hlöng hwanumen kâu, k' ame dit ka hnyi taun ae hu homa-göuleny me ohmâiny. 8 Me Saulo ame ok vat, a tavat hia, he ka he Keila ai me theling Davita me lahien. 9 Ke e khanö Davita but a Saulo ame elâm he ka okon-goâ, me e ame ha kö Abiathara at bihut, ka habe, Hö jem iefoda. 10 Haba Davita ame ha, ka habe, Iehova lö, Khongu Isaraela, inya athnyabaem oge me löng a g' ame be he jem Saulo, Keila ai he ka obia taun cak. 11 Hawa, ame he at Keila ka hnö nya ka hnyi hnyamen? ke ame he ka o Saulo, helâ me hna löng gak a athnyabaem? Iehova lö, Khongu Isaraela, ö u thumetu nya thö a athnyabaem. Me Iehova ame ha ka habe, E ame he ka he jem. 12 Me haingö Davita, ka habe, Hawa, ame he at Keila ka hnö nya me lahiök ka hnyi hnyamö Saulo? Me haingö Iehova, ka habe, Adre me he ka hnö u. 13 Me ame todrö Davita me lahien, ame ne siks haded ödrin, me didrut ûheny Keila, me he hnyi je gethen ae khan' ödrin he ka he hnyin. Ke adre me thumetu Saulo a g' ame kec ut Davita ûheny Keila ; me e ame digic he.

14 Ke haba Davita ame laba hnyi hnye-buba hnyi je hñabâ, me laba hnyi hnyeï ae hut hnyi hnye-buba Zif. Ke Saulo ame elâm e hnyi je bong, ke Khong ame ca hna e kâu. 15 Me a wâ but Davita a g' ame he but Saulo he ka elâm anyin möt : ke e bi Davita hnyi hnye-buba Zif hnyi hnyot. 16 Ke ame todrö Jonathana nöku Saulo, me he kö Davita hnyi hnyot, me sihwegiä unyin Khong. 17 Me e ame ha kâu, ka habe, Ca ot anyin ame ca he cica Saulo ka ö u ; ke u me he ka tuban Isaraela, ke oge me he ka loiny hmelâm ; ke haba hbaca, e khanö cica Saulo ling. 18 Ke ödrü me úhibinyköu hnyi hnyimakö Iehova. Ke Davita ame laba hnyi hnyot, ke Jonathana

## I. SAMUELA 24.

ame he ka hnyi umen uma. 19 Ke haba at Zif, ödrin e he Gibea ai kö Saulo, me ha, ka habe, Hawa, ame ca lubaduöng unyihmun Davita hnyi je hñabâ hnyi hnyot, hnyi hut Hakila, wale hnyi ke keihen ka hnyi hwaiöuiny Jesimon? 20 Anyin a wale, than lö, u me he ka utut helâ me wem; ke haba öhmun e he ka hna e ka hnyi hnyamen than. 21 Me haba Saulo ame ha, ka habe, E so öbun e hñahic únyi ga Iehova; anyin a öbun e betenge gak. 22 Ö öbun he thö, ka me okhaca tuö, me wâhmakhmeto thö hnen hna lubaduöng hnyin, ke ia a wâ eling: anyin adre ha könya, ka habe, e ame ti metâ. 23 Anyin a wale wâ eâu, me khana wia je dok hia wale e ame lubaduöng hnyin, ke hmetu thö könya me hñathu, ke oge me he ka tha he möbun: ke wâ bi, ame ne e bi hnyi hnyei oge me he ka elâm e wanben je thauzan anyin at Juda hia thithö. 24 Me ödrin e tot me bödrin Zif ai, ke a bili Saulo: ke e bi Davita me lahien hnyi hnyebuba Maon, hnyi dok ae tha hon ke keihen ka hnyi hwaiöuiny Jesimon. 25 Ke ame he Saulo me je aten he ka elâm. Ke adre me thumetu Davita: me e ame utut ka hnyi kic, me laba hnyi hnyebuba Maon. Ke Saulo ame löng, me e ame elöm Davita hnyi hnyebuba Maon. 26 Ke Saulo ame he hnyi ke keihen e jem bucen, ke Davita me lahien hnyi ke ke keihen: ke Davita ame logot he ka kec k' ame outö Saulo; anyin a Saulo me lahien ödrin e igigili Davita me lahien he ka köt ödrin. 27 Ke ame o kö Saulo úthumetu, me ha, ka habe, Logotö, me he jem; anyin a utut at Filisiti ka hnyi hon hnyei. 28 Me Saulo ame hmetu úheny hnyi hna hnu Davita, me he ka at Filisiti: anyin a wale adre me hwenyi ien hnyei eling me Sela-hamalekoth. 29 Ke Davita ame he úheny e, me laba hnyi je hñabâ hnyi Eni-gedi.

### HNYIMAKAN 24.

**K**E a hmetu Saulo úheny hnyi hna hnu at Filisiti, me adre thumeto e, ka habe, Wâ bi, e but Davita hnyi hnyebuba Eni-gedi. 2 Me Saulo ame hom kun ta thauzan tavat adre úca unyin at Isaraela hia, me he he ka elâm Davita me lahien hon je kic hnyeuten je got ae hiny. 3 Ke e ame o but hnyi je haginymamoe eú hnyi gethen, wale ae hu op; ke Saulo ame didrö he ka tube li can. Ke Davita me lahien

ödrin e laba hnyi je ouben op. 4 Ke haba je atö Davita ödrin e ha kâu, ka habe, Wâ bi, bong a ha Iehova köu, ka habe, Wâ bi, oge me he ka hna je iwahnaihmiöny möu ka hnyi hnyamâm, ke u me he ka ânyâ kâu únyi ae so köu. Ke Davita ame todrö me subâ higö but obiny úkhaú Saulo. 5 Ke hwaban e, me ame dâ hnyeku Davita can e ame subâ obiny úkhaú Saulo. 6 Me e ame ha ka lahien, ka habe, E so Iehova ame thawo nya he ka ânyâ únyi ang ka tuhök, at Iehova ame hú, he ka inâ hnyamök kâu, anyin a e bi at a hú hnö Iehova. 7 Ke Davita ame thawâ lahien ge je hofuc eling, k' ame ca hn' ödrin he ka tot kö Saulo. Ke Saulo ame todrö me he úheny hnyi op hnyi deny gethen. 8 Ke Davita ame tot hwaban e me didrut úheny hnyi op, me hongot hotu Saulo, ka habe, Tuhök, than lö. Ke Saulo ame hwiö, me Davita ame nom me hnyimakan hnyikânâi, me ogânâ, 9 Ke Davita ame ha kö Saulo, ka habe, anyin a ieu u me löng ta je hofuc hwan tavat, ka habe, Wâ bi, Davita ame elâm he ka okongu u? 10 Me wâ, haba hnyi bong ang a wâ but li emâkâm a Iehova ame hia but hnö u eja ka hnyi hnyamök hnyi op: ke a ha könya ke je hnyat he ka hlingö u: ke so bi oge me betenge gam, me oge me ha, ka habe, oge me ca he ka inâ hnyamök ka tukök; anyin a e at Iehova ame hú. 11 Ke haba khaca, wâ bi, cica lö, me wâ bi obiny ânyâm úkhaú eang hnyi hnyamök: ke oge me subâ obiny ânyâm úkhaú me ca hlingö u, anyin a wale khanö u thö me wâ a e ba únyi ae kong me hulö unyik, ke ca kong hwakecik köu, eja ke ne u je ne elâm melik he ka obia. 12 Hamö Iehova he ka owisa kötu, ke hamö Iehova he ka bi hwaban köu gak: ke so bi ame ca he hnyamök ka mokut hom. 13 Helâji me vejec ehac anyin wahingat, ka habe, Ame o únyi ae kong únyi ge at ae kong: k' ame ca he hnyamök bi ka mokut hom. 14 A o but tuhau Isaraela kö ia? ie at u me hnu hoton? ame ne kuli ae mok, ame ne outo ame fifica. 15 Ke hamö Iehova he ka úhnö me owisa kötu, me wâ, me ivinö hobi könya, me hnö nya únyi hnyi hnyamâm. 16 Ke a hia but Davita ha ta je hofuc eling kö Saulo, me haba Saulo ame ha, ka habe, Hawa ifucâm e Davita, nokuk? Me Saulo ame tenge göranyai. 17 Me e ame ha kö Davita, ka habe, U at ae wisa k' iny monu: anyin a u je bi hwaban könya ge so, ke oge me bi hwaban köu ge kong. 18 Ke u je

## I. SAMUELA 25.

omanenâ hnyi bong ang a u je ânyâ so kënya: anyin a u je ca hlingö nya, hnyi üen Khong ame hnö nya ka hnyi hnyamâm. 19 Anyin a ne ke at ame wâ iwahnaihmiöny më, hawa, e ame he ka hna soâ e? anyin a wale e so ame he Iehova ka bi hwaban köu ge so hwaban hnâm hna ânyâ kënya hnyi bong ang. 20 Ke walang ang, wâ bi, e khanö nya a u me he ka than, ke adre me he ka ohmä dökhü Isaraela hnyi hnyamâm. 21 Ke walang ang, khemanyin dö kënya ga Iehova a u me ca he ka subâ degecâ je mâtrânik hwabök, me ca he ka ohia iök ünyi hnyi lap anyi cica. 22 Ke Davita ame khemanyin kö Saulo. Ke Saulo ame he ka hnyi hnyaban, ke haba Davita me lahien ödrin e ölö hmetu ka hnyi hnabâ.

### HNYIMAKAN 25.

**H**ABA Samuela ame mokcu; me ame úkhacaköu Isaraela hia thithö, me tenge gan, me konâm e hnyi umen uma hnyi Rama. Ke Davita ame todrö me he ka hnyi hnyebuba Parana.

2 Ke e hu ke at hnyi Maon, ae tren ta ünyi hnyi Karemela; e bi at ae ünyi hna-thu, ke kun ta thauzan haleny je mamoe, ke khaca thauzan je got: ke e ame tiga subâ leünen halen je mamoe hnyi Karemela. 3 Haba ien at Nabala; ke Abigaila ien áiân: ke haba momo at ae ti metâ, ke hmanenang hnyimakan: ke at ae wathethöt бага, me kong hwakecin; ke e hanen lap anyi Kaleba. 4 Ke a löng ut Davita hnyi hnyebuba a Nabala ame subâ leünen haleny je mamoe. 5 Haba Davita ame kunâ je hidröu a ten, ke Davita ame ha ka je hidröu, ka habe, He th' öbun Karemela ai, me o unyi Nabala, me iouny më hnyi iök: 6 ke öbun e he ka ha helâng kâu, wale at ame sot hnyi anyin möt, ka habe, Hnahic köu, me hnahic ka ânyâm lap, me hnahic ka ânyâm ta je ünyi hia thithö. 7 Ke walang ang oge me löng ae hu gam tavat subâ leünen mamoe: ke haba tavat tuö halem mamoe ödrin e hia but tha e möhmun, ke öhmun e ca okongu ödrin, ke ca hia gadrin ke ünyi hnyi ta je bong hia thithö, ke tiga ödrin bi hnyi Karemela. 8 Hnö thö ânyâm je hidröu, me ödrin e he ka thumetu u: anyin a wale e so u me betenge ge je hidröu; anyin a öhmun e o but hnyi bong ae so: ö u ham dö je ünyi ae hu gam ka athnyabaem me nokom a Davita. 9 Ke ame o but wahidröu anyi

Davita, me ödrin e ha kö Nabala ta je hofuc hia eling hnyi iö Davita me ame um dö. 10 Ke haba Nabala ame thu ka lathnyabai Davita, ka habe, Ia Davita? ke ia nöku Jese? E se hia lathnyaba adre me ve hna degecâ latuhödra hnyi je bong ang. 11 Hawa, oge me he ka hom anyik areto, me belik kölö, me meno oge hlingâ hobi kâu hnyat subâ leünen halek mamoe, me ham ka tavat ae ca khanö nya dok adre mwi hnyin? 12 Me ame hwio wahidröu anyi Davita, me hmetu, me o, me thumeto e ge je hofuc eling. 13 Me Davita ame ha ka lahien, ka habe, Ve húkälâ ju anyibun je bele vat. Me ödrin e ve húkälâ anyidrin je hele vat; ke Davita ame húkälâ minya anyin hele vat: ke ame he hotu Davita helâke foa haded tavat; ke lo biju li haded ame tuö ta je ünyi. 14 Ke haba ke hidröu ame thumetu Abigaila öiö Nabala, me ha, ka habe, Wâ bi Davita ame kunâ tavat üheny hnyi hnyebuba he ka iouny so me tuhötin; me e ame ü ödrin. 15 Ke e ti so hwakecin tavat köhmun, ke adre ca okongu öhmun, ke ca hia bi unyihmun ke ünyi hnyi ta je bong hia thithö öhmun e tha laba hnyin mödrin, ke tiga öhmun hnyi hnyei: 16 haba ödrin me helâ me hak veto köhmun hnyi lit me lany, hnyi ta je bong hia thithö öhmun e tha laba mödrin he ka tuö je mamoe. 17 Ke walang ang khanö u thö me ünyküme wia ünyi u me he ka ânyâ, anyin ödrin e ip hnân ka tuhötin me anyin lap hia: anyin a e atö Belial me ca khana ke at ka fuc kâu. 18 Me Abigaila ame ie hom je areto a tu haded, me li waina, me faiv ta mamoe adre hia but penapena, me faiv ta tulut hwit adre le, me khaca haded je de wan vine adre hlec meleca, me lo li haded ü ometa, me ip hon je asina. 19 Me ame ha momo ka wahidröu unyin, ka habe, Böbun do, ke wâ bi, ama bilik bi. Ke e ame ca thumetu Nabala a áiân. 20 Ke haba momo ame tabâ asina, ke hnyi üen e ame utut ka hnyi dok ae nedronginy bucen. me wâ bi haba Davita me tavat unyin ödrin e utut me o kâu; me momo ame ukhanö mödrin. 21 Ke a hia but ha Davita, ka habe, E hnathu, e ünyi bau hnök hna tuö ta je ünyi anyin khop ang hnyi hnyebuba, me me ca hia bi ke ong ünyi hnyi ta je ünyi hia gan: ke e ame hia but bi hwaban kënya so ge kong. 22 E so Khong ame ânyâ helâe me bi hanen ka je iwahnaihmiöny me Davita, oge me ne he ka bi kolon ke da a khaca hnyi ta je

## I. SAMUELA 26.

ányi hia thithö unyin e ka o thö lany hnyi hnyomakatu. 23 Ke a ö Davita hnö Abigaila, me e ame ie utut úheny hon asina, me nom ju hnyi hnyimakö Davita, me khudrung hnyikánái. 24 Me e ame ta ju hnyi li can, me ha, ka habe, Tuhök, e so e ta huk hulö: ö u me hna athnyabaem he ka fuc hnyi hnyikönyám ke löng ju hofuc hwan athnyabaem. 25 Ö u ca he tuhök ka ti únykúme ge at e, a atö Belial, jia Nabala: e úcü ien më; Nabala ien bi, ke monu ame laba unyin: ke inya athnyabaem oge ca wá anyám je hidróu, wale u je kuná. 26 Ke walang ang tuhök, kia inya Iehova, me kia inya u, anyin a Iehova ame thawo u, me u me ca he ka hingálá monoá dra, me bi hwaban hobi köu ge hing hnyamám, ke walang e so e helá Nabala je iwahnaihmiöny möu, me tavat ödrin e elám únyi ae kong hobi káu tuhök. 27 Ke walang ang haba bwihlany eá wale a hom athnyabaem ka tuhök, ham dö ka je hidróu, tavat ödrin e he hoton tuhök. 28 Ö u hna but monu anyin athnyabaem: anyin ame he Iehova ka ányá hobi káu tuhök lap ae tethmá, anyin ame vátá tuhök je vat anyi Iehova; ke adre me ca he ka wá hulö unyám hnyi anyám je bong hia. 29 Eja ke ne a ne hia but tot at he ka hnu u, me elám he ka hlingö u, ke so bi adre me he ka tha lan hanom hnyi bwiny möt unyi Iehova Khoagom; ke haba hanon je iwahnaihmiöny möu e ame he ka kúlúá degecá, helá ke úheny hnyi hnyimen koloú. 30 Ke e ka hia but Iehova ányá ka tuhök, helá me ta je únyi hia thithö ae so e ame ha gam, me otilö u hnân taben Isaraela; 31 ca hnân otengiö u, me ovecá hnyekon tuhök, wale ge hnen hna hingálá dra ke ba can, me bi hwaban hobi káu bi hnen tuhök: ke e ka hia but ányá Iehova so ka tuhök, u me he ka únykúme ka athnyabaem. 32 Ke Davita ame ha kö Abigaila, ka habe, Ole kö Iehova Khongu Isaraela at ame kunö u he ka úkhanö mönya hnyi bong ang: 33 ke oleá anyám metá, me oleá köu bi, at ame thawo nya hnyi bong ang he ka ca hingálá dra, me bi hwaban hobi könya bi ge hing hnyamök. 34 Ke kia inya Iehova, Khongu Isaraela, at ame thawo nya he ka ca okongu u. ke e hnathu a u je ne ca logot me he jem he ka úkhanö mönya, me, ame ne ba kolon kö Nabala da a khaca e ka o thö lany hnyomakatu. 35 Ke Davita ame kap ge momo únyi e ame hom káu: me e ame ha, ka habe, He thö me hnahic ka hnyi umám

uma; wá bi, oge me löng hwám hofuc, me köb u bi. 36 Ke Abigaila ame o kö Nabala, ke wá bi, e ame ányá bijeú hnyi umen uma, helá me bijeú anyin than; ke Nabala ame senyin hnyi hnyekon, ke ti monu a ga ic: anyin a wale momo ame ca thumeto e ge ke únyi ame ne úhnyúkong ame ne gan ke ne o but hnyi lany hnyomakatu. 37 K' ame hia but waina unyi Nabala hnyi hnyomakatu, me haba áián ame thumeto e ge ta je únyi eling, me e ame gá on, ke haba e, me helá thibut ta veto. 38 Ke hwaban dö e, helá me ten ta bong, haba Iehova ame kuc Nabala, me me mokcu. 39 Ke a löng ut Davita a ga mokcu Nabala, me e ame ha, ka habe, Ole kö Iehova at ame ivinöá hna ohmehmö nya ga Nabala me thawá athnyabainy ge hulö: ke Iehova ame hia but ohmetoá hulö anyi Nabala ka hnyi hon ban bi. Ke Davita ame úkhúnöng he ka úhnenamö me Abigaila he ka hom me áián. 40 Ke ame o lathnyabai Davita kö Abigaila hnyi Karemela, me ödrin e ha káu, ka habe, A kun' öhmun Davita köu he ka hum u me áián. 41 Me e ame tot me nom hnyikánái, me ha, ka habe, Walö nya ang athnyabaem he ka bi athnyaba me hneú je can lathnyabainy tuhök. 42 Me Abigaila ame logot, me tot, me tabá asina, a the me anyin je hlu bau a faiv ödrin e he hoton; k' ame he hoton je úthumetu anyi Davita, ke áián dö e. 43 Ke Davita ame hom Ahinoam minya úheny Jezerela; ke tha áián hia th' ödrü. 44 Ke a hia but Saulo ham Mikala a nokon öiö Davita kö Paleti nöku Laisi, at úheny Galim.

### HNYIMAKAN 26.

**K**E ame o but hnyat Zif kö Saulo hnyi Gibeá, me ha, ka habe, Hawa, ame ca lubaduöng Davita hnyi hut Hakila, cicö Jesimon? 2 Ke haba Saulo ame todrö me utut ka hnyi hnyebuba Zif, ke tha e më kun ta thauzan at Isaraela adre úca, he ka elöm Davita hnyi hnyebuba Zif. 3 Ke Saulo ame hunuma hnyi hut Hakila, cicö Jesimon, hnyi gethen. Ke Davita ame laba hnyi hnyebuba, ke e ame wá a ga o but Saulo he ka elám e hnyi hnyebuba. 4 Habá Davita ame kuná je hnyat ecmak, me me khana ae hnathu a ga o but Saulo. 5 Ke Davita ame todrö me he ka hnyi dok ame hunuma hnyin Saulo: ke Davita ame wáhmakhmetoá hna mokut hnö Saulo, me

## I. SAMUELA 27.

Abinera nöku Neri, taben anyin utbavat : ke Saulo ame mokut hnyi dok hnân tot hnyin je kat, ke ame hunuma igigilö e tavat. 6 Ke Davita ame ha kö Ahimelek at Heth, me Abisai nöku Zerua, liamekeiny me Joab, ka habe, Ie at ame he ka tha utut mönya kö Saulo ka hnyi hna hunuma? Haingö Abisai, ka habe, Ötu he. 7 Me ame o but Davita me Abisai ka tavat hnyi hnyinghet: ke wâ bi Saulo ame mokut hnying hnyi dok ame tot hnyin je kat, ke adre otilâ anyin ö hnyi kânâ hnyi hunen : ke Abinera me tavat, ödrin e mokut igigilö e. 8 Haba Abisai ame ha kö Davita, ka habe, A hia but Khong ñna ka hnyi hnyamâm iwahnaihmiony möu hnyi bong ang : awe, ö iny he ka dâoâ e ka hnyi kânâ ge ö adre ma okhaca thibi dâ, ke ame ca he ka olo. 9 Haingö Davita kö Abisai, ka habe, Ca he ka hlingâ e : anyin a ie at ae khana he ka inâ hnyamen ka hna hú hnö Iehova, ke ba ju hulö gan? 10 Ke haingö Davita, ka habe, Kia inya Iehova, ke hamö Iehova ne ka kot e ; ame ne he ka o üen ame he ka mokcu hnyin ; ke ame ne he ka mekiny vat. 11 Iehova ame thawo nya, me inye ca he ka inâ hnyamök ka at a hú Iehova : ke ö u hom dö ö hnyi hunen me kaia ae lup, me ötu me he. 12 Me Davita ame hom ö me kaia ae lup únyi hnyi hunö Saulo ; me ödru me he, ke ba at ame wâ, ke ba at ae khana, ke ba at ame hmak dö : anyin a ödra hia adre me mokut ; anyin a o but ködra mokut hnying ae gan únyi ga Iehova. 13 Me haba Davita ame he ka hnyi ke keihen, me tot hon ban bucen ae sâkâû ; ke hu dok! ae lau hnyi wanbödrin : 14 ke Davita ame kuku ka tavat, me Abinera nöku Neri, me ha, ka habe, E, u me ca thu thö Abinera? Me Abinera ame thu, ka habe, U ia ame kuku ka than? 15 Haba Davita ame ha kö Abinera, ka habe, Hawa, u ca at ae hwege? ke ie at ae úcû möu hnyi Isaraela? ieú gam u je ca tuö tuhâm a than? anyin a o ke at eja ka kot than a tuhâm. 16 E ca so únyi e u je ányâ. Kia inya Iehova, ke e úcû öbun he ka mok can öbun e ca tuö tuhöbun wale at a hú Iehova. Ke walang, wâ ju, ewa ö dân than, me kaia ae lup adre ip hnyi hunen? 17 Me haba Saulo ame löngmakhmeto ifuci Davita, me e ame ha, ka habe, Hwâm e, nöku Davita? Me haingö Davita, ka habe, Hok ang than lö a tuhök. 18 Ke e ame ha, ka habe, Ieú gam tuhök u me hnu athnyabaem? ke ieú oge ányâ? ke ieú hulö unyik.

19 Anyin a wale, e na he than a tuhök ka löng hofuc hwan athnyabaem. Ame ne únyi ga Iehova hnâm hna tot könya, me so e ame he ka kap hut : ke ame ne únyi ge tavat, me ödra ka hnaúhangö hnyi hnyimakö Iehova : anyin a ödrin e hia but öbö nya hnyi bong ang me me ca tha inya me jekhöu Iehova, me ha, ka habe, He thö ka athnyaba ke je khong bi. 20 Ke walang ang ca he ka hingâlâ drök ka hnyi kânâ hnyi hnyimakö Iehova : anyin ame he jem tuhan Isaraela he ka elâm outo ame fíca, helâ me hwakecin hnu meno ame gâ hon bucen. 21 Me haba Saulo ame ha, ka habe, E kong hwakecik : hmetu ju u, Davita nöku : anyin oge me ca he hmetu ka okongu u bi, anyin a haba anyik möt me e únyi hnathu hnyi li emakâm hnyi bong ang : wâ bi, oge hia but ányâ monu, me ti monu gan hmâ. 22 Me Davita ame thu, ka habe, Than lö, wâ bi ö! kunâ thö jem ke hidröu he ka hom. 23 Ke ame he bi Iehova ka ve bi hwaban ka tavat anyidrin hwakecin ae wisa, me anyidrin hwakecin ae hnathu : anyin a haba Iehova ame hnö u eja ka hnyi hnyamök, ke oge me ca wek bi nya he ka inâ hnyamök ka at a hú Iehova. 24 Ke wâ bi, adre me öunyihnathoâ ányâm möt eja únyi gak, anyin a wale e so ame he Iehova ka öunyihnathoâ anyik möt, me so e ame omeli nya únyi hnyi ta je vec hia thithö. 25 Ke haba Saulo ame ha kö Davita, ka habe, E so u me hnabic ut, Davita nöku u me he ka ányâ únyi ae beönua, me he bala ka hwege. Ke Davita ame vheno deny gethen, ke Saulo ame hmetu ka hnyi hnyaban.

### HNYIMAKAN 27.

**K**E haingö Davita hnyi hnyekon, ka habe, Oge me he ka mok hnyi ke bong ge hnyamö Saulo : khaca thibi únyi ae so könya oge me he ka ie kec ka hnyi hnyei iny at Filisiti ; me ame he ka hia hna gejon hnö Saulo he ka elöm nya hmetu hnyi je hnyigöulen Isaraela : me oge me he ka kec möt helâe ge hnyamen. 2 Haba Davita ame todrö, me he hanyâúâ me je aten a siks haded a tha e mē, kö Akisa, nöku Maoka, thaniny Gatha. 3 Ke Davita ame tha laba me Akisa hnyi Gatha, e me je aten, ödrin e ve laba hnyi je hnyabadrin, me Davita me laáían, jia Ahinoam at Jezerela, me Abigaila safaci Nabala, momc Karemela. 4 Ke adre thumetu Saulo, ka

I. SAMUELA 28.

habe, a kec ut Davita, Gatha ai, me e ame ca elâm hmetu.

5 Ke Davita ame ha kö Akisa, ka habe, U je ne betenge gak, ö u ham dö könya ke dok hnyi ke taun hnyi hulup, me inye he ka laba eling : anyin a iéu oge me he a athnyabam ka tha laba möu hnyi tauniny than? 6 Haba Akisa ame ham kâu hnyi bong eling Zikelag : anyin a wale iny je than Juda Zikelag ke ne o but hnyi bong ang.

7 Ke haba úseiny je bong ame laba Davita hnyi hnyeiny at Filisiti, me khaca huna ae bekhöt ke vak ta tehi. 8 Ke haba Davita me lahien ödrin e he me tot ka at Gerusi, me Girizi, me Amaleka : anyin a ödrin tavat a aten hnyeiny hwân ehac, wale hnyi gethen ame he Sura ai ke ne o but hnyi hnyeiny Aigupito. 9 Ke Davita ame kot hnyeiny ke e ame ca omelö ke baga me momo, ke e ame hom je mamoe, me bolok, me asina me kamela, me úkhaú ; ke e ame hmetu me he kö Akisa. 10 Haba Akisa ame ha, ka habe, Ie hnyeiny öbun e kot hnyi bong ang? Me ame thu Davita, ka habe, Úehmum hnyi ke keihen Juda ka hnyi hwaiöu, me Jeramela ka hnyi hwaiöu, me Keni ka hnyi hwaiöu. 11 Ke Davita ame ca omelö ke baga me momo, he ka hom Gatha ai, haingen, ka habe, Wâ ödrin e nye haiöhmum, ka habe, A ányâ helâe Davita, ke helâe bala hwakecin hnyi ta je bong hia thibut hnyi hnyeiny at Filisiti. 12 Me Akisa ame kap hofuc ho Davita, me ba, ka habe, E ame ti oikikiâ e bi ka je lawaeny a at Isaraela ; me waleling e ame he ka bi athnyaba könya nyiele balua.

HNyimakan 28.

**H**ABA hnyi úen eling me at Filisiti adre me úkhacaköuá anyidra je utbavat he ka vat me at Isaraela. Me haba Akisa ame ha kö Davita, ka habe, Khanö u wia thö a u me he ka tha he mönya hnyi je utbavat, a u me je atâm. 2 Me haingö Davita kö Akisa, ka habe, Awe u me he ka wâ únyi ame he ka ányâ athnyabaem. Ke Akisa ame ha kö Davita, ka habe, Awe, oge me he ka otölö u he ka tuö bökö nyiele balua.

3 Ke ame mokcu Samuela me a hia but tenge gan Isaraela hia thithö, me konâm e hnyi Rama wale anyin taun. Ke a hia but Saulo ohia hnyi hnyeiny tavat ae tren biobotkong me je at bibihwakecin. 4 Ke haba

at Filisiti ödrin e úkhacaköu me he me hunuma hnyi Sunema : ke Saulo ame ukhacaköuá at Isaraela hia me hunuma hnyi Gileboa. 5 Ke a wâ but Saulo je utbavat anyin at Filisiti, me ame ot, k' ame öbubuny gan hmâ hnyeiny. 6 Ke Saulo ame hnö ga Iehova, ke Iehova ame ca thu kâu, ca deny je bwi, ke ca deny Urim, ke ca deny je perofeta. 7 Me Saulo ame ha ka lathnyabainy, ka habe, He thö ka elâm hobi könya ke momo ae tren biobotkong, me inye he kâu he ka elâm unyiny. Me ame ha kâu lathnyabainy, ka habe, Wâ bi, e hnyi Eni-dora momo ae tren biobotkong. 8 Ke Saulo ame ka kebongonâ e bi, me khavâ bi ke je úkhaú me he, a e me li at a tha he mē, me ödrin e o but unyiny momo hnyeinyhet : me e ame ha, ka habe, Ö u elâm dö hobi könya a deny biobotkong, me oâ könya at oge me he ka ha köu. 9 Me ame ha kâu momo, ka habe, Wâ bi, e khanö u hna ányâ hnö Saulo, wale e ame subâ degecâ tavat ae tren biobotkong me je at bibihwakecin hnyi hnyeiny : ke iéu gam u me he ka lau hnewe hobi könya, me hnân hlingö nya? 10 Ke Saulo ame khemanyiny kâu ga Iehova, ka habe, Kia inya Iehova ae ba únyi ae kong ame he ka o köu can únyi ang. 11 Ke haingen momo, ka habe, O ge me he ka o ia köu? Haingen, ka habe, U me he ka oi Samuela könya. 12 Ke momo ame ö Samuela, me a ame hongot göranyai : ke haingen momo kö Saulo, ka habe, Can iéu u je iyawö nya? anyin a u Saulo. 13 Ke ame ha kâu than, ka habe, U ma ca ot : ke iéu ke únyi u je wâ? ke haingen momo kö Saulo, ka habe, Oge wâ ke khong ame o úheny hnyi kânâ. 14 Ke haingen kâu, ka habe, Iéu imaneniny e? Haingen, ka habe, Ame o hingat ; ke adre tube e ge úkhaú. Me ame khanö Saulo a Samuela ling, ke e ame nom me khudrung hnyikânâi. 15 Haba Samuela ame ha kö Saulo, ka habe, Anyin a iéu u je bwebweli nya, he ka oi nya? Haingö Saulo, ka habe, Iny hlohlo gan hmâ ; anyin ame he at Filisiti ka vat mönya, ke hia but Khong unyik ke ame ca thu hmetu bi könya, a ca deny je perofeta, ke ca deny je bwi : wale me inye hawo u thö, me u me omanenâ könya únyi oge me he ka ányâ. 16 Haba Samuela ame ha, ka habe, Ke hnân eú u je hnei nya anyin ae hiö Iehova but unyâm ke ame hwân he ka iwahnaihmiöny dut möu? 17 Ke Iehova ame hia but ányâ hobi kâu helâ me hnen hna ha a deny inya :

I. SAMUELA 29, 30.

ke Iehova ame hia but kia dökhu úheny unyám, me ham e ka at a hanám, jia Davita. 18 Anyin a u je ca löng hofuc ho Iehova, me ca ohwádá anyin hmönyin ame ubáhlá kö Amaleka, anyin a wale Iehova ame ányá köu únyi eling hnyi bong ang. 19 Ke haba khaca ame he Iehova ka tha hna at Isaraela möu ka hnyi hnyamen at Filisiti : ke nyi u me he me lakom ka tha e mönya : ke ame he Iehova ka hna je utbavat anyi Isaraela ka hnyi hnyamen at Filisiti. 20 Haba Saulo ame ie ta ulili hon káná, me ot gan hmá, can hofuc ho Samuela : ke ba hmetu hwegien ; anyin a ca han eja hnyi lany ke ne o but hnyinghet. 21 Ke ame o but momo kö Saulo me wá ae gan anyin hlohlo, me ha káu, ka habe, Wá bi, inya athnyabaem oge me löng hwám hofuc, ke oge me ip anyik möt hnyi hnyamök, me löng hofuc u je ha könya. 22 Ke walang any ö u löng minya ju könya a athnyabaem, me oge me he ka ip ong jeú hnyi hnyimákám : ke me han dö, me u me he ka hwege u ka he. 23 Ke e ame höcö me ha, ka habe, Oge me ca he ka han. Me ame újengö e li lathnyabainy me momo ; me e ame ling ödrin. Me e ame tot úheny hnyi káná me laba hon hnamokut. 24 Ke e hu ge momo nokon kau ae pipikhenya hnyi hnyaba ; ke e ame ie hlingá, me hok falawa, me op, me le je areto adre ca levená : 25 me e ame hom kö Saulo me li lathnyabainy ; ke ödrin e han. Me ödrin e tot me he but hnyi lit eling.

HNYIMAKAN 29.

**K**E haba at Filisiti ödrin e úkhacaköuá anyidra je utbavat hnyi Afeka : ke at Isaraela adre me hunuma hnyi an ame pupua hnyi Jezerela. 2 Ke ame he je than anyin at Filisiti, a je ve deo haded me deo thauzan : ke Davita me je hnyat unyin ödrin e tha bilidrin bi me Akisa. 3 Me haba je tuhan at Filisiti ödrin e ha, ka habe, Ie hnyat Heberu ang? Ke Akisa ame ha ka latuhan at Filisiti, ka habe, Hawa, e ca khan' öbun a Davita ang, athnyabai Saulo tuhan Isaraela, k' ame tha e mönya hnyi ta je bong ame ne je huna, ke ba ke únyi oge me wá unyin, hwán hnyi bong eji e ame kec hnyin, ke ne o but hnyi bong ang? 4 Me ame hmönyin káu latuhan at Filisiti ; me haingen káu latuhan at Filisiti, ka habe, Kuná hmetu ju, me me he ka hnyi gan, wale dok u je

ip hnyin, ke e ame ca he ka tha he mötin ka hnyi vat, wá e nye hwiö thö me kuc ötin hnyi vat : ke ieú ame he ka úsoköu káu me tuhan? hawa ca ge je ban tavat eang? 5 Ca Davita ang, waleji adre me sitwhanán hnyi bibiá, ka habe,

Saulo ame hia but kot haniny je thauzan,

Ke Davita bi, haniny je ten thauzan ?

6 Haba Akisa ame hawo Davita me ha káu, ka habe, Kia inya Iehova, a u wisa, ke so könya údilám dö me údilám but unyik hnyi utbavat : anyin a oge ca wá gam ke únyi ae kong, hwán hnyi bong eji u je he jem hnyin könya ke ne o but hnyi bong ang : ke so bi u ca o ka je taben. 7 Anyin a wale hmetu ju u, ke he thö me hnahic, me u me ca kong ka je tuhan at Filisiti. 8 Ke haingö Davita kö Akisa, ka habe, Ieú hnök hna ányá? ke ieú u je wá unyin athnyabaem hwán hnyi bong eji oge tha e hnyin möu ke ne o but hnyi bong ang ; me inye ca he ka hnyi vat me je iwahnaihmiöny me than'a tuhök? 9 Haba Akisa ame thu me ha kö Davita, ka habe. E khanö nya a u so könya helá me angela anyin Khong : ke so bi je tuhan at Filisiti ödrin e ha, ka habe, E ame ca he ka tha he mötin ka hnyi vat. 10 Awe, tha vesá-kong ut me lathnyabainy tuhám adre tha he jem möu : ke öbun ka todrö hnyi hnyomakatu, ke lany dö, ie he thö. 11 Me Davita me je aten ödrin e vesá hnyi hnyomakatu, he ka hmetu ka hnyi hnyeiny at Filisiti. Ke at Filisiti adre me he Jezerela ai.

HNYIMAKAN 30.

**K**E ame o Davita me je aten hnyi Zikelag hnyi bong a kuniny, me ame hia but utut at Amaleka ka hnyi hon ke keihen hnyi Hwaiöu, me hon Zikelag minya, me kot Zikelag, me thoug ge meic : 2 me hügúná je momo me hnyat hia únyi hnyin, ame ne gan ame ne úhnyúkong : ödrin e ca hlingá ke at, ke adre hügúná, me he but. 3 Ke ame o but Davita me je aten ka hnyi taun, me wá bi, adre hia but thong ge meic ; ke adre hia but hügúná je laöiödrin, me je lakudrin obaga me wahu. 4 Haba Davita me tavat unyin ödrin e tenge tot göranyai ke ca khan' ödrin hmetu he ka tenge. 5 Ke adre hügúná minya thö laöiö Davita, jia Ahinoam at Jezerela, me Abigaila safaci Nabala at Karemela.



## I. SAMUELA 31.

6 Ke gan hmâ hlöuhlöu anyi Davita ; anyin ame úhnenamö tavat he ka lúá e, anyin ae vec hnyekon tavat hia thithö can je lakudrin obaga me wahlu : ke Davita ame siwhegiá e bi ga Iehova Khongon.

7 Ke Davita ame ha kö Abiathara at bihut, nöku Ahimelek, ka habe, Ö u hö jem könya iefoda. Me Abiathara ame hom iefoda kö Davita. 8 Ke Davita ame hnö ga Iehova, ka habe, Oge ne hnu hoton deö vat, hawa, oge me he ka hom tilödrin ? Me ame ha kâu, ka habe, Hnu thö ; me u me he ke khöu ödrin, me hügúnâ hia hmetu. 9 Me Davita ame he me tavat a siks haded a tha odrin më ; ke ödrin e o but hnyi wagewe Besor, wale a úlubahing hnyin tavat adre laba biju. 10 Ke Davita ame úhnúhnú, a e me foa haded tavat : anyin a laba biju lo li haded tavat ae sényin me ca khan' ödrin he ka hanyâúâ wagewe Besor : 11 ke ödrin e wá ke at Aigupito hnyi hnyei, me ödrin e hom e kö Davita, me hân ge falawa me habelen ge köiö ; 12 ke ödrin e hân ge ú ometa, me li de wan vine adre hlec meleca ; ke e ame han, me ame hmetu hanon : anyin a kun ta bong ke kun ta lit a ca han hnyin me ic. 13 Ke haingö Davita kâu, ka habe, U atö ia ? ke úhem ua ? Haingen, ka habe, Iny hidróu Aigupito, a athnyabainy ke at Amaleka ; ke a digic nya tuhök, anyin a o könya mok hnyi bong et eji. 14 Ke öhmun e utut ka hnyi hon ke keihen a hwaiüiny at Kerethi, me ke keihen iny at Juda, me hwaiüiny Kaleba ; ke öhmun e thong Zikelag ge meic. 15 Ke Davita ame ha kâu, ka habe, Hawa, u me he ka su nya ka hnyi deö vat eling ? Me baingen, ka habe, Khemanyin dö könya unyin Khong a u me ca he ka hlingö nya, me hnö nya hmetu ka tuhök, me oge me he ka hum u kâe ka hnyi deö vat. 16 Me e ame su e, me wá bi, adre me laba me avá kânâ hia, k' adre me han me ic me bijeúâ, anyin ae se hia je únyi adre me hügúnâ ödrin e hom únyi hnyi hnyei iny at Filisiti, me hnyei Juda. 17 Ke haba Davita ame kuc ödrin hwân hnyi hauhao-treng ke ne o but nyi hnyi sahac : ke ba at ame kec möt, ke so thibi ta je hidróu a foa haded, a hnyat tabâ je kamela m' ödrin e kec. 18 Me Davita ame hügúnâ hmetu ta je únyi hia waleji a hom at Ameleka : ke Davita ame hügúnâ hmetu minya laâiân. 19 Ke ba ke únyi bi ae hia gadrin ame ne úhnyúkong ame ne gan,

me lakudrin obaga me wahlu, me ta je únyi adre sö, me ta je únyi hia ödrin e hom : me Davita ame hom hmetu hia. 20 Ke Davita ame hom je hnahat mamoe me kau, wale ödrin e alen hnyi hnyimakan ke je meno eling, me haingen, ka habe, Anyi Davita but je únyi ang. 21 Ke ame o but Davita ka tavat a tu haded wale ae ti sényin me me ca khan' ödrin he ka he hotu Davita, wale ödrin e hia but olabâ hnyi wagewe Besor : ke ödrin e he me úkhanö me Davita me tavat a tha e më : ke e hakekeny dut Davita me tavat e ame iouny mödrin. 22 Me ame ha tavat ae kong hia me tavat Belial adre tha he me Davita, ka habe, Ca he ötin ka khenâ ködrin ta je únyi adre sö wale ötin e sö, anyin a ödrin e ca hnyi tha he mötin, ke so bi ötin e he ka ve ham ka je бага je laöiödrin me je lakudrin mödrin e lili ödrin me he. 23 Ke haingö Davita, ka habe, Hnyat me lakeiny mönya lö, öbun e ca he ka ányâ helâe ge ta ja únyi wale a ham kötin Iehova, at ame hia but tu' ötin, me hna ka hnyi hnyamötin deö vat ame utut kötin. 24 Ke ie at ame he ka ling öbun hnyi únyi eang ? anyin adre me he ka khenâ kâu at ame he ka hnyi vat helâ me hna khenâ kâu at ame laba me tuö ta je omjehen : adre me he ka khenâ ouco thibi. 25 Ke hwân hnyi bong eling ke ne o but nyiele, e ame otilâ e hnân hnanyibu me owisa hnyi Isaraela ke ne o but hnyi bong ang.

26 Ka o but Davita hnyi Zikelag, me e ame kunâ ke je únyi adre sö ka je hingatiny hnyei Juda, a je lahanen, me ha, ka habe, Walang bwihlany hobi köbun únyi hnyi je únyi adre sö ge je iwahnaihmiöny me Iehova ; 27 ködrin hnyi Beth-ela, me Ramoth hnyi hwaiöu, me Jatira ; 28 me ködrin hnyi Aroera, me Sifemo, me Esetemoa ; 29 me ködrin hnyi Rakal, me ödrin hnyi je taun anyin at Jeramela, me ödrin hnyi je taun anyin at Keni ; 30 me ködrin hnyi Horema, me Kor-asan, me ködrin hnyi Atak ; 31 me ködrin knyi Heberona, me ködrin hia thithö wale hnö Davita me anyin tavat hna labö he kâu.

### HNYIMAKAN 31.

**K**E haba at Filisiti adre me vat me Isaraela : me ame kec bi at Isaraela ge at Filisiti, me ta mok hnyi bucen Gileboa. 2 Ke haba at Filisiti adre me hnu hwegiö

## II. SAMUELA 1.

Saulo me lakon ; me at Filisiti ödrin e hlingö Jonathana, me Abinadab, me Mal-ekisua a laku Saulo. 3 Ke hwege vat kö Saulo, ke ame khâu e ge tavat fana ; k' ame ohmakâ gan hmâ e ge tavat fana. 4 Me Saulo ame ha ka at ame hom tilâ anyin ta je ûnyi vat, ka habe, Oc ut ânyâm hele vat me dâoi nya kâu ; wâ e nye o but tavat adre ca peritomonâ me dâoi nya, me okongu nya. Ke ame hócö at ame hom tilâ anyin je ûnyi vat ; anyin ae gan hmâ anyin ot. Me haba Saulo ame hom hele vat me hamen ta takoú e. 5 Ke a wâ but at ame hom tilâ anyin je unyi vat, a ga mokcu Saulo, me e ame ka ta takoú minya anyin bi hele vat, me tha mok me. 6 Me a tha mokcu Saulo me ta lakon a kun, me at ame hom tilâ je omjehen vat, me aten hia thithö hnyi bong eling. 7 Ke a wâ but at Isaraela hnyi ke keihen hnyigöulen bucen, me tavat hnyi hoton Joridano, a ga kec dö at Isaraela, ke a mokcu Saulo me ta lakon

a kun, me ödrin e hna je taun, me kec ; k' ame o but at Filisiti me labâ.

8 Ke haba nyi ame he at Filisiti he ka uny je ûkhaú anyin je komok, me adre me ö Saulo me ta lakon a kun, odrin e ta hnyi bucen Gileboa. 9 Me adre me subâ degecâ ban me uny dut je omjehen vat, me úkhü-nöng ka hnyi hnyei iny at Filisiti hia he ka thumeto hnyi uma umen anyidrin je hnathat, me ka tavat. 10 Ke adre me ip omjehen vat hnyi uma umö Aseira : ke haba unyin bi, me adre me uhno hnyi hna up hak veto hnyi Bethe-san. 11 Ke a löng ut at Jabesi-gileada ûnyi a ânyâ at Filisiti kö Saulo, 12 me ame todrö tavat hwege hia, me he hnyi lit, me hom unyi Saulo, me unyin ta lakon a kun ûnyi hnyi hna up hak veto hnyi Bethe-san ; me ödrin e o hnyi Jabesi, me thong degecâ je unyin eling. 13 Ke ödrin e hom je jei-ödrin me konâm hmelen úö hnyi Jabesi, me ca han bi hnyi seven ta bong.

## TUSI A LOINY ANYI SAMUELA.

### HNYIMAKAN 1.

**K**E hwaban mok anyi Saulo, ke a hmetu Davita úheny hnyi hna kot at Amaleka, ke lo li bong Davita ame laba hnyi Zikelag ; 2 me haba hnyi bong a kuniny, wâ bi, ame o but ke at úheny hnyi hna hunuma unyi Saulo ae khekke anyin je úkhaú, ke e hu kânâ hon ban : ke e ame o but kö Davita me e ame ta hnyikânâi me khudrung. 3 Me haba Davita ame ha kâu, ka habe, U je mwi ua ? Haingen, ka habe, Oge kec möt ûnyi hnyi hna hunuma anyin Isaraela. 4 Ke haingö Davita kâu, ka habe, Hawa bongon ? Ö u thumetu nya thö. Ke e ame thu, ka habe, A kec dö tavat ûnyi hnyi vat, ke se hia tavat a ta me mokcu ; ke a mokcu minya Saulo me Jonathana a nokon. 5 Ke Davita ame ha ka hidröu at ame thumeto e, ka habe, Hawa, a kâmâu ka khanö u a ga mokcu Saulo me Jonathana a nokon ? 6 Me ame ha hidröu at ame thumeto e, ka habe, Inya o ge me he hon bucen Gileboa, ke wâ bi, Saulo ame tot inyifâlâ dân ö ; ke wâ bi, je kariota me tavat tabö hors adre me hnu hwegiâ e. 7

Ke e ame hwiö me ö nya, me hawo nya. Ke haingök dö, Inya ang. 8 Haingen könya, ka habe, U ia ? Ke oge me tha kau, ka habe, Iny at Amaleka. 9 Me e ame ha könya, ka habe, Ö u tödru huk. me hlingö nya, anyin ame o but könya hmak ; can ae tiga bekhöt möt eú hnyik. 10 Me oge me tot hon, me hlingâ, anyin a oge wâ but a ga me ca he bi ka möt hwabon hnen hna ta but : ke oge me hom korona ûnyi hnyi hon ban, me waen hnyi benyin, ke oge me hom jem ka tuhök. 11 Ke Davita ame kât anyin je úkhaú, me kia, ke helâe minya tavat hia unyin : 12 ke ödrin e tenge, me tenge gan hmâ, me ca han ke ne o but sahac, ca Saulo me Jonathana a nokon, me tavat anyi Jehova. me lap anyi Isaraela ; anyin a ödrin e ta but ge hele vat. 13 Ke Davita ame ha ka hidröu at ame thumeto e, ka habe, U at ua ? Haingen ka habe, Iny nokon atkanyua a at Amaleka. 14 Ke Davita ame ha kâu, ka habe, Ieú gam a u ca ot he ka hinobenyom ka at Iehova ame hú ? 15 Ke Davita ame hawâ ke hidröu, me ha, ka habe, Hakekeny ju me hlingâ. Me e ame

## II. SAMUELA 2.

kot moko e. 16 Ke Davita ame ha kâu, ka habe, Ame he drâm ka mokut bi ka hnyi hon bâm; anyin a u je haiö u bi ge hnyimâm, ka habe, Oge me hia but hlingâ at Iehova ame hû.

17 Ke Davita ame tenge ge utengien eang ca Saulo me Jonathana a nokon: 18 ke e ame hûna ködrin he ka nâ lakon Juda ge utengien cafana: wâ bi, adre sihnalimen e hnyi tusi Jasar; ka habe,

19 Isaraela lö, adre hlingâ hmanenangâm hnyi je dok ae görany unyâm!

Ekölö a ta but tavat ae hwege!

20 Ca he ka thumetoâ hnyi Gatha, Ca he ka khetâ e hnyi je getheniny Asekelona;

Wâ e nye senyin wahlu lakon at Filisiti, Wâ e nye hobâ wahlu lakon tavat adre ca peritomonâ.

21 E, öbun je bucen hnyi Gileboa, E so ame ca ta hubun dân hau me we, ke ba je utkânâ hnân hut:

Anyin adre degecâ eling becin at ae hwege me me kong ut,

Bec anyi Saulo, helâke adre ca hû ge wakaco.

22 Ame ca hwiö cafana anyi Jonathana, K' ame ca hmetu baû hele vat anyi Saulo

Ûnyi hnyi dren hna hlingâ, me ûnyi hnyi pipikhenyainy tavat ae hwege,

23 E tha so me hmanenang Saulo me Jonathana hnyi anyidru môt, Ke adre ca oûsâkâû' ödru hnyi mok; Ödru logot hon je aeto, Ödru hwege hon je liona.

24 Wahlu laku Isaraela lö, tengiö Saulo, At ame khaû' öbun ge ûnyi ae dra hnân omecâ, At ame ip je omjehen gol hnyi je khaû' öbun.

25 Ekölö a ta but hnyi wanben vat tavat ae hwege!

Adre hlingö Jonathana hnyi je dok ae görany unyâm.

26 Iny hlöuhlöu gam Jonathana liamekeiny mönya:

E gan hmâ ânyâm mec kõnya: Hnân lâiâ ânyâm ibetengiö kõnya, E beönua hon betenge anyin omomo.

27 Ekölö a ta but tavat ae hwege, Ke a hia but je ûnyi hnân vat!

## HNYIMAKAN 2.

**K**E hwaban e Davita ame hnö ga Iehova, ka habe, Hawa oge me he ka he hnyi ke je taun anyin at Juda? Ke Iehova ame ha kâu, ka habe, He thö. Ke Davita ame ha, ka habe, Oge ma he kâ? Haingen, ka habe, Heberona. 2 Me Davita ame he kâe, me laâiân minya, jia Ahinoam momo Jezerela, me Abigaila safaci Nabala at Karemela. 3 Ke haba tavat a tha e mē, me Davita ame hum ödrin, tha e me anyidrin je lap: ke ödrin e laba hnyi je taun hnyi Heberona. 4 Me ame o hnyat Juda, ke ödrin e hû Davita eling hnân than hon lap anyin at Juda.

Ke adre me thumetu Davita, ka habe, Haba hnyat a könim Saulo ödrin hnyat Jabesi-gileada. 5 Haba Davita ame ûkhû-nöng ka at Jabesi-gileada, me ha ködrin, ka habe, E so öbun e hnabic ut ga Iehova anyin öbun e omanenâ ibetengiö e ka tuhöbun a Saulo, me konâm e. 6 Ke walang ang, e so Iehova ame omanenâ anyin ibetengiö me hnathu köbun: ke haba khaca oge me he bi nya ka bi hwaban köbun betenge eling, anyin öbun e hia but ânyâ ûnyi e. 7 Ke walang ang, hwege th' öbun, me hnyök бага but: anyin a mokcu Saulo tuhöbun, ke haba khaca a hia but hû nya lap anyi Juda me hnân tuhödrin.

8 Ke Abinera nöku Neri, taben ta je vat anyi Saulo, ame hia but hum Ise-boseth nöku Saulo, me hom e Mahanaima ai; 9 me otilâ e ka than hon at Gileada, me Asuri, me Jezerela, me Eferaima, me Beniamina, me Isaraeli hia. 10 (Ke fâte je hunai Ise-boseth nöku Saulo hnyi ûen e ame hwân ka than hnyi Isaraela, ke e ame musi hnyi lo li huna.) Ke ame hnu hotu Davita lap anyin at Juda. 11 Ke haba ûen ame musi hnyi Heberona Davita hon lap anyi Juda, me seven je huna ke siks ta tehi.

12 Ke ame he but Abinera nöku Neri me lakei Ise-boseth a nöku Saulo ûheny Mahanaima Gibeona ai. 13 Ke ame he but Joab nöku Zeruaia, me lakei Davita, me ûkhanö mödrin hnyi an Gibeona; ke ödrin e ve laba ju, ke vat hnyi ke baten an, ke ke vat bi hnyi ke baten. 14 Ke Abinera ame ha kö Joab, ka habe, Me todrö wahi-dröu me walak hnyi hnyimakötin. Me haingö Joab, ka habe, E so ödrin e tot. 15 Me ödrin e ve todrö me he hoton úseidrin; a ödrin twelv ga Beniamina me Ise-boseth

## II. SAMUELA 3.

nöku Saulo, ke ke twelv a lakei Davita. 16 Ke ödrin e ve úkátökouá je bödrin, me ve únákouá anyidrin je hele vat hnyi je vhaködrin; me ödrin e tha ta ju: anyin a wale adre me hwenyi ien dok e, me, Hele-kath-huzurim, wale Gibeona. 17 Ke ti gan hmá vat hnyi bong eling; k' adre me kuc Abinera me at Isaraela hnyi hnyimakan lakei Davita. 18 Ke kun ta laku Zerua eling, jia Joab, me Abisai, me Asael: ke haba Asael at ame wadring hwege helá me zebiiny hnyot. 19 Ke Asael ame hnu Abinera; me e ame wadring hotu Abinera k' ame ca saú ka hnyi ke keihen metá me me. 20 Ke Abinera ame hwiö me ha, ka habe, U Asael? Me e ame thu, ka habe, Inya ang. 21 Me Abinera ame ha káu, ka habe, Saú thö ka hnyi ke keihen metá ame ne me, me kát ke hidróu, me hom anyin ta je únyi vat. Ke e höcö bi Asael he ka saú gan. 22 Me Abinera ame ha hmetu kö Asael, ka habe, Saú thö gak: hnán eú oge me he ka kuc u hnyikánái? ke oge ányá e me oge ma kamáu ka iouny hmetu me Joab a tuhám? 23 Ke e höcö he ka saú: anyin a wale Abinera ame dá e ge obiny ö hnyi hnyekon me ame manen bi ö hnyi hoton; me e ame ta ju me mokcu eling: ke haba tavat hia, hnyat adre me o ka hnyi dok ame ta hnyin Asael me mok hnyin, me, ödrin e todru. 24 Ke haba Joab me Abisai ödrin me hnyi hnu Abinera: ke ame didrut seúnö hnyi úen ödrin me o hnyi bucen Ama, wale cicö Gia gethen ame he hnyi hnyebuba Gibeona. 25 Ke ame úkhacaköu lakon Beniamina hotu Abinera, me me khaca hmetu thö vat, me tot hon ke dok ae hut. 26 Haba Abinera ame hongot kö Joab me ha, ka habe, Hawa, ame he ka han bala hele vat? u me ca wá a g'ame he ka hiny hnyi obiny? ke ie úen u me he ka ha ka tavat he ka hmetu úheny hnyi hna hnu je liamekeiny mödrin? 27 Ke haingö Joab, ka habe, Kia inya Khong, ke u je ne ca fuc me ame ne he ka hmetu nyi tavat úheny bnyi hna hnu je liamekeiny mödrin. 28 Me Joab ame tuá trutru me ame todru tavat hia thithö, me ca hnu Isaraela hmetu, ke haba khaca ödrin e ca vat hmetu. 29 Ke haba Abinera me lahien ödrin e vheno dok ae tha hon hnyi lit hia eling; ke ödrin e banyáúá Joridano, me vheno Betheron hia, me o hnyi Mahanaima. 30 Ke Joab ame hmetu úheny hnyi hna hnu Abinera: ke e ame úkhacaköuá tavat hia, me ame hia but ke je lakei

Davita a eitín, me Asael minya. 31 Ke haba lakei Davita ödrin e hia but kot at Beniamina me lahiö Abinera, a theri haded ke sikste je komok. 32 Ke ödrin e hum Asael me konám e hnyi erkemok anyin kamen, wale hnyi Bethe-leema. Ke haba Joab me lahien ödrin e vheno lit hia, ke a lany dö ködrin hnyi Heberona.

### HNYIMAKAN 3.

**K**E ame vat beú hmá, lap anyi Saulo me lap anyi Davita: ke Davita ame hwege tot, ke ame ngá tot lap anyi Saulo.

2 Ke Davita ame hnokö lakon obaga hnyi Heberona: Aminona nokon a báu, nöku Ahinoam momo Jezerela; 3 ke Kileaba útangköu mé, nöku Abigaila, safaci Nabala, at Karemela; ke Abasoloma a kuniny, nöku Maaka, momo nöku Talemai than Gesuri; 4 ke Adonia vakiny, nöku Hagitha; ke Sefatia a thabúnginy, nöku Abitala; 5 ke Itherama a siksiny, nöku Egela öiö Davita. Adre hnöku ödrin ga Davita hnyi Heberona.

6 Ke hnyi úen ae tiga hu vat ge lap anyi Saulo me lap anyi Davita, me haba Abinera ame silwegiá e bi singiny lap anyi Saulo. 7 Ke e hu ke momo anyi Saulo, adre hwenyi ien me Rizepa, nöku Aia: ke Ise-boseth ame ha kö Abinera, ka habe, Ieú gam u je hom momo anyi cica? 8 Me Abinera ame ti hmönyin can hofuc ho Ise-boseth, me ha, ka habe, Hawa, iny ban kuli anyi Juda? Haba hnyi úen ang oge me omanená ibetengiö ka lap anyi Saulo a kámám, me je liamekeiny mé, me je lahanen, me ca hnö u ka hnyi hnyamö Davita, ke so bi u je he hnyi bong ang ka haikongu nya me momo ang? 9 Hamen Khong he ka ányá heláe kö Abinera, me bi hanen minya, oge ne ca he bi nya ka ányá kö Davita helá me Iehova ame khemanýin káu; 10 he ka wia dökhü únyi hnyi lap anyi Saulo, me otílá theron anyi Davita hon Isaraela me hon Juda, hwán hnyi Dana ke ne o but hnyi Bere-seba. 11 Me e ca khana he ka thu kö Abinera ke hofuc a khaca, anyin a e ame outen.

12 Haba Abinera ame kuná je úthu-metu kö Davita, a ka únyi gan bi, ka habe, I ia hnyeí? haingen minya, ka habe, U me he ka ányá úhinyköu mönya, me wá bi, ame he hnyamök ka tha e möu ke ka wia köu Isaraela hia thithö. 13 Me haingen, ka habe, E so, me oge me he ka úhihi-

## II. SAMUELA 3.

nykôu môu: ke so bi khaca thibi ûnyi oge me wek gam, ka habe, a u me ca he ka wâ hnyimakök u ka ca hum Mikala nöku Saulo jem, u ka he jem, ka iouny mönya. 14 Ke Davita ame kunâ je metâ kö Ise-boseth, nöku Saulo, he ka ha, ka habe, Ham dö kõnya öiök, jia Mikala, waleji oge me bi säniny ge je unen unyin at Filisiti a wan haded. 15 Me haba Ise-boseth ame kunâ je uthumetu he ka hom e unyin aiân baga jia Paletielä nöku Laisi. 16 Ke ame tha he baga me aiân, k' ame tenge hoton, ke ne o but hnyi Bahurim. Me wale Abinera ame ha ka baga, ka habe, Hmetuhmetu ju: me e ame he hmetu.

17 Ke haba Abinera ame ûhnenamö me wahingatiny Isaraela, me ha, ka habe, Haba ebac öbun e elöm Davita me me tuhöbun: 18 awe, ânyâ thö walang ang: anyin a Iehova ame hia but ha ga Davita, ka habe, Oge me he ka omelö lakeik a at Isaraela ûnyi hnyi hnyamen at Filisiti, me hnyi hnyi hnyamen je iwahnaihmiöny mödrin ge hnyamö Davita athnyabaik. 19 Ke Abinera ame fuc minya hnyi hnyikönyen at Beniamina: ke ame he minya Abinera ka fuc hnyi hnyikönyö Davita anyi Heberona ge ta je ûnyi hia ae so kö Isaraela, me lap hia anyi Beniamina. 20 Me Abinera ame o kö Davita hnyi Heberona, ke tha e me tavat a twente. Ke Davita ame ânyâ bijeû hobi kö Abinera me anyin bunyen. 21 Ke Abinera ame ha kö Davita, ka habe, Oge me he ka tot me he, me ûkhacaköuâ ka than a tuhök Isaraela nia, m' ödrin e ûhinhnykôu möu, me u me wusi ködrin hia hoton wem. Me Davita ame kunö Abinera; me e ame he hnyi hnahic. 22 Ke wâ bi ame o but lakei Davita me Joab ûheny hnyi hna hnu vat, me oâ je ûnyi adre sö ae gan: ke hiö Abinera unyi Davita hnyi Heberona; anyin a hia but kunâ e, k' ame he but hnyi hnahic. 23 Ke hnyi ûen ame o but Joab me utbavat hia unyin, adre me ha kö Joab, ka habe, A mwi ang Abinera nöku Neri, a he ka wâ than, ke e a hia but kunâ e, me a he but hnyi hnahic. 24 Haba Joab ame o ka than, me ha, ka habe, Ieû ang u je ânyâ? wâ bi a o köu Abinera; anyin a ieû u je kunâ e, ke a he but eja? 25 E khanö u Abinera nöku Neri a ga o he ka iyawö u, me wâhmakhmeto hnâm hna didrut me didrö, me he ka wâhmakhmeto ta je ûnyi u me ânyâ. 26 Ke ame didrut Joab ûheny unyi Davita, me e ame kunâ je uthumetu

hotu Abinera, ke ödrin e ohmeto e ûnyi hnyi an Sira: ke ca khanö Davita bi. 27 Ke ame hia hmetu Abinera Heberona ai, me haba Joab ame tha saû but mē hnyi homagöule he ka ûhnenamö duöng, me ame dâ e eling hnyi hnyekon, me ame mokcu, can drö Asael liamekeiny mē. 28 Ke hwaban e Davita ame löng me ha, ka habe, Iny gufa me dökhuk döklhu hnyi hnyimakö Jehova nyiele balua ge dra drö Abinera nöku Neri: 29 e so e he ka takoû bö Joab me lap hia anyin kamen; ke ame ca he ka hia ûnyi hnyi lap anyi Joab at ame hingölö, me lepera, me at ame ci, me at ame ta ge hele vat, me at ae ba jeû. 30 Ke Joab me Abisai liamekeiny mē ödru me hlingö Abinera, can e ame hlingö Asael liamekeiny mödru hnyi Gibeona hnyi vat.

31 Ke haba Davita ame ha kö Joab, me tavat hia unyin ka habe, Kia but anyibun je ûkhaû, me weikâ ec mano ae gan nân, me tengiö Abinera. Ke haba Davita a than ame he hoton taben komok. 32 Ke adre me könim Abinera hnyi Heberona: ke ame tenge göranyai than hnyi hu Abinera; k' ame tenge tavat hia. 33 Ke than ame tengiö Abinera, me ha, ka habe,

Hawa, e ûcû Abinera he ka mokcu helâ me imekiny at ae monu?

34 Adre ca ca li hnyamâm, me inâ li cam hnyi wen a fao:

Helâ me at ame ta hnyi hnyimakan tavat ae kong, me u je ta helâe.

K' ame tenge hmetu bi tavat hia gan. 35 Ke ame o but tavat hia ka kunö Davita ka han falawa e me tiga lany; ke Davita ame khemanyin, me ha, ka habe, Hamen Khong he ka ânyâ helâe kõnya me bi hanen minya, oge ne kâlâ falawa, ame ne ke jeû bi, e ka tiga ca dit bi seûnö. 36 Ke haba tavat hia adre me wâhmakhmeto e, ke so hwa-kecin ködra bi: ke haba khaca, ame senyin bi tavat ge ta je ûnyi hia a ânyâ than. 37 Me ame wâhmakhmetoâ hnen tavat hia me at Isaraela hia hnyi bong eling a ca ûnyi ge than he ka hlingö Abinera nöku Neri. 38 Ke haingen than ka lakeiny, ka habe, Hawa, e ca khan' öbun a ga ta but ke taben me at ae gan hnyi bong ang hnyi Isaraela? 39 Ke iny senyin dut hnyi bong ang, eja ke ne adre me hia but hú nya huân than; ke ti hmak kõnya li at ang a li laku Zeriuu: e so Iehova ame he ka bi hwaban ka at a ânyâ hwakecin ae kong hoton anyin bi monu.

## II. SAMUELA 4, 5.

### HNYIMAKAN 4.

**K**E a löng ut nöku Saulo a ga moku Abinera hnyi Heberona, me ame sēnyin li hnyamen, k' ame hmak hnyekon at Isaraela hia. 2 Ke e bi unyin nöku Saulo li at a li taben deö vat: Baana ien ke at, ke Rekaba ien ke at, a li laku Rimona, at Berotha, hanen lakon Beniamina: (anyin adre tha öü Berotha me Beniamina: 3 k' ame kec Gitaim ai at Berotha, k' ödrin e laba atkanyua eling ke ne o but hnyi bong ang.)

4 Ke e hu ke nöku Jonathana nöku Saulo ae mat li can. Ke thabúng hunainy wale hnyi úen ame o úthumetu ka haiö Saulo me Jonathana únyi Jezerela, ka ame hijen e hnen momo ame tuö me kec ut: ke momo ame tiga kec logot, me e ame ta me omadrá e. Haba ien bi, me Mefiboseth.

5 Me ame he li laku Rimona at Berotha, jia Rekaba me Baana, me o helá me jebigö ka hnyi uma umö Ise-boseth, hnyi úen e ame mená hnyi jebigö. 6 Ke ödru me o hnyi wanben uma helá ke ödru me he ka hok hwit; ke ödru me dá e hnyi hnyekon: ke Rekaba me Baana a liamekeiny me ödru me kec. 7 Ke ödru me o ka hnyi uma, me e ame mokut hon hna mokut hnyi hnyeuleny, me ödru me kot e, me hlingá, me subá but ban, me hom ban, me vheno lit hnyi gethen hnyi dok ae tha hon. 8 Ke ödru me hom bö Ise-boseth kö Davita hnyi Heberona, me ha ka than, ka habe, Wá bi, bö Ise-boseth nöku Saulo iwahnaihmiony möu, wale at ame elám ányám möt; ke a hia but Iehova bi hwaban kö Saulo me je mátrániny hobi káu than a tuhök hnyi bong ang. 9 Ke haba Davita ame thu kö Rekaba me Baana a liamekeiny me a li laku Rimona at Berotha, me ha ködru, ka habe, Kia inya Iehova, at ame omelö hanuk únyi hnyi ta je kong hia, 10 hnyi úen a thumetu nya ke at, ka habe, Wá bi, a moku Saulo, ke ame únykúme wale úthumetu ae so könya, me oge me kát e, me hlingá e hnyi Zikelag, wale hwaban oge me bi hwaban anyin úthumetu. 11 Ke hawa ge úganiny hwaban, e ka he tavat ae monu ka hlingá at ae wisa hnyi umen bi uma me hon anyin hna mokut, hawa, oge me ca he ka elám dren únyi hnyi hnyamöbu, me ohí' öbu eang hmeledrany? 12 Ke haba Davita ame kuná anyin je hidróu, me ödrin e hling'

ödru, me subá but li hnyamödru me li cadru, me uhni ödru hon an hnyi Heberona. Ke adre me hom bö Ise-boseth, me konám e hnyi hu Abinera hnyi Heberona.

### HNYIMAKAN 5.

**K**E ame he je tribu Isaraela hia kö Davita hnyi Heberona, me ha, ka habe, Wá bi öhmun ang je jeiám me utiöiám. 2 Ke haba ehac waleji a than kötin Saulo, me u thibi at ame lelö háang me lelö hmetu jem at Isaraela: ke Iehova ame ha köu, ka habe, U ma he ka hán lakeik a Isaraela, ke u me he ka bi than hnyi Isaraela. 3 Ke ame o but wahingatiny at Isaraela hia thithö ka than hnyi Heberona; me Davita than ame úhinyköu mödrin hnyi Heberona hnyi hnyimakö Iehova: me ödrin e hú Davita me me tuhan Isaraela.

4 Ke thöte je hunai Davita hnyi úen e ame hwán he ka musi, ke e ame musi hnyi ta je huna a fáte bi. 5 E ame musi Juda hnyi Heberona seven je huna ke siks je tehi: ke thöte theri je huna e ame musi Isaraela me Juda hia hnyi Jerusalema.

6 Ke ame he than me tavat unyin Jerusalema ai me tot úcon at Jebusi, a je aten hnyi: tavat adre me ha kö Davita, ka habe, U je ne ca hom je wadröu me tavat ame ci, me u me ca he ka didró jem: anyin adre me únykúme a ga ca khanö Davita he ka dit káe. 7 Ke so bi Davita ame húgúná hnabá wale Ziona; a wale taun anyi Davita. 8 Ke Davita ame ha hnyi bong eling, ka habe, Haba at ame he ka kot at Jebusi, me hamen he ka ölö ka hnyi deny köiö, me kot hnyat ame ci me wadröu, a je húkotiánö Davita. Anyin a wale, adre me labö ha, ka habe, Wale bi eling je wadröu me hnyat ame ci; me ca khana he ka dit ka hnyi uma. 9 Ke Davita ame laba hnyi hnabá, k' ame hwenyi ien, me, taun anyi Davita. Ke Davita ame up veto igigilö hwán hnyi Milo ke ne o thö eiö hnyin. 10 K' ame hwege tot Davita; anyin a e bi unyin Iehova Khongon sabaoth.

11 Ke haba Hirama thaniny Turo ame kuná je úthumetu kö Davita, me je úö arasi, me tavat tretrau utö, me hnyat tretrau veto, me ödrin e up uma umö Davita. 12 Ke Davita ame wáhmakhmeto a Iehova ame otilá me me thaniny Isaraela, k' ame

## II. SAMUELA 6.

ogânâ dokhon dôkhu can je lakeiny a at Isaraela.

13 Ke Davita ame hok hanen anyin je momo me laâiân minya úheny Jerusalema, hnyi úen e ame o thö úheny Heberona : ke adre hnokoá ke je laku Davita obaga me omomo. 14 Ke walang je iödrin adre hnokoá kâu hnyi Jerusalema ; jia Samua, me Sobab, me Nathana, me Solomona, 15 me Ibara, me Elisua, me Nefega, me Jafia ; 16 me Elisama, me Eliada, me Elifelet.

17 Ke a löng ut at Filisiti a g' adre hia but hú Davita hnân than Isaraela, me ame he at Filisiti hia ka elöm Davita ; ke a löng ut Davita, me e ame utut ka hnyi hnabâ. 18 Haba at Filisiti ödrin e o me avâ hnyigöuleny bucen Refai. 19 Haba Davita ame hnö unyi Iehova, ka habe, Hawa, oge me he ka tot ka at Filisiti ? u me he ka hn' ödrin ka hnyi hnyamök ? Haingö Iehova kö Davita, ka habe, He thö : anyin oge me he ka ti hna at Filisiti ka hnyi hnyamâm. 20 Ke ame o but Davita hnyi Baala-farez, ke Davita ame kuc ödrin eling : me e ame ha, ka habe, A hia but Iehova ohmetro je iwahnaihmiöny nönya hnyi hnyimakök, helâ me úkhutuiny köiö. Anyin a wale e ame hwenyi ien dok eling me Baala-farez. 21 Ke ödrin e hna degecâ eling anyidrin je idola, me ame hom e Davita me lakeiny.

22 Ke ame o hmetu thö at Filisiti, me avâ hnyigöulen bucen Refai. 23 Ke Davita ame hnö unyi Iehova, me e ame ha, ka habe, U me ca he ka he : ke so bi u me he hwale thö ka hnyi hotudrin, ke he thö ködrin cicö je úö baka. 24 Ke u ka löng dö hwa he ethö hon sabaka, awe, ie utut : anyin a Iehova ame hia but bân hnyi hnyimakâm, he ka kot utbavat anyin at Filisiti. 25 Ke Davita ame ânyâ helâ me hna hûna kâu ga Iehova ; me kot at Filisiti hwan hnyi Geba ke ne o but hnyi Gezera.

### HNyimakan 6.

**K**E Davita ame úkhacaköuâ hmetu tavat adre úca ge at Isaraela, ödrin thöte thauzan. 2 Ke Davita ame tot me tha he me tavat hia unyin, úheny Baala Juda, he ka hom úheny e tang tangen Khong, adre hwenyi Ien, a iö Iehova tuhan sabaoth, at ame laba hon li kerubi. 3 Ke ödrin e ip tang tangen Khong hon kat ae teb únyi, me hom e únyi hnyi uma

umö Abinadab, wale hnyi dok ae hut : ke haba Uza me Ahio li laku Abinadab, ödru me alen kat ae teb únyi. 4 Ke ödrin e hom e únyi hnyi uma umö Abinadab, a e hnyi dok ae hut, tha e me tang tangen Khong : ke Ahio ame he hnyi hnyimakan tang. 5 Ke haba Davita me lap Isaraela hia, adre me khumöngö hnyi hnyimakö Iehova ta je únyi khumöng kop, me je kitara, me nabeli, me bwinybet, me pate, me simebalo. 6 Ke adre me o ka hnyi hna huje hwit anyi Nakan, me haba Uza ame inâ benyin ka hnyi tang tangen Khong, me kât e ; anyin ame haú li bolok. 7 Me ame ubâhlâ hmönyin anyi Iehova kö Uza ; me Khong ame kot e eling can anyin monu ; me e ame mokcu eling hnyi tang tangen Khong. 8 Ke hmak bi Davita can ame utut Iehova kö Uza : ke e ame hwenyi ien dok eling me Farez-uza, ke ne o but hnyi bong ang. 9 Ke Davita ame outö Iehova hnyi bong eling, me e ame ha, ka habe, Ame ka kâmâu ka o könya tang tangö Iehova ? 10 Ke höcö Davita he ka hom bi kâu tang tangö Iehova ka hnyi taun anyi Davita ; me haba Davita ame saúâ ka hnyi uma umö Obed-edoma at Gatha. 11 Me ame mokut tang tangö Iehova eiö hnyin uma umö Obed-edoma at Gatha hnyi kun ta tehi : me Khong ame ohnahici Obed-edoma me anyin lap hia. 12 Ke adre me thumetu Davita than, ka habe, Iehova ame hia but ohnahicâ lap anyi Obed-edoma me ta je únyi hia can tang tangen Khong. Me haba Davita ame he me hom senyiná tang tangen Khong, úheny hnyi uma umö Obed-edoma, ka hnyi taun anyi Davita. 13 Ke ame he hnyat vadren tang tangö Iehova, ke ödrin e he siks ta hna okca, me e ame hudo ke bolok me ke meno ae pipikhenya. 14 Ke Davita ame biâ hwege hnyi hnyimakö Iehova ; ke Davita ame weikâ iefoda lino. 15 Ke haba Davita me lap hia anyi Isaraela, adre me hom tang tangö Iehova me hongot me tûö trutru. 16 Ke hnyi úen ame didrö tang tangö Iehova ka hnyi taun anyi Davita, haba Mikala nöku Saulo ame bwele hnyi mamalama me ö Davita than ame gâ me bibiâ hnyi hnyimakö Iehova ; me e ame hükötiâ e hnyi hnyekon. 17 Ke ödrin e odilâ tang tangö Iehova, me ip e hnyi hnen hnyi wanben uma mano wale ame otilâ Davita hobi kâu : ke Davita ame hudo je hudiny leú me je hudiny ole hnyi hnyimakö Iehova. 18 Ke a hia but Davita

## II. SAMUELA 7.

hudo je hudiny leú me je hudiny ole me e ame ha hnahicâ tavat hnyi iö Iehova tuhan sabaoth. 19 Ke e ame khenâ oúco ka tavat hia, wale ka úseiny Isaraela hia, obaga me omomo minya, úsa khaca ong areto, me khaca uthmeno, me khaca u wan vine ae meleca. Me ame vese thö tavat hia ka hnyi je hnyabadrin. 20 Ke Davita ame hmetu he ka ha hnahicâ anyin bi lap. Ke ame didrut Mikala nöku Saulo he ka úkhanö me Davita, me ha, ka habe, E ti hmanenang eja than Isaraela, at ame bi wânen lathnyaba a je hlu hluiny lathnyabaem, helâ me at ae hop ame bi wânen! 21 Ke haingö Davita kö Mikala, ka habe, Wale hnyi hnyimakö Iehova at ame úcö nya hon kâmâm me anyin lap hia, he ka otilö nya hnân taben tavat anyi Iehova, a Isaraela: wale me inye he ka khumöng dö hnyi hnyimakö Iehova. 22 Ke oge me he ka ikiki tot hon e, ke hamök he ka he hnyikânâi hnyi hnyimakök bi: ke ame he ka oganö nya lathnyaba omomo wale u me ha eja. 23 Ke ba nöku Mikala nöku Saulo ke ne o but bong e ame mokcu hnyin.

### HNyimakan 7.

**K**E ame laba than hnyi umen uma, ke a hia but Iehova omenâ e únyi ge ta je iwahnaihmiöny mē hia igigilö, 2 me haba than ame ha kö Nathana perofeta, ka habe, Wa bi inya oge me laba hnyi uma arasi, ke haba tang tangen Khong ame laba hnyi wanben je tubwiny mano. 3 Ke Nathana ame ha ka than, ka habe, He thö, ânyâ ju ta je únyi hia eú hnyi hnyekom; anyin a tha unyâm Iehova. 4 Ke haba hnyi lit eling, me ame o but hofuc ho Iehova kö Nathana, ka habe, 5 He thö me ha kö Davita athnyabaik, ka habe, Walang hofuc ho Iehova, ka habe, Hawa u me he ka up uma me hnyabak? 6 Anyin oge me ca laba eiö hnyin uma hwân hnyi bong oge me hom jem hnyin lakon Isaraela úheny Aigupito ke ne o but hnyi bong ang; ke oge me hia but laba hnyi uma mano ame ne uma menâ. 7 Ke hnyi ta je hnyei hia waleji oge me tha he me lakon Isaraela hia ka hnyin, hawa, e hu ke ong hofuc oge me ha ka ke tribu Isaraela, waleji oge me hûna he ka hân lakeik a at Isaraela, me ha, ka habe, Ieú gabun öbun e ca up umök uma arasi? 8 Ke haba walang u me he ka ha helâe kö Davita athnyabaik, ka habe, Walang hofuc ho Iehova tuhan sabaoth, ka habe,

Oge me hum u únyi hnyi haginny mamoe, a únyi hnyi hna tuö je mamoe, m' u me he ka musö lakeik a at Isaraela: 9 ke oge me tha he möu waleji hnyi hnâm hna he ka hnyin. me subâ degecâ je iwahnaihmiöny möu hnyi hnyimakâm; ke oge me he ka olungâ iâm helâ me ien tavat ae gan eang hmelen. 10 Ke oge me he ka úca dok hobi kâu lakeik a at Isaraela, me otil' ödra, m' adre me he ka laba hnyi idrin bi, k' adre me ca he hmetu ka bwebweli ödra; ke haba khaca, ame ca he hmetu tavat ae kong ka oveci ödra helâji me ehac, 11 me helâji me úen oge hwân ka kunâ hnyat owisa he ka musi ka lakeik a at Isaraela; ke oge me he ka omenö u únyi ge ta je iwahnaihmiöny möu hia thithö. Ke haba khaca, Iehova ame thumetu u a g' ame he Iehova ka otilâ ânyâm lap. 12 Ke e ka bekhöt ut bongom ta je bong, ke u ka mokut ut unyin lakâmâm, me oge me he ka otilâ mâtrânâm hwabâm, wale at a hing nokom bi, ke oge me he bi nya ka ohmâ dokhon dökhü. 13 Me e ame he ka otilâ uma hobi kâu iök, me oge me he bi nya ka ohmâ theroniny dokhon dökhü nyiele balua. 14 Oge me he ka kamen bi, ke e ame he ka nöku: k' ame ne ânyâ hulö, me oge me he ka kot ge osö hnân kot at, a unyi adre kot kâu lakon at; 15 k' ame ca he ka hia anyik ibetengiö unyin bi, helâji me hnök hna húgúnâ e únyi ga Saulo, wale oge me ohia hnyi hnyimakâm. 16 Ke adre me he ka otilâ hmâ ânyâm lap me dokhom dökhü hnyi hnyimakâm nyiele balua: adre me he ka ohmâ ânyâm theron nyiele balua. 17 Helâ me ta je únyi hia eling me ta je hna omanenâ hia eling a ha Nathana kö Davita.

18 Haba Davita than ame didrö me laba ju hnyi hnyimakö Iehova; me haingen. ka habe, Iny ia Than Iehova, ke ieú anyik lap m' u je hum nya ke ne o but walang ang? 19 Ke únyi ae úhnyúkong e hnyi hnyimakâm, Than Iehova; ke so bi u je hia but ha ge lap anyin athnyabaem hobi kâu nyiele; ke hoton hwakecin at eling, Than Iehova! 20 Ke ieú hmetu ame he Davita ka ha köu? anyin a u je wâhmakhmeto athnyabaem, Than Iehova. 21 Únyi hnyi hwâm hofuc, ke helâ me hnyekom, u je hia but ânyâ ta je únyi hia ae gan eling, he ka owâhmakhmeto athnyabaem. 22 Anyin a wale u gan Iehova Khong: anyin ae ba at ae úcú möu, ke ba ju ke Khong, ke hake u thibi, helâ me hnöhmun hna löng ge je hnyikönyöhmun. 23 Ke ewa ke hnyei



## II. SAMUELA 8, 9.

eang hmeledrany ae úcú me em hnyei, a Isaraela, wale ame he Khong ka omelö kâu bi hnân iny, me otilâ ien bi, me ânyâ hobi köbun je únyi ae gan me hnân outen hobi kâu em hnyei, hnyi hnyimakan lakem, waleji u je omelö köu bi úheny Aigupito, únyi ge ta je hnyei me je khongudrin? 24 Ke u je ohmâ em hnyei a at Isaraela hobi köu, hnân em hnyei nyiele balua; ke haba u Iehova, u je bi Khongudrin. 25 Ke walang ang, Iehova Khong lö, otilâ hmâ ju hofuc u je ha hobi kâu athnyabaem, me anyin lap nyiele balua, me ânyâ helâ me hnâm hna ha. 26 Ke e so he ka ogânâ iâm nyiele balua, me ha, ka habe, Iehova tuhan sabaoth e thibi Khongu Isaraela: ke adre me he ka ohmâ lap anyi Davita athnyabaem hnyi hnyimâkâm. 27 Anyin a u, Iehova tuhan sabaoth, Khongu Isaraela, a hia but omanenâ ka athnyabaem, ka habe, Oge me he ka op ânyâm lap: anyin a wale haba athnyabaem ame wâ eú hnyi hnyekon he ka hijö köu hic eling. 28 Ke walang ang, Than Iehova lö, u thibi Khong, ke hnathu hwâm hofuc, ke u je hia but ha bânâ ka athnyabaem únyi eling ae so: 29 ke walang ang, e na wem bi he ka ohnahicâ lap anyin athnyabaem, me me e bi nyiele balua hnyi hnyimâkâm: anyin a u at ame ha, Than Iehova: me ö u ohnahicâ lap anyin athnyabaem ge hnahic únyi gam nyiele balua.

### HNYIMAKAN 8.

**K**E hwaban e Davita ame kot at Filisiti me hom úhnyúkongu ödra: ke Davita ame hügúnâ Metheg-ama únyi hnyi hnyamen at Filisiti. 2 Ke e ame kot at Moaba, me tuluti ödra ge tulut tö, me omokuli ödra eú hnyi kânâ; ke e ame tuluto lo li gaö he ka hling' ödrin, ke khaca gaö ae bekhöt he ka omelö. Me ame hwân tavat Moaba he ka bi lakei Davita, k' ödrin e hom je bwihlany. 3 Ke Davita ame kot minya Hadadeza, nöku Rehoba, than Zoba, wale me me he ka hügúnâ hmetu iny hnyei hnyi Wagewe. 4 Ke Davita ame hügúnâ gan khaca thauzan ke seven haded tavat tabö hors, ke twente thauzan tavat he hon kânâ: ke Davita ame sö can je hors hanen je kariota hia, k' ame ip biju keihen hobi kâu je kariota a khaca haded. 5 Ke ame o thö at Suria úheny Damaseko he ka hom hadruo Hadadeza, than Zoba, me Davita ame kot twente tu thauzan at Suria. 6 Ke

haba Davita ame otilâ je lap tue hnyi Suria hnyi Damaseko: ke ame bi lakei Davita but at Suria, me adre me hom je bwihlany. Ke Iehova ame ham dökhu kö Davita hnyi je hnyei e ame he ka hnyin hia. 7 Ke Davita ame hügúnâ je bec gol únyi ge lathnyabai Hadadeza, me hom Jerusalema ai. 8 Ke Davita a than ame hügúnâ bras ae ti gan hmâ únyi hnyi taun Beta me Berothai a li taun anyi Hadadeza. 9 Ke a löng ut Toi than Hamath a Davita ame kot utbavat hia anyi Hadadeza, 10 me haba Toi ame kunö Jorama a nokon kö Davita than, he ka iouny mä, me ha hnahicâ e, anyin a e ame hia but vat me Hadadeza, me kot e: anyin a li iwahnaihmiöny jia Toi me Hadadeza. Ke e hu eú hnyi hnyamen je kaia sileva, me je kaia gol, me je kaia bras: 11 Ke Davita than ame okabâ je únyi eling minya kö Iehova, tha e me je sileva me gol wale e ame okabâ únyi hnyi je hnyei hia e ame hom úhnyúkongo; 12 únyi Suria, me Moaba, me laku Amona, me at Filisiti, me Amaleka, me únyi hnyi hna hügúnâ ga Hadadeza nöku Rehoba, thaniny Zoba. 13 Ke ame lung iö Davita hnyi üen e ame hmetu úheny hnyi hna kot at Suria hnyi Hnyigöulen bucen Salt, wale eitin thauzan tavat. 14 Ke e ame otilâ je lap tue hnyi Edoma; hnyi Edoma hia e ame otilâ je lap tue, ke ame bi lathnyabai Davita but at Edoma hia. Ke Iehova ame ham dökhu kö Davita hnyi hnen hna he ka hnyin hia.

15 Ke Davita ame musö Isaraela hia; ke Davita ame úhnö me ânyâ wisa ka lakeiny hia. 16 Ke Joab nöku Zeruaia ame bi taben anyin je utbavat; ke haba Jehosofata nöku Ahiluda at ame oúnykúmeâ: 17 ke Zadoka nöku Ahituba, me Ahimelek nöku Abiathara, li at bihut; ke Seraia at sihnalimen; 18 ke Benaia nöku Jehoiada ban ka at Kerethi me Pelethi; ke je laku Davita tavat musi.

### HNYIMAKAN 9.

**K**E Davita ame hnei, ka habe, Hawa, e hu kolon biju lap anyi Saulo, me o ge me he ka betenge gan ga Jonathana? 2 Ke e hu ke athnyaba hanen lap anyi Saulo, Ziba ien, ke ödrin e hawâ e kö Davita; ke haba than ame ha kâu, ka habe, Ziba u? Haingen, ka habe, E ke, athnyabaem. 3 Me ame ha than, ka habe, Hawa, e hu kolon biju lap anyi Saulo, m' inye he ka omanenâ

## II. SAMUELA 10.

ibetengiö anyin Khong kâu? Ke haba Ziba ame ha ka than, ka habe, Khaca biju nöku Jonathana, wale ae mat li can. 4 Ke haingen than kâu, ka habe, Ewa? Me haingö Ziba ka than, ka habe, Wâ bi, e hnyi hnyaba Makir nöku Amiela, hnyi Lo-deba. 5 Me Davita than ame ukhünöng me hom e únyi hnyi hnyaba Makir nöku Amiela úheny Lo-deba. 6 Me ame o but Mefiboseth, nöku Jonathana, nöku Saulo kö Davita, me e ame ta hnyikânâi me nom. Me haingö Davita, ka habe, Mefiboseth lö. Me haingen, ka habe, Walonya eang a athnyabaem! 7 Ke Davita ame ha kâu, ka habe, Ca ot, anyin oge me he ka betenge gam ga Jonathana a kâmâm, ke oge me he ka hna köu ta hnye i hia i Saulo a kibâm; ke u me he bala ka tha han mönya hnyi anyik laulau. 8 Me e ame nom me ha, ka habe, Iny ia athnyabaem n' u me wâ kuli a mok a iny úcú mē? 9 Me than ame hawo Ziba, athnyabai Saulo, me ha kâu, ka habe, Oge hia but ham ka nokon tuhâm ta je únyi anyi Saulo me anyin lap. 10 Ke hamâm me lakom me lathnyabaem he ka belökâ kânâ hnân hobi kâu; ke u me he ka hom jem jeúiny me me hu an nokon tuhâm: ke ame he bala bi Mefiboseth nokon tuhâm ka tha han mönya hnyi anyik laulau. Ke ödrin fiftin je бага laku Ziba, ke twente je hnyat a bi athnyabainy. 11 Me haba Ziba ame ha ka than, ka habe, Ame he athnyabaem ka ânyâ únyi hia wale tuhök a than ame húna kónya a athnyabaem. Ke haingen than, ka habe, Ame he bi Mefiboseth ka tha han mönya hnyi anyik laulau helâ me ke nokon than. 12 Ke hu nöku Mefiboseth ae úhnyükong, Mika ien. Ke haba je hnyat hia ödrin e laba hnyi hnyaba Ziba, me ödrin hia ödrin e bi athnyabai Mefiboseth. 13 Waleling me me laba Mefiboseth hnyi Jerusalema: anyin a e ame han bala hnyi laulau anyin than; ke e mat li can.

### HNYIMAKAN 10.

**K**E hwaban e ame mokcu thaniny lakon Amona, ke Hanuna nokon ame musi bi hnyi hwaban. 2 Me haba Davita ame ha, ka habe, Oge me he ka betenge kö Hanuna nöku Nahasa helâji me kamen ame betenge gak. Me Davita ame kunâ ke je lathnyabainy he ka otubwelâ ge kamen. Me ame o but lathnyabai Davita hnyi hnye i ny lakon Amona. 3 Ke haba

je tuhan laku Amona ödrin e ha kö Hanuna a thanidrin, ka habe, U me únykúme a Davita ame ogánâ kâmâm, me ame kunâ köu tavat he ka otubwelâ? ke ca Davita bi ame kunâ athnyabainy köu he ka elâm taun, me ecmákâ e, me ohia e? 4 Me haba Hanuna ame hom lathnyabai Davita, me giâ ke keihen je waidrin, me subâ but anyidrin je úkhaú hnyi wanben, wale ke ne o but hnyi hon je hújiödrin, me kun' ödrin. 5 Ke adre hia but thumetu Davita, me e ame úkhünöng he ka úkhanö mödrin: anyin ae hmehma gan hmâ tavat. Ke haingen than, ka habe, Laba ju öbun hnyi Jeriko, ke ne o but ame kú thö je waibun, me hmetu but jem. 6 Ke e ka khana but laku Amona a ödrin bon dut kö Davita, me haba je laku Amona ödrin e ham bak ka at Suria hnyi Bethe-rehob, me at Suria hnyi Zoba, ödrin twente thauzan tavat he hon kânâ, me than Maaka tha e me tavat a khaca thauzan, me tavat anyi Tob a twelw thauzan. 7 Ke âme löng ut Davita, me e ame kunö Joab, me utbavat hia anyin tavat ae hwege. 8 Ke ame o but laku Amona, me tot metâ ka vat hnyi homagöuleny taun: ke at Suria úheny Zoba, me Rehoba, me atö Tob, me Maaka, ödrin e hake tot hnyi ke keihen hnye i. 9 Ke a wâ but Joab a e cicö e vat hnyi hnyimakan me hoton, me e ame úca je hna wia ge at Isaraela hia, me otíl' ödrin metâ ka úcú me at Suria: 10 ke e ame hna kolon tavat kö Abisai liame-keiny mē, ke e ame otíl' ödrin metâ ka úcú me je laku Amona. 11 Ke haingen, ka habe, A ne hwege huk at Suria u me he ka hadruo nya; ke ame ne hwege hom laku Amona, me oge me he bi nya ka hadruo u. 12 Hwege thö, ke so ötu me hnyok бага thö hobi kâu itin hnye i, me hobi kâu je taun anyin Khongutin: ke hamö Iehova bi he ka ânyâ únyi ae so kâu. 13 Me Joab me tavat unyin ödrin e hakekeny he ka vat me at Suria: me ödrin e kec gan. 14 Ke a wâ but laku Amona a ga kec dö at Suria, me ödrin e kec minya ga Abisai, me dit hnyi taun. Ke Joab ame hmetu úheny hnyi hna hnu laku Amona, me he Jerusalema ai. 15 Ke a wâ but at Suria a ga kuc ödra at Isaraela, me ödra adre me úkha-caköu. 16 Ke Hadadeza ame úkhünöng he ka hom at Suria únyi hnyi ke keihen Wagewe: ke ödrin e o but hnyi Helam, tha ödrin me Sobaka taben utbavat anyi Hadadeza hnyi hnyimaködrin. 17 Ke adre me thumetu Davita; me e ame úkha-

## II. SAMUELA 11.

caköu at Isaraela hia, me he hanyâûâ Joridano, me o hnyi Helam. Ke at Suria adre me tot metâ cici Davita, me vat mē. 18 Ke ame kec at Suria ge at Isaraela; ke Davita ame hlingâ at Suria tavat tabö kariota a seven haded, ke fâte thauzan tavat tabö hors, me kuc Sobaka taben anyidrin utbavat, me ame mokcu eling. 19 Ke a wâ but je than hia a lathnyabai Hadadeza a ga kuc ödrin dut at Isaraela, me ödrin e úsoköu me at Isaraela, me bi athnyabaidrin. Me ame ot at Suria he ka hadruâ hmetu lakon Amona.

### HNyimakan 11.

**K**E ame o hmetu but huna a úen ame labö he je than he ka vat hnyin, me haba Davita ame kunö Joab me lakeiny unyin, me Isaraela hia; ke ödrin e ohia lakon Amona me thelöng Raba. Ke Davita ame laba hnyi Jerusalema.

2 Ke haba hnyi sahac Davita ame todrö úheny hon hnen hna mokut, me ngenu hon uma umen than: ke e ame wâ únyi hnyi hon uma ke momo ame soú; ke e te hmanenang momo at ka wâ. 3 Ke Davita ame úkhúnöng he ka hnei ge momo. Ke hangen ke at, ka habe, hawa, ca Bathe-seba e a nöku Eliama, öiö Uria at Heth? 4 Ke Davita ame kunâ je úthumetu me hom e; ke e ame he kâu, me e ame tha mokut mē; (anyin ae bo so but úheny hnyi hna bo kong;) me e ame hmetu ka hnyi umen uma. 5 Me ame erkin dut momo, me e ame úkhúnöng he ka thumetu Davita, ka habe, Iny erkin dut. 6 Me haba Davita ame úkhúnöng kö Joab, ka habe, Kunö Uria thö jem at Heth könnya. Me Joab ame kunö Uria kö Davita. 7 Ke ame o but Uria kâu, me Davita ame hnö, ka habe, Hawa ga Joab, ke hawa ge tavat, ke hawa ge vat? 8 Haba Davita ame ha kö Uria, ka habe, He thö ka hnyi umâm uma me hneú li cam. Ke ame didrut Uria úheny hnyi uma umen than, ke adre me kunâ kâu ujeú únyi ge than. 9 Ke Uria ame mokut hnyi hwanumen uma umen than tha e me lathnyabainy tuban hia, ke a ca he ju ka hnyi umen uma. 10 Ke ödrin e hia but thumetu Davita, ka habe, A ca he bi Uria ka hnyi umen uma, me haba Davita ame ha kö Uria, ka habe, U je ca o bi úhem hnyi hna he? ieú u je ca he gan ka hnyi umâm uma? 11 Haba Uria ame ha kö Davita, ka habe, Ame laba tang hnyi je

uma menâ, me Isaraela, me Juda; ke Joab a tuhök, me lathnyabainy tuhök, ödrin e hunuma hnyi hnyei; ke hawa oge me he ka he ka hnyi umök uma he ka han me ic me tha mokut me öiök? kia inya u, ke kia inya hanom, a oge me ca he ka ânyâ únyi eling. 12 Ke Davita ame ha kö Uria, ka habe, Me laba hmetu ju hnyi bong ang, ke nyi oge me he ka kunö u. Ke Uria ame laba hnyi Jerusalema hnyi bong eling me nyi. 13 Ke a hia but hawâ e Davita, me e ame tha han me ic mē; ke e ame habelen me me monu but: ke hnyi sahac e ame didrut he ka mokut hnyi hnen hna mokut tha e me lathnyabainy than, ke a ca he bi ka hnyi umen uma. 14 Ke hnyi hnyomakatu Davita ame sibnalimen tusi kö Joab, me kunâ e hnyi hnyamö Uria. 15 Ke e ame sibnalimen hnyi tusi, ka habe, Ip Uria ju cicö dok adre vat hwege hnyin, me hna but e, m' adre me kot, me me mokcu. 16 Ke hnyi úen Joab ame hmâkâ taun, me e ame kunö Uria ka hnyi dok cicö hnen hna khana ae hu tavat hwege hnyin. 17 Ke ame didrut tavat hnyi taun, me vat me Joab; ke ame ta but ke je hnyat, wale je lakei Davita; ke ame mokcu minya Uria at Heth. 18 Ke haba Joab ame úkhúnöng he ka thumetu Davita ge ta je únyi hia thithö hnyi vat; 19 ke e ame húna ka úthumetu, ka habe, U ka hia but thumeto than ge ta je únyi hnyi vat, 20 ke ame ne hmönyin than, me e ame ha köu, ka habe, Ieú gabun öbun e hakekeny ka hnyi taun he ka vat? e ca khan' öbun a ödrin e he ka fana únyi hnyi hon hna up hagin? 21 ia kuc Abimelek nöku Jerubeseth? ca hnen ke momo a khûâ veto hnân oamamá hwit hon únyi hnyi hon hna up hak veto, me e ame mokcu hnyi Thebez? ieú gabun öbun e hakekeny ka hnyi hna up hagin? awe, u me he ka ha, ka habe, Ke a mok minya ju athnyabaem jia Uria at Heth. 22 Me ame he úthumetu, me o, me omanená kö Davita je hofuc hia ho Joab. 23 Me ame ha úthumetu kö Davita, ka habe, E hwege huhmun tavat, ke adre me o köhmun ka hnyi hnyei, me öhmun e he ködra ke ne o but ka hnyi homagöuleny taun. 24 Ke haba hnyat fana ödrin e fana lathnyabaem únyi hnyi hon hna up hak veto; k' ame mokcu ke je lathnyabainy than, me a mok minya lathnyabaem jia Uria at Heth. 25 Me Davita ame ha ka úthumetu, ka habe, U me he ka thu kö Joab, ka habe, U me ca he ka vec únyi

## II. SAMUELA 12.

hnyi únyi e, anyin a haba hele vat ame han monu : hwege thö ányám vat ka hnyi taun, me kot : ke u me he ka silhwegíá. 26 Ke a löng ut öiö Uria a ga mokcu áíán a Uria, me e ame tenge can áíán. 27 Ke e a hia but tenge, me haba Davita ame úkhúnöng he ka hom e ka hnyi umen uma, ke áíán dö e, k' ame hnokoá nokon a da. Ke kong kö Iehova únyi eling a ányá Davita.

### HNyimakan 12.

**M**E haba Iehova ame kunö Nathana kö Davita. Ke e ame o but káu, me ha, ka habe, E hu li at hnyi taun a khaca ; e tren omjeú ke at, ke ba ta únyi anyin ke at. 2 Ke e hu ge at ae tren omjeú je mamoe me kau ae ti se hia hmönyin : 3 ke ba ke únyi anyin at ae ba ta únyi, ke so bi khaca thibi nokon mamoe a momo, waleji e ame úco me hat : ke ame gan tot hnyi hnyimakan me lakon ; k' ame hnyi an an jeú, k' ame hnyi ijem belen kaia, k' ame mokut hnyi úlainy, ke e thibi helá me nokon hlu. 4 Ke ame o but ka at ae tren omjeú ke at úheny hnyi hna he, k' ame höcö bi he ka hom únyi hnyi haleny je mamoe me kau he ka thán hobi káu at a o káu, me e ame hom nokon mamoe haleny at ae ba ta únyi, k' ame thán bi hobi káu at a o káu. 5 Me ame úbahlá gan hmá hmönyin anyi Davita ka at ; ke e ame ha kö Nathana, ka habe, Kia inya Iehova, ae úcú he ka mok at ame ányá heláe : 6 ke e ame he ka ovak ham hnán bi hnen nokon mamoe, can e ame ányá únyi e, ke ba betenge gan.

7 Haba Nathana ame ha kö Davita, ka habe, U at eling, Walang hna ha hnö Iehova, Khongu Isaraela, ka habe, Oge hú u hnán thaniny Isaraela, ke oge omeli u únyi hnyi hnyamö Saulo ; 8 ke oge ham köu hnyaban tuhám, me laáíán tuhám ka hnyi úlaiám, me ham köu lap anyi Isaraela me Juda ; ke ame ne ti úhnyúkong e, oge me ne he ka bi hanen köu ge ke únyi me ke únyi. 9 Ieú gam u je hia but höciá hofuc ho-Iehova he ka ányá hulö hnyi hnyimakan ? u je hia but kuc Uria at Heth ge hele vat, me hom áíán me áíám, ke u je hlingá e ge hele vat anyin lakon Amona. 10 Ke walang ang ame ca he ka hia hele vat hnyi hnyabam nyiele balua ; anyin u je höciö nya me hom öiö Uria at Heth me áíám. 11 Walang hna ha hnö Iehova, ka habe, Wá bi, oge me he ka okúá únyi ae

kong köu únyi hnyi hnyabam, ke oge me he ka hom laáíám hnyi hnyimákám, me ham bi ka ke at, ke e ame he ka tha mokut me laáíám hnyi hnyimakan seúnö ang. 12 Anyin a u je ányá duóngá e, ke oge me he bi nya ka ányá únyi ang hnyi hnyimakö Isaraela hia, me hnyimakan seúnö. 13 Haba Davita ame ha kö Nathana, ka habe, Oge hia but ányá hulö kö Iehova. Ke haingö Nathana kö Davita, ka habe, Iehova ame hia but ohia minya ányám hulö ; u me ca he ka mok. 14 Ke so bi can anyin a u je kuná je iwahnaihmöny me Iehova he ka bi gan ge únyi e. awe, ame he ka mok nokom adre me he ka hnokoá. 15 Me haba Nathana ame he ka hnyi hnyaban.

Ke Iehova ame kot wanakat wale a hnokoá öiö Uria ga Davita, ke e gan imekiny. 16 Haba Davita ame elám Kkong hobi káu wanakat ; ke Davita ame ca han, me didrö, me mokut eú hnyi káná hnyi lit hia. 17 Ke ame todrö je hingatiny hnyaban unyin, he ka kap e únyi hnyi káná : ke e ame höcö, ke e ame ca hnyi tha han mödrin. 18 Ke ame mokcu wanakat hnyi bong a seveniny. Ke e ot lathnyabai Davita he ka thumeto e a ga mokcu wanakat : anyin a haingödrin, ka habe, Wá bi, ötin e fuc káu ke tiga möt wanakat, me e ame ca löng hötin : ke hawa anyin vec walang ang, ötin e ne ba káu, ka habe, A mokcu wanakat ? 19 Ke Davida ame wá a g' ame iulitköu lathnyabainy, me Davita ame wáhmakhmeto a ga mokcu wanakat : ke haingö Davita ka lathnyabainy, ka habe, Hawa, a mokcu wanakat ? Me haingödrin, ka habe, A mokcu. 20 Me haba Davita ame todrö úheny hnyi káná, me soú, me hú ge wakaco. me khavá ke je úkhaúen ; me o ka hnyi uma umö Iehova, me khudrung : me e ame he ka hnyi umen uma ; ke e ame huna ködrin, me ödrin e ip jeú hnyi hnyimakan, me e ame han. 21 Me ame ha káu lathnyabainy, ka habe, Ieú únyi ang u je ányá ? a u je ca han k' u tengiá wanakat ke tiga möt ; ke a mokcu wanakat, me u me todrö me han. 22 Me haingen, ka habe, K' ame tiga möt wanakat oge me ca han, k' oge me tenge : anyin a haingök, ka habe, Ie at ae khana ame ne he Iehova ka betenge gak, me me möt bi wanakat. 23 Ke walang a mokcu, hnán eú oge me ca he ka han ? Hawa, e káná nya he ka ohmeto e ? Oge me he bi nya ka he káu

## II. SAMUELA 13.

k'ame ca he bi e ka hmetu kõnya. 24 Ke Davita ame otubweli Bathe-seba a âiân, me didrö kâu, me laba unyin: me e ame hnokôâ da, me hwenyi ien Solomona. Ke Iehova ame betenge gan; 25 me e ame úkhunöng a deny Nathana a perofeta, ke e ame hwenyi ien bi me Jedidia ga Iehova.

26 Ke haba Joab ame vat me Raba hanen lakon Amona, me hûgúnâ taun anyin than. 27 Ke Joab ame kunâ je úthumetu kö Davita, me ha, ka habe, Oge me vat me Raba, eke, oge hia but hûgúnâ taun adre khu an hnyin. 28 Ke haba walang ang u ma he ka úkhacakôuâ kolon tavat, me hunuma hnyi taun, me hûgúnâ e: wâ oge nye hûgúnâ bi nya, me adre me hwenyi ien e venyik. 29 Ke Davita ame úkhacakôuâ tavat hia thithö, me he Rama ai, me vat mē, me hûgúnâ e. 30 Ke e ame hom koronainy anyidrin than únyi hnyi hon ban; ke haba ihmakiny me khaca talan gol, ke e hnyin je veto ae gan hwabân; ke adre me ip hnyi hon bö Davita bi. Ke e ame hom but je únyi adre sö únyi hnyi taun, ae ti gan hmâ. 31 Ke e ame hom but tavat úheny hnyi taun, me ip ödrin hmelen je gili, me je fao ae údö, me je giwa fao, me odili ödrin hnyi hna leú veto kânâ: ke e ame ányâ helâe ka je taun hia anyin lakon Amona. Ke Davita me tavat hia ödrin e hmetu Jerusalema ai.

### HNYIMAKAN 13.

**K**E a um dö ta je únyi e, haba Aba-soloma nõku Davita me hu haniny ae hmanenang, Tamara ien; ke Aminona nõku Davita ame weny e. 2 Ke ame vec Aminona me mok unyin ga Tamara a haniny; anyin a e hlu bau; ke e hmak kö Aminona bi he ka ányâ ke únyi kâu. 3 Ke e hu ihumi Aminona, Jonadaba ien, nõku Simea, liamekeiny me Davita: ke at metâ Jonadaba. 4 Ke haingen kâu, ka habe, leú gam, nokon than lö, a u delâ hnyi je bong? u me ca he ka thumetu nya? Haba Aminona ame ha kâu, ka habe, E wek Tamara, hani Abasoloma liamekeiny mõnya. 5 Ke Jonadaba ame ha kâu, ka habe, U me he ka mokut hon hnâm hna mokut, me mok thoi: ke e ka o kâmâm he ka õ u, u me he ka ha kâu, ka habe, Ö e me he jem Tamara a hanik, he ka haök, me bi han hnyi hnyimakök, m' inye he ka wâ, me han únyi gan. 6 Me Aminona ame mokut, me mok thoi: ke ame o but than

he ka wâ e me haba Aminona ame ha ka than, ha habe, Ö e me he jem Tamara a hanik, me op li ong areto unyik, me inye he ka han únyi gan. 7 Haba Davita ame úkhünöng kö Tamara ka hnyi hnyaba, me ha, ka habe, He thö ka hnyi uma umö Aminona a hanâm, me bi an. 8 Haba Tamara ame he ka hnyi uma umö Aminona a haniny; ke e ae mokut. Ke e ame hom falawa, me op, me ányâ je ong areto hnyi hnyimakan, me le je ong areto. 9 Me e ame hom öt, me hingálâ hnyi hnyimakan; ke e höcö han. Haba Aminona ame ha, ka habe, Didrut tavat hia thithö unyik. Me ame didrut tavat hia thithö unyin. 10 Me Aminona ame ha kö Tamara, ka habe, Hukâ thö jem jeú ka hnyi hnyeule, m' inye he ka han únyi hnyi hnyamâm. Me Tamara ame hom je ong areto a op, me hom kö Aminona a haniny hnyi hnyeule. 11 Ke e ame hom e kâu me me han me e ame kât, me ha kâu, ka habe, Hanik, ötu me he ka tha mokut. 12 Me e ame ha kâu, ka habe, Ohe, hanik, u me ca he ka okongu nya; anyin adra me ca ányâ helâe hnyi Isaraela: u me ca he ka ányâ monu ang. 13 Ke oge me he bi nya ka kâcâ kâ anyik hmehma? ke haba u, me u me he ka helâ me at ae monu hnyi Isaraela. Ke walang ang ö u ma ha thö ka than, anyin a e ame ca he ka behanö nya gam. 14 Ke höcö he ka löng hofuc hwan hlu: ke e hwege hon, me ame okongôâ, me tha mokut mē. 15 Me Aminona ame ti ikikiâ hlu bi; ke beönua tulutiny hna ikikiâ hon tulutiny hna betenge gan abân. Me Aminona ame ha ka hlu, ka habe, Todrö, he thö. 16 Me haingen hlu kâu, ka habe, Ohe, anyin ae beönua monu ang a u je obö nya, hon unyi eji u je ányâ kõnya. Ke e ame ca löng kâu. 17 Me e ame hawâ athnyabainy at a labö huliwa unyin, me ha, ka habe, Lelö but momo ang unyik, me ohmâ hwanuma hwaban. 18 Haba khaúen hlu me úkhaú ae ve makan: anyin ame labö khavâ je úkhaú helâe wahlu lakon than ödrin tiga hlu hmai. Me haba athnyabiny ame hom hlu kâu ka hnyi hwanuma, me ohmâ bi hwanuma hwaban. 19 Me haba Tamara ame ip dröu ka hnyi hon ban, me kia úkhaú ae ve makan a khavâ, me hai hnyamen hon ban, me tenge tot. 20 Ke Abasoloma a haniny ame ha kâu, ka habe, Hawa, a mwi unyâm Aminona a hanâm? awe, laba hnyibu ju, hanik: hanâm e; ca vecâ únyi ang. Ke Tamara ame laba baú

## II. SAMUELA 14.

hnyi uma umö Abasoloma a haniny. 21 Ke a löng ut Davita je únyi hia eling, me e ame gan hmönyin. 22 Ke Abasoloma ame ca fuc kö Aminona, ame ne únyi ae kong ame ne únyi ae so: anyin a Abasoloma ame ikikiö Aminona, can e ame okongu Tamara a haniny.

23 Ke hwaban lo li huna me hu tavat subá leünen mamoe hale Abasoloma hnyi Baala-hazor, hakekeny Eferaima: ke Abasoloma ame hawá obaga hia lakon than. 24 Ke Abasoloma ame o ka than, me ha, ka habe, Wá bi, walang ang, e hu tavat subá leünen mamoe haleny athnyabaem; ö e he but than me lathnyabainy könnya athnyabaem. 25 Ke haingen than kö Abasoloma, ka habe, Ohe, nöku, öhmun e ca he hia thithö ka hnyi he, wá e nye hmak köu. Ke e ame újengö: ke so bi e ame ca he, ke e ame ha hnahicá e. 26 Haba Abasoloma ame ha, ka habe, Ame ne ba, ö e tha he möhmun Aminona liamekeiny mönya. Haba than ame ha káu, ka habe, Hnân eú e ame he ka tha he möu? 27 Ke Abasoloma ame újengö e, me e ame hnö Aminona me je бага hia lakon than he ka tha he mē. 28 Ke Abasoloma ame huna ka lathnyabainy, ka habe, Wá wia öbun, e ka senyin hnyeku Aminona ge waina; ke iny ka ha köbun, ka habe, Kuc Aminona but, awe, hlingá but e, ca ot bi, hawa, inya oge ca huna köbun? hwege thö, me hnyok бага but. 29 Me haba lathnyabai Abasoloma ödrin e ányá kö Aminona helá me hna huna hnö Abasoloma. Me ame todrö je бага lakon than hia, me ve tabá haledrin je miul, me kec. 30 Ke tiga ödrin bi eú hnyi gethen, me ame o but kö Davita úthumetú, ka habe, A hia thö Abasoloma hlingá obaga lakon than hia, ke ba but kolon. 31 Me ame todrö than me kia anyin je úkhaú, me mokut eú hnyi kâná; ke ame tot unyin lathnyabainy hia adre hia but kia anyidrin je úkhaú. 32 Me ame ha Jonadabu nöku Simea, liamekeiny me Davita, ka habe, Ca he bi tuhök ka únykúme e ga mokcu je hidröu hia je lakon than; anyin a Aminona thibi a mokcu: anyin a Abasoloma ame ip hnân, hwân hnyi bong e ame okongu Tamara hnyin a haniny. 33 Ke walang ang ca he bi than a tuhök ka hmak ge únyi ang he ka únykúme a ga mokcu hia je lakon than; anyin a Aminona thibi a mokcu. 34 Ke Abasoloma ame kec. Ke ame bwele hidröu at ame hmak, me wá, ke wá bi, wale tavat

ae se hia ödrin e he hnyi getheniny bucen hnyi hoton. 35 Ke haingö Jonadaba ka than, ka habe, Wá bi, e but ang je lakon than: e hnathu heláji me athnyabaem ame ha. 36 Ke ame um dö ha, me wá bi, ame o but je lakon than me ödrin e tenge göranyai: ke ame ti tenge gan hmâ minya than me lathnyabainy. 37 Ke Abasoloma ame kec, me he kö Talemai nöku Amihuda than Gesuri. Ke Davita ame tenge hnyi ta ogö bong ge nokon.

38 Ke Abasoloma ame kec, me he Gesuri ai, k' ame laba eling kun ta huna. 39 Ke e gan hmâ behe Davita kö Abasoloma: anyin a tubwet ut ga Aminona, anyin a mokcu.

### HNyimakan 14.

**K**E e khañö Joab nöku Zerua a g' ame hnyok kö Abasoloma than. 2 Ke Joab ame úkhünöng Tekoa ai, me hawá ke momo ae metá, me ha káu, ka habe, Ö u me he ka tenge thoi, me khavá je úkhañen hnyamok, k' u me ca he ka süö wakaco, k' u me he ka helá me momo ame tenge beú can at a mokcu: 3 ke he thö ka than me ha káu je hofuc ang. Me Joab ame ip hofuc hnyi hnyimen momo. 4 Ke momo Tekoa ame fuc ka than, me e ame ta hnyikânai, me iyáú, me ha, ka habe, Than lö, hadruá thö. 5 Ke haingen than ka momo, ka habe, Ieú gam? Me haingen, ka habe, Iny safac, ke a mokcu öiök. 6 Ke e hu gaka athnyabaem lakuk li бага, ke ödru me ü hnyi hnyei, ke ba at he ka öúsákáú ödru, k' ame kot ke at ge ke at, me hlingá. 7 Ke wá bi, ame tha todrö lap hia könnya athnyabaem, ke haingödrin dö, ka habe, Hna but at a hlingá liamekeiny mē, m'öhmun e he ka hlingá e can möt anyin liamekeiny mē, waleji e ame hlingá, me ohia minya helaç at ame he ka tren ta je omjeú u ka mok bi: he haba heláe me ödrin e he ka omoko walep a kolon unyik, me me ba but ien me kolon ka öiök eang hmeledrany. 8 Me haba than ame ha ka momo, ka habe, He thö ka hnyi umâm uma, me oge me he bi nya ka huna gam. 9 Haba momo Tekoa ame ha ka than, ka habe, Than a tuhök lö, e so ame he hulö ang ka ta huk me lap anyi cica; ke ba konginy than me anyin theron. 10 Ke haingen than, ka habe, Ame ne he ka fuc köu ke at, hom but jem könnya, k' ame ca he hmetu ka kalö u 11 Me haingen momo, ka habe Ö u úny-

## II. SAMUELA 15.

kúme than Iehova Khongom, me me ca he hmetu at ame bi hwaban komok ka bi hwaban bi, wâ ödrin nye he ka ohja nöku. Me e ame ha ka momo, ka habe, Kia inya Iehova ame ca he ka kölu hnyikânâi ke leünen ban nokom. 12 Haba momo ame ha, ka habe, Ö iny me he a athnyabaem ka ha ke hofuc ka than a tuhök. Haingen, ka habe, Ha thö. 13 Ke haingen momo, ka habe, Ieü can u je hia but ûnykúme he ka anyâ helâe ka tavat anyin Khong? Anyin a haba hnen than hna ha hofuc eling helâ ke e hu hulö ge than, wale hny hnen hna tha hom hmetu at e ame obâ. 14 Anyin a bongon bi at he ka mok, me helâ me köiö adre hingâlâ hnyikânâi, waleji adre me ca he hmetu ka úkhöünâ; ke haba khaca Khong ame ca hlingâ at, ke e ame bi deny, me me ca hia gan at adre me obâ. 15 Ke walang ang oge o but he ka ha hofuc eling ka than a tuhök, anyin a tavat ödrin e hia but ooti nya: ke oge me ha, a athnyabaem, ka habe, Oge me he ka he walang ang ka ha ka than; ame ne he than ka ohwâdâ hna ha ge athnyabaem. 16 Anyin ame he than ka löng, me omelö athnyabainy únyi hny hnyamen at ame he ka tha obiö nya me nöku únyi hny jekhöu jekhon Khong. 17 Ke ame ha athnyabaem, ka habe, Ö u, he ka öusökouâ but hofuc hwan than a tuhök: anyin a helâ than a tuhök me angela anyin Khong, he ka wâhmakhmeto so me kong: ke ame he Iehova Khongom ka tha e möu. 18 Me ame thu than me ha ka momo, ka habe, Ö u ca he ka ikhâlâ gak únyi oge me he ka hnö gam. Haingen momo, ka habe, E so than a tuhök ame fuc walang ang. 19 Me ame ha than, ka habe, ca tha u me Joab hny únyi ang? Me ame thu momo, ka habe, kia inya u than a tuhök a g' ame ca khana ke at he ka saü ka hny ke keihen metâ me me, únyi hny hna ha hia hnen than a tuhök: anyin a Joab, athnyabaem, e bi a hûna könya, me ip ta je hofuc hia eling hnyin hnyimök a athnyabaem: 20 A anyâ únyi eling Joab athnyabaem, hnân he ka wia bongon: ke e metâ tuhök helâ me ûmetâiny angela anyin Khong, he ka wâhmakhmetoâ ta je únyi hia thithö eang hmeledrany. 21 Haba than ame ha kö Joab, ka habe, Wâ bi, oge hia but anyâ únyi ang: he thö ka hawâ hidröu jia Abasoloma. 22 Haba Joab ame ta hnyikânâi me khudrung, me ha hnahicâ than: ke Joab ame ha, ka habe, A wâ but athnyabaem hny bong ang a oge me wâ

ibetengiö hny hnyimákâm than lö a tuhök, anyin a than ame kap hofuc hwan athnyabainy. 23 Haba Joab ame todrö me he Gesuri ai, me hum Abasoloma Jerusalema ai. 24 Ke haingen than, ka habe, E ame he ka saü ka hny umen uma, k' ame ca he ka wâ hnyimakök. Me Abasoloma ame saü ka hny umen uma, k' ame ca wâ hnyimakan than.

25 Ke ba at ae lung gan hmâ helâ me Abasoloma hny anyin hmanenang hny Isaraela hia: e ba hnyikongon hwân hny li hnyeücan ke ne o but hny ban. 26 Ke e ka subâ leünen ban (ke ame sö hny obiny huna anyin ae hmak bi me e ame sö): k' adre me ne tuluto ihmakiny leünen ban, me lo li haded je sekel, hoton tulut anyin than. 27 Ke adre hnokôa kun ta baga laku Abasoloma, ke khaca hlu, Tamara ien: e momo ae hmanenang.

28 Ke Abasoloma ame laba hny Jerusalema hny lo li huna ae bekhöt; k' ame ca wâ hnyimakan than. 29 Ke Abasoloma ame hawö Joab me me kunâ ka than, ke e ame hócö löng; me ame olo hawâ, ke hócö bi he. 30 Me e ame ha ka lathnyabainy ka habe, Wâ bi, e hakekeny könya utkânâ i Joab, ke e hu anyin bali eling; he th' öbun ka thong. Me haba lathnyabai Abasoloma ödrin e thong utkânâ. 31 Haba Joab ame todrö me he kö Abasoloma ka hny umen uma, me ha kâu, ka habe, Can ieü a thong ik utkânâ ge lathnyabaem? 32 Me Abasoloma ame thu kö Joab, ka habe, Wâ bi, oge me úkhünöng köu, ka habe, Aiö u, m' oge me he ka kunö u ka than, he ka ha, ka habe, Oge me he jem úheny Gesuri kâ ieü? e so könya inya tiga laba eling: ke walang ang iny bewâ hnyimakan than; ke ame ne hu hulö unyik me hamen he ka hlingö nya. 33 Me ame he Joab ka than, me thumeto e: ke e ame hawö Abasoloma, me e ame he ka than, me nom hnyikânâi hny hnyimakan than: me ame úcimhnyimak than me Abasoloma.

### HNYIMAKAN 15.

**K**E hwaban e Abasoloma ame penapena ke kariota me je hors hobi kâu e bi, me tavat a fifite he ka bödrin ka wadring hny hnyimakan bi. 2 Ke Abasoloma ame vesâ kong, k' ame tot hny getheniny homagöule: ke ame ne o ke at ae hu iwatretra me me he than ka owisa, me haba Abasoloma ame hawâ e, me ha, ka

## II. SAMUELA 15.

habe, U je mwi ua? Ke haingen, ka habe, Úhek athnyabaem hnyi ke tribu hnyi je tribu Isaraela. 3 Ke Abasoloma ame ha kâu, ka habe, Wâ bi, e so me wisa ânyâm je únyi; ke ba at a kunâ hnen than he ka löng köu. 4 Ke Abasoloma ame ha minya, ka habe, E na kunö nya ju he ka owisa hnyi hnyei, me me he könya tavat hia thithö ae hu iwatretra, me úhnei, me inye he ka owisa kâu! 5 Ke e ka hakekeny kâu ke at he ka nom kâu, me e ame inâ benyin me kât e, me úcimhnyimak me. 6 Ke Abasoloma ame ânyâ helâe kö Isaraela hia ödrin e o ka than he ka úhnei: ke Abasoloma ame venâu hnyekon at Isaraela.

7 Ke hwaban je huna a fâte, Abasoloma ame ha ka than, ka habe, Ó u hnö nya he ka he ka subâ anyik khöbi, wale o ge húkâlâ kö Iehova hnyi Heberona. 8 Anyin a inya athnyabaem oge húkölö khöbi ke oge me tiga laba hnyi Gesuri hnyi Suria, ka habe, A ne he Iehova ka hum nya hmetu Jerusalema ai, awe, oge me he ka bi athnyabai Iehova. 9 Haba than ame ha kâu, ka habe, He thö me hnahic. Me e ame tot me he Heberona ai. 10 Ke haba Abasoloma ame kunâ je hnyat wâ bongon ka hnyi ta je tribu hia anyi Isaraela, haingen, ka habe, Öbun ka löng dö hwan trutru, öbun e he ka ha, ke habe, Than dö Abasoloma hnyi Heberona. 11 Ke ame tha he me Abasoloma tavat a tu haded úheny Jerusalema, adre haw' ödrin, ke ödrin e he me hnathu, ke ca khan' ödrin ke únyi. 12 Ke Abasoloma ame úkhúnöng he ka hum Ahithofela at Gilo, ke obotkongi Davita, úheny hnyi anyin taun, wale úheny Gilo, ke e ame tiga hudo je hut. Ke e hwege but hna sihnân; anyin ame se hia tot tavat unyi Abasoloma.

13 Ke ame o but kö Davita úthumetu, me ha, ka habe, A ok ut hnyekon at Isaraela kö Abasoloma. 14 Haba Davita ame ha ka lathnyabainy hia unyin hnyi Jerusalema, ka habe, Todró, ötin e kec, wâ e nye ca kec möt ke at gatin únyi ga Abasoloma: logotö, m' ötin e he, wâ e nye hom til' ötin logot, me me oâ unyi ae kong kötin, me kot taun ge hele vat. 15 Me ame ha ka than ge lathnyabainy than, ka habe, Wâ bi ame lie lathnyabaem ka ânyâ hia helâ me hna he than a tuböhmun ka ha. 16 Ke ame didrut than me anyin lap hia hoton. Ke than ame ip biju je momo a ten, a anyin je momo he ka tuö hnyaban.

17 Ke ame didrut than me tavat hia hoton; me laba hnyi Bethe-merhak. 18 Ke ame tha he ehele lathnyaba hia unyin; me at Kerethi me Pelethi, me Gatha hia, tavat a siks haded hnyat he hoton úheny Gatha, ödrin e bödrin hnyi hnyimakan than. 19 Ke than ame ha kö Itai at Gatha, ka habe, Anyin a ieu u me tha he möhmun! hmetu ju ka hnyi hnâm, me tha laba me than: anyin a u atkanyua me bâ. 20 U je o et, ke hawa, oge me he ka kunö u hnyi bong ang he ka tha vheno möhmun, iny ka he hnyi je dok oge me wek ka he hnyin? hmetu ju, ke ohmeto ju je liame-keiny möu; ke so e bi unyâm ibetengö me hnathu. 21 Haba Itai ame thu ka than, ka habe, Kia inya Iehova, ke kia inya than a tuhök, haba inya athnyabaem oge me he ka tha laba hnyi dok ame laba hnyin than a tuhök. 22 Ke haingö Davita kö Itai, ka habe, he thö me hanyâúâ. Me Itai at Gatha ame tha he hanyâúâ me tavat hia unyin, me tavat hia ae úhnyúkong unyin. 23 Ke ame tenge göranyai hnyei hia, ke tavat hia adre me he hanyâúâ: me than minya bi ame hanyâúâ wagewe Kederon, k' ame hanyâúâ tavat hia thithö getheniny hnyebuba. 24 Ke wâ bi, Zadoka minya me at Levi hia unyin, ödrin e vaden tangen úhinhnyköu anyin Khong; ke ödrin e ip tang tangen Khong, ke Abiathara ame ölö ke ne o but ame didrut tavat hia úheny hnyi taun. 25 Me ame ha than kö Zadoka, ka habe, Hom hmeto thö tang tangen Khong ka hnyi taun: ame ne he Iehova ka betenge gak, me e ame he ka ohmetu nya, me tha omanená e bi könya me hnyaban minya: 26 ke ame ne ha, ka habe, Oge me ca senyin gam; awe walönya ang, hamen he ka ânyâ könya unyi ae so hnyi hnyimakan. 27 Ame ha minya than kö Zadoka, at bihut, ka habe, Ú at ame wâ? awe, hmetu ju ka hnyi taun hnyi hnahic, me Ahimaza a nokom, me Jonathana a nöku Abiathara, li lakubu a tha ödru möbu. 28 Wâ bi, oge me he ka me laba hnyi dok ae tha hon hnyi hnyebuba, ke ne o but ame o hofuc únyi gabu he ka thumetu nya. 29 Anyin a wale haba Zadoka me Abiathara ödru me vaden hmetu tang tangen Khong Jerusalema ai: me ödru me laba eling. 30 Ke Davita ame ölö hnyi getheniny bucen Elaio, me ölö me tenge tot; ke adre tube ban, ke ba tangen linyeüca: ke haba tavat hia adre me tha he mē, ödrin e ve



## II. SAMUELA 16.

tube je bödrin, me ölö me tenge tot. 31 Ke ame ha ke at kö Davita, ka habe, Ahithofela, ame tha he me tavat hügünâ dökhu, me Abasoloma. Haba Davita ame ha, ka habe, Iehova lö, ohavâ but úhnenamö anyi Ahithofela me me monu but. 32 Ke ame o thö Davita ka hnyi ban bucen, wale adre labö khudrung hnyin ka Khong, wâ bi, Husai at Areki ame úkhanö mē a kia anyin úkot, me e hu kânâ hon ban : 33 ke Davita ame ha kâu, ka habe, U je ne tha he mönya u me he ka ohmakö nya : 34 ke u je ne hmetu ka hnyi taun, me ha kö Abasoloma, ka habe, Oge me he ka bi athnyabaem, than ; helâ me hnök hna bi athnyabainy kâmâm e hac, helâe oge me he walang ang ka bi athnyaba köu : ke wale u me he ka ohavâ hobi könya úhnenamö anyi Ahithofela. 35 Ke hawa, ca tha e möu eling Zadoka me Abiathara li at bihut? ke haba ta je únyi hia thithö u me he ka löng hnyi uma umen than, me u me he ka thumetu Zadoka me Abiathara li at bihut. 36 Wâ bi, eling unyidru li lakudru, jia Ahimaza nöku Zadoka, me Jonathana nöku Abiathara ; ke öbun e he ka kun' ödrü me ta je hofuc hia thithö öbun e he ka löng. 37 Me haba Husai ihumi Davita ame he ka hnyi taun ; ke ame o but Abasoloma hnyi Jerusalema.

### HNYIMAKAN 16.

**K**e a hia but Davita önua úhnyúkong ge ban bucen me wâ bi, ame úkhanö me Ziba athnyabai Mefiboseth tha e me li asina adre hije hok, lo li haded je areto, ke khaca haded de wan vine adre hlec meleca, ke khaca haded je wan úö hnyi huna, ke khaca waina. 2 Ke haingen than kö Ziba, ka habe, Ieú u me he ka ányâ ge ta je únyi ang? Haingö Ziba, ka habe, Haba li asina me hnân bi taben lap anyin than ; ke haba je areto me je wan úö, me, an wahi-dröu ; ke haba waina me belen tavat ae sēnyin hnyi hnyebuba. 3 Ke than ame hnö, ka habe, Ke ewa nokon tuhâm? Haingö Ziba ka than, ka habe, e ame laba bi hnyi Jerusalema : anyin a haingen, Ame he lap anyi Isaraela ka ham könya hnyi bong ang dökhu dökhu cica. 4 Ke haingen than kö Ziba, ka habe, Wâ bi e unyâm ta je ányi hia anyi Mefiboseth. Ke haingö Ziba, ka habe, Inya oge me nom köu, me u me betenge gak than a tuhök.

5 Ke a o but Davita than hnyi Bahurim,

me wâ bi, ame didrut úheny e ke at hanen lap anyi Saulo, Simei ien, nöku Gera : k' ame didrut me úhangö tot. 6. Ke e ame kuc Davita ge veto, me lathnyabai Davita hia thithö : ke e bi hnyi ke keihen a metâ me meny tavat hia me tavat ae hwege hia. 7 Ke haba Simei ame úhangö me ha, ka habe, He thö, he thö, u aten dra, me atö Belial : 8 haba Iehova ame hia but ohmeto köu dra hia dren lap anyi Saulo, at u je hwöhwaban ; ke a hia but Iehova hna dökhu ka hnyi hnyamö Abasoloma a nokom : ke wâ bi, adre me hum u hnyi ányâm hulö, anyin a u ke aten dra. 9 Me haba Abisai nöku Zerua ame ha ka than, ka habe, Can ieú ame he at ang a e kuli ae mok ka hanga than a tuhök? ö u hnö nya he ka sö degecâ ban. 10 Ke haingen than, ka habe, Ieú könya gabun ta laku Zerua? haba hnen hna úhangö, me can ame ha kâu Iehova, ka habe, Hangö Davita thö ; ke ie at ame he ka ha, ka habe, Ieú gam u me ányâ e? 11 Ke Davita ame ha kö Abisai, me lathnyabainy hia, ka habe, Wâ bi, e bekuc nya nöku, at a o únyi hnyi hnyekuk ; me hawa, ame ca he at Beniamina eang ka ányâ helâe? hna but e, hamen he ka úhangö thö, anyin a Iehova ame kunâ e. 12 Ke ame ne he Iehova ka wâ hna okongu nya, me me he Iehova ka bi hwaban so könya hwaban hnen hna hangö nya hnyi bong ang. 13 Ke haba Davita me je aten ödrin e vheno gethen : haba Simei ame vheno baten bucen cicö e, me úhangö tot, me kot e ge veto, me iâ sesâ. 14 Ke ame o but than me tavat hia thithö unyin, ke ödrin sēnyin dut, me ödrin e menâ eling.

15 Ke ame o but Abasoloma me tavat hia thithö a at Isaraela unyin hnyi Jerusalema, ke tha e mē Ahithofela. 16 Ke ame o but Husai at Areki ihumi Davita kö Abasoloma, me haba Husai ame ha kö Abasoloma, ka habe, E so e möt bi than, e so e möt bi than. 17 Ke Abasoloma ame ha kö Husai, ka habe, wale ányâm betenge ka hanâm? anyin a ieú u je ca tha he me hanâm? 18 Haba Husai ame thu kö Abasoloma ka habe, Ohe ; ke haba at a úca Iehova, me tavat eang, me at Isaraela hia, me oge me he ka bi aten, me tha laba mē. 19 Ke haba khaca, ie at ae úcä könya he ka bi athnyabainy kâu? oge me ca he ka bi athnyaba hnyi hnyimakan nokon? oge me he ka bi athnyaba köu helâji me hnök hna bi athnyaba hnyi hnyimakan kâmâm. 20 Ke Abasoloma ame ha kö Ahithofela, ka

## II. SAMUELA 17.

habe, Omanenâ thö ûnykûmânâm ge ûnyi ötin he ka ânyâ. 21 Ke Ahithofela ame thu kö Abasoloma, ha habe, U me he ka didrö ka je momo anyin kâmâm, wale e ame ip he ka tuö uma; ke ame he ka löng Isaraela hia a u bon dut ka kâmâm: me ame he ka hwege hnyamen ta jelahiam. 22 Me ödrin e ulolo uma mano hon ban uma; me haba Abasoloma ame didrö ka je momo anyin kamen hnyi hnyimakan at Isaraela hia thithö. 23 Ke haba ûhnenamö anyi Ahithofela, wale e ame ûhnenamö hnyi je hong eling, e bi helâ ke at ame hnö hnyi hofuc hwan Khong: helâe minya bi je ûhnenamö hia anyi Ahithofela ga Davita me ga Abasoloma.

### HNyimakan 17.

**K**E haba Ahithofela ame ha kö Abasoloma, ka habe, Hnö nya he ka úca twelv thauzan tavat, me oge me he ka tot me hnu hotu Davita eâu hnyinghet: 2 ke oge me he ka o kâu e ka tiga sēnyin, me wakhalet tavat unyin, me ootâ e: ke ame he ka kec tavat hia thithö unyin; ke oge me he ka kot thibi than: 3 ke oge me he ka ohmeto tavat hia thithö kôu: haba at u me elâm me helâke ame hmetu tavat hia: ke ame he ka hnahic tavat hia thithö. 4 Ke so hofuc e kö Abasoloma me wahingatinginy Isaraela hia.

5 Ke Abasoloma ame ha, ka habe, Me hawo Husai at Areki, m' ötin e löng minya hwan. 6 Ke a o but Husai kö Abasoloma, me Abasoloma ame ha kâu, ka habe, Ahithofela ame ha helâng: hawa, ötin e he ka ânyâ hoton hnen hna ha? ame ne ba, fuc dö u. 7 Me haingö Husai kö Abasoloma, ka habe, E ca so ûhnenamö a ûnö Ahithofela walang ang. 8 Ke haba Husai ame ha minya, ka habe, E khanö u hwakecin kâmâm me tavat unyin, a ödrin hnyat ae hwege, ke hmönyin je hnyekudrin helâ me bea adre hûgúnâ lakon hnyi hnyot: ke at vat kâmâm, ke ame ca he ka tha mokut me tavat. 9 Wâ bi, e ame ikhölö walang ang hnyi ke hmonop, ame ne ke dok bi: ke e ka ta ke je hnyat a bân, k' ame löng bi tavat, me adre me he ka ha, ka habe, E hu hna ûhlingö unyin tavat adre me hiö Abasoloma. 10 Me haba at ae hwege, a helâke hnyekon liona but hnyekon, me e ame he ka ti aú but: anyin ae khana Isaraela hia a e hwege kâmâm, me hwege tavat unyin. 11 Anyin a wale inya oge me ûnö he ka úkhacakouâ

Isaraela hia unyâm, hwân Dana ke ne o but Bere-seba, helâ me je önyin köö úseiny; me u me he ka hnyi vat. 12 Me ötin e he ka o kâu hnyi dok adre me he ka wâ hnyin, me ötin e he ka o kâu helâ me dân hau ame ta ka hnyi kânâ: m' ate me ca he ka hna kolon bi me tavat unyin, e ba hmönyin me khaca. 13 Ke haba khaca, ame ne dit ka hnyi taun bi, awe ame he Isaraela hia ka hom ta je tö ae gan ka hnyi taun eling, me lelö e ka hnyi wagewe, ke ne o but ame ca he ka manen ke ong veto eling. 14 Me ame ha Abasoloma me at Isaraela hia, ka habe, E beönua hofuc ho Husai at Areki hon hofuc ho Ahithofela. Anyin a Iehova ame musö he ka ohavâ hofuc ae so ho Ahithofela, me me he Iehova ka oâ ûnyi ae kong kö Abasoloma.

15 Me haba Husai ame ha kö Zadoka me Abiathara li at bihut, ka habe, A helâng me helâng hofuc ho Ahithofela kö Abasoloma me wahingatinginy Isaraela; ke a helâng me helâng hok bi hofuc. 16 Ke walang ang ie úkhünöng dö me thumetu Davita, ka habe, U me ca he ka mokut eâu hnyinghet hnyi dok ae tha hon hnyi hnyeubaba, ke so bi hanyâúâ thö; wâ e nye utâ than me tavat hia thithö unyin. 17 Ke Jonathana me Ahimaza ödru me laba bi hnyi Eni-rogel; ke ame labö he ke athnyaba a hlu me thumetu ödru; me ödru me he me thumetu Davita than: anyin e ca úcú he ka ö ödru hnyi taun. 18 Ke ame ö ödru ke da, me thumetu Abasoloma: ke ödru me ie he me o hnyi uma umen ke at hnyi Bahurim, ae hu hna khú an hnyi hnyeuleny; ke ödru me utut ka hnyin. 19 Ke haba momo ame hom me ulolo hna tube hon hnyimen hna khú an, me ve lau but hon e je hwit adre thotho; ke ba ke ûnyi ae manen. 20 Ke ame o but lathnyabai Abasoloma ka momo hnyi uma, me ha, ka habe, Ewa Ahimaza me Jonathana? Haingen momo ködrin, ka habe, Ödru me he but me hanyâúâ wagewe. Ke ödrin e hia but elöm ödru, me ca wâ bi, me ödrin e hmetu Jerusalem ai. 21 Ke ödrin e he but, me ödru me ölö thö úheny hnyi an, me he me thumetu Davita a than; ke ödru me ha kö Davita, ka habe, Todr' öbun me ie he hanyâúâ wagewe: anyin a helâng hofuc ho Ahithofela gabun. 22 Me ame todrö Davita me tavat hia thithö unyin, me he hanyâúâ Joridano: ke hnyi lany hnyi hnyomakatu e ba at a ca hnyi hanyâúâ Joridano. 23 Ke a wâ but Ahithofela a g' adre ca ânyâ hoton hnen hna

## II. SAMUELA 18.

ha, me e ame ip taben hon haleny asina, me todrö, me he ka hnyi umen uma, hnyi anyin taun me hûna ka anyin lap, me hnok ; me e ame mokcu, me adre me konâm e hnyi erkemok anyin kamen.

24 Ke ame o but Davita hnyi Mahanaima. Ke Abasoloma ame hanyâûâ Joridano, e me at Isaraela hia unyin. 25 Ke Abasoloma ame otilö Amasa hnân taben utbavat hwabö Joab. Ke Amasa me nokon ke at adre hwenyi ien Ithara at Isaraela, at ame he kö Abigaila nöku Nahasa a hlu, hani Zerua, hinyö Joab. 26 Ke Isaraela me Abasoloma adre me hunuma hnyi Gileada.

27 Ke ame o Davita hnyi Mahanaima, me haba Sobi nöku Nahasa at Raba hanen lakon Amona, me Makir nöku Amiela üheny Lo-deba, me Bazilai at Gileada üheny Rogel, 28 ödrin e hom je hna mokut, me je kumete, me je kaia kânâ, me je hwit, me hali, me falawa, me hwit adre le, me je wan owi, me je lentil, me je hna le, 29 me hani, me bata, me mamoe, me fromaginy kau, hobi kö Davita me tavat unyin, hnân han : anyin a haingödrin, ka habe, E meki-hnânem, me sēnyin, me beic tavat hnyi hnyebuba.

### HNyimakan 18.

**K**E Davita ame aû tavat unyin, me otilâ hudrin je taben thauzan me je taben haded. 2 Ke Davita ame khenâ kunâ tavat, haba ke keihen a kuniny hmelen hnyamö Joab, ke ke keihen a kuniny hmelen hnyamö Abisai nöku Zerua liamekeiny me Joab, ke keihen a kuniny hmelen hnyamö Itai at Gatha. Me haingen than, ka habe, haba inya oge me he ka tha he möbun minya. 3 Ke haingen tavat, ka habe, U me ca he ka hnyi he : anyin öhmun e ne kec gadrin me ödrin e ca he ka oûni-hnathu öhmun ; ke ame ne mokcu ke keihen a haf gahmun, me ödrin e ca he ka oûni-hnathu öhmun : ke u ûcû me ten thauzan gahmun : anyin a wale e so u me penapena he ka hadru' öhmun ûnyi hnyi taun. 4 Me ame ha ködrin than, ka habe, Oge me he ka ânyâ ûnyi ae so köbun. Me ame tot than hnyi homagöule, me ame didrut tavat hia, a je deö haded, me je deö thauzan. 5 Ke haba than ame hûna kö Joab, me Abisai, me Itai, ka habe, Ö öbun e menyik ka hidröu jia Abasoloma, can bi inya. Ke a löng ut tavat hia hnyi ün

than ame hûna ka je taben hia ga Abasoloma. 6 Me ame didrut tavat ka hnyi hnyei he ka vat me Isaraela : ke adre me vat hnyi hnyot e Eferaima. 7 Me haba lahiö Davita ödrin e kot tavat eling a at Isaraela, ke e gan hmâ hna hlingâ eling hnyi bong e, ödrin twente thauzan. 8 Ke lau vat eling hon hnyei hia : ke se hia tavat a mok eling ge hnyot, ke e wakhalet thibi a mok ge hele vat hnyi bong eling. 9 Ke haba Abasoloma ame ûkhanö me lahiö Davita. Ke Abasoloma ame tabâ miul, ke haba miul ame gethen hmelen je vheiny ae khöt hnyi iwajo, me ame vhet ju ban hnyi iwajo, me e ame uhni wanben drany me hmeledrany ; ke ame he bala but miul. 10 Haba ke at ame wâ, me ame thumetu Joab me ha, ka habe, Wâ bi oge ö Abasoloma ame uhni hnyi iwajo. 11 Haba Joab ame ha ka at ame thumeto e, ka habe, Wâ bi, u je wâ, ieu u je ca kot gan eling ka hnyi kânâ me inye he ka ham köu ten je sileva, ke wen hnyekon. 12 Haba at ame ha kö Joab, ka habe, Eja ke ne adre ne ham ka hnyi hnyamök khaca thauzan je sileva, me oge me ca he ka inâ hnyamök ka nokon than : anyin a haba hnyi hnöhmun hna löng, than ame hûna köu, me Abisai, me Itai, ka habe, Wâ thibi he ka ca kâlâ hidröu, jia Abasoloma, hnen ke at. 13 Ke haba khaca oge ne ânyâ monoâ me hlingâ e, (ke ba ke ûnyi ae iyong ka than) haba u bi, u je he ka tot gufa. 14 Ke Joab ame ha, ka habe, E ca khanö nya he ka bec helâe unyâm. Ke e ame hom kun ta uthö hnyi hnyamen, me dâoâ oûnykûmi Abasoloma e ka tiga möt hnyi wanben iwajo. 15 Ke ten je hidröu ödrin e hom tilâ je ûnyi vat anyi Joab ödrin e tot igigilö me hlingö Abasoloma. 16 Ke Joab ame tûâ trutru, me ame hmetu ju tavat ûhedrin hnyi hna hnu Isaraela : anyin a Joab ame thawâ tavat. 17 Ke ödrin e hum Abasoloma me khûâ ka hnyi thop ae gan hnyi hnyot, me ti khon gâná je veto hon : ke Isaraela hia ödrin e ve kec ka hnyi umödrin je uma mano. 18 Ke e ka tiga möt bi Abasoloma e ame hia but hom me otilâ hobi kâu bi veto ame tot, wale hnyi thop anyin than : anyin a haingen, ka habe, E ba nökek бага me me oûnykûmeâ iök : ke e ame hwenyi ien e ge ien bi : ke adre me labö ha e, ka habe, hnân ûnykûmi Abasoloma, ke ne o but hnyi bong ang.

19 Haba Ahimaza nöku Zadoka ame ha, ka habe, Ö iny he ka wadring me thu-

## II. SAMUELA 19.

meto than, a ga hia but Iehova bi hwaban ka je iwahnaihmiöny më. 20 Ke haingö Joab kâu, ka habe, U me ca he ka thumeto hnyi bong ang, ke u me he ka thumeto hnyi ke bong : ke haba hnyi bong ang u me ca he ka hom je úthumetu anyin a ga mokcu nökon than. 21 Ke Joab ame ha ka at Kusi, ka habe, He thö ka thumeto than ge ta je únyi u je wá. Ke at Kusi ame nom kö Joab me wadring. 22 Ke ame ha hmetu Ahimaza nöku Zadoka kö Joab, ka habe, Ö iny he ka wadring hoton at Kusi. Haingö Joab, ka habe, Hnân eú u me he nöku ka wadring, anyin a u me ca he ka hu troban uthumetu e? 23 Ke haingen, E so bi, oge ma me wadring. Me haingen kâu, ka habe, Wadring dö. Me Ahimaza ame wadring a gethen hnyi dok ae tha hon, me khaletâ at Kusi.

24 Ke haba Davita ame laba ju hnyi wanben li homagöule : ke ame ölö at hmâkâ ka hnyi hon homagöule ka hnyi hna up veto, me bwele, me wá, ke wale ke at ame hake wadring. 25 Me ame hongot at hmâkâ, me thumeto than. Me haingen than, ka habe, A ne at a khaca, awe e hu je úthumetu hnyi hnyimen. Ke e ame he logot me hakekeny. 26 Haba at hmâkâ ame wá ke at ame wadring ; me ame hongot at ame hmâkâ ka at ame tuö homagöule, ka habe, Wá bi, ke at bi ame wadring. Ke haingen than, ka habe, E ame hom je uthumetu minya. 27 Ke haingen at hmâkâ, ka habe, Oge me wá iwadringiny at ame bân me halâke iwadringi Ahimaza nöku Zadoka. Haingen than, ka habe, At e ae so, k'ame hom je úthumetu ae so. 28 Ke Ahimaza ame hongot, me ha ka than, ka habe, E hnahic ut. Ke e ame nom hnyikânâi hnyi hnyimakan than, me ha, ka habe, Ole kö Jehova Khongom at ame hom hwenbâ tavat adre me höibeny ka than a tuhök. 29 Ke haingem than, ka habe, Hawa, e so hidröu, jia Abasoloma? Me haingö Ahimaza, ka habe, Oge me wá úkhacaköu ae gan hnyi úen Joab ame kunö nya athnyabainy than, walönya ang a athnyabaem, ke ca khanö nya bi ame ne ieú. 30 Ke haingen than, ka habe, Me saú thö, me todru háang. Me e ame saú me tot. 31 Ke wá bi ame o at Kusi ; me haingen at Kusi, ka habe, E hu je úthumetu hobi kâu than a tuhök : anyin a haba Jehova ame bi hwaban ködrin hia thithö hnyi bong ang adre me tot köu. 32 Ke haingen than ka at Kusi, ka habe, Hawa, e so

hidröu, jia Abasoloma? Me haingen at Kusi, ka habe, E na he ka helâ me hidröu eling ta je iwahnaihmiöny me than a tuhök, me ödrin hia ödrin e tot köu he ka okongu u. 33 Ke ame hmak hmönyin than, me ölö ka hnyi hnyeule hon homagöule, me tenge : ke e ame he k'ame ha helang, ka habe, Ekölö ge nöku Abasoloma, e kölö ge nöku, nöku Abasoloma! Ekölö, iny na mokcu me hwabâm, Ekölö Abasoloma, nöku, nöku!

### HNYIMAKAN 19.

**K**E adre me thumetu Joab, ka habe, Wá bi, than ame tenge thungáú ga Abasoloma. 2 Ke adre wia döku hnyi bong eling me me hnyamok ka tavat hia thithö : anyin a löng ut tavat hnyi bong eling, ka habe, Than ame tengege nokon. 3 Ke ame he hnihnik tavat ka hnyi taun hnyi bong eling, helâ me tavat adre me he hnihnik me hmehma ödra ka kec ge vat. 4 Ke haba than ame tube hnyimakan, me than ame tenge hwege göranyai, me ha, ka habe, Ekölö ge nöku Abasoloma, ekölö Abasoloma, nöku, nöku! 5 Ke ame o but Joab ka than ka hnyi uma, me ha, ka habe, U je ohmehma hnyi bong ang hnyimakan lakem, tavat adre me omeli u hnyi bong ang, me lakom je бага me hlu, me laáiám, me ányám je momo; 6 wale hnyi hnâm hna betenge ge tavat adre me húkotiö u, me húkotiá tavat adre me betenge gam. Anyin a u je hia but omanená hnyi bong ang ae ca únyi hnathu köu je tuhan me lathnyaba : anyin a oge me wahmakhmetoá hnyi bong ang a g'ame ne möt bi Abasoloma, ke öhmun mokcu hia thithö hnyi bong ang, ame he ka so hmönyin köu. 7 Ke walang ang, todrö, me didrut, me fuc so ka lakem : anyin oge khemanyin me haiö Iehova a u je ne ca didrut, ame he ka ba at unyám eáu hnyinghet : Ke ame he ka beönua köu monu eling hon ta je monu hia a o köu ehac k' u tiga thöth ke ne o but hnyi bong ang. 8 Me ame todrö than me laba hnyi homagöule. Ke ödrin e thumeto tavat hia thithö, ka habe, Wá bi, ame laba than hnyi homagöule : me ame he tavat hia ka than.

Haba at Isaraela ödrin e ve kec ka hnyi umödrin je uma mano. 9 Ke ame labö iwatretra tavat hia thithö hnyi je tribu Isaraela. hia, ke haingödrin, ka

## II. SAMUELA 19.

habe, Than ame omeli öta únyi ge je iwahnaihmiöny möta, ke e ame omeli öta únyi ge at Filisiti; ke walang e ame kec ge hneyi ca Abasoloma. 10 Ke a mokcu hnyi vat Abasoloma, at ötin e hú. Ke ieú gabun öbun e laba hnyibú he ka ohmeto than?

11 Haba Davita than ame úkhünöng kö Zadoka me Abiathara li at bihut, me baingen, ka habe, Fuc d' öbu ka wahingatiny Juda, me ha, ka habe, Ieú gabun a öbun e bec he ka ohmeto than ka hnyi umen uma? ke a o but hofuc hwan at Isaraela hia thithö ka than hnyi umen uma. 12 Je liamekeiny öbun mönya, a je jeiök me utiöik öbun: ke ieú ang a öbun bec he ka ohmeto than? 13 Ke ha thö kö Amasa, ka habe, Hawa, ca jeiök u me utiöik? e so Khong ame ányá helâe kõnya me bi hanen minya, u je ne ca he ka taben utbavat hnyi hnyimakök bala hwabö Joab. 14 Ke e ame ohmehmela hnyekon at Juda hia thithö helâ me at a khaca; me adre me úkhünöng ka than me ha, ka habe, Hmetu ju me lathnyabaem hia thithö. 15 Me ame hmetu than me o hnyi Joridano. Ke ame o at Juda hnyi Gilegala, me úkhanö me than, he ka hom than hanyâúú Joridano.

16 Ke e logot Simei nöku Gera at Beniamina, wale at Bahurim, me tha he me at Juda he ka úkhanö me Davita a than. 17 Ke khaca thauzan tavat unyin a at Beniamina me Ziba athnyabainy lap anyi Saulo, tha e me lakon ta бага a fiftiny, me lathnyabainy a twente; ke ödrin e he hanyâúú Joridano hnyi hnyimakan than. 18 Ke ame he hanyâúú ke galu, me me houden lap anyin than, me ányá anyin ta je huliwa. Ke Simei nöku Gera ame hanyâúú Joridano me ta ju hnyi hnyimakan than. 19 Me e ame ha ka than, ka habe, Ca he tuhök ka ip hnök, ke u me ca he ka únykúme monu a ányá athnyabaem hnyi bong than a tuhök ame he but úheny Jerusalema, me me vec hnyekon than. 20 Anyin ae khanö nya athnyabaem a oge me ányá hwakecin ae kong: me wâ bi, inya oge me bök ka o ke tiga hia lap hia anyi Josefa hnyi bong ang he ka ut ka úkhanö me than a tuhök. 21 Ke haba Abisai nöku Zeruia ame thu, ka habe, Hawa, adre me ca ke ka hlingö Simei can ang, wale e ame hangâ hna hú hnö Iehova? 22 Ke haingö Davita, ka habe, Ieú kõnya gabun je laku Zeruia, m' öbun e he ka bi iwahnaihmiöny mönya hnyi bong ang? hawa, adre me he

ka hlingâ ke at hnyi Isaraela hnyi bong ang? hawa oge me ca wâ a iny than Isaraela hnyi bong ang? 23 Haba than ame ha kö Simei, ka habe, U me ca he ka mok. Haba than ame khemanyin kâu.

24 Ke haba Mefiboseth nöku Saulo ame utut he ka úkhanö me than; ke a ca hneú li can, me ányâwia wainy, me hneú anyin je úkhaú, hwân hnyi bong ame he than ke ne o but e ame o hmetu me hnahic. 25 Ke e ame o but hnyi Jerusalema he ka iouny me than, me ame ha kâu than, ka habe, Ieú gam Mefiboseth u je ca tha he mönya? 26 Me e ame thu, ka habe, Than lö a tuhök, a iyawö nya athnyabaik: anyin a oge me ha athnybaem, ka habe, Oge me he ka ip taben hon asina, me laba hon, me tha he me than, anyin ae mat can athnyabaem. 27 Ke e ame bi fuco athnyabaem ka than a tuhök; ke helâ me angela anyin Khong than a tuhök: hamâm he ka ányá únyi ae so köu. 28 Anyin a helâ ke je komok ödrin hia hnyi lap anyi cica hnyi hnyimakan than a tuhök: ke so bi u je ip nya athnyabaem unyidrin tavat ödrin e han hnyi ányâm lanlau. Ke hawa, iny úcú hmetu he ka tenge ka than? 29 Haba than ame ha kâu, ka habe, Hnân eú he ka ha hmetu ányâm je únyi? Oge me ha, ka habe, u me he me Ziba ka khenâ hneyi. 30 Ke haingö Mefiboseth ka than, ka habe, E so e he ka hom hia, anyin a haba than a tuhök ame o but ka hnyi umen uma me hnahic.

31 Ke ame utut Bazilai at Gileada úheny Rogel; ke e ame tha hanyâúú Joridano me than, he ka su e hanyâúú Joridano. 32 Ke ti hingat ut Bazilai, eite je hunainy: ke e ame hia but han than k' ame tiga laba hnyi Mahanaima; anyin a e at ae ti únyi hnathu. 33 Ke haingen than kö Bazilai, ka habe, Öte tha hanyâúú, ke u me he ka tha han mönya hnyi Jerusalema. 34 Ke haingö Bazilai ka than, ka habe, Ve biju ta je bong hnyi je huna oge me ka möt hnyin, me inye he ka tha he me than Jerusalema ai? 35 Eite but je hunaik hnyi bong ang: hawa, e khanö nya he ka wâhmakhmeto so me kong? ke khanö nya athnyabeam he ka drem únyi oge me han me ic? ke khanö nya löng hmetu hwan khumöng anyin obaga me omomo? ke hnân eú oge me he a athnyabaem ka hmak ka tuhök? 36 E na omi hanyâúú Joridano athnyabaem me than: ke hnân eú ame he than ka bi hwaban kõnya

## II. SAMUELA 20.

ge hwaban a helae? 37 Ö u hnö nya athnyabaem he ka hmetu m' oge me mok hnyi anyik taun cicö hu cica me bai. Ke wâ bi ang athnyabaem jia Kimeama; hamen he ka tha he me than a tuhök; me u me he ka ânyâ kâu wem. 38 Me than ame thu, ka habe, Ame he Kimeama ka tha he mönya, me oge me he ka ânyâ kâu wem bi, haba ûnyi u je ha kõnya me oge me he bi nya ka ânyâ. 39 Ke ame he hanyâûû Joridano tavat hia, k' ame hanyâûû minya than: ke than ame ûcimhnyimak me Bazilai me hahnahicâ; me e ame hmetu ka hnyi hnyaban.

40 Me haba than ame he hanyâûû Gilegalai, ke Kimeama ame tha he mē: ke ame su than ge at Juda hia thithö, me hafny at Isaraela. 41 Ke wâ bi, ame he at Isaraela hia thithö ka than, me ha ka than, ka habe, Anyin a ieû a hom duöngi u je liamekeiny möhmun a at Juda, me hom than me anyin lap, me tavat hia atö Davita a tha ödrin mē he ka hanyâûû Joridano? 42 Haba at Juda hia thithö adre me thu ka at Isaraela, ka habe, Anyin a iate m' öhmun than: ke can ieû ame hmönyibun köhmun can ûnyi e? E hu hnöhmun hna han ûnyi ge than? e hu omjehelmun ûnyi gan? 43 Me haba at Isaraela adre me thu ka at Juda, ka habe, Ten je ke keihen gahmun unyin than, ke öhmun e hu beönua hubun unyi Davita: ke ieû gabun öbun e hûkötiohmun, me ca me ûhnenamö möhmun he ka ohmeto tuhöhmun? Ke e hwege hofuc hwan at Juda hon hofuc hwan at Isaraela.

### HNYIMAKAN 20.

**K**E e hu eling ke at Belial, Seba ien, nöku Bikeri, at Beniamina: ke e ame tûâ trutru, me ha, ka habe, E ba ke keihöhmun unyi Davita, ka ba jekhöûhmun unyin laku Jese: vese but ka hnyi umöbun je uma mano, Isaraela lö. 2 Me tavat Isaraela hia thithö, adre me vese but ga Davita, hotu Seba nöku Bikeri: ke so bi at Juda adre me kece ka tuhödrin, ûheny Joridano ke ne o but Jerusalema.

3 Ke Davita ame o but ka hnyi umen uma hnyi Jerusalema; haba than ame hom je momo a ten a anyin je momo, waleji e ame ip he ka tuö uma, me ip ödrin hnyi uma ceat, me haödrin, ke e ame ca dit ködrin. Ke a dre ip ödrin ke ne o but

hnyi bong ödrin e mokcu hnyin ödrin e laba helâ me safac.

4 Haba than ame ha kö Amasa, ka habe, Ukhacaköüâ thö kõnya at Juda e tiga ca um dö je bong a kun, ke u me he minya ka hnyi hanen. 5 Me Amasa ame he he ka ûkhacaköüâ at Juda: ke e bec hnyi ûen adre thu. 6 Haba Davita ame ha kö Abisai, ka habe, Ame he walang ang Seba nöku Bikeri ka okongu ötin hu Absoloma: he thö ka hom lathnyabainy tuhâm, me hnu e, wâ e nye hu gan je taun adre bi haginy ge veto, me kec gatin. 7 Ke ame he hoton je atö Joab, me at Kerethi, me at Pelethi, me tavat hwege hia thithö: ke ödrin e didrut ûheny Jerusalema he ka hnu Seba nöku Bikeri. 8 Ke ödrin e o but hnyi veto ae gan hnyi Gibeona, me Amasa ame o he ka ûkhanö mödrin. Ke Joab ame weikâ ge ûkhaüen vat, wale e ame khavâ, ke hnyi hon e wen hnyekon me hele vat adre ohmâ ka hnyi li jevan hnyi tangen; ke e ame tiga he me ame kölu but hele vat. 9 Ke Joab ame ha kö Amasa, ka habe, U so bi, muma? Ke Joab ame kât wai Amasa ge hnyamen a meta he ka ûcimhnyimak mē. 10 Ke ame ca ûnykûme bi Amasa ge hele vat hnyi hnyamö Joab: ke e ame dâ hnyekon, me ame hingölö but tang tiuy hnyikânâi, ke a ca kot e hmetu; ke e ame mokcu. Ke Joab me Abisai liamekeiny mē ödrü me hnu Seba nöku Bikeri. 11 Ke ame todrö unyin ke hidröu atö Joab, me ha, ka habe, Haba at a hiö Joab, me at ame hiö Davita, me hamen he ka he hotu Joab. 12 Ke Amasa ame mokut hwihwiö hnyi dren eü hnyi wanben gethen. Ke a wâ but a g' ame todrü tavat hia, me e ame hum Amasa ûnyi hnyi gethen ka hnyi hnyot, me tube ge ûkhaü, anyin e ame wâ a ga todrü tavat ödrin ka o me wâ e. 13 Ke a hia but hom e ûnyi hnyi gethen, me ame he hotu Joab tavat hia he ka hnu Seba nöku Bikeri. 14 Ke e ame vhenö je tribu anyin at Isaraela hia ke ne o but Abela, me Bethe-maka, me at Beri hia: me ödrin e ûkhacaköü me hnyi he hoton. 15 Ke adre me o me thelöng e hnyi Abela hnyi Bethe-maka, ke ödrin e ûkhöünâ göranyi kânâ cicö taun, ke ame tot ûnyi e cicö hak veto: ke haba tavat hia unyi Joab adre me kokot hna up hak, me me ta but. 16 Ke ame hongot ke momo ae metâ ûnyi hnyi taun, ka habe, Löng ju, löng ju; ö öbun me ha kö Joab, ka habe, Aiö u, m' inye he ka fuc

## II. SAMUELA 21.

kou. 17 Me e ame hakekeny kâu, me haingen momo ka habe, Joab u? Haingen, ka habe, E. Me e ame ha kâu, ka habe, Löng ju hofuc hwan athnyabaem a momo. Haingen, ka habe, Oge me löng. 18 Me haingen momo, ka habe, Adre me labö ha ehac, ka habe, Adre me he ka hnö wia hnyi Abela; me me bi obiny ju. 19 Inya hanen tavat adre behnahic me hnathu hnyi Isaraela: ke u je elâm he ka ohia taun a hinyen hnyi Isaraela: can ieú u me he ka utâ jekhóú Iehova? 20 Ke Joab ame thu me ha, ka habe, Ohe, Ohe, oge me ca he ka utâ me ohia. 21 Ca bongon e: ke so bi haba ke at a aten hnyei ae hut hnyi Eferaima, Seba ien, nöku Bikeri, ame hai hnyamen ka than, Davita: mē hna but at e, me oge me he ka he but úheny hnyi taun. Haba momo ame ha kö Joab, ka habe, Wâ bi, adre me he ka khûâ köu ban únyi hnyi hna up hak. 22 Me haba momo ae metâ ame he ka tavat hia. Me ödrin e subâ but bö Seba nöku Bikeri me khûâ kö Joab. Me e ame tuâ trutru me ödrin e vese thö únyi hnyi taun ka hnyi umödrin je uma mano. Ke haba Joab ame hmetu Jerusalema ai ka than.

23 Ke haba Joab me e taben je utbavat hia anyin at Isaraela: ke Benaia nöku Jehoiada me ban ka at Kerethi, me Pelethi: 24 ke Adorama at ame ô fat: ke Jehosafata nöku Ahiluda at ame oúnykúmeá: 25 ke Seva at ame sihnalimen: ke Zadoka me Abiathara li at bihut: 26 ke Ira minya, at Jaira, at ame musu unyi Davita.

### HNYIMAKAN 21.

**K**E e hu hmiâ hnyi úö Davita a kun hunainy, ke huna me ke huna; ke Davita ame elâm hnyimakö Iehova. Ke Iehova ame thu, ka habe, Ga Saulo me anyin lap ame hingâlâ dra, anyin a e ame hlingâ at Gibeona. 2 Haba than ame hawâ at Gibeona me ha ködrin, (ke ca hanen lakon Isaraela at Gibeona, ke hanen je kolon at Amora; ke a hia but lakon Isaraela khemanyin ködrin: ke Saulo ame elâm he ka kuc ödrin can weny ae gan hmâ ka lakon Isaraela me Juda:) 3 ke Davita ame ha ka at Gibeona, ka habe, Ieú oge me he ka ányâ hobi köbun? ke oge me he ka bi hwaban ge ieú, me öbun e he ka hahnahicâ jekhóú Iehova? 4 Ke

haba at Gibeona ödrin e thu, ka habe, E ca wehmun sileva me gol únyi ga Saulo ame ne anyin lap; ke ca hanymöhmun he ka hlingâ ke at hnyi Isaraela. Ke haingen, ka habe, Oge me he ka ányâ hobi köbun únyi öbun e he ka ha. 5 Me ödrin e thu ka than, ka habe, Haba at a ohí' öhmun, me heleú deny gahmum, me me ohí' öhmun, m' öhmun e ca laba hnyi hnyei hia iny at Isaraela, 6 ame he ka ham köhmun seven lakon obaga me öhmun e he ka uhni ödrin hobi kö Iehova hnyi Gibeona i Saulo, wale hnö Iehova hna úca. Ke haingen than, ka habe, Oge me he ka ham ödrin. 7 Ke than ame omeli Mefiboseth, nöku Jonathana nöku Saulo, can hna khemanyin anyi Iehova a wanbödrü, wale wanbö Davita me Jonathana nöku Saulo. 8 Ke haba than ame hom li бага laku Rizepa momo nöku Aia, wale e ame hnoköa ga Saulo, jia Aremoni me Mefiboseth; me ta бага a thabúng laku Mikala momo nöku Saulo, wale e ame hnoköa ga Aderiela nöku Bazilai at Mehola: 9 ke e ame ham ödrin ka hnyi hnyamen at Gibeona, ke ödrin e uhni ödrin hnyi bucen hnyi hnyimakö Iehova, ke ödrin a tha ta hia but a ödrin seven ke adre hling' ödrin hnyi úen ibi hwân menu, hnyi hna hwân dö meno bali. 10 Ke Rizepa momo nöku Aia ame hom mano ae gan nân me ulolo hobi kâu bi hon kic, hwân hnyi hnyimakan menu ke ne o but ame ta we hudrin únyi hnyi drany; ke e ame ca hna je meno ame gâ ethö he ka laba hudrin hnyi lany, me je menoiny hnyot hnyi lit. 11 Ke adre me thumetu Davita wale ge hna ányâ hnö Rizepa momo nöku Aia, wale momo anyi Saulo. 12 Ke habe Davita ame he me hom je jeiö Saulo me je jeiö Jonathana a nokon unyin at Jabesi-gileada, tavat adre venâu e únyi hnyi gethen hnyi Bethe-san, wale hnen at Filisiti hna uhno hnyin, hnyi úen at Filisiti ödrin e hlingö Saulo hnyi Gibeona: 13 ke e ame hom úheny e je jeiö Saulo me je jeiö Jonathana a nokon; ke ödrin e úkhóúnâ je jeiödrin adre uhno. 14 Ke ödrin e konâm je jeiö Saulo me Jonathana a nokon hnyi hnyei Beniamina hnyi Zela, hnyi hu Kiso a kamen: ke ödrin e ányâ ta je únyi hia hnen than hna húna. Ke hwaban e Khong ame löng hodrin ge hnyei.

15 Ke haba at Filisiti ödrin e vat hmetu me Isaraela; ke Davita ame utut, tha e me lakeiny, me vat me at Filisiti: ke ame

## II. SAMUELA 22.

sényin Davita. 16 Ke haba Isebi-benobe, wale hanen lakon at ae beú, ke kun ta haded sekel bras ihmakiny dân ö, ke adre oweikâ e ge hele vat ae teb únyi, e ame únykúme he ka kuc Davita. 17 Ke haba Abisai nöku Zerua ame hom hadruâ, me kot e, me hlingâ at Filisiti. Ke haba lakei Davita ödrin e khemanyin kâu, ka habe, U me ca he hmetu he ka tha he möhmun ka vat, wâ e nye omoko lamepainy Isaraela.

18 Ke hwaban e, e hu vat hmetu me at Filisiti hnyi Gob: ke haba Sibekai at Husa ame hlingö Saf, hanen lakon at ae beú. 19 Ke e hu vat hmetu me at Filisiti hnyi Gob; ke haba Eleanana nöku Jaare-oragim at Bethe-leema ame hlingâ liame-keiny me Goliatha at Gatha, ke haba taben anyin ö helâ me utöiny únyi hnân hwâwâ mano. 20 Ke e hu vat hmetu hnyi Gatha, ke eling at ae beú hmâ, ke úsa siks je banyen hnyi li hnyamen, me siks je bacan hnyi li can, wale twente foa úseiny; ke ame hnokoâ minya e hnen at ae beú. 21 Ke e ka humbasö Isaraela, haba Jonathana nöku Simea a liamekeiny me Davita ame hlingâ e. 22 Wale hnyat a vak eling nokon at ae beú adre hnokoâ hnyi Gatha; ke ödrin e ta but ge hnyamö Davita me lakeiny.

### HNYIMAKAN 22.

**K**E Davita ame ha kö Iehova je hofu-ciny khumöng ang hnyi bong Iehova ame omelö e únyi hnyi hnyamen je iwahnaihmiöny mē hia, me únyi hnyi hnyamö Saulo: 2 haingen, ka habe,

Iehova kicik, me hnök hnabâ, me at a omeli nya, walönya ang;

3 E Khongon kicik, oge me he ka labageju kâu;

E becik, me faoiny meno hnân omeli nya, me tabök tap ae görany, me hnök hna he ka kec kâu:

At úhömeli nya lö, u je omeli nya únyi hnyi úkonguny.

4 Oge me he ka hongot kö Iehova, e úcú he ka ogânâ:

M' adre me he ka omeli nya únyi ge je iwahnaihmiöny mönya.

5 Anyin ame wadrö nya je waköio adre me mekiny,

Ame oti nya je di anyin tavat ae kong.

6 Ame wadrö nya je töiny hedis:

Oge hnok dö ge je tö adre me mekiny.

7 Oge me hongot kö Iehova hnyi anyik vec, Eke, oge me hawâ Khanguk:

Ke e ame löng hok hnyi umen uma, Ke ame o but hwan anyik khöü ka hnyi li hnyikönyen

8 Ke ame bwebwet me öbubuny hmele-drany,

A okokok dö je taben drany Me bwebwet, anyin a e hmönyin.

9 Ame ölö hai únyi hnyi li hnyingöiny, Ke meic ame han únyi hnyi hnyimen: A möt dö je walep kâu.

10 E ame oto hwalö drany minya, me utut;

Ke e hu menekholom ae khöt eú hmelen li can.

11 Ke e ame laba hon kerubi, me gâ: Eke, adre me wâ e hon li labenyin ang.

12 Ke e ame ányâ menekholom hnân je tungen igigilö e, K' ame úkhöünâ je köio hnân je úlá ae haki ethö.

13 Adre omelö je walepiny meic Únyi ge hadröngöc hnyi hnyimakan.

14 Iehova ame ányâ hendreng únyi hnyi drany,

Ke ame fuc At ae ti Beönua.

15 Ke e ame kunâ je fana me ovesei ödrin; Me hucuce, m' ödrin e monumonu.

16 Me manen dut je deny köio ae gan, Adre me omanenâ je taben hmele-drany, Anyin a Iehova ame thawâ, Únyi ge homenâiny li hnyingöiny.

17 E ame úkhünöng úheny dö, e ame hum nya;

E ame lili nya únyi hnyi hnyin je köio ae se;

18 E ame omeli nya únyi ge iwahnaihmiöny mönya ae hwege

Me tavat adre me húkötio nya; anyin a ödra hwege huk.

19 Adre me o könya hnyi bonginy anyik vec:

Ke Iehova cik.

20 E ame hum nya minya ka hnyi dok ae gan:

E ame omeli nya, anyin a e ame senyin könya.

21 Iehova ame hia but bi hwaban könya hoton hwakecik ae wisa:

E ame bi hwaban könya hoton hauen li hnyamök.

22 Anyin oge me vheno je gethen de Iehova,

Ke oge me ca saú degecâ bi Khong me he monu but.



## II. SAMUELA 23.

- 23 Anyin a e bi hnyi hnyimakök anyin je hna owisa hia :  
Ke oge me ca saü ge anyin je hnanyibu.
- 24 Ke ba kongik kâu,  
Ke oge me tuö nya, m' oge me ca hnyi monu.
- 25 Anyin a wale Iehova ame hia but bi hwaban könya, hoton hwakecik ae wisa ;  
Hoton hwakecik ae wisa hnyi hnyimakan,
- 26 U me he ka betenge ka at ame betenge bi,  
U me he ka ti wisa ka at ae ti wisa ;
- 27 U me he ka hwakecin ae hau ka at ame hwakecin ae hau ;  
Ke u me he ka hwali ka at ame ányá hwakecin ae hwali.
- 28 Ke u me he ka omelö tavat adre me oevcá :  
Ke u me he ka wá tavat ae bi gan, m' u me he ka ohnyikánái ödrin ju.
- 29 Anyin a u, Iehova lö, anyik lamepa :  
Ke ame he Iehova ka omelamá anyik menekholom.
- 30 Anyin a únyi gam oge me wadring hon deö vat :  
Únyi ge Khonguk oge me gâ hanyáúá hna up hagingy.
- 31 Haba Khong, e ti wisa deny gethen :  
Adre cubec hofuc ho Iehova ;  
E becidrin hia tavat adre me labageju kâu.
- 32 Anyin a ia Khong e ka ca Iehova ?  
Ke ia kic e ka ca Khongutin ?
- 33 Khong anyik hnabá ae hwege :  
Ke e ame su at ae ti wisa hnyi deny gethen.
- 34 E ame ányá li can me me helá me aila :  
Me olabö nya hon anyik je dok ae görany.
- 35 E ame ná li hnyamök he ka vat ;  
Me me oto cafana bras ge li benyik.
- 36 U je hia but ham könya becin ányám úhömeli :  
Ke ame oganö nya ge hwakecâm ae menyik.
- 37 U je hia but oganá je hna okca hmelik,  
Ke ame ca hauhau li hnyeúcak.
- 38 Oge hia but hnu hoton anyik je iwahnai-hmiöny me ohi' ödrin ;  
Ke khaca oge me ca hmetuhmetu ke ne o but ame hi' ödrin hia but.
- 39 Ke oge hia but ohi' ödrin, me dáoi ödrin, me me ca khan' ödrin bi tot :  
Eke, ödrin e ta but hmelen li cak.
- 40 Anyin a u je oweikö nya ge man hobi kâu vat :  
U je hom úhnyúkongu ödrin hmelik, tavat adre me tot könya.
- 41 Ke u je wia hoton könya je iwahnai-hmiöny mönya,  
M' oge me he ka ohi' ödra adre me húkotiö nya.
- 42 Adre me bwebwele, ke ba at he ka omelö ;  
Kö Iehova, ke e ame ca thu ködra.
- 43 Me oge me kot omomonu ödra helá me sesáiny káná,  
Oge uti ödrin helá me hmudrainy je gethen, me ulili ödra.
- 44 Ke u je hia but omeli nya únyi hnyi je iwatretra anyin ik hnyei ;  
U je tuö nya m' inye ban ta je hnyei bi :  
Ame he ka bi athnyabaik hnyei ae ca khanö nya.
- 45 Ame he je atkanyua ka nom könya :  
Ödra ka löng gak, me adre me he ka ling nya.
- 46 Ame he je atkanyua ka aú tot,  
Me o hnyi öbubuny únyi hnyi hnyeutidra ae nedrong.
- 47 E möt Iehova ; ke so e hnahic ut kicik ;  
E so adre ogöranyá Khongon kiciny melik :
- 48 Wale Khong at ame bi hwaban hnân hobi könya,  
Me hom úhnyúkongoá ta je hnyei hmelik,
- 49 Me hum nya únyi ge je iwahnai-hmiöny mönya :  
Eke, u je ogöranyi nya hudrin adre me tot könya :  
U je omeli nya ge at ame úokongun.
- 50 Anyin a wale oge me he ka ole köu Iehova hnyi wanben ta je hnyei,  
Me khumöng me oganá iâm.
- 51 E ame omelö gan hmâ hnân hobi kâu than a únyi gan :  
Me omanená ibetengiö ka at e ame hú,  
Kö Davita me je mátrâniny nyiele balua.

### HNYIMAKAN 23.

**K**E walang je hofuc a biliny ho Davita,  
Haingö Davita nöku Jese,  
Ke ame ha at adre me ogöranyá,  
At a hú hnen Khongu Jakob,  
Me at a ányá je khumöng ae hnebwia anyi Isaraela :  
2 Hanu Iehova ame fuc únyi gak,

II. SAMUELA 23.

Ke e bi hnyi bohök hwan hofuc.  
 3 Ame ha Khongu Isaraela,  
 Ame fuc könya kic anyi Isaraela :  
 At ame musö tavat hnyi wisa  
 Ame musi me outen Khong ;  
 4 Ke e ame he ka helâ me lany hnyi  
 hnyomakatu, hnyi ün ame o seünö,  
 Hnyomakatu ae ba ûlâiny ;  
 Hnyi ün ame kû hna önying ûnyi hnyi  
 kânâ,  
 Hnyi lany ae hadröngöc hwaban we.  
 5 Ke ca helâling anyik lap me Khong ;  
 Ke so bi e ame ânyâ mönya ûhiny-  
 köu ame ca ba balua,  
 Adre penapena ta je ûnyi hia thithö  
 hnyin, ke hwege :  
 Anyin a melik hia, me wek hia,  
 Ke so bi e ame tiga ca okûâ e.  
 6 Ke ame he tavat Belial hia thithö ka  
 helâ me je údedö adre degec,  
 Anyin adre me ca he bi ka kât je hnyam :  
 7 Ke haba at ame mádrâ  
 Ame he ka hu fao me taben ö ;  
 Ke adre me he ka thong degecâ ge meic  
 hnyi hnen.  
 8 Ke walang ien tavat ae hwege anyi  
 Davita : jia Josheb-basebeth at Takemoni,  
 homakan je taben ; wale Adino at Ezeni, e  
 ame kot eit haded hnyi ün a khaca. 9 Ke  
 hwaban e Eleazara nöku Dodai nokon at  
 Aohi, ke at hnyi ta hnyat a kun ae hwege  
 unyi Davita, hnyi ün ödrin e humbasö at  
 Filisiti adre me úkbacaköu he ka vat, ke  
 ame he but at Isaraela : 10 e ame tot, me  
 kot at Filisiti, ke ne o but ame hmokun dut  
 hnyamen, ke ame kece hnyamen ka hnyi  
 hele vat : ke Iehova ame omelö gan hmâ  
 hnyi bong eling ; ke haba tavat adre me  
 hmetu he ka sei thibi. 11 Ke hwaban e  
 Sama nöku Age at Harari. Ke ame úkha-  
 caköu at Filisiti me me deö vat, wale baten  
 utkânâ ae únöngöt ge je lentil ; ke haba  
 tavat adre me kec ge at Filisiti. 12 Ke e  
 ame tot hnyi wanben utkânâ, me tuö e, me  
 kot at Filisiti : ke Iehova ame omelö gânâ.  
 13 Ke ame utut hnyat a kun hanen je  
 taben a thöte, me o kö Davita hnyi op  
 Adulama, hnyi ün menu : ke ame hunuma  
 deö vat anyin at Filisiti hnyi thop Refai.  
 14 Ke e bi Davita hnyi hnyabâ, ke e Bethe-  
 leema lap tue anyin at Filisiti. 15 Ke  
 haba Davita ame ti beweny, me ha, ka  
 habe, E na he ke at ka habelik ge an  
 hnyi Bethe-leema hnyi homagöule ! 16 Me  
 ame he hnyat a kun ae hwege me haguta  
 utbavat anyin at Filisiti, me se köiö hnyi an

hnyi Bethe-leema hnyi homagöule, me hom  
 kö Davita : ke so bi e ame höcö ic, ke e ame  
 hingâlâ kö Iehova. 17 Ke e ame ha, ka  
 habe, Ohe, Than lö, oge me ca he ka ânyâ  
 ûnyi eling : hawa, oge me he ka ijem dra  
 dren hnyat ödrin e vheno deny mok!  
 waleling me me ca ijem utköiö. A ânyâ  
 ûnyi e ta hnyat eling a kun ae hwege  
 18 Haba Abisai liamekeiny me Joab nöku  
 Zerua, me at ae beönua hnyi ödrin kun.  
 Ke e ame hai anyin ö ka tavat a kun ta  
 haded me hling' ödrin, ke adre me tha  
 hâiâ me ke li at. 19 Hawa e ca beönua  
 soiny at e hon ke li at a lo? ke e ame taben  
 ködru : ke so bi adre ca otilâ e hnyi kun  
 ta hnyat a bân. 20 Me Benaia nöku  
 Jehoiada, nokon ke at ae hwege hnyi Ka-  
 bezeela, at ame ânyâ je ûnyi ae gan, e ame  
 hlingâ li laku Ariel at Moaba : ke haba  
 hnyi hunainy kiona, me e ame utut ka  
 hnyi thop me hlingâ liona : 21 ke e ame  
 kot ke at Aigupito ae hmanenang : ke hu  
 ö dân at Aigupito ; ke e ame utut kâu me  
 uci, me e ame hügünâ ö ûnyi hnyi hnya-  
 men at Aigupito, me hlingâ e ge dân ö.  
 22 Wale je ûnyi a ânyâ Benaia nöku Je-  
 hoiada, ke adre me tha hâiâ e me ke li at  
 a ödrin kun ae hwege. 23 E beönua e  
 unyin tavat a thöte, ke so bi adre me ca  
 otilâ e hnyi kun a bân. Ke haba Davita  
 ame otilâ e hon je obotkonginy.  
 24 Ke Asael liamekeiny me Joab, me,  
 hanen hnyat a thöte ; me Elekana nöku  
 Dodo at Bethe-leema ; 25 me Sama at  
 Harod, me Elika at Harod ; 26 me Helez  
 at Paleti, me Ira nöku Ikis at Tekoa ;  
 27 me Abiezera at Anathoth, me Mebunai  
 at Husa ; 28 me Zalemon at Ahoi, me Ma-  
 harai at Netofa ; 29 me Hebeb nöku Baana  
 at Netofa ; me Itai nöku Ribai at Gibea  
 hanen lakon Beniamina ; 30 me Benaia at  
 Pirathon, me Hidai ûnyi hnyi je wagewe  
 hnyi Gasa ; 31 me Abi-alibon at Araba, me  
 Azemaveth at Bahurim ; 32 me Eliaba at  
 Salabin, hanen laku Jasen, me Jonathana ;  
 33 me Sama at Harari, me Ahiam nöku  
 Sarari at Arari ; 34 me Elifelet nöku Ase-  
 bai, nokon at Maaka, me Eliama nöku  
 Abithofela at Gilo ; 35 me Hezerai at  
 Karemela, me Paarai at Araba ; 36 me  
 Igala nöku Nathana úheny Zoba, me Bani  
 at Gada ; 37 me Zelek at Amona, me  
 Nahari at Berotha at ame hom tilâ je omje-  
 hen vat anyi Joab nöku Zerua ; 38 me Ira  
 at Iethero, me Gareb at Iethero ; 39 me  
 Uria at Heth : ödrin thöte seven hia.

## II. SAMUELA 24.

### HNYIMAKAN 24.

**K**E ame ubâhla hmetu thö hmönyin anyi Iehova kö Isaraela, ke e ame kunö Davita ködrin he ka ha, ka habe, He thö ka aú at Isaraela me Juda. 2 Ke haba than ame ha kö Joab taben utbavat wale unyin, ka habe, He thö walang ka vheno hnyi wanben je tribu Isaraela hia, hwân hnyi Dana ke ne o but Bere-seba, me öbun e he ka aú tavat, me me khanö nya thö úseiny tavat. 3 Haba Joab ame ha ka than, ka habe, E na he ju Iehova Khongom ka bi hanen ka tavat, ame ne ve úseidrin, he ka osehia ge haded, me me wâ li emakan than a tuhök : anyin a ieu ame weny únyi eling than a tuhök? 4 Ke so bi e hwege hofuc hwan than hu Joab, me je taben vat. Ke Joab me je taben vat ödrin e didrut ge than, he ka aú tavat a at Isaraela. 5 Ke ödrin e he hanyâúâ Joridano me hunuma hnyi Aroera, hnyi ke keihen metân taun hnyi wanben hnyigöulen bucen e Gada, me cicö Jazera ; 6 ke ödrin e o but hnyi Gileada, me hnyei Tati-hodesi ; ke ödrin e o hnyi Dana-jaan, me wadrâ Zidona, 7 me o but hnyi hhabâ hnyi Turo, me je taun hia anyin at Hivi me Kanana : ke ödrin e umo hnyi ke keihen Juda hnyi hwaiöu, hnyi Bere-seba. 8 Ke ödrin e hia but vheno hnyei hia, me ödrin e o hnyi Jerusalema obiny je tehi a naininy me twente je bong. 9 Ke haba Joab ame ham ka than úseiny hna aú tavat : ke e hu hnyi Isaraela eit haded thauzan tavat hwege, tavat hok hele vat ; ke faiv haded thauzan at Juda.

10 Me haba hnyeku Davita ame dá e hwaban hnen hna aú tavat. Me haingö Davita kö Jehova, ka habe, Oge hia but ânyâ monu ae gan hnyi únyi oge me ânya : ke walang ang, Than lö, oge me khöü köu he ka hna but hulö anyin athnyabaem ; anyin oge me ânyâ monu. 11 Ke a hmak dö Davita hnyi hnyomakatu, me ame o but hofuc ho Jehova kö Gada perofeta, at wâ unyi Davita, ka habe, 12 He thö ka fuc kö Davita, ka habe, Walang hofuc ho Iehova, ka habe, Inya oge me ip köu kun ta únyi ; úca thö khaca m' inye he ka ânyâ köu. 13 Ke ame o but Gada kö Davita, me thumeto e, me ha kâu, ka habe, Hawa, ame he ka o köu hmia hnyi em hnyei ke ne o but seven je huna ? ke hawa, u je bekec ge je iwabnaibmiöny möu adre me hnu u ke ne o but kun ta tehi ? ke hawa, adre me ne kunâ mok ae cap hnyi em

hnyei ke ne o but kun ta bong? awe wâhmakhmetö thö hofuc oge me he ka ha hmeto ka at a kunö nya. 14 Haba Davita ame ha kö Gada, ka habe, E gan hma hlo-hlo gak : e so ate me ta walang ang ka hnyi hnyamö Iehova ; anyin ae gan hmâ anyin ta je ibetengiö : ke ca he bi nya ka ta ka hnyi hnyamen at. 15 Me Iehova ame kunâ mok ae cap ka at Isaraela hwân hnyi hnyomakatu ke ne o but hnyi úen adre me thu : me ame mokcu sevente thauzan tavat hwân hnyi Dana ke ne o but Bere-seba. 16 Ke hnyi úen ame he angela ka lau hnyamen hon Jerusalema he ka okongoâ, me haba Jehova ame ietra kong eling, me ha ka angela at ame ohia tavat, ka habe, Soju ; kât ju hnyamâm. Ke ame tot angela anyi Iehova hnyi hna huje hwit anyi Aruna at Jebusi. 17 Me Davita ame wâ angela at ame kot tavat, me e ame ha kö Jehova, ka habe, Me wâ ju, e kong hwakecik, ke oge me hia but ânyâ hwali : ke ieu a ânyâ je mamoe ang? ö u hai hnyamâm könya ke úcon lap anyi cica.

18 Ke ame o but Gada kö Davita hnyi bong eling, me ha kâu, ka habe, Ölö thö, me otilâ taben hut kö Iehova hnyi hna huje hwit anyi Aruna at Jebusi. 19 Haba Davita ame ölö hoton hofuc ho Gada, helâ me hna húna hnö Iehova. 20 Ke Aruna ame bwele me wâ than me latbnyabainy ödrin e he kâu : ke Aruna ame didrut me nom hnyikânâi ka than. 21 Ke Aruna ame ha, ka habe, Ieu can a o thö than eang unyik? Haingö Davita, ka habe, He ka úco möu hna huje hwit, me hnân otilâ taben hut kö Jehova, me me hia ju mok cap unyin tavat. 22 Ke Aruna ame ha kö Davita, ka habe, E so than tuhök ame hom me hudo únyi ae so kâu : wâ bi je bolok hnân hudiny leú, me je únyi hnân huje hwit me omjehen je bolok me hlogon : 23 haba ta je únyi hia eling, than lö, a ham Aruna ka than. Ke haingö Aruna ka than, ka habe, E so ame he Iehova a Khongom ka köp u. 24 Ke haingen than kö Aruna, ka habe, ohe ; ke so bi oge me he ka úco möu ge hwaban : ke haba khaca oge me ca he ka hudo kö Iehova Khonguk je hudiny leú ame o gufa but könya. Me Davita ame úco hna huje hwit me je bolok hwaban je sekel sileva a fifte. 25 Ke haba Davita ame otilâ taben bi hut kö Iehova eling, me hudo je hudiny leú, me je hudiny ole. Ke Iehova ame kap je hna khöü hobi kâu hnyei, me ame hia ju mok ae cap unyin at Isaraela.

# TUSINY JE THAN, TUSI A BAN.

## HNYIMAKAN 1.

**H**ABA Davita a than, me hingat ut ke se hia je hunainy; ke ödrin e khavá e ge je imano, k' ame ca mage bi unyin. 2 Me ame ha káu lathnyabainy, ka habe, E so adre me he ka elâm hlu hmai hobi káu than a tuhök: ke hamen he ka tot hnyi hnyimakan than, me tuö e; ke e ame he ka mokut hnyi úlaiâm, me me mage than a tuhök. 3 Me adre me elâm hnyi je ke keihen Isaraela hia ke hlu ae hmanenang, me ö Abisaga at Sunema me adre me hom ka than. 4 Ke ti hmanenang hlu; ke e ame tuö than me huliwa unyin; ke than ame ca kálá bi. 5 Ke haba Adonia nöku Hagitha ame bi gan, me ha, ka habe, Oge me he bi nya ka than: me e ame penapena je kariota, me tavat tabö hors, me tavat a fite he ka bödrin ka wadring hnyi hnyimakan. 6 Ke ame ca ohmaká e hnen kamen hnyi ta je úen ehac, me ha káu, ka habe, Ieú gam u me ányá helâng? ke e at ae ti hmanenang; ke adre hnokoá e hwabö Abasoloma. 7 Ke e ame úhnenamö me Joab noku Zerua, me Abiathara at bihut: me ödru me hadruö Adonia me he hoton. 8 Ke haba Zadoka at bihut, me Benaia nöku Jehoiada, me Nathana perofeta, me Simei, me Rei, me tavat ae hwege unyi Davita, ödrin e ca tha hien me Adonia. 9 Ke haba Adonia ame thán je mamoe me je bolok me je meno ae pipikhenya, hnyi veto anyi Zoeleth wale hnyi En-rogel; me e ame hawá je liamekeiny mē hia a lakon than, me hnyat Juda hia lathnyabainy than: 10 ke haba Nathana perofeta, me Benaia, me tavat hwege, me Solomona liamekeiny mē, e ame ca hnyi hawá bi. 11 Haba Nathana ame ha kö Bathe-seba hinyö Solomona, ka habe, U me ca löng a ga musi but Adonia nöku Hagitha, ke ca khanö Davita bi a tuhötin? 12 Ke walang ang oge me úsabö möu, m' u me he ka omeli u bi me nokom a Solomona. 13 He thö ka dit kö Davita than me ha káu, ka habe, Than lö a tuhök, u je ca khemanyin kõnya athnyabaem, ka habe, E hnathu ame he Solomona a nokom ka than hwabök, ke e ame he ka tabá anyik theron?

ke anyin a ieú ame musi but Adonia? 14 Wá bi, u ka tiga úhnenamö eling me than, me oge me he ka dit hotom, me ohnathoá hwám hofuc. 15 Haba Bathe-seba ame didrö ka than hnyi hnyeule: a hingat hmönyin dut than; ke Abisaga at Sunema ame bi athnyaba ka than. 16 Haba Bathe-seba ame iyáú me nom ka than. Ke haingen than, ka habe, Ieú u je elâm? 17 Ke e ame ha káu, ka habe, Tuhök lö, u je khemanyin ga Iehova Khongom ka athnyabaem, ka habe, Ame he Solomona a nokom ka than hwabök, ke e ame ke ka tabá anyik theron. 18 Ke wá bi, walang ang ame musi but Adonia, ke ca khanö u than a tuhök: 19 ke e a hia but thán je bolok me je meno ae pipikhenya me je mamoe ae se hia, ke a hia but hawá lakon than, me Abiathara at bihut, me Joab taben vat: ke Solomona athnyabaem, e ame ca hawá bi. 20 Ke haba u, than lö a tuhök, ame bwele köu je li emakan at Isaraela hia, m' u me he ka ha ködrin at ame he ka tabá theron anyin than a tuhök hwaban. 21 Ke a ne ba, adre me he ka hai kongu nya me Solomona a nöku, u ka tha mokut ut me je lakámám. 22 Ke wá bi, e ame tiga úhnenamö me than, me ame o but Nathana perofeta. 23 Ke ödrin e ha ka than, ka habe, Wá bi, Nathana perofeta. Ke e ame didrö ka hnyi hnyimakan than, me e ame nom ju hnyikánái ka than. 24 Haba Nathana ame ha, ka habe, Than lö a tuhök, hawa, u je hia but ha, ka habe, Ame he ka musi but Adonia hwabök, ke e ame he ka tabá anyik theron? 25 Anyin a e ame he but eja, me thán je bolok me je meno ae pipikhenya, me je mamoe ae se hia, ke e a hia but hauá lakon than hia, me je taben vat, me Abiathara at bihut; ke wá bi, ödri ne han me ic hnyi hnyimakan, ke ödrin e ha, ka habe, E so e möt than Adonia. 26 Ke haba inya athnyabaem, me Zadoka at bihut, me Benaia nöku Jehoiada, me Solomona athnyabaem, e ame ca hnyi hau' öhmun. 27 Hawa, adre me ányá únyi eling únyi ge than a tuhök, ke u je ca omanená ka lathnyabaem, at ame he ka tabá theron anyin than a tuhök hwaban? 28 Haba Davita than ame thu me ha, ka habe, Hawö Bathe-seba

## I. JE THAN 2.

thö. Me ame o momo ka than, me tot hnyi hnyimakan than. 29 Me haba than ame khemanyin, ka habe, Kia inya Iehova at ame omeli nya únyi hnyi anyik ta je vec hia, 30 a oge me he ka ányâ hnyi bong ang helâ me hnök hna khemanyin köu ga Iehova Khongu Isaraela, ka habe, E hnathu ame he Solomona a nokom ka than hwabök, me e ame he ka tabâ anyik theron hwabök. 31 Me Bathe-seba ame nom hnyikânâi, me ogânâ than, me ha, ka habe, E so e möt bi than Davita a tuhök nyiele balua. 32 Me Davita ame ha, ka habe, Hawö Zadoka thö könya at bihut, me Nathana perofeta, me Benaia nöku Jehoida. Me ödrin e o but ka than. 33 Ke than ame ha ködrin, ka habe, Tha he th' öbun me lathnyabainy tuhöbun, me otabö Solomona nöku hon halek miul, me hom e Gihona ai: 34 me hamö Zadoka at bihut me Nathana perofeta, he ka hú e eling me me than bi hon at Isaraela: ke öbun e he ka túâ trutru, me ha, ka habe, E so e möt bi than Solomona. 35 Ke öbun e he ka he hoton, me e ame he ka tabâ anyik theron; anyin a e ame he ka than hwabök: ke oge me hia but wia e me me tuhan at Isaraela me Juda. 36 Me haba Benaia nöku Jehoiada ame thu ka than, me ha, ka habe, Amen: e na helâ ju e hna ha hnö Iehova, Khongon than a tuhök. 37 Iehova a tha e möu than a tukök, e na helâ minya ju ame he ka tha e me Solomona, me obeönua anyin theron hon theron anyin than Davita a tuhök. 38 Me ame he Zadoka at bihut me Nathana perofeta, me Benaia nöku Jehoiada, me tavat Kerethi me Pelethi, me olabö Solomona hon miul hale Davita than, me hom e Gihona ai. 39 Me haba Zadoka at bihut ame hom faoiny meno taben wakaco únyi hnyi Uma Mano, me hú Solomona. Ke ödrin e túâ trutru; ke ame ha tavat hia, ka habe, E so e möt bi than Solomona. 40 Me tavat hia adre me he hoton, ke ödrin e túö je köwi me senyin ke gan hmâ senyin, me ame hmouca hmeledrany ge medi ödra. 41 Ke a löng ut Adonia m' ödrin hia thithö unyin, ödrin e hia but han. Ke a löng ut Joab ifucin trutru, me e ame ha, ka habe, Ieú ang ame mede hnyi taun? 42 Ke e ame tiga ha, me wâ bi, ame o but Jonathana nöku Abiathara at bihut: haba Adonia ame ha, ka habe, Didrö; anyin a u at ae so, me u me hom úthumetu ae so. 43 Haba Jonathana ame thu me ha kö Adonia, ka habe, E, a hia but Davita than

otilö Solomona ka than: 44 ke a hía but than tha kunâ e me Zadoka at bihut, me Nathana perofeta, me Benaia nöku Jehoiada, me hnyat Kerethi me Pelethi, ke ödrin e olaba e hon miul haleny than: 45 ke a hia but Zadoka at bihut me Nathana perofeta hú e hnân than hnyi Gihona: ke ödrin e o but úheny e hnyi senyin me ame ü but taun. Wale mede öbun e löng. 46 Ke Solomona ame tabâ minya theroniny döku. 47 Ke wale minya ang, a o but je lakeiny than he ka ha hnahici Davita a tuhötin, me ha, ka habe, E so Khongom ame he ka obeönua iö Solomona hon iâm, me ogânâ anyin theron hon ányâm theron: ke than ame nom ju hon hnen hna mokut. 48 Ke ame ha minya than, ka habe, Ole kö Iehova Khongu Isaraela at ame ham hnyi bong ang at he ka tabâ anyik theron, ke inya oge me wâ. 49 Me ame ot tavat hia a tha ödrin me Adonia, me todrö, me vese but. 50 Haba Adonia ame outö Solomona; ke e ame tot, me kât je baitoiny taben hut. 51 Ke adre me thumetu Solomona, ka kabe, Wâ bi, Adonia ame outö Solomona than: ke wâ bi, e ame kât je baitoiny taben hut me ha, ka habe, Ö e khemanyin könya hnyi bong ang Solomona than a e ame ca he ka hlingâ athnyabainy ge hele vat. 52 Haba Solomona ame ha, ka habe, Ame ne he ka ányâ hwakecin ae úcú ame ca he ka kölu hnyikânâi ke leünen ban: ke adre me ne he ka wâ hwakecin ae kong gan, me e ame he ka mok. 53 Me Solomona than ame úkhünöng, ke ödrin e hom e únyi hnyi taben hut. Ke e ame o me nom ju kö Solomona than: ke Solomona ame ha kâu, ka habe, He thö ka hnyi hnyabam.

### HNYIMAKAN 2.

**K**E hakekeny dut úen ame he but Davita ka mokcu; me e ame húna kö Solomona a nokon, ka habe, 2 Oge me he ka vheno gethen deny aten hmeledrany hia: bethe hwege ju u, me hnyok бага thö; 3 ke tuö je hanymâm únyi ga Iehova Khongom, he ka vheno deny je gethen, me tuö anyin je hna húna, me anyin je hnanyibu, me hnen je hna owisa, me hnen je hna otílâ, helâji me hna sihnalimen hnyi tusi anyi Mose, m' u me hnahic hnyi ta je únyi hia u me he ka ányâ, me ta je dok u me he ka he kâu: 4 me me he Iehova ka ohmâ hwan hofuc, waleji e ame ha gak, ka

## I. JE THAN 2.

habe, Ame ne he lakom ka tuö dedrin je gethen he ka he hnyi hnyimakök hnyi hnathu ge hnyekudrin ae bekhöt me hanu ae bekhöt, (haingen,) ame ca he ka ba hwabâm hon theron hnyi Isaraela. 5 Ke haba khaca, e khanö u but waleji a ânyâ kõnya Joab nöku Zeruia, waleji e ame ânyâ ka li taben vat anyin at Isaraela, jia Abinera nöku Neri, me Amasa nöku Jether, a li at e ame hlingâ, me hingâlâ dren vat hnyi ûen hnahic, me ip dren vat hon wen hnyekon hnyi hnyin, me hnyi tangen hnyeücan hnyi li can. 6 Anyin a wale ânyâ thö hoton ânyâm metâ, me ca hna ban ae hûen ka utut ka hnyi erkemok hnyi hnahic. 7 Ke u me he ka betenge ge laku Bazilai at Gileada, ke ödrin e he ka hnyi han hnyi ânyâm laulau: anyin a helâe ödrin e he kõnya hnyi ûen oge me kec ga Abasoloma liamekeiny möu. 8 Ke wâ bi e unyâm Simei nöku Gera at Beniamina ûbeny Bahurim, ke e ame hangö nya ke hwege hnen hna ûhangö waleji hnyi bong oge me he hnyin Mahanaima ai: ke so bi o ame utut he ka ûkhanö mönya hnyi Joridano, me oge me khemanyin kâu ga Iehova, ka habe, Oge me ca he ka hlingö u ge hele vat. 9 Ke walang ang u me ca he ka ha a e ba anyin monu, anyin a u at ae metâ, ke e khanö u ûnyi ae úcû he ka ânyâ kâu, ke u me he ka hom ban ae hûen ka hnyi erkemok ge dra. 10 Ke Davita ame tha mokut me lakamen, me adre me konâm e hnyi taun anyi Davita. 11 Ke haba ta je bong ame musi hnyin Davita hon at Isaraela, me, fâte je huna: seven je huna e ame musi hnyi Heberona, ke thöte theri je huna e ame musi hnyi Jerusalema.

12 Ke Solomona bi ame tabâ theron anyi Davita a kamen; ke adre ti ohmâ dokhon dökhu. 13 Ke haba Adonia nöku Hagitha ame o kö Bathe-seba hinyö Solomona. Ke haingen momo ka habe, Hawa u me oâ hnahic? Haingen, ka habe, E ke. 14 Me e ame ha ka momo, ka habe, E hu hok hofuc he ka ha köu. Haingen, ka habe, ha thö. 15 Haba e ame ha, ka habe, e khanö u a hanymök dökhu, ke haba at Isaraela hia ödrin e tha hnyimaködrin kõnya me inye than; ke so bi adre wia bi dökhu, me adre ham bi ka keik, anyin a Iehova ame ham kâu. 16 Ke walang ang inya oge me sumatö u ge ke ûnyi a khaca, u me ca he ka behânâ. Haingen momo, ka habe, Ha thö. 17 Haingen,

ka habe, Ö u ha kö Solomona than (anyin a e ame ca he ka behânâ gam,) me me ham Abisaga kõnya at Sunema me öök. 18 Ke Bathe-seba ame ha, ka habe, E so; oge me he ka ûhnenamö me than hobi köu. 19 Haba Bathe-seba ame he kö Solomona than he ka ûhnenamö mē ga Adonia. Ke than ame tot he ka ûkhanö mē, ke e ame nom kâu, me laba hon anyin theron, me kunâ he ka ip ke theron hobi kâu hinyen than; ke momo ame laba hnyi ke keihen a metân. 20 Haba momo ame ha, ka habe, Inya oge me sumatö u ge ke ong ûnyi a khaca; ca he ka behanö nya. Haingen than, ka habe, Bai, sumâtâ thö: anyin a oge me ca he ka behânâ gam. 21 Haingen momo, ka habe, He ka ham Abisaga at Sunema kö Adonia liamekeiny möu me âiân. 22 Haba Solomona than ame thu me ha ka hinyen, ka habe, Anyin a ieu u me sumatö Abisaga at Sunema hobi kö Adonia? sumâtâ minya thö dökhu hobi kâu; anyin a tuhök e; a hobi kâu bi, me Abiathara at bihut, me Joab nöku Zeruia. 23 Haba Solomona than ame khemanyin ga Iehova me ha, ka habe, Ame he Khong ka ânyâ helâe kõnya me bi hanen minya, a ne ca ha Adonia hofuc e hnân hangâ e bi. 24 Awe, kia inya Iehova, at ame ohmö nya, me olabö nya hon theron anyi cica Davita, me at a bi hnyabak, helâ me hnen hna ha bânâ, a g' adre me he ka hlingö Adonia hnyi bong ang. 25 Haba Solomona ame kunö Benaia nöku Jehoiada; ke ame kot moko e. 26 Ke haba than ame ha kö Abiathara at bihut, ka habe, He thö Anathoth ai ka hnyi em hnye; anyin ae úcû u me he ka mok: ke oge me ca he ka hlingö u walang ang, anyin a u je hom tilâ tang tangö Iehova a Than hnyi hnyimakö cica Davita, ke can u je hom vec hnyi ta je ûnyi hia ame vec cica hnyin. 27 Me haba Solomona ame obö Abiathara ûnyi hnyi hanymen at bihut kö Iehova; me me ohwâdâ hofuc ho Iehova, waleji a ha ge lap anyi Eli hnyi Silo. 28 Ke Joab ame long úthumetu eling: anyin a hia but Joab he hoton Adonia, ke so bi a ca he hotu Abasoloma bi. Me Joab ame kec ka hnyi Uma Mano umö Iehova, me kât je baitoiny taben hut. 29 Ke adre me thumetu Solomona than a ga kec dö Joab ka hnyi Uma Mano umö Iehova, ke wâ bi e but hnyi taben hut. Me haba Solomona ame kunö Benaia nöku Jehoiada, me ha, ka habe, He thö ka kot.

### I JE THAN 3.

30 Haba Benaia ame he ka hnyi Uma Mano umö Iehova, me ha kâu, ka habe, Walang hofuc hwan than, ka habe, Aiö u. Haingen, Ohe ; oge ma he ka mok ang. Me Benaia ame hmeto hofuc ka than, me ha, ka habe, Ame ha helâng Joab, ke e ame thu kõnya helâng. 31 Ke haingen than kâu, ka habe, Ânyâ thö helâ me hnen hna ha, ke kot ju, me konâm e ; m' u me he ka ohia dra ae ba hnyikongon, waleji a hingâlâ Joab ûnyi gak, me ûnyi ge lap anyi cica. 32 Ke ame he Iehova ka ohmeto dren ka hnyi hon ban bi, anyin a e ame kot li at ae wisa me so hon, me hling' ödru ge hele vat, ke ca khanö cica Davita, wale jia Abinera nöku Neri, taben vat anyin at Isaraela, me Amosa nöku Jether taben vat anyin at Juda. 33 Ke ame he hmetu drödrü ka mokut hon bö Joab me hon ban je mâtâniny nyiele balua : ke ame he ka hu hnahic ûnyi ga Iehova nyiele balua kö Davita, me je mâtâniny, me anyin lap, me anyin theron. 34 Me haba Benaia nöku Jehoiada ame he, me kot hlingâ e ; ke adre me konâm e hnyi umen uma hnyi hnyebuba. 35 Me haba than ame otilö Benaia nöku Jehoiada hon je utbavat me hwaban : ke than ame otilö Zadoka at bihut me hwabö Abiathara. 36 Ke haba than ame úkhúnöng he ka hawo Simeï, me haingen kâu, ka habe, He thö ka bi umâm uma hnyi Jerusalema, me laba eling, ke ca he bi ka hnyi hoton hak. 37 Anyin a hnyi bong u me he ka he didrut me hanyâûâ wagewe Kideron, wâhmakhmeto ju a u me he ka mok : ame he ka mokut hon bâm drâm bi. 38 Haba Simeï ame ha ka than ka habe, E so hna ha : ame he athnyabaem ka ânyâ helâ me hnâm than hna ha. Ke haba Simeï ame laba hnyi Jerusalema e se hia je bong. 39 Ke hwaban kun ta huna me ame kec li lathnyabai Simeï kö Akisa, nöku Maaka, thaniny Gatha. Ke ödrin e thumetu Simeï, ka habe, Wâ bi, haba li lathnyabaem ödru but Gatha. 40 Haba Simeï ame todrö, me húkâlâ taben hon haleny asina me he Gatha ai kö Akisa he ka elâm li lathnyabainy hlu : ke Simeï ame he me hom anyin li athnyaba ûheny Gatha. 41 Ke adre me thumetu Solomona a Simeï ame he Gatha ai ûheny Jerusalema, ke a o hmetu thö. 42 Haba than ame úkhúnöng he ka hum Simeï, me ha kâu, ka habe, Hawa, oge me ca kunö u he ka khemanyin kö Iehova, me ha hwegiâ köu, ka habe, Wâhmakhmeto ju a u me he ka

mok hnyi bong u me he ka he hnyöu ai, me he monu me ngenü? ke u je ha kõnya, ka habe, E so hofuc oge me löng. 43 Ieü can u je ca vheno hna khemanyin kö Iehova, me hnanyibu oge húna köu? 44 Ke haba than ame ha minya kö Simeï, ka habe, U je wâhmakhmeto but ae kong hia eü hnyi hnyekom, waleji u je ânyâ kö cica Davita ; ke ame he Iehova ka bi hwaban ânyâm monu hon bi bâm, 45 ke ame he Solomona than ka hnahic, ke ame he ka tet hmâ theron anyi Davita hnyi hnyimakö Iehova nyiele balua. 46 Haba than ame kunö Benaia nöku Jehoiada me e ame he me kot hlingâ e. Ke hmâ but dökhu unyi Solomona.

### HNYIMAKAN 3.

**K**E haba Solomona ame hwân he ka liameûngon me Farao than Aigupito, anyin a e ame hom hlu nöku Farao, me hom e ka hnyi taun anyi Davita, ke ne o but e ame mä um dö op umen uma, me uma umö Iehova, me hak veto igigilö Jerusalema. 2 Ke so bi haba tavat adre bi hut hnyi je dok ae görany, anyin a ödra tiga ca um op uma umen iö Iehova ke ne o but hnyi je bong eling. 3 Ke Solomona ame hnyok kö Iehova, k' ame vheno je hnanyibu anyi Davita a kamen ; ke so bi e ame hudo me leü ütö ae bo so hnyi je dok ae görany.

4 Ke haba than ame he Gibeona ai he ka bi hut eling ; anyin a haba wale dok ae görany ke gan bi : khaca thauzan je hudiny leü ame hudo eling Solomona hon taben hut. 5 Ke Iehova ame manen kö Solomona hnyi Gibeona hnyi bwi hnyi hnyinghet : ke ame ha Khong, ka habe, Sumâtâ thö ûnyi oge me he ka ham köu. 6 Ke haingö Solomona, ka habe, U je betenge gan hmâ ga cica Davita athnyabaem, hoton hnen hna' he hnyi hnyimâkâm hnyi hnathu, me hwa-kecin ae so, me hnyekon ae wisa köu ; ke u je tuö hobi kâu ibetengiö ang ae gan, a u je ham kâu nokon he ka laba hon anyin theron, helâ me hnyi bong ang. 7 Ke haba walang ang, Iehova lö a Khonguk, u je otilö nya athnyabaem he ka than hwabö cica Davita : ke iny wanakat ae ûhnyükong ; ke ca khanö nya bongon he ka didrut me didrö. 8 Ke inya but ang a athnyabaem hnyi wanben lakem waleji u je uca, hnyei ae gan, ae pason he ka ha úseiny, ke ca hnân aü anyin aese hia. 9 Ö u ham kõnya athnyabaem hnyok ae metâ he ka owisa ka lakem,

## I. JE THAN 4.

m' inye he ka wâhmakhmeto so me kong ; anyin a ie at ae khana he ka owisa ka lakem ae gan helâng? 10 Ke haba hofuc ho Solomona me so ka Than, wale ame sumâtâ únyi eling. 11 Ke haba Khong ame ha kâu, ka habe, Anyin a u je sumâtâ únyi eling, ke u je ca sumâtâ he ka möt beú hobi köu bi, ke u je ca sumâtâ omjeú hobi köu bi, ke u je ca sumâtâ me me mok je iwahnaihmiony möu ; ke u je sumâtâ bi metâ hobi köu m' u me wâhmakhmetoâ he ka owisa ; 12 awe, oge hia but ânyâ helâ me hnâm hna ha : me wâ bi, oge hia but ham köu hnyok ae metâ me wahmakhmeto ; ke ba ke at a helâ möu ehac, ke haba khaca, e ba ke at ame he ka úcú möu ame he ka o hwabâm. 13 Ke oge hia but ham minya köu únyi u je ca sumâtâ, wale omjeú me he ka lung, me me ca he bi ka úcú möu ke than, hnyi bongom ta je bong hia thithö. 14 Ke u je ne he ka vhenodek je gethen he ka tuö anyik je hnanyibu me hnök je hna hûna, helâ me hnö Davita a kâmâm hna vhenodek, me oge me he ka osehia bongom je bong. 15 Ke ame hmak dö Solomona, me wâ bi, ame bwi : ke e ame o Jerusalema ai me tot hnyi hnyimakan tangen úhinyköu anyi Iehova, me hudo je hudiny leú, me je hudiny ole, me ânyâ bijeú ka lathnyabainy hia.

16 Ke ame o but ka than li momo hnyi gethen, me tha tot hnyi hnyimakan. 17 Ke ame ha ke momo, ka habe, Than lö, oge laba me momo ang hnyi uma a khaca ; ke oge me hnokoâ hnyi uma eling më. 18 Ke haba hnyi bong a kuniny hwaban hnök hna hnokoâ, haba momo ang ame hnokoâ minyâ ; öhmu thibi ; ke ba ke at unyihmu hnyi uma, ke hake öhmu ke hnyi uma. 19 Ke ame mokcu nokon momo ang hnyi hnyinghet ; anyin a e ame hwiö taköü. 20 Ke e ame todrö wanbenset, me hom nöku da gak, e ka tiga mokut bi nya athnyabaem me ip e hnyi úlainy, ke e ame ip bi nokon a mokcu hnyi úlaik. 21 Ke iny ka hmak dö hnyi hnyomakatu he ka asen nöku, me wâ bi a mokcu : k'oge hia but wâhmakhmeto e hnyi hnyomakatu, me wâ bi, a ca nöku bi waleji oge hnokoâ. 22 Ke haingen ke momo, ka habe, Ohe, nöku bi ang ae möt, ke ka nokom e ae mok. Ke haingen momo, a bân, ka habe, Ohe, nokom bi e ae mok, ke ka nöku bi ang ae möt. Wale hnödrü hna ha hnyi hnyimakan than. 23 Haba than ame ha, ka habe, Haingen ke at, ka habe, Ka nöku ang ae möt, ke

nokom bi e ae mok : ke haingen bi ke at, ka habe, Ohe, nokom bi e ae mok, ke ka nöku bi ang ae möt. 24 Ke haingen than, ka habe, Hö jem könya hele vat. Ke ödrin e hom ke hele vat ka hnyi hnyimakan than. 25 Haba than ame ha, ka habe, Kave luâ but wanakat ae möt, me ham ke keihen ka ke at me ke keihen ka ke at. 26 Haba momo hnyen wanakat ae möt ame ha ka than, anyin a e ame hnyok ka nokon, ka habe, Than lö, ham kâu wanakat ae möt, ke ca he bi ka hlingâ. Ka ame ha bi ke at, ka habe, Awe me me ca nöku bi me ca nokom, kave luâ but. 27 Me than ame thu, ka habe, Ham ka at eji wanakat ae möt, ke ca hlingâ bi ; e bi hnyen. 28 Haba at Isaraela hia adre me löng hna owisa hnen than ; me adre me outen than : anyin adre me wâ a e unyin metâ he ka owisa únyi ge Khong.

### HNYIMAKAN 4.

**H**ABA Solomona than, me e thaniny at Isaraela hia thithö. 2 Ke walang je taben unyin ; Azaria nöku Zadoka at bihut ; 3 me Eliorefa me Ahia, li laku Sisa, li at sihnalimen ; me Jehosafata nöku Ahiluda, at ame ounykümeâ ; 4 me Benaia nöku Jehoiada, taben je utbavat ; me Zadoka me Abiathara, li at bihut ; 5 me Azaria nöku Nathana, taben tavat tue ; me Zabuda nöku Nathana, obotkong me at ame tha hnyok me than ; 6 me Ahisara ame tuö hnyaba ; me Adonirama nöku Abeda at ame ö fat. 7 Ke twelv je obotkongi Solomona hon at Isaraela hia, ke hanymödrin he ka bi an than me anyin lap : úsa khaca tehi ködrin ka bi han hnyin hnyi huna. 8 Ke walang je iödrin : jia Bene-huro, hnyi hnyei ae hut hnyi Eferama : 9 Bene-dekera, hnyi Makaza, me hnyi Salabim, me Bathe-theses, me Elonabethe-hanan : 10 ke Bene-heseda hnyi Aruboth ; ke hanymen hnyi Soko me hnyei hia Hefera : 11 ke Bene-abinadab hnyi hnyei ae hut hia e Dora ; wale at a hum Tafatha hlu nöku Solomona me áian bi : 12 ke Baana nöku Ahiluda, hnyi Tanaka, me Megido, me Bethe-seana hia a hakekeny Zaretana, hnyi hmelen Jezerela, hwân e Bethe-seana ke ne o but hnyi Abela-mehola, ke ne o but cicö Jokameama : 13 ke Bene-gibera, hnyi Ramoth-gileada ; e hu hanymen bi hnyi je taun anyi Jaira nöku Manase hnyi Gileada, me hnyi ke keihen Aregoba



## I. JE THAN 5.

hnyi Basana, sikste je taun ae gan adre up hagin y veto me je ohmäiny a bras : 14 ke Ahinadaba nöku Ido, hnyi Mahanaima : 15 ke Ahimaza hnyi Nafatali ; e ame hum Basimathi hlu nöku Solomona me äiän : 16 ke Baana nöku Husai, hnyi Asera me Aloth : 17 ke Jehosafata nöku Parua, hnyi Isakara : 18 ke Simei nöku Ela, hnyi Beniamina : 19 ke Gebera nöku Uri, hnyi hnyei Gileada, hnyei i Sihona than Amora, me Oga than Basana ; ke hake e thibi obotkong hnyi hnyei. 20 Ke e se hia at Juda me Isaraela, helâ me önyin köiö üseiny, adre me han me ic me senyin.

21 Ke haba Solomona ame musö je döku hia hwân hnyi Wagewe ke ne o but hnyi hnyei iny at Filisiti, ke ne o but hnyi hnyigüölen Aigupito : ke adre me ham bwihlany me huliwa kö Solomona hnyi bongon ta je bong hia thithö. 22 Ke haba ö Solomona hnyi bong a khaca, me thöte je tulutiny falawa ae so, ke sikste je tulutiny ke falawa bi ; 23 ten je bolok ae pipikhenya, ke twente je bolokiny hnyot, ke khaca haded je mamoe, ca ha bi je aila, me je zebi, me je imura, me je meno ae pipikhenya helâ me koto. 24 Anyin a e ame musö hia hnyi ke keihen ejem Wagewe, hwân hnyi Tifesa ke ne o but hnyi Gaza, hon ta je than hia hnyi ke keihen ejem Wagewe : ke e hu üsoköu hnyi je ke keihen hia igigilö. 25 Ke haba at Juda me Isaraela hia adre me ve laba hnahic, hmelen haledrin je üvine, ke hmelen haledrin je imeta, hwân hnyi Dana ke ne o but hnyi Bere-seba, hnyi ta je bong hia thithö anyi Solomona. 26 Ke e hu ga Solomona fâte thauzan je hnyeuleny horse hobi kâu anyin je kariota, ke twelv thauzan tavat tabö horse. 27 Ke haba je obotkong eling ödrin e bi ö Solomona than mödrin hia thitho ödrin e he ka hnyi laulau anyi Solomona than, üsa khaca tehidrin : ke ba ke ünyi ae hia. 28 Ke adre me hom bali me je thatünyin hwit minya hobi kâu je hors me je meno ame he logot, ödrin e hom ka hnyi hnen hna laba hnyin, hoton je ve hudrödrin.

29 Ke Khong ame ham kö Solomona metâ me wâhmakhmetoâ ae ti gan, me hnyok ae gan hmâ, helâ me öny hnyi köiö. 30 Ke haba metâ anyi Solomona, me gan hon metâ anyin tavat hia thithö e deiö, me metâ hia hnyi Aigupito. 31 Ke e beönuu anyin metâ hon tavat hia thithö ; hu Ethana at Ezera, me Heman, me Kalekol, me Dada, je laku Mahola ; ke e lung hnyi ta je hnyei

hia igigilö. 32 Ke e ame ha ta je vejec a theri thauzan : ke haba anyin je khumöng, khaca thauzan me faiv. 33 Ke e ame ha bongon je üö hwân ge arasi hnyi Lebanona ke ne o but ge hisop ame kü hnyi hna up veto : ke e ame ha minya ge je meno ae gan, me je meno ame gâ me je meno ame iyâü, me ta je wâ. 34 Ke ame o tavat ühedrin hnyi je hnyei hia he ka löng metâi Solomona, ünyi ge je than hia eang hmele-drany adre me löng ge anyin metâ.

## HNYIMAKAN 5.

**K**E haba Hirama thaniny Turo ame kunâ lathnyabainy kö Solomona ; anyin a e ame löng a g' adre hú me me than hwaban kamen : anyin a Hirama ame labö hnyokö Davita. 2 Ke Solomona ame ükhünöng kö Hirama, me ha, ka habe, 3 E khanö u a e ca khanö cica Davita he ka bi uma hobi kâu iö Iehova Khongon can je vat igigilö, ke ne o but Iehova ame ip ödra hmelen li hnyeücan. 4 Ke walang ang Iehova Khonguk ame omenö nya igigilö ; e ba iwahnaihmiöny, ke ba ke ünyi ae kong ame kü. 5 Ke wâ bi, oge me ünyküme bi nya he ka bi uma hobi kâu iö Iehova Khonguk, helâ me Iehova ame ha kö cica Davita, ka habe, Haba nokom oge me he ka bi uma hobi kâu iök. 6 Ke walang ang u me he ka huna he ka si arasi hnyi Lebanona hobi könya ; ke ame he lakeik ka tha ödrin bi me lakeim ; ke oge me he ka ham köu hwaban lakem hoton hnâm hna ha : anyin ae khanö u ae ba at gahmun ae khana he ka si utö helâ me at Sidona. 7 Ke a löng ut Hirama hofuc ho Solomona, me e ame senyin gan hmâ, me ha, ka habe, Ole kö Iehova hnyi bong ang, at ame ham kö Davita nokon ae metâ he ka musö hnyei eling ae gan. 8 Me haba Hirama ame ükhünöng kö Solomona me ha, ka habe, Oge me löng ut uthumetu u je hunâ könya : me oge me he ka änyâ hia wem, ge ta je utö arasi, me ta je utö kop. 9 Ke hamen lathnyabaik he ka lelö je üö ka hnyi köiö üheny Lebanona : me oge me he ka übukhâlâköuâ je üö he ka häiâ tilâ hnyi köiö ka hnyi dok u me he ka kü könya, ke adre me he ka thang ut eling, me u me he ka kap : ke u me he ka änyâ wek he ka ham jeü hcbi kâu anyik lap. 10 Me Hirama ame ham kö Solomona je utö arasi me je utö köp e ame weny. 11 Ke Solomona bi ame ham kö Hirama

## I. JE THAN 6.

je hwit a twente thauzan je tulut hnân han hobi kâu anyin lap, me je tulutiny wakaco adre kokot a twente: ame ham helâe Solomona kö Hirama hnyi ke huna me ke huna. 12 Ke Iehova ame ham kö Solomona metâ helâ me hnen hna ha bânâ kâu; ke Solomona me Hirama ödru me laba úsoköu; ke ödru me úhinhinköu.

13 Ke Solomona than ame úca tavat úheny Isaraela hia; ke haba hna húce at, me ödrin thöte thauzan tavat. 14 Ke e ame kun' ödrin Lebanona ai, ödrin ten thauzan hnyi tehi: khaca tehidrin hnyi Lebanona, ke lo li tehidrin hnyi hnyabadrin: ke hanymö Adonirama hon tavat adre úca. 15 Ke ödrin sevente thauzan tavat atö Solomona tavat hije hok, ke eite thauzan tavat si utö hnyi je bucen; 16 ca ha bi je homakan adre tuö huliwa anyi Solomona, ödrin theri thauzan ke theri haded tavat musö tavat adre me bi huliwa. 17 Ke haba than ame úkhúnöng he ka hom je veto ae gan hmâ, je veto ae ti únyi hnathu, hnân he ka ip taben uma ge je veto adre tretrao. 18 Ke ame huliwan hnen tavat up uma atö Solomona, me tavat up uma atö Hirama, me tavat Gebali, me penapena je utö me je veto hnân up uma.

### HNHYIMAKAN 6.

**K**E hnyi huna a foa haded ke eite wale ame he but hnyin lakon Isaraela únyi hnyi hnyeí Aigupito, hnyi huna a vakiny musi anyi Solomona hnyi Isaraela, hnyi tehi Zif, wale tehi a loiny, me e ame ibi hwân op uma umö Iehova. 2 Ke haba uma ame op Solomona than hobi kö Iehova, sikste je kubit ibeúen, ke twente úlauen, ke thöte kubit ibeúen göranyai. 3 Ke haba poretiko cicö dok ae kap hnyi uma, twente kubit ibeúen hoton úlauen uma; ke ten je kubit úlauen hnyi hnyimakan uma. 4 Ke e ame ányâ je mamalama hobi kâu uma me pewânâ hmâ. 5 Ke e ame ányâ hnyi hnyeige uma je deö hnyeúle igigilö, hnyi uma, me dok ae kap hmönyin: ke e ame ányâ je hnyeule igigilö. 6 Haba je deö hnyeule eú hmelen, faiv kubit úlauen, ke je deö hnyeule hnyi wanben, siks kubit úlauen, ke haba kuniny, seven kubit ulauen: anyin a e ame op úhnyúkongo me me hu je deö taben hnyi hna up veten uma igigilö hnyöu, ke adre me ca ohmâ je wangöningön eú hnyin je hna up veten uma. 7 Ke haba uma adre me op ge je veto adre penapena

hnyi kic adre me hom únyi hnyin: ke adre me ca löng hama, me gö, me ke fao hnyi uma ödra ka tiga op. 8 Haba hwanumen je hnyeule eú wanben, me hnyi ke keihen metân uma: ke adre me ölö wali ka hnyi je hnyeule eú wanben, ke adre me ölö úheny ang wale hnyi wanben ka hnyi kuniny. 9 Waleling e ame op uma ge je esö arasi. 10 Ke e ame op je deö hnyeule hnyi baten uma hia, úsa faiv kubit ibeúen göranyai, k' ame bi taben je hnyeule ge utö arasi.

11 Ke ame o but hofuc ko Iehova kö Solomona, ame ha, ka habe, 12 Haba bongon uma ang u je op, me u je ne he ka vheno anyik je hnanyibu, me ányâ hnök je hna owisa, me tuö hnök je hna húna hia he ka vheno e; awe, oge me he ka ohmâ köu hok hofuc, waleji oge me ha kö Davita a kâmâm. 13 Ke oge me he ka laba unyin lakon Isaraela, ke oge me ca he ka hna degecâ lakeik a at Isaraela.

14 Me haba Solomona ame op uma, me umo e. 15 Ke e ame op je hnyeige uma eiö hnyin ge je esö arasi; hwân eú hnyikânâ ke ne o thö ethö, e ame tube eiö hnyin ge utö: ke e ame bi deikiny uma ge je esö köp. 16 Ke e ame bi haginy eiö hnyin uma a twente kubit ge je esö arasi, hwân eú hnyikânâi ke ne o thö ethö: wale e ame otílâ e eiö hnyin me hnân umen hofuc, wale hnân dok ae kap hmönyin. 17 Ke haba uma wale uma kap hnyi hnyimakan umen hofuc, me, fâte kubit ibeúen. 18 Ke e hu arasi eiö hnyin uma adre kave je ovejien hnyin, me je vongon úö ae susu, arasi hia, e ba veto ae manen bi. 19 Ke e ame penapena umen hofuc eiö hnyin hnyi wanben uma, m' adre me he ka ip eling tangen úhinhinköu anyi Iehova. 20 Ke haba umen hofuc me twente je kubit ibeúen, ke twente je kubit úlauen, ke twente je kubit ibeúen göranyai; ke ame tube ge gol ae so, me tube taben hut ge arasi. 21 Haba Solomona ame tube eiö hnyin uma ge gol ae so: ke e ame lelö je cein gol hnyi hnyimakan umen hofuc; me tube e ge gol. 22 Ke e ame tube hia uma ge gol ke ne o but ame um do uma: ke e ame tube hia taben hut hnyi umen hofuc ge gol. 23 Ke e ame ányâ hnyi hnyin umen hofuc li kerubi utö elaiö úsa ten kubit ibeúödru göranyai. 24 Ke faiv kubit ke labenyin ke kerubi, ke faiv kubit ke labenyin ke kerubi: ten je kubit hwân hnyi obiny ke labenyin ke ne o but hnyi obiny ke labenyin.

## I. JE THAN 7.

25 Ke ten je kubit ke kerubi : khaca tulut me khaca bongon li kerubi. 26 Ten kubit ibeüen göranyai ke kerubi, ke helâe minya ke kerubi. 27 Ke e ame ip li kerubi hnyi hnyin uma eiö hnyin : ke ame lau li labenyin li kerubi, me ame kâlâ hnyeige uma labenyin ke at, ke ame kâlâ ke hnyeige uma hnen labenyin ke kerubi ; ke ame ûginö ke li labenyidru wanben uma. 28 Ke e ame tube li kerubi ge gol. 29 Ke e ame kave je hnyeige uma hia igigilö ge je kerubi adre kave, me je üö pama, me je vongon ae susu, eiö me eü. 30 Ke e ame ave uma ge gol eiö me eü. 31 Ke e ame tibet li hlinginy üö elaiö hnân hwanumen umen hofuc : haba hlanyn me li uthwanuma úsa ke keihen a thabúnginy hnyeige uma. 32 Ke haba li hlinginy, utö elaiö ; ke e ame kave hnyin je huatheati kerubi, me je üö pama, me je vongon ae susu, me tube ge gol, ke e ame khavâ ge gol je kerubi me je üö pama. 33 Ke helâe minya e ame ânyâ hnân hwanumen uma li uthwanuma elaiö úsa ke keihen a vakiny hnyeige uma ; 34 ke utö köp li hlinginy ; haba li hlinginy ke kwana adre iounyâ, ke li hlinginy ke hwanuma adre iounyâ minya. 35 Ke e ame kave hon je kerubi, me je üö pama, me je vongon ae susu, me e ame tube ge gol adre okhavâ hon hna kave. 36 Ke e ame ânyâ hnyeule hnyi hnyin ge kun ta deö veto adre tetrao, me ke deö venyâ a arasi. 37 Hnyi hunâ a vakiny hnyi tehi Zif adre bi taben uma umö Iehova. 38 Ke hnyi hunâ a eleveniny hnyi tehi Bul, wale tehi a eitiny ame um dö uma me je ke keihen e hia hoton je bongon hia. Me e ame ânyâ hnyi seven je hunâ.

### HNYIMAKAN 7.

**K**E haba Solomona ame otilâ umen uma bi hnyi je hunâ a thötin, me ame um hia thö umen uma. 2 Anyin e ame ânyâ uma úöiny Lebanona ; khaca haded kubit ibeüen e, ke fifte kubit úlauen ke thöte kubit ibeüen göranyai, k' ame bi taben hon vak ta gaöutö arasi a je hmolom, ke je venyâ arasi hon je hmolom. 3 Ke adre bi arasi hon je venyâ ae hon je hmolom a fâte faiv ; a fiftin je gaö. 4 Ke kun ta deö mamalama, khaca mamalama cicö ke mamalama, a kun ta dö. 5 Ke haba hwanuma me uthwanuma, me khaca tulutiny baten a vak : ke ke mamalama cicö ke mamalama a kun ta dö. 6 Ke e ame ânyâ poretiko a

je hmolom ; haba ibeüen e, me, fifte kubit, ke thöte kubit úlauen ; ke e hu poretiko hnyi hnyimakan ; ke je hmolom me je venyâ ae gan cicö e. 7 Ke e ame ânyâ poretiko hobi kâu theron me me owisa hon, wale poretikoiny hna owisa ; ke adre me khavâ e ge arasi hwân eü hnyikânâ ke ne o thö ethö. 8 Ke haba umen uma he ka laba hnyin, me wale hnyeule hnyin poretiko, a khaca thibi hna huliwan. Ke e ame bi uma umen hlu nöku Farao, (at a hom Solomona me âiân,) helâ me poretiko eling. 9 Haba je vetoiny hia, me, gan hwaban, adre tetrao hoton tulut, k' adre gilö ge je gili, eü me eiö, hwân hnyi taben ke ne o but hnyi je vetö ethö, a helâe bala ke ne o but hnyi hnyeule ae gan. 10 Ke haba taben, me je veto ae gan hwaban, a je veto ae gan, ke eit kubit je veto. 11 Ke je veto ae gan hwaban minya ethö, a je veto adre me tetrao, hoton tulut, me je arasi. 12 Ke haba hnyeule ae gan igigilö, me kun ta deö veto adre tetrao, ke khaca deö venyâ arasi ; helâ me hnyeule eiö hnyin uma umö Iehova, me poretikoiny uma.

13 Ke haba Solomona than ame úkhü-nöng he ka hum Hirama úheny Turo. 14 E nokon safac hanen tribu Nafatali, ke at Turo kamen, at ame huliwan bras : e unöngöt ge metâ, me wâhmakhmeto, me wâ únykúme, he ka ânyâ ta je huliwa bras hia. Me e ame he kö Solomona than, me ânyâ anyin ta je huliwa hia. 15 Anyin a e ame ânyâ li hmolom bras, úsa eitiny je kubit ibeüen göranyai, ke úsa twelv kubit tulutiny igigilö, ke at me ke at. 16 Ke e ame ânyâ li ovejien bras adre oköiâ hnân tot ethö hon li ban li hmolom : ke faiv kubit ibeüen göranyai ke ovejien, ke faiv kubit ibeüen göranyai ke ovejien. 17 Ke e ame ânyâ je boert, me je únyi adre wâdrâ kâu helâ me cen, hobi kâu li ovejien wale othö hon ban li hmolom ; seven hobi kâu ke ovejien, ke seven hobi kâu ke ovejien. 18 Ke e ame ânyâ li hmolom ; ke e hu lo li gaö igigilö hon ke boert he ka oiyongâ li ovejien wale ethö hon li ban li hmolom, ke e ame ânyâ helâe hobi kâu ke ovejien. 19 Ke haba li ovejien wale hon ban li hmolominy poretiko, me e hu hna huliwan helâ me obedila, foa je kubit. 20 Ke e hu li ovejien minya ethö hon li hmolom, hakekeny ka hnyi dok a ganiny baten boert : ke haba je wan rimona me tu haded, adre wâdrâ igigilö hon ke ovejien. 21 Ke e ame otilâ li hmolom hnyi poretikoiny

## I. JE THAN 7.

uma kap; ke e ame otilá hmolom hnyi metá me hwenyi ien Jakina: ke e ame otilá ke hmolom hnyi me, me hwenyi ien Boaza. 22 Ke haba ethö hon ban li hmolom e hu hna huliwan helá me obedila: ke adre umo je huliwainy li hmolom eling. 23 Ke e ame ányá taben köiö adre oköiá, ten kubit hnyi ke baten ka hnyi ke baten, me op wathelaba igigilö, ke faiv kubit ibeüen göranyai; ke haba tulutiny igigilö thöte kubit. 24 Ke e hu je ovejien igigilö hmelen baten e, úsa ten hnyi kubit, ame igigilö taben köiö igigilö: adre tha oköiá li deö ovejien hnyi úen adre oköiá taben. 25 Ke adre otabá e hon je bolok a twelv, kun ame hnyimakan ka hnyi hwadrö, ke kun ame hnyimakan jio, ke kun ame hnyimakan ka hnyi hwaiöu, ke kun ame hnyimakan deiö: ke ethö hon e taben köiö, ke ame iobinyköu eü hnyin. 26 Ke khaca hnyam úhakiny; ke adre ányá baten helá me baten utkaia, helá me vongon obedila: lo li thauzan je bath tulutiny. 27 Ke e ame ányá je taben a ten ge bras; foa kubit ibeüen ke taben me ke taben, me foa kubit úlauen, ke kun ta kubit ibeüen göranyai. 28 Ke walang hwakecin hna huliwan je taben: e hu je hwenöniny; ke wanben je baten je hwenöniny: 29 ke haba hnyi je hwenöniny wanben je baten, je liona, me bolok, me kerubi; ke ethö hon je baten e hu je taben: ke eü hmelen je liona me bolok je sa vongon úö adre uhno. 30 Ke haba je taben hia, úsa vak je wil bras me li venyainy wil bras: ke eü hmelen je can a vak e ve hu je ciny: eü hmelen taben soú je ciny adre oköia, ve cicö je sa vongon uö adre uhno. 31 Ke haba hnyimen hnyin ovejien ke ethö, me, khaca kubit; ke wathelaba hnyimen hoton hna huliwan taben, khaca kubit me haf: ke e bi hnyi hon hnyimen minya je hna kave mecá, ke khaca tulutiny vak ta hwenoniny je baten, ke ca wathelaba bi. 32 Ke e hu je wil a vak, eü hmelen je baten, ke e bi hnyi taben je venyáiny je wil: ke haba ibeüen vak ta wil, me, úsa khaca kubit me haf. 33 Ke haba hna huliwan vak ta wil, me helá me wiliny kariota: ke adre oköiá hia, a je venyáiny wil, me otruinny, me je dáiny, me je taben venyáiny je wil. 34 Ke úsa vak ta ci hnyi vak ta baten je taben hia: haba je ciny me hanen je taben. 35 Ke haba ethö hnyi ban taben igigilö únyi ae wathelaba haf kubit göranyai: ke e hnyi hon ban taben je ciny me je baten ke hanen e.

36 Ke e ame kave hon hnyimakan je ciny, me hon je baten, ta je kerubi, me liona, me pama, helá me ve úcú, ke je sa vongon úö igigilö. 37 Heláe e ame ányá je taben a ten: adre ve oköiá hia a khaca tulut, ke khaca bongon. 38 Ke e ame ányá je taben soú bras a ten: haba úganiny taben soú a khaca, me, fáte je bath: úsa vak kubit je taben soú hia: ke úsa khaca taben soú hon je taben a ten. 39 Ke e ame ip je taben a thabúng hnyi ke keihen metán uma, ke ke thabúng hnyi ke keihen meny uma: ke e ame ip taben köiö hnyi ke keihen metán uma, deiö, ka hnyi hwaiöu. 40 Ke haba Hirama ame ányá je taben soú, me je soi, me je kaia. Ke Hirama ame umo ányá je huliwa hia thithö wale e ame ányá hobi kö Solomona than hnán hobi káu uma umö Iehova: 41 a li hmolom, me li únyi a khibiny ovejeien walethö hon ban li hmolom; me li boert hnán tube li dok a khibiny ovejien ethö hon li hmolom; 42 me je wan rimona a foa haded hobi káu li boert; lo li deö wan rimona hobi káu li ve boert, hnán tube li dok a khibiny ovejien walethö hon li hmolom; 43 me je taben a ten, me je taben soú a ten hon je taben; 44 ke khaca taben köiö, me je bolok a twelv hmelen taben köiö; 45 me je öt, me je soi, me je kaia: kaba je únyi hia eling wale a ányá Hirama hobi kö Solomona than hnán hobi káu uma umö Iehova, a bras adre obadröngöcá. 46 Haba than ame oköiá e hnyi dok ae tha hon hnyi Joridano, hnyi káná ae keci, wanben Sukotha me Zaretana. 47 Ke Solomona ame hna ta je únyi hia, me ca tuluto bi, anyin ae ti se hia hmönyin: ke e ca khana he ka elám ihmakiny je bras. 48 Ke Solomona ame ányá je omjehen hia uma umö Iehova: wale taben hut a gol, me laulau gol taben areto hnán omanená; 49 me je taben lamepa gol ae so, thabúng hnyi ke keihen metá, ke ke thabúng hnyi ke keihen me, cicö umen hofuc; me je vongon, me je lamepa, me je akofi gol; 50 me je utkaia, me je uthesiún, me je kaia me je spun, me je taben meic, gol ae so; me je hinge wale hobi káu je hlingin uma eiö hnyin uma, wale dok ae ti kap, me hobi káu je hlingin uma kap wale ke keihen ae gan. 51 Ke ame um dö je huliwa wale ame ányá Solomona than hnyi uma umö Iehova. Haba Solomona ame odilá thö je únyi a okabá Davita a kamen, wale sileva, me gol, me je kaia, e ame tha ip me omjéúny uma umö Iehova.

## I. JE THAN 8.

### HNYIMAKAN 8.

**H**ABA Solomona ame úkhacaköná wahingatiny Isaraela, me je ban je tribu hia, je tuhan je lap anyin je kamen laku Isaraela, kö Solomona than hnyi Jerusalema, he ka hom tangen úhinhinköu anyi Iehova úheny hnyi taun anyi Davita, wale Ziona. 2 Ke ame úkhacaköu kö Solomona than tavat Isaraela hia hnyi bijeú, hnyi tehi Ethanima, wale tehi a seveniny. 3 Ke ame o hia but wahingatiny Isaraela, ke je at bihut ödrin e kap tang. 4 Ke ödrin e hom tang tangö Iehova, me uma mano hnân úkhacaköu, me ta je únyi hia thithö ae kap hnyi hnyin uma; haba tavat bihut me at Levi ödrin e hom ta je únyi eling. 5 Ke haba Solomona me úkhacaköu hia anyi Isaraela, tavat adre me úkhacaköu kâu, ödrin e tha e më hnyi hnyimakan tang, me hudo je mamoe me bolok, a ca hnân bi aú me ha úseiny anyin ae se hia. 6 Ke haba tavat bihut ödrin e odilâ tangen úhinhinyköu anyi Iehova ka hnyi hnen, ka hnyin umen hofuc hnyin uma kap, wale dok ae ti kap, eú hmelen je labenyin li kerubi. 7 Anyin ame lau li kerubi li labenyidru hon tang, me haba li kerubi ödrü me tube tang me li venyâiny. 8 Ke ame beú hmâ li venyâ me me manen li hnyiban li venyâ hnyi dok ae kap cicö umen hofuc, ke ca manen bi eú: ke ka ödrü e ke ne o but hnyi bong ang. 9 E ba únyi hnyi hnyin tang, ke li veto thibi ae lau, waleji ame ip hnyin Mose bnyi Horeba, hnyi úen Iehova ame úhinhinyköu me lakon Isaraela, waleji a úhedrin hnyi hnyei Aigupito. 10 Ke ame didrut tavat bihut úhedrin hnyi dok ae kap, me ame unöngötö uma umö Iehova ge úlá, 11 me me ca khana hnyat bihut he ka tot me huliwa can úlá: anyin ame unöngötö uma umö Iehova ge hmanenangi Iehova.

12 Ke haba Solomona ame fuc, me ha, ka habe, A hia but ha Jehova a e ame he ka laba hnyi menekholom ae gan. 13 Awe, oge me hia but otílâ uma me hnyabam, wale dok hobi köu bi, m' u me he ka laba hnyin nyiele balua. 14 Me haba than ame hwiö me hahnahicâ ukhacaköu hia anyin Isaraela: ke ame todrö úkhacaköu anyin Isaraela hia. 15 Ke haingen, ka habe, Ole kö Iehova, Khongu Isaraela, at ame ha ge hnyimen kö cica Davita, me

ohwâdá ge hnyamen, ka habe, 16 Hwân hnyi bong waleji oge me hom lakeik a at Isaraela úheny Aigupito, me oge me ca úca ke taun únyi hnyi je tribu hia anyin at Isaraela he ka op uma, m' adre me ip eling iök; ke oge me úcö Davita he ka musi hon lakeik a Isaraela. 17 Ke eú hnyi hnyeku cica Davita he ka op uma hnân hobi kâu iö Iehova, Khongu Isaraela. 18 Ke Iehova ame ha kö cica Davita, ka habe, Haba hnâm hna hnyok he ka op uma hobi kâu iök, me so hnâm hna hnyok: 19 ke so bi u me ca he ka op uma; ke haba nokom ame he ka o gam, me hamen bi he ka op uma hobi kâu iök. 20 Ke Iehova ame ohwâdá hwân hofuc e ame ha; anyin a oge me o but hwabö cica Davita, me tabâ theron anyi Isaraela, helâ me hofuc ho Iehova waleji e ame ha bánâ, me oge me hia but op uma hobi kâu iö Iehova Khongu Isaraela. 21 Ke oge me hia but bi hnen eling tang, adre hitangen úhinhinyköu anyi Iehova, waleji e ame ányâ me lakamöta, k' ame hum ödrin únyi hnyi hnyei Aigupito.

22 Haba Solomona ame tot cicö taben hut anyi Iehova hnyi hnyimakan úkhacaköu hia anyin Isaraela, me hai göranyai li hnyamen: 23 ke haingen, ka habe, Iehova lö, Khongu Isaraela, e ba ke khong ae úcú möu, ethö hnyi drany, me eang hmeledrany; at ame tuö úhinhinyköu me ibetengiö ka je laathnyabaem, tavat adre me vheno hnyi hnyimákâm me hnyekudrin ae bekhöt: 24 at ame tuö hobi kâu athnyabaem, a cica Davita, waleji u je fuc kâu: eke, u je fuc ge hnyimâm, me u je hia but ohwâdá ge hnyamâm, helâ me hnyi bong ang. 25 Ke walang ang, Jehova lö, Khongu Isaraela, tuö thö hobi kâu athnyabaem a cica Davita waleji u je ha kâu, ka habe, Ame ca he ka ba hwabâm hnyi hnyimakök hnân tabö theron anyi Isaraela; wale thibi e ame ne he lakom ka tuö dedrin je gethen, he ka vheno hnyi hnyimakök, helâ me hnâm hna vheno hnyi hnyimakök. 26 Ke walang ang, Khongu Isaraela lö, ö u ohnatho hwâm hofuc, waleji u je ba ka athnyabaem a cica Davita. 27 Ke hawa, e hnathu ame he Khong ka laba eang hmeledrany? wá ju, e ca úcú u drany me dranyin ta je drany; ke e ti ca úcú u uma eang o ge op 28 Ke so bi Iehova Khonguk lö, ö u löng hic hijin athnyabaem, me anyin sumat, he ka löng hwan hwatenge me hic wale ame hic athnyabaem hnyi hnyimákâm hnyi bong

## I. JE THAN 8.

ang : 29 me me bwele, li emakâm ka hnyi uma eang hnyi hnyinghet me lany, wale ka hnyi dok u je ha gan, ka habe, Ame he ka hnen e iök : he ka löng hic hijin athnyabaem hnyi dok ang. 30 Ke löng ju sumat anyin athnyabaem, me lakem a Isaraela, ödrin ka he ka hic hnyi dok ang : eke, löng ju u e hnyi drany wale hnyabam ; ke u ka löng ut, ö u thang ut. 31 Ame ne ke at ame monu ka ke at, me adre me ip khöbi kâu he ka kunâ e he ka khemanyin, ke e ame o me khemanyin hnyi hnyimakan ânyâm taben hut hnyi uma eang : 32 awe, löng ju u ethö hnyi drany, me ânyâ thö, me owisa ka lathnyabaem, me bi hwaban at ae kong, me ip hon ban hwakecin bi ; me haiwisa at ae wisa he ka ham kâu hoton hwakecin ae wisa. 33 Adre me ne he ka kot lakem a Isaraela hnyi hnyimakan iwahnaihmiöny, anyin a ödrin e ânyâ hulö köu ; ke ödrin e ne he ka hmetu köu, me haimemenâ iâm, me hic me sumat köu hnyi uma ang : 34 awe, u na löng ju hnyi drany, me hna hulö anyin lakem a Isaraela, me ohmetu ödrin ju ka hnyi hnyei u je ham ka lakamödrin. 35 Adre me ne he ka hlöng drany, me ba we, can adre me ânyâ hulö köu ; ke ödrin ka hic köu hnyi dok ang, me haimemenâ iâm, me hwiö únyi hnyi anyidrin monu, u ka oveci ödrin : 36 awe, u na löng ju hnyi drany, me hna monu anyin lathnyabaem, me lakem a Isaraela, u ka he ka n' ödrin ge gethen ae so he ka vhenö gadrin ; me ham we ka hnyi hon em hnyei, waleji u je ham ka lakem me me idrin. 37 Ame ne hu hmiâ hnyi hnyei, ame ne mok ae cap, ame ne ut me löhau me wahamon me ihmâ ; ame ne theling ödrin je iwahnaihmiöny mödrin hnyi hnyeiny anyidrin je taun ; ame ne hu vec, ame ne hu mok ; 38 haba je hic hia me hna sumat hia hnen ke at, ame ne lakem a Isaraela hia, a tavat adre me ve wâhmakhmetoâ vecin je hnyekudrin, me hai li hnyamödrin ka hnyi uma ang : 39 awe, u na löng ju hnyi drany, a hnyabam, me hna monu bi, me ânyâ, me ham ka tavat hia hoton dedrin je gethen, ke u je wâhmakhmetoâ hnyekudrin ; (anyin a hake u thibi at ame wâhmakhmetoâ hnyekon lakon at hia ;) 40 m' ödrin e he ka outö u hnyi ta je bong hia thithö bongon anyidrin möt hon kânâ, wale hnyei u je ham ka lakamöhmun. 41 Ke haba atkanyua a ca hanen bi lakem a Isaraela, ke e ka o úheny hnyi hnyei ae sâkâú ge iâm ; 42 (anyin a adre me he ka löng ge iâm ae

gan, me hnyamâm ae hwege, me benyâm adre hai ;) ke e ka o me hic hnyi uma eang ; 43 awe, u na löng ju hnyi drany, a hnyabam, me ânyâ helâ me ta je únyi hia ame hawo u hnyin atkanyua ; me me khana iâm tavat hia eang hmeledrany, he ka outö u, helâ me hna ânyâ hnen lakem a tavat Isaraela, me me khan' ödra a g' adre hwenyi ien uma eang wale oge ânyâ, me iâm bi. 44 Ame ne he lakem he ka vat me je iwahnaihmiöny mödrin, hnyi hnâm hna kun' ödrin kâu, ke ödrin e he ka hic kö Iehova cicö taun wale u je úca, me uma wale oge ânyâ hobi kâu iâm : 45 awe, u na löng ju hnyi drany hijidrin hic, me hnödrin hna sumat, me owisa ködrin. 46 Ödrin e ne ânyâ hulö köu, (anyin ae ba at ame ca ânyâ hwakecin ae kong ;) ke u je hmönyâm ködrin, me hn' ödrin ka je iwahnaihmiöny, m' adre me hum ödrin ka hwenbâ ka hnyi hnyeiny je iwahnaihmiöny, ame ne dok ae sâkâú, ame ne hakekeny ; 47 ke so bi ödrin e ne únykúme hnyi hnyekudrin hnyi hnyei adre hom hwenb' ödrin hnyin, me hwiö thö, me khöú köu hnyi hnyei iny tavat adre me hwenb' ödrin, me ha, ka habe, Öhmun e ânyâ hwakecin ae kong, me hwali, me monu ; 48 ke ödrin e ne hmetu köu ge hnyekudrin ae bekhöt me hanudrin ae bekhöt hnyi hnyei iny je iwahnaihmiöny mödrin, tavat adre me hwenb' ödrin, me hic köu cicö idrin hnyei, wale u je ham ka lakamödrin, taun u je úca, me uma wale oge ânyâ hobi kâu iâm : 49 awe, u na löng ju hnyi drany, a hnyabam, hijidrin hic me anyidrin sumat, me owisa ködrin ; 50 me hna but lakem wale ödrin e ânyâ hwakecin ae kong, me hnödrin je hna hanyâúú hia ânyâm hnanyibu ; me okúâ thö betenge gadrin únyi ge tavat adre me hwenb' ödrin, mödrin e he ka betenge gadrin : 51 anyin a lakem me em hnyei ödrin, waleji u je hom úheny Aigupito, únyi hnyi meic hnân leú fao : 52 me u me he ka wâ sumat anyin athnyabaem, me sumat anyin lakem a Isaraela, he ka ling ödrin hnyi ta je úen hia thithö ödrin e he ka hawo u hnyin. 53 Anyin a u, Khong lö a Than, u je úc' ödrin hnân em hnyei únyi hnyi ta je hnyei hia thithö eang hmeledrany, helâ me hnâm hna ha a deny lakem athnyabaem, hnyi hnâm hna hom lakamöhmun úheny Aigupito.

54 Ka um dö Solomona hijöta je hic eling me sumat kö Iehova, me e ame todrö úheny hnyi taben hut anyi Iehova, úheny

hnyi hna cibouca me hna hai li hnyamen hnyi drany ai. 55 Ke e ame tot me hahnahicâ úkhacaköu anyin Isaraela hia ge hwan ae gan, haingen, ka habe, 56 Ole kö Iehova at ame omenâ lakeiny a at Isaraela, helâ me hnen hna ha bánâ hia : e ca haú bi ke hofuc a khaca hnyi hwan ta je hofuc hia ae so, waleji e ame ha a deny Mose athnyabainy. 57 E na tha Iehova ju Khonguta möta helâ me hnen hna tha e me lakamöta : e na ca he ju ka hia gata me hna degeci öta : 58 me me he ka wia je hnyekuta kâu, he ka vheno deny ta je gethen hia, me tuö hnen je hna hûna, me anyin je hnanyibu, me hnen je hna owisa, waleji e ame hûna ka lakamöta. 59 E na hakekenyâ ju Iehova Khonguta hok ta je hofuc ang, wale oge me sumâtâ hnyi hnyimakö Iehova, hnyi lany me lit, me me he ka owisa ka athnyabainy, me lakeiny a Isaraela, únyi ae úcú hnyi ke bong me ke bong : 60 me me khana ta je hnyei hia thithö eang hmeledrany a Iehova thibi Khong; ke ba minya ju. 61 E so e bekhöt je hnyekubun unyi Iehova Khonguta, he ka vheno anyin je hnanyibu, me tuö hnen je hna hûna, helâ me hnyi bong ang. 62 Ke haba than me at Isaraela hia a tha ödra mē, adre me hudo je hut hnyi hnyimakö Iehova. 63 Ke Solomona ame hudo me je hudiny ole, wale e ame hudo kö Iehova, me twente tu thauzan je bolok, ke wan haded ke twente thauzan je mamoe. Me haba than me lakon Isaraela hia adre me okabâ uma umö Iehova. 64 Ke hnyi bong eling than ame okabâ wanben hnyeule ae hnyi hnyimakan uma umö Iehova ; anyin a e ame hudo eling hudiny leú, me hudiny han, me pipikhenyainy hudiny ole : anyin ae úhnyúkong taben hut a bras hnyi hnyimakö Iehova, ke ca úcú bi hobi kâu hudiny leú, me hudiny han, me pipikhenyainy hudiny ole. 65 Me Solomona ame ânyâ bjeú hnyi úen eling, a tha e me at Isaraela hia, e gan hmâ úkhacaköu, hwân hnyi gethen úheny Hamath ke ne o but hnyi wagewe Aigupito, hnyi hnyimakö Iehova Khonguta, seven ta bong ke seven minya ta bong, wale fotin je bong. 66 Ke haba hnyi bong a eitiny e ame kunâ tavat, me adre me hahnahicâ than me ve he ka hnyi umödra je uma mano me senyin me hnyok ame hobâ, can ta je so hia ame ânyâ Iehova kö Davita athnyabainy, me Isaraela a lakeiny.

## HNYIMAKAN 9.

**K**A hia but Solomona umo uma umö Iehova, me uma umen than, me ta je we Solomona hia e ame weny he ka ânyâ, 2 me Iehova ame hmetu kö Solomona helâ me hnen hna manen kâu hnyi Gibeona. 3 Ke Iehova ame ha kâu, ka habe, Oge hia but löng hijâm hic me ânyâm sumat hnyi hnyimakök : oge hia but okabâ uma ang, wale u je ânyâ huân ip iök hnyin nyiele balua ; ke ame he ka e ling li emakök me hnyekuk hnyi je bong hia thibut. 4 Ke haba u, u je ne he ka he hnyi hnyimakök, helâ me hnö Davita a kâmâm hna he me hnyekon ae bekhöt me wisa, he ka ânyâ ta je únyi hia oge hûna köu, me tuö anyik je hnanyibu me hnök je hna owisa ; 5 me oge me he ka ohmâ theroniny dokhom dökhu hon Isaraela nyiele balua ; helâ me hnök hna ha bánâ kö Davita a kâmâm, ka habe, Ame ca he ka ba hwabâm hon theroni Isaraela. 6 Ke öbun e ne hmetu gak, ame ne lakom bi, me ca tuö bi hnök je hna hûna me anyik je hnanyibu, wale oge hia but ip hnyi hnyimaköbun, he ka he me bi athnyabainy je khong baú, me khudrung ködrin : 7 awe, oge me he ka subâ degeci Isaraela únyi hnyi hnyei wale oge ham ködrin ; ke haba uma ang oge okabâ hobi kâu iök, me oge me he ka degeci únyi hnyi hnyimakök ; ke ame he Isaraela ka tot hnân hofuc vejec me hluma hnyi ta je hnyei hia : 8 ke haba uma eang ae beú göranyai, ame he tavat hia adre me he eú hnyi gethen ka láia, me jú ; ke adre me he ka ha, ka habe, Anyin a ieú Iehova ame ânyâ helâe ka hnyei ang me uma ang ? 9 Ke adre me he ka thu, ka habe, Anyin ödrin e hna degeci Iehova Khongudrin, at ame hom lakamödrin úheny hnyi hnyei Aigupito, ke ödrin e kât ke je khong bi, me khudrung ködrin, me bi athnyaba ködrin : anyin a wale Iehova ame oâ ködrin ta je únyi hia thithö eang ea kong. 10 Ke a um dö je hunai Solomona a twente ka op li uma, wale uma umö Iehova me uma umen than, 11 (haba Hirama than Tuö ame hia but ham kö Solomona je úö arasi, me je úö köp, me gol, helâ me je weny hia) haba Solomona than ame ham kö Hirama twente je taun hnyi Galelaia. 12 Ke Hirama ame he úheny Turo he ka wâ je taun a ham kâu Solomona ; me ca so bi kâu. 13 Me haingen, ka habe, Muma

## I. JE THAN 10.

lö, ie je taun ang u je ham kõnya? Me e ame hwenyi ien je taun, ka habe, hneyi Kabul, ke ne o but hnyi bong ang. 14 Ke Hirama ame kunâ ka than je gol a wan haded ke twente je talan.

15 Ke walang bongon a ga úca at hnö Solomona than he ka op uma umö Iehova, me umen uma bi, me Milo, me hak vetoiny Jerusalema, me Hazora, me Megido, me Gezera. 16 Haba Farao than Aigupito ame hia but he me hügünâ Gezera, me thong ge meic, me hlingâ at Kanana tavat a idrin taun, me ham e hnân bwihlany ka nokon hlu, a öiö Solomona. 17 Me Solomona ame op Gezera, me Bethe-horona eü, 18 me Baalath, me Tamara hnyi hnyebuba, hnyi hneyi, 19 me je taun hia hnân ip omjeü omjehe Solomona, me je taun hnân ip anyin je kariota, me je tauniny tavat tabö hors, me únyi a we Solomona he ka op hnyi Jerusalema hnân weny bi, me Lebanona, me hnyi hneyi hia hnyi dokhon dökhü. 20 Ke haba tavat hia, a je kolon at Amora, me Heth, me Perizi, me Hivi, me Jebusi, wale a ca lakon Isaraela; 21 ke lakon aten hneyi a wan hwabödrin, waleji ae ca khana lakon Isaraela he ka ohia, me haba Solomona ame úca hnyat gadrin he ka ányâ anyin ta je huliwa ke ne o but hnyi bong ang. 22 Ke Solomona ame ca hawâ lakon Isaraela he ka ányâ anyin ta je huliwa: ke ödrin bi tavat vat, me je athnyabainy, me je taben, me je homakan, me tavat musö anyin je kariota, me tavat tabö hors. 23 Haba tavat eling ödrin e musí hon ta je huliwa anyi Solomona, a ödrin faiv haded ke fifte, ke ödrin e musö tavat huliwa anyi Solomona. 24 Ke haba momo nöku Farao ame o úheny hnyi taun anyi Davita ka hnyi umen uma wale adre op hnân hobi kâu; me e ame op Milo. 25 Ke Solomona ame okun hudo je hudiny leü, me je hudiny ole, hnyi ke huna me ke huna, hon taben e ame ányâ hobi kö Iehova, ke e ame leü utö ae bo so hon taben hut ae hnyi hnyimakö Iehova. Ke ame um dö uma.

26 Ke habâ Solomona than ame tibet je hu hnyi Eziona-gebera, ae hakekenyâ Elath, hnyi hobatköiöiny Köiö ae Dra hnyi hneyi Edoma. 27 Ke haba Hirama ame kunâ hon hu ai lathnyabainy a je aten hu, tavat ödrin e wâhmakmeto köiö, he ka tha he me lathnyabai Solomona. 28 Ke ödrin e he Ofira ai, me hok gol úheny e foa haded me twente je talan, me hom kö Solomona than.

## HNYIMAKAN 10.

**K**A löng ut momo than Sheba lung anyi Solomona hnyi iö Iehova, me e ame o but he ka cubec ge je hofuc ae iyong. 2 Ke e ame o but hnyi Jerusalema me bunyen ae se, a je kamela ame hijen je utö ae bo so, me gol ae ti gan, me je veto ae únyi hnathu: k' ame o but kö Solomona, me e ame úhnenamö mä ge ta je únyi eü hnyi hnyekon. 3 Ke Solomona ame omanenâ kâu ta je únyi e ame hnö: e ba únyi a ikhâlâ than a ga ca omanenâ kâu. 4 Ke a hia but momo than Sheba wâ ta je metâ anyi Solomona, me uma e ame op, 5 me jeü hon anyin laulau, me hwakecin úlabainy lathnyabainy, me hwakecin útilen anyin tavat huliwa, me je khaúdrin, me tavat khöp anyin utkaia, me deny gethen ame olö ka hnyi uma umö Iehova; me e ame gâ on ge láiâ. 6 Ke e ame ha ka than, ka habe, E hnathu úthumetu oge löng hnyi ik hneyi ge hnâm hna ányâ, me ányâm metâ. 7 Ke so bi oge ca kap úthumetu ke ne o but oge me o me wâ ge li emakök: ke wâ bi, adre me ca thumetu nya ge hafiny: e beönua ányâm metâ me sot hon úthumetu oge me löng. 8 E hnahic ányâm tavat, e hnahic lathnyabaem ang, wale adre tot bala hnyi hnyimákâm, me löng ányâm metâ. 9 Ole kö Iehova Khongom, at ae weny u, he ka otilö u hon theroni Isaraela: anyin a Iehova ame betenge ka at Isaraela nyiele balua, anyin a wale e ame otilö u ka than, he ka ányâ wisa me únyi ae úcü. 10 Ke e ame ham ka than gol a wan haded ke twente je talan, me je utö ae bo so ae ti gan, me je veto ae únyi hnathu: adre me ca oâ hmetu bi je utö ae bo so ae ti gan helâ me hna ham hnen momo than Sheba kö Solomona than. 11 Ke haba je hu minya hu Hirama ödrin e hom gol úheny Ofera ödrin e hom je úö alemuga ae se hia, me je veto ae únyi hnathu. 12 Ke haba than ame tibet je ci ge je úö alemuga hnyi uma umö Iehova me uma umen than, me hnân je kitara, me je nabeli, hobi kâu tavat khumung: adre ca hom je úö alemuga a helâe, ke adre me ca wâ hmetu bi ke ne o but hnyi bong ang. 13 Ke Solomona ame ham ka momo than Sheba ta je únyi hia ae weny, wale a sumâtâ, ca ha bi ta je únyi a ka ham bi kâu Solomona. Me ame hwiö bi momo me he ka hnyi iny hneyi, a e me lathnyabainy.



## I. JE THAN 11.

14 Ke haba ihmakiny gol adre me oâ kö Solomona hnyi huna a khaca, me, siks haded ke sikste siks je talan gol, 15 ke ca ha bi gol únyi ge tavat úcú, me tavat úcú tot, me je thaniny Arabia, me tavat musö hnyi. 16 Ke Solomona than ame ányâ je uthat ae lau a tu haded, gol adre kokot : ke úsa siks haded je sekel gol hnyi uthat a khaca. 17 Me theri haded je bec gol adre kokot ; ke úsa kun ta mina gol hnyi bec a khaca : me than ame ip ta je únyi e hnyin uma utöiny Lebanona. 18 Ke than ame ányâ theron ae gan, a nyon elefan, me tube ge gol ae ti so. 19 Ke e hu hnân ölö ka hnyi theron siks ta deö hna okca, ke wathelaba hon theron hnyi hoton, ke e hu li ci hnyi li ke keihen dok adre me tabá hnyin theron, ke lo li liona ame tot hnyi li ci. 20 Ke twelv je liona ame tot eling hnyi li ke keihen je deö hna okca a siks : ke ba únyi helâe adre me ányâ hnyi je dökhua hia thithö. 21 Ke haba je kaia hia hnân ic beli Solomona than, me gol, ke haba je kaia hia hnyi uma utöiny Lebanona ; me gol ae so : ke ba kaia sileva ; k' adre me ca önyihnatho sileva hnyi bong bongu Solomona. 22 Anyin ae hu hnyi köiö ta je hu hon than úheny Tasesa, tha e me je hu hu Hirama : ke ame labö khöp ta je huiny Tasesa hnyi je ve obiny ta hnna a kun, k' adre me hok gol, me sileva, me je nyon elefan, me ta je cako, me je pikák. 23 Ke haba Solomona than, me beönua hon ta je than hia eang hmele drany ge omjeté me metâ. 24 Me haba hmele drany hia ame elöm Solomona, he ka löng anyin metâ, wale Khong ame ip eú hnyi hnyekon. 25 Ke adre me ve hom anyidrin je bwihlany, a je kaia sileva, me je kaia gol, me je úkhaú, me je únyi hnân vat, me je utö ae bo so, me je hors, me je miul, adre fátâ hnyi ke huna me ke huna. 26 Ke Solomona ame úkhaçaköuâ je kariota, me tavat tabö hors ; me e hu gan bi wan thauzan ke foa haded je kariota, ke twelv thauzan tavat tabö hors, wale e ame khene ödrin ka hnyi je tauniny kariota, me Jerusalema unyin than. 27 Ke haba than ame osehia sileva hnyi Jerusalema me me helâ me je veto, ke e ame osehia minya je arasi me me helâ me je úö sukamore, wale hnyi je hnyei ae hnyikânâ. 28 Ke haba je hors hale Solomona, me adre hom úheny Aigupito ; ke haba tavat úcú hobi kâu than me ödrin e kap je deö hors, ke deö hors ge ke hwaban. 29 Ke ame o but me he úheny

Aigupito ke kariota hwaban siks haded je sekel sileva, me wan haded ke fifte je sekel hwaban horse ; ke ödrin e hom helâe hobi kâu je thaniny at Heth me Suria.

## HNYIMAKAN 11.

**K**E haba Solomona than ame hnyök ka je momo kanyua ae se hia tha ödrin me momo nöku Faraö, a je momo Moaba, me Amona, me Edoma, me Zidona, me Heth ; 2 únyi hnyi je hnyei waleji a ha Iehova ka lakon Isaraela, ka habe, Ca he öbun ködrin, ke khaca ödrin e ca he ka he köbun : anyin ae hnathu ödrin e he ka wia je hnyekubun he ka hnu hoton je khongudrin : me ame kece hnyeku Solomona ködrin. 3 Ke e hu gan seven haded je áiân, je momo than, ke kun ta haded anyin je momo : ke ame wia thö hnyekon hnen je áiân. 4 Anyin ae ka hingat ut Solomona, haba laáiân ödrin e wia thö hnyekon he ka hnu hoton je khong me monu : ke e ca bekhöt bi hnyekon kö Iehova a Khongon, helâ me hnyeku Davita a kamen. 5 Anyin a Solomona ame hnu hotu Aseira khong momo anyin at Zidona, me Milekoma ae ikiki anyin at Amona. 6 Ke Solomona ame ányâ hwakecin ae kong hnyi hnyimakö Iehova, ke ame ca ti hnu hotu Iehova helâ me Davita a kamen. 7 Haba Solomona ame op dok ae görany hobi kö Kemosa ae ikiki anyi Moab, hnyi bucen ae cicö Jerusalema, me hobi kö Moleka at ae ikiki anyin je laku Amona. 8 Ke e ame ányâ helâe hobi kâu je áiân hia a je atkanyua, ödrin e leú utö ae bo so, me hudo ka je khongudrin.

9 Ke haba Iehova ame hmöyin kö Solomona can hna wia hnyekon ga Iehova, Khongu Isaraela, wale a olo omanenâ e bi kâu, 10 k' ame húna kâu hnyi únyi ang ; a e ame ca he bi ka hnu hoton je khong : ke e ame ca tuö hna húna hnö Iehova kâu. 11 Anyin a wale ame ha Iehova kö Solomona, ka habe, anyin a u je ányâ únyi ang, ke u je ca tuö anyik úhinyköu, me anyik ta je hnanyibu, waleji oge me búna köu, me oge me he ka húgúnâ gam dökhua, me ham ka athnyabaem. 12 Ke so bi oge me ca he ka ányâ e hnyi úâm, ga Davita a kâmâm : ke oge me he ka húgúnâ e hnyi hnyamen nokom. 13 Ke oge me ca he ka húgúnâ hia dökhua ; ke oge me he ka ham khaca tribu ka nokom, ga Davita athnyabaik, me Jerusalema waleji oge me úca.

## I. JE THAN 11.

14 Ke haba Iehova ame okûâ iwahnai-hmiöny kö Solomona, jia Hadada at Edoma: a e mâtrânyin than hnyi Edoma. 15 Haba ehac ke tiga Davita hnyi Edoma, ke ame he Jaob taben vat he ka konâm je hnyat adre kot, ke adre hia but hlingâ obaga hia hnyi Edoma; 16 (k'ame laba eling Joab me at Isaraela hia hnyi siks ta tehi, ke ne o but adre hia but subâ degecâ obaga hia hnyi Edoma;) 17 me haba Hadada ame kec, a tha e me keihen at Edoma lakeiny kamen, me he Aigupito ai; ke tiga ûhnyûkong Hadada. 18 Ke ödrin e todrö ûhedrin Midiana, me he Parana ai: ke ödrin e hom ke je hnyat ûheny Parana he ka tha he mödrin, me ödrin e o Aigupito, kö Farao than Aigupito; me e ame ham kâu uma, me hûna he ka hân, me ha iny. 19 Ke e gan hmâ ibetengiö anyi Farao kö Hadada, he e ame ha âiân a liamekeiny me âiân bi, wale liamekeiny me momo than jia Tapenes. 20 Me haba liamekeiny me Tapenes ame hnokoâ nokon бага jia Genubath, ke haba Tapenes ame hnebaiö e hnyi uma umö Farao: ke Genubath ame laba hnyi uma umö Farao a tha e me laku Farao. 21 Ke a löng ut Hadada hnyi Aigupito a ga tha he Davita ka lakamen, ke a mokcu Joab taben vat, me haba Hadada ama ha kö Farao, ka habe, Ó u hnö nya but m' inye he but ka hnyi ik hnyei. 22 Me haba Farao ame ha kâu, ka habe, Ie ûnyi ae hia gam unyik, m' u me elâm he ka he ka hnyi em hnyei? Ke haingen, ka habe, E ba: ke so bi ö u hnö nya but.

23 Ke haba Khong ame okûâ kâu ke iwahnaihmiöny bi, jia Rezona nöku Eliada, at ame kec ga Hadadeza a tuhan, than Zoba: 24 ke e ame ûkhacakouâ tavat unyin bi, me me taben deö vat, waleji nnyi hnö Davita hna kuc ödrin at Zoba: ke ödrin e he Damaseko ai, me laba eling, me musi hnyi Damaseko. 25 Ke e iwahnaihmiöny me at Isaraela hnyi ta je bong hia bongu Solomona, ca ha bi monu Hadada ame ânyâ: ke e ame hûkotiö Isaraela, me musi hnyi Suria.

26 Ke haba Jeroboama nöku Nebata, at Eferaima ûheny Zereda athnyabai Solomona, ke Zerua ien hinyen, e safac, me e at ame hai hnyamen minya ka than. 27 Ke walang can e ame hai hnyamen ka than: haba Solomona ame op Milo, me okhötâ je dok ae hmouca hnyi taun anyi Davita a kamen. 28 Ke at ae hwege hmönyin Jeroboama:

ke a wâ but Solomona a e hidröu ae ti huliwa, ke e ame otilâ e hon ta je huliwa hia hnyi lap anyi Josefa. 29 Ke haba hnyi ûen eling, me ame he Jeroboama ûheny Jerusalema, me ame ûkhanö mä Ahia perofeta at Silo eü hnyi gethen; ke e ame hia but khavâ ke ûkhaüen ae teb ûnyi; ke hake ödrü thibi hnyi hnyei. 30 Ke haba Ahia ame kât ûkhaü ae teb ûnyi e ame khavâ, me kia mûa me me twelv je ec mano. 31 Ke e ame ha kö Jeroboama, ka habe, Hom dö je ec mano a ten: anyin a walang ame ha Iehova, Khongu Isaraela, ka habe, Wâ bi oge me he ka kia dökhü ûnyi ga Solomona, me ham bi köu je tribu a ten: 32 (ke khaca thiju tribu hobi kâu, ga Davita athnyabaik, me ge Jerusalema, taun oge úca hnyi ta je tribu hia hnyi Isaraela:) 33 can ödrin e digic nya, me khudrung kö Aseira khong momo anyin at Zidona, me Kemosa khongon at Moaba, me Milekoma khongon laku Amona; ke ödrin e ca vheno dek je gethen, he ka ânyâ wisa hnyi hnyimakök, me tuö anyik je hnanyibu helâ me Davita a kamen. 34 Ke so bi oge me ca he ka hûgûnâ hia dökhü gan: ke oge me he ka ânyâ e, me me tuhan hnyi ta je bonginy hia anyin möt, ga Davita athnyabaik, wale o ge úca, anyin a e ame tuö hnök je hna hûna, me anyik je hnanyibu: 35 ke oge me he bi ka hûgûnâ dökhü ûnyi hnyi hnyamen nokon, me ham e köu, ten je tribu. 36 Ke khaca tribu oge me he ka ham ka nokon, me me hu ga Davita athnyabaik nyiele balua lamepa hnyi hnyimakök hnyi Jerusalema, taun oge úca hobi kõnya bi he ka ip eling iök. 37 Ke oge me he ka hum u, ke u me he ka musö hia hoton weny hnyekom, ke u me he ka than hon at Isaraela. 38 Ke u je ne he ka löng hia hoton hnök hna hûna köu, me vheno dek je gethen, me ânyâ ûnyi ae wisa hnyi hnyimakök, me tuö anyik je hnanyibu, me hnök je hna hûna, helâji a ânyâ Davita athnyabaik; me oge me he bi nya ka tha inya möu, me bi uma ae tet hmâ me umâm, helâji me hnök hna ânyâ hobi kö Davita, me oge me he ka ham köu Isaraela bi. 39 Ke oge me he ka ovecâ je mâtrâni Davita can e, ke ca nyiela balua. 40 Ma haba Solomona ame elâm he ka hlingö Jeroboama; me Jeroboama ame todrö, me kec Aigupito ai kö Sisaka than Aigupito, ke e bi Aigupito ke ne o but ame mokcu Solomona.

## I. JE THAN 12.

41 Haba kolon je huliwa a ânyâ Solomona, me hnen hna ânyâ hia, me anyin metâ, hawa, adre me ca sihnalimen hnyi tusiny ta je huliwa anyi Solomona? 42 Ke haba ten ame musi hnyin Solomona hon Isaraela hia hnyi Jerusalema, me fâte je huna. 43 Ke amê tha mokut ut Solomona me lakamen, me adre me konâm e hnyi taun anyi Davita a kamen : me Reoboama a nokon ame than ju hwaban.

### HNyimakan 12.

**K**E Reoboama ame he Sekema ai : anyin ame o hnyi Sekema Isaraela hia he ka otilâ e nte than. 2 Ke a löng ut Jeroboama nöku Nebata, (anyin ae tiga e bi hnyi Aigupito, k' ame kec kâe ehac ga Solomona, me ame laba Jeroboama hnyi Aigupito, 3 me adre me úkhúnöng he ka hawâ e;) me ame tha o Jeroboama me úkhacaköu hia anyin at Isaraela, me ha ko Reoboama, ka habe, 4 Haba kâmâm ame ohmakâ únyi hnân úhúkáláköuâ huhmun : ke haba walang ang u ma he ka ohâhá huliwa anyin kâmâm ae vec, me únyi hnân úhúkáláköuâ ae hmak e ame ip huhmun, me öhmun e he ka bi lakem. 5 Me e ame ha ködrin, ka habe, He thö ama kun ta bong, m' öbun hmetu thö könya. Me ame vese thö tavat. 6 Me haba Reoboama than ame úhnenamö me wahingat, a hnyat adre me tot hnyi hnyimakö Solomona a kamen ke tiga möt, me ha, ka habe, Ie hofuc öbun e únykúme hnân thu ka tavat ang? 7 Ke haingödrin kâu, ka habe, U je ne he ka bi athnyaba ka tavat ang hnyi bong ang, me ânyâ wedrin, me thu ködrin, me ha ködrin ta je hofuc ae so, awe, ödrin e he bi ka bi athnyaba köu nyiele balua. 8 Ke e ame degecâ hofuc hwan wahingat ödrin e úhnenamö, ke e ame ka úhnenamö me je hidröu a ödrin tha dö mē, wale ödrin e tot hnyi hnyimakan. 9 Ke haingen ködrin, ka habe, Ieú hnöbun hna ha, mötin e he ka thu ka tavat ang ödrin e ha könya, ka habe, Ohâhá thö únyi hnân úhúkáláköuâ waleji ame ip kâmâm huhmun? 10 Me ame ha kâu je hidröu a ödrin tha dö mē, ka habe, Walang únyi u me he ka ha ka tavat ang adre me fuc köu, ka habe, Haba kâmâm ame ohmakâ únyi hnân úhúkáláköuâ huhmun, ke u me he ka ohâhá e huhmun ; walang únyi u me he ka ha ködrin, ka habe, haba banyök a bakevic ame he ka baki hon hnyi cica. 11 Ke wale bi ang, haba cica ame

ip hubun únyi hnân úhúkáláköuâ ae hmak : ke oge me he bi nya ka bi hanen e hubun : haba cica ame kuc öbun ge osö, ke oge me he bi nya ka kuc öbun ge je sekopio. 12 Haba Jeroboama, me tavat hia, ödrin e o kö Reoboama hnyi bong a kuniny, helâ me hna húna hnen than, ka habe, Hmetu thö könya hnyi bong a kuniny. 13 Ke haba than ame thu hwegiâ ka tavat, me degec hofuc hwan je hingat wale ödrin e úhnenamö ; 14 me fuc ködrin hoton hofuc hwan je hidröu, me ha, ka habe, Haba cica ame ohmakâ únyi hnân úhúkáláköuâ hubun, ke oge me he bi nya ka bi hanen ka únyi hnân úhúkáláköuâ hubun : haba cica ame kuc öbun ge osö, ke oge me he bi nya ka kuc öbun ge sekopio. 15 Me ame ca löng bi than ka tavat ; anyin a únyi ga Iehova únyi eling, me me ohwadâ hwan hofuc, waleji ame ha Iehova kö Jeroboama nöku Nebata a deny Ahia at Silo. 16 Ke a wâ but Isaraela hia a g' ame ca löng ködrin than, haba tavat adre me thu ka than me ha, ka habe, Ewa ke keihöhmun unyi Davita? ke ba jekhöúhmun unyin laku Jese : at Isaraela lö, vese th' öbun ka hnyi umöbun je uma mano : Davita lö, hamâm he ka tuö ânyâm lap. Me Isaraela ame vese but ka hnyi umödrin je uma mano. 17 Ke haba lakon Isaraela, a tavat adre me labâ je taun anyin Juda, me Reoboama ame musi ködrin. 18 Ke Reoboama than ame kunö Adorama, at ame ö fat ; me haba Isaraela hia adre me lúâ ge veto me ame mokcu. Me Reoboama than ame ie he logot me ölö ka hnyi anyin kariota, me kec Jerusalema ai. 19 Me haba Isaraela ame hna degecâ lap anyi Davita ke ne o but hnyi bong ang. 20 Ke a löng ut Isaraela hia a ga o thö Jeroboama, me adre me úkhúnong he ka hawâ ka hnyi úkhacaköu, me otilâ e me than Isaraela hia : ke ba at ame hnu hoton lap anyi Davita, ke so bi hake tribu Juda thibi.

21 Ke ame o thö Reoboama hnyi Jerusalema, me e ame úkhacaköuâ lap anyi Juda, me tribu Beniamina, ödra wan haded ke eite thauzan tavat adre úca, tavat vat, he ka vat me lap anyi Isaraela, he ka ohmeto dökhü kö Reoboama nöku Solomona, 22 Ke ame o but hofuc hwan Khong kö Semaia aten Khong, ka habe, 23 Fuc dö kö Reoboama nöku Solomona than Juda, me lap hia anyi Juda me Beniamina, me kolon biju tavat, me ha ködra ka habe, 24 Walang hna ha hnö Iehova, ka habe.

## I. JE THAN 13.

Ca he öbun, ke ca vat bi me je liamekeiny möbun a lakon Isaraela: ve hmetu ju öbun ka hnyi umöbun je uma; anyin a haba únyi ang me únyi gak. Me adre me löng hofuc ho Iehova, me hmetu me vese but, hoton hofuc ho Iehova.

25 Ke haba hnyi únen e Jeroboama ame op Sekema hnyi hnyei ae hut hnyi Eferaima, me laba eling: ke e ame he úheny e me op Penuela. 26 Ke haba Jeroboama ame ha hnyi hnyekon, ka habe, Ame he ka hmetu walang ang dökhü ka hnyi lap anyi Davita: 27 ame ne he tavat ang he ka bi hut hnyi uma umö Iehova hnyi Jerusalema; me ame he ka wia hmetu hnyekon tavat ang ka tuhödra, a Reoboama than Juda; me adre me he ka hlingö nya, me hmetu kö Reoboama than Juda. 28 Me than ame úhnenamö, me ányá li nokon kau gol; ke e ame ha ködrin, ha habe, E hmak köbun he ka he Jerusalema ai; Isaraela lö, wá ju ang li khongom, a li at ödre hum u únyi hnyi hnyei Aigupito. 29 Me e ame otilá khaca hnyi Beth-ela, ke e ame ip khaca hnyi Dana. 30 Ke haba únyi eling ame okúá hulö: anyin a haba tavat adre me he ka khaca, wale ke ne o but hnyi Dana. 31 Ke e ame bi uma hnyi je dok ae görany, me otilá je hnyat bihut únyi hnyi tavat hia, wale a ca je laku Levi. 32 Ke Jeroboama ame húna he ka bijeúá hnyi tehi a eitiny, hnyi bong a fittininy tehi, helâ me bijeú hnyi Juda, ke e ame ölö ka hnyi taben hut; me e ame ányá helâe hnyi Beth-ela, me bi hut ka li nokon kau wale e ame ányá: ke e ame ip hnyi Beth-ela tavat bihut hnyi dok ae görany wale e ame ányá. 33 Ke e ame ölö ka hnyi taban hut wale e ame ányá hnyi Beth-ela hnyi bong a fittininy tehi a eitiny, wale hnyi tehi e ame únykúme hnyi hnyekon bi: ke e ame húna ke bijeú hobi kâu lakon Isaraela, me ölö ka hnyi taben hut, he ka leú utö ae bo so.

### HNYIMAKAN 13.

**K**E wá bi, ame o but hnyi Beth-ela ke aten Khong úheny Juda ge hofuc ho Iehova: ke Jeroboama ame tot hnyi taben hut he ka leú utö ae bo so. 2 Ke e ame hongot ka hnyi taben hut ge hofuc ho Iehova, me ha, ka habe, Taben hut, taben hut lö, walang hna ha hnö Iehova, Wá bi, adre me he ka hnoká wanakat ka hnyi lap anyi Davita, Josea ien; ke e ame he ka

hudo hom je hnyat bihut hnyi je dok ae görany, tavat ödrin e leú utö ae bo so hom, ke ödrin e he ka le hom je jeien at. 3 Ke e ame bi haten hnyi bong eling, me ha, ka habe, Walang haten ame ha Iehova: Wá bi, ame he ka hmouca taben hut, me hingölö je dröu únyi hnyi hon. 4 Ka löng ut than hofuc hwan aten Khong, wale e ame ha ka hnyi taben hut hnyi Beth-ela, me haba Jeroboama ame inâ hnyamen, únyi hnyi hon taben hut, me ha, ka habe, Kât ju e. Me ame meleca hnyamen wale e ame inâ kâu, me me ca khana bi he ka oc hmetu kâu bi. 5 Ke ame hmouca but minya taben hut, me hingölö but je dröu únyi hnyi hon, helâ me haten ame ha aten Khong únyi ge hofuc ho Iehova. 6 Haba than ame thu me ha ka aten Khong, ka habe, Ö u khöü thö kö Iehova Khongom walang ang, me hic hobi könya, me me so hmetu but hnyamök. Me haba aten Khong ame khöü kö Iehova, me me so hmetu hnyamen than helâ me eja. 7 Ke haba than ame ha ka aten Khong, ka habe, Ötu he ka hnyi hnyabak, m' u me menâ, me oge me he ka ham köu hwaban. 8 Ke haingen aten Khong ka than, ka habe, U je ne ham könya hafiny umâm uma, oge me ca he ka tha dit möu, ke haba khaca, oge me ca he ka han areto me ic köiö hnyi dok ang: 9 anyin a helâe hna húna könya hofuc ho Iehova, ka habe, U me ca he ka han areto me ijem köiö, ke u me ca he ka vheno hmetu dem gethen. 10 Me e ame hmetu hnyi ke gethen, k' ame ca he hnyi gethen. e ame o hnyin Beth-ela ai.

11 Ke ame laba hnyi Beth-ela ke perofeta a hingat; ke ame o but ke nokon me thumeto e ge ta je únyi hia ame ányá aten Khong hnyi bong eling hnyi Beth-ela: k' ödrin e thumeto minya kamödrin ge ta je hofuc e ame ha ka than. 12 Haba kamödrin ame ha ködrin, ka habe, A he ua? Ke haba lakon ödrin e wá gethen a vheno aten Khong at ame o úheny Juda. 13 Me haingen ka lakon, ka habe, Húkálâ ju taben hon asina. Me ödrin e húkálâ taben hon asina: me e ame tabâ. 14 Ke e ame he hoton aten Khong me khaú ju e, a ga laba hmelen iwajo: ke e ame ha kâu, ka habe, U aten Khong waleji a o úheny Juda? Me haingen, ka habe, Inya. 15 Me e ame ha kâu, ka habe, Ötu he ka hnyi hnyabak me han. 16 Ke haingen, ka habe, Eca khanö nya he ka tha hmetu möu: ke oge

## I. JE THAN 14.

me ca he ka tha han me tha ic möu hnyi dok ang: 17 anyin a ha kõnya hofuc ho Iehova, ka habe, U me ca he ka han areto me ic köiö eling, ke u me ca he ka vheno hmetu gethen u je o hnyin. 18 Ke haingen kâu, ka habe, Inya ang ke perofeta helâ möu; ke haba angela ame ha kõnya hnyi hofuc ho Iehova, ka habe, Ohmeto ju e ka hnyi umâm uma, me me han areto me ijem köiö. Ke e ame thoi kâu. 19 Me e ame tha hmetu mē, me e ame han areto me ijem köiö. 20 Ke ödrü me tiga laba hnyi lau-lau, me ame o hofuc ho Iehova ka perofeta, at ame ohmeto e: 21 me e ame hongot ka aten Khong at ame o úheny Juda, me ha, ka habe, Walang hofuc ame ha Iehova, ka habe, Can anyin a u je hia but hanyâûâ hofuc ho Iehova, me ca löng bi hna húna, waleji a húna köu Iehova Khongom, 22 ke u je hmetu, me han areto me ijem köiö hnyi dok waleji e ame húna köu, ka habe, ca he bi ka han areto, me ijem köiö; anyin a wale ame ca he ka o unyâm ka hnyi erkemok anyin lakâmâm. 23 Ke a hia but han areto, ke a hia but ic, me e ame hûkâlâ taben hon asina hobi kâu, waleji perofeta e ame ohmeto. 24 K' ame he but, me ame úkhanö mē liona eú hnyi gethen, me hlingâ e; ke adre khûâ eú hnyi gethen unyin a mokcu, ke ame tot asina hakekenyâ e; ke liona minya ame tot hakekenyâ komok. 25 Ke wâ bi ame he eú hnyi gethen tavat, me wâ komok adre khûâ eú hnyi gethen, me liona ame tot hakekenyâ komok: ke ödrin e o me úthumetu hnyi taun waleji ame laba hnyin perofeta hingat. 26 Ke a löng ut perofeta at ame ohmeto e úheny e hnyi gethen, me e ame ha, ka habe, Wale aten Khong at ame hanyâûâ hofuc ho Iehova: anyin a wale a hia but Iehova hna e ka liona, me ame kia me hlingâ e, boton hofuc ho Iehova waleji e ame ha kâu. 27 Haba e ame ha ka lakon, ka habe, Hûkâlâ ju taben hon asina hobi kõnya. Me ödrin e hûkâlâ. 28 Me e ame he me wâ komok adre khûâ eú hnyi gethen, me asina me liona ödrü me tha tot hakekenyâ komok: haba liona ame ca an komok, k' ame ca kia minya asina. 29 Haba perofeta ame hom unyin aten Khong me ip hon asina, me hmeto: ke e ame o ka hnyi taun anyin perofeta hingat, he ka tenge, me konâm e. 30 Ke e ame ip unyin hnyi anyin bi erkemok; ke ödrin e tenge gan me ha, ka habe, E kölö ge keik! 31 Ka hia but konâm e, me e ame ha ka lakon, ka

habe, Iny ka mokcu öbun e he ka kõnim nya hnyi erkemok hon aten Khong; ip ju je jeiök hnyi je jeien. 32 Anyin ame he ka hwâdâ hofuc waleji e ame hongot ge hofuc ho Iehova ka hnyi taben hut hnyi Beth-ela, me hon je uma hia hnyi je dok ae görany hnyi je taun hnyi Samaria.

33 Hwaban únyi eling haba Jeroboama ame ca hmetu únyi hnyi hwakecin bi ae kong, ke e ame otilâ hmeto je hnyat bihut anyin je dok ae görany únyi hnyi wanben tavat: ame ne weny ke at, e ame okabâ e, me me he ka hu je at bihut hnân je dok ae görany. 34 Ke haba únyi eling ame okúâ hulö ka lap anyi Jeroboama, wale he ka subâ degecâ e me ohia e eang hmeledrany.

### HNYIMAKAN 14.

**K**E haba hnyi úen eling e mok Abia nöku Jeroboama, 2 Me Jeroboama ame ha ka áiân, ka habe, Ö u todrö, ke oiyongi u bi, me me ca manen a u öiö. Jeroboama: ke he thö Silo ai; wâ bi, eling Ahia perofeta, at ame ha kõnya a oge me he ka thaniny hnyeí ang. 3 Ke hom dö hnyi hnyamâm je areto a ten, me je ong areto ae halelöú, me tap hani, me he thö kâu: me e ame he ka thumetu u ge únyi ame he ka o ka wanakat. 4 Ke ame ányâ helâe öiö Jeroboama, me e ame tot me he Silo ai, me o ka hnyi uma umö Abia. Ke ca khanö Ahia but bwele, anyin ae hâe but li emakan anyin a hingat ut. 5 Ke haba Iehova ame ha kö Ahia, ka habe, Wâ bi, öiö Jeroboama ame he jem he ka hnö únyi gam ge nokon; anyin a e mok: u me he ka ha helang me helang kâu; anyin a e ka didrö; me e ame he ka bi ke at. 6 Ke a löng ut Ahia hwan li can momo ame dit hnyi hwanuma, me e ame ha, ka habe, Didrö, öiö Jeroboama; ieu gam u me iyawa me bi ke at? anyin adre me kunö nya me úthumetu ae únyi hnathu köu. 7 He thö ka ha kö Jeroboama, ka habe, Walang hna ha hnö Iehova Khongu Isaraela, ka habe, Oge me oganö u hnyi wanben tavat, me úcö u hnân thaniny hnyeí Isaraela, 8 me kia luâ dökhü únyi hnyi lap anyi Davita, me ham e köu: ke haba u ca úcú me Davita athnyabaik, at ame tuö hnök je hna húna. me vheno hotuk hia ge hnyekon a khaca, he ka ányâ thibi wisa hnyi hnyimakök; 9 ke u je hia but ányâ hulö ae gan hon lakâmâm, me he me ányâ hobi köu bi je khong monu, me je hnathat adre me oköiâ,

## I. JE THAN 15.

he ka ohmönyini nya, ke u je digic nya bi hotom ai : 10 anyin a wale, wâ bi, oge me he ka okûâ únyi ae kong ka lap anyi Jeroboama, ke oge me he ka subâ degecâ ga Jeroboama obaga hia, a hnyat adre ca, me hnyat adre hna hnyi Isaraela, ke oge me he ka aba degecâ lap anyi Jeroboama, helâ me man at ame aba degecâ tet, ke ne o but ame ba but. 11 Haba atö Jeroboama ame ne he ka mok hnyi taun, me ame he je kuli ka an ; ke haba at ame he ka mok hnyi hnyei, me ame he je meno ame gâ ka an : anyin a hia but Iehova ha. 12 Anyin a wale todrö u, me he thö ka hnyi hnyabam : ke u ka utö thö taun, haba wanakat ame he ka mokcu. 13 Ke ame he ka tenge gan Isaraela hia, me konâm e ; anyin a e thibi hanö Jeroboama ame he ka o ka hnyi erkemok : anyin adre wâ anyin únyi ae so kö Iehova Khongu Isaraela hnyi lap anyi Jeroboama. 14 Ke ame he Iehova ka oâ hobi kâu bi than hon Isaraela, at ame he ka subâ degecâ lap anyi Jeroboama hnyi bong eling : ke ne hö? walang ang. 15 Anyin ame he Iehova ka kot Isaraela helâ me hna jijingâ sa hlowe hnyi an ; ke e ame he ka oc me wân Isaraela únyi hnyi hnyei ang ae so, waleji e ame ham ka je lakamödrin, me ovesei ödrin ka hnyi ke keihen hoton Wagewe ; anyin a ödrin e hia but theati Aseira, me okûâ hmönyin anyi Iehova. 16 Ke e ame he ka hna degeci Isaraela can je hulö anyi Jeroboama, wale e ame ânyâ, me at ame okûâ je hulö kö Isaraela. 17 Me ame todrö öiö Jeroboama, me he, me o hnyi Tireza : k' ame o thö hnyi hwanumen uma, me ame mokcu wanakat. 18 Ke haba Isaraela hia ödrin e konâm e, me tenge gan ; hoton hofuc ho Iehova, waleji a ha a deny Ahia perofeta athnyabainy. 19 Haba kolon je hna ânyâ hnö Jeroboama, wale hwakecin anyin vat, me musi, wâ bi adre hia but sihnalimen hnyi tusi hnân ha je bong bongon je than hnyi Isaraela. 20 Ke haba je bonginy musi anyi Jeroboama, me twente tu je huna : ke e ame tha mokut me lakamen, ke Nadaba bi a nokon ame musi hwaban.

21 Ke haba Reoboama nöku Solomona ame musi hnyi Juda. Fâte wan je hunai Reoboama hnyi úen e ame hwân ka musi, ke e ame musi seventin je huna hnyi Jerusalem, wale taun ame úca Iehova hnyi je tribu hia anyi Isaraela he ka ip ien hnyin : ke haba ien hinyen, jia Naama momo Amona. 22 Ke haba at Juda ame ânyâ

hwakecin ae kong hnyi hnyimakö Iehova ; kâ ödrin e ociâ gan hmâ e hon hna ânyâ hnen lakamödrin, hnyi ta je monu hia ödrin e ânyâ. 23 Ke ödrin e ânyâ minya hobi ködrin je dck ae görany, me je veto ame tot, me je Aseira, hon je dok ae hut hia, me hmelen je üö ae hât hia thithö ; 24 ke e hu minya hnyi hnyei tavat adre me hwen Sodoma : ödrin e ânyâ hia hoton je hwakecin ae ikiki anyin je hnyei a obâ ga Iehova hnyi hnyimakan lakon Isaraela. 25 Ke haba hnyi huna a thabûngi Reoboama, me ame o but Sisaka than Aigupito he ka vat hnyi Jerusalema : 26 ke e ame hom ta omjeúiny uma umö Iehova, me omjeúiny uma umen than ; e ame hûgúnâ hia : ke e ame hom hia je bec gol a ânyâ Solomona. 27 Me Reoboama than ame ânyâ je bec bras me hwaban je bec eling, me hna ka taben tavat tue, a hnyat tuö hwanumen uma umen than. 28 Ke ame ne dit than ka hnyi uma umö Iehova, me ame ve hom hnen tavat tue, me odilâ hmeto ka hnyi hnyeuleiny tavat tue. 29 Ke haba kolon je hna ânyâ hnö Reoboama, me anyin ta je huliwa, hawa, adre me ca sihnalimen hnyi tusi hnân ha je bong bongon je than Juda ? 30 Ke ame labö vat Reoboama me Jeroboama hnyi ta ogö bong hia thithö. 31 Ke ame mokut ut Reoboama tha e me lakamen, me adre me tha konâm e me lakamen hnyi taun anyi Davita : ke haba ien hinyen, me, Naama momo Amona. Ke ame than biju Abiama a nokon hwaban.

### HNYIMAKAN 15.

**K**E haba hnyi huna a eitinyin musi anyi Jeroboama nöku Nebata me ame hwân Abiama he ka musi hnyi Juda. 2 E ame musi hnyi Jerusalema hnyi kun ta huna : ke haba ien hinyen, me, Maaka, momo nöku Abisaloma. 3 Ke e ame vheno ta je hwakecin hia ae kong anyin kamen, waleji e ame ânyâ ehac : ke ame ca bekhöt ut hnyekon kö Iehova a Khongon, helâ me hnyeku Davita a kiben. 4 Ke so bi haba Iehova Khongon ame ham kâú lamépa hnyi Jerusalema, ga Davita, he ka otilâ nokon hwaban, me he ka otilâ hmâ Jerusalema : 5 anyin a haba Davita ame ânyâ únyi ae wisa hnyi hnyimakö Iehova, me ca saú únyi hnyi ta je únyi hia e ame hûna kâu hnyi bongon ta je bong hia, ke so bi

## I. JE THAN 15.

hwakecin thibi ga Uria at Heth. 6 Ke ame labö vat Reoboama me Jeroboama hnyi bongon ta je bong hia. 7 Ke haba kolon je hna anyâ hnö Abiama, me anyin ta je huliwa, hawa, adre me ca sihnalimen hnyi tusi hnân ha je bong bongon je than Juda? Ke ame labö vat Abiama me Jeroboama. 8 Ke ame mokut ut Abiama tha e me lakamen; me ödrin e konâm e hnyi taun anyi Davita: ke ame than biju Asa a nokon hwaban.

9 Ke haba hnyi hunâ a twenteiny musî a Jeroboama, than Isaraela, me haba Asa ame hwân ka musî hnyi Juda. 10 Ke fâte wan je hunainy ka musî hnyi Jerusalema: ke haba ien hinyen, me, Maaka nöku Abisalomâ. 11 Ke haba Asa ame anyâ wisa hnyi hnyimakö Iehova helâ me Davita a kibên. 12 Ke e ame obia tavat adre me hwen Sodoma ünyi hnyi hnyeî, me hom hia je idola wale a anyâ lakamen. 13 Ke e ame digic Maaka minya a hinyen, me me ca momo than hmetu, anyin a e ame theati Aseira; ke haba Asa ame sö degecâ idola anyin momo, me thong degecâ hnyi wagewe Kederon. 14 Ke adre ca obia je dok ae görany: ke so bi e bekhöt ut hnyeku Asa anyi Iehova hnyi bongon ta je bong hia. 15 Ke e ame hom ka hnyi uma umö Iehova je ünyi a okabâ kamen, me je ünyi a ka okabâ bi e, sileva, me gol, me je kaia. 16 Ke ame labö vat Asa me Baasa than Isaraela hnyi bongudru ta je bong hia. 17 Ke haba Baasa than Isaraela ame he Juda ai ka vat, me op Rama, me me ca hna ke at he ka didrut me didrö kö Asa than Juda. 18 Ke haba Asa ame hom sileva me gol hia kolon je omjeü hnyi uma umö Iehova, me je omjeüiny uma umen than, me hna ka hnyi hnyamen lathnyabainy: ke haba Asa than ame kun' ödrin me kö Ben-adada nöku Taberimona, nöku Heziona, than Suria, at ame laba hnyi Damaseko, me ha, ka habe, 19 E hu hnötu hna ühinyköu, wanbö cica me kâmâm: wâ bi, inya oge me kunâ köu bwihlany sileva me gol; he thö ka subâ degecâ anyâm ühinyköu me Baasa than Isaraela, me me he but ünyi gak. 20 Ke haba Ben-adada ame ling Asa than, me kunâ je taben anyin je deö vat he ka tot ka je tauni Isaraela, me kot Ijon, me Dana, me Abela-bethe-maaka, me Kinereth hia, me hnyeî Nafatali hia. 21 Ka löng ut Baasa, me e ame hna ju op Rama, me e ame laba hnyi Tireza. 22 Ke hnyi ün e haba Asa than

ame hûna manenâ kö Juda hia thithö; a e ba at ame he ka laba baü: ke ödrin e hom degecâ je vetoiny Rama, me ütöiny, waleji a op Baasa; ke haba Asa than ame hom ta je ünyi e he ka op Geba hnyi Beniamina, me Mizepa. 23 Ke haba kolon je hna anyâ hia hnö Asa, me hwegien hia, me anyin ta je huliwa, me je taun e ame op, hawa, adre ca sihnalimen hnyi tusi hnân ha je bong bongon je than Juda? Ke hnyi anyin hingat, me ame tabâ li can mok. 24 Ke ame mokut ut Asa tha e me lakamen, ke adre me konâm e tha e me lakamen hnyi taun anyi Davita a kibên: ke ame than biju Jehosafata a nokon hwaban.

25 Ke haba hnyi hunâi Asa a loiny than Juda, me ame hwân he ka musî hon Isaraela Nadaba nöku Jeroboama, ke e ame musî hon Isaraela lo li hunâ. 26 Ke e ame anyâ monu hnyi hnyimakö Iehova, me vheno gethen deny kamen, me anyin hulö, wale ünyi ame okûâ hwakecin ae kong hnyi Isaraela. 27 Ke haba Baasa nöku Ahia hanen lap anyi Isakara ame sihnân: me Baasa ame kot e hnyi Gibethon anyin at Filisiti; anyin a Nadaba me Isaraela hia ame thelöng Gibethon. 28 Ke haba Baasa ame hlingâ e hnyi hunâ a kuni Asa than Juda, me e ame than hwaban. 29 Ke e than dut, me e ame ie hlingâ lap hia anyi Jeroboama; e ame ca hna but ga Jeroboama ke at he ka möt ke ne o but e ame hlingâ; hoton hofuc ho Iehova waleji e ame ha a deny Ahia athnyabainy a at Silo: 30 can je hulö anyi Jeroboama waleji e ame anyâ, wale ame okûâ hwakecin ae kong hnyi Isaraela; me can anyin monu wale ame okûâ hmönyin anyi Iehova Khongu Isaraela. 31 Ke haba kolon je hna anyâ hnö Nadaba, me anyin ta je huliwa hia, hawa, adre ca sihnalimen hnyi tusi hnân ha je bong bongon je than Isaraela? 32 Ke ame labö vat Asa me Baasa than Isaraela hnyi bongudru ta je bong hia.

33 Ke haba hnyi hunâ a kuni Asa than Juda, me ame hwân Baasa nöku Ahia ka musî hon Isaraela hia hnyi Tireza ke ne o but hnyi twente foa je hunâ. 34 Ke e ame anyâ hwakecin ae kong hnyi hnyimakö Iehova, me vheno gethen de Jeroboama, me anyin monu, waleji ame okûâ hwakecin ae kong hnyi Isaraela

## HNYIMAKAN 16.

**K**E ame o but hofuc ho Iehova kö Jehu nöku Hanania ga Baasa ame ha, ka habe, 2 Anyin a oge ogöranyi u únyi hnyi sesá me otilö u hnân thaniny lakeik a at Isaraela; ke u je hia but vheno gethen de Jeroboama, me kunâ lakeik a Isaraela he ka monu, he ka okûa anyik hmönyin ge anyidrin je hulö; 3 wâ bi, oge me he ka aba degeci Baasa but me anyin lap; ke oge me he ka wia ânyâm lap he ka helâ me lap anyi Jeroboama nöku Nebata. 4 Haba hanö Baasa ame he ka mok hnyi taun, ame he je kuli ka an, ke haba hanen ame he ka mok hnyi ta hnyei, ame he je meno ame gâ ka an. 5 Ke haba kolon je hna ânyâ hnö Baasa, me anyin je huliwa, me anyin hwege, hawa, adre ca sihnalimen hnyi tusi hnân ha je bong bongon je than Isaraela? 6 Ke ame mokut ut Baasa tha e me lakamen, me adre konâm e hnyi Tireza; ke ame than biju Ela a nokon hwaban. 7 Ke ame o but hofuc ho Iehova minya a deny Jehu a perofeta nöku Hanani ga Baasa, me ga anyin lap, can ta je monu hia e ame ânyâ hnyi hnyimakö Iehova he ka okûâ anyin hmönyin ge huliwa anyin li hnyamen, wale me me helâ me lap anyi Jeroboama, me khaca minya anyin a e ame hlingâ.

8 Ke haba hnyi huna twente siksi Asa than Juda, ame hwân Ela nöku Baasa he ka musi hon Isaraela hnyi Tireza, me musi hnyi lo li huna. 9 Ke haba Zimeri athnyabainy, taben hafiny anyin je kariota, ame sihnân: ke e bi hnyi Tireza ame ic me ka omono e bi hnyi uma umö Areza, at ame tuö hnyaban hnyi Tireza: 10 ke Zimeri ame didrö, me kot e, me hlingâ e, hnyi huna a twente seveni Asa than Juda, me e ame than ju hwaban. 11 Ke e ame bi hwân he ka than, ke e ame hap tabâ anyin theron, me e ame hlingâ hia lap anyi Baasa: e ame ca hna wan ke da a khaca, ame ne liamekeiny mē, ame ne lahanen. 12 Ke haba Zimeri ame ohia lap anyi Baasa helâe, helâ me hofuc ho Iehova waleji e ame ha ga Baasa a deny Jehu perofeta, 13 can ta je hulö hia anyi Baasa, me ta je hulö anyi Ela a nokon, wale ödre ânyâ, me waleji hna okûâ monu anyi Isaraela, he ka kunö Iehova Khongu Isaraela he ka hmönyin ge anyidrin ta je únyi baú. 14 Ke haba kolon je hna ânyâ hnö Ela, me anyin ta je huliwa, hawa, adre ca sihnalimen hnyi tusi hnân ha je bong bongon je than Isaraela?

15 Ke haba hnyi huna a twente seveni Asa than Juda, me, haba Zimeri ame than hnyi Tireza hnyi seven ta bong. Ke ame hunuma tavat úcon Gibethon, wale iny at Filisiti. 16 Ke a löng ut tavat hunuma a ga hia but sihnân ga Zimeri, k' ame hia but kot minya than: anyin a wale haba at Isaraela hia adre me otilö Omeri wale taben vat me me than hnyi bong eling hnyi hna hunuma. 17 Me ame he Omeri tha e me at Isaraela hia úhedrin Gibethon, me ödrin e thelöng Tireza. 18 Ke a wâ but Zimeri a g' adre hûgûnâ but taun, me e ame didrö ka hnyi uma umen than, me e ame thong uma umen than ka hnyi hon e bi ge meic, me ame mokcu, 19 can ta je hulö e ame ânyâ hnyi hnyimakö Iehova, hnyi hnen hna vheno gethen de Jeroboama, me anyin hulö, waleji ame kû monu ka at Isaraela. 20 Ke haba kolon je hna ânyâ hnö Zimeri, me hnen hna sihnân, hawa adre ca sihnalimen hnyi tusi hnân ha je bong bongon je than Isaraela?

21 Me haba at Isaraela adre me khekhe lo but: haba ke hafiny adre me hnu hotu Tibeni nöku Ginath, he ka otilâ me than; ke haba ke haf adre me hnu hotu Omeri. 22 Ke hwege tavat adre me hnu hotu Omeri hon tavat adre me hnu hotu Tibeni nöku Ginath: me ame mokcu Tibeni, me Omeri ame than. 23 Ke haba hnyi huna a thöte wani Asa than Juda, me, ame hwân Omeri he ka musi hon Isaraela hnyi twelw ta huna: ke e ame than hnyi Tireza hnyi je huna a siks. 24 Ke e ame úco únyi ga Semeri ong bucen Samaria hwaban lo li talan sileva; ke e ame bi uma hon bucen, me hwenyi ien taun e ame op, me, Samaria, hoton ien at a iny ehac, jia Semeri. 25 Ke haba Omeri ame ânyâ hwakecin ae kong hnyi hnyimakö Iehova, ke beönuwa anyin ta je hulö hon tavat hia ehac. 26 Anyin a e ame vheno gethen hia de Jeroboama nöku Nebata, me anyin hulö waleji ame okûâ hwakecin ae kong ka at Isaraela, he ka okûâ hmönyin anyi Iehova Khongu Isaraela can anyidra ta je únyi baú. 27 Ke haba kolon je hna ânyâ ga Omeri waleji e ame ânyâ, me tang hwegien, hawa, adre ca sihnalimen hnyi tusi hnân ha je bong bongon je than Isaraela? 28 Me ame mokut ut Omeri tha e me lakamen, me adre me konâm e hnyi Samaria: ke ame than dö Ahaba a nokon hwaban.

29 Ke haba hnyi huna a thöte eiti Asa than Juda ame hwân Ahaba nöku Omeri



## I. JE THAN 17.

he ka musî hon Isaraela : ke Ahaba nõku Omeri ame musî hnyi Samaria twente tu je huna hon Isaraela. 30 Ke haba Ahaba nõku Omeri ame ânyâ ûnyi ae kong hnyi hnyimakö Iehova e beõnua hudrin hia ehac. 31 Ke helâke e hâhâ kâu waleji hnen hna vheno je hulö anyi Jeroboama nõku Nebata, me e minya bi ame hum Jezebela nõku Ethebaala thaniny at Zidona, me âiân, me e ame he me bi athnyaba kö Baala, me khudrung kâu. 32 Ke e ame otilâ taben hut kö Baala hnyi uma umö Baala, wale e ame hia but op hnyi Samaria. 33 Ke Ahaba ame theati Aseira ; ke beõnua hna ânyâ hnö Ahaba he ka okûâ hmönyin anyi Iehova, Khongu Isaraela, hon ta je than Isaraela hia a bân. 34 Ke haba hnyi bongon je bong haba Hiel at Beth-ela ame op Jeriko : e ame bi taben ge hna ohia nokon a bân jia Abirama, me otilâ je homagöule ge hna ohia nokon a wakeiat hmönyin jia Seguba ; hoton hofuc ho Iehova, waleji e ame ha a deny Josua nõku Nuna.

### HNYIMAKAN 17.

**K**E haba Elia at Tisebi, hanen tavat adre me laba hnyi Gileada, ame ha kö Ahaba, ka habe, Kia inya Iehova, Khongu Isaraela, wale oge me tot hnyi hnyimakan, a ame he ka ba hau, me we hnyi je huna, ke so bi hoton hok hofuc. 2 Ke ame o but hofuc ho Iehova kâu, ka habe, 3 He thö eang, me he jio, me lubaduöng hnyi wagewe Kerith, cicö Joridano. 4 Ke u me he ka ijem wagewe, ke oge hia but hûna je oreba he ka hâm. 5 Ke e ame he me ânyâ hoton hofuc ho Iehova : anyin a e ame he me laba hnyi wagewe Kerith, cicö Joridano. 6 Ke haba je oreba ame hom kâu areto me utiö hnyi je hnyomakatu, me areto me utiö hnyi je sahac ; ke e ame ijem wagewe. 7 Ke haba hwaban ta je bong, ame hme thö wagewe, anyin ae ba we hnyi hnyei.

8 Ke ame o but hofuc ho Iehova kâu, ka habe, 9 Todrö, he thö Sarepeta ai, hnyi Sidona, me laba ju eling : wâ bi oge hia but ha ka safac eling he ka hâm. 10 Me e ame todrö me he Sarepeta ai ; ke e ame o hnyi homagöuleny taun, me wâ bi ame thigö eling safac : ke e ame hawâ momo, me ha kâu, ka habe, Ö u he thö ka hom tap köiö belik, me inye he ka ic. 11 Ke ame he momo ka hom, me e ame hongot

ka momo, ka habe, Ö u hom minya thö kõnya ong areto ae ûhnyûkong hnyi hnyamâm. 12 Me ame thu momo, ka habe, Kia inya Iehova Khongom, ae ba ong arete unyik, ke khaca thibi hna auk falawa hnyi taben, me ong wakaco hnyi kaia : ke wâ bi, oge me thigâ li ong utö, me inye he ka didrö me le hobi kõnya me nõkuk, m' õhmu me an dö k' õhmu mokcu. 13 Haba Elia ame ha kâu, ka habe, Ca ot ; he thö ka ânyâ helâ me hnâm hna ha : ke me bâm ka ânyâ hobi kõnya ke ong areto, me hom kõnya, ke hwaban dö e, me u me he ka ânyâ hnân hobi köbu bi a liamokon. 14 Ke walang hna ha hnö Iehova Khongu Isaraela, ka habe, Ame ca he ka aû tap falawa, ke ame ca he ka hme tap wakaco, ke ne o but ka hnyi bong ame he Iehova ka kunâ we ka hnyi hon kânâ. 15 Me ame he momo me ânyâ hoton hofuc ho Elia : me haba momo, me e, me lap anyin momo ödrin e han hnyi je bong ae se hia. 16 K' ame ca aû bi tap falawa, k' ame ca hme tap wakaco, helâ me hofuc ho Iehova, wale e ame ha deny Elia. 17 Ke hwaban ta je ûnyi eling, me hu mok ge nokon momo at a umen uma ; ke e ti gan hmâ imekiny, k' ame ca menâ hmetu bi. 18 Me haba momo ame ha kö Elia, ka habe, Aten Khong lö, ieu gak köu ? u je o kõnya he ka oûnykûmi nya ge anyik hulö, me he ka hlingâ nõkuk ! 19 Ke haingen ka momo, ka habe, Hom but jem kõnya nokom. Me e ame kap ûnyi hnyi ûlainy momo, me oliâ e ka hnyi hnyeule wale e ame laba hnyin, me ip ju hon hnen hna mokut. 20 Me e ame hongot kö Iehova me ha, ka habe, Iehova lö a Khonguk, hawa, u je oâ monu minya hon safac wale at oge me laba unyin, he ka hlingâ nokon ? 21 Me e ame okun mokut hon wanakat me hongot kö Iehova, me ha, ka habe, Iehova lö, a Khonguk, ö u ohmeto ju hanon wanakat ang kâu. 22 Ke Iehova ame löng hofuc ho Elia, me ame hmetu bi hanon wanakat kâu, me e ame möt dö. 23 Haba Elia ame hom wanakat me oliâ hmeto e ûnyi hnyi hnyeule ka hnyi uma, me ham e ka hinyen : ke Elia ame ha, ka habe, Wâ bi a möt ut nokom. 24 Ke haingen momo kö Elia, ka habe, Walang e khanö nya a u aten Khong, ke e hnathu hofuc ho Iehova hnyi hnyimâm.

## HNYIMAKAN 18.

**K**E hwaban je bong ae se, ame o but hofuc ho Iehova kö Elia, hnyi huna a kuniny, me ha, ka habe, He thö, ka omanenö u bi kö Ahaba; ke oge me he ka kunâ we ka hnyi kânâ. 2 Ke Elia ame he he ka omanenâ e bi kö Ahaba. Ke e gan hmiâ hnyi Samaria. 3 Ke haba Ahaba ame hao Obadia, at ame tuö hnyaban. (Ke haba Obadia ame ot gan hmâ ga Iehova: 4 ke haba hnyi ün Jezebela ame subâ degecâ je perofeta anyi Iehova, haba Obadia ame hom je perofeta a wan haded, me ikhöl' ödrin úsa fifte hnyi li op, me haödrin me habeldrin.) 5 Ke Ahaba ame ha kö Obadia, ka habe, Vheno thö hnyeï ka hnyi je pupuainy köïö hia, me je wagewe hia: ötin e ne he ka wâ hnaönying me hnân omelö je hors me miul, wâ e nye hia but je meno. 6 Ke ödrü me khenâ hnyeï me vhenö e: he haba Ahaba ame hake he hnyi ke gethen, ke Obadia ame hake he hnyi ke gethen. 7 Ke e tiga e Obadia eü hnyi gethen, me wâ bi, ame úkhanö mē Elia: ke e ame wâhmakhmeto e, me ta hnyikânâï me ha, ka habe, Hawa, u Elia than? 8 Ke haingen kâu, ka habe, Inya ang: he thö ka ha ka tuhâm, Wâ bi, wale but ang Elia. 9 Ke haingen, ka habe, Ieú anyik hulö, m' u me hnö nya a athnyabaem ka hnyi hnyamö Ahaba he ka hlingö nya? 10 Kia inya Iehova Khongom, ae ba hnyeï me dökhü, wale a ca úkhünöng than ka hnyin he ka elöm u: ke ödrin e ha, ka habe, E hia, me e ame khemanyin me dökhü me hnyeï, a ödrin e ca ö u hnyin. 11 Ke walang ang u me ha, ka habe, He thö ka ha ka tuhâm, ka habe, Wâ bi, walang Elia. 12 Ke oge me ne he eäu ka he gam, me ame he Hanu Iehova ka hum u ka hnyi dok ae ca khanö nya; ke iny ka he but me thumetu Ahaba, ke e ame ca ö u, me e ame he bi ka hlingö nya: ke inya athnyabaem oge me outö Iehova hwân k'iny tigawanakat. 13 Hawa, a ca thumetu u than waleji ge hnök hna ânyâ hnyi ün ame hlingâ je perofeta anyi Iehova ga Jezebela, a oge me ikhâlâ ta je perofeta anyi Iehova a wan haded, úsa fifte hnyi li op, me haödrin, me habelidrin? 14 Ke walang ang u me ha, ka habe, He thö ka ha ka tuhâm, ka habe, Wâ bi, walang Elia: me e ame he ka hlingö nya. 15 Me haingö Elia, ka habe, Kia inya Iehova tuhan sabaoth, a at oge me tot hnyi hnyimakan,

a oge me he ju ka omanenö nya kâu hnyi bong ang. 16 Me ame he Obadia ka úkhanö me Ahaba, me thumeto e: me ame he Ahaba he ka úkhanö me Elia. 17 Me Ahaba ame ö Elia, me haba Ahaba ame ha kâu, ka habe, Awe, u bi; a u at ame omonoâ at Isaraela? 18 Ke e ame thu, ka habe, Oge me ca omonoâ at Isaraela, ke so bi únyi gam me lap anyin kâmâm, waleji hnyi hnöbun hna hna degecâ je hnanyibu anyi Iehova me hnu hoton bi je Baala. 19 Ke haba walang ang u me he ka úkhünöng me úkhacaköuâ könya at Isaraela hia ka hnyi bucen Karemela, me je perofeta anyi Baala a foa haded ke fifte, me je perofeta anyi Aseira a ödrin foa haded a hnyat adre me hnyi han hnyi laulau anyi Jezabela. 20 Me Ahaba ame úkhünöng ka lakon Isaraela hia, me úkhacaköuâ je perofeta ka hnyi bucen Karemela. 21 Ke haba Elia ame hakekeny ka tavat hia, me ha, ka habe, Ke ne o but kehö öbun e he ka lolo hnyi li hna únykúme a lo? Ame ne Khong Iehova, awe hnu thö e: ke ame ne Baala, awe hnu e bi. Ke ame ca thu kâu tavat ge hofuc a khaca. 22 Ke haba Elia ame ha ka tavat, ka habe, Inya thiju kolon ta je perofeta anyi Iehova; ke haba je perofeta anyi Baala, me ödrin foa haded ke fifte tavat. 23 Anyin a wale hamödrin he ka ham köhmun lo li bolok; me ödrin e he ka úca ke bolok hnân hobi ködrin, me susubâ, me ip e hon je utö, ke adre me ca he ka vâc: ke oge me he bi nya ka penapena ke bolok, me ip e hon je utö, ke adre me ca he bi ka vâc. 24 Ke öbun e he ka hawâ ien khongubun, ke oge me he bi nya ka hawâ iö Iehova: ke haba Khong at ame he ka thu ge meïe, me wale thibi Khong. Haba tavat hia thithö adre me thu, ka habe, E so hna ha e. 25 Ke haba Elia ame ha ka je perofeta anyi Baala, ka habe, Úca thö ke bolok hobi köbun, me penapena ama böbun; anyin a öbun se hia; ke hawâ thö ien khongubun, ke so bi ca he ka vâc. 26 Ke ödrin e hom bolok adre ham ködrin, me penapena, me hawâ iö Baala hwân hnyi hnyomakatu ke ne o but jebigö, me ha, ka habe, Baala lö, löng ju köhmun. Ke ba hwan, me ba at ame thu. Me ödrin e gâ hon taben hut adre hia but ânyâ. 27 Ke haba hnyi jebigö Elia ame hlum' ödrin me ha ködrin, ka habe, Hongot hwege thö: anyin a e khong; ame ne hu únykümânen e, ke ame ne saú, ke ame ne he but, ke ame ne mokut, me so he ka ohmâkâ. 28 Ke

I. JE THAN 19.

ödrin e hongot hwege me ve kavi ödrin bi helä me hwakecidrin ge je hele, me je ö, ke ne o but ame hingölö drödrin hudrin bi. 29 Ke ame haü but seünö ödrin e perofeta ke ne o but adre me hudo hut hnyi sahac; ke ba hwan, ke ba at hnän thu, ke ba at ame löng. 30 Haba Elia ame ha ka tavat hia thithö, ka habe, Hakekeny dö könya; me ame hakekeny kâu tavat hia thithö. Ke e ame anyâwia taben hut anyi Iehova adre hagutâ hnyikânâi. 31 Haba Elia ame hom je veto a twelv hoton je tribuiny laku Jakob, me wale ame o hofuc ho Iehova kâu, ka habe, adre me he ka hwenyi iâm me Isaraela. 32 Haba e ame khon je veto hnän taben hut hnyi iö Iehova; ke e ame hiny thop igigilö taben hut, haba kahmen thop wale ae úcú ka ip eú hnyin lo li sea hwit. 33 Me e ame ip gaga utö, me susubâ bolok, me ip hon utö. Ke e ame ha, ka habe, Ünöngötâ thö vak ta kask ge köiö, me hingälâ hon hudiny leú, me hon utöiny. 34 Ke e ame ha, ka haba, Anyâ hmetu ju, me ödrin e olo anyâ. Ke e ame ha, ka habe, Anyâ hmetu ju; me ödrin e okun anyâ. 35 Ke ame di köiö igigilö taben hut; ke e ame ünöngötâ minya thop ge köiö. 36 Ke haba hnyi üen hudo hudiny sahac, haba Elia perofeta ame hakekeny me ha, ka habe, Iehova lö, Khongu Aberahama, me Isaaka, me Isaraela, omanenâ thö hnyi bong ang a u Khongu Isaraela, me inya ang athnyabaem, me oge hia but anyâ ta je ünyi hia thithö ang ünyi hnyi hofuc a hwâm. 37 Löng ju könya Iehova, löng ju könya, me me wâhmakhmeto tavat ang a u Iehova Khong, me u je ohmeto hnyekudrin. 38 Me ame kölu but meic hlögu Iehova, me thong hudiny leú, me je utö me veto, me kânâ, me ame cem degeca minya köiö hnyi thop. 39 Ke ame wâ e hnen tavat, me ödrin e ta hnyikânâi, me ha, ka habe, Iehova, Khong. 40 Me haba Elia ame ha, ka habe, Kât ju je perofeta anyi Baala, ca hna ke at a khaca he ka kec. Me ödrin e köt ödrin; ke Elia ame hum ödrin ka hnyi wagewe Kisona, me hling' ödrin eling. 41 Me Elia ame ha kö Ahaba, ka habe, Todrö, han ju me ic; anyin ae hu hwan we ae gan. 42 Me Ahaba ame he me han me ic. Ke Elia ame ölö ka hnyi ban Karemela; ke e ame ta ju hnyikânâi, me hnyimakan ka hnyi li boucan. 43 Ke e ame ha ka athnyabainy, ka habe, Ölö thö walang ang, me bwele ka hnyi köiö. Me e ame ölö, me wâ, me ha, ka habe, E ba

ünyi, He thö hmetu ke ne o but ka hnyi seven ta ühem. 44 Ke haba hnyi üen a seveniny e ame ha, ka habe, Wâ bi ame o thö üheny ü hnyi köiö ülâ ae ühnyükong helä me hnyamen at. Ke haingen, ka habe, He thö ka ha kö Ahaba, ka habe, Penapena thö anyâm kariota, me he ju me me ca ovheli u bi we. 45 Me ame ie khömet ut drany ge je ülâ me ang, ke gan hmâ we. Ke haba Ahaba ame tabâ anyin kariota me he Jezerela ai. 46 Ke e unyi Elia hnyamen Khong; me e ame oweikâ hnyekon, me wâdring hnyi hnyimakö Ahaba ke ne o but hnyi homagöuleny Jezerela.

HNYIMAKAN 19.

**K**E Ahaba ame thumetu Jezebela ge ta je ünyi hia thithö ame anyâ ga Elia, me hnen hna hlingâ ta je perofeta hia ge hele vat. 2 Me haba Jezebela ame kunâ üthumetu kö Elia, me ha, ka habe, Ame he je khong ka anyâ heläe könya me bi hanen minya, oge ne ca anyâ anyâm möt me me tha úcú me möt anyin ke at gadrin, ame ne bong nyi hnyi awa eang. 3 Ke e amelöng e, me todrö, me ie kec anyin ae be möt bi, me e ame o hnyi Bere-seba hnyi hnyi Juda, me ip eling athnyabainy. 4 Ke e ame he ka hnyi hnyebuba, a khaca bongon ka he; ke e ame o but me laba ju hmelen üö rata-mi: ke e ame sumâtâ me me he ka mokcu; haingen, ka habe, Soju; walang ang, Iehova lö, hom dö anyik möt; anyin a iny ca so hon lakamök. 5 Ke e ame hlöhlöu me mokut hmelen üö ratami; ke wâ bi, angela ame bwebwelâ e me ha kâu, ka habe, Todrö me han. 6 Ke e ame bwele, me wâ bi, hnyi ban ong areto adre le hon walep, me utköiö. Me e ame han, me ic me hlöhlöu hmetu ju. 7 Ke ame olo o angela anyi Iehova me bwebwelâ e, me ha, ka habe, Todrö me han; anyin ae ti sâkâü dem gethen. 8 Me e ame todrö me han me ic, me e ame he fâte je bong ke fâte je lit ge troban han eling, ke ne o but hnyi Horeba bucen anyin Khong. 9 Ke e ame o but ka hnyi op, me laba eling; ke wâ bi, ame o but kâu hofuc ho Iehova, me e ame ha kâu, ka habe, Elia lö, ieú u me anyâ ang? 10 Haingen, ka habe, Inya oge ciâ ga Iehova, Khongon sabaoth; anyin a lakon Isaraela ödrin e hna degecâ anyâm ühinhinyköu, me hagutâ hnyikânâi anyâm taben hut, me hlingâ anyâm je perofeta ge hele vat: ke hake inya thiju kolon; ke ödrin e elâm

I. JE THAN 20.

anyik möt he ka ohia e. 11 Haba e ame ha, ka habe, He thö ka tot hon bucen hnyi hnyimakö Iehova. Ke wâ bi Iehova ame he, ke haba ang ae gan ke hwege ame ohmouca je bucen, me tho je kic hnyi hnyimakö Iehova; ke e hiö Iehova hnyin ang: ke hwiöi hwaban ang, ke e hiö Iehova hnyin hwiöi: 12 ke meic hwaban hwiöi, ke e hiö Iehova hnyin meic: ke haba hwaban meic ke ifucin ae menyik me úhnyúkong. 13 Ke a löng ut e Elia me e ame lan hnyimakan ge anyin úkhaú, me he me tot hnyi hwanumen op. Ke wâ bi ame o but kâu hofuc, ka habe, Elia lö, ieú u me ányâ ang? 14 Haingen, ka habe, Inya oge me ciâ ga Iehova Khongon sabaoth; anyin a lakon Isaraela ödrin e hna degecâ ányâm úhihi-nyköu, me hagutâ degecâ ányâm je taben hut, me hlingâ ányâm je perofeta ge hele vat; ke haba inya thiju kolon; ke ödrin e elâm anyik möt he ka ohia e. 15 Haba Iehova ame ha kâu, ka habe, He hmetu thö hnyi dem gethen ka hnyi hnyebuba Dama-seko: ke u ka o but u me he ka hú Hazaela hnân than Suria: 16 ke u me he ka hú Jehu nöku Nimesi hnân than Isaraela: ke u me he ka hú Elisaia nöku Safata, úheny Abela-mehola me perofeta hwabâm. 17 Ke haba at ame he ka kec ge hele vat anyi Hazaela, me ame he Jehu ka hlingâ: ke haba at ama kec ge hele vat anyi Jehu, me ame he Elisaia ka hlingâ. 18 Ke so bi oge me he ka hna biju gak hnyi Isaraela seven thauzan tavat adre me ca cibouca kö Baala, me je hnyem hia adre ca úcimhnyimak mē. 19 Me e ame he úheny e, me o Elisaia nöku Safata ame wia kânâ me twelv je úcú lo li bolok hnyi hnyimakan, k' ame tot me at a twelviny: me Elia ame he kâu me khûâ anyin úkhaú ka hnyi hon. 20 Ke e ame hna li bolok, me wadring hotu Elia, me ha, ka habe, Ö u hnö nya but he ka úcimhnyimak me cica me bai, m' inye he ka he hotom. Ke e ame ha kâu, ka habe, He hmetu thö, ieú oge ányâ köu? 21 Me e ame hmetu úheny unyin, me hom úcú lo li bolok, me hlingâ, me thân utioiny ge omjehen li bolok, me ham ka tavat, me ödrin e han. Me e ame todrö me he hotu Elia, me bi athnyabainy.

HNYIMAKAN 20.

**K**E haba Ben-adada than Suria ame úkuacaköuâ aten wat hia unyin; me e bi unyin je than a thöte tu, me je

hors me kariota: me e ame ölö Samaria ai me thelöng, me vat mē. 2 Ke e ame kunâ je úthumetu kö Ahaba than Isaraela ka hnyi taun, me ha kâu, ka habe, Walang hofuc ho Ben-adada, ka habe, 3 Anyik bi ányâm sileva me gol; ke anyik bi minya laâiâm me lakom, a tavat ae so unyidrin. 4 Me haba than Isaraela ame thu me ha, ka habe, Than lö, a tuhök, haba inya me anyik ta je únyi, me ányâm bi helâ me hnâm hna ha. 5 Ke ame o hmetu je úthumetu, me ha, ka habe, Walang hofuc ho Ben-adada, ka habe, Oge hia but úkhúnöng köu, me ha, ka habe, U me he ka hna könya ányâm sileva, me ányâm gol, me laâiâm me lakom; 6 ke haba nyi cicö úen ang oge me he ka kunâ köu lathnyabaik, me ödrin e he ka elâm hnyin umâm uma, me je uma umen lakem; ke haba ta je únyi hia thithö ae wem, ödrin e he ka ip hnyi je hnyamödrin, me hom. 7 Haba than Isaraela ame hawâ wahingatiny hia hnyei me ha, ka habe, Wâhmakhmeto th' öbun, a g' ame elâm hna okongoâ hnen at e: anyin a e ame úkhúnöng he ka hom laöiök, me lakuk, me anyik je sileva, me anyik gol, ke oge ca behânâ gan. 8 Haba wahingat hia me tavat hia ödrin e ha kâu, ka habe, Ca löng, ke ca ogâ. 9 Anyin a wale e ame ha ka je úthumetu anyi Ben-adada, ka habe, Ha thö ka than a tuhök, ka habe, Haba ta je únyi hia u je ha könya athnyabaem a bân oge me he ka ányâ: ke haba únyi ang e ca khanö' nya he ka ányâ. Me ame he je úthumetu, me thumeto e. 10 Haba Ben-adada ame ukhúnöng kâu me ha, ka habe, Ame he je khong ka ányâ helâe könya me bi hanen minya, ame ne úcú kânâny Samaria, me me úsa khaca hna auk hobi kâu tavat adre me he ka hnu hotuk. 11 Haba than Isaraela ame thu me ha, ka habe, E ca so he ka hobelöu hnen at ame khavâ je úkhaüen vat, helâ me at ame uny. 12 Ke ame löng hofuc eling, ke ame tiga ic me je than, hnyi anyin je uma menâ, me e ame ha ka lakeiny, ka habe, Penapena thö. Me ödrin e tot metâ cicö taun. 13 Ke wâ bi, ame o but ke perofeta kö Ahaba than Isaraela me ha, ka habe, walang hna ha hnö Iehova, ka habe, Hawa, u je wâ but köien at ang? wâ bi, oge me he ka hna e ka hnyi hnyamâm hnyi bong ang; ke u me he ka wâhmakhmeto a inya Iehova. 14 Haba Ahaba ame ha, ka habe, Hamö ia? Ke haingen, ka habe, Walang hna ha hnö Iehova, ka habe, Hanymen wahidróuiny je thaniny je ke keihen hnyei. Ke haingen

## I. JE THAN 20.

bi, ka habe, Hamö ia he ka ibi hwân vat? Haingen, ka habe, Hamâm. 15 Me e ame hawâ wahidröuiny je thaniny je ke keihen hnyei, ödrin tu haded ke thöte tu : ke hwa-bödrin dö e ame hawâ tavat hia, wale lakon Isaraela hia, ödrin seven thauzan. 16 Ke ödrin e he hnyi jebigö. Ke haba Ben-adada ame ic me ka omonoâ e hnyi je uma menâ, e me je than, wale je than a thöte tu ödrin e hadruâ e. 17 Me ame bân ka didrut je hidröuiny je thaniny je ke keihen hnyei ; ke haba Ben-adada ame úkhünöng thö, me ödrin e thumeto e, ka habe, E hu tavat adre didrut úheny Samaria. 18 Ke haingen, ka habe, ödrin e ne he so, hom melö thö, ke ödrin e ne he ka vat, hom melö thö. 19 Me ame didrut úheny hnyi taun wahidröuiny je thaniny je ke keihen hnyei, k' ame hnu hotudrin utbavat. 20 Ke ödrin e ve hlingâ at ; k' ame kec at Suria, k' ame hnu ödrin Isaraela : ke ame kec bemöt Ben-adada hon hors tha e me tavat tabö hors. 21 Ke haba than Isaraela ame he me kât je hors me kariota, me hlingâ at Suria ke se hia hna hlingâ. 22 Ke ame he hakekeny but perofeta ka than Isaraela me ha kâu, ka habe, He thö, hwege thö, ke wâhmakhmeto thö únyi u me ányâ : anyin a e ka huna but me ame he ka o hmetu köu than Suria.

23 Ke haba lakeiny than Suria ödrin e ha kâu, ka habe, haba khongudrin, me, khongon je hnyei ae hut ; waleling mödrin e hwege hutin : ke ötin ka he ka vat mödrin hnyi hnyebuba, me ötin e he bi ka hwege hudrin. 24 Ke walang únyi he ka ányâ, hom dö je than únyi hnyi je hanymödrin, me ip je taben vat hwabödrin : 25 ke u me he ka aú ke utbavat hobi köu, helâji me utbavat a ta but unyâm, a je hors hwaban je hors, me je kariotâ hwaban je kariota : me ötin e he ka vat mödrin hnyi hnyebuba, me ate me he ka hwege hudrin. Me e ame löng hodrin, me ányâ helâe. 26 Ke a huna but, me haba Ben-adada ame hawâ at Suria, me he Afeka ai he ka vat me at Isaraela. 27 Ke adre me hawâ lakon Isaraela, me ha ödrin, me he ka vat mödrin : ke haba lakon Isaraela ödrin e laba cici ödra helâke li hnahat got ae wakhalet, ke unöngötö hnyei ge at Suria. 28 Ke ame o but ke aten Khong me ha ka than Isaraela, ka habe, Walang hna ha hnö Iehova, ka habe, Anyin ame ha at Suria, ka habe, haba Iehova me Khongon je hnyei ae hut, ke ca Khongon je hnyigöulen bucen, awe, oge me he ka hna köien at ang hia ka hnyi hnyamâm, m' öbun

e he ka wâhmakhmeto a inya Iehova. 29 Ke ödrin e hunuma úceiödraköu hnyi seven ta bong. Ke haba hnyi bong a seveniny ame úkhanö li vat, ke haba lakon Isaraela ödrin e hlingâ at Suria a wan haded thauzan tavat adre me he hon kânâ hnyi bong a khaca. 30 Ke ame kec dö je kolon Afeka ai ka hnyi taun ; me ame ta takou je kolon ge hak veto, a ödrin twente seven thauzan. Ke ame kec dö Ben-adada ka hnyi taun ka hnyeule eiö hnyin. 31 Haba lathnyabainy ödrin e ha kâu, ka habe, Wâ bi öhmun e löng ut a je than ae betenge je thaniny lap anyi Isaraela ; Ö u hn' öhmun he ka khavâ je ecmano ae gan nân hnyi je hnyihmun, me je tö ae gan kahmen hon je böhmun, me he ka than Isaraela : ame ne he ka omeli u. 32 Me ödrin e weikâ je ecmano ae gan nân hnyi je hnyidrin, me je tö hnyi je bödrin, me he ka than Isaraela me ha, ka habe, Haingö Ben-adada athnyabaem, ka habe, Ö u hnö nya he ka möt. Me haingen, ka habe, Hawa e möt? keik e. 33 Haba tavat adre me wâhmakhmeto, me ie belöng ame ne únykûmânen e ; ke ödrin e ha, ka habe, Kem Ben-adada. Ke haingen, ka habe, He th' öbun ka hawâ. Ke Ben-adada ame he kâu ; me e ame hawâ e ka hnyi anyin kariota. 34 Haba Ben-adada ame ha kâu, ka habe, Haba je taun a hügünâ cica ge kâmâm, oge me he ka hna ; ke u me he ka ányâ je gethen hnyi Damaseko hobi köu, helâ me hnö cica hna ányâ hnyi Samaria. Ke haingö Ahaba, ka habe, Oge me he ka hnö u me úhahinyköu ang. Me e ame ányâ úhahinyköu mē, me hna but e.

35 Ke haba ke at hanen lakon je perofeta ame ha ka hanen hnyi hofuc ho Iehova, ka habe, Ö u ku' nya. Ke höcö bi at he ka kot e. 36 Haba e ame ha kâu, ka habe, Anyin a u je ca löng hofuc ho Iehova, wâ bi, u ka he thö úhem ang unyik, ame he bi liona ka hlingö u. Ke e ame tiga ibi he but úheny unyin, me haba liona ame wâ e, me hlingâ. 37 Ke e ame wâ ke at me ha, ka habe, Ö u ku' nya. Me e ame kot e, ame kot me e ame át. 38 Haba perofeta ame he, me tot halubahingen than eú hnyi gethen, me oiyongâ e bi ge hna tube li emakan ge manoiny ban. 39 Ke ame he ehele than, me e ame hawâ than : ke haingen, ka habe, Inya athnyabaem ame he wanben vat ; ke wâ bi ke at ame saúâ könya ke at, me ha, ka habe, Tuö ju at ang : ame ne he ka hia e, ame he ányâm möt he ka bi hwaban anyin möt, ke u je ne he ka bi hwaban khaca

## I. JE THAN 21.

talan sileva. 40 Ke inya athnyabaem ame huliwa tot, me ame hia but e. Haba than Isaraela ame ha kâu, ka habe, Ame he ka helâ me hnâm hna owisa ; u je hia but ha muâ. 41 Ke e ame ie uny jut manoiny ban hnyi hnyimakan ; me than Isaraela ame wâ a e hanen je perofeta. 42 Me haingen kâu, ka habe, Walang hna ha hnö Iehova, ka habe, Anyin a u je hna at oge me hangâ únyi hnyi hnyamâm, me ame he ânyâm môt ka bi hwaban anyin môt, me lakem ka bi hwaban lakeiny. 43 Me ame he than Isaraela ka hnyi umen uma me vec me hmönyin, me o hnyi Samaria.

### HNYIMAKAN 21.

**K**E hwaban ta je únyi e, haba e hu hnyei vine i Nabotha at Jezerela, wale hnyi Jezerela, baten uma umö Ahaba than Samaria. 2 Ke Ahaba ame fuc kö Nabotha me ha, ka habe, Ham dö kõnya em hnyei vine me me ik hnyei khölak, anyin ae hakekeny e ka hnyi umök uma ; me oge me he ka ham köu ke hnyei vine ae ti so me hwaban, ke ame ne wem, me oge me ke ka ham köu mone me hwaban. 3 Haba Nabotha ame thu kö Ahaba, ka habe, Ohe, e kap ga Iehova a oge me he ka ham iny lakamök köu. 4 Ke a o but Ahaba ka hnyi umen uma me hmak me hmönyin can hofuc a ha kâu Nabotha at Jezerela ; anyin a e ame ha, ka habe, Oge me ca he ka ham köu iny lakamök, Me e ame hlöhlöu hon hnen hna mokut me hwiö hnyimakan, k' ame ca han bi. 5 Ke ame o but kâu Jezebela a âiân, me ha kâu, ka habe, Can ieu ame hmak hnyekom, me u me ca hnyi han. 6 Me haingen ka momo, ka habe, Anyin a oge me fuc kö Nabotha at Jezerela, me ha kâu, ka habe, Ham dö kõnya em hnyei vine hwaban mone ; ke ame ne wem, me oge me he ka ham köu ke hnyei vine me hwaban : ke e ame thu, ka habe, Oge me ca he ka ham köu ik hnyei vine. 7 Me haba Jezebela a âiân ame ha kâu, ka habe, Hawa u at ame musö dökhü hnyi Isaraela? Todrö, han ju, ke so e senyin dö hnyekom : haba inya oge me he bi nya ka ham köu hnyei vine i Nabotha at Jezerela. 8 Me haba momo ama sihnalimen je tusi me ha iö Ahaba, me ohmä ge haten anyin than, me e ame kunâ je tusi ka wahingat me je taben hnyi anyin taun, wale hnyat ödrin e tha laba me Nabotha. 9 Ke momo ame sihnalimen

hnyi je tusi, ka habe, Öbun e he ka ha manená ca han, me ip Nabotha hnyi dok ae görany hon tavat : 10 ke ip ju li at a li at Belial hnyi hnyimakan, he ka bi fuco e, me ha, ka habe, U je bi gan ka Khong me than. Me hwaban thö e, hom dö e, me lûâ ge veto me me mokcu. 11 Haba tavat hnyi anyin taun, wale wahingat me je taben ödrin e laba hnyi anyin taun, ödrin e ânyâ helâ me hna kun' ödrin ga Jazebela, hoton hna sihnalimen hnyi je tusi, wale e ame kunâ ködrin. 12 Ödrin e ha manená ca han, me ip Nabotha hnyi dok ae görany hon tavat. 13 Ke a o thö li at, a li at Belial, me laba hnyi hnyimakan : ke haba li at Belial ödrü me bi fuco e, jia Nabotha, hnyi hnyimakan tavat, me ha, ka habe, A hia but Nabotha bi gan ka Khong me than. Me ödrin e hom e ka hnyi hoton taun, me lûâ e ge veto me e ame mokcu. 14 Me ödrin e úkhünöng kö Jezebela me ha, ka habe, Adre hia but lüö Nabotha, ke a mokcu. 15 Ke a löng ut Jezebela a g' adre hia but lüö Nabotha, me a mokcu, haba Jezebela ame ha ko Ahaba, ka habe, Todrö, hom dö hnyei vine i Nabotha at Jezerela me em, waleji a höcö ham köu hwaban mone : anyin ae ca môt bi Nabotha, ke e a mokcu. 16 Ke a löng ut Ahaba a ga mokcu Nabotha, haba Ahaba ame tot me he ka hnyi hnyei i Nabotha at Jezerela he ka hom e me iny bi.

17 Ke ame o but hofuc ho Iehova kö Elia at Tisebi, me ka, ka habe, 18 Tödrö he thö ka úkhanö me Ahaba than Isaraela hnyi Samaria : wâ bi, e bi hnyi hnyei vine i Nabotha, wale e ame he ka hnyin he ka hom me iny. 19 Ke u me he ka ha kâu, ka habe, Walang hna ha hnö Iehova, ka habe, Hawa, u je hia but úhlingö me hügünâ minya? ke u me he ka ha kâu, ka habe, Walang hna ha ga Iehova, ka habe, Haba hnyi dok ame drem je kuli dö Nabotha me ame he je kuli ka drem minya drâm, wale drâm bi. 20 Haba Ahaba ame ha kö Elia, ka habe, E, iwanaihmiöny mönya, u je ö nya bi? Haingen, ka habe, Oge hia but ö u : anyin a u je úcü u bi he ka ânyâ hulö hnyi hnyimakan Iehova. 21 Wâ bi, oge me he ka oâ köu únyi ae kong, me aba degeci u, me subâ degecâ ga Ahaba je wainda hia, me at adre ca, me at ame he baú hnyi Isaraela : 22 ke oge me he ka wia ânyâm lap me me helâ me lap anyi Joroboama nöku Nebata, ke helâ me lap anyi Baasa nöku Ahia, anyin a

## I. JE THAN 22.

u je okûâ anyik hmönyin, me oâ hulö kö Isaraela. 23 Ke haingö Jehova ga Jezebela, ka habe, Ame he je kuli ka ön Jezebela hnyi hna up haginy Jezerela. 24 Haba hanö Ahaba ame he ka mok hnyi taun, me ame he je kuli ka an, ke haba at ame he ka mok hnyi ta hnyei, me ame he je meno ame gâ ethö ka an. 25 (Ke ba at helâ me Ahaba, wale ame ka úco e he ka anyâ hulö hnyi hnyimakö Jehova, k' ame újôngö e áiân jia Jezebela. 26 Ke e ame anyâ únyi ae ikiki hnyi hnen hna hnu hoton je idola, helâ me hna anyâ hia ge at Amora, waleji ame ob' ödra Jehova hnyi hnyimakan lakon Isaraela.) 27 Ke a löng ut Ahaba ta je hofuc eling, me e ame kia anyin úkhaú, me khavâ ecmano ae gan nân, k' ame ca han, k' ame mokulec ec mano ae gan nân, me he menyöng. 28 Me ame o but hofuc ho Jehova kö Elia at Tisebi, ame ha, ka habe, 29 Hawa, u je wâ but a Ahaba ame oúhnyúkongo e bi hnyi hnyimakök? awe, anyin a e ame oúhnyúkongo e hnyi hnyimakök, me oge me ca he bi nya ka oâ únyi ae kong hnyi bongon ta je bong: ke o ge me he bi nya ka oâ únyi ae kong ka anyin lap hnyi ta je bong bongon nokon.

### HNYIMAKAN 22.

**K**E adre me laba hnyi kun ta huna ke ba vat anyin at Suria me Isaraela. 2 Ke haba hnyi huna a kuniny, haba Jehosafata tnan Juda ame o ka than Isaraela. 3 Ke haba than Isaraela ame ha ka lakeiny, ka habe, Hawa, e ca khan' öbun a itin Ramothe-gileada, ke ötin e laba hnyibu, me ca húgûná e únyi hnyi hnyamen at Suria? 4 Me e ame ha kö Jehosafata, ka habe, Hawa, u me he ka tha he mönya he ka vat hnyi Ramothe-gileada? Me haingö Jehosafata ka than Isaraela, ka habe, Iny úcú möu, ke úcú lakeik me lakem, ke úcú halek je hors me halem je hors. 5 Ke haba Jehosafata ame ha ka than Isaraela, ka habe, Ö u hnö thö hofuc ho Jehova hnyi bong ang. 6 Me haba than Isaraela ame úkhacakouâ ta je perofeta, helâ me foa haded, me ha ködrin, ka habe, Hawa, oge me he ka he Ramothe-gileada ai he ka vat, oge ma hna ju? Haingödrin, ka habe, He thö anyin a ame he Jehova ka hna e ka hnyi hnyamen than. 7 Ke haingö Jehosafata, ka habe, E ba minya but ke perofeta anyi Jehova ang, me ötin e he ka hnö e

minya? 8 Haba than Isaraela ame ha kö Jehosafata, ka habe, Khaca biju at jia Mikaia nöku Imela, me e khan' ötin he ka hnei Jehova a deny e : ke so bi húkötianök e ; anyin a e ame ca perofeta únyi ae so gak, ke únyi bi ae kong. Ke haingen Jehosafata, ka habe, Than, ca ha helâe. 9 Haba than Isaraela ame hawâ ke eunuka, me ha, ka habe, He thö ka ie hawo Mikaia nöku Imela. 10 Ke baha than Isaraela me Jehosafata than Juda ödrü me ve laba hon anyidru li theron, ödre khavâ je khaú-ödrü, hnyi dok ae ba ta únyi hnyin hnyi hna didrö ka hnyi homagöuleny Samaria ; ke haba ta je perofeta hia ödrin e perofeta hnyi hnyimaködrü. 11 Ke haba Zedekia nöku Kenaana ame anyâ li faoiny meno a fao bi, me ha, ka habe, Walang hna ha hnö Jehova, ka habe, U me he ka hagutâ at Suria ge li únyi ang, ke ne o but ame hi' ödrin dut. 12 Ke haba ta je perofeta hia adre me perofeta helâe, me ha, ka habe, He thö Ramothe-gileada ai me hnahic : anyin ame he Jehova ka hna e ka hnyi hnyamen than. 13 Ke haba úthumetu at a hawo Mikaia ame ha kâu, ka habe, Wâ bi, walang ang, khaca thibi hofuc hwan je perofeta, ödrin e omanená so ka than : e na so minya ju hwâm e me helâ me hodrin, ke hnyi ha thö únyi ae so. 14 Ke haingö Mikaia, ka habe, Kia inya Jehova, a haba únyi ame he Jehova ka ha, wale thibi e oge me he ka ha. 15 K' ame o but ka than, me haingen than kâu, ka habe, Mikaia lö, hawa, öhmu ma he Ramothe-gileada ai he ka vat, ke öhmu ma hna ju? Haingen kâu, ka habe, He thö me hnahic ; ke ame he Jehova ka hna e ka hnyi hnyamen than. 16 Ke haingen than kâu, ka habe, U me he ka ove khemanyâm könya a u me ca he ka ha könya ke hofuc ke hna-thu thibi hnyi iö Jehova? 17 Ke haingen, ka habe, Oge wâ but Isaraela hia adre me tot monu hon je bucen, helâ me ta je mainoe ae ba at ame tuö : ke haingö Jehova, ka habe, E ba tuhan tavat ang ; hamödrin he ka ve hmetu ka hnyi je hnyabadrin hnyi hnahic. 18 Haba than Isaraela ame ha kö Jehosafata, ka habe, Awe, oge ca ha köu, a e ame ca he ka perofeta únyi ae so könya, ke únyi bi ae kong? 19 Ke Mikaia ame ha, ka habe, Anyin a wale löng ju u hofuc ho Jehova : oge me ö Jehova ame tabâ anyin theron, k' ame útitilen unyin ta je dö hia hnyi drany hnyi ke keihen metâ me meny. 20 Ke haba Jehova ame ha, ka

## I. JE THAN 22.

habe, Ie at ame he ka iyawö Ahaba me me he ka he me ta hnyi Ramothe-gileada? Ke ame ha helâng ke at, ke helâe ke at. 21 Ke ame o but ke hanu me tot hnyi hnyimakö Iehova, me ha, ka habe, Oge me he bi nya ka iyawâ e. 22 Ke haba Iehova ame ha kâu, ka habe, U ma he ka kâmâu? Me haingen, ka habe, Oge me he ka he but, ke oge me he bi nya a hanu ae thoi hnyi hnyimen anyin ta je perofeta hia. Haingen, ka habe, U me he ka iyawâ, me u me he minya ka tom: he thö, me ânyâ helâe. 23 Ke walang ang, wâ bi, a hia but Iehova ip hanu ae thoi hnyi hnyimen ânyâm ta je perofeta eang; ke a hia but Iehova ha únyi ae kong gam. 24 Haba Zedekia nöku Ke-naana ame hakekenyâ me khaú wahicö Mikaia, me ha, ka habe, A deny ua hanu Iehova úheny unyik he ka ha bi köu? 25 Ke haba Mikaia ame thu, ka habe, Wâ bi, u me he ka wâ hnyi bong u me he ka didrö ka hnyi hnyeule eiö hnyin he ka lubaduöng. 26 Me haba than Isaraela ame ha, ka habe, Hum Mikaia thö, me hom e kö Amona at ame musö taun, me Joasa nokon than; 27 me ha, ka habe, Walang hna ha hnen than, ka habe, Ip dö at ang hnyi uma ceat, me hân ge aretoiny vec me köien vec, ke ne o but oge me o me hnahic. 28 Ke haba Mikaia ame ha, ka habe, U je ne he ka o hmetu me hnahic, awe, a ca ha Iehova a deny inya. Me haingen, ka habe, Löng ju öbun tavat hia thithö. 29 Ke haba than Isaraela me Jehosafata than Juda, ödrü me he Ramothe-gileada ai. 30 Ke haingen than Isaraela kö Jehosafata, ka habe, Oge me he ka oiyongi nya bi, me hnyi vat: ke u me he ka khavâ ânyâm je úkhaú. Me haba than Isaraela ame oiyongâ e bi, me hnyi vat. 31 Ke haba than Suria ame hûna ka je taben anyin je kariota a thöte tu, me ha, ka habe, ca he ka vat me tavat ae úhnyúkong me gan, ke hake than Isaraela thibi. 32 Ke haba je taben kariota ödrin e ö Jehosafata, me ödrin e ha, ka habe, Wale but ang than Isaraela me ödrin e saú kâu he ka kot: ke haba Jehosafata ame hongot göranyai. 33 Ke haba je taben kariota ödrin e wâ a ca than Isaraela e, me ödrin e hna but e. 34 Ke haba ke at ame hlec mono fana, me ame aat dö than Isaraela hnyi wanben hna úhújâköuâ úkhaúen vat: anyin a wale e ame ha ka at ame owisa anyin kariota, ka habe, Saú thö, me hum nyâ úheny hnyi hna vat; anyin oge aat dö. 35 Ke gan

tot vat hnyi bong eling; ke adre me otilâ than hon anyin kariota cicö at Suria, me e ame mokcu hnyi sahac: ke ame hingölö dren únyi hnyi aat ka hnyi hnyin kariota. 36 Ke ame he úthumetu háâng ka hnyi wanben je utbavat e ka he but ka dit seúnö, ka habe, Ve hmetu but ka hnyi anyibun je taun me jeibun. 37 Me ame mokcu than, ke adre me hom Samaria ai, me ödrin e konâm than hnyi an hnyi Samaria. 38 K' adre me hneú kariota hnyi an Samaria, ke haba je kuli ödrin e drem dren; (ke haba je momo hnyi gethen ödrin e soú eling;) helâ me hofuc ho Iehova waleji e ame ha. 39 Ke haba kolon je hna ânyâ hnö Ahaba, me anyin ta je huliwa, me uma nyon elefan waleji e ame op, me ta je taun hia e ame op, hawa adre ca sihnalimen hnyi tusi hnân ha je bong bongon je than Isaraela? 40 Ke ame mokut ut Ahaba tha e me lakamen, ke ame than biju Ahazia a nokon hwaban.

41 Ke haba Jehosafata nöku Asa ame hwân he ka thaniny Juda hnyi huna a vaki Ahaba thaniny at Isaraela. 42 Ke thöte faiv je hunai Jehosafata hnyi hna otilâ e ka than; ke e ame musi hnyi Jerusalema twente faiv je huna. Ke Azuba ien hnyien, momo nöku Silehi. 43 Ke e ame vhenö gethen de Asa a kamen; e ame ca saú únyi hnyin, ame ânyâ únyi ae wisa hnyi hnyimakö Iehova: ke so bi adre me ca ohia je dok ae görany; ke haba tavat adre me bi hut bala me leú ütö ae bo so hon je dok ae görany. 44 Ke haba Jehosafata ame ânyâ úsoköu me than Isaraela. 45 Ke haba kolon je hna ânyâ hnö Jehosafata, me tang hwegien wale a manen gan, me hnen minya hna vat, hawa, adre ca sihnalimen hnyi tusi hnân ha je bong bongon je than Juda? 46 Ke haba kolon tavat adre me hwen sodoma, a je kolon biju hnyi je bong bongu Asa a kamen, me e ame ohí' ödrin únyi hnyi hnyei. 47 Ke ba than hnyi Edoma: ke haba ke at ame musi. 48 Ke haba Jehosafata ame tibet je huiny Tasesa, me me he Ofira ai he ka haudin gol: k' ame ca kec bi je hu, anyin a hmouca but je hu hnyi Eziona-gebera. 49 Ke haba Ahazia nöku Ahaba ame ha kö Jehosafata, ka habe, E so e tha he je lakeik me lakem hnyi je hu. Ke ca we Jehosafata bi. 50 Ke ame mokut ut Jehosafata tha e me lakamen, me adre me konâm e me lakamen hnyi taun anyi Davita a kiben: ke ame than biju Jorama a nokon hwaban.



## II. JE THAN 1.

51 Ke haba hnyi hunä a seventini Jehosafata than Juda, ame hwân Ahazia nöku Ahaba he ka musö at Isaraela hnyi Samaria, ke e ame musi hnyi Isaraela hnyi lo li hunä. 52 Ke e ame ânyâ hwakecin ae kong hnyi hnyimakö Iehova, me vhenö gethen deny kamen, me gethen deny hin-

yen, me hnyi gethen de Jeroboama nöku Nebata, waleji hnyi hnen hna oâ hulö ka at Isaraela. 53 Ke e ame bi athnyabai Baala, k' ame khudrung kâu, me ame okûâ hmönyin anyi Iehova, Khongu Isaraela, hoton hna ânyâ hia hnen kamen.

## TUSINY JE THAN, TUSI A LOINY.

### HNYIMAKAN 1.

**K**E haba at Moaba ödrin e ûkhin fuc ka at Isaraela hwaban dö a mokcu Ahaba. 2 Ke haba Ahazia ame kölu ûnyi hnyi hna pewanâ mamalama hnyi hnyeule-ny ethö, hnyi Samaria, me e ame moko: ke e ame kunâ je ûthumetu, me ha ködrin, ka habe, He thö ka hnei Bele-sebuba kongon Ekerona me inye he ka möt ûnyi hnyi mok ang. 3 Ke haba angela anyi Iehova ame ha kö Elia at Tisebi, ka habe, he thö ka ûkhanö me je ûthumetu anyin than Samaria me ha ködrin, ka habe, Hawa, anyin ae ba Khong hnyi Isaraela me öbun e he ka hnei Bele-sebuba khongon Ekerona? 4 Anyin a wale, walang hna ha hnö Iehova, kâ habe, U me ca he ka ut ûnyi hnyi hna mokut u me mokut hon, ke e hnathu u me he ka mokcu. Haba Elia ame he but. 5 Ke ame hmetu ju kâu je ûthumetu, ke e ame ha ködrin, ka habe, Anyin a iéü öbun e hmetu? 6 Ke ödrin e ha kâu, ka habe, Haba ke at ame o me ûkhanö möhmun me ha köhmun, ka habe, He hmetu thö ka than at a kün' öbun, me ha kâu, ka habe, Walang hna ha hnö Iehova, ka habe, Hawa, anyin ae ba Khong hnyi Isaraela, me u me ûkhünöng he ka hnei Bele-sebuba khongon Ekerona? anyin a wale u me ca he ka ut ûnyi hnyi hna mokut u me mokut hon, ke e hnathu u me he ka mokcu. 7 Me e ame ha ködrin, ka habe, Iéü bongon at ame o me ûkhanö möbun, me ha köbun hofuc e? 8 Ke ödrin e thu kâu, ka habe, At ae leün unyin, k' ame weikâ unen meno. Me e ame ha, ka habe, Elia e at Tisebi. 9 Haba than ame kunâ kâu taben tavat a fifte tha e me anyin tavat a fifte. Ke e ame ölö but kâu: ke wâ bi e ame laba hon ban dok ae hut. Ke e ame ha kâu, ka habe, Aten

Khong lö, haingen than, Utut. 10 Ke haba Elia ame thu me ha ka taben tavat a fifte, ka habe, Oge ne aten Khong, me hamen meic he ka gâ ûnyi hnyi drany me le degeci u me tavat a fifte unyâm. Me ame gâ but meic ûnyi hnyi drany me le degecâ e me tavat unyin a fifte. 11 Ke e ame kunâ hmetu kâu ke taben tavat a fifte me tavat a fifte unyin. Me e ame thu me ha kâu, ka habe, Aten Khong lö, walang hofuc hwan than, ka habe, Ie utut. 12 Ke Elia ame thu me ha ködrin, ka habe, Oge ne aten Khong, me hamen meic he ka gâ ûnyi hnyi drany me le degeci u me fifte unyâm. Me ame gâ but meic hlogon Khong ûnyi hnyi drany, me le degecâ e me anyin fifte. 13 Ke e ame kunâ hmetu ke taben tavat a fifte, at a kuniny, a tha e me anyin fifte. Me ame ölö thö taben tavat a fifte a kuniny, me o me ciboucâ hnyi hnyimakö Elia, me ame khöü kâu, me ha kâu, ka habe, Aten Khong lö, ö u öünyihnathöa anyik möt, me möt minya anyin tavat a fifte eang a lathnyabaem. 14 Wâ bi, ame gâ meic ûnyi hnyi drany me le degecâ lo li taben tavat a fifte a tha ödrü me anyidru li ve fifte: ke haba walang ang e so e ûnyi hnathu anyik möt hnyi hnyimâkâm. 15 Haba angela anyi Iehova ame ha kö Elia, ka habe, Tha utut mē; ca outen e. Me e ame tot me tha utut mē ka than. 16 Ke e ame ha kâu ka habe, Walang hna ha hnö Iehova, ka habe, Anyin a u je kunâ je ûthumetu he ka hnei Bele-sebuba khongon Ekerona, hawa can ae ba Khong hnyi Isaraela he ka hnö hofuc a hwan? anyin a wale u me ca he ka ut ûnyi hnyi hnâm hna mokut, ke u me he bi ka mokeu. 17 Me e ame mokcu helâ me hofuc ho Iehova wale a ha Elia. Ke ame hwân ka than Jorama hwaban, hnyi hunä a loi Jorama nöku

## II. JE THAN 2.

Jehosafata than Juda ; anyin ae ba nokon da. 18 Ke haba kolon je hna ânyâ hnö Ahazia, waleji e ame ânyâ, hawa, adre me ca sihnalimen hnyi tusi hnân ha je bong bongon je than Isaraela ?

### HNHYIMAKAN 2.

**K**E haba hnyi ûen ame he Iehova ka hum Elia hnyi drany ai a deny höu, me Elia ame tha he me Elisaia úheny Gilegala. 2 Ke haingö Elia kö Elisaia, ka habe, Ö u me laba ju ang ; anyin a Iehova ame kunö nya Beth-ela ai. Ke haingö Elisaia, ka habe, Kia inya Iehova, ke kia inya u, a oge me ca he ka hnö u. Me ödrü me tha he Beth-ela ai. 3 Ke ame o kö Elisaia lakon je perofeta hnyi Beth-ela me ha kâú, ka habe, Hawa, e khatö u a g' ame he Iehova ka hom at ame nö u únyi gam hnyi bong ang ? Me haingen, ka habe, E khanö nya, ca ha bi. 4 Haba Elia ame ha kâú, ka habe Elisaia lö, ö u laba biju ang ; anyin a Iehova ame kunö nya Jeriko ai. Haingen, ka haba, kia inya Iehova, ke kia iuya u, a oge me ca he ka hnö u. Me ödrü me tha o hnyi Jeriko. 5 Me ame o kö Elisaia lakon je perofeta hnyi Jeriko, me ha kâú, ka habe, Hawa e, khatö u but a g' ame he Iehova ka hom at ame nö u únyi gam hnyi bong ang ? Ke e ame thu, ka habe, E, e khanö nya but ; ca ha bi. 6 Haba Elia ame ha kâú, ka habe, Ö u laba biju ang ; anyin ame kunö nya Iehova Joridano ai. Ke haingen, ka habe, kia inya Iehova, ke kia inya u, a oge me ca he ka hnö u. Me ödrü me tha he. 7 Ke haba fifte tavat hanen lakon je perofeta ödrin e he me útililen cici ödrü ke úsákâúö ; ke haba ödrü, ödrü me tot hnyi baten Joridano. 8 Haba Elia ame hom anyin úkhaú me vhec, me wádrâ wia, me kot wagewe, me ame khekhe lo but, me ödrü me he hanyáúú hnyi dok ae mada. 9 Ke ödre hia but he hanyáúú, haba Elia ame ha kö Elisaia, ka habe, Bethé ha únyi oge me he ka ânyâ hobi köu me adre me tiga ca hum nya gam. Haba Elisaia ame ha, ka habe, Ö u he ka olo ham könya hanom. 10 Ke e ame ha, ka habe, Únyi e ae hmak u je sumátâ : ke so bi, u je ne ö nya hnyi úen adre me hum nya gam, ame he ka helâe köu ; ke ame ne ba, ame ca he ka helâe. 11 Ke ödrü me tiga he, me úhnenamö, me wâ bi, kariota meic, me je hors meic, wale ame óusákâúödrüköuö-

dru ; ke haba Elia ame ölö hnyi drany ai a deny höu. 12 Ke haba Elisaia ame wâ e, me e ame hongot, ka habe, Cica, cica, je kariota anyin at Isaraela me aten tabö hors ! Ke ame ca wâ hmetu bi e : me ame kât anyin bi je úkhaú me kia luâ. 13 Ke e ame hom minya úkhaú anyi Elia wale a kölu gan, me he hmetu me tot hnyi baten Joridano. 14 Ke e ame hom úkhaú anyi Elia, wale a kölu gan, me kot wagewe, me ha, ka habe, Ewa Iehova Khongu Elia ? ke a hia but kot wagewe me ame khekhe lo but, me Elisaia ame he hanyáúú. 15 Ke a wâ but e ge lakon je perofeta hnyi Jeriko, hnyat ödrin e tot cicö e, me ödrin e ha, ka habe, Ame ta hanu Elia ka hnyi hu Elisaia. Me ödrin e he me úkhanö mē, me nom ju hnyi-kânâi hnyi hnyimakan. 16 Ke ödrin e ha kâú, ka habe, Wâ bi, wale unyin lathnya-baem hnyat ae hwege a fifte ; e so ödrin e he me elâm at ame nö u : ame ne hom e ge hanu Iehova, me khúâ ka hnyi hon ké bucen, ame ne hnyigöulen bucen. Me haingen, ka habe, Ca he öbun ka úkhúnöng. 17 Ke ödrin e újengö e ke ne o but e ame hmehma, me e ame ha, ka habe, Úkhúnöng dö. Anyin a wale ödrin e kunâ hnyat a fifte ; ke ödrin e elâm hnyi kun ta bong, ke ödrin e ca wâ bi. 18 Me ödrin e o hmetu thö kâú, ke e ame tiga laba hnyi Jeriko ; me haingen ködrin, ka habe, Hawa, oge me ca ha köbun, ka habe, Ca he ?

19 Ke ame ha kö Elisaia tavat aten taun, ka habe, Than lö, wâ bi, e so úlabainy taun ang a u me wâ : ke kong bi je köiö, ke hnyei бага kânâiny. 20 Me haingen, ka habe, Hom but jem könya kaia ae teb únyi, ke bi sáltiny. Me ödrin e hom kâú. 21 Me e ame he ka hnyi hna pupuainy je köiö, me khúâ sált ka hnyin, me ha, ka habe, Walang hofuc ho Iehova, ka habe, Oge hia but osoâ je köiö ang ; k' ame ca he ka o hmetu mok únyi gan, me hnyei бага. 22 Ke adre me osoâ köiö ke ne o but hnyi bong ang, hoton hofuc ho Elisaia waleji e ame ha.

23 Ke e ame he úheny e Beth-ela ai ; ke ame he eú hnyi gethen, me ame o je waında únyi hnyi taun, me hluma e, me ha, ka habe, Hadróú, ölö thö ; hadróú, ölö thö. 24 Me e ame hwiö me ö 'drin, me hang' ödrin hnyi iö Iehova. Me ame o li bea momo únyi hnyi hnyot me ki' ödrin je waında a fate tu. 25 Ke e ame he úheny e ka hnyi bucen Karemela, me hmetu úheny e Samaria ai.

## II. JE THAN 3.

### HNYIMAKAN 3.

**K**E haba Jorama nöku Ahaba ame hwân ka musî hon Isaraela hnyi Samaria hnyi huna a eitini Jehosafata than Juda, ke twelv but hunainy anyin musî. 2 Ke e ame ânyâ ûnyi ae kong hnyi hnyimakö Iehova; ke so bi ca helâ me kamen, me hinyen: anyin a e ame degec veto ame tot anyi Baala a ânyâ kamen. 3 Ke so bi e ame kece ka je hulö anyi Jeroboama nöku Nebata, wale ame okûâ je hwakecin ae kong anyin at Isaraela; e ame ca saû ûnyi hnyin.

4 Ke Mesa than Moaba at ae tren mamoe; ke e ame fâtâ ka than Isaraela leûnen je nokon mamoe a wan haded thauzan, me je mamoe бага a wan haded thauzan. 5 Ke hwaban dö mok anyi Ahaba, me ame ûkhin fuc than Moaba ka than Isaraela. 6 Ke haba Jorama than ame he ûheny hnyi Samaria hnyi ûen eling, me hawâ at Isaraela hia thithö. 7 Ke e ame he me ûkhû-nöng kö Jehosafata than Juda, ka habe, A hia but than Moaba ûkhin fuc kõnya: hawa, ötu ma tha he Moaba ai he ka vat? Haingen, ka habe, Ötu ma tha he: inya ang helâ möu, me lakeik helâ me lakem, me halek je hors helâ me halem je hors. 8 Ke haingen, ka habe, Ewa detu? Ke e ame thu, ka habe, Detu hnyi hnyebuba hnyi Edoma. 9 Me ame tha he than Isaraela, me than Juda, me than Edoma: me ödrin e he igigilö hnyi seven ta bong: ke ba köiö hobi kâu je utbavat me je meno ödrin e tha he mē. 10 Ke haingen than Isaraela, ka habe, Ekölö, Iehova ame ûkhacaköüâ kun ta than he ka hn' ödrin ka hnyi hnyamen at Moaba. 11 Haba Jehosafata ame ha, ka habe, Hawa, e ba perofeta anyi Iehova eang, m' ötin e he ka hnei Iehova a deny? Me ame thu ke athnyabainy than Isaraela, ka habe, Waleû Elisaia nöku Safata, at ame hingölö köien li hnyamö Elia. 12 Ke haingö Jehosafata, ka habe, E unyin hofuc ho Iehova. Me ame he kâu than Isaraela, me Jehosafata, me than Edoma. 13 Ke Elisaia ame ha ka than Isaraela, ka habe, Ieû gak köu? he bi thö ka je perofeta anyin kâmâm, me je perofeta anyin hinyâm. Ke haingen than Isaraela kâu, ka habe, Obe, anyin a Iehova ame ûkhacaköüâ kun ta than eang he ka hn' ödrin ka hnyi hnyamen at Moaba. 14 Ke haingö Elisaia, ka habe, Kia inya Iehova tuhan sabaoth wale oge me tot hnyi hnyimakan, oge ne ca ogâ-

nâ hnyimakö Jehosafata than Juda, me oge me ca he bi nya ka bwele köu, me ö u. 15 Ke walang ang hom but kõnya ke at ame ânyâ ûnyi khumöng. Ke ame tiga ânyâ ûnyi khumöng, me ame o but kâu hnyamö Iehova. 16 Me e ame ha, ka habe, Walang hna ha hnö Iehova, ka habe, Hiny ju je thop ae se hnyi hnyegöulen bucen eang. 17 Anyin a walang hofuc ho Iehova, ka habe, Öbun e ca he ka wâ ang, me we, ke so bi ame he ka unöngöt hnyigöulen bucen eling ge köiö: m' öbun e he ka ic, a öbun, me je hnahat halebun, me omeno a halebun. 18 Ke ûnyi ae hâhâ e kö Iehova: ke e ame he bi ka hna tavat Moaba ka hnyi hnyamöbun. 19 Ke öbun e he ka kot je taun hia adre up haginy, me je taun hia ae so, me sö degecâ je üö ae so hia, me hlöng je hna pupuainy je köiö, me okongoâ je utkânâ hia ae so ge veto. 20 Ke haba hnyi hnyomakatu hnyi ûen adre me hudo hudiny han, me wâ bi, ame o thö köiö hnyi gethen ûheny Edoma, me ame unöngötö hnyei ge köiö. 21 Ke a löng ut at Moaba a ga o thö je than he ka vat mödrin, me ödrin e hawâ ûkhacaköüâ tavat hia hnyat ae khan' ödrin he ka khavâ khaûen vat, ke ne o but ka wahingat minya, me ödrin e tot hnyi hnyigot. 22 Ke ödrin e vesâ hnyi hnyomakatu kong, ke ame hat dö seûnö hon köiö, ke haba at Moaba ödrin e wâ köiö cici ödrin, k' ame helâ me dra: 23 me haingödrin ka kabe, Waleû dra; adre hia but kot je than, k' ödrin e ivatköu: anyin a wale, at Moaba lö, ate me he bi walang ka sei. 24 Me ödrin e o but ka hnyi hunuma anyin at Isaraela, me ame tot at Isaraela me kot at Moaba, m' ödrin e kec hnyi hnyimaködrin: ke ödrin e ûhnûhnû me kot tilâ at Moaba. 25 Ke ödrin e hagutâ hnyikânâi ta je taun; me ve khüö veto hon je utkânâ hia ae so, me ounöngötâ; ke ödrin e hlöng je hna pupuainy köiö hia, me sö degecâ je üö hia ae so: k' adre hnen biju hnyi Kira-haraseth je vetoiny; k' ame he igigilö e tavat koloú, me kot e. 26 Ke a wâ but than Moaba a g' ame hwege but vat hon, me e ame hom tavat a seven haded, tavat hok hele vat, me me thu vat ka than Edoma: ke ca khan' ödra. 27 Me e ame hom nokon a atö, at ame he ka than hwaban, me hudo e hnân hudiny leû hon hna up haginy. Ke e gan hmâ anyidrin hmönyin ka at Isaraela: me ödrin e hna e me he ka hnyi idrin hnyei.

## II. JE THAN 4.

### HNYIMAKAN 4.

**K**E ame tenge kö Elisaia ke momo áiân ke nokon je perofeta, me ha, ka habe, A mokcu öök athnyabaem : ke u me wâ e at ame outö Iehova, athnyabaem : ke ame o but at waleji e ame hom gufa gan, he ka hom lakuk li бага he ka bi athnyaba. 2 Haba Elisaia ame ha ka momo, ka habe, Ieú oge me ányâ hobi köu? ha thö könya ; ie únyi unyâm hnyin umâm uma? Haingen momo, ka habe, E ba but únyi unyik a athnyabaem hnyin uma, ke tap wakaco thibi. 3 Ke e ame ha, ka habe, he thö ka me sumâtâ ke je kaia unyin tavat hia adre me laba hakekenyi u, je kaia ae ba önyen ; ca owakhaletâ bi. 4 Ke u me he ka tha didrö me lakom me hlöng hwanumâm, me hingâlâ ka hnyi je kaia hia eling, me ip je kaia ae unöngöt. 5 Haba momo ame he but gan, me hlöng hwanumen me lakon ; ke ödrin e hom je kaia kâu, me e ame hingâlâ. 6 K' ame unöngöt je kaia, haba momo ame ha ka nokon, ka habe, Hö jem ke kaia. Ke haingen kâu ka habe, E ba hmetu kaia. Me ame todru wakaco. 7 Ke haba momo ame he me thumeto aten Khong. Ke haingen, ka habe, He thö ka úco wakaco me bi hwaban hna hok gufa, ke u me he bi me lakom ka möt ge kolon.

8 Ke haba hnyi ke bong Elisaia ame he Sunema ai, ke wale ke momo ae únyi hna-thu ; ke e ame thawâ e he ka han. Ke haba hnyi je úen e ame vheno gethen, e ame labö saú kâe he ka han. 9 Ke momo ame ha ka áiân, ka habe, Wâ bi e khanö nya a aten Khong ae kap e, at ame labö he eang. 10 Ötu me he ka ányâ hnyeule ae úhnyükong hon hna up hagin ; ke ötu me he ka ip eling hobi kâu, hna mokut, me laulau, me tap, me taben lamepa : ke e ka o kötu, me ame he ka saú kâe. 11 Ke hnyi ke bong e ame o kâe, me saú ka hnyi hnyeule, me mokut eling. 12 Ke e ame ha kö Gehazi a athnyabainy, ka habe, Hawâ thö momo Sunema. Ke e a hia but hawâ, me e ame tot hnyi hnyimakan. 13 Ke e ame ha kâu, ka habe, Ha thö ka momo, ka habe, Wâ bi, u je kong hnyekuni öhmu ge ta je únyi hia eang adre penapena ; ie únyi adre me he ka ányâ hobi köu? hawa, u je wem adre me he ka haiö u ka than, ame ne taben utbavat? ke momo ame ha ka habe, Inya oge me laba thibi me je lahanök. 14 Ke haingen, ka habe, Ie únyi adre me he ka ányâ hobi

kâu momo? Haba Gehazi ame thu, ka habe, E ba nokon, ke hingat ut áiân. 15 Me haingen, ka habe, hawâ hmeto. Ke a hia but hawâ, me ame tot momo hnyi hwanuma. 16 Me ame ha, ka habe, Cicö úen ang hnyi huna ame he ka o, me u ma he ka delúâ ke da. Haingen momo, ka habe, Ohe, than a aten Khong u me ca he ka thoi ka athnyabaem. 17 Ke ame erkin dut momo me hnokoâ da hnyi úen eling hnyi huna ame o wale a ha Elisaia ka momo. 18 Ke ame gan dut da, me haba hnyi ke bong e ame he unyin kamen ka tavat subö hwit. 19 Ke haingen ka kamen, ka habe, Ekölö ge bök, ekölö ge bök. Me e ame ha ka athnyabainy, ka habe, Hom dö ka hinyen. 20 Ke e ame hom e, me hom ka hinyen, me e ame laba hon li jevan momo ke ne o but jebigö, k' ame mokcu. 21 Ke haba momo ame öliâ, me ip e hon hna mokut a hnen aten Khong, me hlöng hwanumen, me didrut. 22 Ke haba momo ame hawâ áiân me ha, ka habe, Ö u kunâ thö könya ke athnyaba me asina, m' inye he ka wadring ka aten Khong, me ie hmetu. 23 Me haingen, ka habe, Anyin a ieú u me he kâu hnyi bong ang? ke ca teb únyi tehi me sabath ang. Me haingen momo, ka habe, ame he ka so. 24 Ke haba momo ame húkâlâ taben hon asina, me ha ka athnyabainy, ka habe, Alen logotâ me he ; ke ca obeci nya hnyi úbek iny ka ca ha bi köu. 25 Ke ame he momo me o ka aten Khong hnyi bucen Karemela. Ke ame wâ, momo ke tiga sákâú, me ame ha kö Gehazi a athnyabainy, ka habe, Wâ bi, ame he jem momo Sunema : 26 ö u wadring dö walang ang he ka úkhanö me, me hnö, ka habe, Hawa, u so? ke so áiâm? ke so wanakat? Me haingen momo, ka habe, E so. 27 Ke ame o but momo ka aten Khong hnyi dok ae hut, me ame kât li can. Me haba Gehazi ame hakekeny he ka hagutâ momo ; ke haingen aten Khong, ka habe, Ca ányâ : anyin ae vec hnyekon momo ; k' ame ikhâlâ gak Iehova a ca thumetu nya. 28 Ke haingen momo, ka habe, Hawa, than a tuhök lö, oge me sumâtâ gam da? Hawa, oge me ca ha köu, ka habe, Ca iyawö nya bi? 29 Me e ame ha kö Gehazi, ka habe, Húkâlâ ju wen hnyekom, me hom anyik uci hnyi hnyamâm, me he : ame ne úkhanö möu ke at, ca iouny mē ; ke ame ne fuc köu ke at, ca fuc bi : ke u me he ka ip anyik uci hon hnyimakan wanakat. 30 Haba hinyen wanakat ame ha, ka habe, Kia inya Iehova, ke kia inya u, a oge me ca he ka

## II. JE THAN 5.

hnö u. Me e ame todrö me he hoton momo. 31 Ke ame bö Gehazi k' ame bilidru, me ip uci hon hnyimakan wanakat, ke ba hwan, ke ame ca löng. Me e ame hmetu he ka úkhanö mē, me ha káu, ka habe, Ame ca hmak bi wanakat. 32 K' ame o but Elisaia ka hnyi uma, me wá bi, a mokcu wanakat, ke adre ip hnyi hon hnen hna mokut. 33 Me e ame didrö me hlöng hwanumödrü, me hic kö Iehova. 34 Me e ame he me mokut takou wanakat, me ip hnyimen hon hnyimen wanakat, me li emakan hon li emakan wanakat, me li hnyamen hon li hnyamen wanakat: me e ame hlöhlöu hon, me ame mage unyin wanakat. 35 Ke e ame hmetu me okhaca ngenü hnyi hnyin uma; me e ame ölö me hlöhlöu hnyi hon wanakat: ke haba wanakat ame ibi osewen cingö, me ame bwela thö li emakan wanakat. 36 Me e ame hawo Gehazi, me ha, ka habe, Hawa thö at Sunema. Me e ame hawá e. K' ame o but momo káu, me e ame ha, ka habe, Hom dö nokom da. 37 Ke haba momo ame didrö me ta ju ka hnyi li can, me nom hnyikânái; me e ame hom nokon da, me didrut.

38 Ke Elisaia ame hmetu Gilegala ai: ke ame hmiá thö hnyei; ke ame laba hnyi hnyimakan lakon je perofeta: me e ame ha ka athnyabainy, ka habe, Ip ju öt ae gan me öli jeü hobi káu lakon je perofeta. 39 Me ame he ke at ka hnyi hnyot he ka uö khölak, me e ame wá ke úkaia hnyi hnyot me tau wan, me unöngötö ulainy me hom, me heleá ka hnyi öt jeü; anyin adre ca wáhmakhmeto úö e. 40 Ke ödrin e hingálá hobi káu tavat he ka han. Ke ödrin e tiga han hna öt jeü, me ödrin e kuku, me ha, ka habe, Aten Khong lö, e hu hnán mekiny hnyin öt. Ke ca khan' ödrin bi he ka han. 41 Haba e ame ha, ka habe, Hok falawa. Me e ame ip e hnyi öt; me haingen, ka habe, Hingálá but hobi káu tavat, m' ödrin e han. Ke ba but kongon hnyin öt.

42 Ke ame o but ke at úheny Baalasalisa, ke ame hom ka aten Khong aretoiny je wan a bân, a twente je areto bali, me je ban hwit ae hát hnyi tangen tang. Me haingen, ka habe, Ham dö ka tavat m' ödrin e han. 43 Haba athnyabainy ame ha, ka habe, Hawa, oge me he ka ip e hnyi hnyimakan tavat a wan haded? Me ame thu, ka habe, Ham dö ka tavat m' ödrin e han; anyin a walang hna ha hnö Iehova, ka habe, ödrin e he ka han, k' ame he bi ka hu kolon.

44 Me e ame ip hnyi hnyimaködrin, me ödrin e han me hu kolon bi, hoton hofuc ho Iehova.

### HNYIMAKAN 5.

**H**ABA Naamana a taben vat anyin than Suria, me e at ae gan unyin tuhan, k' adre me ogâná, anyin a Iehova ame omelö at Suria a deny e; ke e at ae hwege, ke lepera bi. 2 Ke haba at Suria ödrin e hia but he a únya vat, k' adre húgúná únyi hnyi hnyei Isaraela ke in ae úhnyúkong; k' ame bi athnyaba ka öiö Naamana. 3 Ke haba in ame ha ka momo at ame muso e, ka habe, E na laba ju tuhök unyin perofeta wale hnyi Samaria! anyin a e ame he ka omelö e únyi hnyi anyin lepera. 4 Me ame didrö ke at me thumeto tuhan, ka habe, Ame ha helang me helâe in úheny hnyi hnyei Isaraela. 5 Me haba than Suria ame ha, ka habe, Awe, oge me he ka kunâ tusi ka than Isaraela. Me e ame he, k' ame tha hom me ta je talan sileva a ten, ke siks thauzan je sekel gol, ke ten ta hna khaú. 6 Ke e ame hom tusi ka than Isaraela, ame ha, ka habe, E ka o köu tusi ang, me wá bi, oge me hia but kunö Naamana a athnyabaik köu, m' u me he ka omelö e hnyi anyin lepera. 7 Ke a hia but than Isaraela aú tusi, me e ame kia anyin ukhaú, me ha, ka habe, Hawa, iny Khong, he ka hlingá me omelö, me me kunâ könya at ang he ka ohia lepera ge ke at? Ke wáhmakhmetoá thö, me wá, a e ame heleú can gak. 8 Ke a löng ut Elisaia aten Khong a g' ame kia anyin úkhaú than Isaraela, me e ame úkhúnöng ka than me ha, ka habe, Ieü gam u je kia ányâm úkhaú? e so e ame he jem könya, me e ame he bi ka wáhmakhmeto ae hu perofeta hnyi Isaraela. 9 Me ame o Naamana tha e me haleny je hors me anyin kariota me tot hnyi hwanumen uma umö Elisaia. 10 Haba Elisaia ame kuná úthumetu káu me ha, ka habe, He thö ka sou ama osewen hnyi Joridano, me ame he ka so hmetu unyâm me hát. 11 Ke ame hmönyi Naamana, me e ame he, me ha, ka habe, Wá bi, oge me únykúme a e ame he ka didrut me tot me hawá iö Iehova a Khongon, me aba dok eling ge hnyamen, me ohia lepera. 12 Hawa, e ca beönua bi Abana me Farapa li wageweiny Damaseko hon ta je köiö hia thithö hnyi Isaraela? hawa, oge me ca he ka sou hnyin me inye so but? Me e ame hwiö me he hmönyi. 13 Haba

## II. JE THAN 6.

lathnyabainy ödrin e hakekenyâ e me ha, ka habe, Cica, hawa, a ne ha perofeta köu ûnyi ae gan hmâ, u me ca he ka ânyâ? ke ca hâhâ köu ûnyi e a ha, ka habe, Soû but me u me so? 14 Me e ame he me oseven khut hnyi Joridano helâ me hofuc hwan aten Khong: me ame hmetu utiöiny helâ me utiöiny wanakat ae ûhnyûkong, ke e ame so but. 15 Me e ame hmetu ka aten Khong, e me anyin bunyen hia, me o, me tot hnyi hnyimakan: ke e ame ha, ka habe, Wâ bi, oge me wâ ju walang ang, ae ba Khong hnyi hmeleldrany hia, ke hnyi Isaraela thibi: ke walang ang ö u hom dö bwihlany gak a athnyabaem. 16 Ke haingen, ka habe, Kia inya Iehova at oge me tot hnyi hnyimakan, a oge me ca he ka hom ke ûnyi. Ke e ame ûjengö e he ka kap; ke e ame hócö. 17 Haba Naamana ame ha, ka habe, Hawa, a ne ca eling, ö u hn' ödrin he ka ham ka athnyabaem tang kânâ ame aijen li miul, anyin ame ca he hmetu athnyabaem ka hudo hudiny leû me ke hut bi ka ke je khong ke so bi kö Iehova thibi. 18 Ke haba hnyi ûnyi ang e so ame he Iehova ka betenge ka athnyabaem; e ka didrö tuhök hnyin uma umö Rimona he ka khudrung eling, ke e ame cimâ hnyamök, me oge me nom hnyi uma umö Rimona, haba iny ka nom hnyi uma umö Rimona, me e so ame he Iehova ka betenge ge athnyabaem hnyi ûnyi eling. 19 Ke e ame ha, ka habe, He thö me hnahic. Me e ame he gan, k' ame ca sâkâû ûheny.

20 Ke haba Gehazi athnyabai Elisaia aten Khong ame ha, ka habe, Wâ bi tuhök ame betenge ga Naamana at Suria, k' ame ca kap ûnyi hnyi li hnyamen ûnyi e ame hom jem: kia inya Iehova a oge me he ka wâdring hoton me hom gan ke ûnyi. 21 Me Gehazi ame he hotu Naamana. Ke a wâ but Naamana a ga wâdring hoton ke at, me e ame utut ûheny hon kariota he ka ûkhanö mē, me ha, ka habe, Hawa e so hia? 22 Haingen, ka habe, E so hia. Ke a kunö nya tuhök he ka ha, habe, Wâ bi ame o kõnya walang ang li hidröu ûhedru hnyi hnyei ae hut hnyi Eferaima, hanen lakon je perofeta; ö u ham ju ködrü khaca talan sileva, ke lo li hna khaû. 23 Haba Naamana ame ha, ka habe, E so ka hom lo li talan. Ke e ame ûjengö e, me e ame ca li talan sileva hnyi hnyin li tang, me li hna khaû, me ip hon li lathnyabainy, me ödrü me hom tilâ hnyi hnyimakan. 24 Ke e ame o but ka hnyi dok ae hut, me e ame

hom ta je ûnyi e gadru, me ip hnyin uma: me e ame kunâ li at, m' ödrü me he. 25 Ke e ame didrö me tot hnyi hnyimakan tuhan. Ke haba Elisaia ame ha kâu, ka habe, Gehazi lö u je mua? Me e ame thu, ka habe, E ba dok a mwi hnyin athnyabaem. 26 Ke haingen kâu, ka habe, Hawa, ame ca he unyâm hnyekuk k' ame hwiö thö at ûheny hon anyin kariota he ka ûkhanö möû? Hawa, e úcú ûen ang he ka kap sileva, me je ûkhaû, me je hnyei elaio me vine, me je mamoe me bolok, me lathnyaba obaga me omomo? 27 Anyin a wale ame he ka kece köu me je mâtrânâm nyiele baluae lepera anyi Naamana. Me e ame didrut gan a e lepera but ke hau helâ me kiona.

### HNYIMAKAN 6.

**K**E haba lakon je perofeta ödrin e ha kö Elisaia, ka habe, Wâ bi, haba dok öhmun e laba hnyin hnyi hnyimakâm, me ti hnek bi köhmun. 2 Ö u hn' öhmun dö he ka he Joridano ai me ve hok utö ûheny e, ke öhmun e he ka bi hnyaba eling, m' ötin e he ka laba eling. Me e ame thu, ka habe, He th' öbun. 3 Ke haba ke at ame ha, ka habe, Ö u tha he me lathnyabaem. Ke haingen, ka habe, Ötin a tha he. 4 Me e ame tha he mödrin. Ke ödrin e o but hnyi Joridano, me ödrin e si utö. 5 K' ame tiga si utö ke at, ame kölu but gö ka hnyi köiö: me e ame kuku, ka habe, Ekölö than! anyin a ûnyi adre hia but mē sum-âtâ. 6 Ke haingen aten Khong, ka habe, A kölu ua? Me e ame omanenâ kâu dok. Me e ame sö ke ong utö me khûâ eû, me ame mat dö fao. 7 Ke e ame ha, ka habe, Hom dö. Me e eme inâ but. hnyamen me hom e.

8 Ke ame vat than Suria me Isaraela; me e ame ûhnenamö me lathnyabainy, me ha, ka habe, Oge me he ka hunuma hnyi dok e me dok eling. 9 Haba aten Khong ame ûkhünöng ka than Isaraela me ha, ka habe, Wâ eâu, ca he kâe ka hnyi ke dok; anyin ame tiga he but at Suria ka hnyi dok eling. 10 Ke haba than Isaraela ame ûkhünöng ka hnyi dok wale a ha aten Khong me khû hnyiköny e, me e ame omelö e bi eling ca okhaca me olo. 11 Ke ame kong dö hnyekon than Suria can hofuc eling; me e ame hawâ lathnyabainy me ha ködrin, ka habe, Hawa, öbun e ca he ka thumetu nya a ie at gatin ame tha hien me

## II. JE THAN 7.

than Isaraela? 12 Haba ke athnyabainy ame ha, ka habe, Than a tuhök, e ba: ke so bi Elisaia perofeta hnyi Isaraela, ame labö thumeto than Isaraela ge ta je únyi u me ha hnyin hnyeulem mokut. 13 Ke haingen, ka habe, He thö ka wâ dok e ame laba hnyin, m' oge me he ka úkhúnöng he ka hom e. Me adre me thumeto e, ka habe, Wâ bi e but hnyi Dothana. 14 Anyin a wale e ame kunâ kâe je hors, me je kariota, me utbavat ae gan hmâ: ke ödrin e o but hnyi lit me tot igigilö taun. 15 Ke ame vesâ hnyi hnyomakatu athnyabainy aten Khong, me he hnyöu ai, wâ bi, adre igigilö but taun hnen vat, je hors me je kariota. Haba athnyabainy ame ha kâu, ka habe, Ekölö tuhök! ötin e he ka hawa? 16 Ke haingen, ka habe, Ca ot bi: anyin a hnyat ödrin e laba unyitin ame se hia hon hnyat adre laba unyidrin. 17 Haba Elisaia ame hic me ha, ka habe, Iehova lö, ö u obwela but li emakan, me me wâ. Me Iehova ame obwela li emakan hidröu; ke e ame wâ: ke wâ bi, ame unöngötö bucen ge je hors me je kariota meic igigili Elisaia. 18 Ke ödrin e o but kâu, me haba Elisaia ame hic kö Iehova, me ha, ka habe, Ö u owadruâ but hnyat ang. Me e ame owadru' ödrin helâ me hna ha ga Elisaia. 19 Ke Elisaia ame ha ködrin, ka habe, Ca gethen bi ang, ke ca taun bi e; ke hnu hotuk me oge me he ka hum öbun ka at öbun e elâm. Ke e ame hum ödrin Samaria ai. 20 Ke ödrin e o but hnyi Samaria, me haingö Elisaia, ka habe, Iehova lö, obwela but li emakan tavat ang, m' ödrin e wâ. Me Iehova ame obwela je emaködrin, me ödrin e wâ, ke wâ bi ödrin dut hnyi Samaria. 21 Ke ame ö' drin than Isaraela me haingen kö Elisaia, ka habe, Cica lö, hawa, oge me he ka kuc ödrin? hamök he ka kuc ödrin? 22 Ke e ame thu, ka habe, U me ca he ka kuc ödrin: hawa, u me he ka kot je hna hwenbâ ge ányâm hele vat me cafana? ha ödrin me habelidrin, me ödrin e he ka han me ic, me hmetu ka tuhödrin. 23 Ke e ame pena-pena gan hmâ höbi ködrin: ke ödrin e hia but han me ic, me e ame kun' ödrin, me ödrin e he hmetu ka tuhödrin. Ke a ca he hmetu bi je utbavat anyin at Suria ka hnyi hnyei Isaraela.

24 Ke hwaban ta je únyi eling haba Ben-adada than Suria ame úkhacaköuâ anyin utbavat hia, me he me thelöng Samaria. 25 Ke gan hmâ hmiâ hnyi Samaria: ke wâ bi ödrin e thelöng e me

me eite je sileva hwaban ban asina, ke faiv je sileva hwaban ke keihen kabe a vakiny tatet tiny biny. 26 Ke ame ngenu than Isaraela hon hna up haginy, ke haba ke momo ame hongot kâu, ka habe, Than a tuhök lö, hom hadruo nya. 27 Me e ame thu, ka habe, Ame ne ca he Iehova ka hadruo u, me oge me he bi nya ka kâmâu ka hadruo u? ame ne únyi hnyi hna huje hwit, ame ne únyi hnyi hna hlec wan vine? 28 Ke haingen than kâu, ka habe, Ieú gam bi? Ke haba momo ame thu, ka habe, Haba momo ang ame ha könya, ka habe, Hö jem nokom da k' ötin e he ka an hnyi bong ang, me ötin e he nyi ka an nökek. 29 Me öhmun e ölä nökek, me an: me haba nyi oge me ha kâu, ka habe, Hö jem nokom da me ötin e he ka an: ke haba momo ame hia but ikhâlâ nokon. 30 Ke a löng ut than hofuc hwan momo, me e ame kia anyin úkhaú; (ke e ame ngenu hon hna up haginy;) ke haba tavat adre me wâ, ke wâ bi, e ame khavâ unyin ge ecmano ae gan nân. 31 Ke e ame ha, ka habe, Ame he Khong ka ányâ helâe könya me bi hanen dö minya, ame ne e bala bö Elisaia nöku Safata hnyi bong ang. 32 Ke Elisaia ame laba hnyin umen uma, me wahingat ödrin e tha laba mē; haba than ame kunâ ke at úheny unyin: ke e tiga ca o bi úthumetu kâu, me e ame ha ka wahing-at, ka habe, Hawa, öbun e wâ but hnen nokon at úhlingö ang hna úkhúnöng he ka hom bök? wâ bi, e ka o but úthumetu hlöng ju hwanuma, ke kât ju hlingin kâu: hawa, ca e bi hoton hwan li can tuhan? 33 Ke e ame tiga úhnenamö mödrin, wâ bi, ame o but kâu úthumetu: me e ame ha, ka habe, Wâ bi, únyi ga Iehova kong ang; anyin a ieú oge me he ka halubahing Iehova hmetu?

### HNYIMAKAN 7.

**K**E haba Elisaia ame ha, ka habe, Löng ju hofuc ho Iehova: walang hna ha hnö Iehova, ka habe, Helâ nyi ang, ame he ka khaca sea falawa hwaban sekel, ke lo li sea bali hwaban sekel adre me he ka úco hnyi homagöuleny Samaria. 2 Haba taben, waleji a he cimâ hnyamen than, ame thu ka aten Khong, ka habe, Wâ bi, ame ne he Iehova ka bi mamalama hnyi drany ame ne he ka manen únyi e? Ka haingen, ka habe, Wâ bi, u me he ka hnyi wâ e ge li emakâm k' u me ca he ka hnyi han.

## II. JE THAN 8.

3 Ke e hu tavat a lepera a ödrin foa hnyi hwanumen homagöule, ke ödrin e ûhnenamökouâ me ha, ka habe, Anyin a ieu ötin e he ka laba eang ke ne o but ötin e mokcu? 4 Ötin e ne ha, ka habe, Ötin a he ka hnyi taun, ke e hmiâ hnyi taun, me ötin e he ka mok eling: ke ötin e ne laba bala eang, ötin e he ka mokcu minya. Ke walang ang ötin a kec ka hnyi utbavat anyin at Suria: ödrin e ne he ka omeli ötin, ötin e he ka möt; ke ödrin e me hling' ötin ötin e he bi ka mokcu. 5 Me ödrin e todrö ke hauhaotreng ut, he ka he ka hnyi hna hunuma anyin at Suria: ke ödrin e o but ka hnyi baten hna hunuma anyin at Suria, me wâ bi, a ba but at eling. 6 Anyin a hia but Iehova olöngâ je utbavat anyin at Suria ge medien je kariota, me medien je hors, wale medien je utbavat ae gan: me ödrin e ûhnenamökouâ, ka habe, Wâ bi, than Isaraela ame hia but bi hwaban je than Heth, me je than Aigupito, m' adre me vat mötin. 7 Anyin a wale ödrin e todrö me kec hnyi hauhaotreng, me hna degecâ umödrin je uma mano, me haledrin je hors me haledrin je asina, wale hna hunuma thiju, me ödrin e kec, anyin a ödrin bemöt. 8 K' ame o but je lepera eling ka hnyi baten hna hunuma, me ödrin e didrö hnyin ke uma mano me han me ic, ke ödrin e hom ûheny e sileva, me gol, me ûkhaû, me hom, me ikhâlâ; ke ödrin e hmetu me dit hnyin ke uma mano, me hom ûheny e minya, me he me ikhâlâ. 9 Ke ödrin e ûhnenamökouâ, ka habe, E ca so hnötin hna ânyâ: bonginy ûthumetu ae so bong ang, ke ötin e laba hnyibû: ötin e ne laba ke ne o but ame hmouca lany ötin e ne he ka wâ ûnyi ae kong: ötin e he walang ang ka thumeto lap anyin than. 10 Me ödrin e o me hongot ka hnyat tuö homagöuleny taun: me ödrin e thumetu ödrin me ha, ka habe, Öhmun e o hnyi hna hunuma anyin at Suria, ke wâ bi, e ba but at eling, ke ba hwan at, ke so bi je hors thibi adre noc, me je asina adre noc, me je uma mano thiju. 11 Haba tavat tuö homagöule ödrin e hongot; ke ödrin e thumeto lap anyin than eiö. 12 Haba than ame todrö hnyi hnyinghet me ha ka lathnyabainy, ka habe, Oge me he ka haimamenâ köbun walang ang hna ânyâ hnen at Suria kötin. E khan' ödrin but a ötin mekihnânem; anyin a wale ödrin e he but ûnyi hnyi hna hunuma he ka ikhölö hnyi hnyot, ke hai-ngödrin, ka habe, Ödrin ka he but ûnyi

hnyi taun, me ötin e he ka kât meliödrin, me dit ka hnyi taun. 13 Haba ke athnyabainy ame thu me ha, ka habe, E so he ka hom je hors a thabûng a ke je kolon biju hnyi taun, (wâ bi, ödrin helâ me ûseiny at Isaraela hia thithö je kolon hnyin; wâ bi ödrin helâ me ûseiny at Isaraela hia thithö a mokcu:) me ötin e he ka ûkhünöng me wâ. 14 Me ödrin e hom li kariota me je hors; ke haba than ame ûkhünöng he ka he hoton utbavat anyin at Suria, haingen, ka habe, He thö ka wâ. 15 Me ödrin e he hotudrin ke ne o but Joridano: ke wâ bi, adre avâ gethen hia ge je ûkhaû me je kaia, wale a hna degecâ ju at Suria hnyi hnödrin hna kec logot. Ke haba je uthumetu ame he hmetu me thumeto than. 16 Me ame didrut tavat me sö hna hunuma anyin at Suria. Me adre me úco khaca sea falawa hwaban sekel, ke lo li sea bali hwaban sekel, helâ me hofuc ho Iehova. 17 Ke haba than ame hûna taben, wale at e ame he cimâ hnyamen, he ka tuö homagöule, me haba tavat adre me utö e hnyi homagöule me e ame mokcu, helâ me hna ha hnen aten Khong, waleji a ha hnyi ûen a o kâu than. 18 Me ame hwâdâ thö helâ me hna ha hnen aten Khong ka than, ka habe, Ame he ka bi hwaban lo li sea bali ge sekel, ke khaca sea falawa hwaban sekel, helâ nyi ang, hnyi homagöule Samaria; 19 ke haba taben eling ame thu ka aten Khong, ka habe, Wâ bi, ame ne he Iehova ka bi mamalama hnyi drany ame ne he ka manen ûnyi e? Ke haingen, ka habe, Wâ bi, u me he ka hnyi wâ e gë li emakâm, ke u me ca he ka hnyi han: 20 me ame aat dö helâe kâu, anyin a tavat adre me utö e hnyi homagöule, me e ame mokcu.

### HNYIMAKAN 8.

**K**E a hia but Elisaia fuc ka momo waleji e ame omelö nokon, me ha, ka habe, Todrö, me u me he, me ânyâm lap, me laba kanyua hnyi hnâm hna he ka wâ: anyin a hia but hawâ hmiâ ga Iehova; k' ame he ka o minya hnyi hnyei ke ne o but hnyi seven je huna. 2 Me haba momo ame todrö, me ânyâ helâ me hna ha ge aten Khong: me e ame he me anyin lap me laba kanyua hnyi hnyei iny at Filisiti ke ne o but hnyi seven je huna. 3 Ke hwaban je huna a seven, haba momo ame hmetu ûheny hnyi hnyei iny at Filisiti: ke e ame he me tenge ka than can umen uma me



## II. JE THAN 8.

iny hnyei. 4 Ke haba than ame úhnenamö me Gehazi a athnyabainy aten Khong me ha, ka habe, Me thumetu nya ge ta je únyi ae gan ame ányá Elisaia. 5 Ke e ame tiga omanená ka than hnen hna omelö at a mokcu, ke wâ bi, wale momo a omelö nokon ame tenge ka than can umen uma me iny hnyei. Me haba Gehazi ame ha, ka habe, Than a tuhök lö, wale but ang momo, ke wale but ang nokon waleji a omelö ga Elisaia. 6 Me haba than ame hnö momo, me e ame thumeto e. Me haba than ame kunâ ke athnyaba, me ha, ka habe, Ham hmetu thö ka momo anyin ta je únyi hia, me troban iny hnyei hia, hwân hnyi bong a hna hnyin momo hnyei ke ne o but walang ang.

7 Ke haba Elisaia ame he Damaseko ai; ke a mok Ben-adada than Suria; ke adre me thumeto e, ka habe, A o but ang aten Khong. 8 Haba than ame ha kö Hazaela, ka habe, He thö ka hom bwihlany me úkhanö me aten Khong, me hnö unyi Iehova a deny, me ha, ka habe, Hawa oge me he ka möt únyi hnyi mok ang? 9 Me Hazaela ame he ka úkhanö mē, me hom bwihlany, a ta je únyi ae so hia únyi hnyi Damaseko, k' ame hijen ta je kamela a fâte, me e ame he me tot hnyi hnyimakan me ha, ka habe, A kunö nya köu Ben-adada a nokom, than Suria he ka ha, ka habe, Hawa, oge me he ka möt únyi hnyi mok ang? 10 Haba Elisaia ame ha kâu, ka habe, He thö ka ha kâu, ka habe, U me he ka möt; ke so bi a hia but Iehova omanená kõnya a e ame he ka mokcu. 11 Ke e ame wâ hmâ e ke ne o but e ame hmehma but; me haba aten Khong ame tenge. 12 Haba Hazaela ame ha, ka habe, Tuhök lö, iéu u me tenge gan? Me e ame thu, ka habe, Anyin ae khanö nya únyi ae kong u me he ka ányá ka lakon Isaraela: haba anyidrin ta je hñabâ u me he ka thong ge meic, me u me he ka hlingá ge hele vat ta je hidröu unyidrin, me sa degecâ lakudrin je mendreng, me kave je erkin gadrin. 13 Me haba Hazaela ame ha, ka habe, Ie inya a athnyabaem, a kuli, m' oge me he ka ányá únyi e ae gan? Me Elisaia ame thu, ka habe, A hia but Iehova omanená kõnya a u me he ka than Suria. 14 Ke e ame he but únyi ga Elisaia me o unyin tuhan; me e ame hnö e, ka habe, Iéu a ha köu Elisaia? Me e ame thu, ka habe, E ame ha kõnya a u me he ka möt. 15 Ke haba nyi e ame hom mano tubwiny hna

mokut, me húlúlúá hnyi köö me lau e hon hnyimakan, me e ame mokcu: ke ame than biju Hazaela hwaban.

16 Ke haba hnyi huna a thabúngi Jorama nöku Ahaba than Isaraela, ke Jehosafata than hnyi Juda, me ame hwân Jorama nöku Jehosafata than Juda he ka than. 17 Ke e ame hwân he ka than, ke thöte tu je hunainy; ke e ame musu hnyi Jerusalema eit je huna. 18 Ke e ame vhenogethen deny je than Isaraela, helâ me hna ányá hnen lap anyi Ahaba: anyin a áiân momo nöku Ahaba: ke e ame ányá únyi ae kong hnyi hnyimakö Iehova. 19 Ke so bi e ca we Iehova bi he ka ohia Juda, ga Davita athnyabainy, helâ me hna ha bânâ kâu he ka ham lamepa kâu, hobi kâu bala lakon. 20 Ke haba hnyi bongon je bong Edoma ame hna degeci Juda, me otílö thanidrin bi. 21 Ke haba Jorama ame tha he Zaira ai me anyin te je kariota hia thithö: ke e ame todrö hnyi hnyinghet me kot at Edoma wale adre igigilö e, me je taben kariota, me ame kec tavat ka hnyi umödrin je uma mano. 22 Haba Edoma ame hna degeci Juda bala bi ke ne o but hnyi bong ang. Ke Libena ame hna degecâ minya hnyi úen a khaca. 23 Ke haba kolon je hna ánya hnö Jorama me anyin ta je huliwa hia, bawa, adre ca sihnalimen hnyi tusi hnân ha je bong bongon je than Juda? 24 Ke ame mokut ut Jorama tha e me lakamen, me adre me konâm e tha e me lakamen hnyi taun anyi Davita: ke ame than biju Ahazia a nokon hwaban.

25 Ke haba hnyi huna a twelvi Jorama nöku Ahaba than Isaraela, ame hwân ka than Ahazia nöku Jorama than Juda. 26 Twente tu je hunai Ahazia me e ame hwân ka than; ke e ame than khaca huna hnyi Jerusalema. Ke haba ien hinyen jia Athalia, momo nöku Omeri than Isaraela. 27 Ke e ame vhenogethen deny lap anyi Ahaba, me ányá únyi ae kong hnyi hnyimakö Iehova, helâ me lap anyi Ahaba: anyin a e úngon lap anyi Ahaba. 28 Ke e ame tha he me Jorama nöku Ahaba he ka vat me Hazaela than Suria hnyi Ramothegileada: ke ame aat dö Jorama ge at Suria. 29 Ke haba Jorama than ame hmetu Jezerela ai he ka bi anyin hnân aat ge at Suria hnyi Rama, hnyi hnen hna vat me Hazaela than Suria. Ke haba Ahazia nöku Jorama than Juda ame he he ka ö Jorama nöku Ahaba hnyi Jezerela, anyin a e mok.

## II. JE THAN 9.

### HNYIMAKAN 9.

**K**E haba Elisaia perofeta ame hawá ke at hanen lakon je perofeta me ha kâu, ka habe, Húkâlâ ju wen hnyâm, ke hom tap wakaco eang hnyi hnyâmâm, me he Ramothi-Gileada ai. 2 Ke u ka o but, me u me he ka elöm Jehu nöku Jehosafata nöku Nimesi, me didrö, me otilâ e unyin je liamekeiny mē, me hom dö e ka hnyi hnyeule eiö hnyin. 3 Me hom dö wakaco me hingâlâ hon ban me ha, ka habe, Walang hna ha hnö Iehova, ka habe, Oge hia but hú u hnân than Isaraela. Ke u ma khöng ut hwanuma me kec, ke ca bec bi. 4 Me ame he hidröu, a hidröu perofeta, Ramothigileada ai. 5 K' ame o but, me wâ bi, je taben vat ödrin e tha laba; me e ame ha, ka habe, Tuhök lö, e hu hofuc gak köu. Me haingö Jehu, ka habe, Kö ie at gahmun? Me e ame thu, ka habe, Köu a tuhök. 6 Me e ame todrö me dit ka hnyin uma; ke e ame hingâlâ wakaco hon ban me ha kâu, ka habe, Walang hna ha hnö Iehova, Khongu Isaraela, ka habe, Oge hia but hú u hnân tuhan lakei Iehova, wale Isaraela. 7 Ke u me he ka kot lap anyi Ahaba a tubâm, me inye he ka bi hwaban kö Jezebela dra dren lathnyabaik a je perofeta, me dra dren lathnyabai Iehova hia thithö. 8 Anyin ame he ka hia but lap anyi Ahaba hia: ke oge me he ka subâ degecâ ga Ahaba je wainda hia, me hnyat adre me ca, me hnyat adre he monu hnyi Isaraela. 9 Ke oge me he ka wia lap anyi Ahaba, me me helâ me lap anyi Jeroboama nöku Nebata, me helâ me lap anyi Baasa nöku Ahia. 10 Ke ame he je kuli ka ön Jezebela hnyi ke keihen Jezerela, ke ba at ame he ka konâm. Me e ame khöng ut hwanuma me kec. 11 Ke haba Jehu ame he ka lathnyabainy tuhan: ke haingen ke at kâu, ka habe, Hawa, e so? anyin a ieú ame o köu at e ae monu? Me haingen ködrin, ka habe, E khan' öbun dut at, me hwan hofuc. 12 Me haingödrin, ka habe, E thoi e; thumetu öhmun dö walang ang. Me haingen ködrin, ka habe, E ame ha könnya helâng me helâe, ke haingen, ka habe, Walang hna ha hnö Iehova, ka habe, Oge hia but hú u hnân than Isaraela. 13 Me ödrin e ie he me ve hom anyidrin je úkhaú, me ip hmelen hnyi hon wacuat, me túá trutru me ha, ka habe, Than dö Jehu. 14 Ke haba Jehu nöku Jehosafata nöku

Nimesi ame úkhin fuc kö Jorama. (Ke Jorama ame tue hnyi Ramothi-gileada, e me Isaraela hia thithö, ga Hazaela than Suria: 15 ke ame hmetu but Jorama than Jezerela ai, he ka bi anyin je aat waleji hnân je aat ge at Suria, hnyi hnen hna vat me Hazaela than Suria.) Ke haba Jehu ame ha, ka habe, A ne webun e, awe ca hna ke at a khaca he ka kec únyi hnyi taun, he ka he me thumeto e hnyi Jezerela. 16 Haba Jehu ame tabâ ke kariota, me he Jezerela ai; anyin a Jorama ame mokut eling. Ke Ahazia than Juda ame úö Jorama. 17 Ke haba at ame tue ame tot hon ban hna hnyin Jezerela, me e ame wâ bunyen anyi Jehu, me e ame ha, ka habe, Oge me wâ bunyen. Haba Jorama ame ha, ka habe, Úca thö at tabö hors me kunâ he ka úkhanö mödrin, he ka ha, ka habe, Hawa, úsoköu? 18 Me ame he ke at tabö hors he ka úkhanö mē, me ha, ka habe, Walang hna ha hnen than, Hawa, úsoköu? Ke haingö Jehu, ka habe, Ieú úsoköu gam? he but ka hnyi hotuk. Haba at ame tue ame úthumetu ködrin, ka babe, A o but úthumetu ködrin ke e ame ca hmetu. 19 Me e ame kunâ at tabö hors a loiny, ke e ame o ködrin me ha, ka habe, Walang hna ha hnen than, Hawa, úsoköu? Ke haingö Jehu, ka habe, Ieú úsoköu gam? he thö ka hnyi hotuk. 20 Haba at ame tue ame úthumetu me ha, ka habe, A o but ködrin, ke e ame ca hmetu: ke haba hnen hna alen me helâ me hna alen hnö Jehu nöku Nimesi; anyin a e ame alen hwegiâ. 21 Haba Jorama ame ha, ka habe, Penapena thö. Me adre me penapena anyin kariota. Me ame didrut Jorama than Isaraela, me Ahazia than Juda; me ve tabö kariota, ke ödrü me he he ka úkhanö me Jehu, me wâ e hnyi hnyei i Nabotha at Jezerela. 22 K' ame ö Jehu hnö Jorama, me e ame ha, ka habe, Hawa, úsoköu Jehu? Ke e ame thu, ka habe, Ieú úsoköu, ke se hia bala je bi únyi monu me bibihwakecin anyin hnyâm jia Jezebela? 23 Haba Jorama ame hwiö me kec, me ha kö Ahazia, ka habe, E hu iyawâ Ahazia. 24 Haba Jehu ame hlec cafana ge tang hwegien hia, me ame aat dö Jorama hnyi wanben li benyin, me ame o but fana hnyi oúnykúminy, me e ame ta hweti hnyi anyin kariota. 25 Haba Jehu ame ha kö Bidekara a taben unyin, ka habe, Hom dö, me khúá but e hnyi hnyei i Nabotha at Jezerela, anyin u me únykúme ün waleji ötu me tha tabö kariota hotu

## II. JE THAN 10.

Ahaba a kamen, me Iehova ame ip hon hok eling ae hmak ; 26 ke haingö Iehova, ka habe, Haba et oge me wâ drö Nabotha, me dren lakon je бага ; me haingö Iehova, ka habe, Oge me he ka bi hwaban köu hnyi dok ang. Ke walang ang hom dö me khûâ but e ka hnyi utkânâ, helâ me hofuc ho Iehova. 27 Haba Ahazia than Juda ame wâ me e me kec hnyi getheniny uma umen hna belök. Ke haba Jehu ame hnu e, me ha, ka habe, Kot e hnyi kariota : me adre me kot e hnyi gethen úheny Gura hnyi Ibeleama. Ke e ame kec Megido ai, me e ame mokcu eling. 28 Ke haba lathnyabainy ödrin e hom e Jerusalema ai hon kariota, me konâm hnyi erkemok tha e me lakamen hnyi taun anyi Davita.

29 Ke haba hnyi hunâ a eleveni Jorama nöku Ahaba, me hwân Ahazia ka musi hon at Juda.

30 Ke ame o but Jehu hnyi Jezerela, me haba Jezebela ame löng ; me e ame bi hnalimen li emakan, me omecâ ban, me selat hnyi mamalama. 31 Ke haba Jehu ame tiga didrö hnyi homagöule, me momo ame ha, ka habe, Hawa, Zimeri lö, at úhlingâ tuhâm, u je o hnyi úsoköu ? 32 Me e ame hngele hnyidranayi ka hnyi mamalama, me ha, ka habe, Ia ame tha hien mönya ? ia ? me ame selatâ e li at a lo ame ne kun a je eunuka. 33 Me e ame ha, ka habe, Khûâ but momo hnyikânâi. Me ödrin e khûâ hnyikânâi, me ame fifile thö dren ka hnyi hon haginny veto, me hon je hors : me e ame uto momo ge li can. 34 Me e ame didrö me han me ic, me e ame ha, ka habe, Tuö momo ang adre ohnauhangoâ me konâm bi, anyin a e nokon than. 35 Me ödrin e he ka konâm ; ke ödrin e ca wâ bi, ke so bi ibokomok thiju me li hnyeüca me li hnyam. 36 Me ödrin e hmetu me thumeto e. Me haingen, ka habe, Wale hofuc ho Iehova waleji e ame ha deny athnyabainy a Elia at Tisebi, ka habe, Ame he je kuli ka an unyi Jezebela hnyi hnyei Jezerela : 37 k' ame he unyi Jezebela ka helâ me tet hon kânâ hnyi hnyei Jezerela ; m' adre me ca he ka ha, ka habe, Wale Jezebela.

### HNyimakan 10.

**K**E sevente je laku Ahaba hnyi Samaria. Ke haba Jehu ame sihnalimen je tusi me úkhünöng Samaria ai ka je than Jezerela, wale wahingat, me ka tavat

hat je laku Ahaba, ka habe, 2 Ke ka o but tusi ang köbun, ke e unyibun je lakon tuhöbun, ke e unyibun je kariota me je hors, me taun adre up veten, me je omjehen vat ; 3 öbun e he ka úca ke nokon tuhöbun ae so me úcü, me ip e hon theron anyin kamen, me vat hobi kâu lap anyin tuhöbun. 4 Ke ti gan anyidrin ot, me ödrin e ha, ka habe, Wâ bi, a ca tot li than hnyi hnyimakan : ke ötin e he ka hawa ka tot ? 5 Haba at ame musö hnyaba, me at ame musö taun, me wahingat, me tavat ödrin e hat je wanakat, ödrin e úkhünöng kö Jehu, ka habe, Öhmun ang lathnyabaem, me öhmun e he ka ânyâ ta je únyi hia u me he ka hunâ köhmun ; öhmun e ca he ka otilâ ke at hnân than : ânyâ thö únyi ae so hnyi hnyimákâm. 6 Me e ame sihnalimen ködrin tusi a loiny, me ha, ka habe, A ne tha hiöbun mönya ke öbun e ne he ka löng hok hofuc, me hom but ban tavat a je lakon tuhöbun, me hom but jem könya hnyi Jezerela helâ nyi ang. Ke ödrin sevente je lakon than ödrin e laba unyin je at hnathuiny taun tavat adre me hat ödrin. 7 K' ame o but tusi ködrin, me ödrin e hom je lakon than, me hling' ödrin a ödrin sevente, me hitangen je bödrin me kunâ kâu Jezerela ai. 8 Ke ame o but at me thumeto e me ha, ka habe, Ödrin e o but me ban je lakon than. Ke haingen, ka habe, Khon ju me me lo li hna khon hnyi homagöule ke ne o but nyi. 9 Ke hnyi hnyomakatu e ame didrut, me tot, me ha ka tavat hia, ka habe, Wisa but öbun : wâ bi oge úhügünö than me tuhök, me hlingâ e : ke ia hlingâ tavat hia eang ? 10 Khan' öbun dö walang ang a ame ca he ka kölu hnyikânâi ke uthofuc ho Iehova, wale ame ha Iehova ge lap anyi Ahaba : anyin a hia but Iehova ânyâ únyi e ame ha a deny Elia athnyabainy. 11 Ke wale Jehu ame kot kolon hia lap anyi Ahaba hnyi Jezerela, me anyin je at hnathu hia, me je waeny, me anyin tavat bihut, ke ne o but ame ba but kolon. 12 Me e ame todrö me he, me he Samaria ai. Ke e eü hnyi gethen hnyi uma hnân subâ leünen mamoe umen tavat tuö mamoe, 13 haba Jehu ame úkhanö me je liamekeiny me Ahazia than Juda, me ha, ka habe, Öbun ie hnyat ? Ke ödrin e thu, ka habe, Öhmun je liamekeiny me Ahazia ; k' öhmun e he he ka iouny me lakon than, me lakon momo than. 14 Me e ame ha, ka habe, Hom meliödrin dö, me ödrin e hom meliödrin hnyi thopiny uma adre sö leünen

## II. JE THAN 11.

mamoe hnyin, a ödrin fâte tu, k' ame ca hna but kolon.

15 Ke e ame he but úheny e, me e ame úkhanö me Jonadab, nöku Rekaba ame he ka iouny më : ke e ame iouny, me ha kâu, ka habe, Hawa e wisa hnyekom helâ me hnyekuk köu? Me haingö Jonadab, ka habe, Eke. A ne helâe, awe, ho jem hnyamâm. Ke e ame inâ hnyamen ; me e ame hom e kâu ka hnyi hon kariota. 16 Ke haingen, ka habe, Ötu ma tha he, me u me he ka wâ tang hwegiök hobi kö Iehova. Me adre me olaba e hon kariota. 17 Ke ame o hnyi Samaria, me e ame kot hia je kolon lap anyi Ahaba hnyi Samaria, ke ne o but e ame ohia, hoton hofuc ho Iehova, waleji e ame ha ko Elia. 18 Ke haba Jehu ame úkhacaköuâ tavat hia thithö, me ha ködra, ka habe, E úhnyúkong hnö Ahaba hna bi athnyaba kö Baala ; ke gan bi hnö Jehu hna he ka bi athnyaba kâu. 19 Anyin a wale, hawâ thö könya je perofeta anyi Baala hia thithö, me lathnyabainy hia, me tavat bi hut hia kâu ; e so e he ka ca hia ke at a khaca. anyin ae hu gak hut ae gan kö Baala ; ame ca he ka möt bi at ame hia. Haba Jehu ame ányâ iyawâ e, me me he ka ohia lathnyabai Baala. 20 Ke haingö Jehu ka habe, Okabâ ju úkhacaköu ae únyi hnathu kö Baala. Me adre me hai-memenâ. 21 Ke Jehu ame úkhúnöng ka hnyi Isaraela hia thithö : me ame o je lathnyabai Baala hia, ke ba at ae hia. Ke ödrin e o ka hnyi uma umö Baala ; k' ame unöngöt uma umö Baala hnyi je ke keihen hia. 22 Me e ame ha ka at ame tuö hnyeuleny je úkhaú, ka habe, Hom jem je úkhaú me oúco lathnyabai Baala hia. Me e ame hom je úkhaú hobi ködrin. 23 Ke haba Jehu me Jonadab nöku Rekaba ödru me didrö eiö hnyin uma umö Baala ; me e ame ha ka lathnyabai Baala, ka habe, Elâm dö, me wâ, wâ e nye hu athnyabai Iehova eang unyibun, ke so e hake lathnyabai Baala. 24 Ke ödrin e didrut he ka hudo ta je hut me je hudiny leú. Ke a hia but Jehu ip tavat a eite hnyöu, me ha ködrin, ka habe, Haba at ame he ka möt únyi hnyi tavat oge me he ka hom ka hnyi hnyamöbun, ame he ka hwaban e unyibun. 25 K' a hia but hudo hudiny leú me haba Jehu ame ha ka tavat tue, me je taben, ka habe, Didrö, me hling' ödrin ; ame ca he ka didrut ke at. Me ödrin e kuc ödrin ge hele vat ; ke haba tavat tue me je taben ödrin e khú' ödrin kâú, me he but ka hnyi tauniny uma umö

Baala. 26 Ke ödrin e hom kâú je veto ame tot únyi hnyi uma umö Baala, me le degecâ e. 27 Ke ödrin e hagutâ degecâ hnatheati Baala, me kia degecâ uma umö Baala, me wia hnân uma digic thatúnyi, ke ne o but hnyi bong ang. 28 Helâe hnö Jehu hna ohio Baala únyi hnyi Isaraela. 29 Ke so bi Jehu ame ca saú únyi hnyi je hulö anyi Jeroboama nöku Nebata, at ame okúâ je hwakecin ae kong anyin at Isaraela, ge li nokon kau gol waleji hnyi Beth-ela, me Dana. 30 Haba Iehova ame ha kö Jehu, ka habe, Anyin ae so hnâm hna ányâ, wale u je ányâ wisa hnyi hnyimakök, me ányâ ka lap anyi Ahaba helâ hia me hnyekuk, anyin a wale ame he je mátránâm ka tabâ theron hnyi Isaraela ke ne o but hnyi dö a vakiny. 31 Ke ame ca wâ wia Jehu he ka vheno hnanyibu anyi Iehova Khongu Isaraela, me hnyekon a khaca : e ame ca saú únyi hnyi ta je hulö anyi Jeroboama, wale ame okúâ je hwakecin ae khong anyin at Isaraela.

32 Ke haba hnyi úen eling Iehova ame hwân he ka hom úhnyúkongo at Isaraela : ke haba Hazaela ame kuc ödrin hnyi ta je hnyigöulen Isaraela hia ; 33 me hwân hnyi Joridano e deiö, hnyei Gileada hia, me at Gada, me Rheubena, me Manase, hwân Aroera hnyi hnyigöulen bucen e Arenona, wale Gileada me Basana. 34 Ke haba kolon je hna ányâ hnö Jehu, me anyin je huliwa, me tang hwegien, hawa, adre ca sihnalimen hnyi tusi hnân ha je bong bongon je than Isaraela? 35 Ke a mokut ut Jehu tha e me lakamen ; me ödrin e konâm e hnyi Samaria. Ke ame than biju Jehoaza a nokon hwaban. 36 Haba Jehu ame musi at Isaraela hnyi Samaria hnyi je huna a twente eit.

### HNYIMAKAN 11.

**K**E a wâ but Athalia hinyö Ahazia a ga mokcú nokon, me e ame todrö me hlingâ je mátrániny than hia thithö. 2 Ke haba Joseba, hlu nokon than a Jorama, hani Ahazia ame hum Joasa nöku Ahazia, me hom duöngâ únyi hnyi lakon than adre hlingâ, a tha e me momo ame hat e, me tuö hnyi hnyeule mokut ; k'adre me ikhâlâ e ga Athalia, me me ca hlingâ e. 3 K'adre tha ikhâlâ e me momo hnyi uma umö Iehova hnyi je huna a siks : ke ame than dö Athalia hnyi hnyei.

4 Ke haba hnyi huna a seven, haba

## II. JE THAN 12.

Jehoiada ame úkhúnöng he ka hawá je taben haded, me at Keri, me tavat tue, me hum ödrin káu ka hnyi uma umö Iehova; me e ame úhinhinyköu mödrin, me kun' ödrin he ka khemanyin hnyi uma umö Iehova, me omanená ködrin nokon than. 5 Ke e ame ha ködrin, ka habe, Walang únyi öbun e he ka ányá: haba ke keihen gabun a kuniny, tavat adre me didró hnyin hnyi sabath, adre me he ka tuö hna hmak hnyi uma umen than; 6 ke haba ke keihen a kuniny adre me he ka laba hnyi homagöule Sura; ke haba ke keihen a kuniny hnyi homagöule hoton tavat tue: me öbun e he heláe ka tuö hna hmakiný uma, m' öbun e helá me hak bi. 7 Ke haba lo li ke keihen gabun tavat adre didrut hnyi sabath, adre me he ka tuö uma umö Iehova singiny than. 8 Ke öbun e he hia ka lan than, me ve kát anyibun je omjehen vat hnyi je hnyamöbun; ke haba at ame he ka dit hnyin anyibun je deö vat, me adre me he ka hlingá: ke öbun e he ka tha e me than e ka didró me didrut. 9 Ke haba je taben haded ödrin e ányá helá me hofuc hia a ha Jehoiada at bihut; me ödrin e ve hom je atödrin, tavat adre me he ka didró hnyi sabath, tha ödrin me tavat adre me he ka didrut hnyi sabath, me o kö Jehoiada at bihut. 10 Ke haba at bihut ame ham ka je taben haded je ö me je bec waleji anyi Davita a than a e hnyi uma umö Iehova. 11 Ke haba tavat tue ödrin e ve tot me je omjehen vat hnyi je hnyamödrin, igigilö than, hwân hnyi ke keihen metáiny uma ke ne o but hnyi ke keihen meny uma, hnyi baten taben hut me uma. 12 Ke e ame hom but nokon than, me obicá e ge korona, me ham káu únyi hnân ohnatho; ke ödrin e otílá e me me than, me hú e; me ödrin e khöúkhöú hnyam me ha, ka habe, Khong lö omelö than. 13 Ke a löng ut Athalia medien hnyat tue me tavat, me e ame he ka tavat hnyi uma umö Iehova: 14 me haba momo ame wá, ke wá bi, ame tot than hnyi tap, helá me hwakecin, me tha e me than ta je taben me ta je trutru; ke ame senyin tavat hia hnyi hnyei me tuö trutru. Ke haba Athalia ame kia anyin je úkhaú, me hongot, ka habe, Úhúgúnö than, úhúgúnö than dut ang. 15 Haba Jehoiada at bihut ame kúna ka je taben haded tavat musö uttavat me ha ködrin, ka habe, Hom but momo ka hnyi wanben li deö vat; ke haba at ame he hoton, hlingá ju ge hele vat: anyin a at bihut ame ha, ka habe, ca he ka hlingá

momo hnyi uma umö Iehova. 16 Me ödrin e hna deny hobi káu momo; me momo ame vhenö gethen deny je hors ka hnyi uma umen than: me adre me hlingá momo eling.

17 Haba Jehoiada ame ányá ke úhihinyköu wanbö Iehova, me than me tavat, me me lakei Iehova ödrin; wanben than me tavat minya. 18 Haba tavat hnyi hnyei hia adre me didró ka hnyi uma umö Baala me kia but e; ke ödrin e thu omomono anyin je taben hut, me je hna theatá e bi, me hlingö Matana at bihut kö Baala cicö je taben hut. Ke haba at bihut ame otílá tavat tuö uma umö Iehova. 19 Ke e ame hom je taben haded, me tavat Keri me tavat tue, me aten hia hnyei; me ödrin e utut me than únyi hnyi uma umö Iehova, me he hnyi gethen homagöuleny tavat tue ka hnyi uma umen than. Ke e ame tabá theroniny je than. 20 Me ame senyin tavat hia hnyi hnyei, ke ame laba wia taun: ke ödrin e hlingö Athalia ge hele vat hnyi umen than.

21 Ke seven ta hunai Joasa hnyi úen e ame hwân ka than.

### HCNYIMAKAN 12.

**A**ME hwân Joasa ka than hnyi hunainy musi a seveni Jehu: k' ame musi hnyi Jerusalema hnyi je huná a fáte; haba ien hinyen me Zibia momo Bere-seba. 2 Ke haba Joasa ame ányá únyi ae so hnyi hnyimakö Iehova hnyi bongon ta je bong hia; wale hnö Jehoiada at bihut hna ná e. 3 Ke so bi adre me ca ohia je dok ae görany: ke haba tavat adre me bi hut bala me leú utö ae bo so hnyi je dok ae gorany.

4 Ke haba Joasa ame ha ka tavat bihut, ka habe, Haba je mone hia ae kap wale adre me labö hom ka hnyi uma umö Iehova, a mone cici, wale mone anyin tavat adre ve úcú, me mone hia a únykúme tavat he ka hom ka hnyi uma umö Iehova, 5 me hamen tavat bihut he ka ve kap únyi ge je lahanödrin: me adre me he ka okhötá je dok ae hmouca hnyi uma, wale je dok ae hmouca adre me he bi ka wá. 6 Ke haba hnyi huná a twente theri anyi Joasa a than me haba tavat bihut ödrin e tiga ca okhötá je dok ae hmouca hnyi uma. 7 Me haba Joasa than ame hawo Jehoiada at bihut, me tavat bihut, me ha ködrin, ka habe, Ieú gabun öbun e ca okhötá je dok ae hmouca hnyi uma? ke walang ang ca kap

## II. JE THAN 13.

hmetu bi je mone únyi ge je lahanöbun, ke so bi ham but e hnân hobi kâu je dok ae hmouca hnyi uma. 8 Me haba tavat bihut ödrin e ogâ a ödrin e ca he hmetu ka kap mone únyi ge tavat, ke haba khaca ödrin e ca he ka okhötâ je dok ae hmouca hnyi uma. 9 Me haba Jehoiada at bihut ame hom ke tang me koú moko hlinginy, me ip e hnyi baten taben hut, hnyi ke keihen a metân at ame he ka hnyi uma umö Iehova : ke haba tavat bihut a tavat tuö homagöule ödrin e hitangen eling ta je mone hia adre me hom ka hnyi uma umö Iehova. 10 Ke hnyi úen ödrin e wâ a e gan mone hnyin tang, me ame o but at sihnalimen anyin than, tha e me at bihut ae beönua, me ödru me hitangen me aú je mone adre me wâ hnyi uma umö Iehova. 11 Ke ödru me ham mone wale adre hia but tuluto ka hnyi hnyamen tavat ödrin e ányâ huliwa, tavat tuö uma umö Iehova : me ödrin e bi hwaban tavat tretrau utö, me tavat up uma, tavat adre me huliwan uma umö Iehova ; 12 me hobi kâú minya tavat up veto, me tavat tretrau veto, me hnân úcú utö, me je veto adre tretrao he ka okhötâ je dok ae hmouca hnyi uma umö Iehova, me hobi kâu ta je únyi hia adre úco hobi kâu uma he ka ányâwia e. 13 Ke adre ca ányâ hobi kâu uma umö Iehova je utkaia sileva, me uthe-siún, me je kaia me je trutru, me je kaia gol, me je kaia sileva, únyi hnyi mone adre hom ka hnyi uma umö Iehova : 14 anyin a ödru me ham e ka tavat ányâ huliwa : ke ödrin e ányâwia uma umö Iehova ge mone eling. 15 Ke haba khaca ödru me ca tuluto ka tavat, wale ödru me ham ködrin mone he ka ham ka tavat huliwa : anyin a ödrin e khenâ hnathoâ. 16 Haba moneiny je hudiny hulö, me moneiny je hudiny monu, adre ca hom ka hnyi uma umö Iehova : ke hobi kâu tavat bihut e.

17 Ke haba Hazaela than Suria ame he me vat hnyi Gatha, me hügúna e : ke Hazaela ame hnyimakan he ka he Jerusalema ai. 18 Haba Joasa than Juda ame hom ta je únyi hia ae kap, wale a okabâ Jehosafata, me Jorama, me Ahazia, a lakamen, je than Juda, me anyin bi ta je únyi ae kap, me ta je gol hia adre me wâ hnyi hna ip omjeú hnyi uma umö Iehova, me uma umen than, me kunâ kö Hazaela than Suria : me e ame he but úheny Jerusalema. 19 Ke haba kolon je hna ányâ hnö Joasa, me anyin ta je huliwa, hawa, adre ca sihnalimen hnyi tusi hnân ha je bong bongon je than Juda?

20 Ke ame todrö lathnyabai Joasa, me sihnân, me hlingâ hnyi uma hnyi Milo, gethen úheny Sila. 21 Ke haba Jozakara nöku Simeatha me Jehoabada nöku Somera, a li athnyabainy, ödru me kot e, me e ame mokcu : ke adre me konâm e tha e me lakamen hnyi taun anyi Davita : k'ame than biju Amazia a nokon hwaban.

### HNYIMAKAN 13.

**K**E haba hnyi huna a twente theri anyi Joasa nöku Ahazia, than Juda, ame hwân dö Jehoaza nöku Jehu he ka than hon Isaraela hnyi Samaria, ke ame musu hnyi je huna a seventin. 2 Ke e ame ányâ únyi ae kong hnyi hnyimakö Iehova, k' ame hnu hoton je hulö anyi Jeroboama noku Nebata, at ame okúâ hwakecin ae kong hnyi Isaraela ; e ame ca saú únyi hnyin. 3 Me ame ubâhlâ thö hmönyin anyi Iehova ka at Isaraela, me e ame hn' ödra ka hnyi hnyamö Hazaela than Suria, me ka hnyi hnyamö Ben-adada nöku Hazaela hnyi je bong hia. 4 Ke haba Jehoaza ame khöú kö Iehova, me Iehova ame löng kâu ; anyin a e ame wâ hnödra hna okongoâ at Isaraela : anyin a than Suria ame okongu ödrin. 5 (Me haba Iehova ame ham ka at Isaraela at úhömeli, m' ödrin e didrut únyi hnyi hmelen hnyamen at Suria : k'ame laba hnyi umödrin je uma mano lakon Isaraela helâji me ebac. 6 Ke so bi ödrin e ca saú but únyi hnyi ta je hulö anyin lap anyi Jeroboama, at ame okúâ hwakecin ae kong hnyi Isaraela, ke ödrin e vhenö e : k'ame tot bala bi Aseira hnyi Samaria.) 7 Ke e ame ca hna tavat kö Jehoaza, ke so bi ödrin fite thibi a tavat tabö hors, ke ten je kariota, ke ten thauzan tavat he hon kánâ ; anyin a than Suria ame ohí' ödrin, me wi' ödrin me me helâ me sesâ adre me uto. 8 Ke haba kolon je hna ányâ hnö Jehoaza, me ta je únyi hia e ame ányâ, me tang hwegien, hawa, adre me ca sihnalimen hnyi tusi hnân ha je bong bongon je than Isaraela? 9 Ke ame mokut ut Jehoaza tha e me lakamen, me adre me konâm e hnyi Samaria : k'ame than biju Joasa a nokon hwaban.

10 Ke haba hnyi huna a thöte seven anyi Joasa than Juda me ame hwân dö Joasa nöku Jehoaza ka than hon Isaraela hnyi Samaria, ke ne o but hnyi je huna a sikstin. 11 Ke e ame ányâ únyi ae kong

## II. JE THAN 14.

hnyi hnyimakö Iehova ; k' ame ca saú únyi hnyi ta je hulö hia anyi Jeroboama nöku Nebata, at ame okúâ hwakecin ae kong hnyi Isaraela : ke e ame vheno e. 12 Ke haba kolon je hna ányâ hnö Joasa, me anyin ta je huliwa, me tang hwegien, wale e ame vat me Amazia than Juda, hawa, adre ca sihnalimen hnyi tusi hnân ha je bong bongon je than Isaraela? 13 Ke ame mokut ut Joasa tha e me lakamen ; ke ame tabâ biju Jeroboama anyin theron : ke adre me könim Joasa hnyi Samaria tha e me je than Isaraela.

14 Ke ame takú Elisaia mok wale e ame he ka mokcu hnyin : ke Joasa than Isaraela ame he káu me tenge gan, me ha, ka habe, cica, cica, kariota anyi Isaraela, me anyin tavat tabö hors ! 15 Haba Elisaia ame ha káu, ka habe, Hom dö cafana me thi fana. Me e ame hom cafana me thi fana. 16 Ke e ame ha ka than Isaraela, ka habe, Ip dö hnyamâm hon cafana : me e ame ip hnyamen. Ke haba Elisaia bi ame ip li hnyamen hon li hnyamen than. 17 Ke haingen ka habe, Khöng ut mamalama eiö : ke e ame khöng ut. Ke haingö Elisaia, ka habe, Hlec ut : me e ame hlec. Haingen, ka habe, Fana hnân úhömeli anyi Iehova, wale fana úhömeli ga Suria : anyin a u me he ka kot at Suria hnyi Afeka, ke ne o but u je hia but ohí' ödrin. 18 Ke haingen, ka habe, Hom dö thi fana : me e ame hom. Ke haingen ka than Isaraela, ka habe, Kot ju kânâ : ke e ame kot a ga okun hna, me soju. 19 Haba aten Khong ame hmönyin káu, me ha, ka habe, Hamâm eja he ka kot, ame ne faiv, ame ne siks hna hna ; ke wale u ma kuc Suria ke ne o but ame ba but : ke haba walang ang u me he ka kot Suria ama okun thibi.

20 Ke ame mokcu Elisaia me ödrin e konâm e. Ke haba hnyi ioiny huna me ame o but je deö vat anyin at Moaba hon hnyei. 21 Ke hnyi ke bong, ödrin e tiga konâm ke komok, ke wâ bi, ödrin e wâ ke deö vat ; me ödrin e khúâ komok ka hnyi hu Elisaia : ke ame mádrâ hnen komok je jeü Elisaia, me e ame möt hmetu thö, me tot.

22 Ke haba Hazaela than Suria ame okongóâ at Isaraela hnyi ta je bong hia thithö bongu Jehoaza. 23 Ke haba Iehova ame betenge gadrin, me hmak gadrin, me ödrin, can anyin úhibinyköu me Aberahama, me Isaaka, me Jakob ; ke ca weny bi he ka ohí' ödrin, me digic ödrin bala únyi hnyi

hnyimakan. 24 Ke ame mokcu Hazaela than Suria ; k' ame than biju Ben-adada a nokon hwaban. 25 Haba Joasa nöku Jehoaza ame húgúnâ hmetu je taun únyi ga Ben-adada nöku Hazaela, waleji a húgúnâ únyi ga Jehoaza a kamen hnen vat. Ke Joasa ame okun kot e, me húgúnâ hmeto je taun anyin at Isaraela.

### HNYIMAKAN 14.

**K**E haba hnyi huna a loi Joasa nöku Jehoaza than Isaraela, me ame hwân Amazia nöku Joasa than Juda he ka than. 2 Twente faiv je hunainy hnyi úen e ame hwân ka than ; ke e ame musí hnyi Jerusalem twente nain ta je huna : ke haba ien hinyen, me, Jehoadana a momo Jerusalem. 3 Ke e ame ányâ únyi ae so hnyi hnyimakö Iehova, he so bi a ca helâ me Davita a kiben : k' ame ányâ hia hoton hna ányâ hnö Joasa a kamen. 4 Ke so bi adre me ca ohia je dok ae görany : ke haba tavat adre me bi hudo bala bi je hut me leú ütö ae bo so hnyi je dok ae görany. 5 Ke adre hia but ohmâ dökhü hnyi hnyamen, me e ame hlingâ li athnyabainy a li at ödre hlingâ than a kamen : 6 ke e ame ca hlingâ lakon li at úhlingö : helâ me hna sihnalimen hnyi tusi hnanyibu anyi Mose, waleji a húna Iehova, ka habe, Adre me ca he ka hlingâ je kamen can je nokon, ke haba khaca adre me ca he ka hlingâ je lakon can je kamen ; ke adre me he ka ve hlingâ at can anyin bi hulö. 7 Ke e ame kot at Edoma hnyi thopiny sâlt, a ödrin ten thauzan, me húgúnâ Sela hnyi vat, me hwenyi ien me Jokeheela ke ne o but hnyi bong ang.

8 Ke haba Amazia ame kunâ je úthumetu kö Joasa nöku Jehoaza, nöku Jehu, than Isaraela, me ha, ka habe, Ötu me he ka úhnyimakötuköu. 9 Me Joasa than Isaraela ame úkhúnöng kö Amazia than Juda me ha, ka habe, Haba iwadekonginy Lebanona ame úkhúnöng ka arasiny Lebanona, me ha, ka habe, Ham dö nokom hlu me me áian nökek : he haba ke menoiny hnyeuten Lebanona ame he ehele me ututo iwadekong. 10 E hnathu u je kot at Edoma, k' ame ogöranyi u ge hnyekom bi : senyin dö, ke laba ju hnyi hnyabam ; anyin a ieú u me he ka okúâ monu, me u me he ka ta me at Juda a tha ödrin möu? 11 Ke Amazia ame höcö löng. Me haba Joasa than Isaraela ame he ; ke e me Amazia than Juda ödrü me úhnyimaködruköu hnyi Bethese-

## II. JE THAN 15.

mes hanen hnyei Juda. 12 Ke Juda ame ngâ but hnyi hnyimakan Isaraela; me ödrin e ve kec ka hnyi umödrin je uma mano. 13 Ke haba Joasa than Isaraela ame hum Amazia than Juda, nöku Joasa, nöku Ahazia, hnyi Bethesemes, me o hnyi Jerusalema, me kia hna up haginy veto hnyi Jerusalema hwân hnyi homagöuleny Eferaima ke ne o but hnyi homagöuleny obiny bahebet, foa haded je kubit. 14 Ke e ame hom gol hia, me sileva, me ta je kaia hia adre me wâ hnyi uma umö Iehova, me hnyi hnyeuleny omjeü hnyi uma umen than, me tavat adre hügünâ me hnân hwaban hnyei, me adre me hmetu Samaria ai. 15 Ke haba kolon je hna ânyâ hnö Joasa, me anyin ta je huliwa hia, me tang hwegien, me hnen hna vat me Amazia than Juda, hawa, adre ca sihnalimen hnyi tusi hnân ha je bong bongon je than Isaraela? 16 Ke ame mokut ut Joasa tha e me lakamen, me adre me konâm e hnyi Samaria tha e me je than Isaraela; ke ame than biju Jeroboama a nokon hwaban.

17 Ke ame möt Amazia nöku Joasa than Juda hwaban dö a mokcu Joasa nöku Jehoaza than Isaraela, hnyi fiftin je huna. 18 Ke haba kolon je hna ânyâ hnö Amazia, hawa, adre ca sihnalimen hnyi tusi hnân ha je bong bongon je than Juda? 19 Ke ödrin e sihnân e hnyi Jerusalema; ke e ame kec Lakisa ai: ke ödrin e úkhünöng hoton Lakisa ai, me ödrin e hlingâ eling. 20 Ke ödrin e hom e hon je hors: ke adre konâm e hnyi Jerusalema tha e me lakamen hnyi taun anyi Davita. 21 Haba tavat Juda hia ödrin e hum Azaria, wale a sikstin dut je hunainy, me otilâ e ka than hnân hwabö Amazia a kamen. 22 Haba e ame op Elath me ham hmetu e ka at Juda, hwaban dö a mokut ut than tha e me lakamen.

23 Ke haba hnyi huna a fiftini Amazia nöku Joasa than Juda, me ame hwân ka than Jeroboama nöku Joasa than Isaraela hnyi Samaria, ke ne o but hnyi fâti wan je huna. 24 Ke e ame ânyâ únyi ae kong hnyi hnyimakö Iehova: k' ame ca saü únyi hnyi ta je hulö hia anyi Jeroboama nöku Nebata, at ame okúâ monu hnyi Isaraela. 25 Ke ame hom hmeto hnyigöulen Isaraela hwân hnyi gethen úheny Hamath ke ne o but hnyi köiöiny hnyei ae tha hon, helâ me hofuc ho Iehova Khongu Isaraela, waleji e ame ha a deny athnyabainy a Jona nöku Amitai, profeta, úheny Gathahcera. 26 Anyin a Iehova ame wâ vec

anyin at Isaraela ae ti gan: anyin ae ba at adre ca, ke ba at he monu, ke ba úhadruo hnyi Isaraela. 27 Ke Iehova, ame ca ha a g' ame he ka kot degecâ but iö Isaraela únyi eang hmeledrany: me e ame omeli ödra ge hnyamö Jeroboama nöku Joasa. 28 Ke haba kolon je hna ânyâ hnö Jeroboama, me anyin ta je huliwa hia, me tang hwegien, me hnen hna vat, me hom hmetu Damaseko, me Hamath hnyi Juda, hobi kâu Isaraela, hawa adre ca sihnalimen hnyi tusi hnân ha je bong bongon je than Isaraela? 29 Ke ame mokut ut Jeroboama tha e me lakamen je than Isaraela; ke ame than biju Zakaria a nokon hwaban.

## HNYIMAKAN 15.

**K**E haba hnyi huna a twente seveni Jeroboama than Isaraela, me ame hwân Azaria nöku Amazia than Juda he ka than. 2 Sikstin dut je hunainy hnyi úen e ame hwân ka than; ke e ame musi hnyi Jerusalema fifte tu je huna: haba ien hinyen, me, Jekolia momo Jerusalema. 3 Ke e ame ânyâ únyi ae so hnyi hnyimakö Iehova, helâ me ta je únyi hia a ânyâ Amazia a kamen. 4 Ke so bi adre me ca obia je dok ae görany: ke haba tavat adre me bi hut bala, me leü ütö ae bo so hnyi je dok ae görany. 5 Ke haba Iehova ame kot than, ke a lepera bala bi, ke ne o but hnyi bong e ame mokcu hnyin, ke e ame laba hnyi uma uö komok. Ke Jotham nokon than ame musö hnyaba, me owisa tavat a aten hnyei. 6 Ke haba kolon je hna ânyâ hnö Azaria, me anyin ta je huliwa hia, hawa, adre me ca sihnalimen hnyi tusi hnân ha je bong bongon je than Juda? 7 Ke ame mokut ut Azaria tha e me lakamen; me ödrin e konâm e tha e me lakamen hnyi taun anyi Davita: ke ame than biju Jotham a nokon hwaban.

8 Ke haba hnyi huna a thöte eit anyi Azaria than Juda, me ame than dut Zakaria nöku Jeroboama hon Isaraela hnyi Samaria hnyi siks je tehi. 9 Ke e ame ânyâ únyi ae kong hnyi hnyimakö Iehova, helâ me hna ânyâ hnen lakamen: e ame ca saü únyi hnyi ta je hulö anyi Jeroboama, nöku Nebata, at ame okúâ monu hnyi Isaraela. 10 Ke haba Saluma nöku Jabese ame sihnân e, me kot e hnyi hnyimakan tavat, me hlingâ, me e ame than biju hwaban. 11 Ke haba kolon je hna ânyâ hnö Zakaria, wâ bi, adre hia but sihnalimen hnyi tusi hnân ha je



## II. JE THAN 15.

bong bongon je than Isaraela. 12 Wale hofuc ho Iehova a ha kö Jehu, ka habe, Ame he je matrânâm ka tabâ theron hnyi Isaraela ke ne o but hnyi dö a vakiny. Me adre helâe.

13 Ke ame hwân Saluma nöku Jabese he ka than hnyi hunâ a thöte naini Uzia than Juda; ke e ame musi hnyi Samaria hnyi khaca tehi. 14 Ke ame he thö Menahema nöku Gadi ûheny Tirezâ, me o hnyi Samaria, me kuc Saluma nöku Jabese hnyi Samaria, me hlingâ e, me e ame than biju hwaban. 15 Ke haba kolon je hna ânyâ hnö Saluma, me hnen hna sihnân wale e ame ânyâ, wâ bi, adre hia but sihnalimen hnyi tusi hnân ha je bong bongon je than Isaraela. 16 Ke haba Menahema ame kot Tifesa me tavat hia hnyin, me hnyi hnyigöulen e, hwân Tirezâ: anyin a ödrin e ca khöng homagöule kâu, me e ame kot e; me e ame kave je erkin hia.

17 Ke haba hnyi hunâ a thöte naini Azaria than Juda, ame hwân Menahema nöku Gadi ka than hon Isaraela ten je hunâ hnyi Samaria. 18 Ke e ame ânyâ ûnyi ae kong hnyi hnyimakö Iehova: e ame ca saû, hnyi bongon je bong hia, ûnyi hnyi ta je hulö anyi Jeroboama, nöku Nebata, at ame okûâ monu hnyi Isaraela. 19 Ke ame o but Pula than Asuria he ka vat me hnye; ke haba Menahema ame ham kö. Pula khaca thauzan talan sileva, me me hadruâ e he ka ohmâ dökhu unyin. 20 Ke Menahema ame hom mone hnyi Isaraela, gadrin hia tavat ae tren omjeû, úsa fifte je sekel sileva, he ka ham ka than Asuria. Ke haba than Asuria ame he hmetu, ke ame ca laba bi eling hnyi hnye. 21 Ke haba kolon je hna ânyâ hnö Menahema, me anyin ta je huliwa hia, hawa adre me ca sihnalimen hnyi tusi hnân ha je bong bongon je than Isaraela? 22 Ke ame mokut ut Menahema tha e me lakamen; k' ame than biju Pekahia a nokon hwaban.

23 Ke haba hnyi hunâ a fifte Azaria than Juda, me ame hwân Pekahia nöku Menahema ka than hon Isaraela hnyi Samaria hnyi lo li hunâ. 24 Ke e ame ânyâ ûnyi ae kong hnyi hnyimakö Iehova: k' ame ca saû but ûnyi hnyi je hulö anyi Jeroboama, nöku Nebata, at ame okûâ monu hnyi Isaraela. 25 Ke haba Peka, nöku Remalia, taben anyin vat ame sihnân e, me kot e hnyi Samaria, hnyi uma umen than, tha e me Aregoba me Arie; ke tha e mē at Gileada a ödrin fifte: ke ame hlingâ e me

ame than ju hwaban. 26 Ke haba kolon je hna ânyâ hnö Pekahia, me anyin ta je huliwa hia, wâ bi, adre hia but sihnalimen hnyi tusi hnân ha je bong bongon je than Isaraela.

27 Ke haba hnyi hunâ a fifte tui Azaria than Juda, me ame hwân Peka nöku Remalia ka than hon Isaraela hnyi Samaria, twente je hunâ. 28 Ke e ame ânyâ unyi ae kong hnyi hnyimakö Iehova: k' ame ca saû but ûnyi hnyi je hulö anyi Jeroboama nöku Nebata, at ame okûâ monu hnyi Isaraela. 29 Ke haba hnyi je bong bongu Peka than Isaraela ame o but Tigelathepilesera than Asuria, me hügünâ Ijon, me Abela-bethemaka, me Janoa, me Kadesi, me Hazora, me Gileada, me Galiläia, hnye hia Nafatali; me e ame hum ödrin hia a je hwenbâ Asuria ai. 30 Ke haba Hosea nöku Ela ame sihnö Peka nöku Remalia, me kot e, me hlingâ, me e ame than biju hwaban, hnyi hunâ twentei Jotham nöku Uzia. 31 Ke haba kolon je hna ânyâ hnö Peka, me anyin ta je huliwa hia, wâ bi, adre hia but sihnalimen hnyi tusi hnân ha je bong bongon je than Isaraela.

32 Ke haba hnyi hunâ a loi Peka nöku Remalia than Isaraela, me ame hwân Jotham nöku Uzia than Juda, he ka than. 33 Twente faiv je hunainy hnyi ün e ame hwân ka than; ke e ame musi hnyi Jerusalema sikstin je hunâ: ke haba ien hinyen, me, Jerusa momo nöku Zadoka. 34 Ke e ame ânyâ ûnyi ae wisa hnyi hnyimakö Iehova: e ame ânyâ helâ me ta je ûnyi hia a ânyâ hnö Uzia a kamen. 35 Ke so bi adre ca ohia je dok ae görany: haba tavat ödrin e bi hut bala bi me leú utö ae bo so hnyi je dok ae görany. E ame op homagöule walethö hnyi uma umö Iehova. 36 Ke haba kolon je hna ânyâ hnö Jotham, me anyin ta je huliwa hia, hawa, adre ca sihnalimen hnyi je tusi hnân ha je bong bongon je than Juda? 37 Hnyi je bong eling Iehova ame hwân he ka kunö Rezina than Suria, me Peka nöku Remalia, he ka vat me Juda. 38 Ke ame mokut ut Jotham tha e me lakamen, me adre me konâm e tha e me lakamen hnyi taun anyi Davita a kiben: ke ame than biju Ahaza a nokon hwaban.

## II. JE THAN 16, 17.

### HNYIMAKAN 16.

**K**E haba hnyi huna a seventini Peka nöku Remalia me ame hwân ka than Ahaza nöku Jotham than Juda. 2 Twente but hunai Ahaza hnyi ûen e ame hwân ka than; ke e ame musi hnyi Jerusalema sikstin je huna: ke e ame ca ânyâ ûnyi ae wisa hnyi hnyimakö Iehova a Khongon, helâ me Davita a kiben. 3 Ke e ame vheno gethen deny je than Isaraela, eke, me kunâ nokon he ka he hnyi wanben meic, helâ me hwakecin ae ikiki anyin ke je hnyei, waleji a obâ Iehova hnyi hnyimakan lakon Isaraela. 4 Ke e ame bi hut me leû utö ae bo so hnyi je dok ae görany, me hon je dok ae hut, me hmelen je üö hia ae hât. 5 Ke haba Rezina than Suria, me Peka nöku Remalia than Isaraela, ödru me he Jerusalema ai he ka vat: me ödru me theling Ahaza, ke ca tudrin bi. 6 Haba hnyi ûen eling Rezina than Suria ame hûgûnâ hmetu Elath hobi kâu Suria, me obâ at Juda ûheny Elath: ke ame o at Suria Elath ai me laba eling, ke ne o but hnyi bong ang. 7 Haba Ahaza ame kunâ je úthumetu kö Tigelathi-pilesera than Asuria, me ha, ka habe, Inya ang athnyabaem me nokom: aiö u, me omeli nya ûnyi hnyi hnyamen than Suria, me ûnyi hnyi hnyamen than Isaraela, hnyat adre me tot kõnya. 8 Ke haba Ahaza ame hom sileva me gol adre me wâ hnyi uma umö Iehova, me hnyi hna ip omjeú hnyi uma umen than, me kunâ e hnân bwihlany ka than Asuria. 9 Me haba than Asuria ame löng kâu: me ame he than Asuria Damaseko ai, me hûgûnâ e, me hom tavat adre hom bâ Kira ai, me hlingö Rezina. 10 Ke ame he Ahaza than Damaseko ai he ka úkhanö me Tigelathi-pilesera than Asuria, ke e ame wâ taben hut hnyi Damaseko: me Ahaza a than ame kunâ uthumetu kö Uria at bihut he ka ha bongon e, me tulutiny, hoton hia hna huliwan. 11 Me haba Uria at bihut ame otílâ taben hut: hoton hia hna kunâ hnö Ahaza than ûheny Damaseko, me Uria at bihût ame ânyâ helâe hobi kâu e ka o hmetu Ahaza than ûheny Damaseko. 12 Ke ame o but than ûheny Damaseko, me e ame wâ taben hut: me haba than ame hakekenyâ taben hut, me hudo hut hon. 13 Me e ame le hudiny leû, me hudiny han, k' ame hingâlâ hudiny ic, me e ame dukâiâ dra dren hudiny ole hon taben hut. 14 Ke e ame oc taben

hut a bras wale ame tot hnyi hnyimakö Iehova, ûnyi hnyi hnyimakan uma, wale ûnyi hnyi wanben anyin taben hut me uma umö Iehova, me ip bi hnyi ke keihen anyin taben hut ka hnyi hwadrö. 15 Ke haba Ahaza than ame hûna kö Uria at bihut me ha, ka habe, Adre me he ka le hon taben hut ae gan hudiny leû anyin hnyomakatu, me hudiny han anyin sahaç, me hudiny leû anyin than, me anyin hudiny han, me hudiny leû anyin tavat hia hnyi hnyei, me anyidrin hudiny han, me anyidrin hudiny ic; me dukâiâ hon e dra hia dren hudiny leû, me dra hia dren hut: ke haba taben hut a bras me hnân hobi kõnya bi hnân hnei hnyin. 16 Me Uria at bihut ame ânyâ hia helâ me hna hûna hnö Ahaza than. 17 Ke haba Ahaza ame subâ degeçâ je baten je taben, me oc ûnyi hnyi hon je taben soú; me oc kâu taben köiö ûnyi hnyi hon je bolok a bras eû hmelen, me ip bi hon hna bi dek veto. 18 Ke haba gethen adre bi ban ethö hon hobi kâu bong sabath, wale adre me ânyâ hnyi uma, me gethen deny than hnyöu, me e ame wia ûnyi hnyi uma umö Iehova, can than Asuria. 19 Ke haba kolon je hna ânyâ hnö Ahaza wale e ame ânyâ, hawa, adre ca sihnalimen hnyi tusi hnân ha je bong bongon je than Juda? 20 Ke ame mokut ut Ahaza tha e me lakamen, me adre me konâm e tha e me lakamen hnyi taun anyi Davita: ke ame than biju Hezekia a nokon hwaban.

### HNYIMAKAN 17.

**K**E haba hnyi huna a twelvi Ahaza than Juda, me ame hwân Hosea nöku Ela ka than hnyi Samaria hon Isaraela, nain je huna. 2 Ke e ame ânyâ ûnyi ae kong hnyi hnyimakö Iehova, ke so bi e ca helâ me je than Isaraela a bán. 3 Ke ame o kâu vat ga Salemanesa than Asuria; ke haba Hosea ame bi athnyaba kâu, me ham kâu je bwihlany. 4 Ke a wâ but than Asuria hna sihnân ga Hosea; anyin a e ame hia but kunâ je úthumetu kö So than Aigupito, me ca kunâ ke bwihlany ka than Asuria, helâ me hnen hna labö ânyâ hnyi ke huna me ke huna: anyin a wale haba than Asuria ame hlöng hwanuma kâu, me ca e hnyi uma ceat. 5 Haba than Asuria ame vheno hnyei hia, me he Samaria ai, me thelöng e hnyi kun ta huna. 6 Ke hnyi huna a naini Hosea, haba than Asuria ame hûgûnâ Samaria, me hom Isaraela Asuria ai, me ip ödrin hnyi Hala.

## II. JE THAN 17.

me Habora, hnyi wagewe Gozana, me je taun anyin at Madai. 7 Ke helâe anyin a je lakon Isaraela ame kong hwakecidrin kö Iehova Khongudrin, at a hum ödrin únyi hnyi hnyeí Aigupito únyi hnyi hmelen hnyamö Farao than Aigupito, me outen je khong, 8 me vheno je hnanyibu anyin je hnyeí, wale a obâ Iehova hnyi hnyimakan lakon Isaraela, me je hnanyibuiny je than Isaraela, wale ödrin e otilâ. 9 Ke haba lakon Isaraela ödrin e ânyâ duöngâ je únyi ae ca wisa bi kö Iehova Khongudrin; ke ödrin e otilâ hobi ködrin bi je dok ae görany hnyi anyidrin je taun hia, hwân hnyi tap anyin tavat hmákâ, ke ne o but hnyi taun adre up veten. 10 Ke ödrin e otilâ hobi ködrin bi je veto ame tot, me je Aseira hon je bucen hia, me hmelen je úö hia ae hát: 11 ke ödrin e leú utö ae bo so eling hnyi je dok ae görany hia helâ me je hnyeí wale a oc degecâ Iehova hnyi hnyimaködrin; ke ödrin e ânyâ je únyi ae kong he ka ohmönyni Iehova: 12 ke ödrin e bi athnyaba ka je idola, waleji a ha Iehova ködrin, ka habe, Ca he öbun ka ânyâ únyi e. 13 Ke so bi haba Iehova ame haimemenâ ka Isaraela, me Juda, a deny je perofeta hia, me tavat wâ hia, me ha, ka habe, Hwiö thö únyi hnyi debun ta je gethen ae kong, ke tuö ju hnök je hna húna, me anyik je hnanyibu, helâ me je hnanyibu hia waleji oge húna ka lakamöbun, me kunâ köbun a deny je athnyabaik a je perofeta. 14 Ke so bi ödrin e hócö löng, me ohwegiâ je nyidrin, helâ me nyin je lakamödrin, tavat adre me ca labageju bi kö Iehova Khongudrin. 15 Ke ödrin e hna degecâ anyin je hnanyibu, me anyin úhinhnyköu waleji e ame ânyâ me lakamödrin, me hnen je hna ohnathoâ ködrin; ke ödrin e hnu hoton únyi ae únyi baú, me ödrin e hop bi, me hnu hoton je hnyeí igigili ödrin, waleji a ha Iehova a ödrin e ca he ka ânyâ e úcú mödrin. 16 Ke ödrin e hna degecâ je hna húna hnö Iehova Khongudrin, me ânyâ hobi ködrin je idola adre oköiâ, a li nokon kau, me ânyâ Aseira me khudrung ka je únyi hia hnyi drany, me bi athnyaba kö Baala. 17 Ke ödrin e kunâ lakudrin je бага me hlu he ka he hnyi wanben meic, me bi khong, me biobotkong, me úcú ödrin bi he ka ânyâ hulö hnyi hnyimakö Iehova, he ka ohmönynâ e. 18 Anyin a wale Iehova ame hmönynin gan hmâ kö Isaraela me kun' ödrin dut únyi hnyi hnyimakan: e ba köluidrin, ke hake so thiju tribu anyi Juda.

19 Ke haba Juda minya ame ca tuö je hnanyibu anyi Iehova Khongudrin, ke odrin e vheno je hnanyibu anyin je than Isaraela waleji ödrin e otilâ. 20 Haba Iehova ame hna degecâ je mâtrâni Isaraela hia, me oveci ödrin, me hn' ödrin ka hnyi hnyamen tavat sei, ke ne o but e ame ob' ödrin únyi hnyi hnyimakan. 21 Anyin a e ame kia Isaraela únyi hnyi lap anyi Davita; ke ödrin e othani Jeroboama nöku Nebata: ke haba Jeroboama ame lili Isaraela me me ca hnu hotu Iehova, me kun' ödrin he ka ânyâ hulö ae gan hmâ. 22 Ke haba lakon Isaraela ödrin e vheno ta je hulö hia anyi Jeroboama e ame ânyâ; ödrin e ca saú but únyi hnyin; 23 ke ne o but Iehova ame hom Isaraela but únyi hnyi hnyimakan, helâ me hnen hna ha a deny je athnyabainy hia a ta je perofeta. Me adre me hom at Isaraela únyi hnyi idrin hnyeí Asuria ai, ke ne o but hnyi bong ang.

24 Ke haba than Asuria ame hom tavat úheny Babulona, me Kutha, me Ava, me úheny Hamath me Sefaravaima, me ip ödrin hnyi je tauniny Samaria hwaban lakon Isaraela: me ödrin e labâ Samaria, me laba hnyi je tauniny. 25 Ke haba hnyi ibi laba a ödrin e, me ödrin e ca outö Iehova: waleling me me kunâ je liona hnö Iehova, me hlingâ keihen gadrin. 26 Me ödrin e fuc ka than Asuria, me ha, ka habe, Haba tavat u je hia but hom me ip hnyi je tauniny Samaria, me ca khan' ödrin bongon Khongon hnyeí: anyin a wale e ame kunâ ködrin je liona, me wâ bi, ödrin e hling' ödrin, anyin ae ca khan' ödrin bi bongon Khongon hnyeí. 27 Me haba than Asuria ame húna me ha, ka habe, Adre me he ka kunâ eling ke at bihut, waleji at öbun e hom úheny e; ke ödrin e he ka he me laba eling, ke hamen he ka n' ödrin bi ge bongon Khongon hnyeí. 28 Me haba ke at bihut waleji ödrin e hom úheny Samaria ame o me laba hnyi Beth-ela me n' ödrin ge bongon he ka outö Iehova. 29 Ke so bi haba aten je hnyeí ödrin e ve ânyâ je khongudrin bi, me ip hnyin je uma hnyi je dok ae görany waleji a ânyâ at Samaria, a ta je hnyeí hia hnyi anyidrin je taun wale ödrin e labâ. 30 Ke haba at Babulona ödrin e ânyâ Sukotha-benotha, ke haba at Kutha ödrin e ânyâ Neregala, ke haba at Hamath ödrin e ânyâ Asima, 31 ke haba at Avi ödrin e ânyâ Nibehaza me Taretaka, ke haba at Sefaravaima ödrin e thong lakudrin ge meic kö Aderameleke me Anameleke a li khongon

## II. JE THAN 18.

Sefaravaima. 32 Me ödrin e outö Iehova, me otilâ hobi ködrin ke únyi gadrin, hnyat bihut hnyi je dok ae görany, a hnyat ödrin e bi hut hobi ködrin hnyi je uma umen je dok ae görany. 33 Ödrin e outö Iehova me bi athnyabainy je khongudrin, hoton hwakecin je hnyei adre hia but hum ödrin únyi hnyin. 34 Ke ödrin e ányâ hoton hwakecidrin ehac ke ne o but hnyi bong ang: ödrin e ca outö Iehova, ke haba khaca ödrin e ca ányâ hoton anyidrin je hnanyibu, me anyidrin tulut, me hoton hnanyibu me hna húna waleji a húna Iehova ka lakon Jakob, a hnyat e ame hwenyi iödrin me Isaraela; 35 at eji Iehova ame úhinykôu mē, me húna ködrin, ka habe, Ca he öbun ka outen je khong, me nom ködrin, me bi athnyabaidrin, me bi hut ködrin: 36 Ke haba Iehova at ame hum öbun únyi hnyi hnyei Aigupito ge man ae gan me benyin ame hai, öbun e he ka outen, me khudrung kâu, me bi hut kâu: 37 ke haba je hna ohmâ, me je hna otilâ, me hnanyibu, me hna húna, waleji e ame sihnalimen hobi köbun, me öbun e he ka tuö me ányâ hnyi taogo bong hia; ke ca he öbun ka outen ta je khong bi: 38 ke ca he öbun ka hnying hnök hna úhinykôu möbun; ke ca he öbun ka outen je khong: 39 ke so bi öbun e he ka outö Iehova Khongubun; k' ame he ka omeli öbun únyi hnyi hnyamen je iwahnaihmiony möbun hia. 40 Ke ödrin e ca löng, ke ödrin e ányâ helâ me hwakecidrin ehac. 41 Ke haba je hnyei eling ödrin e outö Iehova, me bi athnyaba ka anyidrin je hnatheat: helâe minya lakudrin, me lakon lakudrin, ödrin e ányâ helâ me hna ányâ hnen lakamödrin ke ne o but hnyi bong ang.

### HNYIMAKAN 18.

**K**E haba hnyi huna a kuni Hosea nöku Ela than Isaraela me ame hwân Hezekia nöku Ahaza than Juda he ka than. 2 Twente faiv but hunainy hnyi úen e ame hwân ka than; ke e ame musi hnyi Jerusalema twente nain je huna: haba ien hinyen me, Abi a nöku Zakaria. 3 Ke e ame ányâ wisa hnyi hnyimakö Iehova, helâ me hna ányâ hia hnö Davita a kiben. 4 Haba e ame ohia je dok ae görany, me tho je veto ame tot, me sö degecâ je Aseira: ke e ame kot amamá on bras waleji a ányâ Mose; anyin a lakon Isaraela ödrin e leú utö ae bo so kâu, ke ne o but hnyi bong

eling; ke e ame hwenyi ien me Nehusetana. 5 Ke ame labageju kö Iehova Khongu Isaraela; ke ba at a biliny ae úcú mē unyin je than Juda hia, ke ba ehac. 6 Anyin a e ame kece hmâ kö Iehova, k' ame ca saú but gan, ke e ame tuö anyin ta je hnanyibu, waleji a húna Iehova kö Mose. 7 Ke haba Iehova ame tha e mē; haba hnyi je dok hia e ame he ka hnyin e ame hnalic, ke e ame hota degecâ than Asuria, me ca bi athnyabainy. 8 E ame kot at Filisiti ke ne o but hnyi Gaza, me hnyigöulen e, hwân hnyi tap anyin tavat hmákâ, ke ne o but hnyi taun adre up hagingy veto.

9 Ke haba hnyi huna a vaki Hezekia than, wale huna a seveni Hosea nöku Ela than Isaraela, me ame o Salemanesa than Asuria Samaria ai, me thelöng e. 10 Ke ödrin e hügúnâ e hnyi obiny kun ta huna: wale hnyi huna a siksi Hezekia, wale huna a naini Hosea than Isaraela, adre hügúnâ Samaria. 11 Ke haba than Asuria ame hom at Isaraela Asuria ai, me ip ödrin hnyi Hala, me Habora hnyi wageweiny Gozana, me je taun anyin at Madai: 12 anyin a ödrin e ca löng hofuc ho Iehova Khongudrin, ke ödrin e hanyâúâ anyin úhinykôu, wale hna húna hia hnö Mose athnyabai Iehova, ke ödrin e höcö bi löng me ányâ.

13 Ke haba hnyi huna a fotini Hezekia than, ame o but Saneribi than Asuria he ka vat me je taun hia adre up hagingy veto bnyi Juda, me hügúnâ. 14 Haba Hezekia than Juda ame úkhünöng Lakisa ai ka than Asuria, me ha, ka habe, Oge hia but monu; hmetu ju gak: haba ta je únyi hia u me he ka ip huk me oge me he ka hom. Haba than Asuria ame bi hwaban kö Hezekia than Juda a kun ta haded talan sileva ke thöte je talan gol. 15 Ke haba Hezekia ame ham kâu ta je sileva hia adre wâ hnyi uma umö Iehova, me hnyi hna ip omjeú hnyi uma umen than. 16 Haba hnyi úen eling Hezekia ame subâ muâ gol hnyi je hlinginy hwanumen uma umö Iehova, me hnyi je hmolom wale a tube Hezekia than Juda, me ham ka than Asuria. 17 Ke haba than Asuria ame kunö Taretana, me Rabesarisa, me Rabesake úheny Lakisa Jerusalema ai kö Heseikia than, me utbavat ae gan. Ke ödrin e he me o hnyi Jerusalema. Ke ödrin e hia but ölö, me ödrin e tot hnyi deny köioiny an ethö, wale hnyi gethen ame he ka hnyi utkânâ anyin at hnú mano. 18 Ke ödrin e hia but hawâ

## II. JE THAN 19.

than, me ame o but ködrin Eliakima nöku Hilekia, at ame musö hnyaba, me Sibena at sihnalimen, me Joa nöku Asafa at ame oünykümeâ. 19 Haba Rabesake ame ha ködrin, ka habe, Ha thö walang ang kö Hezekia, ka habe, Walang hna ha hnen than ae gan, wale than Asuria, ka habe, Ie ünyi eang u me labageju kâu? 20 Hai-ngâm, ka habe, E hu metâ me tang hwege hobi kâu vat; ke so bi hofuc baü e thibi. Ke u me labageju kö ia anyin a u me bi gan könya? 21 Wâ bi, u me bi cem ka uci hlowe ae hmetru, a Aigupito; ke e ka hlec hnyiban e ge at me ame he ka dâ oâ hnyamen: helâe Faraa than Aigupito ködrin hia adre me labageju kâu. 22 Ke öbun e ne ha könya, ka habe, Öhmun e labageju kö Iehova Khonguhmun; hawa, ame ca ohia ga Hezekia anyin je dok ae görany me je taben hut, me ha ka at Juda me Jerusalem, ka habe, Walang taben hut hnyi Jerusalem öbun e he ka khudrung hnyi hnyimakan? 23 Ke walang ang u me he ka ham je haten ka tuhök than Asuria, me oge me he bi nya ka ham köu lo li thauzan je hors, a ne khanö u he ka ve otabâ ge tavat. 24 Ke ieü gam me u me ohmeto ke taben vat ae ühnyükong hmönyin anyin tuhök, m' u me labageju ka Aigupito ge je kariota me tavat tabö hors? 25 Ke hawa, oge me o but ka hnyi taun ang, ke ba Iehova unyik, he ka ohia e? Haba Iehova ame ha könya, ka habe, He thö ka hnyi hnyei ang me ohia e. 26 Me haba Eliakima nöku Hilekia, me Sebena, me Joa, ödrin e ha kö Rabesake, ka habe, Ö u fuc köhmun a lathnyabaem hnyi hwen Suria; anyin ae khan' öhmun e; ke ca fuc köhmun hnyi hwen Juda wâ e nye löng dö tavat hon hna up haginy. 27 Me haba Rabesake ame thu ködrin, ka habe, Hawa, a kunö nya tuhök ka tuhâm, möu minya, he ka ha hofuc ang? hawa, e ame ca kunö nya ka tavat adre me laba hon hna up haginy, m' adre me han tidrin me ijem hnödrin hna hwen hingat a tha ödrin möbun? 28 Ke haba Rabesake ame tot me hongot hwege hnyi hwen Juda, ka habe, Löng ju öbun hofuc hwan than ae gan, a than Asuria. 29 Walang hna ha hnen than, ka habe, Ca he ka iyaw' öbun ga Hezekia; anyin a e ame ca he ka omeli öbun ünyi hnyi hnyamen: 30 ke haba khaca ca he Hezekia ka kun' öbun he ka labageju kö Iehova, haingen, ka habe, Ame he Iehova ka omeli ötin, k' adre me ca he

ka hna taun ang ka hnyi hnyamen than Asuria. 31 Ca he öbun ka ling Hezekia: anyin a walang hna ha hnen than Asuria, ka habe, Öbun e he ka üsoköu mönya, me he könya; m' öbun e he ka ve ijem wan anyibun je vine, me wan anyibun je meta, me ve ijem je an öbun e kou; 32 ke ne o but oge me o me hum öbun ka hnyi ke hnyei helâ meibun, a hnyei ae hu hwit me waina, hnyei ae hu areto me je hnyei vine, hnyei ae hu wakaco elaiö me hani, m' öbun e ka möt, me ca he ka mokcu: ke ca he öbun ka ling Hezekia, e ka cubic öbun me ha, ka habe, Iehova ame he ka omeli ötin. 33 Hawa, e hu hna omelö tavat ge je khongon je hnyei ünyi hnyi hnyamen than Asuria? 34 Ewa je khongon Hamath, me Arepada? ewa je khongon Sefaravaima, me Hena, me Iva? hawa, ödrin e hia but omeli Samaria ünyi hnyi hnyamök? 35 Ia unyin je khongon je hnyei a omelö je idrin ünyi hnyi hnyamök, me me he Iehova ka omelö Jerusalem ünyi hnyi hnyamök? 36 Ke haba tavat ödrin e laba hnyibü, me ca thu kâu ge ke hofuc: anyin a huna than, ka habe, Ca he bi ka thu kâu. 37 Haba Eliakima nöku Hilekia, at ame musö hnyaba, me Sebena at sihnalimen, me Joa nöku Asafa at ame oünykümeâ, ödrin e o kö Hezekia me je ükhâüdrin adre kia, me thumeto e ge hofuc ho Rabesake.

### HNYIMAKAN 19.

**K**'a löng ut Hezekia than, me e ame kia anyin je ükhaü, me khavâ mano ae gan nân, me he ka hnyi uma umö Iehova. 2 Ke e ame kunö Eliakima at ame musö hnyaba, me Sebena at sihnalimen, me je hingat bihut, ödrin e ve khavâ mano ae gan nân, kö Isaia perofeta nöku Amosa. 3 Ke ödrin e ha kâu, ka habe, Walang hna ha hnö Hezekia, ka habe, Haba bong ang bonginy vec, me ü, me ühaikonguny: anyin a o üen o a je wanakat, ke ba tang hwegien he ka hnokoâ. 4 Ame ne he Iehova Khongom ka löng la je hofuc hia ho Rabesake, wale a kunâ than Asuria a tuhan he ka haikongoâ Khong ae möt, ke e ame he ka thawâ je hofuc a löng Iehova Khongom: anyin a wale hic dö hobi kâu je kolon. 5 Me ame he je athnyabai Hezekia than kö Isaia. 6 Ke haba Isaia ame ha ködrin, ka habe, Öbun e he ka ha helâng ka tuhöbun, ka habe, Walang hna ha hnö Iehova, ka habe, Ca he bi ka outen je hofuc u je löng waleji

## II. JE THAN 19.

hnen lathnyabainy, than Asuria hna haikongu nya. 7 Wâ bi, oge me he ka ip hnyi hnyekon ke hanu, ke e ame he ka löng ke úthumetu, me me hmetu ka hnyi iny hnyei; ke oge me he ka ota e ge hele vat hnyi iny hnyei

8 Me ame hmetu but Rabesake me wâ than Asuria hnyi Lebena ame vat eling: ke e ame löng a ga he but úheny Lakisa. 9 Ke e ame löng ga Tiraka than Aithiop, ka habe, Wâ bi, e but ang, k' ame he ka vat möu; me e ame kunâ hmetu je úthumetu kö Hezekia he ka ha, ka habe, 10 Walang hofuc öbun e he ka ha kö Hezekia than Juda, ka habe, Ca he bi ka iyawö u ge Khongom at u je labageju kâu, ka habe, Adre me ca he ka hna Jerusalema ka hnyi hnyamen than Asuria. 11 Wâ bi, u je hia but löng hna ányâ hnen je than Asuria ka je hnyei hia, k' ame ohí' ödrin hia: me hawa, adre me he ka omeli u? 12 Hawa, a hia but je khongon je hnyei omeli ödrin, waleji a ohia ge lakamök, a Gozana, me Karan, me Rezef, me laku Edena hnyi Thelasa? 13 Ewa thaniny Hamath, me thaniny Arepada, me thaniny taun Safaravaima, me Hena, me Iva? 14 Me haba Hezekia ame kap tusi únyi hnyi hnyamen uthumetu, me aú: me ame he Hezekia ka hnyi uma umö Iehova, me ame ulolo e hnyi hnyimakö Iehova. 15 Ke haba Hezekia ame hic hnyi hnyimakö Iehova, me ha, ka habe, Iehova lö, Khongu Isaraela, at ame laba hnyi wanben li kerubi, u thibi Khong hnyi ta je dökhu hia eang hmeledrany; u je op drany me hmeledrany. 16 Iehova lö, tevehlöng ju, me löng; ngele thö me wâ: me löng hofuc ho Saneribi, wale e ame kunâ he ka haikongoa Khong ae möt. 17 Iehova lö, e hnathu a g' ame öba wan je hnyei me je idrin hnen je than Asuria, 18 me khúâ je khongudrin ka hnyi meic: anyin a ödrin ca je khong, ke so bi huliwa anyin li hnyamen at, a je utö me veto; waleling m' adre me ohí' ödrin. 19 Iehova lö, Khonguhmun, ö u omeli öhmun walang ang únyi hnyi hnyamen, me me khana ge je dökhu hia eang hmeledrany a u Iehova Khong, a u thibi.

20 Ke haba Isaia nöku Amosa ame úkhúnöng kö Hezekia, me ha, ka habe, Walang hna ha hnö Iehova, Khongu Isaraela, ka habe, Haba hnyi hnâm hna hic könja ga Saneribi than Asuria, me oge hia but löng. 21 Ke walang hofuc a ha Iehova

gan, ka habe, Haba hlu baú a nöku Ziona ame hukötiö u, k' ame hlumö u; k' ame nyinyikâ ban köu hnen hlu nöku Jerusalema. 22 U je úhaikonguny me bi gan kö ia? u je ha kö ia hofuc ae hwege me bi gan? ka At ae Kap anyi Isaraela. 23 U je hia but haikongo Than a deny ányâm je úthumetu me ha, ka habe, Oge ölö hon bucen, ka hnyin je ke keihen Lebanona, tha e me anyik je kariota ae se hia; ke oge me he ka sö je arasiny ae beú, me je köpiny adre úca: ke oge me he ka o ka hnyi omtabaga hnyi obiny e, hnyi hnyeuten hna belök. 24 Oge hia but khú an ikanyua me ic, ke haba li hnyeúcak ame he ka ohmö je wageweiny hia Aigupito. 25 Hawa, u me ca löng ge hnök hna ányâ e ehac, me op e hnyi je bong a bán? walang ang oge hia but ohwádâ a g' ame he ka ba wan je taun adre up veten, me me je hudrei 26 Anyin ae ba maniny tavat adre me labâ e, ödrin ot me hmehma; ödrin helâ me hna önying, me úö ae ometu ae hât, me hna önying hon uma, me hwit ae meleca ae tiga ca metu bi. 27 Ke oge wâ but hnâm hna laba me hnâm hna didrut me didrö, me hnâm hna ohmönyini nya. 28 Can anyin a o but ka hnyi hnyikönyök hnâm hna ohmönyini nya, me hnâm hna bi gan könja, oge me he ka inâ anyik otru hnyi hnyingöiâm, me anyik fao hnyi hnyimâm, ke oge me he ka ohmetu u hnyi gethen u je o hnyin. 29 Ke walang haten köu: a öbun e he ka han únyi ame ku hwege hnyi huna ang, ke haba hnyi huna a loiny únyi ame ku hwege minya hwaban; ke haba hnyi huna a kuniny öbun e he ka belök, me menu, me ta ta je hnyei vine me ijem wan. 30 Ke haba je kolon lap anyi Juda ae möt, ame he ka kú thö eú me wa göranyai. 31 Anyin ame he ka he úheny Jerusalema je kolon, me úheny hnyi bucen Ziona je hnyat adre me he ka möt: adre me he ka ányâ e hnen we Iehova ae gan hmâ. 32 Anyin a wale, walang hna ha hnö Iehova ge than Asuria, ka habe, E ame ca he ka o ka hnyi taun ang, me hlec fana ka hnyin, me e ame ca he ka o hnyi hnyimakan, tha e me je bec, me khon kânâ kâu. 33 Ke e ame he ka hmetu hnyi gethen a o hnyin, ke e ame ca he ka o ka hnyi taun ang, haingö Iehova. 34 Anyin oge me he ka söng taun ang he ka omelö e, gak bi, me ga Davita athnyabaik.

35 Ke haba hnyi lit eling ame he but angela anyi Iehova me kot tavat a wan haded ke eite faiv thauzan hnyi hna hu-

## II. JE THAN 20, 21.

numa anyin at Asuria : ke ame vesâ tavat hnyi hnyomakatu, me wâ bi, ödrin je komok a mokcu hia. 36 Me ame todrö saneribi than Asuria, me he, me laba hnyi Nineve. 37 Ke e ame laba he ka hmi hnyi uma umö Niseroka a khongon, me haba Aderameleke me Sarezera ödru me kot e ge hele vat, me ödru me kec ka hnyi hnyei Ararata. Ke ame than biju Esar-adon a nokon hwaban.

### HNYIMAKAN 20.

**K**E haba hnyi ün eling ame he but Hezekia ka mokcu. Me ame o kâu Isaia perofeta nöku Amosa, me ha kâu, ka habe, Walang hna ha hnö Iehova, ka habe, Ününe thö me änyâm lap; anyin a u me he ka mokcu, m' u ca he ka möt bi. 2 Me haba Hezekia ame hwiö hnyimakan ka hnyeige uma, me hic kö Iehova, me ha, ka habe. 3 Iehova lö, oge me khöü köu, Ö u ünyküme ju walang ang hnök hna he hnathu hnyi hnyimákâm, me hnyok ae wisa, me änyâ ünyi ae so hnyi hnyimákâm. Ke Hezekia ame tenge hwege. 4 Ke tiga ca o Isaia ka hnyi wanben taun, me ame o kâu hofuc ho Iehova, me ha, ka habe, 5 Hwiö hmetu thö, me ha kö Hezekia, a taben lakeik, ka habe, Walang hna ha hnö Iehova Khongu Davita a kibâm, ka habe, Oge hia but löng hijâm hic, me wâ deköiâm : me wâ bi, oge me he bi nya ka omeli u : haba hnyi bong a kuniny u me he ka he ka hnyi uma umö Iehova. 6 Me oge me he bi nya ka bi hanen bongom je bong ama fiftin je huna ; me oge me he ka omeli u me taun eang ünyi hnyi hnyamen than Asuria, ke oge me he ka söng taun ang gak bi, me ga Davita athnyabaik. 7 Ke haba Isaia ame ha, ka habe, Hom dö u wan meta. Me ödrin e hom ünyi eling me ip hon ohuc, me e ame möt hmetu. 8 Me haba Hezekia ame ha kö Isaia, ka habe, Ieü haten a g' ame he Iehova ka omeli nya, k' oge me he ka dit ka hnyi uma umö Iehova hnyi bong a kuniny? 9 Me haingö Isaia, ka habe, Walang haten köu ünyi ga Jehova, a g' ame he Iehova ka änyâ ünyi a ha : hawa, ame he ka he bala hmenon seünö hnyi ten je haten, ame ne he ka he hmetu hnyi ten je haten? 10 Haba Hezekia ame ha, ka habe, Ünnyi ae hâhâ he ka he bala hmenon seünö ke ne o but hnyi ten je haten : ohe, e so e hmetu hmenon hnyi ten je haten. 11 Haba Isaia perofeta ame hongot kö

Iehova : ke e ame ohmeto hmenon ten je haten, wale je haten adre me vheno hnyi haten seünö anyi Ahaza.

12 Ke haba hnyi ün eling Berodakabaladana nöku Baladana, than Babulona, ame kunâ je tusi me bwihlany kö Hezekia : anyin a e ame löng ae gan imeki Hezekia. 13 Ke Hezekia ame ling ödrin, me omanenâ ködrin uma omjeüiny hia, a sileva me gol, me je utö ae bo so, me wakaco ae gan hwaban, me umen je omjehen vat, me ta je ünnyi hia ae hnyi uma omjeüiny : e ba ünnyi hnyi umen uma, me dokhon dökhü hia a ca omanenâ Hezekia ködrin. 14 Haba Isaia perofeta ame he kö Hezekia than, me ha kâu, ha habe, Ieü hna ha hnen tavat eling? ke ühedrin ua köu? Haba Hezekia ame ha, ka habe, Ühedrin hnyi hnyei ae sâkâü, wale Babulona. 15 Ke haingen, ka habe, Ieü ödrin e hamâ hnyi umâm uma? Haba Hezekia ame thu, ka habe, Ödrin e hia but wâ ta je ünnyi hia hnyi umök uma : e ba ke ünnyi hnyi omjehek oge ca omanenâ ködrin. 16 Haba Isaia ame ha kö Hezekia, ka habe, Löng ju hofuc ho Iehova. 17 Wâ bi, ame he ka o je bong me adre me he ka tha hom Babulona ai ta je ünnyi hia hnyi umâm uma, me je ünnyi a ip lakâmâm ke ne o but hnyi bong ang : ke ame he ka ba kolon, haingö Iehova. 18 Ke haba ke je lakom ame he ka o ünnyi gam, a je mâtrânâm, adre me he ka hom dö; me me je eunuka hnyi hnyaban than Babulona. 19 Haba Hezekia ame ha kö Isaia, ka habe, E so hofuc ho Iehova wale u me ha. Ke haingen minya, ka habe, Hawa, e ca so eling, ame ne hu üsoköu me hnathu hnyi bonguk je bong? 20 Ke haba kolon je hna änyâ hnö Hezekia, me tang hwegien hia, me hnen hna änyâ an, me bi deny köien, me oâ köiö ka hnyi taun, hawa adre ca sihnalimen hnyi tusi hnân ha je bong bongon ta je than Juda? 21 Ke ame mokut ut Hezekia tha e me lakamen : ke ame than biju Manase a nokon hwaban.

### HNYIMAKAN 21.

**T**WELV ta hunai Manase hnyi ün e ame hwân ka than; ke ame musi hnyi Jerusalema hnyi fite faiv je huna : haba ien hinyen me, Hefeziba. 2 Ke e ame änyâ unyi ae khong hnyi hnyimakö Iehova, hoton hwakecin ae ikiki anyin ke je hnyei, waleji Iehova ame obâ hnyi hnyimakan lakon Isaraela. 3 Anyin a e ame

## II. JE THAN 22.

otilâ hmetu je dok ae görany waleji a ohia ga Hezekia a kamen; ke e ame otilâ je taben hut kö Baala, me ânyâ ke Aseira, helâ me hna ânyâ hnö Ahaba than Isaraela, me khudrung ka ta je ûnyi hia hnyi drany, me bi athnyabaidrin. 4 Ke e ame op je taben hut hnyi uma umö Iehova, wale a ha gan Iehova, ka habe, Oge me he ka ip iök hnyi Jerusalema. 5 Ke e ame op je taben hut hobi kâu ta je ûnyi hia hnyi drany hnyi li hnyeuleny uma umö Iehova. 6 Ke e ame kunâ nokon бага he ka he hnyi wanben meic, ke e ame bibihwakecin, me bi biobotkong, me tha laba unyin tavat tren hanu ae kong, me tavat bi khong: e gan hmâ hulo e ame ânyâ hnyi hnyimakö Iehova, me me ohmönyinâ e. 7 Ke e ame otilâ Aseira, wale e ame ânyâ, hnyi uma a ha gan Iehova kö Davita me Solomona a nokon, ka habe, Haba hnyi uma ang, me hnyi Jerusalema, wale oge me úca ûnyi hnyi je tribu Isaraela hia, me oge me he ka ip iök hnyin nyiele balua: 8 ke oge me ca he ka hom li can at Isaraela he ka he ûnyi hnyi hnyei oge me ham ka lakamödrin; ödrin e ne wâ wia he ka ânyâ hia hoton hnök hna hûna ködrin, me helâ me hnanyibu hia waleji a hûna ködrin Mose a athnyabaik. 9 Ke so bi ödrin e ca löng bi: ke haba Manase ame omonu ödrin he ka ânyâ ûnyi ae kong hon ta je hnyei hia, waleji a obâ Iehova hnyi hnyimakan lakon Isaraela. 10 Ke haba Iehova ame fuc a deny je perofeta a je athnyabainy, ka habe, 11 Anyin a Manase than Juda ame ânyâ ta je ûnyi eling ae ikiki, me ânyâ ûnyi ae kong hon ta je ûnyi a ânyâ at Amora, tavat a bân, me okúâ hwakecin ae kong anyin at Juda ge anyin ta je idola: 12 anyin a wale, walang hofuc ho Iehova, Khongu Isaraela, ka habe, Wâ bi, oge me he bi nya ka oâ úokonguny hnyi Jerusalema me Juda, me me he ka umet hnyikönyen tavat, ödrin ka löng. 13 Ke oge me he ka lelö hon Jerusalema tulutiny Samaria, me tulut adre otilâ anyin lap anyi Ahaba: ke oge me he ka kot Jerusalema helâ me at ame khut kaia, ame kot e me wia hnyimen hnyikânâi. 14 Ke oge me he ka hna degecâ kolon ik, me hn' ödrin ka hnyi hnyamen je iwhnaihmiöny mödrin; ke ödrin e he ka je bâ me hna sei hnen je iwhnaihmiöny mödrin; 15 Anyin a ödrin e hia but ânyâ ûnyi ae kong hnyi hnyimakök, me ohmönyini nya, hwân hnyi bong a o hnyin lakamödrin úheny Aigupito, ke ne o but hnyi bong ang. 16 Ke haba khaca, Manase ame hingâlâ

dra ae ba hnyikongon e ti gan, ke ne o but ame ti unöngötö Jerusalema gan hnyi je ke keihen hia; me anyin minya hulö wale ame okúâ hwakecin ae kong anyin at Juda, wale he ka ânyâ ûnyi ae kong hnyi hnyimakö Iehova. 17 Ke haba kolon je hna ânyâ hnö Manase me anyin ta je huliwa, me anyin hulö e ame ânyâ, hawa, adre ca sihnalimen hnyi tusi hnân ha je bong bongon je than Juda? 18 Ke ame mokut ut Manase tha e me lakamen, me adre me konâm e hnyi utkânâ hnyi umen uma, wale utkânâ anyi Uza: ke ame than biju Amona a nokon hwaban.

19 Twente tu but hunai Amona hnyi úen e ame hwân ka than; ke e ame musi hnyi Jerusalema lo li hunai: ke haba ien hinyen me Mesulemeth, momo nöku Haruza úheny Jotebath. 20 Ke e ame ânyâ ûnyi ae kong hnyi hnyimakö Iehova, helâ me hna ânyâ hnö Manase a kamen. 21 Ke e ame vheno ta je gethen hia a vheno kamen, me bi athnyabainy je idola wale a bi athnyabainy kamen, me khudrung ködrin: 22 ke e ame hna degeci Iehova Khongon lakamen, me ca vheno bi gethen de Iehova. 23 Ke haba lathnyabai Amona ödrin e sihnân e, me hlingâ than hnyi umen uma. 24 Ke haba aten hnyei ödrin e hlingâ hia tavat adre sihnö Amona than; ke haba tavat aten hnyei ödrin e otilö Josea a nokon ka than hwaban. 25 Ke haba kolon je hna ânyâ hnö Amona waleji e ame ânyâ, hawa, adre ca sihnalimen hnyi tusi hnân ha je bong bongon je than Juda? 26 Ke adre me konâm e hnyi erkemok hnyi utkânâ anyi Uza: ke ame than biju Josea a nokon hwaban.

### HNYIMAKAN 22.

**E**IT ta hunai Josea hnyi úen e ame hwân ka than, ke e ame musi hnyi Jerusalema thöte wan je hunai: haba ien hinyen me Jedida, nöku Adaiia úheny Bozekath. 2 Ke ame ânyâ ûnyi ae so hnyi hnyimakö Iehova, me vheno gethen hia de Davita a kiben, k' ame ca saú ka hnyi ke keihen metâ me me.

3 Ke haba hnyi hunai a eitini Josea than, me haba than ame kunö Safana nöku Azalia nöku Mesulama, at sihnalimen, ka hnyi uma umö Iehova, me ha, ka habe, 4 He thö kö Hilekia at bihut ae nua, me me aú je mone adre hom ka hnyi uma umö Iehova, wale a kap hnen tavat tuö hwanuma ûnyi



## II. JE THAN 23.

ge tavat : 5 k' ödrin e he ka ham e ka tavat adre me ânyâ huliwa k' adre me tuö uma umö Iehova ; ödrin e he ka ham e ka tavat adre me huliwan uma umö Iehova, he ka okhötâ je dok ae hmouca hnyin uma ; 6 hobi kâu hnyat tretrau utö, me hnyat up uma, me hnyat up veto ; me hnân bi hwabân utö me je veto adre kave he ka ânyâwia uma. 7 Ke so bi adre me ca tuluto ködrin mone adre ham ködrin ; anyin a ödrin e khenâ hnathoâ. 8 Ke haba Hilekia at bihut ae nua ame ha kö Safana at sihnalimen, ka habe, Oge me wâ tusiny hnanyibu hnyi uma umö Iehova. Ke Hilekia ame ham tusi kö Safana, me e ame aú. 9 Ke haba Safana at sihnalimen ame o ka than, me thumeto than, me ha, ka habe, A hia but lathnyabaem hingâlâ je mone a e hnyin uma, me ham e ka tavat bi huliwa, tavat adre me tuö uma umö Iehova. 10 Ke haba Safana at sihnalimen ame thumeto than, me ha, ka habe, Haba Hilekia ame ham kõnya ke tusi. Me Safana ame aú e hnyi hnyimakan than. 11 Ke a löng ut than ta je hofuc hnyi tusiny hnanyibu, me e ame kia anyin je úkhaú. 12 Me haba than ame hünö Hilekia at bihut, me Ahikama nõku Safana, me Akebora nõku Mikaiia, me Safana at sihnalimen, me Asaia athnyabainy than, me ha, ka habe, 13 He th' öbun, me elâm unyi Iehova hnân hobi kõnya, me tavat, me Juda hia thithö ge önyen tusi ang adre wâ : anyin ae gan hmâ hmönyin anyi Iehova kötín, can a ca löng hnen lakamötín hoton je hofuc hnyi tusi ang, he ka ânyâ hia hna sibnalimen gatin. 14 Me haba Hilekia at bihut, me Ahikama, me Akebora, me Safana me Asaia, ödrin e he kö Huleda perofeta momo, öiö Saluma nõku Tikeva, nõku Hasera, at tuö khaú ; (ke haba momo ame laba hnyi Jerusalema hnyi ke keihen a loiny) ; me ödrin e úhnenamö me momo. 15 Ke haba momo ame ha ködrin, ka habe, Walang hna ha hnö Iehova Khongu Isaraela, ka habe, Ha th' öbun ka at wale a kun' öbun kõnya, ka habe, 16 Walang hna ha hnö Iehova, ka habe, Wâ bi, oge me he ka oâ monu ka taun ang me tavat adre me labâ e, wale ta je únyi hia hnyin tusi a aú than Juda : 17 can ödrin e hia but hna degeci nya, me leú utö ae bo so ka je khong, me ohmönyini nya ge ta je huliwa hia anyin je hnyamödrin, anyin a wale ame ubâhlâ thö anyik hmönyin ka dok ang, ke adre me ca he ka omoko. 18 Ke haba than Juda at a kun' öbun he ka elöm Iehova, öbun e

he ka ha heláng kâu, ka habe, Walang hna ha hnö Iehova Khongu Isaraela : haba ge ta je hofuc u je löng, 19 anyin ae menyik hnyekom, ke u je obnyikânâi u bi hnyi hnyimakö Iehova, hnyi úen u me löng hnök hna ha ge dok ang, me tavat adre me labâ e, m' ödrin e he ka ba at ke hnaúhangö, ke u je kia ânyâm je úkhaú, me tenge hnyi hnyimakök ; awe, haingö Iehova, Oge hia but ling u. 20 Wâ bi, anyin a wale, oge me he ka úkhacaköuö u tha e me lakâmâm, ke adre me he ka úkhacaköuö u ka hnyi erkemok k' u hnahic, ke ame ca he li emâkâm ka wâ ta je únyi hia ae kong oge me he ka oâ ka hnyi dok ang. Me ödrin e hmeto je hofuc eling ka than.

### HNyimakan 23.

**K**E haba than ame úkhünöng, me ödrin e úkhacaköu kâu wahingatiny hia Juda me Jerusalema. 2 Haba than ame he ka hnyi uma umö Iehova, tha e me tavat Juda hia, me aten Jerusalema hia, me tavat bihut, me ta je perofeta, me tavat hia ae úhnyúkong me gan : ke e ame aú hnyi je hnyikönyidrin ta je hofuc hnyi tusiny úhihinyköu adre wâ hnyi uma umö Iehova. 3 K' ame tot than hnyi tap me ânyâ úhihinyköu hnyi hnyimakö Iehova, he ka he hotu Iehova, me tuö anyin ta je hnanyibu, me hnen ta je hna ohnatho, me hnen je hna otilâ, ge hnyekon ae bekhöt me hanon ae bekhöt, he ka ânyâ je hofuc hnyi úhihinyköu ang, adre me sihnalimen hnyi tusi ang : me haba tavat hia adre me tot hwege ka hnyi úhihinyköu. 4 Me haba than ame hünö Hilekia at bihut ae nua, me tavat bihut a loiny, me tavat tuö hwanuma, he ka hom únyi hnyi hnyin uma umö Iehova je kaia hia adre ânyâ hobi kö Baala, me Aseira, me hobi kâu ta je únyi hia hnyi drany : me e ame thong degecâ hnyi hoton Jerusalema hnyi je utkânâ hnyi Kederon, me hom je dron Beth-ela ai. 5 Me e ame obâ hnyat bihut anyin je idola, wale a otilâ je than Juda he ka leú utö ae bo so hnyi je dok ae görany hnyi je taun hnyi Juda, me je dok a igigilö Jerusalema ; me tavat leú utö ae bo so kö Baala, me seúnö, me tehi, me je okhú, me ta je únyi hia hnyi drany. 6 Ke e ame hom but Aseira únyi hnyi hnyin uma umö Iehova hoton Jerusalema ai ka hnyi wagewe Kederon, me thong degeci ödrin hnyi wagewe Kederon, me omomono e, me khúâ but dröuiny hon je erkemok anyin

## II. JE THAN 23.

houmonu. 7 Ke e ame tho hnyikânâi je uma umen tavat adre me hwen Sodoma wale hnyi uma umö Iehova, a hwâwâ hnyin je mano singiny Aseira hnen omomo. 8 Ke e ame hom tavat bihut ûnyi hnyi je taun Juda hia, me oikikiâ je dok ae görany ame leû hnyin utö ae bo so ge tavat bihut, hwân hnyi Geba ke ne o but hnyi Bere-seba; ke e ame tho degecâ je dok ae görany hnyi je homagöule wale hnyi homagöule Josua at ame musö taun, wale hnyi ke keihen a meny homagöuleny taun. 9 Ke so bi, haba tavat bihut hnyi je dok ae görany ödrin e ca hnyi he ka hnyi taben hut kö Iehova hnyi Jerusalema, ke ödrin e hnyi an areto adre ca levenâ bi, tha ödrin me je liamekeiny mödrin. 10 Ke e ame oikikiâ Tofet a e hnyi hnyigöulen bucen iny laku Hinom, me me ca he ke at ka kunâ nokon бага ame ne hlu he ka he hnyi wanben meic kö Moleka. 11 Ke e ame hom je hors waleji a ham je than Juda ka seûnö, hnyi hwanuma uma umö Iehova, hnyi baten hnyeule Nathana-meleka, at tuö umen omjeû, wale eiö hnyin haginy; ke e ame thong degecâ je kariota anyin seûnö ge meic. 12 Ke haba je taben hut walethö hnyi hon ban hnyeule Ahaza, a ânyâ ge je than Juda, me je taben hut a ânyâ Manase hnyi li hnyeuleny uma umö Iehova, me haba than ame kia but, me hagutâ hnyikânâi ûheny e, me khûâ dron ka hnyi wagewe Kederon. 13 Ke haba je dok ae görany cicö Jerusalema hnyi ke keihen metân buceniny hnaûhangö, waleji a ânyâ Solomona than Isaraela hobi kö Aseira ûnyi ae ikiki anyin at Zidona, me hobi kö Kemosa ûnyi ae ikiki anyin at Moaba, me hobi kö Milekoma ûnyiae ikiki anyin je laku Amona, me haba than ame oikikiâ. 14 Ke e ame kot omomono je veto ame tot, me sö degecâ je Aseira, me ounöngötâ hnödrin je hna tot hnyin ge je jeien je komok. 15 Ke haba taben hut minya hnyi Beth-ela, me dok ae görany waleji a ânyâ Jeroboama nöku Nebata, at a okûâ hwakecin ae monu anyin at Isaraela, haba taben hut me dok minya ae görany, e ame hagutâ hnyikânâi; ke e ame thong degecâ dok ae görany me oamamá e, me thong degecâ Aseira. 16 Ke haba Josea ame hwiö me wâ je erkemok ae hnyi bucen; me e ame ûkhünöng he ka hom je jeien komok ûnyi hnyi je erkemok me thong degecâ hon taben hut me oikikiâ e hoton hofuc ho Iehova, waleji a ha aten Khong, wale at a ha je hofuc ang. 17 Ke e ame ha, ka habe, Ie ûnyi hnân ûnykûme eling

oge me wâ? Ke ame thu kâu aten taun, ka habe, Wale erkemok hon aten Khong, at a o ûheny Juda, me ha ta je ûnyi e wale u je hia but ânyâ ka taben hut hnyi Beth-ela. 18 Ke haingen, ka habe, Hnen biju e; ca he ke at ka hom but je jeien. Me ame hnen ju je jeien tha e me jeien perofeta at ame o ûheny Samaria. 19 Haba Josea ame hom but je uma hia hnyi je dok ae görany hnyi je tauniny Samaria waleji a ânyâ je than Isaraela he ka okûâ hmönyin anyi Iehova, me ânyâ ködrin helâ me hnen hna ânyâ hnyi Beth-ela. 20 Ke e ame hlingâ je at bihut hia anyin je dok ae görany eling, hon je taben hut, me thong je jeien ta je komok hon; me e ame hmetu Jerusalema ai.

21 Haba than ame hûna ka tavat hia me ha, ka habe, He th' öbun ka tuö paseka kö Iehova Khongubun, helâ me hna sihnalimen hnyi tusiny ûhihinyköu eang. 22 Ke ba ke paseka adre tuö helâe, hwân hnyi je bong bongon je hnyat owisa wale adre owisa Isaraela, me hnyi je bong hia bongon je than Isaraela, me je than Juda; 23 ke so bi hnyi huna a eitini Josea than adre me ânyâ paseka ang kö Iehova hnyi Jerusalema. 24 Ke haba tavat a ödra tren biobotkong, me bi khong, me je terafi, me je idola, me je ûnyi hia ae ikiki adre me wâ hnyi hnyi Juda, me hnyi Jerusalema, me, Josea ame ohia, me me he ka ohwadâ je hofucin hnanyibu adre sihnalimen hnyi tusi a wâ Hilekia at bihut hnyi uma umö Iehova. 25 Ke ba than a helâ mē ebac, ame hwiö kö Iehova me hnyekon ae bekhöt, me hanon ae bekhöt, me hwegien ae bekhöt, hoton ta je hnanyibu hia anyi Mose; ke a ca o bi ke at ae úcú hwaban. 26 Ke so bi Iehova ame ca hwiö ûnyi hnyi anyin hmönyin ae gan wale e ame hmönyin ka Juda, can ta je hwakecin hia a ânyâ Manase he ka ohmönyinâ e. 27 Ke haba Iehova ame ha, ka habe, Oge me he ka hom Juda ûnyi hnyi hnyimakök, helâ me hnök hna hom Isaraela, ke oge me he ka degec taun ang oge úca wale Jerusalema, me uma wale oge ha gan, ka habe, Ame he ka hnen e iök. 28 Ke haba kolon je hna ânyâ hnö Josea, me anyin ta je huliwa, hawa, adre ca sihnalimen hnyi tusi hnân ha je bong bongon je than Juda? 29 Hnyi bongon je bong ame o but Farao-neko than Aigupito he ka vat me than Asuria hnyi wagewe Euferate: ke haba Josea than ame he he ka vat mē; ke ödru me iony dö, me

## II. JE THAN 24.

e ame hlingâ e hnyi Megido. 30 Haba lathnyabainy ödrin e hom unyin a mokcu hon kariota ûheny Megido, me hom e Jerusalema ai, me konâm e hnyi hon erkemok. Haba tavat aten hnyei ödrin e hum Jehoaza nöku Josea, me hû e, me otilâ e ka than hwaban kamen.

31 Twente theri but je hunai Jehoaza hnyi ûen e ame hwân ka than; ke e ame musi hnyi Jerusalema kun ta tehi: ke haba ien hinyen me Hamutala momo nöku Jeremia at Libena. 32 Ke e ame ânyâ ûnyi ae kong hnyi hnyimakö Iehova, helâ me hna ânyâ hia ge lakamen. 33 Ke haba Farao-neko ame ca e hnyi Ribela hnyi hnyei Hamath, me me ca he ka musi hnyi Jerusalema; me e ame kunâ tavat he ka fat khaca haded je talan sileva, ke khaca talan gol. 34 Ke haba Farao-neko ame otilö Eliakima ka than, a ke nöku Josea, me hwabö Josea a kamen, me hwenyi ien Jehoiakima; ke e ame hum Jehoaza but; ke e ame o but hnyi Aigupito me e ame mokcu eling. 35 Ke haba Jekoiakima ame ham je sileva me gol kö Farao; ke e ame kunâ tavat he ka fat me ham mone helâ me hnanyibu anyi Farao: k' ame hawâ ûjengö sileva me gol ûnyi ge tavat aten hnyei, hoton hnen hna ve hawâ fat, he ka ham e kö Farao-neko.

36 Twente faiv but je hunai Jehoiakima hnyi ûen e ame hwân ka than; ke e ame musi hnyi Jerusalema hnyi eleven ta huna: haba ien hinyin, me, Zebuda, nöku Pedaia at Ruma. 37 Ke e ame ânyâ ûnyi ae kong hnyi hnyimakö Iehova, helâ me hna ânyâ hia ge lakamen.

### HNHYIMAKAN 24.

**H**ABA hnyi bongon je bong ame o but Nebukaneza than Babulona, me haba Jehoiakima ame bi athnyabainy hnyi kun ta huna: ke e ame tot me hna degecâ e. 2 Ka haba Iehova ame kunâ kâu je deö vat anyin at Kaledaia, me je deö vat anyin at Suria, me je deö vat anyin at Moaba, me je deö vat anyin laku Amona, me kun' ödrin Juda ai he ka ohia e, helâ me hofuc ho Iehova waleji e ame ha a deny lathnyabainy a je perofeta. 3 E hnathu a ûnyi ge hna hûna hnö Iehova, me me o ûnyi eling ka hnyi hon at Juda, he ka hum ödrin ûnyi hnyi hnyimakan, can je hulö anyi Manase, hoton hnen hna ânyâ; 4 me can minya dra ae ba hnyikongon, waleji e

ame hingâlâ; anyin a e ame ounöngötâ Jerusalema ge dra ae ba hnyikongon: ke ame höcö Iehova he ka hna degecâ. 5 Ke haba kolon je hna ânyâ hnö Jehoiakima me anyin ta je huliwa hia thithö, hawa, adre me ca sihnalimen hnyi tusi hnân ha je bong bongon je than Juda? 6 Ke ame mokut ut Jehoiakima tha e me lakamen, ke ame than biju Jehoiakin a nokon hwaban. 7 Ke ame ca o hmetu bi than Aigupito ûheny hnyi iny hnyei: anyin a than Babulona ame hia but hûgûnâ hia je hanymen than Aigupito, hwân hnyi wagewe Aigupito ke ne o but hnyi wagewe Euferati.

8 Eitin je hunai Jehoiakin hnyi ûen e ame hwân ka than; ke e ame musi hnyi Jerusalema hnyi kun ta tehi: ke haba ien hinyen me Nehuseta, nöku Elenathana at Jerusalema. 9 Ke e ame ânyâ ûnyi ae kong hnyi hnyimakö Iehova, helâ me hna ânyâ hia ge lakamen. 10 Ke hnyi ûen e, ame o but lakei Nebukaneza than Babulona ka hnyi Jerusalema, me adre me thelöng taun. 11 Ke haba Nebukaneza than Babulona ame o ka hnyi taun, ke ame tiga thelöng e ge lakeiny; 12 me ame he but Jehoiakin, me hinyen, me anyin je taben, me anyin je eunuka ka than Babulona: ke than Babulona ame hom e hnyi hunainy ka musi a eit. 13 Ke e ame hom but ûheny e ta je omjeûiny hia uma umö Iehova, me je omjeûiny uma umen than, me susubâ je kaia gol hia waleji a ânyâ Solomona than Isaraela hnyi uma umö Iehova, helâ me Iehova ame ha. 14 Ke e ame hom Jerusalema hia, me je than hia, me tavat hwege vat hia, a ödrin ten thauzan je bâ, me tavat ae metâ hia hnyi ta je huliwa, me tavat huliwan fao; e ba but kolon, ke so bi tavat thiju ae theduoc hnyi hnyei. 15 Ke e ame hum Jehoiakin Babulona ai; tha e me hinyen than, me laâiân than, me anyin je eunuka, me je homakan hnyei, e ame hum ödrin a je hwenbâ Babulona ai ûheny Jerusalema. 16 Ke haba tavat hwege hia ödrin seven thauzan, me haba je hnyat ae metâ huliwa, me hnyat huliwa fao ödrin wan thauzan, a tavat hwege hia me khan' ödrin vat, haba tavat eling than Babulona ame hom Babulona ai a je hwenbâ. 17 Ke haba than Babulona ame otilö Matania ka than, a liamekeiny me kamen, me hnân hwaban, me hwenyi ien e me Zedekia.

18 Twente wan dut je hunai Zedekia hnyi ûen e ame hwân ka than; ke e ame musi hnyi Jerusalema hnyi eleven je huna:

## II. JE THAN 25.

ke haba ien hinyen me Hamutala nöku Jeremia at Libena. 19 Ke e ame ányâ únyi ae kong hnyi hnyimakö Iehova, helâ me hna ányâ hia hnö Jehoiakima. 20 Ke haba Iehova ame hmönyin ka Jerusalema me Juda ke ne o but e ame digic ödrin hnyi hnyimakan bi : ke haba Zedekia ame hna degecâ than Babulona.

### HNYIMAKAN 25.

**K**E haba hnyi huna a naininy anyin musi, hnyi tehi a teniny, hnyi bong a teniny tehi, ame o but Nebukaneza than Babulona, me anyin je utbavat hia, ka Jerusalema, me hunuma cicö e ; me ödrin e otilâ igigilö e je tap hnân vat. 2 Me adre me thelöng taun ke ne o but hnyi huna a eleveni Zedekia than. 3 Ke haba hnyi bong a naininy tehi a vakiny e gan hmâ hmiâ hnyi taun, me ba jeü hobi kâu aten hnyei. 4 Ke adre me kia taun, me ame kec tavat vat hia hnyi hnyinghet, ödrin e gethen hnyi homagöule wanben li bak veto, hnyi utkânâ iny than : (ke e bi at Kaledaia cicö taun igigilö :) ke haba than ame kec hnyi getheniny dok ae tha hon. 5 Me haba utbavat anyin at Kaledaia adre me hnu than, me khaü ju e hnyi dok ae tha hon hnyi Jeriko : ke ame ve kec ut anyin utbavat hia gan. 6 Ke ödrin e kât than me hom e ka than Babulona Ribela ai ; ke ödrin e owisa kâu. 7 Me ödrin e hlingâ je laku Zedekia hnyi hnyimakan, me úâ li emakö Zedekia, me ca e ge fao me hom e Babulona ai.

8 Ke haba hnyi tehi a thabúnginy, hnyi bong a seveniny tehi, wale huna a naintini Nebukaneza than, wale than Babulona, me ame o but Nebuzaradana taben tavat tue, athnyabainy than Babulona, Jerusalema ai : 9 me e ame thong degecâ uma umö Iehova, me uma umen than ; me je uma hia hnyi Jerusalema, wale je uma ae gan, e ame thong degecâ ge meic. 10 Ke haba utbavat hia anyin at Kaledaia, unyin taben tavat tue, ödrin e hagutâ hnyikânâi hna up haginy Jerusalema igigilö. 11 Ke haba je kolon tavat hia a hnen biju hnyi taun, me tavat adre me kec waleji adre kec ka than Babulona, me kolon tavat ae se, haba Nebuzaradana taben tavat tue ame hom bâ. 12 Ke haba taben tavat tue ame ip biju ke je hnyat ae theduoc hnyi hnyei, me hnân hnyat tuö je hnyei vine, me tavat belök. 13 Ke haba li hmolom bras hnyi uma umö

Iehova, me je taben, me taben köiö bras hnyi uma umö Iehova, haba at Kaledaia ödrin e susubâ me hom brasiny Babulona ai. 14 Ke haba je öt, me je soi, me je uthesiün, me je spun, me je kaia bras hia waleji adre huliwan, ödrin e hom. 15 Ke haba je taben wableühleü, me je kaia, e ka gol me adre me hom goliny, ke e ka sileva, me adre me hom silevainy, hnen taben tavat tue. 16 Lo li hmolom, ke khaca taben köiö, me je taben waleji a ányâ Solomona hobi kâu uma umö Iehova ; ca hnân tuluto bi bras hnyin je únyi hia eling. 17 Eitin kubit ibeüen göranyai ke hmolom, ke e hu ovejien hon ban e : ke haba ibeüen göranyai ovejien kun ta kubit ; me hna huliwan boert me rimona igigilö ovejien, bras hia : ke helâe minya hmolom a loiny, me únyi a boert. 18 Ke haba taben tavat tue ame hum Seraia at bihut ae beönu, me Zefania at bihut a loiny, me kun ta hnyat tuö hwanuma : 19 Ke únyi hnyi taun e ame hom ke eunuka at ame musö tavat vat ; ke ödrin thabúng tavat bwele ka wâ hnyimakan than, adre wâ hnyi taun ; me at sihnalimen anyin taben utbavat, at ame úkhacaköüâ tavat aten hnyei ; me ödrin sikste tavat aten hnyei, adre wâ hnyi taun. 20 Ke haba Nebuzaredana taben tavat tue ame hum ödrin, me hom Ribela ai ka than Babulona. 21 Ke haba than Babulona ame hling' ödrin hnyi Ribela, hnyi hnyei Hamath. Me adre me hom hwenbâ Juda únyi hnyi idrin hnyei. 22 Ke haba tavat a je kolon hnyi hnyei Juda, waleji a ip biju Nebukaneza than Babulona, e ame otilö Gedalia nöku Ahikama nöku Safana hudrin.

23 K' a löng ut je taben vat hia, ödrin me je atödrin a haba than Babulona ame otilö Gedalia, me ödrin e o kö Gedalia hnyi Mizepa, wale Isamaela nöku Nethania, me Johanana nöku Karea, me Seraia nöku Tanumeth at Netofa, me Jazania nokon at Maaka, ödrin me je atödrin. 24 Haba Gedalia ame khemanyin ködrin me je atödrin, me ha ködrin, ka habe, Ca he öbun ka outen lathnyabainy at Kaledaia : laba ju hnyi hnyei me bi athnyaba ka than Babulona, me ame he ka so köbun. 25 Ke haba hnyi tehi a seveniny ame o but Isamaela nöku Nethania nöku Elisama, hanen je matrâniny than, ke ödrin ten tavat unyin, me e ame kuc Gedalia, me e ame mokcu, me at Juda me at Kaledaia tavat a tha e më hnyi Mizepa. 26 Me ame todrö

## I. MAN ÛLABAINY JE THAN 1.

tavat hia thithö ae ùhnyükong me gan, me je taben vat, me o hnyi Aigupito : anyin a ödrin e outen at Kaledaia.

27 Ke haba hnyi huna a thöte seveniny bá a Jehoukin than Juda, hnyi tehi a twelviny, hnyi bong a twente seveniny tehi, me haba Evile-merodak than Babulona ame ogöranyâ bö Jehoiakin than Juda únyi hnyi uma ceat hnyi huna a hwân hnyin he ka musi ; 28 me e ame ha kâu hofuc ae

menyik, me e ame ogöranyâ anyin theron hon je theron anyin ta je than a hnyat ödrin e tha laba më hnyi Babulona. 29 Ke e ame ham kâu je úkhaú a hwaban je úkhaúen uma ceat, ke e ame hnyi han hnyi hnyimakan bala hnyi ta je bong hia bongon möt. 30 Ke haba jekhon adre me labö ham kâu, me jekhon únyi ge than, hnyi ke bong me ke bong ke jekhon, hnyi ta je bonginy hia anyin möt.

### TUSI A BAN

GE

## MAN ÛLABAINY JE THAN.

### HNYIMAKAN 1.

**A** DAMU, Seta, Enosa ; 2 Kainana, Mahalaleel, Jareda ; 3 Enoka, Methusela, Lameka ; 4 Noa, Sema, Hama, Jafeta.

5 Je baga laku Jufeta ; Gomera, me Magog, me Madai, me Javana, me Tubala, me Meseka, me Tirasa. 6 Ke haba je baga laku Gomera ; Asekenaza, me Rifatha, me Togarema. 7 Ke haba je baga laku Javana ; Elisa, me Tasesa, me Kitim, me Dodanima.

8 Haba je baga laku Hama ; Kuza, me Mizeraima, me Futa, me Kanana. 9 Ke haba je baga laku Kuza ; Saba, me Havila, me Sabeta, me Rama, me Sabeteka. Ke lo li baga laku Rama ; Sheba, me Dedana. 10 Haba Kuza ame hnöku Nimeroda : wale at ame ibi hwân he ka hwege eang hmelen. 11 Ke haba Mizeraima ame hnöku Luda, me Anami, me Lehabi, me Nafetui, 12 me Patherusi me Kaselui (únyi gan at Filisiti), me Kafetori. 13 Ke haba Kanana ame hnöku Zidona atö, me Heth ; 14 me at Jebusi, me Amora, me Girigasa ; 15 me Hivi, me Areki, me Sini ; 16 me at Arevadi, me Zimari, me Hamath.

17 Haba je baga laku Sema ; me, Elama, me Asura, me Afasada, me Luda, me Arama, me Uza, me Huli, me Gethera, me Meseka. 18 Ke haba Afasada ame hnöku Sala, he haba Sala ame hnöku Heberu. 19 Ke adre me hnokoâ li baga laku Heberu ; haba ien ke at, me, Pelege ; anyin adre me

khenâ hmeledrany hnyi bongon ta je bong ; ke Joketana ien liamekeiny më. 20 Ke haba Joketana ame hnöku Alemodada, me Salefa, me Hazemaveta, me Jara ; 21 me Hadorama, me Uzala, me Dikela ; 22 me Ebala, me Abimaela, me Sheba ; 23 me Ofira, me Havila, me Jobab. Wale je baga laku Johetana hia.

24 Sema, Afasada, Sala ; 25 Heberu, Pelege, Reu ; 26 Serugo, Nahora, Tera ; 27 Aberama (wale Aberahama). 28 Haba li baga laku Aberahama ; jia Isaaka, me Ismaela. 29 Walang anyidrin je dö : Nebaioth, baga nöku Isamaela a bân ; hwaban dö e Kedara, me Adebeela, me Mibesam, 30 Misema, me Duma, me Masa ; me Hadara, me Tema, 31 me Jetura, me Nafiso, me Kedema. Wale je baga laku Isamaela.

32 Ke haba je baga laku Ketura momo anyi Aberahama : e ame hnöku Zimeran, me Jokesana, me Medana, me Midiana, me Isebak, me Sua. Ke lo li baga laku Jokesana ; jia Sheba, me Dedana. 33 Ke haba je baga laku Midiana ; me Efa, me Efera, me Enoka, me Abida, me Eledaa. Je baga laku Ketura tavat hia e.

34 Haba Aberahama ame hnöku Isaaka. Lo li baga laku Isaaka ; jia Esau, me Isaraela.

35 Haba je baga laku Esau ; me Elifaza, me Reuela, me Jeuso, me Jalama, me Kora. 36 Je bága laku Elifaza ; jia Temana, me Omar, me Zefo, me Gatama, me Kenaza, me Timena, me Amaleka. 37 Je baga

## I. MAN ÛLABAINY JE THAN 2.

laku Reuela ; jia Nakath, me Zera, me Sama, me Miza. 38 Ke haba je baga laku Seira ; jia Lotana, me Sobala, me Zibeona, me Ana, me Disona, me Ezera, me Disana. 39 Ke lo li baga laku Lotana ; jia Hori, me Homama : ke haba Timena wale hani Lotana. 40 Je baga laku Sobala ; jia Alevana, me Manakatha, me Ebalá, me Sefo, me Onama. Ke li baga laku Zibeona ; jia Aia, me Ana. 41 Baga nöku Ana ; jia Disona. Ke haba je baga laku Disona ; jia Hemedan, me Eseban, me Itheran, me Kiran. 42 Je baga laku Ezera ; jia Bilehana, me Zaavana, me Akana. Li baga laku Disona ; jia Uza, me Arama. 43 Ke walang je than ödrin e musí hnyi hnyeí Edoma, ke tiga ba than ame musö lakon Isaraela : Bela nöku Beora ; ke Dinaba ien anyin taun. 44 Ke ame mokcu Bela, ke haba at ame musí hwaban, jia Jobab baga nöku Zera úheny Bozera. 45 Ke ame mokcu Jobab, haba at ame musí hwaban, jia Husama únyi hnyi hnyeí iny at Temana. 46 Ke ame mokcu Husama, haba at ame musí hwaban, jia Hadada, nöku Bedada, wale at a kuc Midiana, hnyi utkánâ i Moaba : ke Avitha ien anyin taun. 47 Ke ame mokcu Hadada, haba at ame musí hwaban, jia Samela úheny Masereka. 48 Ke ame mokcu Samela, haba at ame musí hwaban, jia Saulo úheny Rehobath hnyi Wagewe. 49 Ke ame mokcu Saulo, me haba at ame musí hwaban, jia Baala-hanana nöku Akebora. 50 Ke ame mokcu Baala-hanana, k' ame musí hwaban Hadada ; ke Pau ien anyin taun : ke haba ien áiân me Mehetabela nöku Matereda a momo nöku Meza-haba. 51 Ke ame mokcu Hadada. Ke walang ien je taben Edoma ; jia Timena taben ; me Aleva taben, me Jethetha taben ; 52 Aholibama taben, me Ela taben, me Pinono taben ; 53 Kenaza taben me Temana taben, me Mibezara taben ; 54 me Megediela taben, me Irama taben. Wale je taben Edoma.

### HNYIMAKAN 2.

**W**ALANG je baga laku Isaraela ; Reubena, Simeona, Levi, Juda, Isakara, Zebulona ; 2 Dana, Josefa, Beniamina, Nafatali, Gada, Asera.

3 Haba je baga laku Juda ; me Era, me Onana, me Sela : ödrin kun a hnokoâ kâu hnö Bathesua momo Kanana. Haba Era

nöku Juda a bân, me, at ae kong hnyi hnyimakö Iehova ; me e ame hlingâ. 4 Ke haba Tamara a úngon ame hnokoâ kâu Farez me Zera. Ke ödrin thabúng je baga laku Juda hia. 5 Ke lo li baga laku Farez ; Hezerona, me Hamula. 6 Ke haba je baga laku Zera ; me Zimeri, me Ethana, me Heman, me Kalekol, me Dara : ödrin thabúng hia hnyat e. 7 Ke haba je baga laku Karemi ; jia Akara at ame oveçâ at Isaraela, waleji ame ányâ hwakecin ae kong ge únyi adre okabâ. 8 Ke haba je baga laku Ethana ; me Azaria. 9 Ke haba je baga laku Hezerona, wale adre hnokoâ kâu ; me Jeramela, me Ram, me Kaleba. 10 Ke haba Ram ame hnöku Aminadaba ; ke Aminadaba ame hnöku Nasona, taben laku Juda. 11 Ke haba Nasona ame hnöku Salema ; ke Salema ame hnöku Boaza ; 12 ke Boaza ame hnöku Obed, ke Obed ame hnöku Jese ; 13 ke Jese ame hnokoâ nokon a bân jia Eliaba, me Abinadab a loiny, me Simea a kuniny ; 14 me Nathaniela a vakiny, me Radai a thabúnginy ; 15 me Ozema a siksiny, me Davita a seveniny : 16 ke haba li lahanidrin, jia Zeruia, me Abigaila. Ke haba je baga laku Zeruia ; me Abisai, me Joab, me Asael, ödrin kun. 17 Ke Abigaila ame hnöku Amasa ; ke haba kamö Amasa, me Jethero at Isamaela. 18 Ke haba Kaleba baga nöku Hezerona, e hu nokon ga Azuba a áiân me Jeriotha : ke walang je baga lakon momo e : jia Jesera, me Sobab, me Aredon. 19 Ke ame mokcu Azuba, me Kaleba ame hum Eferatha me áiân, at a hnöku Huro kâu. 20 Ke haba Huro ame hnöku Uri, ke Uri ame hnöku Bezalele. 21 Ke hwaban e haba Hezerona ame didró ka hlu nöku Makir kamö Gileada ; wale e ame hom me áiân ke sikste but je hunainy ; ke e ame hnöku Seguba kâu. 22 Ke Seguba ame hnöku Jaira, at ae hu je taun a twente theri hnyi hnyeí Gileada. 23 Ke haba Gesuri me Arama ödru me hûgúnâ je taun anyi Jaira únyi gadrin, tha e me Kenath, me je tauniny ae úhnyúkong, sikste je taun. Ödrin hia je baga laku Makir kamö Gileada. 24 Ke hwaban dö a mokcu Hezerona hnyi Kaleba-eferatha, haba Abia öiö Hezerona ame hnokoâ nokon jia Asura kamö Tekoa. 25 Ke haba je baga laku Jeramela nöku Hezerona a bân ; jia Ram, nokon a bân, me Buna, me Oren, me Ozema, me Abia. 26 Ke haba Jeramela, me, hu ke áiân minya, haba ien jia

### I. MAN ÛLABAINY JE THAN 3.

Atara; me e hinyö Onama. 27 Ke haba je baga laku Ram, wale nöku Jeramela a bân, jia Maaz, me Jamina, me Ekerä. 28 Ke haba li baga laku Onama, jia Samai, me Jada; ke haba li baga laku Samai, jia Nadaba, me Abisura. 29 Ke haba ien momo öiö Abisura, jia Abihaila; ke e ame hnokoâ li lakon jia Aheban, me Molid. 30 Ke li baga laku Nadaba, jia Seled, me Apaim: ke ame mokcu Seled ke ba nokon. 31 Ke haba baga nöku Apaim; jia Ishi. Ke haba baga nöku Ishi; jia Sesan. Ke haba baga nöku Sesan; jia Ahelai. 32 Ke lo li baga laku Jada kei Samai; jia Jethero me Jonathana: ke ame mokcu Jethero ke ba nokon. 33 Ke lo li baga laku Jonathana; jia Peleth, me Zaza. Wale je laku Jeramela. 34 Ke ba baga nöku Sesan, ke je in thibi. Ke e hu athnyabi Sesan, Jara ien. at Aigupito. 35 Haba Sesan ame ham nokon hlu kö Jara athnyabainy me äian; ke e ame hnokoâ kâu jia Atai. 36 Ke haba Atai ame hnöku Nathana, ke Nathana ame hnöku Zabad; 37 ke Zabad ame hnöku Efelal; ke Efelal ame hnöku Obed; 38 ke Obed ame hnöku Jehu; ke Jehu ame hnöku Azaria; 39 ke Azaria ame hnöku Helez, ke Helez ame hnöku Elasa; 40 ke Elasa ame hnöku Sisemai, ke Sisemai ame hnöku Saluma; 41 ke Saluma ame hnöku Jekamia, ke Jekamia ame hnöku Elisama. 42 Ke haba je baga laku Kaleba liamekeiny me Jeramela; jia Misa nokon a bân, kamö Zif; me je baga laku Maresa kamö Heberona. 43 Ke haba je baga laku Heberona; jia Kora, me Tapua, me Rekem, me Sema. 44 Ke haba Sema ame hnöku Rahama, kamö Jorekeam; ke Rekem ame hnöku Samai. 45 Ke haba baga nöku Samai, jia Maon; ke haba Maon me kamö Bethe-zur. 46 Ke haba Efa, momo anyi Kaleba, ame hnöku Karan, me Moza, me Gazez: ke Karan ame hnöku Gazez. 47 Ke haba je baga laku Jadai; jia Regem, me Jotham, me Gesam, me Pelet, me Efa, me Saaf. 48 Haba Maaka, momo anyi Kaleba, ame hnöku Saber, me Tirehana. 49 Ke haba momo eling ame hnöku Saaf, kamö Mademan, me Seva kamö Makebena, me kamö Gibeä; haba hlu nöku Kaleba, jia Akesa. 50 Wale je baga laku Kaleba; nöku Huro, nöku Eferatha a atö, me Sobala kamö Kiriatha-jarim; 51 me Solema kamö Bethe-leema, me Haref kamö Bethe-gader. 52 Ke hu je baga laku Sobala kamö Kiriatha-jarim; jia Haroe,

me hafiny at Manakatha. 53 Ke haba je lap anyi Kiriatha-jarim; me, at Iethero, me at Puth, me at Suma, me at Misera; k'ame o at Zorea, me at Esetaol ünyi gadrin. 54 Haba je baga laku Salema; me Bethe-leema, me at Netofa, me Ataroth-bethe-joaba, me hafiny at Manakatha, me at Zorea. 55 Me je lap anyin tavat sihnalimen adre me laba hnyi Jabez; at Tira, me Simea, me at Suka. Wale at Keni waleji adre me o ünyi ga Hamath, kamen lap anyi Rekaba.

### HNYIMAKAN 3.

**K**E walang je baga laku Davita adre me hnokoâ kâu hnyi Heberona; jia Aminona nokon a bân, nöku Ahinoam momo Jezerela; me Daniela a loiny nöku Abigaila momo Karemela; 2 me Abasoloma a kuniny, nöku Maaka momo nöku Talemai, than Gesuri; ke Adonia a vakiny, nöku Hagitha; 3 Sefatia a thabünginy nöku Abitalia; Itherama a siksiny nöku Egela a äian. 4 Wale ödrin siks adre hnokoâ kâu hnyi Heberona; ke e ame musi eling hnyi seven ta huna me siks ta tehi: ke e ame musi hnyi Jerusalema hnyi je huna a thöte theri. 5 Ke walang lakon adre hnokoâ kâu hnyi Jerusalema: jia Simea, me Sobab, me Nathana, me Solomona, ödrin vak je laku Bathe-sua momo nöku Amiela: 6 ke Ibara, me Elisama, me Elifelet; 7 me Noga, me Nefega, me Jafia; 8 me Elisama, me Eliada, me Elifelet, ödrin nain. 9 Wale je baga laku Davita hia, ke ca ha bi je baga lakon anyin je momo; ke haba hanidrin, jia Tamara. 10 Ke haba nöku Solomona, me Reoboama, ke haba nokon bi, jia Abia, ke nokon bi e Asa, ke nokon bi e Jehosafata; 11 ke nokon bi e Jorama, ke nokon bi e Ahazia, ke nokon bi e Joasa; 12 ke nokon bi e Amazia, ke nokon bi e Azaria, ke nokon bi e Jotham; 13 ke nokon bi e Ahaza, ke nokon bi e Hezekia, ke nokon bi e Manase; 14 ke nokon bi e Amona, ke nokon bi e Josea. 15 Ke haba je baga laku Josea; Johanana nokon a bân, Jehoiakima a loiny, Zedekia a kuniny, Saluma a vakiny. 16 Ke haba li laku Jehoiakima: me haba nokon bi, jia Jekonia, ke haba nokon bi e, Zedekia. 17 Ke haba je baga laku Jekonia, at a bâ; jia Sealetielä a nokon, 18 me Malekiram, me Pedäia, me Senazara, me Jekamia, me Hosama, me Nedabia. 19 Ke

## I. MAN ÛLABAINY JE THAN 4.

haba li бага laku Pedaia ; jia Zerubabela, me Simei ; ke haba li бага laku Zerubabela ; jia Mesulama, me Hanania ; ke hanidru jia Selomith ; 20 me Hasuba, me Ohel, me Berekia, me Hasadia, me Jusabe-hesed, ödrin thabúng. 21 Ke haba li бага laku Hanania ; jia Pelatia, me Jisaia : ta je бага laku Refaia, me je бага laku Arenan, me je бага laku Obadia, me je бага laku Sekania. 22 Ke haba бага nöku Sekania ; jia Semaia : me haba laku Semaia ; Hatusa, me Igalá, me Baria, me Nearia, me Safaat, ödrin siks. 23 Ke haba je бага laku Nearia ; jia Elioenai, me Hezekia, me Azerikam, ödrin kun. 24 Ke haba je бага laku Elioenai ; jia Hodaia, me Elisiba, me Pelaia, me Akub, me Johanana, me Delaia, me Anani, ödrin seven.

### HNYIMAKAN 4.

**H**ABA je бага laku Juda ; jia Farez, me Hezerona, me Karemi, me Huro, me Sobala. 2 Ke haba Reaia nöku Sobala ame hnöku Jahath ; ke Jahath ame hnöku Ahumai me Lahad. Wale ta je lap anyin at Zorea. 3 Ke walang je бага lakon kamö Etama ; jia Jezerela, me Isema, me Idebas : ke haba ien hanidrin, jia Hazeleponi : 4 me Penuela kamö Gedor, me Ezera kamö Husa. Wale je бага laku Huro, nokon a bán nöku Eferatha, kamö Bethe-leema. 5 Ke hu lo li öiö Asura kamö Tekoa, jia Hela, me Naara. 6 Ke haba Naara ame hnokoâ kâu Ahuzama, me Hefera, me Temana, me Hahasetari. Wale je бага laku Naara. 7 Ke haba je бага laku Hela, jia Zereth, me Zoara, me Ethenan. 8 Ke haba Koz ame hnöku Anuba, me Zobela, me je lap anyi Aharehel бага nöku Harum. 9 Ke ame lung so Jabez hon je liamekeiny më : ke haba hinyen ame hwenyi ien, me ha, ka habe, Anyin a oge me hnokoâ ke hmak hnyekuk. 10 Ke haba Jabez ame hongot ka Khongu Isaraela me ha, ka habe, Ö u he ka ti ohnahici nya, me ogânâ ik, ke e na tha e ju mönya hnyamâm, me me tuö nya ge hulö, me inye ca vec bi gan ! Me haba Khong ame ham kâu únyi e ame sumâtâ. 11 Ke haba Kelubo liamekeiny me Sua ame hnöku Mehír, kamö Eseton. 12 Ke Eseton ame hnöku Bethe-rafa, me Pasea, me Tehina kamö Ire-nahasa. Wale je aten Reka. 13 Ke haba li бага laku Kenaza ; me Otheniela, me Seraia : ke haba бага nöku

Otheniela ; me Hathath. 14 Ke haba Meonothai ame hnöku Oferá : ke haba Seraia ame hnöku Joaba kamö Geharashim ; ke ödrin hnyat metâ huliwa. 15 Ke haba je бага laku Kaleba nöku Jefune ; me, Iru, me Ela, me Naam : ke je бага laku Ela ; me Kenaza. 16 Ke haba je бага laku Jehaleela ; me, Zif, me Zifa, me Tiria, me Asareel. 17 Ke haba je бага laku Ezera ; me, Jethero, me Mered, me Efera, me Jalon : ke e ame hnöku Miriama, me Samai, me Iseba kamö Esetemoa. 18 Ke haba áiân a momo Juda ame hnöku Jareda, kamö Gedor, me Heberu kamö Soko, me Jekuthiel kamö Zanoa. Ke wale je бага laku Bithia momo nöku Farao, waleji at a hom ga Mered. 19 Ke haba li бага lakon momo öiö Hodia hani Nahama, kamö Kiela at Garemi, me Esetemoa at Maaka. 20 Ke haba je бага laku Simon ; jia Aminona, me Rina, me Beni-hanan, me Tilon. Ke haba li бага laku Ishi ; me Zoheth, me Beni-zoheth. 21 Ke haba je бага laku Sela nöku Juda ; me, Era kamö Leka, me Laada kamö Maresa, me je aten lap anyin tavat huliwan mano lino, hanen lap anyi Asebea ; 22 ke Jokima, me tavat aten Kozeba, me Joasa, me Saraf, ödrin e musi hnyi Moaba me Jasubi-leem. Ke ta je hofuc but ehac ling. 23 Ödrin ling tavat up kaia kânâ, me tavat ödrin e laba hnyi Netaim me Gedera : ödrin e tha laba eling me than ge anyin huliwa.

24 Haba je бага laku Simeona ; jia Nemuela, me Jamina, me Jarib, me Zera, me Saulo : 25 ke nokon бага bi Saluma, me nokon бага bi Mibesam, me nokon бага bi Misema. 26 Ke haba je mãtrâni Misima ; nokon бага bi Hamuel, nokon. бага bi Zakuri, nokon бага bi Simei 27 Ke ödrin sikstin je laku Simei бага ke ödrin siks je hlu ; ke ca se hia bi lakon je liamekeiny më, ke ca se bi anyidrin lap hia helâ me lap anyi Juda. 28. Ke ödrin e laba hnyi Bere-seba, me Molada, me Hazarasual ; 29 me hnyi Bila, me Azem, me Tolad ; 30 me Bethuela, me Horema, me Zikelag ; 31 me Bethe-marekaboth, me Hazarasusa me Bethe-birei, me Saraim. Wale anyidrin je taun ke ne o but hnyi musi anyi Davita. 32 Ke haba anyidrin je taun ae úhnyükong, Etama, me Aina, me Rimona, me Token, me Asan, thabúng je taun : 33 me anyidrin je taun hia ae úhnyükong igigilö je taun eling ke ne o but hnyi Baala. Wale je hnyabadrin, ke



## I. MAN ÛLABAINY JE THAN 5.

e hu gadrin je hna sihnalimen gagai ödrin. 34 Ke Mesobab, me Jamelek, me Josa baga nöku Amazia ; 35 me Joela, me Jehu baga nöku Josibia, baga nöku Seraia, baga nöku Asiela ; 36 me Elioenai, me Jaakoba, me Jesohaia, me Asaia, me Adiela, me Jesimiela, me Benaia ; 37 me Ziza baga nöku Sefi, baga nöku Alona, baga nöku Jedaia, baga nöku Simeri, baga nöku Semaia ; 38 tavat e ae útangköu hoton je ien, wale je taben anyidrin je lap. K'ame si gan hmâ je lap anyin je lakamödrin. 39 Ke ödrin e he ka hnyi gethen ame didrö Gedor ai, ka hnyi ke keihen e deiö thop, he ka heleü an je hnahat haledrin. 40 Ke ödrin e wâ hna önying ae hlau me so, ke hnyei ae lau, me laba wia, me hnahic ; anyin a haba ehac ame laba eling ke je atö Hama. 41 Ke ame o but tavat adre sihnalimen je iödrin hnyi üö Hezekia than Juda, me sö umödrin je uma mano, me kot at Maon adre wâ eling, me ti ohi' ödrin, ke ne o but hnyi bong ang, me laba je hnödrin : anyin ae hu an eling haledrin je meno. 42 Ke haba keihen gadrin, wale je laku Simeona, a faiv haded obaga ödrin e he ka hnyi bucin Seira, ke haba anyidrin je taben, jia Pelatia, me Nearia, me Refaia, me Uziela, je baga laku Ishi. 43 Ke ödrin e kot je kolon at Amaleka a je wan biju, me laba ju eling ke ne o but hnyi bong ang.

### HNYIMAKAN 5.

**K**E haba je baga laku Reubena nöku Isaraela a bân, (anyin a e atö ; ke so bi e ame okongoâ hna mokut waleji a hnen kamen, me adre me ham bi jekhon a atö ka li laku Josefa nöku Isaraela ; ke adre me ca sihnalimen je dö hoton je útangköu. 2 Ke haba Juda me at ae hwege hon je liamekeiny më, ke a deny e than ; he e hu ga Josefa hanymen atö : 3 haba je baga laku Reubena nöku Isaraela a bân ; me, Enoka, me Palu, me Hezerona, me Karemi. 4 Ke haba je baga mâtrâni Joela ; me, Semaia a nokon, me Goge a nokon, me Simei a nokon, 5 me Mika a nokon, me Reaia a nokon, me Baala a nokon ; 6 me Beera a nokon, waleji a hom hwenbâ ga Tigelathe-pilesera than Asuria : e tuhan at Reubena. 7 Ke haba je liamekeiny më hoton anyidrin je lap at ka aü hna sihnalimen anyidrin ta je dö ; Jeiela a tuhan, me Zakaria, 8 me Bela baga nöku Azaz, baga nöku Sema, baga nöku Joela,

at ame laba hnyi Aroera, ke ne o but hnyi Nebo me Baala-meon : 9 ke e ame laba e deiö ke ne o but hnyi gethen ame he ka hnyi hnyebuba hnyi wagewe Eufirati : anyin ame si but haledrin je meno hnyi hnyei Gileada. 10 Ke haba hnyi üö Saulo me ödrin e vat me at Hagara, me kuc ödrin : me ödrin e laba bi hnyi umödrin je uma mano hnyi ke keihen e deiö Gileada hia.

11 Ke haba je baga laku Gada ödrin e laba cici ödrin, hnyi hnyei Basana ke ne o but hnyi Saleka : 12 Joela a tuhan, me Sefama a loiny, me Janai, me Safata hnyi Basana : 13 ke je liamekeiny mödrin hanen je lap anyin je lakamödrin ; jia Mikaela, me Mesulama, me Sheba, me Jorai, me Jakan, me Zia, me Heberu, ödrin seven. 14 Wale je baga laku Abihaila, baga nöku Huri, baga nöku Jaroa, baga nöku Gileada, baga nöku Mikaela, baga nöku Jesisai, baga nöku Jado, baga nöku Buza ; 15 Ahi baga nöku Abediela, baga nöku Guni, taben je lap anyin lakamödrin. 16 Ke ödrin e laba hnyi Gileada hnyi Basana, me je tauniny, me hnyi je utkânâ igigilö Saron, ke ne o but hnyi je hnyigöülödrin. 17 Adre sihnalimen hia anyidrin je dö hnyi je bong bongu Jotham than Juda, me hnyi je bong bongu Jeroboama than Isaraela.

18 Haba je baga laku Reubena, me at Gada, me hafiny tribu Manase, tavat ae hwege, ae khan' ödrin hok bec me hele vat, me hlic fana, me metâ hnyi vat, ödrin fâte foa thauzan seven haded ke sikste tavat, ae khan' ödrin he ka hnyi vat. 19 Ke ödrin e vat me at Hagara, me Jetura, me Nafiso, me Nodab. 20 Ke adre hadru' ödrin he ka vat mödrin, ke adre hna ködrin at Hagara, me je lahiödrin hia : anyin a ödrin e hongot kö Iehova hnyi vat, me e ame ling ödrin ; anyin a ödrin e labageju kâu. 21 Ke ödrin e söâ haledrin je meno ; a fite thauzan haledrin je kamela, ke tu haded me fite thauzan haledrin je mamoe, me tu thauzan je asina, ke wan haded thauzan tavat. 22 Ke se hia tavat adre ta a g' adre mokcu, anyin a únyi ge Khong vat. Me ödrin e laba hwabödrin ke ne o but ödrin e bâ but.

23 Ke haba lakon hafiny tribu Manase ödrin e labâ hnyei : ödrin e ogânâ idrin úheny Basana ke ne o but hnyi Baalahere mona me Senir me bucen Heremona. 24 Ke walang je taben je lap anyin lakamödrin ; jia Efera, me Ishi, me Eliela, me

## I. MAN ÛLABAINY JE THAN 6.

Azeriela, me Jeremia, me Hodavia, me Jadiela, tavat ae ti hwege, me lung, je taben je lap anyin lakamödrin.

25 Ke ödrin e ânyâ monu ka Khongon lakamödrin, me bi ûnyi monu me je khongon tavat aten hnyei, waleji a ohia Khong hnyi hnyimaködrin. 26 Ke haba Khongon at Isaraela ame bwebwelâ hnyeku Pula than Asuria, me hnyeku Tigelathe-pilesera than Asuria, me e ame hum ödrin but, wale at Reubena, me Gada, me hafiny tribu Manase, me hum ödrin Hala ai, me Habora, me Hara, me ka hnyi wagewe hnyi Gozana, ke ne o but hnyi bong ang.

### HNYIMAKAN 6.

**H**ABA je бага laku Levi; me, Geresoma, me Kohatha, me Merari. 2 Ke haba je бага laku Kohatha; me, Amerama, me Izara, me Heberona, me Uziela. 3 Ke haba je laku Amerama; me Arona, me Mose, me Miriama. Ke haba je бага laku Arona; me, Nadaba, me Abiu, me Eleazora, me Ithamara. 4 Ke haba Eleazara ame hnöku Fineasa, ke Fineasa ame hnöku Abisua; 5 ke Abisua ame hnöku Buki, ke Buki ame hnöku Uzi; 6 ke Uzi ame hnöku Zeraia, ke Zeraia ame hnöku Meraioth; 7 ke Meraioth ame hnöku Amaria, ke Amaria ame hnöku Ahituba; 8 ke Ahituba ame hnöku Zadoka, ke Zadoka ame hnöku Ahimaza; 9 ke Ahimaza ame hnöku Azaria, ke Azaria ame hnöku Johanana; 10 ke Johanana ame hnöku Azaria, (wale at a hom hanymen at bihut hnyi uma ame otilâ Solomona hnyi Jerusalema:) 11 ke Azaria ame hnöku Amaria, ke Amaria ame hnöku Ahituba; 12 ke Ahituba ame hnöku Zadoka, ke Zadoka ame hnöku Saluma; 13 ke Saluma ame hnöku Hilekia, ke Hilekia ame hnöku Azaria; 14 ke Azaria ame hnöku Seraia, ke Seraia ame hnöku Jozadaka; 15 ke ame hnyi he Jozadaka hnyi ûen Iehova ame hom bâ Juda me Jerusalema a ânyâ ge hnyamö Nebukaneza.

16 Haba je бага laku Levi; me, Geresoma, me Kohatha, me Merari. 17 Ke walang li ien li бага laku Geresoma; jia Libeni me Simei. 18 Ke haba je бага laku Kohatha, me Amerama, me Izara, me Heberona, me Uziela. 19 Ke haba li бага laku Merari; me Maheli me Musi. Ke walang je lap anyin at Levi hoton ta je lap anyin lakamödrin. 20 Haba ûnyi ga Geresoma; me, Libeni a nokon бага, Jahath

a nokon бага, Zima a nokon бага; 21 Joa a nokon бага, Ido a nokon бага, Zera a nokon бага, Jeaterai a nokon бага. 22 Ke haba mâtrâni Kohatha; Aminadaba a nokon бага, Kora a nokon бага, Asiro a nokon бага; 23 Elekana a nokon бага, Ebiasafa a nokon бага, Asiro a nokon бага; 24 Tahath a nokon бага, Uriela a nokon бага, Uzia a nokon бага, Saulo a nokon бага. 25 Ke haba li бага laku Elekana; me, Amasai, me Ahimoth. 26 Haba Elekana; me je mâtrâni Elekana; jia Zofai a nokon бага, me Nakath a nokon бага; 27 Eliaba a nokon бага, Jerohama a nokon бага, Elekana a nokon бага. 28 Ke haba li бага laku Samuela; jia Joela a atö, me Abia ûtangköu mē. 29 Haba je mâtrâni Merari; Maheli, Libeni a nokon бага, Simei a nokon бага, Uza a nokon бага; 30 Simea a nokon бага, Hagia a nokon бага, Asaia a nokon бага.

31 Ke walang je hnyat ame otilâ Davita hon hanymen khumöng hnyi uma umö Iehova, k' ame laba hmâ tang. 32 Ke ödrin e hnyi khumöng hnyi hnyimakan uma manoiny uma hnân ûkhacaköu, ke ne o but a hia but Solomona otilâ uma umö Iehova hnyi Jeruselema: ke ödrin e tot gaga hnyi je hanymödrin. 33 Ke walang je hnyat tot, me je mâtrânidrin je бага. Haba keihen ûnyi ge at Kohatha: jia Heman at khumöng, бага nöku Joela, бага nöku Samuela; 34 бага nöku Elekana, бага nöku Jerohama, бага nöku Eliela, бага nöku Toa; 35 бага nöku Zuf, бага nöku Elekana, бага nöku Mahatha, бага nöku Amasai; 36 бага nöku Elekana, бага nöku Joela, бага nöku Azaria, бага nöku Zefania; 37 бага nöku Tahath, бага nöku Asiro, бага nöku Abiasafa, бага nöku Kora; 38 бага nöku Izara, бага nöku Kohatha, бага nöku Levi, бага nöku Isaraela. 39 Ke liamekeiny mē, jia Asafa, at ame tot hnyi ke keihen a metân, wale Asafa бага nöku Berekia, бага nöku Simea; 40 бага nöku Mikaela, бага nöku Baaseia, бага nöku Malekia; 41 бага nöku Etheni, бага nöku Zera, бага nöku Adasia; 42 бага nöku Ethana, бага nöku Zima, бага nöku Simei; 43 бага nöku Jahath, бага nöku Geresoma, бага nöku Levi. 44 Ke haba hnyi ke keihen a meny je liamekeiny mödrin je бага mâtrâni Merari; jia Ethana бага nöku Kisi, бага nöku Abedi, бага nöku Maluka; 45 бага nöku Hasabia, бага nöku Amazia, бага

## I. MAN ÛLABAINY JE THAN 7.

nöku Hilekia ; 46 baga nöku Amezi, baga nöku Bani, baga nöku Semeri ; 47 baga nöku Maheli, baga nöku Musi, baga nöku Merari, baga nöku Levi. 48 Ke adre ip at Levi a je liamekeiny mödrin hobi kâu je hanymen hia hnyi uma umen Khong.

49 Ke haba Arona me lakon ödrin e hudö hon taben leú hut, me hon taben le utö ae bo so, me ânyâ huliwainy dok ae ti kap, me bi hwaban möt anyin at Isaraela, helâ me Mose athnyabainy Khong ame nûna. 50 Ke walang je baga mâtrâni Arona : Eleazara a nokon baga, Fineasa a nokon baga, Abisua a nokon baga ; 51 Buki a nokon baga, Uzi a nokon baga, Zeraia a nokon baga ; 52 Meraioth a nokon baga, Amaria a nokon baga, Ahituba a nokon baga ; 53 Zadoka a nokon baga, Ahimaza a nokon baga.

54 Ke walang je hnyabadrin hoton hnödrin hna hunuma hnyi je hnyigöulödrin : 55 adre me ham ka laku Arona hanen lap anyin at Kohatha, haba leköp a bân hobi ködrin, Heberona hnyi hnyei Juda, me je hnyaban igigilö e ; 56 ke haba je utkânâiny taun, me je tauniny ae ûhnyûkong, adae me ham kö Kaleba nöku Jefune. 57 Ke adre me ham ka laku Arona je taun hnân laba duöng hnyin, a Heberona ; me Libena me je hnyaban igigilö, me Jatira, me Esetemoa me je hnyaban igigilö ; 58 me Holon me je hnyaban igigilö, me Debira me je hnyaban igigilö ; 59 me Asan me je hnyaban igigilö, me Bethe-semes me je hnyaban igigilö : 60 ke ûnyi hnyi tribu anyi Beniamina ; Geba me je hnyaban igigilö, me Alemeth me je hnyaban igigilö, me Anathoth me je hnyaban igigilö. Haba anyidrin je taun hia hnyi anyidrin je lap, a, thötin je taun. 61 Ke adre me ham ka kolon laku Kohatha ge leköp, ûnyi hnyi lap anyin tribu, ûnyi hnyi hafiny tribu, a hafiny Manase, a ten ta taun. 62 Ke hobi kâu laku Geresoma hoton anyidrin je lap, ûnyi hnyi tribu Isakara, me ûnyi hnyi tribu Asera, me ûnyi hnyi tribu Nafatali, me ûnyi hnyi tribu Manase hnyi Basana, a thötin je taun. 63 Ke haba hnân hobi kâu laku Merari hoton anyidrin je lap, adre ham ge leköp ûnyi hnyi tribu Reubena, me ûnyi hnyi tribu Gada, me ûnyi hnyi tribu Zebulona, a twelv je taun. 64 Haba lakon Isaraela ödrin e ham ka at Levi ta je taun me je hnyaban je taun a igigilö. 65 Ke ödrin e ham ge leköp je taun eling adre me ha ien, ûnyi hnyi tribu anyin laku

Juda, me ûnyi hnyi tribu anyin laku Simeona, me ûnyi hnyi tribu anyin laku Beniamina. 66 Ke haba ke je lap anyin je laku Kohatha ae hu je taun hnyi idrin ûnyi hnyi tribu Eferaima. 67 Ke adre ham ködrin je taun hnân lubaduöng hnyin, wale Sekema hnyi hnyei ae hut hnyi Eferaima me je hnyaban igigilö ; me Gezera me je hnyaban igigilö ; 68 me Jokameama me je hnyaban igigilö, me Bethe-horona me je hnyaban igigilö ; 69 me Ajalona me je hnyaban igigilö, me Gatha-rimona me je hnyaban igigilö : 70 ke ûnyi hnyi hafiny tribu Manase ; Anere me je hnyaban igigilö, me Bileam me je hnyaban igigilö, hobi kâu kolon lap anyin laku Kohatha. 71 Hobi kâu laku Geresoma adre ham, ûnyi hnyi lap anyin hafiny tribu Manase, Golana hnyi Basana, me je hnyaban igigilö, me Aseteroha me je hnyaban igigilö : 72 ke ûnyi hnyi tribu Isakara ; Kadesi me je hnyaban igigilö, me Daberath me je hnyaban igigilö ; 73 me Ramotha me je hnyaban igigilö, me Anem me je hnyaban igigilö : 74 ke ûnyi hnyi tribu Aser ; Miseal me je hnyaban igigilö, me Abedon me je hnyaban igigilö ; 75 me Hukok me je hnyaban igigilö, me Rehoba me je hnyaban igigilö : 76 ke ûnyi hnyi tribu Nafatali ; Kadesi hnyi Galilaia me je hnyaban igigilö, me Hamona me je hnyaban igigilö, me Kiriathaima me je hnyaban igigilö. 77 Ke hobi kâu kolon at Levi, laku Merari, adre ham, ûnyi hnyi tribu Zebulona, Rimona me je hnyaban igigilö, me Tabora me je hnyaban igigilö : 78 ke haba hoton Joridano hnyi Jeriko, wale ke keihen Joridano e deiö adre ham ködrin ûnyi hnyi tribu Reubena, Bezeri hnyi hnyebuba me je hnyaban igigilö, me Jahaza me je hnyaban igigilö, 79 me Kademotha me je hnyaban igigilö, me Mefath me je hnyaban igigilö : 80 ke ûnyi hnyi tribu Gada ; adre ham, Ramotha hnyi Gileada me je hnyaban igigilö, me Mahanaima me je hnyaban igigilö, 81 me Hesebona me je hnyaban igigilö, me Jazera me je hnyaban igigilö.

### HNyimakan 7.

**K**E haba je baga laku Isakara ; me, Tola, me Pua, me Jasuba, me Simeona, ödrin vak. 2 Ke haba je baga laku Tola ; me, Uzi, me Refaia, me Jeriela, me Jakemai, me Ibesam, me Samuela, je taben je lap anyin lakamödrin, wale Tola ; tavat

I. MAN ÛLABAINY JE THAN 7.

ae hwege hnyi anyidrin je dö: haba úsei-  
drin hnyi úö Davita, ödrin twente tu thau-  
zan ke siks haded. 3 Ke haba бага нöku  
Uzi; me Iezeraia; ke haba je бага laku  
Iezeraia; me, Mikaela, me Obadia, me  
Joela, me Isia, ödrin thabúng: ödrin je  
taben hia. 4 Ke unyidrin je deö vat a  
thöte siks thauzan, hnyi anyidrin je dö  
hoton je lap anyin lakamödrin: anyin ae  
se hia laöiödrin me lakudrin je бага. 5  
Ke haba je liamekeiny mödrin unyin je  
lap anyi Isakara, a ödrin tavat hwege,  
ödrin eite seven thauzan, adre öú ödrin  
hia hnyi anyidrin je dö.

6 Haba je бага laku Beniamina; me,  
Bela, me Bekera, me Jediaela, ödin kun.  
7 Ke haba je бага laku Bela; me, Eze-  
bona, me Uzi, me Uziela, me Jerimoth,  
me Iri, ödrin faiv; je taben lap anyin  
lakamödrin, tavat hwege; ödrin twente  
tu thauzan ke thöte foa tavat, adre me öú  
ödrin hnyi anyidrin je dö. 8 Ke haba je  
бага laku Bekera; me, Zemira, me Joasa,  
me Eliezera, me Elioenai, me Omeri, me  
Jeremoth, me Abia, me Anathoth, me  
Alemeth. Ödrin hia je бага laku Bekera.  
9 Ke adre me öú ödrin hnyi je dö, hoton  
anyidrin je dö, je taben je lap anyin laka-  
mödrin, hnyat ae hwege, ödrin twente  
thauzan ke tu haded. 10 Ke haba бага  
nöku Jediaela; me Bilehana: ke haba je  
бага laku Bilehana; me, Jeuso, me Benia-  
mina, me Ehuda, me Kenaana, me Zethan,  
me Tasesa, me Ahisahara. 11 Ödrin hia  
e je бага laku Jediaela, hoton je taben je  
lap anyin je lakamödrin, hnyat ae hwege,  
ödrin seventin thauzan ke tu haded, tavat  
ae khan' ödrin he ka hnyi he hnyi utvat  
he ka vat. 12 Ke Supima me Hupima li  
бага laku Iri, ke Husima, бага нöku  
Ahere.

13 Haba je бага laku Nafatali; me,  
Jazela, me Guni, me Jezera, me Saluma;  
a laöbi Bila.

14 Haba je бага laku Manase; me  
Aseriela, wale a hnokoá áiân: (ke haba anyin  
momo, a momo Arama ame hnöku Makir  
kamö Gileada: 15 ke haba Makir ame hok  
áiân ga Hupima me Supima, haba ien hani-  
dru, jia Maaka;) ke Zelofeada ien a loiny:  
ke e hu lakon je hlu ga Zelofeada. 16 Ke  
haba Maaka öiö Makir ame hnokoá da, me  
hwenyi ien Peres; ke Seres ien liamekeiny  
mä; ke li lakon jia Ulam me Rekem. 17  
Ke haba бага нöku Ulum; jia Bedan.  
Wale je mátráni Gileada, нöku Makir,

nöku Manase. 18 Ke haba Hamoleketh  
a haniny ame hnöku Isod, me Abiezera,  
me Mala. 19 Ke haba je бага laku  
Semida; me, Ahian, me Sekema, me Liki,  
me Aniam.

20 Ke haba je mátrani Eferaima; me,  
Suthela, ke Barida a nokon бага, me Tahath  
a nokon бага, me Elada a nokon бага, me  
Tahath a nokon бага, 21 me Zabad a nokon  
бага, me Suthela a nokon бага, me Ezera,  
me Elead, waleji a hling' ödru at Gatha tavat  
adre hnokoá hnyi hnyei, anyin a ödrin e o  
but he ka venâu haledrin je meno. 22 Ke  
ame tenge gadru Eferaima a kamödru hnyi  
je bong ae se, ke ame o but je liamekeiny  
mä he ka otubwelâ e. 23 Ke e ame didrö  
ka áiân, me ame erkin dut momo, me hno-  
koá da, me hwenyi ien Beria, anyin ame o  
je okongon hnyaban. 24 Ke haba nokon  
hlu, jia Seera, wale at ame otílá Bethe-  
horona eú me ethö, me Uzen-seera. 25  
Ke haba nokon бага, Refa, me Resef, me  
Tela a nokon бага, me Thana a nokon  
бага; 26 me Laadan a nokon бага, me  
Amihuda a nokon бага, me Elisama a  
nokon бага; 27 me Nuna a nokon бага,  
me Josua a nokon бага. 28 Ke haba je  
idrin me je hnyabadrin, Beth-ela me je  
tauniny, ke e deiö Naara, ke e jio Gezera  
me je tauniny; Sekema minya me je tauniny  
ke ne o but hnyi Aza me je tauniny: 29  
ke haba hnyi hnyigöulen je laku Manase,  
Betheseana me je tauniny, Megido me je  
tauniny, Dora me je tauniny. Adre labä  
e hnen laku Josefa нöku Isaraela.

30 Ke haba je бага laku Asera; me  
Iemina, me Ieseva, me Isevi, me Beria, me  
Sara a hanidrin. 31 Ke haba li бага laku  
Beria; me Heberu, me Malekiela, wale at  
a ibi hwân laba hnyi Birezavith. 32 Ke  
haba Heberu ame hnöku Jafelet, me Somera,  
me Hotham, me Sua a hanidrin. 33 Ke  
haba je бага laku Jafelet; me Pasak, me  
Bimeal, me Asevath. Wale laku Jafelet.  
34 Ke haba je бага laku Simeri; me, Ahi,  
me Roga, me Jehuba, me Arama. 35 Ke  
haba je бага laku Helem a liamekeiny mä:  
me Zofa, me Iemina, me Seles, me Amal. 36  
Ke haba je бага laku Zofa; me, Sua, me  
Harenefa, me Sual, me Beri, me Imera; 37  
me Bezeri, me Hodi, me Sama, me Silesa,  
me Itheran, me Bera. 38 Ke haba je бага  
laku Jethero, me, Jefune, me Pisepa, me  
Ara. 39 Ke haba je бага laku Ula, me  
Ara, me Haniela, me Risea. 40 Ödrin hia  
ling je mátrâm Asera, je ban je lap anyin

I. MAN ULABAINY JE THAN 8, 9.

lakamen, tavat adre úca ae ti hwege, je ban je taben. Ke haba úseidrin adre me aú he ka hnyi vat, me, twente siks thauzan tavat.

HNHYIMAKAN 8.

**K**E haba Beniamina ame hnöku Bela nokon a bán, me Asebala a loiny, me Ahara a kuniny; 2 me Noa a vakiny, me Rafa a thabúnginy. 3 Ke e hu je baga laku Bela; jia Adara, me Gera, me Abihuda; 4 me Abisua, me Naamana, me Ahoa; 5 me Gera, me Supima, me Hirama. 6 Ke walang je baga laku Ehuda; ödrin je ban je lap anyin lakamen a aten Geba, ke adre me hom hwenb' ödrin Manakatha ai: 7 ke e ame hom hwenbâ minya Naamana, me Ahia, me Gera; ke e ame hnöku Uza, me Ahihuda. 8 Ke haba Saharaim ame hnokoâ je lakon hnyi utkânâiny Moaba, hwaban hnen hna hn' ödrin dut; Husima me Baara ien laâiân. 9 Ke e ame hnokoâ ga Hodes a âiân, Jobab, me Zibia, me Mesa, me Malekam; 10 me Jeuz, me Sabia, me Mirema. Wale lakon, je ban je lap anyin lalamen. 11 Ke e ame hnokoâ ga Husima, Ahituba, me Elepaala. 12 Ke haba je baga laku Elepaala; me, Heberu, me Misam, me Semeri, at ame otillâ Ono me Lod, me je tauniny: 13 me Beria, me Sema, wale li ban je lap anyin lakamen aten Ajalona, tavat ödrin e obâ aten Gatha; 14 me Ahio, me Sasak, me Jeremoth; 15 me Zebadia, me Arada, me Eder; 16 me Mikaela, me Isepa, me Joha, a je baga laku Beria; 17 me Zebadia, me Mesulama, me Hezeki, me Heberu; 18 me Isemerai, me Izelia, me Jobab, je baga laku Elepaala; 19 me Jakim, me Zikeri, me Zabedi; 20 me Elienai, me Zilethai, me Eliela; 21 me Adaia, me Beraia, me Simerath, je baga laku Sema; 22 me Isepana, me Heberu, me Eliela; 23 me Abedon, me Zikeri, me Hanan; 24 me Hanania, me Elama, me Anetothia; 25 me Ifedia, me Penuela, je baga laku Sasak; 26 me Sameserai, me Searia, me Athalia; 27 me Jaresia, me Elia, me Zikeri, je baga laku Jerohama. 28 Ödrin je ban je lap anyin je lakamen, a je taben: ödrin e laba hnyi Jerusalema. 29 Ke ame laba hnyi Gibeona at ame ibi hwân Gibeona, (jia Jeiela) ke Maaka ien âiân: 30 ke haba baga nokon a bán me, Abedon; me Zura, me Kiso, me Baala, me Nadaba; 31 me Gedor,

me Ahio, me Zaker. 32 Ke haba Mike-loth ame hnöku Sema. Ke ödrin minya ödrin e tha laba me je liamekeiny mödrin hnyi Jerusalema, cicö je liamekeiny mödrin. 33 Ke haba Neri ame hnöku Kiso; ke Kiso ame hnöku Saulo; ke Saulo ame hnöku Jonathana, me Maleki-sua, me Abinadab, me Esibaala. 34 Ke haba baga nöku Jonathana, me, Meri-baala; ke haba Meri-baala ame hnöku Mika. 35 Ke haba je baga laku Mika; jia Pithon, me Melek, me Tarea, me Ahaza. 36 Ke Ahaza ame hnöku Jehoadä; ke Jehoadä ame hnöku Alemeth, me Azemaveth, me Zimeri; ke Zimeri ame hnöku Moza: 37 ke Moza ame hnöku Binea; ke Rafa a nokon baga, me Elasa a nokon baga, me Azela a nokon baga; 38 ke ödrin siks je baga laku Azela, walang je iödrin; jia Azerikam, me Bokeru, me Isamaela, me Searia, me Obadia, me Hanan; ödrin hia e laku Azela. 39 Ke haba je baga laku Eseka a liamekeiny më; me, Ulam nokon a bán, me Jeuso a loiny, me Elefelet a kuniny. 40 Ke haba laku Ulam ödrin je hnyat ae ti whege, tavat fana, ke se hia je lakudrin, me je öbidrin, ödrin wan haded ke fite. Ödrin hia e je mâtrâni Beniamina.

HNHYIMAKAN 9.

**M**E helâe adre aú je dö anyin at Isara-ela hia; ke wâ bi, adre sihnalimi-drin hnyi tusi anyin je than Isaraela: ke adre me hom at Juda Babulona ai can hnödrin hna hanyâûâ. 2 Ke haba tavat a bán ka laba hnyi idrin hnyi anyidrin je taun, me, at Isaraela, me tavat bihut, me at Levi, me at Nethini. 3 Ke ame laba hnyi Jerusalema ke je laku Juda, me ke je laku Beniamina, me ke je laku Eferaima me Manase; 4 wale Uthai baga a nöku Amihuda, baga nöku Omeri, baga nöku Imeri, baga nöku Bani, wale ke je mâtrâni Farez nöku Juda. 5 Ke haba keihen at Silo; me Asaia a atö, me je lakon. 6 Ke haba ke je baga laku Zera; me Jeuela, me je liamekeiny mödrin, ödrin siks haded me nainte. 7 Ke ke je baga laku Beniamina; jia Salu nöku Mesulama, me baga nöku Hodavia, me baga nöku Hasenua; 8 me Ibeneia baga nöku Jerohama, me Ela baga nöku Uzi, me baga nöku Mikeri, me Mesulama baga nöku Sefatia, baga nöku Reuela, baga noku Ibeneja? 9 me je liamekeiny mödrin, hoton anyidrin je lap, ödrin nain

haded ke fiftesiks. Ödrin hia je ban je lap anyin lakamen hoton je lap anyin lakamödrin.

10 Ke haba ke je at bihut ; wale Jedaia, me Jehoiarib, me Jakina ; 11 me Azaria baga nöku Hilekia, baga nöku Mesulama, baga nöku Zadoka, baga nöku Meräioth, baga nöku Ahituba, at ame musö uma umen Khong ; 12 me Adaia baga nöku Jerohama, baga nöku Pasur, baga nöku Malekia, me Maseia baga nöku Adiela, baga nöku Jazera, baga nöku Mesulama, baga nöku Mesilemoth, baga nöku Imer ; 13 me je liamekeiny mödrin je ban je lap anyin je lakamödrin wan thauzan ke seven haded ke sikste ; tavat ae ti khana he ka huliwa hnyi uma umen Khong. 14 Ke ke je at Levi ; wale Semaia baga nöku Hasuba, baga nöku Azerikam, baga nöku Hasabia, hanen je baga laku Merari ; 15 me Bakebakara, me Heres, me Galal, me Matania baga nöku Mika, baga nöku Zikeri, baga nöku Asafa ; 16 me Obadia baga nöku Semaia, baga nöku Galal, baga nöku Jeduthun, me Berekia baga nöku Asa, baga nöku Elekana, tavat adre me labä je taun ae úhnyükong anyin at Netofa. 17 Ke haba tavat tuö hwanuma ; me Saluma, me Akub, me Talemon, me Ahiman, me je liamekeiny mödrin ; haba at ae nua me Saluma ; 18 ke haba hanymen, me, homagöuleiny than e jemeiö hwân ehac : ödrin tavat tuö homagöule hobi kâu hna hunuma anyin laku Levi. 19 Ke Saluma baga nöku Kore, baga nöku Ebiasafa, baga nöku Kora, me je liamekeiny mē, hanen lap anyin kamen, tavat Kora, haba ödrin homakan je huliwa, je hnyat tuö je homagöuleiny uma mano : ke je kamödrin waleji ödrin e musö je hna hunuma anyi Iehova, tavat tuö hwanumen ; 20 ke Fineasa nöku Eleazara at ame musi ödrin ehac, ke tha Iehova mê. 21 Haba Zakaria baga nöku Meselema ame tuö hwanumen uma hnân úkhacaköu. 22 Ödrin hia e tavat adre úca he ka tuö hwanuma, ödrin tu hadad ke twelv. Adre öü ödrin hoton anyidrin je dö hnyi anyidrin je taun, waleji hnö Davita me Samuela at wâ hna otilâ ka hnyi je hanymödrin adre thu. 23 Ke hanymödrin me je lakudrin, je hwanumen uma umö Iehova, wale umen uma mano he ka tuö hnyi je deö hmak. 24 E hu tavat tuö hwanuma hnyi je ke keihen a vak, jimeio, me jimeu, me hwadrö, me hwaiou. 25 Ke hamen je liamekiny

mödrin, hnyi anyidrin je taun, he ka tha ö mödrin hwaban je bong a seven, hnyi ke ün me ke ün : 26 anyin a haba tavat tuö hwanuma a foa, wale ae beönua, ödrin at Levi, e hu hanymen adre thu, ke ödrin e tuö je hnyeule me je uma omjeü hnyi uma umen Khong. 27 Ke ödrin e laba igigilö uma umen Khong, anyin a hamödrin he ka tuö, ke hamödrin he ka khöing hwanuma hnyi je hnyomakatu thibut. 28 Ke hanymen keihen gadrin je kaiainy huliwa ; anyin a ödrin e tuluto e ka odilâ thö, me ödrin e tuluto e ka odilâ but. 29 Ke haba keihen minya gadrin adre ip hnân tuö je omjehen, me je kaiainy hia dok ae kap, me falawa ae so, me waina, me wakaco, me libanu, me je únyi ae bo so. 30 Ke haba ke je lakon hnyat bihut ödrin e penapena je wakaco adre obosoä. 31 Ke hamö Matathia, ke at Levi, nöku Saluma at Kora a atö, he ka musö je únyi adre le hnyin je öt. 32 Ke hanymen ke je laku Kohatha a je liamekeiny mödrin, areto adre omanená, he ka penapena e hnyi je sabath thibut. 33 Ke wale tavat khumöng, je ban je lap anyin je lakamen at Levi, adre me laba hnyi je hnyeule, me ba ju ke huliwa ; anyin a ödrin e tot hnyi je hanymödrin hnyi lany me lit. 34 Ödrin je ban je lap anyin je lakamen at Levi, hnyi anyidrin ta je dö hia, je hnyat ae beönua : haba tavat eling ödrin e laba hnyi Jerusalema.

35 Ke ame laba hnyi Gibeona at ame ibi hwân Gibeona, wale Jeiela, ke Maaka ien áiân : 36 ke haba baga nokon a bân, me Abedon, me Zura, me Kiso, me Baala, me Neri, me Nadaba ; 37 me Gedor, me Ahio, me Zakaria, me Mikeloth. 38 Ke haba Mikeloth ame hnöku Semama. Ke ödrin e tha laba me je liamekeiny mödrin hnyi Jerusalema, cicö je liamekeiny mödrin. 39 Ke haba Neri ame hnöku Kiso ; ke Kiso ame hnöku Saulo ; ke Saulo ame hnöku Jonathana, me Maleki-sua, me Abinadab, me Esebaala. 40 Ke haba baga nöku Jonathana, me, Meri-baala ; ke Meri-baala ame hnöku Mika. 41 Ke haba je baga laku Mika : me Pithon, me Melek, me Tarea, me Ahaza. 42 Haba Ahaza ame hnöku Jara ; ke Jara ame hnöku Alemeth, me Azemaveth, me Zimeri ; ke Zimeri ame hnöku Moza ; 43 ke Moza ame hnöku Binea ; ke Refai a nokon baga, me Elasa a nokon baga, me Azela a nokon baga. 44 Ke ödrin siks je baga laku Azela, haba

## I. MAN ÛLABAINY JE THAN 10, 11.

je iödrin, me, Azerikam, me Bokeru, me Isamaela, me Searia, me Obadia, me Hanan : wale je бага laku Azela.

### HNYIMAKAN 10.

**K**E haba at Filisite ödrin e vat me at Isaraela : me ame kec at Isaraela ge at Filisiti, k' ame ta hnyat adre hlingâ hnyi bucen Gileboa. 2 Ke ame hnu hwegö Saulo me lakon ge at Filisiti ; me haba at Filisiti ödrin e kuc Jonathana, me Abinadab, me Maleki-sua, laku Saulo a kun. 3 Ke hwege vat kö Saulo, me ame khaû ju e ge tavat fana ; k' ame hmak ge tavat hlec fana. 4 Me haba Saulo ame ha ka at ame hom tilâ anyin ta je omjehen vat, ka habe, Oc ut ânyâm hele vat me dâoi nya kâu ; wâ e nye o but tavat eling adre ca peretomonâ me oveci nya. Ke hücö bi at ame hom tilâ anyin je omjehen vat ; anyin ae gan hmâ anyin ot. Anyin a wale Saulo ame hom anyin hele vat me ta takoû. 5 Ke a wâ but at ame hom tilâ anyin je omjehen vat a ga mokcu Saulo, me e ame ka ta takoû bi anyin hele vat me mokcu. 6 Waleling me me mokcu Saulo me ta lakon a kun ; k' ame tha mokcu hia anyin lap. 7 Ke haba at Isaraela hnyi hnyigöulen bucen ödrin e wâ a g' adre kec, ke a mokcu Saulo me ta lakon a kun, me ödrin e hna but je taun me kec ; ke ame o but at Filisiti me labâ e.

8 Ke haba nyi me ame o at Filisiti he ka uny je ûkhaûen je komok, me ödrin e ö Saulo me lakon ödrin e ta but hnyi bucen Gileboa. 9 Ke ödrin e uny anyin ûkhaû, me ödrin e hom han, me omjehen vat me kunâ ka hnyi hnyei iny at Filisiti igigilö, he ka thumeto anyidrin je idola, me tavat. 10 Ke ödrin e ip anyin je omjehen vat hnyi uma umen anyidrin je khong, me uhno ban hnyin uma umö Dagona. 11 K' a löng ut at Jabesi-gileada wale ge hnen at Filisiti hna ânyâ kö Saulo, 12 me ame todrö tavat hwege hia me hom unyi Saulo, me unyin je lakon, me hom Jabese ai, me konâm je jeiödrin hmelen iwajo hnyi Jabesi, k' ödrin e ca han hnyi seven je bong. 13 Helâe ame mokcu Saulo can anyin monu wale a ânyâ kö Iehova, waleji a ca löng hoton hofuc ho Iehova ; ke khaca, anyin a e ame elâm unyin at ae tren biobotkong, me hnei ; 14 ke a ca hnei bi ga Iehova : wale me e ame hlingâ e, me wia dökhu kö Davita nöku Jese.

### HNYIMAKAN 11.

**K**E ame ûkhacaköu thö Isaraela hia unyi Davita hnyi Heberona me ha, ka habe, Wâ bi, öhmun ang je jeiâm me je utioiâm. 2 Hnyi je ûen ehac ke tiga than bi Saulo u je lelö ehele me lelö jem at Isaraela : ke haba Iehova Khongom ame ha köu, ka habe, U at ame he ka hân lakeik a Isaraela, ke u me he ka taben lakeik a Isaraela. 3 Me ame o but wahingatiny Isaraela hia thithö ka than hnyi Heberona ; ke Davita ame ûhinhinykö mödrin hnyi Heberona hnyi hnyimakö Iehova ; ke ödrin e hú Davita me hnân thaniny Isaraela, hoton hofuc ho Iehova a deny Samuela. 4 Ke haba Davita me Isaraela hia ödrin e he Jerusalema ai (wale Jebusi) ; e eling at Jebusi tavat a idrin hnyei. 5 Ke haba aten Jebusi ödrin e ha kö Davita, ka habe, U me ca he ka didrö ang. Ke so bi Davita ame hûgûnâ hhabâ hnyi Ziona ; wale taun anyi Davita. 6 Ke haingö Davita, ka habe, Haba at ame he ka bân ka kot at Jebusi, e ame he ka homakan me taben. Me ame bö Joab nöku Zerua, me e ame homakan. 7 Ke ame laba Davita hnyi hhabâ ; anyin a wale adre me hwenyi ien e taun anyi Davita. 8 Ke e ame op taun igigilö hwân hnyi Milo igigilö : ke haba Joab ame ânyâwia ke keihen taun. 9 K' ame görany tot Davita, ke e bi unyin Iehova Khongon sabaoth.

10 Ke walang tavat ae beönua ge tavat ae hwege unyi Davita, tavat a tha hwege më hnyi dokhon dökhu, tha ödrin me Isaraela hia, he ka otilâ e me than, hoton hofuc ho Iehova ga Isaraela. 11 Ke walang ûseiny tavat hwege unyi Davita : Jasobeam nokon at Hakemoni, taben hnyat a thöte ; e ame hai dân ö me hlingâ kun ta haded hnyi ûen a khaca. 12 Ke hwaban e, Eleazara nöku Dodo, at Aohi, hanen hnyat a kun ae hwege. 13 Habe e me unyi Davita waleji hnyi Efesi-damim, k' ame ûkhacaköu eling at Filisiti he ka vat, wale hnyi ke utkânâ, dok ae si hnyin bali ; ke ame kec tavat ge at Filisiti. 14 Ke ödrin e tot hnyi wanben utkânâ, me tuö wia e, me hlingâ at Filisiti ; ke Iehova ame omeli ödrin ge ûhömeli ae gan hmâ. 15 Ke ame he hnyat a kun hanen je taben a thöte kö Davita hnyi op Adulama, hnyi kic ; ke haba at Filisiti ödrin e hunuma hnyi hnyigöulen bucen e Refai. 16 Ke e bi Davita hnyi

## I. MAN ÛLABAINY JE THAN 12.

hnabâ, ke e but hnyi Bethe-leema lap tue anyin at Filisiti. 17 Ke Davita ame weny ke ûnyi, me haingen, ka habe, E na he bi ke at ka habelik ge an ûheny Bethe-leema wale hnyi homagöule! 18 Ke haba ödrin kun ödrin e thu vat anyin at Filisiti, me se köiö hnyi an hnyi Bethe-leema hnyi homagöule, me hom, me hom kö Davita: ke so bi Davita ame höcö he ka ic, ke e ame hingâlâ e kö Iehova, 19 me ha, ka habe, Ohe, Khonguk lö, oge me ca he bi nya ka ânyâ ûnyi eling: hawa, oge me he ka ijem dren tavat eang ödrin e ne mokcu? anyin a ödrin e hom e, ke ödrin e ne mokcu. Anyin a wale e ame höcö he ka ijem. Wale hna ânyâ hnen hnyat eling a kun ae hwege. 20 Ke haba Abisai liamekiny me Joab, me, e beönua ge hnyat a kun: anyin a e ame hai dân ö hon tavat a theri haded me hling' ödrin, me me tha e ien bi me ke li at a lo. 21 Haba ödrin kun, ke e ame lung hon li at a lo, ke adre me otilâ e hnân taben ködrü: ke so bi adre ca otilâ e hnyi kuniny a bân. 22 Haba Benaia nöku Jehoiada nokon at ae hwege hnyi Kabezeela, at ame ânyâ je ûnyi ae gan, me e ame kot li laku Ariel a li at Moaba; ke e ame ut ka hnyi op me hlingâ ke liona eü hnyi waben, wale hnyi ûen ae hu kiona. 23 Ke e ame hlingâ ke at Aigupito, at ae beü hmâ, faiv kubit ibeüen; ke e hu hnyi hnyamen at Aigupito, ö helâ me man utöiny ûnyi hnân hwâwâ mano; me e ame he kâu me uci, me oc ut ö ûnyi hnyi hnyamen at Aigupito, me hlingâ e bi ge dân ö. 24 Wale ta je ûnyi a ânyâ Benaia nöku Jehoiada, me me hu ien unyin hnyat a kun ae hwege hmönyin. 25 Wâ bi, e ame lung hon hnyat a thöte, ke so bi adre ca otilâ e hnyi kuniny a bân: ke Davita ame otilâ e hnân taben tavat tue.

26 Me je aten je deö vat minya ae hwege; Asael liamekeiny me Joab, me Eleanana бага nöku Dodo at Bethe-leema; 27 me Sama at Harari, me Helez at Pelone; 28 me Ira бага nöku Ikez at Tekoa, me Abiezera at Anathoth; 29 me Sibekai at Husa, me Itai at Aohi; 30 me Maharai at Netofa, me Heled бага nöku Baana at Netofa; 31 me Itai бага nöku Ribai ûheny Gibeа anyin laku Beniamina, me Benaia at Pirathon; 32 me Hurai ûheny hnyi je wagewe hnyi Gasa, me Abiela at Araba; 33 me Azemaveth at Bahurim, me Eliaba at Salabon; 34 me je бага laku Hasem at Gizon, wale Jonathana nöku

Sage at Harari; 35 me Ahiam бага nöku Sakari at Harari, me Elifal бага nöku Uri; 36 me Hefera at Mekerathi, me Ahia at Pelone; 37 me Hezero at Karemela, me Naarai бага nöku Ezebai; 38 me Joela liamekeiny me Nathana, me Mibeka бага nöku Hagara; 39 me Zelek at Amona, me Nahari at Berotha, at ame hom tilâ je omjehen vat anyi Joab nöku Zerua; 40 me Ira at Iethero, me Gareb at Iethero; 41 me Uria at Heth, me Zabad nöku Ahelai; 42 me Adina nöku Siza at Reubena, ke taben at Reubena, ke tha e me tavat a thöte; 43 me Hanan бага nöku Maaka, me Josafata at Mitheni; 44 me Uzia at Aseterotha, me Sama me Jehiela li бага laku Hotham at Arcoera; 45 me Jediaela nöku Simeri, me Joha liamekeiny mē, at Tizi; 46 me Eliela at Mahavi, me Jeribai me Josavia li laku Elenaama, me Ithema at Moaba; 47 me Eliela, me Obeda, me Jaasiela at Mezoba.

### HNYIMAKAN 12.

**K**E walang tavat adre me o kö Davita hnyi Zikelag, hnyi ûen e ame tiga lubaduöng ga Saulo nöku Kiso: ke ödrin c hanen je hnyat ae ti hwege, ödrin e hadruâ hnyi vat. 2 Ke ödrin e hok cafana, ke tha metâ hia je li hnyamödrin he ka külüa veto, me hlec fana; haba ödrin je liamekeiny me Saulo at Beniamina. 3 Abiezera at a bân, ke Joasa a loiny, a li laku Sema at Gibeа; me Jeziela, me Pelet, li laku Azemaveth; me Beraka, me Jehu at Anathoth; 4 me Isemaia at Gibeona at ae ti hwege unyin tavat a thöte k' ame musö hnyat a thöte; me Jeremia, me Jaziela, me Johanana, me Jozabada at Gedera; 5 me Eluzi, me Jeremoth, me Bealia, me Semaria, me Sefatia at Harufi; 6 me Elekana, me Iesia, me Azareela, me Joezer, me Jasobeam, tavat Kora; 7 me Joela me Zebadia, li laku Jerohama at Gedor. 8 Ke ame ut minya ke je at Gada kö Davita hnyi hnabâ hnyi hnyebuba, tavat ae ti hwege, tavat ae khana vat, hnyat hok bec me ö; ke haba je hnyimaködrin me helâ me je liona, ke hâhâ je cadrin helâ me je zebi hon je bucen; 9 Ezera at a bân, me Obadia a loiny, me Eliaba a kuniny; 10 me Misemana a vakiny, me Jeremia a thabünginy; 11 me Atai a siksiny, me Eliela a seveniny; 12 me Johanana a eitiny, me Elezabad a naininy; 13 me



## I. MAN ÛLABAINY JE THAN 13.

Jeremia a teniny, me Makebanai a eleveniny. 14 Wale ke je taben vat a laku Gada: haba at ae ûhnyûkong gadrin, me, tha ûcû me wan haded, ke haba at ae gan, me, tha ûcû me wan thauzan. 15 Ke wale hnyat ödrin e he hanyâûâ Joridano hnyi tehi a bân, k' ame bahihingölö je baten wagewe hia; k' ödrin e hnu aten je hnyigöulen bucen hia e deiö me jio. 16 Ke ame o but ke je laku Beniamina me Juda kö Davita hnyi hhabâ. 17 Ke Davita ame didrut he ka ûkhanö mödrin, me ha ködrin, ka habe, Öbun e ne o kõnya hnyi ûsoköu he ka hadruö nya, awe, oge me he ka tha hnyok möbun: ke so bi öbun e ne he ka alecuo nya ka je iwahnaihmiöny mönya, ke ba kongik, awe, e so ame he Khongon lakamötin ka wâ, me thawâ. 18 Me haba hanu ame o kö Amasai wale taben thöte, haingen, ka habe, Davita lö, öhmun je atâm, me je lahiâm, nöku Jese lö: ûsoköu, ûsoköu köu, me ûsoköu ka tavat adre me hadruö u, anyin a Khongom ame hadruö u. Haba Davita ame köp ödrin me otill' ödrin hnân je taben vat. 19 Ke haba keihen je laku Manase adre me utut kö Davita, waleji hnyi ûen e ame tha he me at Filisiti he ka vat me Saulo, ke ödrin e ca hadru' ödrin: anyin a je than Filisiti ödrin e ûhnenamö me kunâ hmetu e, haingödrin, ka habe, E ame he ka kec hmetu kö Saulo a tuhan me je bötin. 20 Ke e ame tiga he Zikelag ai, me ame utut kâu ke je laku Manase, jia Adena, me Jozabada, me Jediaela, me Mikaela, me Jozabada, me Elihu, me Zilethai, je taben thauzan anyin at Manase. 21 Ke ödrin e hadruö Davita he ka vat me deö vat adre sei: anyin a ödrin tavat hwege hia, ke je taben vat ut ödrin. 22 Anyin a hnyi ke bong me ke bong adre me labö o kö Davita he ka hadruâ e, ke ne o but ödrin e se hia hmönyin, helâ me utbavat anyin Khong.

23 Ke walang ûseiny je taben hnyat adre me penapena hobi kâu vat, tavat adre utut kö Davita hnyi Heberona, he ka wia kâu dökhu dökhu Saulo, hoton hofuc ho Iehova. 24 Haba laku Juda tavat hok bec me ö, ödrin siks thauzan ke eit haded, tavat adre penapena hobi kâu vat. 25 Ke laku Simeona tavat hwege he ka vat, ödrin seven thauzan ke wan haded. 26 Ke laku Levi ödrin foa thauzan ke siks haded. 27 Ke Jehoiada at ame musö lap anyi Arona, ke tha e më theri thauzan me

seven haded; 28 ke Zadoka hidröu ae hwege, ke ûnyi hnyi lap anyin kamen twente tu je taben. 29 Ke haba ke je laku Beniamina, je liamekeiny me Saulo, ödrin theri thauzan; ke haba ehac ödrin se hia gadrin ödrin e tha hien me lap anyi Saulo. 30 Ke haba ke laku Eferaima, ödrin twente thauzan ke eit haded, tavat hwege, tavat ae lung hnyi je lap anyin lakamödrin. 31 Ke haba keihen ûnyi hnyi hafiny tribu Manase, ödrin eitn thauzan, tavat adre ha ien, he ka he me otillö Davita ka than. 32 Ke haba ke je laku Isakara, tavat ae metâ he ka wâhmakhmetoâ je ûen, me je ûnyi ae ûcû he ka ânyâ hnen at Isaraela, ödrin tu haded je taben, ke haba je liamekeiny mödrin hia ödrin e ling ödrin. 33 Keihen at Zebulona tavat adre hnyi vat, tavat ae khana he ka vat me je omjehen vat hia ae ve bongon, ödrin fifte thauzan, tavat adre me tot metâ hnyi vat, ke ca lolo bi hnyok. 34 Me keihen at Nafatali, ödrin wan thauzan je taben, ke tha e mödrin seventin thauzan tavat hok bec me ö. 35 Me keihen at Dana, ae khan' ödrin he ka hnyi vat, ödrin twente eit thauzan ke siks haded. 36 Me keihen Asera, ae khan' ödra he ka hnyi vat, me tot metâ, a ödrin fâte thauzan. 37 Ke ûheny hnyi hoton Joridano keihen at Reubena, me Gada, me hafiny tribu Manase, me je omjehen vat ae ve bongon hia, ödrin wan haded ke twente thauzan. 38 Ödrin hia e tavat vat, tavat tot metâ, k' adre me he Heberona ai me hnyok ae bekhöt he ka otillö Davita ka than hon Isaraela hia: ke haba khaca, e tha hnyekon bi je kolon at Isaraela he ka otillö Davita ka than. 39 Ke tha ödrin ling me Davita hnyi je bong a kun, k' ödrin e tha han me ic: anyin a hia but penapena hobi ködrin ge je liamekekeiny mödrin. 40 Ke haba khaca, haba tavat ae hakekeny ködrin, ke ne o but Isakara, me Zebulona, me Nafatali, me ödrin e hok areto hon je asina, me kamela, me miul, me bolok, a jeú falawa, me je û wan meta, me je de wan vine adre hlec meleca, me waina, me wakaco, me bolok, me je mamoe ae ti se hia: anyin ae hu senyin hnyi Isaraela.

### HNYIMAKAN 13.

**K**E haba Davita ame ûhnenamö me je taben thauzan me je taben haded, a je homakan hia. 2 Ke haingö Davita

I. MAN ÛLABAINY JE THAN 14.

ka ùkhacaköu hia anyin at Isaraela, ka habe, Ame ne so köbun, ke ame ne ùnyi ga Iehova Khongutin, me ötin e he ka ùkhünöng ka ta je liamekeiny mötin ehele, a je kolon hnyi hnyei hia iny at Isaraela, wale a tha e mödrin je at bihut me at Levi hnyi anyidrin je taun ae hu je hnyaba igigilö, m' ödrin e he ka ùkhacaköu kötin: 3 me ötin e he ka hom hmetu tang tangen Khongutin kötin bi: anyin a ötin e ca hnei hnyin hnyi je bong bongu Saulo. 4 Me haingen ùkhacaköu hia, ka habe, andre me he ka ânyâ helâe; anyin a hofuc ae so e hnyi hnyimakan tavat hia thithö. 5 Me haba Davita ame ùkhacaköuâ Isaraela hia, hwân hnyi Sihora (wageweiny) Aigupito, ke ne o but ka hnyi hna didrö ka hnyi Hamath, he ka hom tang tangen Khong, ûheny Kiriatha-jarim. 6 Haba Davita me at Isaraela hia ödrin e tha he Baala ai, wale, Kiriatha-jarim, hanen Juda, he ka hom ûheny e tang tangen Khong a Iehova at ame laba hon li kerubi, wale andre hwenyi ien e me Ien. 7 Ke ödrin e hauden tang tangen Khong hon kat ae teb ùnyi ûheny hnyi hnyin uma umö Abinadab: ke haba Uza me Ahio ödrü me alen kat. 8 Ke haba Davita me at Isaraela hia ödrin e khumöng hnyi hnyimakan Khong me tang hwegiödrin hia: ge je khumöng, me je kitara, me nabeli, me bwinybet, me simebalo, me trutru. 9 Ke ödrin e o but ka hnyi hna huje hwit hnyi Kidon, haba Uza ame inâ benyin he ka kât tang; anyin a haû li bolok. 10 Me ame ubâhlâ hmönyin anyi Iehova kö Uza, me e ame kot e, can e ame hinöbeny ka hnyi tang: me e ame mokcu eling hnyi hnyimakan Khong. 11 Haba Davita ame vec can anyin a Iehova ame gâ kö Uza: me e ame hwenyi ien hnyei eling Farez-uza, ke ne o but hnyi bong ang. 12 Ke haba Davita ame outen Khong hnyi bong eling me ha, ka habe, Oge me he ka kâmâu ka hom könya tang tangen Khong? 13 Me Davita ame ca hom kâu tang ka hnyi taun anyi Davita, ke e ame saûâ ka hnyi uma umö Obed-edoma at Gatha. 14 Ke ame hnen tang tangen Khong unyin lap anyi Obed-edoma eiö hnyi uma hnyi kun ta tehi: ke haba Iehova ame ohnahicâ lap anyi Obed-edoma, me anyin ta je ùnyi hia.

HNYIMAKAN 14.

**K**E haba Hirma than Turo ame kunâ je ùthumetu kö Davita, me je üö arasi, me tavat huliwan veto, me tavat tretrau ütö, m' andre me op umen uma. 2 Ke Davita ame wâhmakhmeto a Iehova ame ohmâ e hnân than Isaraela, anyin a andre ogöranyâ dokhon dökhu ùnyi ge lakeiny a at Isaraela. 3 Haba Davita ame hok hanen laâiân hnyi Jerusalema: ke haba Davita ame hnokoâ ke je da me in. 4 Ke walang ien je lakon a o hnyi Jerusalema; jia Samua, me Sobab, me Nathana, me Solomona; 5 me Ibara, me Elisua me Elipelet; 6 me Noga, me Nefega, me Jafia; 7 me Elisama, me Beeliada, me Elifelet. 8 Ke a löng ut at Filisiti a g' andre hia but hú Davita me me tuhan at Isaraela hia, me ame he but at Filisiti hia he ka elöm Davita; k' ame löng ut Davita me e ame he but ködra. 9 Ke a o at Filisiti me sö hnyigöulen bucen e Refai. 10 Me Davita ame hnö unyin Khong, ka habe, Hawa, oge me he ka he ka vat me at Filisiti? ke hawa, u me he ka hn' ödrin ka hnyi hnyamök? Me haingö Iehova kâu, ka habe, He thö; anyin a oge me he ka hn' ödrin ka hnyi hnyâmâm. 11 Ke ödrin e o but hnyi Baala-farez, me Davita ame kuc ödrin eling; me haingö Davita, ka habe, A hia but Khong okhuto je iwahnaihmiöny mönya ge hnyamök helâ me ùkhutuiny köiö. Anyin a wale andre me hwenyi ien dok eling, me, Baala-farez. 12 Ke ödrin e ip biju eling je khongudrin; ke haba Davita ame hûna he ka thong degeci ödrin ge meic. 13 Ke haba at Filisiti ödrin e sö hmetu hnyigöulen bucen. 14 Ke haba Davita hmetu ame hnei unyin Khong, me haba Khong ame ha kâu, ka habe, U ma ca he bi ka ölö ködrin: ke u me saû but gadrin, me u me he ka o ködrin cicö je sa baka. 15 Ke walang bongon bi, haba u ka löng do hwa he hwan tavat ethö hon sa baka, awe u me he ka didrut he ka vat: anyin a hia but he bân Khong hnyi hnyimakâm he ka kot je utbavat anyin at Filisiti. 16 Me haba Davita ame ânyâ helâ me Khong ame hûna kâu: me ödrin e kot je utbavat anyin tavat Filisiti, hwân hnyi Gibeona ke ne o but ka hnyi Gezera. 17 Me ame he but ehele ùlungi Davita ka hnyi ta je hnyei hia; ke Iehova ame

I. MAN ÛLABAINY JE THAN 15, 16.

ányâ me me he ka outen e ge ta je hnyei hia.

HNYIMAKAN 15.

**K**E haba Davita ame ânyâ umen je uma hnyi taun anyi Davita: ke e ame penapena hnen tang tangen Khong, me otilâ uma manoiny. 2 Ke haingö Davita, ka habe, Cu hamen ke at he ka vâdren tang tangen Khong, ke so thibi at Levi: anyin a Iehova ame hia but uc' ödrin he ka vâdren tang tangen Khong, me huliwa kâu nyiele balua. 3 Ke haba Davita ame ûkhacaköuâ Isaraela hia hnyi Jerusalema, he ka hom tang tangö Iehova, ka hnyi hnen, waleji e ame penapena hobi kâu. 4 Ke Davita ame ûkhacaköuâ laku Arona, me at Levi: 5 laku Kohatha; wale Uriela at ae beönua, me je liamekeiny mē a wan haded ke twente: 6 laku Merari; wale Asaia at ae beönua, me je liamekeiny mē a tu haded ke twente: 7 laku Geresoma; wale Joela at ae beönua, me je liamekeiny mē a wan haded ke thöte: 8 laku Elizafana; wale Semaia at ae beönua, me je liamekeiny mē a tu haded: 9 laku Heberona; wale Eliela at ae beönua, me je liamekeiny mē a eite: 10 laku Uziela; wale Aminadaba at ae beönua, me je liamekeiny mē, a wan haded ke twelv. 11 Ke haba Davita ame hawö Zadoka me Abiathara li at bihut, me at Levi, wale Uriela, me Asaia, me Joela, me Semaia, me Eliela, me Aminadaba, 12 me ha ködrin, ka habe, Öbun je kamen ae beönua ge at Levi: okabi öbun ju me je liamekeiny möbun, m' öbun e hom tang tangö Iehova Khongon at Isaraela ka hnyi dok oge penapena hobi kâu. 13 Anyin a öbun e ca hom e hnyi hwân, haba Iehova Khongutin ame gâ but kötin, anyin a ötin e ca hnö e hoton hnanyibu. 14 Haba tavat bihut me at Levi ödrin e ka okabi ödrin bi he ka hom tang tangö Iehova Khongon Isaraela. 15 Ke haba lakon at Levi ödrin e vâdren tang tangen Khong hon je bajebenyidrin ge li venyâiny, helâ me hna hûna hnö Mose hoton hofuc ho Iehova. 16 Haba Davita ame ha ka je tuhan at Levi he ka otilâ je liamekeiny mödrin, je aten khumöng, me je únyi khumöng, je nabeli, me kitara, me simebalo, ödrin e khumöng hwege göranyai me senyin. 17 Ke haba at Levi ödrin e otilö Heman baga nöku Joela; me ke je liamekeiny mē, wale Asafa baga nöku Berekia; me ke baga nöku Merari liame-

keiny mödrin, Ethana baga nöku Kusaa; 18 Ke tha e mödrin je liamekeiny mödrin tavat a loiny, wale Zakaria, me Ben, me Jaziela, me Semiramothe, me Jehiela, me Uni, me Eliaba, me Benaia, me Maseia, me Matathia, me Elifelu, me Mikeneia, me Obed-edoma me Jeila, hnyat tuö hwanuma. 19 Haba tavat khumöng, wale Heman, me Asafa, me Ethana, me, hamödrin he ka ofuco je simebalo bras; 20 ke haba Zakaria, me Aziela, me Semiramothe, me Jehiela, me Uni, me Eliaba, me Maseia, me Benaia me, hanymödrin je nabeli hnyi Alamothe; 21 ke haba Matathia, me Elifelu, me Mikeneia, me Obed-edoma, me Jeila, me Azazia me, hanymödrin je kitara hnyi Seminithe, he ka vhihik. 22 Ke haba Kenania tuhan at Levi, ame musö khumöng: e ame nâ khumöng, anyin a e metâ. 23 Ke haba Berekia me Elekana li at tuö hwanuma me hobi kâu tang. 24 Ke haba Sebania, me Jehosafata, me Nathaniela, me Amasai, me Zakaria, me Benaia, me Elieзера, a tavat bihut, me, hamödrin he ka tûö trutru tot hnyi hnyimakan tang tangen Khong: ke Obed-edoma, me Jeila, li at tuö hwanuma hobi kâu tang. 25 Me Davita me wahingatiny Isaraela, me je taben thauzan, ödrin e he me hom senyinâ tangen úhihinyköu anyi Iehova únyi hnyi hnyin uma umö Obed-edoma: 26 ke ame hadruâ at Levi hnen Khong hnyat vâdren tangen úhihinyköu anyi Iehova, me ödrin e hudo je bolok a seven, me je mamoe baga a seven. 27 Ke haba Davita me at Levi hnyat vâdren tang, me hnyat khumöng, me Kenania at vhihik khumöng ka tavat khumöng me, ödrin e khavâ úkhaú a mano lino: ke Davita ame khavâ iefoda lino. 28 Ke haba at Isaraela hia ödrin e hom tangen úhihinyköu anyi Iehova, me kuku tot, me tûö sofara, me je trutru, me simebalo, ödrin e ofucâ ta je nabeli me kitara. 29 Ke adre me odilâ thö tangen úhihinyköu anyi Iehova hnyi taun anyi Davita, me haba Mikala momo nöku Saulo ame selat hnyi mamalama me ö Davita than ame biâ me khumöng; me e ame húkotiâ e eú hnyi hnyekon.

HNYIMAKAN 16.

**K**E ödrin e odilâ thö tang tangen Khong, me ip hnyi wanben uma mano a otilâ Davita: ke ödrin e hudo je hudiny leú, me ole hnyi hnyimakan Khong.

I. MAN ÛLABAINY JE THAN 16.

- 2 Ke a hia but Davita hudo je hudiny leú me ole, me e ame hahnahicâ tavat hnyi iö Iehova. 3 Ke e ame khenâ oúco ka tavat hia hnyi Isaraela, obaga me omomo, a úsa khaca areto, me khaca uthmeno, me khaca ù wan vine.
- 4 Ke e ame otilâ keihen at Levi he ka huliwa hnyi hnyimakan tang tangö Iehova, me he ka oúnykúmeá, me ole, me oganö Iehova Khongu Isaraela: 5 haba Asafa at ae beónua, me Zakaria tang hoton, me Jeiela, me Semiramoth, me Jehiela, me Matathia, me Eliaba, me Benaia, me Obededoma, me Jiela, a tha ödrin me je nabeli, me kitara; ke Asafa me je simebalo ame ofucâ göranyai; 6 me Benaia me Jaziela a li at bihut ödru me tot me li trutru bala hnyi hnyimakan tangen úhinhnykôu anyin Khong.
- 7 Ke haba hnyi bong eling Davita ame ibi otilö Asafa me je liamekeiny më he ka ole kö Iehova.
- 8 E na ole thö kö Iehova, hawâ thö ien; Haimemenâ anyin ta je huliwa hnyi wanben ta je hnyei.
- 9 Khumöng dö kâu, hai thö je khumöng kâu; Ûhnenamö thö anyin ta je huliwa hia hnân láia.
- 10 Ohobeluâ ju öbun hnyi ien ae kap: Ame he ka hobâ hnyekon tavat adre me elöm Iehova.
- 11 Elöm Iehova ju öbun me tang hwegien; Elâm dö hnyimakan nyiele balua.
- 12 Ûnykúme thö je únyi hnân láia e ame ányâ; Wale je úöman, me je hna owisa únyi hnyi hnyimen;
- 13 Öbun je mâtrâni Isaraela a lathnyabainy, Öbun laku Jakob tavat adre úca.
- 14 E thibi Iehova Khonguta: Ke e thibut hnyi hmeledrany hia thithö hnen je hna owisa.
- 15 Ûnykúme bala ju öbun anyin úhinhnykôu, Waleji hofuc e ame húna ke ne o but hnyi je dö a thauzan;
- 16 Waleji e ame ányâ me Aberahama, Me hnen hna khemanyin kö Isaaka;
- 17 Me otethmâ e kö Jakob me hnân hnan-yibu, Me úhinhnykôu me Isaraela nyiele balua:
- 18 Ka habe, Oge me he ka ham köu hnyei Kanana,
- A hwajeköú me hnân ibun:
- 19 Waleji e tiga wakhalet úseibun, Eke, e ti wakhalet, k' öbun je atkanyua hnyin;
- 20 K' ödrin e he baú hnyi ke hnyei me ke hnyei Ûheny hnyi ke dokhu ka hnyi ke hnyei.
- 21 E ame ca hna ke at he ka okongu ödrin; Eke, e ame oú je than cadrin;
- 22 Ke haingen, ka habe, Ca kâlâ bi hnök je hna hú, Ke ca okongo anyik je perofeta.
- 23 Hmeledrany hia thithö lö, khumöng dö kö Iehova; Omanenâ thö hnyi ke bong me ke bong anyin úhömeli.
- 24 Ha gaga thö anyin hmanenang hnyi wanben ta je hnyei, Me anyin je huliwa hnân láia, hnyi wanben je hnyei hia.
- 25 Anyin ae gan hmâ Iehova, me hnân he ka ti ogânâ: Ke hnân minya outen hon ta je khong hia.
- 26 Anyin a je idola thibi je khongon ta je hnyei: Anyin a Iehova ame op je drany
- 27 E bi hnyi hnyimakan hna ogânâ me hmanenang: Tang hwege me senyin hnyi hnyaban.
- 28 Öbun je lap anyin je hnyei lö, ham dö kö Iehova, Ham kö Iehova hmanenang me tang hwege.
- 29 Ham dö kö Iehova hmanenang ae úcú ka hnyi ien: Hom dö ke hut, me o ka hnyi hnyimakan: Khudrung kö Iehova hnyi mec ae kap.
- 30 Hmeledrany hia thithö lö, öbubuny ju hnyi hnyimakan: K' adre ohmâ hmeledrany, me me ca khana he ka bwebwet.
- 31 Senyin dö je drany, ke hobâ thö hmeledrany; Me ha hnyi wanben je hnyei, ka habe, Iehova at ame musi.
- 32 Ú thö köiö ae gan, me unöngötiny; E so e hobâ ta hnyei, me ta je únyi hia hnyin e;
- 33 Ke ame he ka khumöng senyin dö je úöiny hnyot hnyi hnyimakö Iehova. Anyin a e ame he jem he ka owisa hmeledrany.

I. MAN ULABAINY JE THAN 17.

34 Ö e ole thö kö Iehova ; anyin ae so :  
 Anyin a nyiele balua anyin ibetengiö.  
 35 Ke ha thö, ka habe, Khongon hna omeli  
 öhmun lö, omeli öhmun ju,  
 Me ükhacaköu öhmun, me hn' öhmun  
 únyi hnyi je hnyei.  
 He ka oleá iám ae kap,  
 Me hobâ ge hna oganö u.  
 36 E so he ka haisoi Iehova, Khongu  
 Isaraela.

Hwan ehac balu ke ne o but nyiele  
 balua.  
 Ke haba tavat hia ödrin e ha, ka habe,  
 Amen, me ogânâ Iehova.

37 'Ke e ame ip Asafa eling me je liame-  
 keiny mē, hnyi hnyimakan tangen úhihi-  
 nykōu anyi Iehova, hoton huliwa hnyi ke  
 bong me ke bong : 38 me Obed-edoma me  
 je liamekeiny mödrin, a ödrin sikste eit :  
 me Obed-edoma nöku Jeduthun, me Hosea,  
 he ka tuö hwanuma : 39 me Zadoka at  
 bihut, me je liamekeiny mē a je at bihut,  
 hnyi hnyimakan uma mano umö Iehova,  
 hnyi dok ae görany hnyi Gibeona, 40 he  
 ka hudo je hudiny leü bala kö Iehova hon  
 taben hut hnyi hnyomakatu me sahad,  
 hoton hna sihnalimen hia hnyi hnanyibu  
 anyi Iehova, waleji e ame hūna ka Isarae-  
 la ; 41 ke tha ödrin me Heman me Jedu-  
 thun, me je kolon adre úca, wale adre ha  
 ödrin, he ka ole kö Iehova, anyin a nyiele  
 balua anyin ibetengiö ; 42 ke tha ödrin me  
 Heman me Jeduthun me je trutru me  
 simebalo hobi kâu tavat adre me he ka  
 ofucá e, me je únyi khumöng hnân je khu-  
 möng anyin Khong : me laku Jeduthun he  
 ka tot hnyi homagöule. 43 Ke ame vese  
 out tavat hia ka hnyi je hnyabadrin : ke  
 Davita ame hmetu he ka hahnahicá umen  
 bi uma.

HNYIMAKAN 17.

**K**E ame laba Davita hnyi umen uma,  
 me Davita ame ha kö Nathana, a  
 perofeta, ka habe, Wá bi inya but ang oge  
 me laba hnyi uma arasi, ke e hmelen je  
 mano tangen úhibinykōu anyi Iehova.  
 2 Me haingö Nathana perofeta kö Davita,  
 ka habe, Anyâ thö ta je únyi ae eü hnyi  
 hnyekom ; anyin a tha e möu Khong. 3 Ke  
 haba hnyi hnyinghet eling, ame o but  
 hofuc hwan Khong kö Nathana, ame ha, ka  
 habe, 4 He thö ka ha kö Davita athnya-  
 baik, ka habe, Walang hofuc ho Iehova,  
 ka habe, U ma ca he ka otilâ uma me

hnyabak : 5 anyin a oge me ca laba hnyin  
 uma hwân hnyi bong waleji oge me hom jem  
 hnyin at Isaraela ke ne o but hnyi bong  
 ang ; ke oge mé ngenü úhek hnyi ke uma  
 mano ka hnyi ke uma mano, me úhek ke  
 uma menâ ka hnyi ke uma menâ. 6 Ke  
 haba hnyi ta je dok hia waleji oge me tha  
 he hnyin me at Isaraela hia, hawa, e hu  
 hofuc oge me ha ka hnyat owisa Isaraela, a  
 hnyat oge me kunâ he ka han lakeik, ka  
 habe, Ieü gabun öbun e ca up umök uma  
 arasi? 7 Anyin a wale, u me he ka ha  
 walang ang kö Davita athnyabaik, ka  
 habe, Walang hofuc ho Iehova tuhan sa-  
 baoth, ka habe, Oge me hum u hnyi hagingy  
 mamoe, úhem hnyi hna hnu hoton je ma-  
 moe, m'u me taben lakeik a at Isaraela :  
 8 ke oge me laba unyâm hnyi je dok hia u  
 je he ka hnyin, me subâ degecá je iwahnai-  
 hmiöny möu hnyi hnyimákâm ; ke oge me  
 he ka ogânâ iám helâ me ien tavat ae gan  
 eang hmeledrany. 9 Ke oge me he ka úca  
 ke dok hobi kâu lakeik a Isaraela, me t'  
 ödrin eling, m' ödrin e he ka laba hnyi idrin  
 bi, me ca bwebwelâ hmetu bala bi ; k' ame ca  
 he hmetu bi tavat a lakon hulö ka öba wan  
 gadrin helâ me ehac, 10 ke helâ me hnyi  
 hnök hna hwân he ka otilâ tavat owisa ka  
 lakeik a Isaraela ; ke oge me he ka hom  
 úhnyúkongo ta je iwahnaihmiöny möu hia.  
 Ke haba khaca, oge me thumetu u a g' ame  
 he Iehova ka otilâ ke lap a ânnyâm bi.  
 11 Ke e ka bekhöt ut bongom ta je bong  
 me u me he ka he but ka tha e me lakâmâm,  
 me oge me he bi nya ka otilâ mâtânâm  
 hwabâm únyi hnyi lakom ; ke oge me he  
 ka otethmâ dokhon dökhu. 12 E ame he  
 ka op uma hobi könya, ke oge me he ka  
 otethmâ anyin theron nyiele balua. 13 Oge  
 me he ka kamen, k'ame he ka nökkuk : ke  
 oge me ca he ka hom hmetu anyik ibeten-  
 giö gan helâji me hnök hna hom hmetu ge  
 at a bân : 14 ke oge me he ka ohmâ e hnyi  
 umök uma me dökkuk dökhu nyiele balua :  
 ke adre me he ka otethmâ anyin theron  
 nyiele balua. 15 Helâ me je hofuc hia  
 eling, me hna omanená hia eling a ha  
 Nathana kö Davita.

16 Haba Davita than ame didrö, me  
 laba ju hnyi hnyimakö Iehova me ha, ka  
 habe, Iny ia, Iehova Khong, ke ieü ge  
 anyik lap wale u je hum nya ke ne o but  
 hnyi bong ang? 17 Ke únyi e ae úhnyü-  
 kong hnyi hnyimákâm Khong lö ; ke so bi  
 u je hia but ha minya ge lap anyin athnya-  
 baem hobi kâu nyiele, ke u je hia but ö nya,

## I. MAN ÛLABAINY JE THAN 18, 19.

Iehova Khong, helâ me at ae ûnyi hnathu. 18 Ke ieû hmetu bi ae khanö Davita he ka ha kôu ge hnâm hna ogânâ athnyabaem? anyin a u je wâhmakhmetoâ athnyabaem. 19 Iehova lö, ûnyi ge athnyabaem, me hoton weny hnyekom, u je hia but ânyâ ta je ûnyi hia eling ae gan, he ka omanenâ ta je ûnyi hia eling ae gan. 20 Iehova lö, e ba ke at ae ûcû möu, ke ba ju ke Khong ke hake u thibi, helâ me hnöhmun hna löng hia ge je hnyikönyöhmun. 21 Ke ewa ke hnyei eang hmeledrany ae ûcû me em hnyei wale a Isaraela, waleji a he but Khong he ka omelö kâu bi me hnân lakeiny, me he ka hu iâm, ge je ûnyi ae gan, me hnân outen, ge hna obâ je hnyei hnyi hnyimakan lakem, waleji u je omelö ûheny Aigupito? 22 Anyin a u je wia lakem a Isaraela me me em hnyei nyiele balua; ke u thibi, Iehova, u je bi Khong ködrin. 23 Ke walang ang, Iehova lö, e so adre ohmâ hofuc waleji u je ha ge athnyabaem, me anyin lap, nyele balua, me ânyâ thö helâ me hnâm hna ha. 24 Ke so ama tethmâ iâm me hnân ogânâ nyiele balua, madre me ha, ka habe, Haba Iehova tuhan sabath, e bi Khongon Isaraela, wale Khong ka at Isaraela: ke haba lap anyi Davita a athnyabaem adre hia but otethmâ hnyi hnyimâkâm. 25 Anyin a u Khonguk lö, u je hia but thumeto athnyabaem a u me he ka ôtilâ anyin lap: anyin a wale haba athnyabaem ame wâ he ka hic hnyi hnyimâkâm. 26 Ke walang ang, Iehova, u thibi Khong, ke u je hia but ha bânâ ûnyi eang ae so ka athnyabaem: 27 ke walang ang ame o ûnyi hnyi hnyekom he ka ohnahicâ lap anyin athnyabaem, me me e bala bi hnyi hnyimâkâm: anyin a u Iehova, u je hia but hahnahicâ, k' ame he ka hnahic bi nyiele balua.

### HNYIMAKAN 18.

**K**E hwaban dö e Davita ame kot at Filisiti, me hom ûhnyûkongu ödrin, me hûgûnâ Gatha me je tauniny ûnyi ge at Filisiti. 2 Ke e ame kot Moaba; me lakei Davita but at Moaba, m' ödrin e fat. 3 Ke haba Davita ame kot tilö Hadadeza than Zoba ke ne o but Hamath, k' ame tiga he ka ohmâ anyin musi hnyi wagewe Euferate. 4 Ke Davita ame hûgûnâ gan wan thauzan je kariota, ke seven thauzan tavat tabö hors, ke twente thauzan tavat he hon kânâ: ke Davita ame subâ can je

hors anyin je kariota, ke e ame ip biju keihen hobi kâu je kariota a wan haded. 5 Ke ame o but at Suria ûheny Damaseko he ka hadruö Hadadeza than Zoba, me Davita ame kot twente tu thauzan at Suria. 6 Ke haba Davita ame ip je lap tue hnyi Suria hanen Damaseko: ke lakei Davita but at Suria, me ödrin e fat. Ke haba Iehova ame ham dökhu kö Davita hnyi je dok hia e ame he ka hnyin. 7 Ke haba Davita ame hûgûnâ je bec gol ûnyi ge lakei Hadadeza, me hom Jerusalema ai. 8 Ke Davita ame hûgûnâ bras ae ti gan ûnyi hnyi Tibath me Kuni a li taun anyi Hadadeza, wale hnö Solomona hna ânyâ kâu taben köiö bras, me li hmolom, me je kaia bras ûnyi hnyin. 9 Ke a löng ut Toi thaniny Hamath a Davita ame kot hia je utbavat anyi Hadadeza than Zoba, 10 me e ame kunö Hadorama a nokon kö Davita than he ka talofa mē, me hahnahicâ, anyin a e ame vat me Hadadeza me kot e; anyin a iwahnaihmiöny Hadadeza me Toi, ke e unyin je kaia gol me sileva me bras ae ve bongon. 11 Ke haba Davita than ame okabâ je ûnyi e kö Iehova, a tha e me je sileva me gol, waleji e ame hûgûnâ ûnyi hnyi ta je hnyei; ûnyi hnyi Edoma, me Moaba, me lakon Amona, me at Filisiti, me at Amaleka. 12 Ke haba Abisai nöku Zeruia ame kot at Edoma hnyi Hnyigöulen bucen Sâlt ödrin eitin thauzan. 13 Ke e ame ip je lap tue hnyi Edoma; ke haba at Edoma hia ödrin e athnyabai Davita. Ke haba Iehova ame ham dökhu kö Davita hnyi je dok hia e ame he ka hnyin.

14 Ke haba Davita ame musö at Isaraela hia; ke e ame ûhnei me ânyâ wisa ka lakeiny hia. 15 Ke haba Joab nöku Zeruia, me taben je utbavat; ke Jehosafata nöku Ahiluda at ame oûnykûmeâ. 16 Ke Zadoka nöku Ahituba me Abimeleke nöku Abiathara li at bihut; ke Savesa at sihnalimen; 17 ke Benaia nöku Jehoiada ban ka at Kerethi me Pelethi; ke je laku Davita ödrin e musi unyin than.

### HNYIMAKAN 19.

**K**E hwaban mok a Nahasa thaniny lakon Amona, me haba nokon ame musi biju hwaban. 2 Haba Davita ame ha, ka habe, Oge me he ka betenge ga Hanuna nöku Nahasa, anyin ame betenge k nya kamen. Me Davita ame kunâ je ûthumetu he ka otubwelâ e ge kamen. Ke

## I. MAN ÛLABAINY JE THAN 20.

ame e but je athnyabai Davita hnyi hnyei iny lakon Amona unyi Hanuna he ka otubwelâ e. 3 Ke haba je tuban lakon Amona ödrin e ha kö Hanuna, ka habe, Hawa, u me ûnyküme a Davita ame ogânâ kâmâm, me me ûkhûnõng kôu he ka otubwelâ? hawa, a ca o je athnyabainy he ka elâm, me hagutâ, me ecmâkâ hnyei? 4 Haba Hanuna ame hom lathnyabai Davita, me gi' ödrin, me subâ but je khaüdrin hnyi wanben ke ne o but hnyi hon je hujïödrin me kun' ödrin dut. 5 Me ame he keihen me thumetu Davita ge hna anyâ ka tavat. Me e ame ûkhûnõng he ka ûkhanö mödrin; anyin ae hmehma gan hmâ tavat. Ke haingen than, ka habe, Laba ju öbun hnyi Jeriko ke ne o but ame kü thö je waibun, me he but jem hnyi tien e. 6 K' a wâ but lakon Amona, a adre ka oboni ödrin bi kö Davita, me haba Hanuna me lakon Amona ödrin e kunâ wan thauzan je talan sileva he ka më üco je kariota me tavat tabö hors anyi hnyi Mesopotamia, me Arama-maka, me Zoba. 7 Ke ödrin e bi hwabañ je kariota a thöte tu thauzan, me than Maaka me lakeiny: me ödrin e o but me laba cicö Medeba. Ke ame ûkhacaköu lakon Amona unyi hnyi anyidrin je taun me he ka hnyi vat. 8 Ke a löng ut e ga Davita, me eame kunö Joab me je utbavat hia tavat ae hwege. 9 Ke ame o but lakon Amona me tot metâ he ka vat hnyi homagöuleny taun: ke haba je than hnyat ödrin e o me ödrin e hake laba hnyi ke keihen utkânâ. 10 Ke a wâ Joab a g' adre tot metâ ka vat më hnyi hnyimakan me hoton, me e ame üca tavat adre me üca ge at Isaraela hia, me otil' ödrin metâ cicö at Suria. 11 Ke e ame hna kolon tavat kö Abisai liamekeiny më, ke ödrin e otil' ödrin metâ bi cicö lakon Amona. 12 Ke e ame ha, ka habe, A ne hwege huk at Suria, me u me he ka hadruö nya: ke ame ne hwege hom lakon Amona, me oge me he bi nya ka hadruö u. 13 Hwege ju, ke hnyok бага but hobi kâu itin hnyei, me hobi kâu je taun anyin Khongutin: ke hamö Iehova bi he ka anyâ unyi ae so hnyi hnyimakan. 14 Ke haba Joab me tavat unyin ödrin e hakekenyâ at Suria me vat; ke adre me kec hnyi hnyimaködrin. 15 Ke a wâ but lakon Amona a ga kec dö at Suria, me adre me kec minya hnyi hnyimakö Abisai liamekeiny më, me dit ka hnyi taun. Ke haba Joab ame hmetu Jeru-

salema ai. 16 Ke a wâ but at Suria a ga kuc ödrin dut hnen at Isaraela, me adre me kunâ je uthumetu, me hawâ at Suria unyi hnyi ke keihen Wagewe, tha ödrin me Sobaka taben je utbavat anyi Hada-deza. 17 Ke adre me thumetu Davita; me e ame ûkhacaköuâ Isaraela hia, me he hanyâüâ Joridano, me o ködrin me otilâ metâ vat cici ödrin. Ke a um dö Davita otilâ metâ vat cicö at Suria, me adre me vat më. 18 Ke ame kec ut at Suria hnyi hnyimakan at Isaraela; ke Davita ame hlingâ at Suria, a seven thauzan je aten kariota, ke fâte thauzan tavat adre me he hon kânâ, k' ame hlingö Sobaka taben vat. 19 Ke a wâ but lakei Hada-deza a ga kuc ödrin hnen at Isaraela, me ödrin e úsoköu me Davita, me bi lathnyabainy: me ame höcö bala but at Suria he ka hadruâ hmetu lakon Amona nyiele.

### HNYIMAKAN 20.

**K**E ame o hmetu but huna, üen he ka he but je than ka vat, me haba Joab ame lelö maniny utbavat, me oba wan hnyei iny lakon Amona, me o me igigilö Raba. Ke Davita ame laba biju hnyi Jerusalema. Ke haba Joab ame kot Roba me ohia e. 2 Ke Davita ame hom korona anyin tuhödrin unyi hnyi hon ban, ke adre wâ tuluto ihmakiny khaca talan gol, me je veto ae unyi hnathu hnyin; ke adre me ip hon bö Davita: ke e ame hom unyi hnyi taun je unyi adre sö ae se hia. 3 Ke e ame hom but tavat unyi hnyin, me ip ödrin hmelen je gili, me je fao ae údö, me je nganga. Ke Davita ame anyâ helâe ka je taun hia anyin lakon Amona. Ke haba Davita me tavat hia ödrin e hmetu Jerusalema ai.

4 Ke hwaban e, ame kü thö ke vat me at Filisiti hnyi Gezera: me Sibekai at Husa ame hlingö Saf, hanen lakon at ae beû: me ödrin e ngâ but. 5 Ke e hu hmetu vat me at Filisiti; me haba Eleana-nöku Jaira ame hlingö Lahmi liamekeiny me Goliatha at Gatha, ke haba taben dân ö helâ me utöiny unyi hnân hwâwâ mano. 6 Ke e hu hmetu vat hnyi Gatha ke eling at ae ti beû, ke üsa siks je banyen me je bacan, a twente foa hia; ke e nokon at ae beû. 7 Ke e ame humbasö at Isaraela, me haba Jonathana nöku Simea liamekeiny me Davita ame hlingâ e. 8 Wale je hnyat adre hnokoâ ka at ae beû hnyi

I. MAN ĆLABAINY JE THAN 21.

Gatha; ke ödrin e ta but ge hnyamö Davita, me hnyamen lakeiny.

HNYIMAKAN 21.

**H**ABA Satana ame todrö ka at Isara-  
ela, me cubic Davita he ka aú at  
Isaraela. 2 Ke haingö Davita kö Joab me  
je taben hneyi, ka habe, He thö ka aú at  
Isaraela hwân Bere-seba ke ne o but hnyi  
Dana; ke thumetu nya thö me me khanö  
nya úseidrin. 3 Ke haingö Joab, ka habe,  
E na he Iehova ka osehia lakem ge haded :  
ke so bi, than a tuhök, hawa, ca lakeiny  
tühök ödrin hia? anyin a ieú ame weny  
únyi e hnen tuhök? anyin a ieú u me he ka  
bi jöning at Isaraela? 4 Ke so bi e hwege  
ifucin than hu Joab. Me haba Joab ame  
he me vheno Isaraela hia, me o hnyi Jeru-  
salema. 5 Ke Joab ame ham kö Davita  
kahmen úseiny tavat. Ke haba at Isaraela  
hia, ödra eleven haded thauzan tavat hok  
hele vat: ke haba at Juda, me, foa haded  
ke sevente thauzan tavat hok hele vat.  
6 Ke e ame ca aú at Levi me Beniamina  
unydin: anyin ae ikiki kö Joab hofuc  
hwan than. 7 Ke monu ka Khong únyi  
eling; anyin a wale e ame kot at Isaraela.  
8 Me Davita ame ha ka Khong, ka habe,  
Oge me ányâ hulö ae ti gan, hnyi únyi e  
oge me ányâ: ke inya oge me khöú köu, ö  
u hua but hulö anyin athnyabaem, anyin a  
oge me hia but ányâ monu ae ti gan. 9 Me  
haingö Iehova kö Gada at wâ anyi Davita,  
ka habe, 10 He thö ka ha kö Davita, ka  
habe, Walang hofuc ho Iehova, ka habe,  
Oge me he ka omanená köu kun ta unyi :  
úca thö khaca me inye he ka ányâ köu.  
11 Me ame o Gada kö Davita me ha káu,  
ka habe, Walang han ha hnö Iehova, Ćca  
thö hobi köu bi; 12 ame ne kun ta huna-  
iny hmiâ; k' ame ne kun ta tehi kec a u ge  
iwahnaihmiöny möu, k' ame hom tilö u ge  
hele vat anyin je iwahnaihmiöny; k' ame ne  
kun bongon hele vat anyi Iehova, wale mok  
ae cap hnyi hneyi, k' ame he angela anyi  
Iehova ka hlingâ tavat hnyi Isaraela hia.  
Anyin a wale únykúme wia ju hofuc oge  
me he ka ha hmetu káu at a kunö nya.  
13 Me haingö Davita kö Gada, ka habe, E  
gan hmâ anyik hmak: ke walang oge me  
he bi nya ka ta ka hnyi hnyamö Iehova; an-  
yin ae ti gan hmâ anyin íbetengiö, me oge  
me ca he ka ta ka hnyi hnyamen at. 14 Me  
haba Iehova ame kunâ mok ae cap ka hnyi  
hon Isaraela: me ame mokcu at Isaraela a

sevente thauzan. 15 Ke Khong ame kunâ  
angela Jerusalema ai he ka ohia e: k' ame  
tiga he ka ohia, me haba Iehova ame wâ,  
me ietra únyi ae kong, me ha ka angela  
at ame ohia, ka habe, Soju, thu hmetu ju  
benyâm. Ke ame tot angela anyi Iehova  
hnyi hna huje hwit anyi Aruna at Jebusi.  
16 Ke Davita ame bwele göranyai me wâ  
angela anyi Iehova ame tot hnyi wanben  
hmeledrany me drany, ke e hnyi hnyamen  
hele vat adre oc me hai hon Jerusalem. Me  
ame ta hnyikânâi Davita me wahingat k'  
ödrin e khavâ mano ae gan nân. 17 Ke  
haba Davita ame ha ka Khong, ka habe,  
Hawa, ca únyi gak hnödra hna aú tavat?  
ke haba inya at ae monu ke at ányâ hulö ae  
gan hmâ; ke ieú a ányâ ta je mamoe ang?  
Iehova Khonguk lö, ö u ip hnyamâm huk me  
lap anyi cica, ke ca he ka ip hon lakem me  
hling' ödrin. 18 Haba angela anyi Iehova  
ame húna kö Gada he ka ha kö Davita, me  
me ölö he ka otilâ taben hut kö Iehova  
hnyi hna huje hwit anyi Aruna at Jebusi.  
19 Haba Davita ame ölö hoton hofuc ho  
Gada, wale e ame ha hnyi iö Iehova. 20 Ke  
haba Aruna ame hwiö me wâ angela; me  
ame lubaduöng lakon a vak unyin. Ke  
Aruna ame huje hwit. 21 K' ame tiga he  
Davita kö Aruna, me Aruna ame bwele me  
ö Davita; me e ame he úheny hnyi hna  
huje hwit, me iyâú hnyikânâi kö Davita.  
22 Haba Davita ame ha kö Aruna, ka  
habe, Ham dö könya hna huje hwit, me  
oge me he ka op eling taben hut hobi kö  
Iehova: u me he ka ham e könya hwaban  
mone ae úcú, me me hia but mok ae cap  
unyin tavat. 23 Ke haingö Aruna kö  
Davita, ka habe, Hom dö, ke hamen than  
a tuhök ka ányâ únyi ae so köu: wâ bi,  
inya oge me ham je bolok hnân bi hut, me  
je omjehen huje hwit hnân hlogon, me hwit  
hnân hudiny han; oge me ham hia. 24 Ke  
haingö Davita than kö Aruna, ka habe,  
Ohe; ke so bi oge me he ka úco e hw ban  
mone ae úcú: anyin a oge me ca he ka hom  
ányâm ta je únyi hobi kö Iehova, ke oge  
me ca he ka hudo hudiny leú ae ba hwaban.  
25 Ke haba Davita ame ham kö Aruna  
hwaban dok eling siks haded je sekel gol  
adre tuluto. 26 Haba Davita ame otilâ  
eling taben hut kö Iehova, me hudo je  
hudiny leú, me je hudiny ole, me hongot  
kö Iehova; ke e ame thu káu ge meic únyi  
hnyi drany hon taben hut. 27 Ke Iehova  
ame húna ka angela; me e ame inâ hmetu  
anyin hele vat ka hnyi tangen.



## I. MAN ULABAINY JE THAN 22, 23.

28 Haba hnyi ûen eling, a wâ but Davita a Iehova ame thu kâu hnyi hna hui hwit anyi Aruna at Jebusi, me e ame bi hut eling. 29 Anyin a haba uma mano umö Iehova, waleji a ânyâ Mose hnyi hnye-buba, me taben hudiny leû hobi kâu at Isaraela. 30 Ke ca khanö Davita bi he ka he ka hnyi hnyimakan e he ka ka elâm ûnyi ga Iehova: anyin a e ame ot ge hele vat anyin angela anyi Iehova.

### HNYIMAKAN 22.

**K**E haingö Davita, ka habe, Walang uma umö Iehova Khong, ke walang taben hudiny leû hobi kâu at Isaraela.

2 Ke Davita ame hûna he ka ûkhacaköüa je atkanyua hnyi hnyei Isaraela; me e ame otilâ tavat tretrau veto he ka tretrao me ânyâwia je veto hnân op uma umen Khong. 3 Ke Davita ame penapena gânâ tao hnân faoiny je hlinginy homagöule, me je hna hujö; ke gan hmâ minya bras andre me ca tuluto; 4 me je üö arasi andre me ca aû, anyin a at Sidona me Turo ödrin e hom kö Davita je üö arasi ae se hia. 5 Ke haingö Davita, ka habe, E tiga wanakat me but Solomona a nökek, ke haba uma andre me he ka op hobi kö Iehova me ame he ka ti beonua mecin, me lung, me hmanenang hnyi ta je hnyei: anyin a wale oge me he ka penapena hobi kâu. Ke Davita ame penapena gan hmâ e me tiga ca mok.

6 Ke e ame hawo Solomona a nokon, me hûna kâu he ka op uma hobi kö Iehova, Khongu Isaraela. 7 Ke haingö Davita kö Solomona a nokon, ka habe, Haba inya, me, waleü hnyi hnyekuk he ka op uma hobi kâu iö Iehova a Khonguk. 8 Ke so bi ame o kõnya hofuc ho Iehova, ka habe, E gan hmâ dra u je hingälâ, ke gan hmâ hnâm hna vat: ke u me ca he ka op uma hobi kâu iök, anyin ae gan hmâ dra u je hingälâ hon kânâ hnyi hnyimakök: 9 wâ bi, andre me he ka hnokoâ nokom, at ame laba úsoköu, anyin a oge me he ka óusököna e me je iwahnaihmiöny më igigilö: anyin a andre me he ka hwenyi ien Solomona, ke oge me ke ka ham úsoköu me me laba wia at Isaraela hnyi bongon je bong hia: 10 hamen bi he ka op uma hobi kâu iök, k'ame he ka nökek, ke oge me he bi nya ka kamen; ke oge me he ka otethmä the-roniny dokhon dökhuhon at Isaraela nyiele balua. 11 Ke walang ang nökek, e so

Iehova ame tha e möu; m' u me hnahic bi, ke op dö uma umö Iehova a Khongom, helâ me hnen hna ha gam. 12 E na he ju Iehova ka ham köu metâ me wâhmakhmeto, me hûna köu ge at Isaraela; me u me he ka tuö hnanyibu anyi Iehova Khongom. 13 Me u me he ka hnahic u je ne kong hnyekunâ he ka ânyâ je hna otilâ me je hna owisa waleji a hûna Iehova kö Mose ge at Isaraela: hwege thö, me hnyok бага but; ca ot bi me öbubuny. 14 Me wâ bi oge hia but penapena hnyi anyik vec wan hadel thauzan je talan gol, me wan thauzan thauzan je talan sileva; me bras me fao andre ca tuluto, anyin ae ti se hia; ke oge hia but penapena minya je utö me veto; ke e khatö u he ka bi hanen. 15 Ke haba khaca e unyâm tavat huliwa ae se hia, tavat tretrau me huliwan veto, me utö, me tavat ae metâ hobi kâu je huliwa hia; 16 wale ge gol, me sileva, me bras, me fao, ca hnân aû bi; todrö, ânyâ thö, ke ame he Iehova ka tha e möu. 17 Ke haba Davita ame hûna minya ka je than hia hnyi Isaraela he ka hadruö Solomona a nokon; 18 ka habe, Hawa, ca tha e Iehova a Khongubun möbun? ke a ca omen' öbun hnyi je ke keihen hia? anyin a hia but hna kõnya tavat a idrin hnyei; ke a hia but hom úhnyükongo hnyei hnyi hnyimakö Iehova, me hnyi hnyimakan lakeiny. 19 Walang ang ham but je hnyekubun he ka elöm Iehova Khongubun; anyin a wale todrö, me op dok ae kap anyi Iehova Khong, m' andre me hom tangen úhinhinköu anyi Iehova, me je kaia ae kap anyin Khong, ka hnyi uma andre me he ka otilâ hobi kâu iö Iehova.

### HNYIMAKAN 23.

**K**E hingat ut Davita me se hia je huanainy; me e ame otilö Solomona a nokon ka than hon at Isaraela. 2 Ke e ame úkhacaköüa je than Isaraela hia, me tavat bihut me at Levi. 3 Ke andre aû at Levi hwân ge tavat a thöte huna me gan hon e: ke haba úseidrin andre aû ke бага me ke бага, ödrin thöte eit thauzan. 4 Ke hanymen tavat a twente foa thauzan gadrin he ka tuö huliwa hnyi uma umö Iehova; ke haba siks thauzan wale je homakan me tavat owisa: 5 ke ödrin foa thauzan tavat tuö hwanuma; ke foa thauzan tavat oganö Iehova ge je ûnyi khumöng oge ânyâ hnân oganâ. 6 Ke haba Davita ame khene

## I. MAN ÛLABAINY JE THAN 24.

ödrin hnyi je dö hoton je laku Levi ; wale Geresoma, me Kohatha, me Merari. 7 Ûnyi ge at Geresoma ; Laadan, me Simeï. 8 Haba laku Laadan ; me Jehiela at ae beönua, me Zetham, me Joela, ödrin kun. 9 Haba laku Simeï ; me Selomith, me Haziela, me Harana, ödrin kun. Wale je at a ban ge lakamen je lap anyi Laadan. 10 Haba laku Simeï ; me, Jahath, me Ziza, me Jeuso, me Beraia. Wale ta laku Simeï a vak. 11 Ke Jahath at a ban, ke Ziza útangköu mē : ke ca se hia laku Jeuso me Beria ; anyin a wale adre öü ödru helâ me lap anyin lakamen a khaca. 12 Haba laku Kohatha ; me, Amerama, me Izara, me Heberona, me Uziela, ödrin vak. 13 Haba li laku Amerama ; me, Arona, me Mose ; ke adre me hake ip Arona me me he ka okabâ ta je ùnyi ae ti kap, a e me lakon nyiele balua, he ka leü ütö ae bo so hnyi hnyimakö Iehova, me huliwa kâu, me hahnahicâ tavat hnyi ien nyiele balua. 14 Ke haba Mose aten, Khong, me, adre me tha aü lakon unyin tribu Levi. 15 Ke lo li laku Mose ; wale Geresoma me Eliezera. 16 Haba nöku Geresoma ; me Sebuela at ae beönua. 17 Haba nöku Eliezera ; me, Rehabia at ae beönua. Ke ba hmetu bi бага nöku Eliezera ; ke se hia je laku Rehabia. 18 Haba nöku Izara ; me, Selomithat ae beönua. 19 Haba laku Heberona ; me Jeria at ae beönua, me Amaria a loiny, me Jaziela a kuniny, me Jekameama a vakiny. 20 Haba li laku Uziela ; me, Mika at ae beönua, me Iesia a loiny. 21 Haba li laku Merari ; me Maheli me Musi. Haba li laku Maheli ; me, Eleazara, me Kiso. 22 Ke ame moku Eliazara, ke ba nokon бага, ke lakon je hlu thibi : k'ame hum ödrin laku Kiso a je liamekeiny mödrin. 23 Haba laku Musi ; me, Maheli, me Edera, me Jeremoth, ödrin kun. 24 Wale laku Levi hoton je lap anyin lakamödrin, wale je ban je lap anyin je lakamen a tavat adre me aü me ha úseidrin ke at me ke at, tavat ödrin e ányâ huliwa me bi athnyaba hnyi uma umö Iehova, hwân ge hnyat a twente hunaidrin me gan hon e. 25 Anyin a haingö Davita, ka habe, Haba Iehova, Khongu Isaraela ame hia but omenâ lakeiny ; ke e ame laba hnyi Jerusalema nyiele balua : 26 me haba at Levi ödrin e ca he hmetu ka vadren uma mano me ta je omjeüiny hia hnân huliwan. 27 Ke adre me aü laku Levi hwân ge tavat a twente hunaidrin me

gan hon e, hoton hofuc a biliny ho Davita. 28 Ke hanymödrin he ka bi athnyabainy lakú Arona hobi kâu huliwa hnyi uma umö Iehova, hnyi je hnyeule, me eio hnyi uma, me obosoâ ta je ùnyi hia ae kap, wale je huliwa adre me ányâ hnyi uma umen Khong ; 29 me areto minya hnân omanená, me falawa ae so hobi kâu hudiny han, ame ne je ong areto ae halelöü adre ca levenâ bi, ame ne ùnyi adre ölä, me hna op, me je tulutiny ta je ùnyi, me kahmen je ùnyi wale ae ve bongon ; 30 me he ka tot hnyi ta je hnyomakatu he ka ole me olungi Iehova, helâe minya hnyi je sahac ; 31 me he ka hudo kö Iehova ta je hut hia, hnyi je sabath, me je tehi ae teb ùnyi, me hnyi je bijeü adre thu, hoton úseiny helâe thibut hna owisa gadrin hnyi hnyimakö Iehova bala : 32 ke ödrin e he ka tuö je hanymen hnyi uma hnân úkhacaköu, me je hanymen hnyi dok ae kap, me je hanymen laku Arona je liamekeiny mödrin, hobi kâu huliwainy uma umö Iehova.

### HNYIMAKAN 24.

**K**E adre khenâ laku Arona helâng. Je laku Arona ; wale Nadaba, me Abihu, me Eleazara, me Ithamara. 2 Ke a bö Nadaba me Abihu ka mokcu ke tiga möt bi kamödrü, ke ba nö kudru : anyin a wale Eleazara me Ithamara ödru me tuö hanymen at bihut. 3 Ke haba Davita tha e me Zadoka nöku Eleazara me Abimelek nöku Ithamara, ödrin e khene ödrin hoton hanymödrin hnyi anyidrin huliwa. 4 Ke se hia je at ae beönua adre wâ unyin laku Eleazara, ke e wakhalet bi unyin je laku Ithamara ; ke adre khene ödrin helâng : haba ge laku Eleazara ödrin sikstin, je ban je lap anyin je lakamen ; ke eit ge je laku Ithamara, hoton je lap anyin lakamödrin. 5 Helâe adre khene ödrin hoton ugleköp, hnyat ang me hnyat e ; anyin ae hu tavat musö dok ae kap, me tavat musö uma umen Khong, je laku Eleazara me je laku Ithamara minya. 6 Ke haba Semaia nöku Nathaniela at sihnalimen, hanen je at Levi, ame sihnalimidrin hnyi hnyimakan than, me ta je than, me Zadoka at bihut, me Ahimeleke nöku Abiathara, me je ban je lap anyin lakamen at bihut, me at Levi : khaca thibi lap anyin lakamen adre hom hobi kö Eleazara, me khaca adre hom hobi kö Ithamara. 7 Ke ame aat dö Jehoiarib ge leköp a bán, me

## I. MAN ÛLABAINY JE THAN 25.

Jedaia a loiny ; 8 ke Harim a kuniny, me Seorim a vakiny ; 9 me Malakia a thabûnginy, me Miamin a siksiny ; 10 me Koz a seveniny, me Abia a eitiny ; 11 me Jesua a naininy, me Sekania a teniny ; 12 me Elisiba a eleveniny, me Jakim a twelviny ; 13 me Hupa a thötininy, me Jesebeab a foatininy ; 14 me Bilega a fiftininy, me Imer a sikstininy ; 15 me Hezir a sevenininy, me Hafezez a eitiny ; 16 me Pethaia a naintininy, me Ezekiel a twenteiny ; 17 me Jakina a twente waniny, me Gamuel a twente tuiny ; 18 me Delaia a twente theriiny, me Maazia a twente foainy. 19 Wale je ûtangköu hnyi je hanymödrin, he ka o ka hnyi uma umö Iehova, hoton hna hûna gadrin a deny Arona a kibidrin, helâ me Iehova, Khongu Isaraela ame hûna kâu.

20 Ke haba ge kolon laku Levi : haba ge laku Amerama ; Sebuela ; ge laku Sebeula ; Jehedia. 21 Ke haba ga Rehabia : haba ge laku Rehabia ; me, Isia at ae beönua. 22 Ge at Izara ; me Selomith ; ge laku Selomith ; me, Jahath. 23 Ke haba laku Heberona ; me, Jeria, me Amaria a loiny, me Jaziela a kuniny, me Jekameama a vakiny. 24 Ke nöku Uziela ; me, Mika ; ge laku Mika ; me, Samira. 25 Ke liamekeiny me Mika ; me, Isia : ge laku Isia ; me, Zakaria. 26 Li laku Merari ; me Maheli me Musi ; ke nöku Jaazia ; me, Beno. 27 Haba je laku Merari ; ga Jaazia ; me, Beno, me Sohama, me Zakuri, me Iberi. 28 Ga Maheli ; me, Eleazara, ke ba nokon. 29 Ga Kiso ; haba nöku Kiso ; me, Jeramela. 30 Haba laku Musi ; me, Maheli, me Edera, me Jeremoth. Wale lakon at Levi hoton je lap anyin je lakamödrin. 31 Haba tavat eling ödrin e uglekôb minya helâ me je liamekeiny mödrin a laku Arona, hnyi hnyimakö Davita than, me Zadoka, me Ahimelek, me je ban je lap anyin lakamen tavat bihut me at Levi ; je lap anyin lakamen a je taben helâ me je liamekeiny mödrin ae ûhnyükong.

### HNYIMAKAN 25.

**K**E haba Davita me je taben vat ödrin e bake ip keihen ge laku Asafa, me Heman, me Jeduthun hobi kâu huliwa, he ka perofeta me je kitara, me nabeli, me simebalo : ke haba ûseidrin ödrin e ve ânyâ huliwa hoton je hanymödrin, 2 haba ge laku

Asafa, me, Zakuri, me Josefa, me Nethania, me Asarala ; wale laku Asafa ; k'ame musi ödrin Asafa, ödrin e perofeta hoton musi anyin than. 3 Ga Jeduthun : haba laku Jeduthun ; wale Gedalia, me Zeri, me Isaia, me Hasabia, me Matathia, ödrin siks ; ame musi ödrin Jeduthun a kamödrin, at perofeta me kitara, me ole me oganö Iehova. 4 Ga Heman : haba laku Heman ; wale Bukia, me Matania, me Uziela, me Sebuela, me Jeremoth, me Hanania, me Hanani, me Eliatha, me Gidaleti, me Romameti-ezerâ, me Josebekasa, me Malathi, me Hothir, me Mahazioth : 5 ödrin hia laku Heman at wâ anyin than, hnyi hofuc hwan Khong he ka ogörányâ faoiny meno. Ke haba Khong ame ham kö Heman lakon je бага a fotin ke kun lakon ta hlu. 6 Haba hnyat hia eling ame musi ödrin kamödrin hobi kâu khumöng hnyi uma umö Iehova, me je simebalo, me nabeli, me kitara, hobi kâu huliwa hnyi uma umen Khong ; ke haba Asafa, me Jeduthun, me Heman ame musi ödrin than. 7 Ke haba ûseidrin tha ödrin me je liamekeiny mödrin tavat adre nâ he ka khumöng kö Iehova, tavat hia ae metâ, ödrin tu haded ke eite eit. 8 Ke ödrin e uglekôb ge je hanymödrin, wale tavat ae gan me tavat ae ûhnyükong, at ûne me at adre nâ. 9 Ke ame aat dö kö Josefa hobi kö Asafa ge lekôb a bân : ke Gedalia a loiny ; e me je liamekeiny më me je lakon ödrin twelv : 10 Zakuri a kuniny, e me je lakon me je liamekeiny më a twelv : 11 Iezera a vakiny, e me je lakon me je liamekeiny më a twelv : 12 Nethania a thabûnginy e me je lakon me je liamekeiny më a twelv : 13 Bukia a siksiny, e me je lakon me je liamekeiny më a twelv : 14 Jesarela a seveniny, e me je lakon me je liamekeiny më a twelv : 15 Isaia a eitiny, e me je lakon me je liamekeiny më a twelv : 16 Matania a naininy, e me je lakon me je liamekeiny më a twelv : 17 Simei a teniny, e me je lakon me je liamekeiny më a twelv : 18 Azarela a eleveniny, e me je lakon me je liamekeiny më a twelv : 19 Hasabia a twelviny, e me je lakon me je liamekeiny më a twelv : 20 Sebuela a thötininy, e me je lakon me je liamekeiny më a twelv : 21 Matathia a foatininy, e me je lakon me je liamekeiny më a twelv : 22 Jeremoth a fiftininy, e me je lakon me je liamekeiny më a twelv : 23 Hanania a sikstininy, e me je lakon me

## I. MAN ÛLABAINY JE THAN 26.

je liamekeiny mē a twelv: 24 Josebekasa a seventininy, e me je lakon me je liamekeiny mē a twelv: 25 Hanani a eitiny, e me je lakon me je liamekeiny mē a twelv: 26 Malothi a naintininy, e me je lakon me je liamekeiny mē a twelv: 27 Eliatha a twenteiny, e me je lakon me je liamekeiny mē a twelv: 28 Hothir a twente waniny, e me je lakon me je liamekeiny mē a twelv: 29 Gedaleti a twente tuiny, e me je lakon me je liamekeiny mē a twelv: 30 Mahazioth a twente theriny, e me je lakon me je liamekeiny mē a twelv: 31 Romameti-ezera a twente foainy, e me je lakon me je liamekeiny mē a twelv.

### HNYIMAKAN 26.

**K**E haba je deö hnyat tuö hwanuma: ge at Kora; me, Meselemia nöku Kore hanen laku Asafa. 2 Ke e hu laku Meselemia; wale Zakaria a atö, me Jediaela a loiny, me Zebadia a kuniny, me Jatheniela a vakiny; 3 me Elama a thabúnginy, me Johanana a siksiny, me Elioenai a seveniny. 4 Ke e hu laku Obed-edomia, wale Semaia a atö, me Jehozabada a loiny, me Joa a kuniny, me Sakari a vakiny, me Nathaniela a thabúnginy; 5 me Amiela a siksiny, me Isakara a seveniny, me Peulethai a eitiny: anyin a Khong ame ohnahicá e. 6 K'adre hnokoá minya kö Semaia a nokon, lakon baga, ödrin e musö lap anyin kamödrin: anyin a ödrin tavat ae hwege hmönyin. 7 Haba laku Semaia; me, Otheni, me Refaela, me Obed, me Elezabad, ke hnyat ae hwege je liamekeiny mē, me Elihu, me Semakia. 8 Haba hnyat hia eling hanen laku Obed-edomia; a ödrin me lakudrin me je liamekeiny mödrin, hnyat ae hwege unyidrin hnân hobi kâu huliwa; ödrin sikste tu ûnyi ga Obed-edomia. 9 Ke e hu laku Meselemia me je liamekeiny mē, hnyat ae hwege, k'ödrin eitiny. 10 Ke Hosa minya hanen laku Merari; wale Simeri at ae beönua, (e ca atö, ke so bi kamen ame wia e he ka ban;) 11 me Hilekia a loiny, me Tebalia a kuniny, me Zakaria a vakiny: haba laku Hosa me je liamekeiny mē hia, ödrin thötin. 12 Ûnyi ge hnyat eling je deö hnyat tuö hwanuma, wale ge hnyat ae beönua, hnyat ae ve hu hanymödrin helâ me je liamekeiny mödrin, he ka huliwa hnyi uma umö Iehova. 13 Ke ödrin e uglekôb, a tavat ae ûhnyúkong me tavat ae gan, hoton je

lap anyin lakamödrin, hobi kâu je homagöule hia. 14 Ke ame aat dö Selemia ge lekôb e deiö. Me ödrin e uglekôb hobi kö Zakaria a nokon, at ae metâ hnyi ûhne-namö; ke ame aat dö e ge lekôb ka hnyi hwadrö. 15 Ke hobi kö Obed-edomia ka hnyi hwaiöu; me hobi kâu lakon uma omjeü. 16 Hobi kö Supima me Hosa e jio hnyi homagöule hnyi Saleketh hnyi getheniny hna ölö, ke tavat tue cicö ke tavat tue. 17 Haba e deiö, ödrin siks at Levi, ka hnyi hwadrö, foa hnyi je bong, ke foa ka hnyi hwaiöu hnyi je bong, ke üsa lo hnyi uma omjeü. 18 Hobi kâu Parebara e jio ödrin vak hnyi gethen, ke ödrü lo hnyi Parebara. 19 Wale je hanymen tavat tue, a laku Kora me laku Merari.

20 Ke haba ge at Levi, jia Ahia at ame tuö tang omjeüiny uma umen Khong, me je omjeü ae kap. 21 Haba laku Laadan; lakon hnyat Geresoma ûnyi ga Laadan, ta je ban je lap anyin lakamen ûnyi ga Laadan at Geresoma; jia Jehiela. 22 Lo li laku Jehiela; wale Zetham, me Joela a liamekeiny mē, li at tuö tang omjeü hnyi uma umö Iehova. 23 Ge at Amerama, me at Izara, me at Heberona, me at Uziela: 24 ke Sebuela nöku Geresoma, nöku Mose, wale at ame musö tang omjeü. 25 Me je liamekeiny mē; ûnyi ga Eliezera, Rehabia a nokon, me Jesaia a nokon, me Jorama a nokon me Zikeri a nokon, me Selomith a nokon. 26 Ke haba Selomith me je liamekeiny mē wale tavat tuö hia tang omjeü ae kap, waleji hnö Davita than, me je ban je lap anyin lakamen, me je taben thauzan me haded, me je taben vat hna okabâ. 27 Ödrin e okabâ ta je ûnyi adre söâ hnyi je vat hnân ânyâwia uma umö Iehova. 28 Me je ûnyi hia hnö Samuela at wâ, me Saulo nöku Kiso, me Abinera nöku Neri, me Joab nöku Zerua hna okabâ; ke ame ne ke at ame okabâ ke ûnyi, ame tuö Selomith, me je liamekeiny mē. 29 Ûnyi ge at Izara, hamö Kenania me lakon he ka huliwa ehele hon hnye Isaraela, hnân je homakan me tavat owisa. 30 Ûnyi ge at Heberona, Hasabia me je liamekeiny mē, je hnyat ae hwege, ödrin wan thauzan ke seven haded. tavat musi hnyi Isaraela ke keihen Joridano e jio; hobi kâu ta je huliwa hia anyi Iehova me ta je huliwa anyin than. 31 Ûnyi ge at Heberona jia Jeria at ae beönua, wale ge at Heberona hoton je dö anyin je lap anyin lakamen. Haba hnyi huna a fâteiny musi anyi Davita adre me

I. MAN ÛLABAINY JE THAN 27.

elöm ödrin, k' adre wâ unyidrin hnyat ae hwege hnyi Jezera hnyi Gileada. 32 Ke haba je liamekeiny mē a tavat ae hwege, me, ödrin tu thauzan ke seven haded, je ban je lap anyin lakamen, wale Davita than ame otilla he ka musö at Reubena, me Gada, me hafiny tribu Manase, hnyi ta je únyi hia anyin Khong, me ta je únyi anyin than.

HNAYIMAKAN 27.

**K**E haba lakon Isaraela hoton úseidrin, wale je ban je lap anyin lakamen, me je taben thauzan me haded, me je homakan tavat adre me bi athnyabainy than hnyi ke huliwa adre hhená, hnyat adre me didrö me didrut hnyi ke tehi me ke tehi a je tehiny hia huna, me, ödrin twente foa thauzan hnyi je dö. 2 Haba at ame musö dö a bán hnyi tehi a bán, me, Jasobeam nöku Zabediela: haba úseiny aten deö hanymen, me twente foa thauzan. 3 E hanen laku Farez, at ae beónua hnyi ta je taben vat hia hnyi tehi a bán. 4 Ke hanymö Dodai at Aohi hon dö hnyi tehi a loiny, me deö hanymen; ke Mikeloth at musi; ke haba tavat aten deö hanymen, me, ödrin twente foa thauzan. 5 Haba at musi tavat, at a kuniny ke hobi káu tehi a kuniny, me, Benaia nöku Jehoiada at bihut, wale taben: ke ödrin twente foa thauzan tavat aten deö hanymen. 6 Haba Benaia ling at ae hwege unyin tavat a thöte, ke hon tavat a thöte: ke Amizabada a nokon hanen deö hanymen. 7 Haba taben a vakiny hobi káu tehi a vakiny, me, Asaela liamekeiny me Joab, ke Zebadia a nokon hwaban; ke ödrin twente foa thauzan tavat aten deö hanymen. 8 Haba taben a thabúnginy hobi káu tehi a thabúnginy, me, Sama at Izara; ke ödrin twente foa thauzan tavat aten deö hanymen. 9 Haba taben a siksiny hobi káu tehi a siksiny, me, Ira nöku Ikes at Tekoa; ke ödrin twente foa thauzan tavat aten deö hanymen. 10 Haba taben a seveniny hobi káu tehi a seveniny, me, Helez at Pelone hanen laku Eferaima: ke ödrin twente foa thauzan tavat aten deö hanymen. 11 Haba taben e eitiny hobi káu tehi a eitiny, me Sibekai at Husa, hanen at Zera: ke ödrin twente foa thauzan tavat aten deö hanymen. 12 Ke haba taben a naininy hobi káu tehi a naininy, me, Abiezera at Anathoth, hanen at Beniamina: ke twente foa thauzan tavat aten deö hanymen. 13 Haba

taben a teniny hobi káu tehi a teniny, me, Maharai at Netofa, hanen at Zera: ke twente foa thauzan tavat aten deö hanymen. 14 Haba taben a eleveniny hobi káu tehi a eleveniny, me Benaia at Pirathon, hanen laku Eferaima: ke twente foa thauzan tavat aten deö hanymen. 15 Haba taben a twelviny hobi káu tehi a twelviny me Heledai at Netofa, hanö Otheniela: ke twente foa thauzan tavat aten deö hanymen.

16 Ke walang ang minya hon je tribu Isaraela: haba, hanen at Reubena, me, Eliezera nöku Zikeri, at musi; hanen at Simeona, me, Sefata nöku Maaka: 17 hanö Levi, me, Hasabia nöku Kemuela: hanö Arona; Zadoka: 18 hanö Juda; Elihu, wale hanen je liamekeiny me Davita: hanö Isakara; Omeri, nöku Mikaela: 19 hanö Zebulona; Isemaia, nöku Obadia: hanö Nafatali; Azeriela: 20 hanö Eferaima; Hosea nöku Azazia: hanen hafiny tribu Manase; Joela, nöku Pedai: 21 hanen hafiny tribu Manase hnyi Gileada; Ido nöku Zakaria: hanö Beniamina; Jaasiela, nöku Abinera: 22 hanö Dana; Azareela nöku Jerohama. Wale je taben je tribu hnyi Isaraela. 23 Ke a ca öü ödrin Davita tavat a twente huna me úhnyúkong hon e: anyin a ga ha Iehova a e ame he ka oshia at Isaraela me me he ka helâ me je okhúiny drany. 24 Ke haba Joab nöku Zeruaia ame ibi hwân he ka atú, ke a ca umo bi; anyin a can e, ame o but hmönyin ka at Isaraela; ke haba khaca adre ca sihnalimen úseiny hnyi tusi hnân ha je bong bongu Davita than.

25 Ke Azemaveth nöku Adiela me wale at ame musö je uma omjeú anyin than: ke Jonathana nöku Uzia at ame musö je tang omjeú hnyi ta hnyei, me je taun, me je taun ae úhuyúkong, me je hhabá: 26 ke Ezeri nöku Kelubo at ame musö tavat adre me huliwa hnyi ta hnyei he ka belöká kânâ: 27 ke Simei at Rama at ame musö je hnyei vine: ke Zabedi at Sefama at ame musö wan je hnyei vine hobi káu je uma waina: 28 ke Baala-hanana at Gedera at ame musö je úö elaiö me sukamore wale hnyi hnyei ae hnyikânâ: ke Joasa at ame musö je uma wakaco: 29 ke Setari at Saronat at ame musö je hnahat kau ödrin e han tot hnyi Saronat: ke Safata nöku Adelai at ame musö je kau wale hnyi hnyigöulen je bucen: 30 ke Obeli at Isamaela at ame musö je kamela: ke Jehedeia at

I. MAN ŪLABAINY JE THAN 28.

Merono at ame musö je asina : 31 ke Jaziz at Hagara at ame musö je mamoe. Ödrin hia ling hnyat musö ta je únyi anyi Davita than.

32 Ke Jonathana a ke kamö Davita, me, at úhnenamö, me at wáhmakhmeto, me at sihnalimen : k' ame tha e me lakon than Jehiela nöku Hakemoni : 33 ke Ahithofela at úhnenamö hobi káu than : ke Husai at Areki lahanen than : 34 ke hwabö Ahithofela, me, Jehoiada nöku Benaia, me Abiathara : ke Joab taben vat anyin than.

HNYIMAKAN 28.

**K**E haba Davita ame úkhacaköuá ta je taben at Isaraela hia hnyi Jerusalema, a je taben je tribu, me je taben tavat bi huliwa ka than adre ve khená, me je taben thauzan, me je taben haded, me hnyat musö je únyi me omjehen than me lakon, tha ödrin me je eunuka, me tavat ae hwege, wale je hnyat hia ae hwege. 2 Me ame tot Davita than, me ha, ka habe, Ling nya ju le liamekeiny mönya me lakeik : haba inya oge me únykúme he ka op uma umen tang úhinykóu anyi Iehova, me taben hnyeúcan Khongutin ; ke oge hia but penapena he ka op e. 3 Ke so bi Khong ame ha könya, ka habe, U me ca he ka op uma hobi káu iök, anyin a u at vat me hingálá dra. 4 Ke so bi haba Iehova, Khongu Isaraela, ame úcö nya únyi hnyi lap hia anyi cica m' inye than Isaraela nyiele balua ; anyin a e ame úcö Juda me hnán at musi ; me lap anyi cica únyi hnyi lap anyi Juda ; k' ame senyin gak unyin laku cica, m' inye than Isaraela hia : 5 ke e ame hia but úcö Solomona nöku unyin lakuk (anyin ae se lakuk a ham könya Iehova) he ka laba hon theroniny dökhu dökhu Iehova hnyi Isaraela. 6 Ke e ame ha könya, ka habe, Hamö Solomona nokom he ka op umök uma me je hnyeulek : anyin a oge me hia but úca e me me nöku, k' oge me he bi nya ka kamen. 7 Ke oge me he ka otílá hmá dokhon dökhu nyiele balua, ame ne tethmá he ka ányá anyik ta je hnanyibu, me hnök je hna owisa, helá me hnyi bong ang. 8 Ke walang ang, inya oge me ha hnyi hnyimakan at Isaraela hia, a úkhacakóu anyi Iehova, ke ame löng minya Khongutin, ka habe, Wá wia ju, me elám dö ta je hnanyibu anyi Iehova Khongubun ; me me hu gabun hnyeí ang ae so, me hnán iny lakubun hwaböbun nyiele balua. 9 Ke

haba u, Solomona nöku, khañö u thö Khongon kámám, me bi athnyaba káu ge hnyok ae bekhöt me hanu ae weny : anyin a Iehova ame elám ta je hnyok hia, me wáhmakhmeto ta je hna únykúme hia eú hnyi hnyok : u je ne elám e, me u me he ka wá e ; ke u je ne hna degecá e, me ame he ka digic u nyiele balua. 10 Wá wia walang ang, anyin a Iehova ame úcö u he ka op uma hnán dok ae kap : hwege thö, me ányá thö.

11 Ke haba Davita ame ham kö Solomona a nokon tulutiny poretika, me li umainy, me je uma omjeúiny, me je hnyeuleny ethö, me je hnyeuleny eú hnyin, me dok hnán taben ibetengiö : 12 me tulutiny ta je únyi hia ae hu gan ge hanu, hobi káu je hnyeuleny uma umö Iehova, me je hnyeule hia igigilö, hnán uma omjeúiny uma umen Khong, me uma omjeú ae kap : 13 me hobi káu je at bihut me at Levi, me hobi káu ta je huliwa m' adre me bi huliwa hnyi uma umö Iehova, me hobi káu je kaiainy hia huliwa hnyi uma umö Iehova : 14 e ame ham gol adre tuluto hnán je kaia gol, hobi káu je kaiainy je ve huliwa hia ; me sileva adre tuluto hnán je kaia sileva hia hnán je ve huliwa hia : 15 ke adre tuluto gol minya hnán je taben lamepa gol me je lamepainy, adre ve tuluto goliny je taben lamepa me je lamepainy : ke adre tuluto sileva hnán je taben lamepa sileva hnán je taben lamepa me je lamepainy, hoton je huliwainy je taben lamepa : 16 me gol adre tuluto hnán je laulau taben areto hnán omanená, ke laulau me ke laulau ; me sileva hnán je laulau sileva : 17 me gol hnán je báletiny utiö, me je kaia, me je utkaiá : ke adre tuluto gol hnán je kaia gol hia, ke kaia me ke kaia ; me sileva hnán je kaia sileva, ke kaia me ke kaia : 18 ke adre tuluto gol adre ányáwía, hnán taben leú utö ae bo so ; me gol hnán tulutiny kariota, li kerubi ödrü me lau li labenyidru, me tube tangen úhinykóu anyi Iehova. 19 Haingö Davita, ka habe, Adre omanená könya hnyi tusi ta je únyi hia eling ge hnyamö Iehova wale ta je huliwainy hia tulut eang. 20 Ke Davita ame ha kö Solomona a nokon, ka habe, Hwege thö, me hnyok бага but, me ányá thö ; ca ot bi, ke ca öbubuny bi : anyin ame he Iehova Khong, a Khonguk, ka tha e möu ; e ame ca he ka hia unyám, me hna degeci u, ke ne o but adre umo ta je únyi hia hnán huliwainy uma umö Iehova. 21 Ke

## I. MAN ŪLABAINY JE THAN 29.

wâ bi wale tavat bi hut me at Levi, ödrin e he ka ânyâ huliwainy uma umen Khong : ke ame he ka e unyâm tavat ae weny, tavat ae metâ hobi kâu ta je huliwa hia ke ame he ta je than me tavat hia ka löng ifucâm.

### HNYIMAKAN 29.

**K**E haingö Davita than ka ūkhacaköu hia, ka habe, Wanakat ae tiga but, Solomona a nökek, e thibi ūcanen Khong, ke ti gan hmâ huliwa : anyin a ca hobi kâu at uma, ke hobi kö Iehova Khong. 2 Ke iny ti hwege penapena hobi kâu uma umen Khonguk gol hnân je ūnyi gol, me sileva hnân je ūnyi sileva, me bras hnân je ūnyi bras, me fao hnân je ūnyi fao, me utö hnân je ūnyi utö ; me je veto soama, me je veto hnân ohmâ, me je veto hnân omecâ, ae se makan, me je veto hia ae ūnyi hnathu, me je out ae hau ae se hia. 3 Ke anyin a inya oge me hnyok ka hnyi uma umen Khonguk, me hu gak omjehek gol me sileva, me oge me ham e hobi kâu uma umen Khonguk, ca ha bi hnök hna penapena hobi kâu uma ae kap ; 4 wale kun ta thauzan talan gol, goliny Ofira, ke seven thauzan je talan sileva adre ânyâwia, hnân tube je hnyeige uma : 5 gol hnân je ūnyi gol, me sileva hnân je ūnyi sileva, me hnân ta je ūnyi hia he ka huliwan. Ke ewa at ame weny he ka okabâ e bi hnyi bong ang kö Iehova? 6 Haba je taben je lap anyin lakamen, me je taben je tribu anyi Isaraela, me je taben thauzan me haded, me je taben huliwa anyin than ödrin e ka ham thibut ; 7 me ham hobi kâu huliwainy uma umen Khong faiv thauzan je talan ke ten thauzan je dareke gol, me ten thauzan je talan sileva, me eitn thauzan je talan bras, me wan haded thauzan je talan fao. 8 Ke haba tavat ae hu veto ae ūnyi hnathu, ödrin e ham kö Jehiela at Geresoma, hobi kâu tang omjeŭiny uma umö Iehova. 9 Ke haba tavat ödrin e senyin he ka ham baûâ, anyin a ödrin e ham baûâ me hnyok ae bekhöt kö Iehova : ke haba Davita than ame senyin gan hmâ. 10 Anyin a wale Davita ame ole kö Iehova hnyi hnyimakan ūkhacaköu hia : haingö Davita, ka habe, Ole köu Iehova lö, Khongu Isaraela a kamöhmun, nyiele nyiele balua. 11 E unyâm, Iehova lö, ūganiny, me man, me hmanenang, me hwege, me musi : anyin a ânyâm ta je ūnyi hia ethö hnyi drany me eang hmeledrany ; e unyâm dökhü, Iehova lö, ke adre oganö u

me me ban ta je ūnyi hia thithö. 12 Ūnyi gam ta je omjeû, me hmanenang, ke u je musö hia ; ke e unyâm man me hwege, ke hamâm he ka oganâ me ha hwegien hia. 13 Ke walang ang Khonguhmun lö, öhmun e oleâ köu, me olungâ iâm ae hmanenang. 14 Ke iny ia, ke ia lakeik me me khan' öhmun he ka labö ham me wehmun helâng? anyin a ūnyi gam ta je ūnyi hia, ke öhmun e ham köu ta je ūnyi a ânyâm. 15 Anyin a je atkanyua öhmun hnyi hnyimákâm, me tavat hunuma tot, helâ je lakamöhmun hia : haba bonguhmun je bong eang hmelen helâ me hmenon, ke ba tethmâ. 16 Iehova Khonguhmun lö, ūnyi gam ta je omjeû hia eang, wale öhmun e penapena hnân op uma hobi kâu iâm ae kap, me hing ânyâm. 17 E khanö nya, Khonguk lö, a u at ame elâm hnyok, me senyin hnyi hwakecin ae wisa. Inya oge hia but ham ta je ūnyi hia ang ge wisainy hnyekuk : ke walang ang oge me wâ lakem ang me senyin, k' adre me ka hamödra hna köu. 18 Iehova lö, Khongu Aberahama, me Isaaka, me Isaraela a lakamöhmun, tuö ju hnyi ūnyküme me weny je hnyekon lakem nyiele balua, ke ohmâ je hnyekudrin köu bi : 19 ke ham kö Solomona a nökek hnyok ae bekhöt, he ka tuö hnâm je hna hûna, me hna ohnathö, me hnâm je hnanyibu, me he ka ânyâ ta je ūnyi hia eling, me otillâ uma, wale oge me penapena kâu. 20 Ke haba Davita ame ha ka ūkhacaköu hia, ka habe, Walang ang, oleâ thö kö Iehova Khongubun. Me haba ūkhacaköu hia adre me ole kö Iehova Khongon lakamödrin, me nom ju, me khudrung kö Iehova, me than. 21 Ke haba nyi ödrin e hudo je hut kö Iehova, me hudo je hudiny leû kö Iehova, wan thauzan je bolok, ke wan thauzan je mamoe бага, ke wan thauzan je nokon mamoe, tha e me je hudiny ic, me je hut ae se hobi kâu Isaraela hia ; 22 ke ödrin e han me ic hnyi hnyimakö Iehova hnyi bong eling me senyin gan hmâ. Ke ödrin e olo otillö Solomona nöku Davita ka than, me hû e kö Iehova hnân at musi, me Zadoka he ka at bihut. 23 Ke Solomona ame tabâ theron anyi Iehova me me than hwabö Davita a kamen, k' ame sot bi ; ke ame löng kâu Isaraela hia. 24 Ke haba ta je taben hia, me tavat hwege, me laku Davita minya, ödrin e nom ju kö Solomona than. 25 Ke haba Iehova ame ti oganö Solomona hnyi hnyimakan at Isaraela hia, me ham kâu hmanenanginy than, ke ca helâe ke than Isaraela ehac.

## II. MAN ÛLABAINY JE THAN 1.

26 Haba Davita nöku Jese ame musö at Isaraela hia. 27 Ke haba ûen e ame musi hnyi Isaraela, me, fâte huna ; e ame musi hnyi Heberona seven je huna, ke e ame musi hnyi Jerusalema hnyi thöte theri ta je huna. 28 Ke e ame mokcu k' ame ti hingat ut, ke se hia bongon je bong, me omjeü, me hmanenanginy : ke ame than biju Solomona a nokon. 29 Ke haba ta je

ûnyi ame ânyâ Davita a bân me biliny, wâ bi, adre hia but sihpalimen hnyi tusi Samuela at wâ, me hnyi tusi anyi Nathana perofeta, me hnyi tusi anyi Gada at wâ : 30 tha e me anyin musi hia, me tang hwegien, me ta je ûen ame o kâu, me ka at Isaraela, me je dökhü hia dokhon ta je hnyi.

### TUSI A LOINY

GE

## MAN ÛLABAINY JE THAN.

### HNyimakan 1.

**K**E adre me ohwegiö Solomona nöku Davita hnyi dokhon dökhü, ke tha Iehova a Khongon më, k' ame ogânâ e. 2 Ke haba Solomona ame fuc ka at Isaraela hia, ka je taben thauzan me haded, me tavat owisa, me je taben Isaraela hia, je ban je lap anyin lakamen. 3 Ke haba Solomona me ûkhacaköu hia, ödrin e tha he ka hnyi dok ae görany hnyi Gibeona ; anyin a eling uma ûkhacaköu umen Khong, a ânyâ Mose athnyabainy Khong hnyi hnyebuba. 4 Ke Davita ame hia but hom tang tangen Khong ûheny Kiriatha-jarim ka hnyi dok ame penapena ga Davita hobi kâu : anyin a bia but otilâ uma mano hnyi Jerusalema hobi kâu. 5 Ke haba taben hut a bras, waleji hnö Bezaleli nöku Uri, nöku Huro, hna ânyâ, e but ling hnyi hnyimakan uma mano umö Iehova : ke haba Solomona me ûkhacaköu hia ödrin e elâm hnyin e. 6 Ke haba Solomona ame ölö kâe ka hnyi taben hut bras hnyi hnyimakö Iehova, hnyi uma ûkhacaköu, me hudo hon e je hudiny leü a wan thauzan.

7 Ke haba Khong ame manen hnyi lit eling kö Solomona, me ha kâu, ka habe, Sumâtâ thö ûnyi oge me he ka ham köu. 8 Me haingö Solomona ka Khong, ka habe, U je betenge gan hmâ ga cica Davita, me otilö nya ka than hwaban. 9 Ke walang, Iehova Khong lö, ö u ohmâ ju hwâm hofuc kö cica Davita : anyin a u je otilö nya he ka than hon tavat ae se helâ me sesâiny

hmeledrany üseidrin. 10 Ö u ham könja walang metâ me wâhmakhmeto, m' inye he ka didrut me didrö hnyi hnyimakan tavat eang : anyin a ie at ae khana he ka owisa ka lakem eang ae gan ? 11 Haba Khong ame ha kö Solomona, ka habe. Anyin a e hnyi hnyekom ûnyi e, ke u je ca sumatö omjeü, me ta je ûnyi, me hna ogânâ, me he ka kot je iwahnaihmiony möu. ke u je ca sumâtâ minya he ka möt beü : ke u je sumâtâ he ka metâ me wâhmakhmeto, m' u me owisa ka lakeik a hnyat oge me otilö u he ka than hon : 12 awe. adre ma ham köu metâ me wâkmakhmeto : ke oge me he ka ham köu omjeü, me ta ûnyi, me hna ogânâ ae ca hu helâe je than a bân, ke ame ca he ka helâe hwabâm. 13 Ke haba Solomona ame he Jerusalema ai ûheny hnyi dok ae görany hnyi Gibeona, hnyi hnyimakan uma ûkhacaköu ; ke e ame musi hnyi Isaraela.

14 Ke Solomona ame ûkhacaköuâ je kariota, me tavat tabö hors : ke hu gan wan thauzan ke foa haded anyin je kariota, ke twelv thauzan tavat tabö hors, wale e ame ip ödrin hnyi je tauniny je kariota, me e unyin than hnyi Jerusalema. 15 Ke haba than ame osehia sileva me gol hnyi Jerusalema helâ me je veto, me je arasi helâ me je sukamore hnyi hnyigöulen bucen. 16 Ke haba je hors hale Solomona me adre hom ûheny Aigupito ; ke haba tavat ücü anyin than, me ödrin e kap je deö hors ge hwaban. 17 Ke ödrin e hom me hom ûheny Aigupito kariota hwaban sileva a siks haded



## II. MAN ÛLABAINY JE THAN 2, 3.

je sekel, ke wan haded ke fifte je sekel hwaban hors: me ödrin e hom helâe hobi kâu je thaniny at Heth me Suria.

### HNYIMAKAN 2.

**K**E haba Solomona ame ûnykûme he ka op uma hobi kâu iö Iehova, me ke uma hnân dokhon dökhu. 2 Ke Solomona ame aû tavat a ödrin sevente thauzan tavat sukhöünâ, ke eite thauzan tavat si utö hnyi je bucen, ke theri thauzan ke siks haded tavat tu' ödrin. 3 Ke haba Solomona ame ûkhünöng kö Hirama thaniny Turo, he ka ha, ka habe. U me he ka ânyâ könya, helâ me hnâm hna ânyâ kö cica Davita, me kunâ kâu je arasi hnân op umen uma hnân laba hnyin. 4 Wâ bi, inya oge me op uma hobi kâu iö Iehova Khonguk, he ka okabâ kâu, me he ka leû utö ae bo so hnyi hnyimakan, me hnân hobi kâu bala thibut areto hnân omanenâ me je hudiny leû hnyi je hnyomakatu me sahac, hnyi je sabath, me je tehi ae teb ûnyi, me je bijeû adre thu anyi Iehova Khonguhmun. Wale hna otilâ ka at Isaraela nyiele balua. 5 Ke e gan hmâ uma oge me op, anyin ae beönua Iehova Khonguhmun hon ta je khong. 6 Ke ie at ae khana he ka op uma hobi kâu, anyin ae ca ûcû kâu drany me draniny ta je drany? ke iny ia, me inye he ka op uma hobi kâu, ke so bi he ka leû utö ae bo so thibi hnyi hnyimakan? 7 Walang ang kunâ thö könya at ae metâ he ka huliwan gol me sileva, me bras, me fao, me udrudrâ hlit, me dra vec, me udrudrâ, me at ae khana he ka khavi hnalimen, he ka tha e me tavat ae metâ eang unyik hnyi Juda me Jerusalema, waleji a penapena ga cica Davita. 8 Kunâ minya ju könya je üö arasi, me köp, me alemuga, ûheny Lebanona; ke wâ bi ame he ka tha he lathnyabaik me lathnyabaem, 9 wale he ka penapena hobi könya je utö ae se: anyin ae ti gan hmâ una oge me he ka op. 10 Ke wâ bi, oge me he ka ham ka lathnyabaem a hnyat si utö je tulut hwit adre kokot a twente thauzan, ke twente thauzan je tulut bali, ke twente thauzan je bath waina, ke twente thauzan je bath wakaco. 11 Me haba Hirama than Turo ame thu hnyi tusi a kunâ kö Solomona, ka habe, Anyin a Iehova ame betenge ge lakeiny, me ame otilö u he ka tuhödrin. 12 Haingö Hirama minya, ka habe, E so adre me ole kö Iehova, Khongu Isaraela, at a op drany me hmele-

drany, at a ham nokon ae metâ kö Davita than, at wâhmakhmeto, me wâ ûnykûme, me me op uma hobi kö Iehova, me uma hobi kâu dokhon dökhu. 13 Ke walang ang oge me kunâ ke at a aten cica Hirama, at ae metâ, me wâhmakhmeto, 14 nokon momo Dana, ke at Turo kamen, at ae khana he ka huliwan gol, me sileva, me bras, me fao, me veto, me utö, me udrudrâ hlit, me udrudrâ, me lino ae ûhnyükong nân, me dra vec; me he ka khavi hnalimen, me ûnykûme wia ta je ûnyi adre me hna kâu: me ame he ka tha e me lakem ae metâ, me hnyat ae metâ lakei Davita than a kamâm. 15 Ke walang ang tuhök lö, e so u ma kunâ jem ka lathnyabaem hwit, me bale, me wakaco, me waina, waleji u je ha: 16 ke öhmun e he ka si utö hnyi Lebanona hoton wem: k' öhmun e he ka mâtâ eû hnyi köiö Jopa ai köu bi; ke u me he ka hom Jerusalema ai. 17 Ke Solomona ame aû ta je atkanyua hia hnyi hnyei Isaraela, hwaban hna öü ödrin ga Davita a kamen; k' adre ö ödrin a wan haded ke fifte theri thauzan siks haded tavat. 18 Ke ame otilâ sevente thauzan gadrin he ka sukhöünö ûnyi, ke eite thauzan he ka si utö hnyi je bucen, ke theri thauzan ke siks haded he ka musö tavat huliwa.

### HNYIMAKAN 3.

**M**E haba Solomona ame hwân he ka op uma umö Iehova hnyi Jerusalema hnyi bucen Moria, waleji a manen hnyin Iehova kö Davita a kamen, wale e ame penapena hnyi dok ame kû Davita hnyi hna huje hwit anyi Aruna at Jebusi. 2 Ke e ame hwân he ka op uma hnyi bong a loiny tehi a loiny, hnyi huna a vakiny anyin musi. 3 Ke walang hnö Solomona hna bi taben, me me op uma umen Khong. Haba ibeûen hoton tulut a bân, sikste je kubit, ke haba ûlauen, twente je kubit, 4 Ke haba poretiko hnyi hnyimakan uma, e tha ûcû ibeûen me ûlauen uma, twente je kubit, ke ibeûen göranyai, wan haded me twente: ke e ame tube hnyin ge gol ae so. 5 Ke e ame bi esö ethö hon uma ae gan ge köp, me tube ge gol ae so, me op hon je pama me je cen. 6 Ke e ame omecâ uma ge je veto ae ûnyi hnathu me me hmanenang: ke haba gol, me goliny Parevaima. 7 E ame tube goliny minya uma, je venyâ, me utkhetep, me je baten uma, me je hlinginy hwanuma; me kave je

## II. MAN ÛLABAINY JE THAN 4.

kerubi hnyi baten uma. 8 Ke e ame ânyâ uma ae ti kap; haba ibeûen e ûcû me ùlauen uma, twente je kubit, ke haba ùlauen twente je kubit: ke e ame tube ge gol ae so ke ne o but siks haded je talan. 9 Ke haba ihmakiny je fao fifte je sekel gol. Ke e ame tube goliny je hnyeule ethö. 10 Ke e ame ânyâ hnyi hnyin uma ae ti kap li kerubi adre theâtâ, ke ödrin e tubi ödru ge gol. 11 Ke haba ibeûen je labenyin li kerubi twente je kubit: faiv kubit ke labenyin, ame kâlâ baten uma; ke faiv kubit minya ke labenyin ame kâlâ labenyin ke kerubi. 12 Ke haba labenyin ke kerubi faiv kubit, ame kâlâ baten uma; ke haba ke labenyin faiv kubit minya ame kâlâ labenyin ke kerubi. 13 Adre lau je labenyin li kerubi eling ke ne o but twente je kubit: ke ödru me tot ge li cadru, me hnyimaködrü ka hnyi uma. 14 Ke e ame ânyâ singiny ae udrudrà, me udrudrà hlit, me dra vec, me lino ae ûhnyûkong nân, me tibet je kerubi hnyin e. 15 Ke e ame ânyâ minya hnyi hnyimakan uma li hmolom ûsa thöte faiv kubit ibeûen göranyai, ke haba li ovejien walethö hon li bau ûsa faiv kubit. 16 Ke e ame ânyâ je cen hnyi umen hofuc, me ip hnyi ban li hmolom; ke e ame ânyâ je wan rimona a wan haded, me ip hon je cen. 17 Ke e ame otîlâ li hmolom hnyi hnyimakan uma, khaca hnyi ke keihen metâ, ke khaca hnyi ke keihen me; me hwenyi ien khaca hnyi ke keihen metâ Jakina, ke ien khaca hnyi ke keihen me, Boaza.

### HNYIMAKAN 4.

**K**E e ame ânyâ ke taben hut bras minya a twente je kubit ibeûen, ke twente je kubit ùlauen, ke ten kubit ibeûen göranyai. 2 Ke e ame ânyâ minya taben köiö adre oköiâ a ten kubit ûnyi hnyi ke baten ka hnyi ke baten, ke wathelaba, ke faiv kubit ibeûen göranyai; ke thöte kubit tulutiny igigilö. 3 Ke eü hmelen adre me theâtâ je bolok adre wadrâ igigilö, hnyi ten kubit, igigilö taben köiö. Adre me ânyâ je bolok hnyi li deö hnyi ûen adre oköiâ. 4 K' adre bi taben e hon je bolok a twelv, kun amè tot me hnyimakan ka hnyi hwadrö, kun ame hnyimakan jio, kun ame hnyimakan ka hnyi hwaiöu, kun ame hnyimakan deiö: k'ame tab' ödrin taben köiö, k' ödrin e jobinyköu eü hmelen. 5 Ke khaca hnyam ûhakiny; k' adre ânyâ

baten helâ me baten kaia, helâ me obedila: e khana he ka hu hnyin kun ta thauzan bath. 6 Ke e ame ânyâ je taben sou a ten, k' ame ip thabûng hnyi metâ, ke thabung hnyi me, hnân sou hnyin: k' adre me hneú eling je ûnyi hnân hndiny leú: ke haba taben köiö, me, hnân sûen tavat bihut. 7 Ke e ame ânyâ je taben lamepa gol a ten hoton tulut adre ha, k' ame ip eiö hnyin uma kap, thabung hnyi metâ, ke thabûng hnyi me. 8 Ke e ame ânyâ minya je hulaui a ten, k' ame ip hnyin uma kap, thabûng hnyi ke keihen metâ, ke ke thabung hnyi ke keihen me. Ke e ame ânyâ je kaia gol a wan haded. 9 Ke haba khaca, e ame ânyâ hnyeuleny tavat bihut, me hnyeule aegan, me je hlinginy hnyeule, me tube je hlinginy ge bras. 10 Ke haba taben köiö, e ame ip e hnyi ke keihen metâ e deiö ke ka hnyi hwaiöu. 11 Ke haba Hirma ame ânyâ je öt, me je soi, me ta je kaia. Me haba Hirma ame umo ta je huliwa e ame ânyâ hobi kö Solomona than hnân hobi kâu uma umen Khong: 12 waleling li hmolom, me je ûnyi ae wathelaba, me li ovejien hon ban li hmolom; me li boert hnân tube li ûnyi ae wathelaba anyin li ovejien walethö hnyi hon ban li hmolom; 13 ke foa haded je wan rimona hobi kâu li boert; ke lo li deö wan rimona hobi kâu ke boert, hnân tube li ûnyi ae wathelaba anyin li ovejien ethö hon ban li hmolom. 14 K' ame ânyâ minya je taben, k' ame ânyâ minya je taben sou hon je taben; 15 me khaca taben köiö ke twelv ta bolok eü hmelen. 16 Ke haba je öt, me je soi, me je bâletiny utiö, me je omjehen hia, wale ame ânyâ Hirma a kamen hobi kö Solomona than, hnân hobi kâu uma umö Iehova ge bras ae hadröngöc. 17 Ame oköiâ e hnen than hnyi dok ae tha hon hnyi Joridano, hnyi kânâ ae kece wale wanben Sukotha me Zaretana. 18 Ke haba Solomona ame ânyâ ta je ûnyi hia eling ae ti se hia: ke adre me ca wâ bi ihmakiny bras. 19 Ke haba Solomona ame ânyâ ta je ûnyi wale eiö hnyin uma umen Khong, me taben hut minya a gol, me je laulau taben je areto hnân omanenâ; 20 me je taben lamepa me je lamepainy, me me möt hoton tulut hnyi hnyimakan umen hofuc, gol ae so; 21 me je vongon ütö, me je lamepa, me je akofi, gol, wale gol ae so; 22 me je uthesiün, me je kaia. me je spun, me je taben meic, gol ae so: ke haba hwanumen uma, je hlinginy eiö

## II. MAN ULABAINY JE THAN 5, 6.

hnyin hobi kâu dok ae ti kap, me je hlin-  
giny uma, wale uma kap, gol.

### HNYIMAKAN 5.

**K**E helâe adre umo ta je huliwa a ânyâ  
Solomona hobi kâu uma umö Ie-  
hova. Me Solomona ame odilâ thö je ûnyi  
a okabâ Davita a kamen; wale sileva me  
gol. me je ûnyi hia, me ip hnyi uma omje-  
hiny uma umen Khong.

2 Haba Solomona ame ûkhacaköuâ wa-  
hingatiny Isaraela, me je ban hia anyin je  
tribu, kamen ae beönua ge lakon Isaraela,  
Jerusalema ai, he ka hom tangen ûhihiny-  
köanyi Iehova ûnyi hnyi taun anyi Davita,  
wale Ziona. 3 Ke ame ûkhacaköu thö  
tawat Isaraela hia ka than hnyi bijeü, wale  
hnyi tehi a seveniny. 4 Ke ame o but  
wabingatiny Isaraela hia, me at Levi ödrin  
evadren tang. 5 Ke ödrin e hom tang me  
uma hnân ûkhacaköu, me ta je ûnyi ae kap  
hia hnyi uma hnân ûkhacaköu; wale je  
ûnyi a hom tawat bihut a at Levi. 6 Ke  
haba Solomona than, me ûkhacaköu hia  
anyin Isaraela, tawat adre tha ûkhacaköu  
kâu hnyi hnyimakan tang, me, ödrin e  
hudo je mamoe me bolok a ca hnân aü  
iseiny anyin ae se hia. 7 Ke haba tawat  
bihut ödrin e hom tangen ûhihinyköu anyi  
Iehova ka hnyi hnen, ka hnyi umen hofuc  
hnyi hnyin uma, wale dok ae ti kap, eü  
hnelen je labenyin li kerubi. 8 Anyin a  
li kerubi ödrin me lau li labenyidru hon  
tang, ke haba li kerubi ödrin me tube  
ethö tang me li venyâiny. 9 Ke ame beü  
li venyâ me me manen li hnyiban li venyâ  
hnyi tang cicö umen hofuc, ke ca manen bi  
eü. Ke ka eling ke ne o but hnyi bong  
tang. 10 Ke ba ûnyi hnyin tang ke li veto  
thibi ae lau waleji a ip Mose hnyin hnyi  
Horeba, waleji hnyi ûen Iehova ame ûhi-  
hinyköu me lakon Isaraela, hnyi ûhedrin  
Aigupito. 11 Ke ame didrut tawat bihut  
hnyi hnyi dok ae kap, (anyin adre me okabâ  
tawat bihut hia ae ling, k' ödrin e ca huliwa  
zaga; 12 me at Levi minya hnyat khu-  
mông, ödrin hia, wale Asafa, me Heman,  
me Jeduthun, me je lakudrin, me je liame-  
keiny mödrin, adre khavâ mano lino,  
k' ödrin e hom je simebalo, me je nabeli,  
me je kitara hnyi ke keihen taben hut e  
deü, ke tha ödrin me tawat bihut a wan  
baded ke twente ödrin e tûö trutru :) 13 ke  
haba tawat tûö trutru me tawat khumông,  
me, helâ me at a khaca, he ka hai khumông

helâ me khaca thibi hofuc he ka ogânâ me  
ole kö Iehova; ke ödrin e fuc göranyai ge  
je trutru me simebalo me je ûnyi khumông'  
me oganö Iehova, me ha, ka habe, Anyin  
ae so e, anyin a nyiele balua anyin ibeten-  
giö; me haba hnyi ûen eling ame unöngötö  
uma ge ulâ, wale uma umö Iehova, 14 me  
me ca khana bi tawat bihut he ka tot me  
ânyâ hudrudrin, can ulâ: anyin a unöngötö  
uma umen Khong ge hmanenangi Iehova.

### HNYIMAKAN 6.

**M**E haba Solomona ame ha, ka habe, A  
hia but ha Iehova a g' ame he ka  
laba hnyi menekholom. 2 Ke oge me hia  
but op uma hnân hnyabam, a dok u me he  
ka laba hnyin nyiele balua. 3 Me haba  
than ame hwiö me hahnahicâ ûkhacaköu  
hia anyin Isaraela: k' ame todrö ûkhaca-  
köu anyin Isaraela hia. 4 Me e ame ha, ka  
habe, Ole kö Iehova, Khongu Isaraela, at  
ame fuc ge hnyimen kö cica Davita, me  
ohwâdâ ge li hnyamen, ke haingen, ka  
habe, 5 Hwân hnyi bong oge me hom  
lakeik ûhedrin Aigupito, me oge me ca  
ûca ke taun hnyi je tribu Isaraela hia, he  
ka op uma hnyin, me me laba eling iök; ke  
oge me ca ûca ke at me me tuhan lakeik  
Isaraela: 6 ke oge me ûca Jerusalema,  
m' adre me ip eling iök; ke oge me ücö  
Davita he ka musi hon lakeik a Isaraela.  
7 Ke e hu eü hnyi hnyeku cica Davita  
weny he ka op uma hnân hobi kâu iö  
Iehova, Khongu Isaraela. 8 Ke haba  
Iehova ame ha kö cica Davita, ka habe,  
Anyin a eü hnyi hnyekom he ka op uma  
hobi kâu iök, me so hnâm hna hnyok: 9 ke  
so bi, u me ca he ka op uma, ke hamen  
nokom bi at ame he ka o ûnyi gam, e bi  
ame he ka op uma hobi kâu iök. 10 Ke  
a hia but Iehova ohwâdâ hwan hofuc a ha;  
anyin a oge me o but hwabö cica Davita,  
me tabâ theroniny Isaraela, helâ me hna ha  
bânâ hnö Iehova, ke oge me hia but op  
uma hobi kâu iö Iehova, Khongu Isaraela.  
11 Ke oge hia but ip eling tang, wale adre  
hitangen hnyin ûhihinyköu anyi Iehova,  
wale e ame ânyâ me lakon Isaraela.  
12 Ke e ame tot cicö taben hut anyi  
Iehova, hnyi hnyimakan ûkhacaköu hia  
anyin Isaraela, me lau li hnyamen: 13 (ke  
a hia but Solomona ânyâ ke tap a bras, faiv  
kubit ibeüen, ke faiv kubit ulauen, ke kun  
ta kubit göranyai, me ip e hnyi wanben  
hnyeule; ke e ame tot hon, me cibouca

## II. MAN ULABAINY JE THAN 6.

hnyi hnyimakan úkhacaköu hia anyin Isaraela, me hai hnyi dranyai li hnyamen : 14 ke e ame ha, ka habe, Iehova lö, Khongu Isaraela, e ba ke Khong ae úcú möu, ethö hnyi drany me eang hmeledrany ; at ame tuö úhinhinyköu me ibetengiö ka lathnyabaem, tavat adre me vheno hnyi hnyimákâm me je hnyekudrin ae bekhöt : 15 at ame tuö hobi kâu athnyabaem a cica Davita waleji ge hnâm hna ha bánâ kâu : eke, u je fuc ge hnyimâm, me ohwâdâ ge hnyamâm, helâ me hnyi bong ang. 16 Anyin a wale, Iehova lö, Khongu Isaraela, tuö thö hobi kâu athnyabaem a cica Davita waleji u je ha bánâ kâu, ka habe, Ame ca he ka ba hwabâm hnyi hnyimákök, he ka tabâ theron hnyi Isaraela ; ame ne he thibi lakom ka tuö dedrin je gethen, he ka vheno anyik hnanyibu helâ me hnâm hna hia but vheno hnyi hnyimákök. 17 Ke walang ang, Iehova lö, Khongu Isaraela, e so adre me ohnatho hwâm hofuc, waleji u je ha ka athnyabaem a Davita. 18 Ke hawa, e hnathu ame he Khong ka tha laba me tavat eang hmeledrany? wâ bi, e ca úcú köu drany me draniny ta je drany ; ke ti ca úcú köu uma ang oge hia but op ! 19 Ke so bi Iehova Khonguk lö, ö u wâ ju hic hijin athnyabaem me anyin sumat, me löng hwatenge me hic hijin athnyabaem hnyi hnyimákâm : 20 me me bwelâ but li emakâm cicö uma eang hnyi lany me lit, wale cicö dok waleji u je ha gan a u je he ka ip iâm eling ; me löng hic hijin athnyabaem cicö dok ang. 21 Ö u long ju hic hijin athnyabaem me lakem a Isaraela, ödrin ka he ka hic cicö dok ang : eke, ö u löng ju hnyi hnyabam ethö hnyi drany ; ke u ka löng ut, ö u hna but. 22 Ame ne monu ke at ka ke at bi, k' adre me kunâ e he ka khemanyin, ke ka o but me khemanyin cicö ânyâm taben hut hnyi uma ang : 23 awe, ö u löng ju hnyi drany, me ânyâ, me owisa ka lathnyabaem, me bi hwaban ka at ae kong, me oâ ka hnyi hon ban hwakecin ae kong ; me owisa ka at ae wisa, me hna kâu hoton hwakecin ae wisa. 24 Ke adre me ne kot lakem a Isaraela hnyi hnyimakan iwahnaihmiöny can anyidrin monu köu ; k' ödrin e ne he ka hmetu me ha iâm, me hic me khöü hnyi hnyimákâm hnyi uma ang : 25 awe, ö u löng ju hnyi drany me hna konginy lakem a Isaraela, me ohmetu ödrin ka hnyi hnyei waleji u je ham ködrin me lakamödrin. 26 Ke adre me ne hlöng drany, me ba we, can hwakecidrin ae köng köu ; ke ödrin e ne he ka hic cicö dok ang, me ha iâm, me hwiö únyi hnyi anyidrin monu, u ka oveci ödrin : 27 awe, ö u löng ju hnyi drany, me hna hwakecin ae kong anyin lathnyabaem, me lakem a Isaraela, u ka n' ödrin ge gethen ae so ködrin he ka vheno ; me kunâ but we ka hnyi em hnyei, wale u je ham ka lakem me me idrin. 28 Ke a ne hu hmiâ hnyi hnyei, k' ame ne mok ae cap, k' ame ne ut, me löhau, me wahamon, me ihmâ ; k' ame ne theling ödrin iwahnaihmiöny mödrin hnyi hnyei adre me bi anyidrin je taun hnyin ; ame ne ke je vec ame ne ke je mok ; 29 k' ame ne he ke at ka hic me sumâtâ, k' ame ne lakem hia a Isaraela, tavat adre me ve wâhmakhmeto vec me anyidrin hmak, m' ödrin e hai li benyidrin cicö uma ang : 30 awe, ö u löng ju hnyi drany a hnyabam, me hna, me ham ka tavat hia thithö helâ me dedrin je gethen, ke u je wâhmakhmeto je hnyekudrin ; (anyin a hake u ke thibi at ame wâhmakhmeto hnyekon tavat ;) 31 m' adre me ka outö u, me vheno dem ta je gethen hnyi ta je bong hia bongon anyidrin möt hon kânâ, waleji u je ham ka lakamöhmun. 32 Ke haba atkanyua a ca hanen bi lakem a Isaraela, ke e ka o únyi hnyi hnyei ae sâkâú ge iâm ae gan, me hnyamâm ae hwege, me benyâm adre hai ; ke ödrin ka o but me hic cicö uma ang ; 33 awe, ö u löng ju ethö hnyi drany wale hnyabam, me ânyâ helâ me ta je hofuc hia ame hawo u hnyin atkanyua : me me khana iâm ge ta je hnyei hia thithö eang hmeledrany, me outö u helâ me hnen lakem a Isaraela, me me khan' ödrin a ge adre hwenyi ien uma ang, wale oge ânyâ ge iâm. 34 Ame ne he but lakem he ka vat me je iwahnaihmiöny mödrin, hnyi je gethen hia u me he ka kun' ödrin hnyin, ke ödrin e he ka hic köu cicö taun ang wale u je úca, me uma oge hia but op hobi kâu iâm : 35 awe, ö u löng ju ethö hnyi drany hijidrin hic me anyidrin sumat, me owisa ködrin. 36 Ödrin e ne ânyâ hulö köu. (anyin ae ba at ame ca ânyâ monu.) me u me hmönyâm ködrin, me hu' ödrin ka je iwahnaihmiöny, me adre me lili ödrin a je hwenbâ ka hnyi ke hnyei ame ne sâkâú ame ne hakekeny ; 37 ke so bi ödrin e ne únykúme hmetu hnyi hnyei ödrin e laba hwenbâ hnyin, me hwiö thö, me khöü köü hnyi hnyei ödrin e laba hwenbâ hnyin, me ha, ka habe, Öhmun e hia but ânyâ hwakecin ae kong, me hwali, me monu ; 38 ödrin

## II. MAN ÛLABAINY JE THAN 7.

e ne hmetu köu ge hnyekudrin ae bekhöt me hanudrin ae bekhöt hnyi hnyei ödrin e laba hwenbâ hnyin, wale adre lili ödrin me hwenbâ ka hnyin, me hic cicö idrin hnyei, waleji u je ham ka lakamödrin, me taun u je úca, me uma wale o ge ânyâ hobi kân iâm : 39 awe, ö u löng ju hnyi drany, wale hnyabam, hijidrin hic me hnödrin je hna sumat, me owisa ködrin ; me hna monu anyin lakem wale ödrin e monu köu. 40 Walang ang, Khonguk lö, inya o ge me sumatö u, ö u bwela ge li emákâm, me tevehlöng ge li hnyikönyâm, hic adre hic hnyi dok ang. 41 Ke walang, Iehova Khong lö, todrö ka hnyi hnâm hna mokut, u me tangen hwegiam : Iehova Khong lö, e so adre me khavâ ge úhömeli ânyâm tavat bihut, me senyina hwakecin ae so ânyâm tavat ae kap. 42 Iehova Khong lö, ca he ka wia degecâ hnyimakan hnâm hna hú : únykúme thö je ibetengiö anyi Davita a athnyabaem.

### HNYIMAKAN 7.

**K'** a um dö Solomona hic, me ame kölu but meic únyi hnyi drany, me an hudiny leú me je hut ; ke ame unöngötö uma ge hmanenangi Iehova. 2 Ke ca khana bi tavat bihut he ka didrö ka hnyin uma umö Iehova, anyin a unöngötö uma umö Iehova ge hmanenangi Iehova. 3 Ke haba lakon Isaraela hia ödrin e wâ meic ame kölu me hmanenangi Iehova hon uma ; ke ödrin e nom hnyikânâi ka hnyi dek veto, me khudrung, me ole kö Iehova, me ha, ka habe. Anyin ae so ; anyin a nyiele balua anyin ibetengiö. 4 Ke haba than me tavat hia ödrin e hudo je hut hnyi hnyimakö Iehova. 5 Ke Solomona than ame hudo je bolok a twente tu thauzan, ke wan haded ke twente thauzan je mamoe. Me haba than me tavat hia ödrin e okabâ uma umen Khong. 6 Ke haba tavat bihut ödrin e ve tot hnyi je hanymödrin ; me tavat Levi me ta je únyi khumöng anyi Iehova, waleji a inyâ Davita than hnân ole kö Iehova, anyin a nyiele balua anyin ibetengiö, waleji hnyi úen Davita ame ogânâ hnen ta je únyi eling : ke haba tavat bihut ödrin e túö trura hnyi hnyimaködrin ; k' ame tödrö at Isaraela hia. 7 Ke Solomona ame okabâ wanben hnyeule wale hnyi hnyimakan uma umö Iehova ; anyin a e ame hudo je hudiny leú hnyi dok e. me pipikhenyainy je hudiny ole : anyin a haba taben hut a bras, wale a ânyâ Solomona, me ca úcú hnân ta je

hudiny leú, me je hudiny han, me pipikhenya. 8 Ke haba hnyi úen eling haba Solomona ame ânyâ bijeú hnyi seven ta bong, tha e me Isaraela hia, úkhacaköu ae gan hmâ hmönyin, hwân hnyi homagöuleny Hamath ke ne o but waweiny Aigupito. 9 Ke haba hnyi bong a eitiny, me ödrin e ânyâ úkhacaköu ae únyi hnathu : ke ödrin e okabâ taben hut hnyi seven ta bong, me bijeú hnyi seven ta bong. 10 Ke haba hnyi bong a twente theriny tehi a seveniny, me, e ame kunâ tavat ka hnyi umödrin je uma mano, me senyin me hobâ hnyi je hnyekudrin ge ta je so Iehova ame ânyâ hobi kö Davita, me Solomona, me Isaraela a lakeiny.

11 Heláling Solomona ame umo uma umö Iehova, me uma umen than : ke haba ta je únyi hia a o ka hnyi hnyeku Solomona he ka ânyâ hnyi uma umö Iehova, me hnyi umen uma, me e ame umo hnyi hnahic. 12 Ke Iehova ame manen kö Solomona hnyi ke hnyinghet, me ha kâu, ka habe, Oge hia but löng hijâm hic, me úca dok ang hnân hobi könya bi ke hnân umen bi hut. 13 Oge ne hlöng drany me me ba we, ke oge ne kunâ wahamon he ka an hnyei, ke oge ne kunâ mok ae cap ka lakeik ; 14 ke e ka he lakeik, hnyat adre ip iök hudrin, ka oúhnyúkongu ödrin bi, me hic, me elâm hnyimakök, me hmetu únyi hnyi dedrin je gethen ae kong ; awe, oge me he ka löng hnyi drany, me hna anyidrin monu, me osoâ idrin hnyei. 15 Ke walang ang, oge me he ka bwela, me tevehlöng hic adre me hijö hnyi dok eang. 16 Ke walang oge hia but úca me okabâ uma ang, me me eling iök nyiele balua : ke ame he ka eling li emakök me hnyekuk hnyi je bong hia thibut. 17 Ke haba u, u je ne he ka he hnyi hnyimakök helâ me hna vheno hnö Davita a kâmâm, me ânyâ koton hnök hna húna köu, me tuö anyik je hnanyibu, me hnök je hna owisa ; 18 awe, oge me he ka otethmâ theroniny dokhom dükhu, helâ me hnök hna úhinyköu me Davita a kâmâm, ka habe, Ame ca he ka ba hwabâm hnân musi hnyi Isaraela. 19 Ke öbun e ne hwiö me hna degecâ anyik je hnanyibu, me hnök je hna húna wale oge ip hnyi hnyimaköbun, me he me bi athnyaba ka ke je khong, me khudrung ködrin : 20 me oge me he bi nya ka oc degeci ödrin únyi hnyi ik hnyei wale oge ham ködrin ; ke haba uma ang wale o ge hia but okabâ hobi kâu iök me oge me he ka degec únyi hnyi hnyi-

## II. MAN ULABAINY JE THAN 8, 9.

makök, me oge me he ka wia e hnân úhöücú me hluma hnyi ta je hnyei hia. 21 Ke haba uma eang ae beú görany ai, ame he ka hnân láia ka tavat adre me he, me ha, ka habe, Anyin a ieú Iehova ame ányá helâe ka hnyei ang me uma eang? 22 Ke adre me he ka thu, ka habe, Can ödrin e hna degeci Iehova Khongon je lakamödrin, at ame hum ödrin únyi hnyi hnyei Aigupito, me hom ke je khong bi, me khudrung ködrin, me bi athnyaba ködrin: anyin a wale e ame oâ ködrin ta je únyi eang ae kong.

### HNHYIMAKAN 8.

**K**A um dö je huna a twente, wale hnö Solomona hna op uma umö Iehova hnyin, me umen bi uma, 2 me haba je taun a hia but ham hnö Hiram kö Solomona, me Solomona ame up ödrin me olabâ lakon Isaraela hnyin.

3 Ke haba Solomona ame he Hamathezoba ai, me hom úhnyükongo. 4 Me e ame op Tademora hnyi hnyebuba, me je taun hia hnân ip omjeú, waleji e ame otilâ hnyi Hamath. 5 Ke e ame op Bethe-horona ethö, me Bethe-horona eú, li taun adre up haginny, me je hak veto, me je homagöüle, me je ohmäiny; 6 me Baalath, me je taun hnân ip omjeú anyi Solomona, me je taun hobi kâu je kariota, me je tauniny anyin tavat tabö hors, me je únyi hia ame we Solomona he ka op hnyi Jerusalema, me Lebanona, me je ke keihen hia hnyei e ame musi hnyin. 7 Ke haba tavat hia a kolon a at Heth, me Amora, me Perizi, me Hivi, me Jebusi, wale a ca at Isaraela; 8 ke lakudrin a je wan hwabödrin hnyi hnyei, waleji a ca ohia hnen lakon Isaraela, me haba Solomona ame wia keihen gadrin he ka bi athnyaba, ke ne o but hnyi bong ang. 9 Haba Solomona ame ca kunâ lakon Isaraela he ka bi athnyaba hnyi anyin huliwa; ke ödrin tavat vat, me je taben ae beönua, me taben anyin je kariota, me tavat tabö hors. 10 Wale je taben ae beönua unyi Solomona than, ödrin tu haded ke fifte, hnyat musö tavat. 11 Ke haba Solomona ame hom but momo nöku Farao únyi hnyi taun anyi Davita ka hnyi uma e ame op hobi kâu: anyin a haingen, ka habe, Ame ca he öiök ka laba hnyi uma umö Davita than Isaraela, anyin ae kap je dok adre me oâ tang tangö Iehova kâu.

12 Ke haba Solomona ame hudo je hut

kö Iehova hon taben hut anyi Iehova, wale e ame ányá cicö poretiko, 13 k' ame bi hanymen adre me thu hnyi ke bong me ke bong, k' ame hudo hoton hnanyibu anyi Mose, hnyi je sabath, me je tehi a teb únyi, me hnyi je bijeú adre me thu, wale kun hnyi huna, wale bijeúiny areto adre me ca levená, me bijeúiny je wik, me bijeúiny uma hunuma. 14 Ke e ame huna hoton hna otilâ ga Davita a kamen je deö hanymen tavat bihut, me at Levi ka je hanymödrin, he ka ogáná, me huliwa hnyi hnyimakan tavat bi hut hoton huliwa hnyi ke bong me ke bong: me tavat tuö hwanuma hoton je dö hnyi je homagöüle: anyin a hia but huna helâe Davita aten Khong. 15 K' ödrin e ca ohavá hnanyibu anyin than ka tavat bi hut, me at Levi, ge ta je únyi hia, me ta je omjeú. 16 Ke a hia but Solomona penapena anyin ta je huliwa ke ne o but hnyi bong adre me bi taben hnyin uma umö Iehova, ke ne o but a um dö. K' adre umö uma umö Iehova helâe.

17 Ke haba Solomona ame he Ezionagibera ai, me Eloth ai, hnyi hobat köiöiny hnyei Edoma. 18 Ke haba Hiram ame kunâ kâu je hu a deny lathnyabainy, me lathnyabainy a hnyat wâhmakhmeto köiö: k' ödrin e tha he me lathnyabai Solomona Ofira ai, me hom gol úheny e a foa haded ke fifte je talan, me hom e kö Solomona than.

### HNHYIMAKAN 9.

**K**' a löng ut momo than Sheba lung anyi Solomona, me e ame o ka cubic Solomona ge ta je hofuc hnei ae hmak hnyi Jerusalema, tha e me bunyen ae se hia, me je kamela ödrin e hijen je utö ae bo so, me gol ae gan, me je veto ae únyi hnathu: k' ame o but momo kö Solomona me e ame úhnenamö më ge ta je únyi hia eú hnyi hnyekon. 2 Ke haba Solomona ame omanená ka momo anyin ta je hofuc hia: e ba ke únyi adre ikhâlâ kö Solomona wale a ca omanená ka momo. 3 Ke a hia but momo than Sheba wâ metâ anyi Solomona, me uma e ame op, 4 me jeú hon anyin laulau. me ulabainy lathnyabainy, me útilen hnyat huliwa kâu, me je khaúödrin; me tavat hok utkaia hnân belen, me khaúödrin; me gethen ame ölö ka hnyi uma umö Iehova: me ame gâ ön momo. 5 Me haba momo ame ha ka than, ka habe, E hnathu úthu metu oge löng hnyi ik hnyei ge hnâm hna

## II. MAN ŪLABAINY JE THAN 10.

ányâ, me ânyâm metâ. 6 Ke so bi oge ca kap hnödrin je hna ha, ke ne o but oge me o me wâ ge li emakök: ke wâ bi adre ca hia but thumetu nya hafiny ânyâm metâ: u beönua hon metâ oge me löng. 7 E hnahic tavat unyâm, me hnahic lathnyabaem, tavat adre me utitilen hnyi hnyimâkâm hnyi je bong, me löng ânyâm metâ. 8 Ole kö Iehova a Khongom, at ame senyin gam he ka olabö u hon anyin theron, he ka than hobi kö Iehova a Khongom: anyin a Khongom ame betenge ge at Isaraela he ka otethm' ödrin nyiele balua, anyin a wale e ame otilö u he ka than hudrin, he ka ânyâ wisa, me ûnyi ae ûcü. 9 Me haba momo ame ham ka than gol a wan haded ke twente je talan, me je utö ae bo so ae ti gan, me je veto ae ûnyi hnathu: ke ba hmetu utö ae bo so helâ me hnen momo than Sheba hna ham kö Solomona than. 10 Ke haba lathnyabai Hirama, me lathnyabai Solomona, tavat adre hom gol ûheny Ofira, ödrin e hom je ûö alemuga me je veto ae ûnyi hnathu. 11 Ke haba than ame huliwan je ûö alemuga hnân gethen he ka ölö ka hnyi uma umö Iehova, me uma umen than, me hnân je kitara me je nabeli hobi kâu tavat khumöng: ke adre ca wâ ehac a helâe hnyi hnyei Juda. 12 Ke haba Solomona than ame ham ka momo than Sheba ta je ûnyi hia ae weny, e ame sumâtâ, ca ha bi hnen momo hna hom ka than. Me haba momo ame hwiö thö me he ka hnyi iny hnyei, tha e me lathnyabainy.

13 Haba ihmakiny gol adre me hom kö Solomona hnyi huna a khaca, me, siks haded ke sikste siks je talan gol; 14 me gol minya a hom hnen tavat ûcü, me tavat ûcü tot: ke haba je than Arabia me latuhan hnyei ödrin e hom gol me sileva kö Solomona. 15 Ke Solomona than ame ânyâ je ûnyi adre vakha a gol adre me kokot a tu haded: haba khaca ûnyi adre vakha, me siks haded je sekel gol adre kokot. 16 Me theri haded je bec gol adre kokot; haba bec a khaca me theri haded sekel: k' ame ip hnyin uma utöiny Lebanona hnen than. 17 Ke haba than ame ânyâ ke theron ae gan a nyon elefan, me tube ge gol ae so. 18 Ke e hu wacuat hnân ölö ka hnyi theron siks je utöiny wacuat, me taben can a gol adre me ohmâ ka hnyi theron, ke e hu ci hnyi li ke keihen hnyi hna lap, ke lo li liona ame tot hnyi li ci. 19 K' ame tot twelv je liona eling hnyi lo li ke keihen

hon je utöiny je wacuat a siks: e ba ûnyi adre ânyâ helâe hnyi je dökhu hia thithö. 20 Ke haba je kaia hnân ic anyi Solomona than, me gol, ke ta je kaiainy uma utöiny Lebanona, me, gol ae so hia: ke adre me ca oûnyihnatho sileva hnyi ûö Solomona. 21 Anyin e hu ta je hu hon than ame labö he Tasesa ai me lathnyabai Hirama: k' ame labö khöp je huiny Tasesa hnyi obiny je huna a kun, me hom gol, me sileva, me nyon elefan, me je cako, me je pikäk. 22 Ke beönua Solomona than hon je than hia eang hmeledrany hnyi omjeü me metâ. 23 K' ame elöm Solomona ge ta je than hia eang hmelen he ka löng anyin metâ wale a ip Khong eü hnyi hnyekon. 24 Ke ödrin e ve hom anyidrin je bwihlany, a je kaia sileva, me je kaia gol, me je úkbaü, me je ûnyi hnân vat, me utö ae bo so, me je hors, me je miul, adre me fatâ hnyi ke huna me ke huna. 25 Ke hu ga Solomona foa thauzan je hnyeuleny je horse me je kariota, ke twelv thauzan tavat tabö horse, wale e ame ip hnyi je tauniny kariota, me keihen unyin than hnyi Jerusalema. 26 Ke e ame musi hon ta je than hia thithö hwân hnyi Wagewe ke ne o but hnyi hnyei iny at Filisiti, me ke ne o but hnyi hnyigöulen Aigupito. 27 Ke haba than ame osehia sileva hnyi Jerusalema me me helâ me je veto, k' ame osehia minya je ûö arasi me me helâ me je sukamore hnyi je hnyei ae hnyikânâi. 28 K' adre me hom kö Solomona je hors ûheny Aigupito me ta je hnyei hia.

29 Ke haba kolon je hna ânyâ hnö Solomona a bân me biliny, hawa, adre ca sibnalimen hnyi tusi anyi Nathana perofeta, me hnyi hna perofeta hnö Ahia at Silo, me hnyi hna omanenâ kö Ido at wâ ga Jeroboama nöku Nebata? 30 Ke haba Solomona ame musi hnyi Jerusalema hon at Isaraela hia fâte je huna. 31 Ke Solomona ame tha mokut ut me lakamen, me adre me konâm e hnyi taun anyi Davita a kamen: ke amö than biju Reoboama a nokon hwaban.

### HNYIMAKAN 10.

**K**E Reoboama ame he Sekema ai: anyin ame o but hnyi Sekema Isaraela hia he ka otilâ e ka than. 2 K' a löng ut e Jeroboama nöku Nebata, (anyin a e hnyi Aigupito waleji e ame kec ka hnyin ga Solomona than) me haba Jeroboama ame o

## II. MAN ŪLABAINY JE THAN 11.

hmetu ūheny Aigupito. 3 Me ödrin e ūkhünöng me hawâ e; ke haba Jeroboama ame tha o me at Isaraela hia, me ödrin e ha kö Reoboama, ka habe, 4 Haba kâmâm ame ohmâkâ ūnyi hnân ūhûkâlâkôuâ humun: ke walang ang, e so u me he ka ohâhâ huliwa anyin kâmâm ae vec, me ūnyi hnân ūhûkâlâkôuâ ae hmak e ame ip huumun, me öhmun e he ka bi athnyabaem. 5 Haba e ame ha ködrin, ka habe, Hmetu thö kõnya hwaban kun ta bong. Me ame vese thö tavat. 6 Haba Reoboama ame ūhnenamö me je hingat, tavat adre me tot hnyi hnyimakö Solomona a kamen ke tiga möt, me ha, ka habe, Ie hofuc öbun e ūnyküme he ka thu ka tavat ang? 7 Ke haingödrin kâu, ka habe, U je ne he ka menyik ka tavat ang, me osenyini ödrin, me ha ködrin je hofuc ae so, ödrin e ne ka bi athnyabaem hnyi je bong hia thibut. 8 Ke e ame degec hofuc hwan wahingat ödrin e ūhnenamö, me e ame ūhnenamö me je hidröu tavat a tha dö mē, ödrin e tot hnyi hnyimakan. 9 Ke haingen ködrin, ka habe, Ieü anyibun ūhnenamö, m' adre me he ka thu ka tavat ang, ödrin e fuc kõnya, ka habe, Ohâhâ thö ūnyi hnân ūhûkâlâkôuâ waleji a ip kâmâm huhmun? 10 Me ame ha kâu je hidröu tavat a tha dö mē, ka habe, Walang hofuc u me he ka ha ka tavat ang, ödrin e fuc köu, ka habe, Haba kâmâm ame ohmâkâ ūnyi hnân ūhûkâlâkôuâ huhmun, ke u me he ka ohâhâ e huhmun; walang u me he ka ha ködrin, ka habe, Haba bakevicik ame he ka hake hon hnyi cica. 11 Haba cica ame ip hubun ūnyi hnân ūhûkâlâkôuâ ae hmak, ke oge me he bi nya ka bi hanen e hubun: haba cica ame kuc öbun ge je osö, ke oge me he bi nya ka kuc öbun ge je sekopio. 12 Ke haba Jeroboama me tavat hia ödrin e o kö Reoboama hnyi bong a kuniny, helâ me hna ha ge than, ka habe, Hmetu thö kõnya, hnyi bong a kuniny. 13 Me haba than ame thu hwegiâ ködrin; ke haba Reoboama ame degec hofuc hwan wahingat, 14 k' ame fuc ködrin hoton hofuc hwan wahidröu me ha, ka habe, Haba cica ame ohmâkâ ūnyi hnân ūhûkâlâkôuâ hubun, ke oge me he bi nya ka bi hanen kâe: haba cica ame kuc öbun ge je osö, ke oge me he bi nya ka kuc öbun ge je sekopio. 15 Ke ame ca löng bi than ka tavat; anyin a ūnyi ge Khong, me me he Iehova ka ohwädâ hwan hofuc waleji e ame ha kö Jeroboama nöku Nebata deny Ahia at Silo. 16 Ke a wâ but

Isaraela hia a g' ame ca löng ködrin than, me ame thu tavat ka than me ha, ka habe, Ewa ke keihöhmun unyi Davita? ke ba jekhöühmun unyin nöku Jese: Isaraela lö vese th' öbun ka hnyi umöbun je uma mano: Davita lö, wâ biju anyâm lap. Me ame vese thö Isaraela hia ka hnyi umödrin je uma mano. 17 Ke haba je lakon Isaraela hnyat adre me labâ je tauniny Juda, me, ame musik ködrin Reoboama. 18 Ke haba Reoboama ame kunö Hadorama, at ame o fat; ke haba lakon Isaraela ödrin e lûâ ge veto me ame mokcu. Ke haba Rehoboama ame ie he logot me ölö ka hnyi anyin kariota he ka kec Jerusalema ai. 19 Waleling me adre me degec lap anyi Davita ke ne o but hnyi bong ang.

### HNYIMAKAN 11.

**K**E a o but Reoboama hnyi Jerusalema, me e ame ūkhacaköuâ lap anyi Juda me Beniamina, ödrin wan laded ke eite thauzan tavat adre ūca, a tavat vat, he ka vat me Isaraela, he ka ohmeto dökhu kö Reoboama. 2 Ke ame o but hofuc ho Jehova kö Semaia aten Khong, ame ha, ka habe, 3 Ha thö kö Reoboama, nöku Solomona, than Juda, me ka at Isaraela hia hnyi Juda me Beniamina, ka habe, 4 Walang hna ha hnö Iehova, ka habe, Öbun e ca he ka he, k' öbun e ca he ka vat me je liamekeiny m' öbun: ve hmetu ju öbun ka hnyi umöbun je uma; anyin a ūnyi gak ūnyi ang. Me ödrin e löng hofuc ho Iehova, me hmetu me ca he ka vat me Jeroboama. 5 Ke haba Reoboama ame laba hnyi Jerusalema, me op je taun tue hnyi Juda. 6 E ame op Bethe-leema, me Etama, me Tekoa, 7 me Bethe-zur, me Soko, me Adulama, 8 me Gatha, me Maresa, me Zif, 9 me Adoraima, me Lakisa, me Azeka, 10 me Zorea, me Ajalona, me Heberona, wale hnyi Juda me Beniamina, je taun adre up haginny. 11 Ke e ame ohwegiâ je hnabâ, ma ip hnyin je taben, me ūkhöünâ je jeü, me wakaco me waina. 12 Ke e ame ve ip je bec me je ö hnyi je taun hia, me ti ohwegia. Ke tha hien mē Juda me Beniamina. 13 Ke haba tavat bihut me at Levi a e hnyi Isaraela hia ödrin e ūkhacaköu kâu ūnyi hnyi ta je ke keihen idrin hnyei. 14 Anyin a haba at Levi ödrin e kec hota je hnyabadrin igigilö je taun, me je idrin, me he Juda ai me Jerusalema: anyin a Jeroboama me je lakon ödrin e ob'



## II. MAN ÛLABAINY JE THAN 12, 13.

ödrin ûnyi hnyi hanymödrin ga Jehova : 15 ke e bi ame ka otilâ je at bihut hobi kâu je dok ae görany, me je got бага, me li lakon kau e ame hia but ânyâ. 16 Ke hwabödrin dö, ûnyi hnyi je tribu Isaraela hia, je hnyat ae mou hnyekudrin he ka elöm Jehova Khongon at Isaraela, ödrin e he Jerusalema ai he ka bi hut kö Iehova Khongon lakamödrin. 17 Ke ödrin e otethmä dökhu hnyi Juda, me otethmö Reoboama nöku Solomona ke ne o but hnyi kun ta huna : anyin a ödrin e vhenogethen de Davita me Solomona ke ne o but hnyi kun ta huna. 18 Ke haba Reoboama ame hum Maalatha nöku Jeremoth, nöku Davita, me Abihaila nöku Eliaba nöku Jese ; 19 wale at a hnokoâ je lakon бага a kun ; a Jeuso, me Semaria, me Zaham. 20 Ke e ame hok hwaban e Maaka momo nöku Abasoloma ; ke e ame hnokoâ lakon jia Abia, me Atai, me Ziza, me Selomith 21 Ke Reoboama ame betenge ga Maaka momo nöku Abasoloma hon je laâiân hia, me anyin je momo : (anyin a ödrin eitîn laâiân, me sikste anyin je momo, ke twente eit lakon je бага, me sikste je in.) 22 Ke haba Reoboama ame otilö Abia nöku Maaka hnân taben, me me musö je liamekeiny më : anyin a e ame ûnykûme he ka otilâ e hnân than. 23 Ke e ame metâ me khenâ je lakon hia ka hnyi je ke keihen hia hnyei Juda me Beniamina, ka hnyi je taun adre up haginny : ke e ame ham ködrin jeû ae gan. Ke e ame elâm hobi ködrin je momo ae se hia.

### HNHYIMAKAN 12.

**K**E adre hia but ohmä dokhon dökhu Reoboama k' ame hwege but, me e ame hna degecâ hnanyibu anyi Jehova tha e me Isaraela hia. 2 Ke haba hnyi huna a thabûngi Reoboama than, me ame o but Sisaka than Aigupito Jerusalema ai he ka vat, anyin ödrin e ânyâ hwakecin ae kong kö Jehova, 3 me je kariota a twelv haded, me tavat tabö horse a sikste thauzan : ke ca hnân bi aú tavat adre me tha he më ûheny Aigupito ; a at Lubi, me Suki, me Aithiop. 4 Ke e ame hûgûnâ je taun adre up haginny anyin at Juda, me o hnyi Jerusalema. 5 Haba Semaia a perofeta ame o kö Reoboama, me je taben hnyi Juda a hnyat ûkhacaköu hnyi Jerusalema ga Sisaka, me ha ködrin, ka habe, Walang hna ha hnö Jehova, ka habe, Öbun e hia but

digic nya, anyin a wale oge hia but hna degeci öbun bi ka hnyi hnyamö Sisaka. 6 Me ame oûhnyûkongu ödrin bi je taben hnyi Isaraela me je than, me haingödrin, ka habe, E wisa Jehova. 7 Ke a wâ but Iehova a ödrin e oûhnyûkongi ödrin bi, me ame o but hofuc ho Iehova kö Semaia, ka habe, Ödrin e oûhnyûkongi ödrin ; awe, oge me ca he bi nya ka ohî ödrin : ke so bi oge me he ka omi omeli ödrin, k' adre me ca he ka hingâlâ anyik hmönyin ka hnyi hon Jerusalema a deny Sisaka. 8 Ke so bi ödrin e he ka bi lathnyabainy ; me me kham' ödrin bi anyik huliwa, me huliwainy je dökhuiny ta je hnyei. 9 Ke ame o but Sisaka than Aigupito ka Jerusalema, me hom je omjeûiny uma umö Iehova, me uma umen than ; e ame hom hia thibut : k' ame hom minya je bec gol waleji a ânyâ Solomona. 10 Haba Reoboama than ame ânyâ je bec bras me hwaban, me hna but e ka taben tavat tue, tavat adre me tuö hwanumen uma umen than. 11 Ke haba hnyi je ûen ame didrö than ka hnyi uma umö Iehova, me ame o but tavat tue me hom je bec, ke ödrin e hom hmetu bi ka hnyi hnyeuleny tavat tue. 12 Ke e ame ka oûhnyûkongo e bi, me ame hwiö ûnyi gan hmönyin anyi Iehova, me e ame ca ti ohia e : ke haba khaca e hu ta je ûnyi ae so adre me wâ hnyi Juda. 13 Ke haba Reoboama than ame ohwegiâ e bi hnyi Jerusalema, k' ame musi bi : ke fâti wan je hunai Reoboama hnyi ûen e ame hwân ka musi, ke seventiny je huna e ame musi hnyi Jerusalema, wale taun a úca ga Iehova ûnyi hnyi ta je tribu hia hnyi Isaraela, he ka ip hnyin ien : ke haba ien hinyen, me, Naama momo Amona. 14 Ke e ame ânyâ hulö, anyin a e ame ca penapena hnyekon ke ka elöm Iehova. 15 Ke haba je hna ânyâ hnö Reoboama a bân me biliny, hawa, adre ca sihnalimen hnyi tusi anyi Semaia a perofeta, me Ido at wâ, hoton bongon je dö? Ke haba Reoboama me Jeroboama ödrü me labö vat hnyi je bong. 16 Ke ame tha mokut ut Reoboama me lakamen, me adre me konâm e hnyi taun anyi Davita : ke ame than biju Abia a nokon hwaban.

### HNHYIMAKAN 13.

**K**E haba hnyi huna a eitini Jeroboama than, me ame hwân Abia ka than hnyi Juda. 2 E ame musi hnyi Jerusa-

## II. MAN ÛLABAINY JE THAN 14.

lema hnyi kun ta hunu : ke haba ien hinyen, me, Mikaiia momo nöku Uriela at Gibea. Ke ame vat Abia me Jeroboama. 3 Ke haba Abia ame hnyi vat tha e me anyin deö vat wale tavat vat ae hwege, ödrin foa haded thauzan tavat adre úca : ke Jeroboama ame otilá metá vat m' adre me vat mē haba lahien ödrin eit haded thauzan tavat adre úca, tavat hwege. 4 Haba Abia ame tot hon bucen Zimeri, wale hnyi hnyei ae hut hnyi Eferaima me ha, ka habe, Jeroboama lö, me Isaraela hia, löng ju könja ; 5 hawa, adre ca omanená köbun a haba Jehova Khongu Isaraela ame ham dökhuiy Isaraela kö Davita nyiele balua, káu me je mátrániny ge úhinyköuiny sált? 6 Ke so bi a hia but Jeroboama nöku Nebata athnyabai Solomona nöku Davita tot me úkhin fuc ka tuhan. 7 Ke a hia but úkhacaköu káu tavat ae monu, je atö Belial, wale ödrin e ohwegi' ödrin bi kö Reoboama nöku Solomona, ke tiga hidröu Reoboama, me tiga but hnyekon, ke ca khana bi he ka hlic ödrin. 8 Ke walang ang öbun e únykúme he ka hlec dökhü dökhü Iehova unyin je laku Davita ; ke öbun se hia hmönyin, ke e unyibun li nokon kau gol wale a ányá Jeroboama hobi köbun hnán li khong. 9 Hawa öbun e ca hia but obá tavat bihut kö Iehova, je mátráni Arona, me at Levi, me otilá tavat bihut hobi köbun hoton hwakecin aten ke je hnyei? me me a ne he ke at ka tha e me nak bolok me seven ta je mamoe бага hnán okabá e bi, me e ame he ka at bihut ka at a ca khong bi. 10 Ke haba öhmun, me, Khonguhmun Iehova, ke öhmun e ca hna degecá ; ke haba tavat bihut ödrin e huliwa kö Iehova unyihmun, me, ödrin je mátráni Arona, me at Levi hnyi je hanymödrin : 11 ke ödrin e le kö Jehova je hut me je utö ae bo so hnyi je hnyomaktu me sahac : ke ödrin e ip gaga areto hnan omanená hon laulau gol ae so ; me taben lamepa gol me je lamepainy he ka möt hnyi je sahac : anyin a öhmun e tuö huliwa anyi Iehova Khonguhmun ; ke öbun e hia but hna degecá. 12 Ke wá bi e unyihmun Khong me ban köhmun, me anyin tavat bihut me je trutru ame fuc haten ot, he ka túá haten ot gabun. Lakon Isaraela lö, ca vat bi me Iehova Khongon lakamöbun ; anyin öbun e ca he ka hnahic. 13 Ke haba Jeroboama ame ikhálá ke vat hotudrin ; ke haba ödrin e tot hnyi hnyimakan at Juda, ke vat adre ikhálá hotudrin.

14 K' ame bwele hotudrin ai at Juda, me wá bi, e but vat hnyi hnyimaködrin me hotudrin : me ödrin e tenge kö Iehova, ke haba tavat bihut ödrin e túá je trutru. 15 Me haba at Juda ödrin e hongot hwege : ke ame tiga hongot at Juda, me haba Khong ame kuc Jeroboama me Isaraela hia hnyi hnyimakö Abia me Juda. 16 Ke haba lakon Isaraela ödrin e kec ge at Juda : ke Khong ame hn' ödrin ka hnyi hnyamödrin. 17 Ke haba Abia me lakeiny ödrin e kuc ödrin, ke gan hmá hna hling' ödrin : ke ame ta but a mokcu hnyat a faiv haded thauzan at Isaraela, hnyat adre úca. 18 Me adre me hom úhnyükongo at Isaraela hnyi úen eling, ke hwege but at Juda, anyin a ödrin e labageju kö Jehova Khongon lakamödrin. 19 Ke Abia ame hnu Jeroboama, me húgúná gan je taun, wale Beth-ela me je tauniny, me Jesana me je tauniny, me Eferona me je tauniny. 20 K' ame ca hwege hmetu bi Jeroboama hnyi ta je bong bongu Abia : ke Jehova ame kot e me ame mokcu. 21 Ke ame hwege tot Abia, me e ame hok je momo a fotin me laáian, me hnokoa twente tu lakon je бага, ke sikstin lakon je in. 22 Ke haba kolon je hna ányá hnö Abia, me ta je hwakecin, me hwan ta je hofuc, me, adre hia but sihnalimen hnyi tusiny hna omanená ta je únyi a set hnö Ido a perofeta.

### HNyimakan 14.

**K**E ame tha mokut ut Abia me lakamen me adre me konám e hnyi taun anyi Davita, ke ame than biju Asa a nokon hwaban. Ke ame laba wia hnyei hnyi bongon je bong, ten je hunu. 2 Ke haba Asa ame ányá so me wisa hnyi hnyimakö Iehova a khongon : 3 anyin a e ame ohia je taben hut kanyua, me je dok ae görany, me sö degecá je Aseira ; 4 me huna ka at Juda he ka elöm Iehova, Khongon lakamödrin, me ányá hnanyibu me hna huna. 5 Ke e ame ohia minya je dok ae görany me je hna theati seúnö únyi hnyi je tauniny Juda : ke ame laba wia dökhü hnyi hnyimakan. 6 Ke e ame op je taun adre up haginny hnyi Juda : anyin ame laba wia hnyei, ke ba anyin vat hnyi ta je hunu eling ; anyin a Iehova ame omená e. 7 Ke haingen ka at luda, ka habe, E so ötin e op je taun eling, me ányá je haginny igigila me je hhabá, me homagöule, me ohmáiny :

## II. MAN ULABAINY JE THAN 15.

e tiga e bi hnyei hnyi hnyimakötin, anyin a ötin e elöm Iehova Khongutin; ötin e hia but elâm e, me e ame hia but omen' ötin igigilö. Me ödrin e op me ame hnahic ut. 8 Ke e hu utbavat anyi Asa tavat hok bec me ö, ûnyi ge at Juda theri haded thauzan, me ûnyi ge at Beniamina, tavat hok bec me hlic fana ödrin tu haded ke eite thauzan: haba ödrin hia eling tavat ae hwege. 9 Ke ame o but ködrin he ka vat Zera at Aithiope, me utbavat a wan thauzan je thauzan, ke theri haded je kariota; ke e ame o but hnyi Maresa. 10 Ke haba Asa ame he but he ka ûkhanö mē, me ödrin e otilâ metâ vat hnyi hnyigöulen bucen Zefatha hnyi Maresa. 11 Haba Asa ame tenge kö Iehova Khongon me ha, ka habe, Iehova lö, e ba at ke u thibi he ka hadruâ, wanben at ae hwege, me at ae ba maniny: Iehova lö, Khonguhmun, hadru' öhmun; anyin öhmun e labageju köu, ke hnyi hnyi iâm öhmun e hia but o ka tavat ang ae se. Iehova lö, u thibi Khonguhmun; e so e ca he at ka hwege hom. 12 Me haba Iehova ame kot at Aithiope hnyi hnyimakö Asa, me Juda; me ame kec dö at Aithiope. 13 Ke haba Asa me tavat unyin ödrin e hnu ödrin ke ne o but hnyi Gerara: me ame ta but at Aithiope ae se hia me me ba hmetu manidrin; anyin adre ohi 'ödrin hnyi hnyimakö Iehova, me anyin utbavat; ke ti gan ta je ûnyi adre sö. 14 Ke ödrin e kot je taun hia igigilö Gerara, anyin a ödrin e outö Iehova: me ödrin e sö je taun hia; anyin ae se hia ta je ûnyi hnyin. 15 K' ödrin e sö minya je umen kau, me hom je mamoe me kamela ae se, me hmeto Jerusalema ai.

### HNyimakan 15.

**K**E ame o but hanon Khong kö Azaria nöku Obed: 2 me e ame he ka ûkhanö me Asa, me ha kâu, ka habe, Asa lö, löng ju öbun kõnya, Juda me Beniamina hia: e bala bi Iehova unyibun hnyi ñen öbun e tha öbun mē; ke öbun e ne elâm me öbun e he ka wâ e; ke öbun e ne degec, me e ame he ka digic öbun minya. 3 Ke se hia je bong ae ca lu Khong ae hnathu unyin at Isaraela, ke ba at ûne a at bihut, ke ba hnanyibu: 4 ke so bi hnyi ñen ödrin e hmetu kö Iehova, Khongu Isaraela hnyi anyidrin vec, me elâm e, awe ödrin e wâ e. 5 Ke haba hnyi je

bong eling me ba hnahic ka tavat adre me didrut me didrö, ke gan hmâ vec ködrin hia a aten ta je hnyei. 6 Ke ödrin e hmouca but, k' ame iwahnaihmiöny ke hnyei me ke hnyei, me ke taun me ke taun: anyin a Khong ame bwebweli ödrin ge ta je vec hia. 7 Ke hwege th' öbun, ke ca ohimö je hnyamöbun; anyin adre me he ka bi hwaban anyibun huliwa. 8 Ke a hia but Asa löng je hofuc eling, me hna perofeta hnö Oded a perofeta, me e ame hwege me ohia ta je ûnyi ae ikiki ûnyi hnyi hnyei Juda me Beniamina hia, me je taun e ame hûgúnâ hnyi hnyei ae hut hnyi Eferaima; ke a ame ânyâwia taben hut anyi Iehova, cicö poretiko anyi Iehova. 9 Ke e ame ûkhacaköuâ at Juda me Beniamina hia, me je atkanyua unyidrin ûhedrin Eferaima, me Manase, me Simeona: anyin ae se hia at Isaraela adre me utut unyin, hnyi ûen ödrin e wâ a Iehova Khongon ame tha e mē. 10 Me ödrin e ûkhacaköu hnyi Jerusalema hnyi tehi a kuniny, hnyi huna a fittininy musi anyi Asa. 11 Ke ödrin e hudo kö Iehova hnyi bong eling ke je ûnyi adre me sö, wale ödrin e hom, seven haded je bolok, ke seven thauzan je mamoe. 12 Ke ödrin e úhinhinyköu he ka elöm Iehova Khongon lakamödrin ge hnyekudrin ae bekhöt me hanudrin ae bekhöt; 13 ke haba at ama höcö elöm Iehova Khongon Isaraela me adre me he ka hlingâ, ame ne úhnyükong ame ne gan, ame ne бага ame ne momo. 14 Ke ödrin e khemanyin kö Iehova ge hwan ae gan, me hongot, tha e me je trutru me sofara. 15 Ke haba at Juda hia ödrin e senyinâ hna khemanyin: anyin ödrin e khemanyin ge hnyekudrin ae bekhöt, me elâm e ge wedrin ae bekhöt; me ödrin e wâ e: ke haba Iehova ame omen' ödrin igigilö. 16 Ke haba Maaka hinyö Asa than, me e ame wia degecâ e me me ca momo than hmetu, anyin a e ame ânyâ hna theati Aseira; ke Asa ame sö degecâ idola anyin momo, me oamamâ e, me thong degecâ hnyi wagewe Kederon. 17 Ke adre ca hom degecâ je dok ae görany hnyi Isaraela: ke so bi, e wisa hnyeku Asa, hnyi bongon je bong hia. 18 Ke e ame odilâ ka hnyi uma umen Khong ta je ûnyi a okabâ kamen, me ta je ûnyi a ka okabâ, sileva, me gol, me ta je kaia. 19 Ke ba hmetu vat ke ne o but hnyi huna a thöte faiviny musi anyi Asa.

HNIMAKAN 16.

**H**ABA hnyi huna a thöte siksiny musi anyi Asa, haba Baasa than Isaraela ame he but ka vat me Juda, me op Rama, me me ca khana ke at he ka didrut me didrö kö Asa than Juda. 2 Haba Asa ame hom sileva me gol únyi hnyi uma omjeú hnyi uma umö Iehova me uma umen than, me kunâ kö Ben-adada than Suria, at ame laba hnyi Damaseko, me ha, ka habe, 3 E hu anyitu úhinhinköu, ke helâ minya lakamötu : wâ bi, inya oge me kunâ köu sileva me gol ; he thö ka subâ degecâ úhinhinköu me Baasa than Isaraela, me me he but gak. 4 Haba Ben-adada ame ling Asa, me kunâ anyin je taben vat ka vat me je tauniny Isaraela ; me ödrin e kot Ijon me Dana me Abel-maima, me je tauniny ip omjeú hnyi Nafatali. 5 K' a löng ut Baasa, me e ame hna degecâ he ka op Rama, ke e ame umo ju anyin huliwa. 6 Ke haba Asa than ame oc at Juda hia ; me ödrin e sukhöünâ je veto me utö hnyi Rama, waleji a op Baasa ; ke e ame hom hnân op Geba me Mizepa. 7 Haba hnyi úen eling ame o but Hanani at wâ kö Asa than Juda me ha kâu, ka habe, Anyin a u je hia but labageju ka than Suria, me ca labageju kö Iehova Khongom, anyin a wale a haúhaú but gam utbavat anyin than Suria. 8 Hawa, e ca utbavat ae gan hmâ hmönyin at Aithiope, me Lubi, me se hia hmönyin je kariota me tavat tabö hors ? ke so bi anyin a u je labageju kö Iehova, me e ame hn' ödrin ka hnyi hnyamâm. 9 Anyin ame labö ngele mweimwei li emakö Iehova hnyi hmeledrany hia, he ka hadruâ tavat ae bekhöt ut je hnyekudrin kâu. U je hwen monu hnyi únyi ang ; anyin a hwân hnyi úen ang u me he bala ka labö vat. 10 Me ame hmönyin Asa ka at wâ, me ip hnyi uma ceat ; anyin a e ame hmönyin kâu can hofuc e. Ke Asa ame ovecâ keihen tavat hnyi úen eling. 11 Ke wâ bi, haba ta je únyi a ányâ Asa, a bân me a biliny, wâ bi, adre hia but sihnalimen hnyi tusiny je than Juda me Isaraela. 12 Ke haba hnyi huna a thöte naininy musi anyi Asa, me, e ame moko li can ; ke ti gan anyin mok : ke so bi e ame ca elöm Iehova hnyi anyin mok, ke je at bi tren bubuny. 13 Ke a mokut ut Asa tha e me lakamen, k' ame mok hnyi huna a fâte waniny anyin musi. 14 Me

adre me konâm hnyi anyin hing erkemok waleji e ame hia but thu hnân hobi kâu e bi hnyi taun anyi Davita, me ip ju e hnyi hnen hna mokut dok adre öunongöta ge basama, me ke je únyi adre me úhaniken hoton metâiny at ame huliwan je bubuny : ke gan hmâ hnödra hna leú utö ae bo so hobi kâu.

HNIMAKAN 17.

**K**E ame than biju Jehosafata a nokon hwaban, ke e ame penapena hwege úcon at Isaraela. 2 Me a ame ip vat hnyi ta je tauniny Juda adre me up haginy, me ip je lap tue hnyi hnyeida, me je tauniny Eferaima, waleji a hügünâ Asa a kamen. 3 Ke Iehova ame tha e me Jehosafata, anyin a e ame vheno je de Davita a bân a kiben, ke e ame ca elâm unyin je Baala ; 4 ke e ame elâm unyin Khongon kamen, me vheno anyin je hnanyibu, k' ame ca hnu hoton hwakecin Isaraela. 5 Anyin a wale Iehova ame otethmâ dökhü hnyi hnyamen ; ke haba at Juda hia ödrin e hom kö Jehosafata je bwihlany ; ke e gan hmâ anyin omjeú me hmanenanginy. 6 Ke görany hnyekon hnyi ta je hwakeci Iehova : me e ame ohia je dok ae görany, me je Aseira hnyi Juda. 7 Ke haba hnyi huna a kuniny anyin musi, me e ame kunâ anyin je taben, wale Benaila, me Obadaia, me Zakaria, me Nathaniela, me Mikaia he ka úne hnyi je tauniny Juda ; 8 me tha e mödrin at Levi, wale Semaia, me Nethania, me Zebadia, me Asael, me Semiramoth, me Jonathana, me Adonia, me Tobia, me Tobadonia, tavat Levi ; ke tha e mödrin Elisama, me Jorama, li at bihut. 9 Me ödrin e úne hnyi Juda, ke unyidrin tusi hnanyibu anyi Iehova ; ke ödrin e ngenu hnyi je tauniny Juda, me úne unyin tavat. 10 Ke ame ta but hna outö Iehova hon je dökhüiny hia je hnyeida igigilö Juda, me ödrin e ca vat me Jehosafata. 11 Ke haba keihen at Filisiti ödrin e hom kö Jehosafata je bwihlany, me fâtâ sileva ; ke at Arabia ödrin e hom kâu je meno, a seven thauzan ke seven haded je mamoe бага, me seven thauzan ke seven haded je got бага. 12 Ke ame ti gan tot Jehosafata ; ke e ame otilâ hnyi Juda je hnabâ me je taun hnân ip omjeú. 13 Ke se hia anyin je huliwa hnyi je tauniny Juda ; ke e hnyi Jerusalema tavat vat, a tavat ae hwege.

## II. MAN ULABAINY JE THAN 18.

14 Ke walang úseidrin hoton je lap anyin je lakamödrin; je taben thauzan hnyi Juda; Adena taben, ke tha e me tavat ae hwege ödrin theri haded thauzan: 15 ke haba utangköu më Johanana taben, ke tha e me tu haded ke eite thauzan: 16 me utangköu më, jia Amasia nöku Zikeri, at a ka hamen hna e kö Iehova; ke tha e me tavat ae hwege, ödrin tu haded thauzan: 17 Me únyi ga Beniamina; Eliada at ae hwege, ke tha e më tavat hok fana me bec, ödrin tu thauzan: 18 Ke haba utangköu më, Jehozabada, ke tha e më tavat adre hia but penapena he ka vat, ödrin wan haded me eite thauzan. 19 Haba tavat eling ödrin e bi athnyabainy than, ke ca ha minya tavat a ip than hnyi je taun adre up hagine hnyi hnye Juda hia.

### HNYIMAKAN 18.

**K**E e gan hmâ omjeú me hmanenangi Jehosafata; ke e ame liameúngon me Ahaba. 2 Ke hwaban ke je huna, me e ame he Samaria ai kö Ahaba. Ke Ahaba ame hlingâ ta je mamoe me kau ae se hobi kâu me anyin bunyen, me siwhegiâ e he ka tha he Ramothe-gileada ai. 3 Ke haba Ahaba than Isaraela ame ha kö Jehosafata than Juda, ka habe, Hawa, ötu ma tha he Ramothe-gileada ai? Haingen, ka habe, Iny úcú möu, ke úcú lakeik me lakem; ötin a tha he ka vat. 4 Ke haingö Jehosafata ka than Isaraela, ka habe, Me hnö unyi Iehova hnyi bong ang. 5 Me haba than Isaraela ame úkhacaköuâ ta je perofeta a ödrin foa haded, me ha ködrin, ka habe, Hawa, öhmun e he ka he Ramothe-gileada ai he ka vat, ame ne ba? Me ödrin e ha, ka habe, He thö; k' ame he Khong ka hna e ka hnyi lnyamen than. 6 Me haingö Jehosafata, ka habe, E ba hmetu ke perofeta eang anyi Iehova, m' ötin e he ka hnö minya e? 7 Ke haingen than Isaraela kö Jehosafata, ka habe, Khaca biju at ötin e he ka hnei Iehova a deny e: ke hâkötianök e; anyin a e ame ca labö perofeta so gak bala, ke kong bi: wale jia Mikaia nöku Imela. Me haingö Jehosafata, ka habe, Than lö, ca ha helâe. 8 Me than Isaraela ame hawâ ke eunuka, me ha, ka habe, Ie he thö ka hawo Mikaia nöku Imela. 9 Ke haba than Isaraela me Jehosafata than Juda ödrü me ve laba hon anyidru li theron, adre khavâ je úkhaú, ke ödrü me laba hnyi dok ae ba únyi hnyin

hnyi hna didrö ka hnyi homagöuleny Samaria; ke haba ta je perofeta hia ödrin e perofeta hnyi hnyimaködrü. 10 Ke haba Zedekia nöku Kenaana ame ânyâ li faoiny meno a fao bi, me ha, ka habe, Walang hna ha hnö Iehova, ka habe, U me he ka hagutâ at Suria ge li únyi ang ke ne o but ame hi' ödra bi. 11 Ke haba ta je perofeta hia ödrin e perofeta helâe, me ha, ka habe, He thö Ramothe-gileada ai, me hnahic: anyin ame he Iehova ka hna e ka hnyi hnyamen than. 12 Ke haba úthumetu at a he ka hawo Mikaia ame ha kâu, ka habe, Wâ bi, haba ifucin je perofeta ödrin e omanenâ so ka than ge hnyem a khaca: e na so minya ju hwâm hofuc helâ me hodrin, me u ma he ka fuc so. 13 Me haingö Mikaia, ka habe, Kia inya Iehova, ke haba hofuc ame he Khonguk ka ha, me oge me he bi nya ka ha. 14 K' ame o but e ka than, me than ame ha, ka habe, Mikaia lö, hawa, öhmu me he ka he Ramothe-gileada ai he ka vat, ame ne ba? Ke haingen, ka habe, He th' öbu, me hnahic; k' adre me he ka hnödrin ka hnyi li hnyamöbu. 15 Ke haingen kâu than, ka habe, Hawa oge me he ka ibi ove ha köu a u ma ca ha könya ke hofuc ke hnathu thibi hnyi iö Iehova? 16 Ke haingen, ka habe, Oge me wâ but at Isaraela hia adre me ve avâ but hon je bucen helâ me je mamoe ae ba at ame tuö: ke haingö Iehova, ka habe, E ba tuhan tavat eang; ve hmetu ju ödrin ka hnyi je hnyabadrin me hnahic. 17 Hababa than Isaraela ame ha kö Jehosafata, ka habe, Awe, oge ca ha köu a e ame ca he ka perofeta so gak, ke únyi bi ae kong? 18 Ke haingö Mikaia, ka habe, Anyin a wale löng ju hofuc ho Iehova: oge ö Iehova but ame laba hon anyin theron, ke ame üttilen je dö hnyi drany hnyi ke keihen metâ me meny. 19 Ke haba Iehova ame ha, ka habe, Ie at ame he ka cubic Ahaba than Isaraela, me me he ka hnyi Ramothe-gileada? Me ame ha helâng ke at, ke helâe ke at. 20 Me ame he but ke hanu me tot hnyi hnyimakö Iehova, me ha, ka habe, Oge me he ka cubec e. Ke haingö Iehova kâu, ka habe, Ame he ka kâmâu? 21 Haingen, ka habe, Oge me he ka he but, ke oge me he ka bi hanu ae thoi hnyi hnyimen ta je perofeta hia. Haingen, ka habe, U me he ka cubec e, k' u me he ka tom: he but, me ânyâ helâe. 22 Ke walang ang, wâ bi, a hia but Iehova ip hanu ae thoi hnyi hnyimen ânyâm ta je perofeta

## II. MAN ÛLABAINY JE THAN 19, 20.

eang ; ke a hia but Iehova ha ûnyi ae kong gam. 23 Haba Zedekia nôku Kenaana ame hakekenyâ, me khaû wahicö Mikaia me ha, ka habe, A deny ua hanu Iehova ûheny unyik he ka ha bi kôu? 24 Ke haba Mikaia ame thu, ka habe, Wâ bi, u me he ka wâ hnyi bong u me he ka kec ka hnyeule eiö hnyin he ka lubaduöng. 25 Haba than Isaraela ame ha, ka habe, Hum Mikaia thö, me hom e kö Amona at ame musö taun, me Joasa nokon than ; 26 me ha, ka habe, Walang hna ha hnen than, ka habe, Ip ju e hnyi uma ceat, me hân ge aretoiny vec, me köiöiny vec, ke ne o but oge me o me hnahic. 27 Haba Mikaia ame ha, ka habe, U je ne he ka o me hnahic awe, a ca ha Iehova a deny inya. Ke haingen, ka habe, Löng ju öbun tavat hia.

28 Haba than Isaraela me Jehosafata than Juda ödru me he Ramothe-gileada ai. 29 Me haingen than Isaraela kö Jehosafata, ka habe, Oge me he ka oiyongi nya bi, me hnyi vat ; ke u me he ka khavâ ânyâm je ûkhaû. Me than Isaraela ame oiyongâ e bi, me e ame hnyi vat. 30 Ke haba than Suria ame hûna ka je taben anyin je kariota, ka habe, ca he bi ka vat me tavat ae ûhnûykong me gan, ke hake than Isaraela thibi. 31 Ke haba je taben kariota ödrin e ö Jehosafata, me ödrin e ha, ka habe, Wale but ang than Isaraela. Anyin a wale ödrin e saû kâu he ka kot : ke haba Jehosafata ame hongot göranyai, me Iehova ame hadruâ e ; ke Khong ame ohmetu ödrin gan. 32 Ke ame wâ ge je taben kariota a ca than Isaraela, me ödrin e hna but. 33 Ke haba ke at ame hlec mono anyin fana, me ame aat dö than Isaraela hnyi wanben hna hújâ ûkhaûen vat : me e ame ha ka at ame owisa anyin kariota, ka habe, Saû but, me hum nya ûhek hnyi vat, anyin a oge aat dö. 34 Ke e gan tot vat hnyi bong eling : ke so bi haba than Isaraela ame otilâ e bi hon kariota cicö at Suria ke ne o but sahac : me ame mokcu hnyi ûen ame dit seûnö.

### HNyimakan 19.

**K**E haba Jehosafata than Juda ame hmetu ka hnyin umen uma hnyi Jerusalema me hnahic. 2 Ke haba Jehu nôku Hanani at wâ ame he me ûkhanö mē, me ha kö Jehosafata than, ka habe, Hawa, e so kôu he ka hadruâ at ae kong, me

betenge gadrin adre me hûkötio Iehova ! anyin a wale e hu hmönyin anyi Iehova kôu. 3 Ke so bi, e hu so adre wâ gam, anyin a u je hia but ohia je Aseira hnyi hnyei me penapena hnyekom he ka elâm Khong.

4 Ke Jehosafata ame laba hnyi Jerusalema : ke e ame vheno hmetu hnyei, hwan hnyi Bere-seba ke ne o but hnyei ae hut hnyi Eferaima, me ohmetu ödrin kö Iehova Khongon lakamödrin. 5 Me e ame otilâ tavat owisa hnyei hnyi je tauniny Juda adre up haginy, hnyi ke taun me ke taun. 6 me ha ka tavat owisa, ka habe, Ûnykûme wia hnöbun hna ânya : anyin a öbun e ca owisa hobi kâu at, ke Iehova bi ; ke e bi unyibun öbun ka owisa. 7 Anyin a wale outö Iehova ju öbun : wâ eaû ke ânyâ thö : anyin ae ba monu unyi Iehova Khongutin, ke e ame ca wâhmakhmetoâ at, k' ame ca kap hwaban. 8 Ke Jehosafata ame otilâ hnyi Jerusalema ke je at Levi, me hnyat bihut, me je kamen ae beönua hnyi Isaraela. he ka owisa hobi kö Iehova, me hnyi je iwatretra. Ke ödrin e hmetu Jerusalema ai. 9 Me e ame ha wia ködrin, ka habe, Öbun e he ka ânyâ helâe me outö Iehova hnyi hnathu me hnyok ae wisa. 10 Ke ka o köbun ke iwatretra ûnyi ge je liamekeiny möbun a hnyat labâ anyidrin je taun, ge dra, ame ne hnanyibu, me hna hûna, me hna otilâ, me hna owisa, me öbun e he ka kôu ködrin, m' ödrin e ca he ka kong kö Iehova, wâ e nye o hmönyin köbun me je liamekeiny möbun : ânyâ thö helâe me öbun e ca monu. 11 Ke, wâ bi, Amaria, at bihut ae beönua, e bi at musi öbun hnyi ta je ûnyi anyi Iehova ; me Zebedia nôku Isamaela, at ame musö lap anyin Juda, ge ta je ûnyi anyin than : me at Levi a je homakan hnyi hnyimaköbun. Hwege thö, me ânyâ thö, k' ame he Iehova ka tha e me at ae so.

### HNyimakan 20.

**K**E hwaban ûnyi eling ame o but lakon Moaba, me lakon Amona, ke tha ödrin mē ke je at Amona, he ka vat me Jehosafata. 2 Me ame o keihen me thumetu Jehosafata, ka habe, Ame o but kôu tavat ae se hia hmönyin ûnyi hnyi ke keihen köiö ûhedra Suria ; ke wâ bi, ödrin dut hnyi Hazazo-tamara (wale Eni-gedi). 3 Ke haba Jehosafata ame ot me hwân he he ka elâm unyi Iehova : me otilâ he ka ca

## II. MAN ŪLABAINY JE THAN 20.

han ehe e hnyi Juda hia. 4 Me ame ūkhacakōu thō at Juda hia, he ka elām ūhadruo unyi Iehova : ödrin e o but ūnyi hnyi ta je tauniny Juda hia he ka elām unyi Iehova. 5 Ke haba Jehosafata ame tot hnyi ūkhacakōu anyin at Juda me Jerusalema, hnyi uma umö Iehova, cicö hnyeule ae teb ūnyi ; 6 me e ame ha, ka habe, Iehova lö, Khongon lakamöhmun, hawa, ca u Khongon drany, me at ame musö ta je dökhuieny hia je hnyi? hawa, e ca hwege me man hnyamām, me me ca khana ke at he ka hwege hom? 7 Hawa Khonguhmun lö, ca u at ame obā tavat adre me labā hnyi ang hnyi hnyimakan lakem a at Isaraela, me ham e ka mātāni Aberahama a hanām nyiele balua? 8 Me ödrin e labā e me op hnyin e uma hobi kâu iām, me ha, ka habe, 9 A ne o köhmun ūnyi ae kong, ame ne hele vat, ame ne hna owisa, ame ne mok ae cap, me hmiā, öhmun e he ka tot cicö uma ang, me hnyi hnyimākām, (anyin a e bi iām hnyi uma ang.) me tengge kōu anyi anyihmun vec, me u me he ka löng me omelö. 10 Ke walang ang wā ju lakon Amona, me Moaba, me bucen Seira, waleji u je ca hna at Isaraela he ka vat mödrin, hnyi ioidrin ūheny Aigupito, ke so bi ödrin e hwiö ūheny unyidrin, me ca ohi' ödrin ; 11 wā bi, hnödrin hna bi hwaban köhmun, me o but ang he ka ob' öhmu ūnyi anyi em hnyi waleji u je ham köhmun. 12 Khonguhmun lö, u me ca he ka owisa ködrin? anyin ae ba manihmun he ka tot ka tavat ae se hia hmönyin adre me o köhmun ; ke ca khan' öhmun ke ūnyi he ka anyā : me öhmun e wā hmö u. 13 Ke haba Juda hia ödrin e tot hnyi hnyimakö Iehova, tha ödrin me tavat ae ūhnyükong gadrin, me laöiödrin, me lakudrin. 14 K'ame ta hanu Iehova hu Jaziela, nöku Zakaria, nöku Benaia, nöku Jeiela, nöku Matania, at Levi, hanen laku Asafa, hnyi wanben ūkhacakōu ; 15 ke haingen, ka habe, Löng ju öbun at Juda hia, me öbun aten Jerusalema, me u Jehosafata than : walang hna ha köbun hnö, Iehova, ka habe, Ca ot bi, me ca öbubuny can tavat ang ae se hia hmönyin ; anyin a ca anyibun vat ang, ke vat bi anyin Khong. 16 Haba nyi he th' öbun ködrin : wā bi ödrin e ölö jem deny Ziz ; k' öbun e he ka ö 'drin hnyi obiny hnyigöuleny bucen, cicö hnyebubainy Jeruela. 17 E ca ūnyi hnathu köbun he ka vat eling : tot metā ju, me todru, me wā ūhömeli anyi Iehova hobi köbun a at

Juda me Jerusalema : ca ot bi, me ca öbubuny : he th' öbun ködrin nyi : anyin a tha Iehova möbun. 18 Ke haba Jehosafata ame nom hnyikānāi : ke haba Juda hia me aten Jerusalema ödrin e ta ju hnyi hnyimakö Iehova, me khudrung kö Iehova. 19 Ke haba at Levi, hanen lakon at Kohatha, me lakon at Kora, ödrin e tot he ka ogānö Iehova Khongon at Isaraela, me fuc hwege göranyai. 20 Ke ödrin e vesā hnyi hnyomakatu me he ka hnyi hnyebuba hnyi Tekoa : ke ödrin e tiga he, me haba Jehosafata ame tot me ha, ka habe, Juda lö me aten Jerusalema, löng ju könya : labageju kö Iehova Khongubun, m' öbun e he ka tethmä ; labageju ka anyin je perofeta me öbun e he ka hnahic. 21 Me e ame ūhnenamö me tavat, me otillā tavat khumöng kö Iehova, me olungā meciny hwakecin ae kap, ödrin ka he hnyi hnyimakan utbavat, me ha, ka habe, Ole thö kö Iehova, anyin a nyiele balua anyin ibetenggiö. 22 Me ödrin e hwān he ka khumöng, me olungā, me haba Iehova ame ip tavat lubaduöng ūcon lakon Amona me Moaba, me bucen Seira, tavat a o he ka vat me Juda ; ke adre kuc ödrin. 23 Anyin a haba lakon Amona me Moaba ödrin e tot ūcon aten bucen Seira he ka hlingā me ohi' ödrin : ke ödrin e hia but hlingā aten Seira, me ödrin e ka ūhlingödrinkōu ju. 24 Ke a o but at Juda ka hnyi hnabā hnyi hnyebuba, me ödrin e wā tavat ae se hia ; me wā bi, ödrin je komok a ta but, me ba at ame kec möt. 25 K' a o but Jehosafata me lakeiny he ka sö anyidrin ta je ūnyi, ödrin e wā unyidrin je omjeü ae se hia tha e me je komok, me je omjeü ae so, wale ödrin e uny jut hobi ködrin bi, me ba hmetu hmai he ka hom : ke kun bongudrin ka labö sukhöünā ta je ūnyi, anyin ae ti gan. 26 Ke haba hnyi bong a vakiny ödrin e ūkhacakōu hnyi hnyigöulen bucen Beraka ; anyin a ödrin e ole eling kö Iehova : anyin a wale adre me hwenyi ien dok eling Hnyigöulen bucen Beraka ke ne o but hnyi bong ang. 27 Ke ame hmetu but at Juda me Jerusalema hia, me Jehosafata hnyi hnyimaködrin, he ka he hmetu Jerusalema ai me senyin ; anyin a Iehova ame osenyini ödrin hon je iwahnaihmöny mödrin. 28 Me ödrin e o Jerusalema ai me je nabeli me kitara me trutru ka hnyi uma umö Iehova. 29 Ke ame outen Khong hnen je dokhuiny je hnyi, e ka khan' ödrin a Iehova ame vat e tha hien

## II. MAN ÛLABAINY JE THAN 21.

me Isaraela. 30 Ke ame laba wia dökhu Jehosafata : anyin a Khongon ame omenâ e ehele.

31 Ke haba Jehosafata ame musi hnyi Juda : ke thöte faiv je hunainy hnyi ün e ame hwân he ka than ; ke e ame musi hnyi Jerusalema twente faiv je huna : ke haba ien hinyen me Azuba momo nöku Silehi. 32 Ke e ame vheno gethen de Asa a kamen, me ca saû ünyi hnyin, k' ame ânyâ wisa hnyi hnyimakö Iehova. 33 Ke so bi adre ca ohia je dok ae görany ; ke haba khaca e tiga ca um tavat penapena je hnyekudrin ka Khongon lakamödrin. 34 Ke haba kolon je hna ânyâ hnö Jehosafata a bân me biliny, wâ bi, adre hia but sihnalimen hnyi hofuc ho Jehu nöku Hanani, waleji adre ha hnyi tusiny je than Isaraela.

35 Ke hwaban e Jehosafata than Juda ame tha e me Ahazia than Isaraela ; ke haba at eling ame ânyâ hwakecin ae kong : 36 ke e ame tha e mē he ka tibet je hu hnân kec Tasesa ai : ke adre tibet je hu hnyi Eziona-gebera. 37 Ke haba Eliezera nöku Dodava üheny Maresa ame perofeta kö Jehosafata, me ha, ka habe, Anyin a u je hia but tha e me Ahazia, a hia but Iehova ohia ânyâm ta je huliwa. Ke ame hmouca but ta je hu me me ca khan' ödrin he ka kec Tasesa ai.

### HNyimakan 21.

**K**E ame mokut ut Jehosafata tha e me lakamen, me adre me konâm e unyin lakamen hnyi taun anyi Davita : k' ame than biju Jorama a nokon hwaban. 2 Ke hu je liamekeiny mē a laku Jehosafata, wale Azaria, me Jehiela, me Zakaria, me Azaria, me Mikaela, me Sefata : ödrin hia e je бага laku Jehosafata than Isaraela. 3 Ke haba kamödrin ame ham ködrin je bwihlany ae se hia, sileva, me gol, me omjeü ae ünyi hnathu, tha e me je taun adre up haginy hnyi Juda : ke e ame ham dokhon kö Jorama, anyin a e atö. 4 Ke adre me otilö Jorama hnyi dökhu dokhon kamen, k' ame ohwegiâ e bi, me e ame tha hlingâ je liamekeiny mē, me ke je than minya hnyi Isaraela ge hele vat. 5 Thöte tu je hunai Jorama hnyi ün e ame hwân ka than ; ke e ame musi hnyi Jerusalema eit je huna. 6 Ke e ame vheno gethen deny je than Isaraela, helâ me hna ânyâ ge lap anyi Ahaba : anyin a âiân momo nöku Ahaba : ke e ame ânyâ ünyi ae kong hnyi

hnyimakö Iehova. 7 Ke so bi e ca we Iehova bi he ka ohia lap anyi Davita, can ühihinyköu waleji e ame ânyâ me Davita, me helâ me hnen hna ha bânâ he ka ham lamepa kâu me je mâtrâniny nyiele balua. 8 Ke haba hnyi bongon je bong me haba at Edoma ödrin e hügünâ musi ünyi hnyi hnyamen at Juda, me otilâ ke than hudrin bi. 9 Me ame he Jorama me anyin je taben vat, tha e me anyin je kariota hia : ke e ame todru hnyi hnyinghet, me kot at Edoma tavat adre me igigilö e, me je taben kariota. 10 Me haba at Edoma ödrin e hna degecâ at Juda ke ne o but hnyi bongang : ke haba at Libena ödrin e hna degecâ e hnyi ün minya e : anyin a e ame digic Iehova Khongon lakamen. 11 Ke haba khaca e ame ânyâ je dok ae görany hnyi je bucen Juda, me kunâ aten Jerusalema he ka bi ünyi monu, me cubec at Juda. 12 Ke ame o kâu ke tusi ünyi ga Elia perofeta ame ha, ka habe, Walang hna ha hnö Iehova Khongu Davita a kibâm, ka habe. Anyin a u je ca vheno gethen de Jehosafata a kâmâm, me je gethen de Asa than Juda ; 13 ke u je vheno gethen deny je than Isaraela obiünyimono at Juda me aten Jerusalema, helâ me hnâ ânyâ ge lap anyi Ahaba ; ke haba khaca u je hia but hlingâ je liamekeiny möu wale lap anyin kâmâm, tavat ae so hom ; 14 wâ bi, ame he Iehova ka kot lakem ge vec ae gan hmâ, me je lakom, me laâiâm, me ânyâm ta je ünyi hia : 15 ke u me he ka mok gan hmâ ge tangtem, ke ne o but ame he ka hingölö tangtem ge mok hnyi je bong. 16 Ke haba Iehova ame okhüâ hnyekon at Filisiti, me at Arabia tavat adre me hakekenyâ at Aithi-ope, kö Jorama : 17 me ödrin e o hnyi Juda, me kot e, me hom je tang omjeü hia adre wâ hnyi uma umen than, me lakon minya, me laâiân ; me ame ba but nokon ke Jehoaza thiju a wakeiat hmönyin. 18 Ke hwaban ta je ünyi hia eling, Iehova ame kot e me e ame moko tangtyny, me ca khana he ka möt. 19 Ke hnyi ke ün hwaban lo li huna, ame hingölö tangtyny ge mok, me e ame mokcu ge mok ae kong. Ke ödrin e ca leü ütö ae bo so hobi kâu, helâ me hna leü ütö ae bo so hobi kâu lakamen. 20 Thöte tu je hunainy hnyi ün e ame hwân ka than, ke e ame musi hnyi Jerusalema eit je huna : ke e ame he but k' adre ca tengiâ ; me ödrin e konâm e hnyi taun anyi Davita, ke ca hnyi je erkemok anyin je than.



## II. MAN ÚLABAINY JE THAN 22, 23.

### HNYIMAKAN 22.

**K**E haba aten Jerusalema adre me otilö Ahazia a nokon a wakeiat hmönyin ka than hwaban : anyin a hia but hlingá je tuhan hia hnen deö vat adre tha o me at Arabia ka hnyi hna hunuma. Me Ahazia nöku Jorama than Juda ame musi. 2 Fäte tu je hunai Ahazia hnyi úen e ame hwán ka than ; ke e ame musi hnyi Jerusalema khaca hunu : ke haba ien hinyen, me, Athalia momo nöku Omeri. 3 Ke e ame vheno minya gethen deny lap anyi Ahaba : anyin a hinyen ame labö úsabö mé he ka ányá únyi ae kong. 4 Ke e ame ányá hulö hnyi hnyimakö Iehova, helá me lap anyi Ahaba : anyin a ödrin je hnyat úsabö mé hwaban mok anyin kamen, me e ame kong ut. 5 E ame vheno minya anyidrin úhnenamö, me tha he me Jorama nöku Ahaba than Isaraela he ka vat me Hazaela than Suria hnyi Ramothe-gileada : ke ame aat dö Jorama ge at Suria. 6 Ke e ame hmetu Jezerela ai he ka bi anyin je aat, wale hnán je aat hnyi Rama waleji e ame vat me Hazaela than Suria. Ke haba Ahazia nöku Jorama than Juda ame he he ka ö Jorama nöku Ahaba hnyi Jezerela, anyin a e mok. 7 Ke únyi ge Khong mok anyi Ahazia, can e ame he kö Jorama : anyin a e ame o but, me e ame tha he me Jorama ka vat me Jehu, nöku Nimesi, at ame hú ga Iehova he ka subá degecá lap anyi Ahaba. 8 Ke haba Jehu ame tiga bi hwaban lap anyi Ahaba, me e ame wá a g' ame bi athnyabai Ahazia hnen je tuhan Juda me lakon je liamekeiny me Ahazia, me e ame hling' ödrin. 9 Me e ame elöm Ahazia, ke ödrin e kát e, (ke e ame ikhölö hnyi Samaria), me adre me hom e kö Jehu, me hlingá e ; ke ödrin e konám e, anyin a haingödrin, ka habe, E nöku Jehosafata, at ame elöm Iehova ge hnyekon ae bekhöt. Ke ba hmetu bi maniny lap anyi Ahazia he ka kát dökhü.

10 Ke a wá but Athalia hinyö Ahazia a ga moku nokon, me e ame todrö me hlingá je mátrániny lap hia anyin than Juda. 11 Ke haba Joseba momo nokon than, ame hum Joasa nöku Ahazia, me hom duöngá únyi hnyi lakon than adre me hlingá, me tha ipe me at ame hat hnyi hnyeule mokut. Me Joseba momo nöku Jorama than, öiö Jehoiada at bihut, (anyin a e hani Ahazia) ame ikhálá e ga Athalia, me me ca hlingá

e hnen momo e. 12 Ke e ame laba unyidrin hnyi uma umen Khong, k' ame lubaduöng hnyi siks ta hunu : ke Athalia ame musi hnyi hnyei.

### HNYIMAKAN 23.

**K**E haba Jehoiada ame ohwegiá e hnyi hunu a seveniny, me hom je taben haded, wale Azaria nöku Jerohama, me Isamaela nöku Johanana, me Azaria nöku Obed, me Maseia nöku Adaia, me Elisafata nöku Zikeri, me úhinhinyköu mödrin. 2 Ke ödrin e ngenü hnyi Juda, me úkhacaköúá at Levi hnyi je taun hia hnyi Juda, me je kamen ae beönua hnyi Isaraela, me ödrin e tha o hnyi Jerusalema. 3 Ke haba úkhacaköu hia ödrin e úhinhinyköu me than hnyi uma umen Khong. Me e ame ha ködrin, ka habe, Wá bi, ame he nokon than ka musi heláji me hnö Iehova hna ha ge laku Davita. 4 Walang únyi öbun e he ka ányá : ke haba ke keihen gabun a kuniny hnyat adre me didrö hnyi sabath, tavat bihut me at Levi, me hamöbun he ka tuö je hwanuma ; 5 ke hamen ke keihen a kuniny ka laba hnyi uma umen than ; me ke ke keihen a kuniny biju hnyi homagöuleny taben : ke ame he ka hnen hnyi hnyeuleny uma umö Iehova tavat hia thithö. 6 Ke ba at ame he ka dit hnyi uma umö Iehova, e so thibi tavat bihut, me tavat huliwa a at Levi ; hamödrin he ka dit, anyin a ödrin tavat ae kap : ke hamen tavat hia he ka tuö huliwa anyi Iehova. 7 Ke hamen at Levi he ka walö igigilö than, ödrin e ve hom je únyi hnán vat ; ke ame ne he ke at bi he ka dit ka hnyi uma umö Iehova, me adre me he ka hlingá : ke öbun e he ka tha e me than e ka didrö me didrut. 8 Me haba at Levi me Juda hia ödrin e anyá helá me hna huna ga Jehoiada at bihut : ke ödrin e ve hom tavat gadrin, wale tavat adre me he ka didrö hnyi sabath, tha ödrin me tavat adre me he ka didrut hnyi sabath ; anyin a ca oveséá je dö hnö Jehoiada. 9 Ke haba Jehoiada at bihut ame ham ka je taben haded je ö, me je bec, me je bec ae gan anyi Davita than a e hnyi uma umen Khong. 10 Me e ame otilá tavat hia unyin than igigilö, ke ve hu únyi vat hnyi hnyamödrin, hwán hnyi ke keihen metán uma ke ne o but hnyi ke keihen meny uma, me baten taben hut. 11 Me ödrin e hom nokon than, me obicá e ge korona, me han

## II. MAN ÛLABAINY JE THAN 24.

kâu ûnyi hnân ohnatho, me otilâ e ka than : ke haba Jehoiada me lakon ödrin e hû e ; me ödrin e ha, ka habe, E so e möt than. 12 K' a löng ut Athalia hwan tavat adre me wadring me oganâ than, me e ame he ka tavat hnyi uma umö Iehova : 13 me e ame bwele, me wâ bi, ame tot than hnyi anyin tap hnyi hwanuma, ke tha e me than je taben me je trutru ; ke ame senyin tavat hia aten hnye, me tûö je trutru ; ke tavat khumöng ödrin e ânyâ je ûnyi khumöng, me hai je khumöng hnân oganâ. Me haba Athalia ame kia anyin je ûkhaü, me ha, ka habe, Ûhûgûnö dökhu, ûhûgûnö dökhu but ang. 14 Haba Jehoiada at bihut ame hom je taben haded, tavat musö utbavat, me ha ködrin, ka habe, Hom but momo wanben li deö at ; ke haba at ame he ka he hoton, adre me he ka hlingâ ge hele vat : anyin ame ha at bihut, ka habe, Ca he ka hlingâ momo hnyi uma umö Iehova. 15 Me ödrin e hne deny momo ; me e ame he ka hnyi uma umen than hnyi gethen deny homagöuleny je hors : ke ödrin e hlingâ momo eling.

16 Haba Jehoiada ame ânyâ anyin ûhi-hinyköu me tavat hia me than, m' ödrin e lakei Iehova bi. 17 Ke haba tavat hia ödrin e he ka hnyi uma umö Baala, me kia e, me tho omomono je taben hut kâu, me je hna theatâ, me hlingö Matana at bihut anyi Baala cicö je taben hut. 18 Ke haba Jehoiada ame khenâ huliwainy uma umö Iehova ka tavat bihut a at Levi, waleji Davita ame ve ip hnyi uma umö Iehova he ka hudo je hudiny leü kö Iehova, helâ me hna sihnalimen hnyi tusiny hnanyibu anyi Mose, adre me senyin me khumöng, helâ me Davita ame hûna. 19 Me e ame ip tavat tuö hwanuma hnyi je homagöuleny uma umö Iehova, wâ e nye didrö at a bo kong ge ke ûnyi. 20 Ke e ame hom je taben haded, me je than, me tavat musö tavat, me aten hnye hia, me hom than ûnyi hnyi uma umö Iehova : ke ödrin e gethen ûnyi hnyi homagöule ethö ka hnyi uma umen than, me ip than hon theroniny dökhu. 21 Me ame senyin tavat hia aten hnye, me ame laba wia taun ; k' adre hlingö Athalia ge hele vat.

### HNyimakan 24.

**S**EVEN dut ta hunai Joasa hnyi ûen e ame hwân ka than ; ke ame musi hnyi Jerusalema fâte je huna : haba ien hinyen, me Zibia momo Bere-seba. 2 Ke

haba Joasa ame ânyâ ûnyi ae wisa hnyi hnyimakö Iehova, hnyi je bong hia bongu Jehoiada at bihut. 3 Ke haba Jehoiada ame hok li momo hobi kâu than, me e ame hnoköa lakon je baga me hlu. 4 Ke hwaban e Joasa ame ûnyküme hnyi hnyekon he ka ânyâwia uma umö Iehova. 5 Me e ame ûkhacaköuâ tavat bihut me at Levi, me ha ködrin, ka habe, He th' öbun ka hnyi je tauniny Juda me ûhnöhnö ûnyi ge at Isaraela hia mone hnân ânyâwia uma umen Khongubun hnyi ke huna me ke huna, ke so öbun e he but ka omweimweiâ ûnyi e. Ke so bi ame ca omweimweiâ hnen at Levi. 6 Me than ame hawo Jehoiada at ae beönua, me ha kâu, ka habe, Ieü gam u me ca hûna at Levi he ka hom je bwihlany ûnyi ge at Juda me Jerusalema waleji a hûna ga Mose athnyabai Iehova, me ûnyi ge ûkhacaköu anyin at Isaraela, hobi kâu uma hnân ohnatho? 7 Anyin a haba laku Athalia, momo ae kong, ödrin e hia but tho degecâ uma umen Khong ; ke haba khaca ödrin e hia but ham hia ta je ûnyi a kapiny uma umö Iehova kö Baala. 8 Ke ame hûna than, me ödrin e tibet ke tang, me ip eü hnyi homagöuleny uma umö Iehova. 9 Me ödrin e omanenâ hnyi Juda me Jerusalema hia, a g' adre me he ka hom kö Iehova ta je bwihlany a hûna Mose athnyabainy Khong ka at Isaraela hnyi hnyeubua. 10 Ke haba je than me tavat hia ödrin e tha senyin, me hom je bwihlany, me khûâ ka hnyi tang, ke ne o but ödrin e um dö. 11 Ke haba hnyi ta je ûen hia ame oâ but at Levi tang ka tavat tuö ta je ûnyi anyin than, ke ödrin ka wâ but ae gan hmâ mone, me ame o but at sihnalimen hobi kâu than me at tuö ta je ûnyi anyin at bihut ae beönua, me hingälâ tang, me hom, me hmeto e ka hnyi hnen. Ödrin e ânyâ helâe hnyi ke bong me ke bong, ke e gan hmâ mone ödrin e ûhnöhnö. 12 Haba than me Jehoiada ödrü me ham ka tavat bi huliwa hnyi uma umö Iehova ; ke ödrin e bi hwaban tavat up veto me tretrau utö he ka ânyâwia uma umö Iehova. 13 Ke haba tavat huliwa ödrin e huliwa me ödrin e umo huliwa, ke ödrin e ânyâ uma umen Khong me me helâ me ehac, me ohmâ e. 14 Ke ame um dö huliwa, me ödrin e hom ka than me Jehoiada je kolon mone, ke adre tibet kâu je kaia hobi kâu uma umö Iehova, wale je kaiainy huliwa, me hnân bi hut, me je spun, me je kaia gol me sileva. Ke ödrin e bi

## II. MAN ULABAINY JE THAN 25.

lut bala hnyi uma umö Iehova hnyi ta je bong hia bongu Jehoiada. 15 Ke hingat ut Jehoiada ke se hia je bongon, me e ame mokcu; ke wan haded ke thöte je hunainy me e ame mokcu. 16 Me ödrin e konâm e hnyi taun anyi Davita tha e me je than, anyin a e ame ânyâ so hnyi Isaraela, me ka Khong minya me umen uma. 17 Ke hwabân mok a Jehoiada, me ame o je taben Juda, me nom ka than. Me than ame löng ködrin. 18 Me ödrin e hna degecâ uma umen Khongon lakamödrin, me bi athnyaba ke je Aseira me je idola: me ame o but hmönyin ka at Juda me Jerusalema can hulö eling. 19 Ke so bi e ame kunâ ködrin je perofeta, he ka ohmetu ödrin kö Iehova; me ödrin e siwhegi ödrin, ke ödrin e ca löng bi. 20 Ke ame o but hanon Khong kö Zakaria nöku Jehoiada at bihut; me e ame tot hon tavat me ha ködrin, ka habe, Walang hna ha hnen Khong, ka habe, Anyin a ieü öbun e hanyâüâ hnanyibu anyi Iehova me me ca khan' öbun he ka hnahic? anyin a öbun e hia but hna degeci Iehova, me e ame hia but hna digic öbun. 21 Me ödrin e sihnân, me lüâ e ge veto hnyi hnyeuleny uma umö Iehova hoton musi anyin than. 22 Haba Joasa than ame ca ûnykûme ibetengjö anyi Jehoiada a kamen, k' ame hlingâ nokon bi. Ke ame tiga he but ka mokcu, me haingen, ka habe, E na wâ ju Iehova me bi hwaban. 23 Me haba hnyi obiny huna ame o but kâu deö vat anyin at Suria: ke ödrin e o but hnyi Juda me Jerusalema, me kot je taben tavat hia, me kunâ ta je önyin hia adre me sö ka than Damaseko. 24 Anyin ame o but utbavat anyin at Suria a deö vat ae ûhnyükong; me haba Iehova ame hna utbavat ae gan hmâ ka hnyi hnyamödrin, can ödrin e hna degeci Iehova Khongon lakamödrin. Me adre me owisa belâe kö Joasa. 25 Ke ödrin e he but gan (anyin a ödrin e hna e ke gan je imekiny) me ame sihnân e hnen lathnyabainy, can dra dren laku Jehoiada at bihut, me hlingâ hon hnen hna mokut, me e ame mokcu: me ödrin e konâm e hnyi taun anyi Davita, k' adre me ca konâm e hnyi erkemok anyin je than. 26 Ke haba li at ödru me sihnân, me Zabad nöku Simeatha momo Amona, me Jehozabada nöku Simerith momo Moaba. 27 Ke haba ge lakon, me je hok ae hmak kâu, me hna ânyâwia uma umen Khong, wâ bi, adre hia but sihnalimen hnyi tusi ame ha bongon tusiny je than. Ke ame than biju Amazia a nokon hwaban.

### HNYIMAKAN 25.

**T**WENTE faiv but je hunai Amazia hnyi üen e ame hwân ka than: ke e ame musi hnyi Jerusalema twente nain je huna: ke haba ien hinyen, me, Jehoadana momo Jerusalema. 2 Ke e ame ânyâ wisa hnyi hnyimakö Iehova, ke so bi e ca bekhöt ut hnyekon. 3 Ke hnyi üen adre hia but ohmâ dökhu unyin, me e ame hlingâ li lathnyabiny, waleji ödre hlingâ than a kamen. 4 Ke so bi e ame ca hlingâ lakudru, ke e ame ânyâ hoton hna sihnalimen hnyi tusi hnanyibu anyi Mose, waleji a hûna Iehova, ka habe, Ame ca he ka mok je kamen can lakon, k' ame ca he ka mok je nokon can je kamen; k' ame he tavat hia ka ve moko anyidrin bi hulö. 5 Ke haba Amazia ame ûkhacaköüâ at Juda, me khen' ödrin hoton je lap anyin je lakamen, hmelen je taben thauzan me je taben haded, wale Juda me Beniamina hia: me e ame öü ödrin hwân ge tavat a twente huna me gan hon e, me ö ödrin a ödrin theri haded thauzan tavat adre üca, ae ücü ka hnyi vat, tavat hok ö me bec. 6 Ke e ame bi hwaban minya wan haded thauzan tavat ae hwege ûhedrin Isaraela, a ham hwaban wan haded je talan sileva. 7 Ke ame o but kâu ke aten Khong, me ha, ka habe, Than lö, e so ame ca tha he möu deö vat anyin at Isaraela; anyin a ca tha Iehova me at Isaraela, a je laku Eferaima hia. 8 Ke u je ne behe, he thö, hwege thö hnân vat: ke ame he Khong ka otö u hnyi hnyimakan iwahnaihmiöny; anyin ae hu maniny Khong he ka ûhadruö, me he ka ota. 9 Me haingö Amazia ka aten Khong, ka habe, Ötin e he ka kâmâu ta je talan a wan haded waleji o ge ham ka deö vat anyin Isaraela? Ke haingen aten Khong, ka habe, E khanö Iehova he ka ham gâná köu hon e. 10 Haba Amazia ame hake ip ödrin, wale deö vat a o kâu ûhedrin Eferaima, he ka he hmetu ka hnyi hnödrin: anyin a wale ame ubâhlâ anyidrin hmönyin ka at Juda, me ödrin e he hmetu ka hnyi hnödrin me hmönyin ae gan hmâ. 11 Ke haba Amazia ame hnyok бага, me hom lakeiny ka hnyi Hnyigöulen bucen Sâlt, me kot je laku Seira a ten thauzan gadrin. 12 Ke haba ke ten thauzan minya tavat ae möt a hom je laku Juda, me hum ödrin ka hnyi ban kic, me hagut' ödrin ünyi ethö hnyi kic, me ödrin e amam hia. 13 Ke haba aten deö vat waleji a

## II. MAN ÚLABAINY JE THAN 26.

kunâ hmetu Amazia, m' adre me ca tha he mē ka hnyi vat, me, ödrin e utut ka hnyi je tauniny Juda, hwân hnyi Samaria ke ne o but hnyi Bethe-horona, me hlingâ kun ta thauzau gadrin, me sö gan hmâ.

14 Ke haba hnyi úen ame o hmetu thö Amazia úheny hnyi hna kot at Edoma, me e ame hom je khongon je laku Seira, me otil' ödrin hnân je khongon, me nom ködrin, me leú utö ae bo so ködrin. 15 Me ame ubâhlâ thö hmönyin anyi Iehova kö Amazia, me e ame kunâ kâu ke perofeta, at ame ha kâu, ka habe, Anyin a iéú u je elâm unyin je khongon tavat, wale ödrin e ca hia but omelö je atödrin únyi hnyi hnyamâm? 16 Ke e ame tiga fuc kâu, me haingen than kâu, ka habe, Hawa, öhmun e hia but otilö u he ka hnyi hanen úhnenamö anyin than? soju anyin a iéú adre me he ka hlingö u? Me haba perofeta ame um ju, me ha, ka habe, Oge me wâ but a Khong ame únykúme he ka ohio u, can u je hia but ányâ únyi eling, me ca löng hnök hna nö u.

17 Me haba Amazia than Juda ame úsâbö, me e ame úkhünöng kö Joasa nöku Jehoaza, nöku Jehu, than Isaraela, me ha, ka habe, Ötu me he ka úhnyimakötuköu. 18 Me haba Joasa than Isaraela ame úkhünöng kö Amazia than Juda me ha, ka habe, Haba iwadekonginy Lebanona ame úkhünöng ka arasiny Lebanona, me ha, ka habe, Ham dö nokom hlu me me áiân nökkuk: ke haba ke meno hnyeuten Lebanona ame he, k' ame uto iwadekong. 19 Ke haingâm, ka habe, Wâ bi, u je hia but kot at Edoma; k' ame kap göranyi u ge hnyekom he ka hobelöu: laba ju hnyi hnyabam; iéú gam u me he ka okúâ únyi ae kong m' u me he ka ta, u, me Juda a tha ödrin möu? 20 Ke ame ca löng bi Amazia; anyin a únyi ga Iehova m' adre me he ka hn' ödrin ka hnyi hnyamen ta je iwahnaihmiony mödrin, anyin a ödrin e hia but elâm unyin je khongon Edoma. 21 Me haba Joasa than Isaraela ame he; ke haba e me Amazia than Juda ödrü me úhnyimaködrüköu hnyi Bethe-semes hnyi Juda. 22 Me ame kong ut at Juda ge at Isaraela; m' ödrin e ve kec ka hnyi umödrin je uma mano. 23 Ke haba Joasa than Isaraela ame köt Amazia than Juda, nöku Joasa, nöku Jehoaza, hnyi Bethe-semes, me hom e Jerusalema ai, me kia hna up haginny veto hnyi Jerusalema, an hnyi homagöüle Eferaima ke ne o hnyi homagöuleny kopiny, foa haded

je kubit. 24 Ke e ame hom hia gol me sileva, me ta je kaia adre me wâ hnyi uma umen Khong unyi Obed-edoma, me je omjeú hnyi uma umen than, me je hnyat hnân hwaban, me adre me hmetu Samaria ai.

25 Ke e möt Amazia nöku Joasa than Juda hwaban a mokcu Joasa nöku Jehoaza than Isaraela, fiftin je huna. 26 Ke haba kolon je hna ányâ hnö Amazia, a bân me biliny, wâ bi, adre ca sihnalimen e hnyi tusi anyin je than Juda me Isaraela? 27 Ke hwân hnyi úen ame hwiö Amazia ga Iehova, me ödrin e sihnân e hnyi Jerusalema; me e ame kec Lakisa ai: me ödrin e úkhünöng Lakisa ai me hlingâ eling. 28 Me ödrin e hom e hon je hors, me konâm e tha e me lakamen hnyi taun anyi Davita.

### HNYIMAKAN 26.

**K**E haba tavat Juda hia ödrin e hun Uzia, ke sikstin dut hunainy, me otilâ e ka than hnân hwaban kamen a Amazia. 2 E ame op Elath, me ham hmetu e ka at Juda, hwaban dö a mokut ut than tha e me lakamen. 3 Sikstin dut hunai Uzia, me e ame hwân ka musi; ke e ame musi hnyi Jerusalema fifte tu je huna: ke haba ien hinyen me Jekolia momo Jerusalema. 4 Me e ame ányâ wisa hnyi hnyimakö Iehova, hoton hna ányâ hnö Amazia a kamen. 5 Ke e ame penapena hnyekon he ka elâm Khong hnyi je bong bongu Zakaria, at a hu metâ hnyi je hna omanená hnen Khong: ke haba hnyi ta je bong e ame elöm Iehova me haba Khong ame ohnahicâ e. 6 Me e ame he but me vat me at Filisiti, me tho degecâ hna up haginny hnyi Gatha, me hna up haginny hnyi Jabene. me hna up haginny hnyi Asedoda; me e ame op je taun hnyi hnyeí Asedoda, me Filisiti. 7 Ke haba Khong ame hadruâ e he ka vat me at Filisiti, me at Arabia ödrin e laba hnyi Gure-baala, me at Maon. 8 Ke haba at Amona ödrin e ham je bwihlany kö Uzia: me ame lung ut ien ke ne o but hnyi gethen ame dit ka hnyi Aigupito; anyin a e ame hwege tot gan hmâ. 9 Ke haba Uzia ame op je tap ae beú göranyai hnyi Jerusalema hnyi homagöuleny kopiny, me homagöuleny thop, me hnyi hna hwali hnen haginny, me bi aten. 10 Ke e ame op je tap ae beú göranyai hnyi hnyeububa, me khú je an ae se hia, anyin ae se hia haleny je meno; helâe minya hnyi hnyeí ae hnyikánâ, me dok ae tha

## II. MAN ÛLABAINY JE THAN 27, 28.

hon: ke e hu gan tavat belök me ânyâwia vine hnyi je bucen, me hnyi Karemela; anyin a e at ae bebelök. 11 Ke e hu utbavat anyi Uzia, k' ödrin e ve he but ka vat ke deö me ke deö, hoton ûseidrin hna öu ödrin hnö Jeiela at sihnalimen me Maseia a taben vat, hmeli Hanania a taben vat anyin than. 12 Haba ûseiny je kamen ae beönua, hnyat ae hwege, me odrin tu thauzan ke siks haded. 13 Ke e hu gadrin ke deö vat adre hia but ûne, a theri haded ke seven thauzan ke faiv haded, tavat ödrin e vat ge man ae gan, he ka hom hadruâ than k' ame vat me je iwahnai-hmiöny. 14 Ke haba Uzia ame penapena hobi ködrin a utbavat hia, je bec, me ö, me hhabinybak, me je ûkhaûen vat, me cafana, me je veto hnân koloú. 15 Ke e ame ânyâ hnyi Jerusalema le baliseta a ânyâ ge tavat ae metâ, hnân ip hon je tap ae beû goranyai, me je tap taben vat, he ka hlic fana me khuâ je veto ae gan. Me e ame lung ehele; anyin ae ti gan hnödra hna hadruâ, ke ne o but e ame hwege.

16 K' a hwege but e, me ame bi gan hnyekon, me e ame ânyâ ûnyi ae kong, anyin a e ame hanyâûâ hnanyibu anyi Iehova Khongon; anyin a e ame dit ka hnyi uma umö Iehova he ka leû utö ae bo so hon taben leû utö ae bo so. 17 Ke haba Azaria at bihut ame dit hoton, tha e me tavat bihut kö Iehova a ödrin eite, hnyat ae hwege: 18 me ödrin e tot kö Uzia than, me ha kâu, ka habe, Uzia lö, ca hanymâm bi e, wale he ka leû utö ae bo so kö Iehova, ke so bi hanyemen tavat bihut a je mâtrâni Arona, tavat adre okabâ he ka leû utö ae bo so: didrut ûnyi hnyi dok ae kap; anyin a u je hia but hanyâûâ; ke ca hnân e oganö u ûnyi ga Iehova Khong. 19 Haba Uzia ame hmönyin; ke hu hnyi hnyamen taben meic he ka leû utö ae bo so; ke ame tiga hmönyin ka tavat bihut, me ame o but lepera hnyi bariny hnyi hnyimakan tavat bihut hnyi uma umö Iehova, hnyi baten taben leû utö ae bo so. 20 Ke haba Azaria at bihut ae beönua, me tavat bihut hia ödrin e wâ e, me wâ bi a tabâ thö bariny lepera, me ödrin e logotâ obâ e ûheny dok e; eke, me e ame ie didrut bi, anyin a Iehova ame hia but kot e. 21 Me haba Uzia than ame lepera balua ke ne o but hnyi bong e ame mokcu hnyin, k' ame laba hnyi ke uma bi adre hake ip, anyin a e lepera; anyin adre subâ degecâ e ûnyi hnyi uma umö Iehova:

ke Jotham a nokon ame musö biju hnyaban than, me owisa ka aten hnyei. 22 Ke haba kolon je hna ânyâ hnö Uzia, a bân me biliny, me, ame sihnalimen Isaia a perofeta, nöku Amosa. 23 Ke haba Uzia ame tha mokut me lakamen; ke adre me tha konâm e me lakamen hnyi utkânâ iny je than; anyin a haingödrin, ka habe, E lepera: ke ame than biju Jotham a nokon hwaban.

### HNYIMAKAN 27.

**T**WENTE faiv je hunai Jotham hnyi ûen e ame hwân ka than; ke e ame musi hnyi Jerusalema sikstin je huna: ke haba ien hinyen me Jerusa momo nöku Zadoka. 2 Ke e ame ânyâ wisa hnyi hnyimakö Iehova helâ me hna ânyâ hia hnö Uzia a kamen; ke e ame ca hnyi dit ka hnyi uma umö Iehova. Ke haba tavat ödrin e tiga ânyâ monu. 3 E ame op homagöule ethö hnyi uma umö Iehova, ke e ame bi hanen hak veto hnyi Ofela. 4 Me e ame op minya ke je taun hnyi hnyei ae hutiny Juda, me op je hhabâ me je tap ae beû göranyai hnyi hnyot. 5 E ame vat minya me thaniny je lakon Amona, me hwege hudrin. Ke haba lakon Amona ödrin e ham kâu hnyi huna eling wan haded je talan sileva, me ten thauzan je tulut hwit, me ke ten thauzan bali. Ke helâe hnen lakon Amona hna ham kâu hnyi huna a loiny me kuniny. 6 Ke hwege but Jotham, anyin a e ame tuö wia je hwakecin hnyi hnyimakö Iehova Khongon. 7 Ke haba kolon je hna ânyâ hnö Jotham, me anyin je vat hia, me je hwakecin, wâ bi, adre hia but sihnalimen hnyi tusi anyin je than Isaraela me Juda. 8 Twente faiv je hunainy hnyi ûen e ame hwân he ka than, me e ame musi hnyi Jerusalema sikstin je huna. 9 Ke haba Jotham ame tha mokut me je lakamen, me ödrin e konâm e hnyi taun anyi Davita: ke ame than biju Ahaza a nokon hwaban.

### HNYIMAKAN 28.

**T**WENTE but je hunai Ahaza hnyi ûen e ame hwân ka musi; ke e ame musi hnyi Jerusalema sikstin je huna: ke e ame ca ânyâ wisa hnyi hnyimakö Iehova helâ me Davita a kiben: 2 ke so bi e ame vhenogethen deny je than Isaraela, me ânyâ je idola adre oköiâ hobi kâu Baala. 3 Ke

## II. MAN ÚLABAINY JE THAN 28.

haba khaca e ame leú utö ae bo so hnyi hnyigöulen bucen anyin lakon Hinom, k' ame thong lakon bi ge meic, hoton je hwakecin ae ikiki anyin je wanaithila waleji a obâ Iehova hnyi hnyimakan lakon Isaraela. 4 Ke e ame bi hut me leú utö ae bo so hnyi je dok ae görany, me hon ta je hut, me hmelen ta je úö hia ae hát. 5 Anyin a wale haba Iehova Khongon ame hna e ka hnyi hnyamen than Suria ; m' adre me kot e, me hom hwenbâ je hnyat ae se hia a lakeiny, me hum ödrin Damas-eko ai. Ke adre me hna e minya ka hnyi hnyamen than Isaraela, at a kot e, me gan hmâ hna hlingâ. 6 Anyin a haba Peka nöku Remalia ame hlingâ hnyi Juda tavat a wan haded ke twente thauzan hnyi bong a khaca, ödrin hnyat ae hwege hia ; anyin a ödrin e hia but hna degeci Jehova Khongon lakamödrin. 7 Ke haba Zikeri at ae hwege a at Eferaima ame hlingö Maseia nokon than, me Azerikam at ame musö hnyaba, me Elekana utangköu me than. 8 Ke haba lakon Isaraela ödrin e hom je liamekeiny mödrin adre hom hwenbödrin, a tu haded thauzan, wale omomo, me je thöth, me je in, ke haba khaca adre me sö gånâ anyidrin ta je únyi, me hom ta je únyi adre sö Samaria ai. 9 Ke e hu eling ke perofeta anyi Iehova, Obed ien : ke e ame he me úkhanö me je utbavat adre me o hnyi Samaria, me ha ködrin, ka habe, Wâ bi, anyin a Iehova Khongon lakamöbun ame hmönyin ka at Juda, me ame hn' ödrin ka hnyi hnyamöbun, m' öbun e hia but hling' ödrin k' ame sâ thö hnyi drany ai anyibun hmönyin. 10 Ke walang ang öbun e únykúme he ka hom úhnyúkongo je lakon Juda me Jerusalema m' ödrin e lathnyabaibun obaga me omomo : ke hawa, e ba hnöbun hna hanyâúâ ga Iehova Khongubun? 11 Ke walang ang, ling nya ju, me hna hmetu but je bâ waleji öbun e hom ge je liamekeiny möbun : anyin a e but hubun hmönyin ae gan anyi Iehova. 12 Ke haba ke je taben lakon Eferaima, wale Azaria nöku Johanana, me Berekia, nöku Mesilemoth, me Jezikia nöku Saluma, me Amasa nöku Hadelai, ödrin e todrö ka tavat adre o úheny hnyi hna vat, 13 me ha ködrin, ka habe, Öbun e ca he ka hom jem je bâ : anyin a öbun e beányâ únyi ame he ka oâ monu kötin ga Iehova, he ka bi hanen kongitin, me hwakecitin ae monu : anyin ae gan hmâ anyitin monu, ke gan hmâ minya hmönyin ka at Isaraela. 14 Me

haba tavat vat ödrin e hna je bâ me je únyi adre sö hnyi hnyimakan je than, me úkhacaköu hia. 15 Ke haba tavat waleji adre ve ha iödrin, ödrin e todrö me hom je bâ, me okhavâ tavat hia ae ba úkhaú ge je únyi adre sö, me khavâ, me inâ taben hnyeúcadrin, me haödrin, me habelidrin, me osú' ödrin, me otabâ je at ae sényin gadrin hon je asina, me hum ödrin Jeriko ai, tauniny pama, ka je liamekeiny mödrin : ke ödrin e hmetu Samaria ai.

16 Ke haba hnyi úen eling Ahaza than ame úkhünöng ka je than Asuria he ka hadruâ e. 17 Anyin ame o hmetu but at Edoma, me kot at Juda, me hom je hna hwenbâ. 18 Ke haba khaca a hia but utut at Filisiti ka hnyi je tauniny dok ae hnyikánâ, me ke keihen ka hnyi Whaiöiny Juda, me húgúnâ Bethe-semes, me Aijalona, me Gederöth, me Soko me je tauniny, me Timena me je tauniny, me Gimezo me je tauniny : me ödrin bi, ödrin e ka labâ. 19 Anyin a Iehova ame hom úhnyúkongo at Juda ga Ahaza. than Isaraela ; anyin a e ame hia but ányâ hwakecin ae khálânden hnyi Juda, me ti kong hmönyin hwakecin kö Iehova. 20 Ke ame o but kâu Tigelathe-pilesera than Asuria, me ovecâ e, me ca hadruâ e bi. 21 Anyin a haba Ahaza ame hom ke je únyi únyi hnyi uma umö Iehova, me uma umen than, me je taben, me ham ka than Asuria : ke ame ca hadruâ e únyi eling. 22 Ke haba hnyi úen anyin vec, e ame ányâ hmetu hwakecin ae kong kö Iehova, wale than Ahaza. 23 Anyin a e ame bi hut ka je khongon Damaseko, tavat adre kot e : haingen ka habe, Anyin a je khongon je than Suria ödrin e hadru' ödrin. ke oge me he ka bi hut ködrin, m' ödrin e he ka hadruö nya. Ke so bi ödrin e hangâ e me at Isaraela hia a tha ödrin mē. 24 Ke haba Ahaza ame úkhacaköuâ je kaiainy uma umen Khong, k' ame susubâ je kaiainy uma umen Khong, k' ame hlöng je hwanumen uma umö Iehova ; ke e ame ányâ je taben hut hnyi je ke keihen Jerusalema hia. 25 Ke e ame ányâ hnyi ta je tauniny Juda hia je dok ae görany hnân leú utö ae bo so ka ke je khong, me ohmönyini Iehova, Khongon lakamen. 26 Ke haba kolon hnen je hna ányâ, me je hwakecin a bán me biliny, wâ bi, adre hia but sihnalimen hnyi tusi anyin je than Juda me Isaraela. 27 Ke ame tha mokut ut Ahaza me lakamen, me ödrin e konâm e hnyi taun. wale hnyi Jerusalema ; anyin a ödrin e ca

## II. MAN ŪLABAINY JE THAN 29.

hom e ka hnyi je erkemok anyin je than Isaraela: ke ame than biju Hezekia a nokon hwaban.

### HNYIMAKAN 29.

**T**WENTE faiv but je hunai Hezekia hnyi ūen e ame hwân he ka than; ke e ame musi hnyi Jerusalema twente nain je hunai: ke haba ien hinyen me Abia momo nöku Zakaria. 2 Ke e ame ânyâ ūnyi ae wisa hnyi hnyimakö Iehova, hoton hna ânyâ hnö Davita a kiben. 3 Ke haba hnyi hunai a bâniny anyin musi, ke hnyi tehi a bân, me e ame khöng je hwanumen uma umö Iehova, k' ame ânyâwia e. 4 Ke e ame hawâ tavat bihut me at Levi, k' ame ūkhacaköu ödrin hnyi dok ae laü e jimeyö, 5 me ha ködrin, ka habe, At Levi li ling nya ju; okabi öbun ju, ke okabâ thö uma umö Iehova Khongon lakamöbun, me hom degecâ ta je ūnyi ae ikiki ūnyi hnyi dok ae kap. 6 Anyin a haba lakamötin ödrin e hia but ânyâ hwakecin ae monu, k' ödrin e ânyâ ūnyi ae kong hnyi hnyimakö Iehova Khongutin, me hna degecâ e, me wia je hnyimaködrin ūnyi hnyi hnyaba Iehova, me hwiö hotudrin kâu. 7 Ke ödrin e hia but hlöng je hwanumen pore-tiko, me omokâ ta je lamepa, k' ödrin e ca leü utö ae bo so, me ca hudo je hudiny leü ka Khongon Isaraela hnyi dok ae kap. 8 Anyin a wale e but hon at Juda me Jerusalema hmönyin anyi Iehova, me e ame hia but hn' ödrin he ka bwebwet, me hnân láia, me jü, helâ me öbun e wâ ge je li emaköbun. 9 Anyin a hia but ta but je lakamötin ge hele vat, ke adre hom hwenbâ minya, je lakutin бага, me in, me je laäöitin can e. 10 Ke walang ang ame mokut eü hnyi hnyekuk he ka ânyâ ke ūhinyököu me Iehova, Khongon Isaraela, me me he ka hia but gatin anyin hmönyin ae gan amâ. 11 Lakuk lö, ca oünyibauâ walang ang ūnyi ang: anyin a Jehova ame ūc' öbun he ka tot hnyi hnyimakan, he ka bi athuyabainy, m' öbun e he ka huliwa kâu, me leü utö ae bo so.

12 Haba at Levi ödrin e todrö, wale Mahatha, nöku Amasai, me Joela nöku Azaria, li mätträni Kohatha: ke haba li mätträni Merari, wale Kiso, nöku Abedi, me Azaria, nöku Jehaleela: ke haba li Mätträni Geresoma, wale Joa nöku Zima, me Edena, nöku Joa: 13 ke haba li mätträni Elizafana, wale Simeri me Jeielä:

ke haba li mätträni Asafa, wale Zakaria me Matania: 14 ke haba li mätträni Heman, wale Jehiela me Simei: ke haba li mätträni Jeduthun, wale Semaia me Uziela. 15 Me ödrin e ūkhacaköuâ je liamekeiny mödrin, me okabi ödrin bi, me didrö, hoton hna hûna hnen than hnyi je hofuc ho Iehova, he ka ânyâwia uma umö Iehova. 16 Ke haba tavat bihut ödrin e dit ka hnyi hnyin uma umö Iehova, he ka ânyâwia, me degec ta je ūnyi hia ae kong ödrin e wâ hnyi uma umö Iehova ka hnyi hnyeuleny uma umö Iehova. Ke haba at Levi ödrin e hom kâu ka hnyi wagewe Kederon. 17 Me ödrin e ibi hwân he ka okabâ hnyi bong a bân, hnyi tehi a bân, ke haba hnyi bong a eitiny tehi ödrin e o but ka hnyi pore-tiko anyi Iehova; me ödrin e okabâ uma umö Iehova hnyi je bong a eit: ke haba hnyi bong a sikstininy tehi a bân ödrin e umo. 18 Me ödrin e didrö kö Hezekia than, me ha, ka habe, Öhmun e hia but ânyâwia uma umö Iehova, me taben leü hut, me je omjehen, me laulau taben je areto, me je omjehen hia. 19 Ke haba khaca, haba ta je kaiä hia a degec Ahaza than hnyi anyin musi hnyi ūen e ame ânyâ hwakecin ae kong, me, öhmun e hia but penapena me okabâ; me wâ bi, adre ip cicö taben leü hut kö Iehova.

20 Me haba Hezekia than ame vesâ hnyi hnyomakatu, me ūkhacaköuâ tavat musö taun, me he ka hnyi uma umö Iehova. 21 Ke adre me hom je bolok a seven, me je mamoe бага a seven, me je nokon mamoe a seven, me je got бага a seven, hnân hudiny hulö hobi kâu dökhü, me dok ae kap, me at Juda. Ke e ame ha ka tavat bihut a je mätträni Arona he ka hudi ödrin hon taben hut kö Iehova. 22. Me ödrin e hlingâ je bolok, ke haba tavat bihut ödrin e hom dra, me dukâiâ taben hut: k' ödrin e hlingâ je mamoe бага, me dukâiâ taben hut ge drödrin: k' ödrin e hlingâ minya je nokon mamoe, me dukâiâ taben hut ge drödrin. 23 Ke ödrin e hom je got бага hnân hudiny hulö ka hnyi hnyimakan than me ūkhacaköu; me ödrin e ip je hnyamödrin hudrin: 24 ke haba tavat bihut ödrin e hling' ödrin, m' ödrin e bi hudrin hulö ge drödrin, hnân he ka bi hwaban möt hobi kâu at Isaraela hia thithö: anyin a than ame ha a adre me he ka bi hudiny leü me hudiny hulö hobi kâu Isaraela hia thithö. 25 Ke e ame otilâ at Levi hnyi uma umö Iehova me je

## II. MAN ÛLABAINY JE THAN 30.

simebalo, me nabeli, me kitara, hoton hnanyibu anyi Davita, me Gada at wá unyin than, me Nathana a perofeta: anyin a únyi ga Iehova hnanyibu eling a deny anyin je perofeta. 26 Ke haba at Levi ödrin e tot me je únyi khumöng anyi Davita, k' ame tot tavat bihut me je trutru. 27 Ke haba Hezekia ame húna he ka hudo hudiny leú hon taben hut. Ke hnyi úen adre me hwán he ka hudo, me adre me hwán minya ka khumöng kö Iehova me hwan je trutru me ta je únyi khumöng anyi Davita than Isaraela. 28 Ke haba úkhacaköu hia ödrin e khudrung, k'ame khumöng tavat khumöng, k' ame túö trutru hnen tavat túö trutru; k' adre me ányâ helâe ke ne o but a um dö hudiny leú. 29 Ke ödrin e hia but um dö le je hut, me haba than me tavat hia unyin ödrin e nom me khudrung. 30 Me haba Hezekia than me je taben ödrin e húna ka at Levi he ka khumöng me oganö Iehova ge hofuc ho Davita me Asafa at wá. Me ödrin e khumöngö je hna oganá, me senyin, me ödrin e nom ju me khudrung. 31 Haba Hezekia ame ha, ka habe, Walang öbun e hia but okabi öbun bi kö Iehova, hok ju jem me hom je hut me je hudiny ole ka hnyi uma umö Iehova. Haba úkhacaköu ödrin e hom je hut me je hudiny ole; me tavat ödrin e weny hnyi hnyekudrin ödrin e hom je hudiny leú. 32 Ke haba úseiny je hudiny leú, wale a hom hnen úkhacaköu, me sevente je bolok, me wan haded je mamoe бага, me tu haded je nokon mamoe: ödrin hia e hnân hudiny leú kö Iehova. 33 Ke haba ta je únyi adre okabâ, me, siks haded je bolok, me theri thauzan je mamoe. 34 Ke e wakhalet tavat bihut, ke ca khan' ödrin bi he ka uja ta je hudiny hia leú: anyin a wale ame hadru' ödrin je liamekeiny mödrin a je at Levi, ke ne o but ame um dö huliwa, ke ne o but ame um dö keihen at bihut okabi ödrin bi: anyin ame kong hnyekunâ at Levi hon tavat bihut he ka okabi ödrin bi. 35 Ke se hia minya je hudiny leú, me pipikhenyainy je hudiny ole, me je hudiny ic hobi kâu je hudiny leú. Ke adre helâe hna penapena ta je huliwainy uma umö Iehova. 36 Ke ame senyin Hezekia, me tavat hia, can únyi ame penapena Khong hobi kâu tavat: anyin ae logot únyi eling.

### HNYIMAKAN 30.

**K**E haba Hezekia ame úkhúnöng ka at Isaraela me Juda hia, me sihnalimen minya je tusi ka at Eferaima me Manase, m' ödrin e he ka o ka hnyi uma umö Iehova hnyi Jerusalema, he ka hnyi ányâ paseka kö Iehova, Khongon Isaraela. 2 Anyin a hia but than úhnenamö, me anyin je taben, me úkhacaköu hia hnyi Jerusalema, he ka tuö paseka hnyi tehi a loiny. 3 Anyin ae ca khan' ödrin tuö e hnyi úen eling, anyin ae tiga ca úcú úseiny tavat bihut ödrin e hia but okabi ödrin, ke ödra tiga ca úkhacaköu bi tavat hnyi Jerusalema. 4 Ke e wisa únyi eling hnyi hnyimakan than me úkhacaköu hia. 5 Me ödrin e otilâ hofuc he ka omanená hnyi Isaraela hia, hwán hnyi Bere-seba ke ne o but hnyi Dana, m' ödrin e he ka o ka hnyi paseka kö Iehova, Khongon Isaraela, hnyi Jerusalema: anyin adre me ca tuö ge tavat ae se helâji me hna sihnalimen. 6 Me ame he but tavat, k' ödrin e ve hom je tusi únyi ge than me anyin je taben ka hnyi je ke keihen Isaraela hia me Juda, k' ödrin e ha hoton hnanyibu anyin than, ka habe, Öbun lakon Isaraela lö, hwiö hmetu ju öbun kö Iehova, Khongu Aberahama, me Isaaka, me Isaraela, me e ame he bi ka hmetu köbun je kolon tavat adre me kec möt únyi ge than Asuria. 7 E so öbun e ca he ka helâ me lakamöbun, me je liamekeiny möbun, tavat adre me ányâ hwakecin ae kong kö Iehova, Khongon lakamödrin, me e ame hn' ödrin he ka ba wan, helâ me hnöbun hna wâ. 8 Ke ca he th' öbun walang ang ka ohwegiâ je nyibun, helâji me lakamöbun; ke so bi hn' öbun dut kö Iehova, me didrö ka hnyi anyin dok ae kap, wale e ame hia but okabâ nyiele balua, me bi athnyabai Iehova a Khongubun, me me hwiö únyi gabun anyin hmönyin ae gan hmâ. 9 Anyin a öbun e ne hwiö hmetu ju kö Iehova, me ame he je liamekeiny möbun me lakubun ka wâ betenge hnyi hnyimakan tavat adre me hum ödrin a je hwenbâ, me ödrin e he ka hmetuhmetu ka hnyi hnyei ang: anyin a haba Iehova, me, at ae so me at betenge, at ame ca he ka hwiö hnyimakan gabun öbun e ne hmetu kâu. 10 Ke haba je hnyat hom tusi, me ödrin e ve he ka hnyi ke taun me ke taun hnyi hnyei Eferaima me Manase ke ne o but hnyi Zebulona:



## II. MAN ÛLABAINY JE THAN 31.

me ödrin e hlum' ödrin me hi' ödrin. 11 Ke so bi haba keihen at Asera, me Manase, me Zebulona, me, ödrin e ouhnyükongi ödrin bi, me hnyi he Jerusalema ai. 12 Ke e hnyi Juda hnyamen Khong he ka ham ködrin hnyök a khaca, he ka ânyâ hnanyibu anyin than, me je taben, hoton hofuc ho Iehova. 13 Ke se hia tavat adre me ûkhacaköu hnyi Jerusalema he ka bijeûâ areto adre ca levenâ hnyi tehi a loiny, e se hia hmönyin tavat adre me ûkhacaköu. 14 Ke ödrin e todrö me hom je taben hut wale hnyi Jerusalema, k' ödrin e hom minya ta je taben leü ütö ae bo so, me ödrin e khûâ ka hnyi wagewe Kederon. 15 Me ödrin e hlingâ paseka hnyi bong a fotininy tehi a loiny: ke haba tavat bihut me at Levi ödrin e hmehma, me okabi ödrin bi, me hom je hudiny leü ka hnyi uma umö Iehova. 16 Me ödrin e ve tot hnyi je hnödrin helâ me hwakecidrin, hoton hnanyibu anyi Mose aten Khong: ke haba tavat bihut ödrin e dukâiâ ge dra wale adre me kap únyi ge at Levi. 17 Anyin ae se hia tavat hnyi ûkhacaköu adre ca okabi ödrin bi: anyin a wale hamen at Levi he ka hlingâ je paseka hobi ködrin hia tavat ae ca bo so, he ka okabi ödrin kö Iehova. 18 Anyin ae se hia tavat, wale se hia at Eferaima, me Manase, me Isakara, me Zebulona, adre ca obosoi ödrin bi, ke so bi ödrin e hnyi han paseka ke ca helâ me hna sihnalimen. Anyin a hia but Hezekia hic hobi ködrin, me ha, ka habe, Iehova at ae so, hna but hulö 19 anyin tavat hia, at a penapena hnyekon he ka elâm Khong, Iehova, Khongon lakamen, eja ke ne adre ne ca obosoi ödrin hoton hwakecin hna obosoi anyi uma kap. 20 Ke haba Iehova ame ling Hezekia, me osoâ tavat. 21 Ke haba lakon Isaraela tavat adre me laba hnyi Jerusalema ödrin e ânyâ bijeûiny areto adre ca levenâ hnyi seven je bong me senyin gan hmâ: ke haba at Levi me tavat bihut ödrin e oganö Iehova hnyi ke bong me ke bong ge je únyi khumöng ae gan hwan kö Iehova. 22 Ke Hezekia ame fuc wia ka at Levi hia tavat ae metâ hnyi huliwa anyi Iehova. Me ödrin e bijeûâ hnyi seven je bongon, me hudo je hudiny ole, me omanenö hulö kö Iehova Khongon lakamödrin. 23 Ke haba ûkhacaköu hia adre me úhnenamö he ka tuö ke je bong a seven, me ödrin e tuö ke je bong a seven me senyin. 24 Anyin a Hezekia than Juda ame ham ka ûkhacaköu hnân bi hut

wan thauzan je bolok me seven thauzan je mamoe; ke haba je taben ödrin e ham ka ûkhacaköu wan thauzan je bolok me ten thauzan je mamoe: me se hia tavat bihut ödrin e okabi ödrin bi. 25 Ke ame tha senyin ûkhacaköu hia anyin at Juda, me tavat bihut me at Levi, me ûkhacaköu hia tavat adre me o úheny Isaraela, me je atkanyua tavat adre me o úheny hnyi hnyeï Isaraela, me tavat adre me laba hnyi Juda. 26 Me gun hmâ senyin hnyi Jerusalema: anyin a hwân hnyi üö Solomona nöku Davita than Isaraela me ba helâe hnyi Jerusalema. 27 Me ame todrö tavat bihut a at Levi, me hahnahicâ tavat: k' adre me löng hodrin, k' ame o but hijidrin hic ka hnyi hnyaban ae kap, walethö hnyi drany.

### HNYIMAKAN 31.

**K**E a um dö únyi hia eling, me ame he Isaraela hia, wale tavat adre me mwi e, ka hnyi je tauniny Juda, me oamamâ je veto ame tot, me sö degecâ je Aseira, me hagutâ je dok ae görany, me je taben hut hnyi hnyeï Juda hia, me Beniamina, me Eferaima, me Manase, ke ne o but adre me ohia hia thithö. Me haba lakon Isaraela hia adre me ve he ka hnyi je idrin hnyi anyidrin je taun. 2 Ke haba Hezekia ame otilâ tavat bihut me at Levi hoton anyidrin je dö, hoton je ve hanymödrin, wale tavat bihut me at Levi, hobi kâu je hudiny leü, me je hudiny ole, he ka huliwa, me ole, me oganâ hnyi je homagöuleny uma umö Iehova. 3 Ke e ame otilâ minya jekhon than únyi hnyi anyin ta je únyi, hobi kâu je hudiny leü, wale hobi kâu je hudiny leü hnyi hnyomakatu me sahad, me je hudiny leü hnyi je sabbath, me hobi kâu je tehi ae teb únyi, me je bijeû adre me thu, helâ me hna sihnalimen hnyi hnanyibu anyi Iehova. 4 Ke haba khaca e ame hûna ka tavat adre me laba hnyi Jerusalema he ka ham jekhon tavat bihut me at Levi, m' ödrin e he ka hwege hnyi hnanyibu anyi Iehova. 5 Ke ame hap o ju ehele hnanyibu, me haba lakon Isaraela ödrin e ham gâná je wan whit a bân, me waina, me wakaco, me lani, me troban kânâ hia thithö; ke ödrin e hom gâná a je ke keihen a libenyitainy ta je únyi hia. 6 Ke haba lakon Isaraela me Juda, tavat adre me labâ je tauniny Juda, me, ödrin e hom minya je

## II. MAN ÛLABAINY JE THAN 32.

ke keihen a libenyitainy je bolok me mamoe, me je ke keihen a libenyitainy je ûnyi ae kap wale adre me okabâ kö Iehova Khongudrin, me khon. 7 Ke haba hnyi tehi a kuniny ödrin e hwân ka bi taben je hna khon, me umo hnyi tehi a ten. 8 K' ame o but Hezekia me je taben me wâ je hna khon, me ödrin e haisoi Iehova, me lakeiny a Isaruela. 9 Ke wale Hezekia ame hnö tavat bihut me at Levi ge je hna khon. 10 Ke haba Azaria at bihut ae beönua hanen lap anyi Zadoka ame thu kâu, me ha, ka habe, Hwân hnyi ûen adre hwân ka hom jem je hut ka hnyi uma umö Iehova, öhmun e han me sekuhmun dö, ke gan hmâ bala biju: anyin a Iehova ame hia but ohnahicâ lakeiny; ke haba kolon, wale ta je ûnyi ang ae gan. 11 Haba Hezekia ame ha he ka penapena je hnyeule hnyi uma umö Iehova; me ödrin e penapena. 12 Ke ödrin e odilâ hnyi hnathu je bwihlany, me je ke keihen a libenyitainy, me je hna okabâ: me ame musö ta je ûnyi e hnö Konania at Levi, me Simeï liamekeiny mē ame ûtangköu mē. 13 Ke haba Jehiela, me Azazia, me Nakath, me Asael, me Jeremoth, me Jozabada, me Eliela, me Isemakia, me Mahatha, me Benaia, me ödrin je homakan minya hmeli Konania me Simeï a liamekeiny mē, hoton musi anyi Hezekia than, me Azaria at ame musö uma umen Khong. 14 Ke Kore nöku Iemina at Levi at ame tuö homagöule e jimeyö, e ame tuö je hut ae betenge ka Khong, he ka khenâ je bwihlany kö Iehova, me je ûnyi ae ti kap. 15 Ke ûtangköu mē, Edena me Miniamin, me Jesua, me Semaia, me Amaria, me Sekania, hnyi ta je tauniny tavat bihut, hnyi je hanymödrin, he ka ham ka je liamekeiny mödrin, hoton je dö, e ûcü ka tavat ae gan me ûhnyükong: 16 ca hâiâ bi tavat adre sihnalimen a je бага, hwân ge tavat a kun hunaidrin me gan hon e, wale tavat adre labö|didrö ka hnyi uma umö Iehova, hoton huliwainy ke bong me ke bong, hobi kâu anyidrin huliwa hnyi hanymödrin, hoton anyidrin je dö; 17 me tavat adre sihnalimen hnyi je dö anyin tavat bihut hoton je lap anyin je lakamödrin, me at Levi hwân ge tavat a twente hunaidrin me gan hon e, hnyi je hanymödrin hoton anyidrin je dö; 18 me tavat adre sihnalimen tavat hia ae ûhnyükong gadrin, me laöiödrin, me lakudrin obaga me wahu, hnyi ûkhacaköu hia: anyin a haba hnyi je hanymödrin, me,

ödrin e ka okabi ödrin bi: 19 me ka je mâtrâni Arona a tavat bihut, hnyi je utkânâiny je hnyaba igigilö je taun, hnyi je taun hia, me hu tavat adre me ha iödrin, he ka ham je jekhoú ka ta je бага hia a tavat bihut, me ka tavat adre hia but au unyin at Levi. 20 Ke haba Hezekia ame ânyâ helâe hnyi Juda hia; ke e ame ânyâ ûnyi ae so, me wisa, me hnathu hnyi hnyimakö Iehova a Khongon. 21 Ke haba je huliwa hia e ame ibi hwân hnyi huliwainy uma umen Khong, me hnanyibu, me je hna hûna, he ka elâm Khongon, me e ame ânyâ ge hnyekon ae bekhöt, me e ame hnahic ut.

### HNHYIMAKAN 32.

**H**WABAN ta je ûnyi eling, me hwa-kecin ae hnathu eling, me ame o thö Saneribi than Asuria, k' ame o hnyi Juda, me hunuma cicö je taun adre up hagin, k' ame ûnyküme he ka hûgûnâ me me anyin bi. 2 Ke a wâ but Hezekia a ga o thö Saneribi, k' ame he ka vat me Jerusalem, 3 me e ame ûhnenamö me anyin je taben me anyin tavat ae hwege he ka hlöng je köien je hna pupua wale hotou taun; me ödrin e hadruâ e. 4 Ke adre me ûkhacaköuâ tavat ae se hia, me ödrin e hlöng je hna pupua hia, me wagewe wale ame hingâlö hnyi wanben hnyeï, me ha, ka habe, Hnâneü ame he ka o je than Asuria me wâ köiö ae gan? 5 Ke e ame hwege me op hagin veto hia a ü, me obeüâ göranjai ke ne o but ka hnyi je tap ae beü göranjai, me ke hagin waleü hoton, k' ame ohwegiâ Milo hnyi taun anyi Davita. k' ame ânyâ je ûnyi hnân vat me je bec ae se hia. 6 Ke e ame otilâ je taben vat hon tavat me ûkhacaköu ödrin kâu hnyi dok ae laü hnyi homagöuleny taun, me e ame sihwegi ödrin me ha, ka habe, 7 Hwege th' öbun, me hnyok бага but, ca ot bi, ke ca öbubuny bi ge than Asuria, me tavat ae se hia unyin: anyin ae se hia gatin, ke wakhalet bi unyin: 8 haba e unyin, me benyin at; ke unyitin Iehova Khongutin he ka hadru' ötin, me vatâ anyitin je vat. Ke haba tavat me adre me labageju ka hofuc ho Hezekia than Juda.

9 Ke hwaban e haba Saneribi than Asuria ame kunâ lakeiny Jerusalem a. (ke e but hnyi Lakisi ke tha e mē maniny man hia,) kö Hezekia than Juda, me at Juda hia hnyi Jerusalem, he ka ha, ka

## II. MAN ŪLABAINY JE THAN 33.

habe, 10 Walang hna ha hnö Saneribi than Asuria, ka habe, Öbun e labageju ia ; me öbun e laba bala bi hnyi Jerusalema? 11 Hawa a ca cubic öbun Hezekia m' adre me hn' öbun he ka mok ge hmiâ me beic, me ha, ka habo, Hamö Iehova Khongutin he ka omeli ötin ûnyi hnyi hnyamen than Asuria. 12 Hawa, a ca hom Hezekia anyin je dok ae görany, me anyin je taben hut, me hûna ka at Juda me Jerusalema, ka habe, Öbun e he ka hic cicö taben hut a khaca, me leû utö ae bo so hon e? 13 Hawa, e ca khan' öbun waleji ge hnök me lakamök hna ânyâ ka aten je hnyei? Hawa, e khana je khongon tavat aten je hnyei he ka omelö je atödrin gak? 14 Ewa khongon je hnyei eling waleji hnen lakamök hna ohia, ae khana he ka omelö je aten gak, me me khana Khongubun he ka omeli öbun ûnyi hnyi hnyamök? 15 Ke walang ang ca e Hezekia ka iyau' öbun, me cubic öbun helâe, ke ca labageju kâu: anyin ae ba khongon ke hnyei me ke dökhu ae khana he ka omelö je aten gak, me lakamök: awe, ama kâmâu ka he bi Khongubun ka omeli öbun gak? 16 Me haba je lakeiny ödrin e haikongu Iehova Khong, me Hezekia a athnyabainy. 17 Me e ame sihnalimen je tusi minya, hnân bifuci Iehova Khongon at Isaraela, me he ka haikongoâ e, ka habe, Haba khongon aten je hnyei ödrin e ca omelö je atödrin ûnyi hnyi hnyamök, me helâe ame ca he Khongu Hezekia ka omelö je aten ûnyi hnyi hnyamök. 18 Me ödrin e hongot hwege hnyi hwen Juda ka at Jerusalema hon je haginny veto, he ka oot' ödrin me ohmaki ödrin: m' ödrin e he bi ka hûgûnâ taun. 19 Ke ödrin e hâiâ Khongon Jerusalema helâ me hna hâiâ je khongon aten je hnyei, waleji adre ânyâ ge hnyamen at. 20 Anyin a wale haba Hezekia than, me Isaia nöku Amosa perofeta, ödru me hic me tenge hnyi dranyai. 21 Ke haba Iehova ame kunâ angela, he ka subâ degecâ tavat ae hwege, me je homakan, me je taben, hnyi hna hunuma anyin than Asuria. Me e ame hmehma me hmetu ka hnyi iny hnyei. Ke e ame o but ka hnyin uma umen khongon, me haba li hing lakon ödru me hlingâ e ge hele vat. 22 Helâe Iehova ame omeli Hezekia me aten Jerusalema ûnyi hnyi hnyamö Saneribi than Asuria, me ûnyi hnyi hnyamen tavat hia, me su ödrin ka hnyi je ke keihen hia. 23 Ke se hia tavat adre me hok bwihlany kö Iehova hnyi Jerusalema, me

je omjeû minya kö Hezekia than Juda: k' ame ogânâ e nyiele hnen ta je hnyei hia.

24 Haba hnyi je bong eling ame he but Hezekia ka mokcu: ke e ame hic kö Iehova; me e ame ûhnenamö më me ham kâu ke haten. 25 Ke haba Hezekia ame ca bi hwaban hmetu helâ me hna betenge gan; ke bi gan hnyekon: anyin a wale ame o but hmönyin kâu me at Juda me Jerusalema. 26 Ke so bi haba Hezekia ame ka oûhnyûkongoâ e bi hnyi bi ganiny hnyekon, a e me tavat adre me laba hnyi Jerusalema, me me ca aat bi ködrin hmönyin anyi Iehova hnyi je bong bongu Hezekia. 27 Ke ti gan hmâ omjeû me hmanangi Hezekia: me e ame ânyâ hobi kâu bi je uma hnân ip sileva me gol, me je veto ae ûnyi hnathu, me je utö ae bo so, me je bec, me je kaia ae so ae ve hwakecin; 28 me je uma hnân ip hwit hnyin, me waina, me wakaco; me je hnyeule hobi kâu je meno ae gan, me je hnahat meno hnyi je haginny. 29 Ke haba khaca, e ame ânyâ hobi kâu e bi je taun, me je hnahat mamoe me kau ae se hia: anyin a Khong ame ham kâu ta je ûnyi ae se hia hmönyin. 30 Ke haba Hezekia ling me wale at ame hlöng deny köiö hnyi Gihona ethö, me owisa e ka hnyi ke keihen jimeûiny taun anyi Davita. Ke sot Hezekia hnyi anyin ta je huliwa hia. 31 Ke so bi haba hnyi hwakecin ge je úthumetu anyin je than Babulona, waleji adre me úkhünöng kâu he ka hnö e ge ûnyi hnân lâiâ adre ânyâ hnyi hnyei, me haba Khong ame hna e, he ka cubec e, me me wâ bongon hia hnyekon. 32 Ke haba kolon je hna ânyâ hnö Hezekia, me hwakecin ae so, wâ bi, adre hia but sihnalimen e hnyi hna wâ hnö Isaia a perofeta nöku Amosa hnyi tusi anyin je than Juda me Isaraela. 33 Ke haba Hezekia ame tha mokut ut me lakamen, me ödrin e konâm e hnyi dok adre me ölö hnyin ka hnyi erkemok anyin je laku Davita: ke haba at Juda hia me tavat adre me laba hnyi Jerusalema ödrin e ogânâ e hnyi anyin mok. Ke ame musi biju Manase a nokon hwaban.

### HNYIMAKAN 33.

**T**WELV but je hunai Manase hnyi ûen e ame hwân ka than; ke e ame musi hnyi Jerusalema fifte faiv je huna. 2 Ke e ame ânyâ ûnyi ae monu hnyi hnyimakö Iehova, helâ me hwakecin ae ikiki

## II. MAN ÛLABAINY JE THAN 34.

anyin je wanaithila waleji a obâ Iehova hnyi hnyimakan lakon Isaraela. 3 Anyin a e ame op hmetu je dok ae görany waleji a ohia Hezekia a kamen ; ke e ame otilâ je taben hut kö Baala, me theati Aseira, me khudrung ka ta je únyi hia hnyi drany, me bi athnyabaidrin. 4 Ke e ame op je taben hut hnyi uma umö Iehova, waleji a ha Iehova, ka habe, adre me he ka ip iök hnyi Jerusalema nyiele balua. 5 E ame op minya je taben hut hobi kâu ta je únyi hia hnyi drany hnyi li hnyeuleny uma umö Iehova. 6 Ke e ame kunâ minya lakon he ka he hnyi wanben meic hnyi hnyigöulen bucen anyin nöku Hinom, me e ame bibi-hwakecin, me biobotkong, me bi khong, me elâm unyin tavat ae tren biobotkong, me tavat bi khong : e gan hmâ hulö e ame ânyâ hnyi hnyimakö Iehova, me ohmönyninâ e. 7 Ke haba idola adre theatâ wale e ame ânyâ, me e ame otilâ hnyi uma umen Khong, waleji a ha gan Khong kö Davita me Solomona a nokon, ka habe, Haba hnyi uma eang me hnyi Jerusalema wale o ge úca únyi hnyi ta je tribu hia anyin at Isaraela, oge me he ka ip iök hnyin nyiele balua : 8 ke haba khaca, oge me ca he hmetu ka khöbe at Isaraela únyi hnyi hnyeie waleji oge ham ka je lakamöbun ; ödrin e ne he ka wâ wia thibi he ka ânyâ hia hnök hna hûna ködrin, wale hnanyibu hia, me je hna otilâ, me je hna owisa a deny Mose. 9 Ke haba Manase ame omono at Juda me tavat adre me laba hnyi Jerusalema, me ödrin e ânyâ hulö ae gan hon ta je hnyeie, waleji a ohia ga Iehova hnyi hnyimakan lakon Isaraela. 10 Ke haba Iehova ame fuc kö Manase me lakeiny : k' ödrin e ca löng bi. 11 Anyin a wale haba Iehova ame oâ ködrin je taben vat anyin than Asuria, me ödrin e hum Manase ge je cen, me ca e ge fao, me hom Babulona ai. 12 Ke e ame vec, me ame elöm Iehova Khongon, me ti óuhnyükongoâ e hnyi hnyimakan Khongon lakamen. 13 Ke e ame hic kâu ; me e ame betenge gan, me löng hwan hwakhöü, me ohmeto e Jerusalema ai ka hnyi dokhon lökhu. Me haba Manase ame wahmakhmeto a Iehova thibi Khong.

14 Ke hwaban, e me ame op ke hak veto hoton eü taun anyi Davita, hnyi ke keihen e jio Gihona, hnyi hnyigöulen bucen, ke ne o but hnyi gethen ame dit hnyi homagöuleny je wâ ; k' ame khenyi ka hnyi Ofela, me ti op göranyai : ke e ame ip je taben vat hnyi ta je taun hia adre up

haginy hnyi Juda. 15 Ke e ame hom degecâ je khong kanyua, me idola únyi hnyi uma umö Iehova, me je taben hut hia waleji e ame op hnyi buceniny uma umö Iehova, me hnyi Jerusalema, me khú' ödrin ka hnyi hoton taun. 16 Ke e ame ânyâwia taben hut anyi Iehova, me hudo hon e je hudiny úsoköu me je hudiny ole, me ha ka at Juda he ka bi athnyabai Iehova Khongon at Isaraela. 17 Ke so bi haba tavat me ödrin e bi hut bala bi hnyi je dok ae görany, ke ödrin e ânyâ thibi eling kö Iehova Khongudrin. 18 Ke haba kolon je hna ânyâ hnö Manase, me hijin hic ka Khongon, me ta je hofuc hwan tavat wâ, ödrin e fuc kâu hnyi iö Iehova, Khongon Isaraela, wâ bi, adre hia but sihnalimen unyin je hna ânyâ hnen je than Isaraela. 19 Me hijin hic minya, me hwakecin hna betenge kâu hnen Khong ge anyin khöü. me anyin hulö hia, me hnen hna he hwali, me je ke keihen e ame op je dok ae görany hnyin, me otilâ je Aseira me je hnatheat hnyin, waleji ke tiga ca óuhnyükongoâ e : wâ bi, adre hia but sihnalimen hnyi hofuc hwan tavat wâ. 20 Ke haba Manase ame tha mokut me lakamen, me ödrin e konâm e hnyi umen uma : ke ame musi biju Amona a nokon hwaban.

21 Twente tu but je hunai Amona hnyi úen e ame hwân he ka than ; ke e ame musi lo li huna hnyi Jerusalema. 22 Ke e ame ânyâ únyi ae kong hnyi hnyimakö Iehova, helâ me hna ânyâ hnö Manase a kamen : ke haba Amona ame bi hut ka ta je hnatheat, waleji a ânyâ Manase a kamen, me bi athnyaba ködrin. 23 Ke so bi, e ame ca óuhnyükongoâ e bi hnyi hnyimakö Iehova helâ me hnö Manase a kamen hna óuhnyükongoâ e bi ; ke haba Amona ame ânyâ hwakecin ae kong hmönyin. 24 Ke haba lathnyabainy ödrin e sihnân e, me hlingâ e hnyi umen bi uma. 25 Ke haba tavat aten hnyeie ödrin e hlingâ hia tavat ödrin e sihnö Amona than ; me haba tavat aten hnyeie ödrin e otilö Josea a nokon he ka than hwaban.

### HNYIMAKAN 34.

**E**IT but je hunai Josea hnyi úen e ame hwân ka than ; ke e ame musi hnyi Jerusalema thöte wan je huna. 2 Ke e ame ânyâ wisa hnyi hnyimakö Iehova, me vheno hia je gethen de Davita a kiben, me e ame ca saú ka hnyi ke keihen metâ me

## II. MAN ULABAINY JE THAN 34.

me. 3 Ke haba hnyi hun a eitiny anyin musi, ke tiga úhnyúkong, e ame ibi hwân he ka elâm Khongu Davita a kibên : ke haba hnyi hun a twelv e ame hwân ka ohia je dok ae görany hnyi Juda me Jerusalema, me je Aseira, me je hnatheat, me je hna oköiâ. 4 Ke ödrin e tho degecâ hnyi hnyimakan je taben hut anyi Baala ; ke e ame sö degecâ je hna theati seünö ethö hudrin ; ke e ame oamamâ je Aseira, me je hnatheat adre kave, me hna oköiâ, me omomono, me khûâ ka hnyi hon je erkemok anyin tavat bihut ködrin. 5 Ke e ame thong degecâ je jeien tavat bihut hon anyidrin je taben hut, me ânyâwia Juda me Jerusalema. 6 Ke e ame ânyâ helâe hnyi je tauniny Manase me Eferaima, me Simeona, ke ne o but hnyi Nafatali, hnyi je hnyaba ae ba at hnyin igigilö. 7 Me e ame tho degecâ je taben hut me kot omomono je Aseira me je hnatheat, me sö degecâ je hna theati seünö hia hnyi je ke keihen hnyei Isaraela hia, me e ame hmetu Jerusalema ai.

8 Ke haba hnyi hun a eitiny anyin musi, k' ame hia but ânyâwia hnyei, me uma, me e ame kunö Safana nöku Azalia, me Maseia at ame musö taun, me Joa nöku Jehoaza at ame oúnykúmeâ, he ka anyawia uma umö Iehova a Khongon. 9 Ke ödrin e o but kö Hilekia at bihut ae beönua, me ham mone waleji adre me hom ka hnyi uma umen Khong, wale a úkhöünâ at Levi tavat tuö hwanuma únyi ge at Manase me Eferaima, me je kolon at Isaraela, me at Juda me Beniamina hia, me tavat adre me laba hnyi Jerusalema. 10 Ke ödrin e ham ka hnyi hnyamen tavat huliwa wale tavat tuö uma umö Iehova ; ke haba tavat huliwa hnyi uma umö Iehova, me ödrin e ham e hnân he ka op hmetu me ânyâwia uma ; 11 wale ödrin e ham e ka tavat retrau utö me op veto, hnân úcú veto adre sö, me je utö hnân wangöningön, me hnân je venyâiny je uma waleji a okongo ge je than Juda. 12 Me haba tavat ödrin e ânyâ hnathoâ huliwa : ke haba tavat ame musi ödrin, me, Jahath, me Obadia, a li at Levi, ke li laku Merari ; me Zakaria me Mesulama, ke li laku Kohatha, he ka hnyi musö huliwa : me ke je at Levi tavat ae metâ ge je únyi khumöng. 13 Ke ödrin e musö bi minya hnyat sukhöünâ ta je únyi, me tavat tuö aten huliwa hnyi ta je huliwa : ke haba keihen at Levi, me, ödrin hnyat sihnalimen, me je homakan, me hnyat tuö

hwanuma. 14 Ke haba hnyi úen ödrin e hom mone waleji adre me hom ka hnyi uma umö Iehova, me haba Hilekia at bihut ame wâ tusiny hnanyibu anyi Iehova a ham ga Mose. 15 Me ame ha Hilekia kö Safana at sihnalimen, ka habe, Oge me wâ tusiny hnanyibu hnyi uma umö Iehova. Ke Hilekia ame ham tusi kö Safana. 16 Ke haba Safana ame hom tusi ka than, ke haba khaca e ame thumeto e me ha, ka habe, Haba ta je únyi hia adre me hna ka lathnyabaem, me, ödrin e ânyâ. 17 Ke ödrin e hia but hingälâ mone adre me wâ hnyi uma umö Iehova, me ham ka tavat tuö me tavat huliwa. 18 Ke haba Safana at sihnalimen ame thumeto than, me ha, ka habe, A hia but Hilekia at bihut ham könya ke tusi. Me Safana ame aú ke hofuc hnyin, ka than. 19 K' a löng ut than ta je hofuciny hnanyibu, me e ame kia anyin je úkhaú. 20 Haba than ame búna kö Hilekia, me Ahikama nöku Safana, me Abedon nöku Mika, me Safana at sihnalimen, me Asaia athnyabainy than, me ha, ka habe, 21 He th' öbun ka elâm unyi Iehova hobi könya, me je kolon hnyi Isaraela me Juda, ge hofuciny tusi adre wâ : ânyin ae gan hmâ hmönyin anyi Iehova adre hingälâ kötin, can a ca vheno lakamötin hofuc ho Iehova, he ka ânyâ hia helâ me hna sihnalimen hnyi tusi ang. 22 Haba Hilekia me tavat a kunâ than, ödrin e he kö Huleda perofeta momo, öiö Saluma, nöku Tikeva, nöku Hasera at tuö je úkhaú ; (haba momo eling amelaba hnyi Jerusalema, hnyi ke keihen a loiny ;) me ödrin e úhnenamö me momo únyi eling. 23 Ke haba momo ame ha ködrin, ka habe, Walang hna ha hnö Iehova Khongon Isaraela, ka habe, Ha th' öbun ka at a kun' öbun könya, 24 Walang hna ha hnö Iehova, ka habe, Wâ bi, oge me he ka oâ únyi ae kong hon dok ang, me tavat adre me labâ e, wale ta je hnaúhangö adre sihnalimen hnyi tusi ödrin e aú ka than Juda : 25 can ödrin e hna degeci nya, me leú utö ae bo so ka ke je khong, m' ödrin e ohmönyini nya ge ta je huliwa hia anyin je hnyamödrin ; anyin a wale ame ubâhla thö anyik hmönyin ka dok ang, ke adre me ca he ka ume. 26 Ke haba than Juda at ame kun' öbun ke ka elöm Iehova, öbun e he ka ha helâng kâu, ka habe, Walang hna ha hnö Iehova Khongon Isaraela hnyi ta je hofuc u je löng, 27 anyin ae menyik hnyekom, ke u je oúhnyúkongu u bi hnyi

## II. MAN ULABAINY JE THAN 35.

hnyimakan Khong, hnyi hnâm hna löng hwan hofuc ge dok ang, me tavat adre me labä e, ke u je oúhnyúkongu u bi hnyi hnyimakök, me kia ányâm je úkhaú, me tenge hnyi hnyimakök ; anyin a wale oge me he bi nya ka ling u, haingö Iehova. 28 Wä bi oge me he ka úkhacaköü u tha e me lakámâm, ke adre me he ka úkhacaköu u ka hnyi erkemok me hnahic, ke ameca he li emákâm ka wä ta je únyi hia ae kong, oge me he ka oä ka hnyi hon dok ang, me tavat adre me labä e. Me ödrin e hmeto hofuc ka than.

29 Ke haba than ame úkhûnöng me úkhacaköüä unyin bi wahingatiny Juda me Jerusalema hia. 30 K' ame he than ka hnyi uma umö Iehova, tha e me at Juda hia, me tavat adre me laba hnyi Jerusalema, me tavat bihut, me at Levi, me tavat hia, tavat ae gan me úhnyúkong : ke e ame äú ka hnyi je hnyekönyödrin ta je hofuciny tusi úhilihinyköu hia, wale adre me wä hnyi uma umö Iehova. 31 Ke ame tot than hnyi hnen, me ányä úhilihinyköu hnyi hnyimakö Iehova ; he ka hnu hotu Iehova, me tuö anyin je hnanyibu me hnen je hna ohnathoä, me huen je hna otilä, ge hnyekon ae bekhöt, me hanon ae bekhöt, he ka ányä je hofuciny úhilihinyköu adre me sihnalimen hnyi tusi ang. 32 Me e ame sihwegiä tavat hia kâe, wale tavat adre me wä hnyi Jerusalema me Beniamina. Ke haba tavat adre me laba hnyi Jerusalema, me ödrin e ányä hoton hnanyibu anyin Khong, a Khongon lakamödrin. 33 Ke haba Josea ame ohia ta je únyi ae ikiki hnyi ta je hnyei iny lakon Isaraela, k' ame musi ödrin hia adre me wä hnyi Isaraela he ka bi athnyaba, wale he ka bi athnyabai Iehova Khongudrin. Ke haba hnyi bongon je bong hia ödrin e ca saú, k' ödrin e hnu hotu Iehova, Khongon lakamödrin.

### HNYIMAKAN 35.

**K**E haba Josea ame ányä paseka kö Iehova hnyi Jerusalema : ke ödrin e hlingä paseka hnyi bong a fotininy tehi a bán. 2 Me e ame otilä tavat bihut hnyi hanymödrin, me sihwegi ödrin he ka huliwan uma umö Iehova. 3 Me e ame ha ka at Levi tavat úne ka at Isaraela hia, tavat ae kap anyi Iehova, ka habe, Ip ju tang ae kap hnyi uma a op Solomona nöku Davita than Isaraela ; k' öbun e ca he hmetu ka vadren : ke walang ang bi athnyabai Iehova Khongubun, me lakeiny a at Isaraela.

4 Ke penapena thö hoton je lap anyin lakamöbun me anyibun je dö, helä me hna sihnalimen hnö Davita than Isaraela, me hna sihnalimen hnö Solomona a nokon. 5 Ke ve todr' öbun hnyi dok ae kap hoton je hna khenä je lap anyin je lakamöbun ge je liamekeiny möbun a tavat aten hnyei, me e so c ve hu jekhon lap anyin lakamen a at Levi. 6 Ke hlingä ju paseka, me okabi öbun bi, me penapena thö hnân je liamekeiny möbun, me ányä hoton hofuc ho Iehova a deny Mose. 7 Ke haba Josea ame ham ka tavat je lakon mamoe me got, únyi hayi hna hat, hnân je hudiny paseka hia, hobi kâu tavat hia adre me hnyi hanen, ödrin thöte thauzan, ke theri thauzan je bolok : únyi ge than je meno eling. 8 Ke haba anyin je taben ödrin e ham ke hut ae betenge ka tavat, me tavat bihut, me ka at Levi. Haba Hilekia me Zakaria me Jehiela tavat musö uma umen Khong me, ödrin e ham ka tavat bihut hnân je hudiny paseka tu thauzan ke siks haded je meno ae úhnyúkong, me theri haded je bolok. 9 Ke haba Konania, me Semaia, me Nathaniela li liamekeiny mä, me Hasabia, me Jehiela, me Jozabada, je taben at Levi, ödrin e ham ka at Levi hnân je hudiny paseka faiv thauzan je meno ae úhnyúkong, me faiv haded je bolok. 10 Me adre me penapena je huliwa, haba tavat bihut ödrin e tot hnyi hnödrin, me at Levi hnyi anyidrin je dö, hoton musi anyin than. 11 Ke ödrin e hlingä paseka, ke haba tavat bihut ödrin e dukäiä ge je hpyamödrin, ke haba at Levi ödrin e uja. 12 Me ödrin e hom je hudiny leü me ham hoton jekhon je lap anyin je lakamen tavat, he ka hudo kö Iehova, hoton hna sihnalimen hnyi tusi anyi Mose. Ke ödrin e ányä heläe minya ka je bolok. 13 Me ödrin e omesikâ ge meic paseka hoton bongon e ; Ke ödrin e omesikâ ke je hut ae kap hnyi je öt, me je öt ae gan, me je öt ae lau, me ie hom ka tavat hia. 14 Ke hwaban e ödrin e penapena hobi ködrin bi me tavat bihut ; anyin a haba tavat bihut je mätrâni Arona ödrin e hudo je hudiny leü me pipikhenya ke ne o but hnyi hnyinghet : anyin a wale at Levi ödrin e penapena hobi ködrin bi me tavat bihut a je mätrâni Arona. 15 Ke haba tavat khumöng a je mätrâni Asafa ödrin e tot hnyi hnödrin hoton musi anyi Davita, me Asafa ; me Heman, me Jeduthun at wä anyin than : ke haba tavat tuö hwanuma ödrin e tot hnyi

je hwanuma : ödrin e ca he úhedrin hnyi hanymödrin, anyin a haba at Levi a je liamekeiny mödrin ödrin e penapena hobi ködrin. 16 Ke adre hia but penapena ta je huliwa hia anyi Iehova hnyi bong eling, ne ka ányâ paseka, me hudo je hudiny leü hon taben hut anyi Iehova hoton musi anyi Josea than. 17 Ke haba lakon Isaraela eling, ödrin e ányâ paseka hnyi úen e, me bijeüá areto adre me ca levenâ hnyi seven ta bong. 18 Ke ba paseka helâe hnyi Isaraela hwân hnyi üö Samuela a perofeta ; me haba khaca e ba paseka anyin je than Isaraela hia adre me ányâ helâ me hna ányâ hnö Josea, me tavat bihut, me at Levi, me at Juda me Isaraela hia ling, me aten Jerusalema. 19 Adre me ányâ paseka e hnyi huna a eitinyin musi anyi Josea.

20 Hwabab ta je únyi hia eling, k' ame hia but Josea penapena uma kap, me ame he but Neko than Aigupito ke ka vat me Kakemis hnyi Euferati : ke haba Josea ame he but he ka vat mē. 21 Me e ame kunâ je uthumetu kâu, me ha, ka habe, Ieü gak köu than Juda ? oge me ca o he ka vat möu hnyi bong aug, ke so bi me lap a iwahnaihmiony mönya ; ke Khong ame ha könya he ka ányâ logotâ : soju u ihwegiökou me Khong, at ame tha hien mönya, wâ e nye obiö u. 22 Ke so bi ame ca hwio bi Josea gan, ke e ame oiyongâ e bi, me me hæ ka vat mē, k' ame ca löng bi hofuc ho Neko únyi ge Khong, me e ame o ka hnyi vat hnyi hinyigöulen bucen e Merido. 23 Ke haba tavat hlic fana, me, ödrin fanö Josea than ; me haingen than ka lathnyabainy, ka habe, Ie hum nya thö ; anyin a oge me aat kong ut. 24 Me lathnyabainy ödrin e hom e únyi hnyi kariota e, me ip e hon anyin kariota a löny, me hom e Jerusalema ai ; me ame mokcu, me adre me konâm e hnyi je erke-mok anyin lakamen. Me ame hnyamok Juda me Jerusalema hia ga Josea. 25 Ke haba Jeremia ame khumöngö tenge ca Josea : ke haba tavat khumöng obaga me omomo hia, me, ödrin e haiö Josea hnyi anyidrin tenge ke ne o but hnyi bong ang ; ke adre me otilâ hmâ bongon e hnyi Isaraela : me wâ bi, adre hia but sihnalimen hnyi je khumönginy tenge. 26 Ke haba kolon je hna ányâ hnö Josea, me hwakecin ae so hoton hna sihnalimen hnyi hnanyibu anyi Iehova, 27 me anyin ta je huliwa a bân me biliny, wâ bi, adre hia but sihnalimen hnyi tusiny je than Isaraela me Juda.

HNYIMAKAN 36.

**H**ABA tavat aten hnyeí ödrin e hum Jehoaza nöku Josea, me otilâ e ka than hnyi Jerusalema hwaban kamen. 2 Twente theri but je hunai Jehoaza, hnyi úen e ame hwân ka than ; ke e ame musi hnyi Jerusalema hnyi kun ta tehi. 3 Ke haba than Aigupito ame hlec e hnyi Jerusalema, me kunâ tavat he ka bi hwaban wan haded je talan sileva me kkaca talan gol. 4 Ke haba than Aigupito ame otilö Eliakima ka than, liamekeiny me Jehoaza, hnyi Juda, me Jerusalema, me wia ien me me Jehoiakima bi. Ke haba Neko ame hum Jehoaza liamekeiny mē me hom e Aigupito ai.

5 Twente faiv but je hunai Jehoiakima hnyi úen e ame hwân ka than ; ke e ame musi hnyi Jerusalema eleven je huna ; ke e ame ányâ únyi ae kong hnyi hnyimakö Iehova Khongon. 6 Ke ame o but Nebukaneza than Babulona, me ca e ge je fao, he ka hom e Babulona ai. 7 Ke haba Nebukaneza ame hom minya Babulona ai ke je kaiainy uma umö Iehova, me ip hnyin umen uma hnyi Babulona. 8 Ke haba kolon je hna ányâ hnö Jehoiakima, me hwakecin ae kong e ame ányâ, me adre me wâ gan, wâ bi, adre hia but sihnalimen hnyi tusi anyin je than Isaraela me Juda : ke ame musi biju Jehoiakin a nokon hwaban.

9 Eit but je hunai Jehoiakin hnyi úen e ame hwân ka than ; ke e ame musi hnyi Jerusalema hnyi kun ta tehi me ten je bong : ke e ame ányâ únyi ae kong hnyi hnyimakö Iehova. 10 K' a o hmetu huna, haba Nebukaneza a than ame úkhünöng, me adre me hom e Babulona ai, tha e me ta je kaiainy uma umö Iehova, me otilö Zedekia, liamekeiny me Jehoiakin hnân thaniny Juda me Jerusalema.

11 Twente wan but je hunai Zedekia hnyi úen e ame hwân ka than ; ke e ame musi hnyi Jerusalema hnyi eleven je huna : 12 me e ame ányâ únyi ae kong hnyi hnyimakö Iehova Khongon ; e ame ca oúhnyükongo e bi hnyi hnyimakö Jeremia a perofeta at ame fuc únyi ga Iehova. 13 Ke haba khaca e ame úkhin fuc kö Nebukaneza than, at a hia but kunâ e he ka khemanyin kö Iehova : me e ame hwegiâ nyin, me okhötâ hnyekon me me ca hmetu kö Iehova Khongon Isaraela. 14 Khaca

## EZERA 1.

haba ta je taben tavat bihut hia, me tavat, ödrin e ânyâ hwegiâ monu, hoton hwakecin ae ikiki anyin je wanaithila; me ödrin e oikikiâ uma umö Iehova waleji e ame hia but okabâ hnyi Jerusalema. 15 Ke haba Iehova Khongon je lakamödrin, ame úkhünöng ködrin a deny anyin je úthumetu, ame vesâkong me úkhünöng; anyin a e ame betenge ge lakeiny, me hnyaban: 16 Ke so bi ödrin e hluma je uthumetu anyin Khong, me hûkotiâ hwan hofuc, me hiâ anyin je perofeta, ke ne o but ame okuâ hmönyin anyi Iehova ka lakeiny, ke ne o but ae ba únyi hnân omelö. 17 Anyin a wale e ame oâ ködrin thaniny at Kaledaia, at ame hlingâ je hidröuidrin ge hele vat hnyi uma dok a kabidrin, ke adre ca betenge ka ke hidröu, me hlu, me hingat me hûen: e ame hn' ödrin hia ka hnyi hnyamen. 18 Ke haba ta je kaia hia anyin uma umen Khong ae gan me úhnyükong, me ta je omjeúiny uma umö Iehova, me ta je omjeúiny than me anyin je taben; haba ta je únyi hia eling e ame hom Babulona ai. 19 Me ödrin e thong degecâ uma umen Khong, me tho degecâ hak veto hnyi Je-

rusalema, me thong degecâ ge meic je uma umen than, me okongoâ hia je kaiainy ae so. 20 Ke e ame hom je kolon adre ca hlingâ ge hele vat Babulona ai; me ödrin e bi athnyabainy me je lakon eling, ke ne o but hnyi úen ame musö ge dökhu at Peresi: 21 me me hwâdâ hofuc ho Iehova a deny Jeremia, ke ne o but ame bekhöt ut ta je sabathiny kânâ: anyin a haba hnyi ta je bong ae ba aten hnyei, me wale bi e sabath, ke ne o but hnyi je huna a sevente.

22 Ke haba hnyi huna a bani Koreso than Peresi, me haba Iehova ame bwebwelâ hnyeku Koreso than Peresi, me me hwâdâ hofuc ho Iehova a deny Jeremia. me e ame kunâ metâ ka hnyi dokhon dökhu ehele, me sihnalimen minya, ka habe, 23 Walang hna ha hnö Koreso than Peresi, ka habe, Haba Iehova Khongon drany ame hia but ham könya ta je dökhu hia thithö eang hmeledrany; ke e ame hia but huna könya he ka op ke uma hobi kâu hnyi Jerusalema, wale hnyi hnyei Juda. Haba tavat hia unyibun a hanen je lakeiny hia, e so e ame he thö kâe, me ame he Iehova a Khongon ka tha e mē.

## TUSI EZERA.

### HNYIMAKAN 1.

**H**NYI huna a bâniny musî anyi Koreso tuhan Peresi, me haba Iehova ame bwebwelâ hnyeku Koreso than Peresi, me me hwâdâ hofuc ho Iehova a ha Jeremia, me e ame haimemenâ hnyi dokhon dökhu hia, k' ame sihnalimen minya, ka habe, 2 Walang hna ha hnö Koreso than Peresi, ka habe, A hia but ham könya ga Iehova Khongon dran ta je dökhu hia eang hmelen; ke a hia but huna könya he ka op umen uma hnyi Jerusalema, wale hnyi hnyei Juda. 3 Haba at unyibun a hanen lakeiny hia, ke so e he Khong ka tha e mē, ke so e ame he thö Jerusalema ai, wale hnyi hnyei Juda, me me hnyi op uma umö Iehova, Khongu Isaraela, hnyi Jerusalema, (e thibi Khong). 4 Ke haba kolon tavat hia hnyi je hnyaba hia ödrin e laba hnyin, me so e he tavat aten je hnyabadrin

he ka hadru' ödrin ge sileva, me gol, me omjeú, me omeno, me ta je bwihlany minya ae betenge hobi kâu uma umen Khong wale hnyi Jerusalema. 5 Me ame todri je kamen ae beönua ge at Juda me Beniamina, me tavat bihut me at Levi. a ödrin hia hnyat a bwebwelâ je hnyekudrin ge Khong he ka he me op uma umö Iehova hnyi Jerusalema. 6 Ke haba hnyat hia a igigilö, me, ödrin e hadru' ödrin ge je kaia sileva, me gol, me omjeú, me omeno, me je únyi ae únyi hnathu. ke ca ha bi je bwihlany hia adre me ham hnyi betenge. 7 Ke haba Koreso a than ame hom minya but je kaiainy uma umö Iehova. waleji a hom Nebukaneza únyi Jerusalema me ip hnyi uma umen khongon je khong: 8 me haba Koreso than Peresi ame hou ta je únyi e a deny hnyamö Mitheredath at ame tuö omjeú, me aú kö Sesebaza ke than Juda. 9 Ke walang úseiny: thöte je kaia gol, ke wan thauzan je kaia sileva.



## EZERA 2.

ke twente nain je hele; 10 ke thöte je utkaia gol, ke foa haded ke ten je utkaia sileva a loiny, ke wan thauzan ke je kaia. 11 Haba úseiny je kaia gol me sileva hia, me, faiv thauzan ke foa haded. Ke haba Sesebaza ame hom but ta je únyi hia eling hnyi úen adre hom je aten hwenbá úhedrin Babulona, Jerusalema ai.

### HNYIMAKAN 2.

**K**E walang tavat aten hnyei, ödrin e he úhedrin hnyi hñabâ tavat waleji adre me hom, waleji hñö Nebukaneza than Babulona hna hom Babulona ai, me ödrin e he hmetu Jerusalema me Juda ai, ka hnyi anyidrin je taun; 2 tavat adre me tha o me Zerubabela, a Jesua, me Nehemia, me Seraia, me Reelaia, me Modikai, me Bilesan, me Misepa, me Bigevai, me Reh-um, me Baana. Haba úseiny tavat aten Isaraela: 3 je laku Paros, tu thauzan ke wan haded ke sevente tu. 4 Je laku Sefata, ödrin theri haded ke sevente tu. 5 Je laku Ara, ödrin seven haded ke sevenfe faiv. 6 Je laku Pahatha-moaba, je laku Jesua me Joab, ödrin tu thauzan ke eit haded me twelv. 7 Je laku Elama, ödrin wan thauzan ke tu haded ke fifte foa. 8 Je laku Zatu, ödrin nain haded ke fâte faiv. 9 Je laku Zakai, ödrin seven haded ke sikste. 10 Je laku Binui, ödrin siks haded ke fâte tu. 11 Je laku Bebai, ödrin siks haded ke twente theri. 12 Je laku Azegada, ödrin wan thauzan ke tu haded ke twente tu. 13 Je laku Adonikama, ödrin siks haded ke sikste siks. 14 Je laku Bigevai, ödrin tu thauzan ke fifte siks. 15 Je laku Adin, ödrin foa haded ke fifte foa. 16 Je laku Atera, únyi ga Hezekia, ödrin nainte eit. 17 Je laku Bezai, ödrin theri haded ke twente theri. 18 Je laku Jora, ödrin wan haded ke twelv. 19 Je laku Hasum, ödrin tu haded ke twente theri. 20 Je laku Giba, ödrin nainte faiv. 21 Je laku Bethe-leema, ödrin wan haded ke twente theri. 22 At Netofa, ödrin fifte siks. 23 At Anathoth, ödrin wan haded ke twente eit. 24 Je laku Azemaveth, ödrin fâte tu. 25 Je laku Kiriatha-jarim, Kefira, me Berotha, ödrin seven haded ke fâte theri. 26 Je laku Rama me Geba, ödrin siks haded me twente wan. 27 At Mikemas, ödrin wan haded ke twente tu. 28 At Beth-ela me Ai, ödrin tu haded ke twente theri. 29 Je

laku Nebo, ödrin fifte tu. 30 Je laku Magebis, ödrin wan haded ke fifte siks. 31 Je lakon ke Elama, ödrin wan thauzan ke tu haded ke fifte foa. 32 Je laku Harim, ödrin theri haded ke twente. 33 Je laku Lod, me Hadid, me Ono, ödrin seven haded ke twente faiv. 34 Je laku Jeriko, ödrin theri haded ke fâte faiv. 35 Je laku Senaa, ödrin theri thauzan ke siks haded ke thöte. 36 Ke tavat bihut: haba laku Jedaia, je hanen lap anyi Jesua, ödrin nain hâded ke sevente theri. 37 Je laku Imer, ödrin wan thauzan ke fifte tu. 38 Je laku Pasur, ödrin wan thauzan ke tu haded ke fâte seven. 39 Je laku Harim, ödrin wan thauzan ke seventin. 40 Ke at Levi: je laku Jesua me Kademiël, únyi ge laku Hodavia, ödrin sevente foa. 41 Ke tavat khumöng: je laku Asafa, ödrin wan haded ke twente eit. 42 Je lakon tavat tuö hwanuma: je laku Saluma, je laku Atera, je laku Talemon, je laku Akub, je laku Atila, je laku Sobai, haba ödrin hia, wan haded ke thöte nain. 43 At Nethini: je laku Ziba, je laku Hasufa, je laku Tabaoth; 44 je laku Keros, je laku Sia, je laku Padona; 45 je laku Lebana, je laku Hagaba; je laku Akub; 46 je laku Hagab, je laku Salemai, je laku Hanan; 47 je laku Gidel, je laku Gaha, je laku Reaia; 48 je laku Rezina, je laku Nekoda, je laku Gazam; 49 je laku Uza, je laku Pasea, je laku Besai; 50 je laku Aseña, je laku Meunim, je laku Nefusim; 51 je laku Bakebuk, je laku Hakufa, je laku Harehur; 52 je laku Bazeluth, je laku Mehida, je laku Haresa; 53 je laku Barekos, je laku Sisera, je laku Tama; 54 je laku Nezia, je laku Hatifa. 55 Je lakon lathnyabai Solomona: je laku Sotai, je laku Sofereth, je laku Feruda, 56 je laku Jaala, je laku Darekon, je laku Gidel; 57 je laku Sefata, je laku Hatil, je laku Pokereth-zebaim, je laku Ami. 58 Haba at Nethini hia me lakon lathnyabai Solomona, me, ödrin theri haded ke nainte tu. 59 Ke walang tavat adre me o úheny Tele-mela, me Tele-haresa, me Kerubi, me Adan, me Imer: ke ca khan' ödrin he ka omanená je lap anyin lakamödrin bi, me anyidrin dö, ödrin e ne at Isaraela la: 60 je laku Delaia, je laku Tobia, je laku Nekoda, ödrin siks haded ke fifte tu. 61 Me ke je lakon tavat bihut: je laku Habaia, je laku Koz, je laku Bazilai at ame hok áiân únyi ge je laku Bazilai at

## EZERA 3, 4.

Gileada, m'adre me hawâ e hoton iödrin. 62 Hnyat eling ödrin e elâm hna sihnalimidrin hnyi hna sihnalimen je dö, ke so bi adre ca wâ je iödrin: anyin a wale adre me haikongu ödrin me ob' ödrin me me ca at bihut. 63 Ke haba at ame musi ame ha ködrin m' ödrin e ca he ka hnyi an je únyi ae ti kap, ke ne o but ame tot ke at bihut me Urim me Thumim. 64 Haba úkhacaköu hia ödrin fâte tu thauzan ke theri haded ke sikste, 65 me lathnyabaidrin minya obaga me omomo; ödrin seven thauzan ke theri haded ke thöte seven: ke e hu gadrin tavat khumöng obaga me omomo a ödrin tu haded. 66 E hu haledrin je hors, seven haded ke thöte siks; ke haledrin je miul a tu haded ke fâte faiv; 67 haledrin je kamela a foa haded ke thöte faiv; je asina, siks thauzan seven haded ke twente. 68 Ke haba ke je kamen ae beönua ödrin e o but ka hnyi uma umö Iehova hnyi Jerusalema, m' ödrin e ka hamödrin ham hobi kâu uma umen khong he ka otilâ e hnyi hnen: 69 ödrin e ham hoton hna ve hu ka hnyi tang omjeúiny huliwa, sikste wan thauzan je dareki gol, ke faiv thauzan je mina sileva, ke wan haded je úkhaúen tavat bihut. 70 Ke haba tavat bihut, me at Levi, me ke je hnyat, me tavat khumöng, me tavat tuö hwanuma, me at Nethini, adre me ve labâ anyidrin je taun, me at Isaraela hia hnyi anyidrin bi je taun.

### HNYIMAKAN 3.

**K**E ame o but tehi a seveniny, ke e but lakon Isaraela hnyi anyidrin je taun, me haba tavat adre me úkhacaköu hnyi Jerusalema helâ me at a khaca. 2 Me ame todrö Jesua nöku Jozadaka me je liamekeiny më a tavat bihut, me Zerubabela nöku Sealetielâ, me je liamekeiny më, me otilâ taben hut anyin Khongon Isaraela, hnân hudo je hudiny leú hon e, helâ me hna sihnalimen hnyi hnanyibu anyi Mose aten Khong. 3 Ke ödrin e otilâ taben hut hnyi ka hnen bi; anyin a ödrin e outen tavat aten je hnyei: me ödrin e hudo hon e je hudiny leú kö Iehova, je hudiny leú hnyi hnyomakatu me sahac. 4 Ke ödrin e anyâ bijeúiny uma hunuma, helâ me hna sihnalimen, me hudo je hudiny leú hnyi je bong hia thibut hoton numera, helâ me hna húna, me hoton hanymen ke bong me ke bong; 5 ke hwaban e, e bala bi hudiny

leú, me je tehi a teb únyi, me je bijeú ae kap adre thu anyi Iehova hia, me je hut adre ka hamödra hudo kö Iehova. 6 Ödrin e ibi hwân he ka hudo je hudiny leú kö Iehova hnyi bong a bâniny tehi a seveniny: k' ödra tiga ca umo bi taben uma umö Iehova. 7 Ke ödrin e ham mone ka tavat up veto, me tavat tre-trau utö; me ham jeú me köiö, me wakaco, ka at Zidona me Turo he ka hom je utö arasi únyi Lebanona ka hnyi köiö, Jopa ai, hoton hna hna ködrin ga Koreso than Peresi.

8 Ke haba hnyi huna a loiny hnödrin hna o ka hnyi uma umen Khong hnyi Jerusalema, hnyi tehi a loiny, me ame hwân Zerubabela nöku Sealetielâ, me Jesua nöku Jozadaka, me je kolon a je liamekeiny mödrin a tavat bihut, me at Levi, me hnyat hia adre me he Jerusalema ai úhedrin hnyi hna bâ; he ka otilâ at Levi, hnyat a twente huna me gan hon e, he ka musö huliwa hnyi uma umö Iehova. 9 Me ame todrö Jesua tha e me lakon me je liamekeiny më, me Kademiël me lakon, je laku Juda, helâ me at a khaca, he ka musö tavat bi huliwa hnyi uma umen Khong: me laku Henedada, je lakudrin, me je liamekeiny mödrin a je at Levi. 10 Ke haba hnyat op uma umö Iehova me adre me otilâ tavat bihut adre khaú, ke je trutru hnyi hnyamödrin, ke haba at Levi a laku Asafa ödrin e tot me je simebalo he ka oganö Iehova hoton musi anyi Davita than Isaraela. 11 Ke ödrin e khumöng oganá me ole kö Iehova, anyin a e at ae so, anyin a nyiele balua anyin ibetengiö ka at Isaraela. Ke haba tavat hia ödrin e hongot hwege göranyai me oganö Iehova, anyin adre me bi taben uma umö Iehova. 12 Ke se hia tavat bihut, me at Levi, me je kamen ae beönua, a wahingat ödrin e wâ uma a ban, ke adre me bi taben uma eang hnyi hnyimaködrin, me ödrin e tenge hwege göranyai; ke se hia tavat adre me hongot hwege göranyai hnyi senyin: 13 me ca manen bi ka tavat hwakuku senyin me hwatenge: anyin a tavat adre me hongot hwege göranyai, ke adre me löng medien hnyi dok ae sákâú.

### HNYIMAKAN 4.

**K**E ame löng je iwahnaihmiöny me at Juda me Beniamina a g'ame he but je lakon bâ ka op uma umö Iehova, Khongon at Isaraela; 2 me ödrin e he but kâ

## EZERA 5.

Zerubabela, me je kamen ae beðnua, me ha ködrin, ka habe, Hn' öhmun dut he ka tha op möbun : anyin a öhmun e elâm Khongubun e úcú möbun ; ke öhmun e labö bi hut káu hwân hnyi je bong bongu Esar-adona than Asuria, at a hum öhmun kââng. 3 Me ame ha ködrin Zerubabela, me Jesua, me je kolon je kamen ae beðnua hnyi Isaraela, ka habe, E ca hu hanymöbun unyihmun he ka op uma hobi káu Khonguhmun ; ke öhmun e he ka hake op hobi kö Iehova Khongon at Isaraela, helâ me hna hûna köhmun ga Koreso a than, tuhan at Peresi. 4 Me haba tavat aten hnyei ödrin e osënyinâ je hnyamen at Juda, me oti ödrin hnyi hna up uma, 5 me bi omjeû ka tavat ha bongon m' adre me ovhelâ únykúmenödrin hnyi ta je bong hia bongu Koreso than Peresi. 6 Ke haba hnyi musi anyi Asueru, hnyi ûen e ame hwân ka musi, ödrin e sihnalimen káu he ka haikongoâ aten Juda me Jerusalema.

7 Ke haba hnyi je bong bongu Aretaseta, haba Biselama, me Mitheredath, me Tabeela, me je kolon a je hanödrin, ödrin e set kö Aretaseta than Peresi ; ke haba hna sihnalimen tusi me mataitusi Suria, me adre set hnyi hwen Suria. 8 Haba Rehum at owisa, me Simesai at sihnalimen, ödrü me sihnalimen tusi kö Aretaseta than, me haiö Jerusalema helâng : 9 ame sihnalimen Rehum at owisa, me Simesai at sihnalimen, me je kolon a je lahanödrü ; at Dinai, me at Afareseka, me at Tarepelai, me at Aferesai, me at Areka, me at Babulona, me at Susana, me at Deave, me at Elama, 10 me je ke keihen je hnyei waleji hnö Asenapa ae gan me únyi hnathu, hna hom but, me ip ödrin hnyi taun Samaria, me hnyi ke keihen hnyei hoton wagewe, me tavat a helâe. 11 Walang hna set hnyi tusi waleji ödrin e kunâ kö Aretaseta than, ka habe, Öhmun je athnyabaem tavat hoton wagewe, me tavat a helâe. 12 Khanö u thö than, a haba at Juda tavat ödrin e he but köhmun ühedrin unyâm, ödrin e o but hnyi Jerusalema ; ke ödrin e op taun ame thu musi me kong, k' adre hia but umo je hna up haginny, me okhötâ je taben. 13 Khanö u thö walang ang than a g' adre me ne op hmetu taun ang, me umo je hna up haginny, me ödrin e ca he ka bi fâtâ omjeû me jeû, me bi öhnyei, k' adre me he ka okongoâ je than nyiele. 14 Ke walang ang, anyin a öhmun e an jeû únyi hnyi uma umen than, ke ca úcú köhmun he ka wâ hna öunyibâü

than, anyin a wale öhmun e úkhünöng he ka thumeto than ; 15 m' adre me he ka elâm hnyi tusi hnân öunyikúmeâ anyin lakâmâm : m' u me he wâ hnyi tusi hnân öunyikúmeâ me khana a g' ame thu musi taun ang, k' ame okongoâ ta je than me ta je hnyei, ke haba ehac ödrin e úhügünö musi anyin than hnyin : ke wale can adre me ohia taun ang ehac. 16 Ke öhmun e thumeto than a g' adre me ne he ka op hmetu taun ang, me umo je hna up haginny, awe, ame he ka ba hmetu ânyâm musi hoton wagewe. 17 Me haba than ame úkhünöng he ka thu kö Rehum at owisa, me Simesai at sihnalimen, me je kolon je lahanödrü hnyat adre me laba hnyi Samaria, me je kolon hnyi ke keihen hoton wagewe, ka habe, Hnahic ut, me hofuc helâe. 18 Haba tusi öbun e kunâ köhmun, me adre me hia but aü manenâ hnyi hnyimakök. 19 Ke oge me hûna he ka elâm, me adre me wâ a g' ame bi gan taun eling ehac ka ta je than, k' ame kú hnyin ukhin fuc me úhügünö than. 20 Ke haba ehac e hu je than ae hwege hnyi Jerusalema, k' ödrin e musö je hnyei hia thithö hoton wagewe ; k' adre me labö fâtâ omjeû, me jeû, me bi öhnyei ködrin. 21 Ke haba walang ang e so öbun e he ka nyibo me thawâ tavat eling, m' adre me ca he ka op taun eling ke ne o but oge me he ka otillâ hnanyibu. 22 Ke wâ wia ju me ca ânyâ becâ : anyin a ieû ame he ka kú únyi ae kong me öuhnyükongoâ je únyi anyin je than? 23 Ke haba hnyi ûen adre me aü tusi anyi Aretaseta than hnyi hnyimakö Rehum me Simesai at sihnalimen, me je lahanödrü, me ödrin e ie he Jerusalema ai ka at Juda me thaw' ödrin ge tang hwege me man. 24 Me adre me ip ju huliwainy uma umen Khong hnyi Jerusalema ; ki adre me hna huliwa bala ke ne o but hny' huna a loiny musi anyi Dariu than Peresi.

### HNYIMAKAN 5.

**K**E haba li perofeta, wale Hagai perofeta, me Zakaria nöku Ido, ödrü me perofeta ka at Juda me Jerusalema, hnyi ien Khongu Isaraela ödrü me perofeta ködrin. 2 Me ame todrö Zerubabela nöku Sealetiela, me Jesua nöku Jozadaka, me hwân he ka op uma umen Khong hnyi Jerusalema ; ke e unyidru je perofeta anyin Khong he ka hadru' ödrü. 3 Haba hnyi ûen eling ame o but ködrin Tatenai at ame musi hoton

## EZERA 6.

wagewe, me Setara-bozenai, me je lahanödru, me ha ködrin ka habe, Ie at ame hn' öbun he ka op uma ang, me umo hna up hak ang? 4 Ke öhmun e ha helâng ködrin, ka habe, Ia ien je hnyat ödrin e op uma ang? 5 Ke e but emakan Khongudrin hon wahingatiny at Juda, me adre me ca thaw' ödrin, me me o but hofuc kö Dariu, me adre me he ka thu hmetu hofuc eling hnyi tusi.

6 Haba tusi ame kunâ kö Dariu than hnö Tatenai at ame musî hnyi ke keihen hoton wagewe, me Setara-bozenai, me lahanen a at Afareseka, wale hnyi ke keihen hoton wagewe: 7 ödrin e kunâ tusi kâu, ke adre sihnalimen hnyin helâng, ka habe, Kö Dariu than, hnahic hia but. 8 Khanö u thö than, a öhmun e he ka hnyi hnyei Juda, ka hnyi uma umen Khong ae gan, wale adre op je veto ae gan hnyin, ke adre kha je utö hnyi hna up uma, ke e logot huliwa eang, ke e hnahic ut e hnyi je hnyamödrin. 9 Me öhmun e hnö wahingat eling, me ha ködrin, ka habe, Ia ame hna köbun he ka op uma eang, me umo hak veto ang? 10 Ke öhmun e hnö minya je iödrin, me hnân thumetu u, me me khan' öhmun he ka sihnalimen ien je athnathuidrin. 11 Ke ödrin e thu köhmun helang, ka habe, Öhmun je athnyabainy Khongon drany me hmeledrany me öhmun e op uma waleji adre op ehac ae se hia je hunainy, waleji hnen ke than Isaraela ae gan hmâ hna op me umo. 12 Ke haba hwaban dö e a hia but lakamöhmun ohmönyinâ Khongon drany, me e ame hn' ödrin ka hnyi hnyamö Nebukaneza than Babulona at Kaledaia, at ame ohia uma eang, me hom tavat Babulona ai. 13 Ke haba hnyi huna a bâna than hnyin Koreso than Babulona, me Koreso than ame hûna he ka op uma eang umen Khong. 14 Ke haba je kaia gol me silevainy uma umen Khong, waleji a hom Nebukaneza únyi hnyi uma e Jerusalema, k' ame hom Babulona ai ka hnyi uma hmi; me haba Koreso ame hom ta je únyi e únyi hnyi uma hmi e Babulona, k' ame ham ka ke at Sesebazara ien, at e ame hia but otîlá me gavena; 15 me e ame ha kâu, ka habe, Hom dö je kaia ang, me he thö, me ip ka hnyi uma kap hnyi Jerusalema, k' adre me he ka op uma umen Khong hnyi hnen. 16 Me ame o but Sesebazara at eling, me bi taben uma umen Khong hnyi Jerusalema: ke hwân hnyi úen e ke ne o but walang ang, adre me

labö op, k' adre me tiga ca umo bala. 17 Ke walang ang ame ne so ka than, awe, adre me he ka elâm hnyi uma umen omjeû anyin than hnyi Babulona, ame ne hnathu a g' ame hûna ga Koreso than he ka op uma umen Khong eling hnyi Jerusalema, ke so ame he than ka kunâ köhmun weny hnyi bongon eling.

### HNYIMAKAN 6.

**M**E haba Dariu than ame úkhûnöng m' adre me elâm hnyi uma umen je tusi, dok adre me hip omjeû hnyin hnyi Babulona. 2 Me adre me wâ hnyi Akemetha, hnyi uma umen than hnyi hnyei Madai, tusi adre vhec, k' adre me hia but sihnalimen hnyin hofuc hnân oûnykûmeâ, ka habe, 3 Haba hnyi huna a bâna than hnyin Koreso, me haba Koreso than ame hûna, ka habe, Haba ge uma umen Khong hnyi Jerusalema, me adre me he ka op uma, waleji adre me bi hut hnyin, ke adre me he ka ip hwegiâ je taben; k' ame he ka beû göranyai sikste kubit, ke sikste kubit úlauen; 4 kun ta deö veto ae gan, ke khaca deö utö ae teb unyi: k' adre me he ka bi hwaban e únyi hnyi uma umen than: 5 ke haba je kaia gol me sileva anyin uma umen Khong, waleji a hom Nebukaneza únyi hnyi uma kap hnyi Jerusalema, me hom Babulona ai, adre me he ka ham hmetu, me hom hmetu ka hnyi uma kap hnyi Jerusalema, ke únyi me ke únyi ka hnyi hnen, ke u me he ka ip hnyi uma umen Khong. 6 Ke walang ang, Tatenai lö, at musî hnyi ke keihen hoton wagewe, me Setara-bozenai, me je lahanöbu a at Afareseka hnyi ke keihen hoton wagewe oûsákâû öbun dut me únyi e: 7 ca he ka ovhelö huliwa hnyi uma umen Khong; hamen at ame musö at Juda me wahingatiny at Juda op uma umen Khong eling hnyi hnen. 8 Ke haba khaca inya oge me hûna ge hnöbun hna he ka ânyâ ka wahingatiny at Juda hobi kâu hna op uma umen Khong eling: a haba ke je omjeû, wale únyi hnyi fat hnyi ke keihen hoton wagewe, adre me he ka ie ham ka tavat ang hnân hwaban huliwa, m' adre me ca ovheli ödrin bi. 9 Ke haba je únyi ae úcû ködrin, wale je nokon kau, me je mamoe бага, me je nokon mamoe, hnân hudiny leú ka Khongon drany, me hwit, me sâlt, me waina, me wakaco, hoton hofuc hwan tavat bihut hnyi Jerusalema, me, adre me he ka ham ködrin

## EZERA 7.

hnyi ke bong me ke bong k' adre me ca he ka önua : 10 m' ödrin e he ka hudo je hut ae bo so ka Khongon drany, me hic me me möt than, me lakon. 11 Ke oge me hia but hûna minya, a haba tavat hia thithö adre me he ka wia hofuc ang, adre me he ka oc ut ke utö únyi hnyi umen uma, me adre me he ka ogöranyâ e me ca e hon; me ame he umen uma ka hnân hna digic thätünyi can e : 12 ke so ame he Khong at ame ip ien eling ka ohia ta je than me ta je hnyei hia thithö, ödrin e he ka inâ je hnyamödrin he ka wia únyi e, he ka ohia uma umen Khong eling wale hnyi Jerusalema. Oge me hia but hûna, inya Dariu, ie ânyâ thö.

13 Ke haba Tatenai at ame musî hnyi ke keihen hoton wagewe, me Satara-bozenai, me je lahanödru, ödrin e ie ânyâ, can hna úkhünöng hnö Dariu than ködrin. 14 Ke haba wahingatiny at Juda adre me op uma me hnahic ut, únyi ge hna perofeta hnö Hagai a perofeta me Zakaria nöku Ido. Ke ödrin e op me umo e, hoton musî anyin Khongu Isaraela, me hoton hna hûna hnö Koreso, me Dariu, me Aretaseta thaniny Peresi. 15 Ke adre me umo uma eling hnyi bong a kuniny tehi Adara, wale hnyi huna a siksiny musî anyi Dariu a than. 16 Ke haba lakon Isaraela, me tavat bihut, me at Levi, me je kolon a je bâ, me adre me delec uma umen Khong me senyin. 17 Ke haba hnyi hnödra hna delec uma umen Khong, me ödrin e hudo wan haded je bolok, ke tu haded je mamoe бага, ke foa haded je nokon mamoe; ke twelw ta got бага hnân hudiny hulö tavat Isaraela hia, úco úseiny je tribu Isaraela. 18 Ke ödrin e otílâ tavat bihut ka hnyi je hanymödrin, me at Levi hnyi anyidrin je dö, hobi kâu huliwa anyin Khong, wale hnyi Jerusalema; hoton hna sihnalimen hnyi tusi anyi Mose.

19 Ke haba je lakon bâ adre me ânyâ paseka hnyi bong a fotininy tehi a bán. 20 Anyin a haba tavat bihut me at Levi ödrin e hia but tha obosoi ödrin; ke ödrin e bo so but hia thithö: ke ödrin e hlingâ paseka hobi kâu je lakon bâ hia thithö, me je liamekeiny mödriu a tavat bihut, me hobi ködrin bi. 21 Ke haba lakon Isaraela, hnyat adre me hmetu úhedrin hnyi hna bâ, me hnyat ödrin e laba unyidrin úhedrin hnyi ta je únyi ae ikiki anyin je wanaithila hnyi hnyei he ka elöm Iehova Khongu Isaraela, me, ödrin e hnyi han,

22 me ânyâ senyinâ hnyi seven je bong bijeüniny areto adre ca levenâ: anyin a Iehova ame osenyini ödrin, me wia ködrin hnyekon than Asuria, me ohwegiâ je hnyamödrin hnyi huliwainy uma umen Khong, wale Khongon at Isaraela.

### HNYIMAKAN 7.

**K**E hwaban ta je únyi eling hnyi musî anyi Aretaseta than Peresi, me ame he Ezera nöku Seraia, nöku Azaria, nöku Hilekia, 2 nöku Saluma, nöku Zadoka, nöku Abituba, 3 nöku Amaria, nöku Azaria, nöku Meraioth, 4 nöku Zeraia, nöku Uzi, nöku Buki, 5 nöku Abisua, nöku Fineasa, nöku Eleazara, nöku Arona at bihut ae beönua: 6 haba at eling a Ezera ame he but úheny Babulona; ke e at ae ti khana sihnalimen hnyi hnanyibu anyi Mose, waleji a ham Iehova Khongu Isaraela: ke haba than ame ham hia kâu hnen hna sumâtâ, helâ me hnyamö Iehova a Khongon hon. 7 Ke ame he but ke je lakon Isaraela, me ke je at bihut, me at Levi, me tavat khumöng, me tavat tuö hwanuma, me at Nethini, Jerusalema ai hnyi huna a seveni Aretaseta than. 8 Ke e ame o but hnyi Jerusalema hnyi tehi a thabúnginy wale huna a seveniny than. 9 Anyin a haba hnyi bong a bániny tehi a bán e ame ibi hwân he ka he úheny Babulona, ke haba hnyi bong a bániny tehi a thabúnginy, e ame o but hnyi Jerusalema, helâ me hnyamen Khongon ae so hon. 10 Anyin a Ezera ame penapena hnyekon he ka elâm hnanyibu anyi Iehova, me ânyâ, me he ka únö hnyi Isaraela je hnanyibu me je hna owisa.

11 Ke walang je hofuc hnyi tusi wale a ham Aretaseta than kö Ezera at bihut, me at sihnalimen, at ame sihnalimen je hofuc hnyi je hnanyibu anyi Iehova me hnen je hna hûna ka at Isaraela. 12 Aretaseta, thaniny ta je than, kö Ezera at bihut, at ame sihnalimen hnanyibu anyin Khongon drany, ae bekhöt, me helâe. 13 Inya oge me hûna, a haba at Isaraela hia, me anyidrin tavat bihut, me at Levi, hnyi dökhuk dökhü, ödrin e ka hamödra weny he ka he Jerusalema ai, awe, adre me he ka tha he möu. 14 Anyin a inya than oge me kunö u me je obotkongik a seven he ka elâm ge Juda me Jerusalema, hoton hnanyibu anyin Khongom a e hnyi hnyamâm; 15 me he ka hom sileva me gol, waleji a ka únyi gak

## EZERA 8.

me je obotkongik hna ham ka Khongon Isaraela, at ame laba hnyi Jerusalema, 16 me sileva me gol hia u me he ka wâ hnyi hnye Babulona hia, tha e me hna ham bâûâ hnen tavat, me tavat bihut, ödrin e ka hamödrin ham ka hnyi uma umen Khongudrin hnyi Jerusalema; 17 anyin a wale u me he ka ie úco hwaban je mone eling je bolok, me je mamoe бага, me je nokon mamoe, me je hudiny han, me je hudiny ic, me hudo hon taben hut hnyi uma umen Khongubun hnyi Jerusalema. 18 Ke haba únyi ae so köu me je liamekeiny möu he ka ányâ ge je kolon je sileva me gol, ányâ thö helâ me weny Khongubun. 19 Ke haba je kaia adre ham köu hobi kâu huliwa hnyi uma umen Khongom, ip ju hnyi hnyimakan Khongon Jerusalema. 20 Ke haba ke je únyi ae úcú hobi kâu uma umen Khongom a u me wem he ka ham, me ham dö únyi hnyi uma omjeú anyin than. 21 Ke haba inya, Aretaseta than, me oge me húna ka tavat tuö omjeú hia thithö hnyi ke keihen hoton wagewe, a haba ta je únyi hia ame he Ezera at bihut, at a sihnalimen hnanyibu anyin Khongon drany, ka sumâtâ unyibun, me, adre me he ka ie ányâ, 22 ke ne o but hnyi wan haded je talan sileva, ke wan haded je tulut hwit, ke wan haded je bath waina, ke wan haded je bath wakaco, ke sâlt adre me ca he ka ha tulutiny. 23 Haba ta je únyi hia a húna Khongon drany, me ányâ wisa thö hobi kâu uma umen Khongon drany; anyin a ieú ame he ka hu hmönyin ka dökhnu dokhon than me je lakon? 24 Ke öhmun e ha minya köbun, a haba tavat bihut, me at Levi, me tavat khumöng, me tavat tuö hwanuma, me at Nethini, me lathnyabainy uma eling umen Khong, me adre me ca he bi ka kun' ödrin ka fâtâ omjeú, me jeú, me bi öhnyei. 25 He haba u Ezera, me u ma he ka otílâ tavat úhnei me tavat owisa, hoton metâiny Khongom wale unyâm, he ka owisa ka tavat hia thithö hnyi ke keihen hoton wagewe, tavat hia ae khan' ödra hnanyibu anyin Khongom; ke nâ thö tavat ae ca khan' ödra. 26 Ke haba tavat hia adre me ca hnyi ányâ hnanyibu anyin Khongom me hnanyibu anyin than, me adre me he ka ie bi hwabödra, ame ne he ka mok, ame ne he ka obâ, ame ne he ka hûgúnâ anyin ta je únyi, ame ne he ka ca.

27 Ole kö Iehova Khongon lakamötin, at ame ip únyi e hnyi hnyekon than, he ka

ohmanenangâ uma umö Iehova hnyi Jerusalema; 28 me at ame okúâ könya ibetengiö hnyi hnyimakan than me anyin je obotkong, me hnyi hnyimakan je taben aegan hia thithö anyin than. Ke adre me ohwegiö nya hoton hnyamö Iehova Khonguk huk, me oge me úkhacaköuâ ke je at ae únyi hnathu úhedrin hnyi Isaraela he ka tha he mönya.

### HNYIMAKAN 8.

**W**ALE je lakamödrin ae beönua, ke walang je dö anyin tavat adre tha he mönya úhedrin Babulona, hnyi ün musu anyi Aretaseta than. 2 Hanen je laku Fineasa, Geresoma: hanen je laku Ithamara, Daniela: hanen je laku Davita, Hatusa. 3 Hanen je laku Sekania; hanen je laku Paros, Zakaria: ke adre tha ai gaga më obaga a wan haded ke fifte. 4 Hanen je laku Pahatha-moaba, Elicoenai nöku Zeraia; ke tha e me obaga a ödrin tu haded. 5 Hanen je laku Sekania nöku Jaziela, ke tha e më obaga a theri haded. 6 Hanen je laku Adin, Ebed nöku Jonathan; ke tha e me obaga a fifte. 7 Ke hanen je laku Elama, Jesaia nöku Athalia; ke tha e më obaga a sevente. 8 Ke hanen je laku Sefata, Zebadia, nöku Mikaela, ke tha e më obaga a eite. 9 Hanen je laku Joab, Obadia nöku Jehiela; ke tha e më obaga a ödrin tu haded ke eitin. 10 Ke hanen je laku Selomith, nöku Josefa; ke tha e më obaga a wan haded ke sikste. 11 Ke haba hanen je laku Bebai, Zakaria nöku Bebai; ke tha e më obaga a twente eit. 12 Ke hanen je laku Azegada, Johana nöku Hakatan; ke tha e me obaga a wan haded ke ten. 13 Ke hanen je laku Adonikama, tavat a bilidrin; ke walang je iödrin, Elifelet, me Jeiela, me Semai, ke tha e mödrin obaga a sikste. 14 Ke lo li hanen je laku Rigevai, Uthai me Zabud; ke tha e mödrin obaga a sevente.

15 Ke o ge me úkhacaköu ödrin hnyi wagewe ame hingölö Ahava ai; ke öhmun e hunuma eling hnyi kun ta bong: ke oge me wâ gaga tavat, me tavat bihut, ke oge me ca wâ bi eling je laku Levi. 16 Ke oge me hawo Eliezara, me Ariela, me Semaria, me Elenathana, me Jarib, me Elenathana, me Nathana, me Zakaria, me Mesulama, je at ae únyi hnathu; me Joiarib minya, me Elenathana li at úne. 17 Me oge me kun' ödrin kö Ido tuhan hnye

## EZERA 9.

Kasifa, ke oge me bi hodrin hofuc hnân ha kö Ido, me je liamekeiny mē a at Nethini, hnyi hnyei Kasifa, m' ödrin e he ka hom köhmun ke je lathnyaba hobi kâu uma umen Khonguhmun. 18 Ke helâ me hnyamen Khonguhmun ae so huhmun me ödrin e hom ke at ae metâ köhmun, hanen je laku Maheli nöku Levi, nöku Isaraela; me Serebia, me lakon me je liamekeiny mē a ödrin eitin; 19 me Hasabia, ke tha e mē Jessaia nöku Merari, me je liamekeiny mē me je lakudrin, a twente; 20 me ke je Nethini, hnyat eji a ham ga Davita me je than hobi kâu huliwa anyin at Levi, a tu haded ke twente at Nethini: k' adre me ve ha je ödrin. 21 Ke oge me haimemenâ uen he ka ca han eling hnyi wagewe Ahava, me hom ûhnyúkongi öhmun bi hnyi hnyimakan Khonguhmun, he ka elâm gan dehmun gethen ae wisa, me je wanakat gahmun, me anyihmun ta je ûnyi hia thithö. 22 Anyin a iny hmehma he ka sumâtâ ge than je soje me tavat tabö hors he ka hadru' öhmun can je iwahnaihmiöny eü hnyi gethen: anyin a öhmun e hia but ha ka than, ka habe, E bala bi hnyamen Khonguhmun hnân so ködrin a hnyat adre me elâm e; ke haba maniny man me anyin hmönyin me e bala bi hudrin hia thithö tavat adre me hna degecâ. 23 Me öhmun e ca han k' öhmun e sumâtâ bi Khonguhmun ge ûnyi eling; me e ame ling öhmun. 24 Me oge me ip ke je at bihut ae beönua a ödrin twelv, wale Serebia me Hasabia ke tha mödru ke je liamekeiny mödru a ödrin ten, 25 me oge me tuluto ködrin sileva, me gol, me je kaia, adre me ham hnân hobi kâu uma umen Khong, waleji a ham than me je obohtkonginy, me anyin je taben, me at Isaraela hia thithö eling: 26 haba sileva oge me tuluto ka hnyi hnyamödrin, me, siks haded ke fifte je talan, me je kaia sileva a wan haded je talan; ke wan haded je talan gol; 27 ke twente je utkaia gol, a wan thauzan je dareki ihmakiny, ke lo li kaia bras ae so ae hadröngöc ae ûnyi hna-thu helâ me gol. 28 Ke oge me ha ködrin, ka habe, Öbun e kap ut kö Iehova, ke kap ut je kaia; ke haba sileva me gol, adre me ka hamödra ham kö Iehova Khongon lakamöbun. 29 Wâ wia, me tuö, ke ne o but öbun e he bi ka tuluto hnyi hnyimakan tavat bihut ae beönua, me at Levi, me je taben je kamen ae beönua hnyi Isaraela, hnyi Jerusalema, hnyi je hnyeuleny umö Iehova. 30 Me haba at bihut, me at Levi,

ödrin e tuluto ihmakiny sileva me gol, me je kaia, he ka hom Jerusalema ai ka hnyi uma umen Khonguhmun.

31 Me öhmun e he ûheny hnyi wagewe Ahava hnyi bong a twelviny tehi a bân, he ka he Jerusalema ai: ke ka e huhmun hnyamen Khonguhmun, me e ame omeli öhmun ûnyi hnyi hnyamen je iwahnaihmiöny, me at ame laba duöng eü hnyi gethen. 32 Ke öhmun e o but hnyi Jerusalema, me laba eling hnyi kun ta bong. 33 Ke haba hnyi bong a vakiny adre me tuluto sileva, me gol, me je kaia, ka hnyi hnyamö Meroth nöku Uria at bihut, hnyi uma umen Khonguhmun; ke tha e mē Eleazara nöku Fineasa; ke tha e mödru Jozabada nöku Jesua, me Noadia nöku Binui, li at Levi; 34 ta je ûnyi hia ge úseiny me ihmakiny; ke adre sihnalimen ihmakiny hia hnyi ûen eling. 35 Ke haba lakon je bâ, tavat adre me o ûhedrin hnyi hna bâ, ödrin e hudo je hudiny leü ka Khongon Isaraela, twelv je bolok hobi kâu Isaraela hia, ke nainte siks je mamoe бага, ke sevente seven je nokon mamoe, ke twelv je got бага hnân hudiny hulö: wale hia e je hudiny leü kö Iehova. 36 Ke ödrin e ha hofuc hwan than ka tavat musi ae beönua anyin than, me je gavena hnyi ke keihen hoton wagewe, me ödrin e hadruâ tavat, me uma minya umen Khong.

### HNYIMAKAN 9.

**K**' AME um dö ta je ûnyi eling, me ame hakekeny könya je than hia, haingödrin, ka habe, Haba tavat Isaraela, me tavat bihut, me at Levi, ödrin e ca hia but oúsákâüöâ me tavat aten je hnyei, ge anyidrin je hwakecin ae ikiki, wale at Kanana, me Heth, me Perizi, me Jebusi, me Amona, me Moaba, me Aigupito, me Amora. 2 Anyin a ödrin e hia but hom lakudrin je hlu hobi ködrin me lakudrin je бага; m' adre me hia but úhaniken wan ae kap me tavat aten je hnyei: eke, ame bân je than me tavat musi ka hnyi hulö eling. 3 Ke oge me löng hofuc eling, me kia but anyik úkhaú, me anyik úkot, me hnimö leünen bök me waik, me laba ot. 4 Me ödrin e úkhacaköu hia thithö könya hnyat adre me öbubuny ge hofuc hwan Khongu Isaraela, can hulö anyin je aten bâ; ke oge me laba ot ke ne o but adre me hudo hnyi sahac. 5 Ke hnyi ûen adre me hudo hnyi sahac, me oge me todrö úhek

## EZERA 10.

hnyi anyik hmak, k' ame khekhe but úkha-  
 útik me anyik úkot; me oge me cibouca, me  
 hai li hnyamök kö Iehova Khonguk; 6 me  
 oge me ha, ka habe, Khonguk lö, iny hme-  
 hma but me hmak he ka hngele hnyidra-  
 nyai köu Khonguk: anyin ae gan hmâ  
 hnyikonguhmun hnyi hon je böhmun, ke  
 gan hmâ anyihmun hulö ke ne o but hnyi  
 drany. 7 E gan anyihmun hulö hwan  
 hnyi úen lakamöhmun ke ne o but hnyi  
 bong ang; ke can anyihmun je monu, me  
 adre me hn' öhmun, me latuhömun, me  
 tavat bihut unyihmun, ka hnyi hnyamen  
 je thaniny je hnyei, ka hnyi hele vat, me  
 ka hnyi hwenbâ, me ka tavat söb, me he  
 ka hmehma, helâ me hnyi bong ang. 8 Ke  
 walang ang e okhulit thibi úen ae hu ga-  
 hmun betenge únyi ga Iehova Khongu-  
 hmun, he ka bi kolon köhmun möhmun  
 e möt, me ham köhmun ke fao hnyi anyin  
 dok ae kap, me me he Khonguhmun ka  
 omelamá je emaköhmun, me ham köhmun  
 úhömeli ae úhnyúkong köhmun a je bâ.  
 9 Anyin a öhmun hoúbâ; ke so bi Khongu-  
 hmun ame ca hnying öhmun hoúbâ, ke e  
 ame okúâ ibetengiö hnyi hnyimakan than  
 Peresi he ka ham köhmun úhömeli, m' adre  
 me otílâ uma umen Khonguhmun, me ányâ-  
 wia dok adre me tho, me he ka hna köhmun  
 ke hak hnyi Jerusalema me Juda. 10 Ke  
 walang ang, Khonguhmun lö, hwaban e, ie  
 hofuc öhmun e he ka ha? anyin a öhmun e  
 hia but hna degecâ ányâm je hnanyibu,  
 11 waleji u je húna a deny lathnyabaem  
 a je perofeta, ka habe, Haba hnyei öbun  
 e he ka he ka hnyin me hu, hnyei ae bo  
 kong ge bokonginy aten je hnyei, hnen je  
 hwakecidrin ae ikiki wale ame öunöngötâ  
 je ke keihen hnyei ge hwakecidrin ae ikiki.  
 12 Ke walang ang ca he ka ham lakubun  
 wahlu ka lakudrin obaga, ke ca hok laku-  
 drin wahlu hobi kâu lakubun obaga, ke ca  
 he ka elâm anyidrin hnahic me so nyiele  
 balua: m' öbun hwege bi, me an soiny  
 kânâ, me újelabâ ge lakubun nyiele balua.  
 13 Ke hwaban ta je únyi hia ame o  
 köhmun can hwakecihmun ae kong, me  
 anyihmun hulö ae gan, anyin a u Khongu-  
 hmun u je bi hwaban úhnyúkongo köhmun  
 ke ca gan hmâ hoton anyihmun monu, ke  
 u je ham köhmun úhömeli helâng, 14 hawa  
 öhmun e ne he ka he hmetu ka hanyâúâ  
 ányâm je hnanyibu, me úhamtamomo me  
 tavat adre me ányâ je únyi ae ikiki eling?  
 hawa, u me ca he ka hmönyâm köhmun ke  
 ne o but adre me ohi' öhmun, me ba ju

kolon, me at ae möt? 15 Iehova lö, Kho-  
 ngu Isaraela, u wisa; anyin a öhmun thiju  
 ang je kolon ae möt, helâ me hnyi bong  
 ang: wâ ju, öhmun dut ang hnyi hnyimâ-  
 kâm me hnyikonguhmun; anyin a can e e  
 ca khana ke at he ka tot hnyi hnyimâkâm.

### HNYIMAKAN 10.

**K'** AME tiga hic Ezera, me omanenö  
 hulö, me tenge, me ta hnyikânâi hnyi  
 hnyimakan uma umen Khong, me ame  
 úkhacaköu kâu tavat ae ti se hia úhedrin  
 Isaraela, obaga me omomo me je wanakat:  
 anyin ame tenge hwege tavat. 2 Ke haba  
 Sekhania nöku Jehiela, ke nöku Elama, ame  
 thu me ha kö Ezera, ka habe, Öhmun e hia  
 but ányâ hulö ka Khonguhmun, me hok  
 laöiöhmun kanyua unyin aten je hnyei: ke  
 so bi, walang ang, e hu hna gejon hnyi  
 Isaraela hnyi únyi eling. 3 Ke walang  
 ang, ötin e he ka ányâ úhinyökou me  
 Khongutin he ka degec laöiöhmun me je  
 lakudrin, helâ me hwâm hofuc than, me  
 tavat adre me öbubuny ge hnanyibu anyin  
 Khongutin; ke adre me he ka ányâ hoton  
 hnanyibu. 4 Todrö: anyin a hanymâm  
 únyi ang, ke öhmun e he ka tha hiöhmun  
 möu: hwege thö me ányâ thö. 5 Me  
 Ezera ame todrö me kunâ tavat bihut ae  
 beönua, me at Levi, me at Isaraela hia, he  
 ka khemanyin a ödrin e he ka ányâ hoton  
 hofuc ang. Me ödrin e khemanyin. 6 Me  
 Ezera ame todrö hnyi hnyimakan uma umen  
 Khong, me he ka hnyi hnyeule anyi Joha-  
 nana nöku Eliasiba, ke hnyi úen e ame o  
 but, e ame ca han me ic: anyin a e ame  
 tenge gadrin ge hulö anyin je bâ. 7 Ke  
 ödrin e haimenenâ ka lakon je bâ hia thitbö  
 hnyi Juda me Jerusalema hia, he ka  
 úkhacaköu hnyi Jerusalema; 8 ke haba  
 ödrin hia tavat adre me ne ca o hnyi  
 kun ta bong, hoton hofuc hwan than me  
 wahingat, adre me he ka ohia anyidrin ta  
 je únyi hia, me óusakâú ödrin me úkha-  
 caköu anyin hoúbâ. 9 Me haba at Juda  
 me Beniamina hia ödrin e úkhacaköu hnyi  
 Jerusalema hnyi kun ta bong; ke tehi e a  
 naininy, ke bong twenteiny tehi: ke haba  
 tavat hia ödrin e laba hnyi dok ae lau hnyi  
 hnyimakan uma umen Khong, me öbubuny  
 can únyi eling, me can we ae gan. 10 Ha-  
 ba Ezera at bihut ame todrö me ha ködrin  
 ka habe, Öbun e hia but monu, me hok momo  
 kanyua, he ka bi hanen ka hulö anyin Isa-  
 raela. 11 Ke walang ang omanenâ thö



## NEHEMIA 1.

anyibún hulö kö Iehova, Khongon laka-möbun, me ányá weny: me úsákáú' óbun me tavat aten hnyei, me je momo kanyua. 12 Me ame thu úkhacaköu hia me ha hwegiá, ka habe, Helâ me hnâm hna ha gahmun hamöhmun he ka ányá helâe. 13 Ke se hia tavat, ke úen we ae gan, ke ca khan' öhmun he ka tot eú hnyöu, ke ca huliwa hnân khaca bong ame ne lo li bong: anyin ae gan hmâ hnyikonguhmun hnyi únyi ang. 14 Eso adre me otilâ je tuhöhmun hobi kâu úkhacaköu hia, ke ödrin e he hia thithö tavat adre hok momo kanyua hnyi anyihmun je lap ka he but hnyi úen adre thu, ke tha e mödrin wahingatiny je taun, me tavat owisa, ke ne o but adre wia hmönyin anyin Khonguhmun gahmun hnyi únyi eling. 15 Ke haba Jonathana nöku Asael me Jahazia nöku Tikeva, ödru hwege hnyimaködrü hnyi únyi eling: ke haba Mesulama me Sabethai a at Levi, ödru me tha hien mödru. 16 Ke haba je lakon hoúbâ adre me ányá helâ me hna ha. Ke adre oúsákáúö Ezera at bihut, tha e me ke je kamen ae beönua, hoton je lap anyin je lakamödrin, ke adre háiâ iödrin hia; ke ödrin e laba hnyi bong a bâniny tehi a teniny he ka elâm únyi eling. 17 Ke ödrin e umö úhnö tavat hia thithö, tavat hoc momo kanyua hnyi bong a bâniny tehi a bân. 18 Ke ödrin e wâ ke je lakon tavat bihut, tavat hok momo kanyua: wale ke je laku Jesua nöku Jozadaka, me je liamekeiny mä, jia Maseia, me Eliezera, me Jarib, me Gedelia. 19 Ke ödrin e hai hnyamödrin a ödrin e he ka degec laöiödrin; k' ödrin e hulö but, me ödrin e hudo mamoe бага únyi hnyi hna hat meno, can anyidrin monu. 20 Ke lo li laku Imer; wale Hanani me Zebadia. 21 Ke laku Harim; Maseia, me Elia, me Semaia, me Jehiela, me

Uzia. 22 Ke laku Pasur: Elioenai, me Maseia, me Isamaela, me Nethaniela, me Jozabada, me Elasa. 23 Ke haba at Levi; Jozabada, me Simej, me Kelaia (wale Kelita) me Pethaia, me Juda, me Eliezera. 24 Ke haba at khumöng; Eliasiba: ke tavat tuö hwanuma; Saluma, me Telem, me Uri. 25 Ke at Isaraela: haba laku Paros; Ramaia, me Iezia, me Malekia, me Miamin, me Eleazara, me Malekia, me Benaia. 26 Ke laku Elama; Matania, me Zakaria, me Jehiela, me Abedi, me Jeremoth, me Elia. 27 Ke laku Zatu; Elioenai, me Eliasiba, me Matania, me Jeremoth, me Zabad, me Aziza. 28 Ke laku Bebaj; Johanana, me Hanania, me Zabai, me Athelai. 29 Ke haba laku Bani; Mesulama, me Maluka, me Adaia, me Jasuba, me Seal, me Ramoth. 30 Ke haba laku Patha-moaba; Adena, me Kelal, me Benaia, me Maseia, me Matania, me Bezaleli, me Binui, me Manase. 31 Ke haba laku Harim; Eliezera, me Isia, me Malekia, me Samaia, me Simeona; 32 me Beniamina, me Maluka, me Semaria. 33 Ke haba laku Hasum; Matenai, me Matathia, me Zabad, me Elifelet, me Jeremai, me Manase, me Simej. 34 Ke haba laku Bani, Maadai, me Amerama, me Uel; 35 me Benaia, me Bedeia, me Kelu; 36 me Vania, me Meremoth, me Eliasiba; 37 me Matania, me Matenai, me Jasau; 38 me Bani, me Binui, me Simej; 39 me Selemia, me Nathana, me Adaia; 40 me Makenadebai, me Sasai, me Sarai; 41 me Azareela, me Selemia, me Semaria; 42 me Saluma, me Amaria, me Josefa. 43 Ke haba laku Nebo; Jeiela, me Matathia, me Zabad, me Zebina, me Jadau, me Joela, me Benaia. 44 Haba ödrin hia thithö ödrin e hok ta momo kanyua: ke hu lakon ke je momo.

## TUSI NEHEMIA.

### HNYIMAKAN 1.

**H**OFUC ho Nehemia nöku Hakalia. Haba hnyi tehi Kiselu, hnyi huna a twenteiny, ke inya hnyi Susani hnyabanthan, 2 me ame o könya Hanani ke liamekeiny mönya me ke je at Juda; me oge me

hnei ödrin ge at Juda tavat ae möt je kolon a hoúbâ, me ge Jerusalema. 3 Ke haingödrin könya, ka habe, Haba je kolon adre me möt úhedrin hnyi hna bâ hnyi ke keihen hnyei eling, me gan hmâ vec me hna haikongu ödrin: ke adre hia but kia hna up haginny Jerusalema, k' adre thong degecâ

## NEHEMIA 2.

je hlinginy homagöuleny. 4 Ke hnyi ün oge me löng hofuc e, me oge me laba but me tenge, me hmak hnyekuk hnyi ke je bong, me ca han, ke oge me hic hnyi hnyimakan Khongon drany, 5 me ha, ka habe, Inya oge me khöü köu, Iehova, Khongon drany, Khong ae gan hmâ me hnân outen, at ame tuö úhinhinyköu me ibetengiö ködrin tavat adre me hnyok kâu me tuö anyin je hnanyibu: 6 ö u tevehlöng ju ge li hnyikönyâm, me wâ ge li emâkâm, me löng hic hijin athnyabaem, wale oge me hic köu hnyi ün ang hnyi lany me lit, hobi kâu lakon Isaraela a lathnyabaem, ke oge me haimemenâ je hulö anyin lakon Isaraela, waleji öhmun e hia but ânyâ köu: eke, oge me hia but hnyi ânyâ hulö me lap anyi cica. 7 Öhmun e hia but ânyâ hwakecin ae kong hmönyin köu, me ca tuö je hnanyibu, me je hna hûna, me je hna owisa, waleji u je hûna kö Mose a athnyabaem. 8 Ö u ûnykûme thö hofuc waleji u je hûna kö Mose a athnyabaem, ka habe, Öbun, ka he ka ânyâ hwakecin ae kong, me oge me he bi nya ka ovesei öbun ka hnyi je hnyei: 9 ke öbun ka he ka hwiö könya me tuö anyik je hnanyibu me ânyâ, eja ke ne adre ne ob' öbun ka hnyi je can hmeledrany, me oge me he ka úkhacaköu öbun úhebun e, me hum öbun ka hnyi dok waleji oge me úca he ka ip iök hnyin. 10 Ke walang ang lathnyabaem me lakem, waleji u je omelö ge manâm man ae gan, me hnyamâm ae hwege. 11 Than lö, ö u tevehlöng ju ge li hnyikönyâm ka hic hijin athnyabaem, me je hic hijin lathnyabaem, tavat adre me wedrin he ka outen iâm: ke ö u ohnahicâ but athnyabaem hnyi bong ang, me ham kâu me me betenge gan at ang. (Ke inya ke ji at ame khöp utköiö belen than.)

### HNYIMAKAN 2.

**K**E haba hnyi tehi Nisan, hnyi huna a twentei Aretaseta than, ke e hnyi hnyimakan waina, ke oge me kât waina, me ham ka than. Ke ca bonguk ehac he ka hmak hnyi hnyimakan. 2 Me haba than ame ha könya, ka habe, Ieü ame hmak gan hnyimâkâm, ke u me ca mok bi? wale ae hlöuhlöu hnyekom. Me oge me ot gan hmâ. 3 Me oge me ha ka than, ka habe, E na möt ju than nyiele balua: anyin a ieu ame ca he ka hmak hnyimakök, ke hnyot ut taun ae hnyin je hon lakamök, ke a an dö je homagöuleny ge meic? 4 Me haba

than ame ha könya, ka habe, Ieü wem? Me oge me hic ka Khongon drany. 5 Ke haingök ka than, ka habe, Ame ne so ka than, ke u je ne he ka betenge ge athnyabaem, me u me he ka kunö nya Juda ai, ka hnyi tanniny je hon lakamök, m' inye he ka op. 6 Haba than ame ha könya, (ke ame tha laba mē momo than,) ka habe, Ve ta bonginy úhem? ke ie ün u me he ka o hmetu? Ke so ka than he ka kunö nya; ke oge me thu bonguk kâu. 7 Ke haingök minya ka than, ka habe, Ame ne so ka than, e so he ka ham könya je tusi ka je gavena hnyi ke keihen hoton wagewe, m' ödrin e he ka hnö nya ka he ke ne o but oge me o hnyi Juda; 8 me ke tusi kö Asafa at ame tuö hnyot anyin than, me me he ka ham könya je üö hnân je venyâiny je homagöuleny uma, me hobi kâu hagin taun, me uma minya oge me he ka dit ka hnyin. Ke haba than ame ham könya, helâ me hnyamen Khong ae so könya. 9 Ke oge me o but ka je gavena hnyi ke keihen hoton wagewe, me ham ködrin je tusi anyin than. Ke haba than ame hia hut tha kunö nya me je taben vat me tavat tabö hors. 10 Ke a löng ut Sanabalata at Horono, me Tobia a athnyaba, a at Amona, me ödru me vec gan hmâ anyin ame o but at he ka elâm so hobi kâu lakon Isaraela. 11 Ke oge me o but hnyi Jerusalema me laba eling hnyi kun ta bong. 12 Ke öhmun e todrö hnyi hnyinghet, tha inya me keihen; ke oge me ca thumeto ke at ge ûnyi a ip Khong eü hnyekuk he ka ânyâ hobi kâu Jerusalema: ke ba meno unyik, ke so bi meno thibi oge me tabâ. 13 Ke oge me he but hnyi hnyinghet, k' oge me gethen hnyi homagöuleny e hnyi hnyigöulen bucen cicö pupuainy köiö tanimo, me homagöuleny ta tet, me wâ hna up veto hnyi Jerusalema adre kia, me je hlinginy homagöuleny a aü but ge meic. 14 Ke oge me he ka hnyi homagöuleny pupua me an belen than: ke ba gethen deny meno oge me tabâ. 15 Me oge me ölö hnyi hnyinghet hnyi wagewe, me wâ hna up hak; ke oge me hwiö, me dit hnyi getheniny homagöuleny e hnyi hnyigöulen bucen, me hmetu eling. 16 Ke ca khana tavat musi dok oge mwi hnyin, me hnök hna ânyâ; ke oge me tiga ca thumeto at Juda me tavat bihut, me je than, me tavat musi, me je kolon tavat adre me huliwa. 17 Me oge me ha ködrin, ka habe, Öbun e wâ but anyitin hlöuhlöu, wale bi ang a hnyot ut Jerusalema, k' adre

### NEHEMIA 3.

thong ge meic je hlinginy homagöuleny : ai öbun, m' ate me he ka op haginy Jerusalema, m' adre me ca haikongu ötin hmetu bi. 18 Ke oge me thumetu ödrin ge hnyamen Khonguk ae so huk ; heläe minya ge je hofuc hwan than waleji e ame ha könya. Me ödrin e ha, ka habe, H' ötin ka op. Me ödrin e sihwegia je hnyamödrin ka hnyi huliwa eling ae so. 19 Ke a löng ut Sanabalata at Horono, me Tobia a athnyaba, a at Amona, me Gesem, a at Arabia, me ödrin e hlum' öhmun, me hüköti öhmun, me haingödrin, ka habe, Ie ünyi ang öbun e änyä? hawa öbun e thu musi anyin than? 20 Me oge me thu ködrin, me ha, ka habe, Ame he Khongon drany ka ohnahici öhmun ; anyin a wale öhmun e he, a lathnyabainy, ka todrö me op : ke ba jekhöübun, me musi, me hnän önykümeä hnyi Jerusalema.

#### HNyimakan 3.

**M**E haba Eliasiba at bihut ae beönua me je liamekeiny mä a tavat bihut, ödrin e todrö me op homagöuleny mamoe ; me ödrin e okabä e, me otilä je hlinginy, ke ne o but ka hnyi hnabä hnyi Mea ödrin e okabä e, me ke ne o but hnyi hnabä hnyi Hananel. 2 Ke haba at Jeriko ödrin e op ütangköu mä. Ke haba Zakuri nöku Imeri ame op ütangköu mödrin. 3 Ke haba je luku Hasenaa ödrin e op homagöuleny je wä ; ödrin e ip je venyäiny, me otilä je hlinginy hwanumen, me je läkiny, me je ohmäiny. 4 Ke haba Meremoth, nöku Uria, nöku Koz, ame op ütangköu mödrin. Ke haba Mesulama, nöku Berekia, nöku Mesezabel ame op ütangköu mödrin. Ke haba Zadoka nöku Baana ame op ütangköu mödrin. 5 Ke haba at Tekoa ödrin e op ütangköu mödrin ; ke ame ca hadru' ödrin je tuhödrin ge huliwa anyin tuhödrin. 6 Ke haba Jehoiada nöku Pasea, me Mesulama nöku Besodeia, ödrin me änyä homagöule a ünyi but ehac ; ödrin me ip je venyäiny, me otilä je hlinginy hwanumen, me je läkiny, me je ohmäiny. 7 Ke haba Melatia at Gibeona, me Jadon at Merono, me at Gibeona, me Mizepa, wale hanen theron anyin gavena hnyi ke keihen hoton wagewe, ödrin e op ütangköu mödrin. 8 Ke haba Uziela nöku Haraia hanen tavat huliwan gol, ame op ütangköu mä. Ke haba Hanania nokon ke at huliwan ünyi ae bo so, ame op ütangköu mä, ke ödrin e

owhegiä Jerusalema ke ne o but hnyi hna up veto ae lau. 9 Ke haba Refaia nöku Huro at ame musö ke keihen a hafiny Jerusalema, ame op ütangköu mödrin. 10 Ke haba Jedaia nöku Harumaf, ame op ütangköu mödrin cicö umen uma. Ke haba Hatusa nöku Hasabenia ame op ütangköu mä. 11 Haba Malekia nöku Harim, me Hasuba nöku Pahatha-moaba, ödrin me op ke keihen, me tap ae beü göranyai, hnen je meic. 12 Ke haba Saluma nöku Halohes, at ame musö ke keihen a hafiny Jerusalema, ame op ütangköu mä e me lakon je hlu. 13 Ke haba Hanuma me tavat adre me laba hnyi Zanoa, ödrin e op homagöuleny hnyi hnyigöulen bucen ; ödrin e op e, me otilä je hlinginy hwanumen, me je läkiny, me je ohmäiny, me wan thauzan je kubit hna up veto, ke ne o but hnyi homagöuleny ta tet. 14 Ke haba Malekia nöku Rekaba, at ame musö ke keihen hnyi wale Bethakerem, e ame op homagöuleny ta tet ; e ame op e, me otilä je hlinginy hwanumen, me je läkiny, me je ohmäiny. 15 Ke haba Saluma nöku Kole-hoz, at ame musö ke keihen hnyi a Mizepa, e ame op homagöuleny köiö ame pupua ; e ame op e, me tube, me otilä hlinginy hwanumen, me je läkiny, me je ohmäiny, me hak vetoiny an Siloa hnyi utkänä iny than, ke ne o but wacuat gethen ka hnyi taun anyi Davita. 16 Ke hwaban dö e, Nehemia nöku Azebuk, at ame musö ke keihen a hafiny Bethe-zur, e ame op ke ne o but hnyi cicö je erkemok anyi Davita, me ke ne o but hnyi uma umen hnyat ae hwege. 17 Ke hwaban dö e at Levi ödrin e op, a Rehum nöku Bani. Ke haba Hasabia at ame musö ke keihen a hafiny Keila, wale hanyen, e ame op ütangköu mä. 18 Ke hwaban e je liamekeiny mä ödrin e op, a Bavai nöku Henadada, at ame musö ke hafiny Keila. 19 Ke Ezera nöku Jesua at ame musi hnyi Mizepa ame op ütangköu mä, a ke keihen e, cicö gethen ka hnyi uma adre hip omjehen vat hnyin, hnyi kopiny. 20 Ke hwaban e, Baruka nöku Zabai, e ame hwege op ke ke keihen, hwän hnyi kop ke ne o but ka hnyi hwanumen uma umö Eliasiba at bihut ae beönua. 21 Ke hwaban e, Meremoth, nöku Uria, nöku Koz, ame op ke ke keihen, hwän hnyi hwanumen uma umö Eliasiba ke ne o but ame önya but ge uma umö Eliasiba. 22 Ke hwaban e me tavat bihut a aten Dok ae Tha Hon, ödrin e op. 23 Ke hwaban e, Beniamina me Hasuba, ödrin me

## NEHEMIA 4.

op cicö umödrü uma. Ke hwaban e Azaria nöku Maseia, nöku Anania ame op baten umen uma. 24 Ke hwaban e, Binui nöku Henadada ame op ke keihen, hwan hnyi uma umö Azaria ke ne o but hnyi kopiny, me ke ne o but hnyi bahebet. 25 Haba Palala nöku Uzai ame op, hwân hnyi cicö kopiny, me hñabâ ae silöü hnyi uma ethö umen than, ae hnyi hnyeuleny uma úceat. Ke hwaban e ame op Pedaia nöku Paros. 26 (Ke haba at Nethini me ödrin e laba hnyi Ofela, ke ne o but dok cicö homagöuleny köiö hnyi hnyimakan e deiö, me hñabâ ame silöü.) 27 Hwaban e, at Tekoa ödrin e op ke keihen, cicö hñabâ ae gan ame silöü ke ne o but hnyi hna up veto hnyi Ofela. 28 Haba tavat bihut ödrin e ve op cicö umödrin je uma hwân hnyi hon homagöuleny hors. 29 Hwabödrin dö, me ame op Zadoka nöku Imer, cicö umen uma. Ke hwaban e, ame op Semaia nöku Sekania, at ame tuö homagöüle e deiö. 30 Ke hwaban e, ame op Hanania nöku Selemia, me Hanuna nöku Zalafa a siksiny, ke ke keihen. Hwaban e ame op Mesulama nöku Berekia cicö hnyeuleny. 31 Hwaban e, Malekia, hanen hnyat huliwan gol, ame op ke ne o but hnyi uma umen at Nethini, me tavat úcú, cicö homagöulei Mifekad, me ke ne o but hnyi gethen ame he ka hnyi bahebet. 32 Ke haba hnyi wanben gethen ame he ka hnyi bahebet me homagöuleny mamoe ame op hnyat huliwan gol ; me hnyat úcú.

### HNYIMAKAN 4.

**K**E a löng ut Sanabalata a öhmün e op hak, me e ame hmönyin, me hmönyin gan hmâ, me hluma at Juda. 2 Me e ame fuc hnyi hnyimakan je liamekeiny mē, me utbavat anyin at Samaria, me ha, ka habe, Ieu, ame ânyâ at Juda ang a ödrin mat? hawa ödrin e he ka ohwegi ödrin bi? ödrin e he ka bi hut? ödrin e he ka umo hnyi bong a khaca? hawa ödrin e he ka oâ je veto únyi hnyi je hna khöü ve ta únyi waleji adre thong? 3 Ke e unyin Tobia, at Amona, me e ame ha, ka habe, Haba hnödrin hna op ame ne ölö thö alope, me ame he ka kölu but anyidrin hak veto. 4 Khonguhmun lö, löng ju, anyin adre me höci öhmün : ke ohmeto ju hnödrin hna úhaikonguny ka hnyi hon je bödrin bi, me hn' ödrin m' adre me sei ödrin hnyi ke hnyei adre me hom hwenbödrin : 5 ke ca he ka tube anyidrin monu, ke ca he ka kot degecâ

anyidrin hulö hnyi hnyimákâm : anyin a ödrin e ohmönyini u hnyi hnyimakan tavat adre op veto. 6 Me öhmün e op hak ; ke adre úhújâkôuâ hna up haginny hia ke ne o but hnyi hafiny ibeüen görany : anyin a tavat ödrin e huliwa únyi eü hnyi hnyok.

7 Ke a löng ut Sanabalata, me Tobia, me at Arabia, me Amona, me Asedoda, a e görany jut hna up haginny Jerusalema, ke adre okhötâ je dok ae hmouca, me ödrin e hmönyidrin gan hmâ ; 8 me ödrin e tha ip hnân, ödrin hia he ka vat hnyi Jerusalema, m' adre me ovheli ödrin eling. 9 Ke öhmün e hic ka Khonguhmun me otílâ tavat ka tu' ödrin hnyi lany me lit, gadrin. 10 Ke haba at Juda ödrin e ha, ka habe, E úhnyü-kong biju hwegien tavat sukhöünâ ta je únyi, ke gan hmâ thatúnyi ; me me ca khan' ötin he ka op hak. 11 Ke haba je iwanaihmiöny möhmün ödrin e ha, ka habe, Ame ca he ka khan' ödrin me wâ, ke ne o but ötin e o hnyi wanbödrin, me hling' ödrin, me bi obiny huliwa. 12 Ke ame o but at Juda hnyat adre me laba hakekenyi ödrin, me olibenyita ha köhmün hnyi je dok hia, ka habe, Hamöbun he ka hmetu köhmün. 13 Waleling me oge me ip tavat hnyi je dok ae hnyikânâ hoton hak, me hnyi je dok ae lau, oge me ip ödrin hoton anyidrin je lap, a tha ödrin me anyidrin je hele vat, me je ö, me je cafana. 14 Me oge me wâ, me tot, me ha ka je than me hnyat musi, me je kolon tavat, ka habe, Ca he öbun ka out' ödrin : únykúme ju ka Than, at ae gan me hnân outen, ke he th' öbun ka vat hobi kâu je liamekeiny möbun, me lakubun obaga me wahu, me laöiöbun me umöbun je uma. 15 Ke a löng ut ta je iwahnaihmiöny möhmün a ga khan' öhmün dut, ke a g' ame hia but Khong oúnyibaúâ anyidrin úhnenamö, me öhmün e ve hmetu hia ka hnyi hna up hak ka hnyi anyihmun huliwa. 16 Ke hwân hnyi bong eling, me haba hafiny lathnyabaik ödrin e hnyi ânyâ huliwa, ke haba ke haf ödrin e hom je ö, me je bec, me je cafana, me je úkhaüen vat ; k' ame laba hnyat musi hnyi hoton lap anyi Juda hia. 17 Haba je hnyat ödrin e op hak me tavat sukhöünâ ta je únyi ödrin ka ve kap he ka vaden, me ödrin e ve ânyâ huliwa ge hnyam a khaca, me hom omjehen vat ge ke hnyam ; 18 ke ödrin e ve op, k' adre ve ohmâ anyidrin je hele vat hnyi je jevadrin, k' ödrin e op helâe. Ke haba at ame túö trutru ame laba unyik. 19 Ke oge me ha ka je than, me tavat musi, me je

kolon tavat, ka habe, E gan hmâ me lau huliwa, k' ötin e úsákâúö hon hak, ke at me ke at: 20 ke haba hnyi je dok hia öbun ka he ka löng hwan trutru hnyin, me öbun e he ka he but köhmun kâ ling; ame he Khongutin ka vat hobi kötin. 21 Helâe öhmun e ânyâ huliwa: haba haf gadrin ödrin e hom je ö hwân hnyi haolany ke ne o but ame manen je okhû. 22 Ke haba khaca, oge me ha ka tavat, ka habe, Hamen tavat hia me lathnyabaidrin he ka mokut hnyin Jerusalema, me tu' ötin hnyi hnyinghet, k' adre me he ka huliwa hnyi lany. 23 Ke haba inya me je liamekeiny mönya, me lathnyabaik, me tavat tue, tavat adre me he hotuk, me öhmun e ca hnyi uny anyihmun je úkhaú, k' ödrin hia ödrin e seköiö me je omjehen vat.

HNYIMAKAN 5.

**K**E ame kú gan hmâ ütengien tavat, me je laöiödrin ge je liamekeiny mödrin a at Juda. 2 Anyin ae hu gadrin tavat ödrin e ha, ka habe, Öhmun se hia öhmun me je lakuhmun obaga me wahu, hn' öhmun ju he ka hom hwit, m' öhmun e han me möt. 3 Ke haingen keihen, ka habe, Öhmun e tiga böhmun ka úco je ihmun, me ihmun je hnyei vine, me umöhmun je uma: e so öhmun e hom hwit, can hmiâ. 4 Ke haingen keihen, ka habe, Öhmun e hia but mē sumatâ mone hnân bi fat ka than hwaban ihmun je utkânâ me ihmun je hnyei vine. 5 Ke walang ang haba je unyihmun e úcú me unyin je liamekeiny möhmun, me je lakuhmun e úcú me je lakudrin: ke wâ bi öhmun e ham lakuhmun obaga me wahu hnân lathnyaba, ke adre hia but hom keihen lakuhmun je blu hnân bi athnyaba: ke ba manihmun he ka thawâ; anyin ae unyin keihen bi ihmun je utkânâ, me ihmun je hnyei vine. 6 Ke e gan hmâ anyik hmönyin, hnyi úen oge me löng ütengiödrin me hofuc eling. 7 Me oge me úsabö eú hnyi hnyekuk, me ou je than, me tavat musi, me ha ködrin, ka habe, Öbun e mē ve ham únyi ka je liamekeiny möbun hnân heleú troban. Ke oge me otilâ úkhacaköu ae gan hmâ ködrin. 8 Me oge me ha ködrin, ka habe, Öhmun e úco hmetu je liamekeiny möhmun a at Juda, tavat adre úco ka aten ke je hnyei, hoton hnöhmun hna hu; hawa, öbun e ka he bi ka úco je liamekeiny möbun, ke adre me he ka úcú ödrin köhmun? Me ödrin e

laba hnyibú, me ca wâ ke únyi hnân thu. 9 Haingök minya, ka habe, E ca so únyi e öbun e ânyâ; hawa, öbun e ca he ka he me outen Khongutin, wâ e nye haikongoâ hnen je wanaithila a je iwahnaihmiöny mötin? 10 Ke inya minya, me je liamekeiny mönya me lathnyabaik, öhmun e mē ham ködrin mone me hwit hnân heleú troban, Ö ötin a degec ut ling, he ka mē ham hnân heleú troban. 11 Öbun na ham hmeto ködrin hnyi bong ang idrin je utkânâ, me idrin je hnyei vine, me idrin je hnyei elaiö, me umödrin je uma, me ke keihen a hadediny mone, me hwit, me waina, me wakaco, waleji öbun e hom gadrin. 12 Me ödrin e ha, ka habe, Öhmun e he ka ham hmetu ke adre me ca he ka hnei hwaban gadrin; öhmun e he ka ânyâ helâ me hnâm hna ha. Me oge me hawâ tavat bihut, me kun' ödrin he ha khemanyin a ödrin e he ka ânyâ helâ me hofuc eling. 13 Ke oge me jijingâ manoiny úkhaúk, me ha, ka habe, Ame he Khong ka jijingâ degecâ tavat hia adre me ca ohwâdâ hofuc ang, únyi hnyi umödrin je uma, me anyidrin je huliwa; e so adre me he ka jijing' ödrin helâe, me otheduocâ. Me ame ha úkhacaköu hia, ka habe, Amen, k' adre me oganö Iehova. Me haba tavat ödrin e ânyâ hoton hofuc eling. 14 Ke haba khaca, hwân hnyi úen adre me otillö nya he ka gavena ködrin hnyi hnyei Juda, hwân hnyi huna a twente ke ne o but hnyi huna a thöte tui Aretaseta than, wale twelv je huna, me haba inya me je liamekeiny mönya öhmun e ca an an gavena. 15 Ke haba je gavena ehac, ödrin e ohmakâ tavat, k' ödrin e hom únyi gadrin jeú me waina, me fâte je sekel sileva; eke, ke lathnyabaidrin minya ödrin e muso tavat: ke oge me ca ânyâ helâe, anyin a iny outen Khong: 16 Eke, oge me hnyi hanen huliwan hak veto ang, ke öhmun e ca úcú hnyei: k' ame úkhacaköu eling lathnyabaik hia ka hnyi huliwa. 17 Ke haba khaca ame labö han hnyi anyik laulau at Juda me hnyat musi a wan haded ke fifte, ke ca ha bi ge aten ke je hnyei adre me he köhmun úhedrin hnyi je hnyei igigili öhmun. 18 Ke haba ta je únyi adre me penapena hnyi ke bong me ke bong, me, khaca bolok, ke siks ta mamoe adre me úca; ke adre me penapena hobi könya minya je meno ame gâ, ke haba hnyi je bong a ten adre me hip waina ae ve bongon; ke so bi hnyi ta je únyi hia eling oge me ca úkhünöng he ka hom an gavena, anyin adre me ohmakâ

## NEHEMIA 6, 7.

tavat ang ge huliwa. 19 Khonguk lö, únykúmi nya ju m' inya hnahic, e úcú me ta je únyi hia wale oge me ányâ ka tavat ang.

### HNYIMAKAN 6.

**K**E a löng ut Sanebalata, me Tobia, me Gesem, at Arabia, me je kolon a je iwahnaihmiöny a oge hia but op hak, ke ba hmetu dok ae hmouca hnyin; (ke haba hnyi úen eling iny tiga ca otilâ le hlinginy hnyi je homagöule;) 2 haba Sanebalata me Gesem ödrü me úkhúnöng könya me ha, ka habe, Ötin e he ka iouny hnyi ke taun hnyi hnyigöulen bucen Ono. Ke ödrin e únykúme he ka okongu nya. 3 Me oge me kunâ ködrin úthumetu he ka ha, ka habe, Inya oge me ányâ huliwa ae gan hmâ, ke ca khanö nya he ka he: anyin a ieu adre me he ka ip huliwa, me hna degecâ, me inye he but köbun? 4 Ke ödrin e ovak úkhúnöng könya helâe; ke oge me thu bala ködrin helâe. 5 Me ame othabúng Sanebalata kunâ bala könya helâe lathnya-bainy, me tusi adre ca ohmâ hnyi hnyamen; 6 adre sihnalimen hnyin, ka kabe, Adre me löng ut hnyi ta je hnyei, ke haba khaca ame ha Gesem a u me únykúme me at Juda he ka thu musi; anyin a wale u me op hak: ke u me bewem he ka tuhödrin helâ me hna ha. 7 Ke u je hia but otilâ je perofeta he ka khetâ hofuc gam hnyi Jerusalema, me ha, ka habe, E hu than dut hnyi Juda: ke walang adre me he ka thumeto than helâ me hna ha. Ke walang aiö u me ötin e he ka úhnenamö. 8 Me oge me úkhúnöng kâu me ha, ka habe, E ba únyi helâ me hnâm hna ha, ke u je sit hofuc únyi hnyi hnyekom bi. 9 Anyin a ödrin hia thithö ödrin e beöti öhmun haingödrin ka habe, Ame he ka mat je hnyamödrin hnyi huliwa, m' adre me ca ányâ bi. Ke walang Khong lö, owhegiâ thö li hnyamök.

10 Ke o ge me he ka hnyi uma umö Semaia, nöku Delaia, nöku Mehetabela, wale at adre thelöng hwanumen; me e ame ha, ka habe, Ötu he ka úkhacaköu hnyi uma umen Khong, hnyin uma kap, me hlöng je hwanumen uma kap: anyin a ödrin e he ka he jem he ka hlingö u; eke, hnyi hnyinget ödrin e he ka he jem he ka hlingö u. 11 Ke haingök, ka habe, Ame he at a helâ mönya ka kec? ke ewa at ae úcú mönya ame he ka kec ka hnyin uma

kap he ka omelö e bi? Oge me ca he ka kec ka hnyin. 12 Ke wâ bi, oge me wâhmakhmetoâ a ga ca kunâ e Khong: ke e ame ha baúâ hofuc hwan perofeta e gak: anyin a Tobia, me Sanebalata ödrü me bi hwaban kâu. 13 Anyin a wale adre me bi hwaban kâu me inye ot ju, me ányâ helâe, me inye kong dö, me me hu gadrin únyi hnân haikongu nya, m' adre me he ka ouhnyúkongu nya. 14 Khong lö, únykúme ju kö Tobia, me Sanebalata helâ me anyidru je huliwa ang, me kö Noadia perofeta momo, me je kolon je perofeta hnyat ödrin e besoti nya.

15 Ke adre me umo up haginy hnyi bong a twente faiviny tehi Elul, hnyi je bong a fite tu. 16 Ke a long ut je iwahnaihmiöny möhmun hia, haba ta je hnyei hia igigili öhmun adre me ot me hmak hmönyin: anyin adre me wâhmakhmeto a g' adre ányâ huliwa e ge Khongutin. 17 Ke hnyi úen e haba je than Juda ödrin e kunâ anyidrin je tusi ae se kö Tobia, ke haba Tobia ame kunâ je tusi ae se ködrin. 18 Anyin a se hia tavat hnyi Juda adre me khemanyin kâu, anyin a e úngu Sekania nöku Ara; ke haba Johanana a nokon ame hom hlu nöku Mesulama nöku Berekia. 19 Ke haba hnyi hnyimakök me ödrin e ha hwakecin ae so, me hom kâu hok je hofuc. Ke haba Tobia ame kunâ je tusi he ka ooti nya.

### HNYIMAKAN 7.

**K**E haba hnyi úen adre hia but op hak, ke oge hia but otilâ je hlinginy hwanuma, k' adre hia but otilâ tavat khumöng me at Levi, 2 me oge me kú Hanani liamekeiny mönya, me Hanania at ame muso hhabâ, he ka musi hnyi Jerusalema: anyin a e at ae wisa, k' ame ti outen Khong hon tavat ae se hia. 3 Ke oge me ha ködrü, ka habe, Ca he öbu ka khöng je homagöuleny Jerusalema ke ne o but ame kahwa but seúnö; ke adre me he ka hlöng je hwanuma me ohmâ hmetu k' ödrin e tiga hmâkâ: me otilâ tavat adre me laba hnyi Jerusalema hnân tavat tue hnyi anyidrin je hmak, ve cicö umödrin je uma. 4 Ke ame lau me gan hmâ taun: ke wakhalet ut tavat hnyin, ke adre me tiga ca op je uma. 5 Ke haba Khonguk ame ip eú hnyi hnyekuk he ka úkhacaköuâ ta je than, me tavat musi, me tavat, m' adre me he ka sihnalimidrin gaga. Ke oge me wâ tusi at ame omanená döiny tavat adre me bödra ka

## NEHEMIA 7.

o ang, ke oge me wâ hna sihnalimen hnyin, ka habe ; 6 walang tavat aten hnyei, tavat adre me he but ûhedrin hnyi hna bâ, tavat adre me hom, waleji a hom Nebukaneza than Babulona, ke adre me hmetu Jerusalema ai me Juda, ka hnyi anyidrin je taun ; 7 tavat adre me tha o me Zerubabela, Jesua, Nehemia, Azaria, Raamia, Nahamani, Modikai, Bilesan, Mispereth, Bigevai, Nehum, Baana. Haba úseiny at Isaraela : 8 je laku Paros, ödrin tu thauzan wan haded ke sevente tu. 9 Je laku Sefata, ödrin theri haded ke sevente tu. 10 Je laku Ara, ödrin siks haded ke fifte tu. 11 Je laku Pahatha-moaba, je laku Jesua me Joab, ödrin tu thauzan eit haded ke eit. 12 Je laku Elama, ödrin wan thauzan tu haded ke fifte foa. 13 Je laku Zatu, ödrin eit haded ke fâte faiv. 14 Je laku Zakai, ödrin seven haded ke sikste. 15 Je laku Binui, ödrin siks haded ke fâte eit. 16 Je laku Bebai, ödrin siks haded ke twente eit. 17 Je laku Azegada, ödrin tu thauzan theri haded ke twente tu. 18 Je laku Adonikama, ödrin siks haded ke sikste seven. 19 Je laku Bigevai, ödrin tu thauzan ke sikste seven. 20 Je laku Adin, ödrin siks haded ke fifte faiv. 21 Je laku Atera, únyi ga Hezekia, ödrin nainte eit. 22 Je laku Hasum, ödrin theri haded ke twente eit. 23 Je laku Bezai, ödrin theri haded ke twente foa. 24 Je laku Harif, ödrin wan haded ke twelv. 25 Je laku Gibeona ödrin nainte faiv. 26 At Bethleema me Netofa, ödrin wan haded ke eite eit. 27 At Anathoth, ödrin wan haded ke twente eit. 28 At Beth-azemaveth, ödrin fâte tu. 29 At Kiriatha-jarim, me Kefira, me Berotha, ödrin seven haded ke fâte theri. 30 At Rama me Geba, ödrin siks haded ke twente wan. 31 At Mikemas, ödrin wan haded ke twente tu. 32 At Beth-ela me Ai, ödrin wan haded ke twente theri. 33 Je aten ke Nebo, ödrin fifte tu. 34 Je lakon ke Elama, ödrin wan thauzan tu haded ke fifte foa. 35 Je laku Harim, ödrin theri haded ke twente. 36 Je laku Jeriko, ödrin theri haded ke fâte faiv. 37 Je laku Lod, me Hadid, me Ono, ödrin seven haded ke twente wan. 38 Je laku Senaa, ödrin theri thauzan nain haded ke thöte. 39 Tavat bihut : je laku Jedaia, tavat hanen lap anyi Jesua, ödrin nain haded ke sevente theri. 40 Je laku Imer, ödrin wan thauzan ke fifte tu. 41 Je laku Pasur, ödrin wan thauzan tu haded

ke fâte seven. 42 Je laku Harim, ödrin wan thauzan ke seventin. 43 At Levi : je laku Jesua, me Kademiel je laku Hodavia, ödrin sevente foa. 44 Tavat khumöng : je laku Asafa, ödrin wan haded ke fâte eit. 45 Tavat tuö hwanuma : je laku Saluma, je laku Atera, je laku Talemon, je laku Akub, je laku Hatita, je laku Sobai, ödrin wan haded ke thöte eit. 46 At Nethini : je laku Ziha, je laku Hasufa, je laku Tabaoth ; 47 je laku Keros, je laku Sia, je laku Padona ; 48 je laku Lebana, je laku Hagaba, je laku Salemai ; 49 je laku Hanan, je laku Gidel, je laku Gaha ; 50 je laku Reaia, je laku Rezina, je laku Nekoda ; 51 je laku Gozam, je laku Uza, je laku Pasea ; 52 je laku Besai, je laku Meunim, je laku Nefusim ; 53 je laku Bakebuk, je laku Hakufa, je laku Harehur ; 54 je laku Bazeluth, je laku Mehida, je laku Haresa ; 55 je laku Barekos, je laku Sisera, je laku Tama ; 56 je laku Nezia, je laku Hatifa. 57 Je lakon lathnyabai Solomona : je laku Sotai, je laku Sofereth ; je laku Perida ; 58 je laku Jaala, je laku Darekon, je laku Gidel ; 59 je laku Sefata, je laku Hatil, je laku Pokerethe-hazebaim, je laku Amona. 60 At Nethini hia, me je lakon lathnyabai Solomona, ödrin theri haded ke nainte tu. 61 Ke walang tavat adre me he ûhedrin Tele-mela, me Teleharsa, me Kerubi, me Adan, me Imer : ke ca khan' ödrin bi he ka omanenâ lap anyin lakamödrin, me mâtránidrin, ödrin e ne at Isaraela la : 62 je laku Delaia, je laku Tobia, je laku Nekoda, ödrin siks haded ke fâte tu. 63 Me keihen tavat bihut : je laku Habaia, je laku Koz, je laku Bazilai, at ame hom ke momo nöku Bazilai at Gileada, me adre me hawâ e hoton iödrin. 64 Haba tavat eling ödrin e elâm hna sihnalimidrin unyin je hnyat adre sihnalimen anyidrin je dö, ke hia bi : anyin a wale adre me haikongu ödrin, me ob' ödrin hnyi hanymen bi hut. 65 Ke haba at musi ame ha ködrin, a ödrin e ca he ka hnyi an je únyi ae ti kap, ke ne o but ame tot at bihut me Urim me Thumim. 66 Haba úkhacaköu hia, ödrin fâte tu thuzan theri haded ke sikste. 67 me lathnyabaidrin obaga me omomo, ödrin seven thauzan theri haded ke thöte seven : ke e unyidrin tavat khumöng obaga me omomo, ödrin tu haded ke fate faiv. 68 Ke haledrin ta je hors, seven haded ke thöte siks ; haledrin je miul, tu haded ke fâte faiv ; 69 haledrin

je kamela, foa haded ke thöte faiv ; je asina, siks thauzan seven haded ke twente. 70 Ke haba ke je kamen ae beönua ödrin e ham hobi kâu huliwa. Haba gavena ame ham ka hnyi tang omjeü wan thauzan je dareki gol, ke fifte je kaia, ke faiv haded ke thöte je úkhaüen bi hut. 71 Ke haba ke je kamen ae beönua, ödrin e ham ka hnyi tang omjeü hnân huliwa, twente thauzan je dareki gol, ke tu thauzan tu haded je mina sileva. 72 Ke haba hna ham hnen kolon tavat, me, twente thauzan je dareki gol, ke tu thauzan je mina sileva, ke sikste seven je úkhaüen bi hut. 73 Ke haba tavat bihut, me at Levi, me tavat tuö hwanuma, me tavat khumöng, me keihen tavat, me at Nethini, me at Isaraela hia, me, ödrin e ve labä anyidrin je taun.

Ke ame o but tehi a seveniny, me haba at Isaraela ödrin e laba hnyi anyidrin ta je taun.

HNYIMAKAN 8.

**M**E haba tavat hia thithö ödrin e úkhacaköu helâ me at a khaca hnyi dok ae lau cicö homagöuleny an ; ke ödrin e ha kö Ezera at sihnalimen he ka hom tusiny hnanyibu anyi Mose, waleji a húna Iehova ka at Isaraela. 2 Me haba Ezera at bihut ame hom hnanyibu ka hnyi hnyimakan úkhacaköu obaga me omomo, me tavat hia ae khan' ödra he ka löngmakhmeto, hnyi bong a bániny tehi a seveniny. 3 Me e ame aú tusi e, hnyi dok ae lau cicö homagöuleny an, hwân hnyi haolany ke ne o but hnyi jebigö, hnyi hnyimakan obaga me omomo, me tavat ae khan' ödra he ka löngmakhmeto ; ke ame tevehlöng je hnyikönyen tavat ka hnyi tusiny hnanyibu. 4 Ke haba Ezera at sihnalimen ame tot hon tap utö, waleji adre me tibet hobi kâu huliwa eling ; ke haba Matathia ame tot unyin, me Sema, me Anaia, me Uria, me Hilekia, me Maseia, hnyi ke keihen a metân ; ke ödrin bi hnyi ke keihen a meny, me Pedaia, me Misaela, me Malekia, me Hasum, me Hasebadana, me Zakaria, me Mesulama. 5 Ke haba Ezera ame ulolo tusi hnyi hnyimakan tavat hia ; (anyin a e ethö hon tavat hia ;) ke a hia but ulolo e, me ame tha todrö tavat hia : 6 ke Ezera ame haisoi Iehova Khong ae gan. Me haingen tavat hia, ka habe, Amen, Amen, me hai göranyai je hnyamödrin ; ke ödrin e nom ju hnyikânâi me khudrung kö

Iehova, me hnyimaködrin hnyikânâi. 7 Ke haba Jesua, me Bani, me Serebia, me Jamina, me Akub, me Sebethai, me Hodia, me Maseia, me Kelita, me Azaria, me Jozabada, me Hanan, me Pelaia, me at Levi, me ödrin e ometâ tavat hnyi hnanyibu : ke ame ve tot tavat hnyi je hnödrin. 8 Ke ödrin e aú manená tusi hnanyibu anyin Khong ; me ödrin e ha bongon, m' adre me he ka wâ tremângâ hna aú. 9 Ke haba Nehemia a gavena, me Ezera at bihut ke at sihnalimen, me at Levi tavat adre me ná tavat, me ödrin e ha ka tavat hia, ka habe, Bong ang me kap kö Iehova Khongubun ; ca hmak me tenge. Anyin ame tenge tavat hnyi úen adre me löng hofucin hnanyibu. 10 Ke e ame ha ködrin, ka habe, He th' öbun, an ju pipikhenya me ijem únyi ae senem, me kunâ je jekhöú ka tavat adre me ca penapena hobi kâu : anyin ae kap ka Tuhötin bong ang : ke ca he öbun ka hmak ; anyin a haba tang hwegiöbun me senyin kö Iehova. 11 Me at Levi ödrin e otubwelâ tavat hia, me ha ködrin, ka habe, Laba hnyibú, anyin ae kap bong ang ; ca hmak bi öbun. 12 Ke ame he tavat hia he ka han me ic, me kunâ je jekhöu, me ti senyin, anyin a ödrin e wâhmakhmetoâ je hofuc adre me omanená ködrin.

13 Ke haba hnyi bong a loiny ame úkhacaköu je kamen ae beönua ge tavat hia, me tavat bihut, me at Levi, kö Ezera at sihnalimen, m' adre me he ka tevehlöng hofucin hnanyibu. 14 Ke ödrin e wâ but hna sihnalimen hnyi hnanyibu waleji a húna Iehova a deny Mose a g' ame he lakon Isaraela ka laba hunuma hnyi bijéú hnyi tehi a seveniny : 15 me hamödrin he ka omanená hnyi anyidrin je taun hia thithö, me Jerusalema, ka habe, He thö ka hnyi bucen, me hom je vheiny elaiö, me je vheiny elaiöiny hnyot, me je vheiny adasi, me je lan pama, me vheiny je uö ae gan, hnân he ka ânyâ je uma menâ, helâ me hna sihnalimen. 16 Me ame he but tavat, me hom, me ve ânyâ hobi ködrin bi je uma menâ ethö hon ban umödrin je uma, me hnyi je hnyabadrin, me je hnyaban uma umen Khong, me hnyi dok ae lau hnyi homagöuleny an, me hnyi dok ae lau hnyi homagöule Eferaima. 17 Haba úkhacaköu hia tavat adre me hmetu úheny hnyi hna bâ, adre me ânyâ je uma menâ, me labä je uma menâ : anyin a lakon Isaraela ödrin e ca ânyâ helâe hwân hnyi bong bongu Josua



## NEHEMIA 9.

nöku Nuna ke ne o but hnyi bong ang. Ke e ti gan senyin. 18 Me e ame aú tusi hnanyibu anyin Khong hnyi ke bong me ke bong, hwân hnyi bong a bân ke ne o but hnyi bong a biliny. Me ödrin e tuö bijeú hnyi je bong a seven; ke haba hnyi bong a eitiny e hu úkhacaköu ae únyi hnathu, hoton hna húna.

### HNYIMAKAN 9.

**K**E haba hnyi bong a twente foainy tehi ang ame úkhacaköu thö lakon Isaraela me ca han, me mano ae gan nân, me konâm je bödrin ge kânâ. 2 Ke haba lakon Isaraela ödrin e úsâkâúö me je atkanyua hia, me útitilen me haimemenâ anyidrin je hulö, me je monu anyin lakamödrin. 3 Ke ödrin e todrö hnyi je hnödrin, me aú tusi hnanyibu anyi Iehova Khongudrin hnyi ke keihen a vakiny bong; ke haba hnyi ke ke keihen ödrin e omanenö hulö, me khudrung kö Iehova Khongudrin. 4 Ke haba Jesua, me Bani, me Kademiel, me Sebania, me Buni, me Serebia, me Bani, me Kenani, ödrin e tot hon wacúat anyin at Levi, me hongot göranyai kö Iehova Khongudrin. 5 Me ame ha at Levi, jia Jesua, me Kademiel, me Bani, me Hasabenia, me Serebia, me Hodia, me Sebania, me Pethaia, ka habe, Todr' öbun me oganö Iehova Khongubun nyiele balua: me so adre me haisoâ iam ae hmanenang, waleji adre obeönua hon hna haisoâ me oganá hia. 6 U thibi Iehova, a hake u; u je op drany, wale dranyin ta je drany, me je únyi hia hnyin, me hmeledrany me ta je únyi hia hnyin, je köiö hia me ta je únyi hia hnyin, ke u me tuö hia; ke ame khudrung köu ta je únyi hia hnyi drany. 7 U thibi Iehova Khong, wale at ame úcö Aberama, me hom e úheny Ure hnyi Kaledaia, me hwenyi ien Aberahama; 8 ke u je wâ hnyekon ae wisa but hnyi hnyimakâm, me u je úhinhinköu me he ka ham kâu hnyei iny at Kanana, me Heth, me Amora, me Perizi, me Jebusi, me Girigasa, he ka ham ka je matrâniny, me ohwâdâ hwâm hofuc; anyin a u wisa. 9 Ke u je wâ vec anyin lakamöhmun hnyi Aigupito, me löng ütengiödrin hnyi Köiö ae Dra; 10 me omanenâ je haten me je únyi hnân láia kö Farao me lathnyabainy hia, me aten iny hnyei hia; anyin ae khanö u a ödrin e bi gan ködrin; me u je oganá iam bi, helâ me hnyi bong ang. 11 Ke u je kia luâ köiö hnyi hnyimaködrin, m'

ödrin e he hnyi wanben köiö hnyi dok ae mada; ke u je khúa je iwahnaihmiony mödrin ka hnyi dok ae dit, helâ me veto hnyi köiö ae gan. 12 Ke u je lili ödrin hnyi lany ge úlá ame tot wisa; ke hnyi hnyinghet ge mec ame tot wisa, me me omelami ödrin hnyi gethen ödrin e he ka vhenö. 13 Ke u je utut ka hnyi hon bucen Sinai, me úhnenamö mödrin únyi hnyi drany, me ham ködrin je hna owisa ae úcú, me je hnanyibu ae hnathu, me je hna otilâ me hna húna ae so: 14 me omanenâ ködrin ányâm sabath ae kap, me ha ködrin je hna húna, me je hna otilâ, me hnanyibu a deny Mose athnyabaem: 15 me haödrin únyi hnyi drany anyin ödrin e mekihnânem, me oâ köiö únyi hnyi kic anyin ödrin e beic, me húna ködrin he ka he m' ödrin e he ka hu hnyei waleji u je khemanyin he ka ham ködrin. 16 Ke ödrin e bi gan me lakamödrin, me ohwegiâ je nyidrin, me ca löng bi ányâm je hnanyibu, 17 me höcö löng, me ca únykúme ányâm je únyi hnân láia, waleji u je ányâ hnyi wanbödrin; ke ödrin e ohwegiâ je nyidrin, me thu musi me otilâ taben he ka hmetu ka hnyi dok ae uthaluö: ke u thibi Khong at ame beohia hulö, at ae menyik me unöngöt ge ibetengiö, e bec he ka hmönyin, ke gan hmâ ányâm ibetengiö, me u je ca hna degeci ödrin. 18 Eke, ödrin e ányâ hobi ködrin nokon kau adre me oköiâ, me ha, ka habe, Walang Khongom, at ame hum u úhem Aigupito, ke ödrin e ányâ je únyi ae gan hnân ohmönnyinâ; 19 ke so bi u je ca hna degeci ödrin hnyi hnyebuba can ányâm ibetengiö ae gan hmâ: ke ca hia unyidrin úlá ame tot wisa hnyi lany, he ka lili ödrin eú hnyi gethen; me meic ame tot wisa hnyi hnyinghet he ka omelami ödrin, me omanenâ gethen ödrin e he ka vhenö. 20 U je ham ködrin minya hanom ae so he ka n' ödrin, ke u je ca behânâ ányâm mana ka hnyi je hnyimödrin, ke u je habelidrin, anyin a ödrin beic. 21 Eke, fâte je huna u je hat ödrin hnyin hnyi hnyebuba, e ba ke únyi ae hia gadrin; a ca amam bi anyidrin je úkhaú, ke a ca khibi je cadrin. 22 Ke u je ham ködrin je dökhü, me je hnyei, waleji u je khenâ hoton je jekhöüdrin: me ödrin e hu hnyei i Sihona, me hnyei iny than Hesebona, me hnyei i Oga than Basana. 23 Ke u je osehia je lakudrin helâ me je okhúiny drany, me hum ödrin ka hnyi hnyei, waleji u je ha ka lakamödrin, m' ödrin e he ka he ka hnyin he ka hu. 24 Me ame he ka

## NEHEMIA 10.

hnyin je lakon me hu hnyei, ke u je hom ùhnyúkongoá hnyi hnyimaködrin at Kanaana tavat a idrin hnyei, me hn' ödrin ka hnyi hnyamödrin, tha ödrin me je tuhödrin, me tavat aten hnyei, m' ödrin e he ka ányá wedrin ködrin. 25 Me ödrin e hùgúná je taun adre bi haginy, me hnyei ae pipikhenya, me hu je uma ae unöngöt ge ta je únyi ae so hia, me je hna khú an, me je hnyei vine, me je hnyei elαιο, me je úö ame wa wan ae se hia : me ödrin e han me sekudrin, me ödrin e pipikhenya, me senyiná ányâm so ae gan hmâ. 26 Ke so bi ödrin e ca úling, ke ödrin e hna degeci u, me hna hotudrin ai ányâm hnanyibu, me hlingá ányâm je perofeta tavat adre me thaw' ödrin, he ka ohmetu ödrin köu, ke ödrin e oâ hmönyin ae gan hmâ. 27 Anyin a wale u je hn' ödrin ka hnyi hnyamen je iwahnaihmöny mödrin, tavat adre me oveci ödrin : ke haba hnyi úen vec ödrin e tenge köu, me u me löng hnyi drany ; ke únyi hnyi ányâm betenge ae gan hmâ, me u me ham ködrin tavat he ka omeli ödrin únyi hnyi hnyamen je iwahnaihmöny mödrin. 28 Ke hwaban hnödrin hna laba hnahic ut, me ödrin e ányâ hmeto hulö hnyi hnyimákâm : anyin a wale u je hna degeci ödrin ka je iwahnaihmöny mödrin, me me hu musihudrin : ke so bi hnyi úen ödrin e hmetu, me tenge köu, me u me ling ödrin hnyi drany ; ke u je osehia omeli ödrin hoton ányâm betenge ; 29 ke u je thaw' ödrin, m' u me he ka ohmetu ödrin ka hnyi ányâm hnanyibu : ke so bi ödrin e bi gan me ca löng bi hnâm je hna hûna, ke ödrin e monu hnyi hnâm je hna owisa, (wale a ne ányâ e ke at, me ame he ka möt hnen e,) ke ödrin e behânâ li abenyidrin, me ohwegiâ je nyidrin, me ca löng bi. 30 Ke se hia je huna u je hokhnyoki ödrin, me thaw' ödrin hnen hanom a deny ányâm je perofeta : ke ödrin e ca belöng : anyin a wale u je hn' ödrin ka tavat aten je hnyei. 31 Ke so bi can ányâm ibetengiö ae gan, u je ca ti ohí' ödrin, me hna degeci ödrin ; anyin a u Khong ame betenge me menyik. 32 Ke walang ang Khonguhmun lö, at ae gan, ke at ae hwege, a Khong hnân outen, at ame tuö úhihinyköu me ibetengiö, e na ca he ka únyi bau hnyi hnyimákâm ta je vec hia ame o köhmun, ka latuhöhmun, me anyihmun je than, me tavat bihut unyihmun, me anyihmun je perofeta, me lakamöhmun, me lakem hia, hwân hnyi bong bongon je than Asuria ke ne o but hnyi bong ang. 33 Ke

so bi u wisa hnyi ta je únyi hia thithö ame o köhmun ; anyin ae wisa hnâm hna ányâ, ke kong hnöhmun hna ányâ : 34 ke haba latuhöhmun, me anyihmun je than, me tavat bihut unyihmun, me lakamöhmun, me ödrin e ca ányâ ányâm hnanyibu, me ödrin e ca löng hnâm je hna hûna, me hnâm je hna ohnathoá, waleji u je thaw' ödrin hnyin. 35 Anyin a ödrin e ca hia but bi athnyabaem hnyi dökhudrin dökhü, me ányâm so ae gan hmâ, waleji u je ham ködrin, me hnyi hnyei ae gan me pipikhenya u je ham hnyi hnyimaködrin, ke ödrin e ca hwiö únyi hnyi anyidrin je hna ányâ ae kong. 36 Wâ ju, öhmun ang lathnyabaem hnyi bong ang, ke haba hnyei waleji u je ham ka lakamöhmun he ka an wan, me soiny, wâ bi, öhmun ang a lathnyaba hnyin. 37 Ke ame hwenying gan hmâ hobi káu je than waleji u je otilâ huhmun can anyihmun je hulö : ke ödrin e musö je unyihmun, me halehmun omeno, hoton wedrin, ke gan hmâ vec köhmun. 38 Ke so bi únyi hnyi ta je únyi hia eling öhmun e ányâ úhihinyköu ae hnathu, me sihnalimen ; ke haba tuhöhmun, me at Levi unyihmun, me tavat bihut unyihmun, me ödrin e ohmâ haten.

### HNYIMAKAN 10.

**K**E walang tavat adre me ohmâ haten gadrin, Nehemia gavena nöku Hakkalia, me Zedekia ; 2 ke Seraia, Azaria, Jeremia ; 3 Pasur, Amaria, Malekia ; 4 Hatusa, Sebania, Maluka ; 5 Harim, Meremoth, Obadia ; 6 Daniela, Ginethon, Baruka ; 7 Mesulama, Abia, Miâmin ; 8 Maazia, Bilegai, Semaia ; wale tavat bihut. 9 Me at Levi : Jesua, nöku Azania, Binui, hanen je Laku Henadada, Kademiel ; 10 me je liamekeiny mödrin, Sebania, Hodia, Kelita, Pelaia, Hanan ; 11 Mika, Rehoba, Hasabia ; 12 Zakuri, Serobia, Sebania ; 13 Hodia, Bani, Beninu ; 14 Je taben ka tavat : Paros, Pahatha-moaba, Elama, Zatu, Bani ; 15 Buni, Azegada, Bebai ; 16 Adonia, Bigevai, Adin ; 17 Atera, Hezekia, Azura ; 18 Hodia, Hasum, Bezai ; 19 Harif, Anathoth, Nebai ; 20 Magepias, Mesulama, Hezir ; 21 Mesezabel, Zadoka, Jadua ; 22 Pelatia, Hanan, Anaia ; 23 Hosea, Hanania, Hasuba ; 24 Halohe, Pilea, Sobek ; 25 Rehum, Hasabena, Maseia ; 26 Ahia, Hanan, Anan ; 27 Maluka, Harim, Baana. 28 Me je kolon tavat, tavat bihut, me at

## NEHEMIA 11.

Levi, me tavat tuõ hwanuma, me tavat khumöng, me at Nethini, me tavat hia ödrin e hia but úsákâú ödrin bi me tavat aten je hnyei ka hnyi hnanyibu anyin Khong, me je laöiödrin, me lakudrin obaga me wahu, tavat wâhmakhmeto hia, me tavat ae metâ ; 29 ke ödrin e kece hmâ ka je liamekeiny mödrin, me anyidrin je taben, me ödrin e tha ânyâ hna khemanyin me ha je manyidrin, he ka vheno hnanyibu anyin Khong, waleji a ham a deny Mose athnyabainy Khong, me he ka tuõ me ânyâ je hna huna hia anyi Iehova a Tuhötin, me hnen je hna owisa me hna otilâ ; 30 me öhmun e ca he ka ham lakuhmun wahu ka tavat aten hnyei, me ca he ka hom lakudrin wahu hobi kâu lakuhmun obaga : 31 me a ne hom tavat aten hnyei je omjeû me jeû hia hnyi bong sabbath hnân úcú, öhmun e ca he ka úcú mödrin hnyi sabbath, me ke bong adre okabâ : me öhmun e he ka hna degecâ hnyi huna a seveniny, me ca hnö je hna hok gufa hia. 32 Ke öhmun e otilâ hobi köhmun je hnanyibu, a hamöhmun he ka ve ham ke keihen a kuniny sekel hnyi ke huna me ke huna hobi kâu huliwa hnyi uma umen Khongutin ; 33 hobi kâu areto hnân omanâ, me hudiny han ae bala bi, me hudiny leû ae bala bi, me je sabbath, me je tehi ae teb únyi, me je bijeû adre thu, me je únyi ae kap, me je hudiny hulö hnân bi hwaban möt anyin at Isaraela, me hobi kâu huliwa hia hnyi uma umen Khongutin. 34 Ke öhmun e uglekôbâ, wale tavat bihut, me at Levi, me tavat, únyi ge hudiny utö he ka hom ka hnyi uma umen Khongutin, hoton je lap anyin lakamöhmun, hnyi je ñen adre me thu, hnyi ke huna me ke huna, hnân le hon taben hut kö Iehova Khongutin, helâ me hna sihnalimen hnyi hnanyibu : 35 me he ka hom ka hnyi uma umö Iehova wan a bân hnyi kânâ, me je wan úö hia a bân hnyi ke huna me ke huna : 36 helâe minya lakutin je baga a bân, me haletin omeno, helâ me hna sihnalimen hnyi hnanyibu, me je nokon kau a bân, me haletin je mamoe, he ka hom ka hnyi uma umen Khongutin, ka tavat bihut, tavat adre me huliwa hnyi uma umen Khongutin : 37 me ötin e he ka hom anyitin je falawa a bân, me anyitin je hut adre kap göranyai me wan haletin je úö, me waina me wakaco, ka tavat bihut, ka hnyi je hnyeuleny uma umen Khongutin ; me je ke keihen a libenyitainy jeúiny könötin kânâ ka at Levi ; anyin a haba at Levi ödrin e hom je ke

keihen a libenyitainy hnyi ta je taun hia ötin e belök hnyin. 38 Ke ame he at bihut a mâtrâni Arona ka tha e me at Levi, e ka he at Levi ka hom je ke keihen a libenyitainy : k' ame he at Levi ka hom ke keihen a libenyitainy únyi hnyi je ke keihen a libenyitainy ka hnyi uma umen Khongutin, ka hnyi je hnyeule ka hnyin uma omjeû. 39 Ke hamen lakon Isaraela me lakon at Levi he ka hom ka hnyi je hnyeule hudiny hwit, me waina, me wakaco, a eling je kaiainy dok ae kap, me tavat bihut a hnyat bi huliwa, me tavat tuõ hwanuma me tavat khumöng : ke ötin e ca he ka degec uma umen Khongutin.

### HNYIMAKAN 11.

**K**E haba je thaniny tavat, me, ödrin e laba hnyi Jerusalema : me haba kolon tavat, me, ödrin e uglekôbâ, he ka hom khaca únyi hnyi je libenyitainy tavat he ka laba hnyi Jerusalema, taun ae kap, k' ame hnen bi je hnyat a nain hnyi ke je taun. 2 Ke ame hahnahicâ je hnyat ödrin e ka hamödrin hmehmela he ka laba hnyi Jerusalema hnen úkhacaköu. 3 Ke walang je homakan je ke keihen hnyei, tavat adre me laba hnyi Jerusalema : ke haba hnyi je taun anyin at Juda ödrin e ve laba hnyi idrin je hnyei hnyi anyidrin je taun, at Isaraela, me tavat bihut, me at Levi, me at Nethini, me je lakon lathnyabai Solomona. 4 Ke adre me laba hnyi Jerusalema ke je lakon Juda, me ke je lakon Beniamina. Je laku Juda : Athaia, nöku Uzia, nöku Zakaria, nöku Amaria, nöku Sefata, nöku Mahalaleel, ke je laku Farez ; 5 me Maseia, nöku Baruka, nöku Kole-hoz, nöku Hazaia, nöku Adaia, nöku Joiarib, nöku Zakaria, nokon at Siloni. 6 Haba je laku Farez hia, tavat adre me laba hnyi Jerusalema ödrin foa haded ke sikste eit tavat ae hwege. 7 Ke walang je lakon Beniamina : Salu nöku Mesulama, nöku Joed, nöku Pedaia, nöku Kolaia, nöku Maseia, nöku Ithiela, nöku Jesaia. 8 Ke hwaban dö e, Gebai, Salai, ödrin nain haded ke twente eit. 9 Ke Joela nöku Zikeri at ame tu' ödrin : ke Juda nöku Senua at a loiny hon taun. 10 Ke je at bihut : Jedaia nöku Joiarib, Jakina, 11 Seraia, nöku Hilekia, nöku Mesulama, nöku Zadoka, nöku Meraioth, nöku Ahituba at ame musö uma umen Khong, 12 me je liamekeiny a hnyat adre me ânyâ huliwa

## NEHEMIA 12.

hnyi uma, ödrin eit haded ke twente tu : me Adaia, nöku Jerohama, nöku Pelalia, nöku Amezi, nöku Zakaria, nöku Pasur, nöku Malekia, 13 me je liamekeiny më, je kamen ae beönua ödrin tu haded ke fâte tu : me Amasai, nöku Azareela, nöku Abazi, nöku Mesilemoth, nöku Imer, 14 me je liamekeiny mödrin tavat ae hwege, ödrin wan haded ke twente eit : ke Zabediela, nöku Hagedolima at ame tu' ödrin. 15 Me ke je at Levi minya : Semaia, nöku Hasuba, nöku Azerikam, nöku Hasabia, nöku Buni ; 16 me Sabetai, me Jozabada, ke li tuhan at Levi, hamödrü he ka tuö huliwa hnyi hoton uma umen Khong ; 17 me Matania nöku Mika, nöku Zabedi, nöku Asafa, taben at ame hwân ogânâ hnyi hmi, me Babebukia, at a loiny unyin je liamekeiny më ; me Abeda nöku Samua, nöku Galal, nöku Jeduthun. 18 Haba at Levi hia hnyi taun ae kap, ödrin tu haded ke eite foa. 19 Ke haba tavat tuö hwanuma, Akub, me Talemon, me je liamekeiny mödrü, tavat tuö homagöule, ödrin wan haded ke sevente tu. 20 Ke haba je kolon at Israela, tavat bihut, me at Levi, hnyi je taun hia anyin at Juda, hnyi je ve idrin. 21 Ke haba at Nethini, ödrin e laba hnyi Ofela : ke haba Ziha me Gisepa ödrü me tuö at Methini. 22 Ke haba homakan at Levi hnyi Jerusalema, me, Uzi, nöku Bani, nöku Hasabia, nöku Matania, nöku Mika, ke je laku Asafa, a tavat khumöng, ke hamödrin he ka tuö huliwa hnyi uma umen Khong. 23 Anyin ae hu hnanyibu hnen than gadrin, a e bala bi jekhon tavat khumöng hnyi ke bong me ke bong. 24 Ke haba Pethaia nöku Mesezabel, hanen laku Zera, nöku Juda, e unyin than hnyi ta je únyi hia hnyi hnye. 25 Ke haba ge je taun ae úhnyükong me je utkânâiny, me ame laba ke je laku Juda hnyi Kiriath-areba, me je tauniny, me Dibona me je tauniny, me Jekabezal me je tauniny ; 26 me Jesua, me Molada, me Bethe-palet ; 27 me Hazarasual, me Bere-seba, me je tauniny, 28 me Zikelag, me Mekona, me je tauniny, 29 me Ene-rimon, me Zorea, me Jamuth ; 30 me Zanoa, me Adulama, me je tauniny, me Lakisa, me je tauniny, me Azeka me je tauniny. Me ödrin e laba, hwân hnyi Bereseba ke ne o but hnyi hnyigöulen bucen Hinon. 31 Ke haba laku Beniamina, ödrin e laba hwân hnyi Geba, ke ne o but Mikemas, me Aia, me Beth-ela, me je tauniny ; 32 me hnyi Anathoth, me Nob, me Anania ; 33 me

Hazora, me Rama, me Gitaim ; 34 me Hadid, me Zeboim, me Nebalat ; 35 me Lod, me Ono, me hnyigöulen bucen tavat ae metâ huliwa. 36 K' adre me khenâ at Levi hnyi Juda me Beniamina.

### HNYIMAKAN 12.

**W**ALANG tavat bihut me at Levi, hnyat adre me tha he me Zerubabela, nöku Sealetiel, me Jesua ; wale Seraia, Jeremia, Ezera ; 2 Amaria, Maluka, Hatusa ; 3 Sekania, Rehüm, Meremoth ; 4 Ido, Ginetho, Abia ; 5 Miamin, Maadai, Bilega ; 6 Semaia, Joiarib, Jedaia ; 7 Salu, Amok, Hilekia, Jedaia. Wale je taben tavat bihut me je liamekeiny mödrin hnyi je bong bongu Jesua. 8 Me at Levi minya, wale Jesua, Binui, Kademiel, Serbia, Juda, Matania, at ame vhih khumöng, e me je liamekeiny më. 9 Ke haba Bakebukia, me Uni, li liamekeiny mödrin, ödrü e laba, cici ödrin hnyi je hanyen. 10 Ke haba Jesua ame hnöku Joiakim, me Joiakim ame hnöku Eliasiba, ke Eliasiba ame hnöku Jehoiada, 11 ke Jehoiada ame hnöku Jonathana, ke Jonathana ame hnöku Judua. 12 Ke haba hnyi je bong bongu Joiakim e hu tavat bihut, je kamen ae beönua : únyi ga Seraia, Meraia ; únyi ga Jeremia, Hanania ; 13 únyi ga Ezera, Mesulama ; únyi ga Amaria, Johanana ; 14 únyi ga Meliko, Jonathana : únyi ga Sebania, Josefa ; 15 únyi ga Harim, Adena ; únyi ga Meraiöth, Halekia ; 16 únyi ga Ido, Zakaria ; únyi ga Ginethon, Mesulama ; 17 únyi ga Abia, Zikeri ; únya gâ Miamin, únyi ga Moadia, Piletai ; 18 únyi ga Bilega, Samua ; únyi ga Semaia, Jonathana ; 19 únyi ga Joiarib, Matenai ; únya ga Jedaia, Uzi ; 20 únyi ga Salai, Kolai ; únyi ga Amok, Heberu ; 21 únyi ga Hilekia, Hasabia ; únyi ga Jedaia, Nathaniela. 22 Ke haba at Bevi hnyi je bong bongu Eliasiba, Jehoiada, me Johanana, me Judua, wale adre sihnalimidrin a je kamen ae beönua : me tavat bihut minya hnyi musi anyi Dariu than Peresi. 23 Je laku Levi, je kamen ae beönua, adre me sihnalimidrin hnyi tusi hnân ha je bong, ke ne o but hnyi je bong bongu Johanana, nöku Eliasiba. 24 Ke haba je taben at Levi ; Hasabia, me Serbia, me Jesua nöku Hademiel, me je liamekeiny mödrin cici ödrin, he ka ogânâ me ole, hoton hna húna ga Davita aten Khong ke dö cicö ke dö. 25 Haba Matania, me Bakebukia, me Obadia, me Me-

## NEHEMIA 13.

sulama, me Talemon, me Akub, tavat tuö hwanuma, ödrin e tuö homagöuleny uma omjeü. 26 Ke tavat eling hnyi je bong bongu Joakim nöku Jesua, nöku Jozadaka, me hnyi üö Nehemia, at ame musi, me Ezera, at bihut a at sihnalimen.

27 Ke haba hnyi hna okabâ hna up haginny Jerusalem, ödrin e elâm at Levi hnyi anyidrin je taun hia, he ka hum ödrin Jerusalem ai, he ka hnyi okabâ hak me senyin, me ole, me khumöng, ge je simebalo, me je nabeli, me je kitara. 28 Ke haba lakon tavat khumöng ödrin e úkhacaköu únyi hnyi dok ae tha hon igigilö Jerusalem, me je taun anyin at Netofa; 29 me únyi hnyi Bethe-gilegala, me únyi hnyi je utkânâ anyi Geba, me Azemaveth; anyin a haba at khumöng ödrin e hia but otilâ anyidrin je taun ae úhnyükong igigilö Jerusalem. 30 Ke haba tavat bihut me at Levi, ödrin e obosi ödrin bi; k' ödrin e obosoâ tavat, me je homagöule, me hna up hak veto. 31 Ke oge me hom je than Juda kâ thö ka hnyi hon hna op hak veto hnyi ke keihen metâ, ke ne o but ka hnyi homagöuleny ta tet: 32 ke hwabödrin dö ame he but Hosai me hafiny je than Juda, 33 Azaria, Ezera, Mesulama, 34 Juda, Beniamina, Semaia, Jeremia, 35 me ke je lakon tavat bihut a je бага, k' ödrin e hok trutru: Zakaria nöku Jonathana, nöku Semaia, nöku Matania, nöku Mikaia, nöku Zakuri, nöku Asafa; 36 me je liamekeiny më, a Semaia, me Azarela, me Milalai, me Gilalai, me Maai, me Nathaniela, me Juda, me Hanani, tavat adre me hom je únyikhumöng anyi Davita aten Khong; me Ezera at sihnalimen ame hnyimakan anyidrin bunyen; 37 ke haba hnyi homagöuleny köiö ame pupua, me gethen hnyi hnyimaködrin, ödrin e öliâ wacúatiny taun anyi Davita, hnyi hna öliâ ka hnyi hon hak veto, walethö hon uma umö Davita, ke ne o but ka hnyi homagöuleny köiö e deiö. 38 Ke haba dö a loiny tavat ole, me ödrin e he bi he ka úkhanö mödrin, ke inya bi hotudrin tha inya me hafiny tavat ka hnyi hon hak veto, walethö hon tap ae beü göranyai a hnen je meic, ke ne o but hnyi hna up hak veto ae lau: 39 me ethö hon homagöulei Eferaima me homagöule kâú adrem, me homagöuleny ta je wâ, me tap ae beü göranyai anyi Hananel, me tap ae beü göranyai anyi Mea, ke ne o but hnyi homagöuleny mamoe: me ödrin e todrö hnyi homagöuleny uma ceat. 40 K' ame tot helâe li döiny hnyat ole hnyi uma umen Khong, k' inya minya, me

hafiny hnyat musi unyik: 41 ke haba tavat bihut, Eliakima, me Maseia, me Miamin, me Mikaia, me Elioenai, me Zakaria, me Hanania, hnyat hok trutru; 42 me Maseia, me Semaia, me Eleazara, me Uzi, me Johanana, me Malekia, me Elama, me Ezer. Ke haba tavat khumöng adre me khumöng göranyai tha ödra me Jezeraia at ame tu' ödrin. 43 Ke ödrin e hudo je hut ae gan hnyi bong eling me senyin; anyin a Khong ame osenyini ödrin ge senyin; me je momo me je wanakat minya ödrin e hnyi senyin: me adre me löng hnyi dok ae sâkâú hwan senyin hnyi Jerusalem.

44 Ke adre me otilâ hnyi bong eling tavat hon je hnyeuleny omjeü, me je hut adre kap göranyai, me je wan a bân, me je ke keihen a libenyitainy, m' adre me úkhacaköu kâú únyi hnyi je utkânâiny je taun, je jekhöu hoton hnanyibu hobi kâú tavat bihut me at Levi: anyin a at Juda ödrin e senyin ka tavat bihut me at Levi, tavat huliwa. 45 Ke ödrin e tuö hanymen únyi ge Khongudrin, me hanymen ge hna obosoâ, helâe minya tavat khumöng me tavat tuö hwanuma, hoton hnanyibu anyi Davita me Solomona a nokon. 46 Anyin a hnyi üö Davita ehac me Asafa e hu homakan ka tavat khumöng, me je khumöng hnân oganá me hnân ole ka Khong. 47 Ke haba hnyi üö Zerubabela, me üö Nehemia, haba at Isaraela hia ödrin e ham je jekhon tavat khumöng me tavat tuö hwanuma, ke jekhöu hnyi ke bong: ke ödrin e okabâ ta je únyi hobi kâú at Levi; ke haba at Levi ödrin e okabâ hobi kâú laku Arona.

### HNYIMAKAN 13.

**K**E haba hnyi bong e adre me aú hnyi tusi anyi Mose, ke haba tavat adre me löng; ke adre me wâ hna sihnalimen hnyin, a ame ca he at Amona me Moaba ka hnyi dit hnyi úkhacaköu anyin Khong nyiele balua; 2 can ödrin e ca úkhanö me lakon Isaraela me je areto me köiö, ke ödrin e ham bak kö Balaama me me he ka hang' ödrin: ke so bi haba Khongutin ame wia hna hangâ me me hñahic bi. 3 Ke ödrin e löng ut hnanyibu, me ödrin e öúsâkâúöâ tavat ae se hia ae ve bongon bi únyi ge at Isaraela.

4 Ke haba ehac, Eliasiba at bihut wale adre me otilâ hon je hnyeuleny uma umen Khongutin, ke iatre Tobia më, 5 me e ame hia but penapena hobi kâú hnyeule ae gan, waleji adre me ip hnyin je hudiny han, me

NEHEMIA 13.

libanu, me je kaia, me je ke keihen a libenyitainy hwit, me waina, me wakaco, waleji adre hunâ hobi kâu at Levi, me at khumöng, me at tuö hwanuma ; me je hut adre kap göranyai, hobi kâu tavat bihut. 6 Ke haba hnyi ûen hia eling, me hiö nya hnyi Jerusalema : anyin a haba hnyi huna a thöte tui Aretaseta than Babulona, me oge me he ka than, ke hwaban dö ke je bong oge me sumâtâ than : 7 me oge me o but hnyi Jerusalema, me wâ hulö a ânyâ Eliasiba ga Tobia, a e ame penapena hobi kâu hnyeule hnyi je hnyeuleny uma umen Khong. 8 Me gan hmâ anyik vec : waleling me oge me dedegec je thatûnyî anyi Tobia ûnyî hnyi hnyin hnyeule. 9 Me oge me hûna m' ödrin e ânyâwia je hnyeule : ke oge me odilâ hmetu kâe je kaiainy uma umen Khong, tha eling me je hudiny han, me libanu. 10 Ke oge me wâ but a g' adre me ca ham bi je jekhon at Levi ; me haba at Levi, me tavat khumöng, a tavat ânyâ huliwa, adre me ve kec ka hnyi idrin je hnyeî. 11 Me oge me iwatretra me tavat musi me ha, ka habe, Anyin a ieu adre me hna degecâ uma umen Khong? Me oge me ukhacakou ödrin, me otill' ödrin hnyi hanymödrin. 12 Me haba at Juda hia ödrin e hom ke keihen a libenyitainy hwit, me waina, me wakaco ka hnyi je uma omjeû. 13 Me oge me otillâ tavat tuö uma omjeû, wale Selemia at bihut, me Zadoka at sihnalimen, me Pedaia a hanen at Levi : ke ûtangköu mödrin Hanan nöku Zakuri, nöku Matania : anyin adre me haiwisai ödrin, ke hamödrin he ka khenâ ka je liamekeiny mödrin. 14 Khonguk lö, ûnykûmi nya ju hnyi ûnyî ang, ke ca he ka kot degecâ anyik je huliwa ae betenge waleji oge me ânyâ ka hnyi uma umen Khonguk, me je huliwainy.

15 Haba hnyi ûen eling oge me wâ hnyi Juda keihen adre me hlec wan vine hnyi sabath, me hok je bwiny hwit, me ohijenâ je asina ; me waina minya, me je wan vine, me je wan meta, me je hok hia wale adre me sukhöunâ Jerusalema ai hnyi bong sabath : ke oge me thaw' ödrin hnyi bong ödrin e ûcû jeû hnyin. 16 Ke hu minya ke je at Turo adre me laba eling, hnyat adre me hom je wâ, me ta je ûnyî hia hnân ûcû, m' adre me ûco hnyi sabath me lakon Juda hnyi Jerusalema. 17 Me oge me iwatretra me je taben hnyi Juda, me ha ködrin, ka habe, Ieu ang gabun, öbun e ânyâ ûnyî e ae kong, me okongoâ bong sabath? 18 Hawa a ca ânyâ helâe laka-

möbun, me haba Khongutin ame oâ ta je ûnyî hia eang ae kong kötin, me hon taun ang? ke öbun e bi hanen hmönyin kö Israela hnyi hna okongoâ sabath. 19 Ke ame hauhaotreng ut hnyi je homagöuleny Jerusalema ke tiga hia bi sabath, me oge me ûkhûnöng he ka hlöng je homagöule, ke oge me hûna a g' adre me ca he hmetu bi ka khöng ke ne o but a um dö sabath : ke oge me otillâ ke lathnyabaik hnyi je homagöule, m' adre me ca he ka dit me je hok hnyi sabath. 20 Ke ame mokut tavat tren omjeû me ûcû omjeû hnyi hoton Jerusalema, ame ne khaca ûen ame ne lo. 21 Ke oge me û ödrin, me ha ködrin, ka habe, Ieu ang gabun öbun e mokut hmelen hna up hak? öbun e ne helâe hmetu me oge me he ka köt öbun. Ke hwân e, ödrin e ca o hmetu bi hnyi sabath. 22 Me oge me kunâ at Levi he ka obosoi ödrin bi, m' adre me he ka tuö je homagöule, me okabâ bong sabath. Khong lö, ûnykûmi nya ju hnyi ûnyî eang minya, me betenge gak helâ me ûganiny ânyâm ibetengiö.

23 Ke hnyi ûen eling oge me wâ at Juda tavat adre me hok momo hnyi Ase-doda, me Amona, me Moaba : 24 ke haba je lakudrin adre me hom hanen hwen Ase-doda, ke ca khan' ödrin fuc wia bi hwen Juda, ke hoton hwan ke hnyeî me ke hnyeî. 25 Ke oge me û ödrin, me haikongu ödrin, me kot keihen me hnimö je bödrin, me kun' ödrin he ka hâiâ Khong, me ha, ka habe, Öbun e ca he ka ham lakubun wahlu ka lakudrin obaga, me hom lakudrin wahlu hobi kâu lakubun obaga, me hobi köbun bi. 26 Hawa, a ca monu Solomona tuhan Israela hnen ûnyî e? ke so bi e ba than a helâ mē hnyi je hnyeî ae se hia, ke haba Khongon ame betenge gan, ke Khong ame otillâ e he ka than hon at Isaraela hia ; ke so bi je momo kanyua ödrin e omono e. 27 Hawa, öhmun e he ka ling öbun he ka ânyâ hia hulö e ae gan, he ka hanyâüa weny Khong wale he ka hoktamomo kanyua? 28 Ke haba ke nöku Jehoiada, nöku Eliasiba at bihut ae beönua ame hom nöku Sanabalata at Horono : me oge me obâ e gak. 29 Khonguk lö, ûnykûmi ödrin ju, anyin ödrin e okongoâ hanymen tavat bihut, me ûhinhinkou anyin tavat bihut, me at Levi. 30 Helâe oge me obosoi ödrin ge je atkanyua hia, me owisa hanymen tavat bihut, me at Levi hnyi je ve hanymödrin : 31 me hobi kâu hudiny utö, hnyi ûen adre owisa, me wan a bân. Khonguk lö, ûnykûmi nya ju, me ohnabici nya.

## TUSI ESETERA.

## HNYIMAKAN 1.

**H**ABA hnyi je bong bongu Asueru (haba Asueru ling ame musi hwân hnyi India ke ne o but hnyi Aithiope, ke hnyi je ke keihen hnyei a wan haded ke twente seven :) 2 haba hnyi ün eling ame laba Asueru than hon theroniny dokhon dökhu, hnyi Susani hnyaban than, 3 hnyi huna a kuniny anyin musi, me e ame ânyâ bijeu ka anyin je taben, me lathnyabainy; ke e unyin hmanenanginy Peresi me Madai, je taben me latuhan ta je hnyei: 4 me e ame omanenâ tang omjeüiny dokhon dökhu ae hmanenang, me meciny anyin musi ae so, hnyi je bong ae se, a wan haded ke eite je bong. 5 Ke ame um dö je bong eling, me haba than ame ânyâ ke bijeu ka tavat hia a ödra hnyi Susani hnyaban than, ka tavat ae gan me tavat ae ûhnyükong, hnyi seven ta bong, hnyi hnyeuleny utkâuhnyi uma umen than; 6 adre me uhno mano ae hau, me udrudrâ löhau, me udrudrâ, me ohmä ge je tö ae hau a lino ae ûhnyü kong nân me udrudrâ hlit ka hnyi je otru sileva, me je hmolom veto oüt ae hau; ke gol me sileva je hna mokut ame tot hon hna bi dek veto ae dra, me hau, me mat, me hlit. 7 Ke adre me habelidrin hnyi je kaia gol, (ke ve bongon je kaia,) me waina ae gan anyin than, hoton ibetengio anyin than. 8 Ke adre me ic bi hoton hnanyibu; a g' adre me ca üjengö: anyin a helâe hna owisa hnen than ka hnyat musi hnyi umen uma, a ödrin e he ka ve ânyâ helâ me weny ke at me ke at. 9 Ke haba momo than a Vaseti ame ânyâ bijeu anyin omomo hnyi uma umo Asueru than. 10 Ke haba hnyi bong a seveniny, k' ame senyin hnyekon than ge waina, me e ame ha kö Meuman, me Bizetha, me Harebona, me Bigetha, me Abagatha, me Zethar, me Karekas je eunu-ka a seven, hnyat ödrin e huliwa hnyi hnyimakö Asueru than, 11 he ka hum Vaseti momo than ka hnyi hnyimakan than ame bicâ korona anyin than, he ka omanenâ hmanenanginy momo ka tavat, me je taben: anyin ae so hmainty momo. 12 Ke haba Vaseti momo than ame höcö he ka he hoton

hofuc hwan than a deny anyin je eunuka: anyin a wale ame hmönyin than, k' ame ubâhlâ anyin hmönyin. 13 Me haba than ame ha ka tavat ae metâ, tavat adre me wâhmakhmetoâ je ün, (anyin a wale hwa-kecin than ködrin hia thithö tavat adre me wâhmakhmetoâ hnanyibu, me hna owisa; 14 ke haba ütangköu më, Karesena, me Sethar, me Adematha, me Tasesa, me Meres, me Maresena, me Memukan je taben anyin at Peresi me Madai a ödrin seven, tavat adre me wâ hnyimakan than, me laba beönua hnyi dökhu :) 15 Ieü ötin e he ka ânyâ kö Vaseti momo than hoton hnanyibu, anyin a ca ânyâ helâ me hna huna hnö Asueru than a deny anyin je eunuka? 16 Haba Memukan ame thu hnyi hnyimakan than me anyin je taben, ka habe, a ca monu Vaseti momo than ka than thibi, ke so bi ka je taben hia, me tavat hia ae hnyi je ke keihen hnyei hia i Asueru than. 17 Anyin ame he omomo hia ka löng hwakecin momo than, me ödrin e he ka hûkötîâ laöiödrin obaga, ödrin ka löng a Asueru than ame ûkhünöng he ka hawö Vaseti momo than ka hnyi hnyimakan, ke ame ca he bi. 18 Me ame he je momo than hnyi Peresi me Madai, adre me löng hna ânyâ hnen momo than he ka ha helâe ka je taben hia anyin than. Me ame he ka gan ûhöciö me hmönyin. 19 Ame ne so ka than, e so he ka kunâ hofuc hwan than ünyi gam, me sihnalimen e hnyi je hnanyibu anyin at Peresi me Madai, me me ca wia bi, a g' ame ca he hmetu bi Vaseti ka o hnyi hnyimakö Asueru than; ke ame he than ka ham hanymen momo than ka ke at ae so hon. 20 Ke hnyi ün adre me he ka omanenâ hofuc hwan than wale e ame he ka ha hnyi dokhon dökhu hia, (anyin ae gan hmâ,) me ame he omomo hia ka oganá laöiödra, tavat ae gan me tavat ae ûhnyükong. 21 Ke so hofuc eling ka than me je taben; ke haba than ame ânyâ helâ me hofuc ho Memukan: 22 anyin a e ame kunâ je tusi ka hnyi je ke keihen hnyei hia iny than, hnyi ke keihen me ke keihen, hoton hna sihnalimen, me ke hnyei me ke hnyei hoton hwan hnyei, m' adre me ve musi obaga hnyi

## ESETERA 2.

umödra je uma, me omanená e hoton hwan idrin je hnyei.

### HNYIMAKAN 2.

**H**WABAN ta je únyi eling k' ame hia but hmönyin anyi Asueru than, me e ame únykúmi Vaseti, me únyi e ame ányá, me hna owisa káu. 2 Me haingen lathnyabainy than, a hnyat huliwa káu, ka habe, E so adre me elám hobi káu than wahlu ae hmanenang: 3 ke so ame he than ka otílâ je taben hnyi je ke keihen hia dokhon dökhu, m' adre me úkhacaköua wahlu ae hmanenang hnyi Susani hnyaban than, hnyi uma umen omomo, unyi Hege eunuka anyin than, at ame tuö omomo; k' adre ma ham ködrin ta je únyi hnân obosoá: 4 me haba hlu ae so ka than ame he ka momo than hwabö Vaseti. Ke so hofuc e ka than; me ame ányá helâe.

5 Ke wale ke at Juda hnyi Susani hnyaban than, Modikai ien, nöku Jaira, nöku Simei, nöku Kiso, at Beniamina; 6 a at adre me hom úheny Jerusalema tha e me je bâ, waleji adre tha hom me Jekonia than Juda, a hom Nebukaneza than Babulona. 7 Ke e ame hat Hadasa, wale Esetera, a nokon liamekeiny me kamen; anyin ae ba kamen me hinyen, ke hlu ae so hnyimakan ke hmanenang; haba Modikai ame hom e me me nokon bi hnyi úen ame mokcu kamen me hinyen. 8 Ke adre me löng hofuc hwan than me anyin hnanyibu, k' adre me úkhacaköuá wahlu ae se hia hnyi Susani hnyaban than unyi Hege, me adre me hum Esetera minya ka hnyi uma umen than, unyi Hege, at ame tuö omomo. 9 K' ame so hlu eling, me e ame betenge gan; ke e ame ie ham káu ta je únyi hnân obosoá, me je jekhon, me seven ta hlu adre me úca hnân hobi káu bi, únyi hnyi uma umen than: k' ame hna e me anyin je hlu ka hnyi dok ae so hnyi uma umen omomo. 10 Ke haba Esetera ame ca omanená ge iny hnyei me je lahanen, anyin a Modikai ame húna káu a e ame ca he ka omanená. 11 Ke haba Modikai ame ngeny hnyi je bong hia hnyi hnyimakan hnyeuleny uma umen omomo, he ka wâ hawa ga Esetera, ke ieú adre me he ka ányá káu. 12 Ke a o but úen je hlu he ka ve he kö Asueru than, hwaban twelv ta tehi adre me ányá káu hnyin hoton hnanyibu ge omomo, (anyin adre me ohwádâ ta je bong bongon obosoí ödrin, a siks ta tehi ge wakaco muro,

ke siks ta tehi ge je únyi ae bo so, me ke je únyi hnân obosoá omomo,) 13 ke walang bongon ame he je hlu ka than, adre me ham ködrin ta je únyi hia a wedrin he ka hom únyi hnyi uma umen than. 14 Ödrin e he hnyi sahac me hmetu hnyi hnyomakatu ka hnyi uma umen je momo a loiny, unyi Sasegaz eunuka anyin than, at ame tuö anyin omomo: ödrin e ca he ka hmetu ka than ame ne ca senyin ködrin than, me haw' ödrin ge iödrin bi. 15 Ke ame o but úö Esetera, nöku Abihaila, liamekeiny me kamö Modikai, at a hom e me me nokon, he ka he ka than, me haba hlu eling ame ca weny bi ke únyi, ke so bi hna ha thibi hnö Hege eunuka anyin than, at ame tuö je momo. Ke ame so Esetera hnyi hnyimakan tavat hia adre me wâ e. 16 Ke adre me hum Esetera kö Asueru than ka hnyi uma umen than hnyi tehi a teniny, wale tehi Tebeth, hnyi hunya a seveniny anyin musi. 17 Ke haba than ame weny Esetera hon je momo hia, ke e gan hmâ hnen hna betenge gan, ke e ame weny e hon je hlu hia thithö; me e ame obicâ e ge korona anyin than, me hom e hnân momo than hwabö Vaseti. 18 Me haba than ame ányá bijeú ae gan hmâ hobi káu anyin je taben, me lathnyabainy, bijeú e anyi Esetera; ke e ame hna he ka mená, hnyi je ke keihen hnyei, me ham je bwihlany, hoton betenge anyin than. 19 Ke haba Modikai ame laba hnyi homagöuleny than hnyi úen a loiny adre úkhacaköuá wahlu. 20 E tiga ca um bi Esetera omanená je lahanen me iny hnyei; helâ me hna húna káu ga Modikai: anyin a Esetera ame ányá hna ha hnö Modikai helâ me úen adre me hat hnyin. 21 Ke haba hnyi je bong e waleji ame laba Modikai hnyi homagöuleny than, me ame hmönyi Bigethan me Teres li eunuka anyin than hanen tavat tuö hwanuma, me ödrü me heleú deny he ka hlingö Asueru than. 22 Ke ame manen dut únyi eling kö Modikai, me e ame thumetu Esetera, momo than; ke haba Esetera ame thumeto than únyi hnyi iö Modikai. 23 Ke haba hnyi úen adre me uhnö únyi eling, ke adre me wâhmakhmeto ae hnathu, me adre me tha uhni ödrü hnyi ke úö: me adre me sihnalimen e hnyi tusi hnân ha je bong hnyi hnyimakan than.



## HNYIMAKAN 3.

**K**E hwaban ta je únyi e haba Asueru than ame oganö Hamana nöku Hamedatha at Agaga, me ogöranyâ e, me ip taben tap hon taben je than hia unyin. 2 Ke haba lathnyabainy than a ödrin hnyi homagöuleny than, me ödrin e labö nom, me iyâú kö Hamana; anyin a than ame húna helâe gan. Ke haba Modikai ame ca nom me iyâú kâu. 3 Ke haba lathnyabainy than a ödrin hnyi homagöuleny than, ödrin e ha kö Modikai, ka habe, Ieú gam u me hanyâúâ hnanyibu anyin than? 4 Ke ödrin e ha kâu hnyi ke bong me ke bong, ke ame ca ling ödrin, m' ödrin e thumetu Hamana, me me manen bi a g' ame tethmâ la bongu Modikai: anyin a e ame thumetu ödrin a e at Juda. 5 Ke a wâ Hamana a Modikai ame ca nom, me iyâú kâu, me Hamana ame unöngöt ge hmönyin. 6 Ke ame höcö he ka hake hlingö Modikai; anyin adre hia but omanená kâu hnye i Modikai: anyin a wale Hamana ame heleú deny he ka ohia at Juda hia thithö a ödrin hnyi je ke keihen hia dökhü dökhü Asueru, wale hnye i Modikai. 7 Haba hnyi tehi a bân, wale tehi Nisan, hnyi huna a twelviny musi anyi Asueru, me ödrin e ânyâ Puro, wale uglekôb, hnyi hnyimakö Hamana hnyi ke bong me ke bong, me ke tehi me ke tehi, ke ne o but hnyi tehi a twelviny, wale tehi Adara. 8 Ke haba Hamana ame ha kö Asueru than, ka habe, E hu tavat adre me vese me ve laba hnyi je hnye a je ke keihen hia hnyi dokhom dökhü; ke e ke anyidrin je hnanyibu me ta ogo hnye hia thithö; ke ödrin e ca ânyâ je hnanyibu anyin than: anyin a wale e ca úcú bi ka than he ka hokhnyoki ödrin. 9 Awe, ame ne so ka than, me so adre me sihnalimen m' adre me obi' ödrin; ke hamök bi he ka ham ten thauzan je talan sileva ka hnyat adre me ânyâ huliwa anyin than, m' adre me hom e ka hnyi tang omjehen than. 10 Ke haba than ame uny jut wen banyen me ham e kö Hamana nöku Hamedatha at Agaga, at ame bi iwahnaihmöny me at Juda. 11 Ke haba than ame ha kö Hamana, ka habe, Adre hia but ham köu sileva, me tavat minya, m' u me ânyâ ködrin helâ me wem. 12 Me adre me hawâ tavat sihnalimen anyin than hnyi bong a thötininy tehi a bân, me adre me sihnalimen helâ me hnö Hamana hna húna ka tavat musi ae beönua anyin than, me je gavena

hnyi je ke keihen hnye i, me tavat musö je hnye i; ka ke ke keihen me ke ke keihen hnye i helâ me hna sihnalimen, me ka ke hnye i me ke hnye i hoton hwan je hnye i; ke adre me sihnalimen hnyi iö Asueru than, ke adre me ohmâ haten hnen wen banyen than. 13 Ke adre me kunâ tavat wadringâ je tusi ka hnyi je ke keihen hnye i iny than, he ka ohia me hlingâ, me öba at Juda hia thithö, tavat ae úhnyúkong me wahingat, me ta je wanakat me omomo, hnyi bong a khaca, wale hnyi bong a thötininy tehi a twelviny, wale tehi Adara, ke adre me he ka söh anyidrin ta je únyi. 14 Ke haba hua oc önyen tusi, adre me kunâ ka hnyi je hnye i, m' adre me he ka omanená hnanyibu hnyi je ke keihen hnye i, m' adre me he ka laba penapena hobi kâu bong eling. 15 Ke ame ie he but tavat wadring ge hna húna hnen than, ke adre me omanená hnanyibu hnyi Susani hnyaban than: ke haba than me Hamana ödru me tha laba he ka ic; ke ame hlohlo but taun Susani.

## HNYIMAKAN 4.

**K**E a wâ but Modikai ta je únyi hia thithö adre ânyâ, haba Modikai ame kia anyin je úkhaú, me khavâ ec mano ae gan nân, me botru dröu, me he hnyi wanben taun, me fuc hwege göranyai me tenge: 2 ke e ame o but hnyi hnyimakan homagöuleny than: anyin ame ca he ka delec homagöuleny than at ame khavâ ec mano ae gan nân. 3 Ke haba hnyi je ke keihen hnye i hia waleji a o hnyin hofuc hwan than me anyin hnanyibu, wale hnyok ae hmak gan hmâ ka at Juda, me ca han, me tenge ae gan; ke haba tavat ae se hia adre me mokulec ec mano ae gan nân, me hnabadröu. 4 Haba je hlu anyi Esetera me anyin je eunuka ödrin e o me thumeto e; me ame hlöuhlöu gan hmâ momo than; me e ame úkhünöngâ je úkhaú he ka khaúö Modikai, me hom únyi gan mano ae gan 'nân: ke e ame ca kap. 5 Me Esetera ame hawo Hatak, ke eunuka anyin than, wale e ame otilâ hobi kâu, me bi hofuc kö Modikai he ka wâ ieú ang, ke ieú bongon. 6 Haba Hatak ame he kö Modikai ka hnyi dok ae lau hnyi taun, cicö homagöuleny than. 7 Me Modikai ame thumeto e ge ta je únyi hia ame o kâu, me úganiny mone a ha Hamana he ka ip hnyi uma omjeú anyin than únyi ge at Juda, he ka ohi' ödrin. 8 Ke e ame ham kâu tusi hnanyibu adre me oc,

## ESETERA 5, 6.

wale adre me omanená hnyi Susani, he ka ohí' ödrin, m' adre me omanená kö Esetera, me thumeto e ; me hûna kâu he ka he ka than he ka khöu kâu me sumâtâ aten iny hnyei hnyi hnyimakan. 9 Ke haba Hatak ame he me thumetu Esetera ge hofuc ho Modikai. 10 Me haba Esetera ame ha kö Hatak, me bi hofuc kö Modikai, ka habe ; 11 E khana but lathnyabainy than, me aten je ke keihen hnyei iny than, a haba hnyat hia obaga me omomo, adre me ne he ka than hnyi hnyeule eiö, k' adre me ca hawâ, me khaca thibi hnanyibu ködrin a g' adre me he ka hling' ödrin ke so at ame he than ka inâ kâu uci gol, me me möt bi : ke adre me ca hawo nya he ka he ka than hnyi je bong a thöte. 12 Me adre me thumetu Modikai ge hofuc ho Esetera. 13 Me Modikai ame ha he ka thu kö Esetera, ka habe, Ca he ka ûnykûme hnyi hnyekom a g' ame he ka mok hia at Juda, ke u ma he biju ka möt hnyi uma umen than. 14 Anyin a u je ne laba hnyibû hnyi ûen ang, me ame he ka hu menâ me möt ka at Juda ûnyi hnyi ke dok bi, ke haba u, me lap anyin kâmâm, me, adre me he ka ohia hia : ke khanö ia, hawa, ame ne o but köu dökhu hnân hobi kâu ûen helâng? 15 Me haba Esetera ame ha he ka thu kö Modikai, ka habe, 16 He thö ka ûkhacaköuâ at Juda hia adre me wâ hnyi Susani, ke he th' öbun ka ca han, cak, ca he ka han me ic hnyi kun ta bong, hnyi lit me lany : ke oge me he bi nya me anyik je hlu he ka ca han minya ; ke helâe oge me he ka he ka than, wale a ca úcû me hnanyibu : ke eja ke ne oge ne mokcu, awe, oge me he ka mokcu. 17 Ke haba Modikai ame he but, me ânyâ hia helâ me hna hûna hnö Esetera.

### HNYIMAKAN 5.

**K**E haba hnyi bong a kuniny, haba Esetera ame khavâ je ûkhaûen than, me tot hnyi hnyeule eiö hnyin uma umen than, cicö uma umen than : ke haba than ame laba hon anyin theron hnyi uma umen than, cicö hwânuma. 2 Ke than ame o Esetera momo than ame tot hnyi hnyeule, ke e ame hnyok kâu : me haba than ame inâ kö Esetera uci gol ae hnyi hnyamen. Me Esetera ame hakekeny dö, me kâlâ hnyiban uci. 3 Haba than ame ha kâu, ka habe, Ieû wem Esetera lö, momo than? ke ieû hnâm hna sumat? adre me he ka ham köu hia ke ne o but hafny dökhu. 4 Haba

Esetera ame thu, ka habe, Ame ne so ka than, ame he than me Hamana ka hnyi hanen bijeû oge hia but penapena hobi kâu, hnyi bong ang. 5 Haba than ame ha, ka habe, Újôngi Hamana thö me me ânyâ helâ me hofuc ho Esetera. Me haba than me Hamana ödru me he me hnyi hanen bijeû a penapena Esetera. 6 Ke haba than ame ha kö Esetera, hnyi ûen ame ic waina, ka habe, Ieû wem? ke adre me he ka ham köu : ke ie ûnyi u me he ka sumâtâ? ke adre me he ka ânyâ ke ne o but hnyi hafny dökhu. 7 Me haba Esetera ame thu me ha, ka habe, Walang wek me ûnyi oge me he ka sumâtâ ; 8 oge ne hia but wâ ibetengió hnyi hnyimakan than, ke ame ne so ka than he ka ham wek, me ânyâ ûnyi oge me he ka sumâtâ, ame he than me Hamana ka hnyi hanen bijeû oge me he ka penapena hobi ködru, ke nyi oge me he ka ânyâ helâ me hofuc hwan than. 9 Haba Hamana ame he me senyin hnyi bong eling me hobâ hnyi hnyekon : ke Hamana ame ö Modikai hnyi homagöuleny than, ke ame ca tot, me ca bwebwet gan, me ame unöngötö Hamana ge hmönyin ga Modikai. 10 Ke so bi Hamana ame hokhnyok, me he but ka hnyi umen uma ; me e ame ûkhûnöng he ka hawâ je lahanen me Zeres a âiân. 11 Ke haba Hamana ame omanená ködrin hmananginy anyin tang omjeû, me úseiny je lakon, me ta je ûnyi hia than ame oganá hnyin, me hnen hna ogöranyâ e hon je than me lathnyabainy than. 12 Haingö Hamana minya, ka habe, Haba Esetera momo than ame ca tha hawâ ke at me than ka hnyi bijeû wale ame ânyâ, ke hake inya thibi ; ke e ame he ka hawo nya nyi tha inya me than. 13 Ke ca ûnyi hnathu könya ta je ûnyi hia thithö e, hnyi ûen oge me ö Modikai at Juda ame laba hnyi homagöuleny than. 14 Me ame ha kâu Zeres a âiân me je lahanen hia, ka habe, E so he ka penapena tap utö a fite je kubit ibeûen göranyai, me nyi u me he ka ûhnenamö me than, m' adre me he ka uhni Modikai hnyi hon : ke hwaban e, he senyin dö ka hnyi tha han me than. Ke so hofuc eling kö Hamana ; me ame ûkhûnöng he ka ânyâ tap utö.

### HNYIMAKAN 6.

**H**ABA hnyi lit eling ame ca mokut bi than ; me e ame ûkhûnöng he ka hom tusi hnân önykûmeâ ka hnyi ta je

## ESETERA 7.

bong eji, me adre me aú e hnyi hnyimakan than. 2 Ke adre me wá hna sihnalimen hnyin waleji a omanená hwakeci Modikai ga Bigethan, me Teres, ke li eunuka anyin than, a li at hanen hnyat tuö hwanuma, a li at ödru me heleú deny he ka hlingö Asueru than. 3 Me haingen than, ka habe, Ieú hnödra hna ogáná me ogöranyi Modikai hnyi únyi ang? Me haingen lathnyabainy than a hnyat adre me huliwa káu, ka habe, E ba únyi adre me ányá káu. 4 Haba than ame ha, ka habe, Ie at hnyi hnyeule? Anyin ame o but Hamana hnyi hnyeuleny uma umen than eiö, he ka ha ka than he ka uhni Modikai hon tap utö wale ame hia but penapena hnán hobi káu. 5 Me haingen lathnyabainy than káu, ka habe, Wa bi, wale Hamana ame tot hnyi hnyeule. Me haingen than, ka habe, E so e ame he jem. 6 Me ame didró Hamana. Me haba than ame ha káu, ka habe, Ieú adre me he ka ányá ka at hnen than hna beogáná? Ke haingö Hamana eú hnyi hnyekon, ka habe, Ame he than ka beoganö ia, hawa ca inya la! 7 Me Hamana ame thu ka than ka habe, Haba at hnen than hna beoganá, 8 me so adre me hom but úkhaúen than waleji ame labö khavá káu than, me hors waleji ame labö tabá than, me bicá korona anyin than : 9 ke adre me he ka hna úkhaú me hors ka hnyi hnyamen ke taben ae únyi hnathu, me me khavá at hnen than hna beogáná, me otabá hon hors me me vhenogetheniny taun, me kuku tot hnyi hnyimakan, ka habe, Adre me he ka ányá helâe ka at wale hnen than hna beogáná. 10 Haba than ame ha kö Hamana, ka habe, Logötö, hom but úkhaú me hors helâe me hnám hna ha, me ányá helâe kö Modikai at Juda, at ame laba hnyi homagöuleny than : ca he ka degec ke únyi wale u je ha. 11 Haba Hamana ame hom úkhaú me hors, me khaúö Modikai, me otabá e me me he hnyi wanben taun, me kuku tot hnyi hnyimakan, ka habe, Adre me he ka ányá helâe ka at hnen than hna beoganá. 12 Ke haba Modikai ame hmetu ka hnyi homagöuleny than. Ke haba Hamana ame he logot ka hnyi umen uma, ame hmak hnyekon me tube ban. 13 Ke Hamana ame thumetu Zeres a áián me je lahanen hia ge ta je únyi hia a o káu. Ke ame ha káu hnen tavat unyin ae metâ me Zeres a áián, ka habe, Ame ne at Juda Modikai waleji u je hwán he ka ta hnyi hnyimakan, u me ca he ka hwege hon, ke u me he bala bi ka ta

hnyi hnyimakan. 14 Me ödrin e tiga úhne-namö më, me ame o but je eunuka anyin than he ka ie hawo Hamana ka hnyi bijeú a penapena Esetera.

## HNYIMAKAN 7.

**M**E ame o but than me Hamana he ka ic unyi Esetera momo than. 2 Ke haba than ame ha hmetu kö Esetera hnyi bong a loiny hnyi úen ic waina, ka habe, Ie únyi u me he ka sumâtâ, Esetera, momo than? m' adre me he ka ham köu : ke ieú wem? m' adre me he ka ányá ke ne o but hnyi hafiny dökhu. 3 Haba Esetera momo than ame thu me ha, ka habe, Than lö, oge ne hia but wá ibetengiö hnyi hnyimakám, ke ame ne so ka than, e so he ka omeli nya hoton hnök hna khöú, me ik hnyeí hoton hnök hna sumat : 4 ányin a adre hia but úcú öhmün, inya me ik hnyeí, he ka ohia, me hlingá, me öba. Ke adre ne hia but úcú öhmün hnán lathnyaba obaga me omo-mo, me oge me ne he ka laba hnyibú, ke so bi, ae ca úcú iwahnaihmiöny, me je omjeú anyin than ame he ka hia. 5 Haba Asueru than ame ha kö Esetera momo than, ka habe, Ie at, ke ewa, at ame bi gan hnyi hnyekon he ka ányá helâe? 6 Haba Esetera ame ha, ka habe, Haba at beúkúc, me iwahnaihmiöny, wale Hamana at ang ae kong. Me ame ot Hamana hnyi hnyimakan than me momo than. 7 Me ame todrö than hnyi hmönyin úheny hnyi hna ic waina me he ka hnyi utkânâiny umen than : ke haba Hamana ame tot mé khöúâ e bi kö Esetera momo than ; anyin a ga wá but a ga kong ut ge than. 8 Ke ame hmetu than úheny hnyi utkânâiny umen than ka hnyi dok adre ic waina hnyin ; ke wale Hamana ame ta hon hna mokut hnen Esetera. Me haingen than, ka habe, E ame he minya ka lelö momo than unyik hnyi uma? K' ame tiga he but hofuc únyi hnyi hnyimen than, me adre me tube hnyimakö Hamana. 9 Me haingö Harebona a eunuka hnyi hnyi makan than, ka habe, Wá bi minya tap utö a ányá ga Hamana hobi kö Modikai, at ame ha so hobi káu than, k' ame tot bi hnyi uma umö Hamana, ke fifte kubit ibeúen goranyai. Me haba than ame ha, ka habe, Uhno thö e hnyin. 10 Me ödrin e uhni Hamana hnyi tap utö waleji e ame penapena hobi kö Modikai. Me ame hia ju hmönyin anyin than.

## HNYIMAKAN 8.

**H**ABA hnyi bong eling Asueru than ame ham kö Esetera momo than uma umö Hamana, iwahnaihmiony me at Juda. Ke Modikai ame o hnyi hnyimakan than; anyin a Esetera ame ha kâu a ödrutha at. 2 Ke haba than ame uny jut wen banyen, wale e ame hom únyi ga Hamana, me ham bi kö Modikai. Ke haba Esetera ame otillö Modikai hon hnyaba Hamana. 3 Ke haba Esetera ame fuc hmetu hnyi hnyimakan than, k' ame ta hnyi li can, me tenge me khöu kâu he ka ohia hna he ka okongoâ ga Hamana at Agaga, me anyin bibihwakecin e ame únykúme ka at Juda. 4 Me haba than ame inâ kö Esetera uci gol. Me Esetera ame höhöi thö me tot hnyi hnyimakan than. 5 Ke haingen momo than ka habe, Ame ne so ka than, ke oge ne hia but wâ ibetengiö hnyi hnyimákâm, ke ame ne wisa únyi e hnyi hnyimakan than, ke ame ne senyin könya, awe, e so adre me he ka sihnalimen m' adre me he ka thawâ je tusi wale a únykúme Hamana nöku Hamedatha at Agaga, waleji e ame sihnalimen he ka ohia at Juda hnyi je ke keihen hnyei hia iny than: 6 anyin oge me he ka kâmâu ka wâ hna okongoâ ame o ka hnyi hon ik hnyei? ke oge me he ka kâmâu ka wâ bnödra hna he ka ohia lahanök? 7 Me haba than ame ha kö Esetera momo than, me Modikai at Juda, ka habe, Wâ bi, oge hia but ham uma umö Hamana kö Esetera ke adre hia but tuhno e hnyi tap utö, can e ame inâ hnyamen ka at Juda. 8 Ke öbu me he ka sihnalimen ka at Juda helâ me únyi ae so köbu, hnyi ien than, me ohmâ haten ge wen banyen than: anyin a haba tusi adre sihnalimen hnyi ien than, me ohmâ haten ge wen banyen than, e ca khana ke at he ka wia hmetu. 9 Me adre me hawâ tavat sihnalimen anyin than hnyi úen eling, hnyi tehi a kuniny wale tehi Sivan, hnyi bong a twente theriny; ke adre me sihnalimen helâ me hna hûna hia ga Modikai ka at Juda, me tavat musi ae beönua, me je gavena, me je taben hnyi je ke keihen hnyei, hwân hnyi India ke ne o but Aithiope, wan haded ke twente seven je ke keihen hnyei, ka hnyi je ke keihen hia hoton hna sihnalimen me ka at Juda hoton hna sihnalimen, me ifucidrin. 10 Ke e ame sihnalimen hnyi iö Asueru than, me ohmâ ge wen banyen than, me kunâ

tavat ae logot adre me tabö hors, me je tusi, wale adre tabö hors ae logot wadring hanen je hors haleny than, adre hnokâ unyin: 11 haingen tusi, ka habe, haba than ame hna ka at Juda hnyi ke taun me ke taun, he ka úkhacaköu m' adre me tu' ödrin bi, he ka okongoâ, me hlingâ, me ohia man maniny tavat hia, me ke keihen hnyei adre me he ka kuc ödrin, me anyidrin tavat ae úhnyúkong me omomo, me he ka söh anyidrin ta je únyi, 12 hnyi bong a khaca hnyi je ke keihen hnyei hia i Asueru than, wale hnyi bong a thötininy tehi a twelv, wale tehi Adara. 13 Haba hna oc hna sihnalimen, adre me omanenâ ka hnyi je hnyei hia, m' adre me he ka ham hnân hnanyibu hnyi je ke keihen hnyei hia, me me laba penapena at Juda hnyi bong eling he ka bi hwaban ka je iwahnaihmiony mödrin. 14 Me ame he but tavat ae logot adre tabö hors ae legot wadring adre me labö he hnyi huliwa anyin than, adre újengö me ologotâ hnen hofuc hwan than; ke adre me ányâ hnanyibu hnyi Susui hnyaban than. 15 Ke haba Modikai ame he úheny unyin than k' ame khavâ úkhaüen than ae udrudrá me hau, me korona gol ae gan, me úkhaü a mano lino ae udrudrá hlit: k' adre me senyin me hobâ hnyi taun hnyi Susani. 16 Ke e unyin at Juda melam, me senyin, me hobâ, me oganá. 17 Ke haba hnyi je ke keihen hnyei hia, me je taun hia a o ka hnyin hnanyibu me hofuc hwan than, me ame senyin me hobâ at Juda, ke e hu bijeu me bong ae so. Ke se hia tavat aten hnyei adre me hnyi hanen hmi Juda; k' adre me outen at Juda.

## HNYIMAKAN 9.

**K**E haba hnyi tehi a twelv, wale tehi Adara, hnyi bong a thötininy, k' ame hakekeny dö he úen he ka ohwâda hnanyibu me hna hûna hnen than, k' ame únykúme je iwahnaihmiony me at Juda he ka hu man hudrin; ke so bi adre me wia hmetu bi me me he ka hu man ge at Juda hon tavat adre me húkoti' ödrin; 2 me haba at Juda ödrin e úkhacaköu hnyi anyidrin je taun, hnyi je ke keihen hnyei hia i Asueru than, m' ödrin e hinöbeny ködrin a hnyat adre me beokongu ödrin: ke ba at ame tot hnyi hnyimaködrin; anyin adre me out' ödrin hnyi ta ogo hnyei hia thithö. 3 Ke haba tavat musö je ke keihen hnyei, me tavat musi ae beönua, me je gavena, me tavat adre me ányâ je huliwa anyin than,

ESETERA 9.

me ödrin e hadruâ at Juda ; anyin ame ta hudrin ot ga Modikai. 4 Anyin ae gan hmâ Modikai hnyi uma umen than, k' ame lung hnyi je ke keihen hnyei hia thithö : anyin ame gan tot at eling, wale Modikai. 5 Ke haba at Juda ödrin e kot je iwahnaihmiöny mödrin hia thithö ge hele vat, k' adre me hlingâ, me ohia, me ânyâ wedrin bi ka tavat adre me hûkôti' ödrin. 6 Ke haba at Juda ödrin e hlingâ hnyi Susani hnyaban than me ohia je hnyat a faiv haded. 7 Me Pasedata, me Dalefona, me Asepatha, 8 me Poratha, me Adalia, me Aridatha, 9 me Pamaseta, me Arisai, me Aridai, me Vaezatha, 10 je laku Hamana, nöku Hamedatha, iwahnaihmiöny me at Juda, ödrin ten, adre hlingâ ; ke so bi ödrin e ca söh bi anyidrin ta je únyi. 11 Haba hnyi bong eling adre me hom ka than üseiny tavat adre hlingâ hnyi Susani hnyaban than. 12 Haba than ame ha kö Esetera momo than, ka habe, A hia but at Juda hlingâ me ohia hnyi Susani hnyaban than ödrin faiv haded tavat, me je laku Hamana a ten ; ke ieû la hnödrin hna ânyâ hnyi je ke keihen hnyei iny than ! Ke ieû u me he ka sumâtâ ? m' adre me he ka ham köu : ke ieû hmetu wem ? m' adre me he ka ânyâ. 13 Ke haingö Esetera, ka habe, Ame ne so ka than, e so he ka hna nyi ka at Juda hnyi Susani he ka ânyâ minya helâ me hnyi bong ang, ke adre me he ka uhno je laku Hamana a ten hnyi tap utö. 14 Haba than ame ha he ka ânyâ helâe : ke adre me otilâ hnanyibu hnyi Susani ; me ödrin e uhno je laku Hamana a ten. 15 Ke haba at Juda ae hnyi Susani, ödrin e úkhacaköu hmetu hnyi bong a fotininy tehi Adara, me hlingâ hnyi Susani ödrin theri haded tavat ; ke so bi ödrin e ca söh bi anyidrin ta je únyi. 16 Ke haba ke keihen at Juda hnyi je ke keihen hnyei iny than, adre me úkhacaköu, me tu' ödrin bi, me adre me menâ ju ge je iwahnaihmiöny mödrin, me hlingâ tavat adre me ikiki ödra a ödrin sevente faiv thauzan ; ke so bi adre me ca söh bi anyidrin ta je únyi. 17 Adre me ânyâ únyi e hnyi bong a thötininy tehi Adara ; ke ödrin e menâ hnyi bong a fotininy, me wia e hnân bijeú me senyin. 18 Ke haba at Juda a ödra hnyi Susani adre me úkhacaköu hnyi bong a thötininy, me bong a fotininy ; ke haba hnyi bong a fiftininy ödrin e menâ, me wia e hnân bijeú me senyin. 19 Anyin a wale haba at Juda hnyi je taun ae úhnyúkong, tavat adre me

laba hnyi je taun ae ba hagingy, adre me wia bong a fotininy tehi Adara hnân bong senyin me bijeú, me bong ae so, me hnân úhamköuâ je jekhöú.

20 Haba Modikai ame sihnalimen ta je únyi eling me kunâ je tusi ka at Juda hia a ödra hnyi je ke keihen hnyei hia i Asuert than, dok ae hakekeny me dok ae sâkâú, 21 he ka ha ködrin, m' adre me he ka wia bong a fotininy tehi Adara, me bong a fiftininy minya, hnyi ke huna me ke huna, 22 wale li bong waleji hnen at Juda hna menâ ge je iwahnaihmiöny mödrin, me tehi waleji adre me wia hmutu ködrin úheny hnyi hna hmak hnyekon, me me senyin bi, ke úheny hnyi hna tenge, me me bong bi ae so ; m' adre me he ka ânyâ hnân li bong bijeú me senyin, me hnân úhamköuâ je jekhöú, me ham je bwihlany ka tavat ae theduoc. 23 Ke haba at Juda adre me ogâ he ka ânyâ waleji hoton hnödrin hna bi hwân, me hoton hna sihnalimen ködrin hnö Modikai ; 24 anyin a haba Hamana nöku Hamedatha, at Agaga, iwahnaihmiöny me at Juda, ame únykúme ka at Juda he ka ohi' ödrin, me e ame khúâ Puro, wale ugleköb, he ka hling' ödrin me ohi' ödrin ; 25 ke ame o but únyi e ka hnyi hnyimakan than, me e ame húna hnyi je tusi, me me hmetu ka hnyi hon ban anyin bibiwhakecin ae kong, waleji e ame únykúme ka at Juda ; me adre me he ka uhno e me je lakon hnyi tap utö. 26 Anyin a wale ödrin e hwenyi ien je bong eling, me je Puro, hoton ien Puro. Anyin a wale can ta je hofuciny tusi ang, me hnödrin hna wâ hnyi únyi ang, me únyi a o ködrin, 27 haba at Juda, ödrin e owisa, ke ödrin e ogâ, me je mâtânidrin, me tavat úkhacaköu mödrin hia, me me ca he ka önuâ bi, mödrin e he ka tuö li bong eling helâ me hna sihnalimen, me helâ me úen adre hia but thu, hnyi ke huna me ke huna ; 28 me ödrin e he ka únykúme li bong eling me tuö hnyi ta je dö hia thithö, ge ta je lap hia, me ta je ke keihen hnyei hia, me ta je taun hia ; me me ca he ka hia je bonginy Puro eling unyin at Juda, ke adre me ca he ka bi obiny únykúme e unyin je mâtânidrin. 29 Me haba Esetera momo than, nöku Abihaila me Modikai at Juda, ödra me sihnalimen hwegiâ he ka otilâ hmâ tusi Puro eang a loiny. 30 Ke e ame kunâ je tusi ka at Juda hia thithö hnyi je ke keihen hnyei hia dökhü dökhü Asueru a wan haded ke twente seven, me je hofuc ae menyik me hnathu,

## JOBU 1.

31 me me tot hmâ li bonginy Puro ang, hnyi li ûen adre me thu, helâ me Modikai at Juda me Esetera momo than ame hûna ködrin, ke haba khaca helâ me hnödrin hna owisa hnân hobi ködrin bi me ta je mâtrânidrin, a ta je ûnyi ge ca han me anyidrin tenge. 32 Ke haba hnanyibu hnö Esetera ame otilâ hmâ ta je ûnyi ge Puro ; ke adre me sihnalimen hnyi ke tusi.

### HNYIMAKAN 10.

**K**E haba Asueru than ame hûna ka ta je hnyei me ta je bomeneiny köö

he ka fat. 2 Ke haba ta je ûnyi e ame ânyâ ge tang hwegien me maniny man, me hna omanenâ ûgani Modikai, wale hnen than hna ogöranyâ, hawa, adre me ca sihnalimen hnyi tusi hnân ha je bong bongon je than Madai me Peresi! 3 Anyin a haba Modikai at Juda me utang-köu me Asueru than, ke at ae gan hmâ unyin at Juda, ke haba je liamekeiny më ae se hia me adre me kap soâ ; k' adre me elâm soiny iny hnyei, me ha hnahicâ je mâtrâniny hia thithö.

## TUSI JOBUB.

### HNYIMAKAN 1.

**E**HU ke at hnyi hnyei Uza, Jobu ien ; ke bekhöt me wisa hwakecin, e at ame outen Khong me úsákâüö me hulö. 2 Ke adre me hnokoâ lakon ta baga a seven, ke kun ta hlu. 3 Ke haba haleny omeno me seven thauzan je mamoe, ke theri thauzan je kamela, ke faiv haded je úcú lo bolok, ke faiv haded je asina momo, ke ti se hia lathnyabainy ; me me beönua at eling hon tavat hia aten e deiö. 4 Ke ame labö he lakon je baga he ka ve bijeüâ hnyi umödrin bi je uma hnyi bongudrin je ve bong ; k' ödrin e hawâ ta lahanidrin a kun he ka hnyi han me ic. 5 Ke ame um dö je bonginy tha han, me haba Jobu ame úkhü-nöng he ka okabi ödrin, ke e ame vesâ hnyi hnyomakatu, me hudo je hudiny leü hoton úseidrin : anyin a haingö Jobu, ka habe, Ame ne ânyâ hulö ge lakuk, me haikongoâ Khong eü hnyi je hnyekudrin. Haba Jobu ame ânyâ helâe bala.

6 Ke ame o but ke bong wale ame o hnyin lakon Khong he ka tot hnyi hnyimakö Iehova, k' ame tha o but Satana mödra. 7 Ke haba Iehova ame ha kö Satana, ka habe, Ühem ua? Me Satana ame thu kö Iehova, ka habe, Ühek hnyi hna ngeno hmeledrany, me vheno e. 8 Haba Iehova ame ha kö Satana, ka habe, Hawa, u je wâ ûnyküme athnyabaik a Jobu, anyin ae ba ke at ae úcú më eang hmeledrany, at ae ti so hwakecin ke wisa,

at ame outen Khong, me úsákâüö me hulö. 9 Me Satana ame thu kö Iehova, ka habe, Hawa, e ba troban hna outen Khong ga Jobu? 10 Hawa, u je ca hwö hak igigilö e, ke igigilö hnyaban, ke igigilö anyin ta je ûnyi hia hnyi je ke keihen hia? u je hia but ohnahicâ anyin huliwa, me osehia haleny je meno hnyi hnyei. 11 Ke so bi hai thö benyâm walang ang, me mâdrâ anyin ta je ûnyi hia, me e ame he ka haikongu u hnyi hnyimákâm. 12 Me haba Iehova ame ha kö Satana, ka habe, Wâ bi, e but anyin ta je ûnyi hia thithö hnyi hnyamâm, ke so bi u ma ca he ka hai hnyamâm ka hnyi hon unyin bi. Me haba Satana ame he but úheny hnyi hnyimakö Iehova.

13 Ke hnyi ke bong hnyi ûen ame han me ic waina lakon je baga me lakon je hlu hnyi uma umen tuhödrin, 14 me ame o but úthumetu kö Jobu, me ha, ka habe, Ame hwiö kânâ hnen je bolok, ke e hakekeny ködrin je asina momo ödrin e han : 15 me haba at Sheba ödrin e utut, me húgún' ödrin ; eke, ödrin e hia but kot je athnyaba ge hele vat ; ke inya thiju ang kolon oge me thumetu u. 16 Ke e ame tiga fuc, me ame o but ke at me ha, ka habe, Ame kölu but meic hlogon Khong ûnyi hnyi drany, me thong degecâ je mamoe, me je athnyaba, me oh' ödrin ; ke inya thiju ang kolon oge me thumetu u. 17 Ke e ame tiga fuc, me ame o but ke at me ha, ka habe, Haba at Kaledaia ödrin e vesâ me me kun ta deü vat, me utut ka ta je kamela, me húgún'

JOBU 2, 3.

ödrin, eke, me kot ta je athnyaba ge hele vat; ke inya thiju ang kolon oge me thumetu u. 18 Ke e ame tiga fuc, me ame o but ke at me ha, ka habe, Adre me han me ic waina lakom je бага me lakom je hlu hnyi uma umen tuhödrin: 19 ke wâ bi, ame o but ang ae gan hmâ únyi hnyi hnye-buba, me túâ vak ta kopiny uma, me ame ü takou je hidrou, me ödrin e mokcu; ke inya thiju ang kolon oge me thumetu u. 20 Haba Jobu ame todrö me kia but anyin úkhaú, me giâ ban, me ta ju hnyikânâi me khudrung; 21 me haingen, ka habe, Oge o thu únyi hnyi hnyeuku bai, ke oge me he ka he thu hmetu kâ e: a ham Iehova, k' ame he Iehova ka hom hmetu; e so he ka haisoâ iö Iehova. 22 A ca ânyâ hulö Jobu hnyi ta je únyi hia eling, ke e ame ca haimonoâ Khong.

HNYIMAKAN 2.

**K**E ame o but hmetu ke bong ame o hnyin lakon Khong he ka tot hnyi hnyimakö Iehova, me ame tha o mödrin Satana he ka tot hnyi hnyimakö Iehova. 2 Haba Iehova ame ha kö Satana, ka habe, Chem ua? Me Satana ame thu kö Iehova, ka habe, Chek hnyi hna ngeno hmeledrany me vheno e. 3 Haba Iehova ame ha kö Satana, ka habe, Hawa u me wâ únykúme athnyabaik a Jobu? anyin ae ba ke at ae úcú mē eang hmeledrany, at ae ti so hwakecin, ke wisa, ke e at ame outen Khong, me úsákáúö me hulö: ke e hwege bala bi hnyi anyin wisa, ke u me cubic nya he ka ohia e, ke ba can. 4 Haba Satana ame thu kö Iehova, ka habe, Unen, hwaban unen, eke, haba ta je únyi hia hnen at hua hu, me e ame he ka ham hwaban anyin möt. 5 Ke so bi hai thö walang ang hnyamâm, me kot je jeien me viny, me e ame he ka haikongu u hnyi hnyimákâm. 6 Haba Iehova ame ha kö Satana, ka habe, Wâ bi, e but e hnyi hnyamâm, ke wâ thibi anyin möt. 7 Haba Satana ame he but úheny hnyi hnyimakö Iehova, me kuc Jobu ge je ohuc ae kong, hwân hnyi li hnyeúcan ke ne o but hnyi wanben ban. 8 Ke e ame hom ke watagi kaia me khudreú unyin; ke e ame laba hnyi hnabadröu. 9 Haba âiân ame ha kâu, ka habe, Hawa, u me he bala ka hwege hnyi ânyâm wisa? haikongoâ thö Khong, ke mokcu. 10 Me haingen ka momo, ka habe, E úcú ifucâm me ifucin ke momo ae monu. Hawa? ate me he ka kap so únyi

ge Khong, ke ate me ca he minya bi he ka kap únyi ae kong? Haba hnyi ta je únyi hia thithö eling a ca monu bi Jobu hnen li esongodiny.

11 Ke a löng ut je lahanö Jobu a kun ta únyi eling ae kong ame o but kâu, me ödrin e ve o únyi hnyi je idrin; wale Elifaza at Temana, me Biledad at Sua, me Zofar at Naamathi: me ödrin e tha thu úen he ka he me tha tenge mē me otubwelâ e. 12 Ke tiga sákâú me ödrin e wâ, ke ödrin e ca wâhmakhmeto e bi, me ödrin e tenge hwege goranyai; ke ödrin e ve kia anyidrin je úkhaú, me iâ kânâ ka hnyi hon je bödrin. 13 Me ödrin e tha laba mē hnyi kânâ seven je lany ke seven je lit, ke ödrin e ca fuc kâu: anyin a ödrin e wâ ae ti gan anyin vec.

HNYIMAKAN 3.

**H**WABAN e haba Jobu ame fuc dö me hangâ bongon bong.

2 Ke haba Jobu ame fuc me ha, ka habe:

3 E so he ka mok bong adre hnöku nya hnyin,  
Me lit adre ha hnyin, ka habe, Adre erkinâ da.

4 E so e hnyinghet ut bong eling;  
Ca he bi Khong ka elâm e únyi ethö,  
Ke ca he ka omelamá e ge melam.

5 E so ame he lit me hanon mok ka hom e:  
E so he ka tube e ge úlá;  
Me ootâ e ge menekholom hnyi jebigö.

6 Haba lit eling, me so he ka kât e hnen menekholom ae gan:  
Me me ca he ka hnyi senyin me ta je bonginy huna;  
M' adre me ca he ka tha aú e me ta je tehi.

7 Wâ bi, e so he ka ba wan lit eling;  
M' adre me ca he ka löng hwan senyin hnyin.

8 E so he ka hangâ e hnen tavat adre me hangâ bong,  
Tavat ae khan' ödra he ka bwebwelâ leviathana.

9 E so e he ka udrem je okhúiny okubelit:  
Me elâm lany, ke ba bi;  
Ke ame ca he ka wâ li emakan hnyomakatu:

10 Anyin a e ame ca theling nya hnyi hnyeuku bai,  
Me ikhâlâ vec ge li emakök.

11 Ieú oge me ca mok gan únyi hnyi hnyeuku bai?

- Ke ieu oge me ca mok gan hnyi bong  
oge me o únyi hnyi hnyeku bai?
- 12 K' ame köp nya hnen li jevan, geú?  
Me li basin, m' inye he ka ijem?
- 13 Ame ne helâng, me oge me ne mokut  
me ca bwebwet;  
Me oge me ne mokut hnying, m' inye  
menâ:
- 14 Tha inya me je than me je obotkonginy  
hmeledrany,  
Tavat adre me op je dok ae ba hnyin  
at, hnân hõbi ködrin bi;
- 15 Ke je than a ödra tren gol,  
K' ödrin e öunöngötâ umödrin je uma  
ge sileva:
- 16 K' ame ne hiö nya helâ me da a kölu-  
habu, k' adre ikhâlâ bi;  
Helâ me je mendring adre me ca wâ bi  
lany.
- 17 K' ame ca he hmetu ka ovec' ödra eling  
ge tavat ae kong;  
K' ame menâ bi eling tavat adre me  
sënyin.
- 18 K' ame laba wia eling tavat adre me  
ca;  
K' adre me ca löng hmetu hwan at  
khene huliwa.
- 19 Houmonu eling tha e me at ae únyi  
hnathu;  
K' ame gufa bi athnyaba ge tuhan.
- 20 Hnân eü adre me ham melam ka at  
ame vec,  
Me möt ka at ae hlöublöu hnyok:
- 21 A hnyat adre me bemok, k' ame ca o bi  
ködrin;  
K' adre me hiny me elâm ka wâ, hon je  
omjeü ae iyong;
- 22 A hnyat adre me ti senyin,  
Me hobâ, ödrin ka wâ erkemok?
- 23 Ieu gadra adre me ham melam ka at,  
k' adre me oiyongâ deny gethen,  
At ame thelöng hnen Khong?
- 24 Anyin a inya oge me mâng helâ me oge  
me han,  
K' ame hingâlâ anyik tenge helâ me  
köiö.
- 25 Anyin ame o but könya únyi oge me  
ti ouden,  
K' ame o but könya únyi oge me öbu-  
buny gan.
- 26 Oge me ca laba wia, me ta hau, k' oge  
me ca menâ bi;  
Ke ame o thö hlohlo.

HNYIMAKAN 4.

- H**ABA Elifaza at Temana ame thu,  
me ha, ka habe,
- 2 Hawa, u me he ka vec ame ne he ke at  
ka me úhnenamö möu?  
Ke ia ae khana he ka laba hnyibú?
- 3 Wâ bi, u je hia but nâ tavat ae se hia,  
K' u je hia but ohwegiâ je hnyam' ae  
sënyin.
- 4 U je hia but kât tavat adre me he but  
ka ta hnen hwâm ta je hofuc,  
Ke u je hia but sihwegiâ je boucan ae  
mat.
- 5 K' ame o thö köu walang ang, me u me  
ta;  
K' ame kuc u, me u me hlohlo but.
- 6 Hawa ge hnâm hna ouden Khong, ca  
wale ânyâm labageju,  
Ke hnâm hna he wisa, ca wale bi  
hnâm hna gejon?
- 7 Me únykúme ju, Ie at ame mok ke ba  
hnyikongon?  
Ke ewa dok adre me subâ degecâ at ae  
wisa hwakecin hnyin?
- 8 Wânök, a g' ame he tavat adre me  
belökâ únyi ae kong,  
Me ta úokonguny, he ka hnyi meno e.
- 9 A hi' ödrin dut únyi ge imenâiny  
Khong  
Ke ödrin e aü but ge imenâiny anyin  
hmönyin.
- 10 Haba hmuhmuiny liona, me hwan liona  
ae beüküc,  
Me je nyon je nak liona, me, adre hia  
but thu.
- 11 A mokcu liona hingat, anyin ae ba but  
haniny,  
Ke adre me vese thö je lakon liona.
- 12 Adre oâ duöngâ könya ke únyi,  
Ke haba hnyikönyök ame löng hwan  
hwaulit.
- 13 Hnyi ta je hna únykúme hnyi je hna  
omanená hnyi hnyinghet,  
Hnyi ñen ame ta but mokut hnying  
hon tavat,
- 14 Ame o but könya ot me öbubuny,  
Me me bwebwet je jeiök hia thithö.
- 15 Me ame he but hnyi hnyimakök ke  
hanu;  
K' ame todrö dinen unyik.
- 16 E ame tot, ke oge me ca wâ wia unyin;  
Ke e hnyi hnyimakök helâ ke unyin:  
E ba hwan, ke so bi oge me löng hofuc,  
ka habe,



JOBU 5.

- 17 Hawa, ame he at ame he ka hu obiny ka beönua hon Khong hnyi hwakecin ae wisa ?  
Ke ame he at ka beönua hon At a ope ge ba hnyikongon ?
- 18 Wâ bi e ame ca labageju ka je athnyabainy ;  
Ke e ame ha hnyikongon anyin je angela :
- 19 Awe, ame ca helâe ge tavat adre me labâ je uma kânâ ae kece,  
Ke kânâ dok adre hwân hnyin,  
Ke adre bödra ka hlic ödrin, ke biliny bi walelaba !
- 20 Adre obi' ödrin hnyi wanben hnyomakatu me sahac :  
Ame hi' ödra balua but, ke ba at ame wâhmakhmeto.
- 21 Hawa, adre ca oc ut töiny umödrin uma eú hnyidrin ?  
Ödrin e mokcu, ke ba metâ gadrin.

HNYIMAKAN 5.

- B**ETHE hongot, hawa, e hu at ame he ka thu kôú ?  
Ke ewa at ae kap u me he ka hwiö kâu ?
- 2 Anyin a haba hmönyin ame hlingâ at ae monu,  
Ke haba ciâ ame hlingâ at ame hop.
- 3 Oge hia but wâ at ae monu k' ame bi hweciny :  
Ke oge me ie hangâ hnyaban.
- 4 E sâkâú but lakon ge khötkic  
K' adre me úhlic ödrin hnyi homagöule,  
Ke ba at he ka omeli ödrin.
- 5 Ke ame han hnödrin hna menu hnen at ae mekihnânem,  
Eame hûgúnâ e únyi hnyi je úö ae údö,  
A memang ut hnewe hobi kâu anyidrin ta je únyi.
- 6 Anyin ame ca o but vec únyi hnyi sesâiny kânâ,  
K' ame ca kú hlöuhlöu únyi eú hnyi kânâ ;
- 7 Ke adre me hnokoâ at ka hnyi hlöuhlöu Helâ me je wahleúhleúiny meic ame gâ göranyai.
- 8 Ke oge me behe bi nya ka elâm Khong.  
K' oge me behna but ka Khong hnök hna úhnenamö :
- 9 Wale at ame ânyâ ta je únyi ae gan, ke ca hnân bi elâm ;  
Ke ta je únyi hnân láiiâ, ke ca hnân bi aú :

- 10 Wale at ame ham we ka hnyi hmeledrany,  
Me kunâ köiö ka hnyi hon ta je utkânâ :
- 11 Haba e at ame ip tavat ae hnyikânâ ka hnyi dok ae görany ;  
Me ogöranyâ tavat adre me tenge m' adre me he ka laba khötkic.
- 12 E ame odilâ je únykúmânen tavat bibihwakecin,  
Me me ba únyi adre me he ka ânyâ ge je hnyamödrin.
- 13 E ame ohnokâ tavat ae metâ hnyi anyidrin je bibihwakecin :  
Me ologotâ úhnenamö anyin tavat adre me bigan.
- 14 Adre me úkhanö me menekholom hnyi lany,  
Me khaúteta hnyi jebigö helâke me hnyinghet.
- 15 Ke e ame omelo únyi ge hele vatiny hnyimödrin,  
Wale je at ae theduoc únyi ge hnyamen at ae hwege.
- 16 Me me hu gejon ge at ae theduoc,  
Ke hulö ame kât hnyi men bi.
- 17 Wâ bi, e hnahic at Khong ame ná ;  
Anyin a wale, u ma ca höciâ hna ná hnen Ataekhanahia.
- 18 Anyin a e at ame ovecâ me lan minya ;  
E at ame bi aat me ometo minya ge li hnyamen.
- 19 E ame he ka omeli u hnyi je vec a siks ;  
Eke, ame ca he ka kalö u hnen hulö hnyi seveniny.
- 20 E ame he ka omeli u hnyi hmiâ m' u me ca mok ;  
Me hnyi vat, únyi ge maniny hele vat.
- 21 Adre me he ka ikhölö u únyi ge hinyin je bohmen ;  
Ke u me ca he ka outen hnaúhangö e ka o.
- 22 U me he ka hluma úobiö me hmiâ ;  
Ke u me ca he ka outen je menoiny hnyot.
- 23 Ke ame he je vetoiny hnyei ka thahien möu ;  
Ke ame he ka úsoköu möu ta je menoiny hnyot.
- 24 Ke u me he ka wâ a g' ame hnahic ut umâm uma mano ;  
Ke u me he ka wâ hmetu hnyabam, ke ba ke únyi ame he ka hia.
- 25 Ke u me he ka wâ a g' ame he ka gan mâtrânâm ;  
Ke ame he je sem ka helâ me ajilatiny hmeledrany.

JOBU 6.

- 26 U me he ka o ka hnyi erkemok ke u  
ingat ut ;  
Helá me thi hwit adre me hom hnyi  
ûen.  
27 Wá bi únyi e, wale hnöhmun hna elám,  
ke e ke ;  
Löng ju e, me wáhmakhmetoá hobi köu  
bi.

HNYIMAKAN 6.

- H**ABA Jobu ame thu me ha, ka habe,  
2 Ödra na he ju ka tuluto ihma-  
kiny anyik hmak,  
Me tha ip anyik vec hnyi únyi hnân  
tulut !  
3 Anyin a walang ang ame he ka hmak  
ut hon önyin köiö :  
Anyin a wale e monu but hok je hofuc.  
4 Anyin a eú hnyi hnyekuk je fana anyin  
Ataekhanahia,  
Haba hanuk ame ijem únyi imekiny :  
K' ame tot metá könya je hna ootá  
anyin Khong.  
5 Hawa, ame he asinainy hnyot ka kuku  
ame ne hu önying ?  
K' ame he bolok ka kuku hon an jeú ?  
6 Hawa, adre me he ka han únyi ae  
bokânâ he ka ba bi sâlt ?  
Ke hu hnamen waehenuiny wakunyin  
khoto ?  
7 E höcö bi hanuk he ka kâlâ ;  
Ke helá me jeú ame bokong könya.  
8 Iny na he ju ka kap hnök hna sumâtâ ;  
E na he ju Khong ka ham könya hnök  
hna gejon !  
9 Waleling me me beweny Khong ka hlic  
nya ;  
Me bethang hnyamen he ka subâ degeci  
nya !  
10 M' oge me he ka laba wia,  
Eke, oge me he ka senyiná vec, a at ame  
ca betenge :  
Anyin oge me ca ivinôâ hofuc hwan At  
ae Kap.  
11 Ieú tang hwegiök me inye he ka halu-  
bahingen ?  
Ke ieú obiny gak, m' inye he ha hok-  
hnyokâ ?  
12 Hawa, ame helá me ihwegien veto tang  
hwegiök ?  
Ke bras bi vik ?  
13 Hawa, e ca hnathu ae ba úhadruo  
unyik,  
K' adre me ohia gak he ka ányâ ke únyi  
ae hu troban ?

- 14 A ne he but at ka mok, me so ame he  
hanen ka betenge gan ;  
Wá e nye he ka hna degecá outen Atae-  
khanahia.  
15 A hia but iyawö ge je liamekeiny  
mönya helá me wagewe ;  
Ke helá me deny je wagewe a hingölö  
but ?  
16 Wale a hlit ut hnen köiö ae wahma,  
K' ame laba duöng ut kiona eú hnyin :  
17 Haba hnyi úen mage, me, ame hia but :  
Ke hnyi úen hlöng, me, ame áú büt  
hnyi hnen.  
18 K' ame saú but je bunyen adre me  
gethen eling  
Adre me ölö but ka hnyi hnyebuba, me  
mokeu.  
19 Adre me wá e hnen je bunyen anyi Tema,  
K' adre me halubahingen hnen je bun-  
yeniny Sheba.  
20 Ödrin e hmehma anyin a ödrin e laba-  
gejon ;  
Ödrin e o but kâe me ame gâ udrin.  
21 Anyin a walang öbun e gufa but ;  
Öbun e wá únyi hnân öbubuny gan, me  
öbun e ot.  
22 Hawa, oge me ha, ka habe, Hö jem  
könya ?  
Ke, ha omjehek únyi hnyi tang omje-  
hebun ?  
23 Ke, omeli nya únyi hnyi hnyamen  
iwahnaihmiöny ?  
Ke, úcú melik ju unyin tavat seda ?  
24 Nö nya thö, ke oge me he ka laba  
hnyibú :  
Ke owáhmakhmetu nya thö ge hnök  
hna monu hnyin.  
25 Shaiba ge maniny hofuc ae wisa !  
Ke ieú troban fuc a öbun ?  
26 Hawa, öbun e únykúme he ka úo je  
hofuc ?  
Ke hofuc hwan at ame ti hmönyin.  
helá me ang.  
27 Eke, öbun e beugleköbâ nakahme,  
Me ányâ ka hanöbun, helá me omjeú  
adre úco.  
28 Ke walang ang, öbun na ö nya thö ;  
Anyin oge me ca he ka thoi hnyi hnyi-  
maköbun.  
29 Öbun na hmetu ju, me me ba únyi ae  
hwali ;  
E ke, hmetu ju, ame wisa anyik úhnen-  
amö.  
30 Hawa, e hu hwali hnyi bohök ?  
E ca khana hnyimök he ka demhakh-  
metoá ta je únyi ae kong ?

HNYIMAKAN 7.

- H**AWA, e ca hamen at he ka vat eang hmeledrany?  
 Ke, ca úcú anyin ta je bong me je bong bongon at ame hok hwaban?
- 2 Helâ me athnyaba ame weny hmönyinâ hmenu,  
 Ke helâ me at ame hok hwaban ame halubahingen hwaban anyin huliwa:
- 3 Helâe adre kunö nya he ka hu gak je tehi ae únyi baú,  
 Ke adre me ham kõnya je litiny vec.
- 4 Oge ne he ka mokut haingök, ka habe, Ieú úen oge me he ka höhöi huyin? ke e beú hmâ lit;  
 Ke oge me labö seset ke ne o but haolany.
- 5 Adre me khavâ unyik ge je wahnyöng me je tap kânâ;  
 Ame metu but unen unyik, k' ame han hmetu but.
- 6 E logot bonguk je bong hon jebú anyin at ame hwâwâ mano,  
 Adre me he but, ke ba gejon.
- 7 Öbun na únykúme ju a haba melik me helâ me ang:  
 K' ame ca he hmetu emakök ka wâ so.
- 8 Haba emakan at ame ö nya, me ame ca he hmetu ka ö nya:  
 Ame he ka e but huk li emákâm, k' ame hiö nya but.
- 9 Helâke úlá ame aú, k' ame hia but,  
 Me helâe at ame dit ka hnyi erkemok, e ame ca he hmetu ka ölö göranyai.
- 10 E ame ca he ka hmetu ka hnyi hnyaban, K' ame ca he hnen bi ka wâhmakhmeto hmetu e.
- 11 Anyin a wale oge me ca he ka kât hnyimök  
 Oge me he ka fuc únyi hnyi vecin hanuk;  
 K' oge me he ka tenge hnyi hlöuhlöuiny hnyekuk.
- 12 Hawa, iny köiö ae gan, ame ne tanimo, M' u me otilâ at he ka tuö nya?
- 13 Oge ne ha, ka habe, Ame he hnök hna mokut ka otubweli nya,  
 K' ame he hnök hna mokut ka ohâhá anyik tenge;
- 14 Awe, u je oti nya ge je bwi,  
 Me öbubunyi nya ge je hna omanenâ:
- 15 Waleling m' oge me wek bi he ka hnok,  
 Me he ka mokcu, ke kong bi vecin je jeiök ang.

- 16 Oge me ikikiâ anyik möt; ca wek bi he ka he bala ka möt:  
 Hnö nya but, anyin ae únyi baú but bonguk je bong.
- 17 E hö at, m' u me he ka ogânâ e,  
 M' u me hnyok kâu,
- 18 Me u me he ka wâ e hnyi je hnyomakatu,  
 Me labö cubec e hnyi je ong úen hia?
- 19 U ma ca he ka hwiö únyi gak ke ne o but kehö,  
 Me hnö nya but hnyi ong úen oge me utâ hangöjik hnyin?
- 20 Oge ne hia but monu, ieú hnök hna ányâ köu, a at tuö tavat?  
 Anyin a ieú u je otilö nya hnân ányâm aat,  
 Me inye hmak gak bi?
- 21 Ke ieú u je ca hna degecâ gan anyik hulö, me hom degecâ anyik monu?  
 Anyin a walang ang oge me he ka mokut eú hnyi kânâ;  
 Ke u me he ka elöm nya wia, ke hiö nya bi.

HNYIMAKAN 8.

- K**E haba Biledad at Sua ame thu me ha, ka habe,
- 2 Ke ne o but kehö u me he ka ha je hofuc ang?  
 Ke ne o but kehö ame he hwâm je hofuc ka helâ me ang ae hwege?
- 3 Hawa, ame he Khong ka önua hna owisa?  
 Ke ame he Ataekhanahia ka önua wisâ?
- 4 A ne hia but ányâ monu kâu hnen lakom,  
 Me e ame hia but hn' ödrin ka hnyi hnyamen anyidrin hulö:
- 5 U je ne he ka elâm wia ka Khong,  
 Ke khöú ka Ataekhanahia;
- 6 Ke u me ne at ae ba hnyikongon me wisa whakecâm;  
 Awe e ame he ka hmâkâ walang ang hobi köu,  
 Me ham sot ka hnyi umen hwakecâm ae wisa.
- 7 Eja ke ne a ne úhnyúkong hnâm hna hwân ehac,  
 Ame he ka he bi ka ti se hia obiny köu.
- 8 Ö u hnö thö ge dö a bân,  
 Ke wâ wia ta je únyi waleji hnen laka-mödrin hna elâm bongon:
- 9 (Anyin a ötin je hnyat et thibi, me tavat ae ca khana,

JOBU 9.

- Anyin a bongutin ta je bong eang hmeledrany helâ me hmenon :)
- 10 Hawa, ödrin e ca he ka nö u, me thu köu,  
Me ha je hofuc únyi eú hnyi je hnyekudrin ?
- 11 Hawa, ame he ka kú hage he ba hmu-dra ?  
Ke ame he ka kú amun, ke ba köiö ?
- 12 E ka tiga hát, k' adre tiga ca suba bi,  
Me ame he ka bán ka meleca, ke biliny bi ta je hnyot hia.
- 13 Helâe minya je gethen deny tavat hia adre me hnying Khong ;  
K' ame he ka hia hna gejon ge at ame ca outen bi Khong :
- 14 Adre me he ka subâ degecâ hnen hna gejon,  
K' ame helâke umen wahaihna hnen hna labageju.
- 15 E ame he ka ci ka hnyi umen uma, k' ame ca he bi ka tot :  
K' ame he ka kât hmâ e, k' ame ca he ka tethmâ.
- 16 E hát, ke tiga ca o bi seúnö,  
K' ame he ka iyâú je vheiny hon hnen hna belökâ.
- 17 A dit ut je wân hnyin hna digic thâtúnyi,  
E ame wâ dok ae hu veto hnyin.
- 18 Adre me ne ohia e únyi hnyi hnen,  
Me e ame he ka ivinöâ e, ka habe, Oge me ca ö u.
- 19 Wâ bi, wale senyin hnyi deny gethen,  
K' ame he bi keihen ka kú únyi eú hnyi kânâ.
- 20 Wâ bi, ame ca he Khong ka hota degecâ at ae wisa,  
K' ame ca he ka otethmâ tavat adre me ânyâ hulö.
- 21 E ame he bi ka ounöngötâ hnyimâm ge hluma,  
Ke li esongodâm ge hongot senyin.
- 22 Adre me khavâ ge hmehma tavat adre me húkotiö u ;  
K' ame he ka hia but uma mano umen tavat ae kong.
- 3 Ame ne weny he ka ivinö mē,  
E ca khana he ka thu ka ke únyi a khaca hnyi wan thauzan.
- 4 E at ae metâ hnyekon, ke gan hmâ man :  
Ewa at ae hwege hnyimakan kâu, me me ton ?
- 5 E thibi at ame oc je bucen, ke ca khan' ödrin,  
Hnyi úen e ame wi' ödrin hnyi anyin hmönyin.
- 6 E ame bwebwelâ hmeledrany únyi hnyi hnen,  
Me ame öbubuny je hmolominy.
- 7 E ame hûna ka seúnö, me me ca he ka o ;  
Ke e ame okeceâ khötâ je okhú.
- 8 Hake e ke thibi at ame lau drany,  
Me uto hon je waköiöiny köiö
- 9 E thibi at ame ânyâ Uresa me Oriona me Kukuúnyi  
Me je hnyeule ka hnyi hwaiöu.
- 10 At ame ânyâ ta je únyi ae gan ke ca hnân wâhmakhmeto ;  
Eke, ta je únyi hnân láîâ ke ca hnân áú.
- 11 Wâ bi, e ame he batök, ke oge me ca wâ e :  
E ame he bala, ke ca khanö nya e.
- 12 Wâ bi, e ame hûgúnâ, ke hamö ia he ka thawâ ?  
Ia ame he ka ha kâu, ka habe, Ieú e u me ânyâ ?
- 13 Khong ame ca he ka ohmeto anyin hmönyin ;  
Ame he ta je hnyok bi gan hia ka khudrung kâu.
- 14 Ke haba inya me ti úhnyúkong hnök hna khana he ka thu kâu.  
Ke ca úca hok je hofuc he ka ivinöâ mē.
- 15 Oge ne wisa, me oge me ca he ka thu kâu ;  
Ke oge me he ka khöú ka at ame owisö nya.
- 16 Oge ne hia but hongot, ke e ame thu könya ;  
Me oge me ca he ka únykúme a e ame löng hok.
- 17 Anyin a e ame ohmetru nya ge weneú.  
Me osehia hnök je aat, ke ba can.
- 18 E ame ca he ka hnö nya he ka menâ,  
E ame ounöngöti nya ge je únyi ae hiny.
- 19 Adre ne ha ge maniny tavat ae hwege, wâ bi, e bi e !  
Ke adre me ne ha ge hna owisa, ie ame he ka thu úen könya ?

HNYIMAKAN 9.

**M**E haba Jobu ame thu me ha, ka habe,  
2 E hnathu e khanö nya wia e :  
K' ame he ka kâmâu at ka wisa unyin Khong ?

JOBU 10.

- 20 Oge ne he ka haiwisai nya, ame he hnyimök ka haikongu nya :  
Oge ne ha, ka habe, iny wisa, e ame he ka haihwali nya.
- 21 Oge ne wisa ; me oge me ca wáhmak-hmetu nya bi ; iny höciá anyik möt.
- 22 E khaca thibi bongon ; anyin a wale hnök hna ha, ka habe,  
E ame ohia at ae wisa, me at ae kong.
- 23 Adre me ne ie hlingá ge osö,  
Me ame he ka hluma hna cubec at ae ba hnyikongon.
- 24 Adre me hna hmeledrany ka hnyi hnyamen at ae kong :  
E ame tube je hnyimakan tavat owisa e ;  
K' ame ne ca at eling, awe, ia bi ?
- 25 E logot bonguk je bong hon at ae háhá li can :  
K' ame kec ut, k' ame ca wá so.
- 26 Ame hia but, helá me hu ae logot kec :  
Ke helá me aeto ame gá ka hnyi haniny.
- 27 Oge ne ha, ka habe, Oge me he ka hnying anyik tenge,  
K' oge me he ka wia hnyimakök ae hmak me me menyik bi :
- 28 Me oge me outen anyik je vec hia,  
Ke khanö nya a u me ca he ka ha ae ba kongik.
- 29 Adre me he ka haikongu nya ;  
Ke hnân eú me oge me he ka huliwa baú ?
- 30 Oge ne he ka östö nya ge köien kiona,  
Ke hinyem ge oiöá ;
- 31 Me u me he bi ka odili nya eú hnyi thop ae hmudra,  
Me me he ka ikiki nya hnen hing úkhaúk.
- 32 Anyin a e ca at helá mönya, me inye he ka thu káu,  
M' öhmu me he ka úhnyimaköhmuköu hnyi hna owisa.
- 33 Ke ba at he ka owisa köhmu,  
Me ip li hnyamen buhmu.
- 34 E so e ame he ka hom anyin osö únyi gak,  
Ke ca oti nya ge anyin ta je únyi hnân outen :
- 35 Me oge me he bi nya ka fuc me ca outen ;  
Anyin e ca hwakecik he ka heláe.
- K' oge me he ka fuc hnyi hinyin hanuk.
- 2 K' oge me he ka ha ka Khong, ka habe,  
Ca he ka haikongu nya ;  
Omanená thö könya can u me ú nya gan.
- 3 Hawa e so köu m' u me he ka seda,  
M' u me he ka húkotiá huliwa anyin li hnyamám,  
Me ohnahicá úhnenamö anyin tavat ae kong ?
- 4 Hawa, li emakan at li emákám,  
Ke u me wá helá me ibwelien at ?
- 5 Hawa, e úcú bongom je bong me je bong bongon at,  
Ke e úcú hunaiám me je bong bongon at,
- 6 Me u me hnö anyik hulö  
Me elám anyik monu ;
- 7 Ke so bi e khanö u a iny' ca at ae kong ;  
Ke ba at ame he ka húgúná únyi hnyi hnyamám ?
- 8 Haba li hnyamám a huliwön nya, me up nya,  
Hnyi je ke keihök hia ; ke so bi u me he ka ohio nya.
- 9 Ö u únykúme ju a u je up nya helá me káná ae kece ;  
Ke hawa, u me he ka ohmetu nya ka hnyi káná ?
- 10 Hawa, u je ca hingölö nya helá me dân basin,  
Me owahmai nya helá me fromage ?
- 11 U je okhaúö nya ge unen me viny,  
Me úöhmákouönya ge je jö me töiny.
- 12 U je hia but ham könya möt me ibetengiö,  
Ke u je tuö hanuk ge hnâm hna senö nya.
- 13 Ke u je ikhálá ta je únyi e eú hnyi hnyekom ;  
Ke e khanö nya a ka e bi e unyám :
- 14 Oge ne ányá hulö, u me bi hatök  
Ke u me ca he ka hnö nya but ge anyik hulö.
- 15 Og ne at ae kong, ekölö gak !  
Ke oge ne at ae wisa hwakecin, me oge me ca he ka ogöranyá bök ;  
E gan hmá anyik hnehma,  
Me oge me wá anyik vec.
- 16 A ne hamen bök he ka ogöranyá e bi, u je hnu nya helá me liona :  
Ke u me he ka ányá hmetu könya je únyi hnân láia.
- 17 U je hom gaga je hnyat gam, ödrin e haikongu nya,  
Me bi hanen ányám hmönyin könya ;

HNYIMAKAN 10.

- OGE me sényin dut ge melik ;  
Oge me ca he bi ka thawá anyik tenge ;

JOBU 11, 12.

- K' ame o but kõnya je ûnyi ae ve bongon me vat.
- 18 Ieû u je oi nya gan ûnyi hnyi hnyeku bai?
- Iny na mokcu ehac, k' adre ca õ nya!
- 19 Me inye ba, me ca môt bi ;  
K' adre me kõp nya ûnyi hnyi hnyeku bai ka hnyi erkemok.
- 20 Hawa, e ca wakhalet biju bonguk ta je bong? awe, soju,  
Mê hnö nya but, me inye menâ thö hnyi ong ûen,
- 21 K' inye tiga ca he ka hnyi dok adre me ca hmetu ûnyi hnyin,  
Wale hnyei ae menekholom me hmenon mok ;
- 22 A hnyei ae ti menekholom hmönyin, helâ me menekholom cici ;  
A hnyei iny hmenon mok, ae ba hwenöniny,  
K' ame helâ me menekholom bi lany.

HNYIMAKAN 11.

- M**E haba Zofar at Naamathi ame thu me ha, ka habe,
- 2 Hawa, adre me ca he ka thu hmetu ta je hofuc ae se hia?  
Adre me he bi ka hawisa at ame unöngöt ge je hofuc?
- 3 Ame he hwâm je hofuc gufa ka ohnyibö tavat?  
U me he ka ûhiö, ke ba at ame he ka oihmehmö u?
- 4 Anyin a u je ha, ka habe, E hau hnök hna ûne,  
Ke ba kongik hnyi hnyimâkâm.
- 5 Ke, E na he ju Khong ka fuc,  
Me khöng li esongodiny he ka ivinö möu ;
- 6 Me omanenâ köu ta je ûnyi ae iyong hnyi metâ,  
A g' ame huliwa so hnyi je ve bongon ae se !  
Anyin a wale mê khanö u thö, a Khong ame ca ûnykûme ânyâm ke je hulö.
- 7 Hawa, u je ne elâm Khong, e khatö u he ka wâ?  
E khatö u he ka ti wâhmakhmeto Ataekhanahia ?
- 8 E görany hmönyin helâ me drany ; ieû u me he ka ânyâ ?  
E hnyikânâ hmönyin hmelen hedis ; ieû ae khanö u bi ?
- 9 Haba tulutiny, me beû hmâ hon hmele-drany,
- Me lau hon köiö ae gan.
- 10 Ame ne he ka dit, me hlöng,  
Me hawâ tavat ka hnyi hna owisa, ie at ame he ka thawâ ?
- 11 Anyin a e ame wâhmakhmeto tavat ae ûnyi baû :  
E ame wâ hulö minya, ame ne ca ûnykûme wia gan.
- 12 Ke e ca hu metâ ge at ae hop,  
Eke, adre hnokoâ at helâ me nokon asinainy hnyot.
- 13 U je ne penapena hnyekom,  
Me hinöbeny kâu ;
- 14 Ame ne hu hulö hnyi hnyamâm, degec ut e sâkâu ai,  
Ke ca hna hulö ka mokut hnyi umâm je uma manö :
- 15 Ke helâe u me he ka bwele thö göranyai me ba hnyikongom ;  
Eke, u me he ka hwege, me ca ot bi :
- 16 Anyin a u me he ka hnying ânyâm vec ;  
U me he ka ûnykûme gan helâ me je di a hia but :
- 17 Ke ame he ka görany ânyâm môt hon jebigö ;  
A ne menekholom, ame he ka helâ me hnyomakatu.
- 18 Ke u me he ka laba hmâ, anyin ame he ka hu gejon ;  
Eke, u me he ka elâm, me he ka mokut hnyi hnahic.
- 19 U me he minya ka mokut, me ba at ame he ka ooti u ;  
Eke, ame he ka weny gam tavat ae se hia.
- 20 Ke ame he ka dit ut li emakan tavat ae kong,  
Ke ba gethen adre me he ka kec ka hnyin,  
Ke ödrin e he ka labageju ka hnyi ûen mokcu.

HNYIMAKAN 12.

- H**ABA Jobu ame thu me ha, ka habe.
- 2 E hnathu öbun thibi tavat,  
Me ame he ka tha mokcu metâ möbun.
- 3 Ke so bi e hu ûnykûmânök minya helâ möbun ;  
Ca inya bi hnyi hmelibun :  
Eke, ke ewa at ae ca khana ta je ûnyi helâng ?
- 4 Oge me úcú me at ame hluma gan hnen waeny,

JOBU 13.

- Waleji at ame hongot ka Khong, me e  
ame thu ;  
Adre me hluma ge at ae wisa, me so  
hwakecin.
- 5 Haba at ame laba sot, me wale at ame  
hükötiä at ae hmak, eü hnyi hnyekon ;  
Adre me penapena e hobi kâu at ame  
he ka haü li can.
- 6 Ame mokut so je uma mano umen tavat  
venöu,  
Adre me laba hmâ, tavat adre me ohmö-  
nyinâ Khong ;  
He haba Khong ame ham gâná ka hnyi  
je hnyamödra.
- 7 Ke he thö walang ang ka hnö omenoiny  
hnyot, m' ödrin e he bi ka nö u ;  
Me je meno ame gâ ethö, m' ödrin e he  
ka thumetu u :
- 8 Fuc dö ka kânâ, me ame he ka nö u ;  
K' ame he je wâ eü hnyi köiö ka oman-  
nenâ köu.
- 9 Ie at ame ca wâ tremângâ ta je únyi  
hia eling,  
A g' ame ányâ e hnyamö Iehova ?
- 10 Haba e hnyi hnyamen hanon ta je únyi  
hia ae möt,  
Me homenâ anyin tavat hia thithö.
- 11 Hawa, ca hamen hnyiköny he ka cubec  
ta je hofuc,  
Helâ me hnyem ame dem cubecâ jeü ?
- 12 E unyin wahingat metâ,  
Ke unyin tavat ae se hia, bongon wâ-  
hmâkhmeto.
- 13 E unyin bi metâ me tang hwege ;  
E unyin bi uhnenamö me wâhmakh-  
meto.
- 14 Wâ bi, e ame hagutâ, ke ca khana ke  
at he ka op hmetu ;  
E ame thelöng at, ke ca khana ke at he  
ka khöng hmetu.
- 15 Wâ bi, e ame behânâ köiö, me ame hme  
thö :  
Ke ame kunâ hmetu, me me wia hnyei.
- 16 E unyin hwege me metâ ae hnathu ;  
E ame tren at omono, tha e me at adre  
omono.
- 17 E ame lelö but ta je obotkong, hnyat  
adre hia but söh,  
K' ame omono tavat owisa.
- 18 E ame thang je than adre ca,  
K' ame hükälâ bi wen hnyok hnyi je  
hnyidrin.
- 19 E ame lelö but tavat bihut adre hia but  
söh,  
K' ame hagutâ tavat ae hwege.
- 20 E ame hom hofuc únyi ge at ae hnathu,

- K' ame hom wâhmakhmeto únyi ge  
wahingat.
- 21 E ame hingälâ but úöhüköti hon je  
than,  
K' ame thang wen hnyekon tavat ae  
hwege.
- 22 E ame omanenâ ta je únyi ae iyong  
únyi hnyi menekholom,  
K' ame hom dö hmenon mok ka hnyi  
lany.
- 23 E ame osehia ta je hnyei, me ohí' ödrin  
hmetu :  
E ame olauâ ta je hnyei me odili ödrin  
hmetu.
- 24 E ame hom je hnyekon tavat ae beönua  
hnyi hmeledrany,  
Me kun' ödrin he ka vheno hnyebuba  
ae ba getheniny.
- 25 Ödrin e khaüteta hnyi menekholom me  
ba hnân omelamâ.  
K' ame omonu ödrin helâ me at ame  
monu ge grâg.

HNYIMAKAN 13.

- W**Â bi, a wâ but emakök ta je únyi  
hia eling,  
A löng ut hnyikönyök me wâ únykü-  
me e.
- 2 Haba únyi ae khan' öbun, e khanö nya  
minya :  
Iny ca úhnyükong hmelibun.
- 3 Iny na he ju ka fuc ka Ataekhanahia,  
Iny bewek he ka úhnenamö me Khong.
- 4 Ke öbun tavat sit hofuc thoi,  
Ke öbun tavat tren bubun hia ae únyi  
baü.
- 5 Öbun na he ju ka laba hnyibü !  
Me me manen dut anyibun metâ.
- 6 Löng ju walang ang anyik úhnenamö,  
Ke tèvehlöng ju úivinöik.
- 7 Hawa, öbun e he ka ha únyi ae kong  
he ka bi hien Khong,  
Öbun e he ka fuc thoi he ka bi hien ?
- 8 Öbun e he ka bi so kâu ?  
Öbun e he ka ivinö hobi kâu Khong ?
- 9 Hawa, e so e he ka elâm bongubun ?  
Ke hawa, öbun e he ka iyawâ e, helâ  
me hna iyawâ at ?
- 10 E hnathu e ame he ka thaw' öbun,  
Öbun e ne wâhmakhmeto duöngâ tavat.
- 11 Hawa, ame ca he hmanenanginy ka oti  
öbun,  
Ke ame ca he ka o köbun hna outen e ?
- 12 Haba hobun je hofuc hnân únyküme,  
me helâ me vejeciny hnabadröu,

- Ke haba anyibun je huabá, me je hhabá káná ae kece.
- 13 Laba hnyibú ju öbun gak, m' inye he ka fuc,  
Eja ke ne a ne o but könya ke je únyi bi.
- 14 Anyin a ieú oge me he ka oloú vik ge je nyuk,  
Me ip ju melik hnyi hnyamök ?
- 15 Eja ke ne a ne hlingö nya, oge me he ka halubahingen :  
Ke so bi oge me he ka haisoá dek je gethen hnyi hnyimakan.
- 16 Haba únyi e, me ame he ka omeli nya ;  
Anyin a haba at ame ca ot, me ame ca he ka o ka hnyi hnyimakan.
- 17 Tevehlöng wia ju ifucik,  
Ke so ame dit ka hnyi je hnyikönyöbun hnök hna omanená.
- 18 Wá bi, oge hia but penapena anyik úhnenamö,  
E khanö nya a g' adre me he ka haiwisö nya.
- 19 Ie at ame he ka ivinö mönya ?  
Anyin a oge ne laba hnyibú, me oge me he bi ka mok.
- 20 Haba lo thibi li únyi u me ca he ka ányá könya,  
M' oge me ca he ka ikhölö nya bi hnyi hnyimákâm :
- 21 Hom dö hnyamám gak,  
M' oge me ca he ka outen ányâm ta je únyi hnân outen.
- 22 Me u ma hongot, me oge me he bi nya ka ieú ;  
Ke hnö nya bi he ka fuc, me u me he ka thu könya.
- 23 Ve úseiny anyik ta je monu me anyik ta je hulö ?  
Omanená thö könya hnök hna hanyâúâ me anyik hulö.
- 24 Anyin a ieú u me ikhâlâ hnyimákâm,  
Me únykúme a iny iwahnaihmiöny dut möu ?
- 25 U me he ka hwege ka lan úö ame tûâ ge ang ?  
Ke u me he ka hnu tilâ thatúnyin hwit ae meleca ?
- 26 Anyin a u me sihnalimen ta je únyi ae hmak gak,  
Me oâ könya anyik ta je hulö, waleji k' iny tiga wanakat :
- 27 U je ohmá li cak hnyi úö, me bi haten dek je gethen hia ;  
U je bi haten ka hnyi li hnyeúcak :

- 28 Ke iny helá me únyi ae bobot ame áú but,  
Helá me úkhaú ame an hnen nokon walelaba.

HNYIMAKAN 14.

- H**ABA at a hnokoá hnen momo  
Me wakhalet thibi je bongon, me unöngöt ge hlohlo.
- 2 E ame o but helá me vongon, me adre me subâ but :  
E ame he helá me hmenon, k' ame ca tethmá bi.
- 3 Ke hawa, u me bwela ka at a helâe,  
Me hawo nya he ka úhnei möu ?
- 4 Ie at ae khana hom ke únyi ae kalaöt únyi hnyi únyi ae ca kalaöt ? e ba at.
- 5 Anyin adre hia but omuá anyin je bong, e unyam úseiny je tehiny,  
Me u je hia but bi hnyigöulen e, me e ame ca he ka hanyâúâ ;
- 6 Hwiö thö gan, me me mená ju,  
Ke ne o but e ame he ka ohwadá bongon bong, helá me athnyaba ame hok hwaban.
- 7 Anyin ae hu geju ka úö adre sö, a e ame he ka kú hmetu,  
K' ame ca he ka ba je khûen.
- 8 Eja ke ne ka kueny ju wân eú hnyi káná,  
Ke a bobot dö hnyiban eú hnyi káná ;
- 9 Ke ame he ka kú hmetu e ka löng köiö.  
Me khú helá me úö adre teb ta.
- 10 Ke haba at ame mokcu, me áú but :  
Eke, ame mokcu at, me ewa hmetu ?
- 11 A hme thö je köien köiö ae gan,  
K' ame kong ut je wagewe, me hme thö ;
- 12 Helâe minya at, e ame mokut, k' ame ca höhöi hmetu :  
E ame ca he ka hmak ke ne o but ame hia but drany,  
K' adre me ca he ka bwebwelâ hnyi hnea hna mokut.
- 13 U na he ju ka ikhölö nya hnyi erkemok,  
Ke oiyongi nya ke ne o but ame hia ányâm hmönyin,  
U na he ju ka thu bonguk, me únykúme könya !
- 14 Ame ne mokcu at, hawa ame he bi ka möt hmetu ?  
Oge me halubahingen hnyi je bong bongon anyik vat hia,  
Ke ne o but adre me he ka hnö nya.



JOBU 15.

- 15 U ma he ka hongot, me oge me he bi  
 nya ka iéu köu :  
 U ma he ka hnyok ka huliwa anyin li  
 hnyamâm.
- 16 Ke u je aú walang ang hnök je hna  
 okca :  
 Hawa, u je ca tuö wia anyik hulö ?
- 17 Adre me okeceâ hmâ hnök je hna  
 hanyâûâ hnyin tang,  
 Ke u me thelö anyik monu.
- 18 E hnathu ame ü but bucen me hia but,  
 K' adre me oc ut kic únyi hnyi hnen.
- 19 Ame aú tot je veto ge köiö ;  
 Ke haba babihingölöiny ame kot degecâ  
 kânâiny hmeledrany :  
 Ke u je ohia hna gejon hnen at.
- 20 U je tom bi, me ame hia but ;  
 U je wia hnyimakan, me obâ.
- 21 Adre me ogânâ lakon, ke e ame ca wâ  
 bi ;  
 Adre me hom úhnyúkongu ödrin, ke e  
 ca khana bi.
- 22 Ke ame ka vec thibi unyin,  
 K' ame tenge hnyekon bi, kâ únyi gan.

HNYIMAKAN 15.

- H**ABA Elifaza at Temana ame thu me  
 ha, ka habe,
- 2 Hawa, ame he at ae metâ ka thu ge  
 metâ ae únyi baú,  
 Me ounöngötâ hnyekon ge ang hwei ?
- 3 Hawa, e ame he ka iwatretra ge hofuc  
 ae gufa,  
 Me je hofuc ae ca so troban ?
- 4 Eke, u je hota degecâ ot,  
 Me óhnyúkongoâ khudrung hnyi hnyi-  
 makan Khong.
- 5 Anyin a haba hnyimâm ame omanená  
 hwakecâm ae kong,  
 Ke u je úca bohmen at bibihwakecin.
- 6 Haba hnyimâm bi ame haikongu u, ke  
 ca hnök bi ;  
 Eke, ame haikongu u li esongodâm.
- 7 Hawa u at adre bödra ka hnokoâ ?  
 Ke adre bödra ka hnöku u, ke biliny bi  
 je ong bucen ?
- 8 Hawa u je hia but löng úhnenamö ae  
 nuöng anyin Khong ?  
 Ke u je behânâ metâ hobi köu bi ?
- 9 Ie únyi ae khanö u, ke ca khan' öhmun  
 bi ?  
 Ke iéu e u me wâ únykúme, ke ca e bi  
 unyihmun ?
- 10 Haba e unyihmun tavat ae húen ban  
 me wahingat,

- Ae ti se hia hunaihmun hon kâmâm,  
 11 Hawa, e ti úhnyúkong köu je únyi hnân  
 okahwa únyi ge Khong,  
 Me hofuc ae menyik köu ?
- 12 Iéu ame hom monu u gan hnyekom ?  
 Ke iéu ame bi gan gan li emâkâm ?
- 13 M' u me wia hanom he ka degec Khong,  
 Me oâ je hofuc helâe únyi hnyi hnyi-  
 mâm.
- 14 Ehö at me me hau bi ?  
 Ke hna hnokoâ hnen momo, me me  
 wisa ?
- 15 Wâ bi e ame ca labageju ka anyin tavat  
 ae kap ;  
 Eke, e ca kalaöt bi drany hnyi hnyi-  
 makan.
- 16 Ke e ti ikiki me bokong at,  
 Wale ame ijem hulö helâ me köiö !
- 17 Oge me he ka haimemenâ köu ; ling  
 nya ju ;  
 Ke haba únyi oge hia but wâ, me oge  
 me he ka ha :
- 18 (Hofuc ame omanená hnen tavat ae  
 metâ  
 A únyi ge lakamödra, k' adre me ca  
 ikhâlâ ;
- 19 Waleji hnyat adre ham ködrin hnye  
 Ke ba atkanyua ame he hnyi wanbödrin :)
- 20 Haba at ae kong ame vec bala hnyi  
 bongon je bong hia,  
 Wale hnyi úseiny je huna adre me thu  
 ka at úöveci.
- 21 E bala bi hnyi li hnyikönyen hwan je  
 únyi hnân outen ;  
 K' ame he ka o kâu at sei hnyi úen ae  
 sot.
- 22 E ame ca geju a g' ame he ka hmetu  
 únyi hnyi menekholom  
 Ke haba hele vat ame halubahingen.
- 23 E ame ngenu he ka heleû han me ha, ka  
 habe, Ewa ?  
 E khana a e úhakekenyi mē bong ae  
 menekholom :
- 24 Adre me ootâ a ge hlöuhlöu me hlohlo ;  
 Ödra hwege hon, helâ me than, at ame  
 penapena he ka vat.
- 25 Anyin a e ame hia but hai hnyamen ka  
 Khong,  
 K' ame tot bi gan ka Ataekhanahia ;
- 26 E ame utut kâu ke hwege nyin,  
 E haki me khibi anyin je bec :
- 27 Anyin ame tube hnyimakan ge pipi-  
 khenyainy,  
 Ke ti gan dut li halelöüen ;
- 28 K' ame hia but labâ je taun ae ba wan,  
 Me je uma ae ba aten,

- Wale adre me he ka ie wia me ve ta únyi.
- 29 E ame ca he ka tren omjeú, k' ame ca he ka tethmâ tang omjehen, K' ame ca he ka khulelau ehelehatungen ta je hatong
- 30 E ame ca he ka he but únyi hnyi menekholom ; K' ame he anyin je khúen ka meleca ge báhlân meic, Ke haba homenâ únyi hnyi hnyimen Khong ame he ka ohia e.
- 31 E so e ame ca hamen iyawâ e bi, me labageju ka hnyi únyi ae únyi baú Anyin adre me he ka bi hwaban ge únyi ae únyi baú.
- 32 Adre me he ka ohwâdá ke tiga ca úen bi, Ke ame ca he ka hát anyin vheiny.
- 33 E ame he ka jijingâ degecâ anyin je wan ae but helâ me vine, K' ame he ka kôlu anyin je vongon helâ me elaió.
- 34 Anyin a haba bunyen anyin at ame ca ot, me ame he ka ba wan, Ke meic ame he ka han je uma mano umen tavat adre me kap hwaban ae hwali.
- 35 Ödrin e erkinâ úokonguny, me hnokoâ but hulö, Ke ödrin e penapena iyawö eú hnyi je hnyekudrin.
- 7 Ke walang ang e ame hia but osényini nya ; U je hia but öba aten anyik bunyen.
- 8 U je hia but kât hmö nya, wale únyi hnân haikongu nya : Ke haba unyik ae delâ ame tot könya me bi fuci nya hnyi hnyimakök.
- 9 E ame kiö nya hnyi anyin hmönyin, me sedö nya ; E ame hóc hnyu könya : Ke iwahnaihmiöny mönya ame wâ hmö nya.
- 10 Ödrin e hia but memang könya ge hnyimödrin ; Ödrin e hia but khaú wahicök me haikongu nya : Ödrin e tha sihnök.
- 11 Haba Khong ame hia but hnö nya ka at ae hwali hwakecin, K' ame digic nya ka hnyi hnyamen tavat ae kong.
- 12 Oge me laba sot me e ame thu hweti nya ; Eke, e ame hia but kât nyik me sa omomonu nya : E ame otilö nya hnân anyin únyi adre me vakha.
- 13 Haba anyin tavat hlic fana, ödrin e igigili nya, E ame dá li jebalainuk me ca betenge bi ; E ame hingálâ waadaik hnyikânâi.
- 14 E ame kiö nya me osehia ohmoucö nya ; E ame gâ thö huk helâ me at hwege.
- 15 Oge hia but tibet hon unyik mano ae gan nân, Ke oge hia but ip anyik faoiny meno eú hnyi kânâ.
- 16 Ame kong ut hnyimakök ge tenge, Ke e hon li bademakök hmenon mok ;
- 17 Ke so bi e ba úkonguny hnyi li hnyamök, Ke ba hnyikongon hijic hic.
- 18 Kânâ lö, ca ikhâlâ bi drök, E na ca he ju anyik khöu ka laba.
- 19 Ke walang ang, wâ bi, e hnyi drany at ame ohnathu nya, Ke e hnyi dok ae görany at ame haiwisö nya.
- 20 Haba lahanök ödrin e hlumö nya, Ame khukhula deköien li emakök ka Khong ;
- 21 Me me he ka otilâ wisainy at hnyi hnyimakan Khong, Ke nokon at hnyi hnyimakan hanen !

HNYIMAKAN 16.

- H**ABA Jobu ame thu me ha, ka habe, 2 E se hia je únyi a helâe, oge hia but löng : Öbun hia tavat úütubweli ae monu.
- 3 Hawa, ame he ka hu obiny ta je hofuc baú ? Ke ie únyi ame újengi u he ka thu ?
- 4 E khanö nya minya he ka fuc helâ möbun ; A ne laba hanubun hnyi hnen hanuk, E khanö nya he ka úhújâkôuâ je hofuc köbun, Me nyinyikâ böc köbun.
- 5 Ke so bi oge me he ka ha hwegi öbun ge hnyimök, Me otubweli öbun ge hofuc betenge anyin li esongodik.
- 6 Oge ne fuc, ame ca he bi ka katebu anyik vec : Ke oge ne laba hnyibú ame he ka kâmâu ka hia anyik vec ?

JOBU 17, 18.

22 Anyin a hwaban ke je huna ae wakhalet,  
Me oge me he ka vheno gethen, wale oge  
me ca he bi ka hmetu.

HNYIMAKAN 17.

**A** ME aú but hanuk, ame um dö bonguk  
je bong,  
Ame laba penapena erkemok hobi kö-  
nya.  
2 E hnathu, e unyik tavat hluma at,  
K' ame laba bala emakök hnyi anyidrin  
iwatretra.  
3 Ip ju haten walang ang, u ma he bi ka  
ha hnathu nya ;  
Ie at ame he ka úkhöúhnyam mönya ?  
4 Anyin a u je okhötâ je hnyekudra he  
ka ca wâhmakhmeto :  
Anyin a wale u me ca he ka ogöranyi  
ödrin ;  
5 Haba at ame háiâ je lahanen m' adre me  
sei ödrin,  
Me ame he ka hanenak je li emakan je  
lakon.  
6 E ame wiö nya hnân taben hluma ka  
tavat ;  
Ke inya ang at ae ikiki hnyi hnyi-  
maködrin.  
7 E háe but emakök ge vec,  
Ke haba je outhunyik hia me helâ me  
hmenon.  
8 Ame he ka uthmâhmâ tavat ae wisa  
can e,  
Ke ame he at ae ba hnyikongon ka  
höhöi ka at ame ca ot bi,  
9 Ke so bi ame he at ae wisa ka vheno  
balua deny gethen,  
Ke ame he ka hwege tot at ae tren li  
hnyam ae kalaöt.  
10 Ke haba öbun hia thithö, ö öbun hmetu  
ju, ke ai öbun :  
Ke oge me ca he bi ka wâ ke at ae metâ  
unyibun.  
11 A hia but bonguk je bong, a thu degecâ  
but hnök je hna únykúme.  
Wale önyen hnyekuk.  
12 Ödrin e wia hnyinghet me me lany :  
Ke úhakekenyi lany me menekholom.  
13 Oge ne elâm erkemok helâ me umök  
uma ;  
Oge ne hia but ulolo hnök hna mokut  
hnyi menekholom ;  
14 Oge ne hia but ha ka bobot, ka habe,  
U kamök ;  
Me ka wahnýöng, U hinyök me hanik ;  
15 Awe, ewa walang ang anyik labageju ?

16 Ke haba anyik geju, ia ame he ka wâ e ?  
E ame he ka utut ka hnyi je ohmâiny  
erkemok,  
Me tha menâ eú hnyi kânâ.

HNYIMAKAN 18.

**K** E haba Biledad at Sua ame thu me  
ha, ka habe,  
2 Ke ne o but kehö öbun e he ka laba ip  
je hnewe hnân hofuc ?  
Mê únykúme ju, ke hwaban e öhmun e  
he ka fuc.  
3 Anyin a ieú adre me tha öú öhmun me  
je meno,  
Ke öhmun kong bi hnyi hnyimaköbun ?  
4 Hawa, at lö, u je kiö u hnyi ányâm  
hmönyin,  
Adre me he ka hna but hmeledrany  
hnân hobi köu ?  
Me oc dö kic únyi hnyi hnen ?  
5 Eke, adre me he ka ume melaminy  
tavat ae kong,  
K' ame ca he ka melam bâhlân hlogon  
meic.  
6 Ame he lany ka lit bi hnyi umen uma  
mano,  
K' adre me he ka omoko anyin lamepa  
ethö hon.  
7 Ame he ka úhnyúkong hnen je hna  
okca ae hwege,  
K' ame he ka hagutâ e ge únykúmânen  
bi.  
8 Haba li can ame hom e me me hnök  
hnyi ert,  
Ke e ame uto hnewe.  
9 Adre me he ka noc ohmâiny can,  
K' ame he ofíc ka det hmâ e.  
10 Adre me ikhâlâ hnewe eú hnyi kânâ  
hobi kâu,  
Ke eú hnyi gethen e hu hnewe hobi  
kâu e.  
11 E ame he ka gâon ge ta je únyi hnân  
outen igigilö,  
K' ame he ka wadring hoton li ohmâiny  
can.  
12 Ame he mekihnânem ka oloú tang  
hwegien,  
Ke haba úkonguny ame laba penapena  
hobi kâu e ka tot.  
13 K' ame he ka an je ong outhunyin,  
Ame he ka an je ong outhunyin hia ge  
watöiny mok.  
14 Adre me he ka oc e me iwân únyi  
hnyi umen uma mano, waleji e ame  
labageju kâu ;

JOBU 19.

- Ke adre me he ka hom e ka tuhan ta je  
 ûnyi hnân outen.
- 15 Ame he ka labâ umen uma mano me  
 me ca he ka umen hmetu :  
 K' adre me he ka jijingâ teiö ka hnyi  
 hon hnyaban.
- 16 Ame he ka meleca anyin je iwân eû,  
 K' adre me he ka subâ degecâ je vheiny  
 ethö.
- 17 Adre me ca he hmetu ka ûnykûme kâu  
 eang hmelen,  
 Ke ba hmetu ien bi eû hnyi gethen.
- 18 Adre me he ka kunâ e ûnyi hnyi lany  
 ka hnyi menekholom,  
 Me hnu e ûheny ang hmeledrany.
- 19 E ame ca he ka hu nokon me öbiny  
 unyin iny hnyei,  
 Ke ame he ka ba wan hnyi dok e ame  
 laba hnyin.
- 20 Ame he tavat adre me o hwaban ka  
 uthmâhmâ ge bongon bong,  
 Ke haba dö a bân ödrin e ti ot.
- 21 Wale bongon je hnyaban at ae kong,  
 Ke wale hnen at ae ca khana Khong.

HNyIMAKAN 19.

- H**ABA Jobu ame thu me ha, ka habe,  
 2 Ke ne o but kehö öbun e he ka  
 ovecâ hnyekuk,  
 Me thu omomonu nya ge je hofuc ?
- 3 Öbun e hia but olibenyita but û nya  
 kongu nya :  
 Öbun e ca hmehma ge hnöbun hna  
 omonumonu nya.
- 4 Ke ame ne hnathu hnök hna monu,  
 Awe, ame laba unyik anyik monu.
- 5 Ame ne hnathu öbun e bi gan könya,  
 Me ha hwegiâ könya hna û nya hnyin :
- 6 Khan' öbun dö walang ang a hnen  
 Khong hna ton huk,  
 Me igigili nya ge anyin ert.
- 7 Wâ bi, oge me kukak ge úokonguny ke  
 adre me ca ling nya :  
 Oge me hongot hnân úhadruo, ke adre  
 ca owisa bi.
- 8 E ame hia but hwö hak hnyi dek  
 gethen, me me ca khanö nya bi he ka  
 vheno.  
 Me omenekhulumâ dek je gethen.
- 9 E ame uny jut gak anyik hmanenang,  
 Me hom korona ûnyi hnyi hon bök.
- 10 E ame hia but kia igigili nya, me hiö  
 nya but :  
 Ke e ame hia but oc ut hnök hna geju  
 helâ me úö.

- 11 E ame hia but öubâhlâ anyin hmönyin  
 könya,  
 Ke e ame ûnykûme könya helâ me  
 iwahnaihmiöny më.
- 12 Adre me tha o könya anyin je deö vat,  
 ödrin e otilâ göranyai dedrin je  
 gethen könya,  
 Me hunuma igigilö umök uma mano.
- 13 E ame hia but öü sâkâüöâ mönya 'je  
 liamekeiny mönya,  
 Ke adre atkanyaua but gak je liame-  
 waeny mönya.
- 14 A hia but gak aten anyik lap,  
 Ke adre hnying nya tavat ae khenen  
 könya ehac.
- 15 Tavat adre me laba hnyi umök uma, me  
 je athnyabaik a je hlu ödrin e  
 ûnykûme a iny atkanyua :  
 Helâke iny aten ke hnyei hnyi hnyima-  
 ködrin.
- 16 Oge me hawâ athnyabaik, ke e ame ca  
 ieü bi,  
 Eja ke ne oge ne khöü kâu ge hnyimök.
- 17 E ke bongon bi ka öiök homenök  
 Me hnök hna khöü ka laku bai.
- 18 Je wanakat ae úhnyúköng ödrin e  
 hûkötio nya ;  
 Oge ne tot ödrin e fuc könya.
- 19 Haba je hing lahanök hia ödrin e  
 hûkötio nya ;  
 Ödrin e wia gak tavat waleji oge me  
 betenge gadrin.
- 20 Ame kece je jeiök ka hnyi unök, me  
 vik,  
 Ke oge ka möt thiju ge unen nyuk.
- 21 Betenge ju gak, betenge ju gak, öbun  
 je lahanök ;  
 Anyin ame hia but kalö nya hnen  
 hnyamen Khong.
- 22 Ieü gabun öbun e oveci nya helâji me  
 Khong,  
 Ke öbun e ca sekunâ hnyi vik ?
- 23 Ödra na he ju ka sihnalimen walang ang  
 hok hofuc !  
 Ödra na he ju ka set hnyi tusi !
- 24 Ödra na he ju ka kave ge pen fao me  
 led,  
 Me khavi hnalimen hnyi kic nyiele  
 balua !
- 25 Ke oge me wâhmakhmetoâ ae möt at  
 ame úcü melik,  
 Ke e ame he ka todrö hon kânâ nyiele :
- 26 Ke hwaban dö hna ohia unök helâng  
 Me oge me he bi nya ka wâ Khong hnyi  
 vik :
- 27 Oge me he ka wâ e hnök bi,

JOBU 20.

Me ame he ka wâ ge li hing emakök, ke  
ca ke at bi.  
Ame aú but li jabalainuk eú hnyi  
hnyekuk.  
28 Öbun e ne ha, ka habe, öhmun e kâmâu  
he ka ovecâ e !  
Ke e bi eú hnyi hnyekuk iwâniny  
bongon e ;  
29 Ot ju öbun ge hele vat ;  
Anyin adre me bi hwaban hmönyin ge  
hele vat,  
Me me khan' öbun thö a ga hu hna  
owisa.

HNYIMAKAN 20.

**H**ABA Zofar at Naamathi ame thu me  
ha, ka habe  
2 Anyin a wale, ame thu könya bi hnök  
je hna únykúme,  
Únyi ge belogot wale eú hnyi hnyekuk,  
3 Oge hia but löng ú, k' ame ohmehmö  
nya bi,  
K' ame thu könya hanon únykúamá-  
nök.  
4 Hawa, e ca manen köu únyi ang, hwân  
ehac,  
Hwân hnyi hna ip at eang hmeledrany,  
5 A e okhulit thibi hna hobâ hnen tavat  
ae kong,  
Ke thuthubademak senyin anyin tavat  
adre me ca ot ?  
6 Eja ke ne a ne görany anyin hmane-  
nang ke ne o thö hnyi drany,  
Me kâlâ je úlâ ge ban ;  
7 E ame he ka hia balua but helâ me tiny  
bi tatet :  
K' ame he tavat waleji adre me wâ e ka  
ha, ka habe, Ewa ?  
8 E ame he ka hia helâ me bwi, m' adre  
me ca he hmetu ka wâ e :  
Eke, adre me he ka hnu degecâ e helâ  
me hna omanenâ hnyi hnyinghet.  
9 Haba emakan at waleji ame wâ e, m' ame  
ca he hmetu ka wâ e ;  
K' ame ca he hmetu hnen hna mokut ka  
wâ e.  
10 Ame he lakon ka heleú so unyin tavat  
ae theduoc,  
K' ame he li hnyamen ka ham hmetu  
tang omjehen.  
11 E unöngötö je jeien ge anyin hidröu,  
Ke so bi ame he ka tha mokut më eú  
hnyi kânâ.  
12 Eja ke ne a ne hnebwia hulö hnyi  
hnyimen,

Eja ke ne a ne oiyongâ e hmelen  
bohmen ;  
13 Eja ke ne a ne betenge gan, k' ame ca  
he ka degec e,  
K' ame ne behânâ e balua hnyi hnyimen ;  
14 Ke so bi ame he an jeú ka wia eú hnyi  
hnyekon,  
Me me dân je asip bi eú hnyin.  
15 E ame hia but utâ je omjeú, k' ame he  
bi ka hmita hmetu :  
K' ame he Khong ka degecâ únyi eú  
hnyi hnyekon.  
16 E ame he ka cem únyi hnân mekin  
anyin je asip :  
K' ame he bohmen vaipa ka hlingâ e.  
17 E ame ca he ka wâ je wagewe,  
Wale hani me bata ame hingölö.  
18 E ame he ka ham hmetu únyi a huliwan,  
k' ame ca he bi ka utâ ;  
K' ame ca he bi ka senyin hoton anyin  
ta únyi.  
19 Anyin a e ame hia but okongoâ me hna  
degecâ tavat ae theduoc ;  
K' ame hia but hûgúnâ uma a ca  
otilânen.  
20 Anyin a e ame ca menâ ge monu eú  
hnyi hnyekon  
K' ame ca he ka hip kolon ta únyi e  
ame hnyok kâu.  
21 E ba kolon waleji e ame ca han dö ;  
Anyin a wale ame ca he ka tethmâ  
anyin sot.  
22 E ame he ka theduoc, hnyi úen e ame  
unöngötö ge omjeú :  
K' ame he tavât ae hlöuhlöu ka hai  
hnyamödrin kâu.  
23 E ka tiga he ka sekon,  
K' ame he Khong ka kunâ kaú anyin  
hmönyin ae hwege,  
Me hingólâ ka hnyi hon, e ka tiga han.  
24 E ame he ka kec ge únyi hnân vat a  
fao,  
K' adre me he ka fana e ge cafana bras.  
25 E ame oc ut, me ok ut únyi hnyi  
unyin :  
Eke, e ame ok ut homakan ae hadröngöc  
únyi hnyi waadainy ;  
K' ame tabâ e hnen ta je únyi hnân  
outen.  
26 Adre me hip menekholom hia hobi kâu  
tang omjehen :  
Ame he meic ka aú e, a ca únyi ge at ;  
K' ame he ka an je kolon hnyin umen  
uma mano.  
27 Ame he drany ka omanenâ hwakecin  
ae kong,

- Ke ame he hmeledrany ka tot metâ kâu.  
 28 Ame he ka hia tang omjehen umen uma,  
 K' ame he ka hingölâ degecâ hnyi  
 bonginy anyin hmönyin  
 29 Wale jekhon at ae kong ûnyi ge Khong,  
 Me hna khenâ kâu hnen Khong.

HNYIMAKAN 21.

- H**ABA Jobu ame thu me ha, ka habe,  
 2 Löng wia ju öbun hok hofuc ;  
 Ke wale hnân okaukahwö nya gabun.  
 3 Hokhnyoki nya ju, ke oge me he  
 minya ka ha ;  
 Ke hwaban hnök hna ha, hlumâ bala  
 ju.  
 4 Haba inya, hawa, oge me tenge ka at ?  
 Ke hnân eü oge me he ka hokhnyok ?  
 5 Walö nya ang, lâiâ thö,  
 Ke kât ju je hnyimöbun.  
 6 Haba hnyi je ûen oge me ûnykûme, me  
 ame kong hnyekuk,  
 Ke öbubuny ame kât ju unyik.  
 7 Anyin a ieu ae möt bi tavat ae kong,  
 Me hingat ut, eke, ke gan tot manidrin  
 man ?  
 8 Adre me tha otilâ je mâtrânidrin  
 mödrin hnyi hnyimaködrin,  
 Me je lakudrin cici ödrin.  
 9 E hnahic ut umödrin je uma, ke ba ot,  
 Ke ca e bi hnyi hudrin ösö anyin Khong.  
 10 Ame ûtakû haledrin bolok, ke ca gufa  
 bi ;  
 Ame hnöku haledrin kau, k' adre ca  
 kölu habû.  
 11 Ödrin e kunâ je lakudrin helâ me  
 hnahat mamoe,  
 Ke je lakudrin ödrin e biâ.  
 12 Ödrin e khumöng tha ödrin me bwinybet  
 me kitara,  
 Me senyina ifucin utköwi.  
 13 Ödrin e laba sot hnyi bongudrin je bong,  
 Me utut ka hnyi erkemok helâ me  
 thuthubademak.  
 14 Ke so bi ödrin e ha ka Khong, ka habe,  
 Usâkâüö but möhmun ;  
 E ca bewehmun he ka khana dem je  
 gethen.  
 15 Ia Ataekhanahia m' öhmun e he ka bi  
 athnyabainy ?  
 Ke ieu troban köhmun, öhmun ka he  
 ka hic kâu ?  
 16 Wâ bi, ca he bi hnyi hnyamödrin  
 anyidrin sot :  
 Ke usâkâü mönya je hna ûnykûme  
 anyin tavat ae kong.

- 17 Adre me ove ume lamepa anyin tavat  
 ae kong ?  
 K' ame o but ka hnyi hudrin anyidrin  
 ûokonguny ?  
 K' ame ve khenâ je hlöuhlöu hnen  
 Khong hnyi anyin hmönyin ?  
 18 M' ödrin e tha ûcü me thatûnyin hwit  
 ame tûâ ang,  
 Ke helâ me unen hwit ame tûâ degecâ  
 höu ?  
 19 Öbun e ha, ka habe, Khong ame bip  
 anyin je hulö hobi kâu lakon.  
 E so e ame bi hwaban kâu bi, me me  
 khana e.  
 20 E so ame he li hing emakan ka wâ  
 ûkonguny,  
 E so e ame ijem hmönyin anyin  
 Ataekhanahia.  
 21 Anyin a ewa anyin senyin ka anyin lap  
 hwaban e,  
 Hnyi ûen adre hia but subâ degecâ  
 useiny je tehiny hnyi wanben ?  
 22 Ewa at ame he ka ometâ Khong ?  
 Anyin a e ame owisa ka tavat ae  
 beönuu.  
 23 Ame mokcu ke at hnyi tang hwegien  
 ae bekhöt,  
 Ke ti hnahic k' ame laba so :  
 24 E lup hmönyin li basin ge dân  
 K' ame menyik önyen je jeien.  
 25 Ke ame mokcu ke at bi hnyi vecin  
 hnyekon,  
 K' ame ca han ûnyi ae so.  
 26 Ödru me tha mokut eü hnyi kânâ,  
 K' ödru tha iyong ut ge je wahnyöng.  
 27 Wâ bi, e khanö nya hnöbun je hna  
 ûnykûme,  
 Me anyibun je bibihwakecin hnân  
 okongu nya.  
 28 Anyin a haingöbun, Ewa uma umen  
 than ?  
 Ke ewa uma mano waleji ame laba  
 hnyin tavat ae kong ?  
 29 Hawa, öbun e ca hnö tavat adre me  
 vheno gethen ?  
 Ke e ca khan' öbun je hatödrin ?  
 30 A g' adre ip at ae kong hobi kâu  
 bonginy hlöuhlöu ?  
 Me adre me hom e hnyi bonginy  
 hmönyin.  
 31 Ia ame he ka haimemenâ deny gethen  
 hnyi hnyimakan ?  
 Ke ia ame he ka bi hwaban kâu hnen  
 hna ânyâ ?  
 32 Ke so bi adre me he ka hom e ka hnyi  
 erkemok,

Me tuö e hnyi hon,  
 33 Ame he ka hnebwia kâu kânâiny thop,  
 Ame he tavat hia ka he hoton,  
 Ke ca hnân bi aû tavat adre bödra,  
 34 Öbun a kâmâu ka otubweli nya, ke  
 ûnyi baû,  
 Ke haba hnöbun hna thu hawa, ca  
 wale thibi je thoi ?

HNYIMAKAN 22.

**H**ABA Elifaza at Temana ame thu me  
 ha, ka habe  
 2 Hawa, e khana ke at he ka bi troban  
 hobi kâu Khong ?  
 E hnathu, ame he at ae metâ ka bi  
 troban hobi kâu e bi.  
 3 Hawa hnân osenyinâ Ataekhanahia a  
 u at ae wisa hwakecâm ?  
 Ke ame he ka bi troban kâu a u je öba  
 hnyikongon hwakecâm ?  
 4 Hawa, e ame û u cau hnâm hna outen,  
 Me e ame tha he möu ka hnyi hna  
 owisa ?  
 5 Hawa, e ca gan ânyâm hulö ?  
 Ke e ca hu obiny ge ânyâm je monu.  
 6 Anyin a u je hia but hom je haten  
 ûnyi ge liamekeiny möu, ke ba can,  
 Me uny je ûkhaûen tavat ae theduoc.  
 7 U je ca habelen ge köiö at ae sēnyin,  
 Ke u je behânâ jeû ge at ae mekihnâ-  
 nem.  
 8 Ke haba at ae hwege, me waleji at ae  
 tren kânâ ;  
 Ke haba at ae ûnyi hnathu, me waleji  
 at ame labâ e.  
 9 U je hia but kunâ je safac me ba ke  
 ûnyi,  
 Ke adre hia but thu je benyin je  
 nakahme.  
 10 Anyin a wale e but je hnewe igigili u,  
 K' ame ie hloblo thö hnyekom ge ot,  
 11 K' ame ne menekholom, me u me ca wâ  
 bi,  
 K' ame hûlûlûö u nhen je köiö ae gan  
 hmâ.  
 12 Hawa, ame ca laba Khong ethö hnyi  
 göranyin drany ?  
 Ke wâ bi ûgöranyin je okhû, e ti görany  
 hmönyin !  
 13 Me haingâm, ka habe, Khong ame wâ  
 ieû ?  
 Hawa, e khana he ka owisa ûnyi hnyi  
 menekholom ?  
 14 K' ame oiyongâ e ge je ulâ ae haki, me  
 me ca wâ bi ;

Ke e ame vheno wathelabainy drany.  
 15 Hawa, u me he bala ka laba hnyi gethen  
 ehac  
 Waleji a vheno nhen tavat ae kong ?  
 16 Waleji adre hom buli ödrin hnyin,  
 K' adre me hingölö tabödrin helâ me  
 wagewe :  
 17 Wale hnyat adre me ha, ka habe, Ûsâ-  
 kâûö but möhmun ;  
 Ke, Ieû ae khana Ataekhanahia he ka  
 ânyâ hnân hobi köhmun ?  
 18 Ke so bi e ame öunöngötâ umödrin je  
 uma ge ta je ûnyi ae so ;  
 Ke haba je hna ûnykûme nhen tavat ae  
 kong, me, úsâkâû mönya.  
 19 A wâ e nhen tavat ae wisa, m' ödrin e  
 senyin ;  
 K' ame hlum' ödrin nhen tavat ae ba  
 hnyikongudrin :  
 20 Haingödrin, ka habe, E hnathu adre  
 me suba degecâ ta je iwahnaihmiöny  
 möhmun ;  
 K' ame aû koluidrin ge meic.  
 21 Imetenyimwi thö me walang ang, m' u  
 me hnahic ut :  
 Me ame he ka o köu ûnyi ae so.  
 22 Ö u kap ju walang ang hnanyibu ûnyi  
 hnyi hnyimen,  
 Me ip hmâ ju hwan hofuc eû hnyi hnye-  
 kom.  
 23 U je ne hmetu but ka Ataekhanahia,  
 me adre me he bi ka up u göranyai ;  
 Ke u je ne degec ut hwakecin ae ca wisa  
 ûnyi hnyi umam je uma mano.  
 24 Ke so u ma ip ju tang omjehem eû hnyi  
 kânâ,  
 Ke goliny Ofira hnyi je vetoiny je  
 wagewe ;  
 25 Ke ame he ka hing tang omjehem Atae-  
 khanahia,  
 Me ânyâm sileva ae ûnyi hnathu.  
 26 Ke u me he ka senyin ka Ataekhanahia,  
 Me bwele göranyai ka Khong.  
 27 U me he ka hic kâu, ke e ame he ka  
 ling u ;  
 Ke u me he ka hwâdâ ânyâm je hna bi  
 khöbi.  
 28 U me he ka thamûâ ke ûnyi hnyi hnye-  
 kom, me ame he ka aat köu ;  
 Ke ame he lany ka omelamá dem je  
 gethen.  
 29 Ödra ka ohnyikânâi u, u me he ka ha,  
 ka habe, Todrö ;  
 Ke e ame he ka omelö at ae hnyikânâ.  
 30 E ame he ka omelö at minya ae tren  
 jöniny ;

JOBU 23, 24.

Eke, e ame he ka möt huen li hnyamâm  
ae ba hnyikongon.

HNYIMAKAN 23.

- K**E haba Jobu ame thu me ha, ka habe,  
2 Haba hnyi bong ang me hiny  
bnök hna tenge :  
E hmak hna kuc nya hon imângik.  
3 E na khanö nya ju dok oge me he ka  
wâ e hnyin,  
Me inye he ka he ka hnyi taben tap !  
4 Oge me he ka penapena hok hofuc hnyi  
hnyimakan,  
Me ounöngötâ hnyimök ge je hofuc  
hnân ohnatho.  
5 Ame he ka khanö nya hofuc e ame he  
ka thu könya,  
Me wâ únykúme a e ame he ka fuc  
könya.  
6 Hawa, e ame he ka ivinö mönya ge  
man ae gan ?  
Ohe ; e ame he ka ling nya.  
7 E khana at ae wisa ka ivinö më eling ;  
Me oge me he balua ka möt únyi ge at  
ame owisa könya.  
8 Wâ bi, inya oge me he deiö, ke hia e  
eling ;  
Me jio, ke oge me ca wâ e :  
9 Me ka hnyi hwadrö waleji e ame huliwa,  
ke oge me ca wâ e :  
E ame oiyongâ e hnyi hwaiöu, me oge  
me ca wâ e.  
10 Ke so bi e ame wâ dek gethen ;  
E ka hia but cubic nya me oge me he  
ka o helâ me gol.  
11 E hwege cak ka hnyi hnen je hna okca ;  
Oge me hia but tuö deny gethen, ke oge  
me ca saü bi.  
12 Oge ca hia but saüâ degecâ hnanyibu  
únyi hnyi li esongodiny ;  
Oge hia but oúnyihnatho hofuc a hwan.  
hon ök jeú.  
13 Ke khaca thibi únykúmânen, ke ewa at  
ame he bi ka wia e ?  
Ke e ame ânyâ únyi e ame hnyok kâu.  
14 Anyin a e ame ohwâdâ únyi adre ip  
hobi könya :  
Ke se hia je únyi a helâe unyin.  
15 Anyin a wale iny hlohlo but hnyi hnyi-  
makan ;  
Iny ka únykúme, me oge me ouden e.  
16 Ke a hia but Khong osënyinâ hnyekuk,  
Ke a hia but Ataekhanahia ohlohloinya :  
17 Anyin adre me ca subâ degeci nya ke  
tiga ca o bi menekholom,

Me oiyongâ hnyimakök ge menekholom  
ae khöt.

HNYIMAKAN 24.

- I**EÛ can ame ca he Ataekhanahia ka thu  
je úen ?  
Ke hawa a g' ame ca wâ bongon je bong  
hnen tavat ae khan' ödra e ?  
2 E hu keihen ödrin e oc je hnyigot ;  
Ödrin e hügúnâ je hnahat meno, me  
haödrin.  
3 Ödrin e alen asina haleny nakahme,  
Me hom bolok haleny safac hnân haten.  
4 Ödrin e osaüâ tavat ae theduoc únyi  
hnyi gethen :  
Haba tavat ae hnyikânâ eang hmelen  
me ödrin e lubaduöng.  
5 Wâ bi, helâ me man je asinainy hnye-  
buba  
Ödrin e he but ka hnyi anyidrin je huli-  
wa, me heleú ö 'drin ;  
Haba hnyebuba ame oâ han hobi kâu  
lakudrin.  
6 Ödrin e thu boh a ö 'drin hnyi hnyei,  
K' ödrin e hlo je hnyei vine iny tavat  
ae monu.  
7 Ödrin e mokut thu hnyi hnyinghet hia,  
e ba úkhaúidrin,  
Ke ba tubidrin hnyi megic.  
8 Ödrin e khubet ut ge we únyi hnyi hon  
bucen,  
K' ödrin e deluâ kic anyin ae ba tungu-  
drin.  
9 E hu keihen tavat ödrin e hügúnâ  
nakahme únyi hnyi úlainy at,  
Me hom hnân haten únyi hnyi unyin at  
ae theduoc :  
10 Me ödrin e he thu me ba úkhaú,  
Ke ödrin e hom tilâ je thi hwit ge  
mekihnânem ;  
11 Ödrin e owö wakaco hnyi hnyeuleny  
tavat eling ;  
Ödrin e hlec je wan vine, ke odrin e  
beic bi.  
12 Tavat adre me mâng hnyi tauu ae gan,  
Ke tavat ae aat adre me tenge :  
Ke Khong ame ca haiwisa a e monu  
bi.  
13 Tavat eling ödrin hanen je hnyat degec  
melam ;  
E ca khan' ödrin je getheniny,  
Ke ca vhenö je deny.  
14 Ame vesâ hnyi hnyimakatu at uhlingö,  
me hlingâ at ae theduoc me at ae ba  
omjeú ;



JOBU 25—27.

- Ke haba hnyi hnyinghet e úcú e me at venöu.
- 15 K'ame halubahingen hauhaotreng hnen emakan at bi únyi monu, Hängen, ka habe, e ba ecmak ame he ka ö nya :
- Ke e ame ikhölö hnyimak.
- 16 Hnyi lit ödrin e tho je uma : Hnyi lany ödrin e thelöng bi je hwanu-mödrin ; E ca khan' ödrin bi lany.
- 17 Anyin ae úcú ködrin hia haolany me hmenon mok ; Anyin ae khan' ödrin je öbubunyin hmenon mok.
- 18 E ame logot hon je köiö ; A hnaúhangö but jekhöüdrin hnyi hnyi :
- E ame ca vheno hmetu bi gethen ka hnyi je hnyi vine.
- 19 Ame hia köien kiona anyin ae ba we ke hlöng bi :
- Heläe minya tavat ae kong ge erkemok.
- 20 Ame he hinyen ka hnying ut e ; e hnebwia but e ka wahnyöng ; Adre me ca he hmetu ka únykúme e : Adre me he ka thu hwakecin ae ca wisa helä me úö.
- 21 E ame ohia omjeü anyin momo ae toúnyi wale ame ca hnöku bi ; E ame ca ányâ bi so ka safac.
- 22 E ame lelö tavat ae hwege minya ge maniny man :
- E ame todrö, me ba at ame gejon möt.
- 23 Khong ame hna ködrin he ka laba hna-hic, me me cidrin ling ; Ke e bi li emakan hon dedrin je gethen.
- 24 Adre me ogöranyi odrin ; ke meokhaca me hi' ödrin bi ; Eke, adre me ohnyikân' ödrin, adre me hom degeci ödrin helä me tavat hia, Me sub' ödrin helä me hwit.
- 25 Ame ne ca hnathu e, me ewa at ame he ka ohwâdâ a iny at thoi, Me öunyibaüâ hok hofuc ?

HNYIMAKAN 25.

- M**E haba Biledad at Sua ame thu me ha, ka habe,
- 2 E unyin musi me hna outen ; E ame ohnahicâ anyin je dok ae göranyi.
- 3 Hawa, e hu numerainy anyin je deö vat ? Ke ewa at ame ca he ka wâ anyin melam.
- 4 Anyin a wale ame he ka kâmâu at me me wisa unyin Khong ?

- Ke ama hawa he ka ba hnyikongon at adre me hnokoâ hnen momo ?
- 5 Wâ bi, ame ca hadröngöc tehi Ke ca kalaöt je okhú hnyi hnyimakan :
- 6 Ke ama kâmâu at he ka so, a biget bi ! Me nokon at, a wahnyöng !

HNYIMAKAN 26.

- H**ABA Jobu ame thu me ha, ka habe,
- 2 U je hawa he ka hadruâ at ae ba maniny !
- Me omelö hnyam ae ba hwegien !
- 3 U je hawa he ka úne ka at ae ba metâ Me haimemenâ gâná metâ ae wisa !
- 4 U je hia but ha hofuc kö ia ! Ke hanu ia waleji ame o únyi gam ?
- 5 Ame öbubuny je komok Hmelen je köiö me tavat adre me labä e.
- 6 Ame he thu erkemok hnyi hnyimakan, Ke ba úkhaüen hnaúhangö.
- 7 E ame ulolo ke keihen ka hnyi hwadrö hon ba önyen, Me uhno hmeledrany ka hnyi hon ba.
- 8 E ame lan köiö hnyi anyin je úlá ae khöt ; Ke ame ca mou bi úlá.
- 9 E ame bi haginy hnyimakan anyin theron, Me ulolo anyin úlá hon e.
- 10 E ame bi hnyigot hon köiö, Ke ne o but hnyigöulen lany me mene-kholom.
- 11 Ame öbubuny je hmolominy drany Me uthmâhmâ ge ifucin.
- 12 E ame omunâ köiö ge maniny man, Me kot hagutö Rahab ge anyin metâ.
- 13 E ame osoâ drany ge hanon ; Ke hnyamen ame dâ on ame kec.
- 14 Wâ bi, wale je baten thibi deny je gethen : Ke ötin e löng hwan hwaulit ae úhnyú-köng ! Ke ia ame wâ únykúme hwan thaniny maniny man.

HNYIMAKAN 27.

- K**E Jobu ame fuc hmetu hnyi anyin uhöücú me ha, ka habe,
- 2 Kia inya Khong, at ame hom degecâ anyik wisa ; Me Ataekhanahia, waleji ame ovecâ hnyekuk ;
- 3 (Anyin ae bala bi hanuk unyik,

- Me homená anyin Khong hnyi li hnyi-  
ngöik ;)
- 4 E hnathu ame ca he li esongodik ka ha  
únyi ae kong,  
Ke ame ca he bohök ka ha iyawö.
- 5 Kia inya Khong, oge me ca he ka  
haiwisai öbun :  
Oge me ca he ka degec ha hwakecik ae  
ba hnyikongon ke ne o but oge me  
mokcu.
- 6 Inya oge me kât hmâ hwakecik ae wisa,  
ke oge me ca he ka hna but :  
Ame ca he hnyekuk ka haikongu nya  
iny ka tiga möt.
- 7 E so he ka úcú iwahnaihmiöny mönya  
me at ae kong,  
Ke at ame tot könya, me helâ me at ae  
ca wisa bi.
- 8 Eja ke ne a ne hom troban ge at ame ca  
ot, me ewa gejon bi  
E ka he Khong ka hom hanon ?
- 9 Hawa, ame he Khong ka löng hwakhöu  
E ka o kâu vec.
- 10 Hawa, e ame he ka senyin ka Ataekha-  
nahia,  
Me hongot ka Khong hnyi je ûen hia ?
- 11 Oge me he ka n' öbun ge hwakecin  
hnyamen Khong ;  
Oge me ca he bi nya ka ikhâlâ je bongon  
Ataekhanahia.
- 12 Wâ bi, öbun hia öbun e hia but wâ e ;  
Ke ieü gabun a öbun e tha hop bi ?
- 13 Walang jekhon at ae kong únyi ge  
Khong,  
Me hwajekhon tawat seda, ödrin e he ka  
kap únyi ge Ataekhana hia.
- 14 Adre me ne osehia lakon, me walödrin  
hobi kâu hele vat ;  
Ke ame ca he je mâtrâniny ka sekudrin  
ge jeü.
- 15 Ke haba kolon gan me adre me he ka  
konâm hnyi mok,  
Ke ame ca he je safac gan ka tenge  
thungaú.
- 16 Eja ke ne a ne úkhöünâ sileva helâ me  
kânâ,  
Me penapena je úkhaú helâ me kânâ ae  
kece ;
- 17 Awe e ame penapena, k' ame he at ae  
wisa ka khavâ,  
K' ame he hnyat ae ba hnyikongon ka  
khenâ sileva.
- 18 E ame op umen uma helâ me walelaba,  
Helâ me uma menâ a ânyâ at tue.
- 19 E ame mokut ke tren omjeü, ke so bi  
adre me ca he ka konâm e,
- E ame bwele ge li emakan, me ame hia  
but.
- 20 Ame o but kâu je öbubuny helâ me  
köiö ;  
Ke höu ame venâu e hnyi hnyinghet.
- 21 Haba ang hwei ame túâ degecâ, me ame  
hia ju ;  
K' ame aba degecâ e únyi hnyi hnen.
- 22 Ke ame he Khong ka lûâ e me ca  
betenge :  
K' ame bekec ut únyi hnyi hnyamen.
- 23 Ame he tawat ka khöükhöü hnyamâ,  
Me bwec degecâ e únyi hnyi hnen.

HNYIMAKAN 28.

- E** hu thopiny sileva,  
Me hnen gol adre me ânyâwia.
- 2 Adre hom fao únyi eü hnyi kânâ,  
Ke adre me oköiâ bras únyi hnyi veto.
- 3 Ame bi obiny menekbolom hnen at,  
Me elâm wia hnyi je hnyegöulen ae ti  
sâkâú  
Je veto, hnyi menekholom, me hmenon  
mok,
- 4 E ame hiny dilâ thop ae úsâkâüö me je  
hnyaba ;  
Adre me hnying e hnen can at ame  
ngenu ;  
Ödrin e him hnyihnyikâ, ke úsâkâüö me  
tawat.
- 5 Ame kû jeü únyi hnyi kânâ ;  
Ke adre me seü tilâ e eü hmelen helâ  
me hnen meic.
- 6 Haba je veten e, wale hnen je safairo,  
Ke eling kânâ gol.
- 7 Haba gethen e ae ca khana hnen meno  
ame gâ,  
Ke ame ca wâ e hnen emakan dring :
- 8 Ame ca uto e hnen je meno ae hiny,  
Ke ame ca vheno e hnen je liona ae  
úkúc.
- 9 E ame hai hnyamen ka hnyi je veto  
oût,  
E ame oamamá je bucen únyi hnyi  
hwecin.
- 10 E ame si deny köiö hnyi kic ;  
Ke a wâ but emakan je únyi hnathu hia.
- 11 E ame thelöng je ong wagewe me me ca  
khulu bi ;  
Me oâ ka hnyi lany únyi ae iyong.
- 12 Ke adre me he ka wâ metâ ua ?  
Ke ewa hnen wâ únykúme ?
- 13 E ca khana hwaban e ge tawat ;  
Ke adre me ca wâ e hnyi hnyei iny  
tawat ae möt.

JOBU 29.

- 14 Haingen dok ae dit, Ame ca laba unyik ;  
Ke haingen köiö ae gan, E ba minya bi  
gak.
- 15 Ca hnân úco ge gol,  
Ke adre me ca he ka tuluto sileva hnân  
hwaban e.
- 16 E ca hnân úco bi e goliny Ofira,  
Me soama ae únyi hnathu, me safairo
- 17 Haba gol ke uselat me ca so helâ :  
K' adre me ca he ka bihwaban e ge je  
hmanenanginy gol.
- 18 Adre me ca he ka ha ramothe, me gi-  
bisi :  
Eke, e beönua metâ hon je penina.
- 19 E ca úcú mē topazioiny Aithiope,  
K' adre me ca he ka úco e hwaban  
gol ae so.
- 20 Awe, ame o úheny ua metâ ?  
Ke ewa hnen wâ únykúme ?
- 21 Ame iyong e ge li emakan tavat hia ae  
möt,  
K' adre me ikhâlâ e me me iyong ka  
omeno ame gâ ethö.
- 22 Haingen hnaúhangö me mok, ka habe,  
Öhme löng ut uthumetu gan ge je hnyi-  
könyöhmu.
- 23 Khong ame wâ únykúme deny e,  
Ke e khana hnen bi.
- 24 Anyin a e ame wâ je can hmeledrany,  
E ame bwele eú hnyi hmelen hia drany ;
- 25 He ka ányâ tulut hnân ihmakiny ang ;  
Eke, e ame tuluto je köiö ge tulut.
- 26 Hnyi úen e ame ányâ hnanyibu hobi  
kâu we,  
Me bi deny hucuceiny hwan than :
- 27 Me e ame wâ e, me omanená e ;  
E ame otílâ e, eke, e ame elâm e.
- 28 Ke e ame ha ka at, ka habe,  
Wâ bi, haba hna outen Than, me wale  
metâ ;  
Ke adre me ne degéc hulö, me wale wâ  
únykúme.
- 5 Waleji a tiga e unyik Ataekhanahia,  
Ke ame laba igigili nya je lakuk ;
- 6 Hnyi úen adre hneú hnök hna okca ge  
bata,  
Ke haba kic ame hingâlâ kõnya je wa-  
geweiny wakaco !
- 7 Haba hnyi úen eji oge me he ka hnyi  
homagöuleny taun,  
Ke penapena tabök tap hnyi hna cit  
gethen,
- 8 Me ame ö nya je hidröu me ödrin e luba-  
duöng,  
Me ame höhöi je hingat me tot ;
- 9 A hnyibú but je than,  
Ke ödrin e kât je hnyimödrin.
- 10 Ame ca fuc hmetu tavat ae únyi hnathu,  
Ke ame kece je bohmödrin ka hnyi je  
ecngödidrin.
- 11 Anyin a hnyi úen ame ling nya hnyi-  
köny, me e ame haisoi nya ;  
Ke hnyi úen ame ö nya hnen ecmak,  
me e ame ohnathu nya :
- 12 Anyin a oge me omelö at a theduoc ame  
tenge,  
Me nakahme minya, waleji ae ba at  
ame hadruâ.
- 13 Ame o but kõnya hofuc hnahic únyi. ge  
at ame he ka mokcu :  
Ke oge me osenyiná hnyekon safac.
- 14 Oge me khavâ wisa huân anyik úkhaú :  
Ke haba hnök hna owisa, e úcú me  
úkhaú me hnabinybak.
- 15 Inya ji hing li emakan wadröu,  
Ke inya ji li can at ae mat can.
- 16 Inya ji kamen ka at ae theduoc :  
Ke haba ivinö ae ca khanö nya, oge me  
thang.
- 17 Ke oge me thu jeien wainy at ae kong,  
Me oc ut hnen hna hügúnâ únyi hnyi je  
nyon.
- 18 Ke oge me ha, ka habe, Oge me he ka  
mok hnyi hnök hna thu háú,  
Ke oge me he ka osehia bonguk je bong  
helâ me öny.
- 19 Ame iyâú anyik je wân ka hnyi köiö,  
Ke ame mokut dân hau hon vheik hnyi  
hnyinghet hia :
- 20 E hát bi soik unyik,  
Ke hmâ bala bi anyik cafana hnyi hnya-  
mök.
- 21 Tavat adre me ling nya, me haluba-  
hingen,  
Me laba hnyibú hobi kâu hnök hna úne.
- 22 Hwaban ifucik me adre me ca fuc  
hmetu ;  
E menyik hoc hofuc ködrin.

HNYIMAKAN 29.

- K**E Jobu ame fuc hmetu hnyi anyin  
úhöúcú, me ha, ka habe,
- 2 Ekölö ge je tehi ehac,  
Waleji je bong a tuö nya hnyin Khong ;
- 3 K' ame umumelam anyin lamepa hon  
bok,  
Ke oge me vheno menekholom hnyi  
anyin lany ;
- 4 Helâji me je bong a iny hmai hnyin,  
Hnyi úen ame tha e mönya Khong hnyi  
umök uma mano ;

- 23 K' adre me halubahing nya helâ me we ;  
K' adre me memang helâke adre me halubahingen we a biliny.
- 24 Oge ne hluma ködrin, me ödrin e ca kap e ;  
K' ödrin e ca hna degecâ hnyimakök ae hna menyik.
- 25 Oge me úca dedrin je gethen me laba anyidrin helâ me ban,  
Me laba helâ me than hnyi utbavat,  
Helâ me at ame otubwelâ tavat tenge thungau.

HNYIMAKAN 30.

- K**E walang ang ame hlumö nya dö a biliny,  
Hnyat oge me höcö ip lakamödrin unyin je kuli a hanen halek je hnahat mamoe.
- 2 Eke, ewa troban könya únyi hnyi tang hwegien je hnyamödrin ?  
Ame hia but je hmaidrin.
- 3 Ödrin delâ ge theduoc me hmiâ ;  
Ödrin e ác kânâ ae mada ge nyudrin hnyi hnyebuba dok ae ba wan, ke ba aten.
- 4 Ödrin e oc je hwi hnyi hnyot,  
Ke hicödrin waiau.
- 5 Adre me ob' ödrin unyin tavat ;  
K' adre me kuku ödrin helâke at venöu.
- 6 Hamödrin he ka laba hnyi je hokong,  
Me je hmonopiny kânâ me kic.
- 7 Ödrin e kuku hnyi hnyot,  
Ödrin e úkhacaköu hmelen iokhukhun.
- 8 Ödrin lakon tavat ae monu, eke, lakon tavat ae kong ;  
Adre me kot degeci ödrin únyi hnyi hnyei.
- 9 Ke walang ang ödrin e sit hwahnök,  
Eke, inya ang taben úhiö ködrin ;
- 10 Ödrin e ikiki nya, me úsákâüö mönya,  
Ödrin e ca ot he ka hangöjâ hnyimakök.
- 11 Anyin a e ame hia but thang weiken,  
me oveci nya,  
Ke ödrin e hia but degec töiny hnyem hnyi hnyimakök.
- 12 Hnyi ke keihen metök ame tot dö kong hnyimakan ;  
Ödrin e hagutâ li cak,  
Ke ödrin e okhibö göranyai je dedrin he ka ohio nya.
- 13 Ödrin e okongoâ dek gethen,  
Ödrin e ip hnyi hnyimaködrin anyik hloûhloú,  
Ödrin tavat ae ba at hnân hadru' ödrin.

- 14 Odrin e o hnyi wanben hna kia vat ae gan hmâ :  
Ödrin e tetebulo huk hnyi wanben hna okongoâ.
- 15 Adre me wia könya ta je únyi hnân öbubuny gan,  
Ödrin e hnu anyik hmanenang helâ me ang ;  
Ke ame dit ut anyik hnahic helâ me ulâ.
- 16 Ke walang ang ame hlohlo but hanuk eú hnyi hnyekuk ;  
Ame köt nya je bonginy vec.
- 17 Hnyi je hnyinghet adre me labü dá oâ je jeiök  
Je vec ame öc nya me ca menâ bi.
- 18 Ame kong ut úkhaüök ge hwegien anyik mok :  
E ame cö nya helâ me nyin anyik úkhaü.
- 19 E ame hia but khuö nya ka hnyi hmudra,  
K' iny úcú but me sesâiny kânâ me hnabadröu.
- 20 Inya oge me khöü köu, ke u me ca ling nya bi :  
Oge me tot, ke u je bwele thibi könya.
- 21 U me hwân he ka oveci nya :  
U me sedö nya ge hwegien hnyamâm.
- 22 U je köp nya göranyai ka hnyi ang, u je kunö nya he ka tabâ e ;  
U je öü nya hnyi höu.
- 23 Anyin ae khanö nya a u me he ka lili nya ka hnyi mok,  
Me uma adre penapena hobi kâu tavat hia ae möt.
- 24 Ke hawa ame he ka inâ hnyamen ka hnyi vetaúnyi !  
E úcú at he ka tenge ge ta je únyi eling. eja ke ne adre ne ohia e.
- 25 Hawa, oge me ca tenge can at waleji ame vec ?  
A ca tenge hnyekuk can at ae ba ta únyi ?
- 26 Haba hnyi úen oge me halubahingen so. me ame o bi könya únyi ae kong ;  
K' oge me labagejoâ lany, me ame o bi könya menekholom.
- 27 A citröu hnyekuk, k' ame ca menâ bi ;  
Ame o but je bonginy vec könya.
- 28 Oge me ngenu tenge ke ba seúnö :  
Oge me tot hnyi úkhacaköu, me tenge hnân úhadruo.
- 29 Iny liamekeiny me je tanimo,  
Ke liamekeiny me je iaena.
- 30 Ame lit ut unen unyik, k' ame kölu but gak,  
K' adre hlöng ut je jeiök ge kahwa.

JOBU 31.

31 Anyin a wale adre me wia anyik kitara  
me me tenge bi,  
Ke anyik utkowi me me tenge thungaû  
bi.

HNYIMAKAN 31.

OGE me ûhinykôu me li emakök ;  
Me oge ma kâmâu ka wâ hmâ hlu ?  
2 Anyin a ieû jekhôu ûnyi ge Khong  
ethö,  
Me hwajekôu ûnyi ge Ataekhanahia  
ethö ?  
3 Hawa, ca hloûhloû bi hobi kâu at ae  
kong,  
Ke hnaûhangö hobi kâu tavat adre me  
ânyâ hulö ?  
4 Hawa, e ame ca wâ dek je gethen,  
Me aû hia hnök hna okca ?  
5 Oge ne hia but tha he me ûnyi baû,  
Ke logot li cak ka hnyi iyawö ;  
6 (Ke so adre me tuluti nya hnyi tulut ae  
wisa,  
Me me he Khong ka wâ hwakecik ae  
hnathu ;)  
7 Ame ne hia but saû li cak ûnyi hnyi  
gethen,  
K' ame ne hnu hoton li emakök hnen  
hnyekuk,  
K' ame ne kece ong hnyikongon ka  
hnyi li hnyamök :  
8 Awe, e so oge me belök, k' ame he ke  
at ka han troban ;  
Eke, e so adre me he ka oc degecâ ha-  
nen ik.  
9 A ne hia but iyawâ hnyekuk hnen ke  
momo,  
Ke oge ne hia but tuö hnyi hwanumen  
ke at :  
10 Awe, e so ame he öiök ka oamemâ hobi  
kâu ke at,  
Me ame he keihen ka nom ju ka hnyi  
hon.  
11 Anyin a hulö e ae gan hmâ hmönyin ;  
Eke, monu ae úcú ka tavat owisa he ka  
bi hwaban :  
12 Anyin a e bi meic ame han ke ne o but  
Hnaûhangö,  
Me ame he ka oc degecâ hia hanen ik.  
13 Oge ne hia but hûkotiâ hofuc hmak  
anyin athnyabaik baga me momo,  
Hnyi ûen ödrin e ivino mönya :  
14 Ieû oge me he ka ânyâ e ka he Khong  
ka tot ?  
E ka he ka senâ, ieû oge me he ka thu  
kâu ?

15 Hawa, ame ca ope e, waleji hnen at ame  
up nya eû hnyi hnyok ?  
Khaca thibi at a up öhmu eû hnyi  
hnyok ?  
16 Oge ne hia but behânâ weny at ae the-  
duoc,  
Me ohmakâ li emakan safac ;  
17 Me hake han,  
Me ca tha han mönya je nakahme ;  
18 (Ohe, oge me hat e hwân k' iny tiga  
wanakat, helâke me hnen kamen,  
Ke oge tuö safac hwân hnyi hna hmöku  
nya ;)  
19 Oge ne hia but wâ at ame he ka mok  
anyin ae ba úkhaû,  
Me at ae theduoc anyin ae ba hnân  
khavâ e ;  
20 Ame ne ca hia but haisoi nya hnen li  
jebalainon,  
Ke adre ne ca omageâ e ge leûnen halek  
mamoe ;  
21 Oge ne hia but hai hnyamök ka na-  
kahme,  
Hnyi ûen oge wâ hiök hnyi homagöule :  
22 Awe, e so he ka kölu but benyik ûnyi  
hnyi bajebenyik  
Me thu benyik ke ne o but hnyi jeien.  
23 Haba hlöuhlöû ûnyi ge Khong waleji  
hnân öbubuny kõnya,  
Ke ca khanö nya he ka ânyâ ke ûnyi  
ge ibeönuainy.  
24 Oge ne labegejon gol,  
Me ha ka gol, ka habe, U hnök hna  
geju kâu ;  
25 Oge ne senyin can ae gan hmâ tang  
omjehek,  
Ke can oge hia but hom gâná ge li  
hnyamök ;  
26 Oge ne wâ seûnö hnyi ûen e ame  
manen,  
Me tehi ame he hnyi melaminy ;  
27 K' adre omono duöngâ hnyekuk,  
K' ame ne úcimhnyimak me hnyamök :  
28 Me wale minya ka monu hnân bi hwa-  
ban ge tavat owisa :  
Ke waleling thoi hnyi hnyimakan  
Khong ethö.  
29 Oge ne hia but senyiuâ hna ohia at ame  
ikiki nya,  
Me hobâ, hnyi ûen hulö ame wâ e ;  
30 (Eke, oge me ca hna hnyimök he ka  
monu,  
Waleji he ka sumâtâ anyin möt me  
hofuc ûhangö ;)  
31 A ne ca ha tavat adre me tha laba  
mönya, ka habe,

- Ewa at ae khana he ka wâ at a ca hnyi sekon unyin ?
- 32 Haba atkanyua ame ca mokut hnyi gethen ;  
Ke oge me khöng je hwanumök ka at ame he ;
- 33 Oge ne ikhâlâ hnök je hna hanyâûâ helâji me Adamu,  
Ke oiyongâ anyik monu hnyi ûlaik ;
- 34 Anyin a iny outen tavat ae se hia,  
K' ame ne outhmoki nya hnen hûkötö nya ge je lap,  
M' oge me laba hnyibû, me ca he bi kâû—
- 35 E na he ju ke at ka ling nya !  
(Wâ bi, walang hatök, e so ame he Atae-khanahia ka thu kõnya ;)  
E na hu gak lina sibnalimen hnen at ame iwahnaihmiöny mönya !
- 36 Me oge me he bi nya ka vaden e hon bajebenyik ;  
Me obicâ nya kâû, e me anyik korona.
- 37 Ke oge me he ka aú kâû úseiny hnök hna okca ;  
Oge me he ka úhakekenyâ helâke iny than.
- 38 Ame ne he ik hnyei ka kuku gak,  
K' ame ne tha tenge je hna belökâ e ;
- 39 Oge ne hia but an wan e, me ca bi hwaban,  
Ke kunâ tavat a idra hnyei he ka mok :
- 40 Awe, e so he ka kû iwadekong hwaban hwit,  
Me je watetaföcö hwaban bali.

A um dö je hofuc ho Jobu.

HNYIMAKAN 32.

**K**E ame ca thu hmetu bi kö Jobu hnen je hnyat eling a kun, anyin a ka wisa e hnyi hnyimakan bi. 2 Ke ame ubâhlâ thö hmönyin anyi Elihu nöku Barakhela at Buza, hanen lap anyi Ram : ame ubâhlâ thö anyin hmönyin kö Jobu, anyin a e ame haiwisa e bi me ca haiwisa bi Khong. 3 Ke ame ubâhlâ thö anyin hmönyin minya ka je lahanen a kun, anyin a ödrin e ca wâ únyi hnân thu, ke so bi ödrin e hia but haikongu Jobu. 4 Ke haba Elihu ame hia but halubahing Jobu ge hofuc, anyin a ödrin dö a bân, ke e bi a biliny. 5 Ke a wâ but Elihu ae ba hofuc hnân thu hnyi je hnyimen ta hnyat a kun, me ame ubâhlâ anyin hmönyin.

- 6 Me haba Elihu nöku Barakhela at Buza ame thu me ha, ka habe,  
E wakhalet thibi je hunaik, ke öbun je hingat hnathu but ;  
Anyin a wale iny hlohlo, me ot he ka omanenâ únykúmenök köbun.
- 7 Haingök, Hamen at ae se hia bongon ka fuc,  
Me hamen je huna ae se hia he ka únö metâ.
- 8 Ke e hu hanu eú hnyin at,  
Ke haba homenân Ataekhanahia ame ham ködrin wâ únykúme.
- 9 Ca e unyin at ae beönua thibi metâ,  
Me he ka wâhmakhmetoâ hna owisa, unyin wahingat.
- 10 Anyin a wale, haingök, Ling nya ju ;  
Oge me he ka omanenâ minya hnök hna únykúme.
- 11 Wâ bi, oge me halubahingen hobun je hofuc,  
Oge me tevehlöng hnöbun hna ha can, Öbun ka tiga elâm he ka ha.
- 12 Ke oge me tevehlöng köbun,  
Me wâ bi, e ba at gabun a ngö Jobu,  
Ke ba at unyibun ame thu hwan je hofuc.
- 13 Wâ eâu, wâ öbun nye ha, ka habe, Öhmun e wâ but metâ ;  
E khana Khong he ka hwege hon, ke ca at bi :
- 14 Anyin a e ame ca penapena ifuciny hobi kõnya ;  
Ke oge me ca he bi nya ka ha hobun hofuc iny ka thu kâû.
- 15 Ödrin e lâiâ, k' ödrin e ca thu hmetu bi :  
E ba but hodrin hofuc.
- 16 Hawa, oge me he ka halubahingen anyin a ödrin e ca fuc bi,  
Anyin a ödrin e tot me ca fuc hmetu !
- 17 Oge me he bi nya ka thu hnyi hannyömök,  
K' oge me he ka omanenâ hnök hna únykúme.
- 18 Anyin a iny unöngötö ge je hofuc ;  
K' ame musi nya hnen hanu eú hnyi hnyekuk.
- 19 Wâ bi, e úcú hnyekuk me waina adre ca oc hlinginy ;  
K' ame he but ka hmouca helâ me je tang ae teb únyi.
- 20 Oge me he ka fuc m' inye menâ ju ;  
Oge me he ka khöng li esongodik me thu.
- 21 Iny na ca he ju ka wâhmakhmetoâ at ;

JOBU 33.

K'oge me ca he bi nya ka ham baûâ  
ien ae gan hnân ogânâ at.

22 Anyin ae ca khanö nya he ka ogânâ at  
ge je ien baû ;

Wâ e nye he At a Up nya he ka logot  
hum nya.

HNYIMAKAN 33.

**A** WE, Jobu lö, u na he ju ka löng hok  
hofuc,

Me tevehlöng ju hnök je hna ha hia.

2 Wâ bi, walang ang oge hia but khöng  
hnyimök,

Ame fuc bohömök hnyi hnyimök.

3 Ame he ka o hok hofuc úheny eû hnyi  
hnyekuk ae wisa :

K'ame he li esongodik ka ha hnyi  
hnathu hnök hna wâ.

4 Haba hanon Khong ame up nya,  
Ke a omeli nya homenân Ataekhanahia.

5 Ame ne khanö u, thu thö könya ;  
Ipgaga hwâm je hofuc hnyi hnyimäkök,  
todrö.

6 Wâ bi, oge me hnyimäkök ka Khong  
helâ me u :

Adre up nya minya únyi hnyi kânâ ae  
kece.

7 Wâ bi, adre me ca he ka ooti u ge únyi  
hnân ootâ gak,

K'ame ca he hnyamök ka hmak hom.

8 E hnathu u je hia but fuc hnyi hnyi-  
könyök,

Ke oge hia but löng ifucâm, ka habe,

9 Iny kalaöt, anyin ae ba hnök hna ha-  
nyâûâ ;

E ba hnyikonguk, ke ba hulö eû hnyi  
hnyekuk :

10 Wâ bi, e ame heleû je can könya,  
E ame öü nya me iwahnaihmiöny mē.

11 E ame ohmâ bi cak hnyi utö,  
E ame bi haten dek je gethen hia.

12 Wâ bi, oge me he ka thu köu, a u je  
ca wisa hnyi únyi e ;

Anyin ae gan hmâ Khong hon at.

13 Ieû gam u me ivinö mē ?

Anyin a e ame ca ha bi bongon anyin  
ta je únyi.

14 E okhaca fuc Khong,

Me olo, ke a ca löng bi at.

15 Hnyi bwi, me hna omanenâ hnyi hnyi-  
nghet,

Hnyi úen ame mokut hnying tavat,

Me leleû hon hna mokut ;

16 Hnyi úen eling e ame olöngâ je hnyi-  
könyen tavat,

Me okeceâ hmâ hna úne ködrin.

17 Me me he ka lelö at únyi ge hnen hna  
weny,

Me ikhâlâ bi gan ge at.

18 E ame behânâ hanon ge thop,

Me anyin möt wâ e nye hia ge hele vat.

19 Adre me siwhegiâ e minya hnen vec  
hon hnen hna mokut,

Me ivinö bala eû hnyi je jeien :

20 Me me höcö jeû ge anyin möt,

Me jeû ae hnebwia ge hanon.

21 A aû but viny me me ca manen bi ;

Ke manen dut je jeien adre me ca wâ  
ehac.

22 Eke, ame hakekeny hanon ka hnyi  
erkemok,

Ke anyin möt ka tavat ohia,

23 Ame ne tha he mē ke angela,

At omanenâ bongon, a e beönua hon  
tavat a wan thauzan,

He ka omanenâ ka at hanymen ae wisa ;

24 Awe, e ame he ka betenge gan me ha,  
ka habe,

Omelö e me me ca ut kâû ka hnyi thop,  
Anyin a oge me wâ but hwaban möt.

25 K'ame he ka habubut unyin hon unyin  
wanakat ;

E ame he hmetu ka je bongon anyin  
hidröu :

26 E ame hic ka Khong me e ame betenge  
gan ;

Me e ame wâ hnyimakan me senyin :  
Ke ame ohmeto ka at hwakecin ae wisa.

27 E ame khumöng hnyi hnyimakan tavat,  
ka habe,

Oge hia but ânyâ hulö, me hanyâûâ  
únyi ae wisa,

Ke ba troban könya :

28 E ame hia but omelö hanuk me me ca  
ut ka hnyi thop,

K'ame he anyik möt ka wâ melam.

29 Wâ bi, Khong ame huliwan ta je únyi  
eling,

A ibi olo, ke ibi okun, ka at,

30 He ka hom hmetu hanon únyi hnyi  
thop,

M'adre me melamâ e ge melaminy  
tavat ae möt.

31 Jobu lö, tevehlöng ju, ling nya ju :

Laba hnyibû ju, me oge me he ka fuc.

32 Ame ne hu hofuc gam thu thö könya :  
Fuc dö, anyin ae wek he ka haiwisai u.

33 Ame ne ba, ling nya ju :

Laba hnyibu, me oge me he ka nö u ge  
metâ.

## HNYIMAKAN 34.

- H**ABA Elihu bala ame thu, me ha, ka habe,  
 2 Öbun tavat ae metâ löng ju hok je hofuc ;  
 Ke öbun tavat wâ únykúme, tevehling nya ju.  
 3 Anyin a hanymen hnyiköny he ka löngmakhmeto hofuc,  
 Helâ me hnyem ame drem cubecâ jeû.  
 4 E so ötin e he ka úca wisa hobi kötin ;  
 E so ötin e tha wâhmakhmeto so.  
 5 Anyin a hia but Jobu ha, ka habe, Iny wisa but,  
 Ke a hia but Khong húgúnâ anyik wisa :  
 6 Eja ke ne a ne hu gak wisa, me iny at thoi köbun ;  
 Ca hnân so hnök aat, eja ke ne a ne ba hnök hna hanyâúâ.  
 7 Ie at ae úcú me Jobu,  
 Wale ame ijem úhiö helâ me köiö ?  
 8 At ame tha he me tavat adre me ányâ hulö,  
 Me tha vheno me tavat ae kong.  
 9 Anyin a haingen, ka habe, E ba troban ka at,  
 E ka he ka senyin ka Khong.  
 10 Anyin a wale, ling nya ju, öbun tavat wâhmakhmeto :  
 E so e úsákâúö hulö me Khong ;  
 Ke hwakecin ae kong me Ataekhanahia.  
 11 Anyin a e ame he ka bi hwaban huliwa anyin at,  
 Me ve oâ ka tavat hoton hwakecidrin.  
 12 E hnathu ame ca he Khong ka ányâ hulö,  
 • Ke ame ca he Ataekhanahia ka owhalö hna owisa.  
 13 Ie at a ham kâu musi hon hmeledrany ?  
 Ke ia ip gan hmeledrany hia ?  
 14 Ame ne he ka hnyok ka at,  
 Ame ne he ka ohmeto kâu bi hanon me homenân ;  
 15 Ame he ka tha mok tavat hia,  
 Ke ame he at ka hmetu ka hnyi kânâ.  
 16 U je ne wâúnykúme, löng ju ang :  
 Tevehlöng ju ifucik.  
 17 Hawa, ame he at ame höciâ wisa ka musi ?  
 Ke u me he ka haikongoâ e wale ae wisa me gan ?  
 18 Hawa, e úcú he ka ha ka than, ka habe,  
 U at ae ikiki ?

- Ke ka je taben, Öbun tavat ae kong ?  
 19 Awe, hawa ge at ame ca wâhmakhmetoâ je than,  
 Me ca oúnyihnatho at ae tren omjeû hon at ae theduoc ;  
 Anyin a huliwa anyin li hnyamen ödra hia.  
 20 Ödra logot mokcu, wale hnyi wanbenset ;  
 Adre me obwebwelâ tavat me ame hi' ödra but,  
 Ke adre me hom tavat hwege a ca hnen hnyam.  
 21 Anyin a li emakan ame wâ je gethen deny at,  
 Ke e ame wâ wia hnen hna okca.  
 22 E ba menekholom, ke ba hmenon mok,  
 Me me lubaduöng hnyin tavat adre me ányâ hulö.  
 23 Anyin ae ca únyi hnathu kâu he ka olo únykúme ka at,  
 Me me he hnyi hnyimakan Khong he ka úhnei.  
 24 E ame kot omomono tavat hwege hnyi je deny a ca hnân elâm,  
 Me otilâ keihen me hwabödrin.  
 25 Anyin a wale e ame wâhmakhmetoâ anyidrin je huliwa ;  
 K' ame wi' ödra hnyikânâi hnyi hnyinghet, me ohi' ödra but,  
 26 E ame kuc ödra helâ me tavat ae kong  
 Hnyi hnyimakan tavat adre me wâ ;  
 27 Anyin a ödrin e degec hmeto e,  
 Me ca únykúme bi deny je gethen :  
 28 M' ödrin e oâ kâu hwa tenge anyin tavat ae theduoc,  
 Ke e ame löng tenge anyin tavat adre me ovecâ.  
 29 E ka omenâ, me ie ame he ka haikongoâ ?  
 Ke e ka ikhâlâ hnyimakan, me ie ame he ka wâ e ?  
 Adre me ne ányâ ka hnyei, k' adre me ne ányâ ka at, me, khaca thibi :  
 30 Me me ca he bi at ame ca ot ka musi,  
 Me me ca he ka hu at he ka omonoâ tavat.  
 31 Hawa, ame hia but ha ke at ka Khong, ka habe,  
 Oge hia but kap vec, k' oge me ca he hmetu ka monu :  
 32 Ke haba únyi oge me ca wâ, me u me he ka nö nya :  
 Oge ne ányâ hulö, awe, oge me ca he hmetu ka ányâ ?  
 33 Hawa, adre me he ka bi hwaban e hotor hnâm hna únykúme, me u me he ka höciâ ?



JOBU 35, 36.

Anyin a hamâm he ka úca, ke ca hamök bi :  
 Anyin a wale, ha thö hnâm hna khana.  
 34 Ame he ka he tavat wâhmakhmeto ka ha kõnya,  
 Me tavat ae metâ hia ödrin e löng kõnya, ka habe,  
 35 Haba Jobu ame fuc ke ba wâhmakhmeto,  
 Ke ba metâ hnyi hwan hofuc.  
 36 Ödra na he ka cubic Jobu ke ne o but obiny,  
 Anyin e ame thu helâ me tavat ae kong.  
 37 Anyin a e ame bi hanen bi gan ka anyin hulö,  
 E ame khaú li hnyamen unyihmun,  
 Me osehia hwan je hofuc ka Khong.

HNYIMAKAN 35.

**K**E Elihu bala ame thu me ha, ka habe,  
 2 Hawa, u me únykúme ae wisa ang,  
 Haingâm, ke habe, Iny wisa hon Khong,  
 3 M' u me ha, ka habe, Ieú troban köu?  
 Ke ieú troban kõnya hon hnök hna ányâ hulö ?  
 4 Oge me he ka thu köu,  
 Me je lahanâm unyâm.  
 5 Bwele thö ka hnyi drany me wâ ;  
 Ke wâ bi je úlá ae görany hom.  
 6 U je ne hia but ányâ hulö, ieú hnâm hna ányâ kâu ?  
 Ke ame ne se hia hnâm je hna hanyâúâ, ieú e u me ányâ kâu ?  
 7 U je ne at ae wisa hwakecin, ie únyi e u me ham kâu ?  
 Ke ieú e ame kap únyi hnyi hnyamâm ?  
 8 E khana ányâm monu ka okongo tavat ae úcú möu ;  
 Ke e khana ányâm hwakecin ae wisa he ka osoâ tavat.  
 9 Tavat adre me tenge ge je úokonguny ae se hia ;  
 Adre me khöú ge benyin tavat ae hwege.  
 10 Ke ba at ame ha, ka habe, Ewa Khong at a up nya,  
 At ame ham je khumöng hnyi hnyinghet ;  
 11 At ame n' öta hon omenoiny kânâ,  
 Me omet' öta hon je meno ame gâ ?  
 12 Adre me tenge eling, ke ba at ame thu,  
 Can bi gan anyin tavat ae kong.  
 13 E hnathu ame ca he Khong ka löng hofuc baú,

K' ame ca he Ataekhanahia ka oúnyi-hnatho e,  
 14 Ke ti ca úcú eling, u je ne ha, ka habe, u je ca wâ e,  
 E bi hna owisa unyin, ke u je halubahingen !  
 15 Ke walang ang, anyin a e ame ca hia but senâ hnyi anyin hmönyin,  
 Ke e ame ti wâ hmâ bi gan ;  
 16 Anyin a wale, haba Jobu ame fuc baú :  
 E ame osehia je hofuc ke ba wâhmakhmeto.

HNYIMAKAN 36.

**K**E ame fuc bala Elihu me ha, ka habe,  
 2 Mē na hokhnyok ju, me oge me he ka omanená köu ;  
 Anyin ae tiga hu hok hofuc bi he ka ha ge Khong.  
 3 Oge me he ka hok anyik metâ únyi hnyi dok ae sákâú,  
 Me haiwisa At a Up nya.  
 4 Anyin ae hnathu ame ca thoi hok hofuc :  
 E bi unyâm at ae tren wâúnykúme ae bekhöt.  
 5 Wâ bi, e man Khong, ke ame ca húkotiâ at :  
 E at ae man hnyi hwegien oúnykúmanen.  
 6 E at ame omelö at ae kong :  
 Ke e ame ham wisa ka at adre me ovecâ.  
 7 Eame ca ikhâlâ li emakan ge at ae wisa :  
 Ke haba je than hon theron  
 Me e ame otil' ödra hmâ bala, m' adre me görany dö.  
 8 Ke adre me ne c' ödra ge je fao,  
 Ke nuc ödra ge je tö ae vec ;  
 9 Awe, e ame omanená ködra anyidra je huliwa,  
 Me hnödra hna hanyâúâ, a g' adre hia but ti ányâ hwakecin bi gan.  
 10 Ke ame olöngâ je hnyikonyödra ka hnyi hna úne,  
 Me húna ködra he ka hmetu únyi hnyi hulö.  
 11 Adre me ne he ka löng me bi athnyabainy,  
 Me adre me he ka laba sot hnyi bongudrin je bong,  
 Me senyin hnyi je hunaidrin.  
 12 Ke adre me ne ca löng bi, me ame he ka hi' ödra ge hele vat,

JOBU 37.

- Adre me he ka mok ke ca khan' ödra bongon.
- 13 Ke haba tavat ame ca ot bi je hnyekudra, me adre me ûkhöünâ hmönyin : Adre me ca khöü hnyi úen e ame c' ödra.
- 14 Adre me mokcu k' ödra tiga je hidröu bi,  
E tha obiny melidrin me tavat ae ikiki.
- 15 E ame omelö at ae vec hnen anyin vec. E ame olöngâ je hnyikönyödrin ge hna úöveci.
- 16 Eke, e ame belili u únyi hnyi dok ae kong  
Ka hnyi dok ae lau, dok ae ca hnek bi ;  
Ke haba hnödra hna ip hon ânyâm laulau ame he ka ti pipikhenya.
- 17 Ke u je ounöngöt ge je hna owisa ka at ae kong,  
Ame köt u ge hna owisa me wisa.
- 18 Ke haba khaca, e hu hmönyin, wâ eâu, wâ adre nye he ka hum u ge hnâm hna sekunâ ;  
Ke so ame ca he úganiny hna omeli he ka osaúö u.
- 19 Hawa, ame he ka úcú tang omjehem, m' u me ca he ka kong ut,  
Ame ne je hwegien hia manom man ?
- 20 Ca he ka weny hnyinghet,  
Wale úen adre me subâ degecâ tavat hnyi je hnödra.
- 21 Wâ eâu, ca he ka hnyok ka hwakecin ae kong :  
Anyin a wale hnâm hna hia but úca hon vec.
- 22 Wâ bi, Khong ame ânyâ huliwa ae beónua hnyi maniny man :  
Ewa at úne a helâ mē ?
- 23 Ia kú kâu deny gethen ?  
Ke ia ame he ka ha, ka habe, U je hia but ânyâ hwakecin ae ca wisa ?
- 24 Únykúme ju he ka oganá anyin huliwa, Waleji ame khumöngö hnen tavat.
- 25 A hia but wâ e hnen tavat hia thithö ;  
Tavat adre me wâ sâkâúâ e.
- 26 Wâ bi, e gan hmâ Khong, k' ate me ca wâhmakhmeto e ;  
Ke ca hnân elâm úseiny je hunainy.
- 27 Anyin a e ame lelö göranyai je köiö, K' ame ta but hmetu hnyi we únyi hnyi khömetiny :
- 28 Wale ame hingölö hnen je úlá  
K' ame hingölö gan hmâ hon at.
- 29 Eke, ie at ame wâúnykúme hna ulolo je úlá,

- Ke hwan than únyi hnyi umen uma menâ ?
- 30 Wâ bi, e ame ulolo anyin lany igigilö e ;  
Me khavâ taben köiö ae gan.
- 31 Anyin a e ame owisa tavat ge ta je únyi eling ;  
Me hân gâná.
- 32 E ame tube li hnyamen ge hucuce ;  
K' ame húna kâu me me aat dö únyi e ame kú.
- 33 Haba úlunginy e, me wale at ame haimemenâ e,  
K' ame ha omeno ge weneú ame o thö.

HNYIMAKAN 37.

- H**NYI únyi eling ame öbubuny oúnykúmik,  
Me utut únyi hnyi hnen.
- 2 Löng wia ju öbun hwan ifucin,  
Ke úlunginy ame he but únyi hnyi hnyimen.
- 3 E ame kunâ e kâú ka hnyi hmeledrany hia,  
Ke anyin hucuce ke ne o but hnyi je can hmeledrany.
- 4 Hwaban dö e, me ame hmuhmu hwan ;  
K' ame hwan than ge ifucin ae beónua :  
K' ame ca behânâ, ödra ka löng ifucin.
- 5 Hnân láia hwan than anyin Khong ;  
E ame ânyâ je únyi ae gan, k' ate me ca wâhmakhmeto.
- 6 Anyin a e ame ha ka kiona, ka habe, Ta but u ka hnyi hmeledrany ;  
Ke helâe minya ka we ae úhnyúkong,  
Me anyin we ae gan.
- 7 E ame okeceâ hmâ je hnyamen tavat hia thithö ;  
Me me khana e hnen tavat hia e ame op.
- 8 Ke je menoiny hnyot adre me didrö ka hnyi je dok ae nedrong,  
Me laba hnyi umödra je uma.
- 9 Ame o but höu úheny hnyi hwaiöu,  
Me megic úheny hnyi hwadrö.
- 10 Adre ham köiö ae wahma ge homená anyin Khong :  
Me hom úhnyúkongo je köiö ae lau.
- 11 Eke, e ame ip khömetiny hon úlá ae khöt ;  
E ame olauâ úláiny anyin hucuce,
- 12 Ke adre me hom tilâ e hnen anyin musí,  
Me me aat hia hnen hna húna  
Ka hnyi hon hmeledrany hia ae hu aten ;
- 13 Ame ne hnân únö, ame ne hobi kâu iny hnyei,

JOBU 38.

- Ame ne betenge, me e ame oâ e.  
 14 Jobu lö, tevehlöng ju ang :  
 Todru, me wâ únykúme je huliwa  
 hnân láia anyin Khong.  
 15 Hawa, e khanö u hwakecin hna húna ka  
 je únyi eling hnen Khong,  
 Me omanená imelaminy hucuce hnyi  
 anyin úlá ?  
 16 Hawa, e khanö u bongon hna tuluto je  
 úlá,  
 Je huliwa hnân láia gan at ae tren  
 metâ ae bekhöt ?  
 17 A kâmâu ka mage ânyâm je úkhaú.  
 Hnyi úen ame ta hau hon hmeledrany  
 can ang hnyi hwaiöu ?  
 18 Hawa, e khanö u he ka tha ulolo mē  
 drany,  
 Waleji ae hmâ helâ me uselat bras adre  
 oköiâ ?  
 19 N' öhmun dö ge únyi hnân ha kâu ;  
 Anyin ae ca khan' öhmun he ka pena-  
 pena ifucihmun can menekholom.  
 20 Adre me he ka ha kâu a iny befuc ?  
 Ke ame he at ka beweny m' adre me  
 utâ e ?  
 21 Ke walang ame ca wâ but tavat lany ae  
 hadröngöc hnyi je úlá :  
 Ke ame o ang, me ânyâwia.  
 22 Ame o but úheny hnyi hwadrö drany  
 ae so helâ me gol :  
 E unyin Khong hmanenang hnân outen.  
 23 Haba Ataekhanahia, me ca khan' öta  
 he ka wâ wia ; e nua man :  
 Ke haba hnyi hna owisa me úhnei, me  
 ame ca he ka úokonguny.  
 24 Anyin a wale ame outen e ge tavat :  
 Ke ame ca wâ hmâ tavat adre me  
 hnyokâ wisa.

HNYIMAKAN 38.

- K**E haba Iehova ame thu kö Jobu únyi  
 hnyi weneú, k' ame ha, ka habe,  
 2 Ia olidrá úhnenamö  
 Ge ta je hofuc ae ba wâhmakhmeto  
 hnyin ?  
 3 Hükâlâ ju walang ang wen hnyekom  
 me bi бага ju ;  
 Anyin a oge me he ka hnei u, ke u ma  
 omanená kõnya.  
 4 U uaji hnyi úen oge me ip taben hme-  
 ledrany ?  
 U je ne wâhmakhmetoâ, awe ha thö.  
 5 Ia tuluto e, ame ne manen köu ?  
 Ke ia lau tö hon e ?  
 6 Adre me ohmâ je taben hon ieú ?

- Ke ia ip veto hnân bahebetiny ;  
 7 Hnyi úen ame tha khumöng je okhú  
 lany,  
 K' ame hongot senyin lakon Khong  
 hia ?  
 8 Ke ia hlöng hwanumen köiö ae gan,  
 Hnyi úen e ame patrutrua helâke úheny  
 eú hnyi hnyok ;  
 9 Waleji hnyi hnök hna wia úlá hnân  
 úkhaúen bi,  
 Ke menekholom hnân hlanyin,  
 10 Me kú hnyigöulen e,  
 Me ip je venyâ me je hlinginy,  
 11 Me ha, ka habe, Walang dok u ma o  
 kâu, ke ca hanyâúâ bi ;  
 Ke wale bi ang adre me he ka thawâ  
 ânyâm waköiö ae hmanenang ?  
 12 Hawa, u je hia but musö hnyomakatu  
 hwân hnyi hna hnöku u,  
 Me kú hnen ka haolany ;  
 13 Me me he ka kât je can hmeledrany,  
 Me jijingâ degecâ únyi hnyin e tavat  
 ae kong ?  
 14 Adre wia e helâ me kânâ ae kece adre  
 bi haten hnyin ;  
 Me ame manen dut ta je únyi helâ me  
 úkhaú :  
 15 Me ame hia but ge tavat ae kong me-  
 lamidra,  
 Ke ame hmetru thö benyin ae bi gan.  
 16 Hawa, u je mwi eú hnyin je pupuainy  
 köiö ae gan ?  
 Me vhenö je dok ae lau ae owa ?  
 17 Hawa, adre omanená köu je homagöu-  
 leny mok ?  
 Ke u je hia but wâ je homagöuleny  
 hmenon mok ?  
 18 U je wâhmakhmetoâ but úlauen hme-  
 ledrany ?  
 Ha thö, ame ne khanö u hia eling.  
 19 Ewa gethen ka hnyi hnyaban melam,  
 Ke haba menekholom, me ewa hnen ;  
 20 Me u me he ka hom e ka hnyi hnyi-  
 göulen e,  
 Me wâhmakhmeto je gethen ka hnyi  
 umen uma ?  
 21 Hawa, adre bödra ka hnöku u, me me  
 khanö u e,  
 Ke se hia hmönyin bongom je bong ?  
 22 U je mwi bi hnyi uma omjehen kiona,  
 Me wâ je omjehen we ae wahma,  
 23 Waleji hnök hna ip hobi kâu úen vec,  
 Me bong bongon úkuc me vat ?  
 24 Adre ma kâmâu ka khenâ lany,  
 Me oveseâ ang hwei hon hmeledrany ?  
 25 Ia hiny thop hobi kâu je di,

- Me bi deny hucuce me hwan than;  
 26 Me me he ka ta we ka hnyi kânâ dok  
 ae ba aten;  
 Me hnyebuba wale ae ba at hnyin;  
 27 Me me he ka habelen kânâ ae únyi baú  
 me hnyei baga;  
 Me okúâ hnaönying ae moumou?  
 28 E hu kamen we?  
 Ke ia hnokoâ je dân hau?  
 29 Ame o but úheny eú hnyi hnyeku ia  
 köiö ae wahma?  
 Ke ia op dân hauiny drany ae wahma?  
 30 Adre ohia köiö helâ me hnen veto,  
 Ke ame wahma thö hon köiö ae dit.  
 31 Hawa, e khanö u he ka úhúkâlakouâ je  
 nyingen Kukuúnyi,  
 Me thang je wen Oriona?  
 32 E khanö u he ka hom je Mazarothe  
 hnyi úen e?  
 Ke khanö u he ka tha lili Uresa me  
 anyin bunyen?  
 33 E khanö u but je hnanyibuiny drany?  
 Ke khanö u he ka otilâ musiny e hon  
 hmeledrany?  
 34 E khanö u he ka ogöranyâ hwâm ka  
 hnyi je úlá,  
 Me me o we ae gan he ka tubi u?  
 35 E khanö u he ka kúnâ je hucuce me  
 me hia but,  
 Me thu köu, ka habe, Walöhmung ang?  
 36 Ia ip metâ eú hnyi hnyekon at?  
 Ke ia ham hna únykúme ka hnyi oúny-  
 kumânen at?  
 37 E khanö ia he ka aú je úlá ge metâ?  
 Ke khanö ia he ka hingâlâ je kaiainy  
 drany,  
 38 Me me hmudra but sesâiny kânâ,  
 K' ame úkeceköu kânâ?  
 39 Hawa, u me he ka hnu meno me me an  
 liona?  
 Me osekunâ je nak liona,  
 40 Adre me laba iyâú hnyi je op,  
 K' adre me laba hnyi dok ae nedrong  
 he ka mokut duöng?  
 41 Ia penapena jeú hobi kâu oreba,  
 E ka tenge lakon ka Khong,  
 Me gâ monu ae ba an?

HNYIMAKAN 39.

- E** KHANÖ u úen ame he je gotiny kic  
 ka hnokoâ?  
 Me wâ haten vec a hnyekon je aila?  
 2 E khanö u he ka aú je tehiny erkin a  
 ödra?  
 Me wâ úen adre me he ka hnokoâ?

- 3 Adre me tot hwali me hnokoâ je la-  
 kudra,  
 Me ame hia but anyidra je vec.  
 4 K' ame hwege lakudra, me gan tot hnyi  
 hnyebuba;  
 5 Ia hna asinainy hnyot he ka he monu!  
 Ke ia thang je wen asinainy hnyot?  
 6 Oge me ham hnyebuba hnân umen uma,  
 Me hnyei baga hnân hnyaban.  
 7 E ame hluma medien taun,  
 Ke e ame ca löng hwahongot hwan at  
 ame alin meno.  
 8 Haba hna wâ hon je bucen, wale an  
 jeú,  
 Ke e ame elâm je únyi hia ae hát.  
 9 Hawa, ame weny bolokiny hnyot he ka  
 bi athnyabaem?  
 Me mokulec uma umen halem kau?  
 10 E khanö u he ka ca bolokiny hnyot ge  
 wen hnyi hna belök?  
 Me ame he ka tha seú tilâ kânâ möu?  
 11 U me he ka labageju kâu anyin ae gan  
 hmâ hwegien?  
 Ke u me he ka hna ânyâm huliwa kâu?  
 12 U me he ka labageju kâu a e ame he ka  
 hom ânyâm hwit,  
 Me hlo hwit hobi kâu umâm uma hnân  
 huje hwit?  
 13 Ame lau senyiná labenyin renani;  
 Ke hawa, ame hmanenang taben labe-  
 yin me je leúnen?  
 14 Anyin a e ame ip wakuny hnyi kânâ,  
 Me omagei ödra hnyi sesâ,  
 15 Ke e ame hnying ut a ame ne he cau  
 ka uto hmoucai ödra,  
 Me ke menoiny hnyot ka uto veseâ.  
 16 E khöt hnyekon ka lakon, helâ ke ca  
 lakon bi:  
 Ame ne únyi baú anyin huliwa e ame  
 ca hlohlo bi;  
 17 Anyin a Khong ame hia but behânâ e  
 ge metâ,  
 Ke e ame ca ham kâu wâhmakhmeto.  
 18 Hnyi je úen e ame höhöi thö göranyai.  
 E ame hluma hors me at ame tabâ e.  
 19 Hawa, u je ham tang hwege ka hors?  
 Me khavâ nyin e ge leúnen ame jijing?  
 20 U je kúnâ e he ka gâ helâ me wahamon!  
 Hnân outen hnen imenâiny ae hwege.  
 21 E ame khinö ca hnyi thop me senyiná  
 tang hwege:  
 E ame he me úkhanö me vat.  
 22 E ame hlumâ únyi hnân outen, ke ca  
 öbubuny bi;  
 Ke e ame ca hwiö hmetu ge hele vat.  
 23 Ame kitenge gan tangen fana,

JOBU 40, 41.

- Me ö ae hadröngöc me uthö.  
 24 E ame utá káná hnyi wathethöt me anyin hmönyin ;  
 Ke ame ca únykúme a wale hwan trutru.  
 25 Ame ne fuc dö trutru, me haingen, ka habe, Awe !  
 K' ame löng bunen vat ke tiga sákáú, A hwan thaniny je taben vat, me huo.  
 26 Hawa, ame nap dring ge ányám metá, Me lau li labenyin ka hnyi hwaiöu ?  
 27 Ame gá göranyai aeto hnyi hnám hna húna,  
 Me bi haúen ethö görany ?  
 28 E ame labā kic, me bi hnyaban Hon ban kic, me je hnabā.  
 29 E ame seládrá eling haniny ;  
 Me wá e hnyi dok ae sákáú ge li emakan.  
 30 Haba lakon me adre me ijem dra :  
 Ke haba hnen je komok, me wale hnen bi minya.

HNYIMAKAN 40.

- K**E Iehova ame thu bala kö Jobu me ha, ka habe,  
 2 Ame he at ae hwege hnyimen ka ivinö me Ataekhanahia ?  
 Haba at ame ivinö me Khong, me so e ame thu.  
 3 Me haba Jobu ame thu kö Iehova, me ha, ka habe,  
 4 Wá bi, iny thatúnyi : ieú oge me he ka thu köu ?  
 Oge me kát hnyimök.  
 5 Iny okhaca but fuc ehac, ke oge me ca he ka thu ;  
 Ke olo, me oge me ca he ka bi hanen.  
 6 Haba Iehova ame thu kö Jobu únyi hnyi weneú, me ha, ka habe,  
 7 Húkálá ju wen hnyekom walang ang me bi бага :  
 Me oge me he ka hnei u, m' u ma omanená könya.  
 8 Hawa, u me he ka oúnyibaúá hnök hna owisa ?  
 U me he ka haikongu nya, m' u me wisa bi ?  
 9 E hu gam hnyam helá me Khong ?  
 Ke e khanö u he ka bi hwan than helá me hwan hofuc ?  
 10 Bethe theibi u thö ge beönua me oganá ;  
 Ke khaúö u ju ge hmanenang me hwa-kecin than.

- 11 Hingálá but je bahihingölöiny ányám hmönyin :  
 Bwele ju ka wá tavat ae bi gan hia, me hom úhnyúkongo ju.  
 12 Ö 'dra ju tavat bi gan hia, me ohnyi-káná ju ;  
 Me uto ju tavat ae kong hnyi je hnödra.  
 13 Tha ikhö' ödra ju eú hnyi káná ;  
 Ca ju je hnyimaködra hnyi dok ae iyong.  
 14 Me oge me he ka ogá gam  
 A ae khana hnyamám a metám he ka omeli u bi,  
 15 Wá bi walang behemoth, waleji hnök hna op möu ;  
 E ame han önying helá me bolok.  
 16 Wá bi, e tang hwegien hnyi li jebalainon,  
 Me maniny man hnyi je töiny hnyekon.  
 17 E ame bwebwelá obiny helá me arasi :  
 Adre oúdilákouá je töiny li jevan.  
 18 Helá me bras ae moku je jeien ;  
 Ke úcú me je venyá fao je vhaken.  
 19 E beönua hnyi ta je únyi a ányá Khong :  
 E khana thibi at a op e he ka hakekenyá káu hele vat.  
 20 E hnathu ame okúá an jeú hnen je bucen ;  
 Ame walak eling ta je menoiny hnyot hia.  
 21 E ame mokut hmelen je úö ae hlau,  
 Me sa hlowe, me hnyei ae lup.  
 22 Ame tube e hnen hmenon je úö ae hlau ;  
 Je garabainy di ame tot igigilö e.  
 23 Wá bi, e ka he wagewe ka bahihingölö, e ame ca öbubuny bi :  
 E hwege hnyekon e ka di Joridano ke ne o but hnyi hnyimen.  
 24 Ia noc e k' ame bwele thibi,  
 Me köu hnyingöiny ge fao ?

HNYIMAKAN 41.

- E**KHANÖ u he ka lelö leviathana ge wage ?  
 Me ca bohmen ge tö ?  
 2 E khanö u he ka húkálá tö hnyi hnyingöiny ?  
 Me köu wainy ge fao ?  
 3 E ame he ka osehia khöu köu ?  
 K' ame he ka ha je hofuc ae menyik köu ?  
 4 Hawa, ame he ka ányá úhibinyköu möu,  
 M' u ma hom me athnyabaem bala bi ?

- 5 U me he ka walak mē helâ me menome ame gâ?  
Me noc e me me haleny ânyâm je hlu?
- 6 Ame he tawat thud ka úco e?  
Me kave ka tawat úcú?
- 7 E khanö u he ka öunöngötâ unen ge je ö a telat,  
Ke ban ge ta je úde?
- 8 Ip ju hnyamâm bon;  
Únykúme ju vat, ke ca ânyâ hmetu bala.
- 9 Wâ bi e únyi baú bi labageju he ka hom e:  
Hawa, ame ca he at ka ta but e ka wâ e?
- 10 E ba at ae hwege hnyekon me me bwebwelâ e:  
Awe, ewa at ae khana tot hnyi hnyimakök?
- 11 Ke, ewa at ame bân ka ham kõnya, m'inye he ka bi hwaban?  
Anyin a anyik ta je únyi hia eang hmeledrany.
- 12 Oge me ca he ka laba hnyibú ge je ong outhunyin,  
Me tang hwegien, me manenanginy unyin.
- 13 Ie at ae khana he ka uny anyin úkhaú?  
Ie at ame he ka dit ka hnyi wanben li ganyon?
- 14 Ie at ae khana he ka khöng li hlingen hnyimakan?  
E hu únyi hnân outen igigilö je nyon.
- 15 E ame senyinâ anyin je unö,  
K' adre úohmâkôuâ helâ me únyi hnân okeceâ.
- 16 Adre me oúkeceâ ke at me ke at,  
Me me ca khana ang he ka delec.
- 17 Adre me oúkeceâkôuâ khaca me khaca,  
Adre úkhötkôu, me me ca huân úsâkâúö bi.
- 18 Hnyi hnen hna cihngö ame gâ thö lany,  
Ke tha úcú li emakan me li emakan hnyomakatu.
- 19 Ame o únyi hnyi hnyimen je thi okúnú,  
Ke je wahleúhleúiny meic ame gâ.
- 20 Ame o únyi hnyi li hnyingöiny hai,  
Helâke únyi hnyi öt me bö adre thong.
- 21 Adre omelö je walep ge homenâiny,  
Ke bâhlân ame o únyi hnyi hnyimen.
- 22 E bi hnyi nyin tang hwegien,  
Ke öbubuny ame biâ hnyi hnyimakan.
- 23 Adre oúkeceâkôuâ je ke keihen viny:  
Ke e hwege e, ca hnân bwebwelâ.
- 24 E hwege oúnykúminy helâ me veto;

- Eke, e hwege helâ veto eú hmelen únyi hnân omomono.
- 25 E ka todrö, me haba tawat hwege adre me ot:  
Ame gâudrin ge hnödra hna öbubuny.
- 26 A ne he ke at ka kot e ge hele vat, me únyi baú;  
Helâe minya ge ö, me úde, me fana.
- 27 E ame únykúme fao helâ me thatúnyin hwit,  
Me bras helâ me utö bobot.
- 28 E ame ca he ka kec ge fana:  
Ke e ame wia je veten köloú me me thatúnyin hwit.
- 29 E ame únykúme e úcú je utöhmumu me je thatúnyin hwit:  
E ame hluma úgâiny ö.
- 30 Eú hnyi hmelen helâ me je ec watagi ae so homakan:  
E ame lau helâ me únyi hnân kokot hwit hnyi hon hmudra.
- 31 E ame ocitröuâ köiö ae gan helâ me öt:  
E ame wia köiö me me helâ me wakaco.
- 32 E ame ohauâ hwaban deny gethen;  
Me me he at ka únykúme ae hûen dut köiö ae gan.
- 33 E ba at ae úcú mē eang hmeledrany,  
Adre op he ka ca ot.
- 34 E ame wâ ta je únyi hia ae görany:  
E thibi than hon je lakon bi gan.

HNYIMAKAN 42.

- M**E haba Jobu ame thu kö Iehova me ha, ka habe,
- 2 E khanö nya but ae khanö u he ka ânyâ ta je únyi hia,  
Ke haba hnâm hna únykúme me pason he ka thawâ.
- 3 Ie at ame ikhâlâ úhnenamö me ba wâúnykúme?  
Anyin a wale oge hia but ha únyi oge me ca wâhmakbmeto,  
Je únyi ae beönua huk waleji ae ca khanö nya.
- 4 Ö u löng ju, ke oge me he ka fuc;  
Oge me he ka hnei u, ke nö nya ju.
- 5 Oge hia but löng gam ge li hnyikönyök;  
Ke walang ang ame ö u hnen li emakök.
- 6 Anyin a wale, oge me ikiki nya bi me ietra  
Hnyi sesâ me hnabadröu.
- 7 Ke hwaban hna ha je hofuc eling kö Jobu hnö Iehova, haba Iehova ame ha kö Elifaza at Temana, ka habe, Ame ubâhlâ

## SALAMO 1, 2.

thö anyik hmönyin köu me li lahânâm: anyin a öbun e ca hia but ha gak únyi ae wisa helâ me Jobu athnyabaik. 8 Ke walang ang hom dö hobi köbun bi je bolok a seven, me je mamoe бага a seven, ke he thö kö Jobu athnyabaik, me hudo hobi köbun hudiny leú; ke ame he Jobu athnyabaik ka hic hobi köbun; anyin a oge me he ka kap e, m'oge me ca he ka ânyâ köbun hoton anyibun monu; anyin a öbun e ca ha gak únyi ae wisa helâ me Jobu athnyabaik. 9 Me haba Elifaza at Temana, me Biledad at Sua, me Zofar at Naamathi ödrin e he me ânyâ helâ me hna hûna ga Iehova ködrin: me Iehova ame köp Jobu. 10 Ke Iehova ame ohmetu Jobu úheny hny hna bâ, e ka hijö je lahanen: ke Iehova ame ibi olo ham kö Jobu ta je únyi waleji ae hu gan ehac a bâ. 11 Me ame o kâu je liamekeiny mē hia, me je lahaniny hia, me je hnyat hia a je liamewaeny hia mē ehac, me ödrin e tha han mē eiö hnyin umen uma; me ödrin e tenge kâu, me otu-

bwelâ e hnyi ta je únyi hia ae kong walej a oâ kâu Iehova: ke ödrin e ve ham minya kâu ke mone, ke úsa khaca otru gol. 12 Me Iehova ame gan hmâ oganö Jobu hnyi bongon je bong a biliny hon je bongon a bâ: ke e hu gan ta je mamoe a fotin thauzan, ke siks thauzan je kamela, ke wan thauzan je úcú lo bolok, ke wan thauzan je asina momo. 13 Ke e hu minya gan lakon бага a seven, ke kun ta lakon hlu. 14 Ke e ame hwenyi ien at a bâ, me, Jemima; ke Kezia ien at a loiny, ke Keren-apuka ien at a kuniny. 15 Ke haba hnyi hnyei hia me ba je momo ae hmanenang ka wâ, helâju me ta hlu laku Jobu: ke haba kamödrin ame bi jekhöüdrin helâ me je lahanidrin. 16 Ke hwaban dö e, me möt bala bi Jobu hnyi wan haded ke fâte ta je huna, k' ame wâ lakon, me je laöbiny ke ne o but hnyi dö a vakiny. 17 Me ame mokcu Jobu, ke hingat ut, ke se hia bongon ta je bong.

## TA JE SALAMO.

### TUSI I.

#### SALAMO 1.

**H**NAHIC hnen at ame ca vheno úhne-namö anyin tavat ae monu,  
K' ame ca tot hnyi gethen deny tavat adre me ânyâ hulö,  
K' ame ca laba hnyi tap taben at ame úhiö.  
2 Ke haba hnanyibu anyi Iehova, me wale anyin senyin;  
K' ame labö únykúme ge anyin hnanyibu hnyi lany me lit.  
3 Me e ame he ka úcú me úö adre ta hnyi baten ta je wagewe,  
K' ame wa but wan hnyi huna,  
K' ame ca meleca thö lan;  
K' ame he bi ka hnahic ta je únyi hia e ame ânyâ.  
4 E ca helâe ge tavat ae kong;  
Ke ödra tha úcú me unen whit ame oú ang dö.  
5 Anyin a wale ame ca he bi tavat ae monu ka tot hnyi úhnei,

Ke tavat adre me ânyâ hulö bi, ka tot hnyi úkhacaköu anyin tavat ae wisa.  
6 Anyin a haba Iehova ame wâ gethen deny tavat ae wisa:  
Ke haba gethen deny tavat ae monu, me ame he ka ba but.

#### SALAMO 2.

**I**EÛ can ame imonumonunyköu ta je hnyei,  
K' ame únykúme únyi ae ba troban ge aten ta je hnyei?  
2 Haba je tuhan hmeledrany adre me tet metâ,  
Ke ame tha úsabö je taben,  
He ka hagutö Iehova me at e ame hú me haingödra, ka habe,  
3 E so ate me thamua hnödrü je hna ca,  
Me degec gata hnödrü je hna hûkâlâ.  
4 Ame he at ame laba ethö hnyi drany ka hluma:  
Ke ame he than ka hi' ödra.

SALAMO 3—5.

- 5 Me e ame he ka fuc ködra hnyi anyin hmönyin,  
Me ohmaki ödra hnyi anyin wathe-  
thöt :
- 6 Ke so bi oge hia but otillâ anyik than  
Hon Ziona, anyik bucen ae kap.
- 7 Oge me he ka omanenâ hnanyibu :  
Haingö Iehova könya, ka habe, U thibi  
nökuk ;  
Oge hnöku u hnyi bong ang.
- 8 Sumatö nya thö, me oge me he ka ham  
köu je hnye hnân hwajekhom,  
Me je can hmeledrany hnân em hnye.
- 9 U ma he ka thamú' ödra ge uci a  
fao ;  
Me sa omomonu ödra helâ me utkaia  
adre op.
- 10 Anyin a wale metâ th' öbun je than :  
Ke haba öbun hnyat owisa eang hmele-  
drany, hitangen ju hna úne.
- 11 Bi athnyaba ju kö Iehova me ot,  
Ke senyin dö me öbubuny.
- 12 Úcimhnyimak dö öbun me nokon, wâ e  
nye he ka hmönyin, me hi' öbun dut  
eú hnyi gethen,  
Anyin ame he ka ie kú anyin hmönyin.  
Hnödra hnahic ödra hia adre me laba-  
geju kâu.

SALAMO 3.

*Salamo anyi Davita, hnyi ten e ame kec ga Abasa-  
loma nokon.*

- I** EHOVA lö, adre me osehia je iwahnai-  
hmiöny könya !  
Ödra se hia tawat adre me tot könya.
- 2 E hu tawat ae se adre me ha ge hanuk,  
ka habe,  
E ba úhadruö hobi kâu unyin Khong.  
[Sela.]
- 3 Ke haba u, Iehova lö, u thibi bec igigili  
nya ;  
Ke hmanenangik, me at ame ogöranyâ  
böc.
- 4 Oge me hongot kö Iehova ge ifucik,  
Me e ame thú könya únyi hnyi anyin  
bucen ae kap. [Sela.]
- 5 Oge me hlöhlöu me mokut ;  
Ke oge me hmak hmetu ; anyin a  
Iehova ame ohwegiö nya.
- 6 Oge me ca he ka outen tawat a ten  
thuzan,  
Tawat adre me tot metâ könya igigilö.
- 7 Iehova lö, todrö ; Khonguk lö omeli  
nya thö :

- Anyin a u je hia but kot wahicen je  
iwahnaihmiöny mönya ;  
Ke u je thu hmetro ga nyon tawat ae  
monu.
- 8 E unyi Iehova úhomeli :  
E na e ju ányâm hnahic ka hnyi hon  
lakem. [Sela.]

SALAMO 4

*Hobi kâu At vñik khumöng ; hnyi Neginoh.  
Salamo anyi Davita.*

- K** HONGON hwakecik ae wisa lö,  
ling nya ju, iny ka hawo u ;  
U je hia but thöng nya únyi hnyi  
anyik vec,  
Betenge ju könya, me löng hijik hic.
- 2 Lakon at lö, öbun e he ka wia soik  
me me hnân hmehmâ ke ne o but  
kehö ?  
K' öbun e he ka hnyokâ únyi ae únyi  
baú, me elâm thoi, ke ne o but kehö !  
[Sela.]
- 3 Mē khan' öbun dö a Iehova ame hia  
but hake ip at ae kap hobi kâu  
e bi :  
Ame he Iehova ka löng iny ka hawâ.
- 4 Ot ju, ke ca ányâ bi hulö :  
Únhenamö thö me je hnyekubun hon  
hnöbun hna mokut, ke ca bwebwet bi.  
[Sela.]
- 5 Hudö thö ta je hudiny hwakecin ae  
wisa,  
Ke labageju thö kö Iehova.
- 6 E hu tawat ae se hia adre me ha, ka  
habe, Ie at ame he ka omanenâ köta  
so ?  
Iehova lö, ogöranyâ thö humun mela-  
miny hnyimákâm.
- 7 U je hia but ip hnyi hnyekuk senyin  
Ae gan hon úen adre osehia anyidra  
hwit me waina.
- 8 Oge me he ka hlöhlöu me mokut minya  
hnyi hnahic :  
Anyin a u thibi Iehova ame olabö nya.  
khötkici nya.

SALAMO 5.

*Hobi kâu at vñik khumöng ; ge Nehilot. Salamo  
anyi Davita.*

- J** EHOVA lö, löng ju ka ta je ifucik,  
Únykúme ju mekhunen hnyekuk.
- 2 Tuhök me Khonguk lö, tevehlöng ju ka  
hok hwatenge :  
Anyin a oge me hic köu.



SALAMO 6, 7.

- 3 Iehova lö, hnyi hnyomakatu u ma he ka löng hok ;  
Hnyi hnyomakatu oge me he ka ha gaga hijik hic köu me hmáká.
- 4 Anyin a u ca Khong at ame senyin ka hwakecin ae kong :  
Ke ame ca he hulö ka laba unyâm.
- 5 Ame ca he ka tot hnyi hnyimákâm tavat bi gan :  
U me ikiki gadra hia adre me ânyâ hwakecin ae kong.
- 6 U ma he ka ohî' ödra adre me ha je thoi :  
Ke Iehova ame ikikiâ at ame hingâlâ dra me iyawâ.
- 7 Ke haba inya, oge me he ka didrö ka hnyin umâm uma hnyi ânyâm je ibetengiö ae se hia :  
Ke oge me he ka khudrung ka hnyi umâm uma ae kap me ot köu.
- 8 Iehova lö, lili nya ju ge hwakecâm ae wisa, can je iwahnaihmiöny mönya ;  
Owisa thö dem gethen hnyi hnyimakök.
- 9 Anyin ae ba ke hnathu hnyi je hnyimödra ;  
E kong hmönyin hnyekudra :  
Haba je jeköwidra, me helâ me erkemok ae memang ;  
Ke adre me ütakü ge bohmödra.
- 10 Khong lö, haikongu ödra but ;  
E so adre me ta únyi ge anyidra bi je úhnenamö :  
Ob' ödra but can adre osehia hanyââ Anyin adre me úkhin fuc möu.
- 11 Ke so ame he ka senyin tavat hia adre me labageju köu,  
E so adre me he bala ka hongot senyin, anyin a u thibi at ame sing ödra :  
E so ame he ka senyin köu minya tavat adre me hnyokâ iâm.
- 12 Anyin a u me he ka ohnahicâ at ae wisa ;  
Iehova lö, u me he ka söng igigilöâ ge ibetengiö helâ me bec.

SALAMO 6.

*Hobi kau at chik khumöng ; ge Neginoth, adre hai hnyi eiliny. Salamo anyi Davita.*

- I**EHOVA lö, ca he ka ú nya hnyi ânyâm hmönyin,  
Ke ca he minya ka nö nya hnyi ânyâm wathethöt.
- 2 Iehova lö, betenge ju gak ; anyin a meleca thö unyik ;  
Iehova lö, ometu nya, anyin ame öbubuny je jeien unyik.

- 3 K' ame ot gan hmâ hanuk :  
Ke haba u Iehova, me ieü ün gam ?
- 4 Iehova lö hmetu jem, me omelö hanuk :  
Omeli nya únyi ge ânyâm ibetengiö.
- 5 Anyin a haba ödra ka mokcu, me adre me ca he bi ka únykúmi u :  
Ie at ame he ka ole köu eü hnyi erkemok ?
- 6 Iny sēnyin dut ge anyik mâng ;  
Ame uoü hnök hna mokut ge tenge hnyi je lit hia ;  
Oge me okhubetâ hnok hna mokut ge deköien li emakök.
- 7 Ame jok ut li emakök ge hlöuhlöu ;  
Ke hadedak únyi ge je iwahnaihmiöny mönya hia thithö.
- 8 Úsákáüö but mönya, öbun hia th hö hnyat öbun e ânyâ hulö ;  
Anyin a hia but Iehova löng hok hwatenge.
- 9 Iehova ame hia but löng hnök hna sumâtâ ;  
Ame he Iehova ka kap hijik hic.
- 10 Ame he ka hmehma me ot gan hmâ ta je iwahnaihmiöny hia thithö mönya :  
Adre me ne ka hmetuhmetu, k' adre me he ka ie hmehma.

SALAMO 7.

*Salamo anyi Davita e ame khumöngü kö Iehova únyi ge ta je hofuc ho Kusa at Beniamina.*

- I**EHOVA Khonguk lö, oge me labageju köu :  
Omeli nya ju gadra hia thithö adre me hnu nya, ke hügünö nya but :
- 2 Wâ e nye he ka kia hanuk helâ me man liona,  
Me kia omomono e, ke ba at he ka omeli nya.
- 3 Iehova Khonguk lö, oge ne hia but ânyâ únyi ang ;  
Ke ame ne e bi hulö hnyi li hnyamök ;
- 4 Ke oge ne hia but bi hwaban kong ka at ae úsoköu mönya ;  
(Eke, oge hia but hna but at ae iwahnaihmiöny mönya ke ba can :)
- 5 E so e he iwahnaihmiöny ka hnu hanuk, me kât e ;  
Eke, e so e ame he ka uto ju anyik möt ka hnyi kânâ,  
Me ip hmanenangik eü hnyi sesá. [Sela.]
- 6 Iehova lö, todrö hnyi ânyâm hmönyin,  
Höhöi thö ge hmönyin anyin je iwahnaihmiöny mönya :

SALAMO 8, 9.

- Ke hmákâ thö hobi könya : u je hia but otilâ hna owisa.
- 7 Ke so ame igigili u úkacaköuiny ta je hnyei :  
Ke hmetu ju hudrin ka hnyi dok ae görany.
- 8 Iehova ame owisa ka ta je hnyei :  
Iehova lö, owisö nya ju helâ me hwakecik ae wisa, me hwakecik ae ba hnyikongon.
- 9 E na hu obiny ju monu anyin tavat ae kong, ke otethmâ ju at ae wisa :  
Anyin a Khong at ae wisa ame elâm ta je hnyok me ta je únykúme.
- 10 E unyin Khong singik,  
At ame omelö tavat ae wisa hnyekudra.
- 11 Haba Khong at owisa ae wisa,  
Eke, e Khong at ae hmak ge monu hnyi je bong hia.
- 12 Ke ne a ne ca hwiö hmetu at, me ame he ka khet anyin hele vat ;  
E ame hia but oto anyin cafana me penapena e.
- 13 Ke ame hia but penapena hobi kâu minya ta je únyi hnân hlingâ ;  
E ame he ka vâc anyin je fana.
- 14 Wâ bi, ame vec hnyekon ge hulö ;  
Eke, e ame erkinâ but úokonguny, me hnokoâ thoi.
- 15 E ame hia but hiny thop, k' ame hiny dilâ,  
Me ame ka kölu but ka hnyi thop waleji e ame ânyâ.
- 16 Ame he anyin monu ka hmetuhmetu ka hnyi hon ban,  
K' ame he hnen hna sihnân ka ta hmetu ka hnyi wanben ban.
- 17 Oge me he ka ole kö Iehova hoton hwakecin ae wisa :  
K' oge me he ka khumöng olungâ iö Iehova ae Beönua.

SALAMO 8.

*Hobi kâu at whik khumöng ; adre me hai hnyi Githh. Salamo anyi Davita.*

- I** EHOVA lö, Tuhöhmun,  
E ti so iâm hnyi hmeledrany hia thithö !  
U je hia but ip ânyâm hmanenang ethö hon drany.
- 2 Únyi hnyi hnyimen ta je mendring me ta je inma u je otilâ tang hwege,  
Can ta je iwahnaihmiöny möu,  
M' u me he ka olaba wia iwahnaihmiöny,  
me at ame bi hwaban hmetu.

- 3 Oge me wâ hmâ ânyâm drany a huliwan ge ta je banyâm,  
Wale tehi me ta je okhú u je hia but otilâ ;
- 4 Ehö at bi, m' u me ke ka únykúme gan ?  
Me nokon at, m' u me he ka senâ ?
- 5 Anyin 'a u je op e me me omi úhnyûkong bi hnyi hmelen Khong,  
Me obicâ e ge mec me úoganö.
- 6 U je otilâ e he ka musö ta je huliwa anyin li hnyamâm ;  
U je hia but ip ta je únyi hia thithö eü hmelen li can :
- 7 Ta je mamoe me ta je bolok hia,  
Eke, me ta je menoiny hnyot :
- 8 Ta je meno ame gâ ethö, me ta je wâ eü hnyi köiö,  
Me ta únyi hia adre me ka ve vheno dedra je gethen hnyi köiö.
- 9 Iehova a Tuhöhmun lö,  
Shaiba ge únuainy iâm hnyi hmeledrany hia thithö !

SALAMO 9.

*Hobi kâu at whik khumöng ; adre hai hnyi Muthlaben. Salamo anyi Davita.*

- O** GE me he ka oleâ kö Iehova ge hnyekuk ae bekhöt ;  
Oge me he ka haimemenâ ânyâm ta je huliwa hnân láia.
- 2 Oge me he ka senyin me hobâ köu :  
Ataebeönua lö, oge me he ka khumöng olungâ iâm.
- 3 E ka hmetu je iwahnaihmiöny mönya,  
Adre me haü me hi' ödra hnyi hnyimákâm.
- 4 Anyin a u je hia but ci' nya hnyi anyik wisa me hnök hna ivinö ;  
U je laba hon theron me owisa hnyi wisa.
- 5 U je hia but hijingâ je hnyei, u je ohia tavat ae kong,  
U je kot degecâ je iödra ke ne o but nyiele balua.
- 6 Haba iwahnaihmiöny adre me oum' ödra bi, e ba wan gadra balua ;  
Me je taun u je hia but oc degecâ,  
A aú but minya hna únykúme ködra.
- 7 Ke ame laba Iehova a than nyiele balua :  
E ame hia but penapena anyin theron hnân úhnei.
- 8 Ke e ame he ka owisa hmeledrany hnyi wisa,

SALAMO 10.

- E ame he ka owisa soâ tavat.
- 9 Ame he Iehova ka bi hñabâ hobi kâu tavat adre me sed' ödra, Hñabâ hnyi je bonginy vec ;
- 10 Ke haba tavat ae khan' ödra iâm, me adre me he ka labageju köu ; Anyin a haba u, Iehova, u je ca hna degecâ tavat waleji adre me elöm u.
- 11 Khumöng olungi Iehova, at ame labâ Ziona : Omanenâ thö hnyi wanben ta je hnyei hnen je hna ânyâ.
- 12 Anyin a haba at ame hnei can dra ame ûnykûmi ödra : K' ame ca hnying hwatenge hwan tavat ae theduoc.
- 13 Iehova lö, betenge ju gak ; Wâ ju anyik vec ûnyi ge tavat adre me hûkötio nya, U at ame köp nya göranyai ûnyi hnyi homagöuleny mok ;
- 14 Me inye he ka haimemenâ je hofuc hia hnân oğanö u : Ke oge me he ka senyina ûhömeli gam, Hnyi je homagöuleny hlu nöku Ziona.
- 15 Haba ta je hnyei adre me û but hnyi thop adre hia but ânyâ : K' ame hnok dö je cadra hnyi ert adre me ikhâlâ.
- 16 Ke haba Iehova ame omanenâ e bi, k' ame owisa : K' ame hnok dö at ae kong ge huliwa anyin li hnyamen. [Higaiona. Sela.
- 17 Ame he tavat ae kong ka hmetu ka hnyi hedis, Wale ta je hnyei hia adre me hnying Khong.
- 18 Anyin adre me ca he balua ka hnying tavat ae theduoc, K' ame ca he balua ka hia labageju anyin tavat ae ba ta ûnyi.
- 19 Iehova lö, todrö ; e so ame ca he at ka ton : E so adre me owisa ta je hnyei hnyi hnyimâkâm.
- 20 Iehova lö, ooti ödra ju ; Omanenâ thö ka aten ta je hnyei a ödra tavat bi. [Sela.

SALAMO 10.

- I** EHOVA lö, ieu gam a u me tot sâ-kâu ?  
Me lubaduöng hnyi je ûen ae vec ?
- 2 Adre me hwege hnu tavat ae theduoc hnen tavat ae kong ke bi gan ;

- E so adre me nuc ödra hnen je bibihwa-kecin adre me ûnykûme.
- 3 Haba at ae kong ame ohobeluâ weny hnyekon, K' ame hota degecâ hnen at ae behnyekon, me hmiö Iehova.
- 4 Haba at ae kong, ûnyi hnyi bi ganiny hnyimakan, ame ha, ka habe, E ame ca he ka elâm e. Ke haba hnen je hna 'ûnykûme hia, ka habe, E ba bi Khong.
- 5 E hmâ balua deny je gethen ; E sâkâû balua gan ânyâm je hna owisa : Ke haba je iwahnaihmiöny hia mē, e ame tú' ödra.
- 6 Haingen eû hnyi hnyekon, ka habe, Oge me ca he ka bwebwet : Hnyi je dö hia oge me ca he balua ka vec.
- 7 A unöngötö hnyimen ge ûhangö, me iyawö, me seda : Eû hnyi hmelen bohmen ûokonguny me hulö.
- 8 E ame laba tue hnyi je dok ae iyong hnyi je taun : E ame hlingâ tavat ae ba hnyikongon hnyi ta je dok ae nuong : Haba li emakan ame ecmâkâ tavat adre me okongoâ.
- 9 E ame laba hnyi dok ae nuong helâ me liona hnyi umen op : E ame mokut duöng he ka kât at adre ovecâ : E ame kât at adre ovecâ, me lelö e hnyi úten ert.
- 10 E ame iyâû, me nom, Me ame ta but tavat adre ovecâ hnen anyin tavat ae hwege.
- 11 Haingen eû hnyi hnyekon, ka habe, A hnying ut Khong : E ame ikhâlâ hnyimakan ; e ame ca he balua ka wâ.
- 12 Iehova lö, todrö ; Khong lö hai thö hnyamâm : Ca he ka hnying tavat adre ovecâ.
- 13 Geû ame hmiân Khong hnen at ae kong, Me ha eû hnyi hnyekon, ka habe, U me ca he ka hnei can ?
- 14 U je hia but wâ e ; anyin a u me wâ úveci me vec, he ka hom e hnyi hnyamâm : Ke haba at ae theduoc ame hna but e bi köu ; U thibi at ame hadruâ nakahme.
- 15 Ohmetro but benyin at ae monu ; Ke haba at ae kong, e so u ma elâm

SALAMO 11-13.

- hwakecin ae kong me me ba hmetu  
hnâm hna wâ.
- 16 Iehova thibi Than nyiele nyiele balua :  
A hia but je hnyei únyi hnyi iny  
hnyei.
- 17 Iehova lö, u je hia but löng weny tavat  
ae hnyikânâ :  
U me he ka otilâ hmâ je hnyekudra, u  
me he ka tevehlöng :
- 18 He ka owisa ka nakahme me tavat adre  
ovecâ,  
Me me ca he hmetu bi at a aten hmele-  
drany ka hwege hnyimakan.

SALAMO 11.

*Hobi kâu at thik khumöng. Salamo anyi Davita.*

- I**NYA oge me labageju kö Iehova :  
Anyin a ieü öbun e ha ka hanuk, ka  
habe,  
Kec dö helâ me meno ame gâ ka hnyi  
anyibun bucen ?
- 2 Anyin a wâ bi, ame lau cafana hnen  
tawat ae kong,  
K' adre me ip anyidra fana hnyi tö,  
M' adre me he ka fana hnyi menekho-  
lom tavat ae wisa hnyekudra.
- 3 Adre me ne ohia ta je taben,  
Ieü ame he tavat ae wisa ka ânyâ ?
- 4 E bi Iehova hnyi umen uma ae kap,  
Wale Iehova, ethö hnyi drany anyin  
theron ;  
Haba li emakan ame wâ, k' ame cubec  
lakon at hnen li bademakan.
- 5 Iehova ame cubec at ae wisa :  
Ke e ame hûkötîâ at ae kong, me at  
ame beüokonguny eü hnyi hnyekon.
- 6 E ame he ka öta helâ me we ta je hnöwe  
hon at ae kong ;  
Haba meic, me teio, me ang ame hlâ,  
me wale kaia a jekhöüdra.
- 7 Anyin ae wisa Iehova ; k' ame hnyokâ  
hwakecin ae wisa ;  
E ame he ka wâ hnyimakan at ae wisa.

SALAMO 12.

*Hobi kâu at thik khumöng ; adre me hai hnyi Se-  
minith. Salamo anyi Davita.*

- I**HOVA lö, omelö thö ; anyin ae ba at  
ae wisa hwakecin ;  
K' ame hia but tavat ae hnathu unyin  
lakon tavat.
- 2 Adre me ve ha thoi ka at ame laba ha-  
kekenyi ödra :

- Adre me fuc ge je esongodidra ae útakú,  
me hnyok lo.
- 3 Ame he Iehova ka subâ degecâ ta je  
esongot hia ae útakú,  
Me bohmen minya ame fuc bi gan :
- 4 Waleji tavat adre me ha, ka habe, Ame  
he ka tuhmun ge je bohmöhmun ;  
E unyihmun bi je esongodihmun ; ia  
tuhöhmun ?
- 5 Can adre okongoâ tavat vec, can mâng  
anyin tavat ae theduoc,  
Oge me he ka todrâ walang ang, haingö  
Iehova ;  
Oge me he ka ip wia at wale adre me  
túâ.
- 6 Hofuc ae kalaöt je hofuc ho Iehova ;  
Helâ me sileva adre le hnyi meic eü  
hnyi kânâ  
Wale adre, oseven le.
- 7 Iehova lö, u me he ka tu' ödra,  
U me he ka tu ödra únyi ge dö ang  
nyiele balua.
- 8 Ame vhenö je ke keihen hia hnen tavat  
ae kong,  
Ödra ka ogöranyâ hwakecin ae ikiki  
unyin lakon tavat.

SALAMO 13.

*Hobi kâu at thik khumöng. Salamo anyi Davita.*

- I**HOVA lö, u me he ka hnying nya  
ke ne o but kehö ? ke ne o but nyiele  
balua ?  
U me he ka ikhâlâ hnyimákâm gak ke  
ne o but kehö ?
- 2 Ke ne o but kehö oge me he ka úhne-  
namö eü hnyi hanuk,  
Me hmak ut hnyekuk hnyi lany hia ?  
Ke ne o but kehö ame he iwahnaihmiöny  
mönya ka beönua huk ?
- 3 Iehova lö, Khonguk, únykúmi nya me  
ling nya :  
Omelamá li emakök, wâ oge nye mokut  
me mokcu ;
- 4 Wâ e nye he iwahnaihmiöny mönya ka  
ha, ka habe, A tuk ut hon ;  
Ke wâ e nye he tavat adre me oveci  
nya ka senyin iny ka bwebwet.
- 5 Ke oge hia but labageju hnyi ânyâm  
ibetengiö,  
Ame he hnyekuk ka senyinâ ânyâm  
úhömeli :
- 6 Oge me he ka khumöng kö Iehova,  
Anyin a e ama hia but betenge gan  
hmâ könya.

## SALAMO 14.

*Hobi kdu at rhik khumöng. Salamo anyi Davita.***H**AINGEN at ae monu eü hnyi hnye-  
kon, ka'haba, E ba Khong.Odra bo kong, adre me anyâ ta je hu-  
liwa ae ikiki ;

E ba at ame mâdrâ so.

2 Iehova ame bwele jem ethö hnyi drany  
ka wâ lakon at,Me me wâ thö, hawa, e hu at ame wâ  
ûnykûme,

A at ame elâm Khong.

3 Ödra hia adre me saû ; k' adre me tha  
kong ut ;E ba at ame mâdrâ so, e ba hmönyin  
me khaca.4 Hawa, e ba hnyekudra tavat hia adre  
anyâ hulö ?A tavat adre me an lakeik helâke me  
hna an jeû,

K' adre me ca hongot bi kö Iehova.

5 Haba hnyi dok eîng adre me ot gan  
hmâ :

Anyin a e Khong unyin tavat ae wisa.

6 Öbun e ohmehma ûhnenamö anyin tavat  
adre me vec,

Anyin a Iehova bi hnen hna lubaduöng.

7 E na he ju möt kö Isaraela úheny  
Ziona !E ka he Iehova ka ohmetö lakeiny úhe-  
dra hnyi hhabâ.Me ame he Jakob ka senyin, k' ame he  
Isaraela ka hobâ.

## SALAMO 15.

*Salamo anyi Davita.***I**EHOVA lö, ie at ame he ka mē laba  
hnyin umâm uma menâ ?Ie at ame he ka laba hon anyâm bucen  
ae kap ?2 E so thibi at ame he wisa, me anyâ wisa,  
K' ame ha hnathu únyi eü hnyi hnyekon.3 A at ame ca bi fuc ge bohmen,  
K' ame ca okongoâ liamewaeny mē,Me ca kap bi hna haikongoâ at ame  
laba hakekenyâ e.4 E hûkötö li emakan at ae ikiki ;  
Ke e ame oganâ tavat adre me outö  
Iehova.E ame khemanyin me okongoâ e bi, k'  
ame ca hwiö bi.5 At ame ca mē ham anyin mone ge  
hwaban,Me ca kap hwaban hnân okongoâ at ae  
ba hnyikongon.Ame ca he balua ka bwebwet at ame  
mâdrâ ta je únyi e.

## SALAMO 16.

*Salamo anyi Davita.***K**HONG lö, tuö nya ju : anyin a inya  
oge me labageju köu.2 Oge hia but ha kö Iehova, ka habe, U  
thibi Tuhök :

E ba soik ke unyâm thibi.

3 Ke haba tavat ae kapeang hmeledrany,  
Ödra tavat ae beönua soidra, wale oge  
me ti senyin ködra.4 Ame he ka se hia vec ka tavat adre me  
hwiö ka ke khong :Oge me ca he ka hudo anyidrin je hu-  
diny dra hnân ic,

Ke hom ta je iödrin ge li esongodik.

5 Iehova thibi jekhök me anyik kaia ;  
U thibi at ame otethmâ jekhök.6 A aat dö kõnya je tulut hnyi dok ae so  
hmönyin ;

Eke, e so kõnya ik.

7 Oge me he ka oganö Iehova at ame nö  
nya :Eke, ame siwhegiö nya hnen hnyekuk  
hnyi je lit.8 Oge hia but ip Iehova bala hnyi hnyi-  
makök :Oge me ca he ka bwebwet, anyin a e bi  
hnyi ke keihök a metök.9 Anyin a wale ame senyin hnyekuk, me  
hobâ anyik mec :Ame he but minya unyik ka laba hnyi  
gejon.10 Anyin a u me ca he ka hna but hanuk  
ka hnyi hedis ;Ke u me ca he ka hna degecâ atâm ae  
kap he ka wâ hna bobot.11 U me he ka omamenâ kõnya gethen  
deny möt :E unöngötö senyin hnyi hnyimâkâm ;  
Ke e hnyi hnyamâm a metâm ta je  
únyi hnân osenyinâ nyiele balua.

## SALAMO 17.

*Hic hiji Davita.***I**EHOVA lö, löng ju únyi ae wisa, hwiö  
jem ka anyik tenge ;Tevehlöng ju hijik hic, ame ca o únyi  
hnyi li esongot ae thoi.

SALAMO 18.

- 2 E so ame he ka o únyi hnyi hnyimákâm hna owisa gak ;  
E so ame he li emákâm ka wâ únyi ae úcú.
- 3 U je hia but cubec hnyekuk ; me senö nya hnyi lit ;  
U je hia but cubic nya, ke ba wânâm ;  
Oge me ip hmâ eú hnyi hnyekuk a g' ame ca he hnyimök ka hanyáúá.
- 4 Haba ta je huliwa anyin tavat, me, únyi ge ifuciny li esongodâm  
Oge hia but tuö nya m' inye ca he hnyi je gethen deny tavat úkuc.
- 5 Ame he hmâ hnök je hna okca hnyi dem je gethen,  
K' ame ca haú bi li cak.
- 6 Khong lö, oge hia but hao u, anyin a u me he ka ling nya :  
Tevehling nya ju, me löng ju hok hofuc.
- 7 Omanená thö ányâm ibetengiö ae gan hmâ, u thibi at ame omelö tavat adre me labageju köu  
Ge hnyamâm a metâm, unyin tavat adre me tot ködra.
- 8 Tuö nya ju helâ me wahlidrin y ecmak, Ikhölö nya ju hnyi hmenon li labe-nyâm,
- 9 Únyi ge tavat ae kong tavat adre me oáú nya,  
Wale ta je iwahnaihmiöny hmönyin könya, hnyat adre me igigili nya.
- 10 Adre me lan ödra bi ge anyidra pipi-khenya,  
K' adre me hobelu' ödra ge je hnyimödra bi.
- 11 Walang ang adre me igigilö hnöhmun je hna okca :  
Adre me iwahmö he ka otai öhmun hnyikánái.
- 12 Haba at e, me helâ me liona ame bekie he ka han,  
Ke helâ me nak liona at ame laba tue hnyi je dok ae iyong.
- 13 Iehova lö, tödro,  
Tot metá kâu, me hagutâ e :  
Omelö thö hanuk únyi ge at ae kong ge ányâm hele vat ;
- 14 Iehova lö, omeli nya thö únyi ge tavat hnen hnyamâm,  
Únyi ge aten hmeledrany, tavat tren jekhóu hnyi möt ang,  
U je öunöngötâ je tang tidra ge tang omjehem :  
Adre sekudra but je lakudrin,  
Ke adre me hna kolon ge anyidrin ta je únyi ka lakudrin je mendring.

- 15 Ke haba inya oge me he ka wâ hnyi-  
mákâm hnyi hwakecin ae wisa :  
Ame he ka sekuk, iny ka hmak dö a  
tha helâ möu.

SALAMO 18.

*Hobi kâu at chik khumöng. Salamo anyi Dac'a athnyabai Iehova, waleji at ame ha kö Iehova je ifuciny khumöng ang hnyi bong Iehova ame omelö e únyi hnyi hnyamca je iwahnaihmiöny mä hia, me únyi hnyi hnyamö Saulo : ke hainga, ka habe,*

- I** EHOVA lö, tang hwegiök, oge me hnyok köu.
- 2 Iehova thibi kicik, me hnök hhabâ, me at ame omeli nya ;  
Khonguk, kicik ae hmâ, oge me he ka labageju kâu ;  
Becik, me faoiny meno hnân omeli nya, me anyik tap ae beú göranyai.
- 3 Oge me he ka hongot kö Iehova, at ae úcú hnân oganá :  
Me ame he ka omeli nya únyi ge je iwahnaihmiöny mönya.
- 4 Adre wadrö nya ge ta je tö hnân me-  
kiny,  
K' ame ooti nya hnen je uoúiny hwa-  
kecin ae kong.
- 5 Adre igigili nya ge je töiny erkemok :  
Ame o but könya ta je hnewe hnân mekiny.
- 6 Oge me hongot kö Iehova hnyi anyik vec,  
Me khóu ka Khonguk :  
Ke e ame löng hok hofuc hnyi umen uma ae kap,  
Ke hok hwatenge hnyi hnyimakan ame o but ka hnyi li hnyikönyen.
- 7 Ke ame bwebwet me öbubuny hmele-  
drany,  
Ke memeny dö minya taben je bucen,  
Ke okokok ut, anyin a e hmönyin.
- 8 Ame sâ bai únyi hnyi li hnyingöiny,  
Ke meic ame han únyi hnyi hnyimen :  
K' ame möt dö gan ta je walep.
- 9 E ame oto minya drany, me utut ;  
Ke eú hmelen li can bi menekholom ae khöt.
- 10 Ke e ame laba hon kerubi, me gâ :  
Eke, e ame gâ mweimwei hon li labe-  
nyin ang.
- 11 E ame lubaduöng hnyi menekholom,  
wale umen uma menâ igigilö e ;  
Wale angwe, a je úláiny drany ae haki
- 12 K' ame áu but anyin je úlá únyi ge melaminy hnyimakan,

SALAMO 18.

- We ae wahma me je walepiny meic.
- 13 Iehova ame bi hwan than minya hnyi drany,  
K' ame fuc dö Beönua ;  
We ae wahma me je walepiny meic.
- 14 Ke e ame fana anyin je fana me ovesei ödra ;  
Eke, je hucuce ae se, me omomonu ödra.
- 15 Ke manen dut je deny je di,  
K' adre me omanená ta je taben hmele-drany,  
Ge hnâm hna thawâ, Iehova,  
Ûnyi ge homenáiny li hnyingöiâm ae hwege.
- 16 E ame úkhúnöng úheny thö, e ame hum nya ;  
E ame lili nya únyi hnyi je köiö ae se.
- 17 E ame omeli nya únyi ge iwahnaihmiöny mönya ae hwege,  
Me tavat adre me húkotiö nya, anyin a ödra hwege huk.
- 18 Adre me o könya hnyi bonginy anyik vec :  
Ke Iehova cik.
- 19 E ame su nya minya ka hnyi dok ae lau ;  
E ame omeli nya anyin a e ame senyin könya.
- 20 Haba Iehova ame bi hwaban könya hoton hwakecik ae wisa ;  
E ame bi hwaban könya eúcú me li hnyamök ae kalaöt.
- 21 Anyin oge hia but vhenö je gethen de Iehova,  
Ke oge me ca saú degec monoá Khonguk.
- 22 Anyin a eú bi hnyi hnyimakök hnen je hna owisa hia,  
Ke oge me ca hota but gak anyin je hnanyibu.
- 23 Ke ba hnyikonguk minya gan,  
Ke oge me tuö nya bi ge anyik hulö.
- 24 Anyin a wale a hia but Iehova bi hwaban könya hoton hwakecik ae wisa,  
Me kalaötiny li hnyamök hnyi hnyimakan.
- 25 U me he ka betepge ka at ame betenge ;  
U me he ka wisa ka at ae wisa ;
- 26 U me he ka hwakecin ae kalaöt, ka at ae kalaöt hwakecin ;  
Ke u me he ka ányâ hwali ka at ae hwali hwakecin.
- 27 Anyin a u me he ka omelö tavat ae vec ;  
Ke u me he ka ohnyikánâ je ecmak ae bi gan.
- 28 Anyin a u me he ka omelö anyik lamepa :  
Ame he Iehova Khonguk ka omelamá anyik menekholom.
- 29 Anyin a únyi gam oge me utut ka hnyi hon deö vat ;  
Ke únyi ge Khonguk oge me gâ hanyâúâ hna up hak.
- 30 Ke haba Khong, e wisa deny gethen :  
Haba hofuc ho Iehova adre me cubec ;  
E thibi bec anyin tavat hia adre me labageju kâu.
- 31 Anyin a ia Khong, e ka ca Iehova ?  
Ke ia bi kic, e ka ca Khonguta ?
- 32 Wale Khong at ame oweikö nya ge man,  
Me owisa dek gethen.
- 33 E ame ányâ li cak me me helâ me je aila :  
Me ip nya hon anyik je dok ae görany.
- 34 E ame ná li hnyamök he ka vat ;  
Me ame oto cafana bras ge li hnyamök.
- 35 U je hia but ham minya könya becin ányâm úhömeli :  
K' ame köp nya göranyai hnyamâm a metâm,  
K' ame oganö nya hwakecâm ae menyik.
- 36 U je oganá hnök je hna okca hmelik,  
K' ame ca haúhaú li hnyeúcak.
- 37 Oge me he ka hnu hoton je iwahnaihmiöny mönya me khöú ödra :  
K' oge me ca he ka hmetu ke ne o but adre ohi' ödra.
- 38 Oge me he ka kot mou ödra m' adre me ca he ka tot hmetu :  
K' adre me he ka ta but eú hmelen li cak.
- 39 Anyin a u je oweikö nya ge man ae gan hobi kâu vat :  
U je hom úhnyúkongu ödra eú hmelek, tavat adre me tot könya.
- 40 U je wia hoton je iwahnaihmiöny mönya könya nya bi,  
Me inye he ka subâ degecâ tavat adre me húkotiö nya.
- 41 Adre me khöú ke ba at úhömeli :  
Wale kö Iehova, ke e ame ca fuc ködra.
- 42 Me oge me kot omomonu ödra helâ me sesâ hnyi hnyimakan ang :  
Oge me kot degeci ödra helâ me hmu-drainy gethen.
- 43 U je omeli nya únyi hnyi je iwatretra anyin tavat ;  
U je wiö nya me hnân ban ta je hnyei :  
Ame he ka bi athnyabaik tavat ae ca khanö nya.
- 44 Adre me he ka löng me ie löng hotuk :  
K' ame he je atkanyua ka nom könya.
- 45 Ame he je atkanyua ka aú tot,  
Me o únyi hnyi anyidrin je dok ae 'nuong me öbubuny.

SALAMO 19, 20.

- 46 E möt Iehova ; e so he ka olongo kicik ;  
Ke so adre me ogöranyâ Khongon melik ;
- 47 Wale Khong at ame bi nya,  
K' ame hom úhnyúkongoâ ta je hnyei  
hnyi hmelik.
- 48 E ame omeli nya únyi ge je iwahna-  
ihmiöny mönya :  
Eke, u je ogöranyi nya hon tavat adre  
me tot könya :  
U je omeli nya únyi ge at úokonguny.
- 49 Anyin a wale oge me he ka oleâ köu  
Iehova, hnyi wanben ta je hnyei,  
Me khumöng olungo iâm.
- 50 E gan hmâ hnen hna oâ úhömeli hobi  
kâu than a aten ;  
Me e ame omanená ibetengiö ka hnen  
hna hú,  
A Davita me je mâtrâniny nyiele balua.

SALAMO 19.

*Hobi kâu at vchik khumöng. Salamo anyi Davita.*

- A** ME omanená je drany mec anyin  
Khong ;  
Ke haba hnen ang ethö ame omanená  
huliwa anyin li hnyamen.
- 2 Ame fuc ke bong ka ke bong,  
Ke ke lit ame omanená metâ ka ke lit.
- 3 E ba bi hwan me ba hofuc ;  
Ke adre me ca löng bi hodra.
- 4 Ame he but anyidrin tö tutut ka hnyi  
hmeledrany hia,  
Me hodrin je hofuc ke ne o but ka hnyi  
je can hmeledrany.  
E ame hia but otilâ hnyin uma menâ  
hobi kâu seúnö,
- 5 Wale ae úcú me at a tep faipoipo ame  
he but úheny hnyi hnyeuleny,  
Ke e ame senyin helâ me at ae hwege  
he ka wadringâ deny gethen.
- 6 Eame o but úheny hnyi can hmeledrany.  
Ke haba deny gethen ame he ke ne o  
but ka hnyi ke je can :  
Ke ba ke únyi adre ikhâlâ únyi ge  
kahwainy.
- 7 E bekhöt ut hnanyibu anyi Iehova, ame  
ohâtâ hanu :  
Ke e hmâ hnö Iehova hna ohnathoâ,  
ame ometà at ae ba oúnykuminy.
- 8 E wisa ta je hna húna hnö Iehova, ame  
osenyinâ hnyok :  
E alai hnanyibu anyi Iehova, ame ome-  
lamâ je ecmak.
- 9 E kalaüt ot kö Iehova, ame tethmâ  
nyiele balua :

- E hnathu ta je hna owisa hnö Iehova,  
me wisa hia thithö.
- 10 Ame beönua hon gol, eke, me gol ae so :  
E hnebwia hon hani minya, me hani  
adre ca hlec.
- 11 K' adre me khû hnyekon athnyabaem  
ge ta je únyi e :  
Ke gan hmâ troban ködra tavat adre  
me löng hoton.
- 12 Ie at ae khana he ka wâ monu unyin ?  
Ö u degecâ but anyik ta je monu ae  
iyong.
- 13 Ö u thawâ ju athnyabaem m' oge me  
ca bi gan ;  
K' ame ca he únyi eling ka musu nya :  
me me wisa hwakecik,  
Ké ba hnyikonguk únyi ge hna hanyáúá  
ae gan hmâ.
- 14 E so e me he je hofuc hnyi hnyimök me  
je hna únykúme eú hnyi hnyekuk ka  
úcú but hnyi hnyimákâm,  
Iehova, kicik, at ame omeli nya.

SALAMO 20.

*Hobi kâu at vchik khumöng. Salamo anyi Davita.*

- E** na he ju Iehova ka löng köu hnyi  
bonginy vec ;  
Me ogöranyi u ge ien Khongu Jakob ;
- 2 Me kunâ úhadruo köu únyi hnyi dok  
ae kap,  
Me ci u únyi hnyi Ziona ;
- 3 Me únykúme ányâm ta je bwihlany hia.  
Me kap ányâm je hut adre me le ;  
[Sela.
- 4 Me ham köu weny hnyekom,  
Me ohwâdá ányâm je úhnenamö hia.
- 5 Öhmun e he bi ka hobâ hnyi úhömeli  
gam,  
Me otilâ anyihmun je boúdila hnyi ien  
Khongutin :  
E na he ju Iehova ka ohwâdá hia hnâm  
je hna sumâtâ.
- 6 E kxanö nya walang ang a Iehova ame  
omelö at waleji e ame hú ;  
E ame he ka löng kâu únyi hnyi anyin  
drany ae kap  
Ge hnyamen a metân ae hwege he ka  
omelö at.
- 7 Haba keihen adre me labageju ka ta je  
kariota, ke haba keihen ka ta je  
hors :  
Ke ate me he bi ka ha iö Iehova  
Khonguta.
- 8 Adre me nom ju me ta but :  
Ke ate me köúö thö me tot wisa.



SALAMO 21, 22.

- 9 Iehova lö, omelö thö :  
E na he ju Than ka löng köhmun hnyi  
ûen öhmun e hongot hnyin.

SALAMO 21.

*Hobi kâu at vhiik khumöng. Salamo anyi Davita.*

- I**EHOVA lö, ame he than ka senyinâ  
hwegiâm ;  
Ke haba ânyâm ûhömeli, shaiba ge hnen  
hna senyinâ !
- 2 U je hia but ham kâu weny hnyekon,  
Me ca behânâ bi hna sumâtâ hnen li  
esongodiny. [Sela.]
- 3 Anyin a u je outhmoko e ge ta je hna-  
hacin betenge :  
U je obicâ e ge korona gol ae so.
- 4 E ameumatö möt gam, me u je ham  
kâu ;  
Wale ta je bong ae beû ke ne o but  
nyiele balua.
- 5 E gan anyin mec ûnyi hnyi ânyâm  
ûhömeli :  
U je ip hon, hmanenang me ogânâ.
- 6 Anyin a u me wia e me me ti hnahic  
nyiele balua :  
U je osenyinâ e ge senyin hnyi hnyi-  
mâkâm.
- 7 Anyin ame labageju but than kö Iehova,  
Ke ûnyi ge ibetengiö anyi Beönua e  
ame ca he ka bwebwet.
- 8 Ame he hnyâmâm ka wâ hia ta je  
iwahnaihmöny möu :  
Ame he hnyâmâm a metâm ka wâ tavat  
adre me hûkotiö u.
- 9 U me he ka öücü ödra me ûgimön hnyi  
bonginy ânyâm hmönyin.  
Ame he Iehova ka ut' ödra hnyi  
anyin hmönyin,  
Ke adre me he ka aû but ge meic.
- 10 U me he ka ohia wan gadra ûnyi eang  
hmeledrany,  
Me je mâtrânidra unyin lakon tavat.
- 11 Anyin adre me ûnykûme ûnyi ae kong  
kôu :  
Adre me sihnân, ke ca khan' ödra bi  
ânyâ.
- 12 Anyin a u me he ka hwiö hotudra,  
U me he ka penapena töiny ânyâm  
cafana ka hnyi hnyimaködra.
- 13 Iehova lö, e so u ma beönua hnyi manâm  
man :  
Me öhmun e he ka khumöng me ogânâ  
manâm man.

SALAMO 22.

*Hobi kâu at vhiik khumöng; adre me hai hnyi  
ailainy hnyomakatu. Salamo anyi Davita.*

- K**HONGUK lö, Khonguk lö, ieû gam u  
me hnö nya ?  
Ke sâkâu he ka hadruo nya hnyi hok  
hwatenge?
- 2 Khonguk lö, oge me hongot köu hnyi  
lany, k' u me ca löng kõnya ;  
Ke oge me ca laba hnyibû hnyi hnyi-  
nghet.
- 3 U at ae kap,  
At ame laba hnyi hna ûoganö hnö  
Isaraela.
- 4 Haba lakamöhmun adre me labageju  
kôu :  
Adre me labageju, me u je omeli ödra.
- 5 Adre me tenge köu, me adre me möt ut :  
Adre me labageju köu, k' adre me ca  
hmehma bi.
- 6 Iny biget thibi, ke ca at bi ;  
Wale hna haikongoâ hnen tavat, ke hna  
hmiân hnen tavat.
- 7 Haba tavat hia adre me ö nya, me adre  
me hlumö nya :  
Adre me obeûâ je esongodidra, me nyi-  
nyikâ je bödra, me haingödra, ka habe,
- 8 Hnö u thö kö Iehova ; hamen bi he ka  
omelö e :  
Hamen he ka omelö e, anyin a e ame  
senyin kâu.
- 9 Ke u thibi at ame hum nya ûnyi hnyi  
hnyok :  
Me olabageju nya ûnyi hnyi li basi bai.
- 10 Adre me hnö nya köu hwân ge hna  
hnokoâ :  
U thibi Khonguk hwân a inya hnyi  
hnyeku bai.
- 11 U me ca he ka úsâkâüö mönya ; anyin  
ae hakekeny vec ;  
Anyin ae ba at he ka hadruö.
- 12 E se hia je bolok adre me igigili nya :  
K' ame tot igigili nya ta je bolokiny  
Basana hnyat ae hwege.
- 13 Adre me memang kõnya,  
Helâ me liona ame beolou usukia k' ame  
kuku.
- 14 Adre me hingâlâ degeci nya helâ me  
kõiö,  
Ke ame ok ut je jeiök hia :  
Haba önykûmik me helâ me wasu ;  
Ame oköiâ but eû hnyi hnyekuk.
- 15 E atgec dö tang hwegiök helâ me wata-  
giny kaja ;

SALAMO 23, 24.

- Ke ame kece bohök ka hnyi wahicok ;  
Ke u je bia but hum nya ka hnyi  
sesâiny kânâiny mok.
- 16 Anyin a hia but igigili nya hnen ta je  
kuli ;  
A hia but theling nya hnen je deö at  
ae kong ;  
Me dâ li hnyamök me li hnyeúcak.
- 17 E khanö nya he ka aú je jeiök hia ;  
Wale adre me ö nya me wâ hmö nya :
- 18 Adre me khenâ anyik je úkhaú unyi-  
drin bi,  
Me uglekôbâ anyik úkot.
- 19 Ke so bi Iehova lö, u me ca he ka  
úsákáúö mönya :  
Tang hwegiök lö, logotö he ka hadruo  
nya.
- 20 Omelö ju hanuk únyi ge hele vat ;  
Me hnök hna betenge gan únyi hnyi  
hwegien kuli.
- 21 Omeli nya thö hnyi hnyimen liona ;  
Eke, u je hia but löng könya únyi hnyi  
li faoiny bolokiny hnyot.
- 22 Oge me he ka omanenâ iâm ka je liame-  
keiny mönya :  
Oge me he ka oganö u hnyi wanben  
úkhacaköu.
- 23 Öbun tavat öbun e outö Iehova, oganá  
thö e ;  
Haisoâ thö e öbun je mátrâni Jakob ;  
Ke outen ju e öbun je mátrâni Isaraela  
hia thithö.
- 24 Anyin a e ame ca huiân me húkötö ge  
vec anyin tavat ae vec ;  
Ke khaca e ame ca ikbâlâ hnyimakan  
gan ;  
Ke hnyi úen e ame tenge kâu, ame löng.
- 25 Únyi thibi gam hna oganö nya hnyi  
úkhacaköu ae gan hmâ :  
Oge me he ka subâ anyik je khöbi hnyi  
hnyimakan tavat adre me outen e.
- 26 Haba at ae ilemuk, me, e ame he ka  
han me sekon :  
Ame he ka oganö Iehova hnen tavat  
adre me elâm e :  
E so ame he je hnyekubun ka möt  
nyiele balua.
- 27 Ame he je can hmeledrany hia ka  
únykúme me hwiö kö Iehova :  
Ke ame he ta je lap anyin ta je hnyei  
ka khudrung hnyi hnyimakan.
- 28 Anyin a unyi Iehova dökhu :  
Ke e at ame musö ta je hnyei :
- 29 Ame he hia tavat ae pipikhenya eang  
hmeledrany ka han me khudrung :

- K' ame he ka nom kâu tavat hia adre  
me he ka hnyi kânâ,  
Wale at ae ca khand he ka omelö e bi.
- 30 Ame he ke mátrân ka bi athnyabainy ;  
K' adre me he ka ha dö a biliny únyi  
ge Than.
- 31 Adre me he ka o but me omanenâ  
hwakecin ae wisa  
Ka tavat adre me he ka hnokoâ, a g'  
ame ânyâ e.

SALAMO 23.

*Salamo anyi Davita.*

- H**ABA Iehova at ame tuö helâ me at  
tuö mamoe, ame ca he ka ba ta únyi  
gak.
- 2 E ame omokuli nya hnyi hna önying ae  
hat :  
E ame su nya thö ka hnyi je wagewe  
ame omise.
- 3 E ame ohmeto hanuk :  
E ame su nya hnyi je gethen deny  
hwakecin ae wisa únyi ge ien.
- 4 Eke, oge ne vheno hnyigöulen bucen a  
hmenon mok,  
Me oge me ca he ka outen únyi ae  
kong ; anyin a tha u mönya :  
K' ame okahwö nya ânyâm utömhu me  
cem uci.
- 5 U je penapena laulau hobi könya hnyi  
hnyimakan je iwahnaihmiöny mönya :  
U je hia but hú bök ge wakaco ; ame  
babihingölö thö anyik kaia.
- 6 Ame he thibi so me ibetengiö ka hnu  
hotuk hnyi bongka ta je bong hia :  
Ke oge me he bala ka laba hnyi uma  
umö Iehova nyiele balua.

SALAMO 24.

*Salamo anyi Davita.*

- A**NYI Iehova hmeledrany me ta je  
únyi ae unöngötiny ;  
Me ta ogö hnyei, me tavat adre me laba  
hnyin.
- 2 Anyin a e ame bi taben e hon köiö,  
Me otilâ hmâ e hon je di.
- 3 Ie at ame he ka öliâ bucen anyi Iehova ?  
Ke ie at ame he ka tot hnyi anyin dok  
ae kap ?
- 4 At thibi ae kalaöt li hnyamen, me  
hnyekon ae ba hnyikongon ;  
At ame ca ogöranyâ bi hnyekon ka hnyi  
únyi ae únyi baú,  
Me ca khemanyin thoi.

SALAMO 25, 26.

- 5 Eame he ka kap hnahic únyi ga Iehova,  
Me hwakecin ae wisa únyi ge Khong at  
ame omelö e.
- 6 Wale thibi döiny tavat adre me elâm  
hoton e,  
Tavat adre me elöm u, Khongu Jakob.  
[Sela.]
- 7 Je hlinginy homagöule lö, ogöranyâ thö  
je böbun ;  
Ke görany dö öbun je hlinginy hwan-  
uma ae balua bi :  
Me me he ka didrö Thaniny hmanenang.
- 8 Ie Thaniny hmanenang ?  
Iehova at ae hwege me man,  
Iehova at ae hwege hnyi vat.
- 9 Je hlinginy homagöule lö, ogöranyâ thö  
je böbun ;  
Eke, ogöranyâ thö, öbun je hlinginy  
hwanuma ae balua bi :  
Me me he ka didrö Thaniny hmanenang.
- 10 Ie Thaniny hmanenang e ?  
Iehova tñhan sabaoth,  
E thibi Thaniny hmanenang.

SALAMO 25.

*Salamo anyi Davita.*

- I**EHOVA lö, inya oge me ogöranyâ hanuk  
köu.
- 2 Khonguk lö, oge me labageju köu,  
Iny na ca he ju ka hmehma ;  
U na ca hna ju je iwahnaihmiöny mönya  
he ka ngö nya.
- 3 Eke, ame ca he ka hmehma at ame  
halubahingâm :  
Ke ame he ka hmehma tavat adre me  
iyawö ke ba can.
- 4 Iehova lö, omanená thö könnya dem je  
gethen ;  
Nö nya thö ge dem je gethen.
- 5 Su nya thö hnyi hnathu gam, ke nö nya  
thö ;  
Anyin a u thibi Khong at ame omeli  
nya ;  
Inya oge me halubahing u hnyi je bong  
hia.
- 6 Iehova lö, únykúme ju ibetengiö me  
tang betenge gam,  
Anyin a kueny dut e.
- 7 Ca he ka únykúme ta je hulöiny  
anyik hidröu, me ta je hanyâúâ  
gak :  
Únykúmi nya ju hoton ânyâm ibetengiö,  
Únyi ge hwakecâm ae so, Iehova.
- 8 Haba Iehova me so me wisa :

- Anyin a wale e ame he ka únö gethen  
ka tavat ae monu.
- 9 E ame he ka su tavat ae ilemuk hnyi  
hwakecin ae wisa.  
Me nâ deny gethen ka tavat ae hnyi-  
kânâ.
- 10 Haba je gethen hia de Iehova, me,  
ibetengiö me hnathu  
Ka tavat adre me tuö hna úhinyköu  
mê, me hnen je hna ohnathoâ.
- 11 Iehova lö, únyi hnyi iâm bi,  
Hna but anyik hulö, anyin ae gan  
hmâ e.
- 12 Ie at ame outö Iehova ?  
Me e ame he ka nâ e ge gethen e ame  
he ka úca.
- 13 Ame ne ka laba so hanon ;  
Ke ame he je mátrániny ka hu ködra  
hnyei.
- 14 Haba úhnenamö duöng únyi ga Iehova  
me wale unyin tavat adre me outen e ;  
Ke e ame he ka omanená ködra anyin  
úhinyköu.
- 15 E bala li emakök thibi kö Iehova ;  
Anyin a e ame he ka uny li cak únyi  
hnyi ert.
- 16 Hwiö thö könnya, me betenge ju gak ;  
Anyin a hake inya, ke oge me hom vec.
- 17 Adre osehia ta je vecin hnyekuk :  
U na hum nya únyi hnyi anyik ta je  
vec.
- 18 Únykúme ju anyik hmak me anyik  
vec ;  
Me thang degecâ but anyik ta je hulö  
hia.
- 19 Únykúme ju ge je iwahnaihmiöny  
mönya, anyin a ödra se hia ;  
Ke e gan hmâ hnödrin hna húkötio  
nya.
- 20 U na tuö ju hanuk, me omeli nya thö :  
Iny na ca he ju ka hmehma, anyin a  
inya oge me labageju köu.
- 21 E so he ka otilö nya hmâ hnen hwa-  
kecin ae ba hnyikongon me wisa,  
Anyin a inya oge me laba haluba-  
hingâm.
- 22 Khong lö, omeli Isaraela thö  
Únyi hnyi anyin ta je vec hia thithö.

SALAMO 26.

*Salamo anyi Davita.*

- I**EHOVA lö, owisö nya thö, anyin a oge  
hia but vheno anyik wisa :  
Ke oge hia but labageju kö Iehova, me  
ca bwebwet.

SALAMO 27.

- 2 Iehova lö, elöm nya thö, me ohnathu nya ;  
Elâm dö ûnykûmenök me hnyekuk.
- 3 Anyin ame laba bala cicö li emakök ânyâm ibetengiö ;  
Ke oge hia but vheno ânyâm hnathu.
- 4 Oge me ca tha laba me tavat ae monu ;  
Ke oge me ca he ka thâ he me tavat iyawö.
- 5 Hûkötîânök ûkhacaköu anyin tavat adre me ânyâ hulö,  
Ke oge me ca he ka tha laba me tavat ae kong.
- 6 Oge me he ka hinyem hnyi hwakecin ae ba hnyikongon ;  
Ke helâe oge me he ka igigilö ânyâm taben hut, Iehova :
- 7 M' oge me he ka olungâ hwan ole,  
Me ha gaga ânyâm ta je huliwa hia hnân lâiâ.
- 8 Iehova lö, oge me hnyokâ hnyaban umâm uma,  
Me dok ame laba hnyin ânyâm hmanenang.
- 9 Ca he ka tha hom hanuk me tavat ae kong,  
Me melik unyin tavat ûhlingö :
- 10 Ae hu ûokonguny eû hnyin je hnyamödra,  
Ke unöngötö hnyamödra a metâ ge hok hwaban ae hwali.
- 11 Ke oge me he bi nya ka vheno hwa-kecin ae wisa :  
Omeli nya ju, me betenge ju gak.
- 12 Ame tot li cak hnyi dok ae wisa hon :  
K' oge me he ka haisoi Iehova hnyi jo ûkhacaköu.

SALAMO 27.

*Salamo anyi Davita.*

- I** EHOVA melamik me at ame omeli nya ;  
oge ma outö ia ?  
Iehova tang hwegien anyik möt ; ia oge ma outen ?
- 2 Hnyi ûen ame o but könya tavat ae kong he ka an vik,  
Waleji ae hmönyidra könya ke iwahnaihmiöny mönya, me adre me haü but me ta.
  - 3 Eja ke ne a ne hunuma cici nya utbavat.  
Me ame ca he bi huyekuk ka ot :  
K' ame ne kû thö vat könya,  
Me oge me he bala ka labageju.
  - 4 Khaca thibi ûnyi oge hia but sumâtâ

- ga Iehova, k' oge me he bala ka elâm e ;  
A oge me he bala ka laba hnyin uma umö Iehova hnyi je bongon hia anyik möt,  
He ka wâ hmanenangi Iehova, me hnö hnyi umen uma ae kap,
- 5 Anyin a haba hnyi ûen vec e ame he ka ikhölö nya hnyi umen uma mená :  
E ame he ka tubi nya hnyi dok ae iyong hnyi umen uma mano ;  
E ame he ka ip nya hon kic.
- 6 Ke walang ame he ka görany bök hon ta je iwahnaihmiöny mönya hia igigili nya ;  
Ke oge me he ka hudo je hudiny senyin hnyi umen uma mano ;  
Oge me he ka khumöng, eke, oge me he ka khumöng olungi Iehova.
- 7 Iehova lö, löng ju, iny ka hongot ge ifucik :  
Betenge ju minya gak, me thu thö könya.
- 8 Hnyi ûen u je ha, ka habe, Elâm d' öbun hnyimakök ; me ame ha hnyekuk, ka habe,  
Iehova lö, oge me he ka elâm hnyimákâm.
- 9 U na ca he ju ka ikhâlâ hnyimákâm gak ;  
Ca he ka obâ athnyabaem hnyi hmönyin :  
U thibi at ame labö hadruo nya ;  
Khong lö, at ame omeli nya, ca he ka hota degeci nya, me hnö nya but.
- 10 Anyin a cica me bai ödru me hna degeci nya,  
Ke ame he Iehova ka köp nya.
- 11 Iehova lö, nö nya thö ge dem gethen ;  
Ke su nya eû hnyi gethen ae wisa hon,  
Can je iwahnaihmiöny mönya.
- 12 Ca hnö nya bi ka hnyi weny je iwahnaihmiöny mönya :  
Anyin adre me tot könya tavat adre me bifuci nya, me tavat adre me memená ûokonguny.
- 13 Oge me monumonu, oge ne ca gejon he ka wâ so ûnyi ga Iehova  
Hnyi hnyeï iny tavat ae möt.
- 14 Halubahing Iehova ju :  
Hwege ju, ke so ame he hnyekom he ka hwege ;  
Eke, e so u ma halubahing Iehova.

SALAMO 28—30.

SALAMO 28.

*Salamo anyi Davita.*

- I**EHOVA lö, oge me he ka hongot köu ;  
Kicik lö, ca he ka wejiji gak :  
Wâ u nye laba hnyibû gak,  
M' inye he ka helâ me tavat adre me  
utut ka hnyi thop.
- 2 Lông ju hwan anyik sumat, iny ka  
hawo u,  
Iny ka hai thö li hnyamök ka hnyi dok  
ae kap u me fuc hnyin.
- 3 Ca tha lili nya me tavat ae kong,  
Me tavat adre me ânyâ hulö ;  
Adre me ha je hofuc iny úsoköu ka je  
liamewaeny mödra,  
Ke haba úkonguny eú hnyi hnyidrin.
- 4 Ham but ködra e úcú me hwakecidra,  
me anyidra je huliwa ae kong :  
Ham but ködra hoton huliwa anyin li  
hnyamödra ;  
Ke bi hwaban hwakecidra.
- 5 Adre me ca únykúme ta je huliwa anyi  
Iehova,  
Me hna ânyâ hnen li hnyamen,  
Anyin a wale, e ame he ka hagut' ödra  
but, k' ame ca he ka otil' ödra hmetu.
- 6 E so he ka haisoj Iehova,  
Anyin a e amé hia but long hwan  
anyik je sumat.
- 7 Iehova tang hwegiök me becik ;  
Haba hnyekuk ame labageju kâu, k'  
ame hadruo nya :  
Anyin a wale ame ti senyin hnyekuk ;  
Ke oge me he ka ogânâ e ge anyik  
khumöng.
- 8 Haba Iehova tang hwegien lakeiny,  
Ke e hhabâ hnân úhömeli hobi kâu at  
e ame hú.
- 9 Omelö thö lakem, ke ohnahicâ ju jek-  
hom :  
Ha ö 'dra ju minya, ke kap til' ödra ju  
ke ne o but nyiele balua.

SALAMO 29.

*Salamo anyi Davita.*

- Ö**BUN lakon tavat hwege lö, ham dö kö  
Iehova,  
Ham dö kö Iehova hmanenang me  
hwege.
- 2 Ham dö kö Iehova hmanenang ae úcú  
me ien ;

Khudrung ju kö Iehova hnyi meo ae  
kap.

- 3 E hon je köiö hofuc ho Iehova :  
Khongon hmanenang ame bi hwan than,  
Wale Iehova hon je köiö ae se hia.
- 4 E hwege ifuci Iehova ;  
Ame unöngötö ifuci Iehova ge bongon  
than.
- 5 Ame hmetru je arasi hnen ifuci Iehova ;  
Eke, Iehova ame thu je arasiny Leba-  
nona.
- 6 E ame oututi ödra helâ me nokon kau ;  
Lebanona me Siriona helâ me nak bolo-  
kiny hnyot.
- 7 Ame ovheivheiâ je bâhlân meic hnen  
ifuci Iehova.
- 8 Ame bwebwet hnyebuba hnen ifuci  
Iehova ;  
Iehova ame obwebwelâ hnyebuba hnyi  
Kadesi.
- 9 Ame kölu habú je lakon aila ge ifuci  
Iehova,  
Me okolo but ta je lan hnyot :  
Ke haba hnyin umen uma kap me ame  
ha ta je únyi hia, ka habe, Hmane-  
nang.
- 10 Iehova ame laba me than hnyi úen  
Uoú ;  
Eke, Iehova ame laba a than nyiele  
balua.
- 11 Ame he Iehova ka ham hwege ka  
lakeiny ;  
Ame he Iehova ka ohnahicâ lakeiny ge  
úsoköu.

SALAMO 30.

*Salamo anyi Davita. Khumöng hnyi dilic uma.*

- I**EHOVA lö, oge me he ka oganö u, anyin  
a a je hia but ogöranyi nya,  
Me ca hna je iwahnaihmiöny mönya he  
ka manhic könya.
- 2 Iehova Khonguk lö,  
Oge me hongot köu, me u je hia but  
ometu nya.
- 3 Iehova lö, u je hia but hai göranyai  
hanuk únyi hnyi hedis :  
U je labö omeli nya m' inye ca hnyi  
utut ka hnyi thop.
- 4 Öbun anyin wakap lö, e so öbun e olungâ  
kö Iehova,  
Ke oleâ ka ien ae kap.
- 5 Anyin ae ti okhulit anyin hmönyin ;  
E hu möt bi hnyi anyin ibetengiö baú

SALAMO 31.

- Adre me ne tenge hnyi sahaç,  
Me ame o thö senyin hnyi huyomakatu.
- 6 Haba inya, hnyi úen oge me labö sot,  
me oge me ha, ka habe,  
Oge me ca he bala bi ka bwebwet.
- 7 Iehova lö, únyi ge ányâm ibetengiö baú  
u je otethmâ anyik buçen ;  
U je ikhâlâ hnyimâkâm ; me oge me  
hlohlo.
- 8 Iehova lö, oge me hongot köu ;  
Ke oge me khöú kö Iehova.
- 9 Ieú troban drök iny ka utut ka hnyi  
thop ?  
Hawa, ame he sesâiny kânâ ka oganö  
u ? k' ame he ka haimemenâ ányâm  
hnathu ?
- 10 Iehova lö, löng ju, me betenge ju gak :  
Iehova lö, u na he ju ka hadruo nya.
- 11 U je hia but wia anyik hlöuhlöu ka  
hnyi biâ ;  
U je hia but uny anyik úkhaú ae gan  
nân, me oweikö nya bi ge senyin :
- 12 Me me he ka khumöng oganö u hnen  
anyik mec, k' ame ca he ka laba  
hnyibú.  
Iehova lö Khonguk, oge me he ka oganö  
u nyiele balua.

SALAMO 31.

*Hobi kâu at vhiç khumöng. Salamo anyi Davita.*

- I** EHOVA lö, inya oge me labageju köu ;  
iny na ca he ju ka huehma :  
Omeli nya thö ge hwakecâm ae wisa.
- 2 Ta ju li hnyikönyâm könya ; ie omeli  
nya thö :  
U na he ju ka kicik ae hwege, me  
hnabâ hnân omeli nya.
- 3 Anyin a u thibi kicik, me hnök hnabâ ;  
Anyin a wale lili nya thö me su nya  
únyi ge iâm.
- 4 Uny nya but únyi hnyi ert adre me  
thong duöngâ gak ;  
Anyin a u thibi hnök hnabâ.
- 5 Inya oge me hna hanuk ka hnyi hnya-  
mâm :  
Iehova lö, Khongon hnathu, u je hia  
but bi hwaban anyik möt.
- 6 Húkötianök tavat adre me hnyok ka ta  
je únyi baú me thoi :  
Ke oge me labageju kö Iehova.
- 7 Oge me he ka hobâ me senyin ge ányâm  
tang betenge :  
Anyin a u je hia but wâ anyik vec ;  
U je hia but wâ únykúme hanuk hnyi  
ta je úoveci :

- 8 Ke u je ca hia but theling nya hnyin  
hnyamen iwahnaihmiony ;  
U je hia but ip li cak hnyi dok ae gan.
- 9 Iehova lö, betenge ju gak, anyin oge  
me vec :  
A jok ut li emakök ge hlöuhlöu, eke,  
me hanuk me unyik minya.
- 10 Anyin ame kec dö bonguk je bong hnyi  
tenge, me je hunaik hnyi mâng :  
E mita but tang hwegiök can anyik  
hulö, ke ame aú but je jeiök.
- 11 Can je iwahnaihmiony mönya, adre me  
haikongu nya ;  
Eke, iny ti kong ut hnyi hnyimakan je  
liamewaeny mönya, ke at ootâ laha-  
nök :  
Adre me kec gak tavat adre me ö nya  
eú hnyi gethen.
- 12 Adre me hnying nya but eú hnyi je  
hnyekudra helâ me komok :  
Iny helâ me kaia ae hmouca but.
- 13 Anyin oge hia but löng hna bifuco  
hnen tavat ae se,  
K' adre me öbubuny hnyi je ke keihen  
hia :  
Ke adre me tiga tha fakatau nya,  
Me adre me sihnök he ka ohia anyik  
möt.
- 14 Ke so bi, Iehova lö, oge me labageju köu,  
Haingök, ka habe, U thibi Khonguk.
- 15 Haba bonguk ta je bong me eú hnyi  
hnyamâm :  
Ö u omeli nya únyi hnyi hnyamen ta je  
iwahnaihmiony mönya, me tavat adre  
me sedö nya.
- 16 Oumumelamâ thö hnyimâkâm ka athny-  
abaem ;  
Omeli nya thö hnen tang betenge gam.
- 17 Iehova lö, iny na ca he ju ka hmehma ;  
anyin a oge hia but hao u :  
E so e he tavat ae monu ka hmehma,  
me laba hnyibú hnyi hedis.
- 18 E so he ka hum je esongot ae thoi ;  
Wale adre me bifuco at ae wisa,  
Hnyi hop me bi gan.
- 19 Shaiba ge úganiny ányâm so, wale u je  
hitangen hobi kâu tavat adre me  
outö u,  
Waleji u me ányâ hobi ködra adre me  
labageju köu, hnyi hnyimakan tavat !
- 20 U me he ka olubaduongi ödra hnyi dok  
ae nuong unyâm únyi ge fakatau  
anyin tavat.  
U me he ka ikhol' ödra hnyi uma menâ  
únyi hnyi iwatretra anyin ta je  
bohmen.

SALAMO 32, 33.

- 21 Haisoi Iehova thö :  
Anyin a e ame hia but omanenâ kõnya  
anyin ibetengiö hnân lâiâ hnyi taun  
ae hwege.
- 22 Ke haba inya hnyi anyik uthmâhmâ,  
oge me ha, ka habe, Adre subâ degeci  
nya ûnyi hnyi hnyimâkâm :  
Ke so bi u je löng hwan anyik je sumat  
waleji oge me hao u.
- 23 Hnyok ju kö Iehova, öbun laten ae kap  
hia :  
Iehova ame tuö tavat ae hnathu.  
Me bi hwaban ganâ ka at ame ânyâ  
hwakecin bi gan.
- 24 Hwege thö, ke so ame he je hnyekubun  
ka hwege,  
Öbun tavat hia öbun e halubahing  
Iehova.

SALAMO 32.

*Salamo anyi Davita. Hnân ânö.*

- H**NAHIC hnen at adre hia but ohia  
hnen hna hanyâûâ, me tube anyin  
hulö.
- 2 Hnahic hnen at wale Iehova ame ca ha  
anyin hulö,  
Ke ba iyawö hnyi hanon.
- 3 Hnyi ûen oge me laba hnyibû, me ame  
bobot je jeiök  
Can anyik tenge ae gan hnyi je bong.
- 4 Anyin ae hmak hnyamâm huk hnyi  
lany me lit :  
Adre wia khubetiny unyik me me helâ  
me kahwa hnyi hnyeun. [Sela.]
- 5 Oge me ogâ anyik monu köu, ke oge me  
ca ikhâlâ anyik hulö :  
Haingök, ka habe, Oge me he ka oma-  
nenâ kö Iehova hnök je hna hanyâûâ ;  
Me u je hna degecâ anyik hulö ae gan.  
[Sela.]
- 6 Can e, e so ame he tavat ae so ka hic  
köu hnyi ûen ae khan' ödra he ka  
ö u :  
E hnathu e ka o but wadutö ae gan, me  
ame ca he ka hakekenyâ c.
- 7 U thibi hnök hna lubaduöng ; u me he  
ka tuö nya ge vec ;  
U me he ka igigili nya ge je khumön-  
giny ûhömeli. [Sela.]
- 8 Oge me he ka nö u, me ku köu gethen  
u me he ka vhenö :  
Oge me he ka ûhnenamö möu me  
ecmakö u.
- 9 Ca he öbun ka helâ me hors, me miul,  
ae ba hnyekon :

- Ke hamen fao me töiny he ka hom  
thaw' ödra,  
Wâ ödra nye ca ûhakekenyi u.
- 10 E se hia ta je vec unyin at ae kong :  
Ke haba at ame labageju kö Iehova, me  
ame he tang betenge ka igigilöâ.
- 11 Hobâ thö kö Iehova, me senyin dö,  
öbun tavat ae wisa :  
Ke hongot senyin dö, öbun tavat hnyok  
wisa.

SALAMO 33.

- S**ENYIN dö kö Iehova, öbun tavat ae  
wisa :  
E úcú ka tavat ae wisa he ka oganá.
- 2 Ole thö kö Iehova ge kitara :  
Khumöng olungâ e ge nabeli a hu töiny  
a ten.
- 3 Khumöngö kâu khumöng ae teb ûnyi ;  
Kokot metâ thö me hwan ae gan.
- 4 Anyin ae wisa hofuc ho Iehova ;  
K' ame hnathu anyin ta je huliwa hia.
- 5 E ame hnyokâ hwakecin ae wisa me  
hna owisa :  
E unöngötö hmeledrany ge ibetengiö  
anyi Iehova.
- 6 Adre me op drany ge hofuc ho Iehova ;  
Ke ta je ûnyi hia hnyin ge homenâiny  
hnyimen.
- 7 E ame úkhacaköuâ köien köiö helâ me  
dok ae hut :  
E ame hip je waköiö hnyi je uma omjeú.
- 8 E so ame he hmeledrany hia ka outö  
Iehova :  
Me aten hmeledrany hia ka tet ot ju  
gan.
- 9 Anyin a e ame fuc, me ame aat :  
E ame hûna, me ame tethmâ.
- 10 Iehova ame oúnyibâûâ je ûhnenamö  
anyin ta je hnyei :  
Eame öba troban je únykúmenen tavat.
- 11 Ame he ka tethmâ nyiele balua we  
Iehova,  
Ke je únykúmenen hnyekon ka ta je dö  
hia.
- 12 Hnahic hnen hnyei a Iehova Khongon ;  
A tavat e ame úca hnân hing jekhon.
- 13 Iehova ame bwele ûnyi hnyi drany ;  
E ame wâ lakon tavat hia thithö.
- 14 Únyi hnyi hnyaban e ame bwele hnyi-  
kânâi  
Ka wâ aten hmeledrany hia thithö ;
- 15 Wale at ame op ta je hnyekudra hia,  
Ame únykúme anyidra ta je huliwa  
hia.

SALAMO 34, 35.

- 16 E ba than ame möt ge utbavat ae gan hmá :  
Ame ca möt at ae hwege ge tang hwege ae gan.
- 17 E únyi baú hors hnán omelö :  
Ke e ame ca he ka omelö at ge tang hwegien ae gan.
- 18 Wâ bi, e bi emakö Iehova hon tavat adre me outen e,  
Wale tavat adre me halubahingen anyin tang betenge ;
- 19 He ka hügúnâ je hanudra únyi hnyi mok,  
• Me omeli ödra hnyi úen hmiâ.
- 20 A hia but je hanuta lubahing Ichova :  
E thibi at hadru' öta me becita.
- 21 Ame he je hnyekuta ka senyin kâu,  
Anyin a ötin e labageju ka ien ae kap.
- 22 Iehova lö, e so e e huhmun ányâm tang betenge,  
Hoton hnóhmun hna hia but labageju kôu.

SALAMO 34.

*Salamo anyi Davita ; hnyi áen e ame wia bi hwa-kecin hnyi hnyimakö Abinelek, ke e ame obá e me me he but.*

- O**GE me he bala ka haisoi Iehova hnyi je úen hia ;  
Ame he bala hnyimök ka oganá e.
- 2 Ame he hanuk ka hobeluö Iehova :  
Ame he tavat ae ilemuk ka löng me senyin.
- 3 Öbun na tha he ju mönya he ka oganö Iehova,  
Ke so ötin e he ka tha ogöranyâ ien.
- 4 Oge me elöm Iehova, me e ame ling nya,  
Me omeli nya únyi hnyi anyik je ot hia.
- 5 Adre me wâ e, me adre me melam but :  
Ke ame ca he bi je hnyimaködra ka hmehma.
- 6 Ame hongot dö at eang ame hom vec,  
k' ame löng ut Iehova,  
Me omelö e únyi hnyi anyin ta je vec hia thithö.
- 7 Ame hunuma angela anyi Iehova igigilö tavat adre me outen e,  
Me omeli ödra.
- 8 Öbun na drem cubecâ ju me wâ a at ibetengiö Iehova :  
Hnahic hnen at ame labageju kâu.
- 9 Öbun na he ju ka ot kö Iehova, öbun laten ae kap :  
Anyin ae ba ke únyi ae ba gadra adre me outen.

- 10 E ba an, ke mekihnánem bi je nak liona :  
Ke haba tavat adre me elöm Iehova, me ba ke únyi ae so ame he ka hia gadra.
- 11 Ai öbun je wanakat, ling nya ju :  
Me oge me he ka n' öbun ge bongon he ka outö Iehova.
- 12 Ie at ae bemöt,  
Ke weny ta je bong, me me wâ tho so ?
- 13 Kât je bohámam me me ca hulö bi,  
Ke li esongodám wâ e nye fuc thoi.
- 14 Hota ju hulö, ke mádrâ so ;  
Elâm hnahic, ke hnu hoton.
- 15 E bala li emakö Iehova hon tavat ae wisa,  
Ke haba li hnyikönyen ame löng hodrin hwahongot.
- 16 K' ame khöt bi hnyimakö Iehova ka tavat adre me ányâ hulö,  
He ka subâ degecâ but nyingen hna únykúme ködra únyi ge aten hmele-drany.
- 17 Ame hongot tavat ae wisa ke Iehova ame löng,  
Me omeli ödra únyi hnyi anyidra ta je vec hia thithö.
- 18 E hakekeny Iehova ka tavat ae hmak je hnyekudra,  
K' ame omelö tavat ame vec hanudra.
- 19 E se hia ta je vec anyin at ae wisa :  
Ke Iehova ame omelö e únyi hnyi ta je únyi hia.
- 20 E ame tuö ta je jeien hia thithö :  
E ba me khaca ame he ka hmetru.
- 21 Ame he monu ka hlingâ at ae monu :  
Ke haba tavat adre me húkotiâ at ae wisa me adre me he ka hang' ödra bi.
- 22 Iehova ame omelö hanon lathnyabainy ;  
Ke adre me ca ho ka hangâ ke at unyin tavat adre me labageju kâu.

SALAMO 35.

*Salamo anyi Davita.*

- I**EHOVA lö, u ma he ka ivinö me tavat adre me ivinö mönya :  
Vat dö me tavat adre me vat mönya.
- 2 Hom dö bec, me bec ae gan,  
Ke todrö ka hadruo nya.
- 3 Oc dö minya ö, me thelöng ju gethen deny tavat adre hnu hotuk :  
Ha thö ka hanuk, ka habe, Inya ang at ame omeli u.
- 4 E so he ka hmehma me laba úhnyúkong tavat adre me elâm hanuk :



SALAMO 36.

E so he ka ohmetuhmeto me omonu-  
 monu ödra adre me beokongu nya.  
 5 E so adre me he ka helâ me unen hwit  
 hnyi hnyimakan ang,  
 Ke angela anyi Iehova ame alin ödra.  
 6 E so e lit me haúhaú dedra je gethen,  
 Ke angela anyi Iehova ame hnu ödra.  
 7 Anyin adre hia but ikhâlâ anyidra ta je  
 hnewe gak ke ba can,  
 Ke adre hia but hiny thop hobi kâu  
 hanuk, ke ba can.  
 8 E so ame ie utut kâu hnaúhangö ;  
 Ke so e he ka hnok hnen hnewe e ame  
 ikhâlâ :  
 E so e ame ta ka hnyi hnaúhangö eling.  
 9 K' ame he hanuk ka senyin kö Iehova :  
 E ame he ka senyin hnyi anyin úhö-  
 meli.  
 10 Ame he je jeiök hia ka ha, ka habe,  
 Iehova lö, ie at ae úcú möu,  
 At ame omelö at ae vec únyi ge at ae  
 hwege hon,  
 Eke, me at ae vec me theduoc únyi ge  
 at ame söh e.  
 11 Adre me todrö je at ohnathoâ ae ca  
 wisa ;  
 Adre me hnei nya ge je únyi ae ca  
 khanö nya.  
 12 Adre me bi hwaban anyik so ge kong,  
 Me me hlöuhlöu hanuk.  
 13 Ke haba inya, me oge me khavâ úkhaú  
 ae gan nân hnyi úen mok a ödra :  
 K' oge me hom úhnyúkongo hanuk me  
 ca han ;  
 Ke ame hmetu hijik hic ka hnyi úlaik.  
 14 Ke haba hwakecik kâu, me helâ me  
 liamewaeny k' ame ne liamekeiny  
 më :  
 K' oge me nom me tenge helâ me at  
 ame tenge thungau ge hinyen.  
 15 Ke hnyi úen vec a inya, me adre me  
 senyin me úkhacaköu :  
 Ame úkhacaköu hoúmonu kõnya, ke ca  
 khanö nya ;  
 Adre me kiö nya, me ca menâ bi.  
 16 Helâ me man tawat ae monu, a hnyat  
 úhiö hnyi je bijeú,  
 Adre me hóc nyu kõnya.  
 17 Than lö, u me he ka wâ ke ne o but  
 kehö ?  
 Omelö thö hanuk únyi hnyi anyidra je  
 úokonguny,  
 A hnök hna betenge gan únyi hnyi  
 wanben je liona.  
 18 Oge me he ka ole köu hnyi úkhacaköu  
 ae gan :

K' oge me he ka oganö u hnyi wanben  
 tawat ae se hia.  
 19 U na ca he ju ka hna ta je ivahnai-  
 hmiöny mönya ka senyin huk hnyi  
 hwali :  
 Ke ca hn' ödra a tawat adre me húkötio  
 nya ke ba can, he ka hinoutmhak bi.  
 20 Anyin adre me ca úsabö úsoköu :  
 K' adre me penapena je hofuc iyawö  
 ka tawat adre me laba so hnyi  
 hnyei.  
 21 Eke, adre me memang gan hmâ kõnya ;  
 Haingödra, ka habe, Awe! Awe! öhmui  
 e wâ but.  
 22 Iehova lö, u je hia but wâ e ; ö u ca  
 laba hnyibú :  
 Than lö, ca laba úsákátö mönya.  
 23 Bwebwet dö, ke todrö he ka owisö nya,  
 Hnyi hnök hna ivinö, Khonguk me Tu-  
 hök.  
 24 Iehova, Khonguk lö, owisö nya thö  
 hoton hwekecâm ae wisa ;  
 Me ca hn' ödra bi he ka senyin huk.  
 25 Ca hn' ödra bi he ka ha eú hnyi je hnye-  
 kudra, ka habe, Awe, a so but :  
 Ca hn' ödra he ka ha, ka habe, Ötin e  
 hia but utâ e.  
 26 E so e tha hmehma me lolo tawat adre  
 me senyinâ hna okongu nya :  
 E so e he hmehma me haikongoâ ka  
 khavâ tawat adre me bi gan kõnya.  
 27 E so e hongot senyin me hobâ tawat  
 adre me senyin ge hwakecik ae wisa :  
 E ke, e so adre me ha bala bi, ka habe,  
 Oganö Iehova thö,  
 Wale at ame senyinâ hnahic anyin  
 athnyabainy.  
 28 Ke ame he bohök ka ha hwakecâm ae  
 wisa,  
 Me hna oganö u hnyi je bong.

SALAMO 36.

*Hobi kâu at rhik khumöng. Salamo anyi Davita  
 athnyabai Iehova.*

**A** ME ha eú hnyi hnyekuk ge hna ha-  
 nyâúâ hnen at ae kong, ka habe,  
 E ca hu hnyi li emakan, hna outen  
 Khong.  
 2 Anyin a e ame haisoâ e bi hnyi ka  
 hnyimakan bi,  
 A adre me ca he ka wâ anyin hulö, me  
 ikikiâ e.  
 3 E kong me iyawö ta je hofuc únyi hnyi  
 hnyimen :  
 E ame ca metâ hmetu me ányâ so.

SALAMO 37.

- 4 E ame ûnykûme ûokonguny hon hnen  
hna mokut ;  
E ame labö vheno gethen ae ca so ;  
E ame ca ikiki ge monu.
- 5 Iehova lö, ethö hnyi drany ânyâm ibe-  
tengiö ;  
Ke ne o but hnyi je ûlâ ânyâm hnathu.
- 6 Haba ânyâm wisa, me helâ me je bucen  
anyin Khong ;  
E dit hmönyin hnâm je hna owisa :  
Iehova lö, u thibi at ame tuö möt anyin  
at me meno.
- 7 Khonguk lö, shaiba ge iûnyihnathuiny  
ânyâm betenge !  
K' ame labageju lakon tavat hnyi hme-  
non li labenyâm.
- 8 Adre me he ka sekudra gan hmâ ge ta  
je ûnyi ae pipikhenya hnyi umâm  
uma ;  
Ke u me he ka habelidra ge wageweiny  
ânyâm senyin.
- 9 Anyin a e bi unyâm pupuainy möt :  
Öhmun e he bi ka wâ melam hnen  
ânyâm melam.
- 10 U na he bala ju ka betenge ge tavat ae  
khan' ödra u ;  
Ka ânyâ hwakecâm ae wisa ka tavat  
adre me hnyok wisa.
- 11 Ca he bi ka hna hnyeücan at ae bi gan  
he ka tot kõnya,  
Ke ca hna je hnyamen tavat ae kong  
he ka obö nya.
- 12 Waleling ame ta but tavat adre me  
ânyâ ûnyi ae kong :  
Adre me hagut 'ödra, ke ca khan' ödra  
hmetu bi he ka tot.

SALAMO 37.

*Salamo anyi Davita.*

- U** MA ca vec bi ge tavat adre me ânyâ  
ûnyi ae kong,  
Ke u me ca he ka huhnyinyâ tavat  
adre me ânya ûnyi ae ca wisa.
- 2 Anyin adre me he ka ie subâ degeci ödra  
helâ me hnaönying,  
Me meleca helâ me hnyot ae hât.
- 3 Geju thö kö Iehova, ke mâdrâ so ;  
Labâ hnyei, ke hnu hoton hnathu.
- 4 Senyin dö minya kö Iehova ;  
Me e ame he ka ham köu je hna sumâtâ  
hnen hnyekom.
- 5 Hna but dem gethen kö Iehova ;  
Geju thö minya kâu, me e ame he ka  
ânyâ.
- 6 Me e ame he ka oâ hwakecâm ae wisa  
hela me melam,  
Ke je hna owisa u helâ me jebigö.
- 7 Laba wia ju unyi Iehova, ke halubahi-  
ngen ju :  
Ca he ka hmak ge at ae sot hnyi deny  
gethen,  
Wale at ame bibihwakecin he ka oko-  
ngoâ.
- 8 Soju hmönyin, ke oumo thö wathe-  
thöt :  
U ma ca he ka hmak, ke wale gethen  
deny hulö.
- 9 Anyin adre me he ka subâ degecâ tavat  
adre me ânyâ hulö :  
K' ame he ka hu hnyei ka tavat adre  
me halubahing Iehova.
- 10 Anyin a meokhaca, me ame he ka hia  
but at ae kong :  
Eke, u me he ka ti wâ wia hnen, ka  
hia but e.
- 11 K' adre me he tavat ae ilemuk ka hu  
hnyei ;  
Ke adre me he ka senyina ûsoköu ae  
gan hmâ.
- 12 Haba at ae kong ame sihnân at ae wisa,  
Me hóc nyu kâu.
- 13 Ame he Than ka hlumâ e :  
Anyin a e ame wâ ae hakekeny jut  
bongon bong.
- 14 Haba tavat ae kong adre hia but oc  
hele vat, me oto cafana ;  
M' adre me he ka hagutâ at ae vec me  
at ae theduoc,  
Me hlingâ tavat adre me he wisa hnyi  
gethen.
- 15 Ame he anyidra je hele vat ka dit ka  
hnyi je hnyekudra bi,  
Ke adre me he ka thu anyidra je cafana.
- 16 E nua ûhnyükong hna hu hnen at ae  
wisa hwakecin  
Hon tang omjehen tavat ae kong.
- 17 Anyin adre me he ka thu je benyin  
tavat ae kong :  
Ke haba Iehova ame cö tavat ae wisa.
- 18 E khanö Iehova bi ta je bong bongon  
tavat ae wisa :  
Ke ka e bala bi jekhöüdra nyiele balua.
- 19 Adre me ca he bi ka hmehma hnyi üen  
ae kong :  
Ke adre me he ka sekudra hnyi je  
bonginy hmiâ.
- 20 Ke ame he ka hia tavat ae kong,  
Ke ame he je iwahnaihmiöny me Iehova  
ka helâ me pipikhenyainy lakon  
mamoe :

SALAMO 38.

- Adre me he ka aú but, me hi ödra but  
hnyi hainy meic.
- 21 Haba at ae kong ame mē sumat, me ca  
ham hmetu bi :  
Ke haba at ae wisa ame betenge me  
ham.
- 22 Ame he tavat, wale e ame ohnahicâ, ka  
hu hnyei ;  
Ke e ame he ka subâ degecâ tavat ae  
hnaúhangö.
- 23 Iehova ame otílâ hmâ je hna okca hnen  
at ;  
Ke e ame senyin ge deny gethen
- 24 K' ame ne he bi ka ta, me ame ca he  
ka ta kong :  
Anyin a Iehova ame kât ge hnyamen.
- 25 Iny wanakat ehac, k' iny hingat ut  
walang ang ;  
Ke so bi oge me ca wâ at ae wisa adre  
me degec,  
Me je mátrâniny adre me sumâtâ jeú.
- 26 Haba at eling ame betenge hnyi je bong,  
k' ame mē ham ;  
K' ame hnahic ut je mátrâniny.
- 27 Úsákáúö but me hulö, ke mádrâ so ;  
M' u ma laba hmâ nyiele balua.
- 28 Anyin a Iehova ame weny hna owisa,  
Ke e ame ca degec bi anyin wapak.  
K' adre me tu' ödra balua bi :  
Ke adre me he ka subâ degecâ je mátrân  
tavat ae kong.
- 29 Ame he ka tren hnyei hnen tavat ae  
wisa,  
Me labâ balua.
- 30 Haba hnyimen at ae wisa me ame úsabö  
metâ,  
K' ame fuc bohmen ge hna owisa.
- 31 E bi eú hnyi hnyekon hnanyibu anyin  
Khongon ;  
K' ame ca he ka haúhaú hnen je hna  
okca.
- 32 Haba at ae kong ame ecmákâ at ae  
wisa  
Me elâm he ka hlingâ e.
- 33 K' ame ca he Iehova ka hna e ka hnyi  
hnyamen,  
K' ame ca he ka ohnaúhangöâ e hnyi  
úen adre me owisa gan.
- 34 Halubahing Iehova ju, ke vheno deny  
gethen,  
Me e ame he ka ogöranyi u m' u me he  
ka hu hnyei :  
Ödra ka subâ degecâ tavat ae kong, me  
u me he ka wâ.
- 35 Oge me hia but wâ at ae kong hnyi  
maniny man ae gan,

- K' ame okhulelauâ helâ me úö ae hât  
hnyi kânân kânâ.
- 36 K' ame he ke at hnyi hnyimakan, me  
wâ bi, e hia but e :  
Eke, oge me elâm e, k' oge me ca  
wâ bi.
- 37 Bi haten ju at ae wisa, ke wâ ju at ae  
fofâ :  
Anyin ame he ka hnahic ut obiny at  
eling.
- 38 Ke haba tavat hanyáúúâ, adre me he ka  
tha ohi' ödra bi :  
Haba obiny tavat ae kong adre me he  
ka subâ degecâ.
- 39 Ke haba úhömeli anyin tavat ae wisa,  
me únyi ga Iehova ;  
E thibi tang hwegiödra hnyi úen vec.
- 40 Ke Iehova ame hadru' ödra, me húgún'  
ödra :  
E ame húgún' ödra únyi ge tavat ae  
kong, me omeli ödra,  
Anyin adre me lubaduöng unyin.

SALAMO 38.

*Salamo anyi Davita hnân óánykámed.*

- I** EHOVA lö, ca he ka ú nya hnyi ányâm  
hmönyin :  
Ke ca he bi ka nö nya hnyi hnâm hna  
wathethöt.
- 2 Anyin ame aat dö ányâm je fana könya,  
Ke u je hlic nya hwegiö nya ge hnya-  
mâm.
- 3 E ba ong dok ae so hnyi vik, can ányâm  
hmönyin ;  
Ke haba khaca, e ba hwegien je jeiök  
can anyik hulö.
- 4 Anyin ame ölö thö hon böc anyik je  
hulö :  
Helâ me mán hok ae pason ge ihma-  
kiny.
- 5 E bon dut me bobot hnök je aat,  
Can hwakecik ae monu.
- 6 Oge me seset me ti nom hnyikânâi ;  
Oge me tenge tot hnyi je bong.
- 7 E unöngötö li jebalainuk hnen iei,  
Ke ba ong dok ae so hnyi vik.
- 8 Iny sēnyin k' adre kot hwegiâ unyik :  
Oge me kuku can ame hlohlo but hnye-  
kuk.
- 9 Than lö, e bi hnyi hnyimákâm ta je wek  
hia thithö ;  
Ke ca iyong bi köu anyik mâng.
- 10 Ame utmomokhon hnyekuk, ke hia but  
hwegiök :  
Ke hia minya but melaminy li emökök.

SALAMO 39, 40.

- 11 Adre me tot sákáú laihumik me je laha-  
nök ge anyik mok.  
Ke ame tot sákáú gak je liamekeiny  
mönya.
- 12 Adre me töu hnewek tavat adre me elâm  
hanuk.  
K' ame haiö nya hnen tavat adre me  
bekuc nya,  
K' adre me únykúme tang iyawö hnyi  
je bong.
- 13 Ke oge me ca he bi nya ka löng, iny  
helâ me at ae wejiji ;  
K' iny helâ me hum, a at ame ca khöng  
hnyimen.
- 14 Eke, iny úcú me at ame ca löng bi,  
Ae ba hnân ivinö hnyi hnyimen.
- 15 Anyin a oge me geju u, Iehova :  
Than lö a Khonguk, u me he ka thu  
könya.
- 16 Anyin a haingök, ka hahe, wâ adre nye  
he ka manhic huk :  
E ka haúhaú cak, m' adre me he ka  
ogan' ödra bi huk.
- 17 Anyin a helâke oge me he ka ta but  
eâu,  
Ke haba anyik hlöuhlöu ka e bala bi  
hnyi hnyimakök.
- 18 Anyin a oge me he ka haimemenâ anyik  
hulö ;  
Oge me he ka hmak can anyik monu.
- 19 Ke ame tot je iwahnaihmiöny mönya,  
k' ödra hwege :  
Ke se hia tavat adre me húkhötio nya  
baüo nya.
- 20 Ke haba tavat adre me bi hwaban so ge  
kong,  
Me adre me bi iwahnaihmiöny mönya,  
can oge me hnu hoton únyi ae so.
- 21 Iehova lö, ca hna degeci nya bi :  
Khonguk lö, ca he ka úsákáúo mönya.
- 22 Than lö, at ame omeli nya,  
Logotö he ka hadruo nya.

SALAMO 39.

*Hobi kâu at rhik khumöng, wale Jedulhun. Salamo  
anyi Davita.*

- H** AINGÖK, Oge me he bi nya ka tuö  
dek je gethen,  
M' oge me ca he ka monu ge bohömök :  
Oge me he ka tuö hnyimök ge únyi  
hnân ohnyibö,  
E ka tiga laba hnyi hnyimakök tavat  
ae kong.
- 2 Oge me laba hum ke hnyibú, eke, hnyi  
únyi ae so ;  
Ke ame bwebwet anyik hlöuhlöu.

- 3 E kahwa hnyekuk eú hnyik ;  
Inya oge me tiga únykúme, me ame  
ubâhlâ bala thö meic.  
Me oge me fuc dö ge bohömök ;
- 4 Iehova lö, omanená thö könya obiny  
gak,  
Me tulutiny bonguk je bong, me bo-  
ngon e ;  
Omanená thö könya ae okhulit bonguk  
je bong.
- 5 Wâ bi, u je hia but oâ bonguk je bong  
helâ me je tulutiny hnyam ;  
Ke helâke e ca únyi hnathu je hunaik  
hnyi hnyimákâm : [Sela.  
Awe, thatúnyi tavat hia thithö adre op.
- 6 Ame labö vheno tavat hia hnyi hmenon  
thibi :  
E únyibaú anyidra útuböny :  
E ame khon, ke ca khana ewa at ame  
he ka hlo.
- 7 Ke walang ang, Than, ieú oge me halu-  
bahingen ?  
Ke u thibi hnök hna gejon.
- 8 Thöng nya but únyi hnyi hnök je hua  
hanyâúâ hia :  
Ca hna but at ae monu he ka haiö nya.
- 9 Oge me hum but, oge me ca khöng  
hnyimök ;  
Anyin a u thibi at a ányâ.
- 10 Hom but gak hna kuc nya gam :  
Oge me aú hut ge hna úkúc hnen  
benyâm.
- 11 Hnyi úen u je ná at wale he ka thawâ  
hulö,  
M' u me ohia anyin hmanenang helâ  
me walelaba : [Sela  
Awe, thatúnyi tavat hia thithö.
- 12 Iehova lö, löng ju hijik hic, tevehlöng  
ju anyik tenge ;  
Ca laba hnyibú ge deköiök :  
Anyin a iny atkanyua unyâm,  
Me at ame më laba, helâ me lakamök  
hia thithö.
- 13 Ö u hwiö thö gak, m' inye he ka hwege  
hmetu,  
Inye tiga ca he but, me hia but.

SALAMO 40.

*Hobi kâu at rhik khumöng. Salamo anyi Davita.*

- O** GE me labö halubahing Iehova ;  
Me e ame tevehling nya, me löng  
anyik tenge.
- 2 E ame öu nya minya göranyai únyi  
hnyi thop ae lulung, me únyi hnyi  
kânâ ae kece ;

SALAMO 41.

- Me e ame otilâ li cak hon kic, me ote-  
thmâ hnök je hna okca.
- 3 E ame ip hnyi hnyimök khumöng ae  
teb ûnyi, wale he ka ogânâ Kho-  
nguta :  
Ame he tavat ae se ka wâ, me ot,  
Me geju kö Iehova.
- 4 Hnahic hnen at ame hum Iehova me  
hnân gejon,  
K' ame ca ûnykûme ka at ame hnyok  
bi gan, me tavat adre me saû ka hnyi  
thoi.
- 5 Iehova Khonguk lö, e se hia ânyâm ta  
je huliwa hnân lâiâ u je ânyâ,  
Me hnâm ta je hna ûnykûme köhmun :  
Ca hnân he ka ha gaga köu ;  
Oge ne beomanenâ me ha,  
Me ti se hia hmönyin a ca hnân bi aû.
- 6 E ca wem hut adre me hlingâ me bwi-  
hlany ;  
U je kou li hnyikönyök :  
U je ca hawâ hudiny leu me hudiny  
hulö.
- 7 Ke haingök, Wâ ju, inya ang :  
Adre me sibnalimen gak hnyi tusi adre  
vhec :
- 8 Khonguk lö, oge me senyin he ka ânyâ  
wem ;  
Eke, eû hnyi hnyekuk ânyâm hnanyibu.
- 9 Oge hia but khetâ hwakecin ae wisa  
hnyi ûkhacaköu ae gan ;  
Wâ bi, oge me ca he ka behânâ li esö-  
ngodik,  
E manen köu e, Iehova.
- 10 Oge ca hia but ikhâlâ eû hnyi hnyekuk  
hwakecâm ae wisa ;  
Ke oge hia but omanenâ ânyâm hnathu  
me ûhömeli gam :  
Oge ca hia but ikhâlâ ânyâm ibetengiö  
me hnathu ka ûkhacaköu ae gan.
- 11 Iehova lö, ca behânâ bi gak ânyâm je  
tang betenge :  
E so ame he bala ânyâm ibetengiö me  
hnathu he ka tuö nya.
- 12 Anyin ame igigili nya hnen ta je hulö  
a ca hnân bi aû,  
Ame hia but hom tilö nya hnen anyik  
je hulö, me ma ca khanö nya he ka  
bwele göranyai ;  
Ae se hia hon úseiny leünen bök, me  
ame gâuk.
- 13 Iehova lö, ö u he ju ka omeli nya ;  
Iehova lö, logotö he ka hadruo nya.
- 14 E so adre me he ka hmehma me tha  
monumonu  
Tavat adre me elâm hanuk he ka ohia e :

- E so adre me he ka ohmetuhmeto me  
ohmehma  
Tavat adre me senyin ge hna okongu  
nya.
- 15 E so adre me he ka ba wan hwaban  
hwakecidrin hnân ohmehma,  
Tavat adre me ha könya, ka habe, Ohö,  
Ohö.
- 16 E so adre me he hia tavat adre me  
elöm u ka hobâ me senyin köu :  
E so adre me labö ha hnen tavat adre  
me hnyok ka ânyâm ûhömeli, ka  
habe,  
Oganö Iehova thö.
- 17 Ke iny vec me theduoc ;  
Ke so bi Than ame ûnykûmi nya :  
U thibi at ame hadruo nya me omeli  
nya ;  
Khonguk lö, ca he ka bec.

SALAMO 41.

*Hobi kâu at vhiik khumöng. Salamo anyi Davita.*

- H**NAHIC hnen at ame ûnykûme ka at  
ae sēnyin :  
Ame he Iehova ka omelö e hnyi bong  
ae kong.
- 2 Ame he Iehova ka tuö e, me obeúâ  
anyin möt, ke adre me he ka ohna-  
hicâ e hnyi hnyei ;  
Ke u me ca he bi ka hna e ka hnyi  
weny je iwahnaihmiöny mē.
- 3 Iehova ame he ka kap e hnyi hna úâ :  
U je ânyâwia hia hnen hna mokut hnyi  
anyin mok.
- 4 Haingök dö, Iehova lö, betenge ju gak :  
Ometo thö hanuk ; anyin oge hia but  
monu köu.
- 5 Haba je iwahnaihmiöny mönya me adre  
me haikongu nya, ka habe,  
Ie ün e ame he ka mokcu hnyin, me  
hia bi ien ?
- 6 K' ame ne o ka ö nya, me e ame ha  
thoi :  
Haba hnyekon ame ûkhöünâ hulö eû  
hnyin :  
Me e ame didrut me ha e.
- 7 Haba tavat hia adre me hûkötio nya,  
me adre me ulidri nya :  
Adre me vak he ka okongu nya.
- 8 Haingödra, E kece but kâu mok ae  
kong :  
E ame mokut walang ang, k' ame ca he  
hmetu ka tot.
- 9 Eke, haba ihumik, waleji at oge me  
geju kâu, at ame an ök jeû

SALAMO 42, 43.

- Ame hia but húki nya ge ohmâiny can.
- 10 Ke haba u, Iehova lö, u ma betenge gak, me otیلو nya thö, Me inye he ka bi hwaban ködra.
- 11 Walang haten könya a u me senyin könya, Anyin a ame ca ohobeluâ huk hnen iwahnaihmiöny mönya.
- 12 Ke haba inya, me u je ci nya hnyi hwa-kecik ae hnathu, Me otیلو nya hnyi hnyimâkâm nyiele balua.
- 13 E so he ka haisoi Iehova, Khongu Isaraela, Hwân ehac balua ke ne o but nyiele balua. Amen, me Amen.

TUSI II.

SALAMO 42.

*Hobi kâu at vhiik khumöng. Hnân ünö. Anyin laku Kora.*

- H**ELÂ me aila ame he momokhon ka hnyi ta je wagewe, Helâe minya hanuk ame mokhon köu, Khong.
- 2 E beic hanuk ka Khong, ka Khong ae möt :  
Ie ün en oge me he ka o me manen hnyin hnyi hnyimakan Khong ?
- 3 Haba hing ök jeü hnyi lany me lit me deköien li emakök, Waleji adre me labö ha könya hnyi je bong, ka habe, Ewa Khongom ?
- 4 Oge me ünüküme ta je ünü eling, me hingälâ hanuk eü hnyi hnyekuk, Waleji ge hnök hna tha he me bunyen, me hum ödra ka hnyi uma umen Khong, Tha öhmun me hwan senyin me oganá, at se hia adre me tuö bong ae kap.
- 5 Hanuk lö, ieü gam u me ilitmak ?  
Ke ieü u me hmak gan eü hnyi hnyekuk ?  
Lubahingen ju Khong : anyin oge me he ka oleâ kâu  
Ge möt ünü hnyi hnyimakan.
- 6 Khonguk lö, e hmak ut hanuk eü hnyi hnyekuk :

- Anyin a wale oge me ünükümi u hnyi hnyei Joridano, Me je Heremona, üheny hnyi bucen Mizar.
- 7 Ame hongot ke dok ae dit ka ke dok ae dit hnen hwan ânyâm je bouâdet :  
A hia but khutukhaüö nya ânyâm ta je waköio me ânyâm je wabulu.
- 8 Ke ame he Iehova ka hûna anyin betenge hnyi lany, Ke haba hnyi lit ame he ka tha e mönya anyin khumöng, Wale hic ka Khongon melik.
- 9 Oge me he ka ha ka Khong a kicik, ka habe, Ieü gam u me hnying nya ?  
Geü oge me tenge tot ge hna okongu nya linen je iwahnaihmiöny ?
- 10 Je iwahnaihmiöny mönya adre me hiö nya, helâke e hu hele vat eü hnyi je jeieök ;  
Me labö ha könya hnyi je bong, ka habe, Ewa Khongom ?
- 11 Hanuk lö, ieü gam u me ilitmak ?  
Ke ieü u me hmak gan eü hnyi hnyekuk ?  
Lubahingen ju Khong : anyin oge me he ka oleâ kâu bi,  
Wale melen hnyimakök, me Khonguk.

SALAMO 43.

- K**HONGUK lö, owisö nya, ke ivinö ju hobi könya ka hnyei ame ca ot :  
Ö u omeli nya thö ünü ge at iyawö me at ae ca wisa.
- 2 Anyin a u Khongon tang hwegiök ; can ieü u me digic nya ?  
Can ieü oge me tenge tot ge hna okongu nya hnen ta je iwahnaihmiöny ?
- 3 Ö u kunâ but ânyâm melam me ânyâm hnathu ; hnân he ka su nya :  
Me hum nya ka hnyi ânyâm bucen ae kap,  
Me ka hnyi umâm je uma menâ.
- 4 Me oge me he ka didrö ka taben hut anyin Khong, Wale ka Khong hnök hna senyina gan hmâ :  
Khong a Khonguk lö, oge me he ka oganö u ge kitara.
- 5 Hanuk lö, ieü u me ilitmak gan ?  
Ke ieü gam u me hmak eü hnyi hnyekuk ?  
Lubahingen ju Khong : anyin a oge me he ka oleâ kâu,  
A melen hnyimakök, me Khonguk.

## SALAMO 44.

*Hobi káu at rhik khumöng. Salamo anyin laku Kora. Hnân ünö.*

**K**HONG lö, öhmun e löng ge je hnyikönyöhmun, k' ame ha gaga köhmun hnen je lakamöhmun.

Waleji ge huliwa u je ânyâ hnyi bongudra ta je bong, waleji hnyi ta je bong adrem.

2 U je obâ aten je hnyei ge hnyamâm, me te hwabödra :

U je okongoâ je hnyei, me obâ degeci ödra.

3 Anyin a adre me ca hu hnyei hnen bi anyidra ta je hele vat,

Ke adre me ca möt hnen je hing hnyamödra bi :

Ke so bi hnen hnyamâm, me benyâm, me melaminy hnyimâkâm,

Anyin a u me betenge baû gadra.

4 Khonguk lö, u thibi Tuhök :

Hûna ju möt hobi kö Jakob.

5 Öhmun e he ka hagutâ je iwahnaihmiony möhmun únyi gam :

Únyi hnyi iâm öhmun e he ka uto ju tavat adre me tot köhmun.

6 Anyin oge me ca he ka gejoâ anyikafana,

Keame ca he ka omeli nya anyikhele vat.

7 Ke u je hia but omeli öhmun únyi ge je iwahnaihmiony möhmun,

Me ohmehma tavat adre me hûkoti öhmun.

8 Öhmun e hia but ohobeluâ Khong hnyi je bong,

Me öhmun e he ka oleâ iâm ke ne o but nyiele balua. [Sela.

9 Ke walang ang u je hia but digic öhmun, me öhnyükongu öhmun ;

Me ca tha he hele me anyihmun je utbavat.

10 U je ohmetubmetu öhmun únyi ge je iwahnaihmiony,

Me ame he tavat adre me hûkoti öhmun ka söh hobi ködra bi.

11 U je hia but hn' öhmun helâ me je mamoe hnân han ;

Me ovesei öhmun dut hnyi wanben ta je hnyei.

12 U je úco látâm ke ba troban,

Me u je ca bi hanen ka omjehem ge hwabödra.

13 U me wi' öhmun m' adre me he ka

haikongu öhmun, tavat adre me laba hakekenyi öhmun,

Me hnân hi öhmun me hlum' öhmun hnen tavat adre me laba igigili öhmun.

14 U me wi' öhmun me hnân taben úhiö anyin aten ke je hnyei,

Me hnân nyinyikâ ban hnyi wanben je hnyei.

15 Haba hna hom úhnyükongu nya, e bala bi hnyi hnyimakök hnyi je bong hia,

K' ame tubi nya hnen hmehmainy li emakök ;

16 Únyi hnyi hwan at ame úhaiö me fuc bi gan ka Khong ;

Ke únyi hnyi iwahnaihmiony me at ame bi hwaban hmeto.

17 Ame o but ta je únyi hia e köhmun ; ke so bi öhmun e ca hnying u bi,

Ke öhmun e ca hia but thoi hnyi ânyâm úhinhnyköu.

18 Ame ca hmetu je hnyekuhmun,

K' ame ca saû bi hnöhmun je hna okca únyi hnyi dem gethen ;

19 Ke so bi u je hia but kuc öhmun hnyi hnen je tanimo,

Me tubi öhmun ge hmenon mok.

20 Öhmun e ne hia but hnying ien Khonguhmun,

Me hinöbeny ka ke Khong bi ;

21 Hawa, ame ca he Khong ka elâm e ?

Anyin ae khana ta je únyi ae iyong eú hnyi hnyok.

22 Eke, can iâm adre me hling' öhmun hnyi je bong hia ;

K' adre me öü öhmun helâ me je mamoe hnân hlingâ.

23 Than lö, hmak dö, ieú gam u me mokut ? Todró, ca digic öhmun bala bi.

24 Ieú gam u me ikhâlâ hnyimâkâm,

Me hnying anyihmun vec me hra sed' öhmun.

25 Anyin adre hia but oto hanuhmun ka hnyi sesâ :

K' ame kece but je hnyekuhmun ka hnyi kânâ.

26 Todró he ka hadru' öhmun,

Me bi hwaban anyihmun möt únyi hnyi ânyâm ibetengiö.

## SALAMO 45.

*Hobi káu at rhik khumöng ; adre hai huyi Sosani. Salamo anyin laku Kora. Hnân ünö. Khumöng ibetengiö.*

**A**ME bahihingölö thö hnyekuk ge únyi ae so :

SALAMO 46.

- Oge me ha anyik ta je huliwa hobi kâu than :
- Haba bohök, me pen anyin at ame sisit mweimwei.
- 2 E nua hmönyin soâm hon lakon tavat ; Adre hia but hingâlâ ibetengiö ka hnyi hnyimâm :
- Anyin a wale a hia but Khong ohnahici u nyiele balua.
- 3 At ae hwege lö, weikâ ju ânyâm hele vat hon jevam,
- Wale ânyâm hmanenang me bongon than gam.
- 4 He thö me hnahic hnyi bongon than gam,
- Ûnyi ge hnathu, me menyik, me wisa : Ke ame he hnyam a metâm ka no u ge je huliwa hnân outen.
- 5 E so hmönyin homakan ânyâm je fana ; A ta but je hnyei eü hmelâm ; A hia but dit hnyi hnyekon je iwahnai-hmiöny me than.
- 6 Khong lö, e bi ânyâm theron nyiele balua :
- Uci ae wisa uciny dokhom dökhu.
- 7 U je hia but hnyok ka hwakecin ae wisa, me ikiki ge hwakecin ae kong :
- Anyin a wale Khong a Khongom ame hia but hû u
- Ge wakacoiny senyin hon je lahanâm bi.
- 8 E bo so je ûkhaûâm hia ge muro, me aloe, me kesia ;
- Adre hia but osenyini u ge je ûnyikhumöng, ûnyi hnyi je uma nyon elefan.
- 9 E hu bi je hlu lakon je than hanen je athnyabaem a je momo unyâm :
- Ame tot hnyi hnyamâm a metâm momo than ame theibâ goliny Ofira.
- 10 Nökuk hlu lö, löng ju, me ûnykûme ju, me tevehlöng ju ;
- E so u ma hnying ut em hnyei me hnyaban kâmâm ;
- 11 Be me he than ka weny soâm :
- Anyin a e thibi Tuhâm ; ke nom ju kâu.
- 12 Ke ame he ka e bi nöku Turo tha e me bwihlany ;
- Ke ame he tavat tren omjeû hnyi hnyei ka sumâtâ ibetengiö gam.
- 13 E hmanenang hia, eü hnyin uma, hlu nokon than :
- Adre me tha hwâwâ gol hnyi ûkhaûen.
- 14 Adre me he ka su e ka than, a khavâ ûkhaû adre tibet mecâ :

- Haba wahlu a je lahanen adre me hnu hoton
- Me adre me he ka hum ödrin köu.
- 15 Adre me he ka hum ödrin me senyin me hobâ ;
- Ödrin e he ka didrö ka hnyi uma umen than.
- 16 Ame he je lakom ka hwö hwaban lakâmâm,
- M' u me he ka otil' ödrin, m' ödrin je than eang hmelen hia.
- 17 Oge me he ka oûnykûmeâ iâm hnyi je dö hia :
- Anyin a wale, ame he tavat ka oleâ köu nyiele nyiele balua.

SALAMO 46.

*Hobi kâu at vhiik khumöng ; Salamo anyin laku Kora ; Adre me hai hnyi Alamotha. Khumöng.*

- K**HONG thibi hnöta hñabâ me tang hwegiöta,
- E úhadruo ae hakekeny hmönyin hnyi vec.
- 2 Anyin a wale ate me ca he ka ot, eja ke ne adre ne okebongonâ hmeledrany,
- Me hom je bucen ka hnyi wanben je köiö ;
- 3 Eja ke ne a ne ü me úkhtukhaûâ je waköien,
- Me bwebwet je bucen ge ukhibiny [Sela.
- 4 E hu wagewe, k' ame osenyinâ taun anyin Khong ge je wadutö a ûnyi gau, Wale dok ae kap a hnen je uma mano umen Beönua.
- 5 E but Khong hnyi wanben e ; k' ame ca he ka bwebwet :
- Ame ie he Khong ka hadruâ e, wale hnyi okubelit.
- 6 Ame imemedien ta je hnyei, k' ame bwebwet ta je dökhu :
- E ame fuc ge hwan, me ame köiö but hmeledrany.
- 7 Iehova tuhan sabaoth ame laba unyita ! Khongu Jakob hnöta hñabâ [Sela.
- 8 Ai öbun, wâ ju ta je huliwa anyi Iehova,
- A at ame hia but öba wan hmeledrany.
- 9 E ame bi obiny je vat ke ne o but can hmeledrany ;
- E ame ohmetro cafana, me subâ luâ ö ;
- E ame thong degecâ je kariota ge meic.



SALAMO 47—49.

- 10 Mē soju, ke khan' öbun dö a inya thibi  
Khong:  
Oge me he ka beönua hnyi ta je hnyei,  
oge me he ka beönua eang hmele-  
drany.
- 11 Tha e möta Iehova tuhan sabaoth;  
Hnöta hhabâ Khongu Jakob. [Sela.]

SALAMO 47.

*Hobi kau at vhiik khumöng: Salamo anyin laku  
Kora.*

- T**A je hnyei hia thithö lö, khaûkhaû ju  
je hnyamöbun;  
Hongot ka Khong ge hwan manbic.
- 2 Anyin a Iehova Beönua at hnân outen;  
E than ae gan hmâ hon hmeledrany hia  
thithö.
- 3 E ame he ka hom ûhnyükongo ta je  
hnyei eû hnyi hmelita,  
Me tavat minya eû hnyi hmelen  
hnyeúcata.
- 4 E ame he ka úca jekhöû hobi köta,  
Waleji ame oúnyihnatho Jakob at e ame  
betenge gan. [Sela.]
- 5 Ame ölö thö Khong tha e me hwahongot  
hwege,  
Wale Iehova me ifucin trutru.
- 6 Khumöng oganá thö Khong, khumöng  
oganá thö:  
Khumöng oganá thö Tuhöta, khumöng  
oganá thö.
- 7 Anyin a Khong Tuhan hmeledrany hia  
thithö:  
Khumöng oganá thö, tha e me wâ  
ûnykûme.
- 8 Khong ame musö hon je hnyei:  
Khong ame laba hon anyin theron ae  
kap.
- 9 Ame ûkhacaköu thö ta je tuhan je  
hnyei,  
Me me lakeiny Khongu Aberahama:  
Anyin a anyin Khong ta je becin hmele-  
drany;  
Ke e ti beönua.

SALAMO 48.

*Khumöng; Salamo anyin laku Kora.*

- E**GAN hmâ Iehova, a hnân ti oganá,  
Hnyi taun anyin Khonguta, a  
anyin bucen ae kap.
- 2 E hmanenang utilen ethö, ke hnân  
osenyina hmeledrany hia thithö,  
A bucen Ziona, hnyi je ke keihen ka  
hnyi hwadrö,

Taun anyin than ae gan.

- 3 A hia but Khong omanenâ e bi me  
hnân hhabâ hnyi je uma umen than  
eling.
- 4 Anyin a wâ bi, ame ûkhacaköu thö ta  
je than,  
Ke adre me tha vheno dok eling.
- 5 Adre me wâ, m' adre me lâiâ;  
Adre me gâ thö udrin me ie kec.
- 6 Ame khöû ödra ju eling ge öbubuny;  
Me vec, helâ me momo ame vec huyin.
- 7 U je ohmouca je huiny Tasesa.  
Ûnyi ge ang hwei.
- 8 Helâji me hnöta hna löng, me helâe  
hnöta hna wâ  
Hnyi taun anyi Iehova tuhan sabaoth,  
hnyi taun anyin Khonguta:  
Ame he Khong ka otethmä e nyiele  
balua [Sela.]
- 9 Khong lö, öhmun e hia but ûnykûme  
ânyâm ibetengiö.  
Hnyin umâm uma kap.
- 10 Khong lö, e úcû iâm,  
Me hna oganö u, ke ne o but je can  
hmeledrany:  
E unöngötö hnyamâm a metâm ge hwa-  
kecin ae wisa.
- 11 E so ame he bucen Ziona ka senyin,  
Me wahu laku Juda ka hobâ,  
Can hnâm je hna owisa.
- 12 Vheno thö Ziona, me he igigilö e:  
Aû thö úseiny anyin je hhabâ ae beû  
göranyai.
- 13 Ûnykûme wia ju öbun je haginy e,  
Wâ gaga ju je uma umen je than eling;  
M' öbun e he ka ha gaga e ka dö a  
biliny.
- 14 Anyin a haba Khong ang me Khonguta  
nyiele nyiele balua:  
E ame he ka su öta ke ne o but hnyi  
mok.

SALAMO 49.

*Hobi kau at vhiik khumöng: Salamo anyin laku  
Kora.*

- T**A je hnyei hia thithö lö, löng ju  
ang;  
Tevehlöng ju öbun hia thithö je aten  
hmeledrany:
- 2 Tavat ae hnyikânâ me tavat ae görany,  
Me tavat ae tren omjeû me tavat ae ba  
ta únyi.
- 3 Ame he hnyimök ka ha metâ:  
Ke ame he hnyekuk ka ûnykûme me  
wâhmakhmeto.

SALAMO 50.

- 4 Oge me he ka tā hnyikönyök ka hna  
ouco :  
Oge me he ka hwân hnök je hna ha ae  
iyong tha e me kitara.
- 5 Hnân eü oge me he ka ot hnyi je bong  
ae kong,  
E ka igigili nya hnen hulö wale at ame  
beweny he ka hwö hwabök ?
- 6 Haba tavat adre me gejon tang mone  
gadra  
Me hobeluâ tang omjehedra ae gan  
hmâ ;
- 7 E ca khana bi ke at gadra he ka bi  
hwaban möt anyin ke liamekeiny  
mē,  
Ke ca khana bi he ka ham ka Khong  
hwaban at eling :
- 8 (Anyin a omjeü ae gan hmâ wale hnân  
bi hwaban je hanudra,  
Ke pason e nyiele balua :)  
9 Me me möt balua e,  
Me ca he ka wâ bobot.
- 10 Anyin a e ame wâ a g' ame labö mokeu  
tavat ae metâ,  
Ke ame tha hia but at ae monu me at  
ae ba ounykûminy,  
Me hna but je omjehedrin ka keihen.
- 11 Adre me ûnykûme eü hnyi je hnye-  
kudra a g' ame he ka tethmâ umödra  
je uma nyiele balua,  
Ke je hnyabadra ka hnyi je dö hia ;  
K' adre me hwenyi ien je idra ge iödra  
bi.
- 12 Haba at, me ame ca laba hnyi hma-  
nenang :  
K'ame helâ me omeno wale ame he ka  
hia.
- 13 Haba hwakecidra eling me wale anyidra  
monu :  
K' ame he bi tavat a bilidra ka haisoâ  
hnödra hna ha. [Sela.
- 14 Adre me ip ödra a hnahat hobi kâu  
hedis ;  
K' ame tu' ödra ge mok, helâke at tuö  
mamoe :  
Ame he tavat ae wisa ka musi ödra hnyi  
haolany ;  
K' ame he anyidra hmanenang ka bi  
obiny hnyi hedis, me me ba umen  
bi e.
- 15 Ke ame he Khong ka omelö hanuk ûnyi  
hnyi man maniny hedis :  
Anyin a e ame he ka köp nya. [Sela.
- 16 Ca he ka ot bi a ne he ke at ka hu

- K' ame ne khulelau hmanenanginy  
anyin lap :  
17 Anyin a e ka mokcu, me ba ke ûnyi e  
ame he ka hom ;  
K' ame ca he anyin mec ka ke hoton.
- 18 Eja ke ne a ne hahnahicâ hing hanon  
ke tiga möt,  
K' ame he keihen ka haisoi u, can u je  
ka ohmanenangi u bi,
- 19 Ke so bi e ame he ka he ka ta je döiny  
lakamen ;  
K' adre me ca he bala bi ka wâ melam.
- 20 Haba at adre me ogânâ, k' ame ca wâ  
ûnykûme bi,  
Me ûcü me omeno ame he ka hia.

SALAMO 50.

*Salamo anyi Asifa.*

- H**ABA Khong, a Khong Iehova ame  
hia but fuc,  
Me hawâ hmeledrany ûnyi hnyi hna o  
hnen seünö ke ne o but hnyi hnen  
hna dit.
- 2 A hia but umumelam Khong,  
Ûheny Ziona, wale ae ti hmanenang.
- 3 Ame he ka o but Khonguta, k' ame ca  
he ka laba hnyibû :  
Ame he meic ka han hnyi hnyimakan,  
Ame he ka igigilö e weneü ae gan  
hma.
- 4 E ame he ka hongot ka drany ethö,  
Me hmeledrany, me me he ka owisa  
lakeiny :
- 5 Ûkhacaköu thö könya ta je latök ae  
kap ;  
Waleji tavat adre hia but ûhhiinyköu  
mönya ûnyi ge hut.
- 6 Ke ame he je drany ka omanenâ hwa-  
kecin ae wisa ;  
Anyin a Khong thibi at ame owisa. [Sela.
- 7 Lakeik lö, löng ju me inye he ka ha ;  
Isaraela lö, löng ju, me oge me he ka  
ha hnyikongom.  
Inya thibi Khong, wale Khongom.
- 8 Oge me ca he ka nö u ge hnâm hna bi  
hut ;  
Ke e bala bi hnyi hnyimakök ânyâm ta  
je hut adre le.
- 9 Oge me ca he ka hom ke bolok ûnyi  
hnyi umâm uma,  
Me ta je got бага ûnyi hnyi hnyin ha-  
gâm je hak.
- 10 Anyin a halek bi ta je menoiny hnyot  
hia thithö

SALAMO 51.

- Me ta je meno wale hon je bucen a wan thauzan.
- 11 E kxanö nya ta je meno hia thithö ame gâ hnyi je bucen ;  
Ke halek bi ta je meno hnyi ta hneyi.
- 12 Oge ne mekihnânem, me oge me ca he ka ha köu :  
Anyin a anyik hmeledrany me unöngö-tiny.
- 13 Hawa, oge me he ka an utiöiny ta je bolok,  
Me ijem dren ta je got ?
- 14 Hudo thö ole ka Khong ;  
Ke ham but ka Beönua hnâm je hna khemanyin :
- 15 Ke hao nya thö hnyi bonginy vec ;  
Oge me he ka omeli u, ke ume he ka oganö nya.
- 16 Ke haingen Khong ka tavat ae kong, ka habe,  
Ieü hanymâm a ume haimemenâ anyik ta je hnanyibu,  
Me u me ha anyik úhinykôu ge hnyimâm ?
- 17 Anyin a u me höciâ hna úne,  
Me degec hotom ai hok ta je hofuc.
- 18 U je wâ at ae venöu, me u je tha hnyok mē,  
Ke u je hia but hom jekhom unyin tavat bi únyi monu.
- 19 U je hna hnyimâm ka hulö,  
K' ame sisit iyawö bohâm.
- 20 U je laba ju me haikongoâ liamekiny möu ;  
U je sit hofuc thoi ka nokon hinyâm.
- 21 U je ânyâ ta je únyi eling ke oge me laba hnyibú ;  
U je únykúme a iny tha úcú möu :  
Ke so bi oge me he ka nö u, me ip gaga ta je únyi e hnyi hnyimâkâm.
- 22 Tavat öbun e hnying Khong lö, únykúme ju öbun ang,  
Wâ oge nye he ka ki' öbun, ke ba at he ka omelö :
- 23 Haba tavat hia adre me hudo ole, me adre me oganö nya ;  
Ke oge me he ka omanenâ úhomeli anyin Khong  
Ka at ame penapena deny gethen.

SALAMO 51.

*Hobi kâu at vñik khumöng. Salamo anyi Davita : hnyi áen ame o kâu Nathana perofeta, hucuban dö hnen hna he kö Batheseba.*

- K**HONG lö, betenge ju gak hoton ânyâm ibetengiö :
- Kot degecâ but hnök ta je hna hanyâúâ hoton úganiny ânyâm tang betenge.
- 2 Ti ösüo nya but únyi hnyi anyik monu,  
Me ânyâwiö nya thö únyi hnyi anyik hulö.
- 3 Anyin a oge me ogâ hnök je hna hanyâúâ :  
Ke e bala bi hnyi hnyimakök anyik hulö.
- 4 Oge hia but monu köu, köu thibi,  
Me ânyâ únyi ae kong hnyi hnyimâkâm,  
M'u me he ka wisa u ka ha,  
Ke so hnyi hnâm hna owisa.
- 5 Wâ bi, adre me hnöku nya hnyi monu ;  
Ke a erkin mönya bai hnyi hulö.
- 6 Wâ bi, e bewem hnathu eü hnyi hnyok.  
Ke u me he ka okhanö nya ge metâ hnyi dok ae iyong.
- 7 U me he ka ânyâwiö nya ge hisop, me inye he ka kalaöt ut :  
Ösüo nya ju, me inye he ka hau but hon kiona.
- 8 Olöngi nya ju ge senyin me hobâ ;  
Me me senyin dö je jeien waleji u je thuthu.
- 9 Ikhâlâ ju hnyimâkâm ge anyik ta je hulö,  
Ke kot degecâ but anyik ta je monu hia thithö.
- 10 Khong lö, op dö hobi könya hnyok ae kalaöt ;  
Ke mádrâ hmeto thö hanu ae wisa eü hnyi hnyik.
- 11 Ca digic nya bi hnyi hnyimâkâm ;  
Ke ca hom bi gak hanom ae kap.
- 12 Ohmeto ju könya senyiny ânyâm úhömeli :  
Ke ci nya thö ge hanu ame ie úling.
- 13 Me inye he ka ná dem je gethen ka tavat adre me hanyâúâ ;  
Ke ame he ka hmetuhmetu köu tavat ae kong.
- 14 Khöng lö, Khongon melik, hnö nya but únyi hnyi dra a jönik ;  
Me ame he bohök ka khumöng ogânâ hwakecâm ae wisa.
- 15 Than lö, u me he ka khöng li esongodik ;

K' ame he hnyimök ka omanenâ hnân oganö u.

16 Anyin ae ca wem hut ; me inye he ka ham e :

E ca senem köu je hudiny leü.

17 Haba ta je hut ka Khong me wale thibi hanu ae mita :

Khong lö, u me ca he ka oünyibaüâ hnyok adre omomono ae bewisa.

18 Änyâ thö so kö Ziona hoton hnyekom ae betenge :

Otilâ thö hak veto Jerusalema.

19 Me u me he ka senyina ta je hut ae wisa, wale hut adre me le, me hudiny leu ae bekhöt :

M' adre me he ka hudo je bolok hon änyâm taben hut.

## SALAMO 52.

*Hobi kâu at vhiik khumöng. Salamo anyi Davita hnân ünö: hnyi ün waleji ame o hnyin Doega at Edomo he ka hu kö Saulo, a g' ame he but Davita ka hnyi uma ünö Abimelek.*

**A**T ae hwege lö, ieü gam u me ohobelüâ üokonguny ?

E bala bi ibetengiö anyin Khong.

2 Haba bohâm ame penapena hwakecin ae ti kong,

Helâ me heleügi ae so hwan, k' ame huliwa iyawâ.

3 U je hnyokâ monu hon so ;

Ke thoi, hon he ka ha hofuc ae wisa.

[Sela.

4 Bohmen lö, at thoi,

U je hnyokâ hofuciny hutö hia.

5 K' ame he Khong ka hagutâ degeci u ke ne o but nyiele balua,

E ame he ka köt u, me oc degeci u ünyi hnyi umâm uma mano,

Me uk u ünyi hnyi hnyeiny tavat ae möt .

[Sela.

6 K' ame he bi tavat ae wisa ka wâ e, me ot,

Me hlumâ e, ka habe,

7 Wâ ju at ame ca oünyihnatho bi Khong me me hnabâ bi kâu ;

K' ame gejoâ üganiny tang omjehen,

Me ohwegiâ e bi hnyi anyin hulö.

8 Ke iny ücü me elaiö ame kü khulelau hnyi uma umen Khong :

Oge me labageju ka ihetengiö anyi Khong nyiele nyiele balua.

9 Oge me he ka ole köu ke ne o but nyiele balua, anyin a u je hia but änyâ e :

Ke oge me he ka labageju ka iâm hnyi hnyimakan änyâm wakap, anyin ae so e.

## SALAMO 53.

*Hobi kâu at vhiik khumöng; adre hai hnyi Mahalath. Salamo anyi Davita hnân ünö.*

**H**AINGEN at ae monu eü hnyi hnye-kon, ka habe, E ba Khong.

Adre me bo kong ut, ke adre hia but änyâ huliwa ae ikiki ;

E ba at ame mâdrâ so.

2 Haba Khong ethö hnyi drany ame wâ lakon tavat,

Me me wâ thö, hawa, e hu at ame wâ ünyküme,

Me elâm Khong.

3 Adre me saü hia but ; adre me tha kong ut ;

E ba at ame mâdrâ so, e ba hmönyin me khaca.

4 Hawa, e ba hnyekudra tavat adre me änyâ hulö ?

Wale tavat adre me an lakeik helâ me hna an jeü,

Me ca hongot bi ka Khong.

5 Adre me ot gan hmâ eling, ke ba ünyi hnân outen bi :

Anyin a hia but Khong khüâ degecâ je jeien tavat waleji adre me hunumâ cici u ;

U je hia but ohmehm' ödra, anyin a hia but Khong digic ödra.

6 E na o but ühömeli anyi Isaraela üheny Ziona !

E ka he Khong ka ohmeto lakeiny tavat adre bâ,

Me me he Jakob ka senyin, k' ame he Isaraela ka hobâ.

## SALAMO 54.

*Hobi kâu at vhiik khumöng; hnyi Neginoth. Salamo anyi Davita hnân ünö: hnyi ün a o hnyin at Zif, me ha kö Saulo, ka habe, Hawa ame ca lubaduöng bi Davita unyihmun ?*

**K**HONG lö, omeli nya thö ünyi hnyi iâm,

Ke owisö nya thö hnen tang hwegiâm.

2 Khong lö, löng ju hijik hic ;

Tevehlöng ju ifucin hnyimök.

3 Anyin ame todrö könnya ta je atkanyua, K' adre me elâm hanuk tavat üokonguny :

Adre me ca ip Khong hnyi hnyimâ-ködra.

[Sela.

SALAMO 55, 56.

- 4 Wâ bi Khong thibi at ame hadruo nya :  
Haba Than ame tha e me tavat adre me  
cö hanuk.
- 5 E ame he ka bi hwaban monu anyin je  
iwahnaihmiöny mönya :  
Ohi' ödra but hnyi ânyâm hnathu.
- 6 Oge me he ka hudö köu hut ae betenge :  
Iehova lö, oge me he ka oleâ iâm, anyin  
ae so.
- 7 Anyin a e ame hia but omeli nya hnyi  
je vec hia thithö ;  
Ke a hia but wâ hnen li emakök ûnyi  
oge me wek ka ta je iwahnaihmiöny  
mönya.

SALAMO 55.

*Hobi kâu at vhiik khumöng ; hnyi Neginoth.  
Salamo anyi Davita, hndn ünö.*

- K**HONG lö, long ju ka hijik hic ;  
Ke ca he bi ka ikhâlö u iny ka  
sumat.
- 2 Ling nya ju, me thu thö könya :  
Oge me seset hnyi vec me mâng ;
- 3 Can ifucin iwahnaihmiöny,  
Ke can úöveci anyin at ae kong  
Anyin adre me hna hulö könya,  
K' adre me sedö nya hnyi anyidra  
hmönyin.
- 4 Ame vec gan hmâ hnyekuk eú hnyik :  
K' ame ta but huk je ot adre me  
mekiny.
- 5 Ame o but könya ot me öbubuny,  
K' ame hülülüö nya hnen gâön.
- 6 Ke haingök, ka habe, E na hu ju gak  
li labenyik helâ me biny !  
Me oge me he ka gâ thö, me menâ  
but.
- 7 Wâ bi, oge me he ka ngenu sâkâú ai,  
Oge me he ka laba hnyi hnyebuba.  
[Sela.]
- 8 Oge me he ka logot ka tung  
Ûnyi ge ang ae gan me weneú.
- 9 Than lö, ohi' ödra but, ovehwanâ but je  
bohmödra :  
Anyin oge hia but wâ úokonguny me  
iwatretra hnyi taun.
- 10 Adre me he igigilö hon hak vetoiny hnyi  
lany me lit :  
Ke eú hnyi hnyin e hulö me úokonguny.
- 11 E bi eú hnyi wanben e hwakecin ae  
kong :  
Ke ame ca he but iyawö me thoi úheny  
hnyi je gethen.
- 12 Anyin a ca iwahnaihmiöny bi at ame  
haikongu nya ;

- Ame ne eling, me oge hia but hokhn-  
yokâ :  
Ke ame ca hûkötio nya at eji ame bi  
gan könga ;  
Ame ne eling, me oge hia but ikhölö  
gan :
- 13 Ke ûnyi gam, at ae úcú mönya,  
A liamewaeny mönya, me ihumik.
- 14 Ötuji li at ötu me úhnenamö so,  
Me tha he me bunyen ka hnyi uma  
umen Khong.
- 15 E so e ie o but ködra mok,  
Me tha utut ka hnyi thop k' ödra tiga  
möt :  
Anyin a e bi monu hnyi hnyabadra, eú  
hnyi wanbödra.
- 16 Ke haba inya, oge me he ka hongot ka  
Khong ;  
K' ame he Iehova ka omeli nya.
- 17 Oge me he ka tenge me mâng, hnyi  
sabac me hnyomakatu, me jebigö :  
Me e ame he ka löng ifucik.
- 18 E ame hia but omelö hanuk hnyi hnahic  
ûnyi hnyi hnödra hna vat mönya :  
Anyin a ödra se hia unyik.
- 19 Ame he Khong ka löng me thu ködra,  
Wale at ame laba kâú adrem, [Sela.  
Tavat adre me ca wia bi,  
Me ca ot bi ka Khong.
- 20 E ame hia but hinöbeny he ka kot tavat  
adre me úsoköu mē ;  
Me degec hnen hna úhinyköu.
- 21 E haúhaú hnyimen helâ me bata,  
Ke vat bi hnyekon :  
E menyik hwan je hofuc hon wakaco,  
Ke je hele vat bi ling adre oc.
- 22 Khúâ but kö Iehova ûnyi u me hmak  
gan, ke e ame he ka ci u ;  
E ame ca he balua ka hna at ae wisa  
he ka bwebwet.
- 23 Khong lö, u ma he ka hagut' ödra ka  
hnyi thopiny bobot :  
Haba tavat behingâl dra me tavat  
iyawo me adre me ca he bi ka möt  
hnyi hafiny bongudra je bong ;  
Ke oge me he ka labageju köu.

SALAMO 56.

*Hobi kâu at vhiik khumöng ; adre hai hnyi Jonath  
elem rehokim. Salamo anyi Davita : Mectan :  
hnyi ðen adre me hom e hnen at Filisiti ñnyi  
Gatha.*

- K**HONG lö, betenge ju gak ; anyin a  
beutâ unyik hnen at :  
E ame vat mönya me oveci nya hnyi je  
bong.

SALAMO 57, 58.

- 2 Ame beweny he ka utá unyik hnen je iwahnaihmiöny mönya hnyi je bong : Anyin a ödra se hia adre me vat mönya me bi gan.
- 3 Haba bong oge me ot hnyin, Me oge me he ka labageju köu.
- 4 Ge Khong oge me he bi ka ogânâ hwan hofuc :  
Ge Khong oge hia but labageju, k' oge me ca he ka ot ;  
Ie únyi ae khana at he ka ányâ könya ?
- 5 Adre me labö wia hok hofuc hnyi je bong hia :  
Hnân okongu nya je únykúmenödra hia.
- 6 Adre me úkhacaköu, adre me laba duöng,  
Adre me bi haten hnök je hna okca, Heláji me hnödra hna halubahingen hanuk.
- 7 Hawa, adre me he ka kec möt a deny hulö ?  
Khong lö, hagutâ but ta je hnyei hnen ányâm bi hmönyin.
- 8 U je aú hnök je hna ngenu :  
Hingálâ but je deköiök ka hnyi ányâm kaia ;  
Hawa, ca e bi hnyi anyam tusi ?
- 9 Me ame he ka hmetuhmetu je iwahnaihmiöny mönya hnyi bong oge me hawâ hnyin :  
Walang hnök hna khana, ka habe, hiök Khong.
- 10 Ge Khong, oge me he ka ogânâ hwan hofuc :  
Ga Iehova, oge me he ka ogânâ hwan hofuc.
- 11 Ge Khong, oge hia but labageju, oge me ca he ka ot ;  
Ie únyi ae khana at he ka ányâ könya ?
- 12 Khong lö, e unyik anyik je khöbi gam :  
Oge me he ka hudo je ole köu.
- 13 Anyin a u je hia but omelö hanuk únyi hnyi mok :  
Hawa, u je ca omelö li cak, ödra ka waiflica ?  
Me inye he ka he hnyi hnyimakan Khong  
Hnyi melaminy tavat ae möt.

SALAMO 57.

*Hobi káu at zhik khumöng ; adre hai hnyi Al-tasheth. Salamo anyi Davita ; hnyi áen e ame kec ga Saulo, ka hnyi op.*

**K**HONG lö, betenge ju gak, betenge ju gak ;  
Anyin ame kic gam hanuk :

- Eke, oge me he ka ikhölö hnyi hmenon li labenyâm,
- 2 Oge me he ka hongot ka Khong ae Beönuua ;  
A Khong, at ame ányâ ta je únyi hia hobi könya.
- 3 E ame he ka úkhúnöng únyi hnyi drany me omeli nya,  
Eka haikongu nya hnen at ame me-mang könya. [Sela.  
Ame he Khong ka kunâ anyin betenge me hnathu.
- 4 E 'ú hanuk hnyi wanben ta je liona ;  
Oge me mokut unyin tavat adre me hlâ,  
Wale lakon tavat a je ö me fana ta je nyudra.  
Ke haba bohmödra me hele vat ae so hwan.
- 5 Khong lö, e so u he ka görany hon ta je drany ;  
Me ányâm hmanenang hon hmeledrany hia thithö.
- 6 Adre hia but penapena hnewe hobi káu li cak ;  
Ame hlec hnyikânâi hanuk :  
Adre hia but hiny thop hnyi hnyimakök ; Adre me ka ta hmetu but eü hnyi hnyin e. [Sela.
- 7 Khong lö, e hmâ but hnyekuk, e hmâ bala but hnyekuk :  
Oge me he ka khumöng, eke, oge me he ka khumöng olungö.
- 8 Hmanenangik lö, hmak dö ; nabela me kitara lö, hmak dö :  
Ke oge me he bi nya ka hmákâ hnyi haolany.
- 9 Than lö, oge me he ka ole köu hnyi wanben ta je hnyei :  
Oge me he ka khumöng olungi u hnyi wanben tavat.
- 10 Anyin ae gan hmâ ányâm ibetengjö ke ne o but ka hnyi ta je drany ;  
Ke ányâm hnathu ke ne o but hnyi ta je úlá.
- 11 Khong lö, e so adre me ogöranyi u hon ta je drany ;  
Ke ányâm hmanenang hon hmeledrany hia thithö.

SALAMO 58.

*Hobi káu at zhik khumöng ; adre hai hnyi Al-tasheth. Salamo anyi Davita.*

**H**AWA, öbun e laba hnyibü ke wisa !  
Hawa, e fofâ hnöbun je hna owisa,  
öbun lakon tavat ?

SALAMO 59.

- 2 Eke, öbun e ányá únyi ae hwali eú hnyi hnyok ;  
Öbun e tuluto hnyi hnyei úokongúny anyin je hnyamöbun.
- 3 Adre me oatkanyua tavat ae kong hwân ge hna hnokoâ :  
Adre me he hwali hwân eú hnyi hnyok, me ha je thoi.
- 4 Haba anyidra pâizon me helâ me pâizoniny on :  
Ödra úcú me asipi ae wejiji, at ame hlöng hnyikönyen ;
- 5 K' ame ca löng ifucin tavat bibihwakecin,  
Eja ke ne a ne metâ hmönyin hnödra hna bibihwakecin.
- 6 Khong lö, kot hmetro but je nyudra hnyi hnyin ta je hnyimödra :  
Iehova lö, tho degecâ but ta je wehúlúsinainy je nak liona.
- 7 E so adre me oköi' ödra but helâ me köiö ame hingölö wia :  
E ka lau anyin cafana, me so ame he je fana ka helâke únyi adre subâ degecâ.
- 8 E so adre ohi' ödra helâ me wasua ame köiö but :  
Helâ me erkin ame köluhabû, a ca hnyi wâ bi seúnö.
- 9 E tiga ca löng bi hnen anyibun je öt je angö,  
Me e ame he ka túâ degecâ e ge höu, ame ne hât ame ne möt.
- 10 Ame he at wisa ka senyin, e ka wâ hna bi hwaban :  
E ame he ka hneú li can hnyi dren at ae kong.
- 11 Me me he bi tavat ka ha, ka habe, E hnathu e hu troban hobi kâu at ae wisa :  
E hnathu e hu Khong at ame owisa eang hmeledrany.
- 3 Anyin a wâ bi, adre me mokut duöng ka hanuk ;  
Tavat hwege adre me úkhacaköu könya :  
Iehova lö, ca can hnök hna hanyâúâ, me monu.
- 4 Adre me wadring me penapen' ödra bi ke ba bi anyik monu :  
Hmak dö he ka hadruo nya, me wâ.
- 5 Haba u Iehova lö Khongon sabaoth, Khongu Isaraela,  
Todrö he ka senâ ta je hnyei hia thithö :  
Ca he ka betenge bi ge tavat ae kong adre hanyâúâ. [Sela.
- 6 Adre me hmetuhmetu hnyi sahac, adre me tenge kukâk helâ me kuli,  
Me he igigilö taun.
- 7 Wâ bi, adre me khöimage but ae je hnyimödra ;  
E bi ta je hele vat hnyi je esongodidra :  
Anyin a haingödra, ka habe, Ie at ame löng ?
- 8 Iehova lö, u me he ka hlum' ödra ;  
U me he ka hiâ ta je hnyei hia thithö.
- 9 Tang hwegiök lö, oge me he ka lubahing u :  
Anyin a Khong thibi anyik hnabâ ae beú göranyai.
- 10 Ame he Khongon anyik betenge ka úkhanö mönya  
Khong ame he ka hna könya ka wâ wek ge je iwahnaihmiöny mönya.
- 11 Ca hling' ödra bi, wâ e nye he lakeik ka hnying :  
Than lö, a becihmun,  
Ovesei ödra but ge manâm man, ke hagut' ödra but.
- 12 Can hnödra hna hulö ge hnyimödra, me hofuciny je esongodidra, -  
E so adre me he ka nuc ödra hnyi anyidra bi gan,  
Ke can úhangö me thoi adre me ha.
- 13 Öaú' ödra but ge hmönyin, öaú' ödra but, me me hi' ödra but :  
Ke okhan' odra thö a g' ame musi Khong hnyi wanbö Jakob, [Sela.  
Ke ne o but hnyi je can hmeledrany.
- 14 Ke hn' ödra he ka hmetuhmetu hnyi sahac, hn' ödra he ka tenge kukâk helâ me kuli,  
Me he igigilö taun.
- 15 Adre me he ka he monu he ka heleú han,  
Me bec thibi hnyi hnyinghet hia a ne ca sekudra bi.
- 16 Ke oge me he ka khumöngö tang hwegiâm ;

SALAMO 59.

*Hobi kâu at vhih khumöng ; adre hai hnyi Al-tasheth. Salamo anyi Davita : hnyi hna úkhaköngö hnö Saulo he ka tuö uma m' adre me he ka hlingâ e.*

**K**HONG lö, omeli nya but únyi ge je iwahnaihmiöny mönya ;  
Ogöranyi nya thö únyi ge tavat adre me tot könya.

2 Omeli nya but únyi ge tavat adre me ányá únyi ae kong,  
Ke omeli nya thö únyi ge tavat adre me behingálá dra.

- Eke, oge me he ka khumöng ogânâ  
 ânyâm ibetengiö hnyi hnyomakatu :  
 Anyin a u thibi anyik tap ae beû göra-  
 nyai,  
 Me hnök hhabâ hnyi ûen oge me vec  
 hnyin.
- 17 Tang hwegiök lö, oge me he ka khu-  
 möng olungi u :  
 Anyin a khong thibi anyik tap ae beû  
 göranyai, me Khongon ibetengiö gak.

SALAMO 60.

*Hobi kâu at rhik khumöng : adre me hai hnyi Susani  
 Edutha : Salamo anyi Davita, hnân ânö : hnyi  
 âen e ame vat me Aramu-naharaimi me Arama-  
 zoba, walegi hnyi âen ame hmetuhmetu Joab me  
 kot tavat a tavel thauzan at Edoma hnyi hnyigö-  
 ulen bucen Sält.*

- K**HONG lö, u je hia but hna degeci  
 öhmun, me tho hagut' öhmun ;  
 U je hia but hmönyâm ; u na he ju ka  
 otil' öhmun hmetu.
- 2 U je hia but bwebwelâ hmeledrany ; u  
 je hia but kia e :  
 Tibet hmetoâ thö je hmoucainy ; anyin  
 ame bwebwet.
- 3 U je hia but omanenâ ka lakem ta je  
 ûnyi ae hmak :  
 U je hia but kun' öhmun he ka ijem  
 waina ame omonumonu at.
- 4 U je hia but ham bouðila ka tavat adre  
 me outö u,  
 Me me he ka manen can hnathu. [Sela.
- 5 E so u ma omelö ge hnyamâm a metâm,  
 me ling öhmun ju.  
 Me me möt ut tavat u me betenge  
 gadra,
- 6 A hia but Khong fuc hnyi hwakecin ae  
 kap ; oge me he ka ohobeluâ :  
 Oge me he ka khenâ Sekema, me tuluto  
 hnyigöulen bucen Sukotha.
- 7 Anyik bi Gileada, ke anyik Manase ;  
 Ke singiny bök Eferaima ;  
 Ke Juda anyik uciny musi.
- 8 Moab anyik utkaia hnân sou ;  
 Oge me he ka khûâ hnyi Edoma tangen  
 hnyeúcak :  
 Filisiti lö, hongot dö göranyai can inya.
- 9 Ie at ame he ka hum nya ka hnyi taun  
 ae hwege ?  
 La hia but lili nya Edoma ai ?
- 10 Khong lö, hawa, ca u thibi at ame hna  
 degeci öhmun ?  
 Khong lö, u je ca tha he me anyihmun  
 je utbavat.

- 11 Hadru' öhmun dö ûnyi ge iwahnaihmi-  
 öny :  
 Anyin ae ûnyi baú bi hna hadruâ hnen  
 at.
- 12 Ûnyi ge Khong, ate me he ka hwege :  
 Anyin a e thibi at ame he ka uto ta je  
 iwahnaihmiöny möta,

SALAMO 61.

*Hobi kâu at rhik khumöng ; hnyi Nergina. Salamo  
 anyi Davita.*

- K**HONG lö, löng ju hok hwatenge ;  
 Tevehlöng ju hijik hic.
- 2 Oge me he ka hongot köu ûnyi hnyi can  
 hmeledrany, e ka hlöuhlöu hnyekuk :  
 Lili nya ju ka hnyi kic görany huk.
- 3 Anyin a u thibi hnök hna lubaduöng  
 hnyin,  
 Me hhabâ ae hwege hnyi hnyimakan  
 iwahnaihmiöny.
- 4 Oge me he ka laba hnyin umâm una  
 menâ nyiele balua :  
 Oge me he ka lubaduöng hnyi hmenon  
 li labenyâm. [Sela.
- 5 Anyin a haba u Khong lö, u je hia but  
 löng anyik je khöbi :  
 U je hia but ham könya jekhöu e úci  
 ködra adre me outen iâm.
- 6 U me he ka bi hanen ta je bong ka je  
 bong bongon than :  
 K' ame helâ me ta je dö ae se ta je  
 hunainy.
- 7 E ame he ka laba hnyi hnyimakan  
 Khong nyiele balua :  
 U na penapena thö ibetengiö me hnathu,  
 hnân he ka tuö e.
- 8 Me oge me he ka khumöng ogânâ iâm  
 nyiele balua,  
 M' inye he ka vheno thö anyik je khöbi  
 hnyi je bong.

SALAMO 62.

*Hobi kâu at rhik khumöng ; hoton hwakeci Jedu-  
 thun Salamo anyi Davita.*

- A**ME laba hnyibú hanuk ka Khong  
 thibi :  
 Ûnyi gan anyik möt.
- 2 E thibi kicik me at ame omeli nya :  
 E thibi anyik tap ae beû göranyai :  
 adre me ca he ka ti bwebweli nya.
- 3 Ke ne o but kehö öbun e he ka utut ha  
 at,  
 M' öbun e he ka hlingâ e, wale öbun  
 hia,



SALAMO 63, 64.

- Helâ me hak veto ame ihnyöng, ke hak  
æ memeny ?
- 4 Adre me vñök úhnenamö he ka hagutâ  
e únyi hnyi anyin so ;  
Adre me senyiná je thoi :  
Adre me haisoâ ge je hnyimödra, ke  
úhangö bi eú hnyi hnyok. [Sela.
- 5 Hanuk lö, e so u me he ka laba hnyibú  
ka Khong thibi ;  
Anyin a únyi gan hnök hna gejon.
- 6 E thibi kicik, me at ame omeli nya :  
E thibi anyik tap æ beú göranyai ; adre  
me ca he ka bwebweli nya.
- 7 E bi unyin Khong melik me hmanenan-  
gik :  
Kicik æ hwege me hnök hhabâ unyin  
Khong.
- 8 Tavat lö, labageju thö kâu hnyi je bong ;  
Hingâlâ but je hnyekubun hnyi hnyi-  
makan :  
Khong thibi hnöta hhabâ. [Sela.
- 9 Ta je thatúnyi bi houmonu, ke thoi bi  
tavat æ únyi hnathu :  
Ödra háhá hnyi tulut ;  
Ödra tha háhá hon thatúnyi.
- 10 Ca geju bi ka hwakecin sedâ,  
Ke ca hobelöu bi ka hnyi hwakecin  
venöu :  
E ka osehia tot omejeú, ca hnyok kâu.
- 11 Khaca thibi hofuc ame ha Khong,  
Lo li hofuc oge me löng, ka habe,  
E unyin thibi Khong tang hwege.
- 12 Than lö, e unyâm thibi minya ibetengiö :  
Anyin a u je bi hwaban ka tavat hia e  
úcú me anyidra huliwa.

SALAMO 63.

*Salamo anyi Davita, ke tiga e hnyi hnyebuba Juda.*

- K**HONG lö, æ thibi Khonguk, o ge me  
he ka elöm u hnyi haolany :  
E beic hanuk unyâm, e gan hmâ weny  
unyik köu,  
Hnyi hnyei æ mada me sényin, dok æ  
ba köiö hnyin.
- 2 Oge hia but ö u hnyi umâm uma æ kap,  
M' inye he ka wâ manâm man me ânyâm  
hmanenaug.
- 3 Anyin æ so ânyâm ibetengiö hon möt ;  
Ame he li esongodik ka oganö u.
- 4 Helâe oge me he ka haisoi u inye tiga  
möt :  
Únyi hnyi iâm oge me he ka hai göran-  
yai li hnyamök.
- 5 Ame he ka sekon hanuk helâ me hnen  
onyen je jö me pipikhenya ;

- Ke ame he hnyimök ka oganö u hnen li  
esongodiny senyin ;
- 6 Iny ka únykúmi u hon hnök hna  
mokut,  
Me wâ únykúme gam hnyi je hmak  
hnyi hnyinghet.
- 7 Anyin a u je hadruo nya ehac,  
Me oge me he ka senyin hnyi hmenon  
li labenyâm.
- 8 Ame hwege he hanuk hotom :  
Haba at ame ci nya, me, hnyamâm a  
metâm.
- 9 Ke haba ödra adre me elâm hanuk, he  
ka ohia e,  
Me adre me he ka utut ka hnyi je  
uthankonginy hmeledrany.
- 10 K' adre me he ka hn' ödra but ka hnyi  
maniny hele vat :  
Adre me he ka hnân an je alope.
- 11 Ke ame he than ka senyin ka Khong :  
Adre me he hia ka hobeluâ, wale tavat  
adre me khemanyin gau ;  
Anyin adre me he ka hlöng hnyimen  
tavat adre me thoi.

SALAMO 64.

*Hobi kâu at vñik khumöng. Salamo anyi Davita.*

- K**HONG lö, löng ju hok hwatenge iny  
ka khöü :  
U me he ka tuö anyik möt e ka outen  
iwahnaihmiöny.
- 2 U me he ka ikhölö nya hnyi úhnenamö  
duöng anyin tavat adre me ânyâ  
monu ;  
Me imonumonuiny tavat adre me ânyâ  
hwali :
- 3 Hnyat adre me khet je bohmödra helâke  
hele vat,  
Me lau cafana me hlec anyidra je fana,  
wale je hofuc æ hiny :
- 4 M' adre me he ka fana at æ wisa hnyi  
je dok æ iyong :  
Adre me ie fana e, ke ca ot bi.
- 5 Adre me sihwegi ödra bi hnyi únyi æ  
kong ;  
Adre me vak he ka töu hnewe hnyi dok  
æ iyong ;  
Haingodra, ka habe, Ie at ame he ka  
wâ ?
- 6 Adre me elâm ta je únyi æ kong, hai-  
ngödra, ka habe, Ate hia but elâm  
wia :  
Ke ve dit je hna únykúme, me je hnye-  
kudra.
- 7 Ke Khong ame he ka fan' ödra ;

SALAMO 65, 66.

- Adre me he ka ie aat dö ge fana.  
 8 Helâe adre me he ka ta, ke e kong bi je bohüödra bi ködra.  
 Adre me he tavat hia adre me ö'dra ka nyinyikâ je bödra.  
 9 Ke ame he tavat hia thithö ka ot ;  
 Ke adre me he ka haimemenâ huliwa anyin Khong.  
 Me wâ ûnykûme hnyi metâ hnen hna ânyâ.  
 10 Ame he tavat ae wisa ka senyin kö Iehova, me labageju kâu ;  
 K' adre me he hia tavat adre me hnyok wisa ka hobeluâ.

SALAMO 65.

*Hobi kâu at vhiik khumöng. Salamo walc khumöng anyi Davita.*

- K**HONG lö, adre me he ka laba hnyibü, me oganö u hnyi Ziona :  
 Adre me he ka subâ köu ta je khöbi.  
 2 At ame löng hic lö,  
 Ame he tavat hia thithö ka o but köu.  
 3 E hwege huk ta je ûnyi ae kong :  
 Haba hnöhmun ta je hna hanyâüâ u me he ka kot degecâ.  
 4 Hnahic hnen at u je ûca, me ohakekenyi u,  
 Me me he ka laba hnyin je hnyeulem :  
 Ame he ka sekuhmun ge soiny umâm uma,  
 Wale dok ae kap a umâm uma.  
 5 Khong lö, at ame omeli öhmun,  
 U me he ka thu köhmun ge ta je ûnyi hnân outen hnyi hwakecin ae wisa.  
 U thibi at adre me labageju kâu ke ne o but hnyi je can hmeledrany,  
 Me hnyi köiö hnyi dok ae sâkâü :  
 6 Wale at ame otethmä je bucen hnen maniny man ;  
 Ke ame weikâ hwege :  
 7 Wale at ame ohnyibö iüiny je köiö, a iüiny je wabuluiny,  
 Me imonumonuiny ta je hnyei.  
 8 Adre me outen minya ânyâm ta je haten tavat adre me labâ je can hmeledrany ;  
 U me wia hanymen hnyomakatu me sahab he ka senyin.  
 9 U je senâ hmeledrany, me ödiâ e,  
 U je ohosâ e ;  
 A unöngötö ge köiö wagewe anyin Khong :  
 U je penapena hwit hobi ködra, u je penapena bânâ kânâ.

- 10 U je hneü gâná je ogoweiny,  
 K' u je ânyâwia je khölökiny :  
 U je omitâ e ge we ae hwege ;  
 U je ohnahicâ e k' ame kû.  
 11 U je obicâ huna ge hwakecâm ae so ;  
 K' ame khukhula dem je gethen ge pikhenya.  
 12 Ame khukhula ka hnyi hon ta hnyei hnyi hnyeububa :  
 K' adre me oweikâ je dok ae hut ge senyin.  
 13 Adre me khavâ ta hnyei ge je hnahat mamoe ;  
 Ke adre me tube je hnyigöuleny bucen ge hwit ;  
 Adre me hongot senyin, k' adre me khumöng dö.

SALAMO 66.

*Hobi kâu at vhiik khumöng. Salamo anyi Davita, a khumöng.*

- H**MELEDRANY hia thithö lö, hongot senyin ka Khong :  
 2 Khumöngö hmanenanginy ien ;  
 Omeca thö hna ogânâ e.  
 3 Ha thö ka Khong, ka habe, Hnân öbubuny ge hnâm je hna ânyâ !  
 Ünyi hnyi ûganiny tang hwegiâm ame he je iwahnaihmiöny möu ka nom ju köu.  
 4 Ame he hmeledrany hia thithö ka khudrung ju köu,  
 Me khumöng köu ;  
 Adre me he ka khumöngö iâm. [Sela.  
 5 Ai öbun ka wâ ta je huliwa anyin Khong ;  
 Hnân öbubuny gan hnyi hnen hna ânyâ hon ta je lakon at  
 6 E ame wia köiö me me hnyei ae mada :  
 Adre me he hanyâüâ wagewe ge ta je cadra :  
 Waleling ate me senyin kâu.  
 7 E ame musi nyiele balua hnen hwegien ;  
 Ke haba li emakan ame tuö ta je hnyei :  
 Ca he tavat úkhin fuc ka bi gan. [Sela.  
 8 Öbun ta je hnyei lö, haisoâ thö Khonguta,  
 Ölungâ thö hna ogânâ e ;  
 9 Wale at ame omeli öta tot,  
 K' ame ca hna but ta je cata he ka bwebwet.  
 10 Khonguhmun lö, u je hia but cubic öhmun :  
 U je hia but cubic öhmun helâ me ma hna cubec sileva.

SALAMO 67, 68.

- 11 U je hum öhmun ka hnyi ert ;  
U je ip hok ae hmak hon li jebalainu-  
hmun.
- 12 U je kunâ tavat he ka tabâ je böhmun ;  
Öhmun e vheno meic me köiö ;  
Ke so bi u je oi öhmun ka hnyi dok ae  
widrany.
- 13 Oge me he ka o ka hnyin umâm uma  
me je hudiny leu,  
Oge me he ka thamua köu anyik je  
khöbi,
- 14 Waleji hna ha hnen li esongodik,  
Me úsabö ge hnyimök, hnyi anyik vec.
- 15 Oge me he ka hudo köu je hudiny leü  
ae pipikhenya,  
Me únyi ae bo so hanen je mamoe бага ;  
Oge me he ka tha hudo je bolok me je  
got. [Sela.]
- 16 Ai öbun, löng ju öbun hia öbun e outen  
Khong,  
Me oge me he ka aú gaga hnen hna  
mâdrâ hobi kâu hanuk.
- 17 Oge me hongot kâu ge hnyimök,  
K' ame ogânâ e hnen bohök.
- 18 Oge ne únykûme hulö eü hnyi hnyekuk,  
Ame ca he Than ka ling nya :
- 19 Ke e hnathu a hia but Khong löng ;  
Ke a hia but tevehlöng hwan hijik hic.
- 20 E so he ka haisoâ Khong,  
At ame ca degec hijik hic, me anyin  
ibetengiö gak.

SALAMO 67.

*Hobi kâu at vhiik khumöng. Hnyi Neginoth  
Salamo, a Khumöng.*

- E** NA he ju Khong ka betenge gahmun,  
me ohnahici öhmun,  
Me oumumelamâ hnyimakan hhumun ;  
[Sela.]
- 2 M' adre me he ka wâ dem gethen eang  
hmeledrany,  
Me ânyâm úhömeli hnyi ta je hnyei hia  
thithö.
- 3 Khong lö, e so ame he tavat ka ole köu.  
E so ame he tavat hia thithö ka ole  
köu.
- 4 E na he ju ta je hnyei ka senyin me  
hobâ :  
Anyin a u me he ka owisa tavat hnyi  
wisa,  
Me muso ta je hnyei eang hmeledrany.  
[Sela.]
- 5 Khong lö, e so ame he tavat ka ole köu ;  
E so ame he tavat hia thithö ka ole  
köu.

- 6 Haba hmeledrany ame wa :  
K' ame he Khong, a hing Khonguta ka  
ohnahici öta.
- 7 Ame he Khong ka ohnahici öta ;  
K' ame he je can hmeledrany hia thithö  
ka outen e.

SALAMO 68.

*Hobi kâu at vhiik khumöng. Salamo anyi Davita,  
a Khumöng.*

- E** SO Khong ame todrö, me me vese but  
je iwahnaihmiöny mē ;  
E so ame he tavat adre me hûkötîâ e ka  
kec hnyi hnyimakan.
- 2 Ob' ödra ju, helâ me úhiöiny hainy  
meic :  
E so ame he ka hia tavat ae kong hnyi  
hnyimakan Khong,  
Helâ me wasu ame köiö ge meic.
- 3 Ke so ame he tavat ae wisa ka senyin  
me hongot senyin hnyi hnyimakan  
Khong :  
Eke, e so adre me hobâ gan hmâ.
- 4 Khumöng dö ka Khong, ogânâ thö ien :  
Khaú thö gethen hobi kâu at ame he  
hnyi wanben je hnyebuba ;  
Ien bi Ja ; ke senyin dö hnyi hnima-  
kan.
- 5 Haba Khong hnyi hnyaban ae kap,  
E thibi kamen ta je nakahme, me at  
owisa ka ta je safac.
- 6 Khong ame oji hmâ tavat adre me hake  
laba :  
E ame hom je hna ca ka hnyi je dok  
hnân senyin :  
Ke haba tavat úkhin fuc, me adre me  
laba hnyi dok ae atgec.
- 7 Khong lö, hnyi úen u je he hnyi hnyi-  
makan lakem,  
Me vheno hnyi wanben hnyebuba ;  
[Sela.]
- 8 Ame öbubuny hmeledrany,  
Ame ta but minya drany hnyi hnyi-  
makan Khong :  
Waleling Sinai hnyi hnyimakan Khong,  
Khongu Isaraela.
- 9 Khong lö, u je öta we ae gan hmâ,  
U je hwegiâ hmeto jekhom e ka senyin  
dut e.
- 10 Ame laba hnyin e ânyâm úkhacaköu :  
Khong lö, hnyi ânyâm ibetengiö u me  
penapena hobi kâu tavat ae ba ta  
únyi.
- 11 Than ame ha hofuc :

SALAMO 69.

- E ti se hia je momo adre me khetâ je uthumetu.
- 12 Ame kec je tuhan je utbavat, adre me kec dö :  
Ke haba momo ame laba eiö hnyin uma ame khenâ omjeü adre söh.
- 13 Hawa, öbun e he ka mokut hnyi je haginymamoe,  
Helâ me li labenyin biny adre tube ge sileva,  
Me je leünen unyin ge gol ae hadröngöc.
- 14 Hnyi ün Ataekhanahia ame ovesê je than hnyin e,  
Waleji ame helâ me útainy kiona hnyi Zalemon.
- 15 Bucen anyin Khong, bucen Basana ;  
Bucen ae beü göranyai, bucen Basana.
- 16 Ieü gabun öbun je bucen ae beü göranyai, öbun e wâ ciâ,  
Ge bucen waleji ame weny Khong he ka labâ ?  
E ke, ame he Iehova ka labâ e nyiele balua.
- 17 Lo li miriad, ke se hia hmönyin je thauzan, je kariota anyin Khong :  
E bi unyidra Than, helâe hnyi Sinai hnyi dok ae kap.
- 18 U je hia but ölö ka hnyi dok ae görany, u je hia but hom bâ ânyâm je bâ ;  
U je hia but hom je bwihlany hnyi wanben tavat.  
Eke, hnyi wanben tavat ûkhin fuc, me me he Iehova a Khong ka laba unyidra.
- 19 E so he ka haisoâ Than, at ame hijen honöta hok hnyi je bong,  
Wale Khong at ame omeli öta. [Sela.
- 20 Haba Khong, me Khongon úhömeli hobi köta ;  
Ke e unyi IEHOVA Than je deny he ka kec ge mok.
- 21 K' ame he Khong ka tho ban je iwahnai-hmiöny mē,  
Wale wakaian ban ame kú leünen at ame vhenobala hnyi anyin hulö.
- 22 Haingen Than, ka habe, Oge me he ka hom hmetu únyi hnyi Basana,  
Oge me he ka hum ödra hmetu únyi hnyi ta je diliny köiö :
- 23 M' u me he ka hneü cam hnyi dra,  
Me me he bohmen halem je kuli ka hu jekhöü únyi ge je iwahnai-hmiöny möu.
- 24 Khong lö, adre hia but wâ hnâm je hna vhenobala,
- Waleji je hna he hnen Khonguk a Tuhök ka hnyi uma kap.
- 25 Ame bântavat khumöng, k' ame bilingdrin tavat hai ta je únyikhumöng,  
Hnyi wanben wahlu adre me khaúkhau je bwinybet.
- 26 E so öbun e haisoâ Khong hnyi je úkhacaköu,  
Wale Than, öbun hanen hna pupuainy Isaraela.
- 27 Wale Beniamina a wakeiat ame musi ödra,  
Me je taben at Juda me anyidrin dö,  
Me je taben at Zebulona, me je taben at Nafatali minya.
- 28 Haba Khongom ame musö tang hwegiâm :  
Khong lö, owhegiâ thö hnâm hna ânyâ hobi köhmun.
- 29 Can umâm uma kap hnyi Jerusalema  
Ame he je than ka ham je bwihlany köu.
- 30 Thawâ ju je menoiny ta saamun,  
Me je bolok ae se hia, tha ödra me je nokon kau halen tavat,  
Adre me uto ge je cadra je ong sileva ;  
E ame hia but ovesê tavat adre me senyina vat.
- 31 Ame he ka o but je than úhedra Aigupito ;  
Ame he Aithiope ka ie inâ li hnyamen ka Khong.
- 32 Öbun ta je dökhuieny hmeledrany lö,  
khumöng dö ka Khong ;  
Ö öbun e oganá Than ; [Sela.
- 33 At ame tabâ draniny ta je drany, a únyi adrem ;  
Wâ bi, e ame ha hofuc ge hwan ae hwege.
- 34 Ha thö hwegien Khong :  
E bi anyin hmanenang hu Isaraela,  
Me hwegien hnyi ta je ulâ.
- 35 Khong lö, u at hnân outen únyi hnyi ânyâm je dok ae kap :  
Haba Khongu Isaraela, e ame ham wege me man ka je lakeiny.  
Haisoâ thö Khong.

SALAMO 69.

*Hobi kau at ehik khumöng: adre hai hnyi je Sosani. Salamo anyi Davita.*

**K**HONG lö, omeli nya thö,  
Anyin ame o but ta je di ka hanuk.  
2 Oge me cúlulú hnyi hmudra ae dit, ke ba dok he ka tot hnyin :

- Oge me o but ka hnyi je köiö ae dit, me ame húlúlúö nya nhen je wadutö.
- 3 Oge sēnyin dut ge anyik tenge; e atgec dö jeköwik :  
A jok ut li emakök ke oge me halubahingen Khonguk.
- 4 Ödra se hia but hon leünen bök tavat adre me hmiödra inya ke ba can :  
E hwege tavat adre me behlingö nya, wale je iwahnaihmiöny mönya ge can ae ca hnathu :  
Waleling m' oge me ham hmetu únyi oge me ca hügúná.
- 5 Khong lö, e khanö u anyik monu ;  
K' adre ca ikhálá gam hnök je hna ányá hulö.
- 6 Than lö, Iehova tuhan sabaoth, ca he ka hna tavat adre me halubahingâm ke ka hmehma únyi gak :  
Khongu Isaraela lö, ca he ka hna tavat adre me elöm u he ka hmehma únyi gak.
- 7 Anyin a oge hia but hokhnyoká úokong- uny can u ;  
A hia but tube hnyimakök ge hmehma.
- 8 Iny atkanyua but unyin jē liamekeiny mönya,  
Iny helá me aten ke hnyei ka lakon hinyök.
- 9 Anyin a hia but utö nya nhen weny ae gan ka hnyi umâm uma ;  
K' ame ta but huk ta je úhiö anyin tavat adre me hiö u.
- 10 Hnyi úen oge me tenge, k' ame vec hanuk ge ca han,  
Me adre me hiö nya can e.
- 11 Hnyi úen oge me khavá úkhaú ae gan nân,  
Me adre me wiö nya bi hnân taben úhiö ködra.
- 12 Adre me úhnenamö gak tavat adre me laba hnyi homagöule ;  
K' adre sit hwanök nhen tavat ic grág.
- 13 Ke haba inya, Iehova lö, oge me hic köu hnyi úen ae úcú :  
Khong lö, únyi hnyi úganiny ányâm ibetengiö  
Thu thö könya hnyi hnathuiny ányâm úhömeli.
- 14 Omeli nya thö únyi hnyi hmudra, ke ca hnö nya but he ka cúlúlú :  
E so adre me omeli nya únyi ge tavat adre me húkotiö nya, ke únyi hnyi je köiö ae dit :
- 15 Ca hna uou he ka húlúlúö nya,  
Ke ca hna bi dok ae dit he ka utö nya;  
Ke ca hna bi thop he ka hlöng hnyimen huk.
- 16 Iehova lö, thu thö könya, anyin ae so ányâm ibetengiö :  
Hwiö thö konya hoton ányâm je betenge ae se hia.
- 17 Ke ca ikhálá bi hnyimákâm ka athnya- baem ;  
Anyin a iny vec ; ie thu thö könya.
- 18 Hakekeny ju ka hanuk, me omelö e ;  
Bi hwaban dö anyik möt can je iwa- hnaihmiöny mönya.
- 19 E khanö u hna haikongu nya, me anyik hmehma, me anyik hlöuhlöu :  
E hnyi hnyimákâm ta je iwahnaihmiöny hia thithö mönya.
- 20 E vec hnyekuk ge hna haikongu nya ;  
ke iny unöngötö ge hmak :  
Ke oge me halubahingen ibetengiö, ke ba bi ;  
Me úütubweli, ke oge me ca wâ bi.
- 21 Ke adre ham könya waada hnân ök jeú ;  
Ke hnyi hnök hna beic adre me ham könya vinega he ka ijem.
- 22 E so e hnân hnewe anyidra laulau hnyi hnyimaködra ;  
Ke ödra ka laba khötkic, e so ame ofiic únyi eling.
- 23 E so e wadröu but ta je emaködra, m' adre me ca wâ bi ;  
Me öbubuny bala bi je jebalainudra.
- 24 Hingálá but hudra ányâm hmönyin,  
Ke so he ka khöú ödra hwegien ányâm wathethöt.
- 25 E so e he ka ba wan anyidra je lap ;  
Ke ca he ke at ka laba hnyi umödra je uma mano.
- 26 Anyin adre me ovecâ at u je hia but kot ;  
Ke adre me úhnenamö ge tenge anyin tavat u je hia but oaatâ.
- 27 Bi hanen ju hulö hon anyidra hulö :  
Ke so adre me ca o ka hnyi hwakecâm ae wisa.
- 28 E so adre me kot degeci ödra únyi hnyi tusiny möt,  
Ke ca tha sihnalimidra bi me tavat ae wisa.
- 29 Ke iny vec me hlöuhlöu :  
Khong lö, e so he ka ogöranyi nya thö ge ányâm úhömeli.
- 30 Oge me he ka oganá ien Khong hnyi khumöng.  
Me olungá e ge ole.

SALAMO 70, 71.

- 31 Anyin a wale thibi ae so kö Iehova hon bolok,  
Wale ae hu faoiny me boujimen bacan.
- 32 Adre hia but wâ hnen tavat ae menyik:  
Haba öbun tavat öbun e elâm Khong, e so e he ka möt je hnyekubun.
- 33 Anyin a Iehova ame löng tavat ae theduoc,  
K' ame ca hûkötia hnyat e ame ca.
- 34 E so e he drany me hmeledrany ka ogânâ e,  
Me köiö, me ta je únyi hia adre me he hnyin.
- 35 Anyin ame he Khong ka omeli Ziona,  
me otilâ je taun anyi Juda ;  
K' adre me he ka labâ e, me hu e.
- 36 K' ame he ka hu e hnen mátrániny lathnyabainy ;  
K' ame he tavat adre me hnyokâ ien ka labâ e.

SALAMO 70.

*Hobi kâu at vhiik khumöng. Salamo anyi Davita ;  
huân önykâmed.*

- K**HONG lö, logotö he ka omeli nya ;  
Iehova lö, logotö he ka hadruo nya.
- 2 E so adre me hmehma me monumonu  
Tavat adre me elâm hanuk ;  
E so adre me ohmetuhmetu ödra me ohmehm' ödra  
Tavat adre me senyin he ka okongu nya.
- 3 E so adre me ohmetuhmetu ödra can  
hwakecidra huân hmehma gan,  
Tavat adre me ha, ka habe, Ohö, öhö.
- 4 Ke so ame he ka senyin me hoba gam  
tavat hia thithö adre me elöm u ;  
Ke so ame he bala tavat adre me hnyokâ ányâm úhömeli ka ha, ka habe,  
Ogânâ thö Khong.
- 5 Khong lö, mweimwei thö könya ;  
K' inye at ae vec me theduoc :  
U thibi at ame hadruo nya me omeli nya ;  
Iehova lö, ca he ka bec.

SALAMO 71.

- I**EHOVA lö, oge me labageju köu :  
Iny na ca he bala ju ka hmehma.
- 2 Omeli nya únyi ge hwakecâm ae wisa,  
me uny nya :  
Tevhling nya ju, me omeli nya.

- 3 Hamâm bi he ka kicik huân laba hnyin,  
me inye labö he bala ka hnyin :  
U je hia but hûna he ka omeli nya ;  
Anyin a u thibi kicik me hnök hnabâ.
- 4 Khonguk lö, uny nya but únyi hnyi hnyamen at ae kong,  
Únyi hnyi hnyamen at ae ca wisa me at úokonguny.
- 5 Iehova lö, Than, u thibi hnök hna labagejon ;  
Oge me labageju köu, hwân k' iny tiga hidröu.
- 6 Ame kap tilö nya únyi gam hwân hnyi hna hnöku nya :  
U thibi at u je hum nya but únyi hnyeku bai :  
Oge me he bala ka oganö u.
- 7 Iny úcü me únyi huân láia gan ka tavat ae se hia ;  
Ke u thibi hnök hnabâ ae hwege.
- 8 Ame he ka unöngötö hnyimök ge hna oganö u,  
Me ge hmanenangâm hnyi je bong hia.
- 9 Ca he ka hna degeci nya hnyi üen a iny hingat ;  
Ca hna degeci nya bi e ka hia but hwegiök.
- 10 Anyin ame úsabö gak je iwahnaihmiöny mönya ;  
Ke haba tavat tuö hanuk adre me vhök úhnenamö,
- 11 Haingödra, ka habe, A hia but Khong hna degecâ e :  
Wadring dö hoton me kât e ; anyin ae ba at ame he ka omelö.
- 12 Khong lö, ca úsâkâüö mönya ;  
Khonguk lö, logotö he ka hadruo nya.
- 13 E so adre me he ka hmehma me hi' ödra but je iwahnaihmiöny me hanuk ;  
E so e he ka khaú' ödra adre me elâm he ka okongu nya ge úhaikonguny me hlöuhlöu.
- 14 Ke ogo me he ka geju bala bi,  
Me bi hanen tilâ ka hnyi hnök hna oganö u.
- 15 Ame he hnyimök ka ha gaga hwakecâm ae wisa,  
Me ányâm úhömeli hnyi ta ogö bong ;  
Anyin ae ca khanö nya úseiny e.
- 16 Oge me ka o hnyi man mani Iehova Than :  
Oge me he ka ha thibi hwakecâm ae wisa, a hwakecâm thibi.
- 17 Khong lö, u je hia but nö nya huân k' iny tiga hidröu ;

SALAMO 72.

- Ke oge hia but omanenâ ke ne o but  
walang ang ânyâm ta je huliwa hnân  
lâiâ.
- 18 Eke, Khong lö, ca he ka hnö nya hnyi  
anyak hingat me hûen ;  
M' inye mē he ka omanenâ tang  
hwegiâm ka ke dö,  
Ke manâm man ka tavat adre me he  
ka o.
- 19 Khong lö, e ti beönua hwakecâm ae  
wisa ;  
U at ame hia but ânyâ ta je ûnyi ae  
gan hmâ,  
Khong lö, ie at ae ûcû möu ?
- 20 Haba u at ame omanenâ köhmun je vec  
ae hwege ke se hia,  
Me u me he ka hmetu ka omeli öhmun,  
Me hum öhmun hmetu göranyai ûnyi  
hnyi je dok a diliny hmeledrany.
- 21 Bi hanen ju ka hmanenangik,  
Ke hmetu bi me okahwö nya.
- 22 Khonguk lö, oge me he ka oganö u ge  
nabeli,  
Wale ânyâm hnathu :  
At ae Kap anyi Isaraela lö  
Oge me he ka khumöng olungi u ge  
kitara.
- 23 Iny ka khumöngi u, me ame he li  
esongodik ka senyin gan hmâ ;  
Me hanuk minya, waleji u je omelö.
- 24 Ame he bohömök ka ha hnyi je bong ge  
hwakecâm ae wisa :  
Anyin a ödra hmehma me monumonu  
tawat adre me elâm he ka okongu nya.

SALAMO 72.

*Salamo anyi Solomona.*

- K**HONG lö, ham dö ka than he ka  
owisa ûnyi gam,  
Ke ham hwakecâm ae wisa ka nokon  
than.
- 2 E ame he ka owisa lakem ge hwakecin  
ae wisa,  
Me latâm ae vec hoton wisa.
- 3 Ame he ta je bucen ka öküâ úsoköu hobi  
kâu tavat,  
Me je dok minya ae hut, hnen hwakecin  
ae wisa.
- 4 E ame he ka owisa tavat ae vec hnyi  
hnyei,  
E ame he ka omelö lakon tavat ae ba  
ta ûnyi,  
Me thu omomono at ame úkonguny.
- 5 Adre me he ka outö u ke tiga e bi  
seúnö,

- Ke tiga e bi tehi, ke ne o but hnyi ta  
je dö hia.
- 6 E ame he ka ta helâ me we hon ta  
hnaönying adre sö :  
E ûcû me we ame ta but ka hnyi ta  
hnyei.
- 7 Hnyi bonginy ta je bong ame he at ae  
wisa ka kú khulelau ;  
K' ame he ka gan hmâ úsoköu ke ne o  
but ame aú but tehi.
- 8 E ame he ka musi minya ûnyi hnyi ke  
köiö ke ne o but ka hnyi ke köiö,  
Ke ûnyi hnyi Wagewe ke ne o but ka  
hnyi je can hmeledrany.
- 9 Ame he ka nom kâu tavat adre me laba  
hnyi hnyebuba ;  
Ke ame he je iwahnaihmiöny mē ka  
drem kânâ.
- 10 Ame he je than Tasesa me je bomene  
ka ham ta je bwihlany ;  
K' ame he je than Sheba me Seba ka  
ham ta je fat.
- 11 E ke, ame he je than hia thithö ka ta  
ju hnyikânâi kâu :  
K' ame he ta je hnyei hia ka bi athnya-  
bainy.
- 12 Anyin a e ame he ka omelö at ae ba ta  
ûnyi e ka tenge ;  
Me at ae vec waleji ae ba at he ka  
hadruâ,
- 13 Ke e ame he ka betenge ge at ae vec  
me at ae theduoc,  
K' ame he ka omelö je hanon tavat ae  
ba ta ûnyi.
- 14 E ame he ka omelö je hanudra ûnyi hnyi  
hwakecin úsedö me hna okongoâ ;  
K' ame he ka ûnyi hnathu drödra hnyi  
hnyimakan :
- 15 M' adre me he ka möt : k' adre me he  
ka ham kâu goliny Sheba :  
K' ame he tavat ka hic bala hobi kâu ;  
K' adre me he ka haisoâ e hnyi je  
bong hia.
- 16 Ame he ka hu hnyi hnyei whit ae gan  
hmâ hon ban je bucen ;  
K' ame he ta je waniny ka bwebwet  
helâ me Lebanona :  
K' ame he ka sot aten je taun helâ me  
hnaönyinginy hmeledrany.
- 17 Amo he ka tethmä ien nyiele balua ;  
K' ame he ka e bala bi e ka tiga hu  
seúnö ethö :  
Ke ame he ka hnahic tavat ûnyi gan ;  
Ame he ta ogö hnyei hia ka ha a e ame  
senyin.

SALAMO 73.

- 18 E so adre me haisoi Iehova a Khong,  
wale Khongu Isaraela,  
E thibi at ame ânyâ ta je ûnyi hnân  
lâiâ :  
19 Ke so adre haisoâ ien ae hmanenang  
nyiele balua ;  
Ke so e unöngöt hmeledrany hia thithö  
ge anyin hmanenang.  
Amen me Amen.  
20 A um dö ta je hic hiji Davita a nöku  
Jese.

TUSI III.

SALAMO 73.

*Salamo anyi Asafa.*

- E** HNATHU e so hwakecin Khong kö  
Isaraela,  
A tavat ae kalaöt hnyekudra.  
2 Ke haba inya, me oge me thöthö,  
A ne haühaü but li cak.  
3 Anyin oge me ciâ ge tavat bi gan,  
Hnyi ûen oge me wâ hnahic anyin tavat  
ae kong.  
4 Anyin ae ba vec hnyi anyidra mok :  
Ke hwenying ut hwegiödra.  
5 Adre me ca hnyi vec helâ me ke je  
hnyat,  
K' adre me ca okongu ödra helâ me  
keihen.  
6 Anyin a wale adre ovhekinyi ödra ge bi  
gan ;  
Adre me khavâ ûkhaüen a ûokonguny.  
7 A didrut li emaködra hnen pipikhenya :  
A bahihingölö je ûnykûmânen ta je  
hnyekudra.  
8 Adre me ûhiö, me ha ûkonguny hnyi  
anyidra hulö :  
Adre me ha biganá.  
9 Adre me fuc göranyai ka hnyi drany,  
K' ame ngenau eang hmeledran je bohmö-  
dra.  
10 Anyin a wale, ame hmetuhmetu jem  
lakeiny :  
Adre me ijem je köiö hnyin utkaia ae  
unöngöt.  
11 Haingödra, ka habe, Ame he Khong ka  
kâmâu ka khana ?  
Ke hawa, e hu wâhmakhmetoâ unyi  
Beönua ?  
12 Wâ bi, wale bi eling tavat ae kong ;

- Adre me laba khötkic bala bi, me se  
hia tot je omjehedra.  
13 E hnathu, e ûnyi baü hnök hna okhala-  
ötâ hnyekuk,  
Me hinyem hnyi hwakecin ae ba hnyi-  
kongon ;  
14 Anyin adre me oveci nya hnyi je bong,  
Me osöi nya hnyi je hnyomakatu hia.  
15 Oge ne hia but ha, ka habe, Oge me he  
ka ha helâe ;  
Wâ bi, inya at ame omonoâ ta je lakom.  
16 Oge ne ûnykûme deny me inye he ka  
khana e,  
Ûnyi e ae vec könya ;  
17 Ke ne o but oge me o ka hnyi uma  
umen Khong,  
Me ûnykûme thö obiny ködra.  
18 E hnathu u je ip ödra hnyi je dok ae  
haühaü :  
U je hagut' ödra hnyikânâi ka hnyi  
hnaühangö.  
19 Eke, ame ie logöt ka ohi' ödra !  
Adre me aü but hnen je ûnyi hnân  
ootâ.  
20 Helâ me man bwi e ka hmak dö at,  
Helaê, Than lö, u ka hmak dö, u me he  
ka ikiki ge hmenudra.  
21 Anyin ame hiny dut hnyekuk,  
K' adre me dâ li jebalainuk :  
22 Iny monu ke ca khanö nya ;  
Iny helâ me meno hnyi hnyimâkâm.  
23 Ke so bi inya bala bi unyâm :  
U je kât hnyamök a metök.  
24 U me he ka su nya ge hnâm hna  
ûhnenamö,  
Ke hwaban dö e u me he ka hum nya  
ka hnyi hmanenang.  
25 Anyin a ca hobi könya hnyi drany  
ethö ?  
Ke ba wek ge at eang hmelen ke bake  
u ke.  
26 E sényin dut unyik me hnyekuk :  
Khong thibi kicin hnyekuk me jekhök  
nyiele balua.  
27 Anyin a wâ bi, ame he ka hia but tavat  
adre me úsâkâüö möu ;  
U je hia but ohi' ödra hia adre me bi  
ûnyi monu digic u,  
28 Ke haba inya, e so könya he ka hakekeny  
ka Khong :  
Oge me hia but wia Than Iehova me me  
hnök hna lubaduöng,  
M' oge me he ka omanenâ ânyâm ta je  
huliwa hia thithö.



SALAMO 74, 75.

SALAMO 74.

*Salamo anyi Asafa, hnân ünö.*

- K**HONG lö, ieu gam u me údigic balua but ?  
 Ieu ame sâ gan ânyâm hmönyin ka hnahat mamoe a em ?
- 2 Ünüküme ju ânyâm úkhacaköu waleji u je úco ehac,  
 Waleji u je bi hwaban me me tribu a jekhom ;  
 Me bucen Ziona, dok u je laba hnyin.
- 3 Ogöranyâ thö li cam hon ta je uma ae únyi baú bala but,  
 Wale ta je únyi ae kong hia ame ânyâ hnen iwahnaihmiöny hnyi dok ae kap.
- 4 Haba ta je iwahnaihmiöny me adre me hmuhuu hnyi wanben ânyâm úkhacaköu ;  
 Adre me hai thö anyidra je boúdila me hnân je haten.
- 5 E manen dut e helâ me at ame hai thö Ta je giwa hnyi hnyot ae wanenec.
- 6 Ke walang haba ta je únyi adre kave mecâ,  
 Adre me tha kot degecâ ge je gö me je hama.
- 7 Adre hia but thong degecâ umâm uma kap ;  
 Adre hia but okongoâ hnyaban iâm ke ne o but ka hnyi kânâ.
- 8 Haingödra eú hnyi je hnyekudra, ka habe, Ötin e he ka tha walak' ödra :  
 Adre hia but thong degecâ je uma úkhacaköu hia umen Khong hnyi hnyei.
- 9 Ate me ca wâ ta je hatöta :  
 E ba hmetu bi perofeta ;  
 Ke ba at gata ame wâ úen ame he ka bi obiny hnyin.
- 10 Khong lö, ke ne o but kehö ame he je iwahnaihmiöny ka úhaikonguny ?  
 Hawa, ame he bala bi iwahnaihmiöny ka hmi ödra iâm ?
- 11 Hnân eú u je hom hmetu hnyamâm, wale hnyamâm a metâm ?  
 Lau but únyi hnyi úlaiâm me ohi' ödra.
- 12 Ke Khong thibi Tuhök kâú adrem,  
 At ame huliwan hna úhömeli hnyi wanben hmeledrany.
- 13 U je hia but subâ luâ köiö ge tang hwegiâm :  
 U je tho ban ta je tanimo hnyi je köiö.

- 14 U je kot omomono ta je ban leviathana,  
 U je ham e hnân han ka tavat adre labâ hnyebuba.
- 15 U je khenâ luâ pupua me wadutö :  
 U je ohmö ta je wagewe ae gan hmâ.
- 16 Ânyâm bi lany ânyâm minya bi lit :  
 U je hia but penapena melam me seúnö.
- 17 U je hia but ip je hnyigöulen hmeledrany hia :  
 U je hia but op honivakeny me hnyeun.
- 18 Iehova lö, ünüküme thö únyi ang, a ga hia but iwahnaihmiöny úhaikonguny,  
 Ke adre hia but hmiödra iâm hnen tavat ae monu.
- 19 U na ca he ju ka hna halem biny ka menoiny hnyot :  
 Ca he bala ka hnying möt anyin lakem adre me vec.
- 20 Ünüküme ju ânyâm úhinhnyköu :  
 Anyin ae unöngötö je dok ae mene-kholom eang hmeledrany ge je hnyaban úkonguny.
- 21 E na ca he ju ka hmetuhmetu me hmehma tavat adre me okongoâ :  
 E so e he ka ogânâ iâm hnen at ame vec me at ae ba ta únyi.
- 22 Khong lö, todrö, ivinö thö hobi köu bi :  
 Ünüküme ju hna haikongu u hnen at ae monu hnyi ta je bong.
- 23 Ca he ka hnying ifucin je iwahnaihmiöny möu :  
 Ame ölö bala göranyai imedien tavat adre me tot köu.

SALAMO 75.

*Hobi kâú at vâik khumöng ; adre hai hnyi Al-taseth Salamo anyi Asafa, a Kkumöng.*

- K**HONG lö, öhmun e ole köu ;  
 Öhmun e ole, anyin a hakekeny dut iâm :  
 Ame úsabö tavat ge ânyâm ta je huliwa hnân láia.
- 2 Iny ka he ka wâ úen adre thu,  
 Me oge me he ka owisa hnyi wisa.
- 3 Adre me oköiâ hmeledrany me tavat hia thithö adre me labâ e :  
 Ke oge hia but otilâ je hmolominy [Sela.
- 4 Haingök dö ka tavat bi gan, ka habe,  
 Ca bi gan bi :  
 Me ka tavat ae kong, ka habe, Ca hai bi göranyai faoiny meno :
- 5 Ca ogöranyâ bi anyibun faoiny meno ;  
 Ke ca fuc bi ke hwege nyibun.
- 6 Anyin a ca úheny jimeio me jimeú,

SALAMO 76, 77.

- Ke ca úheny hwaiöu ame o but hna ogöranyá.
- 7 Ke Khong thibi at owisa :  
E ame ohnyikánâ ke at me ogöranyá ke at.
- 8 Anyin a e hnyi hnyamö Iehova kaia, ke ame húlúlù hangoc dö waina ;  
Ke unöngötö ge hna úthueniken, ke e ame hingálâ únyi hnyi hnyin e :  
E hnathu ame he tavat hia ae kong hnyi hmeledrany ka drem e, me ijem kánáiny.
- 9 Ke oge me he ka haimanenâ nyiele balua,  
Oge me he ka khumöng ogânâ Khongu Jakob.
- 10 Oge me he ka subâ degecâ ta je faoiny meno hia anyin tavat ae kong ;  
K' adre me he ka ogöranyá li faoiny at ame ányá hwakecin ae wisa.

SALAMO 76.

*Hobi káu at chík khumöng ; hnyi Neginoth.  
Salamo anyi Asafa, a Khumöng.*

- E** KHAN' ödra but Khong hnyi Juda :  
E gan hmâ ien hnyi Isaraela.
- 2 Ke e bi hnyi Salema umen uma menâ,  
Ke e hnyi Ziona hnyaban.
- 3 E ame thu degecâ eling je fanainy cafana ;  
Me bec, me hele vat, me vat. [Sela.]
- 4 U hmanenang me so úheny hnyi je bucen adre sei hnyin.
- 5 Adre hia but söh tavat hwege adre me mokut balua but ;  
Ke adre me ca wâ hmetu ta je hnyamödra hnen tavat hwege hia.
- 6 Khongu Jakob lö, únyi ge hnâm hna thawâ,  
Ame tha mokut hnying kariota me hors.
- 7 U thibi hnân outen, wale a u :  
Ke ie at ame he ka tot hnyi hnyimákâm u ka hmönyin dö ?
- 8 Únyi hnyi drany u je olöngâ hnâm hna owisa ;  
Ame ot bi hmeledrany me ca bwebwet,
- 9 Waleji hnyi hna tot hnen Khong he ka owisa,  
Me omelö tavat ae hnyikánâ eang hmeledrany hia [Sela.]
- 10 E hnathu ame he ka oganö u hnen hmönyin anyin tavat :  
Ke u me he ka thawâ kolon je wathethöt.
- 11 Hükölö khöbi ju, me thamúâ kö Iehova Khongubun :

- E so ame he tavat hia adre me laba igigilö e ka ham je bwihlany ka at ae úcú ke ka outen.
- 12 E ame he ka sö degecâ but hanon ta je tuhan :  
E at hnân outen ka ta je thaniny hmeledrany.

SALAMO 77.

*Hobi káu at chík khumöng ; holon hwakeci Jeduthun. Salamo anyi Asafa.*

- O** GE me he ka tengge ka Khong ge ifucik ;  
Wale ka Khong ge hok hofuc, me e ame he ka tevehling nya.
- 2 Oge me elâm Khong hnyi bonginy anyik vec :  
Oge me inâ hnyamök hnyi lit, me ca menâ bi ;  
E höcö hanuk he ka kap únyi hnân otubwelâ.
- 3 Oge me únykúme ge Khong, ke iny hlohlo :  
Oge me ha gaga anyik vec, k' ame bahihingölö hanuk. [Sela.]
- 4 U je ci li emakök inye hmákâ :  
Iny hlóuhlöu but, ke ca khanö nya hmetu bi he ka fuc.
- 5 Oge hia but únykúme ta je bong káu adrem,  
Wale ta je huna adrem balua.
- 6 Oge me únykúme ge anyik khumöng hnyi hnyinghet :  
Oge me úhnenamö me hnyekuk bi ;  
Ke haba hanuk ame ti elâm wia.
- 7 Hawa, ame he bala Than ka údigic !  
K' ame ca he hmetu bi ka betenge !
- 8 Hawa ame hia anyin ibetengiö nyiele balua ?  
Hawa, ame he ka önua hnen hna ha bánâ nyiele balua ?
- 9 Hawa, a hnying ut Khong he ka betenge ?  
Ke hawa, e ame hlöng ut anyin tang betenge ae menyik hnyi anyin hmönyin ? [Sela.]
- 10 Ke haingök, ka habe, Walang anyik sényin ;  
Ke oge me he ka únykúme ta je hunainy hnyam bi a metán Beönua.
- 11 Oge me he ka ha gaga ta je huliwa anyi Ja ;  
Anyin oge me he ka únykúme ányám ta je únyi hnân láia únyi adrem.

SALAMO 78.

- 12 Ke oge me he ka únykúme ányám ta je huliwa hia,  
Me únykúme gaga ge hnám ta je hna ányá.
- 13 Khong lö, e bi dem gethen hnyi dok ae kap;  
Ie ke khong ae gan ae úcú me Khong?
- 14 U thibi Khong at ame ányá ta je únyi hnán láia :  
U je hia but omanená tang hwegiám hnyi wanben ta je hnyei.
- 15 U je hia but omelö lakem ge benyám a metám,  
Wale je mátráni Jakob me Josefa.
- 16 Khong lö, a õ u but köiö ;  
A õ u but köiö, me ot ju.  
Ame öbubuny minya je dok ae dit.
- 17 Ame hingölö but köiö hnen je úlâ ;  
Ame lung drany :  
Ame gâ thö minya ányám je fana.
- 18 E hnyi hõu hwan ányám than ;  
Je hucuce adre me öumumelamá hmeledrany :  
Ke hmeledrany ame öbubuny me bwebwet.
- 19 E bi hnyi köiö dem gethen,  
Ke eú hnyi köiö ae gan deny hnám hna he,  
Ke ca manen bi je deny je hnyeúcam.
- 20 U je su lakem helâ me hnahat mamoe,  
Ge hnyamö Mose me Arona.

SALAMO 78.

*Salamo anyi Asafa, hnán únö.*

- L**AKEIK lö, tevehlõng ju hnök hna-nyibu :  
Ta ju je hnyikönyöbun ka ta je ifucin hnyimök.
- 2 Oge me he ka khõng hnyimök me úhö-úcu ;  
Oge me he ka ha ta je hofuc ae iyong kâú adrem :
- 3 Waleji ta je únyi ate me löng me khan' öta,  
Ke haba lakamöta adre me ha gaga köta.
- 4 Ate me ca he ka ikhâlâ ge ta je mátránidra,  
K' adre me he ka ha gaga je hna oganö Iehova ka dö ame he ka o but,  
Ke tang hwegien, me ta je únyi hnán láia gan waleji e ame ányá.
- 5 Anyin a e ame otilâ unyi Jakob únyi hnán ohnatho,

- K' ame omanená hnanyibu unyi Isaraela,  
Waleji e ame húna ka lakamöta,  
M' adre me he bi ka omanená ka lakudra :
- 6 Me me khana thö hnen dö ame he ka o,  
a lakudra adre me he ka hnokoá ;  
M' adre me he bi minya ka todrö me ha gaga ka lakudra :
- 7 M' adre me he ka geju ka Khong,  
Me ca hnying je huliwa anyin Khong,  
M' adre me he ka tuö anyin je hna-nyibu :
- 8 M' adre me ca he ka tha úcu me lakamödra,  
Waleji dö ae újõng me úkhin fuc ;  
Wale tavat adre me ca penapena ta je hnyekudra,  
Ke ca hnathu ta je hanudra ka Khong.
- 9 Adre me kec dö hnyi bonginy vat  
Lakon Eferaima adre penapena me hom je cafana.
- 10 Adre me ca vheno hna úhinhinykõu me Khong,  
K' adre hõcö he ka vheno anyin hna-nyibu ;
- 11 K' adre me hnying anyin ta je huliwa,  
Me hnen je hna ányá hnán láia, waleji e ame omanená ködra.
- 12 E ame ányá ta je únyi hnán láia hnyi hnyimakan lakamödra,  
Hnyi hnyei Aigupito, hnyi ta hnyei hnyi Zoana.
- 13 E ame subá luá köiö, me bi dedra ;  
Ke e ame otilâ köiö helâ me li khölöki.
- 14 Haba hnyi lany e ame su ödra ge úlâ,  
Ke melaminy meic hnyi je hnyinghet hia.
- 15 E ame tho luá je kic hnyi hnyebuba,  
Me habelidra helâke me únyi hnyi je dok ae dit.
- 16 E ame oá minya únyi hnyi kic je wadutö ame hingölö  
Me hingâlâ köiö helâ me je wagewe.
- 17 Ke so bi adre me monu bala bi kâu,  
He ka thu musi anyi Beönua hnyi hnyebuba.
- 18 Ke adre me cubec Khong ge je hnyekudra  
Hnyi hnödra hna sumató ö 'dra meno.
- 19 Eke, adre me ulidro Khong ;  
Haingödra, ka babe, Hawa, e khana Khong he ka laulau hnyi hnyebuba ?
- 20 Me wá bi, e ame kot kic, me ame hingölö but köiö,  
Ame bahihingölö ta je wadutö ;

SALAMO 78.

- Ke hawa, e khana he ka ham jeú minya ?  
 Hawa, e ame he ka penapena utiö hobi kâu lakeiny ?
- 21 Anyin a wale Iehova ame löng, me ame wathethöt dö :  
 Ke adre hú meic unyi Jakob,  
 K' ame ölö bi minya hmönyin kö Isaraela ;
- 22 Anyin adre me ca labageju ka Khong, Me gejon anyin úhömeli.
- 23 Ke so bi e ame húna ka ta je úlá ethö, Me khöng ut ta je hwanumen drany ;
- 24 Ke e ame hingálâ únyi ethö mana he ka ha ö 'dra,  
 Me ham ködra jeú únyi hnyi drany.
- 25 Haba tavat, adre me ve an jeú an tavat ae hwege :  
 E ame kúna ködra jeú a sekudra.
- 26 E ame okúâ thö ang hwei únyi hnyi drany :  
 Me lelö hwaiöu ge maniny man.
- 27 Ke e ame hingálâ ködra únyi ethö minya utiö helâ me sesâ,  
 Me je meno ame gâ helâ me önyin köiö :
- 28 Ke e ame okoloâ hnyi wanben hnödra hna hunuma,  
 Igigilö ta je hnyabadra.
- 29 Me adre me han me sekudra hmönyin ;  
 Ke e ame hna but ködra wedra
- 30 Ke adre me ca thawâ bala bi hnödra hna weny,  
 Ke tiga e bi utiö hnyi je hnyimödra,
- 31 Me ame kú thö hmönyin anyin Khong ködra,  
 Me hlingâ ta je pipikhenya unyidra,  
 Me kot degecâ wahidröu hnyi Isaraela,
- 32 Ke so bi adre me tiga ânyâ hulö,  
 K' adre ca labageju bi hnyi anyin ta je huliwa hnân láiâ.
- 33 Anyin a wale e ame ohia bongudra je bong hnyi únyi baú,  
 Ke je hunaidra hnyi ot.
- 34 Hnyi úen e ame hling' ödra, me adre me elâm dö e :  
 Adre me hnetuhmetu, me hwege hnö Khong.
- 35 Ke adre me únykúme a Khong thibi kicidra,  
 Me Khong ae Beönua at ame omeli ödra.
- 36 Ke adre me útakú ge hnyimödra kâu,  
 Ke thoi kâu ge je bohmödra.
- 37 Anyin ae ca wisa hnyekudra kâu,  
 K' adre me ca hnathu bi ka hnyi hna úhibinykôu më.
- 38 Ke e at ae unöngöt ge ibetengiö, me e ame thang anyidra hulö, k' ame ca ohí' ödra bi :  
 Eke, e ame osehia ohmeto anyin hmönyin,  
 Ke ame ca oubâhlâ anyin wathethöt.
- 39 Ke e ame únykúme a ödra tavat bi ;  
 A ang ame he but, k' ame ca hmetu but.
- 40 Ke ti se hia hnödra hna ukhin fuc máu hnyi hnyebuba,  
 Me ojâtâ hnyekon hnyi hnyot !
- 41 Ke adre me hmetuhmetu me cubec Khong,  
 Me haiúhnyúkongoâ At ae Kap anyi Isaraela.
- 42 Adre me ca únykúme bi hnyamen,  
 Me bong waleji e ame omeli ödra hnyi únyi ge iwahnaihmiöny.
- 43 Me hnen hna otilâ hnyi Aigupito anyin ta je haten,  
 Me anyin ta je únyi hnân láiâ hnyi ta hnyei hnyi Zoana ;
- 44 Me wia anyidra je wagewe, me me dra bi,  
 Me anyidra ta je di, m' adre me ca he hmetu ka ic.
- 45 E ame kunâ ködra ta je nöng he ka úlú' ödra ;  
 Me je rana he ka ohí' ödra.
- 46 Ke e ame ham troban ta idra ka ta je ihmâ  
 Me anyidra huliwa ka ta je wahamon.
- 47 E ame omoko haledra je vine ge we ae wahma,  
 Me haledra ta je úö sukamore ge megic.
- 48 E ame hna but minya haledra ta je meno ka we ae wahma,  
 Me je hnahat haledra ka ta je hucuce.
- 49 E ame kunâ ködra hlönginy anyin wathethöt,  
 A hmönyin, me wathethöt, me vec,  
 A je hna kunâ ae kong.
- 50 E ame bi gethen deny anyin hmönyin ;  
 E ame ca hom behânâ hanudra ge mok,  
 E ame hna but anyidra möt ka mok ae cap ;
- 51 Me hlingâ watö hnyi Aigupito,  
 Je wahwege ae nua hnyi je uma mano umö Hama :
- 52 Ke e ame lelö lakeiny helâ me je mamoe,  
 Me su ödra hnyi hnyebuba helâ me hnahat meno.
- 53 Ke e ame su ödra til' ödra wia, m' adre me ca ot bi :  
 Ke ame húlúlúâ je iwahnaihmiöny mödra hnen köiö.

SALAMO 79.

- 54 Ke e ame hum ödra ka hnyi baten anyin dok ae kap,  
Wale becen ang, a úco hnen hnyamen a metân.
- 55 E ame obâ aten ke je hnyei hnyi hnyimaködra,  
Me ve khene idra hnen tulut,  
Me olabâ je tribu Isaraela hnyi umödra je uma mano,
- 56 Ke so bi adre me cubec me úkhin fuc me Khong ae Beönua,  
Me ca vheno bi hnen je hna ohnatho.
- 57 Ke adre me hmetuhmetu me iyâwâ helâ me lakamödra :  
Adre me saú but helâ me cafana ame önua.
- 58 Anyin a adre me ohmönyinâ e ge anyidra je dok ae görany,  
Me ociâ e ge anyidra je hnatheat,
- 59 Ke haba Khong ame löng, me e ame hmönyin,  
Me ame ti ikikiâ at Isaraela :
- 60 Me e ame hna degecâ uma hnyi Silo,  
Waleji uma mano e ame otilâ unyin tavat ;
- 61 Me hna anyin hwege ka hnyi hwenbâ,  
Ke hmanenanginy ka hnyi hnyamen iwahnaihmiöny.
- 62 E ame hna but minya lakeiny ka hnyi hele vat ;  
Ke e ame hmönyin ka jekhon.
- 63 Haba meic ame an wahidröu unyidra ;  
Ke ba khumönginy faipoipo ge wahu.
- 64 Ame ta but anyidra tavat bihut ge hele vat ;  
K' ame ca tengi' ödra hnen anyidrin ta je safac.
- 65 Waleling me me hmak dö Than helâ me at ame mokut,  
Helâ me at ae hwege ame kuku can ame ic waina.
- 66 Ke e ame kot tilâ ta je iwahnaihmiöny mä hnyi kec a ödra :  
Me hn' ödra hnân taben úhiö nyiele balua.
- 67 Ke haba khaca, e ame hom behânâ uma mano umö Josefa,  
K' ame ca úca bi tribu Eferaima ;
- 68 Ke e ame úca tribu Juda,  
Wale bucen Ziona e ame hnyok kâu.
- 69 Ke e ame op umen uma kap helâ me je dok ae görany,  
Helâ me hmeledrany waleji e ame otet-hmä nyiele balua.
- 70 E ame úca minya Davita me me athnyabainy,

K' ame hom but e únyi hnyi je haginymamoe :

- 71 E ame hom e únyi hnyi hnen hna he hoton je mamoe ame úasin,  
Me me haö Jakob a lakeiny, me Isaraela wale jekhon.
- 72 Me e ame haödra hoton wisainy hnyekon :  
Me su ödra hnen metâiny li hnyamen.

SALAMO 79.

*Salamo anyi Asafa.*

**K**HONG lö, ame o but aten ke je hnyei ka hnyi em ;

- Adre hia but okongoâ umâm uma ae kap ;  
Adre hia but tho Jerusalema me me vetaúnyi but.
- 2 Adre hia but ham ta je unyin lathnyabaem me hnân an ta je meno ame gâ ethö,  
Wale viny ányâm wakap ka ta je menoiny hmeledrany.
- 3 Adre hia but hingâlâ drödra helâ me köiö igigilö Jerusalema ;  
Ke ba at he ka konim ödra.
- 4 Adre haikongu öhmun tavat adre me laba kakekenyi öhmun,  
Adre me útuböny me hluma hnen tavat adre me laba igigili öhmun.
- 5 Iehova lö, ke ne o but kehö, u me he bala ka hmönyin ?  
Ame he ányâm ciâ ka ubâhlâ helâ me meic ?
- 6 Hingâlâ but ányâm wathethöt ka tavat ae ca khan' ödra u,  
Me ka ta je dokhu waleji adre me ca hawâ iâm.
- 7 Anyin adre hia but ön Jakob,  
Me kia degecâ bi hnyaban.
- 8 Ca únykúme köhmun can ta je hulö anyin lakamöhmun :  
E so e ie he ányâm je tang betenge ka outhmoki öhmun,  
Anyin adre me hom úhnyúkongo hwegiöhmun.
- 9 Khongon melihmuu lö, hadru' öhmun dö can hmanenanginy iâm :  
Ke thöng öhmun dö, me ohia anyihmun je hulö ge iâm,
- 10 Hnân eú ame he ta je hnyei ka ha, ka habe, Ewa Khongudrin ?  
E so e ka manen dut hnyi ta je hnyei hnyi hnyimaköhmun.

SALAMO 80, 81.

- Hna bi hwaban dra dren lathnyabaem  
adre hingälä.
- 11 E so e ame o but ka hnyi hnyimákâm  
mâng anyin tavat adre ca ;  
Omelö tavat adre me kunâ he ka mok  
hoton úganiny manâm man ;
- 12 Ke bi hwaban ju a oseven ka hnyi  
úlainy tavat adre me laba hakekenyi  
öhmun  
Hnödra hna haikongoâ, adre me haiko-  
ngu u gan Than.
- 13 Me haba öhmun je lakem, me je mamoe-  
einy em hneyi,  
Öhmun e he ka ole köu nyiele balua :  
K' öhmun e he ka haimemenâ hnân  
oganö u ka ta je dö.

SALAMO 80.

*Hobi kâu at vñik khumöng : adre hai hnyi Sosani-  
Edutha. Salamo anyi Asafa.*

- A**T tue mamoe a Isaraela lö, loug ju,  
At ame su Josefa helâ me hnahat  
mamoe ;  
At ame laba hon li kerubi, öumumelamá  
but.
- 2 Bwebwelâ thö tang hwegiâm hnyi hnyi-  
makö Eferaima, me Beniamina, me  
Manase,  
Me o but jem he ka omeli öhmun.
- 3 Khong lö, ohmetu öhmun ju ;  
Me öumumelamá thö hnyimákâm, m'  
öhmun e he ka möt.
- 4 Iehova lö, Khongon sabaoth,  
U me he ka hmönyin ke ne o but kehö  
ge hic hijin lakem ?
- 5 U je hia but haödra ge jeúiny tenge  
Me habelidra gan hmâ ge deköien ecmak.
- 6 U je otil' öhmun hnân iwatretra ka  
tavat adre me laba hakekenyi öhmun :  
K' ame hluma je iwahnaihmiöny möh-  
mun.
- 7 Khongon sabaoth lö, ohmetu öhmun ju ;  
Ke omelamá thö hnyimákâm me öh-  
mun e he ka möt.
- 8 U je hom vine únyi Aigupito :  
U je obâ je hneyi, me ta ju e hnyin.
- 9 U je bi hnyimakan e,  
Me ame hwân dut me öunöngötâ hneyi.
- 10 Ame khavâ je bucen hnen hmenon,  
Ke je vheiny e, helâ me je arasi anyin  
Khong.
- 11 Ame hlau ta je anginy ke ne o but hnyi  
köiö,

- Me je vheiny ke ne o but hnyi Wagewe.
- 12 Ieú gam u je kia degecâ haginy je hak,  
Me adre me tau e hnen tavat hia adre  
me gethen eling ?
- 13 Ame oloú usukia e hnen buakainy hnyot,  
Me an e hnen menoiny hnyot.
- 14 Khongon sabaoth lö, Ö u hmetu ju :  
Wâ ju únyi hnyi drany, me wâ me senâ  
vine ang,
- 15 Ke tuö ju hna ta hnen hnyamâm a  
metâm,  
Me anginy u je hat hobi köu bi.
- 16 Adre thong degecâ e ge meic, ke adre  
sö degecâ :  
A hi' ödra but ge hna ú ödra hnen  
hnyimákâm.
- 17 E so e bala bi hnyamâm hon aten a  
hnyamâm a metâm  
Hon lakon at waleji u je hat hobi köu  
bi.
- 18 Me öhmun e ca he ka hmetu gam :  
Omeli öhmun ju, m' öhmun e he ka  
hawâ iâm.
- 19 Iehova lö, Khongon sabaoth, ohmetu  
öhmun ju ;  
Omelamá thö hnyimákâm, m' öhmun e  
möt ut.

SALAMO 81.

*Hobi kâu at vñik khumöng : adre hai hnyi Gitâh.  
Salamo anyi Asafa.*

- K**HUMÖNG hwege thö ka Khongon  
tang hwegiöta :  
Hongot senyin dö ka Khongu Jakob.
- 2 Vec dö salamo, ke hom jem bwinybet,  
Me kitara a adre me belöng, me nabela  
minya.
- 3 Túâ thö trutru hnyi úlabainy tehi,  
Hnyi tehi a bekhöt hnyi bongon anyita  
bijeu ac únyi hnathu.
- 4 Anyin a hnanyibu ling kö Isaraela,  
Hna húna hnen Khongu Jakob.
- 5 E ame otilâ e unyi Josefa hnân ohna-  
thoâ,  
Hnyi úheny dut hnyi hneyi Aigupito :  
Waleji hnyi úen oge me löng hwan  
hneyi ae ca khanö nya.
- 6 Oge me uny jut hok únyi hnyi li  
abenyin :  
Adre thang li hnyamen únyi hnyi tang.
- 7 U je khöú hnyi vec, me oge me omeli u ;  
Oge me thu köu únyi hnyi dok ae iyong,  
a umen hwan than ;  
Oge me cubic u hnyi je köien Meriba.

[Sela.

SALAMO 82, 83.

- 8 Lakeik lö, löng ju, me oge me he ka ha  
cicö köu : Isaraela lö, u na he ju ang  
ka löng könya !
- 9 Ame ca he ka e unyâm ke khong  
kanyua ;  
Ke u me ca he ka khudrung ka khongon  
ke hnyei.
- 10 Inya thibi Iehova Khongom,  
At ame hum u but únyi hnyi hnyei  
Aigupito :  
Memang gan hmâ but hnyimâm, me  
oge me he bi ka öunöngötâ e.
- 11 Ke haba lakeik adre me ca löng ifucik ;  
K' ame ca ogö nya bi Isaraela.
- 12 Me oge me hn' ödra but ka hnyi ikikiny  
ta je hnyekudra bi,  
M' adre me he ka vheno bala bi ta je  
únykúmenödra.
- 13 E na he ju lakeik ha ling nya,  
Me vheno dek je gethen hnen at Isara-  
ela !
- 14 Oge me he ka ie ngâ je iwahnaihmiöny  
mödra,  
Me wia ju hnyamök ka tavat adre me  
oveci ödra.
- 15 Ame he tavat adre me húkötio Iehova  
he ka iyâu kâu ;  
K' ame he ka tethmâ balua bi bongudra  
je bong.
- 16 Ke e ame he ka haödra ge hwit ae ti  
so :  
Me osekuni u ge hani únyi hnyi kic.

SALAMO 82.

*Salamo anyi Asafa.*

- K**HONG ame tot hnyi úkhacaköu anyin  
Khong ;  
E ame owisa hnyi wanben ta je khong.
- 2 Ke ne o but kehö öbun e he ka owisa  
hwalö,  
Me bi haten tavat ae monu? [Sela.
- 3 Owisa thö ka at ae sēnyin me nakahme :  
Ányâ thö wisa ka at ae vec me at ae  
theduoc.
- 4 Omelö at ae sēnyin me ba ta únyi :  
Thöng ödra bi únyi hnyi hnyamen tavat  
ae kong.
- 5 E ca khan' ödra, ke ca wâhmakhmeto bi ;  
Adre me ngenu hnyi menekholom :  
Ame bwebwet hia thö je taben hmele-  
drany.
- 6 Haingök, ka habe, Öbun je khong,  
Ke öbun hia je lakon Beönuu.
- 7 Ke so bi öbun e he ka mok helâ me  
tavat,

- Me ta helâ me ta je than.
- 8 Khong lö, todrö, owisa thö hmeledrany :  
Anyin ame he ka hu gam ta je hnyei  
hia thithö.

SALAMO 83.

*Khumöng wale Salamo anyi Asafa.*

- K**HONG lö, ca laba hnyibú bi :  
Khong lö, ca hum bi, ke ca laba  
hmâ bi.
- 2 Anyin a wâ ju, a imonumonuny je iwa-  
hnaihmiöny möu :  
Ke haba tavat adre me húkötio u adre  
hia but ogöranjá je bödra.
- 3 Adre me vak wia he ka okongoâ lakem,  
Me úhanyinyâ ge tavat u je ikhâlâ.
- 4 Adre hia but ha, ka habe, Ötin e he  
ka ohi' ödra me me ca hnyei hmetu  
bi ;  
M' adre me ca he hmetu ka únykúme  
io Isaraela.
- 5 Anyin adre hia but tha úhanyinyâ  
hwegeâ ;  
Ke adre me ohmâ úhahinyköu úö bi  
únyi möu :
- 6 Je uma mano umö Edoma, me at Isa-  
maela ;  
Me Moaba, me at Hagara ;
- 7 Me Gebal, me Amona, me Amaleka ;  
Me Filisiti, tha e me tavat aten Turo :
- 8 Ke ame úkhacaköu mödra Asuria ;  
K' adre hia but hom hadruâ laku Lota.  
[Sela.
- 9 Ányâ thö ködra helâji me hna ányâ kö  
Midiana ;  
Me Sisera, me Jabin, hnyi wagewe  
Kisona :
- 10 Waleji adre ohi' ödra hnyi Eni-dora ;  
Adre me wi' ödra me me helâ me tatet  
hobi kâu kânâ.
- 11 Óuco ju ta je tuhödra me Oreba me  
Zeeba ;  
Eke, óuco ju je tuhödra hia me Zeba  
me Zalemuna :
- 12 Waleji tavat adre me ha, ka habe, E so  
ate me hügúnâ  
Je hnyei iny Khong.
- 13 Khonguk lö, óucú ödra me sesâ ame  
khenyi ge ang ;  
Me thatúnyin hwit ame óu ang dö.
- 14 Me meic at ame thong hnyot,  
Me bahlân meic at ame thong je bucen ;
- 15 Helâe u me he ka hnu ödra til' ödra ge  
ányâm höu,  
Me ooti ödra ge ányâm weneú.

SALAMO 84, 85.

- 16 Iehova lö, tube ju je hnyimaködra ge hmehma ;  
M' adre me he ka elâm iâm.  
17 E so adre me he bala ka hmehma me ot ;  
Eke, e so adre me he ka hmak, me hia but :  
18 Me me kxan' ödra a u thibi, wale a iâm I EHOVA,  
At ae Beönua hon hmeledrany hia thithö.

SALAMO 84.

*Hobi kâu at vñik khumöng; adre hai hnyi Gíúth. Salamo anyin laku Kora.*

- I EHOVA tuhan sabaoth lö,  
Shaiba ge soiny umâm je uma menâ !  
2 Ame ti weny hanuk, eke, ame mokhon ae behe ka hnyi je hnyeule Iehova ;  
Ame khumöng senyin hnyekuk me vik ka Khong ae möt.  
3 Eke, a wâ but wahelö háûen,  
Ke wahalep ame wâ dok he ka hnokoâ hnyin,  
Wale ânyâm je taben hut, Iehova tuhan sabaoth,  
Tuhök me Khonguk.  
4 Hnahic hnen tavat adre me laba hnyin umâm uma :  
Adre me he ka oganö u bala. [Sela.  
5 Hnahic hnen at at ae hwege gam ;  
Eû bi hnyi hnyekoa hna cit gethen ame he Ziona ai.  
6 Ame he hnyi wanben thopiny Tenge, adre me ânyâ e me hnân je hna pupu-ainy köiö ;  
Eke, haba we a bán ame tube e ge je hnahic.  
7 Adre me he ka hwege tot,  
Adre me ve manen dut hnyi hnyimakan Khong hnyi Ziona.  
8 Iehova lö, Khongon sabaoth, löng ju hijik hic :  
Khongu Jakob lö, tevehlöng ju. [Sela.  
9 Khong a becihmun lö, bwele but,  
Me wâ hnyimakan at u je hú.  
10 Anyin ae so bong a khaca hnyin je hnyeulem, hon je bong a wan thauzan.  
E beönua soiny kõnya he ka tuö hwanumen uma umen Khonguk,  
Hou he ka laba eiö hnyin je uma mano umen tavat ae kong.  
11 Anyin a Iehova Khong seünö me bec :  
Ame he Iehova ka ham betenge me hmanenang :

- E ame ca he ka behânâ ke únyi ae so ge tavat adre me vheno wisa.  
12 Iehova tuhan sabaoth lö,  
Hnahic hnen at ame labageju köu.

SALAMO 85.

*Hobi kâu at vñik khumöng. Salamo anyin laku Kora.*

- I EHOVA lö, u je hia but betenge ka em hnyei :  
U je hia but ohmetuhmetu Jakob úheny hnyi hna bâ.  
2 U je hia but thang degecâ hulö anyin lakem,  
U je hia but tube hia anyidra ta je monu. [Sela.  
3 U je hia but hom degecâ hia ânyâm wathethöt :  
U je hia but hwiö únyi hnyi ânyâm hmönyin ae hlöng.  
4 Khong at ame omeli öhmun lö, hwi' öhmun ju,  
Ke oumo ânyâm hmönyin köhmun,  
5 Hawa, u me he bala ka hmönyâm köhmun ?  
U me he ka obeûâ ânyâm hmönyin ka ta je dö hia ?  
6 Hawa, u me ca he hmetu bi ka omeli öhmun :  
Me me he bi lakem ka senyin gam ?  
7 Iehova lö, omanená thö köhmun ânyâm ibetengiö,  
Me ham köhmun ânyâm úhömeli.  
8 Oge me he ka löng hna ha hnen Khong ae Iehova :  
Anyin a e ame he ka ha úsoköu ka lakeiny me anyin wakap :  
Ke so adre me ca he hmetu bi ka hwa-kecidra ae monu.  
9 E hnathu e hakekeny ka tavat adre me ouden e anyin úhömeli ;  
Me me he hmanenang ka labâ ita hnyei.  
10 A úkhanö thö ibetengiö me hnathu ;  
A úcimhnyimak dö wisa me úsoköu.  
11 Ame kú thö hnathu únyi hnyi hmeledrany ;  
Ke haba wisa ame selat jem ethö hnyi drany.  
12 Eke, Iehova ame he ka ham únyi ae so ;  
K' ame he ita hnyei ka widrany.  
13 Ame he hwakecin ae wisa ka he hnyi hnyimakan ;  
Me ame he ka ânyâ deny li hnyeücan me me gethen he ka he hnyin.



## SALAMO 86.

*Hic hiji Davita.*

- I**EHOVA lö, ta jem hnyikönyâm, me  
 thu könya;  
 Anyin a iny vec me theduoc.
- 2 Tuö ju hanuk; anyin a inya ang at ot  
 köu:  
 Khonguk lö, ö u omelö thö athnyabaem,  
 at ame labageju köu.
- 3 Than lö, betenge ju gak;  
 Anyin oge me hongot bala köu hnyi je  
 bong.
- 4 Osenyiná thö hanon athnyabaem;  
 Anyin oge me ogöranyâ hanuk köu  
 Than.
- 5 Anyin a Than lö, u thibi at ae so, me  
 at ame thang,  
 Me se hia ibetengiö ködra hia andre me  
 hongot köu.
- 6 Iehova lö, tevehläng ju hijik hic;  
 Me löng ju hok hwakhöü.
- 7 Hnyi bonginy anyik vec, oge me he ka  
 hongot köu;  
 Anyin a u me he ka thu könya.
- 8 Than lö, e ba at ae úcú möu ge ta je  
 khong;  
 Ke ba je huliwa ae úcú me ânyâm ta je  
 huliwa.
- 9 Than lö, ame he ta je hnyei hia thithö  
 u je op ka o me khudrung ju hnyi  
 hnyimákâm,  
 Me andre me he ka ogânâ iâm.
- 10 Anyin a u gan, me at ame ânyâ je únyi  
 hnân láia:  
 U thibi Khong a khaca.
- 11 Iehova lö, nö nya thö ge dem gethen;  
 oge me he ka vheno ânyâm hnathu:  
 Othabongonâ ju hnyekuk me inye ot ge  
 iâm.
- 12 Than a Khonguk lö, oge me he ka oganö  
 u ge hnyekuk ae bekhöt;  
 Ke oge me he bala ka olungâ iâm.
- 13 Anyin ae gan hmâ ânyâm betenge  
 könya:  
 Ke u je hia but thang hanuk únyi hnyi  
 erkemok ae dit hmönyin.
- 14 Khong lö, ame tot könya tavat bi gan,  
 Ke ame elâm hanuk hnen úkhacaköu  
 anyin tavat úkonguny,  
 K' andre me ca ip u hnyi hnyimaködra.
- 15 Than lö, u thibi Khongon ibetengiö me  
 betenge baú,  
 At ame ca ie hmönyin bi, ke ti hu gam  
 ibetengiö me hnathu.

- 16 Ö u hwiö thö könya me betenge gak:  
 Hna but hwegiâm ka athnyabaem,  
 Me omelö nokon бага athnyabaem a  
 momo.
- 17 Omanená thö könya haten ae so;  
 Me me he ka wâ me hmehma bi hnen  
 tavat andre me hûkotiö nya,  
 Anyin a u Iehova at ame hadruo nya,  
 me otubweli nya.

## SALAMO 87.

*Salamo anyin laku Kora, a Khumöng.*

- E**THÖ hnyi je bucen ae kap taben.  
 2 Iehova ame ti beweny je homa-  
 göuleny Ziona,  
 Hon ta je hanyaba Jakob hia thithö.
- 3 Taun anyin Khong lö,  
 Andre me ha ta je hofuc ae hmanenang  
 gam. [Sela.]
- 4 Oge me he ka haiö Rahaba, me Babu-  
 lona a unyin tavat ae khan' ödra  
 inya:  
 Wâ bi Filisiti me Turo, tha ödrü me  
 Aithiop;  
 Walang at andre hnokoâ eling.
- 5 Eke, andre me he ka ha ga Ziona, ka  
 habe, Andre me hnokoâ eling at ang  
 ame ne at e;  
 Ke ame he ka otethmä e hnö Beönua.
- 6 Ame he Iehova ka aú, e ka sihnalimen  
 ta je hnyei, ka habe,  
 Walang at andre me hnokoâ eling. [Sela.]
- 7 Ke haba tavat khumöng, me tavat  
 minya biâ, andre me he ka ha, ka habe,  
 E unyâm anyik je pupua hia thithö.

## SALAMO 88.

*Khumöng wale Salamo anyin je laku Kora; hobi  
 kau at vik khumöng; andre hai hnyi Mahalatha  
 Leanotha. Salamo hnân únö anyi Hemana at  
 Ezera.*

- I**EHOVA lö, Khongon melik,  
 Oge hia but hongot köu hnyi lany me  
 lit:
- 2 E so e ölö thö hijik hic hnyi hnyimákâm;  
 Ta ju hnyikonyâm ka hok hwatenge:
- 3 Anyin ae unöngötö hanuk ge je vec:  
 Ke ame hakekeny anyik möt erkemok  
 ai.
- 4 Andre me tha öü nya me tavat andre me  
 utut ka hnyi thop;  
 Iny úcú me at ae ba at hnân hadruâ e:
- 5 Wale at andre hna baúâ unyin je komok,  
 Helâ me tavat andre hia but hlingâ andre  
 me mokut hnyin erkemok,

SALAMO 89.

- Waleji u me ca únykúme hmetu bi ;  
K' adre subâ degecâ bi únyi hnyi hnyamâm.
- 6 U je hia but ip nya hnyi thop ae dit hmönyin,  
Hnyi je dok ae menkholom, hnyi je dok ae dit.
- 7 E hmak hmönyin huk ányâm hmönyin,  
Ke u je hia but oveci nya ge ányâm ta je waköio hia thithö. [Sela.
- 8 U je hia but öúsákâüöâ je liamewainy mönya ;  
Ke u je hia but okúâ ködra he ka ikiki nya :  
Adre hia but theling nya, ke ca khanö nya hmetu he ka dit ut.
- 9 A jok ut li emakök can vec :  
Iehova lö, oge hia but hawo u hnyi je bong,  
Oge hia but inâ li hnyamök köu.
- 10 Hawa, u me he ka omanená ta je únyi hnân láiiâ ka tavat a mokcu ?  
Hawa, ame he ta je komok ka tot me oganö u ? [Sela.
- 11 Hawa, adre me he ka ha ányâm ibeten-giö eü hnyi erkemok ?  
Me ányâm hnathu hnyi Hnaúhangö ?
- 12 Hawa, adre me he ka wâ ányâm ta je únyi hnân láiiâ hnyi menekolom ?  
Me ányâm wisa hnyi hnyei adre me hnying hnyin ?
- 13 Iehova lö, oge hia but tenge köu,  
Ke ame he ka ölö ka hnyi hnyimákâm hnyi je hnyomakatu hijic hic.
- 14 Iehova lö, ieü gam u me degec hanuk ?  
Ieü gam u me ikhâlâ hnyimákâm gak ?
- 15 Iny vec ut me mok hwân k' iny tiga wanakat :  
K' ame gâuk hnyi úen oge vheno ányâm ta je únyi hnân outen.
- 16 A hia but húlúlüö nya hnen ányâm wathethöt ae gan hmâ ;  
Ame subâ degeci nya ge je únyi hnân ootâ únyi gam.
- 17 Adre me igigili nya hnyi je bong helâ me köio ;  
Adre me tha útitilen könya.
- 18 U je hia but öúsákâüöâ at ame betenge gak me hanök,  
Ke u je ip hnyi menekholom liamewaeny mönya.
- Oge me he ka omanená ányâm hnathu ge hnyimök ka ta je dö hia.
- 2 Anyin a oge hia but ha, ka habe, Adre me he ka op göranyai Betenge baü nyiele balua ;  
U me he ka otethmä ányâm hnathu hnyi je drany.
- 3 Oge hia but úhinhinköu me hnök hna úca,  
Oge hia but khemanyin kö Davita athnyabaik, ka habe,
- 4 Oge me he ka otethmä je mâtranâm nyiele balua,  
Me otilâ ányâm theron ke ne o but hnyi ta je dö hia. [Sela.
- 5 Iehova lö, ame he ta je drany ka olungâ ányâm ta je únyi hnân láiiâ ;  
Me ányâm hnathu minya hnyi úkhacaköu anyin wakap.
- 6 Anyin a ie ke at ethö hnyi drany ae úcú me Iehova ?  
Ie ke at unyin lakon tavat ae hwege ae úcú me Iehova,
- 7 Wale Khong adre outen hnyi úkhacaköu anyin wakap,  
Me hnân outen hudra hia adre me laba igigilö e ?
- 8 Iehova lö, Khongon sabaoth,  
Ja lö, ie at ae úcú möu, at ae man ?  
Ke ame igigili u ányâm hnathu.
- 9 U je musö hmanenanginy köio :  
E ka o thö ta je waköioiny, u thibi at ame otahauâ.
- 10 U je hia but thuthu omomonu Rahaba, helâ me at adre hia but hlingâ ;  
U je hia but oveseâ je iwahnaihmioeny möu ge hnyamâm ae hwege.
- 11 Ányâm drany me hmeledrany minya ;  
Me hon kânâ me unöngötiny, u je bi taben e.
- 12 Haba hwadrö me hwaiöu me u je up li dok e :  
Tabora me Heremona ame senyiná iâm.
- 13 E hwege hmönyin hnyamâm :  
E man benyâm, ke görany hnyamâm a metâm.
- 14 Haba taben ányâm theron me wisa me hna owisa :  
Ame he ibetengiö me hnathu ka bán hnyi hnyimákâm.
- 15 Hnahic hnen hnyei a löng ut hwan senyin :  
Iehova lö, adre me he hnyi melaminy hnyimákâm.
- 16 Adre me senyin hnyi je bong hia ge iâm :

SALAMO 89.

*Salamo hnân ünö anyi Ethana at Ezera.*

OGE me he bi nya ka khumöngö ibetengiö anyi Iehova nyiele balua :

- Ke andre me ogöranyi ödra hnyi hwake-  
cin ae wisa únyi gam.
- 17 Anyin a u thibi hmanenanginy hwegi-  
ödra :  
Ke andre me he ka ogöranyá anyihmun  
faoiny meno hnyi ányâm ibetengiö.
- 18 Anyin a e unyi Iehova becihmun  
Ke tuhöhmun unyin At ae Kap anyi  
Isaraela.
- 19 U je ha eji ka latâm ae kap deny hna  
omanená,  
Haingâm, ka habe, Oge hia but ip úha-  
druo unyin at ae hwege ;  
Oge hia but ogöranyá hna úca unyin  
tavat.
- 20 Oge hia but ö Davita athnyabaik ;  
Me hú e ge anyik wakaco ae kap :
- 21 Ame he bala hnyamök ka tha e mē ;  
K' ame he benyik ka ohwegiá e.
- 22 Ame ca he iwahnaihmiöny ka okon-  
goá e ;  
K' ame ca he nokon at ae kong ka  
ovecá e.
- 23 Ke oge me he ka kot omomono hnyi  
hnyimakan ta je iwahnaihmiöny mē,  
Me kot tavat andre me húkotiá e.
- 24 Ke ame he ka tha e me anyik hnathu  
me anyik ibetengiö ;  
K' andre me he ka ogöranyá anyin faoiny  
meno hnyi iök.
- 25 Oge me he ka otilá minya hnyamen hon  
köiö  
Me hnyamen a metân hon je wagewe.
- 26 E ame he ka hawo nya, ka habe, U  
thibi kamök,  
Me Khonguk, me kiciny melik.
- 27 Ke oge me he ka wia e me me nökek a  
bán,  
At ae beönua hon je than eang hmele-  
drany.
- 28 Oge me he bala ka tuö anyik ibetengiö  
hobi kâu e,  
K' ame he ka tethmá anyik úhinhinköu  
unyin.
- 29 Ke oge me he ka otethmá je mátrániny  
nyiele balua,  
Me anyin theron helá me ta je bong hnyi  
drany.
- 30 A ne he lakon ka hna degecá anyik  
hnanyibu,  
Ke ca vhenö hnök je hna owisa ;
- 31 Andre me ne hanyáúá hnök je hna otilá,  
Me ca tuö anyik ta je hnanyibu ;
- 32 Awe, oge me he bi nya ka bi hwaban  
hnödra ta je hna hanyáúá ge osö,
- Me anyidrin ta je hulö ge ta je hna  
hmatá.
- 33 Ke so bi, oge me ca he ka hom anyik  
betenge hia únyi gan,  
Me ohaúá anyik hnathu.
- 34 Oge me ca he ka oúnyibaúá anyik úhi-  
hinköu,  
Ke oge me ca he ka wia hofuc ame he  
but únyi hnyi li esongodik.
- 35 Oge hia but okhaca khemanyin hnyi  
hwakecik ae kap ;  
Oge me ca he ka thoi kö Davita ;
- 36 Ame he ka tethmá je mátrániny nyiele  
balua,  
Me anyin theron helá me seúnö hnyi  
hnyimakök.
- 37 Ame he ka tethmá balua e bi helá me  
tehi,  
Me helá me únyi hnân ohnathoá ae  
hnathu hnyi drany. [Sela.
- 38 Ke u je hia but hna degecá me ounyi-  
baúá,  
Ke u je hia but hmönyin ka at u je hú.
- 39 U je hia but húkotiá hna úhinhinköu  
me athnyabaem ;  
U je hia but okongoá anyin korona  
hnyikánái.
- 40 U je hia but kia haginny je hak hia ;  
U je hia but okongoá anyin je hnabá.
- 41 Andre me söh e hnen tavat, hia andre me  
vhenö gethen :  
Andre me hiá e hnen tavat andre me laba  
hakekenyá e.
- 42 U je hia but ogöranyá hnyamen a metân  
tavat andre me ovecá e ;  
U je hia but osenyiná ta je iwahmai-  
hmiöny hia mē.
- 43 Eke, u je öönua homakan anyin hele  
vat,  
Me ca otethmá e hnyi vat.
- 44 U je hia but ohia anyin hmanenang,  
Me hagetá hnyikánái anyin theron.
- 45 U je hia but owakhaletá je bonginy  
hidröu a e :  
U je hia but tube e ge hmehma. [Sela.
- 46 Iehova lö, ke ne o but kehö, hawa u  
me he ka ikhölö u nyiele balua ?  
Ke ne o but kehö ame he ányâm hmö-  
nyin ka ubáhlá helá me meic ?
- 47 Ö u únykúme ju ae okhulit bonguk ta  
je bong :  
Ieú gam u je hia but op gufa lakon  
tavat hia thithö !
- 48 Ie at ame he ka möt, k' ame ca he ka  
wá mok bi,

SALAMO 90, 91.

- At ame he bi ka omelö hanon únyi hnyi hnyamen erkemok ? [Sela.]  
 49 Than lö, ewa ányâm tang betenge ehac, Waleji u je khemanyin kö Davita hnyi anyâm hnathu ?  
 50 Than lö, únykúme ju hnödra hna hiá lathnyabaem ;  
 Me hnök hna kap tilá hnyi úlaik hna úhiö hnen ta ogö hneyi hia ;  
 51 Iehova lö, ányâm ta je iwahnaihmiony andre me úhiö,  
 Waleji hnyi hnödra hna úhiö ta je hna okca anyin at u je hú.  
 52 E so he ka haisoi Iehova thö nyiele balua. Amen, me Amen.

TUSI IV.

SALAMO 90.

*Hic hiji Mose a athnyabainy Khong.*

- T**HAN lö, u thibi hnyabahmun  
 Hnyi je dö hia.  
 2 Adre me tiga ca hnokoâ ta je bucen,  
 K' u tiga ca op hmeleledrany me hon kânâ,  
 Waleji hwân adrem balua ke ne o but nyiele balua, u thibi Khong.  
 3 U je wia at me me sesâiny kânâ ;  
 Me ha, ka habe, Hmetuhmetu ju öbun lakon tavat.  
 4 Anyin ae úcú hnyi hnyimákâm ta je huna a wan thauzan,  
 Me bong et waleji a hia but,  
 Me helâ me ke hna hmak hnyi lit.  
 5 U je hom degeci ödra helâ me hnen di ;  
 ödra úcú me at ame mokut :  
 Hnyi hnyomakatu ödra úcú me hna-önying ame kú wia.  
 6 Haba hnyi hnyomakatu e ame kú hlau,  
 me kú wia ;  
 Ke haba hnyi sahac adre me subâ e,  
 me ame meleca thö.  
 7 Anyin a adre ou öhmun hnyi ányâm hmöuyin,  
 Ke adre oveci öhmun hnyi ányâm wathethöt.  
 8 U je hia but ip anyihmun ta je monu hnyi hnyimákâm,  
 Me ta je monu gahmun ae iyong hnyi melaminy hnyimákâm.  
 9 Ame hia gaga bonguhmun ta je bong hia hnyi ányâm hmönyin :  
 Amo hia tot ta je hunaihmun helâ me hna ha hofuc.

- 10 Haba ta je bonginy ta je hunaihmun, me sevente ta je huua,  
 K' ame ne eite ta je huna, e ka hwege at ;  
 Ke so bi e huliwa me hlöuhlöu hmanenangidra ;  
 Anyin a ame ie hia but, me öhmun e did ut.  
 11 Ie at ame wâhmakhmetoâ hwegien hmönyin gam,  
 Me ányâm wathethöt, hoton hna outö u hnyi tulut ae úcú köu ?  
 12 Ö u he ju ka n' öhmun he ka aú bonguhmun ta je bong,  
 Me me he ka ve hu gahmun hnyok ae metâ.  
 13 Iehova lö, metu ju ; ke ne o but kehö ?  
 E so u ma ietra ge ta je lathnyabaem.  
 14 Ö u osekuni öhmun dö hnyi je hnoma-katu ge ányâm ibetengiö ;  
 M' öhmun e he ka senyin me hobâ hnyi bonguhmun ta je bong hia.  
 15 Osenyini öhmun dö hoton úseiny je bong waleji u je oveci öhmun hnyin,  
 Waleji ta je huna öhmun e wâ monu hnyin.  
 16 E so e manen ka lathnyabaem ányâm huliwa,  
 Me ányâm hmanenang ka lakudra.  
 17 Ke so e he ka e huhmun hmanenangi Iehova a Khonguhmun :  
 Ke otethmä ju huhmun huliwa anyin je hnyamöhmun ;  
 Eke, haba huliwa anyin ta je hnyamöhmun, ö u otethma ju e.

SALAMO 91.

- H**ABA at ame laba hnyi hna lubaduöng anyi Beönua,  
 Me ame he ka laba bala hnyi hmenon Ataekhanahia.  
 2 Oge me he ka ha kö Iehova, ka habe, E thibi hnök hna lubaduöng me hnök hnabâ ;  
 Me Khonguk, a at oge me labageju kâu.  
 3 Anyin a e ame he ka uny u únyi hnyi hnewe anyin at ame töu hnewe,  
 Me únyi hnyi mok cap at ame okongoâ.  
 4 E ame he ka tubi u ge leünen,  
 Ke u me he ka lubaduöng hmelen li labenyin :  
 Haba anyin hnathu, me, hnân bec me bec ae gan.  
 5 U me ca he ka outen únyi adre me outen hnyi hnyinghet,  
 Ke fana at ame gâ hnyi lany ;

SALAMO 92, 93.

- 6 Ke mok cap at ame ngeny hnyi menek-holom,  
Ke mok hnân mekiny at ame úhohiö hnyi jebigö.
- 7 Ame he khaca thauzan ka ta hnyi ke keihâm ;  
Ke ten je thauzan hnyi hnyamâm a metâm ;  
K' ame ca he bi ka hakekenyi u.
- 8 Ame he ka wâ e thibi hnen li emâkâm,  
Me wâ hwaban ka tavat ae kong.
- 9 Anyin a u thibi Iehova hnök hnabâ !  
U je hia but wiö Beönua me hnân hnyabam ;
- 10 Ame ca he ka o köu ke únyi ae kong,  
K' ame ca he mok ka dit ka hnyi umâm uma mano.
- 11 Anyin a e ame he ka hûna anyin ta je angela gam,  
He ka tuö u hnyi dem ta je gethen hia,
- 12 Adre me he ka kap tilö u ge ta je hnyamödra,  
Wâ u nye he ka thö hnyeúcam hnyi veto.
- 13 U me he ka uto liona me asip :  
U me he ka uto nak liona me on ge li cam.
- 14 Can e ame hnyok könya, me oge me he ka omelö e :  
Oge me he ka otilâ e göranyai anyin' a e khana but iök.
- 15 E ame he ka hawo nya, me oge me he ka thu kâu ;  
Oge me he ka tha inya mē hnyi vec :  
Oge me he ka omelö e, me ogânâ e.
- 16 Oge me he ka osekunâ hnyekon ge möt ae beú,  
Me omanená kâu anyik úhömeli.

SALAMO 92.

*Salamo, wale khumöng hobi kâu bong sabath.*

- H**ULIWA ae so he ka ole kö Iehova,  
Me khumöngö iâm, Beönua :
- 2 He ka omanená ányâm ibetengiö hnyi hnyomakatu,  
Me ányâm hnathu hnyi je lit ;
- 3 Hnen únyi khumöng ae hu je töiny a ten, me nabeli ;  
Me hwan kitara ae únyi hnathu.
- 4 Anyin a u thibi Iehova at ame osenyini nya ge ányâm huliwa :  
Oge me he ka ohobeluâ hnyi ta je huliwa anyin li hnyamâm.
- 5 Iehova lö, shaiba ge úganiny ányâm ta je huliwa !

- E dit hmönyin hnâm ta je hna únykúme.
- 6 E ca khana bi at ae ba hnyekon ;  
K' ame ca wâhmakbmeto e hnen at ae monu.
- 7 E ka kú thö helâ me hnaönying tavat ae kong,  
Ke hu sot ge tavat hia adre me ányâ hulö ;  
Me haba obiny ködra a g' adre me he ka ohí' odra balua.
- 8 Ke haba u Iehova, u je laba ethö görany nyiele balua.
- 9 Anyin a wâ bi, Iehova, ta je iwahnaihmióny möu,  
Wâ bi, ame he ka hia ta je iwahnaihmióny möu ;  
Adre me he ka oveseâ hia tavat adre me ányâ hulö.
- 10 Anyin a u je hia but ogöranyâ anyik faoiny meno helâ me faoiny rema :  
Adre me hú nya ge wakaco ae teb únyi.
- 11 A hia but wâ minya hnen li emakök hnök hna wek ka ta je iwahnaihmióny mönya.  
A hia but löng hnen li hnyikönyök hnök hna wek ka tavat ányâ hulö adre tot könya.
- 12 Ame he at ae wisa ka kú wia helâ me pama :  
E ame he ka kú gan hmâ helâ me arasi Lebanona.
- 13 Haba ödra adre me t' ödra hnyin uma umö Iehova,  
Me adre me he ka kú wia hnyi je hnyeuleny Khonguta.
- 14 Adre me he bala ka wa k' ödra hingat ut ;  
Adre me he ka pipikhenya me hát.
- 15 He ka omanená a e wisa Iehova ;  
E thibi kicik, ke ba balua hwali gan.

SALAMO 93.

- I**EHOVA ame musi; e ame khavâ ge hmanenang ;  
Iehova ame khavâ, e ame öweikâ e ge hwege :  
Adre otethmâ minya hmeledrany, me ma ca khana he ka bwebwet.
- 2 E tethmâ ányâm theron hwân adrem :  
U únyi kâú adrem balua.
- 3 Iehova lö, ame hai göranyai hnen ta je di,  
Haba ta je di adre me hai göranyai ifucidra ;

SALAMO 94, 95.

- Haba ta je di adre me ogöranyâ meaidra.  
 4 E hwege Iehova hnyi dok ae görany  
 Hon hwan je köiö ae se hia,  
 Me je wabuluiny köiö ae hwege.  
 5 E hnathu hmönyin hnâm ta je hna  
 ohnatho :  
 E úcú hwakecin ae kap ka hnyi umâm  
 uma,  
 Ke ne o but nyiele balua, Iehova.

SALAMO 94.

- I** EHOVA lö, wale Khong at ame bi  
 hwaban hulö,  
 Khong lö, at ame bi hwaban, umume-  
 lam but.  
 2 At ame owisa hmeledrany lö, todrö :  
 Bi hwaban dö ka tavat adre me hnyok  
 bi gan.  
 3 Iehova lö, ke ne o but kehö ame he  
 tavat ae kong,  
 Ke ne o but kehö ame he tavat ae kong  
 ka ton ?  
 4 Adre me fuc, adre me ha bi gan :  
 Adre me hai ödra bi hnödra hia tavat  
 adre me ânyâ hulö ?  
 5 Iehova lö, adre me kot omomono lakem,  
 Me ovecâ jekhom.  
 6 Adre me hlingâ safac me atkanyua,  
 Me hlingâ ta je nakahme.  
 7 Haingödra, ka habe, Ame ca he Ja ka wâ,  
 K' ame ca he Khongu Jakob ka wâh-  
 makhmetoâ.  
 8 Únykúme ju öbun tavat ae ba hnyeku-  
 bun unyin tavat :  
 Ke haba öbun tavat ae monu, ie üen  
 öbun e he ka meta hnyin ?  
 9 Hawa ge at ame op hnyiköny, e ame ca  
 he ka löng ?  
 Haba at ame op ecmak, e ame ca he ka wâ ?  
 10 Haba at ame osöâ ta je hnyei, e ame ca  
 he ka bi obiny,  
 Wale at ame ná tavat m' adre me metâ ?  
 11 Iehova ame wâ ta je únykúmenen tavat,  
 Ae únyi baú bi.  
 12 Ja lö, hnabic hnen at u je osöâ,  
 Me ná e únyi hnyi ânyâm hnanyibu ;  
 13 Me u me he ka omenâ e únyi hnyi je  
 bong ae kong,  
 Ke ne o but hnyi hna hiny thop hobi  
 káu at ae kong.  
 14 Anyin ame ca he bi Iehova ka hna  
 degecâ lakeiny,  
 K' ame ca he ka hna but hwajekhon.  
 15 Anyin ame he ka hmetu thö hna owisa  
 ka hwakecin ae wisa

- K' ame he tavat adre me hnyok wisa  
 hia ka hnu hoton e.  
 16 Ie at ame he ka tot hobi könya ka  
 tavat adre ânyâ hulö ?  
 Ie at ame he ka tot hobi könya ka tavat  
 adre me ânyâ únyi ae kong ?  
 17 A ne ca hadruo nya Iehova,  
 Me logota laba hanuk hnyi dok adre  
 laba hnyibú hnyin.  
 18 Hnyi üen eji oge me ha, ka habe, Ame  
 baúhaú but cak ;  
 Haba ânyâm ibetengiö, Iehova, ame köp  
 nya göranyai,  
 19 Ame okahwa hnyekuk ge ta je únyi  
 hnân otubwelâ unyi gam,  
 Hnyi hnök ta je hna únykúme ae se hia  
 eú hnyik.  
 20 Hawa, ame he ka tha e möu taben lap  
 anyin hwakecin ae kong,  
 Waleji at ame tretrao úkonguny me  
 hnân hnanyibu ?  
 21 Adre me tha úkhacaköu he ka okongöa  
 hanon at ae wisa hwakecin,  
 Me ohnaúhangöâ dra ae ba hnyikongon.  
 22 Ke Iehova thibi hnök hna bá ae beú  
 göranyai ;  
 Ke Khonguk thibi kicin hnök hnaluba-  
 duöng hnyin.  
 23 Ke e ame hia but bi hwaban ködra bi  
 hwakecidra aa monu,  
 Ke e ame he ka subâ degeci ödra hnyi  
 anyidra monu bi ;  
 K' ame he Iehova a Khonguta ka ohí  
 ödra.

SALAMO 95.

- A** I öbun ate me he ka khumöng kö  
 Iehova :  
 Ate me he ka hongot senyin ka kic at  
 ame omeli öta.  
 2 E so ate me o but ka hnyi hnyimakan  
 me ole,  
 E so ate me hongot senyin káu ge je  
 salamo,  
 3 Anyin a Khong ae gan hmâ Iehova,  
 Ke Than ae gan hmâ hon ta je khong  
 hia thithö.  
 4 E bi hnyi hnyamen ta je diliny hmele-  
 drany ;  
 Anyin bi minya je ban ta je bucen ethö.  
 5 Anyin köiö, e bi at a op e ;  
 E ame mádrâ minya kánâ ge li hnyä-  
 men.  
 6 Ai öbun, e so ate me he ka khudrung  
 ju me nom ;

SALAMO 96, 97.

- Ate me he ka cibouca hnyi hnyimakö Iehova at a up öta :
- 7 Anyin a e thibi Khonguta,  
Ke öta tavat aten iny hnyei, me haleny ta je mamoe hnyi hnyamen.  
Hnyi bong ang, öbun na he ju ka löng hwan hofuc !
- 8 Ca okhötâ bi je hnyekubun helâ me eji hnyi Meriba,  
Ke helâji me bonginy Masa hnyi hnyebuba :
- 9 Waleji a cubic nya hnyin ta je lakam-öbun,  
Me nö nya, me wâ anyik huliwa.
- 10 Hnyi ta je huna a fâte oge me wâ dö ang me iny vec gadrin,  
Me haingök dö, ka habe, Hnyei ang ame he monu ta je hnyekudra ;  
Ke ca khan' ödra dek ta je gethen :
- 11 Anyin a waleji oge me khemanyin hnyi anyik wathethöt, ka habe,  
Adre me ca he ka dit ka hnyi hnök hna menâ.

SALAMO 96.

- K**HUMÖNGÖ thö kö Iehova khumöng a teb únyi :  
Hmeledrany hia thithö lö, khumöng dö kö Iehova.
- 2 Khumöng dö kö Iehova, ogânâ thö ien ;  
Omanená thö anyin úhömeli hnyi ke bong me ke bong.
- 3 Aú gaga thö anyin hmanenang hnyi wanben aten ke je hnyei,  
Me anyin ta je huliwa hnân láii hnyi wanben tavat hia.
- 4 Anyin ae gan hmâ Iehova, me hnân olungâ göranyai ;  
E bi hnân outen hon ta je khong hia thithö.
- 5 Anyin a haba je khongon ta je hnyei hia thithö wale, a je hnatheat ;  
Ke haba Iehova ame op ta je drany.
- 6 E bi hnyi hnyimakan hna ogânâ me hmanenginy than :  
Eiö hnyi umen uma ae kap tang hwege me hmanenang.
- 7 Öbun je döiny ta je hnyei lö, ham but kö Iehova,  
Ham but kö Iehova hmanenang me hwege.
- 8 Ham dö kö Iehova hmanenang ae úcú ka hnyi ien :  
Hom dö hut, me hom dö ka hnyi je hnyeuleny.

- 9 Öbun na he ju ka khudrung kö Iehova hnyi hmanenang ae kap :  
Hmeledrany hia thithö lö, öbubuny ju hnyi hnyimakan.
- 10 Ha th' öbun hnyi wanben ta je hnyei, ka habe, Ame musi Iehova :  
Ke tethmä minya hmeledrany, k' ame ca he bi ka bwebwet :  
E ame he ka owisa ta je hnyei hnyi wisa.
- 11 E so ame he je drany he ka senyin, me hmeledrany he ka hobâ ;  
E so he ka ú köiö me unöngötiny ;
- 12 E so e hobâ ta hnyei, me ta je únyi hia hnyin ;  
Me ame he ka khumöng senyin dö ta je úöiny hnyot hia thithö ;
- 13 Hnyi hnyimakö Iehova, anyin a e ame he jem ;  
Anyin a e ame he jem he ka owisa hmeledrany :  
E ame he ka owisa hmeledrany hnyi wisa ;  
Me ta je hnyei hia hnyi anyin hnathu.

SALAMO 97.

- I**EHOVA ame musi ; e so e hobâ hmeledrany ;  
E so e senyin ta je bomene ae se hia.
- 2 E igigilö e je úlá me menekholom :  
Haba taben anyin theron, me, hwakecin ae wisa me hna owisa.
- 3 Ame he but meic hnyi hnyimakan,  
Me thong degecâ igigilö ta je iwahnaihmiöny mä.
- 4 Ame umumelam hmeledrany ge anyin ta je hucuce :  
A wâ but hnen hmeledrany me öbubuny bi.
- 5 Ame köiö but je ong bucen hnyi hnyimakö Iehova helâ me wasu,  
Hnyi hnyimakan Tuhan hmeledrany hia thithö.
- 6 Ame omanená hwakecin ae wisa hnen ta je drany,  
Ke a hia but wâ hnen ta je hnyei anyin hmanenang.
- 7 E so e hmehma but hia thithö tavat adre me bi athnyabainy je hnatheat,  
Me hobelu' ödra bi ge ta je idola :  
Khudrung ju kâu, öbun ta je khong hia thithö.
- 8 A löng ut Ziona me senyin,  
K' adre me hobâ wahlu laku Juda ;  
Can hnâm ta je hna owisa, Iehova.

SALAMO 98—100.

- 9 Anyin a u beönua hmönyin Iehova hon hmeledrany hia thithö :  
Adre ti ogöranyi u hon ta je khong hia thithö.
- 10 Öbun tavat öbun e hanyok kö Iehova lö, ikikiä thö monu :  
E ame tuö ta je hanon anyin wa kap ;  
E ame hügün' ödra únyi hnyi hnyamen tavat ae kong.
- 11 Adre tä melam hobi káu at ae wisa hwakecin,  
Me senyin hobi káu tavat hanyok wisa.
- 12 Öbun tavat ae wisa lö, senyin dö kö Iehova ;  
Ke ole thö ka ien ae kap.

SALAMO 98.

*Salamo.*

- K**HUMÖNGÖ thö kö Iehova khumöng a teb únyi ;  
Anyin a e ame hia but ányâ ta je únyi hnân láia :  
Haba hnyamen a metân, me benyin ae kap ödru me hia but ányâ úhömeli hobi káu e.
- 2 A hia but Iehova omanená anyin úhömeli :  
E ame hia but omanená hwakecin ae wisa hnyi hnyimakan ta je hnyei.
- 3 E ame hia but únykúme anyin íbetengö me anyin hnathu ka lap anyi Isaraela :  
A hia but wâ hnen je can hmeledrany hia úhömeli anyin Khonguta.
- 4 Hmeledrany hia thithö lö, hongot senyin kö Iehova :  
Hai thö me khumöng senyin, eke khumöng ogánâ.
- 5 Khumöng olungi Iehova ge kitara ;  
Ge kitara me hwan khumöng,
- 6 Bi hwan dö senyin kö Iehova  
Ge je trutru me hwan sofara.
- 7 E so he ka mea köiö me unöngötiny ;  
Me kânâ me tavat adre me laba hon ;
- 8 E so ame he je wadutö ka khöúkhöú hnyam ;  
Me ta je ong bucen he ka khumöng senyin.
- 9 Hnyi hnyimakö Iehova, anyin a e ame he ka o ka owisa hmeledrany ;  
E ame he ka owisa hmeledrany hnyi wisa,  
Me ta je hnyei hnyi hnathu.

SALAMO 99.

- I**EHOVA ame musi ; e so he ka öbubuny ta je hnyei :  
E ame laba hon li kerubi ; e so e he hmeledrany ka bwebwet.
- 2 E gan hmâ Iehova hnyi Ziona ;  
Eke, e ame laba görany hon ta je hnyei hia thithö.
- 3 E so adre me he ka ogánâ iam ae gan me hnân outen :  
E kap thibi e.
- 4 Ke haba hwegien than me ame hanyok ka hna owisa ;  
U je otethmä hnathu,  
U je mádrâ hna owisa me wisa unyi Jakob.
- 5 Ogöranyi Iehova thö a Khonguta,  
Ke khudrung ju hnyi taben li hnyeúcan :  
E kap thibi e.
- 6 E bi Mose me Arona unyin anyin tavat bi hut,  
Me Samuela unyin tavat adre me hawá ien ;  
Ödrin e hongot kö Iehova, ke e ame thu ködrin.
- 7 E ame ha ködrin hnyi úlá ame tot wisa :  
Ödrin e vheno hnen je ohnatho, me hnanyibu waleji e ame ham ködrin.
- 8 Iehova a Khonguhmun lö, u je thu ködrin :  
U thibi Khong waleji at ame thang anyidrin je hulö,  
Ke so bi u je bi hwaban hnödrin je hna ányâ.
- 9 Ogöranyi Iehova thö a Khonguta,  
Ke khudrung ju hnyi anyin ong bucen ae kap :  
Anyin ae kap Iehova a Khonguta.

SALAMO 100.

*Salamo hnân ole.*

- J**E hnyei hia thithö lö, hongot senyin dö kö Iehova.
- 2 Bi athnyabai Iehova thö me senyin :  
He thö ka hnyi hnyimakan me khumöng.
- 3 Khan' öbun dö a Iehova thibi Khong :  
E thibi at a up öta, ke öta bi laten ;  
Öta ta je lakeiny, me mamoeiny iny ta hnyei.
- 4 Didrö ka hnyi homagöuleny me ole,



SALAMO 101, 102.

Me ka hnyi je hnyeuleny me ogânâ :  
 Oleâ ju kâu, me haisoâ thö ien.  
 5 Anyin ae so Iehova ; e tethmâ balua  
 bi anyin ibetengiö ;  
 Me anyin hnathu ke ne o but ta je dö  
 hia thithö.

SALAMO 101.

*Salamo anyi Davita.*

**O**GE me he ka khamöngö ibetengiö me  
 hna owisa :  
 Iehova lö, oge me he ka khumöng köu.  
 2 Oge me he ka metâ hnyi gethen ae  
 wisa :  
 Ie ün u me he ka o hnyin könya ?  
 Oge me he ka he hnyin umök uma me  
 hnyok ae wisa.  
 3 Oge me ca he ka ip ke ûnyi ae kong  
 hnyi hnyimakök :  
 Hükötiânök hwakecin tavat adre me  
 saû ;  
 K' ame ca he ka kece könya.  
 4 Ame he ka úsákâüö mönya hnyok ae  
 hwali :  
 Oge me ca he ka khana ûnyi ae kong.  
 5 Haba at ame háîâ duöngâ liamewaeny  
 mē, me oge me he bi nya ka obia :  
 Oge me ca he ka hokhnyokâ at ae hwege  
 hnyimakan, me at ame hnyok bi gan.  
 6 Oge me he ka ngele ka tavat ae hnathu  
 hnyi hnyei, m' adré me he ka tha  
 laba mönya :  
 Haba at ame vheno gethen ae wisa, me  
 e ame he ka bi athnyabaik.  
 7 Ame ca he ka laba eiö hnyin umök uma  
 at ame iyawâ ;  
 Haba at ame ha thoi ame ca he ka teth-  
 mâ hnyi hnyimakök.  
 8 Haba hnyi je hnyomakatu me oge me  
 he ka obia tavat hia thithö ae kong  
 hnyi hnyei ;  
 He ka subâ degecâ ûnyi hnyi taun anyi  
 Iehova tavat hia adre me ânyâ hulö.

SALAMO 102.

*Hic hijin at ae vec, hnyi hua hâlâlâ e, k' ame hin-  
 gllâ anyin tenge hnyi hnyimakö Iehova.*

**I**HOVA lö, löng ju hijic hic,  
 Ke so e o but köu hok hwatenge.  
 2 Ca ikhâlâ gak hnyimâkâm hnyi bon-  
 giny anyik vec :  
 Tevehlöng ju könya ;  
 Ie thu thö könya hnyi bong oge me  
 hongot hnyin.

3 Anyin a aû but bonguk ta je bong helâ  
 me hainy meic,  
 K' ame hlâ thö je jeiök helâke uthmeic.  
 4 Ame kot ut me meleca hnyekuk helâ me  
 hnaönying ;  
 Ke oge me hnying ut he ka an ök jeû.  
 5 E úkeceköu thö je jeiök me vik  
 Can hwan anyik ta je mâng.  
 6 Iny úcú me kati hnyi hnyebuba ;  
 Iny helâ me mun at ame laba hnyi  
 hwaban je hnyaba.  
 7 Oge me hmákâ, ke haba iny  
 Úcú me wahelö ame hake laba hon uma.  
 8 Adre me labö hiö nya ta je iwahnai-  
 hniöny mönya ;  
 Haba ödra adre me wathethöt könya  
 adre me hahnaûhangö nya.  
 9 Anyin oge hia but an dröu helâ me jeû,  
 Me úthueniken belik me dân ecmak.  
 10 Can ânyâm hmönyin me wathethöt ;  
 Anyin u je hia but köp nya göranyai  
 me hna degeci nya hmetu,  
 11 Haba bonguk ta je bong me helâ me  
 hmenu ae beû ;  
 Ke iny meleca helâ me hnaönying.  
 12 Ke haba u Iehova lö, u me he ka laba  
 nyiele balua ;  
 Me hna ûnykúme köu, ke ne o but ka  
 hnyi je dö hia.  
 13 U me he ka tot me betenge ge Ziona :  
 Anyin a ün dut he ka betenge gan,  
 eke, a o but ün adre thu.  
 14 Anyin a lathnyabaem adre hnyok ka  
 ta je vetoiny,  
 Me betenge ge sesâiny.  
 15 Ke ame he ta je hnyei ka outen iö  
 Iehova,  
 Me ânyâm hmanenang minya hnen ta  
 je tuhan hmeledrany hia thithö ;  
 16 Anyin a hia but Iehova up Ziona,  
 E manen dut e hnyi anyin hmanenang.  
 17 E ame hia but hwiö ka hic hijin at ae  
 ba ta ûnyi,  
 Me ca hükötiâ bi hijidrin je hic.  
 18 Adre me he ka sihnalimen ûnyi ang  
 hobi kâu dö ame he ka o :  
 Ke ame he ka oganö Ja hnen tavat  
 adre me he ka op,  
 19 Anyin a e ame hia but selâdrâ jem ethö  
 hnyi anyin dok ae kap ;  
 Iehova hnyi drany ethö ame wâ hmele-  
 drany ;  
 20 He ka löng mâng anyin at adre ca ;  
 He ka thang tavat adre me he ka  
 hlingâ ;

SALAMO 103.

- 21 Me me he tavat ka ha iö Iehova hnyi  
Ziona,  
Me hnân ogânâ e hnyi Jerusalema ;  
22 Hnyi hna úkhacaköu hnen ta je hnyei,  
Me ta je dökhu, he ka athnyabai  
Iehova.
- 23 E ame oúhnyúkongoâ hwegiök hnyi  
gethen ;  
E ame owakhaletâ bonguk ta je bong.  
24 Haingök, ka habe, Khonguk lö, ca he  
ka hum nya hnyi wanben bonguk ta  
je bong :  
Haba je hunaiâm, me, wale hnyi ta je  
dö hia.
- 25 U je hia but bi taben hmeledrany kâú  
adrem ;  
Ke haba ta je drany me wale huliwa  
anyin li hnyamâm.
- 26 Ame he ka hia ta je únyi e, ke u tethmâ  
balua bi ;  
Eke, ame he ta je únyi e hia ka amam  
helâ me úkhaú ;  
U me he ka wia e helâ me úkhaú, m'  
adre me ke bongon bi :
- 27 Ke tha úcú bala bi hwakecâm,  
Ke ba obiny ta je hunaiâm ;  
28 Haba lakon lathnyabaem, me, adre me  
he ka laba hmâ,  
K' adre me he ka otethmâ je matrâ-  
nidra hnyi hnyimâkâm.

SALAMO 103.

*Salamo anyi Davita.*

- H**ANUK lö, haisoi Iehova thö ;  
Ke so he ka haisoâ ien ae kap ge ta  
je únyi hia eú hnyi hnyekuk.  
2 Hanuk lö, haisoi Iehova thö,  
Ke ca he bi ka hnying anyin ta je  
betenge ;  
3 Wale at ame hna degecâ ányâm ta je  
hulö hia ;  
Me ometo hnâm je mok hia ;  
4 Wale at ame omeli u únyi hnyi úohiö ;  
Me obicö u ge ibetengiö me betenge ae  
menyik :  
5 Wale at ame osekuni u ge ta je únyi  
ae so ;  
Me ame hát ányâm hidröu helâ me aeto.  
6 E wisa ta je hna ányâ hnö Iehova,  
Me hnen ta je hna owisa hobi kâu  
tavat hia adre me okongu ödra.  
7 E ame omanenâ deny ta je gethen kö  
Mose,

- Me anyin ta je huliwa ka lakon Isa-  
raela.  
8 E unöngötö Iehova ge ibetengiö me  
betenge ae menyik,  
Ke bec he ka hmönyin, ke gan hmâ  
anyin betenge.  
9 E ame ca he balua ka labö thawâ ;  
Ke haba khaca, e ame ca he ka kât  
hmâ anyin hmönyin nyiele balua.  
10 E ame ca hia but ányâ köta e úcú me  
anyita ta je hulö,  
K' ame ca bi hwaban köta e úcú me  
anyita ta je monu.  
11 Anyin ae gan hmâ anyin ibetengiö ka  
tavat adre me outen e,  
Helâ me úgöranyn je drany hon hme-  
ledrany.  
12 E ame öúsákâúöâ möta anyita ta je  
hulö,  
Helâ me úsákâúen jimeio me jimeú.  
13 Iehova ame betenge ge tavat adre me  
outen e,  
Helâ me kamen ame betenge ge lakon.  
14 Anyin ae khana bongon hna tretrau öta ;  
E ame labö únykúme a öta sesáiny  
kânâ.  
15 Haba at, helâ me hnaönying bongon  
je bong ;  
Ke e ame kú so helâ me hnyot ame  
vhöng.  
16 Anyin ame túâ e hnen ang, me ame  
hia ju e ;  
K' ame ca he hmetu hnen e ka wâhma-  
khmetoâ e.  
17 Ke hwân adrem balua ke ne o but  
nyiele balua ibetengiö anyi Iehova  
ka tavat adre me outen e,  
Ke e bi hwakecin ae wisa ka lakon ta  
je lakon ;  
18 Ka tavat adre me vheno anyin úhihi-  
nyköu,  
Me tavat adre me únykúme anyin je  
hna húna he ka ányâ.  
19 A hia but Iehova ip hmâ anyin therou  
hnyi drany ;  
Ke haba dokhon dökhu me ame musö  
hon ta je únyi hia thithö.  
20 Haisoi Iehova ju, öbun ta je angela  
unyn :  
Öbun hnyat ae man hnyi tang hwege,  
a hnyat ányâ hwan hofuc,  
Me tevehlöng ifucin.  
21 Haisoi Iehova ju, öbun hia ta je únyi e  
ame op ;  
Öbun lathnyabainy, hnyat öbun e labö  
ányâ weny.

SALAMO 104.

22 Haisoi Iehova ju, öbun hia a anyin ta je huliwa,  
 Hnyi je ke keihen hia hnyi dokhon dökhü :  
 Hanuk lö, haisoi Iehova thö.

SALAMO 104.

**H**ANUK lö, haisoi Iehova thö.  
 Iehova Khonguk lö, u gan hmâ hmönyin ;  
 Adre me khaüö u ge hna ogânâ me mecin than.  
 2 U je tubi u ge melam helâ me ûkhaü ;  
 Me ulolo drany helâ me imano :  
 3 Wale at ame bi taben je hnyeuleny hnyi köiö ;  
 K' ame wia je ûlá me hnân anyin kariota ;  
 Me gâ hnyi li labenyin ang :  
 4 E ame wia je ang me me anyin je úthumetu ;  
 Ke haba lathnyabainy, me, meic ame ubâhlâ :  
 5 At ame bi taben hmeledrany,  
 Me me ca he ka bwebwet nyiele balua.  
 6 U je tube e ge köiö ae dit helâ me ûkhaü ;  
 K' ame bongon dö köiö hon ta je bucen.  
 7 U je hûna me ame kec ut ;  
 K' ame kec mweimwei ge hwan ânyâm than.  
 8 Ame öliâ je bucen me utut ka hnyi je hnyigöulen bucen,  
 Ka hnyi dok u je penapena hobi kâu.  
 9 U je hia but bi hnyigöulen, me me ca he bi ka hanyâüâ ;  
 Me he hmetu he ka tube hmeledrany,  
 10 E ame kunâ ta je pupua ka hnyi je hnyigöulen bucen ;  
 K' ame hingölö wanben je bucen.  
 11 Ame ijem e hnen ta je menoiny hnyot hia ;  
 Ke sekon dö ta je asinainy hnyot adre beic.  
 12 Ame bi hâüen ta je meno ame gâ ethö hnyi baten,  
 Adre me fuc hon ta je anginy.  
 13 E ame hneü je bucen ûnyi hnyi je hnyeuleny ethö :  
 A unöngötö hmeledrany ge wan ânyâm ta je huliwa.  
 14 E ame okûâ hnaönying hobi kâu ta je meno,  
 Me ta je hatong hobi kâu at ;  
 Me me he ka oâ jeü ûnyi hnyi kânâ :

15 Me waina minya hnân osenyinâ hnye-kon at,  
 Me wakaco hnân hmanâ hnyimakan,  
 Me jeü hnân sibwegiâ hnyekon at.  
 16 E sekon dut ta je üö anyi Iehova ;  
 Je arasiny Lebanona waleji e ame tâ ;  
 17 Waleji hnen je meno ame gâ hna bi hâüödra hnyin :  
 Haba kasida ame bi umen hnyi ta je köp.  
 18 Haba je bucen ae beü göranyai me hobi kâu je gotiny hnyot ;  
 Me je kic hobi kâu je shefani hnân lubaduöng hnyin.  
 19 E ame op tehi hobi kâu je üen :  
 E khana but seünö üen ame he ka dit hnyin.  
 20 U je ânyâ menekholom me ame hnyinghet ut ;  
 Wale üen ame ibi hwân je menoiny hnyot he ka ngenü.  
 21 Je nak liona adre me kuku me bi ö'dra,  
 Me heleü ö'dra ûnyi ge Khong.  
 22 Ame o but seünö adre me he but,  
 Me ve mokut hnyi je hnödra.  
 23 Ame he but at he ka huliwa  
 Me ânyâ hudrân ke ne o but sahac.  
 24 Iehova lö, shaiba ge üsehiainy ânyâm ta je huliwa !  
 U je hia but huliwan hia thithö ge metâ :  
 A unöngötö hmeledrany ge tang omjehem.  
 25 Wale köiö, e gan hmâ me lau,  
 Ae eü hnyin ta ûnyi ame bwebwet ke ca hnân aü,  
 A je meno ae ûhnyükong me gan hmâ.  
 26 Ame kec eling ta je hu ;  
 Ke wale leviathana at u je op he ka walak hnyin.  
 27 Ödra hia thithö adre me halubahingâm,  
 M' u me he ka ha ödra hnyi üen ae ücü.  
 28 Adre me hlo ûnyi u je ham ködra ;  
 U je lau hnyamâm me ame sekudra but ge jeü.  
 29 U je ikhâlâ hnyimákâm me adre me hlohlo ;  
 U je hom hmetu homenâ gadra, me adre me mokcu,  
 K' adre me hmetuhmetu ka hnyi sesâ.  
 30 U je kunâ hanom, me adre me up ödra ;  
 Ke u je ohâtâ hnyimakan kânâ.  
 31 E so e tethmâ hmanenangi Iehova nyiele balua :  
 E so Iehova ame senyinâ anyin ta je huliwa :

SALAMO 105.

- 32 Haba e at ame bwele ka wâ hmeledrany,  
me ame bwebwet bi ;  
E ame kâlâ je bucen, me ame sâ thö.
- 33 Oge me he ka khumöng kö Iehova ke  
ne o but obiny anyik möt :  
Oge me he ka khumöng ogânâ Khonguk  
e ka tiga hu möt gak.
- 34 E so ame hnebwia mekhunen hnyekuk  
kâu :  
Oge me he ka senyin kö Iehova.
- 35 E so adre me he ka ohia tavat ae kong  
ûnyi eang hmeledrany,  
Me me ba but balua tavat ae monu.  
Hanuk lö, haisoi Iehova.  
Oganö Ja th' öbun.
- 13 Me adre me ngenu ûhedra hnyi ke  
hnyei ka hnyi ke hnyei,  
Ûhedra hnyi ke dökhu ka hnyi ke  
hnyei.
- 14 E ame ca hna ke at he ka okongu  
ödra ;  
Eke, e ame thawâ ta je than gadra ;
- 15 Haingen, ka habe, Ca he ka kâlâ hnök  
ta je hna hû,  
Ke ca okongo anyik ta je perofeta.
- 16 Ke e ame hawâ hmiâ ka hnyi hnyei ;  
E ame thu uciny jeû hia thithö
- 17 E ame kunâ bânâ at ;  
Wale Josefa at adre úco me me athnya-  
ba :
- 18 Adre me ovecâ li can ge fao úceat ;  
K' adre me ca e ge cen a fao :
- 19 Ke ne o but ûen adre me ohwâdá hwan  
hofuc :  
Haba hofuc ho Iehova ame cubec e.
- 20 Haba than ame ûkhünöng he ka thang  
e ;  
Waleji at ame muso ta je hnyei, me  
hna baûâ but e.
- 21 E ame otilâ e hnân tuhan hnyaban,  
He ka musö tang omjehen hia :
- 22 He ka ca je taben hoton weny,  
Me ometâ wahingatiny.
- 23 K' ame o but minya Isaraela hnyi  
Aigupito ;  
Haba Jakob ame laba atkanyua hnyi  
hnyei i Hama.
- 24 Me e ame ti osehia lakeiny,  
Me ohwegi ödra hon ta je iwahnaihm-  
öny mödra.
- 25 E ame wia hnyekudra he ka hûkötîâ  
lakeiny,  
He ka iyawâ lathnyabainy.
- 26 E ame kunö Mose a athnyabainy,  
Me Arona wale hnen hna úca.
- 27 Ödru me omanená hnyi wanbödra anyin  
ta je haten,  
Me ta je ûnyi hnân lâiâ hnyi hnyei i  
Hama.
- 28 E ame kunâ lit, me ame menekholom  
but ;  
Ke ödru me ca hna degecâ hwan hofuc.
- 29 E ame wia belidra je an me me dra,  
Me hlingö haledra ta je wâ.
- 30 A öunöngötâ idra hnyei ge ta je rama,  
Wale hnyi je hnyeuleny latuhödra.
- 31 E ame ha, me ame o but ta je nöng,  
Me je outo hnyi idra hnyei hia.
- 32 E ame ham ködra we ae wahma me  
hwaban we,  
Me meic ame ubâhlâ hnyi idra hnyei.

SALAMO 105.

- OLEÂ thö kö Iehova, hawâ thö ien :  
Omanená thö hnyi wanben ta je  
hnyei anyin ta je huliwa.
- 2 Khumöng dö kâu, khumöng ogânâ e ;  
Uhnenamö ju öbun ge anyin ta je  
huliwa hnân lâiâ hia.
- 3 Ohobeluâ thö hnyi ien ae kap :  
E so ame he hnyekon tavat adre me  
elöm Iehova ka hobâ,
- 4 Elöm Iehova thö me hwegien :  
Elâm balu thö hnyimakan.
- 5 Únykúme ju ta je ûnyi hnân lâiâ waleji  
e ame hia but ânyâ ;  
Anyin ta je úöman, me ta je hna owisa  
hnen hnyimen ;
- 6 Öbun ta je mât ránî Aberahama a athnya-  
bainy,  
Öbun je mât ránî Jakob wale tavat a  
úca.
- 7 E thibi Iehova a Khonguta :  
E but hnyi hmeledrany hia hnen ta je  
hna owisa.
- 8 E ame hia but únykúme bala anyin  
ûhinhinköu,  
Waleji hofuc e ame hûna ka ta je dö a  
khaca thauzan,
- 9 Waleji e ame ohmâ kö Aberahama,  
Me hnen hna khemanyin kö Isaaka ;
- 10 E ame otethmâ kö Jakob me hnân  
hnanyibu,  
Kö Isaraela hnân ûhinhinköu a nyiele  
balua :
- 11 Haingen, ka habe, Oge me he ka ham  
köu hnyei Kanana,  
Wale hna ugleköp a hwajekhöubun :
- 12 Waleji ae tiga wakhalet tavat ;  
Eke, ädre ti wakhalet, me je atkanyua  
bi hnyin ;

SALAMO 106.

- 33 E ame kot minya haledra ta je vine,  
me haledra te je imeta ;  
Me thu omomono ta je üö hnyi idra  
hnyei hia.
- 34 E ame ha, me ame o but ta je wahamon,  
Me ta je wanyilö ke ca hnân bi aú,
- 35 Me adre me an hia ta je khölakiny idra  
hnyei  
Me an minya troban ta idra.
- 36 E ame kot minya ta je lakudra a bân  
hia thithö hnyi idra hnyei,  
Je wan a bân hwegiödra hia.
- 37 Ke e ame hum ödra but me sileva me  
gol :  
Ke ba ke at ae sēnyin ge anyidra ta je  
tribu.
- 38 Ame senyin Aigupito hnyi üen adre  
he but ;  
Anyin ame hia but ta hudra hna out'  
ödra.
- 39 E ame ulolo ülâ hnân tube,  
Me meic he ka húnú ödra hnyi hnyi-  
nghet.
- 40 Adre me sumat me e ame oâ ta je  
jüö,  
Me sekudra ge jeü ünyi hnyi drany.
- 41 E ame khöng ut kic, me ame badedö  
but köiö ;  
Me di ka hnyi je dok ae atgec helâ me  
wagewe.
- 42 Anyin a e ame únykúme hwan hofuc  
ae kap,  
Me Aberahama athnyabainy.
- 43 Me e ame hom but lakeiny me senyin,  
Me tavat e ame úca me hobâ.
- 44 Me e ame ham ködra ta je hnyei iny  
aten ke je hnyei ;  
M' adre me he ka hu hobi ködra bi  
huliwa hnen aten ke je hnyei :
- 45 M' adre me he ka vheno hnen ta je  
hna otilâ,  
Me löng hoton anyin ta je hnanyibu.  
Oganö Ja th' öbun.

SALAMO 106.

- O**GANÖ Ja th' öbun.  
Oleâ ju kö Iehova, anyin ae at ae so :  
Anyin a nyiele balua anyin ibetengiö.
- 2 Ie at ae khana he ka ha ta je huliwa ae  
man anyi Iehova,  
Me omanená hia ta je ünyi hnân ogânâ  
e ?
- 3 Hnahic hnen tavat adre me vheno hna  
owisa,  
Ke at ame ányâ bala hwakecin ae wisa.
- 4 Iehova lö únykúmi nya ju hel me  
hnâm hna labö betenge ka lakem ;  
U na senö nya ju ge ányâm úhömeli :  
5 M' oge me he so but helâ me tavat u  
je úca,  
M' inye he ka tha senyin me lakem,  
Me tha ohobeluâ me jekhom.
- 6 Öhmun e hia but ányâ hwakecin ae  
kong helâ me lakamöhmun,  
Öhmun e hia but he hwali, me ányâ hulö.
- 7 Ame ca wâhmakhmeto ányâm ta je  
ünyi hnân láiâ hnen lakamöhmun  
hnyi Aigupito ;  
K' adre me ca únykúme bi úganiny  
ányâm ta je betenge ;  
K' adre me úkhin fuc hnyi köiö, wale  
Köiö ae Dra.
- 8 Ke so bi e ame omeli ödra can ien bi,  
Me me he ka omanená maniny man.
- 9 E ame thawâ Köiö ae Dra, me ame  
mada :  
Me e ame hum ödra hnyi je dok ae dit  
helâ me hnyebuba.
- 10 Ke e ame omeli ödra ünyi hnyi hnyamen  
at ame húkoti' ödra,  
Me omeli ödra ünyi hnyi hnyamen  
iwahnaihmiöny.
- 11 Ke haba köiö ame húlúlúâ ta je iwa-  
hnhaihmiöny mödra :  
Ke ba ju kolon me khaca.
- 12 Me adre me kap hwan hofuc ;  
Me khumöng ogânâ e.
- 13 K' adre me ie hnying ut hnen je hna  
ányâ ;  
K' adre me ca lubahingen bi anyin  
úhnenamö :
- 14 K' adre me behnyekon gan hmâ hnyi  
hnyebuba,  
Me cubec Khong hnyi hnyebuba.
- 15 Me e ame ham hnödra hna sumâtâ ;  
Ke so bi e ame kunâ delâ ka ta je  
hanudra.
- 16 Ke adre me ciâ ga Mose hnyi hna hu-  
numa,  
Me Arona at ae kap anyi Jehova.
- 17 Ame memang ut kânâ me utö Dathana,  
Me húlúlúâ but dö anyi Abirama.
- 18 Ke haba meic ame an hnyi anyidrin dö  
Haba bálhân meic ame thong degecâ  
tavat ae kong.
- 19 Adre me ányâ nokon kau hnyi Horeba,  
Me khudrung ka hnathheat adre oköiâ.
- 20 Helâe adre me wia but anyidra hmane-  
nang  
Me me úcú me bolok ame han önying.

SALAMO 107.

- 21 Adre me hnying Khong wale at ame  
omeli ödra,  
At ame änyâ ta je ünyi ae gan hnyi  
Aigupito ;
- 22 Wale ta je ünyi hnân lâiâ hnyi hnyei i  
Hama,  
Me ta je ünyi hnân outen hnyi köö ae  
Dra.
- 23 Anyin a wale e ame ha he ka ohi' ödra,  
Ke so bi hnö Mose, waleji e ame úca,  
hna tot hnyi iwatretra hnyi hnyima-  
kan,  
He ka ohmeto anyin hmönyin, wâ e nye  
ohi' ödra but,
- 24 Eke, adre me hmiödra hnyei ae hmane-  
nang,  
K' adre me ca kap bi hwan hofuc :
- 25 Me adre me ulit hnyi umödra je uma  
mano,  
Me ca löng ifuci Iehova..
- 26 Anyin a wale e ame ogöranyâ hnyamen  
ködra,  
A e ame he ka hagut' ödra hnyi hnye-  
buba ;
- 27 Me hagutâ ta je mâtrânidra unyin aten  
ta je hnyei,  
Me ovesei ödra ka hnyi ta je hnyei.
- 28 Me adre me úkhacaköu kó Baala-  
peora,  
Me an ta je hut ka ta je komok.
- 29 Helâe adre me ohmönyinâ e ge anyidra  
ta je hulö ;  
Me ame utut mok ae cap ködra.
- 30 Ke haba Fineasa ame tot me änyâ  
wisa ;  
Me ame todru mok ae cap.
- 31 Ke adre me aú e kâu hnân hwakecin  
ae wisa,  
Ke ne o but ta je dö hia nyiele balua.
- 32 Adre me ohmönyinâ e hnyi an Meriba,  
Me ame o but kong kö Mose ünyi  
gadra :
- 33 Anyin adre me ovecâ hanon,  
Me e ame fuc monu ge li esongodiny.
- 34 Adre me ca ohia ta je hnyei,  
Helâ me Iehova ame húna ködra ;
- 35 K' adre me úthuenikeni ödra me ta je  
hnyei,  
Me nâ ta je hwakecidra :
- 36 Ke adre me bi athnyaba ka anyidra je  
hnatheat ;  
Wale me hnân hnewe ködra :
- 37 Eke, adre me hudo lakudra obaga me  
wahlu ka je demoni,
- 38 Me hingâlâ dra ae ba hnyikongon wale  
dren lakudra obaga me wahlu,
- Waleji adre hudo ka ta je idolainy  
hnyei Kanana ;  
Me ame kong ut hnyei ge dra,  
39 Waleling m' ödra kong bi ünyi ge anyi-  
dra ta je huliwa,  
Me bi ünyi monu ge hnödra hna änyâ.
- 40 Anyin a wale, ame ubâhlâ thö hmönyin  
anyi Iehova ka lakeiny,  
Me e ame húkotiâ jekhon.
- 41 Me e ame hn' ödra but ka hnyi hnyamen  
ta je hnyei ;  
Me ame musî ödra bi hnen tavat adre  
me húkoti' ödra.
- 42 K' ame sed' ödra hnen je iwahnaihmiöny  
mödra,  
M' adre me oúhnyúkongoi ödra hnyi  
hmelen ta je hnyamödra.
- 43 E ame omeli ödra hnyi ta je üen ae se ;  
Ke adre me úkbin fuc hnyi anyidra  
úhnenamö,  
K' ame ohnyikön' ödra hnen hwakecidra  
ae monu.
- 44 Ke so bi e ame löng hnödra hna vec,  
Hnyi üen e ame wâ anyidra tenge ;
- 45 Ke e ame únykúme hnân hobi ködra  
anyin úhikinyköu,  
Me ame ietra hoton úganiny anyin be-  
tenge.
- 46 E ame ökúâ betenge minya ködra  
Unyin tavat adre me hwenb' ödra.
- 47 Iehova Khonguhmun lö, omeli öhmun,  
Me úkhacaköu' öhmun dö ünyi hnyi ta  
je hnyei,  
He ka oleâ iâm ae kap,  
Me ohobeluâ hnyi hna oganö u.
- 48 E so he ka haisoi Iehova, Khongu Isara-  
ela,  
Hwân ehac balua ke ne o but nyiele  
balua.  
Ke so ame he tavat hia ka ha, ka habe,  
Amen.  
Oganö Ja th' öbun.

TUSI V.

SALAMO 107.

- O**LEÂ ju kö Iehova ; anyin ae at ae so :  
Anyin a nyiele balua anyin betenge.  
2 E so he ka ha helâe tavat a omeli ödra  
Iehova,  
Waleji e ame omelö ünyi hnyi hnyamen  
iwahnaihmiöny ;

SALAMO 107.

- 3 Me úkhacaköu ödra únyi hnyi ta je hnyi,  
 Úhedra jimejö me jimeú,  
 Úhedra hnyi hwadrö me hwaiöu.
- 4 Adre me ngenu monu hnyi hnyebuba ae ba getheniny ;  
 Adre me ca wâ taun hnân labâ.
- 5 Adre me mekihnânem me beic,  
 Me e hlohlo ta je hanudra eú hnyidra.
- 6 Me adre me tenge kö Iehova hnyi anyidra hlöuhlöu,  
 Me e ame omeli ödra únyi hnyi anyidra ta je vec.
- 7 E ame su ödra minya eú hnyi gethen ae wisa,  
 M' adre me he ka he ka hnyi taun hnân labâ.
- 8 E na he ju tavat ka oleá kö Iehova can anyin betenge,  
 Me anyin ta je huliwa hnân láia gan ka lakon tavat !
- 9 Anyin a e ame osekunâ hanon at ame behu,  
 Me öunöngötâ ge so hanon at ae mekihnânem.
- 10 Haba tavat adre me laba hnyi menekholom me hmenon mok,  
 Wale adre me c' ödra hnen vec me fao ;
- 11 Anyin adre me hna degecâ hofuc hwan Khong,  
 Ke hmiödra ta je hofuc ho Beönua :
- 12 Anyin a wale e ame hom úhnyúkongoâ je hnyekudra ge vec ;  
 Adre me ta but ke ba at he ka úhadruo.
- 13 Ke adre me tenge kö Iehova hnyi anyidra hlöuhlöu,  
 Me e ame omeli ödra únyi hnyi anyidra ta je vec.
- 14 E ame hum ödra únyi hnyi menekholom me hmenon mok,  
 Me thu je hna c' ödra.
- 15 E na he ju tavat ka oleá kö Iehova can anyin betenge,  
 Me can anyin ta je huliwa hnân láia gan ka lakon tavat !
- 16 Anyin a e ame hia but thu je homagöule bras,  
 Me subâ degecâ ta je venyâ fao.
- 17 Adre me ovecâ tavat ae monu can hnödra hna hanyáúá,  
 Me can anyidra ta je monu.
- 18 Haba hanudra ame höciâ ta je jeú hia thithö ;
- K' adre me hakekeny ka hnyi homagöuleney mok.
- 19 Ke adre me tenge kö Iehova hnyi anyidra hlöuhlöu,  
 Me e ame omeli ödra únyi hnyi anyidra ta je vec.
- 20 E ame kunâ hwan hofuc, me ohmetu ödra,  
 Me omeli ödra únyi hnyi anyidra ta je thop.
- 21 E na he ju tavat ka oleá kö Iehova can anyin betenge,  
 Me can anyin ta je huliwa hnân láia gan ka lakon tavat !
- 22 Ke so adre me he ka hudo je hudiny ole,  
 Me ha anyin ta je huliwa me khumöngö.
- 23 Haba tavat adre me utut ka hnyi ta je hu hnyi köiö.  
 Wale adre me bi huliwa hnyi köiö ae gan :
- 24 Me adre me wâ ta je huliwa anyi Iehova,  
 Me anyin ta je huliwa hnân láia gan hnyi dok ae dit.
- 25 Anyin a e ame húna, me okúâ ang ae hwege,  
 Wale ame vhiik dö ta je waköiö.
- 26 Ame ölö thö göranyai, me ut hnyikânai ka hnyi dok ae dit :  
 Ke ame köiö but ta je hanudra ge vec.
- 27 Adre me thöthö me hwalihwali helâ me at ame monu ge grâg,  
 Ke monumonu hia anyidra metâ.
- 28 Ke adre me tenge kö Iehova hnyi anyidra hlöuhlöu,  
 Me e ame hum ödra but únyi hnyi anyidra ta je vec.
- 29 E ame wia thö weneú me me ta but hau,  
 Me ame hnyibi ju ta je waköiö.
- 30 Ke adre me senyin anyin a ta but hau ködra ;  
 Me e ame su ödra ka hnyi wasaú adre bekec ka hnyin.
- 31 E na he ju tavat he ka oleá kö Iehova can anyin betenge.  
 Me can anyin ta je huliwa hnân láia gan ka lakon tavat !
- 32 E so minya adre me he ka ogöranyâ e hnyi úkhacaköu anyin tavat,  
 Me ogânâ e hnyi taben lap anyin wahi-ngat.
- 33 E ame wia ta je wagewe me me hnyebuba but,

SALAMO 108, 109.

- Me je pupuainy köiö me me kânâ ae mada ;
- 34 Me kânâ ae wa me me hnyebubainy sält,  
Can hulö anyin tavat adre me labā e.
- 35 E ame wia hnyebuba me me an,  
Me kânâ ae mada me me je pupuainy köiö.
- 36 Ke e ame olabā eling tavat ae mekihnâ-nem,  
M' adre me he ka penapena taun hnân labā ;
- 37 Me belökâ ta hnyei, me tâ ta je vine,  
Me hom bi hobi ködra troban.
- 38 E ame ohnahici ödra minya, m' adre me ti se hia ;  
K' ame ca hna haledra omeno he ka wakhalet.
- 39 Ke hnyi ke ün adre me owakhaletâ me ohnyikön' ödra nmetu,  
Can hna okongoâ, me vec, me tenge.
- 40 E ame hingälâ hna hûkötîâ ka hnyi hon ta je tuhan,  
Me kun' ödra he ka he monu hnyi hnyebuba ae ba getheniny.
- 41 Ke so bi e ame ogöranyâ at ae vec únyi hnyi vec,  
Me osehiâ anyin lap helâ me hnahat mamoe.
- 42 Ame he tavat ae wisa ka wâ e me senyin ;  
K' ame he hia hulö ka kât hnyimen bi.
- 43 Haba at ae metâ ame he ka wâ wia ta je únyi eling,  
K' adre me he ka únykúme wia tang betenge anyi Iehova.

SALAMO 108.

*Salamo anyi Davita, a Khumöng.*

- K**HONG lö, e mou but hnyekuk ;  
Oge me he ka khumöng, eke, oge me he ka khumöng ogânâ me hmanenangkik.
- 2 Nabela me kitara lö, hmak dö !  
Oge me he bi nya ka hmak hnyi haolany.
- 3 Iehova lö, oge me he ka ole köu hnyi wanben ta je hnyei :  
Ke oge me he ka khumöng oganö u hnyi wanben tavat.
- 4 Anyin ae gan hmâ ânyâm ibetengiö hon drany,  
Ke haba ânyâm hnathu ke ne o but ka hnyi ta je úlá.
- 5 Khong lö, e so adre me ogöranyi u hon ta je drany :

- Me ânyâm hmanenang hon hmeledrany hia.
- 6 Ö u omelö ju ge hnyamâm a metâm me ling öhmun ju,  
Me me möt tavat a laounykúmâm.
- 7 A hia but Khong ha hnyi hwakecin ae kap ; oge me he ka ohobeluâ :  
Oge me he ka khenâ Sekema, me tuluto hnyigöulen bucen Sukotha.
- 8 Anyik bi Gileada ; ke anyik minya Manase ;  
Ke haba Eferaima wale hwegien bök :  
Ke Juda at ame ham hnök huanyibu.
- 9 Moab anyik utkaia hnân sou ;  
Oge me he ka khûâ hnyi Edoma taben hnyécak :  
Oge me he ka hongot göranyai hon Filisiti.
- 10 Hawa, ie at ame he ka hum nya ka hnyi taun adre up haginy ?  
Ie at a hia but su nya Edoma ai ?
- 11 Khong lö, hawa, u je ca hna degeci öhmun ?  
Ke u je ca tha he möhmun, Khong, me anyihmun je utbavat.
- 12 Hadru' öhmun dö únyi ge iwahnaihmiöny :  
Anyin ae únyi baú bi úhadruo anyin at.  
Únyi ge Khong ate me he ka hwege :  
Anyin a e bi at ame he ka uto ta je iwahnaihmiöny möta.

SALAMO 109.

*Hobi kâu at vâik khumöng. Salamo anyi Davita.*

- K**HONGON hnök hna ogânâ lö, ca laba hnyibú bi.
- 2 Anyin adre hia but khöng hnyem ae kong me hnyem ae iyawö könya :  
Adre hia but bi fuc könya ge bohmen ae thoi.
- 3 Adre me igigili nya minya me ta je hofuc ae hiny,  
Me vat mönya ke ba can.
- 4 Adre me iwahnaihmiöny mönya hwanban anyik betenge :  
Ke haba inya oge mo hic.
- 5 Ke adre hia but bi hwaban könya so ge kong  
Me anyik betenge ge hûkötö.
- 6 Ötilâ thö hon e at ae kong :  
Ke so e tot iwahnaihmiöny hnyi hnyamen a metân.
- 7 Ödra ka owisa kâu, e so e ame he but ke hu jonin dut ;



SALAMO 110.

- Ke so adre wia anyin khöü me me hulö bi.
- 8 E so e he ka wakhalet bongon je beng ;  
E so e he ke at ka hom hanyemen.
- 9 E so he ka wia lakon me me je naka-  
hme,  
Me he ka safac âiân.
- 10 E so e he monu bala bi lakon, me  
sumat ;  
Me so adre me heleü jeü hnyi hwaban  
hnödra je hna laba.
- 11 E so ame hügünâ anyin ta je únyi hia  
hnen at ame bibihwakecin ;  
Ke so ame he je atkanyua ka venâu  
hnen hna huliwan.
- 12 E so e ba at ama betenge gan ;  
Ke so e ba at ame he ka betenge ge  
lakon a je nakahme.
- 13 E so he ka subâ degecâ ta je mâtrániny ;  
E so he ka kot degecâ iödra hnyi dö a  
biliny.
- 14 E so e he Iehova ka únykúme jönin  
lakamen ;  
Ke so he ka ca kot degecâ monu anyin  
hinyen.
- 15 E so e he ka e bala ta je únyi e hnyi  
hnyimakö Iehova,  
Me me he ka subâ degecâ únyi eang  
hmeledrany hna únykúme ködra.
- 16 Anyin a e ame ca únykúme he ka  
betenge,  
Ke e ame seda at ae vec me at ae the-  
duoc,  
Me hlingâ at ae hlöuhlöu hnyekon.
- 17 Eke, e ame weny he ka hahnauhangöâ,  
me ame o but e kâu ;  
Ke e ame ca senyin he ka ohnahicâ, me  
ame sâkâü balua but gan únyi eling.
- 18 E ame khavâ úhangö minya helâ me  
úkhaüen,  
Me ame dit e eü hnyi hnyekon helâ me  
köiö,  
Me hnyi hnyin je jeien helâ me wa-  
kaco.
- 19 E so e he ka e bi kâu helâ me úkhaü e  
ame khavâ,  
E so he ka e bi kâu helâ me weiken e  
ame weikâ,
- 20 Walang hwaban ka ta je iwahnaihmiöny  
mönya únyi ga Iehova,  
Me ka tavat adre me haikongoâ ha-  
nuk.
- 21 Iehova lö, Than, e so u ma ânyâ hobi  
könya únyi hnyi iâm :  
Thöng nya but, anyin ae so ânyâm ibe-  
tengiö,
- 22 Anyin a iny vec me theduoc,  
K' ame hwadâ but eü hnyi hnyekuk.
- 23 Inya oge me hia helâ me hmenon ae  
beü :  
K' adre me túö nya helâ me wahamon.
- 24 E senyin dut li boucak anyin oge me ca  
han ;  
K' ame aü tot pipikhenyainy vik.
- 25 Ke iny' taben úhiö ködra :  
Adre me ö nya me adre me hnyihnyikâ  
je bödra.
- 26 Iehova Khonguk lö, hadruo nya ;  
Ö u omeli nya ju hoton. ânyâm ibeten-  
giö,
- 27 Me me khan' ödra a walang hnyamâm ;  
Ke u thibi Iehova at ame ânyâ e.
- 28 E so adre me he ka hahnauhangö, ke so  
u ma he bi ka ohnahicâ :  
Ödra ka tot, me adre me he ka hmehma,  
ke ame he athnyabaem ka senyin.
- 29 E so he ka khavâ te je iwahnaihmiöny  
mönya ge hmehma,  
Ke so adre me tubi ödra bi ge ilitmak  
helâ me úkhaü.
- 30 Oge me he ka ole oganö Iehova ge hnyi-  
mök ;  
Eke, oge me he ka ogânâ e hnyi wanben  
tavat ae se hia.
- 31 Anyin a e ame he ka tot hnyi hnyamen  
a metân at ae ba ta únyi,  
He ka omelö e únyi ge tavat adre me  
he ka owisa hanon.

SALAMO 110.

*Salamo anyi Davita.*

- H** AINGÖ Iehova ka tuhök, ka habe,  
Laba ju hnyi ke keihök a metök,  
Ke ne o but oge me he ka wia ta je  
iwahnaihmiöny möu me hnân taben  
li cam.
- 2 Ame he Iehova ka kunâ uciny tang  
hwegiâm úheny Ziona :  
U ma musö bi hnyi wanben ta je iwa-  
hnaihmiöny möu.
- 3 Haba lakem adre me he ka hudo me  
hnyekudra bi hnyi bonginy manâm  
man :  
Hnyi ta je hmanenang ae kap únyi hnyi  
tangen hnökuiny haolany,  
E bi unyâm dân hauiny ânyâm hidröu,
- 4 Iehova a hia but khemanyin, k' ame ca  
he bi ka ictra, ka habe,  
U thibi at bihut nyiele balua helâ me  
hwakeci Melekisedek.
- 5 Haba Than hnyi hnyamâm a metâm,

SALAMO 111—113.

- Ame he ka kot muâ ta je than hnyi  
bonginy anyin hmönyin.
- 6 E ame he ka owisa hnyi wanben ta je  
hnyei,  
E ame he ka öunöngötâ ta je dok ge je  
komok ;  
E ame he ka kot muâ ban ta je hnyei  
ae se.
- 7 E ame he ka ijem wagewe eü hnyi  
gethen :  
Anyin a wale, e ame he ka ogöranyâ  
ban.

SALAMO 111.

- O**GANÖ Ja th' öbun.  
Oge me he ka ole kö Iehova ge hnyok  
ae bekhöt.  
Hnyi ûhnenamö anyin tavat ae wisa  
me hnyi ûkhacaköu.
- 2 E gan hmâ ta je huliwa anyi Iehova,  
Adre me elâm wia e hnen tavat hia  
thithö adre me senyin gan.
- 3 E mec me hmanenang anyin huliwa :  
Ke ame tethmâ bala bi hwakecin ae  
wisa.
- 4 E ame hia but wia me hnân ûnykûme  
anyin ta je huliwa hnân lâiâ :  
E menyik Iehova me unöngöt ge ibete-  
ngiö.
- 5 E ame hia but ham jeü ka tavat adre  
me ouden e :  
E ame he ka ûnykûme anyin ûhiny-  
köu nyiele balua.
- 6 E ame hia but omanenâ maniny anyin  
huliwa ka lakeiny,  
Hnyi hnen hna ham ködra jekhon ta je  
hnyei.
- 7 Haba huliwa anyin li hnyamen, me,  
hnathu me wisa ;  
E hmâ hnen ta je hna hûna.
- 8 E tethmâ e ke ne o but nyiele nyiele  
balua,  
Ke ame ânyâ hoton hnathu me wisa.
- 9 E ame hia but kunâ ûhömeli ka lake-  
iny ;  
E ame hia but hûna anyin ûhinyköu  
ke ne o but nyiele balua :  
E kap me hnân okabâ ien.
- 10 Haba hwân metâ wale he ka ot kö Ie-  
hova ;  
Ke adre me wâhmakhmeto wia hnen  
tavat hia adre me ânyâ hoton e :  
Ame tethmâ hna ogânâ e nyiele balua.

SALAMO 112.

- O**GANÖ Ja th' öbun.  
Hnahic hnen at ame outö Iehova,  
At ame senyin gan hmâ ge anyin ta je  
hnanyibu.
- 2 Ame he ta je mâtrâniny ka hu man  
eang hmelen :  
Ame he ka hnahic döiny tavat ae wisa.
- 3 E bi hnyi umen uma ta je möne me  
omjeü :  
Ke e tethmâ nyiele balua hwakecin ae  
wisa.
- 4 Ame o but melam hnyi menekholom ka  
tavat ae wisa :  
E menyik, me betenge vec, me wisa.
- 5 Hnahic hnen at ame menyik, me mē  
ham ;  
E ame he ka tuö anyin te je ûnyi hnyi  
hna owisa.
- 6 Anyin a e ame ca he bala ka bwebwet ;  
Adre me he ka ûnykûme nyiele balua  
at ae wisa hwakecin.
- 7 E ame ca he ka ouden te je ûthumetu  
ae kong :  
E mou but hnyekon, k' ame labageju kö  
Iehova.
- 8 Ame tethmâ hnyekon, e ame ca he ka  
ot,  
Anyin a e ame he ka wâ weny ka ta je  
iwahnaihmiöny me.
- 9 E ame hia but kuia, me ham ka tavat  
ae theduoc ;  
K' ame tethmâ nyiele balua hwakecin  
ae wisa :  
Ame he ka görany anyin faoiny meno  
ge ogânâ.
- 10 Ame he tavat ae kong ka wâ e, me  
hmak bi ;  
Me ame he ka hoc nyu, me aü but :  
Ame he ka hia weny tavat ae kong.

SALAMO 113.

- O**GANÖ Ja th' öbun  
Lathnyabai Iehova lö, ogânâ thö,  
Ogânâ thö iö Iehova.
- 2 E so he ka haisoâ iö Iehova,  
Hwân walang ang ke ne o but nyiele  
balua.
- 3 E so adre me ogânâ iö Iehova,  
Hwân hnyi hna o thö seünö ke ne o but  
hnyi hna ûdiliny.
- 4 E beönua Iehova hon ta je hnyei hia  
thithö,

SALAMO 114—116.

- Me anyin hmanenang hon ta je drany.  
 5 Ie at ae ûcû me Iehova Khonguta,  
 Wale at ame laba ethö,  
 6 Wale at ame oûhnyûkongo e bi me me wâ  
 Ta je ûnyi hnyi drany me hmeledrany?  
 7 E ame ogöranyâ at ae theduoc ûnyi  
 hnyi sesâ,  
 Me kap göranyai at ae ba ta ûnyi, ûnyi  
 hnyi hna khûö thatûnyi:  
 8 Me me he ka tha ölabä e me ta je than,  
 Wale ta je tuhan lakeiny.  
 9 E ame wia momo ae toûnyi he ka tuö  
 uma,  
 Me me hnokoâ je lakon hnyi senyin.  
 Oganö Ja th' öbun.

SALAMO 114.

- H**NYI ûheny but Isaraela ûheny Aigu-  
 pito,  
 Wale lap anyi Jakob ûnyi hnyi hnyei  
 ae atkanyua hwan kâu;  
 2 E bi Juda umen uma ae kap,  
 Ke Isaraela dokhon dökhu.  
 3 A wâ but hnen köiö, me ame kec ut;  
 Ame ohmetu thö Joridano.  
 4 Ame ututut ta je bucen helâ me je ma-  
 moe бага,  
 Me ta je ong hut helâ me je lakon  
 mamoe.  
 5 Köiö lö, ieu can gam, me u me kec ut?  
 Me u Joridano, a u je hmetu ju?  
 6 Me öbun je bucen a öbun e ututut helâ  
 me ta je mamoe бага;  
 Me öbun ta je ong hut, a helâ me je  
 lakon mamoe?  
 7 Hmeledrany lö, öbubuny ju hnyi hnyi-  
 makan Than,  
 Hnyi hnyimakan Khongu Jakob;  
 8 Waleji at ame wia kic me me an,  
 Me out me me hna pupua hnen je köiö.

SALAMO 115.

- I**EHOVA lö, ca köhmun bi, ca köhmun  
 bi,  
 E so bi he ka hna hna olungâ ka iâm,  
 ûnyi hnyi ânyâm betenge me ânyâm  
 hnathu.  
 2 Hnân eû ame he ka ha ke je hnyei, ka  
 habe,  
 Ewa walang ang Khongudrin?  
 3 Ke ethö hnyi drany Khonguta:  
 A hia but ânyâ hia hnen hna weny.  
 4 Haba anyidra ta je idola, me sileva me  
 gol,

- A huliwan ta je hnyamen at.  
 5 E ve hu hnyimödra, k' adre me ca fuc  
 bi;  
 E ve hu li emaködra, k' adre me ca wâ  
 bi;  
 6 E ve hu li hnyikönyödra, k' adre me ca  
 löng bi;  
 E ve hu hnyingoidra, k' adre me ca bu-  
 bune bi;  
 7 E ve hu li hnyamödra, k' adre me ca  
 mâdrâ bi;  
 E ve hu li cadra, k' adre me ca he bi;  
 K' adre me ca fuc bi a deny je jeköwi-  
 dra,  
 8 Ame he tawat adre me up ödra ka helâ  
 mödra;  
 Eke, ödra hia hnyat adre me labageju  
 ködra.  
 9 Isaraela lö, labageju thö kö Iehova:  
 E thibi at ame hadru' ödra me becidra.  
 10 Lap anyi Arona lö, labageju th' öbun  
 kö Iehova:  
 E thibi at ame hadru' ödra me becidra.  
 11 Öbun tawat outö Iehova lö, labageju thö  
 kö Iehova:  
 E thibi at ame hadru' ödra me becidra.  
 12 Iehova ame hia but ûnykûmi öta; ke  
 ame he ka ohnahici öta:  
 E ame he ka ohnahicâ lap anyi Isaraela;  
 E ame he ka ohnahicâ lap anyi Arona.  
 13 E ame he ka ohnahicâ tawat adre me  
 outö Iehova,  
 Tawat ae ûhnyûkong me tawat ae gan.  
 14 E na he ju Iehova ka osehiai öbun til'  
 öbun,  
 Wal' öbun me lakubun.  
 15 Öbun e hnahic ut ga Iehova,  
 At ame op drany me hmeledrany.  
 16 Haba ta je drany, me je drany anyi  
 Iehova;  
 Ke e ame ham hmeledrany ka ta je  
 lakon at.  
 17 Haba tawat ae mokcu, me adre me ca  
 oganö Ja,  
 Me tawat hia adre me utut ka hnyi dok  
 adre me laba hnyibu hnyin.  
 18 Ke so bi ate me he ka haisoi Ja  
 Hwân walang ang, ke ne o but nyiele  
 balua.  
 Ogânâ Ja th' öbun.

SALAMO 116.

- O**GE me hnyok kö Iehova anyin a e  
 ame hia but löng  
 Hok hofuc me anyik khöü.

SALAMO 117, 118.

- 2 Anyin a e ame hia but ta hnyikönyen könya,  
Me oge me he ka hawâ e hnyi bonguk ta je bong hia.
- 3 Ame wadrö nya hnen ta je toiny mok,  
Me ame köt nya hnen ta je vecin erke-mok :  
Oge me wâ vec me tenge.
- 4 Me oge me hawâ iö Iehova, ka habe,  
Iehova lö, ö u omelö thö hanuk.
- 5 E betenge me wisa Iehova ;  
Eke, at ame betenge baû Khonguta.
- 6 Iehova ame tuö tavat ae ba hnyeku-dra :  
Adre me hom ûhnyûkongu nya, me e ame omeli nya.
- 7 Hanuk lö, hmetu ju ka hnyi hnâm hna menâ ;  
Anyin a hia but Iehova ânyâ köu so.
- 8 Anyin a u je hia but omelö hanuk me me ca mok,  
Me li emakök me me ca tenge,  
Me li cak me me ca ta.
- 9 Oge me he ka he hnyi hnyimakö Iehova  
Hnyi hnyei iny tavat ae möt.
- 10 Oge me labageju, wale me inye fuc dö :  
E gan hmâ anyik vec :
- 11 Oge me ha hnyi hnök hna uthmâhmâ,  
ka habe,  
E thoi tavat hia thithö.
- 12 Oge me he ka bi hwaban ge ieû kö Iehova  
Anyin ta je so hia könya ?
- 13 Oge me he ka hom utkaia anyin ûhömeli,  
li,
- 14 Me hawâ iö Iehova.  
Oge me he ka thamûâ anyik ta je khöbi kö Iehova,  
Eke, hnyi hnyimakan lakeiny hia thithö.
- 15 E ûnyi hnathu kö Iehova  
Mok anyin anyin wakap.
- 16 Than lö, e hnathu inya athnyabaem :  
Iny' athnyabaem a nokon athnyabaem a momo ;  
U je hia but thang hna cö nya.
- 17 Oge me he ka hudö köu hudiny ole,  
Me hawâ iö Iehova.
- 18 Oge me he ka thamûâ kö Iehova anyik ta je khöbi,  
Eke, hnyi hnyimakan lakein hia thithö ;
- 19 Hnyi je hnyeuleny uma umö Iehova,  
Ke hnyi wanbâm Jerusalema.  
Oganö Ja th' öbun.

SALAMO 117.

- O GANÖ Iehova th' öbun ta je hnyei hia ;  
Olungâ thö e öbun tavat hia thithö.  
2 Anyin ae gan hmâ anyin betenge köta :  
K' ame tethmä nyiele balua hnathu anyi Iehova.  
Oganö Ja th' öbun.

SALAMO 118.

- O LEÂ ju kö Iehova ; anyin a e at ae so :  
Anyin a nyiele balua anyin ibetengiö.  
E na he ju Isaraela ka ha, ka habe,  
2 Nyiele balua anyin ibetengiö.  
3 E na he ju lap anyi Arona ka ha, ka habe,  
Nyiele balua anyin ibetengiö.  
4 E na he ju tavat adre me outö Iehova ka ha, ka habe,  
Nyiele balua anyin ibetengiö.  
5 Hnyi anyik vec oge me hongot kö Ja :  
Me ame löng könya hnö Ja, me e ame ip nya hnyi dok ae gan.  
6 Hiök Iehova : oge me ca he bi nya ka ot :  
Ieû ke ûnyi ame he at ka ânyâ könya ?  
7 Hiök Iehova e unyin tavat adre me hadruo nya :  
Anyin a wale oge me he ka wâ wek ge tavat adre hûkötiö nya.  
8 E ûnyi hnathu he ka labageju kö Iehova  
Hon he ka labageju ka at.  
9 E ûnyi hnathu he ka labageju kö Iehova  
Hon he ka labageju ka ta je than.  
10 Adre me igigili nya ta je hnyei hia thithö :  
Hnyi iö Iehova oge me he ka subâ degeci ödra.  
11 Adre me igigili nya, eke, adre me igigili nya :  
Hnyi iö Iehova oge me he ka subâ degeci ödra.  
12 Adre me igigili nya helâ me ta je bi ;  
adre me aû but helâ me ta je angö hnyi meic ;  
Hnyi iö Iehova oge me he ka subâ degeci ödra.  
13 U je hagutö nya hwegiö nya, me inye he ka ta :  
Ke haba Iehova ame hadruo nya.

SALAMO 119.

- 14 Tang hwegiök Ja, me anyik khumöng ;  
Ke e thibi at ame omeli nya.
- 15 E bi hnyi je uma mano umen tavat ae  
wisa hwan senyin, me úhömeli :  
Ame ányá hwegiá hnen hnyam a metö  
Iehova.
- 16 Ame görany dut hnyam a metö Iehova :  
Ame ányá hwegiá hnen hnyam a metö  
Iehova.
- 17 Oge me ca he ka mok, ke oge me he  
ka möt,  
Me omanená ta je huliwa anyi Ja.
- 18 Haba Ja ame hia but osöi nya hwegiö  
nya :  
K'ame ca hia but hnö nya bi he ka mok.
- 19 Khöng ut könya ta je homagöuleny  
hwakecin ae wisa :  
Oge me he ka didrö hnyin, oge me he  
ka ole kö Ja.
- 20 Walang thibi homagöule Iehova ;  
Ame he tavat ae wisa ka dit hnyin.
- 21 Oge me he ka ole köu, anyin a u je hia  
but thu könya,  
Ke u thibi at ame omeli nya.
- 22 Haba veto waleji a degec hnen tavat  
up uma,  
Wale thibi e hnân ban bahebet.
- 23 Haba únyi eling únyi ga Iehova ;  
Ke hnân láia köta.
- 24 Walang thibi bong ame ányá Iehova ;  
Ate me he ka senyin me hobá hnyin.
- 25 Iehova lö, ö u omelö ju :  
Than lö, öhmun e khöú köu, ohnahici  
öhmun.
- 26 Hnahic hnen at ame o hnyi iö Iehova :  
Öhmun e hia but ha hnahici öbun únyi  
hnyi uma umö Iehova.
- 27 Iehova Khong, ke e ame hia but ome-  
lami öta :  
Ca ju je hut ge je tö, wale ka hnyi je  
baitoiny taben hut.
- 28 U thibi Khonguk, ke oge me he ka  
ole köu :  
U thibi Khonguk, oge me he ka ogö-  
ranyi u.
- 29 Oleá ju kö Iehova ; anyin a e at ae so :  
Anyin a nyiele balua anyin ibetengiö.

SALAMO 119.

⚠ ALEF.

**H**NAHIC hnen tavat adre me fofá  
hnyi gethen,  
Tavat adre me vheno hnanyibu anyi  
Iehova.

- 2 Hnahic hnen tavat adre me vheno  
hnen ta je hna ohnathoá,  
Tavat adre me elám e hnen hnyok ae  
bekhöt.
- 3 Eke, adre me ca hnyi ányá hwakecin  
ae hwali ;  
K' adre me vheno deny ta je gethen.
- 4 U je hia but huná ányám ta je hna-  
nyibu,  
M' öhmun e he ka tuö wia.
- 5 E na tethmá ju dek ta je gethen  
He ka vheno ányám ta je hnanyibu !
- 6 Oge me ca he ka hmehma,  
Iny ka wá wia ányám ta je hnanyibu  
hia.
- 7 Oge me he ka ole köu ge hnyekuk ae  
wisa,  
E ka khanö nya thö hnám je hna owisa  
ae wisa.
- 8 Oge me he ka tuö ányám ta je hna-  
nyibu :  
U na ca he ju ka hna degeci nya.

⚡ BETH.

- 9 Ame he ka kâmâu hidröu ka ányáwia  
deny gethen ?  
Hamen he ka wá wia e hoton hwám  
hofuc.
- 10 Oge me hia but elöm u ge hnyekuk ae  
bekhöt :  
Ö u ca hnö nya but he ka he monu  
únyi hnyi ányám ta je hnanyibu.
- 11 Oge hia but hitangen hwám hofuc eú  
hnyi hnyekuk,  
Me inye ca he ka ányá hulö köu.
- 12 Iehova lö, e so adre me haisoi u :  
Nö nya thö ge ányám ta je hnanyibu.
- 13 Oge hia but omanená ge li esongodik  
Ta je hna owisa hia únyi hnyi hnyi-  
mám.
- 14 Oge hia but senyiná deny hnám je hna  
ohnathoá,  
Helá me hnök hna senyiná ta je omjeú  
hia thithö.
- 15 Oge me he ka únykúme wia ka ányám  
je hnanyibu,  
Me wá wia dem je gethen.
- 16 Oge me he ka hobá ge hnám ta je hna  
otilá :  
Oge me ca he ka hnying hwám hofuc.

⚡ GIMEL.

- 17 Ányá thö so ka athnyabaem, me inye  
he ka möt ;  
Me oge me he ka tuö hwám hofuc.

SALAMO 119.

- 18 Obwela but li emakök, me inye he ka wá  
Ta je únyi hnân láíá únyi hnyi ányâm hnanyibu.
- 19 Iny atkanyua eang hmeledrany :  
Ca ikhálâ bi gak ányâm ta je hnanyibu.
- 20 Ame hmouca but hanuk hnen weny ae gan hmâ  
Hnyi je bong hia ka hnyi hnâm ta je hna owisa.
- 21 U je hia but oú tavat bi gan a tavat hnaúhangö,  
Tavat adre me he monu únyi hnyi ányâm ta je hnanyibu.
- 22 Ohia but gak úhiö me hna úhúkotiö ;  
Anyin a oge hia but tuö hnâm ta je hna ohnatho.
- 23 Ame tha laba je than me bifuci nya :  
Ke inya athnyabaem oge me únykúme ka ányâm je hnanyibu.
- 24 Hnân osenyini nya hnâm ta je hna ohnatho.  
K' ame nö nya hnyi anyik úhnenamö.
- † DALETH.
- 25 Ame kece hanuk ka hnyi sesâ :  
Omeli nya thö hoton hwâm hofuc.
- 26 Oge me haimemenâ dek ta je gethen, me u je thu könya :  
Nö nya thö ge ányâm ta je hnanyibu.
- 27 Okhanö nya thö ge deny ányâm ta je hnanyibu :  
M' oge me he ka únykúme ányâm ta je huliwa hnân láíá.
- 28 Ame tenge hanuk ge hmak :  
Sihwegiö nya thö hoton hwâm hofuc.
- 29 Oúsákáúöâ but mönya deny thoi :  
Me ham batá könya ányâm hnanyibu.
- 30 Oge hia but úca gethen deny hnathu :  
Oge hia but ip hnyi hnyimakök hnâm ta je hna owisa.
- 31 Oge me kece ka hnâm ta je hna ohnathoâ :  
Iehova lö, ca ohmehmai nya but.
- 32 Oge me he ka wadringâ deny ányâm ta je hnanyibu.  
U ka he ka ogânâ hnyekuk.
- † HE.
- 33 Iehova lö, nö nya thö ge deny ányâm ta je hnanyibu ;  
Me oge me he ka vheno e ke ne o but obiny.
- 34 Ham könya metâ, me oge me he ka tuö ányâm hnanyibu ;
- Eke, oge me he ka tuö e ge hnyekuk ae bekhöt.
- 35 Su nya thö hnyi gethen deny ányâm ta je hnanyibu ;  
Anyin oge me senyinâ e.
- 36 Ohmehmela thö hnyekuk ka hnyi hnâm ta je hna ohnathoâ,  
Ke ca he ka behnyokâ omjeú bi.
- 37 Wia ju li emakök, me inye ca he ka wá únyi ae únyi baú,  
Me omeli nya thö hnyi dem je gethen.
- 38 Ohwádâ ju hwâm hofuc ka athnyabaem,  
Wale at ame outö u.
- 39 Wia degecâ but hna hiö nya wale oge me outen ;  
Anyin ae so hnâm je hna owisa.
- 40 Bethe wá bi, oge me wek hwegiâ ányâm ta je hnanyibu :  
Omeli nya thö hnyi ányâm wisa.
- † VAU.
- 41 Iehova lö, e so e o but könya ányâm betenge,  
Wale ányâm úbömeli hoton hwâm hofuc.
- 42 Me oge me he ka hu hnân thu ka at ame hiö nya ;  
Anyin a inya oge me labagejon hwâm hofuc.
- 43 Ke ca he ka hom hia únyi hnyi hnyimök hofuc ae hnathu ;  
Anyin a oge hia but gejon hnâm je hna owisa.
- 44 Me oge me he bala ka tuö ányâm hnanyibu  
Ke ne o but nyiele balua.
- 45 Ke oge me he ka vheno dok ae gan ;  
Anyin a oge hia but elâm ányâm ta je hnanyibu.
- 46 Oge me he minya ka úhnenamö hnyi hnyimakan je than hnâm ta je hna ohnathoâ,  
Ke oge me ca he ka hmehma.
- 47 Ke oge me he ka hobâ ányâm ta je hnanyibu,  
Waleji oge me hnyok kâu.
- 48 Oge me he minya ka ogöranyâ li hnyimök ka hnyi ányâm ta je hnanyibu,  
waleji oge me hnyok kâu ;  
Ke oge ma he ka únykúme wia ányâm ta je hnanyibu.
- † ZAIN.
- 49 Únykúme ju je hofuc ka athnyabaem,  
Waleji u je kunö nya he ka gejon.

SALAMO 119.

- 50 Wale at ame otubweli nya hnyi anyik  
vec :  
Anyin a hia but omeli nya hwâm  
hofuc.
- 51 E gan hmâ hna hlumö nya ge tavat  
bi gan :  
Ke so bi oge me ca hia but saú únyi  
hnyi ânyâm hnanyibu.
- 52 Iehova lö, oge hia but únykúme hnâm  
je hna owisa kâû adrem,  
Me oge me otubweli nya bi.
- 53 Ame hia but o kõnya hmönyin ae gan  
hmâ,  
Can tavat ae kong adre me degec  
ânyâm hnanyibu.
- 54 Haba ânyâm je hnanyibu me wale  
hwanyik je khumöng  
Hnyi uma oge me laba kanyua hnyin.
- 55 Iehova lö, oge hia but únykúme iâm  
hnyi hnyinghet,  
Me tuö ânyâm hnanyibu.
- 56 Ka hia but helâe kõnya,  
Anyin oge me ânyâ ânyâm ta je hna-  
nyibu.
- KHETH.
- 57 Iehova thibi jekhök :  
Oge hia but ha a oge me he ka vheno  
hwâm je hofuc
- 58 Oge hia but sumatâ ânyâm ibetengiö  
ge hnyekuk ae bekhöt :  
Betenge ju gak hoton hwâm hofuc.
- 59 Oge hia but únykúme dek je gethen,  
Ke oge me wia li cak ka hnyi hnâm ta  
je hna ohnathoâ.
- 60 Oge me mweimwei me ca bec bi,  
He ka tuö ânyâm ta je hnanyibu.
- 61 Ame hia but wâdrö nya ge ta je tö  
anyin tavat ae kong ;  
Ke oge me ca hnying ânyâm ta je  
hnanyibu.
- 62 Oge me he ka todrö hnyi wanbenset  
he ka oleâ köu  
Can hnâm ta je hna owisa ae wisa.
- 63 Iny liamewaeny mödra hia thithö adre  
me outö u,  
Me tavat adre me tuö ânyâm ta je  
hnanyibu.
- 64 Iehova lö, e unöngötö hmeledrany ge  
ânyâm tang betenge :  
Nö nya thö ge anyâm je hnanyibu.
- SETH.
- 65 Iehova lö, u je hia but mádrâ so ka  
athnyabaem,  
Hoton hwâm hofuc.
- 66 Nö nya thö ge hna owisa ae so me metâ;  
Anyin a inya oge me kap ânyâm ta je  
hnanyibu.
- 67 Oge me he monu waleji hnyi úen a iny  
tiga ca vec ;  
Ke walang ang inya oge me vheno  
hwâm hofuc.
- 68 U thibi at ae so, me at ame ânyâ so ;  
Nö nya thö ge ânyâm ta je hnanyibu.
- 69 A hia bnt sit hofuc thoi kõnya tavat  
bi gan :  
Oge me he ka tuö ânyâm ta je hnanyibu  
ge hnyekuk ae bekhöt.
- 70 A khöt ut ta je hnyekudra ge pipi-  
khenya ;  
Ke inya oge me hobâ ânyâm hnanyibu.
- 71 E hu soik únyi hnyi hna oveci nya ;  
Me inye he ka nâ ânyâm ta je hna-  
nyibu.
- 72 E beönua soiny kõnya hnanyibuiny  
hnyimâm  
Hon je thauzan gol me sileva.
- \ JOD.
- 73 Ame up nya me tretrau nya ge li hnya-  
mâm :  
Okhanö nya thö, me me khanö nya  
ânyâm ta je hnanyibu.
- 74 Adre me he tavat adre me outö u ka ö  
nya me senyin ;  
Anyin a oge me gejon hwâm hofuc.
- 75 Iehova lö, e khanö nya but ae wisa  
hnâm ta je hna owisa.  
Me u je hia but oveci nya hnyi hnathu.
- 76 E na he ju ânyâm betenge ka otubweli  
nya,  
Helâ me hwâm hofuc ka athnyabaem.
- 77 E so e he ka o but kõnya ânyâm ibe-  
tengiö, m' inye he ka möt :  
Anyin a inya oge me senyinâ ânyâm  
hnanyibu.
- 78 E so e hmehma tavat bi gan : anyin  
adre hia but hagutö nya ge thoi :  
Ke oge me he bi nya ka únykúme wia  
ge ânyâm ta je hnanyibu.
- 79 E so e hwiö thö kõnya tavat adre me  
outö u,  
M' adre me he ka khana hnâm ta je  
hna ohnathoâ.
- 80 E so e ba hnyikongon hnyekuk hnyi  
ânyâm ta je hnanyibu ;  
Me inye ca he ka hmehma.
- ▷ KAF.
- 81 Ame mokhon hanuk hnyi wek ka  
ânyâm úhömeli :

- Ke oge me gejon hwâm hofuc.
- 82 A jok ut li emakök can hwâm hofuc,  
Wale me inya ha thö, ka habe, Ieü  
ûen u me he ka okhahwö nya hnyin?
- 83 Iny úcú me tangen köiö hnyi hainy  
meic;  
Ke oge me ca hnying bi ânyâm ta je  
hnanyibu.
- 84 Ve ta bong bonginy athnyabaem?  
Ieü ûen u me he ka bi hwaban ka tavat  
adre me oveci nya?
- 85 A hia but hiny je thop hobi kõnya  
hnen tavat bi gan,  
Ke ca tha úcú ödra me ânyâm hnanyibu.
- 86 E hnathu hia ânyâm ta je hnanyibu:  
Adre me oveci nya ge thoi; hadruo  
nya thö.
- 87 K' adre me ne ohiö nya but hnyi hnyei;  
Ke inya oge me ca hna degecâ ânyâm  
ta je hnanyibu.
- 88 Omeli nya thö hoton ânyâm ibetengiö;  
Me oge me he ka vheno hnâm hna  
ohnathoâ ge hnyimâm.
- ↳ LAMED.
- 89 Iehova lö, adre otethmä nyiele balua  
Ethö hnyi drany hwâm hofuc.
- 90 Ke ne o but hnyi ta je dö hia ânyâm  
hnathu:  
U je hia but otethmä hmeledrany, me  
ame hmâ e.
- 91 Ame hmâ hnyi bong ang hoton hnâm  
je hna otilâ:  
Anyin a lathnyabaem ta je ûnyi hia  
thithö.
- 92 Oge ne ca senyinâ ânyâm hnanyibu,  
Ma hiö nya but hnyi anyik vec.
- 93 Oge me ca he ka hnying bala ânyâm ta  
je hnanyibu;  
Anyin a u je hia but omeli nya a deny e.
- 94 Ânyâm inya, omeli nya;  
Anyin a o ge me elâm ânyâm ta je  
hnanyibu.
- 95 A hia but tavat ae kong halubuhing'  
nya he ka hlingö nya;  
Ke inya oge me he ka únykúme hnâm  
ta je ohnathoâ.
- 96 Oge hia but wâ obiny ta je ûnyi hia ae  
bekhöt soiny;  
Ke laü hmönyin ânyâm hnanyibu.
- ▷ MEM.
- 97 Shaiba ge hnök hna hnyok ka ânyâm  
hnanyibu!  
E bi mekhunen hnyekuk hnyi je bong  
hia.
- 98 Haba ânyâm hnanyibu ame ometö nya  
hon ta je iwahnaihmiöny mönya;  
Anyin a ödra bala but unyik.
- 99 Iny metâ hon tavat hia adre me nö  
nya;  
Anyin a inya oge me únykúme wia  
hnâm ta je hna ohnathoâ.
- 100 E nua hnök hna wâhmakhmeto hon  
wahingat,  
Anyin oge hia but vheno ânyâm ta  
je hnanyibu.
- 101 Oge hia but behânâ li cak ge ta je  
gethen hia ae kong,  
Me inye he ka tuö hwâm hofuc.
- 102 Oge me ca hia but saü ûnyi hnyi  
hnâm ta je hna ohnathoâ;
- 103 Shaiba ge hnebwiainy hwâm ta je  
hofuc hnyi ecngodik!  
Eke, e hnebwia hon hani hnyi hnyi-  
mök.
- 104 Oge me wâhmakhmeto a deny ânyâm  
ta je hnanyibu:  
Anyin a wale hûkötianök ta je gethen  
hia ae thoi.
- ▷ NUN.
- 105 Haba hwâm hofuc, me, lamepainy li  
cak,  
Me melaminy dek gethen.
- 106 Oge hia but khemanyik, me ohmä e,  
A oge me he ka vheno hnâm ta je hna  
owisa ae wisa.
- 107 E gan hmâ anyik vec:  
Iehova lö, omeli nya thö helâ me  
hwâm hofuc.
- 108 Iehova lö, ö u kap ju je hut ae betenge  
ûnyi hnyi hnyimök,  
Ke nö nya thö ge hnâm je hna owisa.
- 109 E bala bi hanuk hnyi hnyamök;  
Ke oge me ca hnying bi ânyâm hna-  
nyibu.
- 110 A hia but tavat ae kong töu hnwei  
nya;  
Ke oge me ca he monu ûnyi hnyi  
ânyâm ta je hnanyibu.
- 111 Oge hia but hom hnâm ta je hna  
ohnathoâ hnân jekhöúk nyiele ba-  
lua;  
Anyin ame osenyinâ hnyekuk.
- 112 E hmehmela hnyekuk he ka ânyâ  
ânyâm ta je hnanyibu,  
Nyiele balua, ke ne o but obiny.
- ▷ SAMEK.
- 113 Hûkötianök tavat adre me hnyok lo;  
Ke oge me hnyokâ ânyâm hnanyibu.



- 114 U thibi hnök hna lubaduöng me becik :  
Oge me gejon hwâm hofuc.
- 115 Úsákáúö but mönya öbun tavat ânyâ hulö ;  
Me oge me he ka vhenö ta je hnanyibu anyin Khonguk.
- 116 Ci nya thö e úcú me hwâm hofuc, m' oge me he ka möt :  
Ke ca hnö nya bi he ka hmehma ge hnök hna gejon.
- 117 Ci nya thö, me oge me he ka möt,  
Ke oge me he bala bi ka wâ wia ânyâm ta je hnanyibu.
- 118 U je hia but wâ öúnyibaú' ödra hia adre he monu únyi hnyi ânyâm ta je hnanyibu ;  
Anyin a ödra thoi me iyawö.
- 119 U je ohia hia tavat ae monu eang hmeledrany helâ me dron fao :  
Anyin a wale inya oge me hnyok ka hnâm ta je hna ohnathoâ.
- 120 Ame öbubuny vik ge hnök hna outö u ;  
Ke iny ot ge hnâm ta je hna owisa.
- ∇ AIN.
- 121 Oge hia but ânyâ hna owisa me hwa-kecin ae úcú ;  
Ca hnö nya bi ka tavat adre me okongu nya.
- 122 Bi singiny ju athnyabaem, me me so :  
Ca hna but tavat ae bi gan he ka okongu nya.
- 123 A jok ut li emakök anyin hna lubahingen ânyâm úhömeli,  
Me hwâm hofuc ae wisa.
- 124 Mádrâ thö ka athnyabaem hoton ânyâm betenge,  
Ke nö nya thö ge ânyâm ta je hnanyibu,
- 125 Inya ang athnyabaem, okhanö nya thö,  
Me me khanö nya thö hnâm ta je hna ohnathoâ.
- 126 Úen dut ang kö Iehova he ka huliwa ;  
Anyin adre hia but öúnyibaúâ ânyâm hnanyibu.
- 127 Anyin a wale inya oge me hnyok ka ânyâm ta je hnanyibu  
Hon gol, eke, hon gol ae so.
- 128 Anyin a wale oge me haiwisa hia ânyâm ta je hnanyibu ge ta je únyi hia ;  
Hmiök ta je gethen hia ae thoi.
- ∇ PE.
- 129 Hnân láia hnâm ta je hna ohnathoâ :  
Anyin a wale ame tuö hnen hanuk.
- 130 Haba hna omanená bongon hwâm ta je hofuc, me wale hnân omelamá ;  
Ame owâhmakhmeto tavat ae ba hnyekudra.
- 131 Inya oge me memang, me mokhon hwege ;  
Anyin oge me wek gan hmâ ka ânyâm ta je hnanyibu.
- 132 Hwiö thö könya, me betenge ju gak,  
Helâ me hwakecâm ka tavat adre me hnyokâ iâm.
- 133 Lelö ju li cak ka hnyi hwâm hofuc ;  
Ke ca hna but hulö he ka musi nya.
- 134 Húgúnö nya but únyi hnyi úokonguny anyin at :  
Me oge me he ka tuö ânyâm ta je hnanyibu.
- 135 Öumumelamá thö hnyimákâm hon athnyabaem ;  
Ke nö nya thö ge ânyâm ta je hnanyibu.
- 136 Ta je di ame hingölö hnyi li emakök,  
Can adre me ca tuö ânyâm ta je hnanyibu.
- ∇ TZADE.
- 137 Jehova lö, u wisa,  
Ke wisa minya hnâm ta je hna owisa.
- 138 U je hia but húna hnâm ta je hna ohnathoâ hnyi hwakecin ae wisa,  
Me hwakecin ae hnathu hmönyin.
- 139 Ame hia but oaúö nya hnen wek ae gan hmâ,  
Anyin ame hnying ut hwâm hofuc hnen ta je iwahnaihmiöny mönya.
- 140 E kalaöt hmönyin hwâm hofuc ;  
Anyin a wale a hia but athnyabaem hnyok kâu.
- 141 Iny úhnyúkong me hmiödra :  
Ke oge me ca hnying hnâm ta je hnanyibu.
- 142 E wisa balua but hwakecâm ae wisa,  
Ke hnathu ânyâm hnanyibu.
- 143 Ame hia but o könya vec me hmak :  
Ke inya oge me senyin ge ânyâm ta je hnanyibu.
- 144 E wisa balua bi hnâm ta je hna ohnathoâ :  
Okhanö nya thö, me oge me he ka möt.

## 7 KOF.

- 145 Oge hia but hongot ge hnyekuk ae bekhöt; Jehova lö thu thö könya: Oge me he ka vheno ânyâm ta je hnanyibu.
- 146 Oge hia but hongot köu; omeli nya thö, Me oge me he ka wâ wia hnâm ta je hna ohnathoâ.
- 147 Oge me khaletâ haolany, me tenge; Oge me gejon hwâm hofuc.
- 148 Ame khaletâ je ûen hmak hnyi hnyinghet hnen li emakök; Me inye he ka únykúme wia hwâm hofuc.
- 149 Jehova lö, löng ju ifucik hoton ânyâm ibetengiö; Omeli nya thö, hoton hnâm ta je hna owisa.
- 150 E hakekeny jut tavat úokonguny; Ödra úsákáúö but me ânyâm hnanyibu.
- 151 Jehova lö, u hakekeny thibi; Ke hnathu hia ânyâm ta je hnanyibu.
- 152 E khanö nya but adrem únyi hnyi hnâm ta je hna ohnathoâ, A u je hia but bi taben e ke ne o but nyiele balua.

## 7 RESH.

- 153 Únykúme ju ge anyik vec, me omeli nya; Anyin oge me ca hnying ânyâm ta je hnanyibu.
- 154 Ivinö thö hobi könya, me bi hwaban anyik möt; Omeli nya thö hoton hwâm hofuc.
- 155 E sákáú but úhömeli ka tavat ae kong; Anyin adre me ca elâm ânyâm ta je hnanyibu.
- 156 Jehova lö, e gan hmâ ânyâm ta je ibetengiö; Omeli nya thö hoton hnâm ta je hna owisa.
- 157 E se hia tavat adre me sedö nya me bi iwahnaihmiony mönya; Ke oge me ca hia but saú únyi hnyi hnâm ta je hna ohnathoâ.
- 158 Oge me wâ but tavat úalecuo, me oge me hmak dö; Anyin adre me ca vheno hwâm hofuc.
- 159 Jehova lö, únykúme ju ge hnök hna hnyok ka ânyâm ta je hnanyibu. Omeli nya thö, hoton ânyâm ibetengiö.
- 160 Haba önyen hwâm hofuc, me, hnathu;

K' ame ve tethmâ nyiele balua hnâm ta je hna owisa hia.

## 7 SHIN.

- 161 A hia but sedö nya hnen ta je than, ke ba can; Ke haba hnyekuk ame outen hwâm hofuc.
- 162 Oge me senyinâ hwâm hofuc, Helâ me at ame hlo omjeú ae gan hmâ adre söh.
- 163 Oge me húkotiâ me ikikiâ thoi; Ke oge me hnyok ka ânyâm hnanyibu.
- 164 Iny oseven oganö u hnyi bong a khaca, Can hnâm je hna owisa ae wisa.
- 165 E gan hmâ hnahic hnen tavat adre me hnyokâ ânyâm hnanyibu; Ke ba únyi hnân ohaú' ödra.
- 166 Jehova lö, inya oge hia but gejon ânyâm úhömeli, Me ânyâ hnâm ta je hna húna.
- 167 Haba hanuk, me, ame hia but vheno hnâm ta je hna ohnatho; Ke oge me hnyok gan hmâ káu.
- 168 Inya oge hia but vheno hnâm ta je hnanyibu me hnâm ta je hna ohnathoâ; Anyin a eú hnyi hnyimákâm dek ta je gethen hia.

## 7 TAU.

- 169 Jehova lö, e so e ka o but ka hnyi hnyimákâm anyik tenge; Okhanö nya thö hoton hwâm hofuc.
- 170 E so e he ka o but hnyi hnyimákâm hok hwakhöü; Omeli nya thö hoton, hwâm hofuc.
- 171 E so ame he li esongodik ka ha hna ogânâ; Anyin a u me nö nya ge ânyâm ta je hnanyibu.
- 172 E so ame he bohök ka khumöngö hwâm hofuc; Anyin ae wisa ânyâm ta je hnanyibu hia.
- 173 E so e penapena hnyamâm ka hadruo nya; Anyin oge hia but úca ânyâm ta je hnanyibu.
- 174 Jehova lö, oge me ti wek hmönyinâ ânyâm úhömeli; Ke oge me senyin ge ânyâm hnanyibu.
- 175 E so e he hanuk ka möt, me e ame he ka oganö u; Ke so e he hnâm je hna owisa ka hadruo nya.

SALAMO 120—124.

176 Oge hia but he monu helâ me mamoe  
a hia ; ö u elom nya,  
Anyin oge me ca hnying ânyâm ta je  
hnanyibu.

SALAMO 120.

*Khumöng ölö.*

**H**NYI anyik vec oge me hongot kö  
Iehova,  
Me e ame thu kõnya.  
2 Iehova lö, omelö thö hanuk únyi ge li  
esongot ae thoi,  
Me únyi hnyi bohmen ae thoi.  
3 Bohmen ae iyawö lö,  
Ieú adre me he ka ham köu, ke ie ke  
únyi minya adre me he ka ânyâ köu?  
4 Je fana anyin at hwege ae so homakan,  
Me je walepiny sâ.  
5 E kölö gak anyin a inya oge me laba  
kanyua hnyi Meseka,  
Ke unyin je uma mano hnyi Kedara !  
6 E kueny dut tha laba hanuk  
Me at ame húkotiâ úsoköu,  
7 Iny at ae beúsoköu :  
Ke iny ka fuc, me adre me bi vat.

SALAMO 121.

*Khumöng ölö.*

**O**GE me he ka hngele göranyai ka hnyi  
je bucen :  
Ama he ka o úheny ua hna hadruo nya?  
2 Haba úhadruo nya me únyi ga Iehova,  
At ame op drany me hmeledrany.  
3 E ame ca he ka hna li cam he ka bwe-  
bwet :  
Ame ca he ka ta mokut bi at ame  
tuö u.  
4 Wâ bi, haba at ame tuö Isaraela  
Ame ca he ka ta mokut me mokut  
hnying.  
5 Iehova thibi at ame tuö u :  
Iehova thibi hmenom hnyi hnyamâm a  
metâm.  
6 Ame ca he bi seúnö ka li u hnyi lany,  
Ke tehi hnyi lit.  
7 Ame he Iehova ka tuö u hnyi ta je  
únyi hia ae kong ;  
E ame he ka tuö hanom.  
8 Ame he Iehova ka tuö u, u ka dit ut,  
ke u ka didrö hmetu,  
Hwân walang ang ke ne o but nyiele  
balua.

SALAMO 122.

*Khumöng ölö : anyi Davita.*

**I**NYA oge me senyin hnyi úen ödrin e  
ha kõnya, ka habe,  
E so ötin e he ka hnyi uma umö Iehova.  
2 Jerusalema lö, ame tot je li cahmun  
Hnyi ta je homagöulem ;  
3 Wale Jerusalema adre op  
Helâ me taun adre úhújákouâ wia :  
4 K' ame ölö ka hnyin hnen ta je tribu, a  
ta je tribu anyi Ja,  
Hnân únyi hnân ohnathoâ kö Isaraela,  
M' adre me he ka oleâ iö Iehova.  
5 Anyin a eling ta je theron hnân owisa,  
Je theroniny lap anyi Davita.  
6 Hic ju, me me hnahic Jerusalema :  
Ame he ka hu sot ka tavat adre me  
hnyok köu.  
7 E so e eú hnyi hagâm hak hnahic,  
Me sot hnyin unâm ta je uma.  
8 Ge ta je liamekeiny mönya me ta je  
lahanök,  
Oge me he ka ha hnahici u.  
9 Únyi ge uma umö Iehova a Khonguta  
Oge me he ka elâm ânyâm so.

SALAMO 123.

*Khumöng ölö.*

**I**NYA oge me bwele göranyai köu,  
At ame laba hnyi drany.  
2 Wâ bi, je li emakan ta je athnyaba ame  
hngele ka hnyi hnyamen ta je tuhö-  
dra,  
Ke li emakan in ame hngele ka hnyi  
hnyamen tuhan a momo ;  
Helâe minya je li emaköta kö Iehova a  
Khonguta,  
Ke ne o but e ame he ka betenge gata.  
3 Iehova lö, betenge ju gahmun, betenge  
ju gahmun :  
Anyin adre me haikongu öhmun gan  
hmâ.  
4 Ame ti unöngöt hanuhmun  
Ge hna hmiân hnen tavat adre me laba  
khötkic,  
Me hna úhiö hnen tavat bi gan.

SALAMO 124.

*Khumöng ölö ; anyi Davita.*

**E**SO ame he Isaraela ka ha, ka habe  
Ame ne ca tha hiö Iehova möta ;

SALAMO 125—128.

- 2 A ne ca Iehova bi at ame tha hien möta,  
 Hnyi ün waleji ame todrö köta tavat :  
 3 Awe, ma hia but ut' öta k' öta tiga möt bi.  
 Waleji hnyi iubâhlâiny hmönyin anyin tavat köta.  
 4 Ma hia but hülûlû' öta hnen ta je köiö,  
 Me khutukhaûâ je hanuta hnen di :  
 5 A ne helâe me a hia but khutukhaûâ ta je hanuta ge ta je köiö ae bi gan.  
 6 Haisoi Iehova thö,  
 Wale at ame ca hn' öta ka ta je nyudra me hnân han.  
 7 A möt ut hanuta helâ me meno ame gâ unyi hnyi hnewe anyin tavat tâu hnewe :  
 A mou thö hnewe, m' ate me möt ut.  
 8 Haba iö Iehova ame hadru' öta,  
 At ame op drany me hmeledrany.

SALAMO 125.

*Khumöng ölö.*

- H**ABA tavat adre me labageju kö Iehova,  
 Ödra úcú me bucen Ziona, wale at ame ca bwebwet, k' ame tethmâ nyiele balua.  
 2 Ame igigili Jerusalema hnen ta je bucen,  
 Me helâe ame igigilö lakeiny hpö Iehova,  
 Hwân walang ang ke ne o but nyiele balua.  
 3 Anyin ame ca he uciny musi anyin tavat ae kong ka laba hon hwajekhon tavat ae wisa ;  
 Me me ca he tavat ae wisa ka hinöbeny ka hulö.  
 4 Iehova lö, ânyâ thö sö ka tavat ae so,  
 Me ka tavat adre me hnyok wisa.  
 5 Ke haba tavat adre me saú ka hnyi ta je gethen ae hwali,  
 Ame he Iehova ka hum ödra he ka tha he me tavat adre me ânyâ hulö.  
 E so e e hon Isaraela hnahic.

SALAMO 126.

*Khumöng ölö.*

- H**NYI hna ohmetu Ziona ga Iehova úheny hnyi hna bâ,  
 Öta úcú me tavat adre me bwi.  
 2 Me ame unöngötö ta je hnyimöta ge behluma,

- Me ta je bohmöta ge khumöng :  
 Me ame ha thö ta je hnyei, ka habe,  
 Iehova ame hia but ânyâ ta je únyi ae gan ka tavat ang.  
 3 A hia but Iehova ânyâ ta je únyi ae gan köta ;  
 Waleji ate me senyin gan.  
 4 Iehova lö, hmetu ju köhmun ta je bâ,  
 Helâ me ta je wekhet hnyi Hwaiöu.  
 5 Haba tavat adre me ta tengiâ, adre me he ka meno hnyi senyin.  
 6 Eja ke ne a ne tenge tot me tang hatong :  
 E ame he ka hmetuhmetu hnyi senyin me ta je thi hwit.

SALAMO 127.

*Khumöng ölö ; anyi Solomona.*

- A**NE ca op Iehova uma,  
 Me me he tavat ka okhot ka op e :  
 Ame ne ca tuö bi taun Iehova,  
 Ma me he ka hmak baú at ame tue.  
 2 E únyi baú hnöbun hna vesákong, me bec he ka mokut,  
 Me an jeúiny huliwa ae hmak :  
 Anyin a helâe e ame ham mokut ka laoúnykúminy.  
 3 Wâ bi, jekhöúta únyi ga Iehova ta je wanakat :  
 Ke hwaban únyi gan, wale wan tangen hnöku.  
 4 Haba lakon hidröu,  
 Helâ me thi fana hnyi hnyamen at ae hwege.  
 5 Hnahic hnen at ae hu tangen fana ae unöngöt gadrin :  
 Adre me ca he ka hmehma,  
 Ödra ka úhnenamö me ta je iwahnai-hmiöny mödra hnyi homagöule.

SALAMO 128.

*Khumöng ölö.*

- H**NAHIC hnen at ame outö Iehova,  
 A at ame vhenö deny ta je gethen.  
 2 U me he ka senyin me hnahic ;  
 Anyin a u me he ka an troban huliwa anyin li hnyamâm.  
 3 Haba âiâm ame he ka helâ me vine ame wa, hnyi je ke keihen umâm uma eiö hnyin :  
 Ke lakom helâ me khûen elaiö igigilö ânyâm laulau.  
 4 Wâ bi, helâe mân hnahic anyin at Ame outö Iehova,

SALAMO 129—132.

- 5 Ame he Iehova ka ohnabici u úheny  
Ziona :  
Ke u me he ka wâ so ka Jerusalema  
hnyi je bong hia bongon ânyâm môt.  
6 Eke, u me he ka wâ lakon ta je lakâm.  
E so e hon Isaraela hnahic.

SALAMO 129.

*Khumöng ölö.*

- E** SO ame he Isaraela ka ha, ka habe,  
Adre hia but osehia oveci nya,  
hwân k' iny tiga hidröu ;  
2 Adre hia but osehia oveci nya hwân k'  
iny tiga hidröu ;  
K' ödra ca hwege bi huk.  
3 Haba tavat adre me hwiö kânâ, me,  
adre me trohnen hon juk ;  
Adre me obeûâ anyidra je ogowe.  
4 E wisa Iehova :  
E ame hia but subâ degecâ tö anyin  
tavat ae kong.  
5 E so adre me he ka hmehma, me ohme-  
tuhmetu ödra hia  
Wale ame hmiödra Ziona.  
6 E so adre me he ka helâ me hnaönying  
hon ban je uma,  
A meleca thö ke tiga ca kû wia :  
7 Wale ae ca úco beuyin at ame subö  
hwit,  
Me úlainy at ame ce hwit.  
8 Ke ame ca ha bi tavat adre me gethen  
hnyin, ka habe,  
E so e e unyibun hnahic anyi Iehova ;  
Öhmun e ha hnahici öbun hnyi iö  
Iehova.

SALAMO 130.

*Khumöng ölö.*

- I**EHOVA lö, inya oge me hia but hongot  
köu únyi hnyi je dok ae dit.  
2 Than lö, löng ju itucik :  
E so u ma tevehlöng  
Hok ta je hwatenge.  
3 Ja a Than lö, u je ne he ka bi haten je  
hulö,  
Ie at ame he ka tot ?  
4 Ke u thibi at ame thang degecâ,  
M' adre me he ka outö u.  
5 Inya oge me halubahing Iehova, ame  
úlubahing hanuk,  
Ke inya oge me gejon hwan hofuc.  
6 Ame halubahingen Than hnen hanuk,  
E nua hon tavat tue adre me boulany ;  
Eke, hon tavat tue adre me boulany.

- 7 Isaraela lö, geju Iehova ju ;  
Anyin ae unyi Iehova ibetengiö,  
Ke gan hmâ úhömeli unyin.  
8 Ke e ame he ka omeli Isaraela  
Únyi hnyi anyin ta je monu hia thithö.

SALAMO 131.

*Khumöng ölö ; anyi Davita.*

- I**EHOVA lö, e ca bi gan hnyekuk, k'  
ame ca hop li emakök ;  
Ke oge me ca vheno ta je únyi ae gan  
hmâ,  
Me ta je únyi ae iyong huk.  
2 E hnathu oge hia but otubwelâ me  
ohnyibö hanuk ;  
Helâ me mendreng adre hia but hnebaio  
unyin hinyen ;  
Haba hanuk me e bi unyik helâ me  
mendreng adre hnebaio.  
3 Isaraela lö, geju Iehova ju  
Hwân walang ang, ke ne o but nyiele  
balua.

SALAMO 132.

*Khumöng ölö.*

- I**EHOVA lö, únykúme ju kö Davita  
Anyin ta je vec hia ;  
2 A g' ame khemanyin kö Iehova,  
Me bi khöbi ka Mani Jakob :  
3 E hnathu oge me ca he ka dit ka hnyi  
uma menâ a umök uma,  
Me ölö ka hnyi hon hnok hna mokut ;  
4 Oge me ca he ka hna li emakök he ka  
mokut,  
Me li bademakök he ka ta mokut ;  
5 Ke ne o but oge me he ka wâ dok hobi  
kö Iehova,  
Wale uma menâ hobi kâu Mani  
Jakob.  
6 Wâ bi ate me löng únyi eling hnyi  
Eferatha :  
Ate me wâ but e hnyi ta hnyei hnyi  
hnyot.  
7 Öta he ka dit ka hnyi umen je uma  
menâ ;  
Ate me he ka khudrung ka hnyi taben  
li hnyeúcan.  
8 Iehova lö, todrö ka hnyi dok u je menâ  
hnyin,  
U, me tangen manâm man.  
9 E so e kbavâ hwakecin ae wisa hnen  
tavat bi hut köu,  
Ke so ame khumöng senyin hnen  
ânyâm wakap.

SALAMO 133—135.

- 10 Ca wia degecâ bi hnyimakan at u je hû.  
Can athnyabaem a Davita.
- 11 A hia but Iehova khemanyin kö Davita  
hnyi hnathu ;  
E ame ca he ka hwiö gan, ka habe,  
Ûnyi hnyi mâtrân unyâm oge me he ka  
ctilâ hon ânyâm theron.
- 12 Ame ne he lakom ka vheno anyik úhi-  
hinyköu,  
Me je únyi hnân ohnathu nya wale oge  
me he ka n' ödra gan,  
Awe, ame he balua ta je lakudra ka  
tabâ ânyâm theron.
- 13 Anyin a hia but Iehova úca Ziona ;  
E ame weny e hnân hnyaban.
- 14 Wale thibi e hnök hna menâ nyiele  
balua :  
Oge me he ka labâ e ; anyin oge wek e.
- 15 Oge me he ka ti ohnahicâ jeúiny :  
Oge me he ka osekunâ ge jeú ta je aten  
ae ba ta únyi.
- 16 Oge me he ka khavâ minya anyin tavat  
bihut ge úhömeli :  
K' ame he anyin wakap ka khumöng  
senyin.
- 17 Oge me he ka vhöng eling faoiny meno  
anyi Davita :  
Oge hia but penapena lamepa hobi kâu  
hnök hna hû.
- 18 Oge me he ka khavâ ta je iwahnaihmi-  
öny mē ga hmehma :  
K' ame he ka khulelau hon e anyin  
korona.

SALAMO 133.

*Khumöng ölö ; anyi Davita.*

- W**Â bi, e ti so me kese hmönyin  
He ka tha laba je liamekeiny me  
úhnyökou !
- 2 E úcú me wakaco ae únyi hnathu hon  
ban.  
Ame khukhula ka hnyi wainy,  
Waleji a wai Arona ;  
Ame khukhula ka hnyi baten khâüen.
- 3 E úcú me dân hau hnyi Heberona,  
Ame ta hon je bucen Ziona :  
Anyin a Iehova ame hûna eling hna-  
hic,  
A möt nyiele balua.

SALAMO 134.

*Khumöng ölö.*

- W**Â bi, haisoi Iehova th' öbun, öbun  
lathnyabai Iehova hia.

- Tavat öbun e labö tot hnyi uma umö  
Iehova hnyi je hnyinghet.
- 2 Hai thö hnyauöbun ka hnyi dok ae  
kap,  
Me haisoi Iehova.
- 3 E so he ka hahnahici u úheny Ziona  
hnö Iehova ;  
Wale at ame op drany me hmeledrany.

SALAMO 135.

- O**GANÖ Ja th' öbun.  
Oganâ thö iö Iehova ;  
Öbun lathnyabai Iehova lö, ogânâ e :
- 2 Öbun tavat öbun e labö tot hnyi uma  
umö Iehova,  
Hnyi je hnyeuleny uma umen Khon-  
guta.
- 3 Oganö Ja th' öbun ; anyin ae so Ie-  
hova :  
Khumöng ogânâ thö ien ; anyin ae  
so e.
- 4 Anyin a Ja ame hia but úcú Jakob  
hnân hobi kâu,  
Me Isaraela hnân tang omjehen ae únyi  
hnathu.
- 5 Anyin ae khanö nya a e gan hmâ  
Iehova,  
K' ame beönua Tuhöta hon ta je khong  
hia.
- 6 Haba ta je únyi hia ame we Iehova,  
me ame hia but ânyâ,  
Hnyi drany ethö, me hmeledrany, me  
eú hnyi köiö, me je dok hia ae dit.
- 7 E ame öliâ thö hai únyi hnyi je can  
hmeledrany ;  
E ame bi hucuce hobi kâu we ;  
E ame hom but ang únyi hnyi tang  
omjehen.
- 8 Waleji at ame kot watö hnyi Aigupito,  
Tavat me omeno.
- 9 Aigupito lö, e ame kunâ köu ta je haten,  
me ta je únyi hnân láiâ,  
Hu Farao, me lathnyabainy hia thithö.
- 10 Waleji at ame kot ta je hnyi ae se  
hia,  
Me hlingâ ta je than ae man ;
- 11 Wale Sihona tuhan at Amora,  
Me Oga tuhan Basana,  
Me je dökhu hia hnyi Kanana :
- 12 Me ham but idra hnyi hnân hwaje-  
khöü,  
Hwajekhon Isaraela a lakeiny.
- 13 Iehova lö, ke ne o but nyiele balua iâm :  
Iehova lö, ke ne o but hnyi ta je dö hia  
hna únykúmi u.

SALAMO 136, 137.

- 14 Anyin ame he Iehova ka owisa lakeiny,  
Me ietra ge lathnyabainy.
- 15 Haba ta je idola anyin ta je hnyei me  
sileva me gol,  
A huliwan ta je hnyamen at.
- 16 E hu hnyimödra, k' adre me ca fuc bi ;  
E hu li emaködra, k' adre me ca wâ bi ;
- 17 E hu li hnyikönyödra, k' adre me ca  
löng bi ;  
Ke ba homenâ hnyi je hnyimödra.
- 18 Ame he tavat adre up ödra ka helâ  
mödra ;  
Eke, tavat hia adre me labageju ködra.
- 19 Lap anyi Isaraela lö, oganö Iehova th'  
öbun :  
Lap anyi Arona lö, oganö Iehova th'  
öbun :
- 20 Lap anyi Levi lö, oganö Iehova th'  
öbun :  
Öbun tavat öbun e outö Iehova lö,  
oganö Iehova th' öbun.
- 21 E so adre haisoi Iehova úheny Ziona,  
At ame laba hnyi Jerusalema.  
Oganö Ja th' öbun.

SALAMO 136

- O**LEÄ ju kö Iehova ; anyin a e at ae so :  
Anyin a nyiele balua anyin ibeteng-  
giö.
- 2 Oleä ju ka Khongon ta je khong :  
Anyin a nyiele balua anyin ibetenggiö.
- 3 Oleä ju ka Tuhan ta je than :  
Anyin a nyiele balua anyin ibetenggiö.
- 4 Kâu at ame hake ânyâ ta je únyi hnân  
láia gan hmâ :  
Anyin a nyiele balua anyin ibetenggiö.
- 5 Kâu at ame op drany hnyi metâ :  
Anyin a nyiele balua anyin ibetenggiö,
- 6 Kâu at ame olauâ kânâ hon köiö :  
Anyin a nyiele balua anyin ibetenggiö :
- 7 Kâu at ame op ta je melam ae gan  
hmâ :  
Anyin a nyiele balua anyin ibetenggiö.
- 8 Wale seúnö he ka musö selany :  
Anyin a nyiele balua anyin ibetenggiö.
- 9 Tehi me ta je okhú he ka musö lit :  
Anyin a nyiele balua anyin ibetenggiö.
- 10 Kâu at ame kot Aigupito wale ta je  
lakudra a bân :  
Anyin a nyiele balua anyin ibetenggiö :
- 11 Me hum Isaraela únyi hnyi wanbödra :  
Anyin a nyiele balua anyin ibetenggiö :
- 12 Hnen hnyamen ae hwege, me benyin  
ame hai :

- Anyin a nyiele balua anyin ibetenggiö.
- 13 Kâu at ame subâ luâ Köiö ae Dra :  
Anyin a nyiele balua anyin ibetenggiö :
- 14 Me ohei Isaraela hnyi wanben e :  
Anyin a nyiele balua anyin ibetenggiö :
- 15 Me khüö Farao me anyin utbavat ka  
hnyi Köiö ae Dra :  
Anyin a nyiele balua anyin ibetenggiö.
- 16 Kâu at ame su tilâ lakeiny hnyi hnye-  
buba :  
Anyin a nyiele balua anyin ibetenggiö.
- 17 Kâu at ame kot ta je than ae gan :  
Anyin a nyiele balua anyin ibetenggiö :
- 18 Me hlingâ ta je than ae lung :  
Anyin a nyiele balua anyin ibetenggiö :
- 19 A Sihona tuhan at Amora :  
Anyin a nyiele balua anyin ibetenggiö :
- 20 Me Oga tuhan Basana :  
Anyin a nyiele balua anyin ibetenggiö :
- 21 K'ame ham idra hnyei hnân hwajekhöü :  
Anyin a nyiele balua anyin ibetenggiö :
- 22 Wale a hnân jekhöü Isaraela a athnya-  
bainy :  
Anyin a nyiele balua anyin ibetenggiö.
- 23 At ame únykúmi öta hnyi hna ohnyi-  
kânâi öta :  
Anyin a nyiele balua anyin ibetenggiö
- 24 K' ame hia but omeli öta únyi ge ta je  
iwahnaihmiöny möta :  
Anyin a nyiele balua anyin ibetenggiö.
- 25 E ame hia but ham han ka ta je únyi  
hia ae möt :  
Anyin a nyiele balua anyin ibetenggiö.
- 26 Oleä ju ka Khongon drany :  
Anyin a nyiele balua anyin ibetenggiö.

SALAMO 137.

- H**ABA hnyi je wagewe hnyi Babulona,  
Me ate me laba ju eling, eke k' ate  
me tenge,  
Öta ate me únykúme Ziona.
- 2 Ate me uhno anyita je kitara  
Hnyi je úö garaba hnyi wanben e.
- 3 Anyin a tavat adre hwenböta ödrin e  
kun' öta eling he ka khumöng,  
Ke tavat sed' öta adre me kun' ota he  
ka senyin, haingödra, ka habe,  
Hai thö köhmun ke khumönginy Ziona.
- 4 Öhmun e he ka kâmâü ka hai khumöng  
anyi Iehova.  
Hnyi ke hnyei bi ?
- 5 Jerusalema lö, oge ne he bi ka hny  
ing u,  
Me so e he hnyamök a metök ka hnying  
metâiny.

SALAMO 138, 139.

- 6 E so e he ka kece bohömök ka hnyi  
ecngödik,  
Oge ne ca únykúmi u ;  
Ke oge ne ca ogöranyi Jerusalema,  
Hon anyik je senyin hia.
- 7 Iehova lö, únykúme ju ka laku Edoma  
Ge bong bongon Jerusalema ;  
Waleji adre me ha, ka habe, Thö degecâ  
but, thö degecâ but,  
Ke ne o but ka hnyi taben.
- 8 Hlu nöku Babulona lö, adre me he ka  
ohiö u,  
Ame he ka hnahic ut at ame bi hwaban  
köu,  
Hnâm hna ânyâ kohmun.
- 9 Ame he ka hnahic at ame kât me sa  
degecâ lakom ta je inma  
Hnyei ge kic.

SALAMO 138.

*Salamo anyi Davita.*

- O**GE me he ka ole köu ge hnyekuk ae  
bekhöt :  
Oge me he ka khumöng oganö u hnyi  
hnyimakan ta je khong.
- 2 Oge me he ka khudrung ka hnyi umâm  
uma ae kap,  
Me oleâ iâm can ânyâm ibetengiö, me  
ânyâm hnathu :  
Anyin a u je hia but ogânâ hwâm hofuc  
hon iâm hia.
- 3 U je thu könya hnyi bong oge me  
hongot,  
U je sihwegiö nya ge tang hwege ka  
hnyi hanuk.
- 4 Iehova lö, ame he je tuhan hmeledrany  
hia ka oleâ köu,  
Anyin adre hia but löng hofuc únyi  
hnyi hnyimâm.
- 5 Eke, adre me he ka khumöngö je gethen  
de Iehova ;  
Anyin ae gan hmâ hmanenangi Iehova.
- 6 Eja ke ne a ne görany Iehova, e ame  
he ka wâ tawat ae hnyikânâ :  
Ke e ame wâhmakhmetoâ tawat bi gan  
hnyi dok ae sâkâú.
- 7 Eja ke ne oge ne he hnyi wanben vec,  
u me he ka omeli nya :  
U me he ka hai hnyamâm hon hmönyin  
anyin je iwahnaihmiony mönya,  
K' ame he hnyamâm a metâm ka omeli  
nya.
- 8 Ame he Iehova ka obekhötâ hobi könya :  
Iehova lö, nyiele balua ânyâm ibetengiö ;

Ca hna degecâ bi ta je huliwa anyin li  
hnyamâm.

SALAMO 139.

*Hobi kâu at vhiik khumöng. Salamo anyi Davita.*

- I**EHOVA lö, u je hia but elölöm nya, me  
wâhmakhmetu nya.
- 2 U je wâhmakhmeto úlabaik me útilök,  
U je wâ únykúme únykúmenök hnyi  
dok ae sâkâú.
- 3 U je elâm wia dek gethen me hnök hna  
mokut,  
Me khenenâ dek ta je gethen hia.
- 4 Iehova lö, e ba bi ke hofuc hnyi bohömök,  
Ke wâ bi, u je wâhmakhmeto hia.
- 5 U je hia but theling nya hnyi hotuk  
me hnyimakök,  
Me ip hnyamâm huk.
- 6 E iyöng huk metâ eling ;  
E görany e, ke ca khanö nya he ka ölö  
kâu.
- 7 Oge me he ka he kâ úhek unyin hanom ?  
Ke oge me he ka kec kâ ge hnyimâkâm ?
- 8 Oge ne he ka ölö ka hnyi drany, me u  
ling :  
Ke oge ne ulolo hnök hna mokut hnyi  
hedis me wâ bi, u bi ling.
- 9 Oge ne he ka hom li labenyin hnyoma-  
katu,  
Me laba hnyi can je köiö ;
- 10 Me ame he hnyamâm ka su nya eling,  
K' ame he benyâm a metâm ka köt  
nya.
- 11 Oge ne ha, ka habe, E hnathu ame he  
menekholom ka húlúlúö nya,  
K' ame he melam igigili nya ka lit ;
- 12 Ke so bi ca hnân olidrá bi köu menek-  
holom,  
Me ame umumelam lit helâ me lany :  
E tha úcú menekholom me melam köu.
- 13 Anyin a ânyâm li jebalainuk :  
U je tubi nya hnyi hnyeku bai.
- 14 Oge me he ka oleâ köu ; anyin a hnân  
ot me láia ge hnödra hna tretrau nya :  
Hnân láia ânyâm ta je huliwa ;  
Ke a wâ wia but e hnen hanuk.
- 15 E ca iyong köu unyik,  
Waleji hnyi hna up nya hnyi dok ae  
iyong,  
Ke hna huliwan hnyi je dok a diliny  
hmeledrany.
- 16 A wâ but unyik hnen li emâkâm k' iny  
tiga ca bekhöt ut,  
Ke u je sihnalimen hnyi ânyâm tusi je  
ong outhunyik hia,



SALAMO 140, 141.

- Waleji adre me tretrao hnyi ke bong  
me ke bong,  
Ke tiga ba ke únyi ae bekhöt.  
17 Khong lö, shaiba ge soiny kõnya hnâm  
ta je hna únykúme!  
Shaiba ge úseiny ae ti se hia!  
18 Oge ne aú, me ti se hia hmönyin hon ta  
je waöny:  
Inya oge me hmak dö ke inya bala bi  
unyâm.  
19 Khong lö, e hnathu u me he ka hlingá  
at ae kong:  
Anyin a wale, úsákáüü but mönya öbun  
tavat öbun e mádrá dra.  
20 Anyin adre me úhnenamöi u kongu u,  
Adre me ha baúá iâm, ta je iwahnaih-  
miöny möu.  
21 Iehova lö, hawa oge me ca húkötia  
tavat adre me ikiki u?  
Me vec minya ge tavat adre me bi tot  
köu?  
22 Oge me ti hmiök hmönyin ödra:  
Oge me öü ödra a je iwahnaihmiöny.  
23 Khong lö, elölöm nya thö, me wá thö  
hnyekuk:  
Cubic nya ju, me wá thö je únykúme-  
nök:  
24 Me wá ju ame ne eú hnyi hnyekuk  
gethen deny monu,  
Ke su nya thö hnyi gethen a nyiele  
balua.

SALAMO 140.

*Hobi káu at rhik khumöng. Salamo anyi Davita.*

- I**EHOVA lö, húgúnö nya but unyin at ae  
kong;  
Tuö nya ju ge at úokonguny:  
2 Waleji adre me únykúme ta je úokon-  
guny eú hnyi je hnyekudra;  
Adre me labö úkhacaköu he ka vat.  
3 Adre hia but khet homakan ta je bo-  
hmödra helâ me on:  
Eú hnyi hmelen je esongodidra páizo-  
niny asip. [Sela.  
4 Iehova lö, tuö nya ju ge li hnyamen at  
ae kong;  
Tuö nya ju ge at úokonguny:  
Waleji tavat adre me únykúme he ka  
ötö nya.  
5 Haba tavat bi gan adre hia but töu  
hnewe duöng, me ta je tö me hnok;  
Adre hia but thong ert eú hnyi baten  
gethen;  
Adre hia but ta je offic me hnok. [Sela.

- 6 Oge me ha kö Iehova, ka habe, U thibi  
Khonguk:  
Iehova lö, löng ju hok hwatenge.  
7 Iehova a Than lö, tang hwegen melik,  
U je hia but tube bök hnyi bonginy vat.  
8 Iekova lö, ca ham bi ta je weny at ae  
kong;  
Ca ohwádâ anyin bibihwakecin; wá  
adre nye görany dö. [Sela.  
9 Haba je bodra adre me igigili nya,  
Me so ame tubi ödra ge úokongunyin je  
esongodidra.  
10 E so ame ta ta je walep ae möt hudra:  
E so adre me khú' ödra ka hnyi meic:  
Me je thop ae dit, m' adre me ca he  
hmetu ka tot.  
11 Ame ca he at ame ha monu ka tethmâ  
hnyi hnyei:  
K' ame he hulö ka hnu at úokonguny  
he ka hagutâ e.  
12 E khaü nya but a g' ame he Iehova  
ka ányâ wisa ka at ae vec,  
Me owisa ka at ae theduoc.  
13 E hnathu ame he tavat ae wisa hwake-  
cidra ka oleâ iâm:  
K' ame he tavat ae wisa ka laba hnyi  
hnyimákâm.

SALAMO 141.

*Salamo anyi Davita.*

- I**EHOVA lö, oge hia but hongot köu,  
mweimwei thö kõnya:  
Löng ju ifucik, iny ka hongot köu.  
2 E so e tethmâ hijik hic hnyi hnyimákâm  
helâ me utö ae bo so;  
Ke hna ogöranyâ li hnyamök, helâ me  
hut adre me hudo hnyi je sahac.  
3 Iehova lö, otílâ thö at he ka tuö hnyi-  
mök;  
Tuö ju hwanumen li esongodik.  
4 Ca ohmehmela hnyekuk ka hofuc ae  
kong,  
He ka tha ányâ hwakecin ae kong  
Me tavat adre me ányâ hulö:  
Ke ca hnö nya he ka an ö'dra jeú ae  
senem.  
5 E so he ka kuc nya hnen at ae wisa  
hwakecin, wale a betenge;  
Ke thawo nya, wale helâke wakaco hobi  
káu ban;  
E so ame ca he bök ka höcö:  
Anyin oge me he bala ka hic, ödra ka  
úokonguny.  
6 Ame hugutâ anyidra tavat owisa ka  
hnyi ta je kic;

SALAMO 142—144.

- Me adre me he ka löng hok ta je hofuc anyin aa hnebwia.
- 7 Ame oveseâ ta je jeiöhmun hnyi hwanumen erkemok,  
Helâ me hnyi üen at ame wia kânâ me seütîlâ e.
- 8 Anyin a e bi köu, Iehova a than, li emakök :  
Oge me labageju köu ; ca hingâlâ bi melik.
- 9 Tuö nya ju ünyi hnyi hnyimen hnewe adre hia but ip me hnok,  
Me je offic anyin tavat adre me ânyâ hulö.
- 10 E so e he ka hnok tavat ae kong hnyi ütödra je ert,  
Ke nya bi oge me he ka möt.

SALAMO 142.

*Salamo anyi Davita ; hnân änc, hnyi änc e ame laba hnyi op ; Hic.*

- O**GE me tenge kö Iehova ge ifucik ;  
Ge ifucik oge me tenge khöü kö Iehova.
- 2 Inya oge me hingâlâ hnyi hnyimakan je ünykûmenök ;  
Oge me ha anyik vec hnyi hnyimakan.
- 3 Hnyi hna hülülûâ hanuk eü hnyi hnyekuk, e khanö u dek gethen.  
Hnyi dek gethen adre hia but töu hnewe hobi könya.
- 4 Wâ ju hnyi ke keihök a metök, me wâ ;  
anyin ae ba at ae khana inya :  
E ba but hnyeutök ; ke ba at ame ünykûme hanuk.
- 5 Iehova lö, oge me tenge köu ;  
Haingök, ka habe, U thibi hnyeutök,  
Me jekhök hnyi hnyei iny tavat ae möt.
- 6 Löng ju anyik tenge ; anyin ae gan hmâ hna hom ühnyükongu nya ;  
Hügünö nya but ge tavat adre me oveci nya, anyin a ödra hwege huk.
- 7 Hom but hanuk ünyi hnyi uma ceat,  
m' oge me he ka oleâ iâm :  
Ame he tavat ae wisa ka igigili nya ;  
Anyin a u me he ka mâdrâ so könya.

SALAMO 143.

*Salamo anyi Davita.*

- I**EHOVA lö, löng ju hijik hic ; tevehlöng ju anyik je hwakhöü :  
Thu thö könya hnyi ânyâm hnathu, me hwakecâm ae wisa.

- 2 Ke u me ca he ka ühnei me athnya-baem ;  
Anyin ae ba at ae möt ae wisa hnyi hnyimâkâm.
- 3 Anyin a hia but ovecâ hanuk hnen iwahnaihmiöny ;  
E ame hia but bagutâ melik hnyikânâi :  
E ame hia but olabö nya hnyi je dok ae lit, helâ me tavat a kueny mok.
- 4 Anyin a wale, ame hülülûâ hanuk eü hnyi hnyekuk.  
K' ame ba wan hnyekuk.
- 5 Inya oge me ünykûme je bong kâü adrem ;  
Oge me labö ünykûme ânyâm ta je huliwa hia :  
Oge me ünykûme hna mâdrâ hnen li hnyamâm.
- 6 Oge me lau li hnyamök köu :  
E beic hanuk unyam helâ me kânâ ae atgec. [Sela.]
- 7 Iehova lö, mweimwei thö he ka thu könya ; ame sënyin hanuk ;  
Ca ikhâlâ bi gak hnyimâkâm ;  
Wâ oge nye ücü me tavat adre me utut ka hnyi erkemok.
- 8 Hnö nya he ka löng ânyâm ibetengiö hnyi hnyomakatu ;  
Anyin a inya oge me labageju köu :  
Okhanö nya thö gethen deny hanymök ;  
Anyin oge me ogöranyâ hanuk köu.
- 9 Iehova lö, hügünö nya but unyin ta je iwahnaihmiöny mönya :  
Oge hia but lubaduöng unyâm.
- 10 Nö nya thö he ka ânyâ wem ; anyin a u thibi Khonguk :  
E so hanom ; su nya ju ka hnyi hnyei iny hwakecin ae wisa.
- 11 Iehova lö, omeli nya thö, ünyi hnyi iâm :  
Hnyi hwakecâm ae wisa hum nya but ünyi hnyi vec.
- 12 Ke hnyi ânyâm ibetengiö subâ degecâ but ta je iwahnaihmiöny mönya,  
Me ohia tavat hia adre me ovecâ hanuk ;  
Anyin a inya athnyabaem.

SALAMO 144.

*Salamo anyi Davita.*

- E**SO he ka haisoi Iehova a kicik,  
At ame nâ li hnyamök he ka vat,  
Me je banyök he ka üküc :  
2 At ame betenge gak, ke hnök hhabâ,  
Anyik tap ae beü görany, me at ame omeli nya ;  
Becik, me at oge me labageju kâü ;

- At ame hom ûhnyûkongoâ lakeik eû  
hnyi hmelik.
- 3 Iehova lö, ehö at, me u me wâhmakh-  
meto e?  
Me nokon at, me u me he ka wâ ûny-  
kûme e?
- 4 E ûcû at me ûnyi ae ûnyi baû :  
Ke bonginy ta je bong e ûcû me hmenu  
ame hia but.
- 5 Iehova lö, ken dut ânyâm drany me ölö  
ju :  
Kâlâ ju ta je bucen me me he ka sâ.
- 6 Jijingâ but hucuce, me ovesei ödra ;  
Fana but ânyâm ta je fana me omonu-  
monu ödra.
- 7 Hinöbeny dut ûheny thö ;  
Omeli nya but, me hûgûnö nya ûnyi  
hnyi je köiö ae gan,  
Me hnyamen ta je atkanyua ;
- 8 Hnyat adre me fuc baû ge je hnyimö-  
dra,  
Ke haba je hnyamödra a metödra, me,  
ûthumetu ae thoi.
- 9 Khong lö, oge me he ka hai köu khu-  
mông ae teb ûnyi :  
Oge me he ka khumông köu ge nabeli  
ae hu töiny a ten.
- 10 E thibi at ame ham möt ka ta je than :  
At ame omeli Davita a athnyabainy  
ûnyi hnyi hele vat hnân mekinny.
- 11 Omeli nya me hûgûnö nya ûnyi hnyi  
hnyamen ta je atkanyua,  
Hnyat adre me fuc baû ge je hnyimö-  
dra.  
Ke haba je hnyamödra a metödra, me,  
uthumetu ae thoi.
- 12 E ka helâ me je ûö ame kû so lakuta  
obaga hnyi anyidra hidröu ;  
Ke lakuta wahu helâ me vetoiny bahe-  
bet adre me tretrao hnân uma umen  
than ;
- 13 E ka unöngötö umöta ta je ombani ge  
ta je jeû ae ve bongon hia ;  
K' ame he haleta ta je mamoe ka hnokoâ  
je thauzan me je ten thauzan hnyi  
ta ita ;
- 14 Hnyi ûen adre me hijen je hok ae gan  
haleta je bolok ;  
Ke ba hmetu ûhagutö ka hnyi taun me  
hna utut hnyöu ai,  
Ke ba hwatenge hnyi deta ta je gethen ;
- 15 Awe, hnahic hnen hnyei a helâe ;  
Eke, hnahic hnen hnyei a Iehova Kho-  
ngudrin.

## SALAMO 145.

*Salamo hnân ogânâ ; anyi Davita.*

- K**HONGUK lö, Than, oge me he ka  
ogânö u :  
Ke oge me he ka haisoâ iâm nyiele  
nyiele balua.
- 2 Oge me he ka haisoi u hnyi je bong ;  
Ke o ge me he ka ogânâ iâm nyiele  
nyiele balua.
- 3 E gan hmâ Iehova, me hnân ti ogânâ ;  
Ke ca hnân elâm úganiny.
- 4 Ame he ke dö ka ogânâ ânyâm ta je  
huliwa ka ke dö,  
Me omanená hnâm ta je hna ânyâ ae  
man.
- 5 Oge me he ka ûnykûme hmanenanginy  
úganâm ae mec,  
Me hnâm ta je hna ânyâ hnân láia.
- 6 Ke ame he tavat ka ha ge man maniny  
ânyâm ta je huliwa hnân outen ;  
Ke oge me he ka haimemenâ úganâm.
- 7 Adre me he ka ha hnödra hna ûnykûme  
ge ânyâm so ae gan hmâ,  
Me khumôngö hwakecâm ae wisa.
- 8 E betenge baû me betenge vec Iehova ;  
E bec he ka hmönyin, ke betenge gan  
hmâ.
- 9 E so Iehova ka ta je ûnyi hia ;  
Ke e hon anyin ta je huliwa hia anyin  
ibetengiö
- 10 Iehova lö, ame he ka oleâ köu ânyâm  
ta je huliwa hia thithö ;  
Ke ame he ânyâm wakap ka haisoi u.
- 11 Adre me heka ha hmanenanginy dokhom  
dökhu,  
Me ûhnenamö manâm man ;
- 12 M' adre me he ka haimemenâ ka lakon  
tawat anyin ta je huliwa ae man,  
Me hmanenanginy dokhon dökhu ae  
mec.
- 13 Haba dokhom dökhu, dökhu a nyiele  
balua,  
Me ka ta je dö hia thithö ânyâm musi.
- 14 Iehova ame cö tavat hia adre me ta,  
Me otilâ wisa tavat hia adre me iyâû.
- 15 Ame hngele but köu je emaködra hia :  
Me u je ha ödra hnyi ûen ae ûcû.
- 16 U je lau hnyamâm,  
Me osekunâ ta je ûnyi hia thithö ae  
möt.
- 17 E wisa Iehova hnyi deny ta je gethen  
hia,  
K' ame betenge hnyi anyin ta je huliwa  
hia.

- 18 E hakekeny Iehova ködra hia adre me hawâ e,  
A tavat hia adre me hawâ e hnyi hnathu.
- 19 E ame he ka ânyâ weny tavat adre me outen e ;  
E ame he minya ka löng hodra hwatenge me omeli odra.
- 20 Iehova ame tu' ödra hia adre me hnyok kâu ;  
K' ame he ka ohia tavat hia ae kong.
- 21 Ame he hnyimök ka ha hnân oganö Iehova ;  
Ke so ame he tavat hia ka haisoâ ien ae kap nyiele nyiele balua.

SALAMO 146.

- OGANÖ Ja th' öbun.  
Hanuk lö, oganö Iehova thö.
- 2 Oge me he ka oganö Iehova inye tiga möt :  
Oge me he ka khumöng oganá Khonguk e me tiga inya ang.
- 3 Ca geju öbun ka ta je than,  
Ke nokon at bi, wale ae ba hna úhadruo unyidrin.
- 4 Ame he but homenáiny, me e ame hmetuhmetu ka hnyi kânáiny ;  
Hnyi bong eling e ame ca únykúme hmetu bi.
- 5 Hnahic hnen at ame hadruâ e hnen Khongu Jakob,  
At ame labageju kö Iehova a Khongon :
- 6 Waleji ame op drany me hmeledrany,  
Me köiö me ta je únyi hia thithö hnyin ;  
At ame tuö hnathu nyiele balua :
- 7 At ame ânyâ wisa ka tavat adre me oveci ödra ;  
K' ame ham jeú ka tavat a ödra meki-hnânem :  
Iehova ame thang tavat adre c' ödra ;
- 8 Iehova ame obwela ta je wadröu ;  
Iehova ame otilâ wisa tavat adre me iyau :  
Iehova ame betenge ka tavat ae wisa ;
- 9 Iehova ame tuö ta je atkanyua ;  
E ame cö je nakahme, me je safac ;  
Ke e ame ohnyimenâ hnyikânâi gethen deny tavat ae kong.
- 10 Ame he Iehova ka musi nyiele balua,  
Ziona lö, ame he Khongom ka musi ka ta je dö.  
Oganö Ja th' öbun.

SALAMO 147.

- OGANÖ Ja th' öbun ;  
Anyin ae so he ka khumöng oganá Khonguta ;  
Anyin ae kese, me úcú he ka oganá.
- 2 Iehova ame op Jerusalema ;  
E ame úkhacakouâ hmetu at Isaraela adre obâ,
- 3 E ame ometo tavat ae vec hnyekudra,  
Me lan hnödra ta je aat.
- 4 E ame aú ta je okhú ;  
Me hwenyi ien hia.
- 5 E gan hma Tuhöta, ke ti tren man ;  
Ke ca hnân bi ha hnen hna wáhma-khmeto.
- 6 Iehova ame cö tavat ae hnyikânâ :  
E ame hagutâ hnyikânâi tavat ae kong.
- 7 Khumöng thö kö Iehova me ole ;  
Khumöng oganá Khonguta ge kitara :
- 8 At ame tube drany ge ta je úlá,  
Me penapena we hobi kâu hmeledrany,  
Me okúâ önying hon ta je bucen.
- 9 E ame ham ka ta je meno ö 'dra jeú,  
Me ka je lakou oreba ame kuku.
- 10 E ame ca senyin bi ka hwegien hors :  
E ame ca senyin ge li can at.
- 11 Iehova ame senyin ka tavat adre me outen e,  
Tavat adre me gejon anyin ibetengiö.
- 12 Jerusalema lö, oganö Iehova thö :  
Ziona lö, oganá thö Khongom.
- 13 Anyin a e ame hia but ohwegiâ je venyainy ta je homagöulem ;  
E ame hia but ohnahicâ lakom hnyi wanbâm.
- 14 E ame ham úsoköu hnyi je ke keihâm ;  
E ame ounöngöti u ge hwit ae ti so.
- 15 E ame kunâ anyin hnanyibu ka hnyi hmeledrany ;  
K' ame walring logot hwan hofuc.
- 16 E ame ham kiona helâ me leúnen mamoe ;  
E ame jijingâ dân hau ae wahma helâ me hnabadröu.
- 17 E ame khúâ köien köiö ae wahma helâ me je atmen :  
Ie at ae khana he ka tot hnyi hnyimakan anyin megic ?
- 18 E ame kunâ hwan hofuc me oköiö but ta je únyi e :  
E ame kunâ anyin ang he ka túâ, me ame hingölö but ta je köiö.
- 19 E ame omanená hwan hofuc kö Jakob,

Ke anyin ta je hnanyibu me hna owisa  
kö Isaraela.

- 20) E ame ca ânyâ helâe ka ke hnyei :  
Ke haba hnen je hna owisa, me ca  
manen bi ködra.  
Oganö Ja th' öbun.

## SALAMO 148.

- O GANÖ Ja th' öbun.  
Oganö Iehova ju öbun ûnyi ethö  
hnyi drany :  
Ogânâ thö e hnyi je dok ae görany.  
2 Ogânâ thö e öbun anyin ta je angela  
hia thithö :  
Ogânâ thö e öbun tavat hia e ame op.  
3 Ogânâ thö e öbu seünö me tehi :  
Ogânâ thö e öbun hia ta je okhû ae  
umumelam.  
4 Ogânâ thö e öbun je draniny drany,  
Me öbun ta je köiö ethö hon drany.  
5 E so adre me he ka ogânâ iö Iehova :  
Anyin a e ame hûna, me up ödra.  
6 E ame hia but otetm' ödra minya nyiele  
nyiele balua :  
E ame hia but ip hnanyibu wale ame  
ca he ka hia but.  
7 Oganö Iehova thö eang hmeledrany,  
Öbun ta je tanimo me ta je dok hia  
ae dit :  
8 Meic me we wahma, kiona me hai ;  
Ang ae hwege, at ame hwâdâ hwan  
hofuc :  
9 Je bucen me je hut hia ;  
Je ûö ae wa me je arasi hia :  
10 Je meno ae hiny me je meno hia ae  
hnam ;  
Je ûnyi ame iyâû me ta je meno ame  
gâ :  
11 Je tuhan hmeledrany me ta je hnyei  
hia ;  
Je taben me tavat owisa hmeledrany  
hia ;  
12 Je wahidrou me wahlu minya ;  
Wahingat me je wanakat :  
13 E so adre me he ka ogânâ iö Iehova ;  
Anyin ae hake görany thibi ien :  
Ethö hon hmeledrany me drany anyin  
hmanenang.  
14 Ke e ame hia but ogöranyâ faoiny meno  
anyin lakeiny,  
Wale hna ogânâ hnen anyin wakap.  
A hnen laku Isaraela, hnyei ae hake-  
keny kâu.  
Oganö Ja th' öbun.

## SALAMO 149.

- O GANÖ Ja th' öbun.  
Hai thö kö Iehova khumöng a teb  
ûnyi,  
Me hna ogânâ e hnyi úkhacaköu anyin  
wakap.  
2 E so e he Isaraela ka senyin ka at a  
op e :  
E so e hobâ je laku Ziona ka Tuhödra.  
3 E so adre me he ka ogânâ ien ge bibiâ :  
E so adre me he ka khumöng olungâ e  
ge bwinybet me kitara.  
4 Anyin a Iehova ame senyin ka lakeiny :  
E ame he ka ohmanenangâ tavat ae  
hnyikânâ ge ûhömeli.  
5 E so ame he wakap ka hobâ ge hma-  
nenang :  
E so adre me he ka khumöng senyin  
hon hnödra ta je hna mokut.  
6 E so e he ka e bi hnyi je hnyimödra  
hnân ogânâ hmönyin Khong,  
Me hnyi ta je hnyamödra hele vat a lo  
li homakan ;  
7 Hnân he ka bi hwaban ka ta je hnyei  
hia,  
Me bi hwaban ka tavat hia ;  
8 He ka ca ta je tuhödra ge je cen,  
Me anyidra je taben ge je tö a fao ;  
9 He ka ânyâ hnyi wanbödra hna owisa  
adre sihnalimen :  
Wale hna ogânâ hobi kâu anyin wakap  
hia thithö.  
Oganö Ja th' öbun.

## SALAMO 150.

- O GANÖ Ja th' öbun.  
Ogânâ thö Khong hnyi umen uma  
ae kap :  
Ogânâ thö e hnyi drany ethö a hnyaban  
maniny man.  
2 Ogânâ thö e can anyin ta je huliwa ae  
man :  
Ogânâ thö e hoton soiny úganiny.  
3 Ogânâ thö e ge hwan ifucin trutru :  
Ogânâ thö e ge nabela me kitara.  
4 Ogânâ thö e ge bwinybet me bibiâ :  
Ogânâ thö e ge ûnyi khumöng ae hu  
töiny, me utköwi.  
5 Ogânâ thö e ge simebalo ae mea hwege :  
Ogânâ thö e ge simebalo wale at ame  
mea hwege göranyai.  
6 E so ame he ka oganö Ja hnen ta je  
ûnyi hia thithö ae hu homenân.  
Oganö Ja th' öbun.

# TA JE VEJEC.

## HNYIMAKAN 1.

- T**A je vejec anyi Solomona nöku Davita tuhan Isaraela :
- 2 Me me khana metâ me hna únö :  
Me wâhmakhmetoâ je hofucin wâ tremângâ ;
- 3 Me kap hna úne hnyi hwakecin ae metâ,  
Me wisa, me hna owisa, me hwakecin ae úcú ;
- 4 Me me ometâ tavat ae ba hnyekudra,  
Me ham ka wahidröu hna úne me hna únükúme :
- 5 Me me löng hnen at ae metâ, me bi hanen anyin metâ ;  
Me me he at wâhmakhmeto ka hu metâ hnân úhnenamö :
- 6 Me me wâhmakhmetoâ vejec me úhöúcú ;  
A ta je hofuc hwan tavat ae metâ, me hodra ta je hofuc ae vhet.
- 7 Haba hwakecin he ka ot kö Iehova, me wale hwân he ka wâhmakhmeto ;  
Haba tavat ae monu me andre me hmiödra meta me hna úne.
- 8 Nökuk lö, löng ju hna nö u hnen kâ-mâm,  
Ke ca degec bi hna úne hnen hinyâm :
- 9 Anyin ame he ka helâ me korona ae hmanenang hon bâm,  
Ke sawakiny hnyi nyem.
- 10 Nökuk lö, a ne cubic u tavat ae kong,  
Ca hmehmela bi.
- 11 Adre me ne ha, ka habe, Öta he,  
Ate me mokulec at,  
Ate me he ka tuö at ae ba hnyikongon,  
ke ba can ;
- 12 Ate me he ka ut' ödra meli ödra helâ me hedis,  
Ke tiga bekhöt, helâ me tavat andre me utut ka hnyi thop ;
- 13 Ate me he ka wâ je wakomjeú hia  
Ate me he ka ounöngötâ umöta je uma ge ta je únyi adre söh ;
- 14 U ma tha uglekóbâ möhmun ;  
K' ame he minya ka tha tangöta tang hia :
- 15 Nökuk lö, ca tha he hnyi gethen mödra ;  
Behânâ ju cam ge dedra je gethen :
- 16 Anyin ame wadring je cadra ka hnyi hulö,  
Ke adre he mweimwei he ka hingâlâ dra.
- 17 Anyin e únyi baú he ka lau hnewe,  
E ka wâ but e hnen meno ame gâ :
- 18 Ke haba je hnyat eling adre me khöu mokut ködra bi,  
Adre me mokut duöng ködra bi.
- 19 Helâe dedra ta je gethen hia tavat adre me behnyekudra omjeú ;  
Ame ohia möt anyin tavat ae tren e.
- 20 Metâ ame kuku eú hnyi gethen,  
E ame hongot ge hwan hnyi je hnau-drà ;
- 21 E ame kuku hnyi je dok ae únyi hnathu adre laba úkhacaköu hnyin ;  
Hnyi hna dit hnyi je homagöule,  
E ame ha hwan je hofuc hnyi taun ; ka habe ;
- 22 Tavat ae ba hnyekudra lö, öbun e he ka hnyok ka hwakecin ba hnyekon ke ne o but kehö ?  
Me tavat úhiö he ka hiâ ke ne o but kehö,  
Me tavat ae monu ha hmiödra wâhmakhmeto ?
- 23 Hwiö th' öbun ge hnök hna úne :  
Wâ bi, oge me he ka hingâlâ köbun hanuk,  
Oge me he ka omanená köbun hok ta je hofuc.
- 24 Can oge me hongot, ke öbun höcö ;  
Oge me hinöbeny, ke ba at ame löng ;
- 25 Ke öbun e öünyibâúâ hia anyik úhnenamö,  
Me ca weny bi hnök hna únö ;
- 26 Oge me he bi inya ka hlumâ anyibun vec ;  
Me úhiö e ka o köbun ot ;
- 27 E ka o köbun ot helâ me weneú,  
E ka o köbun vec helâ me höu ;  
E ka o köbun vec me hmak.
- 28 Me adre me he ka tenge könnya, ke oge me ca he bi nya ka thu ;  
Adre me he ka elölöm nya, k' adre me ca he ka o nya :

TA JE VEJEC 2, 3.

- 29 Anyin adre me hûkötö he ka wâhmak-  
hmeto,  
K' adre me ca úca he ka outö Iehova :  
30 Ke adre me ca wedra anyik musi ;  
K' adre me hmiödra hia hnok hna  
únö ;  
31 Anyin a wale adre me he ka an wan  
hwakecidra bi,  
K' ame he ka sekudra hnen anyidra bi  
bibihwakecin .  
32 Anyin adre me he ka hling' ödra hnen  
ihwiöiny tavat ae ba hnyekudra bi,  
Ke ame he ka hi' ödra hnen sot anyin  
tavat ae monu.  
33 Ke haba at ame ling nya me ame he ka  
laba khötkic,  
Me laba wia, me ca outen únyi ae kong.

HNYIMAKAN 2.

- N**ÖKUK lö, u je ne he ka kap hok ta  
je hofuc,  
Me ip unyâm anyik ta je hnanyibu ;  
2 M' u ma tevehlöng metâ,  
Me hnyokâ he ka wâhmakhmeto ;  
3 Eke, u je ne hawâ metâ,  
Me hongot ka wâ únykúme ;  
4 U je ne elâm e helâ me sileva,  
Me elâm e helâ me tang omjeú adre  
ikhâlâ ;  
5 Awe, u me he ka wâhmakhmetoâ hwa-  
kecin ot kö Iehova,  
Me khanö u bi Khong.  
6 Anyin a Iehova ame ham metâ ;  
Ke únyi hnyi hnyimen ame o wâhmak-  
hmeto me wâ únykúme :  
7 E ame ip metâ ae so hobi kâu tavat ae  
wisa,  
E thibi becin tavat adre me he, ke ba  
hnyikongudra ;  
8 Me me he ka wâ je gethen deny hna  
owisa,  
Me tuö gethen deny anyin wakap.  
9 Me u me he ka wâ únykúme wisa, me  
hna owisa,  
Me únyi ae úcú, me je gethen hia ae so.  
10 Anyin ame he metâ ka dit eú hnyi  
hnyekom,  
K' ame he ka senem bi ka hanom wâ-  
hmakhmeto ;  
11 Ame he ka ö u hnen únykúme,  
K' ame he ka tuö u hnen wâ úny-  
kúme :  
12 Me me omeli u únyi hnyi gethen ae  
kong,  
Únyi ge at ame úkhin fuc ;

- 13 Tavat adre me hna degecâ je gethen  
deny wisa,  
Me vheno bi je gethen deny menekho-  
lom ;  
14 Tavat adre me senyin he ka ânyâ hulö,  
Me hobâ hwegien hwakecin ae kong ;  
15 E hâu dedra ta je gethen,  
Ke ödra hwali hnyi anyidra je gethen :  
16 Me he ka tuö u ge momo kanyua,  
Wale momo kanyua, at ame fuc útakú ;  
17 At ame hna degecâ at úne kâu ke tiga  
hlu,  
Me hnying hna úhinyköu me Khon-  
gon :  
18 Anyin ame ihnyöng ka hnyi mok umen  
bi uma,  
Me deny ta je gethen ka ta je komok :  
19 Ame ca hmetu ke at ge tavat adre me  
he kâu,  
K' adre' me ca he ka o hmetu ka hnyi  
je gethen deny möt :  
20 Me u me he ka vheno je gethen deny  
tavat ae so,  
Me tuö je gethen deny tavat ae wisa.  
21 Anyin ame he tavat ae wisa ka labâ  
hnyei,  
K' ame he tavat ae ba hnyikongudra ka  
mō.  
22 Ke adre me he ka subâ degecâ tavat ae  
kong únyi hnyi hnyei,  
Ke adre me he ka ve degecâ tavat iyawö  
únyi hnyin.

HNYIMAKAN 3.

- N**ÖKUK lö, ca he ka hnying anyik hna-  
nyibu ;  
Ke hna bi hnyekom he ka tuö hnök je  
hna húna :  
2 Anyin ame he ka ou kâu hnahic,  
Me je bong ae se hia, me möt ae beú.  
3 E so e ca hia gam ibetengiö me hnathu :  
Vekiny ju li únyi e hnyi nyem ;  
Ke sihnalimen ju hnyi laulauiny hnye-  
kom :  
4 Me u me he bi ka wâ ibetengiö me laba  
wia  
Hnyi hnyimakan Khong me at.  
5 Labageju thö kö Iehova ge hnyekom ae  
bekhöt,  
Ke ca labageju bi ka hnâm hna wâ  
únykúme :  
6 Únykúme ju kâu hnyi dem ta je gethen  
hia,  
Me e ame he ka owisa dem ta je gethen.  
7 Ca oúnyihnathoâ ânyâm bi metâ ;

TA JE VEJEC 4.

- Ot ju ga Iehova, me kec dö ge hulö :
- 8 K' ame he ka hnân tang hwegien bibi-kâm,  
Me önyen bi ka je jeiâm.
- 9 Oganö Iehova thö ge je omjehem,  
Me wan a bán hnyi em ta hnyi hia :
- 10 Me me he ka ti unöngöt umâm je uma jeü,  
K' ame he ka bahihingölö ge waina ânyâm je hna hlic vine.
- 11 Nökuk lö, ca hûkotiâ bi je hna nö u ga Iehova ;  
Ke u ma ca sēnyin e ka fuc :
- 12 Anyin a Iehova ame nâ at wale e ame betenge gan ;  
Helâ me mân kamen ame nâ nokon e ame senyin kâu.
- 13 Hnahic hnen at ame wâ metâ,  
Me at ame hom wâhmakhmeto.
- 14 Anyin ae gan hmâ hwaban e hon hwabab sileva,  
Ke troban e hon gol.
- 15 E únyi hnathu e hon je penina ;  
Ke haba ta je omjeü u je ne bewem hia e ca úcú mē.
- 16 E se hia ta je bong hnyi benyin a metân ;  
Ke tang omjeü, me hna ogânâ hnyi benyin a meny.
- 17 Je gethen ae hmanenang deny ta je gethen,  
Ke hnahic deny ta je gethen hia.
- 18 Cöiny möt e, ka tavat hia adre me kât e :  
Ke hnahic tavat adre me kât hmâ e.
- 19 Iehova ame bi taben hmeledrany hnen metâ ;  
M otilâ drany hnen wâ únykúme.
- 20 Ame hmetruhmetru je dok ae dit ge hnen hna wâ tremângâ,  
Ke je úlá ame ota but únya hau.
- 21 Nökuk lö, e so e me ca he ta je únyi e ka hia hnyi hnyimákâm ;  
Kât hmâ ju metâ me hna únykúme ;
- 22 K' ame he ka lnân melen hanom,  
Me theibiny nyem.
- 23 Me u me he ka he khötkic hnyi dem gethen,  
K' ame ca he ka haú cam.
- 24 Hnyi úen u me he ka mokut u me ca he ka ot :  
Eke, u me he ka mokut, k' ame he ka hnebwia hnâm hna mokut hnying.
- 25 Ca he bi ka outen únyi hnân ie outen,

- Me hna okongoâ anyin tavat ae kong e ka o but :
- 26 Anyin a Iehova ânyâm hna gejon,  
Ke e ame he ka tuö li cam wâ e nye hnok.
- 27 Ca behânâ so ge tavat ae úcú he ka kap e,  
A ne khanö u he ka ânyâ.
- 28 Câ ha bi ka waem, ka habe, Mē he thö,  
ke u hmetu thö,  
Ke nyi oge me he ka ham ;  
Ke ka e bi únyi unyâm.
- 29 Ca vak únyi ae kong ka waem,  
Anyin a e ame laba hnahic unyâm.
- 30 Ca iwatretra baú me waem,  
E ka ba únyi ae kong e ame ânyâ köu.
- 31 Ca behnyökâ bi at úokonguny,  
Ke ca úca bi deny ke gethen.
- 32 Anyin ae ikiki Iehova ge at ae hwali hwakecin :  
Ke e unyin tavat ae wisa anyin úsabâ ae iyong.
- 33 E bi hnyi uma umen at ae kong hnaúhangö únyi ga Iehova ;  
Ke e ame ohnahicâ uma umen at ae wisa.
- 34 E hnathu, e ame hlumâ tavat úhlu-möny,  
Ke e ame ham betenge baú ka tavat ae úhnyúkong.
- 35 K' ame he tavat ae metâ ka hu hmanenang ;  
Ke haba tavat ae monu adre me he ka hom bi hmehma.

HNYIMAKAN 4.

- L AKUK lö, löng ju hna úne hnen at ae hu lakon,  
Tevehlöng ju me wâhmakhmetoâ.
- 2 Anyin a inya oge me nâ soi öbun ;  
Ca hna dogecâ bi anyik hnanyibu.
- 3 Anyin a inya nöku cica ehac,  
Iny mita me oúnykúm a khaca kö bai.
- 4 Ke e ame nö nya, me ha könja, ka habe,  
Kât ju hok ta je hofuc ge hnyekom ;  
Tuö ju anyik ta je hnanyibu me u me mot :
- 5 Bi metâ thö, bi wâhmakhmeto thö ;  
Ca hnying bi, ke ca saú bi ge ta je hofuc únyi hnyi hnyimök :
- 6 Ca hna degecâ bi, me e ame he ka tuö u ;  
Betenge ju gan, me e ame he ka omeli u.
- 7 E beónua metâ : bi metâ thö :



TA JE VEJEC 5.

- Eke, bi wâhmakhmeto thö, tha e me ta je únyi u je hom.
- 8 Oúnyihnthoá thö e, me e ame he ka ogöranyi u :  
K' ame he ka oganö u, u ka he ka deluá e.
- 9 E ame he ka obicö u ge korona ae hmanenang,  
Me ham köu hnabinybak ae mec.
- 10 Nökuk lö, löng ju, me kap ju hok ta je hofuc ;  
Me me se hia ta je hunainy ányâm möt.
- 11 Oge nö u hnyi deny metá ;  
Oge me su u hnyi je gethen deny wisa.
- 12 U ka he, ame ca he ka hnek hnâm ta je hna okca ;  
Ke u je ne wadring u me ca he ka haú.
- 13 Kát hmâ ju hna únö ; ca hna :  
Tuö ju e ; anyin a wale melâm.
- 14 Ca dit ka hnyi gethen deny tavat ae monu,  
Ke ca he hnyi gethen deny tavat ae kong.
- 15 Sákâú but gan, ca vhenö e ;  
Hwiö thö únyi hnyin, ke ie he thö.
- 16 Anyin adre me ca mokut ödra ka ca ányâ hulö ;  
Ame hia but hnödra bemokut ödra ka ca othöá keihen.
- 17 Anyin adre me han aretoiny hulö,  
Me ijem wainainy úkonguny.
- 18 Ke haba gethen deny tavat ae wisa me helâ me melam ae hadröngöc,  
Ame melam tot ke ne o but jebigö.
- 19 Haba gethen deny tavat ae monu me helâ me menekholom :  
Adre me ca wâ bi únyi adre thö hnyin.
- 20 Nökuk lö, löng ju hok ta je hofuc ;  
Ta ju hnyikönyâm ka hok ta je uthofuc.
- 21 E so e me ca he ka hia hnyi hnyimâkâm,  
Tuö ju ta je únyi e eú hnyi wanben hnyekom.
- 22 Anyin a wale melen tavat adre me wâ ta je únyi e,  
Me tang hwegien unyin hia.
- 23 Ti tuö wia ju hnyekom ;  
Anyin ame o but möt únyi e.
- 24 Degec ut hwali únyi hnyi hnyimâm,  
Ke úsákâúöâ but möu li esongot ae úkhin fuc.
- 25 Bwele wisa ju li emákâm,  
Ke so ame he wan li emákâm ka bwele cici u.

- 26 Okhabalavá deny li cam,  
Me me tethmâ dem ta je gethen hia.
- 27 Ca saú bi ka hnyi ke keihen metá me me :  
Oc ut cam únyi hnyi hulö.

HNYIMAKAN 5.

- N**ÖKUK lö, löng ju ka anyik metá ;  
Ta ju hnyikönyâm ka hnök hna wâhmakhmeto :
- 2 Me me he ka hu gam hna únykúme,  
K' ame he li esongodâm ka tuö wâ únykúme.
- 3 Anyin ame khukhula hani únyi hnyi esongodiny momo kanyua,  
Ke menyik hnyimen hon wakaco :
- 4 Ke haba obiny gan, me hiny helâ me khöhlöng,  
Ke so hwan helâ me hele vat a lo homakan.
- 5 Ke ame utut li can ka hnyi mok ;  
K' ame kát hmâ hedis hnen je hna okca ;
- 6 Waleling me me ca wâ bi dok ae tha hon hnen momo eling, hnyi gethen deny möt :  
K' ame hwihwiö deny je gethen, ke ca khana bi.
- 7 Ke walang ang, lakuk lö, ling nya ju,  
Ke ca saú bi ge ta je hofuc únyi hnyi hnyimök.
- 8 Oúsákâúöâ but me, dem gethen,  
Ke ca hakekenyâ hwanumen uma :
- 9 Wâ u nye ham hmaem ka ke je hnyat,  
Me ta je hunaiâm ka tavat adre beovecâ :
- 10 Wâ e nye he ta je atkanyua ka unöngöt ge tang hwegiâm ;  
Ke e biju hnyi uma umen ke at bi hnâm hna huliwa ;
- 11 Ke u je mâng hnyi obiny jut,  
Hnyi úen ame aú but utiöiâm me unyâm,
- 12 Ke u me he ka ha, ka habe, Nakaik ge hna úne oge hmiök,  
Me hna unö a höciâ ge hnyekuk ;
- 13 Ke oge me ca löng ifuciny tavat adre me nö nya,  
Me ca tevehlöng tavat adre me úne könya !
- 14 Oge ne he but hnyi ta je monu hia,  
Unyin tavat adre tha laba, me úkhaca-köu.
- 15 Ijem dö an u je ka hiny,  
Me köiö ame di únyi hnyi belâm bi an.

TA JE VEJEC 6.

- 16 Hawa, e so e ve di ehë ânyâm ta je pupua,  
Me ânyâm je wagewe eû hnyi ta je gethen ?
- 17 E so e hake hobi kôu bi ta je únyi e,  
Ke ca hobi kâu bi ta je atkanyua a tha ödra möu.
- 18 E so e hnahic ânyâm pupua,  
Ke tha senyin dö me âiân ânyâm hidröu.
- 19 Helâ me aila wale amo hnyok so, me gotiny hnyot ae kese,  
E so e seköm ge li basin hnyi je únen hia;  
Ke u me he ka senyin gan hmâ bala ge hna betenge gan.
- 20 Anyin a ieu, nökek, u me he ka senyin ge momo kanyua,  
Me deluâ úlainy ke momo kanyua ?
- 21 Anyin ae cico li emakö Iehova ta je gethen deny at,  
Ke e ame tuluto deny ta je gethen hia.
- 22 Ame he ka hnok at ae kong hnen hwakecin bi ae kong,  
Ke adre me he ka noc e ge je töiny bi anyin hulö.
- 23 E ame he ka mok can ae ba úne gan ;  
Ke e ame he ka he monu hnen anyin hwen monu ae gan.
- 8 Ke ba homakan, ke ba at ame musö,  
Ke ame penapena an jeû hnyi honiva-keny,  
K' ame sukhöünö an jeû hnyi únen menu.
- 9 Úsenyin lö, u me he ka mokut ke ne o but kehö ?  
Ie únen u me he ka höhöi thö úhem hnyi hna mokut ?
- 10 Mē na mokut ju, mē na ta mokut,  
Mē na hūkâlâ li hnyamâm me mokut leleú :
- 11 Waleling me me o kôu theduoc helâ me ioiny at hûgúnâ,  
Ke ba jeu, helâ me at ame hom omjehen vat.

HNYIMAKAN 6.

- N**ÖKUK, u je ne tot me hwaban hânâm,  
Ke u je ne úkhöü hnyam hobi kâu atkanyua,
- 2 Wale u je nuc u hnen ta je hofuc únyi hnyi hnyimâm,  
Me hnok ut hnen ta je hofuc únyi hnyi hnyimâm.
- 3 Walang únyi u me he ka ânyâ, nökek, me omeli u bi,  
Anyin a u je o ka hnyi hnyamen hânâm ;  
He thö, oúhnyúkongi u bi, ke újengö thö hânâm.
- 4 Ca he ka mokut,  
Me ta mokut.
- 5 Okhulu u but helâ me zebi hnyi hnyamen at hnuk meno,  
Ke meno ame gâ únyi hnyi hnyamen at ame töu hnewe.
- 6 Úsenyin lö, he thö ka wahajö ;  
Wâ ju ta je hwakecin, m' u ma metâ but :
- 7 Ke ba at owisa kâu,
- 12 Haba at ae únyi baú, a at ânyâ hulö ;  
Me e ame hwege hnyimen ;
- 13 E ame atmemâkâ, k' ame fuc hnen li can.  
E ame kû hnen je banyen ;
- 14 Eú hnyi hnyekon hwali, k' ame labö vak únyi ae kong ;  
E ame okúâ iwatretra.
- 15 Anyin a wale ame he ka ie o úokonguny kâu ;  
E ame he ka ie oamamâ but, ke ba eny.
- 16 Walang ta je únyi a siks ame ikiki gan Iehova ;  
Eke, e hu seven e ame hmiân, ka habe,
- 17 Bi gan, me bohmen at ame thoi,  
Me li hnyam ame hingâlâ dra ae ba hnyikongon ;
- 18 Me hnyok ame únykúme bibihwakecin ae kong,  
Me li can ame wadring ka hnyi hulö ;
- 19 Me at bi fuco wale at ame ha je thoi,  
Me at ame okúâ iwatretra ka hnyat me lakeiny.
- 20 Nökuk lö, tuö ju hna húna hnen kâ-mâm,  
Ke ca degec bi hna úne hnen hinyâm :
- 21 Ca bala ju hnyi hnyekom,  
Kinyâ ju hnyi nyem.
- 22 U je ne he, e ame he ka su u ;  
U je ne mokut, e ame he ka tuö u ;  
U je ne hmak hmetu, e ame he ka úhnenamö möu.
- 23 Anyin a haba hna húna, me wale lamepa ; ke haba hnanyibu, me wale melam ;  
Ke haba hna nâ me me metâ, me wale gethen deny möt :
- 24 He ka tuö u ge momo ae kong,

TA JE VEJEC 7.

- Ūnyi ge útakūiny bohmen momo kanyua.  
 25 Ca behnyekom eū hnyi hnyekom anyin hmanenang;  
 Ke so ame ca omonu u hnen bademakan.  
 26 Anyin a ong jeū thibi āu ka at, can momo hnyi gethen:  
 Ke haba āiān ke бага wale at ame bi ūnyi monu, ame noc hanu ae ūnyi hnathu.  
 27 Hawa, e khana at he ka hok meic ka hnyi ūlainy,  
 K' ame ca he ka hlā anyin ūkhaū?  
 28 Hawa, e khana at ka uto je walep ae mōt,  
 K' ame ca he ka hlā li hnyeūcan?  
 29 Ke helāe at ame he ka āiān ke at;  
 Ame ca he ka ba hwaban ka at ame kālā momo e.  
 30 Adre me ca labō hmiōdra at venōu, ame ne venōu bi  
 Me me sekon hnyekon, anyin ae meki-hnānem:  
 31 Ke ōdra ka kāt e, e ame he ka oseven bi hwaban;  
 E ame he ka ham hia ōnyen umen uma.  
 32 Ke haba at ame bi ūnyi monu me momo, e at ae ba hnyekon;  
 E ame ānyā ke ūnyi wale ame he ka ohia hanon bi.  
 33 E ame he ka hu aat, me hmehma;  
 Ke adre me ca he ka kot degecā hna haikongoā e.  
 34 Anyin u haba ciā, wale at ame ohmōnyinā at;  
 Ke e ame ca he ka betenge hnyi bong bi hwaban.  
 35 E ba hwaban e ame he ka kap,  
 Ke u je ne ham kāu ta je bwihlany ae se hia, me e ame ca he ka so hmetu bi.

HNYIMAKAN 7.

- N**ŌKUK lö, tuō ju hok ta je hofuc,  
 Ke ip ju unyām hnök ta je hna hūna.  
 2 Tuō ju hnök je hna hūna, m' u me mōt bi;  
 Ke anyik hnanyibu helā me wan li emākām.  
 3 Ca ju ka hnyi je banyām;  
 Sihnalimen ju hnyi laulauiny hnyekom.  
 4 Ha thō ka metā, ka habe, Hanik u;  
 Ke hawā thō wāhmakhmeto me ha, ka habe, Waek:  
 5 Me me tuō u ge momo kanyua,  
 A atkanyua ame útakū ge hwan ta je hofuc.  
 6 Anyin a oge me selat hnyi hna pewan,  
 Hnyi mamalaminy umök uma;  
 7 Me oge me wā unyin tavat ae ba hnyekudra,  
 Ke wā bi eū unyin je thōth  
 Ke hidrōu ae ba hnyekon,  
 8 K' ame he hnyi gethen hakekeny hnyekhutuiny momo,  
 Me e ame vheno gethen ka hnyi umen uma;  
 9 Wale hnyi hauhaotreng, hnyi sahaç,  
 Hnyi hnyinghet ae lit, ke menekholom hmōnyin.  
 10 Me wā bi, ke momo ame ūkhanō mē,  
 K' ame khavā khaūen momo hnyi gethen, ke hnyok thoi.  
 11 A momo ae fuc bebehu, ke beānyā weny;  
 K' ame ca laba li can hnyi hnyaban:  
 12 Haba ūen ang, me eū hnyi gethen,  
 haba eāu me eū hnyi je hnaudrā,  
 K' ame tue hnyi ta je hnyekhutiny,  
 13 Me haba momo ame kāt e, me ūci-mhnyimak mē,  
 K' ame ca hmehma bi hnyimakan, k' ame ha kāu, ka habe,  
 14 E bi unyik je hudiny ole;  
 Oge hia but thamūā anyik ta je khōbi hnyi bong ang.  
 15 Anyin a wale oge me o but he ka ūkhanō möu,  
 He ka elām hnyimākām, me oge me ō u ju.  
 16 Oge hia but ulolo je kubō hon hnök hna mokut,  
 Mano ae se se hia hnalimen ūnyi Aigupito.  
 17 Oge hia but hū hnök hna mokut  
 Ge muro, me aloe, me kinamo.  
 18 Aiō u, ame he ka sekutu ge ibetengiō ke ne o but ame lany dö,  
 Ōtu me he ka hobā ibetengiō.  
 19 Anyin ae hia but бага hnyi uma,  
 E a he but ka hnyi dok ae sākāū:  
 20 A hia but hom tang mone;  
 Ke e ame he ka hmetu e ka bekhöt ut tehi.  
 21 Ke haba momo ame osaūā e hnen anyin ta je hofuc ae iyawā,  
 E ame lelō e hnen útakūiny li esongodiny.  
 22 Me ame ie he hoton,  
 Helā me bolok adre me he ka hlingā,

TA JE VEJEC 8.

- Ke helâ me at ame monu, wale adre  
ca, m' adre me nâ e :
- 23 Ke ne o but adre me dâcâ akiny ge  
fana ;  
Helâ me meno ame logot ka hnyi  
hnewe,  
Ke ca khana a g' adre me mekiny.
- 24 Ta je lakuk lö, ling nya ju walang ang,  
Ke tevehlông ju ta je hofuc únyi hnyi  
hnyimök.
- 25 Ca saû bi hnyekom ka hnyi deny je  
gethen,  
Ca he monu bi hnyi deny ta je gethen.
- 26 Anyin a e ame othöâ tavat ae se hia  
adre me aat ut gan :  
Eke, haba ta je haniny me utbavat ae  
hwege.
- 27 Gethen ame he hedis ai umen uma,  
Ame ihnyöng ka hnyi je hnyeuleny  
mok.
- 12 Inya, a metâ, oge hia but ip wâ trema-  
ngâ hnân dok oge me laba hnyin,  
Oge me elâm wia wâhmakhmeto, ke  
hna ânyâ ae úcú.
- 13 Haba ot kö Iehova, me wale he ka  
hmiân hulö :  
Ke haba bi gan, ke begörany, ke gethen  
ae kong,  
Ke hnyem ae hwali, me wale je hûkö-  
tiânök.
- 14 E unyik wâ bongon, me úne ae wisa :  
Inya bi wâhmakhmeto ; e hu manik.
- 15 Haba je than me adre me musi bi únyi  
gak,  
K' ame owisa hnen ta je taben.
- 16 Únyi gak ame musi je taben,  
Me tavat ae beönua, me tavat owisa  
hia eang hmelen.
- 17 Inya oge me betenge gadra adre me  
hnyok kõnya ;  
K' adre me he ka õ nya tavat adre me  
elâm hwegiö nya.
- 18 E unyik omejeú, me hmanenang ;  
Eke, je omjeú ae tethmâ, me hwakecin  
ae wisa.
- 19 E so anyik wan hon gol, eke, hon gol  
ae so ;  
Me anyik troban, hon sileva ae so.
- 20 Inya oge me vheno gethen ae wisa,  
Hnyi wanben je gethen owisa :
- 21 M' oge me he ka otreni ödra ge omjeú  
adre me hnyok kõnya,  
M' oge me he ka öunöngötâ umödra je  
uma omjeú.
- 22 Iehova ame tren inya, hnyi hwân deny  
je gethen,  
Ke tiga ba anyin huliwa kâú adrem.
- 23 Adre otilö nya kâú adrem bala, hnyi  
hwân,  
Hnyi úen ae tiga ba bi hmeledrany.
- 24 Adre hnöku nya, ke tiga ba bi dok ae  
dit ;  
Hnyi úen ae tiga ba pupua ae unöngöt  
ge köiö.
- 25 Adre hnöku nya ke tiga ca otilá ta je  
bucen,  
Ke tiga ba bi je dok ae hut :
- 26 Hnyi úen ae tiga ca op kânâ, me hnyot,  
Me sesâiny kânâ a bán, eang hmelen.
- 27 Hnyi úen e ame penapena drany, inya  
but ling :  
Hnyi hnen hna tuluto wathelaba hon  
köiö :
- 28 Hnyi úen e ame otethmâ ta je úlá ethö :  
Me hwegiâ je pupuainy dok ae dit :
- 29 Hnyi úen e ame bi hnyigöulen köiö

HNyimakan 8.

- H**AWA, ame ca hongot bi metâ,  
Ke fuc göranyai wâhmakhmeto ?
- 2 E ame tot hon je dok ae görany hnyi  
gethen,  
Ke hnyi je dok ame iouny hnyin je  
gethen ;
- 3 Hnyi je homagöule, hnyi hna dit ka  
hnyi taun,  
Ke hnyi hna dit ka hnyi je hwanuma,  
e ame kuku, ka habe,
- 4 Tavat lö, inya oge me haw' öbun,  
Ke hobi kâú lakon at bi ifucik.
- 5 Öbun tavat ae ba hnyekubun lö, Wâ-  
hmakhmeto ju wâ wia ;  
Ke öbun tavat ae monu, wâ únykúme  
ju öbun.
- 6 Löng ju, anyin oge me he ka ha ta je  
hofuc ae beönua ;  
Oge me he ka khöng li esongodik he  
ka ha ta je hofuc ae wisa.
- 7 Anyin ame he hnyimök ka ha hnathu ;  
Ke ikiki hulö ka li esongodik.
- 8 E wisa hia ta je hofuc únyi hnyi hnyi-  
mök ;  
E ba ke ong hwali me monu hnyin.
- 9 E ti manen hia ka at wâhmakhmeto,  
Ke wisa bi ka tavat adre me wâ metâ.
- 10 Kap ju hnök hna úne ke ca kap sileva  
bi ;  
Ke metâ, hon gol ae so.
- 11 Anyin ae so metâ hon ta je penina ;  
Ke ca úcú mē ta je únyi hia adre me  
wedra.

TA JE VEJEC 9, 10.

- Me me ca he je köiö ka hanyâûâ hnen  
hna hûna :  
Hnyi ûen e ame bi taben hmeledrany :  
30 Oge me laba unyin ling, inya ke taben  
huliwa :  
E ame senyin gak hnyi je bong,  
Ke oge me hobâ bala hnyi hnyimakan ;  
31 Me hobâ hnyi hmeledrany adre me  
labâ ;  
Ke haba anyik senyin ae gan wale  
unyin lakon tavat.  
32 Anyin a wale, lakuk lö ling nya ju  
walang ang :  
Anyin ae hnahic tavat adre me tuö dek  
ta je gethen.  
33 Löng ju hna ûne, me metâ but,  
Ke ca hücö bi.  
34 Hnahic hnen at ame hling nya,  
At ame hmâkâ hnyi je homagöulek  
hnyi ta ogö bong,  
At ame tue hnyi uthwanumök.  
35 Anyin a haba at ame ö nya, me ame  
wâ möt,  
K' ame he ka hu gan ibetengiö ûnyi ga  
Iehova.  
36 Ke haba at ame haû bi gak, me e ame  
okongoâ hanon bi :  
Ke haba tavat adre me hûkötio nya,  
me adre me hnyok mok.

HNYIMAKAN 9.

- H**ABA metâ ame hia but op umen  
uma,  
A hia but delâ anyin je hmolom a  
seven :  
2 A hia but hlingâ haleny ta je meno ; a  
hia but ûhaniken anyin waina ;  
A hia but laulau.  
3 A hia but kunâ anyin wahlu, k' ame  
hongot  
Hon je dok ae görany hnyi taun, ka  
habe,  
4 Ewa at ae ba hnyekon, saû ju ang :  
Ke haingen ka at ae ba ûnykûme, ka  
habe,  
5 Ai öbun, me hnyi an ök jeû,  
Me ijem anyik waina oge me ûhaniken.  
6 Soju, öbun tavat ae ba hnyekubun, m'  
öbun e möt ;  
Me vhenö gethen deny wâ ûnykûme.  
7 Haba at ame thawâ at ame hlumö at,  
me ame he ka hmehma bi ;  
Ke haba at ame nâ at ae kong, me ame  
he ka hu monu.

- 8 Ca nâ at ame hlumö at, wâ e nye he ka  
hmiön u :  
Nâ thö at ae metâ, me e ame he ka  
betenge gam.  
9 Nâ thö at ae metâ, me e ame he ka  
metâ tot :  
Nâ thö at ae wisa, me e ame he ka  
bihanen anyin ûne.  
10 Haba ot kö Iehova, wale hwân metâ :  
Ke haba he ka khana At ae Kap, wale  
wâhmakhmeto.  
11 Anyin ame he ka osehia bongom ta je  
bong ûnyi gak,  
Me ame he ka bihanen je hunainy  
ânyâm möt.  
12 U je ne metâ, hobi köu bi metâ :  
U je ne hlumö at me, u me he ka hake  
wâ troban.  
13 Haba momo ae monu ame fuc bebehû ;  
E at ae ba hnyekon, ke ca khana ta je  
ûnyi.  
14 E ame laba hnyi hwanumen umen uma,  
Hon tap hnyi je dok ae görany hnyi  
taun,  
15 He ka hawâ tavat adre me he,  
Wale adre me he wisa hnyi dedra je  
gethen ;  
16 Ewa at ae ba hnyekon, hamen he ka  
saû eang :  
Ke haingen ka at ae ba hnyekon, ka  
habe,  
17 E hnebwia köiö adre venâu,  
Ke kese bi jeû adre an duöngâ.  
18 Ke e ca khana a wale hnen ta je komok ;  
Me haba tavat adre me mē laba hnyi  
umen uma wal' ödra bi hnyi je dok  
a diliny hedis.

HNYIMAKAN 10.

- T**A je vejec anyi Solomona.  
Haba nokon ae metâ ame osenyinâ  
kamen :  
Ke haba nokon ae monu ame oveçâ  
hinyen.  
2 E ba troban uma omjeûiny hwakecin  
ae kong :  
Ke haba hwakecin ae wisa, wale ûhö-  
meli ûnyi hnyi hna mok.  
3 Ame ca he Iehova ka omekihnânemâ at  
ae wisa hwakecin :  
Ke e ame hna degeçâ weny at ae kong.  
4 Ame he ka ba ta ûnyi ge at ame huliwa  
me hnyam ae hwen hücö :

TA JE VEJEC 11.

- Ke haba hnyamen at ae hwege huliwa  
ame he ka tren omjeû.
- 5 Nokon ae metâ at ame úkhôúnâ hnyi  
honivakeny :  
Ke haba at ame mokut hnyi úen menu,  
me wale nokon at ame ohmehma.
- 6 Ame laba je hnahic hon ban at ae  
wisa :  
Ke haba hnyimen at ae kong ame  
ikhâlâ úkongun.
- 7 E so he ka únykúme ka at ae wisa :  
Ke ame he ka bobot ien at ae kong.
- 8 Ame he at ame hnyok metâ ka kap ta  
je hnanyibu :  
K' ame he ka ta at ae monu ifucin.
- 9 Haba at ame vheno wisa, me ame he  
khôtkic :  
Ke ame he ka manen at ame ohwalö  
deny ta je gethen.
- 10 Haba at ame úatmemakö, me ame okúâ  
vec :  
K' ame he ka ta at ae monu ifucin.
- 11 Pupuainy möt hnyimen at ae wisa :  
Ke haba hnyimen at ae kong, me ame  
ikhâlâ úkonguny.
- 12 Haba hmönyin, me wale at ame okúâ  
iwatretra :  
Ke ibetengiö ame tube ta je hulö hia.
- 13 E manen dut metâ hnyi hnyimen at  
ame wâ únykúme :  
Ke hu osö hobi kâu jon at ae ba hnye-  
kon.
- 14 Haba tavat ae metâ, adre me hitangen  
wâhmakhmeto :  
Ke haba hnyimen at ae monu ame  
hakekenyâ úkonguny.
- 15 Haba tang omjehen at ae tren omjeû,  
me, anyin taun ae hwege :  
Ke haba úkonguny anyin at ae ba ta  
únyi, me ba anyidra omjeû.
- 16 Haba huliwa anyin at ae wisa, me ame  
oâ möt ;  
Ke haba troban at ae monu, me hulö.
- 17 Haba at ame tuö hna nâ e, me ame  
laba hnyi gethen deny möt :  
Ke haba at ame degec hna nâ e, me  
ame hâu bi.
- 18 Haba at ame oiyongâ úöhúkoti, me  
ame thoi hnyimen ;  
Ke haba at bifuco, me wale at ae monu.
- 19 E ka se hia hofuc, me ca ba hulö :  
Ke metâ at ame noc bohmen.
- 20 Sileva ae so li esongodiny at ae wisa :  
Ke thatúnyi hnyekon tavat ae monu.
- 21 Haba li esongodiny at ae wisa me ame  
hân tavat ae se :
- Ke a mok ut tavat ae monu anyin ae  
ba hnyekudra.
- 22 Haba hnahic únyi ga Iehova ame ohuâ  
omjeû,  
Ke e ame ca vecâ.
- 23 Helâke walak ka at ae monu he ka  
ânyâ hulö :  
Ke helâe minya metâ ka at ame wâ  
únykúme.
- 24 Haba hna outen hnen at ae kong, me  
ame he ka aat kâu :  
Ke ame he ka ham weny at ae wisa.
- 25 E ka o höu, me ame he ka hia at ae  
kong :  
Ke hu taben nyiele balua at ae wisa.
- 26 Haba at ae hwen höcö ka at ame kunâ e,  
Me úcú me vinega ka nyu, me hai ka li  
ecmak.
- 27 Haba ot kö Iehova, ame osehia ta je  
bong :  
Ke adre me he ka owakhaletâ ta je  
hunainy tavat ae kong.
- 28 Hnân osenyinâ gejon anyin tavat ae  
wisa :  
Ke ame he ka hia geju anyin tavat ae  
kong.
- 29 Haba gethen de Iehova, wale hnabâ ka  
tavat ae wisa ;  
Ke úokonguny bi ka tavat adre me  
ânyâ monu.
- 30 Adre me ca hom degecâ at ae wisa nyiele  
balua ;  
Ke ame ca he bi tavat ae kong ka labâ  
hnyei.
- 31 Haba hnyimen at ae wisa me ame oâ  
metâ :  
Ke adre me he ka subâ degecâ bohmen  
at ae hwali.
- 32 E khana but li esongodiny at ae wisa  
únyi ae úcú ;  
Ke haba hnyimen at ae kong me ame  
ha hwali.

HNyimakan 11.

- I**KIKI kö Iehova tulut uhni ae iyawö ;  
Ke e ame senyinâ tulut ae ti wisa.
- 2 E ka o but bi gan, me ame o but hme-  
hma :  
Ke e unyin tavat ae hnyikânâ bi, metâ.
- 3 Ame he hwakecidra ae ba hnyikongon  
ka su tavat ae wisa :  
K' ame he hwakecin ae hwali ge tavat  
ae kong ka ohî' ödra.
- 4 E ca únyi hnathu omjeû hnyi úen hmö-  
nyin :

TA JE VEJEC 12.

- Ke haba hwakecin ae wisa me wale úhömeli únyi hnyi hna mok.
- 5 Ame he hwakecin at ae wisa ae ba hnyikongon ka kú deny gethen :  
K'ame he at ae kong ka ta ge anyin bi hulö.
- 6 Ame he hwakecin ae ba hnyikongon anyin tavat ae wisa ka omeli ödra :  
K'ame he ka hnok tavat adre me ányá iyawâ hnen hwakecidra ae hwali.
- 7 E ka mokcu at ae kong, me ame hia but hnen hna gejon :  
K'ame he ka hia but gejon hwakecin ae kong.
- 8 Adre me omelö at ae wisa únyi hnyi vec,  
K'ame o but at ae kong ka hnyi hnen bi.
- 9 Haba hnyimen at ame ca ot, me ame okongoá waeny :  
Ke adre me he ka omelö tavat ae wisa únyi ge wáhmakhmeto.
- 10 E ka sot at ae wisa, me ame senyin taun :  
Ke ka mok at ae kong, me adre me kuku.
- 11 Adre me ogöranyâ taun hnen hnahic anyin tavat ae wisa :  
K'adre me hagutá e ge hnyimen tavat ae kong.
- 12 Haba at ame húkotiâ hanen, me ba metâ bi gan :  
Ke ame laba hnyibú at ame wâ únykúme.
- 13 Haba at ame hok hofuc, me ame omanená ta je únyi ae iyong ;  
Ke haba at ae hnathu hnyekon me ame ikhölö hofuc.
- 14 E ka ba musi ae wisa ame he ka ta but aten hnyei :  
Ke ame laba wia hnen tavat ha bongon ae se hia.
- 15 Ame he ka vec at ame tot me hwaban atkanyua :  
Ke haba at ame höcö úkhöú hnyam me ame laba khötkic.
- 16 Haba momo ae so me ame hom hmâ hna oganá :  
Ke haba tavat hwege me adre me hok omjeú.
- 17 Haba at ame betenge, me ame ányá hwakecin ae so bi káu :  
Ke haba at beovecâ me ame ovecâ unyin bi.
- 18 Ame bi huliwa iyawö hnen at ae kong :
- Ke haba at ame tâ hwakecin ae wisa me hu hwaban ae hnathu.
- 19 Haba at ame tethmâ hnyi hwakecin ae wisa me ame he ka hu möt :  
Ke haba at ame hnu hoton hulö me ame hlingâ e bi.
- 20 Hmiö Iehova ta je hnyok ae hwali :  
Ke e ame senyin ge tavat ae wisa hwakecidra.
- 21 Eja ke ne a ne ihok beny me ke at, ame ca he ka ba hwaban ka at ae kong :  
Ke ame he ka möt ta je mátrániny tavat ae wisa.
- 22 Otru gol hnyi hnyingöiny buaka,  
Momo ae ba hna únykúme ae úcú.
- 23 E hake so thibi weny tavat ae wisa :  
Ke haba úlubahing anyin tavat ae kong me wale hmönyin.
- 24 E hu at ame oveseâ anyin ta únyi, me ame gan tot anyin ta únyi ;  
Ke e hu tavat adre behaná únyi ae úcú, ke adre me he bala ka theduoc.
- 25 Ame he ka pipikhenya at ame ham baúâ :  
Ke adre me he ka hú at ame úöhüö.
- 26 Haba at ame behaná hwit, ame he tavat ka hangâ e :  
Ke ame he hnahic ka laba hon ban at ame úco e ka tavat.
- 27 Haba at ame elâm hwegiâ so, me ame elâm ibetengiö :  
Ke haba at ame elâm úkonguny me ame he ka o káu.
- 28 Haba at ame labageju ka tang omjeú me ame he ka ta :  
Ke ame he tavat ae wisa ka hlau helâ me lan úö ae hát.
- 29 Haba at ame bwebwelâ anyin lap, me ame he ka hu ang hnân jekhon :  
K'ame he at ae monu ka bi athnyabainy at ame hnyok metâ.
- 30 Haba wan at ae wisa me úöiny möt,  
Ke haba at ae metâ, me ame ohmehmela ta je hanu.
- 31 Wâ bi adre me he ka bi hwaban eang hmeledrany ka at ae wisa :  
Ke hawa bi ge at ae monu me at ae kong !

HNYIMAKAN 12.

- H**ABA at ame weny hna úne, me ame hnyok wáhmakhmeto :  
Ke hwakecin meno at ame hociâ hna ná.
- 2 Haba at ae so, me ame he ka hu ibetengiö ga Iehova ;

TA JE VEJEC 13.

- Ke e ame he ka ohnaûhangöâ at ae kong.
- 3 Ame ca he ka tethmä at ge hulö :  
K' adre me ca he ka oc degecâ iwân tavat ae wisa.
- 4 Haba momo ae so hwakecin, me korono anyin âiân :  
Ke haba momo ame ohmehma, me helâke amam but ta je jeien.
- 5 Ame ûcû ta je hna ûnykûme hnen at ae wisa,  
Ke tang iyawö je ûhnenamö anyin tavat ae kong.
- 6 Haba ta je hofuc hwan tavat ae kong, me ame ha ge dra adre me mokulec tuö :  
K' ame he ka omeli ödra ge hnyimen tavat ae wisa.
- 7 Adre me hagutâ tavat ae kong, me ame hi' ödra but :  
K' ame he ka tethmä uma umen tavat ae wisa.
- 8 Adre me he ka haisoâ at hoton anyin metâ :  
K' adre me he ka hûkötîâ at ae hwali hnyekon.
- 9 E so at adre me ca oûnyihnatho, k' ame hu athnyabainy,  
Hon at ame ogânâ e bi, ke ba an jeû.
- 10 Haba at ae wisa, me ame betenge ge haleny meno :  
Ke haba ibetengiö anyin at ae kong, me wale beovecâ.
- 11 Haba at ame belökâ kânân kânâ, me ame he ka sekon ge jeû :  
Ke ba hnyekon at ame hnu hoton ta je ûnyi baû.
- 12 Haba tavat ae kong, me adre me weny ert ûten tavat ae monu :  
Ke haba iwân tavat ae wisa me ame wan.
- 13 Ame hnok dö at ae kong ge hna hanyâ-ûâ ge li esongodiny :  
Ke ame he at ae wisa ka khulu but ûnyi hnyi vec.
- 14 Ame he at ka sekon ge so hnen wan hnyimen bi :  
Ke haba troban li hnyamen at, me ame he ka hmetu kâu.
- 15 Haba gethen deny at ae monu, me ka wisa bi kâu :  
Ke metâ bi at ame löng hna une.
- 16 Ame ie manen hmönyin anyin at ae monu :  
Ke ame tube hmehma hnen at ae metâ.
- 17 Haba at ame ha hnathu, me ame omanená wisa,  
Ke haba at ame ohnathoâ thoi, me ame omanená iyawö.
- 18 E hu tavat adre me ie fuc, helâke adre dâ ge hele vat :  
Ke haba bohmen at ae metâ, me hnân ometo.
- 19 Haba esongot ae hnathu, me ame he ka tethmä nyiele balua :  
Ke helâ me hna thuthubademak bohmen ae thoi.
- 20 E hu iyawö eû hnyi hnyekon tavat adre me ûnykûme hulö ;  
Ke ame senyin tavat adre me ûhnenamö me me hnahic.
- 21 E ba ûnyi ae kong ame he ka o ka at ae wisa :  
Ke ame he ka unöngöt tavat ae monu ge hulö.
- 22 Hmiö Iehova ta je esongot ae thoi :  
Ke e ame senyin ge tavat adre me mâdrâ hnathu.
- 23 Haba at ame wâ wia, me e ame ikhâlâ metâ :  
Ke haba hnyekon tavat ae monu, me ame omanená hwen monu.
- 24 Ame he hnyamen tavat ae hwege huliwa ka musi :  
Ke adre me he ka kunâ üsenyin he ka ânyâ je huliwa.
- 25 Haba hlöuhlöu eû hnyi hnyekon at, me ame okhudrungo at :  
Ke ame osenyiná e hofuc ae so.
- 26 Haba at ae wisa, me ame kû gethen ka lahanen :  
Ke haba gethen deny tavat ae kong, me ame omonu ödra.
- 27 Haba üsenyin, me, ame ca le haniny :  
Ke haba wakomjeû anyin tavat, me hobi kâu bi at ae hwege huliwa.
- 28 E hu möt bi eû hnyi gethen deny hwa-kecin ae wisa ;  
Ke ba mok bi hnyi deny gethen.

HNYIMAKAN 13.

- H**ABA nokon ae metâ me ame löng hna ûne hnen kamen :  
Ke haba at ame ûhiö, me ame ca löng bi hna nâ.
- 2 Ame he at ka an so ûnyi hnyi wan hnyimen :  
K' ame he tavat iyawö ka an úokonguny.



TA JE VEJEC 14.

- 3 Haba at ame tuö hnyimen, me ame tuö bi anyin möt.  
Ke haba at ame fuc gâná me ame he ka hu hnaúhangö.
- 4 Ame weny hnen hnyekon üsényin, ke ba bi :  
K' ame he ka pipikhenya at ae hwege huliwa.
- 5 Haba at ae wisa me ame húkotiâ hofuc ae thoi :  
K' adre me ikiki at ae kong, me hnân ohmehma.
- 6 Hwakecin ae wisa ame tuö at ae ba hnyikongon eû hnyi gethen :  
Ke hwakecin ae monu ame hagutâ at ae kong.
- 7 E hu tavat adre me otre ni ödra omjeú, me ba bi :  
Ke hu tavat adre me otheduoci ödra, me gan bi omjeú gadra.
- 8 Haba hwaban möt anyin at, me ûnya tang omjehen :  
Ke ame ca löng hna ná hnen at ae theduoc.
- 9 Ame senyin melaminy tavat ae wisa :  
K' adre me he ka omoko lamepa anyin tavat ae kong.
- 10 Ame oâ iwatretra ge bigan  
Ke hu metâ ge tavat adre me kap úhnenamö ae so.
- 11 Haba omjeú adre me ie hom, me ame he ka hia tot bi :  
K' ame he ka osehia hnen at ame úkhö-únâ deny huliwa.
- 12 Haba geju adre bec ka ohwâdâ me ame omoko hnyok :  
Ke adre me ne ohwâdâ weny, me helâke úöiny möt.
- 13 Haba at ame húkotiâ hofuc, me ame okongoâ e bi :  
Ke ame he ka hu troban ge at ame outen hnanyibu.
- 14 Haba hnanyibu anyin at ae metâ, me wale pupuainy möt,  
Me me kec ge je hnewe adre me mekiny.
- 15 Haba únykúme ae so, me ame okúâ ibetengiö :  
Ke hokong gethen deny tavat iyawö.
- 16 Ame huliwa metâ hnen at ae so :  
Ke haba at ae monu me ame omanená anyin hwen monu.
- 17 Haba úthumetu ae monu me ame ta ka hnyi hulö :  
Ke haba úthumetu ae hnathu me hnyi hwegien unyin.
- 18 Ame he ka theduoc me hmehma at ame höciâ hna ûne ;  
Ke adre me he ka ogânâ at ame löng hna ná.
- 19 E hnebwia ka hnyi hnyok hna weny ae hwâdâ :  
Ke ikiki ka tavat ae monu he ka saú únyi hnyi hulö.
- 20 Tha he ju me tavat ae metâ, m' u me he ka metâ :  
Ke ame he ka iei at ame hanen tavat ae monu.
- 21 Ame he hulö ka he hoton tavat ae kong :  
Ke adre me he ka bi hwaban so ka tavat ae wisa.
- 22 Haba at ae so me ame he ka ha jekhon je laöbiny ;  
Ke adre me ip hobi kâu tavat ae wisa omjehen at ae kong.
- 23 E gan hmâ jeú hnyi hnyei iny at ae theduoc :  
Ke e hu minya hna ohia ge hna owisa ae hwali.
- 24 Haba at ame behânâ osö me ame húkotiâ nokon :  
Ke haba at ame betenge ge nokon me e ame ná e hnyi ke je úen.
- 25 Ame han me sekon at ae wisa :  
Ke ame he ka ba önyen hnyekon tavat æ kong.

HNYIMAKAN 14.

- T**A je momo ae metâ adre me ve ânyâwia ta je hnyabadra :  
Ke haba momo ae monu ame thang degecâ hnen li hnyamen bi.
- 2 Haba at ame he hnyi anyin wisa me e ame outö Iehova ;  
Ke haba at ae hwali deny gethen, me ame húkotiâ e.
- 3 E hnyi hnyimen at ae monu osöiny bigan :  
K' ame he je hnyimen tavat ae metâ ka tu' ödra bi.
- 4 A ne ba bolok, me kalaöt taben han :  
Ke se hia jeú hwaban ihwegien bolok.
- 5 Ame ca he at ohnatho ae hnathu ka thoi bi ;  
K' ame he ka ha thoi hnen at ohnatho ae ca wisa bi.
- 6 Ame heleú metâ hnen at ame úhiö, k' ame ca wâ bi :  
Ke hâhâ he ka wâhmakhmeto hnen at ame wâ únykúme.

- 7 U je ne he hnyi hnyimakan at ae monu,  
Me u me ca he ka wâ unyin bi li esongot  
ae wâ ûnykûme.
- 8 Haba metâ anyin at e so, me wale he  
ka wâ ûnykûme deny gethen :  
Ke haba hwen monu anyin tavat ae  
monu, me wale tang iyawö.
- 9 Ame hlumâ hulö hnen tavat ae monu :  
Ke e unyin tavat ae wisa ibetengiö.
- 10 E khana hnyok anyin bi vec ;  
K' ame ca he atkanyua ka hnyi hanen  
anyin senyin.
- 11 Adre me he ka hagutâ uma umen tavat  
ae kong :  
K' ame he ka hwege uma mano umen  
tavat ae wisa.
- 12 E hu gethen ae wisa hnyi hnyimakan  
at,  
Ke haba obiny e, me gethen deny mok.
- 13 Ame hmak hnyok hnyi úen adre me  
hluma ;  
Ke haba obiny senyin, me hlöuhlöu.
- 14 Ame he at ame saú hnyekon ka sekon  
ge deny ta je gethen :  
K' ame he at ae so ka sekon a ka únyi  
gan bi.
- 15 Haba at ae ba hnyekon me ame kap ta  
je hofuc hia :  
Ke haba at wâ wia me ame wâ ûnykûme  
deny gethen.
- 16 Ame ot at ae metâ, me kec ge hulö :  
Ke haba at ae monu ame bi gan, me ka  
geju kâu bi.
- 17 Haba at ame ie hmönyin, me ame he ka  
ânyâ monu.  
Ke adre me hûkötîâ at bibihwakecin ae  
kong.
- 18 Haba hwajekhon tavat ae ba hnyekudra,  
me monu :  
Ke haba tavat wâ wia me adre obicâ  
ge wâhmakhmeto.
- 19 Tavat ae kong adre me iyâú ka tavat  
ae so ;  
Ke tavat ae monu adre me iyâú hnyi je  
homagöuleny at ae wisa.
- 20 Ame hmiân at ae theduoc hnen hanen :  
Ke se hia tavat adre me betenge ge at  
ae tren omjeú.
- 21 At ae kong at ame hmiân hanen :  
Ke hnahic at ame betenge ge at ae ba  
ta únyi.
- 22 Hawa, e ca monu tavat adre me vak  
hulö ?  
Ke ame he ka hu betenge me hnathu  
ge tavat adre me vak so.
- 23 E hu troban hnyi ta je huliwa hia :  
Ke haba ifucin li esongot me ame hake  
ûötheduoci.
- 24 Haba tang omjehen tavat ae wisa, me  
anyidra korona :  
Ke haba hwen monu anyin tavat ae  
monu, me ka hwen monu bi.
- 25 Haba at ohnathoâ hnathu me ame omelö  
tavat :  
Ke haba at ame ha thoi ame okûâ iyawö.
- 26 E hnyi ot kö Iehova labageju ae hwege :  
K' ame he lakon ka hu dok hnân luba-  
duöng hnyin.
- 27 Haba ot kö Iehova, me wale pupuainy  
möt,  
M' adre me kec ge je hnewe hnân  
mekiny.
- 28 Haba hmanenanginy than, me tavat ae  
se hia :  
Ke e ka wakhalet thibi, hnân e okongoâ  
than.
- 29 Haba at ae bec he ka hmönyin, me gan  
hmâ wâhmakhmeto :  
Ke haba at ame ie hmönyin, me ame  
ogânâ hwen monu.
- 30 Haba hnyekon ae wisa me wale melen  
unyin :  
Ke haba ciâ me wale bobot ka ta je  
jö.
- 31 Haba at ame ovecâ at ae theduoc me  
ame baikongoâ At a op e :  
He haba at ame betenge ge at ae the-  
duoc, me ame ogânâ e.
- 32 Adre hagutâ hnyikânâi at ae kong hnyi  
anyin monu :  
Ke haba at ae wisa, me hu gejon hnyi  
anyin mok.
- 33 Ame laba metâ hnyi hnyekon at ame  
wâ ûnykûme :  
K' ame manen ta je únyi eú hnyi hnye-  
kon tavat ae monu.
- 34 Haba at ame ogöranyâ hnyei, me hwa-  
kecin ae wisa :  
Ke ame haikongoâ tavat hnen hwakecin  
bi ae kong.
- 35 Ame betenge than ge athnyaba ame  
huliwa metâ  
K' ame he ka hmönyin ka at ame ohme-  
hma.

HNYIMAKAN 15.

- A**DRE me thu menyikâ, me adre me  
obâ hmönyin  
Ke hofuc ae vec ame okûâ hmönyin.
- 2 Haba bohmen at ae metâ me ame ha  
wisa ge wâhmakhmetö :

TA JE VEJEC 15.

- Ke haba hnyimen tavat ae monu, me ame hingâlâ hwen monu.
- 3 Ka e bi li emakö Iehova hnyi ta je dok hia,  
E ame wâ so me kong.
- 4 Haba bohmen ae wisa, me wale ûöiny möt :  
Ke haba he ka fuc hwali, me wale hnân oamamâ hnyok.
- 5 Haba at ae monu, me ame hmiân hna úne hnen kamen :  
Ke haba at ame kap hna nâ, me ame he ka wâ wia.
- 6 E gan hmâ omjeú hnyi uma umen at ae wisa :  
Ke e hu vec ae gan hnyi troban at ae kong.
- 7 Haba li esongodiny at ae metâ, me ame khukhua wâhmakhmeto :  
K' ame ca hnyi helâe hnyekon at ae monu.
- 8 Hmiö Iehova hut anyin tavat ae kong ;  
Ke e ame senyin ge hic hijin at ae wisa.
- 9 Hmiö Iehova gethen deny at ae kong :  
Ke e ame betenge ge tavat adre me vheno wisa.
- 10 E hu hna nâ ae vec hobi kâu at ame hna degecâ gethen :  
K' ame he ka mok at ame hociâ hna nâ.
- 11 E bi hnyi hnyimakö Iehova hedis me hnaúhangö,  
Awe, ame ca he ka helâe ge je hnyekon tavat !
- 12 Haba at ame úhiö, me ame ca betenge bi ka at ame nâ e :  
E ame ka he ka he ka at ae metâ.
- 13 Haba hnyok ame senyin, me ame osoâ hnyimak :  
Ke haba hnyok ae hmak me ame ohlôu-hlôuâ at.
- 14 Haba hnyekon at ame wâ únykúme, me ame elâm metâ :  
Ke haba hnyimen tavat ae monu, me ame han hwen monu.
- 15 E kong ta je bong hia ka at ame vec :  
Ke haba hnyok ae hâhâ, me wale bijeú hnyi ta je bong.
- 16 E so e úhnyúkong hna hu tha e me ot kö Iehova,  
Hon e ka se hia ta je únyi tha e me hlohlo.
- 17 E so jekhöú a tap khölak tha e me ibetengiö,  
Hon ut bolok ame han eiö hnyuma, tha e me úöhüköti.
- 18 Haba at ae hmönyin, me ame ohuâ iwatretra :  
Ke haba at ae bec he ka hmönyin, me ame thawâ ivinö.
- 19 Haba gethen deny úsényin, me helâ me lak úö ae udedö :  
Ke adre ányâ deny at ae wisa me me hna cit gethen.
- 20 Haba nokon ae metâ, me ame osenyinâ kamen :  
Ke haba at ae monu, me ame húkotiâ hinyen.
- 21 Haba hwen monu, me wale senyin ka at ae ba hnyekon :  
Ke haba at ame wâhmakhmeto, me ame vheno wisa.
- 22 A ne ba úhnenamö, ame ca he ka hwádâ je weny :  
Ke ame otílâ e, hnen tavat úhnenamö ae se hia.
- 23 Ame senyin at ge hna thu hnen hnyimen :  
Shaiba ge soiny hofuc adre me ha hnyi úen ae úcú !
- 24 Ame ölö göranyai gethen deny möt, ka tavat ae metâ,  
Me me kec ge hedis eú.
- 25 Ame he Iehova ka oc degecâ uma umen at ae bi gan :  
Ke e ame he ka otethmâ hnyigöulen safac.
- 26 Hmiö Iehova ta je bibihwakecin ae kong :  
Ke alai ta je hofuc ae kese.
- 27 Haba at ame behnyekon omjeú, me ame omonumonoâ anyin bi lap :  
Ke ame he ka möt at ame húkotiâ ta je bwihlany.
- 28 Haba hnyekon at ae wisa, me ame únykúme hnen hna thu :  
Ke haba hnyimen at ae kong, me ame wala hofuc ae kong.
- 29 Iehova ame úsákâúö me tavat ae kong :  
Ke e ame löng hic hijin tavat ae wisa.
- 30 Haba melaminy li ecmak, me ame osenyinâ hnyok :  
Ke haba úthumetu ae so ame opipikhenya je jö.
- 31 Haba hnyiköny, me ame löng hna úne hnân melen,  
Me ame he ka tha laba me tavat ae metâ.
- 32 Haba at ame hmiân hna úne me ame ka hmiân e bi :  
Ke haba at ame löng hna nâ, me ame he ka hu úne gan.

33 Haba at ot kö Iehova, me wale hna úne hnen metá ;  
Ame bán hwakecin ae úhnyúkong, me biliny bi hna ogánâ.

HNYIMAKAN 16.

Ú NYI bi ge at hna penapena hnyok :  
Ke únyi ga Iehova bi he ka thu ge bohmen.

- 2 Haba ta je gethen hia deny at, me ka so bi kâu :  
Ke haba Iehova ame tuluto ta je hanu.
- 3 Hna but ányâm ta je huliwa kö Iehova, K' ame he ka tethmâ hnâm je hna únykúme.
- 4 Iehova ame op ta je únyi hia he ka ve hu hanymen :  
Eke, me at minya ae kong hobi kâu bong ae kong.
- 5 Hmiö Iehova tavat hia adre me bi gan :  
A ne he ke at ka ihok beny me ke at, me ame ca he ka ba hwaban.
- 6 Ame he ka hneú degecâ hulö hnen ibetengiö me hnathu :  
K' ame he tavat ka hota hulö ge ot kö Iehova.
- 7 Ame ne osenyini Iehova ge je gethen deny at  
Me e ame óusokóuâ e me je iwahnai-hmiöny mē.
- 8 E so e úhnyúkong hna tren, tha e me hwakecin ae wisa,  
Hon je troban ae gan hmâ, a tha e me hwali bi.
- 9 Haba hnyekon at, me ame únykúme deny gethen :  
Ke Iehova ame musö hnen ta je hna okca.
- 10 E beönua hofuc hnyi hnyimen than :  
Ame ca he hnyimen ka hanyáúâ hnyi hna owisa.
- 11 Haba tulut ke tulut uhni ae wisa, me li únyi anyi Iehova :  
Anyin bi huliwa ta je fao hnân tulut eú hnyin tang.
- 12 E ikiki hwakecin je than adre me ne ányâ hulö :  
Anyin ame tethmâ theron hnen wisa.
- 13 Ame senyiná je esongot ae wisa hnen je than ;  
Ke adre me betenge ge at ame ha hofuc ae wisa.
- 14 Haba hmönyin anyin than, me helâ me je uthumetu adre me mekiny :  
Ke ame he at ae metá ka omenyikâ e.
- 15 E bi möt hnyi melaminy hnyimakan than ;  
Ke haba anyin betenge me helâ me úlâiny we a biliny.
- 16 Shaiba ge soiny hom metá hon gol !  
Eke, e so he ka hu wâhmakhmeto hon he ka húce sileva.
- 17 Haba hna cit gethen deny at ae wisa, me ame saú únyi ge hulö :  
Haba at ame tuö deny gethen, me ame omelö hanon.
- 18 Ame bán bi gan, ke biliny bi hnaúhangö,  
Ke ame bán hnyok ae hop, ke biliny bi he ka ta.
- 19 E so he ka hnyok hnyikánâ tha e me tavat ae ilemuk,  
Hon he ka tha khenâ je hna söh me tavat bi gan.
- 20 Haba at ame löng hoton hofuc me ame he ka wâ so :  
Ke hnahic bi at ame labageju kö Iehova.
- 21 Haba tavat ae tren hnyok ae metá, me adre me he ka ha me tavat wâ wia.  
Ke haba hnebwiainy li esongot, me ame bi hanen metá.
- 22 Haba wâhmakhmeto, me wale pupuainy möt ka at ae hu e :  
Ke haba hwen monu anyin tavat ae monu, me ame n' ödra bi.
- 23 Haba hnyekon at ae metá ame ná hnyimen,  
Me bi hanen úne ka li esengodiny.
- 24 Haba hofuc ae kese, me helâ me hani adre tiga ca hlec,  
Ae hnebwia ka hnyi hanu, me möt ka hnyi je jeien.
- 25 E hu gethen ae wisa hnyi únykúmenen at,  
Ke haba obiny e, me gethen deny mok.
- 26 Haba behan jeú ge at huliwa me ame huliwa hobi kâu :  
Anyin a hnyimen ame újengöâ e.
- 27 Haba at ae únyi baú, me ame vak úkonguny :  
Ke e hnyi hnyimen meic ame an.
- 28 Haba at ae hwali, me ame tâ iwatretra :  
Ke haba at ame úhaiö me ame óusákáúöâ tavat me lawaedra.
- 29 Haba at úokonguny, me ame cubec waeny,  
Me lelö e ka hnyi gethen ae ca so.
- 30 Haba at ame mook, me ame únykúme ta je únyi ae hwali :  
Ke ame óâ hulö hnen at ame obuhlumo li esengodiny.

TA JE VEJEC 17.

- 31 Korona ae hmanenang ûhûen,  
K' adre me he ka wâ e hnyi gethen  
deny wisa.
- 32 E nua at ame bec he ka hmönyin, hon  
at ae hwege ;  
Ke nua at ame musö hnyekon hon at  
ame hûgûnâ taun.
- 33 Adre me khûâ leköp ka hnyi hon li  
jevan,  
Ke hamö Iehova he ka musö hia.
- HNYIMAKAN 17.
- E** SO ujeû ae atgec a tha e me laba wia.  
Hon bijeû hnyi uma hia a tha e me û.  
2 Ame he athnyaba ae metâ ka musö  
wanakat ame ohmehma,  
K' ame he ka tha hu jekhöû unyin je  
liamekeiny.
- 3 Hnân leû sileva öt, ke hnân leû gol meic :  
Ke Iehova bi at ame cubec ta je hnyok.
- 4 Haba at ae kong, me ame tevehlông je  
esongot ae thoi ;  
K' ame löng hoton bohmen ae ûoko-  
nguny bi hnen at thoi.
- 5 Haba at ame hiâ at ae theduoc, me ame  
haikongoâ At a Op e :  
K' ame ca he bi ka ba hwaban ka at  
ame senyinâ ûokonguny.
- 6 Korona anyin wahingat ta je laöbidra ;  
Ke haba hmanenanginy je wanakat, me  
ûnya lakamödra.
- 7 Hofuc ae hmanenang, ame ca ûcû ka  
at ae monu :  
Ke hawa ge li esongot ae thoi anyin ke  
taben !
- 8 Veto ae gan hwaban, bwihlany ka at  
ae hu e :  
E so troban e hnyi hna wia e ka ke dok  
me ke dok.
- 9 Haba at ame tube hna hanyâûâ, me  
ame elâm ibetengiö :  
Ke haba at ame haha ta je ûnyi, me  
ame öüsâkâûöâ tavat me lawaedra.
- 10 Ame nua dit hofuc nâ ka hnyi hnyekon  
at ae wâhmakhmeto  
Hon je hna kot a khaca haded hnyi  
knyekon at ae monu.
- 11 Haba at ae kong, me ame elâm he ka  
okûâ hna thu musi ;  
Anyin a wale adre me he ka kunâ kâu  
ûthumetu ae beovecâ.
- 12 E so at ame he ka ûkhanö me bea adre  
hugunâ lakon,  
Hon he ka ûkhanö me at ae monu hnyi  
anyin hwen monu.
- 13 Haba at ame bi hwaban so ge kong,  
Me ame ca he bi ka hia hulö hnyi  
hnyaban.
- 14 Haba hwân iwatretra, me helâ me  
adre si deny köiö :  
Anyin a wale degec ut ivinö, ka tiga  
ca kû wathethöt.
- 15 Haba at ame haiwisa at ae kong, ke at  
ame haikongoâ at ae wisa,  
Me tha hmiö Iehova hia ödru.
- 16 Hnân eû hwaban hnyi hnaymen at ae  
monu he ka ûcû metâ,  
Ke ba hnyekon bi ?
- 17 Haba waeny me ame betenge hnyi je  
ûen hia,  
Ke adre hnökoâ liamakeiny hobi kau  
bong adre me vec hnyin.
- 18 Haba at ae ba hnyekon, me ame ûkhöû  
hnyam,  
Me tot hnân hwaban hnyi hnyimakan  
waeny.
- 19 Haba at ame weny ka hanyâûâ, me  
ame weny iwatretra :  
Haba at ame ogöranyâ homagöuleny,  
me ame heleû hnaûhangö.
- 20 Haba at ame hnyok ae hwali me ame  
ca he ka wâ so :  
Ke haba at ame hwihwiö ge bohmen,  
me ame he ka ta ka hnyi ûokonguny.
- 21 Haba at ame hnokoâ at ae monu, me e  
hmak kâu :  
Ke ba senyin ge kamen at ae monu.
- 22 Haba hnyok ae hâhâ, me wale bubuny  
ae so :  
Ke haba hnyok ame blöuhlöu me ame  
ohwawacitâ je jö.
- 23 Haba at ae kong, me ame oc ut bwi-  
hlang ûnyi hnyi ûlainy,  
Hnân ohwalö deny hna owisa.
- 24 E bi metâ hnyi hnyimakan at ame  
wâhmakhmeto :  
Ke e bi li emakan at ae monu hnyi je  
can hmeledrany.
- 25 Haba nokon ae monu, me ame ovecâ  
kamen,  
Ke ûnyi ae hiny ka momo a hnokoâ e.
- 26 E ca so he ka bi hwaban ka at ae wisa,  
Ke kot je than bi can anyidrin wisa.
- 27 Haba at ame takoû hwan ta je hofuc,  
me ame wâhmakhmeto :  
Ke haba at ae menyik hnyekon, me at  
ame wâ ûnykûme.
- 28 Ame ne laba hnyibu at ae monu, me  
adre me ha me metâ bi :  
K' ame ne obuhlumo li esongodiny, me  
adre me ûnykûme me at ame wâ wia.

HNYIMAKAN 18.

- H**ABA at ame ka hake laba, me ame elâm bi weny,  
 K' ame hmönyin ge metâ hia ae so.  
 2 Haba at ae monu, me ame ca senyinâ wâhmakhmeto,  
 Ke so bi e ame omanenâ hnyekon.  
 3 E ka o at ae kong, me ame o but minya ikiki,  
 Ke haba û, me ame tha e me hmehma.  
 4 Helâ me köiö ae dit je hofuc hwan hnyimen at ;  
 Ke helâ me wagewe ame di pupuainy metâ.  
 5 E ca so he ka tha hien me at ae kong, Me ohaûâ at ae wisa hnyi hna owisa.  
 6 Haba li esongodiny at ae monu me ame he hnyi ivinö,  
 K' ame hawâ je hna kot ge hnyimen.  
 7 Haba hnyimen at ae monu, me ame ohnaûhangöâ e,  
 Ke haba hnyimen, me wale hnewe hobi kâu anyin möt.  
 8 Haba ta je hofuc hwan at ûhaiö, me helâ me je ong jeû ae hnebwia,  
 Ke adre me dit ka hnyi hnyin hnyekon.  
 9 Haba at ame bec hnyi anyin bi huliwa, E liamekeiny me at ame okongoâ.  
 10 Hnabâ ae hwege iö Iehova :  
 Ame kec ka hnyin at ae wisa me laba khötkic.  
 11 Haba tang omjehen at ae tren ta ûnyi, me wale anyin taun ae hwege,  
 Ke helâ me hak veto ae beû göranyai hnyi únykúmenen bi.  
 12 Ame bân ka bi gan hnyekon at, ke biliny bi he ka hia,  
 Ke ame bân hnyok ae hnyikânâ, ke biliny bi hna ogânâ.  
 13 Haba at ame thu ka hofuc, ke tiga ca löng wia,  
 Me wale anyin monu bi, me hnân hmehma.  
 14 Ame he hnyekon at ka hokhnyokâ anyin mok :  
 Ke haba hnyok ae hlöuhlöu bi, me ie at ame he ka hokhnyokâ e ?  
 15 Haba hnyekon at ame wâ wia, me ame bi hanen wâhmakhmeto ;  
 Ke haba hnyikönyen at ae metâ, me ame elâm he ka wâhmakhmeto.  
 16 Haba bwihlany anyin at, me ame bi hnen hobi kâu ;

Me hom e ka hnyi hnyimakan tavat ae beönuu.

- 17 Helâke wisa at ame bân hnyi anyin ivinö ;  
 Ke ame o but ke at me omanenâ e.  
 18 Haba ugleköp ame bi obiny ivinö,  
 Me oveseâ tavat hwege.  
 19 E gan huliwa he ka ohmehmela liamekeiny e ka hu jöminy, hon taun ae hwege,  
 Ke haba je ivinö eling, me helâ me je ohmäiny hnabâ.  
 20 Ame he ka sekon hnyekon at ge wan hnyimen bi ;  
 E ame he ka sekon ge ûnyi hnyi li esongodiny.  
 21 Haba mok me möt, me ame musö hnen bohmen ;  
 Ke haba tavat adre me betenge gan, me adre me he ka an wan.  
 22 Haba at ame wâ momo e me âiân bi, me ame wâ so,  
 Ke ame betenge gan Iehova.  
 23 Ame ha hofuc ae menyik ge tavat ae theduoc :  
 Ke hwege ifucin at ae tren omjeû.  
 24 Haba at ae se hia laihuminy, me ame okongoâ e bi :  
 Ke hu ihum a at betenge, k' ame kece hmâ hon je liamekeiny.

HNYIMAKAN 19.

- E**SO at ae ba ta ûnyi k' ame vheno anyin wisa,  
 Hon at ae hwali ifucin ke monu.  
 2 E ca so he ka ba wâhmakhmeto ge at ;  
 Ke ame he ka monu at ame he logot ge li can.  
 3 Haba hwen monu anyin at, me ame ohwalö deny gethen ;  
 Ke ame hmönyin hnyekon kö Iehova.  
 4 Adre me bi hanen je lawaeny ae se ge omjeû :  
 K' adre öúsâkâûöâ lahanen ka at ae ba ta ûnyi.  
 5 Ame ca he ka ba hwaban ka at ame sit hofuc thoi :  
 K' ame ca he bi ka so at ame ha thoi.  
 6 E se hia adre me he ka sumat ge at ame ham gâná :  
 Ke haba at ae kuia je bwihlany, me lawaeny thithö tavat hia.  
 7 Adre me hûkötîâ at ae ba ta ûnyi hnen je liamekeiny mē :  
 K' ame ti he je lawaeny ka úsâkâûö mē,

- E ame hnu hotudrin me je hofuc, ke hi' ödra bi.
- 8 Haba at ae hu hnyekon, me ame ka betenge bi gan :  
Ke ame he ka wâ so at ame tuö wâ ûnykûme.
- 9 Ame ca he ka ba hwaban ka at ame sit hofuc thoi :  
K' ame he bi ka hia at ame ha thoi.
- 10 E ca ûcû bi ka at ae monu he ka kap sot,  
Ke ti ca ûcû bi ka athnyaba he ka musö ta je than.
- 11 Haba hna wâ wia hnen at, me ame obecâ anyin hmönyin ;  
Ke hnân ohmanenangâ e, he ka onuâ hna hanyâtâ,
- 12 Haba wathethöt anyin than, me helâ me liona ame kuku ;  
Ke haba anyin betenge, me helâ me dân hau hon hnaönying.
- 13 Haba nokon ae monu me wale hmakiny kamen :  
Ke ame khukhula bala bi je iwatretra anyin momo.
- 14 Haba uma me omjeû, me wale jekhöu ûnyi ge lakamen :  
Ke ûnyi ga Iehova âiân a momo wâ wia.
- 15 Haba hwakecin ûsënyin me ame okûâ mokut hnying ae gan ;  
Ke ame he ka mekihuânem at ame hücüâ huliwa.
- 16 Haba at ame tuö hnanyibu, me ame ka tuö hanon bi :  
Ke haba at ame khâlânden hnyi deny gethen, me ame he ka mok.
- 17 Haba at ame betenge ge at ae theduoc, me ame mē ham kü Iehova,  
Ke e ame he ka bi hwaban hnen hna ânyâ ae so.
- 18 Nâ tho nokom, e me tiga hu geju bi ;  
Ke u me ca he ka ip hnyi hnyekom he ka ohia e.
- 19 Ame he ka hu hwaban ka at ae gan wathethöt :  
Anyin a u je ne omelö e, me hamâm he ka ânyâ hmeto bala.
- 20 Löng ju ûhnenamö, me kap ju hna úne, M' u me he ka metâ hnyi obiny.
- 21 E se hia ûnykûme eû hnyi hnyekon at ;  
Ke ame he ka tethmâ musi anyi Iehova.
- 22 Haba weny at, me betenge :  
Ke so at ae theduoc hon at ae thoi.
- 23 Haba ot kö Iehova, me wale hnân môt :  
K' ame he ka laba sekon wale at ae hu e ;

- Ame ca he hulö ka senâ e.
- 24 Haba ûsënyin, me ame ödilâ hnyamen hnyin mini,  
Ke ame hücö he ka ohmeto e ka hnyi hnyimen.
- 25 Kot dö at ame úhiö, me ame he ka ná wâ wia hnen at ae ba hnyekon :  
Ke ná thö at ame wâ ûnykûme, me e ame he ka wâhmakhmetoâ metâ.
- 26 Haba at ame fuc bebehu ka kamen, ke obâ degecâ hinyen,  
Me wale nokon a at ame okûâ hmehma me haikongo.
- 27 Nökuk lö, soju löng hwa úne  
U ka he ka labö omono thibut je ifucin wâ ûnykûme.
- 28 Haba at ohnatho ke at ae ûnyi baû, me ame hlumâ hna owisa :  
K' ame utâ hulö ge hnyimen tavat ae kong.
- 29 Adre hia but penapena hna owisa hobi kâu tavat úhiö,  
Ke je hna kot hobi kâu jön tavat ae monu.

HNYIMAKAN 20.

- H**ABA waina, me wale at hlumö at,  
ke haba grâg me wale at ame mede monu.  
Ke ca metâ bi at ame monu ge li ûnyi e.
- 2 Haba outen than, me helâ me liona ame kuku :  
Haba at ame ohmönyinâ e, me ame ka okongoâ e bi.
- 3 Hnân ogânâ at ame ne tot sâkâû ge iwatretra :  
K' ame he tavat hia ae monu ka beû.
- 4 Haba ûsënyin me ame hücö he ka seû kânâ can megic ;  
Anyin a wale e ame he ka sumat hnyi ûen menu, ke ba bi.
- 5 Haba hna ûnykûme eû hnyi hnyekon at, me helâ me köiö ae dit ;  
K' ame he at wâ ûnykûme ka sâû e.
- 6 E se hia tavat adre me ve ha hwakeci-dra bi ae betenge :  
Ke ie at ae khana elâm at ae hnathu ?
- 7 Haba at ae wisa, wale at ame he hnyi anyin wisa,  
Me huahic bi lakon hwaban.
- 8 Haba than ame tabâ theroniny owisa,  
Me ame oveseâ ta je hulö hia ge li emakan.
- 9 Ie at ame he ka ha, ka habe, Oge hia but okalaötâ hnyekuk,

TA JE VEJEC 21.

- Iny bo so but únyi ge hulö ?
- 10 A ne ve ihmakiny bi tulut, k' ame ne ve tulut bi,  
Me hmiö Iehova li únyi hia e.
- 11 E manen wanakat bi ge lnen hna ányâ,  
Ame ne so, ame ne wisa anyin huliwa.
- 12 Hnyiköny at ame löng, ke ecmak at ame bwele,  
Ke Iehova ame tha up hia.
- 13 Ca hnyokâ bemokut, wâ u nye theduoc;  
Hmak ut, e me sekome ge jeú.
- 14 Haingen at úco ke únyi, ka habe, Únyi baú, únyi baú :  
Ke e ame he but, me e ame hobâ gan.
- 15 E hu gol, ke se hia ta je penina :  
Ke haba li esongot ame wâhmakhmeto me wale omjeú ae únyi hnathu.
- 16 Hom dö úkhaüen at ame tilö hwaban atkanyua ;  
Ke hok haten únyi ge at ame tot hnân hwaban je atkanyua.
- 17 E hnebwia ka at jeú hwaban thoi ;  
Ke hnyi ke bong ame he ka unöngöt hnyimen ge kânâ.
- 18 Ame ohmâ ta je únykúme hnen úhne-namö :  
Ke u ma vak dö vat hoton hna úhne-namö wia.
- 19 Haba at ame hok úsabú me ame omanenâ ta je únyi ae iyong :  
Awe, ca tha e me at ame memang li esongodiny.
- 20 Haba at ame hangâ kamen me hinyen,  
Me adre me he ka ume anyin lamepa hnyi wanben menekholom.
- 21 Adre me ne ie hom tang omjeú hnyi hwân ;  
Ke ame ca he ka hnahic obiny.
- 22 Ca ha, ka habe, Oge me he ka bi hwaban monu :  
Halubahing Iehova ju, ke e ame he ka omeli u.
- 23 E hmiö Iehova je tulut ae ve ihmakiny ;  
Ke ca so tulut uhni ae iyawö.
- 24 Únyi ga Iehova ta je hna okca hnen at ;  
Ke ame he at ka kâmâu ka wâ únykúme deny gethen ?
- 25 Hnân hnewe ka at ame ie ha okabâ ke únyi,  
Ke e ka hia but bi khöbi, me ame he bi ka hnö.
- 26 Haba than ae metâ, me ame oveseâ ta je monu,  
Me wiwia waengen hnyi hudrin.
- 27 Lamepa anyi Iehova, me hanon at,

- Ame elâm ta je ke keihen hnyok hia.
- 28 Betenge me hnathu, li at tuö than :  
Ke haba ciny anyin theron me ibetengiö.
- 29 Haba mecin wahidröu, me tang hwege gadra :  
Ke haba hmanenanginy wahingat, me húen.
- 30 Adre me hneú degecâ hulö ge je hna kot ame aatâ :  
K' ame dit ka hnyi hnyin hnyok ta je hna kot.

HNYIMAKAN 21.

- E** HNYI hnyamö Iehova hnyekon than helâ me je deny köiö :  
K' ame wia e ka hnyi hnen hna weny.
- 2 Haba je gethen hia deny at, me ka wisa bi kâu :  
Ke Iehova ame tuluto je hnyok.
- 3 He ka ányâ únyi ae úcú me owisa,  
Me wale únyi ae so kö Iehova hon hut.
- 4 Haba begörany ke hnyok bi gan,  
Wale lamepa anyin tavat ae monu, me hwakecin ling ae kong.
- 5 Haba je hna únykúme hnen tavat hwege huliwa, me ame otrenâ omjeú :  
Ke haba tavat adre me he logot, me adre me he logot ka theduoc.
- 6 Adre me ne bi hanen omjeú ge bohmen ae thoi,  
Me wale hai ame tûâ, ke hnewe adre me mekiny.
- 7 Ame he úkonguny anyin tavat ae kong ka ohí' ödra bi ;  
Anyin a ödra höcö ányâ hna owisa.
- 8 E ti hwali gethen deny at ame hijen monu :  
Ke haba at ae kalaöt hnyekon, me wisa anyin huliwa.
- 9 E so he ka laba hnyi bahebetiny ban uma  
Hon he ka laba eiö hnyi uma ae gan tha e me momo ae fuc bebehu.
- 10 Haba hnyekon at ae kong me ame weny únyi ae kong :  
Ke e ame ca betenge ka waeny.
- 11 Ödra ka bi hwaban ka at ame úhiö, me adre me ometâ at ae ba hnyekon :  
Ke ödra ka nâ at ae metâ, me ame he ka wâhmakhmeto.
- 12 Haba at ae wisa, ame wâ únykúme uma umen at ae kong ;  
A g' adre me hagutâ tavat ae monu me ohí' ödra bi.



TA JE VEJEC 22.

- 13 Haba at ame hlöng hnyikonyen ge úte-  
ngien at ae theduoc,  
Me ame he bi ka tenge ke adre me ca  
he ka löng kâu.
- 14 Haba bwihlany ae iyong ame omenyikâ  
hmönyin,  
Me bwihlany hnyi úlainy ame omenyikâ  
wathethöt ae hwege.
- 15 Hnân osenyinâ at ae wisa, he ka ányâ  
wisa ;  
Ke ame he ka hnaúhangö tavat adre  
me mádrâ hulö.
- 16 Haba at ame saú monoâ únyi hnyi  
gethen deny metâ,  
Me ame he ka tha laba me tavat adre  
mokcu.
- 17 Haba at ame hnyok senyin baú me  
ame he ka ba ta únyi :  
Haba at ame hnyok ka waina me  
wakaco, me ame ca he ka hu omjeú.
- 18 Haba at ae kong, me e bi hnân úcú  
melen at ae wisa ;  
Ke haba tavat iyawö, me adre me he  
ka hwaban tavat ae fofâ.
- 19 E so he ka laba hnyi hnyebuba,  
Hon he ka tha e me momo ae fuc bebe-  
hu me tenge monu.
- 20 E hu omjeú ae únyi hnathu, me wakaco  
hnyi hnyaban at ae metâ ;  
Ke haba at ae monu, me ame utâ hia.
- 21 Haba at ame hnu hoton wisa me  
ibetengiö  
Me ame wâ möt, me wisa, me ogânâ.
- 22 Haba at metâ me ame öliâ haginy taun  
anyin tavat ae hwege,  
Me öhnyikânâ tang hwege adre me  
geju kâu.
- 23 Haba at ame tuö hnyimen me bohmen,  
Me ame ka tuö e bi ge vec.
- 24 At ae began me begörany, me úhiö  
ien bi,  
E ame huliwa hnyi biganiny at ae hop.
- 25 Ame he weny úsényin ka hlingâ e bi ;  
Anyin ame höcö li hnyamen huliwa.
- 26 E hu tavat adre behnyekon gánâ hnyi  
je bong :  
Ke at ae wisa ame kuia, me ca behanâ  
bi.
- 27 Únyi ae ikiki hut anyin at ae kong :  
Ke beönua monuiny, e ka hom e me  
únykúmenen ae kong.
- 28 Ame he ka mok at ame ohnathoâ thoi :  
Ke haba at ame löng ame he bala bi ka  
ha hofuc.
- 29 Haba at ae monu, me ame öhúhnöhnökâ  
hnyimakan :

- Ke haba at ae fofâ, me ame penapena  
deny gethen.
- 30 E ba metâ, ke ba wáhmakhmeto,  
Ke ba úhnenamö, ame vak kö Iehova.
- 31 Adre me penapena hors hobi kâu bon-  
giny vat :  
Ke hamö Iehova he ka omelö.

HNYIMAKAN 22.

- E** SO he ka weny ien ae lung so hon  
ta je omjeú ae se hia,  
Me betenge hnyok hon sileva me gol.
- 2 Tavat tren omjeú me ta je theduoc adre  
me iouny :  
Ame up ödra hia Iehova.
- 3 Haba at wâ wia, me ame wâ monu me  
ikhölö :  
Ke haba tavat ae ba hnyekon me adre  
me he, ka hu vec bi.
- 4 Haba troban hwakecin ae hnyikânâ,  
me ot kö Iehova,  
Wale omjeú, me hna ogânâ, me möt.
- 5 E bi ta je úö ae údedö me ta je hnewe  
hnyi gethen deny at ae hwali :  
Ke haba at ame ka tuö e bi, me ame  
he ka úsákâúö me je únyi e.
- 6 Nâ thö wanakat hnyi deny ae úcú,  
Ke e ka hingat ut, me ame ca he bi ka  
sâú únyi hnyin.
- 7 Ame he at ae tren omjeú ka musö ta je  
theduoc,  
K' ame he at ame mē sumâtâ ka bi  
athnyabainy at ame mē ham.
- 8 Haba at ame tâ hulö, me ame he ka  
meno vec :  
K' ame he ka hia uciny anyin wathethöt.
- 9 Ame he ka hnahic at ae hu li ecmak ae  
so ;  
Anyin a e ame he ka hân at ae theduoc.
- 10 Obâ but at úhiö, me ame he ka hia  
minya ú ;  
Eke, ame he ka ba ivinö me hmehma.
- 11 Haba at ame weny hnyok ae alai,  
Me ame he ka ihuminy than, can ibe-  
tengiö anyin li esongodiny.
- 12 Ame he li emakö Iehova ka tuö at wâ  
únykúme,  
Ke e ame he ka hagutâ hofuc hwan at  
ae iyawö.
- 13 Haingen úsényen, ka habe, Kabeú ge  
liona :  
Ame he ka hlingö nya eú hnyi gethen.
- 14 Hmonop ae dit hnyimen momo kanyua :  
Ame he ka kölu kâu at ae ikiki kö  
Iehova.

TA JE VEJEC 23.

- 15 Adre lan hwen monu hnyi hnyekon wanakat ;  
Ke osöiny hnân nâ ame he ka úsákáúöâ e mē.
- 16 Haba at ame ovecâ at ae theduoc he ka osehia anyin bi ta je únyi,  
Ke at ame ham ka at ae tren omjeú me ödru me he ka ba ta únyi.
- 17 Tevehlöng ju, ke löng ju hofuc hwan at ae metâ,  
Me hnyok ju ka hnök hna wâhmakhmeto.
- 18 Anyin a únyi ae kese, u ka he ka tuö ta je únyi e eú hnyi hnyekom,  
Adre ne otethmâ hnyi li esongodâm.
- 19 Oge hia but omanenâ e köu hnyi bong ang,  
Me u me labageju kö Iehova.
- 20 Hawa, oge ca sihnalimen köu ehac ta je únyi ae so,  
Je úhnenamö me wâhmakhmeto ;
- 21 He ka okhanö u hnathuiny je hofuc ae hnathu,  
M' u me he ka hom hmetu ka tavat adre me kunö u ta je hofuc ae hnathu?
- 22 Ca söh at ae theduoc, can anyin e ame theduoc,  
Ke ca seda at ae vec hnyi homagöule :
- 23 Anyin ame he Iehova ka ivinö hobi ködra,  
Me hügúnâ melen tavat adre me sei ödra.
- 24 Ca bi liamewaeny me at ae hmönyin ;  
Ke ca tha he bi me at ae wathethöt :
- 25 Wâ u nye nâ je hwakecin,  
Me ame nuc u bi.
- 26 U ma ca hanen tavat adre me úkhöü hnyam,  
Me tavat adre me tot hnân hwaban ge hna hok gufa.
- 27 A ne ba gam únyi hnân bi hwaban,  
Hnân eú ame he ka hom hnâm hna mokut únyi eú hmelâm ?
- 28 Ca he ka oc je hnyigot kâú adrem,  
A konâm je lakibâm.
- 29 U je wâ but at ame ânyâ logotâ anyin huliwa? awe, e ame he ka tot hnyi hnyimakan je than ;  
E ame ca he bi ka tot hnyi hnyimakan hoúmonu.
- 2 Ke u je ne at hutö,  
Me ip ju hele hnyi hnyem.
- 3 Ca wem bi anyin ta je ujeú ae so ;  
Anyin ame iyawö ta je jeú e.
- 4 Ca osényini u bi he ka tren omjeú ;  
Degec ut a ka hnâm bi hna wâ únykúme.
- 5 Hawa, u me he ka wâ hmâ únyi ae ba önyen ?  
Anyin a haba je omjeú, me ame labö bi labenyin,  
Helâ me aeto at ame gâ dranyai.
- 6 Ca he hnyi an jeú an at ae hmak li emakan,  
Ke ca wem bi anyin je ujeú ae so :
- 7 Anyin ae úcú e me únykúmânen hnyekon :  
Haingen köu, ka habe, Han dö ke ic dö ;  
K' ame ca tha e bi möu hnyekon.
- 8 U me he ka hmita hmetoâ ujeú u je an,  
Ke únyi baú hwâm ta je hofuc ae kese.
- 9 Ca fuc bi hnyi hnyikönyen at ae monu ;  
Anyin a e ame he ka húkotiâ hwâm je hofuc ae metâ.
- 10 Ca oc bi hnyigöulen kâú adrem ;  
Ke ca hnyi he ka hnyi hnyei iny naka-hme :
- 11 Anyin ae hwege singidra ;  
E ame he ka ivinö hobi ködra möu.
- 12 Hna but hnyekom ka úne,  
Ke li hnyikönyâm ka ta je ifucin wâ únykúme.
- 13 Ca behânâ bi ka wanakat hna nâ :  
Anyin u je ne kot\_ge osö, e ame ca he ka mok.
- 14 U me he ka kot ge osö,  
Me omelö e ge hedis.
- 15 Nökuk lö, a ne metâ but hnyekom  
Ame he hnyekuk ka senyin :
- 16 Eke, ame he ka hobâ únykúmânök,  
E ka ha ta je únyi ae wisa hnen li esongodâm.
- 17 Ca hna but hnyekom he ka behnyekon ge tavat ae kong :  
Ke outö Iehova ju hnyi je bong hia thibut.
- 18 Anyin e hnathu ame he ka hu obiny ;  
Ke adre me ca he ka subâ degecâ ânyâm geju.
- 19 Nökuk lö, löng ju, ke metâ but,  
Ke tuö ju hnyekom eú hnyi gethen.
- 20 Ca tha e me tavat adre me hwen hmiâ waina :  
Me tavat utâ uthmeno :

HNYIMAKAN 23.

U KA he ka laba ka tha han me than,  
Únykúme wia ju at e hnyi hnyimákâm ;

- 21 Anyin ame he ka theduoc at ame hwen  
hmiâ waina me utâ meno :  
Ke ame he at bemokut ka khavâ úkhaú  
ae ti khekhe.
- 22 Lõng ju ka kâmâm at a hnöku u,  
Ke ca hûkötö ge hinyâm e ka somaca  
but.
- 23 Úco thö hnathu, ke ca úco degecâ hmetu  
bi ;  
Eke, metâ, me úne, me wâ únykúme.
- 24 Ame he ka hobâ gan hmâ kamen at ae  
wisa :  
Ke haba at ame hnokoâ at ae metâ me  
ame he ka senyin gan.
- 25 Eso ame he kâmâm me hinyâm ka  
senyin,  
Me so ame he momo at a hnöku u ka  
hobâ.
- 26 Nökuk lö, hö jem hnyekom kõnya,  
Ke wâ thö dek je gethen ge li ema-  
kâm.
- 27 Anyin a hmonop ae dit momo hnyi  
gethen ;  
Ke op ae hnek momo kanyua.
- 28 Eke, e ame mokut duöng helâ me at  
venöu,  
Me bihanen ka tavat iyawö, unyin tavat.
- 29 Ie at ame hlöuhlöu ? ie at ame vec ? ie  
at ame iwatretra ?  
Ie at ame fufuc ? ie at ame aat baú ?  
Ie at ae hngihngidra li emakan ?
- 30 Walödra tavat adre me bec hnyi waina ;  
Tavat adre me ná elâm waina adre úha-  
niken.
- 31 Ca he ka wâ hmâ waina e ka ubâhlâ,  
E ka ke man bi hnyi utkaia  
Ke omi hingâlâ but :
- 32 Haba hnyi obiny, me e ame úhûlû helâ  
me on,  
Me dá helâ me vaipa.
- 33 Ame he li emâkâm ka wâ je momo  
kanyua,  
K' ame he bi hnekome ka ha ta je únyi  
ae hwali.
- 34 Eke, u me he ka helâ me at ame mokut  
hnyi wanben köiö,  
Ke helâ me at ame mokut hnyi ban  
aneunyainy hu.
- 35 U ma he ka ha, ka habe, Adre hia but  
kuc nya, ke oge me ca vec ;  
Adre hia but osöi nya ke oge me ca  
lõng vecin.  
Oge me he ka hmak dö kehö ? oge me  
he hmetu ka elâm e.

HNYIMAKAN 24.

- C**A he ka behnyekom tavat ae kong,  
Ke ca wem bi he ka tha u mödra :
- 2 Anyin a je hnyekudra adre me únykúme  
he ka oseda,  
Ke je esongodidra ame ha úkonguny.
- 3 Adre me op uma únyi ge metâ,  
K' adre me otethmâ e ge wâ únykúme.
- 4 Ke únyi ge wâhmakhmeto adre me  
öunöngötâ je hnyeuleny  
Ge ta je omjeú ae únyi hnathu me kese  
hia thithö.
- 5 E hwege at ae metâ ;  
Eke, haba at wâhmakhmeto e ame  
ohwegiâ man.
- 6 Anyin a u me he ka vak wia ânyâm vat  
hoton hna úhnenamö wia :  
Ke adre me he ka laba khötkic hnen  
tavat úhnenamö ae se hia.
- 7 E ti görany hmönyin metâ ka at ae  
monu :  
E ame ca hnyi ha hofuc hnyi homagöule.
- 8 Haba at ame vak monu,  
Me ame he tavat ka háiâ e me at ame  
ânyâ hwali.
- 9 Haba hna únykúme hnen at ae monu,  
me wale hulö :  
Ke hûkötö tavat ge at ame úhiö.
- 10 U ka sēnyin hnyi bonginy vec,  
E úhnükong bi tang hewegiâm.
- 11 Omeli ödra thö tavat adre me hom he  
ka mok,  
Ke behan' ödra ju tavat adre hia but  
penapena he ka hling' ödra.
- 12 U ka ha, ka habe, Wâ bi, e ca khan'  
öhmun e :  
Hawa, ame ca he ka únykúme e ge at  
ame tululo hnyok ?  
Ke hawa, e ca khana e hnen at ame  
tuö hanom ?  
Ke hawa, ame ca he bi e ka bi hwaban  
ka at hoton anyin ta je huliwa ?
- 13 Nökuk lö, han dö hani, anyin ae so e ;  
Me hani adre tiga ca hlec ae hnebwia  
ka hnyi hnyimâm :
- 14 Helâe, u ma he ka wâ metâ ka hnyi  
hnyekom :  
U je ne wâ e, awe, ame he ka hu  
hwaban,  
Ke adre me ca he ka subâ degecâ ânyâm  
geju.
- 15 At ae kong lö, ca mokulec ecmakâ hnya-  
ban at ae wisa ;  
Ca ohia hnen hna menâ hnyin.

TA JE VEJEC 25.

- 16 Anyin ame oseven ta ju at ae wisa,  
k' ame tot hmetu :  
Ke ame he bi tavat ae monu ka hia  
hnen vec.
- 17 E ka ta iwahnaihmiöny möu, ca he ka  
senyin,  
Ke adre ne hagutâ e, ca he ka hobâ  
hnyekom :
- 18 Wâ e nye wâ Iehova, me e ame hmö-  
nyin,  
Me ame wia anyin wathethöt únyi gan.
- 19 Ca he ka hmak hnyekom ge tavat ányâ  
hulö ;  
Ke ca behnyekom tavat ae kong :
- 20 Anyin ame ca he ka hu troban ka at ae  
kong ;  
Adre me he ka ume lamepa anyin tavat  
ae monu.
- 21 Nökuk lö, outö Iehova ju me than :  
Ca tha e me tavat adre me hwihwiö :
- 22 Anyin ame he ka ie o ködra anyidra vec ;  
Ke ie at ae khana ge úhnaúhangöiny je  
hunaidra.
- 23 Walang ke je hofuc hwan tavat metâ.
- E ca so he ka wâhmakhmetoâ at hnyi  
hna owisa.
- 24 Haba at ame ha ka at ae kong, ka habe,  
U wisa ;  
Me ame he je at ka hangâ e, me ikikiâ  
e hnen je hnyei :
- 25 Ke ame he ka hu senyin ge tavat adre  
me thawâ e,  
Ke ame he ka o ködra hnahic ae únyi  
hnathu.
- 26 Haba at ame thu wisa  
Helâke e ame úcimhnyimak.
- 27 Penapena ju ányâm huliwa eú,  
Ke hnakânâ wia e hobi köu bi hnyi  
hnyot ;  
Ke hwaban e, u me he ka op umâm  
uma.
- 28 U ma ca he ka hnyi ha a ga monu ke  
at, ke ba can ;  
Ke u me ca he ka iyawö ge li esongodâm.
- 29 Ca ha bi, ka habe, Oge me he ka ányâ  
kâu helâ me hnen hna mádrâ kõnya ;  
Ke oge me he ka bi hwaban ka at helâ  
me anyin huliwa.
- 30 Inya oge me he ka hnyi ta hnyei iny  
úsēnyin,  
Ke hnyi hnyei vine iny at ae ba hnye-  
kon ;
- 31 Ke wâ bi, i watetaföcö but e,  
K' ame kú takoué e ge vhat,

- Ke kong ut hak vetoiny.
- 32 Me oge me wâ, me únykúme wia :  
Oge me wâ me kap hna úne.
- 33 Mē na mokut, mē na ta mokut,  
Mē na húkâlâ li hnyam me mokut leleú.
- 34 Me ame he ka o köu theduoc helâ me at  
ame venöu ;  
Me ba han, helâ me at ame khavâ  
ukhaúen vat.

HNYIMAKAN 25.

WALANG minya je vejec anyi Solo-  
mona, waleji hnen je atö Hezekia  
tuhan Juda hna uny.

- 2 Hmanenanginy Khong he ka oiyongâ  
ke únyi :  
Ke hmanenanginy je than he ka elelâm  
ke únyi,
- 3 E görany drany, ke dit hmeledrany,  
Ke haba hnyekon je than, me ca hnân  
thang.
- 4 Hom degecâ but kânâiny sileva,  
Me me manen dut kaia hobi kâu at ame  
le :
- 5 Hom degecâ but at ae kong unyin than,  
Me me hwege anyin theron hnyi wisa.
- 6 Ca he ka jöjön hnyi hnyimakan than,  
Ke ca tot bi hnyi hnen tavat ae beónua :
- 7 Anyin ae so he ka ha köu, ka habe, Aiö  
u kâ ângi ;  
Ke kong bi he ka ohnyikönö u hnyi  
hnyimakan than,  
U je wâ e hnen li emâkâm.
- 8 Ca ie he logot he ka ivinö  
Wâ e nye ca khanö u únyi he ka ányâ  
hnyi obiny,  
E ka hia but ohmehmö u hnen at ame  
laba hakekenyi u.
- 9 Ka ivinö thö hobi köu bi me at ame  
laba hakekenyi u,  
Ke ca omanená únyi ae iyong ge ke at :
- 10 Wâ e nye haikongu u hnen at ame löng,  
Ke ca wia hmetu bi gam hna haiko-  
ngu u.
- 11 Je ohköiö gol hnyi je tang sileva  
Hofuc adre me ha hnyi úen ae úcú.
- 12 Otru gol, me omjeú gol ae so,  
Helâe at metâ ame nâ at ame löng ge  
hnyikönyen,
- 13 Haba úthumetu ae hnathu,  
Me helâ me imegecin kiona hnyi úen  
menu, ka at a kunâ e,  
Anyin a e ame omenyikâ hnyekon la-  
tuhan.

TA JE VEJEC 26.

- 14 Je ùlâ, me ang, ke ba we,  
At ame ka haisoâ e bi ge anyin je  
betenge, k' ame thoi bi.
- 15 Adre me ohmehmela than ge hok hnyok,  
K' ame ohmetro jö ge esongot ae men-  
yik,
- 16 Hawa, u je wâ hani? an dö ûnyi ae ûcû  
kôu;  
Wâ e nye sekom me hmita hmetu.
- 17 E so cam ame owakhaletâ uto uma  
umen waem;  
Wâ e nye hócö thö gam, me hûkötio u.
- 18 Hama, me hele vat, me fana ae so ho-  
makan  
At ame ohnathoâ thoi ge ke at.
- 19 Nyu ae hmetru, ke ca a khikhin,  
He ka geju ka at ae ca hnathu hnyi  
ûen vec.
- 20 Haba at ame hai je khumöng ka hnyok  
ae hlöuhlöu,  
Me helâ me at ame uny dö ûkhaû hnyi  
bong megic, ke helâ me soda adre me  
hû ge vinega.
- 21 A ne mekihñanem iwahnaihmiöny möu,  
bethe hân ju;  
K' ame ne beic, habelen ju ge köio :
- 22 Anyin a u me he ka ûkhöünâ je walep  
ae möt hon ban,  
K' ame he Iehova ka bi hwaban köu.
- 23 Haba ang ûnyi hnyi hwadrö, me ame  
hom we:  
Ke ame ökûâ hnyimak ae hmönyin  
hnen bohmen ame úhaiö.
- 24 E so he ka laba hnyi bahebetiny ban  
uma,  
Ke kong bi he ka tha uma hnyi uma ae  
gan me momo ame ú.
- 25 Helâ me köio ae katebu ka at ame beic,  
Helâe uthumetu ae so ûnyi hnyi hnyeï  
ae sâkâû.
- 26 Pupua adre uto, ke köio adre oikikiâ  
Helâe at ae wisa k' ame he hwahwali  
hnyi hnyimakan at ae monu.
- 27 E ca so he ka han gâñâ hani:  
Ke ca hmanenang ka tavat he ka ve  
elâm anyidrin hmanenang bi.
- 28 Haba at ame ca musö hnyekon bi,  
Wale helâ me taun adre me hagutâ  
hnyikânâi he ba hak vetoiny.
- 2 Ame gâ monu meno, me gâ baú waha-  
lep,  
Ke helâe ame ca he bi ka man úhangö  
baú.
- 3 Hobi kâu hors ong ütö, ke hobi kâu  
asina töiny hnyimen,  
Ke hobi kâu unyin at ae monu osö.
- 4 Ca thu ka at ae monu hoton anyin  
hwen monu,  
Wâ u nye úcû thö mē.
- 5 Thu thö ka at ae monu hoton anyin  
hwen monu,  
Wâ e nye bemetâ hnyi ûnykúmenen.
- 6 Haba at ame kunâ at monu he ka bi  
úthumetu  
E ame ka subâ li can bi, me ijem monu.
- 7 Ame him li can at ae khikhin can:  
Ke helâe vejec hnyi hnyimen tavat ae  
monu.
- 8 Helâ me tang veto ae gan hwaban hnyi  
ve veto,  
At ame ogânâ at ae monu.
- 9 Helâ me makjöngöc ame dit hnyi hnya-  
men at ie monu,  
Helâe vejec hnyi hnyimen at ae monu.
- 10 Haba at fana ame wat hia,  
Helâe at ame hawâ at ae monu he ka  
huliwa kâu, me tavat adre me he  
baú bi.
- 11 Helâ me kuli ame hmetu ka hnyi hnen  
hna hmita,  
Helâe at ae monu, wale ame hmetu ka  
hnyi anyin hwen monu.
- 12 U je wâ at ae metâ hnyi hnen bi hna  
ûnykúme?  
E so geju ka at ae monu hon e bi.
- 13 Haingen üsënyin, ka habe, Kabeú ge  
liona;  
Waleú liona hnyi gethen.
- 14 Helâ me ame hwihwiö hlingen hwanu-  
ma hnyi hinj,  
Helâe üsënyin hon hnen hna mokut.
- 15 Haba üsënyin ame odilâ hnyamen hnyin  
mini,  
Ke ti sënyin e he ka ohmeto e ka hnyi  
hnyimen.
- 16 E metâ üsënyin hnyi ka hnen hna ûny-  
kúme  
Hon tavat a seven adre me thu wisa.
- 17 Haba at ame he, k' ame saú he ka hnyi  
hanen ivinö anyin ke at,  
E úcû me at ame kât li hnyikönyen kuli.
- 18 Helâ me at ae wiákú ame khûâ ta je  
okúnú,  
Me je fana, me mok,
- 19 Helâe at ame iyawa ke at,

HNYIMAKAN 26.

**H**ELÂ me kiona hnyi honivakeny, me  
helâ me we hnyi ûen menu;  
Helâe minya e ca úcû hmanenang ka at  
ae monu.

TA JE VEJEC 27.

- K' ame ha, ka habe, Hawa, oge me ca úhiö?
- 20 E ka ba utö, me mok ut meic :  
Helâe, e ka ba at ame úhaiö, me ba but ú.
- 21 Helâ me walep hnyi wanben je uthmeic,  
ke utö hnyi meic,  
Helâe minya at ú, a hnân okúâ iwatretra.
- 22 Haba hofuc hwan at ame úhaiö, me helâ me je ujeú ae hnebwia,  
Ame dit ka hnyi hnyin hnyekon.
- 23 Haba esongot ae kaukahwa, ke hnyok ae kong,  
Me úcú me kaia kânâ adre me tube ge drön sileva.
- 24 Haba at ame úöhúkoti, e ame iyawö hnen li esongodiny,  
Me ip tang iyawö hnyi hnyekon :
- 25 E ka ha hofuc ae wisa, ca kap bi ;  
Anyin a eú hnyi hnyekon je únyi ae ikiki a seven.
- 26 Eja ke ne a ne khavâ anyin úöhúkoti ge iyawö,  
Ame he ka manen hwakecin ae kong hnyi ukhacaköu.
- 27 Haba at ame hiny thop me ame he ka ta kâú ka hnyin :  
Ke haba at tetebulo veto, me ame ka tetebulo hmetu bi kâú.
- 28 Haba bohmen ae thoi, me ame húkotiâ tavat e ame ovecâ ;  
Ke haba hnyem ae útakú, me ame okúâ úokonguny.
- 7 Haba at ae sekon me ame hócö ge hani ;  
Ke hnebwia hia ta je únyi ae hiny ka at ae mekihnânem.
- 8 Helâ me meno ame gâ monu únyi hnyi háúen,  
Helâe at ame he monu únyi hnyi hnen.
- 9 Wakaco me únyi ae bo so ame osenyiná hnyok :  
Ke hnebwia úhnenamö únyi hnyi hnyekon ihuminy at.
- 10 Ca degec ihumâm me ihuminy kâmâm ;  
Ke ca dit bi ka hnyi uma umen liamekeiny möu hnyi bong u me vec hnyin :  
E so at ame laba hakekeny, hon liamekeiny ame laba sákâú.
- 11 Nökuk lö, metá but, me me senyin dö hnyekuk,  
Me me hu hnân thu kâú at ame haikongu nya.
- 12 Haba at wâ wia, me ame wâ monu, me ikhölö :  
Ke haba tavat monu adre me he, me hu vec gadra.
- 13 Hom dö úkhaúen at, wale ame tot hnân hwaban atkanyua ;  
Ke hok haten dö únyi ge at ame tot hnân hwaban momo ae atkanyua.
- 14 Haba at ame vesâ hnyi haolany me haisoâ ihuminy ge hofuc ae gan,  
Me adre me he ka ha hofuc e, me hnân hangâ.
- 15 E úcú khukhula hnyi bong we  
Me momo ae fuc bebehu.
- 16 Haba at ame thawâ momo e, e ame thawâ ang,  
Ke haba hnyamen a metân ame kâlâ wakaco.
- 17 Adre khet homakan fao hnen fao ;  
Helâe ame so hnyimakan at únyi ge ihuminy.
- 18 Haba at ame tuö imeta, me ame he ka an wan ;  
Ke haba at ame tuö tuhan, me adre me he ka ogânâ.
- 19 E úcú hnyimak me hnyimak hnyi an,  
Helâe minya hnyekon ke at ka ke at :
- 20 Ame ca sekon hedis me hnaúhangö ;  
Ke haba khaca, ame ca sekon li emakan at.
- 21 Hnân leú sileva öt, ke hnân leú gol meic,  
Ke adre tuluto at ge hna ogânâ e.
- 22 U je ne oamemâ at ae monu ge utö tha e me hwit hnyi hnyin kumete,

HNYIMAKAN 27.

- U ma ca hobâ ge bong nyi,  
Anyin ae ca khanö u únyi ame he ka o hnyi bong.
- 2 E so ame he ke at he ka haisoi u, ke ca hing hnyimâm bi ;  
Ke hnen atkanyua, ke ca hnen esongodâm bi.
- 3 E hmak veto, ke hmak minya öny ;  
Ke haba hmönyin anyin at ae monu, e ti hmak bi hon li únyi e.
- 4 Wathethöt ame beovecâ, ke hmönyin ame bahihingölö ;  
Ke ie at ame he ka tot hnyi hnyimakan ciâ ?
- 5 E so hwa úne ae manen  
Hon betenge ae iyöng.
- 6 E hnathu je aat hnen at ibetengiö :  
Ke osehia úcimhnyimak at iwahnaihmöny.

TA JE VEJEC 28.

- Me ame ca he ka hia gan anyin hwen monu.
- 23 U ma labö ie wâhmakhmetoâ halem ta ja mamoe ;  
Me tuö wia ju je hnahat meno a halem :
- 24 Anyin ame ca tethmä nyiele balua je omjeü ;  
Ke hawa, e bi korona ke ne o but ke dö me ke dö ?
- 25 Adre hom hna önying me ame manen dut je bâtan ae hât,  
Ke adre úkhacaköüâ je khölakiny ta je bucen.
- 26 Je nokon mamoe hnân úkhaúâm,  
Ke je nokon got hnân bi hwaban hnyei :
- 27 Ke ame he ka úcú dân basin got hnân âm, me ânyâm lap ;  
Me hnân melen je athnyabaem a je hlu.

HNYIMAKAN 28.

- A** ME kec at ae kong ke ba at ame hnu :  
Ke haba tavat ae wisa ödra helâ me liona ame ca ot.
- 2 E se hia je tuhan hnyei can ta je hna hanyâüâ :  
Ke ame he ka beü musi hnen tavat wâ bongon me wâhmakhmeto.
- 3 Haba at ae ba ta únyi k' ame ovecâ tavat ae theduoc,  
Me wale at ame helâ me we ame hom degecâ ta je jeü.
- 4 Haba tavat adre me degec hnanyibu, me adre me ogânâ tavat ae kong ;  
Ke haba tavat adre me tuö hnanyibu, me adre me ivinoâ mödra.
- 5 Haba tavat ae kong, me adre me ca wâ hmakhmeto bi hna owisa :  
Ke haba tavat adre me elöm Iehova me adre me wâ únykúme hia.
- 6 E so at ae theduoc k' ame vheno hwa-kecin ae wisa  
Hon at ame he hwali hnyi deny je gethen ke tren bi omjeü.
- 7 Haba at ame vheno hnanyibu, me wale nokon ae metâ :  
Ke haba at ame hanen tavat hwen hmiâ, me ame ohmehma kamen.
- 8 Haba at ame osehia anyin ta je únyi ge hnen hna mē ham hnân heleú troban me bi gâná,  
E ame úkhöúnâ hobi kâu bi at ame betenge ge ta je theduoc.
- 9 Haba at ame wia hnyikönyen me me ca löng bi hnanyibu,

- Me ikiki bi hijin hic.
- 10 Haba at ame omono at ae fofâ ka hnyi gethen ae kong,  
Me ame he ka kölu ka hnyi anyin bi hmonop :  
K' ame he ka hu so ge tavat ae wisa hwakecidra.
- 11 Haba at tren ta únyi, me ame metâ hnyi ka hnen bi hna únykúme ;  
K' ame wâ bongon bi e hnen at ae theduoc a at ame wâ únykúme.
- 12 E ka senyin tavat ae wisa, me gan hmâ hmanenang :  
Ke e ka todrö tavat ae kong, me ame he tavat ka ikhölö.
- 13 Haba at ame ikhâlâ hnen je hna hanyâüâ, me ame ca he ka sot :  
Ke adre me he ka betenge ge at ame omanenâ me degecâ.
- 14 Hnahic hnen at ame labö ot :  
Ke haba at ame onâkâ hnyekon me ame he ka ta ka hnyi vec.
- 15 Haba at ae kong ame musö tavat ae theduoc,  
Me liona ame kuku, ke bea ame he monu.
- 16 Haba than ame ca wâ únykúme, me e at ame ovecâ :  
Ke haba at ame hûkötîâ behnyokâ omjeü, me ame he ka osehia bongon ta je bong.
- 17 Haba at ae hmak ut ge dren ke at Me ame he ka kec ka hnyi hmonop ; ke so ame ca he ke at ka thawâ e.
- 18 Haba at ame vheno wisa, me ame he ka möt :  
Ke haba at ae hwali a lo bongon, me ame he ka ie ta.
- 19 Ame he ka sekon ge jeü at ame belökâ kânân :  
K' ame he ka sekon ge theduoc at ame he hoton tavat ae hop.
- 20 Haba at ae hnathu me ame he ka ti hü je hnahic :  
Ke haba at ame ie behu omjeü me ame ca he ka ba hwaban.
- 21 E ca so he ka wahmakhmetoâ at :  
Ke ca so he ka hanyâüâ hobi kâu ujeü.
- 22 Haba at ae khöt hnyimakan me ame ie hnu hoton omjeü,  
Ke ca khana a g' ame he ka o kâu theduoc.
- 23 Haba at ame úthao me ame he bi ka wâ ibetengiö  
Hon at ame útakú ge bohmen.

- 24 Haba at ame venâu ta je únyi anyin kamen me hinyen, ke ha, ka habe, E ba monu ;  
Me e hanen at ame usada.
- 25 Haba at ame behu ta je únyi, me ame okúá iwatretra :  
Ke haba at ame labageju kö Iehova, me ame he ka pipikhenyá.
- 26 E monu at ame ka labageju ka hnyi hnyekon bi :  
Ke haba at ame vheno wisa, me ame he ka möt.
- 27 Haba at ame ham omjeú ka at ae theduoc, me ame ca he ka ba anyin ta je únyi :  
Ke haba at ame tube li emakan me adre me he ka osehia hângâ.
- 28 E ka todrö tavat ae kong me ame he tavat hia ka lubaduöng :  
Ke e ka hi' ödra but, me ame he ka se hia tavat ae wisa.

HNYIMAKAN 29.

- H**ABA at adre me osehia ná, k' ame ka ohwegiá bi nyin,  
Me adre me he ka ie oamámâ, ke ba bi eny.
- 2 E ka se hia tavat ae wisa, me ame senyin tavat :  
Ke e ka musi at ae kong, me ame he ka mâng tavat.
- 3 Haba at ame hnyok ka metâ me ame osenyinâ kamen :  
Ke haba at ame tha e me je momo hnyi gethen, me ame odilâ omjeú.
- 4 Haba than, me ame ohmâ hnyei ge hna owisa :  
Ke haba at ame hnö je bwihlany, me ame hagutá e.
- 5 Haba at ame ita hofuc ka ke at  
Me ame ka thong ert hobi kâu li can.
- 6 E hu hnewe hnyi hna hanyâúâ hnen at ae kong :  
K' ame khumöng me senyin at ae wisa.
- 7 Haba at ae wisa, me ame únykúme he ka bi hien at ae theduoc :  
Ke haba at ae kong, me ba wâhmakhmeto gan he ka khana thö.
- 8 Haba tavat úhiö, me adre me thong taun :  
Ke haba tavat ae metâ, me adre me öhaúâ bi hmönyin,
- 9 E ka he at ae metâ ka ivinö me at ae monu,

- Ame ne hmönyin, ame ne hluma, me ba ta hau.
- 10 Haba at ame behingâlâ dra, me ame hmiân at ae wisa,  
Ke haba at ae fofâ, me adre me elâm ke ka hlingâ e.
- 11 Haba at ae monu, me ame ha hia anyin hmönyin :  
Ke haba at ae metâ, me ame noc e, me omenâ e.
- 12 E ka he at musi ka löng hoton ta je hofuc thoi,  
Me tavat ae kong hia je athnyabainy.
- 13 Haba at ae theduoc ke at üöveci, me ödru me iouny ;  
Iehova bi at ame omelamâ li emaködru hia.
- 14 Haba than a at ame owisa hnathoâ ka tavat ae theduoc,  
Me ame he bala bi ka tethmâ anyin theron.
- 15 Haba osö ke hwa úne, me wale li at üömetö ;  
K' ame he ka ohmehma hinyen ge wanakat adre me hna.
- 16 E ka se hia tavat ae kong, me se hia minya hanyâúâ :  
K' ame he tavat ae wisa ka wâ hnödra hna kölu.
- 17 Nâ thö nokom, me u me he ka laba so ;  
Eke, e ame he ka osenyinâ hnyekom.
- 18 E ka ba hna omanenâ, me ame he tavat ka hota degecâ hokhnyok :  
Ke hnahic hnen at ame tuö hnanyibu.
- 19 E ca khana bi ta je hofuc he ka thawâ athnyaba :  
Eja ke ne a ne wâhmakhmeto, me ame ca he ka löng hoton.
- 20 U je wâ but at ame fuc bebehú ?  
E so geju ka at ae monu hon momo eling.
- 21 Haba at ame betenge ge athnyabainy hwân ke tiga wanakat,  
Me ame he ka kap e me nokon hnyi obiny.
- 22 Ame okúá iwatretra at ame hmönyin,  
K' ame osehia hanyâúâ ge at ae wathe-thöt.
- 23 Haba bigan anyin at, me ame ohnyikânâ e :  
K' adre me he ka ogânâ at ame hnyok hnyikânâ.
- 24 Haba at ame tha hien me at venöu, me e ame ka hmiân hanon bi :  
E ame löng úhangö, k' ame ca omanenâ bi.



TA JE VEJEC 30.

- 25 E ka ot at, me hnân e hnewe :  
K'ame he ka laba khötkic at ame labageju kö Jehova.
- 26 E se hia tavat adre me elâm ibetengiöge at musi :  
Ke ûnyi ga Jehova hna owisa ka at.
- 27 Hükötiânen tavat ae wisa, at ae hwali hwekecin :  
Ke hükötiânen at ae kong, at ae fofâ hnyi gethen.

HNYIMAKAN 30.

**J**E hofuc ho Agura nöku Jake : wale hofuc.

- Haingen at kö Ithiela, wale Ithiela me Ukala, ka habe,
- 2 E hnathu iny monu hon tavat,  
Ke ba gak wâhmakhmeto anyin at :
- 3 Ke oge ca hia but ûne ge metâ,  
Ke oge me ca wâhmakhmeto At ae Kap.
- 4 Ie at ame ölö hnyi dranyai me ut hmetu but ?  
Ie at ame ûkhöunâ ang hnyi li hnyamen ?  
Ie at ame lan köiö hnyi ûkhaûen ?  
Ie at ame otillâ hia je can hmeledrany ?  
Ia ien ke ia ien nokon ame ne khanö u ?
- 5 E kalaöt hia hofuc hwan Khong :  
E thibi becin tavat adre me labageju kâu.
- 6 Ca bi hanen bi ka hnyi hwan hofuc,  
Wâ e nye he ka nö u, k' u thoi bi.
- 7 Lo li ûnyi oge me sumâtâ gam ;  
Ca behana bi gak inye tiga ca mok ;
- 8 U na öusâkâûöâ but mönya ûnyi baû me thoi :  
Ca otheduoci nya, me otrengi nya ;  
Ke haök ge ûnyi ae ûcû könya.
- 9 Wâ e nye sekuk dö, me ivinö u, me ha, ka habe, Ia Jehova ?  
Ke wâ iny nye theduoc, me venöu,  
Me ha monoâ ien Khonguk.
- 10 Ca hai thoiâ athnyaba ka tuhan,  
Wâ e nye hangö u hnen e, ke adre me haikongu u.
- 11 E hu dö adre me hangâ kamödra,  
Me ca haisoâ hinyödra.
- 12 E hu dö ae ba hnyikongon hnyi hnödra hna ûnykûme bi.

- Ke adre me ca hneû degecâ ikiki gadra.
- 13 E hu dö ae görany hmönyin je emakodra,  
Ke ti görany dö je bademaködra.
- 14 E hu dö ke hele vat je nyudra, ke je hele vat je wehûlûsinaidra,  
He ka an tavat ae theduoc hnyi hnyei,  
ke tavat ae ba ta unyi unyin tavat.
- 15 Lo li hlu laku Aluka, ödrü me ha, ka habe, Hojem, hojem.  
Kun ta ûnyi ame ca hnyi sekon bala,  
Eke, vak ta ûnyi ame ca hnyi ha, ka habe, Soju :
- 16 Wale erkemok ; me hnyok ae toûnyi ;  
Me kânâ ame ca unöngöt ge köiö ;  
Me meic ame ca ha, ka habe, Soju
- 17 Haba ecmak at ame hlumâ kamen,  
Ke höcö long hinyen,  
Me ame he je orebainy hnyigöulen bucen ka ûâ e,  
K'ame he je lakon aeto ka an e.
- 18 Kun ta ûnyi ae iyong könya,  
Eke, vak ta ûnyi ae ca khanö nya :
- 19 Wale deny aeto hnyi drany ;  
Me deny on hnyi kic ;  
Me deny hu hnyi wanben köiö ;  
Me deny бага me hlu.
- 20 Helae deny momo ame bi ûnyi monu ;  
E ame han ke kot hnyimen,  
Me ha, ka habe, E ba monu oge me ânyâ.
- 21 Ame öbubuny hmeledrany can kun ta ûnyi,  
Ke ca khana he ka hokhnyokâ ta ûnyi a vak :
- 22 Wale athnyaba k'ame ne than bi ;  
Me at ae monu ae sekon dut ge jeû
- 23 Can momo ae kong ae hu âiân dut ;  
Me athnyaba a momo at ame he ka hwöhwan at ame musö e.
- 24 Vak ta ûnyi ae ûhnyükong eang hmeledrany,  
Ke ödrin ti metâ gan hmâ bi :
- 25 Wale je wahajö a ödra ca hwege bi,  
Ke so bi adre me penapenö ö' dra hnyi honivakeny ;
- 26 Je shefani a ödra ca man bi,  
Ke adre me bi umödra hnyi je kic ;
- 27 E ba tuhan je wahamon,  
Ke so bi adre me he guga hia hnyi je bunyen ;

TA JE VEJEC 31.

- 28 Je behölök ame iyâw ge li hnyamen,  
Ke e bi hnyin je uma umen than.
- 29 Kun ta únyi ae hmanenang hnyi hnö-  
drin hna he,  
Eke, vak ta únyi ae mec úhedrin.
- 30 Wale liona, at ae man hon je meno,  
K' ame ca whiö bi ge ke je meno hia ;
- 31 Horsiny vat, me got бага minya ;  
Me than, ae ca khan ödra tot metâ kâu.
- 32 U je ne hia but hwen monu me ka  
oganö u bi,  
Ke u je ne vak hulö,  
Kât ju hnyimâm.
- 33 Ödra ka huliwan debai me ame manen  
dut bata,  
Ke ödra ka ken böhöhiny, me ame  
hingölö but dra :  
Helâe ödra ka hlec wathethöt, me ame  
o but iwatretra.
- HNYIMAKAN 31.
- J**E hofuc ho Lemuela than ; wale hofuc  
ame úne kâu hnen hinyen.
- 2 Nökuk lö, ieú ? nökek lö, úheny ú hnyi  
hnyekuk, ieú ?  
Nökuk lö, oge bi khöbi gan, ieú ?
- 3 Ca ham hwegiâm ka ta je momo,  
Ke ca ányâ únyi wale ame okongoâ je  
than.
- 4 Lemuela lö, e ca úcú je than, e ca úcú  
ka je than he ka ic waina ;  
Ke ca úcú ka je taben he ka ha, ka  
habe, ewa grág ?
- 5 Wâ adre nye ic me hnying ut hnanyibu,  
Me omonoâ iwatretra anyin at ame  
vec.
- 6 Ham bi grág ka at ame he but ka mok,  
Me waina ka at ae vec hnyekon :
- 7 E ame he ka ic me hnying anyin the-  
duoc,  
Me ca únykúme hmetu bi anyin vec.
- 8 Fuc dö hobi kâu at ame laba hnyibú,  
Hnyi ivinö anyin tavat adre mok de-  
gecâ.
- 9 Fuc dö, owisa wia ju,  
Ivinöâ thö hobi kâu at ae vec me the-  
duoc.
- 10 Ie at ame wâ momo ae so hwakecin ?  
E beönua hwaban e hon je penina.
- 11 Ame labageju kâu hnyekon áiân,  
K' ame ca he ka hia gan troban.
- 12 Ame ányâ so kâu hnen momo, ke ca  
kong bi  
Hnyi je bonginy hia anyin möt.
- 13 A momo ame elâm je leúnen mamoe me  
lino,  
Me huliwa senyin ge li hnyamen.
- 14 Momo ame helâ me je hu úcú ;  
E ame hok an jeú úheny sâkâú.
- 15 E ame vesâ ke tiga hnyinghet,  
Me hân anyin lap,  
Me khene hanymen lathnyabainy a je  
hlu.
- 16 E ame únykúme utkânâ me úco e :  
E ame te vine troban li hnyamen.
- 17 Momo ame weikâ e ge tang hwege,  
Me ohwegiâ li benyin bi.
- 18 E ame wâ ae so tang omjeú a úco :  
K' ame ca mok anyin lamepa hnyi  
hnyinghet.
- 19 E ame ip hnyamen hon únyi hnân amu  
tö mano ;  
Me kât taben tö hnyi hnyamen.
- 20 E momo ame lau li hnyamen ka at ae  
vec :  
Eke, e ame hinobeny ka at ae theduoc.
- 21 E ame ca outen kiona ge anyin lap :  
Anyin ame khavâ úkhaú ae dra vec  
anyin lap hia.
- 22 E ame hwâwâ je kubö me omeca :  
K' ame khavâ úkhaú lino ae so ke  
udrudrâ hlit.
- 23 E manen dut áiân hnyi homagöule,  
A ne tha laba me wahingatiny hnyei.
- 24 E momo ame tibet je úkhaú lino me  
úco  
K' ame hna je wen hnyok ka at úcú.
- 25 Tang hwege me hmanenang anyin  
úkhaú ;  
Ke ame hluma buhlumâ je bong ame he  
ka o.
- 26 E momo ame ha metâ ;  
Ke e hnyi bohmen hnanyibuiny ibete-  
ngiö.
- 27 E ame tuö wia hwakecin anyin lap,  
K' ame ca an jeú ke laba baú bi.
- 28 Ame tot je lakon me haisoâ e ;  
K' ame ogânâ e ge áiân, me ha, ka habe,
- 29 E se hia omomo ae so hwakecidra,  
Ke u beönua hudrin hia.
- 30 Ame thoi hmai, ke thatúnyi bi hma-  
nenang :  
Ke haba momo a at ame outö Iehova,  
me adre me he ka haisoâ momo e.
- 31 Ham but ka momo wan li hnyamen ;  
Ke hamen ta je huliwa anyin momo he  
ka ogânâ e hnyi je homagöule.

# TUSI ANYIN AT KHET.

## HNYIMAKAN 1.

**W**ALANG hofuc hwan at Khet, a nöku Davita, tuhan Jerusalema.

2 Haingen at Khet, ka habe, E ti thatúnyi e ti thatúnyi ta je únyi hia. 3 Ieú troban ka at hnyi anyin ta je huliwa hia e ame mádrá hmelen seúnö? 4 Ame hia ke dö, k' ame o bi ke dö; ke haba hmeledrany, me tet hmâ bala bi, 5 Ame labö o seúnö, k' ame dit hmetu seúnö, me wadring ka hnyi hnen hna o hnyin. 6 Ame he ang ka hnyi hwaiöu me hwiö ka hnyi hwadrö; k' ame hwihwiö monu hnyi deny gethen, k' ame he hmetu ang bi ka hnyi deny gethen e igigilö. 7 Ame hingälâ ta je di ka hnyi köiö ae gan, ke so bi ame ca unöngöt bi köiö; ke haba dok ame hingälâ je wagewe hnyin, me wale thibi e dok ame hmetu ka hnyin. 8 E ti unöngöt ta je únyi hia ge sényin; e pason he ka ha : ke ca sekon bi li ecmak ge hna wâ, k' ame ca unöngöt li hnyeköny ge hna löng. 9 Haba únyi ame o ehac, me ame he hmetu bi ka o; ke haba únyi adre hia but ányâ, me adre me he hmetu bi ka ányâ : ke ba únyi ae teb únyi hmelen seúnö. 10 Hawa, e hu ke únyi wale adre me ha gan, ka habe, Wâ bi, únyi ae teb-únyi? me wale únyi a o ehac hnyi úen ae tiga hi' öta. 11 E ba hna únykúme hmetu je dö ehac; he haba khaca, ame ca he ka hu hna únykúme minya je dö ame he ka o, wale unyin tavat adre me he ka o nyiele.

12 Inya at Khet, tuhan Isaraela hnyi Jerusalema. 13 Ke oge me kong hnyekunâ he ka elâm me hnö a deny metâ, ta je únyi hia adre me ányâ hnyi hmeledrany: e hmak hmönyin huliwa Khong ame ham ka lakon tavat he ka huliwan. 14 Oge hia but wâ ta je huliwa hia adre me ányâ hmelen seúnö; ke wâ bi thatúnyi hia, k' adre me han ang. 15 E pason he ka owisa únyi ae hwali : ke pason he ka aú bi ta je únyi ae ba. 16 Oge me úhnenamö me hnyekuk, haingök, ka habe, Wâ bi, oge hia but hom hobi könya metâ ae beönua hudra hia adre bödra hnyi Jerusalema : eke, a wâ but hnyekuk metâ me wâhmakhmeto ae gan hmâ. 17 Ke oge me kong hnyekunâ

he ka metâ, me he ka khana hwen monu me hwakecin ae únyi baú : oge me wâ a g' ame han minya ang. 18 Anyin a e ka gan hmâ metâ, me gan minya bi hmak : ke e ka bi hanen wâhmakhmeto hnen at, me ame bi hanen minya vec.

## HNYIMAKAN 2.

**H**AIINGÖK eú hnyi hnyekuk, ka habe, Awe, oge me he ka cubic u ge senyin; anyin a wale he thö vheno thö so : ke wâ bi, wale ke thatúnyi. 2 Oge me ha ge hwen hluhluma, ka habe, Hwen monu e : ke ge senyin, e ame hö? 3 Oge me únykúme eú hnyi hnyekuk he ka ose-nyinâ unyik ge waina, ke ame tiga lelö hnyekuk hnen metâ, me he ka kât hmâ hwen monu, m' oge me he ka wâ únyi ae so ka tavat he ka ányâ hnyi hmeledrany hnyi ta je bonginy anyidra möt. 4 Oge me ányâ je huliwa ae gan hmâ : oge me op umök je uma; o ge me tâ je hnyei vine; 5 ke oge me bi ik, me bi anyik je utkânâ, me tâ eling ta je úö hia ame ve wa wan : 6 oge me ányâ anyik je köiö, hnân hú kânâ ame kú hnyin ta je úö : 7 oge me úco je hlu бага me momo, ke e hu je athnyabaik adre hnökoâ hnyi hnyabak; e hu minya unyik ye hnahat kau me je mamoe, ae nua hudra hia adre bödra ka laba hnyi Jerusalema : 8 oge me úkhöünâ minya sileva, me gol, me je omjehen je than, me je hnyei : e hu gak minya tavat khumöng obaga me omomo, me je weny tavat, wale omomo ae se hia. 9 Ke oge me gan dut me tren gâná hudra hia tavat adre bödra ka laba hnyi Jerusalema : ke e bi minya unyik anyik metâ. 10 Ke oge me ca behânâ ta je únyi hia ame bewâ hnen li emakök : oge me ca thawâ hnyekuk únyi hnyi ta je senyin hia, anyin ame senyin hnyekuk ge anyik ta je huliwa hia; ke wale troban anyik ta je huliwa hia. 11 Me oge me wâ ta je únyi hia ame ányâ hnen li hnyamök, me ta je huliwa oge me huliwan he ka ányâ; ke wâ bi, thatúnyi hia, ke ame han ang, ke ba troban hmelen seúnö.

12 Ke oge me hwiö he ka wâ metâ, me

hwen monu, me hwakecin ae únyi baú : anyin ae hö at ame he ka o hwaban than? me wale thibi e adre hia but ányâ ehac. 13 Ke oge me wâ but ae únyi hnathu metâ hon hwen monu, helâ me lany ae únyi hnathu hon menekholom. 14 Haba at ae metâ me hu li emakan hnyi ban, ke ame he at ae monu hnyi menekholom : ke so bi oge me wâ a g' ame o khaca thibi únyi ka tavat hia. 15 Ke haingök eú hnyi hnyekuk, ka habe, Haba únyi ame he ka o ka at ae monu, me ame he ka o minya kõnya ; awe, hnân eú a iny metâ gan hmâ? Me oge me ha eú hnyi hnyekuk, ka habe, Wale minya ke thatúnyi. 16 Anyin adre me ca únykúme nyiele balua at ae metâ me at ae monu ; anyin adre me he ka hnying hia hnyi je bong ame he ka o. Ekölö ame he ka mok at ae metâ helâ me at ae monu! 17 Me oge me höcö möt; anyin ae vec kõnya huliwa adre me ányâ hmelen seúnö ; anyin a thatúnyi hia, k' ame han ang.

18 Ke oge me höciâ anyik ta je huliwa hia wale oge me ányâ hmelen seúnö: anyin a hamök he ka hna e ka at ame he ka hwöhwabök. 19 Ke e khanö ia ame ne he ka at ae metâ ame ne at ae monu? ke e ame he bi ka musö anyik ta je huliwa hia wale oge me huliwan, me omanená hnyin metâ hnyi hmelen seúnö. Wale ke thatúnyi. 20 Anyin a wale oge me hwihwiö k' ame hmak hnyekuk ge ta je huliwa hia oge me ányâ hmelen seúnö. 21 Ke waleú at ame huliwa hnyi metâ, me wâhmakhmeto, me ti khana; ke so bi e ame he ka hna e ka at a ca hnyi huliwan bi me hnân weúhúneny. Wale minya thatúnyi, me monu ae gan hmâ. 22 Anyin a ieú ame hu ke at ge anyin ta je huliwa hia, me ivecín hnyekon, waleji e ame huliwa hnyin hmelen seúnö? 23 Anyin a e ame vec thibi hnyi bongon taje bong, k' ame huliwa hnyi hlöuhlöu ; eke, ame ca mokut bi hnyekon hnyi je hnyinghet. Wale ke thatúnyi.

24 E ba nua soiny at hon he ka han me ic me hna hnyekon he ka senyin so hnyi anyin huliwa. Oge me wâ minya e, a únyi ge Khong. 25 Ke ie at ae khana han, ke ie at ae khana senyin, huk? 26 Anyin a Khong ame ham metâ ka at k' ame oseyniná e, ke wâhmakhmeto, ke senyin : ke e ame ham huliwa ae hmak ka at ae kong, he ka úkhacaköuâ me úkhöünâ, me me he ka ham bi ka at ame oseyniná Khong. Wale ke thatúnyi, ke ame han ang.

HNYIMAKAN 3.

**E** HU bonginy ta je únyi hia, me úen hobi kâu ta je huliwa hia hnyi hmeledrany : 2 e hu úen hna hnöku öta, me úen mok ; úen he ka tâ, me úen oc hmetu hna tâ ; 3 úen hlingâ, me úen ometo ; úen hagutâ, me úen otilâ ; 4 úen teuge. me úen hluma : úen hnyamok, me úen bibiâ ; 5 úen khûâ degecâ je veto, me úen úkhöünâ je veto ; úen údeluö, me úen ca he ka deluâ ; 6 úen hlo, me úen okolo ; úen tuö, me úen degec ; 7 úen kia, me úen tibet ; úen laba hnyibú, me úen fuc ; 8 úen betenge, me úen húkötîâ ; úen vat, me úen úsoköu. 9 Ieú troban ka at ame huliwa hnyi ta je únyi e ame ányâ? 10 O ge wâ but huliwa ae hmak wale a ham Khong ka tavat he ka huliwan. 11 E ame hia but ányâ ta je únyi hia he ka hmanenang hnyi je úen ae úcú : ke khaca, e ame ip únykúme ka hmeledrany eú hnyi hnyekudra, ke so bi, at ame ca wâ huliwa ame ányâ Khong únyi hnyi hwân, ke ne o but hnyi obiny. 12 E khanö nya ae ba soidra, hon he ka senyin, me ányâ so, ödra ka tiga möt. 13 Ke haba khaca, ae ka han me ic tavat, me senyin so hnyi anyidra huliwa, wale bwihlany anyin Khong. 14 E khanö nya a haba hna ányâ hnen Khong ame he ka e nyiele balua : adre me ca he ka bi hanen ka hnyin, ke adre me ca he ka ohia únyi hnyin : ke Khong ame ányâ e me me ot at hnyi hnyimakau. 15 Haba únyi kâu adrem ka e bi walang ang ; ke haba únyi ame he ka o, me únyi kâú adrem : ke Khong ame elâm únyi ae hia.

16 Ke oge me wâ hmetu hmelen seúnö, ae hnyi umen owisa, a e bi ling hwakecin ae kong ; ke e bi hnyi hnen hwakecin ae wisa, wale bi e hwakecin ae kong. 17 Haingök hnyi hnyekuk, ka habe, Hamen Khong he ka owisa ka at ae wisa me at ae kong : anyin ae hu úen ta je únyi hia me ta je huliwa hia. 18 Haingök hnyi hnyekuk, ka habe, Wale can tavat, me me he Khong ka cubic ödra, me he ka omanená ködra a ödra úcú me ta je meno. 19 Anyin a haba únyi ame o ka at, me ame o minya ka meno ; k' ame o ködru únyi a khaca ; haba mok anyin ke at, me helâ me mok anyin ke at ; eke, e tha úcú homenödra ; ke ca beönua bi at hon meno : anyin a thatúnyi hia. 20 K' ame he ödru lo hia ka hnyi dok a khaca ; úhedru hia eú hnyi

kânâ, k' ödru me he ka wia hmetu hia me me kânâ. 21 Ie at ae khana hanon at ame ölö göranyai, me hanon meno ame utut kâú hnyikânâi? 22 Anyin a wale oge me wâ but ae ba soiny at ae nua hon he ka senyinâ anyin ta je huliwa; anyin a wale jekhon: anyin a ie at ame he ka hom hmetu e, me me wâ ta je únyi hwaban?

HNYIMAKAN 4.

**K**E oge me hmetu me wâ je hna seda hia hmelen seúnö: ke wâ bi je deköien tavat adre me oveci ödra, ke ba at ame hadru' ödra; ke tren hwege tavat adre me oveci ödra, ke ba at ame hadru' ödrin bi. 2 Ke oge me ha hnahicâ tavat ae mok a g' adre mokcu e hac, hon tavat adre möt a g' adre me möt walang ang; 3 eke, ke hnahic hudru hia at ae tiga ca o, at ame tiga ca wâ huliwa ae kong adre me ânyâ hmelen seúnö.

4 Me oge me wâ ta je huliwa hia, me ta je únyi hia ae so adre me huliwan, a g' ame behnyokâ at ge ke at bi can e. Wale ke thatúnyi, ke adre me han ang. 5 At ae monu ame húkâlâ li hnyamen, me ka an bi viny. 6 E so e khaca hnyam ae unöngöt tha e me laba wia, hon li hnyam ae tha unöngöt bi tha e me huliwa me hna han ang.

7 Me oge me hmetu me wâ ta je únyi baú hny hmelen seúnö. 8 E hu at a khaca, a hake e bi; eke, e ba nokon me liamekeiny; ke so bi e ba obiny anyin ta je huliwa hia, ke ca sekon li emakan ge omjeú. Haingen, ka habe, Inya oge me huliwa hobi kö ia, me ka behanö nya bi ge ta je únyi ae so? Wale ke thatúnyi, me huliwa ae kong. 9 E so li at a lö hon at a khaca; anyin ödru me he ka hu hwaban ae so anyidru huliwa. 10 Ame ne ta ke at me hamen ke at he ka lelö hanen: ke e kölö ge at a khaca e ka ta but, ke ba hanen he ka lelö hmetu e. 11 Walang khaca, ame ne tha mokut li at a lo, ödru me he ka mage: ke ame he ka kâmâu ka mage at a khaca? 12 Ke ame ne ton ke at hon at a khaca, e khana li at a lo he ka tot kâú; ke ame ca ie mou tö a kun ta waamoiny.

13 E so hidröu ae theduoc ke at ae metâ bi, hon than a hingat at ae monu, wale at ame höcö löng, ödra ka he ka nâ. 14 Anyin a e ame dit ut únyi hny uma ceat he ka than; eke, adre me hnökoâ hny dokhon dökhü ke ba omjeú. 15 Oge wâ

but ta je únyi ae möt, adre me he hmelen seúnö, a tha ödra me hidröu, wale at a loiny, at ame hwöhwaban. 16 Ca hnân bi aú tavat e ame musö: ke so bi adre me ca he ka senyin kâú hwaban dö e. E hnathu e thatúnyi e, k' ame han ang.

HNYIMAKAN 5.

**T**UÖ ju li cam u ka he ka hny uma umen Khong; anyin ae so he ka hakekeny dö he ka löng, hon he ka hudö bi hut anyin at ae monu. 2 Ca he ka logot hnyimâm, ke ca he ka logot hnyekom, he ka ha ke hofuc hny hnyimakan Khong; anyin a ethö Khong hny drany, ke u ang hmele-drany: anyin a wale e so e wakhalet hwâm je hofuc. 3 Anyin ame kú bwi hnen ta je huliwa ae se hia; me ifucin at ae monu hnen ta je hofuc ae se hia. 4 U ka he ka bi khöbi ka Khong, ca bec bi he ka ohwâdá; anyin a e ame ca senyin ka tavat ae monu: owhâdá thö hnâm hna bi khöbi. 5 E so he ka ca bi khöbi, ke kong he ka bi khöbi me ca ohwâdá bi. 6 Ca hna hnyimâm he ka bijöniny unyâm; ke ca ha bi hny hnyimakan angela, ka habe, e monu e: anyin a ieú ame he Khong ka hmönyin ge ifucâm, me ohiâ huliwa anyin li hnyâmâm? 7 Anyin ame he ka helâe can je bwi ae se hia, me je thatúnyi, me se hia je hofuc: ke u me he ka outen Khong.

8 U je ne wâ hna okongoâ at ae theduoc, k' adre me ne hügünâ hwegiâ hna owisa me únyi ae úcú hny ke keihen hnyei, ca uthmâhmâ bi ge únyi eling: anyin ae hu at ae gan hon tavat ae beönua ame wâ; ke e hu bi ae beönua hudra. 9 Ke haba jeúiny kânâ me hobi kâú tavat hia: k' adre me bi an than únyi hny hnyei.

10 Haba at ame hnyokâ sileva, me ame ca he ka sekon ge sileva; ke haba at ame hnyokâ omjeú ae se hia, me ame ca he bi ka sekon ge hna osehia: Wale ke thatúnyi. 11 E ka se hia omjeú, me se hia minya ödra adre me an e: ke ieú troban ka at a anyin ta je únyi, k' ame wâ thibi ge li ecmak? 12 E senem hna mokut ka at huliwa, k' ame ne han gan ame ne úhnyükong: ke ca khana at tren omjeú he ka mokut, can ae ti unöngöt hnyekon.

13 Walang únyi ae kong ae vec oge me wâ hmelen seúnö, je omjeú a tuö hnen ke at a omjehen, k' ame ka ovecâ e bi gan: 14 ke ame hia ta je omjeú eling hny deny ae kong; ke ame ne hu nokon, me ba ke

## AT KHET 6, 7.

únyi hobi káu bi. 15 Heláji me ioiny a g' ame he thu únyi hnyi hnyekon hinyen, me heláe minya e ame he ka hmetuhmetu helá me úen a o hnyin, ke ba únyi e ame he ka hom únyi hnyi anyin ta je huliwa me hom hnyi hnyamen bi. 16 Ke wale monu ae vec, a g' ame he ka hmetuhmetu tha úcú me úen waleji e ame o hnyin : ke ieú troban káu a e ame huliwa ka ang? 17 Ke haba khaca, e ame han hnyi bongon je bong hia hnyi menekholom, me vec hmönyin, me mok, me wathethöt.

18 Wâ bi, e so wânök ke mec bi a g' ame he at ka han me ic, me senyina so hnyi anyin ta je huliwa hia, waleji e ame ányâ hmelen seúnö hnyi je bong bongon anyin môt, wale a ham káu Khong : anyin a wale jekhon. 19 Ke haba at ame ham káu omjeú me ta je únyi hnen Khong, k' ame ham káu minya man he ka han hnyi ta je únyi e, me hom jekhon, me senyiná anyin huliwa ; me wale bwihlany anyin Khong. 20 Anyin a e ame ca he ka ti únykúme ta je bong bongon anyin mot ; anyin a Khong ame thu káu me me senyin hnyekon.

### HNYIMAKAN 6.

**E** HU ke monu oge me wâ hmelen seúnö, ke e hmak e ka tavat : 2 wale at hnen Khong hna ham omjeú káu, me ta je únyi, me ogânâ, ke ca hia bi gan ke únyi e ame weny, ke so bi Khong ame ca hna but káu man he ka han hnyin, ke ame han hnen atkanyua ; wale thatúnyi me mok ae kong. 3 A ne khaca haded je lakon ke at, ke se hia hunainy anyin môt, me me ti se hia je bonginy ta je hunainy, ke ame ca sekon bi ge so, ke adre ca konâm bi ; inya oge me ha, me so kôluhabú hon e ; 4 anyin ame o hnyi únyi baú, me he hmetu hnyi menekholom, ke ame oiyongâ ien hnen menekholom ; 5 ke haba khaca e ame ca wâ seúnö, ke ca khana bi ; e nua menâiny at ang hon at eji : 6 eke, eja ke ne a ne môt hnyi lo li thauzan je huna, k' ame ca wâ bi so : hawa, me ca he ka he ka hnyi dok a khaca? 7 Haba ta je huliwa hia anyin at, hnân hobi káu bi hnyimen, k' ame ca sekon bi weny. 8 Anyin a ieú troban ka at ae metâ hon at ae monu? ie únyi anyin at ae theduoc at ae khana he ka he hnyi hnyimakan tavat ae môt? 9 E so hna wâ hnen li ecmak, hon nna weny hnen hnyok ; wale ke thatúnyi, ke ame han ang.

10 Haba únyi ame o adre hia but hwenyi

ien ehac, ke manen dut ae at : ke ca khana bi he ka ivinö me at ae beönua hon e. 11 E se hia ta je únyi ame bi hanen ka únyi baú, anyin a wale ieú troban ka at? 12 Anyin ae khanö ia únyi ae so ka at hnyi môt ang, hnyi ta je bonginy anyin môt ae únyi baú, ame môt hnyin helâ me hmene? ke ie at ame he ka omanená ka at únyi ame he ka o hwaban e hmelen seúnö?

### HNYIMAKAN 7.

**E** ÚNYI hnathu ien ae lung so hon wa- kaco ae so ; ke únyi hnathu bong mok, hon bong ate o hnyin. 2 E so he ka he ka hnyi uma ödra ka tenge hnyin, hon he ka he ka hnyi uma ödra ka bijeú hnyin : anyin a wale obiny tavat hia ; ke ame he at ae môt ka únykúme e eú hnyi hnyekon. 3 E so hlöuhlöu hon hluma : anyin ae so but hnyok hnen hnyimak ae menyöng. 4 E bi hnyekon at ae metâ hnyi uma adre me tenge hnyin, ke e bi hnyekon tavat ae monu hnyi uma adre me senyin hnyin. 5 E so he ka löng úthaö hnen at ae metâ, hon he ka löng khumöng anyin tavat ae monu. 6 Anyin ame fifica je wahleúbleú hmelen öt, ke helâ úhlumainy at ae monu : ke thatúnyi e. 7 Haba behom gâná ame omonoâ at ae metâ ; ke haba bwihlany ame okongoâ wâ únykúme. 8 E so obiny ke únyi hon hwân : ke so hokhnyok hon hnyok bi gan. 9 Ca logot hnyekom he ka hmönyin, anyin a haba hnyekon at ae monu. me wale hnyaban hmönyin. 10 Ca ha bi, ka habe, A hawa ae so je bong a bán hon je bong ang? anyin ae ca metâ bi hnam hna hnö e. 11 E so metâ, ae úcú e me hwajekhöu : eke, e ti beönua e ka tavat adre me wâ seúnö. 12 Anyin a haba metâ me hnân söng, helâ me mone bi me hnân söng : ke haba nuainy wâhmakhmeto a g' ame he metâ ka tuö môt anyin at ae tren e. 13 Únykúme ju huliwa anyin Khong : anyin a ie at ae khana he ka owisa hnen hna ohwalö? 14 Senyin dö hnyi bong sot, ke únykúme ju hnyi bonginy vec : Khong ame ányâ khaca me me úcon khaca, me me ca he bi at ka wâ ta je únyi ame he ka o hwaban e.

15 Wale hia wânök hnyi je bong bongon anyik hnyok baú : e hu at ae wisa ame mokcu hnyi hwakecin ae wisa, ke hu bi at ae kong ame môt beú hmâ hnyi hwakecin ae kong. 16 Ca he ka hwakecâm ae ti wisa ; ke ca ogânâ hmönyiná anyâm metâ :

anyin a ieu u me he ka hamâm hlingö u bi? 17 U ma ca he ka ti kong, ke ca he bi ka monu: anyin a ieu u me he ka mok ke tiga ca ûâm bi? 18 E so u ma kât ûnyi ang; eke, ca hom hmetu hnyamâm ûnyi hnyin: anyin a haba at ame outen Khong, me ame he ka o ûnyi hnyi je ûnyi e hia.

19 E man hmönyin metâ ka at ae metâ hon tavat musi a ten hnyi taun. 20 Anyin ae ba at ae wisa eang hmeledrany, a at ame ânyâ so k' ame ca ânyâ hulö. 21 Ke haba khaca ca he ka hnyok bi ta je hofuc hia adre me ha; wâ u nye löng athnyabaem me hangö u but: 22 anyin e khanö u hnyi hnyekom minya a u je osehia hangâ keihen.

23 Oge hia but ohnathoâ ta je ûnyi hia e hnen metâ: haingök, Oge me he ka metâ; ke e ame ûsâûkâûöâ mönya. 24 Haba ûnyi ae sâkâû but, me dit hmönyin; ie at ae khana he ka wâ e? 25 Oge me hwihwiö, me ûnykûme eü hnyi hnyekuk he ka khana, me elâm, me wâ metâ, me bongon ta je ûnyi, me khanö nya hnyikongon monu, me hwen monuiny monu: 26 ke oge me wâ ke ûnyi ae hiny hon mok, wale momo a haba hnyekon bi me je hnewe me je ert, ke je ûnyi hnân úce at li hnyamen: haba at ae so hnyi hnyimakan Khong, me ame he ka kec gan; ke ame he ka hnok at ae kong gan. 27 Haingen at Khet, ka habe, Wâ bi, walang hnök hna wâ, iny ka tuluto ke ûnyi me ke ûnyi, me inye wâ bongon: 28 wale oge me tiga elâm bi, ke oge me ca wâ bi: oge wâ but бага a khaca ûnyi hnyi thauzan; ke oge me ca wâ bi momo unyidra hia. 29 Wâ bi, waleü ûnyi a khaca oge me wâ, a Khong ame op at he ka wisa; ke adre me elâm bi je biûnyi ae se hia.

HNYIMAKAN 8.

**I**E at ae úcû me at ae metâ? ke ie at ae khana bongon ta je ûnyi? Haba metâ anyin at ame omelamâ hnyimakan, me wia thö hwegien hnyimakan. 2 Haingök, Vheno thö hnanyibu anyin than, ke ûnyi ge úhinykôu hnyi hnyimakan Khong. 3 Ca logot bi he ka he gan; ca hwege ka hnyi ûnyi ae kong: anyin a e ame ânyâ hia weny. 4 Anyin ae hu man maniny hofuc hwan than; ke ie at ame he ka ha kâu, ka habe, Ieu u me ânyâ? 5 Haba at ame vheno hnanyibu, me ame ca he ka wâ ûnyi ae kong; ke haba hnyeü-

kon at ae metâ ame wâhmakhmeto ûen me hna owisa: 6 anyin a haba ta je ûnyi hia, me e hu ûen me öwisa; anyin a haba okongon at, me hmak kâu: 7 anyin ae ca khana ûnyi ame he ka o; ke ie at ame he ka omanenâ kâu ge ûen ame he ka o? 8 E ba at ame tren musi hon hanu, he ka behânâ hanu; ke ba at ame musö bong mok; ke ba at adre me hna ûnyi hnyi vat eling: k' ame ca he hwakecin ae kong ka omelö tavat adre me mâdrâ e. 9 Oge hia but wâ ta je ûnyi hia eling, ke oge me ûnykûme eü hnyi hnyekuk ta je ûnyi hia adre me ânyâ hmelen seuno: e hu ûen adre me musö ke at ge ke at bi me me kong.

10 Me oge me wâ minya tavat ae kong adre konâm, k' adre me o but ka hnyi erkemok; ke haba tavat adre hia but ânyâ so me adre me he but ûnyi hnyi dok ae kap, k' adre me hnying ödra hnyi taun: wale ke thatûnyi. 11 Anyin adre me ca ie bi hwaban huliwa ae kong, anyin a wale e hwege hnyekon tavat he ka mâdrâ hulö. 12 Eja ke ne a ne khaca haded hna ânyâ hulö hnen at ae kong, k' adre osehia bongon je bong, ke so bi, oge me wâ but a g' ame he ka so ka tavat adre me outen Khong, a tavat ot hnyi hnyimakan: 13 ke ame ca he bi ka so at ae keng, k' adre me ca he ka osehia bongon je bong, ke helâ me hmenu; anyin a e ame ca ot hnyi hnyimakan Khong. 14 E hu thatûnyi adre me ânyâ eang hmeledrany; a g' ame aat ka tavat ae wisa helâ me hna ânyâ ka tavat ae kong: ke haba khaca, ame aat ka tavat ae kong helâ me hna ânyâ ka tavat ae wisa: haingök, Wale ke thatûnyi. 15 Me oge me haisoâ hna hobâ, anyin ae ba so ka at hmelen seünö, ke so bi adre me he ka han me ic me senyin: anyin a wale ûnyi ame he ka tha e me at hnyi anyin huliwa hnyi bongon ta je bong hia wale a ham kâu Khong hmelen seünö.

16 Hnyi ûen oge me ûnykûme eü hnyi hnyekuk he ka khana metâ, me wâ ta je ûnyi adre me ânyâ eang hmelen; (anyin ae hu at ame ca mokut hnyi lany me lit:) 17 me oge me wâ hia huliwa anyin Khong, ae ca khana bi at he ka wâ ta je huliwa adre me ânyâ hmelen seünö: anyin ame ne he at ka huliwa me elâm e, me e ame ca he ka wâ; eke, ame ne ûnykûme ge at ae metâ he ka khana e, me ca khana bi he ka wâ.

HNHYIMAKAN 9.

**O**GE me únykúme ta je únyi eling eú hnyi hnyekuk, he ka wá wia ta je únyi e; a haba tavat ae wisa ke tavat ae metá, ke anyidra ta je huliwa, me wale hnyi hnyamen Khong: ame ne ibetengiö, ame ne úöhúkoti, e ca khana tavat: e hnyi hnyimaködra ta je únyi e. 2 E tha úcú thibi ta je únyi hia ame o ka tavat hia: khaca thibi únyi ame o ka at ae wisa me at ae kong; ka at ae so, me at ae bo so, me at ae bo kong; me ka at ame bi hut, me ka at ame ca bi hut: e úcú at ae so me at ae kong; e úcú at ame úhinhinköu me at ame ot úhinhinköu. 3 Walang únyi ae kong hnyi ta je únyi adre ányá hmelen seúnö, a khaca thibi únyi ame o ka tavat hia: eke, e únöngöt minya thö hnyekon tavat ge hulö, ke e bi hwen monu hnyi ta je hnyekudra, k' ödra tiga möt bi, ke hwaban e adre me he ka tavat adre mokcu. 4 Anyin a haba at ame tiga hanen tavat ae möt me hu geju bi unyin: anyin ae so kuli ae möt hon liona ae mok. 5 Anyin ae khana tavat ae möt a g' adre me he ka mok: ke ca khana bi tavat adre mokcu ke únyi, ke ba hmetu bi hwaban ködra; anyin adre hnying bi gadra. 6 A tha hia but walang ang anyidra ibetengiö, me anyidra úöhúkoti, me anyidra hmönyin; ke adre me ca he hmetu ka hnyi hanen nyiele balua ke huliwa adre ányá hmelen seúnö.

7 He thö u, an ju ám jeú, me senyin me ijem ányám waina me hnyok ame hobá; anyin a hia but Khong walang ang kap ányám ta je huliwa. 8 E so e hau bala je khaúám; ke ca he ka hia wakaco hnyi hon bâm. 9 Möt senyin dö tha u me áíám u me hnyok káu hnyi je bonginy ányám möt ae únyi baú: anyin a wale jekhom hnyi möt ang, me huyi ányám huliwa u je huliwan hmelen seúnö. 10 Haba hna wá hnen li hnyamám he ka ányá, ányá thö hnen hwegiám; anyin ae ba huliwa, me únykúme, me wáhmakhmeto, me metá, hnyi erkemok, u me he ka hnyin.

11 Oge me hmetu me wá hmelen seúnö, a g' ame ca bân ka o at ae háhâ can, ke haba khaca ame ca ton bi at ae hwege, ke haba khaca e ca tren jeú at ae metá, ke haba khaca ame ca o je omjeú ka at ame wáhmakhmeto, ke betenge baú, ka at ame huliwa tremang; ke haba úen, me únyi ame o monu, ame o ködra hia. 12 Anyin

a haba at, e ca khana bi úen: helá me ta je wá adre me hnok hnyi ert, me ta je meno adre me hnok hnyi hnewe, ke ame hnok dö e úcú mödra tavat hnyi úen ae kong, e ka ie o ködra.

13 Oge hia but wá minya metá helang hnyi hmelen seúnö, ke haingök, E gan hmá: 14 wale a g' ame hu taun ae úhnyükong, ke wakhalet thibi aten; k' ame he than ae gan úcon k' ame igigilö e, me op ta je tabiny vat cicö e: 15 ke adre me wá ke aten e ae metá ae theduoc, ke e ame omelö taun ge anyin metá; ke ba at ame únykúme ka at eling ae theduoc. 16 Me oge me ha, ka habe, E so metá hon tang hwege: ke so bi adre me húkotiá metá anyin at ae theduoc, k' adre me ca löng hwan hofuc.

17 Adre me löng hofuc ae menyik hwan tavat ae metá, hon hna ba hwegiá hnen at ame musi unyin tavat ae monu. 18 E so metá hon je omjehen vat; ke haba at hulö a khaca, me ame okongoá so ae gan hmá.

HNHYIMAKAN 10.

**H**ABA ta je nöng adre mokcu, me adre me obokongoá wakaco ae bo so: heláe minya e hmak hnyi tulut monu ae úhnyükong hon metá me hna ogána. 2 E bi hnyekon at ae metá hnyi ke keihen a metán, ke e bi hnyekon at ae monu hnyi ke keihen a meny. 3 Eke, ke haba khaca, e ka vheno gethen hnen at ae monu, me ba únykúmenen, ke e ame omanená ka tavat hia a e at ae monu. 4 A ne tot köu hmönyin anyin than, ca he thö hnyi hnám: anyin a hwakecin ae menyik ame thawá ta je monu ae gan. 5 E hu monu oge hia but wá hmelen seúnö, heláke monu ame o únyi ge at musi: 6 a g' adre me otílá hwen monu hnyi je dok ae görany, ke haba tavat tren omjeú me adre me laba hnyikánái. 7 Oge hia but wá ta je athnyaba adre me tabö hors, ke haba ta je than adre me he hon káná heláke ta je athnyaba. 8 Haba at ame hiny thop, me ame he ka kölu ka hnyin; ke haba at ame thu hak me ame he ka oloú on. 9 Haba at ame thu veto me ame he ka kong hnen e: ke haba at ame khú utö, me ame he ka aat káu. 10 Ame ne kong hwan fao, k' adre ca bân ka khet homakan e, me hamen at he ka ti ham hwegien, ke so metá bi hnán he ka owisa. 11 A ne úhúlú on k' adre me tiga ca ohnamá, me ba troban ka at



AT KHET 11, 12.

ame ohnamâ. 12 Haba je hofuc hwan hnyimen at ae inetâ, me wale tang beten-ge; ke haba li esongodiny at ae monu me ame he ka utâ e bi. 13 Haba hofuc a bân ûnyi hnyi hnyimen me wale hwen monu; ke haba hofuc a biliny ûnyi hnyi hnyimen, me ti hwen monu. 14 Haba at ae monu e ame osehia hwan je hofuc: ke so bi e ca khana at ûnyi ame he ka o; ke ie at ame he ka omanenâ kâu ta je ûnyi ame he ka o hwaban? 15 Haba huliwa anyin tavat ae monu, me ame osenyini ödra hia, anyin adre me ca wâ bi gethen ka he ka hnyi taun. 16 Hnyei lö, e kôlö gam, e ka wanakat tuhâm, ke ame han hnyi hnyomakatu ânyâm je taben! 17 Hnyei lö, hnâm hnâhic e ka nokon than tuhâm, ke ânyâm je taben adre me han hnyi ûen ae ucû m' adre me hwege, ke ca hnân bi he ka monu ge grâg! 18 Can hwen höcö ame ü but ban uma; ke e ka ca huliwa li hnyam ame he ka khula uma. 19 Adre ânyâ bijeu hnân hnyi hluma, ke waina ame osenyinâ möt: ke ucû ta je ûnyi hia ka mone. 20 Ca hangâ bi than, ohe, ca ânyâ hnyi hnyekom; ke ca hangâ bi tavat adre tren omjeu eiö hnyi ânyâm hnyeule mokut: anyin ame he meno ame gâ ethö ka hom hwan, ke ame he at ae hu li labenyin ka omanenâ hna ha.

HNYIMAKAN 11.

**K**HÛÂ but ânyâm areto ka hnyi hon du: anyin a u me he ka wâ hmetu hwaban je bong ae se hia. 2 Ve ha jekhon tavat a ödrin seven, eke, ame ne eit; anyin ae ca khanö u ûkonguny ame he ka o eang hmeledrany. 3 Ame ne unöngöt je ûlä ge we, me ame ta we ka hnyi hon kânâ: ke ame ne ta üö, ame ne ka hnyi hwaiöu, ame ne ka hnyi hwadrö, haba hna ta hnen üö, me ame he ka mokut hnyi dok eling. 4 Haba at ame tuö ang, e ame ca he ke belök; ke haba at ame tuö je ûlä ame ca he ka menu. 5 E ca khanö u gethen deny ang, me úküen ta je jö hnyi hnyekon momo ae erkin; helâe e ca khanö u ta je huliwa anyin Khong at ame ânyâ hia. 6 Hnyi hnyomakatu tâ ju hatungâm je hatong, ke hnyi sahac ca thawâ li hnyamâm: anyin ae ca khanö u ûnyi ame he ka kû, ame ne eang ame ne e, ke ame ne he ka tha so hia. 7 E hnathu e kese lany, ke so ka li ecmak he ka wâ seünö. 8 Eke, ame ne möt at, me se hia ta je hunainy, me so e ame senyinâ

hna; ke so bi e so e ame ûnykûme je bong ae menekholom, anyin ame he ka se hia. Thatûnyi ta je ûnyi hia ame o.

9 Hidröu lö, senyin dö, u ka tiga but; ke hobâ thö hnyekom hnyi je bonginy ânyâm hidröu, ke vheno thö je gethen deny hnyekom, me ta je ûnyi u je wâ hnen li emâkâm: ke khanö u thö a ame he Khong ka hum u can ta je ûnyi hia e ka hnyi hna owisa. 10 Anyin a wale, degec ut vec ûnyi hnyi hnyekom, ke úsâkâüö but me hulö: anyin ae thatûnyi ûen wanakat me hmai.

HNYIMAKAN 12.

**K**E ûnykûme ju At a up u hnyi je bonginy ânyâm hidröu, e tiga ca o ta je bong ae kong, me tiga ca hakekeny bi ta je huna wale u me he ka ha hnyin, ka habe, O ge me ca senyinâ hmetu e; 2 e ka tiga ca menekholom bi seünö, me lany, me tehi, me ta je okhû, k' ame ca hmetu ta je ûlä hwaban útainy we: 3 hnyi bong adre me he ka öbubuny hnyin tavat tuö uma, ke haba tavat hwege adre me he ka iyâü, ke haba tavat khin hwit adre me ca huliwa hmetu bi, anyin a ödra wakhalet biju, ke menekholom but tavat selat hnyi je mamalama, 4 k' adre me he ka hlöng je hwanuma eü hnyi gethen; e ka úhnyükong ut hwan khin hwit, ke ame he ka tot bi at hnyi ifuciny meno ame gâ, k' ame he ka sēnyin hia omomo hia adre hnyok ka khumöng; 5 eke, adre me he ka outen ûnyi ae görany, ke e bi eü hnyi gethen ta je ûnyi hnân outen; k' ame he saked ka vhong, k' ame he ka hmak ge wabamon, ke ba hmetu hna weny: anyin ame he at ka hnyi umen uma a nyiele balua, k' ame vheno gethen hnen tavat adre me hnyamok: 6 e ka tiga ca mou bi tö sileva, ke tiga ca hmouca kaia gol, ke tiga ca hmouca kaia hnyi an, ke tiga ca ok waengen hnyi taben köiö; 7 ke ame hmetu sesâ hnyikânâi, helâ me ehac, ke ame he hmetu hanu ka Khong at ame ham e. 8 Awe, haingen at khet, ka habe, E ti thatûnyi ke thatûnyi ta je ûnyi hia.

9 Ke haba khaca, anyin ae metâ at Khet, me e ame nâ tavat ge metâ; eke, e ame ûnykûme, me elelâm, me ip gaga ta je vejec ae se hia. 10 Haba at Khet ame elâm ta je hofuc ae ucû, ka ta je hofuc adre me sihnalimen hnyi wisa, wale je hofuc ae hnathu.

## KHUMÖNG HWANYI SOLOMONA 1, 2.

11 Haba je hofuc hwan at ae metâ, me helâ me ûnyi hnân dô bolok, ke haba ta je hofuc hwan je homakan ta je ûkhacakôu, me helâ me je fao adre me ti ohmâ, a ham ge at a khaca a at tuö mamoe. 12 Ke walang khaca, nôkuk lö, kap ju hna nâ : e ba obiny bi ka hnödra hna sihnalimen ta je tusi ae se hia ; ke ödra ka unö gânâ tusi, me ame sēnyin dut unyin.

13 Walang obiny ûnyi e ; adre hia but löng hia : outen ju Khong ke vheno anyin ta je hnanyibu ; anyin a wale hanymen ae bekhöt ge tavat hia. 14 Anyin ame he Khong ka hom ta je huliwa hia ka hnyi hna owisa, ke ta je ûnyi hia ae iyong, ame ne ta je ûnyi ae so, k' ame ne ta je ûnyi ae kong.

## KHUMÖNG HWANYI SOLOMONA.

### HNYIMAKAN 1.

**K**HUMÖNG ae beönuwa hwanyi Solomona.

- 2 E so e ame ûcimhnyimak mönya ge je ûcimhnyimakiny hnyimen :  
Anyin ae so ânyâm ibetengiö hon waina.
- 3 E so bunen wakaco unyam ;  
Ke haba iâm, me helâ me wakaco adre hingâlâ ;  
Anyin a wale ame hnyok köu wahlu.
- 4 Lili nya thö ; m' öhmun e he ka wadring hotom :  
Than ame su nya ka hnyi je hnyeuleny :  
Öhmun e he ka senyin me hobi u,  
Öhmun e he ka ha gânâ ge ânyâm ibetengiö hon waina :  
Adre me hnyok köu hnyi wisa.
- 5 Ta je wahluiny Jerusalema lö,  
Iny hlit, k' iny hmanenang bi,  
Helâ me je uma mano hnyi Kedara,  
Helâ me je mano singi Solomona
- 6 Ca ö nya öbun, anyin a iny hlit,  
Anyin ame li nya seünö.  
Laku bai ödrin e hmönyidrin kõnya,  
Ödrin e otillö nya he ka tuö je hnyei vine ;  
Ke oge me ca tuö ik hnyei vine.
- 7 U na ha ju kõnya, u at oge me hnyok köu  
Hnâm hna hân halem hnyin, ke dok u je omenâ hnyin hnyi jebigo :  
Ieü gak bi a oge me he ka helâ me ame tubi hnyimak  
Hakekeny je hnahat meno halen je lawaem ?

8 U at ae ti mec hon omomo lö, a ne ca khanö u bi,  
Vheno thö je hna okca hnen je hnahat meno,  
Me hân je lakon halem je got hnyi hnyei iny tavat tuö mamoe.

9 Oûnykûmik lö, inya oge me oûcü u  
Me hors hnyi kariota anyi Farao.

10 E hmanenang li wahicâm ge je leünen adre hwâwâ,  
Ke nyem ge sawakiny.

11 Öhmun e he ka ânyâ hobi köu je hna hwâwâ gol  
Ke je fao sileva.

12 Than ame tiga han,  
Me ame bo so anyik nardo.

13 Bwiny muro kõnya oûnykûmik  
At ame mokut hnyi ûlaik.

14 Vongon kofera kõnya oûnykûmik,  
Hnyi je hnyei vine Eni-gedi.

15 Wâ bi, u hmanenang oûnykûmik ; wâ bi, u hmanenang ;  
Li emakâm helâ me li biny.

16 Wâ bi, u hmanenang oûnykûmik, eke, me mec :  
Ke hât hnötu hna mokut.

17 Je arasi je venyâiny umötu uma,  
Ke je köp je dâiny.

### HNYIMAKAN 2.

**I**NYA ang obedilainy Sarena,  
Me sosaniny je hwatapkölu

2 Helâ me sosani hnyi je ûö ae ûdedö,

KHUMONG HWANYI SOLOMONA 3.

- Helâe oûnykûmik unyin wahlu.
- 3 Helâ me i okhöiö hnyi je úöiny hnyot,  
Helâe oûnykûmik unyin wahidröu.  
Oge me laba ju hnyi hmenon me gan  
senyin,  
Ke hnebwia anyin wan hnyi hnyimök.
- 4 E ame hum nya ka hnyi uma adre me  
bijeú hnyin,  
Ke haba anyin boúdila huk, me ibe-  
tengiö.
- 5 Thawo nya ju ge je hmata a wan vine,  
okahwö nya ju ge je okhöiö :  
Anyin a oge me moko ibetengiö.
- 6 Hunen bök hnyamen a meny,  
K' ame köt nya ge hnyamen a metân.
- 7 Wahluiny Jerusalema lö, oge me khe-  
manyin köbun,  
Ge je zebi me je ailainy hnyot,  
M' öbun e ca he ka bwebwelâ me ohmakâ  
ibetengiö,  
Ke ne o but e ame beweny.
- 8 Hwan oûnykûmik ! wâ bi, e ame ho jem,  
E ame utut hon je bucen, me gâ hon  
je hut.
- 9 E úcú oûnykûmik me zebi me nokon  
aila :  
Wâ bi, e ame tot hoton hagitin hak,  
E ame selat hnyi je mamalama,  
E ame omanená e bi hnyi hna pewan.
- 10 Ame fuc dö oûnykûmik me ha könya,  
ka habe,  
Todrö, oûnykûmik, hmanenangik, me  
he jem.
- 11 Anyin a wâ bi, e hia but hnyeun,  
A um dö we, ke hia but ;
- 12 E manen dut je vongon úö hnyi hneyi ;  
K' ame o but úen ame cûk hnyin je  
meno ame gâ,  
K' adre me löng úkukuiny biny hnyi  
ita hneyi ;
- 13 Ame he but ka metu je wan meta ae  
hât,  
K' ame vhöng je vine,  
Me obosoâ hneyi.  
Todrö, oûnykûmik, hmanenangik me he  
jem.
- 14 Biny a halek lö, u hnyi khekheiny kic,  
hnyi dok ae nedrong hnyi hwatap-  
kölu,  
Iny na wâ ju hnyimâkâm, iny na löng  
ju ifucâm ;  
Anyin ae kese hwâm, ke hmanenang  
hnyimâkâm.
- 15 Kât do hobi kötin ta je alope, wale je  
alope ae úhnyûkong wale adre oko-  
ngoâ je vine ;  
Anyin ame vhöng anyitin je vine.
- 16 Anyik oûnykûmik, ke inye bi a anyin.  
E ame úhalin hnyi je sosani.
- 17 Hwiö thö, oûnykûmik, me u me helâ  
me zebi me nokon aila  
Hon je buceniny Bether,  
Ke ne o but menyikiny bong, ke ame he  
but je hmenu.

HNYYIMAKAN 3.

- I**NYA hon hnök hna mokut hnyi hnyi-  
nghet oge me elâm at oge me hnyok  
kâu :
- 1 Oge me elân, ke oge me ca wâ bi.
- 2 Oge me he ka tot walang ang me vheno  
taun,  
Hnyi je gethen me je hna cit gethen,  
Oge me he ka elâm at oge me hnyok  
kâu :  
Oge me elâm, ke oge me ca wâ bi.
- 3 Ame ö nya hnen tavat tue tavat adre  
me vheno taun :  
Me haingök, ka habe, Öbun e wâ at oge  
hnyok kau ?
- 4 Oge me he úhek unyidra ke tiga ca  
sâkâû,  
Me oge me wâ e at oge me hnyok kau :  
Ke oge me kât e, me ca hna hmetu bi,  
Ke ne o but o ge me hom e ka hnyi  
uma umö bai,  
Hnyi hnyeuleny at ame erkini nya.
- 5 Je wahluiny Jerusalema lö, o ge me  
khemanyin köbun,  
Ge je zebi me je ailainy hnyot,  
Ca he öbun ka bwebwelâ me ohmakâ  
ibetengiö,  
Ke ne o but e ame weny.
- 6 Ie at ang ame o únyi hnyi hnyeubua  
helâ me hai ame sâ göranyai,  
Adre me obosoâ ge muro me libano,  
Me je únyi adre me oamamâ anyin at  
úcú omjeú ?
- 7 Wâ bi hna mokut hnö Solomona :  
Ödrin sikste tavat hwege igigilö e,  
Hanan tavat hwege hnyi Isaraela.
- 8 Ödrin hia ödrin e hok hele vat, adre n'  
- ödrin he ka vat :  
Adre ve weikâ anyidra je hele vat hnyi  
je jevadrin,  
Can ot hnyi hnyinghet.

KHUMÖNG HWANYI SOLOMONA 4, 5.

- 9 Haba Solomona than, e ame ânyâ tap  
hnân sam  
A utöiny Lebanona.  
10 E ame ânyâ je can sileva,  
Ke haba taben, me gol, ke taben lap  
mano ae udrudrâ,  
K' adre omecâ e ge ibetengiö,  
Ûnyi ge wahluiny Jerusalema.  
11 Wahluiny Ziona lö, he th' öbun ka ö  
Solomona than,  
A bicâ korona wale hnen hinyen hna  
okorona e hnyi bonginy úkocö,  
Ke hnyi bong e ame senyin hnyi  
hnyekon.

HNYIMAKAN 4.

- W**Â bi, u hmanenang oúnykúmik ; wâ  
bi u hmanenang ;  
Helâ me li biny li emâkâm hnyi hnyin  
hna tube hnyimâkâm :  
E úcú leúnen bâm me hnabat got,  
Adre me mokut hnyi bucen Gileada.  
2 E úcú je nyom me hnabat mamoe adre  
me tep subâ leúnen,  
Wale adre me o únyi hnyi hna sou ;  
Ke hu gadra hia li lakon a li húnye,  
Ke ba at ae hlöuhlöu unyidra.  
3 E úcú li esongodâm me tö ae dra,  
E hmanenang hnyimâm :  
E úcú halelouâm me ong rimona  
Hnyi hnyin hna tube hnyimâkâm.  
4 E úcú nyem me uma ae beú göranyai  
umö Davita waleji adre op hnân uma  
hip omjehen vat,  
Adre me uhno je bec a wan thauzan  
hnyin e  
Je bec anyin tavat hwege hia.  
5 E úcú li bâsâm me li lakon zebi a li  
húnye,  
Ödru me tha han tot hnyi je sa sosani,  
6 Oge me he ka he ka hnyi buceniny  
muro,  
Me hutiny libano,  
Ke ne o but hnyi sahac e ka beú but je  
hmenu.  
7 Oúnykúmik lö, u hmanenang hia  
E ba hnyikongon hnyi unyâm.  
8 Öiök lö, he thö jem mönya úheny  
Lebanona,  
He jem mönya úheny Lebanona :  
Selat dö únyi hnyi hon Amana,  
Ûnyi hnyi hon Senira me Heremona,  
Ûnyi hnyi je opiny je liona,  
Me je bucen anyin je lepat.

- 9 U je hia but venâú hnyekuk, waek,  
öiök ;  
U je hia but venâú hnyekuk ge emâkâm  
a khaca,  
Hnen kinyâm sawakiny a khaca hnyi  
nyem.  
10 E ti mec ânyâm ibetengiö, waek, öiök ;  
E beönua ânyâm ibetengiö hon waina,  
Me bunen ânyâm wakaco hon ta je úö  
hia ae bo so.  
11 Öiök lö, e lup esongodâm helâ me hani  
adre tiga ca hlec :  
Hani me debai eú hnyi hmelen bo-  
hmâm ;  
Ke haba bunen ânyâm úkhaú me helâ  
me bunen Lebanona.  
12 Utkânâ adre hlöng homagöuleny, waek,  
öiök  
An adre hlöng, pupua adre okeceâ  
haten.  
13 Je rimona tha e me je wan ae únyi  
hnathu je khúâm ;  
Kofera me je úöiny nardo,  
14 Nardo me keroko,  
Kane me kinamo, tha e me je úöiny hia  
libanu ;  
Muro me aloe, me je hing úö ae bo so.  
15 Pupuainy taun,  
Pupuainy köiö möt,  
Ke je di únyi Lebanona.  
16 Ang hnyi hwadrö lö, hmak dö ; ang hnyi  
hwaiöu lö, aiö u ;  
Bwang ut ka hnyi ik hnyei, me me bon  
je úö ae bo so.  
E na o ju oúnykúmik ka hnyi iny  
hnyei,  
Me me an wan haleny je úö ae únyi  
hnathu.

HNYIMAKAN 5.

- I**NYA oge me o ka hnyi ik hnyei, waek,  
öiök :  
Oge hia but auk anyik muro, ke anyik  
je úö ae bo so ;  
Oge me an anyik hani adre ca hlec tha  
e me hani ;  
Oge me ijem anyik waina me debai.  
Je lahanök lö, han ju ;  
Öbun laoúnykúmik lö, ijem gâná thö.  
2 Inya oge me mokut, ke hmak bi hnye-  
kuk :  
Wale ifucin oúnykúmik ame kokot,  
haingen, ka habe,

KHUMÖNG HWANYI SOLOMONA G.

- Hanök lö, oúnykúmik, halek biny, beö-  
nuaik khöng ut könya :  
Anyin a menyik ut bök ge hau,  
Ke leúnen bok ge dân hau hnyi lit.
- 3 Oge me uny anyik ukot ; oge ma kâmáu  
ka kháva hmetu ?  
Oge me hneü li cak ; oge ma kâmáu ka  
okongoá hmetu ?
- 4 Oúnykúmik ame inâ hnyamen hnyin  
omokuiny hwanuma,  
Ke haba hnyekuk ame tenge gan.
- 5 Me oge me tot he ka khöng ka oúnykú-  
mik ;  
K' ame khula but muro únyi hnyi  
hnyamök,  
Ke muro ae lup únyi hnyi otbanyök,  
Ka hnyi hnyiban ohmáiny.
- 6 Oge me khöng ka oúnykúmik,  
Ke oúnykúmik ame hia but hwiö me  
he.  
E ame fuc eja ke ame sényin hnyekuk :  
Oge me elâm e, ke oge me ca wâ bi ;  
Oge me hawâ e, ke e ame ca ieü könya.
- 7 Adre me ö nya tavat tue, tavat adre me  
vheno taun,  
Adre me kuc nya, me oge me aat dö ;  
Haba tavat tuö hna up haginy adre me  
hügünâ gak únyi hnân tube hnyi-  
makök.
- 8 Je wahluiny Jerusalema lö, inya oge me  
ha hwegiâ köbun, ka habe, Öbun e ne  
wâ oúnykúmik,  
Thumeto thö e, a oge me moko ibe-  
tengiö.
- 9 Momo ae hmanenang hon ta je momo  
hia lö,  
Hawa, e nua oúnykúmâm hon ta je  
oúnykúminy at ?  
Ieü oúnykúmâm hon ta je hna únykúme,  
Anyin a u me ha hwegiâ helâe köhmun ?
- 10 E hau me dra oúnykúmik,  
E beönua hon ta je ten thauzan.
- 11 Haba ban me helâ me gol ae hma-  
nenang,  
Haba leúnen ban, me hlau, ke hlit helâ  
me oreba.
- 12 Haba li emakan me helâ me li biny  
hnyi baten wagewe ;  
Adre hneü ge debai, k' adre ohmâ wia.
- 13 Haba li wahicen me helâ me sa basama,  
me je üö ae bo so :  
Haba esongodiny me helâ me li sosani.  
ame khula muro ae hnebwia únyi  
hnyin.
- 14 Haba li hnyamen, me li ötru gol adre  
ohmâ berulo hnyin :  
Haba unyin, me nyon elefan adre huli-  
wan, ke adre tube ge safairo.
- 15 Haba li can, me li hmolom a veto ae  
hau adre otilâ hnyi taben' gol ae so :  
Haba hmainy me helâ me Lebanona, e  
hmanenang helâ me arasi.
- 16 E hnebwia but hnyimen ; eke, e ti hma-  
nenang hia.  
Wahluiny Jerusalema lö,  
Wale oúnykúmik, ke wale hanök.

HNYIMAKAN 6.

MOMO ae hmanenang hon omomo hia  
lö,

Ame he kâ oúnykúmâm ?  
Ame saü kâ oúnykúmâm  
M' ötin e he ka tha elâm e ?

- 2 A he but háâng oúnykúmik ka hnyi  
iny hnyei, ka hnyi ta sa basama  
He ka úhalin hnyi ta hnyei, me aoc je  
sa sosani.
- 3 Anyik oúnykúmik, ke inya bi anyin  
oúnykúmik :  
E ame úbalin hnyi je sa sosani.
- 4 Oúnykúmik lö, u hmanenang helâ me  
Tireza,  
Ke mec helâ me Jerusalema.  
Hnân outen helâ me utbavat k' adre  
hom je bouðila.
- 5 Wia thö li emâkâm gak,  
Anyin a oge me ngâ but gadru.  
E úcü leúnen bâm me hnahat got,  
Adre mokut hnyi baten bucen Gile-  
ada.
- 6 E úcü nyom me hnahat mamoe momo,  
Adre me o únyi hnyi hna sou ;  
K' ödra hia adre me hnöku húnye,  
Ke ba at ae hlöuhlöu gadra.
- 7 E úcü li halelouâm me ong rimona  
Hnyi hnyin únyi hnân tube hnyimâ  
kâm.
- 8 Ödrin sikste ta je momo than, ke eite  
anyidrin je momo  
Ke ca hnân bi aú wahu.
- 9 Halek biny, a beönuaik, e khaca thibi  
E thibi hake nokon hinyen ;  
A oúnykúminy momo at a hnokoâ e.  
Ame wâ e hnen wahu, me adre me  
haisoâ e ;  
Je momo than, me anyidra je momo  
adre me ogânâ e.

KHUMÖNG HWANYI SOLOMONA 7, 8.

10 Ie momo e, ame selat helâke me  
haolany,  
Ke e hmanenang helâ me tehi,  
Ke alai helâ me seûnô  
Hnân outen helâ me utbavat adre hom  
je bouðila?

11 Oge me he ka hnyi ta sa egozi,  
He ka wâ ta je ûnyi ame kû hnyi hnyi-  
göulen bucen,  
Me he ka wâ ame ne kû hlau vine,  
Me vhöng rimona.

12 Ke tiga ca khanö nya bi, haba hnyekuk  
ame ip nya  
Unyin je kariota anyin je aten ik hnyei  
a je taben.

13 Hmetu ju, hmetu ju, at Sulami;  
Hmetu ju, hmetu ju, m' öhmun e he ka  
ö u.

Öbun e he ka wâ at Sulami geú,  
Helâ me li deö biâ?

HNHYIMAKAN 7.

**M**OMO nokon than lö, shaiba ge hma-  
nenanginy li cam hnyi li taben  
hnyeuca!

E úcú hna hújá jevam me sawakiny ae  
ûnyi hnathu,

Hna huliwan hnen at huliwa ae metâ.

2 Haba bibikâm me úcú me ûnya kaia ae  
wathelaba,

Ae unöngöt ge waina adre úhaniken:

Haba hnyekom, me úcú me thi hwit,

Adre theibâ ge sosani.

3 E úcú li básâm me li nokon zebi

A li húnye.

4 E úcú nyem me uma ae beú göranyai a  
nyon elefan;

E úcú li emâkâm me li köiöiny Hese-  
bona, hnyi homagöuliny Bathe-rabim;

E úcú hnyingöiâm me tap ae beú göra-  
nyai e Lebanona,

Wale a cicö Damaseko.

5 E úcú bâm me Karemela,

Ke úcú leúnen bâm me ûnyi ae udru-  
drâ;

A hnok ut than ge je leúnen.

6 Shaiba ge ânyâm hmanenang me mec

Oúnykûmik, hnân senyinâ!

7 E úcú ibeúâm me pama,

Ke úcú li básâm me li de vine.

8 Haingök, Oge me he ka ölö hnyi pama,  
Oge me he ka kât je lan:

Ke ame he li básâm ka helâ me li de  
vine,

Ke úcú bunen homenâm me je okhöiö;

9 Ke helâ me waina ae so hnyimâm,  
Wale adre me omi uto hobi kâu oúny-  
kûmik,

K' ame ofuco li esongodiny at ame  
mokut.

10 Inya a anyin oúnykûmik,

Ke e ame weny inya.

11 Oúnykûmik lö, aiö u, ötu me he ka hnyi  
utkânâ;

Ötu me he ka laba hnyi je taun ae  
ûhnyükong.

12 Ötu me he ka vesâ ka hnyi je hnyei  
vine;

Me wâ ame ne vhöng vine, ke wa je  
ong vine,

Ke vhöng rimona:

Oge me he ka betenge gam eling.

13 E so bunen je dudai,

Ke ta je wan üö ae so hnyi homagöuleta,  
a teb ûnyi ke but ehac,

Waleji oge ip hobi köu, oúnykûmik.

HNHYIMAKAN 8.

**U**NA úcú ju me hanik,  
At a ijem li basi bai!

Iny ka ö u thö ehele, me oge me he ka  
ucimhnyimak möu;

Eke, e ba at ame he ka húkötiö nya.

2 Oge me he ka su u me hum u ka hnyi  
uma umö bai,

At ame he ka nö nya;

Oge me he ka habelâm ge waina ame  
bo so,

Dân anyik rimona.

3 Taben bök benyin a meny,

Ke e ame he ka köt nya ge benyin a  
metân.

4 Ta je wahuiny Jerusalema lö, inya oge  
me ha hwegiâ köbun,

Ca he öbun ka bwebwelâ, me ohmâkâ  
ibetengö,

Ke ne o but e ame weny.

5 Ie at e, ame o úheny hnyi hnyebuba,

Ame he cimâ oúnykûminy?

Oge ohmakö u hmelen okhöiö:

Waleling a vec hnyin hnyekon hinyâm  
gam,

ISAIA 1.

- |  |  |
|--|--|
| <p>Waleji e ame hnöku u, hnyi hnen hna vec hnyekon gam.</p> <p>6 Ip nya ju eú hnyi hnyekom helâ me hna ohmâ haten, helâ me hna ohmâ haten hnyi benyâm :<br/>Anyin ae hmâ ibetengiö helâ me mok ;<br/>Ke haba ciâ, e ame bevecâ helâ me erkemok :<br/>Haba bâhlân, me helâ me bâhlân meic, A bâhlân bi anyi Ja.</p> <p>7 E ca khana köiö ae gau he ka ume ibetengiö,<br/>Ke ca khana je wadutö he ka odilâ e :<br/>A ne he ke at ka ham ta je omjeúiny hia umen uma me hwaban ibetengiö, Me ame ca he bi ka úcû.</p> <p>8 E hu hanihmun ae úhnyúkong, Ke ba bi haten li basin :<br/>Ieú ate me he ka ányâ hobi kâu hanihmun<br/>Hnyi bong adre me he ka úhnenamö gan ?</p> <p>9 Ame ne hak veto adre op, hlu e Me ate me he ka op hon e bi hak sileva :<br/>Ke ame ne hlinginy hwanuma,</p> | <p>Me ate me<sup>h</sup>he ka tube e ge je esöiny arasi,</p> <p>10 Inya ang hna up veto, ke li basic helâ me li hhabâ hon<br/>Ke iny úcû kâu me at adre betenge gan.</p> <p>11 E hu ga Solomona hnyei vine hnyi Baala-hamon ;<br/>E ame hna hnyei vine ka tavat tue ;<br/>Hamödra he ka ve hom je ong sileva a wan thauzan hwaban je wan.</p> <p>12 Haba ik hnyei vine, a ik hnyei, e bi hnyi hnyimakök :<br/>Solomona lö, u ma he ka hom wan thauzan<br/>Ke tu haded hobi kâu tavat tuö je wan.</p> <p>13 At ame labâ je hna belök lö,<br/>Haba je lawaem adre me tevehlöng ifucâm :<br/>Ö u hnö nya he ka hnyi löng e.</p> <p>14 Oúnykúmik lö, mweimwei thö,<br/>Ke u me he ka helâ me ziba me nokon aila<br/>Hon je bucen, dok ae hu hnyin je utö ae bo so.</p> |
|--|--|

TUSI ISAIA A PEROFETA.

HNYIMAKAN 1.

**H**NA wâ hnö Isaia nöku' Amosa, waleji e ame wâ ge Juda me Jerusalema, hnyi je bong bongu Uzia, me Jotham, me Ahaza, me Hezekia, a je thaniny Juda.

2 Drany lö, löng ju, ke hmeledrany lö, tevehlöng ju, anyin a Iehova ame hia but fuc me ha, ka habe, Oge hia but hat me tuö je wanakat, ke ödra bi adre me úkhin fuc mönya. 3 E khana but bolok at a haleny e, ke e khana but asina taben han únyi ge tuhan : ke ca khana Isaraela bi, k'ame ca únykúme bi lakeik. 4 Ekölö gam hnyei ae kong hwakecin, tavat ae hmak ut ge hulö, mátrániny tavat adre ányâ monu, je lakon adre he hwali: adre hia but hna degeci Iehova, me húkotiâ Kapi Isaraela, adre me atkanyua but me hmetu hmetu but. 5 Anyin a ieú adre me he hmetu ka kuc öbun, me tiga bihanen

bala hnöbun hna úkhin fuc? Ame mok hia ban, ke sényin hia hnyok. 6 Hwân hnyi hnyeúca ke ne o but hnyi ban, e ba dok ae so hnyin ; ke je aat, me je khibi, me je dok ae han : adre ca hia but ometo, me lan, me omenyikâ ge wakaco. 7 A ba but wanibun hnyei ; a hia but thong anyibun je taun ge meic ; ke haba könöbun kânâ, me ame an e hnen ta je atkanyua hnyi hnyimaköbun, me ba wan, helâke adre hagutâ degecâ hnen je atkanyua. 8 Ke adre hna degecâ wahluiny Ziona, helâ me uma hwaelu hnyi hnyei vine, ke helâ me uma tue hnyi hnyin ta sa kokuma, ke helâ me taun adre thelöng ut. 9 Haba Iehova tuhan sabaoth, a ne ca hia but bi kolon ae úhnyúkong thibi köta, me ate me he ka helâ me Sodoma, me ate me he ka úcû me Gomora.

10 Öbun je taben hnyi Sodoma lö, löng ju hofuc ho Iehova ; at Gomora lö, teveh-

löng ju ka hnanyibu anyin Khonguta. 11 Haingö Iehova, ka habe, Hnân eü könya anyibun ta je hut ae se hia? oge unöngötö ge je hudiny leü a je mamoe бага, me pipikhenyainy je meno andre hat; ke oge me ca senyin ge dren ta je bolok, me lakon mamoe, me je got бага. 12 Ke öbun ka he ka manen hnyi hnyimakök, me ia kun' öbun he ka uto je hnyeulek? 13 Ca hom hmetu bi je hut ae ünyi baü; ke ikiki könya je utö ae bo so; ke haba je tehi ae manen, me je sabath, me hna hawä je úkhacaköu, E ca khanö nya he ka hota hulö me úkhacaköu ae ünyi hnathu. 14 Ke oge me ikikiä je tehibun ame manen, me anyibun je bijeü andre thu: e hmak könya je ünyi e; ke oge me höcö bi ka hom. 15 Ke öbun ka he ka hinöbeny, me oge me he ka ikhâlâ li emakök gabun: eke, öbun ka he ka osehia hic, me oge me ca he ka löng: a unöngöt je hnyamöbun ge dra. 16 Sou but, okalaöti öbun; degec ut anyibun ta je huliwa ae kong hnyi hnyimakök; soju hna mádrâ hulö: 17 nâ thö he ka änyâ so; elâm dö hna owisa, betenge ge at andre ovecâ, owisa at ae ba kamen, ivinö thö hobi kau safac.

18 Haingö Iehova, ka habe, Ai öbun walang ang, ate me he ka tha úsabö: eja ke ne a ne helâ me dra vec anyibun ta je hulö, me ame he ka hau bi helâ me kiona; ke ame ne dra helâ me dila, me ame he ka helâ me leünen mamoe. 19 Öbun e ne hmehmela me löng, me öbun e he ka an so ünyi hnyi kânâ: 20 ke öbun e ne höcö ke úkhin fuc, me andre me he ka ön öbun ge hele vat: anyin a hia but ha ge hnyimö Iehova.

21 Ekölö, momo hnyi gethen dut taun hnathu! waleji ae unöngöt ge wisa! ame laba ehac hnyi hwakecin ae wisa, ke walang ang bi tavat úhlingö. 22 E kânâ but änyâm sileva, k' andre me úhaniken änyâm waina me köiö. 23 Tavat úkhin fuc je tuhâm, ke lahanen tavat venöu; ödra hia thithö andre me hnyok ta je bwihlany, ka hnu hoton je hwaban: andre me ca owisa hobi kâu at a mokeu kamen, ke andre me ca oâ ködra hna ivinö hobi kâu safac.

24 Anyin a wale ame ha Than, Iehova tuhan sabaoth, Maniny Isaraela, ka habe, Awe, oge me he ka omenö nya ge tavat hükötiö nya, oge me he ka bi hwaban ka je iwalmahmiöny mönya; 25 ke oge me he ka wia hnyamök köu, me ti thong degecâ kânâm kânâ, me hom hia änyâm

dron fao: 26 ke oge me he ka ham hmetu köu tavat owisa, helâji me ehac, me je at úhnenamö helâ me hnyi hwân: hwaban e andre me he ka hwenyi iâm, Taun ae wisa, me taun ae hnathu. 27 Andre me he ka omeli Ziona ünyi ge hna owisa, me je laten andre hmetu kâu ünyi ge hwakecin ae wisa. 28 Ke ame he ka tha hnaúhangö tavat hanyâüâ me tavat ae kong, k' ame he ka hia but tavat andre me hna degeci Iehova. 29 Ke andre me he ka hmehma ge je iwajo öbun e weny, ke öbun e he ka monumonu can ta hnyei öbun e úca. 30 Anyin a öbun e he ka helâ me iwajo ae meleca lan, me helâ me hnyei ae ba köiö hnyin. 31 Ke ame he at hwege ka helâ me wakunenu, me anyin huliwa helâ me wahleühleuiny meic; ke andre me he ka tha thong degeci ödru, ke ba at ame he ka ume.

HNHYIMAKAN 2.

**H**OFUC ame wâ Isaiä nöku Amosa ge Juda me Jerusalema.

2 Hnyi ta je bong a biliny andre me he ka otethmä buceniny uma kap umö Iehova hon ban je bucen, ke andre me he ka ogöra-nyâ hon je hut; ke ame he ta je hnyei hia ka ok ut kâu. 3 Ke ame he ka o ta je hnyei ae se hia me ha, ka habe, Ai öbun me ötin e ölö thö ka hnyi bucen anyi Iehova, ka hnyi uma umen Khongu Jakob; ke e ame he ka n' öta ge deny je gethen, ke ate me he ka vhenö je gethen ünyi gan: anyin ame he ka he but hnanyibu úheny Ziona, me hofuc ho Iehova úheny Jerusalema. 4 Ke e ame he ka owisa ge ta je hnyei, me nâ je hnyei ae se: ke andre me he ka kokot anyidra je hele vat, me me hnân bi hwiö kânâ, me dödra je ö hnân je bálet andre dela kâu vine: ame ca he ke hnyei ka nang hele vat ka kot ke hnyei, ke andre me ca he hmetu bala he ka nâ vat.

5 Lap anyi Jakob lö, ai öbun, ate me he ka vhenö melam anyi Iehova. 6 Anyin a u je degec lakem, a lap anyi Jakob, anyin a ödra unöngötö ge je hwakecin ünyi jemeiö, ke ödra tavat bibihwakecin helâ me at Filisiti, k' andre me úkhöü hnyam me lakon je atkanyua. 7 Ke unöngöt idra hnyei ge sileva me gol, ke ca hnân bi aü omjehe- dra ta je omjeü; ke unöngötö idra hnyei ge ta je hors, ke ca hnân bi aü anyidra je kariota. 8 Ke unöngötö idra hnyei ge ta je idola; k' andre me khudrung ka huliwâ anyin ta je hnyamödra, wale andre me änyâ



ISAIA 3.

ge je banyödra. 9 Ke ame nom ju hoümonu, ke ame hnyikânâ but at ae únyi hnathu : anyin a wale u me ca he ka kot degecâ anyidra hulö. 10 Didrö hnyi hnyin kic, ke ikölö u bi eü hnyi kânâ, únyi ge hna outö Iehova, ke únyi ge anyin hmanenang ae mec. 11 Adre me he ka ohnyikânâ hnyimakan tavat adre me begörany, ke adre me he ka hom úhnyükongo tavat adre me bi gan, ke adre me he bi ka oganö Iehova thibi hnyi bong e. 12 Anyin ame he ka o ke bong bongu Iehova tuhan sabaoth, ka hnyi hon tavat begörany me bi gan hia, ke tavat hia adre me ogân' ödra ; me adre me he ka ohnyikön' ödra : 13 ke hon je arasiny hia Lebanona, ae görany ke beü ; ke hon je iwajoiny hia Basana ; 14 ke hon ta je bucen hia ae beü, ke hon je hut hia ae görany ; 15 ke hon je hnabâ hia ae beü, ke hon je hna up hak veto ; 16 ke hon je huiny 'hia Tasesa, ke hon ta je únyi adre tretrau hia ae kese. 17 Ke adre me he ka hom úhnyükongo tavat adre me begörany, k' adre me he ka ohnyikânâ tavat ae bi gan : ke adre me he ka oganö Iehova thibi hnyi bong e. 18 Ke ame he ka hia hia but ta je idola. 19 K' ame he ka dit tavat ka hnyi hnyin ta je op hnyi je kic, ke eü hnyi hnyin ta je uthankonginy kânâ únyi ge hna outö Iehova, ke únyi ge anyin hmanenang ae mec, hnyi úen e ame he ka todrö ka jijingâ hwegiâ hmeledrany. 20 Ke hnyi bong eling ame he tavat ka degec anyidra je idola sileva, me anyidra je idola gol, waleji adre me tibet hnân hic ködra, adre me he ka degec ka je afora, ke ta je obübü bi ; 21 me me dit ka hnyin je esoping kic, ke je khekheiny je kic ae újejong, únyi ge outö Iehova me anyin hmanenang ae mec, e ka todrö ka jijingâ hwegiâ hmeledrany. 22 Soju öbun labageju ka at, ame menâ ge li hnyingöiny : anyin a hnân eü he ka únykúme kaú ?

HNyimakan 3.

**A**NYIN a wâ bi, haba Than Iehova tuhan sabaoth, ame hom únyi Jerusalema me Juda ke ci me ke ci, wale je ci areto hia, me je ci köiö hia ; 2 me at hwege, me at vat ; me at owisa, me perofeta, me at bi khong, me hingat ; 3 me taben ka fifte, me at lung so, me obongon, me at tretrau ae metâ, me at ae khana khet. 4 Ke oge me he ka ham ta je wanakat me hnân tubödra, ke ame he ta je mendreng

ka musi ödra. 5 Ke ame he tavat ka úöveciköu, ke at me ke at : ame he wanakat ka bi gan ka hingat, me hoümonu ka je than. 6 Ke ame he at ka kât liamekeiny mē hnyi hnyaban kamen, me ha, ka habe, E hu úkhaúâm, u me he ka tuhömun, ke u me he ka musö monu ang : 7 ke haba hnyi bong eling e ame he ka hongot göranyai, me ha, ka habe, Oge me ca he ka bi anyin, anyin ae ba jeü me úkhaú hnyi umök uma ; ca he öbun ka otölö nya bi hnân than thaniny hnyei. 8 Anyin ame hangâ but Jerusalema, ke Juda ame ü : anyin ae iwahnaihmiöny me Iehova je bohmödra me anyidra je huliwa, he ka ohinyâ li emakan ae hmanenang. 9 Ame omanen' ödra hnen ta je hnyimaködra ; ke adre me omanenâ anyidra hulö helâ me Sodoma, adre ca ikhâlâ bi. Ekölö ge hanudrin : anyin adre me hia but bi hwaban hulö ködra bi. 10 Ha thö ka at ae wisa hwa-kecin, ka habe, ame he ka hu so gan ; anyin adre me he ka an wan anyidra huliwa. 11 Ekölö ge at ae monu ! ame he ka hu kong gan ; anyin adre me he ka ham kâu hwaban li hnyamen. 12 Ke haba lakeik, ame sed' ödra hnen je wanakat, ke ame musi ödra hnen je momo. Lakeik lö, a omonu u hnen tavat adre me su u, me ohia dem ta je gethen. 13 Ame todrö Iehova he ka ivinö, e ame tot he ka owisa ta je hnyei. 14 Ame he Iehova ka he me owisa ka wahingatiny lakeiny, me latuhödra ; ka habe, Öbun e hia but an hia hnyei vine ; ke eiö hnyi umöbun je uma ta je únyi adre hügúnâ ge tavat ae theduoc : 15 ke ieú gabun öbun e okongoâ lakeik, me omomono hnyimakan ta je theduoc ? haingö Iehova tuhan sabaoth.

16 Ke ame ha Iehova, ka habe, Can anyin ame hop wahluiny Ziona, k' adre me he me öbeúâ je nyidra, ke iyawö li ecmak, ke he hop, ke ocuha je omakhmäiny cadra : 17 anyin a wale ame he Than ka kot wanben je bodra ge oholök, k' ame he Iehova ka omanenâ je unyidra. 18 Ke haba hnyi bong eling, me ame he than ka hügúnâ je mecin je ohmakhnainy je cadra, me je boert, me je omjehedrin e úcú me ong tehi ; 19 me je únyi adre ohima, me je waen, me je únyi hnân tubi hnyimak ; 20 me je hnabecin, me je omjehen li cadra, me je wen hnyok, me je kaia hnân hnulâ, me je ong khong ; 21 me je wen banyen, me je otu hnân hnyingöidra ; 22 me je úkhaú ae hmanenang, me je úkot, me je mano hnân

ISAIA 4, 5.

tube, me je tang ; 23 me je ong uselat, me je lino ae úhnyúkong nân, me telenuiny ban, me je úkhaú ae halelóú. 24 Ke ame he ka hu bebong hwaban bo so ; ke tö ae gan nân, hwaban wen hnyok ; ke hadreú, hwaban hna theibâ ban ; ke hnamöc a mano ae gan nân, hwaban úkhaú ae laú ; ke delâ, hwaban hmainy hnyimak. 25 Ke ame he je obaga unyâm ka ta ge hele vat, ke tavat hwege bi hnyi vat. 26 K' ame he je homagöuleny ka tenge me hlöuhlöu ; ke e ame he ka laba eú hnyi kânâ ke ba at unyin.

HNYIMAKAN 4.

**K**E hnyi bong eling ame he ta momo a seven ka kât бага a khaca me ha, ka habe, Öhmun e he ka an ö'hmun bi jeú, ke khavâ anyihmun bi je úkhaú : haba welmun thibi a u me ip iâm huhmun ; m' u ma ohia but hna haikongu öhmun.

2 Hnyi bong eling ame he ka hmanenang me mec hanö Iehova, k' ame he ka so me kese wan kânâ ka at Isaraela tavat adre kec möt. 3 Ke adre me he ka ha, me kap kolon hnyi Ziona, me at ame laba biju hnyi Jerusalema, wale tavat hia thithö adre tha signalimen me tavat ae möt hnyi Jerusalema : 4 e ka hia but Than hneú ikikiny wahluiny Ziona, me kot degecâ dren Jerusalema únyi hnyi wanben e hnen homenáiny owisa, me homenáiny kahwa. 5 K' ame he Iehova ka op hnyi ta je hnyaban hia hnyi bucen Ziona, me hnyi je úkhaca-köuiny e, úlá me hai hnyi lany, ke bâhlân meic ame ubâhlâ hnyi hnyinghet : anyin ame he ka hu únyi hnân tube hon hmanenang hia. 6 Ke ame he ka hu ama menâ hnân hwaclu hnyi lany can kahwa, me hnân lubaduöng me nedrong ge weneú me we.

HNYIMAKAN 5.

**I**NY bekhumöngö ka ti oúnykúmik khu-möng ge oúnykúmik ge iny hnyei vine. E hu ge oúnykúmik ehac hnyei vine hnyi hutiny kânâ ae hosó : 2 ke e ame seú igigilö, me hlo je vetoiny, me tâ vine soreka hnyin e, me otílö uma hnân belök wanben e, me si taben hlic vine hnyin minya : me e ame lubahingen he ka wa wan vine, ke ame wa bi wan vineiny hnyot. 3 Ke walang ang öbun tavat öbun e laba hnyi Jerusalema, me at Juda, öbun na owisa thö

könya me ik hnyei vine. 4 Ieú ae khan' ödra ányâ hmetu hnyi ik hnyei vine a oge ca hia but ányâ hnyin e? oge me halubahingen he ka wa wan vine, ke ieú ame wa wan vineiny hnyot gan? 5 Ke oge me he ka omanená walang ang köbun únyi oge me he ka ányâ hnyi ik hnyei vine : oge me he ka hom degecâ haginy, m' adre me he ka an dö e ; oge me he ka hagutâ haginy, m' adre me he ka uto but e : 6 ke oge me he ka oúnyibauâ e ; ke adre me ca he ka ányâwia me jien ; ke ame he ka kú hnyin e je iwadekong me watetaföcö : ke oge me he ka húna ka je úlá me me ca he ka ta we káu. 7 Anyin a hnyei vine i Iehova tuhan sabaoth lap anyi Isaraela, ke haba tavat Juda haleny uö ae so : ke e ame elâm hna owisa, ke wâ bi hna ovecâ ; k' ame elâm hwakecin ae wisa, ke wâ bi hwan tenge bi.

8 Ekölö ge tavat adre me bi hanen ke uma ka ke uma, ke bi hanen ke utkânâ me ke utkânâ, ke ne o but ame ba dok hnân laba hnyin, m' öbun biju öbun e hake laba hnyi wanben hnyei! 9 Ame ha Iehova hnyi li hnyikönyök, ka habe, E hnathu ame he ka ba önyen ta je uma ae se, je uma ae gan me hmanenang, ke ba at ame he ka labâ. 10 Anyin a ten ta ekeriny hnyei ame he ka wa thibi bath a khaca, ke khaca homer wan adre tâ ame he ka wa khaca thibi efa.

11 Ekölö ge tavat adre me vesâkong hnyi hnyomakatu he ka hnu hoton grâg ; ke adre me laba ke ne o but hnyi hnyinghet m' adre me monu ge waina! 12 Ke e bi kitara me nabeli, me bwinybet, me utköwi, me waina, hnyi anyidra je bijeú : ke adre me ca únykúme ge huliwa anyi Iehova, k' adre ca hia but únykúme bi huliwa anyin li hnyamen. 13 Anyin a wale ame he lakeik ka bâ, can e ba únyi ae khan' ödra : k' ame mekihnânen tavat ae beönua gadra, ke mok ge beic hoúmonu gadra. 14 Anyin a wale a hia but hedis ogânâ weny bi, k' ame memang gan hmâ a ca hnân bi tuluto : me ame tha utut ka hnyin anyidra hmanenang, me hoúmonu, me tavat mede, me tavat hobâ. 15 Ke ame nom ju hoúmonu, ke adre me hom hnyikânâi je taben, k' adre me ohnyikânâ li emakan at ae begörany : 16 ke adre me oganö Iehova tuhan sabaoth ge hna owisa, k' adre me okabâ Khong at ae Kap ge hwakecin ae wisa. 17 Ke ame he lakon mamoe ka han hnyi hna alin ödra ka hnyin, k' ame he ta je atkanyua ka han

ta je hnyei iny tavat ae pipikhenya adre me hna degecâ.

18 Ekölö gadra adre me lelö monu ge je töiny thoi, ke lelö hulö ge töiny kat : 19 tavat adre me ha, ka habe, E so e ame logot, e so e ame mweimweiâ anyin huliwa, m' öhmun e he ka wâ e ; ke ohakekenyâ thö, me o but musu anyin Kabiny Isaraela me me khan' öhmun dö !

20 Ekölö gadra adre me ha únyi ae kong, me so ; ke haba so, me kong ; me ip menekholom hnyi hnen lany, ke lany hnyi hnen menekholom ; me ip hiny hnyi hnen hnebwia, ke hnebwia hnyi hnen hiny !

21 Ekölö ge tavat a ödra metâ hnyi hnödra hna únykúme bi, me únykúme a ödra tavat wâ wia !

22 Ekölö ge tavat a ödra hwege ka ic waina, me tavat hwege he ka úhaniken tap grág : 23 adre haiwisa at ae monu ge hwanban, me hok wisa unyin at ae wisa ! 24 Anyin a wale, helâ me bâhlân meic ame an thatúnyi, ke helâ me önying ae meleca ame ta hnyikânâi hnyi meic, helâe ame he ka bobot anyidra iwân, k' ame he ka sâ göranyai anyidra je vongon helâ me sesâiny kânâ : anyin adre me hna degecâ hnanyibu anyi Iehova tuhan sabaoth, me húkötia hofuc hwan Kapi Isaraela.

25 Anyin a wale ame han hmönyin anyi Iehova ka lakeiny, ke e ame nang hnyamen hudra, me kuc ödra, me ame öbubuny je ong bucen, ke haba je unyidra a moku, me helâ me únyi ae ikiki eú hnyi gethen. Ke hnyi ta je únyi e, e ame ca wia bi anyin hmönyin, ke ame inâ bala bi hnyamen. 26 Ke e ame he ka ogöranyâ boúdila ka hnyi ta je hnyei ae sâkâú, ke e ame he ka hülúwhajú ködra únyi hnyi obiny hmeledrany : ke wâ bi adre me he ka ie o logot : 27 ame ca he ke at gadrin ka sényin me haú ; e ba at ame he ka tamokut me mokut ; k' ame ca ok bi wen hnyekudra, k' ame ca mou bi hna húkâlâ hnyeúcadra : 28 e so homakan anyidra je fana, ke oto anyidra je cafana hia, ke helâ me oút je boújimen can haledra je hors, ke helâ me höu anyidra je waengen : 29 ke adre me he ka kuku helâ me je liona, adre me he ka kuku helâ me je nak liona : eke, adre me he ka kip me oloú je hanidra, me hom ka hnyi dok ae iyöng, ke ame he ka ba at ka omelö. 30 Hnyi bong eling adre me he ka kuku gadra helâ me imeainy köö : ke ödra ka wâ hnyei, wâ bi, e menekholom me hnak, me khömet ge je úläiny.

## HNYIMAKAN 6.

**H**ABA hnyi hunainy mok a Uzia than, me oge me wâ Than ame tabâ theron ae görany ke beönua, ke unöngötö uma ge obiny anyin úkhaú. 2 K' ame tot ethö hon e je serafi ; ke ve hu labenyidra a siks ; k' adre me tube je hnyimaködra ge li labenyidra, k' adre tube li cadra ge ke lo, k' adre me gâ ge ke lo hmetu. 3 Ke adre me úkukoköu me ha, ka habe, E kap, e kap, e kap, Iehova tuhan sabaoth : e unöngötö hmeledrany hia ge anyin hmanenang. 4 Ke ame bwebwelâ je taben je hwanuma ge ifucin at ame hongot, k' ame unöngötö uma ge hai. 5 Me oge me ha, ka habe, Ekölö gak ! anyin oge ngâ but ; anyin a inya at ae kong esongodiny, ke inya oge me laba unyin tavat ae kong je esongodidra : anyin a li emakök ame wâ Than, a Iehova tuhan sabaoth. 6 Haba ke serafi ame gâ könya, ke e bi hnyi hnyamen walepae möt, wale e ame hom únyi hnyi taben hut ge akofi : 7 me e ame kâlâ hnyimök kâu, me ha, ka habe, Wâ bi, ame kâlâ li esongodâm ge únyi e ; ke adre ohia but ânyâm monu, k' adre me hneú degecâ ânyâm hulö. 8 Ke oge me löng ifuci Iehova ame ha, ka habe, Oge me he ka kunö ia, ke ie at ame he ka he hobi kötin ? Me oge me ha, ka habe, Inya ang ; kunö nya thö. 9 Me e ame ha, ka habe, He thö, me ha ka tavat ang, ka habe, Obun e labö löng, ke ca wâhmakhmeto bi ; ke öbun e labö wâ, ke ca wâ únykúme bi. 10 Opipikhenya ju hnyekon tavat eang, ke owejijö but ta je hnyikönyödra, ke omúko but ta je emaködra ; wâ adre nye wâ ge ta je emaködra, me löng ge ta je hnyikönyödra, me khana ge je hnyekudra, me hwiö hmetu bi, me metu but. 11 Me oge me ha, ka habe, Than lö, ke ne o but kehö ? Ke haingen, ka habe, Ke ne o but ame ba but wan je taun, ke ba at ame labâ, ke ba but at hnyi je uma ; ke ba but wan hnyei, 12 ke Iehova ame hom but sâkâú ai tavat, ke e gan hmâ hna hna degecâ hnyei. 13 Ke ame ne tiga hu ke keihen a libenyitainy biju hnyin e, adre me he ka han metoâ e : helâ me man ela me iwajo, wale ame tiga e bi önyen, ödra ka hia but öüo ; helâe ame he ka wan ae kap önyen.

## HNYIMAKAN 7.

**K**E hnyi je bong bongu Ahaza nöku Jotham, nöku Uzia, than Juda,

haba Rezina than Suria, me Peka nöku Remalia, than Isaraela, ödrü me o hnyi Jerusalema he ka vat mē ; ke ca khan' ödrü he ka hwege hon e. 2 Ke adre thumeto lap anyi Davita, ka habe, Ame tha hien at Eferaima me at Suria. Me ame bwebwet hnyekon, me hnyekon lakeiny, helâ me je üö hnyi hnyot ame bwebwet ge ang.

3 Me haba Iehova ame ha kö Isaia ka habe, He thö walang ang ka ûkhanö me Ahaza, u me Sear-jasub a nokom, hnyi obiny gethen deny köiöiny an ethö, hnyi gethen wanben utkânâ anyin at hnû khaú ; 4 me ha kâu, ka habe, Wâ ju, me mē laba ju ; ca ot bi, ke ca sēnyin bi hnyekom, can li hnyiban utö eang ae hai, ke can hmönyin anyi Rezina, me Suria, me nöku Remalia. 5 Anyin a Suria, me Eferaima, me nöku Remalia, ödrin e si hnâm, me ha, ka habe, 6 Ötin he Juda ai, me ovecâ, me bi detin ka hnyin, me otilö thaniny, wale nöku Tabeela ; 7 walang hofuc hwan Than Iehova, ka habe, Ame ca he ka hmâ únyi e, ke ame ca he ka aat. 8 Anyin a Damaseko ban ka Suria, ke Rezina ban ka Damaseko : ke tiga ca um bi je huna a sikste faiv me adre me he ka bödra ka subâ Eferaima, me me ca hnyei hmetu bi : 9 Ke Samaria ban ka Eferaima, ke nöku Remalia ban ka Samaria. Öbun e ne ca labageju, e hnathu öbun e ca he ka tethmâ.

10 Ke Iehova ame ha hmetu kö Ahaza, ka habe, 11 U me he ka sumâtâ hobi köu haten únyi ga Iehova, a Khongom ; sumâtâ thö ame ne únyi eú, ame ne únyi ethö. 12 Haba Ahaza ame ha, ka habe. Oge me ca he ka sumat, ke oge me ca he ka cubic Iehova. 13 Ke e ame ha, ka habe, Lap anyi Davita lö, löng ju walang ang ; hawa, únyi ae úhnyúkong e öbun e ovecâ at, ke öbun e he minya ka ovecâ Khong ? 14 Anyin a wale, ame he Than ka ham köbun haten ; wâ bi, ame he hlu ka erkin, me hnokoâ da, me hwenyi ien e Emanuela. 15 E ame he ka han bata me hani, e ka khana he ka höciâ hulö, me úca so. 16 Anyin ae ka tiga ca khana e wanakat he ka höciâ hulö me úca so, me adre me he ka hna degecâ hnyei iny li than u je hûkötîâ. 17 Ame he Iehova ka oâ köu, me em hnyei, me lap anyin kâmâm ta je bong adre tiga ca wâ, hwân hnyi bong ame he Eferaima úheny Juda ; wale than Asuria.

18 Ke haba hnyi bong eling me ame he Iehova ka húlúwhajú ka je nöng únyi hnyi

obiny je wageweiny Aigupito, me ta je bi minya únyi hnyi hnyei Asuria. 19 Ke adre me he ka o hia me tabâ je thop ae ba aten, me je esopiny kic, me je üö oe údedö hia, me je hnaönying hia.

20 Ke haba hnyi bong eling ame he Than ka úgi ge heleúgi adre me mē bi hwaban, a e bi hnyi ke keihen hoton wagewe, wale unyin than Asuria, ban me leúnen li can : k' ame he minya bi ka khudreú bi wainy.

21 Ke haba hnyi bong eling ame he at ka hat nak kau me li mamoe ; 22 ke can úganiny dân basidrin, e ame he ka han bata : anyin ame he ka han bata me hani ödra hia je kolon hnyei.

23 Ke haba hnyi bong eling, hnyi ta je hnyei hia ae hu vine hnyin a wan thauzan, a hwaban je ong sileva a wan thauzan, me wale ame he bi ka hnen ta je iwadekong me watetaföcö. 24 Adre me he ka o ang me je fana me je cafana ; anyin ame he ka unöngötö hnyei hia ge je iwadekong me watetaföcö. 25 Ke haba hnyi je ong bucen hia waleji adre me labö trohnenâ ge unu, me u me ca he ka he ka hnyi, anyin a u ma outen je iwadekong me watetaföcö, ke hnân bi e kunâ je bolok ka hnyin, me hnân uo ge je mamoe.

#### HNYIMAKAN 8.

**K**E haba Iehova ame ha könya, ka habe, U ma he ka hom veto ae gan ae lau, me sihnalimen huyin e ge pen anyin at, ka habe, Hobi kâu Mahera-salala-hasa-baza ; 2 ke oge me he ka hom könya li at ohnathoâ ae hnathu he ka sihnalimen, wale Uria at bihut, me Zakaria nöku Jeberekia. 3 Ke oge me he but ka perofeta momo ; ke e ame erkin me hnokoâ da. Haba Iehova ame ha könya, ka habe, Hwenyi ien ju Mahera-salala-hasa-baza. 4 Anyin ae ka tiga ca khana wanakat he ka ha, ka habe, Cica ke bai, me adre me he ka hom je omjeúiny Damaseko me je hna söh hnyi Samaria hnyi hnyimakan than Asuria.

5 Ke haba Iehova ame ha hmetu könya, ka habe, 6 Anyin a hnen tavat hna höciâ je köiöiny Siloa, ame omi di, me senyin bi kö Rezina me nöku Remalia ; 7 anyin a wale, wâ bi, ame he Than ka oâ ködra je köiö únyi hnyi Wagewe, wale ae hwege me gan, than Asuria me anyin hmanenang hia : ke e ame he ka o hnyi deny je gethen hia, me bahihingölö hon je baten ; 8 ke e ame he ka di bala Juda ai ; me bahihingölö

me vheno e, me khibi ke ne o but hnyi nyin; me ame he ka önöngötö ülauen em hnyei, Emanuela.

9 Ta je hnyei lö, hmönyin dö, ke öbun e he ka omomonu; ke je hnyei hia ae sákâü lö, tevehlöng ju: oweikâ ju je hnyekubun, ke öbun e he ka omomonu. 10 Tha ûhne-namö thö, ke ame he bi ka ûnyi baü; ha thö hofuc, ke ame ca he bi ka hwädâ: anyin ae unyita Khong. 11 Anyin a walang hna ha hnö Iehova kõnya me man ae hwege, me nö nya m' inye ca he ka vheno gethen deny tavat ang, me ha, ka habe, 12 Ca he öbun ka hnyi ha, ka habe, Ame sihnân, hnyi ta je ûnyi hia thithö ame he tavat ang, ka ha hnyin ka habe, Ame sihnân; ke haba khaca, ca ot bi helâ me iodra, ke ca öbubuny bi. 13 Öbun e he ka okabi Iehova tuhan sabaoth; ke so öbun e he ka ot kâu, me öbubuny gan. 14 Ke e thibi hnân dok ae kap; ke veto hnân setu me kic hnân öhükötö ka li lap anyi Isaraela, hnân hnewe me ofic ka tavat adre me laba hnyi Jerusalem. 15 Ke se hia tavat adre me he ka haü hnyin, me ta, me amam, me hnok, me hom.

16 Hükâlâ ju ûnyi hnân ohnatho, ke okeceâ hmâ ju hnanyibu unyin je latök. 17 Ke oge me he ka halubahing Iehova, at ame ikhâlâ hnyimakan ge lap anyi Jakob, ke oge me he ka elâm e. 18 Wâ bi, haba inya ke lakuk a ham kõnya Iehova, me hnân je haten ke hnân lâiâ hnyi Isaraela ûnyi ga Iehova tuhan sabaoth, at ame laba hnyi bucen Ziona.

19 Ke ödra ka ha köbun, ka habe, Elâm dö unyin tavat tren je khong, me tavat bi khong, tavat adre me cuk me fufuc: hawa, ca hamen hnyei he ka elâm unyin Khongudra? hawa, adre me he ka elâm hobi kâu tavat ae möt unyin ta je komok? 20 Kec do ka hnyi hnanyibu me hna ohnatho! adre me ne ca fuc hoton hwan hofuc eling me ame he ka ba hnyomakatu hobi ködra. 21 Ke adre me he ka vheno e hnyi vec me mekihnânem: ke ödra ka he ka mekihnânem, me adre me he ka vec hnyok, me hangâ hnyi ien tuhödra me Khongudrin, ke hngele bi hnyi dranyai: 22 ke adre me he ka wâ hmeledrany, ke wâ bi, vec me menekholom, k' ame he ka lit ge vec; ke adre me he ka ob' ödra ka hnyi menekholom ae khot.

HNYIMAKAN 9.

**K**E ame ca he bi ka lit at eji ame vec hnyok. Haba hnyi je bong ehac e ame öhükötiâ hnyei Zebulona me hnyei Nafatali, ke haba hnyi üen a biliny, me e ame ohmanenangâ, hnyi gethen hnyi hobat köiö, hoton Joridano, Galilaia iny ke ta je hnyei. 2 Haba tavat waleji adre me vheno menekholom, me adre me wâ melam ae gan: ke haba tavat adre me labâ je hnyei a hanon mok, me ame umumelam hudra lany. 3 U je hia but osehia hnyei, ke u je ogânâ senyin: k' adre me senyin hnyi hnyimâkâm helâ me senyin hnyi menu, ke helâ me hna senyin ge tavat adre me khenâ je hna söh. 4 Anyin a u je hia but thu anyin ûnyi hnân öhükâlâkôuâ ae hmak, me uciny abenyin, me osö anyin at ame okongoâ e, helâke hnyi bong bongon Midiana. 5 Anyin a haba je onjehen vat hia anyin tavat penapena hnân vat, ke je ûkhaü adre me kina hnyin dra, me adre me he ka ip hnân thong, ke hnân hlogon meic. 6 Anyin adre me hnokoâ hobi köta wanakat, k' adre me ham köta da; ke ame he ka e bi hon bajebenyin musi; ke adre me he ka hwenyi ien e, Hnân lâiâ, me At ame obongon, me Khong ae man, me Kamen a nyiele balua, me Thaniny üsoköu. 7 Ame ca he ka hu obiny üganiny anyin musi, me üsoköu hon theron anyi Davita, me hon dokhon dökhü, he ka ohmâ e me cö e ge hna owisa me hwakecin ae wisa hwân walang ang ke ne o but nyiele balua. Ame he ka ânyâ e hnen weny ae gan hinâ anyi Iehova tuhan sabaoth.

8 Than ame kunâ hofuc kö Jakob, ke ame ta bi hon Isaraela. 9 Ke ame he ka khana hnen tavat hia, wale Eferaima, me tavat adre me laba hnyi Samaria, tavat adre me ha ge hnyok bi gan me begörany, ka habe, 10 A kölu but je veto kânâ, ke öhmun e he bi ka up uma ge je veto adre kave: adre sö but je sukamore, ke öhmun e he bi ka bi hnen ge je arasi. 11 Anyin a wale ame he Iehova ka otilâ görany kâu je iwahnaihmiöny me Rezina, me obwe-bwelâ anyin je iwahnaihmiöny; 12 at Suria hnyi hnyimâködra, me at Filisiti hotudra ai; ke adre me he ka utö Isaraela ge hnyem ae memang. Ke hnyi ta je ûnyi e hia, e ame ca hwiö hnyi anyin hmönyin, ke ame lau bala bi hnyamen.

13 Ke so bi ame ca hwiö tavat kâu at

ISAIA 10.

ame kuc ödra, ke haba khaca adre me ca elöm Iehova tuhan sabaoth. 14 Anyin a wale ame he Iehova ka subâ degecâ hnyi Isaraela ban me obiny, pama me amun, hnyi bong a khaca. 15 Haba hingat ae lung so, me wale ban; ke haba obiny, me wale perofeta ame ûne thoi. 16 Anyin a haba tavat adre me su tavat ang, me wale tavat omonu ödra; ke adre me ohi ödra a tavat he hotudrin. 17 Anyin a wale ame ca he Than ka senyin ge je hidröu unyidra ke e ame ca he ka betenge ge tavat ae ba kamödra, me je safac: anyin a ödra hia thithö adre me ca ot, ke tavat bi ae kong, me je hnyem hia ame hwen monu. Hnyi ta je ûnyi e hia, ame ca hwiö anyin hmönyin, ke ame lau bala bi hnyamen.

18 Anyin a haba hwakecin ae kong ame han helâ me meic; ke ame an je iwadekong me watetaföcö: eke, e ame möt hnyi je nedronginy hnyot, ke adre me sâ khekhenyi göranyai hainy e. 19 Ame le degecâ hnyei ûnyi ge wathethöt anyi Iehova: ke haba tavat, me helâ me utö hnân hlâ hnyi meic; ke ba at ame betenge ge liamekeiny mä. 20 Ame he ke at ka söh hnyi ke keihen a metâ, k' ame he ka mekihnânem bala bi; ke e ame he ka han hnyi ke keihen me, k' ame ca he ka sekon bi: k' adre me he ka ve an viny je benyidra bi: 21 Manase ame he ka ön Eferaima; ke Eferaima ame he ka ön Manase: k' ödrü ma he ka tha hiödrü ka vat me Juda. Ke hnyi ta je ûnyi e hia, e ame ca hwiö hnyi anyin hmönyin, k' ame lau bala bi hnyamen.

HNYIMAKAN 10.

**E**KÖLÖ ge tavat adre me otölö hna-nyibu ae ca wisa, me tavat adre me sihnalimen ûnyi ae hwali: 2 he ka wia at ae theduoc hnyi hna owisa, me ohia wisa ûnyi ge lakeik adre me vec, m' adre me söh ta je safac, me hügünâ ta je ûnyi anyin tavat ae ba kamödra! 3 Ke ieü öbun e he ka ânyâ hnyi bonginy sene, ke hnyi hnauhangö ame he ka o ûnyi hnyi dok ae sâkâu? öbun e he ka kec kö ia me me hadru' öbun? ke öbun e he ka ip ua anyibun hmanenang? 4 Adre me he bi ka tha iyâû thibi me ta je bâ, me tha ta me tavat adre me hlingâ. Ke hnyi ta je ûnyi e hia, e ame ca hwiö hnyi anyin hmönyin, k' ame lau bala bi hnyamen.

5 Ekölö ge at Asuria, osöiny anyik hmö-

nyin, ke utöhmu hnyi hnyamen anyik wathethöt! 6 Oge me he ka kunâ e ka tavat a adre ca ot, ke oge me he ka hûna kâu hnyei ae hmönyik ka hnyin, he ka hügünâ ta je omjeü, me söh ta je ûnyi, me uti ödra helâ me hmudra hnyi je gethen. 7 Ke so bi e ame ca weny bi he ka helâe, k' ame ca ûnykúme hnyekon he ka helâe; ke e bi hnyi hnyekon he ka ohia me subâ degeca je hnyei ke ca wakhalet bi. 8 Anyin a e ame ha, ka habe, Hawa, ca je hing than hia anyik je taben? 9 Hawa, e ca tha úcú Kalene me Kakemis? ke ca úcú Hamath me Arepada? ke ca úcú Samaria me Damaseko? 10 Haba hnyamök ame hia but wâ ta je dökhü ae hu je idola, ke beönua hnödra hnatheat hudra hnyi Jerusalema me Samaria; 11 me hawa, oge me ca he bi ka ânyâ ka Jerusalema me je idolainy helâ me hnök hna ânyâ ka Samaria me je idolainy?

12 Anyin a wale e ka hia but Than umo anyin huliwa hia ka bucen Ziona me Jerusalema, me oge me he ka senâ wan hnyok bigan anyin than Asuria, me hmanenanginy li emakan ame begörany. 13 Anyin a haingen, ka habe, Oge hia but ânyâ e ge hnyamök ae hwege, me anyik metâ; anyin a inya at wâ wia: ke oge hia but wia je hnyigöulen ta je hnyei, me hügünâ ta je tang omjehedra, me ohnyikânâ tavat adre me tabâ je theron helâ me at hwege: 14 ke hnen hnyamök hna wâ ta je omjeüiny je hnyei helâ me hâüen meno; ke helâ me at ame hlo je wakunyin meno adre de degec, helâe oge hia but hlo ta je hnyei hia: ke ba at ame bwebwet abenyin, me memang, me cúk. 15 Hawa, ame he gö ka oho-beleuâ hon at ame nang e? ame he gili ka ogânâ e ka at ame obwebwelâ e? helâke hnen osö hna obwebwelâ at ame nang e, ke helâke hnen uci hna kap göranyai at a ca utö bi.

16 Anyin a wale ame he Than, Than tuhan sabaoth, ka'kunâ delâ ka anyin ta je pipikhenya; ke eü hnyi hmelen anyin hmanenang adre me he ka vâc hna hlâ helâ me hna hlâiny meic. 17 Ke haba melaminy Isaraela ame he ka hnân meic, ke haba anyin Kap hnân bâhlân: ke ame he ka thong me an anyin je iwetetaföcö me iwadekong hnyi bong a khaca. 18 Ke e ame he ka an hmanenanginy anyin hnyot, me iny hnyei ame wa wan, wale hanu me unyin: k' ame he ka helâke at kât boúdila ame ta ke mok. 19 Ke haba kolon ta je úöiny anyin hnyot

ame he ka wakhalet, me me khana wanakat ka sihnalimidrin.

20 Hnyi bong eling ame ca he hmetu ti ka he je kolon hnyi Isaraela, me tavat adre kec möt hnyi lap anyi Jakob ka labageju ka at a kuc ödra : ke adre me he ka labageju, hnyi hnathu kö Iehova, wale Kabi Isaraela. 21 Ame he ka hmetu ke kolon, wale kolon unyi Jakob, ka Khong ae man. 22 Anyin a eja ke ne a ne helâ me öny eü hnyi köiö lakem Isaraela, ame he ka hmetu thibi koluidra : adre me ip hmâ he ka ohia, ke wale ame badedö but hwakecin ae wisa. 23 Anyin a haba úohiö waleji adre ip hmâ, me ame he Than Iehova tuhan sabaoth ka ânyâ hnyi wanben hmeledrany hia.

24 Anyin a wale, walang hna ha hnen Than, Iehova tuhan sabaoth, ka habe, Lakeik lö, tavat adre me laba hnyi Ziona, ca outen bi öbun at Asuria : eja ke ne a ne kuc u ge osö, me nang anyin uci köu helâji me hnyi Aigupito. 25 Anyin a mē okhaca, me ame he ka hwâdâ wathethöt, me anyik hmönyin hnyi úohi' ödra bi. 26 Ke ame he Iehova tuhan sabaoth ka oâ kâu osö, helâ me hna kot at Midiana hnyi kic Oreba ; k' ame he anyin uci ka e hon köiö, ke e ame he ka hai göranyai e helâ me hnyi Aigupito. 27 Ke hnyi bong eling adre me he ka hom honen hok únyi hnyi hon bajebenyâm, me anyin bi hna úhúkâlaköuâ únyi hnyi hon nyem, ke adre me he ka ohia hna úhúkâlaköuâ, can wakaco hnân hú.

28 E ame o but hnyi Aiath, e ame vheno Migeron ; e ame ip anyin bi thatúnyi hnyi Mikemas : 29 adre me hanyâûâ gethen ae hnek ; adre me mokut hnyi Geba ; ame öbubuny Rama ; Gibeä anyi Saulo ame kec dö. 30 Hlu nöku Galim lö, hongot dö göranyai ! Laisi lö, löng ju ! ekölö gam Anathoth ! 31 Ame kecec ut at Mademana ; k' ame úkhacaköu aten Gebim, he ka kec. 32 Hnyi bong ang e ame he ka laba hnyi Nob : k' ame jijingâ hnyamen ka bucen anyin hlu Ziona, a hutiny Jerusalema.

33 Wâ bi ame ke Than, Iehova tuhan sabaoth, ka sö degecâ ta je vheiny ge hna outen : ke haba tavat ae beü göranyai, me adre me he ka öüo, ke adre me he ka ohnyikânâ tavat bi gan. 34 Ke e ame he ka sö hnyot ae khöt ge fao, k' ame he Lebanona ka ta ge at ae hwege.

## HNYIMAKAN 11.

**K**E ame he ka o khûen únyi hnyi iwân anyi Jese, ke ame he ka wa wan ke vheiny únyi hnyi anyin iwân : 2 ke ame he hanu Iehova he ka laba hon, a hanuiny metâ me wâhmakhmeto, hanuiny omanenâ bongon, hanuiny man, hanuiny wâ únykúme me outö Iehova ; 3 ke haba anyin senyin, me wale he ka ot kö Iehova : ke e ame ca he ka owisa hoton hna wâ hnen li ecmak, me nâ hoton hna löng hnen li hnyiköny : 4 ke e ame he ka owisa ka ta je theduoc hnyi hwakecin ae wisa, me nâ hnyi tulut ae úcú ka tavat ae menyik eang hmeledrany : ke e ame he ka kot hmeledrany ge osöiny hnyimen, me hlingâ tavat ae kong ge homenâ únyi hnyi hnyimen. 5 Ke wen hnyekon hwakecin bi ae wisa, ke wen fetriny hwakecin bi ae hnathu. 6 Ke ame he lukö ka tha laba me nokon mamoe, ke ame he lepad ka tha mokut me nokon got ; ke ame he nokon kau me nokon liona ka tha e me meno adre opipikhenyâ ; ke ame he wanakat ae úhnyükong ka su ödra. 7 Ke ame he nak kau me bea ka tha han ; k' ame he je lakudru ka tha mokut : k' ame he liona ka han thatúnyin hwit helâ me bolok. 8 Ke ame he wanakat ame i ka walak hon hwanumen asip, k' ame he wanakat adre hnebaiö ka ip hnyamen hon háuen vaipa. 9 Adre me ca he ka ovecâ me okongoâ hnyi anyik bucen hia ae kap : anyin ame he ka unöngötö hmeledrany ge wâ únykúme ga Iehova, helâ me köiö ame tube taben köiö ae gan.

10 Ke haba hnyi bong eling, haba iwân anyi Jese, at ame tot hnân haten ka ta je hnyei, me ame he ta je hnyei ka elâm e ; ke ame he ka hmanenang hnen hna menâ.

11 Ke hnyi bong eling ame he hmetu Iehova ka olo inâ hnyamen he ka hom kolon lakeiny, wale a tiga laba, úheny Asuria me Aigupito, me Patherusi, me Kuza, me Elama, me Sinara, me Hamath, me únyi hnyi ta je bomene hnyi köiö. 12 Ke e ame he ka ogöranyâ bou-dila hobi kâu ta je hnyei, me úkhacaköuâ je hna degec ge at Isaraela, me úkhacaköuâ je hna ovecâ a at Juda únyi hnyi je can hmeledrany a vak. 13 Ke ame he ka hia ciâ anyi Eferaima, ke adre me he ka subâ degecâ tavat adre me oveci Juda : ame ca he Eferaima ka ciâ ga Juda, k' ame ca he Juda ka oveci Eferaima. 14 Ke adre me he

ka utut ka hnyi hon je bajebenyin at Filiti e jimeû; adre me he ka tha söh tavat aten jimeio: adre me he ka inâ hnyamödra hon Edoma me Moaba; ke ame he ka ling ödra je laku Amona. 15 Ke ame he Iehova ka ohia beduainy köio hnyi Aigupito, ke jijingâ hnyamen hon Wagewe ge anyin ang ame hlâ, me kot e me me seven but ta je di, m' adre me he ka hanyâûa ke mada bi tangen hnyeücadra. 16 K' ame he ka hu hna cit gethen anyin kolon lakeiny, a kolon únyi Asuria; helâji ka Isaraela hnyi bong e ame he úheny hnyi hnyei Aigupito.

HNYIMAKAN 12.

**K**E haba hnyi bong eling, me u me he ka ha, ka haba, Iehova lö, oge me he ka oleâ köu; anyin a eja ke ne u je ne hmönyin könya, me ame hwiö but ânyâm hmönyin, me u je otubweli nya. 2 Wâ bi Khong thibi melik; ke oge me he ka labagejon, me ca he ka ot: anyin a haba Than Iehova, me wale tang hwegiök, me hwanyik khumöng: me e bi ang anyik úhömeli. 3 Anyin a wale öbun e he ka se köio me senyin únyi hnyi je pupuainy möt. 4 Ke haba hnyi bong eling öbun e he ka ha, ka habe, Oleâ thö kö Iehova, hawâ thö ien; omanenâ thö unyin ta je hnyei anyin ta je huliwa, ke thumeto thö ae beönuu thibi ien. 5 Khumöng dö kö Iehova; anyin a e ame ânyâ ta je únyi ae beönuu: e so adre me omanenâ e hnyi hmeledrany hia. 6 At ame laba hnyi Ziona lö, hongot dö göranyai me kuku: anyin ae gan hmâ Kabi Isaraela eü hnyi wanbâm.

HNYIMAKAN 13.

**H**OK honen Babulona, waleji a wâ Isaila nöku Amosa. 2 Ogöranyâ thö boüdila hon bucen dok ae ba leünen, hongot dö ködra, úalú thö ge hnyam, m' adre me didrö hnyi je homagöuleny je than. 3 Oge hia but húna ka anyik wakap, eke, oge hia but hawâ je atök a tavat hwege he ka ohwâdâ anyik hmönyin, a je atök adre me hobâ me bi gan. 4 E hu hwan tavat ae se hia hnyi je bucen helâ me tavat ae se hia hmönyin! hwan medien je dökhuieny je hnyei adre me tha úkhacaköu! Iehova tuhan sabaoth ame oc je utbavat he ka vat. 5 Úhedra hnyi

hnyei ae sákâû, únyi hnyi je can drany, wale Iehova, a tha e me je omjehen anyin hmönyin, he ka ohia hia hnyei. 6 Tenge ju öbun; anyin a e but ang bong bongu Iehova; ame he ka o helâ me hna ohia hnen Ataekhanahia. 7 Anyin a wale ame he ka him but ta je beny hia, k' ame he ka köio but hnyekon tavat hia thithö: 8 adre me he ka gâ udra; k' ame he ka o ködra vec me hlöuhlöu; adre me he ka hmak helâ me momo ame vec hnyekon: adre me he ka úláiaköuâ; helâ me báhlân meic hnyi ta je hnyimaködra. 9 Wâ bi, e but ang bong bongu Iehova, a hlâ thö ge wathethöt me hmönyin ae kahwa; he ka öba aten hnyei, me ohia tavat ae kong hnyin e. 10 Anyin a haba ta je okhüiny drany me ta je deö okhüiny, ame ca he ka manen melamidra, ke ame ca he tehi ka oumumelamá. 11 Ke oge me he ka bi hwaban hulö ka hmeledrany, me hwakecin ae monu ka tavat ae kong; ke oge me he ka bi obiny bi gan anyin tavat hnyok bi gan, me ohnyikánâ begörany ge tavat adre ootâ. 12 Oge me he ka owakhaletâ at hon gol ae so, ke ame he ka wakhalet tavat hon goliny Ofira. 13 Anyin a wale oge me he ka ööbubunâ je drany, ke ame he ka jijingâ hmeledrany únyi hnyi hnen e, hnen hmönyin ga Iehova tuhan sabaoth, me hnyi bonginy anyin wathethöt ae kahwa. 14 Ke adre me he ka ve hwiö ka hnyi idra ta je hnyei, me ve kec ka hnyi ta je idra, helâ me zebi adre hnu, me helâ me je mamoe ae ba at ame alen. 15 Adre me he ka d' ödra hia tavat adre me wâ; ke ame he ka ta ge hele vat tavat hia adre me hom. 16 Ke adre me he ka sa lakudra je mendreng hnyi hnyimaködra; ke adre me he ka söh umödra ta je uma, me okongoâ laöioödra. 17 Wâ bi, oge me he ka bwebwelâ at Madai ködra, tavat adre me ca únykúme sileva, ke haba gol, me adre me ca he ka senyiná e. 18 Ke ame he anyidra je cafana ka öuo wahidröu; ke adre me ca he ka betenge ge wan hnyok; ame ca he li emaködra ka hna baúâ je wanakat. 19 Ke ame he Babulona, hmanenanginy je dökhuieny me soiny mec anyin at Kaledaia, ka helâ me Sodoma me Gomora hnyi úen Khong ame hagut' ödru. 20 Adre me ca he bala ka laba hnyin, k' adre me ca he ka labâ e hnyi ke dö me ke dö nyiele balua: k' ame ca he at Arabia ka otílâ umen uma mano eling; k' ame ca he tavat tuö mamoe ka omokulec e je hnahat mamoe. 21 Ke



## ISAIA 14.

ame he ka mokut eling ta je menoiny hnyot; k' ame he ka unöngöt umödra ta je uma ge ta je meno hnân outen, ke ame he ka laba eling je kasida, k' ame he je got бага ka walak eling. 22 Ke ame he je luko ka kuku hnyi je uma umen latuhödra, me ta je iaena hnyi umödra je una ae kese: ke hakekeny dut ün he ka o, k' ame ca he ka bec bonginy je bong.

### HNYIMAKAN 14.

**A** NYIN ame he Iehova ka betenge ga Jakob, ke e ame he hmetu ka úcö Isaraela, me ip ödra hnyi idra: k' ame he je atkanyua ka tha e mödra, k' adre me he ka kece ka lap anyi Jakob. 2 Ke ame he je hnyei ka hum ödra, me ip ödra hnyi hnödra: ke ame he lap anyi Isaraela ka hum ödra ka hnyi hnyei i Iehova hnân je athnyaba obaga me omomo: ke adre me he ka hwenbödra bi, waleji tavat adre me bá gadra; k' adre me he bi ka musi ka tavat adre me sed' ödra.

3 Ke haba hnyi bong ame he Iehova ka omenö u únyi hnyi ányâm vec, me ányâm ot, me huliwa ae hmak adre me kunö u ka hnyin, 4 me u me he ka hai úhöücú eang ge than Babulona, u me ka ha, ka habe, Ekölö ge hna bi obiny at úsedö! ke adre me bi'obiny taun gol! 5 A hia but Iehova thu uci anyin tavat ae kong, me haten musi anyin tavat musi; 6 waleji ame kot tavat ge wathethöt k' ame ca menâ bi nang, waleji ame musö hmönyinâ ta je hnyei, ge hna seda ae ca hnân thawâ bi. 7 A menâ hia thibut hmeledrany me laba wia: k' adre me ie hai khumöng. 8 Eke, ame senyin köu ta je köp, me je arasiny Lebanona, me ha, ka habe, Hwân hnyi hnödra hna omokuli u, me ba at si utö ame o köhmun. 9 Ame bwebwet ut hedis eü gam he ka úkhanö möu, u ka dit ka hnyin: e ame bwebwela je komok gam, a je taben hnyei hia; e ame otilâ je thaniny hia hmeledrany únyi hnyi anyidra je theron. 10 Adre me he hia thithö ka ha köu, ka habe, Hawa u je senyin dut helâ möhmun? hawa, u úcü but möhmun. 11 Adre ohnyikânâ hedis ai ányâm hmanenang, me meainy ányâm je nabeli: adre me ulolo eü hnyi hmelâm je biget, ke adre me okhoti u ge waahnyöng. 12 Okhú lan lö, nokon hnyomakatu, ekölö ge hnâm hna ta únyi ethö hnyi drany! at ame ohnyikânâ ta je hnyei lö, ekölö ge hnödra hna si u hagutö

u hnyikânâi. 13 Ke u je ha eü hnyi hnyekom, ka habe, Oge me he ka ölö hnyi dranyai, oge me he ka ogöranyâ anyik theron hon je okhú anyin Khong; ke oge me he ka laba hon buceniny úkacaköu hnyi ke keihen ka hnyi hwadró: 14 oge me he ka ölö hon je úlá; oge me he ka helâ me Beönua. 15 Ke so bi adre me he ka ohnyikânâi u hedis ai, ka hnyi údiliny thop. 16 Haba tavat adre me ö u adre me he ka wâ wia, me wâ únykúme me ha, ka habe, Hawa, wale at ame jijingâ hmeledrany, at ame bwebwelâ je dökhu; 17 at ame wia hmeledrany me me helâ me hnyebuba, me hagutâ hnyikânâi je tauniny; at ame ca hna tavat hwenbâ ka hnyi ta je idra? 18 Haba je thaniny hia ta je hnyei, ödra hia thithö adre me ve mokut hnyi hmanenang hnyi umödra bi je uma. 19 Ke haba u, me adre digic u helâ me anginy ae ikiki ke ba erkemok gam, ke helâ úkhaüen komok, adre dá ge hele vat, adre me utut ka hnyi ta je veten thop; ke helâ me komok adre me uto hmelen je cadrin. 20 U me ca he ka úkacaköu mödra hnyi erkemok, anyin a u je okongoâ em hnyei, me hlingâ lakem; adre me ca he bi ka ha nyiele balua matrâ-niny tavat ae kong. 21 Penapena thö dok hnân hlingâ je lakon, can hulö anyin je kamödra; m' ödra me ca he ka tot me me idra hnyei, me ounöngötâ kânâiny hmeledrany hnen ta je taun. 22 Ke haingö Iehova tuhan sabaoth, ka habe, oge me he ka höhöi ködra, me subâ degecâ ge Babulona ien me kolon, me nokon me öbiny, haingö Iehova. 23 Ke oge me he ka wia e hnân iny kifoda, me hnân je wadutö; ke oge me he ka aba e ge brum hnân mekiny, haingö Iehova tuhan sabaoth.

24 Haba Iehova tuhan sabaoth ame khemanyin, me ha, ka habe, E hnathu ame he ka helâji me hnök hna únykúme; ke ame he ka tethmä helâji me hnök hna ip hmâ hnyi hnyekuk: 25 Ke oge me he ka oamâmâ at Asuria hnyi ik hnyei, me uto e hmelen li cak hon anyik je bucen: me ame he ka hia hna úhúkáláköuâ únyi gadra, me honen hok únyi hnyi hon je bajebenyidra. 26 Wale hna únykúme adre me únykúme hnyi hmeledrany hia: ke wale hnyam adre me hai hon ta je hnyei hia. 27 Anyin a hia but únykúme hnö Iehova tuhan sabaoth, ke ie at bi ame he ka thawâ e? ke ame hai hnyamen, ke ie at ame he ka ohmetu e?

ISAIA 15, 16.

28 Hnyi hunainy mok a Ahaza than ame o but hok eang.

29 Filisiti hia lö, ca senyin bi can adre thu uci waleji ame kuc u : anyin ame he ka o but vaipa únyi hnyi iwân anyin on, ke haba mâtrân e me on ame hlâ me gâ. 30 Ke ame he nokon a bân at ae theduoc ka han, k' ame he tavat ae ba ta únyi ka mokut khötkic : ke oge me he ka hlingâ ânyâm wân ge mekihnânem, ke adre me he ka hlingâ ânyâm je kolon. 31 Homagöule lö, kuku tenge thö ; taun lö, tenge thö : Filisiti hia lö, u je aú hia but ; anyin ame o hai únyi hnyi hwadrö, ke ba at ame he ka tot baú e ka o thö bonginy bong adre thu. 32 Ke ieú hnân thu ka je úthumetuiny je hnyei? ame ha, ka habe, A hia but Iehova bi taben Ziona, ke ame he ta je aten adre me vec ka lubaduöng hnyin e.

HNYIMAKAN 15.

**H**OK honen Moaba. Adre me söh Ara-moaba hnyi hnyinghet, k' adre me oúnyibaúâ e ; adre me söh Kira-moaba hnyi hnyinghet, k' adre oúnyibaúâ e. 2 Me e ame ölö ka hnyi uma kap, me Dibona, ka hnyi je dok ae görany he ka tenge : Moaba ame kuku tenge ge Nebo, me Medeba : ame hadreu je bödra hia, k' adre me sö degecâ je waidra hia thithö. 3 Hnyi dedra je gethen adre me weikâ ecmano ae gan nân : ödra hia adre me kuku tenge, me tenge gan hmâ hon ban umödra je uma, ke hnyi je hnaudrà. 4 Ke Hesebona ame kuku, me Eleala ; k' adre me löng hodra ke ne o but hnyi Jahaza : anyin a wale haba vat anyi Moaba adre me hongot göranyai ; k' ame öbubuny je hnyekudra. 5 Ame tenge hnyekuk ge Moaba ; ame kec anyin je taben Zoara ai, wale Egelath-selisia : ke adre me vheno gethen úheny Lubith me tenge tot ; anyin a haba hnyi gethen úheny Horonaim adre me hongot göranyai tenge ae imekiny. 6 Anyin ame he ka mada thö je aniny Nimera : anyin a meleca thö önying ; e ba but hna önying ae mita, ke ba but hnyot ae hát. 7 Anyin a wale haba je omejeú gadrin ae gan, me ta je omjedra adre ip, adre me he ka hom ka hnyi wageweiny garaba. 8 Anyin ame hia but hwan tenge he igigilö je hnyigöulen Moaba ; me anyin kuku tenge ke ne o but Egelaim, me anyin kuku tenge ke ne o but Beer-elima. 9 Anyin a unöngötö je aniny Dimon ge dra ; anyin a oge

me he ka bi hanen monu kö Dimon, oge me he ka kunâ liona ka at Moaba tavat adre me kec, me je kolon hnyei.

HNYIMAKAN 16.

**K**UNÂ tho je lakon mamoe hobi kâu at musö hnyei úheny Sela wale cicö hnyebubu, ka hnyi bucen anyiu hluiny Ziona. 2 Ke ame he wahluiny Moaba hnyi je hna utihai hnyi Arenona ka helâ me je meno ame gâ monu, ke helâ me hâueu meno adre oveseâ. 3 Ha ju bongon, owisa thö ; bi hmenom ju helâ me lit hnyi jebigö : ikhâlâ ju je hna obâ ; ca he ka hâiâ tavat adre kec. 4 E na he ju ka laba unyâm ta je atök adre obâ ; ke haba u Moaba eso u me he ka tubi ödra hnyi hnyimakan at sei : anyin ame he ka hia at úöveci, a um do hwakecin sei, adre ohia tavat seda únyi hnyi hnyei. 5 Ke adre me he ka otilâ ke theron hnyi ibetengiö, k' ame he ka tabâ e ke at hnyi hnathu, hnyi uma mano umö Davita ; he ka owisa, me elâm hna owisa, me logot he ka ânyâ wisa.

6 Ate hia but löng hnyok bi gan anyi Moaba, a e bi gan hmönyin ; wale anyin bi gan, me begörany, me wathethöt ; ke únyi baú bi anyin je bi gan. 7 Anyin a wale, ame he Moaba ka tenge kuku ge Moaba, adre me he hia ka tenge : öbun e he ka mâng ge je taben Kira-haraseth, adre ti okongöâ. 8 Anyin a ut ame kot je utkânâ iny Hesebona, me vine hnyi Sibema ; je thaniny je hnyei adre me hia but thu je úöiny ae so ; adre me o ke ne o but Jazera, adre me vheno hnyebuba ; ke ame hlau je vheiny, me hanyâúâ köiö. 9 Anyin a wale oge me he ka tenge helâ me útengien Jazera can vine hnyi Sibema : Hesebona me Eleala lö, oge me he ka hú u ge je deköiök : anyin ame o but hwan vat hon ânyâm je waniny hnyeun me ânyâm menu. 10 Ke adre me hom degecâ senyin me hobâ únyi hnyi hnyei ame wa wan ; ke ame ca he ka hu hmetu khumöng, me hongot senyin hnyi je hnyei vine : ame ca he at ka uto waina hnyi je taben, a at ame ututo ; oge hia but bi obiny kuku senyin. 11 Anyin a wale ame fuc hnyekuk helâ me kitara can Moaba, k' ame fuc hnyekuk can Kira-heres. 12 Ke e ka manen Moaba, ke e ame kong hnye-kunâ e hon dok ae gorany, k' ame dit ka hnyi anyin dok ae kap he ka hic, me e ame ca he bi ka ton.

13 Walang hofuc ho Iehova ehac ge Moaba. 14 Ke a hia but fuc Iehova walang ang, me ha, ka habe, Hnyi ta huna a kun hoton je hunainy at ame hok hwaban, me adre me he ka hûkotiâ hmanenanginy Moaba, tha e me aten ae se hia hmönyin ; k' ame he ka wakhalet hmönyin je kolon ke ca únyi hnathu hmetu.

HNYIMAKAN 17.

**H**OK honen Damaseko. Wâ bi, adre me he ka degec Damaseko me me ca taun hmetu bi, k' ame he biju ka hudrei. 2 Adre me he ka hna degecâ but je tauniny Aroera : ke hnân bi hobi kâu je hnahat mamoe, k' adre me he ka mokut eling ke ba at ame he ka ootödra. 3 Ke ame he ka hia hnabâ hnyi Eferaima, me dökhü hnyi Damaseko, me je kolon hnyi Suria ; k' adre me he ka helâ me hmanenanginy lakon Isaraela, haingö Iehova tuhan sabaoth.

4 Ke haba hnyi bong eling me adre me ke ka ohalelöüâ hmanenangi Jakob, k' ame he ka delâ unyin ae pipikhenya. 5 Ke ame he ka helâ me at subö hwit ame úkhacakouâ hwit ame tot, k' ame subâ je wan ge benyin ; eke, ame he ka helâ me hna hlo hwit hnyi hnyigöulen bucen e Refaima. 6 Ke so bi ame he ka hu kolon hnyin e hnân hlo, helâke hna jijingâ üö elaiö, ame ne lo ame ne kun thibi ta wan hnyi obiny vheiny ae görany, ame ne vak ame ne thabûng hnyi je vheiny üö ae wa so wale hnyi je baten, ame ha Iehova Khongu Isaraela. 7 Hnyi bong eling ame he at ka bwela ka At a op e, ke ame he li emakan ka wâ Kabi Isaraela. 8 Ke e ame ca he ka bwela ka hnyi ta je taben hut, huliwa anyin li hnyamen, ke ame ca he ka wâ ta je únyi a ânyâ hnen je banyen, je Aseira, me je hna theati seúnö. 9 Hnyi bong eling ame he anyin je taun adre up veten ka helâ me je dok ae ba aten hnyi hnyot me hon ban bucen, waleji adre hna degecâ hnyi hnyimakan lakon Isaraela : k' ame he ka dok ae ba wan. 10 Anyin a u je hnying Khongon ânyâm úöhmeli, ke u je ca únykúme kicin tang hwegiâm ; anyin a wale u je tâ je üö ae hmanenang, metâ ta je hatong kanyua : 11 hnyi bong u je tâ hnyin u je si hagingy, ke hnyi hnyomakatu u je ovhöngâ ânyâm je hatong : ke ame he ka ba menu hnyi bonginy hlöuhlöu me vec ae gan hmâ.

12 Ekölö ! hwan tavat ae se hia, adre

me mede helâ me hwan köiö ; me iwadrin-giny je hnyei, adre me wadring helâ me wekhetiny je köiö ae se hia ! 13 Ame he je hnyei ka wadring helâ me wekhetiny je köiö ae se hia : ke e ame he ka thaw'ödra, m' adre me kec sâkâû ai, ke adre me he ka hnu ödra helâ me unen hwit hon je bucen ge ang, ke helâ me thatûnyi ge hön. 14 Ke e ka sahac ut, wâ bi adre me öbubuny ; ke e tiga ca hnyomakatu bi, e hia ödra but. Wale jekhon tavat sei öta, me jekhon tavat adre me hûgûnâ anyita ta je únyi.

HNYIMAKAN 18.

**E**KÖLÖ ! hnyei ae hu hwan li labe-nyidra, a e bi hnyi ke keihen wage-weiny Aithiope : 2 at ame kunâ je úthumetu a deny je köiö, wale adre me tabâ je hu gom hon köiö, me ha, ka habe, he th' öbun je úthumetu ae logot, ka hnyi hnyei ae hwege me hnyok бага, ka hnyei adre outen hwân ehac me nyiele ; wale a hnyei adre ham je tulut, me adre me ututo, hnyei a susubâ hnen je wagewe ! 3 Öbun hia thithö tavat adre me laba hnyi hmeledrany, ke tavat laba hon kânâ hia, e ka kap göranyai boúdila hon je bucen, wâ thö ; ke e ka tûâ trutru löng ju öbun. 4 Anyin a walang hna ha hnö Iehova kõnya, ka habe, Oge me he ka laba wia, me wâ hnyi hnyabak ; helâ me hlöng ae gan e ka o seunö, ke helâ me hauiny úlá e ka hlöng hnyi üen menu. 5 Anyin a ödra tiga ca menu, e ka kölu vongon, k' ame wia bi vongon me me wan vine ame he ka metu but, me e ame he ka sö je vheiny ge hele si vine, m' adre me he ka hom je anginy ame iyâû me sö degecâ. 6 K' adre me he ka tha hna degecâ e ka ta je meno ame gâ adre me behan hon je bucen, me omenoiny hnyot : ke ame he ta je meno ame gâ adre me behan ka laba e hnyi honivakeny, k' ame he omenoiny hnyot hia ka laba e hnyi hnyeun. 7 Hnyi üen eling adre me he ka ham bwihlany kö Iehova tuhan sabaoth únyi hnyi hnyei ae hwege me hnyok бага, wale hnyei adre me outen hwân ehac ke ne o but nyiele ; a hnyei ame tuluto, k' ame ututo, a hnyei ame susubâ ge ta je wagewe, ka hnyi hnen iö Iehova tuhan sabaoth, wale bucen Ziona.

HNYIMAKAN 19.

**H**OK honen Aigupito. Wâ bi Iehova ame tabâ úlá ae

logot, k' ame he ka o hnyi Aigupito : me ame he ka bwebwet je idolainy Aigupito hnyi hnyimakan, k' ame he ka köiö but hnyekon Aigupito eü hnyin e. 2 Ke oge me he ka obwebwelâ at Aigupitö ka tot metâ bi ka at Aigupito ; k' adre me he ka ve vat, a ke at me liamekeiny mē, ke ke at me at ame laba hakekeny kâu ; ke ke taun me ke taun, ke ke dökhu me ke dökhu. 3 K' ame he Aigupito ka gâon hnyin e ; ke oge me he ka ohia ûhnenamöiny : ke adre me he ka elâlâm je idola, me tavat ulit, me tavat tren biobotkong, me tavat bi khong. 4 Ke oge me he ka hna at Aigupito ka hnyi hnyamen than ae beovecâ ; k' ame he bi ka musi ödra hnen than ae hwege hnyimakan, ame ha Than, Iehova tuhan sabaoth. 5 Ke ame he ka hme köiö, k' ame he ka mada me hwa hwacit wagewe. 6 Ke ame he ka bo kong ta je wagewe ; k' ame he ka hme me hwa hwacit ta je wadutöiny : ame he ka meleca je saköwi me je saamun. 7 Haba je hna önying hnyi wagewe Nail, hnyi baten Nail, me ta je ûnyi hia adre tã hnyi baten Nail, ame he ka mada, me hia, me me ba but. 8 Ke ame he ka tenge tavat thut, ke adre me he ka hlöuhlöu hia tavat adre me hnahna wage ka hnyi Nail, ke adre me he ka hmak hnyok tavat adre thung ert eü hnyi köiö. 9 Ke adre me he ka hmehma tavat adre me huliwan lino, me tavat hwâwâ mano ae hau. 10 Ke adre me he ka kia je taben e, ke ame he ka hmak hnyekon tavat hia thithö adre me huliwa ge hwaban. 11 E ti monu but je thaniny Zoana ; ke ûhnenamöiny tavat ae nua metâ he ka ha bongon unyi Farao ödrin e monu but : ieü gabun öbun e ha kö Farao, ka habe, Inya nokon at ae metâ, nokon je than kâu adrem? 12 Ewa bi ânyâm tavat ae metâ? hamödrin he ka thumetu u walang ang, me omanená ; me so e khan' ödrin ûnyi ame ip hmâ Iehova ge Aigupito. 13 A monu but je thaniny Zoana, adre iyawâ je thaniny Nofi ; haba je taben je tribuiny, adre hia but omonoâ Aigupito. 14 A hia but Iehova hingâlâ ka hnyi wanben e hanu ae hwali : ke adre omonoâ Aigupito hnyi anyin ta je huliwa hia, helâ me at ame monu ge grâg ame he monumonu hnyi hnen hna hmita. 15 Ke ame ca he ka hu huliwa anyin Aigupito he ka ânyâ hnen ban me hmokunen, me lan pama, me saköwi.

16 Hnyi bong eling ame he Aigupito ka helâ me omomo : ke ame he ka öbubuny

me ot can hna jijingâ hnyamö Iehova tuhan sabaoth, wale e ame jijingâ hudra. 17 Ke ame he ka hnân outen hnyei Juda ka Aigupito, ame he tavat hia thithö ka ot e ka ha ien bi ködra, can hna ûnykûme ga Iehova tuhan sabaoth, wale e ame ûnykûme gadra.

18 Hnyi bong eling adre me he ka ha hwen Kanana hnyi je tauniny Aigupito a thabûng, me khemanyin kö Iehova tuhan sabaoth ; adre me he ka hwenyi ien khaca me taun ae hnaûhangö.

19 Hnyi bong eling ame he ka hu taben hut kö Iehova hnyi wanben hnyei Aigupito, me haten adre otilâ kö Iehova hnyi hnyigöulen e. 20 Ke wale hnan haten me ohnathoâ kö Iehova tuhan sabaoth hnyi hnyei Aigupito : anyin adre me he ka hongot kö Iehova can tavat adre me oveci ödra, me e ame he ka kunâ ködra at ûhömeli, me at sing ödra, me e ame he ka omeli ödra. 21 Ke ame he Iehova ka manen bi hnyi Aigupito, k' ame he at Aigupito ka khan' ödra Iehova hnyi bong eling ; eke, adre me he ka khudrung me je hut me je bwihlany, me bi khöbi kö Iehova, me ohwâdâ bi e. 22 Ke ame he bala bi Iehova ka kot Aigupito, me osoâ bi ; ke adre me he ka hmetu kö Iehova, me e ame he ka ling ödra, me osoi ödra.

23 Hnyi bong eling ame he ka hu hna cit gethen ûheny Aigupito Asuria ai, ke ame he at Asuria Aigupito ai, ke at Aigupito ame he ka he Asuria ai ; k' ame he at Aigupito ka tha hmi me at Asuria.

24 Hnyi bong eling ame he Isaraela ka bi kuniny me Aigupito me Asuria, hnân hnahic hnyi wanben hmeledrany : 25 anyin ame hia but Iehova tuhan sabaoth hahnahici ödra me ha, ka habe, E so e hnahic Aigupito a lakeik, me Asuria troban li hnyamök, me Isaraela jekhök.

#### HNYIMAKAN 20.

**H**NYI ûen waleji ame o Taretana Asedoda ai hnyin, wale hnyi ûen Saregon than Asuria ame kunâ e, k' ame vat me Asedoda k' ame hûgûnâ e ; 2 haba hnyi ûen eling, me ame ha Iehova a deny Isäia nöku Amosa, ka habe, He thö ka thang mano ae gan nân hnyi fetrem, ke uny jut tangen li hnyeucam. Me e ame ânyâ helâe, k' ame he thu ke ba tangen hnyeüca. 3 Ke haingö Iehova, ka habe, Helâ me hnö Isäia athnyabaik hna

## ISAIA 21, 22.

he thu hnyi kun ta huna, ke ba tangen hnyeûcan hnan haten me hnân ûöman ka at Aigupito me Aithiope; 4 helâe minya ame he than Asuria ka lelö at Aigupito a je bâ me at Aithiope tavat adre me ca, wahidröu me wahingat ae ba ûkhaûidra me tangen hnyeucadra, k' adre ca tube je hújiödra me me hmehma Aigupito. 5 Ke adre me he ka ot me hmehma can at Aithiope wale adre me geju ködra, me can at Aigupito wale adre me hobeluâ. 6 Ke ame he tavat adre laba hnyi hobat köiö ka tha ha hnyi bong eling, ka habe, Wâ bi, wale hnöta hna geju kâu, m' ate me kec kâu me me hadru' öta m' ate me möt ûnyi ge than Asuria : ke haba öta ate ma hawa ka kec ?

### HNyimakan 21.

**H**OK honen hnyeubainy köiö. E ame o but ûheny hnyi hnyeubaba, ûnyi hnyi hnyei adre outen, helâ me höu ame tûâ ûheny hnyi hwaiöu. 2 Adre thumetu nya ge hna omanenâ ae hmak ; at ânyâ hwakecin iyawâ ame iyawâ, ke at sei ame söh. Elama lö, ölö thö ; Madai lö, igigilö ju ; oge hia but umo je bongon mâng hia. 3 Anyin a wale a unöngötö li fetrem ge vec ; ame hum nya hnen vec helâ me momo ame vec hnyekon ame he ka hnökoâ : inya oge me vec me me ca khanö nya löng bi ; inya oge me öbubuny me me ca khanö nya bwela bi. 4 Ame momokon hnyekuk, oge me öbubuny ge ot ae gan hmâ : haba hauhaotreng oge me wek, me adre hia but wia ka öbubuny könya. 5 Adre me penapena laulau, adre otilâ tavat tue, adre me han me ic : todr' öbun je than, botro ju je bec. 6 Anyin a walang hna ha hnö Iehova könya, ka habe, He thö ka otilâ at hmâkâ ; hamen he ka omanenâ ûnyi e ame he ka wâ : 7 ke e ka wâ deö vat adre me tabö hors, a úsa lo, me tavat tabö asina, me tavat tabö kamela, me hamen he ka löng wia me ti wâ wia. 8 Me e ame hongot helâ me liona, ka habe, Than lö, inya oge me tot bala hnyi je lany hon tap tue, ke oge me tuö hanymök hnyi lit hia : 9 ke wâ bi, waleú deö at ame o, tavat tabö hors a ödra úsa lo. Ke e ame thu me ha, ka habe, A'ta but, a ta but Babulona ; ke adre hia but sa hnyikânâi je idolainy je khongon. 10 Ekölö gam hnök hna kokot, me hwit hnyi anyik om hani : oge hia but

omanenâ köbun hnök hna löng ga Iehova tuhan sabaoth, Khongu Isaraela.

11 Hok honen Duma.

Ame hongot könya ûheny Seira, ke at, me ha, ka habe, At hmâkâ lö, hawa ge lit ? At hmâkâ lö, hawa ge lit ? 12 Ke ame thu ge at hmâkâ me ha, ka habe, Ame o hnyomakatu, k' ame o minya lit : öbun e ne he ka hnö, hnö thö : hmetu ju öbun me he jem.

13 Hok honen Arabia.

Öbun je bunyen Dedana lö, öbun e he ka mokut hnyi hnyot hnyi Arabia. 14 Adre me hom köiö ka tavat beic ; haba je aten hnyei Tema, me adre me hok areto me ûkhanö me tavat kec. 15 Anyin adre me kec ge je hele vat, a hele adre oc, me cafana adre lau, me vecin vat. 16 Anyin ame ha helâng könya Than, ka habe, Hnyi huna a khaca, hoton ta je hunainy at ame hok hwaban, me ame he ka ta but hia hmananginy Kedera : 17 ke haba kolon úseiny tavat hlic fana, a tavat hwege unyin lakon Kedara, me adre me e ka wakhalet ut : anyin a hia but ha Iehova Khongu Isaraela.

### HNyimakan 22.

**H**OK honen hnyigöulen bucen adre me omanenâ hnyin.

Ieü gam walang ang a u je tha ölö ka hnyi hon je ban uma me je âtâm hia ? 2 U at ae unöngöt ge hwan kuku, taun ae mede, taun ae senyin ; haba je kokâm me adre me ca hlingâ ge hele vat, k' adre me ca mok hnyi vat. 3 Adre tha kec hia latuhâm, adre c' ödra ge tavat hlic fana : adre tha c' ödra hia adre me wâ gam, adre kec sâkâú ai. 4 Anyin a wale, haingök, Hwiö thö gak, oge me he ka tenge hwege ; ca huliwa bi he ka otubweli nya, can hna okongoâ hluiny ik hnyei. 5 Anyin a bonginy hmak eling, me iututi, me monumonu ûnyi ge Than, Iehova tuhan sabaoth, hnyi hnyigöulen bucen hna omanenâ ; adre me kia je hak veto, me tenge ka je bucen. 6 Ke Elama ame hom thi fana, me je kariota me tavat tabö hors : ke Kira ame uny ju hna tube bec. 7 Ke ame unöngöt ge je kariota je hnyigöulen bucen ae ti so hnyi em hnyei, k' ame tot metâ tavat tabö hors hnyi homagöule. 8 Me e ame hom degec hna tube Juda ; ke hnyi bong eling u me únykúme ge ta je omjehen vat eiö hnyin uma hnyi wanben hnyot. 9 Ke

öbun e wâ je dok a hmoucainy taun anyi Davita, ae se hia : ke öbun e ûkhacaköüâ je köiö hnyi an eü. 10 Ke öbun e aü je umainy Jerusalema, me kia je uma m' adre me op hmetu hak. 11 Öbun e op minya an wanben li hna up veto hobi kâu köiöiny an a kâü adrem : ke öbun e ca ûnykûme ge at a ânyâ, me ca ûnykûme wia ge at tibet e kâü adrem. 12 Ke hnyi bong eling Than, Iehova tuhan sabaoth ame hawâ he ka tenge, me tenge thungaü, me hadreü, me weikâ mano ae gan nân : 13 ke wâ bi, adre me senyin me hobâ, adre me khuc bolok, me hlingö mamoe, me han ütiö, me ic waina : ate me he ka han me ic, anyin a nyi ate me he ka mok. 14 Ke haba Iehova tuhan sabaoth ame omamenâ ka hnyi li hnyikönyök, ka habe, E hnathu adre me ca he ka hna köbun hulö eang ke ne o but öbun e mokcu, ame ha Iehova tuhan sabaoth.

15 Walang hna ha ge Than, Iehova tuhan sabaoth, ka habe, He thö, didrö ka at tuö tang omjeü eang jia Sebena, at ame musö uma me ha, ka habe, 16 Ieü u je ânyâ eang? ke ie at e unyâm, anyin a u me thu op hnân erkemok? u je thu opiny erkemok ethö hobi kâu, me kave umen bi hnyi kic! 17 Wâ bi, ame he Iehova ka ti khûâ hwegiö u, helâ me at ae hwege; eke, e ame he ka lan hwegiö u. 18 E hnathu e ame he ka hwiö me khuö u ka hnyi hnyei ae gan helâ me wâthâ; u me he ka mokcu eling, ke ame he ka e eling je kariotainy ânyâm hmanenang, u at ame hi hmehma hnyaban tuhâm. 19 Ke oge me he ka obö u ûnyi hnyi hanymâm, me hagutö u ûnyi hnyi hnâm hna tot görany hnyin. 20 Ke hnyi bong eling oge me he ka hawâ athnyabaik jia Eliakima nöku Hilekia : 21 ke oge me he ka okhavâ e ge ânyâm ûkhaü, me ohwegiâ e ge wen hnyekom, ke oge me he ka hna ânyâm musi ka hnyi hnyamen : ke e ame he ka kamen ka tavat adre me laba hnyi Jerusalema, me lap anyi Juda. 22 Ke oge me he ka ip kiiny lap anyi Davita hon bajebenyin; ke e ame he ka khöng ke ba at ame he ka hlöng, ke e ame he ka hlöng ke ba bi at ame he ka khöng. 23 Ke oge me he ka ohmâ e helâ me fao hnyi dok ae hwege; ke e ame he ka hnân theron ae hmanenang hnyi lap anyin kamen. 24 Ke adre me he ka uhno hon e hmanenanginy hia lap anyin kamen, wale ta je mâtrân, me ta je wan, me ta je kaia hia ae ûhnyükong, hwân ge je utkaia ke

ne o but ta je kaia hia ae gan. 25 Ke haingö Iehova tuhan sabaoth, ka habe, Hnyi bong eling ame he ka kong ut fao adre ohmâ hnyi dok ae hwege; ke adre me he ka sö degecâ me me kölu but, k' adre me he ka subâ degecâ hok a honen; anyin ame ha Iehova.

HNYIMAKAN 23.

HOK honen Turo.

Je huiny Tasesa lö, kuku tenge thö; anyin ae ba wan e, ke ba uma, ke ba hna dit : adre me omanenâ e ködra ûnyi hnyi Kitim. 2 Öbun tavat a aten bomene, laba hnyibú ju; a u at adre me ounöngötâ hnen tavat úcú hnyi Zidona, tavat adre me hanyâüâ köiö. 3 Ke haba hon je köiö ae gan me wale wan Sihora, ke hu gan hna menu hnyi Nail; ke wale hnyaban úcú anyin je hnyei. 4 Zidona lö, hmehma ju : anyin a hia but fuc hnen köiö, haingen hhabâiny köiö, ka habe, A ca vec hnyekuk, me hnokoâ, ke oge me ca hat je hidröu, me tuö wahu. 5 E ka o úthumetu Aigupito ai, me adre me he ka vec gan hmâ ge hna thumetu ge Turo. 6 He th' öbun Tasesa ai; kuku tenge thö, öbun tavat öbun e labâ bomene. 7 Hawa, wale tauniny anyibun senyin, ae kâü adrem hwân, waleji ame labö hom e ge li can ka hnyi dok ae sâkâü he ka mē laba? 8 Ie at ame ûnykûme he ka ânyâ e ka Turo, a at ame ham je korona, ke haba je tuhan, me tavat úcú omjeü, k' ame úcú omjeü hnyin je at hnathuiny hmeledrany? 9 Ame ûnykûme e hnö Iehova tuhan sabaoth, hnân he ka oûnyibaüâ bigan anyin tavat hia ae hmanenang, me ohükötiâ je at hnathuiny hia hmeledrany. 10 Hluiny Tasesa lö, vheno thö em hnyei helâ me Nail; e ba hmetu bala wen hnyekom. 11 E ame hia but hai hnyamen hon köiö, e ame oöbubunyâ je dökhu : a hia but hûna Iehova ge Kanana, m' adre me he ka ohia je hhabâiny. 12 Ke e ame ha, ka habe, U me ca he hmetu ka hobelöu, u hluiny Ziona adre me okongu u : tödrö, he thö Kitim ai; ke ba bi hna menâ eling hobi köu. 13 Wâ bi, hnyei iny at Kaledaia; wale hnyei a hia but; haba at Asuria adre me ip e hobi kâu je menoiny hnyot : adre me otillâ je uma tue, adre me hagutâ je uma umen thaniny; e ame öba wan e. 14 Je huiny Tasesa lö, kuku tenge thö : anyin a ba but wan anyibun hhabâ. 15 Ke hnyi bong eling, adre

ISAIA 24, 25.

me he ka hnying Turo hnyi sevente je huna, helâ me je bong bongon ke than a khaca : ke hnyi obiny je huna a sevente, ame he Turo ka helâ me sit khumöng ka momo hnyi gethen. 16 Hom dö kitara, vheno thö taun, u momo hnyi gethen adre hnying ; kokot me me hwan æ kese, khumöngö thö je khumöng æ se hia, m' adre me he ka ûnykûme köu. 17 Ke hnyi obiny je huna a sevente, ame he Iehova ka senâ Turo ; ke e ame he ka hmetu ka hnyi hok hwaban, me bi ûnyi monu me je dökhuieny hia hmeledrany hnyi hon kânâ. 18 Ke ame he ka hwakecin æ kap kö Iehova ta je ûnyi gan hnân úcö me hnen hna hok hwaban : adre me ca he ka ip me úkhöünâ ; anyin a hobi kâu tavat adre me laba hnyi hnyimakö Iehova ta je ûnyi hnân úcö gan, he ka han sekon, me úkhaú æ nâk.

HNYIMAKAN 24.

**W**Â bi, Iehova ame öba ûnyi hnyi hmeledrany, me öba waniny, me ohnyimenâ e hnyikânâi, me oveseâ tavat adre me labâ e. 2 Ke walang bongon ame he ka o, khaca thibi tulut ka tavat me at bi hut ; khaca thibi tulut ka athnyaba me tuhan ; khaca thibi tulut ka athnyaba momo me momo a tuhan ; khaca thibi tulut ka at úco ke ûnyi me at kap hwaban gan ; khaca thibi tulut ka at ame mē ham ke ûnyi me at ame mē sumâtâ e ; khaca tulut ka at ame mē ham mone ge hwaban me at ame mē hom mone ge hwaban. 3 Ame he ka ti ba önyen hnyei, me ti söh ; anyin a hia but Iehova ha hofuc ang. 4 Ame hlöuhlöu tavat me meleca, ame sēnyin hmeledrany me meleca, adre me sēnyin je tavat æ be-önua hnyi hnyei. 5 E ikiki hnyei hmenen tavat adre me labâ e ; anyin adre me hanyâúâ ta je hnanyibu, me wia hna otilâ, me thu hna úhinykôu a nyiele balua. 6 Anyin a wale ame an hnyei hnen hnaúhangö, ke adre wâ jönyin tavat adre me labâ e ; anyin a wale adre me thong degecâ tavat adre me labâ hnyei, ke ödra wakhalet biju je kolon. 7 Ame tenge waina adre teb ânyâ, k' ame sēnyin vine, adre me mâng hia tavat æ hnyok senyin. 8 E hia but senyinyiny bwinybet, a um dö hwan tavat senyin, e hia but senyinyiny kitara. 9 Adre me ca he ka ic waina me khumöng ; k' ame he ka hiny grâg ka tavat adre me

ijem e. 10 Adre me hagutâ taun æ monu : adre hlöng je uma hia me me ca he bi at ka dit. 11 Adre me tenge eú hnyi gethen can waina ; e lit ut senyin hia, e hia but hobâ anyin tavat. 12 E ha önyen hnyi taun, ke adre kot homagöule ge hnaúhangö. 13 Anyin ame he ka helâe bi hnyi hmeledrany unyin je hnyei, helâ me hna jijingâ úö elaiö, ke helâ me je wan vine adre me hlo, ödra ka hia but tau je wan. 14 Ame he tavat eling ka hongot göranyai me kuku ; k' adre me hongot göranyai ûnyi hnyi köiö ge hmanenangi Iehova. 15 Anyin a wale, oganö Iehova thö ihnyi jimeio, ke hnyi je bomene hnyi köiö, wale iö Iehova, a Khongon Isaraela.

16 Ate me hia but löng je khumöng ûnyi hnyi can hmeledrany, hna ogânâ tavat æ wisa. Ke haingök, Oge me delâ tot, oge me delâ tot, ekölö gak ! a hia but iyawö ge tavat iyawö ; eke, ame iyawö gan hmâ hnen tavat iyawö. 17 Aten hmeledrany lö, e but unyâm ot, me thop, me hnewe. 18 Ke ame he ka ta ka hnyi thop at ame kec ge hwan ûnyi hnân ootâ ; ke ame he ka hnok hnyi hnewe at ame ölö ûnyi hnyi thop : anyin adre me khöng ut je mamalamainy drany, me ame bwebwet dö je taben hmeledrany. 19 A ti mou but hmeledrany, a aú but hia hmeledrany, a ti bwebwet hmeledrany. 20 Ame he ka he ta tot hmeledrany helâ me at æ monu ge grâg ; me bwebwet helâ me uma menâ ; k' ame he ka hmak hon e je hna hanyâúâ, me ame he ka ta, k' ame ca he hmetu bi ka tot.

21 Ke hnyi bong eling ame he Iehova ka bi hwaban ka tavat æ gorany ethö, ke je tuhan hmeledrany hnyi hmeledrany. 22 Ke adre me he ka úkhacaköu ödra helâ me hna úkhacaköuâ tavat adre c' ödra hnyi thop, k' adre me he ka hlöng hwanuma hnyi uma ceat, ke hwaban ta je bong æ se hia, me adre me he ka sen' ödra. 23 Ke ame he ka hmak tehi, me hmehma bi seúnö ; anyin ame he Iehova tuhan sabaoth ka musu hnyi hmanenang hnyi bucen Ziona, me hnyi Jerusalema, me hnyi hnyimakan anyin wahingat.

HNYIMAKAN 25.

**I**EHOVA lö, u thibi Khonguk ; oge me he ka ogöranyi u, oge me he ka ogânâ iam ; anyin a u je hia but ânyâ ta je ûnyi hnân láia, wale je hna musu ehac, hnyi hnathu, me wisa. 2 Anyin a u je

wia taun me me je hna digic thatúnyi bi ; ke taun adre up haginny me me ba wan : ke uma umen je atkanyua me me ca taun hmetu bi ; ke adre me ca he bala bi ka op e. 3 Anyin a wale ame he ka oganö u hnen hneyi ae hwege, ame he ka outö u hnen tauniny je hneyi ae hwege hnyimaködra. 4 Anyin a u thibi hñabâ ka at ae vec, me hñabâ ka at ae theduoc hnyi anyin hmak, me hñedrong hnyi weneú, me hna baelelu hnyi kahwa, e ka helâ me weneú anyin tavat ae hwege hnyimaködra ka hnyi hna up veto. 5 U me he ka hom úhnyúkongo mede anyin je atkanyua, helâ me kahwa hnyi dok ae hwahwacit ; adre me he ka hom únyúkongo khumöng anyin tavat ae hwege hnyimaködra helâ me kahwâ hnyi baten hmenon úlá. 6 Ke ame he Iehova tuhan sabaoth ka ányâ hnyi bucen ang hobi kâu ta je hneyi hia thithö bijeú ge ta je únyi ae pipikhenya, bijeú waina adre tha ip me kolon, ke adre ányâ-wia. 7 Ke e ame he ka ohia hnyi bucen ang hñân tubiny at ame tube tavat hia thithö, me hñân tube, wale ame tube ta je hneyi hia thithö. 8 E ame hia but utâ mok me ohia e ; ke ame he Than Iehova ka kot degecâ ta je deköio únyi hnyi ta je hnyimak hia thithö ; ke e ame he ka ohia hna haikongoá lakeiny únyi eang hmeledrany hia : anyin ame ha Iehova.

9 Ke adre me he ka ha hnyi bong eling, ka habe, Wâ bi, Khonguta ang ; ate me halubahingen, ke e ame he ka omeli öta : Iehova ang ; ate me halubahingen, ate me he ka senyin me hobâ anyin úhömeli. 10 Anyin ame he ka laba hmâ hnyamö Iehova hon bucen ang, ke adre me he ka ututo Moaba hnyi hnen bi, helâ me hna ututo je thatúnyin hwit hnyi köien tatet. 11 Ke e ame he ka inâ li hnyamen hnyi wanben, helâ me at ame hai ame hinobeny : ke e ame he ka ohnyikânâ anyin bigan tha e me bibihwakecin anyin li hnyamen. 12 Ke e ame he ka öuo hñabâ ae görany wale hnyi hagâm hak, me hagutâ me othahonâ me kânâ, wale ka hnyi sesâ.

HNYIMAKAN 26.

**H**NYI bong eling adre me he ka sit khumöng ang hnyi hneyi Juda, ka habe, E hu but gata taun ae hwege ; e ame he ka otílâ úhömeli hñân hak me singiny. 2 Khöng ut je homagöule me me didrö hneyi ae wisa, a at ame tuö

hñathu. 3 U ma he bi ka tuö hnyi hñahic ae bekhöt at ame tethmâ hnyok unyâm : anyin a e ame labageju köu. 4 Labageju thö kö Iehova nyiele balua : anyin a haba THAN IEHOVA, me kic nyiele balua. 5 Anyin a e ame hia but öuo tavat adre me laba ethö, wale taun ae görany : e ame ohnyikânâ e, me othahonâ e me sesâ. 6 K' adre me he ka ututo e ge ca ; a je can tavat ae theduoc, a je can tavat ae ba ta únyi. 7 E wisa gethen deny tavat ae wisa : u thibi at ae wisa ke u je okhabalauâ gethen deny tavat ae wisa. 8 Eke, Iehova lö, hnyi gethen deny hñâm je hna owisa, öhmun e hia but halubahingâm ; ke weny je hnyekuhmun ka iâm, ke he ka únykúmi u. 9 Ame weny u ge hnyekuk hnyi hnyinghet ; eke, oge me he ka elelöm u ge hanuk eú hnyi hnyekuk ; ke wale but ang hnyi hmeledrany hñâm je hna owisa, waleling me me he tavat adre me laba hnyi hmeledrany ka ná hwakecin ae wisa. 10 Eja ke ne adre ne betenge ge at ae kong, me ame ca he ka ná wisa ; k' ame he ka ányâ hwakecin ae hwali hnyi hneyi ae wisa, k' ame ca he bi ka wâ hmâ hmanangi Iehova.

11 Iehova lö, e görany hnyamân, k' adre me ca wâ bi : ke so bi adre me he ka wâ wem ae gan hmâ ka tavat, m' adre me he ka hmehma bi ; eke, ame he meic ka an ta je iwahnaihmiöny möu. 12 Iehova lö, u me he ka otílâ úsoköu hobi köhmun : anyin a u je hia but ányâ hobi köhmun anyihmun ta je huliwa hia thithö. 13 Iehova Khonguhmun lö, adre hia but musi öhmun hnen ke je than minya ; ke hake u ke thibi, m' öhmun e he ka ogânâ iâm. 14 Adre mokcu, adre me ca he bi ka möt ; ödra ta je komok, adre me ca he ka tot hmetu : anyin a wale u je hia but sen' ödra me ohí ödra, me tha ohia hna únykúme gadra. 15 Iehova lö, u je hia but osehiâ hneyi, u je osehia hneyi ; adre hia but oganö u : u je oc úsákáúöâ je hnyigöuleny hneyi hia.

16 Iehova lö, hnyi úen vec adre hia but senö u, adre me hingálâ hic, u ka hom úhnyúkongu ödra. 17 Haba momo ame he ka o erkin, me ame vec ke ame kuku ge vec ; helâe gahmun Iehova lö, hnyi hnyimákâm. 18 Öhmun e helâji me erkin, öhmun e vec, me oâ thibi ang ; öhmun e ca bi melen tavat ; ke adre me ca kölu bi tavat adre me laba hmeledrany. 19 Ame he ka möt hmetu ta je kokâm ; ame he ka tot hmetu ta je kokik. Hmak dö, me



ISAIA 27, 28.

khumöng d' öbun tavat öbun e laba hnyi sesá : anyin a helá me dân hau hon úö ae ometu dân ányâm hau, ke ame he kânâ ka oâ ta je komok.

20 Aiö u, ik hnyei, didrö ka hnyi je hnyeulem, ke hlöng ju hwanuma hwabâm : ke ikhölö ju helá me thuthubadecmak ke ne o but ame hia but hmönyin, 21 Anyin a wâ bi, ame he Iehova ka he úheny hnyi hnen hna laba, he ka bi hwaban hulö anyin tavat adre me labâ hmeledrany : ke ame he hmeledrany ka omanená dren e, ke ame ca he hmetu ka tube ta je hna hlingâ.

HNYIMAKAN 27.

**H**NYI bong eling ame he Iehova ka bi hwaban ge anyin hele vat ae nâk me gan hmâ me hwege kö leviathana, on ame kec logot, me leviathana on ame hwahwali ; ke ame he ka hlingâ tanimo wale hnyi köiö.

2 Hnyi bong eling : hnyei vine ae kese, khumöng dö kâu. 3 Inya Iehova at ame tuö e ; oge me he ka labö hú e hnyi je ong úen hia, oge me he ka tuö e hnyi lit me lany, wâ e nye okongoâ e hnen ke at. 4 E ba wathethöt unyik ; e na tot metâ könya je iwadekong me watetaföcö hnyi vat ! oge me he ka he ködra, oge me he ka tha thong degeci ödra. 5 Ke walang khaca, e so e ame kât tang hwegiök, me me úso-köu mönya. 6 Hnyi úen ame he ka o me ame he Jakob ka hu iwân ; k' ame he Isaraela ka vhei me vhöng : k' ödrü me he ka ounöngötâ hon hmeledrany ge ta je wan úö.

7 Hawa, e ame kot e bi helâji me hnen hna kot tavat adre me kot e ? ke hawa, adre me hlingâ e bi helâ me hnen hna hlingâ tavat adre hlingâ e ? 8 Hnyi tulut, hnyi úen u je obâ e, u je ou e ; e ame hia but hom e ge ang ae hwege hnyi bonginy ang hwei. 9 Anyin a wale adre me he ka hneú degecâ hulö anyi Jakob, ke walang wan hia hnyi hna ohia anyin hulö ; e ka ányâ je vetoiny hia taben hut, me me helâ me veten inyâ veto adre me oamâmâ, me me ca he hmetu ka tot je Aseira, me je hna theati seúnö. 10 Anyin ame hake laba taun adre up haginny, hnyaba ae ba wan k' adre degec ut, helâ me hnyeububa : ame he ka han tot eling nokon kau, k' ame he ka mokut eling, me an ta je anginy. 11 Ke e ka meleca ta je vheiny, me adre me he ka thu degecâ ; ame he omomo ka

he bi, me thong ut ge meic : anyin a e hnyei ame ca wâhmakhmeto ; anyin a wale ame ca he ka betenge gadra at ame up ödra, ke haba at ame otil' ödra, me ame ca he bi ka ányâ so ködra.

12 Hnyi bong eling ame he Iehova ka tau wan, hwân hnyi wadutöiny Wagewe, ke ne o but hnyi wageweiny Aigupito, k' adre me he ka hlu öbun a úsa khaca, öbun lakon Isaraela.

13 Ke haba hnyi bong eling, me adre me he ka túâ, trutru ae gan ; ke ame he ka he tavat wale adre me hakekeny ka mok hnyi hnyei Asuria, me tavat adre me hna degecâ hnyi hnyei Aigupito ; me adre me he ka hmi kö Iehova hnyi bucen ae kap hnyi Jerusalema.

HNYIMAKAN 28.

**E**KÖLÖ ge koronainy bigan anyin tavat adre me monu ge grâg hnyi hnyei Eferaima, me vongan ame meleca ge hmainty ae hmanenang, wale hnyi ban hnyigöulen bucen ae pipikhenya anyin tavat adre me ngâ ge waina. 2 Wâ bi, e unyin Than at ae hwege me hnyok бага ; helâ me hna ta hnen we ae wahma, me höu ame okongoâ, helâ me je köiö ame di hwege me bahihin-gölö, adre me he ka sa hwegiâ hnyikânâi. 3 Adre me he ka ututo ge ta je hnyeúca koronainy biganiny tavat adre me monu ge grâg hnyi Eferaima : 4 ke haba vongan ame meleca ge hmainty ae hmanenang, wale hnyi ban hnyigöulen bucen ae pipikhenya, ame he ka helâ me wan meta a bân ke tiga ca honivakeny ; e ka wâ e hnen ke at, ke tiga e bi hnyi hnyamen e ame ie han e. 5 Ke hnyi bong eling ame he Iehova tuhan sabaoth ka tot hnân korona ae hmanenang, me hnabinybak ae mec, hobi kâu je kolon lakeiny : 6 me hnân hanuiny hna owisa ka at ame laba hnyi tap owisa, me hnân tang hwege ködra adre me ohmetuhmeto vat únyi hnyi homagöule. 7 Ke a hia but minya tavat ang he hwali ge waina, me he monu ge grâg ; ame he hwali at bi hut me perofeta ge grâg, ame ut' ödra ge waina, ke adre me he monu ge grâg ; adre me haú hnyi hnödra hna wâ, me ta tot hnyi hna owisa. 8 Anyin a unöngötö je laulau hia ge hna hmita me ikiki, e ba dok ae kalaöt. 9 E ame he ka nö ia ge metâ ? ke ame he ka owâhmakhmetu ia ge uthumetu ? tavat adre hnebaiö, me hom únyi hnyi li basin ? 10 Anyin a

e bi hna únö, me ke hna únö; hna únö, me ke hna únö; ke tulut, me ke tulut, tulut me ke tulut; hnyiban ang ae úhnyúkong, me hnyiban e ae úhnyúkong. 11 Ohe, ke e ame he ka ha ka tavat ang a deny tavat adre ha hofuc hwen kanyua, me hwen ke hnyei bi: 12 walegi e ame ha ködra, ka habe, Walang hna mená, omená ju at ae sēnyin; ke walang hnahic: ke so bi ödra hōcö bi löng. 13 Anyin a wale ama e bi ködra hofuc ho Iehova, a hna únö, me ke hna únö, hna únö, me ke hna únö; tulut me ke tulut, tulut me ke tulut; hnyiban ang ae úhnyúkong, me hnyiban e ae úhnyúkong; m' adre me he ka he me ta hnyimen göranyai, me hmetru, me hnok, me ca.

14 Anyin a wale löng ju hofuc ho Iehova, öbun tavat hlumö at, tavat öbun e musö tavat eang a e hnyi Jerusalema: 15 Anyin a öbun e ha, ka habe, Öhmun e hia but úhihinykōu me mok, ke öhmun e tha hien me hedis; e ka o thö okongon ae bahihingölö, ame ca he ka o köhmun; anyin a öhmun e hia but wia thoi me hnân anyihmun hnabá, ke öhmun e hia but ikhölö hmelen iyawö: 16 anyin a wale ame ha Than Iehova, ka habe, Wá bi, inya oge me ip hnyi Ziona veto hnân taben, a veto adre cubec, vetoiny ban kopiny ae gan hwaban hnân taben ae hmâ: k' ame ca he ka he mweimwei at ame labageju káu. 17 Ke oge me he ka ányá hna owisa hnân tulut, ke hwakecin ae wisa hnân tulut úhni; k' ame he we wahma ka aba degecá hnabâiny thoi, k' ame he ka bahihingölö ta je köiö ka hnyi dok adre me lubaduöng hnyin. 18 Ke ame he ka únyi baú hnöbun hna úhihinykōu me mok, k' ame ca he ka tethmá hnöbun hna tha hien me hedis; ke e ka o thö okongon ae bahihingölö, me adre me he ka utiti öbun. 19 Hnyi je úen e ame he ka o, me ame he ka hum öbun; anyin a e ame he ka o hnyi je hnyomakatu, me lany me lit: ke e thibi ot he ka wáhmakhmeto úthumetu. 20 Anyin ae okhulit hna mokut, me me ca khana bi at he ka hlöhlöu hnyin; ke úhnyúkong aven kubö, me ca úcú bi e ka tube e. 21 Anyin ame he Iehova ka todrö helâji me hnyi bucen Farez, k' ame he ka hmönyin helâji me hnyi hnyigöulen Gibeona; me me ányá anyin huliwa, wale anyin huliwa ae ke bongon bi, me oá hnen hna ányá, wale hnen hna ányá ae ke bongon bi. 22 Ke walang ang ca he öbun ka hlumö at, wá adre nye ohmâ je hna c' öbun: anyin a oge

hia but löng únyi ge Than, Iehova tuhan sabaoth, a g' ame ip hmâ he ka ohia hnyi hmeledrany hia.

23 Tevehlöng ju öbun, ke löng ifucik: tevehlöng ju, ke löng hofuc oge me he ka ha. 24 Hawa, ame he at trohnen ka labö trohnen me me cekön? hawa e ame he bala ka wia me omomono kânán káná? 25 E ka thaohoná e, hawa, ame ca he bi ka khúkhúá je kesaka, ke jijingá but je komina, me tā gaga hwit me bali hnyi hnen, ke kesem hnyi baten e? 26 Anyin a Khongon ame ometá e hoton wisa, me ná e. 27 Anyin adre me ca uja kesaka ge únyi ae so homakan, k' adre me ca wia waengeniny kat hon komina; ke adre me kokot kesaka ge uci, k' adre kokot komina ge ong utö. 28 Adre me omomono hwit; anyin a e ame ca he bala ka kokot: ke ame ne jijingá e hnen waengeniny kat me haleny je hors, me e ame ca omomono e. 29 Ame o minya únyi ga Iehova tuhan sabaoth, at ae khana bongon hnân láia, ke e gan hmâ anyin metá.

HNyimakan 29.

**E**KÖLÖ ge Ariela, waleji Ariela a taun ame hunuma hnyin Davita! bi hanen ke je huna ka ke je huna; ányá gaga je bijeú: 2 me oge me he ka ovecá Ariela, ke ame he ka hu hlöuhlöu me tenge: ke e ame he ka hing Ariela kōnya. 3 Ke oge me he ka hunuma igigili u, ke oge me he ka theling u ge je lap tue, me otilá je uma ae hwege cici u. 4 Ke u me he ka hnyikáná, me fuc eú hnyi káná, ke ame he ka úhnyúkong ifucám eú hnyi sesá; ke ame he ifucám ka helá me hwan at tren biobotkong, eú hnyi káná, ke ame he hnám hna fuc ka ulit eú hnyi sesá. 5 Ke ame he ka úcú me sesá ame gá úganiny je iwahnaihmiöny möu, ke ame he ka helá me unen hwit ame ou ang úseiny tavat ae hwege hnyimaködra: eke, e ame he ka ie o helá me thuthubadecmak. 6 Ame he Iehova tuhan sabaoth ka sená e tha e me hwan than, me hwiöi, me hwan ae gan hmâ, me höu, me weneú, me báhlán meic ame han. 7 Ke ame he ka helá me bwi me hna omanená hnyi lit úseiny je hnyei hia, tavat adre me vat me Ariela. tavat adre me vat mē me je singiny, me tavat adre me hlec e. 8 Ke ame he ka helá me at ae mekihnánem ame bwi, ke wá bi, e ame han; ke e ame hmak dö, ke

mekihnânem bi: ke helâ me at ae beic ame bwi, ke wâ bi e ame ic; ke e ame hmak dö, me wâ bi, e sēnyin bi, ke beic: ke ame he ka helâe ūseiny je hnyei hia tavat adre me vat me bucen Ziona.

9 Todru, ke lâiâ thö; hobâ thö ke wadröu but: adre monu but, ke ca ūnyi ge waina; adre me ta tot, ke ca ūnyi ge grâg. 10 Anyin a hia but Iehova hingâlâ hubun hanuiny mokut hnying, me ömûki öbun, wale ta je perofeta; ke ame tube je böbun, wale tavat wâ. 11 Ke haba hnaomanenâ hia köbun me helâ me hofuc hnyi tusi adre ohmâ, waleji adre ham ka at ae khana tusi, me ha, ka habe, Ö u aú thö ang; ke haingen, ka habe, E ca khanö nya, anyin adre okeceâ hmâ e: 12 ke adre ham tusi ka at ae ca khana tusi, me ha, ka habe, Ö u aú thö ang: ke haingen, ka habe, E ca khanö nya tusi.

13 Ke haingö Iehova, ka habe, Anyin ame hakekenyi nya tavat ang ge je hnyimödra me oganö nya ge je esongodidra, k' adre me oúsákâü mönya je hnyekudra, ke haba hnödra hna outö nya, me wale thibi hna n' ödra ge hna ūne hnen at: 14 anyin a wale wâ bi, oge me he bala ka ânyâ ūnyi ae ke bongon bi ka tavat ang, a ūnyi hnân lâiâ me ūnyi a ūöman: ke ame he ka hia metâ anyin tavat ae metâ gadra, k' ame he ka iyong ūnykûmânen tavat wâ via gadra.

15 Ekölö gadra tavat adre me elâm eü hnyin he ka ikhâlâ ga Iehova anyidra ta je ūhnenamö, ke e bi hnyi menekholom anyidra ta je huliwa, me ha, ka habe, Ia ame ö 'ta? ia ae khana öta? 16 Öbun e ohnyimenâ hnyikânâi ta je ūnyi! Hawa, adre me he bi ka ūnykûme ka at up kaia, me helâ me kânâ ae kece; me me he bi ūnyi adre tibet ka ha ka at ânyâ, ka habe, E ame ca up nya; me he ūnyi adre me tretrao ka ha ka at ame tretrao, ka habe, E ba metâ gan? 17 Hawa, adre me ca he logot ka wia Lebanona me me utkânâ ae hoso, k' adre me he bi ka ūnykûme utkânâ ae hoso, me hnyot bi? 18 Ke hnyi bong eling ame he ta je wejiji ka löng hofuc hnyi tusi, k' ame he li emakan je wadröu ka bwela e ka ba but lit me menekholom. 19 Ke ame he tavat ae ilemuk ka ogânâ anyidra senyin ga Iehova, k' ame he tavat ae theduoc ka hobâ ge Kabi Isaraela. 20 Anyin adre me oúnyibaúâ at ūöveci, ke a obiny jut at hlumö at, ke adre me subâ degeci ödra hia thithö adre me hmâkâ

hwakecin ae kong: 21 a tavat adre me bijöniny at hnyi hna ivinö, me lau hnewe hobi kâu at ame nâ hnyi homagöule, me ohaúâ at ae wisa ke ba can. 22 Anyin a wale, walang hna ha hnö Iehova at ame omeli Aberahama, haingen ge lap anyi Jakob, ka habe, Ame ca he Jakob ka hmehma walang ang, k' ame ca he ka löhau hnyimakan. 23 Ke e ka wâ lakon, wale huliwa anyin li hnyamök hnyi wanben, me adre me he ka okabâ iök; eke, adre me he ka okabâ Kabi Jakob, me outen Khongu Isaraela. 24 Me ame he tavat ae monu hnyekudra ka wâ metâ, k' ame he tavat ulit ka ūnö hna ūnö.

HNYIMAKAN 30.

**E**KÖLÖ ge tavat adre me ukhin fuc, ame ha Iehova, tavat adre me elâm bongon, ke ca ūnyi bi gak; adre me tube hnen ūnyi hnân tube, ke ca ūnyi bi ge hanuk, m' adre me he ka bi hanen hulö ka hulö: 2 tavat adre me he but he ka he Aigupito ai, me ca elâm bi unyik; he ka ohwegi ödra ge tang hwegiö Farao, me labageju ka hmenon Aigupito! 3 Anyin a wale ame he tang hwegiö Farao ka hnân ohmehmai öbun, ke haba hna labageju ka hmenon Aigupito ame he ka hnân ohmaki öbun. 4 Anyin a e hnyi Zoana je tuhan, ke ame o but hnyi Hanes anyin ta je ūthumetu. 5 Ödra hia thitbö adre me he ka hihmehma tavat ae ba troban ködra, ke ca hnân ūhadruo me troban, ke hnân hmehma me haikongoâ minya.

6 Hok honen je meno hnyi Hwaiöu.

Adre me he hnyi wanben hnyei ae vec me hlöuhlöu, wale ame o ūnyi hnyin liona momo me liona, vaipa me on ae hlâ ame gâ, adre me hom je omjehedra hnyi hon jon je asina, me tang omjehedra hon je jon ae khibi ge je kamela, ka tavat adre me ca he ka bi troban ködra. 7 Ke ca ūnyi hnathu, ke ūnyi baú ūhadruö ge Aigupito: anyin a wale oge me hwenyi ien e, Rahaba, at ame laba thibi. 8 Ke haba walang ang he thö, sihnalimen ju e hnyi taben hnyi hnyimaködra, me sihnalimen ju e hnyi tusi, me me e bi huân hobi kâu je bong nyiele nyiele balua. 9 Anyin a ödra tavat ūkhin fuc, tavat thoi, tavat höcö löng hnanyibu anyi Iehova: 10 tavat adre me ha ka tavat wâ, ka habe, Ca wâ ju; me ha ka ta je perofeta, ka habe, Ca omanenâ köhmun wisa, ha bi thö köhmun ūnyi ae

ISAIA 31.

menyik, perofeta thö tang iyawö : 11 kec dö únyi hnyi gethen, saú but únyi hnyi deny, ohia but únyi hnyi hnyimaköhmun Kabi Isaraela. 12 Anyin a wale, walang hna ha hnen Kabi Isaraela, ka habe, Anyin a öbun e hna degecâ hofuc ang, me geju bi ka úöveci me hwakecin ae hwali, me labageju kâu ; 13 anyin a wale ame he hulö ang ka helâ me hmouca köbun, ame he ka ta, ae dua hnyi hna up veto ae beú göranyai, ame he ka ie bobot helâ me thuthubadecmak. 14 Ke e ame he ka tho e helâ me hna tho kaia kânâ adre oamamá me ca betenge gan ; m' adre me ca he bi ka wâ ong eckeihe ae úcú he ka hok meic únyi hnyi hnabadröu, me seköiö únyi hnyi taben köiö. 15 Anyin a walang hna ha hnen Than Iehova, Kabi Isaraela, ka habe, Adre me he ka omeli öbun, öbun ka hmetu me menâ ; ke haba tang hwegiöbun, me ame he ka e bi hnyi labawia me labageju : ke so bi e ca webun. 16 Ke haingöbun, ka habe, E ba, anyin öhmun e he ka tabö hors me kec ; awe, öbun e he ka kec : ke haingöbun, Öhmun e he ka tabâ je meno ae logot ; awe ame he bi ka logot tavat hnu öbun. 17 Ame he wan thauzan ka kec ge ifucin at a khaca ; öbun e he ka kec ge ifucin hnyat a thabúng : ke ne o but adre me hn' öbun dut helâ me aneunya hon bucen, ke helâ me bouðila hon dok ae hut. 18 Anyin a wale ame he Iehova ka halubahingen me me betenge gabun, ke can e adre me he ka ogânâ e, me me he ka betenge baú köbun ; anyin a Khongon owisa Iehova ; hnödra hnahic hia adre me halubahingen e.

19 Anyin ame he tavat ka laba hnyi Ziona wale Jerusalema : u me ca he ka tenge hmetu ; ke e ame he ka betenge gam hnyi hnâm hna hongot ; ke ka löng, me ame he ka thu köu. 20 Ke ame he Than ka ham köbun jeúiny vec me köien úöveci, ke so bi ame ca he hmetu tavat adre me nö u ka iyong, k' ame he li emákâm ka wâ tavat adre me nö u : 21 ke ame he li hnyikönyâm ka löng hofuc hnyi hotom, ka habe, Walang gethen, vheno ju öbun hnyin e ; öbun ka saú ka hnyi ke keihen metâ, ke öbun ka saú ka hnyi keihen me. 22 Ke öbun e he ka oikikiâ sileva tubwiny anyibun je hnatheat, me gol adre oköiâ hmananginy anyibun je idola : u me he ka degec helâ me ecmano ae ikiki ; u me he ka ha kâu, ka habe, Kec dö u. 23 Me e ame he ka ham we hobi kâu hatungâm ta

je hatong, wale u me he ka tä hnyi kânâ ; me jeú minya a troban kânâ, k' ame he ka pipikhenya me se hia : ke hnyi bong eling ame he halem ta je meno ka han tot hnyi je hnyei ae gan. 24 Ke ame he je bolok me je asina wale adre me huliwan kânâ ka an jeú ae senem, wale adre me ulec ge soi me ut. 25 Ke ame he ka e bi hnyi hon ban ta je bucen hia ae beú göranyai, me je hut hia ae görany, je wagewe me je köiö ame di, hnyi bonginy úhlingö ae gan hmâ, e ka ta but je tap ae beú göranyai. 26 Ke ame he melaminy tehi ka helâ me melaminy seúnö, k' ame he ka osewen melaminy seúnö, helâ me melaminy je bong a seven, hnyi bong ame he Iehova ka lan aat ge lakeiny, me ometo aat a je hna d' ödra.

27 Wâ bi, ame o but iö Iehova únyi hnyi dok ae sákâú, ame ubáhlâ ge anyin hmönyin, ke khöt ge hai ame ölö göranyai : ame unöngötö li esongodiny ge wathethöt, ke helâ me meic ame han bohmen : 28 ke haba hnen hna menâ me helâ me wagewe ame bahihingölö ke ne o but hnyi nyin, he ka cubec ta je hnyei ge úcúbec únyi a ohia : ke ame he ka e hnyi hnyimen je hnyei töiny hors wale at ame omonoâ. 29 Öbun e he ka hu khumöng helâ me hnyi lit hnyi hna ányâ bijeú ; ke ame he ka senyin hnyok, helâ me at ame hom utköwi he ka he ka hnyi bucen anyi Iehova, ka Kici Isaraela. 30 Ke ame he Iehova ka olöngâ ifucin ae hmanenang, me omanená úköluiny hnyamen, tha e me anyin hmönyin ae gan, me báhlân meic ame han, tha e me hna oamamá, me weneú, me we wahma. 31 Anyin adre me he ka tho oamamá Asuria hnen ho Iehova, e ame he ka kot ge osö. 32 Ke haba je hna hna hia ge uci at a hanyimen, wale ame he Iehova ka ip hon, ame he ka tha e me je bwinybet me kitarata : ke e ame he ka vat më ge je vat ae hwege. 33 Anyin adre hia but penapena Tofet kâú adrem ; eke, adre hia but penapena e hobi kâu than ; e ame hia but ányâ e ae dit me lau : haba hna khon e, wale meic me utö ae se hia, ke ame vâc e ge homenö Iehova, helâ me wagewe teio.

HNYIMAKAN 31.

**E**KÖLÖ gadra tavat adre me he Aigu-pito ai, he ka hok úhadruö, me labageju ka ta je hors ; me labageju ka ta je kariota, anyin ae se hia : me labageju ka tavat tabö hors, anyin a ödra ti hwege ; ke

ISAIA 32, 33.

adre me ca bwela ka Kabi Isaraela, me ca elöm Iehova! 2 Ke so bi e metâ, ke e at ame oâ ûnyi ae kong, ke ame ca he ka ohmeto hwan je hofuc : ke e ame he ka tot metâ ka lap anyin tavat ae kong, me ka singiny tavat adre me ânyâ monu. 3 Ke ta je at thibi at Aigupito, ke ca Khong bi ; ke je viny haledra je hors, ke ca je hanu bi ; ke e ka he Iehova ka hai hnyamen, me ame he ka tha ta, a at ame hadruâ me at hok ûhadruö, m' ödru me he ka tha hia but. 4 Anyin a walang hna ha hnö Iehova kõnya, ka habe, Ame fuc hnyin liona me nak liona hon haniny adre me ne hawâ tavat tuö mamoe ae se hia úcon, k' ame ca outen ifucidra, k' ame ca iyâú ge imediödra ; ke helâe ame he Iehova tuhan sabaotn ka utut he ka vat hnyi hon bucen Ziona, ke hon hutiny eling. 5 Haba je meno adre me gâ, me helâe ame he Iehova tuhan sabaotn ka tuö Jerusalema ; e ame he ka tuö, me hna e, k' ame he ka he me omelö e. 6 Lakon Isaraela lö, hmetu ju öbun kâu, waleji öbun e ti hna degecâ. 7 Anyin a hnyi bong eling adre me he ka ve degec anyidra je idola sileva, me anyidra je idola gol, waleji ame tibet je hing hnyamöbun me me hulö bi. 8 Me ame he at Asuria ka ta ge hele vat, ca hele vat bi anyin at ; ke ame he ka an e ge hele vat, a ca hele vat anyin at : ke e ame he ka kec ge hele vat, k' ame he wahidröu unyin ka bi fat. 9 Ke ame he ka hia hnen hna kic gan can e ame ti ot bi, k' ame he anyin je taben ka outen boúðila, ame ha Iehova, at a anyin bi meic hnyi Ziona, ke at a anyin bi inyâ ji hnyi Jerusalema.

HNYIMAKAN 32.

**W**Â bi, ame he ke than ka musî hnyi hwakecin ae wisa, k' ame he je taben ka owisa hnyi hna owisa. 2 Ke ame he at ka helâ me hna lubaduöng ge ang, ke nedrong ge weneú ; helâ me je di hnyi dok ae hwahwacit, helâ me dok ae hmenu hnyi kic ae gan hnyi hnyei ae sényin. 3 Ke ame ca he ka hadedak li emakan tavat adre me bwela, k' ame he ka tevehlöng li hnyikönyen tavat adre me löng. 4 Ke ame he je hnyok ame tot bebehú ka nâ he ka wâhmakhmeto, ke ame he je esongodiny tavat ae teta ka ie fuc wisa. 5 Adre me ca he hmetu ka ha ge at ae monu, a e at betenge bi, k' adre me ca he ka ha ge at iyawö, a e at ame ham gâná bi. 6 Anyin

ame he at ae monu ka ha hofuc ae monu, k' ame he hnyekon ka ânyâ hulö, wale he ka ânyâ hwakecin ae ca úcú, me ha monu ga Iehova, me öba jeú ka at ae mekihnânem, me ohmö köiö belen at ae beic. 7 Ke e kong je bibihwakecin anyin at iyawö : e ame elâm je úokonguny, me me ohia tavat ae ilemuk ge hofuc ae thoi, eja ke ne a ne wisa ifucin at ae ba ta ûnyi. 8 Ke haba at betenge e ame elâm deny betenge, ke e ame he ka tethmâ ûnyi ge hwakecin betenge.

9 Omomo lö, tavat adre me laba wia lö, todrö, löng ju ifucik ; wahlu, tavat adre me laba monu lö, tevehlöng ju hok hofuc. 10 Öbun e he ka öbubuny hnyi je bong ae se hia hon khaca huna, öbun je momo ae monu : anyin ame he ka ba wan vine, ame ca he ka o hna menu. 11 Öbun je momo adre me laba wia lö, öbubuny ju ; tavat adre me laba monu lö, ot ju : uny jut me me ba úkhaú, ke húkölö hnamejibun ju mano ae gan nân. 12 Adre me he ka khaú úlaidra can ta hnyei ae kese, me can vine ae wa. 13 Ame he ka kú hnyi kânâ kânân lakeik ta je iwadekong me je iwatetaföcö, eke, hon je umainy senyin hia hnyi tauniny senyin : 14 anyin adre me he ka hna bi uma ae mec, adre me he ka degec taun ae ti hu aten ; ame he dok ae hut me tap tue ka hnân op nyiele balua, hnân senyin hnen je asinainy hnyot, hnân han tot hnen ta je hnâhat meno ; 15 ke ne o but adre me hingâlâ huta hanu ûnyi ethö, k' ame he ka hnyei belök hnyebuba, k' adre me he ka aú hnyei belök me hnyot bi. 16 Me ame he wisa ka laba hnyi hnyebuba, ke ame he hwakecin ae wisa ka laba hnyi hnyei belök. 17 Ke haba troban hwakecin ae wisa, wale úsoköu, ke haba obiny hwakecin ae wisa wale laba hnahic me laba khötkic nyiele balua. 18 Ke ame he lakeik ka laba hnyi dok ae úsoköu, me je uma adre me laba khötkic hnyin, me je hna menâ wale je dok adre me laba wia hnyin. 19 Ke ame he ka ta we ae wahma, hnyi úen ame he ka ü hnyot ; ke ame he ka hnyikânâ taun. 20 Hnöbun hnahic tavat öbun e te hwit hnyi baten ta je köiö hia, me hna je can ta je bolok me asina.

HNYIMAKAN 33.

**E**KÖLÖ gam at ame söh, k' adre ca sei u bi ; ke u at ame iyawö, k' adre ca iyawö u bi ! U ka hia but söh, me adre

me he ka sei u ; ke u ka bi obiny ânyâm iyawö, me adre me he ka iyawö u. 2 Iehova lö, betenge ju gahmun ; öhmun e hia but halubahingâm : e so u ma bi hnyamödra hnyi je hnyomakatu, ke melihmun minya hnyi üen vec. 3 Ame kec ta je hnyei ge hwan imonumonun ; k' ame vese but ta je hnyei u ka todrö. 4 Adre me he ka hlo hnöbun ta je hna söh helâ me hna hlo hnen ihmâ : helâ me hna gâ ge ta je wahamon, adre me he ka gâ kâu. 5 Adre me oganö Iehova ; anyin a e ame laba ethö : e ame hia but ounöngötâ Ziona ge hna owisa me hwakecin ae wisa. 6 Ke ame he ka hu hwakecin ae tethmâ hnyi bongom ta je bong, wale ühömeli ae gan, me metâ me wâhmakhmeto : haba tang omjehen bi, me ot kö Iehova.

7 Wâ bi, ame kuku eü tavat ae hwege gadra ; k' ame tenge hlöuhlöu ta je üthu-metuiny úsoköu. 8 E ba but aten je hna cit gethen, k' ame ca ngenu tavat : e ame hia but thu ühinyököu, e ame hia but hûkötîâ je taun, e ame ca ûnykúme at. 9 Ame tenge me sényin hnyei : e hmehma Lebanona, ke meleca thö : ke úcú but Saronna me hnyeububa ; ke ame öbubuny Basana me Karemela. 10 Ke haingö Iehova, oge me he bi nya walang ang ka tot ; oge me he ka oganö nya bi walang ang ; k' adre me he walang ang ka ogöranyi nya. 11 Öbun e he ka erkinâ unen hwit, k' öbun e he ka hnoköâ taun thatúnyin hwit : haba homenöbun me meic hnân ön öbun bi. 12 Ke ame he ta je hnyei ka helâ me hna inyâ veto : ke helâ me je üö ae údedö adre thong.

13 Öbun tavat sâkâú, löng ju ge hnök hna ânyâ ; ke öbun tavat ae hakekeny, ogâ thö manik man. 14 Ame ot hnyi Ziona tavat ae kong ; k' ame o but öbubuny ka tavat adre me ca ot bi. Ie at gata ae khana he ka laba hnyi meic ame han? ie at gata ae khana he ka laba hnyi bâhlân meic nyiele balua? 15 Haba at ame vheno wisa, k' ame ha hofuc ae wisa ; ke ame hûkötîâ hwaban hna ovecâ, k' ame jijingâ li hnyamen be me ca kap hwaban ae hwali, k' ame hlöng li hnyikönyen me me ca löng ge dra, k' ame múko li emakan me me ca wâ hulö ; 16 awe, e ame he ka laba hnyi dok ae görany : ke hnen hna lubaduöng bi je kic a je hnabâ : adre me he ka hân e ; ame he ka tethmâ hna habelen e. 17 Ame he li emâkâm ka wâ Than hnyi anyin hmanenang : ödrü me he ka wâ hnyei ae

beü hmâ hmönyin. 18 Ame he hnyekom ka ûnykúme hna ootâ : Ewa at aú úseiny, ewa at tuluto fat? ewa at ame aú je hnabâ ae beü göranyai? 19 U ma ca he ka wâ tavat ae hwege hnyimödra, a tavat ae iyong ifucidra, u me ca löng bi ; ke atkanyua bohödra, u me ca löngmakhmeto. 20 Únykúme thö kö Ziona taun anyita je bijeü : ame he li emâkâm ka wâ Jerusalem taun adre laba wia hnyin, uma mano adre me ca he ka hom, adre me ca he bala ka oc je faoiny, ke ba ke töiny ame he ka mou. 21 Anyin ame he ka e bi eling Iehova hnyi anyin hmanenang, wale dok ae hu je wagewe ae lau me je di ; ke ame ca he hnyin je galu adre me galo, ke ame ca ke kec eling hu ae gan. 22 Anyin a Iehova at ame owis' öta, Iehova at ame ha anyita ge hnanyibu, Iehova tuhöta ; e ame he ka omeli öta. 23 A ok ut je töiny hom hu ; e ca úcú hnân ohmâ taben anyidra aneunya, e ca khan' ödra he ka ulolo hünvü : me adre me khenâ but hna söh ae gan hmâ : ame he tavat ae kong je cadra ka hügünâ hna söh. 24 Ke ame ca he bi ka ha hnen at ame labâ e, ka habe, Iny mok : adre me he ka hna degecâ hulö anyin tavat adre me labâ e.

HNYIMAKAN 34.

ÖBUN ta je hnyei lö, hakekeny dö he ka löng ; ke öbun tavat, tevehlöng ju : e so ame he hnyei me unöngötiny ka löng, me hmeledrany minya me ta je ünyi hia ame kü hnyin. 2 Anyin a e but hmönyin anyi Iehova hon ta je hnyei hia, me anyin wathethöt hon anyidra ta je utbavat hia : e a hia but ohí' ödra, e a hia but hn' ödra, m' adre me he ka hling' ödra. 3 Ke adre me he ka degec ta je hna hlingâ unyidra, k' ame he ka hu bokonginy je unyidra ae mok, k' ame he ka köiö but je bucen ge drödra. 4 Ke ame he ka aú but ta je döiny drany hia, ke adre me he ka vhec drany helâ me tusi : ke ame he je dö hnyin e ka kölu helâ me lan vine ame kölu, ke helâ me lan ae meleca ünyi hnyi imeta. 5 Anyin a sekon dut anyik hele vat ge hnen hna ijem hnyi drany : wâ bi, e ame he ka utut hon Edoma me hon tavat oge me hangâ, m' adre me owisa. 6 A sekon dut ge dra hele vat anyi Iehova, adre me opipikhenya e hnen dren lakon ta je mamoe me ta je got, me pipikhenyainy je wagien je mamoe baga : anyin ae hu hut

kö Iehova hnyi Bozera, me úhlingö ae gan hmâ hnyi knyei Edoma. 7 Ke ame he je bolokiny hnyot ka tha ta mödra, me je nokon kau me je bolok; ke ame he ka monu idra hnyei ge dra, me ame he ka opipikhenya könödra kânâ. 8 Anyin a wale bong bi hwaban ga Iehova, hunainy bi hwaban hulo hnyi hna ivinö ge Ziona. 9 Ke ame he ka wia je wageweiny me me tar, ke adre me he ka wia sesâiny me me teio, ke ame he kânâiny ka tar ame hlâ. 10 Adre me ca he ka ume e hnyi lit me lany; ame he bala bi ka o hainy: ame he ka ba wan e, hwân hnyi ke dö ke ne o but ka hnyi ke dö; e ba at ame he ka vheno e nyiele balua. 11 Ke ame he ka iny kati me kifoda, ke ame he ka labâ e mun me oreba: ke e ame he ka inâ hon e tulutiny imonumonuny, me tulutiny e ba önyen. 12 Adre me he ka hawâ tavat ae beönuu he ka musî, ke ba at eling; ke ame he ka únyi baú hia je thaniny. 13 Ke ame he ka kú ta je ivatetaföcö hnyi je uma umen je thaniny, ke je vhat me iwadekong hnyi je hhabâiny: ke e ame he ka hnân hnen je lukö me je mun. 14 Ke ame he ka iouny eling je menoiny hnyebuba me je lukö, k' ame he got бага ka hawâ hanen; eke, ame he ka hnen ling lilith, me wâ hobi kâu e hna menâ. 15 Ame he minya kifosa ka bi háuen eling, me hip akuny, me tho wakuny me úkhacaköuâ lakon hmelen e: eke, ame he minya je da a ka úkhacaköu eling, a úsa lo. 16 Elâm d' öbun tusi anyi Iehova, ke aú thö: ame ca he ka hia ke at a khaca gadra, ke ame ca he bi ka ba úcon: anyin a hia but hûna e hnen hnyimök, ke a úkhacaköuâ e ge hanon. 17 Ke e ame ugleköpi ödra, ke ame khenâ ge hnyamen ködra hoton tulut: ame he ka idra nyiele balua, adre me he ka laba eling hwân hnyi ke dö ke ne o but ka hnyi ke dö.

HNYIMAKAN 35.

**A**ME he hnyebuba me dok ae atgec ka senyin; k' ame he hnyot ka hobâ me vhöng helâ me obedila. 2 E ame he ka vhöng gan hmâ me senyin ge hobâ me khumöng; adre me he ka ham kâu hmanenanginy Lebanona me mecin Karemela me Sarona: adre me he ka wâ hmanenangi Iehova, wale mec anyin Khonguta.

3 Ohwegiâ je hnyam ame him, ke ohwegiâ je bouca ae mat. 4 Ha thö ködra

tavat ae sēnyin hnyok, ka habe, Hwege thö, ca ot bi: wâ bi, ame he ka o Khongubun tha e me hwaban, ame he Khongka bi hwaban; e ame he ka o me emeli öbun. 5 Me ame he ka obwela je emakan tavat a ödra wadröu, me khöng je hnyikönyen tavat ae wejiji. 6 Me ame he ka gâ tavat ae kong cadra helâ me aila, k' ame he bi ka khumöng bohmen at ae hum: anyin ame he ka patrutrua köiö hnyi hnyebuba, me je wagewe hnyi dok ae hnyei бага. 7 Ke ame he kânâ a öny ka wia me me an, ke dok ae atgec ame he ka wia me me pupuainy köiö: hnyi uma umen je lukö waleji adre me mokut hnyin, ame he ka kú hnyin sa kowi me amun. 8 Ke ame he ka hu hna cit gethen eling, me ke gethen, k' adre me he bi ka hwenyi ien e, me, gethen ae kap; ame ca he ka vheno e ge tavat ae kong; ke ame he ka hobi ködra: ke haba tavat vheno gethen, k' ame ne tavat ae monu, me adre me ca he ka he monu hnyin. 9 Ame he ka ba liona eling, ke ame ca he ka he kâe meno ame úhúlú, adre me ca he ka wâ e eling: ke ame he tavat adre úcú melidra ka vheno e: 10 ke ame he ka hmetu tavat a úcú melidra Iehova, me o hnyi Ziona me hwan khumöng; ke e hon je bödra senyin a nyiele balua: k' adre me he ka senyin me hobâ, k' ame he ka hia hlöuhlöu me mâng.

HNYIMAKAN 36.

**K**E haba hnyi hunu a fotini Hezekia than, me ame o but Saneribi than Asuria ka vat me je taun adre up veten hnyi Juda, me hügünâ. 2 Ke haba than Asuria ame kunö Rabesake úheny Lahisa Jerusalem a kö Hezekia than me utbavat ae gan hmâ. Ke e ame tot hnyi deny köiö ethö, hnyi gethen ame he ka hnyi utkânâ anyin at ame hnú khaú. 3 Me ame o but kâu Eliakima nöku Hilekia, at ame musö hnyaba, me Sebena at sihnalimen, me Joa nöku Asafa at ame oúnykúmeâ. 4 Ke Rabesake ame ha ködra, ka habe, Ha thö walang ang kö Hezekia, ka habe, Walang hna ha hnen than ae gan, a than Asuria, ka habe, Ie únyi e u me labageju kâu? 5 Haingök a haba ányâm metâ me tang hwegiâm hobi kâu vat, me wale je hofuc baú thibi: ke u me labageju kö ia waleling m' u me bi gan könya? 6 Wâ bi, u me labageju ka uci hlowe ae mita eú, wale Aigupito; ke e ka hlec hnyiban e ge at.

me ame he ka dâôâ hnyamen: ke helâe Farao than Aigupito kôdra hia adre me labageju kâu. 7 Ke u je ne ha kônya, ka habe, Ôhmun e labageju kô Iehova Khonguhmun; hawa, ca anyin je dok ae görany me anyin je taben hut waleji a ohia hnö Hezekia, me ha ka at Juda me Jerusalema, ka habe, Ôbun e he ka hic hnyi hnyimakan taben hut ang? 8 Ke walang ang, u na he ju ka uhihinykôu me tuhök thaniny Asuria, ke oge me he bi nya ka ham kôu lo li thauzan je hors a ne khanö u he ka ve bi at he ka tab' ödrin. 9 Ke u me he ka kâmâu ka ohmeto ke taben vat ae ûhnyükong hmönyin unyin lathnyabainy tuhök, me labageju kô Aigupito hobi kâu je kariota me tavat tabö hors? 10 Ke hawa, oge me o but ka hnyei ang ka ohia e, ke a ca musî bi Iehova? Haba Iehova ame ha kônya, ka habe, He thö ka hnyei eang me ohia e. 11 Me haingö Eliakima, me Sebena, me Joa, kô Rabesake, ka habe, Ô u fuc ka lathnyabaem hnyi hwen Suria; anyin ae khan' öhmun e: ke ca fuc kôhmun hnyi hwen Juda wâ e nye löng dö tavat hon hna up haginy. 12 Me Rabesake ame thu, ka habe, Hawa, a kunö nya tuhök ka tuhâm möu minya he ka ha hofuc e? hawa, a ca kunö nya ka tavat adre me laba hon hna up haginy, m' adre me an tidra tatet me ijem hnödra hna hwen hingat tha ödra möbun? 13 Ke haba Rabesake ame tot me hongot hwege göranyai hnyi hwen Juda me ha, ka habe, Löng ju hofuc hwan than ae gan a than Asuria. 14 Walang hna ha hnen than, ka habe, Ca hna but kô Hezekia he ka iyaw' öbun; anyin ae ca khana he ka omeli öbun: 15 ke haba khaca e so ame ca he Hezekia ka kun' öbun he ka labageju kô Iehova, ame ha, ka habe, Ame he Iehova ka omeli öta; ke ame ca he ka hna taun ang ka hnyi hnyamen than Asuria. 16 Ca he öbun ka ling Hezekia: anyin a walang hna ha hnen than Asuria, ka habe, Üsoköu thö mönya, me he kônya; ke öbun e he ka ve an wan anyibun vine me halebun je elaiö, me ve ijem je an öbun e kofî: 17 ke ne o but oge me o me hum öbun ka hnyi hnyei helâ me ibun hnyei, hnyei ae hu hwit me waina, hnyei ae hu areto me je hnyei vine. 18 Wâ wia wâ e nye he Hezekia ka iyau' öbun, me ha, ka habe, Ame he Iehova ka omeli öbun. Hawa, e hu hna omelö tavat hnen je khongon je hnyei ûnyi hnyi hnyamen than Asuria? 19 Ewa je khongon Hamath

me Arefada? ewa je khongon Sefaravaima? hawa, ödrin e hia but omeli Samaria ûnyi hnyi hnyamök? 20 Ewa je khongon je hnyei a hnyat adre hia but omelö idra je hnyei ûnyi hnyi hnyamök, me me he Iehova ka omeli Jerusalema ûnyi hnyi hnyamök? 21 Ke adre me laba hnyibü, me ca thu kâu ge ke hofuc, anyin a hûna than, ka habe, Ca he ka thu kâu. 22 Me haba Eliakima nöku Hilekia at ame musö hnyaba, me Sebena at sihnalimen, me Joa nöku Asafa at oûnykûmeâ, me ödrin e he kô Hezekia me je ûkhaû adre kia, me thumeto e ge je hofuc ho Rabesake.

HNYIMAKAN 37.

**K**E a löng ut Hezekia than me e ame kia anyin je ûkhaû, me khavî ecmano ae gan nân, me dit ka hnyi uma umö Iehova. 2 Ke e ame kunö Eliakima at ame musö hnyaba, me Sebera at sihnalimen, me wahingat a tavat bi hut, adre ve khavâ ecmano ae gan nân, kô Isaiâ perofeta nöku Amosa. 3 Ke ödrin e ha kâu, ka habe, Walang hna ha hnö Hezekia, ka habe, Bonginy vec, me û, me ûhaikonguny bong ang: anyin a ûen a o ta je wanakat, ke ba at ae hwege he ka hnokoa. 4 Ame ne he ka löng ut la Iehova Khongom hofuc ho Rabesake, waleji a kunâ hnen than Asuria a tuhan he ka haikongoa Khong ae möt, ke e ame he ka thawâ hofuc ame löng Iehova Khongom: anyin a wale hic dö hobi kâu ta je kolon. 5 Me ame o lathnyabai Hezekia kô Isaiâ. 6 Ke ame ha Isaiâ ködrin, ka habe, Öbun e he ka ha helâng ka tuhöbun, ka habe, Walang hofuc ho Iehova, ka habe, Ca he ka outen hofuc u je löng, waleji hnen athnyabainy than Asuria hna haikongu nya. 7 Wâ bi, oge me he ka ip ke hanu eû hnyi hnyekon, me e ame he ka löng úthumetu me hmetu ka hnyi iny hnyei; ke oge me he ka öta e ge hele vat hnyi iny hnyei bi.

8 Me ame hmetu but Rabesake, me wâ a g' ame vat than Asuria me Libena: anyin a e ame löng a g' ame he but úheny Lakisa. 9 Ke e ame löng bongu Tiraka than Aithi-ope, ka habe, E but ang ame he ka vat möu. Ke a löng ut e, me e ame kunâ je úthumetu kô Hezekia he ka ha, ka habe, 10 Walang hofuc öbun e he ka ha kô Hezekia than Juda, ka habe, Ca he ka iyawö u bi hnen Khongom wale u je labageju kâu me ha, ka habe, Adre me ca he



ka hna Jerusalema ka hnyi hnyamen than Asuria. 11 Wâ bi u je löng ut hna ânyâ hnen than Asuria ka ta je hnyei hia, a g' adre ti ohia bi: ke adre me kâmâu ka omeli u. 12 Hawa, a hia but je khongon je hnyei omeli ödra waleji a ohia hnen lakamök, waleji Gozana, me Karan, me Rezef, me laku Edena hnyi Thalasa? 13 Ke ewa tuhan Hamath, ke tuhan Arepada, ke tuhan taun Sefaravaima, ke Hena, ke Iva? 14 Ke haba Hezekia ame kap tusi únyi hnyi hnyamen je úthumetu me ame aú: me Hezekia ame he ka hnyi uma umö Iehova, me e ame ulolo e hnyi hnyimakö Iehova. 15 Ke haba Hezekia ame hic kö Iehova, me ha, ka habe, 16 Iehova tuhan sabaoth lö, Khongu Isaraela, ke at ame laba wanben li kerubi, u thibi Khong, a hake u ke, hnyi ta je dökhu hia eang hmeledrany; u je op drany me hmeledrany. 17 Iehova lö, tâ ju hnyikönyâm me löng; Iehova lö, hmak dö me wâ; me löng ju hofuc ho Saneribi, wale e ame úkhünöng he ka haikongoâ Khong ae möt. 18 Iehova lö, e hnathu, hnen je than Asuria hna öba wan je hnyei me je idrin, 19 me adre hia but khûâ je khongudrin ka hnyi meic: anyin a ödrin ca je khong bi, ke so bi huliwa anyin je hnyamen at, k' ödrin utö me veto bi; anyin a wale adre oh' ödrin. 20 Iehova lö, Khonguhmun, walang ang ö u omeli öhmun dö únyi gan, me me khana hnen je dökhu hia eang hmeledrany a u thibi Iehova, a hake u ke.

21 Me haba Isaiâ nöku Amosa ame úkhünöng kö Hezekia me ha, ka habe, Walang hna ha hnö Iehova Khongu Isaraela ka habe, U je hic könya ga Saneribi than Asuria, 22 awe, walang hofuc ho Iehova ame ha gan, ka habe, A húkötü u me hlumö u hnen hlu wale hlu Ziona; ke ame nyinyikâ ban gam hnen hlu Jerusalema. 23 U je haikongoâ me bi gan kö ia? u je hongot göranyai kö ia ge hwâu hofuc me bi gan ge li emâkâm? wale ka Kabi Isaraela. 24 U je hia but haikongoâ Than a deny je athnyabaem, me ha, ka habe, O ge ölö hon je bucen hnyi ke keihen Lebanona tha inya me anyik ta je kariota ae se hia; ke oge me he ka sö but ta je arasiny ae beú göranyai me je köpiny adre úca: ke oge me he ka o ka hnyi dok a göranyin, hnyi hnyeuten adre belökâ. 25 Oge hia but khú an, ke haba li hnyeúcak ame ohmö je wageweiny hia Aigupito. 26 Hawa, u je ca löng a oge ânyâ e kâú

adrem, ke oge mâdrâ e hnyi je bong a bân? walang ang oge hia but ohwâdâ mu me he ka öba je taun adre up haginny me me je ve ta únyi. 27 Anyin a wale e úhnyükong maniny tavat adre me labâ e, ke ödra ot me ame gâüdrin; ödra úcú me hna önying, me úö ae ometu ae hât, me hna önying hon ban uma, ke helâ me hnyei hwit ae tiga ca metu. 28 Ke oge wâ but hnâm hna laba, me hnam hna didrut, me didrö, me hnâm hna hmönyin könya. 29 Can hnâm hna hmönyin könya, ke ame o but ka hnyi li hnyikönyök hnâm hna bi gan könya, me oge me he bi nya ka inâ anyik otru hnyi hnyingöiâm, me anyik fao hnyi li esongodâm, ke oge me he ka ohmetu u hnyi gethen u je o hnyin. 30 Ke walang ame he ka haten köu: öbun e he ka han únyi ame kú hwege hnyi huna ang, ke haba hnyi huna a loiny öbun e he ka han únyi ame kú hwaban e; ke haba hnyi huna a kuniny, me öbun e he ka belök me menu, me tâ je hnyei vine me ijem je wan. 31 Ke haba je kolon lap anyi Juda, tavat ae möt, adre me he ka kú hmetu eú, me wa göranyai. 32 Anyin ame he ka he úheny Jerusalema ta je kolon, k' ame he ka he únyi hnyi bucen Ziona tavat adre me he ka möt: ame he ka ânyâ e ge weny ae gan ga Iehova tuhan sabaoth. 33 Anyin a wale, walang hna ha hnö Iehova ge than Asuria, ka habe, E ame ca he ka o ka hnyi taun ang, me hlic faua hnyin, ke e ame ca he ka hom bec me tot hnyi hnyimakan e, me otillâ taben kânâ cicö e. 34 E ame he ka hmetu hnyi gethen a o hnyin, k' ame ca he ka o ka hnyi taun ang, ame ha Iehova. 35 Anyin a oge me he ka tuö taun ang me omelö e gak bi, me ga Davita athnyabaik. 36 Me ame he but angela anyi Iehova me kot hna hunuma anyin at Asuria, a wan haded ke eite faiv thauzan: ke hnyi úen adre me vesâ hnyi hnyomakatu, me wâ bi, adre mok hia ju. 37 Me ame todrö Saneribi than Asuria me he, me laba hnyi Niseve. 38 Ke e ame hic hnyi uma umö Niseroka a khongon, me ame kot e ge hele vat hnen li lakon jia Aderamelek me Sarezera: ke ödru me kec ka hnyi hnyei Ararata. Ke ame than biju Esar-adon a nokon hwaban.

HNYIMAKAN 38.

**K**E haba hnyi úen eling ame he but Hezekia ka mok. Ke ame o kâu

ISAIA 39.

Isaia perofeta nöku Amosa me ha kâu, ka habe, Walang hna ha hnö Iehova, ka habe, Çhüneköut thö me ânyâm lap; anyin a u me he but ang ka mok, ke u me ca he bi ka möt. 2 Me Hezekia ame wia hnyimakan ka hnyi hnyeige uma, me hic kö Iehova, 3 me ha, ka habe, Iehova lö, u na he ju ka ûnykûme walang ang hnök hna he hnathu hnyi hnyimâkâm me hnyok .ae wisa, ke ânyâ so hnyi hnyimâkâm. Ke Hezekia ame tenge hwege. 4 Ke ame o but hofuc ho Iehova kö Isaia, ka habe, 5 He thö me ha kö Hezekia, ka habe, Walang hna ha hnö Iehova Khongu Davita a kibâm, ka habe, Oge hia but löng hijâm hic, me wâ ta je deköiâm: me wâ bi oge me he ka bi hanen bongom je bong a fiftin je huna. 6 Ke oge me he ka omeli u me taun ang ûnyi hnyi hnyamen than Asuria: ke oge me he ka bi singiny taun ang. 7 Ke walang haten köu ûnyi ga Iehova, a g' ame he Iehova ka ânyâ ûnyi eang e ame ha: 8 wâ bi, oge me he ka ohmeto hmenon hnyi hon wacuat, waleji ame dit hnyi haten seûnö anyi Ahaza, he ka hmetu-hmetu ten je haten. Me ame hmetu seûnö hnyi ten je haten waleji ame dit hnyin.

9 Tusi anyi Hezekia than Juda hnyi anyin mok, ke ame möt hmetu hnyi hna ûâ.

10 Oge me ha, ka habe, Hnyi jebigöiny bonguk je bong oge me he ka he ka hnyi homagöuleny erkemok:

Ke adre hügünö nya kolon je hunaik.

11 Haingök, Oge me ca he ka ö Ja, wale Ja hnyi hnyei iny tavat ae möt:

Oge me ca he hmetu ka wâ at unyin tavat adre me labâ hmeledrany.

12 Adre oc anyik dö, ke adre hom ûnyi gak helâ me uma mano umen at tuö mamoe:

Oge hia but vhec anyik möt helâ me at ame hwâwâ mano; e ame he ka subâ degeci nya ûnyi hnyi hna tuhuny:

U me he ka bi obiny gak hwân hnyi lany ke ne o but hnyinghet.

13 Inya oge me hok hnyok ke ne o but hnyi hnyomakatu; ke e ame thu je jeiök hia helâ me liona:

U me he ka bi obiny kõnya hwân hnyi lany ke ne o but hnyi lit.

14 Inya oge me fufuc helâ me wahalep me âiâ,

Inya oge me tenge helâ me biny; e hanenak ut li emakök anyin bwela göranyai;

Iehova lö, iny vec, u na he ju ka sing nya.

15 Ieü oge me he ka ha? e ame hia but ha kõnya, ke e bi at ame ânyâ:

Oge me he ka omis he hnyi ta je hunaik hia can vecin hnyekuk.

16 Than lö, ame möt at hnen ta je ûnyi eling,

Ke e bi eü hnyin hia anyik möt:

Anyin a wale ö u osoi nya me omeli nya.

17 Wâ bi, inya hnahic ut ûnyi hnyi vec ae gan hmâ:

Ke u je hia but betenge ge hanuk me omelö ûnyi hnyi monop ae bon;

Anyin a u je hia but khúâ hotom ai anyik ta je hulö hia.

18 Anyin ame ca he erkemok ka oganö u, e ca khana mok he ka haisoi u:

E ca khana tavat adre me dit ka hnyi thop ka gejon ânyâm hnathu.

19 Ame he at ae möt ka oganö u, a at ae möt, helâ me hnök hna ânyâ hnyi bong ang:

Hamen kamen he ka omanená ânyâm hnathu ka lakon.

20 Iehova ame tot he ka omeli nya:

Anyin a wale ate me he ka hai hwanyik je khumöng tha e me je ûnyikhumöng ae hu töiny.

Hnyi ta je bonginy anyita möt, hnyin uma umö Iehova.

21 Ke haba Isaia ame hia but ha, ka habe, E so adre me hom hmata a wan meta, me ip hon ohuc hnân bubuny, me e ame möt dö. 22 Ke a hia but minya ha ga Hezekia, ka habe, Ieü haten a oge me he ka he hnyi uma umö Iehova?

HNYIMAKAN 39.

**H**NYI ün eling haba Merodaka-baladana nöku Baladana, than Babulona ame kunâ je tusi me je bwihlany kö Hezekia; anyin ame löng ut a ga ne mokcu ke a möt hmetu thö. 2 Me Hezekia ame senyin ködrin, me omanená ködrin tang omjehen, wale sileva me gol, me je utö ae bo so, me wakaco ae so, me uma umen omjehen vat hia, me ta je ûnyi hia eü hnyi tang omjehen: e ba ke ûnyi hnyi umen uma me hnyi dokhon dökhu hia a ca omanená Hezekia ködrin. 3 Me haba Isaia perofeta ame he kö Hezekia than me ha kâu, ka habe, Ieü hna ha hnen tavat e? ke úhedrin ua köu? Me Hezekia ame thu

ka habe, Úhedrin hnyi hnyei ae sákâú ka o kõnya, wale Babulona. 4 Ke haingen, ka habe, Ieú ódrin e hamâ hnyi umâm uma? Ke Hezekia ame thu, ka habe, Ódrin e hia but wâ ta je únyi hia thithö hnyi umök uma: e ba ju ke omjehek oge me ca omanená ködrin. 5 Me Isaia ame ha kö Hezekia, ka habe, Löng ju hofuc ho Iehova tuban sabaoth. 6 Wâ bi, ame he ka o ta je bong, me adre me he ka tha hom Babulona ai ta je únyi hnyi umâm uma, me ta je únyi a hip hnen lakâmâm ke ne o but hnyi bong ang: ke ame he ka ba kolon ame ha Iehova. 7 Ke haba ke je lakon ame he ka o únyi gam, a je mátránâm, adre me he ka hom dö; adre me he ka hnân je eunuka hnyi hnyaban than Babulona. 8 Haba Hezekia ame ha kö Isaia, ka habe, E so hofuc ho Iehova wale u me ha. Ke e ame ha minya, ka habe, Ame he ka hu úsoköu me hnathu hnyi bonguk ta je bong.

HNYIMAKAN 40.

**O**TUBWELÂ ju öbun, otubwelâ ju öbun lakeik, haingen Khongubun. 2 Ha thö hofuc ae kaukahwa kö Jerusalema, ke hongot dö kâu a ga um dö bonginy vec, ke adre hia but thang degecâ anyin hulö; a hia but kap únyi ga Iehova hna olo bi hwaban anyin ta je hulö hia.

3 Ifucin at ame hongot, ka habe, Penapena th' öbun gethen de Iehova hnyi hnyebuba, okhabalavâ hna cit gethen hobi kâu Khonguta hnyi hnyei бага. 4 Adre me he ka ogöranyâ ta je hnyigöuleny bucen hia, ke adre me he ka ohnyikânâ ta je bucen me ta je hut hia: ke adre me he ka owisa ta je dok ae hwahwali, ke adre me he ka othahonâ ta je dok ae újejöng: 5 ke adre me he ka omanená hmanenangi Iehova, ke ame he ka tha wâ hnen tavat hia thithö: anyin a ha hnen hnyimö Iehova. 6 Ifucin ke at ame ha, ka habe, Hongot dö. Ke haingen ke at, ka habe, Oge me he ka hongoti ieú? Hna önying tavat hia thithö, ke helâ me vongon hnyot hmanenanginy: 7 ame meleca hna önying, ke ame kölu vongon; anyin ame túâ hon e homenö Iehova: e hnathu a hna önying tavat. 8 Hna önying ame meleca, ke vongon ame kölu: ke tethmâ bi nyiele balua hofuc hwan Khonguta.

9 At ame omanená úthumetu ae so kö Ziona lö, ölö thö ka hnyi bucen ae beú

göraný; at ame omanená úthumetu ae so kö Jerusalema lö, fuc hwege thö; fuc hwege thö göranyai ca ot bi; ha thö ka je tauniny Juda, ka habe, Wâ bi, Khongubun! 10 Wâ bi, ame he Than Iehova ka o helâ me at ae man, k' ame he benyin ka musi hobi kâu e bi: wâ bi, e unyin hwaban, ke e hnyi hnyimakan hwaban anyin huliwa. 11 E ame he ka hân haleny hnahat mamoe helâ me at tuö mamoe, e ame he ka hom tilâ lakon mamoe hnyi li benyin, me köp ödra hnyi úlainy, me omi alen je hnyat adre me úasin.

12 Ia tuluto köiö hnyi thopiny hnyamen, ke tuluto drany ge banyen, ke hitangen hnyi tulut sesâiny hmeledrany, ke tuluto ihmakiny ta je bucen, ke ta je hut bi hnyi tulut? 13 Ie at a tuluto hanu Iehova, ke ia obotkonginy me me ometâ e? 14 E ame úhnenamö me ia, me me nâ e, ke úne kâu hnyi gethen deny hna owisa, me nâ e he ka khana wâhmakhmeto, me okhana e hnyi gethen deny wâ únykúme? 15 Wâ bi, haba je hnyei me helâ me úkhulainy baket, k' adre me únykúmi ödra me helâ me kânâ hnyi únyi hnân tulut: wâ bi, e ame kap göranyai je bomene helâ me únyi ae ti úhnyúkong hmönyin. 16 Ke ca úcú bi Lebanona hnân thong, ke ca úcú bi ta je menoiny hnân hudiny leú. 17 Haba ta je hnyei hia, me helâke ba hnyi hnyimakan; ke ti ba me ba önyen hnyi únykúmenen. 18 Awe, öbun e he ka öuco Khong me ia? ke ewa úhóúcé, m' öbun e he ka öuco mē? 19 Haba at huliwa ame oköiâ hnatheat, k' ame tube e ge gol hnen at ame huliwan gol, k' ame le je tö sileva hobi kâu e. 20 Ke haba at ae ba ta únyi, me ame úca úö ame ca he ka amam bi; e ame elâm hobi kâu bi ke at ae metâ huliwa he ka penapena hnatheat a únyi ame ca he ka bwebwet. 21 Hawa, e ca khan' öbun? öbun e ca löng? k' adre ca thumetu öbun únyi hnyi can? k' öbun e ca wâhmakhmeto hwân hnyi hna bi taben hmeledrany? 22 E at ame laba hon wathelabainy hmeledrany, ke helâ me ta je wahamon tavat adre me labâ e; at ame ulolo drany helâ me imano, k' ame ulolo e me helâ me uma mano adre me laba hnyin: 23 at ame oúnyúkongo me öba je than; at ame wia tavat owisa hmeledrany m' adre me únyi baú bi. 24 Eke, adre me tiga ca te ödra, k' adre me tiga ca könim ödra; eke e tiga ca hu wân anyidra hnyiban eú hnyi kânâ; me e ame tú' ödra, me adre me meleca thö,

ke haba weneû ame tûâ degeci ödra helâ me thatúnyin hwit. 25 Ke öbun e he ka öúcú nya me ia, m' oge me he ka tha úcú mē? ame ha At ae Kap. 26 Bwela th' öbun göranyai, me wâ, ia op ta je únyi e, ke ame su anyidra ta je dö hnyi úseidra: e ame ve hawâ ta je iödra hia thithö; ke haba hnyi úganiny maniny man, ke can hwegien ae gan, me ame ca hia bi khaca.

27 Anyin a ieu gam Jakob u me ha, ke u Isaraela u me fuc, ka habe, E iyoug kö Iehova dek gethen, ke a he but únyi ge Khonguk hna owisa kõnya? 28 Hawa, e ca khanö u? u me ca löng? a Khong nyiele balua, a Iehova, at a op je can hmeledrany e ame ca mat, me sēnyin; ca hnân bi wâ anyin metâ. 29 E ame ha hwegien at ae sēnyen, me ham gānâ hwege ka at ae ba maniny. 30 Ke ame he je thöth ka mat me sēnyin, ke ame he je wahidröu ka ta but: 31 ke ame he tavat adre me halubahing Iehova ka ohâtâ tang hwegiödra; adre me he ka gâ göranyai ge je labenyidra helâ me aeto; adre me he ka wadring, ke adre me ca he ka mat; adre me he ka he, me ca he bi ka sēnyin.

HNYIMAKAN 41.

**T**A je bomene lö, laba hnyibû ju hnyi hnyimakök; ke ame he ta je hnyei ka ohâtâ tang hwegeiödra: he but jem ödra, m' adre me fuc dö: ate me he ka úkhacaköu me úhnei. 2 Ia oâ ke at úheny jimeio, waleji e ame hawâ ka hnyi li can hnyi hwakecin ae wisa? e ame hna je hnyei kâu, me otilâ he ka musi hon ta je than; e ame hn' ödra ka hnyi anyin hele vat helâ me sesâ, me ka anyin cafana helâ me je thatúnyin hwit ame tûâ ang. 3 E ame hnu hotudra, me he so; waleji hnyi gethen e ame tiga ca vheno ge li can. 4 Ia mádrâ me ányâ e, ame hawâ je dö únyi hnyi can? Inya Iehova at a bân me biliny, inya thibi e. 5 Haba je bomene adre me wâ me ot; haba je can hmeledrany adre me öbubuny: adre me hakekenyâ, me o. 6 Adre me úhadruoköu ödra ke at me ke at; ke adre me ve ha ka je liamekeiny mödra, ka habe, Hwege ju. 7 Ke haba at tretrau úto ame sihwegiâ at leú fao, ke haba at ame okhabalavâ ge hama ame sihwegiâ at ame kot taben huliwa a fao, me ha, ka habe, E so hna leú veto hnân hûjâ: me e ame ohmâ e ge je fao me me ca bwebwet.

8 Ke haba u Isaraela lö a athnyabaik,

ke Jakob at oge me úca, mátrâni Aberahama a hanök; 9 a u at oge me kât únyi hnyi je can hmeledrany, ke hawâ únyi hnyi je ke keihen e, ke ha köu, ka habe, Ú thibi athnyabaik oge úcö u ke ca hna degeci u; 10 awe, ca ot bi, anyin a tha inya möu; ca hlohlo bi, anyin a inya Khongom: oge me he ka ohwegiö u; eke, oge me he ka hadruö u; eke, oge me he ka ci u ge hnyamök a metök ae wisa. 11 Wâ bi, adre me he ka hmehma me hlohlo ödra hia thithö adre me hmönyidra köu: ke haba tavat adre me ivinö möu me adre me he ka helâ me ba k' adre me he ka hia but. 12 U me he ka elöm ödra, ke u me ca he ka ö'dra, wale tavat adre me ivinö möu; k' ame he ka helâ me ba me únyi baú bi tavat adre me vat möu. 13 Anyin a inya Iehova Khongom oge me he ka kat benyâm a metâm, me ha köu, ka habe, Ca ot; oge me he bi nya ka hadruö u. 14 Ca ot bi u Jakob a waahnyöng, ke öbun tavat Isaraela; haingö Iehova, ka habe, Oge me he ka hadruö u; ke haba at úhömeli u, me Kabi Isaraela. 15 Wâ bi, oge me he ka wiö u hnân huje hwit ae so hwan a teb únyi ke hu nyon: m' u me he ka kokot je bucen me me úhnyúkong ju, ke u me he ka wia je hut me me helâ me unen hwit. 16 U me he ka ulic ödra, k' ame he ang ka tûâ degeci ödra, k' ame he höu ka ovesei ödra: ke u me he ka senyini Iehova, ke u me he ka hobâ Kabi Isaraela. 17 Tavat adre me vec, ke ta je theduoc, me adre me heleú köio, me ba, ke atgec dö ta je bohmödra ge beic; ke oge me he bi nya Iehova ka thu ködra, oge me ca he bi nya Khongu Isaraela ka hna degeci ödra. 18 Oge me he ka oâ je-wagewe hon je bucen ae ba leúnen, ke je hna pupua köio hnyi je hnyigoulen je bucen: oge me he ka wia hnyebuba me me köio, ke hnyei ae hwahwacit me me je an ame pupua. 19 Oge me he ka tã ta je arasi hnyi hnyebuba, ke je öhum, ke adasi, ke úö hnân wakaco; oge me he ka tha ip hnyi hnyei бага köp, ke tidera, ke tasura: 20 m' adre me he ka wâ me khan' ödra, me únykúme, me tha wâ únykúme a ga ányâ hnen benyi Iehova, ke a op e hnen Kabi Isaraela.

21 Hö jem hnöbun hna ivinö, ame ha Iehova; omanená thö hobun ta je hofuc ae hwege, ame ha Tuhö Jakob. 22 E so adre me he ka omanená, me thumetu öta ge ta je únyi ame he ka kú: ha th' öbun ge bongon ta je únyi kâú adrem, m' ate me únykúme me wâ obiny ta je únyi e; ke

ame ne he ka omanená kôta ta je únyi ame he ka o. 23 Úthumetu thö ge ta je únyi ame he ka kú hnyi obiny, me me khan' öhmun a öbun ta je khong : eke, ányá thö so, ame ne kong, m' öhmun e he ka hlohlo, me tha wá bi e. 24 Wá bi, öbun ti ba, ke ti ba önyen anyibun huliwa : e ikiki at ame uc' öbun.

25 O ge hia but oá ke at úheny hnyi hwadrö, ke e ame he jem ; ke úheny hnyi hna o hnen seúnö, oge me oá ke at ame hawá iök : e ame he ka je than helá me hna dá dröu, ke helá me at ame op kaia ame ututo káná ae kece. 26 Ie at ame haimemená e únyi hnyi can, me me khan' öta thö ? me káú adrem m' ate me he ka ha ka habe, E at ae wisa ? eke, e ba at a haimemená, eke, e ba at ame omanená, eke, e ba at a löng höbun je hofuc. 27 Oge ma bök ka ha kö Ziona, ka habe, Wá bi, wá bi ödra ; ke oge me he ka ham kö Jerusalema at ame he ka hom úthumetu ae so. 28 Ke oge me wá, ke ba at, ke ba at ha bongon unyidra, ke oge me hnei ödra, ke ba at ae khana thu ge ke hofuc. 29 Wá bi, ödra hia, e únyi baú me ba önyen anyidra je huliwa : ang thibi, me monu but anyidra ta je hnatheat adre oköiá.

HNYIMAKAN 42.

**W**Á bi ang athnyabaik, at o ge me cö ; úcanök, ame senyin káu hnyekuk : oge hia but ip hanuk hon e ; e ame he ka oá hna owisa ka je Ethen. 2 E ame ca he ka ha hwegiá, me fuc göranyai, k' ame ca he ka olöngá ifucin eú hnyi gethen. 3 E ame ca he ka thu hlowe ame hmetru, ke ame ca he bi ka ume wakunenu ame ven : e ame he ka oá hna owisa hoton hnatu. 4 E ame ca he ka sēnyin me ngá, ke ne o but e ame he ka ip hna owisa eang hmeledrany ; ke ame he ta je bomene ka halubahingen anyin hnanyibu. 5 Walang hna ha hnö Iehova a Khong, at a op drany, me ulolo e ; at a olauá hmeledrany me ta je únyi ame kú hnyin ; at a ham homená ka tavat hia thithö hon e, ke hanu ka tavat adre me vheno e : 6 haba inya Iehova, oge hia but hawo u hnyi wisa, ke oge me he ka kát benyám, me tuö u, me hnö u hnân úhinhinköu me tavat hnân melaminy ta je Ethen ; 7 he ka obwela je ecmak ae wadröu, he ka hom but at adre me ca únyi hnyi uma ceat, ke tavat adre me laba hnyi menekholom únyi hnyi dok adre cö 'dra hnyin.

8 Inya Iehova, wale iök : ke oge me ca he ka ham anyik hmanenang ka ke at, ke hna oganö nya bi ka ta je idola. 9 Wa bi, a hwadá thö ta je únyi a bán, ke inya oge me omanená ta je únyi ae teb únyi : ke oge me bök ka omanená köbun, ke tiga ca kú ta je únyi e.

10 Hai thö kö Iehova khumöng ae teb únyi, ke hna oganá e únyi hnyi can hmeledrany ; öbun tavat öbun e ut hnyi köiöai, ke unöngötiny e, ke je bomene, ke ta je aten. 11 E so ame fuc göranyai hnyebuba me je tauniny, a je taun ae úhnyúkong ame labá at Kedara ; e so ame khumöng tavat a aten Sela, e so adre me he ka hongot ethö hon bucen. 12 E so adre me he ka hna hmanenang kö Iehova, me omanená hna oganá e hnyi je bomene. 13 Ame he Iehova ka he helá me at ae hwege ; e ame he ka oá tang hwege helá me tabenvat : e ame he ka kuku, eke, e ame he ka hongot göranyai ; e ame he ka hwege hon je iwahnaihmiöny mä. 14 E beú but hnök hna laba hnyibu ; oge hia but laba wia me hokhnyoká : ke walang ang oge me he ka kuku helá me momo ame hnokoá ; oge me he ka máng me momokhon. 15 Oge me he ka öba wan je bucen me je hut, ke omeleca anyidra ta je khölak ; ke oge me he ka wia ta je wagewe me me je bomene bi, ke oge me he ka ohmö je an. 16 Ke oge me he ka hom ta je wadröu hnyi gethen ae ca khan' ödra ; me su ödra hnyi je gethen ae ca khan' ödra : ke oge me he ka wia menekholom hnân lany bi hnyi hnyimaködra, ke owisa je dok ae hwahwali. Wale ta je únyi oge me he ka ányá hobi ködra, ke oge me ca he bi ka hn' ödra. 17 Ke adre me he ka ohmetu ödra, m' adre me he ka hmehma, tavat adre me labageju ka ta je idola, tavat adre me ha ka je hnatheat adre oköiá, ka habe, Öbun je khonguhmun.

18 Löng ju, öbun ta je wejiji ; bwela hut, me me wá thö, öbun ta je wadröu. 19 Ie wadröu, wale athnyabaik ? me ie wejiji helá me anyik úthumetu oge me kuná ? ie wadröu helá ma at ame úsoköu mönya ? ke wadröu helá me athnyabai Iehova ? 20 E se hia ta je únyi u je wá, me ca vheno bi ; adre khöng ut li hnyikönyen, ke e ame ca löng bi. 21 Ame so kö Iehova hnyi anyin hwa-kecin ae wisa, he ka oganá hnanyibu, me ohmanenangá e. 22 Ke hnyei adre hügúná me söh hnyei ang ; ke adre nuc ödra hia thithö hnyi je thop, ke adre ikhöl' ödra hnyi je uma ceat : ödra a tavat hnân hügú-

nâ, ke ba at ame tubi ödra; me hnân söh, ke ba at ame ha, ka habe, Ham hmetu but. 23 Ia gabun ame he ka tevehlöng ûnyi ang? me tâ hnyikönyen me löng hobi kâu nyiele? 24 Ia hnö Jakob m' adre me söh, me Isaraela ka tavat venöu? hawa, ca hnö Iehova? waleji at ate me ânyâ hulö kâu, ke adre me höcö he ka vhenö deny je gethen, ke khaca adre me ca löng bi anyin ta je hnanyibu. 25 Anyin a wale e ame hingâlâ hudra úganiny anyin hmönyin, me ihwegien anyin vat; ke e ame vác e igigilö e, ke e ca khana bi; ke ame hlá e, ke e ame ca únykúme bi.

HNYIMAKAN 43.

**K**E walang ang, walang hna ha hnö Iehova at a up u Jakob, me at a huliwön u Isaraela, ka habe, Ca ot bi, anyin a oge hia but úcö ânyâm möt; oge hia but hawâ iâm, anyin a atök ut u. 2 U ka he ka hanyâúâ je köiö, me oge me he ka tha inya möu; me je wagewe, adre me ca he ka khutukhaúö u: u ka he ka he wanben meic, ame ca he ka thung u; k' ame ca he bâhlân ka möt unyâm. 3 Anyin a inya Iehova Khongom, Kabi Isaraela, at ame omeli u; oge hia but ham Aigupito hnân hwaban melâm, ke Aithiope me Teba hnân hwabâm. 4 Anyin a u oúnykúmik, me hmanenang, me hnök hna betenge gan; awe, oge me he ka ham tavat hnân hwabâm, me je hnyei hwaban melâm. 5 Ca ot bi, anyin a tha inya möu: oge me he ka hom ta je mátránâm úheny jimeü, me úkhacaköu u úheny jimeü; 6 oge me he ka ha ka ke keihen hwadrö, ka habe, Hna but; ke ka ke keihen hwaiöu, Ca behánâ bi; hom but lakuk obaga úhedra sákáú, ke lakuk wahu únyi hnyi je can hmeledrany; 7 haba ödra hia adre ip hudra iök, waleji oge me op hnân oganö nya; me inya at a huliwön ödra; eke, oge hia but up ödra. 8 Hö jem tavat ae wadröu ke hu ecmak, ke tavat ae wejiji ke hu hnyiköny. 9 Úkhacaköuâ thö ta je hnyei hia, me ame he tavat ka úkhacaköu: ie at gadra ame he ka haimemenâ e, me omanená köta ta je únyi a bân? hamödra he ka hawâ tavat ohnatho, m' adre me he ka ohnathu ödra: ke adre me ne he ka löng me ha, ka habe, E hnathu. 10 Öbun tavat ohnathu nya, haingö Iehova, ke athnyabaik waleji oge me úca: me me khan' öbun me labageju könya, me wâ únykúme a inya thibi; e ba ke Khong a

ban ke bilik bi, ke haba khaca, me ba ke at hnyi hwabök. 11 Inya thibi Iehova, ke ba ju ke at úhömeli, ke hake inya ke. 12 Oge hia but haimemenâ, ke oge hia but omelö, ke oge hia but omanená, ke tiga ba khong kanyua unyibun: anyin a wale haingö Iehova, öbun tavat ohnathu nya, a inya thibi Khong. 13 Eke, inya but ling ke tiga ba bong; ke ba at ae khana he ka hügúnâ únyi hnyi hnyamök: inya oge me he ka huliwa, ke ie at ame he ka bi ovheliny.

14 Walang hna ha hnö Iehova at omeli öbun, a Kabi Isaraela, ka habe, Can gabun, oge me he ka úkhünöng Babulona ai, ke oge me he ka hum ödra hia thithö a je bâ, wale at Kaledia, adre me tabâ je hu adre me senyin hnyin. 15 Inya Iehova, Kabi-bun, at a Up Isaraela, ke Tuhöbun. 16 Walang hna ha hnö Iehova at ame bi gethen hnyi köiö, k' ame bi deny gethen hnyi wanben köiö ae gan; 17 at ame hom je kariota me je hors, me utbavat me tang hwege; adre me tha mokut ju, k' adre me ca he ka tot hmetu bi; e hi' ödra but, k' adre me mok ut helâ me wakunenu: 18 haingen, ke habe, Ca únykúme bi ta je únyi a bân, ke ca hnyok bi ka ta je únyi kâú adrem. 19 Wâ bi, oge me he ka ânyâ únyi a teb únyi; k' ame he ka kú walang ang; ame ca he ka khan' öbun e? Oge me he ka bi gethen hnyi hnyebuba, me bi wagewe hnyi hnyei бага. 20 Ke ame he ka oganö nya hnen je menoiny hnyot, je luko me je iaena: anyin oge me oâ köiö hnyi hnyebuba, me je wagewe hnyi dok ae hnyei бага, he ka habelen lakeik waleji oge úca: 21 waleji tavat oge me op hobi könya bi, m' adre me he ka oganö nya. 22 Ke so bi u je ca hawo nya, Jakob; ke u je katebu könya Isaraela. 23 U je ca hom könya halem ta je nak meno a je hudiny leú; ke u je ca oganö nya ge ânyâm ta je hut. Oge ca ohmakö u ge ta je hut, me osënyini u ge ta je úö ae bo so. 24 U je ca úcú úö ae hnebwia hobi könya hwaban mone, ke u je ca osekuni nya ge pipikhenyainy ânyâm ta je hut: ke u je hia but ohmaki nya ge ânyâm ta je hulö, u je hia but osënyini nya ge hwakecâm ae kong. 25 Inya, inya thibi at ame kot degecâ hnâm ta je hna hanyâúâ cak bi; ke oge me ca he ka únykúme ânyâm ta je hulö. 26 Oúnykúmi nya thö; ate me he ka tha úhneiköu: ha thö hnâm hna ivinö, m' adre me he ka haiwisai u. 27 Ame ânyâ hulö hnen kâmâm a bân, ke ame úkhin fuc

mönya ányâm je úthumetu. 28 Anyin a wale oge me he ka okongoá je tuhan dok ae kap, me hnö Jakob ka hnaúhangö, ke Isaraela hnân haikongoá.

## HNYIMAKAN 44.

**K**E walang ang löng ju, Jakob athnya-baik ; ke Isaraela waleji oge úca: 2 walang hna ha hnö Iehova at a huliwön u, at a up u hwân hnyi hnyekon hinyâm, at ame he ka hadruo u, ame ha, ka habe, Ca ot bi, Jakob a athnyabaik; me u Jesuruna, waleji oge úca. 3 Anyin oge me he ka hingâlâ köiö hon at ame beic, me je wagewe hon dok ae hwahwacit: oge me he ka hingâlâ hanuk hon je mátrânâm, me hnahicik hon tavat adre me o únyi gam: 4 ke adre me he ka tha kú me hna önying, helâ me je garaba hnyi baten je wagewe. 5 Ame he ke at ka ha ka habe, Inya atö Iehova; ke ame he ke at ka hwenyi ien bi hoton iö Jakob; ke ame he ke at ka sihnalimen ge hnyamen hobi kö Iehova, me hwenyi ien hoton iö Isaraela.

6 Walang hna ha hnö Iehova, Tuhö Isaraela, me at úco anyin möt, wale Iehova tuhan sabaoth: inya ang at a bán, me a biliny; ke ba ju ke Khong ke inya thibi. 7 Ke ia ame he ka hongot helâ mönya, me haime-menâ, me penapena hobi kõnya, hwân hnyi hnök hna ip tavat kâú adrem? ke so adre me he ka haimemenâ ta je únyi ame he ka o, me ta je únyi ame he ka aat dö. 8 Ca ot bi, ke ca öbubuny bi: hawa oge ca haime-menâ köu ehac, me omanenâ köu? ke öbun tavat ohnathu nya. Hawa, e hu ke Khong minya ju ke inya thibi? eke e ba ke Kic; e ca khañö nya khaca. 9 E únyi baú hia tavat adre me bi hnatheat; ke ba troban anyidra ta je únyi adre me hnyok kâú: ke ame ca bwele tavat adre me ohnathu ödra, ke ca khañ' ödra bi; m' adre me he ka hmehma but. 10 Ie at ame tibet ke khong, me oköiâ ke hnatheat ae ba troban? 11 Wá bi, ame he ka hmehma je lawaeny hia; ke je at, tavat adre me huliwan: e so adre me oukhacaköu ödra hia, e so adre me útilen; adre me he bi ka ot, adre me he ka tha hmehma. 12 Haba at leú fao e ame ányâ giwa, me huliwan hnyi walep, me kokot e ge je hama, me huliwan e ge benyin ae hwege: eke, e ame mekihñânem, me ame ba hwegien; e ame ca ijem köiö me e ame sēnyin dut. 13 Haba at ame tretrau utö ame lelö tulut; e ame bi hnalimen e

ge pensel; e ame tibet e ge je omelö, ke e ame tuluto e ge je kompas, ke e ame ányâ öúco e me at, hoton hmainy at, me me laba hnyin uma. 14 E ame sö hobi kâú e je arasi, me hok tireza, me wajo, me onákâ khaca hobi kâú e hnyi je úöiny hnyot: e ame tâ köp, ke ame he we ka öküá e. 15 Ke ame he ka le e hnen at; ke e ame hom hanen hnân hlök; eke, e ame vác e, me le falawa: eke, e ame thekhong, me khudrung kâú; e ame bi hnatheat, me ta ju hnyi hnyimakan. 16 Ke hnyiban e, e ame vác hnyi meic; ke ke hnyiban hnân leú utb-meno me han, me me sekon dö: eke e ame hlök me ha, ka habe, Awe, oge mage thö, oge löng dö meic: 17 ke haba kolon, e ame bi khong kâú, hnân anyin idola: e ame ta kâú me khudrung, me hic kâú, me ha, ka habe, Omeli nya thö; anyin a u khonguk. 18 E ca khañ' ödra, ke adre me ca wá únykúme: anyin a e ame omúko je emaködra, m' adre me ca bwela bi; me je hnyekudra m' adre me ca wáhmakhmeto. 19 Ke ba at ame únykúme hnyi hnyekon, ke ba metâ me wáhmakhmeto me me he ka ha, ka habe, Oge hia but vác ke hnyiban hnyi meic; eke, oge hia but le falawa hon walepiny ke hnyiban; oge hia but leú meno me han: ke hawa, oge me he bi ka bi únyi ae ikiki hnyi kolon? hawa, oge me he ka khudrung ju ka hnyiban úö? 20 E ame han dröu: k' ame omono e ge hnyok adre iyawö, me me ca khana he ka omelö hanon me ha, ka habe, Hawa, e ba thoi hnyi hnyam a metök?

21 Jakob lö, únykúme ta je únyi e, ke u Isaraela, anyin a u athnyabaik: oge me up u, ke u athnyabaik: Isaraela lö, oge me ca he ka hnying u. 22 Oge hia but kot degecá hnâm ta je hna hanyáúá helâ me úlá ae khöt, me ányâm ta je hulö helâ me úlá: hmetu ju kõnya, anyin a oge hia but úcú u. 23 Drany lö, khumöng dö, anyin a ányâ e Iehova; je hnyikánâiny hmeledrany lö, hongot senyin dö; öbun je bucen lö, ie khumöng dö göranyai, ke hnyot minya, ke ta je úö hia hnyin e: anyin a hia but Iehova úcú Jakob, ke e ame he ka ogânâ e bi hnyi Isaraela.

24 Walang hna ha hnö Iehova, at a úcú u, ke at a up u hwân hnyi hnyekon hinyâm: inya Iehova at a op ta je únyi hia; at a hake ulolo drany; at thibi a olauá hmeledrany; ie at unyik? 25 inya at ame oúnyi-baúá je haten anyin tavat ae thoi, me omono tavat bi khong; me ohmeto tavat

ae metâ, me omono anyidra wâhmakhmeto: 26 at ame ohnathoâ hofuc hwan athnyabainy, me ohwâdâ hna ûhnenamö hnen anyin je metâ; at ame ha ge Jerusalema, ka kabe, Adre me he ka labâ e; haingen ge je tauniny Juda, ka habe, Adre me he ka up veto, ke oge me he ka otilâ hmeto je hudrei: 27 at ame ha ka dok ae dit, ka habe, Hme but, ke oge me he ka ohwahwacitâ ânyâm je wagewe: 28 at ame ha ga Koreso, ka habe, At tuö mamoe hobi kõnya, e ame he ka ânyâ hia: e ame he bi ka ha ge Jerusalema, ka habe, Adre me he ka up vetoiny; e ame he ka ha ge uma kap, ka habe, adre me ke ka bi trobâm.

HNYIMAKAN 45.

**W**ALANG hna ha hnö Iehova kö Koreso, a at e ame hû, at oge me kât hnyamen a metân he ka hom ûhnyûkongoâ je hnyei hnyi hnyimakan, ke oge me he ka thang wen hnyin je than; he ka khöng je hlinginy hnyi hnyimakan, k' adre me ca he ka hlöng je homagöule; 2 oge me he ka bök hnyi hnyimâkâm he ka okhabalavâ je dok ae újejöng: oge me he ka tho amamâ je hlinginy bras, ke subâ degecâ je ohmâiny fao: 3 ke oge me he ka ham köu je omejeúiny menekholom, me je tang omjeú adre ikhâlâ hnyi je dok ae iyong, me me khanö u a inya Iehova Khongu Isaraela, at ame ha iâm. 4 Oge hia but ha iâm, ga Jakob a athnyabaik, ke ga Isaraela hnök hna úca: oge hia but ham köu iâm ke ca khanö u bi inya. 5 Inya Iehova, ke ba ju ke at; ke ba ju ke Khong, ke hake inya ke: oge me he ka oweikâ hnyâm, ke ca khanö u bi nya: 6 me me khan' ödra hwân hnyi hna o hnen seúnö, me únyi jimeú, ae ba ju ke at, ke hake inya thibi: inya Iehova ke ba ju ke at. 7 Oge me op lany ke oâ lit; oge me ânyâ úsoköu, ke oâ hulö; inya Iehova at ame ânyâ ta je únyi hia thithö eling.

8 Ta ju, öbun je drany únyi ethö, ke so ame he je úlá ka hingâlâ jem hwakecin ae wisa: e so ame he hmeledrany ka memang, me owa but möt, me tha oâ hwakecin ae wisa; inya Iehova at a op e.

9 Ekölö ge at ame iwatretra me at a op e! a ec kaia unyin ta je ec kaia eang hmeledrany! hawa, ame he kânâ ae kece ka ha ka at a op e, ka habe, Ieú u me op? ke hawa, ame he únyi u je huliwan ka ha, ka habe, E ba li hnyamen? 10 Ekölö ge at

ame ha ka kamen, ka habe, Ieú u je hnoko? ame ne ha ka momo, ka habe, U je hnokoâ ieú? 11 Walang hna ha hnö Iehova Kabi Isaraela, at a op e, ka habe, Hnei nya thö ge ta je únyi ame he ka o; ke hûna thö kõnya ge lakuk, me huliwa anyin li hnyamök. 12 Oge hia but ânyâ hmeledrany me op tavat adre me labâ e: oge me ulolo drany ge li hnyamök, ke oge musö ta je únyi hia hnyin e. 13 Oge hia but oâ at e hnyi wisa, ke oge me he ka owisa deny je gethen hia, e ame he ka op anyik taun, me hna ta je atök a je hwenbâ, ke ca ge hwabban ke ca ge bwihlany, ame ha Iehova tuhan sabaoth.

14 Walang hna ha hnö Iehova, ka habe, Haba troban huliwa hnyi Aigupito, me je omjeúiny Aitbiope hnân úcú, me at Seba, tavat ae beú, adre me he ka hum ödra köu, me me ânyâm; adre me he ka he hotom; adre me he ka he ke tiga c' ödra ge je tö a fao: ke adre me he ka iyâú köu, me khöu köu me ha, ka habe, E hnathu e bi Khong unyâm; ke ba ju ke at, ke ba ke Khong. 15 E hnathu u Khong ame ikhölö, Khongu Isaraela, at úhömeli. 16 Adre me he hia thithö ka hmehma me hlohlo: adre me he ka he me tha monumonu, tavat adre me bi idola. 17 Ke adre me he ka omeli Isaraela unyi Iehova hnyi möt ame ca ba balua: öbun e ca he ka hmehma me hlohlo nyiele balua.

18 Anyin a walang hna ha hnö Iehova at a op drany; e thibi Khong; at ame ânyâ hmeledrany me op e; e ame otethmä e, k' ame ca op baúâ e, e ame mâdrâ e me me labâ e: haingen, ka habe, Inya Iehova ka ba ju ke at. 19 Oge me ca ha ikhâlâ hnyi dok a menekholominy hnyei; oge me ca ha ka je mâtrâni Jakob, ka habe, Elâm baúö nya thö: inya Iehova at ame ha wisa, oge me haimemenâ ta je únyi ae úcú. 20 Úkhacaköu thö ke ai öbun; tha hakekenyâ ju, öbun tavat öbun e kec möt únyi hnyi je hnyei: e ca hu metâ gadra adre me hom tilâ ütöiny anyidra je idola, me hic ka khong ae ca khana he ka omelö. 21 Haimemenâ thö, ke hakekenyâ thö; eke, e so adre me tha úhnenamö: ia omanená e hwân kâú adrem? ia haimemenâ e hwân kâú ehac? hawa, ca hnök Iehova? ke ba ju ke Khong, ke hake inya ke; Khong ae wisa me at úhömeli; ke ba ju ke at, ke inya thibi. 22 Bwele ju jem kõnya m' adre me he ka omeli öbun, öbun hia thithö je can hmeledrany: anyin a inya thibi Khong ke



## ISAIA 46, 47.

ba minya ju ke at. 23 Oge hia but khemanyin gak bi, ame he but hofuc únyi hnyi hnyimök hnyi wisa, ke ame ca he bi ka hmetu a g' adre me he hia ka cibouca könya, ke ame he ta je hnyem hia thithö ka khemanyin gak. 24 Ame he ka ha könya ke at, ka habe, E hu but gak thibi únyi ga Iehova wisa me hwege : ame he ka o tavat káu, ke adre me he ka hmehma, waleji tavat adre me hmönyidra káu. 25 Adre me he ka haiwisa ta je mâttrâni Isaraela hia thithö unyi Iehova, ke adre me he ka hobâ.

### HNYIMAKAN 46.

**B**EL ame iyâú, Nebo ame he nom ; e bi hon je meno anyidra je idola, ke hon je meno ae hnam ; e hmak anyibun je hok ka ta je meno, k' adre sényin dut. 2 Adre me he nom, k' adre me tha iyâú ; e ca khan' ödra he ka hauden hok, k' adre me he but a g' adre me bâ.

3 Ling nya ju lap anyi Jakob, me je kolon hia lap anyi Isaraela, tavat adre me hom til' ödra únyi hnyi hna hnokoá, tavat adre me kap til' ödra únyi hnyi hnyok : 4 ke inya thibi e, ke ne o but öbun e hingat ut, ke oge me he ka kap til' öbun ke ne o but öbun e húen dut : oge hia but op me oge me he ka kap ; eke, oge me he ka kap me omelö. 5 Öbun e he ka úhüücü nya ke oücü nya me ia, ke tuluti nya me inye úcü me ia ? 6 Haba tavat adre me hingálâ gol únyi hnyi tang, ke tuluto sileva hnyi tulut, me adre me hawâ at ame huliwan gol, me e ame ányâ e me me khong ; adre me ta ju hnyikânâi, eke, adre me khudrung. 7 Adre me vâdren e hon abenyidra, k' adre me hom tilâ e, me ip e hnyi hnen, ke e ame tot ; k' ame ca he bi únyi hnyi hnen : eke, ame he at ka tenge káu, ke e ca khana he ka thu, me omelö e únyi hnyi anyin hmak.

8 Únykúme thö e öbun, ke hnyok бага thö : tavat hanyâúá lö, únykúme hmetu e. 9 Únykúme ju ta je únyi waleji a hân : anyin a inya Khong, ke ba minya ju ; inya Khong, ke ba at ae úcü mönya ; 10 at ame haimemenâ obiny únyi hnyi can, ke ame ha ehac ta je únyi a ödra, tiga ca ányâ bi ; k' ame ha, ka habe, Ame he ka tethmâ anyik musi, ke oge me he bi nya ka ányâ hia wek : 11 at ame hawâ meno ame gâ ae behan úheny jimeió, úheny hnyi hnyei ae sâkâú, waleji at oge me úsabö mē ; eke, oge

hia but ha, me oge me he ka ohwâdá e ; oge hia but ip hnyi hnyekuk, me oge me he bi ka ányâ. 12 Ling nya ju, öbun tavat ae hnyok бага, tavat adre me úsâkâúö me wisa : 13 oge me hakekenyâ anyik wisa, e ame ca he ka úsâkâúö, ke ame ca he ka bec úhömeli únyi gak ; ke oge me he ka ip hnyi Ziona úhömeli hobi kö Isaraela hmanenangik.

### HNYIMAKAN 47.

**U**TUT, ke laba ju hnyi sesâ, u hlu Babulona ; laba ju eú hnyi kânâ ke ba but theron, u hlu anyin at Kaledaia : anyin adre me ca he hmetu ka haiö u a u menyik me mita. 2 Hom dö li veto hnân oamamá me khenyö falawa : ip ju únyi hnân tube hnyimákâm, kia degecâ but baten khaúâm, omanená ju cam, vheno thö je wagewe. 3 Ame he ka manen ányâm hmehma, eke, adre me he ka wâ unyâm : oge me he ka bi hwaban, oge me ca he ka betenge ge ke at. 4 At ame úcü melita, Iehova tuhan sabaoth ien, wale Kabi Isaraela. 5 Hlu nokon at Kaledaia lö, laba hnyibú ju, ke he thö ka hnyi dok ae lit : anyin adre me ca he hmetu ka hawo u momo thaniny je dokhu. 6 Oge me hmönyik ka lakeik, oge me okongoá ik hnyi me hn' ödra ka hnyi hnyamâm : e ba hmönyin betenge u je ányâ ködra ; u je ti ohmákâ ányâm hna úhúkâláköuá hon wahingat. 7 Ke u je ha, ka habe, Oge me he bala ka than momo ; ke u je ca únykúme ta je únyi eling eú hnyi hnyekom, u je ca únykúme ge obiny ta je únyi e.

8 Ke walang ang, löng ju ang, u at ame labö hnu hoton je senyin, at ame laba khötkic, at ame ha eú hnyi hnyekom, ka habe, Inya thibi, ke ba ju ke at ; oge me ca he ka laba helâ me safac, ke haba khaca oge me ca he ka wâ ba nokon : 9 ke so bi ame he ka o köu li únyi ang helâ me thuthubadecmak hnyi bong a khaca, wale ba nokon, me ba áiân : ame he ka ti o köu, eja ke ne u je ne osehia bala ányâm je bibihwakecin, me osehia bi khong. 10 Anyin a u je hia but labageju ka ányâm je hulö ; u je ha, ka habe, E ba at ame ö nya ; ame omono u hnen ányâm metá me ányâm wâhmakhmeto : ke u je ha eú hnyi hnyekom, ka habe, Inya thibi, ke ba minya ju ke at. 11 Anyin a wale ame he ka o köu únyi ae kong, ke u me ca he ka wâ deny ame he ka o hnyin : ke ame he ka o köu úkonguny ke ca khanö

ISAIA 48, 49.

u he ka önua : ke ame he ka ie o köu hnaúhangö ke ca khanö u bi. 12 Todró walang ang me ányám ta je bibihwakecin, me hnám hna osehia bi khong, wale u je huliwa hnyin hwán k' u tiga wanakat ; ame ne khanö u he ka bi troban, ame ne he ka tom. 13 U at ae sēnyin ge ányám je úhnenamö ae se hia : e so ame he tavat adre me khená drany, ke tavat adre tuö je okhú, ke tavat wá tremângá je tehi, he ka tot me omeli u únyi hnyi ta je únyi ame he ka o köu. 14 Wá bi adre me he ka helá me thatúnyin hwit ; k' ame he meic ka thong degeci ödra ; k' adre me ca he ka omeli ödra únyi hnyi maniny báhlán ; k' ame ca helá me walep hnán hlok, ke meic adre laba hnyi hnyimakan. 15 Adre me he ka heláe köu ta je únyi waleji u je hia but huliwa hnyin : haba tavat adre me úcú omjeú unyám hwán ke u tiga wanakat me adre me he ka ve he but hnyi dedra je gethen ; ke ba bi at ame he ka omeli u.

HNYIMAKAN 48.

**L**AP anyi Jakob lö, löng ju ang, öbun tavat adre hwenyi iödra hoton iö Isaraela, a tavat adre me o but únyi hnyi je köien Juda ; a tavat adre me khemanyin hnyi iö Iehova, me ha ge Khongon Isaraela, ke ca hnathu bi me wisa. 2 Anyin a adre me ka haw' ödra a hanen taun ae kap, ke adre me ka laba kece ka Khongu Isaraela ; Iehova tuhan sabaoth ien. 3 Oge me böc ka ha ta je hofuc káú adrem : eke, ame he but únyi hnyi hnyimök, me oge me omanená : oge me ie ányá, me adre me ohwádá bi. 4 É khanö nya a u at újöng, ke töiny fao nyem, ke bras barem ; 5 anyin a wale, oge hia but haimemená e köu únyi adrem ; oge me omanená köu ke tiga ca hwádá but : wá u nye he ka ha, ka habe, Hnen anyik idola hna ányá, ke hnen anyik hnatheat, ke anyik hnatheat adre me oköiá hna húna ködra. 6 U je hia but löng ; wá ju ta je únyi hia e ; ke hawa gabun, öbun e ca he bi ka haimemená e? hwán hnyi úen ang oge hia but omanená köu ta je únyi ae teb únyi, waleji ta je únyi ae iyong, ae ca khanö u. 7 Adre op ta je únyi e walang ang, ke ca ehac ; ke e hia bong ang u je ca löng ta je únyi e ; wá u nye ha, ka habe, Wá bi, e khanö nya ta je únyi e. 8 Eke, u je ca löng ; eke, e ca khatö u, eke, adre ca khöng li hnyikönyám hwán ehac : anyin ae khanö nya a u at iyawö gan hmá, ke u

at hanyáúá hwán hnyi hnyekon hnyám. 9 Can iök bi, oge me he ka obecá anyik hmönyin, ke can hna oganö nya oge me he ka hokhnyok gam, m' o ge me ca he ka subá degeci u. 10 Wá bi, oge hia but cubic u, ke ca helá me sileva ; oge úcö u hnyi hna meicin seda. 11 Gak, gak bi, oge me he ka únyá e ; anyin a iéú adre me he ka haikongoá iök? ke oge me ca he ka ham anyik hmanenang ka ke at.

12 Ling nya ju Jakob me Isaraela waleji oge úca : inya thibi ; inya ang at a bán, ke inya minya ang at a biliny. 13 Eke. hnen hnyamök hna bi taben hmeledrany, ke hnen hnyamök a metök hna ulolo je drany : oge me hawá ta je únyi e, me adre me tha tot. 14 Úkhacaköu th' öbun hia thithö me löng ; ie at gadra ame haimemená ta je únyi e? Iehova ame betenge gan, e ame he ka ányá weny ka Babulona, ke ame he benyin ka e hon at Kaledaia. 15 Inya, inya at ame ha ; eke, oge hia but hawá e : oge hia but hom e, ke e ame bi sot hnyi deny bi gethen. 16 Hok ju jemu könya, löng ju ang ; oge ca fuc hnyi dok ae iyong hwán hnyi can ; hnyi úen eji. inya ling : ke walang ang Iehova Than ame kunö nya, me hanon. 17 Walang hna ba hnö Iehova at ame úcú melám, Kabi Isaraela : Inya Iehova Khongom, at ame nö u he ka hu troban, at ame su u hnyi gethen u me he ka vheno. 18 Nakaem, u je ne löng anyik ta je hnanyibu me me helá me wagewe ányám hnahic, ke helá me je waköiöiny köiö hwakecám ae wisa : 19 ke helá me öny ta je mátránám, ke haba wan hnyekom me helá me úseiny je waöny : adre me ca he ka subá degeci me ohia ien hnyi hnyimakök.

20 He but úheny Babulona, kec d' öbun ge at Kaledaia ; haimemená thö ge hwan khumöng, thumeto ju e, ha ju e ke ne o but hnyi can hmeledrany : ha thö, ka habe. A hia but Iehova úcú melen athnyabainy a Jakob. 21 Ke adre me ca beic hnyi úen e ame su ödra hnyi hnyebuba : e ame öá köiö únyi hnyi kic hobi ködra : k' ame sö kic me ame patrutrua but köiö. 22 Haingö Iehova, ka habe, E ba hnahic ge tavat ae kong.

HNYIMAKAN 49.

**L**ING nya ju öbun je bomene ; ke tevehlöng ju öbun ta je hnyei ae sákáú : Iehova ame ha iök únyi hnyi hnyok ; k' ame ha iök únyi hnyi hnyeku

bai: 2 ke e ame ânyâ hnyimök me me helâ me hele vat ae so hwan, e ame ikhölö nya hnyi hmenon hnyamen; ke e ame wiö nya m' inya fana ae hadröngöc, e ame ikhölö nya hnyi tangen anyin fana: 3 ke e ame ha könya, ka habe, U thibi athnyabaik; a Isaraela, at oge me he ka hmanenang gan. 4 Ke haingök, ka habe, Oge hia but huliwa baú, ke a dit ut hwegiök, ke ba troban ke únyi baú bi: ke so bi, e hnathu, hamö Iehova he ka owisa könya, ke e unyin Khonguk hwabök bi. 5 Ke walang ang ame ha Iehova, at a up nya únyi hnyi hnyok m' inya athnyabainy, he ka ohmetu Jakob kâu, me me úkhacaköu hmetu Isaraela unyin: (anyin a inya at adre ogânâ hnyi hnyimakö Iehova, ke haba Khonguk me wale tang hwegiök :) 6 eke, haingen, ka habe, E ti hâhâ a u me he ka bi athnyabaik he ka ogöranyâ je tribu anyi Jakob, ke ohâtâ hmetu hnyat adre tuö a at Isaraela: me oge me he bi minya he ka hnö u hnân melaminy ta je Ethen, ke hnân anyik úhömeli ka hnyi can hmeledrany. 7 Walang hna ha hnö Iehova, at ame úcü meli Isaraela, wale Kabiny, kâu a at ame húkhötiâ hnen tavat, ke u at ame bi athnyabainy tavat musi, ka habe, Ame he je than ka wâ me tot; k' ame he lakon than ka khudrung; can bi Iehova ae hnathu, wale Kabi Isaraela at a úcü u. 8 Walang hna ha hnö Iehova, ka habe, Oge me thu köu hnyi úen ae úcü, ke oge me hadruö u hnyi bonginy möt: ke oge me he bi nya ka tuö u, me hnö u hnân úhibinyköu me tavat, he ka ogöranyâ hnyei, me olab' ödra hnyi hnyei ae ba aten: 9 me ha ka tavat adre ca, ka habe, Didrut öbun; ke ködra hnyi dok ae lit, ka habe, Omanen' öbun ju. Adre me he ka han hnyi je gethen, me han tot hnyi je dok hia ae görany. 10 Adre me ca he ka mekihnânem me beic; ke ame ca he ka li ödra kahwa, me seúnö: anyin ame he at a betenge gadra ka hum ödra, me su ödra ka hnyi an ame pupua. 11 Ke oge me he ka wia anyik je bucen hia hnân gethen, ke adre me he ka ögoranyâ anyik je hna cit gethen. 12 Wâ bi, ame he ka o tavat ang úhedra sâkâú: ke wâ bi, tavat ang úhedra hnyi hwadrö, me úhedra jimeú; ke tavat ang úhedra hnyi hnyei Sinim. 13 Je drany lö, khumöng dö; hmeledrany lö, senyin dö; je bucen lö, ie khumöng dö göranyai: anyin a Iehova ame otubwelâ lakeiny, me e ame he ka betenge ge anyin tavat adre me oveci ödra.

14 Ke haingen Ziona, ka habe, A hia but Iehova digic nya, ke a hnying nya but Than. 15 Hawa, ame he mono ka hnying nokon ame asen, me me ca he ka betenge ge onyen hnyekon? eke, e khan' ödra he ka hnying, ke so bi oge me ca he ka hnying u. 16 Wâ bi, oge hia but khavi hnalimâm hnyi li hnyamök; e bala bi hnyi hnyimakök ta je bahebetâm. 17 Ame mweimwei je lakom; ame he ka he but unyâm tavat adre me okongu u me tavat adre me ohio u. 18 Bwela thö göranyai li emâkâm me wâ igigilö: ödra hia thithö ang adre me úkhacaköu, me he jem köu. Haingö Iehova, Kia inya, ke e hnathu, u me he ka hum ödra hia me me khaûâm me hnân theibâm, me hnân oweikö u, helâ me hlu ame he ka faipoipo. 19 Ke haba je dok unyâm ae ba hnyin wan, ke je dok ae ba hnyin tavat, ke em adre hia but okongoâ, me e hnathu, ame he ka hnek em walang ang ge tavat adre me he ka labâ, ke adre me he ka ösâkâú ödra waleji adre me ohio u. 20 Ame he lakem waleji u je tenge gadra, ka ha bi hnyi li hnyikönyâm, ka habe, E hnek könya hnen: ö u ha hnök m' inye he ka labâ. 21 Ke u me he ka ha eú hnyi hnyekom, ka habe, Ia hnöku ödra ang könya anyin oge hia but tenge ge imekiny lakuk, me hake laba, a at adre obâ ke he monu? ke ia hat hnyat ang? Wâ bi, iny khaca thibi; ke haba hnyat ang, me úhedra ua? 22 Walang hna ha hnö Iehova, ka habe, Oge me he ka hai hnyamök ka ta je hnyei, ke oge me he ka otilâ anyik boudila ka tavat: ke adre me he ka hom jem lakom obaga hnyi je úlaidra, ke vaden lakom wahlu. 23 Ke ame he je than ka hat ödra hobi köu, ke je momo than ka úhalin: adre me he ka nom hnyikânâi köu, me drem sesâiny li cam; ke ame he ka khanö u a inya Iehova, k' adre me ca he bi ka hmehma, a tavat adre me halubahing nya. 24 Hawa, adre me he ka húgúnâ je hna söh unyin at ae hwege, me omelö je bâ waleji adre me hom hoton hnanyibu? 25 Ke so bi, walang hna ha hnö Iehova, ka habe, Adre me he ka húgúnâ je bâ unyin tavat ae hwege, ke adre me he ka hna but hna söh hnen tavat ae hwege hnyimen: anyin a oge me he ka ivinö me at ame ivinö möu, ke oge me he ka omelö ta je lakom. 26 Ke oge me he bi nya ka hân tavat ge hing vidra a ödra adre me oveci u; k' adre me he ka monu ge hing drödra bi, helâke me hnen waina ae hne-

ISALIA 50, 51.

bwia : ke ame he tavat hia ka khan' ödra a inya Iehova, at ame omeli u, me at ame úcú melâm, a Man mani Jakob.

HNYIMAKAN 50.

**W**ALANG hna ha hnö Iehova, ka habe, Ewa tusiny thang faipoipo ge hinyöbun, waleji oge me degec e káu? ke ewa at oge hia but úcú öbun káu unyin tavat oge me hom gufa gadra? Wâ bi, can hwakecibun ae kong adre úcú öbun, k' adre me degec hinyöbun can hnöbun hna hanyâtiâ. 2 Ieú can a e ba at hnyi úen oge me o hnyin? ke oge me hongot ke ba at ame ieú? Hawa, e okhulit hnyamök me ca khanö nya he ka omelö? ke ba but manik man he ka hûgúnâ? Wâ bi, hnyi hnök hna thawâ oge me omada köiö, me wia je wagewe me me hnyebuba bi : ame bokong ut haledra je wâ anyin ae ba köiö, ke adre mok ut ge beic. 3 Oge me tube drany ge menekholom, me khavâ e ge mano ae gan nân.

4 Haba Than Iehova ame hia but ham könya bohmen at úne, me me khanö nya he ka sihwegiâ at ae sényin ge hofuc : e ame úöhmak hnyi je hnyomakatu, e ame ohmâkâ hnyikönyök he ka löng helâ me tavat úne. 5 Haba Than Iehova ame khöng li hnyikönyök, ke oge me ca úkhin fuc, ke oge me ca he hmetu. 6 Oge me hna juk ka tavat úkúc, me li wahicök ka tavat adre me hnimö je leúnen : oge me ca ikhâlâ hnyimakök ge hmehma me úhangöji. 7 Ke ame he Than Iehova ka hadruo nya ; anyin a wale ame ca kong hnyekuk : anyin a wale oge me ányâ hnyimakök helâ me öüt, ke e khanö nya but a oge me ca he ka hmehma. 8 E hakekeny jut at ame haiwisö nya ; ie at ame he ka ivinö mönya? ötu me he ka tha todrö : ie at ama tot könya? e so e ame he jem könya. 9 Wâ bi, ame he Than Iehova ka hadruo nya ; ie at ame he ka haikongu nya? wâ bi adre me he hia thithö ka amam helâ me úkhaú ; ame he walelaba ka ön ödra.

10 Ia gabun ame outö Iehova, at ame löng ifucin athnyabainy? haba at ame he hnyi menekholom ke ba melam gan, e so e ame labageju ka iö Iehova, me fât ka Khongon. 11 Wâ bi, öbun hia thithö tavat öbun e hú meic, öbun e igigili öbun bi ge je okúnú : vhenö thö melaminy hlögubun meic me je okúnú öbun e vác.

Öbun e he ka hu únyi gak ; wale öbun e he ka mokut hnyi hlöuhlöu.

HNYIMAKAN 51.

**L**ING nya ju öbun tavat öbun e hnu hoton wisa, tavat öbun e elöm Iehova : wâ ju kic adre sub' öbun únyi hnyin, me hwanumen thop adre hiny öbun hnyin. 2 Wâ thö kamöbun a Aberahama, me Sara at a hnöku öbun : anyin oge hawâ e ke tiga khaca, ke oge me ohnalicâ me osehia e. 3 Anyin ame hia but Iehova otubweli Ziona ; e ame hia but otubwelâ je dok hia thithö unyin ae ba wan, me wia hnyebubainy me me úcú me Edena, me iny hnyei бага me me helâ me hna belök hnö Iehova ; adre me he ka wâ hnyin e senyin me hobâ, me ole, me hwan khumöng.

4 Lakeik lö, ling nya ju ; ik hnyei lö, tevehlöng ju könya : anyin ame he ka he but úheny unyik hnanyibu, ke oge me he ka ip hnök hna owisa hnân melaminy ta je hnyei. 5 E hakekeny jut hwakecin ae wisa, a he but anyik úhömeli, ke ame he li benyik ka owisa ta je hnyei ; ke ame he ta je bomene ka halubahing nya, me labageju ka hnyi benyik. 6 Bwele thö göranyai ka hnyi drany, ke wâ ju hmeledrany eú : anyin ame he ka didrut drany helâ me hai, k' ame he ka amam hmeledrany helâ me úkhaú, k' ame he tavat adre me labâ e ka mok helâe : ke ame he ka e balua bi anyik úhömeli, k' adre me ca he ka ohia hwakecik ae wisa.

7 Ling nya ju öbun tavat ae khan' öbun wisa, tavat ae hu anyik hnanyibu eú hnyi hnyekudra ; ca he ju öbun ka outen hna haikongu öbun ge at, ke ca gäubun ge hnödra hna hlum' obun. 8 Anyin ame he bi walelaba ka ön ödra helâ me úkhaú, k' ame he bi waahnyöng ka ön ödra helâ me leúnen mamoe : k' ame he ka e balua bi hwakecik ae wisa, ke anyik úhömeli ke ne o but hnyi ta je dö hia.

9 Hmak dö, hmak dö, hnyamö Iehova. khavâ ju tang hwege ; hmak dö helâji me hnyi ta je bong kâú adrem, wale ta je dö a bân. Hawa, ca u at ame sö omomonu Rahaba me kot tanimo? 10 Hawa, ca u at ame ohmö köiö wale köiö ae dit hmönyin ; at ame wia dok ae dit hnyi köiö me hnân gethen bi me me vhenö hnen tavat adre úco melidra? 11 Ke ame he ka hmetu tavat a bi hwaban melidra hnö Iehova, me o hnyi Ziona me hwan khumöng ; k' ame

ISAIA 52.

he ka e bi hon ta je bödra senyin a nyiele balua : adre me he ka senyin me hobâ, k' ame he ka hia hlöuhlöu me mâng.

12 Inya, inya at ame otubweli öbun : u ia, at ame outen at ame he ka mok, ke nokon at adre me he ka wia me me ücü me hna önying : 13 ke u me hnying Iehova bi At a up u, at ame ulolo drany k' ame bi taben hmeledrany ; ke u me labö outen hnyi ta je bong hia can wathethöt anyin at üöveci, hnyi ün e ame penapena he ka ohia ? ke e but ua hmönyin anyin at üöveci ? 14 Adre me he ka ie thang at bâ adre ca ; ke e ame ca he ka mokcu me dit ka hnyi thop, ke ame ca he ka ba an jeü. 15 Anyin a inya Iehova Khongom at ame oâ je waköiöiny köiö me ame mea but : haba ien, me Iehova tuhan sabaöth. 16 Ke oge hia but ip hok ta je hofuc hnyi hnyimâm, me tubi u hnyi hmenon hnyamök, m' oge me he ka ohmä drany me bi taben hmeledrany, me ha kö Ziona, ka habe, U ik hnyei.

17 Jerusalema lö, hmak dö, hmak dö, todrö, at ame ic ünysi hnyi beli Iehova wale kaiainy anyin hmönyin ; u je hia but ijem önyen kaiainy ta tot, me ijehmö e. 18 E ba at ame he ka su tilâ e wale unyin je lakon hia e ame hnokoâ ; ke ba at ame hom hnyamen wale unyin je lakon hia e ame hat. 19 Walang li ünysi ame o köu ; ie at ame he ka tenge gam ? habe, e ba at, me hnaühangö, me hmiâ, me hele vat ; oge ma kâmâu he ka otubweli u. 20 Ame ta but je lakom, adre me mokut hnyi je hna saü hia hnyi gethen, helâ me gotiny hnyot ame hnok hnyi ert ; adre unöngötö ge hmönyin anyi Iehova, wale hna thawâ hnen Khongom. 21 Anyin a wale, löng ju ang, u at adre ovecâ, me at he monu ke ca hnen waina : 22 walang hna ha hnen Tuhâm, a Iehova, a Khongom, at ame ivinöâ lakeiny, ka habe, Wâ bi, oge hia but hom ünysi hnyi hnyamâm kaiainy ta tot ; me u me ca he hmetu ka ijem e : 23 ke oge me he ka ip e hnyi hnyamen tavat adre me oveci u ; waleji tavat adre me hia but ha köu, ka habe, Nom ju m' öhmun e he ka he but hom : ke u je hia but ham jom hnân hing kânâ, ke helâ me gethen, ka tavat adre me vhenö.

HNYIMAKAN 52.

**H**MAK dö, hmak dö, Ziona, khavâ thö tang hwegiâm ; Jerusalema lö, taun ae kap, khavâ ju khaüâm a je ükhaü

ae hmanenang : anyin ame ca he hmetu ka o köu at adre ca peretomon, me ikiki. 2 Jijingö u but ünysi hnyi sesâ ; Jerusalema lö, todrö, laba thö : thang ut hna ca nyem hluiny Ziona at a bâ.

3 Anyin a walang hna ha hnö Iehova, ka habe, adre ücü öbun ke ünysi baü bi ; ke adre me he ka ücü öbun hmetu ke ca bi hwaban bi ge mone. 4 Anyin a walang hna ha hnen Than Iehova, ka habe, Haba lakeik a bân adre me he Aigupito ai he ka laba eling : ke haba tavat Asuria adre me oveci ödra ke ba can. 5 Ke walang ang, haingö Iehova, oge ma änyâ ieü eang, anyin adre hom bâüâ lakeik ? ame kuku tavat adre me musî ödra, haingö Iehova, ke adre me haikongoâ iök hnyi je bong hia thibut. 6 Anyin a wale, ame he lakeik ka khan' ödra iök : anyin a wale, ame he ka khan' ödra hnyi bong eling a inya at ame ha ; wâ bi inya.

7 E so hmönyin hon je bucen li can at ame hom üthumetu ae so, at ame haime-menâ üsoköu, at ame hom üthumetu ae kese, at ame haimemenâ ühömeli ; at ame ha kö Ziona, ka habe, Ame musî Khongom ! 8 Ifucin tavat tue unyâm ! adre me hongot göranyai, adre me tha khumöng ; anyin adre me he ka wâ, me iohnyimaköu, hnyi hnö Iehova hna ohmetu Ziona. 9 Ie tha hongot senyin dö göranyai, öbun je dok ae ba wan hnyi Jerusalema : anyin a hia but Iehova otubwelâ lakeiny, e ame ücü meli Jerusalema. 10 A hia but Iehova vhec ükhaüen benyin ae kap hnyi hnyimakan je hnyei hia ; ke ame he je can hmeledrany hia ka wâ ühömeli anyin Khonguta. 11 He thö, he th' öbun, he but ühebun e, ca kâlâ bi ünysi ae ikiki ; he but ünysi hnyi hnyin e ; e so e kalaöt ut öbun, tavat öbun e kap tilâ je kaia anyi Iehova. 12 Anyin a öbun e ca he ka he logot, ke öbun e ca he ka kec duöng ; anyin ame he Iehova ka bân hnyi hnyimaköbun ; k' ame he Khongu Isaraela ka he hotubun.

13 Wâ bi, ame he athnyabaik ka änyâ ünysi ae metâ, adre me he ka ogöranyâ e, me obeönua e, me e ame he ka görany hmönyin. 14 Ödra se hia adre me üthmâhmâ gam, (adre okongoâ gan hmâ hnyimakan hon hnyimakan tavat hia, ke unyin, hon unyin tavat,) 15 helâe e ame he ka dukâiâ je hnyei ae se hia ; ame he ta je than ka laba hum gan : anyin adre me he ka wâ ünysi adre me tiga ca thumetu ödra gan ; ke

ISAIA 53, 54.

adre me he ka wâ únykúme únyi adre me tiga ca löng.

HNyimakan 53.

**I**E at a kap anyihmun úthumetu? k' adre hia but omanená kö ia benyi Iehova? 2 Anyin a e ame kú tot hnyi hnyimakan helá me bátân, ke helá me wân únyi hnyi káná ae atgec: e ba anyin hmanenang, ke ba meciny; ke ate me wâ e, me ba hmanenang gan m' ate me he ka weta. 3 E húkotiánen tavat, k' adre me hna degecâ e; e at ae vec, ke at ae khana hlöuhlöu: ke adre me húkotiá e helá me at ame he tavat ka ikhálá je hnyimaködra gan, k' ate me ca oúnyihnathoâ e.

4 E hnathu e ame hia but vaden anyita ta je hlöuhlöu, ke hom tilá anyita ta je vec: ke ate me únykúme e a g' adre hom oúhnyúkongoâ, a g' ame kot e ge Khong, k' adre ovecâ. 5 Ke so bi e ame aat dö can hnöta ta je hna hanyáúâ, k' adre me khaú e can hwakecita ae kong: adre me ip hon e je hna kot m' ate me hnahic bi, ke öta metu but can hna khuâ hnân. 6 Öta hia thithö ate me hia but he monu helá me je mamoe; ate me ve saú ka hnyi je gethen, ke haba Iehova ame ip hon e anyita ta je hulö hia thithö.

7 Adre me ovecâ e, ke e ame ka hokhnyokâ, k' ame ca khöng hnyimen bi; adre me lelö e helá me nokon mamoe adre me hom he ka hlingá, ke helá me mamoe ame laba hnyibú hnyi hnyimakan tavat subâ leúnen; eke, e ame ca khöng hnyimen. 8 Adre me hom e únyi hnyi hna ovecâ me hna úhnei; ke ewa at bi hnyi anyin dö ame únykúme a g' adre subâ degecâ e únyi hnyi hnyeí iny tavat ae möt? adre me kot e can je hna hanyáúâ hnen lakeik. 9 Ke adre me penapena anyin erkemok unyin tavat ae kong, ke ame mok bi unyin tavat adre tren omjeú; ke so bi e ba hnyikongon, ke ba iyawö hnyi hnyimen.

10 Ke so bi e úcú kö Iehova he ka thu hwetö e; e ame hia but ohlöuhlöuâ e: ke u ka he ka hudo e hnân hudiny hulö, me e ame he ka wâ je mátrân, e ame he ka osehia bongon je bong, ke haba we Iehova ame he ka sot unyin. 11 E ame he ka wâ ivecin hanon me sekunâ: k' ame he athnya-baik ae wisa ka owisa tavat ae se hia ge hnen hna wáhmakhmeto: ke e ame he ka vaden anyidra ta je hulö. 12 Anyin a wale, oge me he ka khene jekhon me tavat

ae beönua, ke e ame he ka tha khená je hna söh me tavat ae hwege: anyin a e ame hingálá anyin möt ka mok, ke adre me tha lelö e me tavat hanyáúâ: ke so bi e ame vaden hulö anyin tavat ae se hia, k' ame khöúâ tavat hanyáúâ.

HNyimakan 54.

**K**HUMÖNG dö, u momo toúnyi at ame ca hnokoâ; ke ie kñumöng dö göranyai, ke hongot senyin dö momo ame ca vec hnyekom: anyin ae se hia lakon tavat laba baú hon lakon tavat ae hu laöiödra, haingö Iehova. 2 Ogânâ but umâm uma mano, ke so adre me he bi ka ulili mano singiny hnyabam; ca behânâ: öbeúâ but ányâm je tö, ke ohmâ ju ányâm je ohmáiny tö. 3 Anyin a u me he ka lau hnyi ke keihen metâ me me; ke ame he je mátrânâm ka hu je hnyeí, me labâ je taun ae ba wan. 4 Ca ot bi; anyin a u me ca he ka hmehma: ke ca hlohlo bi; anyin adre me ca he ka ohmehmai u: anyin a u me he ka hnying hmehma waleji u ka tiga úhnyúkong, ke u me ca he bi ka únykúme hna ohmehmai u waleji u tiga safac. 5 Anyin a áiâm bi at a up u: haba ien, me Iehova tuhan sabaoth: ke haba at a úcú melâm, me Kabi Isaraela; adre me he ka hawâ e me Khongon hmele-drany hia thithö. 6 Anyin a hia but Iehova hawo u helá me momo adre me degec ke hlöuhlöu hnyok, ke helá me momo adre hom ke hlu, k' adre obâ degecâ, haingen Khongom. 7 Ke oge hia but hna degeci u hnyi ong úen ae úhnyúkong; ke oge me he ka köp u hmetu hnyi tang betenge ae gan. 8 Hnyi wathethöt ae bahingölö oge me ikhálá hnyimakök gam helá me thuthubadecmak; ke oge me he ka betenge gam ge betenge a nyiele balua, haingö Iehova at a omeli u. 9 Anyin ae úcú könnya únyi ang me uou unyi Noa; anyin a helá me hnök hna khemanyin a g' ame ca he uou ga Noa ka tube hmele-drany, helâe oge hia but khemanyin a oge me ca he ka hmönyin hmetu köu, me thawo u. 10 Anyin ame he ka hia ta je bucen, ke ame he ka bwebwet je hut; ke ame ca he bi ka hia anyik betenge unyâm, ke ame ca he ka hom degecâ hnök hna úhinyökou ge úsoköu, haingö Iehova' at ame betenge gam.

11 At ae vec lö, a túâ weneú, ke adre ca otubwelâ, wâ bi, oge me he ka ohmâ ányâm

je veto hnyi je ve makan, me bi tabâm ge je safairo. 12 Ke oge me he ka ânyâ ta je baitoâm ge je veto ae dra vec, me je homagöülem ge je veto a bereketh, me je hnyigöülâm hia ge je veto ae kese. 13 Ke ame he Iehova ka nâ lakom hia ; ke ame he ka gan hnahic anyin lakom. 14 Adre me he ka otethmô u hnyi hwakecin ae wisa : me u me he ka laba sâkâu ge seda, anyin u me ca he ka ot ; me laba sâkâû me öbubuny, anyin a e ame ca he bi ka o köu. 15 Eja ke ne adre ne ûkhacaköu, ke ca ûnyi bi gak : haba tavat adre me ûkhacaköu he ka vat möu, adre me he bi ka ta, can bi u. 16 Wâ bi, oge hia but op at leû fao wale ame tûâ je walep hnyi meic, at ame hom je omjehen huliwa ; ke oge hia but op at ame sei he ka ohia. 17 E ba ûnyi adre ânyâ hnân vat möu ame he ka ton ; ke haba ta je bohmen hia thithö tavat adre me he ka tot ka ivinö möu hnyi hna owisa, u me he ka haikongoâ. Wale jekhon je athnyabai Iehova, me hwakecidra ae wisa ûnyi gak, haingö Iehova.

HNyimakan 55.

**E** ÖBUN hia tavat ae beic lö, ai öbun ka hnyi je an, ke at ae ba mone ; ai öbun, úco ju, ke an ju ; eke, ai öbun úco ju waina me debai, ke ca ge mone bi, ke ca ge hwaban. 2 Ieû gabun öbun e ham mone hwaban ûnyi a ca jeû ? ke anyibun huliwa hwaban ûnyi ame ca osekunâ ? long wia ju kõnya, ke an ju ûnyi ae so, ke ame he je hnyekubun ka senyinâ ûnyi ae pipikhenya. 3 Tevehlöng ju, ke ai öbun kõnya ; löng ju me me möt je hanubun : ke oge me he ka ânyâ úhinhinköu möbun a nyiele balua, wale tang betenge ae hnathu unyi Davita. 4 Wâ bi, oge hia but otilâ e hnân at ohnathoâ ka tavat, ke homakan, ke at musi ka tavat. 5 Wâ bi, u me he ka hawâ hnyei ae ca khanö u, k' ame he ka wadring hotom tavat ae ca khanö u bi, ûnyi ga Iehova a Khongom, me Kabi Isaraela ; anyin a e ame hia but oganö u.

6 Elöm Iehova th' öbun, e me tiga ün he ka wâ e, hawâ thö e, e me tiga hakekeny : 7 e so ame he at ae kong ka degec hwakecin, ke so ame he at ae monu ka degec ta je ûnykúmenen : ke so e ame hmetu kö Iehova me me he ka betenge gan ; ke so e ame hmetn ka Khonguta, anyin a e ame he ka ti kot degecâ hia. 8 Ke haba ta je ûnykúmenök, me ca ta je ûnykúmenöbun

bi, ke haba debun je gethen, me ca dek bi, haingö Iehova. 9 Anyin ae görany drany hon hmeledrany, helâe dek ta je gethen ae görany hmönyin hon debun je gethen, ke ta je ûnykúmenök ae görany hmönyin hon ta je ûnykúmenöbun. 10 Anyin ame ta we me kiona ûnyi hnyi drany, k' ame ca hmetu bi ka hnyin, k' ame okhubitâ kânâ, me öwa e me ovhöngâ e, me ame ham je hatong ka at ametâ, ke jeû ka at ame han ; 11 ke ame he ka helâe hok hofuc wale ame he but ûnyi hnyi hnyimök : a g' ame ca he ka hmetu baû kõnya, ke so bi, ame he ka ânyâ wek, k' ame he bi ka aat hnyi ûnyi oge me kunâ e ka hnyin. 12 Anyin a öbun e he ka didrut hnyi senyin, ke adre me he ka lili öbun ge hnahic : ame he ta je bucen me ta je hut ka ie khumöng dö huyi hnyimaköbun, ke ame he je úöiny hnyot hia ka khöúkhöu hnyam. 13 Ame he ka kû köp hwaban watetaföcö, ke ame he ka kû adasi hwaban iwadekong : ke e ame he ka hnân ien kö Iehova, me hnân haten nyiele balua, ke adre me ca he ka subâ degecâ.

HNyimakan 56.

**W**ALANG hna ha hnö Iehova, ka habe, Vheno thö ûnyi ae úcú, ke ânyâ thö ûnyi ae wisa : anyin ae hakekeny jut he ka o anyik úhömeli, me he ka omanenâ anyik wisa. 2 Hnahic hnen at ame ânyâ e, me nokon at ame kât hmâ e ; at ame tuö sabbath, me ca okongoâ e, me at ame tuö hnyamen me me ca ânyâ bi hulö. 3 Ke haba khaca, e so ame ca he atkanyua, at ame hia but ûkhacaköu kö Iehova ka ha, ka habe, E hnathu ame he Iehova ka obö nya ûnyi hnyi iny hnyei : ke haba khaca, e so ame ca he eunuka ka ha, ka habe, Wâ bi, inya ang úö ae mada. 4 Anyin a walang hna ha hnö Iehova Tuhan ta je eunuka, tavat adre me tuö anyik je sabbath, me úca ta je ûnyi oge me senyinâ, me kât hmâ anyik úhinhinköu, ka habe ; 5 Oge me he ka ham ködra hnyi umök uma me hnyi hnyin hna up hagik hak ke haten, me ien ae so, hon lakudra a wainda me wahlu ; oge me he ka hain ködra ien ae tethmâ, wale adre me ca he bi ka subâ degecâ. 6 Ke haba ta je atkanyua minya, tavat adre me ûkhacaköu kö Iehova, he ka bi athnyabainy, me hnyok ka iö Iehova, me bi huliwa kâu, ödra hia thithö adre me tuö sabbath me ca okongoâ, me kât hmâ anyik

úhinhinköu; 7 oge me he ka hom tavat eling ka hnyi anyik bucen ae kap, me osenyini ödra hnyi uma hnân hic kõnya; ke haba anyidra je hut adre le, ke anyidra je hut, adre me he ka kâp hon tabök tap: ke adre me he ka ha ge umök uma, ka habe, ae uma hnân hic hobi kâu ta je hnyi hia thithö. 8 Haingen Than Iehova, at ame úkhacaköuâ ta je hna obâ a at Isaraela, ka habe, Oge me he bi ju ka úkhacaköu keihen unyin, ke ca ha bi ge hing aten adre hia but úkhacaköu.

9 Ai öbun omenoiny ta hnyi he ka han, eke, öbun hia thithö omenoiny hnyot. 10 E wadröu but tavat tue unyin, ödra tavat hia thithö ae ca metâ bi; ödra je kuli hia thithö ae hum, e ca khan' ödra kuku; a tavat bwi, me leleú, tavat bemokot. 11 Eke, e hwenhmiâ je kuli ke ca khan' ödra he ka sekudra; ke tavat tuö mamoe ke ca khan' ödra bi he ka wâhmakhmeto: ödra hia thithö adre me ve saú ka hnyi dedra bi ta je gethen, adre me ve wia ka anyidra bi troban hnyi je hnödra. 12 Haingödra, ka habe, Ai öbun, oge mâ he ka hok waina, ke ötin e he ka ijem gânâ grâg; he bong nyi ame he ka helâ me bong ang, bong ae gan me pason he ka ha.

HNYIMAKAN 57.

**A**ME hia at ae wisa, ke ba at a únykúme e hnyi hnyekon; ke adre me hom tavat ae wisa, ke ba at ame únykúme a g' adre hom at ae wisa ge monu ame he ka o. 2 E ame dit ka hnyi hnahic; k' adre me ve menâ hon hnödra hna mokut, wale tavat adre me vheno hwakecidra ae fofâ.

3 Ke hakekeny ju öbun je lakon momo at ame bibihwakecin, a je matrân momo ame bi únyi monu me momo hnyi gethen. 4 Öbun e hlumö ia? öbun e memang kö ia, me inâ bohmöbun? hawa, ca öbun je lakon tavat hanyâúâ? a je matrân at ae thoi, 5 öbun tavat ame ka öújögöi öbun hnyi hmelen je iwajo me je úö hia thithö ae hât; tavat adre me hlingâ je wanakat hnyi hnyigöulen je bucen hmelen je hmakat hnyi kic. 6 Haba jekhom, me eú hnyi hnyigöulen bucen hnyi wanben je veto ae haúhaú; wale, wale bi hna khenâ köu: u je hia but hingâlâ hudiny ic bi ködra me bi hut. Hawa, oge me he ka hna baúâ ta je únyi e? 7 U je hia but ip hnâm hna mokut hon bucen ae beú ke görany, u je ölä

kâe me hudo je hut. 8 Ke u je hia but otilâ hnâm hna öúnykúmeâ hoton je hlinginy je hwanuma, me je uthwanuma: anyin a u je hia but omanená unyâm bi ka ke at ke ca inya bi, ke u je ölä thö; u je hia but olauâ hnâm hna mokut, me ânyâ úhinhinköu mödra; u je wem hnödra hna mokut hnyi dok u je wâ e. 9 Ke u je hom wakaco ka than, me osehia ânyâm je únyi ae bo so, ke u je kunâ ânyâm je uthumetu sâkâú ai, me ohnyikânâi u bi ke ne o but hnyi hedis. 10 U je sényin dut hnen dem gethen ae sâkâú; ke so bi u je ca ha, ka habe, E ba but hna gejon: u je wâ tang hwegien hnyamâm; anyin a wale u je ca sényin. 11 Ke ie at waleji u me ouden me öbubuny gan, anyin a u me thoi, me ca únykúme kõnya, ke u je ca ipe eú hnyi hnyekom? hawa, oge me ca laba hnyibú hwân ehac, me u je outó nya? 12 Oge me he ka haimemenâ ânyâm wisa; ke haba ânyâm ta je huliwa bi, me ame ca ke ka hu troban köu. 13 U ka tenge, me hamen je hnyat u je úkhacaköuâ he ka omeli u; ke so bi, ame he ka tú' ödra hnen ang, ame he homenâ ka hom degeci ödra hia thithö: ke ame he bi ka hu hnyi hnen tavat adre me labageju kõnya, ke idra bi anyik bucen ae kap. 14 Ke e ame he ka ha, ka habe, op dö göranyai, op dö göranyai, penapena thö gethen, hom but únyi ame othöâ hnyi gethen deny lakeik.

15 Anyin a walang hna ha hnen At ae görany me Beönua, at ame laba nyiele balua, ke E kap ien, ka habe, Inya oge me labâ dok ae görany me dok ae kap, ke haba khaca, tha inya me at ae bewisa me hnyikânâ hanon, me me omelö hanon at ae hnyikânâ, me okaukahwa hnyekon at ae bewisa. 16 Anyin oge me ca he ka ivinö ke ne o but nyiele balua, ke oge me ca he bala ka hmönyin: anyin ame he ka ta sényin hnyok hnyi hnyimakök, me hanu o ge op. 17 Can hulöiny anyin behnyekon oge me hmönyik me kot e, oge me ikhölö me hmönyik: ke e ame hanyâúâ tilâ hnyi je deny hnyekon. 18 Oge wâ but deny ta je gethen, ke oge me he ka omelö e: ke oge me he bi minya ka su e, me öküâ hmetu je únyi ae so kâu, me tavat adre me tha tenge mē. 19 Inya oge me op wan esongot: habe, Hnahic, hnahic ka at hnyi dok ae sâkâú, me kâu hnyi dok ae hakekeny, haingö Iehova; ke oge me he ka omelö e. 20 Ke haba tavat ae kong, me ödra tha úcú me köiö ame bwebwet; anyin ae ca khana he ka menâ, ke ame khúkhúâ



göranyai hmudra me thatúnyi nhen je wakö-  
iöiny. 21 Haingen Khonguk, ka habe, E  
ba hnahic anyin tavat ae kong.

HNYIMAKAN 58.

**H**ONGOT hwege ju, hai göranyai ifu-  
câm helâ me trutru, ke haimemenâ  
thö ka lakeik hnödra hna hanyâúú, ke hai-  
memenâ thö ka lap anyi Jakob anyidra ta  
je hulö. 2 Ke adre me elöm nya hnyi je  
bong, k' adre me senyin he ka khan' ödrâ  
dek je gethen: helâ me hnyei ame ânyâ  
wisa, me ca hna degecâ je hna otilâ hnen  
Khongudrin, helâe adre me hnei nya ge  
hna owisa ae úcú, adre me senyin he ka  
hakekeny ka Khong. 3 Haingödra, ka  
habe, Anyin a ieu öhmun e ânyâ ca han ke  
u me ca wâ bi? anyin a ieu öhmun e ovecâ  
ta je hanuhmun, ke u me ca wâhmakhmeto?  
Wâ bi, hnyi bonginy anyibun ca han, öbun  
e hnu webun, ke hwege hûna troban anyi-  
bun je huliwa. 4 Wâ bi, öbun e ânyâ ca  
han m' öbun e he ka iwatretra me ivinö,  
me úkhulup ge hnyam adre vhec a hulö:  
k' öbun e ca ânyâ ca han hnyi bong ang  
m' adre me löng ethö ifucibun. 5 Hawa,  
oge me úca ca han a helâe? ke hawa, bong  
ang me bonginy ovecâ hnyekon at? he ka  
nyingö ban helâ me saamun, ke bi hnen  
hna mokut mano ae gan nân me hnabadröu?  
hawa, u me he ka ha e me üen ca han bi,  
ke bong ae so kö Iehova? 6 Hawa, ca  
walang bi ca han oge me wek? a g' adre  
me he ka hna baúâ at adre me ca monoâ,  
ke thang je töiny únyi hnân úhúkâlâkôuâ,  
ke hna baúâ tavat adre me oveci ödra, ke  
thamuâ je hna úhúkâlâkôuâ hia thithö.  
7 Hawa, ca e bi minya, he ka khenâ ám je  
jeú ka at ae mekihnânem, ke u me he ka  
hom tavat ae theduoc adre me obâ but ka  
hnyi hnyabam? ke u ka wâ at ame he  
thu m' u me he ka okhavâ e; ke u me ca  
he bi ka lubaduöng ge je liamekeiny möu.  
8 Me ame he ka o melamâm helâ me hao-  
lany, ke u me he ka ie so; ke ame he ka  
he hwakecâm ae wisa hnyi hnyimákâm; ke  
ame he hmanenangi Iehova ka he hnyi ho-  
tom. 9 Me u me he ka hongot, k' ame he  
Iehova ka ieu; u me he ka khöú, ke e ame  
he ka ha, ka haba, Inya ang. U je ne  
hom but únyi gam hna úhúkâlâkôuâ, me  
kú ge banyen, me úhnenamö monu; 10 ke  
u je ne betenge ge at ae mekihnânem, me  
osekonâ at adre ovecâ; awe, ame he ka o  
melamâm hnyi menekholom, ke ame he

ânyâm lit ka helâ me jebigö: 11 ke ame  
he bala bi Iehova ka su u, me osekuni u  
hnyi je dok ae atgec, me ohwegiâ je jeien  
unyâm; ke u me he ka helâ me hna belök  
adre hú, ke helâ me an ame ca hme bi  
köien. 12 Ke ame he ke je lahanâm ka  
op je dok ae ba wan kâú adrem: u me he  
ka otilâ je taben ta je dö ae se hia; ke adre  
me he ka hwenyi iâm, At ame op hmetu  
dok ae hmouca, me at ame ânyâwia je  
gethen m' adre me laba hnyin. 13 U je  
ne thawâ cam hnyi sabath, me ca ânyâ bi  
wem hnyi anyik bong ae kap; ke u me he  
ka ha ge sabath a bonginy senyin, me ha  
ge hna okabâ hnö Iehova a hnân ogânâ;  
ke u je ne ogânâ e, me ca vheno dem je  
gethen, me ânyâ únyi hnân osenyini u, me  
ca ha bi hwâm bi je hofuc: 14 awe, u me  
he ka senyin kö Iehova; ke oge me he ka  
hum u, m' u me tabâ je dok ae göranyn  
hmeledrany; ke oge me he ka hâm únyi hnyi  
hnyei i Jakob a kâmâm: anyin a hia but  
ha hnen hnyimö Iehova.

HNYIMAKAN 59.

**W**Â bi, e ca okhulit benyi Iehova me  
me ca khana he ka omelö; ke ca  
wejeji li hnyikönyen me me ca khana he ka  
löng: 2 ke haba ta je hwakecibun ae kong,  
me ame úsâkâú öbun me Khongubun, ke  
anyibun je hulö ame ikhö' öbun ge hnyi-  
makan, me me ca löng. 3 Anyin ae kong  
ut je hnyamöbun ge dra, me je banyöbun  
hnen hulö; ame ha thoi hnen je eson-  
godibun, ke ame fuc monu je bohmöbun.  
4 E ba at ame hawâ hnyi hwakecin ae  
wisa, ke ba at ame ivinö hnyi hnathu: adre  
me labageju ka únyi ae ba önyen, me ha  
thoi; k' adre me erkinâ úökonguny, me  
hnokoâ but hulö. 5 Adre me tho je wa-  
kunyin vaipa, ke hwâwâ haihnai wahaihnâ:  
ama mok at ame he ka an je akunyidra,  
ke at ka tho but khaca, me ame ie oâ but  
on. 6 K' ame ca he bi ka úkhaú anyidra  
je úhahná, ke adre me ca he bi ka tubi  
ödra ge anyidra ta je huliwa: haba anyidra  
je huliwa, me je huliwa ae kong, ke e bi  
hnyi hnyamödra úökonguny. 7 Ke ame  
wadring je cadra ka hnyi hulö, k' adre me  
logot hingâlâ dra ae ba hnyikongon: je  
únykúme ae kong je únykúmenödra; ke eú  
hnyi anyidra je hna cit gethen hnaúhangö  
me úökonguny. 8 E ca khan' ödra gethen  
deny hnahic; ke ba wisa hnyi je dedra: k'  
adre me ka ânyâ hobi ködra je gethen ae

hwali ; e ca khan' ödra hnahic tavat adre me vheno e. 9 Anyin a wale e úsákáúö möhmun hna owisa, k' ame ca khöü öhmun wisa: öhmun e halubahingen lany, ke wâ bi, wale lit ; öhmun e halubahingen umumelam, ke wâ bi, wale menekolom. 10 Öhmun e khaüteta hna up veto helâke ta je wadröu, eke, öhmun e khaüteta helâke ba li ecmak : öhmun e haúhaú hnyi jebigö helâke me hauhautreng : öhmun helâke me ta je komok unyin tavat ae möt. 11 Öhmun e kuku hia helâ me je bea, ke kuku tenge tot helâ me je biny : öhmun e halubahingen owisa ke ba bi ; me halubahingen úhömeli ke úsákáúö bi möhmun. 12 Anyin ae se hia hnöhmun je hna hanyáúá hnyi hnyimákâm, ke ame hai öhmun anyihmun je hulö : anyin a e bi unyihmun hnöhmun je hna hanyáúá, ke e khan' öhmun dut anyihmun ta je monu : 13 wale hnyi hnöhmun hna hanyáúá me ivinö Iehova, me hmetuhmetu ge Khonguhmun, me ha úöveci me thu musi, me únykúme me ha únyi hnyi hnyok je hofuc ae thoi. 14 Ke adre me ohmetu hna owisa, ke ame tot sákáú hwakecin ae wisa : anyin a kölu but hnathu eú hnyi gethen, ke ca khana hwakecin ae fofá he ka didró. 15 Eke, e hia but hnathu ; ke haba at ame kec ge hulö, me e ame ka ányâ e bi me hnân söh : ke Iehova ame wâ e, me ame kong káu ae ba owisa. 16 Ke e ame wâ ae ba at, me e ame láia ae ba at ame khöüá : anyin a wale ame ka ányâ möt hobi káu e hnen hnyamen bi ; ke ame cö e anyin bi hwakecin ae wisa. 17 Ke e ame khavá hwakecin ae wisa helâke me hna tube úláiny, ke e ame bicá möt ; ke e ame khavá úkhaúen bihwaban hnân úkhaú, me khavá weny ae gan hmâ helâ me úkot. 18 E ame he ka bi hwaban hoton huliwa, wale hmönyin ka tavat a úcon, me hwaban ka ta je iwahnaihmiöny mē ; e ame he ka bi hwaban ka je bomene. 19 Me adre me he ka outen iö Iehova úhedra jimeú, me outen anyin hmanenang úhedra hnyi hna o hnen seúnö : anyin a e ame he ka o helâ me wagewe ae hwege, wale ame túá hnen homenö Iehova. 20 Ke ame he at úhömeli ka o hnyi Ziona, me ködra tavat adre me hmetu únyi hnyi hulö anyi Jakob, haingö Iehova. 21 Ke haba inya, waleú anyik úhinyköu mödra, haingö Iehova : Haba hanuk at ame laba hom, me hok je hofuc waleji oge ip hnyi hnyimâm, ame ca he ka hia únyi hnyi hnyimâm, me hnyimen ta je mátránâm, me hnyimen ta je mátrániny

ta je mátránâm, hwân walang ang, ke ne o but nyiele balua, haingö Iehova.

## HNYIMAKAN 60.

**H**ÖHÖI thö, umumelam dö ; anyin a o but melamâm, ke a o but hom hmanenangi Iehova. 2 Anyin a wâ bi, ame he ka tube hmeledrany hnen lit, ke ame he ka tube ta je hnyei hnen menekholom : ke ame he Iehova ka o hom, ke ame he ka manen hmanenanginy hom. 3 Ke ame he ta je hnyei ka he ka hnyi ányâm metam, me je than ka hnyi iumumelaminy hnâm hna o. 4 Bwele thö göranyai igigilö me wâ : ödra hia thithö adre me úkhacaköu, adre me o köu : ame he ka o lakom je бага úhedra hnyi dok ae sákáú, ke adre me he ka deluá lakom je hlu. 5 Me u me he ka wâ me senyin, ke ame he hnyekom ka öbubuny me hlau ; anyin adre me he ka wia köu tang omjeü únyi hnyi köü, ke adre me he ka hom köu tang omjeüiny je hnyei. 6 Ame he ka avi u hnen ta je kamela ae se hia, me je nak kamela únyi Midiana me Efa ; adre me he ka o hia úhedra Sheba : adre me he ka hom gol, me libanu, me haimemenâ hnân oganö Iehova. 7 Adre me he ka úkhacaköuá je hnahat hia hnyi Kedera köu, k' ame he je mamoe bagainy Nebaioth hia ka bi athnyabaem : adre me he ka öliá tabök tap hnyi so, ke oge me he ka omecá uma umen anyik hmanenang. 8 Ie je hnyat ang adre me gâ helâ me úlá, ke helâ me je biny ka hnyi je hwanumödra bi ? 9 E hnathu, ame he je bomene ka halubahing nya, k' ame he ka bán je huiny Tasesa he ka hom lakom obaga únyi hnyi dok ae sákáú, ke e unvidra anyidra sileva me gol, hobi káu iö Iehova a Khongom, me Kabi Isaraela at ame ohmanenangi u. 10 Ke ame he je atkanyua ka op hagâm je hak, k' ame he je tuhödra ka bi athnyabaem : anyin a oge me kuc u ehac hnyi anyik hmönyin, ke hnyi anyik ibetengiö oge hia but betenge gam. 11 Ame he bala ka khöng ut je homagöulem ; k' adre me ca he bi ka hlöng hnyi lany me lit, me me he tavat ka sukhöünâ köu ta je omjeüiny ta je hnyei, me lelö tilâ latuhödra. 12 Anyin ame he ka hia tavat me dökhü bi adre me höcö bi athnyabaem ; eke, adre me he ka ti öba wan ta je hnyei eling. 13 Ame he ka o köu hmanenanginy Lebanona, wale köp, me tidera, me tasura ; hnân he ka ohmanenangâ

ISAIA 61, 62.

anyik dok ae kap, ke oge me he bi nya ka ohmanenangâ e a hnen li cak. 14 Ke ame he lakon tavat adre me oveci u ka o me iyâu gam; ke ame he tavat hia adre me hûkötïö u ka nom ju ka hnyi li hnyeûcam; ke adre me he ka haiö u, a Taun anyi Iehova, Ziona anyin Kabi Isaraela. 15 Anyin a adre hia but digic u me hûkötïö u, waleling me me ca he ke at unyâm, awe, oge me he bi nya ka wiö u hnân hnyeï ae mec nyiele balua, ke hnân senyin hnyi ta je dö ae se hia. 16 Ke u me he ka he minya ke ijem debainy ta je hnyeï, ke ijem je basin ta je than: ke ame he ka khanö u a inya Iehova at ame omeli u, ke at ame úcû melâm, Mani Jakob. 17 Oge me he ka ham gol hwaban bras, ke oge me he ka ham sileva hwaban fao, ke bras hwaban utö, me fao hwaban veto: ke oge me he ka wia ânyâm je taben me me hnahic, me je homakan ânyâm huliwa m' adre me wisa. 18 Adre me ca he hmetu ka löng úökonguny hnyi em hnyeï, ke ame ca he bi ka ba wan me hna úhangö hnyi je hnyigöulâm; ke u me he ka hwenyi ien ânyâm je hna up haginny, ka habe, Úhömeli, me je homagöulem, ka habe, Ogânâ. 19 Ame ca he hmetu seünö ka hnân melamâm hnyi lany; ke ame ca he ka omelami u ge melaminny tehi: k' ame he Iehova ka olanyi u nyiele balua, ke Khongom a mecâm. 20 Ame ca he hmetu ka dit ânyâm seünö, ke ame ca he bi ka hia ânyâm tehi: anyin ame he Iehova ka melamâm nyiele balua, ke adre me he ka umo je bonginy tenge a u. 21 Ke ame he ka wisa hia ânyâm tavat, adre me he ka hu hnyeï nyiele balua; a bätân oge tâ, huliwa anyin li hnyamök, m' adre me he ka oganö nya. 22 Ame he ka wan thauzan bi, tavat ae wakhalet, ke ame he ka hnyeï ae hwege bi, hnyeï ae úhnyúkong: oge me he, inya Iehova, ka ologotâ e hnyi ûen e.

HNyimakan 61.

**E**HUK hanon Than Iehova; anyin a hia but Iehova hú nya he ka khetâ uthumetu ae so ka tavat ae ilemuk; e ame kunö nya he ka lan tavat ae vec hnye-kudra, me he ka ba hna hna bâûâ ka ta je bâ, me hna khöng uma ce at ka tavat adre ca; 2 he ka haimemenâ hunainy ae úcû kö Iehova, me bonginy bi hwaban ge Khonguta; he ka otubwelâ tavat hia adre me tenge thungaû; 3 he ka ip hobi kâu

tavat adra tenge hnyi Ziona, he ka ham ködra ûnye vekiny hwaban hnabadröu, me wakoïny senyin hwaban hlöuhlöu, me úkhaûen ogânâ, hwaban hnyok ae hmak; m' adre me he ka hwenyi iödra me je úöïny wisa, a tâ Iehova, m' adre me he ka ogânâ e. 4 Ke adre me he ka op je dok ae ba wan ehac, adre me he ka otilâ hmeto je ke keihen adre degec ehac, ke adre me he ka ânyâwia je taun ae ba aten, je dok adre degec hnyi je dö ae se hia. 5 Ke ame he ka tot ta je atkanyua me hân halebun je hnahat mamoe, ke ame he tavat aten ke je hnyeï ka seú tila kânâ hobi köbun, me tuö ibun je hnyeï vine. 6 Ke adre me he ka hwenyi iöbun, me Tavat bihut kö Iehova: k' ame he tavat ka haiöbun me Lathnyabainy Khonguta: öbun e he ka an je soiny ta je hnyeï, ke öbun e he ka hobeluâ anyidra hmanenang. 7 Ame he ka lo li hwaban köbun, hwaban anyibun hmehma; ke hwaban imonumununy adre me he ka senyina jekhöüdra; anyin a wale adre me he ka olo hu hnyi idra hnyeï: k' adre me he bi ka senyin nyiele balua. 8 Anyin a inya Iehova oge me hnyok ka hna owisa, inya oge me hûkötïâ venöu, ke hwakecin ae kong; ke oge me he ka bihwaban ködra hnyi hnathu, k' oge me he ka ânyâ mödra úhi-hinyköu a nyiele balua. 9 Ke ame he ka lung je mâtrânidra unyin ta je hnyeï, me lakudra huyi wanben tavat: ame he hia tavat adre me ö 'dra ka wâhmakhmeto a ödra ta je mâtrân a ohnahicâ Iehova.

10 Oge me he ka ti senyini Iehova, k' ame he hanuk ka hobâ Khonguk; anyin a e ame hia but khaüö nya ge je úkhaüny möt, k' ame khaüö nya ge úkotiny hwakecin ae wisa, helâ me at ame hap faipoipo ame omecâ e ge únyevekiny, ke helâ me hlu ame he ka faipoipo ame theibâ e. 11 Anyin a kânâ ame okûâ je vongon, ke ta hnyeï ame okûâ je hatong adre me tâ hnyin; helâe minya ame he Iehova ka okûâ kwakecin ae wisa me ogânâ hnyi hnyimakan ta je hnyeï hia thithö.

HNyimakan 62.

**H**ABA can bi ge Ziona, me oge me ca he ka laba hnyibû, ke can bi ge Jerusalema, me oge me ca he bi ka menâ, ke ne o but ame o but hwakecin ae wisa helâ me lany, me anyin úhömeli helâ me okúnú ae umumelam. 2 Ke ame he je hnyeï ka wâ hwakecâm ae wisa, k' ame he

ta je than hia ka wá ányâm hmanenang : ke adre me he bi ka hwenyö ke iâm bi ae teb únyi ame he hnyimö Iehova he ka ha. 3 Ke u me he ka hnân korona ae mec hnyi hnyamö Iehova, ke hnân hnabinybak anyin than hnyi hnyameu Khongom. 4 Ke adre me ca he hmetu ka haiö u, ka habe, Adre degec ; ke adre me ca he bi ka ha ge em hneyi, ka habe, E ba aten : ke adre me he ka hwenyi iâm, ka habe, Hnök hna senyin gan, ke haba ien em hneyi, A faipoipo thö : anyin ame senyin köu Iehova, k' ame he ka faipoipo em hneyi. 5 Anyin a helâke hidröu ame hom hlu, helâe ame he je lakom ka faipoipo möu : ke ame he Khongom ka senyin köu, helâ me at ame hap faipoipo ame senyinâ âiân.

6 Jerusalem lö, o ge hia but ip tavat tue hon hagâm je hak ; adre me ca he bala bi ka hum hnyi je lany me lit hia : öbun tavat öbun e únykümi Iehova, ca he bi ka menâ, 7 ke ca hna but kâu he ka menâ, ke ne o but e ame otílâ, me ke ne o but e ame wia Jerusalema hnân ogânâ hnyi hmeledrany. 8 A hia but Iehova khemanyin ge hnyamen a metân, me benyin ae hwege, ka habe, E hnathu oge me ca he hmetu ka hna ányâm whit hnân an je iwahnaihmiöny möu ; ke ame ca he je atkanyua ka ijem ányâm waina waleji u je huliwan : 9 ke ame he tavat adre hip e ka han, me oganö Iehova ; ke ame he tavat adre úkhöúnâ e ka ijem e hnyi je hnyeuleny anyik dok ae kap.

10 Didrö, didrö hnyi je homagöule ; penapena thö deny tavat ; op dö göranyai, op dö göranyai hna cit gethen ; hlo thö je veto ; ogöranyâ thö boúðila hobi kâu ta je hneyi. 11 Wâ bi, Iehova ame hia but ha ka je can hmeledrany, ka habe, Ha thö ka hluiny Ziona, ka habe, Wâ bi, ame o but ányâm úhömeli ; wâ bi, e unyin hwan, ke e bi hnyi hnyimakan hwaban anyin huliwa. 12 Ke adre me he ka hwenyi iödra, Hneyi ae kap, A úco Iehova : ke adre me he ka hwenyi iâm, Hna elâm, Taun adre degec.

HNYIMAKAN 63.

**I**E at ang ame he jem úheny Edoma, ae dra anyin úkhaú úheny Bozera ; a at ae hmanenang ge anyin úkhaú, k' ame he hnyi meciny anyin tang hwege ? Inya thibi, at ame ha hnyi wisa, at ae hwege he ka omelö. 2 Ieú ae dra gan ányâm je

úkhaú, haba ányâm je úkhaú me helâ me je úkhaúen at hlic vine ? 3 Inya oge hia but hake hlic vine ; ke ba at unyik únyi hnyi ta je hneyi : eke, oge me hlic ödra hnyi anyik hmönyin, ke ututi ödra hnyi anyik wathethöt ; me ame kong anyik je úkhaú ge drödra, ke oge hia but okongoâ hia anyik úkhaú. 4 Anyin a e bi eú hnyi hnyekuk bonginy hmönyin, k' ame o but hunainy hnök hna úco. 5 Ke oge me wâ, me ba at úhadruo ; ke oge me láia ae ba at hnân ci : anyin a wale ame hom möt könya hnen hing benyik ; ke ame ci nya hnen bi anyik wathethöt. 6 Ke oge me ututo tavat hnyi anyik hmönyin, ke omonu ödra hnyi anyik wathethöt, ke oge me hingálâ dren anyidra möt ka hnyi hon kánâ.

7 Oge me he bi nya ka ha ge tang betenge anyi Iehova, me je hnân oganö Iehova, hoton ta je únyi hia thithö waleji a ham köta Iehova ; me so ae gan hmâ ka lap anyi Isaraela, waleji e ame ham ködra hoton anyin ibetengiö baú, ke hoton anyin tang betenge ae gan hmâ. 8 Anyin a e ame ha, ka habe, E hnathu, ta je atök ödra, a je wanakat adre me ca he bi ka ányâ iyawö : me me at omeli ödra bi. 9 E ame tha vec mödra hnyi anyidra ta je vec hia, ke e ame omeli ödra ge angelainy hnyimakan : e ame úcú ödra hnyi anyin ibetengiö, ke hnen hna betenge baú ; ke ame hum ödra me köp ödra bala bi hnyi je bong ehac. 10 Ke adre me úkhin fuc, me ovecâ hanon ae kap : anyin a wale e ame hwiö but me ame iwahnaihmiöny mödra, ke e ame ka hamen bi vat mödra. 11 Me e ame únyküme je bong ehac, wale ga Mose me lakeiny, ke haingen, ka habe, E but ua at ame hum ödra úhedra eú hnyi köiö, tha e me tavat tuö haleny hnahat mamoe ? ke e but ua at ame ip hanon ae kapeú hnyi hnyekudra ? 12 At ame su ödra ge benyen ae hmanenang tha e me hnyam a metö Mose ? at ame subâ luâ köiö hnyi hnyimaködra, me wia hobi kâu bi ien a nyiele balua ? 13 at ame hum ödra hnyi je dok ae dit, helâ me hors hnyi hnyebuba, m' adre me ca haú. 14 Haba hanu Iehova ame omen' ödra, helâ me je meno ame utut hnyi je hwatapkölu : helâe u je su lakem, me wia hobi köu ien ae hmanenang. 15 Wâ ju únyi hnyi drany, me wâ únyi hnyi hnyabam ae kap me hmanenang ; ewa wem ae hwege me hna ányâ hnen manâm man ? adre hom behânâ medien hnyekom me ányâm betenge könya. 16 Anyin a u

kamöhmun, eja ke ne a ne ca ö 'hmun Aberahama, ke ca khanö Isaraela öhmun : Iehova lö, u thibi kamöhmun ; at a úcú öhmun hwân nyiele, wale iâm. 17 Ieú u je omonu öhmun gan Iehova únyi hnyi dem gethen, me okhötâ je hnyekuhmun m'öhmun e ca outö u? Hmetu ju can je athnyabaem, a je tribuiny em hnyei. 18 E okhulit hna labâ e hnen ânyâm tavat ae kap : haba je iwahnaihmiöny möhmun, adre me hia but uto ânyâm dok ae kap. 19 Öhmun e helâ me tavat u je ca musi ödra adrem balua ; ke helâ me tavat adre ca ip iâm hudra.

HNyimakan 64.

Ö U he ju ka kia but drany, me utut, me me badedö but je bucen hnyi hnyimákâm ; 2 helâ me meic ame vâc je ong utö, me ame citröu köiö ge meic : he ka omanenâ iâm ka ta je iwahnaihmiöny möu, me me öbubuny je hnyei hnyi hnyimákâm ! 3 Waleji hnyi hnâm hna ânyâ je únyi hnân outen waleji öhmun e ca únykúme, u je utut, me ame badedö but je bucen hnyi hnyimákâm. 4 Anyin a haba hwân kâú adrem, ame ca löng bi hnen tavat, me ca tevehlöng bi, ke ame ca wâ hnen ecmak ke Khong, ke hake u ke thibi, at ame huliwa ködra adre me halubahingen e. 5 U me úkhanö me at ame senyin me ânyâ hwakecin ae wisa, tavat adre me únykúme köu hnyi dem ta je gethen : wâ bi, u je hmönyâm, ke öhmun e ânyâ hwakecin ae kong : öhmun e laba kueny hnyin, ke hawa, öhmun e ha ka möt? 6 Öhmun hia thithö öhmun e helâ me únyi ae bo kong, ke helâ me je úkhaú ae ikiki anyihmun wisa hia thithö : öhmun hia öhmun e meleca helâ me lany hnyot ; k' ame ohí' öhmun hnen hwakecihmun ae monu helâke ame ou ang dö. 7 Ke ba at ame hawâ iâm, me ka bwebwelâ e bi me me he ka köt u : anyin a u je hia but ikhâlâ hnyimákâm gahmun, ke u je oau' öhmun hnen je hwakecin ae monu öhmun e ânyâ. 8 Ke walang ang, Iehova lö, u thibi Kamöhmun ; öhmun ang kânâ ae kece, ke u at ame op kaia ; ke ohmun hia thithö ang huliwa anyin hnyamâm. 9 Iehova lö, ca he ka hmonyâm gan hmâ, ke ca he ka únykúme hwakecin ae kong nyiele balua : wâ bi, ö u wâ thö, öhmun hia thithö ang je atâm. 10 A hnyot ut ânyâm je taun ae kap, a hnyöt ut Ziona, e ba but wan hnyi Jeru-

salema. 11 Adre hia but hlâ ge meic umöhmun uma ae kap ke hmanenang, waleji a oganö u hnyin hnen lakamöhmun ; k'adre hia but hagutâ anyihmun ta je únyi hia ae kese. 12 Iehova lö, hawa, u me he ka hokhnyokâ ta je únyi e? u me he ka laba hnyibú, me oveci öhmun hwegi öhmun?

HNyimakan 65.

O GE me ling ödra tavat adre me ca hnei nya ; ame ö nya bi ge tavat adre me ca elöm nya : oge me ha, ka habe, Walö nya ang, walö nya ang, ka hnyei adre me ca haw' ödra hoton iök. 2 Oge hia but lau li hnyamök hnyi je bong hia ka tavat adre me ca úling, waleji adre me vhenö gethen ae ca so hoton je únykúmenödra bi ; 3 tavat adre me ohmönyini nya hnyi hnyimakök hnyi ta je bong, adre me bi hut hnyi ta hnyei, k' adre me leú utö ae bo so hon je veto kânâ ; 4 tavat adre me laba hnyi wanben je erkemok, ke hnyi je dok ae iyong ; tavat adre me han utiöiny buaka, ke e hnyi anyidra je kaia dân ta je únyi ae ikiki ; 5 tavat adre me ha, ka habe, Tot ut háâng, ca hakekenyi nya anyin a iny kap hom : wale hai hnyi li hnyingöik, ke meic ame hlâ hnyi je bong hia. 6 Wâ bi, a sihnalimen dut hnyi hnyimakök : oge me ca he ka laba hnyibú, ke oge me he ka bi hwaban, eke, oge me he ka bi hwaban ka hnyi je úlaidra, 7 wale ta je hwakecibun ae kong, tha e me hwakecin ae kong anyin lakamöbun, haingö Iehova, waleji adre leú utö ae bo so hon je bucen, me bi gan könya hon je hut : anyin a wale oge me he ka böc ka tuluto anyidra ta je huliwa ka hnyi je úlaidra.

8 Walang hna ha hnö Iehova, ke habe, Adre me wâ waina ae teb únyi hnyi thi vine, ke haingen ke at, ka habe, Ca degec e, anyin ae hu hnahic hnyin : helâe oge me he ka ânyâ, can ta je athnyabaik, m' oge me ca he ka tha ohí' ödra hia. 9 Ke oge me he ka oâ ke mâtân únyi ga Jakob, me at ame he ka labâ anyik je bucen únyi ga Juda : ke ame he tavat oge úca ka hu hnyei, k' ame he je athnyabaik ka labâ e. 10 Ke ame he Sarona ka hnân hnyeuleiny ta je mamoe, ke haba, hwatapköluiny Akora me hnân mokut hnen je hna hat meno, hobi kâú lakeik waleji tavat adre me elöm nya. 11 Ke haba öbun tavat öbun e hna degeci Iehova, me hnying anyik bucen ae kap, me penapena laulau kö Gada,

me öunöngötâ hudiny ic hobi kö Meni ; 12 me oge me he ka ip öbun hobi kâu hele vat, ke öbun e he hia ka iyâú ka hnyi hna hlingâ : anyin oge hongot, ke öbun e ca ieú ; oge me fuc, ke öbun e ca löng ; ke öbun e ânyâ hulö hnyi hnyimakök, me úca únyi oge me ca wek.

13 Anyin a wale, walang hna ha hnen Than Iehova, Wâ bi, ame he je athnyabaik ka han, ke öbun e he bi öbun ka mekihnâ-nem : wâ bi, ame he je athnyabaik ka ic, ke öbun e he bi öbun ka beic : wâ bi ame he je athnyabaik ka senyin, ke öbun e he bi öbun ka hmehma : 14 wâ bi, ame he je athnyabaik ka khumöng ge senyin hnyok, ke öbun e he bi öbun ka tenge ge hnyok ae hlöuhlöu, me kuku tenge ge vecin hanu. 15 Ke öbun e he ka hna öbun hnân hângâ ka tavat oge úca, k' ame he Than Iehova ka hlingö u ; me wenyö ke ien bi hon je athnyabainy : 16 me me he at ame ha hnahicâ e bi hnyi hmeledrany, me ame he ka ha hnahicâ e bi ge Khong ae hnathu ; ke haba at ame khemanyin hnyi hmeledrany, me ame he ka khemanyin ge Khong ae hnathu ; anyin a hia but hnying ta je vec a bân, ke adre hia but ikhâlâ ta je únyi e ge li emakök. 17 Anyin a wâ bi, inya oge me op drany a teb únyi, me hmeledrany a teb únyi : ke adre me ca he bi ka únykú-me ta je únyi a bân, k' ame ca he ka o eú hnyi hnyekon at. 18 Ke so öbun e senyin me hobâ balua hnyi únyi oge me op : anyin a wâ bi, oge me op Jerusalema, hnân senyin, ke ta je aten hnân hobâ. 19 Ke oge me he ka senyinâ Jerusalema, me hobâ ta je atök : ke adre me ca he hmetu ka löng hwan thungaú, me tenge. 20 Ame he ka ba hmetu inma adre me konâm hnyi je bong a tep thibi, ke hingat ae ca bekhöt bongon je bong : anyin ame he wanakat ka mok a khaca haded ta je hunainy, ke haba at ae kong a khaca haded hunainy, me ame he bi ka hnaúhangö. 21 Ke adre me he bi ka op ta je uma me laba hnyin ; k' adre me he bi ka tâ je vine, me ijem wan. 22 Adre me ca he bi ka up uma, me ame he ke at bi he ka labâ e ; k' adre me ca he bi ka tâ, me ame he ke at bi he ka han : anyin a haba ta je bong bongon lakeik me ame he ka helâ me ta je bong bongon úö, ke ame he hnök je hna úca ka senyinâ beú hmâ ta je huliwa anyin je hnyamödra. 23 Adre me ca he bi ka huliwa baú, k' adre me ca he ka hnokoâ hnân hobi kâu úökonguny ; anyin a ödra

je mâtrâniny tavat a hahnahicâ Iehova, tha ödra me lakudra. 24 Ke ödra ka tiga ca hongot bi, me oge me he bi nya ka ieú : ke ödra ka tiga fuc, me oge me he bi nya ka ling ödra. 25 Ame he bi lukö ka tha han me nokon mamoe, ke ame he liona ka han thatúnyin hwit helâ me bolok : ke haba sesâiny kânâ, me wale an ta je on. Ke adre me ca he bi ka okongo me ohia hnyi anyik bucen hia ae kap, haingö Iehova.

## HNYIMAKAN 66.

**W**ALANG hna ha hnö Iehova, ka habe, Anyik theron drany, ke taben li hnyeúcak hmeledrany : ieú bongon uma öbun e he ka op hobi könya ? ke ewa dok oge me he ka menâ hnyin ? 2 Anyin a haba ta je únyi hia ang ame ânyâ hnen hnyamök, me me e bi ta je únyi hia thithö e, haingö Iehova : ke walang at oge me he ka wâ, wale at ae theduoc me bewisa hanon, me öbubuny ge hök hofuc. 3 Haba at ame hlingâ bolok, me ame helâ me at ame hlingâ at ; haba at ame hudo nokon mamoe, me ame helâ me at ame thu nyin kuli ; haba at ame hudo bwihlany, me ame helâ me at ame hudo dren buaka ; haba at ame leú libanu, me ame helâ me at ame hahnahicâ hnatheat : eke, adre hia but úca dedra bi je gethen, ke ame senyin je hanudrin hnyi anyidra bi ta je únyi ae ikiki. 4 Oge me he bi minya ka úca anyidra ta je tang iyauö, me oâ ködra ta je únyi adre me outen ; anyin a hnyi úen oge me hongot, e ba at ame ieú ; hnyi úen oge me fuc, e ba at ame löng : ke so bi adre me ânyâ hulö hnyi hnyimakök, me úca únyi oge me ca senyinâ.

5 Löng ju öbun hofuc ho Iehova, tavat adre me öbubuny ge hwan hofuc, ka habe, A hia but ha hnen je liamekeiny möbun tavat adre me húkoti' öbun, me digic öbun can iök, ka habe, E so adre oganö Iehova, m' öhmun e he ka wâ anyibun senyin ; ke adre me he ka hmehma. 6 Hwan mede hnyi taun, hwan hofuc hnyi uma kap, ho Iehova ame bi hwaban ka je iwahnaihmiöny mē. 7 E ka tiga ca vec hnyekon momo e ame hnokoâ ; ke tiga ca o anyin vec, e ame hnokoâ da. 8 Ie at ame löng a helâe ? ie at ame wâ ta je únyi a helâe ? Hawa, adre me he ka hnokoâ hnyeí hnyi bong a khaca ! hawa, adre me he ka hnokoâ ke dökhu hnyi úen a khaca thibi ? ke so bi ame o

## JEREMIA 1.

but je lakon Ziona e ka tiga vec hnyekon. 9 Hawa, oge me he ka oâ vec hnyekon, me ca he ka oâ? haingö Iehova: hawa, oge me he bi nya at ame oâ, ka thawâ bi? haingen Khongom.

10 Tha senyin d' öbun me Jerusalema, me hobâ thö gan öbun hia thithö tavat öbun e hnyok kâu: tha senyin hwege thö mē, öbun hia thithö öbun e tenge gan: 11 m' öbun e he ka ijem me sekubun ge li basin hnân otubwelâ; m' öbun e he ka oâ debai me hobâ úganiny anyin hmanenang. 12 Anyin a walang hna ha hnö Iehova, ka habe, Wâ bi, oge me he ka inâ hnahic kâu helâ me wagewe, me hmanenanginy je hnyei helâ me di ame bahihingölö, ke öbun e he ka ic; adre me he ka abiny öbun, me jijing' öbun hon li jevan. 13 Ame otubwelâ wakat nhen hinyen, ke helâe oge me he ka otubweli öbun; ke adre me he ka otubweli öbun bi hnyi Jerusalema. 14 Ke öbun e he ka wâ e, me ame he ka senyin je hnyekubun, ke ame he ka möt so je jeiöbun, helâ me je bätân: ke ame he je athnyabainy ka khan' ödra hnyamö Iehova, ke e ame he ka hmönyin ka je iwahnaihmiöny mē. 15 Anyin a wâ bi, ame he Iehova ka o me meic, ke helâ me höu anyin je kariota; me me ohmeto anyin hmönyin hnyi wathethöt, me nhen hna thawâ hnyi bâhlân meic. 16 Anyin ame he Iehova ka ivinö me tavat nhen meic, me anyin hele vat: ke ame he ka se hia hani Iehova. 17 Haba tavat adre me okabi ödra bi me obosoi ödra bi, he ka he hnyi ta hnyei, hoton khaca hnyi wanben, adre an utiöiny buaka, me hnyi ae ikiki, me tep: awe, adre me he ka tha bi obiny ködra, haingö Iehova. 18 Anyin ae khanö nya hnödra hna ânyâ,

me je únykúmenödra: ame o thö úen, me oge me he ka úkhacaköuâ ta je hnyei hia thithö, me je hwen hnyei; ke adre me he ka o but, me wâ anyik hmanenang. 19 Ke oge me he ka ip unyidra haten, ke oge me he ka kunâ ka hnyi ta je hnyei tavat gadra adre me kec möt, Tasesa ai, me Pula ai me Luda ai, wale tavat hlic fana, me Tubala ai, me Heleni ai, me ka hnyi je bomene ae sákâú, tavat adre me ca hnyi löng úthumetu gak, me ca wâ anyik hmanenang: ke adre ma he ka khetâ anyik hmanenang ka hnyi je hnyei. 20 Ke adre me he ka hom je liamekeiny möbun hia thithö únyi hnyi ta je hnyei hia thithö hnân hut kö Iehova, hon ta je hors, me ta je kariota, me hon je tap, me je miul, me hon je meno adre me he logot, ka hnyi anyik bucen ae kap a Jerusalema, haingö Iehova, helâ me lakon Isaraela adre me hom bwihlany hnyi kaia ae kalaöt ka hnyi uma umö Iehova. 21 Ke oge me he ka hom keihen gadra, m' adre me tavat bihut, me at Levi but, haingö Iehova. 22 Anyin ame he ka tet hmâ hnyi hnyimakök drany a teb únyi, me hmeledrany a teb únyi, wale oge me he ka op, haingö Iehova, ke helâe ame he ka tethmâ mátránibun me iöbun. 23 Ke hwân hnyi ke imaneniny tehi, ke ne o but hnyi ke imaneniny ke tehi, ke hwân hnyi ke sabath, ke ne o but hnyi ke sabath, ame he ka o tavat hia he ka khudrung hnyi hnyimakök, haingö Iehova. 24 Ke adre me he ka he me wâ ta je unyin tavat adre mokcu, a tavat adre hia but úkhiny fuc mönya: anyin ame ca he ka mok hnödra waahnyöng, k' ame ca he bi ka mok anyidra meic; ke ame he bi tavat hia thithö ka húkoti ödra.

## TUSI JEREMIA PEROFETA.

### HNYIMAKAN 1.

**H**OFUC ho Jeremia nöku Hilekia, hanen tavat bihut waleji a ödra hnyi Anathoth, hnyi hnyei Beniamina: 2 waleji ame o hofuc ho Iehova kâu hnyi bong bongu Josea, nöku Amona than Juda, hnyi huna a thötininy anyin musi. 3 Ke ame o minya hnyi bong bongu Jehoiakima nöku Josea, than Juda, ke ne o but hnyi

obiny huna a eleveni Zedekia, nöku Josea than Juda; ke ne o but adre me hom hwenbâ at Jerusalema hnyi tehi a thabunginy.

4 Ke ame o but könya hofuc ho Iehova, ame ha, ka habe, 5 Oge bök ka ö u, ke ödra tiga ca up u hnyi hnyok, ke oge bök ka okabi u, ke u tiga ca o bi úhem hnyi hnyok; oge hia but ip u hnân peropeta ka ta je hnyei. 6 Me oge me ha, ka habe,

Ekölö Than Iehova! wâ bi, e ca khanö nya he ka fuc: anyin a iny wanakat. 7 Haba Iehova ame ha kõnya, ka habe, Ca ha bi, ka habe, Iny wanakat: anyin a u me he ka he ködra hia thithö, wale oge me kunö u ka hnyin, ke u me he ka ha ta je hofuc hia thithö oge me he ka hûna köu. 8 Ca he bi ka ot gadra: anyin a tha inya möu he ka omeli u, haingö Iehova. 9 Me haba Iehova ame inâ hnyamen me kâlâ hnyimök; ke Iehova ame ha kõnya, ka habe, Wâ bi, oge hia but ip hok ta je hofuc hnyi hnyimâm: 10 wâ bi, oge hia but ötilö u hnyi bong ang hon ta je hnyei me hon ta je dökhu, he ka oc degecâ me hagutâ, ke he ka ohia, ke he ka öüo; he ka op göranyai, me tä.

11 Ke ame o minya but kõnya hofuc ho Iehova ame ha, ka habe, Jeremia lö, ieü u me wâ? Me haingök, ka habe, Inya oge me wâ ong utö saked. 12 Ke haba Iehova ame ha kõnya, ka habe, E so hnâm hna wâ: anyin oge me hmâkâ hok hofuc he ka ohwädâ. 13 Ke ame olo o kõnya hofuc ho Iehova ame ha, ka habe, Ieü u me wâ? Me haingök, ka habe, Inya oge me wâ öt ame citröu; ke ame hwiö hnyimen únyi hnyi hwadrö. 14 Ke haba Iehova ame ha kõnya, ka habe, Ame he ka patrutrua únyi ae kong úheny hnyi hwadrö ködra hia thithö tavat adre me labâ hnyei. 15 Anyin a wâ bi, inya oge me he ka hawâ ta je lap hia hnyi dökhu únyi hnyi hwadrö, haingö Iehova: ke adre me he ka he jem, me ve otilâ anyidra je theron hnyi je homagöuleny Jerusalema, me cicö hna up haginy hia igigilö, me cicö je tauniny Juda hia. 16 Ke oge me he ka ha hnök je hna owisa gadra, can anyidra ta je hulö hia; waleji hnyi hnödra hna digic nya, me leü utö ae bo so ka ke je khong, me hmi ka ta je huliwa anyin ta je hnyamödra bi. 17 Anyin a wale, u me ke ka hûkâlâ wen hnyekom, ke todrö, me ha ködra ta je únyi hia thithö oge me hûna köu: ca hlohlo gadra, wâ oge nye he ka ohlohloi u hnyi hnyimaködra. 18 Anyin a wâ bi, oge hia but wiö u hnyi bong ang me hnân taun adre up haginy, me hmolom fao, me hak bras, úcon tavat hia, úcon je than Juda, me je taben e, me anyin tavat bihut, me tavat aten hnyei. 19 Ke adre me he ka vat möu; ke adre me ca he ka hwege hom; anyin a tha inya möu he ka omeli u, haingö Iehova.

HNYIMAKAN 2.

**K**E ame o but kõnya hofuc ho Iehova, ame ha, ka habe, 2 He thö, hongot dö hnyi je hnyikönyen Jerusalema, ka habe, Walang hna ha hnö Iehova, ka habe, Inya oge me únykúmi u wale ge hwakecâm ae menyik ku tiga hlu, me ányâm betenge waleji hnyi hnâm hna úkócö: waleji hnyi hnâm hna he hotuk hnyi hnyebuba, hnyi hnyei adre ca belökâ. 3 E kap Isaraela kö Iehova, wan a bân hnyi troban hnyei: adre me ha hnaúhangöâ tavat adre me utâ e; ame he ka o únyi ae kong ködra, haingö Iehova.

4 Lap anyi Jakob lö, löng ju hofuc ho Iehova, me öbun je lap hia hnyi lap anyi Isaraela: 5 Walang hna ha hnö Iehova, ka habe, Ieü ke únyi ae ca wisa a wâ lakamöbun unyik, m' adre me öusákâü ödra mönya, me hnu hoton únyi ae ba önyen, me bibi hop? 6 Ke haba khaca, adre me ca ha ka habe, Ewa Iehova at ame su' öta únyi hnyei Aigupito; at ame hum öta hnyi hnyebuba, wanben hnyei a hnyei baga me hu je uthankong, hnyi hnyei ae hwahwacit me hmenon mok, hnyi hnyei ame ca vheno hnen at, ke ba at ame labâ e? 7 Ke oge me hum öbun ka hnyi hnyei ae hu jeüuy, he ka an wan me soiny; ke öbun e o but me oikikiâ ik hnyei, me wia lakeik me me únyi ae ikiki. 8 Haba tavat bihut adre me ca ha ka habe, Ewa Iehova: ke haba tavat adre me huliwan hnanyibu, me ca khan' ödra inya; ke haba tavat musi adre me úkhin fuc mönya, ke haba je perofeta adre me perofeta ga Baala, me hnu hoton ta je únyi ae ba troban. 9 Anyin a wale, oge ma he hmetu ka ivinö möbun, haingö Iehova, ke oge me he ka ivinö me laöbibun. 10 Ke he th' öbun ka hnyi je bomeneiny Kitim, me wâ; me úkhünöng dö Kedara ai me únykúme wia: m' adre me wâ ame ne hu únyi helâe ehac. 11 Hawa, e hu hnyei ame wia je khongon, ke ca je khong bi? ke so bi, a hia but lakeik wia anyidra hmanenang, m' adre me hom bi únyi ae ba troban. 12 Drany lö, láiâ ju ge únyi ang, ot gan hmâ ju, me hlöuhlöu ju, haingö Iehova. 13 Anyin a lo li monu a ányâ lakeik; a g' adre hia but hna degeci nya köiöiny möt ame pupua, me tho hobi ködra bi je an, a je an ae hmouca, ame ca hom behânâ köiö. 14 Hawa, athnyaba bi Isaraela? hawa, e bi athnyaba



### JEREMIA 3.

adre úco k' adre hnokoâ hnyi hnyaba? can ieu'adre sôh e? 15 Ame hia but kuku je nak liona, me fuc hwege göranyai: ke adre hia but öba wan iny hnyei; adre me thong anyin je taun, me ba at ame labâ e. 16 Haba je lakon Nofi, me Tapanes adre hia but tho koronainy bâm. 17 Hawa, u je ca ânyâ hobi köu bi, hnyi hnâm hna digic Iehova a Khongom, waleji hnyi ûen e ame su u eü hnyi gethen? 18 Ke walang ang ieu u me ânyâ hnyi gethen úheny Aigupito, he ka ijem köiöiny Sihora? ke ieu u me ânyâ hnyi gethen úheny Asuria, he ka ijem köiöiny Wagewe? 19 Ame he ka thao u hnen bi ânyâm hulö, ke ame he ka û u hnen bi hnâm je hna kölu: anyin a wale khanö u thö me wâ ûnyi ae hiny me kong, wale ge hnâm hna digic Iehova a Khongom, ke u je outö nya, haingen Than Iehova tuhan sabaoth. 20 Anyin a hwân ehac oge hia but thu degecâ ânyâm hna úhükälaköuâ, me thamua hna cö u; ke haingâm, ka habe, Oge me ca he ka bi athnyaba; anyin a u me mokut hon je bucen hia ae beü, ke hmelen je úö hia ae hát, he ka bi ûnyi monu. 21 Ke haba u, me oge me tâ helâ me vine ame khulelau, hatong ae so: ieu gam u me hwiö gak, ke u vine but ae monu me atkanyua? 22 Eja ke ne u je ne söü soda, me hom gâná sop, e bala bi hnyi hnyimakök ânyâm hulö, haingen Than Iehova. 23 U ma kâmâu he ka ha, ka habe, Iny ca monu, k' oge me ca hnu hoton ta je Baala? wâ ju dem gethen hnyi hnyigöulen bucen, khanö u thö hnâm hna ânyâ: u nak kamela ame he logot, ame he monu hnyi dem gethen: 24 asinainy hnyot at ame khenenâ hnyebuba, ame bubune ang hnyi weny hnyekon; ie at ame he ka ohmeto e. hnyi weny? ame ca he ka osënyini ödra bi tavat adre me elâm e, adre me he ka wâ e hnyi anyin tehi. 25 Tuö ju li cam wâ e nye ba tangen hnyeúcâm, me jeköwem wâ e nye beic: ke u je ha, ka habe, E ûnyi baú: e ba; anyin oge hia but betenge ge ta je atkanyua, ke oge me he bala ka hnu hotudra. 26 Ame hmehma at venöu at ka wâ e, helâe ame he ka hmehma lap anyi Isaraela; walödra e ta je than, me ta je taben, me tavat bihut, me ta je perofeta; 27 wale tavat adre me ha ka hnyiban utö, ka habe, Kamök u; me ka veto, U je hnöku nya: anyin adre me hotudra könnya, me ca hnyimaködra bi; ke hnyi ûen anyidra vec, adre me he ka ha, ka habe, Todró me omeli öhmun. 28 Ke ewa

je khongom waleji u je ânyâ hobi köu? Hamödrin he ka tot, a ne khan' ödrin he ka omeli u hnyi ûen u me vec hnyin: anyin ae úcú úseiny ânyâm je khong, Juda, me ânyâm je lap.

29 Geü öbun e ivinö mönya? öbun hia öbun e hia but úkxin fuc mönya, haingö Iehova. 30 Oge kot je lakubun ke ûnyi baú bi; adre me ca kap hna n' ödra; hnen anyibun hele vat hna an anyibun je perofeta, helâ me liona at ame ohia. 31 Dö lö, wâ ju hofuc ho Iehova. Hawa, oge hia but helâ me hnyebuba ka at Isaraela? ame ne hnyei ae khömet? anyin a ieu ame ha lakeik, ka habe, Öhmun e monu, öhmun e ca he hmetu köu? 32 Hawa, ame he hlu ka hnying je hna theibâ e, ke hlu ame tep faipoipo ka hnying bi úkhaüen? ke haba lakeik adre me hnying nya hnyi je bong a ca hnân bi aú. 33 U je ti theibi u bi he ka úkócö! anyin a wale u je nâ je momo ae kong ge je hwakecâm. 34 Ke adre me wâ minya hnyi obiny ânyâm je úkhaü dren tavat ae theduoc ae ba hnyikongudrin; oge ca wâ e hnyi dek adre thu ka hnyin, ke hon je ûnyi e hia. 35 Ke so bi, u je ha, ka habe, E ba monu gak; e hnathu, e ame ohmeto anyin hmönyin gak, wâ bi, oge me he ka ivinö möu, anyin a u je ha, ka habe, Oge ca ânyâ hulö. 36 Anyin a ieu u me labö ngenu monu gan me wia dem je gethen? u me he ka hmehma ge Aigupito, helâji me hnâm hna hmehma ge Asuria. 37 Ke u me he ka he úhem e me li hnyamâm hon bâm: anyin a Iehova ame hna degecâ ta je ûnyi u me geju kâu, ke u me ca he ka sot gadra.

### HNyimakan 3.

**H**AIINGÖDRA, ka habe, A ne ke at ame degec âiân, ke ame he gan me ame âiân ke бага bi, hawa, e ame he ka hmetu ka momo? Ame ca he ka ti kong hnyei eling? Ke u je hia but bi ûnyi monu me tavat ae se hia; ke so bi, hmetu ju könnya, haingö Iehova. 2 Bwele thö ka hnyi je dok ae ba leünen ethö, me wâ: ewa dok adre ca tha mokut möu hnyin? U je laba halubahing' ödra eü hnyi je gethen, helâ me at Arabia hnyi hnyebuba; ke u je hia but oikikiâ hnyei ge huâm hna bi ûnyi monu, me hwakecâm ae kong. 3 Anyin a wale adre behânâ je uth we, ke ba but we a biliny; ke hu gam bariny momo hnyi gethen, u je ca hmehma bi 4 Hawa, u

## JEREMIA 4.

me ca he ka hao nya hwân walang ang, Cica, u at ame su nya k'iny tiga ûhnyûkong? 5 Hawa, e ame he bala ka hmönyin? me tuö e ke ne o but obiny? Wâ bi, u je hia but ha me ânyâ ta je ûnyi ae kong me ânyâ wem bi.

6 Ke haba Iehova ame ha kõnya hnyi je bong bongu Josea than, ka habe, Hawa, u je wâ but hnö Isaraela, at ame labö kölu, hna ânyâ? E ame ölö ka hnyi je bucen hia ae beû göranyai ke he hmelen je ûö hia ae hât, me bi ûnyi monu eling. 7 Ke oge me ha hwaban hnen hna ânyâ ta je ûnyi eling, ka habe, E ame he ka hmetu kõnya; ke e ame ca hmetu: ke a wâ but ûnyi e hnen liamekeiny mē, jia Juda at iyawö. 8 Ke oge me wâ but, anyin a hnyi hna bi ûnyi monu hnö Isaraela, at ame labö kölu, me oge me degec e, me ham kâu tusiny thang hna faipoipo, ke so bi, ame ca ot bi Juda at iyawö a liamekeiny mē; ke e ame he minya bi, me bi ûnyi monu. 9 Ke can ame hâhâ kâu he ka bi ûnyi monu, me ame ikiki but hnyei, ke e ame bi ûnyi monu me je veto, me hnyiban je utö. 10 Ke so bi, hnyi ta je ûnyi e hia, haba liamekeiny mē, jia Juda at iyawö, ame ca hmetu kõnya me hnyekon ae bekhöt, ke ame thoi, haingö Iehova. 11 Ke haba Iehova ame ha kõnya, ka habe, E hu omi wisa ge Isaraela, at ame labö kölu, hon Juda at iyawö. 12 He thö me ha ta je hofuc ang hnyi ke keihen hnyi hwadrö, ka habe, Hmetu ju u Isaraela, at ame labö kölu, haingö Iehova; oge me ca he ka ö' bun hnyi hmönyin; anyin a inya at ibetengö, haingö Iehova; oge me ca he ka ip hmönyin nyiele balua. 13 Ke so bi, ogâ thö ânyâm hulö, a u je ânyâ hwakecin ae ikiki kö Iehova Khongom, me he monu unyin je atkanyua hmelen ta je ûö hia ae hât: ke öbun e ca löng hok hofuc haingö Iehova. 14 Öbun na hmetu ju, öbun tavat labö kölu, haingö Iehova; anyin a iny helâ me âiân köbun: ke oge me he ka hum öbun, úsa khaca ûnyi hnyi taun, ke úsa lo ûnyi hnyi lap, me hum öbun Ziona ai: 15 ke oge me he ka ham köbun tavat tuö mamoe hoton hnyekuk bi, tavat adre me he ka ha ö' bun ge metâ me wâhmakhmeto. 16 Ke öbun ka se hia but, me ti osehia hnyei, hnyi je bong eling, haingö Iehova, adre me ca he hmetu ka ha, ka habe, Tangen úhinhnyköu anyi Iehova: ke adre me ca he ka ûnykúme ka hnyin; ke adre me ca he ka ûnykúme gan; ke adre me ca he ka senâ e; ke adre me ca he ka ânyâ

hmetu. 17 Hnyi ûen eling adre me he ka hâiâ Jerusalema, ka habe, theron anyi Iehova: ke adre me he ka úkhacaköu ka hnyin je hnyei hia thithö, ka iö Iehova hnyi Jerusalema: ke adre me ca he hmetu ka hnu hoton je hnyekudra ae újöng me kong. 18 Hnyi je bong eling ame he lap anyi Juda ka tha he me lap anyi Isaraela, ke adre me he ka tha o ûnyi hnyi hnyei hnyi hwadrö ka hnyi hnyei waleji oge ham ka lakamöbun me hnânibun. 19 Ke oge me ha, ka habe, Oge me he ka kâmâu ka ip u unyin je lakon, me ham köu hnyei ae so, a jekhom ae so unyin je döiny ta je hnyei? ke oge me ha, ka habe, Öbun e he ka hao nya, ka habe, Cica; me ca he ka hwiö hmetu gak. 20 E hnathu, öbun e hia but ânyâ hwakecin ae iyawö kõnya lap anyi Isaraela, helâ me momo ame degec âiân ge hwakecin iyawö, haingö Iehova. 21 Adre me löng hofuc hon je dok ae ba lefûnen ethö görany, wale tenge me khöü anyin lakon Isaraela; anyin adre hia but omono dedra je gethen, me hnying Iehova Khongudrin. 22 Hmetu ju öbun tavat öbun e labö kölu, oge me he ka ometo hnöbun je hna kölu. Wâ ju, öhmun e o but köu; anyin a u Iehova Khonguhmun. 23 E hnathu, e ûnyi baû úhadruo ûnyi hnyi je hut, wale imonumonuny hon je bucen: e hnathu, e unyi Iehova Khonguta úhömeli anyi Isaraela. 24 Ke haba hna hmehman ame ohia huliwa anyin lakamöta hwân k' öta tiga hidröu; wale haledra je hnabat mamoe me kau, je lakudra obaga me wahlu. 25 E so ate me mokut hnyi anyita hmehma, ke so ame tubi öta hnen anyita hlohlo: anyin ate hia but ânyâ hwakecin ae kong kö Iehova Khonguta, öta me lakamöta, hwân k' öta tiga ûhnyûkong ke ne o but hnyi bong ang; ke ate me ca hia but löng hofuc ho Iehova Khonguta.

### HNYIMAKAN 4.

**I**SARAELA lö, u je ne he ka hmetu, u me he ka hmetu bi kõnya, haingö Iehova; ke u je ne he ka degec ûnyi hnyi hnyimakök je ikikiâm, u me ca he bi ka he monu: 2 ke u me he ka khemanyin hnyi hnathu, me owisa, me wisa hnyok, ka habe, Kia inya Iehova; ke ame he je hnyei ka ha hnahici ödra gan, me ohobelua gan.

3 Anyin a walang hna ha hnö Iehova ka at Juda me Jerusalema, ka habe, Trohnenâ ju könöbun kânâ ae itremacat ut, ke

## JEREMIA 4.

ca he bi ka belökâ dok ae hu wadekong hnyin. 4 Peritomoni öbun dö kö Iehova, ke hom but ong unen hnyekubun, öbun tavat Juda me aten Jerusalema: wâ e nye gâ but anyik hmönyin helâ me meic, me hlâ, ke ba at ame he ka ume, can úkongon anyibun ta je huliwa. 5 Khetâ thö hnyi Juda, ke haimemenâ thö hnyi Jerusalema me ha, ka habe, Úkhacaköu thö, ate me he ka didrö ka hnyi je taun adre up haginy. 6 Ogöranyâ thö boúdila hnyi Ziona, kec dö ka hnyi dok ae khötkic, ca tot bi: anyin oge me he ka hom okongon úheny hnyi hwadrö, me hnaúhangö ae gan hmâ. 7 Ame he but liona úheny hnyi umen úhnyot, at ame okongoâ je hnyei; e ame he hnyi deny gethen, e ame he úheny hnyi hnen; he ka obâ aten em hnyei, me öba wan ânyâm je taun, me ba but aten. 8 Can e, weikâ ju öbun mano ae gan nân, tenge thö me kuku; anyin ame ca hmetu gata hmönyin ae gan hmâ anyi Iehova. 9 Haingö Iehova, ka habe, Hnyi bong eling ame he ka aú but hnyekon than, me hnyekon je taben; ke ame he tavat bihut ka uthmâhmâ, k' ame he ta je perofeta ka láiâ. 10 Me oge me ha, ka habe, E kölö Than Iehova, e hnathu u je ti omono tavat ang me Jerusalema, me ha, ka habe, Öbun e he ka hu úsököu; ke hwádâ but hele vat ka hnyi hnyok. 11 Hnyi úen e, adre me he ka ha ka tavat ang me Jerusalema, ka habe, Ang ae kahwa únyi ethö je dok ae ba leúnen hnyi hnyebuba cicö hluiny ik hnyei, ca hnân ulec me ânyâwia; 12 ame he ka o hobi könya ang ae hwege úheny e: ke walang ang oge me he ka ha je hna bi hwaban ködra. 13 Wâ bi, e ame he ka o helâ me je úlá, me anyin je kariota helâ me höu: haba haleny je hors e logot hon je aeto. Ekölö gata anyin ate hnaúhangö but. 14 Jerusalema lö, hneú but hnyekom wale hwakecâm ae kong, me u me he ka möt. Ame he ka mokut eú hnyekom je hna únykúme ae kong ke ne o but kehö? 15 Anyin ame ha hofuc úheny Dana, me haimemenâ monu únyi hnyi bucen Eferaima: 16 ha thö ka ta je hnyei: wâ bi, haimemenâ thö ka Jerusalema, a ame he jem tavat tue úheny hnyi hnyei ae sákâú, me kuku göranyai ka hnyi je tauniny Juda. 17 Adre me he ka tot igigilö e, helâ me tavat hmâkâ ta hnyei; anyin a e ame úkhin fuc mönya, haingö Iehova. 18 Hnen dem je gethen me hnâm hna ânyâ hna ohwádâ köu ta je únyi eling; wale ânyâm

hulö: anyin ae hiny e; ame o but ka hnyi hnyekom.

19 Hnyekuk, hnyekuk! oge me vec ut eú hnyi hing hnyik; ame bwebwet hnyekuk eú hnyik; e ca khanönya he ka laba hnyibú; anyin a u je löng ut, hanuk lö, ifucin trutru me hwan vat. 20 Adre me hongot úhangö me úhangö; anyin adre söh hia thö hnyei: adre ie söh umök je uma mano, me anyik je hak mano helâ me thuthubadecmak. 21 Oge me he ka wâ boúdila ke ne o but kehö, me löng ifucin trutru? 22 Anyin ae monu but lakeik, e ca khanö nya hnödra; ödra tavat ae monu, ke ödra tavat adre me ca wâhmakhmeto: ödra metâ he ka ânyâ hulö, ke ca khan' ödra bi he ka ânyâ so.

23 Oge me wâ hmeledrany, ke wâ bi, e ba hwenöiny, ke ba önyen; ke oge me wâ drany ae ba but melam. 24 Oge me wâ je bucen, ke wâ bi, adre me öbubuny, ke haba je hut hia adre me jijing. 25 Oge me wâ, ke wâ bi, e ba but at, ke a hia but ta je meno hia ame gâ ethö. 26 Oge me wâ, ke wâ bi, a hnyotö ta hnyei ae so, ke adre me hagutâ but je tauniny hia hnyi hnyimakö Iehova, hnyi hnyimakan anyin hmönyin ae kahwa. 27 Anyin a walang hna ha hnö Iehova, ka habe, Ame he ka ba wan hnyei hia; ke so bi, oge me ca he ka kot hia. 28 Anyin a wale ame he hmeledrany ka tenge, ke 'ame he ka khömet ut drany: anyin oge hia but ha, me únykúme, ke oge me ca he ka ietra, ke haba khaca oge me ca he ka hmetu úhek e. 29 Ame he taun hia ka kec ge hwan tavat tabö hors, me tavat hlic fana; adre me kec ka hnyi hnyot, me ölö hnyi kic: adre me he ka hna degecâ je taun hia, ke ba at a khaca ame he ka labâ. 30 Ke haba u, ödra ka hia but sei u, ieú u me he ka ânyâ? Eja ke ne u je ne he ka hkaúö u ge úkhaú ae dra vec, me theibi u ge je hmanenanginy gol me ogânâ li emâkâm ge botru, e únyi baú bi hnâm hna he ka ohmanenangi u bi; ame he tavat adre me wedra u ka húkötio u, adre me he ka elâm he ka hlingö u. 31 Anyin oge hia but löng hwatenge helâ me momo ame vec hnyekon, helâ me vec anyin momo ame o nokon a bân, útengien hluiny Ziona, at ame momokhon, me inâ but li hnyamen, haingen, ka habe, Ekölö gak walang ang! anyin ae sényin dut hnyekuk hnyi hnyimakan tavat úhlingö.

HNYIMAKAN 5.

**W**ADRINGÂ thö je gethen hnyi  
Jerusalema, me wâ walang ang,  
me khana, me elâm hnyi je dok ae nedrong,  
ame ne he ka wâ at, ame ne hu at ame  
ânyâ wisa me elâm hnathu; me oge me he  
ka hna anyin hulö. 2 Ke adre me ne he  
ka ha, ka habe, Kia inya Iehova; e hna-  
thu, adre me khemanyin thoi. 3 Iehova  
lö, hawa, ame ca wâ ûnyi ae hnathu hnen  
li emâkâm? u je kuc ödra ke adre me ca  
vec bi; u je öâu' ödra, k' ödra höcö bi he  
ka kap hna nâ: adre hia but onâkâ je  
hnyimaködra hon veto; ödra höcö bi he ka  
hmetu. 4 Me oge me ha, ka habe, Ame  
ne ta je theduc ang: adre me hwen monu;  
anyin ae ca khan' ödra bi gethen de Iehova,  
me hna owisa hnen Khongudrin: 5 oge me  
he ka he ka tavat ae ûnyi hnathu, me fuc  
ködra; anyin ae khan' ödra gethen de  
Iehova, me hna owisa hnen Khongudrin.  
Ke haba tavat ang adre hia but tha  
thamuâ hnaûhûkâlâkôuâ, me thu je wen.  
6 Anyin a wale ame he liona ûnyi hnyi  
hnyot ka hling' ödra, ame he lukoiny sahac  
ka sei ödra, ame he lepad ka tuö anyidra  
je taun, ame he ka oloû usuki' ödra tavat  
adre me didrut ûnyi hnyi hnyin: anyin a  
ödra ibi ose úkhin fuc, ke ödra ose hia  
kölö. 7 Oge me he ka kâmâu he ka hnö  
u? haba je lakom adre hia but hna degeci  
nya, adre me khemanyin ge tavat a ca je  
khong bi: hnyi úen oge me ha ö'dra sekun-  
i ödra, adre me bi ûnyi monu, me úkhaca-  
kôuâ je deö at hnyi je uma umen momo  
hnyi gethen. 8 Haba hnyi je hnyoma-  
katu ödra úcû me je hors adre me han so:  
adre me ve kuku ka ta je laâiân ke at.  
9 Hawa, oge me ca he ka bi hwaban can  
ta je ûnyi e? haingö Iehova: ke ame ca  
he hanuk ka bi hwaban ka hnyi hnyei a  
helâe?

10 Ôliâ thö je hna up hagin, me hlingâ;  
ke ca he bi ka ohia hia: hom but je anginy,  
anyin a ca je ûnyi e anyi Iehova.  
11 Anyin a hia but lap anyi Isaraela, me  
lap anyi Juda ânyâ hwakecin ae iyawö  
könya, haingö Iehova. 12 Adre hia but  
ivinö Iehova, me ha, ka habe, Ca e bi; ke  
ame ca he ka o köta ûnyi ae kong; ke ate  
me ca he ka wâ hele vat me hmiâ: 13 ke  
ame he bi je perofeta ka helâ me ang, ke  
ca eû bi hnyidrin hofuc hwan Khong: adre  
me he ka ânyâ helâe ködra bi. 14 Anyin

a wale walang hna ha hnö Iehova Khongon  
sabaoth, ka habe, Anyin a öbun e ha hofuc  
e, wâ bi, oge me he ka wia hok hofuc hnyi  
hnyimâm me me meic bi, ke hnyei ang, me  
me utö, ke e ame he ka ön ödra. 15 Wâ  
bi, oge me he ka hom tavat ûnyi hnyi dok  
ae sâkâû köbun, lap anyi Isaraela, haingö  
Iehova: hnyei ae hwege, hnyei kâû adrem,  
hnyei ae ca khanö u hwan idra, ke u me ca  
wâhmakhmetoâ bi ifucidra. 16 Helâ me  
erkemok adre khöng tangen anyidra je  
fana, ödra tavat hwege hia. 17 Ke adre  
me he ka an hnâm hna meno, me âm jeû,  
wale ae úcû he ka han hnen lakom obaga  
me wahlu: adre me he ka an halem je ma-  
moe, me kau; adre me he ka an halem je  
vine, me halem je meta: adre me he ka  
kot ge hele vat ânyâm je taun adre up ha-  
giny, waleji u je labageju kâû. 18 Ke so  
bi haba hnyi je bong eling, oge me ca he ka  
hling' öbun hia, haingö Iehova. 19 Ke  
öbun e he ka ha, ka habe, Anyin a ieu  
Iehova Khonguta ame ânyâ köta ta je ûnyi  
hia eling? u me he ka thu ködra, ka habe,  
Anyin a öbun e digic nya me bi athnyaba  
ka je khong kanyua hnyiibun hnyei, awe  
helâe öbun e he ka bi athnyaba ka je atka-  
nyua hnyi hnyei a caibun bi.

20 Ha thö e ka lap anyi Jekob, me haimenâ  
hnyi Juda me ha, ka habe, 21 Löng ju  
hofuc walang ang tavat ae monu me ba hnye-  
kudra: tavat ae hu li ecmak, k' adre me ca  
wâ bi; e hu li hnyiköny k' adre me ca  
löng bi: 22 Hawa, öbun e ca outö nya!  
haingö Iehova: ke öbun e ca he ka öbu-  
buny gak, at ame ip öny hnân hnyigöulen  
köiö, hoton hnanyibu ae tethmâ, m' adre  
me ca he bi ka hanyâûâ e. 23 Ke haba  
tavat ang e hu gadra hnyok ae újüng, me  
úkhin fuc; adre me thu musi me he but.  
24 Ke adre me ca ha eû hnyi je hnyeku-  
dra, ka habe, Ate me he walang ang ka  
outö Iehova Khonguta, at ame ham we,  
wale a bân, me beliny hnyi úen e; at ame  
tuö hobi köta je wikiny menu adre thu.  
25 Hnen hwakecibun ae kong hna ohavâ  
bi ta je ûnyi eling ke hnen anyibun je hulö  
hna thelöng so. 26 Anyin adre wâ tavat  
ae kong unyin lakeik: adre me tuö, helâ  
me úyâûiny at ame töu hnewe: adre me  
hwa offic me me hnok at. 27 E unöngötö  
umödra je uma ge thoi, helâ me tangen  
ame unöngöt ge je meno ame gâ: anyin a  
wale ödra gan hmâ me tren omjeû. 28 Ödra  
pipikhenya me habubut; eke, adre me  
beönua hnyi hulö: adre me ca ivinö, wale

JEREMIA 6.

ivinö hobi kâu at a mokcu kamen, m' adre me he ka sot; ke adre me ca owisa ge wisainy at ae theduoc. 29 Hawa, oge me ca he ka bi hwaban can ta je únyi e? haingö Iehova: ke ame ca he bi hanuk ka bi hwaban ka hnyei a helâe?

30 Adre hia but ânyâ hnyi hnyei únyi hnân lâiâ ke ikiki: 31 je perofeta adre me profeta thoi, ke haba tavat bihut me adre me musi únyi gadra bi; ke adre me weny helâe hnen lakeik: ke ieú öbun e he ka ânyâ hnyi obiny e?

HNyimakan 6.

**T**A je lakon Beniamina lö, kec bemöt dö únyi hnyi wanben Jerusalema, ke tûâ thö khoto hnyi Tekoa ke ogörányâ thö haten hnyi hon Beth-akerem: anyin ame selâdrâ únyi ae kong úheny hnyi hwadrö, me hna úhangö ae gan. 2 Oge me he ka subâ degecâ hluiny Ziona ae hmanenang me menyik. 3 Ame he ka o kâu tavat tuö mamoe tha ödra me haledra ta je hnahat meno; adre me he ka ötilâ umödra je uma mano igigilö e, adre me he ka ve úhalin hnyi ta je hnödra. 4 Penapena thö he ka vat mē; todrö, me ate me he ka ölö hnyi jebigö. E kölö gata! anyin ae haú but seúnö, e beú but je hmenon sahad. 5 Todrö, m' ate me he ka ölö hnyi hnyinghet, me ate me he ka ohia je uma umen tuhau. 6 Anyin a hia but Iehova tuhan sabaoth ha, ka habe, Sö but ta je úö, ke hlu thö göranyai kânâ cicö Jerusalema: wale taun adre me he ka bi hwaban; ae ti hu úöveci eú hnyin e. 7 E ame hingälâ hwakecin ae kong helâ me pupua ame hingölö hnyin köiö: adre me löng hnyin e úokonguny me hna söh; e bala bi hnyi hnyimakök mok me je aat. 8 Jerusalema lö, kap ju hna únö, wâ e nye hwiö hnyekuk gam; wâ oge nye he ka öba wanâm, me u me hnyei adre me ca labâ.

9 Walang hna ha hnö Iehova tuhan sabaoth, ka habe, Adre me he ka hlo je kolon Isaraela helâ me hnyei vine: hmetu ju hnyamâm ka hnyi je tangen, helâ me at ame tau je wan vine. 10 Oge me he ka fuc me kou köia, me me löng? wâ bi, adre ca peritomonâ je hnyikönyödra, me me ca khan' ödra he ka tevehlöng: wâ bi, adre me wia hofuc ho Iehova me me hnân bi úhiö; adre me ca senyinâ e. 11 Anyin a wale, oge me unöngöt ge hmönyin anyi Iehova; iny senyin dut ge hok hnyok:

hingälâ but e hon je thöth eú hnyi gethen, me hon wahidröu adre me tha úkhacaköu: anyin adre me he ka tha hom бага me áiân momo, me hingat me at ae se hia hunainy. 12 Ke ame he ka umen ke keihen umödra je uma, tha e me ta je hnyei me omomo: anyin oge me he ka hai hnyamök hon aten hnyei, haingö Iehova. 13 Anyin a hwân ge tavat ae úhnyükong gadra, ke ne o but ge tavat ae gan gadra, ödra hia thithö adre me behnyekudra omjeú; ke hwân ge ta je perofeta ke ne o but ka tavat bihut adre me ânyâ thoi. 14 Ke adre hia but ometo úhnyükongoâ je aat hnân lakeik me ha, ka habe, E hnahic ut, e hnahic ut: ke ba bi hnahic. 15 Hawa, ödra hmehma can ta je únyi ae ikiki adre me ânyâ? e ba, ke ba ong hmehma gadra, ke ca khan' ödra hmehma: anyin a wale adre me he ka tha ta me tavat adre me ta: hnyi úen oge me he ka sen' ödra adre me he ka haú, haingö Iehova.

16 Walang hna ha hnö Iehova, ka habe, Todr' öbun hnyi je gethen, me wâ, me hnö je gethen kâu adrem; ewa gethen ae so, me vhenö e, me öbun e he bi ka wâ hna menâ hobi kâu je hanubun: ke haingödra, ka habe, Öhmun e ca he ka vhenö e. 17 Ke oge me otilâ tavat he ka tu' öbun he ka ha, ka habe, Löng ju ifucin trutru; ke haingödra, ka habe, Öhmun e ca he ka löng. 18 Anyin a wale löng ju öbun ta je hnyei, ke haba öbun tavat öbun e úkhacaköu, khan' öbun dö ta je únyi gadra. 19 Hmeledrany lö, löng ju: wâ bi, oge me he ka hom únyi ae kong ka tavat ang, wale troban je únykümenödra, anyin adre me ca hia but löng hok hofuc; ke haba anyik hnanyibu adre hia but hna degecâ e. 20 Hnan eú könya libanu adre me oâ úheny Sheba, me úö ae hnebwia únyi hnyi hnyei ae sâkâú? oge me ca kap soâ je hüdiny anyibun leú, ke oge me ca senyinâ anyibun ta je hut. 21 Anyin a wale walang hna ha hnö Iehova, ka habe, Wâ bi, oge me he ka ip ta je únyi hnân ohavâ hnyi hnyimakan tavat ang: ke ame he je kamen me je lakon ka tha haú hnyin e; ame he ka tha mok at me waeny.

22 Walang hna ha hnö Iehova, ka habe, Wâ bi, ame he ka o tavat úhedra hnyi hnyei hnyi hwadrö; ke adre me he ka obwebwelâ ke hnyei ae gan únyi hnyi je can hmeledrany. 23 Adre me hok cafana me ö; ödra tavat beöveci, me ca betenge; ame ü ifucidra helâ me köiö, ke adre me

JEREMIA 7.

tabá je hors ; adre me ve tot metá hia, helá me tavat ka hnyi vat, úcom, hluiny Ziona. 24 Ate hia but löng úthumetu gadra ; e sēnyin dut ta je hnyamōta : ame hom til' ōta hnen hlōuhlōu me vec, helá me momo ame he ka hnokoá. 25 Ca he but ka hnyi ta hnyei, ke ca vheno gethen ; anyin ae hu hele vat eling anyin iwabnaihmiōny, me hnân ootá hnyi je ke keihen hia. 26 Nokon ik hnyei a hlu lö, oweikö u ju ge mano ae gan nân, seset ju hnyi hnabadrōu : tenge thungaú thō helá me at ame tenge ge nokon a khaca, ame tenge thungaú hwege ; anyin ame he ka ie o kōta at sei. 27 Oge hia but otillō hnân tap tue me hnabâ unyin lakeik ; me ame he ka khanö u me cubec dedra gethen. 28 Ödra tavat újōng hia, adre me tha ngenu me tavat úhaiö : ödra bras me fao : ödra tavat iyawö hia thithö. 29 Ame sâ hwege únyi hnân túa meic ; ke haba meic ame an led ; ame ányáwia báúú hnen at ame leú fao ; ke adre me ca oc degecá tavat ae kong. 30 Adre me he ka hwenyi iödra sileva adre degec, anyin a hia but Iehova digic ödra.

HNYIMAKAN 7.

**W**ALANG hofuc ame o kö Jeremia únyi ga Iehova, ka habe, 2 Todrö hnyi hnyigöulen uma umö Iehova, ke haimemená thō eling hofuc ang me ha, ka habe, Löng ju hofuc ho Iehova öbun hia thithö at Juda öbun e dit hnyi je homagöule ang he ka khudrung kö Iehova. 3 Walang hna ha hnö Iehova tuhan sabaoth Khongu Isaraela, ka habe, Ányáwia wia thō debun je gethen, me je hwakecibun ; me oge me he ka olab' öbun hnyi dok ang. 4 Ca he öbun ka labageju ka ta je hofuc thoi me ha, ka habe, Umö Iehova, umö Iehova, ödrin hia eang. 5 Anyin a öbun e ne ti ányáwia debun je gethen, me je hwakecibun ; öbun e ne ti owisa ka ke at me ke at ; 6 öbun e ne ca ovecá atkanyua, me at a mok kamen, me safac, me ca hingálá bi dra ae ba hnyikongon hnyi dok ang, me ca hnu hoton ke je khong, m' adre me okongu öbun : 7 awe, oge me he ka olab' öbun hnyi dok ang hnyi hnyei waleji oge ham ka lakamöbun, ke ne o but nyiele balua. 8 Wá bi, öbun e labageju ka ta je hofuc ae thoi, ae ba troban. 9 Hawa, öbun e he ka venöu, me úhlingö, me bi únyi monu me khemanyin thoi, me leú utö ae bo so kö Baala, me hnu hoton

ke je khong, wale ae ca khan' öbun, 10 me o me tot hnyi hnyimakök hnyi uma eang, waleji adre ip hon e iök me ha, ka habe, Adre hn' öhmun ; m' öbun e he ka ányá ta je únyi hia eling ae ikiki? 11 Hawa, op umen tavat venöu hnyi hnyimaköbun uma eang wale adre ip hon e iök? Wá bi inya oge wá but, haingö Iehova. 12 Ke he thō walang ang ka hnyi hnök ehac hnyi Silo waleji oge bök ka ip iök hnyin, ke wá thō hnök hna ányá káu can hulö anyin lakeik a at Isaraela. 13 Ke walang can hnöbun hna ányá ta je huliwa hia eling, haingö Iehova, ke oge me he ka fuc köbun, oge me vesá hnyi hnyomakatu me fuc, ke öbun e ca löng bi öbun ; ke oge me haw' öbun ke öbun e ca ieu bi : 14 anyin a wale oge me he ka ányá ka uma wale adre ip hon iök waleji öbun e labageju káu, me ka hnyi dok waleji oge ham köbun me lakamöbun helá me hnök hna ányá ka Silo. 15 Ke oge me he ka digic öbun únyi hnyi hnyimakök, heláji me hnök hna degec je liamekeiny möbun hia, je mátráni Eferaima hia.

16 Anyin a wale u me ca he ka hijö tavat ang, ke ca ogöranyá tenge me hic hobi ködra, ke ca khöu bi könya : anyin oge me ca he ka ling u. 17 Hawa, u me ca wá hnödra je hna ányá hnyi je tauniny Juda me je gethen hnyi Jerusalem! 18 Ta je wanakat adre me thigö utö, ke haba je kamen adre me hú meic, ke haba je momo adre me up falawa, me adre me ányá je ong areto hobi káu momo thaniny drany, me hingálá ka ke je khong je hudiny ic, me adre me ohmönyini nya? 19 Hawa, adre me ohmönyini nya? haingö Iehova ; ke ca ödra bi, me ame hmehma ta je hnyimaködra? 20 Anyin a wale, walang hna ha hnen Than Iehova, ka habe, Wá bi, ame he ka hingölö, but anyik hmönyin me anyik wathethöt hon dok ang ; hnyi hon at me hon meno, me hon je úöiny hnyot, me hon wan káná ; ke ame he ka ubáblá, k' ame ca he bi ka mok.

21 Walang hna ha hnö Iehova tuhan sabaoth Khongu Isaraela, ka habe. Tha hom d' öbun je hudiny leú me anyibun ta je hut, ke an d' öbun ta je utiö. 22 Anyin oge ca fuc ka je lakamöbun me huna ködra hnyi úen oge hum ödra únyi hnyi hnyei Aigupito, ge ta je hudiny leú me ta je hut : 23 ke wale bi ang únyi oge huna ködra, ka habe, Löng ju öbun hok hofuc, ke oge me he ka Khongubun, ke öbun

JEREMIA 8.

e he ka lakeik : ke tha vheno th' öbun gethen oge hûna, m' öbun e so. 24 Ke adre me ca löng bi, me tevehlöng, ke adre me vheno hnödra bi hna ûhnenamö hoton ihwegien hnyekudra ae kong ; me he nulötudra, ke ca hnyimaködra bi. 25 Hwân hnyi bong a he but hnyin je lakamöbun ûnyi hnyi hnyei Aigupito ke ne o but hnyi bong ang, oge hia but kunâ köbun je athnyabaik hia a je perofeta, me vesäkong hnyi je bong me ûkhûnöng : 26 ke so bi adre me ca ling nya bi, me tevehlöng, ke adre me ohwegiâ je nyidra : me ânyâ hwakecin ae kong hmönyin hon je lakamödra.

27 Ke u me he ka ha hia ta je hofuc ang ködra : ke adre me ca he ka ling u : u me he ka haw' ödra ke adre me ca he ka ieü köu. 28 Ke u me he ka ha ködra, ka habe, Walang hnyei adre me ca löng bi ifuci Iehova Khongudrin, me ca kap hna ünö : a moku hnathu, adre subâ degecâ thö ûnyi hnyi ta je hnyimödra.

29 Jerusalema lö, subâ luâ but leûnen bâm, me degec e, ke tenge thungaû thö hnyi dok ae görany ; anyin a hia but Iehova degec me hna but dö e ame hmönyin kâu. 30 Anyin a ânyâ ûnyi ae kong hnen lakon Juda hnyi hnyimakök, haingö Iehova : adre hia but ip anyidra ta je ûnyi ae ikiki hnyi hnyin uma waleji oge ip iök hon, m' adre me okongoâ e. 31 Ke adre me op ta je dok ae göranyin Tofet, ae hnyin hnyigöulen bucen anyin je laku Hinom, me adre me thong je lakudra бага me hlu hnyi meic ; waleji oge ca ûkhûnöng, ke oge ca ûnykûme. 32 Anyin a wale, wâ bi, ame he ka o je bong haingö Iehova, ke adre me ca he hmetu ka haiö Tofet, me hnyigöulen bucen anyin je laku Hinom, ke so bi hnyigöulen bucen hnân hlingâ at : anyin adre me he ka khön komok hnyi Tofet ke ne o but ame ba but hnen. 33 Ke ame he je unyin tavat ang ka hnân an je meno ame gâ ethö, me je menoiny hnyot ; ke ba at ame he ka bwe-bwelâ. 34 Ke oge me he ka obuhlumo hnyi je tauniny Juda, me je gethen minya hnyi Jerusalema, hwan senyin, me hwan hobâ, me hwan li at ödre tep faipoipo : anyin ame he ka ba aten hnyei.

HNyimakan 8.

**H**NYI ûen eling, haingö Iehova, adre me he ka hom je jeien je than

Juda, me je jeien je taben, me je jeien tavat bi hut, me je jeien ta je perofeta, me je jeien aten Jerusalema ûnyi hnyi ta je erkemok : 2 ke adre me he ka ve ip ödra hnyi hnyimakan seûnö me tehi, me je dö hia hnyi drany, waleji adre me hnyok kâu, me bi athnyaba kâu, me hnu hoton, me elâm, me khudrung kâu : adre me ca he ka ûkhacaköu me könim ödra ; adre me he ka hnân tatet hnyi kânâ. 3 Ke adre me he ka bemok hon bemöt hnen ta je kolon hia anyin lap ang ae kong, waleji adre me tiga laba bi ju hnyi ta je dok oge ob' ödra ka hnyin, haingö Iehova tuhan sabaoth.

4 Ke u me he ka ha ködra, ka habe, Walang hna ha hnö Iehova, ka habe, Hawa, ame he tavat ka ta, me ca tot hmetu? hawa, ame he at ka saû, ke ame ca he ka hmetuhmetu? 5 Anyin a ieü ame hmetuhmetu tavat ang wale Jerusalema ke ame labö kölu balua? adre me kât hmâ thoi ödra, höcö he ka hmetu. 6 Oge me tevehlöng me löng, ke adre me ca fuc wisa : e ba at ame ietra anyin hulö me ha, ka habe, Ieü hnök hna ânyâ? ödra hia thithö adre me ve hmetu ka hnyi dedra je gethen, helâ me hors ame ie wadring ka hnyi vat. 7 Eke, e khana but kasi-dainy drany ûen e : ke a wâhmakhmeto but meköta, me wahalep, me aguru, ûen adre me o' hnyin ; ke ca khana bi lakeik hna otillâ hnö Iehova. 8 Ieü gabun öbun e ha, ka habe, öhmun tavat ae metâ, ke e unyihmun hnanyibu anyi Iehova? Ke wâ bi, a hia but huliwa iyawö pen ae thoi anyin tavat sihnalimen. 9 A hmehma but tavat metâ, adre me monumonu but, me hnok dö : wâ bi, adre hia but hna degecâ hofuc ho Iehova ; ke ieü bongon metâ unyidra? 10 Anyin a wale oge me he ka ham je laöiödra ka keihen, me je idra ka keihen he ka labâ : anyin a hwân ge tavat ae ûhnyükong, ke ne o but ka tavat ae gan ödra hia thithö adre me behnyekudra omjeü, hwân ge tavat perofeta, ke ne o but ka tavat bihut, ödra hia thithö adre me huliwa iyawö. 11 Ke adre hia but ometo ûhnyükongo aat hnân hlu a lakeik me ha, ka habe, Hnahic ut, hnahic ut ; ke ba bi hnahic. 12 Hawa, adre me hmehma hwaban hnödra hna ânyâ ûnyi ae ikiki? e ba, ödra ca hmehma bi, ke ca khan' ödra bi he ka hmehma : anyin a wale adre me he ka tha ta me tavat adre me ta : hnyi ûen adre me sen' ödra, adre

JEREMIA 9.

me he ka haú, haingö Iehova. 13 Oge me he ka ti ohi' ödra, haingö Iehova : ame he ka ba wan hnyi je ivine, ke ame he ka ba wan meta, ke ame he ka melega je lan ; ke ame he ka hia gadra ta je únyi o ge hia but ham ködra. 14 Ke ieu' ate me he ka laba monu gan? Úkhacaköu thö, me ate me he ka dit hnyi je taun adre up haginy, me laba hnyibú eling: anyin a Iehova Khonguta ame öhnyibú öta, me habelita ge köiö adre me mekiny, anyin ate me hia but anyá hwakecin ae kong kö Iehova. 15 Ate me halubahingen hnahic, ke ba bi so, ke ate me halubahingen úen metu, ke wá bi, hlohlo bi! 16 Ame o but úheny Dana hwan hna mená hwege hnen haleny je hors: ame tha öbubuny hnyei hnyi úkukuiny anyin tavat hwege, ke adre me o me an hnyei me ta je únyi hia hnyin: taun me tavat adre me labá e. 17 Ke wá bi, oge me he ka kuná öhbun ta je on, me je vaipa a ca hnán ohnamá; m' adre me he ka úlú öbun, haingö Iehova.

18 E na kxanönya ju he ka otubweli nya hnyi hlöuhlöu! e sényin dut hnyekuk eú hnyik. 19 Wá bi, útengien hluiny ik hnyei únyi hnyi hnyei ae sákáú: hawa, ca e bi Iehova hnyi Ziona? ke ca e bi ling thaniny? anyin a ieu' adre hia but ohmönyini nya ge anyidra je hnatheat, me anyidra ta je únyi baú a je atkanyua. 20 A um dö úen menu: obiny ju ang honivakeny, ke adre ca omeli öta bi. 21 Oge aat dö, anyin a aat dö hluiny ik hnyei: iny hlit ut ame o but könya uthmáhmá. 22 Hawa, e ba basama hnyi Gileada? e ba at eling ae tren bubuny? anyin a ieu' adre me ca omelö hluiny ik hnyei.

HNyimakan 9.

**E** NA köiö ju bök, ge pupuainy deköien li emakök, me inye he ka tenge hnyi lany me lit can tavat adre me hlingá aten hluiny ik hnyei! 2 E na hu ju gak hnyi hnyebuba omtabaga wale hna mená hnen tavat adre me he, me inye he bi ka hna lakeik, me he digic ödra! anyin a ödra hia thithö tavat bi únyi monu úkhacaköu anyin tavat iyawö. 3 Ke adre me lau je bohmödra helá me anyidra je cafana hnán thoi; ke adre me hwege hnyi hnyei ke ca hnán bi hnathu: anyin adre me ogáná tilá anyidra hulö, ke ca kxan' ödra inya haingö Iehova. 4 Ve

wá ju öbun je lahanöbun, ke ca labageju öbun ka je liamekeiny: anyin ame he je liamekeiny hia thithö ka iobö. 5 Ke adre me he ka ve iyawá je lahanödra, me ca ha bi hnathu; adre hia but ná je bohmödra he ka fuc thoi; adre sényin dut anyin anyá hwakecin ae kong. 6 E bi, hnyabam hnyi wanben iyawö; can iyawö ödra höcö he ka wáhmakhmetu nya, haingö Iehova.

7 Anyin a wale walang hna ha hnö Iehova tuhan sabaoth, Wá bi, oge me he ka oköi' ödra, me cubic ödra; anyin a ieu' hmetu ke únyi oge me he ka anyá, can hluiny ik hnyei? 8 Fana adre me mekiny ta je bohmödra; e ame fuc iyawö: ke at ame ha úsoköu ge hnyimen ka ke at, ke e ame ip hnán hobi káu e eú hnyi hnyekon. 9 Hawa, oge me ca he ka sen' ödra can ta je únyi e? haingö Iehova: hawa ame ca he hanuk ka bi hwaban ka hnyei a heláe?

10 Oge me he ka tenge thungau can ta je bucen, me khumöng tenge can ta je dok a je sajilat hnyi hnyebuba, anyin adre thong degecá thö, me me ca vheno hnen at; ke ca khana tavat he ka löng hwan je meno; ame tha hia but je meno ame gá ethö me je menoiny hnyot. 11 Ke oge me he ka wia Jerusalema me me helá me je hna digic thatúnyi, me op umen je luko; ke oge me he ka öba wan je tauniny Juda, me me ba but at ama labá. 12 Ie at ae metá me me wá únykúme e? ke ie at ame ha káu hnen hnyimö Iehova, me me haimemená e? anyin a ieu' ame kong ut hnyei adre thong helá me hnyebuba, me me ba at ama vheno?

13 Ke haingö Iehova, ka habe, Anyin adre hna degecá anyik hnanyibu waleji oge hia but ip hnyi hnyimaködra, me ca löng bi ifucik, me ca hnu bi hoton; 14 ke adre hia but hnu hoton ihwegien hnyekudra. me je Baala, waleji a n' ödra hnen lakamödra: 15 anyin a wale, walang hna ha hnö Iehova tuhan sabaoth Khongu Isaraela. ka habe, Wá bi, oge me he ka ha ö' dra ge khöhlöng wale tavat ang, me habelidra ge köiöiny úö adre me mekiny. 16 Ke oge me he ka ovesei ödra ka hnyi ta je hnyei a ca wá bi gadra me hnen lakamödra: ke oge me he ka kuná hotudra hele vat, ke ne o but oge hia but öau' ödra hia.

17 Walang hna ha hnö Iehova tuhan sabaoth, ka habe, Únykúme ju öbun, ke hawá thö je momo tenge, m' adre me he jem: ke hom dö je momo ae metá, m' adre



## JEREMIA 10.

me he jem : 18 m'adre me ie tenge thungaú gata, me me hingölö je deköiö hnyi je emaköta, me khukhula köiö únyi hnyi je bademaköta. 19 Anyin adre me löng hnyi Ziona hwan tenge thungaú, ka habe, Ekölö adre sei öta! e gan hmâ anyita hlohlo, anyin ate hia but hna degecâ hnyei, anyin adre hia but kia je hnyabata. 20 Omomo lö, löng ju hofuc ho Iehova, ke tevehlöng ju ifucin hnyimen, nâ thö lakubun wahu ge bongon tenge thungaú, ke ve nâ thö je lawaebun ge khumöng tenge. 21 Anyin ame o but mok a deny hnyi anyita je mamalama, ame dit ka hnyi umöta je umen than : he ka subâ degecâ ta je wanakat eú hnyi hwanuma, me wahidrou eú hnyi ta je gethen. 22 Ha thö, ka habe, Walang hna ha hnö Iehova, ka habe, Ame he tavat adre mokcu ka ta hnyi ta hnyei helâ me tatet, me helâ me je thi hwit hwaban at ame subâ, ke ba at ame he ka hlu ödra.

23 Walang hna ha hnö Iehova, ka habe, E so e me ca he at ae metâ ka hobâ anyin metâ, ke ca he at ae hwege ka hobâ ihwengien, ke ca he at tren omjeu ka hobâ tang omjehen : 24 ke so at ame hobâ he ka hobâ únyi ang, a e ame wâhmakhmeto me khana inya, a inya Iehova at ame ânyâ betenge, me owisa, me únyi ae úcú eang hmeledrany : anyin a inya oge me senyin ka ta je únyi eling, haingö Iehova. 25 Wâ bi ame he ka o je bong, haingö Iehova, ke oge me he ka tha bi hwaban ka tavat adre me peritomonâ hnyi hna ca peritomonâ ödra ; 26 at Aigupito, me Juda, me Edoma, me je laku Amona, me Moaba, me tavat hia adre me giâ ke keihen leünödra, tavat adre me laba hnyi hnyebuba : anyin adre ca peritomonâ je hnyei hia, ke adre ca peritomonâ lap anyi Isaraela hia eú hnyi je hnyekudra.

### HNYIMAKAN 10.

**L** AP anyi Isaraela lö, löng ju hofuc ame ha Iehova köbun : 2 walang hna ha hnö Iehova, ka habe, Ca he öbun ka nâ hwakecin je hnyei, ke ca outen je haten drany ; anyin ame outen e hnen ta je hnyei. 3 Anyin ae únyi baú bi hwakecin ta je hnyei : anyin a keat ame sö úö hnyi hnyot, huliwa anyin li hnyamen at huliwa ge gö. 4 Adre me theibâ e ge sileva me gol, ke adre me ohmâ e ge fao me hama, me me ca bwebwet bi. 5 Ödra úcú me pama adre kave, ke ca khana bi fuc : adre me labö vaden, anyin ae ca khana he. Ca he bi

ka out' ödra ; anyin ae ca khan' ödra he ka okongo, ke haba khaca, me ca khan' ödra bi he ka ânyâ so. 6 E ba ju ke at ae úcú möu Iehova : u gan hmâ, ke gan hmâ iâm hnyi man. 7 Ie at ame ca he ka outö u, Tuhan ta je hnyei? anyin ae úcú u : ke haba khaca, me ba ju ke at ae úcú möu unyin tavat ae metâ hia hnyi ta je hnyei me hnyi ta je dökhudra hia. 8 Ke ödra tavat a hwakecin meno me monu hia : haba hna únö hnen je hnatheat wale thibi e a hnyiban utö. 9 Adre me hom sileva adre kot halelöüâ únyi Tasesa, me gol únyi Ufaz, huliwa anyin at ame khavi, ke hnen hnyamen at huliwan gol : haba je khaüödra ae udrudrá me udrudrá hlit : huliwa hia anyin tavat a ödra metâ huliwa. 10 Ke Iehova Khong ae hnathu, e thibi Khong ae möt, me Than nyiele balua : ame öbubuny hmeledrany hnyi anyin hmönyin, ke ca khana ta je hnyei ka tot hmâ hnyi anyin wathethöt.

11 Walang hnöbun hna he ka ha ködra, ka habe, Haba ta je khong wale adre ca op drany me hmeledrany, ame he ka hi' ödra eang hon kânâ hia ; me hnyi hmeledrany. 12 E thibi at a op kânâ ge maniny man, e ame otilâ hmâ hmeledrany ge anyin metâ, me ulolo drany ge anyin wâhmakhmeto : 13 e ame fuc k' ame bwebwelâ ta je köiö ethö hnyi drany, ke ame öliâ hai únyi hnyi can hmeledrany ; e ame ânyâ hucuce hobi kâu we, me hom ang únyi hnyi tang omjehen. 14 Ame ve hwakecin meno bi tavat hia, me ba wâhmakhmeto unyidra : a ve hmehma but tavat huliwan gol hia ge anyidra bi hnatheat : anyin ae thoi but anyin idola adre oköiâ, ke ba homenâ eú hnyidrin. 15 Ödrin bi a únyi baú me hnân iyawö : hnyi úen bi hwabödrin, ame he ka hi' ödrin. 16 E ca helâe jekhöt Jekob : anyin a e at ame op hia ; ke Isaraela tribuiny jekhon : Iehova tuhan sabaoth ien.

17 Çkhacaköüâ thö je tang omjehem únyi hnyi hnyei, u at ame labâ hnabâ. 18 Anyin a walang hna ha hnö Iehova, ka habe, Wâ bi, oge me he ka kúlûâ helâke me veto, tavat adre me labâ hnyei walang ang, me hom úhnyúkongu ödra, me me khan' ödra thö. 19 Ekölö ge hnök aat! ame han gan hmâ : ke haingök, ka habe, E hnathu wale anyik bi vec, ke oge me he ka hokhnyokâ. 20 E kong ut umök uma mano, ke mou but anyik je tö hia thithö : a he but lakuk, ke ba but, e ba hmetu at he ka ulolo umök uma mano, me otilâ anyik hak mano. 21 Anyin a hwa-

## JEREMIA 11.

kecin dut meno tavat tuö mamoe, me ca elâm bi unyi Iehova; anyin a wale, e ba sot gadra, ke ame vese hia haledra je hna hat mamoe. 22 Hwan úthumetu, wâ bi, e but ang, ke gan hmâ imonumonuny úheny hnyi hnyei hnyi hwadrö, he ka wia je tauniny Juda me me ba wan, me hnen je luko. 23 Iehova lö, e khanö nya but a ca hanymen bi at deny gethen: e ca hanymen at ame he ka owisa hnen je hna okca. 24 Iehova lö, nö nya thö, ke ányâ thö hnyi úen ae úcú: ca hnyi ányâm hmönyin wâ e nye hia but. 25 Hingâlâ but ányâm hmönyin hon je hnyei ae ca khan' ödra u, me hon je lap adre me ca hawâ bi iâm: anyin adre hia but öaúö Jakob, eke, adre hia but utâ e, me ohia e, me öba wan hnyaban.

### HNYIMAKAN 11.

**W**ALANG hofuc ame o kö Jeremia únyi ga Iehova ame ha, ka habe, 2 Löng ju öbun je hofucin úhibinyköu ang, me ha ka tavat Juda me aten Jerusalema; 3 ke ha thö ködra, ka habe, Walang hna ha hnö Iehova Khongu Isaraela, ka habe, Hna úhangö at ame ca he ka löng ta je hofucin úhibinyköu ang, 4 waleji oge húna ka lakamöbun, hnyi bong oge hum ödra hnyin únyi hnyi hnyei Aigupito, únyi hnyi hnyin meic fao me ha, ka habe, Löng ju ifucik, me ányâ thö hoton hnök hna húna köbun; me öbun e he ka lakeik, ke oge me he inya ka Khongubun: 5 me inye he ka ohwádâ úhibinyköu oge khemanyiná ka lakamöbun, he ka ham ködra hnyei ame di hnyin debai me hani, helâ me hnyi bong ang. Me oge me thu me ha, ka habe, Iehova lö, Amen.

6 Haba Iehova ame ha könya, ka habe, Khetâ thö ta je hofuc hia thithö ang hnyi ta je tauniny Juda, me je gethen hnyi Jerusalema me ha, ka habe, Löng ju öbun je hofucin úhibinyköu ang, me ányâ. 7 Anyin oge ha hwegiâ ka lakamöbun hnyi bong oge hum ödra hnyin únyi hnyi hnyei Aigupito, ke ne o but hnyi bong ang, me vesâkong me ha hwegiâ, ka habe, Löng ju ifucik. 8 Ke adre me ca löng me tevehlöng, ke so bi, adre me ve vheno hwegien je hnyekudra bi ae kong: anyin a wale, oge me oâ ködra ta je hofucin úhibinyköu hia eang, waleji, oge húna ködra he ka ányâ, ke adre me ca ányâ bi.

9 Ke haba Iehova ame ha könya, ka habe, Adre wâ hna úhnehnâmö duöng

anyin at Juda, me aten Jerusalema. 10 Adre me hmetuhmetu but ka je hulö anyin lakamödra waleji adre me höcö löng hok ta je hofuc; ke adre me hnu hoton ke je khong he ka bi athnyaba ködrin: a hia but lap anyi Isaraela me lap anyi Juda thamúâ úhibinyköu, waleji oge khemanyiná ka lakamödra. 11 Anyin a wale walang hna ha hnö Iehova, ka habe, Wâ bi, oge me he ka oâ ködra únyi ae kong ae ca khan' ödra bi he ka kec gan; ke adre me he ka tenge könya, ke oge me ca he ka ling ödra. 12 Me ame he ka he je lap anyi Juda me je aten Jerusalema, me tenge ka je khong, waleji adre leú utö ae bo so kâu: ke adre me ca he bi ka omeli ödra hnyi úen anyidra vec. 13 Anyin ae úcú úseiny ányâm je khong Juda me ányâm je taun; ke öbun e hia but otilâ je taben hut ka únyi ae ikiki, a je tap huân leú utö ae bo so kö Baala, hoton úseiny je getheniny Jerusalema. 14 Anyin a wale, u me ca he ka hijö tavat ang, ke u me ca he ka tenge me hic hobi ködra: anyin oge me ca he ka löng ködra hnyi úen adre me he ka hawo nya hnyin hnyi anyidra vec.

15 Ieú ame ányâ oúnykúmik eang hnyi umök uma, anyin a e ame hia but bi únyi monu me tavat ae se, ke a he but gam utiö ae kap? hnyi úen u je ányâ únyi ae kong u me senyin bi. 16 Haba Iehova ame hwenyi iâm, ka habe, Elaio ae hát, ae hmanang, ke so wan: ke e ame hú meic hon e me gan hmâ hwan hwalung, ke hmetru but je anginy e. 17 Anyin a haba Iehova tuhan sabaoth at ame te u, ame ha únyi ae kong köu, can hulö anyin lap anyi Isaraela, me lap anyi Juda, waleji adre me ányâ hobi ködra bi me ohmönyini nya, adre me leú utö ae bo so kö Baala.

18 Ke haba Iehova ame owâhmakhmetu nya gan, me me khanö nya thö: me u je omanená könya anyidra ta je huliwa. 19 Ke iny úcú me nokon mamoe ae hnam adre me lelö he ka hlingâ; ke ca khanö nya bi, a g' adre me ip je hna únykúme könya me ha, ka babe, Ate me he ka tha ohia úö me wan, ke ate me he ka subâ degecâ e hnyi hnyei iny tavat ae möt, m' adre me ca he hmetu ka únykúme ien. 20 Ke Iehova tuhan sabaoth lö, at ame owisa wia, at ame cubec je únykúme me hnyok, e so oge me wâ hna bi hwaban ködra gam: anyin oge hia but omanená hok hofuc köu. 21 Anyin a wale, walang hna ha hnö Iehova ge aten Anathoth, tavat

## JEREMIA 12, 13.

adre me elâm he ka hlingö u, ka habe, U me ca he ka perofeta hnyi iö Iehova, wâ u nye mok ut gahmun : 22 Anyin a wale walang hna ha hnö Iehova tuhan sabaoth, ka habe, Wâ bi, oge me he ka bi hwaban ködra : ame he wahidröu ka mok ge hele vat ; ame he lakudra obaga me wahlu ka mok ge hmiâ ; 23 ke ame he ka ba kölüdra : anyin oge me he ka oâ únyi ae kong ka tavat aten Anathoth, wale hnyi hunainy hna sen' ödra hnyin.

### HNYIMAKAN 12.

**I**EHOVA lö, u thibi at æ wisa, iny ka he ka ivinö möu : ke so bi, oge me beúhnenamö möu ge hna owisa : ieú can ame sot gan gethen deny tavat ae kong? adre me laba so geú ödra hia adre me ti iyawö? 2 U je hia but te ödra, eke, e hu iwân gadra ; adre me kú, eke, adre me wa wan ; u hakekeny hnyi je hnyimödra, ke sákáú hnyi je únykúmenödra. 3 Ke haba u Iehova lö, u je wâhmakhetu nya : u je ö nya, me cubec hnyekuk gam : lili ödra but helâ me je mamoe hnân he ka hlingâ, me penapen' ödra hobi kâu bong he ka hlingâ hnyin. 4 Ame he hnyi he ka tenge ke ne o but kehö, me meleca je úöiny hnyot hia ae ometu? can hulö anyin tavat adre me labâ e, adre hia but ohia je meno a vak can, me ta je meno ame gâ ; anyin a haingödra, ka habe, E ame ca he ka wâ obiny köta. 5 U je ne hia but tha wadring me tavat adre me he hon kânâ, ke u sényin dut unyidra, u me he ka kâmâu ka úö wadring me ta je hors? ke u je ne laba khötkic hnyi hnyeiny úsoköu, ieú u me he ka ányâ hnyi hmanenanginy Joridano? 6 Anyin a hia but iyawö u hnen je liamekeiny möu, ke hnen minya lap anyin kâmâm ; ke adre me hao u hwegiö u : eja ke ne adre ne há so köu, ca köp ödra bi.

7 Oge hia but hna umök uma, oge hia but hna degecâ ik hnyi ; oge hia but hna önykúmik ka hnyi hnyamen je iwahnaihmiöny mē. 8 Haba ik hnyi me helâ me lionsa hnyi hnyot : e ame fuc hwege könya ; anyin a wale, oge hia but húkotiâ e. 9 Hawa, helâ me meno ame gâ ame seset ke at ae úhúlú, ik hnyi könya? ame o but kâu ta je meno ame gâ ae úhúlú wale a igigilö but? he th' öbun, úhacaköuâ thö je menoiny hnyot hia thithö, hum ödra ju he ka úhúlú. 10 Haba tavat tuö mamoe

ae se hia, adre hia but ohia ik hnyi vine, adre hia but ututo jekhök, me wia jekhök ae kese hnân hnyeubaba ae ba wan. 11 Adre hia but öba wan e ; e ame tenge könya ke ba but wan ; adre öba wan hnyi hia, anyin ae ba at ame únykúme eú hnyi hnyekon. 12 Ame he but tavat sei hon je dok hia ae görany hnyi hnyeubaba : anyin a hele vat anyi Iehova ame han, hwân hnyi ke obiny hnyi ke ne o but hnyi ke obiny, ke ba bi hnahic ka ke at. 13 Adre hia but belökâ whit, me meno iwadekong ; adre hia but oveci ödra bi, ke ba troban : ke öbun e he ka hmehman je jetinyibun hnyi, can hmönyin ae gan hmâ anyi Iehova.

14 Walang hna ha hnö Iehova ge tavat hia ae kong adre me laba hakekeny nya, tavat adre me kâlâ hnyi waleji oge ham ka lakeik a Isaraela, haingen, ka habe, Wâ bi, oge me he ka uk ödra únyi hnyi idra hnyi, me oc lap anyi Juda únyi hnyi wanbödra. 15 Ke iny ka hia but uk ödra oge me he ka hmetu me betenge gadra ; ke oge me he ka ve ohmetu ödra ka hnyi je idra, me idra ta hnyi. 16 Ke ödra ka he ka ti nâ je gethen deny lakeik, me khemanyn hnyi iök, ka habe, Kia inya Iehova ; helâji me hnödra hna nâ lakeik he ka khemanyn ga Baala ; awe, adre me he ka up ödra göranyai wanben ik hnyi. 17 Ke adre ne ca he ka löng, me oge me he ka oc degecâ, me ohia hnyi eling haingö Iehova.

### HNYIMAKAN 13.

**W**ALANG hna ha hnö Iehova könya, ka habe, He thö me úco hobi köu bi wen hnyekom a lino, ke oweikâ ju hnyâm, ke ca he ka hneú e hnyi köiö. 2 Me oge me úco wen hoton hofuc ho Iehova, me oweikâ hnyik. 3 Me ame olo o hofuc ho Iehova könya ame ha, ka habe, 4 Hom dö wen u je úco, wale hnyi hnyâm, ke todrö, he thö Euferate ai, me ikhâlâ e hnyi esopiny kic. 5 Me oge me he me ikhâlâ e hnyi Euferate hoton hna húna könya ga Iehova. 6 Ke hwaban je bong ae se hia, haba Iehova ame ha könya, ka habe, Todrö, he thö Euferate ai, me hom úheny e wen waleji oge húna köu he ka ikhâlâ eling. 7 Me oge me he Euferate ai, me hiny, me hom wen únyi hnyi dok oge ikhâlâ e hnyin : ke wâ bi, e kong ut wen, ke únyi baú but. 8 Me ame o but könya hofuc ho Iehova ame ha, ka habe, 9 Walang hna ha hn

## JEREMIA 14.

Iehova, ka habe, Helâe oge me he ka okongoâ hnyok bi gan anyi Juda, me hnyok bi gan ae gan hmâ anyin Jerusalema. 10 Haba hnyei ang ae kong, tavat adre me hœcö löng hok je hofuc, tavat adre me hnu hoton hwegien hnyekudra bi, me he hoton ke je khong bi he ka bi athnyaba ködrin, me khudrung ködrin, adre me he ka úcú me wen ang, ae únyi baú but. 11 Anyin ame kece wen ka hnyi hnyin at, helâe öge hia but okeceâ könya lap hia anyi Isaraela, me lap hia anyi Juda, haingö Iehova; m' adre me he ka hnân lakeik, me iök, me ogânâ, me hmanenang: ke adre me hœcö löng. 12 Anyin a wale, u me he ka ha ködra hofuc ang, ka habe, Walang hna ha hnö Iehova Khongu Isaraela, ka habe, Ame he ka unöngöt ta je kaia hia ge waina: ke adre me he ka ha köu, ka habe, Hæwa, e ca khan' öhmun a g' ame he ka unöngöt dö ta je kaia ge waina? 13 Me u me he ka ha ködra, ka habe, Walang hna ha hnö Iehova, ka habe, Wâ bi, oge me he ka öunöngötâ tavat aten hnyei ang hia, wale je than a tavat adre me tabâ theron anyi Davita, me tavat bi hut, me ta je perofeta, ma aten Jerusalema hia, m' adre me he ka monu ge grâk. 14 Ke oge me he ka öüsetuödraköu ödra, a je kamen me lakon, haingö Iehova: oge me ca he ka menyik, me hokhnyok, me betenge, ke oge me he ka ohî' ödra.

15 Löng ju öbun, ke tevehlöng ju: ca hnyok bi gan: anyin a hia but ha Iehova. 16 Hna but kö Iehova Khongubun hna ogânâ, e me tiga ca omenekhulumâ, ke e me tiga ca haú je cabun hon je bucen ae lit; ke öbun ka tiga halubahingen melam me e ame wia bi ka hnyi hmenon mok, me lit ae gan. 17 Ke öbun e ca löng, ame he hnyekuk ka tenge hnyi dok ae iyong can anyibun bigan; ke ame he li emakök ka ti tenge, me lup ge deköiök, anyin adre hom bâ hna hat mamoe hale Iehova. 18 Ha thö ka than me momo than, ka habe, Öhnyikön' öbun ju, ke laba ju: anyin a kölu but anyibu li korona ae mec, wale koronainy anyibun hmanenang. 19 Adre hlöng ut je taun hnyi hwaiöu, ke ba at ame he ka khöng: a hom hwenbâ Juda hia; adre me tha hwenbâ hia.

20 Bwela thö göranyai me wâ tavat adre me o úhedra hnyi hwadrö: ewa hna hat meno adre ham köu, hna hat halem æ kese? 21 Ieú u me he ka ha, e ka he ka otilâ je waem hom hnân bâm, anyin a u je hia but n' ödra he ka musi u? hawa, ame

ca he ka köt u ge je vec, helâ me momo ame he kahnoköâ? 22 Ke u je ne hæeú hnyi hnyekom, ka habe, Can ieú ame o könya ta je únyi ang? can úganiny hwakecâm æ kong adre hai obiny ányâm úkhaú, me adre me okongoâ ohmâiny li cam. 23 Hawa, e khana at Aithiop he ka wia unen unyin, me lepad, hna bi hnahlimen unen? awe, e khan' öbun he ka ányâ so, wale tavat adre me khenen he ka ányâ hulö. 24 Anyin a wale, oge me he ka ovesei ödra, helâ me thatúnyi ame ou ang dö únyi hnyi hnyebuba. 25 Walang hna khenâ köu, jekhom adre tuluto köu únyi gak, haingö Iehova; anyin a u je hnying nya me labageju ka hnyi thoi. 26 Anyin a wale oge me he ka hai obiny ányâm úkhaú ka hnyi hnyimákâm, me e me manen hnân ohmehmai u. 27 Oge hia but wâ hwakecâm æ ikiki, wale hnâm je hna bi únyi monu, me hwâm hwakuku helâ me hors, me úganiny hnâm hna bi únyi monu hon je dok æ hut hnyi ta hnyei. Ekölö gam Jerusalema! u me ca he ka bo so; ke ne o but kehö?

### HNYIMAKAN 14.

**W**ALANG hofuc ho Iehova kö Jeremia ge ibainy we, ka habe,

2 Juda ame tenge, ke je homagöuleny ame hlöuhlöu, adre me laba, ke hlit bi hon kânâ; ke ame o thö hwan tenge hnyi Jerusalema. 3 Ke haba je tuhödra, me adre me kunâ je lakudra ka hnyi ta je an: adre me o but ka hnyi ta je thop, k' adre me ca wâ bi köiö; adre me hmetu me belidra je kaia æ hme: adre me hmehma me hlohlo, me tube je bödra. 4 Adre me hmehma tavat trohnen, me tube je bödra, anyin a khékhe but kânâ, can æ ba we hnyi hnyei. 5 Eke, ame hnokoâ aila minya hnyi hnyot, me ame hna degecâ nokon, anyin æ ba but önying. 6 Ke haba je asinainy hnyot adre me tot hnyi je dok æ görany, adre me momokhon can æ ba ang, helâ me je alegeta: a dit ut je emaködra anyin æ ba but önying.

7 Iehova jö, eja ke ne a ne hwadâ köhmun anyihmun ta je hulö, ányâ bi thö u can iâm; anyin a öhmun e osehia but kölu: öhmun e hia but ányâ hulö köu. 8 Gejou Isaraela lö, at ame ömelö e hnyi úen vec, anyin a ieú u je helâ me atkanyua hnyi hnyei, me helâ me at ame vheno gethen me e ame saú thö ka mokut? 9 Anyin a ieú, u je helâ me at ame gâ ön, ke helâ me at æ

JEREMIA 15.

hwege ae ca khana he ka omelö ? ke so bi, u bi Iehova hnyi wanböhmun, ke u je ip iâm huhmun ; ca hna degeci öhmun bi.

10 Walang hna ha hnö Iehova, ka tavat ang, ka habe, Heläe, e wedra he ka he baü : adre me ca hia but behânâ bi je cadra : anyin a wale ame ca he bi Iehova ka köp ödra ; e ame he walang ang ka únykúme anyidra monu, me senâ anyidra je hulö. 11 Ke haba Iehova ame ha könya, ka habe, U me ca he ka hijö tavat ang, m'adre me so. 12 Ödra ka he ka ányâ ca han, oge me ca he ka löng útengiödra ; ke ödra ka ha ke hudo je hudiny leü me bwihlany, me oge me ca he ka köp ödra : ke oge me he ka ohí' ödra ge hele vat, me hmiâ, me mok ae cap. 13 Me oge me ha, ka habe, Ekölö Than Iehova ! wâ bi, je perofeta adre me ha ködra, ka habe, Öbun e ca he ka wâ hele vat, ke öbun e ca he ka hu hmiâ : ke oge me he ka ham köbun eang úsoköu ae únyi hnathu. 14 Me Iehova ame ha könya, ka habe, Je perofeta adre me perofeta thoi hnyi iök : oge ca kun' ödrin, ke oge ca húna ködrin, ke oge ca fuc ködrin : ödrin e perofeta köbun me omanená thoi, me hna bi khong, me únyi ae ba önyen, me iyawö eü hnyi je hnyekudrin. 15 Anyin a wale walang hna ha hnö Iehova ge ta je perofeta, tavat adre me perofeta hnyi iök, ke oge ca kun' ödrin, ke so bi, ödrin e ha, ka habe, Ame ca he ka hu hele vat me hmiâ hnyi hnyei ang : Awe, adre me he ka ohia je perofeta eling ge hele vat me hmiâ. 16 Ke haba tavat ödrin e perofeta ködrin, adre me he ka khú' ödra ka hnyi je getheniny Jerusalema can hmiâ me hele vat ; ke ba at ame he ka könim ödra, ödra, me laöiödra, me lakúdra obaga me wahu : anyin oge me he ka hingälâ hudrin hwakecidrin bi ae monu. 17 Ke u me he ka ha ködra hofuc ang, ka habe, E so ame hingölö únyi hnyi li emakök deköiö hnyi lany me lit, me ca he ka menâ ; anyin a aat dö hluiny ik hnyei, ke gan hmâ aat, ke gan hmâ hna kot. 18 Oge ne he ka hnyi hnyei, wâ bi je hna kot hnen hele vat ! ke oge ne he ka hnyi taun, me wâ bi, tavat ae sényin ge hmiâ ! anyin ame tha ngeno baüâ hnyei hnen perofeta, me at bihut, ke ba metâ gadrin.

19 Hawa, u je hia but ti digic Juda ? ke a hia but hanom ikikiâ Ziona ? anyin a ieú u je kuc öhmun, ke ba eny köhmun ? öhmun e halubahingen hnahic, ke ba bi so, me únen metu, ke wâ bi ot bi. 20 Iehova

lö, e khan' öhmun dut anyihmun hulö, me hulö anyin lakamöhmun : anyin a öhmun e hia but ányâ köu hwakecin ae kong. 21 Ca he bi ka ikiki öhmun, únyi hnyi iâm ; ca he ka okongoâ theroniny ányâm hmanenang : únykúme ju, ca he ka thamúa ányâm úhinhinyköu möhmun. 22 Hawa, e hu at unyin ta je únyi baü anyin ta je wanaithila ae khana he ka bi we ? hawa, e khana drany he ka ham we ? hawa, ca u bi Iehova Khonguhmun ? anyin a wale öhmun e he ka halubahingâm ; anyin a u je op ta je únyi hia eling.

HNYIMAKAN 15.

**H**ABA Iehova ame ha könya, ka habe, Eja ke ne a ne tot Mose me Samuela hnyi hnyimakök, oge me ca he ka hnyok ka tavat ang : ob' ödra but gak, m'adre me he but. 2 Ke adre me ne he ka ha köu, ka habe, Öhmun a he kâ ? u me he ka ha ködra, ka habe, Walang hna ha hnö Iehova, ka habe, Haba at hobi kâu mok, me ame ka he bi ka hnyi mok ; ke haba at hobi kâu hele vat, me ame ka he bi ka hnyi hele vat ; ke haba at hobi kâu hmiâ, me ame ka he bi ka hnyi hmiâ ; ke haba at hobi kâu bá, me ame ka he bi ka bá. 3 Ke oge me he ka otílâ ködra vak ta únyi, haingö Iehova : wale hele vat he ka hlingâ, me je kuli he ka oloú kia, me ta je meno ame gâ, me ta je menoiny hnyot he ka an me ohia. 4 Ke oge me he ka hn' ödra ka hnyi hlohlo hnyi ta je dökhü hia eang hmeledrany, jöni Manase nöku Hezekia than Juda, can hnen hna ányâ hnyi Jerusalema. 5 Anyin a ie at ame he ka betenge gam Jerusalema ? ke ie at ame he ka máng gam ? ke ie at ame he ka saü me me hnö bongom ? 6 Haingö Iehova, ka habe, U je hia but hna degeci nya, ke u je hmetuhmetu : anyin a wale oge hia but hai hnyamök gam, me ohio u ; oge sényin dut ge ietra. 7. Ke oge hia but ulic ödra ge ut hnyi je homagöuleny hnyei ; oge hia but öba lakudra, oge hia but öba lakeik ; adre me ca hmetu únyi hnyi dedra je gethen. 8 Adre ose hia je safac unyidra hnyi hnyimakök hon je waönyin köiö : oge hia but hom ködra úcon hinyen wahidröu, at ame söh hnyi jebigö : oge hia but ie oâ ködra ot me öbubuny. 9 E sényin dut momo ame hnöku ödrin seven ; e ame mokcu ; ame didrut anyin seúnö, ke tiga lany bi ; e ame hia but hmehma me hlohlo : ke oge me he ka hna je

köluidra ka hnyi hele vat hnyi hnyimakan je iwahnaihmiöny mödra, haingö Iehova.

10 Ekölö gak, bai lö, anyin a u je hnokoâ at ae iwatretra, ke at ivinö me hmeledrany hia! oge ca hia but mē ham mone hnân troban, ke haba khaca adre ca mē ham mone kõnya hnân troban; ke so bi, ödra hia adre me hangö nya. 11 Haingö Iehova, ka habe, E hnathu, oge me he ka sihwegiö u hnyi so; e hnathu, oge me he ka kunâ iwahnaihmiöny he ka khöu kōu hnyi üen ae kong me üen ae vec.

12 Hawa, e khana at he ka thu fao wale fao üheny hnyi hwadrö, me bras? 13 Oge me he ka ham manâm man me tang omjehem hnân söh ke ca ge hwaban, ke can bi ânyâm je hulö hia hnyi je hnyigöulâm hia. 14 Ke oge me he ka tha obei ödra me je iwahnaihmiöny möu ka hnyi hnyi ae ca khanö u: anyin ame ubâhlâ meic hnyi anyik hmönyin, ke ame he ka thong hubun.

15 Iehova lö, u je wâ but: únykümi nya ju, me senö nya, me bi hwaban ka tavat cak, ka tavat adre me sedö nya, ca hom digic nya hnyi hnâm hna ling vec ae beúhmâ: khanö u thö a adre hia but haikongu nya can iâm. 16 Adre me wâ hwâm je hofuc, me oge me an e; ke hnân senyin me hnân hobâ hwâm je hofuc hnyi hnyekuk: anyin adre me hwenyi iök ge iâm, Iehova Khongon sabaoth. 17 Oge me ca laba hnyi úkhacakou anyin tavat adre me walak me hop: oge me hake laba can hnyamâm; anyin a u je hia but öunöngöti nya ge hmönyin. 18 Anyin a ieú a e bala bi anyik vec, ke ba eny hnök aat, ke ame ca bemetu? hawa, u me he ka helâ me wagewe ame iyawö, a köiö ame hme?

19 Anyin a wale, walang hna ha hnö Iehova, ka habe, U je ne he ka hmetu, me oge me he ka hum u, ke u me he ka tot hnyi hnyimakök: ke u je ne he ka oc ut únyi ae únyi hnathu únyi hnyi únyi ae ikiki, u me he ka helâ me hnyimök: adre me he ka hmetu köu, ke u me ca he ka hmetu ködra. 20 Ke oge me he ka wiö u ka tavat ang hnân hak bras ae hwege; ke adre me he ka vat möu, ke ame ca he ka tudra: anyin a tha inya möu he ka tuö u, me omeli u, haingö Iehova. 21 Ke oge me he ka hügünö u únyi hnyi hnyamen tavat ae kong, ke oge me he ka úco melam únyi hnyi hnyamen tavat a ödra wathethöt.

## HNYIMAKAN 16.

**A**ME o minya but kõnya hofuc ho Iehova ame ha, ka habe, 2 U me ca he ka hok momo me hu nokom baga me hlu hnyi dok ang. 3 Anyin a walang hna ha hnö Iehova ge ta je da me in adre hnokoâ eang, me je lahinyödra adre hnöku ödra, me je lakamödra adre hnöku ödra hnyi hnyi ang, ka habe, 4 Adre me he ka mok ge je mok ae kong; adre me ca he ka tenge gadra, ke adre me ca he ka kõnim ödra; adre me he ka hnân tatet hon kânâ; ke ame he ka ön ödra hnen hele vat me hmiâ, ke ame he je unyidra ka hnân an ta je meno ame gâ ethö, me je menoiny hnyot. 5 Anyin a walang hna ha hnö Iehova, ka habe, Ca didrö ka hnyi uma tenge, ka ca he bi ka hnyi tenge thungaú, ke ca mâng gadra; anyin oge hia but hom anyik hnahic únyi ge hnyi ang, wale ibetengiö me betenge vec, haingö Iehova. 6 Ke ame he tavat ae gan me tavat ae úhnyükong ka mok hnyi hnyi ang: adre me ca he ka kõnim ödra; ke ame ca he tavat ka tenge gadra, ke adre me ca he ka thamüö hwadrak ny, me ohadreúâ, adre me ânyâ hnyi hnyamok; 7 ke ame ca he tavat ka tha subö areto hnyi tenge gadra wale hnân otubweli ödra ge je komok; k' ame ca he tavat ka ham ködra kaia ka habelidra hnân otubwelâ ge kamödra me hinyödra a mokcu. 8 Ke u me ca he ka dit hnyin uma bijeú he ka tha laba mödra, me hnyi han me ic. 9 Anyin a walang hna ha hnö Iehova tuhan sabaoth, Khongu Isaraela, ka habe, Wâ bi, oge me he ka bi obiny hnyi dok ang hnyi hnyimaköbun hnyi bongubun ta je bong hwan senyin me hwan hobâ, me hwan li at ödre tep faipoipo. 10 Ke hnyi üen u me he ka haimemenâ ta je hofuc hia ang ka tavat ang, me adre me he ka ha köu, ka habe, Anyin a ieú Iehova ame ha gahmun ta je únyi ae kong hia thithö ae gan hmâ? ke ieú hwakecihmun ae kong? ke ieú hnöhmun hna ânyâ kö Iehova Khonguhmun? 11 me u me he bi ka ha ködra, ka habe, Can lakamöbun ödrin e hna degeci nya, haingö Iehova, me hnu hoton je khong, me bi athnyaba ködrin, me khudrung ködrin, ke adre me hna degeci nya bi, me ca tuö bi anyik hnanyibu; 12 ke öbun e hia but ânyâ hulö ae gan hmâ hon je lakamöbun; anyin a, wâ bi, öbun e ve hnu hoton ihwegien je hnyekubun ae kong, me öbun e ca

## JEREMIA 17.

ling nya bi : 13 anyin a wale oge me he ka ob' öbun hnyi hnyei ang ka hnyi hnyei ae ca khan' öbun, öbun, me je lakamöbun ; ke öbun e he ka bi athnyaba eling ka ke je khong hnyi lany me lit ; ke oge me ca he ca betenge gabun.

14 Anyin a wale, wâ bi, ame he ka o je bong, haingö Iehova, ke adre me ca he ka ha, ka habe, Kia inya Iehova, at ame hom je lakon Isaraela ünyi hnyi hnyei Aigupito ; 15 ke so bi, Kia inya Iehova at ame hom lakon Isaraela ünyi hnyi hnyei hnyi hwa-drö, me ünyi hnyi je hnyei hia waleji e ame ob' ödra ka hnyin : ke oge me he ka ohmetu ödra ka hnyi idra hnyei, waleji oge ham ka lakamödra. 16 Wâ bi, oge me ho ka hawâ tavat thut ae se hia, haingö Iehova, m' adre me he ka nuc ödra ; ke hwaban e, oge me he ka hawâ tavat hnu meno ae se hia, ke adre me he ka hnu ödra ünyi hnyi je bucen hia, me je hut hia, me ünyi hnyi je hmakaniny je kic. 17 Anyin a e hnyi hon dedra je gethen hia li emakök : ödra ca iyong hnyi hnyimakök, ke adre ca ikhâlâ gak hwakecidra ae kong. 18 Ke oge me he ka bök ka olo bi hwaban hwakecidra ae kong me anyidra hulö ; anyin adre hia but oikikiâ ik hnyei hnen unyin anyidra ta je ünyi ae bon a g' adre mokcu, ke adre hia but öunöngötâ ik hnyei ge anyidra ta je ünyi ae ikiki. 19 Iehova lö, tang hwegiök, me hnök hnabâ, me hnök hna lubaduöng hnyi bonginy vec, ame he ka o köu ta je hnyei ünyi hnyi je can hmeledrany me ha, ka habe, e ba jekhon je lakamöbun, ke so bi, thoi, wale je ünyi baü me ba troban hnyin. 20 Hawa, ame he ke at ka ânyâ je khong hobi kâu, ke ca je khong bi thö ? 21 Anyin a wale, wâ bi, oge me he ka owâhmakhmetu ödra, hnyi üen ang oge me he ka owâhmakhmetu ödra ge hnyamök, me manik man ; ke ame he ka khan' ödra a iök Iehova.

### HNYIMAKAN 17.

**A**DRE hia but sihnalimen hulö anyi Juda ge pen fao, me homakan samira : adre kave hnyi viny je hnyekudra, me hon je baitoiny anyibun je taben hut ; 2 ke haba ta je lakudra adre me ünykûme anyidra ta je taben hut, me anyidra je Aseira hnyi je üö ae hât hon je hut ae görany. 3 Anyik bucen hnyi utkânâ lö, oge me he ka ham ânyâm ta je ünyi me je tang omjehem hia, hnân söh, me ânyâm

je dok ae görany hnyi ta je hnyigöulâm hia thithö, can hulö. 4 Ke haba u, u me ka he ka hamâm bi degec em hnyei waleji oge ham köu ; ke oge me he ka kunö u he ka bi athnyaba ka je iwahnaihmöny möu, hnyi hnyei ae ca khanö u : anyin a öbun e hia but hû meic eü hnyi hnyekuk, ke ame he bala bi ka möt.

5 Walang hna ha hnö Iehova, ka habe, E ka mok at ama labageju ka at, me wia at me me hnân hnyamen, ke haba hnyekon ame hota degeci Iehova. 6 Ke e ame he ka helâ me üö ae ba lan hnyi hnyebuba, ke ame ca löng bi, e ka o so ; ke e ame he ka labâ je dok ae hwahwacit hnyi hnyebuba, hnyei ae sâlt, ke ca hnân labâ. 7 Hnahic hnen at ame labageju kö Iehova, at ame ip Iehova hnân jekhon. 8 Anyin a e ame he ka helâ me üö adre tã hnyi ta je köiö, ame iyâü je wân ka hnyi wagewe, ke ame ca he ka hlohlo, e ka o bi kahwa, ke ame he ka hât ta je lan ; ke ame ca he ka hmak hnyi huna ae ba hnyin we, ke ame ca menâ bi wa. 9 Haba hnyekon at, me wale at ae ti iyawö hon ta je ünyi hia thithö, ke ti kong e : ie at ame he ka wâhmakhmeto e ? 10 Inya Iehova at ame elâm hnyok, oge me cubec ta je hna ünykûme, he ka ve ham ka tavat hia helâ me dedra ta je gethen, me helâ me wan anyidra ta je huliwa. 11 Haba kore ame mokulec ta je lakon, ke ca ta je hing lakon bi, helâe ge at ae tren omjeü ke ca hoton bi wisa ; hnyi wanben bonginy je bong, e ame he ka hna degecâ bi e, ke haba hnyi obiny e ame he ka at ae monu.

12 Theron ae hmanenang me görany ünyi hnyi hwân, wale hnen anyita dok ae kap. 13 Iehova gejon Isaraela lö, adre me he ka hmehma ödra hia adre me hna degeci u ; ke haba tavat adre me digic nya, me adre me he ka sihnalimen hnyi kânâ, anyin adre me hna degecâ köiöiny möt ame pupua, wale a Iehova. 14 Iehova lö, ometu nya but, me inye metu but ; omeli nya thö, me inye möt ut ; anyin a u thibi hnök hna ogânâ. 15 Wâ bi, ödra adre me ha könya, ka habe, Ewa hofuc ho Iehova ? e so e hwâdâ thö walang ang. 16 Ke haba inya oge me ca ie ngâ he ka at tuö mamoe hotom ; ke haba khaca, oge me ca hia but weny bonginy vec ; e khanö u ; e hnyi hnyimâkâm hofuc ame he but ünyi hnyi li esongodik. 17 E so u me ca bi hnân ot könya ; u thibi hnök hnabâ hnyi bonginy vec. 18 E so e hmehma tavat adre me

JEREMIA 18.

sedö nya, ke ca hnö nya bi he ka hmehma : e so ödra hlohlo, ke ca hnö nya bi he ka hlohlo : oâ ju ködra bong ae kong, ke ohî' ödra but, me olo ohia.

19 Walang hna ha könya hnö Iehova, ka habe, He thö ka tot hnyi homagöuleny je lakon tavat, wale hnen je tuhan Juda hna didrö me didrut hnyin, me hnyi je homagöuleny hia Jerusalema; 20 ke ha thö ködra, ka habe, Löng ju hofuc ho Iehova, öbun je than Juda me at Juda hia, me aten Jerusalema hia, tavat adre me didrö hnyi je homagöule ang : 21 walang hna ha hnö Iehova, ka habe, Wâ eâu öbun, ke ca hom bi ke únyi hnyi bong sabath, ke ca dit më hnyi je homagöuleny Jerusalema : 22 ke ca he öbun ka hok únyi hnyi umöbun je uma hnyi bong sabath, ke ca ányâ bi ke huliwa, ke so öbun e okâbâ bong sabath, helâji me hnök hna húna ka lakamöbun; 23 ke so bi adre me ca löng, me tevehlong, ke adre me ohwegiâ je nyidra, m' adre me ca löng bi me kap bi hna únö. 24 Ke öbun e ne ti ling nya, haingö Iehova, me ca hom bi ke únyi ka hnyi je homagöuleny taun ang hnyi bong sabath, ke öbun e ne okabâ bong sabath me ca huliwa hnyin e; 25 awe, ame he ka labö didrö hnyi je homagöuleny taun ang je than me je taben, tavat adre me tabâ theron anyi Davita, adre me tabâ je kariota me je hors, ödrin, me je taben, aten Juda, me aten Jerusalema : ke ame he ka tethmä taun ang nyiele balua. 26 Ke adre me he ka o únyi hnyi je tauniny Juda me je ke keihen igigilö Jerusalema, me únyi hnyi hnyei Beniamina, me hnyei ae tha hon, me je bacen, me únyi hnyi Hwaiöu, adre me hom je hudiny leú, me je hut, me je hudiny han, me libanu, me adre me he ka hom je hudiny ole, ka hnyi uma umö Iehova. 27 Ke öbun e ne ca ling nya he ka okabâ bong sabath, me he ka ca hije hok, me didrö ka hnyi je homagöuleny Jerusalema hnyi bong sabath; awe, oge me he ka hú meic hnyi ta je homagöuleny e, ke ame he ka an je uma umen je than hnyi Jerusalema, ke ame ca he ka mok.

HNYIMAKAN 18.

**H**OFUC ame o kö Jeremia únyi ga Iehova ame ha, ka habe, 2 Todrö, he thö ka hnyi uma umen at ame up kaia ke oge me he ka ölöngi u e ge hok hofuc. 3 Me oge me he ka hnyi uma umen at ame

up kaia, ka wâ bi, e ame ányâ anyin huliwa hon li waengen. 4 Ke ame kong ut kaia hnyi hnyamen at ame up kaia waleji e ame op, me e ame op hmetu e, me me ke kaia, helâ me weny at ame up kaia he ka ányâ.

5 Me ame o but könya hofuc ho Iehova ame ha, ka habe. 6 Lap anyi Isaraela lö, hawa, e ca khanö nya he ka ányâ köbun helâ me man at ang ame up kaia? haingö Iehova. Lap anyi Isaraela lö, wâ bi, öbun úcú hnyi hnyamök me kânâ ae kece hnyi hnyamen at ame up kaia. 7 Hnyi úen oge me he ka fuc ge ke hnyei me ke dökhu, he ka oc ut, me hagutâ me ohia e; 8 ame ne he hnyei eling wale oge me fuc gan he ka hmetu únyi hnyi anyidra hulö, awe, oge me he ka ietra únyi ae kong waleji oge únyküme he ka ányâ ködra. 9 Ke haba hnyi úen oge me he ka fuc ge ke hnyei, me ke dökhu he ka otilâ me tâ e; 10 ame ne ányâ hulö hnyi hnyimakök, me ca löng ifucik, awe, oge me he ka ietra so, waleji oge ha he ka ohnahici ödra hnyin. 11 Ke walang ang, he thö ka ha ka at Juda me aten Jerusalema, ka habe, Walang hna ha hnö Iehova, ka habe, Wâ bi, oge me he ka penapena únyi ae kong hobi köbun, me únyküme hna únyküme he ka ányâ köbun: ve hmetu ju öbun walang ang únyi hnyi debun ta je gethen ae kong, ke osoâ but debun je gethen me anyibun ta je huliwa. 12 Ke adre me ha, ka habe, E únyi baú bi : anyin öhmun e he ka hnu hoton anyihmun ta je bibihwakecin, me ve ányâ hoton ihwegien je hnyekuhmun ae kong.

13 Anyin a wale, walang hna ha hnö Iehova, ka habe, Hnö th' öbun unyin ta je hnyei, ie at ame löng je únyi a helâe a hia but ányâ únyi ae ti kong hnen hluiny Isaraela. 14 Hawa, ame he kionainy Lebanona ka kölu únyi hnyi hon kicin utkânâ? ame he ka hme köiö katebu wale ame hingölö úheny hnyi dok ae sâkâú? 15 Anyin adre hnying nya lakeik, adre hia but leú utö ae bo so ka únyi ae ba önyen; ke adre hia but ohaú ödra bi hnyi dedra je gethen, a je gethen kâú adrem, he ka he hnyi je ong gethen, adre ca okhibö göra-nyai; 16 me adre me wia idra hnyei hnân láiiâ, me jú nyiele balua; ame he tavat hia adre me gethen unyin ka láiiâ me nyinyiká je bödra. 17 Oge me he ka ovesei ödra hnyi hnyimakan iwahnaihmiöny helâ me hnen ang hwei; oge me he ka hotuk me ca hnyimakök bi ködra, hnyi bonginy anyidra vec.



JEREMIA 19.

18 Me andre me ha, ka habe, Ai öbun m' ate me he ka anyâ je bibihwakecin kö Jeremia ; anyin ame ca he ka hia hnanyibu unyin at bihut, me ûhnenamö unyin at ae metâ, me hofuc ûnyi ge perofeta. Ai öbun, ate me he ka kot e ge bohmen, ke ca he bi öta ka tevehlöng bi hwan ta je hofuc.

19 Iehova lö, tevehlöng ju kõnya, ke löng ju ifucin tavat andre me ivinö mönya. 20 Hawa, andre me he ka bi hwaban so ge kong? anyin andre hia but hiny thop, me inye he ka mok. Ünüküme ju waleji hnök hna tot hnyi hnyimâkâm he ka khöüâ so hobi ködra, me ohavâ anyâm hmönyin gadra. 21 Anyin a wale hna but lakudra ka hnyi hmiâ, ke hn' ödra but ka hnyi maniny hele vat, ke ame he ka ba but lakon laöïödra, me je safac hi, ke ame he mok ka hlingâ obaga, andre me he ka hlingâ anyidra wahidröu ge hele vat hnyi vat. 22 E so andre me löng tenge hnyi umödra je uma, hnyi üen u me he ka ie oâ ködra deö vat : anyin andre hia but hiny thop hnân odili nya, me ikhâlâ je hnewe hnân li cak. 23 Ke so bi, Iehova lö, e khanö u hia anyidra ûhnenamö gak hnân he ka hlingö nya ; ca he ka hna hwakecidra ae kong, ke ca he ka kot degecâ anyidra monu ûnyi hnyi hnyimâkâm : ke so he ka hagut' ödra but hnyi hnyimâkâm ; ke anyâ thö ködra hnen anyâm hmönyin.

HNyimakan 19.

**W**ALANG hna ha hnö Iehova, ka habe, He thö ka üco kaia kânâ andre op me hom ke je hingatiny tavat, me ke je hingatiny tavat bihut ; 2 ke he thö ka hnyi hnyigöulen bucen anyin nöku Hinom, ae hnyi homagöuleny Harsith, ke khetâ thö eling ta je hofuc oge me he ka ha köu : 3 me ha, ka habe, Löng ju öbun hofuc ho Iehova je than Juda, me aten Jerusalema ; walang hna ha hnö Iehova tuhan sabaoth, Khongu Isaraela, ka habe, Wâ bi, oge me he ka oâ ûnyi ae kong ka hnyi hon dok ang ; ke ame he ka tenge met hnyi hnyikönyen tavat andre me löng. 4 Anyin andre hia but hna degeci nya me okebononâ bi dok ang, me leü utö eang ae bo so ka ke je khong, waleji ae ca khan' ödra, ödra me je lakamödra me je than Juda ; ke andre hia but öunöngötâ dok ang ge dra dren tavat ae ha hnyikongudrin : 5 me op je dok ae görany anyi Baala, he ka thong je lakudra ge meic hnân hudiny leü kö

Baala ; waleji oge ca húna, ke oge ca ha, ke oge ca ünüküme ; 6 anyin a wale, wâ bi, ame he ka o je bong, haingö Iehova, ke andre me ca he hmetu ka ha ka dok ang Tofet me hnyigöulen bucen anyin nöku Hinom, ke so bi, Thopiny hlingö at. 7 Ke oge me he ka öünyibaüâ ûhnenamö anyin Juda me Jerusalema hnyi dok ang ; ke oge me he ka otai ödra ge hele vat hnyi hnyimakan je iwahnaihmiöny mödra, me hnen hnyamen tavat andre me elâm he ka hling' ödra : ke oge me he ka hom ta je unyidra hnân an ta je meno ame gâ ethö, me je menoiny hnyot. 8 Ke oge me he ka wia taun ang hnân kuko me jü ; ame he tavat andre me gethen hnyin ka láiiâ me jü, can ta je mok hnyin. 9 Ke oge me he ka hn' ödra he ka an viny lakudra obaga, me viny lakudra wahlu, ke andre me he ka ve an viny je lawaedra, hnyi hna igigilö, me hna thelöng, wale ame he ka oveci ödra hnyin hnen je iwahnaihmiöny mödra, me tavat andre me elâm he ka hling' ödra. 10 Me u me he ka tho kaia hnyi hnyimakan tavat andre me tha he möu. 11 Ke u me he ka ha ködrin, ka habe, Walang hna ha hnö Iehova tuhan sabaoth, ka habe, Oge me he ka ohmouca hnyei ang helâ me hna tho kaia kânâ, wale ae ca khan' ödra he ka obekhötâ hmetu : ke andre me he ka khön komok hnyi Tofet, ke ne o but ame ba but dok hnân khön komok hnyin. 12 Haingö Iehova, ka habe, Oge me he ka anyâ helâe ka dok ang, me tavat andre me labâ e, me wia taun ang me me helâ me Tofet : 13 ke haba ta je uma hnyi Jerusalema, me ta je uma umen je than Juda, a je uma andre oikikiâ, ame he ka helâ me Tofet, wale je uma hia thithö waleji andre me leü utö ae bo so ka hnyi hon ka ta je ûnyi hia hnyi drany, me hingâlâ hudiny ic ka ke je khong.

14 Me ame o thö Jeremia ûheny Tofet, waleji hnyi hnö Iehova hna kunâ he ka perofeta ; me e ame tot hnyi hnyeuleny uma umö Iehova, me ha ka tavat hia thithö, ka habe, 15 Walang hna ha hnö Iehova tuhan sabaoth, Khongu Isaraela, ka habe, Wâ bi, oge me he ka oâ ka taun ang me ta je tauniny hia je ûnyi ae kong hia but ohwegiâ je nyidra, me ca löng bi ta je ifucik.

HNYIMAKAN 20.

**K**E haba Pasur, nöku Imer at bihut, ke at musi ae beönua hnyi uma umö Iehova, ame ling Jeremia ame perofeta ta je únyi eling. 2 Me haba Pasur ame fuc kö Jeremia perofeta, me ca e, a ohmâ hnyi utö ae hnyi homagöuleny Beniamina ethö, waleji hnyi uma umö Iehova. 3 Ke haba nyi Pasur ame hum Jeremia únyi hnyi utö adre ce at hnyin. Me Jeremia ame ha kâu, ka habe, Ame ca he Iehova ka ha hmetu iâm me Pasur, ke jia bi a Magora-misabibi. 4 Anyin a walang hna ha hnö Iehova, ka habe. Wâ bi, oge me he ka wiö u bi hnân ooti u bi me lawaem hia: ke adre me he ka ta ge hele vat anyin je iwahnaihmiony mödra, ke ame he li emâkâm ka wâ e: ke oge me he ka hna at Juda hia ka hnyi hnyamen than Babulona, ke ame he ka hum ödra Babulona ai, me hling' ödra ge hele vat. 5 Ke haba khaca oge me he ka hna tang omjeúiny taun ang, me ta je troban gan, me ta je únyi ae únyi hnathu hnyin, eke, ta je omjeú anyin je than Juda hia, oge me he ka ham ka hnyi hnyamen ta je iwahnaihmiony mödra, ke adre me he ka sei ödra, me hum ödra, me tha he mödra Babulona ai. 6 Ke haba u Pasur, me tavat hia adre me tha laba möu, öbun e he ka bâ: ke u me he ka o hnyi Babulona, me mokcu eling, me könim u eling, u me lahânâm hia, waleji u je perofeta thoi ködra.

7 Iehova lö, u je hia but cubic nya, me oge me hmehmela: u hwege huk, me ame tom: iny taben úhiö hnyi je bong hia, ame hlumö nya hnen ke at me ke at hnyi ta je bong hia. 8 Anyin a hnyi úen oge me fuc, oge me kuku; oge me hongot, ka habe, Úokonguny me söh: anyin adre wia hofuc ho Iehova, me hnân haikongu nya, me úhiö hnyi je bong hia. 9 Ke oge me ha, ka habe, Oge me ca he ka hâiâ e, me fuc hmetu hnyi ien, ke haba, e bi ú hnyi hnyekuk helâ me meic ae möt, adre hlöng hnyi hnyin je jeiök, ke iny sényin dut anyin hokhnyok, ke pason. 10 Anyin a oge hia but löng hna úhaikonguny hnen tavat ae se hia, me hna öbubuny hnyi je ke keihen hia. Haingödrin a je hing waek, tavat adre me tuö hnök hna haúhaú, ka habe, Haikongoâ ju e, m' öhmun e he ka hnyi haikongoâ; ame ne he ka hmehmela m' ate me he ka hwege hon, m' ate me he ka

bi hwaban kâu. 11 Ke e bi Iehova unyik helâ me taben vat ae hwege: anyin a wale ame he ka haúhaú but tavat adre me hnu nya, me ca tudra bi: adre me he ka hmehma gan hmâ, anyin a ca tudra bi, adre me ca he ka hnying anyidra hmehma nyiele balua. 12 Iehova tuhan sabaoth lö, at ame cubec tavat ae wisa at ame wâhmakhmeto je hna únykúme me je hnyok, e so oge me he ka wâ hnâm hna bi hwaban ködra; anyin oge hia but omanenâ köu hok hofuc. 13 Khumöng dö kö Iehova, oganö Iehova thö: anyin a e ame hia but húgúnâ hanon at ae theduoc únyi hnyi hnyamen tavat ae kong.

14 Eka mok bong adre hnöku nya hnyin: e so adre me ca haisoâ bong a hnöku nya hnyin bai. 15 Eka mok at ama thumetu cica, ka habe, A o but nokom da, ame osenyinâ e. 16 E so ame he at e ka helâ me je taun waleji a hagutâ Iehova, me ca ietra bi: ke so e ame löng hwakuku hnyi hnyomakatu, me hwahongot hnyi jebigö; 17 anyin a e ame ca hlingö nya únyi eú hnyi hnyok: me me erkemok könya hnyeku bai me erkin bala thibut hnyekon. 18 Anyin a ieu oge me o but úhek hnyi hnyok he ka wâ vec me hlöuhlöu, me me he ka um dö bonguk je bong hnyi hmehma?

HNYIMAKAN 21.

**W**ALANG hofuc ame o kö Jeremia únyi ga Iehova waleji hnyi hnö Zedekia than hna kunö Pasur nöku Malekia kâu, me Zefania nöku Maseia at bihut ame ha, ka habe, 2 Ö u hnei Iehova thö gatin; anyin a Nebukaneza than Babulona ame vat mötin: ame ne he Iehova ka ányâ hobi kötin hoton anyin ta je huliwa hia hnân láiâ, me me he ka he but gatin.

3 Me haba Jeremia ame ha ködru, ka habe, Walang hofuc öbu me he ka ha kö Zedekia, ka habe, 4 Walang hna ha hnö Iehova Khongu Isaraela, ka habe, Wâ bi, oge me he ka ohavâ je omjehen vat ae hnyi je hnyamöbun, waleji ge hnöbun hna vat me than Babulona, me at Kaledaia, tavat adre me igigili öbun hoton hna up veto, ke oge me he ka úkhacaköu ödra hnyi wanben taun ang. 5 Ke haba inya oge me he ka vat möbun ge hnyam adre hai me beny ae hwege, me hnyi hmönyin me wathethöt, me hmönyin ae gan hmâ. 6 Ke oge me he ka kot aten taun ang, wale a at me

JEREMIA 22.

meno : adre me he ka mok ge mok ae gan, wale mok cap. 7 Ke hwaban e, haingö Iehova, oge me he ka hnö Zedekia than Juda, me je athnyabainy, me tavat a je kolon hnyi taun ang únyi hnyi mok ae cap, me hele vat, me hmiâ, ka hnyi hnyamö Nebukaneza than Babulona, me hnyamen je iwahnaihmiöny mödra, me hnyamen tavat adre me elâm he ka hling' ödra : ke e ame he ka kuc ödra ge hele vat ; e ame ca he ka omeli ödra, me hnyok ködra, me betenge. 8 Ke u me he ka ha ka tavat ang, ka habe, Walang hna ha hnö Iehova, ka habe, Wâ bi, inya oge me ip hnyi hnyim-aköbun gethen deny möt, me gethen deny mok. 9 Haba at ame he ka laba bala bi hnyi taun ang, ame he ka mok ge hele vat, me hmiâ, me mok ae cap : ke haba at ama didrut, me kec ka at Kaledaia, tavat adre me igigilö öbun, me ame he ka möt, ame he ka jekhon anyin möt. 10 Anyin a inya oge hia but hnyimakök ka hnyi taun ang me me kong, ke ca hnân bi so, haingö Iehova : adre me he ka hna e ka hnyi hnyamen than Babulona, ke e ame he ka thong e ge meic.

11 Ke haba lap anyin than Juda, löng ju hofuc ho Iehova gan, ka habe, 12 Lap anyi Davita lö, walang hna ha hnö Iehova, ka habe, Anyâ thö únyi ae wisa hnyi hnyomakatu, ke omelö thö at adre söh únyi hnyi hnyamen at úöveci, wâ e nye gâ but anyik hmönyin helâ me meic ame ubâhlâ, ke ba at ama ume, can úkongon anyibun ta je huliwa. 13 Wâ bi, úcûk u, at ame laba hnyi hnyigöulen kicin dok ae tha hon, haingö Iehova, öbun tavat, öbun e ha, ka habe, Ie at ame he ka utut köta? ke ie at ame he ka dit ka hnyi je hnyabata? 14 Ke oge me he ka bi hwaban köbun, e úcû me wan anyibun ta je huliwa, haingö Iehova : ke oge me he ka hú meic hnyi je hnyeuten, ke e ame he ka an igigilö ehele.

HNyimakan 22.

**W**ALANG hna ha hnö Iehova, ka habe, He thö ka hnyi uma umen than Juda, me ha hofuc ang eling, ka habe, 2 Than Juda lö, löng ju hofuc ho Iehova, u at ame tabâ theron anyi Davita, u, me je athnyabaem, me lakem, tavat adre me dit hnyi je homagöule ang. 3 Walang hna ha hnö Iehova, ka habe, Anyâ thö wisa me únyi ae úcû, ke omelö thö at adre söh únyi hnyi hnyamen at úöveci : ca he ka anyâ

monu, me úokonguny ka atkanyua, me nakahme, me safac, ke ca hingâlâ dra ae ba hnyikongon hnyi dok ang. 4 Anyin a öbun e ne he ka anyâ únyi e, me ame he ka dit hnyi je homagöuleny uma ang je than tavat adre me tabâ theron anyi Davita, adre me laba hon je kariota me hors, e me je athnyabainy me je lakeiny. 5 Ke öbun e ne ca löng je hofuc ang, oge me khemanyin gak bi, haingö Iehova, a g' ame he ka ba wan uma eang. 6 Anyin a walang hna ha hnö Iehova ge uma umen than Juda, ka habe, U Gileada könya, ke ban Lebanona : ke so bi, e hnathu, a oge me he ka wiö u me hnân hnyeububa, je taun ae ba aten. 7 Ke oge me he ka penapena gam tavat ohia, ae ve hu únyi hnân vat : ke adre me he ka sö but anyâm je arasi adre úca, me khûâ ka hnyi meic. 8 Ke ame he je hnyei ae se hia ka gethen hnyi taun ang me ve úhakouâ, ha habe, Can ieu Iehova ame anyâ helâng ka taun ang ae gan? 9 Ke adre me he ka thu, ka habe, Can hnödra hna degec úhinyköu anyi Iehova Khongudrin, me khudrung ka ke je khong, me bi athnyabaidrin.

10 Ca tenge bi can at a mokcu, ke ca mâng bi gan : ke tenge hwege bi thö ge at ame he ; anyin a e ame ca he ka hmetu, me wâ hnyei adre hnokoâ e hnyin. 11 Anyin a walang hna ha hnö Iehova ga Saluma nöku Josea than Juda, at ame hwö hwabö Josea a kamen, at ame he but únyi hnyi dok ang, ka habe, E ame ca he ka hmetu kââng ; 12 ke e ame he ka mokcu hnyi dok adre hom bâ e ka hnyin, ke ame ca he hmetu bi ka wâ hnyei ang.

13 Ekölö gan at ame op umen uma hnyi hwakecin ae ca wisa, me je hnyeuleny hnyi hwakecin ae ca úcû : at ame kap huliwa ge tavat me ca bi hwaban bi, ke ame ca ham kâu troban ; 14 at ame ha, ka habe, oge me he ka op umök uma ae lau, ke bwang je hnyeule, ke e ame kave anyin je mamalama ; ke adre me tube ethö hnyin ge arasi, me botro ge botru ae dra. 15 Hawa, u me he ka musu, anyin a u me bebeönua hnyi arasi? hawa, a ca han kâmâm, me ic, me anyâ wisa, me únyi ae úcû? me e ame so but. 16 E ame owisa ivinö anyin at ae theduoc me at ae vec ; me ame so but e. Hawa, ame ca wâhmak-hmetu nya e? haingö Iehova. 17 Ke haba li emâkâm me hnyekom hobi kâu hnâm hna behnyekon, me he ka hingâlâ dra ae ba hnyikongon, me hobi kâu hna okongâo,

## JEREMIA 23.

me úokonguny, me me ányâ thö. 18 Anyin a wale, walang hna ha hnö Iehova ga Jehoiakima nöku Josea, than Juda, ka habe, Adre me ca he ka tenge gan me ha, ka habe, Ekölö ge keik! Ke ekölö ge hanik! ke ekölö ge anyin hmanenang! 19 Adre me he ka konâm e helâ me hna konâm asina, adre me he ka lelö e me khúa hnyi hoton je homagöuleny Jerusalema.

20 Ölö thö Lebanona ai me hongot; ke hongot dö göranyai hnyi Basana: me hongot hnyi Abarima; anyin adre hia but ohia je oúnykúmâm. 21 Oge fuc köu hnyi ányâm sot, me u me ha, ka habe, Oge me ca he ka löng. Wale hwakecâm k' u tiga úhnyúkong, ke u je ca löng ifucik. 22 Adre me he ka hân tavat adre me tuö halem ta je mamoe ge ang, ke ame he je oúnykúmâm ka bá; me u me he ka hnehma me hlohlo can ányâm ta je monu hia thithö. 23 At ame laba hnyi Lebanona lö, at ame bi umen uma hnyi je arasi, nakaem, e ka o vec köu, wale vec helâ me momo ame vec hnyekon e ka he ka hnokoâ. 24 Kia inya haingö Iehova, eja ke ne a ne hnân okeceâ haten hnyi hnyam a metök könya jin Konia nöku Jehoiakima than Juda, oge me he ka oc degeci u e; 25 me oge me he ka hnö u ka hnyi hnyamen tavat adre me elâm he ka hlingö u, me ka hnyi hnyamen tavat waleji u me ouden, wale ka hnyi hnyamö Nebukaneza than Babulona, me ka hnyi hnyamen at Kaledaia. 26 Ke oge me he ka obö u me hinyâm at a hnöku u ka hnyi ke hnye bi, waleji adre ca hnöku öbun hnyin; ke öbun e he ka mok eling. 27 Ke haba hnye waleji adre me weny he ka hmetu ka hnyin, adre me ca he ka hmetu ka hnyin. 28 Hawa, kaia kânâ ae hmöuca adre me húkotiâ at ang, wale a Konia? hawa, e kaia a ca hnân senyina? anyin a ieú adre digic ödra, e me je mátrániny, ke adre ob' ödra ka hnyi hnye ae ca khan' ödra bi? 29 Hmeledrany, hmeledrany, hmeledrany lö, löng ju hofuc ho Iehova. 30 Walang hna ha hnö Iehova, ka habe, Sihnalimen ju at ang a g' ame he ka ba nokon, ke ame ca he ka so bongon je bong: anyin ame ca he ka hnahic ke mátrániny, at ame he ka tabâ theron anyi Davita, me musi hmetu hnyi Juda.

### HNYIMAKAN 23.

**E**KÖLÖ ge tavat tuö mamoe, tavat adre me ohia me oveseâ je mamoe

oge me hat! haingö Iehova. 2 Anyin a wale walang hna ha hnö Iehova Khongu Isaraela ge tavat tuö mamoe tavat adre me tuö lakeik, ka habe, Öbun e hia but oveseâ halek je mamoe, me ob' ödra, me ca sen' ödra; wâ bi, oge me he ka bi hwaban úkongon anyibun ta je huliwa, haingö Iehova. 3 Ke oge me he ka hawâ kolon halek ta je mamoe únyi hnyi ta je hnye hia waleji oge ob' ödra ka hnyin, me ohmetu ödra ka hnyi hnyeuledra; ke adre me he ka hnokoâ sehia me ti sehia. 4 Ke oge me he ka otílâ hudrin tavat tuö mamoe, he ka ha ö 'dra: ke adre me ca he hmetu ka ot, me hlohlo, me hia, haingö Iehova.

5 Wâ bi, ame he ka o je bong, haingö Iehova, ke oge me he ka oâ kö Davita Khûen ae wisa, ke e ame he ka than me musi me so, me ányâ únyi ae wisa me únyi ae úcú hnyi hnye. 6 Hnyi bonginy je bong, ame he ka möt Juda, k' ame he Isaraela ka laba khotkic: ke walang ien adre me he ka hawâ, ka habe, Iehova wisaita. 7 Anyin a wale, wâ bi, ame he ka o je bong, haingö Iehova ke adre me ca he hmetu bi ka ha, ka habe, Kia inya Iehova at ame hom lakon Isaraela únyi hnyi hnye Aigupito; 8 ke so bi, Kia inya Iehova at ame su je mátrániny lap anyi Isaraela únyi hnyi hnye hnyi hwadrö, me únyi hnyi je hnye waleji oge ob' dra ka hnyin: me adre me he ka labâ idra bi.

9 Ge ta je perofeta. Ame vec eú hnye-kuk me öbubuny hia je jeiök, oge me helâ me at ame monu ge grák, me helâ me at ame ngâ ge waina; can ga Iehova me hwan hofuc ae kap. 10 Anyin a unöngötö hnye ge tavat bi únyi monu; anyin ame tenge hnye can hna hángá: e atgec dö je dok a je sajilat hnyi hnyeubaba: ke kong dedra je gethen, ke ca wisa tang hwegiödra. 11 Anyin ame bi gan je perofeta me tavat bilut, eke, oge hia but wâ anyidra hulö hnyi umök uma, haingö Iehova. 12 Anyin a wale ame he dedra je gethen ka helâ me dok ae haúhaú hnyi menekholom ködra, adre me he ka alin ödra m' adre me ta hnyin: anyin oge me he ka oâ ködra únyi ae kong, wale hunainy bi hwaban ködra, haingö Iehova. 13 Ke oge hia but wâ hwen monu unyin je perofetainy Samaria: adre me perofeta me haiö Baala, me omonö lakeik a at Isaraela. 14 Ke oge hia but wâ únyi ae ikiki unyin je perofeta hnyi Jerusalema; adre me bi únyi monu me vhenho thoi, ke adre me ohwegiâ je hnyamen

JEREMIA 23.

tavat ae kong, me me ca ve ödra hmetu hnyi anyidra hulö : ödra hia thithö adre me helâ me at Sodoma kõnya, ke haba tavat adre me labâ e, ödra helâ me Gomora.

15 Anyin a wale, walang hna ha hnö Iehova tuhan sabaoth ge je perofeta, ka habe, Wâ bi, oge me he ka ha ö'dra ge khöhlöng me habelidra ge köiö hnân mekiny : anyin ame o but bi gan ka hnyi hnyei hia ûnyi ge je perofeta hnyi Jerusalema. 16 Walang hna ha hnö Iehova tuhan sabaoth, ka habe, Ca löng ta je hofuc hwan ta je perofeta adre me perofeta köbun ; adre me ûnö köbun ta je ûnyi baû bi ; adre me ha hna omanenâ ûnyi eû hnyi hnyekudra bi, ke ca ûnyi bi hnyi hnyimö Iehova. 17 Adre me ha bala bi ka tavat adre me hûkötïö nya, ka habe, Iehova ame ha, ka habe, Öbun e he ka hnahic : ke adre me ha ködra hia thithö tavat adre me hnu hoton hwegien je hnyekudra bi, ka habe, E ba hulö ame he ka o köbun. 18 Anyin a ie at a mwi hnyi ûhnenamö anyi Iehova me me khana me löng hwan hofuc ? ie at ame hia but tevehlöng me löng hnök hna ha ? 19 Wâ bi, ame o but weneû anyi Iehova, wale anyin hmönyin, eke, weneû ame khenyö : e ame he hwege hon ban tavat ae kong. 20 Ame ca he ka hmetu hmönyin anyi Iehova, ke ne o but e ame hia but ânyâ, ke ne o but e ame ohwâdâ je ûnykûmenen hnyekon : öbun e he ka ti wâhmakhmeto e hnyi je bong a biliny. 21 Oge ca kunâ je perofeta e, ke so bi, adre me wadring : oge ca fuc ködra, ke so bi, adre me perofeta. 22 Ke so bi adre ne hia but mwi hnyi anyik ûhnenamö, awe, adre me he ka olöngâ lakeik ge hok ta je hofuc, me ohmetu ödra ûnyi hnyi dedra je gethen ae kong, me ûkonginy anyidra ta je huliwa. 23 Hawa, inya ang Khong hnyi dok ae hakekeny, haingö Iehova, ke ca Khong hnyi dok ae sâkâû ? 24 E hu at ama ikhölö hnyi dok ae iyong ke oge me ca he ka wâ ? haingö Iehova. Hawa, e ca unöngöt drany me hmeledrany gak ? haingö Iehova. 25 Oge hia but löng waleji ge hna ha hnen ta je perofeta, tavat adre me perofeta thoi hnyi iök me ha, ka habe, Oge hia but bwo, oge hia but bwo. 26 Ame he ka e bi ke ne o but kehö eû hnyi hnyekon ta je perofeta tavat adre me perofeta thoi : wale tavat adre me perofeta iyawöâ je hnyekudra ? 27 Tavat adre me ûnykûme he ka ohnyingâ lakeik wale ge iök hnen je bwidra, wale adre me ve ha ka

lahanödra, helâji me hnen lakamödra hna hnying iök ga Baala. 28 Haba perofeta ae hu bwi, me hamen bi he ka ha bwi ; ke haba at ae hu gan hok hofuc, hamen he ka ha hnathoâ hok hofuc. Hawa, e ûcü thatûnyin hwit me je wan ? haingö Iehova. 29 Hawa, e ûcü hok hofuc me meic ? haingö Iehova, ke helâ me hama at ame kot omomono kic ?

30 Anyin a wale, wâ bi, ûcü ta je perofeta, haingö Iehova, tavat adre me ivenâukouâ hok ta je hofuc. 31 Wâ bi, ûcü ta je perofeta, haingö Iehova, tavat adre me fuc ge bohmödra me ha, ka habe, E ame ha. 32 Wâ bi, ûcü ta je perofeta tavat adre me bwi thoi, haingö Iehova, wale tavat adre me ha bi me omono lakeik hnen anyidra ta je thoi, me hwakecidra ae hop : ke oge me ca kun' ödra me hûna ködra ; ke ame he ka ba troban ka hnyei ang ûnyi gadra, haingö Iehova. 33 Ke e ka he ka hnei u hnen tavat ang, ame ne perofeta, ame ne at bihut me ha, ka habe, Ieû hok ûnyi ga Iehova ? me u me he ka thu ködra, ka habe, Ie hok ? Oge me he ka hna degeci öbun, haingö Iehova. 34 Ke haba perofeta, me at bihut, a tavat adre me he ka ha, ka habe, Walang hok ûnyi ga Iehova, awe, oge me he ka bi hwaban ka at eling me anyin lap. 35 Walang ûnyi öbun e he bi ka ûhakouâ, a ke at me ke at, ka habe, Ieû hna thu hnö Iehova ? ke ieû hna ha hnö Iehova. 36 Ke ca he hmetu öbun ka ha hok ûnyi ga Iehova : anyin a haba ve ifucin tavat wale honödra bi je hok ; anyin a öbun e hia but ohavâ hofuc hwan Khong ae möt, Iehova tuhan sabaoth Khonguta. 37 U me he ka ha helâng ka je perofeta, ka habe, Ieû hna thu hnö Iehova köu ? ke ieû hnen hna ha ? 38 Ke öbun e ha, ka habe, Hok ûnyi ga Iehova ; awe, walang hna ha hnö Iehova, ka habe, Can hnöbun hna ha hofuc ang, ka habe, Hok ûnyi ga Iehova, ke so bi, oge ûkhünöng köbun m' öbun e ca he ka ha, ka habe, Hok ûnyi ga Iehova : 39 anyin a wale oge me he ka ti hnying öbun, ke oge me he ka obâ degeci öbun ûnyik, öbun, me taun, waleji oge ham köbun me lakamöbun : 40 ke oge me he ka wi' öbun hnân haikongoâ nyiele balua, me hnân hmehma nyiele balua, a ca hnân he ka hnying.

## HNYIMAKAN 24.

**H**ABA Iehova ame omanená könya, ke wâ bi, li tang meta adre ip hnyi hnyimakan uma umö Iehova : hnyi ün Nebukaneza than Babulona ame hia but hum Jekonia nöku Jehoiakima than Juda, me je taben hnyi Juda, me tavat huliwa me tavat leü fao, úhedra Jerusalema, me hum ödra Babulona ai. 2 Haba ke tang meta, me, ti so helâ me je wan meta a bân : ke haba ke tang meta, me kong, ke ca hnân han, anyin ae kong. 3 Haba Iehova ame ha könya, ka habe, Jeremia lö, ieü u je wâ ? ke haingök, ka habe, Je wan meta : haba je wan meta ae so, me e ka ti so, ke haba je wan ae kong, me e ka ti kong, ke ca hnân han anyin ae kong. 4 Me ame o but könya hofuc ho Iehova, ka habe, 5 Walang hna ha hnö Iehova Khongu Isaraela, ka habe, Oge me he ka wâhmakhmeto je bâ anyin at Juda, waleji oge kun' ödra úhedra ang ka hnyi hnyei Kaledaia, m' adre me so, helâ me je wan meta eang ae so. 6 Ke oge me he ka wâ hm' ödra, m' adre me so, ke oge me he ka ohmetu ödra ka hnyi hnyei ang : ke oge me he ka up ödra göranyai, ke adre me ca he ka hagut ödra ; ke oge me he ka te ödra, me ca he ka oc. 7 Ke oge me he ka ham ködra hnyok he ka wâhmakhmetu nya, a inya Iehova : ke adre me he ka bi lakeik, ke oge me he ka Khongudrin, anyin adre me he ka hmetu könya ge hnyok ae bekhöt. 8 Ke haba je wan meta ae kong, ke ca hnân han anyin ae kong : E hnathu, haingö Iehova, oge me he ka hnö Zedekia than Juda helâe, me anyin je taben, me je kolón hnyi Jerusalema, je kolon tavat aten hnyei ang me tavat adre me laba hnyi Aigupito : 9 ke oge me he ka hn' ödra m' adre me he ka lili ödra monu ödra hnen ta je dökhu hia eang hmeledrany ; m' adre me he ka hnân haikongoâ, me taben úhiö me hlumâ, me hangâ hnyi ta je dok hia thithö oge me he ka ob' ödra ka hnyin. 10 Ke oge me he ka kunâ ködra hele vat, me hmiâ, me mok ae cap, ke ne o but adre me oaü' ödra únyi hnyi hnyei oge ham ködra me lakamödra.

## HNYIMAKAN 25.

**H**OFUC ame o kö Jeremia ge tavat Juda hia hnyi huna a vaki Jehoiakima nöku Josea, than Juda ; wale huna a bâni

Nebukaneaz than Babulona ; 2 waleji hofuc a ha Jeremia perofeta ka tavat hia hnyi Juda, me tavat hia adre me laba hnyi Jerusalema, ka habe, 3 Hwân hnyi huna a thötini Josea nöku Amona than Juda, ke ne o but hnyi bong ang, wale hnyi huna a twente theri, ame o but könya hofuc ho Iehova, me oge hia but ha köbun, me labö vesâ kong me ha, ke öbun e ca löng bi öbun. 4 Ke a hia but Iehova kunâ köbun je perofeta hia a je athnyabainy, ame vesâ kong me úkhünöng : ke öbun e ca hia but löng, me ca tâ je hnyikönyöbun he ka löng ; 5 Haingödra, ka habe, Ve hmetu ju öbun únyi hnyi debun ta je gethen ae kong, me úkonginy anyibun ta je huliwa, me öbun e he ka labâ hnyei a ham köbun Iehova, me lakamöbun kâü ehac, ke ne o but nyiele balua : 6 ke ca hnu hoton ke je khong he ka bi athnyaba ködrin, me khudrang ködrin, ke ca he bi ka ohmönyini nya ge ta je huliwa anyin je hnyamöbun ; ke oge me ca he ka okongu öbun. 7 Ke so bi, öbun e ca hia but ling nya, haingö Iehova ; me öbun e he ka ohmönyini nya ge ta je huliwa anyin je hnyamöbun me öbun e he ka kong. 8 Anyin a wale, walang hna ha hnö Iehova tuhar' sabaoth, ka habe, Anyin a öbun e ca löng hok ta je hofuc. 9 Wâ bi, oge me he ka kunâ me hom je lap hia hnyi hwadrö, haingö Iehova, me Nebukaneza than Babulona athnyabaik, me oi ödra úcúdrin hnyei ang, me tavat adre me laba hnyin, me ta je hnyei hia igigilö e ; ke oge me he ka ti ohí' ödra, me wi' ödra hnân kuko me jú, me ba wan nyiele balua. 10 Ke oge me he ka ohia gadra hwan senyin me hwan hobâ, me ifucin li at ödre tep faipoipo, me meainy li veto hnân omomono, me melaminy lamepa. 11 Ke ame he ka ba wan hnyei ang hia, me hnân láia, ke ame he ta je hnyei eling ka bi athnyabainy than Babulona hnyi sevente ta je huna. 12 Ke e ka bekhötö ta je huna a sevente, me oge me he ka bi hwaban ka than Babulona ke tavat eling can hwakecidra ae kong, haingö Iehova, ke hnyei Kaledaia : ke oge me he ka wia e me me ba wan nyiele balua. 13 Ke oge me he ka oâ ka hnyei eling ta je hofuc hia oge hia but ha gan, wale hna sihnalimen hia hnyi tusi ang, waleji hnö Jeremia perofeta ge ta je hnyei hia. 14 Anyin ame he je hnyei ae se hia me je than ka thalu' ödra, ke oge me he ka bi hwaban ködra helâ me hwakecidra, me helâ me hna ányâ hnen je hnyamödra.

JEREMIA 26.

15 Anyin a walang hna ha hnö Iehova Khongu Isaraela könya, ka habe, Hom dö tap wainainy hmönyin ang únyi hnyi hnyamök, me habelen je hnyei hia waleji oge me he ka kunö u ka hnyin. 16 Ke adre me he ka ic me ta tot, me ti hmönyin, can hele vat oge me he ka kunâ ködra. 17 Me oge me hom kaia únyi hnyi hnyamö Iehova, me habelen je hnyei hia waleji ame kunö nya Iehova ka hnyin : 18 wale Jerusalema me je tauniny Juda, me je thaniny, me je taben, m' adre me wi' ödra he ka ba wan, me hnân kuko me jú, me hangâ helâ me hnyi bong ang ; 19 kö Farao than Aigupito, me lathnyabainy, me anyin je taben, me je lakeiny hia ; 20 me ke je tavat bi ae ve bongon hia, me ta je than hia thithö hnyei Uza, me ta je than hia thithö hnyi hnyei Filisiti, me Asekelona, me Gaza, me Ekerona, me je kolon hnyi Asedoda ; 21 me Edoma, me Moaba, me je laku Amona ; 22 me ta je thaniny hia Turo, me ta je thaniny hia Sidona, me je thaniny bomene hnyi ke keihen hoton köiö ; 23 me Dedana me Tema, me Buza, me ödra hia thithö tavat adre me giâ ke keihen leünödra ; 24 me je thaniny hia Arabia, me ta je thaniny hia ke je hnyat ae ve bongon bi adre me laba hnyi hnyebuba ; 25 me ta je thaniny hia Zimeri, me ta je thaniny hia Elama, me ta je thaniny hia Madai ; 26 me ta je than hia hnyi hwadrö, tavat ae hakeny me sâkâú, ke at me ke at, me ta je dökhuiiny hia hmeledrany hnyi hon kânâ : ke ame he than Sesaka ka ic hnyi hwabödra. 27 Ke u me he ka ha ködra, ka habe, Walang hna ha hnö Iehova tuhan sabaoth, Khongu Isaraela, ka habe, Ijem d' öbun, ke monu thö, me hmita but, me ta ju, ke ca tot hmetu bi, can hele vat oge me he ka kunâ köbun. 28 Ke adre ne hócö hom kaia únyi hnyi hnyamâm ke ic, u me he ka ha ködra, ka habe, Walang hna ha hnö Iehova tuhan sabaoth, ka habe, E hnathu öbun e he ka ijem. 29 Anyin a wâ bi, inya oge me hwân he ka oatâ únyi ae kong ka taun wale adre wenyö kâu iök, ke hawa, adre me ca he minya ka bi hwaban köbun? Öbun e ca he ka he baú : anyin oge me he ka hawâ hele vat hobi kâu tavat hia thithö adre me laba eang hmeledrany, haingö Iehova tuhan sabaoth. 30 Anyin a wale, u me he ka perofeta ködra ta je hofuc ang hia me ha ködra, ka habe, Ame he Iehova ka kuku ethö, me fuc göranyai únyi hnyi hnyaban ae kap ;

e ame he ka kuku úcon haleny haginy hnahat ; e ame he ka kuku úcon aten hmeledrany hia helâ me tavat adre me ututo wan vine. 31 Ame he ka o mede ke ne o but hnyi can hmeledrany : anyin ae hu ivinö anyi Iehova me ta je hnyei, e ame he ka úhnei me tavat hia : ke haba tavat ae kong, e ame he ka hn' ödra ka hnyi hele vat, haingö Iehova.

32 Walang hna ha hnö Iehova tuhan sabaoth, ka habe, Wâ bi, ame he ka he úkonguny únyi hnyi ke hnyei ka hnyi ke hnyei, ke ame he ka o weneú ae gan únyi hnyi can hmeledrany. 33 Ke haba hnyi bong eling ame he ka e bi ta je hani Iehova ka e hnyi ke can hmeledrany ke ne o but ka hnyi ke can hmeledrany : adre me ca he ka tenge gadra, me hlu ödra, me konâm ; ke adre me he ka hnân tatet hon kânâ. 34 Kuku tenge thö, öbun tavat tuö mamoe ; ke tenge thö me seset hnyi kânâ öbun je homakan hnahat mamoe, anyin a hwâdâ thö je bong hnân he ka hling' öbun, ke oge me he ka tha oamem' öbun, ke öbun e he ka kölu helâ me kaia ae so. 35 Ke ame he ka ba gethen deny tavat tuö mamoe he ka kec hnyin, me hnân homakan hnahat mamoe he ka möt hnyin. 36 E hu hwa-tenge ge tavat tuö mamoe, me kuku tenge ge homakan hnahat! anyin a hia but Iehova okongoâ hnödra hna han hnyin. 37 Ke adre ohnyibö je haginy mamoe ae hnahic ge hmönyin anyi Iehova. 38 A hia but hna degecâ umen uma helâ me liona : anyin adre hia but wia idra hnyei me hnân láia hnen hwegien at úöveci, me hnen anyin hmönyin ae hwege.

HNYIMAKAN 26.

**H**ABA hnyi hwân musi a Jehoiakima nöku Josea than Juda, ame o but hofuc ang únyi ga Iehova, ka habe, 2 Walang hna ha hnö Iehova, ka habe, He thö ka tot hnyi hnyeuleny uma umö Iehova, me ha ka ta je tauniny Juda hia, tavat adre me o he ka hnyi khudrung hnyi uma umö Iehova, ta je hofuc hia thithö wale oge hûna he ka ha ködra ; ca ikhâlâ bi ke hofuc. 3 Adre me ne he ka löng, me ve hmetu únyi hnyi dedra ta je gethen ae kong : me oge me he ka ietra únyi ae kong waleji oge únykúme he ka ányâ ködra can úkongon anyidra ta je huliwa. 4 Ke u me he ka ha ködra, ka habe, Walang hna ha hnö Iehova, ka habe, Öbun e ne ca ling

nya he ka vheno anyik hnanyibu, waleji oge ip hnyi hnyimaköbun, 5 me löng ta je hofuc hwan lathnyabaik a je perofeta, waleji oge kuná köbun, me vesá kong me kun' ödra, ke öbun e ca löng bi ; 6 awe, oge me he ka wia uma eang me me helâ me Silo, ke oge me he ka wia taun ang hnân hangâ hnen je hnyei hia eang hmelen. 7 Ke haba tavat bihut, me je perofeta, me tavat hia adre me ling Jeremia ame ha ta je hofuc eling hnyi uma umö Iehova. 8 Ke a hia but Jeremia ha hia hna hûna kâu hnö Iehova he ka ha ka tavat hia, me ame kât e hnen tavat bihut, me ta je perofeta, me tavat hia me ha, ka habe, U me he but ka mok. 9 Anyin a ieû, u je perofeta hnyi iö Iehova me ha, ka habe, Ame he Uma kap eang ka helâ me Silo, ke ame he ka hnyot taun ang, ke ama ba at ame he ka labâ e? Ke ame ûkhacaköu tavat hia kö Jeremia hnyi uma umö Iehova.

10 Ke a löng ut ta je hofuc eling hnen je taben hnyi Juda, me ödrin e he ûbedrin hnyi uma umen than ka hnyi uma umö Iehova, ke ödrin e laba hnyi homagöule ae teb ûnyi gethen ame he ka hnyi uma umö Iehova. 11 Me haba tavat bihut, me je perofeta, adre me ha ka je taben me tavat hia, ka habe, E úcú but at ang he ka mok, anyin a e ame perofeta úcon taun ang, helâ me hna löng hnen je hnyikönyöbun. 12 Me Jeremia ame ha ka ta je taben hia, me tavat hia, ka habe, Iehova ame kunö nya he ka perofeta ûnyi ae kong ka uma eang me taun eang a ta je hofuc waleji öbun e löng. 13 Ke walang ang ânyâwia thö debun je gethen, me je hwakecibun, ke löng ju ifuci Iehova Khongubun; me me he Iehova ka ietra ûnyi ae kong waleji e ame ha gabun. 14 Ke haba inya, wâ bi, inya but hnyi hnyamöbun : ânyâ thö könya helâ me ûnyi ae so me úcú könya. 15 Ke so bi, wâhmakhmeto ju öbun, öbun e ne he ka hlingö nya, öbun e he ka ohwâdá dra ae ba hnyikongon hubun, me hon taun ang. me tavat adre me labâ e : anyin ae hnathu Iehova ame kunö nya köbun he ka ha ka hnyi je hnyikönyöbun ta je hofuc ang. 16 Me ame ha hnen je taben me tavat hia ka tavat bihut me ta je perofeta, ka habe, E ca úcú bi at ang he ka mok, anyin a e ame fuc köta hnyi iö Iehova Khonguta. 17 Me ame tot ke je hingatiny hnyei me ha ka tavat hia adre me ûkhacaköu, ka habe, 18 Haba Mika at Moresa ame perofeta

hnyi bong bongu Hezekia than Juda ; ke e ame ha ka tavat hia, ka habe, Walang hna ha hnö Iehova tuhan sabaoth, ka habe, Adre me he ka seû Ziona helâ me utkânâ, ke adre me he ka wia Jerusalema me me hna digic thatûnyi, me buceniny uma ka helâ me je dok ae görany hnyi hnyot. 19 Hawa ga Hezekia than Juda me at Juda hia, adre me hlingâ e? hawa, e ame ca outö Iehova, me khöû kö Iehova, ke haba Iehova ame ietra hulö waleji e ame ha gadra? Ate me ne ânyâ hulö ae gan hmâ köta bi. 20 Ke hu minya ke at ame perofeta hnyi iö Iehova jia Uria nöku Semaia at Kiriatha-jarim, ke e ame perofeta ûnyi ae kong hon taun ang me hnyei ang, helâ me ta je hofuc ho Jeremia : 21 Ke haba Jehoiakima than, me anyin tavat hia ae hwege, me anyin je taben hia, adre me löng hwan, haba than ame elâm he ka hlingâ e ; ke e khanö Uria but, me e ame ot, me kec, me he Aigupito ai : 22 ke haba Jebiakima than ame ûkhünöng Aigupito ai, jia Elemathana nöku Akebora, me keihen a tha ödra me Aigupito ai : 23 ke adre me hum Uria úbeny Aigupito me hom e kö Jehoiakima than, me e ame hlingâ e ge hele vat me khûâ unyin ka hnyi erkemok anyin houmonu. 24 Ke so bi, haba Ahikama nöku Sefana ame hadruo Jeremia, m' adre me ca hna e ka tavat he ka hlingâ.

HNYIMAKAN 27.

**H**ABA hnyi hna hwân musi a Jehoiakima nöku Josea, than Juda, ame o but hofuc ang ûnyi ga Iehova kö Jeremia, ka habe, 2 Walang hna ha könya hnö Iehova, ka habe, Ânyâ thö hobi köu je tö. me je hna úhükâlâköuâ, me ip hon nyem. 3 ke kunâ thö ta je ûnyi e ka than Edoma, me than Moaba, me thaniny je laku Amona, me thaniny Turo, me thaniny Zidona, a deny je úthumetu tavat adre me o hnyi Jerusalema kö Zedekia than Juda ; 4 ke hûna thö ka je tuhödra, ka habe, Walang hna ha hnö Iehova tuhan sabaoth Khongu Isaraela, ka habe : Walang hofuc öbun e he ka ha ka ta je tuhöbun ; 5 ka habe, Oge hia but op hmeledrany, wale at me meno hon hmeledrany hnen manik man ae gan hmâ me benyik ae lau ; ke oge me ham e ka at ae úcú könya. 6 Ke walang ang oge hia but ham je hnyei ang kö Nebukaneza than Babulona, athnyabaik ;



## JEREMIA 28.

ke haba khaca oge hia but ham kâu je menoiny hnyot hnân bi athnyabainy. 7 Ke ame he je hnyei hia thithö ka bi athnyabainy, me lakon, me laöbiny, ke ne o but ame o but üen iny hnyei bi : ke ame he bi je hnyei ae se hia, me je than ae gan ka thaluâ e. 8 Ke haba hnyei me dökhu ame ca bi athnyabai Nebukaneza eling than Babulona me ca hna je nyidra ka hnyi hna úhúkálákouâ anyin than Babulona, me oge me he ka kot hnyei eling, haingö Iehova, ge hele vat, me hmiâ, me mok ae cap, ke ne o but oge hia but oaú' ödra a deny hnyamen. 9 Ke haba öbun ca löng bi ka anyibur je perofeta, me anyibun tavat bi khong, me anyibun tavat bwi, me anyibun tavat bibihwakecin, me anyibun tavat tren khong, tavat adre me fuc köbun me ha, ka habe, Ca he öbun ka bi athnyabainy than Babulona : 10 anyin adre me perofeta thoi köbun, m' adre me he ka öüsákâú' öbun me ibun hnyei ; me oge me he ka ob' öbun me öbun e he ka mok. 11 Ke haba hnyei tavat adre me hna je nyidra ka hnyi hna úhúkálákouâ anyin than Babulona, me bi athnyabainy, me oge me he ka ip tavat eling ka laba bi hnyi idra, haingö Iehova ; ke adre me he ka belökâ me labâ e.

12 Me oge me ha kö Zedekia than Juda helâ me ta je hofuc hia eling, ka habe, Hna but je nyibun ka hnyi hna úhúkálákouâ anyin than Babulona, me bi athnyabainy, me iny hnyei me öbun e mot. 13 Anyin a ieu öbun e he ka mok, u me lakem ge hele vat, me hmiâ, me mok ae cap, helâji me hna ha ga Iehova ka hnyei ame hócö bi athnyabainy than Babulona? 14 Ke ca löng bi hofuc hwan je perofeta, tavat adre me fuc köbun me ha, ka habe, Öbun e ca he ka bi athnyabainy than Babulona : anyin a ödra adre me perofeta thoi köbun. 15 Anyin oge ca kun' ödra, haingö Iehova, ke adre me perofeta thoi hnyi iök ; waleling me inye he ka ob' öbun, m' öbun e he ka mok, öbun me je perofeta tavat adre me perofeta köbun. 16 Ke oge me fuc minya ka tavat bihut, me tavat hia eang, ka habe, Walang hna ha hnö Iehova, ka habe, Ca löng bi je hofuc hwan anyibun je perofeta, tavat adre me perofeta köbun me ha, ka habe, Wâ bi, adre me he ka ie hom hmetu je kaiainy uma umö Iehova úheny Babulona : anyin a ödra adre me perofeta thoi köbun. 17 Ca ling ödra bi ; bi athnyaba thö ka than Babulona me

öbun e möt : anyin a ieu ame he ka ba wan taun ang? 18 Ke adre ne je perofeta, ke a ne e bi unyidra hofuc ho Iehova, e so adre me he walang ang ka khöü kö Iehova tuhan sabaoth, m' adre me ca hom Babulona ai ta je kaia a kolon biju a e biju hnyi uma umö Iehova, me hnyi uma umen than Juda me Jerusalema. 19 Anyin a walang hna ha hnö Iehova tuhan sabaoth ge li hmolom, me taben köiö ae gan, me je taben, me je kolon ta je únyi a hnen biju hnyi taun ang, 20 waleji a ca hom Nebukaneza than Babulona waleji hnyi hnen hna hum Jekonia nöku Jehoiakima than Juda úheny Jerusalema Babulona ai, me je taben hia hnyi Juda me Jerusalema : 21 eke, walang hna ha hnö Iehova tuhan sabaoth Khongu Isaraela ge ta je únyi a hnen biju hnyi uma umö Iehova me uma umen than Juda me Jerusalema, ka habe, 22 adre me he ka hom ta je únyi e Babulona ai, ke ame he ka hnen ling ke ne o but hnyi bong oge me he ka sen' ödra hnyin, haingö Iehova ; me oge me he ka hom ta je únyi e me ohmeto ka hnyi dok ang.

### HNYIMAKAN 28.

**K**E haba hnyi huna eling, hnyi hwâniny musî a Zedekia than Juda, hnyi huna a vakiny, hnyi tehi a thabúnginy, me ame fuc könya Hanania nöku Azura perofeta at úheny Gibeona, hnyi uma umö Iehova hnyi hnyimakan tavat bihut me tavat hia, ka habe, 2 Walang hna ha hnö Iehova tuhan sabaoth, Khongu Isaraela, ka habe, Oge hia but thamua hna úhúkálákouâ anyin than Babulona. 3 E ka tiga ca um bi li huna oge me he ka ohmeto ka hnyi dok ang ta je omjehen hia uma umö Iehova, waleji hnö Nebukaneza than Babulona hna hom úheny ang, me hom Babulona ai : 4 ke oge me he ka ohmetu Jekonia nöku Jehoiakima, than Juda ka hnyi dok ang, me ta je bâ hia anyin at Juda, tavat adre me he Babulona ai, haingö Iehova : anyin oge me he ka thamua hna úhúkálákouâ anyin than Babulona. 5 Me haba Jeremia perofeta ame ha kö Hanania perofeta hnyi hnyimakan tavat bihut, me tavat hia adre me útitilen hnyi uma umö Iehova, 6 haingö Jeremia perofeta, ka habe, Amen : e na ányâ helâ ju e Iehova : e na ohwâdâ ju Iehova hwan hofuc, waleji u je perofeta, he ka ohmeto ka hnyi dok ang ta je omje-

JEREMIA 29.

hen uma umö Iehova, me ta je bâ hia, ûheny Babulona. 7 Ke so bi, walang ang löng ju hofuc ang wale oge me he ka ha ka hnyi li hnyikönyâm, me li hnyikönyen tavat hia, ka habe, 8 Haba je perofeta a bödra ehac, ke a bilik bi möu, adre me perofeta ge ta je hnyei ae se hia, me ta je dökhu ae gan, he ka vat, me monu, me mok ae cap. 9 Haba perofeta at ame perofeta hnahic, ke e ka hwädâ thö hofuc hwan perofota eling, adre me he ka wâhmakhmeto perofeta e a ga kunâ Iehova. 10 Me haba perofeta Hanania ame hom hna ûhûkâlâkôuâ ûnyi hnyi hon nyi Jeremia perofeta me thamuâ e. 11 Ke haba Hanania ame ha hnyi hnyimakan tavat hia, ka habe, Walang hna ha hnö Iehova, ka habe, Helâe oge me he ka thamuâ hna ûhûkâlâkôuâ anyi Nebukaneza than Babulona ûnyi hnyi hon nyin ta je hnyei hia, ke tiga ca um bi li huna. Ke haba Jeremia perofeta ame he but. 12 Me ame o but hofuc ho Iehova kö Jeremia, hwaban hnö Hanania perofeta hna thamuâ hna ûhûkâlâkôuâ ûnyi hnyi hon nyi Jeremia perofeta, me ha, ka habe, 13 He thö ka ha kö Hanania perofeta, ke habe, Walang hna ha hnö Iehova, ka habe, U je hia but thamuâ hna ûhûkâlâkôuâ a utö, ke u me he ka ânyâ ke je hna ûhûkâlâkôuâ a fao me hnân hwaban. 14 Anyin a walang hna ha hnö Iehova tuhan sabaoth, Khongu Isaraela, ça habe, Oge hia but ip hna ûhûkâlâkôuâ a fao hon nyin ta je hnyei hia eling, m' adre me he ka bi athnyabai Nebukaneza than Babulona : ke adre me he bi ka bi athnyabainy : ke oge hia but ham kâu minya je menoiny hnyot. 15 Me haba Jeremia perofeta ame ha kö Hanania perofeta, ka habe, Hanania lö, löng ju walang ang ; a ca kunö u Iehova ; ke u je olabagejo tavat ang ka hnyi thoi. 16 Anyin a wale, walang hna ha hnö Iehova, ka habe, Wâ bi, oge me he ka obö u ûnyi eang hmeledrany ; u me he ka mok hnyi huna eang, anyin a u je hia but fuc ûkhin fuc me Iehova. 17 Me ame mokcu Hanania perofeta hnyi huna eling, hnyi tehi a seveniny.

HNYIMAKAN 29.

**W**ALANG önyen tusi wale a kunâ Jeremia perofeta ûheny Jerusalema ka ta je kolon wale a wahingatiny je bâ, me tavat bihut, me ta je perofeta, me tavat hia, waleji hnö Nebukaneza hna hom ûheny Jerusalema Babulona ai : 2 (hwaban hna he hnö Jekonia than, me momo than, me je eúnuka, me je taben Juda me Jerusalema, me tavat ae metâ huliwa, me tavat leú fao ûhedra Jerusalema ;) 3 a deny Elasa nöku Safana, me Gemaria nöku Helekia, (waleji hnö Zedekia than Juda hna kunâ Babulona ai kö Nebukaneza than Babulona) me ha, ka habe, 4 Walang hna ha hnö Iehova tuhan sabaoth, Khongu Isaraela, ka ta je bâ hia, waleji oge ûkhü-möng he ka hom ûheny Jerusalema Babulona ai, ka habe, 5 Bi umöbun dö uma me labâ ju ; ke biibun dö me an ju wan ; 6 hok öiöbun dö me bi lakubun da me in ; ke heleú âiân dö lakubun obaga, ke ûhamköuâ thö lakubun wahu ka je бага, m' adre me he ka hnokoâ obaga me wahu ; me öbun e he ka se hia eling, me ca he bi ka wakhalet. 7 Ke elâm dö hnahicin taun waleji oge ûkhünöng he ka hum öbun ka hnyin, ke hic dö kö Iehova hobi kâu e : anyin a hnyi hnahicin e, öbun e he ka hnyi hnahic. 8 Anyin a walang hna ha hnö Iehova tuhan sabaoth, Khongu Isaraela, ka habe, E so he ka ca omonu öbun ge anyibun je perofeta a ödra unyibun, me anyibun tavat bi khong, ke ca löng öbun ka ta je bwi, waleji adre bwo hobi köbun. 9 Anyin adre me perofeta thoi köbun hnyi öök : oge ca kun' ödra, haingö Iehova. 10 Anyin a walang hna ha hnö Iehova, ka habe, E ka bekhöt dö ta je huna a sevente hnyi Babulona, oge me he ka sen' öbun, me ohwädâ köbun hok hofuc ae so, m' adre me ohmetu öbun ka hnyi dok ang. 11 Anyin ae khanö nya bi ta je ûnyküme, oge me ûnyküme köbun, haingö Iehova, je hna ûnyküme ae hnahic, ke ba kong hnyin, me me he ka hu gejon hnyi obiny. 12 Ke öbun e he ka hao nya, me öbun e he ka he me hic könya, me oge me he ka ling öbun. 13 Ke öbun e he ka elöm nya me ö nya, öbun ka he ka elöm nya hnen je hnye-kubun ae bekhöt. 14 Ke öbun e he ka ö nya, haingö Iehova, ke oge me he ka ohmetu öbun ûnyi hnyi hna hwenbâ, ke oge me he ka ûkhacaköu öbun ûnyi hnyi ta je hnyei hia, me je dok hia, waleji oge ob' öbun ka hnyin, haingö Iehova ; ke oge me he ka ohmetu öbun ka hnyi dok waleji oge hwenb' öbun hnyin. 15 Anyin a öbun e hia but ha, ka habe, Haba Iehova ame hia but oâ hobi köta hnyi Babulona ta je perofeta. 16 Anyin a walang hna ha hnö Iehova ge than at ame tabâ theron anyi Davita me

## JEREMIA 30.

tavat hia, tavat adre me labā taun ang, a je liamekeiny möbun adre ca hnyi he möbun ka hnyi bâ ; 17 walang hna ha hnö Iehova tuhan sabaoth, ka habe, Wâ bi, oge me he ka kunâ ködra hele vat, me hmiâ, me mok ae cap, ke oge me he ka wi' ödra, m' adre me úcú me wan meta ae kong ke ca hnân bi han, anyin ae kong. 18 Ke oge me he ka hnu ödra ge hele vat, me hmiâ, me mok ae cap ; ke oge me he ka hnödra ka he monu hnyi je dökhü hia eang hmeledrany, me me hnân hangâ, me kuku, me jú, me hnân haikongoâ hnyi ta je hnyei hia thithö waleji oge me he ka ob' ödra ka hnyin : 19 anyin adre me ca hia but löng hok hofuc, haingö Iehova, waleji oge kunâ ködra a deny je athnyabaik a je perofeta, ke vesákong, me úkhünöng, ke öbun e höcö löng, haingö Iehova. 20 Anyin a wale, löng ju öbun hofuc ho Iehova, öbun hia thithö je bâ waleji oge kunâ Babulona ai úhebun Jerusalema.

21 Walang hna ha hnö Iehova tuhan sabaoth, Khongu Isaraela, ga Ahaba nöku Kolaia, me Zedekia nöku Maseia li at ödru me perofeta thoi köbun hnyi iök, ka habe, Wâ bi, oge me he ka hn' ödru ka hnyi hnyamö Nebukaneza than Babulona, ke e ame he ka hling' ödru hnyi hnyimaköbun. 22 Ke adre me he ka hom bongon hangâ gadru hnen ta je bâ hia thithö anyin at Juda a ödra hnyi Babulona me ha, ka habe, Ame he Iehova ka wiö u helâ me Zedekia, ke helâ me Ahaba, waleji a thong hnen than Babulona hnyi meic : 23 can anyin ödre hia but ânyâ hwen monu hnyi Isaraela, ke ödre hia but bi únyi monu me laâiân la-waëdru, ke ödre hia but ha je hofuc ae thoi hnyi iök, waleji oge ca húna ködru ; ke inya at ae khana e, me ohnatho, haingö Iehova.

24 Ke u me he ka fuc ga Semaia at Nehelami me ha, ka habe, 25 Walang hna ha hnö Iehova tuhan sabaoth, Khongu Isaraela, ka habe, Anyin a u je úkhünöng me je tusi hnyi iâm ka tavat hia a ödra hnyi Jerusalema, me kö Zefania nöku Maseia at bihut, me ka tavat bihut hia me ha, ka habe, 26 A hia but Iehova otölö u hnân at bihut hwabö Jehoiada at bihut, m' öbun e he ka musi hnyi uma umö Iehova, ka tavat ae monu, me tavat adre me wi' ödra hnân perofeta, m' adre me hn' ödra ka hnyi utö hnân ce at hnyin, me je tö a fao. 27 Ke walang ang anyin a iéu u je ca thao Jeremia at Anathoth, at ame wia e bi hnân perofeta köbun, 28 Anyin a hnyi únyi e

e ame kunâ köhmun ka hnyi Babulona me ha, ka habe, E tiga bec hna bâ : bi umöbun dö uma me labā ju, me bi ibun dö, me an ju wan? 29 Ke haba Zefania at bihut ame aú tusi eling, ke ame löng Jeremia perofeta. 30 Me ame o but hofuc ho Iehova kö Jeremia perofeta me ha, ka habe, 31 Úkhünöng dö ka je bâ hia me ha, ka habe, Walang hna ha hnö Iehova ge Semaia at Nehelami, ka habe, Anyin a Semaia ame perofeta köbun, ke oge ca kunâ, ke e ame olabageju öbun ka hnyi thoi ; 32 anyin a wale, walang hna ha hnö Iehova, ka habe, Wâ bi, oge me he ka bi hwaban kö Semaia, me je máträniny ; ame ca he ka hu aten ame he ka laba unyin tavat ang, ke haba khaca e ame ca he ka hnyi wâ so, wale oge me he ka ânyâ ka lakeik, haingö Iehova, anyin a e ame hia but ha he ka úkhin fuc me Iehova.

### HNYIMAKAN 30.

**H**OFUC ame o kö Jeremia únyi ga Iehova ame ha, ka habe, 2 Walang hna ha hnö Iehova, Khongu Isaraela, ka habe, Sihnalimen ju hnyi tusi ta je hofuc hia wale oge me ha köu. 3 Anyin a wâ bi, ame he ka o je bong, haingö Iehova, me oge me he ka ohmeto lakeik a at Isaraela me Juda úhedra hnyi hna bâ, haingö Iehova : ke oge me he ka ohmetu ödra ka hnyi hnyei, waleji oge ham ka lakamödra, ke adre me he ka hu e.

4 Ke walang je hofuc ho Iehova ge at Isaraela, me Juda. 5 Anyin a walang hna ha hnö Iehova, ka habe, Ate hia but löng hwan öbubuny me ot, ke ca hnahic bi. 6 Hnö thö walang ang me wâ, a ne бага ame hnokoâ wanakat : anyin a iéu oge me wâ je бага hia adre me ve tot cimâ je jebalainudra helâ me momo ame vec hnyekon, ke löhau hia but ta je hnyimaködra? 7 Ekölö! anyin ae gan hmâ bong eling, ke ba ke bong a helâe : wale úen vec kö Jakob ; ke so bi, adre me he ka omelö e hnyin. 8 Ke hnyi bong eling haingö Iehova tuhan sabaoth, oge me he ka thamua hna úhúkäläkouâ únyi hnyi hon nyem, me thu omomono je hna cö u ; ke ame ca he hmetu ta je atkanyua ka thaluâ e : 9 ke adre me he ka bi athnyabai Iehova Khongudrin me Davita a tuhödra wale oge me he ka oâ ködra. 10 Anyin a wale Jakob lö, athnyabaik, ca ot, haingö Iehova ; ke Isaraela lö, ca hlohlo bi : anyin a wâ bi, oge me he ka omeli u

## JEREMIA 31.

únyi hnyi dok ae sákáú, me je mátránám únyi hnyi hnyeí waleji adre hwenb' ödra hnyin; ke ame he Jakob ka hmetu me menâ, me laba hnahic, ke ba at ame he ka ootâ e. 11 Anyin a haingö Iehova, ka habe, tha inya but möu he ka omeli u; anyin oge me he ka bi obiny ka je hnyeí hia waleji oge obö u ka hnyin, ke oge me ca he ka bi obiny köu; ke oge me he ka nö u ge hna owisa, ke oge me ca he ka hnö u ke ba hwaban.

12 Anyin a walang hna ba hnö Iehova, ka habe, E ba eny ge ányâm vec, ke gan hmâ hnâm aat. 13 E ba at ame he ka ivinö hobi köu, m' adre me he ka lan u; e ba bubuny adre me melen unyâm. 14 A hnying u but hnen je lawaem hia; adre me ca elöm u: anyin oge kuc u helâ me hna kot hnen iwahuaihmiöny, me hna kot hnen at ame beovecâ: can úganiny hwakecâm ae kong, anyin ae se hia ányâm ta je hulö. 15 Ieú gam u me tenge can hna kuc u? e ca hnân e eny ányâm vec: oge ányâ e köu ca ae se hia je hwakecâm ae kong, ke ti se hia ányâm je hulö. 16 Anyin a wale, adre me he ka ohi' ödra tavat adre me ohiö u; ke adre me he ka hwenbâ ta je iwahnaihmiöny möu; ke adre me he ka söh tavat adre me sei u, ke oge me he ka hna he ka hügúnâ hia ta je únyi anyin tavat adre me hügúnâ ányâm ta je únyi. 17 Anyin oge me he ka oâ hmetu köu möt, ke oge me he ka ometa hnâm je aat, haingö Iehova; anyin adre hia but hao u, ka habe, Hna degec, haingödra E bi Ziona, waleji ame ca elâm hnen ke at. 18 Walang hna ha hnö Iehova, ka habe, Wâ bi, oge me he ka ohmeto je uma mano umö Jakob adre hom, me betenge ge hnyaban; ke adre me he ka otílâ taun hon hna hagutâ e, ke ame he ka tot uma umen than hoton bongon e. 19 Ke ame he ka o gadra hwan ole, me hwan tavat adre me senyin: ke oge me he ka osehi' ödra, ke adre me ca he ka wakhale; ke oge me he ka ogan' ödra, k' adre me ca he bi ka úhnyúkong. 20 Ke ame he lakudra ka helâ me ehac, ke ame he ka tethmâ anyidra úkhacaköu hnyi hnyimakök, ke oge me he ka bi hwaban ködra hia adre me sed' ödra. 21 Ke ame he ka o than únyi gadra, ke ame he ka o únyi hnyi wanbödra at ama musi ödra; ke oge me he ka ohakekenyâ e könnya: ke ie at ae hu tang hwegien he ka hakekenyi nya? haingö Iehova. 22 Ke öbun e he ka lakeik, ke oge me he ka Khongubun.

23 Wâ bi weneú anyi Iehova wale anyin wathethöt ame he thö, a weneú at ame aba: e ame he ka hwádâ hon ban tavat ae kong. 24 Ame ca he hmönyin ae hwege anyi Iehova ka hmetu, ke ne o but e ame hia but mádrâ, me ohwádâ je únykúmenen hnyekon; öbun e he ka wáhmakhmetoâ hnyi je bong a biliny.

### HNYIMAKAN 31.

**H**AINGÖ Iehova, ka habe, hnyi úen eling, oge me he ka Khongon je lap hia anyin at Isaraela, ke adre me he ka lakeik. 2 Walang hna ha hnö Iehova, ka habe, Adre wâ betenge hnyi hnyeububa hnen ta je lakon únyi ge hele vat; waleji a Isaraela hnyi hnök hna he ka omen' ödra. 3 Haba Iehova ame manen dut könnya ehac me ha, ka habe, Inya oge me betenge gam ge betenge a nyiele balua: anyin a wale oge hia but lili u ge betenge baú. 4 Hluiny Isaraela lö, oge me he ka up u hmetu, me adre me he ka up u; adre me he ka ohmanenangi u ge ányâm je bwinybet, ke u me he ka he hnyi bibiâ anyiz tavat adre me senyin. 5 U me he hmetu ka tâ ta je vine hon je bucen hnyi Samaria: ame he tavat belök ka tâ me ijem ta je wan hnyi senyin. 6 Anyin ame he ka hu úen hongot ge tavat tue hnyi bucen Eferaima, ka habe, Todró, ate me he Ziona ai kö Iehova Khonguta. 7 Anyin a walang hna ha hnö Iehova, ka habe, Khumöng senyin dö ga Jakob, me hongot dö ge hnyeí ae beönuu: haimemenâ thö, ogânâ thö, me ha, ka habe, Iehova lö-omelö thö lakem, a je kolon hnyi Isaraela. 8 Wâ bi, oge me he ka hum ödra únyi hnyi hnyeí hnyi hwadrö, me úkhacaköu ödra únyi hnyi je can hmeledrany, tha e mödra je wadröu, me tavat ae kong cadra, me erkin, me momo ame he ka hnokoâ: adre me he ka hmetu kâang, a bunyen ae gan. 9 Adre me he ka o me tenge tot, ke oge me he ka lili ödra ge khöu: oge me he ka hum ödra ka hnyi je wagewe, hnyi gethen ae wisa, wale adre me ca he ka hau hnyin: anyin a inya ang kâmâm Isaraela, ke haba Eferaima, me, nökek a bán.

10 Je hnyei lö, löng ju hofuc ho Iehova, ke haimemenâ thö e hnyi je bomene ae sákáú: me ha, ka habe, Haba at ame ovesei Isaraela ame he ka úkhacaköu ödra hmetu, me tu' ödra, helâ me at ame tuö haleny hnahat mamoe. 11 Anyin a Iehova ame hia but omeli Jakob, me hügúnâ e únyi

JEREMIA 31.

hnyi hnyamen at ae hwege hon. 12 Ke adre me he ka o me khumöng hnyi dok ae görany hnyi Ziona, me tha he ka hnyi soi Iehova, ka hnyi hwit, me waina, me wakacc, me je nokon mamoe, me kau: ke ame he je hnyekudra ka helâ me hna belök adre hû; ke adre me ca he balua hmetu he ka tenge. 13 Me ame he ka senyin hlu hnyi bibiâ, me wahidröu eang me wahingat; anyin oge me he ka wia anyidra tenge me me hnân bi senyin, ke oge me he ka otubweli ödra, me osenyini ödra únyi hnyi tenge. 14 Ke oge me he ka osekunâ tavat bihut ge pipikhenya, ke oge me he ka osekunâ lakeik ge soik, haingö Iehova.

15 Walang hna ha hnö Iehova, ka habe, Adre me löng hnyi Rama, hwa tenge thungau, me tenge hwege, Rakela ame tenge ge lakon; k' ame ca tubet bala bi ge lakon, anyin adre au but. 16 Walang hna ha hnö Iehova, ka habe, Soju hwâm hwatenge, me khula a li deköiâm: anyin adre me he ka bi troban ânyâm huliwa, haingö Iehova; ke adre me he ka hmetu únyi hnyi hnyei iny je iwahnaihmiony. 17 Ke e hu hnân gejon hnyi ânyâm obiny, haingö Iehova; ke ame he lakom ka hmetu ka hnyi hnyigöulödra. 18 E hnathu oge hia but ling Eferaima ame mâng me ha, ka habe, U je hia but kuc nya, me adre me kuc nya, helâ me bolok ae ca khenenâ hna úhükâlâkôuâ; ohmetu nya ju, me oge me he ka hmetu: anyin a u Iehova Khonguk. 19 Ke hwaban e, e hnathu oge me hmetu, me oge me ietra; ke hwaban hnödra hna nö nya, me oge me khaú jevak: iny hmehma but, eke, iny hlohlo, anyin oge me hokhnyokâ hna haikongu nya k' iny tiga hidröu. 20 Hawa, nöku a oúnykúmik Eferaima? hawa, e wanakat ae kese? anyin a iny ka hia but fuc gan, oge me ti únykúme bala hmetu gan; anyin a wale ame fuc hnyekuk gan; e hnathu oge me he ka betenge gan, haingö Iehova.

21 Otilâ thö hobi köu je haten gethen, konâm ju hobi köu je utö hnân kú gethen; hnyok ju ka hna cit gethen, waleji gethen u me he hnyin: hluiny Isaraela lö, hmetu ju, hmetu ju kââng ka hnyi ânyâm taun. 22 Ke ne o but kehö u me he ka he monu, u hlu ame labö kölu? anyin a Iehova ame hia but op únyi ae teb únyi hnyi hnyei, ame he momo ka ton ge бага.

23 Walang hna ha hnö Iehova tuhan sabaeth, Khongu Isaraela, ka habe, Adre me he hmetu ka ha hofuc ang hnyi hnyei

Juda, me je tauniny, iny ka he ka ohmetu ödra úhedra hnyi hna bâ me ha, ka habe, Hnyaban hna owisa lö, me bucen ae kap, E so e he Iehova ka ohnahici u. 24 K' ame he Juda me je tauniny hia ka tha labâ e; tavat belök, me tavat alin meno. 25 Anyin oge hia but osekunâ tavat hia ae sēnyin, me öunöngötâ tavat hia ae hlöuhlöu. 26 Me oge me hmak me wâ, ke so könya hnök hna mokut. 27 Wâ bi, ame he ka o je bong, haingö Iehova, me oge me he ka tã lap anyi Isaraela me lap anyi Juda, a je wan at, me wan meno. 28 Ke helâ me hnök hna tu' ödra he ka oc, me kia, me hagutâ, me ohia, me ovecâ; helâe oge me he ka tu' ödra he ka op göranyai, me tã, haingö Iehova. 29 Hnyi bong eling adre me ca he hmetu ka ha, ka habe, Haba je lakamömun adre hia but ijem wan vine ae but, me ame miminy bi nyon je lakon. 30 Ke ame he ka ve mok tavat can hwakecidra ae kong; ke haba at ama ijem wan vine ae but, ame he bi ka miminy nyon.

31 Haingö Iehova, ka habe, Wâ bi, ame he ka o je bong me oge me he ka ânyâ úhihinyköu a teb únyi me lap anyi Isaraela, me lap anyi Juda: 32 ca helâ me úhihinyköu eji oge ânyâ me lakamödra, waleji hnyi bong oge hom hnyamödra he ka su ödra únyi hnyi hnyei Aigupito; ke adre me thamuâ anyik úhihinyköu eja ke ne oge ne helâ me âiân бага ködra, haingö Iehova. 33 Ke walang úhihinyköu oge me he ka ânyâ me lap anyi Isaraela, hwaban je bong eling, haingö Iehova; oge me he ka ip anyik hnanyibu eú hnyidra, me sibnalimen e hnyi je hnyekudra; ke oge me he ka Khongudrin, ke adre me he ka lakeik; 34 ke adre me ca he hmetu ka ve nâ tavat ae hakekeny ködra, me je liamekeiny mödra, me ha, ka habe, Khan' öbun dö Iehova: anyin adre me he hia ka khan' ödra inya, hwân ge ta je hoúmonu ke ne o but ka tavat ae beönua, haingö Iehova: anyin oge me he ka hna but hwakecidra ae kong, ke oge me ca he hmetu ka únykúme anyidra ta je hulö. 35 Walang hna ha hnö Iehova at ame ham seúnö hnân lany hnyi selany, me hnanyibuiny tehi me ta je okhú hnân melam hnyi lit, at ame bwebwelâ köiö me me ü je waköiöiny; Iehova tuhan sabaeth ien: 36 haingö Iehova, ka habe, a ne he ka hia hnyi hnyimakök je hnanyibu eling, me ame he ka ba hmetu hnyei hnyi hnyimakök mâtrániny Isaraela nyiele balua. 37 Walang hna ha hnö Iehova, ka habe, A

ne khana he ka tuluto drany ethö, me elâm e taben hmeledrany, me oge me he minya ka degec hia je mâtrâniny Isaraela, can ta je únyi hia adre me ânyâ, haingö Iehova. 38 Wâ bi, ame he ka o je bong, haingö Iehova, me adre me he ka op taun hobi kö Iehova, hwân hnyi tap ae beú göranyai tabö Hananel, ke ne o but hnyi homagöuleny kop. 39 Ke ame he ka he wisa tulut tö ka hnyi bucen Gareb, me ame he ka khenyi hnyi Goatha. 40 Ke ame he ka kap kö Iehova hnyigöulen bucen hia anyin je komok, me je hnabadröu, me je utkânâ hia ke ne o but hnyi wagewe Kederon, ke ne o but hnyi kopiny homagöuleny je hors e deiö; adre me ca he hmetu ka oc e, me kia nyiele balua.

HNYIMAKAN 32.

**W**ALANG hofuc ame o kö Jeremia únyi ga Iehova hnyi huna a teni Zedekia than Juda, waleji huna a eitini Nebukaneza. 2 Haba hnyi úen eling ame igigilö Jerusalema hnen vat anyin than Babulona: ke adre me ip Jeremia perofeta hnyi hnyeuleny uma ceat, ae hnyi uma umen than Juda. 3 Anyin ame ip e Zedekia than Juda hnyi uma ceat me ha, ka habe, Ieû gam u me perofeta me ha, ka habe, Walang hna ha hnö Iehova, ka habe, Wâ bi, oge me he ka hna taun ang ka hnyi hnyamen than Babulona, ke e ame he ka hûgúnâ e; 4 ke ame ca he bi Zedekia than Juda ka kec ge at Kaledaia, ke e bnathu adre me he ka hna e ka hnyi hnyamen than Babulona, ke ödrü me he ka ifucköu me iohnyimak; 5 ke e ame he ka lili Zedekia Babulona ai, ke e ame he ka laba eling ke ne o but hnyi úen oge me he ka senâ e, haingö Iehova: eja ke ne öbun e ne vat me at Kaledaia, öbun e ca he ka hwege.

6 Haba Jeremia ame ha, ka habe, Ame o könya hofuc ho Iehova ame ha, ka habe, 7 Wâ bi, ame he ka he but köu Hanamela nöku Saluma a ke kâmâm he ka ha, ka habe, Úco thö utkânâ a ik hnyi Anathoth: anyin ae hu musi gam he ka úco hmetu e. 8 Me ame o könya Hanamela nöku cica hoton hofuc ho Iehova hnyi hnyeuleny uma ceat, me ha könya, ka habe, Ö u úco thö utkânâ a ik hnyi Anathoth hnyi hnyei Beniamina: anyin ae úcú köu he ka hu, ke hu musi gam he ka úco hmetu; úco thö me hobi köu. Me oge me wâhmakhmeto a hofuc e ho Iehova. 9 Me oge me úco

utkânâ me Hanamela nöku cica hnyi Anathoth, me tuluto kâu mone, a seventin je sekel sileva. 10 Me oge me set iök hnyi hna úhinhinköu, me okeceâ haten, me hawâ tavat ohnatho, me tuluto mone hnyi tulut. 11 Me oge me hom hna set úhinhinköu ge hna úco, waleji at adre okeceâ haten hoton hnanyibu me hwakecin, me tusi minya adre ca ohmâ: 12 Me oge me ham tusiny úcú kö Baruka nöku Neria, nöku Maseia, me hnyi hnyimakö Hanamela nöku cica, me hnyi hnyimakan tavat ohnatho tavat adre set iödra hnyi hna úhinhinköu ge hna úco, me hnyi hnyimakan tavat Juda hia tavat adre me laba hnyi hnyeuleny uma ceat. 13 Ke oge me hûna kö Baruka hnyi hnyimaködra, ka habe, 14 Walang hna ha hnö Iehova tuhan sabaoth, Khongu Isaraela, ka habe, Hom dö li tusi ang, wale úhinhinköu ge hna úco, wale tusi adre okeceâ haten, me tusi minya adre ca ohmâ, me hitöng ödrü hnyi kaia kânâ; me me e bala bi hnyi ta je bong ae se hia. 15 Anyin a walang hna ha hnö Iehova tuhan sabaoth, Khongu Isaraela, ka habe, Adre me he ka he hmetu bi ka úco je uma, me je utkânâ, me je hnyei vine hnyi hnyei ang.

16 Ke iny ka hia but ham tusiny úcú kö Baruka nöku Neria, me oge me hic kö Iehova, me ha, ka habe, 17 Ekölö Than Iehova! wâ bi, u je hia but op drany me hmeledrany ge manâm man ae gan hmâ me benyâm adre hai; ke ba únyi ae hmak köu: 18 at ame omanenâ tang betenge ka ta je dö a thauzun, me bi hwaban hulö anyin je kamen ka hnyi úlainy ta je lakudra hwabödra: Khong ae gan hmâ me man, Iehova tuhan sabaoth ien: 19 e beönua hnyi úhnenamö, me maniny huliwa: at ame wâ ge li emakan ta je gethen hia deny tavat; me me ve ham ka tavat únyi ae úcú me dedra ta je gethen me hoton wan anyidra ta je huliwa: 20 at ame ip je haten me je únyi hnân láia hnyi hnyei Aigupito, ke ne o but hnyi bong ang, hnyi wanben at Isaraela me ke je tavat; me bi iâm, helâ me hnyi bong ang; 21 ke u je hom lakem a Isaraela únyi hnyi hnyei Aigupito ge je haten, me je únyi hnân láia, me hnyam ae hwege, me beny adre hai, me únyi hnân ot ae gan hmâ; 22 ke u je ham ködra hnyei ang, waleji u je khemanyinâ ka lakamödra he ka ham ködra, hnyei ame di hnyin debai me hani; 23 ke adre me o ka hnyin, me labâ e; ke so bi, adre me ca löng hwâm hofuc, ke adre me ca vheno bi ânyâm je

JEREMIA 33.

hnanyibu ; ke adre ca anyâ ke únyi hnyi je únyi hia thithö u je hûna ködra : anyin a wale, u me oâ ködra ta je únyi hia eang ae kong : 24 wâ bi je kânâ adre hlu göranyai, adre me o but hnyi taun he ka hûgûná e ; ke adre me hna taun ka at Kaledaia, tavat adre me vat mē, can hele vat, me hmiâ, me mok ae cap : ke ame hwádâ thö hnâm hna ha ; ke, wâ bi, u je wâ. 25 Ke haba u Than Iehova u je hia but ha könnya, ka habe, Úcú em ju hwaban mone, me hawâ tavat ohnatho ; ke so bi, adre hia but hna taun ka at Kaledaia.

26 Me ame o but hofuc ho Iehova kö Jeremia me ha, ka habe, 27 Wâ bi, Inya Iehova Khongon tavat hia thithö : hawa, e hu ke únyi ae ca khanö nya he ka anyâ ?

28 Anyin a wale, walang hna ha hnö Iehova, ka habe, Wâ bi, oge me he ka ham taun ang ka hnyi hnyamen at Kaledaia me hnyamö Nebukaneza than Babulona, me e ame he ka hûgûná e : 29 ke ame he ka o at Kaledaia tavat adre me vat me taun ang, me thong taun ang ge meic me me hlâ, tha e me je uma wale adre me leü ütö ae bo so hon kö Baala, me hingâlâ hudiny ic ka ke je khong, me adre me ohmönyini nya. 30 Anyin a haba lakon Isaraela me lakon Juda, adre me anyâ thibi únyi ae kong hnyi hnyimakök, hwân k' ödra tiga hidröu : anyin a lakon Isaraela adre me labö ohmönyini nya ge ta je huliwa anyin je hnyamödra, haingö Iehova. 31 Anyin a hnân öküâ hmönyin me wathethöt könnya taun ang hwân hnyi bong adre op e hnyin ke ne o but hnyi bong ang ; me oge me beohia e hnyi hnyimakök : 32 can ta je hulö hia anyin lakon Isaraela, me lakon Juda, waleji adre me mádrâ he ka ohmönyini nya, ödra, me latuhödra, me anyidra je taben, me anyidra tavat bihut, me anyidra je perofeta, me at Juda, me aten Jerusalem. 33 Ke adre me hia but wia könnya hotudra, me ca hnyimaködra bi : eja ke ne oge ne n' ödra, me vesâ kong me úne, me adre me ca he ka löng me kap hna únö. 34 Ke adre me otílâ je únyi ae ikiki hnyi uma waleji adre wenyö kâu iök, me adre me okongoâ e. 35 Ke adre me otílâ je dok ae görany anyi Baala, hnyigöulen bucen anyin nöku Hinom, me kunâ je lakudra obaga me wahlu ka he hnyi wanben meic kö Moleka ; waleji a oge ca úkhünöng, ke oge ca únykúme, ag' adre me he ka anyâ únyi eling ae ikiki ; he ka oâ hulö ge at Juda.

36 Anyin a wale, walang hna ha hnö Iehova Khongu Isaraela ge taun ang, waleji öbun e ha gan, ka habe, adre hia but ham e ka hnyi hnyamen than Babulona, ge hele vat, me hmiâ, me mok ae cap : 37 haingen, ka habe, Wâ bi, oge me he ka hlu ödra únyi hnyi ta je hnyei hia, waleji oge ob' ödra ka hnyin hnyi anyik hmönyin, me anyik wathethöt, me hmönyin ae gan hmâ ; ke oge me he ka ohmetu ödra ka hnyi dok ang, me olabâ khötkici ödra : 38 ke adre me he ka lakeik, ke oge me he ka Khongudrin : 39 ke oge me he ka ham ködra hnyok a khaca, me gethen a khaca, m' adre me he ka outö nya balua ; m' adre me he ka so, me je lakudra hwabödra : 40 ke oge me he ka anyâ mödra úhinyökou a nyiele balua, a oge me ca he ka hwiö gadra, wale he ka anyâ ködra so ; ke oge me he ka ip eü hnyi hnyekudra he ka ot könnya, m' adre me ca he ka digic nya. 41 Eke, oge me he ka senyin ködra, he ka mádrâ ködra so, ke e hnathu oge me he ka te ödra hnyi hnyei ang, ge hnyekuk ae bekhöt me hanuk ae bekhöt. 42 Anyin a walang hna ha hnö Iehova, ka habe, Oge me he ka oâ ködra ta je so hia oge hia but ha bânâ ködra, helâji me hnök hna oâ ta je únyi hia eang ae kong ka tavat ang. 43 Ke adre me he ka úco je utkânâ hnyi hnyei ang, waleji öbun e ha gan, ka habe, E ba wan, ke ba minya at me meno ; ke adre hia but hna e ka hnyamen at Kaledaia. 44 Ame he bi tavat ka úco je utkânâ hwaban mone, me set iödra hnyi úhinyökou, me okeceâ haten, me hawâ tavat ohnatho, wale hnyi hnyei Beniamina, me hnyi je dok igigilö Jerusalem, me je tauniny Juda, me je tauniny je bucen, me je tauniny hnyei ae hnyikânâ, me je taun hnyi Hwaiöu : anyin oge me he ka ohmetu ödra a ta je bâ, haingö Iehova.

HNYIMAKAN 33.

**K**E ame olo o hofuc ho Iehova kö Jeremia hnyi úen e ame tiga laba hnyi hnyeuleny uma ceat, me ha, ka habe, 2 Walang hna ha hnö Iehova at ame anyâ, a Iehova at ame op e, me ohmâ e, Iehova ien ; 3 ame ha, ka habe, Hongot dö könnya, me oge me he ka thu köu, me omanená köu ta je únyi ae gan, me hmak, wale ae ca khanö u. 4 Anyin a walang hna ha hnö Iehova, Khongu Isaraela ge je umainy taun ang, me je uma umen je than Juda, wale adre kia hnân singidra ge je dok adre

JEREMIA 34.

hlu göranyai me je hele vat, ame ha, ka habe, 5 Adre me o he ka vat me at Kale-daia, ke so bi, adre me he ka öunöngöti ödra ge je komok, waleji oge hlingâ hnyi anyik hmönyin me wathethöt, ke oge hia but ikhâlâ hnyimakök ge taun ang can anyidra ta je hulö hia. 6 Wâ bi, oge me he ka hom kâe ûnyi hnân ometo me eny, ke oge me he ka ometu ödra; ke oge me he ka omanenâ gâná ködra hnahic me hnathu. 7 Ke oge me he ka ohmeto at Juda me Isaraela ûhedra hnyi hna hwenbâ, me up ödra hmetu göranyai helâ me hnyi hwân. 8 Ke oge me he ka ösû' ödra ûnyi hnyi anyidra ta je hulö hia waleji adre ânyâ kõnya; ke oge me he ka hna hia anyidra ta je hulö waleji adre me ânyâ me monu kõnya. 9 Ke ame he taun ang he ka hnân ien adre senyinâ, me hnân ogânâ, me haisoâ hnyi hnyimakan ta je hnyei hia eang hmeledrany, tavat adre me he ka löng ta je so hia thithö wale oge me he ka ânyâ ködra, ke adre me he ka ot me öbubuny ge ta je so hia me ta je hnahic hia wale oge me he ka oâ kâu. 10 Walang hna ha hnö Iehova, ka habe, Adre me he hmetu ka löng hnyi dok ang, waleji öbun e ha gan, ka habe, E ba wan, e ba at, ke ba meno, hnyi ta je tauniny Juda, me je getheniny Jerusalema wale ae ba wan, ke ba minya at he ka labâ e, ke ba meno, 11 me adre me he bi ka löng hwan senyin me hwan hobâ, me ifucin li at ödre tep faipoipo, me ifucin tavat adre me ha, ka habe, Oganö Iehova thö tuhan sabaoth, anyin ae so Iehova, anyin a nyiele balua anyin ibetengiö: me hwan tavat adre me hom hudiny ole ka hnyi uma umö Iehova. Anyin oge me he ka ohmeto tavat adre bâ helâ me hnyi can, haingö Iehova. 12 Walang hna ha hnö Iehova tuhan sabaoth, ka habe, Hnyi dok ang ae ba wan, ke ba minya at me meno, me hnyi ta je tauniny hia, ame he ka hu hnyaban tavat tuö mamoe, adre me mokulec haledra je hnahat mamoe. 13 Hnyi je tauniny hnyei ae hut me je tauniny hnyei ae hnyikânâ, me je taun hnyi Hwaiöu, me hnyi hnyei Beniamina, me je dok igigilö Jerusalema, me je tauniny Juda, ame he hmetu je hnahat mamoe ka he hmelen li hnyamen at ame tu' ödra, haingö Iehova.

14 Wâ bi, ame he ka o je bong, haingö Iehova, me oge me he ka ohwâdâ hofuc ae so waleji oge ha ge lap anyi Isaraela me lap anyi Juda. 15 Hnyi je bong eling,

me ûen eling, oge me he ka oâ kö Davita Angin hwakecin ae wisa, ke e ame he ka ânyâ ûnyi ae wisa me ûnyi ae úcû hnyi hnyei. 16 Hnyi je bong eling adre me he ka omeli Juda, ke ame he Jerusalema ka laba khötkic: ke walang ien adre me he ka hawâ, ka habe, Iehova wisaita. 17 Anyin a walang hna ha hnö Iehova, ka habe, Ame ca he ka ba hwabö Davita at ame he ka tabâ theroniny lap anyi Isaraela: 18 ke ame ca he ka hia hnyimakök ka tavat bihut a at Levi, at ame he ka hudo je hudiny leû, me le je hudiny han, me labö bi hut hnyi je bong. 19 Ke ame o but hofuc ho Iehova kö Jeremia ame ha, ka habe, 20 Walang hna ha hnö Iehova, ha habe, A ne khan' öbun he ka thamua anyik ûhinyköu a lany, me anyik ûhinyköu a lit, be me ca he ka ve o but lany me lit hnyi ûen; 21 awe, adre me he minya ka thamua anyik ûhinyköu me Davita athnyabaik, me me ba mâtrâniny he ka musi hon anyin theron; me anyik ûhinyköu me at Levi a tavat bihut, a lathnyabaik. 22 E ca khan' ödra he ka aú ta je ûnyi ethö hnyi drany, me tuluto je önyin köiö; ke helâe oge me he ka osehia je mâtrâni Davita athnyabaik, me at Levi a anyik tavat huliwa. 23 Ke ame o but hofuc ho Iehova kö Jeremia, ka habe, 24 Hawa, u me ca ûnyküme hofuc hwan tavat ang waleji a haingödra, ka habe, Haba li lap waleji a úca Iehova, me e ame hna degecâ but? ke adre me hûkötia lakeik, me me ca hnyei hmetu bi hnyi hnyimaködra. 25 Walang hna ha hnö Iehova, ka habe, A ne ca e bi anyik ûhinyköu a lany me lit, ke oge ne ca hia but otilâ je hnauyibuiny drany me hmeledrany, 26 awe, oge me he ka hna degecâ je mâtrâni Jakob, me Davita athnyabaik, m' oge me ca he ka hom unyin je mâtrâniny hnân musö je mâtrâni Aberahama, me Isaaka, me Jakob: anyin oge me he ka ohmetu ödra ûhedra hnyi hna bâ, me betenge gadra.

HNYIMAKAN 34.

**W**ALANG hofuc ame o kö Jeremia ûnyi ga Iehova, waleji hnyi hnö Nebukaneza than Babulona, me anyin utbavat hia, me je dökhu hia e ame musö eang hmelen, me je tavat hia adre me vat me Jerusalema, me je tauniny hia, ame ha, ka habe, 2 Walang hna ha hnö Iehova



## JEREMIA 35.

Khongu Isaraela, ka habe, He thö ka ha kö Zedekia than Juda me ha kâu, ka habe, Walang hna ha hnö Iehova, ka habe, Wâ bi, oge me he ka ham taun ang ka hnyi hnyamen than Babulona, ke e ame he ka thong e ge meic: 3 ke u me ca he ka kec gan, ke e hnathu adre me he ka köt u, me hnö u ka hnyi hnyamen; ke u me he ka ûhnyimâkâmköu me than Babulona, ke öbu me he ka ifucköu, ke u me he ka he Babulona ai. 4 Ke so bi, Zedekia than Juda lö, löng ju hofuc ho Iehova: walang hna ha hnö Iehova gam, ka habe, U me ca he ka mok ge hele vat; 5 u me he ka mok wia, ke adre me he ka le hobi köu helâ me hna le hobi kâu lakâmâm, je than a bân hnyi ûen ae tiga hiö u; ke adre me he ka tenge thungau gam me ha, ka habe, Ekölö ge than! anyin oge hia but ha, haingö Iehova. 6 Me Jeremia perofeta ame ha kö Zedekia than Juda ta je hofuc eling hnyi Jerusalema, 7 hnyi ûen ame vat deö vat anyin than Babulona me Jerusalema, me je tauniny Juda hia a je kolon, wale Lakisa, me Azeka: anyin a wale li kolon je tauniny Juda, je taun adre up haginy.

8 Walang hofuc ame o kö Jeremia únyi ga Iehova hwaban hna úhinyköu hnö Zedekia than me tavat hia hnyi Jerusalema he ka haimemenâ hna thang bauâ; 9 m' adre me he ka ve hna bauâ je athnyabaidra obaga me omomo, a je tavat Heberu; m' adre me ca he ka thalu ödra, wale at Heberu a je liamekeiny mödra: 10 ke ame ânyâ e hnen je than hia me tavat hia, waleji adre úhinyköu he ka ve hna bauâ je athnyabaidra obaga me omomo, m' adre me ca he hmetu ka thalu ödra nyiele; adre me hnu hoton, me kun' ödra: 11 ke hwaban e adre me hwiö me ohmeto je athnyaba obaga me omomo, waleji adre hna bauâ, me thalu ödra, m' adre me je athnyaba hmetu obaga me omomo; 12 anyin a wale ame o but hofuc kö Jeremia únyi ga Iehova, ka habe, 13 Walang hna ha hnö Iehova Khongu Isaraela, ka habe, Oge úhinyköu me lakamöbun, waleji hnyi bong oge hum ödra hnyin únyi hnyi hnyei Aigupito, únyi hnyi hnyaba ae úthaluö me ha, ka habe, 14 Hnyi obiny je huna a seven u me he ka hna liamekeiny möu a at Heberu, waleji u je úco, ke a bi athnyabaem hnyi siks ta huna, u me he ka hna bauâ e: ke haba je lakamöbun adre me ca ling nya, me tevehling nya. 15 Ke öbun e hwiö walang ang me ânyâ wisa hnyi

hnyimakök, wale hnyi hnöbun hna haime-menâ he ka ve thöng waeny; ke öbun e hia but úhinyköu hnyi hnyimakök, hnyi uma waleji adre ip hon iök: 16 ke so bi öbun e hwiö hmetu me okongoâ iök, me ve ohmeto je athnyaba obaga me omomo, waleji öbun e hna bauâ hoton wedra; ke öbun e musî ödra, he ka bi athnyaba obaga me omomo. 17 Anyin a wale, walang hna ha hnö Iehova, ka habe, Öbun e ca hia but ling nya, he ka ve haimemenâ hna thang bauâ ka je liamekeiny möbun, me je lahanöbun: wâ bi, haingö Iehova, inya oge me haimemenâ köbun hna thang bauâ, ka hnyi hele vat, me mok ae cap, me hmiâ; ke oge me he ka hn' öbun he ka monu hnyi ta je dökhü hia thithö eang hmeledrany. 18 Ke oge me he ka ham ka tavat a tavat hanyâúú anyik úhinyköu, waleji adre ca ohwâdâ hofucin úhinyköu waleji adre ânyâ hnyi hnyimakök, waleji hnyi hnödra hna subâ luâ nokon kau, me he hnyi wanben li ke keihen e; 19 je than Juda, me je thaniny Jerusalema, je eunuka, me tavat bihut, me tavat hia hnyi hnyei, a tavat adre me he hnyi wanben li ke keihen nokon kau; 20 awe, oge me he ka ham ödra ka hnyi hnyamen ta je iwahnaihmiöny mödra, me ka tavat adre me elâm he ka hling' ödra: ke ame he ta je unyidra ka hnân an ta je meno ame gâ, me ta je menoiny hnyot. 21 Ke oge me he ka ham Zedekia than Juda me anyin je taben ka hnyi hnyamen ta je iwahnaihmiöny mödra, me ka tavat adre me elâm he ka hling' ödra, me ka hnyi hnyamen utbavat anyin than Babulona, tavat adre me he hââng úhedra unyibun. 22 Wâ bi, haingö Iehova, ka habe, o ge me he ka huna me ohmetu ödra ka hnyi taun ang; ke adre me he ka vat mē, me hûgúnâ e, me thong e ge meic: ke oge me he ka wia je tauniny Juda, me me ba wan, ke ba at ama labâ.

### HNYIMAKAN 35.

**W**ALANG hofuc ame o kö Jeremia hnyi je bong bongu Jehoiakima nöku Josea than Juda, ka habe, 2 He thö ka hnyi lap anyi Rekaba, me úhnenamö mödra, me hum ödra ka hnyi uma umö Iehova, ka hnyi ke hnyeule, me habelidra ge waina. 3 Me oge me hum Jazania nöku Jeremia, nöku Habazinia, me je liamekeiny mē, me je lakon hia, me lap hia anyi Rekaba; 4 me oge me hum ödra ka

JEREMIA 36.

hnyi uma umö Iehova, ka hnyi hnyeuleny je laku Hanan, nöku Igedalia, a aten Khong, a hnyi baten hnyeuleny je taben, a hnyi hon hnyeule anyi Maseia nöku Saluma, at ame tuö hwanuma; 5 ke oge me ip hnyi hnyimakan je lakon lap anyi Rekaba je kaia ae lup ge waina, me je utkaia, me ha ködrin, ka habe, Ijem dö waina. 6 Ke haingödra, ka habe, Öhmun e ca he ka ic waina, anyin a Jonadaba nöku Rekaba a kamöhmun ame hûna köhmun, ka habe, Ca he öbun ka ijem waina, öbun, me je mátrânbun nyiele balua: 7 ke öbun e ca he ka up uma, me belök, me te vine, me hu je únyi e: ke öbun e he ka labā je uma mano hnyi je bong hia thithö; m' öbun e he ka möt hnyi je bong ae se hia hon káná wale öbun e laba atkanyua hnyin. 8 Ke öhmun e hia but ányá hoton hofuc ho Jonadaba nöku Rekaba a kamöhmun hnyi hnen hna hûna hia köhmun, he ka ca ic waina hnyi bonguhmun ta je bong hia, öhmun, me laöiöhmun, me je lakuhmun obaga me wahu; 9 me ca up umöhmun uma hnân labā; ke ba minya gahmun hnyi vine, me utkáná, me hatunguhmun; 10 ke so bi, öhmun e hia but labā je uma mano, me löng me ányá hoton hia hna hûna köhmun ga Jonadaba a kamöhmun. 11 Ke haba hnyi únen eji ame o Nebukaneza than Babulona ka hnyi hnyi, me öhmun e ha, ka habe, Ai öbun, ate me he Jerusalema ai me kec ge utbavat a at Kaledaia, me utbavat a at Suria; me öhmun dut ang öhmun e laba hnyi Jerusalema.

12 Me ame o but hofuc ho Iehova kö Jeremia ame ha, ka habe, 13 Walang hna ha hnö Iehova tuhan sabaoth, Khongu Isaraela, ka habe, He thö ka ha ka at Juda me tavat aten Jerusalema, ka habe, Hawa, öbun e ca he ka kap hna únö me löng hok hofuc? haingö Iehova. 14 A hwádá but hofuc ho Jonadaba nöku Rekaba waleji e ame hûna ka je lakon, m' ödrin e ca ic waina, ke ödrin e ca ic ke ne o but hnyi bong ang, anyin ödrin e löng hoton hna hûna hnen kamödrin: ke so bi, oge hia but fuc köbun me vesákong me ha, ke öbun e ca ling nya bi. 15 Ke oge hia but minya kuná köbun je athnyabaik hia a je perofeta, me vesákong me úkhúnöng me ha, ka habe, Ve hmetu ju öbun walang ang únyi hnyi debun je gethen ae kong, me ányáwia thö je hwakecibun, ke ca hnu hoton ke je khong he ka bi athnyabaidrin,

me öbun e he ka laba hnyi hnyi waleji oge ham köbun me lakamöbun: ke so bi, öbun e ca tevehlöng me ling nya. 16 Ke anyin a je laku Jonadaba nöku Rekaba ödrin e hia but ohwádá hna hûna hnen kamödrin, ke haba bi tavat ang, adre me ca wen ling nya; 17 anyin a wale walang hna ha hnö Iehova Khongon sabaoth, Khongu Isaraela, ka habe, Wá bi, oge me he ka oá ka at Juda, me aten Jerusalema hia ta je únyi ae kong waleji oge ha gadra: anyin a oge hia but fuc ködra ke adre me ca löng bi: ke oge hia but hongot ködra ke adre me ca ieu bi. 18 Ke haba Jeremia ame ha ka lap anyi Rekaba, ka habe, Walang hna ha hnö Iehova tuhan sabaoth, Khongu Isaraela, ka habe, Anyin öbun e hia but löng hoton hna hûna hnö Jonadaba a kamöbun, me tuö hia hnen je hna hûna, me mádrá helá me hnen hna hûna hia köbun; 19 anyin a wale, walang hna ha hnö Iehova tuhan sabaoth, Khongu Isaraela, ka habe, Ame ca he ka ba mátrâni Jonadaba, nöku Rekaba, he ka tot hnyi hnyimakök nyiele balua.

HNYIMAKAN 36.

**K**E haba hnyi huna a vaki Jehoiakima nöku Josea than Juda, me ame o but hofuc ang kö Jeremia únyi ga Iehova, ka habe, 2 Hom dö tusi adre vhec, me sihnalimen hnyin e ta je hofuc hia waleji oge ha köu ge Isaraela, me Juda, me je hnyi hia, hwân hnyi bong waleji oge fuc hnyin köu, hwân hnyi ta je bong bongu Josea, ke ne o but hnyi bong ang. 3 Ame ne he la lap anyi Juda ka löng ge ta je únyi hia ae kong waleji oge me únykúme he ka ányá ködra; m' adre me he ka ve hmetu únyi hnyi dedra ta je gethen ae kong; m' oge me he ka hna anyidra monu me hulö. 4 Haba Jeremia ame hao Baruka nöku Neria; ke haba Baruka ame sihnalimen hia únyi hnyi hnyimö Jeremia ta je hofuc ho Iehova waleji e ame ha káu, hnyi tusi adre vhec. 5 Ke haba Jeremia ame ha kö Baruka, ka habe, Inya ang at adre thawá; e ca khanö nya he ka dit hnyi uma umö Iehova; 6 anyin a wale, he thö ka aú tusi waleji u je set únyi hnyi hnyimök, ta je hofuc ho Iehova ka hnyi je hnyikönyen tavat hnyi uma umö Iehova hnyi bonginy ca han: ke u me he minya ka aú ka hnyi hnyikönyen at Juda hia tavat adre me o únyi hnyi anyidra je taun. 7 Adre ne

JEREMIA 36.

he ka he la ka ha hnödra hna khöü hnyi hnyimakö Iehova, me ve hmetu únyi hnyi dedra je gethen ae kong; anyin ae gan hmâ hmönyin me wathethöt ame ha Iehova hon hnyeí ang. 8 Ke haba Baruka nöku Neria ame ányâ hia helâ me hna húna kâu ga Jeremia perofeta, me e ame aú tusi wale ta je hofuc ho Iehova hnyi uma umö Iehova.

9 Ke haba hnyi huna a thabúngí Jehoiakima nöku Josea, than Juda, hnyi tehi a naininy, me ame haimemenâ he ka ányâ ca han hnyi hnyimakö Iehova hnen tavat hia hnyi Jerusalema, me tavat hia tavat adre me he únyi hnyi je tauniny Juda Jerusalema ai. 10 Me Baruka ame aú tusi wale ta je hofuc ho Jeremia hnyi uma umö Iehova hnyi hnyeule anyi Gemaria nöku Safana at sihnalimen, hnyi hnyeule ethö, hnyi hna dit hnyi homagöuleny ae teb únyi uma umö Iehova ka hnyi hnyikönyen tavat hia. 11 Ke haba Mikaia nöku Gemaria, nöku Safana, ame löng únyi hnyi tusi ta je hofuc hia ho Iehova, 12 me e ame utut ka hnyi uma umen than, ka hnyi hnyeuleny at sihnalimen: ke wâ bi, ta je taben hia adre me laba eling, wale Elisama at sihnalimen, me Delaia nöku Semaia, me Elenathana nöku Akebora, me Gemaria nöku Safana, me Zedekia nöku Hanania, me je taben hia. 13 Me haba Mikaia ame thumetu ödrin ge ta je hofuc hia waleji e ame löng, hnyi úen Baruka ame aú tusi ka hnyi hnyikönyen tavat hia. 14 Anyin a wale haba je taben hia ödrin e kunö Jehudi, nöku Nethania, nöku Selemia, nöku Kusi kö Baruka, he ka ha, ka habe, haba tusi waleji u je aú ka hnyi hnyikönyen tavat hia, hamâm he ka hom jem. Me haba Baruka nöku Neria ame hom tusi hnyi hnyamen, me he ködrin. 15 Ke ödrin e ha kâu, ka habe, Laba ju ka aú köhmun. Me haba Baruka ame aú ködrin. 16 Ke ödrin e hia but löng ta je hofuc hia, me ödrin e tha ot, me ha kö Baruka, ka habe, Öhmun e he ka thumeto than ge ta je hofuc e. 17 Ke ödrin e hnei Baruka me ha, ka habe, Mē thumetu öhmun dö, u je kâmâu ka sihnalimen ta je hofuc hia e únyi hnyi hnyimen? 18 Me ame ha ködrin Baruka, ka habe, E ame ha könya ge hnyimen ta je hofuc hia e, me oge me sihnalimen hnyi tusi ge köiö sisit. 19 Me haba je taben ödrin e ha kö Baruka, ka habe, He thö ka ikhölö, u me Jeremia, me me ca wâ hnöbu hnen ke at. 20 Ke ödrin e

didrö ka than hnyi hnyeule; k' ödrin e ip biju tusi hnyi hnyeule anyi Elisama at sihnalimen; ke ödrin e thumeto than ge ta je hofuc hia thithö 21 Me haba than ame kunö Jehudi he ka hom tusi; me e ame hom e únyi hnyi hnyeule anyi Elisama at sihnalimen. Ke haba Jehudi ame aú e ka hnyi li hnyikönyen than, me je taben hia tavat ödrin e tot unyin than. 22 Ke ame laba than hnyi uma honivakeny hnyi tehi a naininy; ke ame hlâ meic hnyi taben meic hnyi hnyimakan. 23 Ke a hia but Jehudi aú je ke keihen ame ne kun ame ne vak, me e ame kave e ge hele delö pen, me khûâ ka hnyi meic wale hnyi taben, ke ne o but ame an dut tusi meic. 24 Ke ödrin e ca ot bi, me kia anyidrin je úkhaú, wale than me je athnyabainy hia, tavat ödrin e löng ta je hofuc hia eling. 25 Ke haba khaca, ame khöü ka than ga Elenathana, me Delaia, me Gemaria, me me ca thong tusi, ke ame ca ling ödrin. 26 Ke haba than ame húna kö Jeramela nokon than, me Seraia nöku Azeriela, me Selemia nöku Abedela he ka hum Baruka at sihnalimen me Jeremia perofeta: ke haba Iehova ame ikhöl' ödru.

27 Me ame o but hofuc ho Iehova kö Jeremia, hwaban hna thong tusi ge than, me ta je hofuc waleji a sihnalimen Baruka únyi hnyi hnyimö Jeremia, ka habe, 28 U me he hmetu ka hom ke tusi me sihnalimen hnyin e ta je hofuc hia a bán waleji a e hnyi tusi a bán, wale a thong degecâ Jehoiakima than Juda. 29 Ke u me he ka ha ga Jehoiakama than Juda, ka habe, Walang hna ha hnö Iehova, ka habe, U je hia but thong tusi ang, haingâm, Anyin a ieu u je sihnalimen hnyin e, ka habe, Ame he ka o than Babulona me okongoâ hnyeí ang, me ohia hnyin e at me meno? 30 Anyin a wale walang hna ha hnö Iehova ga Jehoiakima than Juda, ka habe, Ame he ka ba hwaban hnân tabâ theron anyi Davita: ke adre me he ka khûâ unyin ae mok ka hnyi kahwa hnyi lany me megic hnyi hnyinghet. 31 Ke oge me he ka bi hwaban kâu, me je mátrâ-niny, me je athynabainy, can hwakecidra ae kong: ke oge me he ka oâ ködra me aten Jerusalema, me at Juda ta je únyi hia ae kong waleji oge ha gadra, ke adre me ca löng bi. 32 Me Jeremia ame hom ke tusi me ham e kö Baruka at sihnalimen, nöku Neria; me e ame sihnalimen hnyin e únyi hnyi hnyimö Jeremia ta je hofucin tusi hia waleji a thong degecâ Jehoiakima

than Juda hnyi meic : ke adre me bi hanen ke je hofuc ae se minya ka hnyin a helâe.

HNYIMAKAN 37.

**K**E ame musi bi ju Zedekia than nöku Josea hwabö Konia nöku Jehoiakima, waleji hnö Nebukaneza than Babulona hna otillâ hnyi hnyeï Juda. 2 Ke e ame ca löng bi, me lathnyabainy, me tavat aten hnyeï, ta je hofuc ho Iehova, waleji e ame ha a deny Jeremia perofeta.

3 Haba Zedekia than ame kunö Jukala nöku Selemia, me Zefania, nöku Maseia at bihut, kö Jeremia perofeta me ha, ka habe, Ö u hic dö hobi köhmün kö Iehova Khonguta. 4 Ke ame didrö Jeremia me didrut unyin tavat anyin a ödra tiga ca hia but ip e hnyi uma ceat. 5 Ke ame o but utbavat anyi Farao ûhedra Aigupito : ke hnyi ûen ame khana e hnen at Kaledaia tavat adre me igigilö Jerusalema, me adre me vese but ûhedra Jerusalema. 6 Me ame o but hofuc ho Iehova kö Jeremia perofeta, ka habe, 7 Walang hna ha hnö Iehova, Khongu Isaraela, ka habe, Ha th' öbu ka than Juda, at a kun' öbu kõnya ka hnei nya, ka habe, Wâ bi, haba utbavat anyi Farao tavat adre me o he ka hadru' öbun, adre me he ka hmetu Aigupito ai ka hnyi idra. 8 Ke ame he at Kaledaia ka hmetu me vat me taun ang, me hûgûnâ e, me thong ge meic. 9 Walang hna ha hnö Iehova, ka habe, Ca iyawöbun bi me ha, ka habe, E hnathu ame he but gata at Kaledaia : anyin adre me ca he ka he. 10 Anyin a eja ke ne öbun e ne hia but kot utbavat a at Kaledaia tavat adre me vat möbun, ke hu aat dö ge je kolon gadra, adre me he bi ka ve tot hnyi umödra je uma mano, me thong taun ang ge meic.

11 Ke hnyi ûen ame he but utbavat a at Kaledaia ûhedra Jerusalema can utbavat anyi Farao, 12 me haba Jeremia ame didrut ûheny Jerusalema he ka he hnyi hnyeï Beniamina, me me hom jekhon eling unyin tavat. 13 Ke hnyi ûen e ame o hnyi homagöuleny at Beniamina, e bi ling ke taben tavat tue, Iria ion, nöku Selemia, nöku Hanania ; me e ame kuc Jeremia perofeta, me ha, ka habe, U me utut ka at Kaledaia. 14 Ke haingö Jeremia, ka habe, U me thoi ; oge me ca utut ka at Kaledaia ; ke e ame ca löng kâu : me Iria ame kuc Jeremia me hom e ka je taben. 15 Ke haba je than adre me hmönyidra kö Jere-

nia, me kot e, me ca e hnyi uma umö Jonathana at sihnalimen : anyin adre me hia but ânyâ e me hnân uma ceat. 16 Ke ame didrö Jeremia ka hnyi uma ceat, eû hmelen uma, ke se hia je bongu Jeremia ka laba eling ; 17 me haba Zedekia than ame ûkhûnöng he ka hawâ e : ke than ame hnö duöngâ e hnyi umen uma me ha, ka habe, Hawa, e hu hofuc ûnyi ga Iehova ? Ke haingö Jeremia ame ha, ka habe, E hu, Ke e ame ha minya, ka habe, Adre me he ka hnö u ka hnyi hnyamen than Babulona. 18 Ke haba Jeremia ame ha minya kö Zedekia than, ka habe, Ieü anyik monu köu, me je athnyabaem, me taun ang, m' öbun e cö nya ? 19 Ke ewa anyibun je perofeta adre me perofeta köbun me ha, ka habe, Ame ca he than Babulona ka o köbun, me hnyeï ang ? 20 Ke walang ang ö u na löng ju kõnya than lö a tuhök : ö u na kap soâ ju hnök hna khöü hnyi hnyimákâm ; me u me ca kunö nya hmetu bi ka hnyi uma umö Jonathana at sihnalimen, wâ oge nye mokcu eling. 21 Me haba Zedekia than ame hûna, me adre me ip Jeremia hnyi hnyeuleny uma ceat, me ham kâu hnyi ke bong me ke bong khaca falawa ûnyi hnyi gethen anyin tavat up falawa, ke ne o but ame ba but areto hnyi taun. Helâe Jeremia ame laba hnyi hnyeuleny uma ceat.

HNYIMAKAN 38.

**K**E haba Sefata nöku Matana, me Gedalia, nöku Pasur, me Jukala nöku Selemia, me Pasur, nöku Malekia, ödrin e tha löng je hofuc waleji ame ha Jeremia ka tavat hia, ka habe, 2 Walang hna ha hnö Iehova, ka habe, Haba at ama laba bala bi hnyi taun ang, ame he ka mok ge hele vet, me hmiâ, me mok ae cap : ke haba at ame he ka he ka at Kaledaia, e ame he ka möt biju, ke ame he bi ka jekhon anyin möt, ke e ame he bi ka möt. 3 Walang hna ha hnö Iehova, ka habe, E hnathu adre me he ka hna utbavat anyin than Babulona, ke e ame he ka hûgûnâ e. 4 Me ame ha je taben ka than, ka habe, E so adre me hlingâ but at ang ; anyin a helâe e ame osënyinâ je hnyamen tavat vat a ta je kolon hnyi taun ang me tavat hia, hnyi hnen hna ha je hofuc helâe : anyin a haba at ang, e ame ca elâm he ka osoâ bi tavat ang, ke e ame okongoâ bi. 5 Ke haingö Zedekia than, ka habe, Wâ bi, e but e

JEREMIA 39.

hnyi je hnyamöbun : anyin ae ca khana bi than he ka ve e möbun. 6 Me adre me hum Jeremia me khûâ ka hnyi hmonop anyi Malekia nokon than, ae hnyi hnyeuleny uma ceat : ke adre me hnöhnö Jeremia but ge je tö. Ke ba but köiö hnyi hmonop ke hmudra thiju, ke ame cilok ut Jeremia hnyi hmudra. 7 Ke e ka khanö Ebede-melek ut, a eunuka at Aithiop, ae hnyi hnyaban than, a g' adre me ip Jeremia hnyi hmonop ; ke haba than ame laba hnyi homagöuleny Beniamina ; 8 Me haba Ebede-melek, ame he únyi hnyi uma umen than me ha ka than, ka habe, 9 Than a tuhök lö, e kong hia hwakecin tavat e waleji adre ányâ kö Jeremia perofeta, wale adre khûâ ka hnyi hmonop ; anyin a e ame he ka mok, la, eling ge mekihñanem : anyin ae ba hmetu bi areto hnyi taun. 10 Me haba than ame hûna kö Ebede-melek at Aithiop me ha, ka habe, Hom dö tavat a thöte úhedra ang, me öü Jeremia perofeta úheny ú hnyi hmonop, e me tiga ca mok. 11 Me haba Ebedemelek ame hom tavat ka tha he mē, me he ka hnyi uma umen than hnyi hmelen hna hip omjeú, me hom úheny e je ecmano ae khekhe, me je úkhaú ae bobot ut, me khûâ kö Jeremia eú hnyi hmonop ge je tö. 12 Haba Ebedemelek at Aithiop ame ha kö Jeremia, ka habe, mē ip ju ec mano ae khekhe me bobot ut hmelen li hnyabenyâm hnyi tö. Haba Jeremia ame ányâ helâe. 13 Me adre me öü Jeremia ge je tö, me hom e úheny hnyi hmouop ; ke Jeremia ame laba hnyi hnyeuleny uma ceat.

14 Me haba Zedekia than ame úkhûnöng he ka hao Jeremia perofeta kâu, ka hnyi hwanuma a kuniny hnyi uma umö Iehova : ke haingen than kö Jeremia, ka habe, Oge me he ka hnei u ge ke hofuc ; ca he ka ikhâlâ gak. 15 Ke haingö Jeremia kö Zedekia, ka habe, Oge ne thumetu u, hawa, u me ca he ka hlingö nya? ke oge ne he ka ha bongon köu, u me ca he ka ling nya. 16 Me Zedekia than ame khemanyin duöng kö Jeremia me ha, ka habe, Kia inya Iehova, at a up ötu a oge me ca he ka hlingö u, me hnö u ka hnyi hnyamen tavat ang adre me elâm he ka hlingö u. 17 Ke haba Jeremia ame ha kö Zedekia, ka habe, Walang hna ha hnö Iehova Khongon sabaoth, Khongu Isaraela, ka habe, U je ne he ka je taben anyin than Babulona, u me he ka möt, ke adre me ca he ka thong taun ang ge meic ; ke u me he ka möt me

ányâm lap ; 18 ke u je ne ca he ka je taben anyin than Babulona, me adre me he ka hna taun ang ka hnyi hnyamen at Kaledaia, ke adre me he ka thong ge meic, ke u me ca he ka kec gadra. 19 Me Zedekia ame ha kö Jeremia, ka habe, Iny outen at Juda tavat adre hia but utut ka at Kaledaia, wâ adre nye he ka hnö nya ka hnyi je hnyamödra m' adre me he ka hlumö nya. 20 Ke haingö Jeremia, ka habe, Adre me ca he ka hnö u. Ö u löng ju walang ang hofuc ho Iehova, wale oge me ha köu, me me he ka hu so gam, ke u me he minya, ka möt. 21 Ke u je ne höcö he, walang hofuc ame omanená könya Iehova, ka habe, 22 Wâ bi, adre me he ka hom omomo hia a je kolon hnyi uma umen than Juda ka je taben anyin than Babulona, ke ame he je momo eling ka ha, ka habe, Haba je lawaem adre me iyawö u, ke ame tudra but : a didrut li cam hnyi hmudra, me adre me hmetu but. 23 Ke adre me he ka hom je láâiâm me je lakom ka at Kaledaia : ke u me ca he ka kec gadra, anyin ame he ka köt u hnen than Babulona : ke u me he ka thong taun ang ge meic. 24 Me haba Zedekia ame ha kö Jeremia, ka habe, Ca he ke at ka khana je hofuc ang, me u me ca he ka mok. 25 Ke ame ne löng je taben a oge hia but úhnenamö möu, me adre me he ka o köu me ha köu, ka habe, Mē thumetu öhmun dö walang ang waleji ge hnâm hna ha ka than ; ca ikhâlâ gahmun, ke öhmun e ca he ka hlingö u : 26 awe, u me bre ka ha ködra, ka habe, Oge me khöú ka than me me ca he ka ohmetu nya ka hnyi uma umö Jonathana, wâ oge nye mokcu eling. 27 Me ame o but kö Jeremia je taben hia me hnö e : me e ame thumetu ödra helâ me je hofuc hia waleji a hûna than. Me adre me laba hnyibú but ; anyin adre ca löng hna úhnenamö. 28 Ke haba Jeremia ame laba hnyi hnyeuleny uma ceat, ke ne o but hnyi bong adre me kot Jerusalema.

HNyimakan 39.

**K**E haba hnyi úen adre kot Jerusalema, (hnyi huna a naini Zedekia than Juda, hnyi tehi a teniny ame o but Nebukaneza than Babulona me anyin utbavat hia ka Jerusalema me igigilö e ; 2 ke haba hnyi huna a eleveni Zedekia hnyi tehi a vakiny, hnyi bong a naniny tehi, adre me tho hmouca haginy taun :) 3 me ame didrö je taben anyin than Babulona, me laba

## JEREMIA 40.

hnyi homagöule eü hnyi wanben, jia Neregale-sareza, me Samegara-nebo, me Saresekim, a Rab-saris, me Neregale-sareza, a Rab-mag, me ke je taben hia anyin than Babulona. 4 Ke a ö 'dra but Zedekia than Juda, me tavat vat hia, me adre me kec me he hnyi hnyinghet, únyi hnyi taun, hnyi gethen úheny hnyi utkânâ iny than, hnyi homagöule wanben li hak veto: ke e ame vheno gethen úheny hnyeubaba. 5 Ke haba utbavat anyin at Kaledaia adre me hnu ödra me khöü Zedekia hnyi dok ae tha hon hnyi Jeriko: ke adre me kât e me hom kö Nebukaneza than Babulona hnyi Ribela hnyi hnyei Hamath, ke e ame owisagan. 6 Haba than Babulona ame hlingâ hnyi Ribela je laku Zedekia hnyi hnyimakan; ke haba than Babulona ame hlingâ je homakan at Juda hia. 7 Ke e ame úâ li emakö Zedekia, me ca e ge fao, me hom e Babulona ai. 8 Ke haba at Kaledaia adre me thong uma umen than, me je uma umen tavat ge meic, me kia hna up haginny Jerusalema. 9 Ke haba je kolon tavat a hnen biju hnyi taun, me tavat kec waleji adre me utut kâu, me keihen minya a je kolon ame hum ödra Nebuzaradana taben tavat tue, Babulona ai. 10 Ke haba Nebuzaradana taben tavat tue, ame ip biju keihen ae theduoc, tavat ae ba omjeü unyidra, hnyi hnyei Juda, me ham minya ködra je hnyei vine me je utkânâ hnyi bong eling. 11 Ke haba Nebukaneza than Babulona ame hünö Jeremia kö Nebuzaradana taben tavat tue me ha, ka habe, 12 Hom dö e, me wâ wia e, ke ca okongoâ e, ke ányâ thö kâu helâ me únyi e ame he ka ha köu. 13 Me Nebuzaradana taben tavat tue, me Nebusazepana, a Rab-saris, me Neregale-sareza, a Rab-meg, me ta je taben hia anyin than Babulona, ödrin e kunâ; 14 adre me úkhúnöng me hum Jeremia únyi hnyi hnyeuleny uma ceat me hna e kö Gedalia nöku Ahikama, nöku Safana, me me hom e ka hnyi uma: me e ame tha laba me tavat.

15 Ke ame o but kö Jeremia hofuc ho Iehova, waleji hnyi úen adre hlöng hnyin hwanumen hnyi hnyeuleny uma ceat, ame ha, ka habe, 16 He thö ka ha kö Ebedemelek at Aithiop, ka habe, Walang hna ha hnö Iehova tuhan sabaoth, Khongu Isaraela, ka habe, Wâ bi, oge me he ka oâ hok hofuc ka taun ang me me kong ke ca so bi; ke ame he ka aat hnyi hnyimákâm hnyi bong eling. 17 Ke haingö Iehova, ka habe,

Oge me he ka omeli u hnyi bong eling; ke adre me ca he ka hnö u ka hnyi hnyamen tavat waleji u je outen. 18 Anyin ae hnathu oge me he ka omeli u, ke u me ca he ka ta ge hele vat, ke ame he ányâm möt ka jekhom: anyin u je hia but labageju könya, haingö Iehova.

### HNYIMAKAN 40.

**W**ALANG hofuc ame o kö Jeremia únyi ga Iehova, hwaban hna thang e hnyi Rama ga Nebuzaradana taben tavat tue, waleji hnyi hna hom e adre ca ge tö fao tha e me je bâ hia úheny Jerusalema me Juda, tavat adre hom Babulona ai. 2 Haba taben tavat tue, ame hum Jeremia me ha kâu, ka habe, Haba Iehova a Khongom ame ha úkongon ang ka hnyi dok ang; 3 ke a hia but Iehova oâ, me ányâ helâji me hnen hna ha; anyin a öbun e hia but ányâ hulö kö Iehova, me ca löng hoton ifucin, anyin a wale ame o but köbun únyi eling. 4 Ke walang ang, wâ bi, oge me thang je tö fao hnyi bong ang ae hon li hnyamâm, A ne so köu he ka tha he mönya Babulona ai, aiö u, ke oge me he ka ö u, ke a ne kong köu he ka tha he mönya Babulona ai, degecu, wâ bi, wale hnyei hia hnyi hnyimákâm; haba dok ae so me úcü köu he ka he ka hnyin, he thö ka hnyin. 5 Ke e ka tiga ca hmetu, haingen, ka habe, Hmetu ju kö Gedalia nöku Ahikama, nöku Safana, waleji hnen than Babulona hna otilâ hon je taun Juda, me tha laba mē unyin tavat: ke ame ne úcü u he ka he ka hnyi ke dok, he thö ka hnyin. Me haba taben tavat tue ame ha kamejin me bwihlany, me kunâ e. 6 Me haba Jeremia ame he kö Gedalia nöku Ahikama hnyi Mizepa, me tha laba mē unyin je kolon hnyi hnyei.

7 Ke hnyi úen ae khana but je taben vat hia hnyi hnyei, ödra me anyidra tavat, a than Babulona ame otilö Gedalia nöku Ahikama hnân gavena hon hnyei, me hna but kâu obaga me omomo, me ta je wanakat, me ta je theduoc hnyi hnyei unyin tavat adre ca hom bâ Babulona ai; 8 me adre me o kö Gedalia hnyi Mizepa, jia Isamaela nöku Nethania, me Johanana me Jonathana li laku Kareä, me Serua nöku Tanumeth, me je laku Efai at Netofa, me Jezania nokon ke at Maaka, ödra me je atödra. 9 Ke haba Gedalia nöku Ahikama, nöku Safana ame khemanyin ködra, me je

JEREMIA 41.

atödra me ha, ka habe, Ca ot öbun he ka bi athnyaba ka at Kaledaia : laba ju hnyi hnyeï me bi athnyabainy than Babulona, me ame he ka hu so gabun. 10 Ke haba inya, wâ bi, oge me he ka laba hnyi Mizepa, he ka tot hnyi hnyimakan at Kaledaia tavat adre me he ka o köta : ke haba öbun, úkhöúnâ thö waina me wan ae metu, me wakaco, ke hitangen ju hnyi tangöbun je tang, ke labâ ju je taun öbun e hom. 11 Ke hnyi úen ame löng ut at Juda hia hnyi Moaba, me unyin je laku Amona, me hnyi Edoma, me hnyi je hnyeï hia a than Babulona ame ip biju je kolon at Juda, ke e ame hia but otílö Gedalia nöku Ahikama, nöku Safana hudrin, 12 me ame hmetu at Juda hia únyi hnyi ta je dok waleji adre ob' ödra ka hnyin, me o ka hnyi hnyeï Juda, kö Gedalia hnyi Mizepa, me úkhöúnâ waina, me je wan ae metu ae se hia hmönyin.

13 Ke haba Johanana nöku Karea, me ta je taben vat hia ae hnyi hnyeï, adre me o kö Gedalia hnyi Mizepa, 14 me adre me ha kâu, ka habe, E khanö u a haba Baalisa thaniny je laku Amona ame kunö Isamaela nöku Nethania he ka hlingö u? Ke haba Gedalia nöku Ahikama ame ca kap hnödra hna ha. 15 Me haba Johanana nöku Karea ame ha duöngâ kö Gedalia hnyi Mizepa, ka habe, Ö u mē hnö nya but, me oge me he ka hlingö Isamaela nöku Nethania, ke ba at ame he ka wâ: can ieú e ame he ka hlingö u? ke ame he ka vese but at Juda tavat adre me úkhacaköu köu, me ame he ka hia je kolon at Juda? 16 Ke haba Gedalia nöku Ahikama ame ha kö Johanana nöku Karea, ka habe, U ma ca he ka ányâ únyi e: anyin a u me thoi hnyi hnâm hna ha ga Isamaela.

HNYIMAKAN 41.

**K**E haba hnyi tehi a seveniny haba Isamaela nöku Nethania, nöku Elisama, a ke nokon than, ke hanen je taben ae beönua anyin than, ke tha e mē je hnyat a ten, ödrin e o kö Gedalia nöku Ahikama hnyi Mizepa; ke ödrin e tha han eling hnyi Mizepa. 2 Me ame todrö Isamaela nöku Nethania me hnyat a ten a tha ödrin mē, me kuc Gedalia nöku Ahikama nöku Safana ge hele vat, me hlingâ e, waleji hnen than Babulona hna otílâ hnân gavena hon hnyeï. 3 Haba Isamaela ame kot minya at Juda hia unyin, wale unyi Gedalia

hnyi Mizepa, me at Kaledaia tavat adre me wâ eling. 4 Ke hnyi bong a loiny hwaban hna hlingö Gedalia, ke ca khana bi ke at, 5 me ame o but tavat a eite úhedra Sekema me Silo me Samaria, adre giâ je waidra, me kia anyidra je úkhaú, me ka kavi ödra bi, adre me hom je bwihlany me libanu ka hnyi uma umö Iehova. 6 Me ame he Isamaela nöku Nethania úheny Mizepa he ka úkhanö mödra, ame tenge tot hnyi gethen: ke e ame úkhanö thö mödra, me e ame ha ködra, ka habe, Ai öbun kö Gedalia nöku Ahikama. 7 Ke ödrin e o but hnyi wanben taun, me haba Isamaela nöku Nethania ame hling' ödrin me khú' ödrin ka hnyi hmonop, e, me tavat a tha e mē. 8 Ke e anyidrin tavat a ten tavat adre me ha kö Isamaela, ka habe, Ca he ka hling' öhmun anyin ae hu anyihmun únyi öhmun e ikhâlâ hnyi utkânâ, hwit, me bali, me wakaco, me hani, me e ame hokhnyokâ, me ca tha hling' ödrin unyin je liamekeiny mödrin. 9 Ke haba hmonop waleji hnö Isamaela hna khúâ je komok hia, e ame tha hling' ödra me Gedalia ka hnyin, (wale hnö Asa than hna ányâ can e ame ot ga Baasa than Isaraela,) haba Isamaela nöku Nethania ame öunöngötâ e ge je komok. 10 Me haba Isamaela ame hombâ je kolon tavat hnyi Mizepa, je lakon than a je hlu, me tavat hia a je kolon hnyi Mizepa, waleji hnö Nebuzaradana taben tavat tue hna hna kö Gedalia nöku Ahikama: haba Isamaela nöku Nethania ame hum ödra a hwenbâ m' adre me he ka je laku Amona.

11 Ke a löng ut Johanana nöku Karea me je taben vat hia unyin ta je monu hia a ányâ Isamaela nöku Nethania, 12 me adre hom tavat hia me he me vat me Isamaela nöku Nethania, me adre me wâ e hnyi an ae gan hnyi Gibeona. 13 Ke adre me ö Johanana me je taben vat hia unyin hnen tavat hia unyi Isamaela nöku Nethania, me adre me senyin. 14 Ke haba tavat hia a hom Isamaela úhedra Mizepa, adre me hwiö, me hmetu, me he kö Johanana nöku Karea. 15 Ke ame kec Johanana ga Isamaela nöku Nethania tha e me tavat a eit, me he ka je laku Amona. 16 Me haba Johanana nöku Karea, me je taben vat a tha ödrin mē adre me hom je kolon tavat waleji e ame hügúnâ hmetu ga Isamaela nöku Nethania úheny Mizepa, hwab hnen hna kuc Gedalia nöku Ahikama, wale tavat ae hwege, me omomo, me je

wanakat, me je eunuka, waleji e ame hom hmeto úheny Gibeona : 17 ke adre me he but me laba hnyi Garuthe-kimeama hakekeny Betheleema, m' adre me he Aigupito ai, 18 ge at Kaledaia ; anyin adre me out' ödra hnyi hnö Isamaela nöku Nethania hna kuc Gedalia nöku Ahikama waleji hnen than Babulona hna otílá hnân Gavena hon hnyei.

HNYIMAKAN 42.

**K**E haba je taben vat hia me Johanana nöku Karea, me Jezania nöku Hosaia, me tavat hia, hwân ge tavat ae úhnyúkong ke ne o but ka tavat ae gan adre me hakekenyâ, 2 me ha kö Jeremia perofeta, ka habe, Ö u kap ju hnöhmun hna khöú köu, ke u me he ka hic hobi köhmun kö Iehova a Khongom, öhmun je kolon ang ; anyin a je wan biju öhmun ae wakhalet thibi, ke se hia ehac, öhmun manen köu : 3 me me he Iehova a Khongom ka omanená köhmun gethen öhmun e he ka vheno, me únyi öhmun e he ka ányâ. 4 Ke Jeremia perofeta ame ha ködra, ka habe, Oge hia but ling öbun ; wâ bi, oge me he ka hic kö Iehova Khongubun, hoton hnöbun hna ha ; ke haba ta je únyi hia ame he Iehova ka thu köbun, oge me he ka omanená köbun ; oge me ca he ka ikhâlâ gabun ke únyi. 5 Ke ödrin e ha kö Jeremia, ka habe, Iehova at ame ohnathu öta me owisa köhmun, öhmun ka ca ányâ bi hoton hofuc ame he Iehova a Khongom ka kunö u mē köhmun. 6 A ne so, A ne kong, öhmun e he ka löng hoton ifuci Iehova Khonguta, wale öhmun e kunö u kâu ; me öhmun e so öhmun ka löng hoton ifuci Iehova Khonguta.

7 Ke hwaban je bong a ten ame o but hofuc ho Iehova kö Jeremia. 8 Me e ame hao Johanana nöku Karea, me je taben vat hia unyin, me tavat hia hwân ge tavat ae úhnyúkong ke ne o but ka tavat ae gan, 9 me ha ködra, ka habe, Walang hna ha hnö Iehova, Khongu Isaraela, waleji öbun e kunö nya kâu, he ka ip hnöbun hna khöú hnyi hnyimakan, ka habe, 10 Öbun' e ne he ka laba bala bi hnyi hnyei ang, oge me he ka up öbun göranyai, me ca hagut' öbun, ke oge me he ka könim öbun, me ca oc degeci öbun : anyin oge me ietra ge únyi ae kong oge hia but ányâ köbun. 11 Ca he öbun ka outen than Babulona, wale at öbun e outen ; haingö Iehova, ca he ka

outen e, anyin a tha inya but möbun he ka omeli öbun, me húgún' öbun únyi hnyi hnyamen. 12 Ke oge me he ka betenge gabun, me ohmetu öbun ka hnyiibun hnyei. 13 Ke öbun e ne ha, ka habe, Öhmun e ca he ka laba hnyi hnyei ang, me ca löng hofuc ho Iehova Khongubun ; 14 me ha, ka habe, Ohe, öhmun e he ka he ka hnyi hnyei Aigupito, me öhmun e ca he ka löng vat eling, me löng ifucin trutru, ke ame ca he bi ka hmiâ jeú ; ke öhmun e he ka laba eling : 15 anyin a wale, löng ju walang ang hofuc ho Iehova öbun je kolon hnyi Juda : walang hna ha hnö Iehova tuhan sabaoth, Khongu Isaraela, ka habe, Öbun e ne ohwegiâ je hnyimaköbun he ka he Aigupito ai, me he me laba atkanyua eling ; 16 awe, ame he ka khöú öbun eling hnyi hnyei Aigupito hele vat, wale öbun e outen, ke ame he hmiâ ka hnu öbun ka hnyi hnyei Aigupito, wale öbun e outen ; ke öbun e he ka mok eling. 17 Ame he ka helâe ka tavat hia adre me ohwegiâ ta je hnyimaködra he ka he Aigupito ai me laba kanyua eling : adre me he ka mok ge hele vat, me hmiâ, me mok ae cap : ke ba at gadra ame he ka hnen biju me kec ge okongon wale oge me he ka oâ ködra. 18 Anyin a walang hna ha hnö Iehova tuhan sabaoth, Khongu Isaraela, ka habe, Oge hia but hingâlâ anyik hmönyin me anyik wathethöt hon tavat adre me laba hnyi Jerusalema, helâe oge me he ka hingâlâ anyik wathethöt hubun, öbun ka he ka he Aigupito ai ; ke öbun e he ka hnân ou, me kuko, me hângâ, me haikongo ; ke öbun e ca he hmetu ka wâ hnyei ang. 19 A hia but Iehova ha gabun, je kolon hnyi Juda, ka habe, Ca he öbun Aigupito ai : wâhmakhmeto ju a oge me ha hwegiâ köbun hnyi bong ang. 20 Anyin öbun e hia but iyaw' öbun bi ; anyin a öbun e kunö nya kö Iehova Khongubun me ha, ka habe, Hic dö hobi köhmun kö Iehova Khonguta ; ke öhmun e he ka ányâ hia hoton hofuc ame he Iehova Khonguta ka ha köu : 21 ke oge hia but thumetu öbun hnyi bong ang ; ke öbun e ca löng ifuci Iehova Khongubun, me ke hofuc waleji e ame kunö nya mē köbun. 22 Ke walang ang wâhmakhmeto th' öbun a öbun e he ka mok ge hele vat, me hmiâ, me mok ae cap. hnyi dok waleji öbun e weny he ka he kâu me laba atkanyua hnyin.



HNYIMAKAN 43.

**K**E a um dö Jeremia ha ka tavat hia thithö ta je hofuc ho Iehova Khongudrin, waleji a kunâ mē ködra Iehova Khongudrin, wale ta je hofuc hia eling, 2 me haba Azaria nöku Hosaia, me Johanana nöku Kareä, me tavat bi gan hia, ödrin e ha kö Jeremia, ka habe, U me ha thoi: a ca kunö u Iehova Khonguta he ka ha, ka habe, Ca he öbun Aigupito ai he ka mē laba eling: 3 anyin a haba Baruka nöku Neria, ame kunö u gahmun, he ka hn' öhmun ka hnyi hnyamen at Kaledaia, m' adre me he ka hling' öhmun me hum öhmun a je bâ Babulona ai. 4 Me haba Johanana nöku Kareä me je taben vat hia, me tavat hia, adre me ca löng hofuc ho Iehova he ka laba bala bi hnyi hnyei Juda. 5 Ke haba Johanana nöku Kareä, me je taben vat hia, adre me hom je kolon at Juda hia tavat adre me hmetu ühedra hnyi je hnyei waleji adre ob' ödra ka hnyin, m' adre me laba hnyi hnyei Juda; 6 wale obaga, me omomo, me ta je wanakat, me je hlu lakon than, me tavat hia waleji hnö Nebuzaradana taben tavat tue hna ip unyi Gedalia nöku Ahikama, nöku Safana, me Jeremia perofeta, me Baruka nöku Neria; 7 ke adre me o ka hnyi hnyei Aigupito; anyin adre me ca löng bi hofuc ho Iehova: ke adre me o but hnyi Tapanesi. 8 Me ame o but hofuc ho Iehova kö Jeremia hnyi Tapanesi ame ha, ka habe, 9 Hom dö je veto ae gan ge hnyamâm, me konâm hnyi dröu adre dâ, hnyi veto kânâ ae hnyi hwanumen uma umö Farao hnyi Tapanesi, hnyi hnyimakan at Juda: 10 ke ha thö ködra, ka habe, Walang hna ha hnö Iehova tuhan sabaoth Khongu Isaraela, ka habe, Wâ bi, oge me he ka hum Nebukaneza than Babulona athnyabaik, ke oge me he ka otillâ anyin theron hon je veto e waleji oge konâm; ke e ame he ka ulolo anyin imanoiny than hon e. 11 Ke e ame he ka o me kot hnyei Aigupito; ke haba at hobi kâu mok, me ame ka he bi ka mok, ke haba at hobi kâu bâ, me ame ka he bi ka bâ, ke haba at hobi kâu hele vat, me ame ka he bi ka hnyi hele vat. 12 Ke oge me he ka hû meic hnyi je uma ümen je Khongon Aigupito, ke e ame he ka thong degecâ me hum ödrin a je bâ: ke e ame he ka omecâ e bi ge hnyei Aigupito helâ me at tuö ma-moe ame khavâ anyin je ükhaû; ke e ame

he ka he üheny e me hnahic. 13 Ke ame he ka tho minya je veto ame tot hnyi Bethesemes, a e hnyi hnyei Aigupito, ke e ame he ka thong degecâ je uma umen je khongon Aigupito ge meic.

HNYIMAKAN 44.

**W**ALANG hofuc ame o kö Jeremia ge at Juda hia, tavat adre me laba hnyi hnyei Aigupito, tavat adre me laba hnyi Mighedola, me Tapanesi, me Nofi, me hnyei Patherusi ame ha, ka habe, 2 Walang hna ha hnö Iehova tuhan sabaoth, Khongu Isaraela, ka habe, öbun e wâ but ta je okongon hia waleji oge oâ ka Jerusalem, me je tauniny Juda hia; ke wâ bi, e hnyot ut hnyi bong ang, ke ba but at ame labâ; 3 can anyidra ta je hulö waleji adre me änyâ me adre me ohmönyini nya, hnyi hnödra hna he ka leü ütö ae bo so, me bi athnyaba ka ke je khong bi, waleji ae ca khan' ödra; ödra, möbun, me lakamöbun. 4 Ke so bi, oge me kunâ köbun je athnyabaik hia je perofeta, me vesâkong, me ükhünöng, me ha, ka habe, Öbun a ca änyâ ünyi ang ae ikiki wale a hmiök. 5 Ke adre me ca löng bi, ke adre me ca tevehlöng bi he ka hmetu ju ünyi hnyi anyidra ta je hulö, m' adre me ca he ka leü ütö ae bo so ka ke je khong. 6 Anyin a wale oge me hingâlâ anyik wathethöt me anyik hmönyin, ke ame ubâhlâ hnyi je tauniny Juda, me je gethen hnyi Jerusalem, ke ame ba wan gadra, ke hnyot dö helâ me hnyi bong ang. 7 Anyin a wale, walang hna ha hnö Iehova, Khongon sabaoth, Khongu Isaraela, ka habe, Anyin a ieü öbun e änyâ hulö ae gan hmâ eang me hnân jönibun bi, he ka subâ degeci öbun bi obaga me omomo, me je mendreng, me wanakat ame i, ünyi hnyi wanben Juda, me me ba but kolon gabun; 8 me ame ohmönyini nya hnen ta je huliwa anyin li hnyamöbun, öbun e leü ütö ae bo so ka ke je khong bi hnyi hnyei Aigupito, wale öbun e he ka hnyin he ka me labâ; me adre me he ka subâ degeci öbun, me öbun e he ka hnân hangâ me haikongoâ unyin ta je hnyei hia thithö eang hmele-drany? 9 Hawa, öbun e hnying ut je hwakecin ae kong anyin lakamöbun, me hwakecin ae kong anyin je tuhan Juda, me hwakecin ae kong anyin je laöiödra, me hwakecibun ae kong, me hwakecin ae kong anyin je laöiöbun, waleji adre änyâ hnyi hnyei Juda, me je getheniny Jerusalem?

JEREMIA 44.

10 Adre me ca vec ke ne o but hnyi bong ang, ke adre ca hia but ot, ke adre me ca vheno anyik hnanyibu, me hnök je hna hûna, waleji oge ip hnyi hnyimaköbun me lakamöbun. 11 Anyin a wale walang hna ha hnö Iehova tuhan sabaoth, Khongu Isaraela, ka habe, Wâ bi, inya oge me he ka wâ hm' öbun me öbun e kong ut, me subâ degecâ at Juda hia thithö. 12 Ke oge me he ka hom je kolon at Juda, tavat adre me ohwegiâ je hnyimaködra he ka he Aigupito ai he ka me laba eling, ke adre me he ka oaü' ödra hia hnyi hnyei Aigupito, adre me he ka ta ge hele vat, me hmiâ, adre me he ka mok hwân ge tavat ae úhnyükong ke ne o but ge tavat ae gan, ge hele vat, me hmiâ ; ke adre me he ka hnân ou, me kuko, me hangâ, me haikongo. 13 Anyin oge me he ka bi hwaban ka tavat adre laba hnyi Aigupito, helâji me hnök hna bi hwaban ka Jerusalema ge hele vat, me hmiâ, me mok ae cap : 14 me me ca he ka kec möt ke at, a kolon at Juda adre me he Aigupito ai he ka labâ, me hmetu ka hnyi hnyei Juda wale adre me weny he ka hmetu ka hnyin me laba : anyin adre me ca he bi ka hmetu, ke so thibi hnyat adre me kec möt.

15 Me ame thu kö Jeremia hnen ta je бага hia tavat ae khan' ödra a haba laöiödra adre me leü ütö ae bo so ka ke je khong, me je momo hia adre me ütiten, a úkhacaköu ae gan hmâ, me tavat hia adre me laba hnyi Aigupito, hnyi Patherusi me ha, ka habe, 16 Haba hofuc u je hia but ha köhmun hnyi iö Iehova, öhmun e ca lie ka löng köu. 17 Ke e hnathu öhmun e he bi ka ânyâ ta je únyi hia ame o but hnyi je hnyimöhmun, he ka leü ütö ae bo so ka momo thaniny drany, me hingâlâ je hudiny ic kâu, helâji me hnöhmun hna ânyâ, öhmun me je latuhöhmun me anyihmun je taben, hnyi je tauniny Juda, me je getheniny Jerusalema : anyin a hnyi úen eling e gan hmâ ö 'hmun, ke öhmun so, ke ba kong öhmun e wâ. 18 Ke hwân hnyi úen öhmun e ca leü ütö ae bo so ka momo thaniny drany, ke hingâlâ je hudiny ic kâu, me hia gahmun ta je únyi hia, ke adre oaü öhmun ge hele vat me hmiâ. 19 Ke hnyi úen öhmun e leü ütö ae bo so ka momo thaniny drany, me hingâlâ je hudiny ic kâu, hawa, ame hia but unyihmun je laöiöhmun, a je бага, waleji hnyi hnöhmun hna op je ong areto hobi kâu he ka khudrung kâu, me hingâlâ je hudiny ic kâu ?

20 Me haba Jeremia ame ha ka tavat hia, ka obaga me omomo, me tavat hia tavat adre me hia but thu kâu eling, ka habe. 21 Haba ütö ae bo so öbun e le hnyi je tauniny Juda me je getheniny Jerusalema. öbun me lakamöbun, me latuhöbun, me anyibun je taben, me tavat aten hnyei. hawa, ame ca únykúme e Iehova, me ip hnyi hnyekon? 22 me me ca khanö Iehova hmetu bi he ka hokhnyokâ úkongon anyibun ta je huliwa me ta je únyi ae ikiki öbun e ânyâ ; anyin a wale a hnyot di ibun hnyei, ke hnân lâiâ, me hnân hangâ. ke ba but at ame labâ, helâ me hnyi bong ang. 23 Can öbun e hia but leü ütö ae bo so, me can öbun e hia but ânyâ hulö kö Iehova, me ca löng bi ifuci Iehova, me ca vheno anyin hnanyibu, me hnen je hna hûna, me hnen je hna ohnatho ; anyin a wale ame o köbun okongon, helâ me hnyi bong ang.

24 Ke haba Jeremia ame ha ka tavat hia me omomo hia, ka habe, Löng ju hofuc ho Iehova, öbun at Juda a öbun hnyi hnyei Aigupito. 25 Walang hna ha hnö Iehova tuhan sabaoth, Khongu Isaraela, ka habe. Öbun e hia but me laöiöbun ha ge hnyimöbun, me ohwâdâ ge je hnyamöbun, ka habe, Öhmun e he ka ohwâdâ anyihmun je khöbi waleji öhmun e bi khöbi, he ka leü ütö ae bo so ka momo thaniny drany, me hingâlâ je hudiny ic kâu ; awe, he th' öbun he ka ohwegiâ anyibun je khöbi, me ohwâdâ anyibun je khöbi. 26 Anyin a wale, long ju öbun hofuc ho Iehova, at Juda hia. tavat öbun e laba hnyi Aigupito, ka habe. Wâ bi inya oge hia but khemanyn hnyi iök ae gan hmâ, haingö Iehova, a g' ame ca he hmetu ka ha iök hnen hnyimen at Juda hnyi hnyei Aigupito hia, ka habe, Kia inya Than Iehova. 27 Wâ bi, oge me hmak' ödra m' adre me kong, me ca so bi : ke adre me he ka aü but hia at Juda a ödra hnyi hnyei Aigupito ge hele vat me hmiâ, ke ne o but ame ba but. 28 Ke haba tavat adre me kec möt ge hele vat, me adre me he ka hmetu únyi hnyi hnyei Aigupito ka hnyi hnyei Juda, a ödra wakhalet thiju ; ke ame he ka khana je köluiny at Juda hia tavat adre me he ka hnyi hnyei Aigupito he ka mē labâ, a ho ia hofuc ame he ka ton, ame ne hok, ame ne hodra. 29 Ke haingö Iehova, ka habe, Walang haten köbun a oge me he ka bi hwaban köbun hnyi dok ang, me me khan' öbun a g' ame he ka ton hok hofuc köbun hnân okongon : 30 wa-

JEREMIA 45, 46.

lang hna ha hnö Iehova, ka habe, Wâ bi, oge me he ka hnö Farao Hofera than Aigupito ka hnyi hnyamen ta je iwahnaihmöny më, me ka hnyi hnyamen tavat adre me elâm he ka hlingâ e; helâ me hnök hna hnö Zedekia than Juda ka hnyi hnyamö Nebukaneza than Babulona, a iwahnaihmöny më, ke at ame elâm he ka hlingâ e.

HNyimakan 45.

**W**ALANG hofuc ame ha Jeremia perofeta kö Baruka, nöku Neria, waleji hnyi hnen hna sihnalimen ta je hofuc ang hnyi tusi ûnyi hnyi hnyimö Jeremia, hnyi huna a vaki Jehoiakima nöku Josea than Juda, ka habe, 2 Walang hna ha hnö Iehova Khongu Isaraela gam Baruka, ka habe, 3 U je ha, ka habe, Ekölö gak walang ang! anyin a Iehova ame hia but bi hanen hlöuhlöu ka hnyi anyik vec; oge sênyin dut anyin mâng, ke oge me ca wâ hna menâ. 4 U me he ka ha helâng kâu, ka habe, Walang hna ha hnö Iehova, ka habe, Wâ bi, haba hnök hna op göranyai oge me he ka kia but, ke haba hnök hna tâ oge me he ka oc hmetu; waleling hnyei hia eang. 5 Ke hawa, u me elâm je ûnyi ae gan hobi köu bi? ca elâm bi: anyin a wâ bi, oge me he ka oâ okongon ka tavat hia thithö, haingö Iehova; ke oge me he ka ham köu anyâm bi möt hnân jekhom hnyi ta je dok hia thithö waleji u me he ka he ka hnyi.

HNyimakan 46.

**W**ALANG hofuc ho Iehova ame o kö Jeremia perofeta ge ta je hnyei, 2 Ge Aigupito: me utbavat anyi Farao-neko thaniny Aigupito, a e hnyi wagewe Euferate hnyi Kakemis, waleji hnö Nebukaneza than Babulona hna kot hnyi huna a vaki Jehoiakima nöku Josea than Juda. 3 Penapena th' öbun bec, me bec ae gan, ke hakekeny ju he ka vat. 4 Bi omjehen ju je hors, ke tabâ th' öbun tavat tabö hors, ke todrö me je hnabicen vat; khet ju je ö, khavâ ju je ûkhaüen vat. 5 Anyin a ieu oge me wâ e? adre me ot me hmetu-hmetu; ke adre kot anyidra je taben, adre me kec hwege me ca hwiö bi: e hu ûnyi hnân ootâ igigilö, haingö Iehova. 6 E so ame ca kec at ae hâhâ can, e so ame ca he ka kec möt at ae hwege; adre me haü me ta hnyi hwadrö hnyi baten wagewe

Euferate. 7 Ie at ang ame ölö helâ me Nail, me bwebwelâ je köiöiny helâ me je wagewe? 8 Aigupito ame ölö helâ me Nail, ke ame bwebwelâ köiöiny helâ me je wagewe: ke haingen, ka habe, Oge me he ka ölö, oge me he ka tube hmeledrany; oge me he ka ohia taun me je aten e. 9 Ölö thö, öbun je hors; wadring hwege thö, öbun je kariota; e so ame he but tavat ae hwege; jia at Kusa me Futa, tavat ae khan' ödra he ka kât bec; ke at Luda tavat ae khan' ödra he ka kât me hlöu cafana. 10 Anyin a bong bongon Than Iehova tuhan sabaoth bong eling, a bong bi hwaban, he ka bi hwaban ka je iwahnaihmöny më: ke ame he hele vat ka an, me sekön, ke ijem drödra me me sekön: anyin ae hu hut ka Than Iehova tuhan sabaoth hnyi hnyei hnyi hwadrö hnyi wagewe Euferate. 11 Ölö thö Gileada ai, me hok basama, u hluiny Aigupito: e ûnyi haü bi hnâm hna bi bubuny ae se hia; e ba bi eny hobi köu. 12 A löng ut ta je hnyei anyâm hmehma, k' ame unöngötö hnyei ge ütengiâm: anyin a at ae hwege ame haü ge at ae hwege, k' ödru me tha ta ju.

13 Walang hofuc ame ha Iehova kö Jeremia perofeta ge iöi Nebukaneza than Babulona he ka kot hnyei Aigupito.

14 Haimemenâ thö hnyi Aigupito, ke omanenâ thö hnyi Migidola, ke omanenâ thö hnyi Nofi me Tapenesi; ha th' öbun, ka habe, Todrö, penapena thö; anyin ame an igigili u hnen hele vat. 15 Anyin a ieu adre me aba degecâ tavat ae hwege unyâm? adre me ca tot bi, anyin ame hagut' ödra Iehova. 16 E ame ohaüâ tavat ae se hia, eke, ke at ame ta hon ke at; ke haingödra, ka habe, Todrö, ate me hmetu ka ta je atöta, me hnyei adre me hnöku öta hnyin, can hele vat at ame ükonguny. 17 Adre me kuko eling me ha, ka habe, Haba Farao than Aigupito me mede thibi; e ame onua but üen adre thu. 18 Haingen Than, Iehova tuhan sabaoth ien, ka habe, Kia inya, e hnathu e ame he ka o helâ me Tabora unyin ta je bucen, ke helâ me Karemela hnyi baten köiö. 19 Hlu lö, at ame laba hnyi Aigupito lö, penapena thö hobi köu he ka he ka hnyi hwenbâ: anyin ame he ka ba but wan hnyi Nofi, ke ame he ka le degecâ ke ba aten. 20 Aigupito kau ae mec unyin; ke ame o but okongon üheny hnyi hwadrö, a o thö e. 21 Haba je aten adre me hok hwaban hnyi wanben e, ödra helâ me je

nokon kau adre me tuö hnyi uma ; anyin adre me hwiö minya me tha kec, adre me ca tot hmá bi : anyin ame o but ködra bong bongudra vec, úen he ka sen' ödra. 22 Ame he ka he ifucin helá me on ; anyin adre me he ka tha bunyen me utbavat, ke Adre me he ka o káu me je giwa, helá me tavat si utö. 23 Haingö Iehova, ka habe, adre me he ka sö anyin hnyot, ke ca hnân wá ; anyin a ödra se hia hon ta je wahamon, ke ca hnân aú úseidra. 24 Ame he ka hmehma hluiny Aigupito ; adre me he ka hna e ka hnyi hnyamen tavat aten hwadrö. 25 Haingö Iehova tuhan sabaoth, Khongu Isaraela, ka habe, Wá bi, oge me he ka bi hwaban kö Amona úheny No, me Farao, me Aigupito, tha e me je khongon, me je thaniny ; wale Farao, me tavat adre me labageju káu : 26 ke oge me he ka hn' ödra ka hnyi hnyamen tavat adre me elám he ka hling' ödra, me ka hnyi hnyamö Nebukaneza than Babulona, me ka hnyi hnyamen ta je athnyabainy : ke hwaban e adre me he ka labá e helá me hnyi je bong káu adrem, haingö Iehova. 27 Ke haba u Jakob a athnyabaik, ca ot bi, me Isaraela, ca hlohlo bi : anyin a wá bi oge me he ka omeli u únyi hnyi dok ae sákáú, me je mât ránâm únyi hnyi hnyei waleji oge hum ödra ka hnyin ; ke ame he Jakob ka hmetu, me laba so me mená, ke ba hmetu bi at ame he ka ootâ e. 28 Jakob, athnyabaik lö, ca ot bi, haingö Iehova ; anyin a tha inya möu : anyin oge me he bi ka ti ohia je hnyei hia waleji oge obö u ka hnyin, ke oge me ca he ka ti ohio u ; ke so bi oge me he ka nö u ge hna owisa, ke oge me ca he bi ka hnö u ke ba hwaban.

HNYIMAKAN 47.

**W**ALANG hofuc ho Iehova ame o kö Jeremia perofeta ge at Filisiti, k' ame tiga ca kot Gaza ga Farao.

2 Walang hna ha hnö Iehova, ka habe, Wá bi, ame o but je köio úheny hnyi hwadrö, k' ame he ka wagewe ae uou, k' ame he ka khutu takou hnyei me ta je únyi hia hnyin, me taun me tavat adre me labá e : ke ame he tavat ka tenge, k' ame he tavat hia aten hnyei ka kuku göranyai. 3 Ke ame ca hwiö lakamen ka ta je lakudra, anyin ae sényin dut ta je hnyam, can hwan can haleny je hors ae hwege, me kec hwegeiny anyin je kariota, me lunginy anyin je waengen ; 4 can bong ame o he ka söh

at Filisiti hia, me subá degecá e hnyi Turo me Zidona ta je úhadruo a laba biju : anyin ame he Iehova ka söh at Filisiti, ta je kolon bomene Kafetori. 5 A o but hadreú ban kö Gaza ; adre me ohia Asekelona, kolon hnyigöulen anyidra bucen ; u me he ka kavi u bi ke ne o but kehö ? 6 Hele vat anyi Iehova lö, ie úen u me he ka laba so ? didró hnyi tangám, mená ju, ke ca bwebwet bi. 7 U ma kámáu ka laba so, ke Iehova ame hia but húna káu ? wale ge Asekelona me hobat köio ; wale dok e ame kú.

HNYIMAKAN 48.

**G**E Moaba. Walang hna ha hnö Iehova tuhan sabaoth, Khongu Isaraela, ka habe, Ekölö ge Nebo ! anyin a hnyot dö ; a hmehma but Kiriathaima, adre me hügúná e : a hmehma but Misegab, k' adre hagutá e. 2 E ba but hmetu hna oganá Moab : k' adre hia but penapena okongon hobi káu bi hnyi Hesebona, haingödra, ka habe, Ate me he ka subá degecá e me me ca hnyei hmetu bi. Ke haba u Mademena lö, adre me he minya ka ohnyibú u ; k' ame he hele vat ka hnu u. 3 Hwan tenge únyi Horonaim, adre me söh me ohia ! 4 Adre me ohia Moaba ; adre me löng útengien tavat ae úhnyükong eú hnyin. 5 Anyin adre me he ka he me tenge tot hnyi gethen ame ölö Lihith ai ; anyin a hnyi gethen adre me utut úheny Horonaim adre hia but löng tengeiny kuku hnyi hna ohia. 6 Kec dö, omeli öbun dö, me öbun e he ka helá me úö ae ba lan hnyi hnyebuba. 7 Anyin a hnyi hnám hna labageju ka ányám ta je huliwa me tang omjehem, adre me he ka hum u minya : ke ame he Kemosá ka hnyi bá me anyin tavat bihut, me anyin je taben. 8 Ke ame he ka utut at söh ka hnyi je taun hia, ke ame ca he ka möt ke taun ; ke adre me he ka okongoá hnyegöulen bucen, me öba wan dok ae tha hon ; helá me hna ha hnö Iehova. 9 Ham dö li labenyin kö Moaba, me me gá me kec : ke ame he ka ba önyen je tauniny, ke ba bi aten. 10 E ka mok at ame mádrá iyawoá huliwa anyi Iehova, ke e ka mok at ame beháná anyin hele vat ka hnyi dra. 11 Haba Moaba ame hia but laba mená hwán ke tiga hidróu, me laba hon anyin je atmen, ke adre ca hingálá e únyi hnyi ke kaia ka hnyi ka kaia, ke adre ca hia but hom hwe-

JEREMIA 48.

nbâ e : anyin a wale e bi hnebwiainy, ke ame ca wia bi bunen e. 12 Anyin a wale, wâ bi, ame he ka o je bong, haingö Iehova, me oge me he ka kunâ kâu tavat adre hingâlâ, m' adre me he ka hingâlâ e ; ke adre me he ka hingâlâ hia únyi hnyi anyin je kaia, me oamamâ anyidra je kaia. 13 Ke ame he Moaba ka hmehma ge Kimosa, helâji me lap anyi Isaraela ame hmehma ge Beth-ela, waleji adre me labageju kâu. 14 Ieú gabun öbun e ha, ka habe, Öhmun tavat hwege, me tavat khenen vat? 15 Adre kot hia thö Moaba, ke adre me he ka hnyi je taun, ke haba anyin je hidröu e ame úca, adre me he unyin tavat adre me he ka hling'ödra, haingen Than, Iehova tuhan sabaoth ien. 16 E hakekeny jut he ka o vec anyi Moaba, ke logot hmönyin dut okongon. 17 Öbun hia thithö tavat igigilö e, máng dö gan, ke öbun hia tavat ae khan' öbun ien, ha thö, ka habe, Ekölö a hmetru thö uci ae hwege, utö ae mec! 18 Hlu ame laba hnyi Dibona lö, utut úhem hnyi ányâm hmanenang, ke laba biju hnyi dok ae atgec ; anyin ame o köu at ame söh Moaba, e ame ohia ányâm je hnabâ. 19 At ame laba hnyi Aroera lö, todru eú hnyi gethen me selâdrâ : hnö thö at ame kec me at ae möt, ka habe, Ieú adre hia but ányâ? 20 A hmehma but Moaba ; anyin adre hagutâ e : kuku thö göranyai me tenge ; ha thö e hnyi Arenona a ga aú hia but Moaba. 21 Ke ame o but hna owisa ka hnyi hnyi ae tha hon ; ka hnyi Holon, me Jahaza, me Mefath ; 22 me Dibona, me Nebo, me Bethe-dibela-thaim ; 23 me Kiriathaima, me Bethegamul, me Bethe-meon ; 24 me Kerioth, me Bozera, me je tauniny hia hnyin Moaba, dok ae sákâú me dok ae hakekeny. 25 Adre me subâ degecâ faoiny meno anyi Moaba, ke ame hmetru thö benyin, haingö Iehova. 26 Habelen ju ge grág me me monu ; anyin a e ame bi gan kö Iehova : ke ame he Moaba ka seset hnyi huen hna hmita, ke adre me he ka wia e hnân hlumâ. 27 Ke hawa, u je ca hlumö Isaraela? adre me wâ e unyin tavat venöu? anyin a u je háiâ e me u je nyinyikâ bâm kâu. 28 Öbun tavat öbun e laba hnyi Moaba lö, hna but je taun, ke labâ thö je kic ; m' u me helâ me biny at ame bi unen uma hnyi baten hnyimen op. 29 Öhmun e löng ut bigan anyi Moab, a e gan hmâ hop ; k' ame begörany, ke bi gan, ke bemusi, ke khulelau hnyekon. 30 Haingö Iehova, ka

habe, Oge me wâ anyin wathethot ae únyi baú e ; ke ba troban ge hnen hna labö fuc bigan. 31 Anyin a wale oge me he ka kuku göranyai ge Moab ; eke, oge me he ka hongot tenge ge Moaba hia : adre me he ka tenge thungaú ge at Kira-heres. 32 Vineiny Sibema lö, oge me he ka tenge gam ae nua hon útengiö Jazera : ame hanyâúú köiö je angâm, me o ke ne o but köiö anyi Jazera : k' ame utut at söh ka hnyi ányâm je wan ae metu, me wan vine. 33 Ke adre hom degecâ senyin me hobâ únyi hnyi hnyi a wa so ke únyi hnyi hnyi Moaba, ke oge hia but öba waina hnyi hna hlec wan vine : e ba at ame he ka uto me hongot senyin ; haba hongot senyin, me helâ me ba hongot senyin. 34 Hwân hnyi Hesebona ke ne o but hnyi Eleala, me Jahaza, adre hia but hongot göranyai, ke hwân hnyi Zoara ke ne o but Horonaim ke ne o but hnyi Egelath-selisia, anyin ame he ka hme je aniny Nimera minya. 35 Ke haingö Iehova, ka habe, Oge me he ka ohia hnyi Moaba at ame bi hut hnyi dok ae görany, me at ame leú utö ae bo so ka je khongon. 36 Anyin a wale ame fuc hnyekuk helâ me utköwi ge Moaba, k' ame fuc hnyekuk helâ me utköwi ge at Kira-heres : anyin a hia but je kolon je únyi adre me hu. 37 Ke hadreú je bödra hia, ke adre giâ je waidra hia : e hu hwadeny hna kave hon je hnyam hia, ke ecmano ae gan nân hon je nyidra. 38 E hu hwan tenge hon je ban uma hia hnyi Moaba, me hnyi je getheniny : anyin oge hia but tho hmouca Moaba helâ me káiâ a ca hnân senyina, haingö Iehova. 39 Nakainy hna hagutâ e ! nakainy hnödra hna kuku göranyai ! nakainy Moaba at ame hwiö but hoton ai anyin ae hmehma ! ke helâe ame he Moaba ka hnân hlumâ me ot ködra hia igigilö e. 40 Anyin a walang hna ha hnö Iehova, ka habe, Wâ bi, e ame he ka gâ helâ me aeto, me lau li labenyin ka Moaba. 41 Adre hügúnâ Kerioth, ke ame hom uthmâhmâ je hnabâ, ke hnyi bong eling ame he hnyekon tavat hwege hnyi Moaba ka helâ me hnyekon momo ame he ka hnokoâ. 42 Ke adre me he ka kot Moaba me me ca he hmetu ka hnyi, anyin a e ame hia but bi gan kö Iehova. 43 E but unyâm ot me thop, me hnewe, at ame laba hnyi Moaba, haingö Iehova. 44 Haba at ame kec ge ot, e ame he ka ta ka hnyi thop ; ke haba at ame ölö únyi hnyi thop, ame he ka hnok hnyi hnewe ; anyin oge

JEREMIA 49.

me he ka oâ kâu, jia Moaba, huna adre sen' ödra hnyin, haingö Iehova. 45 Haba tavat adre kec adre me tot hnyi hmenu Hesebona ke ba tang hwegiödra: anyin ame he but meic üheny Hesebona, me bâhlân meic ünyi hnyi hnyin Sihona, me ame an baten wainy Moaba, me wanben ban tavat adre me imonumonu. 46 Ekölö gam Moaba! e kong ut at Kemosa: anyin adre hom lakom je бага m' adre me bâ, me lakom je hlu he ka bâ. 47 Ke so bi, oge me he ka ohmeto at Moaba ühedra hnyi hna bâ hnyi je bong a biliny, haingö Iehova. Wale hna owisa ka Moaba.

HNYIMAKAN 49.

**G**E je laku Amona. Walang hna ha hnö Iehova, ka habe, Hawa, e ba laku Isaraela? ke ba at he ka hwöhwanban? ke anyin a ieu ame hwöhwanbö Gada hnö Malekama, ke ta je aten adre me labâ je tauniny? 2 Anyin a wale, wâ bi, ame he ka o je bong, haingö Iehova, me oge me he ka olungâ hnyi Raba iny lakon Amona hwan vat; me e ame he ka hna digic thâtünyi ae ba önyen, k' adre me he ka thong degecâ ge meic lakon wahu: k' ame he Isaraela ka hom iny tavat waleji adre me hom iny, haingö Iehova. 3 Kuku tenge thö, Hesebona, anyin ae kong ut Ai; hongot dö göranyai wahu laku Raba, oweik' öbun ju ge ec mano ae gan nân: tenge thungaü thö, me he monu hnyi je hak; anyin ame he ka bâ Malekama, tha e me anyin tavat bihut, me anyin ta je taben. 4 Anyin a ieu u me hobeluâ je hnyigöulen bucen, a änyâm hnyigöulen bucen ame di, u hlu at ame labö kölu? a at ame labageju ka je omjehen me ha, ka habe, Ie at ame he ka he könya? 5 Wâ bi oge me he ka oâ ot köu, haingen Than Iehova tuhan sabaoth, ünyi gadra hia tavat adre me igigili u; ke adre me he ka ob' öbun hnyi je ve cici öbun bi, ke ame he ka ba at he ka hlo tavat adre me he monu. 6 Ke hwaban e oge me he ka ohmeto je bâ anyin lakon Amona, haingö Iehova.

7 Ge Edoma. Walang hna ha hnö Iehova tuhan sabaoth, ka habe, Hawa, e ba hmetu metâ hnyi Temana? hawa, a aü but hna khana bongon unyin tavat wâ wia? ke a hia but anyidra metâ? 8 Aten Dedana lö, kec hmetu ju öbun, laba ju hnyikânâi; anyin a oge me he ka oâ okongon Esau kâu, wale

hnyi üen oge me he ka senâ e. 9 Ame ne o köu tavat hlu wan vine, hawa, adre me ca he ka hna ke je wan ae wakhalet? ame ne o köu tavat venöu hnyi hnyinghet, me adre me ca he ka okongoâ ünyi ae ücü ködra? 10 Ke oge me öba khauö Esau. oge me khöng je dok ae iyong gan, ke e ca khana bi he ka ikhâlâ e: adre me ohia ta je mâtrâniny, me je liamekeiny mē, me tavat ae hakekeny kâu, ke e ame hia but. 11 Hna but lakom a ga mokcu lakamödra, me oge me he ka tuö melidra; ke so e he änyâm je safac ka labageju könya. 12 Anyin a walang hna ha hnö Iehova, ka habe, Wâ bi, haba tavat a ca hamödra he ka ijem kaia, e hnathu adre me he ka ijem; ke haba u, u at adre me ca he ka bi hwaban? ohe, u me ca he bi ka he ke ba hwabâm, e hnathu u me he ka ic. 13 Anyin oge hia but khemanyin gak bi, haingö Iehova, a ga me he Bozera ka hnân kuko, me haikongo, me ba wan, me hnân hangâ; ke ame he ka ba wan je tauniny hia nyiele balua. 14 Oge hia but löng üthumetu ünyi ga Iehova, ke adre kunâ üthumetu ka hnyi je hnyei hia thithö, he ka ha, ka habe, Ükhacaköu thö, ke he thö kâu, ke todrö he ka vat. 15 Anyin a wâ bi, inya oge hia but wiö u mu me ühnyükong unyin je hnyei, me hûkötianen tavat. 16 Ame iyawö u bi hnen hnye-kom ge hnâm hna ootâ, u at ame laba hnyi je khekheiny kic, me je dok ae göranyin bucen: eja ke ne u je ne ip hauâm ethö helâ me aeto, oge me he ka hoi u üheny e, haingö Iehova. 17 Ke ame he Edoma ka hnân läiâ: ame he tavat hia adre me he hnyin ka kuko, me jú can hnân je aat hia. 18 Haingö Iehova, ka habe. E ba at ame he ka labâ e, helâ me hnyi hnödra hna ohia Sodoma me Gomora me je taun ae hakekenyâ, ke ame ca he ke at he ka me laba eling. 19 Wâ bi, e ame he ka ölö helâ me liona ünyi hnyi hmanenanginy Joridano ka hnyi taun ae hwege, ke oge me he ka ie okecâ e üheny e; ke haba at adre me üca, oge me he ka otilâ e hon: anyin a ie at ae ücü mönya? ke ie at ame he ka thu üen könya? ke ie at tuö mamoe ame he ka tot hnyi hnyimakök? 20 Anyin a wale löng ju öbun hna ünyküme hnö Iehova, waleji e ame ünyküme ge Edoma: me je ünykümenen waleji e ame ünyküme ka tavat adre me laba hnyi Temana: E hnathu adre me he ka lili ödra, wale tavat ae ühnyükong hnyi hna hat meno; e hna-

## JEREMIA 50.

thu e ame he ka öba wan je hnyabadra. 21 Ame jijing ut hmeledrany hnen hwan ütaidra; e hu hwatenge, adre me löng e hnyi Köiö ae Dra. 22 Wâ bi e ame he ka ölö me gâ helâ me aeto, me lau li labe-nyin ka Bozera: ke hnyi bong eling ame he je hnyekon je tavat ae hwege hnyi Edoma ka helâ me hnyekon momo ame he ka hnokoâ.

23 Ge Damaseko. Ame hmehma but Hamath me Arefada; anyin adre me hia but löng je uthumetu ae kong, k' ame oaü ödra but: e bi hlöuhlöu hon köiö, ke ca khana bi he ka ta hau. 24 Ame sēnyin dut Damaseko, e ame hwiö he ka kec, ame kât e ge öbubuny: k' ame o but kâu hlöuhlöu me vec helâ me momo ame vec hnyekon. 25 Ieü adre ca hna degecâ gan taun ae lung, taun oge me senyin kâu? 26 Anyin a wale ame he ka ta wahidrouiny hnyi je getheniny, ke ame he ka mok hia aten vat hnyi bong eling, haingö Iehova tuhan sabaoth. 27 Ke oge me he ka hú meic hnyi hak vetoiny Damaseko, k' ame he ka an je uma ae únyi hnathu umö Ben-adada.

28 Ge Kedara, me je dökhu hnyi Hazora, waleji hnö Nebukaneza than Babulona hna kot.

Walang hna ha hnö Iehova, ka habe, Todr' öbun, he thö Kedara ai, me söh tavat e deiö. 29 Adre me hügünâ umödra je uma mano, me haledra je hna hat mamoe; adre me he ka hom hobi ködra bi singidra je mano, me anyidra je kaia hia, me hale-dra je kamela: ke adre me he ka hongot ködra, ka habe, Únyi hnân outen hnyi je ke keihen hia. 30 Öbun tavat aten Hazora lö, kec dö, he sâkâü ai, laba ju hnyikânâi, haingö Iehova; anyin a hia but úhnenamö gabun Nebukaneza than Babulona, me úny-kúme hna ányâ köbun. 31 Todrö, ke he th' öbun ka hnyi hnyei ame laba so, k' adre me labâ ke ba hmak, haingö Iehova, tavat ae ba hlinginy hwanuma me ohmâiny, k' adre me hake laba. 32 Ke haba hale-dra je kamela, me hnân hügünâ bi, ke hnân söh bi úseiny haledra omeno: ke oge me he ka oveseâ ka hnyi je ang tavat adre me giâ ke keihen waidra; ke oge me he ka oaü anyidra vec úheny hnyi je ke keihidra, haingö Iehova. 33 Ke haba Hazora me hnân uma umen je luko, ke ba wan nyiele balua: ame ca he ke at ka laba eling, k' ame ca he nokon at ka me laba eling.

34 Hofuc ho Iehova ame o but kö Jeremia profeta ge Elama, hnyi hna hwân musi a Zedekia than Juda, ka habe, 35 Walang hna ha hnö Iehova tuhan sabaoth, ka habe, Wâ bi oge me he ka thu cafana anyi Elama, wale úbeönuainy hwegiödra. 36 Ke oge me he ka oaü kö Elama je ang a vak hnyi vak ta ke keihen drany, ke oge me he ka ovesei ödra ka hnyi vak ta ang hia; ke ame he ka ba hnyei ame ca he ka o ka hnyin hnödra hna obâ únyi hnyi Elama. 37 Ke o ge me he ka ootâ at Elama hnyi hnyimakan je iwahnuaihmiöny mödra, me hnyi hnyimakan tavat adre me elâm he ka hling' ödra: ke oge me he ka oaü ködra okongon, wale anyik hmönyin ae hwege, haingö Iehova; ke oge me he ka kunâ hotudra hele vat, ke ne o but oge hia but oh' ödra: 38 ke oge me he ka otilâ anyik theron hnyi Elama, ke oge me he ka ohia eling than me je taben, haingö Iehova. 39 Ke haba hnyi je bong a biliny, oge me he ka ohmeto at Elama úhedra hnyi hna bâ, haingö Iehova.

### HNYIMAKAN 50.

**H**OFUC ame ha Iehova ge Babulona me hnyei Kaledaia a deny Jeremia perofeta.

2 Haimemenâ thö unyin ta je hnyei me omanena thö, me otilâ thö ke haten; omanenâ thö, ke ca ikhâlâ bi: ha thö, ka habe, Adre hügünâ Babulona, a hmehma but Bel, e hlohlo but Merodaka; e hmehma but anyin je hnatheat, e hlohlo but je idolainy. 3 Anyin ame o ke hnyei úcon únyi hnyi hwadrö, ame he ka öba wan iny hnyei, e ba at ame hé ka labâ e: adre kec ut, e hi' ödra, wale at me meno. 4 Hnyi je bong eling me úen e, haingö Iehova, ame he ka o je lakon Isaraela, tha ödra me je lakon Juda, adre me he ka he me tenge tot, me elöm Iehova Khongudrin. 5 Adre me he ka hnö ge Ziona me hnyimaködra kâe, me ha, ka habe, Ai öbun, ate me he ka úkha-caköu unyi Iehova, hnyi úhinhnyköu a nyiele balua, ke ca hnân hnying.

6 Haba je lakeik a hia but helâ me je mamoe a hia, a omonu ödra hnen tavat tu' ödra, adre hia but hna degeci ödra hon je bucen: adre me he monu hon je bucen me je hut, adre hnying ut hnödra hna menâ. 7 Ame hia but ön ödra hnen tavat hia adre me ö'dra: ke haingen je iwahnai-hmiöny mödra, ka habe, Ohmun ca kong

JEREMIA 50.

anyin adre hia but ânyâ hulö kö Iehova, a hnyaban wisa, wale Iehova hna gejon hnen lakamödra. 8 Kec dö únyi hnyi hnyin Babulona, ke he but únyi hnyi hnyei Kaledaia, ke helâ ju öbun me je got baga a hnyimakan hna hat meno. 9 Anyin a wâ bi oge me he ka bwebwet, me oâ ka Babulona ta je hnyei ae gan ke se hia úheny hnyi hwadrö: ke adre me he ka tot metâ kâu; adre me he ka hom e úheny e; ame he anyidra je fana ka helâ me je fana anyin at ae hwege ae khenen vat; e ba at gadra ame he ka hmetu baû. 10 Ke adre me he ka söh Kaledaia: ke ame he ka sekudra hia tawat adre me söh e, haingö Iehova. 11 Anyin a öbun e senyin me hobâ, tawat adre me soh ik, anyin a öbun e ututut helâ me nak kau at ame uto wan hwit, me kuku helâ me je hors ae hwege; 12 ame he hinyöbun ka hmehma gan hmâ; ke ame he ka hlöhlo at ame hnöku öbun: wâ bi, e ame he ka hnyei a biliny, hnye-buba, me atgec, ke hnyot ut. 13 Can hmönyin anyi Iehova adre me ca he ka labâ e, ke e ame he hia ka ba wan: ke adre me he ka láia tawat hia thithö tawat adre me he hnyi Babulona, me jú, can ta je okongon hia thithö. 14 Tot metâ thö ka Babulona igigilö, öbun hia thithö tawat hlöu cafana; hlec ut kâu, ca behânâ je fana: anyin a e ame hia but ânyâ hulö kö Iehova. 15 Hongot dö göranyai kâu igigilö; a ngâ but; a kölu but je hak, k' adre kia thö je hna up haginy: anyin a waleling hmönyin anyi Iehova; bi hwaban ju kâu; ânyâ thö kâu helâ me hnen hna ânyâ. 16 Suba degecâ but at ame tä úheny Babulona, me at ame huliwa ge únyi hnân subö hwit hnyi úen menü: adre me he ka ve hnyimaködra ka hnyi je idra, me ve kec ka hnyi idra je hnyei, can hele vatiny úöveci.

17 Isaraela mamoe adre oveseâ; ame alen e hnen je liona: a bân than Asuria ka an e; ke a biliny Nebukaneza eang than Babulona ame tho je jeien. 18 Anyin a wale, walang hna ha hnö Iehova tuhan sabaoth, Khongu Isaraela, ka habe, Wâ bi, oge me he ka bi hwaban ka than Babulona me iny hnyei, helâji me hnök hna bi hwaban ka than Asuria. 19 Ke oge me he ka ohmetu Isaraela ka hnyi hnyaban; ke e ame he ka han tot hon Karemela me Basana, ke e ame he ka han me sekon hon je hut hnyi Eferaima me Gileada. 20 Hnyi je bong eling me hnyi úen e, haingö Iehova,

adre me he ka elâm hulö anyin Isaraela, ke ba but: me je hulö anyin Juda, ke adre me ca he ka wâ: anyin oge me he ka thang je monu anyin tawat oge me hna me hnân kolon.

21 He thö ka hnyi hnyei Merathaim, he ka vat mē, me úcon tawat adre me laba hnyi Pekoda: hlingâ ju me ti ohia hwa-bödra, haingö Iehova, ke ânyâ hia thö helâji me hnök hna hûna köu. 22 E hu hwan vat hnyi hnyei, me úokonguny ae gan. 23 Nakainy, hna thu hmetro hamainy hmeledrany hia! Nakainy Babulona a ba wan unyin je hnyei! 24 Oge hia but töu hnewem, me u me hnök dö Babulona, ke e ca khanö u bi: adre me ö u me köt u minya, anyin a u je vat me Iehova. 25 Haba Iehova ame hia but khöng anyin je uma omjehen vat, me hom but únyi hnyin je únyi hnân vat hnyi anyin hmönyin: anyin ae hu huliwa anyin Than Iehova tuhan sabaoth, hnyi hnyei Kaledaia. 26 Ai öbun kâu úhebun hnyi je dok ae sâkâû, khöng ut je omjehen; jien dö e göranyai helâ me hna digic thatúnyi, ke ti ohia e; me me ba but kolon. 27 Hlingâ but haleny je bolok hia; e so adre me he ka hnyi hna hlingâ: ekölö gadra! anyin ame o but bongudra bong, úen senâ e. 28 Ifucin tawat adre me kec me tawat ae möt únyi hnyi hnyei Babulona, m' adre me haime-menâ hnyi Ziona hna bi hwaban hnö Iehova Khonguta, wale hwaban ge umen uma kap. 29 Hawâ úkhacaköuâ thö ka Babulona tawat hlic fana, tawat hia adre me hlöu cafana; hunuma ju igigilö e; ca hna ke at ka kec möt: ham dö kâu helâ me anyin huliwa; ânyâ hia thö kâu helâ hiaji me hnen hna ânyâ: anyin a e ame hia but hwege hnyimakan kö Iehova, Kabi Isaraela. 30 Anyin a wale ame he ka ta hnyi ta je getheniny wahidrüiny, ke adre me he ka ohia anyin tawat vat hia hnyi bong eling haingö Iehova. 31 Wâ bi, iny iwahnai-hmiöny möu, u at bigan, haingen Than. Iehova tuhan sabaoth: anyin ame o but bongom bong, wale úen oge me he ka senö u. 32 Ke ame he ka haú me ta at ae bigan, ke ba at ame he ka hai hmetu e: ke oge me he ka hú meic hnyi tauniny, k' ame he ka an e igigilö hia.

33 Walang hna ha hnö Iehova tuhan sabaoth, ka habe, Adre me tha ovecâ lakon Isaraela, me lakon Juda: ke adre me köt ödra hnen tawat adre hwenb' ödra; adre me hócö ke ka hn' ödra. 34 E hwege at



JEREMIA 51.

ame úcú melidra; Iehova tuhan sabaoth ieu: e ame he ka ti ivinö hobi ködra, me me he ka omenâ hmeledrany, me oöbubunyâ tavat adre me laba hnyi Babulona. 35 Ke haingö Iehova, ka habe, E hu hele vat hon at Kaledaia, ke hon tavat adre me laba hnyi Babulona, ke hon anyin je taben, ke hon anyin tavat ae metâ. 36 E hu hele vat hon tavat bigan thoi, ke adre me he ka monu: e hu hele vat hon anyin tavat ae hwege, ke adre me he ka hlohlo. 37 E hu hele vat hon haledra je hors, ke hon anyidra je kariota, ke hon tavat hia ae ve bongon hnyi wanben, k' adre me he ka helâ me omomo: e hu hele vat hon tangen tang omjeü, ke adre me he ka hügúnâ. 38 E hu bongon ihmeiny hon köien je köihnam, k' ame he ka hwahwacit: anyin a e hnyeiny ta je hnatheat, k' adre me ti hobâ je idola. 39 Anyin a wale ame he je menoiny hnyot me je lukö ka tha labâ e, k' ame he ta je iaena ka laba eling: ke ca hnân hmetu bi hnyaba nyiele balua; ke adre me ca he ka labâ hnyi ke dö me ke dö. 40 Helâji me hnen Khong hna ohia Sodoma me Gomora me je taun ae hakekenyâ, haingö Iehova; helâe minya ame ca he hmetu ke at ka laba eling, ke ame ca he ke nokon at ka me labâ e. 41 Wâ bi, ame o but tavat ûhedra hnyi hwadrö; ke hnyeï ae gan, me je than ae se hia ame he ka bwebwet únyi hnyi je can hmeledrany. 42 Adre me hok cafana me ö; ödra tavat beovecâ, ke ca tren ibetengiö; ame mea ifucidra helâ me köiö, ke adre me tabö hors; adre me ve tot metâ, helâ me útilen at hnyi vat, he ka vat möu hlu nokon Babulona. 43 A löng ut than Babulona ge úlungidra, me ame sényin li hnyamen; ame khaú ju e hnen hlöuhlöu, me vec helâ me momo ame vec hnyekon. 44 Wâ bi, e ame he ka ölö helâ me liona únyi hnyi hmanenanginy Joridano ka taun ae hwege: ke oge me he ka ie okeci ödra gan; ke oge me he ka otilâ hon, at adre úca: anyin a ie at ae úcú mönya? ke ie at ame he ka thu úen könya? ke ie at tuö mamoe ame he ka tot hnyi hnyimakök? 45 Anyin a wale löng ju öbun hna únykúme hnö Iehova, waleji e ame únykúme ge Babulona; me hnen je hna únykúme he ka ányâ waleji e ame ip hmâ he ka ányâ ka hnyeï Kaledaia, ka habe, E hnathu adre me he ka lili ödra, wale tavat ae úhnyúkong hnyi hna hat meno; e hnathu e ame he ka öba wan hnyabadra mödra. 46 Hnyi hwan hna kot Babulona ame öbubuny hme-

ledrany, ke adre me löng útengien hnyi ta je hnyeï.

HNYIMAKAN 51.

WALANG hna ha hnö Iehova, ka habe, Wâ bi oge me oâ úcon Babulona, me úcon tavat adre me laba hnyi Leb-kamai, ang at ame ohia. 2 Ke oge me he ka kunâ Babulona ai je atkanyua, tavat adre me he ka ulec e; ke adre me he ka öba önyen hnyeï: anyin adre me he ka ve tot kâu igigilö hnyi bonginy vec. 3 E so ame ca he at hlic fana ka lau anyin cafana, ke so e ame ca he ka hobeluâ anyin úkhaüen vat: ke ca he öbun ka omelö wahidröuiny; kot hia thö anyin utbavat. 4 Ke adre me he ka ta a ta je hna kot hnyi hnyeï Kaledaia, me je hna dáoâ hnyi je getheniny. 5 Anyin a ca degec Isaraela me Juda hnen Khongon, a Iehova tuhan sabaoth; eja ke ne a ne unöngöt idra hnyeï ge hulö ka Kabi Isaraela. 6 Kec ut únyi hnyi Babulona, ke ve omeli öbun dö; ca he öbun ka hnyi mok hnyi anyin bi hulö: anyin a úen dut ang bi hwaban ga Iehova; e ame he ka ham kâu hwaban. 7 Babulona ehac, me helâji me kaia gol hnyi hnyamö Iehova, k' ame omono hmeledrany hia: k' ame hia but ijem wainainy ge ta je hnyeï; anyin a wale ame monu thö ta je hnyeï. 8 Ame ie ta but Babulona me aú but: kuku tenge thö gan; hok basama thö hnân eny anyiu vec, k' ame ne he la ka möt. 9 Ate me beomeli Babulona, k' ame ca möt bi: hna but e, ke ate me he ka ve he ka hnyi ta je ita; anyin a haba hwaban bi, me ke ne o but ka hnyi drany, k' ame o but ka hnyi ta je úlá. 10 Haba Iehova ame hia but oâ hwakecita ae wisa: ai öbun m' ate me he ka ha gaga hnyi Ziona huliwa anyi Iehova Khonguta. 11 Khet ju je fana; kât hma ju je bec: Iehova ame otilâ hanon je than Madai; anyin a haba hnen hna únykúme ge Babulona, he ka ohia e: anyin a wale hwaban únyi ga Iehova, a hwaban umen uma. 12 Otilâ thö haten hon hna up veto hnyi Babulona, ohmâ ju tavat adre me hmákâ, otilâ thö tavat tue, penapena thö he ka khöu mokut: anyin a Iehova ame únykúme me ányâ, waleji hnen hna ha ge tavat adre me laba hnyi Babulona. 13 At ame laba hnyi je köiö ae se hia, me tren omjeü ae gan, ame o but obiny köu, tulutiny behnyekon a u. 14 Haba Iehova tuhan sabaoth ame khem-

JEREMIA 51.

anyin gan bi, ka habe, E hnathu oge me he ka ounöngöti u ge at helâ me je wabamon; ke adre me he ka hongot göranyai úcom.

15 E ame hia but op drany ge maniny man, me otilâ hmâ ta je hnyei ge anyin metâ, me ulolo drany hnen anyin wâhmakhmeto: 16 e ame fuc me ame bwebwet bi ta je köiö hnyi drany, ke e ame oâ hai únyi hnyi je can hmeledrany; e ame op hucuce hobi kâu we, me oâ ang únyi hnyi tangen omjeû. 17 Ödra monu hia tavat, tavat ae ca khan' ödra; ame hmehma but tavat hia huliwa gol can anyidra bi hnathat: anyin a thoi but anyin idola adre oköiâ, ke ba homenâ eû hnyidrin. 18 Ödra ta je únyi baû, huliwa hnân hlumâ: ame he ka hi ödra but hnyi úen adre me sen' ödra. 19 E ca helâe jekhóu Jakob; anyin a e at ame op hia; ke Isaraela tribuiny a wajekhön: Iehova tuhan sabaoth ien.

20 U anyik utöhmu me anyik únyi hnân vat: oge me he ka hum u hnân he ka tho oamamá je hnyei; me ohia je dökhü; 21 ke únyi gam oge me he ka tho oamamá hors me at ame tabâ; me oamamá kariota me at ame tabâ; 22 ke únyi gam oge me he ka oamamá obaga me omomo, me oamamá hingat me thöth; me oamamá hidröu me hlu; 23 ke oge me he ka oamamá at tuö mamoe me hnahat meno unyin, únyi gam; me oamamá at ame hwiö kânâ me li bolok unyin, me oamamá je gavena me je taben. 24 Ke oge me he ka bi hwaban kö Babulona, ke tavat hia adre me laba hnyi Kaledaia ta je monu hia waleji adre ányâ hnyi Ziona hnyi hnyimaköbun, haingö Iehova.

25 Wâ bi, bucen lö at ame okongo, e ve inya but möu, haingö Iehova, u at ame okongo hia hmeledrany: ke oge me he ka lau hnyamök hom, me hagutö u únyi hnyi hon je kic, me wiö u hnân bucen adre thong. 26 Ke adre me ca he ka hom unyâm veto hnân ban bahebet, me veto hnân taben; ke u me he ka ba wan nyiele balua, haingö Iehova. 27 Otilâ thö boúdila hnyi hnyei, tûâ thö trutru hnyi je hnyei, penapena thö je hnyei kâu, hawâ úkhacaköuâ thö kâu ta je dökhüiny Ararata, me Mini, me Asekenaza: otilâ thö ke taben vat kâu; oâ thö je hors helâ me je wahamon ae újejöng. 28 Penapena thö je hnyei úcon, wale je tuhan Madai, me anyin je gavena, me anyin je taben hia, me je hnyei

hia e ame musö. 29 Ke ame öbubuny hnyei me vec: anyin ame tethmä je hua únykúme hnö Iehova ge Babulona, he ka öba wan hnyei Babulona, ke ba aten. 30 Ame ca bevat hnen tavat hwege hnyi Babulona, adre me laba hnyi hnyin je hñabâ: e ba but tang hwegiödra; ödra úcú me omomo: a thong ut je hnyabadra; ke a mou thö ta je ohmäiny. 31 Ame he ke at ame wadring ka iouny me ke at ame wadring, k' ame he ke úthumetu ka iouny me ke úthumetu, he ka thumeto than Babulona a g' adre hia but kot anyin taun hnyi je ke keihen hia: 32 ke adre me húgúnâ je gethen, me thong je sahlowe ge meic, k' ame seon bi tavat vat.

33 Anyin a walang hna ha hnö Iehova tuhan sabaoth, a Khongu Isaraela, ka habe, Haba hluiny Babulona, me helâ me hna huje hwit hnyi úen adre me ututo e; ke meokhaca me amer he ka o but kâu úen menu. 34 A hia but ön nya hnö Nebukaneza than Babulona, e ame hia but ohmöiöngi nya, e ame wiö nya me kaia ae ba önyen; e ame utö nya helâ me tanimö; e ame osekunâ e ge anyik ta je únyi ae ti senem; e ame obö nya kâû. 35 Ame he ka ha hnen at ame laba hnyi Ziona, ka habe, E so ame he ka mokut hon Babulona hna okongu nya me je liamekeiny mönya; k' ame he Jerusalema ka ha, ka habe, Ame he drök ka mokut hon tavat adre me laba hnyi Kaledaia. 36 Anyin a wale walang hna ha hnö Iehova, ka habe, Wâ bi, oge me he ka ivinö hobi köu, me bi hwaban hobi köu; ke oge me he ka ohmö anyin köiö, me ohmö anyin hna pupua. 37 Ke ame he Babulona ka helâ me hna digic thatúnyi, ke hnyaban ta je luko, a hnân láiâ, me ju, ke ba at ame he ka labâ. 38 Adre me he ka tha kuku helâ me je nokon liona. 39 Ödra ka kahwa me oge me he ka bi jeû hobi ködra, me omonu ödra ge grâg, m' adre me he ka hobâ, me mokut nyiele balua, me ca hmak hmetu, haingö Iehova. 40 Oge me he ka hum ödra helâ me lakon mamoe he ka hling' ödra, helâ me je mamoe бага me je got бага. 41 Nakainy hna húgúnâ Sesaka! k' ame ie utut hnen hna ogânâ hnen hmeledrany hia! Ekölö, e ba but wan Babulona unyin je hnyei hia! 42 Ame khibi thö köiö hon Babulona, ame khutu takou e hnen je waköiöny ae se hia. 43 A hnyot ut anyin je taun, hnyei ae hwahwacit, me hnyebuba, hnyei ae ba at ame he ka

## JEREMIA 52.

labā, k' ame ca he hnyin ke nokon at. 44 Ke oge me he ka bi hwaban kö Bel hnyi Babulona, ke oge me he ka hom hmetu únyi hnyi hnyimen únyi e ame hia but utâ ; ke ame ca he ka o kâu je hnyei : eke, ame he ka ta but hna up veto hnyi Babulona.

45 Lakeik lö, he th' öbun únyi hnyi hnyin e, m' öbun e ve möt únyi ge hmönyin anyi Iehova ae gan hmâ. 46 Ke ca sēnyin bi je hnyekubun, me outen úthumetu adre me he ka löng hnyi hnyei ; anyin ame he ka o úthumetu hnyi huna eang, ke hwaban huna ang ame he ka o ke úthumetu me úokonguny hnyi hnyei, ke taben ame ve e me ke taben. 47 Anyin a wale, wâ bi, ame he ka o je bong ke oge me he ka bi hwaban ka je hnatheat anyin Babulona, ke ame he ka hmehma hnyeiny hia ; ke ame he ka ta je hna kot hia hnyi wanben e. 48 Ke ame he drany me hmeledrany me ta je únyi hnyin ka khumöng senyin hon Babulona ; anyin ame he ka o kâu je tavat söh únyi hnyi hwadrö, haingö Iehova. 49 A hia but Babulona ota je hna hlingâ a at Isaraela, helâe ame he ka ta je hna hlingâ hnyi Babulona hnyi hnyei hia. 50 Öbun tavat öbun e kec möt ge hele vat, hele thö, ca tot bi ; únykúmi Iehova thö únyi hnyi dok ae sâkâú, e so e kú Jerusalema eú hnyi je hnyekubun. 51 Öhmun e hmehma but anyin a öhmun e löng hna úhaikonguny ; ame tube je hnyimaköhmun hmehma : anyin a haba je atkanyua adre me o but ka hnyi je dok a kabiny uma umö Iehova. 52 Anyin a wale, wâ bi, ame he ka o je bong, haingö Iehova, ke oge me he ka bi hwaban ka anyin je hnatheat ; ke ame he tavat ae aat ka vec hnyi hnyeiny hia. 53 Eja ke ne a ne ölö hnyi drany ai Babulona, ke eja ke ne a ne ohmâ je dok a göranyin ae hwege, ame he ka o kâu únyi gak tavat söh, haingö Iehova. 54 Hwan kuku tenge únyi Babulona, me úokonguny ae gan únyi hnyi hnyei Kaledaia ! 55 anyin a Iehova ame söh Babulona, me ohia únyi hnyin e hwan ae gan ; ke ame mea je waköiöiny helâ me je köiö ae se hia, ame fuc ut hwan : 56 anyin ame o but kâu, wale ka Babulona at söh, ke adre me hom but anyin tavat hwege, ame hmetru thö anyidra je cafana : anyin a Iehova Khong at ame bi hwaban, e ame he bi ka bi hwaban. 57 Ke oge me he ka omono je tuhan me tavat anyin ae metâ, me je gavenainy me anyin je taben, me tavat anyin ae

hwege ; ke adre me he ka mokut nyiele balua, me ca hmak hmetu bi, haingen Than, Iehova tuhan sabaoth ien. 58 Walang hna ha hnö Iehova tuhan sabaoth, ka habe, Adre me he ka tho degecâ je haginyy ae lau adre op hnyi Babulona, k' adre me he ka thong ge meic je hlinginy homagöuleny ae görany ; ke ame he tavat ka huliwa hnân únyi baú, me je hnyei hnân meic ; ke adre me he ka sēnyin.

59 Walang hofuc ame hûna Jeremia perofeta kö Seraia, nöku Neria, nöku Maseia, waleji hnyi hnen hna tha he me Zedekia than Juda Babulona ai hnyi huna a vakiny anyin musi. Haba Seraia, me wale at musö hnyaban than. 60 Ke haba Jeremia ame sihnalimen hnyi tusi ta je únyi ae kong ame he ka o kö Babulona, wale ta je hofuc eang hia waleji adre me sihnalimen ge Babulona. 61 Ke haba Jeremia ame ha kö Seraia, ka habe, U ka o but hnyi Babulona, me wâ ju, me aú ta je hofuc ang hia, 62 me ha, ka habe, Iehova lö, u je ha ge dok ang he ka ohia, me me ca he ke at ka labâ, ame ne at, ame ne meno, ke ame he ka hnyot nyiele balua. 63 Ke u ka um dö aú tusi ang, me u me he ka hûkölö veten me khúâ e ka hnyi wanben Euferate : 64 ke u me he ka ha, ka habe, Ame he Babulona ka dit helâe, ke ame ca he bi ka höhöi can okongon oge me he ka oâ kâu : ke adre me he ka sēnyin.

A um dö je hofuc ho Jeremia.

### HNYIMAKAN 52.

**T**WENTE wan dut je hunai Zedekia hnyi úten e ame hwân he ka musi ; ke e ame musi eleven je huna hnyi Jerusalema : ke haba ien hinyen, me Hamutala a nöku Jeremia at Libena. 2 Ke e ame ânyâ hulö hnyi hnyimakö Iehova, helâji me hna ânyâ hia ga Jehoiakima. 3 Anyin a can hmönyin anyi Iehova adre me ânyâ ka Jerusalema me Juda ke ne o but ame digic ödra hnyi hnyimakan : ke haba Zedekia ame úkhin fuc ka than Babulona. 4 Ke haba hnyi huna a naininy anyin musi, hnyi tehi a teniny, hnyi bong a teniny tehi, haba Nebukaneza than Babulona ame o but hnyi Jerusalema, e me anyin utbavat hia, me hunuma cicö e ; ke adre me otilâ je taben vat igigilö. 5 Ke adre me igigilö taun ke ne o but hnyi huna a eleveni Zedekia than. 6 Haba hnyi tehi a vakiny, hnyi bong a naininy tehi, e gan hmâ hmiâ

JEREMIA 52.

hnyi taun, ke ba but an tavat. 7 Ke adre me kia taun, me ame kec tavat vat hia me he but hnyi hnyinghet únyi hnyi taun adre gethen hnyi homagöulen wanben li hak adre up veten, hnyi utkânâ anyin than; (ke e bi at Kaledaia igigilö taun:) ke adre me kec hnyi gethen úheny hnyi dok ae tha hon. 8 Ke haba utbavat anyin at Kaledaia, me adre me hnu than, me khöü Zedekia hnyi je dok ae tha hon hnyi Jeriko; ke ame vese but anyin utbavat gan. 9 Me adre me kât than, me hom e ka than Babulona Ribela ai hnyi hnyeï Hamath, me e ame owisa kâu. 10 Ke haba than Babulona ume hlingâ je laku Zedekia hnyi hnyimakan; ke e ame hlingâ minya je taben Juda hia hnyi Ribela. 11 Ke e ame ûâ li emakö Zedekia; ke haba than Babulona me ame ca e ge fao, me hom e Babulona ai, me ip e hnyi uma ceat ke ne o but bong e ame mokcu hnyin.

12 Ke haba hnyi tehi a thabúnginy hnyi bong a teniny tehi, wale huna a naintini Nebukaneza than Babulona, ame o but Nebuzaredana hnyi Jerusalema wale taben tavat tue, at ame tot hnyi hnyimakan than Babulona: 13 ke e ame thong degecâ uma umö Iehova, me uma umen than; ke e ame thong degecâ ge meic ta je uma hia hnyi Jerusalema, wale je uma ae gan hia. 14 Ke haba utbavat hia anyin at Kaledaia unyin taben tavat tue, me adre me kia degecâ hna up veto hnyi Jerusalema igigilö. 15 Me haba Nebuzaradana taben tavat tue ame hom bâ ke je hnyat ae theduoc me je kolon tavat a lnen biju hnyi taun, me tavat kec waleji adre me ut ka than Babulona, me ke je hnyat minya a je kolon. 16 Ke haba Nebuzaradana taben tavat tue ame ip biju keihen ae ti theduoc hnân tuö je hnyeï vine me tavat belök. 17 Ke haba li hmolom bras hnyi uma umö Iehova, me je taben, me taben köiö a bras hnyi uma umö Iehova, at Kaledaia adre tho amamá me hom brasiny hia Babulona ai. 18 Adre me hom minya je öt, me je soi, me je uthesiún, me je kaia, me je spun, me je omjehen bras hia waleji adre me huliwa kâu. 19 Ke haba taben tavat tue ame hom je utkaia, me je taben meic, me je kaia me je öt, me je taben lamepa, me je spun, me je kaia; adre hom goliny je únyi ae gol, me silevainy je únyi ae sileva. 20 Haba li hmolom, ke khaca taben köiö, me je bolok brasa twelv eü hnyi hmelen je taben, waleji hnö Solomona than hna ânyâ hobi kâu

uma umö Iehova: e ca hnân tuluto úhmakiny bras hnyi ta je únyi hia eling. 21 Ke haba li hmolom, me eitiny kubit ibeüen göranyai hmolom; ke a wádrâ e ge tö a twelv kubit; ke haba úhakiny me vak ta banyen; e moku hnyin. 22 Ke e hu ethö hon e ban a bras; ke faiv kubit ibeüen göranyai ban, tha e me boert me je rimona hon ban igigilö, bras hia: ke belâe hmolom a loiny ae hu e me je rimona. 23 Ke úsa nainte siks je rimona hnyi je baten; haba ta je rimona hia hnyi boert igigilö, me wan haded. 24 Ke haba taben tavat tue ame hum Seraia at bihut ae beönua, me Zefania at bihut a loiny, me je hnyat a kun hnyat tuö hwanuma: 25 ke e ame hom únyi lnyi taun ke eunuka at ame musö tavat vat; me tavat a seven tavat ödrin e wâ hnyimakan than, wale tavat adre wâ hnyi taun; me at sihnalimeu anyin taben utbavat, at ame úkhacakönâ tavat aten hnyeï; me tavat a sikste adre wâ hnyi taun unyin aten hnyeï. 26 Ke haba Nebuzaradana taben tavat tue ame hum ödra, me hum ödra ka tuhan Babulona Ribela ai. 27 Ke haba than Babulona ame kot hling' ödra hnyi Ribela hnyi hnyeï Hamath. Me adre me hom hwenbâ at Juda únyi hnyi idra hnyeï. 28 Walang tavat a hom Nebukaneza a je bâ; haba hnyi huna a seveniny, me ödrin theri thauzan ke twente theri at Juda: 29 haba hnyi huna a eitini Nebukaneza, me ödrin eit haded ke thöte tu e ame hom bâ úhedrin Jerusalema: 30 ke haba hnyi huna a twente theri Nebukaneza, me Nebuzaradana taben tavat tue ame hom bâ at Juda, a ödrin seven haded ke fâte faiv: ke haba úseiny tavat hia me foa thauzan ke siks haded.

31 Ke haba hnyi huna a thöte seveniny bâ a Jehoiakin than Juda, hnyi tehi a twelviny, hnyi bong a twente faiviny tehi, me haba Evile-merodiak tuhan Babulona. hnyi huna a hwân hnyin anyin musi, me e ame ogöranyâ bö Jehoiakin than Juda, me hom e únyi hnyi uma ceat; 32 me e ame ha hofuc ae menyik kâu, me ogöranyâ anyin theron hon je theron anyin ta je than unyin hnyi Babulona. 33 Ke e ame bi lnen anyin je úkhaüen uma ceat, ke e ame hnyi han me hnyi ta je bongon hia anyin möt. 34 Ke haba jekhon, me adre me labö khene jekhon unyin than Babulona, hnyi ke bong me ke bong ke ne o but hnyi bong e ame mokcu hnyin, a je bongon hia anyin möt.

# JE TENGE ANYI JEREMIA.

## HNYIMAKAN 1.

**N**AKAINY taun ame hake laba, waleji ae unöngöt ge at!

Ke helâ me momo a safac ut walang ang!

Waleji ae gan unyin ta je hnyei, ke momo than unyin je ke keihen hnyei, K' ame bi fat walang ang!

2 E ame tenge gan hmâ hnyi hnyinghet, ke e hnyi li wahicen deköien ; E ba at hnyi je lawaeny hia he ka otubwelâ e :

K' ame iyawâ e je liamewaeny mē, K' adre me bi iwahnaihmiöny mē.

3 A bâ but Juda can úoveci me huliwa ae hmak ;

E ame laba unyin je ethen, k' ame ca wâ bi hna menâ :

Haba tavat hia adre me ovecâ e, me adre me khaú e hnyi dok ae hnek.

4 Ame tenge je getheniny Ziona, anyin ame ca o tavat ka hnyi úkhacaköu ae únyi hnathu ;

E ba but at hnyi je homagouleny hia, k' ame mâng anyin tavat bihut :

Ame hlöublöu wahlu unyin, ke haba e, me momo ame vec dö.

5 E beönua tavat adre me okongoâ e, k' ame sot bi je iwahnaihmiöny mē ;

Anyin a Iehova ame hia but ovecâ e, can hnen je hna hanyâúâ ae se hia :

Adre me hom bâ lakon ae úhnyúkong hnyi hnyimakan je iwahnaihmiöny.

6 K' ame hia hia but bongon than unyin hlu lakon Ziona :

Haba anyin je taben, me ödra tha úcú me je aila adre me ca wâ bi únyi hnân han.

Ke adre me kec ke ba bî tang hwege hnyi hnyimakan at ame úhnûnú.

7 Hnyi bonginy vec me hmak, Jerusalema ame únykúme

Ta je únyi gan ae kese hwân hnyi je bong kâú ehac :

Hnyi úen ame ta anyin tavat ka hnyi hnyamen iwahnaihmiöny, ke ba at ame hadruâ e,

Ame wâ e hnen je iwahnaihmiöny, adre me hlumâ ta je hna okongoâ e.

8 Jerusalema ame hia but hulö gan hmâ ; anyin a wale e ame helâ me únyi ae ikiki :

Haba tavat adre me ogânâ e adre me húkötîâ e, anyin adre hia but wâ a e ame he thu :

Eke, e ame mâng, me hwiö.

9 E hnyi obiny anyin úkhaú anyin ikiki ; e ame ca únykúme obiny kâú ;

Anyin a wale hnân láîâ hna oúhnyú-kongoâ e ; e ba at ame otubwelâ e :

Iehova lö, wâ bi anyik vec ; anyin ame bi gan iwahnaihmiöny.

10 Haba iwahnaihmiöny ame inâ hnyamen ka hnyi anyin ta je únyi hia ae kese :

Anyin e ame hia but wâ je wanaithila a g' adre me hia but dit ka hnyi anyin dok ae kap,

Waleji u je ha a g' adre me ca he ka dit ka hnyi ânyâm úkhacaköu.

11 Adre me mâng ta je aten hia, adre me heleú jeú ;

Adre hia but ham anyidra ta je únyi ae kese hnân úcú jeú, m' adre me ohâtâ melidra :

Iehova lö, bwele ju, ke wâ ju ; anyin oge kong ut.

12 Hawa, e únyi baú köbun tavat hia adre me vheno gethen ?

Bwele thö, me wâ, ame ne hu hlöuhlöu helâ me anyik hlöuhlöu, wale adre ânyâ könya.

Waleji hnö Iehova hna oveci nya hnyi bonginy anyin hmönyin ae hwege.

13 E ame hia but kunâ úheny dö meic ka hnyi je jeiök, k' ame ton bi :

E ame nia but thong ert hobi kâú li cak, e ame hia but ohmetu nya ;

E ame hia but hake ip nya, me ohlohloi nya hnyi je bong.

14 Ame ca ge hnyamen úhúkâlaköuâ hnök je hna hanyâúâ ;

K' adre úcaköuâ, k' adre me ip hon nyik ; e ame oaúâ tang hwegiök ;

Haba Than ame hia but hnö nya ka hnyi je hnyamödra, ke ca khanö nya he ka tot ködra.

15 Haba Than ame hia but húkötîâ anyik tavat hwege hia unyik ;

JE TENGE ANYI JEREMIA 2.

- E ame hia but hawâ úcuk úkhacaköu  
ae únyi hnathu he ka oamamá je  
wahidröu unyik :  
Than ame hia but ututo hlu, wale hluiny  
Juda hnyi hna hlec wan vine.
- 16 Can ta je únyi eling, me oge me tenge ;  
ke haba emakök, me ame hingölö köiö  
únyi hnyi li emakök ;  
Anyin ae úsákáúö but mönya at úötu-  
bweli, at a hamen he ka okahwa  
hnyekuk :  
E ba but thatúnyi anyin je lakuk, anyin  
ame ton iwahnaihmiöny.
- 17 Ziona ame lau li hnyamen ; e ba at he  
ka otubwelá ;  
Iehova ame hia but ha ga Jakob, a g'  
adre me he ka iwahnaihmiöny mē  
tawat igigilö e :  
E ikiki Jerusalema unyidra.
- 18 E wisa Iehova ; ke oge hia but thu  
anyin je hnanyibu :  
Je hnyei hia lö, öbun na löng ju, me wá  
anyik hlöuhlöu :  
Adre hom hwenbâ anyik je wahlu me  
wahidröu.
- 19 Oge me hawâ je lawek, k' adre me  
iyawö nya :  
A moku anyik tawat bihut me wa-  
hingat hnyi taun,  
Hnyi üen adre me heleü ö 'dra, m' adre  
me möt hmetu.
- 20 Iehova lö, wá ju ; anyin a inya oge me  
vec ; ame bwebwet hnyekuk ;  
Ame hwiö hnyekuk eü hnyik ; anyin  
oge hia but úkhin fuc hwege :  
Haba hele wat ame öba lakon e hele, ke  
eiö hnyin uma e hu mok.
- 21 Adre löng ut a inya oge mâng ; ke ba  
at ame otubweli nya ;  
A löng ut je iwahnaihmiöny mönya hia  
hna okongu nya ; adre me senyin a  
u je hia but ányá :  
U me he ka oá bong waleji u je thu, m'  
adre me he ka úcú mönya.
- 22 E na o ju ta je hwakecidra hia ae kong  
hnyi hnyimákâm ;  
Ke ányá thö ködra heláji me hnám hna  
ányá könya can hnök je hna ha-  
nyâúú :  
Anyin a iny osehia but mâng, ke senyin  
dut hnyekuk.

HNyimakan 2.

**N**AKAINY hna okhömetá hluiny Ziona  
hnen Than hnyi anyin hmönyin !

- E ame hia but khúâ únyi hnyi drany  
hmanenanginy Isaraela ka hnyi hme-  
ledrany,  
Ke ame ca hia but únykúme taben  
hnyeúcan hnyi bonginy anyin hmö-  
nyin.
- 2 A hia but Than utá je hnyaba Jakob  
hia, ke ame ca betenge bi ;  
E ame hagutá hnyi anyin hmönyin je  
hnabâ anyin hluiny Juda ;  
E ame tha ohonâ me kánâ :  
E ame oikikiâ dökhu me je thaniny.
- 3 E ame hia but subâ degecá hnyi anyin  
hmönyin faoiny meno hia anyi Isa-  
raela ;  
E ame hia but oc hmetu benyin a metân  
hnyi hnyimakan je iwahnaihmiöny :  
E ame hia but thung Jakob helâ me  
meic ame ubáhlâ, at ame han igigilö.
- 4 E ame hia but lau anyin cafana helâ  
me iwahnaihmiöny, k' ame tot helâ  
me at wat ame hai hnyamen a metân,  
Me hlingâ hia tawat ae kese at ka wá :  
E ame hingálâ anyin hmönyin helâ me  
meic hnyi uma mano umen hluiny  
Ziona.
- 5 Ke helâke e iwahnaihmiöny Than, e  
ame utá Isaraela ;  
E ame utá je uma hia umen than, e ame  
ohia anyin je hnabâ :  
Ke e ame hia but osehia tenge me tenge  
thungaú ka hluiny Juda.
- 6 Ke e ame hia but hügúnâ hwegiâ umen  
uma menâ, helâke uma menâ bi hnyi  
ta hnyei ;  
E ame hia but ohia dok adre me úkha-  
caköu hnyin :  
Haba Iehova ame ohnyingâ hnyi Ziona  
úkhacaköu ae únyi hnathu, me sa-  
bath,  
K' ame húkotiâ than me at bihut hnyi  
anyin hmönyin ae gan.
- 7 Haba Than ame hia but hota degecá  
taben hut kâu, e ame hia but ikikiâ  
anyin dok ae kap,  
E ame hia but hna ka iwahnaihmiöny  
umen je uma ae mec :  
Adre hia but mede hnyi uma umö  
Iehova helâ me bong úkhacaköu ae  
únyi hnathu.
- 8 Iehova ame hia but únykúme he ka  
ohia hna up veto anyin hluiny Ziona ;  
E ame hia but lelö tulut, e ame ca thu  
hmetu hnyamen hnyi hnen hna ohia :  
Ke e ame kunâ singiny me hna up veto  
he ka tenge ; k' ame tha senyin.

### JE TENGE ANYI JEREMIA 3.

- 9 Ame dit bi je homagöuleny ka hnyi kânâ ; k' ame ohia me oamamâ je ohmâiny ;  
E but je thaniny me je taben hnyi je hnyei ae ba hnanyibu gadra ;  
Eke, adre me ca wâ bi hnen anyin je perofeta hna omanená ûnyi ga Iehova.
- 10 Haba wahingatîn hlu Ziona adre me laba hnyi kânâ, adre me hnyibû ;  
Adre hia but konâm je bödra ge kânâ ; adre hia but weikâ ecmâno ae gan nân :  
Je wahluiny Jerusalema adre me nom hnyikânâi.
- 11 A didrut li emakök anyin tenge, ame bwebwet hnyekuk,  
Ame hingölö akik hnyikânâi, can hnödra hna okongoâ hlu nokon lakeik ;  
Anyin ame ta mok hnyi getheniny taun je wanakat me je mendreng adre i.
- 12 Adre me ha ka lahinyödra, ka habe, Ewa hwit me waina ?  
Ödra ka ta mok helâ me at ae aat hnyi je getheniny taun,  
Me ödra ka hingâlâ je hanudrin hnyi ûlainy je lahinyödra.
- 13 Ieü oge me he ka ohnathu köu ? ieü oge me he ka öücü u mē hluiny Jerusalema ?  
Ieü oge me he ka öücü u mē he ka otubweli u, hlu nokon Ziona ?  
Anyin ae gan hmâ hnâm aat helâ me köiö : ie at ame he ka okhötâ hmetu ?
- 14 Ânyâm je perofeta adre hia but wâ hobi köu ta je hna omanená ae ûnyi baü me monu ;  
Ke adre me ca omanená bi hwakecâm ae monu, he ka ohmetu u ûhem hnyi hna bâ :  
Ke adre hia but wâ hobi köu je hok ae thoi me hnân omono.
- 15 Adre me khöükhöü hnyam köu tavat hia adre me vheno unyâm ;  
Adre me jû me nyinyikâ je bödra ka hluiny Jerusalema, haingödra, ka habe  
Hawa, wale taun adre me labö ha, ka 'habe, E beönua hmanenanginy, ame senyiná hnen hmeledrany hia ?
- 16 Adre hia but memang köu ta je iwahnaihmiöny hia möu ;  
Adre me jû me höchnyu me ha, ka habe, Ate hia but ut' ödra ;  
E hnathu walang bong ate me labö lubahingen ; ate me elâm me wâ.
- 17 A hia but Iehova ânyâ waleji hnen hna ûnykûme ;  
E ame hia but ohwâdâ hwan hofuc waleji e ame hûna hnyi ta je bong kâü adrem ;  
E ame hia but kia, me ca betenge bi :  
Ke e ame osenyiná iwahnaihmiöny hom, Me ogöranyâ faoiny meno anyin je tavat adre me tot köu.
- 18 Haba je hnyekudra ame tenge ka Than :  
Hna up veto anyin hluiny Ziona lö, e so e hingölö li deköiö helâ me wagewe hnyi lany me lit ;  
U ma ca menâ ju ; e so e me ca soju wan emâkâm.
- 19 Todrö, hongot dö hnyi hnyinghet hnyi je hna hmak a bân ;  
Hingâlâ but hnyekom helâ me köiö hnyi hnyimakan Than ;  
Hai thö kâü li hnyamâm ge melen lakom a je wanakat,  
Wale adre me ta mok hnen hmiâ hnyi je hna saü hnen je gethen hia.
- 20 Iehova lö, wâ ju, me ûnykûme ju waleji ge hnâm hna ânyâ e kâü!  
Hawa, ame he ka he bi je momo ka an ta je troban gadra, a je lakudra adre bwebwelâ hnyi li hnyamödra ?  
Hawa, adre me he ka hlingâ at bihut me perofeta hnyi dok ae kap anyin Than ?
- 21 Wahidröu me wahingat adre me mokut hnyi kânâ eü hnyi gethen ;  
Anyik wahlu me wahidröu adre me ta ge hele vat :  
U je hia but hling' ödra hnyi bonginy ânyâm hmönyin ; u je hia but kot me ca betenge bi.
- 22 U je hia but hawâ helâ me hnyi bonginy ûkhacaköu ae ûnyi hnathu, ta je ûnyi hnân ooti nya igigilö,  
Ke ba at ame kec möt me kolon hnyi bonginy hmönyin anyi Iehova :  
A hia but oâûâ hnen iwahnaihmiöny mönya tavat waleji oge me kap me hat.

### HNYIMAKAN 3.

- I**NYA at a khana üöveci ge osö a anyin hmönyin.
- 2 E ame hia but su nya me hum nya ka he hnyi menekholom, ke ca bi hnyi lany.
- 3 E hnathu e ame labö ohmeto hnyamen me ûcûk hnyi je bong hia thibut

JE TENGE ANYI JEREMIA 3.

- 4 E ame hia but odelâ vik me unök ; e ame hia but thu je jeiök.
- 5 E ame up tap cici nya, me oigigili nya ge khöhlöng me vec.
- 6 E ame hia but olabö nya hnyi je dok ae menekholom helâ me tavat adre me kuedra ka mokcu.
- 7 E ame hia but theling nya, me ca khanö nya didrut ; e ame ohmakâ anyik sa cen fao.
- 8 Eke, iny ka tenge me hongot göranyai, me e ame hlöng hwanuma ge hijik hic.
- 9 E ame hia but thelöng dek je gethen ge je veto adre tretrao, me ohwalö dek je gethen.
- 10 E helâke me bea könya, at ame mokut tu' önya, helâ me liona hnyi je dok ae iyong.
- 11 E ame hia but osauâ dek je gethen, me oloú kiö nya ; e ame hia but öba wan gak.
- 12 E ame hia but lau anyin cafana, me otilö nya hnân dá ge fana.
- 13 E ame hia but odilâ je can anyin je fana ka hnyi li wagiök.
- 14 Iny taben úhiö ka tavat hia ; ke adre me khumöngi nya hnyi je bong.
- 15 E ame hia but öunöngöti nya ge únyi ae hiny me osekuni nya ge khökhölong.
- 16 E ame hia but thu hmetro je nyuk ge je oveto, e ame könim nya ge dröu.
- 17 Ke u je hia but öúsákâüö nya me hnahic ; oge hnying ut senyin.
- 18 Ke haingök, ka habe, E hia but tang hwegiök, me hnök hna geju kâu únyi ga Iehova.
- 19 Únykúme ju anyik vec me hmak, wale ge det me khökhölong.
- 20 Ame labö únykúme e, me ame nom ju hnyekuk eú hnyik.
- 21 Oge me únykúme hmetu e, anyin a wale oge me labageju.
- 22 Iehova ame betenge, waleling me ca hi' öta, anyin ame ca um bi anyin ibetengiö.
- 23 K' ame teb únyi hnyi je hnyomakatu ; e gan hmâ ányâm hnathu.
- 24 Haingen hnyekuk, ka habe, Jekhök Iehova ; anyin a wale, oge me he ka geju kâu.
- 25 E so Iehova ka tavat adre me halubahingen, ke at ame elâm e.
- 26 E so he ka gejon me halubahingen úhömeli anyi Iehova.
- 27 E so ka at he ha hijen hna úhúkálákouâ ke tiga úhnyúkong.
- 28 Hamen he ka hake laba me laba hnyibú, anyin a e ame ip hon.
- 29 Hamen he ka ciron hnyimen eú hnyikânâ ; ame ne hu gejon.
- 30 Hamen he ka hna wahicen ka at ame khaú, a unöngötö ge hna haikon-goâ.
- 31 Anyin ame ca he bi Than ka degec nyiele balua.
- 32 Anyin a eja ke ne a ne ovecâ, e ame he hmetu ka betenge hoton úganiny anyin betenge.
- 33 Anyin a e ame ca ovecâ únyi ge hnyok, me otengiâ lakon tavat.
- 34 Adre ne uto eú hnyikânâ aten uma ceat hia hnyi hmeledrany,
- 35 Adre ne ohaúâ hna owisa at hnyi hnyimakan At ae Beönua,
- 36 Adre ne omono at hnyi hna ivinöâ e bi, ame ca so bi ka Than.
- 37 Ie at ame ha, me ame hwadá thö, ke ame ca húna e Than ?
- 38 Hawa, ame ca o bi únyi ae kong me so hnyi hnyimen At ae Beönua ?
- 39 Anyin a ieu úhaiö at ae möt, wale at, can hwaban anyin ta je hulö ?
- 40 Ate me he ka elâm me cubec deta je gethen, me hmetu kö Iehova.
- 41 Ate me he ka kap göranyai je hnyekuta me je hnyamöta ka Khong ethö hnyi drany.
- 42 Öhmun e hia but hanyáúâ me thu musi ; ke u je ca hna.
- 43 U je hia but khaúö u ge hmönyin me hnu öhmun ; u je hia but hlingâ me ca betenge.
- 44 U je hia but tubi u ge úlá, me me ca didrö hijihmun hic.
- 45 U je hia but wi' öhmun me tiren me únyi baú wanben je hnyei.



JE TENGE ANYI JEREMIA 4.

- 46 Adre hia but memang köhmun je iwa-  
hnaihmiöny hia möhmun.
- 47 Ame o but köhmun ot, me thop, me ba  
at, me hna ohia.
- 48 Ame hingälâ je wagewe ûnyi hnyi li  
emakök, can hna ohia hluiny ik  
hnyi.
- 49 Ame hingölö li emakök, me ca menâ bi,  
ke ba thö obiny,
- 50 Ke ne o but Iehova ame bwele ju me  
wâ ûnyi ethö hnyi drany.
- 51 Li emakök ame ovecâ hnyekuk, can je  
hluiny hia ik taun.
- 52 Adre hia but hnu nya helâ me meno  
ame ga, ödra je iwahnaihmiöny mönya  
ke ba can.
- 53 Adre hia but subâ degecâ anyik möt  
hnyi thop, me khüö veto huk,
- 54 Ame khutukhavâ bök köiö; ke haingök,  
Adre hia but subâ degeci nya.
- 55 Iehova lö, oge me hawâ iâm ûnyi hnyi  
thop ae dit.
- 56 U je löng ifucik; ca ikhâlâ li hnyikö-  
nyâm ge anyik homenâ, ke anyik  
tenge.
- 57 U je hakekenyâ hnyi bong oge me hao  
u hnyin: u je ha, ka habe, Ca ot bi,
- 58 Than lö, u je hia but ivinö hobi könya;  
u je hia but úcú melik.
- 59 Iehova lö, u je wâ hwali könya; owisa  
thö hobi könya.
- 60 U je hia but wâ hia anyidra hmönyin  
me hnödra je hna únykúme hia gak.
- 61 Iehova lö, u je hia but löng hnödra hna  
haikongoâ, me hnödra je hna únykúme  
hia gak;
- 62 Je esongödidra tavat adre me tot könya,  
me anyidra je bibihwakecin könya  
hnyi je bong.
- 63 Bethe wâ ju úlabaidra me utilödra;  
inya ang at adre me sit hwânân.
- 64 Iehova lö, u me he ka bi hwaban ködra  
hoton huliwa anyin je hnyamödra.
- 65 U me he ka ham ködra hnyok ae khöt,  
ke hang' ödra but.
- 66 U me he ka hnu ödra hnyi hmönyin,  
me ohí' ödra eang hmeledrany anyi  
Iehova.

HNYIMAKAN 4.

- N**AKAINY gol ae udrem but! a hwiö  
but gol ae so!  
Adre hingälâ je vetoiny dok ae kap  
hnyi je hna saú hia.
- 2 Je lakon Ziona ae ûnyi hnathu, ödra  
tha úcú me gol ae so,  
Nakainy hna oúcú ödra me ta je kaia  
kânâ, huliwa anyin at ame up kaia.
- 3 Je luko adre me ham je basidra, ke  
ame ijem ta je lakudra:  
Ke haba hlu nokon lakeik ame beovecâ  
helâ me je iaenainy hnyi hnyebuba.
- 4 Ame kece bohunen mendreng ka hnyi  
eengödiny ge beic:  
Ta je wanakat adre me sumatö jeú, ke  
ame ca subâ ködra hnen ke at.
- 5 Haba tavat adre me han so, me adre me  
hake laba hnyi je gethen:  
Haba tavat adre me hat hnyi mano ae  
dra, me adre me deluâ je hna digic  
thatûnyi.
- 6 Anyin ae gan hmâ hulö anyin hluiny  
ik hnyi hon hulö anyin Sodoma,  
Waleji adre ohia helâ me thuthuba-  
demak, ke ba hnyam ame hinöbenyn  
ka hnyin.
- 7 Ame alae but anyin je taben hon kiona,  
ke hau hon debai,  
E hngihngidra je únyidra hon je penina,  
haba úhadröngöcidra helâ me safairo:
- 8 Ke hlit je unyidra hon walep; adre me  
ca wâhmakhmetu ödra bi eú hnyi  
gethen:  
Ame kece thö unyidra ka hnyi je  
jeiödra; adre me meleca thö, ke helâ  
me uci.
- 9 E so tavat adre me hlingâ ge hele vat  
hon tavat adre me mok ge hmiâ;  
Anyin a ödra aú but, adre kot moko,  
anyin a ba but wan kânâ.
- 10 Haba je momo betenge adre me thân je  
hing lakudra ge je hnyamödra bi;  
Adre me ön ödra hnyi hna ohiainy  
hluiny ik hnyi.
- 11 Haba Iehova ame ohwâdâ anyin hmön-  
yin, me hingälâ anyin wathethöt ae  
gan;  
Ke e ame hia but hú meic hnyi Ziona,  
waleji ame thong degecâ je taben e.
- 12 Ame ca únykúme je thaniny hnyi me  
tavat adre me labâ hmeledrany,  
A g' ame he ka dit hnyi homagöuleny  
Jeruselema iwahnaihmiöny bi ke at  
ame tot metâ.

JE TENGE ANYI JEREMIA 5.

- 13 Can hulö anyin je perofetainy, me hulö anyin tavat bihut,  
Hnyat adre hia but hingälâ dra dren tavat ae wisa hnyi wanben e.
- 14 Adre me ngenü helâ me wadröu hnyi je gethen, adre me kong ut ge dra,  
Me me ca khana at he ka kâlâ je khatüödra.
- 15 Adre me hongot ködra, ka habe, He th' öbun ae ikiki l he thö, he thö, ca kâlâ bi :  
Hnyi ün adre me kec ut ke he monu, me haingen tavat aten ta je hnyei, ka habe, Adre me ca he hmetu ka me laba eang.
- 16 Ame hia but ovesei ödra hnen hmönyin anyi Iehova ; e ame ca he hmetu ka ünükümi ödra bi :  
Adre me ca okabâ hnyimakan tavat bihut ; k' adre me ca betenge ge wahingat.
- 17 Ame dit je emaköhmun ge hnöhmun hna elâu úhadruöhmun ae únyi baú.  
Hnyi hnöhmun hna hmak öhmun e hia but hmakâ ke hnyei ae ca khana he ka omeli.
- 18 Adre me cet je nyeúcahmun, me ca khan' öhmun he ka vheno dehmun je gethen :  
E hakekeny jut obiny köhmun, a bekhöt ut bonguhmun ta je bong, anyin ame o but obiny köhmun.
- 19 E logot tavat adre me hnu öhmun hou ta je aetöiny drany :  
Adre me hnu öhmun hon je bucen, adre me khöu mokut hnyi hnyebuba köhmun.
- 20 Haba hna menü hnyi je hnyingöihmun, wale a hú Iehova, me ame didrut hnyi anyidra je thop ;  
Waleji at öhmun e ha gan, ka habe, Öhmun e he ka möt unyin je hnyei hnyi hmelen hmenon.
- 21 Senyin dö me hobâ thö, u hluiny Edoma, at ame laba hnyi Uza :  
Ke ame he ka o köu minya kâia ; u me he ka monu ge grâg, me he thu ka únyi bi gam.
- 22 Hluiny Ziona lö, a hwâdâ but hna bi hwaban ânyâm hulö ;  
E ame ca he hmetu ka hwenbö u ehele ; Hluiny Edoma lö, e ame he ka senâ ânyâm hulö ;  
E ame he ka omanenâ je hwakecâm ae kong.

HNYIMAKAN 5.

- I**EHOVA lö, ünüküme ju únyi a o köhmun :  
Bwele ju me wâ hna haikongu öhmun.
- 2 Adre hom ihmun hobi kâu ta je at-kanyua,  
Me umöhmun je uma hobi kâu aten ke je hnyei bi.
- 3 Öhmun je nakahme, me tavat a mokcu kamen,  
Haba je lahinyöhmun me helâ me je safac.
- 4 Öhmun e hia but ijem belihmun je an hwaban mone ;  
Ke öhmun e bi hwaban ködra hlöghmun je ütö.
- 5 Tavat adre me hnu öhmun adre me tot hon je nyihmun :  
Öhmun e sényin, me ca menâ bi.
- 6 Öhmun e hia but ham hnyam me nom ka at Aigupito,  
Me at Asuria, me me hnyi sekuhmun.
- 7 A hia but monu je lakamöhmun, me hi' ödra but ;  
Ke öhmun e hia but hanö obiny anyidra ta je hulö.
- 8 Je athnyaba adre me musi öhmun :  
Ke ba at he ka hügün' öhmun hnyi je hnyamödra.
- 9 Öhmun e bi ö 'hmun, me öhmun e ne mokcu,  
Can hele vat hnyi hnyebuba.
- 10 E hlit ut unen je unyihmun helâ me wahnainyâ  
Anyin ae höc hmiâ.
- 11 Adre me okongoâ omomo hnyi Ziona,  
Me wahu minya hnyi je tauniny Juda.
- 12 Adre me uhno je taben waleji adre noc je hnyamödra :  
Ke adre me ca ogânâ bi hnyimakan wahingat.
- 13 Adre me hom wahidröu he ka khin hwit,  
Ke haba je da adre me ta hmelen je ütö adre hom.
- 14 E ba but wahingat hnyi je homagöule,  
Ke soju khumöng anyin wahidröu.
- 15 E ba hmetu senyin hnyi ta je hnyekuhmun,  
Adre me wia anyihmun bibiâ me me hlöuhlöu bi.
- 16 Ame kölu but korona únyi hnyi hon ta je böhmun :  
Ekölö gahmun walang ang ! anyin ae kong ut hwakecihmun.

## EZEKIELA 1.

- |   |  |
|---|--|
| <p>17 Anyin a wale, e sēnyin dut hnye-<br/>kuhmun ;<br/>Ke can ta je ūnyi eling amo hadedak<br/>ta je emaköhmun.</p> <p>18 Can bucen Ziona, wale ae ba wan ;<br/>Je alope adre me vheno e.</p> <p>19 Iehova lö, u at ame laba nyiele balua ;<br/>E bi ânÿâm theron ke ne o but hnyi ke<br/>dö me ke dö.</p> <p>20 Anyin a ieu u je hnying öhmun bala,</p> | <p>Me hn' öhmun hnyi je bong helâe, ae<br/>se hia hmönyin ?</p> <p>21 Iehova lö, ohmetu öhmun ju köu, me<br/>öhmun e hmetu ju ;<br/>Ohâtâ thö bonguhmun ta je bong helâji<br/>me ehac.</p> <p>22 Ke so bi u je hia but ti hna degeci<br/>öhmun,<br/>U je hmönyâm hmönyin köhmun.</p> |
|---|--|

## TUSI EZEKIELA PEROFETA.

### HNYIMAKAN 1.

**H**NYI huna a thöte, hnyi tehi a vakiny, ke tha inya me je bâ hnyi wagewe Kebara, me ame hmouca but drany, me oge me wâ je hna omanenâ ūnyi ge Khong. 2 Hnyi bong a thabûnginy tehi, wale huna a thabûnginy bâ a Jehoiakin, 3 me ame o but hnyi hnathu hofuc ho Iehova kö Eze-kiela at bihut, nöku Buzi, hnyi hnyei Kaledaia hnyi wagewe Kebara ; k' ame laba hon e eling hnyamö Iehova. 4 Ke oge me bwele me wâ höu ame o ūheny hnyi hwadrö, ke ūlâ ae gan, me meic ame gâ khenyi tot, ke e hadröngöc igigilö, ke eü hnyin e helâ me makan bras, ame hlâ ūnyi hnyi hnyin meic. 5 Ke ūnyi hnyi hnyin e ame o but helâke ta ūnyi ae möt a vak. Ke walang hwakecidrin ; ödrin helâ me at. 6 Ke ūsa vak je hnyimaködrin, ke usa vak je labenyidrin. 7 Ke haba je cadrin, me ame wisa je cadrin ; ke haba je hnyeücadrin, me helâ me hnyeücan nokon kau ; k' ödrin hadröngöc helâ me bras adre me kot wia. 8 Ke ve hu je hnyamödrin helâ me at eü hmelen je labenyidrin hnyi vak ta ke keihödrin : ke walang bongon je hnyamödrin me labenyidrin hnyat a vak ; 9 adre ūohmâköuâ labenyidra ; k' ödrin ka he me ödrin e ca hwiö ; k' ödrin e ve he wisa. 10 Ke haba hwakecin je hnyimakoödrin, me ve hu hnyimak helâ me at ; ke haba ödrin vak, m' ödrin ve hu hnyimak helâ me liona hnyi ke keihen metâ ; ke hnyi ke keihen me, me ve hu hnyimak helâ me bolok ; ke haba hnyat a vak, me ve hu

hnyimak helâ me aeto. 11 Ke haba je hnyimaködrin me labenyidrin me ame ca hújö ethö ; k' adre me ūohmâköuâ labenyidrin khaca me khaca, ke lo ame tube je unyidrin. 12 Ke adre me ve he wisa : haba dok ame he ka he hnyin hanu, me ödrin e he minya ka hnyin : ödrin e ca hwiö, ödrin ka he. 13 Ke haba bongon ge ta je ūnyi ae möt, me helâ me walep ame möt ge meic, helâ me je okûnú : e ame he wanben je ūnyi ae möt : ke ame ubâhlâ meic, ke ame gâ but hucuce ūnyi hnyi hnyin meic. 14 Ke haba je ūnyi ae möt me ödrin e gâ me hmetu helâ me hucuce. 15 Ke oge me wâ je ūnyi ae möt, ke wâ bi, waengen a khaca hnyi kânâ unyin je ūnyi ae möt, hobi kâu je hnyimakan a vak. 16 Haba bongon je waengen me huliwainy helâ me makan veto berulo : ke tha ūcú ödrin vak ; ke haba bongudrin me huliwainy, me helâ me ke waengen hnyi hnyin ke waengen. 17 Ödrin ka he, me ödrin e vheno vak ta ke keihödrin : ödrin e ca hwiö, ödrin ka he. 18 Ke haba anyidrin je otru me beü göranyai me hnân outen ; ke unöngötö anyidrin je otru ge je ecmak igigili ödrin hnyat a vak. 19 Ke e ka he je ūnyi ae möt me ame he je waengen hnyi je batödrin : ke ödra ka ogöranyâ je ūnyi ae möt ūnyi ang hmelen, me adre me ogöranyâ minya je waengen. 20 Haba dok ame he ka he hnyin hanu, me ödrin e he minya ka hnyin ; wale dok ame he ka he hnyin hanu : ke ame he göranyai je waengen tha e mödrin ; anyin a e hnyi je waengen hanon je ūnyi ae möt. 21 Ödrin ka he, me ödrin e he minya ; ke ödrin ka

## EZEKIELA 2, 3.

tot, me ödrin e tot minya ; ke ödra ka köp ödrin göranyai úheny ang hmelen, me adre me kap göranyai je waengen minya tha e mödrin : anyin a e bi hnyi je waengen hanon únyi ae möt. 22 Ke ethö hon ban únyi ae möt heláke unyin ae lau, helá me makan veto ae alai adre outen, adre olauá ethö hon je bödrin. 23 Ke wisa je labenyidrin hmelen unyin ae lau, khaca cicö khaca : úsa lo hnân tube ke keihen, ke úsa lo hnân tube ke keihen unyidrin. 24 Ke oge me löng hwan je labenyidrin ödrin ka he, helá me hwan köö ae gan, helá me ifuci Ataekhanahia, hwan imonumonuny helá me hwan utbavat : ödrin ka todru me ödrin e ohimö je labenyidrin. 25 Ke e hu hwan únyi hnyi unyin ae lau ae hon je bödrin : ödrin ka todru, me ödrin e ohimö je labenyidrin. 26 Ke e hnyi hon unyin ae lau ae hnyi hon je bödrin ke únyi helá me theron, helá me veto safairo ; ke ethö hon únyi helá me theron me hu bongon helá me bongon at ethö hon e. 27 Ke oge me wá helá me makan bras, helá me man meic hnyi hnyin e igigilö, hwân hnyi hnyin ke ne o but ethö ; ke hwân hnyi hnyin ke ne o but hnyikânâi oge me wá helá me man meic, k' ame hadröngöc e igigilö. 28 Ke haba hwakecin hadröngöc igigilö, me helá me man wajileufat ae hnyi úlá hnyi úen we. Wale bongon a manen me hmanengi Iehova. Ke oge me wá, me oge me ta hnyikânâi, me löng ifucin ke at ame fuc.

### HNyimakan 2.

**K**E e ame ha könya, ka habe, Nokon at lö, todrö ge li cam, me oge me he ka fuc köu. 2 Ke ame dit hanu ka hnyi hnyekuk hnyi úen e ame fuc könya, me otílá li cak ; me oge me löng ifucin at ame fuc könya. 3 Ke e ame ha könya, ka habe, Nokon at lö, inya oge me kunö u ka lakon Isaraela, ka je hnyei adre me úkhin fuc, waleji tavat adre me thu anyik musi : ödra me lakamödra adre hia but ányâ hwakecin ae kong könya ke ne o but hnyi bong ang. 4 Ke haba lakon, me hwege hnyimaködra me khöt hnyekudra ; inya oge me kunö u ködra : ke u me he ka ha ködra, ka habe, Walang hna ha hnen Than Iehova. 5 Ke haba ödra, adre me ne he ka löng, k' ame ne ba, (anyin a ödra lap úkhin fuc,) me ame he ka khan' ödra ae unyidra perofeta. 6 Ke haba u, nokon at, ca ot bi gadra, ke ca outen hodra ta je

hofuc, eja ke ne a ne tha e möu úö ae údedö me watetaföcö, ke eja ke ne a ne tha laba möu ta je sekopio : ca outen bi hodra ta je hofuc, ke ca öbubuny ge je hnyimaködra, anyin a ödra lap úkhin fuc. 7 Ke u ma he ka ha ködra hok ta je hofuc, k' adre me ne he ka löng, k' ame ne ba : anyin a ödra tavat úkhiny fuc hmönyin. 8 Ke haba u, nokon at, löng ju hnök hna ha köu ; ca he ka úkhin fuc helá me lap ang ae úkhin fuc : memang ut me u me he ka an únyi oge me he ka ham köu. 9 Ke oge me wá, ke wá bi, ame iná ke hnyam könya ; ke wá eú hnyin ke tusi adre vhec ; 10 ke e ame ulolo e hnyi hnyimakök ; ke adre me tha sihnalimen li ke keihen : ke adre me sihnalimen hnyin e tenge, ke tenge thungaú, ke vec hnyok.

### HNyimakan 3.

**K**E e ame ha könya, ka habe, Nokon at lö, an ju únyi e u me wá, an ju tusi ang adre vhec, ke he thö, me fuc ka lap anyi Isaraela. 2 Me oge me memang ut, me e ame haök ge tusi adre vhec. 3 Ke e ame ha könya, ka habe, Nokon at lö, ip ju eú hnyi hnyekom, ke öunöngötá thö hnyekom ge tusi e adre vhec wale oge ham köu. Me oge me an e ; ke haba hnebwiainy hnyi hnyimök me helá me hani.

4 Ke e ame ha könya, ka habe, Nokon at lö, he thö ka lap anyi Isaraela, me ha ködra hok ta je hofuc. 5 Anyin adre ca kunö u ka hnyi hnyei ae atkanyua ifucidra, me hmak ifucidra, ke ka lap anyi Isaraela ; 6 ca ka hnyi je hnyei ae se ae atkanyua ifucidra, me hmak ifucidra, ke ca khanö u ifucidra. E hnathu, oge ne kunö u ködra, me adre me ne he ka ling u. 7 Ke so bi ame ca he lap anyi Isaraela he ka ling u ; anyin adre me höcö ling nya : anyin a tavat hwege hnyimakan me khöt hnyekudra hia lap anyi Isaraela. 8 Wá bi, oge hia but ohwegiá hnyimákâm cicö hnyimaködra, me barem cicö je baridra. 9 Oge hia but wia barem me me helá me samira ae hwege hon out : ca ot bi gadra, ke ca öbubuny ge je hnyimaködra, anyin a lap úkhin fuc. 10 Ke e ame ha könya, ka habe, Nokon at lö, haba hok ta je hofuc hia oge me he ka ha köu, ip ju eú hnyi hnyekom, me löng ju ge li hnyikönyâm. 11 Ke he thö ka je bâ wale tavat aten em hnyei, me fuc ködra, me ha ködra, ka habe, Walang hna ha

## EZEKIELA 4.

hnen Than Iehova ; adre me ne he ka löng, ame ne ba.

12 Ke haba hanu ame köp nya göranyai, ke oge me löng hnyi hotuk hofuc hwawadring ae hwege, ame ha, ka habe, E so he ka haisoâ hmanenangi Iehova ûnyi hnyi hnen. 13 Ke oge me löng hwan je labenyin je ûnyi ae möt ame ûsetu, me hwan je waengen cici ödrin, wale hmuhmuiny hwege wadring. 14 Me hanu ame köp nya göranyai, me hum nya : ke oge me he but, ke iny vec me hmönyin, ke e hwege hnyamö Iehova huk. 15 Me oge me o but ka ta je bâ hnyi Tel-abib, tavat adre me laba hnyi wagewe Kebara, me ka hnyi dok adre me labâ ; me oge me tha laba hmak mödra hnyi seven ta bong.

16 Ke a um dö je bong a seven, me ame o but kõnya hofuc ho Iehova, ka habe, 17 Nokon at lö, oge hia but otilö u hnân at tue hobi kâu lap anyi Isaraela : anyin a wale löng ju hofuc ûnyi hnyi hnyimök, me kou ködra ûnyi gak. 18 Iny ka ha ka at ae kong, ka habe, U me he ka mok ; ke u je ca kou kâu, ke ca fuc he ka khû hnyikönyen at ae kong ûnyi hnyi deny gethen ae kong me me möt ; awe, ame he at ae kong ka mekiny anyin hulö ; ke oge me he bi nya ka elâm dren gam. 19 Ke u je ne khû hnyikönyen at ae kong, k' ame ca hmetu bi ûnyi hnyi anyin hulö me deny gethen ae kong, me ame he ka mekiny anyin hulö, ke u me he bi ka möt. 20 Ke haba khaca, ame ne hmetu thö at ae wisa ûnyi hnyi hwakecin ae wisa, me ânyâ hulö, ke inya oge me ip ûnyi hnân öthöâ hnyi hnyimakan, me e ame he ka mok : e ame he ka mekiny anyin hulö, k' adre me ca he ka ûnykûme hwakecin ae wisa e ame ânyâ, anyin a u je ca kou kâu ; k' oge me he bi nya ka elâm dren gam. 21 Ke so bi u je ne khû hnyikönyen at ae wisa, me me ca kong bi at ae wisa, k' ame ca kong bi, me e ame he bi ka möt, anyin a e ame kap hnödra hna khû hnyikönyen ; ke u me omeli u bi.

22 Ke eling huk hnyamö Iehova : ke e ame ha kõnya, ka habe, Todrö, he thö ka hnyi dok ae tha hon, me oge me he ka fuc eling köu. 23 Me oge me tot me he ka hnyi dok ae tha hon : ke wâ bi, ame tot eling hmanenangi Iehova, helâ me hmanenang waleji oge me wâ hnyi wagewe Kebara : me oge me ta ju hnyikânâi. 24 Me ame dilic nya hnen hanu me otilâ li cak ; me ha kõnya, ka habe, He thö ka

hlöng bi hwanumâm hnyi umâm uma. 25 Ke haba u, nokon at, wâ bi adre me he ka ip hom je tö hnân ca, k' adre me he ka cö u kâu, ke u me ca he ka didrut ködra : 26 ke oge me he ka okeceâ bohâm ka hnyi ecngödrâm, me u me he ka hum, ke u me ca he ka thaw' ödra : anyin a ödra lap ûkhin fuc. 27 Ke iny ka he ka fuc köu, me oge me he ka khöng hnyimâm, ke u me he bi ka ha ködra, ka habe, Walang hna ha hnen Than Iehova, ka habe, Haba at ame löng, löng ju ; ke haba at ae höcö, höcö ju : anyin a ödra lap ûkhin fuc.

### HNYIMAKAN 4.

**K**E haba u, nokon at, u me he ka hom veto kânâ ae lau me ip e hnyi hnyimâkâm, ke op ju hon e tauu Jerusalema : 2 ke u me he ka thelöng e ge vat, me op cicö e je taben vat, me hlu kânâ cicö e ; me ânyâ minya je hunuma cicö e, me ip igigilö cicö e je ûnyi hnân tho. 3 Ke u me he ka hom fao ae lau, me ip e hnân hak fao hnyi wanbâm me taun ; ke u me hnyimâkâm kâu, ke adre me he ka igigilö e, ke u me he ka thelöng e. Wale thibi e ame he ka bi haten ka lap anyi Isaraela.

4 Ke u me he ka mokut hnyi ke keihâm a mem, me ip hon e hulöiny lap anyi Isaraela : haba ûseiny je bong u me he ka mokut hnyin e, ame he ka tabö u anyidra hulö. 5 Ke oge hia but ip köu je hunainy anyidra hulö, hoton ûseiny je bong, wale theri haded me nainte ûseiny je bong : me ame he ka takû u hulö anyin lap anyi Isaraela. 6 Ke haba khaca u ka umo thö e, me u me he hmetu ka mokut hnyi ke keihâm a metâm. ke ame he ka takû u hulö anyin lap anyi Juda : fâte je bong, oge me hia but ip köu ke bong hnân ke huna. 7 Ke u me he ka hnyimâkâm ka Jerusalema adre igigilö, me vhec benyin ânyâm ûkhaû ; ke u me he ka perofeta ûcon. 8 Ke wâ bi, oge me cö u ge tö, ke u me ca he ka hwiö ge ke keihâm ka hnyi ke keihâm, ke ne o but u je hia but umo je bonginy igigilö. 9 Ke u me he ka hok whit me bali, me owi, me lentil, me dokana, me kesem, hobi köu, me tha ip hnyi kaia a khaca, ke u me he ka bi âm ; hoton ûseiny je bong u me he ka mokulec ke keihâm, wale theri haded ke nainte je bong, u me he ka an e. 10 Ke haba âm u me he ka han, ame he ka he hoton tulut, twente je sekel hnyi bong : u me he ka an e hnyi ke

ûen me ke ûen. 11 Ke u me he ka ijem köiö hoton tulut, hanen a siksiny hin : u me he ka ijem hnyi ke ûen me ke ûen. 12 Ke u me he ka an e helâ me je ong areto bali, ke u me he ka thân e hnyi hnyimaködra ge tatet ame he but ûnyi ge at. 13 Ke Iehova ame ha, ka habe, Ame he lakon Isaraela ka an helâe ö 'dra jeû ae bokong hnyi je hnyei oge me he ka ob' ödra ka hnyin. 14 Me oge me ha, ka habe, Ekölö 'Than Iehova! wâ bi, adre me ca obokongu nya : anyin oge me ca hnyi an ûnyi ame ka hamen mok, ke hna oloú kia ge meno, hwân k' iny tiga ûhnyúkong ke ne o but walang ang ; k' ame ca hnyi dit utiö ae ikiki ka hnyi hnyimök. 15 Me e ame ha könya, ka habe, Wâ bi, inya oge me ham köu tiny kau hwaban tiny at, ke u me he ka bi âm hnen e. 16 Ke e ame ha könya, ka habe, Nokon at, wâ bi, oge me he ka thu uciny han hnyi Jerusalema : ke adre me he ka han ge tulut, ke hom ûhnyúkongo ; ke adre me he ka ic ge tulut me hlohlo : 17 me me ba but jeû me köiö gadra, m' adre me ûlâiâkôuâ, me oaûâ but hnyi anyidra hulö.

## HNYIMAKAN 5.

**K**E haba u nokon at, hom dö hele vat ae so hwan, wale hele me heleûgi anyin at ûgi u me he ka hom, me u me he ka giâ bâm me waiâm : ke u me he ka hom tulut adre me ûhnö gan, ke u ma khenâ je leûn. 2 Haba ke keihen a kuniny, u me he ka thong ge meic hnyi wanben taun, e ka um dö je bonginy thelöng ; ke u me he ka hom ke hanen a kuniny me kokot tilâ ge hele vat ; ke haba ke hanen bi a kuniny, me u ma khûâ ka hnyi ang, ke oge me he bi nya ka oc hele vat he ka hnu hoton. 3 Ke u me he ka hom ûheny e ke je leûnen, me hûkâlâ hnyi obiny ânyâm ûkhaû. 4 Ke u me he ka hom hmetu keihen eling, me khûâ ka hnyi meic, me thong degecâ hnyi meic ; me ame he meic ka he but ûnyi gan ka hnyi lapanyi Isaraela hia.

5 Walang hna ha hnen Than Iehova, ka habe, Walang Jerusalema : oge hia but ip e hnyi wanben je hnyei, ke ame laba ta je hnyei igigilö. 6 Ke e ame hia but hanyâûâ hnök hna owisa hnyi hnen hna ânyâ monu hon ta je hnyei, me hanyâûâ anyik je hnanyibu hon je hnyei igigilö : anyin adre me hia but hna degecâ hnök je hna owisa, me ca vheno anyik je hnanyibu. 7 Anyin a

wale walang hna ha hnen Than Iehova, ka habe, Anyin a öbun e monumonu hon je hnyei igigili öbun, me ca vheno bi anyik je hnanyibu, me ca ânyâ hnök je hna owisa, ke haba khaca, öbun e ca hia but ânyâ hoton je hna otilâ ge je hnyei igigili öbun : 8 anyin a wale, walang hna ha hnen Than Iehova, ka habe, Wâ bi, e ve inya möu, a inya ; ke oge me he ka ti bi hwaban köu eû hnyi wanbâm hnyi hnyimakan ta je hnyei. 9 Ke oge me he ka ânyâ unyâm ûnyi oge tiga ca ânyâ, ke oge me ca he hmetu ka ânyâ helâe, can ta je hwakecâm ae ikiki. 10 Anyin a wale ame he je kamen ka an je lakudra hnyi wanbâm, ke ame he je lakon ka an je lakamödra ; ke oge me he ka bi hwaban köu, ke oge me he ka oveseâ je kolon hia gam ka hnyi ta je ang hia. 11 Anyin a wale, kia inya, haingen Than Iehova, e hna-thu anyin a u je okongoâ anyik dok ae kap ge ânyâm ta je ûnyi hia ae kong, me ânyâm ta je ûnyi ae ikiki hia, anyin a wale, oge me he bi nya ka oûhnyúkongu u ; ke oge me'ca he ka hok hnyok, ke haba khaca, oge me ca he ka betenge. 12 Ke ame he ke keihâm a kuniny ka mok ge mok ae cap, ke ame he ka oaû' ödra hnyi wanbâm ge hmiâ ; ke ame he ke keihâm a kuniny ka ta ge hele vat igigili u ; ke haba ke keihâm oge me he ka oveseâ ka hnyi ta je ang hia, ke oge me he ka oc hele vat he ka hnu ödra. 13 Ame he ka hwâdâ helâe anyik hmönyin, ke oge me he ka osekunâ hudra anyik wathethöt, me inye menâ thö : ke ame he ka khan' ödra a inya Iehova oge me fuc hnyi anyik ciâ, iny ka hia but ohwâdâ anyik wathethöt hudra. 14 Ke haba khaca, oge me he ka öba wan gam, ke adre me he ka haikongu u, unyin je hnyei igigili u, hnyi hnyimakan tavat hia adre me he unyâm. 15 Ke e ame he ka hnân haikongoâ me taben ûhiö me hnân nâ me kuko ka je hnyei igigili u, iny ka he ka bi hwaban köu, hnyi hmönyin me wathethöt, me hna û hwegiâ : oge hia but ha, inya Iehova : 16 hnyi ûen oge me he ka kunâ ködra je fanainy hmiâ ae kong, wale hnân ohia, wale oge me he ka kunâ he ka ohi' öbun ; ke oge me he ka ogânâ hmiâ köbun me thu uciny anyibun jeû : 17 ke oge me he ka kunâ köbun hmiâ me je meno ae kong, ke adre me he ka ohia lakom ; k' ame he mok ae cap me dra ka vhenu u ; ke oge me he ka oâ köu hele vat : Inya Iehova, oge hia but ha e.

## HNYIMAKAN 6.

**K**E ame o but kõnya hofuc ho Iehova, ka habe, 2 Nokon at lö, hnyimákám dö ka hnyi je buceniny Isaraela, ke perofeta thö ködrin, 3 ma ha, ka habe, Je buceniny Isaraela lö, löng ju hofuc hwan Than Iehova, ka habe, Walang hna ha hnen Than Iehova, ka je bucen, me je hut, me je wadeny köö, me je hnyigöuleny bucen, ka habe, Wâ bi, inya oge me he ka oâ köbun hele vat, ke oge me he ka ohia anyibun je dok ae görany. 4 Ke ame he ka ba önyen anyibun je taben hut, k' adre me he ka thu anyibun je hna theati seünö; ke oge me he ka ota tavat adre hlingâ unyibun hnyi hnyimakan anyibun je idola. 5 Ke oge me he ka ip je kokiny lakon Isaraela hnyi hnyimakan anyidra ta je idola; ke oge me he ka khúkhúá ta je jeiöbun igigilö anyibun je taben hut. 6 K' ame he ka ba wan je taun öbun e labâ, ke ba önyen anyibun je dok ae görany; me me ba at ke kong ut anyibun je taben hut, me me monumonu ke hia anyibun je idola, me suba degecâ anyibun je hna theati seünö, me ohia anyibun je huliwa. 7 Ke ame he ka ta hnyi wanböbun tavat adre me hlingâ, ke öbun e he ka wâ a inya Iehova. 8 Ke so bi oge me he ka bi kolon, me me hu tavat unyibun adre me he ka kec möt ge hele vat hnyi je hnyei, öbun ka vese ka hnyi je hnyei. 9 K' ame he tavat adre me kec möt ka únykúmi nya hnyi ta je hnyei adre me he ka laba hwenbâ hnyin, a inya höcö wâ hmetu je hnyekudra ae bi únyi monu, waleji ame hna degeci nya, me je emaködra ae bi únyi monu hoton anyidra je idola: ke adre me he ka húkoti' ödra bi hnyi huyimaködra bi, can je hulö waleji adre me ányâ ge anyidra ta je únyi ae ikiki. 10 Ke ame he ka khan' ödra a inya Iehova: oge ca hia but ha baúâ bi a oge me he ka ányâ ködra únyi eling ae kong.

11 Walang hna ha hnen Than Iehova, ka habe, Khaúkhaú thö, ke ututo ju, me ha, ka habe, Ekölö! can ta je únyi ae kong me ikiki anyin lap Isaraela: anyin adre me he ka ta ge hele vat, me hmiâ, me mok ae cap. 12 Haba at hnyi dok ae sákâú ame he ka mok ge mok ae cap; ke haba at ae hakekeny ame he ka ta ge hele vat; ke haba kolon, wale adre thelöng ame he ka mok ge hmiâ: helâe oge me he ka

ohwâdá anyik hmönyin hudra. 13 Ke ame he ka khan' öbun a inya Iehova, e ka e but je kokidra hnyi wanben anyidra je idola igigilö anyidra je taben hut, hon je dok ae hut hia ae görany, me hon ban je bucen hia, me hmelen je úö hia ae hát, me hmelen je iwajo hia ae wanenec, waleji adre ham hnyin je únyi ae boso ka anyidra je idola hia. 14 Ke oge me he ka hai hnyamök hudra me öba wan hnyei me wia ka hnyot, hwân hnyi hnyebuba hnyi Dibela, hnyi je hnyabadra hia: ke ame he ka khan' ödra a inya Iehova.

## HNYIMAKAN 7.

**K**E ame o but kõnya hofuc ho Iehova ame ha, ka habe, 2 U nokon at lö, walang hna ha hnen Than Iehova ka hnyei Isaraela, ka habe, Obiny dut: ame o but obiny ka vak ta kopiny hnyei. 3 Ame o but walang ang köu obiny, ke oge me he ka ohwâdá anyik hmönyin köu, me owisa köu hoton hwakecâm; ke oge me he ka oâ ka hnyi hom ányâm ta je únyi ae ikiki. 4 Ke oge me ca he ka hok hnyok gam, me betenge: ke oge me he ka oâ dem je gethen hom, ke ame he ka e hnyi wanbâm ányâm ta je únyi ae ikiki: ke ame he ka khan' öbun a inya Iehova.

5 Walang hna ha hnen Than Iehova, ka habe, Úkongon, úkongon a khaca; wâ bi, a ame o thö. 6 Ame o but obiny, wale obiny ame o, e ame hmak dö úcom, wâ bi, e ame o but. 7 At ame labâ hnyei lö, ame o but hna saú gam: ame o but úen, ke hakekeny jut bong; a bonginy imonumunony ke ca bong bi hnân hongot senyin hon je bucen. 8 Walang, e hakekeny jut me oge me he ka hingâlâ anyik wathethöt hom, me ohwâdá anyik hmönyin hom, ke oge me he ka owisa gam hoton dem je gethen; ke oge me he ka oâ ka hnyi hom ányâm ta je únyi hia ae ikiki. 9 Ke oge me ca he ka hokhnyok me betenge: ke oge me he ka oâ köu hoton dem je gethen, ke ame he ka e hnyi wanbâm ányâm ta je únyi ae ikiki; me ame he ka khan' öbun a inya Iehova, at úkúc. 10 Wâ bi bong, wâ bi e ame o thö: a o thö hnâm hna saú, k' ame vhöng uci, e hlau but bi gan. 11 Ame todrö úokonguny hnan úci ae kong; ame he ka hi' ödra hia me úseidra, me omjehedra: ke haba khaca, ame ca he ka hu je beönua gadra. 12 Ame o but úen, e hakekeny jut bong: e so ame ca senyin at ame

## EZEKIELA 8.

úcú, ke hlöuhlöu at ame kap mone : anyin ae bi hmönyin hon tavat ae se hia. 13 Anyin ame ca he hmetu bi at ame úcú ka hnyi únyi adre úcö, eja ke ne adre ne möt bala bi : anyin a haba hna omanená hobi kâu tavat ae se hia hnyin, me ba at ame he ka hmetu ; k' ame ca he ke at ka ohwegiâ e bi ge hwakecin ae kong. 14 Adre hia but túâ trutru, me penapena hia ; ke ba at ame hnyi he ka hnyi vat : anyin a e bi hon úseidra hia anyik hmönyin. 15 Hele vat hnyi hoton hak, ke mok ae cap me hmiâ eú hnyin : ame he ka mok at hnyi ta hnyi ge hele vat, ke ame he bi hmiâ me mok ae cap ka an tavat hnyi taun. 16 Ke haba tavat adre me kec gadra, me adre me he ka kec möt, k' adre me he ka helâ me je binyin hnyigöulen bucen, k' adre me he ka ve tenge hon je bucen can hwakecidra. 17 Ame he ka mat ta je hnyam hia, k' ame he je bouca hia ka sēnyin helâ me köiö. 18 Adre me he minya ka weikâ ecmanno ae gan nân, ke adre me he ka tubi ödra ge öbubuny : ke ame he ka hnehma ta je hnyimak hia, me hadreú hia ta je bödra. 19 Adre me he ka khuâ eú hnyi gethen anyidra sileva, ke ame he ka helâ me únyi ae ikiki anyidra gol : e ca khana anyidra sileva me gol he ka omeli ödra hnyi bonginy hmönyin anyi Iehova ; ame ca he ka sekudra, me öunöngötâ je hnyekudra ; anyin a wale hulö at ame öhaú' ödra. 20 Ke haba mecin anyin hmanang, e ame otílâ e hnyi bongon than : ke adre me otílâ bi je idola ae ikiki me hnân húkotiâ hnyin e : anyin a wale oge bia but hna e ködra hnân únyi ae ikiki. 21 Ke inya oge me he ka hna e ka hnyi hnyamen je atkanyua hnân söh, me ka tavat ae kong eang hmelen hnân únyi adre húgúnâ ; ke adre me he ka okongoâ e. 22 Oge me he ka wia hnyimakök gadra, ke adre me he ka okongoâ anyik dok ae iyong ; ke ame he tavat venâu ka dit hnyin e me okongoâ e. 23 Ányâ thö sa 'cen : anyin ae unöngötö hnyei ge dra a jöning, ke a unöngötö taun ge úokonguny. 24 Ke oge me he ka oâ tavat ae kong hmönyin hnyi je hnyei, ke adre me he ka hu umödra je uma : ke oge me he ka bi obiny hobelöuiny anyidra tavat hwege ; ke adre me he ka oikikiâ anyidra je dok ae kap. 25 Ame he jem hnaúhangö ; ke adre me he ka elâm hnahic ke ba bi. 26 Ame he ka o but' ke úokonguny me ke úokonguny, ke ame he ka hu ke úthumetu me ke úthmetu ; ke adre me he ka elâm

hna omanená unyin perofeta ; ke ame he ka hia hnanyibu unyin at bihut, me wâ bongon unyin wahingat. 27 Ame he than ka tenge, ke ame he taben ka khavâ hlohlo, ke ame he hnyamen tavat aten hnyei ka öbubuny ; oge me he ka ányâ ködra hoton dedra ta je gethen, me oge me he ka owisa ködra hoton únyi ae úcú ködra ; ke ame he ka khan' ödra a inya Iehova.

## HNYIMAKAN 8.

**K**E hnyi huna a siks hnyi tehi a siksiny, hnyi bong a thabúnginy tehi, inya oge me laba hnyi umök uma, ke ame laba ju hnyi hnyimakök wahingatiny Juda, me ame ta but huk eling hnyamen Than Iehova. 2 Ke inya oge me bwele, ke wâ bi, wale bongon a helâ me meic ; hwân hnyi hnyin at ke hnyikânâi me helâ me meic ; ke hwân hnyi hnyin göranyai me ame ubâhlâ helâ me makan bras. 3 Ke e ame hinöbeny helâke hnyam, me kât leúnen bök : ke haba hanu ame köp nya göranyai wanben hmeledrany me drany, k' ame hum nya Jerusalema ai hnyi hna omanená únyi ge Khong, ka hnyi hlinginy homagöule ka hnyi hnyeule eiö hnyin ka hnyi hwadrö ; wale taben idolainy ciâ hnyin, at ame ociâ. 4 Ke wâ bi eling hmanenanginy Khongu Isaraela, helâ me hna omanená waleji oge me wâ hnyi dok ae tha hon. 5 Ke e ame ha konya, ka habe, Nokon at lö, wâ thö walang ang gethen ka hnyi hwadrö. Me oge me bwele ka hnyi gethen ka hnyi hwadrö, ke wâ bi jimele hnyi homagöuleny taben hut ame tot idolainy cia eling hnyi hna dit. 6 Ke e ame ha konya, ka habe, Nokon at lö, u je wâ but únyi adre me ányâ? wale únyi ae ikiki ame ányâ eang ge lap anyi Isaraela, me inye he ka úsákáúö me anyik dok ae kap? ke u me he eáú ka wâ minya je únyi ae ikiki. 7 Ke e ame hum nya ka hnyi hwanumen hnyeule : ke inya oge me bwele, ke wâ bi wale wakhala hnyi hna up veto. 8 Ke e ame ha konya, ka habe, Nokon at lö, u me he walang ang ka hiny hnyi hna up veto ; ke inya oge me hiny hnyi hna up veto, ke wâ bi hwanuma. 9 Ke haingen konya, ka habe, Didrö me wâ ta je únyi ae ikiki me kong adre me ányâ eling. 10 Me oge me dit me wâ, ke wâ bi, ta je úhöúcú hia únyi ame iyáú, me je meno ae ikiki, me ta je idola hia anyin lap Isaraela, adre sihnalimen igigilö hnyi hna up veto. 11 Ke ame tot hnyi hnyi-



## EZEKIELA 9, 10.

makan ta je únyi e tavat a sevente hanen wahingatiny lap anyi Isaraela, ke ame tot Jazania nöku Safana hnyi wanbödrin, ke ve hu taben meic hnyi je hnyamödrin ; ke ame sâ göranyai hai ae gan huâ a hainy utö ae bo so. 12 Ke e ame ha kõnya, ka habe, Nokon at lö, hawa u me hia but wâ hna ve ânyâ hnen wahingatiny lap anyi Isaraela hnyi dok ae menekholom hnyi je hnyeuleny je ûhötücü? anyin adre me ha, ka habe, Ame ca õ 'ta but Iehova ; Iehova ame hia but hna degecâ hmeledrany. 13 Ke e ame ha kõnya, ka habe, U me he ka wâ eâu ke ta je únyi ae gan hmâ úikikiny adre me ânyâ. 14 Me e ame hun nya ka hnyi homagöuleny uma umö Iehova ka hnyi ke keihen ka hnyi hwadrö ; ke wâ bi, omomo adre me laba eling ka tenge ga Tamuza. 15 Ke haingen kõnya, ka habe, Nokon at lö, u je wâ but e ? u me he ka wâ eâu je únyi ae ikiki gan hmâ hon e. 16 Me e ame hum nya ka hnyi hnyeuleny uma umö Iehova eiö hnyin, ke wâ bi, hnyi hwanumen uma umö Iehova, wanben poretika me taben hut, helâke me twente faiv tavat adre me hotudra ka hnyi uma umö Iehova, me hnyimaködra deiö ; ke adre me khudrung deiö ka seünö. 17 Ke e ame ha kõnya, ka habe, Nokon at lö, u je wâ but e ? Hawa, únyi ae hâhâ ka lap anyi Juda wale a g' adre me ânyâ je únyi ae ikiki wale adre me ânyâ eang? anyin adre hia but öunöngötâ hnyei ge úokonguny, me hwiö hmetu m' adre me ohmönyini nya : ke wâ bi, adre me inâ anginy úö ka hnyi je hnyingöidra. 18 Anyin a wale oge me he bi nya ka huliwa hnyi hmönyin : oge me ca he ka hok hnyok, me betenge : eja ke ne adre ne hongot hwege göranyai ka hnyi li hnyikönyök, oge me ca he ka ling ödra.

### HNYIMAKAN 9.

**K**E e ame hongot hwege ka hnyi li hnyikönyök, ka habe, Öhakekenyâ ju jem tavat adre me tuö taun, tha ödrin me anyidrin je únyi hnân úhlingö. 2 Ke wâ bi ame o but siks tavat únyi hnyi getheniny homagöule ethö hnyi ke keihen ka hnyi hwadrö, ödrin e ve o me anyidrin ta je únyi hnân úhlingö ; ke haba hnyi wanbödrin ke at ame khavâ úkhaú lino, ke hu kaia sisit hnyi vhaken. Ke ödrin e didrö me tot hnyi baten taben hut bras. 3 Ke ame he but hmanenanginy Khongu Isaraela únyi hnyi hon kerubi, waleji ame tabâ ka

hnyi hwanumen uma : Me e ame hawâ at ame khavâ lino, ae hu kaia sisit hnyi, vhaken. 4 Ke haba Iehova ame ha kâu, ka habe, Vheno thö taun wanben Jerusalema, ke u me he ka bi haten hnyi je bariny tavat adre me mâng me tenge can ta je únyi hia ae ikiki wale adre me ânyâ hnyi wanben e. 5 Ke e ame ha ka keihen, ke oge me hnyi löng, ka habe, He th' öbuu ka vheno taun hoton e, me kot : ca he öbun ka hok hnyok me betenge : 6 hlingâ degecâ but wahingat me wahidröu, me wahlu, me wanakat, me omomo : ke ca he ka hakekenyâ ke at ae hu haten ; ke hwân dö hnyi anyik dok ae kap. Me adre me hwân ge wahingat hnyi hnyimakan uma. 7 Ke e ame ha ködrin, ka habe, Okongoâ but uma, me öunöngötâ thö je hnyeule ge je hna hlingâ : he th' öbun. Me adre me he me hlingâ hnyi taun. 8 Ke hnyi üen ödrin e hlingâ, k' oge me hake laba, me oge me ta hnyikânâi me tenge, me ha, ka habe, Ekölö Than Iehova ! hawa, u me he ka kot hia je kolon Isaraela, anyin a u me hingâlâ ânyâm hmönyin hon Jerusalema? 9 Me e ame ha kõnya, ka habe, E ti gan hmâ hulö anyin lap Isaraela me Juda, ke ame unöngötö hnyei ge dra, k' ame unöngötö taun ge hna ohwalö je hna owisa : anyin a haingödra, ka habe, Iehova ame hia but hna degecâ hmeledrany, ke ame ca wâ bi Iehova. 10 Ke haba inya oge me ca he bi nya ka hok hnyok me betenge, ke oge me he ka oâ dedra je gethen ka hnyi hon je bödra. 11 Ke wa bi, haba at ame khavâ lino, ae hu kaia sisit hnyi vhaken, ame thumetu, ka habe, Oge hia but ânyâ helâ me hnâm hna kûna kõnya.

### HNYIMAKAN 10.

**K**E oge me wâ, ke wâ bi, wale hnyi unyin ae lau hnyi hon ban je kerubi ame manen ethö hudrin helâke veto safairo, ame manen helâ me man ke theron. 2 Ke e ame fuc ka at ame khavâ lino, me ha, ka habe, He thö ka hnyi wanben je waengen ame khenyi, wale hmelen kerubi, me öunöngötâ hnyamâm ge je walep ae möt únyi hnyi wanben je kerubi, me khûkhûâ ka hnyi taun. Me e ame he, ke oge me wâ. 3 Ke haba je kerubi ödrin e tot hnyi ke keihen metân uma, e ka didrö at ka huyin : ke unöngötö hnyeule eiö hnyin ge úlá. 4 Ke haba hmanenanginy Iehova ame ölö úheny hon kerubi, me tot hon hwanumen

## EZEKIELA 11.

uma ; ke unöngötö hnyeule ge ùlâ, ke unöngötö hnyeule ge melaminy hmanenangi Iehova. 5 Ke adre me löng hwan je labenyin je kerubi ke ne o but hnyeule eû, helâ me ifucin Khong Aekhanahia, e ka fuc. 6 Ke hnyi ùen e ame hûna ka at ame khavâ lino, ka habe, Hom dö meic ùnyi hnyi wanben je waengen ame khenyi, hnyi wanben je kerubi, me e ame didrö me tot hnyi baten ke waengen. 7 Ke haba kerubi ame inâ hnyamen ùnyi hnyi wanben je kerubi ka hnyi wanben meic a e hnyi wanben je kerubi, me aoc e, me ip hnyi hnyamen at ame khavâ lino, ke e ame hom me didrut mē. 8 Ke ame manen ge je kerubi helâ me hnyamen at hmelen je labenyidrin. 9 Ke oge me wâ, ke wâ bi, vak ta waengen hnyi baten je kerubi, ke waengen hnyi baten ke kerubi, ke ke waengen hnyi baten ke kerubi : ke haba bongon je waengen me helâ me makan veto berulo. 10 Ke haba bongudrin, ödrin vak ae tha ùcû, helâke ke waengen hnyi hnyin ke waengen. 11 Ödrin ka he ödrin e tha vheno vak ta ke keihödrin : ödrin e ca hwiö ödrin ka he, ke haba dok ame hnyimakan ka hnyin je bödrin, ödrin e vheno e ; ödrin e ca hwiö ödrin ka he. 12 Ke haba je unyidrin hia me je hotudrin, me je hnyamödrin, me je labenyidrin, me je waengen, e unöngötö ge je ecmak igigilö, wale je waengen unyidrin a vak. 13 Haba je waengen, adre me haw' ödrin, ke oge löng e, a je waengen adre me okhenyö. 14 Ke úsa vak je hnyimaködrin, hnyimakan kerubi ke hnyimak, ke hnyimakan at hnyimak a loiny, ke huyimakan liona kuniny, ke hnyimakan aeto vakiny. 15 Ke ame ölö göranyai je kerubi : wale ùnyi ae möt, waleji oge wâ hnyi wagewe Kebara. 16 Ke hnyi ùen ame he je kerubi, me ame tha he mödrin je waengen, ke e ka ulolo je labenyidrin je kerubi he ka gâ göranyai ùhedrin ang hmelen, me ame ca hwiö bi je waengen unyidrin. 17 Ödrin ka tot me ödrin e tot minya ; ke ödrin ka ölö göranyai me ödrin e he minya göranyai : anyin a e hnyi hnyidrin hanon ùnyi ae möt. 18 Me ame he but hmanenangi Iehova ùnyi hnyi hwanumen uma me laba hon je kerubi. 19 Haba je kerubi ödrin e lau göranyai je labenyidra me gâ göranyai ùhedrin ang hmelen, ke inya oge me wâ, ödrin ka he, me ka tha ödrin me je waengea : ke ödrin e tot hnyi homagöuleny uma umö Iehova e jimeio ; ke 'thö hudrin hmanenanginy Khongu Isaraela.

20 Wale ùnyi ae möt, waleji oge me wâ hmelen Khongu Isaraela hnyi wagewe Kebara ; ke khanö nya but a ödrin je kerubi. 21 Usa vak je hnyimaködrin, ke úsa vak labenyidrin ; ke helâ me hnyamen at hmelen je labenyidrin. 22 Ke haba bongon je hnyimaködrin, je hnyimak waleji oge me wâ hnyi wagewe Kebara, wale bongudrin ke walödrin bi ; ke ödrin e ve he hnyimaködrin wisa.

## HNYIMAKAN 11.

**K**E haba hanu ame köp nya göranyai me hum nya ka hnyi homagöuleny uma umö Iehova e jimeio, hnyi hnyimakan e deiö : ke wâ bi, wale hnyi homagöule ödrin twente faiv tavat ; ke oge me ö Jazania nöku Azura hnyi wanbödrin, me Pelatia nöku Benaia, li taben tavat. 2 Ke e ame ha könya, ka habe, Nokon at lö, wale tavat adre me vak hulö, me úhnenamö iyawö hnyi taun ang : 3 haingödrü, ka habe, Eca hakekeny bi ùen he ka op uma : haba taun ang, me helâ me öt, ke öta ang ta je utiö. 4 Anyin a wale perofeta thö ködrü. nokon at, perofeta thö. 5 Ke ame o but könya hanu Iehova, ke e ame ha könya, ka habe, Ha thö, ka habe, Walang hna ha hniö Iehova, ka habe, Lap anyi Isaraela ö, walang hobun hofuc ; anyin a oge me wâ but ta je ùnyi ame kü eû hnyi je hnyekubun. 6 Öbun e hia but osehia je hanibun hnyi taun ang, k' öbun e hia but öunöngötö je getheniny ge je hanibun. 7 Anyin a wale walang hna ha hnen Than Iehova, ka habe, Haba je hanibun waleji öbun e ip hnyin e, ödra a ta je viny bi, ke haba taun ang, me öt bi : ke adre me he ka hum öbun ùnyi hnyin e. 8 Öbun e hia but outen hele vat ; ke oge me he bi nya ka oâ köbun hele vat. haingen Than Iehova. 9 Ke oge me he ka hum öbun ùnyi hnyi hnyin e, me hniö öbun ka hnyi hnyamen je atkanyua, me bi hwaban köbun. 10 Öbun e he ka ta ge hele vat ; oge me he ka owisa köbun hnyi hnyigöulen Isaraela ; ke ame he ka khan' öbun a inya Iehova. 11 Ame ca he taun ang ka hnân öt köbun, ke öbun e ca he ka hnân utiö hnyi hnyin e ; oge me he ka owisa köbun hnyi hnyigöulen Isaraela ; 12 ke ame he ka khan' öbun a inya Iehova : anyin a öbun e ca hia but vheno anyik je hnanyibu, ke öbun e ca änyâ hnök je hna owisa, ke öbun e hia but änyâ hoton je hna otilâ hnen je hnyei igigili öbun. 13

Ke inya oge me tiga perofeta, me ame mokcu Pelatia nöku Benaia. Me oge me ta hnyikânâi me tenge hwege, me ha, ka habe, Ekölö Than Iehova! u me he ka bi obiny ka je kolon Isaraela?

14 Me ame o but kõnya hofuc ho Iehova, ka habe, 15 Nokon at lö, haba je liamekeiny möu, je liamekeiny möu, wale tavat ödra tha at möu, me lap anyi Isaraela hia, haba ödra bi wale tavat a hia but ha ködra hnen aten Jerusalema, ka habe, Úsákáúö but me Iehova; adre me ham hnyei ang köhmun me hnân ihmun: 16 anyin a wale, ha thö, ka habe, Walang hna ha hnen Than Iehova, ka habe, Eja ke ne oge ne hia but úsákáú ödra unyin je hnyei, ke eja ke ne oge ne hia but ovesei ödra unyin je hnyei, oge me he bi nya ka dok ae kap ködra hnyi üen ae úhnyúkong hnyi je hnyei adre me he ka o ka hnyin. 17 Anyin a wale ha thö, ka habe, Walang hna ha hnen Than Iehova, ka habe, Oge me he ka hum öbun únyi hnyi je hnyei, me úkhacaköu öbun únyi hnyi je hnyei waleji adre ovesei öbun ka hnyin, ke oge me he ka ham köbun hnyei Isaraela. 18 Ke adre me he ka he kâe, me degec e je únyi ae ikiki me kong hia. 19 Ke oge me he ka ham ködra hnyok a khaca, me ip eü hnyi je hnyekubun hanu ae teb únyi; ke oge me he ka hom but hnyok ae veto hnyi je unyidra, me ham bi ködra hnyok a utiö: 20 m' adre me he ka vheno anyik je hnanyibu, me tuö hnök je hna otílâ, me ányâ e: ke adre me he ka bi lakeik, ke oge me he bi nya ka Khongudrin. 21 Ke haba tavat adre me hnu hoton hnen je hnyekudra ta je önyen anyidra ta je únyi ae ikiki me kong, oge me he ka oâ dedra je gethen ka hnyi hon je bödra, haingen Than Iehova. 22 Ke haba je kerubi adre me lau göranyai je labenyidrin ke tha ödrin me je waengen; ke ethö hnyi hudrin hmanenanginy Khongu Isaraela. 23 Ke ame he göranyai hmanenangi Iehova únyi hnyi wanben taun, me laba hon bucen hnyi ke keihen taun e deiö. 24 Ke haba hanu ame köp nya göranyai, me hum nya Kale-daia ai ka ta je bâ, hnyi hna omanená hnen hanon Khong. Me ame ölö thö gak hna omanená waleji oge me wâ. 25 Me oge me ha ka ta je bâ únyi hia a omanená kõnya Iehova.

## HNYIMAKAN 12.

**K**E ame o but kõnya hofuc ho Iehova, ame ha, ka habe, 2 Nokon at lö, u je laba hnyi wanben lap ae úkhin fuc, tavat ae hu li ecmak hnân bwele, k' adre me ca bwele bi, ke hu li hnyikönyödra hnân löng, k' adre me ca löng bi; anyin a ödra lap ae úkhin fuc. 3 Anyin a wale, nokon at lö, u ma penapena ta je únyi hnân sukhöünâ, ke sukhöünâ but hnyi lany hnyi hnyimaködra; ke u me he ka he thö únyi hnyi hnâm ka hnyi ke dok hnyi hnyimaködra: eja ke ne ödra lap ae úkhin fuc, me adre ne he la ka únykúme. 4 Ke u me he ka sukhöünâ ányâm ta je únyi hnyi lany hnyi hnyimaködra, helâke me ta je únyi hnân sukhöünâ: ke haba u, me u me he ka didrut hnyi sahac hnyi hnyimaködra, helâke me úhedra tavat ka hnyi ke hnyei. 5 Tho moko but hna up uma hnyi hnyimaködra, ke sukhöünâ hnyi gethen eling. 6 U me he ka vaden ta je únyi e hon bajebenyâm hnyi hnyimaködra, me sukhöünâ but hnyi lit; ke u me he bi ka tube hnyimákâm, m' u me ca wâ bi kânâ: anyin a oge hia but ip u hnân haten ka lap anyi Isaraela. 7 Me oge me ányâ helâ me hna húna kõnya: ke oge me sukhöünâ hnyi lany anyik thatúnyi, helâke me ta je únyi adre me hom ka hnyi ke dok, ke hnyi sahac oge me tho hna up uma ge li hnyamök; oge me hom hnyöü ai hnyi lit, ke oge me vaden hon bajebenyik hnyi hnyimaködra. 8 Ke haba hnyi hnyomakatu, me ame o kõnya hofuc ho Iehova ame ha, ka habe, 9 Nokon at lö, hawa, ame ca ha bi köu hnen lap anyi Isaraela, lap ae úkhin fuc, ka habe, Ieü u me ányâ? 10 Ha thö ködra, ka habe, Walang hna ha hnen Than Iehova, ka habe, Haba hok ang, únyi ge than Jerusalema, me lap hia anyi Isaraela hnyi wanbödra. 11 Ha thö, ka habe, Inya ang haten köbun: adre me he ka ányâ ködra helâ me hnök hna ányâ: adre me he ka he ka hnyi ke hnyei, ka bâ. 12 Ke haba than unyidra e ame he ka vaden hon abenyin hnyi lit, me didrut: adre me he ka tho moko hna up uma, he ka sukhöünâ hnyi gethen e: e ame he ka tube hnyimakan me me ca wâ bi kânâ ge ecmak. 13 Ke oge me he ka lau ütök ert hon e, ke e ame he ka hnök hnyi anyik hnewe: ke oge me he ka hom e Babulona ai, ka hnyi hnyei at Kaledaia: ke so bi, e ame ca he ka wâ e, ke e ame he ka mok e. 14 Ke

oge me he ka khúkhúâ lahien hia igigilö e, me anyin je deö vat hia, ka hnyi je ang hia ; ke oge me he ka oc hele vat he ka hnu ödra. 15 Ke adre me he ka wâ a inya Iehova, iny ka he ka ovesei ödra unyin ta je hnyei, me ve ob' ödra ka hnyi je hnyei. 16 Ke oge me he ka bi köluidra ae wakhalet únyi ge hele vat, me hmiâ, me mok ae cap ; m' adre me he ka ha gaga anyidra ta je únyi ae ikiki hia unyin ta je hnyei adre me he ka he ka hnyin ; ke adre me he ka wâ a inya Iehova.

17 Ke ame o but kõnya hofuc ho Iehova ame ha, ka habe, 18 Nokon at lö, an ju ám jeú me öbubuny, me ijem belâm utköö me ot, me hom úhnyúkongo ; 19 ke ha thö ka tavat aten hnyei, ka habe, Walang hna ha hnen Than Iehova, ha thö ge aten Jerusalema, me hnyei Isaraela, ka habe, Adre me he ka an ö 'dra jeú me hom únyúkongo me ijem belidra utköö me láîâ, me me hia but ta je únyi hnyi iny hnyei, can úkonguny anyin tavat adre me labâ e. 20 Ke ame he ka iny wau ta je taun adre me labâ, ke ame he ka ba aten hnyei ; ke ame he ka khan' öbun a inya Iehova.

21 Ke ame o but kõnya hofuc ho Iehova ame ha, ka habe, 22 Nokon at lö, ieúji öbun e vejeta hnyi hnyei Isaraela ka habe, Adre me hobeúâ but je bong, k' ame ca hwâdâ but je hna omanená ? 23 Anyin a wale, ha thö ködra, ka habe, Walang hna ha hnen Than Iehova, ka habe, Oge me he ka bi obiny vejec eling, k' adre me ca he hmetu ka vejecâ e hnyi Isaraela ; ke ha thö ködra, ka habe, E hakekeny jut je bong, ke ihwâdâiny ta je hna omanená hia. 24 Anyin ame ca he hmetu ka hu omanená ae únyi baú, me bi khong ae iyawö hnyi wanben lap anyi Isaraela. 25 Anyin a inya Iehova ; oge me he bi nya ka fuc, ke haba hofuc oge me he ka ha me ame he bi ka hwâdâ ; ame ca he hmetu ka bec : anyin oge me he ka ha hofuc hnyi bongubun je bong, lap ae úkhin fuc, me ohwâdâ e, haingen Than Iehova.

26 Ke ame o but kõnya hofuc ho Iehova, ame ha, ka habe, 27 Nokon at lö, wâ bi, ame ha lap anyi Isaraela, ka habe, Haba hna omanená e ame wâ, me hobi kâu je bong ae tiga sâkâú, ke e ame perofeta ge ta je únen nyiele. 28 Anyin a wale ha thö ködra, ka habe, Walang hna ha hnen Than Iehova, ka habe, Ame ca he ka bec hmetu bi hok ta je hofuc hia, ke haba hofuc oge me he ka ha, me ame he ka hwâdâ, haingen Than Iehova.

## HNYIMAKAN 13.

**K**E ame o but kõnya hofuc ho Iehova ame ha, ka habe, 2 Nokon at lö, perofeta thö úcon ta je perofetainy Isaraela a tavat adre me perofeta, ke ha ködra tavat adre me perofeta únyi eú hnyi je hnyekudra bi, ka habe, Löng ju öbun hofuc ho Iehova ; 3 Walang hna ha hnen Than Iehova, ka habe, Ekölö ge je perofeta ae monu, tavat adre me hnu hoton ta je hnyekudra bi, ke ba únyi adre me wâ ! 4 Isaraela lö, haba ányâm je perofeta me helâke me je alopeiny je dok ae hnyot. 5 Öbun e ca hia but ölö ka hnyi je dok ae khekke, ke öbun e ca okhötâ hna up haginny lap anyi Isaraela, me me tot hnyi vat hnyi bong bongu Iehova. 6 Adre me hia but wâ únyi ae únyi baú, ke bi khong thoi, me ha, ka habe, Haingö Iehova ; ke ame ca kun' ödra ga Iehova : ke adre hia but kunâ tavat he ka geju a ga me he ka hwâdâ but hofuc. 7 Hawa, öbun e ca wâ hna omanená ae únyi baú, me bi khong thoi, anyin öbun e ha, ka habe, Hö Iehova ; ke so bi oge ca fuc bi ?

8 Anyin a wale walang hna ha hnen Than Iehova, ka habe, Anyin a öbun e hia but ha únyi ae únyi baú me wâ je thoi, awe, wâ bi, e ve inya möbun haingö Iehova. 9 Ke ame he hnyamök ka ve e me je perofeta tavat adre me wâ únyi ae únyi baú, me bi khong thoi ; adre me ca he ka hnyi hanen úhnenamö anyin lakeik, ke adre me ca he ka sihnalimidra hnyi tusiny lap anyi Isaraela, ke adre me ca he ka o ka hnyi hnyei Isaraela ; ke ame he ka khan' öbun a inya Iehova. 10 Anyin a wale, ke can minya anyin adre me hia but omono lakeik me ha, ka habe, E hnahic ut ; ke ca hnahic bi ; ke hnyi únen ame up veto ke at, wâ bi, adre me botru ge dröu adre ca huliwan : 11 ha thö ka tavat adre me botru ge dröu adre ca huliwan, ka habe, E ame he ka kölu : ame he ka ta we ae gan ; me haba öbun, je veto we wahma, öbun e he ka kölu ; ke ame he ka kia e hnen weneú. 12 Wâ bi, e ka ú but hna up veto, hawa, adre me ca he ka ha köbun, ka habe, Ewa tap dröu waleji öbun e botro e ? 13 Anyin a wale, walang hna ha hnen Than Iehova, ka habe, Oge me he bi nya ka kia e ge weneú hnyi anyik wathethöt ; ke ame he ka gan we hnyi anyik hmönyin, me je veto we wahma hnyi wathethöt he ka ohia e.

EZEKIELA 14.

14 Ke oge me he ka kia hna up veto öbun e botro ge dröu adre me ca huliwan, me hagutâ e hnyikânâi, me me manen dut taben : ke e ame he ka ü, ke ame he ka hi' öbun hnyin e ; ke öbun e he ka wâ a inya Iehova. 15 Helâe oge me he ka ohwâdâ anyik wathethöt hon hna up veto me tavat adre me botro e ge tap dröu adre ca huliwan ; ke oge me he ka ha köbun, ka habe, E hia but hna up veto, me tavat adre me botro e ; 16 wale je perofetainy Isaraela tavat adre me perofeta ga Jerusalema, me wâ hobi kâu e je hna omanenâ ae hnahic ke ba bi hnahic, haingen Than Iehova.

17 Ke haba u, nokon at lö, hnyimâkâm dö ka omomo wale hnyi em hnyei, tavat adre me perofeta únyi hnyi je hnyekudra bi ; ke u ma perofeta thö úcúdra, 18 me ha, ka habe, Walang hna ha hnen Than Iehova, ka habe, Ekölö ge omomo hnyat adre me tibet taben je bokhulubenyidra hia, me ányâ je hnabinybak hobi kâu je dö hia, m' adre me töuhneweny tavat ! Hawa, öbun e he ka noc tavat aten ik hnyei, me omelö tavat hobi köbun bi ? 19 Ke öbun e hia but okongu nya unyin lakeik hwaban je hnyam bali, me je ujeú, he ka hlingâ tavat a ca hnân bi mok, me omelö tavat a ca hnân bi möt, hnen anyibun thoi ka ta je atök tavat adre me long thoi. 20 Anyin a wale, walang hna ha hnen Than Iehova, ka habe, Wâ bi, e ve inya me taben je bokhulubenyibun, waleji öbun e töuhneweny tavat eling, me alin ödra, ke oge me he ka hügún' ödra únyi hnyi je hnyamöbun ; ke oge me he ka uny tavat, waleji öbun e noc, waleji tavat adre me alen. 21 Ke oge me he ka kia je hnabicöbun, me omelö lakeik únyi hnyi hnyamöbun, ke adre me ca he hmetu bi ka hn' ödra hnyi je hnyamöbun he ka noc ; ke ame he ka khan' öbun a inya Iehova. 22 Anyin a öbun e hia but ovecâ hnyekon at ae wisa ge je thoi, waleji oge me ca ovecâ ; me ohwegiâ hnyamen tavat ae kong, me me ca he ka hmetu bi únyi hnyi deny gethen ae monu, me me möt : 23 anyin a wale öbun e ca he hmetu ka wâ únyi ae únyi baú, me bi khong : ke oge me he ka omelö lakeik únyi hnyi hnyamöbun : k' ame he ka khan' öbun a inya Iehova.

HNYIMAKAN 14.

**K**E ame o but könya keihen wahingatiny Isaraela, me laba hnyi hnyi-

makök. 2 Me ame o but könya hofuc ho Iehova ame ha, ka habe, 3 Nokon at lö, haba tavat ang me adre hia but odilâ anyidrin je idola ka hnyi je hnyekudra, me ip hnyi hnyimaködra anyidra hulö, at ame othöâ : hawa, e úcú bi ödra he ka hnei nya ? 4 Anyin a wale, ha thö ködra, ka habe, Walang hna ha hnen Than Iehova, ka habe, Haba tavat hia aten lap anyi Isaraela, at ame hom anyin ta je idola ka hnyi hnyekon, me ip hnyi hnyimakan anyin hulö, at ame othöâ, me ame o ka at a perofeta ; hamök bi Iehova he ka thu ka at eling hoton úseiny anyin je idola ; 5 m' oge me he ka noc lap anyi Isaraela eú hnyi hnyekudra bi, anyin a ödra úsâkâúö mönya hia ge anyidra je idola. 6 Anyin a wale, ha thö ka lap anyi Isaraela, ka habe, Walang hna ha hnen Than Iehova, ka habe, Hmetu ju, hmetu ju öbun únyi hnyi anyibun je idola ; me wia thö je hnyimaköbun, únyi hnyi anyibun ta je únyi ae ikiki hia. 7 Anyin a haba aten lap anyi Isaraela hia, me je atkanyua adre me mē laba hnyi hnyei Isaraela, at ame oúsâkâúö mönya me kap anyin je idola hnyi hnyekon, me ip hnyi hnyimakan anyin hulö, at ame othöâ, me ame o ka perofeta he ka hnei nya hobi kâu e ; hamök bi Iehova he ka thu kâu : 8 ke oge me he ka wâhmâ at eling, me ip hnân lâiâ, me hnân haten me vejec, ke oge me he ka subâ degecâ e únyi hnyi wanben lakeik ; ke ame he ka khan' öbun a inya Iehova. 9 Ke a ne monu but perofeta me ha ke hofuc, inya Iehova at ame omono perofeta eling, ke oge me he ka inâ hnyamök hon e, me ohia e únyi hnyi ik hnyei a Isaraela. 10 Ke adre me he ka kap hwaban anyidra hulö : ame he ka tha úcú hwaban ka perofeta me at ame elâm unyin ; 11 me me ca he monu hmetu gak lap anyi Isaraela, me oikiki ödra hmetu bi hnyi hnödra je hna hanyâúâ ; ke so bi, m' adre me he ka lakeik, me oge me he bi nya ka Khongudrin haingen Than Iehova.

12 Ke ame o but könya hofuc ho Iehova ame ha, ka habe, 13 Nokon at lö, e ka ányâ hulö könya hnen ke hnyei me ányâ únyi ae kong, ke iny ka hai hnyamök hon e, me ohmetro ciny jeúiny, me kunâ kâu hniâ, me subâ degecâ únyi hnyin e at me meno, 14 eja ke ne a ne eling hnyat ang a kun, a Noa, me Daniela, me Jobu, ödrin e he ka ve omeli ödrin bi hake ödrin hnen hwakecidrin ae wisa, haingen Than Iehova. 15 Oge ne kunâ je meno ae kong

## ZEKIELA 15, 16.

ka vheno hnyei, me ödrin e okongoâ e, me me i wau, me me ca he at ka he hnyin, can je meno; 16 eja ke ne a ne eling hnyat eji a kun, me haingen Than Iehova, Kia inya inya, a ödrin e ca he ka omelö je lakon obaga me wahu; k' ödrin e he ka omeli ödrin bi, k' ame he ka i wau hnyei. 17 Ke oge ne oâ hele vat ka hnyei eling, me ha, ka habe, Hele vat lö, vheno thö hnyei; ke inya oge me subâ degecâ únyi hnyin e at me omeno; 18 eja ke ne a ne eling hnyat eji a kun, me haingen Than Iehova, Kia inya inya, a ödrin e ca he ka omelö je lakon obaga me wahu, ke ödrin e he ka omeli ödrin thibi. 19 Ke oge ne kunâ mok ae cap ka hnyi hnyei eling, ke hingälâ anyik wathethöt hon e, wale dra, he ka subâ degecâ únyi hnyin e at me omeno: 20 eja ke ne a ne eling Noa, me Daniela, me Jobu, haingen Than Iehova, Kia inya inya, a ödrin e ca he bi ka omelö je lakon obaga me wahu; ke ödrin e he thibi ka omeli ödrin bi ge hwakecidrin ae wisa. 21 Anyin a walang hna ha hnen Than Iehova, ka habe, Hawa, e ca beönua bi, iny ka he ka kunâ Jerusalema ai anyik ta je hna owisa a vak ae kong, wale a hele vat, me hmiâ, me omeno ae kong, me mok ae cap, he ka subâ degecâ únyi hnyin e at me omeno? 22 Ke wâ bi, ame he ka hu kolon hnyin e, a tavat adre me he ka hom but, a je lakon obaga me wahu: wâ bi, adre me he ka he köbun, ke öbun e he ka wâ ta je hwakecidra me anyidra ta je huliwa: m' adre me he ka otubweli öbun únyi ge okongon waleji oge me oâ ka Jerusalema, me ta je únyi hia oge me oâ ka hnyin. 23 Ke adre me he ka otubweli öbun, öbun ka wâ je hwakecidra me anyidra je huliwa: ke öbun e he ka wâ a oge me ca ânyâ ke ba can bi ta je únyi hia waleji oge me ânyâ ka hnyin, haingen Than Iehova.

### HNYIMAKAN 15.

**K**E ame o but könya hofuc ho Iehova, ame ha, ka habe, 2 Nokon at lö, ieú ûnuainy vine hon ta je úö hia, wale anginy vine unyin ta je úöiny hnyot hia? 3 Hawa, adre me he ka hom hnyiban útöiny hnân ânyâ ke huliwa? hawa, adre me he ka bi matalafi únyi gan hnân uhno ke únyi? 4 Wâ bi, adre me khúâ e ka hnyi meic hnân utö: ke haba meic ame an li hnyiban me thong wanben; hawa, e úcú hnân ke huliwa? 5 Wâ bi, e ka tiga bekhöt, me

ame ca úcú hnân huliwan: ke e ti ca úcú hobi kâu ke huliwa e ka hia but meic an me thong. 6 Anyin a wale walang hna ha hnen Than Iehova, ka habe, Haba vine unyin úöiny hnyot, me oge me hna hnân an meic, helâe oge me he ka hna aten Jerusalema. 7 Ke oge me he ka wâhm' ödra; adre me he ka kec ge meic, ke ame he bi ka an hnen ke meic; ke öbun e he ka wâ a inya Iehova, iny ka wâhm' ödra. 8 Ke oge me he ka ohia tavat, anyin adre hia but hanyâúâ, haingen Than Iehova.

### HNYIMAKAN 16.

**K**E ame o but könya hofuc ho Iehova ame ha, ka habe, 2 Nokon at lö, omanená thö ka Jerusalema ta je únyi ae ikiki hnyin. 3 Ke ha thö, ka habe, Walang hna ha hnen Than Iehova ka Jerusalema, ka habe, Haba dok u je kú hnyin, ke dok adre hnöku u hnyin, me únyi hnyi hnyei Kanana; at Amora kââmâm, ke momo Heth hinyâm. 4 Ke haba hna hnöku u, haba hnyi bong adre hnöku u hnyin, me adre ca subâ bibikâm, ke adre ca östüö u hnyi köiö me u me so; ke adre ca botru u ge sâlt, ke adre ca lan u ge mano. 5 E ba at a betenge gam me ânyâ hobi köu ta je únyi me betenge gam: ke adre khüö u hnyi utkânâ, anyin adre húkhötiâ unyâm hnyi bong adre hnöku u hnyin. 6 Ke hnyi úen oge me he unyâm, me ö u me u me seset hnyi drâm, me oge me ha köu, ka habe, Eja ke ne u je ne seset hnyi drâm, möt dö; eke, oge me ha köu, ka habe, Eja ke ne u je ne seset hnyi drâm, möt dö. 7 Oge me osehiö u helâ me vongan hnyot. me u me se hia but, me gan dut, ke u je o ka hnyi bongon ae ti mec; ame ku li basâm, ke beú but leúnen bâm; ke so bi ehac u je he thu me ba úkhaú: 8 ke hnyi úen oge me he unyam me ö u, me wâ bi, úen betenge ânyâm bong, ke oge me lau hom obiny anyik úkhaú, me khaúö u at ame mokut thu: eke, oge me khemanyn köu, me úhinyköu möu, haingen Than Iehova, ke u anyik bi. 9 Ke oge me osüö u ge köiö; eke, oge me kot degecâ drâm hnyi unyâm, me hú u ge wakaco. 10 Ke oge me okhaúö u ge mano adre tibet omecâ, me odilâ li hnyeúcam hnyi unen takesa, ke oge me oweikö u ge lino, me khaúö u ge silek. 11 Ke oge me otheibi u ge je omeoin, me inâ li waen hnyi li benyâm, me

EZEKIELA 16.

ovekinyi u ge ong sacen. 12 Ke oge me ip otru hnyi hnyingöiâm, me li theibiny hnyiköny hnyi li hnyikönyâm, me obicö u ge korana ae hmanenang. 13 Adre me theibi u helâe ge gol me sileva ; ke haba khaûâm, me lino me silek, me mano adre me tibet omecâ ; ke haba âm jeû, me falawa ae so, me hani, me wakaco : ke u ti hmanenang hmönyin, ke u je so tot ke ne o but bongon than. 14 Ke ame lung ânyâm hmanenang ka hnyi je hnyei ; anyin ae bekhöt ut e, ge bongon than gak waleji oge me ip hom, haingen Than Iehova.

15 Ke u je gejon ânyâm hmanenang, me bi únyi monu ge ânyâm lung, me hingâlâ ânyâm je bi únyi monu ködra hia adre me gethen unyâm ; ka anyin dut. 16 Ke u je hom ânyâm ke je úkhaû me ânyâ hobi kâu je dok ae görany ae ve bongon bi, me bi únyi monu eling : ame ca he ka o but ta je únyi helâe, k' ame ca he hmetu ka helâe. 17 Ke u je hom je hmanengâm gol me sileva gak, waleji oge me ham köu, me ânyâ je hna theâtâ at, m' u me bi únyi monu mē ; 18 ke u je hom ânyâm je úkhaû adre omecâ, me khaû' ödrin, me ip hnyi hnyimaködrin anyik wakaco, me anyik utö ae bo so. 19 Ke haba jeû oge me ham köu, wale falawa me wakaco me hani, waleji oge me ham me âm, me u je ip hnyi hnyimaködrin, me hnân bo so, ke e hnathu e ; haingen Than Iehova. 20 Ke haba khaca, u je hia but hom lakom obaga me wahlu, waleji u je hnoko hobi könya, me hudi ödra ködrin me huân ö 'drin. Hawa, únyi ae úhnyúkong hnâm je hua bi únyi monu, 21 m' u me hlingâ lakuk, me hn' ödra he ka he hnyi wanben meic ködrin ? 22 Ke haba hnyi hwakecâm ae ikiki me ânyâm je bi únyi monu hia, me u je ca únykúme je bonginy hlu a u, hnyi úen ae ba úkhaû, ke u me mokut thu, me seset hnyi drâm. 23 Ke hwaban ânyâm ta je hulö hia, (ekölö, ekölö gam ! haingen Than Iehova,) 24 me u je op dok ae nua bi hobi köu, me ânyâ hobi köu ke dok ae görany hnyi ta je gethen hia thithö. 25 U je hia but op ânyâm je dok ae görany, hnyi je hua saû hia, me oikikiâ ânyâm hmanenang, ke u je öúsa-kâûöâ li hnyeúcâm ka tavat adre me gethen unyâm, me osehia hnâm hna bi únyi monu. 26 Ke u je hia but bi únyi monu me tavat Aigupito, tavat adre me laba hakekenyi u, tavat ae gan hmaidra ; ke u je hia but osehia hnâm je hna bi únyi monu, me ohmönyini nya. 27 Anyin a wale wâ bi, oge

hia but hai hnyamök hom, me oúnyúkongoâ âm jeû, me hnö u ka hnyi weny tavat adre me húkötio u, je wahluiny Filisiti tavat adre me hmehma ge je hwakecâm ae ikiki. 28 U je hia but minya bi únyi monu me at Asuria, anyin a u me ca hmâ ; eke, u je hia but bi únyi monu mödra, ke so bi u je ca sekon bi. 29 Ke haba khaca u je hia but osehia hnâm hna bi únyi monu hnyi hnyei Kanana, ke ne o but hnyi Kaledaia ; ke so bi ame ca sekom hnen e. 30 Nakaem ge sényin hnyi hnyekom, haingen Than Iehova, anyin u me ânyâ ta je únyi hia eling, huliwa anyin momo ae hwege hnyimen, at ame bi únyi monu ; 31 ke anyin a u je op ânyâm dok ae nua hnyi je hna saû hia, me ânyâ ânyâm dok ae görany hnyi je gethen hia ; ke ca úcú bi me momo hnyi gethen u bi, u me húkotiâ hwaban. 32 U momo at ame bi únyi momu ! at ame weny je atkanyua ke degec bi áiân ! 33 Adre me ham je bwihlany ka je momo hia hnyi gethen : ke u bi, u me ham ânyâm je bwihlany ka je lawem hia, me bi hwaban ködra, m' adre me o köu hnyi je ke keihen hia hnyi hnâm je hna bi únyi monu. 34 Ke ve bongom bi me ke je momo hnyi bi únyi monu a u, ke ba at ame he köu he ka bi únyi monu : ke u je bi hwaban, ke adre me ca bi hwaban köu, anyin a wale, e ke bongom bi.

35 Anyin a wale, momo hnyi gethen lö, löng je hofuc ho Iehova : 36 Walang hna ha hnen Than Iehova, ka habe, Can adre me hingâlâ ikiki a u, ke manen dut unyâm ge hnâm hna bi únyi monu me je lawem ; ke can je idolainy hia ânyâm je hwakecin ae ikiki, ke can dren lakom, waleji u je ham ködrin ; 37 anyin a wale, wâ bi, oge me he ka úkhacaköu je lawem hia, waleji u je úsenyinköu mödra, me tavat hia waleji u je wem, tha ödra me tavat hia waleji u je húkotiâ ; oge me he ka úkhacaköu ödrin úcom igigilö, me omanená unyâm ködra, m' adre me he ka wâ unyâm hia. 38 Ke oge me he ka bi hwaban köu, helâ me hna bi hwaban ka omomo, hnyat adre me bi únyi monu, me hingâlâ dra : ke oge me he ka oâ köu dren wathethöt me ciâ. 39 Ke oge me he ka hnö u ka hnyi hnyamödrin, k' adre me he ka tho umâm uma ae nua, me hagutâ ânyâm je dok ae görany ; ke adre me he ka un dö je khâuâm, me hom je ohmanenangâm ae meic : ke adre me he ka hnö u ke ba úkhaû ke ba únyi gam. 40 Ke adre me he ka oâ köu deö at, ke

EZEKIELA 17.

adre me he ka lüö u ge veto, me dáoá u ge je hele vat. 41 Ke adre me he ka thong degecá umám je uma ge meic, me bi hwaban köu hnyi hnyimakan omomo ae se hia; k' oge me he ka thao u m' u me ca he hmetu ka bi únyi monu, ke u me ca he hmetu ka hawá at ge hwaban. 42 Heláe oge me he ka bi obiny anyik hmönyin köu, ke ame he ka hwiö gam hnök hna ciá, ke oge me he ka mená, ke oge me ca he hmetu ka hmönyin. 43 Anyin a u je ca hia but únykúme je bonginy hlu a u, ke u je oveci nya ge ta je únyi hia eling, anyin a wale, wá bi, oge me he ka bi hwaban hwakecám ka hnyi bâm, haingen Than Iehova: ke u me ca he ka ányá hwakecám ae ikiki eling hon ta je hwakecám ae ikiki hia thithö.

44 Wá bi, ame he tavat hia adre me vejecá ka vejeci u, me ha, ka habe, E tha úcú hinyen me nokon hlu. 45 U hlu nokon hinyâm, at ame húkotiá áian me lakon; ke u hanen je liamekeiny möu, tavat adre me húkotiá laöiödrin me je lakudrin: haba hinyöbun, me momo Heth, ke at Amora kamöbun. 46 Ke haba tuhám Samaria, e me je lakon adre me laba hnyi ke keihen a men: ke haba kem a wakeiat at ame laba hnyi ke keihen a metám, jia Sodoma me lakon wahu. 47 Ke so bi u je ca vheno dedra je gethen, me ányá hoton hwakecidra ae ikiki; ke so bi heláke ame únyi ae úhnyúkong eling, ke u je ányá hwakecin ae kong hmönyin hudra hnyi dem je gethen hia. 48 Haingen Than Iehova, ka habe, Kia inya inya a g' ame ca hia but ányá Sodoma, a liamekeiny möu, e me lakon wahu, heláji me hnám hna ányá, u me lakom wahu. 49 Wá bi, walang hulö anyi Sodoma a liamekeiny möu; haba eú hnyin e me lakon wahu, bi gan, me gan hmá jeú, me laba monu me sot; ke e ame ca hadruá je hna ovecá me tavat theduoc. 50 Ke adre me hop, me ányá hwakecin ae kong hnyi hnyimakök: anyin a wale oge me hum ödra heláji me hnök hna wá. 51 Ke haba Samaria ame ca hia but ányá hafny ányâm hulö; ke u je osehia je hwakecám ae ikiki hudra, me haiwisa je liamekeiny möu hnyi ta je hwakecám ae ikiki waleji u je ányá. 52 Ke haba u, hamám he ka hom ányâm hmehma, anyin a u je hia but haiwisa je liamekeiny möu; he ödra wisa bi hom, can ányâm ta je hulö waleji u je ányá ae gan nmá hudra: eke, u me he ka hlohlo, me hom ányâm hmehma, anyin u je hia but haiwisa je liamekeiny möu. 53 Ke oge

me he ka ohmetu ödra tavat bá, at Sodoma tavat bá me je lakon wahu, me at Samaria tavat bá me lakudra wahu, me je bá unyidra: 54 m' u me he ka hom ányâm hmehma, me hmehma hia ge hnám hna ányá, waleji u je otubweli ödra. 55 Ke ame he ka hmetu thö je liamekeiny möu, wale Sodoma me lakon wahu ka idrin a bán, ke ame he Samaria me lakon wahu ka hmetu ka idrin a bán, ke haba u me lakon wahu öbun e ka hmetu kaibun a bán. 56 Ke u je ca haiö Sodoma a liamekeiny möu ge hnyimám hnyi bonginy ányâm bi gan: 57 ödra ka tiga ca omanená ányâm hulö, helá me úen hna haikongo hnen wahu laku Suria, m' ödra hia thithö igigilö e, wahu lakon at Filisiti, hnyat adre me húkotiá u igigilö. 58 Adre me hia but bi hwaban köu hwakecám ae ikiki me kong, haingö Iehova. 59 Anyin a walang hna ha hnen Than Iehova, ka habe, Oge me he bi nya ka ányá köu helá me hnám hna ányá, anyin a u je húkotiá hna khemanyin me thamúa úhinyköu. 60 Ke so bi oge me he ka únykúme waleji ge hnök hna úhinyköu möu hnyi úen a u hlu, ke oge me he ka ohmá hobi köu úhinyköu a nyiele balua. 61 Me u me he bi ka únykúme je hwakecám me hmehma, u ka he ka kap je liamekeiny möu, wale je atö me je wakeiat: ke oge me he ka ham ödra köu hnán lakom, ke ca hoton bi ányâm úhinyköu. 62 Ke oge me he ka ohmá anyik úhinyköu möu; me u me he ka wá a inya Iehova: 63 m' u me he ka únykúme, me hlohlo, me ca he hmetu ka fuc, can ányâm hmehma; iny ka hia but thang degecá hnám hna ányá hia thithö, haingen Than Iehova.

HNYIMAKAN 17.

**K**E ame o but könya hofuc ho Iehova, ka habe, 2 Nokon at lö, ha thö húkehmuen, me ha úhöücú ka lap anyin Isaraela; 3 me ha, ka habe, Walang hna ha hnen Than Iehova, ka habe, Ame o but hnyi Lebanona aeto ae gan hmá labenyin, ke beú je leúnen labenyin, ke se hia leúnen, ke se hia hnalimen, k' ame hom bovinny arasi: 4 e ame thu bovinny je khúen, me hom dö ka hnyi hnyei adre me úcú omjeú hnyin; e ame ip e hnyi taun adre úcú omjeú hnyin. 5 Ke e ame hom ke je hatong hnyi hnyei, me tá hnyi utkáná ae hoso; k' ame ip e hnyi baten je köiö ae se;



EZEKIELA 18.

k' ame tā helâ me garaba. 6 Ke ame kû thö, k' ame ivine but ae hlau me ometu, k' ame hwiö kâu bi je anginy, ke eü hnyi hmelen bi ta je wân : me ame ivine but e, k' ame vhei je vheiny, k' ame oâ je khûen. 7 Ke e hu minya ke aeto ae gan labenyin, ke se hia leüen : ke wâ bi, haba ivine eling me ame hwân ka hwiö kâu je wân, k' ame vhei kâu je vheiny, úheny hnyi dok adre me tā me me he ka hú e. 8 Adre tā e hnyi kânâ ae hoso baten je köiö ae se hia, me me he ka vhei je anginy me wa, me me he ka ivine but ae hmanenang. 9 Ha thö, ka habe, Walang hna ha hnen Than Iehova, ka habe, Hawa, e ame he ka hnahic? hawa e ame ca he ka oc iwân, me subâ degecâ je wan me me meleca ; me me meleca hia je lan ae hât ; ke ca hnen bi man ae gan me tavat ae se hia, m' adre me he ka oc e me iwân? 10 Eke, wâ bi, eja ke ne adre ne tā, hawa ame he ka hnahic? hawa, ame ca he ka meleca, e ka kâlâ e hnen ang hwei? e ame he ka meleca hnyi dok e ame kû hnyin.

11 Ke ame o but könya hofuc ho Iehova ame ha, ka habe, 12 Ha thö walang ang ka lap ae úkhin fuc, ka habe, Hawa e ca khan' öbun bongon ta je únyi e? ha thö ködra, ka habe, Wâ bi, ame o but hnyi Jerusalema than Babulona, me hom thaniny me je taben, me hum ödrin kâu hnyi Babulona ; 13 ke e ame hom ke nokon than, me úhinhinyköu mē, me kunâ e he ka khemanyin, ke e ame hom minya tavat ae hwege hnyi hnye: 14 me me ohnyikânâ but dökhu, me ca he ka ogânâ but e, ke so bi me me tethmâ hnyi hna tuö anyin úhinhinyköu. 15 Ke e ame úkhin fuc mē, me kunâ anyin je úthumetu Aigupito ai, m' adre me he ka ham kâu je hors me tavat ae se hia. Hawa, e ame he ka hnahic? ame he at ame ânyâ ta je únyi e ka möt? hawa e ame he ka thamuâ úhinhinyköu, ke möt bi? 16 Haingen Than Iehova, ka habe, Kia inya inya, e hnathu hnyi dok ame laba hnyin than, at ame othanâ e, ke e ame hûkötîâ hnen hna khemanyin me thamuâ anyin úhinhinyköu, e ame he ka mok gan hnyi wanben Babulona. 17 Ke ame ca he bi Farao me anyin utbavat ae gan hmâ, me anyin úkhacaköu ae gan ka tha e mē hnyi vat, hnyi úen adre okhibö kânâ göranyai, me up uma hnân tue, m' adre me subâ degecâ tavat ae se hia. 18 Anyin a e ame hia but hûkötîâ hna khemanyin hnyi hnen hna thamuâ úhinhinyköu ; ke wâ bi, e ame

hna but ham hnyamen, me ânyâ ta je únyi eling hia ; e ame ca he ka kec möt. 19 Anyin a wale walang hna ha hnen Than Iehova, ka habe, Kia inya inya, e hnathu oge me he ka bi hwaban kâu, hnök hna khemanyin waleji e ame hûkötîâ me anyik úhinhinyköu waleji e ame thamuâ. 20 Ke oge me he ka thong útök ert hobi kâu, ke e ame he ka hnok hnyi anyik hnewe, ke oge me he ka hom e Babulona ai, ke ivinö mē eling, can hnen hna hanyâúâ waleji e ame ânyâ könya. 21 Ke ame he tavat hia adre me kec unyin hnyi anyin je deö vat hia ka ta ge hele vat, ke adre me he ka oveseâ je kolon ka hnyi ta je ang hia : ke öbun e he ka wâ a inya Iehova at ame ha.

22 Walang hna ha hnen Than Iehova, ka habe, Oge me he bi nya ka hom bovinny arasi ae görany, me tā e ; k' oge me he ka thu bovinny khûen, at ae habubut, ke oge me he ka tā e hon bucen ae beü göranyai ke nua : 23 k' oge me he ka tā e hnyi bucen Isaraela ae beü : k' ame ke ka vhei je anginy, me wa, k' ame he bi ka arasi ae hmanenang : k' ame he ka laba eü hmelen ta je meno hia thithö ae ve man úgâidra : adre me he ka laba hnyi hmenon je vheiny e. 24 Ke ame he ka khana je úöiny hnyot hia a inya Iehova at ame ohnyikânâ úö ae beü göranyai, k' ame ogöranyâ úö ae hnyikânâ, k' ame omeleca úö ae hât, k' ame ökûleläuâ úö ae meleca : inya Iehova at ame ha me ânyâ.

HNHYIMAKAN 18.

**K**E ame o but könya hofuc ho Iehova ame ha, ka habe, 2 Anyin a ieü öbun e oüco hnye: Isaraela, me ha, ka habe, Haba lakamen adre hia but ijem wan vine ae but me ame miminy bi nyon je lakon? 3 Haingen Than Iehova, ka habe, Kia inya inya a öbun e ca he hmetu ka ha úhöücü e hnyi Isaraela. 4 Wâ bi, haba je hanu hia, me anyik, anyik bi hanon kamen, ke anyik minya hanon nokon : ke haba hanu ame ânyâ hulö, me ame he bi ka mok. 5 Ke ame ne wisa at, k' ame ânyâ únyi ae úcü ke wisa, 6 k' ame ne ca munyi han hon je bucen, k' ame ca bwelu göranyai ka je idolainy lap anyi Isaraela, k' ame ca hia but okongoâ áiân ke at, k' ame ca kâlâ momo hnyi úen ae ca úcü ; 7 ke ame ca iyawâ ke at, ke ame ohmetoâ haten ka at ame me hom omjeü gan, ke ame ca hûgúnâ ta je únyi anyin ke at, ke

EZEKIELA 19.

ame hân at ae mekihânem, ke ame okhavâ at ae ba ûkhaû: 8 at ame ca me ham mone ge hwaban, me ca hok hanen, ke ame ohmeto hnyamen ûnyi hnyi hulö, ke ame owisa wia hobi kâu ke at me ke at, 9 ke ame vheno anyik je hnanyibu, ke tuö hnök je hna owisa, ke me ânyâ hnathu; awe, e at ae wisa, e hnathu e ame he ka möt haingen Than Iehova. 10 Ke ame ne hu nokon at ame hûgûnâ, at ame hingâlâ dra, me ânyâ ke ûnyi a helâe, 11 ke ame ca ânyâ bi je hanymen eling, ke so bi a hia but hnyi han hon je bucen, ke okongoâ âiân ke at, 12 ke a hia but iyawâ at ae vec me at ae theduoc, ke hûgûnâ omjeû, ke ame ca ohmeto haten, ke ame hia but bwele göranyai ka je idola, me ânyâ ûnyi ae ikiki, 13 ke ame me ham mone ûnyi ge hwaban, ke ame hok hanen: hawa, e ame he ka möt? e ame ca he ka möt: e ame hia but ânyâ hia ta je ûnyi ae ikiki: e hnathu e ame he ka mok; ame he ka takou e bi hnen dren. 14 Ke wâ bi ame ne hu nokon, at ame wâ ta je hulö hia waleji a ânyâ kamen, ke e ame ot, me ca ânyâ helâe, 15 at ame ca hnyi han hon je bucen, ke ame ca hia but bwele göranyai ka je idola- iny lap anyi Isaraela, ke ame ca okongoâ âiân ke at, 16 ke ame ca iyawâ ke at, ke hom haten, ke hûgûnâ omjeû, ke so bi ame hân at ae mekihânem, me okhavâ at ae ba ûkhaû, 17 k' ame ohmeto hnyamen ge at adre ovecâ, ke ame ca kap hwaban hna me ham mone me hok hanen, ke ame ânyâ hnök je hna owisa, me vheno anyik je hnanyibu; e ame ca he ka mok can hwakecin ae kong anyin kamen, ke e ame he bi ka möt. 18 Ke haba kamen, can anyin e ame seda, me söh liamekeiny mē, me ânyâ ûnyi ae ca so unyin iny hnyei, e ame he ka mekiny hwakecin bi ae kong. 19 Ke öbun e ha bi, ka habe, anyin a ieû ame ca takou bi je lakon hulö anyin kamen? Ame ne ânyâ ûnyi ae ûcû me wisa hnen nokon, k' ame tuö hia anyik je hnanyibu, ke me ânyâ e, me ame he bi ka mök. 20 Haba at ame ânyâ hulö, me ame he bi ka mok; k' adre me ca he ka bi hwaban hulö anyin kamen ka nokon, k' adre me ca he ka bi hwaban hulö anyin nokon ka kamen; ke haba hwakecin ae wisa anyin at ae wisa me ame ka he bi ka mokut hon, ke haba hwakecin ae kong anyin at ae kong me ame he bi ka mokut hon. 21 Ke ame ne hmetu at ae kong ûnyi hnyi anyin ta je hulö hia waleji e ame ânyâ, ke tuö hia anyik je hnan-

yibu, k' ame ânyâ ûnyi ae ûcû me wisa, me ame he bi ka möt, me ca mok. 22 Adre me ca he hmetu ka ha kâu hnen ta je hna hanyâûâ: k' ame he bi ka möt ge hwakecin ae wisa e ame ânyâ. 23 Haingen Than Iehova, ka habe, Hawa oge me senyin e ka mok at ae kong? ke hawa oge me ca senyin bi e ka he ka hmetu ûnyi hnyi ta je hwakecin me me mot? 24 Ke ame ne hmetu at ae wisa ûnyi hnyi anyin hwakecin ae wisa, k' ame ânyâ bi hulö, k' ame ânyâ hia je ûnyi ae ikiki wale ame ânyâ at ae kong, hawa, e ame he bi ka möt? Haba ta je hwakecin hia ae wisa waleji e ame ânyâ, me adre me ca he hmetu ka ha: ke haba anyin monu waleji e ame monu hnyin, ke anyin hulö waleji e ame hulö hnyin, me e ame he ka moko. 25 Ke so bi, öbun e ha, ka habe, E ca ûcû hna ânyâ hnen Than. Lap anyi Isaraela lö, löng ju walang ang: Hawa e ca ûcû hwakecik? hawa e ca hwali bi hwakecibun? 26 E ka hmetu thö at ae wisa ûnyi hnyi hwakecin ae wisa, k' ame ânyâ bi hulö, ke moko e; me e ame he ka mok hnyi anyin hulö waleji e ame hia but ânyâ. 27 Ke haba khaca, e ka hmetu at ae kong ûnyi hnyi anyin hulö waleji e ame ânyâ, k' ame ânyâ ûnyi ae ûcû me wisa, me ame he ka omelö hanon. 28 Anyin a e ame ûnykûme ke hmetu ûnyi hnyi hnen ta je hna hanyâûâ hia waleji e ame ânyâ, me e ame he bi ka möt, me ame ca he bi ka mok. 29 Ke ame ha hnen lap anyi Isaraela, ka habe, E ca ûcû bi hwakecin Than. Lap anyi Isaraela lö, hawa e ca ûcû hwakecik? hawa e ca hwali bi hwakecibun? 30 Anyin a wale, lap anyi Isaraela lö, oge me he ka ve bi hwaban köbun hoton je hwakecibun, haingen Than Iehova. Hmetu ju, ke hmetu ju öbun ûnyi hnyi anyibun ta je hulö; me me ca he hulö ka hang' öbun. 31 Degec ut gabun anyibun ta je hulö hia waleji öbun e ânyâ; ke ânyâ thö hobi köbun hnyok a teb ûnyi me hanu a teb ûnyi: ke anyin a ieû öbun e he ka mok lap anyi Isaraela? 32 Anyin oge me ca senyin ge mok anyin at ame mok, haingen Than Iehova: anyin a wale hmetu ju öbun. m' öbun e möt.

HNHYIMAKAN 19.

**K**E so u ma hwân ka tenge ge je taben Isaraela, 2 ke ha thö, ka habe, Ehö hinyâm? Liona: e ame mokut unyin je liona, e ame hat lakon unyin je nak liona.

EZEKIELA 20.

3 Ke e ame hat ke nokon ; me ame nak liona but : ke e ame nâ he ka kât je haniny, e ame han at. 4 Ke ame lung ut hnyi je hnyeï ; adre noc e hnyi anyidra thop ; ke adre me hom e adre ca ge je bâlet ka hnyi hnyeï Aigupito. 5 Ke e ka wâ hnen momo a g' ame lubahingen ke hia hnen hna gejon, me e ame hom ke nokon, me wia e hnân nak liona. 6 Me e ame ngeny hnyi wanben je liona, ke nak liona but e ; ke e ame nâ he ka kât je haniny, e ame han at. 7 Ke e ame khana je uma umen tuhödra, me öba wan anyidra je lap ; ke ba but aten hnyeï, me unöngötiny e can ûkukuiny. 8 Me ame todrö kâu igigilö e ûhedra hnyi je ke keihen hnyeï : ke adre me thong útödra ert hon e ; adre noc e hnyi anyidra thop. 9 Ke adre me ca e ge je bâlet me ip e hnyi umen meno, me hom e ka than Babulona ; adre me hom e ka hnyi je uma ce at ae hwege, m' adre me ca he hmetu ka löng ifuciny hon je buceniny Isaraela.

10 Haba hinyâm me helâ me vine, hnyi drâm, at adre tâ hnyi baten je köïö : e ame wa, ke se hia je anginy anyin ae se hia je köïö. 11 Ke e hu gan je vheiny ae hwege hnân uci anyin tavat musi, ke adre ogöranyâ ibeüen e ûnyin je anginy ae khöt ke e manen ge ibeüiny göranyai unyin je anginy ae se hia. 12 Ke adre oc e hnyi wathethöt, ke adre khûâ e hnyikânâi, me ame meleca but wan ge ang hwei : adre thu degecâ me ame meleca but je anginy ae hwege ; ame an hnen meic. 13 Ke walang ang, adre tâ e hnyi hnyebuba hnyi hnyeï ae atec he ba köïö. Ke ame he but meic ûnyi hnyi utöiny je anginy, me thong wan, ke ba hmetu bi unyin ke anginy ae hwege hnân ciny musi. Wale tenge, k' ame he ka e bi hnân tenge nyiele.

HNYIMAKAN 20.

**K**E haba hnyi huna a seven, hnyi tehi a thabunginy, hnyi bong a teniny tehi, me ame o but keihen wahingatiny Isaraela he ka hnö ga Iehova, me ödrin e laba hnyi hnyimakök. 2 Me ame o but könya hofuc ho Iehova ame ha, ka habe, 3 Nokon at lö, ha thö ka wahingatiny Isaraela, ka habe, Walang hna ha hnen Than Iehova, ka habe, Hawa, öbun e o but he ka hnei nya? Kia inya inya a öbun e ca he ka hnei nya, haingen Than Iehova. 4 Hawa, nokon at lö, u me he ka owisa kodra, hawa u me he ka owisa ködra?

omanenâ thö ködra je hwakecin ae ikiki anyin lakamödrin : 5 ke ha thö ködrin, ka habe, Walang hna ha hnen Than Iehova, ka habe, Haba hnyi bong eji oge me úcâ hnyin Isaraela, ke oge me hinöbeny ka je matrâniny lap anyi Jakob, ke omanenö nya ködra hnyi hnyeï Aigupito, ke oge me hinöbeny ködra me ha, ka habe, Inya Iehova Khongubun ; 6 haba hnyi bong eling oge me hinöbeny hnyin ködra he ka hum ödra ûnyi hnyi hnyeï Aigupito ka hnyi hnyeï waleji oge me elâm hobi ködra, k' ame di hnyin debai me hani, k' ame hmanenang hon ta je hnyeï hia thithö : 7 ke oge me ha ködra, ka habe, Ve degec ut öbun ta je ûnyi ae ikiki hnyi hnyimaköbun, ke ca okongu öbun bi ge ta je khongon Aigupito ; inya Iehova Khongubun. 8 Ke so bi adre me ûkhin fuc mönya, me höcö ling nya ; k' adre me ca ve degec ta je ûnyi ae ikiki hnyi hnyimaködra, k' adre me ca hna degecâ je khongon Aigupito : me oge me ha a oge me he ka hingâlâ anyik hmönyin hudra, hnân he ka umo anyik wathethöt hnyi wanben hnyeï Aigupito. 9 Ke so bi oge me huliwa ûnyi hnyi iök, me me ca kong bi hnyi hnyimakan je hnyeï waleji adre me laba hnyin, ke oge me omanenö nya bi ködra hnyi hnyimaködra, hnyi hnök hna hum ödra ûnyi hnyi hnyeï Aigupito. 10 Ke oge me hum ödra ûnyi hnyi hnyeï Aigupito, me hum ödra ka hnyi hnyebuba. 11 Ke oge me ham ködra anyik je hnanyibu, me omanenâ ködra hnök je hna owisa, waleji a e ka he at ka mâdrâ, me ame he ka möt hnyin. 12 Ke oge me ham minya ködra anyik je sabath, hnân haten könya mödra, me me khan' ödra a inya Iehova at ame okabi ödra. 13 Ke haba lap anyi Isaraela adre me ûkhin fuc mönya hnyi hnyebuba : adre me ca vheno anyik je hnanyibu, ke adre me hûkötia hnök je hna owisa, waleji a e ka he at ka mâdrâ, me ame he ka möt hnyin ; ke adre me okongoa gan hmâ anyik je sabath : me oge me ha a oge me he ka hingâlâ anyik hmönyin hudra hnyi hnyebuba, he ka ohï' ödra but. 14 Ke so bi oge me huliwa can iök, me me ca he ka kong bi hnyi hnyimakan je hnyeï, waleji oge me hum ödra hnyi hnyimakan. 15 Ke haba khaca, oge me hinöbeny göranyai ködra hnyi hnyebuba, a oge me ca he ka hum ödra ka hnyi hnyeï waleji oge ham ködra, ame di hnyin debai me hani, ae beönua hon ta je hnyeï hia thithö ; 16

EZEKIELA 20.

anyin adre me húkotiá hnök je hna owisa, me ca vheno anyik je hnanyibu, ke adre me okongoá anyik je sabbath : anyin a je hnyekudra ame hnu hoton je khongudrin. 17 Ke so bi oge me wá betenge gadra me ca ohí' ödra, ke oge me ca oumi ödra hnyi hnyebuba. 18 Ke oge me ha ka lakudra hnyi hnyebuba, ka habe, Ca vheno bi öbun hwakecin lakamöbun, me ányá hnödra je hna owisa, me okongu öbun ge anyidra je idola : 19 Inya Iehova Khongubun ; vehno thö anyik je hnanyibu, ke tuö ju hnök je hna owisa, me ányá : 20 ke okabá thö anyik je sabbath ; ke ame he ka hnân haten kõnya möbun, me me khan' öbun a inya Iehova Khongubun. 21 Ke haba je lakudra adre me úkhin fuc mönya ; adre me ca vheno anyik je hnanyibu, me ca tuö hnök je hna owisa me ányá, waleji a e ka he ke at ka ányá e ame he ka möt hnyin ; k' adre me okongoá anyik je sabbath : me oge me ha a oge me he ka hingálá anyik hmönyin hudra, me umo anyik wathethöt hudra hnyi hnyebuba. 22 Ke so bi oge me ohmeto hnyamök, k' oge me huliwa can iök, me me ca he ka kong e hnyi hnyimakan je hnyei, waleji oge me hum ödra hnyi hnyimaködra. 23 Ke haba khaca, oge me hinobeny göranyai ködra hnyi hnyebuba, he ka ovesei ödra unyin aten ta je hnyei, me ob' ödra ka hnyi ta je hnyei ; 24 anyin adre me ca hia but ányá hnök je hna owisa, ke adre me húkotiá anyik ta je hnanyibu, k' adre me okongoá anyik ta je sabbath, ke adre me hnyimaködra ka ta je idola anyin lakamödra. 25 Ke haba khaca, oge me ham ködra je hnanyibu ae ca so, me je hna owisa a ca hnân melen ; 26 ke oge me okongu ödra hnyi anyidra bi ta je bwihlany, waleji hnyi hnödra hna ovheno je lakudra a watö hia hnyi wanben meic, m' oge me he ka öba wan gadra, me me khanödra a inya Iehova.

27 Anyin a wale, nokon at lö, ha thö ka lap anyi Isaraela, me ha ködra, ka habe, Walang hna ha hnen Than Iehova, ka habe, Haba lakamöbun adre hia but haikongunya, waleji hnyi hnödra hna ányá hwakecin ae kong kõnya. 28 Anyin a hnyi üen oge me hum ödra ka hnyi hnyei, waleji oge me hinöbeny göranyai he ka ham ködra, k' adre me wá je hut hia ae beú, ke je úö hia ae hlau, me adre me hudo eling anyidra je hut, me ham eling anyidra bwihlany at ame okúá hmönyin, ke adre me obosoá anyidra bo so, ke adre me hingálá eling hudiny anyi-

dra ic. 29 Me oge me ha ködra, ka habe, Ehö dok ae görany öbun e he ka hnyin ! Waleling m' adre me hwenyi ien e me Bama ke ne o but hnyi bong ang. 30 Anyin a wale, ha thö ka lap anyi Isaraela, ka habe, Walang hna ha hnen Than Iehova, ka habe, Hawa, öbun e okongu öbun minya hoton hwakecin lakamöbun ? ke hawa, öbun e bi únyi monu hoton anyidra ta je únyi ae ikiki ? 31 ke öbun ka hom anyibun ta je bwihlany, ke öbun ka ovheno ta je lakubun hnyi wanben meic, hawa öbun e okongu öbun bi ge anyibun ta je idola ke ne o but hnyi bong ang ? ke hawa, öbun e he bi ka hnei nya, lap anyi Isaraela ? Haingen Than Iehova, ka habe, Kia inya inya a öbun e ca he ka hnei nya : 32 ke haba únyi ame o hnyi je hnyekubun ame ca he ka hwádá ; wale ge hnöbun hna ha, ka habe, Öhmun e he ka helá me je hnyei, helá me je lap hnyi je hnyei, adre me bi athnyabainy utö me veto. 33 Haingen Than Iehova, ka habe, kia inya inya a oge me he ka bi than hubun ge hnyam ae hwege me beny adre hai, me hmönyin adre hingálá : 34 ke oge me he ka hum öbun unyin tavat, me úkhacaköu öbun únyi hnyi je hnyei, waleji adre ovesei öbun ka hnyin, hnen hnyam ae hwege me beny adre hai, me hmönyin adre hingálá ; 35 ke oge me he ka hum öbun ka hnyebuba anyin je hnyei, me ivinö eling möbun ötin ka iohnyimak dö. 36 Oge ivinö me lakamöbun hnyi hnyebubainy hnyei Aigupito, helâe oge me he minya ka ivinö möbun, haingen Than Iehova. 37 Ke oge me he ka odili öbun hmelen uci, ke oge me he ka hum öbun ka hnyi ohmáiny úbihinyköu ; 38 ke oge me he ka kot degecá tavat úkhin fuc unyibun, me tavat ae kong hwakecidra kõnya ; oge me he ka lili ödra únyi hnyi hnyei adre me me laba hnyin, ke adre me ca he bi ka dit ka hnyi hnyei Isaraela : ke öbun e he ka wá a inya Iehova. 39 Ke haba öbun, lap anyi Isaraela lö, walang hna ha hnen Than Iehova, ka habe, Ve he th' öbun ka bi hluiny anyibun je idola. ke hwaban e öbun e ne ca ling nya ; ke so bi. öbun e ca he hmetu bi ka okongoá iök ae kap ge anyibun ta je bwihlany me anyibun je idola. 40 Anyin a hnyi hon anyik bucen ae kap, hon bucen dok ae görany hnyi Isaraela, haingen Than Iehova, ame he ka bi athnyabaik eling hnyi hnyei hnen lap anyi Isaraela hia, a ödra hia thithö ; oge me he ka köp ödra eling, ke oge me he ka elâm eling anyibun je bwihlany, me je hudiny

EZEKIELA 21.

anyibun wan a bân, me anyibun ta je únyi hia ae kap. 41 Oge me he ka köp öbun, helâ me únyi ae bo so, iny ka he ka hum öbun unyin ta je hnyei, me úkhacaköu öbun únyi hnyi ta je hnyei waleji adre hia but ovesei öbun ka hnyin ; k' oge me he ka kap bi únyi gabun hnyi hnyimakan ta je hnyei hia. 42 Ke öbun e he bi ka wâ a inya Iehova, iny ka he ka hum öbun ka hnyi hnyei Isaraela, waleji hnyei oge me hinö-beny he ka ham ka lakamöbun. 43 Ke öbun e he ka únykúme eling debun je gethen, me hnöbun je hna ányá, waleji öbun e hia but okongu öbun hnyin ; m' öbun e he ka húkoti öbun can ta je hulö hia öbun e hia but ányá. 44 Ke öbun e he ka wâ a inya Iehova, iny ka hia but huliwa unyibun can iök, ke ca hoton debun je gethen ae kong, ke anyibun je huliwa ae kong, lap anyi Isaraela, haingen Than Iehova.

45 Ke ame o but könya hofuc ho Iehova, ame ha, ka habe, 46 Nokon at lö, hnyimákâm ju ka hnyi hwaiöu, ke fuc dö ka hnyi hwaiöu, ke perofeta thö úcon hnyot hnyi utkáná ka hnyi Hwaiöu ; 47 ke ha thö ka hnyot hnyi Hwaiöu, ka habe, Löng ju hofuc ho Iehova, ka habe, Wâ bi oge me he ka hú meic unyám, k' ame he ka an igigili u je úö hia ae hát, me je úö hia ae bobot : k' ame ca he ka mok báhlân ame hlâ, ke ame he ka hlâ ta je hnyimak hia, hwân hnyi hwaiöu ke ne o but hnyi hwadrö. 48 Me ame he tavat hia thithö ka wâ a inya Iehova at ame hú e : k' adre me ca he bi ka une. 49 Waleling m' oge me ha, ka habe, Ekölö Than Iehova, ödra adre me ha gak, ka habe, Hawa, e ca at ame ha je úhoucú ?

HNYIMAKAN 21.

**K**E ame o but könya hofuc ho Iehova, ame ha, ka habe, 2 Nokon at lö, hnyimákâm dö Jerusalema ai, me fuc dö ka hnyi je dok ae kap, ke perofeta thö úcon hnyei Isaraela ; 3 me ha ka hnyei Isaraela, ka habe, Walang hna ha hnö Iehova, ka habe, Wâ bi, ve e inya möu, ke oge me he ka oc ut anyik hele vat únyi hnyi tangen, me subâ degecâ únyi gam at ae wisa me at ae kong. 4 Anyin a oge me he ka subâ degecâ gam at ae wisa me at ae kong, anyin a wale ame he ka he but anyik hele vat únyi hnyi tangen úcon tavat hia thithö hwân hnyi hwaiöu ke ne o but ka hnyi hwadrö : 5 ke ame he tavat hia thithö ka

wâ a inya Iehova at ame oc ut anyik hele vat únyi hnyi tangen, ke e ame ca he bala bi ka hmetu. 6 Anyin a wale, nokon at lö, mâng ju ; u me he ka mâng hnyi hnyime-ködra ke hmetru but li jebalainom me hmak. 7 Ke ödra ka ha köu, ka habe, Anyin a ieú u me mâng ? me u me he ka thu ködra, ka habe, Can je úthumetu, anyin ame he jem : ke ame he ka köiö but ta je hnyok hia, ke ame he ka him ta je beny hia, ke ame he ka sényin ta je hanu hia, ke ame he ka hwebwet ta je bouca hia helâ me köiö : wâ bi, e but ang, ke ame he ka hwádâ, haingen Than Iehova.

8 Ke ame o but könya hofuc ho Iehova ame ha, ka habe, 9 Nokon at lö, perofeta thö, me ha, ka habe, Walang hna ha hnö Iehova, ka habe, Ha thö, ka habe, Hele vat, hele vat, a so but hwan, adre khet : 10 e so hwan me me hlingâ ; adre khet e me me helâ me hucuce ; hawa, ate me he ka senyin ? haba uci anyin nöku ame húkotiâ ta je úö hia. 11 Ke adre ham e he ka khet me me hom hnen hnyam : ame so hwan hele vat, eke, adre khet e me ham ka hnyi hnyamen at úhlingö. 12 Nokon at lö, kuku thö, ke kuku tenge thö : anyin a e bi hon lakeik, e bi hon je taben Isaraela : adre hn' ödra ka hnyi hele vat tha ödra me lakeik : anyin a wale khaú thö jevam. 13 Anyin e hu úcubic ; ke hawa, ame ne he ka hia but uci at ame hangâ ? haingen Than Iehova. 14 Anyin a wale, nokon at lö, u me he ka perofeta me khaúkhaú li hnyamâm ; ke so ame he ka olo hele vat hnyi úen a kuniny, wale hele vat anyin tavat adre kot moko ; e bi hele vat anyin at ae gan hmâ adre kot moko, wale ame dit ka hnyi je hnyeuledra. 15 Oge hia but ip obiny hele vat hnyi je homagöuledra hia, me me köiö but je hnye-kudra me me osehia hnödra je hna haú : ekölö ! adre ányá e helâ me hucuce, adre khet homakan e hnân úhlingö. 16 Khaca ju öbun, he thö ka hnyi ke keihen metâ ; tet metâ ju, he thö ka hnyi ke keihen me ; hnyi dok u je hnyimákâm ka hnyin. 17 Ke oge me he bi nya ka khaúkhaú li hnyamök, ke oge me he ka sekunâ anyik hmönyin : inya Iehova at ame ha.

18 Ke ame o but hmetu könya hofuc ho Iehova ame ha, ka habe, 19 Nokon at lö, u me he ka kú li gethen, me me o hele vat anyin than Babulona ; lo li gethen ka he únyi hnyi hnyei a khaca : ke bi haten ju ke dok, bi haten e hnyi hwâniny gethen ka hnyi taun. 20 U me he ka kú gethen me

me o hele vat hnyi Raba anyin je laku Amona, me ka hnyi Juda hnyi Jerusalema adre up haginy. 21 Anyin ame tot than Babulona hnyi hnyivheden li gethen, wale hnyi hwâniny li gethen, he ka bi khong : e ame jijingâ je fana, e ame hnö je idola, k' ame wâ akiny. 22 E hnyi hnyamen a metân he ka bi khong ge Jerusalema, he ka ip je únyi vat hnân tho, he ka bi hwanumen hnân úhlingö, he ka ohwegiâ hwakuku, he ka ip je únyi vat hnân tho hnyi je homagöule, he ka okhibö kânâ, me ok je tap tue. 23 Ke haba e, me ame he ka helâ me hna bi khong ae thoi hnyi hnyimaködra bi, waleji adre hia but khemanyin ködra : ke e ame oúnykúmiâ hmetu hwakecin ae kong, m' adre hum ödra.

24 Anyin a wale, haingen Than Iehova, ka habe, anyin a öbun e hia but oúnykúmiâ hmetu hwakecibun ae kong, ke manen dö hnöbun hna hanyâúú, ke manen dö anyibun je hulö hnyi anyibun je huliwa hia ; anyin adre me únykúmi öbun, awe, adre me he ka hum öbun ge hnyam. 25 Ke haba u, at adre me ti kot monoâ lö, a u at ae kong, tuhan Isaraela, k' ame o but bongom bong, hnyi úen adre umo hwakecin ae kong ; 26 me walang hna ha hnen Than Iehova, ka habe, Hom dö hnabinybak, ke hom dö korona gan : ame ca he ka tethmâ únyi ang : ogöranyâ thö únyi ae hnyikânâ, ke ohnyikânâ ju dok ae görany. 27 Oge me he ka ohnyimenâ e hnyikânâi, hnyimen hnyikânâi, hnyimen hnyikânâi : k' ame he ka hia but únyi e, ke ne o but ame o at a hanymen bi ; ke oge me he ka ham kâu.

28 Ke haba u, nokon at lö, perofeta thö me ha, ka habe, Walang hna ha hnen Than Iehova ge je laku Amona, me hna haikongu ödra ; ke u me he ka ha, ka habe, Hele vat, hele vat adre oc, adre khet me me úhlingö, me me an, me me helâ me hucuce. 29 Adre me wâ iyawöâ hobi köu, adre me bi khong thoi hobi köu, he ka ip u hon nyin tavat ae kong adre kot moko, wale a o but bongudra bong, hnyi úen umo hwakecin ae kong. 30 Ohmeto e bi ka hnyi tangen. Oge me he ka owisö u hnyi dok adre up u hnyin, wale hnyei adre hnöku u hnyin. 31 Ke oge me he ka hingälâ anyik hmönyin hom ; oge me he ka tûâ köu meicin anyik wathethöt : ke oge me he ka hnö u ka hnyi hnyamen tavat a helâ me meno, tavat ae khan' ödra he ka úohiö. 32 U me he ka hnân hing utö ka hnyi meic ; ame he drâm ka

hnen hnyi wanben hnyei ; adre me ca he hmetu ka únykúmi u : anyin a inya Iehova at ame ha.

## HNYIMAKAN 22.

**K**E ame o but könya hofuc ho Iehova ame ha, ka habe, 2 Nokon at lö, hawa, u me he ka owisa, u me he ka owisa taun ae kong ge dra' awe, omanená thö kâu ta je únyi ae ikiki gan hia. 3 Ke u me he ka ha, ka habe, Walang hna ha hnen Than Iehova, ka habe, Taun ame hingälâ dra hnyi wanben e, me me o thö úen bi, at ame ânyâ je idola hobi kâu e bi, me me okongoâ e ! 4 Jönâm bi dra u je hia but hingälâ, ke u je kong ut ge je idola u je hia but ânyâ ; ke u je hia but ohakekenyâ bongom je bong, ke u je o but ang ka je hunaiâm : anyin a wale oge hia but hnö u hnân taben ou hnen ta je dökhu, me hnân hlumâ hnen ta je hnyei hia. 5 Ame he ka hlumö u hnen tavat ae hakekeny köu me tavat ae sâkâú, u at ae kong ut, ke gan hmâ hna mediâ. 6 Wâ bi, a hia but mwi unyâm je taben Isaraela ödrin hia hoton je ve hwegiödrin, he ka hingälâ dra. 7 Ödrin e ca hia but oúnyihnathoâ je kamen me hinyen unyâm ; ödrin e hia but seda atkanyua hnyi wanbâm : ödrin e hia but okongoâ at a mokcu kamen, me je safac unyâm. 8 U je hia but hûkötîâ hnök je hna okabâ, me okongoâ anyik je sabath. 9 E hnyi wanbâm ehac tavat bifuco thoi m' adre me hingälâ dra : ke e unyâm hnyat adre me han hon je bucen : k' adre hia but ânyâ únyi ae ikiki hnyi wanbâm. 10 E unyâm adre hia but hai fetriny kamödra : k' adre hia but okongoâ momo unyâm at ame hake laba hnyi bongon momo. 11 K' ame hia but ânyâ ke at únyi ae ikiki me áiân ke at : k' ame hia but ke at bi únyi monu me úngon ; k' ame hia but ke at unyâm okongoâ haniny a nokon kamen. 12 E unyâm adre hia but kap je bwihlany m' adre me hingälâ dra ; u je hia but hok hwaban únyi adre me me ham, ke ta je troban bi, ke u je hia but hwenmiâ ka hom troban ge at ame laba hakekeny u ge úöveci, ke u je hnying nya, haingen Than Iehova. 13 Anyin a wale, wâ bi, oge hia but khaú li hnyamök can ta je únyi ae hu gam a deny únyi ae ca úcú, ke can dra ae hnyi wanbâm. 14 Hawa, u me he ka hok hnyokâ, k' ame he bi li hnyamâm ka hwege hnyi bong oge me he ka mâdrö u hnyin ? Inya Iehova at

ame ha, me oge me he ka ányá. 15 Me oge me he ka ovesei u ka hnyi ta je dökhu, me obö u ka hnyi ta je hnyei; me oge me he ka ohia hwakecin ae ikiki gam. 16 Ke u me he ka kong ka únyi gam bi, hnyi hnyimakan ta je hnyei; ke u me he ka wá a inya Iehova.

17 Ke ame o but kõnya hofuc ho Iehova ame ha, ka habe, 18 Nokon at lö, helá me káná kõnya lap anyi Isaraela : ödra bras hia thithö, ke tin, ke fao, ke led, hnyi wanben meic; ödra hia dron sileva. 19 Anyin a wale walang hna ha hnen Than Iehova, ka habe, Anyin a öbun e káná but hia thithö, anyin a wale, wá bi, oge me he bi nya ka úkhacaköu öbun hnyi wanben Jerusalema. 20 Adre me úkhöüná sileva me bras me fao me led me tin hnyi wanben meic, me ou meic me me köiö but; ke heláe oge me he ka úkhacaköu öbun hnyi anyik hmönyin me anyik wathethöt, ke oge me he ka ip öbun eling me oköi öbun. 21 Eke, oge me he ka úkhacaköu öbun, me tú' öbun ge báhlán anyik wathethöt, me oköi öbun hnyi wanben e. 22 Adre me oköiö sileva hnyi wanben meic, heláe adre me he ka oköi öbun hnyi wanben e; ke öbun e he ka wá a inya Iehova at ame hia but hingálá hmönyin köbun.

23 Ke ame o but kõnya hofuc ho Iehova ame ha, ka habe, 24 Nokon at lö, ha thö káu, ka habe, U huyei adre ca ányáwia, ke a ca hú we hnyi bonginyhmönyin. 25 Anyin je perofeta adre me si hnán hnyi wanben, helá me liona ame kuku ame oloú kia haniny: adre hia but an at; adre me hügúná omjeú, me ta je únyi ae únyi hnathu; adre hia but osehia je safaciny hnyi wanben e. 26 Haba anyin tavat bi hut adre me hia but hanyáúá anyik hnan-yibu, me okongoá hnök je hna okabá: adre ca hia but ve bongon únyi ae kap me únyi ae monu, ke adre me ca hia but ve okhana tavat ge únyi ae bo kong me únyi ae bo so, me múko je emaködra ge anyik je sabath, ke inya at adre okongoá hnyi wanbödra. 27 Haba je taben hnyi wanben e, me helá me je luko adre me oloú kia je hanidra; he ka hingálá dra, me ohia at, m' adre me hu omjeú a deny ta je únyi ae ca úcú. 28 Ke haba je perofetainy adre hia but botru hobi ködra ge dröu ae kong, adre me wá únyi ae únyi baú, me bi khong thoi ködrin, me ha, ka habe, Walang hna ha hnen Than Iehova, ke a ca ha bi Iehova. 29 Haba tavat aten hnyei adre

hia but úveci, me hügúná omjeú; eke, adre hia but okongoá ta je hna ovecá, me tavat ae theduoc, me sedá atkanyua hnen únyi ae ca wisa bi. 30 Ke oge me elám gadra at he ka op hagik hak, me tot hnyi hnyimakök hnyi dok ae khekhe hobi káu hnyei, m' oge me ca he ka ohia e: ke ba bi at oge me wá. 31 Anyin a wale oge hia but hingálá anyik hmönyin hudra; oge hia but ohí' ödra ge báhlán anyik wathethöt: oge hia but bi hwaban ködra dedra je gethen, haingen Than Iehova.

## HNYIMAKAN 23.

**K**E ame o but minya kõnya hofuc ho Iehova ame ha, ka habe, 2 Nokon at lö, e hu lö li momo ehac a tha hinyödrü: 3 ke ödrü me bi únyi monu hnyi Aigupito; ödre bi únyi monu k' ödrü tiga li hlu: k' adre hlec eling li basidru, k' adre ken eling li basidru k' ödrü tiga li hlu. 4 Ke haba li iödrü, me Ahola atö, ke Aholiba keiny: ke anyik ödrü, ke ödrü me hnokoá obaga me wahlu. Ke haba li iödrü, me haba Ahola me wale Samaria, ke haba Aholiba, me wale Jerusalema. 5 Ke tiga anyik momo Ahola, me e ame bi únyi monu; k' ame betenge ge je laweny, a at Asuria, tavat adre me laba hakekenyá, 6 k' adre khavá úkhaú ae udrudra, a je taben me tavat musi, a je wabidróu ae hmanenang hia, ödra tavat tabö hors. 7 Haba momo ame bi únyi monu mödra, tavat adre me úca ge at Asuria hia: ke e ame okongoá e bi ge je idola anyin tavat e ame betenge gadra. 8 Ke haba khaca, e ame ca degec anyin bi únyi monu úheny Aigupito; anyin adre me tha mokut mē ke tiga hlu, k' adre me ken li basin ke tiga hlu: k' adre me hingálá anyidra je bi únyi monu ka hnyi hon. 9 Anyin a wale oge me hna e ka hnyi hnyamen ta je laweny, ka huyi hnyamen at Asuria, waleji e ame betenge gan. 10 K' adre me hai fetriny: k' adre me hom lakon obaga me wahlu, k' adre me hlingá e bi ge hele vat: ke haba momo, me taben úhiö unyin omomo: anyin adre me bi hwaban káu. 11 Ke haba Aholiba a keiny ame wá e, ke so bi e nua weny bi hnyi bi únyi ae ikiki hon tuhan, ke beónua anyin bi únyi monu hon bi únyi monu anyin tuhan. 12 E ame betenge ge at Asuria tavat adre me laba hakekenyá, a ta je taben me tavat musi, a tavat adre me khavá úkhaú ae mec, a tavat tabö hors, a

wahidröu hia ae hmanenang. 13 Me oge me wâ ae kong minya but momo e ; ke khaca thibi dedru gethen. 14 Ke e ame osehia hnen hna bi únyi monu ; anyin a e ame wâ tavat adre me sihnalimen hnyi hna up uma, tavat adre op úcúbongo me at Kaledaia adre me sihnalimen ge botru ae dra, 15 adre me weikâ weiködra, adre me bicâ je hnabinybak adre bihnalimen, helâke me je taben hia ödra, helâ me at Babulona hnyi hneyi Kaledaia, hneyi adre hnöku ödra hnyin. 16 Ke e ame ö 'dra me ie betenge ködra, me kunâ je úthumetu ködra Kaledaia ai, 17 Ke haba at Babulona adre me o but kâu ka hnyi hnen hna mokut, ke adre me okongoâ e hnen anyidra bi únyi monu, ke e ame kong ut gadra, me e ame hûkötî ödra. 18 Me e ame omanená anyin bi únyi monu, me omanená unyin : me oge me hûkötî e helâji me hnök hna hûkötîâ tuhan. 19 Ke e ame osehia hnen hna bi únyi monu, ame únykúme je bonginy anyin hlu, waleji e ame bi únyi monu hnyi hneyi Aigupito. 20 Ke e ame betenge ka je lawedra, ke helâ me unyin Asina je unyidrin ; ke helâ me dân unyin hors dân je unyidrin. 21 Me u je únykúme hmetu hwakecâm ae ikiki, k' u tiga hlu, waleji ge hna ken li basâm ge at Aigupito, waleji li basâm k' u tiga hlu.

22 Anyin a wale, Aholiba lö, walang hna ha hnen Than Iehova, ka habe, Wâ bi oge me he ka otîlâ je lawem úcom, waleji u je hûkötîâ, ke oge me he ka hum ödra úcom úhedra ehele ; 23 wale at Babulona me at Kaledaia hia, Pekoda, me Shoa, me Koa, tha e mödra at Asuria hia ; ödra wahidröu-hia ae hmanenang, je taben me tavat musi hia, je lakon than, me tavat ae lung, ödra tavat tabö hors hia. 24 Ke adre me he ka o köu me je únyi hnân vat, me je kariota, me je kat, me je bunyen ae gan ; adre me he ka igigili u, me je bec ae gan, me bec, me hnabinybak vat : ke oge me he ka hna ködra he ka bi hwaban, ke adre me he ka owisa gam hoton hnödra bi hna owisa. 25 Ke oge me oâ anyik ciâ úcom, ke adre me he ka mádrö u hnyi wathethüt ; ke adre me he ka subâ degecâ hnyingöiâm me li hnyikönyâm ; ke ame he je kolon gam ka ta ge hele vat : adre me he ka hom lakom obaga me wahlu ; ke ame he meic ka an je kolon gam. 26 Ke adre me he ka uny jut ányâm je úkhaú, me hûgúnâ je ohmanenangâm. 27 Helâe oge me he ka bi obiny hwakecâm ae ikiki, me

hnam hna bi únyi monu, waleji ge úhem Aigupito : m' u me ca he ka bwele ka ta je únyi e, me únykúme hmetu ka Aigupito. 28 Anyin a walang hna ha hnen Than Iehova, ka habe, Wâ bi, oge me he ka hnö u ka hnyi hnyamödra wale u je ikikiâ, ka hnyi hnyamödra wale u je hûkötîâ : 29 ke adre me he ka ányâ köu hnyi hmönyin, me hom hia hwabâm, me hnö u bi ke ba úkhaú me he thu : ke ame he ka manen dut hmehmainy hnâm je hna bi únyi monu wale hwakecâm ae ikiki, me ányâm tje bi únyi monu. 30 Adre me he ka ányâ ta je únyi e köu anyin a u je hia but bi únyi monu hoton ta je hneyi, ke u kong ut ge anyidra je idola. 31 U je hia but vhenogethen deny tuhâm ; anyin a wale oge me he ka ham anyin kaia ka hnyi hnyamâm. 32 Walang hna ha hnen Than Iehova, ka habe, U me he ka ijem kaia belen tuhâm, wale ae dit ke gan hnyin : k' adre me he ka hlumö u, me hiö u ; e gan hmâ önyen. 33 U me he ka unöngöt ge hna ic monu me hlöuhlöu, hnen kaiainy uthmâhmâ me ba wan, hnen utkaia anyin tuhâm a Samaria. 34 U me he ka ijem e me ijem hmö, ke u me he ka âc je anmen e, me seutâ li basâm : anyin a oge hia but ha, haingö Iehova. 35 Anyin a wale, walang hna ha hnen Than Iehova, ka habe, Anyin a u je hia but hnying nya, me kunö nya ka hnyi hotom, anyin a wale ame he ka tabö u hwakecâm ae ikiki me ányâm bi únyi monu.

36 Ke haba khaca, Iehova ame ha könya, ka habe, Nokon at lö, hawa, u me he ka owisö Ahola me Aholiba ? awe, omanená thö ködru hwakecidru ae ikiki. 37 Anyin a ödru me hia but bi únyi monu, ke e hnyi li hnyamödra dra, ke ödru me hia but bi únyi monu ge anyidra je idola ; ke adre hia but kunâ je lakudru obaga waleji ödre hnokoâ hobi könya, ka he hnyi wanben meic ködru hnân han. 38 Wale hmetu ang hnödra hna hia but ányâ könya : k' ödru me hia but okongoâ anyik dok ae kap waleji hnyi bong eling, me öünyibaúâ anyik je sabath. 39 Ke ödru ka hia but hlingâ je lakudru hobi kâu anyidru je idola, me ödru me he ka hnyi anyik dok ae kap waleji hnyi bong eling he ka okongoâ e ; ke wâ bi, adre hia but ányâ helâe hnyi umök uma. 40 Ke haba khaca. öbwe hia but úkhünöng ka ta je baga tavat adre me he but únyi hnyi dok ae sákâú : waleji adre kunâ ka hnyin úthumetu, ke wâ bi, ödrin e o but ; ke u je soú halubahing' ödrin, me



EZEKIELA 24.

bi hnalimen li emákám, me theibi u; 41 me laba hon hna mokut ae hmanenang, ke e hnyi hnyimakan e laulau adre penapena, waleji u je ip hon anyik utö ae bo so, me anyik wakaco. 42 Ke e hu bi unyin hwan tavat ae se hia adre me laba monu: ke adre me hom tavat adre me monu ge grák úheny hnyi hnyebuba tha ödra me je houmonu; ke adre me inâ je waen hon li benyidru, me obic' ödru ge je korona ae hmanenang. 43 Me oge me ha ge momo at ame kueny bi únyi monu, ka habe, Ödrin e he bi walang ang ka bi únyi monu mē, ke e minya mödrin. 44 Ke ödrin e he kâu helâ me úhedra ka momo hnyi gethen: helâe ödrin e he kö Ahola me Aholiba, li at ae ikiki hwakecidru. 45 Ke ame he tavat ae wisa ka bi hwaban ködru helâ me hna bi hwaban ka momo hnyi gethen, me hna bi hwaban ka omomo adre me hingálâ dra; anyin a ödru li at bi únyi monu, ke e hnyi li hnyamödra. 46 Anyin a walang hna ha hnen Than Iehova, ka habe, Oge me he ka ou ködru deö at, me hna he ka oveci ödru me söh. 47 Ke ame he deö at ka lú ödru ge veto, me kuc ödru ge anyidra je hele vat; adre me he ka hlingâ je lakudru obaga me wahlu, me thong degecâ umödra je uma ge meic. 48 Helâe oge me he ka bi obiny hwakecin ae ikiki hnyi hnyei, me me nâ omomo hia thithö m' adre me ca he ka ányâ hoton hwakecibu ae ikiki. 49 Ke adre me he ka bi hwaban hwakecibu ae ikiki hubu, ke ame he ka tab' öbu hulö ge anyibu je idola: ke öbu me he ka wâ a inya Iehova Than.

HNYIMAKAN 24.

**K**E ame o but hmetu könja hofuc ho Iehova hnyi huna a naininy, hnyi tehi a ten, hnyi bong a teniny tehi, me ha, ka habe, 2 Nokon at lö, sihnalimen ju ien bong, a bong ang: k' ame o than Babulona hnyi Jerusalema hnyi bong ang. 3 Ke ha thö úhöúcú ka lap úkhin fuc, me ha ködra, ka habe, Walang hna ha hnen Than Iehova, ka habe, Ip ju öt hon meic, ip ju, ke hingölö köiö but minya ka hnyin: 4 ke úkhöúnâ thö ka hnyin je uthmeno, je uthmeno ae so, wale li benyin me li can; öunöngötâ thö ge je jö adre úca. 5 Hok mamoe thö adre úca, ke úkhöúnâ je jö eú hmelen, ke ocitrouâ wia e; eke, ölä ju je jö hnyi wanben e.

6 Anyin a wale, walang hna ha hnen

Than Iehova, ka habe, Ekölö ge taun ame hingálâ dra, a öt ae hu vi hnyin, k' adre me ca obia vi wale únyi hnyi hnyin e! hai thö ke uthmeno me ke uthmeno; k' adre ca hia but kú e hnen uglekóbâ. 7 Anyin a e hnyi wanben e dra e ame hingölö; e ame hingálâ e hon kic ae ba leúnen; k' ame ca hingálâ e hon kânâ me me iyong ge sesâ; 8 me me he ka oâ hmönyin he ka bi hwaban, ke oge hia but ip dren bi hon kic ae ba leúnen me me ca iyong. 9 Anyin a wale walang hna ha hnen Than Iehova, ka habe, Ekölö ge taun ame hingálâ dra! oge me he bi nya ka ogánâ hna khon utö. 10 Hom gánâ thö utö, hú thö meic, ölä via ju utiöiny, me me hu önyen dán, me thong degecâ je jö. 11 Hwaban e otílâ e ae ba önyen hon je walep ae möt, me me kahwa, me hlâ brasiny, me me köiö but konginy eú hnyin, me me obia vi hnyin. 12 A sényin dut momo ge huliwa ae hmak; ke so bi ame ca he but únyi gan anyin vi ae gan; k' ame ca hia bi vi hnyin ge meic. 13 E bi hnyi hwakecâm ae ikiki únyi ae ti kong: oge hia but obosoi u ke u ca bo so, anyin a wale adre me ca he hmetu ka obosoi u únyi hnyi hwakecâm ae ikiki, ke ne o but oge me he ka ip hom anyik hmönyin. 14 Inya Iehova at ame ha: ame he ka o, ke inya oge me he ka ányâ; oge me ca he ka hmetu, ke oge me ca he ka betenge, ke oge me ca he ka ietra; adre me he ka bi hwaban köu hoton dem je gethen, ke hnâm je hna ányâ, haingen Than Iehova.

15 Ke ame o but minya könja hofuc ho Iehova ame ha, ka habe, 16 Nokon at lö, wâ bi, oge me hügúnâ gam wem hnen mok: ke so bi u me ca he ka tenge me tenge thungaú, ke ame ca he bi ka hingölö li deköiâm. 17 Máng ju ke ca hwege; ca he bi ka hnyamok, wano ju hnabicom, ke ina ju li tangen hnyeúcám, ke ca tube li esongodâm, ke ca an ju jeú an tavat. 18 Me oge fuc ka tavat hnyi hnyomakatu; ke hnyi sahac ame mokcu öiök: ke haba hnyi hnomakatu oge me ányâ helâ me hna húnâ könja. 19 Ke haba tavat adre me ha könja, ka habe, Hawa, u me ca he ka thumetu öhmun hnân eú köhmun ta je únyi, m' u me ányâ helâe? 20 Me oge me ha ködra, ka habe, Ame o but könja hofuc ho Iehova, ame ha, ka habe, 21 Ha thö ka lap anyi Isaraela, ka habe, Walang hna ha hnen Than Iehova, ka habe, Wâ bi, oge me he ka okongoá anyik dok ae kap, wale

EZEKIELA 25, 26.

tang hwegiöbun ae beönuu, webun, ame oünyihnatho hnen hnyekubun; ke ame he ka ta ge hele vat je lakubun obaga me wahlu waleji öbun e kec hot' ödra. 22 Ke öbun e he ka änyâ helâji me hnök hna änyâ: öbun e ca he ka tube je esongodibun me an jeü an tavat. 23 Ke ame he ka e bi hon böbun je hnabinybak, ke hnen ju je tangen hnyeücabun hnyi je cabun: öbun e ca he ka tenge me tenge thungaü; ke öbun e he ka aü tot hnyi anyibun ta je hulö, me ütengiököu. 24 Helâe ame he Ezekielä ka hnân haten köbun: öbun e he ka änyâ helâji me hnen hna änyâ: ke e ka hwädâ thö e, öbun e he ka wâ a inya Iehova.

25 Ke haba u nokon at lö, hnyi bong oge me he ka hom gadra tang hwegiödä, wale senyin ge anyidra hmanenang, wale wedra, me weny hnyekudra, wale lakudra obaga me wahlu, 26 hawa, ame ca he ka o köu at ame kec möt hnyi bong eling, me thumetu u? 27 Haba hnyi bong eling u me he ka khöng hnyimâm ka at ame kec möt, ke u me he ka fuc, ke u me ca he ka hum hmetu: helâe u me he ka hnân haten ködra; ke adre me he ka wâ a inya Iehova.

HNYIMAKAN 25.

**K**E ame o but könya hofuc ho Iehova ame ha, ka habe, 2 Nokon at lö, hnyimâkâm dö ka je lakon Amona, me perofeta gadra: 3 ke ha thö ka lakon Amona, ka habe, Löng ju öbun hofuc hwan Than Iehova; Walang hna ha hnen Than Iehova, ka habe, Anyin a u je ha, ka habe, Öhö, ka anyik dok ae kap, hnyi üen eji adre me okongoâ; ke ka hnyei Isaraela hnyi üen adre me öba wan e; ke ka lap anyi Juda, hnyi üen adre me he but ka bâ: 4 anyin a wale, wâ bi, oge me he ka hnö u ka tavat e jimeio me hnân idra, k' adre me he ka hunuma hnyi wanbâm, me bi hnyabadra unyâm; k' adre me he ka an âm jeü, me ijem belâm debai. 5 Ke oge me he ka wia Raba hnân umen kamela, ke lakon Amona hnân hnyaban je hnahat mamoe: me öbun e ka wâ a inya Iehova. 6 Anyin a walang hna ha hnen Than Iehova, ka habe, Anyin a u je hia but khaü li hnyamâm, ke uto ge li hnyeücam, me hobâ, me ikikiâ hnyei Isaraela ge hnyekom; 7 anyin a wale, wâ bi, oge me he ka hai hnyamök hom, k' oge me he ka hnö u me hnân söh

hnen ta je hnyei; ke oge me he ka subâ degeci u unyin tavat, me ohiö u ünyi hnyi je hnyei: k' oge me he ka ohiö u, me u me he ka wâ a inya Iehova.

8 Walang hna ha hnen Than Iehova, ka habe, Anyin a haingen Moaba me Seira, ka habe, Wâ bi, e tha ücü lap anyi Isaraela me ta je hnyei hia thithö; 9 anyin a wale, wâ bi, oge me he ka khöng ke batän Moaba ünyi hnyi ta je taun, a ta je taun hnyi hnyigöulen, wale hmanenanginy tavat, a Beth-jesimoth, me Baal-meon, me Kiria-thaima, 10 ka tavat e jimeio, m' adre me he but ücon lakon Amona, me oge me he ka hn' ödra hnân idra, m' adre me ca he bi ka ünyküme hmetu Amona unyin ta je hnyei: 11 ke oge me he ka bi hwaban ka at Moaba; m' adre me he ka wâ a inya Iehova.

12 Walang hna ha hnen Than Iehova, ka habe, Anyin a Edoma ame okongoâ lap anyi Juda hnyi hnen hna bi hwaban, ke jöniny jut ae gan hmâ wale hnen hna bi hwaban ködra; 13 anyin a wale, walang hna ha hnen Than Iehova, ka habe, Oge me he ka hai hnyamök hon Edoma, me subâ degecâ gan at me meno; ke oge me he ka öba wan gan, hwân hnyi Temana; adre me he ka ta ge hele vat ke ne o but hnyi Dedana. 14 Ke oge me he ka bi hwaban kö Edoma a deny lakeik a at Isaraela; ke adre me he ka änyâ hnyi Edoma hoton anyik hmönyin me anyik wathethöt: ke adre me he ka wâ bongon hnök hna bi hwaban, haingen Than Iehova.

15 Walang hna ha hnen Than Iehova, ka habe, Anyin a at Filisiti adre me bi hwaban, me bi hwaban hnen hnyok ae hmönyin he ka ohia e me bi iwahnaihmiöny mē nyiele balua; 16 anyin a wale, walang hna ha hnen Than Iehova, ka habe, Wâ bi, oge me he ka hai hnyamök hon at Filisiti, ke oge me he ka subâ degecâ at Kerethi, me ohia je kolon hnyi hobatköio. 17 Ke oge me he ka ti bi hwaban ködra hnyi ü ae hwege; ke adre me he ka wâ a inya Iehova, iny ka he ka bi hwaban ünyi gak hnyi hudrin.

HNYIMAKAN 26.

**K**E hnyi huna a eleveniny, hnyi bong a bäniny tehi, ame o but könya hofuc ho Iehova, ame ha, ka habe, 2 Nokon at lö, anyin a Turo ame hia but ha ge Jerusalema, ka habe, Öhö, e hmetru but at eji a homa-

göuleny ta je hnyei; e ame hnyimakan dö könya: oge me he ka unöngöt, ke ba but wan gan: 3 anyin a wale, walang hna ha hnen Than Iehova, ka habe, Wâ bi, úcük u, Turo, ke oge me he ka öliâ köu ta je hnyei ae se hia, helâ me köiö ame öliâ ta je waköiöiny. 4 Ke adre me he ka ohia je hna up haginy, me kia je tap tue hnyin: oge ma aba minya sesâiny, me wia e me kic ae ba leünen. 5 Ke e ame he ka dok hnân ulolo je ert hnyin, hnyi wanben köiö; anyin oge hia but ha, haingen Than Iehova: ke ame he ka hnân söh hnen ta je hnyei. 6 Ke haba je lakon wahlu hnyi je hna belök adre me he ka hlingâ ge hele vat: me adre me he ka wâ a inya Iehova. 7 Anyin a walang hna ha hnen Than Iehova, ka habe, Wâ bi, oge me he ka oi Nebukaneza than Babulona úheny hnyi hwadrö, a tuhan je than, tha e me je hors, ke je kariota, ke tavat tabö hors, ke deö at, ke tavat ae se hia, ka Turo. 8 Ke e ame he ka hlingâ lakom wahlu ge hele vat hnyi je hna belök: k' ame he ka op cici u je tap vat, ke okhibö kânâ cici u, ke hai göranyai bec cici u. 9 Ke e ame he ka otílâ anyin ta je únyi vat hnân tho hnyi ányâm je hna up haginy, ke e ame he ka kia degecâ ányâm je tap tue ge anyin je giwa. 10 Anyin ae se hia haleny je hors me ame he ka oiyongi u ge sesâiny kânâ gadra: k' ame he ka öbubuny ányâm je hna up haginy ge hwan tavat tabö hors, ke je kat, ke je kariota, e ka didrö ka hnyi je homagöulem, helâ me udilidra hnyi taun adre me kia. 11 K' ame he ka uto dem je gethen hia thithö hnen ta je boujimen can haleny je hors: ke e ame he ka hlingâ lakem ge hele vat, ke adre me he ka ohnyikânâ je taben tang wegíâm. 12 K' adre me he ka hügúnâ ta je omjehem, ke söh ányâm ta je únyi adre úcú: k' adre me he ka kia hagâm ta je hak, ke hagutâ umâm je uma ae hmanenang: k' adre me he bi ka khúâ hnyi köiö ányâm je veto me utö me sesâiny kânâ. 13 Ke oge me he ka bi obiny hwan ányâm khumöng; k' adre me ca he hmetu bi ka löng hwan ányâm je kitara. 14 Ke oge me he bi nya ka wiö u hnân kic ae ba leünen: ke u me he ka dok hnân döi ert; k' adre me ca he hmetu ka up u: anyin a inya Iehova at ame ha, haingen Than Iehova.

15 Walang hna ha hnen Than Iehova ka Turo, ka habe, Hawa, ame ca he ta je bomene ka öbubuny ge hwan útaem, e ka

mâng tavat ae aat, k' ödra ka hlingâ tavat hnyi wanbâm? 16 Haba hnyi úen eling me ame he ka utut ta je thaniny köiö hia úhedrin hnyi hon anyidrin ta je theron, me ip anyidrin je úkot, me uny anyidrin ta je úkhaú ae ve bongon bi: k' adre me he bi ka okhaú' ödra ge öbubuny; k' adre me he ka laba hnyi kânâ, ke adre me he ka labö öbubuny, me uthmâhmâ gam. 17 Ke adre me he ka tenge thungaú gam, me ha köu, ka habe, Ekölö ge hna ohiö u waleji a labâ hnen aten köiö, taun ae lung, me hwege hnyi köiö, e me tavat adre me labâ, tavat adre me ooti ödra hia tavat adre me he hnyin! 18 Walang ang ame he je bomene ka öbubuny hnyi bonginy ta a u; eke, ame he je bomene ka hlohlo hnyi bong u me he ka he hnyin. 19 Anyin a walang hna ha hnen Than Iehova, ka habe, Iny ka he ka wiö u me me taun ae ba önyen, helâ me je taun ae ba aten, wale iny ka okhibö dok ae dit hom, ke ame he ka khaúö u hnen köiö ae gan; 20 hnyi úen eling, oge me he ka ohnyikânâi u tha u me tavat adre me utut kâú ka hnyi thop, ka tavat kâú adrem, me ip u hnyi dok a hnyikânâiny hmeledrany, hnyi je dok ae ba aten ehac, tha u me tavat adre me utut ka hnyi thop, me me ca labö u hmetu hnen tavat; ke oge me he ka ip hmanenang hnyi hnyei iny tavat ae möt: 21 oge me he ka wiö u hnân outen ke ame he ka hiö u: eja ke ne adre ne elöm u, adre me ca he hmetu ka ö u nyiele balua, haingen Than Iehova.

## HNYIMAKAN 27.

**K**E ame o but minya könya hofuc ho Iehova, ame ha, ka habe, 2 Nokon at lö, u me he ka hai khumöng tenge ge Turo; 3 ke ha thö ka Turo, ka habe, U at ame laba hnyi hna dit hnyin úheny hnyi köiö, at ame úcú omjeúiny je hnyei hobi kâú je bomene ae se hia, walang hna ha hnen Than Iehova, ka habe, Turo lö, u je hia but ha, ka habe, E beönua hmanenangik. 4 E hnyi wanben köiö je hnyigöulâm, haba tavat adre up u adre me obeönua hmanenangâm. 5 Adre hia but tibet ányâm je eso hia ge je úö köp úheny Senir: adre me hom je arasi úheny Lebanona hnân bi aneunyainy hu hobi köu. 6 Adre hia but ányâ ányâm je wi a je iwajoiny Basana; adre hia but tibet ányâm je tap ge utö tasura adre me omecâ ge nyon elefan, únyi hnyi je bomeneiny Kitim. 7 Mano lino

ae ve bongon únyi Aigupito u je ulolo hnân húnjú me me ányâm bouídila; mano ae udrudrá ke udrudrá hlit únyi hnyi je bomeneiny Elisa ányâm unyitung. 8 Aten Zidona me Arevadi ányâm tavat galu, Turo lö, haba tavat ae metá hnyi wanbám, me wale tavat adre me kú deny je hu. 9 E unyâm wahingatiný Gebala ke aten ae metá ányâm tavat bi ouge; e unyâm je huiny köiö hia ke ta je matelo he ka úco ta je omjehem. 10 Tavat Peresi me Luda me Futa je soja unyâm he ka bi singám, k' adre me uhno hnyi wanbám bec me hnabinybak vat, ödra tavat adre me ohmanenangi u. 11 E hnyi hon hagám hak igigili u tavat Arevadi a tha ödra me ányâm je deó vat, ke tavat Gamadi eiö hnyi ányâm je tap tue: k' adre me uhno anyidra je bec hnyi hagám hak igigilö; k' adre me obe-khótá ányâm hmanenang. 12 Tasesa ame úcú omjehem anyin ae ti se hia je ve bongon omjeú hia; k' adre me úcú sileva me fao me bras me led hnyi ányâm je hna úcú. 13 Haba tavat úcú möu, me Javana, me Tubala, me Meseke, k' adre me úcú at me ta únyi a bras hnyi ányâm hna úcú. 14 Ke haba aten lap anyi Togarema, me adre me úco je hors, ke je hors hnân vat, ke je miul hnyi ányâm hna úcú. 15 Ame úcú unyâm at Dedana; k' ame úcú unyâm ta je bomene ae se hia: k' adre me hom je nyon elefan ke je úö ebeni hnân úcú. 16 Ame úco gam Suria, anyin ae se hia hnâm je hna huliwa; k' adre me úco hnyi ányâm je hna úcú je semerado, ke mano ae udrudrá hlit, ke úkhaú adre me tibet omecá, ke mano lino, ke waji, ke veto ae dra vec. 17 K' ame úcú unyâm at Juda me hnyei Isaraela, adre me úcú hnyi ányâm je hna úcú hwit únyi Minith, ke panag, ke hani, ke wakaco, ke basama. 18 Damaseko ke at ame úco gam hnâm je hna huliwa ae se hia, anyin ae se hia je omjeú ae ve bongon; ke waina minya únyi Elebona, ke leúnen mamoe ae hau. 19 Haba Vedana me Jevana ödru me úco tö hnyi ányâm je hna úcú; ke fao ame hadröngöc, ke kasia, ke kani hnyi ányâm je hna úcú. 20 Dedana ke at ame úco gam je úkhaú hnân tabö hors ae únyi hnathu. 21 Arabia me je thaniny hia Kedara, ödrin tavat adre me úco möu je nokon mamoe, me je mamoe бага, me je got; wale hnödra hna úco möu. 22 Tavat úcú hnyi Sheba me Rama tavat adre me úcú möu; adre me úco hnyi ányâm je hna úcú je utö hia ae bo so ae

únyi hnathu, me je veto ae únyi hnathu hia, me gol. 23 Karan me Kane me Edena tavat úcú hnyi Sheba, me Asur, me Kalemada tavat adre me úcú möu. 24 Ödra tavat adre me úco möu ta je únyi ae únyi hnathu, je bwinymano ae udrudrá me hna tibet omecá, me je tangen úkhaú ae mec, adre ca ge tö me tibet ge arasi, hnyi ányâm je hna úcú. 25 Haba je huiny Tasesa hnân hauden omjehem adre úco: ke adre me öunöngöti u, me ohmanenangi u hnyi wanben je köiö. 26 Haba ányâm tavat galu adre hia but hum u ka hnyi je köiö ae gan; ke ang hwei ame thu u hnyi wanben je köiö. 27 Haba je omjehem, me ányâm je hna úcú, me ányâm ta je únyi hnân úcú, me je aten hóm je hu, me ányâm tavat adre kú deny hu, me ányâm tavat bi ouge, me tavat adre me úco ányâm ta je únyi, me ányâm tavat vat hia hnyi wanbám, me ányâm bunyen hia thithö hnyi wanbám, adre me he ka tha ú eú hnyi köiö hnyi bong adre me he ka hangö u hnyin. 28 Hnyi kuku tengeiny ányâm tavat ame kú deny je hu ame he ka öbubuny je hnyaba igigilö. 29 Ke ame he tavat galu hia, me je aten hu, me tavat ame kú deny je hu, ka utut únyi hnyi hon hudrin je hu me tot hnyi hnyei, 30 ke adre me he ka olungá anyidra hwatenge gam, ke adre me he ka tenge hwege, me konám je bödra ge káná, me hinö hnyi dröu: 31 ke adre me he ka öhadreúá je bödra gam, me weiká mano ae gan nân, me tenge me hnyok as vec gam, me tenge hwege. 32 Ke ödra ka tenge thungaú adre me he ka hai khumöng tenge gam, ke adre me he ka tenge gam me ha, ka habe, Ia ae úcú me Turo wale adre ohia hnyi köiö? 33 Ödra ka oá tang omjehem únyi hnyi köiö, me u je öunöngötá je hnyei ae se hia: u je orená je thaniny hmeledrany ge ta je omjehem, me ta je únyi hnân úcú ae se hia. 34 Hnyi úen adre me thu u ge köiö hnyi wanben je köiö ae dit, me a ta but ányâm ta je únyi hnân úcú me ányâm je bunyen hia hnyi wanbám. 35 Haba aten je bomene me adre me uthmâhmâ hia gam, k' ame he je tuhödra ka ot gan hmá, ke hmak je hnyimaködra. 36 Haba tavat úcú hnyi je hnyei me adre me jú gam; u at ame ootá, ke u me ca he hmetu bi ka manen nyiele balua.

## HNYIMAKAN 28.

**K**E ame o but minya kõnya hofuc ho Iehova, ame ha, ka habe, 2 Nokon at lö, ha thö ka je tuhan Turo, ka habe, Walang hna ha hnen Than Iehova, ka habe, Anyin ae bi gan hnyekom, ke u je ha, ka habe, Inya ang ke khong, me oge me laba hnyi tap taben Khong hnyi wanben je köiö; ke so bi u thibi at ke ca Khong, ke u je oüco hnyekom me hnyekon Khong: 3 ke wâ bi, u at ae metâ hu Daniela; ke ba ke únyi ae iyong adre me ikhâlâ gam: 4 ke hu but gam omjeû hnen ânyâm metâ me hnâm hna wâhmakhmeto, ke hu gol me sileva hnyi je tang omjehem: 5 u je hia but osehia ânyâm ta je únyi hnen úganiny ânyâm metâ, ke hnâm hna úcû, me bi gan hnyekom hnen tang omjehem: 6 anyin a wale, walang hna ha hnen Than Iehova, ka habe, Anyin a u je oüco hnyekom me hnyekon Khong; 7 wâ bi, haba can eling, me oge me he ka oâ kôu je atkanyua, tavat adre me outen hnyi ta je hnyei: ke adre me he ka oc anyidra je hele vat me okongoâ hmanenanginy ânyâm metâ, k' adre me he bi ka oikikiâ ânyâm hmanenang. 8 Ödra adre me he ka ohnyikönö u ka hnyi thop; me u me he ka mok helâ me imekiny tavat adre me hlingâ hnyi wanben je köiö. 9 Hawa, u me he bala ka labö ha hnyi hnyimakan at ame hlingö u, ka habe, Iny Khong? ke u at bi, ke ca Khong hnyi hnyamen at ame okongu u. 10 Me u me he bi ka mok helâ me imekiny tavat adre me ca peritomon, ge hnyamen ta je atkanyua: anyin oge hia but ha, haingen Than Iehova.

11 Ke ame o but minya kõnya hofuc ho Iehova ame ha, ka habe, 12 Nokon at lö, hai thö khumöng tenge ge thaniny Turo, me ha kâu, ka habe, Walang hna ha hnen Than Iehova, ka habe, U hnân okeceâ haten ae bekhöt, ae unöngöt ge metâ, ke bekhöt hmanenanginy. 13 U je mwi but Edena hnyi hnyaban Khong; adre tubi u ge je veto hia ae únyi hnathu, wale sadio, me topazio, me aloma, me berulo, me soama me jasepi, me safairo, me semerado, me bereketh, me gol: e bi unyâm hna huliwan ânyâm je pate me je utköwi; adre pena-pena hnyi wanbâm hnyi bong adre up u hnyin. 14 U kerubi adre hú a at ame tube; ke oge otölö u, me me hu hnyabam hnyi bucen ae kap anyin Khong; u je hia

but ngeny hnyi wanben ta je veto meic. 15 U je bekhöt ut hnyi dem je gethen, hwân hnyi bong adre up u hnyin ke ne o but adre me wâ hwakecîn ae kong gam. 16 Hnyi úganiny hnâm hna úco adre me öunöngöti u ge úkonguny, ke u je ânyâ hulö: anyin a wale oge hia but hagutö u únyi hnyi hon bucen anyin Khong; ke oge hia but ohlö u, kerubi at ame tube, únyi hnyi wanben je veto meic. 17 E bi gan dut hnyekom ge ânyâm hmanenang, e monu but ânyâm metâ hnen ânyâm mec: oge hia but khüö u hnyikânâi, oge hia but ip u hnyi hnyimakan je than m' adre me he ka ö u thö. 18 Hnyi úganiny ânyâm je hulö, wale hnyi úkongon hnâm hna úco, u je hia but okongoâ ânyâm je dok ae kap; anyin a wale oge hia but oâ meic hnyi wanbâm, e ame hia but ön u, ke oge hia but wiö u me dröu but hon kânâ hnyi hnyimaködra hia adre me ö u. 19 Adre me he ka uthmâhmâ gam wale tavat adre me wâhmakhmetu u hia hnyi ta je hnyei: u me he ka hnân hângâ, ke u me ca he hmetu ka manen nyiele balua.

20 Ke ame o but kõnya hofuc ho Iehova, ame ha, ka habe, 21 Nokon at lö, hnyimâkâm dö ka Zidona, me perofeta úcon, 22 me ha, ka habe, Walang hna ha hnen Than Iehova, ka habe, Wâ bi, úcük u Zidona; k' adre me he ka oganö nya hnyi wanbâm, m' adre me he ka wâ a inya Iehova, iny ka hia but owisa kâu, ke ka hia but okabi nya hnyin. 23 Anyin oge me he ka kunâ kâu mok ae cap ke dra hnyi deny je gethen; k' ame he tavat aat ka ta hnyi wanben, ke hele vat bi hnyi je ke keihen hia; m' adre me he ka wâ a inya Iehova. 24 Ke ame ca he hmetu lap anyi Isaraela ka hu iwadekong ame dâ ke údö ae ocen únyi gadra igigili ödra, wale hnyat hûkötö ödra; ke adre me he ka wâ a inya Than Iehova.

25 Walang hna ha hnen Than Iehova, ka habe, Iny ka hia but úkhacaköuâ lap anyi Isaraela únyi hnyi je hnyei a je hnyei adre ovesei ödra ka hnyin, k' adre hia but okabi nya bi hnyi hnyimakan ta je hnyei, me adre me he ka labâ idra waleji oge me ham ka athnyabaik a Jakob. 26 Ke adre me he bi ka laba khötkic hnyin e; eke, adre me he ka up uma, me belöki vine, me laba khötkic; iny ka hia but bi hwaban ködra hia tavat adre me hûkötö ödra igigilö; ke adre me he ka wâ a inya Iehova Khongudrin.

## HNYIMAKAN 29.

**H**NYI huna a teniny, hnyi tehi a teniny, hnyi bong a twelv, ame o but kõnya hofuc ho Iehova ame ha, ka habe, 2 Nokon at lö, hnyimákâm dö kö Farao than Aigupito me perofeta úcon me Aigupito hia thithö; 3 ha thö, ke habe, Walang hna ha hnen Than Iehova, ka habe, Wâ bi, úcúk u, Farao than Aigupito, a tanimo ae gan at ame laba hnyi je wage-winy, at ame hia but ha, ka habe, Haba anyik wagewe me ka anyik bi, ke oge me ka op e hobi kõnya bi. 4 Ke oge me he bi nya ka det hnyimâm ge je wage, ke oge me he ka okeceâ je wâiny ânyâm je wagewe ka hnyi je unâm; ke oge me he ka oi u únyi hnyi wanben ânyâm je wagewe, tha u me ta je wâiny ânyâm je wagewe hia adre me kece ka hnyi je unâm. 5 Ke oge me he ka hnö u adre digic u hnye-buba ai, u me je wâiny ânyâm je wage-we: u me he ka ta ka hnyi hon kânâ; adre me ca he ka tha úkhacaköü u me úkhöünâ: oge hia but hnö u hnân an ta je meno hnyi hnyot me ta je meno ame gâ ethö. 6 Ke ame he aten Aigupito hia ka wâ a inya Iehova, anyin a ödra uci hlowe ka lap anyi Isaraela. 7 Ödra ka köt u hnen hnyam, me u me hmetru, me ovechmwiâ je bajebenyidra hia: ke ödra ka ci gam u me hmetru, me öbubunyâ je jevadra hia. 8 Anyin a wale, walang hna ha hnen Than Iehova, ka habe, Wâ bi, oge me he ka oâ köu hele vat, me subâ degecâ gam at me meno. 9 Ke ame he ka wau hnyei Aigupito me ba aten; ke adre me he ka wâ a inya Iehova: anyin a e ame ha, ka habe, Anyik bi wagewe, ke oge hia but op e. 10 Anyin a wale, wâ bi, úcúk u, me ânyâm je wagewe, ke oge me he ka wia hnyei Aigupito me me ba aten me wau, hwân hnyi tap tue hnyi Seveni ke ne o but hnyi hnyigöulen Aithiop. 11 Ke ame ca he ka vheno e hnen je can tavat, ke ame ca he minya je can meno ka vheno e, ke adre me ca he ka labâ e ke ne o but hnyi fâti je huna. 12 Ke oge me he ka wia hnyei Aigupito me me wau hnyi wanben je hnyei a wau, ke ame he ka ba aten je tauniny hnyi wanben je taun adre öba wan, ke ne o but hnyi fâte je huna, ke oge me he ka oveseâ at Aigupito ka hnyi je hnyei me ob' ödra ka hnyi ta je hnyei. 13 Ke walang hna ha hnen Than Iehova, ka habe,

E ka um dö je huna a fâte oge me he ka úkhacaköü at Aigupito únyi hnyi ta je hnyei wale adre ovesei ödra ka hnyin: 14 ke oge me he ka ohmeto at Aigupito úhedra hnyi hna bâ, ke oge me he ka ohmetu ödra ka hnyi hnyei Patherusi, hnyei adre hnöku ödra hnyin; ke adre me he ka dökhü ae hnyikânâ eling. 15 E ame he ka hnyikânâ hnyi hmelen je dökhü; ke ame ca he hmetu ka ogöranyâ e bi unyin je hnyei: ke oge me he ka owakhaleti ödra, m' adre me ca musö je hnyei. 16 Ke ame ca he hmetu ka hnân labageju kâu hnen lap anyi Isaraela, hnân öünykúmeâ je hulö, ödra ka hwiö ködra: ke adre me he ka wâ a inya Iehova.

17 Ke haba hnyi huna a twente seveniny, hnyi tehi a bân, ke hnyi bong a baniny tehi, ame o but kõnya hofuc ho Iehova, ame ha, ka habe, 18 Nokon at lö, haba Nebukaneza than Babulona ame ânyâ huliwa ae so hmönyin úcon Turo hnen anyin je utbavat: e hadreú thö je bödra hia, k' ame han hia but je abenyidra; ke so bi e ame ca kap troban, me anyin utbavat, únyi Turo, hnyi huliwa e ame ânyâ úcon: 19 anyin a wale, walang hna ha hnen Than Iehova, ka habe, Wâ bi, oge me he ka ham kö Nebukaneza than Babulona hnyei Aigupito; ke e ame he ka hom aten ae se hia, me je hna söh, me ta je omjeú; ke wale hwaban ka anyin je utbavat. 20 Oge me ham kâu hnyei Aigupito hwaban anyin huliwa e ame ânyâ kâu, anyin adre me huliwa hobi kõnya, haingen Than Iehova.

21 Hnyi bong eling oge me he ka oâ faoiny meno hobi kâu lap anyi Isaraela, ke oge me he ka hna köu m' u ma khöng hnyimâm hnyi wanbödra; k' adre me he ka wâ e inya Iehova.

## HNYIMAKAN 30.

**K**E ame o but minya kõnya hofuc ho Iehova, ame ha, ka habe, 2 Nokon at lö, perofeta thö, me ha, ka habe, Walang hna ha hnen Than Iehova, ka habe, Kuku tenge th' öbun, Ekölö ge bong! 3 Anyin ae hakekeny jut bong, e hakekeny jut bongu Iehova, bong ae khömet; a üen hobi kâu ta je hnyei. 4 Ke ame he ka o hele vat hnyi Aigupito, k' ame he ka hu hlöuhlöu hnyi Aithiop, e ka ta but ta je komok hnyi Aigupito; ke adre me he ka hom aten ae se hia, ke adre me he ka tho je taben e.

EZEKIELA 31.

5 Ke ame he bi ka tha ta mödra ge hele vat at Aithiop, me Futa, me Luda, me tavat hia ae ve bongon, me Kubu, me tavat aten hnyeï adre me úhinhinykôu.

6 Walang hna ha hnô Iehova, ka habe, Ame he minya ka ta tavat adre me hadruâ Aigupito, ke ame he ka hnyikânâ biganiny maniny man, hwân hnyi tap tue hnyi Seveni, adre me he ka ta hnyi wanben e ge hele vat, haingen Than Iehova. 7 Ke ame he ka wau idrin hnyi wanben je hnyeï a wau, ke ame he je tauniny ka laba hnyi wanben je taun ae ba aten. 8 Ke adre me he ka wâ a inya Iehova, iny ka hia but hú meic hnyi Aigupito, me kot hia tavat úhadruo. 9 Hnyi úen eling ame he ka he but je úthumetu úheny unyik adre tabâ je hu he ka ootâ at Aithiop tavat adre me laba sot; ke adre me he ka hu vec helâ me je bonginy Aigupito; anyin a wâ bi, e but ang.

10 Walang hna ha hnen Than Iehova, ka habe, Oge me he ka öumo tavat ae se hia hnyi Aigupito a deny hnyamö Nebukaneza than Babulona. 11 Adre me he ka oâ e tha e me lakeiny, a oti ödra hnen je hnyeï, he ka ohia hnyeï; ke adre me he ka oc anyidra je hele vat úcon Aigupito, me öunöngötâ hnyeï ge je komok. 12 Ke oge me he ka ohmö je wagewe, me úco hnyeï ka hnyi hnyamen tavat ae kong; ke oge me he ka öba wan hnyeï, me ta je únyi hia hnyin ge hnyamen je atkanyua: inya Iehova at ame ha.

13 Walang hna ha hnen Than Iehova, ka habe, Oge me he minya ka ohia je khong, me bi obiny je idola hnyi Nofi: ke ame ca he hmetu ka hu thaniny hnyeï Aigupito; ke oge me he ka okúâ ot hnyi hnyeï Aigupito. 14 Ke oge me he ka öba wan Patherusi me hú meic hnyi Zoana, me bi hwaban ka No. 15 Ke oge me he ka hingâlâ anyik hmönyin hon Sina, wale singiny Aigupito; ke oge me he ka subâ degeçâ tavat ae se hia hnyi No. 16 Ke oge me he ka hú meic hnyi Aigupito; ame he ka vec gan hmâ Sina, ke adre me he ka thuthu hmetro No: k' ame he ka hu je iwahnaimiöny me Nofi hnyi selany. 17 Ame he ka ta wahidrouiny Aven me Pibeseth ge hele vat: k' ame he ka bâ je hnyeï eling. 18 Ke ame he ka olidrâ lany hnyi Tapanesi, iny ka he ka thamuâ eling je hna úhúkâlâkôuâ anyin Aigupito, ke ame he ka o obiny hmanenanginy maniny man; ke haba e, me adre me he ka tube e

hnen úlá; k' ame he lakon wahu ka bâ. 19 Helâe oge me he ka bi hwaban hnyi Aigupito, m' adre me he ka wâ a inya Iehova.

20 Hnyi huna a eleveniny hnyi tehi a bân, hnyi bong a seveniny tehi, ame o but kõnya hofuc ho Iehova, ame ha, ka habe, 21 Nokon at lö, oge hia but thu benyi Farao than Aigupito; ke wâ bi, adre me ca lan e he ka bi bubunin, ke ca ge mano me lan e, me me hwege hmetu e hnân he ka hok hele vat. 22 Anyin a wale, walang hna ha hnen Than Iehova, ka habe, Wâ bi, úcûk u Farao than Aigupito, me oge me he ka thu li benyin, wale at ae hwege ke at minya adre hia but thu; ke oge me he ka okolo hele vat únyi hnyi hnyamen. 23 Ke oge me he ka oveseâ at Aigupito unyin tavat, me ob' ödrin ka hnyi ta je hnyeï. 24 Ke oge me he ka ohwegiâ li hnyamen than Babulona, me ham anyik hele vat ka hnyi hnyamen: ke oge me he ka thu li benyi Farao, me e ame he ka mâng hnyi hnyimakan helâ me imânginy tavat adre me kot moko. 25 Ke oge me he ka ogöranyâ li hnyamen than Babulona, k' ame he bi ka him li benyi Farao; ke adre me he ka wâ a inya Iehova, iny ka hia but ham anyik hele vat ka hnyi hnyamen than Babulona, ke e ame he ka hai hon hnyeï Aigupito. 26 Ke oge me he ka oveseâ at Aigupito unyin tavat, me ob' ödra ka hnyi ta je hnyeï, m' adre me he ka wâ a inya Iehova.

HNYIMAKAN 31.

**H**NYI huna a eleveniny, hnyi tehi a kuniny, hnyi bong a bâniny tehi, ame o but kõnya hofuc ho Iehova ame ha, ka habe, 2 Nokon at lö, ha thö kö Farao than Aigupito, me anyin tavat ae se, ka habe, U úcû me ia hnyi úgânâm? 3 Wâ bi, haba at Asuria, me arasiny Lebanona ae hmanenang anginy, ke gan hmenon, ke beú göranyai, ke haba ban, me walethö hnyi je úlá. 4 Ame hat e ge ta je köiö, k' ame ogöranyâ e hnen je dok ae dit; anyin je wagewe ame di igigilö dok e ame belökâ; ke ame di anyin je ong wagewe ka hnyi je úöiny hnyot hia. 5 Anyin a wale e beönua ibeüen göranyai hon ta je úöiny hnyot hia; ke adre osehia je anginy, ke beú je anginy can je köiö ae se hia, e ka okúâ. 6 Haba ta je meno hia ame gâ ethö, adre me bi haú' ödra hnyi je vheiny, ke haba je menoiny

EZEKIELA 32.

hnyot hia adre me hnokoâ hmelen je vheiny, ke haba je hneyi hia ae gan adre me laba hnyi hmenon. 7 Ke e hmanenang hnyi ûganiny, me ibeûen je anginy; anyin a e bi wân hnyi je köiö ae se hia. 8 Ame ca ikâlâ e hnen ta je arasi hnyi hnyaban Khong: e ca ûcû ta je köp me ta je anginy, ke ca ûcû ta je aremoni me ta je vheiny; ke ba ûö hnyi hnyaban Khong ae ûcû mē hnyi hmanenanginy. 9 Oge me omecâ e ge ta je anginy ae se hia: me me ciâ gan ta je ûö hia hnyi Edena, hnyi hneyi iny Khong.

10 Anyin a wale, walang hna ha hnen Than Iehova, ka habe, Anyin a u beú göranyai, ke e bi ban hnyi je ûlâ, ke ethö hnyekon hnyi ibeûen; 11 me oge me he ka hna e ka hnyi hnyamen at ae hwege hnyi je hneyi; ka e ame he ka mâdrâ e: oge hia but obâ e can hwakecin ae kong. 12 Ke haba je atkanyua, tavat ame outen hnen ta je hneyi, adre hia but subâ degecâ e, me hna degecâ bi; a kölu but je anginy hon je bucen, me hnyi je hnyigöulen bucen hia, ke a hmetru but je vheiny hnyi je wageweiny hia hmeledrany: ke ame utut e tavat hia aten hmeledrany ûnyi hnyi hmenon, me hna degecâ e bi. 13 Ame he je meno hia ame gâ ethö ka ta hon hnyaban adre degec, ke ame he je menoiny hnyot hia ka mokulec je vheiny: 14 me me ca bi gan ta je ûö hnyi baten je köiö ödra ka görany, me ca e je bödrin hnyi dok ae hlau, ke ame ca tot unyidrin hnyi ibeüödrin tavat ae hwege, wale tavat hia adre ijem köiö; anyin adre hn' ödra hia ka hnyi mok kâû ka hnyi kânâ unyin je lakon at tha ödra me tavat adre me utut ka hnyi thop.

15 Walang hna ha hnen Than Iehova, ka habe, Hnyi bong eji e ame dit ka hnyi hedis, me oge me oâ hnyamok; can e oge me tube dok ae dit, ke thawâ je wageweiny, k' ame todrö je köiö ae gan: ke oge me ohlöhluöâ Lebanona can e, k' ame mok unyin ta je ûöiny hnyot hia can e. 16 Oge me oöbubunyâ ta je hneyi ge hwan útainy, hnyi ûen oge me khúâ e ka hnyi hedis tha e me tavat adre me dit ka hnyi thop: ke haba je ûöiny hia Edena, je hna úca me soiny Lebanona, a tavat hia adre me ic köiö, adre me tubet bi eü hnyi kânâ. 17 Adre me tha ut minya mē ka hnyi hedis ka tavat adre me hlingâ ge hele vat; eke, tavat eji a hnyamen, wale tavat adre me laba hnyi hmenon hnyi wanben je hneyi.

18 U hmanenang ke gan helâ me ia

unyin je ûöiny Edena? ke so bi adre me he ka tha hum u me ta je ûöiny Edena kâû ka hnyi kânâ: ke u me he ka mokut hnyi wanben tavat adre me ca peritomonâ, tha u me tavat adre me hlingâ ge hele vat. Wale Farao me anyin tavat hia ae se, haingen Than Iehova.

HNYIMAKAN 32.

**H**NYI huna a twelviny, hnyi tehi a twelv, hnyi bong a bâniny tehi ame o but könya hofuc ho Iehova, ame ha, ka habe, 2 Nokon at lö, hai thö khumöng tenge ga Farao than Aigupito, me ha kâu, ka habe, Adre me oúcû u me nak lionainy ta je hneyi: ke u helâ me tanimoiny köiö; k' ame patrutruâ ânyâm je wagewe, ke u je obwebwelâ köiö ge li cam, me ohâeâ anyidra ta je wagewe. 3 Walang hna ha hnen Than Iehova, ka habe, Oge me he ka ulolo anyik ert hom, a tha u me tavat ae se; k' adre me he ka lili u hnyi útök ert. 4 Ke oge me he bi nya ka hnö u hnyi kânâ, ke khúö u ka hnyi utkânâ, ke oge me he ka olaba ka hnyi hom ta je meno adre me gâ ethö, me osekunâ je menoiny hnyot hia thithö adre me he ka ön u. 5 Ke oge me he ka ip je utiöiâm ethö hon je bucen, me öunöngötâ je hnyigöulin bucen ge ibeüâm göranyai. 6 Oge me he minya ka hú hneyi u je hai hnyin ke ne o but hnyi je bucen, ge drâm; ke ame he ka unöngöt je deny köiö gam. 7 Ke haba hnyi ûen oge me he ka oumi u, me oge me he ka tube drany, me olidrâ je okhúiny; ke oge me he ka tube seúnö ge ûlâ, ke ame ca he ka melam tehi. 8 Oge me he ka olidrâ hom je lany hia hnyi drany ae umumelam, me hna but menekholom hon em hneyi, haingen Than Iehova. 9 Ke oge me he minya ka ohwönyinâ hnyekon je hneyi ae se hia, hnyi ûen oge me he ka ohnauhangö u unyin ta je hneyi, ka hnyi je hneyi ae ca khanö u bi. 10 Eke, oge me he ka kunâ je hneyi ae se hia ka lâiâ gam, ke ame he je tuhödra ka ot gan hmâ hobi köu, iny ka nyikâ anyik hele vat hnyi hnyimaködra; ke adre me he ka öbubuny bala, wâ adre nye mokcu, hnyi bonginy ta a u. 11 Anyin a walang hna ha hnen Than Iehova, ka habe, Ame he ka o köu hele vat anyin than Babulona. 12 Hnen je hele vat anyin tavat hwege oge me he ka öta tavat ae se hia unyâm; ödra hia tavat adre me outen hnen je hneyi: ke adre me



### EZEKIELA 33.

he ka kot hia hmanenanginy Aigupito, ke adre me he ka ohia aten hia ae se. 13 Ke oge me he ka ohia je menoiny hia únyi hnyi je köiö ae se hia ; ke adre me ca he hmetu ka ohâeâ e hnen can at, ke adre me ca he hmetu ka ohâeâ e hnen újimen can meno. 14 Me oge me he ka oalaiâ anyidra je köiö, me hingâlâ anyidra je wagewe helâ me wakaco, haingen Than Iehova. 15 Iny ka hia but öba wan hnyei Aigupito, me me hnyei wau, me ohia iunöngötiny hnyei, iny ka hia but kot hia tavat adre me laba hnyin, adre me he ka wâ a inya Iehova. 16 Walang khumöng tenge adre me he ka hai ; ame he wahluiny je hnyei ka khumöng tengiâ ; adre me he ka khumöng tenge gan, ge Aigupito, me aten hia ae se, haingen Than Iehova.

17 Ke hnyi huna a twelviny hnyi bong a fittininy tehi, ame o but könya hofuc ho Iehova, ame ha, ka habe, 18 Nokon at lö, tenge thö ge aten Aigupito ae se hia, ke hagut' ödra but, e, me wahliuny je hnyei ae lung kâú ka hnyi kânâ tha ödra me tavat adre me utut ka hnyi thop. 19 U hmanenang hu ia ? utut me tha mokut me tavat adre me ca peritomon. 20 Adre me he ka ta hnyi wanben tavat adre me hlingâ ge hele vat : adre hia but hna e ka hnyi hele vat : lelö e me aten ae se hia. 21 Ame he ka fuc kâú tavat ae hwege a je taben hnyi wanben hedis, tha e me tavat adre me hadruâ e : adre me utut, adre me mokut, a g' adre ca peritomonâ, k' adre hlingâ ge hele vat. 22 Wale Asuria me anyin ukhacaköu hia ; ke wale hon ta je erkemok igigilöâ : ödra hia tavat adre me hling' ödra k' adre me ta ge hele vat : 23 k' adre me ip anyidra je erkemok hnyi je ke keihen thop ae sâkâú, k' ame mokut anyin úkhacaköuhnyi baten anyin erkemok : ödra hia tavat adre hling' ödra, k' adre me ta ge hele vat, tavat adre me ot gadra waleji hnyi úen adre me möt. 24 E bi Elama me aten hia ae se igigilö anyin erkemok : tavat adre hling' ödra, k' adre ta ge hele vat, k' adre me utut kâú ka hnyi kânâ a g' adre ca peritomonâ, waleji tavat adre ot gadra ödra tiga möt, k' adre me tha hmehma me tavat adre me utut ka hnyi thop. 25 Adre hia but ip hnen hna mokut hnyi wanben tavat adre me hling' ödra tha e me aten hia ; ke igigilö e anyin je erkemok : tavat hia adre ca peritomon, k' adre hling' ödra ge hele vat ; anyin adre me ot gadra waleji ödra tiga möt, k' adre

hia but tha hmehma me tavat adre me utut ka hnyi thop : k' adre me ip e hnyi wanben tavat adre me hling' ödra. 26 Ke wale Meseka me Tubala me aten hia ae se ; ke igigilö anyin je erkemok : tavat hia adre me ca peritomon, k' adre hling' ödra ge hele vat ; anyin a ödra tavat adre me ot gadra waleji hnyi úeu ödra tiga möt. 27 K' adre me ca he ka tha mokut me tavat ae hwege adre me ta, k' adre ca peritomon, a tavat adre me utut ka hnyi hedis tha ödra me anyidra ta je omjehen vat, k' adre me húnâ anyidra je hele vat, ke wale hwakecidra ae kong hnyi hon je jei ödra ; anyin a g' adre ot gadra hnen tavat hwege hnyi úen adre me tiga möt. 28 Ke adre me he ka thu degeci u hnyi wanben tavat adre ca peritomonâ, me tha mokut me tavat adre hlingâ ge hele vat. 29 E bi Edoma me anyin je than me anyin je taben hia, waleji adre tha ip hnyi anyidra tang hwege unyin tavat adre hling' ödra ge hele vat : adre me he ka tha mokut me tavat adre ca peritomonâ, me tavat adre me utut ka hnyi thop. 30 E bi je thaniny hwadrö, ödra hia, me at Zidona hia, adre tha utut me tavat adre hling' ödra ; waleji hnyi ot adre oâ hnyi hwegiödra ödra hmehma but ; ke adre me mokut a g' adre ca peritomon, tha ödra me tavat adre hling' ödra ge hele vat, me tha hmehma me tavat adre me utut ka hnyi thop. 31 Ame he Farao ka ö'dra, me tubet can aten hia ae se : wale Farao me anyin utbavat hia, adre hling' ödra ge hele vat, haingen Than Iehova. 32 Anyin oge hia but ip m' adre me ot gan hnyi úen möt ; ke adre me he ka omokulec e unyin tavat adre ca peritomonâ, me tavat adre hling' ödra ge hele vat, a Farao me aten hia ae se, haingen Than Iehova.

### HNYIMAKAN 33.

**K**E ame o but könya hofuc ho Iehova ame ha, ka habe, 2 Nokon at lö, ha thö ka tavat aten em hnyei, me ha ködra ka habe, Oge ne oâ hele vat ka hnyi ke hnyei, ke a ne he tavat aten hnyei ka hom ke at gadra, me otilâ e hnân anyidra at hmâkâ : 3 ke e ka wâ hele vat ame o ka hnyi hnyei, me e ame tûâ trutru me kou ka tavat ; 4 ke haba at ame löng hwan trutru, ke ame ca vheno bi, ke ame ne o hele vat me hlingâ e, me ame he dren ka takou e bi. 5 E ame löng hwan trutru ke

EZEKIELA 33.

ame ca vheno bi; me ame he ka takou e hnen dren bi: ke so bi ame ne hia but long me ame ka omelo e bi. 6 Ke ame ne wa hele vat hnen at hmaka, k' ame ca tuu trutru, me ba haten ka tavat, me ame o but hele vat me hlinga ke at unyidra; me ame mekiny hwakecin ae kong, me oge me he ka elam dren bi unyin at hmaka. 7 Ke haba u nokon at, oge hia but otilo u hnân at hmaka lap anyi Isaraela; anyin a wale u me he ka long hofuc unyi hnyi hnyimok, me kou kodra bi unyi gak. 8 Iny ka ha ka at ae kong, ka habe, At ae kong lo, u me he ka mok, ke u me ca he bi ka fuc me kou ka at ae kong hnyi deny gethen; awe, ame he at eling ae kong ka mekiny hwakecin ae kong, ke oge me he bi nya ka elam dren gam. 9 Ke u je ne kou at ae kong he ka hmetu hnyi deny gethen, k' ame ca hmetu bi unyi hnyi deny gethen; awe, e ame he ka mekiny hwakecin ae kong, ke u bi u je omeli u.

10 Ke haba u, nokon at lo, ha tho ka lap anyi Isaraela, ka habe, Walang hnobun hna ha, ka habe, Huhmun bi anyihmun je monu ke anyihmun je bulo, ke ohmun e au tot hnyin; k' ohmun e he ka hawa he ka mot? 11 Ha tho kodra, ka habe, Kia inya inya, haingen Than Iehova, a oge me ca senyin bi ge mok anyin at ae kong; ke so bi me me he ka hmetu at ae kong unyi hnyi deny gethen me me mot: hmetu ju, hmetu ju obun unyi hnyi debun ta je gethen ae monu; ke ieu gabun m' obun e he ka mok lap anyi Isaraela? 12 Ke haba u, nokon at lo, ha tho ka lakon em hnyei, ka habe, Ame ca he hwakecin ae wisa anyin at ae wisa ka omelo e hnyi uen monu a e; ke haba hwakecin ae kong anyin at ae kong, me ame ca he ka ota e hnyi bong e ame hmetu unyi hnyi anyin hulö; k' ame ca he ka mot bi at ae wisa hwakecin hnen e hnyi bong e ame anyâ hnyin hulö. 13 Ke iny ka ha ka at ae wisa, ka habe, e ame he ka mot; k' ame ne he bi ka labageju hwakecin ae wisa, k' ame ne anyâ hulö bi, awe adre me ca he ka unykume hwakecin ae wisa; k' ame he bi ka mekiny hulö e ame anyâ. 14 Ke haba khaca, iny ka ha ka ke at ae kong, ka habe, U me he ka mok; ke e ame hmetu bi unyi hnyi anyin monu, me anyâ unyi ae wisa me unyi ae ucü; 15 k' ame ne he at ae kong ka ohmeto haten, k' ame ne ham hmetu unyi e ame huguna, me vheno je hnanyibuiny mot, ke ame ca anyâ bi monu;

awe, e ame ke ka mot, ke ame ca he bi ka mok. 16 Adre me ca he ka ha kau ke monu hnyi ta je monu e ame hia but anyâ; e ame hia but anyâ unyi ae ucü me wisa; e ame he ka mot. 17 Ke so bi haingen lakon em hnyei, ka habe, E ca ucü bi hwakecin Than: ke haba odra bi, e ca ucü hwakecidra. 18 E ka hwiö at ae wisa hnyi hwakecin ae wisa, me anyâ hulö, e ame he ka mekiny e. 19 Ke e ka hwiö at ae kong unyi hnyi anyin hulö, me anyâ unyi ae ucü me wisa, e ame he ka mot hnen e. 20 Ke so bi obun e ha bi, ka habe, E ca ucü bi hwakecin Than. Lap anyi Isaraela lo, oge me he ka ve owisai obun hoton je hwakecibun.

21 Ke haba hnyi huna a twelviny ba a ohmun, hnyi tehi a teniny, hnyi bong a faiviny tehi, ame o but konya ke at a kec mot uheny Jerusalema me ha, ka habe, Adre hia but kot taun. 22 Ke e huk hnyamö Iehova eja hnyi saha, ke tiga ca o at a kec mot; ke e ame hia but khong hnyimok, ke ne o but e ame o konya hnyi hnyomakatu; ke ame khong ut hnyimok ke oge ca hum hmetu bi. 23 Ke ame o but konya hofuc ho Iehova, ame ha, ka habe, 24 Nokon at lo, ame ha tavat adre me laba je dok ae hwahwacit ehele hnyi Isaraela, ka habe, Hake Aberahama thibi, ke e hu gan hnyei: ke ohmun se hia bi; ke adre hia but ha kohmun hnyei me me ihmun. 25 Anyin a wale, ha tho kodra, ka habe, Walang hna ha hnen Than Iehova, ka habe, Obun e han meno me dren, me bwele ka je idola, me hingala dra: k' ame ka he bi ka ibun hnyei? 26 Obun e tot me anyibun je hele vat, me anyâ unyi ae ikiki, me ve okongoa laaian keihen: k' ame ka he bi ka ibun hnyei? 27 Walang hofuc u me he ka ha kodra, ka habe, Walang hna ha hnen Than Iehova, ka habe, Kia inya inya a haba odra hnyi je dok ae hwahwacit adre me he ka ta ge hele vat, ke haba at ae hnyi ta hnyei, oge me he ka ham e ka je meno me me an e, ke haba odra a odra hnyi je hnaba me je op, adre me he ka mekiny mok ae cap. 28 Ke oge me he ka oba wan hnyei me me hnân laia, k' ame he ka um dö hmanenanginy maniny man; k' ame he ka ba wan je bucen Isaraela, ke ba at ame he ka vheno. 29 Me adre me he ka wa a inya Iehova, iny ka hia but oba wan hnyei me me hnân laia, can ta je hwakecin hia ae ikiki adre hia but anyâ. 30 Ke haba u, nokon at

lö, ame haiö u hnen lakon em hnyei hnyi je hna up hak, ke hnyi hwanumen je uma, k' adre me úhakouá, ka habe, Öbun mē he thö jem me löng hofuc ame o únyi ga Iehova. 31 Ke adre me he köu helá me hwakecin tavat, k' adre me laba hnyi hnyimákâm helá me lakeik, k' adre me löng hwâm hofuc, ke so bi adre me ca mádrâ: anyin adre me ha betenge ge ta je hnyimödra, k' adre me vheno hnödra hna behnyekon ge je hnyekudra. 32 Ke wâ bi, haba u, me u tha úcû me hhumöng ae kese anyin at ae so hwan, a at ae khana he ka ânyâ únyikhumöng ködra: anyin adre me löng hwam je hofuc ke adre me ca mádrâ bi. 33 Ke e ka hwádâ thö e (ke wâ bi, ame he ka hwádâ,) me adre me he ka wâ a g' ame hu perofeta unyidra.

## HNYIMAKAN 34.

**K**E ame o but könya hofuc ho Iehova ame ha, ka habe, 2 Nokon at lö, perofeta thö úcon tavat adre me tuö mamoe hnyi Isaraela, perefota thö, me ha ködra, wale ka tavat ádre me tuö memoe, ka habe, Walang hna ha hnen Than Iehova, ka habe, Ékölö ge tavat tuö mamoe hnyi Isaraela, wale tavat adre me ka ha ödra bi! hawa, ca hanyen bi tavat tuö mamoe he ka hân hnahat mamoe? 3 öbun e an je pipikhenya, ke khaú' öbun ge leúnen, ke hlingâ je at ae pipikhenya; ke so bi, öbun e ca hân je mamoe. 4 Öbun e ca hia but sihwegiâ ta je meno ae sēnyin, ke omelö at ae mok, k' öbun e ca ujâ meno ae hmetru jein, k' öbun e ca ohmeto je hna obâ, k' öbun e ca elâm at ae hia; ke öbun e hia but musi ödra hwege me oveci ödra. 5 Ke adre me ovesei ödra anyin ae ba at ame tuö: ke ame ön ödra thö ta je menoiny hnyot, k' adre me vese but. 6. Haba halek je mamoe adre me he monu hon je bucen me je hut hia ae görany: eke, ame vese thö halek ta je mamoe hon hmeledrany hia thithö; ke ba at ame elâm me hnö. 7 Anyin a wale, öbun tavat tuö mamoe lö, löng ju hofuc ho Iehova; 8 Haingen Than Iehova, ka habe, Kia inya inya, anyin adre hia but söh hnök hnahat mamoe, ke ka an dut je menoiny hnyot hia halek je mamoe, anyin ae ba at ame tuö, ke adre me ca elâm hnök hnahat mamoe hnen tavat tuö halek je mamoe, ke haba tavat tuö mamoe adre me ka ha ödra bi, me ca hân bi hnök hnahat mamoe; 9 anyin a wale, öbun

tavat tuö mamoe lö, löng ju hofuc ho Iehova; 10 Walang hna ha hnen Than Iehova, ka habe, Wâ bi, úcúk tavat tuö mamoe; ke oge me he ka elâm hnök hnahat mamoe unyidra, me ob' ödra m' adre me ca hân hmetu hnök hnahat mamoe; ke ame ca he hmetu tavat tuö mamoe ka ha ödra bi; ke oge me he ka hügúnâ hnök hnahat mamoe únyi hnyi je hnyimödra bi, me me ca ö 'dra hmetu. 11 Ke walang hna ha hnen Than Iehova, ka habe, Wâ bi, hamök he ka elâm hnök hnahat mamoe me elelâm. 12 Haba at tuö mamoe ame elam hnahat haleny hnyi úen e ame tha e me hnahat haleny mamoe adre vese, helâe oge me he ka elâm halek hnahat mamoe, ke oge me he ka hum ödra únyi hnyi je dok hia waleji adre vese ka hnyin, hnyi bong ae khömet me menekholom. 13 Ke oge me he ka su ödra úheny unyin tavat, me úkhacaköu ödra úheny hnyi je hnyei, me hum ödra ka hnyi idra; ke oge me he ka ha ödra hon je bucen Isaraela, hnyi je deny köiö, me hnyi je ke keihen hnyei adre me labâ. 14 Oge me he ka ha ödra hnyi je sajilat ae so; ke ame he ka hnen hagidra hon je bucen ae beú hnyi Isaraela: adre me he ka mokut eling hnyi hak ae so, me han hnyi sajilat ae hát hon je bucen Isaraela. 15 Inya oge me he ka hân halek hnahat mamoe, k' oge me he ka omokuli ödra, haingen Than Iehova. 16 Oge me he ka elâm at ae hia, me ohmeto hna obâ me ce ujâ at ae hmetru jein, me ohwegiâ at ae sēnyin, ke haba at ae pipikhenya ke at ae hwege, me oge me he ka ohia; k' oge me he ka ha ödra ge hna owisa. 17 Ke haba öbun hnök hnahat mamoe lö, walang hna ha hnen Than Iehova, ka habe, Wâ bi, oge me owisa ke meno me ke meno, a je mamoe бага tha ödra me je got бага. 18 Hawa, únyi ae úhnyúkong köbun wale hnöbun hna han hnyi sajilat ae so, me öbun e he minya ka uto bi ge calun kolon anyibun sajilat? ke öbun e ijem je an ae alai, me ohâeâ bi kolon ge je cabun? 19 Me haba halek mamoe, adre me an hnöbun hna uto ge cabun, me ijem hnöbun hna ohâeâ ge cabun.

20 Anyin a wale, walang hna ha hnen Than Iehova, ka habe, hamök a walönya ang, he ka owisa je meno ae pipikhenya me je meno ae delâ. 21 Anyin a öbun e hagutâ ge je vhak me je abeny, me kot tavat ae mok hia ge je faoibun, me öbun e ovesei ödra ohele; 22 anyin a wale oge

EZEKIELIA 35, 36.

me he bi nya ka omelö hnök hnabat mamoe, k' adre me ca he hmetu ka sei ödra ; k' oge me he ka owisa ke meno me ke meno. 23 Ke oge me he ka otílâ hudra ke at tuö mamoe e khaca, me e ame he ka ha ödra, a athnyabaik Davita ; ke hamen he ka ha ödra ; ke e at tuö mamoe ködra. 24 Ke inya Iehova Khongudrin, ke Davita athnyabaik tuhödra ; inya Iehova at ame ha. 25 Ke oge me he ka ânyâ úhihinköu úsoköu m' ödrin, ke oge me he ka ohia ta je meno ae kong únyi hnyi hnyei : ke adre me he ka laba khötkic hnyi hnyebuba, ke mokut hnyin : hnyi hnyot. 26 Ke oge me he ka wi' ödra ke ta je dok igigili ödra, me me anyik hut ae hnahic ; ke oge me he ka öta we hnyi úen ; k' ame he ka ta hnahic helâ me we. 27 Ke ame he je úöiny hnyei ka wa, k' ame he kânâ ka ham jeúiny, k' adre me he ka laba khötkic hnyi idra ; me adre me he ka wâ a inya Iehova, iny ka hia but thu je venyâiny hna úhúkâlaköu ödra, me omeli ödra únyi hnyi hnyamen tavat adre me thalu ödra. 28 Ke adre me ca he hmetu ta je hnyei ka sei ödra, ke ame ca he ka ön ödra hnen ta je menoiny hnyot ; ke adre me he ka laba khötkic, ke ba at ame he ka ooti ödra. 29 Ke oge me he ka okúâ hobi ködra ke úö ae lung, ke adre me ca he hmetu bi ka obi' ödra ge hmiâ hnyi hnyei, ke ame ca he hmetu bi ta je hnyei ka ohmehmai ödra. 30 Ke adre me he ka wâ a inya Iehova Khongudrin ame tha e m' ödra, ke haba ödra, wale lap anyi Isaraela, a je lakeik, haingen Than Iehova. 31 Ke haba öbun halek je mamoe, je mamoeiny ta ik, öbun je at, ke inya Khongubun, haingen Than Iehova.

HNYIMAKAN 35.

**K**E ame o but könya hofuc ho Iehova ame ha, ka habe, 2 Nokon at lö, hnyimákâm dö ka bucen Seira, me perofeta úcon, 3 me ha kâu, ka habe, Walang hna ha hnen Than Iehova, ka habe, Wâ bi, úcúk u bucen Seira, ke oge me he ka hai hnyamök úcom, ke oge me he ka öba wan gam me me hnân láiiâ. 4 Oge me he ka öba önyen ânyâm je taun, ke u me he ka ba wan, ke u me he ka wâ a inya Iehova. 5 Anyin a hwân ehac ânyâm hmönyin, ke u je hia but hna but lakon Isaraela ka hnyi maniny hele vat hnyi úen anyidra vec, hnyi úen umo hwakecin ae kong : 6 anyin a wale, haingen Than

Iehova, ha habe, Kia inya inya, a oge me he ka ip u hobi kâu dra, ke ame he dra ka hnu u : u je ca ikiki ge dra, awe, ame he dra ka hnu u. 7 Helâe oge me he ka hna bucen Seira me me hnân láiiâ me ba but wan ; ke oge me he ka subâ degecâ únyi hnyin e at ame vheno me at ame hmetu. 8 Ke oge me he ka öunöngötâ je buceniny ge je kokiny : hnyi ânyâm je hut, me ânyâm je hnyigöulen hut me ânyâm je deny köiö hia, adre me he ka ta ge hele vat. 9 Oge me he ka wiö u me me ba wan nyiele balua, ke adre me ca he ka labâ ânyâm je taun : ke öbun e he ka wâ a inya Iehova. 10 Anyin a u je ha, ka habe, Ame he ka ik bi li aten hnyei ang a lo me li hnyei ang a lo, ke öhmun e he ka labâ e ; ke so bi waleji eling Iehova : 11 anyin a wale, haingen Than Iehova, ka habe, Kia inya inya, a oge me he ka ânyâ helâ me ânyâm hmönyin, ke hoton hnâm hna behnyekom wale ae manen gam hnyi hnâm hna hmönyin ködra ; ke adre me he ka ö nya iny ka bi hwaban köu. 12 Me u me he ka wâ a inya Iehova at ame long hia hnâm hna bi gan waleji u je hia but haiâ je bucen Isaraela, haingâm ka habe, E ba but wan, k' adre hna but köhmun he ka han. 13 Ke öbun e hia but bi gan könya ge je hnyimöbun, me osehia hobun je hofuc könya : oge me löng ut. 14 Walang hna ha hnen Than Iehova, ka habe, E ka senyin hia hmeledrany, me oge me he bi nya ka öba wan gam. 15 Helâji me hnâm hna senyin anyin ae ba wan lap anyi Isaraela, helâe oge me he ka ânyâ köu : bucen Seira lö, ke Edoma hia, u me he ka ba wan, wale hia thibut : m' adre me he ka wâ a inya Iehova.

HNYIMAKAN 36.

**K**E haba u, nokon at lö, perofeta thö ka je buceniny Isaraela, me ha, ka habe, Je buceniny Isaraela lö, löng ju hofuc ho Iehova. 2 Walang hna ha hnen Than Iehova, ka habe, Anyin a iwahnaihmiöny ame hia but ha gam, ka habe, Öhö ! ihmun dut je dok ae görany a je dok kâú adrem : 3 anyin a wale perofeta thö, me ha, ka habe, Walang hna ha hnen Than Iehova, ka habe, Can, anyin adre me öba wan gabun, ke ön öbun hnyi je ke keihen gabun, m' öbun e iny je kolon ta je hnyei, ke adre me hai öbun hnen tavat fufuc, k' adre me haikongu öbun hnen tavat : 4 anyin a

wale, öbun je buceniny Isaraela lö, löng ju hofuc hwan Than Iehova, ka habe, walang hna ha hnen Than Iehova ka ta je bucen me ta je hut me je deny köiö, me je hnyigöulen bucen, me je hnyebuba ae ba aten, me je taun adre me hna degecâ, wale a hnân söh me ou hnen kolon ta je hnyei igigilö : 5 anyin a wale, walang hna ha hnen Than Iehova, ka habe, Haba hnyi meiciny anyik ciâ oge hia but ha ka je kolon je hnyei, me ka Edoma hia, waleji adre hom ik hnyei me me idra a hnyi senyin hnyok ae bekhöt, me hnyi hûkhötiâ hnen oûnykûm, he ka hna degecâ e hnân söh : 6 anyin a wale perofeta thö ka hnyei Isaraela, me ha ka je bucen me je hut, me je deny köiö me je hnyigöulen ta je bucen, ka habe, Walang hna ha hnen Than Iehova, ka habe, Wâ bi, inya oge hia but ha hnyi anyik ciâ, me anyik hmönyin, anyin ame hihmehm' öbun ta je hnyei ; 7 anyin a wale, walang hna ha hnen Than Iehova, ka habe, Oge hia but hai hnyamök, haingök, E hnathu ame he je hnyei igigili öbun ka hmehma ka únyi gadra bi. 8 Ke haba öbun, je bucen Isaraela lö, ame he ka vhei anyibun ta je anginy, me wa hobi kâu lakeik a Isaraela ; anyin a ödra hakekeny jut he ka o. 9 Anyin a wâ bi, inya oge me tha e möbun, ke oge me he ka hwiö köbun, ke adre me he ka trohnen me belöki öbun : 10 ke oge me he ka osehia tavat unyibun, lap hia anyi Isaraela, wale hia thibut : ke adre me he ka labâ je taun, me op je dok ae ba wan : 11 ke oge me he ka osehia tavat me menö unyibun ; ke adre me he ka osehia me si : ke oge me he ka olab' öbun helâ me bongubun ehac, me ânyâ gan hmâ so köbun hon ehac a bân' : me öbun e he ka wâ a inya Iehova. 12 Eke, oge me he ka ovhenö tavat hubun, wale lakeik a Isaraela ; ke adre me he ka hum u me idra, ke u me he ka hnân jekhoüdra, ke u me ca he hmetu ka öba lakudra. 13 Walang hna ha hnen Than Iehova, ka habe, Anyin adre me ha köbun, ka habe, U bi hnyei, at ame an tavat me öba lakon hnyei ; 14 anyin a wale u me ca he hmetu ka an tavat, me öba lakon em hnyei, haingen Than Iehova ; 15 ke oge me ca he hmetu ka ha gam hmehma anyin ta je hnyei, ke ame ca he hmetu je hnyei ka haikongu u, ke u me ca he hmetu ka othöâ em hnyei, haingen Than Iehova.

16 Ke ame o but minya könya hofuc ho Iehova ame ha, ka habe, 17 Nokon at lö,

hnyi ün waleji ame laba at Isaraela hnyi idra hnyei, me adre me okongoâ ge hwakecidra me hnödra hna ânyâ : haba hwakecidra hnyi hnyimakök me helâ me úkonginy momo ame hom bongon omomo. 18 Anyin a wale oge me hingâlâ anyik hmönyin hudra, can dra adre hia but hingâlâ hon kânâ, ke can adre me okongoâ e hnen khongudrin je khong : 19 me oge me ovesei ödra unyin ta je hnyei, me adre me ob' ödra unyin tavat : ke oge me bi hwaban ködra hoton hwakecidra ke hnödra je hna ânyâ. 20 Ke hnyi ün adre me o ka hnyi je hnyei, waleji adre me he ka hnyin, me adre me okongoâ iök ae kap ; anyin ame ha tavat gadra, ka habe, Ta je atö Iehova ang, k' adre me he but úhedra hnyi iny hnyei. 21 Ke so bi oge me betenge, can iök ae kap waleji ame haikongoâ hnen lap anyi Isaraela unyin ta je hnyei, a je hnyei adre me he ka hnyin. 22 Anyin a wale ha thö ka lap anyi Isaraela, ka habe, Walang hna ha hnen Than Iehova, ka habe, Lap anyi Isaraela lö, oge me ca ânyâ e can öbun, ke so bi can iök ae kap, waleji öbun e hia but haikongoâ hnyi ta je hnyei, waleji öbun e he ka hnyin. 23 Ke oge me he ka okabâ iök ae gan, waleji adre me haikongoâ unyin ta je hnyei, wale öbun e hia but haikongoâ hnyi wanbödra ; me ame he je hnyei ka wâ a inya Iehova, iny ka okabi nya bi gabun hnyi hnyimaköbun, haingen Than Iehova. 24 Anyin a oge me he ka hum öbun unyin tavat, me úkhacaköu öbun únyi hnyi je hnyei hia, me hum öbun ka hnyi ibun. 25 Ke oge me he ka dukâi' öbun ge köiö ae alai m' obun e he ka kalaöt ut : ke oge me he ka obosoi öbun únyi hnyi hwakecibun ae ikiki hia, me khongubun je khong hia. 26 Ke oge me he bi minya ka ham köbun hnyok ae teb únyi, me ip hanu ae teb únyi eü hnyibun ; ke oge me he ka hom hnyok ae veto únyi hnyi je unyibun, ke oge me he ka ham köbun hnyok ae utiö. 27 Ke oge me he ka ip hanuk eü hnyibun, me wi öbun he ka vhenö anyik je hnanyibu, m' öbun e he ka tuö hnök je hna owisa, me ânyâ. 28 Me öbun e he ka laba hnyi hnyei waleji oge me ham ka lakamöbun ; ke öbun e he ka lakeik, ke oge me he ka Khongubun. 29 Ke oge me he ka omeli öbun únyi hnyi hwakecibun ae ikiki hia : ke oge me he ka hawa hwit, me osehia e, ke oge me ca he ka kunâ köbun hmiâ. 30 Ke oge me he ka osehia ta je wan üö, me

jeúiny káná, m' adre me ca he hmetu ka haikongu öbun can hmiá unyin ta je hnyei. 31 Ke öbun e he ka únykúme ta je hwakecibun ae kong, me hnöbun je hna ányá ae ca so; ke öbun e he ka húkötí öbun bi hnyi hnyimaköbun bi can anyibun ta je hulö me hwakecibun ae ikiki. 32 Oge ca ányá e can öbun, e so öbun e tremángá e, haingen Than Iehova: hamöbun he ka hmehma me hlohlo can ta je hwakecibun, lap anyi Isaraela. 33 Walang hna ha hnen Than Iehova, ka habe, Haba hnyi bong oge me he ka okalaöti öbun únyi hnyi anyibun je hulö hia, me oge me he minya ka olab' öbun hnyi je taun, ke adre me he ka op je dok ae ba wan. 34 Ke adre me he hmetu ka belöká káná ae ba wan, ke so bi, e ba wan ehac hnyi hnyimaködra hia adre me he hnyin. 35 Ke adre me he ka ha, ka habe, Haba hnyei ang waleji ae ba wan, me úcú bi me hnyei Edena; ke adre up haginny me labá je taun waleji ae ba wan, me ba aten, me ve ta únyi. 36 Me ame he ka khana hnen je hnyei a je kolon igigili öbun, a inya Iehova at ame op hmetu je hnyaba adre hota degecá, me belöká je dok ae ba wan: inya Iehova at ame ha, ke oge me he ka ányá.

37 Walang hna ha hnen Than Iehova, ka habe, Can únyi e, hamen lap anyi Isaraela he ka elám unyik, he ka ányá hobi ködra; oge me he ka osehi' ödra helá me hnahat mamoe. 38 Adre me he ka öunöngotá je taun wale ae ba wan hnen ta je deö at, helá me hnahat meno hobi káu taben bi hut, ke helá me hnahat meno hnyi Jerusalema hnyi je bijeú adre thu: me adre me he ka wá a inya Iehova.

### HNYIMAKAN 37.

**K**E ame o but huk hnyamö Iehova, ke e ame hum nya hnyi hanu Iehova, me ip nya hnyi wanben hnyigöulen bucen; ke e unöngöt ge je jö; 2 ke e ame hum nya eling igigilö, ke wá bi, e ti se hia je jö eú hnyi hnyigöulen bucen; ke wá bi e ti löulöu but je jö. 3 Ke e ame ha könya, ka habe, Nokon at lö, hawa, e khana je jö eling he ka möt? Me haingök, ka habe, Than Iehova lö, e manen köu. 4 Ke e ame ha minya könya, ka habe, Perofeta thö hon je jö ejo, me ha ködra, ka habe, Je jö ae löulöu but lö, löng ju hofuc ho Iehova. 5 Walang hna ha hnen Than Iehova ka je jö ang, ka habe, Wá bi oge me he ka odilá

homená ka hnyi je hnyibun m' öbun e he ka möt dö. 6 Ke oge me he ka ip je töiny unyibun, me bi vibun, me lan öbun ge unen, me odilá homená hnyi hnyibun, m' öbun e he bi ka möt; me öbun e he ka wá a inya Iehova. 7 Me oge me perofeta helá me hna húna könya: ke oge me tiga perofeta, me e hu mede, ke wá bi hwiöi, me ame úheköu ta je jö, a ke jö ka ke jö. 8 Ke inya oge me wá, me wá bi, e hu gadra ta je tö, k' ame kú viny, k' ame lan bi e ge unen: ke ba homená eú hnyidra. 9 Me e ame ha könya, ka habe, Nokon at lö, perofeta thö ka ang, perofeta thö me ha ka ang, ka habe, Walang hna ha hnen Than Iehova, ha habe, Homená lö, aiö u únyi hnyi je ang a vak, me mená ka hnyi hon je hna hlingá ejo, m' ödrin e he ka möt bi. 10 Me oge me perofeta helá me hnen hna húna könya, me ame dit hnyi hnyidrin homená, m' ödrin e möt dö, m' adre me tot ge cadra, a utbavat ae gan hmá hmönyin. 11 Me e ame ha könya, ka habe, Nokon at lö, haba je jö eling, me wale lap anyi Isaraela hia: wá bi, adre me ha, ka habe, E löulöu but je jeiöhmun, ke hia but anyihmun geju; k' adre hia but subá degeci öhmun. 12 Anyin a wale, perofeta thö me ha ködra, ka habe, Lakeik lö, wá bi, oge me he bi nya ka khöng ta je hubun, me höi öbun únyi hnyi je hubun, haingen Than Iehova; ke oge me he ka hum öbun ka hnyi hnyei Isaraela. 13 Me öbun e he ka wá a inya Iehova, lakeik lö, iny ka hia but khöng je hubun, me höi öbun únyi hnyi je hubun. 14 Ke oge me he ka ip hanúk eú hnyi hnyibun, ke öbun e he ka möt, ke öge me he ka ip öbun hnyiibun hnyei: me öbun e he ka wá a inya Iehova at ame ha e, me ányá e, haingö Iehova.

15 Ke ame o minya könya hofuc ho Iehova ame ha, ka habe, 16 Nokon at lö, hom dö ke ong utö, me sihnalimen hon e, ka habe, Hnân höbi káu Juda, me lakon Isaraela a je lahanen: ke u ma hom dö ke ong utö minya me sihnalimen hon e, ka habe, Hnân hobi háu Iosefa, ong utö anyin Eferaima, me hobi káu lap anyi Isaraela a je lahanen: 17 ke úhújaköuáju me me khaca thibi utö, m' ödra me khaca thibi hnyi hnyamám. 18 Ke e ka ha köu lakon em hnyei, ka habe, Hawa, u me ca he ka omanená köhmun bongon ta je únyi e! 19 me u me he ka ha ködra, ka habe, Walang hna ha hnen Than Iehova, ka habe, Wá bi oge me he ka hom ong utö

EZEKIELA 38.

anyin Josefa a e hnyi hnyamen Eferaima, me je tribu Isaraela a lahanen ; ke oge me he ka tha ip mē, wale ong utō anyin Juda, me wia me me khaca thibi utō, ke adre me he ka khaca hnyi hnyamök. 20 Ke haba li ong utō waleji u je sihnalimen hon me ame he ka e hnyi hnyamâm hnyi hnyimäködra. 21 Ke ha thö ködra, ka habe, Walang hna ha hnen Than Iehova, ka habe, Wâ bi, oge me he ka hom je lakon Isaraela únyi hnyi wanben je hnyei, wale adre me he ka hnyin, me úkhacaköu ödra úhedra e he, ke oge me he ka hum ödra ka hnyi idra hnyei : 22 ke oge me he ka wi' ödra hnan hnyei a khaca hnyi kânâ, hnyi je bucen Isaraela : k' ame he than a khaca ka tuhödra hia : k' adre me ca he hmetu ka lo li hnyei, ke adre me ca he hmetu bi ka kia luâ me me lo li dökhu : 23 ke adre me ca he hmetu bi ka kong ge anyidra je idola, me anyidra ta je únyi ae ikiki, me hnödra je hna hanyâúâ hia : ke oge me he ka omeli ödra únyi hnyi je hnyabadra hia waleji adre ânyâ monu hnyin, ke oge me he ka obosoi ödra : helâe adre me he ka lakeik, ke oge me he ka Khongudrin. 24 Ke ame he Davita athnyabaik ka bi tuhödra ; ke ame he ka khaca at ama tuhödra helâ me hnahat mamoe : k' adre me he ka vheno hnök je hna owisa, me tuö anyik je hnanyibu, me ânyâ. 25 Me adre me he ka labâ hnyei waleji oge me ham kö Jakob athnyabaik, waleji a labâ ge iakamöbun ; k' adre me he ka labâ e, ödra, me lakudra, me laöbidra nyiele balua : k' ame he Davita athnyabaik ka tuhödra nyiele balua. 26 Ke oge me he ka ânyâ m' ödra úhinyökü üsoköu : me úhinyökü a nyiele balua m' ödra : me oge me he ka ti ödra, me osehi' ödra, me ip unyidra anyik dok ae kap nyiele balua. 27 Me ame he ka laba unyidra umök uma mano ; ke oge me he ka Khongudrin, k' adre me he ka lakeik. 28 Me ame he je hnyei ka wâ a inya Iehova at ame okabi Isaraela, e ka e bi unyidra anyik dok ae kap nyiele balua.

HNYIMAKAN 38.

**K**E ame o but könya hofuc ho Iehova, ame ha, ka habe, 2 Nokon at lö, hnyimákâm dö kö Gog, aten Magog, a tuhan Rosha, me Meseka, me Tubala, me perofeta úcon, 3 me ha, ka habe, Walang hna ha hnen Than Iehova, ka habe, Wâ bi, úcük u Gog, tuhan Rosha, me Meseka, me

Tubala : 4 ke oge me he ka ohmetu u, me det hnyimâm ge je wage, me oge me he ka lili u but, me ânyâm utbavat hia, je hors, me tavat tabö hors, adre me khavâ khaüen vat ae bekhöt, a bunyen ae gan hmâ, tavat ae hu gadra bec, me bec ae gan, ödra hia adre me hok hele vat : 5 Peresi, me Aithiop, me Futa, unyidra ; tavat hia ae ve hu bec me hnabecen vat : 6 Gomera me anyin je deö vai hia ; lap anyi Togarema úhedra hnyi hwadrö hmönyin, me anyin je deö vat hia : e se hia je hnyei adre me tha ödra möu. 7 Penapena wia thö, eke u ma ka penapenö u bi, u me je deö vat adre me ukhacaköu unyâm, ke u ma he ka taben ködra. 8 Ke hwaban je bong ae se hia adre me he ka senö u : ke hnyi je huna a biliny u me he ka o ka hnyi hnyei adre ohmeto únyi hnyi hele vat, wale adre úkhacaköu únyi hnyi je hnyei ae se hia, hon je bucen Isaraela ae itremacat but ehac : ke adre hom e únyi hnyi je hnyei, ke adre me he ka laba khötkic ödra hia thithö. 9 Ke u me he ka ölö me o helâ me weneú, u me he ka helâ me úlá ame tube hnyei, u, me ânyâm je deö vat hia, me je hnyei ae se hia tha ödra möu. 10 Walang hna ha hnen Than Iehova, ka habe, Hnyi úen eling, ame he ka o je únyi hnyi hnyekom, ke u me he ka hu hna únykúme ae kong : 11 ke u me he ka ha. ka habe, Oge me he ka he ka hnyi hnyei ae hu je taun hnyin ae ba haginý ; oge me he ka he ködra tavat adre me laba sot, adre me laba khötkic, ödra hia adre me laba ke ba hak adre op, ke ba ohmâiny me hlinginy homagöule : 12 he ka hom hna söh, me hna húgúnâ ; me he ka wia hnyamâm ka hnyi je dok ae ba aten ehac ke adre me labâ walang ang, me ka tavat adre úkhacaköu únyi hnyi je hnyei, tavat a ödra tren je meno me omjeú, tavat adre me laba hnyi wanben hmeledrany. 13 Ame he Sheba ka ha köu, me Dedana, me tavat adre me úcú úhedra Tasesa, me je nak lionainy hia, ka habe, Hawa, u je o ka hom hna söh ? u je hawâ ânyâm úkhacaköu he ka hom hna húgúnâ ? he ka sukhoúnö sileva me gol, he ka hom ta je meno me omjeú, he ka hom hna söh ae gan ?

14 Anyin a wale, nokon at lö, perofeta thö me ha kö Gog, ka habe, Walang hna ha hnen Than Iehova, ka habe, Hnyi bong eling e ka laba khötkic lakeik a at Isaraela, hawa ame ca he ka khanö u ? 15 Ke u me he ka o úhem hnyi hnâm, je ke keihen ae

sákâû hnyi hwadrö, u, me je hnyei ae se a tha ödra möu, tavat tabö hors hia bunyen ae gan, me utbavat ae gan hmâ: 16 ke u me he ka o úcon ik hnyei a Isaraela, helâ me úlá ame tube hnyei; ame he ka o hnyi je bong a biliny, me oge me he ka oi u ka hnyi ik hnyei, me me wâhmakhmetu u, iny ka kap gam Gog lö, hnyi hnyimaködra. 17 Walang hna ha hnen Than Iehova, ka habe, Hawa, u e at waleji oge ha ehac a deny je athnyabaik a je perofetainy Isaraela, tavat adre me perofeta hnyi je bong eling hnyi je huna ae se hia, a oge me he ka oi u úcúdra? 18 Ke haba hnyi bong eling, bong a o hnyin Gog úcon hnyei Isaraela, haingen Than Iehova, ame he ka manen anyik hmönyin hnyi hnyimakök. 19 Anyin a oge hia but ha hnyi hnök hna ciâ, ke hnyi meicin anyik hmönyin, ka habe, E hnathu hnyi úen eling ame he ka hu hwiöi ae gan hnyi hnyei Isaraela; 20 m' adre me he ka öbubuny ge hnyimakök ta je wâ eü hnyi köiö, me ta je meno ame gâ ethö, me je menoiny hnyot, me ta je únyi hia ame iyâú wale adre me iyâúâ kânâ, me tavat hia hon kânâ, k' ame he je bucen ka kölu, k' ame he ka ta je dok ae hwatapkölu, k' ame he je hna up veto hia ka ta hnyikânâi. 21 Ke oge me he bi nya ka hawâ hele vat úcon hnyi anyik ta je bucen hia, haingen Than Iehova; k' ame he anyidra je hele vat ka ve úcon tavat hia. 22 Ke oge me he bi nya ka ivinö úcon ge mok ae cap me dra, ke oge me he ka kunâ kâu, me ka anyin je deö vat, me je hnyei ae se hia unyin, we ae gan, me we wahma ae gan, me meic, me teio. 23 Ke oge me he ka oganö nya, me okabi nya bi, ke oge me he ka manen hnyi hnyimakan je hnyei ae se hia; me adre me he ka wâ a inya Iehova.

## HNYIMAKAN 39.

**K**E haba u, nokon at, perofeta thö úcon Gog me ha, ka habe, Walang hna ha hnen Than Iehova, ka habe, Wâ bi, úcük u Gog lö, tuhan Rosha, me Meseka, me Tubala: 2 ke oge me he ka ohmetu u, me lili u, me oi u úhem hnyi hwadrö hmönyin; ke oge me he ka hum u ka hnyi je bucen Isaraela: 3 ke oge me he ka kot degecâ ânyâm cafana únyi hnyi hnyamâm a mem, me okolo ânyâm je fana únyi hnyi hnyamâm a metâm. 4 U me he bi ka ta hnyi je bucen Isaraela, u, ke ânyâm je deö vat hia, me ta je hnyei unyâm: oge me he

ka hnö u ka ta je meno ame gâ a ödra behan, me menoiny hnyot he ka an. 5 U me he ka ta hnyi ta hnyei: anyin oge hia but ha, haingen Than Iehova. 6 Ke oge me he ka kunâ meic kö Magog, me ka tavat adre me laba khötkic hnyi je bomene: me adre me he ka wâ a inya Iehova. 7 Ke oge me he ka omanená iök ae kap hnyi wanben ik hnyei a Isaraela; ke oge me ca hn' ödra hmetu he ka haikongoâ iök ae kap: ke ame he je hnyei ka wâ a inya Iehova a kabi Isaraela. 8 Wâ bi, ame o but, k' ame he ka hwádâ but, hangen Than Iehova; walang bong waleji oge ha. 9 Ke ame he tayat adre me labâ je taun Isaraela ka hú meic, me thong degecâ je únyi hnân vat, wale je bec, me je bec ae gan, je cafana me fana, me je ong ö, me je ö, ke adre me he ka thong degecâ ge meic hnyi seven je huna: 10 m' adre me ca he ka thigö hnyi hnyei, me si utö hnyi hnyot; anyin adre me he ka bi meic ge ta je únyi hnân vat: ke adre me he ka söh tavat waleji adre me sei ödra, me hügúnâ únyi ge tavat adre me hügúnâ gadra, haingen Than Iehova.

11 Ke haba hnyi bong eling, oge me he ka hna kö Gog ke dok hnân khön komok hnyi Isaraela, wale hnyigöulen bucen anyin tavat adre me he hnyi ke keihen e deiö hnyi köiö: ke ame he ka hlöng gethen ka tavat adre me he: ke adre me he ka könim Gog me anyin je deö vat hia eling: ke adre me he ka hwenyi ien e Hnyigöulen bucen Hamona-gog. 12 Ke seven je tehi ame he lap anyi Isaraela ka labö könim ödra, m' adre me obosoâ hnyei. 13 Eke, ame he tavat hia thithö hnyi hnyei ka hnyi könim ödra; ke ame he ka hnân ölungi ödra hnyi bong adre me oganö nya hnyin, haingen Than Iehova. 14 Ke adre me he ka úca tavat he ka huliwa hmâ he ka vhenö hnyei m' adre me konâm tavat adre me he, a je kolon hon kânâ, he ka obosoâ e: ke e ka um dö je tehi a seven, adre me he ka elâm. 15 Ke haba at ame vhenö hnyei ame he ka he hnyin; ke at ka wâ jeien komok, e ame he ka otilâ haten hnyin e, ke ne o but adre hia but konâm e hnen tavat adre me konâm hnyi hnyigöulen bucen a Hamona-gog. 16 Ke adre me he minya ka hwenyi ien ke taun, ka habe, Hamona. Helâe adre me he ka obosoâ hnyei.

17 Ke haba u, nokon at lö, walang hna ha hnen Than Iehova, ka habe, Ha thö ka je meno hia ame gâ, me je menoiny hnyot



hia, ka habe, Ûkhacaköu thö, ke ai öbun ; ùkhacaköu ùhebutun hnyi je ke keihen hia ka hnyi anyik hut wale oge me hudo hobi köbun, a hut ae gan hmâ walethö hon je bucen Isaraela, m' öbun e he ka an utiö me ijem dra. 18 Ke öbun e he ka an utiöiny tavat ae hwege, ke ijem dren je taben eang hmelen, ke je mamoe бага, me je nokon mamoe, me je got, me je bolok, a je meno hia ae pipikhenya únyi hnyi Basana. 19 Ke öbun e he ka an pipikhenya me sekubun, me ijem dra me monu but, únyi hnyi anyik je hut oge hia but hudo hobi köbun. 20 Ke öbun e he ka sekon hnyi anyik laulau ge je hors me je kariota, me tavat hwege, me tavat vat hia, haingen Than Iehova. 21 Ke oge me he ka ip anyik hmanenang hnyi ta je hnyei, k' ame he je hnyei hia ka wâ hnök hna owisa waleji oge me ányâ, me hnyamök waleji oge me ip hudra. 22 Me ame he lap anyi Isaraela ka wâ a inya Khongudrin, hwân hnyi bong eling ke ne o but nyiele. 23 Me ame he ka manenka ta je hnyei a g' adre hwenbâ lap anyi Isaraela can anyidra hulö ; can adre me ányâ hwakecin ae kong könya, me oge me ikhâlâ hnyimakök gadra : me oge me hn' ödra ka hnyi hnyamen je iwahnaihmiöny mödra, m' adre me ta hia but ge hele vat. 24 Oge me ányâ ködra hoton anyidra bo kong, me hnödra hna hanyâûâ ; me oge me ikhâlâ hnyimakök gadra.

25 Anyin a wale, walang hna ha hnen Than Iehova, ka habe, Oge me he walang ang ka ohmetu Jakob úheny hnyi hna bâ, me betenge hia ge lap anyi Isaraela ; me oge me he bi nya ka ciâ can iök ae kap. 26 Ke adre me he ka vheno anyidra hmehma, ke hwakecidra ae kong waleji adre me ányâ könya, ödra ka he ka laba hnahic hnyi idra hnyei, ke ba at ame he ka oot' ödra ; 27 ke iny ka hia but ohmetu ödra úhedra hnyi je hnyei, me ùkhacaköu ödra úhedra hnyi je hnyei iny je iwahnaihmiöny mödra, ke iny kap ut gadra hnyi hnyimakan je hnyei ae se hia. 28 Me adre me he ka wâ a inya Iehova Khongudrin, anyin oge me kun' ödra ka bâ hnyi je hnyei, ke oge hia but ùkhacaköu ödra ka hnyi idra bi ; ke oge me ca he hmetu ka hna degecâ ke at gadra nyiele ; 29 ke oge me ca he hmetu ka ikhâlâ hnyimakök gadra : anyin oge hia but hingâlâ hanuk hon lap anyi Isaraela, haingen Than Iehova.

## HNYIMAKAN 40.

**H**NYI huna a twente faiviny bâ a öhmun, hnyi hnyimakan huna, hnyi bong a teniny tehi, hnyi huna a foininy hwaban hna kot taun, hnyi bong a ka e, ame e bi huk hnyamö Iehova, ke e ame hum nya kâ e. 2 Hnyi je hna omanenâ únyi ge Khong e ame hum nya ka hnyi hnyei Isaraela, me ip nya hon bucen ae beú göranyai, ke haba hnyi hon e e hu helâke bongon ke taun hnyi hwaiöu. 3 Ke e ame hum nya kâ e, ke wâ bi elingat, haba unyin me helâ me bras, ke e hnyi hnyamen tö lino, me hlowe tulut ; ke e ame tot hnyi homagöule. 4 Ke ame ha könya at, ka habe, Nokon at lö, wâ thö ge li emâkâm, ke löng dö ge li hnyikönyâm, ke wâhukhmetoâ thö ta je únyi hia wale oge me he ka omanenâ köu ; anyin adre hum u kââng m' oge me he ka omanenâ köu ta je únyi e : omanenâ thö ka lap anyi Isaraela ta je únyi hia thithö u me he ka wâ.

5 Ke wâ bi, hna up hak veto hoton uma igigilö, ke e bi hnyi hnyamen at hlowe tulut a siks je kubit ibeüen, a je kubit me hnyam : ke e ame tuluto úlauen uma, khaca hlowe ; ke khaca hlowe ibeüen göranyai. 6 Me e ame o but hnyi homagöule e deiö, me ölö hnyi wacûatiny ; ke e ame tuluto baten homagöule khaca hlowe úlauen ; ke habe ke baten me khaca hlowe úlauen. 7 Ke haba hnyenle me khaca hlowe ibeüen, ke khaca hlowe úlauen, ke haba dok hnyi wanben je hnyeule, me faiv kubit ; ke haba baten homagöule hnyi baten poretikoiny homagöule eiö hnyin, me khaca hlowe. 8 E ame tuluto poretikoiny homagöule eiö hnyin, a khaca hlowe. 9 Ke e ame tuluto poretikoiny homagöule a eit kubit ; ke je hmolominy úsa lo li kubit ; ke haba poretikoiny homagöule, me eiö hnyin, cico uma. 10 Ke haba je hnyeule hnyi homagöule e deiö, me kun hnyi ke keihen, ke kun hnyi ke keihen ; a khaca tulut hia : ke khaca tulutiny je hmolom hnyi li ke keihen a lo. 11 Ke e ame tuluto úlauen homagöule ten je kubit ; ke haba ibeüen homagöule me thötin je kubit ; 12 ke haba hnyigöulen cico je hnyeule, me khaca kubit, ke khaca kubit hnyigöulen hnyi ke keihen ; ke haba ta je hnyeule, me úsa siks je kubit hnyi ke keihen, ke siks je kubit hnyi ke keihen. 13 Ke e ame tuluto homagöule hwân hnyi

hon ke hnyeule ka hnyi hon khaca, ke haba úlaueu me twente faiv je kubit; ke hwanuma cicö ke hwanuma. 14 Ke e ame ányá minya je hmolom a sikste je kubit; ke haba hnyeule me ame o ke ne o but hmolom, ke homagöule e igigilö. 15 Ke hwân hnyi hnyimakan homagöule adre me dit hnyin, ke ne o but hnyi hnyimakan poretikoiny homagöule eiö, me fifte je kubit. 16 Ke e hu je mamalama adre me hlöng hnyi je hnyeule, ke e hnyi je hmolominy eiö hnyi homagöule igigilö, ke helâe ka hnyi je poretiko: ke hu je mamalama igigilö eiö: ke ve hu je pama hnyi je hmolom.

17 Ke e ame hum nya ka hnyi hnyeule eü, ke wâ bi wale je hnyeule me je hna bi dek veto adre me ányá hobi kâu hnyeule igigilö: thöte je hnyeule hon hna bi dek veto. 18 Ke haba hna bi dek veto hnyi ke keihen homagöule helâ me ibeüen je homagöule, wale hna bi dek veto eü. 19 Ke e ame tuluto úlaueu hwân hnyi hnyimakan homagöule eü ke ne o but hnyi hnyimakan hnyeule eiö me hoton, wan haded je kubit, hnyi ke keihen e deiö, me hwadrö. 20 Ke haba homagöule eü ame hnyimakan ka hnyi hwadrö; ke e ame tuluto ibeüen e, me úlaueu e. 21 Ke haba je hnyeuleiny, me kun hnyi ke keihen ke kun hnyi ke keihen: ke haba je hmolominy me je poretikoiny helâ me tulutiny homagöule a bân; fifte kubit ibeüen e, ke twente faiv kubit úlaueu. 22 Ke haba je mamalamainy, me je poretikoiny, me je pamainy, helâ me tulutiny homagöule ame hnyimakan deiö; ke adre me ölö ka hnyin hnyi wacüat a seven je utwacüat; ke e hnyi hnyimaködra je poretikoiny. 23 Ke haba homagöuleiny hnyeule eü, cicö ke homagöule, ka hnyi hwadrö me deiö; ke e ame tuluto hwân hnyi ke homagöule ke ne o but hnyi ke homagöule wan haded kubit. 24 Ke e ame hum nya ka hnyi hwaiöu, ke wâ bi ke homagöule ka hnyi hwaiöu: ke e ame tututo je hmolominy, me je poretikoiny hoton je tulut eling. 25 Ke e hu je mamalama hnyin, me hnyi je poretikoiny igigilö, helâ me je mamalama eling: haba ibeüen fifte kubit, ke twente faiv kubit úlaueu. 26 Ke seven je utwacüat hnân ölö, ke e cici ta je únyi e je poretiko; ke e hu je pama khaca hnyi ke keihen, ke khaca hnyi ke keihen hnyi ta je hmolominy. 27 Ke e hu homagöuleiny hnyeule eiö hnyi hwaiöu: ke e ame tuluto hwân hnyi ke homagöule

ke ne o but ka hnyi ke homagöule ka hnyi hwaiöu, wan haded je kubit.

28 Me e ame hum nya ka hnyi hnyeule eiö a deny homagöule ka hnyi hwaiöu: ke e ame tuluto homagöule ka hnyi hwaiöu hoton je tulut eling; 29 ke haba je hnyeuleiny, me je hmolominy, me je poretikoiny, hoton ta je tulut eling: ke e hu je mamalama hnyin e, me hnyi je poretiko igigilö: fifte kubit ibeüen, ke twente faiv kubit úlaueu. 30 Ke e hu je poretiko igigilö, haba ibeüen me twente faiv kubit, ke úlaueu faiv kubit. 31 Ke ame hnyimakan ka hnyeule eü ta je poretiko; ke e je pama hnyi je hmolominy: ke eit je utwacüat hnân ölö. 32 Ke e ame hum nya ka hnyi hnyeule eiö e deiö: ke e ame tuluto homagöule hoton je tulut e; 33 ke haba je hnyeuleiny, me je hmolominy, me je poretikoiny, me helâ me je tulut eling: ke wale je mamalama hnyin e, me hnyi je poretikoiny igigilö: haba ibeüen e, me fifte kubit, ke twente faiv kubet úlaueu. 34 Ke haba je poretikoiny, me cicö hnyeule eü; ke e hu je pama hnyi je hmolominy hnyi lo li ke keihen: ke eit je utwacüat hnân ölö. 35 Ke e ame hum nya ka hnyi homagöule ka hnyi hwadrö: ke e ame tuluto e hoton je tulut eling; 36 wale je hnyeuleiny, me je hmolominy, me je poretikoiny; ke e hu je mamalamainy igigilö: haba ibeüen e, me fifte kubit, ke twente faiv kubit úlaueu. 37 Ke haba je hmolominy, me cicö hnyeule eü; ke e hu je pama hnyi je hmolominy hnyi lo li ke keihen: ke eit je utwacüat hnân ölö.

38 Ke e hu hnyeule me hwanumen hnyi baten je hmolominy hnyi je homagöule; k' adre me hneü je hudiny leü eling. 39 Ke haba hnyi poretikoiny homagöule, me hu lo li laulau hnyi lo li ke keihen, hnân hlingâ e ta je hudiny leü me hudiny hulö me hudiny monu. 40 Ke haba hnyi ke keihen eü, me gethen ame he ha hnyi homagöule hnyi hwadrö, wale li laulau; ke e hnyi ke keihen, hanen poretikoiny homagöule, ke wale lo li laulau. 41 Vak ta laulau hnyi ke keihen, ke vak ta laulau hnyi ke keihen, hnyi homagöule; a cit je laulau hnan hlingâ je hut hnyin. 42 Ke e hu vak ta laulau hobi kâu hudiny leü a je veto adre sö, úsa khaca kubit ke haf ibeüen, ke úsa khaca kubit me haf úlaueu, ke khaca kubit ibeüen göranyai: waleji adre me labö ip hnyin ta je omjehen hlingâ hudiny leü me hut. 43 Ke ta je únyi hnân uhni, a khaca hnyam úlaueu

adre me ohmâ eü igigilö : ke e hnyi hon je laulau utiöiny je hut. 44 Ke e hnyi hoton homagöule eiö je hnyeule anyin tavat khumöng hnyi hnyeule eiö, wale hnyi homagöule ka hnyi hwadrö; k' ame hnyimakan ka hnyi hwaiöu, khaca hnyi homagöule e deiö ame hnyimakan ka hnyi hwadrö. 45 Ke e ame ha könya, ka habe, Haba hnyeule ang ame hnyimakan ka hnyi hwaiöu, ke hobi kâu tavat bihut, a tavat adre me tuö hanymen hnyi uma kap. 46 Ke haba hnyeule ame hnyimakan ka hnyi hwadrö, me hobi kâu tavat bihut, tavat adre me tuö huliwa hnyi taben hut : ödra je laku Zadoka, a ke je laku Levi, tavat adre hakekenyi Iehova me huliwa kâu. 47 Ke e ame tuluto hnyeule, ke wan haded je kubit ibeüen, ke wan haded kubit úlauen; ke úcû vak ta ke keihen; ke e taben hut hnyi hnyimakan uma.

48 Me e ame hum nya ka hnyi poretikoiny uma, me tuluto je hmolominy poretko hia, faiv kubit hnyi ke keihen, ke faiv kubit hnyi ke keihen; ke haba úlauen homagöule, me kun ta kubit hnyi ke keihen, ke kun ta kubit hnyi ke keihen. 49 Haba ibeüen poretko me twente je kubit, ke haba úlauen me eleven kubit: wale hnyi wacuât adre ölö kâ e: ke e hu je utkhetep hnyi le hmolom, khaca hnyi ke keihen, ke khaca hnyi ke keihen.

## HNYIMAKAN 41.

**M**E e ame hum nya ka hnyi uma kap, me tuluto ta je utkhetepiny, siks je kubit úlauen hnyi ke keihen, ke siks je kubit úlauen hnyi ke keihen, wale úlauen uma mano. 2 Ke haba úlauen hwanuma, me ten je kubit; ke haba li baten hwanuma, me faiv je kubit hnyi ke keihen, ke faiv je kubit hnyi ke keihen: ke e ame tuluto ibeüen e, me fâte je kubit, ke haba úlauen, me twente kubit. 3 Me e ame didrö ka hnyin me tuluto uthwanuma, me úsa lo li kubit: ke haba hwanuma me siks je kubit, ke haba úlauen hwanuma me seven je kubit. 4 Ke e ame tuluto ibeüen e, me twente je kubit, ke twente kubit úlauen, hnyi hnyimakan uma kap: ke haingen könya, ka habe, Walang dok ae ti kap. 5 Me e ame tuluto hnyeigeuma, me siks je kubit; ke haba úlauen je hnyeule hnyi baten me úsa vak ta kubit igigilö hnyi je ke keihen hia. 6 Ke haba je hnyeule hnyi baten uma me kun ta deö, khaca hon khaca,

me thöte hna ip gaga, ke adre me dit hnyin hna up veto a hanen hnyeigeuma hnân je hnyeule hnyi baten uma, m' adre me ohmâ hnyin ke adre me ca ohmâ hnyi hnyeigeuma. 7 Ke lau tot ta je hnyeule wale khaca hon khaca igigilö uma; anyin adre me igigilö gaga uma, khaca ethö hon khaca: anyin a wale ame lau tot uma göranyai; ke helâe adre me ölö hwân hnyi hnyeule hnyikânâi ke ne o but hnyi hnyeule ethö a deny hnyeule hnyi wanben. 8 Ke oge me wâ minya a g' adre ogöranyâ taben uma igigilö: haba taben je hnyeule hnyi baten, me khaca hlowe ae bekhöt wale siks je kubit ae gan. 9 Haba úhakiny hna up veto hobi kâu je hnyeule hnyi baten eü hnyöu, me faiv je kubit: ke haba kolon adre ip hobi kâu je hnyeule hnyi baten a hanen uma. 10 Ke haba úlauen wanben je hnyeule, me twente je kubit igigilö uma hnyi je ke keihen. 11 Ke haba je hwanumen je hnyeule, me ame hnyimen ka hnyi kolon adre ip, khaca hwanuma ame hnyimen ka hnyi hwadrö, ke ke hwanuma ame hnyimen ka hnyi hwaiöu: ke haba úlauen kolon adre me ip, me faiv je kubit igigilö. 12 Ke haba hna up uma cicö wanben hnyi ke keihen e jio, me sevente kubit úlauen; ke haba úhakiny hna up veten uma, me faiv je kubit igigilö, ke nainte kubit ibeüen e. 13 Me e ame tuluto uma, me wan haded kubit ibeüen e; ke haba wanben ke uma, ke hna up veten e, me wan haded je kubit; 14 ke haba úlauen hnyimakan uma, ke wanben e deiö, me wan haded je kubit.

15 Ke e ame tuluto úlauen hna up uma hnyi hnyimakan ke uma wale hnyi hoton e, me je hnyeule görany hnyi ke keihen, me ke keihen, me wan haded je kubit; me uma kap eiö, me je poretikoiny hnyeule; 16 me li bahebetiny hwanuma, me je mamalama adre me hlöng, me je deö hnyeule ethö görany a je deö a kun, cicö hwanuma adre me tube ge esö ethö igigilö, me hwân hnyi kânâ ke ne o but hnyi je mamalama; k' adre me hlöng je mamalama; 17 ke ne o but hnyi hon hwanuma, me uma eiö hnyin, me hnyöu, me hna up veto hia igigilö eiö me hnyöu, ge je tulut. 18 Ke adre me bi kerubi me je pama; ke e hu pama wanben ke kerubi me ke kerubi, ke úsa lo hnyimakan je kerubi; 19 me me hu hnyimakan at cicö pama hnyi ke keihen, me hnyimakan nak liona cicö pama hnyi ke keihen: adre ânyâ helâe uma hia igigilö. 20 Hwân hnyi kânâ ke ne o but ethö hon

hwanuma adre ânyâ je kerubi me je pama hnyi hna up veten uma. 21 E úcú thibi vak ta ke keihen li uthwanumen uma kap; ke haba hnyimakan dok ae kap, e tba úcú bongon me bongon uma kap. 22 Haba taben hut, me utö, ke kun ta kubit ibeüen göranyai, ke lo li kubit ibeüen e; ke utö je kopiny a vak, me taben, me je ke keihen: ke e ame ha kõnya, ka habe, Walang laulau a e hnyi hnyimakö Iehova. 23 Ke úsa lo li hwanumen uma kap, me dok ae kap. 24 Ke úsa lo li hlinginy li hwanuma, adre me khöng veseâ; lo hobi kâu ke hwanuma, ke lo li hlinginy hobi kâu khaca. 25 Ke adre ânyâ hnyin, wale hnyin li hlinginy uma kap, je kerubi me je pama, helâji me hna ânyâ hnyin hna up veto; ke e hu je esö ae haki hnyi hnyimakan poretika hnyöu. 26 Ke e je mamalama adre hlöng me je pama hnyi ke keihen, hnyi baten poretika: ame helâe je deö hnyeule hnyi baten uma, me je esö ae haki.

## HNYIMAKAN 42.

**M**E e ame hum nya ka hnyi hnyeule eü, hnyi gethen ka hnyi hwadrö: me e ame hum nya ka hnyi hnyeule cicö wanben, ke e cicö hna up uma ame hnyimakan ka hnyi hwadrö. 2 Cicö ibeüen a wan haded je kubit, ke fifte kubit úlauen, e bi hwanuma ka hnyi hwadrö. 3 Cicö dok a twente kubit a hanen hnyeule eiö, ke cicö hna bi hak veto a hanen hnyeule eü, e bi ke deö hnyeule ethö görany cicö ke deö hnyeule, a kun ta deö hnyeule ethö görany. 4 Ke cicö je hnyeule hna ngeny, ten je kubit úlauen eiö hnyin, ke gethen a khaca kubit; ke ame hnyimakan ka hnyi hwadrö je hwanumen. 5 Ke okhulit je hnyeule ethö hon: anyin adre oúhnyûkongoâ ge je deö hnyeule ethö görany hon deö hnyeule hnyi wanben, me hnyikânâ, hnyi hna up veten uma. 6 Anyin a kun ta deö hnyeule, ke ba je hmolominy helâ me je hmolominy je hnyeule: anyin a wale adre me öúhnyûkongoâ at ethö görany hon at hnyikânâi me at hnyi wanben, hwân hnyikânâ ke ne o but ethö görany. 7 Ke haba hna up hak veto eü hnyöu, hnyi baten je hnyeule, a cicö hnyeule eü, hnyi hnyimakan je hnyeule, me fifte kubit ibeüen e. 8 Anyin a haba ibeüen je hnyeulen hnyi hnyeule eü, me fifte je kubit: ke wâ bi, wan haded je kubit hnyi hnyimakan uma kap. 9 Ke eü hmelen je hnyeule eling

gethen adre me dit hnyin jimeyö, wale at ka dit ka hnyin úheny hnyi hnyeule eü. 10 E hu je hnyeule hnyi úhakiny hna up veten hnyeule e deiö, cicö wanben, ke cicö hna up uma. 11 Ke haba gethen hnyi hnyimakan e, me helâ me getheniny je hnyeule ka hnyi hwadrö; haba ibeüen me tha úcú me úlauen: ke haba je gethen hia me hoton khaca bongon, me je hwanuma. 12 Ke helâ me je hwanumen je hnyeule ka hnyi hwaiöu, me e hu hwanuma hnyi hna hwân gethen, wale gethen cicö hna up hak veto e deiö, a gethen hnân dit ka hnyi je hnyeule. 13 Me e ame ha kõnya, ka habe, Haba je hnyeule ka hnyi hwadrö, ke je hnyeule ka hnyi hwaiöu cicö wanben, me wale je hnyeule ae kap, wale dok ame he tavat bihut ka an hnyin ta je únyi ae ti kap, a tavat adre me hakekeny kö Iehova: ke adre me he ka ip eling je únyi ae ti kap, me hudiny han, me hudiny hulö, me hudiny monu; anyin a dok e ae kap. 14 E ka didrö tavat bihut, me ödrin e ca he ka dit únyi hnyi dok ae kap ka hnyi hnyeule eü, ke ödrin e he ka mē ip eling je khaúödrin, wale ödrin e huliwa kâu; anyin ae kap ta je únyi e: ke ödrin e he ka khavâ ke je úkhaú, m'ödrin e he ka úhakekenyâ ta je únyi anyin tavat.

15 Ke e ka hia but tuluto uma eiö hnyin, me e ame hum nya kâu a gethen deny homagöule e deiö, me tuluto e igigilö. 16 E ame tuluto ke keihen e jimeyö ge hlowe tulut, a faiv haded je hlowe, hoton hlowe tulut igigilö. 17 E ame tuluto ke keihen ka hnyi hwadrö, a faiv haded je hlowe, hoton hlowe tulut igigilö. 18 E ame tuluto ke keihen ka hnyi hwaiöu, faiv haded je hlowe, hoton hlowe tulut. 19 E ame hwiö ka hnyi ke keihen ka hnyi jimeü, me tuluto faiv haded je hlowe hoton tulut hlowe. 20 E ame tuluto e hnyi vak ta ke keihen: ke e hu hak veto adre op e igigilö, faiv haded ibeüen, ke faiv haded úlauen, me me hu hnyigöulen dok ae kap me dok ca kap.

## HNYIMAKAN 43.

**H**WABAN dö e, me e ame hum nya ka hnyi homagöule, wale homagöule e jimeyö: 2 ke wâ bi ame o but hmanenanginy Khongu Isaraela úheny jimeyö: ke haba hwan helâ me hwan ta je köiö: ke ame hadröngöc hmeledrany ge hmanenanginy. 3 Ke haba imaneniny, me helâ me imaneniny oge me wâ, waleji oge wâ hnyi

## EZEKIELA 43.

ioik he ka ohia taun ; ke haba je hna omanená me helâ me hna omanená waleji oge wâ hnyi wagewe Kebara : me oge me ta hnyikânâi. 4 Ke haba hmanenangi Iehova ame didrô hnyin uma a gethen hnyi homagöule e jimeyö. 5 Ke haba hanu ame köp nya göranyai, me hum nya ka hnyi hnyeule eiö hnyin ; ke wâ bi ame unöngötö uma ge hmanenangi Iehova. 6 Ke oge me löng ke at ame fuc könya únyi hnyi hnyin uma ; ke ame tha tot mönya at. 7 Ke e ame ha könya, ka habe, Nokon at lö, walang hnen anyik theron, me hnen li hnyeúcak, wale oge me he ka laba hnyin unyin je lakon Isaraela nyiela balua : ke ame ca he hmetu lap anyi Isaraela ka okongoâ iök ae kap, ödra, me latuhödra, hnen anyidra bi únyi monu, me hnen unyin latuhödra ae mok hnyi anyidra je dok ae görany ; 8 me hnyi hnödra hna ip baten hwanumödra hnyi baten hwanumök, me uthwanumödra hnyi baten uthwanumök me ba hnyigöulök mödra, ke hna up hak veto thibi ; ke adre hia but okongoâ iök ae kap ge anyidra ta je únyi ae ikiki waleji adre me ányâ ; anyin a wale oge hia but ohi' ödra hnyi anyik hmönyin. 9 Walang ang, e so adre me degec sâkâú ai gak, anyidra bi únyi monu, me je unyin latuhödra ae mok, ke oge me he ka laba anyidra nyiele balua.

10 Nokon at lö, hamâm he ka omanená uma ka lap anyi Isaraela m' adre me he ka hmehma ge hwakecidra ae kong : ke hu' ödra bi he ka tuluto tulut. 11 Ke adre me ne he bi ka hmehma ge hnödra hia je hna ányâ, me omanená thö ködra tulutiny uma, me bongon, me je gethen hnân didrut me didrô, me ta je tulutiny hia, me ta je hna húna gan, me ta je bongon, ke sihnalimen ju e hnyi hnyimaködra : m' adre me he ka tuö je tulutiny hia, me je hna húna gan hia, me ányâ. 12 Walang hnanyibuiny uma : haba hnyi ban bucen, me ame he bi ka ti kap hnen e hia igigilö. Wâ bi, wale thibi e hnanyibuiny uma.

13 Ke walang tulutiny taben hut ge je kubit : (haba kubit, me khaca kubit me hnyam : ) a khaca kubit hnyi hnyin, ke khaca kubit úlauen, ke haha baten e igigilö, me khaca hnyam : me ame he ka bi taben e hnân taben bi hut. 14 Ke haba hwân hnyi hnyin, eú hnyi kânâ, ke ne o but hnyi dok ame silöú eú, me lo li kubit, ke khaca kubit úlauen ; ke hwân hnyi dok ame silöú wale ae úhnyúkong ke ne o but hnyi dok ae silöú wale ae gan, me vak ta

kubit, ke khaca kubit úlauen. 15 Ke vak ta kubit taben hut göranyai : ke hwân hnyi hnabadröiny taben hut ke ethö, me ame he ka hu vak ta baitoiny. 16 Ke haba hnabadröiny taben hut, me ame he ka twelv kubit ibeúen, ke twelv úlauen, ke khaca thibi tulutiny je ke keihen a vak. 17 Ke haba dok ame silöú me ame he ka fotin kubit ibeúen, ke fotin úlauen hnyi je ke keihen a vak ; ke haba baten igigilö e, me ame he ka haf kubit ; ke khaca kubit hnyin e igigilö ; ke haba wacúatiny, me ame he ka hnyimakan deiö.

18 Ke e ame ha könya, ka habe, Nokon at lö, Walang hna ha hnen Than Iehova, ka habe, Wale je hnanyibuiny taben hut hnyi bong adre me he ka tibet e hnyin, hnân hudo hnyin e je hudiny leú, me dukâiâ dra ka hnyi hon. 19 Ke u me he ka ham nak bolok hnân hudiny hulö, ka tavat bihut a at Levi je mátrâni Zadoka, tavat adre me hakekeny könya, haingen Than Iehova. 20 Ke u me he ka hom hanen dren e, me kina hon vak ta baitoiny, me hon vak ta kopiny dok ame silöú, me hon baten igigilö : helâe u me he ka obosoâ e me bi hwaban anyin möt. 21 U me he ka hom minya bolok hudiny hulö, ke e ame he ka thong degecâ e hnyi dok adre kú hnyi uma, hoton dok ae kap. 22 Ke haba hnyi bong a loiny u me he ka hudo got бага ae ba hnyikongon hnân hudiny hulö ; ke adre me he ka obosoâ taben hut, helâ me hna obosoâ e ge bolok. 23 Ke u ka hia but obosoâ e, u me he ka hudo nak bolok ae ba hnyikongon, me mamoe бага ae ba hnyikongon únyi hnyi hnabat meno. 24 Ke u me he ka úhakekenyi ödrü hnyi hnyimakö Iehova, ke ame he tavat bihut ka khúö sâlt hudru, ke adre me he ka hudi ödrü kö Iehova hnân hudiny leú. 25 Seven je bong u me he ka penapena got hnân hudiny hulö ke bong me ka bong : ke adre me he minya ka penapena nak bolok me mamoe бага únyi hnyi hna hat meno, ae ba hnyikongon. 26 Seven je bong adre me he ka bi hwaban möt anyin taben hut, me obosoâ ; adre me he ka okabâ e helâe. 27 Ke at ka hia but ohwâdâ je bong, ke hwân hnyi bong a eitiny ke ne o but nyiele, me ame he tavat bihut ka hudo hon taben hut anyibun je hudiny leú, me anyibun je hudiny úsoköu ; ke oge me he ka köp öbun haingen Than Iehova.

## HNYIMAKAN 44.

**M**E e ame ohmetu nya a gethen hnyi homagöule e deiö anyin dok ae kap eü hnyöu; ke a hlöng ut. 2 Ke haba Iehova ame ha könya, ka habe, Ame he ka hlöng ut homagöule eang, ame ca he hmetu ka khöng bi, ke ba at ame he ka dit hnyin, anyin a dit hnyin Iehova, Khongu Isaraela; anyin a wale ame he ka hlöng ut balua. 3 Ke haba than, e ame he ka laba hnyin, a e than bi, me han eling hnyi hnyimakö Iehova; e ame he ka didrö a gethen hnyi poretikoiny homagöule, ke e ame he ka didrut hmetu hnyi gethen eling. 4 Ke e ame hum nya a gethen hnyi homagöule hnyi hwadrö hnyi hnyimakan uma; ke inya oge me wâ, ke wâ bi, ame unöngötö uma umö Iehova ge hmanenangi Iehova: me oge me ta hnyikânâi. 5 Ke Iehova ame ha könya, ka habe, Nokon at lö, wâhmakhmetoâ ju, ke wâ thö ge li emâkâm, ke löng ge li hnyikönyâm hofuc hia oge me he ka ha köu ge je hna hûna hia ge uma umö Iehova, me ta je hnanyibuiny hia; ke wâhmakhmetoâ ju gethen hnân dit ka hnyi uma, me je gethen hia hnân didrut ûnyi hnyi dok ae kap. 6 Ke u me he ka ha ka tavat ûkhin fuc, wale ka lap anyi Isaraela, ka habe, Walang hna ha hnen Than Iehova, ka habe, Lap anyi Isaraela lö, soju je hwakecibun hia ae kong, 7 waleji hnyi hnöbun hna ödilâ je atkanyua, tavat adre me ca peritomonâ hnyok, ke adre ca peritomonâ unyidra, m' adre me he ka hnyi laba hnyi anyik dok ae kap, he ka okongoâ e, wale umök uma, öbun ka hom ok jeü, wale pipikhenya, me dra, ke adre hia but thamuâ hnök hna ûhinyköu, he ka bi hanen ka hwakecibun ae kong. 8 Ke öbun e ca hia but tuö hanymen ge anyik ta je ûnyi ae kap: ke öbun e hia but otillâ tavat tuö anyik huliwa hnyi anyik dok ae kap hobi köbun bi. 9 Walang hna ha hnen Than Iehova, ka habe, E ba atkanyua adre ca peritomonâ hnyok, ke adre ca peritomonâ unyin, ame he ka hnyi dit ka hnyi anyik dok ae kap, wale atkanyua at ame tha laba me lakon Isaraela. 10 Ke haba at Levi waleji adre me úsâkâüö mönya, hnyi hna he monu hnen at Isaraela, waleji ame he monu gak ka anyidra je idola; me ame ka he bi ka takû ödra anyidra hulö. 11 Ke so bi hamödrin he ka huliwa hnyi anyik

dok ae kap, a tavat musi hnyi je homagöuleny uma, me bi huliwa eiö hnyi uma; ödrin e he ka hlingâ hudiny leü me hut hobi kâu hnyei, ke ödrin e he ka tot hnyi hnyimakan tavat me bi huliwa ködra. 12 Anyin ödrin e huliwa ködra hnyi hnyimakan je khongudrin, me othôâ lap anyi Isaraela; anyin a wale, oge hia but hai göranyai hnyamök úcúdrin, haingen Than Iehova, ke ame he bi ka takû ödra anyidra hulö. 13 Ke adre me ca he ka hakekeny könya, he ka ânyâ hanymen at bihut könya, me he ka hakekenyâ hnök je hna okabâ, ka ta je ûnyi ae ti kap, ke ame he ka takû ödra anyidra hmehma, me ta je ûnyi ae ikiki adre hia but ânyâ. 14 Ke so bi oge me he ka wi' ödrin hnân tavat tuö hanymen hnyin uma me je huliwainy hia, me ta je ûnyi hia adre me he ka ânyâ hnyin.

15 Ke haba tavat bihut a at Levi, je laku Zadoka, waleji adre tuö je hanymen hnyi anyik dok ae kap hnyi hna he monu gak hnen lakon Isaraela, me adre me he ka hakekeny könya m' adre me huliwa könya; ke adre me he ka tot hnyi hnyimakök he ka hudo könya pipikhenya me dra, haingen Than Iehova; 16 Adre me he ka dit hnyi anyik dok ae kap, ke adre me he ka hakekeny ka hnyi anyik laulau, m' adre me huliwa könya, ke adre me he ka tuö hanymen gak. 17 Ke ödra ka he ka dit hnyi je homagöuleny hnyeule eiö, adre me he ka khavâ je úkhaú lino; ke adre me ca he ka khavâ leúnen mamoe ödra ka huliwa hnyi je homagöuleny hnyeule eiö, me eiö hnyin uma. 18 Adre me he ka bicâ je hnabinybak lino, me inâ je trauzes lino; ke adre me ca he ka weikâ ûnyi ame oâ khun. 19 Ke ödra ka didrut ka hnyi hnyeule eü, wale hnyeule eü hnyöu ka tavat, adre me he ka me uny jut anyidra je úkhaú wale adre me huliwa kâu, me ip hnyi je hnyeule ae kap, me khavâ ke je úkhaú, m' adre me ca he ka okabâ tavat ge anyidra je úkhaú. 20 Ke adre me ca he ka giâ je bödra, ke adre me ca he ka hna leúnen bödra; adre me he ka sö thibi je leúnen bödra. 21 Ke haba khaca, ame ca he ke at bihut ka ijem waina e ka dit ka hnyi hnyeule eiö. 22 Ke adre me ca he ka hom safac, me momo adre degec me hnân öiödra: ke adre me he ka hok hlu hnathu a je matrân lap anyi Isaraela, me ame ne safac âiân at bihut. 23 Ke adre me he ka ná lakeik ge bongon ûnyi ae kap,

EZEKIELA 45.

me únyi ae ca kap, me owáhmakhmetu ödra ge únyi ae bo kong, me únyi ae bo so. 24 Ke haba hnyi je ivinö, me adre me he ka tot me owisa; adre me he ka owisa hoton hnök hna owisa: ka adre me he ka tuö anyik je hnanyibu, me hnök je hna húna hnyi anyik je bijeú hia adre thu; ke adre me he ka okabá anyik je sabath. 25 Ke adre me ca he ka he ka at a mokuwá adre nye obokongi ödra bi: ke so bi e khan' ödra he ka obokongi ödra bi can kamen, me hinyen, me nokon бага me hlu, me liamekeiny me haniny at ae ba áiân. 26 Ke ödra ka hia but obosoâ e, me adre me he ka aú kâu seven ta bong. 27 Ke haba hnyi bong e ame he ka dit ka hnyi dok ae kap, ka hnyi hnyeule eiö he ka huliwa hnyi dok ae kap, me e ame he ka hudo hudiny anyin hulö, haingen Than Iehova. 28 Ke ame he ka hu idra: ke inya ang idrin: ke öbun e ca he ka bi hwajekhóúdrin hnyi Isaraela, ke inya ang jekhoúdrin. 29 Adre me he ka an hudiny han, me hudiny hulö, me hudiny monu; ke hobi ködra ta je únyi hia adre me nauá hnyi Isaraela. 30 Ke hobi kâu tavat bihut je únyi a bán hnyi ta je wan a bániny ta je únyi hia, me ta je bwihlanyin hia ta je únyi hia öbun e ányá me bwihlany: öbun e he ka ham minya je falawa a bán adre tiga op ka at bihut, me me mokut hon umöbun je uma hnabic. 31 Ame ca he at bihut ka hnyi an únyi a mok hwege, me únyi adre oloú kia, ame ne meno ame gá ame ne meno ame he.

HNYIMAKAN 45.

**K**E haba khaca, öbun ka: he ka khená ibun hnyei, me öbun e he ka ham kö Iehova bwihlany ong dok ae kap únyi hnyi hnyei: haba ibeúen e, me twente faiv thauzan je hlowe, ke ten thauzan úlauen: k' ame he ka kap e hnyi hnyigöulen hia igigilö. 2 Ke haba, ke keihen e adre me he ka ip hnân dok ae kap me faiv haded ibeúen, ke faiv haded úlauen, khaca thibi tulutiny vak ta ke keihen igigilö; ke fite je kubit utkâná igigilö. 3 Ke haba hnyi hna tuluto eling u ma he ka tuluto twente faiv thauzan ibeúen, ke ten thauzan úlauen: ke ame he ka e hnyin e dok ae kap, wale ae ti kap. 4 E bi dok ae kap hnyi hnyei; me hobi kâu tavat bihut tavat adre me huliwan dok ae kap, tavat adre me hakekeny he ka huliwa kö Iehova; ke

ame he ka hnân hnen umödra je uma, me hnen ae kap hnân dok ae kap. 5 Ke haba twente faiv thauzan ibeúen me ten thauzan úlauen, me hobi kâu at Levi, tavat adre me huliwa hnyi uma, me me hwajeköúdra me hobi kâu je hnyeule a twente. 6 Ke öbun e he ka kú kâná iny taun, faiv thauzan úlauen, ke twente faiv thauzan ibeúen, hnyi baten bwihlany a utkâná ae kap: ke wale hobi kâu lap anyi Isaraela hia. 7 Ke haba dok hobi kâu than, me ame he ka e hnyi ke keihen me ke keihen bwihlany ae kap, me kâná iny taun, cicö bwihlany ae kap, me cicö kâná iny taun, hnyi ke keihen hnyi jimeú e jio, ke hnyi ke keihen jimeyö e deiö: ke haba ibeúen ame he ka helâ me ke jekhöú, hwân hnyi hnyigöulen ka hnyi jimeú ke ne o but hnyi hnyigöulen e jimeyö. 8 Ke haba kâná ame he ka hnân iny bi hnyi Isaraela: ke adre me ca he hmetu je than anyik ka hom úhnyükongo lakeik; ke adre me he ka ham kâná ka lap anyi Isaraela hoton anyidra ta je tribu.

9 Walang hna ha hnen Than Iehova, ka habe, Je than Isaraela lö, soju; degec ut öbun úokonguny, ke sei, me anyá thö únyi ae úcú me únyi ae wisa; ohia ju hnöbun hna musi hwege hon lakeik, haingen Than Iehova. 10 Öbun e he ka hu tulut uhni ae wisa, me efa ae wisa, me bath ae wisa. 11 Ame he ka khaca thibi tulutiny efa me bath, me me hu hnyi bath ke keihen a libenyitainy homer, me efa ame he ka ke keihen a libenyitainy homer: ame he tulut ka hnu hoton homer. 12 Ke haba sekel me ame he ka twente je gera: twente je sekel, twente faiv je sekel, fiftin je sekel, wale anyibun mina. 13 Walang bwihlany öbun e he ka hudo; ke keihen a siksiny efa únyi hnyi homer hwit, ke öbun e he ka ham ke keihen a siksiny efa únyi hnyi homer bali: 14 ke haba jekhöú adre me ha ge wakaco, haba khaca bath wakaco, me wale ke keihen a libenyitainy únyi hnyi hnyin kori, wale ten je bath a khaca homer; anyin a haba ten je bath, me wale homer: 15 ke khaca nokon mamoe únyi hnyi huahat meno hnyi lo li haded, únyi hnyi je sajilat ae hoso hnyi Isaraela; hnân hudiny han me hudiny leú, me je hudiny ole, hnân úcú melidra, haingö Iehova. 16 Ke ame he tavat hia thithö hnyi hnyei ka ham bwihlany eling hobi kâu than Isaraela. 17 Ke hamen than he ka ham je hudiny leú, me je hudiny han, me je hudiny ic,

EZEKIELA 46.

hnyi je bijeú, ke hnyi úen bi a manen hnyin je tehi, ke hnyi je sabbath, ke hnyi je bijeú hia adre thu anyin lap Isaraela: e ame he ka penapena hudiny hulö, ke hudiny han, ke hudiny leú, ke ta je hudiny ole, hnân he ka bi hwaban melen lap anyi Isaraela.

18 Walang hna ha hnen Than Iehova, ka habe, Hnyi tehi a bân, hnyi bong a bâniny tehi, u me he ka hom nak bolok ae ba hnyikongon; me u me he ka obosoâ dok ae kap. 19 Ke ame he at bihut ka hom hanen dren hudiny hulö, me kina hnyi je uthwanumen uma, ke hon je kopiny a vak dok ame silöú hnyi taben hut, ke hon ta je uthomagöuleny hnyeule eiö. 20 Ke u me he ka ânyâ helâe hnyi bong a seveniny tehi hobi kâu at ame hau, ke hobi kâu at ae ba hnyok: m' öbun e he ka bi hwaban melen uma helâe. 21 Ke hnyi tehi a bân, hnyi bong a fotininy tehi, me öbun e he ka ânyâ paseka, seven je bonginy bijeú; k' adre me he ka han areto adre ca levenâ. 22 Ke hnyi bong eling ame he than ka penapena hobi kâu bi, ke hobi kâu tavat hia aten hnyei, bolok hnân hudiny hulö. 23 Ke haba hnyi je bong a seven hnyi bijeú, me e ame he ka penapena hudiny leú hnyi je bong hobi kö Iehova, a seven ta bolok, ke seven ta mamoe бага ae ba hnyikongon hnyi ta bong a seven; ke úsa khaca got бага hnyi ke bong me ke bong hnân hudiny hulö. 24 Ke e ame he ka penapena hudiny han, khaca efa hobi kâu bolok, ke khaca efa hobi kâu mamoe бага, ke khaca hin wakaco hobi kâu efa. 25 Hnyi tehi a seveniny, hnyi bong a fiftininy tehi, hnyi bijeú e ame he ka ânyâ helâ me hnyi je bong a seven; hoton hudiny hulö, me hudiny leú, me hudiny han, me hoton wakaco.

HNYIMAKAN 46.

**W**ALANG hna ha hnen Than Iehova, ka habe, Haba homagöuleny hnyeule eiö wale a hnyimakan deiö, me adre me he ka hlöng hnyi je bonginy huliwa a siks; ke adre me he ka khöng e hnyi bong sabbath, ke hnyi bong ame manen hnyin tehi adre me he ka khöng e. 2 Ke ame he than ka didrö a deny getheniny poretikoiny homagöule eü, me tot hnyi uthomagöule, ke ame he tavat bihut ka penapena anyin hudiny leú, me anyin je hudiny ole, ke e ame he ka khudrung hnyi baten homagöule; me

e ame he ka he: ke adre me ca he ka hlöng homagöule ke ne o but sahac. 3 Ke ame he tavat aten hnyei ka khudrung hnyi hlinginy homagöule eling hnyi hnyimakö Iehova hnyi je sabbath me je úen ame manen hnyin tehi. 4 Ke haba hudiny leú ame he than ka hom kö Iehova hnyi bong sabbath, me siks ta nokon mamoe ae ba hnyikongon ke khaca mamoe бага ae ba hnyikongon; 5 ke haba hudiny han, me khaca efa hobi kâu mamoe бага, me hobi kâu je nokon mamoe hudiny han, hoton hna hu, ke khaca hin wakaco hobi kâu efa. 6 Ke haba hnyi bong ame manen hnyin tehi me khaca nak bolok ae ba hnyikongon; ke siks ta nokon mamoe ke khaca mamoe бага; ae ba hnyikongudrin: 7 ke e ame he ka penapena hudiny han, khaca efa hobi kâu bolok, ke khaca efa hobi kâu mamoe бага, me hobi kâu je nokon mamoe hoton hna hu, ke khaca hin wakaco hobi kâu efa. 8 Ke e ka didrö than, me e ame he ka didrö a gethen poretikoiny homagöule, ke e ame he ka didrut hmetu e. 9 Ke e ka o tavat aten hnyei hnyi hnyimakö Iehova hnyi je bijeú adre thu, haba at ame he ka didrö hnyi homagöule ka hnyi hwadrö he ka khudrung, me e ame he ka hmetu but hnyi homagöule ka hnyi hwaiöu; ke haba at ame didrö hnyi homagöule ka hnyi hwaiöu, me e ame he ka dit hmetu but hnyi homagöule ka hnyi hwadrö; e ame ca he ka hmetu hnyi homagöule a dit hnyin, k' ame he ka didrut cicö e. 10 Ke haba than, me e ame he ka dit hnyi wanbödra ödra ka didrö; ke ödra ka didrut, me e ame he ka tha didrut mödra. 11 Ke haba hnyi je bijeú ke je bong adre thu, me ame he ka hu hudiny han, khaca efa hobi kâu bolok, ke khaca efa hobi kâu mamoe бага, ke hobi kâu je nokon mamoe hoton hna hu, ke khaca hin wakaco hobi kâu efa. 12 Ke e ka he than ka penapena hut ae betenge, ame ne hudiny leú, ame ne hudiny ole hnân hut ae betenge kö Iehova, me hamen ke at he ka khöng ut kâu homagöule e deiö, ke e ame he ka penapena anyin hudiny leú, ke anyin je hudiny ole, helâ me hnen hna ânyâ hnyi bong sabbath: me e ame he ka dit ut; me ame he ke at ka hlöng homagöule, e ka didrut. 13 Ke u me he ka penapena hnyi ke bong me ke bong khaca nokon mamoe a khaca hunainy ae ba hnyikongon hnân hudiny leú kö Iehova: u me he ka penapena e hnyi je hnyomakatu. 14 Ke u me



EZEKIELA 47.

he ka penapena hudiny han hobi kâu e hnyi je hnyomakatu, ke keihen efa a siksiny, ke ke keihen a kuniny hin wakaco, hnân úhaniken me tap falawa; a hudiny han hobi kö Iehova, wale hnanyibu adre ohmâ nyiele balua. 15 Helâe adre me he ka penapena nokon mamoe, ke hudiny han, ke wakaco, hnyi je hnyomakatu nnan hudiny leú balua.

16 Walang hna ha hnen Than Iehova, ka habe, A ne he than ka ham bwihlany ka ke nokon, me wale hwajekhon bi: me ame he ka únyi anyin lakon: me ame he ka e bi unyidrin me hwajekhóudrin. 17 Ke so bi ame ne he ka ham bwihlany ka athnyabainy, a hanen hwajekhon, me ame he ka anyin bi ke ne o but hnyi huna adre me thang; me ame he ka ohmetu e ka than; ke so bi hwajekhon me hobi kâu lakon. 18 Ke haba khaca, ame ca he than ka hûgúnâ hwajekhon tavat, me hagut' ódra únyi hnyi idra; e ame he ka ham hwajekhon ka je lakon ge iny bi: me me ca vese lakeik hnyi je idra bi.

19 Me e ame hum nya ka hnyi gethen, wale hnyi baten homagöule, ka hnyi je hnyeule ae kap anyin tavat bihut, hnyi hnyimakan ka hnyi hwadrö: ke wâ bi, wale ke dok hnyi ke keihen hoton e jiö. 20 Me e ame ha könya, ka habe, Walang dok ame he tavat bihut ka ölä hudiny monu, me hudiny hulö hnyin, ke adre me he ka thân hudiny han hnyin; m' adre me ca he ka kom e ka hnyi hnyeule eú, he ka okabâ tavat. 21 Me e ame hum nya ka hnyi hnyeule eú hnyöu, me ovhenu nya ka hnyi vak ta kopiny hnyeule; ke wâ bi, e ve hu hnyeule hnyi vak ta kopiny hnyeule. 22 Hnyi vak ta kopiny hnyeule e hu hnyeule adre bi hanen, fâte kubit ibeúen ke twente faiv úlaen: khaca thibi tulutiny vak ta hnyeule eling hnyi je kopiny. 23 Ke e hu hna up veto igigiliö, a igigilö vak eling, ke adre ányâ je únyi hnân öt hmelen je hna up veto igigilö. 24 Me e ame ha könya, ka habe, Walang je uma hnân öt, ame he tavat huliwan uma ka ölä hut anyin tavat hnyin.

HNyimakan 47.

**M**E e ame ohmetu nya ka hnyi hwanu-  
men uma; ke wâ bi, ame hingölö köiö únyi hnyi hmelen hwanumen uma e deiö, anyin ame hnyimakan deiö uma: ke ame hingölö köiö únyi hnyi hmelen, hnyi

ke keihen metân uma, hnyi ke keihen taben hut ka hnyi hwaiöu, 2 Me e ame hum nya kâú a gethen hnyi homagöule ka, hnyi hwadrö, me su nya hnyi gethen eú, ka hnyi homagöule eú, a gethen hnyi homagöule e deiö; ke wâ bi, ame hingölö köiö únyi hnyi ke keihen metâ. 3 Ke ame he deiö at ae hu tulut tö hnyi hnyamen, me e ame tuluto khaca thauzan je kubit, ke e ame ovhenu nya hnyi wanben köiö, me böngön ju köiö hnyi li omakhnâiny. 4 Ke e ame tuluto hmetu khaca thauzan, k' ame ovhenu nya hnyi wanben köiö, me böngön ju köiö hnyi li bouca. Ke e ame tuluto hmetu khaca thauzan, k' ame ovhenu nya hnyi wanben köiö, me böngön ju hnyi bibiköta. 5 Ke hwaban dö e e ame tuluto khaca thauzan; me wale wagewe but, me ca khanö nya hmetu he ka vheno: anyin ame khibi thö göranyai köiö, a köiö hnân hai hnyin, wagewe a ca hnân vheno. 6 Ke e ame ha könya, ka habe, Nokon at lö, hawa, u je wâ but? Me e ame hum nya, me ohmetu nya ka hnyi baten wagewe. 7 Ke oge me hmetu but, ke wâ bi, e se hia hmönyin je úö hnyi baten wagewe hnyi li ke keihen. 8 Ke e ame ha könya, ka habe, Ame hingölö köiö ang ka hnyi je ke keihen e deiö, me ame he ka badedö ka hnyi hnye-buba: k' ame he ka he bi hnyiköiöai; ke haba köiö adre hingälâ, me ame he ka utut ka hnyi köiö ae gan; me ame he ka so but köiö. 9 Ke haba je únyi hia ae möt adre me si but hnyi je dok hia ame o hnyin wagewe, me adre me he ka möt; ke ame he ka se hia hmönyin ta je wâ: anyin ame o eling köiö ang, k' ame he ka omelö köiö ae gan, me ame he ka möt hia ta je únyi hnyi je dok hia ame o wagewe ka hnyin. 10 Ke ame he tavat thut ka útitilen hnyi baten: hwân hnyi Ene-gedi ke ne o but hnyi Ene-gelima, k' adre me he ka thong eling je ert; ke helâ me je wâiny köiö ae gan je wâ, e ve bongon, ke se hia hmönyin. 11 Ke ame ca he ka so but je hmudrainy, ke je utkânâiny ae lup; k' adre me he ka hna e me me köiö hiny. 12 Ke haba hnyi li baten wagewe hnyi ke keihen me ke keihen me ame he ka kú ta je úö hia hnân an wan, ae ca meleca lan ke ca ba wan: ame he ka wa wan ae teb únyi hnyi je tehi hia, anyin ame hingölö köiö únyi hnyi dok ae kap; ke hnân an je wan, ke hnân bubuny je lan.

13 Walang hna ha hnen Than Iehova, ka habe, Waleú hnyigöulen öbun e he ka

khenâ hnyi hnyei hnân hwajekhon hoton je tribu Isaraela a twelv : ame he ka hu je hwajekhôu Josefa. 14 Ke öbun e he ka ve hu e, ke at me ke at ; waleji oge me inâ göranyai hnyamök he ka ham e ka je lakamöbun : ke öbun e he ka hu hnyei ang hnân ibun. 15 Ke walang hnyigöulen hnyei : haba ke keihen ka hnyi hwadrö, hwân hnyi köiö ae gan gethen Hethelon, ke ne o but hnyi gethen ame he Zedad ai ; 16 Hamath, me Berotha, me Siberaim wale wanben hnyigot hnyi Damaseko, me hnyigot hnyi Hamath ; Hazer-atikon hnyi hnyigot hnyi Hauran. 17 Ke haba hnyigot hwân hnyi köiö me Hazar-enana hnyi baten Damaseko, ke haba hnyi hwadrö me hwadrö hmönyin, me hnyigot hnyi Hamath. Wale ke keihen ka hnyi hwadrö. 18 Ke haba hnyi ke keihen e deiö, wanben Hauran, me Damaseko, me Gileada, me hnyei Isaraela, me e bi Joridano ; öbun e he ka tuluto hwân hnyi hnyigot ka hnyi hwadrö ke ne o but köiö e deiö. Wale ke keihen o deiö. 19 Ke haba ke keihen ka hnyi hwaiöu me hwaiöu hmönyin, hwân hnyi Tamara ke ne o but hnyi köiö Meribakadesi, ke ne o but wageweiny Aigupito, ke ne o but köiö ae gan. Wale ke keihen hnyi hwaiöu me hwaiöu hmönyin. 20 Ke naba ke keihen e jio, me köiö ae gan, hwân hnyi hnyigot hnyi hwaiöu ke ne o but hnyi cicö gethen ame he Hamath ai. Wale ke keihen e jio. 21 Helâe öbun e he ka khenâ köbun hnyei ang hoton je tribu Isaraela. 22 Ke öbun e he ka khenâ e hnân ibun me je atkanyua tavat adre me tha laba möbun, tavat adre me hnokoâ unyibun ; ke adre me he ka helâ me tavat unyin lakon Isaraela wale adre hnokoâ hnyi hnyei ; me adre me he ka hu idra möbun unyin je tribu Isaraela. 23 Ke haba tribu wale ame laba unyin je atkanyua, öbun e he ka ha idrin eling, haingen Than Iehova.

## HNYIMAKAN 48.

**K**E walang ien ta je tribu : hwân hnyi baten ka hnyi hwadrö hnyi baten gethen ame he Hethelon ai ke ne o but hnyi gethen ame he Hamath ai, me Hazar-enana hnyi hnyigöulen Damaseko, ka hnyi hwadrö hnyi baten Hamath ; wale li ke keihen e deiö me jimeú ; khaca jekhöu Dana. 2 Ke haba hnyi hnyigöulen Dana, hwân hnyi ke keihen e jimeyö ke ne o but

hnyi ke keihen e jimeú ; khaca jekhöu Asera. 3 Ke haba hnyi hnyigöulen Asera, hwân hnyi ke keihen e jimeyö ke ne o but hnyi ke keihen e jimeú ; khaca jekhöu Nafatali. 4 Ke haba hnyi hnyigöulen Nafatali, hwân hnyi ke keihen e jimeyö ke ne o but hnyi ke keihen e jimeú ; khaca jekhöu Manase. 5 Ke haba hnyi hnyigöulen Manase, hwân hnyi ke keihen e jimeyö ke ne o but hnyi ke keihen e jimeú ; khaca jekhöu Eferaima. 6 Ke haba hnyi hnyigöulen Eferaima, hwân hnyi ke keihen e jimeyö ke ne o but hnyi ke keihen e jimeú ; khaca jekhöu Reubena. 7 Ke haba hnyi hnyigöulen Reubena, hwân hnyi ke keihen e jimeyö ke ne o but hnyi ke keihen e jimeú ; khaca jekhöu Juda.

8 Ke haba hnyi hnyigöulen Juda hwân hnyi ke keihen e jimeyö ke ne o but hnyi ke keihen e jimeú, me wale bwihlany öbun e he ka ham, twente faiv thauzan je hlowe úlaen, ke haba ibeüen, me helâ me khaca jekhöu, hwân hnyi ke keihen e jimeyö ke ne o but hnyi ke keihen e jimeú : k' adre me he ka bi hnen dok ae kap hnyi wanben e. 9 Ke haba bwihlany öbun e he ka ham kö Iehova, me ame he ka twente faiv thauzan ta je hlowe ibeüen, ke ten thauzan úlaen. 10 Ke haba hobi kâu hnyat ang, wale hobi kâu tavat bihut, me bwihlany ae kap ; haba ka hnyi hwadrö, me twente faiv thauzan ibeüen, ke ten thauzan úlaen e jio, ke ten thauzan úlaen e deiö, ke twente faiv thauzan ibeüen ka hnyi hwaiöu : ke ame he dok ae kap anyi Iehova ka hnen hnyi wanben e. 11 Wale hobi kâu tavat bihut, tavat adre hia but okabâ a hanen je laku Zadoka, wale tavat adre hia but tuö hanyemen únyi gak ; tavat adre ca hnyi he monu, waleji hnyi hna he monu hnen lakon Isaraela, helâji me hnen at Levi hna he monu. 12 Ke ame he ka hnân bwihlany ködrin únyi hnyi bwihlany hnyi kânâ, únyi ae kap hmönyin, hnyi hnyigöulen at Levi. 13 Ke hoton tulutiny hnyigöulen tavat bihut, ame he ka hu hnen at Levi twente faiv thauzan ibeüen, ke ten thauzan úlaen : haba ibeüen hia, me twente faiv thauzan, ke ten thauzan úlaen. 14 Ke adre me ca he ka úco hanen utkânâ, ke khaca adre me ca he ka bi hwaban e, ke adre me ca he ka hna wan kânâ a bân ka ke at bi : anyin ae kap e kö Iehova. 15 Ke haba faiv thauzan kolon úlaen, hnyi hnyimakan twente faiv thauzan, me hnân dok ae ca kap, hobi kâu taun, me je uma, me je

EZEKIELA 48.

hnyaba igigilö: ke ame he taun ka hnen hnyi wanben e. 16 Ke walang je tulutiny; foa thauzan faiv haded hnyi ke keihen ka hnyi hwadrö, ke foa thauzan faiv haded hnyi ke keihen ka hnyi hwaiöu, ke foa thauzan faiv haded hnyi ke keihen e jimeyö, ke foa thauzan faiv haded hnyi ke keihen e jimeü. 17 Ke ame he ka hu utkânâ hobi kâu je hnyaba igigilö taun; haba ka hnyi hwadrö tu haded ke fifte, ke tu haded ke fifte ka hnyi hwaiöu, ke tu haded ke fifte jimeio, ke tu haded ke fifte jimeü. 18 Ke haba ibeüen kolon, hoton tulutiny bwihlany ae kap, me ten thauzan jimeyö, ke ten thauzan jimeü, ke e ame he ka hoton tulutiny bwihlany ae kap; ke haba jeüiny, me an tavat adre me huliwa hnyi taun. 19 Ke haba tavat adre me huliwa hnyi taun, ünyi hnyi je tribuiny Isaraela hia, adre me he ka belökâ e. 20 Haba bwihlany ae bekhöt, me twente faiv thauzan ke keihen, ke twente faiv thauzan ke keihen: öbun e he ka ham bwihlany ae kap, tha e me kânâ iny taun, khaca thibi tulutiny vak ta ke keihen. 21 Ke ame he ka hobi kâu than kolon hnyi ke keihen me ke keihen bwihlany ae kap, me kânâ iny taun, hnyi hnyimakan twente faiv thauzaniny bwihlany hnyi hnyigöulen e jimeyö, me jimeü cicö twente faiv thauzan hnyi hnyigöulen e jimeü, hoton tulutiny je jekhöü, wale hobi kâu than: ke haba bwihlany ae kap me dok ae kap anyin uma ame he ka hnen hnyi wanben e. 22 Ke haba hanen iny at Levi, me kânâ iny taun, a e hnyi wanben iny than, wale hnyi wanben hnyigöulen Juda, me hnyigöulen Beniamina, haba kânâ eling me iny than.

23 Ke haba ke je tribu: hwân hnyi ke keihen e jimeyö ke ne o but hnyi ke keihen e jimeü; khaca jekhöü Beniamina. 24 Ke haba hnyi hnyigöulen Beniamina, hwân hnyi ke keihen e jimeyö ke ne o but hnyi ke keihen e jimeü; khaca jekhöü Simeona.

25 Ke haba hnyi hnyigöulen Simeona, hwân hnyi ke keihen e jimeyö, ke ne o but hnyi ke keihen e jimeü; khaca jekhöü Isakara. 26 Ke haba hnyi hnyigöulen Isakara, hwân hnyi ke keihen e jimeyö ke ne o but hnyi ke keihen e jimeü; khaca jekhöü Zebulona. 27 Ke haba hnyi hnyigöulen Zebulona, hwân hnyi ke keihen e jimeyö, ke ne o but hnyi ke keihen e jimeü; khaca jekhöü Gada. 28 Ke haba hnyi hnyigöulen Gada, hnyi ke keihen ka hnyi hwaiöu, ame he hnyigöulen hwân hnyi Tamara ke ne o but hnyi köio Meriba-kadesi, ka hnyi wageweiny Aigupito, ke ne o but hnyi köio ae gan. 29 Wale hnyei öbun e he ka khenâ hnân iny je tribu Isaraela, ke wale je jekhöüdrin, haingen Than Iehova.

30 Ke walang je hnyigöuleiny taun; haba hnyi ke keihen ka hnyi hwadrö foa thauzan faiv haded je hlowe tulut: 31 ke haba je homagöuleiny taun me adre me he ka ha hoton ien je tribu Isaraela; kun ta homagöule ka hnyi hwadrö, khaca me homagöule Reubena; ke haba khaca, me homagöule Juda; ke haba khaca, me homagöule Levi: 32 ke haba hnyi ke keihen e jimeyö, me foa thauzan ke faiv haded je hlowe; ke kun ta homagöule: haba khaca, me homagöule Josefa; ke haba khaca, me homagöule Beniamina; ke haba khaca, me homagöule Dana: 33 ke haba hnyi ke keihen ka hnyi hwaiöu, me foa thauzan ke faiv haded je hlowe tulut; ke kun ta homagöule; haba khaca, me homagöule Simeona; ke haba khaca, me homagöule Isakara; ke haba khaca, me homagöule Zebulona: 34 ke haba hnyi ke keihen e jio, me foa thauzan ke faiv haded je hlowe, ke kun ta homagöule: haba khaca, me homagöule Gada; ke haba khaca, me homagöule Asera; ke haba khaca, me homagöule Nafatali. 35 Ke haba je hlowe igigilö me eitn thauzan: ke hwân hnyi bong eling haba ien taun, me, Iehova bi eling.

# TUSI DANIELA.

## HNYIMAKAN 1.

**H**NYI huna a kuniny musu a Jehoiakima than Juda, haba Nebukaneza than Babulona ame o hnyi Jerusalema me thelöng e. 2 Ke haba Than ame hnö Jehoiakima than Juda ka hnyi hnyamen, tha e me ke je omjehen uma umen Khong; me e ame sukhöünâ ka hnyi hnyei Sinara ka hnyi uma umen khongon: ke e ame ip je omjehen ka hnyi uma omjeü umen khongon. 3 Ke ame ha than kö Asepenaza at ame musö anyin je eunuka, he ka hom ke je lakon Isaraela, a je matrâniny than ke je hnyat ae nua; 4 a je thöth ae ba hnyikongudrin, hnyat ae hmanenang he ka wâ, ke hnyat ae khan' ödrin je metâ hia, k' ödrin e wâhmakhmeto, ke tremângâ je hna úne, hnyat ae úcú he ka tot hnyi uma umen than; me hamen he ka n' ödrin ge úne ke hwen Kaledaia. 5 Ke haba than ame khenâ ködrin jeü an than hnyi taogo bong, ke waina a belen, me adre me he ka hat ödrin hnyi kun ta huna; me hwaban e me ödrin e he ka tot hnyi hnyimakan than. 6 Ke wale unyidra, a hanen lakon Juda, Daniela, ke Hanania, ke Misaela, ke Azaria. 7 Ke haba tuhan je eunuka ame hwenyi iödrin: ke e ame hwenyi iö Daniela, me Beletisaza; ke Hanania, me Saderaka; ke Misaela, me Mesaka; ke Azaria, me Abedengo. 8 Ke e mou hnyi hnyeku Daniela a g' ame ca he ka okongoâ e hnen jeü than, ke waina a belen: anyin a wale e ame sumâtâ tuhan je eunuka, me me ca ka hamen bi okongoâ e. 9 Ke haba Khong ame okûâ he ka betenge me hnyok kö Daniela hnen tuhan ta je eunuka. 10 Me haba tuhan ta je eunuka ame ha kö Daniela, ka habe, Iny ot ge than a tuhök, at ame khenâ ö 'bun jeü ke belibun: ke anyin a ieü e ame he bi ka wâ je hnyimakhöbun ae hlöuhlöu, me ca helâ me hnyimakan wahidröu a tha dö möbun? me öbun e he ka bi jöning böc ka than. 11 Ke haingö Daniela kö Meleza, wale at a otilâ tuhan je eunuka hu Daniela me Hanania me Misaela me Azaria, ka habe, 12 Mē cubic öhmun a lathnyabaem hnyi je bong a ten; me adre me he ka ha ö 'hmun

ge je khölak, me habelihmun ge köiö. 13 Ke u me he ka wâhmakhmeto je hnyimakhömun, me hnyimakan wahidröu hnyat adre me hnyi an jeü an than; ke ânyâ thö köhmun a lathnyabaem hoton hnâm hna he ka wâ. 14 Me e ame ling ödrin hnyi únyi eling, me cubic ödrin hnyi je bong a ten. 15 Ke ame um dö je bong a ten, me adre me wâ je hnyimakhödrin ae hmanenang, ke gan je unyidrin, hon hnyimakan wahidröu hia hnyat adre me an jeü an than. 16 Me haba Meleza ame hom hmetu jeü an than, me belidrin waina, me ha ö 'drin bi ge je khölak. 17 Ke haba je hidröu eling a vak, me Khong ame ham ködrin wâhmakhmeto me wânyküme hnyi je úne me metâ hia: ke haba Daniela ame metâ hnyi je hna omanenâ hia me ta je bwi. 18 Ke ame um dö je bong waleji hnen than hna thu bongon he ka hum ödrin, me haba tuhan je eunuka ame hum ödrin ka hnyi hnyimakhö Nebukaneza. 19 Ke haba than ame úhnenamö mödrin; ke ba ke at gadra hia adre me wâ ae úcú me Daniela, me Hanania, me Misaela, me Azaria: anyin a wale ödrin e tot hnyi hnyimakan than. 20 Ke haba hnyi ta únyi hia ge metâ me wâhmakhmeto, wale ame hnei ödrin gan than, e ame ö 'drin a ten beonuâ anyidrin metâ hon metâiny ta je magoi hia me tavat bibi-hwakecin hnyi dokhon dökhua hia. 21 Ke e bi Daniela ke ne o but hnyi huna a báni Koreso than.

## HNYIMAKAN 2.

**H**NYI huna a loiny musu a Nebukaneza, haba Nebukaneza ame bwo je bwi; me ame hlohlo hnyekon, me e ame ca mokut bi. 2 Me haba than ame úkhunöng he ka hom je magoi, ke tavat bibi-hwakecin, ke tavat tren khong, ke tavat Kaledaia, he ka omanenâ ka than je bwi-ny. Me ödrin e o but me tot hnyi hnyimakan than. 3 Ke haingen than ködrin, ka habe, Oge hia but bwi, k' ame hlohlo hnyekuk ae bekhanö nya bwik. 4 Me ame fuc at Kaledaia ka than hnyi hwen Suria, me ha, ka habe, E so e möt than nyiele balua; ha thö bwi köhmun a lathnyabaem,

## DANIELA 2.

me öhmun e he ka omanená bongon. 5 Ke haba than ame thu me ha ka at Kaledaia, ka habe, E hia but gak únyi: ke öbun e ne ca he bi ka omanená könya bwi, ke bongon e, me adre me he ka subâ omomonu öbun, m' adre me he ka wia umöbun je uma me hnân digic thatúnyi. 6 Ke so bi öbun e ne he ka omanená bwi me bongon e, awe, öbun e he ka hu únyi gak je bwihlany me hwaban, k' adre me he ka ogân' öbun: anyin a wale omanená thö könya bwi me bongon e. 7 Me adre me thu hmetu a loiny me ha, ka habe, E so ame he than ka ha bwi ka lathnyabaem, m' öhmun e he ka omanená bongon e. 8 Ke haba than ame thu, me ha, ka habe, Inya oge me wâ but a öbun e he ka obeçâ üen, anyin ae khan' öbun dut a g' ame hia but gak únyi. 9 Ke öbun e ne ca he ka omanená bongon bwi, me khaca thibi hnanyibu köbun: anyin a öbun e hia but penapena thoi me iyawö he ka ha könya, ke ne o but adre me hwiö üen: anyin a wale ha thö könya bwi, me me khanö nya thö ae khan' öbun he ka omanená bongon e. 10 Me haba at Kaledaia adre me thu hnyi hnyimakan than, ka habe, E ba at eang hmeledrany ae khana he ka omanená únyi anyin than; anyin ae ba than, ke taben, ke at musî ame hia but elâm únyi a helâe unyin je magoi ke tavat bibihwakecin ke at Kaledaia. 11 Ke haba únyi ame elam than, me e ti hmak, ke ca khana bi ke at he ka omanená e hnyi hnyimakan than, ke so thibi je khong, a tavat adre me ca tha laba me tavat. 12 Anyin a wale than ame hmönyin me wathethöt gan hmâ, me úkhünöng he ka ohia tavat hia ae metâ hnyi Babulona. 13 Ke adre me haimemenâ hnanyibu, ke adre me he ka hlingâ tavat ae metâ; ke adre me elöm Daniela me je lahanen he ka hling' ödrin. 14 Haba Daniela ame thu hnyi wâhmakhmeto me metâ kö Arioka taben tavat tue anyin than, at ame he he ka hlingâ tavat metâ hnyi Babulona; 15 me e ame ha kö Arioka a taben unyin than, ka habe, anyin a ieu ae logot hnanyibu únyi ge than? Haba Arioka ame omanená únyi eling kö Daniela. 16 Haba Daniela ame didrö me sumâtâ ge than he ka hna kâu üen, me me he ka omanená bongon bwi ka than.

17 Haba Daniela ame he ka hnyi umen uma me omanená únyi eling kö Hanania, me Misaela, me Azaria a je lahanen: 18 m' ödrin e he ka sumâtâ betenge únyi ge Khongon drany hnyi únyi eling ae

iyong; me me ca tha he Daniela me je lahanen ka mok tha ödrin me tavat ae metâ hnyi Babulona. 19 Me adre me omanená kö Daniela hnyi hna omanená hnyi lit únyi eling ae iyong. Me haba Daniela ame haisoâ Khongon drany. 20 Ke haingö Daniela, ka habe, E so adre me haisoâ ien Khong nyiele nyiele balua; anyin a e unyin metâ me man: 21 ke e ame wia je huna me je üen: e ame hom but je than me otîlä je than: e ame ham metâ ka tavat ae metâ, me wâhmakhmeto ka tavat wâhmakhmeto: 22 e ame omanená je únyi ae dit ke iyong: e khana ta je únyi hnyi menekholom, ke ame tha laba mē lany. 23 Inya oge me ole me oganö u Khongon lakamök, u at a ham könya metâ me man, ke u je hia but omanená könya walang ang hnöhmun hna sumatö u: anyin a u je hia but omanená köhmun únyi anyin than. 24 Anyin a wale Daniela ame he kö Arioka, wale a kunâ than he ka hlingâ tavat ae metâ hnyi Babulona: e ame he me ha kâu, ka habe, Ca he ka hlingâ tavat ae metâ hnyi Babulona: hum nya thö ka hnyi hnyimakan than, me oge me he ka omanena bongon ka than.

25 Me haba Arioka ame ie hum Daniela ka hnyi hnyimakan than, me ha helâng kâu, ka habe, Oge me wâ at a hanen bâ anyin at Juda, me ame he ka omanená bongon ka than. 26 Ke haingen than kö Daniela, adre hwenyi ien Beletisaza, ka habe, Hawa, e khanö u he ka omanená könya bwik bwi oge me bwo me bongon e? 27 Me Daniela ame thu hnyi hnyimakan than me ha, ka habe, Haba únyi ae iyong wale u je elâm, than, ke ca khana bi tavat ae metâ, ke tavat bibihwakecin, ke je magoi, ke tavat tren khong he ka omanená ka than; 28 ke so bi, e hu Khong hnyi drany at ame omanená ta je únyi ae iyong, me e ame hia but thumetu u Nebukaneza than, ta je únyi ame he ka o nyiele. Walang bwem ke únyi eji u je wâ hon hnâm hna mokut: 29 haba u, than lö, ame o but hnâm je hna únykúme hon hnâm hna mokut, wale ta je únyi ame he ka o nyiele: ke haba at ame omanená ta je únyi ae iyong ame thumetu u ge ta je únyi ame he ka o. 30 Ke haba inya, me adre me ca omanená könya únyi ang ae iyong can a iny metâ hon tavat hia ae möt, ke so bi hnân omanená bongon ka than, me me khanö u thö je únykúmenen hnyekom. 31 Than lö, u je wâ, me wâ bi hnatheat ae gan. Ke haba

DANIELA 3.

hnatheat eling, wale ae gan, ke ti so hmönyin hmanenanginy, me ame tot hnyi hnyimâkâm; ke hnân outen e at ka wâ. 32 Ke haba ban hnatheat eling, me gol ae so, ke haba ûlainy ke li benyin, me sileva, ke haba hnyekon ke li jevan, me bras, 33 ke haba li can, me fao, ke haba li hnyeûcan, me fao ke keihen ke kânâ kece ke keihen. 34 Ke u je wâ ke ne o but ame manen dö veto adre sö ke ca hnen hnyam, k' ame kot hnatheat hnyi li can a fao ke kânâ kece, me ame omomonu but. 35 Me ame tha omomonu but fao, me kânâ kece, me bras, me sileva, me gol, me helâ me unen hwit hnyi hna huje hwit hnyi honivakeny; ke haba ang ame tûâ degecâ, ke ba hmetu bi hnen: ke haba veto, at ame kot hnatheat, me e ame wia me bucen ae gan hmâ, me ame öunöngötâ hmele drany hia. 36 Wale bwi; ke öhmun e he ka omanenâ hnyi hnyimakan than bongon e. 37 U than lö, thaniny ta je than, ke Khongon drany ame ham köu dökhu, me man, me tang hwege, me hmanenang; 38 Ke e ame hia but hna ka hnyi hnyamâm je menoiny hnyot, me je meno ame gâ ethö, hnyi je dok hia ame laba hnyin lakon tavat, ke e ame hna köu he ka musi ödra hia: haba u, waleji ban a gol. 39 Ke hwabâm dö ame he ka kú ke dökhu ae ûhnyûkong hmelâm; ke ke dökhu minya a kuniny, a bras, e ame he ka musö hmele drany hia. 40 Ke haba dökhu a vakiny ame he ka hwege helâ me fao: anyin a haba fao at ame omomono me hom oûnyûk-ongoâ ta je ûnyi hia: ke helâ me fao ame oamemâ ta je ûnyi hia eling, helâe e ame he ka omomono me oamemâ. 41 Ke anyin a u je wâ li hnyeûca me je bacan, a kânâ hnân up kaia hanen, ke fao hanen, me adre me he ka subâ luâ dökhu; ke so bi, ame he ka e unyin hwegien fao, anyin a u je wâ fao adre úhaniken me kânâiny kaia. 42 Ke haba je bacan a fao me kânâ kece hanen, helâe ame he ka hwege ke keihen dökhu, me ngâ ke keihen. 43 Ke u je wâ fao adre úhaniken me kânâiny kaia, adre me he ka úhaniken me je mâtâniny at; ke adre me ca he ka úkeceköu bi, helâ me fao ame ca tha hûjö me kânâ ae kece. 44 Ke haba hnyi je bongongon je than eling, me ame he Khongon drany ka oâ ke dökhu a g' adre me ca he ka ohia nyiele balua, ke adre me ca he ka hna dökhu eling ka ke hnyei; ke e ame he ka kot omomono me ohia ta je dökhu hia eling, ke e ame he ka

tethmâ nyiele balua. 45 Anyin a u je wâ a g' adre sö veto ûnyi hnyi bucen, ke ca hnen hnyam, me e ame kot omomono fao, me bras, me kânâ ae kece, me sileva, me gol; haba Khong ae gan ame omanenâ ka than ta je ûnyi ame he ka o nyiele: ke e hnathu bwi, ke hmâ bi hna ha bongon. 46 Me haba Nebukaneza than ame ta ju hnyikânâi me nom kö Daniela, me úkhúnöng he ka ham bwihlany me je ûnyi ae bo so kâu. 47 Ke haingen than kö Daniela, ka habe, E hnathu, haba Khongubun me Khongon ta je khong, ke Tuhan ta je than, ke at ame omanenâ ta je ûnyi ae iyong, anyin ae khanö u he ka omanenâ ûnyi e ae iyong. 48 Me haba than ame ogöranyi Daniela, me ham kâu je bwihlany ae gan, me otilâ e he ka musö hnyei Babulona hia, me wia e me taben ae beönua hon tavat ae metâ hia hnyi Babulona. 49 Ke Daniela ame sumâtâ than, me e ame otilö Saderaka, ke Mesaka, ke Abedenego hon ta je ûnyi hnyi hnyei Babulona: ke haba Daniela ame laba hnyi homagöuleny than.

HNYIMAKAN 3.

**H**ABA Nebukaneza than ame ânyâ hnatheat gol, ke sikste kubit ibeüen göranyai, ke siks ta kubit úlauen: me e ame otilâ e hnyi dok ae tha hon hnyi Dura, hnyi hnyei Babulona. 2 Ke haba than Nebukaneza ame úkhúnöng he ka úkhacaköuâ tavat musi ae gan, ke je gavena, ke tavat musi, ke tavat owisa, ke tavat tuö omjeû, ke tavat ha bongon hnanyibu, ke tavat úhnei ge hnanyibu, ke tavat musi hia hnyi hnyei, ka hnyi dok adre me he ka okabâ hnyin hnatheat wale a otilâ hnen Nebukaneza. 3 Ke ame úkhacaköu tavat musi ae gan, ke je gavena, ke tavat musi, ke tavat owisa, ke tavat tuö omjeû, ke tavat ha bongon hnanyibu, ke tavat úhnei ge hnanyibu, ke tavat musi hia hnyi hnyei, ka hnyi okabâ hnatheat wale a otilâ hnen Nebukaneza than; me adre me útitilen hnyi hnyimakan hnatheat wale a otilâ Nebukaneza. 4 Me ame ha gânâ hnen at bi hnyimen musi, ka habe, Walang hnanyibu köbun tavat lö me je hnyei, me je ve hwen hnyei, ka habe, 5 Haba úen öbun e he ka löng hnyin ifucin trutru, ke utköwi, ke kitara, ke sabeka, ke saniter, ke sumefono, ke ta je únyikhu-möng hia, me öbun e he ka ta ju hnyikânâi me khudrung ka hnatheat gol, wale a otilâ

### DANIELA 3.

Nebukaneza than: 6 ke haba at ame ca he ka hnyi ta, me khudrung, me adre me he ka khûâ e hnyi awa eling ka hnyi thop ae môt hnyin meic. 7 Anyin a wale hnyi ûen tavat hia adre me lóng ifucin trutru, ke utköwi, ke kitara, ke saniter, ke ta je ûnyikhumöng hia, me ame ta hnyikânâi tavat hia, me je hnyei, me je ve hwen hnyei, me khudrung ka hnatheat gol a otilâ Nebukaneza. 8 Anyin a wale hnyi ûen eling ame hakekeny keihen at Kaledaia, me khûâ at Juda. 9 Adre me ha kö Nebukaneza than, ka habe, E so u môt than nyiele balua. 10 U, than lö u je otilâ hnanyibu a haba at ama lóng ifucin trutru, ke utköwi, ke kitara, ke sabeka, ke saniter, ke sumefono, ke ta je ûnyikhumöng hia, me ame he ka ta ju me khudrung ka hnatheat gol: 11 ke haba at ame ca he ka hnyi ta me khudrung, me adre me he ka khûâ ka hnyi thop ae môt ge meic. 12 Wale keihen at Juda u je hia but otilâ hon ta je ûnyi hnyi hnyei Babulona, jia Sadereka, ke Mesaka, ke Abedenego; haba hnyat eling, than lö, ödrin e ca lóng köu: ödrin e ca bi athnyaba ka ânyâm je khong, me khudrung ka hnatheat gol u je otilâ. 13 Me ame hmönyi Nebukaneza ke wathethöt, me ûkhûnöng he ka hum Saderaka, ke Mesaka, ke Abedenego. Me adre me hom je hnyat eling ka than. 14 Ke haba Nebukaneza ame ha ködrin, ka habe, Hawa Saderaka, ke Mesaka, ke Abedenego lö e hu can gabun a öbun e ca bi athnyaba ka khonguk, me khudrung ka hnatheat gol oge otilâ? 15 Walang ang, öbun e ne penapena, öbun ka lóng ifucin trutru, ke utköwi, ke kitara, ke sabeka, ke saniter, ke sumefono, ke je ûnyikhumöng hia me öbun e he ka ta me khudrung ka hnatheat gol oge me ânyâ, me so ling: ke so bi öbun e ne ca he ka khudrung, haba hnyi awa eling, me adre me he ka khû' öbun ka hnyi thop ae môt hnyin meic; ke ewa khong ame he ka hûgûn' öbun hnyi li hnyamök? 16 Me ame thu Saderaka, ke Mesaka, ke Abedenego, me ha ka than, ka habe, Nebukaneza lö, e ca ûcû köhmun he ka thu köu hnyi ûnyi e. 17 A ne helâe, me khana Khonguhmun, at öhmun e bi athnyabainy he ka hûgûn' öhmun ûnyi hnyi thop ae môt hnyin meic; me e ame he ka hûgûn' öhmun ûnyi hnyi hnyamâm, than. 18 Ke so bi a ne ba, me wâhmakhmetoâ ju than a öhmun e ca he ka bi athnyaba je khongom, me khudrung ka hnatheat gol u je otilâ.

19 Me ame unöngötö Nebukaneza ge hmönyin, ke ke bongon bi hnyimakan kö Saderaka, ke Mesaka, ke Abedenego: ke e ame fuc me hûna ködra a g' adre me he ka oseven okahwa meic hon hnödra hna labö okahwa e. 20 Me e ame hûna ka ke je taben, a hanen je deö vat unyin he ka cö Saderaka, ke Mesaka, ke Abedenego, me khû' ödrin ka hnyi thop ae môt hnyin meic. 21 Me adre me ca hnyat eling, ke hu tangen cadrin, ke hnabicödrin, ke ûköt, ke je khaüödrin, me khû' ödrin ka hnyi wanben thop ae môt hnyin meic. 22 Anyin a wale, ke can ame hwege hna hûna hnen than, ke ti kahwa hmönyin meic, me ame hlingâ ge bâhlân meic tavat adre me hum Saderaka, ke Mesaka, ke Abedenego. 23 Ke haba hnyat eling a kun, wale Saderaka, ke Mesaka, ke Abedenego, me ödrin e ta adre me c' ödrin ka hnyi thop ae môt hnyin meic. 24 Me ame uthmâhmâ Nebukaneza than, me ie tot: me e ame thu me ha ka anyin tavat ûhnenamö, ka habe, Hawa, ötin e ca khûâ kun ta hnyat adre ca ka hnyi meic? Me adre me thu me ha ka than, ka habe, E, than. 25 Me e ame thu me ha, ka habe, Wâ bi, oge me wâ hnyat a ödrin vak k' adre thang bi, ödrin e ngenu hnyin meic, k' ödrin e ca kong bi; ke haba unyin at a vakiny, me helâ me unyin ke khong. 26 Me haba Nebukaneza ame hakekeny ka hnyi hnyimen thop ae môt hnyin meic, me ha, ka habe, E, Saderaka, me Mesaka, me Abedenego, je athnyabainy Khong ae Beönuu, ai öbun, kâ âng. Me ame didrut Saderaka, me Mesaka, me Abedenego ûnyi hnyi hnyin meic. 27 Ke ame wâ hnyat eling hnen tavat musi ae gan, ke je gavena, ke tavat musi, ke tavat ûhnenamö anyin than, wale adre ûkhacaköu, ae ba maniny meic hon je unyidrin, ke a ca hlâ bi leûnen bödrin, ke a ca wia bi tangen li cadrin, ke a bon meic unyidrin. 28 Ke haba Nebukaneza ame ha, ka habe E so adre haisoâ Khongu Saderaka, me Mesaka, me Abedenego, at ame kunâ anyin angela, me omelö je athnyabainy hnyat adre me labageju kâu, ke ödrin e wia hofuc hwan than, me hna je unyidrin, m' ödrin e ca he ka bi athnyaba me khudrung ka ke khong bi. 29 Anyin a wale oge me otilâ hnanyibu, a haba tavat hia, me ta je hnyei, me je ve hwen hnyei, adre ne he ka ha ûnyi ae kong ge Khongu Saderaka, me Mesaka, me Abedenego, me adre me he ka subâ omomonu ödra, me

wia umödrin je uma hnân digic thatûnyi : anyin ae ba ke khong ae khana he ka úhömeli helâe. 30 Haba than ame ogö-ranyi Saderaka, me Mesaka, me Abedenego, hnyi hnyei Babulona.

## HNYIMAKAN 4.

**I**NYA Nebukaneza than, ame ha ka tavat hia, me je hnyei me je ve hwen hnyei bi, tavat adre me labâ hmeledrany hia, ka habe, E so ame osehiâ anyibun hnahic. 2 Oge me únykúme e so he ka omanená ta je haten me je únyi hnân láiiá waleji a ányâ könya Khong ae Beönua. 3 E ti beönua anyin je haten! ke ti gan hmâ anyin ta je únyi hnân láiiá gan! dökhu ae hmâ nyiele balua dokhon dökhu, ke; hwân hnyi ke dö, ke ne o but ka hnyi ke dö anyin musi.

4 Inya Nebukaneza oge me menâ hnyi umök uma, ke iny sot hnyi hnyabak. 5 Oge me bwo bwi, me ame ooti nya; ke oge me hmak ge je hna únykúme hon hnök hna mokut, ke ta je únyi ae manen könya. 6 Anyin a wale oge me otilâ hnanyibu he ka hom könya tavat metâ hia hnyi Babulona, me me hamödra he ka omanená bongon bwi. 7 Me ame o könya ta je magoi, ke tavat bibihwakecin, ke at Kale-daia, ke tavat tren khong: me oge me ha bwi hnyi hnyimaködra; ke adre me ca omanená könya bongon. 8 Ke hwaban e ame o but könya Daniela, ke ien Beletisaza, k' adre tha ien me anyik khong, ke e unyin hanon je khong ae kap: me oge me ha kâu bwi me ha, ka habe, 9 Beletisaza lö, tuhan je magoi, e khanö nya but a e unyâm hanon je khong ae kap, ke ba ke únyi ae iyong ae hmak köu, anyin a wale ha thö könya hna wâ hnyi bwik waleji oge me bwo, me bongon e. 10 Ke walang hnök hna wâ hon hnök hna mokut; Wâ bi, inya oge me wâ úö hnyi wanben hmeledrany, ke beú hmönyin göranyai. 11 Ke ame kú thö úö, ke hwege bi, ke haba ibeúen e, me ame o but hnyi drany, me e manen ke ne o but hnyi je can hmeledrany. 12 Ke e hmanenang je lan, ke se hia je wan, ke hu han hnyin e hobi kâu hia: ke haba ta je menoiny hnyot me adre me tung hmelen, ke haba je meno adre me gâ ethö, me adre me tabâ je anginy, k' adre me hân ta je únyi hia ae möt únyi hnyin e. 13 Wale únyi oge me wâ hon hnök hna mokut, ke wâ bi at hmákâ ke e kap ame

utut úheny hnyi drany. 14 Me e ame hongot hwegiâ, ka habe, Sö but úö, ke subâ but ta je anginy, ke jijingâ degecâ but je lan, ke ve khúâ je wan e: e so e kec ut únyi hnyi hmelen e ta je meno adre me he, ke je meno ame gâ únyi hnyi je anginy. 15 Ke so bi hnen ju hnyiban e ke iwân eú hnyi kânâ, ke ohmâ ju e ge je tö fao ke bras, hnyi hna önying ae hât hnyi kânâ; ke so e ame khubet ge dân hau únyi hnyi drany, ke so e ame he ka tha jekhon me ta je menoiny hnyot hnyi hna önying: 16 adre me he ka wia hnyekon at a e, me ham bi kâu hnyekon meno, ke ne o but ame um dö je úen a seven. 17 Hnen musi anyin tavat hmákâ únyi eling, me hnen hofuc hwan tavat ae kap hna búna eling: me me khana tavat ae möt a g' ame musi At ae Beönua hnyi dökhu dokhon tavat, ke e ame ham kâu hnen hna weny, me otilâ hon e houmonu. 18 Wale bwik waleji oge bwo, inya Nebukaneza than: ke hamâm Beletisaza he ka omanená bongon könya, anyin ae ca khana bi tavat hia ae metâ hnyi dökhu dökhu he ka omanená könya bongon; ke e khanö u, anyin a e unyâm hanon je khong ae kap.

19 Me ame hlohlo Daniela, Beletisaza ke ien, hnyi ong úen, ke ame ohmákâ e hnen je hna únykúme. Me amé ha than, ka habe, Beletisaza lö, ca he ka hmak ge bwi me bongon e. Ke haingö Beletisaza, ka habe, thân lö, e na ödrin ju tavat adre me húkotiö u bwi e, ke e na ödra ju je iwahnaihmöny möu bongon e. 20 Haba úö u je wâ, waleji ame kú thö me hwege, me beú ke ne o but hnyi drany, me manen ka hmeledrany hia; 21 ke hmanenang je lan, ke se hia je wan, ke hu han hnyin hobi kâu hia; ke je menoiny hnyot adre me laba hmelen, me je meno adre me gâ adre bi uma hnyi je anginy: 22 than lö, u ling, anyin a u gan hmâ me hwege; ke ame kú gan ányâm lung ke ne o thö hnyi drany, me ányâm musi ke ne o but hnyi je can hmeledrany. 23 Ke u je wâ than lö at hmákâ me at ae kap ame utut úheny hnyi drany me ha, ka habe, Sö but úö, me ohia e; ke so bi hna biju hnyiban e me iwân hnyi kânâ, ke ohmâ ju e ge tö fao ke bras hnyi hna önying ae hât; ke e ame he ka khubet ge dân hau únyi hnyi drany, ke ame he ka tha jekhon me je menoiny hnyot, ke ne o but ame um dö je úen a seven; 24 than lö, walang bongon, ke wale musi anyin At ae Beönua, ame he ka o ka



## DANIELA 5.

tuhök a than : 25 a adre me he ka obö u unyin tavat, ke u me he ka tha laba me je menoiny hnyot, ke u me he ka han önying helâ me bolok, ke u me he ka kubet ge dân hau únyi hnyi drany, k' ame he ka seven je úâm ; ke ne o but ame khanö u thö a g' ame musi At ae Beönua hnyi dökhu dokhon tavat, k' ame ham e ka hnen hna weny kâu. 26 Ke haba hna hûna he ka hnen biju hnyiban úö ke wân, me wale ame he ka hmâ köu dokhom dökhu, e ka khanö u thö a g' ame musi drany. 27 Anyin a wale, than lö, e na so ju köu bok hofuc, ke soju monu gam, me ânyâ wisa, ke soju lwakecâm ae kong, ke betenge ju ge tavat ae theduoc ; m' adre me ne he ka obeûâ hnâm hnâhic. 28 Me ame aat dö kö Nebukaneza ta je únyi hia eling. 29 Ke hwaban je tehi a twelv e ame ngenu hnyi uma umen than e Babulona. 30 Ke haingen than, ka habe, Hawa, ca Babulona ang ae gan, waleji oge me op hnân hnyaban than hnen manik man ae hwege, ke hnân he ka ogânâ anyik hmanenang. 31 Ke tiga e hofuc hnyi hnyimen than, me ame o but ke hofuc únyi hnyi drany, ka habe, Nebukaneza than lö, adre me ha köu ke hofuc : a g' adre hia but hûgúnâ dökhu gam. 32 Me adre me he ka obö u unyin tavat, me u me he ka tha laba me ta je menoiny hnyot ; u m he bi ka han önying helâ me bolok ke ame he ka seven je úâm, ke ne o but ame khaüö u thö a g' ame musi At ae Beönua hnyi dökhu dokhon tavat, me ham e ka at e ame weny kâu. 33 Ke haba hnyi awa eling ame hwâdâ thö kö Nebukaneza : me adre me öbâ e unyin tavat, me e ame han önying helâ me bolok, ke khubet unyin ge dân hau únyi hnyi drany, ke ne o but ame beû but leúnen ban helâ me leúnen aeto, ke helâ me újimen bacan meno ame gâ je boujimen. 34 Ke hwaban je bong, inya Nebukaneza oge me bwele thö göranyâi ka hnyi drany, me ame hmetu könya hnyekuk, me oge me haisoi Beönua, ke ogânâ ke ogöranyâ e at ae möt nyiele balua : anyin a nyiele balua anyin musi, ke haba dokhon dökhu ame o but ka hnyi ta je dö hia : 35 k' ame únykúme a helâ me thatúnyi tavat adre me labâ hia hmeledrany : ke e ame ânyâ hoton weny unyin je köiöiny drany, ke tavat adre me labâ hmeledrany ; ke ba at ame he ka thawâ hnyamen me ha kâu ka habe, Ieú u me ânyâ? 36 Hnyi úen eling ame hmetu

hnyekuk könya ; ke ame hmetu thö könya anyik lung ke anyik hmanenang, me me mec dökhu dökhu ; ke ame elöm nya hmetu hnen anyik tavat úhnenamö me anyik je taben ; ke adre ohmö nya hmetu thö hnyi dökhu dökhu, ke adre bi hanen anyik hmanenang ae gan. 37 Ke walang ang, inya Nebukaneza oge me olungâ me ogânâ Thaniny drany ; anyin ae wisa anyin ta je huliwa hia, ke úcú deny je gethen : ke e khana he ka hom úhnyükongo tavat vheno bi gan.

### HNYIMAKAN 5.

**H**ABA Belesaza than ame ânyâ bijeú ae gan ka anyin je taben a wan thauzan, ke e ame ic waina hnyi hnyimakan thauzan. 2 Hnyi úen e ame ic waina Belesaza ame úkhúnöng he ka hom je kaia gol me sileva, waleji a hûgúnâ Nebukaneza a kamen únyi hnyi hnyin uma kap e Jerusalema ; me me ic kâu than, me anyin je taben, me laâiân, me anyin je momo. 3 Me adre me hom je kaia gol waleji adre hûgúnâ únyi hnyi uma umen Khong hnyi Jerusalema ; me ame ic kâu than me anyin je taben, me laâiân, me anyin je momo. 4 Adre me ic waina me ogânâ je khong gol me sileva, me bras, me fao, me utö, me veto. 5 Haba hnyi awa eling ame o but je banyen at, me sihnalimen cicö taben lamepa hnyi hna up uma hnyi uma umen than : ke a wâ but than hanen hnyam at a sihnalimen. 6 Me ame hwiö hnyimakan than, ke ame ohmakâ e hnen je únykúmenen ; ke ame memen dut je jeien hnyin, ke ame öbubuny but li boucan. 7 Haba than ame ha hwegiâ he ka hom tavat bibihwakecin, me at Kaledaia, me tavat tren khong. Ke than ame ha ka tavat metâ hnyi Babulona, ka habe, Haba at ama aú hna sihnalimen ang, me omanená könya bongon e, me adre me he ka okhavâ ge úkhaú ae udrudrá hlit, ke ovhekinyâ ge sawakiny gol, ke e ame he ka tot me at a kuniny unyin je musi hnyi dökhu. 8 Ke ame o but tavat metâ hia anyin than : ke ca khan' ödrin he ka aú hna sihnalimen, me omananá bongon ka than. 9 Me ame hmak gan hmâ Belesaza than, me ame ke bongon bi hnyimakan, me ame hlohlo anyin je taben. 10 Ke ame didrö momo than ka hnyi uma han únyi hnyi hofuc hwan than me anyin je taben : ke haingen momo than, ka habe, E so e

möt than nyiele balua ; ca hmak bi ge je únykúmenâm, ke ca okebongonâ hnyimákâm : 11 e hu ke at hnyi dokhom dökhu a e unyin hanon je khong ae kap ; ke haba hnyi úen kamâm, me adre me wâ unyin melam, ke wâ únykúme, ke metâ, helâ me metâ anyin je khong : ke haba Nebukaneza than a kamâm, wale than a kamâm bi, me e ame otilâ e hnân taben ka ta je magoi, ke tavat bibihwakecin, ke at Kaledaia, ke tavat tren khong ; 12 anyin adre me wâ hnyok ae beönua unyi Daniela eling, ke wâhmakhmeto, ke wâ únykúme, k' ame omanenâ bongon je bwi, k' ame wia je hofuc ae iyong, ke thang ta je vhet, ke haba than ame hwenyi ien e me Beletisaza. Ke walang, e so he ka hum Daniela, me ame he ka omanenâ bongon.

13 Me adre me hum Daniela ka hnyi hnyimakan than. Ke haingen than kö Daniela, ka habe, U Daniela hanen je bá anyin at Juda, waleji hnen than a kamök hna hom úheny Juda? 14 Oge hia but löng gam a e unyâm hanon je khong, ke adre me wâ melam unyâm, ke wâ únykúme, ke metâ ae beönua. 15 Ke adre hia but hom tavat ae metâ ka hnyi hnyimakök, a tavat bibihwakecin, m' adre me he ka aú hna sihnalimen ang me omanenâ kõnya bongon : ke ca khan' ódra omanenâ bongon únyi e. 16 Ke oge me löng gam a e khanö u he ka omanenâ bongon, me thang ta ja vhet : ke walang a ne khanö u he ka aú hna sihnalimen, me omanenâ kõnya bongon, me adre me he ka okhaúö u ge úkhaú ae udrudrá hlit, me ovhekinyi u ge sawakiny gol, ke u me he ka at a kuniny bi unyin je musi hnyi dökhu. 17 Haba Daniela ame thu hnyi hnyimakan than, me ha, ka habe, Hnen ju unyâm ányâm je bwihlany, ke ham bi ka ke at hwaban únyi gam ; ke so bi oge me he ka aú kóu than hna sihnalimen, me omanenâ kóu bongon. 18 Than lö, Khong ae Beönua ame ham kö Nebukaneza a kamâm dökhu, me hna ogánâ, me mec, me hmanenang : 19 ke can hna ogánâ e adre me ham káu, me ame óbubuny me ot hnyi hnyimakan tavat hia, me ta je hnyei, me je ve hwen hnyei : e ame hlingâ hnen hna behlingâ, me omelö hnen hna beomelö ; ke e ame ogánâ hnen hna beogánâ, me öhnyikánâ hnen hna beöhnyikánâ. 20 Ke hnyi úen ame bi gan hnyekon, ke hwege hnyekon me me huliwa hnyi hop, me adre me öhnyikánâ e únyi hnyi hon theroniny dokhon dökhu, ke adre

me hügúnâ gan anyin hmanenang : 21 ke adre obâ e unyin tavat ; ke helâ but me je meno hnyekon, ke e ame tha laba me je asinainy hnyot ; e ame han önying helâ me bolok, ke khubet unyin ge dân hau únyi hnyi drany : ke ne o but e ame wâ a g' ame musi Khong ae Beönua hnyi dökhu dokhon tavat, me e ame otilâ hon e hnen hna weny káu. 22 Ke haba u, Belesaza a nokon lö, u je ca öhnyikánâ hnyekom, ke so bi e khanö u ta je únyi hia eling ; 23 ke u je bi gan ka Thaniny drany ; ke adre hia but hom je omjehen umen uma ka hnyi hnyimákâm, ke u je hia but, ke ányâm je taben, ke laáiâm, ke ányâm je momo, ic waina káu ; ke u je hia but ogánâ je khong sileva, me gol, me bras, me fao, me utö, me veto, wale adre me ca bwele, me löng, me khana : ke haba Khong at ame musö homenâm, ke e unyin dem je gethen hia, me u je ca ogánâ : 24 me ame kunâ únyi gan hanen hnyam ang, me ame sihnalimen hofuc ang. 25 Ke walang hofuc adre set, ka habe, MENE, MENE, TEKEL, UPARESin. 26 Ke walang bongon únyi e, ka habe, MENE ; a hia but Khong aú dokhom dökhu me bi óbiny. 27 TEKEL ; adre hia but tuluti u hnyi tulut uhni me ö u a u háhâ thö. 28 PARES ; adre hia but kia dokhom dökhu me ham ka at Madai me Peresi. 29 Me haba Belesaza ame húna, me adre me okhaú Daniela ge úkhaú ae udrudrá hlit, me ovhekinyâ e ge sawakiny gol, me haimemenâ gan a e ame he ka at musi a kuniny bi hnyi dökhu. 30 Ke adre me hlingö Belesaza than Kaledaia hnyi hnyinghet eling. 31 Ke haba Dariu at Madai ame kap musi hnyi dökhu, k' ame ne sikste tu je hunainy.

## HNYIMAKAN 6.

**K**E ame so kö Dariu he ka otilâ hon dökhu tavat musi ae gan a wan haded ke twente, m' adre me he ka laba hnyi dökhu hia ; 2 ke hudrin hia ta hnyat musi a kun ae beönua, ke Daniela khaca unyidrin ; me me he tavat musi ae gan he ka ha gaga ködrin je bongon, me me ca kong bi ta je únyi anyin than. 3 Ke adre me ónyihnthu Daniela hon ke li at musi ae beönua ke tavat musi ae gan, anyin a e unyin hanon ae ti so ; ke únykúmenen than he ka otilâ e hon dökhu hia. 4 Ke haba ke li at musi ae beönua ke tavat musi

## DANIELA 6.

ae gan, me adre me elâm can ga Daniela ûnyi hnyi dökhu ; ke ca khan' ödra he ka wâ ke can ke hulö : anyin a e hnathu, ke ba monu ke kongon adre me wâ gan. 5 Me ame ha hnen tavat eling, ka habe, Ötin e ca he bi ka wâ can ga Daniela, ke so bi ötin e he ka me wâ can ge hnanyibu anyin Khongon. 6 Me haba ke li at musi ae beönua ke tavat musi ae gan, ödrin e ukhacaköu ka than me ha kâu, ka habe, Dariu a than lö, e so u möt nyiele balua. 7 Öhmun e hia but tha úhnenamö a öhmun tavat musi hia ae beönua hnyi dökhu, ke je gavena, ke je musi ae gan, ke tavat úhnenamö, ke je taben, huân he ka ötila hnanyibu anyin than, me ohmâ hna nyibon, ka habe, Haba at ame he ka sumâtâ ke únyi unyin ke khong me ke at ke ne o but hnyi je bong a thöte, ke so bi köu thibi than, me adre me he ka khûâ ka hnyi op liona. 8 Ke walang ang, than lö, u na otilâ thö hna nyibon, me sihnalimen tusi, m' adre me ca he ka wia bi, hoton bongon hnanyibu anyin at Madai me Peresi, waleji adre me ca he ka wia. 9 Anyin a wale, haba Dariu than ame set ien hnyi hna sihnalimen me hna nyibon. 10 Ke e khañö Daniela but a g' adre set ut tusi, me e ame didrö ka hnyi umen uma ; (ke adre khöng je mamalaminy hnyeuleny cicö Jerusalema ;) ke e ame ibi okun cibouca hnyi je bong, me hic, me ole hnyi hnyimakan Khongon, helâ me hnen bi hna labö khenenâ. 11 Ke haba hnyat eling, adre me úkhacaköu me ö Daniela ame sumat me khöü hnyi hnyimakan Khongon. 12 Me adre me he me ha ka than ge hnanyibu anyin than ; Hawa, u je ca set iâm hnyi hnanyibu, a haba at ame he ka sumat únyi ge ke khong me at, ke ne o but hnyi je bong a thöte, ke so bi köu thibi than, me adre me he ka khûâ e ka hnyi op liona ? Ke haba than ame thu me ha, ka habe. E hnathu únyi e, helâ me hnanyibu anyin at Madai me Peresi, wale adre me ca he ka wia. 13 Me adre me thu me ha ka than, ka habe, Haba Daniela hanen je bâ anyin at Juda, me e ame ca outö u, than, me hnanyibu u je set iâm hnyin, ke e ame ibi okun sumâtâ ta je únyi hnyi je bong. 14 Ke a löng ut than hofuc eling, me e ame vec gan hmâ, me ip hmâ hnyi hnyekon he ka omeli Daniela : ke e ame huliwa ke ne o but ame didrut seúnö he ka omelö e. 15 Haba tavat eling adre me úkhacaköu ka than me ha ka than, ka habe, Khanö u thö,

than lö, a haba hnanyibu anyin at Madai me Peresi, m' adre me ca he ka wia hna nyibon me hnanyibu wale a otilâ than. 16 Ke than ame húna me adre me lili Daniela, me khûâ e ka hnyi op liona. Ke haingen than kö Daniela, ka habe, Haba Khongom, wale u je bi athnyabainy hnyi je bong, me e ame he ka omeli u. 17 Ke adre me hom veto me hlöng hnyimen thop ; ke haba than ame bi haten e ge anyin únyi hnân ohmâ haten, ke je hna ohmâ haten anyin je taben unyin ; m' adre me ca wia bi ga Daniela ke únyi a khaca. 18 Me ame he than ka hnyi umen uma, k' ame ca han hnyi lit ; k' adre me ca hom ta je únyikhumöng ka hnyi hnyimakan : ke e ame ca mokut. 19 Ke haba than ame vesâ hnyi hnyomakatu, me he logot ka hnyi op liona. 20 Ke e ame o but ka hnyi thop kö Daniela, me e ame hongot tenge göranyai : ke haingen than kö Daniela, ka habe, Daniela lö, athnyabainy Khong ae möt, hawa, e khana Khongom, wale at u je bi athnyabainy hnyi je bong he ka omeli u únyi ge je liona ? 21 Me Daniela ame thu ka than, ka habe, Than lö, e so u möt nyiele balua. 22 Haba Khonguk ame kunâ anyin angela, me öbuhlumo hnyimen je liona, m' adre me ca okongu nya : anyin adre me wâ ae ba hnyikonguk hnyi hnyimakan : ke haba khaca, than lö, e ba mouu oge me ânyâ hnyi hnyimákâm. 23 Me haba than ame senyin gan hmâ, me úkhúnöng he ka öü Daniela únyi hnyi thop. Me adre me öü Daniela únyi hnyi thop, ke ba aat adre me wâ gan, anyin a e ame labageju ka Khongon. 24 Ke than ame húna he ka hom tavat waleji adre me khûö Daniela, me adre me khû' ödrin bi ka hnyi op liona, ödrin, ke lakudrin, ke laöiödrin ; ke e hu maniny je liona hudrin, me me hmetru je jeiödrin hia, k' ödrin tiga ca kâlâ kânâ eü hnyi hnyin thop.

25 Ke haba Dariu than ame sihnalimen ka tavat hiâ, ke ta je hnyei, ke je ve hwen hnyei, a tavat adre me labâ hmeledrany hia, ka habe, E so öbun e hnahic hmönyin. 26 Inya oge me otilâ hnanyibu, ka habe, haba hnyi ta je ke keihen hia dökhu, me hamen tavat he ka ot me öbubuny hnyi hnyimakan Khongu Daniela : anyin a e Khong ae möt, k' ame tethmâ nyiele balua, ke adre me ca he bi ka ohia dokhon dökhu, ke hamen bi he ka musi ke ne o but hnyi obiny : 27 e ame omelö, ke hûgûná, k' ame ânyâ je haten ke je únyi

## DANIELA 7.

hnân láîâ ethö hnyi drany, ke eang hmelen ; at ame omeli Daniela únyi ge maniny je liona. 28 Ke so eling Daniela hnyi úen musi anyi Dariu, me úen musi anyi Koreso at Peresi.

### HNYIMAKAN 7.

**H**NYI huna a bâni Belesaza than Babulona, Daniela ame bwi, ke hu únyi ame manen kâu hon hnen hna mokut : me e ame sihnalimen bwi, me ha önyen ta je únyi. 2 Haingö Daniela, ka habe, Oge me wâ hnyi hna omanená könya bnyi lit, ke wâ bi, ame úhalupköu vak ta ang hon köiö ae gau. 3 Ke vak ta meno ae gan ame o únyi hnyi köiö ae ve bongudrin. 4 Haba at a bân, me helâ me liona, ke hu li labenyin aeto gan : inya oge me wâ ke ne o but adre hia thö hnimö li labenyin, ke adre kap e göranyai únyi hnyi kânâ, me otilâ e ge li can helâ me at, ke adre me ham kâu hnyekon at. 5 Ke wâ bi ke meno, at a loiny, helâ me bea, ke adre ogöranyâ ke keihen, ke kun ta jeien vhak hnyi hnyimen wanben ga nyon : ke adre me ha kâu, ka habe, Todrö, an gâûa ju utiö. 6 Hwaban e, inya oge me wâ, ke wâ bi ke meno helâ me lepad, ke e hu hnyi hoton vak ta labenyin meno ame gâ ; ke vak ta ban meno eling ; ke adre ham kâu he ka musi. 7 Hwaban e, inya oge me wâ hnyi je hna omanená hnyi lit, ke wâ bi meno a vakiny adre outen, ke tren man, ke ti hwege ; ke e hu je nyon ae gan a fao ; e ame olou me thu omomono, me ututo je kolon ge je can ; ke ve e bi me je meno a bân a kun ; ke ten je faoiny. 8 Inya oge me únykúme je faoiny, ke wâ bi, ame o but hnyi wanben ke faoiny ae úhnyúkong, ke adre oc wia hnyi hnyimakan e ta faoiny a kun a bân ; ke wâ bi, hnyi faoiny eling je ecmak helâ me je emakan at, me hnyem at ame ha je únyi ae gan. 9 Inya oge me wâ ke ne o but adre otilâ je theron, ke ame laba hon ke hingat at kâu adrem : e hau anyin úkhaú helâ me kiona, ke helâ me leúnen mamoe ae so leúnen ban, ke helâ me báhlân meic anyin theron, ke helâ me meic ame hlâ je waengen. 10 Ke ame hingölö wagewe meic me patrutrua únyi hnyi hnyimakan : k' adre me bi athnyaba kâu tavat a wan thauzan je thauzan, k' ame utitilen hnyi hnyimakan khaca miriad je miriad : k' adre me pena-pena he ka úhnei, k' adre me ulolo je tusi.

11 Ke oge me wâ hnyi úen eling, a can ifucin hwan ae gan hwan faoiny meno ; haba, inya oge me wâ ke ne o but adre me hlingö meno, ke obia unyin, k' adre me hna e me me thong meic. 12 Ke haba kolon je meno, me adre me hügúnâ musi gadrin : ke so bi adre me obeûa melidrin, ke ne o but hnyi ke huna me úen. 13 Ke oge me wâ je hna omanená hnyi lit, ke wâ bi, ame tha o me je úlâiny drany, at helâ me nokon at, ke e ame o ka hingat kâu adrem, m' adre me hom e ka hnyi hnyimakan. 14 Ke adre me ham kâu musi, ke hmanenang, ke dökhu, me me he tavat hia, ke ta je hnyei, ke je ve hwen hnyei ka bi athnyabainy : ke haba anyin musi, me musi ae tethmâ, k' ame ca he ka hia ; ke haba dokhon dökhu, me adre me ca he bi ka obia.

15 Ke haba inya Daniela, me ogo me hlöuhlöu eú hnyi hnyekuk, k' ame ohmaki nya je hna omanená könya hon hnök hna mokut. 16 Me oge me hakekeny ka ke at ame tot, me hnö e ge hnathuiny ta je únyi eling. Me e ame ha könya, me omanená bongon ta je únyi, ka habe, 17 Haba ta meno ang ae gan a vak, me walödrin vak ta than, ödrin e he ka o únyi hnyi hmeledrany. 18 Ke ame he ka kap dökhu hnen tavat ae kap anyi Beönua, mödrin e hu bala bi dökhu, wale nyiele nyiele balua. 19 Ke oge me bekhanö nya hnathuiny meno a vakiny ae ve bongon bi me je meno hia, k' adre me outen, ke haba je nyon, me je fao, ke bras je boujimen, at ame olou, ke thu omomono, k' ame uto je kolon ge je can ; 20 ke hawa ge je faoiny a ten hnyi ban, ke fao ame o k' ame ta ju kun ta faoiny hnyi hnyimakan ; wale fao ae hu je ecmak, ke hnyem, at ame ha ta je únyi ae gan, ke gan hmâ unyin hon je lahanen. 21 Ke inya oge me wâ, ke ame vat fao eling me tavat ae kap, me hwege bi hudra ; 22 ke ne o but ame o hingat at kâu adrem. ke adre me hna ka tavat ae kap anyi Beönua he ka owisa ; me ame o thö úen me hu dökhu ge tavat ae kap. 23 Haingen, ka habe, Haba meno a vakiny me wale dökhu a vakiny eang hmelen, ae ve bongon bi me ta je dökhu hia, e ame he ka an hmeledrany hia me uto e, me thu omomono e. 24 Ke haba je fao a ten, únyi hnyi hnyin dökhu eling ame he ka o je than a ten : ke hwabaödrin dö ame he ka o khaca ; ke e ame he ka ve e me je than a bân, ke e ame he ka hom úhnyúkongoâ

DANIELA 8.

kun ta than. 25 Ke e ame he ka fuc bi gan kö Beönua, me ovecâ tavat ae kap anyi Beönua : ke e ame he ka únykúme ka wia je úen, me je hnanyibu ; ke adre me he ka hn' ödrin ka hnyi hnyamen, ke ne o but ame o ke úen me li úen, me haf úen. 26 Ke adre me he ka laba he ka úhnei, ke adre me he ka húgúnâ anyin musî, he ka ohia e, me oumo, ke ne o but obiny. 27 Ke haba dökhu, me musî me uganiny ta je dökhu eang hmeledrany hia, adre me he ka ham ka tavat ae kap anyi Beönua : dökhu ae hmâ dokhon dökhu, ke ame he ta je musî hia ka bi athnyaba me löng kâu. 28 Walang obiny únyi. Ke haba inya Daniela oge me hmak ge ta je únykúmenök, me ame ke man bi hnyimakök : ke oge me tuö únyi eling eú hnyi hnyekuk.

HNYIMAKAN 8.

**H**NYI huna a kuniny musî anyi Belesaza than, a o thö hna omanená könya, wale könya Daniela, hwaban hnök hna wâ a bân. 2 Ke inya oge me wâ hnyi hna omanená ; ke hnyi úen oge me wâ, me oge me laba hnyi Susani hnyi uma umen than hnyi ke keihen hnyei a Elaine ; ke oge me wâ hnyi hna omanená, ke inya but hnyi wawewe Ulai. 3 Me oge me bwele me wâ, ke wâ bi, mamoe бага ae hu li faoiny ame tot cicö wagewe ; ke beú göranyai li faoiny ; ke beú ke at hon ke at, ke haba at ae beönua, me a biliny ka o. 4 Inya oge me wâ mamoe бага ame hagutâ jio, me ka hnyi hwadrö, me ka hnyi hwaiöu ; ke ca khana ke meno he ka tot hnyi hnyimakan, ke ba at ae khana he ka húgúnâ gan ; ke e ame ányâ hoton weny, k' ame ogânâ e bi. 5 Ke inya oge me tiga únykúme, ke wâ bi, ame o but got бага úheny jimeú hon kânâ hia, k' ame ca kâlâ kânâ : ke hu fao got ae gan wanben li emakan. 6 Ke e ame o but ka mamoe бага a lo li faoiny, waleji oge me wâ ame tot cicö wagewe, me utut kâu hnyi tang hwegien ae gan. 7 Ke oge me wâ a g' ame hakekeny ka mamoe бага, k' ame hmönyin kâu, me kot mamoe бага, me thu li faoiny ; ke ba maniny mamoe бага he ka tot hnyi hnyimakan : me e ame hagutâ e hnyikânâi, me uto e ; ke ba at ae khana he ka húgúna mamoe бага gan. 8 Ke haba got бага ame ka ogânâ hmönyin e bi : ke hwege but e me hmetru but faoiny ae gan ; ke ame o thö vak ta fao ae gan hwanban e, cicö vak ta ang hnyi drany. 9 Ke

haba únyi hnyi khaca fao, me ame o thö ke fao ae úhnyúkong, k' ame gan tot ka hnyi hwaiöu ke deiö, ke ka hnyi hnyei ae hmanenang. 10 K' ame gan tot ke ne o but hnyi je utbavat hnyi drany ; k' ame hagutâ hnyikânâi ke je utbavat, ke je okhú, me uto ju. 11 Eke, e ame ka ogânâ e ke ne o but ka hnyi taben je utbavat ; k' ame húgúnâ gan hudiny leú adre labö hudo bala, k' ame hagutâ but hnen e, a dok ae kap. 12 K' adre me tha hna but kâu utbavat me hudiny leú adre me hudo bala, can hna hanyâúú ; k' ame hagutâ hnathu hnyikânâi k' ame ányâ weny bi, ke hu sot gan. 13 Ke inya oge me löng ke at ae kap ame fuc ; ke ame fuc minya ke at ae kap ka at eji a bân ka fuc, ka habe, Ke ne o but kehö hna omanená ge hudiny leú adre me hudo bala, ke hna hanyâúú wale at ame öba wan, a g' adre hna dok ae kap me utbavat minya, m' adre me uto ju ? 14 Me haingen könya, ka habe, Ke ne o but ka hnyi lo li thauzan ke theri haded ta je sahac me hnyomakatu ; ke hnyi úen eling adre me he ka ányâwia dok ae kap.

15 Ke haba inya Daniela, oge me wâ hna omanená, me oge me elâm bi he ka wâhmakhmeto e ; ke wâ bi, ame tot ke at hnyi hnyimakök helâ me at. 16 Ke oge me löng ifucin at wanben li baten Ulai, k' ame hongot me ha, ka habe, Gaberiela lö, omanená thö bongon hna omanená ka at ang. 17 Me e ame hakekeny ka hnyi dok oge me tot hnyin ; ke e ame o but, me oge me ot, me ta hnyikânâi ; ke e ame ha könya, ka habe, Nokon at lö, wâhmakhmeto ju ; anyin ame he ka hwâdá hna omanená hnyi úen hnyi obiny. 18 Ke e ame tiga úhnenamö mönya, me oge me mokut hnying me ta ju hnyikânâi : ke e ame kâlö nya me otilö nya. 19 Ke haingen, ka habe, Wâ bi, oge me he ka thumetu u ge únyi ame he ka o hnyi úen hmönyin hnyi obiny : anyin ame he ka hwâdá hnyi úen adre thu hnyi obiny. 20 Haba mamoe бага u je wâ a lo li faoiny, me wale li than Madai me Peresi. 21 Ke haba got бага at walak, me than Heleni e ; ke haba faoiny ae gan wanben li emakan, me than e a bân. 22 Ke haba at ae hmetru, waleji ame o thö vak hwaban, me wale ame he ka o vak ta dökhu únyi hnyi hnyei, ke ca helâ me maniny e. 23 Ke haba hnyi obiny dökhudrin dökhu, hnyi úen ame he ka bekhöt tavat hanyâúú, me ame he ka o than ae hwege hnyimakan, at ae khana je vhet. 24 Ke ame he ka gan hmâ hwegien,

ke ca hnen bi tang hwegien, ke ke bongon bi hnen hna he ka ohia, ke e ame he ka hnahic me ânyâ weny : ke e ame he ka ohia tavat tren man, me tavat ae kap. 25 Ke ûnyi hnyi anyin bibihwakecin ame he ka sot iyawö hnyi hnyameu : ke e ame he ka ogânâ e bi hnyi hnyekon, ke e ame he ka ohia tavat ae se hia adre me laba khötkic : e ame he minya ka tot ka thaniny ta je than ; ke so bi, e ame he ka hmetru, ke ca hnen bi hnyam. 26 Ke haba hna omanenâ ge je sahac me hnyomakatu waleji adre ha, me e hnathu e ; ke so bi, ikhâlâ ju hna omanenâ ; anyin ae se hia je bonginy. 27 Ke inya Daniela oge me ta hnyikânâi me mok hnyi ke je bong ; me oge me todrö me mâdrâ huliwa anyin than : ke oge me lâiâ hna omanenâ, ke ba at ame wâ ûnykûme.

## HNYIMAKAN 9.

**H**NYI huna a bâni Dariu nöku Asueru, a mâtrân at Madai, wale adre otilâ me me thaniny dôkhu anyin at Kaledaia ; 2 haba hnyi huna a bâniny anyin musi, inya Daniela oge me wâhmakbuneto ge je tusi numerainy je huna, waleji ge ioiny hofuc ho Iehova kö Jeremia perofeta hnyin, me me he ka hwâdâ je huna a seventi waleji hnyi hna öba wan Jerusalema. 3 Me oge me bwele thö ka than a Khong me elâm a deny hic me khöü, me ca han, me mano ae gan nân, me hnabadröu. 4 Me oge me hic kö Iehova a Khonguk, me omanenâ, ka habe, Than lö, a Khong ae gan ke hna outen, at ame tuö úhinyköu me ibetengiö ka tavat adre me hnyok kâu, me vheno anyin ta je hnanyibu ; 5 öhmun e hia but ânyâ hulö, ke hwakecin ae hwali, ke hwakecin ae kong, ke úkbin fuc, ke saü ûnyi hnyi hnâm je hna hûna ke hnâm hna owisa : 6 ke öhmun e ca hia but löng ka lathnyabaem a ta je perofeta, tavat adre me fuc hnyi iâm ka latuhöhmun, ke anyihmun je taben, ke lakamöhmun, ke tavat hia thithö hnyi hnyei. 7 Than lö, e unyâm wisa, ke e unyihmun hmehma, helâ me hnyi bong ang ; wale a at Juda, ke at Jerusalema, ke at Isaraela hia, a tavat hakekeny ke sâkâu, hnyi je hnyei hia waleji u je ob' ödra ka hnyin, can hnödra hna hanyâüâ waleji adre hanyâüâ gam. 8 Than lö, e unyihmun hmehma, wale latuhöhmun, ke anyihmun je taben, ke lakamöhmun, anyin a öhmun e hia but ânyâ hulö köu.

9 E unyin Than a Khonguhmun ibetengiö, k' ame thang degecâ hulö ; anyin a öhmun e hia but úkbin fuc kâu ; 10 k' öhmun e ca hia but löng hoton ifuci Iehova Khonguhmun, he ka vheno anyin je hnanyibu, waleji e ame ip hnyi hnyimaköhmun a deny lathnyabainy a ta je perofeta. 11 Eke, a hia but hanyâüâ ânyâm je hnanyibu hnen at Isaraela hia, k' adre me saü but, k' adre me ca löng ifucâm : anyin a wale, adre hia but hingâlâ huhmun hnaúhangö, ke hna khemanyin waleji adre me sihnalimen hnyi hnanyibu anyi Mose athnyabainy Khong ; anyin a öhmun e hia but ânyâ hulö kâu. 12 Me e ame hia but ohwâdâ hwan hofuc, waleji e ame hai' öhmun, ke tavat owisa köhmun, me e ame oâ köhmun ûnyi ae kong hmönyin : anyin adre me ca ânyâ eang hmeledrany hia helâ me hna ânyâ ka Jerusalema. 13 Ke ame aat köhmun ta je ûnyi hia ae kong eang, helâ me hua sihnalimen hnyi hnanyibu anyi Mose : ke so bi öhmun e ca hia but sumâtâ betenge anyi Iehova Khonguhmun, me öhmun e hmetu ju ûnyi hnyi ta je hwakecihmun ae kong, me wâ ûnykûme ânyâm hnathu. 14 Anyin a wale, a hia but Iehova hmâkâ ûnyi ae kong, me ohwâdâ köhmun : anyin ae wisa Iehova Khonguhmun hnyi anyin ta je huliwa hia e ame ânyâ, k' öhmun e ca hia but löng ifucin. 15 Ke walang ang, Than a Khonguhmun lö, at ame hom lakem ûnyi hnyi hnyei Aigupito ge hnyam ae hwege, ke adre ölungi u helâe hnyi bong ang ; öhmun e hia but ânyâ hulö, ke kong hwakecihmun. 16 Than lö, ö u öhaüâ but ânyâm hmönyin me ânyâm wathethöt ûnyi hnyi ânyâm taun a Jerusalema, ânyâm bucen ae kap, hoton ânyâm wisa : anyin a can anyihmun je hulö, me je hwakecin lakamöhmun ae kong, adre me haikongoâ Jerusalema, me lakem, hnen tavat hia igigili öhmun. 17 Ke walang ang Khonguhmun lö, löng ju hic hijin athnyabaem, me hnen hna khöü, ke omelamâ thö hnyimâkâm hon ânyâm dok ae kap ae ba wan, ûnyi hnyi ien Than. 18 Khonguk lö, tevehlöng ju me löng ; huak dö me wâ a ga ba but wan gahmun, me taun waleji adre wenyö kâu iâm : anyin a öhmun e ip anyihmun je khöü hnyi hnyimâkâm, ca anyin a öhmun wisa, ke ûnyi hnyi ânyâm ta je betenge ae gan hmâ. 19 Than lö, löng ju ; Than lö, thang degecâ but ; Than lö, tevehlöng ju, me ânyâ ; ca bec bi ; ûnyi gam e Khonguk lö, anyin adre wenyö iâm hon taun me lakem.

DANIELA 10.

20 Ke inya oge me tiga fuc, me hic, me omanenâ anyik hulö, me hulö anyin je liamekeiny mönya a at Isaraela, me ip gaga hnyi hnyimakö Iehova Khonguk anyik khöû hobi kâu bucen ae kap anyin Khonguk; 21 eke, inya oge me tiga fuc me hic, me haba Gaberiela, waleji oge bök ka wâ hnyi hna omanenâ, ame gâ logot, me kalö nya hnyi ûen adre labö bi hut hnyi sa hac. 22 Ke e ame nö nya me ûhnenamö mönya, me ha, ka habe, Daniela lö, oge me o but walang ang he ka ometö u, me okhanö u. 23 Haba hnyi ûen u je hwân ka khöû, adre me húna, me oge me o but he ka thumetu u; anyin adre me ti betenge gam; anyin a wale, wâ únykúme thö únyi eling, me wâhmakhmeto hna omanenâ. 24 Sevente je wik adre me thu ka hnyi em hnyei, ke ányâm taun ae kap, m' adre me obekhötâ hna hanyâúâ, me bi obiny je hulö, me tube hwakecin ae monu, m' adre me oâ wisa a nyiele balua, me ohmâ haten hna omanenâ ke hna perofeta, me hú dok ae ti kap. 25 Wâhmakhmetoâ thö, ke wâ únykúme, a haba hwân hnyi hna húna he ka ohâtâ me op hmetu Jerusalema ke ne o but at adre hú, a than, me ame he ka seven ta wik: ke haba sikste tu je wik me adre me he ka ányâ hmetu e, wale je gethen ke köiö igigilö, hnyi ûen adre ovecâ. 26 Ke hwaban ta je wik a sikste tu, me adre me he ka subâ degecâ at adre me hú, ke ba únyi gan: ke haba lakeiny than ame he ka o, m' adre me he ka ohia taun ke dok ae kap; ke ame he ka obiny e ge di, k' ame he ka hu vat ke ne o but obiny; k' adre me ohmâ but he ka öba wan. 27 Ke e ame he ka ohmâ úhinyköu ka tavat ae se hia hnyi wik a khaca; ke haba hnyi hafny wik, me e ame he ka bi obiny hut ke bwihlany; ke ame he ka o at ame öba wan, k' ame he ka tabâ labenyin ta je únyi ae ikiki; ke adre me he ka hingâlâ hmönyin hon at ame öba wan, ke ne o but ame bekhöt únyi adre ohmâ.

HNyimakan 10.

**H**NYI huna a kuni Koreso than Peresi, me adre me omanenâ ke únyi kö Daniela, adre hwenyi ien Beletisaza; ke e hnathu únyi e, wale vat ae gan, me e ame wâhmakhmetoâ únyi e, k' ame wâ únykúme hna omanenâ. 2 Haba hnyi ûen eling, inya Daniela oge me labö tenge hnyi kun ta wik ae bekhöt. 3 E ba jeû ae so oge

me an, k' ame ca dit ke utiö ke tap waina hnyi hnyimök, ke oge me ca sâü wakaco ke ne o but hnyi kun ta wik ae bekhöt. 4 Ke haba hnyi bong a twente foainy tehi a bân, tiga inya hnyi baten wagewe ae gan, a Hidekela, 5 inya oge me bwele me wâ, ke wâ bi at ame khavâ mano lino, ke a oweikâ e ge goliny Ufas: 6 ke helâ unyin me berulo, ke helâ hnyimakan me hucuce, ke helâ li emakan me li lamepainy meic, ke helâ me bras ae hadröngöc li benyin me li can, ke helâ me hwan tavat ae se hia ifucin. 7 Ke hake inya Daniela at ame wâ hna omanenâ eling: ke adre me ca hnyi wâ hna omanenâ ge tavat adre me tha e mönya; ke so bi, ame o but ködra öbubuny ae gan hmâ, me adre me kec dö me lubaduöng. 8 Me hake inya biju me oge me wâ hna omanenâ eling ae gan, ke ba hmetu bi hwegiök: ke adre wia anyik hmanenang me oge me kong ut, ke ba but hwegiök. 9 Ke so bi oge me löng ifucin: he inya oge me tiga löng ifucin, me oge me mokut hnying ut, k' ame hnyimakök hnyikânâi. 10 Ke wâ bi, ame kalö nya hnen ke hnyam me oge me icimöng ge li boucak me li hnyamök. 11 Ke e ame ha könya, ka habe, Daniela lö, at adre ti betenge gan, wâhmakhmetoâ thö hofuc oge me ha köu, ke tot wisa thö; anyin adre kunö nya köu: ke a hia but ha könya hofuc eling, me oge me tot öbubuny. 12 Ke haingen könya, ka habe, Daniela lö, ca ot bi; anyin a hwân hnyi bong a bân, waleji a mou hnyin hnyekom he ka wâhmakhmeto, me hom úhnyükongu u hnyi hnyimakan Khongom, adre löng ut ifucâm: ke oge me o but ang únyi ge hwâm je hofuc. 13 Ke haba thaniny dökhü Peresi ame labö iwatretra mönya twente wan je bong; ke wâ bi, ame o but Mikaela, ke than ae gan he ka hadruo nya: ke oge me laba eling me je thaniny Peresi. 14 Ke walang ang oge me o but he ka thumetu u ge ta je únyi ame he ka o ka aten em hnyei hnyi je bong a biliny: anyin ae bec je bonginy hna omanenâ. 15 Ke a hia but ha könya je hofuc eling, me oge me nom ju hnyikânâi me laba hnyibú. 16 Ke wâ bi, ame kâlâ hnyimök ke at helâ me at: me oge me khöng ut hnyimök me fuc, me ha ka at ame tot hnyi hnyimakök, ka habe, Than lö, can hna omanenâ, ame takú nya anyik je hlöuhlöu, ke ba but hwegiök. 17 Ke ame he ka hawa ka khanö nya a athnyabaem than he ka úhmenamö mön than? anyin a haba

DANIELA 11.

inya, me ba but hwegiök, ke oge me ca menâ hmetu bi. 18 Ke ame mâdrö nya hmetu hnen at a helâ me at, me ha hwegiök. 19 Ke e ame ha, ka habe, At adre me betenge gan lö, ca he bi ka ot; hnahic ju, hwege thö, eke, hwege thö. Ke a hia but fuc könya, me oge me hwege but, me ha, ka habe, Than lö, ha thö; anyin a u je ohwegiö nya. 20 Ke haingen, ka habe, E khanö u úhek köu? ke oge me he walang ang ka hmetu he ka vat me than Peresi: ke iny ka he but, wâ bi, ame he bi ka o than Heleni. 21 Ke so bi oge me he ka ha köu hna sihnalimen hnyi tusiny hnathu: ke ba hiök hnyi ta je únyi eling, ke so thibi Mikaela a tuhöbun.

HNYIMAKAN 11.

**K**E hnyi hunâ a bâni Dariu at Madai, inya oge me tot he ka hadruâ e me ha hwegien.

2 Ke walang ang oge me he ka omanenâ köu hnathu. Wâ bi, ame he ka o kun ta thaniny Peresi; k' ame he bi ka tren omjeû ae gan at a vakiny hon ta hnyat a kun: ke e ka hwege bi deny ta je omjehen, me e ame he ka obwebwelâ hia úcon dökhu Heleni. 3 Ke ame he ka tot ke than at ae hwege, at ame he ka musi ge musi ae gan, me ânyâ helâ me weny. 4 Ke e ka tot, me ame he ka hmetru dokhon dökhu, me adre me he ka kia vâkâ e ka hnyi vak ta anginy drany: ke ca hobi kâu bi je mâtrâninny, ke ca hoton anyin musi; anyin adre me he ka oc dokhon dökhu, me me hobi kâu ke je hnyat, ke ca ôdrin bi. 5 Ke ame he ka hwege thaniny hwaiöu, tha e me ke taben unyin, k' ame he ka hwege hon e me musi bi, ke haba anyin musi me musi ae gan. 6 Ke e ka um dö je hunâ me ödru me he ka úkhacaköu; k' ame he hlu nokon than hnyi hwaiö ka senâ than hnyi hwadrö he ka ânyâ úhahinykôu: ke haba hwegien benyin hlu me ame ca he ka tethmâ; k' ame ca he minya бага ka tot, ke benyin; ke adre me he ka hna but hlu, me tavat adre me hom e, me at ame hnokoâ e, me at ame ha hwegien hnyi úen eling. 7 Ke ame ke ka o ke khúen ge iwân hlu, hnyi hnen at eling, wale ame he ka o ka hnyi utbavat, me ame he ka delec hnabâ anyin than hnyi hwadrö, me bi ovhelidra, ke ame he ka hwege: 8 me hom bâ Aigupito ai je khöngudrin, me anyidra je hna theat adre oköiâ, me anyidra je kaia ae ti so, a sileva me gol; ke e

ame he ka hokhnyok hnyi je hunâ ae se ge than hnyi hwadrö. 9 Ke e ame he ka he hnyi dökhu dokhon than hnyi hwaiöu, ke e ame he ka hmetu ka hnyi iny bi hnyei. 10 Ke ame he je lakon ka vat, me úkhacaköu köiö köien at ae gan, adre me he ka o me bahihingâlâ, me vheno: ke adre me he ka hmetu me vat, ke ne o but hnyi hnen hnabâ. 11 Ke ame he ka hmönyin hnyekon than hnyi hwaiöu, ke e ame he ka he me vat mē, wale a than hnyi hwadrö: ke e ame he ka otilâ metâ utbavat ae gan, ke adre me he ka hna utbavat eji ka hnyi hnyamen. 12 Ke ame he ka bi gan utbavat, ke ame he ka görany bi hnyekon: ke e ame he ka öta je miriad, ke e ame ca he ka ton. 13 Ke ame he ka hmetu than hnyi hwadrö, me otilâ utbavat ae gan hon a bân; ke e ka um dö je úen, wale je hunâ, me e ame he ka oâ je utbavat ae gan me omjeû ae gan. 14 Ke hnyi úen eling ame he ka tot ka than hnyi hwaiöu tavat ae se hia: ke ame he ka bi gan tavat úokonguny hnyi em hnyei m' adre me ohmâ hna omanenâ; ke adre me he ka ta. 15 Me ame he ka o than hnyi hwadrö, me okhibö göranyai kânâ, me húgûnâ taun adre up haginny ae so: ke ame ca he ka ton je utbavat hnyi hwaiöu, me tavat e ame úca, ke ame ke ka ba tang hwege hnân he ka ton. 16 Ke haba at ame he ka he úcon, me ame he ka ânyâ hoton weny, ke ba at ame he ka ot hnyi hnyimakan: ke e ame he ka tot hnyi hnyei ae hmanenang, ke e bi hnyi hnyamen úokonguny. 17 Ke e ame he ka hnyimakan dö he ka o me hom maniny dökhon dökhu hia, me tavat ae fofâ unyin: ke e ame he ka ânyâ weny: ke e ame he ka ham kâu hlu nokon momo me me kong; ke e ame ca he bi ka tethmâ me tha hien mē. 18 Hwabân dö e, e ame he ka hnyimakan ka hnyi je bomene, me húgûnâ keihen ae se: ke haba ke than ame he bi ka biobiny hnen hna haikongoâ; eke, e ame he ka wia kongon kâu bi. 19 Me e ame he ka hnyimakan ka hnyi je hnabâinny iny hnyei: ke e ame he ka haú me ta, ke adre me ca he hmetu ka wâ e. 20 Ke ame he ka tot ke at hwabân e, at ame he ka kunâ at hok fat he ka vheno hmanenanginy dökhu: ke adre me he ka ohia e hnyi ke je bong, ke ca hnen bi hmönyin, ke ca hnen bi vat. 21 Ke ame he ka tot hwabân e, at adre me húkötîâ, waleji adre me tiga ca ham kâu hmanenanginy dokhu: ke e ame he ka o hnyi úen úsoköu, me



DANIELA 12.

hu dökhu ge hofuc útakú. 22 Ke ame he ka khutu takou e je vat ae uou hnyi hnyimakan, me hmouca but; eke, thaniny úhinykôu minya. 23 Ke hwaban do hna úhinykôu mē, me ame he ka othoiá: anyin a e ame he ka he me hwege hnyi hnyi ae úhnyúkong. 24 E ame he ka o hnyi úen úsokôu ka hnyi je dok ae so hnyi hnyi; ke e ame he ka ányá únyi a ca ányá lakamen ke lakiben; e ame he ka khená kôdra hna húgúná ke hna söh, ke je omjeú: eke, e ame he ka bibihwakecin úcon je hnabá ke ne o but hnyi ke úen. 25 Ke e ame he ka obwebwelá maniny man ke tang hwegein hnyekon, ke je utbavat ae gan, úcon than hnyi hwaiöu; k' ame he than hnyi hwaiöu ka vat, a tha e ke utbavat ae gan hmá ke hwege: ke e ame ca he bi ka tot, anyin adre me he bi ka ányá bibihwakecin káu. 26 Eke, ame he tavat adre me an an jeú ka kot e, k' ame he anyin utbavat ka ti osehia: ke ame he ka ú je komok ae se hia. 27 Ke haba li than eling, me ödru me he ka hnyok úokonguny, ke ödru me he ka úhnenamö thoi hnyi laulau a khaca: k' ame ca he ka hwadá: anyin adre me he ka bi obiny hnyi úen adre thu. 28 Me e ame he ka hmetu ka hnyi iny hnyi me je omjeú ae gan hmá; ke ame he hnyekon ka höciá úhinykôu ae kap; ke e ame he ka ányá weny, me hmetu ka hnyi iny hnyi. 29 E ame he ka hmetu hnyi úen adre me thu, me he ka hnyi hwaiöu; ke ca helá me he a bán me biliny. 30 Anyin ame he je huiny Kitim ka he úcon; anyin a wale, e ame he ka hmak, me hmetu me hmönyin ka úhinykôu ae kap, me ányá weny bi: e ame he ka hmetu me tha úhnenamö me tavat adre me degec úhinykôu ae kap. 31 Ke ame he ka tot hobi káu je deö vat, ke adre me he ka okongoá dok ae kap wale a hnabá, me ohia hudiny leú adre hudo hnyi je bong hia, ke adre me he ka otilá únyi ae ikiki at ame öba wan. 32 Ke haba tavat ae kong hwakecidra ka hnyi úhinykôu, e ame he ka omonu ödra ge hofuc útakú: ke haba tavat ae khan' ödra Khongudrin adre me he ka hwege me újông. 33 Ke haba tavat ae metá unyin tavat, adre me he ka ná tavat ae se hia: ke so bi adre me he ka ta ge hele vat, me meic, me hwenbá me söh, hnyi je bong ae se hia. 34 Ke ödra ka ta but, me adre me he ka na omi hadru' ödra: ke ame he tavat ae se hia ka bi hiödra ge hofuc útakú. 35 Ke ame he

keihen tavat ae metá ka ta, madre me cubic ödra, me ányáwia, me ohawá, ke ne o but úen obiny: anyin ame he ka e hnyi úen adre thu. 36 Ke ame he than ka ányá hoton weny; ke e ame he ka ogáná e bi, me ogöranyá e bi hon ta je khong hia, me ha ta je únyi hnân outen ge Khongon ta je [khong: ke e ame he ka sot ke ne o but ame hwadá but hmönyin; anyin adre me he ka ányá hna mou hnyok ka hnyin. 37 Ke e ame ca he ka únykúme je khongon lakamen, me wenyá omomo, me únykúme ka ke khong bi: anyin a e ame he ka ogáná e bi hudrin hia. 38 Ke e ame he ka ogáná khongon je hnabá hnyi hnen e: ke e ame he ka ogáná ke khong ae ca khana lakamen, ge gol me sileva, me je veto ae únyi hnathu, me je únyi ae senem. 39 Ke e ame he ka ányá úcon je hnabá ae ti hwege a tha hien me khong khanyua; ke haba at ame he ka nom káu me e ame he ka bi hanen káu hmanenang: ke e ame he ka kun' ödrin ka musö tavat ae se hia, me khená hnyi ge hwaban. 40 Ke haba hnyi úen obiny ame he than hnyi hwaiöu ka invinö mē: ke ame he than hnyi hwadrö ka utut káu, helá me höu me je kariota, me tavat tabö hors, me je hu ae se hia; ke e ame he ka dit ka hnyi je hnyi, me ave me vheno. 41 E ame he ka he minya ka hnyi hnyi ae hmanenang, ke ame he ka ta je hnyi ae se hia: ke ame he ka kec möt gan, Edoma, ke Moaba, ke lakon Amona ae beonua. 42 Ke e ame he ka hai hnyamen hon je hnyi: ke ame ca he ka kec möt hnyi Aigupito. 43 Ke e ame he ka musö ta je tang omjeú, je gol, me sileva, me je únyi hnathuiny Aigupito hia: ke ame he at Libua me Aithiop ka he hoton. 44 Ke ame he ka ohmaká e je úthumetu úheny jimeyö me hnyi hwadrö; ke e ame he ka he me hmönyin ae gan ka hlingá me ti ohia hmönyin tavat ae se hia. 45 Ke e ame he ka otilá je uma manoiny hnyaban hnyi wanben köiö me bucen ae hmanenang ae kap; ke ame he ka o obiny káu, ke ba at ame he ka hadruá e.

HNYIMAKAN 12.

**K**E haba hnyi úen eling ame he Mikaela ka tot, wale than ae gan at ame tot singiny aten em hnyi: ke ame he ka hu úen vec, e ba heláe hwân hnyi hna hwenyi ien, me hnyi, ke ne o but hnyi úen eling: ke hnyi úen eling adre me he ka omelö

## HOSEA 1.

aten em hnyei, ödra hia adre me wâ hna  
sihnalmidra hnyi tusi. 2 Ke se hia tavat  
adre me mokut eü hnyi kânâ adre me he  
ka hmak hmetu, keihen ka hnyi möt nyiele  
balua, ke keihen ka hnyi hmehma me ikikiâ  
nyiele balua. 3 Ke haba tavat ae metâ,  
me adre me he ka umumelam helâ me  
melaminy drany; ke haba tavat adre me  
wia tavat ae se hia hnyi hwakecin ae wisa,  
me ödra helâ me ta je okhû nyiele balua.  
4 Ke haba u Daniela lö, ikhâlâ ju je hofuc,  
me ohmâ ju haten tusi, ke ne o but hnyi  
ûen obiny: k' ame he tavat ae se ka wa-  
dring ehele, me ame he metâ ka gan tot.

5 Ke inya Daniela oge me wâ, ke wâ bi,  
ke li at ödru me tot, ke at hnyi baten  
wagewe, ke ke at hnyi ke baten wagewe.  
6 Ke haingen ke at ka at ame khavâ lino,  
at ame laba hon köien wagawe, ka habe,  
Ke ne o but kehö obiny ta je ûnyi eling  
hnân lâiâ? 7 Ke oge me löng at ame  
khavâ lino, at ame laba hon köien wa-  
gawe, me ame ogöranyâ hnyamen a metân  
me hnyamen a meny ka hnyi drany, me  
k' anyin gan at ae möt nyiele balua

a g' ame he ka hobi kâu ûen, me lo  
li ûen, me ûen me haf: ke e ka hia but  
oveseâ maniny hnyei ae kap, awe, ame he  
ka hwâdâ ta je ûnyi hia eling. 8 Ke oge  
me löng, ke oge me ca wâ ûnykûme: me  
oge me ha, ka habe, Tuhök lö, ieu obiny ta  
je ûnyi e? 9 Ke haingen, ka habe, Daniela  
lö, he thö; anyin adre hia but ikhâlâ me  
ohmâ haten ta je ûnyi e ke ne o but hnyi  
ûen obiny. 10 Ame he tavat ae se hia ka  
obosoi ödra, me ohaw' ödra, me ânyâwi  
ödra; ke ame he tavat ae kong ka ânyâ  
hwakacin ae kong bala; ke ame ca he ke  
at ae kong he ka wâ ûnykûme: ke so bi,  
ame he tavat ae metâ ka wâ ûnykûme. 11  
Ke hwân hnyi ûen adre me he ka ohia  
hnyin hudiny leü adre hudo hnyi je bong  
hia, ke ne o but adre me otilâ ûnyi ae ikiki  
at ame öba wan, me wan thauzan tu haded  
ke nainte je bong. 12 Hnabic hnen at  
ame lubahingen ke ne o but hnyi je bong a  
wan thauzan ke theri haded ke thöte faiv.  
13 Ke he thö u ke ne o but obiny: anyin  
a u me he ka menâ, me tot hnyi jekhom,  
e ka um dö je bong.

## HOSEA.

### HNyimakan 1.

**W**ALANG hofuc ho Iehova, waleji ame  
o kö Hosea, nöku Beeri, hnyi je  
bong bongu Uzia, me Jotham, me Ahaza,  
me Hezekia, je than Juda, ke hnyi üö Jero-  
boama nöku Joasa, than Isaraela.

2 Hnyi ûen Iehova ame bân ka fuc kö  
Hosea, me haingö Iehova kö Hosea, ka  
habe, He thö ka hok momo hnyi gethen ke  
lakon gethen: anyin ae gan hmâ bi ûnyi  
monu ge tavat, a g' adre me digic Iehova.  
3 Me e ame he me hum Gomera nöku  
Dibelaima; k' ame erkin bi, me hnokoâ  
nokon. 4 Ke haba Iehova ame ha kâu, ka  
habe, Hwenyi ien dö, ka habe, Jezerela;  
ke haba me okhaca me oge me he bi nya  
ka bi hwaban drö Jezerela ka lap anyi  
Jehu, ke oge me he ka bi obiny dökhu  
dokon lap anyi Isaraela. 5 Ke haba hnyi

bong eling, me oge me he ka thu cafana  
anyin Isaraela hnyi hnyigöulen bucen anyi  
Jezerela. 6 Ke e ame erkin hmetu me  
nokoâ in. Ke haingo Iehova kâu, ka habe,  
Hwenyi ien dö e, ka habe, Lo-ruama: anyin  
oge me ca he hmetu ka betenge ge lap anyi  
Isaraela, wale he ka thang degeci ödra.  
7 Ke so bi, oge me he ka betenge ge lap  
anyi Juda me omeli ödra a deny Iehova  
Khongudrin, ke oge me he ka omeli ödra  
ge cefana, me hele vat, me vat, me je hors,  
me tavat tabö hors. 8 Ke ame hia but  
momo hnebaiö Lo-ruama, me e ame erkin  
hmetu me hnokoâ da. 9 Ke haingö Iehova,  
ka habe, Hwenyi ien dö, me Lo-ami; anyin  
a ca lakeik ut öbun, me oge me ca he bi  
nya ka Khongubun.

10 Ke so bi haba numerainy lakon Isa-  
raela, me ame he ka ûcû me önyin köiö,  
wale ae ca khana bi ke at he ka tuluto

## HOSEA 2, 3.

me aú numerainy; ke haba hnyi dok wale adre me ha ködra, ka habe, Ca lakeik ut öbun, me adre me he bi ka ha ködra, ka habe, Öbun lakon Khong ae möt. 11 Ke ame he ka úkhacaköu je lakon Juda, me je lakon Isaraela, ke adre me he ka otilá hobi ködra ke taben a khaca, ke adre me he ka he but únyi hnyi hnyei: anyin ame he ka bong ae gan bong bongu Jezerela.

### HNyimakan 2.

**H**A thö ka je liamekeiny möbun, ka habe, Ami; me ka je lahanibun, ka habe, Ruama.

2 Ivinö thö me hinyöbun, ivinö thö; anyin a ca öiök ut e, ke ca áiân dut inya: ke so e ame degec anyin bi únyi monu únyi hnyi hnyimakan, me hnen hna venöu hnyi wanben li basin; 3 wá oge nye uny jut anyin je úkhaú, me hna but e, helá me hnyi bong e ame o hnyin, me wia e me me helá me hnyeububa, me ip e helá me hnyei ae hwahwacit, me hlingá e ge beic; 4 eke, oge me ca he ka betenge ge je lakon; anyin a ödrin je lakon gethen. 5 Anyin a hinyödrin ame bi únyi monu: momo a hnöku ödrin ame ányá únyi hnân hmehma; anyin a haingen, ka habe, Oge me he ka hnu hoton lawek, tavat adre me ha ök, me belik köiö, me leúnen mamoe, me lino, me wakaco, me belik. 6 Anyin a wale, wá bi, oge me he ka thelöng dem gethen ge je iwadekong, me hák veto, me me ca he ka wá deny je gethen. 7 Ke e ame he ka hnu hoton laweny, ke e ame ca he ka khalet' ödrin; ke e ame he ka elöm ödrin, ke ame ca he bi ka wá: me e ame he ka ha, ka habe, Oge me he ka hmetu ka öiök a bán; anyin ae so könya hmetu, ke kong walang ang. 8 Anyin ae ca khana bi momo a oge me ham káu whit, me waina, me wakaco, me osehia káu sileva, me gol, wale ödrin e bi Baala káu. 9 Anyin a wale óge me he hmetu ka húgúná anyik whit hnyi úen e, me anyik waina hnyi úen e, me húgúná anyik leúnen mamoe, me anyik lino a hnân okhaúá hnen he thu. 10 Ke walang ang oge me he ka omanená hwakecin ae ikiki hnyi hnyimakan laweny, ke ba at ame he ka húgúná e únyi hnyi hnyamök. 11 Ke oge me he ka bi obiny anyin senyin hia, je bijeú, me je tehi a tebúnyi, me je sabbath, me anyin je úkhacaköu hia adre thu. 12 Ke oge me he ka ohia anyin je vine, me imeta, wale e ame ha gan, ka habe, Wale

hwabök a ham könya lawek: ke oge me he ka wia me me hnyot bi, ke ame he je menoiny hnyot ka han. 13 Ke oge me he ka bi hwaban káu je bong bonginy je Baala, wale e ame leú utö ae bo so hnyin ködrin; ke e ame theibá e ge je theibeny hnyikönyen me je ohmanenanginy, me hnu hoton je laweny, k' ame hnying nya bi, haingö Iehova. 14 Anyin a wale, wá bi oge me he ka lelö e me hom e hnyeububa ai, me ita hofuc káu. 15 Ke oge me he ka ham káu iny je hnyei vine úheny e, me hnyigöulen bucen Akora hnân gethen deny gejon: ke e ame he ka thu hmetu eling helá me ehac ke tiga hlu, ke heláji me ehac hnyi úheny hnyi hnyei Aigupito. 16 Ke haingö Iehova, ka habe, Hnyi bong eling u me he ka hawo nya, me Ishi; ke u me ca he hmetu ka hawo nya, me Baali. 17 Ke oge me he ka hom but ien je Baala únyi hnyi hnyimen, ke adre me ca he hmetu ka únykúmi ödrin hoton je iödrin. 18 Ke hnyi úen eling oge me he ka ányá úhinyköu hobi ködrin me je menoiny hnyot, me je meno ame gá ethö, me je meno ame iyawá káná: ke oge me he ka thu cafana me hele vat, me vat únyi hnyi hnyei, ke oge me he ka omokulic ödrin hnyi sot. 19 Ke oge me he ka hum u me öiök nyiele balua; eke, oge me he ka hum u me öiök hnyi wisa, me hna owisa, me hnyok ae so, me betenge. 20 Oge me he ka hum u könya hnyi hnathu: ke ame he ka khanö u Iehova. 21 Haingö Iehova, ka habe, Hnyi bong eling oge me he ka thu hmetu, oge me he ka thu hmetu ka je drany, ke drany ame he ka thu hmetu ka hnyi hmeledrany; 22 ke ame he hmeledrany ka thu hmetu ka whit, me waina me wakaco; ke ödrin e he ka thu kö Jezerela. 23 Ke oge me he ka tá e hobi könya bi hnyi káná; ke oge me he ka betenge gan waleji adre ca betenge gan; ke oge me he ka ha ködra a ca lakeik, ka habe, Lakeik u; ke adre me he ka ha, ka habe, Khonguk.

### HNyimakan 3.

**K**E Iehova ame ha könya, ka habe, He hmetu thö ka betenge ge momo at ame betenge gan waeny ke momo ame venöu, helá me betenge anyi Iehova ka lakon Isaraela, tavat adre me hnyimakan ka je khong, ke wedra je hmata a wan vine. 2 Ke oge me úco e hwaban je ong sileva a fiftin, ke khaca homer bali, ke haf

## HOSEA 4, 5.

homèr bali: 3 me haingök ka momo, ka habe, U me he ka laba halubahing nya hnyi ta je bong ae se hia; u ma ca he ka bi únyi monu, ke u me ca he ka áîân ke baga bi: me oge me he bi nya ka helâe köu. 4 Anyin ame he lakon Isaraela ka laba thibi hnyi se hia je bong ke ba than, ke ba taben, ke ba at bihut, ke ba veto ame tot, ke iefoda ke hnatheat: 5 me hwaban e ame he lakon Isaraela ka hmetu me elöm Iehova Khongudrin, me Davita a tuhödra; me adre me he ka o me outö Iehova me anyin so hnyi je bong a biliny.

### HNYIMAKAN 4.

**L**AKON Isaraela lö, löng ju hofuc ho Iehova: anyin ae hu ivinö anyi Iehova me aten hnyei, anyin ae ba hnathu, me ibetengiö, ke ca khan' ödra bi Khong hnyi hnyei. 2 Adre me khemanyin thibi, me thoi, me hlingâ at, me venöu, me bi únyi monu: k' adre me utut, me dra ame kâlâ dra bi. 3 Anyin a wale ame he hnyei ka tenge, kâ sényin hia but tavat adre me labâ e, tha ödra me je menoiny hnyot, me je meno ame gâ ethö; eke adre me he minya ka hom but je wâ eü hnyi köiö. 4 Ke so bi, ca he ke at ka ivinö, ke ca he ke at ka ná; anyin a haba je liamekeiny möu, me ödrin úcû me tavat adre me ivinö me at bihut. 5 Ke u me he ka haü hnyi selany, ke u me he ka tha haü me perofeta hnyi lit; ke oge me he ka ohia hinyâm. 6 Adre me ohia lakeik anyin ae ba wâhmakhmeto: anyin a u je hia but hna degecâ wâhmakhmeto, awe, oge me he bi nya ka hna degeci u, m' u me ca at bihut könya: anyin a u je hnying hnanyibu anyin Khongom, me oge me he bi nya ka hnying lakom. 7 K' adre me ânyâ hwakecin ae kong könya hoton úseidra: oge me he ka wia anyidra hmanenang, m' adre me hmehma but. 8 Adre me ha ö'dra bi ge hulö anyin lakeik, me behnyokâ hwakecidra ae kong. 9 K' ame he bi ka khaca bongon tavat me at bihut: ke oge me he ka bi hwaban ködra hoton dedra je gethen, me bi hwaban ködra hoton anyidra je huliwa. 10 Ke adre me he ka han, me ca sekudra bi; adre me he ka bi únyi monu, k' adre me ca he bi ka osehia: anyin adre hia but degec he ka löng kö Iehova. 11 Haba únyi ame hûgúnâ hnyok, me wale bi únyi monu, ke waina, ke waina ae teb únyi. 12 K' ame labö he lakeik ka hnei unyin

anyidra je ong utö, k' ame thumetu ödra anyidra uci: anyin adre me omonu ödra hnen bi únyi monu, k' adre me kec únyi hnyi hmelen Khongudrin he ka bi únyi monu. 13 K' adre me bi hut hon ban je bucen, ke leu utö ae bo so hon je dok ae görany, ke hmelen je iwajo, ke je libene, ke je ela, anyin ae so hmenon: anyin a wale ame bi únyi monu lakubun wahlu, k' ame venöu laöiöbun. 14 Ke oge me ca he ka bi hwaban ka lakubun wahlu can hnödra hna bi únyi monu, ke laöiöbun can hnödra hna venöu; k' adre me ka tha he me hnyat venöu, k' adre me tha bi hut me omomo hnyi gethen: ke haba hnyei ame ca wâhmakhmeto, me adre me he ka öta e. 15 Isaraela lö, eja ke ne u je ne bi únyi monu, ke so u Juda ame ca he bi ka monu; ke ca he öbun Gilegala ai, ke ca he Beth-aven ai, ke ca khemanyin bi, ka habe, Kia inya Iehova. 16 Anyin a hia but Isaraela úkhin fuc, helâ me man kau at ame hwen höcö: ke ame he Iehova walang ang ka ha ö'dra helâ me nokon mamoe hnyi dok ae lau. 17 Ke Eferaima ame úkhacaköu me je idola; hna but e. 18 A hiny dut belidra; k' adre me bi únyi monu bala: ke haba je tuhan me adre me beányâ únyi hnân ohmehma gan. 19 Haba ang ame hia but vhec e ge li labenyin; ke adre me he ka hmehma ge anyidra je hut.

### HNYIMAKAN 5.

**T**AVAT bihut lö, löng ju hofuc ang; lap anyi Isaraela lö, löng ju; lap anyi than lö, tevehlöng ju, anyin adre ha hwaban köbun; anyin a hnewe öbun ka Mizepa, me ert adre thong hon Tabora. 2 Ke haba tavat thu musi adre me úhlingö gan hmâ; ke inya bi at ú ödra hia. 3 Oge me ö Eferaima but, ke ca iyong bi Isaraela könya: anyin a walang ang, u Eferaima, u je hia but bi únyi monu, ke kong ut Isaraela. 4 Haba anyidra ta je huliwa ame ovheli ödra he ka hmetu ka Khongudrin: anyin a e unyidra weny he ka bi únyi monu, ke ca khan' ödra but Iehova. 5 Ke haba bi gan anyin Isaraela ame ohnathoâ hnyi hnyimakan: anyin a wale ame he ka tha ta Isaraela me Eferaima hnyi anyidru hulö; k' ame he minya Juda ka ta unyidru. 6 Adre me he ka he me elöm Iehova me haledra je hnath mamoe me kau; ke adre me ca he bi ka wâ e: e ame ka he me digic ödra. 7 Adre hia

## HOSEA 6, 7.

but iyawö kö Iehova ; anyin adre hia but hnokoâ je lakudra a je atkanyua : ke walang ang ame he tehi a teb ûnyi ka ön ödra me je jekhöüdra.

8 Tûâ th' öbun sofa hnyi Gibea, me trutru hnyi Rama : kuku thö hnân haten hnyi Beth-aven ; e hnyi hotom Beniamina. 9 Ame he ka ba wan Eferaima hnyi bong û : oge hia but omanenâ ka je tribuiny Isaraela ûnyi ame he ka o. 10 Haba je than hnyi Juda e úcû me tavat adre me hok hnyigot : oge me he ka hingâlâ hudrin anyik hmönyin helâ me köiö. 11 Adre ovecâ Eferaima, adre ngâ e hnyi ûhnei ; anyin a e ame ogâ he ka hnu hoton hna húna. 12 Anyin a wale, iny helâ me nokon walelaba ka Eferaima, ke iny helâ me bobot ka lap anyi Juda. 13 Ke a wâ but Eferaima anyin mok ke a wâ but Juda hnân aat, me haba Eferaima ame he Asuria ai, k' ame úkhünöng kö Jareba than ; ke ca khana bi he ka omeli u, me ometo hnöbun aat. 14 Anyin a oge me he ka helâ me liona ka Eferaima, ke helâ me nak liona ka lap anyi Juda : haba inya me oge me he ka oloú kia me he but ; oge me he ka hom, ke ba at ame he ka húgúnâ. 15 Oge me he ka he but me hmetu ka hnyi hnök, ke ne o but adre me ogâ anyidra monu, me elâm hnyimakök : ke adre me he ka ti elöm nya e ka hu vec gadra.

### HNYIMAKAN 6.

**A**I öbun, ate me he hmetu kö Iehova ; anyin a e ame hia but oloú kia, me e ame he ka ometo ; e ame hia but kot, k' ame he bi ka lan. 2 Hwaban lo li bong e ame he ka omeli öta : ke hnyi bong a kuniny e ame he ka höi öta, m' ate me he ka möt hnyi hnyimakan. 3 Ke so ate me wâhmakhmeto, e so ate me he hoton he ka ö Iehova ; e hmâ bi hnen hna he, helâ me hnyomakatu ; ke e ame he ka o köta helâ me we, helâ me we a biliny ame hú kânâ.

4 Eferaima lö, ie ûnyi oge me he ka ânyâ köu ? Juda lö, ie ûnyi oge me he ka ânyâ köu ? anyin ae úcû anyibu so me úlá hnyi hnyomakatu, ke helâ me dân hau ae logot hia. 5 Anyin a wale, oge hia but kuc' ödra a deny je perofeta ; oge hia but hling' ödra ge je ifucin hnyimök : ke ame he but je hna owisa gam helâ me melam. 6 Anyin ae wek ibetengiö, ke ca but bi ; ke beönua he ka wâhmakhmetoâ Khong

hon je hudiny leú. 7 Ke adre hia but hanyâûâ úhinhinyköu helâ me Adamu : k' adre me iyawö nya eling. 8 Gileada taun anyin tavat adre me ânyâ hulö, k' ame kong ut ge dra. 9 Haba bunyen a tavat bi hut adre me úhlingö hnyi gethen úheny Sekema, helâ me tavat sei adre me mokulec at : eke, adre hia but ânyâ ûnyi ae ikiki. 10 Oge hia but wâ hnyi lap anyi Isaraela ûnyi ae ti kong hmönyin ; wale bi ûnyi monu anyi Eferaima, ke kong minya but Isaraela. 11 Ke u minya Juda lö, adre hia but thu bongon subö hwit hobi köu, waleji hnyi hnök hna ohmeto lakeik úhedra hnyi hna bâ.

### HNYIMAKAN 7.

**K**E oge me be ometo Isaraela, me ame manen bi thö hwakecin ae monu anyin Eferaima, me hulö anyin Samaria ; anyin adre me thoi : ke ame didro tavat venöu, ke haba deö at venöu adre me soh eü hnyöu. 2 Ke adre me ca únykúme bi hnyi je hnyekudra, a inya oge me únykúme ta je hwakecidra hia ae kong : ke walang ang ame theling ödra hnen bi anyidra ta je huliwa ; ke e bi hnyi hnyimakök. 3 Adre me osenyinâ than ge anyidra bi monu, me je taben hnen anyidra je thoi. 4 Ödra tavat bi ûnyi monu hia ; ödra helâ me wahnainyâ ame khutâ at ame inyâ ; e ame ca ânyâwia hmetu meic hwân hnyi hna up falawa ke ne o but ame khibi thö. 5 Ke haba hnyi bong bongon tuhöta ame mok je taben ge úkahwâiny waina ; e ame úkhöü hnyam me tavat úhiö. 6 Anyin adre hia but penapena hnyekudra helâ me wahnainyâ, ke adre me mokut iyawö bi : ame mokut at ame inyâ ö 'dra hnyi lit hia ; ke hnyi hnyomakatu e ame han helâ me meic ame ubâhlâ. 7 Ödra kahwa hia but helâ me wahnainyâ, ke adre me ohia tavat owis' ödra ; a ta but anyidra je than : e ba ke at gadra ame hongot könya. 8 Eferaima ame úkhacaköu me je hnyei ; Eferaima ame helâ me ong areto adre ca wia. 9 A hia but ohia hwegien hnen je atkanyua, ke ca khana bi : eke, úsa khaca but tehüen, ke ca khana bi. 10 Ke ame ohnatho hnen bi gan anyin Isaraela hnyi hnyimakan : ke so bi adre me ca hmetu bi kö Iehova Khongudrin, me elâm e, hnyi je ûnyi hia eling. 11 Ke e úcû Eferaima me biny ae únyibâú me ba hnyekon : adre me hongot ka Aigupito, me he Asuria ai. 12 Ödra ka he me

## HOSEA 8, 9.

oge me he ka thong ütök ert hudrin ; oge me he ka hagut' ödra helâ me je meno ame gâ ethö : oge me he ka kuc ödra helâ me hna löng hnyi anyidra úkhacaköu. 13 Ekölö gadra ! anyin adre hia but he monu gak ; hang' ödra but ! anyin adre hia but hanyâûâ gak : oge me beúcú melidra, ke adre me sit hofuc thoi bi gak. 14 Ke ame ca hia but tenge je hnyekudra könya, ke adre me kuku tenge bi hon hnödra je hna mokut : adre me úkhacaköu ge hwit me waina, k' adre me úkhin fuc mönya. 15 Oge hia but n' ödra me ohwegiâ je hnyamödra, ke so bi adre me únykúme úökonguny úcük. 16 Adre me hmetu ke ca kâu bi ethö görany ; ödrin úcú me cafana ae iyawö ; k' ame he anyidra je taben ka ta ge hele vat can ae hwege ifucidra : wale hnân hlum' ödra hnyi hnyei Aigupito.

### HNYIMAKAN 8.

**I**P ju trutru hnyi hnyimâm. E ame he úcon lap anyi Iehova helâ me aeto : anyin adre hia but hanyâûâ anyik úhinyköu, me khikhin ge anyik huanyibu. 2 Ke adra me he ka tenge könya, ka habe, Khonguk lö, öhmun hnyat Isaraela ke khanö u öhmun. 3 A hia but Isaraela degec so : me ame he ka bnu e hnen iwahnaihmiöny. 4 Adre hia but otílâ je than, ke ca únyi bi gak ; adre hia but bi taben, ke ca khanö nya : adre hia but ányâ anyidra sileva me gol hnân anyidra je idola, m' adre me ka subâ degeci ödra bi. 5 Samaria lö, e ame hia but hota degecâ nokon kau unyâm ; k' ame ubâhlâ thö anyik hmönyin ködra : ke ne o but kehö adre me ca he ka vheno hwakecin ae so ? 6 Anyin a únyi ga Isaraela e ; k' ame ányâ e hnen at huliwa, ke ca Khong bi e : eke, adre me he ka kot omomonö nokon kau anyin Samaria. 7 Anyin adre me belökâ ang, me adre me he ka meno höu : ke ba gan hwit ame kú, ke ba falawa hnyi boviny : ke a ne hu, me ame he bi je atkanyua ka utâ e. 8 Adre hia but utâ Isaraela : ödra bi walang ang unyin je hnyei helâ me kaia a ca hnân senyinâ. 9 Anyin adre me he Asuria ai, helâ me asinainy hnyot ame hake he : Eferaima ame hia but hok laweny ge hwaban. 10 Eke, eja ke ne adre ne hok ge hwaban unyin je hnyei, oge me he walang ang ka úkhacaköu ödra ; ke ödrin e hwân he ka úhnyúkong tot can hok ge thaniny je taben. 11 Haba Eferaima ame

hia but osehia je taben hut he ka ányâ monu, anyin a wale e hu hulö gan can je taben hut. 12 Oge ne sihnalimen kâu anyik huanyibu me je únyi hnân ná a ten thauzan, me adre me únykúme e me únyi a ca únyi hnathu. 13 Ke haba je bwihlany adre me hudo könya, adre me hudo utiö me an e ; ke ame ca he Iehova ka köp ödra : e ame he walang ang ka únykúme anyidra hulö, me bi hwaban hwakecidra ae kong ; adre me he ka hmetu Aigupito ai. 14 Ke a hia but Isaraela hnying At a op e, me op je uma umen je khong ; ke Juda ame hia but osehia je taun adre up haginy ; ke so bi oge me he ka kunâ meic ka hnyi anyin je taun, me me an je uma umen than.

### HNYIMAKAN 9.

**I**SARAELA lö, ca senyin bi me hobâ helâ me je hnyei ; anyin a u je hia but bi únyi monu me degec Khongom, u je hok at ge hwaban hnyi je hna huje hwit hia. 2 Adre me ca he bi ka ha ö'dra ge hna huje hwit, me hna hlic wan vine, ame he ka hia gan waina ae teb únyi. 3 Adre me ca he ka labâ hnyei i Iehova ; he ame he Eferaima ka hmetu Aigupito ai, me an je meno ae ikiki hnyi Asuria. 4 Adre me ca he ka hingâlâ waina kö Iehova, ke e ame ca he ka senyin ködra : haba anyidra je hut e úcú me han anyin tavat adre me hnyamok ködrin ; adre me he hia ka kong tavat adre me an e : anyin a haba ö'dra jeú me hnân behan bi, ke ame ca he ka o ka hnyi uma umö Iehova. 5 Ieú öbun e he ka ányâ hnyi bonginy úkhacaköu ae únyi hnathu, me hnyi bonginy bijeú anyi Iehova ? 6 Anyin a wâ bi adre me he me degec hna úhangö, ke so ame he Aigupito ka úkhacaköu ödra, k' ame he Nofi ka kónim ödra : haba hnen anyidra je sileva ae hmanenang, me ame he ka watetaföcö : k' ame he ka hnen iwadekong hnyi umödra je uma mano. 7 A o thö je bong bi hwaban, a o thö je bong he ka öuco ; k' ame he Isaraela ka wâ e : at ae monu perofeta, ke monu at ae tren hanu, anyin ae se but ányâm je hulö, ke gan hmâ úöhúkoti. 8 Ke haba Eferaima, me at hmâkâ ehac unyin Khonguk : ke haba perofeta hnyi deny je gethen hia ae hu hnewe anyin at ame töu hnewe, k' adre me ivinö bi hnyi uma umen Khongon. 9 Adre me ka oikiki ödra, helâji me hnyi je bong bongu Gibeä : ke e ame he ka

HOSEA 10, 11.

únykúme hwakecidra ae kong, me bi hwan anyidra je hulö. 10 Oge me ö Isaraela helâ me je wan vine hnyi hnyeububa ; oge me wâ lakamöbun helâ me je wan meta a bân : ke adre me he kö Baala-peora, ke ka hn' ödra bi ka únyi hnân ohmema, me adre me tha ikiki me únyi adre me hnyok kâu. 11 Ke haba at Eferaima, me ame he ka gâ thö anyidra hmanenang helâ me meno ame gâ : k' adre me ca he bi ka hnokoâ, ke erkin, ke oerkinâ. 12 Eja ke ne adre ne hat je lakudra, me oge me he bi nya ka ohi' ödra unyin tavat, me me ba hmetu at a kolon : eke, ekölö gadra bi, iny ka he ka digic ödra ! 13 Adre me tâ Eferaima hnyi hnyei ae so, helâ me hnök hna wâ Turo : ke so bi ame he Eferaima ka hom je lakon ka at úhlingö. 14 Iehova lö, ham ködra ; ieú u me he ka ham ? ham ködra hnyok ame köluhabú, me li bai ae ba dân. 15 E hnyi Gilegala hwakecidra ae kong ; anyin oge me húkoti' ödra eling : ke oge me he ka ob' ödrâ únyi hnyi umök uma, can anyidra ta je huliwa ae kong : oge me ca he hmetu bi ka betenge gadra ; tavat úhkin fuc je latuhödra bia. 16 Adre me kot at Eferaima, ke meleca thö iwân gadra k' adre me ca he ka wa : eke, eja ke ne adre ne hnokoâ, me oge me he bi nya ka hlingâ lakudra adre me betenge gan. 17 Ame he bi Khonguk ka hota degeci ödra, anyin adre me ca löng kâu : me adre me he ka he baú hnyi wanben ta je hnyei.

HNYIMAKAN 10.

**H**ABA Isaraela, me vine, at ame kú hlau, k' ame wa je wan ; hoton úganiny je wan e, e ame osehia je taben hut ; hoton úsoiny iny hnyei, adre op je veto ame tot ae hmanenang. 2 Ame kia but je hnyekudra ; ke walang adre me he ka owisa anyidra hulö ; e ame he ka thö degecâ anyidra je taben hut, me okongoâ anyidra je veto ame tot. 3 E hnathu adre me he walang ang ka ha, ka habe, E ba but tuhöta : anyin ate me ca outö Iehova ; ke haba than, ieú ae khana he ka ányâ hobi köta ? 4 Adre me ha ta je hofuc baú, adre me khemanyin thoi hnyi hnödra hna úhinyköu : anyin a wale ame o but hna owisa helâ me je úö adre me mekiny hnyi je utkânâ adre me belökâ. 5 Ame he tavat adre me laba hnyi Samaria ka hmak hnyekudra ge je nokon kau hnyi Beth-aven ;

anyin ame he aten ka tenge can e, ke tavat bihut hnyin, waleji adre hobeluâ ge hmanenanginy, anyin ae hia but e. 6 Ke adre me he minya ka hom e Asuria ai hnân bwihlany kö Jaröba than : ame he Eferaima ka hmehma, ke ame he Isaraela ka hmehma ge hnen hna úhnenamö. 7 Haba Samaria, me adre subâ degecâ tuhan, helâ me je ong utö hon köiö. 8 Adre me he ka ohia minya je dok ae görany hnyi Aven, wale hulöiny Isaraela : ame he ka kú úö ae údedö me watetaföcö hon anyidra je taben hut ; ke adre me he ka ha ka je bucen, ka habe, Tubi öhmun ju ; me ka je hut, ka habe, öbun kölu takú öhmun ju. 9 Isaraela lö, u je hia but ányâ hulö hwân hnyi je bongu Gibeä : adre me tot eling, me me ca he ka khöú ödra hnyi Gibeä hnen vat me lakon hulö. 10 Iny ka wek oge me he ka bi hwaban ködra ; ke ame he je hnyei ka úkacaköu úcúdra, ödra ka c' ödra can anyidra li monu. 11 Eferaima kau ae kbenen, at ame beututo hwit ; ke oge hia but hanyâúâ nyin ae hmanenang : oge me he ka ip at ka hije hu Eferaima ; k' ame he Juda ka wia kânâ, k' ame he Jakob ka trohnenâ kânân kânâ. 12 Te hatungen ju öbun hnyi hwakecin ae wisa, menâ ju hoton ibetengiö ; he th' öbun ka trohnenâ kânöbun kânâ ae itremacat : anyin a úen ang he ka elöm Iehova, ke ne o but e ame o me öta hubun hwakecin ae wisa. 13 Öbun e hia but belökâ hwakecin ae kong, me meno hulö ; öbun e hia but an waniny thoi : anyin a u je labageju ka hnyi dem gethen, me ányâm tavat hwege ae se hia. 14 Anyin a wale ame he ka o imonumonuny unyin em hnyei, k' adre me he ka ohia hnâm je hnabâ hia, helâ me hnö Salemana hna ohia Beth-arebela hnyi úen vat : waleji adre me sa je wanakat me lahinyödrin. 15 K' ame he Beth-ela ka ányâ helâe köbun can hwakecibun ae kong : ke adre me he ka subâ degecâ than Isaraela hnyi hnyomakatu kong.

HNYIMAKAN 11.

**H**NYI úen ae tiga wanakat Isaraela, oge me betenge gan, me hawâ nö kuk úheny Aigupito. 2 Adre me haw' ödra, me adre me he but únyi gadra : adre me bi hut ka je Baala, me leú utö ae bo so ka je idola. 3 Ke so bi oge me nö Eferaima he ka he, oge me delu' ödra ge li benyik ; ke ca khan' ödrin a oge me ometu ödra. 4

## HOSEA 12, 13.

Oge me lili ödra hnyi je tö anyin at, wale a töiny ibetengiö; ke iny úcú ködrin me at ame hom degecá hna úhúkálákouá únyi hnyi je waidra. 5 E ame ca he bi ka hmetu ka hnyi hnyeí Aigupito; k' ame he bi at Asuria ka tuhan, anyin adre me höcö he ka hmetu. 6 Me ame he ka nyiká hele vat hnyi anyin je taun, me ohia je venyâiny, me ön ödra, can hnödra je hna úhnenamö. 7 E hwege lakeik he ka digic nya: eja ke ne adre ne hongot kö Beönua, me ba at a khaca ame he ka ogáná e. 8 Eferaima lö, oge me he ka kámâu ka hna degeci u? Isaraela lö, oge me he ka kámâu ka hnö u? oge ma kámâu ka wiö u helâ me Adema? me ip u helâ me Zeboim? k' ame hwiö öünykúmik eü hnyi hnyekuk, k' ame tha kú gan hmâ thö anyik je tang betenge. 9 Ke oge me ca he bi ka ohwádâ anyik hmönyin ae gan, ke oge me ca he hmetu bi ka ohio Eferaima: anyin a inya Khong, ke ca at bi; At ae Kap hnyi wanbâm: me oge me ca he ka delec taun. 10 Adre me he ka hnu hotu Iehova, hnyat adre me he ka kuku helâ me liona: anyin a e ame he ka kuku thö, me ame he ka o je wanakat úhedra jimeú hnyi öbubuny. 11 Adre me he ka o me öbubuny helâ me meno ame gâ úheny Aigupito, ke helâ me biny úheny hnyi hnyeí Asuria: ke oge me he ka olab' ödra hnyi hnyin umödra je uma, haingö Iehova.

12 Eferaima ame wadrö nya ge thoi, me lap anyi Isaraela ge tang iyawö: ke haba Juda e ame tiga tha musi me Khong, ke ame hnathu ka At ae Kap.

### HNYIMAKAN 12.

**E**FERAIMA ame an ang, me wadring hoton ang hwei: e ame osehia thoi me öba wan hnyi je bong; ke ödrin e úhi-hinykôu me at Asuria, me hok wakaco Aigupito ai. 2 Ke hu ivinö anyi Iehova me Juda, ke e ame he ka bi hwaban kö Jakob hoton deny je gethen; e ame he ka bi hwaban kâu hoton hnen hna ányâ. 3 E ame kât ohmâiny can liamekeiny me hnyi hnyok; ke e ame újông ka Khong hnyi anyin hmai: 4 eke, e ame újông ka angela, me hwege bi: e ame tenge me khöú kâu: e ame wâ e hnyi Beth-ela, ke e ame úhnenamö möhmun eling; 5 wale Iehova Tuhan sabaoth; Iehova, wale hnân úny-kúme e. 6 Anyin a wale hmetu ju ka

Khongom: tuö ju ibetengiö me hna owisa, ke halubahingen bala Khongom.

7 E at ame úcú omjeú, e hnyi hnyamen tulut iyawö; e ame weny he ka seda. 8 Ke haingö Eferaima, ka habe, E hnathu, iny tren dut omjeú, oge wâ but tang omjehek: adre me ca he ka wâ hnyikonguk, wale a hulö bi hnyi anyik ta je huliwa hia. 9 Ke inya Iehova Khongom únyi hnyi hnyeí Aigupito; oge me he hmetu bi ka olabö u hnyi je uma mano, helâji me hnyi je bonginy bijeú ae únyi hnathu. 10 Oge hia but fuc minya ka je perofeta, me osehia je hna omanená; me ha je úhöúcú a deny je perofeta. 11 E kong ut Gileada? e hnathu ödra únyi baú; adre me hudo je bolok hnyi Gilegala: eke, haba anyidra je taben hut me helâ me je vetaúnyi hnyi je deny utetebelökiny ta hnyeí. 12 Ke haba Jakob ame kec ka hnyi utkânâ hnyi Aram, k' ame huliwa Isaraela hnân he ka bi hwaban momo, k' ame tuö mamoe hwaban áiân. 13 Ke haba Iehova ame hum Isaraela úheny Aigupito a deny perofeta, me tuö e a deny perofeta. 14 Ke a hia but Eferaima ti okuá hmönyin; anyin a wale ame he ka hnen bi ju dren hon, k' ame he Tuhan ka ohmeto kâu hnen hna úhaikonguny.

### HNYIMAKAN 13.

**A**ME fuc Eferaima, me ame öbubuny ehe; ke e ame ka ogáná e hnyi Isaraela: ke e ame hulö but ga Baala, me ame mokcu. 2 Ke walang ang adre me kong tot, k' adre me ányâ je idola hobi ködra adre me okoiâ ge anyidra sileva, a je idola hoton anyidra metâ, huliwa anyin at tretrao hia: k' adre me ha ge je únyi e, ka habe, E so ame he tavat adre me he ka hudo hut ka drem je nokon kau. 3 Anyin a wale adre me he ka helâ me úlá hnyi hnyomakatu, ke helâ me dân hau ae logot hia, ke helâ me unen hwit ame ou ang dö únyi hnyi hna huje hwit, ke helâ me hai únyi hnyi deny hai. 4 Ke inya Iehova Khongom únyi hnyi hnyeí Aigupito; k' ame ca he ka khanö u ke khong ke hake inya thibi, ke ba at úhömeli ke hake inya ke. 5 E khanö nya u ehac hnyi hnyebuba, hnyi hnyeí ae hwahwacit. 6 Adre me ka sekudra hoton ö 'dra jeú; e sekudra thö me ame bi gan je hnyekudra: anyin a wale adre me hnying nya. 7 Anyin a wale iny



## JOELA 1.

úcu me liona ködra, oge me he ka tue eú  
 hnyi gethen helâ me lepad: 8 ke oge me  
 he ka úkhanö mödra helâ me bea adre me  
 hûgúnâ lakon, ke oge me he ka kia thamúâ  
 tangen oúnykúmidra: ke oge me he ka ön  
 ödra eling helâ me liona; ame he ka olou  
 ki' ödra hnen menoiny hnyot. 9 Isaraela  
 lö, walang hna hangö u, a g' ame ve u  
 mönya, at hadruö u. 10 Ewa tuhâm, me  
 me omeli u hnyi ânyâm ta je taun hia  
 thithö? ke ânyâm tavat owisa köu, waleji  
 u je ha, ka habe, Ham könya than me je  
 taben? 11 Oge hia but ham köu than  
 hnyi anyik hmönyin, ke hûgúnâ e hmetu  
 hnyi anyik wathethöt. 12 Adre hia but  
 lan hulö anyin Eferaima; adre hia but  
 hitangen anyin monu. 13 Ame he ka o  
 kâu vec, helâ me momo ame he ka hnokoâ:  
 e nokon ae ba metâ; anyin e ca so e ame  
 bec he ka kölu. 14 Oge me he ka hûgún'  
 ödra únyi hnyi maniny erkemok; oge me  
 he ka omeli ödra únyi ge mok: Mok lö,  
 ewa ânyâm je úokonguny? Erkemok lö,  
 ewa hnâm hna úhangö? adre me he ka  
 ikhâlâ ietra ge li emakök. 15 Eja ke ne a  
 ne se hia but e unyin je liamekeiny, ame he  
 bi ka o ang hwei wale ang anyi Iehova  
 únyi hnyi hnyeububa, me me hwahwacit  
 anyin pupua, me hme belen an: e ame he  
 ka söh tang omjeú hia ae hmanenang. 16  
 Ame he Samaria ka hijen anyin bi hulö;  
 anyin e ame hia but úkxin fuc me Khongon:  
 adre me he ka ta ge hele vat; adre me he  
 ka sa lakudra je mendring, me kave omomo  
 a je erkin.

## HNYIMAKAN 14.

**I**SARAELA lö, hmetu ju kö Iehova  
 Khongom; anyin a u je ta but ge  
 ânyâm hulö. 2 Hom dö je ifucibun ke  
 hmeto ju kö Iehova, ha thö kâu, ka habe,  
 Hom dö hulö hia, me kap ju únyi ae so:  
 me öhmun e he ka ham je hudiny hnyi-  
 möhmun. 3 Ame ca he Asuria ka omeli  
 öhmun; öhmun e ca he ka tabâ je hors:  
 ke öhmun e ca he hmetu bi ka ha ke je  
 huliwa anyin je hnyamöhmun, ka habe,  
 Obun je konguhmun: anyin ame wâ unyâm  
 betenge ge tavat a mokcu kamödra. 4 Oge  
 me he ka osoâ hna digic nya gadra: anyin  
 ame hwiö gadra anyik hmönyin. 5 Oge me  
 he ka helâ me dân hau kö Isaraela: e ame  
 he ka vhöng hela me obedila, me sit ut helâ  
 me Lebanona. 6 Ame he ka gan je angin,  
 ke ame he hmanenanginy ka helâ me elaiö,  
 ke bunen ame he ka helâ me Lebanona. 7  
 Ame he tavat adre me laba hnyi hmenon  
 ka hmetu; adre me he ka möt hmetu helâ  
 me hwit, me vhöng helâ me vine: ame he  
 ka helâ me wainainy Lebanona bunen. 8  
 Ame he Eferaima ka ha, ka habe, Hnân eú  
 hmetu könya je idola? oge hia but thu kâu  
 ke oge me he ka wâ e: iny helâ me köp ae  
 hât; adre me he ka wâ gak wan gam. 9  
 Ie at ae metâ, me me wâ únykúme ta je  
 únyi eling? ie at ame wâ wia me me  
 wâhmakhmeto ta je únyi e? anyin ae wisa  
 je gethen de Iehova, ke ame he at ae wisa  
 ka vhenö; ke ame he tavat hanyâúâ ka ta  
 hnyin.

## JOELA.

### HNYIMAKAN 1.

**W**ALANG hofuc ho Iehova waleji ame  
 a kö Joela nöku Pethuela.

2 Öbun wahingat lö, löng ju hofuc ang,  
 ke tevehlöng ju öbun tavat aten hnyei.  
 Hawa, e hu únyi helâng hnyi bongubun je  
 bong, ame ne hnyi bong bongon lakamöbun?  
 3 Thumeto thö lakubun ge únyi eling, ke  
 ame he lakubun ka thumeto lakudra bi,  
 ke hamen lakudra ka thumeto dö a biliny.

4 Haba kolon ame hna ge lakon wahamon,  
 me ame han e hnen wahamon veto, ke haba  
 ju hna hna hnen wahamon veto, me ame  
 han hnen oböu, ke haba hna hna hnen  
 oböu, me amé han hnen walewi. 5 Hmak  
 d' öbun tavat öbun e ic monu, ke tenge;  
 ke haba öbun tavat hia öbun e ic waina,  
 kuku tenge thö, ge waina ae hnebwia;  
 anyin adre me subâ degezâ e únyi hnyi je  
 hnyimöbun. 6 Anyin ame o but ke hnyei  
 ka hnyi ik hnyei, a tavat hwege, ke ca

hnân aú ; haba je nyudra, me helâ me nyon liona, ke haba je ohúlúsinaidra, me helâ me ohúlúsinainy liona. 7 Ke e ame öba wan anyik vine, me thu anyik imeta : k' ame okalaötâ e, me degec ; ke hau but je vheiny. 8 Tenge thö, helâ me hlu ame weikâ ecmano ae gan nân can âiân hlu a e. 9 Adre me subâ degecâ hudiny han me hudiny ic ûnyi hnyi uma umö Iehova ; k' ame tenge tavat bihut a lathnyabai Iehova. 10 E ba but wan ta hnyei, ame tenge kânâ ; anyin ae ba but hwit, a hme thö waina ae teb ûnyi, ke ba wakaco. 11 Hme-hma ju öbun tavat belök, tenge th' öbun tavat huliwan vine, can hwit me bali ; anyin ae kong ut hwit hnyi ta hnyei. 12 E meleca thö vine, ke ba but meta ; a mok dö rimona, me pama, me tapua, wale je úöiny hia hnyei : anyin ame aú but senyiny unyiny tavat. 13 Tavat bihut lö, oweik' öbun ju, ke tenge ; tavat huliwan taben hut lö, kuku tenge thö ; lathnyabainy Khonguk lö, ai öbun, mokut hnyi lit hia hnyi mano ae gan nân : anyin ae ba hmetu hudiny han me hudiny ic hnyi uma umen Khongubun. 14 Thu bongon ju he ka ca han, hawâ thö úkhacaköu ae ûnyi hnathu ; úkhacaköuâ thö wahingat me aten hnyei hia ka hnyi uma umö Iehova Khongubun, ke tenge th' öbun kö Iehova. 15 Ekölö ge bong ! anyin ame he jem bong bongi Iehova, ke e ame he ka o helâ me hnaúhangö ûnyi ge Ataekhanahia. 16 Hawa, ame ca ba jeú gata, eke, me senyiny me hobâ hnyi uma umen Khonguta ? 17 A bobot ut je hátong eú hnyi kânâ ; e ba but önyen je uma jeú, e amam but je omhani ; anyin ae meleca thö hwit. 18 Ekölö ge útengien je meno ! ame hlohlo je hnahat kau anyin ae ba but ö 'dra ; eke adre öba wan je hnahat mamoe. 19 Iehova lö, inya oge me tenge köu : anyin a hia but meic thong jeú an je meno hnyi hnyebuba, ke haba bâhlân ame hia but an je úöiny hnyot hia. 20 Eke, je menoiny hnyot adre me momokhon unyâm : anyin e hme but je deny köiö, ke a hia but meic thong jeú an je meno hnyi hnyebuba.

### HNYIMAKAN 2.

**T**ÛA thö trutru hnyi Ziona, me olungâ haten hnyi anyik bucen ae kap ; öbubuny ju öbun hia aten hnyei ; anyin ame he jem bong bongu Iehova, ae hakekeny jut ; 2 bonginy lit me menekholom, bonginy úlâ me khömet, helâ me melaminy hnyo-

makatu ame ulolo hon je bucen ; hnyei ae gan me hwege, e ba helâe ehac, ke ame ca he hmetu ka helâe, hnyi je hunainy je dö ae se hia. 3 Ame han meic hnyi hnyimaködra, ke haba bâhlân ame hlâ hwabödra : haba hnyei hnyi hnyimaködra, me helâ me hnyei Edena, ke hnyebuba ae ba wan hnyi hwabödra ; eke, ke ba at ame kec möt ge ioidra. 4 Haba unyidra me helâ me unyiny je hors ; ke adre me wadring helâ me je hors adre me tabâ. 5 Helâ me hwan je kariota hnyi ban je bucen hwan gâ a ödra, ke helâ me hwan bâhlân meic ame thong thatúnyiny hwit, helâ me tavat ae hwege adre me tot metâ he ka vat. 6 Ame öbubuny tavat hnyi hnyimaködra ; k' ame löhau ta je hnyimak hia. 7 Adre me wadring helâ me tavat hwege ; k' adre me ölö hanyâúâ hak veto helâ me tavat vat ; k' adre me ve vheno dedra je gethen, ke adre me ca saú ûnyi hnyi anyidra je deö at. 8 Adre me ca úhneki ; k' adre me ve vheno dedra je gethen : adre me thu vat me omjehen vat, k' adre me ca saú hnyi dedra. 9 Adre me utut ka hnyi taun ; adre me wadring hon hak veto ; adre me ölö ka hnyi hnyiny je uma ; k' adre me didrö hnyi je mamalama helâ me at venöu. 10 Ame öbubuny hmeledrany hnyi hnyimaködra ; k' ame jijing drany : ame menekholom seúnö me tehi, k' ame ca melam ta je okhü : 11 ke ame fuc Iehova hnyi hnyimakan anyin utbavat ; anyin ae gan hmâ hnen hna hunuma ; anyin ae hwege at ame ohwâdá hwan hofuc : anyin ae gan hmâ bong bongu Iehova me hnân outen e ; ke ie at ae hwege he ka hokhnyok hnyiny e ? 12 Ke so bi, haingö Iehova, ka habe, Wanglang ang hwiö thö könya ge je hnyekubun ae bekhöt, me ânyâ ca han, me tenge, me tenge thungaú : 13 kia but je hnyekubun, ke ca kia je úkhaú bi, me hwiö thö kö Iehova Khongubun : anyin a e at ame betenge baú, ke betenge vec, ke bec he ka hmönyiny, ke gan hmâ anyin ibetengiö, k' ame ka ietra hulö. 14 E khanö ia, a g' ame ca he bi ka hmetu me ietra, me ip bi nhahic hwaban, wale hudiny han ke hudiny ic hobi kö Iehova Khongubun.

15 Túâ thö trutru hnyi Ziona, thu bongon ju ânyâ ca han, hawâ úkhacaköuâ thö ae ûnyi hnathu : 16 úkhacaköuâ thö tavat, okabâ thö úkhacaköu, hawâ thö wahingat, úkhacaköuâ thö ta je wanakat, me tavat adre me i : hamen at a tep faipoipo ka he ûnyi hnyi hnyeuleny, me hlu a tep faipoipo

únyi hnyi ong hnyeuleny. 17 E so ame he tavat bihut, a je athnyabai Iehova ka tenge hnyi wanben poretika me taben hut, me ha, ka habe, Iehova lö, betenge ju ge lakem, ke ca he ka hna jekhom me hnân taben haikongoá, me he ka musî ödra hnen ta je hnyei: anyin a ieú ame he ka ha hnen je hnyei, ka habe, Ewa Khongudrin?

18 Me Iehova ame ciâ ge iny hnyei, me betenge ge lakeiny. 19 Ke Iehova ame thu me ha ka lakeiny, ka habe, Wâ bi, oge me he ka kunâ köbun hwit, me waina, me wakaco, me me sekubun hnen je únyi e: ke oge me ca he hmetu ka hn'öbun me hnân haikongoá hnen ta je hnyei: 20 ke oge me he ka öúsákâúöâ m'öbun utbavat únyi hnyi hwadrö, me obâ e ka hnyi hnyei ae hwahwacit me ba wan, haba hnyimakan e ka hnyi köiö e deiö, me hoton ka hnyi köiö e jiö; ke ame he ka o anyin bokong, ke ame he ka o bunen anyin bobot, anyin a e ame hia but ányâ ta je únyi ae gan. 21 Hnyei lö, ca ot bi, senyin dö me hobâ; anyin a hia but Iehova ányâ ta je únyi ae gan. 22 Je menoiny utkânâ lö, ca ot bi; anyin ame kú jeú an je meno hnyi hnye-buba, anyin ame wa ta je úö, ke ame wa gan hmâ meta me vine. 23 Ke senyin dö, öbun je lakon Ziona me hobâ ga Iehova Khongubun; anyin a e ame ham köbun we a bân ae úcú, ke e ame kunâ köbun we, wale we a bân me we a biliny, hnyi tehi a bân. 24 Ke ame he ka unöngöt je hna huje hwit ge hwit, me bahihingölö thö je tengen waina me wakaco. 25 Ke oge me he ka bi hwaban köbun je huna, waleji a an hnen wahamon veto, me oböu me walewi, me nokon wahamon, wale anyik utbavat ae gan oge kunâ köbun. 26 Ke öbun e he ka han me sekubun, me ogânâ iö Iehova Khongubun, at ame hia but ányâ únyi hnân láiâ unyibun: ke ame ca he balua bi lakeik ka hmehma. 27 Ke öbun e he ka wâ a inya hnyi wanben Isaraela, ke inya Iehova Khongubun, ke ba ju ke at: ke ame ca he balua bi lakeik ka hmehma.

28 Ke hwaban e, oge me he ka hingálâ hanuk hon tavat hia thithö; ke ame he lakubun obaga me wahu ka perofeta, ame he wahingatibun ka bwo je bwi, ame he wahidrou unyibun ka wâ je hna omanená: 29 ke hnyi je bong eling oge me he bi minya ka hingálâ hanuk hon ta je athnyaba baga me momo. 30 Ke oge me he ka omanená je haten ethö hnyi drany me eang hmeledrany, wale dra, me meic, me

hai ame sâ göranyai. 31 Ame he ka wia seúnö me me lit, me tehi me me dra, me ame he ka o but bong bongu Iehova, bong ae gan hmâ ke hnân outen. 32 Ke ame he ka e bi, a haba at ame he ka hawâ iö Iehova me e ame he ka möt: anyin ame he ka hu tavat kec möt hnyi bucen Ziona me Jerusalema, helâji me hna ha hnö Iehova, ke unyin je kolon, hnyat a haw'ödra ga Iehova.

## HNYIMAKAN 3.

**A** NYIN a wâ bi, haba hnyi je bong eling ke úen eling, iny ka he ka hom hmetu je bâ wale a at Juda me Jerusalema, 2 me oge me he bi ka úkhacaköuâ je hnyei hia, me hum ödra ka hnyi hnyigöulen bucen anyi Jehosafata; ke oge me he ka úhnei m'ödra eling can lakeik me jekhöük a Isaraela, wale adre oveseâ ka hnyi je hnyei, me khenâ ik hnyei. 3 Ke adre hia but uglekóbâ lakeik; k' adre ham da me hwaban momo hnyi gethen, k' adre úcú waina me hwaban hlu, m' adre me he ka ic. 4 Eke, Turo me Sidona lö, me je ke keihen hia Filisiti, ieú gabun könya? hawa, öbun e he ka ham könya hwaban? ke öbun e ne bi hwaban könya, me oge me he bi nya ka ie ohmeto hwaban eling ka hnyi hon je böbun. 5 Anyin a öbun e hia but hom anyik sileva me anyik gol, me sukhö-unâ je omjehek ae hmanenang ka hnyi je uma umen Khongubun: 6 ke öbun e hia but úco lakon Juda me Jerusalema ka at Heleni, m' öbun e he ka öúsákâú' ödra ge idra: 7 wâ bi, oge me he ka höi' ödra únyi hnyi dok waleji öbun e úcú ödra ka hnyin, me ohmeto hwaban ka hnyi hon je böbun; 8 ke oge me he ka úco lakubun obaga me wahu ka je lakon Juda, k' adre me he bi ödra ka úcú ödra ka at Sheba, hnyei ae sákâú: anyin a hia but ha Iehova.

9 Haimemenâ thö e ka ta je hnyei; penapena thö vat: bwebwelâ thö tavat hwege; e so e hakekeny me ölö thö tavat vat hia. 10 Kokot anyibun je únyi hnân wia kânâ, me me ta je hele vat bi, ke anyibun je hele subö vine, me me ta je ö bi: e so ame he at ae senyin ka ha, ka habe, Iny hwege. 11 Logot öbun, ai öbun je hnyei hia igigilö, ke úkhacaköu thö: Iehova lö, oâ but kâe ányâm tavat hwege. 12 E so ame mweimwei je hnyei, me o ka hnyi hnyigöulen bucen anyi Jehosafata: anyin oge me he ka laba eling he ka owisa je

## AMOS 1.

hnyei igigilö. 13 Inâ but ûnyi hnân subö whit, anyin a hmahmat ut widrany: ai öbun, ututo ju; anyin ae unöngöt dö hna hlic wan vine, ame bahihingölö je tangen; anyin ae gan hmâ hwakecidra ae kong. 14 Ödra se, ödra se hia hnyi hnyigöulen bucen hna owisa! anyin ae hakekeny jut bong bongu Iehova hnyi hnyigöulen bucen hna owisa. 15 A lit ut seünö me tehi, ke ame ca melam ta je okhû. 16 Ke ame he Iehova ka kuku hwege hnyi Ziona, me fuc ûnyi hnyi Jerusalema; ke ame he ka jijing drany me hmeledrany: ke haba Iehova e ame he ka hnân luabaduöng ka lakeiny, me hhabâ hobi kâu lakon Isaraela. 17 Me öbun e he ka wâ a inya Iehova Khongubun, at ame laba hnyi Ziona, anyik bucen ae

kap: me ame he ka kap bi Jerusalema, ke ame ca he hmetu ta je atkanyua ka vheno e. 18 Ke haba hnyi ûen eling ame he ta je bucen ka khukhula ge waina ae hnebwia. ke ame he je hut ka di ge debai, ke ame he ka khukhutu köien je wagewe Juda; ke ame he pupua ka o ûnyi hnyi uma umö Iehova, me hû hnyigöulen bucen Sitima. 19 Ame he ka ba wan Aigupito, ke ame he Edoma ka hnyebuba ae ba wan, can hna ovecâ lakon Juda, anyin a adre hia but hingâlâ dra ae ba hnyikongon hnyi idrin hnyei. 20 Ke ame he Juda ka laba hmâ, me Jerusalema, ke ne o but hnyi ta je dö. 21 Ke oge me he ka haisoâ drödra waleji oge me tiga ca haisoâ: anyin a Iehova ame laba hnyi Ziona.

## AMOS.

### HNYIMAKAN 1.

**W**ALANG hofuc ho Amosa, wale at ame tha e me tavat tuö omeno hnyi Tekoa, ke walang wâhnen ge at Isaraela hnyi je bong bongu Uzia than Juda, me hnyi je bong bongu Jeroboama nöku Joasa than Isaraela, lo li huna ke tiga hia bi hwioi.

2 Ke haingen, ka habe, Ame he Iehova ka kuku hwege hnyi Ziona, me fuc ûnyi hnyi Jerusalema; k' ame he bi ka tenge je hnyaban tavat tuö mamoe, k' ame he ka meleca ban Karemela.

3 Walang hna ha hnö Iehova, ka habe, Can kun ta monuiny Damaseko, eke, can vak, me oge me ca he ka ohavâ hwaban e; anyin adre hia but kokot at Gileada hneu je ûnyi hnân huje whit a fao: 4 ke oge me he ka kunâ meic ka hnyi lap anyi Hazaela, k' ame he bi ka an hnyi uma ae hmanenang umö Ben-adada. 5 Ke oge me he ka thu venyâiny Damaseko, me suba degecâ tavat adre me laba hnyi hnyigöulen bucen Aven, me at ame hom uciny musu ûnyi hnyi lap anyi Edena: k' ame he ka hom bâ at Suria, Kira ai, haingö Iehova.

6 Walang hna ha hnö Iehova, ka habe,

Can kun ta monuiny Gaza, eke, can vak, me oge me ca he ka ohavâ hwaban; anyin adre me hom bâ hnyei hia, m' adre me hn' ödra ka at Edoma: 7 ke oge me he ka kunâ meic ka hnyi hna up haginy Gaza, k' ame he ka thong degecâ je uma umen than hnyin. 8 Ke oge me he ka subâ degecâ aten Asedoda, me at ame hok uciny musu hnyi Asekelona; ke oge me he ka wia hnyamök úcon Ekerona, me ame he ka hia je kolon hnyi Filisiti, haingen Than Iehova.

9 Walang hna ha hnö Iehova, ka habe, Can kun ta monuiny Turo, eke, can vak, me oge me ca he ka ohavâ hwaban e; anyin adre me hna tavat hia ka at Edoma, ke adre me ca ûnykûme ûhinyköu liamekeiny: 10 ke oge me he ka kunâ meic ka hnyi hna up haginy Turo, k' ame he ka thong degecâ je uma umen than hnyin e.

11 Walang hna ha hnö Iehova, ka habe, Can kun ta monuiny Edoma, eke, can vak, me oge me ca he ka ohavâ hwaban e; anyin a e ame hnu liamekeiny mē ge hele vat, me degec ibetengiö, ke ame labö kia but anyin hmönyin, ke e ame tuö anyin wathethöt nyiele balua. 12 Ke oge me he ka kunâ meic ka hnyi Temana, ke ame he ka thong degecâ je uma umen than hnyi Boyera.

## AMOS 2, 3.

13 Walang hna ha hnö Iehova, ka habe, Can kun ta monuiny lakon Amona, eke, can vak, me oge me ca he ka ohavâ hwaban e; anyin adre hia but kave je erkin hnyi Gileada, m' adre me he ka ogânâ idra: 14 ke oge me he ka hú meic hnyi hna up haginy Raba, ke e ame he ka thong degecâ je uma umen than hnyin e, me kuku hwege hnyi bonginy vat, me weneú hnyi bonginy höu: 15 ke ame he ka bâ tuhödra, e me anyin je taben, haingö Iehova.

### HNYIMAKAN 2.

**W**ALANG hna ha hnö Iehova, ka habe, Can kun ta monuiny Moaba, eke, can vak, me oge me ca he ka ohavâ hwaban e; anyin e ame thong je jeien than Edoma me me dröu but: 2 ke oge me he ka kunâ meic hon Moaba, me e ame he ka thong degecâ je uma umen than hnyi Kerioth; ke ame he Moaba ka mok hnyi mede, me kuku hwege, me hwan trutru: 3 ke oge me he ka subâ degecâ at owisa hnyi wanben e, me tha hlingâ e me ta je taben hia hnyin e, haingö Iehova.

4 Walang hna ha hnö Iehova, ka habe, Can kun ta monuiny Juda, eke, can vak, oge me ca he ka ohavâ hwaban e; anyin adre hia but hna degecâ hnanyibu anyi Iehova, me ca tuö hnen je hna otilâ, ke ame omonu ödra anyidra je thoi, waleji a hnu hoton lakamödra: 5 ke oge me he ka kunâ meic hon Juda, k' ame he ka thong degecâ je uma umen than hnyi Jerusalema.

6 Walang hna ha hnö Iehova, ka habe, Can kun ta monuiny Isaraela, eke, can vak, me oge me ca he ka ohavâ hwaban e; anyin adre hia but üco at ae so hwaban sileva, ke at ae theduoc hwaban li tangen hnyeúca: 7 tavat adre me behnyekudra kânâ a e hon ban tavat ae theduoc, k' adre me wia gethen deny tavat ae menyik: k' ame he at me kamen unyin hlu a khaca, me okongoâ iök ae kap: 8 ke adre me mokulec je úkhaú adre me ham hnân haten, hnyi hmelen ta je taben hut hia, k' adre me ijem waina anyin tavat adre me takou ge hnanyibu hnyi uma umen Khongudrin. 9 Ke so bi, oge me ohia at Amora hnyi hnyimäködra, waleji a helâ me úgöranynin je arasi úgöranynidra, ke úcú me je iwajo tang hwegiödra; ke so bi oge me ohia wan gadra ethö, me je iwân eú. 10 Ke oge me hum öbun minya únyi hnyi hnyei Aigupito, ke

lili öbun hnyi hnyeububa fâte je huna, m' öbun e he ka hu hnyei iny at Amora. 11 Ke oge me oâ ke je lakubun m' ödrin je perofeta bi, ke wahidröu gabun m' ödrin je Nazeri bi. Lakon Isaraela lö, hawa, ca e? haingö Iehova. 12 Ke öbun e habelen je Nazeri ge waina, ke öbun e húna ka je perofeta, ka habe, Ca he öbun ka perofeta. 13 Wâ bi oge me he ka hlic öbun hnyikânâ helâ me úkat ame hlec ae unöngöt ge je thi hwit. 14 Ke ame he ka ba but hna bân anyin at ae hâhâ can, k' ame ca he at ae hwege ka oâ tang hwegien, k' ame ca he at ae gan ka omelö e bi: 15 k' ame ca he bi ka tot at ame hok cafana: k' ame ca he ka kec möt at ae hâhâ can: ke haba khaca, ame ca he at tabö hors ka omelö e bi: 16 Ke haba at ae hwege hnyekon wale unyin tavat ae hwege, me e ame he ka kec ke ba úkhaú hnyi bong eling, haingö Iehova.

### HNYIMAKAN 3.

**J**E lakon Isaraela lö, löng ju hofuc ang wale a ha Iehova úcúbun, úcon lap hia oge hom úheny hnyi hnyei Aigupito, ame ha, ka habe, 2 Oge hia but khanö nya thibi öbun hnyi ta je lap hia eang hmeledrany: anyin a wale oge me he ka bi hwaban ta je hwakecibun hia ae kong. 3 Hawa, ame he ka tha he li at a lo, e ka ca tha hnyekudru bi? 4 Hawa, ame he ka kuku liona hnyi hnyot, e ka ba haniny? hawa, ame he nak liona ka fuc hnyi umen bi, e ka ba únyi e ame hom? 5 Hawa, e khana meno ame'gâ he ka ta hon kânâ ge hnewe e ka ba offic hobi kâu? ame he ka fific offic eú hnyikânâ, e ka ba haniny? 6 Hawa, adre me he ka tûâ trutru hnyi taun, ke ame ca he ka ot tavat? hawa, ame he ka hu únyi ae kong hnyi taun ke a ca ányâ bi Iehova? 7 E hnathu ame ca he bi Than Iehova ka ányâ ke únyi a ne ca bân ka omanenâ weny ka je perofeta a je athnyabainy. 8 A um dö kuku liona, ie at ame ca he ka outen? a hia but Iehova fuc, ie at ame ca he bi ka perofeta?

9 Haimemenâ thö hnyi je uma umen than hnyi Asedoda, me je uma umen than hnyi hnyei Aigupito, me ha, ka habe, Úkhaaköu thö hon je buceniny Samaria, me wâ je imediököu ae gan hnyin e, me je hna ovecâ hnyi wanben e. 10 Anyin e ca khan' ödra he ka ányâ únyi ae úcú, tavat adre me úkhöünâ úkonguny me hna söh hnyi umödra je uma ae hmanenang, haingö

Iehova. 11 Anyin a wale, walang hna ha hnen Than Iehova, ka habe, Ame he ka hu iwahnaihmiony igigilö hnyei; ke e ame he ka hügünâ tang hwegiâm gam, ke adre me he ka söh umâm je uma ae hmanenang. 12 Walang hna ha hnö Iehova, ka habe, Adre me he ka hügünâ lakon Isaraela tavat adre me laba hnyi Samaria hnyi kopiny hna mokut, helâ me at tuö mamoe ame hügünâ ûnyi hnyi hnyimen liona li can, ame ne ke keihen hnyikönyen. 13 Löng ju öbun, me ohnathoâ ûcon lakon Jekob, haingen Than Iehova Khongon sabaoth. 14 Anyin a hnyi bong oge me he ka bi hwaban monuiny Isaraela, me oge me he minya ka bi hwaban ka je taben hut hnyi Beth-ela, ke adre me he ka sö degecâ je baitoiny taben hut, me kölu hnyikânâi. 15 Ke oge me he ka tha kot umen hnyeun me honivakiny; k' adre me he ka ohia je uma a nyon elefan, k' ame he ka ba but je uma ae gan, haingö Iehova.

HNYIMAKAN 4.

**L**ÖNG ju hofuc ang öbun je kau hnyi Basana, a öbun hnyi je bucen Samaria, a hnyat öbun e ovecâ tavat ae theduoc, me okongoâ tavat ae vec, a hnyat öbun e ha ka latuhöbun, ka habe, Hom but jem me habelihmun. 2 A hia but Than Iehova khemanyinâ hwakecin ae kap, a g' ame he ka o but köbun je bong adre me he ka hum öbun ge ta je bâlet, me lelö kolon gabun ge je wage. 3 Ke öbun e he ka he ehele hnyi je dok ae hmouca ve cici öbun; ke öbun e he ka khû' öbun ka hnyi Haremona, haingen Than.

4 Ai öbun Beth-ela ai, me ânyâ monu; ke Gilegala ai, me osehia hnöbun je hna hanyâûâ; ke hom anyibun je hut hnyi je hnyomakatu, ke anyibun je ke keihen a libenyitainy hwaban ta bong a kun hia; 5 me hudo thö hudiny ole adre me levenâ, me thu bongon je hut ae betenge me haimemenâ: anyin a wale webun, lakon Isaraela, haingen Than Iehova. 6 Ke oge hia but ham köbun je nyu ae ba tiren hnyi anyibun je taun hia, me ohmiâ jeû hnyi je hnöbun hia: ke so bi öbun e ca hmetu könya haingö Iehova. 7 Me oge hia but behânâ me köbun, ke adre me he bi ka menu hwaban kun ta tehi: ke oge me öta we hnyi ke taun, k' oge me ca öta hnyi ke taun: k' ame ta we ka hnyi hon ke ong dok, ke haba dok ame ca ta we ka hnyin

me ame melecâ thö. 8 Waleling me me he lo li taun ame ne kun ka hnyi taun a khaca he ka ic köiö, k' adre me beic bala bi: ke so bi öbun e ca hmetu könya haingö Iehova. 9 Oge hia but kuc öbun ge meleca me löhau: ke haba wahamon ame an hnyiganinyibun ta hnyei, meibun je hnyei vine, me halebun je meta, me halebun je elaiö: ke so bi öbun e ca hmetu könya haingö Iehova. 10 Oge hia but kunâ köbun mok ae cap helâ me hnyi Aigupito: oge hia but hlingâ wahidröu gabun ge hele vat, me hügünâ halebun je hors: ke oge hia but oâ bokonginy hnöbun hna hunuma ka hnyi je hnyingöibun: ke öbun e ca hmetu könya haingö Iehova. 11 Oge hia but ohia keihen gabun helâ me hnen Khong hna ohia Sodomame Gomora, ke öbun ûcü me uthmeic adre oc ûnyi hnyi meic: ke so bi öbun e ca hmetu könya, haingö Iehova. 12 Anyin a wale, oge me he ka ânyâ helâe köu Isaraela: ke can anyin oge me he ka ânyâ helâe köu, penapena thö he ka iouny me Khongom, Isaraela. 13 Anyin a wâ bi, haba at ame op je bucen, me mâdrâ ang, me omanenâ ka at ûnykúmenen, at ame wia hnyomakatu me me lit, me vheno je dok ae görany hnyi hmeledrany; haba ien e, me Iehova Khongon sabaoth.

HNYIMAKAN 5.

**L**AP anyi Isaraela lö, löng ju hofuc ang wale oge me ha hnân khumöng tengge gubun. 2 A ta but hluiny Isaraela; e ame ca he hmetu bi ka tot: adre degec e hon kânân kânâ, e ba at ame he ka otilâ e. 3 Anyin a walang hna ha hnen Than Iehova, ka habe, Haba taun ame he ke wan thauzan úheny hnyin, me ame he ka wan haded biju kolon; ke haba at ama he ke wan haded úheny hnyin, me ame he ka ten biju kolon, hobi kâu lap anyi Isaraela. 4 Anyin a walang hna ha hnö Iehova ka lap anyi Isaraela, ka habe, Elöm nya th' öbun, m' öbun e he ka möt: 5 ke ca elâm bi hnyi Beth-ela, ke ca didrö ka hnyi Gilegala, ke ca hanyâûâ Bere-seba ai: anyin e hnathu ame he Gilegala ka bâ, ke ame he ka ûnyi baû Beth-ela. 6 Elöm Iehova th' öbun m' öbun e he ka möt; wâ e nye gâ but helâ me meic ka lap anyi Josefa, me an e, ke ba at hnyi Beth-ela he ka ume: 7 öbun tavat öbun e wia hna owisa me me helâ me khöhlöng, me khûâ hnyikânâi hwakecin ae wisa; 8 elâm dö at ame ânyâ

kukuûnyi me orion, k' ame wia hmenon mok ka hnyi hnyomakatu, at ame omene-khulumo lany me me lit; k' ame hawâ köien köiö ae gan me hingâlâ ka hnyi kânâ: Iehova ien; 9 at ame ie oâ hnaû-hangö ka at; ae hwege, me ame o úohia ka hnyi hnabâ. 10 K' adre me hûkötîâ at ame úthao hnyi homagöule, me ikikiâ at ame ha wisa. 11 Anyin a öbun e uto at ae theduoc, me hûgûnâ gan je hok hwit: anyin a wale öbun e ca he ka labâ je uma öbun e hia but op ge veto adre tretrao: k' öbun e ca he ka ic wainainy je hnyei vine öbun e belökâ. 12 Anyin ae khanö nya a öbun e osehia hanyâûâ, ke úganiny anyibun je hulö; öbun tavat ovecâ at ae wisa, me kap hwaban ae hwali, me ohavâ ka at ae theduoc hnyi homagöule. 13 Anyin a wale, ame he at wâ wia ka laba hnyibu hnyi ûen eling; anyin a ûen e ae kong bi. 14 Elâm dö so, ke ca monu bi, m' öbun e möt: me ame he Iehova Khongon sabaoth ka tha e m' öbun, helâ me hnöbun hna ha. 15 Hûkötîâ thö hulö, ke hnyok bi ka so, ke otîlâ hmâ ju wisa hnyi homagöule: me ame he la Iehova Khongon sabaoth ka betenge ge je kolon ga Josefa. 16 Anyin a wale, walang hna ha hnen Than Iehova Khongon sabaoth, ka habe, Adre me he ka tenge hnyi ta je gethen ae lau hia; ke adre me he ka ha hnyi ta je hna cit gethen hia, ka habe, Ekölö! ekölö! he adre me he ka hawâ thö tavat belök m' adre me tenge, ke tavat ae khan' ödra tenge he ka tenge thungaú. 17 Ke adre me he ka tenge thungaú hnyi ta je hnyei vine hia: anyin oge me he ka ovhenu u, haingö Iehova. 18 Ekölö gabun tavat öbun e weny bong bongu Iehova! hnân eú bong bongu Iehova köbun? e menekholom bi, ke ca melam bi. 19 Ke helâ me at ame kec ge liona, k' ame úkhanö bi me bea; ke ame ne dit hnyin uma ke ame ka ip hnyamen hnyi hua up uma, me ame oloú but on. 20 Hawa, ame ca he ka menekholom bong bongu Iehova, ka ba melam? ke hlit hmönyin, ke ba lany hnyin e? 21 Iny höcö me hûkötîâ anyibun je bong bijeú, ke oge me ca he ka senyin hnyi anyibun je úkhacaköu ae únyi hnathu. 22 Eke, öbun e ne hudo könya anyibun je hudiny leú me hudiny han, me oge me ca he bi nya ka kap: ke oge me ca he ka wâ anyibun je hudiny úsoköu a halebun je meno ae pipikhenya. 23 Hom but gak hwan ányâm je khumöng; ke oge me ca he ka löng hwan ányâm je nabeli. 24 Ke

so ame di hna owisa helâ me köiö, me hwa-kecin ae wisa helâ me wagewe ae hwege. 25 Lap anyi Isaraela lö, hawa, öbun e hom könya je hut me bwihlany hnyi ta je huna a fâte hnyi hnyebuba? 26 Eke, öbun e hia but hom tilâ Sikutha a tuhöbun me Kiuna anyibun je hnatheat, okhûiny khongubun khong, waleji öbun e ka ányâ hobi köbun. 27 Anyin a wale, oge me he ka hum öbun ka hnyi bâ hnyi hoton Dama-seko, haingö Iehova, Khongon sabaoth ien.

HNYIMAKAN 6.

**E**KÖLÖ ge tavat adre me laba wia hnyi Ziona, me tavat adre me laba khötkic hnyi je buceniny Samaria, je at hnathu hnyi je hnyei ae beönuu, wale ame he ködrin lap anyi Isaraela! 2 He thö Kalene ai me wâ; ke úhem e, he thö Hamath ai ae gan: ke utut minya Gatha ai anyin at Filisiti: hawa, ödra so hon je dokhu eling? ame ne gan je idra hon je ibun? 3 Öbun tavat öbun e úsákâúö me bong ae kong, me ohakekenyâ taben lap anyin úokonguny; 4 tavat adre me mokut hon je hna mokut a nyon elefan, me hlöhlöu hon hnödra je ong hna mokut, tavat adre me an lakon je hnahat mamoe, me lakon kau únyi hnyi hnyin uma; 5 tavat adre me khumöngö je khumöng baú tha e me hwan nabeli; tavat adre me únykúme je únyikhumöng hobi ködra bi, helâji me Davita; 6 tavat adre me ijem waina únyi hnyi je utkaia, k' adre me ka súa wakaco ae so; ke adre me ca hmak bi ge vec anyin Josefa. 7 Anyin a wale adre me he walang ang ka bâ, tha ödra me tavat adre me bödra ka bâ, ke ame he ka hia hwan senyin anyin tavat adre me hlöhlöu. 8 A hia but Than Iehova khemanyin ame ka ha gan bi, me haingö Iehova Khongon sabaoth, ka habe, Oge me höcö ge beönuu anyin Jakob, me hûkötîâ je uma umen tuhan: anyin a wale oge me he bi nya ka hna taun me önyen. 9 Ke ame ten je kolon tavat hnyi uma a khaca, me adre me he ka mok. 10 Ke ame ne he ke kamen ka vaden at, wale at ame thong degecâ e, k' ame hom but je jö únyi hnyi hnyin uma, ke ame he ka ha ka at eiö hnyauma, ka habe, E hu at biju unyâm? me e ame he ka thu, ka habe, E ba; me e ame he ka ha, ka habe, Laba hnyibû ju; anyin ate me ca he ka ha iö Iehova. 11 Anyin a wâ bi, Iehova ame hûna, ke adre me he ka kot uma ae gan,

me me amam but, ke uma ae ûhnyûkong me me khekhe but. 12 Hawa, ame he ta je hors ka wadring hon kic? k' ame he at ka wia kânâ eling hnen ta je bolok? anyin a öbun e hia but wia hna owisa ka hnyi waada, ke wan hwakecin ae wisa ka hnyi khöhlöng: 13 öbun tavat öbun e hobâ ûnyi ae ba önyen me ha, ka habe, Hawa, öhmun e ca bi faoimun meno ge tang hwegiöhmun? 14 Ke wâ bi, lap anyi Isaraela lö, oge me he bi nya ka otilâ hnyei úcûbun, haingö Iehova Khongon sabaoth; ke adre me he ka oveci öbun hwân hnyi homagöuliny Hamath ke ne o but ka hnyi wageweiny dok ae tha hon.

HNYIMAKAN 7.

**W**ALANG hna omanená könya ge Than Iehova: ke wâ bi, e ame op je wahamon hnyi dok a hwân ka kû hnyin jeú a biliny; he wâ bi wale hna kû a biliny hwaban hna sö hobi kâu than. 2 Ke hnyi úen adre hia but an hia önyinginy hnyei, me oge me ha, ka habe, Than Iehova lö, ö u thang degecâ hulö: ama kâmaú Jakob he ka tot? anyin a e ûhnyûkong. 3 Haba Iehova ame ietra ûnyi e: Ame ca he ka hwâdâ haingö Iehova.

4 Walang hna omanená könya ge Than Iehova: ke wâ bi, Than Iehova ame hawâ meic hnân bi hwaban, ke e ame thong dok ae ti dit, ke ame bethong ut kânâ. 5 Me o ge me ha, ka habe, Than Iehova lö, ö e soju: ama kâmaú Jakob he ka tot? anyin a e ûhnyûkong. 6 Haba Iehova ame ietra ûnyi e: Ame ca he ka hwâdâ haingen Than Iehova.

7 Walang hnen hna omanená könya: ke wâ bi Than ame tot hnyi hak veto ame tot wisa, ke e hnyi hnyamen tulut tot. 8 Haba Iehova ame ha könya, ka habe, Amosa lö, ieú u je wâ? He haingök, ka habe, Tulut tot. Ke haingen Than, ka habe, Wâ bi, oge me he ka otilâ tulut tot wanben lakeik a at Isaraela; oge me ca he hmetu ka he me digic ödra, 9 ke ame he ka ba wan je dok ae görany anyi Isaaka, me ba önyen je dok ae kap anyi Isaraela; ke oge me he ka tot úcon lap anyi Jeroboama me hele vat.

10 Me haba Amazia at bihut hnyi Bethela ame úkhúnöng kö Jeroboama than Isaraela me ha, ka habe, A hia but Amosa si hnâm hnyi wanben lap anyi Isaraela: e ca úcú bi hnyei he ka hok hnyokâ hwan je

hofuc. 11 Anyin a walang hna ha hnö Amosa, ka habe, Ame he Jeroboama ka mok ge hele vat, ke e hnathu adre me he ka hom bâ at Isaraela ûnyi hnyi idra. 12 Ke haba Amazia ame ha kö Amosa, ka habe, At ame wâ lö, he thö, kec dö ka hnyi hnyei Juda, me han eling, me perofeta eling: 13 ke ca perofeta hmetu bi hnyi Beth-ela: anyin a dok e ae kap anyin than, ke hnyaban e than. 14 Me haba Amosa ame thu me ha kö Amazia, ka habe, Iny ca perofeta bi nya, ke ca nokon bi nya perofeta: ke iny at tuö meno me at ame huliwan je úö sukamore: 15 ke Iehova ame hum nya ûnyi hnyi hoton hnath meno, ke Iehova ame ha könya, ka habe, He thö, me perofeta ka lakeik a at Isaraela. 16 Anyin a wale löng ju walang ang hofuc ho Iehova, ka habe, Haingâm, ca perofeta bi ka at Isaraela, ke ca fuc bi ka lap anyi Isaaka; 17 anyin a wale walang hna ha hnö Iehova, ka habe, Ame he áiâm ka helâ me momo hnyi getheniny taun, k' ame he ka ta lakon obaga me wahlu ge hele vat, ke adre me he ka khenâ em hnyei ge tulut tö; ke u me he bi ka mok hnyi hnyei ae ikiki, ke e hnathu adre me he ka hom bâ at Isaraela ûnyi hnyi idra hnyei.

HNYIMAKAN 8.

**W**ALANG hna omanená könya ge Than Iehova: ke wâ bi tang wan úö ae mat. 2 Ke e ame ha könya, ka habe, Amosa lö, ieú u je wâ? Me haingök, ka habe, tang wan úö ae mat. Me haingö Iehova könya, ka habe, A o but obiny ka lakeik a at Isaraela; oge me ca he hmetu ka he me digic ödra. 3 Ke haba je khumöng hnyi uma kap, me ame he ka helâ me kuku tenge hnyi bong eling, haingen Than Iehova: k' ame he ka se hia ta je komok; k' adre me he ka khúâ hnyibú ödra hnyi je dok hia. 4 Löng ju hofuc ang öbun tavat öbun e beutâ ta je theduoc, me öta tavat ae vec hnyi hnyei, 5 haingödra, ka habe, ame he ka um kehö manen a tehi, m' ate me úcú anyita hwit? ke sabath, m' ate me khöng tang hwit? ke adre me öhnyûkongoâ efa k' adre ogânâ sekel, k' adre omono tulut ge iyawö: 6 m' ate me úco tavat ae ba ta ûnyi, hwaban sileva, ke at ae theduoc hwaban li tangen hnyeuca, ke úco ta je tiren hwit. 7 A hia but Iehova khemanyiná únuainy Jakob, ka habe, E hnathu oge me ca he balua ka



## AMOS 9.

hnying anyidra ta je huliwa. 8 Hawa, ame ca he tavat ka öbubuny can eling, ke tenge hia tavat adre me labā e? eke, e ame he bi ka khibi hia helâ me Wagewe; ke e ame he ka bwebwela, k' ame he ka dit hmetu ju, helâ me wageweiny Aigupito. 9 Ke haingen Than Iehova, ka habe, Hnyi ûen eling oge me he ka odilâ seünö hnyi jebigö, me ölidrà hnyei hnyi lany. 10 Ke oge me he ka wia anyibun je bijeü ka hnyi tenge, me anyibun je khumöng hia ka hnyi tenge thungâu; ke oge me he ka oâ ka hnyi ta je hnyin hia mano ae gan nân, me ohadreüâ ta je ban hia; ke oge me he ka wia e helâ me hwatenge can nokon a khaca, me obiny e helâ me bong vec. 11 Haingen Than Iehova, ka habe, Wâ bi ame he ka o je bong, me oge me he ka kunâ hmiâ ka hnyi hnyei, ca hmiâ ge ba han me köiö, ke hmiâ bi ge hofuc ho Iehova. 12 Ke adre me he ka he monu ûnyi hnyi ke köiö ka hnyi ke köiö, ke ûhedra hnyi hwadrö ke ne o but jimeyö; adre me he ka wadring monu he ka elâm hofuc ho Iehova, ke adre me ca he bi ka wâ. 13 Hnyi bong eling ame he wablu ae hmanenang me wahidröu ka momonu ge beic. 14 Tavat adre me khemanyinâ hulöiny Samaria me ha, ka habe, Dana lö, kia inya Khongom; ke kia inya gethen ûheny Bere-seba; ke adre me he ka ta, ke adre me ca he hmetu bi ka tot.

### HNYIMAKAN 9.

**O**GE me wâ Than ame tot hnyi taben hut: ke haingen, ka habe, Kot dö je ban, me me jijing dö je hwanuma: me thu omomonu ödrin hon je bödra hia; ke oge me he ka hlingâ at a biliny gadra ge hele vat: e ba at a khaca gadra ame he ka kec, ke ba ke at gadra ame he ka möt. 2 Eja ke ne adre ne hiny kânâ ke ne o but hnyi hedis, ame he hnyamök ka lili ödra ûheny e; eja ke ne adre ne ölö hnyi drany ai oge me he ka hum ödra ûheny e. 3 Eja ke ne adre ne lubaduöng ethö hon Kare-mela, oge me he ka elâm me lili ödrin ûheny e; eja ke ne ödrin e ne oiyongi ödra ge li emakök eü hnyi hmelen köiö, oge me he ka kunâ on he ka ûlû ödra eling, 4 eja ke ne adre ne bâ ge je iwahnaihmiöny mödra, oge me he ka kunâ hele vat he ka hling' ödra eling: ke oge me he ka wâ

hm' ödra, m' adre me kong ut, ke ca so bi. 5 Anyin a haba Than Iehova tuban sabaoth, wale thibi e at ame kâlâ hnyei, me ame köiö but, ke amo he tavat hia adre me labā e ka tenge; ke e ame he ka khibi hia helâ me Wagewe; k' ame he ka dit hmetu helâ me Wageweiny Aigupito; 6 e thibi at ame op je hnyeuleny ethö hnyi drany, k' ame bi taben hnyeuleny hnyi hmeledrany: at ame hawâ köien köiö ae gan me hingâlâ ka hnyi hon kânâ, Iehova ien. 7 Lakon Isaraela lö, hawa öbun úcú me at Aithiop könya? haingö Iehova. Hawa, oge me ca su at Isaraela ûhedra hnyi hnyei Aigupito, ke at Filisti ûhedra hnyi Kafetori, ke at Suria ûhedra hnyi Kira? 8 Wâ bi, e bi li emakan Than Iehova hon dökhu ae kong, ke oge me he ka ohia e ûnyi hnyi hon kânâ; ke so bi oge me ca he ka ti ohia hia lap anyi Jakob, haingö Iehova. 9 Anyin a wâ bi oge me he ka hûna, ke oge me he ka cubec lap anyi Isaraela unyin je hnyei, helâ me hna degec tiren hwit hnyi taben úcubic, ke so bi ame ca he ka kölu ke wan ae úhnyükong hnyikânâi. 10 K' ame he tavat ae kong hnyi ik hnyei ka mok ge hele vat, wale tavat adre me ha, ka habe, Ame ca he ka hakekeny köta, me khaú öta hnen ûnyi ae kong.

11 Hnyi bong eling oge me he bi ka hai uma menâ umö Davita a ta, me okhötâ hmetu je dok ae hmouca hnyin; ke oge me he ka otilâ je ke keihen a amam but, me op hmeto e helâ me hnyi je bong ehac; 12 m' adre me he ka hu je kolon ge at Edoma, ke ta je hnyei hia wale adre me ip hudra iök, haingö Iehova, at ame ânyâ e. 13 Ke haingö Iehova, ka habe, Wâ bi ame he ka o je bong, me ame he at ame trohnen ka khaú at ame subö hwit, ke ame he at ame utoto wan vine ka khaú at ame cekön; ke ame he je bucen ka khukhula ge waina ae hnebwia, k' ame he je hut hia ka lup. 14 Me oge me he ka ohmeto lakeik a at Isaraela waleji adre me hom bâ, me adre me he bi ka otilâ hmeto ta je taun waleji ae ba wan, me labâ hmetu; ke adre me he ka tâ ta je hnyei viue me ic wainainy; ke adre me he ka belökâ ta hnyei me an jeüiny. 15 Ke oge me he ka te ödra hnyi idra bi, ke adre me ca he hmetu ka khöbi ödra hnyi idra waleji oge ham ködra, haingö Iehova a Khongom.

# OBADIA.

## HNYIMAKAN 1.

**H**NA omanená kö Obadia.  
ge Edoma. Ate me löng ut je uthu-  
metu únyi ga Iehova, ke adre úkhú-  
nöng ka hnyi je hnyei, me ha, ka habe,  
Todr' öbun, ke so ate me tot úcon me vat  
mē. 2 Wâ bi, oge hia but hom úhnyúko-  
ngu u unyin je hnyei: e gan hmâ hna  
húkotiö u. 3 A hia but omenu u bi hnen  
hnyekom ae bi gan, u at ame laba hnyi je  
op hnyi kic, ethö hnyabam; at ame ha  
hnyi hnyekon, ka habe, Ie at ame he ka  
ohnyikánö nya hnyikánái? 4 Eja ke ne  
u je ne ölö bi göranyai helâ me aeto, ke  
eja ke ne u je ne ip háúâm unyin je okhú,  
oge me he bi nya ka ohnyikánái u úheny  
e, haingö Iehova. 5 Ame ne o köu tavat  
venöu me tavat sei hnyi lit, (ekölö ge hna  
subâ degeci u!) hawa, adre me ca he ka  
venöu ke ne ka úcú ödra thö? ame ne o  
köu tavat töu wan vine, hawa, adre me ca  
he ka hnen bi ju ke je wan? 6 Ekölö ge  
hna úhnei ga Esau! ekölö ge hna elâm  
omjehen adre oiyongâ! 7 Adre hia but  
hum u hnyi gethen hnen lahiâm hia, wale  
ka hnyi hnyigot: adre hia but iyawö u,  
me hwege hom, tavat adre úsoköu möu;  
adre lau hnewe hobi köu hnen tavat adre  
me an âm jeú: e ba bi metâ gan. 8 Haingö  
Iehova, ka habe, Hawa oge me ca he ka  
ohia hnyi bong eling tavat ae metâ hnyi  
Edoma, me wâ únykúme únyi hnyi bucen  
anyi Esau? 9 Temana lö, ame he ányâm  
tavat hwege ka öbubuny, m'adre me hlingâ  
degecâ tavat hia hnyi bucen anyi Esau.  
10 Ame he ka takú u hmehma can úoko-  
nguny ka kem a Jakob, ke adre me he ka  
subâ degeci u nyiele balua. 11 Hnyi bong  
u je tot sâkâú hnyin, wale hnyi bong adre  
me hûgúnâ anyin ta je únyi hnen je atka-  
nyua, k' ame didrö ke je hnyat ka hnyi je  
homagöuleny, k' adre me uglekóbâ Jerusa-  
lema, me helâke u me tha hien m' ödra.

12 Ca he ju ka wâ hnyi bonginy kem,  
hnyi bonginy vec a e, ke ca hobâ lakon  
Juda hnyi bonginy bâ; ke ca fuc bi gan  
hnyi bonginy hlöuhlöu. 13 Ca he ju ka  
delec homagöuleny lakeik hnyi bonginy  
vec a ödra; eke, ca he ka wâ hna oveci  
ödra hnyi bonginy vec a ödra, ke ca he  
öbun ka hinöbeny ka hnyi anyidra ta je  
únyi hnyi bonginy hlöuhlöu a ödra. 14  
Ke u me ca he ka tot hnyi hna saú he ka  
hlingâ tavat adre me kec gan; ke ca hna  
but kâu je köluidra hnyi bonginy hlöuhlöu  
a ödra. 15 Anyin ae hakekeny jut bong  
bongu Iehova hnyi ta je hnyei hia: me ame  
he ka ányâ bi köu, helâji me hnâm hna  
ányâ; k' ame he ka hmetu bi ka hnyi hon  
bâm ányâm huliwa. 16 Anyin a öbun e  
hia but ic hon anyik bucen ae kap, me ame  
he bala bi ta je hnyei ka ic helâe, eke, adre  
me he ka ic me utâ, k' adre me he ka helâ  
me at adre ca hnokoâ. 17 K' ame he ka  
ku hon bucen Ziona tavat adre me kec  
möt, k' adre me he ka okabâ, k' ame he lap  
anyi Jakob ka hu je idra. 18 Ke ame he  
lap anyi Jakob ka meic bi, ke lap anyi  
Josefa ka bâhlân, ke lap anyin Esau helâ  
me thatúnyin hwit, me adre me he ka  
vhök ödrin me thong degeci ödrin: ke ame  
he ka ba kolon lap anyi Esau, anyin a hia  
but ha Iehova. 19 Ke ame he aten Hwaiöu  
ka hu bucen anyi Esau; k' ame he tavat  
aten dok ae tha hon ka hu hnyei iny at  
Filisiti: k' adre me he ka hu utkânâ hnyi  
Eferaima, ke utkânâ hnyi Samaria; ke  
haba Gileada, me ame he ka iny Beniamina.  
20 Ke haba je bâ a je utbavat eang a  
lakon Isaraela unyin at Kanana, me adre  
me he ka hu ke ne o but hnyi Sarepeta;  
ke haba je bâ a at Jerusalema hnyi Sefa-  
radi, me adre me he ka hu je taun hnyi  
Hwaiöu. 21 Ke ame he tavat úhömeli ka  
o ka hnyi bucen Ziona he ka owisa ka  
bucen anyi Esau; ke ka anyi Iehova bi  
dökhu.

# JONA.

## HNYIMAKAN 1.

**A**ME o but hofuc ho Iehova kö Jona nöku Amitai ame ha, ka habe, 2 Todrö he thö Nineve ai, wale taun ae gan, me fuc hwege úcon; anyin a o but hnyi hnyimakök anyidra monu. 3 Me haba Jona ame todrö me kec Tasesa ai ge hnyimakö Iehova; ke e ame he Jopa ai, me wâ ke hu ame he Tasesa ai: ke e ame bi hwaban hna houden e, me dit hnyi hnyin hu, he ka tha kec m' ödrin Tasesa ai, ame kec ge hnyimakö Iehova. 4 Ke haba Iehova ame kunâ ang ae gan ka hnyi köiö, me ame o but weneú ae gan hmâ hnyi köiö, ke a ne hmouca thö hu. 5 Me ame ot aten hu, me ve tenge ka anyidrin je khong; ke ödrin e khúâ hnyiköiöai je omjeú únyi hnyi hu me me hâhâ thö. Ke haba Jona, me ame hia but utut ka hnyi hnyin hu; ke e ame mokut, me mokut hnying. 6 Me haba tuhan hu ame ölö but kâu me ha, ka habe, Ieú gam u at mokut hnying? todrö me tenge ka Khongom, ame ne he Khong ka únykúmi ötin, me ötin e ca mok. 7 Ke ödrin e úhakouâ, ka habe, Ötin a ugleköp, me me manen kötin can ia ame o únyi eang ae kong kötin. Me ödrin e ugleköp me ame hwâdâ kö Jona leköp. 8 Me ödrin e ha kâu, ka habe, Ö u ha thö köhmun únyi ga ia únyi ang ae kong kötin; ieu banyâm? ke úhem ua? ewa em hnyi? ke u at ua? 9 Haingen ködrin, ka habe, Iny at Heberu; ke inya oge me outö Iehova, Khongon drany, at ame op köiö me hot. 10 Me ame ot gan hmâ tavat me ha kâu, ka habe, Ieú ke únyi ang u je hia but ânyâ? anyin ae khana but tavat a e ame kec ge hnyimakö Iehova, anyin a e ame hia but thumetu ödrin. 11 Me haingödrin kâu, ka habe, Ieú öhmun e he ka ânyâ köu me me ta but hau hon köiö köhmun? anyin ame hwege tot je waköiöiny köiö. 12 Ke haingen ködra, ka habe, Hum nya thö, me khúö nya but hnyiköiöai; me me he ka ta but hau hnyi köiö köbun: anyin ae khanö nya ame o but weneú ang ae gan hnyi köiö köbun, cak thibi. 13 Ke so bi tavat ödrin e hwege galu, he ka he hmetu hot ai; ke ca khan' ödrin bi; anyin ame hwege tot

köiö ködrin. 14 Anyin a wale ödrin e tenge kö Iehova, me ha, ka habe, Iehova lö, öhmun e khöü köu, öhmun e khöü köu, öhmun na ca he ju ka mok can at ang, ke ca he bi ka ip huhmun dra ae ba hnyikongon: anyin a u Iehova u je hia but ânyâ helâ me wem. 15 Me ödrin e hum Jona me khúâ hnyiköiöai: me ame ta but hau hnyi köiö hwaban hna úkhutukhaú. 16 Haba tavat ödrin e ot gan hmâ ga Iehova, me bi hut kö Iehova, me bi khöbi. 17 Ke Iehova ame penapena wâ ae gan hmâ he ka utö Jona: ke Jona ame laba hnyi hnyekon wâ hnyi kun ta lany ke kun ta lit.

## HNYIMAKAN 2.

**M**E Jona ame hic kö Iehova a Khongon eú hnyi hnyin wâ. 2 Ke e ame ha, ka habe,

- Oge me tenge kö Iehova hnyi anyik vec,  
Me e ame thu könya;  
Oge me khöü únyi hnyi hnyekon hedis,  
Me u je löng ifucik.
- 3 Anyin u je khúö nya ka hnyi dok ae dit, hnyi wanben köiö,  
K' ame igigili nya hnen wekbet  
K' ame khutukhaúö nya hnen ânyâm je waköiö, ke ânyâm je wabulu.
- 4 Me haingök, ka habe, Adre me hota degeci nya únyi hnyi hnyimákâm;  
Ke so bi, oge me he hmetu ka bwele ka hnyi umâm uma ae kap.
- 5 A igigili nya köiö, ke ne o but ka hnyi hanu;  
Ame húlúlúö nya hnen dok ae dit;  
A wadrâ bök hnen leúnen hme.
- 6 Oge ú but ka hnyi je taben je bucen;  
E bi huk hmeledrany me je ohmáiny nyiele balua;  
Ke so bi, Iehovah Khonguk lö, u je hia but öliâ melik úheny ú hnyi thop.
- 7 Hnyi úen ame momonu hanuk eú hnyik, oge me únykúmi Iehova:  
Ke ame o but köu hijik hic ka hnyi ânyâm dok ae kap.
- 8 Haba tavat adre me hnyok ka ta je únyi ae únyi baú me thoi,

JONA 3, 4.

Me adre me degec hing betenge ködra bi.

9 Ke oge me he bi nya ka bi hut köu me hwan ole ;

Oge me he ka thamua anyik khöbi.

Haba ühömeli únyi ga Iehova.

10 Ke Iehova ame fuc ka wâ, me e ame hmitö Jona hmetu hot ai.

HNYIMAKAN 3.

**K**E ame o hmetu hofuc ho Iehova kö Jona hnyi úen a loiny, ame ha, ka habe, 2 Todrö me he Neneve ai, a taun ae gan, me khetâ ka hnyin, hnök hna húna köu he ka khetâ. 3 Me haba Jona ame todrö me he Nineve ai helâ me hofuc ho Iehova. Ke haba Nineve me taun ae gan hmâ hmönyin, ke kun ta bong he ka he igigilö e 4 Ke haba Jona ame hwân ka dit hnyi taun, ke khaca bong ka he, me e ame hongot, me ha, ka habe, Fâte biju ta bong me adre me he ka ohia but Nineve. 5 Ke haba at Nineve adre me kap Khong ; me adre me haimemenâ he ka ânyâ ca han, ke adre me khavâ ec mano ae gan nân, hwân ge tavat ae gan ke ne o but houmonu. 6 Ke ame o but úthumetu ka than Nineve, me e ame todrö úheny hnyi anyin theron, me uny jut anyin úkhaü me khavâ ec mano ae gan nân, me laba ju hnyi hnabadröu. 7 Ke e ame úkhünöng me haimemenâ hna húna hnen than me anyin je taben, ka habe, Ca he ka an ke ujeü hnen at me meno, je hnahat kau me mamoe ; adre me ca he ka han, ke adre me ca he ka ic köiö : 8 ke adre me he ka khavâ tavat me meno ge mano ae gan nân, ke tenge hwege th' öbun ka Khong : eke, hamödra he ka ve hwiö únyi hnyi dedra ta ge gethen ae kong, me únyi hnyi úkonguny anyin je hnyamödra. 9 E khanö ia, ame ne he Khong ka hwiö me ietra, me degec anyin hmönyin ae gan, m' ate me ca he ka mok ? 10 Ke a wâ but Khong anyidra je huliwa, a adre me hwiö únyi hnyi dedra ta je gethen ae kong ; me

haba Khong ame ietra únyi ae kong wale a ha he ka ânyâ ködra ; ke e ame ca ânyâ bi.

HNYIMAKAN 4.

**K**E e ti kong hmönyin e kö Jona, me e ame hmönyin. 2 Me e ame bic kö Iehova me ha, ka habe, Iehova lö, hawa, ca hok e ke tiga inya bi hnyi ik hnyei ? Anyin a wale oge me kec ehac Tasesa ai : anyin ae khanö nya a u Khong ae betenge, me betenge vec, me bec he ka hmönyin, ke gan hmâ so, ke at ame ietra únyi ae kong. 3 Anyin a wale, Iehova lö, ö u hom dö walang ang melik ; anyin ae so oge me he ka mok, hon he ka möt. 4 Haba Iehova ame ha könya, ka habe, Hawa, u úcü he ka hmönyin ? 5 Me haba Jona ame he but únyi hnyi taun me laba hnyi ke keihen e deiö taun, me bi una menâ hobi kâu e bi, me laba hmelen e hnyi hmenon, me wâ únyi ame he ka o ka hnyi taun. 6 Ke haba Iehova ame penapena iogum, me ökûâ kö Jona, me hnân tungen ban, me omelö e únyi hnyi anyin vec. Me haba Jona ame ti senyin gan hmâ ka iogum. 7 Ke hnyi ioiny lany nyi hnyomakatu, haba Khong ame penapena wacihngâü, ke e ame köu iogum me ame meleca thö. 8 Ke ame o thö seünö, me Khong ame penapena ang hwei ae kahwa ; ke ame dei bö Jona me e ame momonu, ke e ame sumâtâ me me mokcu, haingen, ka habe, E so iny he ka mokcu, hon he ka möt. 9 Haba Khong ame ha kö Jona, ka habe, Hawa, u úcü he ka hmönyin ge iogum ? Me e ame thu, ka habe, Iny úcü he ka hmönyin ke ne o but mok. 10 Me haingö Iehova, ka habe, U je betenge ge iogum wale u je ca huliwan, me ökûâ ; at ame kú hnyi lit a khaca, k' ame hia hmetu hnyi lit a khaca : 11 ke hawa, e ca úcü könya he ka betenge ge Nineve taun ae gan, ke se hia aten hon khaca haded ke twente thauzan, tavat ae ca khan' ödra benyidra a metödra me me ; ke ca ha bi omeno.

# MIKA.

## HNYIMAKAN 1.

**W**ALANG hofuc ame o kö Mika at Moresa hnyi úö Jotham, me Aha-za, me Hezekia, a je than Juda, wale e ame wâ ge Samaria me Jerusalema.

2 Öbun ta je hnyei hia lö, löng ju; hmeledrany lö, ke ta je únyi hia hnyin e, tevehlöng ju : ke so ame he Than Iehova ka ohnathoâ úcúbun, wale Than hnyi umen uma ae kap. 3 Anyin a wâ bi, ame he Iehova ka he únyi hnyi hnen, me utut, me ututo je dok ae görany hnyi hmeledrany. 4 Me ame he je bucen ka köö hnyi hmelen, k' ame he ka hmouca hnyigöulen je bucen, helâ me wasu hnyi meic, ke helâ me köö ame hingölö hnyi dok ae hwatapkölu. 5 Ame o but ta je únyi hia eling can hna hanyâúâ hnö Jakob, ke can je hulö anyin lap anyi Isaraela. Ie hna hanyâúâ hnö Jakob? hawa, ca Samaria bi? ke ie je dok ae görany ga Juda? hawa, ca Jerusalema bi? 6 Anyin a wale oge me he ka wia Samaria me me helâ me hna digic thatúnyi hnyi utkânâ, ke hnân te vine hnyin, ke oge me he ka hagutâ je veto hnyin e ka hnyi hnyigöulen bucen, me omanená je taben e. 7 Ke adre me he ka thu omomono je idolainy hia thithö, ke adre me he ka thong degecâ ge meic je troban hia, ke oge me he ka öba wan je khongon hia: anyin a e ame úkhöünâ e ge troban momo hnyi gethen, k' adre me he ka he hmetu k' ame troban momo hnyi gethen. 8 Can e oge me he ka tenge tot me huku tenge, ke oge me he ka he monu ke ba úkhaú me he thu; oge me he ka tenge tot helâ me luko, ke tenge thungâu helâ me ta je iaena. 9 Anyin a ca hnân eny ta je aat gan: anyin a o but ke ne o but hnyi Juda; k' ame o ke ne o but ka hnyi homagöuleny ik hnyei a Jerusalema. 10 Ca he bi ka ha hnyi Gatha, ke ca tenge bi: oge hia but seset hnyi kânâ hnyi Bethel-Afera. 11 He thö hnyi hmehma ke ba úkhaú, at ame laba hnyi Safira: ame ca o but at ame laba hnyi Zaanán; k' ame he tenge tot hnyi Beth-azel ka ohia gabun at ame tethmâ. 12 Anyin a haba at ame laba hnyi Maroth, me ame kueny ka haluba-

hingen hnahic: anyin ame utut únyi ae kong únyi ga Iehova ka hnyi homagöuleny Jerusalema. 13 At ame laba hnyi Lakisa lö, ca ju kariota ka hnyi meno ame he logot: haba momo e, me hwân hulö ka hluiny Ziona; anyin adre me wâ unyâm je hna hanyâúâ hnen Isaraela. 14 Anyin a wale u me he ka ham bwihlany úhúne kö Moresa-gatha: k' ame he je lap anyin Akiziba ka helâ me thoi ka je than Isaraela. 15 At ame laba hnyi Maresa lö, oge me he bi nya ka hom köu at ame he ka hum u: k' ame he hmanenanginy Isaraela ka o ka hnyi Adulama. 16 Ohia but leúnen bâm ke giâ bi; can lakom u me betenge gadrin: ogânâ but dok ae ba leúnen helâ me aeto; anyin adre me he but ka bâ úhedra unyâm.

## HNYIMAKAN 2.

**E**KÖLÖ ge tavat adre me únykúme monu, me ányâ hulö hon hnödra je hna mokut, adre me ányâ e hnyi haolany anyin ae metâ ködra. 2 Ke adre me behnyekudra ta hnyei me húgúna; ke ta je uma, me hom bi: ke adre me ovecâ at me anyin lap, wale at me iny hnyei. 3 Anyin a wale walang hna ha hnö Iehova, ka habe, Wâ bi, oge me únykúme únyi ae kong ka lap ang, m' öbun e ca he ka thang je nyibun únyi hnyin, ke öbun e ca he ka he kököm; anyin a úen ang ae kong. 4 Hnyi úen eling adre me he ka hai úhöúcú gabun me tenge thungâu gan hmâ me ha, ka habe, Adre ti öba wan gata; e a hia but wia jekhon lakeik: ekölö ge hnen hna hom e únyi gak! e ame khenâ ita ta hnyei ka tavat úkхин fuc. 5 Anyin a wale, ame he ka ba at gam ame he ka khúâ tulut ge ugleköp hnyi úkhacaköu anyi Iehova. 6 Haingödra ka habe, Ca perofeta thö. Adre me ca he ka perofeta ka hnyat eling; ame ca he ka hia bi ta je hna haikongoâ. 7 Lap anyi Jakob lö, hawa, adre me he ka ha, ka habe, Hawa, e sényin dut hanu Iehova? hawa, e ame ányâ je únyi ang? Hawa ame ca he hok hofuc ka osoâ at ame vheno wisa? 8 Ke hwân hnyi je bong ang haba lakeik adre me tot helâ me iwa-

hnaihmiöny : öbun e uny úkhaú únyi hnyi hon khaúen tavat adre me he sot helâ me tavat úhedra hnyi vat. 9 Ke öbun e obâ omomoiny ik hnyei hnyi umödra je uma ae hmanenang ; öbun e húgúnâ anyik hmanenang ge lakudra nyiele balua. 10 Todr' öbun, ke he thö ; anyin ae ba hna menâ köbun eang : can únyi ae kong, at ame ohia, wale at ame ti ohia. 11 Ame ne he ke at wale ame vheno ang me iyawö ka ha thoi, ka habe, Oge me he ka perofeta kôu ge waina me grâg ; awe, hamen bi he ka perofeta ka tavat ang.

12 Jakob lö, oge me he ka úkhacaköüö u hia ; e hnathu oge me he ka úkhöünâ je kolon Isaraela ; oge me he ka tha ip ödra helâ me je mamoe hnyi Bozera ; helâ me hnahat meno hnyi idra utkânâ, adre me he ka mede, anyin ae se hia tavat. 13 Ame he at tho hnyi hnyimaködra : adre me hia but utut me he thö ka hnyi homagöule, me didrut hnyin : ke haba tuhödra ame he hnyi hnyimaködra, ke Iehova a hnyimakan ködra.

## HNYIMAKAN 3.

**K**E haingök, ka habe, Öbun na löng ju, je at hnathu anyi Jakob, me tavat owisa ka lap anyi Isaraela : hawa, ca hamöbun he ka khan' öbun hna owisa ? 2 tavat adre me húkötîâ so, ke wedra hulö ; tavat adre me uja unen unyidra, ke viny únyi hnyi je jeiödra ; 3 tavat adre me an minya unyin lakeik ; k' adre me uja unen unyidra, ke thu je jeiödra : eke, adre me susub' ödra helâke me hnân öt, ke helâke me je uthmeno hnân öt ae gan. 4 Me adre me he ka tenge kö Iehova, ke e ame ca he ka thu ködra ; eke, e ame he ka ikhâlâ hnyimakan gadra hnyi úen eling, hoton úkonginy anyidra ta je huliwa. 5 Walang hna ha hnö Iehova ge je perofeta, tavat adre me omono lakeik ; tavat adre me úhúlú ge ta je nyudra, k' adre me hongot, ka habe, Úsoköu ; ke haba at ame ca hinö únyi ka hnyi je hnyimödra, me adre me penapena he ka vat mē. 6 Anyin a wale, ame he ka lit köbun, me me ba hna omanenâ köbun bi ; k' ame he ka menekholom köbun, m' öbun e ca he bi ka bi khong ; ke ame he ka dit seúnö hon je perofeta, k' ame he ka khömet bong hudra. 7 Ke ame he ka hmehma tavat wâ, me hlohlo tavat bi khong ; eke, adre me he ka tube je esongödindra : anyin ae ba hofuc hwan

Khong. 8 Ke hnathu a iny unöngötó ge man únyi ge hanu Iehova, ke únyi ge hna owisa, ke tang hwege he ka omanenâ kö Jakob hnen hna hanyâúâ, me kö Isaraela anyin hulö bi. 9 Ö öbun löng ju ang, öbun je at hnathuiny lap anyi Jakob, ke tavat owisa ka lap anyi Isaraela, tavat húkötîâ hna owisa, me ohwalö ta je únyi hia ae úcú. 10 Ke adre me op göranyai Ziona hnyi dra, ke Jerusalema hnyi hwa-kecin ae kong. 11 Ke haba je homakan, me adre me owisa hnân hwaban, k' ame úne tavat bihut ge hwaban, k' ame bi kong hnen je perofetainy ge mone : ke so bi hwakecidra he ka labageju kö Iehova, me ha, ka habe, Hawa ca Iehova hnyi wanböta ? ke ba únyi ae kong ame he ka o köta. 12 Anyin a wale adre me he ka wia kânâiny Ziona helâ me utkânâ can gabun, ke haba Jerusalema, me ame he bi hnân digic thâtúnyi hnyin, ke buceniny uma me ame he ka helâ me je hut hnyi hnyot.

## HNYIMAKAN 4.

**K**E haba hnyi je bong a biliny adre me he ka otethmâ buceniny uma kap umö Iehova hon ban je bucen, ke adre me he ka ogöranyâ e hon je hut, ke ame he ta je hnyei hia ka he kâu. 2 Ke ame he ka o ta je hnyei ae se hia me ha, ka habe, Ai öbun m' ate me he ka ölö ka hnyi bucen anyi Iehova, me uma umen Khongu Jakob ; ke e ame he ka n' öta ge deny je gethen, ke ate me he ka vheno je gethen únyi gan : anyin ame he ka he but hnanyibu úheny Ziona, ke hofuc ho Iehova úheny Jerusalema. 3 Ke e ame he ka owisa ka ta je hnyei ae se hia, me fuc ka je hnyei ae hwege hnyi je dok ae sâkâú ; ke adre me he ka kokot anyidra je hele vat me me hnân bi hwiö kânâ, ke dödra je ö hnân hele subö vine : ame ca he ke hnyei ka hai hele vat ka ke hnyei, ke adre me ca he hmetu ka únö vat. 4 Ke adre me he ka ve laba hmelen haledra je vine me hmelen haledra je imeta ; ke ba at ame he ka ooti ödra : anyin a hia but ha hnen hnyimö Iehova tuhan sabaoth. 5 Anyin a tavat adre me ve he hnyi ien ta je khongudrin, ke ate me he bi öta ka he hnyi iö Iehova Khonguta nyiele nyiele balua.

6 Hnyi bong eling, haingö Iehova, oge me he ka úkhacaköüâ tavat adre me he ci, ke oge me he ka úkhöünâ at adre obâ, me at oge hia but ovecâ ; 7 ke oge me he ka

wia at ame ci me hnân kolon, me at adre degec me hnân hnyei ae hwege: k' ame he Iehova ka musi ödra hnyi bucen Ziona, hwân walang ang ke ne o but nyiele balua. 8 Ke haba u tap tue anyin hnahat mamoe, hut anyin hluiny Ziona me ame he ka o köu; eke, ame he ka o musi a bân, wale dökhu dokhon hluiny Jerusalema. 9 Ieû ang a u me kuku göranyai? E ba than hnyi wanbâm? a mokcu at ame bi hnyimâm, anyin ame khöu u hnen vec helâ me momo ame vec hnyekon? 10 Vec dö, ke hnokoâ but, u hluiny Ziona, helâ me momo ame vec hnyekon: anyin a u me he ka he but walang ang ûnyi hnyi hnyin taun, me laba hnyi ta hnyei, me o ka hnyi Babulona; ke adre me he ka hûgûnô u ûhem e; k' ame he Iehova ka ûcû u eling ûnyi ge je iwahnaihmiöny möu. 11 Ke walang ang ame ukhacaköu je hnyei ae se ûcom, ke haingödra, ka habe, E so e ame kong bi, e so ate me wâ weta ka Ziona ge je emaköta. 12 Ke ca khan' ödra je ûnykûmenö Iehova, k' adre me ca wâ ûnykûme anyin musi: anyin a e ame ûkhacaköu ödra helâ me je thi hwit ka hnyi hna huje hwit. 13 Todrö, huje, u hluiny Ziona: anyin oge me he ka wia ânyâm fao meno me me fao bi, ke oge me he ka wia je boûjimen je bacam me me bras: m' u me he ka kot omomono je hnyei ae se: ke u me he ka ham kö Iehova hnödra je hna söh, ke je omjedra ka Thaniny hmeledrany hia.

## HNYIMAKAN 5.

**H**LUINY je deö vat lö, u me he walang ang ka ûkhacaköu me me je deö vat: e ame igigili öta hnen vat: k' adre me he ka kot wahicen at owisa hnyi Isaraela ge uci.

2 Ke haba u Bethe-leema Eferatha, a at ae ûhnyûkong unyin ta je thauzan hnyi Juda, me ame he ka o hobi könya ûnyi gam at musi hnyi Isaraela; at ame he ehele hwân kâû adrem, ke nyiele balua. 3 Anyin a wale e ame he ka hn' ödra, ke ne o but ûen ame he ka hnokoâ hnen momo ame vec hnyekon: me ame he ka hmetu je kolon a je liamekeiny mē ka lakon Isaraela. 4 Ke e ame he ka tot me hân haleny hnahat hnyi man mani Iehova, me hmanenanginy iö Iehova a Khongon: k' adre me he ka laba hmâ; anyin a e ame he ka gan hmâ walang ang ke ne o but hnyi je can hmeledrany. 5 K' ame he at ang me hnân úsoköu köta:

e ka o but at Asuria ka hnyi ita hnyei, k' ame uto je umen latuhöta, waleling ate me he ka otilâ kâu hnyat tuö mamoe a ödrin seven, ke eit ta taben tavat. 6 Ke adre me he ka öba waniny hnyei Asuria ge hele vat, ke hnyei i Nimeroda hnyi je homagöuleney; ke e ame he ka omeli öta ge at Asuria, e ka o ka hnyi ita hnyei me uto je ita. 7 Ke ame he je kolon ga Jakob hnyi wanben je hnyei ae se hia, helâ me dân hau ûnyi ga Iehova, helâ me we ame khukhula hon hna önying; at ame ca bec ge at, ke ame ca halubahingen at. 8 Ke ame he ka e bi kolon ga Jakob unyin ta je hnyei, hnyi wanben tavat ae se hia, helâ me liona unyin je menoiny hnyot, helâ me nak liona hnyi wanben je hnahat mamoe: wale, ame ne he wanben, e ame he ka uto, me oloû kia, ke ba at ame he ka hûgûnâ. 9 E so ame görany hnyamâm hon tavat adre me oveci u, ke so adre me subâ degecâ je iwahnaihmiöny hia möu.

10 Ke haba hnyi bong eling, haingö Iehova, me oge me he ka subâ degecâ je hors hnyi wanbâm, me ohia ânyâm je kariota: 11 ke oge me he ka subâ degecâ je taun hnyi em hnyei, me hagutâ ânyâm je hnabâ hia: 12 ke oge me he ka subâ degecâ hna bibihwakecin ûnyi hnyi hnya mâm; k' ame ca e bi hmetu unyâm tavat biobotkong: 13 ke oge me he ka sö degecâ ânyâm je hnatheat me ânyâm je veto adre otilâ hnyi wanbâm; ke u me ca he hmetu ka khudrung ka huliwa anyin li hnyamâm. 14 Ke oge me he ka oc degecâ ânyâm Aseira unyâm: he oge me he ka ohia ânyâm je taun. 15 Ke oge me he ka bi hwaban hnyi hmönyin me wathethöt ka je hnyei adre me ca löng bi.

## HNYIMAKAN 6.

**L**ÖNG ju öbun walang ang hna ha hnö Iehova, ka habe Todrö, ivinö ju hnyi hnyimakan je bucen, me me löng ifucâm hnen je hut. 2 Löng ju öbun je bucen lö, ivinö anyi Iehova, me öbun je taben a tethmâiny hmeledrany: anyin ae hu ivinö anyi Iehova me lakeiny, ke e ame he ka úhnei me Isaraela. 3 Lakeik lö, ieû o ge ânyâ köu? ke ieû o ge osényini u hnyin? khüö nya but. 4 Anyin oge hum u ûnyi hnyi hnyei Aigupito, me omeli u ûnyi hnyi hnyaba úthaluö; ke oge kunö Mose me Arona, me Miriama hnyi hnyimâkâm. 5 Lakeik lö, ûnykûme thö walang

ang ge hna elâm gan hnö Baraka than Moaba, ke hnö Balaama nöku Beora hna thu kâu; ûnykûme ju hwân hnyi Sitima ke ne o but hnyi Gilegala, me me khan' öbun nwakecin ae wisa anyi Iehova. 6 Ieü oge me he ka oâ hnyi hnyimakö Iehova, ke khudrung ka Khong ae beönua? hawa, oge me he ka hom kâu je hudiny leü, je nak kau a khaca hunainy? 7 Hawa, ame he Iehova ka senyin ge je thauzan mamoe бага, ke je ten thauzan wagewe wakaco? hawa, oge me he ka ham nöku a bân, me hwaban hnök hna hanyâûâ, a wan unyik, me hwaban hulöiny hanuk bi? 8 At lö, e ame hia but omanená köu ûnyi ae so; ke ie ke ûnyi ame we Iehova gam, ke so bi he ka ânyâ wisa, me hnyokâ ibetengiö, me tha he me Khongom ke hnyok ae hnyikânâ?

9 Ifuci Iehova ame hongot hnyi taun, k' ame he at ae metâ ka wâ iâm: löng ju öbun öso, ke at ame musö e. 10 Hawa, e bala bi tang omjeü a hwaban hulö eiö hnyin uma umen at ae kong, ke efa ae hâhâ a ûnyi ae kong? 11 Hawa, oge me he ka so ke e unyik tulut ae hwali, ke tangen ta je ûnyi hnân tuluto ae thoi bi? 12 A unöngötö tavat tren omjeü ge úokonguny, k' ame fuc thoi tavat adre me labâ e, k' ame iyawö je bohmödra hnyi je hnyimödra. 13 Anyin a wale oge hia but kuc u me takû u ge aat ae gan hmâ; ke oge hia but öba wan gam can ânyâm ta je hulö. 14 U me he bi ka han, me u me ca he bi ka sekom; ke ame he ka e bi hnyi wanbâm hna hom ûhnyükongu u: ke u me he ka sukhönâ omjeü, k' ame ca he bi ka sot hnâm hna sukhönâ; ke haba ûnyi u me hom, me oge me he bi nya ka hna ka hnyi hele vat. 15 U me he ka tâ, ke u me ca he bi ka menu: u me he ka ututo je elaiö, ke u me ca he ka súa wakacoiny; ke wan vine, ke u me ca he ka ic wainainy. 16 Ke adre me tuö je hnanyibu anyi Omeri, ke ta je ûnyi hia a ânyâ ge lap anyi Ahaba, ke öbun e hnu hoton hnödra hna ûhnenamö: waleling me oge me öba wan gam, ke wia tavat adre me labâ e me me hnân jú; ke öbun e he ka hom tilâ hna haikongoâ lakeik.

## HNYIMAKAN 7.

**E**KÖLÖ gak! anyin a iny úcú me úö adre me tau wan, ke iny úcú me hna hlo wan vine: ke ba hmetu bi wan vine hnân ic; me wan meta a bân wale ame wek hnen hanuk. 2 E hia but at

ae so eang hmeledrany, ke ba at ae föfâ unyin tavat: ödra hia adre me mokut he ka mádrâ dra; adre me ve hnu je lawaedra ge ert. 3 Adre me inâ li hnyamödra ka hnyi ûnyi ae kong he ka ie ânyâ; ame hnei hwaban hnen taben me at owisa; ke haba at ae gan, me e ame ha úokonguny eü hnyi hnyekon: ke adre me tha hwâwâ helâe. 4 Haba tavat ae so gadra, me helâ me úö ae údedö: ke haba tavat ae ti föfâ gadra, me kong hon hak ae údedö: e but ang bong bongon tavat adre me tuö u, wale úen he ka senö u; adre me he walang ang ka hlöhlö. 5 Ca labageju ka waem, ca geju bi ka at ame kú gethen: tuö ju hwanumen hnyimâm ge momo at ame mokulec úlaiâm. 6 Anyin a haba nokon бага ame ca ogânâ kamen, ke nokon momo ame tot úcon hinyen, ke úngon úcon úngon; haba je iwahnaihmiöny me at, me, ka e hnyi hnyaban bi.

7 Ke haba inya, oge me he ka bwele kö Iehova; oge me he ka lubahingen Khongon melik: ame he Khonguk ka ling nya. 8 Iwahnaihmiöny mönya lö, ca he ka senyin huk: iny ka he ka ta, oge me he ka tot hmetu; iny ka laba hnyi menekholom ame he Iehova ka omelami nya. 9 Oge me he ka hok hnyokâ hmönyin anyi Iehova, anyin oge hia but monu kâu; ke ne o but e ame he ka ivinö hobi kõnya, me owisa hobi kõnya: e ame he ka su nya ka hnyi melam, ke oge me he ka wâ hwakecin ae wisa gan. 10 Ke ame he je iwahnaihmiöny mönya ka hnyi wâ, ke ame he ka taköu e hnen hmehma; waleji at ame ha kõnya, ka habe, Ewa Khongom? Ame he li emakök ka wâ e; walang ang adre me he ka ututo e helâ me hmudra eü hnyi gethen. 11 Bong adre op hnyin hagâm hak! hnyi bong eling adre me he ka thang hnyigot. 12 Hnyi bong eling adre me he ka o köu úhedra Asuria ke je tauniny Aigupito, ke úhedra Aigupito ke ne o but hnyi Wagewe, ke úhedra hnyi ke köiö ke ne o but hnyi ke köiö, ke úhedra hnyi ke bucen ke ne o but hnyi ke bucen. 13 Ke ame he ka ba wan hnyei can hulö anyin tavat adre me labâ e, me wale troban anyidra ta je huliwa.

14 Hân ju lakem ge ânyâm uci, wale hnahat mamoe a jekhom, wale hnyat adre me hake laba hnyi hnyot hnyi wanben Karemela: e so adre me he ka an tot hmetu hnyi Basana me Gileada helâ me hnyi je bong kâu adrem. 15 Oge me he



## NAHUMA 1, 2.

ka omanenâ ködra je ûnyi hnân lâiâ helâ me hnyi je bong u je he hnyin ûhem hnyi hnyei Aigupito. 16 Ame he je hnyei ka wâ me hmehma ge manidra man hia: adre me he ka kât je hnyimödra, k' ame he ka wejiji je hnyikönyödra. 17 K' adre me he ka drem kânâ helâ me on; adre me he ka o me öbubuny helâ me ta je ûnyi adre me iyâwâ kânâ ûnyi hnyi je dok ae nedrong: adre me he ka o me ot kö Iehova Khonguta, ke adre me he ka outö u. 18 Ie ke Khong ae úcû möu, at ame

hna monu, k' ame ca oúnyihnathoâ hna hanyâúú hnen je kolon jekhon? e ame ca tuö anyin hmönyin nyiele balua, anyin a e ame senyin he ka betenge. 19 Ke e ame he ka hmetuhmetu me betenge gata; e ame he ka uto anyita je hulö hmelen li can: ke u me he ka khúâ anyidra ta je monu hia thithö ka hnyi köiö hnyi dok ae dit. 20 U me he ka ohwâdâ hnathu kö Jakob, ke ibetengiö kö Aberahama, waleji u je khemanyinâ ka lakamöhmun hwân hnyi je bong kâú adrem.

## NAHUMA.

### HNYIMAKAN 1.

**H**OK honen Nineve. Tusiny hna omanenâ kö Nahuma at Elekosi.

2 Haba Iehova, me e Khong ame ciâ ke bi hwaban: Iehova ame bi hwaban, ke tren hmönyin; Iehova ame bi hwaban ka je iwahnaihmiony mē, ke e ame ip hmönyin hobi kâu je iwahnaihmiony mē. 3 E bec Iehova he ka hmönyin, ke gan hmâ maniny man, ke e ame ca he ka hna bâúâ at ame ânyâ hulö: haba gethen de Iehova wale hnyi höu me weneü, ke haba je ulâ, me wale sesâ hnyi li can. 4 E ame thawâ köiö me omada e, me ohmö ta je wagewe hia: e sēnyin thö Basana me Karemela, e meleca thö vongon hnyi Lebanona. 5 Ame öbubuny je bucen gan, ke ame köiö but je hut; ke ame khibi göranyai kânâ hnyi hnyimakan, eke, hmeledrany, me tavat adre me labâ e. 6 Ie at ame he ka tot hnyi hnyimakan anyin hmönyin? ke ie at ame he ka tot e ka ubâhlâ anyin wathethöt? ame hingâlâ anyin hmönyin helâ me meic, ke e ame tho je kic. 7 E so Iehova, e hnabâ hnyi bong vec; ke e ame wâhmak-hmeto tavat adre me labageju kâu. 8 E ame he ka ti ohia dok e ge di at ame aba, me hnu je iwahnaihmiony mē ka hnyi menekholom. 9 Ieü hnöbun hna si hnö Iehova? e ame he ka ti ohia: ame ca he ka olo o vec. 10 Eja ke ne adre ne vhet helâ me üö ae údedö, me ti khubet hnyi

hnödra hna ic, adre me he ka thung ödra helâ me thatúnyin hwit ae mada. 11 Ame he but únyi gam ke at ame únykúme únyi ae kong kö Iehova, at ame úhnenamö he ka ânyâ únyi ae monu. 12 Walang hna ha hnö Iehova, ka habe, Eja ke ne ödrin e ne bekhöt me se hia, helâe minya adre me he ka subâ degeci ödrin, ke e ame he ka hia. Oge hia but oveci u, ke oge me ca he hmetu ka oveci ü. 13 Ke walang ang oge me he ka thu anyin hna úhúkâlákouâ walethö hom, ke thamua je hna cö u. 14 Ke a hia but Iehova hûna gam a g' adre me ca he hmetu ka tâ hnyat a iâm bi: ke oge me he ka subâ degecâ je khongom a je hnatheat adre me kave me okoiâ únyi hnyi umödrin je uma; ke oge me he ka ânyâ ânyâm erkemok; anyin a u kong ut. 15 Wâ bi, e hon je bucen li can at ame hom uthumetu ae so, at ame haimemenâ úsoköu! Juda lö, tuö ju ânyâm je bijeü, ke thamua ânyâm je khöbi: anyin ame ca he hmetu at ae kong ka vhenü u; k' adre hia but subâ degecâ e.

### HNYIMAKAN 2.

**A**ME o but hnyi hnyimákâm at ame sa omomono: hmákâ ju hnabâ, tuö thö gethen, ca ju hnyâm, ti ohwegiâ thö tang hwegiâm. 2 Anyin a Iehova ame ohmeto hmanenangi Jakob, helâ me hmanenangi Isaraela: anyin a hingâlâ degeci ödra hnen

tavat hingâlâ degecâ, me okongoâ anyidra je anginy. 3 Haba je taben unyin, me dra anyidrin je bec, k' ame khavâ úkhaú ae dra ge tavat hwege: k' ame hadröngöc je kariota ge fao hnyi je bong e ame penapena hnyin, k' adre me hmejijingâ je ö. 4 Ame he monoâ je kariota eú hnyi je gethen, ke úöhnekiköu hnyi je hna cit gethen: me manen helâ me uthmeic, me gâ monu helâ me hucuce. 5 E ame únykúme anyin je homakan: adre me haú hnyi úhedra; k' adre me logot ka hnyi hna up hak, ke adre hia but penapena únyi hnân tubi ödra. 6 Adre me khöng ut je homagöuleny je wagewe, k' ame aú but uma umen than. 7 Ke adre me öba khaúö Huzaba, adre me lelö momo e, me ame tenge lathnyabainy a wahu helâ me je biny, k' ödrin e khaú je úlaidra. 8 Ke hwân kâú adrem me helâ me ong an Nineve: ke so bi adre me kec; haingödra, ka habe, Todru, todru öbun, ke ba at ame bwele hoton ai. 9 Söh thö sileva, söh thö gol: ke ca hnân bi aú je omjeú, wale soiny ta je únyi ae hmanenang. 10 E ba önyen e, adre me öba önyen, iny jut wau: ke ame köiö but hnyok, k' ame öbubuny je boucadra, ke vec hia thö je hnyidra, ke löhau but ta je hnyimaködra hia. 11 Ewa uma umen liona, ke dok ame an hnyin je nak liona, wale ame vheno hnen liona ke liona momo, ke nokon liona, ke ba at ame ooti ödra? 12 Haba liona ame olou kia, ka öúcö je lakon, me hlingâ hobi kâú laáian, me öunöngötâ umen je op ge haniny, me umen je uma ge je hna hlingâ. 13 Wâ bi, e ve inya möu haingö Iehova tuhan sabaoth, ke oge me he ka thong anyin je kariota hnyi hai, k' ame he hele vat ka an halem je nak liona: ke oge me he ka subâ degecâ hanem únyi eang hmeledrany, ke adre me ca he hmetu ka löng ifucin ányâm je úthumetu.

HNYIMAKAN 3.

**E**KÖLÖ ge taun ae kong ge dra! a unöngöt hia thö ge je thoi me úkonguny; ame ca hia je hanidra. 2 Ame usik osö, ke hu hwan je waengen; me je hors adre okca monu, me je kariota adre me utulut; 3 tavat adre me tabö hors, k' ame hadröngöc ö me hele vat; ke se hia tavat adre hlingâ, ke hna úkhöünâ je komok ae se hia; ke ca hnân bi aú tavat adre mokcu; adre me haú hon tavat adre

mokcu: 4 anyin ame osehia bi únyi monu momo hnyi gethen ae hmanenang, tuhan hna bi khong, at ame úco je hnyei ge anyin bi únyi monu, me je lap ge hnen hna bi khong. 5 Haingö Iehova tuhan sabaoth, ka habe, Wâ bi, e ve inya but möu, ke oge me he ka hai ányâm úkhaú ka hnyi hnyimákâm; ke oge me he ka omanenö u ka ta je hnyei ke ba úkhaúâm, me ányâm hmehma ka ta je dökhü. 6 Ke oge me he ka khúa hom je únyi ae ikiki, me okongu u, me otilö u hnân wâ. 7 Ke ame he ka e bi, a haba tavat adre me ö u me adre me he ka kec gam me ha, ka habe, Iny jut wau Nineve: ie at ame he ka tenge gan! oge me he ka elâm ua tavat adre me he ka otubweli u? 8 Hawa, u beönua hon No-amona, wale ame laba hnyi je wagewe, ke ame igigilö e je köiö, haba köiö ae gan, me singiny, ke haba haginy hak, me köiö! 9 Aithiop me Aigupito li tang hwegien, ke ca hnân bi tulut; Futa me Lubi li at ödra me hadruö u. 10 Ke so bi adre hom e, e ame he but ka hnyi hwenbâ: ke adre me sa lakudra je mendreng hnyi ta je hna saú hia gethen: ke adre me uglekóbâ anyidra tavat ae únyi hnathu, ke adre me ca tavat ae beönua unyidra ge je tö fao. 11 U me he minya ka monu ge grâg, ke u me he ka ikhölö; ke u me he ka heléu hhabâ can je iwahnaihmiöny. 12 Ame he ányâm je hhabâ ka helâ me imetâ ae hu wan a bân: adre ne jijingâ me ame he ka kölu je wan ka hnyi hnyimen at ame he ka ijem. 13 Wâ bi, haba tavat hnyi wanbâm, me helâ me omomo; adre me khöng laúa je homagöuleny em hnyei ka ta je iwahnaihmiöny möu: k' adre me thong ányâm je venyâ ge meic. 14 Seköiö thö hobi kâú he ka theling' u, ohwegiâ ju ányâm je hhabâ: he thö ka hnyi kânâ ae kece, ke ututo ju dröu adre me huliwan, ohwegiâ thö hna leú veto kânâ. 15 Ame he bi meic ka thung u eling; k' ame he hele vat ka subâ degeci u, k' ame he ka ön u helâ me oböu: e so u ma osehiö u helâ me je oböu, k' u ma osehiö u helâ me je wahamon. 16 U je hia but osehia tavat úcü unyâm hon ta je okhúiny drany: ke haba je oböu adre me okongoâ k' adre me ve gâ thö. 17 Haba tavat adre me korona gam, me helâ me ta je wahamon, ke haba je homakan tavat unyâm, me helâ me lakon wahamon ae se hia wale adre me laba hnyi ta je hak hnyi bong ae megic, ke e ka o but seúnö, me adre me gâ thö, ke ca

## HABAKUKA 1, 2.

manen bi dok adre me laba hnyin. 18 Than Asuria lö, ame mokut ut tavat tuö mamoe unyâm : k' ame mokut minya tavat ae únyi hnathu unyâm : k' ame vese but lakem hon je bucen, ke ba at he ka úkhacaköu

ödra. 19 E ba hnân okatebo hnâm hmouca ; ke kong ut hnâm aat : ke haba tavat adre me löng ge bongom, me adre me khöükhöü hnyam gam ; anyin á ie at ame ca hia but labö cap kâu ányâm hulö ?

# HABAKUKA.

### HNYIMAKAN 1.

**W**ALANG hok ame wâ Habakuka perofeta.

2 Iehova lö, oge me he ka khöü köu ke ne o but kehö, ke u me ca ling nya bi ? oge me tenge köu ge úokonguny, ke u me ca omelö bi. 3 Anyin a ieu u je omanená könya hulö, me wâ hwakecin ae hwali ? ányin a e hnyi hnyimakök hna söh me úokonguny : ke e hu hna ivinö, ke adre me oâ iwatreta. 4 Anyin a wale adre me oúnyibâúú hnanyibu, ke ame ca he but hna owisa bala ka hwâdá ; anyin a tavat ae kong adre me igigilö tavat ae wisa ; anyin a wale ame he but hna owisa ae hwali. 5 Bwele thö unyin ta je hnyei me wâhmakhmeto, me láiâ gan hmâ thö : anyin oge me ányâ huliwa hnyi bongubun je bong, eje ke ne adre ne thumetu öbun, öbun e ca he ka kap. 6 Anyin a wâ bi, oge me oâ at Kaledaia, hnyei ae hiny ame ie utut ; tavat adre me vheno úláuen hmeledrany, he ka húgúnâ je dok hnân labâ, a ca idra bi. 7 Ödra tavat hnân outen me öbubuny gadra : ame ka o bi gadra hna owisa me hmanenangidra. 8 E logot minya haledra je hors hon je lepad, ke hwege hnyimak hon je luko hnyi sahac ; tavat tabö hors unyidra adre me ave ehe thibut : eke, anyidra tavat tabö hors úhedra sâkâú ; adre me gâ helâ me aeto at ame logot ka an haniny. 9 Adre me tha o hia he ka úokonguny ; helâ me ang hwei imaneniny je hnyimaködra ; adre me úkhacaköuâ je bâ helâ me öny. 10 Eke, e ame hlumâ je than, ke taben úhiö kâu je taben : e ame hlumâ je hnabâ hia ; anyin a e ame okhibö göranyai kânâ me húgúnâ. 11 Me e ame he ka o helâ me ang me hanyâúú,

me me hu hulö kâu : wale at a haba tang hwegien me únyi ge khongon. 12 Iehova lö, Khonguk, me Kapik, hawa, u ca at kâu adrem bala ? öhmun e ca he ka mok. Iehova lö, u je otilâ e me hnân owisa, Kicik lö, oâ e me hnân ná. 13 E kalaöt hmönyin li emâkâm, me u je ca bewâ hulö, ke u je höcö wâ hwakecin ae hwali, anyin a ieu u je wâ tavat iyawö, me laba hnyibú hnyi úen ame he at ae kong ka utâ at ae wisa hon e bi ; 14 me mádrâ tavat m' ödra helâ me wâiny köiö, ke ta je únyi ame iyâú ke ba at ame musi ödra ? 15 E ame kap göranyai ödra hia ge wage, k' ame ohnoki ödra hnyi úten ert, k' ame hum ödra hnyi úten ert hlihli : anyin a wale e ame senyin me hobâ. 16 Anyin a wale, e ame bi hut ka úten ert, k' ame leú utö ae bo so ka úten ert hlihli ; anyin ae pipikhenya jekhon únyi gan, ke gan hmâ an jeú. 17 Anyin a wale, hawa, ame he ka öba önyen úten ert, k' ame ca he ka hokhnyok hnyi hnen hna labö ohia ta je hnyei.

### HNYIMAKAN 2.

**O**GE me he ka tot hnyi hnök hna hmâkâ, me laba hon tap tue, ke oge me he ka selâdrâ me löng hofuc e ame he ka ha könya, ke hofuc oge me he ka thu ge hnök hna tenge. 2 Ke haba Iehova ame thu könya me ha, ka habe, Sihnalimen ju hna omanená, me kave hnyi je taben, me me he ka áú ge tavat adre me wadring bi. 3 Anyin a haba hna omanená me hobi kâu úen adre thu, k' ame he mweimwei ka hnyi obiny, k' ame ca he bi ka thoi : eja ke ne a ne bec, mē halubahingen ; anyin e hnathu e ame he ka o, k' ame ca he ka bec. 4 Wâ bi, ame bi gan hnyekon.

### HABAKUKA 3.

k' ame ca fofâ bi eú hnyin : ke ame he at ae wisa hwakecin ka môt hnen anyin labageju. 5 Eke, haba waina, ame at iyawö, ke at bi gan, k' ame ca laba hmâ hnyi hing hnyaban bi ; ke ame ogânâ weny helâ me hedis, k' ame helâ me mok, k' ame ca sekon bi, ke e ame úkhacaköuâ unyin ta je hnyei hia, k' ame hlo tavat hia thithö. 6 Hawa, ame ca he tavat ang hia ka ha úböúcú gan, me vejec hnân úhiö kâu, me ha, ka habe, Ekölö ge at ame ca osehia ta je únyi a ca anyin bi ! ke ne o but kehö ? ke at minya ame osehia ta je haten hna hok gufa ! 7 Hawa, adre me ca he ka ie tot tavat adre me he ka úlú u, ke hmak bi tavat adre me he ka oveci u, m' u me he ka hnân söh ködra ? 8 Anyin a u je hia but söh ta je hnyei ae se hia, me ame he ka sei u hnen ta je kolon ta je hnyei hia ; can dren tavat, me úokonguny adre me ányâ ka hnyei, me taun me tavat hia adre me labâ e.

9 Ekölö ge at ame hûgúnâ troban ae hwali hobi kâu anyin lap, me me ip ethö görany háúen, me me môt únyi ge hnyamen úkongon ! 10 U je hia but únykúme únyi hnân ohmehma ányâm lap, hnyi hnâm hna subâ degecâ je hnyei ae se hia, me ányâ hulö köu bi. 11 Anyin ame he veto hnyi hna up uma ka fuc, ke ame he ka thu kâu hnen utö a venyâ.

12 Ekölö ge at ame otilâ ke taun ge dra, me ohmâ taun hnyi hwakecin ae kong ! 13 Wâ bi, hawa, ca únyi ga Iehova tuhan sabaoth a ame he tavat ka huliwa hobi kâu meic, me ame he je hnyei ka osényini ödra hnyi únyi ae únyi baú ? 14 Anyin ame he ka unöngöt hmeledrany ge hna wâhmakhmetoâ hmanenangi Iehova, helâ me köiö ame tube je taben e.

15 Ekölö ge at ame habelen waeny, ame bihanen ányâm hmönyin kâu, ke ame omono e, m' u me ke ka ö 'drin ae ba úkhaú ! 16 U je unöngötö ge hmehma ke ca hmanenang bi : bethe ic dö minya, m' u me helâ me at adre ca peritomonâ : adre me he ka wia köu kaiainy hnyam a metö Iehova, ke ame he ka e bi hon ányâm hmanenang hmehma ae ikiki. 17 Anyin ame he ka tubi u hnen úokonguny ka Lebanona, me hna obia je meno wale ame ooti ödrin ; can dren at, me úokonguny ka hnyei, me taun me tavat adre me labâ e.

18 Ieú troban hnatheat me me huliwan e hnen at ame op e ; me idola adre oköiâ, me at ame ná thoi, me me labageju kâu at

ame huliwan bi, he ka ányâ je idola ae hum. 19 Ekölö ge at ame ha ka utö, ka habe, Hmak dö : me ka veto ame ca fuc, ka habe, Todró ! Hawa, ame he ka únö únyi ang ? Wâ bi adre tube e ge gol me sileva, ke ba hmönyin homená eú hnyin e. 20 Ke e bi Iehova hnyi hnyin umen uma ae kap : e so ame he hmeledrany hia ka laba hnyibú ju hnyi hnyimakan.

### HNYIMAKAN 3.

**W**ALANG hic hiji Habakuka profeta, adre me hai hnyi Shigiontha.

2 Iehova lö, oge hia but löng úthumetu gam, me oge me ot :

Iehova lö, ohâtâ thö ányâm huliwa hnyi wanben ta je huna,

Omanená thö hnyi wanben ta je huna : Ke únykúme ju ibetengiö hnyi úen wathethöt.

3 Ame o but Khong úheny Temana, Ke At ae Kap úheny hnyi bucen Parana. [Sela.

Ame khavâ drany hnen anyin hmanenang,

K' ame unöngötö hmeledrany ge hna ogânâ e.

4 Haba melaminy, me helâ me lany ; K' ame o li basesönginy únyi hnyi hnyamen :

K' ame oiyongâ eling maniny man.

5 Ame he but mok ae caphnyi hnyimakan, K' ame gâ thö je uthmeic hnyi li can.

6 E ame tot me tuluto hmeledrany ; E ame bwele me oveséa ta je hnyei :

Ke adre me oveséa je bucen kâú adrem. K' ame nom ju je hut kâú ehac ;

E kueny jut deny ta je gethen.

7 Oge me wâ je uma mano umö Kuza hnyi vec :

K' ame öbubuny je mano singiny hnyei Midiana.

8 Hawa, Iehova ame hmönyin ka je wagewe ?

Hawa, u me hmönyâm ka je wagewe, Ke wathethöt ge köiö ae gan,

M' u me tabâ halem je hors, Ke ta je kariotainy ányâm úhömeli ?

9 Adre me oc ut ányâm cafana ; E hnathu ta je hofuc u je khemanyin ka ta je tribu. [Sela.

Ke u je kia hmeledrany ge ta je wagewe.

10 Haba je bucen adre me ö u, me ot ; Ame he but hwegeiny di :

## ZEFANIA 1.

- Ame mea dok ae dit,  
Me hinöbeny göranyai.
- 11 Ame tot seúnö me tehi hnyi hnödrü ;  
Hnyi melaminy ânyâm je fana adre gâ,  
Hnyi melaminy ânyâm ö ame hadröngoc.
- 12 U je vhenö hnyeï hnyi hmönyin,  
U je uto je tavat hnyi wathethöt.
- 13 U je he but hnân he ka omelö lakem,  
He ka omelö hnâm hna hú ;  
U je aat dö ban únyi hnyi lap anyin at  
ae kong  
Me omanená taben ke ne o but hnyi  
kic. [Sela.]
- 14 U je dáoâ taben je aten vat gan ge dân  
bi je ö :  
Adre me utut helâ me höu he ka ovesei  
nya ;  
Adre me senyin helâ ke at ame he ka  
han duöngâ at ae ba ta únyi.
- 15 U je oheâ halem je hors eú hnyi köiö,  
Hnyi dok ame khibi hnyin göranyai köiö  
ae gan.
- 16 Oge me löng, me ame ututut hnyekuk,  
Ame öbubuny li esongödik ge hwan ;
- E amam but je jeiök, ke oge me öbu-  
buny hnyi hnök :  
M' oge me he ka menâ hnyi bonginy  
vec,  
Hnyi úen e ame o but úcon hnyeï wale  
ame o kâu a je deö vat,
- 17 Eja ke ne a ne ca vhöng imeta,  
Ke ba wan hnyi je ivine ;  
Eja ke ne a ne ba hna huliwan elaiö,  
Ke ba jeú hnyi je hna belök ;  
Eja ke ne adre ne subâ degecâ hnahat  
meno hnyi hak,  
Ke ba but kau hnyi je hnyeuleny meno :
- 18 Ke so bi oge me he bala bi nya ka hobâ  
kö Iehova,  
Oge me he ka senyin ka Khong at ame  
omeli nya.
- 19 Iehova Than me wale tang hwegiök,  
E ame wia li cak me me helâ me can je  
aila,  
K' ame he ka ovhenu nya hnyi anyik  
je dok ae görany.
- Hobi kâu at ame vhek khumöng hnyi  
Neginoth.

## ZEFANIA.

### HNYIMAKAN 1.

**W**ALANG hofuc ho Iehova ame o kö  
Zefania nöku Kusi, nöku Gedalia,  
nöku Amaria, nöku Hezekia, hnyi je bong  
bongu Josea nöku Amona, than Juda.

2 Haingö Iehova, ka habe, Oge me he  
ka ti ohia ta je únyi hia thithö únyi hnyi  
hon kânâ. 3 Oge me he ka ohia tavat ke  
omeno ; oge me he ka ohia omeno ame gâ  
ethö, ke ta je wâ eú hnyi köiö, ke ta je  
únyi ame öhaúâ, ke tavat minya ae kong ;  
me oge me he ka subâ degecâ at únyi hnyi  
hon kânâ haingö Iehova. 4 Ke oge me  
he ka hai hnyamök ka hnyi hon at Juda,  
ke tavat hia adre me laba hnyi Jerusalema ;  
ke oge me he ka subâ degecâ únyi hnyi  
dok ang je kolon Baala, ke ien tavat bihut  
ka je hnathat, tha ödra me tavat bihut ;  
5 ke tavat adre me hic hon ban je uma ka

ta je únyi hnyi drany, ke tavat adre me  
khemanyin kö Iehova, k' adre me khem-  
anyin ge anyidrin than ; 6 ke tavat adre  
me hmetu unyi Iehova ; ke tavat adre me  
ca elöm Iehova, me ca hnö e.

7 Laba hnyibú ju hnyi hnyimakan Than  
Iehova : anyin ae hakekeny jut bong bongi  
Iehova : anyin a hia but Iehova penapena  
hut, me okabâ hnen je hna hawâ. 8 Ke  
haba hnyi bonginy hut anyi Iehova, me oge  
me he bi nya ka bi hwaban ta je taben, ke  
lakon than, ke tavat adre me khavâ je  
úkhaúiny ta je hnyeï bi. 9 Ke hnyi bong  
eling oge me he ka bi hwaban ködra hia, a  
tavat adre me gâ hanyâúâ hwanuma, tavat  
adre me öunöngötâ je uma umen je tuhödra  
ge úkonguny me thoi. 10 Ke haingö  
Iehova, Haba hnyi bong eling me ame he  
bi ka hu hwatenge hnyi homagöuleny wâ,  
k' ame he ka hu kuku tenge hnyi ke keihen

## ZEFANIA 2, 3.

a loiny, ke dia ae gan hnyi je hut. 11 Kuku tenge th' öbun tavat öbun e laba hnyi Maketas, anyin adre kot hia thö hnyei Kanana : adre subâ degeci ödra hia tavat adre me ngenu me sileva. 12 Ke hnyi ün eling oge me he ka jien Jerusalema ge je lamepa ; ke oge me he ka bi hwaban ka tavat adre me laba sot, tavat adre me ha eü hnyi hnyok ka habe, Ame ca he Iehova ka mâdrâ so, ke ame ca he ka ânyâ minya ünyi ae kong. 13 Ke ame he ka hnân söh bi je omjedra, ke ame he ka ba wan umödra je uma : eke, adre me he ka op je uma ke adre me ca he bi ka labâ ; adre me he ka belöki vine, ke adre me ca he bi ka ic wainainy. 14 E hakekeny jut bong ae gan bongi Iehova, e hakekeny jut ke logot hmönyin dut, hwan bong bongi Iehova ; ame tenge gan hmâ eling at ae hwege. 15 Haba bong eling bonginy hmönyin, bonginy vec me hlöuhlöu, bonginy hnaühangö me öba wan, bonginy lit me menekholom, bong ae hu ülä me khömet, 16 bonginy fuc trutru me öbubuny ka hnyi je taun adre up hagin, me je tap tue görany. 17 Ke oge me he ka ovecâ tavat, m' adre me he ka he helâ me je wadröu, anyin adre hia but ânyâ hulö kö Iehova : ke adre me he ka hingälâ drödra helâ me sesâ, me utioidra minya helâ me tatet. 18 E ca khana bi anyidra sileva me gol he ka omeli ödra hnyi bonginy hmönyin anyi Iehova ; ke adre me he ka thong degecâ hnyei hia ge meicin anyin ciâ : anyin a e ame he ka bi obiny, eke, obiny ae mweimwei ka tavat hia adre me laba hnyi hnyei.

### HNYIMAKAN 2.

**H**NYEI ame ca hmehma lö, ükhaca-köu th' öbun, eke, ükhacaköu thö ; 2 e ka tiga ca oâ hna otilâ, e ka tiga ca he but bong helâ me thatünyin hwit, e ka tiga ca o bi köbun hmönyin ae gan anyi Iehova, e ka tiga ca o bi köbun bong bonginy hmönyin anyi Iehova. 3 Elöm Iehova th' öbun hia tavat ae ilemuk hnyi hnyei, tavat adre ânyâ hnen hna owisa ; elâm dö hwakecin ae wisa, elâm dö menyik : adre me ne he ka ikhö' öbun hnyi bonginy hmönyin anyi Iehova. 4 Anyin adre me he he ka hota degecâ Gaza, ke ame he ka ba wan Asekelona : adre me he ka obâ Asedoda hnyi jebigo, k' adre me he ka oc Ekerona me iwân. 5 Ekölö ge tavat adre me labâ hobat köiö, wale hnyei iny at Kerethi ! e

ve e möbun hofuc ho Iehova, Kanana, hnyei iny at Filisiti ; oge me he ka ohiö u me me ba at ame he ka labâ. 6 Ke haba hobat köiö, me ame he ka hu je uma umen tavat tuö mamoe hnyin, ke ta je hnyeuleny je hnahat mamoe. 7 Ke haba hobat köiö, me ame he ka hnân hobi kâu je kolon lap anyi Juda ; k' adre me he ka hân haledrin ta je hnahat mamoe eling : k' adre me he ka mokulec je uma umö Asekelona hnyi sabac ; anyin ame he Iehova Khongudrin ka sen' ödrin, me ohmetu ödrin ühedrin hnyi hna bâ. 8 Oge hia but löng hna haikongoâ hnö Moaba, ke hna ü hnen lakon Amona, waleji tavat adre me haikongoâ lakeik, k' adre me bi gan hnyi je hnyigöulödra. 9 Anyin a wale, haingö Iehova tuhan sabaoth, Khongu Isaraela, ka habe, Kia inya inya a g' ame he Moaba ka ücü me Sodoma, k' ame he lakon Amona ka ücü me Gomora, a iny jut vhat, ke thopiny salt, ke ba wan nyiele balua : k' ame he je kolon lakeik ka sei ödra, ke ame he je kolon hnyi ik hnyei ka hwöhwabödra. 10 Adre me he ka hu e can anyidra bi gan, anyin adre hia but haikongoâ me bi gan ka lakei Iehova tuhan sabaoth. 11 Ke ame he Iehova ka ooti ödra : anyin a e ame he ka ohia tilâ je khong khongon hmeledrany hia ; me ame he tavat ka khudrung kâu, ke at me ke at hnyi je ve hnödra, wale ta je bomeneiny ta ogö hnyei hia. 12 Ke haba öbun, at Aithiop lö, me adre me he ka hling' öbun ge anyik hele vat. 13 Ke e ame he ka hai hnyamen ka hnyi ke keihen ka hnyi hwadrö, me ohia Asuria ; ke e ame he ka öba wan Nineve, me me hwahwacit helâ me hnyebuba. 14 Ke ame he je hnahat meno ka mokut hnyi wanben e, a omenoiny ta je hnyei hia : ame he kati me kifoda ka mokut hnyi ban je hmolominy : k' adre me he ka cük hnyi je mamalama ; ke ba at hnyi je hwanuma : anyin a e ame he ka hom singiny ünyi hnyi hon hna huliwan arasi. 15 Walang taun waleji ame senyin me laba wia, at ame ha eü hnyi hnyekon ka habe, Inya thibi, ke ba hmetu ke at : Ekölö, e ba but wan e, hnân mokut hnen je meno ae hiny ! ame he tavat adre me he unyin ka jü, me nyinyikâ ban.

### HNYIMAKAN 3.

**E** KÖLÖ ge at ame ükhin fuc me at ae ikiki, taun ame ovecâ ! 2 E ame ca löng hofuc ; e ame ca kap hna ünö ; e ame ca labageju bi kö Iehova ; e ame ca

## HAGAI 1.

hakekeny bi ka Khong. 3 Haba anyin je taben unyin, me helâ me je liona ame kuku; anyin bi tavat owisa, me helâ me je luko adre o hnyi sahaç; adre me ca hna kolon bi hobi kâu nyi. 4 Tavat hop me iyawö anyin je perofeta: a hia but anyin tavat bihut okongoâ dok ae kap, adre hia but hanyâüâ hnanyibu. 5 At ae wisa Iehova hnyi wanben e; e ame ca he ka ânyâ hulö; e ame oâ hna owisa ka hnyi melam hnyi je hnyomakatu, e ame ca haü bi; ke haba at ae ca wisa bi, me ca khana bi hmehma. 6 Oge hia but subâ degeçâ je hnyei, e ba but aten anyidra je tap tue; oge hia but ohnyeutâ dedra je gethen, me ba at ame vheno: adre kot anyidra je taun, e ba but at, ke ba but at ame labâ. 7 Haingök, ka habe, U ma he ka ot gak, me kap ju hna ûne; m' adre me ca he ka subâ degeçâ hnyaban, hoton hnök hna otilâ hia gan: ke so bi adre me vesâ hnyi hnyomakatu kong me okongoâ anyidra ta je huliwa hia. 8 Anyin a wale halubahing nya ju, haingö Iehova, ke ne o but bong oge me he ka höhöi ka hnyi hna söh: anyin a mou but hnyekuk he ka ûkhacaköüâ je hnyei, m' oge me he ka ûkhacaköüâ je dökhü, he ka hingâlâ hudrin anyik hmönyin, wale anyik wathethöt ame ubâhlâ; anyin adre me he ka thong degeçâ hnyei hia ge meicin anyik ciâ. 9 Me oge me he bi ka wia ka hnyi hnyei hwen ae wisa, m' adre me he hia ka hawâ iö Iehova, me bi athnyabainy ge hnyok a khaca. 10 Ame he tavat adre me khöü könya, a hlu tavat adre oveseâ, ka hom ta je bwihlany könya, ûnyi hnyi hoton je wageweiny Aithiop. 11 Hnyi bong eling u me ca he ka hmehman ta je hwakecâm hia waleji u je hanyâüâ gak: anyin a wale oge me he bi nya ka hom but gam hnyi bong eling tavat hop ke bi

gan unyâm, ke u me ca he hmetu ka begö-rany hnyi anyik bucen ae kap. 12 Ke oge me he ka ip hnyi wanbâm ta je hna ovecâ me theduoc, ke adre me he ka labageju ka iö Iehova. 13 Ke ame ca he je kolon hnyi Isaraela ka ânyâ hulö me ha thoi; k' adre me ca he ka wâ hnyi je hnyimödra bohmen ae iyawö; anyin adre me he ka han me mokut, ke ba at ame he ka ooti ödra. 14 Hluiny Ziona lö, khumöng dö; Isaraela lö, kuku thö; hluiny Jerusalema lö, senyin dö ke hobâ ge hnyekom ae bek-höt. 15 A hia but Iehova hom hna owisa gam, e ame hia but ohia iwahnaihmiony möu: e bi hnyi wanbâm Iehova Tuhan Isaraela: u me ca he hmetu ka outen ûnyi ae kong. 16 Hnyi bong eling adre me he ka ha ka Jerusalema, ka habe, Ca ot bi: Ziona lö, e so ame ca he ka him bi li hnyamâm. 17 E bi hnyi wanbâm Iehova Khongom, at ae hwege, k' ame he bi ka omelö: e ame he ka senyin köu ke hobâ, e ame he ka laba wia hnyi anyin betenge, e ame he ka senyin gam ge khumöng. 18 Oge me he ka ûkhacaköüâ tavat adre me hlöuhlöu ge wedra ka hnyi ûkhacaköu ae ûnyi hnathu, tavat hanen em hnyei: wale ae hmak kâu hna haikongoâ. 19 Wâ bi, hnyi ûen eling oge me he ka mâdr' ödra hia tavat adre me oveci u: ke oge me he ka omelö at ame he ci, ke hlo at adre me obâ; ke oge me he ka wi' ödra hnân ogânâ me lung bi, wale adre me hmehma gadra hnyi hmeledrany hia. 20 Ke hnyi ûen eling oge me he ka hum öbun, ke hnyi ûen eling oge me he ka ûkhacaköu öbun: ke oge me he ka wi' öbun m' adre me lung me ogânâ unyin ta je hnyei hia eang hmeledrany, iny ka he ka ohmetu öbun ûhebun hnyi hna bâ wale hnyi hnyimaköbun, haingö Iehova.

## HAGAI.

### HNyimakan 1.

**H**NYI huna a loi Dariu than, hnyi tehi a siksiny, hnyi bong a bâniny tehi, ame o but hofuc ho Iehova a deny Hagai perofeta kö Zerubabela nöku Sealetielä,

gavenainy Juda, me kö Josua nöku Joza-daka, at bihut ae beönua, ame ha ka habe, 2 Walang hna ha hnö Iehova tuhan sabaoth, ka habe, Haingen tavat ang, ka habe, E tiga ca o bi ûen, wale ûen he ka op uma umö Iehova. 3 Me ame o but hofuc ho

## HAGAI 2.

Iehova a deny Hagai perofeta ame ha, ka habe, 4 Hawa, e ûen labā umöbun je uma adre tubi esöiny, ke hnyot bi uma kap ang? 5 Ke walang ang, walang hna ha hnö Iehova tuhan sabaoth, ka habe, Ûnykúme ju debun je gethen. 6 Öbun e hia but ti belök, ke úhnyúkong bi hna hom; öbun e han, ke ca sekubun bi; öbun e ic, ke beic bala bi; öbun e khaû, ke ba at ame mage bi; ke haba at ame huliwa ge hwaban, me ame hom hwaban he ka hitangen hnyi tang ae moku. 7 Walang hna ha hnö Iehova tuhan sabaoth, ka habe, Ûnykúme ju debun je gethen. 8 Ölo thö hon bucen me hok utö, me hötilö uma; ke oge me he ka senyiná e, ke adre me he bi ka oganö nya, haingö Iehova. 9 Öbun e gejon únyi ae gan, ke wâ bi, e úhnyúkong; ke öbun e hom e ka hnyi hnyaba, me oge me tûâ e. Geu? haingö Iehova tuhan sabaoth. Can umök uma ae hnyot dö, ke öbun bi, öbun e ve wadring ka hnyi umöbun je uma. 10 Anyin a wale, can gabun adre me thawâ drany me me ba dân hau, ke adre me thawâ kânâ me me ba jeúiny. 11 Ke oge me oi seúnö ka hnyi kânâ, me ka je bucen, me ka hnyi hwit, me ka hnyi waina, me ka hnyi wakaco, me ka hnyi jeúiny kânâ, me ka at, me ka meno, me ka hnyi ta je huliwa hia hnen hnyam.

12 Me haba Zerubabela nöku Sealetiel, me Josua nöku Jozadaka, at bihut ae beö-nua, me je kolon hia hnyi hnyei, me adre me löng hoton hofuc ho Iehova Khongudrin, me hofuc ho Hagai perofeta, hoton hna kunâ ga Iehova Khongudrin; ke ame ootö Iehova hnen tavat. 13 Me haba Hagai, me úthumetu anyi Iehova hnyi hofuc ho Iehova, me e ame ha, ka habe, Tha inya but möbun haingö Iehova. 14 Me haba Iehova ame bwebwelâ hnyeku Zerubabela nöku Sealetiel, gavenainy Juda, ke hnyeku Josua nöku Jozadaka at bihut ae beö-nua, ke je hnyekon tavat hia hnyi hnyei; me adre me o, me ányâ huliwa hnyi uma umö Iehova tuhan sabaoth, Khongudrin, 15 hnyi bong a twente foainy tehi a siks, hnyi hun a loi Dariu than.

### HNyimakan 2.

**H**ABA hnyi tehi a seven, hnyi bong a twente waniny tehi, me ame o but hofuc ho Iehova a deny Hagai perofeta ame ha, ka habe, 2 Ha thö walang ang kö Zerubabela nöku Sealetiel, gavenainy Juda,

ke Josua nöku Jozadaka at bihut ae nua, ke kolon tavat, ka habe, 3 Ia gabun a kolon at a wâ uma eang hnyi hmanenanginy a bán? ke hawa ge hnöbun hna wâ walang ang? hawa ca helâ me thatúnyi hnyi je hnyimaköbun? 4 Ke walang ang, Zerubabela lö, hwege thö, haingö Iehova; ke hwege thö u Josua nöku Jozadaka at bihut ae nua; ke hwege th' öbun tavat hia aten hnyei, haingö Iehova, ke huliwa thö: anyin a tha inya but möbun haingö Iehova tuhan sabaoth, 5 hoton hofuc oge me úhi-hinykôuâ m' öbun hnyi úen öbun e he but úhebun Aigupito, k' ame laba hanuk unyibun: ca ot bi öbun. 6 Anyin a walang hna ha hnö Iehova tuhan sabaoth, ka habe, Okhaca biju, ke ca bec bi, me oge me he bi nya ka jijingâ drany ke hmeledrany, ke köiö ke kânâ; 7 ke oge me he ka jijingâ ta je hnyei hia, ke ame he ka o ta je únyi wale ame weny ta je hnyei hia, ke oge me he ka öunöngötâ uma eang ge hmanenang, haingö Iehova tuhan sabaoth. 8 Haba sileva, me anyik; ke anyik gol, haingö Iehova tuhan sabaoth. 9 Ame he bi ka gan hmâ hmanenanginy uma eang a biliny hon uma a bán, haingö Iehova tuhan sabaoth: ke oge me he ka ham úsököu hnyi dok ang haingö Iehova tuhan sabaoth.

10 Hnyi bong a twente foainy tehi a nain hnyi hun a loi Dariu, ame o but hofuc ho Iehova a deny Hagai perofeta, ame ha, ka habe, 11 Walang hna ha hnö Iehova tuhan sabaoth, ka habe, Hnö thö walang ang tavat bihut hnyi hnanyibu, ka habe, 12 A ne ke at ame hom uthmeno ae kap hnyi baten khaûen, ke ame ne he khaûen ka kâlâ areto, ame ne öt jeú, ame ne waina, ame ne wakaco, ame ne ke jeú, hawa ame he ka kap? Ke haingen tavat bihut, ka habe, E ba. 13 Haba Hagai ame ha, ka habe, A ne ke at ame bo kong ge únyi ae mok ame kâlâ khaca hnyi ta je únyi eling, hawa, ame he ka bo kong? Ke haingen tavat bihut, ka habe, E bo kong ut. 14 Haba Hagai ame thu me ha, ka habe, Helâe tavat ang, ke helâe hnyei ang hnyi hnyimakök haingö Iehova; ke helâe ta je huliwa hia anyin je hnyamödra; ke haba únyi adre me hudo eling me e bo kong ut. 15 Ke walang ang, ö öbun únykúme ju hwân hnyi bong ang ke ne o but ehac, hnyi úen a ödra tiga ca hia but ip ke veto hon ke veto hnyi uma umö Iehova: 16 hwân hnyi je bong hia eling, ame ne o at ka



## ZAKARIA 1.

hnyi hna khon hwit a twente je tulut, me ame ten biju; ame ne he ke at ka hnyi tangen waina he ka sâú fifte je tulut, me ame twente biju. 17 Oge me kuc öbun ge meleca me om, me we wahma hnyi ta je huliwa hia anyin je hnyamöbun; ke so bi öbun e ca hwiö könya haingö Iehova. 18 Ö öbun únykúme ju, hwân hnyi bong ang ke ne o but ehac, hwân hnyi bong a twente foainy tehi a naininy, hwân hnyi hna bi taben uma umö Iehova, únykúme ju. 19 Hawa e hu hatong hnyi omhani? eke, ame ca wa bi ivine, me imeta, me rimona, me elaio; hwân hnyi bong ang oge me he ka ohnahici öbun.

20 Ke ame olo o hofuc ho Iehova kö

Hagai hnyi bong a twente foainy tehi, ame ha, ka habe, 21 Ha thö kö Zerubabela gavenainy Juda, ka habe, Oge me he ka jijingâ drany me hmeledrany: 22 ke oge me he ka ohnyimenâ hnyikânâi je theroniny je dökhu, me ohia tang hwegien je dökhuiny je hnyei; ke oge me he ka ohnyimenâ hnyikânâi je kariota me tavat adre me tabâ, ke ame he ka ta je hors me tavat adre me tabâ, ge hele vat anyin je liamekeiny mödra. 23 Hnyi bong eling, haingö Iehova tuhan sabaoth, oge me he ka hum u Zerubabela, nöku Sealetiel, athnyabaik, haingö Iehova, me wiö u helâ me únyi hnân ohmâ haten: anyin oge hia but úcö u, haingö Iehova tuhan sabaoth.

## ZAKARIA.

### HNyimakan 1.

**H**NYI tehi a eitiny hnyi hunâ a loi Dariu, ame o but hofuc ho Iehova kö Zakaria, nöku Berekiâ, nöku Ido profeta, ame ha, ka habe, 2 Iehova ame hia but hmönyin gan hmâ ka lakamöbun. 3 Anyin a wale ha thö ködra, ka habe, Walang hna ha hnö Iehova tuhan sabaoth ka habe, Hmetu ju könya, me oge me he bi nya ka hmetu köbun, haingö Iehova tuhan sabaoth. 4 Ca he öbun ka helâ me lakamöbun waleji adre me hongot ka ta je profeta kâú adrem, me ha, ka habe, Walang hna ha hnö Iehova tuhan sabaoth, ka habe, Hmetu ju öbun walang ang únyi hnyi debun ta je gethen ae kong, ke anyibun je huliwa ae kong: ke adre me ca löng bi, k' adre me ca tevehlöng könya, haingö Iehova. 5 Ewa lakamöbun? ke ta je profeta, hawa, adre me möt balua? 6 Ke haba hok je hofuc ke anyik je hnanyibu, waleji oge me hûna ka lathnyabaik a je profeta, hawa, ödrin e ca khaú lakamöbun? me adre me hmetu me ha, ka habe, Haba Iehova tuhan sabaoth ame únykúme he ka ányâ köhmun, hoton dehmun je gethen, ke anyihmun je huliwa, ke helâe e ame hia but ányâ köhmun.

7 Ke haba hnyi bong a twente foainy

tehi a eleveniny, wale hnyi tehi Sebat, hnyi hunâ a loi Dariu, me ame o but hofuc ho Iehova kö Zakaria nöku Berekiâ, nöku Ido profeta, me ame ha ka habe, 8 Oge me wâ hnyi hnyinghet, ke wâ bi at ame tabâ hors ae dra, ke e ame tot hnyi wanben je úö adasi hnyi dok ae hwaelu; ke hwaban e je hors ae dra, ke hngingidra, ke hau. 9 Me oge me ha, ka habe, Than lö, je iéu e? Ke haba angela at ame úhnenamö mönya ame ha, ka habe, Oge me he ka omanená köu bongon ta je únyi ang. 10 Me ame thu hnen at ame tot hnyi wanben ta je úö adasi, me ha, ka habe, Wale je hna kunâ hnö Iehova he ka vhenö hmeledrany. 11 Ke adre me thu ka angela anyi Iehova at ame tot hnyi wanben je úö adasi me ha, ka habe, Ohmun e hia but vhenö hmeledrany, ke, wâ bi ame laba wia hmeledrany hia, ke hnahic. 12 Me haba angela anyi Iehova ame thu me ha, ka habe, Iehova tuhan sabaoth lö, ke ne o but kehö a u me ca he ka betenge ge Jerusalema, me je tauniny Juda, wale u je hmönyâm ka hnyin, hnyi je hunâ a sevente? 13 Ke haba Iehova ame thu ka angela at ame úhnenamö mönya hnyi je hofuc ae so, wale je hofuc hnân okhaukahwa hnyok. 14 Me haba angela at ame úhnenamö mönya, ame ha könya,

## ZAKARIA 2, 3.

ka habe, Hongot dö me ha, ka habe, Walang hna ha hnö Iehova tuhan sabaoth, ka habe, Inya oge me ciâ Jerusalema, me Ziona, ke gan hmâ hna ciâ. 15 Ke e gan hmâ anyik hmönyin ka tavat adre me laba hnahic : anyin ae ûhnyûkong anyik hmönyin, ke haba ödrin bi, me adre me ogânâ hna ovecâ. 16 Anyin a wale, walang hna ha hnö Iehova, ka habe, Inya oge me hmetu Jerusalema ai me je ibetengiö; adre me he ka op hmetu umök uma eling, haingö Iehova tuhan sabaoth, ke adre me he ka lelö tulut tö hon Jerusalema. 17 Hongot hmetu thö, me ha, ka habe, Walang hna ha hnö Iehova tuhan sabaoth, ka habe, Ame he ka se hia hmetu anyik je taun ûnyi ge hnahic; ke ame he hmetu Iehova ka otubwelâ Ziona, me senyin ka Jerusalema.

18 Ke oge me bwele thö me wâ, ke wâ bi vak ta faoiny meno. 19 Ke haingök ka angela at ame ûhnenamö mönya, ka habe, je ieu e? Ke haingen kõnya, ka habe, Wale je faoiny meno hnyat ödrin e hia but oveseâ Juda, me Isaraela, me Jerusalema. 20 Haba Iehova ame omanenâ kõnya je hnyat huliwa a vak. 21 Me oge me ha ka habe, Ieu ang ödrin e o kâu? Ke haingen, ka habe, Wale je fao a vak ödrin e oveseâ at Juda, me me ba at ame ogöranyâ ban : ke so bi haba hnyat ang ödrin e o but he ka ooti ödrin, he ka hagutâ je faoiny je hnyei, tavat adre me ogöranyâ je fao ûcon hnyei Juda me oveseâ.

### HNYIMAKAN 2.

**K**E oge me bwele thö, me wâ, ke wâ bi, at ae hu tulut tö hnyi hnyamen. 2 Me haingök, ka habe, U me he kâ? Me e ame thu kõnya, ka habe, Oge me he ka tuluto Jerusalema me wâ ûlauen ke ibeuën. 3 Ke wâ bi, ame he but angela at ame ûhnenamö mönya, ke ame he ke angela bi ka ûkhanö mē, 4 me haingen kâu, ka habe, Mē wadring dö he ka ha ka hidröu eling, ka habe, Adre me he bi ka labâ Jerusalema helâ me je taun ae ba haginy, anyin ae se hia but tavat me meno hnyi wanben e. 5 Anyin a haba inya, me oge me he ka helâ me hak meic igigilö e, haingö Iehova, anyin a haba inya, me hnân hmanenang hnyi wanben e. 6 E, e, kec dö ûnyi hnyi hnyei hnyi hwadrö, haingö Iehova : anyin a oge bia but ovesei öbun helâ me vak ta ang hnyi drany, haingö Iehova. 7 Ziona lö,

kec möt dö, u at ame laba unyin lakon Babulona. 8 Anyin a walang hna ha hnö Iehova tuhan sabaoth, ka habe, E ame hia but kunö nya ka hnyi je hnyei iny tavat adre me sei öbun he ka hom hmanenang : anyin a haba at ame kal' öbun, me ame ka kâlâ wan emakan bi. 9 Ke wâ bi oge me he ka nyinyikâ hnyamök hudra, me ame he ka sei ödra hnen tavat waleji adre me bi lathnyaba ködra; m' öbun e he ka wâ a ga kunö nya Iehova tuhan sabaoth. 10 Khumöng dö ke senyin, u hluiny Ziona : anyin a wâ bi, oge me he, me oge me he ka laba hnyi wanbâm, haingö Iehova. 11 Ke ame he ta je hnyei ae se hia ka tha hien me Iehova hnyi bong eling, ke adre me he bi ka lakeik : ke oge me he ka laba hnyi wanbâm, me u me he ka wâ a ga kunö nya köu Iehova tuhan sabaoth. 12 Ke ame he Iehova ka laba hnyi Juda, wale hwajekhön hnyi hnyei ae kap, me ame he bi ka úca Jerusalema. 13 Tavat hia thithö lö, laba hnyibú ju hnyi hnyimakö Iehova; anyin a e ame todrö ûheny hnyi hnyaban ae kap.

### HNYIMAKAN 3.

**K**E e ame omanenö Josua kõnya wale at bihut ae beönua, ame tot hnyi hnyimakan angela anyi Iehova, ke haba Satana ame tot hnyi ke keihen a metân he ka iwahnaihmiöny mē. 2 Haba Iehova ame ha kö Satana, ka habe, Satana lö, e so e ú u Iehova; eke, e so ame he Iehova at ame senyin ka Jerusalema ka ú u: hawa, ca uthmeic bi ang adre oc ûnyi hnyin meic! 3 Ke haba Josua ame khavâ je úkhaú ae kânâ, me tot hnyi hnyimakan angela. 4 Me e ame thu me ha ka tavat adre me tot hnyi hnyimakan, ka habe, Uny jut je úkhaú ae kânâ gan. Ke haingen kâu ka habe, Wâ bi oge hia but ohia hwakecâm ae kong gam, ke oge me he bi ka okhaúö u ge je úkhaú ae hmanenang. 5 Ke oge me ha, ka habe, E so adre me obicâ e ge hnabinybak ae so. Me adre me obicâ e ge hnabinybak ae so, me okhaúâ e ge je úkhaú; ke haba angela anyi Iehova ame tot. 6 Haba angela anyi Iehova ame ha hwegiâ kö Josua, ka habe, 7 Walang hna ha hnö Iehova tuhan sabaoth, ka habe, U je ne he ka vhenö dek je gethen, me tuö hnök je hna otilâ, me u me he ka owisa umök uma, me tuö je hnyeulek, ke oge me he ka ham köu dok he ka vhenö unyin

## ZAKARIA 4, 5.

tavat adre me tot eü. 8 Josua at bihut ae nua lö, löng ju walang ang, u me lahânâm tavat adre me tot hnyi hnyimâkâm; anyin a ödra tavat me hnân haten: anyin a wâ bi, oge me he ka oâ athnyabaik wale Khûen. 9 Anyin a wâ bi veto oge hia but ip hnyi hnyimakö Josua; seven je ecmak hnyi veto a khaca: wâ bi oge me he ka kave hna kave e, haingö Iehova tuhan sabaoth, ke oge me he ka ohia hulöiny hnyei eling hnyi bong a khaca. 10 Hnyi bong eling haingö Iehova tuhan sabaoth, öbun e he ka ve hawâ je lahanöbun ka hnyi hmelen je ivine, me hmelen je imeta.

### HNYIMAKAN 4.

**K**E ame hmetu angela, at ame ûhnenamö mönya, me ohmakö nya, helâ me hna üöhmak hnyi hna mokut. 2 Me haingen kõnya, ka habe, Ieü u je wâ? Me haingök, Inya oge hia but wâ, ke wâ bi taben lamepa a gol hia, ke hu kaiainy hnyi ban e, ke je lamepainy a seven ethö hon e; ke seven je deny wakaco ka hnyi je lamepa hnyin e: 3 ke hu lo li elaio hnyi baten e, khaca hnyi ke keihen metân kaia, ke khaca hnyi ke keihen me. 4 Me oge me thu me ha ka angela at ame ûhnenamö mönya, ka habe, Tuhök lö, ie je ûnyi e? 5 Me ame ha kõnya angela, at ame ûhnenamö mönya, ka habe, Hawa, e ca hanö u bongon ta je ûnyi e? Me haingök, ka habe, Tuhök lö, e ca khanö nya. 6 Me e ame thu me ha kõnya, ka habe, Walang hna ha hnö Iehova kö Zerubabela, ka habe, Ca ûnyi ge man, ke ca ûnyi ge tang hwege, ke so bi ûnyi ge hanûk, haingö Iehova tuhan sabaoth. 7 U ie at, bucen ae gan? u me he bi ka helâ me dok ae tha hon hnyi hnyimakö Zerubabela: ke e ame he ka hom je veto hnân öumo, me hongot, ka habe, Ibetengiö bâu, ibetengiö baü unyin e. 8 Ke ame o but kõnya hofuc ho Iehova, ame ha, ka habe, 9 A hia but hnyamö Zerubabela bi taben uma eang; me ame he li hnyamen ka öumo e; me u me he ka wâ a ga kunö nya köbun Iehova tuhan sabaoth. 10 Ke ie at ame hia but hûkötîâ bonginy ûnyi ae ûhnyûkong? anyin a haba hnyat ang a seven, a je emakö Iehova, me ödrin e he ka senyin ödrin ka wâ tulut tot hnyi hnyamö Zerubabela; ke ödrin e vheno hmeledrany hia. 11 Me oge me thu me ha kâu, ka habe, Ieü li elaio eling hnyi ke keihen a metân taben lamepa, ke meny? 12 Me

oge me olo thu, me ha kâu, ka habe, Ieü li anginy elaio wale hnyi deny hingälâ wakaco a gol, wale hnân hingälâ wakaco gol ûnyi hnyin? 13 Me e ame ha kõnya, ka habe, E ca khanö u bongon li ûnyi e? Ke haingök, ka habe, Tuhök lö, e ca khanö nya. 14 Ke haingen, ka habe, Wale li lakon wakaco, a li at ödru me tot hnyi hnyimakan Thaniny hmeledrany hia.

### HNYIMAKAN 5.

**K**E inya hmetu oge me bwela me wâ, ke wâ bi tusi adre vhec at ame gâ. 2 Ke e ame ha kõnya, ka habe, Ieü u je wâ? ke haingök ka habe, Inya oge me wâ tusi adre vhec ame gâ; twente kubit ibeüen e, ke ten kubit ûlauen. 3 Me haingen kõnya ka habe, Wale hnaühangö at ame vheno hia hon kânâ: anyin a haba at venöu, me adre me he ka subâ degecâ hoton e hnyi ke keihen e; ke haba at ame khemanyin adre me he ka subâ degecâ hoton e hnyi ke keihen e. 4 Oge me he ka kunâ e, haingö Iehova tuhan sabaoth, ke e ame he ka dit hnyi hnyin uma umen at venöu, me uma umen at ame khemanyinâ thoiâ iök: ke e ame he ka laba hnyi hnyin umen uma, me ohia e, tha e me utöiny, me je vetoiny. 5 Me ame he but angela at ame ûhnenamö mönya, me ha kõnya, ka habe, Bwele thö walang ang, me wâ thö ie ûnyi ang ame he but. 6 Ke haingök, ka habe, A ieü e? Ke e ame ha kõnya, ka habe, Walang efa at ame he. Ke haingen, ka habe, Walang hnân öücü ödra hnyi hnyei hia: 7 (ke wâ bi, adre me kap görany ai talan led:) ke walang ke momo ame laba hnyi wanben efa. 8 Ke haingen, ka habe, Wale Hwakecin ae Kong; ke e ame khûâ hnyikânâi momo, ka hnyi wanben efa: me e ame khûâ tulut led ka hnyi hnyimen ûnyi e. 9 Ke inya oge me bwele me wâ, ke wâ bi, li momo ödru me o, ke e hnyi li labenyidru ang; ke ve hu labenyidru helâ me labenyin kasida: ke ödru me kap göranyai efa hnyi wanben hmeledrany me drany. 10 Me oge me ha ka angela, at ame ûhnenamö mönya, ka habe, Ödru me hom kâ efa? 11 Ke haingen kõnya, ka habe, Ödru me he ka bi umen uma hnyi hnyei Sinara: ke e ka penapena, adre me he ka ip momo hnyin wale hnyi hing taben lap.

ZAKARIA 6, 7.

HNYIMAKAN 6.

**K**E inya oge me bwele hmetu me wâ, ke wâ bi ame o vak ta kariota únyi hnyi wanben li bucen ; ke haba li bucen, me li bucen bras. 2 E hnyi kariota a bân li hors ae dra, ke e hnyi kariota a loiny li hors ae hlit ; 3 ke e hnyi kariota a kuniny li hors ae hau ; ke e hnyi kariota a vakiny li hors ae sisit hûen. 4 Ke oge me thu me ha ka angela at ame úhnenamö mönya, ka habe, Tuhök lö, je ieu e? 5 Ke haba angela ame thu me ha kõnya, ka habe, Wale je ang a vakiny drany, hnyat ödrin e he úhedrin hnyi hna tot hnyi hnyimakan Thaniny hmeledrany. 6 Ke haba kariota a e hnyin li hors ae hlit, me ame he ka hnyi hnyei hnyi hwadrö ; ke haba li hors ae hau, me ödru me he hotudru ; ke haba li at ae sisit, me ödru me he ka hnyi hnyei hnyi hwaiöu. 7 Ke haba li at ae hûen, me ödru me he me heleú he ka vheno hmeledrany : ke haingen, ka habe, He th'öbu ka vheno hmeledrany. Me ödru me vheno hmeledrany. 8 Ke e ame hongot kõnya, me ha kõnya, ka habe, Wâ bi, haba tavat adre me he ka hnyi hnyei ka hnyi hwadrö, me adre hia but okatebo anyik hmönyin hnyi hnyei ka hnyi hwadrö.

9 Ke ame o but kõnya hofuc ho Iehova, ame ha, ka habe, 10 Hom dö hanen je bá únyi hnyi lap anyi Heledai, ke Tobija, ke Jedaia ; ke so u ma o hnyi bong eling me dit hnyi uma umö Josea nöku Zefania, wale ödrin e o ka hnyin úhedrin hnyi Babulona ; 11 eke, hom dö únyi gadrin sileva me gol, me ányá je korona me ip hon bö Josua nöku Jozadaka at bihut ae nua ; 12 ke u me he ka ha kâu, ka habe, Walang hna ha hnö Iehova tuhan sabaoth, ka habe, Wâ bi at, haba ien, me Khûen ; ke e ame he ka kú únyi hnyi hnen me op uma umö Iehova : 13 ke e ame he ka op uma umö Iehova ; ke e ame he ka varen hmanenang, ke e ame he ka laba me musi hon anyin theron ; ke e ame he ka at bihut hon anyin theron : ke ame he ka e bi hnyi wanbödru úhnenamoiny úsoköu. 14 Ke haba je korona, me hobi kö Helem, me Tobija, me Jedaia, me Hen nöku Zefania, hnân öúnykúmeá hnyi uma umö Iehova. 15 Ke ame he tavat úhedra sâkâú ka o me op uma umö Iehova, me öbun e he ka wâ a ga kunö nya köbun Iehova tuhan sabaoth. Ke ame he ka aat e, öbun e ne löng wia ifuci Iehova Khongubun.

HNYIMAKAN 7.

**K**E haba hnyi huna a vaki Dariu than, me ame o but hofuc ho Iehova kö Zakaria hnyi bong a vakiny tehi a naininy, wale Kiselu. 2 Ke haba at Beth-ela adre hia but kunö Sarezera me Rege-melek, me je aten he ka khöüâ betenge ga Iehova, 3 me ha ka tavat bihut hnyi uma umö Iehova tuhan sabaoth, me ka je perofeta, ka habe, Hawa, e úcú kõnya he ka tenge hnyi tehi a faiviny, me úsákâú helâji me hnök hna ányá waleji hnyi je huna ae se hia? 4 Me ame o but hofuc ho Iehova tuhan sabaoth kõnya, me ha, ka habe, 5 Ha thö ka aten hia hnyei, me ka tavat bihut, ka habe, Haba hnyi je úen öbun e ányá ca han me tenge thungaú hnyi tehi a faiviny me tehi a seveniny, hnyi je huna a sevente, hawa, öbun e ányá ca han kõnya? 6 Ke haba hnyi je úen öbun e han me ic, hawa, öbun e ca han hobi köbun bi, me ic hobi köbun bi. 7 Hawa, e ca úcú köbun he ka löng hofuc waleji Iehova ame ha a deny je perofeta kâú adrem, hnyi úen adre labâ Jerusalema ke e sot, ke adre me labâ je tauniny igigilö e, me ke keihen ka hnyi Hwaiöu, me dok ae tha hon?

8 Ke ame o but hofuc ho Iehova kö Zakaria ame ha, ka habe, 9 Walang hna ha hnö Iehova tuhan sabaoth, haingen, ka habe, Owisa wia ju, ve omanená betenge me hnyok ae menyik ka je liamekeiny möbun : 10 ke ca ovecá safac me nakahme, me atkanyua, me at ae theduoc ; ke ca únykúme eú hnyi hnyok únyi ae kong ka ke at. 11 Ke ödra höcö löng, me beháná bajebenyidra, k' adre me hlöng je hnyikönyödra, m' adre me ca löng bi. 12 Eke, adre me wia je hnyekudra me me helâ me samira, m' adre me ca löng bi hnanyibu, me je hofuc ho Iehova tuhan sabaoth, waleji a kuná hnen hanon a deny je perofeta a bân : anyin a wale ame o but hmönyin ae gan únyi ga Iehova tuhan sabaoth. 13 Ke e ame hongot, k' adre me ca löng bi ; helâe, adre me he ka hongot ke oge me ca he bi nya ka löng, haingö Iehova tuhan sabaoth : 14 ke oge me he ka ovesei ödra ge höu ka hnyi je hnyei hia waleji ae ca khan' ödra. Me ba wan hnyei hwabödra, ke ba at ame he ehele me hmetu : anyin adre me öba wan hnyei ae hmanenang.

HNYIMAKAN 8.

**K**E ame o kõnya hofuc ho Iehova, ame ha, ka habe, 2 Walang hna ha hnö Iehova tuhan sabaoth, ka habe, Oge me ciâ Ziona, ke gan hmâ hna ciâ, ke oge me ciâ e hnyi hmönyin ae gan. 3 Walang hna ha hnö Iehova, ka habe, Oge me laba hmetu hnyi Ziona, ke oge me he ka laba hnyi wanben Jerusalema : ke adre me he ka hwenyi ien Jerusalema, me 'Taun ae hnathu ; k' adre me he ka hwenyi ien bucen anyi Iehova tuhan sabaoth, ka habe, Bucen ae kap. 4 Walang hna ha hnö Iehova tuhan sabaoth, ka habe ; Ame he bi wahingat me wasomaca ka laba hnyi ta je getheniny Jerusalema, k' adre me he ka ve he me uci, hoton ûhingetidra bi. 5 Ke ame he ka unöngöt je getheniny taun ge wainda me waindusem hnyat adre me walak eü hnyi ta je gethen. 6 Walang hna ha hnö Iehova tuhan sabaoth, ka habe, Ame ne hnân lâiâ ka je kolon tavat ang hnyi je bong eling, hawa e ca úcú kõnya he ka hnyi lâiâ? haingö Iehova tuhan sabaoth. 7 Walang hna ha hnö Iehova tuhan sabaoth, ka habe, Wâ bi, oge me he ka omelö lakeik ûnyi hnyi hnyei e deiö, ke hnyei e jiö : 8 ke oge me he ka hum ödra, m' adre me he ka laba hnyi wanben Jerusalema ; ke adre me he ka lakeik, ke oge me he ka Khongudrin hnyi hnathu me hwakecin ae wisa. 9 Walang hna ha hnö Iehova tuhan sabaoth, ka habe, Ohwegiâ thö je hnyamöbun, tavat öbun e löng hnyi bong ang hofuc ang a deny je perofeta a ödra hnyi bong adre bi taben hnyin uma umö Iehova tuhan sabaoth, wale uma kap, m' adre me he ka op e. 10 Anyin ae tiga ca o je bong eling, adre me ca bi hwaban ka tavat, me hobi kâu je meno ; ke ba hnahic ka at ame didrut me didrö can iwahnaihmiöny : anyin oge me ve kunâ tavat hia he ka úiwahnaihmiönyköu. 11 Ke walang ang, oge me ca he ka helâ hnyi je bong a bán ka je kolon tavat ang, haingö Iehova tuhan sabaoth. 12 Anyin ame he ka hu hatonginy úsoköu ; ame he vine ka wa, ke kânâ ame he ka oâ jeüiny, ke ame he drany ka ham dân hau ; ke oge me he ka kunâ je kolon tavat ang ka hu ta je ûnyi hia eling. 13 Adre ohnaûhang' öbun lap anyi Juda, me lap anyi Isaraela unyin je hnyei, helâe oge me he ka omeli öbun, ke öbun e he ka hnahic : ca ot bi, owhigiâ thö je hnyamöbun.

14 Anyin a walang hna ha hnö Iehova tuhan sabaoth, ka habe, Oge ûnykúme he ka ânyâ ûnyi ae kong köbun, waleji ge hnen lakamöbun hna ohmönyini nya, haingö Iehova tuhan sabaoth, ke oge me ca ietra ; 15 helâe oge me ûnykúme hmetu hnyi bong ang he ka ânyâ so ka Jerusalema, me ka lap anyi Juda : ca ot bi. 16 Walang ûnyi öbun e he ka ânyâ. Ôhaköuâ thö hnathu ; owisa hnatho thö me hnahic hnyi je homagölebun : 17 ke ca he ke at unyibun he ka ûnykúme ûnyi ae kong hnyi je hnyekubun ka ke at ; ke ca hnyok bi hna khemanynin thoi : anyin a hûkötianök ta je ûnyi hia e, haingö Iehova.

18 Ke ame o but kõnya hofuc ho Iehova tuhan sabaoth, ka habe, 19 Walang hna ha hnö Iehova tuhan sabaoth, ka habe. Haba hna ânyâ ca han hnyi tehi a vakiny, me hna ânyâ ca han hnyi tehi a thabûnginy, me hna ânyâ ca han hnyi tehi a seveniny, me hna ânyâ ca han hnyi tehi a teniny, me ame he ka hnân senyin me hobâ ka lap anyi Juda, me bijeü ae so. 20 Walang hna ha hnö Iehova tuhan sabaoth, ka habe, Ame he hmetu ka o tavat, ke aten ta je taun ae se hia : 21 k' ame he aten ke taun ka he ka aten ke taun bi me ha, ka habe, E so ate me he mweimwei me sumâtâ ibetengiö ga Iehova, me elöm Iehova tuhan sabaoth : ke oge me he ka hnyi he. 22 Eke, ame he ka o but tavat ae se hia ke ta je hnyei ae hwege he ka elöm Iehova tuhan sabaoth hnyi Jerusalema, me sumâtâ ibetengiö ga Iehova. 23 Walang hna ha hnö Iehova tuhan sabaoth, ka habe, Hnyi je bong eling, me ame he hnyat a ten ka kât obiny úkhaü anyin at Juda, walödrin hnyi ta je hwen hnyei hia, me ha, ka habe, Öhmun e he ka tha he möbun, anyin ae khan' öhmun dut a e unyibun Khong.

HNYIMAKAN 9.

**W**ALANG hok, wale a hofuc ho Iehova hnyi hnyei i Haderaka, k' ame he ka menâ bi hnyi Damaseko : anyin ame bwele kö Iehova emakan at ke emakan ta je tribu Isaraela hia : 2 ke Hamath minya wale útangköu mē : ke Turo me Sidona anyin e gan hmâ metâiny. 3 Ke haba Turo, me ame ka op hnabâ, me úkhö-ûnâ sileva helâ me sesâ, ke gol ae so helâ me hmudrainy gethen. 4 Wâ bi, ame he Than ka obâ e, me kot maniny man hnyi köiö ; ke adre me he ka thong degecâ e ge

## ZAKARIA 10.

meic. 5 Ame he Asekelona ka wâ e, me ot ; ke Gaza, me ame he ka vec gan hmâ ; ke Ekerona ; anyin a e ame he ka hmehma ge hnen hna gejon : ke ame he ka hia than hnyi Gaza, ke adre me ca he bi ka labâ Asekelona. 6 Ke ame he atkanyua ka laba hnyi Asedoda, ke oge me he bi nya ka subâ degecâ bi ganiny at Filisiti. 7 Ke oge me he ka hom dren ûnyi hnyi hnyimen, ke ta je ûnyi ae ikiki e ame oloû ; k' ame he biju ka kolon hobi kâu Khonguta : ke e ame he ka helâ me taben hnyi Juda, k' ame he Ekerona ka helâ me at Jebusi. 8 Ke oge me he ka hunuma igigilö umök uma, ûcon iwahnaihmiöny, me me ca he ke at ka he me hmetu : ke ame ca he hmetu at üoveci ka he hnyi wanbödra : anyin a walang ang inya oge me wâ ge li emakök. 9 Senyin gan hmâ thö u hluiny Ziona ; kuku thö u hluiny Jerusalema : wâ bi ame he ka he but köu Tuhâm : e at ae wisa, ke tren ûhömeli ; at ae ilemuk, ame tabö asina, me nak asina a nokon asina. 10 Ke oge me he ka subâ degecâ kariota ûnyi Eferaima, me hors ûnyi Jerusalema, ke adre me he ka subâ degecâ cafanainy vat ; ke e ame he ka ha úsoköu ka ta je hnyei : ke e ame he ka musi hwân hnyi ke köiö, ke ne o but ka hnyi ke köiö, ke hwân hnyi Wagewe ke ne o but ka hnyi je can hmele-drany. 11 Ke haba u, can dren ûhilihinyköu möu, me oge hia but kunâ tavat adre ca gam ûnyi hnyi thop ae ba köien. 12 Hmetu ju ka hnyi hñabâ, öbun tavat adre ca a tavat gejon : inya oge me ha hnyi bong ang a oge me he ka ibi olo ham köu. 13 Anyin oge hia but lau Juda hobi könya, me ip Eferaima hon cafana ; ke oge me he ka obwebwelâ le lakom, Ziona, lö, ûcon je lakon Heleni, me oge me he ka wiö u helâ me hele vat anyin at ae hwege. 14 Ke ame he Iehova ka manen hudrin, ke ame he anyin fana ka gâ helâ me hucece : ke ame he Than Iehova ka tûâ trutru, me he hnyi je höu úheny hnyi hwaiöu. 15 Ame he Iehova tuhan sabaoth ka sing ödra ; ke adre me he ka han me uto je veto adre kúlúec ; ke adre me he ka ic me mede helâ me tavat adre ic waina : ke adre me he ka unöngöt helâ me kaia, me helâ me je kopiny taben hut. 16 Ke ame he Iehova Khongudrin ka omeli ödra hnyi bong eling helâ me hnahat mamoe wale lakeiny : anyin adre me he ka helâ me vetoiny korona adre kap göranyai hon iny hnyei. 17 Anyin ae ti gan hmâ anyin so, ke ti gan hmâ anyin

hmanenang ! ame he ka sot wahidröu ge hwit, ke wahu minya ge waina.

## HNHYIMAKAN 10.

**S**UMATÖ Iehova thö ge we hnyi úen we a biliny, Iehova at ame mádrâ je hucece ; me e ame he ka ham we ae gan ködra me me ve hu gadra önyinginy hnyei. 2 Anyina a hia but ha thoi je idola, ke haba tavat bi khong adre hia but wâ thoi ; ke adre hia but ha je bwi ae thoi, e únyi baú bi hnödra hna otubwelâ : anyin a wale adre me vheno je dedra helâ me je mamoe, adre me vec anyin ae ba at ame tu' ödra. 3 Ame ubâhlâ thö anyik hmönyin ka tavat tuö mamoe, ke oge me he ka bi hwaban ka je got бага : anyin a hia but Iehova tuhan sabaoth senâ hnahat haleny wale a lap anyi Juda, ke e ame he ka wi' ödra helâ me haleny je hors ae mec hnyi vat. 4 Ame he ka o únyi gan veto hnân kopiny, ke únyi gan minya matalafi, me cafanainy vat, únyi gan ame he tavat musi hia. 5 Ke adre me he ka helâ me tavat hwege, tavat adre me uto je iwahnaihmiöny hnyi hnu-drainy gethen hnyi vat ; ke adre me he ka vat, anyin a e unyidra Iehova : ke ame he tavat tabö hors ka hlöhlö. 6 Ke oge me he ka ha hwegien lap anyi Juda, me omelö lap anyi Josefa, me obmetu ödra, anyin oge me betenge gadra ; ke adre me he ka helâ ke m' oge me ca digic ödra : anyin a inya Iehova Khongudrin, ke oge me he ka ling ödra. 7 Ke ame he at Eferaima ka helâ me at ae hwege, ke ame he je hnye-kudra ka senyin helâ me tavat adre ic waina : eke, ame he je lakudra ka wâ me senyin ; ame he je hnyekudra ka hobâ kö Iehova. 8 Oge me he ka húlúhwajü ködra, me úkhacaköu ödra anyin oge hia but úcü melidra : ke adre me he ka si helâ me hwakecin úsehiaidra. 9 Ke oge me he ka te ödra unyin je hnyei ; ke adre me he ka únykúme könya hnyi je dok ae sâkâú : ke adre me he ka tha möt hmetu me je laku-dra. 10 Ke oge me he ka ohmetu ödra únyi hnyi hnyei Aigupito, me úkhacaköu ödra úhedra Asuria ; ke oge me he ka hum ödra ka hnyi hnyei Gileada me Lebanona ; ke adre me ca he ka wâ dok hobi ködra. 11 Ke e ame he ka vheno köien üoveci, me kot je waköiöiny köiö, ke ame he je dok ae dit hnyi Nail ka mada : ke adre me he ka ohnyikânâ bi gan anyin Asuria, ke ame he ka hia hnyi Aigupito uciny musi. 12

## ZAKARIA 11, 12.

Ke oge me he ka ha hwegiödra únyi ga Iehova ; ke adre me he ka ngenü únyi ge ien e haingö Iehova.

### HNYIMAKAN 11.

**L**EBANONA lö, khöng ut je homagöulem, me me he meic ka thong degecâ ânyâm je arasi. 2 Köp lö, kuku tenge thö, anyin a ta but arasi, k'ame kong ut je üö ae hmanenang : je iwajoiny Basana lö, kuku tenge thö, anyin ae hnyikânâ but uhnyot ae hwege. 3 Wale úkuku tengeiny tavat tuö mamoe ! anyin ae kong ut anyidra hmanenang : úkukuiny je nak liona ! anyin ae kong ut hmanenanginy Joridano. 4 Walang hna ha hnö Iehova Khonguk, ka habe, Hân ju hnahat mamoe hnâp hlingâ ; 5 haba tavat a haledra adre me hling' ödra, k' adre ca únykúme a ka ödra kong can e ; ke haba tavat adre me úcú ödra, me adre me ha, ka habe, Ole kö Iehova anyin a iny tren dut omjeú : ke ame ca betenge gadrin je latuhödrin. 6 Anyin oge me ca he hmetu ka betenge ge tavat adre me labâ hnyei, haingö Iehova : ke wâ bi oge me he ka ve hna tavat ka hnyi hnyamen je lahanödra, ke ka hnyi hnyeman tuhan : me adre me he ka kot hnyei, ke oge me ca he ka omeli ödra únyi hnyi je hnyamödrin. 7 Waleling me oge me hân hnahat mamoe hnân hlingâ, a ta je mamoe ae ti kong hnyi hnahat. Ke oge me hom li uci ; haba khaca oge me hwenyi ien, me Hmanenang, ke oge me hwenyi ien khaca, me Je wen ; ke oge me hân hnahat mamoe. 8 Ke oge me subâ degecâ hnyat tuö mamoe a kun hnyi tehi a khaca ; ke vec hnyekuk gadrin, k' ame hûkötio nya ge ta je hnyekudrin. 9 Me haingök, ka habe, Oge me ca he bi nya ka ha ö 'bun : haba at ame he bi ka mok, me ame ka e bi ka mok ; ke haba at adre me he ka subâ degecâ, me adre me ka he bi ka subâ degecâ ; ke haba kolon, me so ame he ka ve an vidrin hnen keihen. 10 Ke oge me hom anyik uci wale Hmanenang, me thu e, m' oge me he ka ohmetro úhihinyköu, waleji oge me ânyâ me ta je hnyei hia. 11 Ke ame hmetru thö hnyi bong eling : ke e khana but hnahat mamoe ae vec ut, tavat adre me tevehläng könya a wale hofuc ho Iehova. 12 Me haingök ködra, ka habe, A ne so köbun hö jem hwabök ; ke a ne ba, hna ju. Me adre me tuluto hwabök a thöte je sileva. 13 Ke Iehova ame ha könya, ka habe, Khúâ thö

e ka at ame up kaia, wale hwaban adre me ha me hwabök. Me oge me hom je sileva a thöte, me khúâ hnyi uma umö Iehova ka at ame up kaia. 14 Ke haba ke uci, me oge me thu e, wale Je wen, m' oge me he ka ohmetro hwakecin liamekeiny, a Juda me Isaraela.

15 Ke Iehova ame ha könya, ka habe, Hom dö hmetu je omjehen at ae monu a at tuö mamoe. 16 Anyin a wâ bi, oge me he ka oâ at ame tuö mamoe hnyi hnyei, at ame ca he ka sen' ödra wale adre subâ degecâ, ke e ame ca he ka elâm je mamoe adre ve se but, me ometo je aat ; ke e ame ca he ka hân je mamoe ae hwege, ke e ame he ka an viny ae pipikhenya, me kia amemâ je boújimödrin. 17 Ekölö ge at ame ca ti tuö mamoe, at ame hna degecâ hnahat mamoe ! ame he hele vat ka ta hon benyin, ke emakan a metân : ame he ka meleca benyin, ke ti lit emakan a metân.

### HNYIMAKAN 12.

**W**ALANG hok, wale hofuc ho Iehova ge Isaraela.

2 Walang hna ha hnö Iehova at ame ulolo drany k' ame bi taben hmeledrany, me op hanon at eú hnyi hnyekon, ka habe, Wâ bi oge me he ka wia Jerusalema hnân kaiainy ta tot ka je hnyei hia igigilö, ke haba khaca me ame he ka e hon Juda hnyi hna igigilö Jerusalema. 3 Ke hnyi ûen eling oge me he ka wia Jerusalema hnân veto ae hmak ka tavat hia ; haba tavat adre me ka kap göranyai, me adre me he ka aat bi ; ke ame he ka úkhacaköu úcon ta je hnyeiny hia hmeledrany. 4 Hnyi bong eling, haingö Iehova me oge me he ka kot ta je hors hia ge uthmâhmâ, k'ame he ka monu bi at ame tabâ e : ke oge me he ka bwele ka wâ lap anyi Juda, ke oge me he ka owadruâ ta je hors hia haleny tavat. 5 Ke ame he je taben hnyi Juda ka ha eú hnyi je hnyekudra, ka habe, Tang hwegiöhmun tavat adre me laba hnyi Jerusalema unyi Iehova tuhan sabaoth a Khongudrin. 6 Hnyi bong eling oge me he ka wia je taben Juda me me helâ me hlogon öt hnyi wanben ütö, me helâ me okûnu hnyi je thi hwit ; ke adre me he ka an tavat hia igigilö, hnyi ke keihen metâ me me : ke ame he hmetu Jerusalema ka labâ hnen, wale hnyi Jerusalema. 7 Ke ame he ka bö Iehova ka me omelö je uma mano umö Juda, me me ca görany hmanena-

## ZAKARIA 13, 14.

nginy lap anyi Davita, me hmanenanginy aten Jerusalema hon Juda. 8 Hnyi bong eling ame he Iehova ka söng aten Jerusalema; ke haba at ae sényin gadra hnyi bong eling ame he ka helâ me Davita; ke ame he lap anyi Davita ka helâ me Khong, helâ me angela anyi Iehova hnyi hnyimaködra. 9 Ke hnyi bong eling oge me he ka elâm he ka ohia ta je hnyei hia, tavat adre me hok vat Jerusalema ai. 10 Ke oge me he ka hingâlâ hon lap anyi Davita me aten Jerusalema, hanuiny ibetengiö baú me hanuiny khöü; ke adre me he ka ô nya waleji adre dá: ke adre me he ka tenge gan, helâ me at ame tenge ge nokon a khaca, ke adre me he ka vec gan, helâ me at ame vec ge nokon a bân. 11 Hnyi bong eling ame he ka tenge thungaú hnyi Jerusalema, helâ me tenge thungaú hnyi Haderimona hnyi hnyigöulen bucen Megido. 12 Ke ame he tavat ka tenge thungaú, úsa khaca je lap hia; hake tavat thibi hnyi lap anyi Davita, me hake laöiödra thibi; hake tavat thibi hnyi lap anyi Nathana, me hake laöiödra thibi; 13 hake tavat thibi hnyi lap anyi Levi, me hake je laöiödra thibi; me hake tavat thibi hnyi lap anyin at Simei, me hake laöiödra thibi; 14 me kolon je lap hia, ke lap me ke lap a hake ödra thibi, me hake laöiödra thibi.

### HNyimakan 13.

**H**NYI bong eling adre me he ka oâ pupua ka lap anyi Davita me aten Jerusalema hobi kâu hulö me hwakecin ae ikiki. 2 Ke hnyi bong eling haingö Iehova tuhan sabaoth, me oge me he ka ohia ta je ien je idola hnyi hnyei, m' adre me ca he hmetu ka ûnykúme ködrin: ke haba khaca oge me he ka obâ ta je perofeta me ta je hanu ae ikiki hnyi hnyei. 3 Ke ame ne perofeta hmetu ke at, ke ame ne ha kâu hnen kamen me hinyen, a li at ödre hnokoâ, ka habe, U me ca he ka möt; anyin a u me ha thoi hnyi iö Iehova: ke e ka perofeta, me ame he kamen me hinyen a li at ödre hnokoâ ka dâoâ e. 4 Ke hnyi úen eling ame he ta je perofeta ka ve hmehma ge hnödra hna wâ, ödra ka perofeta; ke adre me ca he ka khavâ úkhaú ae hu dinen he ka iyawö: 5 ke adre me he ka ve ha, ka habe, Iny ca perofeta bi nya, ke iny at belök bi; anyin adre me thalüö nya k' iny tiga wanakat. 6 Ke adre me he ka ha kâu, ka habe, Aat wanben li benyâm ahö?

Me e ame he ka ha, ka habe, Wale hna kuc nya hnyi hnyaban je lahanök.

7 Hele vat lö, hmak dö ka at ame tuö mamoe könya, me úcon at ae úcú mönya, haingö Iehova tuhan sabaoth: kot dö at ame tuö mamoe, me ame he ka ve se but ta je mamoe; ke oge me he ka wia hnyamök ka tavat ae úhnyükong. 8 Ke haingö Iehova, ka habe, Haba hnyi hnyei hia, me adre me he ka subâ degecâ li ke keihen hnyin e m' adre me mokcu; ke ame he ka hnen biju hnyin e ke keihen a kuniny. 9 Ke oge me he ka hom ke keihen a kuniny ka he hnyi wanben meic, me ányáwi' ödra helâ me hna ányáwia sileva, me cubic ödra helâ me hna cubec gol: ke adre me he ka hawâ iök, me oge me he bi nya ka ling ödra: ke oge me he ka ha, ka habe, Lakeik ödra; me adre me he ka ha, ka habe, Iehova Khonguhmun.

### HNyimakan 14.

**W**Â bi, ame he ka o bong bongu Iehova, ke adre me he ka khenâ hnyi wanbâm hna söh. 2 Anyin oge me he ka úkhacaköuâ ta je hnyei hia úcon Jerusalema he ka vat; ke adre me he ka hügúnâ taun, me söh je uma, me okongoâ omomo: ke adre me he ka hom bâ hafiny taun, ke adre me ca he ka subâ degecâ únyi hnyi taun kolon tavat. 3 Ke haba Iehova ame he ka he but, me vat me je hnyei eling, helâji me hnen hna vat hnyi bonginy vat. 4 Ke haba hnyi bong eling, me ame he li can ka tot hon bucen Elaio, cicö deiö Jerusalema, ke adre me he ka subâ luâ bucen Elaio hnyi wanben e deiö me jio, me ame he ka hu hnyigöulen bucen ae gan; ke ame he ke keihen bucen ka he ka hnyi hwadrö, ke haba ke keihen ame he ka he ka hnyi hwaiöu. 5 Ke öbun e he ka kec me gethen hnyi hnyigöulen anyik je bucen: anyin ame he ka he ke ne o but hnyi Azale hnyigöulen je bucen: eke, öbun e he ka kec helâji me hnöbun hna kec ge hwiöi hnyi je bong bongu Uzia than Juda: ke ame he Iehova Khonguk ka o, ke ame he ka tha o möu tavat hia ae kap. 6 Ke haba hnyi bong eling, ame ca he ka tha e bi lany me melam me menekholom: 7 ke ame he ka khaca bong ae manen kö Iehova; ca lany bi, ke ca lit bi: ke so bi hnyi sabac ame he ka lany. 8 Ke haba hnyi bong eling ame he ka di köiö möt úheny Jerusalema; ame he ka di hanen ka hnyi köiö e



## MALAKI 1.

deiö, ke ke hanen ka hnyi köö e jio : ame he ka e bi hnyi honivakeny me hnyeun. 9 Ke ame he Iehova ka Thaniny hmeledrany hia : hnyi bong eling ame he Iehova ka khaca thibi, ke khaca thibi ien. 10 Adre me he ka wia hnyeï hia me me helâ me dok ae tha hon hwân hnyi Geba ke ne o but hnyi Rimona ke keihen ka hnyi hwaiöuiny Jerusalema ; ke adre me he ka ogöranyâ e, ke e ame he ka labâ iny, hwân hnyi homagöuleny Beniamina ke ne o but hnyi hnen homagöule a bân, ke ne o but hnyi homagöuleny kop, he hwân hnyi tap tue anyi Hananel ke ne o but hnyi hna hlic wan vine anyin than. 11 Ke adre me he ka labâ e, ke ame ca he hmetu ka hnaühangö ; k' ame he Jerusalema ka laba khötkic. 12 Ke walang mok ae cap ame he Iehova ka kunâ ka tavat hia waleji adre me vat me Jerusalema : ame he ka aü tot je unyidra ödra ka he bi, ke ame he ka aü tot je emaködra hnyi je hnen, ke ame he ka aü tot je bohmödra hnyi je hnyimödra. 13 Ke hnyi bong eling ame he ka gan imonumonuny gadra ünyi ga Iehova ; ke adre me he ka ükötköüödra, me ühaiköüâ je hnyamödra. 14 Ke ame he Juda ka vat hnyi Jerusalema ; ke adre me he ka ükhöüna ta je omjeüiny hia je hnyeï igigilö, gol, me sileva, me je ükhaü, ae se hia hmönyin. 15 Ke ame he ka ücü mok ae cap

anyin hors, me miul, me kamela, me asina, me ta je meno hia wale ame he ka he bi hnyi je hunuma eling, me mok eling ae cap. 16 Ke haba je kolon ta je hnyeï hia tavat adre me he ücon Jerusalema, me adre me he bi ka he hnyi je huna he ka hnyi khudrung ka Than, Iehova tuhan sabaoth, me hnyi hanen bijeüiny uma mano. 17 Ke haba aten je lapiny hmeledrany adre me ca hnyi he bi Jerusalema ai he ka hnyi khudrung ka Than Iehova tuhan sabaoth, me ame he bi ka ba we hobi ködra. 18 Ke a ne ca hnyi he lap anyin Aigupito, me o but, me ame he ka ba we ködra ; ame he ka e bi ling mok ae cap, wale hnö Iehova hna kunâ ka hnyi je hnyeï adre me ca hnyi he me tuö bijeüiny uma mano. 19 Wale konginy Aigupito me konginy je hnyeï hia tavat adre me ca hnyi he me tuö bijeüiny uma mano. 20 Hnyi bong eling ame he ka e hnyi je pate anyin je hors, ka habe, EJKAP KO IEHOVA ; ke ame he je öt hnyi uma umö Iehova ka helâ me je kaia cicö taben hut. 21 Eke, ame he ka kap kö Iehova tuhan sabaoth je öt hia hnyi Jerusalema me Juda : ke ame he tavat bihut hia ka he me hom me ölä : ke ame he ka ba hmetu bi at Kanana hnyi uma umö Iehova tuhan sabaoth hnyi bong eling.

## MALAKI.

### HNYIMAKAN 1.

**W**ALANG hok wale a hofuc ho Iehova ka Isaraela a deny Malaki.

2 Oge hia but betenge gabun, haingö Iehova. Ke haingöbun, ka habe, U je hai but betenge gahmun hnyi ieü ? Hawa, ca kei Esau Jakob ? haingö Iehova : ke oge me betenge ga Jakob ; 3 ke oge me höciö Esau, me wia anyin je bucen me me ba wan, me hna but jekhon ka ta je luko hnyi hnyebuba. 4 Anyin a haba Edoma ame ha, ka habe, Adre hia but kiâ degeci öhmun,

ke öhmun e he ka hmetu ka op je dok ae ba aten ; ke walang hna ha hnö Iehova tuhan sabaoth, ka habe, Adre me he ka op, ke oge me he bi nya ka hagutâ hnyikânâi : ke ame he tavat ka hwenyi ödra, ka habe, Hnyigoulen hwakecin ae kong, ke Tavat ame hmönyin ködra Iehova nyiele balua. 5 Ke ame he je emaköbun ka wâ, ke öbun e he ka ha, ka habe, E so adre me oganö Iehova hnyi je ke keihen hoton hnyigöuleny Isaraela.

6 Haba nokon, me ame ogânâ kamen, ke athnyaba ame ogânâ tuhan : awe, a ne

## MALAKI 2.

kamen bi nya, me ewa hna oganö nya? ke oge ne than, me ewa eang hna outö nya? haingö Iehova tuhan sabaoth köbun tavat bihut, tavat öbun e hückötiâ iök. Ke haingöbun, ka habe, Öhmun e hawa ka hückötiâ iâm? 7 Anyin a öbun e hudo areto ae kong hon anyik taben hut. Ke haingöbun, ka habe, Ieú öhmun e okongu u hnyin? Anyin öbun e ha, ka habe, Haba laulau anyi Iehova, me únyi hnân hückötiâ. 8 Ke hnyi úen öbun e hudo meno ae wadröu hnân hut, e ca hulö e! ke hnyi úen öbun e hudo ta je meno ame ci, ke at ame takou mok, e ca hulö bi e! Ham dö e walang ang ka tuhâm: hawa, e ame he bi ka senyin köu? hawa, e ame he ka köp u? haingö Iehova tuhan sabaoth. 9 Ke walang, öbun na he ka sumâtâ thö Khong, me me he ka betenge gata: ke deny öbun únyi ang; hawa, e ame ca he ka köp öbun? haingö Iehova tuhan sabaoth. 10 Nakainy ame ne hu ke at unyibun he ka hlöng je hwanuma, m' öbun e ca he ka vác baúâ meic hon anyik taben hut! Haingö Iehova tuhan sabaoth, ka habe, Oge me ca senyin köbun, ke oge me ca he ka kap hnöbun hna hudo. 11 Anyin a hwân hnyi hna o hnen seúnö ke ne o but hnyi hnen hna dit adre me he ka oganá iök hnen ta je Hnyei; ke haba hnyi je dok hia adre me he ka leú ütö ae bo so ka iök, me hut ae so: anyin adre me he ka oganá iök hnen ta je Hnyei, haingö Iehova tuhan sabaoth. 12 Ke öbun e okongoâ e, anyin a öbun e ha, ka habe, E kong ut laulau anyi Iehova, ke ikiki je wan ke jeú hon e. 13 Ke haingöbun, ka habe, Wâ bi, únyi hnân hücüâ! ke öbun e hia but hückötiâ e, haingö Iehova tuhan sabaoth: ke öbun e hia but hom únyi adre me húgúnâ, ke at ae kong can, ke hna takou hnen mok; wale hut öbun e hom: hawa e úcü könya he ka kap e únyi gabun? haingö Iehova. 14 Ke e ka mok at iyawö, at ae hu бага hnyi haleny hnabat mamoe, ke e ame bi khöbi, me hudo at ae kong ka Than; anyin a iny than ae gan hmâ, haingö Iehova tuhan sabaoth, ke hnân outen iök unyin je Hnyei.

### HNYIMAKAN 2.

**K**E walang ang, tavat bihut lö, walang hna húna hobi köbun. 2 Öbun e ne ca he ka löng, me ca ip hmâ hnyi

hnyekubun, he ka oganá iök, haingö Iehova tuhan sabaoth, me oge me he bi nya ka kunâ köbun hnaúhangö, ke oge me he ka hangâ hna ha hnahici öbun; eke, oge hia but hangâ, anyin öbun e ca ip hmâ e hnyi hnyekubun. 3 Wâ bi, oge me he ka thawâ je hatong gabun, me khinö tatet hnyi je hnyimaköbun, wale tatetiny halebun je hut; k' adre me he ka tha hom degeci öbun mē. 4 Ke öbun e he ka wâ a oge me kunâ köbun hna húna e, me me e unyin at Levi anyik úhihinyköu, haingö Iehova tuhan sabaoth. 5 E unyin anyik úhihinyköu ge möt me úsoköu; ke oge me ham e kâu me me he ka ot, me e ame outö nya, me öbubuny ge iök. 6 E hnyi hnyimen hnanyibuiny hnathu, ke adre me ca wâ hwakecin ae kong hnyi esongödiný: e ame tha he mönya hnyi úsoköu me wisa, me ohmeto tavat ae se hia únyi hnyi hulö. 7 Anyin a hamen li esongödiný at bihut he ka tuö metâ, ke e úcü he ka elâm hnanyibu hnyi hnyimen: anyin a e úthumetu anyi Iehova tuhan sabaoth. 8 Ke öbun e saú but únyi hnyi gethen; öbun e hia but ohavâ tavat ae se hia hnyi hnanyibu; öbun e hia but okongoâ úhihinyköu anyi Levi, haingö Iehova tuhan sabaoth. 9 Anyin a wale oge hia but wi' öbun hnân hückötiâ me kong hnyi hnyimakan tavat hia, hoton hnöbun hna ca tuö dek je gethen, ke öbun e úciâköuâ ge hnanyibu.

10 Hawa, ca khaca kamöta hia? a ca up öta hnen Khong a khaca? anyin a ieú ate me úiyawököu, me okongoâ úhihinyköu anyin lakamöta? 11 Juda ame hia but iyawö, ke adre ânyâ únyi ae ikiki hnyi Isaraela me Jerusalema; anyin a hia but Juda okongoâ únyi ae kap waleji e ame hnyok kâu, me hom hlu nokon khong kanyua me áiân. 12 Ame he Iehova ka subâ degecâ at ame ânyâ e, wale at ame tue me at ame thu, hnyi je uma mano umö Jakob, me at ame hudo hut kö Iehova tuhan sabaoth. 13 Ke wale minya ang hnöbun hna ânyâ: öbun e tube taben hut anyi Iehova ge dán ecmak, me tenge, me máng, me me ca wâ hmetu hut, me ca kap senyinâ e únyi gabun. 14 Ke öbun e ha ka habe, Anyin a ieú? Anyin a Iehova ame hia but ohnathoâ gam me áiân ânyâm hidröu waleji u je iyawöâ, ke e bi lihum möu, me áiâm u je úhihinyköu mē. 15 Hawa, e ame ca ânyâ únyi a khaca, ke e unyin kolon hanu? Ke at a khaca geú?

## MALAKI 3, 4.

Anyin e ame elâm mâtrân ae so. Anyin a wale, tuö ju je hanubun, me ca he ke at ka iyawâ áiân anyin hidröu. 16 Anyin a haingö Iehova Khongon Isaraela, ka habe, Hükötianök he ka digic ta momo, me at ame tube khaüen ge úokonguny, haingö Iehova tuhan sabaoth: anyin a wale tuö ju je hanubun me me ca iyawö.

17 Öbun e hia but ohmakö Iehova ge je ifucibun. Ke haingöbun, ka habe, Öhmun e ohmakâ e ge ieu? Anyin öbun e ha, ka habe, E so kö Iehova tavat hia adre me ânyâ hulö, ke e ame senyin ködra; ke haingöbun, ka habe, Ewa Khong at ame owisa?

### HNYIMAKAN 3.

**W**Â bi, oge me kunâ anyik úthumetu ke e ame he ka ânyâwia gethen hnyi hnyimakök: ke ame he ka ie o ka hnyi uma umen Than wale öbun e elâm; me úthumetuiny úhinhnyköu at öbun e senyinâ, wâ bi, e ame o, haingö Iehova tuhan sabaoth. 2 Ke ie at ame he ka hokhnyokâ bonginy o a e? ke ie at ame he ka tot, e ka manen dut? anyin a e úcú me meic hlogon at ame leü fao, me helâ me sop anyin at ame hnú khaü: 3 ke e ame he ka laba helâ me at le me ânyâwia sileva, ke e ame he ka obosoâ je laku Levi, me ânyâwi 'ödra helâ me gol me sileva; ke adre me he ka hudo kö Iehova je hut hnyi hwakecin ae wisa. 4 Me Iehova ame he ka senyinâ hut anyi Juda me Jerusalema, helâ me hnyi je bong kâu adrem, me je huna a bân. 5 Ke oge me he ka hakekeny köbun he ka owisa; ke oge me he ka ie omanenâ at ae tren khong, me tavat bi únyi monu, me tavat khemanyin thoi; me tavat ovecâ at ame huliwa ge hwaban e, me safac, me nakahme, me tavat ohavâ wisa ka atkanyua, me ca outö nya, haingö Iehova tuhan sabaoth. 6 Anyin a inya Iehova oge me ca hwiö; anyin a wale, adre ca ohi' öbun je laku Jakob.

7 Hwân hnyi je bong bonginy je lakam-öbun öbun e hna degecâ anyik je hnanyibu, me ca tuö e. Hmetu ju öbun könnya ke oge me he ka hmetu köbun, haingö Iehova tuhan sabaoth. Ke haingöbun, ka habe, Öhmun e he ka hmetu ka hnyi ieu? 8 Hawa, ame he at ka venâu je únyi anyin Khong? Ke so bi öbun e hia but venâu anyik ta je únyi. Ke haingöbun, Ie

únyi öhmun e venâu gam? Wale je ke keihen a libenyitainy me je hut. 9 Ame ti ohnaúhang' öbun; anyin öbun e venâu gak, wale hnyei hia ang. 10 Hom' öbun libenyitainy ae bekhöt ka hnyi uma hnân hip omjeú, me me hu han hnyi umök uma, me cubic nya ju walang ang hnen e, haingö Iehova tuhan sabaoth, oge ne ca he ka khöng ut köbun je hlinginy drany, me hingälâ hubun hnahic, ke ne o but ame ba hnen e. 11 Ke oge me he ka thawâ hobi köbun at ame ohia, ke e ame ca he ka ohia jeúiny könöbun kânâ; ke ame ca he ka ba wan halebun vine hnyi ta hnyei, haingö Iehova tuhan sabaoth. 12 Ke ame he je hnyei hia ka ha hnahici öbun: anyin a öbun e he ka hnyei hnân wenyâ, haingö Iehova tuhan sabaoth.

13 E hwege ifucibun úcúk, haingö Iehova, Ke haingöbun, ka habe, Ieu öhmun e ha gam? 14 Öbun e hia but ha, ka habe, E únyi baú he ka bi athnyaba ka Khong: ke ieu troban hnöta hna tuö hnen je hna otillâ, me tenge tot hnyi hnyimakö Iehova tuhan sabaoth? 15 Ke walang ang ate me he ka ha me hnahic ut at ame bi gan; eke, adre me op göranyai tavat adre me ânyâ hulö; eke, adre me cubic Iehova, ke ödra ka möt bi. 16 Me ame úhnenamököuâ tavat adre me outö Iehova: ke Iehova ame tevehlöng me löng, me adre me sihnalimen tusi hnân öünykúmeâ hnyi hnyimakan, hobi kâu tavat adre me outö Iehova, me únykúme ien. 17 Ke haba ödra me tang omjehek, haingö Iehova, hnyi bong oge me thu; ke oge me he ka betenge gadra helâ me at ame betenge ge nokon at ame huliwa kâu. 18 Me öbun e he ka hmetu me wâhm-akhmetoâ at ae wisa me at ae kong, ke at ame bi athnyaba ka Khong ke at ame ca ânyâ.

### HNYIMAKAN 4.

**A**NYIN a wâ bi ame he ka o bong, k' ame kahwa helâ me inyâji; ke haba tavat bi gan hia, me tavat hia adre me ânyâ hulö me adre me he ka helâ me thatúnyin hwit: ke haba bong ame he ka o, me ame he ka thong degeci ödra, haingö Iehova tuhan sabaoth me me ba wan me anginy gadra. 2 Ke haba öbun tavat öbun e outen iök, me ame he ka o köbun seúnöiny hwakecin ae wisa, me únyi hnân ometo hnyi li labenyin; ke öbun e he ka

#### MALAKI 4.

he but me ututut helâ me nokon kau úheny | hnyi Horeba hobi kâu at Isaraela hia, wale  
hnyi haginy. 3 Ke öbun e he ka uto | je hna otilâ, me hna owisa. 5 Wâ bi, oge  
tawat ae kong; anyin adre me he ka helâ | me he ka kunö Elia perofeta köbun e ka  
me hnabadröu hmelen je hnyeúcabun hnyi | tiga ca o bi bong bongu Iehova bong ae  
bong waleji oge me thu, haingö Iehova | gan ke hnân outen. 6 Ke e ame he ka  
tuhan sabaoth. | ohmeto je hnyekon lakamen ka lakon, ke  
4 Únykúme th' öbun hnanyibu anyi | je hnyekon lakon ka lakamödra; wâ oge  
Mose athnyabaik, waleji oge me hûna kâu | nye o me kot kânâ ge hnaúhangö.